


Tĩrtũm kapẽr ã kagà
nyw



New Testament in Apinayé (BR:apn:Apinayé)

Tĩrtũm kapēr ã kagà nyw

New Testament in Apinayé (BR:apn:Apinayé)

copyright © 1999 Wycliffe Bible Translators, Inc.

Language: Apinayé

Translation by: Wycliffe Bible Translators, Inc.

Apinayé [apn], Brazil

Copyright Information

© 1999, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apinayé

© 1999, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022
383a4e22-34cd-505f-9cc2-2f9921e7aa9f

Contents

Matêwre	1
Makre	69
Rukre	108
Juãw	179
Atre	230
Rômãn	290
Wam Korĩt	325
Sikũn Korĩt	356
Karatas	376
Epes	388
Pĩripos	399
Korosẽ	406
Wam Tesarõn	413
Sikũn Tesarõn	419
Wam Ximotre	423
Sikũn Ximotre	432
Xitre	438
Piremõ	442
Eprêw	444
Xiakre	468
Wam Pêtre	476
Sikũn Pêtre	485
Wam Juãw	490
Sikũn Juãw	497
Hapuhã Juãw	498
Jutre	499
Apokarip	502

Matêwre

Matêwre kot tanhmã Jesus kot amnhî nhîpêx to ho pa hã kagã

Matêwre na pre kagãja nhîpêx. Kêp Jesus nhÿ hã hkrajê jahkre xwÿnh na pre. Nê kêp lÿjaew. Hixi hô pê na Rewi. Tã na pre mē pamã kagãja nhîpêx nê kamã Jesus kot pika hwÿr wrÿk nê kator nê tanhmã ri amnhî nhîpêx to ho pa hã harê nê hã kagã. Nê kêp mē panhõ pahihtî mex o mex ã harê nê hã kagã. ã na pre Matêwre mē pamã Jesus jarê nê hã kagã anê.

Apraãw kanrêhã hkra nê htãmnhwÿjê nhÿxi

Rukre 3.23-38

¹ Amnepê m Jesus Kris kormã pika hwÿr wrÿk kêt ri hukkamã higêtjê nhÿxi na jajaja. Wÿj ri higêtjê hô nhÿxi na pre kêp Tawi. Nê Tawi xwÿj ri higêt nhÿxi pê na pre Apraãw.

² Nê Apraãw kra na pre kêp Ijak.

Nê Ijak kra na pre kêp Jako.

³ Nê Jako hkra na pre kêp Juta mē htõjaja.

³ Nê Juta hkra na pre wa kêp Pere nê Jera. Nê Pere mē Jera wa katorxã na pre kêp Tama.

Nê Pere hkra na pre kêp Erõ.

Nê Erõ hkra na pre kêp Ari.

⁴ Nê Ari hkra na pre kêp Amĩnatap.

Nê Amĩnatap kra na pre kêp Nasõ.

Nê Nasõ hkra na pre kêp Samõ.

⁵ Nê Samõ hkra na pre kêp Poas.

Nê Poas katorxã na pre kêp Raap.

Nê Poas kra na pre kêp Opex.

Nê Opex katorxã na pre kêp Rutre.

Nê Opex kra na pre kêp Jese.

⁶ Nê Jese hkra na pre kêp Pahihti Tawija.

Nê Tawi hkra na pre kêp Sarumãw.

Sarumãw katorxãja Uristi hprõ na pre.

Tã nhÿm pre Uristi ty nhÿm Tawija hãmri mÿrpê Uristi hprõ ho hprõ nê kamã hkra. Nhÿm wa hkraja kêp Sarumãw.

⁷ Nê Sarumãw kra na pre kêp Ropã.

Nê Ropã hkra na pre kêp Apiasti.

Nê Apiasti kra na pre kêp Asti.

⁸ Nê Asti hkra na pre kêp Josapa.

Nê Josapa hkra na pre kêp Jorã.

Nê Jorã hkra na pre kêp Ojis.

⁹ Nê Ojis kra na pre kêp Jotã.

Nê Jotã hkra na pre kêp Akaj.

Nê Akaj kra na pre kêp Ejekis.

¹⁰ Nê Ejekis kra na pre kêp Manase.

Nê Manase hkra na pre kêp Amõ.

Nê Amõ hkra na pre kêp Josis.

¹¹⁻¹² Nê Josis kra na pre kêp Jekonís mē htõjaja.

Kormã mē htÿr ri na pre Papirõn nhõ xwÿnhjaja kot mē hkurê kaxãr kaxyw mē hwÿr hprõt nê mē unê. Ijaew piitã unênh pa nê ma akupÿm mē õ pyka hwÿr mē ho hapêx nhÿm mē hpãnhã Papirõn kamã pa ho pa. Jakamã nhÿm Josis mē hkra Jekonís mē htõjaja mē hipêêxã pyrà nê Papirõn kamã pa ho pa.

Nê Jekonís kra na pre kêp Saraxi.

Nê Saraxi hkra na pre kêp Joropape.

¹³ Nê Joropape hkra na pre kêp Apiux.

Nê Apiux kra na pre kêp Eriakí.

Nê Eriakí hkra na pre kêp Ajo.

¹⁴ Nê Ajo hkra na pre kêp Satok.

Nê Satok kra na pre kêp Akí.

Nê Akí hkra na pre kêp Eriux.

¹⁵ Nê Eriux kra na pre kêp Eresa.

Nê Eresa hkra na pre kêp Matã.

Nê Matã hkra na pre kêp Jako.

¹⁶ Nê Jako hkra na pre kêp Juje.

Nê Juje hprõ na pre kêp Marir.

Nê Marir Kra na pre kêp Jesus.

Mê kot kãm: "Tirtÿm kot mē pakaxyw ãm xwÿnh" anhÿr xwÿnhnta na pre.

¹⁷ Nhÿm Apraãw kanrêhã axte axpên kanrêhã mē ãptãr nywjaja Tawija wÿr kêp 14. Nê Tawi nhÿrõ pê Papirõn hwÿr mē hapêx kêt ri axpên kanrêhã mē ãptãr nywjaja mããnen kêp 14. Nê ra Papirõn kamã mē pa nhÿrõ pê axpên kanrêhã Jesus pê Tirtÿm kot mē pakaxyw ãm xwÿnhnta wÿr mããnen kêp 14. ã na pre Jesus Kris xwÿj ri higêtjê nhÿxi anê.

Jesus Kris kator

Rukre 1.26-38, 2.1-7

¹⁸ Tã ã mē hixi jarênh kot anhÿr kanrêhã na pre ã Jesus Kris kator anê. Nhÿm pre kormã Jujeja Marir o hprõ kaxyw. Nom kormã ho hprõ hkêt ri nhÿm htujarõ. Kormã hukukrit tã nhÿm Tirtÿm Karõ tanhmã ho nhÿm htujarõ.

¹⁹ Hãmri nhÿm Jujeja harênh ma nê tee ri hamaxpêr nê htÿx nhãm mēhõ kot kêp htu hã hkamnhÿx. Juje kot tãm amnhî nhîpêx nê tãm hamaxpêr jakamã tee ri kot ho hprõ hukkamã hamaxpêr. Nê hamaxpêr o:

—Na pa mãn ixte htute hã. Nhãm mēhõ ra kot ã hipêx anhÿr kênã. Nê kot paj ho ixprõ hkêt nê. Nom kot paj ixkwÿjê mã ã kot amnhî nhîpêx anhÿr o amnhÿrit kêt nê. Kot paj anê nhÿm mē kuma nê ho kapêr punuj nhÿm amnhî kamã hpjjaãm tÿx nê. Ja pymaj kot paj ixkatãt kôt hkaga kurê kumrêx. Nom ixkwÿjê hkã ã hkaga. Anê.

²⁰ Nê ã hamaxpêr anhÿrja o ra gõr nê nõ. Nhÿm Tirtÿm kapêr o mē wrÿk xwÿnhjê hô hwÿr wrÿ nê hwÿr axàn kurì xa. Hãmri nê kãm:

—Pa Juje? E ot pa awÿr tē. Kwa tee ri Marir o aprõ hukkamã ajamaxpêr punuj kêt

nê. Mâmri ho aprô. Mêhō kot apê tanhmã ho hkêt. Tirtûm Karô na pre ã hipêx anê. Jakamã kwa tee ri ajamaxpêr kêt nê mãmri ho aprô nê war apa.

²¹ Koja hkrare kato nê myre nê hprêk. Hãmri nê mê kot hkôt amnhî xunhwÿr xwÿnhjaja mê kot amnhî tomnuj piitã pê mê utãr pa. Jakamã koja kato ka wa hã hixi mê nhûm kêp Jejus. Anê.

Nhûm pre ã Tirtûm kapêr o mê wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tirtûm kêp mê papytãr xwÿnh” anhÿr pyrãk. Jakamã nhûm Tirtûm kapêr o mê wrÿk xwÿnhja Juje ôt kãm ã kãm Marir jarênh anê.

²²⁻²³ Nom kormã ã kãm kapêr anhÿr xwÿj ri na pre ra Tirtûm nhÿ hã kapêr xwÿnhjê hõja kukamã tanhmã harênh to nê hã kagã. Nê hã kagã ho:

E mê inhma nê inhmar tÿx nê ho apa. Koja nhÿrmã pyka já kamã mêhō kormã hkukrit tã htujarō. Nê hkra kato nê myre. Nhûm mê omu nê hã hixi mê nhûm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tirtûm mê pahkôt pa ho pa” anhÿr jarênhja pyrãk. Jakamã nhûm pre Tirtûm nhÿ hã kapêr xwÿnhja Jejus kukamã ã harênh anê nê hã kagã.

²⁴ Jakamã nhûm Tirtûm kapêr o mê wrÿk xwÿnhja Juje mã kapêr par mê nhûm hkrãkato. Hãmri nê kot kãm ujarênh xá hkôt Marir o hprō.

²⁵ Nom kormã tanhmã ho hkêt nê ri o pa rãhã nhûm hkrareja kato. Hãmri nhûm wa hã hixi mê nhûm kêp Jejus nê mããnen kêp Emanuew.

2

Kanhêti ho studa xwÿnhjê jarênh

¹ Nhûm pre Jejus Perêj kamã kato. Pika pê Jutej kamã. Pahi Eroxo kormã kot Jutej nhō xwÿnhjê ho amnhÿptãr o pa ri nhûm ô pika kamã kato. Hãmri nhûm Tirtûmja kaxkwa kamã Kra kator jarênh xá hã kanhêti raxta ô nhō nhûm pika hō kamã kanhêti ho studa xwÿnhjaja omu. Kanhêtiya pumu nê hkÿnh nê axpên mã:

—Kwa ga mê kanhêti raxti mÿj pumu. Mãn ra Ijaew nhō pahi nywta kato nhûm kanhêti mÿj kêp ho amnhÿrit xá hã ajêt. Kwa pu mê ma hapêr o mô nê nhÿri tokyx omu nã.

Anê hãmri nê amnhî to pikuprōnh pa nê ma hapêr o pa. Ma myt gjêx xá hwÿr hapêr o pa hã apkati sohtë nê. Hãmri nê ra Ijaew nhō pika hwÿr pój nê krÿ pê Jerujarê hwÿr hapêr o mô. Pahi Eroxo nhō krÿja wÿr nhûm mê hapêr o mô hãmri nê kamã pój nê mê hkrare nywta ã krÿ nhō xwÿnhjê kukjêr o mô

² nê mê kãm:

—Pa? Ot pa mê apê Ijaew nhō pahi nywreta pumunh kaxyw mô. Ham kator xwÿnhja. Mê inhō pika kamã na pa prem kaxkwa hkrax rûm kot ho amnhÿrit xá hã kanhêti raxta pumu. Hãmri nê nhÿri pahi nywre pumunh nê kutã mê ixkôn krã ho ixtêm nê ixkrÿ nê kãm mex o mex ã harênh kaxyw nêtãnh mê inhō krÿ rûm hapêr o mô. Kwa mê inhmã harê. Nhÿri na? Na pa mê inhmã omunh prãm tÿx kumrêx.

Anhÿr o hã mê hkukjêr o môr jakamã nhûm mê piitã pahi nywja jarênh ma nê axpên mã harênh o hprôt.

³ Nhûm pahi Eroxa jarênh ma nê tee ri amnhî kukamã hamaxpêr. Pahi nyw kot mê ho amnhÿptãr ã hkamnhÿx nhûm já kêp omnuj tÿx nê. Nhûm krÿ nhō xwÿnhjaja ã hamaxpêr anhÿr ã omu nê tee ri amnhî kukamã hamaxpêr o ra kãm ma nê.

⁴ Hãmri nhûm pahi Eroxa amnhî wÿr hkwyjê hã karō. Mê ô patre krahtûmjaja nê Tirtûm kapêr tûm o mê ahkre ho mê pa xwÿnhjaja nhûm amnhî wÿr mê hã karō nê Tirtûm kot nhÿrmã mê hwÿr mênh mã xwÿnhja ã mê hkukjêr kaxyw. Nê mê kãm:

—E Tirtûm kot nhÿrmã mê pahwÿr mênh mã xwÿnhja ã na pa mê akukjêr kaxyw mê ato akuprō. Kwa mê atō inhmã harê. Koja nhÿrmã kator kaxyw nê nhÿri koja we kato? Xã jar mê panhō krÿ kamã nã? Xã nhÿri krÿ hō kamã? Anê.

⁵ Hãmri nhûm mê kuma nê kãm:

—Nã mê panhō pika pê Jutej kamã koja xep kato. Krÿ pê Perêj kamãã. Na pre Tirtûm nhÿ hã kapêr o mê pa xwÿnhja ra hkukamã mê panhÿgêtjê mã tanhmã harênh to nê hã kagã. Nê hã kagã ho:

⁶ Pa Perêj nhō xwÿnhjaja? E mê anhō krÿ grire htã kamã koja nhÿrmã mê panhō Pahi Maatiya kato. Koja mê pahpê Ijaewjê piitã mê pahto amnhÿptãr mex o pa. Jakamã mê anhō krÿ grire htã koja Ijaew piitã axpên mã mex ã harênh o pa.

Ã na pre Tirtûm kot mê pahwÿr mênh mã xwÿnhja kukamã mê kãm harê nê hã kagã anê. Anê.

⁷ Hãmri nhûm pahi Eroxo tee ri ã harênh anhÿrja ma hãmri nê amnhî wÿr mê kot hã ãhkukjêr o môr xwÿnhjê hã karō. Nom nhÿri Ijaew kãx ã. Hãmri nhûm mê ma hwÿr mra nê agjê nhûm mê omu nê pahi nywta ã mê hkukja nê mê kãm:

—E mê aprÿ hã inhmã pahi kator nywta jarê. Tanhmã na pre ra mê ate kanhêti pumunh ã mytwrÿ kute? Xã ham na ka prem omu nã amnepê mã? E mê aprÿ hã tanhmã inhmã harênh to. Anê.

Hãmri nhûm mê ihõja kãm:

—Nã na ra hã amgrã axkrut kaxyw. Na pa prem omu hãmri nê inhnojarê nê man ixpa ho ixpa ry rax nê mê awÿr pój. Anê.

⁸Nhũm mē kuma nē mē kām:

—Tỳ. Nom jar amrakati. Perēj kamā na xep kato. E mē māmri ma hwỳr mō nē kamā hapēr. Hāmri nē nhỹri omu nē akupỳn ixwỳr mō nē inhmā harē. Pa ijaxwỳja ma hwỳr mō nē omu nē mē apyrà nē kām mex o mex ā harē. Ijaxwỳja inhmā omunh prām tỳx kumrēx. Anē.

Nom hēx rom ā ri mē kām kapēr anē. Kot nhỹri harēnh mar nē hā àmnēnh nhũm mē kot hp̄ir kaxyw nhũm hēx rom ā kām omunh prām tỳx ā amnhĩ jarēnh anē.

⁹⁻¹⁰Jakamā nhũm mē kuma hāmri nē kato nē ma Perēj wỳr mōr kurē kumrēx. Hāmri nē kormā mē ō pika kamā mē pa ri kanhēti ho studa xwỳnh̄ta nhũm mē axte amnhĩ kukamā omu nē hkĩnh nē. Nhũm ma Perēj wỳr mē hkukamā mō nhũm mē omunh pē ma hkōt pa rāhā hwỳr pōj. Nhũm kanhētija pahĩ nywre nhōrkwỳ myri ajēt.

¹¹Jakamā nhũm mē ma hkōt mra nē ixkreja wỳr pōj nē kapem xa. Hāmri nē mē kām kapēr nē mē hwỳr agjē nē Jejus mē katorxàja wa omu. Hāmri nē Jejus kutā hkōn krā ho hkrĩ hpa nē kām kapēr nē kām:

—Pa Xugitre. Hēxta waa nē. Nā amex o amex. Kot kaj nhỹrmā axaptār hāmri nē apē mē inhō Pahĩ Maati. Nā àm hāmri na pa mē apumu nē ixkĩnh nē. Anē.

Hāmri nē ahpỳnhā kām hkĩnh xà gō. Kām ōr kwỳ gō nē kām mēhkuxwa xà hkwỳ gō nē kām te kot rāmre kuxware pyrāk pē m̄iraja nhũm mē kām hkwỳ gō. Mē hkĩnh xà hā kàxpore sohtō nhũm prem kām ōr pa.

¹²Hāmri nē ra akupỳm Jerujarē kamā pahĩ Erox wỳr nojarēt. Nhũm kamāt nhũm mē gōr nē hikwỳ hāmri nē ra amỳti. Nhũm Tirtũm mē hpimtir kām mē kām kapēr nē mē kām:

—Pa? E mē inhma. Kēr ka mē akupỳm pahĩ Erox wỳr amrar nē kām mē hkrata jarēnh kēt nē. Àm kwarĩ ho kwarĩ. Nē kēr ka mē pry hō hā m̄an ma mē anhō pika hwỳr akupỳm apa ho apa.

Anhỳr o mē kām kapēr jakamā nhũm apkati nhũm mē kànhmā hkrĩ hāmri nē Tirtũm kot mē kām hā karō xà hkōt ma akupỳm mē ō pika hwỳr pa kurē kumrēx nē akupỳm pahĩ Erox wỳr m̄rar kēt nē.

Juje mē hprō wa kot Erox pymaj ma Jejus o mōr

Apokarip 12.1-6, 12.13-18

¹³Tā nhũm kanhēti ho studa xwỳnh̄jaja ma akupỳm hapēx hāmri nhũm Tirtũm axte Marir m̄jēn Juje hwỳr kapēr o mē wrỳk xwỳnh̄jē hō mē. Nhũm kē axte hpimtir kām hwỳr wrỳ nē kām kapēr nē kām:

—Pa Juje. E kwa kànhmā nhỹ. Na ra pahĩ Eroxja aprō pē hkrata ā amỳnē. Kōja tokyx pōristi hkwỳjaja mē anhō krĩ hwỳr pōj nē war apē hp̄ir kaxyw ri hapēr. Jakamā

kwa wa tokyx akato nē ma pika pē Ejit wỳr amōr kurē kumrēx. Nē Ejit kamā apa rāhā pa nhỹrmā akupỳn amnē war amē. E kwa tokyx. Anē.

¹⁴Hāmri nhũm kuma nē kànhmā nhỹ nē Marir mra nē war amnhĩ to akuprō nē ra nojarēt. Hāmri nē krĩja pē Jejus o kato nē ma o mōr kurē kumrēx. Wa mōr ryy nē hāmri nē Ejit wỳr pōj nē kamā pa ho pa.

¹⁵⁻²⁰Rōm nhũm pahĩ Erox tee ri amnhĩ wỳr kanhēti ho studa xwỳnh̄jē kamā hamak o pa nom nhũm mē akupỳm hwỳr m̄rar kēt nē. Jakamā nhũm mē kamā gryk nē hamaxpēr o:

—Tk. Kwa nà. Na mē àm inhmā hēx nē akupỳn ixwỳr m̄rar nē nhỹri inhmā pahĩ nywta jarēnh kēt nē. Nā kwār mē māmri ā inhĩpēx anē. Mē kot ixpē ho hpimxuure kaxyw ā. Nā kot paj mē kēp kupĩ nhũm mē rĩ amnhĩ pumu. Na xep prem kanhēti kot harēnh xàja pumunh ā ra hā amgrā pyxi nē hkōt mytwrỳ kēp 6. Jakamā m̄an mē hkrata ra hā amgrā axkrut kaxyw. Nā na pa ra ijamaxpēr. Kot paj Perēj kamā mē hkra myjaja ra mē hā amgrā axkrut xwỳnh̄jaja nē kormā mē hā amgrā axkrut kēt xwỳnh̄ piitā mē himex pa. Jao ra mē kamā pahĩ nywta pĩ. Nā ixte hp̄ir mā kēnā. Kōja hprēk nē ixpānhā Ijaew o amnhĩptār kēt nē.

Anhỳr o hamaxpēr hāmri nē amnhĩ wỳr ō pōristi hkwỳjē hā karō nē mē kām mē hkrājē hā amỳnē nē mē kām:

—E kēr ka mē ma Perēj wỳr mra nē kamā mē kēp mē hkra myrejaja ra mē hā amgrā axkrut xwỳnh̄jē nhĩmex pa. Nē kormā mē hā amgrā axkrut kēt xwỳnh̄jaja m̄ānēn mē himex par kumrēx. Nē Perēj pu hā ri krĩ hkyre hkōt m̄ānēn ri ajapōj nē ā mē himex par anē. Anē.

Hāmri nhũm mē kuma nē ma mē hwỳr m̄rar kurē kumrēx. Hāmri nē Perēj wỳr pōj nē mē kēp mē hkra myre piitā mē himex pa. Jakamā nhũm mē katorxà nē mē hipēxàjaja tee ri mē hkra htyk xwỳnh̄jē pumu nē hkaprĩ htỳx nē m̄yr rūnh nē. Nom na pre Tirtũm nhỹ hā kapēr jarēnh o mē pa xwỳnh̄ finat Jeremistija ra amnepēm ā mē kot amnhĩ nhĩpēx anhỹrja kukamā mē panhĩgētjē mā mē harē nē hā kagā. Na pre mē kām Ijaew kurē xwỳnh̄jē pynēnh nē ma mē ō pika hwỳr mē ho hapēx par kaxyw. Hāmri nhũm mē panā Rrakewja te ra kot tee ri ja hā mē omunh nē tanhmā amnhĩ nhĩpēx to pyrāk nhũm Jeremistija tanhmā Ijaewjē jarēnh to nē hā kagā. Nē hā kagā ho:

Amnepēm Perēj kamā na pre mē panā Rrakewja hpjagri ho nōrja ā ra htyk kaxyw nē tee ri hkra kator mā xwỳnh̄ta kukamā hamaxpēr nē m̄yr o nō. Nhũm hkwỳjaja tee ri akupỳm tam hamaxpēr kaxyw kām kapēr. Tā jarāhā Rrakew kanrēhā hkra nē

htâmnhwý nijaja ra uràk nê tee ri mê hkrare ho hamak xàj mýr o pa. Mê kot mê kêp utàr nê mê himex par jakamâ nhùm mê tee ri mê ho hamak xàj mýr o pa. Anê.

Nhùm pre finat Jeremîsja mê hkukamâ â mê harê nê mê hâ kagà anê. Tâ ra jarâhâ mēni piitâ Rrakew pyrâ nê hkrajê o hamak xàj mýr o pa.

Wa kot akupým wa ô pika hwýr Jejus o môr

Juâw 7.41-42

Tâ nhùm mytwrý grêre nê hapêx nhùm pahi Erox ty. Jakamâ nhùm kamât nhùm Jujeja gôr nê nô. Nê kê ôt kâm axte amýti. Nhùm Tirtúm kapêr o mê wrýk xwýnhja axte hwýr wrý nê kâm:

—Pa Juje? E na ra Marir pê hkra pír mã xwýnhja ty. Jakamâ kwa wa māmri ma akupým mô. Ma akupým mê apê Ijaewjê nhô pika hwýr axâmnhix aprô mê hkrata wa o mô.

Anhýr o kâm kapêr. Na pre ra amnepê m Tirtúm nhý hâ kapêr o mê pa xwýnhjê hōja ja kukamâ mê panhigêtjê mã ja jarê nê hâ kagà. Nê hâ kagà kot: “Ixpê Tirtúm kot paj nhýrmâ Ejit rúm ma akupým ô pika hwýr ixkrata wa mê kumê.” Anhýr o kot hkukamâ harênh nê hâ kagà.

²¹ Jakamâ nhùm Tirtúm kapêr o mê wrýk xwýnhja â Juje mã karô anê hāmri nhùm kuma nê ma akupým wa o mô. Ma akupým mê ô pika hwýr wa o mô.

²² Tâ ra akupým hpôx kaxyw htêp o mô. Hāmri nê pahi Erox kra Akêrawja ra hipêxâ mýr pê kot Jutej kamâ mê ho amnhiptâr hâ harênh ma. Hāmri nê tee ri mê amnhî kukamâ hamaxpêr nê kâm mê hwýr wa o môr pyma nê.

Tâ nhùm kamât nhùm Juje ra gôr nê nô nê kê axte amýti. Nhùm kê axte Tirtúm kapêr o mê wrýk xwýnhja hwýr wrý nê akupým ô pika hkwy pê Jutej wýr môr nê wa mê hkurê nê kâm:

—Pa Juje? E kêr ka Jutej wýr wa mê amôr kêt nê. Pânhâ nhâm mê anhô pika hō hwýr măn mô nê kamâ ri apa.

Anê nhùm kuma nê hpânâ wa mê ma mê ô pika hkwy pê Garirej wýr wa mê juk nê ma mô.

²³ Nê kamâ pój nê krî pê Najare hwýr mô nê kamâ amnhim ôrkwy nhípêx nê kamâ wa mê pa ho pa. Nhùm pre ra amnepê m Tirtúm nhý hâ kapêr o mê pa xwýnhjê hōja ra â mê kot amnhî nhípêx anhýrja kukamâ mê panhigêtjê mã mê harê nê hâ kagà. Nê hâ kagà kot:

Tirtúm kot mê pahwýr mēnh mã xwýnhja koja kêp Najare nhô xwýnh. Anê.

3

Juâw Paxis kot Tirtúm kapêr jarênh o pa Makre 1.1-6; Rukre 3.1-14; Juâw 1.19-23

¹ Nhùm pre Juâw Paxisja â amnhî nhípêx anê. Nê pika pê Jutej kamâ mê kâm Tirtúm kapêr jarênh o pa. No âm krîm pa hkêt nê. Âm mê hpu hâ krî pê amým ri kapôt â ri mê kâm Tirtúm kapêr jarênh o pa.

²⁻³ Tirtúm nhý hâ kapêr o pa xwýnh finat Ijais ra kot Juâw kukamâ mê panhigêtjê mã tanhmâ harênh to nê hâ kagà xá hkôt. Na pre hkukamâ hâ kagà ho:

Koja nhýrmâ mêhō mōn pōj. Kapôt â mōn pój nê mê kâm tanhmâ mēmoj tâ karô hto ho ri pa. Nê mê kâm: “Koja Tirtúm tokyx mê pahwýr mê panhō Pahihtija mê nhùm wrý nhùm mê piitâ omu. Jakamâ kwa mê tokyx kutêp tām amnhî nhípêx o ri apa. Te mê kot mêhō kutêp pry ho mexta pyrâ nê amnhî nhî ho tām amnhî nhípêx nê tām ajamaxpêr mex o ri apa. Kêr ka mê Pahihti kutêp â amnhî nhípêx anhýr o ri apa.” Anhýr o koja mê kâm ujarênh o pa. Anê.

Na pre finat Ijaisja Juâw Paxis kukamâ â mê kâm harênh anê nê hâ kagà. Tâ nhùm hâ kagà xàja kôt nhùm Juâw Paxisja mōn pōj. Hāmri nê Ijais kot hkukamâ harênh xá hkôt kapôt â ri mê kâm ujarênh o pa nhùm mê kâm mar prām xwýnhhaja ma hwýr mra. Nhùm mê kâm kapêr nê mê kâm:

—E koja Tirtúm tokyx kot mê pakaxyw âm xwýnhja o amnhîrît. Jakamâ kwa mê tokyx kutêp amâ amnhî tomnuj kaga hprām xàj tām amnhî nhípêx o apa.

Anhýr o Jejus kutêp mê kâm kapêr o pa.

⁴ Juâw Paxisja hikâxpore hkêt jakamâ na pre ê mex kêt nê pa. Âm mēmo mry pê kamer kî ho amnhim ê nhípêx nê hagjê nê hâ pa. Nê mēmo mry hkâ ho amnhî pre nê ri pa. Nê mēo mex kur kêt nê âm krit ku nê menh ôr o ri pa.

⁵ Jakamâ nhùm kapôt â ri mê kâm Tirtúm kapêr jarênh o pa nhùm mê kot mar kaxyw ma hwýr mra. Pika pê Jutej kamâ ri mê pa xwýnhhaja. Nê Jutej kamâ krî pê Jerujarê nhô xwýnhhaja. Nê pyhti pê Jotâw mýri mê pa xwýnhhaja. Nhùm prem piitâ harênh ma nê kot mar kaxyw ma hwýr mra.

⁶ Hāmri nê kapêr ma nê Tirtúm noo mã mê kot amnhî tomnuj xwýnh â kâm amnhî jarê. Mê kot amnhî tomnuj kaga nê tam amnhî nhípêx o pa hprām xàj â kâm amnhî jarênh anê. Nhùm Tirtúm kaxkwa kamâ hkrî htâ mê kuma nê amnhî katut kôt mê kot amnhî tomnuj rēnh pa nê axte kâm hamaxpêr kêt nê. Jakamâ nhùm pre Juâw Paxisja Tirtúm mã gôx kâm mê hkrâ kumrâr pa. Pyhti pê Jotâw kamâ mê hkrâ kumrâ.

7 Tã nhũm Parijew mẽ Satusew nhõ xwýnhjaja mãânên mẽ hkõt ma Juãw Paxis wýr mra. Mẽ uràk nẽ mẽ kệp Ijaew jakamã haxwýja Juãw Paxis kot mẽ hkrã kumrãr kaxyw ma hwýr mra. No ãm hkwyjẽ hkĩnhã mẽ kot amnhĩ tomnuj kaga hprãm xàj kãm amnhĩ jarẽnh kêt nẽ. ãm amnhĩ krã hkõt hkwyjẽ hkõt hwýr mra nẽ amnhĩ to kuma. Nom nhũm Juãw Paxisja ra hprĩ hã ã mẽ hamaxpẽr anhýrja kõt mẽ omunh mex nẽ. Jakamã mẽ kãm:

—Tk kwa nã. Kormã mẽ ate amnhĩ tomnuj pix o ri apa kẽnã. Xã kot paj mẽ ate amnhĩ tomnuj o apa rãhã mẽ akrã kumrã nhũm Tirtũm ja hã mẽ apumõ nhũm ja kãm mex nẽ? Nã koja já kãm mex kêt nẽ. Koja ja mýrapẽ nhýrmã tanhmã mẽ atomnuj týx to ka mẽ tee ri umaj apimxur prãm kaprý.

⁸ Na htem amnhĩ tomnuj kaga nẽ tãm amnhĩ nhĩpẽx nẽ tam axpẽn nhĩpẽx. Jakamã e kwa mẽ ã amnhĩ nhĩpẽx o apa anẽ pa ri kormã mẽ akrã kumrã.

⁹ Na ka htem atýx ri ajamaxpẽr o: “Mẽ ixpẽ finat Apraãw kanrẽhã htãmnhwý hkwy na pa mẽ. Jakamã koja Tirtũm ja hã mẽ ixpumõ hãmri nẽ mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nẽ. Koja mẽ ixto mex nẽ.” Anhýr o atýx ri amnhĩ kukamã ajamaxpẽr. Nom ja kot anhýr kêt. Mẽ apẽ Apraãw kanrẽhã htãmnhwý htã mẽ ate uràk nẽ tãm amnhĩ nhĩpẽxe hã. Kot kaj mẽ apẽ htãmnhwý htã amnhĩ tomnuj o ri apa hãmri nẽ Tirtũm noo mã te mẽ apẽ pikap kẽnre nhĩkwý pix pyrãk.

¹⁰ Na ra Tirtũm mẽ ate amnhĩ tomnuj mýrapẽ tanhmã mẽ ato kaxyw. Te ho mẽhõ nhõ mẽmo hprã õ hkêt nhũm kot tee ri omunh nẽ krãhyr nẽ kuwy kamã mẽnh nẽ ho kaxãr par pyrãk o koja mẽ anhĩpẽx. Jao amnhĩ nẽ kuwy hwýr mẽ arẽ ka mẽ kamã amnhĩ xã htýx kamã ajamak rãhã ho ri apa. Anẽ.

Nhũm pre ã Juãw Paxisja Parijew mẽ Satusew nhõ xwýnhjẽ mã kapẽr anẽ.

¹¹ Hãmri nẽ hpãnhã axte mẽ kot mar kaxyw hwýr mẽ mrar xwýnhjẽ mã kapẽr nẽ mẽ kãm:

—E ra mẽ ate amnhĩ tomnuj kaga xwýnhjaja. Na pa Tirtũm mã mẽ akrã kumrãr kaxyw gõ pix o mẽ akrã kumrã. Nom koja tokyx ixpãnhã Tirtũm kot mẽ pakaxyw ãm mã xwýnhã tãm mẽ pahwýr pøj. ãhpumunh týx o kot ijakrenh par jakamã na pa hte ãm kukwak ri ixpa nẽ amnhĩ tã hã ixpijaãm o ri ixpa. Koja mẽ awýr Tirtũm Karõ rẽ nhũm mẽ akarõ mã agjẽ. Ka mẽ ý hã tam amnhĩ nhĩpẽx o ri apa. Nom kormã mẽ kot tam amnhĩ nhĩpẽx kêt xwýnhjaja koja Tirtũm kot mẽ pahwýr mẽnh xwýnhja ja hã mẽ omu nẽ mẽ hipẽx o te kuwy kot mẽmoj to kaxãr par pyrãk o mẽ hipẽx.

¹² —Na htem pur kãm harõj nhĩkẽ nẽ ho grã nẽ hpãnhã kahtwý. Nẽ kahuk pa hãmri nẽ hkapĩ nhũm kõk apẽ nẽ prýhka ho htor pa. Nhũm mẽ hpãnhã hy ho pa nẽ ixkre kamã gõj kãm unhwý. Ja pyrã nẽ koja tokyx Tirtũmja mẽ piitã mẽ kot tanhmã amnhĩ nhĩpẽx to ho pa hã mẽ omunh xã hkõt mẽ ho axkjẽ. Jakamã mẽ kot tãm amnhĩ nhĩpẽx o mẽ pa xwýnhjaja koja ma amnhĩ wýr mẽ ho api nhũm mẽ kuri mex rãhã nẽ pa ho pa. No mẽ kot amnhĩ tomnuj rãhã ho mẽ pa xwýnhjaja koja jajẽ hkĩnhã tanhmã mẽ homnuj to. Nhũm mẽ ma kuwy raxja wýr pa nẽ kamã amnhĩ xã htýx kamã hamak rãhã nẽ pa ho pa.

Anhýr o mẽ kãm kapẽr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-

34

¹³ Tã nhũm Jejus pika pẽ Garirej rũm kato nẽ ma Juãw Paxis wýr mõ. Juãw kot pyhti pẽ Jotãw kamã hkrã kumrãr kaxyw ma hwýr mõ. Hãmri nẽ omu nẽ kãm:

—Pa. E ot pa awýr amnhĩ to tẽ. Ate mẽ kuxwar ixkrã kumrãr kaxyw. Anẽ.

¹⁴ Hãmri nhũm tee ri kuma nẽ kãm:

—Kwa nã. Aa ate amnhĩ tomnure hã kot pa kêt ri akrã kumrã. Nã ka kot kaj ixkrã kumrã. Anẽ.

¹⁵ Hãmri nhũm kãm:

—Kwa nã. Mãmri ixkrã kumrã Juãw Paxis. Tirtũm kãm ja prãm kẽnã kot ka kêt ri axtem nẽ ixkaga. Kot puj mẽ Tirtũm kãm hprãm xã hkõt tanhmã amnhĩ nhĩpẽx to ho ri papa. Anẽ.

Hãmri nhũm kuma nẽ kãm:

—Tõe. Nã kot paj akrã kumrã. Anẽ.

¹⁶ Hãmri nẽ pyhti hwýr o wrý nẽ kamã hkrã kumrã. Hãmri nẽ wa akupým api nẽ gõ mý ri ãm rãhã nhũm kaxkwa axkjẽ. Hãmri nhũm kurũm Tirtũm Karõja Jejus wýr te tuuti pyrã nẽ ahtar mã hwýr wrýk o tẽ nẽ ikre hã xa. Nhũm Jejus arĩ amnhĩ wýr wrýk o htẽm kãm omunh o xa.

¹⁷ Hãmri nhũm Tirtũm kaxkwa rũm kãm kapẽr nẽ kãm:

Pa? E apẽ ixkra mex na ka. ãm hãmri na ka hte ixkanrẽhã ã amnhĩ nhĩpẽx mex anẽ. Inhmã ajapẽ kamã na ka ri apa ho apa. Anẽ.

4

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãânẽn Eprẽw 2.18, 4.15

¹ Tã nhũm Jejus Tirtũm Karõ nhý hã ma kapõt ã ri pa. Satanasti kot amnhĩ tã kamã hamak kaxyw nhũm ma kapõt ã ri pa.

² Ri pa hã apkati xohtô nê. Ra hã arıgro pê 40. Nê kormã apkur kêt jakamã ra kãm prãm tıx kumrêx nê ri pa.

³ Hãmri nhũm Satanastija nhÿhÿnh hwÿr tê nê hêx rom kãm kapêr nê kãm:

–Pa. E kwa mãn ka ra amã prãm tıx nê nã? Nom xep apê Tirtũm Kra jakamã apê mêmoj hihtıx kêt. Tirtũm pyrã nê axãhpumunh o axãhpumunh kênã. Jakamã kwa kên nhıkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtıx. E kwa tokyx kãm akapêr. Anê.

⁴ Hãmri nhũm kuma nê kãm:

–Tk. Nã kot paj amar xã hkôt ã ri amnhĩ nhípêx anhÿr kêt nê. Koja Tirtũm kãm inhmã mêmoj nhôr prãm nê inhmã mêmoj gô pa ri kormã kukrê. Kapêr ã kagã htũm kot ja jarênh kot:

Na htem mê apkur xã pix kukwak ri htır nê pa hkêt nê. Na htem mãânên Tirtũm kapêr ma nê hkôt amnhĩ nhípêx nê htır nê pa. Anê.

–Ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhípêx anhÿr kêt nê. ãm kwarĩ ho kwarĩ. Anê.

⁵ Hãmri nhũm Satanastija tee ri kuma hãmri nê hpãnhã ma Jerujarê hwÿr o mô. Nê Tirtũm mã amnhĩ jarênh xã hã ixkre hprêk nhımök wÿr ho api nê kÿxpê hatur xã hã ãm nhũm xa. Hãmri nê amnhĩ parpê kên rũnh nhıkwÿ xwÿnhja pumunh o xa nhũm Satanasti kãm:

⁶ –E apê Tirtũm Kra jakamã kwa ja rũm ahpar mã ajarĩ nê mã tẽ nê pikap tẽm. Koja Anhípêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koja kapêr o wrÿk xwÿnh kwÿjê mã ajarê ka ajarĩ nê ahpar mã tẽ nhũm mê kÿx pê amÿ nhũm mêmoj akã hyr kêt nê. Anê.

–Ã kapêr ã kagã htũm kot ajarênh anhÿr jakamã e tokyx ajarĩ. Anê.

⁷ Hãmri nhũm Jejus kuma nê kãm:

–Tk kot paj ri ate inhmã karô xãja kôt ã amnhĩ nhípêx anhÿr kêt nê. Koja Tirtũm tãm inhmã ijarĩ hã karô pa ri mar xã hkôt ijarĩ. No kot pa ri amar xã hkôt ijarĩ hkêt nê. Tirtũm kapêr ã kagã htũm kot ja jarênh kot:

Kêr ka mê amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhípêx to hkêt nê. Anê.

–Ã kot ja nê kapêr kot anhÿr jakamã kwarĩ ho kwarĩ. Kot paj ri amar xã hkôt ijarĩ hkêt kumrêx. Tirtũm tãm kot inhmã ã ixte amnhĩ nhípêx anhÿr ã karôre hã. Anê.

⁸ Hãmri nhũm Satanasti tee ri kuma nê hpãnhã ma nhÿri kên prêeti hwÿr o tẽ nê himök ã axte o xa. Hãmri nê kãm pika piitã

ahkre hpa. Nê mê hikukrêx piitã nhũm kãm ahkre ho xa. Kãxpore nê mêmoj mex piitã nhũm kãm ahkre nhũm Jejus piitã omunh o xa.

⁹ Hãmri nhũm kê Satanasti axte kãm:

–E mãn ka kam ri mêmoj mex mÿj piitã omunh pa. Piitã inhô na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã ôr pa. Ka kam mêmoj piitã ho anhô nê ho amnhĩptãr o apa. Jakamã e kwa tokyx. Anê.

¹⁰ Hãmri nhũm kuma nê axte kãm kapêr nê kãm:

–Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tirtũm kapêr ã kagã htũm kot ja nê kapêr kãm hihtıx kênã. Kapêr kot:

Kêr ka mê ixkapêr pix ma nê ixkutã pix mã akônkrã ho akrĩ nê inhmã inhmex o inhmex ã ijarê. Kêr ka mê ã amnhĩ nhípêx anhÿr o ri apa.

–Anhÿr o kot hã karô jakamã kot paj amã amex o amex ã ajarênh kêt kumrêx. Anê.

¹¹ Hãmri nhũm tee ri amnhĩ tã kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hkaga nê ma tẽ. Hãmri nhũm Tirtũm kapêr o mê wrÿk xwÿnhjaja Jejus wÿr wrÿ nê tanhmã ho mex to nê kãm ô nhũm kukrê nê akupÿm hihtıx.

*Jejus kot Garirej kamã kapêr o pa
Makre 1.14-15; Rukre 4.14-15*

¹² Tã nhũm Juãw Paxisja mêmoj tã pahi Eroxo mã akır nhũm amnhĩ tã kuma nê gryk xãj haxã nhũm hkrĩ ho hkrĩ. Hãmri nhũm Jejusja harênh ma nê ma akupÿm Garirej kamã krĩ pê Najare hwÿr ma akupÿm tẽ.

¹³ Hãmri nê ra pój nom kamã ri pa hkêt nê. Nê hpãnhã kurũm kato nê mã krĩ pê Kapanaũ hwÿr tẽ. Gô rax pê Garirej mÿri na pre. Pika hkwy pê Jepurô mê Natari wa mê kamã na pre nhũm Jejus ma hwÿr tẽ. Hãmri nê kamã pa.

¹⁴ Nhũm ra amnepem Tirtũm nhÿ hã kapêr jarênh o mê pa xwÿnh finat Ijaisja Jejus kukamã ra mê panhígêttjê mã ã kot amnhĩ nhípêx anhÿr ã harê nê hã kagã. Jejus kot ã mê hwÿr mör anhÿrja kukamã nhũm pre harê nê hã kagã.

¹⁵ Pika hkwy kamã mê pa xwÿnhjaja nhũm pre mê hkukamã mê harênh mex nê. Nê pika pê Garirej kamã mê pa xwÿnhjaja nhũm pre mãânên mê hkukamã mê harê. Nê pyhti pê Jotãw mê gô xujanãr wa hkaêx kãm pika piitã kamã mê pa xwÿnhjaja. Nê krĩ pê Garirej kamã mê kêp Ijaew kêt xwÿnhjaja nhũm pre mãânên mê harê. Á na pre finat Ijaisja mê hkukamã Tirtũm nhÿ hã mê piitã mê harê nê hã kagã anê. Jejus kot ma mê hwÿr mörja kukamã nhũm ra hprĩ hã harê nê hã kagã. Nê hã kagãja o:

¹⁶ E. Kot paj mê amâ mēmoj mex jarê ka mē inhma. Mē ate Tirtûm pumunh kêt jakamâ te mē ate kamât kô kamâ ri apa pyrâk. Tâ koja Tirtûm mē amâ amnhî to amnhîrit ka mē hpânhâ te mē ate hirâ kamâ ri apa pyrâk o amnhî nhîpêx nê ra hkôt amnhî xunhwÿ.

Anhÿr o mē hkukamâ mē harê nê hâ kagâ.
¹⁷ Tâ nhûm ra kot hkukamâ mē kâm ujarênh xâ hkôt nhûm Jejusja mē hwÿr mō nê mē kâm Tirtûm kapêr jarênh o ri mē hkôt pa. Nê mē kâm tanhmâ amnhî jarênh to ho pa. Nom kormâ hprî hâ mē kâm amnhî jarênh kêt nê. Te ho nhâm mēhō jarênh pyrâk o mē kâm amnhî jarê nê mē kâm:

—E na ra Tirtûmja kot mē akaxyw âm xwÿnhâ mē nhûm mē awÿr wrÿ. Jakamâ kwa mē tokyx tee ri ate amnhî tomnuj â amnhî pumu nê â ate amnhî nhîpêx anhÿr kaga nê hpânhâ Tirtûm kôt mân amnhî nhîpêx o ri apa.

Anhÿr o mē kâm kapêr o pa pê mē ahkre ho ri mē hkôt pa.

Jejus kot amnhî wÿr tep pynênh xwÿnhjê hwÿr

Makre 1.16-20; Rukre 5.1-11

¹⁸ Tâ nhûm Jejus ma gō rax pê Garirej mÿ ri pa nê gōx kâm ja wa omu. Simâw Pêtre mē htō Andreja nhûm wa gōx kâm kryhti rēnh o wa xa. Hâmri nhûm Jejus wa hwÿr tē nê wa omu nê amnhî kôt wa kuwÿ nê wa kâm:

¹⁹ —Pa. E kwa ma ixkôt mân war apa. Kot paj tanhmâ war ajahkre hto ka wa ma mē kâm ijarênh o ri apa. Mē kot war amar nê ra ixkôt amnhî xunhwÿr kaxyw. Anê.

²⁰ Hâmri nhûm wa kuma nê kryhti re nê wa ma hkôt htēm kurê kumrêx.

²¹ Hâmri nhûm mē ma nhâm axte mō nê ra jajê hwÿr kato. Jepetew mē hkra Xiakre mē Juâwja nhûm wa mē hwÿr kato. Nhûm mē ô pâr kâm kryhti ho mex o wa mē nhÿ. Hâmri nhûm mē hwÿr mra nhûm Jejus amnhî kôt ja wa kuwÿ nê wa kâm:

—Pa Xiakre mē Juâw. E wa ma ixkôt mân wa apa. Anê.

²² Hâmri nhûm wa kuma nê hipêêxâ mâ amnhî jarê nê ma hkôt pa ho pa kurê kumrêx.

Jejus kot tanhmâ amnhî nhîpêx to

Rukre 6.17-19

²³ Tâ nhûm Jejus Garirej kamâ Ijaew mâ Tirtûm kapêr jarênh o pa. Na pre lte Tirtûm kapêr o mē ahkre xâ hâ ixkre hwÿr agjê nê kamâ mē kâm Tirtûm kapêr jarênh o hkrî nê mē kâm:

—E mē tee ri ate amnhî tomnuj â amnhî pumu nê hpânhâ Tirtûm kôt mân amnhî nhîpêx o ri apa. Kot kaj mē â amnhî nhîpêx anê nhûm ja hâ mē apumu nê mē ato hkra kurê kumrêx. Anê.

Hâmri nê akupÿm mē kâm mē à xwÿnhjê ho mex. Ahpÿnhâ tanhmâ mē à kute xwÿnhjaja nhûm akupÿm mē ho mex o pa.

²⁴ Jakamâ nhûm mē piitâ pikaja kamâ ri axpên mâ harênh o hprôt. Nê pika pê Sir kôt määnen ma ri axpên mâ harênh o hprôt. Nhûm mē piitâ harênh ma nê ma hwÿr mē à xwÿnhjê ho mra. Ahpÿnhâ ri tanhmâ mē à kute xwÿnhjaja. Mē à htÿx xwÿnhjaja. Nê mē î kamâ mē htyk xwÿnhjaja. Nê mē hkrâ pipânh xwÿnhjaja. Nê mēkarōmnuti kot Satanasti nhÿ hâ tanhmâ ri mē ho xwÿnhjaja. Nhûm prem mē hamÿ nê ma Jejus wÿr mē o mra nhûm mē omu nê akupÿm mē ho mex pa.

²⁵ Jakamâ nhûm mē ohtō nê ma hkôt pa. Krî pê Garirej rûm nê Tekap rûm nê Jerujarê rûm nê pika pê Jutej rûm. Nê pyhti pê Jotwâ nhîkjê rûm mē pa xwÿnhjaja. Nhûm mē â ohtō nê ma Jejus kôt omunh o pa anê.

5

Jejus kot tanhmâ mē ahkre hto

Rukre 6.20-23

¹ Nhûm Jejus amnhî kôt ri mē kot omunh o mē pa xwÿnhjê pumu hâmri nê mē ahkre kaxyw ma tē nê hixêt â api nê himök â nhÿ. Hâmri nhûm mē ma hkôt mra nê pu hâ hkrî pa.

² Hâmri nhûm mē ahkre nê mē kâm:

³ E mē inhma. Kot kaj mē atō amnhî kaxyw tanhmâ Tirtûm mē wa inhmâ ajamaxpêr to nê ajamaxpêr o: “Koja Tirtûm inhîhkō hâ pa hkêt pa ixtÿx ri tanhmâ amnhî tomnuj to ho ri ixpa râhâ ho ri ixpa.” Anhÿr o ajamaxpêr. Hâmri nhûm Tirtûm â ajamaxpêr anhÿr â apumu nhûm ja kâm mex nê. Hâmri nhûm apê hkra hâ ato mex nê atânopxar o akôt pa ho pa ka ajamakêtkati nê axâmnhîx akînh nê ri apa.

⁴ Nê kot ka mē atō tanhmâ amnhî tomnuj to. Hâmri nê tee ri ja hâ amnhî pumu nê apijaam nê akaprî nê. Nê akaprî xâj amÿr o nhÿ. Amÿr rax nê. Hâmri nhûm Tirtûm ja hâ apumu nhûm ja kâm mex nê. Jakamâ nhûm anê akaprî hta nê ato mex nê ka ajamakêtkati nê axâmnhîx akînh nê ri apa.

⁵ Nê kot ka mē atō agryk tokyx anhÿr kêt nê. Nê kripêm amnhî tâ amâ mē hkaprî ho ri apa. Hâmri nhûm Tirtûm ja hâ apumu nhûm ja kâm mex nê. Hâmri nhûm ato mex nê ka ajamakêtkati nê axâmnhîx akînh nê ri apa.

⁶ Nê kot ka mē atō amâ Tirtûm kâm hprâm xâ hkôt amnhî nhîpêx o ri apa hprâm nê. Nhûm amnhî tâ apumu nhûm ja kâm mex nê. Hâmri nhûm ato

mex nê tanhmâ akrâ hto ka hkôt pix mâ amnhî nhîpêx o ri apa. Jao ajamakêtkati nê axâmnhîx akînh nê ri apa.

7 Nê mê kamâ mê axukaprî ho ri apa xwýnhjaja na hte Tirtûm ja hâ mê apumu nhûm ja kâm mex nê. Jakamâ na hte mê hâ mê apyrâ nê mê akamâ ukaprî ho pa. Jao mê ato mex nê ka mê ajamakêtkati nê axâmnhîx akînh nê ri apa.

8 Nê kot ka mê atô â ajamaxpêr anê nê ajamaxpêr o: “Nà kot paj âm Tirtûm kapêr kôt pix mâ ri amnhî nhîpêx o ri ixpa. Âm ja pix na inhmâ hprâm.” Anhÿr o ajamaxpêr. Hâmri nhûm Tirtûm amnhî tâ mê apumu nê mê ato mex nê. Ka mê ajamakêtkati nê axâmnhîx akînh nê ri apa. Nê nhÿrmâ Tirtûm wÿr api nê kuri amex rãhâ apa ho apa.

9 Nê kot ka mê atô mêhõ wa kot axpên kutâ amnhî xâm xwýnhhta axpên tâ wa omu nê wa kot tanhmâ axpên nhîpêx tota nê tanhmâ wa kâm akapêr to nê akupÿm tâm wa âm. Hâmri nhûm Tirtûm ja hâ apumu nhûm ja kâm mex nê. Nê apê hkra hâ ajarê ka ajamakêtkati nê axâmnhîx akînh nê ri apa.

10 Nê koja mêhõ mê ate Tirtûm kapêr mar xâ hkôt amnhî nhîpêx o apa hâ mê apumu nê hâ tanhmâ mê anhîpêx kati hto. Tâ nom koja Tirtûm arî mê ato mex nê. Mê apê hkra jakamâ mê kot tanhmâ mê anhîpêx hto htâ ka mê ajamakêtkati nê axâmnhîx akînh nê ri apa.

11-12 —Kwâr mê māmri ixtâ mê ato kapêr rÿ mê ato hêx rÿ tanhmâ ri mê atomnuj to. Kwâr mê māmri â mê anhîpêx anê. Nom kêr ka mê arî amnhî kaxyw inhmâ ajamaxpêr tÿx rãhâ pê ajamakêtkati nê axâmnhîx akînh nê ri apa. Kwâr mê māmri ixtâ â mê anhîpêx anê nê mê amex kêt â mê ajarê. Amnepê m na prem â Tirtûm nhÿ hâ kapêr jarênh xwýnhjê nhîpêx anê. Jakamâ koja mê urâk nê â mê anhîpêx anê. Hâmri nhûm Tirtûm ja hâ mê apumu nê amnhîm mê amex â mê ajarê. Hâmri nê nhÿrmâ kaxkwa kamâ wa inhõ kri kamâ mê ato mex nê. Jakamâ kêr ka mê â amnhî kukamâ ajamaxpêr anhÿr pê māmri akînh nê ajamakêtkati nê axâmnhîx ri apa. Kwâr mê māmri â wa ixtâ mê anhîpêx anê. Anê.

Jejus krajaja te kot kaxwa mê kanê hpôk wa urâk

Makre 9.49-50; Rukre 13.34-35

13 Nhûm Jejus arî mê kâ m kapêr nê mê kâ m:

—Nê mê ate ixkôt amnhî xunhwÿr xwýnhjaja te mê ate kaxwa pyrâk. Kaxwaja mê apkur xâ ho ành mã mex. No koja mêhõ tèn kamâ pika hkwy mê nê ho ahkâ. Hâmri tanhmâ kot wem ho nê akupÿm ho mex? Nà koja akupÿm mex kêt nê. Âm mê kot hkaprî pix kaxyw koja mex. Ja pyrâ nê kot ka mê atô ate inhmâ tanhmâ amnhî nhîpêx to ho apa hâ amnhî jarênh tâ gaa nê ri amâ ixkôt amnhî nhîpêx prâm kêt nê. Hâmri nê ra te apê kaxwa mê pika pihkarta pyrâk. Kwa mê ixujarênh ma nê kâ m ajamaxpêr tÿx rãhâ ho ri apa.

14-16 —Nê te mê ate kanê hpôk pyrâk. Nê te mê ate hixêt prêk nhîmök â kri xâm pyrâk. Koja krija hixêt prêeti nhîmök â xa nhûm mê piitâ omu. Nê kanêja. Xâ na htem kanê hpôk nê poti ho hpro? Nâ na htem hpôk nê kÿx pê mêmo j nhîmök â unhwÿ nhûm mê piitâ mê kâ m hirâ nhûm mê hirâ kamâ mêmo j pumunh mex nê. Ja pyrâ nê kot kaj mê tâ m amnhî nhîpêx o ri apa nhûm mê piitâ ja hâ mê apumunh kôt ra kaxkwa kamâ Tirtûm mex â harênh o pa. Anê.

Jejus kot tanhmâ Mojes kapêr jarênh to Rukre 16.16-17

17 Nhûm Jejus arî mê kâ m kapêr nê mê kâ m:

—Nê amnepê m Mojes kot Tirtûm nhÿ hâ Ijaewjê mã tanhmâ mê kot amnhî nhîpêx to hâ mê kâ m karôja. Nê amnepê m Tirtûm nhÿ hâ kapêr jarênh o mê pa xwýnhjê kapêrja. Ixte mê kapêr o ijapêx kaxyw na pa pre mê awÿr ixwÿk kêt nê. Jakamâ kwa mê ri â axpên mã ijarênh anhÿr kêt nê. Kêt ixpri hâ ixte mê amâ mê kapêr jarênh nhûm mê ate mar mex kaxyw na pa pre kaxkwa rûm mê awÿr wrÿ.

18 —Tirtûm kapêr â kagâ htûm kot mêmo j jarênhja. Koja ujarênh xâ hkôt mêmo j tanhmâ amnhî to hpar mê nhûm ri kormâ kaxkwa mê pika wa hapêx pa nhûm kapêr â kagâja mãânên hapêx. Nom nhûm Tirtûm kapêr koja mêmo jja pyrâ nê aa hapêx kêt nê. Koja rãhâ ho rãhâ nê aa ihkjê ho tanhmâ mên h to hkêt nê. Âm hāmri na pa â mê amâ harênh anê.

19 —Nê kot ka mê atô Tirtûm kapêr o pixire nê hirôp xa. Hâmri nê ra amnhî pyrâ nê anhîõ mã ja hâ amÿnê. Apyrâ nê kot hirôp âm kaxyw ka kâ m hâ amÿnê. Kot kaj â amnhî nhîpêx anê hāmri nê apê Tirtûm kra hkêt â amnhî to amnhîrit. Nom kot ka kêt mê tâ m amnhî nhîpêx o ri apa. Nê amnhî pyrâ nê tâ m mê kot amnhî nhîpêx kaxyw mê kâ m akapêr o ri apa hāmri nhûm Tirtûm ja hâ apumu nê ato hkra nê no mex nê.

20 —No Parijew nhõ xwýnhjaja nê Tirtûm kapêr tûm o mê ahkre ho mê pa xwýnhjaja. Mê kot Tirtûm kapêr kôt amnhî nhîpêx mex â amnhî jarênh tâ no âm hkôt â amnhî

nhîpêx anhÿr kêt nê. Jakamâ kot kaj mê hkôt amnhî nhîpêx o ri apa hâMRI nê mê urak nê nhÿrmâ Tirtûm mê wa inhô krî kamâ apa hkêt nê. Anê.

Mê gryk o mê pa xwÿnhjê jarênh

Rukre 12.58-59; mãânên Rômân 12.19; Epes 4.26; Wam Ximotre 2.8; Xiakre 1.19-20

²¹ Nhûm JeJus arî mê kâm kapêr nê mê kâm:

–Nê amnepêm na prem mê panhîgêtjê mã Tirtûm kapêr kwÿ jarênh o pa nê mê kâm:

Kêr ka mê axpên par kêt nê. Kot kaj mê mêhox pí nhûm mê ja mÿrapê atom-nuj nê. Nê ma mê anhô pahihiti hwÿr ato tê nhûm mÿrapê tanhmâ ato rÿ hkôt apî. Anê.

Âm hâMRI na prem mê kâm ja jarê.

²² Tâ kot paj ixprî hâ mê amâ tanhmâ harênh to ka mê inhma. Kot kaj mê mêmoj tâ anhîo kamâ agryk. HâMRI nhûm Tirtûm tee ri ja hâ apumu nhûm ja kâm mex kêt nê. Jakamâ koja mê anhô pahihiti tanhmâ ja hâ mê ato japêr hâ koja ja mex nê. Rÿ kot kaj mê tanhmâ mêhõ japrÿ hto. Ho hagrô rÿ ho rop. Mÿrapê kop apu akwÿ kot apynênh nê anhô pahihiti hwÿr ato htêm nê ïhkram ajaxâr ronhÿx ja inhmâ mex nê. Rÿ kot kaj mê tanhmâ anhîo mã akapêr punuj to nê kâm: “Tk. Ate ho warêhti hâ. Te apê hagrô pyrâk kênâ.” Anhÿr o kâm akapêr. Tâ kop apu Tirtûm ra â akapêr anhÿrja mÿrapê mê kot amnhî xâ htÿx kamâ hamak tûm xâta wÿr amênh ronhÿx ja inhmâ mex nê. Ja pumaj kwa kêr ka mê â axpên mã akapêr anhÿr kêt nê. Kêt mê axpên mã tâm akapêr pix o ri xpên kôt apa.

²³ –Nê kêr ka mê tanhmâ ate anhîo nhîpêx hto kamâ Tirtûm mã mex o mex â harênh kêt nê. Kêr ka mê kâm amnhî jarênh o akri hâMRI nê ra mêhõ kot mêmoj tâ akamâ gryk xwÿnh mã ajamaxpêr japêr.

²⁴ HâMRI nê akato nê ma hwÿr atêm kurê kumrêx nê wa tâm axpên mã akapêr nê tâm akupÿm axpên xâm. HâMRI nê rî kormâ ma akupÿm tê nê Tirtûm mã amnhî jarênh jatour xâm amê nê kâm mex o mex â harê. Kêr ka mê â amnhî nhîpêx anhÿr o ri apa.

²⁵⁻²⁶ –Na htem tanhmâ axpên nhîpêx to hâMRI nê kot tanhmâ war axpên to xwÿnhjê hõja ma ô pahi hwÿr tê nê kâm tanhmâ kot ho xwÿnhnta jarênh kaxyw nojarêt. HâMRI nhûm ra kamâ gryk xwÿnhnta kot pahi mã harênh kaxyw nojarêt â harênh ma nê tee ri amnhî kukamâ hamaxpêr nê ma hwÿr tê nê wa akupÿm tâm axpên xâm. Na htem â amnhî nhîpêx anê. Pahi kot wa harênh mar nê tanhmâ axpên tâ wa ho pymaj na htem â amnhî nhîpêx anê nê tokyx tâm akupÿm axpên xunhwÿ. No koja mê anhÿr kêt nhûm pahÿja wa harênh ma nê wa kot tanhmâ axpên to xwÿnhnta ô jaxâ nhûm tee ri kâm

kator prâm. HâMRI nê tanhmâ amnhî to nê ra amnhî pânâhâ kâm amnhîrer pa nhûm pahihitja rî kormâ pôristi mã anê nhûm kâm ure nhûm kato. Ja pyrâ nê kêr ka mê Tirtûm tanhmâ kot mê anhîpêx to pymaj tokyx mê ate amnhî tomnuj kaga nê hkôt amnhî nhîpêx râhâ ho ri apa. Anê.

Tanhmâ mê pahte mê pahprôjê nhîpêx to Matêwre 19.3-9; Makre 9.43-47, 10.2-9; mãânên Rukre 16.18

²⁷ Nhûm JeJus arî mê kâm kapêr nê mê kâm:

–Nê na pre finat Mojesja mê panhîgêtjê mã Tirtûm kapêr tûm kwÿ jarê nê mê kâm: “Kêr ka mê amnhî prô pix tânopxar o ri apa. No mê kuha hâ nhâm mêhõ ho amnhîkati ho ri apa hkêt nê.” Anê. Âm hâMRI na pre mê kâm ja hâ karô.

²⁸ Tâ kot paj ixprî hâ mê amâ tanhmâ harênh to ka mê inhma. Kot kaj mê nhâm mêhõ pumu nê amâ ho amnhîkati hprâm mã ajamaxpêr. Jao te ra ate ho amnhîkati pyrâk o amnhî nhîpêx. Kormâ ate ho amnhîkati hkêt tâ ra hkukamâ ajamaxpêr jakamâ te ra ate ho amnhîkati pyrâk o amnhî nhîpêx.

²⁹ â mê hamaxpêr punuj anhÿr xwÿnhjaja koja mê nhÿrmâ ma mê kot amnhî xâ htÿx kamâ hamak tûm xâta wÿr ma mra nê kamâ pa râhâ ho pa. Jakamâ kêr ka mê nhâm mêhõ pumu nê amâ hkînh japêr hâMRI nê te ate ano kaxâr nê mênh nê axte ate omunh kêt pyrâk o amnhî nhîpêx. Jao hkâx â rîit nê ma nhÿhÿm atêm kurê kumrêx.

³⁰ –Nê kot kaj mê anhîhkra ho tanhmâ amnhî tomnuj to kaxyw. HâMRI nê tee ri ja hâ amnhî pumu nê te ate amnhî nhîhkra krâhÿr nê mênh pyrâk o amnhî nhîpêx nê tanhmâ amnhî tomnuj to hkêt nê. Mê ïhkra ho mê kot tanhmâ amnhî tomnuj to ho mê pa xwÿnhjaja koja mê nhÿrmâ ma mê kot amnhî xâ htÿx kamâ hamak tûm xâta wÿr ma mra nê kamâ pa râhâ ho pa. Anê.

Mê pahte axpên kaga hkêt

³¹ Nhûm JeJus arî mê kâm kapêr nê mê kâm:

–Nê na pre finat Mojes mê panhîgêtjê mã Tirtûm kapêr tûm kwÿ jarê nê mê kâm: “Kot kaj mê atô aprô kaga kaxyw hâMRI nê ate hkaga hâ amnhî jarênh â kaga nhîpêx nê kâm agô nê rî kormâ hkaga.” Anê. Âm hâMRI na pre â mê kâm Tirtûm kapêr tûm jarênh anê.

³² Tâ kot paj ixprî hâ mê amâ tanhmâ harênh to ka mê inhma. Kêr ka mê atÿx ri amâ hprâm xâ hkôt aprô kaga hkêt nê. Nom koja aprô akuha hâ nhâm mêhõ ho amnhîkati ka harênh ma hâMRI nê amâ ja hâ hkaga hprâm nê mâmri kam nê hkaga. Ja tanhmâ kute hkêt. Nom koja â amnhî nhîpêx anhÿr kêt tâ ka amnhî krâ hkôt hkaga. HâMRI nhûm mêhõ apânâ ho hprô nê o

pa. Hämri nê ra kot apê aprô ho amnhîkati ho pa pyrâk o hipêx. Nê nija haxwÿja. Te arî kêp aprô htâ akuhpa hâ nhâm myja o amnhîkati o pa pyrâk o amnhî nhîpêx. Anê.

Tâm mē pakapēr ā Jejus kot mē pamā karō

Xiakre 5.12

³³ Nhūm Jejus arî mē kām kapēr nê mē kām:

–Nê na pre finat Mojes mē panhîgêt nê pahpāmĵē mā Tirtūm kapēr tūm jarēnh o: “Kêr ka mē Tirtūm mā mēmoĵ to anhÿr ā amnhî jarē hāmri nê amnhî jarēnh xâ hkôt kām tanhmā amnhî nhîpêx to. Nom kêr ka mē atÿx ri kām tanhmā amnhî jarēnh to ho amnhî to axêx kêt nê. Ām akatât kôt mē ate amnhî jarēnh to xâ hkôt kām tanhmā mēmoĵ to.” Anê. Ām hāmri na pre mē kām ja jarē.

³⁴ Tā kot paj ixprî hâ mē amā tanhmā harēnh to ka mē inhma. Kêr ka mēhō mā tanhmā amnhî jarēnh to. Tirtūm mā pix mā amnhî jarēnh kêt nhâm mēhō mā mǎānēn tanhmā amnhî jarēnh to. Nê akatât kôt kām amnhî jarē. Na ka htem mē kot mē axêx kêt kôt mē apumunh kaxyw mēmoĵ nhîxi jarēnh kôt amnhî jarē. Nom kêr ka mē axte ā mēmo nhîxi hâ amnhî jarēnh anhÿr kêt nê. Mēmoĵ tā amnhî jarē nê akatât kôt amnhî jarēnh kurê kumrêx. No mē kot axêx kêt kôt apumunh kaxyw mēmoĵ nhîxi hkôt amnhî jarēnh kêt nê. Tanhmān kaxkwa nhîxi jarēnh kôt mēmoĵ tā amnhî jarēnh kêt nê. Kaxkwa kêp Tirtūm krî xâ maati kēnâ kot ka kêt mē axtem nê atÿx ri amnhî kaxyw hixi jarē.

³⁵ Rÿ mē kot axêx kêt kôt apumunh kaxyw pika nhîxi jarēnh kêt nê. Pika kêp Tirtūm par xām xâ kēnâ kot ka kêt mē atÿx ri amnhî kaxyw tanhmā hixi jarēnh to. Nê kri pē Jeru-jarēja mǎānēn kêr ka mē ri amnhî kaxyw tanhmā hixi jarēnh to hkêt nê. Koja nhÿrmā Tirtūm mē awÿr Jerujarē hwÿr ixpē pahî maati hâ inhmē pa kamā mē ato amnhîptâr o ixkrî. Jakamā kêr ka mē ri atÿx amnhî kaxyw tanhmā hixi jarēnh to ho ri apa hkêt nê.

³⁶ –Nê kêr ka mē kot axêx kêt kôt apumunh kaxyw mē ri tanhmā amnhî krâ hkî jarēnh to hkêt nê. Kot kaj mē anê nê ām tanhmā hâ harēnh to kaprÿ. Xâ kot kaj mē ajamaxpêr pix o tanhmā amnhî krâ hkî hto? Nâ kot kaj mē ho anhÿr kêt nê. Jakamā mē ri atÿx tanhmā harēnh to hkêt nê.

Nê mē atÿx ri mēmo nhîxi jarēnh kôt mēmoĵ tā amnhî jarēnh o apa hkêt nê.

³⁷ Ām akatât kôt tām amnhî jarēnh kurê kumrêx. Jao mē kām: “Tÿ. Nâ kot paj ho anê.” Anhÿr o mēmoĵ tanhmā ho. Rÿ mē kām: “Nâ kot paj ho anhÿr kêt nê.” Anhÿr o mēmoĵ tanhmā ho hkêt nê. Ām akatât kôt tanhmā mēmoĵ tā amnhî jarēnh to xâ hkôt ho anhÿr

kurê kumrêx. Mē kot Satanasti hkôt amnhî nhîpêx o mē pa xwÿnh pixjaja na htem hêx rom mēmoĵ nhîxi jarēnh kôt tanhmā amnhî jarēnh to ho pa. Anê.

Mē pahte tanhmā axpēn nhîpêx to hâ Jejus kot mē pamā karō

Rukre 6.27-30, 23.34; mǎānēn Atre 7.60; Rōmān 12.14

³⁸ Nhūm Jejusja arî mē kām kapēr nê mē kām:

–Na prem amnepēm mē panhîgêtĵē mā Tirtūm kapēr tūm jarēnh o: “Koja mēhō apē ano katōk nê hkapa hâ koja mē anhō pahija atā mā ho anê nê kêp no kapa. Rÿ koja mēhō apē axwa hō hkwyÿr hâ koja atā mā ho anê nê atā kêp wa hō hkwyÿr.” Anhÿr o mē kām hâ karō. Ām hāmri na prem ā ja jarēnh anê.

³⁹ Tā kot paj ixprî hâ mē amā tanhmā ja jarēnh to ka mē inhma. Koja mēhō tanhmā mē anhîpêx to ka mē ām amnhî tā omu nê tanhmā amnhî tā ho hkêt nê. Koja anhînep akura ka ām omu nê tanhmā amnhî tā ho hkêt nê. Te ate kām ihkjê hpêr nhūm kot ihkjê kamā hkuranh pyrâk o amnhî nhîpêx nhūm ja amā mex nê. No amnhî tā tanhmā ho hkêt nê.

⁴⁰ –Nê koja mēhō anhînōhkâ hâ awÿ nhūm mē anhō pahija amā anê ka māmri kām agō nê tanhmā hâ kām nê hkêt nê. Te ate hkôt kry pē kām anhînōhkâ hpakâ ry jagjēnh xwÿnhnta nhōr pyrâk o amnhî nhîpêx. Nom kêr ka mē kamā agryk kamā kām ôr kêt nê.

⁴¹ –Nê koja mēhō ate kām jēnh tur nê hkôt ho amōr rÿy kaxyw amā kapēr ka māmri kām ho anê. Nê kot amā nhÿri hâ karō xaja wÿr o pōĵ nom kamā kām ôr kêt nê. Kām ho hakrenh rÿy nê rî kormā akupÿm kām agō.

⁴² –Nê koja mēhō ô mēmoĵ kêt nê awÿr tē nê mēmoĵ tā awÿ ka māmri kām agō. Rÿ nhūm awÿr tē nê apē mēmoĵ to ĩpresta kaxyw ka māmri kām ho ĩpresta. Kêr ka mē ā axpēn nhîpêx anhÿr o ri apa. Anê.

Mē pamā axpēn kînh ā Jejus kot mē pamā karō

Rukre 6.32-36; mǎānēn Rōmān 12.14

⁴³ Nhūm Jejus arî mē kām kapēr nê mē kām:

–Nê na prem amnhî krâ hkôt axtem nê tanhmā mē panhîgêtĵē mā mēmoĵ jarēnh to nê mē kām: “Kêr ka mē amā mē akrāmnhwÿĵē pix kînh nê tanhmā mē ho mex to. No kêt mē kot tanhmā mē ato xwÿnhjaja kêr ka mē māmri mē kamā axâhkurê ho ri apa.” Anhÿr o mē kām karō.

⁴⁴ Nom pa kot paj mē amā Tirtūm kot tanhmā ja hâ karō hto hâ harê ka mē inhma. Kêr ka mē kot tanhmā ri mē atomnuĵ to xwÿnhjaja amnhî tā tanhmā mē ho hkêt nê. Ām tanhmā mē ho mex to pix hkukamā

mãn ajamaxpêr. Nê mê ho Tirtûm wÿr pix kukamã mân ajamaxpêr.

⁴⁵ Na hte ã kaxkwa kamã Mêpahpãm Tirtûmja amnhî nhîpêx anhÿr o pa. Mê kot amnhî tomnuj xwÿnhjaja nê mê kot amnhî to mex xwÿnhjaja nhûm hte mê ho hpimràatã mê ho mex o axpên pyrãk. Jao hamê wa hwÿr na rê nê hamê wa hwÿr myyti rê nhûm hamê wa kãm hirã ho pa. Jakamã kêr ka mê urãk nê mê piitã tãm mê hipêx o axpên pyrãk. Mê kot amnhî tomnuj xwÿnhjê mê mê kot amnhî to mex xwÿnhjê mê ho apimràatã mê ho mex o axpên pyrãk.

⁴⁶—Nê xat kaj mê amã mê piitã mê ho mex prãm kêr nê ãm mê kot mê ato mex xwÿnhjê pixjaja ka mê amã mê ho mex prãm nhûm Tirtûm ja hã mê apumu nê nhûm ja kãm mex nê nã? Nã koja kãm mex kêr nê. Koja mêhõ ato mex kêr tã kêr ka ãm amnhî rom ho mex nê. Nhûm Tirtûm ja hã apumu nê amnhîm amex ã ajarê. Mê kot amnhî tomnuj xwÿnhjaja na htem ãm mê kot mê ho mex xwÿnhjê pixjaja nhûm mê amnhî xwar mê ho mex. No tãm mê kot amnhî nhîpêx xwÿnhjaja na htem mê piitã mê ho mex o axpên pyrãk. Mê kot tãm amnhî nhîpêx xwÿnhjaja nê mê kot amnhî tomnuj xwÿnhjaja nhûm mê ho hpimràatã mê ho mex o axpên pyrãk.

⁴⁷—Nê na hte mê hkwyjaja ãm amnhî kwÿjê pix mã kapêr mex o pa. Nom mê piitã tãm mê hipêx kêr nê. Nom kêr ka mê ã amnhî nhîpêx anhÿr kêr nê. Kêr ka mê kurom mê piitã tãm mê hipêx o axpên pyrãk. Mê akwÿjê mê mê akwÿ hkêr xwÿnhjaja ka mê hipêx o axpên pyrãk. Nê tãm mê kãm akapêr o axpên pyrãk.

⁴⁸ Kaxkwa kamã Mêpahpãm Tirtûm pyra nê mê kot amnhî tomnuj xwÿnhjê mê mê kot amnhî to mex xwÿnhjaja mê ho apimràatã mê ho mex o axpên pyrãk. Na hte ã Tirtûmja mê panhîpêx anê. Anê.

6

Mê pahte mê kêp amrakati xwÿnhjê ho mex rãhã hã mê pamã karõ

¹⁻² Nhûm Jejus arî mê kãm kapêr nê mê kãm:

—Nê na htem mê piitã hkwyjê noo mã tanhmã mê kêp amrakati xwÿnhjê ho mex to. Nom kãm mê hkaprî kamã tanhmã mê ho mex to hkêr nê. ãm hkwyjaja kot ja hã mê omunh nê mê mex ã mê harênh pix kaxyw na htem krî hkõt ri mê kêp amrakati xwÿnhjê piitã mê ho mex o pa. Nê mê pikuprõnh xã hã ixkre kamã kuhê nê tanhmã mê ho mex to. Mê hkwyjaja kot ja hã mê omunh nê amnhîm mê mex ã mê ho jarkrar kaxyw. Jakamã koja nhÿrmã Tirtûmja axte ja hã mê kãm mêmoj mex nhõr kêr nê. Ra jar mê hkwyjaja kot ja hã mê omunh nê amnhîm mê mex ã mê harênh kênã. Jakamã kwa kêr ka

mê ho mê urãk kêr nê. Nê tanhmã mêhõ ho mex to kaxyw nê akwÿjê noo kuhpa hã mê hkãx ã tanhmã mê ho mex to. No kot kaj mê noo mã tanhmã mê ho mex to. Mê kot hã apumunh nê ato jarkrar kaxyw tanhmã mê ho mex to nhûm kaxkwa kamã Mêpahpãmja ja hã apumu nê mê hã tanhmã ato mex to hkêr nê. Koja ãm hã apumu.

³—Ja pymaj kêr ka mê mê kêp amrakati xwÿnhjê mã mêmoj nhõr kaxyw hãmri nê mê piitã mê noo hkãx ã tanhmã mê ho mex to. Hãmri nê nhãm ri ja hã mê kãm amnhî to jarkrar kêr nê. Aprõ mã rÿ akrajê mã rÿ akrãmnhwÿ mã hã amnhî jarênh kêr nê.

⁴ Kot kaj mê noo hkãx ã tanhmã ho mex to noo nhûm Tirtûm tapxipix apumunh o nhÿ. Hãmri nê ja hã ato mex rax nê ka amex nê apa. Anê.

Tanhmã mê pahte Tirtûm mã amnhî jarênh to hã mê pamã karõ

Rukre 11.1-13, 18.9-14

⁵ Nhûm Jejus arî mê kãm kapêr nê mê kãm:

—Nê mãanên ja. Na htem hakwa pix o amnhî mex ã amnhî jarênh xwÿnhjaja Tirtûm mã amnhî jarênh kaxyw nê mê kot Tirtûm kapêr o mê ahkre xã hã ixkreja wÿr agjê. Nê mê piitã mê noo mã kãm tanhmã amnhî jarênh to. Rÿ gáp kuhê nê mê piitã mê noo mã kãm amnhî jarê. Tã mêmo kaxyw na htem mê noo mã Tirtûm mã amnhî jarê? Nã ãm mê kot ja hã mê omunh nê mê mex ã mê ho jarkrar pix kaxyw. Nê mê harênh o: “E mũjti pumu. Na hte apkati mê ã Tirtûm mã amnhî jarênh anê. Kot amnhî to mex xwÿnhjê mã.” Anhÿr ã harênh kaxyw. Tã ra mê piitã mê kot ja hã omunh nê amnhîm mex ã ho jarkrar jakamã koja Tirtûm axte ja hã tanhmã ho mex to hkêr nê. Ra pika ja kamã mê kot mê omunh nê mê mex ã mê harênh kênã.

⁶ No mê kajaja. Kêr ka mê urãk nê ã amnhî nhîpêx anhÿr kêr nê. ãm Tirtûm mã amnhî jarênh kaxyw nê akwÿjê noo hkãx ã hitom wÿr agjê nê hitom kãm ahte kãm amnhî jarê. Hãmri nhûm Tirtûm tapxipix ja hã mê apumu. Mê amã amnhî to amnhîrît kêr tã mê apumu. Hãmri nê mê ato mex nê.

⁷—Nê mê kêp Tirtûm kra hkêr xwÿnhjaja na htem sãnti mã amnhî jarênh kaxyw nê xatã kãm amnhî jarê. Nê xatã kãx pèê kãm amnhî jarê. Nê hamaxpêr o: “Kot paj xatã sãnti mã amnhî jarê nhûm inhmar japêr.” Anhÿr o hamaxpêr jakamã xatã kãm amnhî jarê. No ãm htÿx ã hamaxpêr anhÿr kaprÿ.

⁸ Jakamã kwa kêr ka mê ho mê urãk kêr nê. Tirtûm ra kot mê ate mêmoj tã hwÿr xãta ra ja kukamã kot mê omunh mex kênã kot ka kêr mê xatã hã hwÿr o akuhê.

⁹—Nê kêr ka mê kãm amnhî jarênh kaxyw nê amnhî krã hkõt tanhmã kãm amnhî jarênh to rÿ kãm amnhî jarênh o:

Pa Mēinhîpêêxa maati pê kaxkwa kamā ri apa xwýnh? Amex o amex Tîrtûm.

¹⁰ Apê mē ijamār mex xwýnh maati na ka.

Na hte kaxkwa kamā mē kot ri amā tanhmā amnhî nhîpêx to ho mē pa xwýnhjaja akôt pix mā amnhî nhîpêx o ri pa. Tā ijaxwýja inhmā mē urāk nē akôt pix mā amnhî nhîpêx o ri ixpa hprām.

¹¹ Nē kwa jarāhā mē inhmā mēmoj gō pa mē akukwak ri ho apku.

¹² Na pa hte tōhā amnhî tomnuj nē Tîrtûm. Nom mē kot tanhmā ixtomnuj to xwýnhjaja na pa hte ām mē omu nē amnhî tā tanhmā mē ho hkêt nē. Nē ja ho ijamakêtkati nē axte kām ijamaxpêr kêt nē. Ā ixte amnhî nhîpêx anhÿr jakamā kwa ja hā ixpumu nē ixpyrā nē ixte tanhmā amnhî tomnuj to hā ixpumu nē hā tanhmā ixto hkêt nē. Ām ho ajamakêtkati kurē kumrêx nē axte kām ajamaxpêr kêt nē.

¹³ Nē kot paj nhÿrmā tanhmā amnhî tomnuj to kaxyw ka ja hā ixpumu nē ixte ā amnhî nhîpêx anhÿrja nē ixto htÿx nē pa tanhmā amnhî tomnuj to hkêt nē. Ām mēmoj punuj pê ixpytār rāhā ho apa Tîrtûm. Tā ām ja pix na hapêx. Anē.

—E kër ka mē ā Tîrtûm mā amnhî jarēnh anē. Anē.

¹⁴ —Nē koja mēhō tanhmā anhîpêx to htā ka ho ajamakêtkati nē axte kām ajamaxpêr pix o ri apa hkêt nē. Hā koja kaxkwa kamā Mēpahpām maatija ja hā apumu nē apyrā nē tanhmā ate amnhî tomnuj to ho hamakêtkati nē axte kām hamaxpêr kêt nē.

¹⁵ Nom kot kaj mē ā amnhî nhîpêx anhÿr kêt nē. Nē tanhmā mē kot mē atota ā anohtÿx rāhā ho apa hāmri nhÿm Mēpahpām maatija mē apyrā nē mē ate tanhmā amnhî tomnuj to ho hamakêtkati hkêt nē. Ām hā nohtÿx rāhā ho pa ho pa. Anē.

Tanhmā mē pahte Tîrtûm mā mex o mex ā harēnh to

Rukre 18.11-12

¹⁶ Nhÿm Jejus arī mē kām kapêr nē mē kām:

—Nē mē kot amnhî to jarkrar xwýnhjaja na htem Tîrtûm mā amnhî jarēnh kaxyw hāmri nē tōhā ho apkur kêt rāhā kām amnhî jarēnh jakamā hkuk kaprī nē hkwýjê hkôt pa. Tā mo kaxyw na htem ā mē noo mā amnhî nhîpêx anē? ām mē apkur kêt rāhā Tîrtûm mā amnhî jarēnh ā mē omunh pix kaxyw. Tā ra jar pika ja kamā mē kot ja hā mē omunh jakamā koja Tîrtûm nhÿrmā ja hā tanhmā mē ho mex to hkêt nē. Jakamā kwa kër ka mē ho mē urāk kêt nē.

¹⁷ Kër ka mē tōhā Tîrtûm mā amnhî jarēnh rÿy kaxyw axāpkur kaga hāmri nē amnhî krā

kahō nē amnhî jaxwÿr mux nē akuk kīnh nē ri akwýjê hkôt apa.

¹⁸ Hāmri nē nhÿri mē hkàx ā ahte kām amnhî jarē nē kām mex o mex ā harē. Kot kaj mē ā mē hkàx ā amnhî nhîpêx anē nhÿm mē akwýjaja mē axāpkur kaga hā mē apumunh kêt nē. Nhÿm Tîrtûm pix ja hā mē apumu. Hāmri nē nhÿrmā ja hā mē ato mex nē. Anē.

Kaxkwa kamā mēmoj mex

Rukre 12.33-34; määnēn Sikûn Ximotre 4.8; Wam Pêtre 1.4; Eprêw 10.34

¹⁹ Nhÿm Jejus arī mē kām kapêr nē mē kām:

—Nē määnēn ja. Kër ka mē jar pika ja kamā akukrêx rÿnh o apa hkêt nē. Kêt jar mē hikukrêx koja kritpê mē kêt nē. Kot kaj mē ho akuprō nhÿm amnhôre apê homnu rÿ paratre apê homnu. Nē kàx o mē akukrêx nhÿm haxwýja apê omnu rÿ nhÿm mēhō apê hkwy ho ahki.

²⁰ Jakamā kër ka mē akukrêx rÿnh o apa hkêt nē. Kaxkwa kamā Tîrtûm kot mē akutêp mē akukrêx o pikuprōnhja na kêt mex kumrêx o jar mē hikukrêx jakrenh par. Jakamā kër ka mē amā nhÿrmā kaxkwa kamā akukrêx mex prām xāj tām mē piitā tām mē hipêx nē mē ho mex o ri apa. Nē mē kamā axukapri nē. Nē Tîrtûm kôt ri amnhî nhîpêx mex nē. Hāmri nhÿm ā mē ate amnhî nhîpêx anhÿr ā mē apumu nē mē akutêp mē amā mēmoj mex kwý jaxwý. Kaxkwa kamā mo amnhôre nē mo paratre? Nē kamā mo mē ahkīnh xwýnh? ām kamā amrakati kumrêx.

²¹ Kot kaj mē jar akukrêx rÿnh hāmri nē ām tanhmā apê homnu hto pix kukamā ajamaxpêr. Nom kot kaj mē apê Tîrtûm kra hā kaxkwa kamā akukrêx mē ajamaxpêr rāhā ho ra akīnh nē ri apa.

²² —Nē kot kaj mē ixkapêr ma nē ixkôt amnhî nhîpêx hāmri nē tām amnhî nhîpêx. Nē tām axpên hipêx. Jao te hirā kamā arīt mex pyrāk o amnhî nhîpêx.

²³ No koja mēhō ixkapêr ma nē ām kuma nē ixkwým ri amnhî nhîpêx o pa. Hāmri nē te kamāt kō kamā mēhō rīt mex kêt kot amnhî nhîpêx pyrāk o amnhî nhîpêx. E kër ka mē ā amnhî nhîpêx anhÿr pymaj ixkapêr ma nē kām ajamaxpêr tÿx rāhā ho ri apa.

²⁴ —Nē kot kaj apyxi nē anhō patrāw hamêxkrut hāmri nē arīgro pyxi hā hamē wa kām axāpênh o amÿkry hkêt nē. Kot kaj anē nē hō gryk ā ihō kaga. Ja pyrā nē kot kaj mē jar akāxpore nē akukrêx pix mā ajamaxpêr nē amā hapê ho akwýjê pê ho anhōxy ho ri apa. Nē gryk ā Tîrtûm kām hprām xā hkôt tanhmā ho mē ho mex to hkêt nē. Jakamā kwa kër ka mē Tîrtûm pix mā măn ajamaxpêr rāhā nē. Jao akāxpore

nê akukrêx pix kukamâ ajamaxpêr o ri apa hkêt nê. Anê.

Mê pahte tee ri amnhî kukamâ pajamaxpêr kêt â mê pamâ karô

Rukre 12.22-31; määñen Pîripôs 4.6; Wam Pêtre 5.7

²⁵ Nhùm Jejus arî mê kâm kapêr nê mê kâm:

—E. Kwa kêr ka mê tee ri mëmoj tâ amnhî kukamâ ajamaxpêr kêt nê. Tanhmân axâpkur xâ rÿ axê ka mê tee ri hkukamâ ajamaxpêr kêt nê. Mëmoj piitâ hkukamâ tee ri ajamaxpêr o ri apa hkêt nê. Tîrtûmja âhpumunh tÿx o âhpumunh tÿx xwÿnh na. Na pre âhpumunh tÿx o mê anhîpêx ka mê kukwak ri atîr nê apa. Jakamâ xâ kot mê amâ mê anhô ho pa kaxyw âhpumunh kêt? Nâ ja kaxyw âhpumunh tÿx kênâ. Kêp mê anhîpêx xwÿnh jakamâ määñen kêp mê amâ mê anhô xwÿnh. Nê kêp mê amâ mê axê nhôr xwÿnh.

²⁶ —Mân ka htem kuwênhre pumu. Na hte tee ri amnhî xâpkur xâ hkukamâ hamaxpêr o hkaprî nê ri pa hkêt nê. Mê anhîpêxâ maati tâm na hte kâm ô ho pa. Tâ kâm mê ajapê htÿx o kot kuwênhre jakrenh jakamâ koja urâk nê mê amâ mê anhô râhâ ho pa.

²⁷ —Nê xâ kot kaj mê kritpêm atîr prâm xâj ja pix kukamâ ajamaxpêr râhâ nê ra ajamaxpêr kôt kritpêm atîr nê apa? Nâ kot kaj mê anhÿr kêt nê.

²⁸ —Mân ka htem akunî kamâ pixôrâ pumu. Na hte tee ri tanhmâ kute hkukamâ hamaxpêr o ra hkaprî nê harir kêt nê.

²⁹ Tâ nom muxre nê harir ka mê omu. Te ho amnepêm pahihtî Sarumâw xê mex pyrak nom mex o hakre.

³⁰ Pixôrâreja koja mëmo arîgro hâ htîr nê mux nê harir tâ mëmo arîgro hâ ra grâ pa nê hapêx. Kêp pixôrâ pix nê hapêx tokyx anhÿr tâ nhùm Tîrtûm ho mex nê nhùm mux nê harir. No mê kajaja na hte mê ato mex o pixôrâ ho mexta jakre. Jakamâ kwa mëmo kaxyw kot ka kêt mê tee ri amnhî xê hkukamâ ajamaxpêr o ri akaprî nê apa? Kot kaj mê â ajamaxpêr anhÿr jao kormâ amnhî kaxyw Tîrtûm mâ ajamaxpêr tÿx kêt nê.

³¹ —Kwa mê tee ri axâpkur xâ hkukamâ ajamaxpêr o ri akaprî hkêt nê. Nê tee ri amnhî kukamâ tanhmâ ajamaxpêr to ho ri akaprî hkêt nê.

³² Mê kot Tîrtûm kôt amnhî xunhwÿr kêt xwÿnhjaja na htem â ri hamaxpêr anhÿr o pa. Tâ nom kêr ka mê ho mê urâk kêt nê. Tîrtûm ra kot mê panhō mëmoj kêt kôt mê pahpumunh mex kênâ.

³³ Jakamâ kêr ka mê hkôt ri tanhmâ amnhî nhîpêx to râhâ ho ri apa. Nê amâ ja pix tânopxar prâm. Hâmri nhùm Tîrtûm amnhî tâ mê apumu nê apkati mê mê amâ mëmoj nhôr o pa.

³⁴ —Jakamâ kwa kêr ka mê tee ri amnhî kukamâ ajamaxpêr o akaprî nê apa hkêt nê. Tîrtûm kot apkati mê mê pajamâr mex jakamâ kêr ka mê jarâhâ amnhî kukamâ apkati mê ajamaxpêr kêt nê. Kê apkati mân. Âm jarâhâ pix mâ mân mê ate tanhmâ amnhî nhîpêx tota kukamâ ajamaxpêr. Tîrtûm kot mê pahpumunh mex o pa râhâ kênâ. Anê.

7

Mê pahte axpên to pakapêr punuj kêt â kot mê pamâ karô

Rukre 6.37-38, 6.41-42; määñen Rômân 2.1-3; Wam Korît 4.5; Xiakre 4.11-12

¹ Nhùm Jejus arî mê kâm kapêr nê mê kâm:

—Nê kêr ka mê atÿx ri amnhî krâ hkôt tanhmâ akwÿjê hô kot amnhî tomnuj to hâ harênh kêt nê. Kot kaj mê â harênh anê nhùm Tîrtûm ja hâ mê apumu nê mê kajaja â mê ajarênh anê.

² Na hte tanhmâ mê pahte axpên nhîpêx to hâ mê pahpumunh kôt tanhmâ mê panhîpêx to.

³⁻⁵ Jakamâ kwa kêr ka mê mëhō kot tanhmâ amnhî tomnuj to hâ omu hâmi nê hâ kâm kapêr tokyx anhÿr kêt nê. Akumrêx ate tanhmâ amnhî tomnuj to hâ amnhî pumu nê hkaga hâmi nê rî kormâ ate mëmoj tâ omunh xwÿnhhta wÿr tē nê hâ tanhmâ kâm akapêr to. Kêr ka mê â amnhî nhîpêx anhÿr o ri apa.

—Nê xâ koja mê akwÿjê hô tanhmâ amnhî tomnuj to grire. Ka ate amnhî tomnuj tÿx o hakrenh tâ â kot amnhî nhîpêx anhÿr â omu nê hâ kâm akir nhùm amâ ja mex nê nâ? Nâ koja amâ ja mex kêt nê. Kot ka akumrêx ate tanhmâ amnhî tomnuj tota kaga hâmi nê rî kormâ anhîo tanhmâ kot amnhî tomnuj to grireta nê kâm akapêr nhùm ja amâ mex nê.

⁶ —Nê xâ na htem mê apkur xâ mex jamÿ nê rop mâ kurê? Nâ na htem anhÿr kêt nê. Ja pyrâ nê kêr ka mê kot Tîrtûm kaga xwÿnhjê mâ kapêr jarênh o ri apa hkêt nê. Anê.

Mê pahte mëmoj to presija hâ amnhî to Tîrtûm wÿr

Makre 11.24; Rukre 11.5-13; Juâw 14.13-14; määñen Wam Tesarôn 5.17; Xiakre 1.5-8, 4.1-3

⁷⁻¹¹ Nhùm Jejus arî mê kâm kapêr nê mê kâm:

—Nê xâ kot we akraja kâm prâm nê tep â awÿ ka axtem nê kagâ hô py nê kâm agô? Rÿ nhùm krâhyre gre hâ awÿ ka axtem nê makre hô py nê kâm agô? Nâ na ka htem â mê hipêx anhÿr kêt. Na ka htem kot mëmoj tâ mê awÿr xâ hkôt kâm mëmoj gô. Mê ate amnhî tomnuj tâ na ka htem akrajê ho mex o ri apa. Tâ kaxkwa kamâ Tîrtûmja na hte mê ato mex o mê ate mê akrajê ho mex jakrenh. Kâm mê ajapê htÿx kôt na hte mê

amã mêmôj mex nhõr o pa. Jakamã kot ka mē mēmôj tã awý nhũm mē ama nē mē ate mēmôj tã hwýr xàta kôt amã kugõ. Æm xatã mē ate hã axãhwýr o ri apaja nhũm mē amã hprãm xwýnhnta gõ. Æm mēmôj tã hwýr rãhã ho ri apa nhũm mē ama nē mē amã mēmôj tanhmã hipêx to. Te ho mēhõ kãm tep xãnh nē teprẽnhxã hpyr nē xatã gõx kãm rẽnh o ãm pyrà nē xatã mēmôj tã awý. Hãmri nhũm mē ama nē mē amã hprãm xwýnhnta gõ. Te tep kanhêr xwýnhnta jatã kot tep kanhêr pyràk. Jao mē amã mēmôj prãm xwýnhnta gõ.

¹² —Nē mē piitã mē kot tãm mē anhîpêxja na mē amã hprãm. Tã kër ka mē amnhî pyrà nē tãm mē piitã mē hipêx o ri apa. Mē kot tãm mē anhîpêx kêt tã kër ka mē axãmnhîx mē kêp anhõxy hket nē tãm mē hipêx. Kot kaj mē ã axpên nhîpêx anê nē finat Mojes mē Tirtũm nhý hã mē kapêr o mē pa xwýnhjê xujarẽnh xã hket axpên nhîpêx mex o ri apa. Anê.

Pry pijakrut jarẽnh

Rukre 13.24; mãânên Piripos 3.19-21

¹³⁻¹⁴ Nhũm Jejus arî mē kãm kapêr nē mē kãm:

—Tirtũm kapêrja mē kêp hihtýx jakamã na htem ohtõ nê hket amnhî xunhwýr kêt nê. Na htem ãm hpýnhre nê hket amnhî xunhwý nê hket amnhî nhîpêx. Jakamã te Tirtũm nhõ krî hwýr pry grireta ã hpýnhre nê pa pyràk. No nhũm Satanasti hket mē kot amnhî xunhwýr xwýnhjaja na htem Satanasti kôt pix mã tanhmã amnhî tomnuj to hprãm. Mē kãm mex jakamã nhũm mē amnhî nhîpêx o te pry krepak rax ã axpên kôt mē ohtõ nê pa pyràk o amnhî nhîpêx. Axtem kuwy hwýr pry krepakja nõr tã nhũm mē htýx kuwyja wýr amnhî to pa. Jakamã Tirtũm kapêrja mē apê hihtýx tã kër ka mē mãmri hket amnhî xunhwý. Jao Tirtũm nhõ krî hwýr pry grireta ã mãn apa. Anê.

Mē kot amnhî to hêx xwýnhjê jarẽnh

Rukre 6.43-44; mãânên Xiakre 3.9-12;

Wam Juãw 3.10, 4.4-6

¹⁵ Nhũm Jejus arî mē kãm kapêr nē mē kãm:

—E kwa mē o kora. Mē akwýjaja kot kêp Tirtũm nhý hã kapêr jarẽnh xwýnh ã amnhî jarẽnh tã na htem ja hã amnhî to hêx. Nhũm htem kãm mē kapêr mar prãm nê. Te mē kapêr mex pyràk tã no nhũm htem ãm mē kãm amnhî to hêx pix o ri mē hket pa. Mē kot mar nê axtem nê Tirtũm kapêr kwým tanhmã amnhî nhîpêx to kaxyw nhũm htem hêx rom tanhmã mē kãm kapêr to. Jakamã kwa mē o kora. Mē axkãm ajamak rom nê amnhî nê mē omunh mex nê.

¹⁶ Kêr ka aprî hã mē piitã mē kot tanhmã amnhî nhîpêx to hã mē omu nê rî kormã tanhmã mē harẽnh to. Mē hamaxpêr punuj xwýnhjaja kêp Tirtũm nhý hã kapêr jarẽnh

xwýnh kêt. No koja mē tãm hamaxpêr nê tãm amnhî nhîpêx ka ja hã mē omu nê mē kêp Tirtũm nhý hã kapêr jarẽnh xwýnh ã mē omunh kurê kumrêx. Na htem hprî hã mē kot tanhmã amnhî nhîpêx to ho pa hã mē omu nê rî kormã tanhmã mē harẽnh to.

¹⁷ Na htem hamaxpêr punuj hãmri nê hket tanhmã amnhî tomnuj to. Nom koja mēhõ hamaxpêr mex nê hãmri nê hket tãm amnhî nhîpêx mex o pa.

¹⁸ Na htem tanhmã hamaxpêr to xã hket tanhmã amnhî nhîpêx to ho pa.

¹⁹ —Nē koja mēhõ õ pî hpãr õ hket japêr nhũm tee ri omu hãmri nê krãhta nê kuwym kumê. Ja pyrà nê koja mēhõ tanhmã amnhî tomnuj to ho pa nhũm Tirtũm tee ri ja hã omu hãmri nê ã kot amnhî nhîpêx anhýr o paja mýrapê kuwy hwýr kumê.

²⁰ Jakamã kot kaj mē tanhmã mē kot amnhî nhîpêx to ho pa hã akwýjê pumu nê ra aprî hã tanhmã mē kute hã mē omunh kurê kumrêx. Mē kêp Tirtũm nhý hã kapêr xwýnh ã mē omu rý mē kêp hkwyým ri kapêr xwýnh ã mē omu. Anê.

Mē kot Tirtũm nhõ krî hwýr gjêx mã xwýnhjê jarẽnh

Rukre 13.25-27; mãânên Sikũn Korõt 13.5; Wam Juãw 2.3-6

²¹⁻²³ Nhũm Jejus arî mē kãm kapêr nē mē kãm:

—Nê Inhîpêxã Tirtũm mē wa inhõ krîja wýr koja mē piitã gjêx kêt nê. Æm mē kot kapêr kôt amnhî nhîpêx o mē pa xwýnh pixjaja koja mē nhýrmã ma hwýr agjê. Na hte mē hkwyjaja ixto “Pahihti” anhýr ã ijarẽnh tã no ãm ixkõt ri amnhî nhîpêx kêt nê. Jakamã koja mē nhýrmã wa inhõ krî hwýr apir kêt nê. Kot paj nhýrmã mē piitã mē htúr ri tanhmã mē kot amnhî nhîpêx to ho pa hã mē omunh xã hket tanhmã mē harẽnh to. Mē mex ã mē hkwyjê jarê nê mē kot amnhî tomnuj ã mē hkwyjê jarê. Hãmri nhũm mē hkwy kot ixkõt amnhî nhîpêx o pa hket xwýnhjaja kuwyta wýr ma pa pymaj tee ri amnhî kukamã hamaxpêr hãmri nê tanhmã inhãm amnhî jarẽnh to nê inhãm: “Kwa Jejus. Xã ate ixpumunh kêt? Na pa pre amnepem ixtir ri pikap ixpare na anhý hã aa mē kot mēmôj pumunh kêt kwý ho anhýr rax nê. Nê ixkwýjê nê mēkarõmnuti jano nê mē kãm akapêr jarẽnh o ri ixpa. Kwa xã ate ja hã ixpumunh kêt?” Anhýr o inhãm amnhî jarê.

—Nom mē htúr ri ã mē kot amnhî nhîpêx anhýr o pa htã ixkapêr kôt amnhî nhîpêx kêt jakamã kot paj mē kuma nê ãm mē kuma nê amnhî nê mē hano nê mē kãm: “Tk kwa mē ma mra. Mē apê ixkwý hket. Mē ate ixkõt amnhî nhîpêx o apare hã. Æm mē ate amnhî tomnuj xwýnh na ka mē. E mē ma kuwy hwýr amrar kurê kumrêx.” Anhýr o

kot paj amnhî nê mê hano. Hâmri nhûm mê kot ixkôt amnhî nhîpêx o mê pa xwýnh pixjaja ma Tîrtûm mê wa inhô krî hwýr gjêx pa. Anê.

Ixkre pijakrut jarênh

Rukre 6.46-49; määnên Xiakre 1.22-25; Wam Juâw 2.3-6

²⁴ Nhûm Jejus arî mê kâam kapêr nê mê kâam:

—E kot paj mê amâ awjarê ka mê ixu-jarênh ma. Nâ mê kot ixkapêr mar nê hkôt amnhî nhîpêx o mê pa xwýnhjaja te mê kot ixujarênh ja pyrâk. Mê kot amnhî nhîpêx o te mêhôt kot amnhî kukamâ hamaxpêr mex nê aptýx kâam amnhîm ôrkwý nhîpêxja pyrâk.

²⁵ Koja mêhôt aptýx kâam amnhîm hipêx nhûm mêmô arîgro hâ na wrýk rax nê gô htâm rax nê hanhi no nhûm arî am týx nê xa. Tâ kot kaj mê ixkôt amnhî nhîpêx o ri apa hâ kot kaj mê te ixkre ja pyrâk. Jao amex nê ajamakêtkati nê ri apa. Te ho gô htâm kot ixkre janhîr nhûm arî am týxta pyrâk.

²⁶⁻²⁷ —No mê kot ixkapêr mar nê am mar xwýnhjaja. Te mê kot mêhôt kot amnhî kukamâ hamaxpêr mex kêt nê htýx môr nê gô mýri gyw rerek kâam amnhîm ôrkwý nhîpêx pyrâk. Koja mêmô arîgro hâ ôrkwý hâ kôk xapêr týx nê na wrýk rax nê. Nê gô htâm nê hanhi nê kêp grânh pa. Jakamâ koja mêhôt ixkôt amnhî nhîpêx kêt nê te kot â kot amnhî nhîpêx anhýr xwýnhja pyrâk. Jakamâ kwa mê ixkapêr mar týx nê hkôt amnhî nhîpêx râhâ ho ri apa. Te mêhôt aptýx kâam ôrkwý xâam xwýnhja pyrâk. Anê.

²⁸ Nhûm pre Jejusja â mê kâam ujarênh ry anê nhûm mê amnhî jaêr pê kot tanhmâ mê ahkre htoja mar o hkri.

²⁹ Hâmri nê axpên mâ harênh o:

—Hêxta waa nê. Am hâmri na â mê pamâ kapêr anê. âhpumunh týx kôt na hte am hâmri tanhmâ mê pamâ ujarênh to. Pêr am Tirtûm kapêr tûm o mê ahkre xwýnhjê kurom âhpumunh týx kumrêx. Anê.

8

Kâ nhy hkro xapêr o pa xwýnh jarênh

Makre 1.40-45; Rukre 5.12-16

¹ Tâ nhûm Jejus mê kâam kapêr pa hâmri nê hixêt prêeta rûm akupýn wrý nê ma tê nhûm mê ohtô nê ma hkôt mra.

² Hâmri nhûm mêhôt my hkâ nhy hkro xapêr o pa xwýnhja omu nê hwýr tê. Hâmri nê kutâ hkônkrâ ho têm nê hipô nê nhý nê amnhî to kuwý nê kâam:

—Pa Pahihti. E ot pa awýr amnhî to tê. Akupým ate mê ixto mex kaxyw axâhpumunh týx jakamâ kot ka amâ akupým ixto mex prâm nê mämri ixto mex. Anê.

³ Hâmri nhûm Jejus kuma nê hkâ punuti hâ îhkra xi. Amnhî kamâ kahak kêt nê hâ îhkra xi nê kâam:

—Nâ kot paj ato mex. E akupým akâ mex. Anê.

Hâmri nhûm hkâ akupým mex kurê kumrêx.

⁴ Hâmri nhûm Jejus kâam:

—E kêr ka amnhî tâ mê kâam tanhmâ ijarênh to hkêt râhâ ma patre hwýr tê kê akupým akâ mex â apumu. Hâmri ka hpânhâ amnepêm finat Mojes kot mê ate akupým amex â Tirtûm mâ tanhmâ amnhî nhîpêx to hâ karôta ka kâam ho anê. Kê mê piitâ akupým akâ mex â apumu. Anê.

Pôristi krâhtûm mâ âpênh xwýnh jarênh

Rukre 7.1-10

⁵ Tâ nhûm Jejus ma krî pê Kapanaû hwýr mô. Hâmri nê hwýr pøj nhûm Rôm nhô xwýnh pê pôristi krâhtûmja omu nê hwýr tê. Kêp Ijaew kêt tâ hwýr tê. Na pre kâam âpênh xwýnh kêp â htýx nê nô nhûm omu nê tee ri hkukamâ hamaxpêr. Hâmri nê Jejus ra ô krî hwýr hpôx â omu nê hwýr tê nê kâam harê nê kâam:

⁶ —Pa Jejus? E ot pa awýr tê. Inhmâ âpênh xwýnhja na ixpê â htýx nê. Ra î kamâ htyk pa nê nô. O mûj inhôrkwý kamâ nô. Anê.

⁷ Nhûm Jejus kuma nê kâam:

—Tý? Tôe. Nâ pa ma akôt tê nê akupým amâ ho mex. Anê.

⁸⁻⁹ Hâmri nhûm tee ri kuma nê kâam:

—Kwa akînhâ ixpê Ijaew kêt jakamâ ixte amnhî kuk â ixpijaam. Am ja rûm mân akapêr pix o akupým inhmâ ho mex nâ? Ixpê mê hkrâhtûm na pa hte inhô pôristi mâ mêmôj tâ karô nhûm mê inhmar xâ hkôt inhmâ mêmôj tanhmâ ho. Na pa hte mê kâam: “E mê ma mra nê â amnhî nhîpêx anê.” Anê nhûm htem inhma nê ma mrar kurê kumrêx. Rý pa mê kâam: “E mê amnhî ixwýr mra nê â amnhî nhîpêx anê.” Anê nhûm mê inhma nê ixwýr mra. No kêt ixrom axâhpumunh týx kôt na ka hte mê âja mâ akapêr nhûm ama nê mê kêp hapôx nê ma mrar kurê kumrêx. Jakamâ kwa am ja rûm akapêr pix o akupým inhmâ ho mex nâ? Anê.

¹⁰ Hâmri nhûm Jejus amnhî jaêr pê kot kâam â kapêr anhýrta ma nê hkînh nê. Hâmri nê hâ hkôt ri mê môr xwýnhjê mâ kâam:

—Kwa xâ na ka mêmýja kapêr ma? Mê pahkînh â kêp Ijaew kêt tâ mê arom amnhî kaxyw inhmâ hamaxpêr týx nê. Aa mê atô urâk nê â amnhî kaxyw inhmâ ajamaxpêr týx anhýr kêt tâ nhûm mê arom kâam âpênh xwýnh kaxyw â inhmâ hamaxpêr týx anê.

¹¹ Nâ koja nhýrmâ mê hkwyjaja kêp Ijaew kêt tâ ohtô nê pika piitâ kurûm ma Tirtûm mê wa inhô krî hwýr api nê hwýr agjê. Nê wa ixkuri wa inhô krî kamâ Ijaew pâr krax pê Apraaw nê Ijak nê Jako mê pimrâatâ pa ho pa. Mê kêp Ijaew kêt tâ mê îhkô hâ apkur

mex o hkrî nhûm Tirtûm mē ho mex rax o pa.

¹² No pēr mē apē Ijaew kwýjaja kot kaj mē hkôt hwýr agjêx kêt nē. Tirtûm kām hwýr mē agjêx prām tā ka mē axtem nē hkaga. Jakamā kot kaj mē ma kamāt kô xihtýx rax wýr ajapêx nē mē kēp awry rax nē mē kot amnhî xà htýx kamā hamak tûm xàta kamā apa ho apa. Hāmri nē tee ri mē ixwýr agjêx prām kaprý nē akaprî xàj mur nē amnhî kamā agryk týx nē. No âm tee ri amnhî kamā agryk kaprý. Mē ate Tirtûm kapēr kaga nē hkôt amnhî xunhwýr kêt jakamā kot kaj mē nhýrmā ā amnhî nhîpêx anē. Anē.

¹³ Nhûm pre ā Jejusja mē kām kapēr anē. Hāmri nē pôristi krāhtûmta mā kām:

–E māmri ma akupým tē nē amā âpênh xwýnhhta pumu. Ra ate kaxyw inhmā ajamaxpēr týx jakamā na pa ra akupým amā ho mex. E akupým tē nē omu.

Anhýr o kām kapēr rôm nhûm ra akupým kām mex kurê kumrêx.

*Jejus kot ahpýnhā mē à xwýnhjê ho mex
Makre 1.29-31; Rukre 4.38-41*

¹⁴ Tā nhûm Jejus ma Simāw Pêtre nhôrkwý hwýr tē nē hwýr axà. Nhûm Simāw Pêtre xupānhgêx ra à nē hkà kagro htýx nē nō.

¹⁵ Hāmri nhûm Jejus hwýr axà nē omu nē ïkra hā kupy nhûm hkà hakry nē akupým hihtýx kurê kumrêx. Jakamā kànhmā nhý nē mē kām mēo hā âpênh o ri mra.

¹⁶ Tā nhûm ra awjakry. Ra kamātre ho mō nhûm mē piitā Jejus wýr mē à xwýnhjê ho mra. Nē mēkarômnuti kot mē hwýr gjêx xwýnhjaja nhûm mē hwýr mē o mra. Hāmri nhûm mē omu nē akupým mē piitā mē ho mex. Mē à xwýnhjê ho mex nē mē hkwyjê nē mēkarômnuti jano. Âm kapēr pix o mē nē mē hano nhûm mē kēp hapój nē ma hapêx.

¹⁷ Na pre ra Tirtûm nhý hā kapēr xwýnh finat Ijaisja ā amnhî nhîpêx anhýrja kukamā amnepêm mē kām harênh o:

Tirtûm kot mē pahwýr mēnh mā xwýnhja koja nhýrmā wrý nē mē panē mē paxà piitā rēnh pa nē akupým mē pahto mex pa. Anē.

Na pre ā finat Ijaisja Jejus kukamā harênh anē. Tā nhûm wrý nē kot harênh xà hkôt ā amnhî nhîpêx anhýr o pa.

Wa kām Jejus kôt amnhî xām prām xwýnh wa harênh

Rukre 9.57-62

¹⁸ Tā nhûm Jejus amnhî pu hā rît nē tee ri hwýr mē mrar xwýnhjê pumu hāmri nē hkôt mē pa ho mē pa xwýnhjê mā kām:

–E ma pu mē pâr mā agjê nē ma xarmā mō. Anē.

¹⁹ Hāmri nhûm mē nojarêt rôm nhûm Tirtûm kapēr tûm o mē ahkre xwýnhjê hō Jejus wýr tē nē kām:

–Pa mē ijahkre xwýnh? E pa ma akôt ri ixpa ho ixpa nā. Anē.

²⁰ Hāmri nhûm kuma nē kām:

–Ko ka mā. Kam nē rî ma ixkôt ri apa. Nom kêr ka inhmar kumrêx. Xore na hte pika hkre kamā hikwý. Nē kuwênhre pî nhîmök ā hikwý. No pa ixpê Tirtûm kot mē awýr inhmēnh xwýnh tā mry hkînhā inhôrkwý hkêt. Na pa hte amarî nhām krî hwýr ixpa nē nhām hō hwýr ixpa. Tā xà kot ka ixpyrà nē ā amnhî nhîpêx anhýr o ri apa nā? Anē.

²¹ Hāmri nhûm pānhā hōja hwýr tē. Ra mē kot hkôt amnhî xunhwýr xwýnhjê hōja hwýr tē nē kām:

–Pa Pahihti. E pa amā amnhî jarê ka inhma. Kot paj ma akôt ixpa ho ixpa no âm kormā. Koja nhýrmā inhîpêexà tanhmā amnhî to nē ty mán. Pa haxà hāmri nē rî kormā ma akôt ixpa ho ixpa. Anē.

²² Hāmri nhûm kuma nē kām:

–Kwa nā ri ā ajamaxpēr anhýr kêt nē. Ma ixkôt apa ho apa kurê kumrêx. Kê mēmoj inhnē ano kupyry rý apē âmnrê kêt nē. Kwâr mē htîr tûm nē mē pa hkêt mā xwýnhjaja mán axwakre kamā amā anhîpêexà jamār o pa nē haxà. Anē.

*Jejus kot kôk o pinhkrênh jarênh
Makre 4.35-41; Rukre 8.22-25*

²³ Tā nhûm mē ra xarmā nojarêt nhûm Jejus mē hkôt mē pa ho mē pa xwýnhjaja pâr wýr agjê hāmri nē himô raxja ā ma xarmā mō.

²⁴ Hāmri nhûm Jejus ra ôtxwa nē ra gôr nē nō. Puh nhûm naja hkoko ho mō nē kôk xâpêr týx kumrêx. Nhûm gô kànhmā harî nē axpên tak týx nē. Xatā axpên tak nē pâr kre kamā axkapî nhûm ra âr o mō. Hāmri nhûm mē tee ri omu nē kām ma htýx kumrêx. Nē tee ri amnhî nhîpêx. No nhûm Jejusja htýx gôr nē nō.

²⁵ Hāmri nhûm mē hwýr hprôt nē kumra nē kām:

–Kwa Pahihti. Kot puj mē jarāhā pahtyk pa. Kwa tokyx kànhmā nhý nē ri tanhmā amnhî nhîpêx to wehe. Anē.

²⁶ Hāmri nhûm hkrākato nē kànhmā nhý nē kôk mā kapēr nē kām:

–E kwa hāmri anhîkrê. Anē.

Puh nhûm hpinhkrênh pa nhûm gôja tām nôr kurê kumrêx. Hāmri nhûm Jejusja hkôt mē pa ho mē pa xwýnhjê hwýr apkjê nē mē kām:

–Hêxta waa nē. Kwa pēr âm kormā te mē ate amnhî kaxyw Tirtûm mē wa inhmā ajamaxpêr týx kêt pyràk. Hā na ka mē amā ma xàj tee ri amnhî kukamā ajamaxpêr. Anē.

²⁷ Hāmri nhûm mē amnhî jaêr pē ā kot amnhî nhîpêx anhýrja ā omu nē tee ri

hamaxpêr nê axpên pumunh pê omunh o kuhê. Hâmri nê axpên mã:

—Kokÿÿ. Pêr Jejus kêp mē panhîō hkêt. Mē pahtō kot pu we te kot amnhî nhîpêx pyrâ nê kôk mã pakapêr nhûm hpinhkrênh kurê kumrêx? Nâ Jejusja mē pakurom âhpumunh tÿx o âhpumunh tÿx. Anê.

*Jesus kot wa nê mêkarōmnuti janor
Makre 5.1-20; Rukre 8.26-39*

²⁸ Tâ nhûm mē ra himō rax pê Garirejja â rê nê pika pê Geras wÿr pōj nê kamâ mō. Hâmri nhûm ra mēhō myja wa hamêxkrut nê mē kutâ tē. Ra mêkarōmnuti kot hamē wa hwÿr gjêx xwÿnhja wa. Mêkarōmnuti sohtō kot tanhmâ wa ho jakamâ nhûm wa oprê htÿx nê hihtÿx rax nê wa pa. Jakamâ nhûm mē piitâ kâ m wa uma nê amnhî nê mē htykjê jagjênh xâ hâ kên kre kaêx kâ m wa kumê nhûm wa kamâ pa ho pa. Jakamâ nhûm wa Jejus kutâ tē nê amnhî wÿr omu hâmri nê amnhî nê tanhmâ kâ m kapêr to. Nom mêkarōmnuti nhÿ hâ âmra kamâ kâ m kapêr nê kâ m:

²⁹ —Pa Tirtûm Kra Jejus? Mo kaxyw na ka mē ixwÿr tē? Kwa tanhmâ mē ixto hkêt nê. Ate tanhmâ mē ixtomnu hto hâ arîgrota kormâ katoore hâ. Anê.

³⁰ Nhûm ra krî nhō xwÿnhjê hkrit hagrō ohtō nê ri mē hpum pa.

³¹ Nhûm mêkarōmnuti mē omu hâmri nê amnhî to Jejus wÿr nê kâ m:

—Kwa kot ka jahti wa nê mē ijapôx japêr nê mē kot amnhî xâ htÿx kamâ hamak tûm xâta wÿr mē ixrênh kêt nê. Hagrō hkwÿ mÿj wÿr mân mē ixrê pa mē hpânâ hwÿr mân haggê nâ? Anê.

³² Hâmri nhûm mē kuma nê mē kâ m:

—Tôe mē tã m mē hwÿr mân mra. Anê.

Hâmri nhûm mē kuma nê myta wa kêp hapōj nê hagrō hwÿr mra kurê kumrêx nê hpânâ kâ m gjêx pa. Hâmri nhûm hagrōta mêkarōmnuti pymaj amÿra nê ma hprôt nê himō hâ hixêt prêk â axpum rôrôk nê gôx kâ m mrô nê pikaprâr pa.

³³ Hâmri nhûm hagrō jamâr o ri mē pa xwÿnhjaja tee ri omu hâmri nê ma akupÿm krîm hprôt nê mē kâ m awjarê. Nê myta wa akupÿm tã m hkrâ hâ harênh o hprôt.

³⁴ Hâmri nhûm krî nhō xwÿnhjaja tee ri mē hkrit jarênh ma nê ma piitâ Jejus wÿr mra nê hkaxpa. Hâmri nê amnhî nê kâ m:

—E kwa mē ma amrar kurê kumrêx. Anê.

Hâmri nhûm mē kuma nê awjanâ nê ma akupÿm pan rê.

9

î kamâ htyk xwÿnh jarênh

Makre 2.1-12; Rukre 5.17-26; Juâw 10.37-

38

¹ Nhûm Jejus mē hkôt mē pa ho mē pa xwÿnhjaja awjanâ nê ma akupÿm pâr wÿr

mra nê gjêx pa nê akupÿm xarmâ rê nê akupÿm Jejus nhō krî hwÿr mō.

² Hâmri nê hwÿr pōj nhûm krî nhō xwÿnh kwÿjaja mē omu nê î kamâ htyk xwÿnhja mÿ nê Jejus wÿr o tē. Nôr xâ kamâ nôr rãhâ nhûm mē hâ hije nê kumÿ nê hwÿr o tē. Hâmri nhûm amnhî tã mē omu. Ra mē kot hkrâmnhwÿta kaxyw kâ m hamaxpêr tÿx â mē omu nê î kamâ htyk xwÿnhnta mã kapêr nê kâ m:

—Pa? Kwa tee ri amnhî kukamâ ajamaxpêr kêt nê. Na pa ra apê tanhmâ ate amnhî tomnuj to ho ijapêx pa. Kot paj axte kâ m ijamaxpêr kêt nê. Anê.

³ Hâmri nhûm Tirtûm kapêr tûm o mē ahkre xwÿnhjaja tee ri â kot kâ m kapêr anhÿrja â kuma nê axpên mã:

—Tk. Kwa mēhō myti mÿj kêp Tirtûm kêt tã te ri kot amnhî nhîpêx pyrâk â amnhî nhîpêx. Tirtûm pix na kot mē nê mē kot amnhî tomnuj o hapêx xwÿnh. Anê.

⁴ Hâmri nhûm Jejus amnhî tã mē kuma nê mē kâ m:

—Kwa mē â ajamaxpêr anhÿr kêt nê.

⁵ Ixte mē nê mē kot amnhî tomnuj o ijapêx par â amnhî jarênh tã mē ate ja kôt ixpumunh kêt jakamâ na ka mē ja kaxyw ixkôt ajamaxpêr kêt nê. Nom kot paj mē anoo mã akupÿm î kamâ htyk xwÿnhnta o mex ka mē apiitâ hâ ixpumu hâmri nê ixkôt ajamaxpêr kurê kumrêx. Ixpê Tirtûm kot mē awÿr inhmênh xwÿnhnta na pa. Ixte mē anê mē ate amnhî tomnuj rênh kaxyw na pre mē awÿr inhmê pa mē awÿr wrÿ.

⁶ Tã mē ate ja hâ ixpumunh kaxyw kot paj mē anoo mã ja ho mex.

Anhÿr o mē kâ m amnhî jarê hâmri nê î kamâ htyk xwÿnhnta mã kâ m:

—E kãnhmâ xa nê anôr xâta py nê ma akupÿm anhôrkwÿ hwÿr tē. Anê.

⁷ Puh nhûm kãnhmâ â m kurê kumrêx nê nôr xâ py nê mē noo mã kato nê ma akupÿm ôrkwÿ hwÿr tē.

⁸ Hâmri nhûm mē piitâ no hapôx rûnh nê omunh o kuhê nê kamâ no pyma htÿx nê. Nê tee ri omu nê axpên mã:

—Kokÿÿ. Kwa aa mē pahte â mēhō kot amnhî nhîpêx anhÿr â omunh kêt tã jarãhâ ja pumu.

Anhÿr o Jejus jarê hâmri nê ÿ hâ Tirtûm mã mex o mex â harê.

*Jesus kot amnhî kôt Matêwre hwÿr
Makre 2.13-17; Rukre 5.27-32*

⁹ Tã nhûm Jejus mē kêp kato nê hkôt mē pa xwÿnhjê mē nhûm mē ma mō. Hâmri nê pa ixpê Matêwre ixpumu. Ixte Rôm kâ m mē ho amnhîptâr xwÿnh mã krî nhō xwÿnhjê pê kãxpore hkwÿ jamÿnh xwÿnh na pa pre. Nom mē kot ho tewên kryre htã ixte amnhîm hkwÿ ho ixârîk prãm xâj na pa pre hte mē kâ m ho rûnh nê harê. Jakamâ nhûm

mê piitâ kãm ixkînh kêt nê. Tã pa pre mê kêp kãxpore jamÿnh xã hã ixkre kamã mê kêp hamÿnh o nhÿ nhÿm Jejus mê hkwyjaja ijãnh mra nê ixpumu nê amnhî kôt ixwÿ nê inhmã:

—Pa? E axapênhta kaga nê hpãnhã amnê mê ixkôt mân tê nê ixkôt mân ri apa ho apa. Anê.

Hãmri pa kuma nê ixapênh kaga nê ma hkôt tê. Nê hpãnhã hkôt ixpa ho ixpa.

¹⁰ Hãmri nê mêmô arîgro hã amnhî nhôrkwÿ hwÿr Jejus nê hkôt mê pa ho pa xwÿnhjaja mê ixkrãmnhwÿ hkwyjê hwÿ. Nhÿm mê piitã mra nê inhôrkwÿ hwÿr agjê nê ixkutã apkur o hkrî. Nê ixpyrà nê Rôm nhô pahi mã mê kêp kãxpore hkwy jamÿnh xwÿnh kwÿ haxwÿja ixwÿr mra nê mê ixkutã apkur o hkrî.

¹¹ Hãmri nhÿm Parijew nhô xwÿnhjaja mra nê inhôrkwÿ kapem mê ixapkur ã mê ixpumu. Nê tee ri mê ixkaêx ã Jejus pumu hãmri nê hkôt mê pa ho mê pa xwÿnhjê hwÿr agjê nê mê ixtã mê kãm akir nê mê kãm:

—Kwa mê kot jajê kutã apkur kêt tã mê akrãhtÿmja axtem nê mê kutã apkur o nhÿ. Kwa nã mê kot amnhî tomnuj xwÿnh kênã. Jejus kot amnhî to mex ronhÿx mê kutã apkur kêt nê. Anê.

¹² Hãmri nhÿm Jejus amnhî tã ã mê kapêr anhÿrja ma nê mê kãm:

—Tk. Nã ixte tãm mê unhwÿr kaxyw na pa mê kutã ixapkur o nhÿ. Xã na hte têtôja mê mex xwÿnhjê hwÿr mra nê mê hkane? Nã ãm mê ã xwÿnhjê pix wÿr na hte mra nê tanhmã mê hkane nê. Ra mê ate ja pumunh mex. Tã ja pyrà hto na pa pre mê kot amnhî to mex xwÿnhjê hwÿr ixwÿrk kêt nê. Mê kot amnhî tomnuj xwÿnhjê pix wÿr na pa pre wrÿ. Ixte tãm mê unhwÿr kaxyw mê hwÿr wrÿ nê ã jajê kutã ixapkur o inhÿr anê.

¹³ Ga mê ma mra nê Tirtÿm kapêr ã kagã htÿm kot ja jarênhja kamã harê nê ama. Harênh kot:

Na ka htem inhmã tanhmã amnhî jarênh to kaxyw hãmri nê inhmã mêmôj gô nê tanhmã ixto mex to. Nom kêr ka mê ãm ja pix ho anhÿr kêt nê. Mê mãânên mê piitã tanhmã mê ho mex to ho ri apa. Anê.

—Ã Tirtÿm kapêr ã kagã htÿm kot ja jarênh kot anhÿr. Tã ja pyrà nê na pa pre mê kot amnhî tomnuj xwÿnhjê hwÿr wrÿ nê mê kamã ixukuprî ho ixpa. Mê kot amnhî tomnuj kaga nê hpãnhã tãm amnhî nhîpêx kaxyw na pa pre ã mê hwÿr ixwÿrk anê. Tã ka mê ri atÿx amnhî krã hkôt ã ixto akapêr anê. Anê.

*Mê kot mêmôj tã Jejus kukjêr
Makre 2.18-20; Rukre 5.33-35*

¹⁴ Tã nhÿm Juãw Paxis kôt mê pa xwÿnhjaja Jejus wÿr mra nê mêmôj tã hkukja nê kãm:

—Pa? E ot pa mê awÿr mra. Kwa mê inhmã mêmôj jarê. Na pa htem têtôhã Parijew nhô xwÿnhjê pyrà nê ixapkur kêt kãm Tirtÿm mã amnhî jarê. Tã nom akôt mê pa ho mê pa xwÿnhjaja na htem ãmnhîx apkur o pa kamã kãm amnhî jarênh o pa. Kwa mo na htem mê ixpyrà nê têtôhã apkur kêt kamã kãm amnhî jarênh kêt nê? Anê.

¹⁵ Hãmri nhÿm mê kuma nê mê kãm:

—Nã mo kaxyw kot kêt mê apkur kêt rãhã kãm amnhî jarê? Mê hkaprîre hã. Mê kot ixkôt pa ho pa hã amnhî pumunh jakamã na htem hkînh nê ixkôt pa. Kormã ixte mê kamã ixpa kênã kot kêt mê apkur kêt rãhã Tirtÿm mã tanhmã amnhî jarênh to. Xã na htem hkrãmnhwÿ hã hkînh kaxyw hã akuprô nê hkaprî nê apkur kêt o kamãt nê mÿr o hkrî? Nã na htem anhÿr kêt nê. Na htem hã akuprô nê hkînh nê hã apkur rÿnh nê. Ja pyrà nê na hte ixkôt mê pa ho mê pa xwÿnhjaja ixkôt kormã ãmnhîx hkînh nê apkati mê apkur o pa. Nom koja mê kãm ixkurê xwÿnhjaja nhÿrmã tanhmã ixto hãmri nhÿm mê hkaprî htyx nê ri kormã têtôhã apkur kêt rãhã Tirtÿm mã amnhî jarê. Anê.

*Mê pahte Jejus kôt amnhî nhîpêx
Makre 2.21-22; Rukre 5.36-39*

¹⁶ Nhÿm Jejus mê piitã mê kãm kapêr nê mê kãm:

—Mê kot amnhî tomnuj xwÿnhjaja ra mê kot amnhî nhîpêx tÿm o amnhî pyràk jakamã na htem tanhmã mê kot amnhî nhîpêx nyw tota kaga.

¹⁷ Tã ixte amnhî nhîpêx nywja te kot mê ate amnhî nhîpêx tÿm pyràk kêt jakamã na ka htem ixkapêr ma nê ãm ama. Kwa mê inhma nê mê ate amnhî nhîpêx tÿmja gryk ã ixkaga hkêt nê. Anê.

Mê hkra htyk nê mêtô ni kamrô wa harênh

Makre 5.21-43; Rukre 8.40-56

¹⁸ Nhÿm pre ã Jejus mê kãm kapêr anhÿr o xa. Rôm nhÿm mêtô pahiltija tê nê mar o xa. Hãmri nê hamaxpêr o:

—Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anê. E pa hwÿr tê nê ixkrare ho kuwÿ. Anê.

Hãmri nê hwÿr tê nê kutã hkônkrã ho nhÿ nê kãm:

—Pa akupÿm mê ixto mex xwÿnh? E ot pa awÿr tê. Kwa ma ixkôt tê nê inhmã ixkra nire pumu nê tanhmã inhmã ho kê akupÿm inhmã htîr. Na ham ixpê ty pa kaxyw amã ijamaxpêr nê man awÿr tê. Anê.

¹⁹ Hãmri nhÿm kuma nê kãm:

—Tôtê. Nã kot paj ma akôt tê. Anê.

Hãmri nê ma hkôt tê. Mê ixpê hkôt ixpa ho ixpa xwÿnhjê mê pa mê ma hkôt mô.

²⁰⁻²¹ Nhùm mēhō ni kamrō rāhā ho pa xwýnhja ma mē ixkōt tē. Na pre hte hkamrō hkryre rāhā ho pa hā amgrā pē 12 nē tee ri kām amnhī mex prām o pa. Jakamā Jejus jarēnh ma nē amnhī kaxyw kām hamaxpēr kurē kumrēx nē hamaxpēr o:

—Ma pa kop ma hwýr tē nē kēp ē nhīrē pix kupēnh tā akupým inhmex japēr. Anē.

Hāmri nē ma mē ohtōjē kaēx kōt hwýr tē. Nē katut kōt tē nē kēp ē nhīrē kupē.

²² Hāmri nhùm Jejus ho hakēx nē amnhī tā omu nē kām:

—Pa? Kwa tee ri amnhī kukamā ajamaxpēr kēt nē. Ate amnhī kaxyw inhmā ajamaxpēr týx jakamā na ka ra akupým amex. E māmrī ajamakētcati nē ri apa. Anē.

Hāmri nhùm akupým mex nē hkīnh týx nē ma akupým tē.

²³ Hāmri pa mē ma htyk xwýnh nhīpēxā hkōt mra nē ōrkwý hwýr agjē nē mē pikuprōnh xwýnhjē pumu. Nhùm mē ra mē hā htu rax nē. Nē omūj ri kaprī xāj pifti kakōr o hkrī nē omūj ri mur. Kāx pē mur nē amnhī tak o hkrī.

²⁴ Hāmri nhùm Jejus mē hwýr axā nē mē omu. Nē ra kot my hkrata htyk ā omunh tā kuri mē mýr o mē hkrī xwýnhjē mā kapēr nē mē kām ām ōt nē nōr ā harē nē mē kām:

—Pa? Kwa mon ka mē ri akaprī nē amýr o akrī? E mē ma mra. Na wa hkrata wa kēp htyk kēt nē. Na ām gōr nē nō. Anē.

Hāmri nhùm mē kot ra htyk ā omunh mex jakamā kuma nē ām kuma. Nhùm mē hkwyja axtem nē ri axpēn mā hā hpēr o pikēnh o hkrī.

²⁵ Hāmri nhùm kapōt mā mē hano nhùm mē hapōj nē kapōt ā kuhē. Hāmri nhùm Jejusja htyk xwýnhja wýr axā nē hpa hā kupy nē kānhmā ām nhùm akupým htūr nē kānhmā ām kurē kumrēx.

²⁶ Hāmri nhùm mē piitā akupým htūr kām omu nē ma ri krī piitā hkōt ri mē kām harēnh o hprōt.

*Wa nohkre xwýnh wa harēnh
Matêwre 20.29-34*

²⁷ Tā nhùm Jejus kato nē ma tē. Pa mē hkōt ixpa ho ixpa xwýnhja ma hkōt mō. Hāmri nhùm wa myja wa hamēxkrut. Hamē wa nohkre xwýnh wa Jejus jarēnh ma nē hā ajēt nē hkōt rōrōk o mō. Nē xātā amnhī to hwýr o hkōt rōrōk o mō nē kām:

—Pa Jejus? E Tirtūm kot mē ixkaxyw axām jakamā kwa wa xipumu nē wa ixkamā axukaprī kēt wehe. Anē.

²⁸ Hāmri nhùm wa kuma nē wa hkukamā nhýri ixkrem axā nhùm wa hkōt axā nē xa nhùm wa omu nē wa kām:

—Pa? E xān ka wa ra amnhī kaxyw inhmā ajamaxpēr týx nē nā? Anē.

Hāmri nhùm wa kām:

—Tý. Wa ixte amnhī kaxyw amā ijamaxpēr týx kēnā. Anē.

²⁹ Hāmri nhùm wa kuma nē hamē wa no hā ihkra xi nē wa kām:

—Tōe. Na war ate tanhmā amnhī kaxyw inhmā ajamaxpēr to xā hkōt kot paj war anhīpēx. Anē.

³⁰ Hāmri nhùm wa akupým rīt mex kurē kumrēx. Hāmri nē akupým kato nē ma htēm kaxyw nhùm wa kām:

—E kēr ka wa nhām mē kām ixte war ato mex ā ijarēnh kēt nē. Ām kwarī ho kwarī.

³¹ Anhýr tā no nhùm wa kuma nē ām kuma nē wa ma tē nē krī pu hā mē piitā mē kām ri war amnhī tā harēnh o mra.

Kapēr kēt xwýnh jarēnh

³² Tā nhùm Jejus ma axte nhýhým mē ixto mō. Hāmri nhùm mēhō my mēkarōmnuti kot hwýr ār nē tanhmā ho nhùm kapēr kēt nē pa xwýnhja nhùm mē Jejus wýr o tē.

³³ Hāmri nhùm omu nē nē mēkarōmnuti jano nē kām:

—E kēp akato nē ma tē. Anē.

Hāmri nhùm kuma nē kurūm kato nhùm akupým kapēr mex kurē kumrēx. Hāmri nhùm mē kot hā omunh xwýnhja tee ri kot mēkarōmnuti janor ā omu nē kamā no pyma nē. Nē axpēn mā:

—Kokýy. Aa mē pahte ā mēhō kot anhýr pumunh kēt kumrēx tā na pu mē jarāh ja pumu. Anē.

³⁴ Nom nhùm mē hkwy pē Parijew nhō xwýnhja axtem nē hā mē kām kapēr o:

—Tk. Kot amnhī krā hkōt mē hanor kēt kēnā. Mēkarōmnuti nhō pahi nhý hā kot mē nē mē hanor kēnā. Anē.

*Jejus kēp mē pakamā ukaprī xwýnh
Makre 6.34; Rukre 10.2-3; Juāw 4.35*

³⁵ Tā nhùm Jejusja krī ho ohtō nē hkōt ri mē kām Tirtūm kapēr jarēnh o pa. Pa mē hkōt ixpa. Na pre hte nhýri krī hwýr pōj nē mē kot Tirtūm kapēr o mē ahkre xā hā ixkre hwýr mra nē hwýr agjē nē mē pikuprōnh xwýnhjē jahkre. Nē mē kām:

—E mē inhma. Tirtūm kām mē apiitā mē ato hkra hprām. Jakamā kwa mē ate amnhī tomnuj kaga hprām xāj hkōt amnhī xunhwý nē kapēr kōt amnhī nhīpēx. Jao amnhī nhīpēx nyw o amnhī nhīpēx o ri apa.

Anhýr o mē kām kapēr. Hāmri nē ahpýnhā ri tanhmā mē ā kute xwýnhjē ho mex. Nhùm mē ohtō nē hkōt mar o pa.

³⁶ Hāmri nhùm mē omu nē kām mē hkaprī nē. Na prem tee ri amnhī kukamā hamaxpēr o pa jao ra hkaprī nē. Nhùm Jejus ja hā mē omu nē hamaxpēr o:

—Hēxta waa nē. Na mē mex kēt nē pa. Te mē kēp ōwēhti jamār xwýnh kēt kot amnhī nhīpēx pyrāk o htýx ri pa. Mēhō koja kām mē hkaprī nē tanhmā mē ho mex to ho pa? Anē.

Hāmri nē mē kamā ukaprī nē.

³⁷ Hāmri nê mē hā mē ixpê hkôt ixpa ho ixpa xwýnhjê mã kapêr nê mē inhmā:

—Nā na mē kormā ohtô rax nê Tirtūm kapêr mar kêt nê. No ām kormā mē ate mē kām kapêr jarênh o apa kaxyw mē agrêre. Te pur rax kām ra harôj kamrêk par nê ām tā no ām kaxyw hikênh xwýnhjaja grêre pyrāk.

³⁸ Jakamā kwa mē ho Tirtūm wý kê axte mē kaxyw mē akwýjê rê kê mē apyrā nê ma mē hkôt ri mē kām kapêr jarênh o pa. Anê.

10

*Jejus kot mē ho 12 nê mē rênh
Makre 3.13-19; Rukre 6.12-16*

¹⁻⁴ Tā nhūm Jejusja hkôt mē ixpa ho mē ixpa xwýnhjê ho 12 nê mē ixrê. Mē ixte ma krī piitā hwýr inhmrar nê ý hā mē ahkre nê tanhmā mē à kute xwýnhjê ho mex o ixpa kaxyw. Nê ý hā mē nê mēkarômnuti janor o ixpa kaxyw nhūm mē ixrê. Na pre mē ixto 12 nê mē ixrê. Ā mē inhīxi kot anhýr.

Pêtre kumrêx na pre kuta. Hixi hō pé Simāw.

Nê hkôt htô Andreja ta.

Nê hkôt Jepetew kra Xiakreja ta.

Nê hkôt Xiakre htô Juāwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhūm pre mē hkôt ixta.

Ixpê pahī nhý hā kām mē kēp ixu-jamýnh xwýnh tā nhūm pre jajê hkôt ixta.

Nê ixkôt Apew kra Xiakre hōja ta.

Nê hkôt Tatewja ta.

Nê hkôt Simāw Jeroxja ta.

Nê hkôt Jut Kariotja ta.

Kormā kot mē kām Jejus kurê xwýnhjê nhīhkram ôr mã nhūm Jejus kot amnhī kukamā omunh mex tā mē hkôt amnhī kaxyw kuta.

Ā mē ixte ý hā mē ahkre o ixpa kaxyw mē ixrênh xwýnhjê nhīxi kot anhýr.

*Jejus kot mē kēp 12jê mã mē âpênh ā karô
Makre 6.7-13; Rukre 9.1-6, 10.1-12,
10.14; mãânên Atre 13.50-51, 18.6*

⁵ Hāmri nhūm Jejus mē ixrênh pa nê ma mē hwýr mē ixrênh kaxyw tanhmā mē inhmā kapêr to nê mē inhmā:

—E. Kêr ka mē ma mē piitā mē kām ri ijarênh o apa. No ām kormā mē kēp Ijaew kêt xwýnhjê nhô pika hwýr apa hkêt nê. Rý mē kēp Samar nhô krī hwýr ka mē apa hkêt nê.

⁶ Ām mē pahpê Ijaew nhô krī kôt pix mã mân ri apa. Mē kot tee ri amnhī kukamā hamaxpêr o pa jakamā te mē kēp ôwêhti pikunor nê htýx ri mex kêt nê pa pyrāk.

⁷ Jakamā kêr ka mē ma mē hwýr apa nê ā mē hkôt ri mē kām akapêr o apa anê nê

mē kām: “E kot kaj mē ate amnhī tomnuj kaga nê Tirtūm kôt amnhī xunhwý hāmri nhūm amnhī tā mē apumu nê mē ato hkra. Jakamā e kwa mē tokyx hkôt amnhī xunhwý.” Anê. Kêr ka mē ā mē kām akapêr anhýr o ri mē hkôt apa.

⁸ Hāmri nê akupým mē à xwýnhjê ho mex o ri apa. Nê mē htyk xwýnhjaja ka mē akupým mē ho htír o ri apa. Nê mē hkānhý rúnh xwýnhjaja ka mē akupým mē ho mex o ri apa. Nê mē kamā mēkarômnuti xwýnhjaja ka mē nê mē hano. E kêr ka mē ā inhý hā mē ho mex o ri apa anê. Na pa amarī tanhmā mē ato ka mē inhmā amnhīrer kêt tā ra mē ate tanhmā mē ho mex to mã tām. Tā kêr ka mē amnhī xwar amarī ri mē ho mex o ri mē hkôt apa. No ri mē ho mex pānhā kàxpore hā axāhwýr kêt nê.

⁹⁻¹⁰ —Nê kêr ka mē ma mē hwýr apa kaxyw anojarêt hāmri nê amnhī kôt akukrêx rúnh o apa hkêt nê. Ām anhý kamā mē hwýr apa. Nê akàxpore ho rax nê ho apa hkêt nê. Rý akawā kamā axê hkwy rý aparkā hō xâr nê ho amôr kêt nê. Rý kô hō py nê ri ho apa hkêt nê. Ām anhô mrykà pix jamý nê ma ho apa. Kêr kê mē ate Tirtūm kapêr o mē ahkre nê mē ho mex xwýnhjaja mân amnhī pānhā mē amā mē axâpkur xâ gô ka mē kutā axâpkur o ri mē hkôt apa.

¹¹ —Nê kêr ka mē nhýri krī hwýr ajapôj nê kamā mēhō kot amnhī to mex xwýnh japêr. Nê ra omu hāmri nê kuri mân pôj nê hkôt apikamênh tāmā kurūm akupým ajapôj nê ma nhām krī hō hwýr mra.

¹² —Nê kêr ka mē mēhō nhôrkwý hwýr pôj nê mē kām: “E ot pa mē anhýr mô. Na koja Tirtūmja mē ato mex nê.” Anhýr o mē kām akapêr.

¹³ Koja mē ama nê amnhī wýr awý ka mē amnhī tā mē omu nê mē kām: “E koja Tirtūm mē ato mex nê ka mē ajamakêtkati nê ri axāmnhīx apa.” Anhýr o mē kām akapêr. No koja mē amnhī nhôrkwý nê mē akurê nhūm Tirtūm ja hā mē omu nê mē ho mex kêt nê.

¹⁴ —Nê koja nhýri krī hō kamā mē akaga nê akapêr mar kêt japêr. Ka mē tee ri amnhī tā mē kamā ama hāmri nê tokyx mē kurūm ajapôj nê ma akupým apa. Nê akupým anojarêt nê mē noo mã akuhê nê amnhī par ā awjagrô kapī nê ma apa. Mē kot Tirtūm kaga hā amnhī pumunh kaxyw ka mē ā mē noo mã amnhī nhīpêx anê. Hāmri nê ma nhýhým hpānhā apa.

¹⁵ Koja nhýrmā Tirtūm mē kot amnhī tomnuj mýrapê tanhmā mē ho. Na pre ā Sotô mē Komo nhô xwýnhjê nhīpêx anê. Na prem amnhī tomnuj týx nê nhūm Tirtūm tee ri ja hā mē omu nê tanhmā hā mē homnuj týx to. Tā jar mē kām ixkapêr mar prām kêt nê mē kot ixkaga xwýnhjaja koja ja hā mē omu nê kot Sotô mē Komo nhô xwýnhjê nhīpêx o

mê hipêx. No âm tanhmâ mê ho htÿx o mê hakre. Anê.

Nhûm pre Jejus â mê inhmâ mê ixâpênh â karô anê.

Jejus kot mê kêp 12jê hkukamâ mê harênh Makre 13.9-13; Rukre 12.11-12, määnên Rukre 21.12-17; Wam Pêtre 3.13-17, 4.12-19; Rukre 6.40; Juâw 15.20; Rukre 12.2-9

¹⁶ Nhûm Jejus arî kot mê ixrênh xwÿnhjê mâ kapêr nê mê inhmâ:

—E kot paj ma mê hwÿr mê arê. Ma mê ate Tirtûm kapêr o mê ahkre ho ri mê hkôt apa kaxyw. Jakamâ kot kaj mê te ôwêhti kot mry xoprê hwÿr amnhî to mrar nhûm kot hkwy hpar pyrâk o amnhî nhîpêx. Koja mê hkwyjaja mê ate mê ahkre ma nhûm ja mê kêp omnuj nê nhûm mê hâ tanhmâ mê anhîpêx to. Tâ nom kêr ka mê tee ri amnhî kukamâ ajamaxpêr nê amâ mê uma hkêt nê.

¹⁷ —E kwa mê o kora. Kêr ka mê ma mê hwÿr mra nê amnhî nê mê htânopxar o ri apa. Koja mê hkwyjaja mê akapêr ma nê kêp mê aprâm nôkati. Nê mê apynê nê ma mê utâr xwÿnhjê hwÿr mê ato mra nê mê kâm tanhmâ mê ato hêx to. Hâmri nhûm mê mar xâ hkôt mê atak. Tirtûm kapêr o mê ahkre xâ hâ ixkre kamâ koja mê mê anhîpêx anê.

¹⁸ —Nê koja mê ixtâ tanhmâ mê ato kaxyw mê apynê nê ma mê ô pahi hwÿr mê ato mra nê tanhmâ kâm mê ato hêx to. Nom kwâr mê mamrî â mê anhîpêx anê. Koja mê ato anê ka mê kutâ akrî nê mê kâm Tirtûm kapêr jarê. Ijaewjê mâ nê mê kêp Ijaew kêt xwÿnhjê mâ.

¹⁹ —Nê koja mê ma mê ô pahi hwÿr mê ato mra nê â mê anhîpêx anê nom kêr ka mê tee ri tanhmâ mê kâm amnhî jarênh to hkukamâ ajamaxpêr kêt nê. Koja Tirtûm Karô tãm tanhmâ mê akrâ hto ka mê ô ri mê kâm akapêr mex nê.

²⁰ Nê kot kaj mê amnhî krâ hkôt ri mê kâm akapêr kêt nê. Tirtûm Karô nhÿ hâ kot kaj mê ô ri mê kâm tanhmâ axujarênh to.

²¹⁻²² —Nê koja mê hkwyjaja ixtâ mê akamâ gryk nê. Nê mê atâ âmnenh pix o pa. Nê mê kot mê apar kaxyw mê akwyjê hâ amÿnê. Koja mê anhîpêxâ hkwyjaja mê apê mê hkra hâ amÿnê. Nhûm mê akra hkwyjaja mê apê mê hipêxâ hâ amÿnê. Nhûm mê atô hkwyjaja mê apê mê htô hâ amÿnê. Nhûm mê akatorxâjaja mê atâ amÿnê. Hâmri nhûm mê apa. No âm kwâr mê âmri â mê anhîpêx anê. Â mê kot mê anhîpêx anhÿr tâ kêr ka mê tee ri amnhî kukamâ ajamaxpêr pê ixkaga hkêt nê. Mê âm amnhî to htÿx râhâ ty. Hâmri nê akaxwÿnhja ma Tirtûm mê wa inhô krî hwÿr axâpir kurê kumrêx nê wa ixkuri akupÿm amex nê atir tûm nê apa ho apa.

²³ —Nê koja mê nhÿri krî hkwy kamâ ixtâ tanhmâ mê anhîpêx hto ka mê mämri mê

kurûm ajapôj nê ma nhÿhÿm krî hō hwÿr apa. Nê hpânâ kamâ mê kâm ri ijarênh o mê hkôt apa. Kot kaj mê kormâ Ijaewjê nhô krî piitâ hwÿr apa hkêt ri pa akupÿn mê awÿr wrÿ. Kwa kêr ka mê ixkapêr mâ ajamaxpêr tÿx râhâ ri apa.

²⁴⁻²⁵ —Mê ate ixkôt apa ho apa xwÿnh na ka mê. No pa na ixpê mê ajahkre xwÿnh. Jakamâ koja mê kot tanhmâ inhîpêx to ho määnên mê anhîpêx. Koja mê nhÿrmâ tanhmâ inhîpêx to nê mâ ixkôt mê ato anê nê. Mê pahte amnhî nhîpêxja kot axpên pyrâk. Jakamâ koja mê ixpê Satanasti hâ ijarê nê määnên tanhmâ mê ajarênh punuj to ho pa. Mê pahte amnhî nhîpêxja kot axpên pyrâk jakamâ koja mê panhîpêx o axpên pyrâk.

²⁶ —Tâ nom kêr ka mê tee ri amnhî kukamâ ajamaxpêr pê amâ mê uma ho apa hkêt nê. Na htem piitâ axpên pê tanhmâ hamaxpêr punuj to ho hpimxur o pa nom tee ri ho pimxur prâm kapÿr. Koja nhÿrmâ mê hamaxpêr piitâ amnhîrit pa. Nê mëmoj piitâ ra hpimxur mex tâ koja nhÿrmâ amnhîrit par kumrêx.

²⁷ —Nê koja nhÿrmâ mê piitâ ixte amnhî nhîpêx kôt ixpumu. Na pa ra mê hkâx â mê amâ ixujarênh rax nê. Tâ kêr ka mê ma mê piitâ mê kâm harênh o ri apa. Nê ra ixte mê hkâx â ahte ixte mê amâ mëmoj jarênhhta ka mê hpânâ ma mê kâm harênh o ri apa kê mê apyrâ nê harênh ma.

²⁸ —E kêr ka mê amâ mê kot tanhmâ mê ato mâ xwÿnhjê pyma ho apa hkêt nê. Mê kot mê apar mâ tâ koja mê âm mê akrâhkâ pix pa nom tanhmâ mê akaxwÿnh to hkêt nê. Tirtûnja tapxixix na hte mê hkrâhkâ nê mê hkaxwÿnh mê ho pimrâatâ kot amnhî xâ htÿx kamâ hamak tûm xata wÿr mê rênh pumunh. Tâ kot hwÿr mê arênh pymaj kêr ka mê amâ kapêr kwÿm ri tanhmâ amnhî nhîpêx to pyma ho ri apa.

²⁹⁻³¹ —Nê Tirtûm kot mê pahto hapêx par pumunh tâ määnên kot mê pajamâr mex. Mân ka htem kuwênhre pumu. Na hte Tirtûm kuwênhre jamâr mex o pa. Mê piitâ mê kot âm omunh tâ nom nhûm Tirtûm mê kurom hamâr mex pê mê htânopxar râhâ ho pa. Tâ kâm mê pajapê htÿx o kot kuwênhre jakrenh jakamâ kwa mê tee ri amnhî kukamâ ajamaxpêr o ri akapÿr nê apa hkêt nê. Koja Tirtûm mê pahtânopxar râhâ ho pa. Kot mê panhî piitâ omunh par. Nê ahpÿnhâ tanhmâ mê pahkrâ hkî kute hkôt mê pahpumunh par. Tâ kot mê pahtânopxar râhâ jakamâ mo kaxyw kot kaj kêt mê ri amâ mê uma ho apa? Anê.

Mê pahte Jejus kôt amnhî xunhwÿr rÿ mê pahte hkaga jarênh

³² Nhûm Jejus arî kot mê hwÿr mê ixrênh xwÿnhjê mâ kapêr nê mê inhmâ:

—E kwa mẽ māmri akwýjê mã mẽ apê ixkwý há amnhî jarênh o ri apa nê amã mẽ uma xàj tee ri amnhî nhîpêx kêt nê. Kot kaj mẽ kãm ra ate ixkôt amnhî xunhwýr ã amnhî jarê. Pa ja há mẽ apumu hãmri nê mẽ apyrã nê kaxkwa kamã Inhîpêêxã mã ra ate ixkôt amnhî xunhwýr ã mẽ ajarê.

³³ Nom kot kaj mẽ kot ixtã tanhmã mẽ ato pymaj apê ixkwý há amnhî jarênh kêt nê. Pa ja há mẽ apumu hãmri nê nhýrmã amnhî xwar Inhîpêêxã mã mẽ apê ixkwý hkêt ã mẽ ajarê. Jakamã kwa mẽ māmri mẽ kãm apê ixkwý há amnhî jarênh o ri mẽ hkôt apa kê mẽ ama nê amnhî kaxyw inhmã hamaxpêr japêr. Anê.

Mê kãm Jejus ã hwýjê kurê xwýnhjaja Makre 8.34-35; Rukre 9.24, mãânên Rukre 12.51-53, 14.26-27; Apokarip 12.11

³⁴ Nhũm Jejus arî kot mẽ hwýr mẽ ixrênh xwýnhjê mã kapêr nê mẽ inhmã:

—Ra mẽ awýr ixwýrk tã koja mẽ piitã ixkukwak ri hamakêtkati nê ãnnhîx ri pa hkêt nê. Kormã. Koja mẽ akwýjaja ixkapêr ma nê mẽ apyrã nê amnhî kaxyw ixkôt hamaxpêr. Nhũm mẽ akwýjaja axtem nê kuma nê ãm kuma. Hãmri nê ixtã tanhmã mẽ atomnuj to ho pa ka mẽ amnhî xã htýx kamã ajamak o ri apa.

³⁵ —Koja mẽ akrajaja ixtã mẽ apê mẽ hipêêxã nê mẽ katorxã kutã amnhî xunhwý. Nhũm mẽ wýjjaja ixtã mẽ umregêxjê kutã amnhî xunhwý.

³⁶ —Koja mẽ ã mẽ akwýjaja ixtã mẽ akutã amnhî xunhwýr anê. Mẽ anhôrkwý kamã mẽ akukwak ri pa htã ixtã mẽ akutã amnhî xunhwý.

³⁷ —Nê mẽ amã mẽ anhîpêêxã nê mẽ akatorxã japêe. Nê mẽ amã mẽ akrajê japêe. Tã nom kot kaj mẽ gryk ã ixkôt amnhî nhîpêx mex o ri apa hkêt hãmri nê apê ixkwý mã tãm kêt.

³⁸ Rý nhũm mẽ nhýrmã ixtã mẽ apar kaxyw ka mẽ tee ri amnhî kukamã ajamaxpêr nê mẽ kot mẽ apar pymaj ixkaga há kot kaj apê ixkwý mã tãm kêt nê.

³⁹ Koja mẽ nhýrmã ixpí pa mẽ anê ty. Tã mẽ ate ixkôt amnhî nhîpêx o apa xwýnhjaja. Koja mẽ ixpyrã nê ixtã mẽ apar mã tã kwa kër ka mẽ amã atyk pymaj ixkaga hkêt nê. Kwãr mẽ māmri tanhmã ixtã mẽ ato. Kot kaj mẽ nhýrmã Tirtũm mẽ wa ixri axte amnhî xã kamã ajamak kêt nê atir tũm nê amex rãhã apa ho apa. Nom kot kaj mẽ jar amã amex nê apa hprãm xãj ixkaga hãmri nê nhýrmã wa ixri atir tũm nê apa ho apa hkêt nê. Anê.

Mê kot Jejus krajê ho mex xwýnhjê jarênh Matêwre 25.34-40; Makre 9.41; Juãw 13.20

⁴⁰ Nhũm Jejus arî kot mẽ hwýr mẽ ixrênh xwýnhjê mã kapêr nê mẽ inhmã:

—E koja mẽhõ nhýri mẽ apumu nê mẽ apê ixkra há tanhmã mẽ ato mex to nê te pa kot ixto mex pyrãk. Nê kot kaj mẽ tanhmã pa ixto mex to nê te Tirtũm o mex pyrãk.

⁴¹ —Nê kot ka mẽ nhýri Tirtũm nhý há mẽ kãm kapêr jarênh xwýnhjê hõ tanhmã ho mex to nhũm Tirtũm há apumu nê nhýrmã há ato mex nê. Rý ka mẽ mẽhõ kot Tirtũm kôt amnhî nhîpêx xwýnhjê hõ pumu nê tanhmã ho mex to. Nhũm Tirtũm há apumu nê mãânên há ato mex nê. Te ate mẽhõ ho mexta pyrã nê mãânên ato mex nê.

⁴² Nhũm mẽhõ nhýri mẽ kot ixkôt kormã amnhî xãm nyw nê kormã ãhpumunh tohtuj anhýr xwýnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwýnh mũj kãm kôr. Kormã kot Jejus kôt amnhî xãm týx kêt tã kêp hwýjê. E kot paj kãm gô hwýjê kê ho ixkô.” Anê hãmri nê kãm hwýjê nhũm ho ixkô. Hãmri nhũm Tirtũm há omu nhũm kot kãm gô pix nhõr nhũm kot ho hkôm tã nhũm ja há ho mex rax nê. Anê.

Nhũm pre ã Jejus kot mẽ hwýr mẽ ixrênh xwýnhjê mã kapêr ry rax anê. Mẽ ixpê 12jê mã ã kapêr anê.

11

Juãw Paxis kot Jejus jarênh mar Rukre 7.18-23, 7.5, mãânên Rukre 4.16-21

¹ Tã nhũm Jejus ra kot mẽ hwýr mẽ ixrênh xwýnhjê mã kapêr pa hãmri nê kato nê ma krî pu há krî hwýjê hkôt ri pa. Nê mẽ kãm Tirtũm kapêr jarênh o ri mẽ hkôt pa.

² Nhũm Juãw Paxisja arî kêp prés nê mẽ hagjênh xã kamã hkrî. Nhũm pre hte hkôt mẽ pa ho mẽ pa xwýnhjaja hwýr mra nê kãm Jejus kot tanhmã amnhî nhîpêx to ho pa há harê. Hãmri nhũm harênh ma nê tee ri hkukamã hamaxpêr. Hãmri nê hkôt mẽ pa xwýnh wa ho akxrut nê wa kuta

³ nê hwýr wa kumê nê wa kãm:

—Kwa wa ma Jejus wýr tẽ nê hukjja nê kãm: “Xã ka na pre Tirtũm mẽ ixwýr amê nã? Xã kormã axtem mẽhõ na pa mẽ ri hamãr o ri ixpa?” Anhýr o hukjja hãmri nê tanhmã kot amnhî jarênh to há ama nê man akupýn ixwýr tẽ nê inhmã harê. Anê.

⁴ Hãmri nhũm wa kuma nê ma hwýr tẽ. Nhũm Jejus kormã tanhmã mẽ ã kute xwýnhjê ho mex o xa. Mẽ nohkre xwýnhjaja nhũm akupým mẽ ho mex. Nê mẽkarõnnuti kot mẽ hwýr gjêx xwýnhjaja nhũm mẽ nê mẽ hanor o ãm rãhã nhũm Juãw kôt wa pa xwýnhnta wa hwýr tẽn pøj. Nê kormã mẽ há omunh o wa xa. Hãmri nê kãm Juãw Paxis kapêr jarê nhũm wa kuma nê wa kãm:

—Tý. Nã ãm hãmri na ja há ijarê. Ixpê mẽ ate ixkamã ajamak o apa xwýnhnta na pa. Na ka wa kam ã ixte amnhî nhîpêx anhýr ã ixpumu. Jakamã wa ma akupým tẽ nê aprî há kãm ijarê.

⁵ Na pa hte akupÿm më nohkre xwÿnhjê ho mex. Nê më hkânhy xwÿnhjaja pa akupÿm më hkâ ho mex. Nê më hyk o më pa xwÿnhjaja pa akupÿm më hte ho mex. Nê më htyk xwÿnhjaja pa akupÿm më ho më htîr. Nê më kêp amrakati nê ri më pa xwÿnhjaja pa më kâm mëmoj mex jarênh o ri më hkôt ixa. Á na pa hte më hipêx anhÿr o ri ixa. Jakamâ e wa ma akupÿm Juâw wÿr tê nê á kâm ijarênh anê.

⁶ Kê ijarênh ma nê ixkôt hamaxpêr tÿx nê tee ri ixkukamâ hamaxpêr kêt nê. Koja á amnhî nhîpêx anê nê hamakêtkati nê ri pa. E wa tokyx ma akupÿm tê nê kâm á ijarênh anê. Anê.

Jejus kot tanhmâ Juâw Paxis jarênh to Rukre 7.24-35

⁷⁻⁹ Nhûm pre á Jejus Juâw Paxis kôt wa pa ho wa pa xwÿnhja wa kâm amnhî jarênh anê nê akupÿm hwÿr wa kumê nhûm wa ma akupÿm hwÿr tê. Hâmri nhûm Jejus më kot mar o kuhê xwÿnhjê mã tanhmâ Juâw Paxisja jarênh to nê më kâm:

—Na ka pre htem kapôt á Juâw Paxis mar kaxyw ma hwÿr mra. Nom ê mex á omunh kaxyw rÿ hpîjaâm kâm tanhmâ kapêr to há mar kaxyw na ka prem hwÿr amrar kêt nê. Tîrtûm nhÿ há kapêr o pa jakamâ na ka prem ate mar kaxyw ma hwÿr mra. Tîrtûm nhÿ há ixkukamâ ijarênh o pa xwÿnh na. Ixpê Tîrtûm kot më akaxyw ixâm xwÿnh á na hte ijarênh o pa. Nê hprî há tanhmâ më amâ ijarênh to. Jakamâ kapêrja mex o kot wam Tîrtûm nhÿ há kapêr jarênh xwÿnhjê kapêr piitâ hakrenh par.

¹⁰ Tîrtûm kapêr á kagâ htûm kot Juâw kukamâ tanhmâ harênh to nê harênh kot:

Kot paj Ixkra hkukamâ ma më hwÿr harênh xwÿnhja më nhûm ma ri kutêp më kâm harênh o pa. Më kot mar nê kutêp tãm amnhî nhîpêx o pa kaxyw.

—Anhÿr o Tîrtûm Juâw Paxis kukamâ harê nhûm prem há kagâ. Tã nhûm ixkukamâ më awÿr kumê.

¹¹ Juâw Paxisja na mex kumrêx. Na pre hprî há ixkukamâ tanhmâ ijarênh to ho pa. Tã nom ixkôt më pa ho më pa xwÿnhjê hkînâ na pre ixkôt pa ho pa hkêt nê. Jakamâ ixkôt më pa ho më pa xwÿnhjaja kot ixkôt hprî há ixkapêr mar o pa jakamâ na më mex o më kot Juâw Paxisja jakrenh. Anê.

¹²⁻¹³ —Na pre finat Mojes kumrêx më kâm Tîrtûm kapêr kwÿ há kagâ. Tã nhûm hpânâ Tîrtûm nhÿ há kapêr jarênh xwÿnhjaja Mojes mÿr pê hkwy há kagâ. Nhûm prem kamâ harê nê kuma nê hkôt amnhî nhîpêx o pa. Hâmri nhûm Juâw Paxisja më mÿrpê kato nê tãm Tîrtûm kapêr o më ahkre ho ri pa. Tã pa hpânâ ho më ajahkre ho ri më akôt ixa nhûm më ohtô nê inhma nê ixkôt amnhî

xunhwÿ nê kâm ixkapêr kôt pix mã amnhî nhîpêx o ri pa hprâm nê.

¹⁴ —Amnepêm na pre Tîrtûm nhÿ há kapêr jarênh xwÿnhjaja mëhõja kukamâ tanhmâ harênh to ho pa. Nê më kâm harênh o: “Koja nhÿrmâ mëhõ te Eris kot amnhî nhîpêx pyrâk o amnhî nhîpêx nê më awÿr mô. Nê më amâ Tîrtûm kot më awÿr mënh mã xwÿnhja jarênh o pa ka më ama.” Anhÿr o më kâm mëhõ jarê. Tã kot paj më amâ kot hkukamâ harênh xwÿnhja nhÿi jarê ka më inhma. Nã Juâw Paxisja kukamâ na prem á harênh anhÿr o pa.

¹⁵ —E kot pa më amâ më piitâ htÿx ri tanhmâ më hamaxpêr to ho më pa há më amâ më harê ka më harênh ma.

¹⁶ Te mëhprîre kot amnhî nhîpêx pyrâk o na htem amnhî nhîpêx. Mëhprîrejaja na htem më ôrkwy kapem mëmoj to amnhîkati nê tee ri hkwyjê kot amnhî nhîpêx pumu nê më kâm:

¹⁷ Kwa na pa më amâ gre htã ka më ixkutâ anhökrepôx kêt nê. Pa më ja há më apumu nê hpânâ më amâ më htyk jarê htã ka më akaprî nê amÿr kêt nê. Kwa më ri á amnhî nhîpêx anhÿr kêt nê. Anê.

—Mëhprîjaja na htem á axpên mã kapêr anê. Tã te më ate më urâk. Tîrtûm kot më awÿr ý há kapêr jarênh xwÿnhjê rênh tã ka më te mëhprîre kot amnhî nhîpêx pyrâ nê më ama nê âm më ama nê më hkôt amnhî nhîpêx kêt nê.

¹⁸ —Juâw Paxis na pre më awÿr mô nê ixkînâ apkur mex o ri pa hkêt nê. Nê ixkînâ á wîhti ho hkôm kêt nê. Ka më ja há omu nê hkaga nê atÿx ri Satanasti nhÿ há tanhmâ kot amnhî nhîpêx to há hkamnhîx. Hâmri nê mëhprîre kot amnhî nhîpêx pyrâ nê hkôt amnhî nhîpêx kêt nê.

¹⁹ Tã hãmri pa hpânâ më awÿr mô nê Juâw Paxis rom apkati më ixâpkur mex o ri më akôt ixa. Nê kurom më akutâ wîhti hkwy ho ixkôm o ri ixa. Tã ka më ja há xpumu nê atÿx ri ixâpkur rûnh nê xpipân o ri ixa há ixkamnhîx nê á axpên mã ixto akapêr anê. Nê më kot amnhî tomnuj xwÿnhjê hkôt ri ixa xwÿnh á axpên mã ijarê. Á na ka htem axpên mã ijarênh anê. Jao te më ate Juâw Paxis nhîpêx pyrâ nê ixkaga nê ixkôt amnhî nhîpêx kêt nê. Na hte á htÿx ri tanhmâ më hamaxpêr to ho më pa xwÿnhjaja amnhî nhîpêx anê. No tãm ri më hamaxpêr xwÿnhjaja na htem ahpÿnhâ wa ixte amnhî nhîpêx á wa xpumu nê axpên mã wa ijarênh o: “Nã ahpÿnhâ wa kot amnhî nhîpêx tã no âm hamê Tîrtûm nhÿ há kapêr mex o pa. E pu më wa urâk nê Tîrtûm kôt amnhî xunhwÿ.” Anhÿr o axpên mã wa ijarê. Anê.

Mê kot Tirtûm kôt mê hamaxpêr kêt xwÿnhjê jarênh

Rukre 10.13-15

²⁰ Na pre hte Jejus krî piitâ hkôt pa nê krî nhô xwÿnhjê mâ kapêr nê mê kot amnhî tomnuj â mê kâm kapêr. Korajî mê Pese nhô xwÿnhjê kumrêx mâ kapêr nê mê kâm:

²¹⁻²² —E mê inhma. Amnepêm krî pê Sitô mê Xir wa kamâ mê pa xwÿnhjaja na prem tanhmâ amnhî tomnuj tÿx to ho pa nhûm Tirtûm tee ri ja hâ mê omu nê mê kot amnhî tomnujta â tanhmâ mê ho. Tâ kwa mê o kora Korajî mê Pesêj nhô xwÿnhjaja. Ra ixte mê amâ aa mê ate mêmoj pumunh kêt kwÿ ho anhÿr rax tâ ka mê omu nê am omu nê amnhî tomnuj kaga hkêt nê. Arî tanhmâ amnhî tomnuj to ho ri apa. Mÿrapê kot kaj mê amex kêt nê. Kop apu Sitô rÿ Xir kamâ mân ixte mê kâm aa mê kot mêmoj pumunh kêt kwÿ ho anhÿr o ri ixpa ronhÿx mê omu nê mê arom amnhî kaxyw ixkôt hamaxpêr tÿx kurê kumrêx. Nê tee ri kot tanhmâ kot amnhî tomnuj to hâ amnhî pumu nê hkaprî nê hkaga hpa. No mê kajaja na pa hte tee ri mê amâ aa mê ate mêmoj punuj kêt kwÿ ho anhÿr o ixpa kaprÿ. Ka mê ja hâ ixpumu nê am ixpumu nê amnhî tomnuj kaga hkêt nê. Jakamâ koja nhÿrmâ Tirtûm tanhmâ mê atomnuj tÿx to. Nê tanhmâ Sitô mê Xir wa kamâ mê pa xwÿnhjê jarênh to nhûm mê kot amnhî tomnuj mÿrapê amnhî xâ htÿx kamâ hamak râhâ ho pa. No mê kajaja mê ate amnhî tomnuj tÿx o mê hakrenh jakamâ koja Tirtûm mê hkînhâ mê atomnuj tÿx kumrêx. Ka mê amnhî xâ htÿx kamâ ajamak râhâ ho ri apa kâm ga. Anê.

²³⁻²⁴ Nhûm pre â Jejus mê kâm kapêr anê. Nê hpânhâ Kapanau nhô xwÿnhjê mâ kapêr nê mê kâm:

—No mê apê Kapanau nhô xwÿnhjaja. Kot kaj mê ajaxwÿja mê urâk nê amex kêt nê. Ra ixte mê amâ aa mê ate mêmoj pumunh kêt kwÿ ho anhÿr rax nhûm mê ate hâ ixpumunh tâ amnhî tomnuj kaga hkêt tâ Tirtûm mê wa inhô krî hwÿr akrâ. No am hwÿr akrâ kaprÿ. Kot kaj mê atô hwÿr axâpir kêt nê. Kop apu Sotô nhô xwÿnhjaja mân kot â ixte amnhî nhîpêx anhÿr â ixpumunh ronhÿx mê ra kot amnhî tomnuj kaga nê ixkôt amnhî xunhwÿr kurê kumrêx. No mê kajaja na ka mê â amnhî nhîpêx anhÿr kêt nê. Jakamâ kot kaj mê nhÿrmâ ma kuwy maatita wÿr ajapêx pa kâm ga. Anê.

Jejus kot ô Papaj mâ amnhî jarênh

Rukre 10.21-22

²⁵⁻²⁶ Tâ nhûm Jejus Tirtûm mâ amnhî jarê nê kâm:

—Pa Papaj? Nâ apê mê inhô Pahi Maati na ka. Pikap ri mê pa xwÿnhjaja nê kaxkwa kamâ mê pa xwÿnhjaja apê mê xipiitâ mê inhô Pahi Maati na ka. Am hâMRI na

ka hte amnhî nhîpêx mex o ri apa. Na ka hte mê âhpumunh tÿx â mê kot amnhî to jarkrar xwÿnhjê mâ axâhpumunh tÿx o amnhîrit kêt nê. Am mê âhpumunh kêt â mê kot amnhî jarênh xwÿnhjê pix mâ na ka hte axâhpumunh tÿx o amnhîrit nhûm mê tapxipixjaja ja hâ apumu. Nâ am hâMRI. Am hâMRI na ka hte amâ hprâm xâ hkôt â mê piitâ mê hipêx anhÿr o ri apa Papaj. Jakamâ mê kot amnhî to hkryre xwÿnh pixjaja na htem hprî hâ ate amnhî nhîpêx kôt apumunh o pa. Anê.

Nhûm pre â Jejus Tirtûm mâ amnhî jarênh anê.

²⁷ HâMRI nê hpânhâ mê kot mar o kuhê xwÿnhjê mâ kapêr nê mê kâm:

—Nâ na pre ra Inhîpêexâja inhîhkra kamâ mêmoj piitâ hagjênh pa. Ixte kâm ho amnhîptâr o ixpa kaxyw. Jakamâ tapxipix na kot ixpê Kra hâ ixpumunh par. No jar pika ja kamâ mê pa xwÿnhjaja na mê kot ja hâ ixpumunh kêt. Nê papxipix na ixte Inhîpêexâ kot tanhmâ amnhî nhîpêx to hâ omunh par. Jakamâ na pa hte â amnhî nhîpêx o ri ixpa anê nê inhmâ hprâm xâ hkôt mê hkwyjê mâ ho amnhîrit o ri ixpa. Jakamâ nhûm mê ixpyrâ nê Inhîpêexâ kot tanhmâ amnhî nhîpêx to ho pa hkôt omu.

²⁸⁻³⁰ —Nê tee ri amnhî kukamâ mê ajamaxpêr o ri apa xwÿnhjaja te mê ate mêmoj pyti rax tur nê ahte ho apa pyrâk. Kwa mê ixkôt amnhî xunhwÿ nê ixte amnhî nhîpêx â ixpumu. Ixte mê akamâ ixukaprî xwÿnh na pa. Na pa hte mê akutâ inhnojârê râhâ ho ixpa. Jakamâ kot kaj mê ixkôt amnhî xunhwÿ pa te ixte mê anê mêmoj pyti ho ixwÿrk pyrâk o mê anhîpêx nê tãm mê axunhwÿ ka mê tãm ajamaxpêr nê tãm amnhî nhîpêx o ri apa. Mo kaxyw koja ixkôt mê kot amnhî nhîpêx o pa xwÿnhjaja tee ri amnhî kukamâ hamaxpêr o pa? Nâ na htem ixkamnâr rom hamakêtkati nê amnhîx ri pa ho pa. Anê.

12

Jejus kêp arîgromnu hpâm

Makre 2.23-28; Rukre 6.1-5

¹ Tâ nhûm Ijaew nhô arîgromnu pê sapja kato. HâMRI nhûm Jejus mê hkôt ri mê ixpa ho mê ixpa xwÿnhjê mê pa mê ma mê hpur kôt ri nhÿhÿm ri ixpa. HâMRI nê ra mê inhmâ prâm nê mêmo hy te kot harôj pyrâk xwÿnhja kwÿ rê nê kugrâ nê ma Jejus kôt hkanhar o mô. Mê ixpê Ijaew na pa htem axpên pur kâm â amnhî nhîpêx anhÿr o ixpa.

² HâMRI nhûm mê ixkwÿ pê Parijew nhô xwÿnhjaja kâm mêmoj tâ Jejus o kapêr prâm jakamâ â mê ixte amnhî nhîpêx anhÿr â mê ixpumu nê mê ixtâ Jejus kukjêr kurê kumrêx nê kâm:

—Kwa Tirtûm kapêr tûm kot mê panhō arîgromnu hâ mê pahte mê hpur kâm mêmoj

nhîkênh nê mê pahkurê htâ nhûm ri akôt mê pa ho mê pa xwýnhjaja axtem nê ã amnhî nhîpêx anhÿr o ri akôt pa. Mêmo hyta rê nê akôt hkanhar o pa. Kwa mê kãm anê kê mê ã amnhî nhîpêx anhÿr kêt nê. Na htem arîgromnu hã mêmoj tâ ãpênh kêt kênã. Anê.

³⁻⁴ Hãmri nhûm mê kuma nê hprî hã mê kãm Tirtûm kapêr jarê nê mê kãm:

—Tk. Xãn ka htem Tirtûm kapêr ã kaga htûm kot pahi Tawi kot tanhmã amnhî nhîpêx tota kamã harênh nê mar kêt nê? Na pre hkôt ri mê pa xwýnhjê mê nhûm mê prãm xaj Tirtûm mã amnhî jarênh xã hã ixkre hwÿr agjê. Hãmri nhûm mê õ patre maatiija mê kãm prãm tÿx ã mê omu nê kãm mê hkaprî nê mê kãm mêmoj gô. Mê kot Tirtûm noo mã pâwti jaxwÿr xwýnhhta gô nhûm mê kuku. Tirtûm kapêr ã kaga htûm kot ja nê mê hkurê htâ nhûm mê kãm prãm tÿx ã mê omu nê mê kamã ukaprî xaj mê kãm kugô. ãm mê õ patre pix kot ja hkur kaxyw tâ nhûm mê kãm kugô nhûm mê kuku. Tã nom nhûm Tirtûm ja hã mê omu nhûm ja kêp omnuj kêt nê. Kot mê kamã ukaprî nê mê kãm õr ã omu nhûm ja kãm mex nê.

⁵ —Mê panhõ arîgromnu htã na hte patrejaja arî hã Tirtûm mã amnhî jarênh xã hã ixkre kamã ãpênh o pa. Tirtûm kapêr ã kaga htûm kôt na htem arîgromnu htã nhûm mê arî hã apê nhûm Tirtûm pê jamnuj kêt nê. Kumã mê ãpênh xwýnh kênã.

⁶ ãm hãmri na pa mê amã ja jarê. Tirtûm mã amnhî jarênh xã hã ixkreta mex tâ nom ixpê Tirtûm Kra jakamã inh mex o ixte ixkreta jakrenh.

⁷ Tirtûm kapêr ã kaga htûm kot ja harênh kot:

Kêr ka mê inhmã amnhî jarênh kaxyw nê ãm inhmã mêmoj nhõr pix pê inhmã amnhî jarênh kêt nê. Mê mãânên mê kamã axukaprî o ri apa pê inhmã amnhî jarê. Ja na kêt inhmã hprãm.

—Ã harênh kot anhÿr. Tã mê ate aprî hã ja mar ronhÿx ka mê ixkôt mê pa xwýnhjê kot mêmo hy rênh nê hkanhar o môr ã mê omu nê ri tanhmã mê ho akapêr to hkêt nê. ãm mê kãm prãm ã mê omu nê mê kamã axukaprî nê.

⁸ —Kêt pa na pre Tirtûm mê akaxyw ixãm nê mê awÿr inhmê. Jakamã papxipix na pa hte arîgromnu hã tanhmã mê kot amnhî nhîpêx to hã mê kãm karõ. Kwa mê jajê pumu nê mê kamã axukaprî kêt wehe. Kwãr mê mãmrî mêmo hyta rê nê hkanhar o ixkôt mô. Anê.

*ÿkra grã xwýnh jarênh
Makre 3.1-6; Rukre 6.6-11*

⁹ Nhûm pre ã Jesus Parijew nhõ xwýnhjê mã kapêr anê hãmri nê Tirtûm kapêr o mê ahkre xã hã ixkre hwÿr tê nê axã.

¹⁰ Nhûm Parijew nhõ xwýnhjaja tanhmã ho kapêr to kaxyw htãnopxar o kuhê. Jakamã nhûm ixkre kamã mêhõ my ÿkra grã xwýnhjaja mê pikuprõnh xwýnhjê nhîhkõ hã nhÿ nhûm Parijew nhõ xwýnhjaja omu nê axpên mã:

—Kwa pu mê jar pakuhê nê Jesus kot tanhmã amnhî nhîpêx to hã omu. Xã koja arîgromnu hã müjti ho mex nã? Kojã ho anê nê Tirtûm kapêr tûm kuhpa hã amnhî nhîpêx. E pu mê kop xa nê hã omu. Anê.

Hãmri nê hã Jesus kujka nê kãm:

—E mê inhmã mêmoj jarê. Xã na htem arîgromnu hã akupÿm mê ho mex nhûm Tirtûm kãm ja mex nê nã? Anê.

¹¹ Hãmri nhûm mê hamaxpêr kôt mê omunh mex nê mê kãm:

—Kwa tanhmã na htem arîgromnu hã amnhî nhîpêx to ho pa wehe? Xã koja we mê akrit õwêhti ahkrehti kamã tẽm ka omu nê ãm omu nê arîgro mex jamãr pê ho axãpir kêt nê? Nã kot kaj mê tee ri omu nê ho axãpir kurê kumrêx.

¹² Arîgromnu hã mê ho mexja ja mex kênã. Tirtûm mã mê pahpê panhÿja na mê pamex o mê hkrit jakrenh jakamã kêr pu mê tee arîgromnu htã pu mê hã tanhmã axpên to mex to ho papa. Ja na Tirtûm kãm hprãm.

Anhÿr o mê kãm kapêr.

¹³ Hãmri nê hpãnhã myta mã:

—E anhÿkra katãt. Anê.

Hãmri nhûm ÿkra katãt nê mex kurê kumrêx.

¹⁴ Hãmri nhûm Parijew nhõ xwýnhjaja tee ri ja hã omu nê Jesus kamã gryk nê. Arîgromnu pê sap ã kot ho mex jakamã nhûm mê kamã gryk tÿx nê. Hãmri nê ma mra nê hapõj nê hã axpên kujjêr o kuhê nê axpên mã:

—Kwa ã kot amnhî nhîpêx anhÿrja mÿrapê tanhmã kot puj wem ho? ã kapêr anhÿrja o te mê papamjaja mê pahte hkÿnhã mê kamã paxukaprî kêt pyrãk ã mê pajarê. Kojã mê pahkwÿjaja kuma hãmri nê mê pahte amnhî nhîpêx kaga nê amnhî kaxyw hkõt pix mã hamaxpêr. Kwa tanhmã kot puj wem ja nê ho?

Anhÿr o axpên kujjêr o kuhê.

*Jesus kêp Tirtûm kot mê pahwÿr mênh
xwýnh ã harênh*

Makre 3.7-12

¹⁵ Hãmri nhûm Jesus amnhî tâ Parijew nhõ xwýnhjê jamaxpêr kôt mê omu hãmri nê mê kêp kato nê hpãnhã ma nhÿhÿm krî hõ hwÿr ma tẽ. Nhûm mê ohtõ nê omu nê ma hkõt mra nhûm mê omu nê akupÿm mê kãm mê ã xwýnh piitã ho mex.

¹⁶ Hãmri nê mê kãm:

—E na pa akupÿm mê ato mex. Nom kêr ka mê amnhî tâ ixto axãmra ho ri apa hkêt

nê. Ixpê Tirtûm Kra hã mē kãm ijarēnh kêt nê. Æm kwarī kumrêx.

Anhÿr o mē kãm kapêr.

¹⁷ Na pre ra amnepê m Tirtûm nhÿ hã kapêr xwÿnh finat Ijaisja Jejus kukamã mē kãm tanhmã harēnh to nê hã kagã. Te Tirtûm tãm kapêr pyrãk o harê nê hã kagã. Nê hã kagã ho:

¹⁸ Ota ixkôt amnhî nhîpêx o pa xwÿnhnta xa. Pa na pa amnhî kaxyw Æm. Inhmã hapêê. Na pa hte tanhmã kot amnhî nhîpêx to ho pa hã omu nê ixkînh tÿx nê. Kot paj hwÿr amnhî karô mē nhûm hwÿr axã nhûm ma ÿ hã pika piitã hkôt mē piitã mē kãm ijarēnh o ri mē hkôt pa. Mē kot hprî hã ixte tanhmã amnhî nhîpêx to nê tanhmã ijamaxpêr to hã ixpumunh kaxyw.

¹⁹ Nom koja ri amnhî to Æmra o pa hkêt nê. Rÿ kãm amnhî to rax prãm o mē kãm tanhmã amnhî nhîpêx to ho pa hkêt nê.

²⁰ Æm kapêr xukaprî pix o koja mē hirerek xwÿnhjê mã kapêr o pa. Nê mē kot tee ri amnhî nhîpêx Æ amnhî pumunh xwÿnhjê kamã ukaprî o pa. Nê mē kot htÿx ri amnhî nhîpêx o mē pa xwÿnhjê kutã nojarêt rãhã ho pa jakamã nhûm mē hpãnhã tãm amnhî nhîpêx o pa. Koja Æ amnhî nhîpêx anhÿr o ri mē hkôt pa rãhã ra akupÿm mēmoj piitã tãm haxwÿr pa.

²¹ Æ kot amnhî nhîpêx anhÿr o pa jakamã koja pika piitã hkôt mē pa xwÿnh kwÿjaja kukwak ri amnhî kaxyw Tirtûm kôt hamaxpêr nê hkôt amnhî xunhwÿ. Anê.

Na pre Æ finat Ijaisja Tirtûm nhÿ hã kormã Jejus wrÿk nê kator kêt ri tanhmã kot amnhî nhîpêx to ho pa hkukamã harēnh nê hã kagã anê. Tã nhûm mē hwÿr wrÿ nê Æ mē hkôt amnhî nhîpêx anhÿr o pa.

Jejus mē mēkarômnuti wa harēnh

Makre 3.20-30; Rukre 11.14-23, 11.31-32, 12.10

²² Tã nhûm prem Jejus wÿr mēhõ myja o mō. Mēkarômnuti kot hwÿr Ær nê ho nohkre nê ho kapêr kêt xwÿnhnta nhûm mē hwÿr o mō. Hãmri nhûm omu nê nê mēkarômnuti jano nê akupÿm ho mex kurê kumrêx nhûm akupÿm rît mex nê akupÿm kapêr mex nê.

²³ Hãmri nhûm mē amnhî jaêr pē omu nê kamã no pyma nê hã axpênh kujêr o:

—Kokÿÿ. Jejus na hte Æm mē ho mex o mē ho mex o pa. Mãn kêp Tirtûm kot mē pahwÿr mēnh mã xwÿnhnta na nã? Æ na hte Æ amnhî nhîpêx anhÿr o pa. Mãn kêp pahi finat Tawi kanrêhã tãmnhwÿta na nã? Anê.

²⁴ Nom nhûm Parijew nhõ xwÿnhjaja Æ Jejus kot amnhî nhîpêx anhÿr Æ omu nê kêp mēkarômnuti hkwy hã hkamnhîx. Jakamã

mē kot hã axpêr kujêr Æ mē kuma nê mē kãm:

—Tk pêr hinhu nhîkôoti nhÿ hã na hte mē nê amnhî kwÿjê japôx o pa. Anê.

Hinhu nhîkôoti nhÿ hã hõ pê Satanasti nhûm prem Æ Satanasti nhÿ hã Jejus kot amnhî nhîpêx Æ hkamnhîx anê.

²⁵ Nhûm ra mē hamaxpêr kôt mē omunh mex jakamã mē kãm:

—Kwa mē inhma mē ate ixpê Satanasti hkwy hã ixkamnhîx xwÿnhjaja. Koja pika nhõ xwÿnhjaja axpênh kutã amnhî xunhwÿ nê axpu hãmri nê anhrã nê ma ahpÿnhã ri pa. Hãmri nê amnhî krã hkôt ri tanhmã amnhî nhîpêx to ho pa. Jakamã nhûm mē ò pahija mē hamãr kêt nê. Nê koja krî nhõ xwÿnhjaja. Rÿ mē kot axpênh to hkwy xwÿnhjaja mēmoj tã axpênh kãm gryk nê axpênh kutã amnhî xunhwÿ. Hãmri nê ahpÿnhã awry hã pa nhûm mē ò pahija tee ri kãm mē hamãr prãm kaprÿ. Mo mē hkwyjaja kot ri mē hamãr o pa? No koja pahija tãm amnhî nê amnhî kwÿjê janor kêt nê.

²⁶ Tã ja pyrã nê ixte Satanasti nhÿ hã tanhmã amnhî nhîpêx to ho ri ixpa ronhÿx pa ri mē nê amnhî kwÿjê janor kêt nê.

²⁷ —No mē akwÿjaja? Xã Satanasti nhÿ hã na htem mē nê mēkarômnuti japôx o pa? Kêp apu pa ixte ÿ hã mē nê amnhî kwÿjê japôx ronhÿx mē akwÿjaja ixpyrã nê ÿ hã mē nê amnhî kwÿjê japôx o pa. Nã Tirtûm nhÿ hã mē ixte mē nê mē hapôx o ixpa kênã. Jakamã mē ate Æ ijarēnh anhÿrja mex kêt.

²⁸ Tirtûm Karô nhÿ hã ixte mē nê mē hapôx jakamã kwa mē ja hã ixpumu nê ixte mē ato amnhîptãr kaxyw Tirtûm kot mē awÿr inhmēnh kôt ixpumu kêt wehe. Pa na ka htem ijamãr o apa.

²⁹ —Satanastija Æhpumunh tÿx jakamã na htem tee ri kêp hkôt mē kot amnhî xunhwÿr xwÿnhjê pytãr kaxyw nhûm mē nê mē omunh mex nê. Tã nom ixãhpumunh tÿx o ixte Satanasti jakrenh par jakamã na pa hte kêp mē utã nhûm mē hpãnhã ixkôt ri amnhî nhîpêx.

³⁰ —Ra mē amã ixkapêr mar prãm tã nom kormã ixkôt amnhî xunhwÿr kêt nê. Kwa wem ma amnhî to amôr gri nê tokyx ixkôt amnhî xunhwÿr kêt wehe. Kot kaj mē anhÿr kêt hãmri nê mē apê ixkutã amnhî xunhwÿr xwÿnh pyrãk o amnhî nhîpêx.

³¹⁻³² —Nê koja mēhõ ixkapêr ma nê kãm ixprãm kêt nhûm Tirtûm ixtã omu nom tokyx tanhmã ixtã ho hkêt nê. Koja kormã amnhî tã hamã. Karô kot axte kãm ijarēnh o amnhîrît nhûm jatã kot mar nê kãm ixprãm nê ixkôt amnhî xãm prãm xãj nhûm kormã amnhî tã hamã. Nom koja Karô xatã mē kãm tanhmã ixto amnhîrît to htã nhûm mē kuma nê Æm kuma nê te mē kêp amnhî jamak pro pyrãk. Jao ra Karô hã hpijaãm kêt o amnhî nhîpêx. Mÿrapê koja Tirtûm

nhÿrmã amnhî xwar te kêp amnhî jamak pro pyrãk o mê hipêx nhÿm mê tee kãm amnhî kaprî kaprÿ. Hãmri nê amnhî xã htÿx kamã hamak o pa xãta wÿr ma pa nê kamã pa rãhã nê pa ho pa. Anê.

Mê pajamaxpêr xã hkôt tanhmã ri mê pakapêr to

Rukre 6.43-45

³³ Nhÿm Jejus arî Parijew nhô xwÿnhjê mã kapêr nê mê kãm:

—Nê kot kaj mê atô anhô mêmô pãr nhÿm amã ô mex nê. Ô rax nê. Ka omu nê akînh nê amnhîm mex ã harê. No koja apê ô hkêt ka tee ri omu nê mex kêt ã harê. Na htem ã amnhîm mêmô xô hpãr pumunh kôt tanhmã kute hã harênh anê. Ja pyrã nê na htem tanhmã mê kot amnhî nhîpêx to hã mê omunh kôt tanhmã mê harênh to. Mê kot amnhî tomnuj xwÿnh ã mê harê rÿ mê kot amnhî to mex xwÿnh ã mê harê.

³⁴⁻³⁵ —Nê koja mêmô hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htÿx ri tanhmã amnhî tomnuj to ho pa. Na htem ahpÿnhã amnhî jamaxpêr xã hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xã hkôt tanhmã ri kapêr to ho pa.

³⁶⁻³⁷ Kojã nhÿrmã Tirtÿm mê piitã tanhmã mê kapêr to hã mê mar xã hkôt tanhmã mê harênh to. Jakamã mê akapêr mex o mê apa xwÿnhjaja koja mê amex ã mê ajarê. Nom mê atÿx ri akapêr punuj o mê apa xwÿnhjaja koja mê amex kêt ã mê ajarê. Hãmri nê mê akapêr punuj o apaja mÿrapê mê atomnuj tÿx nê. Anê.

Jejus kot Jôhti jarênh

Makre 8.11-12; Rukre 11.29-32

³⁸ Hãmri nhÿm Tirtÿm kapêr tÿm o mê ahkre xwÿnh mê Parijew nhô xwÿnh kwÿjaja mêmôj tã Jejus wÿ nê kãm:

—Kwa Pahiütü. Mê inhmã aa mê ixte mêmôj pumunh kêt ô ho anê. Kot paj mê omu hãmri nê Tirtÿm kot mê ixwÿr amênh ã apumunh kurê kumrêx. Jakamã e mê inhmã mêmôj to anê nã. Anê.

³⁹ Hãmri nhÿm mê kuma nê mê kãm:

—Tk. Pêr ãm mê ajamaxpêr punuj pix o na ka htem apa. Ixpê Tirtÿm kot mê awÿr inhmênh xwÿnh tã mê ate ja hã ixpumunh kêt. Nê mê ate ja hã axpên mã ijarênh kêt tã ixte mê amã aa mêmôj pumunh kêt ô ho anhÿr kaxyw hã ixwÿ. Nã pa mê amã ho anhÿr kêt nê. Kormã. ãm amnepêm Jôhti kot tanhmã amnhî nhîpêx toja pix kot paj mê amã harê.

⁴⁰ —Tirtÿm nhÿ hã kapêr xwÿnh Jôhtija amnepêm na pre tep rax kumrêxja hÿr

rãhã kukrê. Nhÿm ôxãhkre kamã htÿr nê hkrî hã apkati axkrunêpxi hãmri nê htÿr rãhã ôxãhkre rÿm kato. Tã ixpê Tirtÿm kot mê awÿr inhmênh xwÿnh kot paj nhÿrmã kênh kre kamã ixtyk nê inhnôr ã apkati axkrunêpxi. Jôhti hkînhã ixtyk kumrêx nê inhnôr ã apkati axkrunêpxi hãmri nhÿm Tirtÿm akupÿm ixto itÿr.

⁴¹ —Nê koja nhÿrmã Tirtÿm akupÿm mê htyk nê mê hikwÿ xwÿnh piitã akupÿm mê ho htÿr hãmri nhÿm mê piitã Inhîpêexã mê wa ixkutã hkrî pa wa tanhmã mê harênh to. Tirtÿm mê wa ixkuri mê htÿr tÿm nê mê pa ho mê pa mã xwÿnhjê hã mê hkwyjê jarê nê wa ixkuri mê pa ho mê pa hkêt xwÿnhjê jarê. Mê piitã ã ahpÿnhã mê harênh anê. Amari mê pa xwÿnhjaja nê mê ô pahijaja. Jakamã nhÿm Nîniwe nhô xwÿnhjaja tanhmã wa inhmã mê ajarênh to. Jôhti kot mê hwÿr môr nê mê kãm Tirtÿm kapêr jarênh o pa xwÿnhjaja nhÿm mê tanhmã wa inhmã mê ajarênh to nê wa inhmã: “Na pre Jôhtija man mê inhô krî hwÿr mô nê mê inhmã akapêr jarênh o ri mê ixkôt pa. Pa prem kuma nê mê ixte amnhî tomnuj kaga nê akôt amnhî xunhwÿr kurê kumrêx Tirtÿm. No or war akutã mê hkrî xwÿnh kwÿ ata mê na pre Akra Jejus tãm mê hwÿr mô nê mê kãm kapêr o ri mê hkôt pa nhÿm prem mar tã mê ixkînhã mê kot amnhî tomnuj kaga nê hkôt amnhî xunhwÿr kêt nê. Mê ixkurom mê kot Akra mar tã amnhî kaxyw kãm hamaxpêr kêt nê.” Anhÿr o koja mê wa inhmã mê ajarê ka mê tee ri mê ama nê ra mê amã ma nê. Nom ãm mê amã ma kaprÿ.

⁴² —Nê sur kãm mê ô pahi nitita koja mê hpãnhã tanhmã wa inhmã mê ajarênh to nê wa inhmã: “Na pa pre inhmã pahi Sarumãw kot war anhÿ hã ahpumunh tÿx ã harênh ma hãmri nê inhmã mar prãm xãj ma awry hã ô pika hwÿr mô nê omu nê kapêr ma. Hãmri nê ma akupÿm inhô pika hwÿr mô nê ixkwÿjê mã ahpumunh tÿx ã harênh o ri ixpa. Tã Akra Jejus na kot ahpumunh tÿx o pahi Sarumãw jakrenh tã or war akutã mê hkrî xwÿnh kwÿ ata mê. Mê kot kapêr mar tã ixkînhã kãm mar prãm kêt. Na prem kuma nê ãm kuma.” Anhÿr o koja wa inhmã mê ajarê. Hãmri nê ja hã mê amã akir ka mê tee ri mar o akri nê amnhî kamã agryk o akri. Nom ãm amnhî kamã agryk kaprÿ. Anê.

Mêkarômnuti kot tanhmã mêmô hto hã harênh

Rukre 11.24-26

⁴³ Nhÿm Jejus arî Parijew nhô xwÿnhjê mê Tirtÿm kapêr tÿm o mê ahkre xwÿnhjê mã kapêr nê mê kãm:

—Te mê ate ixte mêmô nê mêkarômnuti japôx xwÿnhnta pyrãk. Nhÿm te kêp kator nê ma htêm pyrãk. Nê nhÿri amgrã kamã ri pa pyrãk. Kojã ja kêp omnuj nhÿm tee ri kamã

nhÿri hkôt xâ japêr o pa. Nom tee ri hapêr o pa kaprÿ.

⁴⁴ Hâmri nê tanhmâ amnhÿ kukamâ hamaxpêr to nê hamaxpêr o: “E kot paj ma akupÿm mê kot nê ixkator xwÿnhnta wÿr tê nê axâ nê kamâ mân ri ixpa.”

⁴⁵ Anhÿr o hamaxpêr hâMRI nê ma akupÿm hwÿr tê. Nom kormâ akupÿm hwÿr àr kêt ri nhÿm kamâ amrakati nê ri pa. Jakamâ nhÿm akupÿm hwÿr axâ. Nom ahte hwÿr àr kêt nê. Amnhÿ kôt hkwyjê ho 7 nê hwÿr mê ho gjêx pa. Mê kêp 7jaja nê wamta mê nhÿm mê piitâ hwÿr gjêx pa. No mê kêp 7jaja na omnuj tÿx o kot wamta jakrenh jakamâ nhÿm mê kot hwÿr gjêx xwÿnhnta mê ý hâ ra amnhÿ tomnuj tÿx nê oprê htÿx o pa. Wam pyxire kot hwÿr àrta nhÿ hâ nhÿm amnhÿ tomnuj o ri pa nom kawax pê oprê. Tâ nhÿm ra axte hwÿr mê ohtô nê gjêxta nhÿ hâ hâMRI oprê htÿx kumrêx. Ja pyrâ nê kot kaj mê tokyx ixkôt amnhÿ xunhwÿr kêt nê hâMRI nê amnhÿ tomnuj tÿx pix o ri apa. Anê.

Jejus kot tanhmâ hkwyjê jarênh to hâ harênh

⁴⁶ Nhÿm Jejus arÿ mê ahkre ho nhÿ. Rôm nhÿm katorxâ nê htôjaja nhÿhÿnh hwÿr môn pôj. Nom kormâ hwÿr gjêx kêt nê. Mê kot hâ htu rax jakamâ nhÿm mê tee ri hwÿr gjêx kaxyw kormâ kapôt â hâ mê omunh o kuhê.

⁴⁷ Hâmri nhÿm mêhôja kapôt â mê omu nê Jejus mâ mê harê nê kâm:

—Kwa Pahihti. Ota akatorxâ mê atôjaja awÿr môn pôj nê tee àr kaxyw. O mÿj mê kapôt â kuhê. Anê.

⁴⁸⁻⁵⁰ Hâmri nhÿm kuma nê kâm:

—Tôe. Nâ kot pa ixkato nê mê omu. Inhmâ mê hapêê. Nom kot kaj mê atô Tirtÿm kapêr ma nê hkôt amnhÿ xâm nê hkôt amnhÿ nhÿpêx. Hâ kot kaj te apê ixtô rÿ ixkatorxâ pyrâk o pu mê axpên nhÿpêx o ri papa. Pa inhmâ ixkatorxâ nê ixtôjê japê pyrâ nê määnên inhmâ mê ajapê nê. Anê.

13

Mêmo hy hkre xwÿnh jarênh

Matêwre 13.18-23; Makre 4.1-9; Rukre 8.4-8

¹ Hâmri nhÿm Jejus mê kâm kapêr pa nê ixkre rÿm kato nê ma himô rax wÿr tê nê gô mÿri mê kâm ujarênh kaxyw nhÿ. Pa mê ixpê hkôt mê ixpa ho ixpa xwÿnhjaja ma hkôt mra.

²⁻³ Hâmri nê gôta wÿr pôj nê mÿri ixkrÿ. Nhÿm mê Jejus â htu rax nê nhÿm tee ri mê omunh o nhÿ. Hâmri nê hamaxpêr nê kânhmâ xa nê tê nê pâr krem axâ nê pâr kre kamâ mÿtÿm awry rÿm mê ahkre ho nhÿ nhÿm mê piitâ omunh nê mar mex o hkrÿ. Nhÿm mê kâm ujarênh o mê ahkre ho nhÿ. Nom mê kâm tãm ujarênh kêt nê. Mê kot Tirtÿm kapêr mar nê tanhmâ hkôt amnhÿ

nhÿpêx to ho paja nhÿm hâ kuxi nê mê kâm harênh o nhÿ nhÿm mê amgrâ kamâ kÿx pê mar o hkrÿ. Nhÿm mê kâm:

⁴ —E mê inhma. Kojâ mêhô ma pur mâ mō nê pur kâm mêmo hy ho ukapêr o ri pa. Nom nhÿm hy piitâ amex kâm rôrôk kêt nê. Kojâ hkwyjâ ahpÿnhâ nhÿri rôrôk. Kwÿ aptÿx kâm rôrôk nhÿm kuwênhre omu nê hwÿr mra nê hkrêr pa.

⁵ —Nê koja kên kâm hkwy rôrôk nê ra higrôt kutâ nojarêt nê higrôt pa. Nom nhÿm kamâ aptÿx nê kêp pika hkryre.

⁶ Jakamâ nhÿm higrôt nhÿm hâ myt aha nê arÿgro htÿx mê nhÿm grâ pa. Harê hkryre jakamâ grâ pa.

⁷ —Nê koja mrônhÿ kamâ hkwy rôrôk nê higrôt tâ no nhÿm utÿja kêp amÿtâ nhÿm ô hkêt nê.

⁸ —No kêt hirâ kamâ pika mex kâm rôrôk xwÿnhja hirâ kamâ rôrôk jakamâ higrôt mex nê piitâ ô rÿnh nê. Kamâ ô hkwy kêp 30 nê kamâ hkwy kêp 60 nê kamâ hkwy kêp 100. Â mê ujarênh kot anhÿr.

⁹ Kwa kêr ka mê ixujarênhja ma nê kâm ajamaxpêr tÿx râhâ ho apa. Anê.

Mêmo kaxyw Jejus kot mê ujarênh o mê ahkre

Makre 4.10-25; Rukre 8.9-15

¹⁰ Hâmri pa mê ixpê Jejus kôt mê ixpa ho ixpa xwÿnhjaja Jejus kot mê kâm â ujarênh anhÿrja â kuma nê tee ri hkukamâ ijamaxpêr. Hâmri nê hâ hkukja nê kâm:

—Kwa axujarênhnta na pa mê ixprÿ hâ hkôt mêmoj pumunh kêt nê. Mon ka hte âm mê ujarênh pix o mê ahkre? Anê.

¹¹ Hâmri nhÿm mê inhmâ:

—Tôe. Nâ kot paj mê amâ harê. Tirtÿm kâm mê ate aprÿ hâ mar prâm jakamâ kot paj ixprÿ hâ mê amâ harê. Mê kot amnhÿ tomnuj kaga nhÿm Tirtÿm kot ja hâ mê omunh nê mê ho hkra. Ja na pa harê. No mÿjjaja mê akÿnhâ kâm ja mar prâm kêt jakamâ na htem ixujarênhja ma nê âm kuma nê htÿx ri pa.

¹² —No kêt mê kajaja na ka mê ixkôt ri apa ho apa. Nê xatâ ixkapêr mar o apa jakamâ na ka mê aprÿ hâ ixkapêr ma. Tâ mê ate ixkôt amnhÿ nhÿpêx o apa jakamâ na pa tanhmâ mê akrâ hto ka mê aprÿ hâ mar mex o mō. No mê kot ixkapêr mar nê âm mar xwÿnhjaja na mê akÿnhâ inhmar tÿx kêt nê. Jakamâ nhÿm Tirtÿm tanhmâ mê hkrâ hto nhÿm mê hâ no hkêt tokyx anê htÿx ri pa.

¹³ “Ixtê mê kâm aa mê kot mêmoj pumunh kêt kwÿ ho anhÿr rax tâ nhÿm mê omu nê âm omu. Nê ixtê amnhÿ nhÿpêxja nhÿm mê kâm hkÿnh kêt nê. Nê mê kot ixkapêr mar tâ âm inhma nê kâm hprÿ hâ inhmar prâm kêt nê.”

—Jakamâ na pa hte â mê kâm mêmoj te ho tãm pyrâ nê harê no âm hâ haxwÿ nê mê kâm ixujarênh anê.

14-15 —Na pre ra Tirtûm nhÿ hã kapêr o pa xwÿnh Ijaisja amnepêm mê hkukamã tanhmã mê harênh to nê hã kagã. Mê kot inhmar nê ãm inhmar xwÿnhjê jarê nê tanhmã mê hkukamã mê harênh to nê mê harênh o:

Koja mê ujarênh mex mar pymaj amnhÿ jamak pro nê amnhÿ no hpro nê hkôt hamaxpêr kêt nê. Jakamã koja mê kãm mê kot amnhÿ nhÿpêx mex prãm kêt nê harênhja ma nê ãm kuma. Nê omu nê ãm omu. Mê kãm hprãm kêt jakamã koja mê ã amnhÿ nhÿpêx anê. Æ mê kot amnhÿ nhÿpêx anhÿr kêt ronhÿx mê ra Tirtûm kapêr ma nê hkôt amnhÿ xunhwÿ. Hãmri nhÿm amnhÿ tã mê omu nê mê nê mê kot amnhÿ tomnuj rênh pa. Hãmri nhÿm mê hkôt amnhÿ nhÿpêx mex nê kapêr mar mex o pa. Tã no nhÿm mê Æ amnhÿ nhÿpêx anhÿr kêt nê. Anê.

—Æ Ijaisja mê hkukamã mê harê nê mê hã kagã anê.

16 —No kêt mê kajaja na ka htem ano ho ixte tanhmã amnhÿ nhÿpêx to ho ixpa hã ixpumunh o ixkôt apa. Nê mê ajamak o ixkapêr mar o ri ixkôt apa.

17 Amnepêm mê akukamã pahijaja nê Tirtûm nhÿ hã mê kãm kapêr o ri mê pa xwÿnhjaja na prem kãm ixpumunh prãm tÿx o pa. Nê mê kãm ixkapêr mar prãm tÿx o pa. No ãm mê akÿnhã ixpumunh nê ixkapêr mar kêt rãhã htyk pa. Kormã ixwrÿk nê jar ixkator kêt jakamã na prem arÿ hÿr nê pa ri ixpumunh kêt rãhã ra htyk pa. Æm mê kapÿipixjaja na ka mê mÿr pê ixte amnhÿ nhÿpêx ã ixpumunh nê ixkapêr mar o ixkôt apa. Tã mê kurom mê ate ano ho ixpumunh nê ajamak o ixkapêr mar o ixkôt apa jakamã kwa mê ja hã amnhÿ pumu nê tãm amnhÿ nhÿpêx o ri apa pê akÿnh nê ri apa. Anê.

Nhÿm pre Æ Jejus mê ixpê hkôt ixpa ho ixpa xwÿnhjê mã kapêr anê.

*Jejus kot hprÿ hã mêmo hy jarênh
Makre 4.13-20; Rukre 8.11-15*

18 Hãmri nhÿm Jejus mê ixpê hkôt ixpa ho ixpa xwÿnhjê mã hprÿ hã mê ujarênhnta jarê nê mê inhmã:

—E kot paj ixprÿ hã mê amã mêmo hy ho ukapêr xwÿnh ã ixujarênhnta jarê ka mê inhma. Nã mêmo hyta te kêp Tirtûm kapêr pyrãk. Nê ahpÿnhã mêmo hy rôrôk ã pikata te kêp mê apê panhÿ ahpÿnhã mê ate Tirtûm kapêr mar nê ahpÿnhã hkôt tanhmã amnhÿ nhÿpêx tota pyrãk.

19 Jakamã mê kot mar xwÿnh kwÿjaja te mê kot aptÿx kãm hy rôrôk nhÿm kuwênh kot hwÿr mmar nê hkrêr par xwÿnhnta pyrãk. Jao Tirtûm kapêr ma no nhÿm Satanasti te kuwênh kot hy krêr parta pyrã nê mê kot mar nê amnhÿ kaxyw hkôt hamaxpêr

nê hkôt amnhÿ xunhwÿr pymaj hãmri ra tanhmã kapêrja nê mê hkrã hto. Jakamã nhÿm mê kuma nom ho hamakêtkati tokyx anê nê axte kãm hamaxpêr kêt nê pa.

20 —Nê mê kot mar xwÿnh kwÿjaja te mê kot kênre kamã hy hkwy rôrôk nê higrôt nê grã par tokyx anhÿr xwÿnhnta pyrãk. Jao Tirtûm kapêr ma nê hkÿnh nê. Nê kãm mar prãm nê.

21 Tã nhÿm mêhõ Tirtûm nê tanhmã mê kãm kapêr to nhÿm mê kuma nê Tirtûm kaga. Te mêmo hy higrôt nom ra grã par tokyx anhÿrta pyrãk.

22 —Nê mê kot mar xwÿnh kwÿjaja te mrônhi kamã hy hkwy rôrôk nê higrôt nhÿm mrônhi kot kêp ãmnar xwÿnhnta pyrãk. Jao mê kãm Tirtûm kapêr mar prãm tã mãânên kãm mê hikukrêx rÿnh nê mê hikãpore rÿnh prãm. Hãmri nê ãm ja pix kukamã hamaxpêr o pa. Nê ja gryk ã axte Tirtûm kapêr mã hamaxpêr nê hkôt amnhÿ nhÿpêx kêt nê.

23 —Nê mê kot mar xwÿnh kwÿjaja te hirã kamã pika mex kãm hy hkwy rôrôk nê higrôt nê ô rÿnhnta pyrãk. Jao ixkapêr ma nê amnhÿ krã him hagjênh tÿx nê. Nê ixkôt ri amnhÿ nhÿpêx mex rãhã ho pa. Jakamã te mêmo hy ô rÿnh nê ô mex pyrãk o amnhÿ nhÿpêx. E Æ ixujarênhja kot anhÿr. Anê.

Harôj kaakre jarênh

Matêwre 13.36-43; Makre 4.26-29

24 Nhÿm Jejus axte mê kot mar o hkrÿ xwÿnhjê mã awjarê nom hprÿ hã mê kãm ujarênh kêt nê. Axte mê kãm mêmoj tã kuxi nê awjarê nê mê kãm:

—Nã nhÿrmã Tirtûm mê kot kormã hÿr ri tanhmã amnhÿ nhÿpêx to ho pa hã mê omunh xã hkôt ahpÿnhã tanhmã mê harênh toja te mê ujarênh ja pyrãk. Koja mêhõ harôj y mex o ukapêr kaxyw ma hpur mã mô. Hãmri nê hkre hpa nê ma akupÿm mô.

25 Tã nhÿm kamãt nhÿm ra gôr nê nô. Hãmri nhÿm kãm hkurê xwÿnhnta ma kêp ihpur wÿr tê nê harôj mexnta nhÿpy axtem nê kêp harôj kaakre hkre. Harôj kaakreja te kot harôj mex pyrãk nom mê kot hkur kêt. Tã nhÿm kêp harôj y mex nhÿpy hkre hpa hãmri nê ma akupÿm tê.

26 —Tã nhÿm hamê higrôt nê anhÿpê ô.

27 Nhÿm kãm mê ãpênh xwÿnhnta tee ri harôj mex kaêx ã harôj kaakreta pumu nê hpur nhõ dôh wÿr tê nê kãm harê nê kãm: “Kwa ate harôj mex pix kre htã pêr hkaêx ã harôj kaakre mãânên kato. Kwa tanhmã na pre amnhÿ to nê hkaêx ã kato?” Anê.

28 Hãmri nhÿm tee ri mê kuma nê mê kãm: “Nã mêhõ kãm ixkurê xwÿnh na pre ã inhÿpêx anê.” Anê hãmri nhÿm kãm mê ãpênh xwÿnhnta kãm: “Kwa xã kot paj mê tokyx ma hwÿr mra nê nê harênh pa nê kurê nã?” Anê.

²⁹ Nhũm mẽ kãm: “Nà kot kaj mẽ anẽ nẽ haròj mexta mẽ ho apimrààtã ixpê harênh pa.

³⁰ Kwār māmri haròj mex mẽ hpimrààtã ô hpa mãn. Ka mẽ rĩ ma hwỳr mra nẽ haròj kaàkre kumrêx jarênh pa nẽ axpên tã harê ho ê nẽ ma o mra nẽ hpòk. Hãmri nẽ rĩ kormã hpãnhã haròj mex jakã nẽ ho akuprô nẽ ô ho mra nẽ ixkre kamã haxwỳ.” Anẽ. Ả mẽ ujarênh kot anhỳr.

Anhỳr o mẽ kãm kapêr.

Jeus te kot mẽmo hy hkryre pyrãk ả harênh

Makre 4.30-32; Rukre 13.18-19

³¹⁻³² Hãmri nhũm Jeus arĩ mẽ kãm amnhĩ tã kuxi nẽ ujarênh o nhỹ. Nẽ tanhmã mẽ kãm amnhĩ tã ujarênh to nẽ mẽ kãm:

—Nà Tĩrtũm kot mẽ awỳr ixte mẽ ato amnhĩptãr kaxyw inhmênh ả jarênhja. Te ixte mẽmo hy pixire nhũm mẽ kot hkre nhũm higrôt pyrãk. Koja gaa nẽ hprêk. Hãmri nẽ hpa anhgrã nhũm kuwênhre hwỳr mra nẽ hoptĩ kamã amnhũm haẽ nhĩpêx nẽ kamã hikwỳ. Tã kot paj nhỹrmã mẽmo hy jarênhnta pyrã nẽ ixpyxi htã pika piitã hkôt mẽ ho amnhĩptã nẽ mẽ omunh mex rãhã ho ixpa. Anẽ.

Jeus te kot pãwti kaxkrit xã pyrãk ả harênh

Rukre 13.20-21

³³ Nhũm Jeus arĩ mẽ kãm amnhĩ tã kuxi nẽ ujarênh o nhỹ nẽ mẽ kãm:

—E kot pa hpãnhã mẽ amã tanhmã pãwti kaxkrit xã jarênh to ka mẽ inhma. Na hte mênijaja pãwti nhĩpêx kaxyw hãmri nẽ kaxkrit xã hkwỳ ho grire nẽ kupy nẽ trik xôm mẽ ho ahkã. Hãmri nẽ ho pãwti nhĩpêx. Kaxkrit xãja grire htã pãwti piitã ho kaxkrit mex nẽ. Tã ja pyrã nẽ ixpyxi htã koja mẽ nhỹrmã pika piitã hkôt ixkôt amnhĩ nhĩpêx mex o pa.

Anhỳr o mẽ kãm amnhĩ jarê.

Jeus kot mẽ ujarênh pix kãm mẽ ahkre hã harênh

Makre 4.33-34

³⁴ Na pre ả Jeusja mẽ ujarênh o mẽ ahkre ho pa anẽ. Ảm mẽ ujarênh pix o mẽ ahkre ho pa. Te tãm ujarênh pyrãk no ảm mẽmoj tã haxwỳ rỹ amnhĩ tã haxwỳ nẽ mẽ kãm tanhmã amnhĩ jarênh to.

³⁵ ả kot mẽ ahkre ho pa anhỳr kukamã na pre ra amnepêm Tĩrtũm nhỹ hã kapêr o mẽ pa xwỳnhjê hõja harê nẽ hã kagã. Te Jeus tãm tanhmã amnhĩ jarênh to pyrãk o hkukamã harê nẽ hã kagã nẽ hã hkagã ho:

Kot paj mẽ kãm ixujarênh pix kãm mẽ ahkre ho ri ixpa. Mẽmoj te ho tãm pyrã nẽ harê nom mẽmoj tã haxwỳ nẽ tanhmã mẽ kãm ixujarênh to. Nẽ aa mẽ kot

mẽmoj mar kêt xwỳnh kwỳ kot paj mẽ kãm harê kê mẽ kuma. Anẽ.

Jeus kot hprĩ hã haròj kaàkre jarênh Matêwre 13.24-30, 13.47-50

³⁶ Tã nhũm Jeus mẽ kãm ujarênh pa nẽ mẽ kure nẽ ma tẽn ixkrem axã. Hãmri pa mẽ ixpê hkôt ixpa ho ixpa xwỳnhjaja ma hkôt mra nẽ ixkrem agjê. Hãmri nẽ haròj kaàkre hã ujarênhnta ả hkukja nẽ kãm:

—Kwa aprĩ hã mẽ inhmã haròj kaàkre jarênhnta jarê nã. Na pa mẽ kormã ixprĩ hã mar mex kêt nẽ. Anẽ.

³⁷ Hãmri nhũm mẽ inhmã:

—Tõe pa ixprĩ hã mẽ amã harê. Ảm paa.

Ixpê Tĩrtũm kot mẽ awỳr inhmênh xwỳnh te ixte mẽmo hy mex o ukapêr xwỳnhnta pyrãk.

³⁸ Nẽ purta te kêp pika piitã pyrãk.

Nẽ haròj mexta te ra mẽ ate ixkôt amnhĩ xunhwỳr nẽ ixkôt amnhĩ nhĩpêx o apa xwỳnhjê pyrãk.

Nẽ haròj kaàkreta te mẽ kot Satanasti hkôt amnhĩ nhĩpêx o mẽ pa xwỳnhjê pyrãk.

³⁹ Nẽ kot haròj kaàkre hkre xwỳnhnta te Satanasti pyrãk.

Nẽ haròj jakãr xã hã arĩgrota te Tĩrtũm kot ahpỳnhã tanhmã mẽ harênh to xã hã arĩgrota pyrãk.

Nẽ mẽ kot haròj jakãr xwỳnhjaja te Tĩrtũm kapêr o wrỹk xwỳnhjê pyrãk.

⁴⁰ Mẽ ujarênhja kamã na prem haròj kaàkre kumrêx jarê nẽ hã hpòk jarê. Ja pyrã nẽ koja nhỹrmã Tĩrtũm kot ahpỳnhã tanhmã mẽ harênh to xã hã arĩgrota ả hãmri ả mẽ kot amnhĩ tomnuj o mẽ pa xwỳnhjê nhĩpêx anẽ.

⁴¹ —Kot paj nhỹrmã kãm mẽ piitã mẽ ho amnhĩptãr kaxyw hãmri nẽ kapêr o mẽ wrỹk xwỳnhjê mã anẽ nhũm mẽ ma mran wrỹ nẽ mẽ kot amnhĩ tomnuj xwỳnhjê pix o akuprô. Nẽ mẽ kot nhãm mẽ hkwỳjê kot mẽ urãk nẽ tanhmã amnhĩ tomnuj to ho pa kaxyw mẽ kãm anhỳr xwỳnhjaja nhũm mẽ määnên mẽ ho akuprô.

⁴² Hãmri nẽ mẽ ho pikuprõnh pa nẽ te mẽ kot haròj kaàkreta nhĩpêx pyrã nẽ kuwy kamã mẽ rênh pa. Hãmri nhũm mẽ kamã amnhĩ xã htỹx kamã hamak rãhã nẽ pa ho pa. Nẽ amnhĩ xã htỹx ả maj tee ri mỳr rãhã ho pa. Nẽ tee ri amnhĩ xã hã maj amnhĩ nham o axpên kamnhar tỹx kaprỹ.

⁴³ —No ixkôt mẽ kot amnhĩ nhĩpêx xwỳnhjaja koja mẽ mẽ kurom mex kumrêx nẽ pa. Kot paj mẽ ho mex rax nẽ nhũm mẽ mex rãhã nẽ pa ho pa. Tĩrtũm kot kormã pika nyw nhĩpêx mã xwỳnhnta kamã nhũm mẽ mex kumrêx nẽ pa ho pa. E kêt ka mẽ ixujarênhja ma nẽ kãm ajamxpêr tỹx rãhã ho apa. Anẽ.

Mẽ hikurêx mex o hpimxur jarênh Piripos 3.7

⁴⁴ Nhùm Jejus arî mê xpiitâ mê inhmâ tanhmâ ujarênh to. Nom hprî hâ ujarênh kêt nê. Kê axte mêmoj tâ kuxi nê mê inhmâ tanhmâ ujarênh to nê mê inhmâ:

—Mê ate ixkôt amnhî xunhwÿr xwÿnhjaja te mê apê mê hikukrêx mex â pika japrôr xwÿnhnta pyrâk. Koja mêhõ mê hikukrêx mex jamÿ nê o tē nê nhÿri amnhîm ho amÿxu. Kaxyw kakwÿ nê kamâ hagjê nê hity hpa nê ma akupÿm tē. Hâmri nhùm jââ nhùm mêhõ tēn kâm kato. Hâ pikata kakwÿ nê kâm kato nê omu nê hkînh nê. Nê hamaxpêr o: “E pa ma tē nê inhôrkwÿ kamâ ixkukrêx piitâ ho wēnê hpa nê hpânhâ kâxpore jamÿ nê ho amnhîm mê hikukrêx mex â pika japrô nê amnhîm mêmoj mexta o ixârîk pa.” Anhÿr o hamaxpêr nê akupÿm hity hpa nê ma akupÿm tē. Hâmri nê mêmoj mexta gryk â õ mêmoj piitâ ho wēnê hpa. Hikukrêx nê ôrkwÿ nhùm piitâ ho wēnê hpa. Hâmri nê hpânhâ kâxpore jamÿ nê ma o tē nê amnhîm pikata japrô. Hâmri nê ma akupÿm hwÿr tē nê kamâ mê hikukrêx mexta kwrÿnh pa nê ho õ kumrêx.

—Tâ te mê ate mêhõ kot â amnhî nhîpêx anhÿr xwÿnhnta pyrâk. Na ka mê urâk nê inhgryk â amnhî tomnuj kaga hpa nê hpânhâ ixkôt amnhî nhîpêx. Te mêhõ kot mêmo mê hikukrêx mex gryk â hikukrêx tÿm piitâ kaga hpar nê mê hikukrêx mex o hpimxur xâ hâ pikata japrôr pyrâk. Anê.

Mêhõ kot kênjaxênhjaprôr jarênh

⁴⁵ Nhùm Jejus arî mê inhmâ awjarê nê mê inhmâ:

—Nê ja. Na htem kâm hkînh nê hamakêtkati nê ri hpa hprâm xâj Tirtÿm kôt amnhî xunhwÿr nê hkôt ri amnhî nhîpêx râhâ ho pa. Te mêhõ my kâm kênjaxênh mex prâm nê ma ri hapêr o pa xwÿnhnta pyrâk.

⁴⁶ Nê ra nhÿri omu nê ma tē nê prês â mê hkukja. Nhùm mê kâm hâ ho ohtô nê harê nhùm ma akupÿm tē nê kâm ho õ hprâm xâj hikukrêx piitâ ho wēnê hpa. Hâmri nê kâxpore jamÿ nê o tē nê amnhîm ho haprô. Kênjaxênh mexta pix gryk â hikukrêx piitâ ho wēnê hpa nê hpânhâ ho amnhîm haprô.

—Tâ ja pyrâ nê na ka htem amex nê ajamakêtkati nê axâmhix ri apa hprâm xâj ixkôt amnhî xunhwÿr nê ixkôt pix mâ amnhî nhîpêx o apa. Anê.

Kryhti jarênh

Matêwre 13.24-30, 13.36-43

⁴⁷⁻⁴⁸ Nhùm Jejus arî mê inhmâ awjarê nê mê inhmâ:

—E Tirtÿm kot nhÿrmâ tanhmâ mê harênh to xâ hâ arîgro kot paj ixprî hâ tanhmâ mê amâ harênh to. Te ho mêmyjaja kot himô kamâ kryhti rēnh pyrâk. Koja mê gôx kâm kumê nê akupÿm ho api nhùm kamâ tep ohtô nê. Nhùm omu nê kÿx pê amgrâ kamâ hkapi nê ahpÿnhâ ri tanhmâ kamâ kute

kawrâ. Nê kamâ mex kawrâ nê kawâ kamâ kugjê nê mê kot hkur kêtja nhùm nhâm kurê.

⁴⁹ Ja pyrâ nê Tirtÿm kot ahpÿnhâ ri tanhmâ mê kot amnhî nhîpêx to hâ mê omunh xâ hkôt tanhmâ mê hipêx to kaxyw arîgrota â â mê hipêx anê. Koja kapêr o mê wrÿk xwÿnhjaja mê kot hkôt amnhî xunhwÿr xwÿnhjê nê mê kot amnhî tomnuj o mê pa xwÿnhjê kawrâ hpa.

⁵⁰ Nê te mê kot tep mex nê tep punu kawrâ nê nhâm rēnhnta pyrâk o mê hipêx nê ma kuwy hwÿr mê o mra nê kamâ mê kurê. Nhùm mê tee ri amnhî xâ htÿx â maj amÿra nê tee ri amnhî nhîpêx kaprÿ. Anê.

Nhùm pre â Jejusja axte mê ixpê hkôt mê ixpa ho mê ixpa xwÿnhjê mâ ujarênh anê.

⁵¹ Hâmri nê mê inhmâ:

—E xân ka mê atâ aprî hâ ixujarênhnta ma nâ?

Anê pa mê kâm:

—Tÿ. Nâ na pa mê atâ ixprî hâ mar mex nê. Anê.

⁵² Hâmri nhùm mê inhmâ:

—Tôe. Nâ âm hâmri. Na ka xep mê ra ixte mê ahkre nywta mar mex nê. Nê mê akwÿjaja mâânēn Tirtÿm kapêr tÿm mar mex nê. Te mê apê mêhõ apkur xâ rax pyrâ nê ma ho mê piitâ mê hipêx o ri mê hkôt paja pyrâk. Ja pyrâ nê kêr ka mê ma mê piitâ mê hkôt Tirtÿm mê wa ixkapêr o mê ahkre ho ri mê hkôt apa. Anê.

Najare nhõ xwÿnhjaja kot Jejus kaga hâ mê harênh

Makre 6.1-6; Rukre 4.16-30; Juâw 1.11

⁵³ â Jejus mê inhmâ ujarênh par anê.

⁵⁴ Hâmri nê ma akupÿm Najare hwÿr mô nê Tirtÿm kapêr o mê ahkre xâ hâ ixkre hwÿr tē nê axâ nê mê ahkre ho nhÿ. Nhùm mê amnhî jaêr pê tanhmâ kot mê ahkre hto hâ kuma nê tee ri hkukamâ hamaxpêr nê axpên mâ:

—Tk. Kwa kêp mê panhîõ htâ tanhmâ kot we amnhî to nê â âhpumunh tÿx kôt mê pamâ kapêr anê nê ri mê kâm aa mê kot mêmoj pumunh kêt kwÿ ho anhÿr o pa?

⁵⁵⁻⁵⁶ Na pre mê panoo mâ hprêk nhùm mê pahte pahprî hâ hkwyjê pumunh. Kêp pî kuprâr xwÿnh Juje mê hprô Marir wa hkraa. Nê kêp Xiakre nê Juje nê Simâw nê Jut mê htôõ. Nê htôxjaja jar mê pakamâ pa nhùm mê pahte mê piitâ mê omunh mex kênâ kot kêt we mê kurom â âhpumunh tÿx anê. Anê.

⁵⁷ Hâmri nê kamâ gryk nê hkaga. Hâmri nhùm tee ri amnhî tâ mê omu nê mê kâm:

—Nâ Tirtÿm nhÿ hâ kapêr jarênh o mê pa xwÿnhjaja na htem krî hkwy kamâ kâm mê mar prâm nê. Nom õ krî kamâ mê kot karâre rÿm hprêk kâm omunh xwÿnhjaja na htem kuma nê âm kuma. Anê.

⁵⁸ Tâ mê kot amnhî kaxyw hkôt hamaxpêr kêt jakamâ nhùm tee ri mê kâm aa mê kot

mêmoj pumunh kêt kwý ho anhÿr rax prâm. No âm mê kâm mêmoj to grêre nê ho anê.

14

*Mê kot Juâw Paxis pÿr â mê harênh
Makre 6.14-29; Rukre 9.7-9*

¹Tâ nhùm pika pê Garirej kamâ mêo pahiti Erox Jejus jarênh ma

²nê tee ri hkukamâ hamaxpêr nê hã ô pöristi mâ kapêr nê mê kâm:

—Kwa pêr Juâw Paxis na nã? Ra ixte hã ixâmênh nhùm mê kot hpÿr tâ mân tanhmã amnhÿ to nê akupÿm htÿr. Nã pêr tãm kênã. Jakamã na hte aa mê kot mêmoj pumunh kêt kwý ho anhÿr o pa. Anê.

³⁻⁵Na pre ra Erox htô pê hpröptàn ho hprö. Tõ arÿ htÿr tâ nhùm axtem nê kêp utã nê ho hprö. Hãmri nhùm Juâw Paxisja harênh ma nê hã kâm akir nê kâm:

—Kwa Eroxis kêp atö hprö kênã na ka kêt axtem nê kêp utã nê ho aprö. Kwa ja omnuj tÿx o omnuj tÿx. Anê.

Hãmri nhùm amnhÿ tâ kuma nê kamã gryk nê kot hpÿr kaxyw. Tã nom nhùm Ijaew kot axpên mã kêp Tÿrtüm nhÿ hã kapêr jarênh xwÿnh ã harênh jakamã nhùm mê umaj hpÿr kêt nê. Âm ho prês nê haxã nhùm hkrÿ ho hkrÿ.

⁶Tã nhùm jãã nhùm Erox kator ã arÿgro kato nhùm mê hã akuprö nê hã hkÿnh. Hãmri nhùm hprö nyw kra niti mê hwÿr axã nê ahte mê hipök ri mê kâm gre. Mê kot omunh nê kamã hkurê kaxyw nhùm mê noo mã hpÿjaam kêt nê mê kâm grer o xa. Hãmri nhùm pahi Erox omu nhùm ja kâm mex nê nhùm hkÿnh nê kamã nopyma nê.

⁷Hãmri nê kâm:

—Nã âm hãmri na ka ã mê inhmä amnhÿ nhÿpêx anê. Jakamã kwa mãmri mêmoj tâ ixwÿ. Amã mêmoj prâm xã hkôt hã ixwÿ kot paj amã kugö. Âm hãmri na pa amã anê. E mêmoj na amã hprâm? Anê.

⁸Hãmri nhùm kuma nê kâm:

—Ma Juâw Paxis krã na pa inhmä hprâm. Inhmä hkrã krãhta nê pasiiti kamã axã nê ixwÿr o tê nê inhmä agö. Anê.

Ra katorxã kot kaxyw kâm karö jakamã nhùm ã hã hwÿr anê.

⁹Hãmri nhùm Eroxja tee ri kuma nhùm ja kêp omnuj nê. Nom ra mê pikuprönh rax xwÿnhjê nhÿpök ri mê noo mã kot kâm: “E mãmri amã mêmoj prâm xã hkôt hã ixwÿ pa amã kugö.” Anhÿr jakamã kâm kot kêp nê hprâm kêt nê. Hãmri nê Juâw Paxis wÿr ö pöristi hkwy rê

¹⁰nhùm mê ma mê hagjênh xãta wÿr mra nê unê nê mut krãhta.

¹¹Hãmri nê hkrã mÿ nê pasiiti kamã kuxã nê ma akupÿm nita wÿr o tê nê kâm kugö nhùm kumÿ nê ma katorxã hwÿr o tê nê kâm kugö.

¹²Hãmri nhùm Juâw Paxis kôt mê pa xwÿnhjaja tee ri mê kot hpÿr ã harênh ma nê ma hwÿr mra nê kumÿ nê ma o mön haxã. Hãmri nê ma Jejus wÿr mra nê kâm harê.

Jejus kot mê ho ohtö nê mê kâm mê ö hã harênh

Makre 6.30-44; Rukre 9.10-17; Juâw 6.1-14

¹³Hãmri nhùm Jejus Juâw Paxis jarênh ma nê hkapri nê. Nê ma himö nhÿkjê hwÿr kapöt ã mör kaxyw pãr krem axã nê ma mö. Pa mê hköt ixpa ho ixpa xwÿnhjaja ma hköt mra. Hãmri nhùm krÿ hkwy kamã mê pa xwÿnhjaja harênh ma nê ohtö nê ma mê inhÿhkrep pikap mra. Nê ra amnhÿ to wa nê mê inhömör xãja wÿr pöj nê mê ixkutêp hkrÿ.

¹⁴Jakamã pa mê mö nê mê hwÿr pöj nê mê omu. Hãmri nhùm Jejus mê omu nê kâm mê hkapri nê mê kâm mê ã xwÿnhjê ho mex pa.

¹⁵Tã nhùm ra myt ãr kaxyw pa mê hköt ixpa ho ixpa xwÿnhjaja tee ri mê omu nê Jejus wÿr mra nê kâm:

—Kwa na ra amÿkry htÿx nê. Amnhÿ nê mê hano kê mê ma nhÿri krÿ hkwy hwÿr mra nê tokyx amnhÿm mêmoj japrö nê kuku. Mo jar mê apkur xã hã mêö? Jar akunÿ pix kênã. Anê.

¹⁶Hãmri nhùm mê inhma nê mê inhmä:

—Nã kot paj mê hanor kêt nê. Mê kajaja kot kaj mê kâm ö nhùm mê apku. Anê.

¹⁷⁻²¹No nhùm mê ohtö rax kumrêx. Mêmÿjaja kêp 5.000. Nê kaxyw mê hprö nê mê hkrajaja. Jakamã nhùm Jejus ã mê inhmä kapêr anê pa mê tee ri mê hkukamã ijamaxpêr nê kâm:

—Kwa nã mê panhõja raxti hã. Mê panhõ päwti kêp sÿk pix. Nê kaxyw tep grãja pi-jakrutre kênã kot kêt mê piitä mê hipêx. Nã xã kot paj mê ma mra nê nhÿri mê kâm mê mêmoj japrö nhùm mê kuku? Anê.

Hãmri nhùm mê inhmä:

—Nã pu mê kâm mêmoj japrör kêt nê. Kot puj mê kâm mê panhõta o anhrã. E mê kâm anê kê mê ahpÿnhã ri hije nê hkrÿ hpa. Anê.

Hãmri pa mê kuma nê mê kâm anê nhùm mê piitä hkrÿ hpa. Hãmri nhùm Jejus päwti mê tepja jamÿ nê kaxkwa hwÿr rÿt nê ho Tÿrtüm wÿ nê kâm:

—Pa Papaj? Nã apê mê inhmä mê inhö ho apa xwÿnh jakamã amex o amex. Anê.

Hãmri nê mê kâm ho hkry hpa nê hköt mê ixpa ho mê ixpa xwÿnhjê mã kugö pa mê ö ri ho mê hipêx pa. Nhùm mê piitä apkur o hkrÿ. Mëöja grire htã nhùm Jejus tanhmã mê kâm ho rax to nhùm mê ohtö rax kumrêx tâ piitä kuku nê ho öhy htu hpa nhùm arÿ mêö jakrêx prä. Hãmri pa mê akupÿm hakrêx o akuprö nê ho kawã ho 12 nê ho nyt pa.

Jejus kot gö krãhkã hã âm nê htêm ã harênh

Makre 6.45-52; Juâw 6.15-21

22-23 Tã nhũm Jejus mē ixpê hkôt ixpa ho ixpa xwýnhjê mã anê pa mē akupým pàr mã agjê nê ma xarmã hkukamã mô. Hãmri nhũm mē kot mar o kuhê xwýnhjê jano nhũm mē ma akupým hapêx. Hãmri nhũm Jejus kot Tirtũm mã amnhĩ jarênh kaxyw ahte tē nê hixêt ã api nê himôk ã kãm amnhĩ jarênh o nhỹ.

Gaa nhũm ra kamàt nhũm arĩ ahte hixêt nhĩmôk ã nhỹ.

24 Rôm pa mē pàr kãm mē inhmôr xwýnhjaja kormã himô nhĩpôk ri mô. Pu nhũm kôk xàpêr tỳx mē ixkaxpa. Nê gô axpên tak tỳx nê pa mē tee ri rêm̄ti ho gô rên̄h nhĩpêx nê tee ri axpên pumu.

25 Tã nhũm krãhyre kã nhũm Jejus man mē ixkôt gô krãhkã hã xan tē

26 pa mē amnhĩ wýr omu. No nhũm kormã hirã mex kêt jakamã pa mē ixprĩ hã omunh mex kêt nê. Hãmri nê tee ri omu nê mēkarô hã hkamnhĩx nê umaj ixãmra rax nê.

27 Hãmri nhũm mē inhmã kapêr nê mē inhmã:

—Tk. Kwa mē amã ma hkêt nê. Pa na pa mē akôt tē. Anê.

28 Hãmri nhũm Simãw Pêtre kuma nê kãm:

—Kwa xã ka na ka tē? Tôe apê mē inhô Pahĩti jakamã kwa amnhĩ wýr ixwý pa apyrã nê gô krãhkã hã xa nê awýr tē nã? Anê.

29 Hãmri nhũm kãm:

—Tôe mamrĩ amnê ixwýr tē. Anê.

Hãmri nhũm kuma nê pàr rũm kato nê hwýr tē. Urãk nê gô krãhkã hã hwýr tē.

30 Hãmri nê kormã htêp o htêm mē kôk xàpêrta kamã ama nê tee ri amnhĩ kukamã hamaxpêr pê ra àr o mô. Hãmri nê ãmra kamã Jejus mã amnhĩ to akir nê kãm:

—Kwa tokyx ixto api Pahĩti. Anê.

31 Hãmri nhũm hpa hã kupy nê ho àpir kurê kumrêx nê kãm:

—Kwa pêr ãm kormã ate amnhĩ kaxyw inhmã ajamaxpêr tỳx kêt. Mon ka we ixkamnãr rom mãmri man ixwýr atêmre hkêt nê? Anê.

32 Hãmri nhũm wa akupýn mē ixwýr tē nê wa axã. Hãmri nhũm kôk katãt kôt pinhkrên̄h pa nhũm gô tãm nôr kurê kumrêx.

33 Hãmri pa mē Jejus kot ã amnhĩ nhĩpêx anhyrja ã omu hãmri nê kãm mex o mex ã harê nê kãm:

—Kwa ãm hãmri na hte amnhĩ pê Tirtũm Kra hã amnhĩ jarê. Nã apê Kra kênã. Anê.

Jenêjare kamã Jejus kot akupým mē ho mex ã harênh

Makre 6.53-56

34 Tã pa mē ra himô hã rê nê Jenêjare hwýr pôi.

35 Hãmri nê ma kapê hã ri ixpa. Hãmri nhũm pika nhô xwýnh kwýjaja Jejus pumu

nê mē piitã mē kãm harênh o hprôt nê ahpýnhã hwýr nhỹhýnh mē ã xwýnhjê hã karô. Nhũm mē man mē ixwýr mē o mra

36 nê mē ho Jejus wý nê kãm:

—Pa? Kwa kê mē ã xwýnhjaja akupým mex kaxyw apê axê kupê nã? Anê.

Hãmri nhũm mē kãm:

—Tôe. Kwãr mē mãmri mran hkupê. Anê.

Hãmri nhũm mē kuma nê axpên pãnhã hwýr mra nê kêp ê pix kupênh tã ra akupým mex nê ma akupým mra.

15

Parijew nhô xwýnh mē Tirtũm kapêr tũm o mē ahkre xwýnhjê jarênh
Makre 7.1-13

1 Tã nhũm Parijew nhô xwýnh mē Tirtũm kapêr tũm o mē ahkre ho mē pa xwýnhjaja Jerujarê rũm ma Jejus wýr mra. Na htem mē ixkukamã mē inhĩgêjtê pyrã nê apkur kaxyw nê amnhĩ nhĩhkra kuhôn̄h ryy nê. Amnhĩ nhĩhkra htyk pix kuhôn̄h nê hkrĩ hkêt nê ãm amnhĩ nhĩhkra kuhôn̄h japjêê nê. Nê ô prat kuhôn̄h japjêê nê kormã apkur kaxyw hkrĩ. Tirtũm kot ja hã mē omunh nê mē mex ã mē harênh ã amnhĩ kamnhix jakamã na pre ã amnhĩ nhĩpêx anhyr o pa. Jakamã nhũm mē ma Jejus wýr mra.

2 Hãmri nê omu nê kãm:

—Pa Jejus? E kwa mē inhmã mêm̄oj jarê. Amnepê mē panhĩgêjtêjaja na prem apkur kaxyw nê amnhĩ nhĩhkra kuhôn̄h japjê nê rĩ kormã apku. Tã pa htem arĩ ijaxwýja ã amnhĩ nhĩpêx anê. No akôt mē pa ho mē pa xwýnhjaja na htem mē ixpyrã nê ã amnhĩ nhĩpêx anhyr kêt nê. Kwa mo na htem amnhĩ nhĩhkra tyk kuhôn̄h tokyx anê nê hkrĩ nê apku? Anê.

3 Hãmri nhũm mē kuma nê mē kãm:

—Tk. Na ka htem ãm mē panhĩgêjtê hkôt pix mã amnhĩ nhĩpêx o apa no Tirtũm kapêr kôt amnhĩ nhĩpêx kêt nê.

4 Tirtũm na pre mêm̄oj tã mē pamã karô ho:

Kêr ka mē anhyrêpêxã nê mē akatorxã wa hã apijaãm nê mē ho ajuta rãhã ho ri apa. Kot kaj mē ã amnhĩ nhĩpêx anhyr kêt nê tanhmã mē kãm akapêr punuj to ho ri apa. Hã koja mē akwýjaja ja mýrapê mē apa. Anê.

—Na pre ã Tirtũmja mē pamã karô anê.

5 No mē kajaja na ka htem ã akwýjê mã karô anhyr kêt nê. ãm kapêrja kwým na ka htem mē kãm karô nê mē kãm:

Kot kaj mē mêm̄o arĩgro hã akãxpore japêr nom kêr ka mē ho tanhmã akatorxã rý anhyrêpêxã ho ajuta hto kaxyw wa kãm hkwy nhôr kêt nê. ãm ho ate wa ho ajuta hkêt ã wa kãm amnhĩ jarê hãmri nê Tirtũm mã amnhĩ jarênh xã hã ixkre hwýr o tē nê mē ixte tanhmã

ixkreta ho mex to kaxyw mê inhmã agô. Kot kaj mê ã amnhî nhîpêx anê nhûm Tîrtûm ja hã mê apumu nhûm ja kãm mex nê. Kêr ka mê ã amnhî nhîpêx anhÿr o ri apa.

—Anhÿr o na ka htem mê kãm karô ho ri apa.

⁶ Nom Tîrtûm kapêr tûm kot ã ja jarênh anhÿr kêt. Âm amnhî krã hkôt na ka htem ã mê kãm karô punuj o ri apa anê. Te mê akapêrja mex o kot Tîrtûm kapêr jakrenh pyrãk.

⁷ Mê ate Tîrtûm kôt amnhî nhîpêx ã amnhî jarênh tâ âm amnhî to axêx nê hkôt amnhî nhîpêx kêt nê. Na pre Tîrtûm amnepêx mê akukamã tanhmã mê ajarênh to. Nhûm ÿ hã mê kãm kapêr jarênh xwÿnh Ijaisja ô ri mê kãm mê ajarê nê hã kagã. Te Tîrtûm tãm kot mê ajarênh pyrãk.

⁸ Na pre mê akukamã mê ajarênh o: Mê kãm ixkînh ã mê kot amnhî jarênh tâ mê kãm ixkînh kêt. Na htem kãm ixprãm ã amnhî jarênh kaprÿ.

⁹ Mê kot ixkuhpa hã amnhî krã hkôt mêmoj tâ hkwyjê mã karô ho pa jakamã na htem kot ixkôt amnhî nhîpêx o pa hã amnhî jarênh kaprÿ. Anê.

—Na pre ã Ijaisja Tîrtûm nhÿ hã mê akukamã mê ajarê nê mê atã kagã anê. Anê.

Nhûm pre ã Jejus Parijew nhô xwÿnhjê mê Tîrtûm kapêr tûm o mê ahkre xwÿnhjê mã kapêr anê.

Mêmoj kot mê pahomnu hã harênh Makre 7.14-23

¹⁰ Tã nhûm Jejus amnhî wÿr mê kot mar o kuhê xwÿnhjê hwÿ nê axte mê kãm kapêr nê mê kãm:

—E mê inhma nê inhmar tÿx nê.

¹¹ Na hte Tîrtûm kapêr tûm o mê ahkre xwÿnhjaja amnhî krã hkôt mê ate amnhî nhîhkra kuhôn japjê hã mê amã karô ho pa. Nê amnhî krã hkôt mê axãpkur xã hã tanhmã mê amã karô hto ho pa. Tîrtûm kot ja hã mê apumunh kôt mê amex ã mê ajarênh kaxyw ã mêmoj tâ mê amã karô anê. Nom na hte Tîrtûm tanhmã mê kot amnhî nhîhkra kuhôn to hã mê omunh xã hkôt tanhmã mê harênh to hkêt nê. Rÿ mê axãpkur xã pumunh kôt mê mex ã mê ajarênh kêt nê. Ja tanhmã kãm kute hkêt. Na hte ã mê kot amnhî nhîpêx anhÿr ã mê omunh xã hkôt mê mex ã mê harênh rÿ mê mex kêt ã mê harênh kêt nê. Na hte mêmoj kur ã mê omu nê âm mê omu nê hã tanhmã mê harênh to hkêt nê. Âm mê kapêr punuj rÿ mê kapêr mex ã mê mar kôt pix mã na hte tanhmã mê harênh to. Anê.

¹² Nhûm pre ã Jejus mê kãm kapêr anê pa mê hkôt mê ixpa ho mê ixpa xwÿnhjaja kuma hãmri nê hwÿr mra nê kãm:

—Kwa na ka ã mê kãm akapêr anê nhûm Parijew nhô xwÿnhjaja tee ri ama nhûm ja mê kêp omnuj nê. Anê.

¹³⁻¹⁴ Hãmri nhûm mê inhma nê tanhmã mê inhmã Parijew nhô xwÿnhjê jarênh to nê hprî hã mê hkukamã mê harênh o:

—Tk. Kwãr mãmri mê kêp omnuj. Mê kot Tîrtûm kapêr tûm o mê ahkre ho pa htã na htem hkôt amnhî nhîpêx kêt. Jakamã te mê nohkre xwÿnh kôt amnhî nhîpêx pyrãk. Koja mêhõ nohkre htã amnhî kôt nhÿhÿm nohkre hõ ho mô hãmri nê wa hamê pry pumunh kêt nê htÿx mô hãmri nê nhÿri ahkrehti kamã tẽm. Tã Parijew nhô xwÿnhjaja te kot wam htẽm xwÿnhnta pyrãk nhûm mê kot mê mar xwÿnhjaja te kot wam htẽm xwÿnh kôt hõ htẽmta pyrãk. Jakamã Parijew nhô xwÿnhjaja mê kot mê mar o pa xwÿnhjê mê koja mê hpimràatã nhÿrmã te ahkrehti kamã rôrök par pyrãk o amnhî nhîpêx nê mex kêt nê pa ho pa. Koja kaxkwa kamã inhô Papaj nhÿrmã amnhî nê mê hanor pa.

—Inhõ Papaj te kêp mêmo hy hkre ho pa xwÿnhnta pyrãk. Na htem mêmo hy hkre nhûm higrôt hapôj nê higrôt mex nê. Hãmri nhûm mê hwÿr mra nê omu nê nê mêmoj nhigrôt punuj jarê nê kurê. Ja pyrã nê koja nhÿrmã inhô Papaj amnhî nê Parijew nhô xwÿnhjê janor pa nhûm mê mex kêt nê pa ho pa. Jakamã kwa kêr ka mê hkôt ri amnhî nhîpêx kêt nê. Anê.

Nhûm pre ã Jejus mê ixte hkôt ixpa ho ixpa xwÿnhjê mã hprî hã Parijew nhô xwÿnhjê hkukamã ã mê harênh anê pa mê mar o ixkrî.

¹⁵ Hãmri nhûm Simãw Pêtre tee ri Tîrtûm kot mê apkur xã hã mê omunh xã hkôt tanhmã mê harênh to hkêt ã harênh ma. Nê âm tanhmã mê kapêr to pix ã mê mar kôt tanhmã mê harênh toja mã hãmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

¹⁶ Hãmri nhûm kuma nê hprî hã mê inhmã awjarê nê mê inhmã:

—Kwa xãn ka mê kormã aprî hã ja mar kêt nê?

¹⁷ E pa ixprî hã mê amã harê ka mê inhma. Nã na htem mêmoj ku nhûm hte mê hkrã hi hwÿr gjêx kêt nê. Na hte mê ôhy pix wÿr agjê nê gaa nê nhãm hapôj nê hapêx. Na htem mê apkur xãja ku nê ÿ hã tanhmã amnhî tomnu hto hkêt nê. Jakamã na hte Tîrtûm ja hã mê omunh xã hkôt tanhmã mê harênh to hkêt nê.

¹⁸ Âm mê hkrã kamã mê hamaxpêr punuj pix nhÿ hã mê kot tanhmã amnhî tomnuj to jakamã na hte Tîrtûm mê hamaxpêr ã mê omunh xã hkôt tanhmã mê harênh to.

¹⁹ Koja mêhõ tanhmã hamaxpêr punuj to nê ra hkôt amnhî tomnuj pix o pa. Na htem

nhâm mê hpar o pa nê mê kêp ahkî nê amnhî to hêx nê mê hakwa kamâ nhâm expên mâ mê hixi jarênh o pa. Nê nhâm mê kêp mê hprô ho amnhîkati nê mê hkuprî hwÿr mra nê mê ho amnhîkati. Nê tanhmâ ri expên tomnuj to ho pa.

²⁰ Mê hamaxpêr punuj nhÿ hã na htem ã amnhî nhîpêx anhÿr o pa. No na hte Tirtûm mê kot amnhî nhîhkra kuhônî japiê hkêt ã mê omunh xà hkôt mê kot amnhî to mex xwÿnh ã mê harênh kêt nê. Ja tanhmâ kãm kute hkêt. Anê.

Jejus kot Ijaew kêt xwÿnh ni kamâ ukapri hã harênh

Makre 7.24-30

²¹ Tã nhûm Jejus mê inhmâ kapêr pa hãmri nê mê inhmâ anê pa mê ma hkôt mô. Ma Xir mê Sitôja wa pu hã ri ixpa.

²² Nhûm mêhõ nija omu nê hwÿr tê. Mê ixkînhâ kêp Ijaew kêt tã hwÿr tê. Kanaã nhõ xwÿnh na pre. Tã Jejus wÿr tê nê kãm:

—Ka Pahihti Jejus? Apê Tirtûm kot mê ixwÿr amênh xwÿnh jakamâ xê ixujarênh ma nê ixkamâ axukapri hkêt wehe. Na mêkarômnutija tanhmâ ixpê ixkra ho nhûm ixpê omnuj tÿx kumrêx. Anê.

²³ Hãmri nhûm Jejus kuma nê ãm kuma nê kãm tanhmâ nê hkêt nê. Jakamâ pa mê ixpê hkôt ixpa ho ixpa xwÿnhjaja kãm:

—Kwa hano kê ma akupÿm têê ri. Na ãm ri mê pahkôt xatã hkrata jarênh pix o ri pa. Anê.

²⁴ Nom nhûm kot amnhî tã kamâ hamak kaxyw tanhmâ mê inhmâ hã kapêr to nê mê inhmâ:

—Nà ãm Ijaewjê pix wÿr na pre Tirtûm inhmê. Te mê kêp ôwêhti pikunor pyrâk o na htem htÿx ri amnhî nhîpêx o pa. Jakamâ ãm mê hwÿr pix mâ na pre inhmê. Na kormâ inhmâ tanhmâ nhâm mê hkwyjê jarênh to hkêt nê. Anê.

²⁵ Hãmri nhûm nitita tee ri amnhî tã kuma nê hwÿr tê nê kutã hkônkrã ho htêm nê nhÿ nê kãm:

—Xê ma we ixkamâ axukapri hkêt wehe. Anê.

²⁶ Hãmri nhûm kãm:

—Nà kormâ. Na pre Tirtûm mê kêp Ijaewjê pix wÿr inhmê. Jakamâ na pa kormâ nhâm tanhmâ mê akwyjê ho mex to hkêt nê. Anê.

²⁷ Hãmri nhûm kãm:

—Ma ãm hãmri na ka akapêr. Nom ixpê Ijaew kêt tã mê kuxwar ãm ixto mex grîre kêt wehe. Anê.

²⁸ Hãmri nhûm kuma nê kãm:

—Nà ãm hãmri na ka ã akra kaxyw inhmâ ajamaxpêr tÿx anê. Jakamâ kot paj nê mêkarômnutita jano. Koja axte tanhmâ apê ho hkêt kumrêx.

Anhÿr o kãm kapêrja rôm nhûm hkraja akupÿm mex kurê kumrêx.

Jejus kot mê à xwÿnhjê ho ohtô nê mê ho mex à harênh

Makre 7.31-37

²⁹ Tã nhûm Jejus mê inhmâ anê pa mê ixrohã krîja pé ixkato nê ma himô rax pé Garirej wÿr mô. Nê nhÿri gô mÿri hixêt wÿr mô nê hã api nê ixkrî.

³⁰ Hãmri nhûm mê ohtô nê ma mê ixkôt mra. Nê mê à xwÿnhjaja nhûm mê hamÿ nê Jejus wÿr mê o mra. Na prem ohtô rax kumrêx. Ra ri mê pa hkêt xwÿnhjaja nê mê nohkre xwÿnhjaja nê mê hyk o mê pa xwÿnhjaja. Nê mê kapêr kêt xwÿnhjaja nê ahpÿnhã ri tanhmâ mê à kute xwÿnhjaja nhûm mê hamÿ nê ma Jejus wÿr mê o mra nê kutã mê haxwÿ. Hãmri nhûm mê omu nê ahpÿnhã akupÿm mê ho mex pa.

³¹ Jakamâ na pre mê kapêr kêt xwÿnhjaja akupÿm kapêr mex nê. Nê ri mê pa hkêt xwÿnhjaja akupÿm mra mex nê. Nê mê hyk o mê pa xwÿnhjaja akupÿm tãm ri mra. Nê mê nohkre xwÿnhjaja akupÿm rit mex nê. ã ahpÿnhã akupÿm mex par anê. Hãmri nhûm mê kot hwÿr mê hamÿnh nê Jejus wÿr mê o mra xwÿnhjaja amnhî jaêr pé akupÿm mê mex ã mê omu nê mê kamâ no puma nê hkînh nê. Hãmri nê Tirtûm mã mex o mex ã harê nê expên mã harênh o:

—Nà ãm hãmri mê panhõ Tirtûmja ãm mex o mex. Anê.

Jejus kot mê ho 4.000 nê mê kãm mê ô hã harênh

Makre 8.1-10

³² Tã nhûm Jejus mê ixte hkôt ixpa ho ixpa xwÿnhjaja amnhî wÿr mê ixwÿ nê mê ixkôt mê mra xwÿnhjê hjakre nê mê inhmâ:

—E. Ka mê rî kam jajê pumu. Na pa ra inhmâ mê hkapri nê. Na mê pahkôt ri pa hã apkati axkrunêpxi nhûm ra mê kêp mêôja hapêx pa. Koja mê apkur kêt rãhã ma akupÿm mê ô krî hwÿr pa hãmri nê pry hã hirot nê rôrôk o pa. Mê ô krî hwÿr awryy. Anê.

³³ Nhûm pre ã mê inhmâ mê harênh anê pa mê tee ri kuma hãmri nê kãm:

—Kwa nom nhÿri kot pu mê kãm mêmoj japrô nhûm mê tokyx kuku? Ja kapôt pix kênh. Nê mê ohtô griã. Anê.

³⁴ Hãmri nhûm mê inhmâ:

—No mê panhõ pâwtita? Tanhmâ na arî kute nê hikwÿ? Anê.

Hãmri pa mê kãm:

—Nà ãm kêp 7 pix. Nê kaxyw tep kwÿ no ãm grêre. Kot mê ho dare kaxyw ã. Anê.

³⁵ Hãmri nhûm mê inhma nê mê ixkôt mê mra xwÿnhjê mã anê nhûm mê hkrî pa.

³⁶ Hãmri nhûm pâwti mê tep grêreta jamÿ nê ho Tirtûm wÿ nê kãm:

—Pa Papaj. Nà apê mê inhmâ mê inhõ ho apa xwÿnh jakamâ amex o amex. ãm amex kumrêx. Anê.

Hâmri nê mê kâm mêmojta o hkry hpa nê mê inhmâ kugô pa mê ô ri ho xa nê ho mê hipêx pa.

³⁷⁻³⁸ Hâmri nhûm mê piitâ apku nê ôhy htu hpa. Nhûm prem mêmyjaja kêp 4.000 nê kaxyw mênjajaja nê mêhprîjajaja. Mê ohtô rax kumrêx tâ nhûm Jejus mêô ho mê hipêx pa. Hâmri pa mê hakrêx o akuprô nê ho kawâ ho 7 nê ho nýt.

³⁹ Hâmri nhûm Jejus ma akupým mê ô kri hwýr mê hano pa mê pâr krem agjê hâMRI nê ma ijaxwýja mô. Ma pika pê Makatâ hwýr mô.

16

Parijew nhô xwýnh kwý kot aa mê kot mêmoj pumunh kêt ô ho anhýr â Jejus wýr â mê harênh

¹ Tâ pa mê ra hwýr pôj nhûm Parijew mê Satusew nhô xwýnhjaja Jejus pumu nê hwýr mra. Nê hêx rom kot kamâ hamak kaxyw hwýr mra nê kâm:

—Pa Jejus? E kwa mê inhmâ aa mê ixte mêmoj pumunh kêt ô ho anê nâ? Pa mê ate ho anhýr â apumu nê Tirtûm kot mê ixwýr amênh â akôt ijamaxpêr kurê kumrêx. E kwa tokyx. Anê.

²⁻³ Hâmri nhûm mê kuma nê mê kâm:

—Tk. Nà kot paj mê amâ ho anhýr kêt nê. Mê ate hâ ixpumunh nê ixkôt ajamaxpêre kaxyw â. Na ka htem kaxkwa kamâ kakrâ pumu nê axpên mâ na wrýk â harê. Nê kaxkwa mex pumu nê axpên mâ amgrâ hâ harê. Tâ ixte tanhmâ mê amâ mêmoj nhîpêx to hâ ixpumu nom Tirtûm kot mê awýr inhmênh xwýnh â ixkôt ajamaxpêr kêt nê.

⁴ âm mê ajamaxpêr punuj pix o na ka htem ri ajamaxpêr o apa. Ixpê Tirtûm kot mê awýr inhmênh xwýnh tâ ka mê ja hâ ixkôt ajamaxpêr kêt nê. Tâ mê ate aa mêmoj pumunh kêt kwý ixte mê amâ ho anhýr kaxyw ka mê inhmâ hâ karô. Nà kot paj mê amâ ho anhýr kêt nê. Kormâ. Kot paj âm nhýrmâ te amnepêM Jôhti kot amnhî nhîpêx pyrâk o amnhî nhîpêx. E ja pix kot paj mê amâ harê. Nom kot paj mê amâ aa mê ate mêmoj pumunh kêt ô ho anhýr kêt nê. Anê.

Nhûm pre â Jejus mê kâm kapêr anê hâMRI pa mê ixrohâ mê kêp ixkato nê ma ixpa.

Jejus kot hkôt mê pa xwýnhjê jahkre hâ harênh

Makre 8.14-21

⁵ Tâ pa mê Jejus mê ixrohâ ma mô nê pâr mâ agjê nê ma xarmâ akupým rê nê hikjê hâ mô. Hâmri nê tee ri mê ixâpkur xâ japêr nê axpên mâ:

—Kwa na pu mê panhō pāwti ho paja-makêtkati nê kure. Anê.

⁶ Hâmri nhûm Jejus mê inhma nê tanhmâ mê inhmâ Parijew mê Satusew nhô xwýnhjê

jarênh to. Nom pāwti hā kuxi nê mê inhmâ mê harê nê mê inhmâ:

—Kwa mê o kora. Kêr ka mê Parijew mê Satusew nhô xwýnhjê mê kêp pāw kaxkrit xâ hkwy hpyr kêt nê. Anê.

⁷ Hâmri pa mê tee ri kuma nê ixprî hâ mar mex kêt nê. Nê arî kapêrta â axpên kukjêr o hkôt mô nê axpên mâ:

—Kwa mê pahte mê panhō pāwti rer jakamâ mân mê pahte mê ô pāw kaxkrit xâ kwý hpyr nê mê pahkurê nâ? Anê.

⁸ Hâmri nhûm mê inhma nê mê inhmâ:

—Hêxta waa nê. Mon ka mê âm axpên mâ mê panhō pāwti hkêt pix jarênh o mô? Pêr kormâ mê ate amnhî kaxyw inhma ajamaxpêr tÿx kêt.

⁹ Jââ ixte mê anoo mâ pāwti kêp 5 pix tâ nhûm ixte ho mê kêp 5.000tajê nhîpêx par. Nhûm mê kot hkur nê ho ôhy htu hpar nhûm mê ate mêô jakrêx o apikuprônh par nê ho kawâ ho 12 nê ho hipu.

¹⁰ Nê ham pāwti kêp 7 o mê kêp 4.000 nhîpêx par nhûm mê kot hkur nê ho ôhy htu hpar nhûm mê ate mêô jakrêx o apikuprônh raxja.

¹¹ Ra ixte mê anoo mâ ja ho anhýr o axkrut tâ ka mê ra hâ ano hkêt nê arî axpên mâ mê paxâpkur xâ pix jarênh o ixkôt mô. Nà mê paxâpkur xâja na pa harênh kêt nê. Parijew mê Satusew nhô xwýnhjê nhô pāwti kaxkrit xâ pix na pa hâ kuxi nê mê amâ tanhmâ harênh to. Anê.

¹² Nhûm pre â mê inhma kapêr anê hâMRI pa mê atâ kuma nê kâm:

—Nà na pa xep mê hâMRI tâ ama. Xep mê ixte Parijew mê Satusew nhô xwýnhjê kapêr kôt amnhî nhîpêx nê na ka mê ixkurê nê â mê harênh anê. Anê.

Jejus kot amnhî tâ hkôt mê pa xwýnhjê kukjêr â harênh

Makre 8.27-30; Rukre 9.18-21

¹³ Tâ pa mê axte Jejus kôt mô nê pika pê Sejarej Piripos kamâ kormâ mô nhûm Jejus amnhî tâ mê ixkukja nê mê inhmâ:

—E mê inhma mêmoj jarê. Tanhmâ na hte mê akwýjaja axpên mâ ijarênh to wehe? Anê.

¹⁴ Hâmri pa mê kâm:

—Nà na htem ahpýnhâ tanhmâ ajarênh to. Na hte kamâ mê hkwyjaja ajarênh o finat Juâw Paxis â ajarê. Nhûm kamâ mê hkwyjaja ato finat Eris â ajarê nhûm mê hkwyjaja tôhâ apê Tirtûm nhý hâ akapêr o apa xwýnhjê hô akupým atûr â ajarê. Nê tôhâ finat Jeremîstija rý axtem hô hâ ajarê. Â na htem ahpýnhâ axpên mâ ajarênh anê. Anê.

¹⁵ Hâmri nhûm mê inhma nê mê inhmâ:

—No mê kajaja? Ixpê mêhō hā na ka htem axpên mâ ijarê? Anê.

¹⁶ Hâmri nhûm Simâw Pêtre kâm:

—Nà apê Tirtùm kot mē ixkaxyw axām nē mē ixwÿr amēnh xwÿnh na ka. Nē apē mē xpiitā mē inhō Pahī Maati na ka. Ā na pa htem xapēn mā ajarēnh anē. Anē.

¹⁷ Hāmri nhūm kuma nē kām:

—Nā ām hāmri na ka ā ijarēnh anē Simāw Pētre. Nom amnhī krā hkōt na ka ā ijarēnh anhÿr kēt nē. Tirtùm tām kot amā ixto amnhīrīt xā hkōt na ka ā ijarēnh anē.

¹⁸ Nā akumrēx na ka ā ijarēnh anē. Tā koja mē apyrā nē nhÿrmā mē kot ixkōt amnhī xunhwÿr xwÿnhjaja ma hkwyjē mā ja hā ijarēnh o ri krī piitā hkōt pa. Hāmri nhūm mē hkwyjaja mē kuma nē mē apyrā nē ixkōt amnhī xunhwÿ. Hāmri nhūm mē kēp ixprām nōkati xwÿnhjaja tee ri tanhmā mē kot ijarēnh toja ma nē ā ijarēnh anhÿrja nē mē kām kapēr tā nom ho hkapyrÿ. Ā koja ixkōt mē kot amnhī xunhwÿr xwÿnhjaja mē kām ijarēnh o pa anē. Jao te mē apē kēn nhūm ixte mē ato amnhīm inhōrkwy nhīpēx pyrak. Tā akumrēx ate ā ijarēnh kot anhÿr jakamā kot paj te ixte akumrēx amÿnh nē ato ixtēm nē inhōrkwy nhīpēx kaxyw amnhīm akumrēx axām pyrak o anhīpēx Simāw Pētre.

¹⁹ —E kēr ka ma inhÿ hā tanhmā mē piitā mē kām ijarēnh to ho ri apa. Mē kot hprī hā amar kaxyw. Kojā mē hkwyjaja ama nē amnhī kaxyw ixkōt hamaxpēr nē ixkōt amnhī xunhwÿ. Ka ja hā mē omu nē mē kām: “E ra mē ate Jejus kōt amnhī xunhwÿr jakamā kot ka mē nhÿrmā ty nē ma kaxkwa hwÿr api nē Tirtùm mē wa kuri amex kumrēx nē atir tūm nē apa ho apa.” Anhÿr o mē kām ijarēnh o apa. No mē kot akapēr mar nē ām mar nē ixkōt amnhī xunhwÿr kēt xwÿnhjaja ka mē kām: “No mē kajaja mē ate Jejus kōt amnhī xunhwÿr kēt jakamā kot kaj mē nhÿrmā Tirtùm mē Krata wa kuri atir tūm nē apa ho apa hkēt nē.” Anhÿr o ā inhÿ hā mē kām akapēr anhÿr o ri mē hkōt apa. Jao te ate kaxkwa hwÿr saf pyr nē Tirtùm krajē mā kahē xā rēnh nē Tirtùm kra hkēt xwÿnhjē pē kahē pyrak o amnhī nhīpēx o apa. Anē.

Nhūm pre ā Jejus Simāw Pētre mā kapēr anē.

²⁰ Hāmri nē hpānhā mē xpiitā mē inhmā kapēr nē mē inhmā:

—E. Kwa kēr ka mē kormā mē piitā mē kām Tirtùm kot mē awÿr inhmēnh ā mē kām ijarēnh o ri apa hkēt nē. Kormā. Anē.

Jejus kot amnhī kukamā amnhī jarēnh ā harēnh

Makre 8.31-33; Rukre 9.22

²¹ Hāmri nhūm Jejus hprī hā amnhī kukamā tanhmā mē inhmā amnhī jarēnh to nē mē inhmā:

—Nā mē kajaja mē ate aprī hā ixpumunh mex. No mē pahkwÿjaja kām hprī hā

ijarēnh mar nē ixpumunh prām kēt. Ijaew krāhtūmjaja nē Tirtùm kapēr tūm o mē ahkre xwÿnhjaja nē patre krāhtūmjaja. Mē kām hprī hā ixpumunh nē kām ixkapēr mar prām kēt jakamā kot paj tokyx ma Jerujarē hwÿr mō nhūm mē kamā ixpynē nē ixtak rax nē xpi. Nom kot paj ixtyk ā apkati axkrunēpxi nhūm Tirtùm akupÿm ixto ixtir. Anē.

²² Hāmri nhūm Simāw Pētre tee ri kot ā mē kām amnhī jarēnh anhÿrja ā kuma nē hwÿr tē nē hpa hā kupy nē mē ixpē ho kato nē mē ixkāk ā o xa. Nē ā kot amnhī jarēnh anhÿrja nē kām kapēr nē kām:

—Kwa nē Pahīhti. Ri ā amnhī jarēnh anhÿr kēt nē. Mo kot kēt mē ri axtem nē ā anhīpēx anē? Anē.

²³ Hāmri nhūm kuma nē hwÿr apkjē nē omu nē kām:

—Tk. Te apē Satanasti kapēr pyrak o na ka ā inhmā akapēr anē. Kot kaj ā akapēr anē hāmri nē ixkōt apa hkēt nē. Tirtùm kām hprām xā hkōt na ā mē kot inhīpēx anhÿr kaxyw kēnā. Tā ka Tirtùm jamaxpēr o ajamaxpēr kēt nē amnhī jamaxpēr o ā inhmā akapēr anē. Te apē ixpē axamnār xwÿnh pyrak o amnhī nhīpēx. Anē.

Jejus krajaja kot tanhmā amnhī nhīpēx to hā mē harēnh

Makre 8.34-9.1; Rukre 9.23-27; Juāw 12.24-26; määnēn Rōmān 15.1; Wam Korīt 10.23-24; Karatas 5.24; Piriapos 2.4; Wam Pētre 4.1; Apokarip 2.10, 12.11

²⁴ Nhūm pre ā Jejus Simāw Pētre mā kapēr anē hāmri nē hpānhā mē ixpē hkōt ixpa ho ixpa xwÿnh piitā mē inhmā kapēr nē mē inhmā:

—E kot kaj mē ixkōt amnhī xunhwÿr ā amnhī jarē hāmri nē määnēn amnhī jarēnh o: “Jejus kēr inhō Pahīhti jakamā kot paj kapēr kōt pix mā amnhī nhīpēx rāhā ho ri ixpa. Kwār ixkwÿjaja tanhmā hā inhīpēx hto.” Anhÿr o amnhī jarē.

²⁵ —Kojā mē ixtā mē atōx pī rÿ tanhmā mē atō hto ka ty. Tā nom koja akaxwÿnh ma ixwÿr āpir kurē kumrēx. Hāmri ka ixkuri atir tūm nē amex rāhā nē apa ho apa. Nom kot kaj mē jar atir prām xāi ixkaga hāmri nē inhō krī hwÿr axāpir kēt nē.

²⁶ —Nē koja mēhō hikukrēx rax gryk ā Tirtùm kaga. Tā nhÿrmā ty hāmri nē amnhī kōt hikukrēx o hpyr nē o mōr kēt nē. Kojā tee ri kuwy hwÿr mōr pymaj amnhī nē hikukrēx rax o amnhī pānhā amnhīrer prām kaprÿ. Tanhmā koja amnhī to nē Tirtùm mā amnhīre nē ma o krī hwÿr api? Kojā ā amnhī nhīpēx anhÿr kēt nē.

²⁷ —Nē ixpē Tirtùm kot mē awÿr inhmēnh xwÿnh kot paj nhÿrmā kaxkwa rūm akupÿn mē awÿr wrÿ nhūm Tirtùm kapēr o mē wrÿk xwÿnhjaja man ixkōt wrÿ. Hāmri pa inhō

Papaj nhÿ hã ixte mē piitã tanhmã mē kot amnhÿ nhÿpêx to hã mē omunh xã hkôt ahpÿnhã tanhmã mē harênh to.

²⁸ ãm hãmri na pa ã mē amã amnhÿ jarênh anê. Kot paj nhÿrmã akupÿn ixte mē ato amnhÿptãr kaxyw man mē awÿr wrÿ. Tã kot kaj mē akwÿjaja akupÿn ixwÿrÿyta kukamã tokyx ixte tanhmã ixte amnhÿ nhÿpêx to hã ixpumu. Anê.

17

Jejus kot hixêť prêk nhÿmök ã hirã kamã ãm ã harênh

Makre 9.2-13; Rukre 9.28-36; mãânêh Sikÿn Pêtre 1.16-18

¹ Tã nhÿm semãnja hapêx nhÿm Jejus ma nhÿri hixêť prêk wÿr mō. Nê kaxyw Simãw Pêtre nê Xiakre nê Xiakre htō Juãwja nhÿm ma amnhÿ kôt wa mē o mō. Nhÿm wa mē mō nê hixêť prêk ã api nê himök ã kuhê.

² Hãmri nhÿm Jejus xep ra axtem nê xa. Axtem hkuk nhÿrã htÿx nê xa. Te myyti nhÿrã htÿx pyrãk. Nê ê haka htÿx kumrêx.

³ Hãmri nhÿm xep ja wa kaxkwa rÿm hwÿr wrÿ nê kuri kãm kapêr o xa. Mojes mē Erisja wa nhÿm hwÿr wrÿ nê kuri xa. Tÿrtÿm amnepêm amnhÿ wÿr wa ho ãpir tã wa akupÿn wrÿ nê Jejus mã kapêr o xa.

⁴ Hãmri nhÿm Jejus kôt mē mōr xwÿnhjaja wa mē omu nhÿm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nã ãm hãmri na pu mē amnê mō. Kwa pu mē kritpêm jar axkamê nê tokyx panojarêť kêt nê. Pa mē amã pô nhÿrōnh o axkrunêpxi nê hipêx. Amã hō nhÿpêx nê Mojes mã hō nhÿpêx nê Eris mã hō nhÿpêx ka mē kamã akrÿ. E kwa pa mē amã ho anê nã?

Anhÿr o kãm kapêr. Nom amnhÿ krã hkôt ã kapêr anê.

⁵ Hãmri nê kormã ã kãm kapêr anhÿr rōm nhÿm ra kakrã jaka htÿxja wrÿ nê wa mē hkunor pa nhÿm wa mē kamã kuhê. Nhÿm kakrã kamã Tÿrtÿm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

⁶ Hãmri nhÿm mē tee ri kuma nê kãm ma htÿx nê umaj pikap rōrōk nê htu mÿrpe hikwÿ.

⁷ Hãmri nhÿm Jejus mē hwÿr tē nê mē hã ãkra jaxwÿ nê mē kãm:

—E mē kãnhmã akuhê nê amã ma hkêť nê. Anê.

⁸ Hãmri nhÿm mē kuma nê kãnhmã rÿť nê Jejus pix pumu nhÿm ahte xa nhÿm kuri wa ãm xwÿnhja wa ra ma akupÿm api.

⁹ Hãmri nhÿm mē kormã akupÿm hixêť nhÿmök rÿm mē ixwÿr wrÿk o mō nhÿm Jejus mē kãm:

—E kêr ka mē ham ate mēmoj pumunh xwÿnhja kormã nhãm mē kãm harênh kêt nê. Kot paj nhÿrmã ty nê akupÿm ixtÿr ka mē rÿ kormã mē kãm ja hã ijarênh o ri apa. Anê.

¹⁰ Hãmri nhÿm mē kormã akupÿn mē ixwÿr wrÿk o mō nhÿm mē Jejus mã:

—Kwa mē inhmã mēmoj jarê. Na htem Tÿrtÿm kapêr tÿm o mē ijahkre xwÿnhjaja mē inhmã: “Eris kumrêx koja Tÿrtÿm mē pahwÿr kumê nhÿm Krisja kormã hapu hã wrÿ.” Anê. Na htem ã mē inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

¹¹ Hãmri nhÿm mē kãm:

—Nã ãm hãmri na prem ã wa ijarênh anê. Na pre ra ixkukamã te Eris kot amnhÿ nhÿpêx pyrãk xwÿnhja tē nê ixkutêp mē kãm ijarênh o pa.

¹² Tã nom nhÿm mē ja hã omunh kêt nê. Na prem axtem nê kãm hprãm xã hkôt tanhmã hipêx to nê kupÿ. Tã koja mē nhÿrmã ã hipêx anhÿr pyrãk o inhÿpêx. Anê.

¹³ Hãmri nhÿm mē ra hprÿ hã kuma nê axpên mã:

—Kwa Juãw Paxis pimrãata na ã mē pamã harênh anê. Tapxÿpix na pre te Eris kot amnhÿ nhÿpêx pyrãk o amnhÿ nhÿpêx o pa. Tã tãm na mē pamã harê. Anê.

Jejus kot mēhō hkra nê mēkarōmnuti kator ã harênh

Makre 9.14-29; Rukre 9.37-43

¹⁴ Tã nhÿm mē ra akupÿm ahpãr mã man mē ixwÿr hpōx o mō nhÿm mē ohtō rax nê Jejus kutêp kuhê. Hãmri nhÿm mēhō myja mē omu nê mē kutã tē nê mē hkaxpa nê Jejus kutã hkōn krã ho tēm nê nhÿ nê hkra ho kuwÿ nê kãm:

¹⁵ —Pa Jejus. Kwa inhmã ixkra kamã axukaprÿ nê. Na hte mēkarōmnutija xatã tanhmã ixpê ho nhÿm hte ÿ hã mra nê rōrōk nê tōhã kuwÿ kamã rōrōk nê tōhã gōx kãm mran mrō nê ixpê homnuj tÿx nê.

¹⁶ Tã pa akôt mē pa ho mē pa xwÿnhjê hwÿr o tē nom nhÿm mē kot inhmã ho mex kaxyw tee ri tanhmã ho hkapyr. Kwa xã kot kaj akupÿm inhmã ho mex nã? Anê.

¹⁷ Hãmri nhÿm kuma nê mē ixte hkôt ixpa ho ixpa xwÿnhjê mã kapêr nê mē inhmã:

—Hêxta waa nê. Ra mē ate ixte Tÿrtÿm nhÿ hã mē ho mex ã ixpumunh o ixkôt apa rÿy htã kormã ixpyrã nê ã mē hipêx anhÿr kêt nê. Nã kormã mē kaxyw Tÿrtÿm kôt mē ajamaxpêr tÿx kêt jakamã na ka mē tee mē ho mex kaxyw. Anê.

Hãmri nê myta mã kãm:

—E amnê ixwÿr akrata o tē pa omu. Anê.

¹⁸ Hãmri nhÿm kuma nê hwÿr o tē nhÿm omu nê nê mēkarōmnutija kator nhÿm akupÿm mex kurê kumrêx.

¹⁹ Hāmri pa mē ixte Jejus kôt ixpa ho ixpa xwýnhjaja ja hā omu mē hkàx ā amnhī tā hkukja nē kām:

—Kwa na pa mē axwakre kamā tee ri nē hanor prām kaprý. Kwa mon pa mē apyrā nē nē hanor nhūm kator nē ma htēm kēt nē? Anē.

²⁰⁻²¹ Hāmri nhūm mē inhmā:

—Nā kormā mē ate mē kaxyw Tirtūm kôt ajamaxpēr tỳx kēt. Nom kot ka mē kaxyw hkôt ajamaxpēr tỳx hāmri nē hkôt amnhī nhīpēx kukwak ri mēmoj tā awý nhūm mē ama nē mē ate mēmoj tā axáhwyr xā hkôt mē amā tanhmā mēmoj nhīpēx to. Te mē ate pī hpār mūj mā akapēr nē kām: “Kwa amnhī jarē nē ma tē nē gō xujanār kām mām mrō.” Anhýr nhūm kot amar nē amar xā hkôt ā amnhī nhīpēx anhýr kurē kumrēx pyrāk. Ja pyrā nē kot kaj mē amnhī kaxyw Tirtūm kôt ajamaxpēr tỳx kukwak ri mēmoj tā awý nhūm mē ama nē mē amā mēmoj tanhmā ho rý mē amā mēmoj gō. Anē.

Jejus kot htyk kukamā amnhī jarēnh ā harēnh

Makre 9.30-32; Rukre 9.43-45

²²⁻²³ Tā hāmri pa mē Jejus kôt ma mō nē nhýri pika pē Garirej kamā kormā ixpa. Hāmri nhūm Jejus axte amnhī kukamā mē inhmā tanhmā htyk ā amnhī jarēnh to nē mē inhmā:

—Nā koja mē tokyx mē kām ixtā amýnē nhūm mē xipī. Mē kot xipír tā kot paj ixtyk ā apkati axkrunēpxi nhūm Tirtūm akupým ixto ixtír. Anē.

Hāmri pa mē tee ri ā kot amnhī jarēnh anhýrja ā kuma nē ixkaprī htỳx kumrēx.

Jejus kot Tirtūm nhōrkwý hwýr ā

Rōmān 13.5-7; Wam Korīt 10.32-11.1

²⁴ Tā pa mē Jejus kôt ma mō nē ra Kapanau hwýr pōj. Hāmri nhūm mē kot Tirtūm mē amnhī jarēnh xā hā ixkre ho mex kaxyw mē kēp kàxpore hkwy jamýnh xwýnhjaja mē ixpumu nē mē ixwýr mra nē Simāw Pêtre mē kām:

—Pa. Kwa xā na hte mē ajahkre xwýnhja mē pahpē hkwyjē pyrā nē Tirtūm mā amnhī jarēnh xā hā ixkre ho mex kaxyw kàxpore hkwy nhōr kēt nē nā? Anē.

²⁵ Hāmri nhūm mē kuma nē mē kām:

—Tỳ kot mē kām ōr o pa kēnā. Anē.

Hāmri nē ma mē ixkót tē nē mē ixkót mēhō nhōrkwý hwýr axā. Hāmri nē kot Jejus mā mē harēnh mā tā nhūm ra hamaxpēr ā omu nē kumrēx kām kapēr nē kām:

—Kwa inhmā mēmoj jarē Simāw Pêtre. Xā na hte pahi hkrajaja ō papaj mā kàxpore hkwy nhōr o pa nā? Xā na hte am hkra hkēt xwýnh pixjaja kām hkwy nhōr o pa? Anē.

²⁶ Hāmri nhūm kuma nē kām:

—Nā mē kēp hkra hkēt xwýnh pixjaja na hte kām ōr o pa. Anē.

Hāmri nhūm Jejus kām:

—Tỳ. Nā am hāmri na ka ja jarē. Na hte pahi hkrajaja ō papaj mā kàxpore nhōr kēt nē. Mē kēp hkra kēnā. Tā ixpē Tirtūm Kra jakamā mo kaxyw kot pa kēt ōrkwý hwýr inhýx kaxyw kām kàxpore hkwy gō?

²⁷ Tā nom kot paj ōr kēt nhūm kàxpore hkwy jamýnh xwýnhjaja tee ri ja hā ixpumu nē axpēn mā ixte amnhī tomnuj xwýnh ā ijarē. Jakamā e ma gōnhmā tē nē tep ō kanhē. Hāmri nē ho api nē apy nē hakwa jakjē nē kamā kàxpore htỳxre pumu. Nē apy nē man o tē nē pahpānhā kàxpore jamýnh xwýnhmā mā agō. Anē.

Nhūm pre ā Jejus Simāw Pêtre mā karō anē nhūm kuma nē ma hwýr tē nē kot kām karō xā hkôt ā amnhī nhīpēx anē.

18

Mē kot amnhī to rūnh xwýnhjē jarēnh

Makre 9.33-37; Rukre 9.46-48; mādānēn Piriapos 2.3-7; Wam Pêtre 3.4, 5.5-6

¹ Tā mē ixte Jejus kôt ixpa ho ixpa xwýnhjaja amnhī kukamā ijamaxpēr nē amnhī tā Jejus kukja nē kām:

—Kwa mē inhmā mēmoj jarē Pahihti. Nhýrmā mē ixpē pahi nē anhīhkō hā mē ho amnhīptār o ri ixpata ā mē ixtō kot paj we mē ho amnhīptār rax o ixkwýjē jakre? Anē.

² Hāmri nhūm mē inhma nē amnhī wýr mēhprīre hō mā hpa ho apē nhūm hwýr tē nē mē ixkuri xa.

³ Hāmri nhūm Jejus omu nē hā mē inhmā:

—E mē inhma. Kēr ka mē apē pahi pyrāk o tanhmā amnhī jarēnh to ho ri apa hkēt nē. Am te amarī ri mē apa pyrāk o amnhī nhīpēx. Te mēhprīre kot amnhī nhīpēx pyrāk. Kot kaj mē ā amnhī nhīpēx anhýr o apa hkēt hāmri nē nhýrmā inhīhkō hā mē ho amnhīptār kēt nē.

⁴ Jakamā kot kaj mē amā nhýrmā inhīhkō hā mē ho amnhīptār o apa hprām. Hā kot kaj mē te mēhprīre kot amnhī nhīpēx pyrā nē amā amnhī to rūnh prām kēt nē apa.

⁵ —Nē kēr ka mē apē pahi kot amnhī nhīpēx pyrāk o tanhmā amnhī jarēnh to ho apa hkēt nē. Am te amarī ri mē apa pyrāk o amnhī nhīpēx. Jao nhýr mēhprījē hō pumu nē kamā axukaprī nē kām mēmoj tanhmā ho rý kām mēmoj gō. Hāmri nē te pa ate tanhmā ixto mex to pyrāk o amnhī nhīpēx. Kot kaj mē ā amnhī nhīpēx anhýr o apa hāmri nhūm Tirtūm ja hā mē apumu nē mē ate amnhī to rūnh kēt tā mē ate amnhī to rūnh xwýnh ā mē ajarē. E kot kaj mē amā amnhī to rūnh prām hā kot kaj mē ā amnhī nhīpēx anhýr o ri apa. Anē.

Mē kot amnhī tomnuj xwýnhjē hkukamā mē harēnh

⁶ Nhūm Jejus arī mē inhmā mēhprī jarē nē mē inhmā:

—Nê mêhprîre na htem amnhî kaxyw ixkôt hamaxpêr o pa. Tã koja mêhõ inhnê tanhmã mê kãm kapêr to. Mê kot tanhmã amnhî tomnuj to hprãm xäj tanhmã mê kãm kapêr to ho pa. Hãmri nhũm mê kuma nê mê kapêr xã hkôt tanhmã amnhî tomnuj to. Hã koja Tirtũm ja hã omu hãmri nê kot inhnê tanhmã kãm kapêr to xwýnhta pumu nê homnuj tÿx nê. Te mê kot mêhõ pynênh nê mut ã kên pytî hõ nhõr nê ma o htêm nê gô xupÿm kãm mênh pyrãk o hipêx. Te ho ja pyrãk no ãm homnuj tÿx o hakre.

⁷ —Nê koja mêhõ inhnê tanhmã mê kot ixkôt amnhî xunhwÿr xwýnhjê hõ mã kapêr to. Kot tanhmã amnhî tomnuj to hprãm xäj tanhmã kãm kapêr to. Rÿ kot ixkaga hprãm xäj tanhmã kãm kapêr to. Hãmri nhũm kuma nê mar xã hkôt ixkapêr kwÿm tanhmã amnhî tomnuj to. Tã koja Tirtũmja ja hã omu nê mãânêñ kot inhnê kêp ãmnãr xwýnhta pumu nê ã inhnê kãm kapêr anhÿrja mÿrapê homnuj tÿx kumrêx.

⁸⁻⁹ —E kwa mê okora. Kot kaj mê anhîhkra ho tanhmã amnhî tomnuj to rÿ apar o tanhmã amnhî tomnuj to. Hã kêr ka mê axte ã amnhî nhîpêx anhÿr pymaj te mê ate amnhî pê krãhyr nê mênh pyrãk o amnhî nhîpêx nê axte ã amnhî tomnuj anhÿr kêt nê. Rÿ ka mê ano ho mêmoj punuj pumu. Hã kêr ka kãm ajamaxpêr pix o apa pymaj te mê ate amnhî pê ano katök nê kaxãr nê mênh pyrãk o amnhî nhîpêx nê nhãm arît kurê kumrêx. Kêr ka mê ã amnhî nhîpêx anhÿr o ri apa. Hãmri nê nhÿrmã ty nê ma Tirtũm nhõ krî hwÿr api. No kot ka mê arî akutã ano nê arî akutã apar nê arî akutã anhîhkra rãhã ri apa htã ho amnhî tomnuj o apa. Hãmri nê nhÿrmã ty nê ate amnhî tomnuj mÿrapê ma mê kot amnhî xã htÿx kamã hamak tũm xã hwÿr ma mõ.

¹⁰⁻¹¹ —Nê kêr ka mê mêhprîrejê kamã axukapri rãhã ho apa. Na hte kaxkwa kamã Tirtũm kapêr o mê wrÿk xwýnh kwÿjaja Tirtũm mã mê hamãr mex o pa. Tã koja mêhõ tanhmã kêp hõ hto nhũm mê hã omu nê ma tẽ nê Tirtũm mã harênh kurê kumrêx. Anê.

*ôwêhti pikunor jarênh
Rukre 15.3-7*

¹² Nhũm Jejus arî mê inhmã kapêr nê mê inhmã:

—E pa mê amã awjarê ka mê ixujarênh ma. Nã koja mêhõ my hkrit ôwêhti sohtõ nê. Nê apkati mê ma hamãr o pa. Hãmri nhũm pyxire nê tanhmã amnhî to nê kêp akunok. Kwÿ kaga nê ma nhÿhÿm ahte tẽ nê kêp akunok. Hãmri nhũm mytita ma akupÿm o mõr kaxyw hkwy ho pikuprõnh pa hãmri nê tee ri hkwy kaêx ã pikunor xwýnhta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwy ho mõ nê

nhÿri kure. Kutêp apkur kaxyw nhÿri kure hãmri nê ma akupÿm pikunor xwýnhta japêr o tẽ.

¹³ Hãmri nê hapêr ryy nê nhÿri hwÿr kato nê omu nê hkînh nê. Hãmri nê kutu nê ma akupÿm o tẽ. Na hte pikunor kêt xwýnhjê nhÿ hã hkînh tã pikunor xwýnhta mã kato nê hkînh tÿx nê. Krit sohtõ htã nom ãm kãm ho pixi nê ho hpikunor prãm kêt. ã Mê ujarênh kot anhÿr.

¹⁴ Ja pyrã nê Tirtũm kãm mêhõ pyxi nê nhÿrmã ma kuwy wÿr mõr prãm kêt kumrêx. Mê piitã mê kot hkôt amnhî xunhwÿrja na kãm hprãm. Anê.

Jejus kôt mê pahtõjê hõ kot mê pahtomnuj jarênh

¹⁵ Nhũm Jejus arî mê inhmã kapêr nê mê inhmã:

—Nê ja. Koja ixkôt mê atõ rÿ mê atõx tanhmã atomnuj to. Hã kêr ka ma hwÿr tẽ nê kot tanhmã anhîpêx to hã amnhî tã kãm akapêr. Nom kêr ka mê nhãm mêhõ mã harênh kêt nê. ãm tanhmã kot ato xwýnhta pix wÿr tẽ nê kumê war axpên mã akapêr nê war axpên ma. Nhũm ama nê akupÿm tãm anhîpêx hã kêr ka akupÿm te ixkôt kêp atõ rÿ atõx pyrãk o ka wa axpên nhîpêx nê axte jam ajamaxpêr kêt nê.

¹⁶ Nom koja ama nê ãm ama rÿ tanhmã ato hkêt ã amnhî jarênh japêr. Hã kêr ka ma akupÿm tẽ nê akupÿm amnhî kôt Kris kôt atõ rÿ atõx o axkrut rÿ mê ho axkrunêpxi nê amnhî kôt hwÿr mê o mra kê mê axpên tã war ama. Amnepêñ Tirtũm kapêr ã kaga htũm kot ja jarênh o:

Kêr ka mê atõ tanhmã axpên nhîpêx to. Hãmri nê hã axpên mã akapêr kaxyw nê amnhî kôt akwÿjê ho axkrut rÿ ho axkrunêpxi nê akupÿm hwÿr mê o mra kê mê axpên tã war ama. Anê.

—ã Tirtũm kapêr ã kaga htũm kot ja jarênh kot anhÿr.

¹⁷ Jakamã kêr ka mê amnhî kôt akupÿm kot tanhmã ato xwýnhta wÿr mê o mra kê mê atã kuma. Hãmri nhũm arî mê kãm kot tanhmã ato hkêt ã amnhî jarê ka tee ri amnhî tã omu nê ikrêsti hwÿr tẽ nê Kris kwÿ hã mê pikuprõnh xwýnhjê mã harê. Kê mê ama hãmri nê ja hã axte kot tanhmã ato xwýnhta mã kapêr. Nhũm mê mar kêt nê arî kot tanhmã ato hkêt ã amnhî jarê ka mê amnhî nê hanor kurê kumrêx. Hãmri nê te kêp Kris kôt mê atõ rÿ mê atõx kêt pyrãk o hipêx.

¹⁸ —Nê koja mêhõ ixkôt amnhî xãm nê Inhîpêxã Tirtũm kôt ri amnhî nhîpêx o pa. Ka mê ja hã omu nê inhÿ hã tanhmã kãm akapêr to nê kãm; “E ra ate Jejus kôt amnhî xãm jakamã kot kaj nhÿrmã Tirtũm mê wa kuri amex kumrêx nê atÿr tũm nê apa ho apa.” Anhÿr o kãm akapêr. Nom mê kot

ixkôt amnhî xunhwÿr kêt xwÿnhjaja ka mē ā mē kām akapēr anhÿr kêt nē. Ām inhÿ hā mē kām: “No mē kajaja mē ate Jesus kôt amnhî xunhwÿr kêt jakamā kot kaj mē Tirtūm mē Krata wa kuri atir tūm nē amex nē apa hkēt nē.” Anē. Kēr ka mē inhÿ hā ā ahpÿnhā tanhmā mē kām akapēr to ho apa anē.

19-20 —Nē kot kaj mē Tirtūm mā amnhî jarēnh kaxyw te axkrutre rÿ axkrunēpxire htā axpēn wÿr akuprō nom mē kapxixijaja apikuprōnh kêt nē. Kot paj mē akaēx ā mē anhîhkō hā mē amar o xa. Mē ate ano ho ixpumunh kêt tā pa wa mē anhîhkō hā mē amar o xa. Jakamā kot kaj mē axpēn wÿr akuprō nē mēmoj tā Tirtūm wÿr nhūm kaxkwa kamā ja hā mē ama. Nē mē ate hā axāhwÿr xwÿnhnta nhūm mē amā tanhmā ho. Kēr ka mē ā ixkamnār rom axāmnhîx amnhî to Inhîpēxā hwÿr anē. Anē.

Nhūm pre ā Jesus mē inhmā kapēr anē.

Mē pahte tanhmā axpēn nhîpēx to hā mē pamā karō

Matêwre 6.14-15; Rukre 17.3-4; määnēn Epes 4.32; Korosē 3.13

²¹ Tā nhūm Simāw Pêtre Jesus wÿr tē nē mēmoj tā hkukja nē kām:

—Kwa inhmā mēmoj jarē Pahihtî. Xā koja akôt ixtō rÿ ixtōx tanhmā inhîpēx to pa amnhî tā omu nē ām omu nē amnhî tā tanhmā ho hkēt nē. Nhūm axte tanhmā ixto nē axte tanhmā ixto ho 6 tā pa ām amnhî tā omu nē amnhî tā tanhmā ho hkēt nē. Ām ho ijamakētcati nē axte kām ijamaxpēr kêt nē. Ā amnhî tā hipēx anhÿr o 7 nhūm ja amā mex nē nā? Anē.

²² Hāmri nhūm kām:

—Nā kot kaj ā amnhî tā hipēx anhÿr o 7 pix kêt nē. Koja mēhō xatā tanhmā ato rāhā nē ka amnhî tā omu nē ajaxwÿja amnhî tā xatā tanhmā ho hkēt nē. Ām amnhî tā omu nē ām omu nē tām hipēx rāhā ho ri apa. Māmri ho anhÿr o apa rāhā nē aa jam anhÿrer kêt nē.

²³ —E kot paj ixprî hā mē amā tanhmā ja jarēnh to ka mē inhma. Tirtūm na hte xatā mē ate tanhmā amnhî tomnuj to hā mē apumu nē mē anē rēnh o pa. Te kot pahi kot ā hkwÿjē nhîpēx anhÿr pyrāk. Koja mē ō pahija kām mē āpēnh xwÿnhjaja kot kēp kaxpore ho ipresta hā mē omunh kaxyw nhÿ.

²⁴ Hāmri nhūm mē hwÿr ja ho tē nē kutā ām. Ra kot kēp hikāxpore ho ipresta rax xwÿnhja.

²⁵ Tā no ām aa akupÿm kām ōr kêt nē ra kēp ho hapēx pa. Hāmri nhūm pahija tee ri amnhî tā omu nē hkwÿjē mā hā amÿnē nē mē kām: “E. Mē ma o tē nē hprō nē hkrajaja nē ōrkwÿ nē hikukrēx mērohā ho wēnē hpa nē hpānhā kaxpore py nē man inhmā o tē. Kot ixpē ixkaxpore ho ipresta nē akupÿm inhmā ōr kêt mÿrapē.” Anē.

²⁶ —Hāmri nhūm kot ho ipresta xwÿnhnta tee ri amnhî tā kuma nē kutā hkōnkrā ho nhÿ nē amnhî to hwÿr kām hihtÿx nē kām: “Kwa nā ri ixto anhÿr kêt nē pahihtî. Ixkamā axukapri nē hkēt wehe. Nā kot paj akupÿm amā kugō kām ga.” Anē.

²⁷ —Hāmri nhūm amnhî tā kuma nē kām hkapri nē. Hāmri nē kām: “Tōe. Nā kot paj ā anhîpēx anhÿr kêt nē. Kot paj anhō kôt kaxōnh pa nē kumē ka māmri ma ajamakētcati nē axāmnhîx apa.” Anē.

²⁸ Nhūm ā kām kapēr anē nhūm kuma nē hkīnh nē. Hāmri nē ma tē nē kato nē ixkre kapem pōristi hō pumu. Na pre ra kēp kaxpore hkwy ho grire nē ho ipresta nhūm kato nē omu. Hāmri nē hwÿr tē nē amnhî kīnhā ōkre hā kumÿ nē kām: “Kwa tokyx akupÿm ate ixpē kaxpore ho ipresta pānhā inhmā agō.” Anē.

²⁹ Hāmri nhūm tee ri amnhî tā omu nē ra ham kot pahi kutā amnhî nhîpēxta pyrā nē kutā hkōnkrā ho nhÿ nē kām: “Kwa nā. Kwa ri ixto anhÿr kêt nē. Nā kot paj hpānhā amā kugō. Kwa ixkamā axukapri nē hkēt wehe.”

³⁰ Anhÿr tā nom nhūm kuma nē ām kuma nē hā amÿnē. Hā hkwÿjē mā amÿnē nē mē kām: “E mē ma jahti ho tē nē haxā. Koja kot ixpē kaxpore ho ipresta pānhā inhmā kugō nē ri kormā kato nē ri amnhî pumu.” Anē. Hāmri nhūm mē kuma nē ma o tē nē haxā.

³¹ —Hāmri nhūm hkwyjaja tee ri mar o kuhē nhūm mē kēp ja omnuj nē nhūm mē pahi hwÿr agjē nē kām harē.

³² Hāmri nhūm tee ri harēnh ma nē kamā gryk tÿx nē akupÿm amnhî wÿr hā karō nhūm akupÿm hwÿr axā nhūm kām: “Tk. Kwa na ka pre amnhî tomnuj tÿx nē. Ate amnhî to ixwÿr nhūm inhmā akapri nē ixte anhō kôt kaxōnh nē mēnh tā

³³ ka amnhî kīnhā anhîōta kamā axukapri hkēt nē ri ā hipēx anē.” Anē.

³⁴ Hāmri nē kamā gryk nē hā ō pōristi mā amÿnē nhūm mē ma o tē nē haxā. Mē kot mē hagjēnh xā hā ixkre kamā apkati mē tanhmā mē kot hipēx to kaxyw nhūm mē kām hā amÿnē. Tanhmā mē kot hipēx to rāhā nhūm kot akupÿm kaxpore raxta nhōr par nē ri kormā kator kaxyw nhūm mē ma o tēn haxā. Ā mē ujarēnh kot anhÿr. Anē.

³⁵ Nhūm pre ā Jesus mē ixte hkōt ixpa ho ixpa xwÿnhjē mā kapēr anē. Hāmri nē mē inhmā:

—Ja pyrā nē koja ixkôt mē atō rÿ mē atōx tanhmā mē atomnuj to ka mē amnhî tā omu nē ām omu nē ho ajamakētcati kurē kumrēx nē axte kām ajamaxpēr kêt nē. Te pahi kot mēhō nhō kôt kaxōnh par nē axte kām hamaxpēr kēeta pyrāk. No kot kaj mē ā amnhî nhîpēx anhÿr kêt nhūm kaxkwa kamā inhō Papaj ja hā mē apumu nē te ho pahi tee ri kot amnhî tomnuj xwÿnhnta kot amnhî nhîpēx ā omunh nē hā āmnēnh nhūm

mê kot apkati mê tanhmâ omnuj tota pyrâk o mê anhîpêx. Anê.

19

Jejus kot mê pahte axpên kaga nê mê pahkurê

Matêwre 5.31-32; Makre 10.1-12; Rukre 16.18; määnên Wam Korît 7.10-16

¹Tâ nhûm Jejus mê inhmâ kapêr pa nê mê inhmâ anê pa mê ixrohâ Garirej rûm ixkato nê pyhti pê Jotâw hâ rê nê hpânâ ihkjê hâ ri ixa. Pika pê Jutej kamâ.

²Hâmri nhûm mê ohtô nê Jejus pumu nê man mê ixwÿr mra nhûm mê omu nê mê kâm akupÿm mê â xwÿnhjê ho mex.

³Hâmri nhûm Parijew nhô xwÿnh kwÿjaja hwÿr mra. Hêx rom kot kamâ hamak nê tanhmâ ho kapêr punuj to kaxyw hwÿr mra nê kâm:

—Pa? Kwa mê inhmâ mêmoj jarê. Tanhmâ na pre amnepê m finat Mojesja mê pahte mê pahprô kaga hâ mê panhîgêtjê mâ karô hto? Xâ kot mê pahprô pahkwÿm ri tanhmâ amnhî nhîpêx to pu mê hkaga nhûm ja Tirtûm mâ mex nê nâ? Anê.

⁴Hâmri nhûm mê kâm:

—Nâ na ka mê aprî hâ Mojes kot tanhmâ ja jarênh to mar mex kêt nê. Ja kot anhÿr kêt. Amnepê m mêmoj piitâ hkrax kâm na pre Tirtûm my nê nija wa hipêx. Axpên kaxyw wa hipêx.

⁵Hâmri nê wa hkukamâ tanhmâ wa kot amnhî nhîpêx to hâ wa harê nê wa harênh o:

Koja mêmyjaja hprô kaxyw hâ mri nê gryk â katorxâ mê hipêêxâ wa hkaga nê âm hprô kôt pix mâ pa ho pa. Te wa tipxi nê ri wa pa pyrâk o amnhî nhîpêx. Anê.

—Na pre â Mojes Tirtûm nhÿ hâ mê kâm ja jarênh anê.

⁶Jakamâ koja te wa tipxi nê ri wa pa pyrâk o axpên nhîpêx o pa. Tirtûm tãm kot axpên mâ wa ôr kênâ kot kêt wa axtem nê ri htÿx ri hamaxpêr nê axpên kaga. Anê.

⁷Hâmri nhûm mê kuma nê kâm:

—Tÿ. Nom finat Mojes na pre mê pakukamâ mê panhîgêtjê mâ â ja hâ karô anê nê mê kâm:

Kot kaj mê aprô kaga kaxyw hâ mri nê ra kêp aprô hkêt â hâ kaga nhîpêx nê kâm agô nê amnhî nê hano kê ma tê.

—Anhÿr o na pre mê kâm hâ karô. Tâ ka na ka mê ixte axpên kaga hkêt â mê inhmâ karô. Anê.

⁸Hâmri nhûm mê kuma nê mê kâm:

—Tÿ no âm mê kâm Tirtûm kapêr kôt amnhî nhîpêx prâm kêt jakamâ na pre â mê kâm ja jarênh anê. No amnepê m mêmoj piitâ hkrax kâm na prem â amnhî nhîpêx anhÿr o pa hkêt nê.

⁹Jakamâ kêr ka mê aprô kaga hkêt nê apa. Kot kaj mê hkaga nê hpânâ nhâm mêhô ho aprô nhûm Tirtûm noo mâ te ate wam aprô kamâ nhâm aprô nyw o amnhîkati pyrâk. Tirtûm pê ja omnuj tÿx nê. Rÿ koja mêhô hprô kaga ka hpânâ ho aprô nhûm Tirtûm noo mâ te ate wam mjên pê ho amnhîkati pyrâk. Ja määnên Tirtûm pê omnuj tÿx nê. Anê.

Nhûm pre â Parijew nhô xwÿnhjê mâ kapêr anê.

¹⁰Hâmri pa mê ixte hkôt ixa ho ixa xwÿnhjaja â kapêr anhÿrja â kuma nê kâm:

—Xâ na hte mê mjên ra kâm mê hprô hkÿnh kêt tâ hkaga hkêt nê arî hkôt pa ho pa nhûm hte Tirtûm mâ ja mex nê nâ? Jakamâ kwa xâ kot paj mê nhÿrmâ ixprô kaga pymaj ixprô hkêt kumrêx nê ixa ho ixa nhûm ja mê inhmâ mex nê nâ? Anê.

¹¹Hâmri nhûm mê inhmâ:

—Nâ âm hâ mri na ka mê ja jarê. No mê ate harênhja na mê piitâ mê kâm mex kêt. Koja Tirtûm tãm amâ aprô hkêt â ajarê ka rî aprô hkêt nê ahte ajamakêtkati nê ri apa.

¹²Na htem piitâ hprô nê pa hkêt nê.

Na hte kamâ tanhmâ mê kute xwÿnhjaja kormâ hprîre ri tanhmâ kute mÿrapê kâm hprô hprâm kêt nê pa.

Nê kamâ tanhmâ mê ho mÿrapê nhûm mê hkurê hkêt nê hprô hkêt nê pa.

Nê kamâ mê kâm Tirtûm mâ tanhmâ amnhî to ho pa pix prâm xâj kâm hprô hprâm kêt nê pa.

Tâ kot kaj mê jajê pyrâ nê â amnhî nhîpêx anhÿr prâm nê rî kam nê aprô hkêt nê apa. Anê.

Jejus kot amnhî nê mêhprÿjê janor kêt â harênh

Makre 10.13-16; Rukre 18.15-17

¹³Tâ nhûm Ijaew kwÿjaja Jejus pumu nê hwÿr mê hkrarejê jamÿ nê mê o mra. Kot mê hâ îhka jaxwÿr nê mê ho Tirtûm wÿr kaxyw hwÿr mê o mra. Hâmri pa mê ixte hkôt ixa ho ixa xwÿnhjaja tee ri mê omu nê tanhmâ nê mê kâm ixkapêr to nê mê kâm:

—Tk. Mo kaxyw na ka mê Jejus wÿr mê o mra? Kormâ mê raxre kênâ. Kwa mê ma akupÿm mê o mra nâ? Anê.

¹⁴Hâmri nhûm Jejus mê inhma nê mê inhmâ:

—Kwa nâ mê ri inhnê mêhprÿjê kurê hkêt nê. Kwâr mê mâmri ixwÿr mê o mra. Anê.

Hâmri nê amnhî wÿr mê mê kâm hpa ho apê nhûm mê hwÿr mê o mra nhûm mê kuri kuhê nhûm mê omu nê mê hâ mê inhmâ:

—E mê jarejê pumu. Na htem hamakêtkati nê hkÿnh nê ri pa. Nê mê kâm amnhî to rûnh prâm kêt nê. Tâ Tirtûm kôt mê kot amnhî nhîpêx o mê pa xwÿnhjaja te mê kot jajê pyrâ nê kâm amnhî to rûnh prâm kêt nê pa. Anê.

¹⁵ Hāmri nē mē hā ihkra jaxwý nē mē ho Tirtüm wý hāmri nē mē inhmā anē pa mē ma axte mē kurüm mō.

Kāxpore rūnh xwýnh jarēnh

Makre 10.17-22; Rukre 18.18-23; määnēn Rōmān 3.19-20; Wam Ximotre 6.6; Xiakre 2.10

¹⁶ Tā nhūm Ijaew ōja Jejus wýr tē nē kām:
—Pa mē ijahkre xwýnh? Kwa inhmā mēmoj jarē. Tanhmā kot pa nhýrmā Tirtüm ri ixtír tūm nē ixa pa ixa kaxyw amnhī nhípēx to wehe? Anē.

¹⁷ Hāmri nhūm kām:

—Tk. Ra Tirtüm kot nhýrmā mē atír tūm nē apa kaxyw mēmoj tā mē amā karō nhūm ate mar mex kēnā kot ka kēt ri axte ja hā ixkukja. Nā Tirtümja mex o mex jakamā kot kaj amā kuri atír tūm nē apa hprām hā kot kaj kapēr kōt amnhī nhípēx no ri apa. Anē.

¹⁸ Hāmri nhūm kām:

—No nhý kapēr kōt kot paj amnhī nhípēx o ri ixa wehe? Anē.

Hāmri nhūm kām:

—Na pre mē amā mēmoj tā karō ho:

Kēr ka mē axpēn par kēt nē.

Nē nhām mē hprō ho amnhīkati hkēt nē.

Nē mē kēp axàhkñh kēt nē.

Nē tanhmā mē ho axēx to hkēt nē.

¹⁹ Nē anhipēēxā mē akatorxā wa hā api-jaam nē wa ho mex pē wa kutā anojarēt o ri apa.

Nē amā akwýjē hā ma ho te ka amā amnhī tā ma pyrāk o mē hipēx. Jao tām mē hipēx o ri apa.

E kot kaj amā nhýrmā Tirtüm kuri atír tūm nē apa hprām hā kēr ka ā amnhī nhípēx anhýr o ri apa. Anē.

²⁰ Hāmri nhūm kuma nē kām:

—Ku nhūm. Ra ā ixte amnhī nhípēx anhýr o ri ixa kēnā. Nom te kormā ixtír tūm nē ixa kaxyw ixte tām kēt pyrāk. Kwa axte inhmā mēmoj jarē nā? Anē.

²¹ Hāmri nhūm kām:

—Nā kormā mēmoj pyxi nē arīk. Na ka amā akukrēx rax prām týx o amā Tirtüm prām jakre. Jakamā ma akupým tē nē akukrēx rax o wēnē hpa nē hpānhā kāxpore jamý nē ma mē kēp amrakati xwýnhjē mā ōr pa. Hāmri nē rī akupýn ixwýr tē nē rī ixkōt apa ho apa. Anē.

²² Hāmri nhūm kuma nē tee ri amnhī kukamā hamaxpēr. Kām hikukrēx rax japē nē kām kamā ihkra karo hprām kēt nē. Hāmri nē tee ri Jejus kot ā kām hā karō anhýrja ma nhūm ja kēp omnuj nē nhūm ma akupým htēm kurē kumrēx.

²³ Hāmri nhūm Jejus tee ri omu nē mē inhmā:

—Hēxta waa nē. Koja mē hikukrēx rūnh xwýnhjaja ohtō nē kām mē hikukrēx japē xāj

Tirtüm mē wa ixri htír tūm nē pa ho pa hkēt nē. Wa ixte amnhī nhípēxja mē kēp hihtýx.

²⁴ Mē kām hikukrēx rūnh mā ihkra karo hprām kēt rāhā tee ri kām Tirtüm kōt amnhī nhípēx prām kaprý. Te ho mēhō kot menh kagō hā hkre nē kām kagō katōk prām kēt rāhā kām guhkrax kām ār prām kaprýta pyrāk. Anē.

Nhūm pre ā Jejus mē inhmā kapēr anē.

²⁵ Hāmri pa mē kuma nē tee ri amnhī kukamā ijamaxpēr nē kām:

—Kwa mē xpiitā mē inhmā mē ixkukrēx japē kēnā. Jakamā xā kot paj mē xpiitā nhýrmā war ari ixtír tūm nē ixa ho ixa hkēt nē nā? Anē.

²⁶ Hāmri nhūm mē inhmā:

—Nā kot kaj mē amnhī krā hkōt mē amā mē akukrēx japēja mā anhýrer kēt nē. Ām Tirtüm pix na hte ja kaxyw tanhmā mē akra hto ka mē amā akukrēx japē hkēt nē. Jao ra mē apē Tirtüm mē wa ixri atír tūm nē mē apa ho mē apa mā xwýnh. Anē.

²⁷ Hāmri nhūm Simāw Pētre kām:

—Kwa no we mē pajaja Pahihti? Na pa prem agryk ā mēmoj piitā hkaga hpa nē akōt ixa ho ixa. Jakamā kot paj mē nhýrmā war ari ixtír tūm nē ixa ho ixa nā? Anē.

²⁸ Hāmri nhūm kuma nē mē xpiitā mē inhmā:

—Tý. Kot paj nhýrmā mēmoj piitā ho nyw pa hāmri nē ixte mē ho amnhiptār o ixkri xā maati kamā nhý nē mē piitā mē kot tanhmā amnhī nhípēx to hā mē omunh xā hkōt tanhmā mē harēnh to. Tā mē kajaja mē ate ixkōt apa ho apa xwýnhjaja kot kaj mē inhmā Ijaew kot amnhī nhípēx ā mē omunh xā hkōt ahpýnhā tanhmā inhmā mē harēnh to. Mē mex ā mē harē rý mē mex kēt ā mē harē. Kot kaj mē ā inhmā mē harēnh anē. Ām hāmri na pa mē amā ixkapēr anē.

²⁹ —Nē ka mē atō inhmā tanhmā amnhī nhípēx to ho apa kaxyw akwýjē re nē ma inhmā mēmoj to anhýr o ri apa. Tanhmān anhōrkwý rý atō rý atōx re. Rý aprō nē akrajē re. Rý akatorxā mē anhipēēxā war are. Rý akukrēx piitā rer pa hāmri nē ma mē piitā mē kām ixkapēr o mē ahkre ho ri mē hkōt apa. Hā kot paj mē apumu nē mē ato mex rax nē. Hāmri ka mē ma mē hkōt apa nē mē kām ixkapēr jarēnh o apa nhūm mē kot mē amar xwýnh kwýjaja mē ama nē kām mē akñh nē. Nē ra mē ate akwýjē rer par tā mē tāmjaja te mē apē mē hkra rý mē htō rý mē htōx pyrāk o mē anhipēx nē mē ato mex o pa. Hāmri ka mē nhýrmā ty nē ma Tirtüm mē wa inhō krī hwýr api nē wa ixkuri amex kumrēx nē atír tūm nē apa ho apa.

³⁰ Nom kwa kēr ka mē amnhī tā ja ma nē amnhī to rūnh xwýnh ā amnhī kamnhix kēt nē. Jar mē kot amnhī to rūnh ā amnhī to jarkrar xwýnhjaja koja mē nhýrmā amnhī

to hkryre hã amnhĩ pumu. No jar mẽ kot amnhĩ to hkryre xwýnh ã amnhĩ jarênh xwýnhjaja koja mẽ nhýrmã amnhĩ to rũnh ã amnhĩ pumu. Anê.

20

Jejus kot nhýrmã hkrajê ho mex ã harênh Rômãn 9.14-16

¹ Nhũm Jejus arĩ mẽ ixte hkôt ixpa ho ixpa xwýnhjê mã awjarê mẽ mẽ inhmã:

—Nê kot paj nhýrmã tanhmã mẽ ato mex to. Te ixpê hpur nhô dõn kot amnhĩ nhĩpêx pyrãk o mẽ anhĩpêx. Koja pur nhô dõnja ihpur kãm mẽmo xõ ra hkã hpa nhũm omu hãmri mẽ kaxyw mẽ ãpênh xwýnhjê japêr kaxyw ma gãm tẽ. Nê gáp xa mẽ mẽ kãm akir nhũm mẽ hã akuprõ.

² Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axãpênh o amýkry pa hpãnhã mẽ kot apkati pixi hã mẽ ãpênh pãnhã mẽ kãm amnhĩrer xãja kõt mẽ amã amnhĩre.” Anê hãmri nhũm mẽ kuma mẽ kãm: “Tõe. Nã kot paj mẽ amã apê.” Anê nhũm pur wýr mẽ kurê nhũm mẽ ma kãm ãpênh mã mra.

³ —Tã nhũm arĩ kýx mã myt tẽ nhũm pur nhô dõn akupým gãm tẽ nhũm mẽ hkwyjã arĩ kuhê.

⁴ Nhũm tee ri mẽ omu mẽ mẽ kãm: “Kwa mon ka mẽ axãpênh kêt mẽ arĩ akuhê? E. Mẽ ma wamtajê hkõt mra mẽ inhmã apê pa hpãnhã mẽ amã amnhĩrer mex mẽ.” Anê.

⁵ Hãmri nhũm mẽ kuma mẽ ma mẽ hkõt mra. Tã nhũm ra myt kaxkwa nhĩpõk ri ajêr nhũm hpur nhô dõnja mã hkwyjê ho anê mẽ. Kê axte mẽ hkõt jajê jano nhũm mẽ ma mẽ hkõt mra. Tã nhũm ra myt ahpanh grire nhũm ma akupým kêwe gãm tẽ mẽ mã mẽ ho anê mẽ axte mẽ hkõt jajê mẽ.

⁶ —Tã nhũm ra myt grire nhũm ma akupým kêwe gãm tẽ mẽ jajê pumu nhũm kê wem arĩ gáp kuhê. Hãmri nhũm tee ri mẽ omu mẽ mẽ kãm: “Kwa mon ka mẽ axãpênh kêt mẽ atýx gáp akuhê ho akuhê?” Anê.

⁷ Hãmri nhũm mẽ kãm: “Nã mẽhõ kot mẽ inhmã mẽ ixãpênh ã karõre hã.” Anê. Hãmri nhũm mẽ kãm: “Tõe. Mẽ ma mẽ hkõt ixpur wýr mra mẽ inhmã mãn apê.” Anê hãmri nhũm mẽ kuma mẽ ma hkwyjê hkõt mra.

⁸ —Tã nhũm ra kamãt. Hãmri nhũm hpur nhô dõnja kãm ãpênh xwýnhjê krãhtũm wýr tẽ mẽ kãm: “E. Mã mẽ hwýr tẽ mẽ mẽ kãm anê mẽ mẽ ãpênh kaga mẽ man akõt mra ka inhmã mẽ kãm amnhĩre. Nom kêr ka hapu hã mẽ mõi xwýnhjê kumrêx mã amnhĩre mẽ wam mẽ mõi xwýnhjê ho hapu mẽ mẽ mẽ kãm amnhĩre.” Anê. Hãmri nhũm kãm: “Tõe. Nã kot paj mẽ ho anê.” Anê.

⁹ Hãmri mẽ ã mẽ kãm amnhĩrer anê. Hapu hã mẽ mrar xwýnhjê kumrêx mã amnhĩre.

Te mẽ kot kwýhtã ãpênh o amýkry pyrãk o nhũm hpãnhã mẽ mẽ kãm amnhĩre.

¹⁰ Hãmri nhũm wam mẽ mrar xwýnhjaja ja hã mẽ omu mẽ hkingh mẽ. Hãmri mẽ htýx hamaxpêr o: “Nã kot paj xep kãxpore jamýnh rax o mẽ hakre. Ixãpênh rax o ixte mẽ hakrenh kênã.” Anhýr tã no nhũm mẽ piitã mẽ mẽ kãm amnhĩrer o axpên pyrãk. Ra pur nhô dõn kot kãm hã karõ xã hkõt.

¹¹ Hãmri nhũm mẽ hamý mẽ tee ri hkre kamã omu mẽ we ra hpur nhô dõnja kamã gryk mẽ.

¹² Hãmri mẽ hwýr mra mẽ kãm: “Kwa jajaja na mẽ amã ãpênh o ore pyxi mẽ. No kêt mẽ pajaja na pa mẽ kwýhtã ixãpênh rax o kamãt. Arĩgro htýx kãm ixãpênh o ixãm o ixtã kamãt tã ka pêr ãm mẽ inhmã amnhĩrer o axpên pyrãk. Kwa na ka mẽ ixtomnuj mẽ.” Anê.

¹³ Hãmri nhũm mẽ kuma mẽ mẽ kãm: “Tk. Nã na pa mẽ atomnuj kêt mẽ. Na pa kwýhtã tanhmã mẽ amã amnhĩrer to xã jarê ka mẽ inhma nhũm ja mẽ amã mex mẽ ka mẽ ma hwýr axãpênh mã mra.

¹⁴ Kwa mẽ akãxpore jamý mẽ ma mra. ãm pa inhmã hprãm xã hkõt na pa ã mẽ amã amnhĩrer anê.

¹⁵ Ixkãxpore jakamã kot paj nhãm inhmã mẽhõ mã õr prãm xã hkõt kãm kugõ. Tã ka mẽ ã mẽ hã ixkamã agryk anê. E mẽ akãxporeja my mẽ ma mra.” Anê. Nhũm ã hpur nhô dõn mẽ mẽ kãm kapêr anê. ã mẽ ujarênh kot anhýr. Anê.

¹⁶ Nhũm pre ã Jejus mẽ inhmã ujarênh anê mẽ mẽ inhmã:

—Ja pyrã mẽ wam mẽ ate ixkõt amnhĩ xunhwýr xwýnhjaja mẽ hapu hã mẽ kot kormã ixkõt amnhĩ xunhwýr mã xwýnhjaja kot paj nhýrmã mẽ apiitã mẽ ato mex kumrêx o axpên pyrãk. Anê.

Jejus kot htyk kukamã amnhĩ jarênh Makre 10.32-34; Rukre 18.31-34

¹⁷ Tã nhũm Jejus mẽ inhmã anê pa mẽ ixrohã ma Jerujarê hwýr mẽ. Mẽ ohtõjê hkõt mẽ. Hãmri nhũm Jejus mẽ ixpê 12jê mã anê mẽ mẽ ixkwýjê hkãx ã mẽ inhmã kapêr kaxyw ahte hapu hã mẽ ixto mẽ.

¹⁸ Hãmri mẽ mẽ inhmã amnhĩ kukamã tanhmã amnhĩ jarênh to mẽ mẽ inhmã:

—E na pu mẽ ra Jerujarê hwýr mẽ. Kamã koja mẽ pahkwýjaja inhĩpêx kati mẽ. Koja mẽ patre krãhtũmjê mẽ Mojes kapêr o mẽ ahkre xwýnhjê nhĩhkram ijaxã nhũm mẽ kot ixpir kaxyw ixtã amýnê.

¹⁹ Koja mẽ mẽ kãm ixkurê xwýnhjaja ixpynê mẽ Rõm nhô xwýnhjê nhô põiistijê hwýr ixto tẽ mẽ mẽ kãm tanhmã ixto hêx to. Hãmri nhũm mẽ kuma mẽ mẽ mar xã hkõt tanhmã inhĩpêx to. Nhũm mẽ hkwyjaja ixtã hpêr o axkê mẽ ixtã akunha nhũm mẽ hkwyjaja ixto kapêr punuj mẽ tanhmã ijapry hto mẽ ixtak.

Hāmri nē ma ixto tē nē pī kahpa hā inhō nē
ixpī. Ā koja mē inhīpēx anē. Nom kot paj
ixtyk ā ixtā apkati axkrunēpxi nhūm Tirtūm
akupŷm ixto ixtīr. Anē.

*Xiakre mē Juāw wa katorxā kot wa ho
Jejus wŷr ā harēnh*

*Makre 10.35-45; māānēn Rōmān 12.3,
12.10, 12.16; Epes 4.2; Piripos 2.3-8; Xiakre
4.6; Wam Pētre 5.3*

²⁰Tā nhūm Jepetew prōja amnhī kōt Jejus
wŷr hkra Xiakre mē Juāwja wa o tē. Kot wa
ho Jejus wŷr kaxyw hwŷr wa o tē. Mē ixpyrā
nē wa kot Jejus kōt pa ho pa xwŷnhjē hō na
pre wa nhūm wa katorxāja Jejus wŷr wa o tē.
Hāmri nē kutā hkōnkrā ho tēm nē nhŷ

²¹nhūm kām:

—Pa mo na? Anē.

Hāmri nhūm kām:

—Ma ixkrata na pa ixte wa ho awŷr kaxyw
awŷr wa o tē. Xē kot kaj nhŷrmā ate mē piitā
mē ho amnhīptār kaxyw nhŷ nhūm ixkrata
wa akutā anhījē nē wa kēp anhō kōwenatō nē
akutā anhījē nē wa ato nhŷ. Ja prām xāj na
pa ā wa ho awŷr anē. Anē.

²²Hāmri nhūm kuma nē Xiakre mē Juāw
wa omu nē wa kām:

—Nā na war akatorxāja htŷx ā war ato
ixwŷr anē. Koja mē tokyx xipī kot paj amnhī
xā htŷx kām ijamak kām ty. Tā xā koja mē
ixpyrā nē ā war anhīpēx anē ka wa ixpyrā
nē amnhī xā htŷx kamā ajamak rax kām ty
nā? Anē.

Hāmri nhūm wa kām:

—Tŷ. Nā kot pa wa ijaxwŷja anē nē apyrā
nē amnhī xā htŷx kām ijamak kām ty. Anē.

²³Hāmri nhūm wa kām:

—Nā ām hāmri na ka wa amnhī jarē. War
ate ixpyrā nē ixkōt amnhī xā htŷx kām aja-
mak kām atyk mā kēnā. Tā nom war aka-
torxā kot war ato ixwŷrta ā kot paj tanhmā
war amā nē hkēt nē. Kēt inhō Papaj tām koja
ixkaxyw mēhō japēr nhūm inhīhkō hā nhŷ.
No pa kot paj amnhī kaxyw mēhō jarēnh kēt
nē.

Anhŷr o wa kām kapēr.

²⁴Hāmri pa mē ixte wa urāk nē Jejus kōt
ixpa ho ixpa xwŷnhjaja wa katorxā kot ā wa
ho Jejus wŷr anhŷrja ā kuma nē wa kamā
inhgryk nē. Hāmri nē axpēn mā ixkapēr o:

—Tk. Nā koja Juāw mē Xiakre wa nhŷrmā
kēp ō kōwenatō nē mē pahto amnhīptār kēt
kumrēx. Anē.

²⁵Nhūm Jejus mē inhma nē amnhī wŷr mē
ixpiitā mē inhmā hpa ho apē nē mē inhmā:

—E mē annē ixwŷr axkamē pa mē amā
awjarē mān. Anē.

Hāmri pa mē hwŷr axkamē nhūm mē
inhmā:

—E mē inhma. Na hte Ijaew kēt xwŷnhjē
nhō pahijaja ā amnhī nhīpēx anhŷr o ri
pa nē amarī hkrī xā kamā hkrī ho hkrī.

āhpumnh tŷx jakamā amarī ixkre hkre
jakry kamā hkrī ho hkrī nē kām mē āpēnh
xwŷnhjē pix mā mēmo mē āpēnh ā karō. Na
htem ā amnhī nhīpēx anhŷr o hkrī. Nē mē
kot mex ā harēnh kaxyw tanhmā mē ho mex
to ho pa.

²⁶⁻²⁷Tā no mē kajaja. Kēr ka mē ho mē
urāk kēt nē. Ām te amarī ri mē apa pyrāk
o axpēn nhīpēx o ri apa. Nē te mē apē mē
kām axāpēnh xwŷnh pyrāk o amnhī nhīpēx o
ri mē hkōt apa. No kēr ka mē ho amnhīptār
mā ajamaxpēr o ri apa hkēt nē.

²⁸Mē ate mēmoj tā pa ixkutā anojarēt ho
apa kaxyw na pa pre mē awŷr ixwŷr kēt
nē. Ixte amarī mēmoj to mē kamjaja mē
akutā inhnojarēt o ixpa kaxyw na pa pre mē
awŷr wrŷ. Nē mē ate ixkōt amnhī xunhwŷr
xwŷnhjē nē ixtyk kaxyw na pa pre wrŷ. Anē.

*Jejus kot no hkre xwŷnh wa ho mex ā
harēnh*

*Matêwre 9.27-31; Makre 10.46-52; Rukre
18.35-43*

²⁹Tā pa mē Jejus kōt kormā Jerujarē hwŷr
ra Jeriko htēp o mō. Hāmri nē kurūm ixkaton
mō nhūm mē ohtō nē mē ixkōt mra.

³⁰Nhūm pry nhīhkjē hā no hkre xwŷnh
wa āhwŷr o hkrī xwŷnhja wa amnhī wŷr mē
inhmār mar o nhŷ. Mē ohtō nē Jejus kōt
mē mrar xwŷnhjē mrar ma nē mē kām:

—Kwa mo na? Mēmoj wŷr na ka mē axo-
htō nē mra? Anē.

Hāmri nhūm mē wa kām:

—Nā Jejus pē Najare nhō xwŷnhhta kōt na
pa mē mra. Anē.

Hāmri nhūm wa mē kuma hāmri nē kàx pē
Jejus mā kapēr nē kām:

—Pa Pahihti? E apē mē inhō Pahihti mex
na ka. Te apē amnepēm anhīgēt pahihti
Tawita pyrāk. Jakamā kwa wa ixkamā
axukapri nē akupŷm wa ixto mex. Anē.

³¹Hāmri nhūm Jejus kōt mē mōr xwŷnhjaja
wa kuma nē wa kām:

—Tk. Kwa war akapēr kēt nē nhŷ nā. Anē.

Tā no nhūm wa ām mē kuma nē xatā
amnhī to kuwŷ. Kàx pē amnhī to kuwŷ.

³²Hāmri nhūm Jejus wa kuma nē xa nē wa
omu nē wa kām:

—Pa mo na? Tanhmā kot pa wa ato? Anē.

³³Hāmri nhūm wa kām:

—Nā akupŷm wa inhmā wa ixrit mex
prām. Anē.

³⁴Hāmri nhūm kām wa hkapri nē wa
no htok nhūm wa akupŷm rit mex kurē
kumrēx. Hāmri nē rit mex ā amnhī pumu nē
hkīnh tŷx nē ma Jejus kōt hkŷjē hkōt mō.

21

*Jejus kot Jerujarē hwŷr àr ā harēnh
Makre 11.1-11; Rukre 19.28-40; Juāw
12.12-19*

¹ Tã nhũm Jejus kormã Jerujarê hwÿr kormã mô. Pa mê hkôt mô nê ra Petake hwÿr ixàhtêp o mô. Hixêht pê Oriwêhti kahti ri na pre krÿja xa. Jakamã pa mê wa hwÿr ixàhtêp o mô nhũm Jejus mê ixte hkôt ixpa ho ixpa xwÿnhjê wa ho axkrut nê amnhî kukamã wa kumê.

² Nê wa kãm:

—E wa ma krÿ mÿj wÿr mê ixkukamã wa tẽ. Nê wa hwÿr axã nê nhÿri jumênre mê hkra wa kãm ê nê wa âm xwÿnh wa omu hãmri nê kãm ê xã hpôt nê man akupÿn amnê hamê wa o tẽ.

³ Koja mêhõ ja hã war apumu nê hã tanhmã war amã kapêr to ka wa kãm ã ijarênh anê nê kãm: “Nã mê panhõ Pahihti na hã karõ pa wa hwÿr tẽ.” Anhÿr o wa kãm ijarê. Hãmri nhũm war ama nê war amã ör kurê kumrêx. E wa ma hwÿr tẽ. Anê.

⁴ Tirtũm kapêr ã kagã htũm ra kot ja kukamã harênh. Na pre ra Tirtũm nhÿ hã kapêr xwÿnhjê hõ ja jarê nê hã kagã ho:

⁵ Pa Jerujarê nhõ xwÿnhjaja. Kwa mê tee ri amnhî kukamã ajamaxpêr ho amã ma hkêt nê. Ota mê anhõ pahi nywta ra jumênre hã nhÿ nê mê awÿr hpõx o tẽ. Te kot amnhî to grire xwÿnh pyrãk o amnhî nhîpêx nê tẽ.

⁶ Anhÿr o kot hkukamã harênh jakamã nhũm Jejus amnhî kukamã ja wa kumê hãmri nhũm wa ma hwÿr htêh kurê kumrêx.

⁷ Nê krÿta wÿr pøj nhũm Jejus kot wa kãm harênh xã hkôt nhũm wa jumênreta pumu. Hãmri nê hamê wa kãm ê xã hpôt nê ma Jejus wÿr wa o tẽ. Hãmri nê kaxyw amnhî xê hkwy hkwÿr nê kãm ho jumênre nywta kô kahty. Nê kãm ho htÿx nê o xa nhũm Jejus hã nhÿ nê hã mô.

⁸ Kormã Jerujarê hwÿr hixêht ã àpir o mô. Nhũm mê kot omunh o kuhê xwÿnhjaja hkÿnh nê ma hkukamã pry ho mex kaxyw amnhî xê hkwyptyr ho mô. Nê pô hkwy jakã nê utr o mô.

⁹ Nhũm mê hkwyjaja Jejus kukamã mra nhũm mê hkwyjaja hapu hã hkôt mra. Nê piitã kãx pê Tirtũm mex o mex ã harênh o hkôt mô nê harênh o:

Ota Tirtũm kot mê pahwÿr mênh xwÿnhnta ra pøj. Âm hãmri na mê pahwÿr wÿr. Ja na mex kumrêx. Kêp mê panhõ Pahihti mex na. Âm hãmri na pre Tirtũm mê pahwÿr kumê. Tirtũm mex kumrêx. Âm mex o mex.

Anhÿr o Jejus kôt Jerujarê hwÿr harênh o mô. Kot mê ho amnhîptãr kurê kumrêx ã hkamnhix jakamã hkÿnh nê hkôt ã harênh anhÿr o mô.

¹⁰ Hãmri nhũm krÿ nhõ xwÿnhjaja tee ri mê kuma nê xepên mã:

—Kwa mêhõ na we hpõx o mô nhũm mê ã hkôt harênh anhÿr o mô? Anê.

¹¹ Hãmri nhũm Jejus kôt mê mra xwÿnhjaja mê kuma nê mê kãm:

—Nã Tirtũm nhÿ hã kapêr jarênh xwÿnh pê Jejus na. Kêp Garirej kamã krÿ pê Najare nhõ xwÿnhnta na. Anê.

Jejus kot Tirtũm nhõrkwy hwÿr ãr ã harênh Makre 11.15-19; Rukre 19.45-48; Juãw 2.13-22

¹²⁻¹³ Tã hãmri nhũm Jejus Jerujarê wÿr axã nê jumênre rùm wÿr nê ma Tirtũm mã amnhî jarênh xã hã ixkre hwÿr tẽ nê axã. Hãmri nê tee ri mê kot tanhmã ixkre kamã amnhî nhîpêx to hã mê omunh o xa. Nhũm mê axtem nê môx nê ôwêhti nê tuuti ho wênê ho kuhê. Mê kot haprõr nê Tirtũm mã amnhî jarênh kaxyw kãm hpar nê ör kaxyw mê kãm ho wênê ho kuhê. Nom axtem nê mê kãm hã ohtõ rax kãm mê kãm ho wênê. Hãmri nhũm Jejus mê hwÿr axã nê tee ri mê omu nhũm ja kêp omnu tÿx kumrêx. Hãmri nhũm mê hwÿr tẽ nê mê kot kãxpore ho pinhpanh xwÿnhjê pê mê õ mēsti rēnh pa. Nê mê kot tuuti ho wênê xwÿnhjê pê hkri xã hkujate nê rēnh pa. Hãmri nê mê kãm:

—Tk. Kwa Tirtũm kapêr ã kagã htũm kot ixkreja jarênh kot:

Inhõrkwyja âm mê ate inhmã amnhî jarênh xã hã ixkre pix kaxyw na.

Anhÿr o kot harênh tã ka mê axtem nê kamã ã amnhî nhîpêx anê. E kwa mê ajapõx tokyx anê. Anê.

Hãmri nê mê kator pa nhũm mê ma hapêx.

¹⁴ Hãmri nhũm mê no hkre xwÿnhjaja nê mê hyk o mê pa xwÿnhjaja mra nê agjê nê Jejus kutã kuhê nhũm mê omu nê akupÿm mê ho mex.

¹⁵⁻¹⁶ Hãmri nhũm mēhprÿ hkwyjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtũm na pre mê ixwÿr amê.

Kot kaj te anhîgêt Tawi pyrã nê mê ixto amnhîptãr o apa.

Anhÿr o kãm grer o kuhê. Hãmri nhũm patre krãhtũm mê Tirtũm kapêr tũm o mê ahkre ho mê pa xwÿnhjaja tee ri ã mê grer anhÿr ã mê kuma. Nê tee ri Jejus kot mê no hkre xwÿnhjê mê mê hyk o mê pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mēhprÿjaja mê grer kãm ã ajarênh anê ka mê mar kêt nê? Mê grerja mexti hã. Anê.

Hãmri nhũm mê kãm:

—Tÿ ixte mê mar kēnã. Tirtũm kãm hprãm xã hkôt na mê ã inhmã inhmex o inhmex ã ixtã grer anê. Tirtũm kapêr ã kagã htũm kot ã mê hkukamã harênh kot anhÿr. Mê harênh kot:

Koja mēhprÿjaja Pahihti mã mex o mex ã grer o kuhê.

Anhÿr o kot mē hkukamā harēnh kēnā. Tā mñn ka mē kormā kamā harēnh kēt jakamā na ka mē ja jarēnh mar kēt nē. Kwār mē māmri ā inhñex ā grer anē.

¹⁷ Anhÿr o mē kām kapēr hāmri nē mē inhñā anē pa mē ixkreta rūm ijapōj nē ma akupÿm Petān wÿr mra nē kamā amnhñm hikra.

Jejus kot mēmo hpār mā kapēr ā harēnh Makre 11.12-14; määnēn Xiakre 1.6

¹⁸ Tā nhñm kwÿhtā nhñm Jejus kñnhmā nhÿ nē mē inhñā anē pa mē ixrohā ma akupÿm Jerujarē hwÿr mra. Hāmri nē kormā mō nhñm Jejus pry kahti ri ra kām prām nē.

¹⁹ Hāmri nē mēmo pī pē fikēhti jarēnhja pumu nē kot ô hkwÿ rēnh nē hkrēr kaxyw hwÿr māt. Hāmri nē tee ri ô japēr nhñm ô hkēt nē ām hō hpix harir. Hāmri nhñm tee ri omu nē kām:

—E kot kaj axte axō hkēt kumrēx.

Anhÿrja o nhñm grā par kurē kumrēx.

²⁰ Hāmri pa mē ixte hkōt ixpa ho ixpa xwÿnhjaja omu nē Jejus mā:

—Kokÿÿ. Kwa tanhmā na we amnhñ nhñpēx to nē grā kurē kumrēx? Anē.

²¹ Nhñm mē inhñmā:

—Nā kot kaj mē ixpyrā nē fikēhti kot tanhmā amnhñ nhñpēx to kaxyw Tirtūm mā ajamaxpēr tÿx nē nhñm amā hprām xā hkōt amā tanhmā hipēx to. Nom kēr ka mē ajamaxpēr kati ho tee ri hkukamā ajamaxpēr kēt nē. Ām kaxyw Tirtūm kōt ajamaxpēr tÿx nē nhñm mē amā tanhmā mēmoj nhñpēx to. Ām hāmri na pa mē amā ja jarē. No ām ja pix kēt. Kot kaj mē määnēn hixēt mÿj mā akapēr nē kām: “E anhÿr xāta rūm akato nē ma tē nē gō rax kām mrō.” Anē nhñm amar xā hkōt ā amnhñ nhñpēx anē.

²² —Nē kot kaj mē mēmoj tā Tirtūm wÿ nē kaxyw kām ajamaxpēr tÿx kām hā awÿ nhñm amā mēmoj prām xwÿnhnta gō. Anē.

Mēhō nhÿ hā Jejus kot mē ahkre hā harēnh

Makre 11.27-33; Rukre 20.1-8

²³ Nhñm arigro hō hā nhñm Jejus kēwe axte Tirtūm mā amnhñ jarēnh xā hā ixkreja wÿr axā nē kamā mē ahkre ho nhÿ. Mē kām tanhmā mē kot amnhñ nhñpēx to nē nhÿrmā Tirtūm mē wa kuri htir tūm nē pa kaxyw tanhmā mē kām kapēr to ho nhÿ. Hāmri nhñm Ijaew krāhtūmjē mē mē ô patre krāhtūmjaja hāmri hwÿr mra nē hēx rom mēmoj tā hkukja nē kām:

—Kwa mē inhñm amnhñ jarē. Mēhō nhÿ hā na ka hte ā amnhñ nhñpēx anhÿr o apa? Na ka hte akupÿm mē ho mex o apa nē tanhmā mē ahkre hto ho apa. Xā amnhñ krā hkōt na ka hte ā amnhñ nhñpēx anē nā? Anē.

²⁴ Hāmri nhñm mē kām:

—Nā kot pa ixkumrēx mēmoj tā mē akukja. Ka mē inhñm nē tanhmā inhñm harēnh to pa ri kormā mē amā amnhñ jarē.

²⁵⁻²⁶ Finat Juāw Paxis ā kot paj mē akukja. Mēhō nhÿ hā na pre hte mē hkrā kumrār o pa? Xā amnhñ krā hkōt nā? Xā Tirtūm nhÿ hā? E mē atō inhñmā ja jarē. Anē.

Hāmri nhñm mē kuma nē tee ri kot tanhmā kutā kām harēnh to hkukamā hamaxpēr pē axpēn pumunh o kuhē nē axpēn mā:

—Kwa tanhmā kot puj wem kām ja jarēnh to? Or mē kot mar o kuhē xwÿnhjaja na htem kēp Tirtūm nhÿ hā kapēr jarēnh xwÿnh ā harē. Tā kot puj mē kām kot amnhñ krā hkōt kot mē hkrā kumrār ā harē nhñm mē tee ri mē pama nē mē pakamā gryk tÿx nē. Nē mē paxēx rom ā mē pahte kām pakapēr anhÿr ā mē pahpumu nē kēn o mē pahtak o mē panhñmex. No kot puj mē kām Tirtūm nhÿ hā kot mē hkrā kumrār ā harē hāmri nhñm mē pamā: “Kwa ā kot anhÿr kēnā na ka prem kapēr ma nē hkōt ajamaxpēr kēt nē?” Anē. Jakamā kot puj mē ja pymaj tanhmā kām harēnh to hkēt nē. Kot puj mē ām kām aa te mē pahte ja jarēnh mar kēt pyrāk o harē. Anē.

Mē kot tanhmā Jejus mā nē nhñm kot ta pānhā tanhmā mē kām nē pymaj nhñm mē tee ri kām tanhmā nē hprām kaprÿ o kuhē.

²⁷ Hāmri nē kām:

—Konēn. Mē ixte mēhō nhÿ hā kapēr o pa hā omunhre hā. Anē.

Hāmri nhñm mē kuma nē mē kām:

—Tk. Tōe kot pa xep ijaxwÿja mē amā tanhmā amnhñ jarēnh to hkēt nē. Ijaxwÿja ixte mēhō nhÿ hā ā ixte amnhñ nhñpēx anhÿr o ri ixpa hā amnhñ pumunhre hā. Anē.

Mēhō my mē hkra wa pijakrut ā wa harēnh

Matêwre 7.21-23; Rukre 7.29-30

²⁸ Hāmri nhñm Jejus axte Ijaew krāhtūmjē mē mē ô patre krāhtūmjē mā kapēr nē mēmoj tā kuxi nē tanhmā mē kām ujarēnh to nē mē kām:

—E pa mē amā awjarē ka mē inhñm. Koja mēhō hkra my hamēxkrut. Hāmri nē hkra kot waja mā tanhmā kapēr to nē kām: “E kēr ka jarāhā ma tē nē inhñmā pur kām apē.” Anē.

²⁹ Hāmri nhñm kuma nē pur mā htēm kaga nē hitōt nē. Tāā no ām hā ahtūmre nē tanhmā hamaxpēr to hāmri nē ma hwÿr tē nē kamā āpēnh o xa.

³⁰ Hāmri nhñm wa hipēxēxaja hpānhā hkra kot hapu hwÿr tē nē mā kām kapēr anē nē kām: “E kēr ka ajaxwÿja atō hkōt tē nē wa inhñm apē.” Anē nhñm kuma nē kām: “Tōe. Nā kot paj ma tē.” Anhÿr tā no ām hōta kñnhā htēm kēt nē.

³¹ —Jakamã e. Nhỹ hkra na pre hipêêxã kapêr ma nê hkôt amnhĩ nhĩpêx nê kapêr nhĩrôp ãm kêt nê? Xà kot waja nà? Xà kot haputa? E mê atô tanhmã inhmã wa harênh to. Anê.

Hãmri nhũm mê kuma nê kãm:

—Nà kot wata. Kot wata na hitôt tã tanhmã hamaxpêr to nê ma tẽ nê kãm apê. Anê.

Hãmri nhũm mê kãm:

—Tỹ ãm hãmri na ka harê. No mê kajaja te mê ate hkra kot haputa kot amnhĩ nhĩpêx pyrãk. Mê ate Tirtũm kapêr kôt amnhĩ nhĩpêx o apa hã amnhĩ jarênh tã hkwyãm ri amnhĩ nhĩpêx o apa. Te mê ate kot hapu kot hipêêxã mã ãpênh ã amnhĩ jarênh tã kãm ãpênh kêeta pyrãk. No kêt mê kot amnhĩ tomnuj o mê pa xwỹnh kwỹjaja na mê arom Tirtũm kapêr ma nê hkôt amnhĩ nhĩpêx. Jao ra tãm amnhĩ nhĩpêx o pa. Jakamã mê arom ma kaxkwa hwỹr pa kaxyw ra tãm nê. ãm hãmri na pa mê amã ixkapêr.

³² Na ka mê finat Juãw Paxis ã ixkukja. Juãw Paxisja na pre hte mê ate tãm amnhĩ nhĩpêx ã mê amã karô ho pa. Tã no ka mê ãm ama nê ãm ama nê aa kapêr kôt amnhĩ nhĩpêx kêt nê. Nom mê kot tomnuj o mê pa xwỹnh kwỹjaja mê arom kuma nê Tirtũm kôt amnhĩ nhĩpêx. Ka mê ja hã mê omu nê ãm mê omu nê mê urãk nê ã amnhĩ nhĩpêx anhỹr kêt nê. Anê.

*Mê ãpênh punu xwỹnhjê jarênh
Makre 12.1-12; Rukre 20.9-18*

³³ Nhũm Jejus arĩ Ijaew krãhtũmjê mê mê õ patre krãhtũmjê mã kapêr. Nê mê kot tanhmã hipêx to hkukamã mê kãm tanhmã amnhĩ jarênh to. No ãm amnhĩ tã kuxi nê mê kãm awjarê nê mê kãm:

—Koja mêhõ mê kot kãm pur kãm ãpênh kaxyw hkwyjê mã karô nhũm mê ma hwỹr mra nê kamã mêmõ hy hkre nê hkre pa. Hãmri nhũm hpur nhõ dõn nhỹhỹm nojarêr nê kãm mê ãpênh xwỹnhjê mã tanhmã hpur jarênh to nê mê kãm: “E or ixpur nõ. Kê kamã mêmõj kã hpa ka mê mãmri kamã axujamỹnh pa nê ho axkjê. Nê ixkutêp inhmã inhõ jaxwỹ nê mãmri anhõ tanhmã ho hprãm xã hkôt tanhmã ho.”

—Anhỹr o mê kãm kapêr hãmri nê ma nhỹhỹm mõ.

³⁴ Tã nhũm ra pur kãm mêmõj hkã pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm ãpênh xwỹnhjê ho axkrunêpxi nê akupỹm mê hwỹr mê kurê. Mê kot mê kãm hkwy nhõr nhũm mê ma kot kãm o mõr kaxyw nhũm ma mê hwỹr mê kurê.

³⁵ Nhũm mê ma hwỹr mõ. Mõõ nê ra hwỹr pøj nhũm mê amnhĩ wỹr mê omu nê axtem nê mê homnuj nê. Nê mê unê nê ja tak nê ja pi nê hõja nhũm mê kên o htak hãmri nê

amnhĩ nê wa hano nhũm wa ma akupỹm ÿ kamã mõ.

³⁶ Hãmri nhũm mê õ patrãwja tee ri wa omu nê hamaxpêr o: “Kwa nã na mê ixpê inhmã mê ãpênh xwỹnhjê homnuj tỹx nê. Nã kot paj axte mê hwỹr mê hkwyjê rê. Nom hpãnhã mê ho ohtõ nê mê kurê. Kê mê ohtõ nê mê hwỹr mõ nê tã inhmã inhõ hkwy jamỹ nê man ixwỹr o mõ.”

—Anhỹr o hamaxpêr hãmri nê mê hwỹr jajê rê nhũm mê ma akupỹm mê hwỹr mõ. Nhũm mê amnhĩ wỹr mê ohtõ hã nê mã mê ho anê nê mê hipêx kati nê nhũm mê ÿ kamã ma õ patrãwja wỹr akupỹm mõ.

³⁷ Hãmri nhũm tee ri mê omu nê hamaxpêr o: “Hêxta waa nê. Tanhmã kot paj amnhĩ nhĩpêx to? Nã kot paj pêr mê hwỹr ixkraja mãn mê. Inhmã hapê htỹx tã kot paj mê hwỹr kumê kê ma mê hwỹr mõ. Hãmri nhũm mê kêp ixkra hã omu nê tanhmã ixpê ho hkêt nê. Nê tã inhmã kãm inhõja kwỹ gõ.” Anê.

—Hãmri nê mê hwỹr kumê nhũm ma mõ.

³⁸ Tã hãmri ra mê hwỹr hpõx o mõ nhũm mê amỹm amnhĩ wỹr omu nê kêp hkra hã omu nê axtem nê hã xpênh mã amỹnê nê axpênh mã: “E onêj hpur nhõ dõn krata tẽ. Kojã nhỹrmã õ papaj mỹr pê amnhĩm hpur ã pykata pytã nê ho õ. Jakamã kwa pu mê hpĩr kurê kumrêx nê kêp hpur ho arĩk nê ho panhõ. E tokyj pu mê kupi ri.” Anê.

³⁹ —Hãmri nhũm ra tẽ nê mê hwỹr pøj nhũm mê unê nê hpur nê ho kato nê mã ho anê nê kupi. ã mê ujarênh kot anhỹr. Anê.

⁴⁰ Nhũm pre ã Jejus mê kãm ujarênh anê. Hãmri nê hã mê hkukja nê mê kãm:

—E koja pur nhõ dõnja hkra jarênh ma hãmri nê tãm mê hwỹr mõ hãmri nê tanhmã mê hipêx to wehe? Anê.

⁴¹ Hãmri nhũm mê kãm:

—Nã koja ma akupỹm mê hwỹr mõ hãmri nê mê homnuj tỹx nê mê himex pa. Hãmri nê hpãnhã nhãm hpur ã mêmõjê rê nhũm mê tã katãt kôt kãm ãpênh o pa. Anê.

⁴² Hãmri nhũm Jejus mê kãm:

—Tỹ ãm hãmri na ka ã mê harênh anê. Kot mê ho anhỹr mã tãm kênã. Mãn ka prem ra Tirtũm kapêr ã kagã htũm kot tanhmã ja jarênh toja ma? Harênh kot:

Mê kot kên o amnhĩm õrkwỹ nhĩpêx kaxyw nê kên maati pumu nê htỹx omnuj ã hkamnhĩx nê hkagata. Mê kot hkaga htã nhũm Tirtũm mê kuroom mex o kot kên piitã hakrenh par ã omunh kurê kumrêx. Tirtũm kot kên maati mex ã harênh xwỹnhlta mê pamã mex o mex.

Ã Tirtũm kapêr ã kagã htũm kot ja jarênh kot anhỹr.

⁴³ Ja pyrã nê na pre ra Tirtũm amnhĩ kaxyw mê apê Ijaew xunhwỹ. Mê apê hkra nê hkôt mê ate amnhĩ nhĩpêx kaxyw amnhĩ kaxyw

mê axunhwý. Tã ka mê axtem në hkaga. Te mê kot kên maati pumunh në mex kêt ã hkamnhix në hkagata pyrãk. Jakamã koja mê apãnhã Ijaew kêt xwýnh kwýjê xunhwý nhùm mê arom hkôt amnhî nhîpêx mex o pa. Jao ra mê kêp hkra në. Anê.

⁴⁴ Nhùm pre ã Jejus mê kãm te kêp kên maati pyrãk o mê kãm amnhî jarênh anê. Hãmri në axte amnhî tã kuxi në mê kãm axte kên jarênh pyrãk ã amnhî jarê në mê kãm:

—Nà kot kaj mê atõ ixkaga hãmri në te mêhõ htýx htêm në kên pumunh kêt në hã hték në tèm pyrãk o amnhî nhîpêx. Jao ixkutã amnhî xãm. Rý ka tanhmã ajamaxpêr to në ixkaga nhùm te kên maati kot anhîpy tèm në axõm par pyrãk o anhîpêx ka mê amex kêt kumrêx. Anê.

⁴⁵ Nhùm pre ã mê kãm ujarênh kãm mê harênh anê. Hãmri nhùm patre krãhtümjê mê Parijew nhõ xwýnhjaja tee ri amnhî tã kuma

⁴⁶ nhùm ja mê kêp omnuj týx jakamã nhùm mê kãm unênh në haxãr prãm në. No mê ãm amnhî tã kãm mê kot mar o kuhé xwýnhjê puma në. Mê kurom Jejus kêt Tirtüm nhý hã kapêr xwýnh ã hkamnhix jakamã nhùm mê kãm mê uma në. Hãmri në kormã tanhmã ho hkêt në.

22

Pahi kot hkra hprõ kaxyw hkwyjê hwýr ã harênh

Rukre 14.15-24; mããñen Wam Korõt 6.9-11; Epes 5.5-6; Apokarip 19.7-8

¹⁻² Tã nhùm Jejus axte mê kãm awjarê. Ijaew kot Tirtüm kaga hã mê kãm hã kuxi në awjarê në mê kãm:

—E pa mê amã ahpýnhã mê kot Tirtüm kapêr mar në tanhmã amnhî nhîpêx to xwýnhjê jarê ka mê inhma. Te mê kot pahiti kot hkra hprõ kaxyw nhùm kot amnhî wýr hkwyjê hwýr nhùm mê kot harênh mar në ahpýnhã tanhmã amnhî nhîpêx to xwýnhjaja kot amnhî nhîpêx pyrãk. Koja pahitija hkra hã hkînh në hã apkur mex kaxyw amnhî wýr hkwyjê hã karõ.

³ Hãmri nhùm kãm mê ãpênh xwýnhjaja ra kot amnhî wýr mê hã karõ xwýnhjê hwýr mra në mê kãm nojarêt nhùm mê kuma në ãm mê kuma në axtem në mê kêp hitõt në. Hãmri nhùm mê tee ri mê kuma në akupým tã në pahiti mã mê harê.

⁴—Hãmri nhùm tee ri amnhî tã mê harênh ma në hpãnhã mê hwýr axtem kãm ãpênh xwýnh kwýjê rê nhùm mê ma mê hwýr mra në mê kãm: “Pa. E kwa mê tokyx. Na ra pahiti mê akutêp mêõ nhîpêx pa. Na mê môx kwýhpa në ho ãr mex në. Nê mê akutêp mêmoj nhîpêx par jakamã e kwa mê tokyx nã.” Anê.

⁵ ã mê kãm kapêr anhýr tã nhùm mê kuma në ãm mê kuma në ma ahpýnhã nhýhým

mra. Nhùm ja ma ãpênh mã mra nhùm ja ma ihpur kãm ãpênh mã ma tã nhùm ja ma nhýhým mêmo to wênê ho tã.

⁶ Nhùm mê hkwyjaja mê kãm ujarênh xwýnhjê pynê në mê htak o mê kupa.

⁷—Hãmri nhùm pahitija mê harênh ma në ãhkurê në. Hãmri në mê hwýr põristi hkwy rê nhùm mê ma mê hwýr mra në mê unê në mê kupa në mê õ krî hã hpók pa.

⁸ Hãmri nhùm pahiti kãm mê ãpênh xwýnh kwýjê mã kãm: “Kwa ra ixte mê kutêp mêõ mex kwý xunhwýr tã nhùm mê ixwýr mra kêt në. Ixtýx ho mê mex ã mê hkamnhix në amnhî wýr mê hã karõ no mê mex kêt. Mê kot mê ixkutã apkur mã tãm kêt.

⁹ E kwa mê ma krî hkôt axtem mê hkwyjê japêr o mra. Nê nhýri mêhõ pumu në kãm awjarê kêt man ixwýr tã në ixkra hã hkînh në mê ixkutã apku. Mê ã mê kãm axujarênh o amrar anê.” Anê.

¹⁰—Hãmri nhùm mê kuma në ma mê hapêr o mra në mê piitã mê kãm anhýr o mra. Nhùm mê kuma në wam tajê rom ma mê hkôt mra kurê kumrêx. Mê kot amnhî to mex xwýnhjaja në mê kot amnhî tomnuj xwýnhjaja hãmri piitã ma mê hkôt mra. Hãmri në ixkreja wýr mra në hwýr gjêx kaxyw nhùm mê kãm mê ê mex gõ nhùm mê hagjê hãmri në kormã mê apkur xã hã ixkre hwýr agjê në ho nyt pa.

¹¹ Hãmri nhùm pahitija mê hwýr axã në mê piitã mê omu. Nhùm ja pxi në axtem në hkwyjê hkînhã mê kot kãm ê mex nhõrja jaxãr kêt rãhã axã në apkur o nhý.

¹² Hãmri nhùm tee ri ja hã omu në hwýr tã në kãm: “Pa. Tk. Kwa na htem ixkrem gjêx kaxyw në mê kot mê kãm mê ê mex nhõr jagjê në rî kormã hwýr agjê në apku. Tã mon ka akwyjê hkînhã haxãr kaga? Kwa na htem ã amnhî nhîpêx anhýr kêt në.” Anhýr o kãm kapêr nom nhùm kuma në ãm kuma në tanhmã kutã kãm në hkêt në. ãm htýx apkur o nhý.

¹³ Jakamã nhùm tee ri omu hãmri në hã mê kot kãm ãpênh xwýnhjê mã amýnê në mê kãm: “E mê hwýr tã në unê në hpa në hte hpre në ma o tã në kamãt kó kamã amê. Ké tee ri mur në amnhî xã htýx kamã hamak o amnhî nham o axpên kamhar týx kapry ho nõ në rî amnhî pumu.” Anê. Hãmri nhùm mê kuma në kãm ho anê. ã mê ujarênh kot anhýr. Anê.

¹⁴ Nhùm pre Jejus ã mê kãm ujarênh anê hãmri në mê kãm:

—Nà Tirtüm kot pahitita pyrã në amnhî wýr mê ho ohtõ në mê hwýr tã na hte mê piitã hkôt amnhî xunhwýr kêt në. Jakamã na hte ãm mê ho grêre në amnhî wýr mê ho api. Anê.

Parijew nhô xwýnh kot Jejus kamã hamak ã më harênh

Makre 12.13-17; Rukre 20.20-26; mãânên Rômãn 12.1, 13.7

¹⁵⁻¹⁶ Tã nhũm Parijew nhô xwýnhjaja ã Jejus kot më kãm ujarênh anhýrja ma hãmri nê kurũm kato nê tanhmã hkukamã axpên mã hã ãmnênh to. Hãmri nê hwýr më hkwyjê më Eroxo kôt më pa xwýnh kwýjê rê. Héx rom më kot mëmoj tã hkukjêr kaxyw hwýr më kurê nhũm më ma hwýr mra nê omu nê kãm:

—Kwa Jejus. Nã ãm hãmri na ka hte Tirtũm kapêr o më ahkre mex o ri apa nê më kamã akahak o apa hkêt nê. Më kot tanhmã ato kapêr punuj to htã ka aprĩ hã më ahkre mex o ri apa.

¹⁷ E kwa më inhmã mëmoj jarê. Rõm nhô pahĩtti kot më pahpê Ijaew më pahte kãm kãxpore hkwy nhõr ã më pamã karõta. Kwa xã ja amã mex nã? Xã kot pu më kãm hkwy gõ? Nã xã kot pu më kãm õr kêt nê? E kwa më inhmã tanhmã ja jarênh to. Anê.

¹⁸ Nhũm prem ã héx rom ãhkukjêr anhýr tã no nhũm ra më hamaxpêr ã më omu nê më kãm:

—Tk. Kwa mon ka më ã axêx rom ja hã ixkukjêr anê?

¹⁹⁻²⁰ E më atõ inhmã kãxpore htýxre hõ gõ pa omu. Anê.

Hãmri nhũm më kãm ja gõ nhũm kupy nê kãnhmã më kãm kupê nê më kãm:

—E mëhõ nhĩxi nê mëhõ karõ na ja hã? Anê.

²¹ Hãmri nhũm më kãm:

—Pahi Sesti karõ nê hixi na hã. Anê.

Hãmri nhũm më kuma nê më kãm:

—Tý. Tõ kêr ka më mãmri kãm hkwy nhõr o apa. Hã hkarõ nê hã hixi. Tãm kot hipêx xwýnh jakamã õ na. No më kajaja na pre Tirtũm më anhĩpêx nhũm më apê õ jakamã kwa kêr ka më kapêr kôt pix mã ri amnhĩ nhĩpêx o ri apa. Anê.

²² Hãmri nhũm më amnhĩ jaêr pê ã kot kãxpore jarênh anhýrja ma nê axte kãm tanhmã nê hkêt nê. Hãmri nê akryk omu hãmri nê ma akupým mra.

Akupým më htĩr ã më harênh

Makre 12.18-27; Rukre 20.27-40; Juãw 5.21, 6.39-40; mãânên Wam Korit 6.14, 15.12-28; Wam Tesarõn 4.13-18

²³ Tã nhũm Satusew nhô xwýnh kwýjaja më kot akupým më htĩr kêt ã më hkamnhĩx kêt xwýnhjaja na pre më. Na pre htem më htyk nê më hapêx kumrêx ã më hkamnhĩx jakamã axpên mã tanhmã Jejus jarênh to nê axpên mã:

—E kwa pu më hwýr mra nê mëmoj xihtýx ã hkukja. Kê më pama nê tee ri tanhmã më pamã kapêr to hkukamã hamaxpêr kapry.

Kê më piitã ja hã omu nê ãhpumunh kêt ã omunh kurê kumrêx. E tokyx pu më hwýr.

Anhýr jakamã Parijew nhô xwýnhjê pyrà nê héx rom ma hwýr mra nê hkukja nê kãm:

²⁴ —Pa Jejus? Kwa më inhmã mëmoj jarê.

Na pre finat Mojesja Tirtũm nhý hã ã më panhĩgêjtê mã karõ anê. Më hkra hkêt rãhã më pa nê më htyk xwýnhjaja nhũm më harênh o:

Koja mëhõ hprõ nê kamã hkra hkêt rãhã pan ty. Hã koja hkôt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwýnhhta hkra pyràk. Anê.

Ã na pre Mojesja Tirtũm nhý hã më kãm karõ anê.

²⁵ Jakamã kwa ga më ixujarênh ma. Koja më kot axpên to htõ xwýnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkôt htõja hpãnhã ho hprõ

²⁶ nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwýja hpãnhã tãm o hprõ nê we wa axpên to pa grire nhũm haxwýja kamã hkra hkêt rãhã ty. Hãmri nhũm htõ hkwyjaja ni pyxi nê axpên pãnhã ho hprõ hpa no mëhõ kamã hkra hkêt rãhã htyk pa.

²⁷ Hãmri nhũm më hprõta më hkôt amnhĩ to hitep nê ty.

²⁸ Tã Tirtũm kot akupým nhýrmã më ho htĩr ronhýx nhý nhýx kêp nija mjên kumrêx? Ra piitã kot ho hprõ kênã. E më inhmã ja jarê. Anê.

²⁹⁻³⁰ Hãmri nhũm Jejus më kuma nê më kãm:

—Nã kaxkwa kamã më kot amnhĩ nhĩpêxa axtem na. Më htĩr ri më kot Tirtũm kôt amnhĩ xunhwýr xwýnhjaja na htem ty hãmri nê Tirtũm nhõ kri kamã axte kãm hprõ hprãm kêt nê pa. Jakamã hprõ hkêt nê pa. Rý ni japêr nê mjên kêt nê pa. Nom ri kãm mjên rý hprõ hprãm kêt nê pa. Hãmri nê Tirtũm kapêr o më wryk xwýnhjê pyrà nê axte htyk kêt nê. ãm htĩr tũm rãhã nê pa ho pa. Pêr më ate Tirtũm kapêr ã kagã htũm mar mex kêt jakamã na ka më ã ja hã ixkukjêr anê. Tirtũm ãhpumunh týx o ãhpumunh týx jakamã kumã më ate mëmoj tã ixkukjêr xwýnhhta na tanhmã kêp kute hkêt. Ra ja kukamã ãhpumunh týx kênã.

³¹⁻³² —Nom më ate akupým më htĩr kêt ã më hkamnhĩxja kot paj ixprĩ hã më amã harê. Amnepêm na pre Tirtũm pi hpõkja kamã tanhmã Mojes mã kapêr to. Mãn ra më ate mar. Na pre kãm:

Ixpê Apraãw nhõ Tirtũm na pa. Nê mãânên ixpê Apraãw kra Ijak më htãmnhwý jako wa õ Tirtũm na pa.

Anhýr o Mojes mã amnhĩ jarê nhũm kuma nê hã kagã. Kêp apu arĩ më htyk rãhã nhýx

pre ã mẽ harênh anhÿr kêt nê. Nhÿx pre mẽ harênh o: “Amnepê m Apraãw nê hkra nê htãmnhwÿ mẽ htÿr ri ixpê mẽ õ Tÿrtÿm na pa pre.” Anhÿr o nhÿx pre mẽ harê. Nom na pre ã amnhÿ jarênh anhÿr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhÿm prem ra Tÿrtÿm ri ra akupÿm htÿr nê mex nê pa ho pa. Tã ka htem Tÿrtÿm kapêr kwÿm ri akupÿm mẽ htÿr kêt ã mẽ harênh o apa.

Anhÿr o Satusew nhõ xwÿnhjê mã kapêr.

³³ Hãmri nhÿm mẽ kot mar o kuhê xwÿnhjaja amnhÿ jaêr pê kot mẽ ahkreja ma.

Tÿrtÿm kapêr maati jarênh

Matêwre 10.37; Makre 12.28-34; Rukre 10.25-28; mãânê n Wam Juãw 5.3

³⁴ Tã nhÿm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ urãk nê hêx rom ãhkukjêr nê hamaxpêr o hakrenh kaxyw hwÿr mra.

³⁵ Hõja kêp Tÿrtÿm kapêr tÿm o mẽ ahkre o mẽ pa xwÿnh jakamã hêx rom kamã hamak kaxyw kãm kapêr nê kãm:

³⁶ –Kwa Jejus. Ot pa mẽ awÿr mra. Kwa mẽ inhmã mẽmoj jarê. Na pre Tÿrtÿm ahpÿnhã mẽmoj to 10 nê hã mẽ pamã karõ. Mẽ pahte hkõt amnhÿ nhÿpêx kaxyw hã mẽ pamã karõ. Tã nhÿ kapêr na mex o kot hkwy jarênh wehe? Anê.

³⁷ Hãmri nhÿm kuma nê mẽ kãm:

–Nã kot mẽ pamã hã karõ kot:

Kêr ka mẽ anhÿ piitã ho amã Tÿrtÿm kÿnh tÿx o apa. Mẽ amã hkÿnh tÿx o mẽmoj piitã hakrenh par o apa.

³⁸ E Tÿrtÿm kot mẽ pamã hã karõ ja na mex o piitã hakrenh par.

³⁹ Nê hkõt ja:

Kêr ka mẽ amã akwÿjê hã ma ho te ka amã amnhÿ tã ma pyrãk. Jao ra tãm mẽ hipêx.

⁴⁰ ã Tÿrtÿm kapêr ã kagã htÿm kot mẽ pamã hã karõ kot anhÿr. ã mẽ pahte amnhÿ nhÿpêx anhÿr o papaja na Tÿrtÿm kãm hprãm tÿx kumrêx. Kot kaj mẽ ja wa hkõt amnhÿ nhÿpêx rãhã ho ri apa nê mãânê n ra Tÿrtÿm kot mẽ pamã mẽmoj tã karõ xwÿnh piitã hkõt amnhÿ nhÿpêx. Ja na pre Mojes mẽ Tÿrtÿm nhÿ hã kapêr xwÿnhjaja amnepê m Tÿrtÿm nhÿ hã mẽ panhigêtjê mã hã karõ ho pa. Anê.

Jejus kot amnhÿ tã mẽ hkukjêr ã harênh

Makre 12.35-37; Rukre 20.41-44; mãânê n Rõmãn 1.3-4

⁴¹ Nhÿm Parijew nhõ xwÿnhjaja arÿ Jejus mar o kuhê nhÿm amnhÿ tã tanhmã mẽ hkukjêr to. Nom te nhãm mẽhõ hã mẽ hkukjêr pyrãk o mẽ hkukja nê mẽ kãm:

⁴² –E mẽ inhmã mẽmoj jarê. Tanhmã na ka htem axpên mã Tÿrtÿm kot mẽ akaxyw ãm mã xwÿnhnta jarênh to? Kêp mẽhõ kanrêhã htãmnhwÿ koja wehe? Anê.

Hãmri nhÿm mẽ kãm:

–Nã koja kato nê kêp pahi finat Tawi kanrêhã htãmnhwÿ koja.

⁴³ Anê nhÿm Jejus mẽ kuma nê mẽ kãm:

–Tÿ. ãm hãmri na ka mẽ harê. No mo na htem axpên mã kêp pahi Tawi hkanrêhã htãmnhwÿ pix ã harê nê mãânê n kêp õ pahÿhti hã harênh kêt nê? Tawi na pre Tÿrtÿm Karõ nhÿ hã tanhmã harênh to nê harênh o:

⁴⁴ Na pre Tÿrtÿm inhõ Pahÿhti mã ã kapêr anê nê kãm: “E amnê ixwÿr tê nê inhÿhkõ hã nhÿ nê inhmã mẽ ho amnhÿptãr o akrÿ. Kot paj mẽ kot kãm akurê xwÿnh piitã mẽ unênh pa nê awÿr mẽ o mra nê anhÿhkram mẽ haxãr pa.” Anhÿr o pre kãm kapêr.

⁴⁵ ã Tawija Tÿrtÿm kot Kris mã kapêr jarênh nê kêp õ pahi hã kagã anê. Mẽ kajaja na ka htem ãm kêp Tawi tãmnhwÿ pix ã axpên mã harênh o ri apa. No kêt Tawija na pre kêp õ Pahÿhti hã harênh o pa. Anê.

⁴⁶ Hãmri nhÿm mẽ kuma nê tee ri kot tanhmã kutã kãm kapêr to hkukamã hamaxpêr nê axte mẽmoj tã hkukjêr kêt nê. Tanhmã kot mẽ amnhÿ to nê hamaxpêr o hakre? Na prem tee ri kãm hamaxpêr o hakrenh prãm kaprÿ. Jejus mẽmoj piitã hkukamã ãhpumunh tÿx o ãhpumunh tÿx.

23

Jejus kot tanhmã Parijew nhõ xwÿnhjê jarênh to

Makre 12.38-40; Rukre 11.43-46, 20.45-47

¹ Tã nhÿm Jejus mẽ ixte hkõt ixpa ho ixpa xwÿnhjê mẽ mẽ kot mar o kuhê xwÿnhjê mã kapêr nê mẽ inhmã tanhmã Parijew nhõ xwÿnh mẽ Mojes kapêr o mẽ ahkre xwÿnhjê jarênh to nê mẽ inhmã:

² –Nã Parijew nhõ xwÿnh mẽ Tÿrtÿm kapêr tÿm o mẽ ahkre xwÿnhjaja na htem hprÿ hã Tÿrtÿm kapêr ã kagã htÿm mar mex nê.

³ Jakamã kêr ka mẽ mar tÿx nê mẽ kot ho mẽ ajahkre kõt amnhÿ nhÿpêx. No mẽ kot amnhÿ nhÿpêxja kêr ka mẽ hkõt amnhÿ nhÿpêx kêt nê. Mẽ kot Tÿrtÿm kapêr tÿm o mẽ ajahkre htã hkõt amnhÿ nhÿpêx kêt nê.

⁴ Te mẽ kot mẽhõ kot mẽ katut ã mẽ kãm mẽ jênh pytÿ janhõr tã no ãm mẽ kuxwar hkwy htur kêt kot amnhÿ nhÿpêx pyrãk o na htem amnhÿ nhÿpêx o pa. Jao mẽ amã mẽmoj tã karõ nê mẽ amã: “E kêr ka mẽ ã amnhÿ nhÿpêx anê nê ã amnhÿ nhÿpêx anê.” Anhÿr pix o mẽ amã kapêr o pa. Nom mẽ tãmjaja amnhÿ kapêr kõt amnhÿ nhÿpêx kêt nê.

⁵—Na htem hkwyjê kot mē omunh nē mē kot amnhī to mex ā mē harēnh kaxyw mē noo mā tanhmā amnhī nhīpēx to. Nē mē mē noo mā mē ē mex pix kām pa. Nē amnhīm Tirtūm kapēr ā kagā htūm kwý hā kagā nē amnhī nhōkrā hā hanhō nē amnhī pa hā hanhō nē hā pa. Mē kot hā nohtýx rāhā hā mē hkamnhīx kaxyw nhūm htem ā amnhī nhīpēx anhýr o pa. Nē mē kām mē piitā mē kot amnhīm mē rūnh ā mē harēnh o paja nhūm htem kām hprām.

⁶—Nē mē pahpē Ijaewjē nhō Tirtūm kapēr o mē ahkre xā hā ixkre kamā mē kot amnhī to rūnh xwýnhjē hkrī xā mex pix kamā kām hkrī hprām. Nē mēmoj tā mē apkur xā mex ā arīgro hā nhūm htem ma mē apkur xā hā ixkre hwýr akuprō nhūm mē kot amnhī to rūnh xwýnhjē hkrī xā mex pix kamā kām hkrī hprām.

⁷Nē nhýri pry hā mra nhūm mē kot mē omunh nē mē kēp mē ahkre xwýnh maati hā mē hā hpijaām kām tanhmā mē kām kapēr mex toja nhūm htem kām hprām. Ā na hte Parijew nhō xwýnh mē Tirtūm kapēr tūm o mē ajahkre xwýnhjaja hēx rom mē anoo mā amnhī nhīpēx anhýr o pa.

⁸⁻¹⁰—No mē kajaja. Kér ka mē ho mē urāk kēt nē. Ké mē axpēn mā mē ajarēnh o: “Pahi Maati” anhýr o mē ajarēnh kēt nē. Rý mē ajarēnh o: “mē ijahkre xwýnh maati” anhýr o axpēn mā mē ajarēnh hkēt nē. Kēt paxipix na pre Tirtūm mē akaxyw ixām jakamā paxipix na ixpē mē anhō Pahi Maati. Nē paxipix na ixpē mē ajahkre xwýnh maati. No mē kajaja ixkōt mē apē axpēn to atōx nē atō na ka mē.

—Nē kēr ka mē ri axpēn jarēnh o: “Mēpahpām” anhýr kēt nē. Kēt kaxkwa kamā na Mēpahpāmja.

¹¹⁻¹²—Nē kot ka mē amnhī to rax prām xāj tanhmā amnhī to jarkrar to ho apa htā no nhūm akwýjaja ama nē ām ama nē akōt hamaxpēr kēt nē. No kot kaj mē piitā mē kutā tanhmā anojarēt to ho apa nhūm mē amnhī tā mē apumu nē axpēn mā mē amex ā mē ajarē. Jakamā kot kaj mē amā mē piitā mē kot mē amex ā mē ajarēnh prām hāmri nē ri mē piitā mē kām tanhmā amnhī nhīpēx to pē mē kutā anojarēt rāhā ho ri apa. Anē.

Jejus kot mē hkwyjē mā kapēr týx ā harēnh

Makre 12.40; Rukre 11.39-52, 20.45-47

¹³⁻¹⁴Tā nhūm Jejus hpānhā Parijew nhō xwýnh mē Tirtūm kapēr tūm o mē ahkre ho mē pa xwýnhjē mā kapēr. Nē mē kām kapēr kām hihtýx nē mē kām:

—E mē apē Parijew nhō xwýnh mē Tirtūm kapēr tūm o mē ahkre xwýnhjaja. E mē inhma. Kot kaj mē amex kēt nē. Mē apē mē no kupyx xwýnh na ka mē. Nē mē amā Tirtūm kōt amnhī nhīpēx prām kēt. Nē

nhýrmā atyk nē mē amā ō krī hwýr axāpir prām kēt. Nē akwýjaja kot hwýr āpir pymaj na ka htem akwýjē nē tanhmā mē kām axēx to ho apa. Mē kot mē apyrā nē Tirtūm kapēr kwým amnhī nhīpēx prām xāj na ka htem amnhī mē tanhmā mē kām axēx to ho ri apa. Jao te mē ate mē kēp Tirtūm nhō krī hwýr kahēxā kahē htýx pyrāk o apa.

¹⁵—Nē mē akwýjaja kot mē akōt amnhī xunhwýr nē mē akōt amnhī nhīpēx prām xāj na ka htem ma awry hā nhýhým tanhmā mē kām ri axujarēnh to ho ri apa. Jakamā nhūm mēhō mē ama nē mē akōt amnhī xām hāmri nē ra amnhī tomnuj týx o mē ajakre. Jakamā koja mē nhýrmā mē apyrā nē ma mē kot amnhī xā htýx kamā hamak tūm xāta wýr pa. Jakamā kwa mē o kora. Kot kaj mē amex kēt nē.

¹⁶—Hēxta waa nē. Mē apē Parijew nhō xwýnhjē mē mē apē Tirtūm kapēr tūm o mē ahkre xwýnhjaja kot kaj mē amex kēt kumrēx. Na ka htem mē kēp mē hikāxpore jamýnh prām xāj atýx ri tanhmā mē ahkre lto ho apa nē mē kām: “Kot kaj mē ām hāmri mēmoj tā amnhī jarēnh kaxyw hāmri nē Tirtūm mā amnhī jarēnh xā hā ixkre nhīxi jarēnh kōt mēhō mā amnhī jarē nhūm ama nē hamaxpēr o: ‘Ko. Apu ām hāmri na inhmā amnhī jarē rý ko na apu ām amnhī to hēx.’ Anhýr o hamaxpēr. Nom kot kaj mē ixkreta ho mex kaxyw mē kām kāxpore hkwy gō hāmri nē ate mē kām ōr xāta jarēnh kōt ām hāmri mēmoj tā mēhō mā amnhī jarē. Hāmri nhūm ama nē hamaxpēr o: ‘Nā ām hāmri na ā inhmā amnhī jarēnh anē. Kot ixkre ho mex kaxyw kāxpore hkwy nhōr kōt ā amnhī jarēnh anē. Jakamā na amnhī to hēx kēt nē.’” Anhýr o hamaxpēr. Na ka htem ā mē ahkre ho apa anē.

¹⁷Nom mē ate mē ahkreta mex kēt. Pēr mē ajamaxpēr mexti hā. Tirtūm mā amnhī jarēnh xā hā ixkreta mex o ixkre ho mex kaxyw kāxpore nhōrta jakrenh. Tā ka htem axtem nē mē kot kām kāxpore nhōrta mex o ixkre jakrenh ā harē. No mē pahte ām hāmri mēmoj tā amnhī jarēnh nē aa paxēx kēt rāhā ho papaja na Tirtūm kām hprām.

¹⁸—Nē na ka htem mē kēp mē hikukrēx jamýnh prām xāj ā atýx ri mē ahkre anē nē mē kām: “Kot kaj mē ām hāmri mēmoj tā amnhī jarēnh kaxyw nē Tirtūm mā mēmoj nhōr xā hā mēstija jarēnh kōt mēhō mā tanhmā amnhī jarēnh to. Hāmri nhūm mē ama nē hamaxpēr o: ‘Nā ām hāmri na inhmā amnhī jarē rý ko na apu ām inhmā amnhī to hēx.’ Anhýr o hamaxpēr. Nom kot kaj mē Tirtūm mā mēmoj nhōr xā hā mēstija ā kām mēmoj xi. Hāmri nē ra mē ate kām ōr xāta jarēnh kōt ām hāmri mēmoj tā mēhō mā amnhī jarē. Hāmri nhūm ama nē hamaxpēr o: ‘Nā ām hāmri na ā inhmā amnhī jarēnh anē. Kot Tirtūm mā mēmoj nhōr ā amnhī

jarênh kôt kot amnhî jarênh anhÿr jakamâ na amnhî to hêx kêt nê.' Anhÿr o hamaxpêr.' Anê. Na ka htem â mê ahkre anê.

¹⁹ Mê ajamaxpêr kêt xwÿnh na ka mê. Tîrtûm mâ mêmoj nhôr xâ hâ mêstija na mex o mê kot hâ kâ m mêmoj nhôrta jakrenh. Tâ na ka htem axtem nê mê kot hâ kâ m mêmoj nhôrta mex o mêsti jakrenh â harê.

²⁰ Nom Tîrtûm mâ mêsti mê mê kot hâ kâ m mêmoj nhôrta te kot axpên pyrâk jakamâ kot kaj mê mêstija jarênh kôt mêmoj tâ amnhî jarê nê määnên mê ate hâ Tîrtûm mâ mêmoj xirja jarênh kôt amnhî jarê. Hamê wa kot axpên pyrâk jakamâ hamê wa harênh pé amnhî to axêx kêt nê. Jakamâ kêr ka mê mêmoj tâ amnhî jarênh kaxyw nê hamê wa harênh kôt â m hâ mri mêmoj tâ amnhî jarê nê ho axêx kêt nê.

²¹ Tâ kot kaj mê â m hâ mri amnhî jarênh â mêmoj tâ amnhî jarênh kaxyw nê Tîrtûm mâ amnhî jarênh xâ hâ ixkre hkôt hâ amnhî jarê nê määnên Tîrtûm kêp ixkre hpâm kôt hâ amnhî jarê. Jakamâ kêr ka mê hamê wa harênh pé amnhî to axêx kêt nê.

²² —Nê kot kaj mê â m hâ mri amnhî jarênh â mêmoj tâ amnhî jarênh kaxyw nê kaxkwa jarênh kôt amnhî jarênhja o määnên kaxyw kaxkwa kamâ Tîrtûm krî xâ maati hkôt amnhî jarê. Nê määnên Tîrtûm kôt amnhî jarê. Jakamâ kwa hamê wa harênh pé amnhî to axêx kêt nê.

²³ —Hêxta waa nê. Mê apê Parijew nhô xwÿnh mê mê apê Tîrtûm kapêr tûm o mê ahkre xwÿnhjaja kot kaj mê amex kêt nê. Mê ate mê no kupyx xwÿnh na ka mê. Na ka htem Tîrtûm kapêr piitâ hkôt amnhî nhîpêx kêt nê â m hkwy kôt pix mâ amnhî nhîpêx o ri apa. Na ka htem â m kapêr o hpÿnhre nê hkôt amnhî nhîpêx â amnhî pumu nê ate amnhî to mex xwÿnh â amnhî jarênh o apa. No Tîrtûm kâ m hprâm xâ piitâ hkôt amnhî nhîpêx kêt nê. Mê ate tâ m mê hipêx nê mê ho mex nê mê kamâ axukapri hâ kot mê amâ karôja. Nê mê amâ Tîrtûm kînh â kapêr kôt amnhî nhîpêx hâ karôja ra mê ate mar tâ hkôt amnhî nhîpêx kêt nê. Mê ate kapêr piitâ hkôt amnhî nhîpêx ronhÿx ja mê amâ mex o mex.

²⁴ Mê ate â m kapêr o hpÿnh nê hkôt amnhî nhîpêx jakamâ te mê ate atÿx ri tanhmâ axâpkur to ho mê akrî pyrâk. Jao te mê axâpkur xâ hâ mêô kamâ pure pumunh nê nê hanhir nê rênh tâ määnên kamâ kên rax pumunh tâ nê hanhir nê rênh kêt râhâ hkur pyrâk. Jao Tîrtûm kapêr o hpÿnhre nê hkôt amnhî nhîpêx no piitâ hkôt amnhî nhîpêx kêt nê. Pêr mê ajamaxpêr kêt tâ na ka htem atÿx mê ahkre ho ri apa.

²⁵ —Hêxta waa nê. Mê apê Parijew nhô xwÿnh mê mê apê Tîrtûm kapêr tûm o mê ahkre xwÿnhjaja kot kaj mê amex kêt nê. Mê ate mê no kupyx xwÿnh na ka mê. Nâ mê

apê Parijew nhô xwÿnhjaja te mê ate mê kot apkur kaxyw prat kre kuhôn punuj tâ mex â harênh nê kamâ apkur pyrâk o na ka mê. Jao â m mê akrâhkâ rûm pix mâ mê amex. Nê mê noo mâ te mê amex pyrâk no mê anhôxâhkre kaxwÿnh kâ m mê ajamaxpêrja mex kêt. Mê akapêr prâm nê mê axâhkurê nê mê anhôxyÿ.

²⁶ Mê ajamaxpêr mex kêt kênâ. Kwa kêr ka mê tâ m ajamaxpêr o tâ m akwÿjê nhîpêx o ri apa. Nê axâmnhîx ri mê kêp amrakati xwÿnhjê mâ mêmoj nhôr o ri apa. Kot kaj mê â amnhî nhîpêx anê nhûm Tîrtûm ja hâ mê apumu nê amnhîm mê amex â mê ajarê. No na ka htem amâ mê amnhî to mex prâm xâj â m tee ri amnhî kuhôn hapjê kaprÿ.

²⁷ —Hêxta waa nê. Mê apê Parijew nhô xwÿnhjê mê mê apê Tîrtûm kapêr tûm o mê ahkre ho mê apa xwÿnhjaja kot kaj mê amex kêt nê. Te mê ate mê htykjê jagjênh xâ pyrâk. Na htem mê hagjênh xâ ho mex o pa nom kamâ mê hi nê ahpunuj pix.

²⁸ Ja pyrâ nê â mê ate amnhî nhîpêx anhÿr. Kapôt rûm mê anhîja na mex. Te mê ate mê ho mex o apa pyrâk o na ka htem amnhî nhîpêx nhûm mê â m akrâhkâ pix pumu nom â m mê akrâ hi kaxwÿnh kâ m mê ajamaxpêr punuj râhâ hâ mê apumunh kêt nê. Mê ate tanhmâ mê no kupyx to pix kukamâ ajamaxpêr jakamâ te mê ate mê htykjê jagjênh xâ pyrâk.

²⁹⁻³⁰ —Hêxta waa nê. Mê apê Parijew nhô xwÿnh mê mê apê Tîrtûm kapêr tûm o mê ahkre xwÿnhjaja kot kaj mê amex kêt nê. Mê ate mê no kupyx xwÿnh na ka mê. Na ka htem ma mê hâ pika hwÿr apa nê Tîrtûm nhÿ hâ kapêr o mê pa xwÿnhjê hâ pika ho mex. Nê kot amnhî to mex xwÿnhjê hâ pika ho mex. Nê axpên mâ mê harênh o: "Hêxta waa nê. Na pre amnepê m mê pakukamâ mê panhîgêjtaja Tîrtûm nhÿ hâ mê kâ m kapêr xwÿnhjê homnuj nê mê kupa. No kêt mê papajaja mê kamâ ri papa ronhÿx pu prem mê urâk nê â mê hipêx anhÿr kêt nê." Anhÿr o axpên mâ mê hkapri ho ri apa.

³¹⁻³² Nom â m amnhî to axêx. Mê ate â amnhî nhîpêx anhÿr o apa kênâ. Â mê ate amnhî nhîpêx anhÿr jao ra apê mê hkanrêhâ mê hkra kumrêx â amnhî to amnhîrit mex o apa.

³³ Te mê ate kagâ xoprê kot mê hkamnar nê mê homnuj tÿx pyrâk jakamâ koja Tîrtûm nhÿrmâ ma mê kot amnhî xâ htÿx kamâ hamak tûm xâta wÿr mê ajano ka mê ma hwÿr ajapêx. Hâ mri nê tee ri amâ ajapôx prâm kaprÿ nê rî amnhî pumu.

³⁴ —Kot paj nhÿrmâ ma mê awÿr inhÿ hâ ixkapêr jarênh o mê pa xwÿnh kwÿ rê. Nê inhÿ hâ mê âhpumunh xwÿnh kwÿ rê. Nê ixkapêr o mê ahkre xwÿnh kwÿ rê. Nom kot kaj mê â m mê kapêr ma nê apê mê hprâm nôkati nê tanhmâ mê homnuj tÿx to ho apa.

Nê ixpê mê hkwýjê hpar o apa. Jao pî kahpa hâ mê hanhôr o mê hkwýjê hpa. Nhùm mê hkwýjaja Tirtüm kapêr o mê ahkre xâ hâ ixkre kamâ mê ahkre ho hkrî ka mê omu nê mê unê nê ixkreja kamâ mê htak. Hâmri nhùm mê apymaj nhâm ahpÿnhâ krî hkwý hwÿr hprôt nê mra. Â kot kaj mê inhÿ hâ ixkapêr jarênh xwÿnhjê nhîpêx anhÿr o apa.

³⁵⁻³⁶ Na prem ra mê himex rax nê. Am-nepêw panhî kator krax rüm Atâw kra Apewta na pre Tirtüm nhÿ hâ kapêr o pa nhùm htôja kâm mar prâm kêt nê kupî. Tâ nhùm Tirtüm axte mê hwÿr ý hâ kapêr o mê pa xwÿnh kwýjê rê nhùm prem mâ mê ho anê nê mê hkwýjê nhîmex. Nhùm pre xatâ mê hwÿr mê hkwýjê rê nhùm mê xatâ mê kupa. Apew rüm Parakis kra Jakaris wÿr na prem mê himex rûnh nê. Hâmri nhùm prem Tirtüm mâ amnhî jarênh xâ hâ ixkre kamâ Jakarisja pî. Tâ mê kajaja mê ate mê urâk nê mê amâ Tirtüm kapêr mar prâm kêt nê mê urâk nê amâ Tirtüm nhÿ hâ kapêr xwÿnhjê nhîmex prâm nê. Â mê ate mê anhîgêjtêj pyrà nê mê hipêx anhÿr mÿrapê koja Tirtüm mê apê mê hkanrêhâ mê hkra nê mê htâmnhwÿjaja mê ato hpimràatâ tanhmâ mê ato htÿx to ka mê amnhî xâ htÿx kamâ ajamak râhâ ho ri apa. Anê.

Jejus kâm Jerujarê nhô xwÿnhjê japê htÿx â harênh

Rukre 13.34-35; mãânênh Rômân 11.25-27

³⁷ Hâmri nhùm Jesus te ra kot Jerujarê nhô xwÿnhjê pumunh nê mê kâm kapêr pyràk o tanhmâ kapêr to ho xa. Nê mê kâm:

–Hêxta waa nê Jerujarê nhô xwÿnhjaja. Tirtüm kot xatâ mê awÿr ý hâ kapêr jarênh xwÿnhjê rênh nhùm mê kot mê akôt mê amâ kapêr jarênh o pa htâ ka mê kapêr mar kêt kumrêx. Nê axtem nê kên o mê htak o mê himex o apa. Â na ka htem amnhî tomnuj o apa anê. Tâ nom arî inhmâ mê ajamâr o ri ixpa hprâm. Te ho krâhyre kot nore hpro nê ho hikwÿ pyràk o na pa inhmâ mê anhîpêx prâm nê. Nom mê amâ ixprâm nôkati nê mê ate ixkaga kumrêx.

³⁸ Mÿrapê koja Tirtüm mê anhô krî jamâr kêt nê.

³⁹ Kot paj tokyx ty nê mê apiitâ mê are nê ma akupÿm api ka mê axte ixpumunh kêt nê. Âm akupÿn ixwrÿk xâ hâ arîgrota pix â koja mê akwÿjaja mê amÿrpê krî ja kamâ ixpôx â ixpumu. Hâmri nê mê akurom ixpumu nê hkînñ tÿx nê. Nê tâ ixkôt amnhî xunhwÿr kurê kumrêx. Hâmri nê axpên mâ ijarênh o:

Ota Tirtüm kot mê pahwÿr mênñ xwÿnhnta wrÿ. Nâ âm hâmi na mê pahwÿr wrÿ. Ja mex o mex.

Koja mê â axpên mâ ijarênh anê. Anê.

24

Jejus kot mê pakukamâ mêmoj jarênh Makre 13.1-13; Rukre 21.5-19; mãânênh Wam Ximotre 4.1-3; Sikün Ximotre 3.1-9; Apokarip 6.1-17

¹ Tâ nhùm Jesus Tirtüm mâ amnhî jarênh xâ hâ ixkre rüm kato nê ma tê. Pa mê ixte hkôt ixpa ho ixpa xwÿnhjaja kormâ ixkreja pumunh o ixkuhê nê kâm harê nê kâm:

–Kwa Pahîhti. Hêxta waa nê. Ixkreja âm mex kumrêx. Anê.

Hâmri nhùm mê inhmâ:

² –Tÿ mex nom koja nhÿrmâ mê kâm Tirtüm kurê xwÿnhjaja grânh pa. Kojaja arî kên ô axkrutre nê axpên myñh nê nôr kêt nê. Kojaja piitâ anhrâ nê ahpÿnhâ ri hikwÿ. Anê.

³ Hâmri pa mê kuma nê tee ri hkukamâ ijamaxpêr. Hâmri nhùm Jesus ma tê nê hixêt pê Oriwêhti hâ api nê hâ nhÿ pa mê ma hkôt mra nê mê kot â ixkre nhîpêx anhÿrta â hkukja nê kâm:

–Kwa xâ âm hâmi koja mê â ixkretra nhîpêx anê? Kwa mê inhmâ aprî hâ harê. Xâ koja mê nhÿrmâ ho anê nâ? Xâ koja mê tokyx ho anê? Nê akupÿn mê ixwrÿ awrÿk nhùm mêmoj piitâ hapêxja. Kwa mêmo koja we wÿj ri tanhmâ amnhî nhîpêx to wehe? Anê.

⁴ Hâmri nhùm mê inhmâ hprî hâ tanhmâ mêmoj kot amnhî nhîpêx to hkukamâ ujarênh o nhÿ nê mê inhmâ:

–Nâ nhÿrmâ mêmoj piitâ hapêx kaxyw tanhmâ amnhî nhîpêx toja kumrêx kot paj mê amâ harê ka mê inhma. Nâ koja mê ohtô nê mê awÿr mra nê hêx rom te pa ixte amnhî nhîpêx pyràk o amnhî nhîpêx o mê akôt pa.

⁵ Nê mê amâ amnhî jarênh o: “E Tirtüm na pre mê awÿr inhmê. Ixpê kaxkwa rüm ixwrÿk xwÿnhnta na pa.” Anhÿr o mê akôt mê amâ amnhî to hêx o pa. Jao ohtô nê mê nokupÿr o pa.

⁶ –Nê koja mê nhÿri awry hâ axpên par o pa nê mê atâ axpên par o pa. Nom kêr ka mê harênh ma nê ri tokyx mêmoj piitâ hapêx â hkamnhîx kêt nê. Kormâ mêmoj piitâ hapêx xâ hâ arîgroja kormâ.

⁷ Kojaja mêmoj piitâ hapêx kaxyw nhùm ahpÿnhâ ri pika piitâ hkôt mê pa xwÿnhjaja pika hô nhô xwÿnhjê kutâ kuhê nê pijapu ho kuhê. Jao ra axpên par o pa. Hâmri nhùm nhÿri pika hkwÿ htetet tÿx kumrêx. Nê mê hpur kâm mêôja hapêx nhùm mê kâm prâm tÿx nê pa. Jakamâ nhùm mê ohtô nê prâm xâj axkaprâ.

⁸ Nom ja kormâ mêmoj hapêx kaxyw krax pix na. Te ho mênijê hō hpijagri kaxyw nê kormâ kawax pê ôhy xâ pyràk.

⁹ –Nê koja mê piitâ ixkôt mê akamâ gryk nê kâm mê akurê htÿx o pa. Nê mê awÿr mra nê ixtâ mê apynê nê mê atomnuj tÿx nê mê apa.

¹⁰ Jakamã koja mẽ kot ixkôt amnhĩ xunhwýr xwýnh kwýjaja mẽ umaj tee ri amnhĩ kukamã hamaxpêr hãmri nê ixkaga. Nê ixkôt mẽ kãm axpên tâ amýnê nê axpên kãm gryk o pa.

¹¹ Nhũm nhýri mẽ hkwyjaja Tirtũm nhý hã kapêr jarênh xwýnh ã amnhĩ to hêx o pa. Jao mẽ ohtó nê mẽ nokupyr o pa.

¹² Koja mẽ ã amnhĩ nhĩpêx anhýrja o ra piitã kãm axpên kamã ukapri hkêt o pa.

¹³ Koja mẽ ã ixtã mẽ atomnuj o pa anê. Tã nom kêr ka mẽ amnhĩ to htýx nê ixkaga hkêt nê. Mẽ kot mẽ apar tâ ka mẽ kaxkwa kamã akupým atír kurê kumrêx.

¹⁴ —Nê kot kaj mẽ apê ixkwýjaja ma krĩ piitã hkêt Tirtũm kapêr o mẽ ahkre ho apa. Mẽ kot amnhĩ tomnuj kaga nê ixkôt amnhĩ xunhwýr nhũm Tirtũm kot ja hã mẽ omunh nê mẽ ho hkra hã mẽ kãm harênh o ri mẽ piitã mẽ hkêt apa. Kot kaj mẽ piitã mẽ kãm ijarênh pa pa ri kormã akupým mẽ awýr wrý. Anê.

Mẽ pahomnuj týx xwýnh maati hã harênh

Makre 13.14-23; Rukre 21.20-24; mãânêh Sikũn Tesarõn 2.3-4

¹⁵ Nhũm Jejus arĩ mẽmoj kukamã mẽ inhmã kapêr nê mẽ inhmã:

—Amnepêh Tirtũm nhý hã kapêr xwýnh finat Tãniewja na pre tanhmã mẽ atomnuj týx xwýnh maati ja jarênh to. Tã koja nhýrmã ra kot harênh xã hkôt axtem nê Tirtũm mã amnhĩ jarênh xã hã ixkre hwýr axã nê Tirtũm xãm xã kamã xa. Ka mẽ ja hã omu hãmri nê mẽ kot krĩ grãnh par ã hkamnhix kurê kumrêx.

¹⁶ Koja ã amnhĩ nhĩpêx anê ka mẽ amým amnhĩ wýr mẽ omu hãmri nê ajapój nê ma aprôt nê amrar kurê kumrêx. Mẽ apê jar pika pê Jutej kamã mẽ apa xwýnhjaja kaj mẽ omu hãmri nê mẽ kot mẽ apar pymaj aprôt nê ma amrar kurê kumrêx.

¹⁷ Rý ka mẽ anhõrkwý hkrãmnênh o akrĩ japêr nê amým amnhĩ wýr mẽ omu nê akukrêx wýr axãr nê hõ hpyr mã ajamxpêr kêt nê. Æm wrý nê aprôt nê ma atêm kurê kumrêx.

¹⁸ Rý ka mẽ apur kãm axápênh o apa japêr nê amým mẽ omu hãmri nê akupým anhõrkwý hwýr axê jamýnh kaxyw atêm kêt nê. Æm mẽ umaj aprôt nê ma atêm kurê kumrêx.

¹⁹ —No mẽ hutjaró nê mẽ hkra karàre xwýnhjaja koja mẽ kêp mẽmoj omnuj týx nê. Tanhmã kot mẽ amnhĩ to nê mẽ umaj hprôt týx? Nã pika ja kamã koja mẽ mex kêt o mex kêt. Mẽ kot amnhĩ tomnuj mýrapê koja Tirtũm tanhmã mẽ homnuj týx to.

²⁰ —Nê kwa kêr ka mẽ amnhĩ to Tirtũm wý kê ã mẽ kot amnhĩ nhĩpêx anhýr xã hã arĩgroja na wrýk pê ã amnhĩ nhĩpêx anhýr

kêt nê. Rý mẽ hkôt xã hã arĩgro pê sap ã ã amnhĩ nhĩpêx anhýr kêt nê.

²¹ —Nê ã mẽ kot amnhĩ nhĩpêx anhýr ã arĩgroja ã koja mẽ piitã amnhĩ xã htýx kãm hamak týx kumrêx. Amnepêh Tirtũm kot pika ho kator krax rũm amnê mẽ pa xwýnhjaja kormã aa kot ã amnhĩ xã htýx kamã hamak anhýr kêt tâ arĩgroja ã koja mẽ amnhĩ xã htýx kumrêx kamã ama. Hãmri nê axte pika ja kamã ã amnhĩ xã htýx kumrêx kamã hamak anhýr kêt nê.

²² Kop apu Tirtũm kot mẽ kot amnhĩ xã htýx kamã hamak xã hã arĩgro hkwy ho gri hkêt ronhýx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwýnhjê japê xãj mẽ amã ho gri.

²³⁻²⁴ —Tã ã mẽmoj kot amnhĩ nhĩpêx anhýr jakamã koja mẽmojaja tanhmã mẽ amã ixto hêx to nê mẽ amã: “Ota ra Kris akupým wrý. Kwa mẽ hwýr mra nê omu.” Anê. Rý mẽ amã: “Krisja krĩ mýj kamã na raa. Kwa mẽ ma hwýr mra nê omu.” Anhýr o mẽ amã ixto hêx o pa. Rý mẽ awýr mra nê mẽ amã amnhĩ to hêx nê mẽ amã: “E. Ot pa ixpê Kris ã mẽ awýr wrý. Tirtũm na mẽ awýr inhmê pa wrý.” Anê. Rý mẽ amã: “E ixpê Tirtũm nhý hã ixkapêr xwýnh na pa mẽ awýr mõn pøj.” Anhýr o mẽ amã amnhĩ to hêx. Hãmri nê mẽ anokupyr kaxyw mẽ amã aa mẽ kot mẽmoj pumunh kêt kwý ho anhýr o pa. Tirtũm kot amnhĩ kêt mẽ arênh xwýnhjaja kãm mẽ ate ja hã mẽ omunh nê mẽ gryk ã ixkaga hprãm xãj koja mẽ ã mẽ anoo mã amnhĩ nhĩpêx anhýr o pa. Nom ãm ã amnhĩ nhĩpêx anhýr kapry ka mẽ ixkaga hkêt nê.

²⁵ —E kwa mẽ inhmar týx nê. Na pa ra ixpri hã ã mẽ kot amnhĩ nhĩpêx anhýrja kukamã ã mẽ amã mẽmoj jarênh anê. Tã kêr ka mẽ amnhĩ nê ã mẽ kot amnhĩ to hêx anhýr o mẽ pa xwýnhjê pumunh mex o apa nê axkãm ajamak rom.

²⁶ Rý koja mẽ tanhmã mẽ amã ixto hêx to nê mẽ amã: “Ota Tirtũm kot mẽ pahwýr mênh xwýnhnta kapót ã mõn pøj. E mẽ tokyx ma hwýr mra nê omu.” Anhýr o mẽ amã ijarê ka mẽ ama nê ãm mẽ ama nê hwýr amrar kêt nê. Rý nhũm mẽ amã: “Ota hitom kãm xa. E mẽ mamrĩ hwýr agjê nê omu.” Anê no ka mẽ ãm mẽ ama nê ãm mẽ ama nê hwýr agjê kêt nê.

²⁷ Kot paj nhýrmã akupým mẽ awýr ixwrýk kaxyw hãmri nê ixpimxur kãm ixwrýk kêt nê. Koja pika piitã hkôt mẽ pa xwýnhjaja anhĩpê ixwrýk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu.

²⁸ Te nhýri mẽmoj kro nê nõr nhũm nhõnhti kot omunh nê hã htor nê hpinhpanh nhũm mẽ piitã hã omunh pyrãk o kot paj amnhĩ nhĩpêx. Anê.

Jejus akupÿn wrÿk xwÿj ri mēmoj kukamā harēnh

Makre 13.24-31; Rukre 21.25-33; määnēn Wam Tesarōn 4.16-17

²⁹ Nhūm Jejus arī mē ixte hkōt ixpa ho ixpa xwÿnhjē mā kapēr nē mē inhmā:

—Nē kot paj akupÿn mē awÿr inhno-jarēt nhūm ri Tirtūm kaxkwa kamā tanhmā mēmoj nhīpēx to. Kapēr ā kagā htūm kot tanhmā ja kukamā harēnh to nē harēnh kot: Koja Tirtūm kaxkwa ho āk nhūm kanhēti pi-itā rōrōk pa nhūm myyti ahtyk nhūm mytwrÿre urāk nē axte hpōk kēt nē. Anē.

³⁰ Koja ā mēmoj amnhī nhīpēx anhÿr pa hāmri pa kaxkwa hā mē amā mēmoj nhō. Hāmri nhūm pika piitā hkōt ri mē pa xwÿnhjaja piitā omu nē tee ri amnhī kukamā hamaxpēr o hkaprī nē mÿr rax kumrēx. No mē kajaja kot kaj mē omu hāmri nē akupÿn mē awÿr ixwrÿk nē mē ato amnhīptār mā ajamaxpēr kurē kumrēx. Kot paj kakrā kamā hirā htÿx kām akupÿn ixihÿtÿx kām mē awÿr wrÿ.

³¹ Hāmri nē Tirtūm kapēr o mē wrÿk xwÿnh maati mā anē nhūm pifti kakō hāmri nhūm hkwyjaja kuma nē ma mē awÿr pika piitā hkōt angrā nē ma mra nē inhmā mē ato akuprō. Ixte amnhī kaxyw mē axunhwÿr xwÿnhjē o akuprō nē man akupÿn ixwÿr mē ato hapēx. Anē.

*Jejus kot mēmo pār o ejēp jarēnh
Makre 13.28-31; Rukre 21.29-33*

³² Nhūm Jejus arī mē inhmā kapēr nē mē inhmā:

—E ka mē pī hpār mÿj pumu. Na hte mēmo mytwrÿ hā rā nhūm mē omu nē ô hukamā hamaxpēr kurē kumrēx.

³³ Ja pyrā nē koja ā ixte mēmoj jarēnh anhÿr xwÿnhjaja amnhī nhīpēx par mē ka mē omu nē akupÿn mē awÿr ixwrÿk mā ajamaxpēr kurē kumrēx. Kot paj te ra mē anhōrkwy kapem ixām pyrāk o amnhī nhīpēx.

³⁴ Nom akupÿn ixwrÿk kēt ri koja ā mē kot mēmoj kot amnhī nhīpēx anhÿr pumunh xwÿnhjaja kormā piitā htyk kēt ri pa akupÿn wrÿ.

³⁵ —Nē koja nhÿrmā pika nē kaxkwa wa hapēx pa. Tā no ām ixkapērja koja wa urāk nē aa hapēx kēt nē. Koja ām rāhā ho rāhā. Kot paj aa ihkjē ho tanhmā mēnh to hkēt nē. Anē.

Mē pahte akupÿn Jejus wrÿk xā hā arġro pumunh kēt ā mē pajarēnh

Makre 13.32-37; Rukre 12.37, 17.26-30, 17.34-36; määnēn Wam Tesarōn 5.2

³⁶ Nhūm Jejus arī mē inhmā kapēr nē mē inhmā:

—Nē ixte akupÿn mē awÿr ixwrÿk xā hā arġroja mē ate omunh kēt. Nē kaxkwa

kamā Tirtūm kapēr o mē wrÿk xwÿnhjaja haxwÿja kot ja pumunh kēt. Nē ijaxwÿja ixpē Tirtūm Kra htā ixte ja hā amnhī pumunh kēt. Ām inhō Papaj pix na kot ja pumunh.

³⁷ —Nē kot paj nhÿrmā man akupÿn mē awÿr wrÿ. Akupÿn mē awÿr ixwrÿk xā hā arġrota ā koja mē htÿx ri amnhī tomnuj o pa. Te amnepēm Noehi kormā hÿr ri mē pa xwÿnhjaja kot htÿx ri amnhī tomnuj o pata pyrāk.

³⁸ Na pre htem amnhī kaxyw Tirtūm mā hamaxpēr kēt nē. Ām jar mē kot amnhī nhīpēx pix kukamā hamaxpēr kōt pix mā amnhī nhīpēx o pa. Rōm nhūm Noehitja gō htām pymaj pār rax nhīpēxta mā axā.

³⁹ Nhūm mē ja hā omu nē ām omu nē tanhmā ri amnhī kukamā hamaxpēr to hkēt nē. Hāmri nhūm naja mē haēr pē wrÿ nē wrÿk rax o mē hanhir pa. Tā akupÿn ixwrÿk xā hā arġroja ā koja mē htÿx ri ā amnhī nhīpēx anhÿr o paja o pa mē haēr pē naja pyrā nē akupÿn wrÿ.

⁴⁰ —E kot paj mē amā nhÿrmā akupÿn ixwrÿk nē tanhmā mē anhīpēx to hā amnhī jarē. Te kot ja pyrāk. Koja mēmyjē hō wa hamēxkrut nē hpur kām āpēnh o xa. Nhūm hōja ra ixkōt amnhī xām nhūm hōja ixkōt amnhī xām kēt japēr. Hāmri pa amnhī wÿr ra kot ixkōt amnhī xām xwÿnhnta o api nhūm kot ixkōt amnhī xām kēt xwÿnhnta hpur kām ahte arī xa. Hāmri nē tee ri hkrāmnhwÿ japēr rīt o xa.

⁴¹ Rÿ nhūm mēnijē wa hamēxkrut nē harōj kahuk o xa. Nhūm hōja ra ixkōt amnhī xām nhūm hōja ixkōt amnhī xām kēt japēr. Hāmri pa amnhī wÿr kot ixkōt amnhī xām xwÿnhnta ho api nhūm kot ixkōt amnhī xām kēt xwÿnhnta tee ri hkrāmnhwÿ japēr rīt o xa hāmri nē hamaxpēr rax kumrēx. Kot paj nhÿrmā akupÿn wrÿ nē ā mē anhīpēx anē.

⁴² Tā mē ate akupÿn ixpōx xā hā arġro pumunh kēt jakamā kwa kēr ka mē ijamār rāhā ho ri apa.

⁴³ Na htem htÿx ri nhÿri tanhmā amnhī nhīpēx to ho pa nhūm mē kēp āhkĭnh xwÿnh mē ōrkwy hwÿr agjē nē mē kēp ahkĭ.

⁴⁴ Tā mē ate akupÿn ixwrÿk xā hā arġro pumunh kēt jakamā kwa kēr ka mē ixwakre kamā te mē apē mē ōrkwy nhō dōn kot amnhī nhīpēx pyrā nē atÿx ri tanhmā amnhī tomnuj to ho apa hkēt nē. Ixkutēp axkām ajamak rom nē ri apa. Jao tām ixkutēp amnhī nhīpēx rāhā ho ri apa. Anē.

*Mē kām mē āpēnh mex xwÿnhjē jarēnh
Rukre 12.41-48*

⁴⁵ Nhūm Jejus arī mē inhmā kapēr nē mē inhmā:

—E koja mē kām āpēnh xwÿnhjē hō āpēnh mex o pa hāmri nhūm ō patrāw āpēnh ā omu hāmri nē ma nhÿhÿm mōr kaxyw nē

İhkram mêmoy piitâ haxâr pa nê kâm: “E kêr ka ixwakre kamâ inhmâ inhôrkwî tânopxar mex nê. Nê inhmâ mê àpênh xwýnhjê mã mê apkur xâ nhôr o apa.” Anhÿr o kâm mêmoy tâ karô hãmri nê kato nê ma nhÿhÿm mô.

⁴⁶ Hãmri nhùm kot kâm àpênh mex xwýnhja wakre kamâ kâm àpênh mex o pa. Jakamâ nhùm ô patrâw akupÿn hpôx o mô nhùm amnhî wÿr harênh ma nê hkînh nê. Nê tee ri amnhî kukamâ hamaxpêr o kâm uma hkêt nê. Kot wakre kamâ kutêp kâm àpênh mex jakamâ tee ri tanhmâ amnhî kukamâ hamaxpêr to hkêt nê.

⁴⁷ Jakamâ nhùm ô patrâwja akupÿn pôj nê kot kâm àpênh mex â omu nê hkînh nê. Hãmri nê kot kâm ô mêmoy piitâ hamâr o pa kaxyw İhkram haxâr pa.

⁴⁸ No koja axtem nê wakre kamâ kâm àpênh mex kêt japêr. Nê hamaxpêr o: “Tk. Nâ koja tokyx akupÿn môr kêt nê.” Anhÿr o hkamnhÿx.

⁴⁹ Hãmri nê wakre kamâ kâm mê àpênh xwýnhjê htak nê pipânih pix o pa. Nê kâm kagôxyhti xânh xwýnhjê kôt pix mã pa.

⁵⁰ Hãmri nhùm ô patrâwja haêr pê akupÿn pøj nê tee ri ja hâ omu.

⁵¹ Hãmri nê kamâ gryk tÿx nê tanhmâ homnuj htÿx to nê kâm mê àpênh punuj xwýnhjê mê mê ho hpimràatâ amnhî nê mê kator pa. Hãmri nê mê kot kapêr kwÿm amnhî nhîpêx xwýnhjê mê mê ho hpimràatâ tanhmâ mê homnuj to nê amnhî nê mê kator. Hãmri nhùm mê tee ri amnhî kukamâ hamaxpêr nê mur nê tee ri amnhî nhîpêx. Tâ kêr ka mê ixwakre kamâ ho mê urâk kêt nê. Mê kurom ixwakre kamâ ixkapêr kôt amnhî nhîpêx mex râhâ ho ri apa. Anê.

25

Kormâ mê mjên kêt xwýnhjê ho 10 nê mê harênh

Wam Tesarôn 5.1-3

¹ Nhùm Jejus arî mê inhmâ kapêr nê mê inhmâ:

—Nê mê ate Tirtüm kôt amnhî nhîpêx o mê apa xwýnhjaja kêr ka mê akupÿn amnhî wÿr ixkâm ajamak rom nê ri apa. Nom mê kêp Tirtüm prâm nôkati xwýnhjaja koja mê akînhâ âm htÿx tanhmâ amnhî to pix kukamâ hamaxpêr o pa. Te kormâ mê mjên kêt xwýnhjaja kot amnhî nhîpêxta pyrâk. E pa mê amâ tanhmâ mê harênh to ka mê inhma. Kojâ kormâ mê mjên kêt xwýnhjê kêt 10jaja ma hkrâmnhwÿ mjên mã xwýnh kutâ pry hâ mra. Amnhî kôt kanê jamÿ nê o mra nê kutêp pry nhîkrep hkrî.

²⁻⁴ Nhùm mê kêp 5jaja hkwyjê rom amnhî kukamâ hamaxpêr mex nê kanê kaxyw amnhî kôt orti hkwyjê ho mô. No nhùm mê kêp 5 nê mê hkînhâ âm htÿx kanê pix jamÿ nê o mra.

⁵ Hãmri nê mê mjên mã xwýnhja kutêp axpên mã kapêr o hkrî. Nhùm tokyx htêm kêt nhùm mê kutêp hkrî nê gaa nê ra ôtxwa nê gaa nê hkwyjê nê ra ôt pa.

⁶—Tâ nhùm kôt â kamât hãmri nhùm mjên mã xwýnhta hpôx o têt. Hãmri nhùm kot hkukamâ harênh xwýnhja mê ôt o mê hkwyjê xwýnhjê mã amÿra nê mê kâm: “Kwa mê hãmri. Ota mjên mã xwýnhta têt. Mê tokyx kânhmâ akrî pu mê kutâ mra.” Anê.

⁷ Hãmri nhùm mê hkrâ hapôj nê kanê hpök.

⁸ Nom nhùm mê hkwyjê hkînhâ ô kanê kaxyw orti ho pa hkêt xwýnhjaja ra mê kêp mê kanêja hkapyr hpa nhùm mê tee ri kot hpök kaxyw. Hãmri nê orti hkwyjê hâ hkwyjê hwÿ nê mê kâm: “Xê mê inhmâ orti ho inhô kanê go.” Anê.

⁹ Nom nhùm mê kêp nê nê mê kâm: “Ma mê inhô kanê kamâ orti grire kênâ kot pa kêt mê amâ ho go. Xê mê tokyx ma mra nê nhÿri amnhîm hkwyjê japrô mê.” Anê.

¹⁰ Hãmri nhùm mê tee ri mê kuma nê ma amnhîm hkwyjê japrô mã ma mra.

—Rôm nhùm mjên mã xwýnhta mê hânih têt nhùm kanê kamâ arî mê orti xwýnhjaja omu nê hâ jêt kurê kumrêx. Hãmri nê ma hkôt môn mê pikuprônih xâ hâ ixkreja wÿr wa hâ hkînh nê apkur kaxyw gjêx pa nhùm mê hâ kahê. Mê gjêx xâ hâ oreja ra hwÿr hpôx jakamâ nhùm mê hâ kahê.

¹¹—Tâ nhùm ma mê kot orti japrô mã mra xwýnhjaja hãmri amnhî to hapu nê mra nê tee ri mê hâ hakwakre kupê nê htatak nê tee ri mê kâm akir nê mê kâm: “Xê mê inhmâ kahê xâ mê pa mê awÿr agjê.” Anê.

¹² Hãmri nhùm hprô mã xwýnhta mê kuma nê mê kâm: “Tk. Nâ ixte mê apumunhre hâ kot pa kêt mê amâ kahê xâ mê. Kwa mê ma akupÿm mra.” Anê. Â mê ujarênh kot anhÿr. Anê.

¹³ Nhùm pre â Jejus mê inhmâ ujarênh anê. Hãmri nê mê inhmâ:

—E kêr ka mê te kot amnhî kôt orti hkwyjê ho môr xwýnhjaja kot amnhî nhîpêx pyrâk. Mê ate akupÿn ixwÿrk xâ hâ arîgro pumunh kêt jakamâ kêr ka mê apkati mê ixkamâ ajamak râhâ ho apa. Anê.

Mê kâm mê àpênh xwýnhjê jarênh Rukre 19.11-27

¹⁴ Nhùm Jejus arî mê inhmâ kapêr nê mê inhmâ:

—E kêr ka mê ixwakre kamâ inhmâ tanhmâ amnhî nhîpêx mex to ho ri apa pa hpânihâ mê amâ amnhîrer mex nê. Mê ate tanhmâ inhmâ amnhî nhîpêx to ho apa xâ hkôt kot paj mê amâ amnhîre. Te mêhō my kot kâm mê àpênh xwýnhjê nhîpêx pyrâk. Kojâ nhÿhÿm nojarêt nê kâm mê àpênh xwýnhjê mã hikukrêx piitâ hkaga hpa. Ôrkwyjê nê hpur nê hkrî. Âm mêmoy

piitã mē kot wakre kamã kãm hamãr o pa kaxyw mē kãm hkaga hpa.

¹⁵ Hãmri nē ahpÿnhã mē kãm kãxpore hkwȳ gō. Mē kot kutêp kãm tanhmã ho rûnh to kaxyw ahpÿnhã mē kãm ôr pa. Kot kãxpore pumunh mex xwÿnhja mã nhũm ho 5.000 nē kugō. Nē kot hkôt kax pê omunh xwÿnhja mã nhũm ho 2.000 nē kugō. Nē kormã kot omunh tÿx kêt xwÿnhja mã nhũm ãm ho 1.000 pix nē kugō. Hãmri nē mē kãm amnhĩ jarē nē ma nhÿhÿm mō.

¹⁶ Hãmri nhũm kot ho 5.000 nē hamÿnh xwÿnhja kãxporeta py nē ma o mōr kurē kumrêx nē tanhmã ho àpênh to ho mōr kãm ra hipy axte ho 5.000 nē kumē.

¹⁷ Nhũm kot ho 2.000 nē hamÿnh xwÿnhja mããnênh tanhmã ho àpênh to ho mōr kamã ra hipy axte ho 2.000 nē kumē.

¹⁸ Nom nhũm kot ho 1.000 pix nē hpyr xwÿnhja wa hkĩnh ã axtem nē ma o tē nē kãm kakwÿ nē kamã haxã nē hity hpa nē ma akupÿm tē.

¹⁹ –Tã nhũm mē ô patrãwja akupÿn mōn pōj nē mē kãm: “E mē amnē ixwÿr mra nē ixte mē amã kãxpore ho ixpigrãnh xwÿnhnta jarē. Tanhmã na ka prem ixkutêp inhmã hipêx to?” Anē.

²⁰ Hãmri nhũm kot ho 5.000 nē hpyr xwÿnhnta kumrêx hwÿr tē nē kãm: “E ota akãxporeta. Ate inhmã ho 5.000 pix nē ôr tã pa amã ho rax nē amã hipy axte ho 5.000 nē kumē nhũm ho axkamur nē ra ho 10.000. Tã ota.” Anhÿr o kãm kapêr hãmri nē kãm kugō

²¹ nhũm amnhĩm hamÿ nē omu nē hkĩnh nē. Hãmri nē kãm: “Nã ãm hãmri na ka inhmã ho anē. Ixte amã ho 5.000 pix nē ôr tã ka ra inhmã ho rax jakamã kot kaj apē inhmã mē àpênh xwÿnhjê hkrãhtũm. E amnē ixwÿr axã pu mē apku nē pahkĩnh.” Anē.

²² –Hãmri nhũm hpãnhã kot ho 2.000 nē hpyr xwÿnhnta hwÿr tē nē ô patrãwta mã kãm: “E ota akãxporeta. Ate inhmã ho 2.000 pix nē ôr tã pa amã ho rax nē amã hipy axte ho 2.000 nē kumē. Tã ota.” Anē.

²³ Hãmri nhũm kuma nē amnhĩm hamÿ nē omu nē hkĩnh nē. Hãmri nē kãm: “Nã ãm hãmri na ka ã inhmã ho rax anē. Ixte amã ho 2.000 pix nē ôr tã ka inhmã ho rax jakamã kot kaj apē inhmã mē àpênh xwÿnhjê hkrãhtũm. E amnē ajaxwÿja ixwÿr axã pu mē apku nē pahkĩnh.” Anē.

²⁴ –Tã nhũm kot ho 1.000 pix nē hpyr xwÿnhnta hapu hã wa hkôt tē. Hãmri nē ô patrãw mã tanhmã kapêr to nē kãm: “Nã ra ixte apumunh tũm. Pêr axãhkurē pix kãm na ka hte apa. Nē amã akãxpore ho rax nē anhō ho rax pix kukamã ajamaxpêr o ri apa. Nom mē pajaja mē ixàpênh rax pix kukwak ri na ka hte akãxpore rax nē apa.

²⁵ Jakamã na pa inhmã apyma nē. Nē akãxporeta py nē ma o tē nē kaxyw kre

nē kamã haxã. Tã ka akupÿn mōn pōj pa ajarênh ma hãmri nē hkapa nē man akupÿn amã o tē. Tã ota anhō 1.000ta.” Anē.

²⁶⁻²⁷ Hãmri nhũm tee ri kuma nē kãm: “Tk. Kwa amã ixpyma nē ate ixpumunh mex anhÿr tã na ka ixte amã kãxpore nhōrta pyr nē ma ho atēm. Nē mē kot mē kêp kãxpore jamÿnh o kuhê xã kamã mē kãm ôr nhũm mē ixkutêp tanhmã inhmã ho rax to hkêt nē? Pêr ãm amã kaga nē ate amnhĩ tomnu pix o ri apa xwÿnh.” Anē.

²⁸⁻³⁰ Hãmri nē kêp kãxporeta py nē nhãm jam kugō nē kãm: “E amÿ nē o tē nē kot inhmã ho 10.000 nē ôr xwÿnhnta mã agō. Hãmri nē jahti pynê nē ma o tē nē kamãt kô kamã amē. Apênh mexti hã. Kojã tee amÿra nē amnhĩ xã htÿx kamã hamak xãj tee ri amnhĩ nham o axpênh kamhar tÿx kapÿr nē rĩ amnhĩ pumu.” Anhÿr o kãm kapêr nhũm kuma nē hpa hã kupy nē ma o tē. Hãmri nhũm mē ô patrãwja mē àpênh xwÿnhjê mã kãm: “E mē ate ixwakre kamã mē axàpênh mex xwÿnhjaja kot paj ã mē ato mex rax anē ka mē akĩnh nē. Nom mē kot inhmã mē àpênh mex kêt xwÿnhjaja kot paj mē kêp mēō mēmoja jamÿ nē nhãm mēhōm kugō nhũm hkaprĩ nē.” Anē. ã mē ujarênh kot anhÿr. Anē.

Jejus kot nhÿrmã mē piitã tanhmã mē harênh to hã harênh

Matêwre 13.35-43, 13.47-50; mããnênh Apokarip 20.11-15

³¹ Nhũm Jejus arĩ mē inhmã kapêr nē mē inhmã:

–Nē kot paj nhÿrmã akupÿn mē awÿr wÿr nhũm Tirtũm kapêr o mē wÿrk xwÿnh piitã man ixkôt wÿr. Kot paj wÿr nē ixpê pahĩ maati hã ixkrĩ xã maati kamã inhmex nē nhÿ.

³²⁻³³ Hãmri nē Tirtũm kapêr o mē wÿrk xwÿnhjê mã anē nhũm mē ma krĩ piitã hkôt mē apiitã mē ato pikuprõnh pa nē akupÿn ixwÿr mē ato hapêx. Pa mē apumu nē tanhmã mē axunhwÿr to. Te ôwêhti jamãr o pa xwÿnh kot ôwêhti kaêx ã motre pumunh nē nhãm nē motre xunhwÿr parta pyràk.

³⁴ Hãmri nē ixupók rũm mē ate ixkôt amnhĩ xunhwÿr xwÿnhjê mã ixkapêr nē mē amã: “E mē kajaja kot kaj mē amex kumrêx nē ri apa ho apa. Amnepêm kormã mēmoj piitã hkêt ri na pa pre Inhĩpêxã mē wa mē akukamã tanhmã ijamaxpêr to nē mē amã mēmoj mex xunhwÿr rũnh nē.

³⁵ Tã ka prem ajapój hãmri nē ixkôt amnhĩ xunhwÿr nē tanhmã ixto mex to ho ri apa.

Na pa pre inhmã prãm nē ixpa ka prem ixpumu nē ixkamã axukapri nē inhmã mēmoj gō pa kuku.

Nē na pa pre inhmã kôr nē ixpa ka prem ja hã ixpumu nē inhmã gō pa ho ixkō nē akupÿm ixihtÿx.

Nê aa mê ate ixpumunh kêt tâ ka prem nhÿri ixpumu nê amnhî nhôrkwÿ hwÿr ixwÿ.

³⁶ Nê na pa pre ixê pynajti nê ri ixpa ka prem ja hâ ixpumu nê inhmâ axê gô pa haxâ nê ri hâ ixpa.

Nê na pa pre ixâ nê inhîkwÿ ka prem ixwÿr mra nê ixkane nê tanhmâ ixto mex to pa akupÿm inhmex.

Nhÿm prem ijaxâ pa mê hagjênh xâ kamâ ixkrî ka prem ixwÿr mra nê tanhmâ ixto mex to.

Â mê ate ixto mex anhÿr o ri apa jakamâ nhÿm inhô Papajja ixtâ mê apumu. Tâ koja ixtâ mê ato mex rax nê." Anê.

³⁷ —Kot paj â mê ate tãm amnhî nhîpêx xwÿnhjê mâ ixkapêr anê. Hâmri ka mê tee ri inhma nê amnhî tâ ixkukja nê inhmâ: "Kwa xâ mê pajaja na pa prem â ato mex anê? Nâ mê ixte â anhîpêx anhÿr kãm amnhî pumunh kêt tâ na ka â mê ijarênh anê. Kwa nhÿri na ka pre amâ prâm nê apa pa prem apumu nê amâ mêmôj gô ka aku? Nê nhÿri na ka pre amâ kôr nê apa pa prem amâ gô hkwy ka ho ixkô?"

³⁸ Nê nhÿri na pa prem apumu nê amnhî nhôrkwÿ hwÿr awÿ? Rÿ ka pre axê pynajti nê apa pa prem amâ inhînhkâ gô ka hagjê?

³⁹ Nê nhÿri na ka pre axâ nê anhîkwÿ pa prem apumu nê akane? Nê nhÿri na prem ajaxâ pa mê hagjênh xâja wÿr mra nê kamâ tanhmâ ato mex to? Nâ mê pa hkêt." Anhÿr o amnhî tâ ixkukja.

⁴⁰ Hâmri pa mê amâ: "Nâ mê kêp amrakati xwÿnhhjaja na pre htem pa pyrâk. Tâ ka prem mê kamâ axukapri hâ tanhmâ mê kutâ anojarêt to ho ri apa jao te pa tanhmâ ixto mex to ho apa pyrâk. Âm hâmri na ka prem â mê ho mex anhÿr o ri apa." Anê. Kot paj â mê ate amnhî to mex xwÿnhjê mâ ixkapêr anê.

⁴¹ —Hâmri nê hpânâ apke rÿm mê kot ixkôt amnhî xunhwÿr kêt xwÿnhjê mâ tanhmâ ixkapêr to nê mê kãm: "No mê kajaja kot paj ixupôk rÿm mê unhwÿr xwÿnhjtajê hkînâ mê ato mex kêt nê. Amnepê m na pre Tirtûmja Satanasti mê mê kot tanhmâ kãm amnhî nhîpêx to ho mê pa xwÿnhjê mê mê ho hpimrâatâ mê kaxyw kuwy rax kumrêxa nhîpêx. Mê kot amnhî tomuj tÿx mÿrapê nhÿrmâ kamâ amnhî xâ htÿx kamâ hamak râhâ nê pa ho pa kaxyw. Tâ kot kaj mê ajaxwÿja ma mê hkôt hwÿr ajapêx. Mê apê Satanasti hkôt mê ate amnhî nhîpêx o apa xwÿnhjê jakamâ kot kaj mê urân ma hwÿr ajapêx pa.

⁴² Aa mê ate tanhmâ ixto mex to hkêt. Na ka pre htem inhmâ prâm nê ixpa hâ ixpumu nom inhmâ mêmôj nhôr kêt nê. Nê inhmâ kôr nê ixpa hâ ixpumu nom inhmâ gô hkwy hkêt nê.

⁴³ Nê nhÿri ahte ixpa hâ ixpumu nom amnhî nhôrkwÿ hwÿr ixwÿr kêt nê. Nê ixê

pynajre nê ixpa hâ ixpumu nom inhmâ axê nhôr kêt nê. Nê ixâ nê inhîkwÿ hâ ixpumu nom ixkane hkêt nê. Nê mê kot ijaxâr nhÿm arî ixkrî hâ ixpumu nom ixwÿr amrar nê tanhmâ ixto mex to hkêt nê. Â mê ate inhîpêx anhÿr o apa jakamâ e mê ma kuwy hwÿr apa kurê kumrêx." Anê. Kot paj â mê kãm ixkapêr anê.

⁴⁴ Hâmri nhÿm mê tee ri inhma nê amnhî tâ ixkukja nê inhmâ: "Kwa nâ â mê ijarênh anhÿr kêt nê. Aa mê ixte â anhîpêx anhÿre hâ. Nhÿri na pa prem tanhmâ akute hâ apumu? Nâ aa mê ixte nhÿri â ate amnhî nhîpêx anhÿr â apumunhre hâ." Anê.

⁴⁵ —Koja mê â inhmâ amnhî tâ aprâr anhÿr kaprÿ. Kot paj mê kãm: "Nâ na ka pre htem mê kêp amrakati xwÿnhjê pumu nê âm mê omunh o ri apa nê mê kamâ axukapri hkêt nê. Â mê hipêx anhÿr jao te pa â inhîpêx anhÿr pyrâk. Jakamâ kwa mê tokyx ma kuwy hwÿr ajapêx kurê kumrêx." Anê. Kot paj â kuwy hwÿr mê hanor anê.

⁴⁶ Hâmri nê hwÿr mê rênh pa nhÿm mê ma hwÿr hapêx nê kamâ amnhî xâ htÿx kãm hamak râhâ nê pa ho pa nê aa kator kêt kumrêx. No kêt mê ate tãm amnhî nhîpêx o mê apa xwÿnhhjaja kot kaj mê kurom ma Tirtûm mê wa inhô krî hwÿr api nê kamâ amex nê atÿr tÿm nê apa ho pa. Kot paj â ahpÿnhâ mê apiitâ mê anhîpêx anê. Anê.

Nhÿm pre â Jejus akupÿn wrÿk â amnhî kukamâ mê inhmâ ujarênh anê. Hâmri nê mê inhmâ ujarênh pa.

26

Mê kot Jejus â ànnênh â amnhî jarênh

Makre 14.1-2; Rukre 22.1-2; Juâw 11.45-

53

¹ Tâ nhÿm Jejus mê ixte hkôt ixpa ho ixpa xwÿnhjê mâ ujarênh pa nê mê inhmâ:

² —E kot puj mê axte pahatâ apkati axkrut hâmri nhÿm arÿgro pê Pas kato. Jakamâ koja mê piitâ amnepê m Tirtûm kot Ejit nhô xwÿnhjê pê mê pakukamâ mê panhîgêtjê kator mâ hamaxpêr nê hâ hkîn kaxyw Jerujarê hwÿr akuprô. Kamâ koja mê ixpynê nê pi kahpa hâ inhô nê ixpi. Koja mê tokyx â inhîpêx anê. Anê.

Nhÿm pre â amnhî kukamâ mê inhmâ amnhî jarênh anê.

³ Rôm nhÿm Jerujarê kamâ patre krâhtÿmjê mê Ijaew pigêtjaja patre maati Kajpasja nhôrkwÿ kamâ axpên wÿr akuprô.

⁴⁻⁵ Ra mê kãm Jejus pir prâm tâ mê kãm mê kot hkôt kapêr mar o pa xwÿnhjê pyma nê. Hâmri nê tee ri hamaxpêr nê axpên mâ:

—Hêxta waa nê. Tanhmâ kot puj wem ho nê kupiî? Kot puj mê pahkîn kãm tanhmâ ho nhÿm mê hkîn xwÿnhhjaja hâ mê pakamâ gryk tÿx nê. Pu mê hâ axpu nê hâ tanhmâ

axpên to. Jakamã kwa pu mē kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

⁶Tã nhũm Jejus kormã krĩ pē Petãn kamã Simãw nhõrkwý kamã apkur o nhÿ. Simãwja na pre hkã kro xápêr tÿx o pa nhũm Jejus ra arĩgro hõ hã akupÿm hkã ho mex. Hãmri nê akupÿm õ krĩ hwÿr pøj nê õrkwý hwÿr tē nē kuri apkur o nhÿ.

⁷Hãmri nhũm mêhõ nija hpõx ã omu nê hamaxpêr o:

—Ma koja pēr Jejusja pa hã apkati grêre hãmri nê ty. An pa ma hwÿr tē nē mēhkuxwa xã ho hkuxwa.

Anê hãmri nê kên jaka ho kãx kãm mēhkuxwa xãja nhũm kumy nê ma hwÿr o tē. Hãmri nê ho hkrã gregrer nê hã hkapĩr pa nê ho hkuxwa hpa. Mēhkuxwa xã hã kãxpore xohtõ rax tã nhũm ã hã hkapĩr par anê.

⁸Hãmri pa mē ixte Jejus kõt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mēhkuxwa xãta kapĩr pa.

⁹Kop apu ma kot o htēm nê ho wēnē nê hpãnhã kãxpore ho rax kumrêx nê hamÿnh nê ho mē kēp amrakati xwÿnhjê nhĩpêx par o nhÿx ja kãm mex nê. Kwa mo na we ã amnhĩ nhĩpêx anhÿr kêt nê? Anê.

¹⁰Hãmri nhũm Jejus amnhĩ tã mē inhma nê mē inhmã:

—Kwa kot ixto mex kaxyw kēnã na ka mē axtem nê ixtã kãm akir.

¹¹Mē kēp amrakati xwÿnhjaja koja mē arĩ mē akõt pa rãhã nê. Ka mē amã mēmo arĩgro hã tanhmã mē ho ajuta hto hprãm nê tanhmã mē ho ajuta hto nê mē kãm mēmoj gõ. No pa kot paj ri mē akõt ixpa ka mē ixto mex ry ho apa hkêt nê. Kot paj tokyx mē apiitã mē arê.

¹²Ixyk nhũm mē kot ijaxãr kukamã na ã ixkuxwa anê. ãm hãmri na ã inhĩpêx anê.

¹³ãm hãmri na pa mē amã kot ã inhĩpêx anhÿrja jarê. Koja mē krĩ piitã hkõt axpên mã ijarênh ã kagã kamã ijarênh o pa nê kamã nija kot ã inhĩpêx anhÿr kamã harê nê kuma. Anê.

Jut Kariot kot mē kãm Jejus ã ãmnênh

Makre 14.10-11; Rukre 22.3-6

¹⁴Tã nhũm Jut Kariotja. Kēp mē ixpê Jejus kõt ixpa ho ixpa xwÿnh pē 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tē nê tanhmã Jejus o mē mar to nê mē kãm:

¹⁵—E ot pa mē amã Jejus jarênh o tē. Xã kot paj mē amã hã amÿnê ka mē hpãnhã inhmã amnhĩre nã? Anê.

Hãmri nhũm mē kuma nê hkĩnh nê. Hãmri nê kãm:

—Nã kot paj mē amã amnhĩre.

Anê hãmri nê kãm kãxpore ho 30 nê õr kurê kumrêx nhũm hamÿ nê hkĩnh nê kato nê ma tē.

¹⁶Hãmri nê mē kãm Jejus pynênh kaxyw tãnopxar o ri hkõt ri pa. Mē kot mar o ri pa xwÿnhjê hkã ã onênh nê ma mē hwÿr o htēm kaxyw.

Jejus kot hkõt mē pa xwÿnhjê kutã apkur

Makre 14.12-21; Rukre 22.7-13; Juãw 13.21-30

¹⁷Tã nhũm mē hkĩnh pē Pasja kato. Amnepēm kormã Ejit kãm mē pa ri na pre mē inhĩgêjtaja õwêhti hkrare hkwy hpa nê ho anê nê kuku. Tirtũm kot ja hã mē omunh nê Ejit nhõ xwÿnhjê nê mē kator kaxyw nhũm prem ã amnhĩ nhĩpêx anê. Tã mē ixpê mē hkanrêhã mē htãmnhwÿjaja na pa htem arĩ amgrã mē arĩgro pē Pasja ã axpên wÿr akuprõ nê jam ijamaxpêr pē mē urãk nê õwêhti hkrare hkwy pa nê pãwti kaxkrit kêt kãm kuku. Jakamã pa mē ixte Jejus kõt ixpa ho ixpa xwÿnhja wa axkrut nê Jejus wÿr tē nê amnhĩ tã hkukja nê kãm:

—Kwa nhÿri kot paj wa wa tē nê mē akutêp Pas ã mē panhõ hã apê? Anê.

¹⁸Hãmri nhũm wa kãm:

—Nã wa mãmrĩ ma Jerujarêja wÿr wa tē. Nê krĩm axã nê mêhõ myti pumunh kurê kumrêx nê kãm: “E Jejus na wa inhmê pa wa awÿr tē. Na awÿr hpêr mēnh o: ‘E na pa ra inhnojarêt. Jakamã nhÿri kot paj wa ixkõt ri mē pa ho mē pa xwÿnhjê mē Pas ã axpên kutã apku?’ Anhÿr o awÿr hpêr mē.” Anê. E wa ã kãm akapêr anê kē war ama nê war amã õrkwÿ nhĩmõk ã ixkre rax õ jahkre. Kamã ra kaxyw mē paxãpkur xã hã mēmoj piitãã. Ka wa omu hãmri nê mãmrĩ mē ixkutêp kamã mēmoj tã apê. Anê.

¹⁹Hãmri nhũm wa kuma nê ma Jerujarê hwÿr tē. Nê hwÿr axã hãmri nê ra kot wa kãm mēmoj jarênh xã hkõt mēmoj piitã omu hãmri nê mē ixkutêp mēõ hã ãpênh o wa xa.

²⁰Tã nhũm kamãt pa mē Jejusja kõt ixkreta wÿr ixpõx pa nê hwÿr agjê nê ixãpkur kaxyw ixkrĩ. Mē ixte Jejus kõt ixpa ho ixpa xwÿnhjê pē 12jaja pa mē ixpiitã Jejus kutã ixãpkur o ixkrĩ.

²¹Hãmri nhũm Jejus tanhmã mē inhõ jarênh to nê mē inhmã:

—E pa mē amã mēmoj jarê ka mē inhma. Kot kaj mē atõ mē kãm ixkurê xwÿnhjê nhĩhkram ijaxã. Anê.

²²Hãmri pa mē tee ri kuma nê ixkaprĩ htÿx nê. Hãmri nê axpên pãnhã amnhĩ tã hkukja nê kãm:

—Kwa xã pa? Nã pa hkêt. Kot paj ã anhĩpêx anhÿr kêt kumrêx Pahihti.

Anhÿr o axpên pãnhã kãm amnhĩ tã aprã.

²³Hãmri nhũm mē inhmã:

—Nã ãm hãmri na pa mē amã akapêr. Mē ate ixkutã guhkrax kãm anhõ pãwti ho mry

kagô nhek o akrî xwÿnhjê hô kot kaj mê kâm ixtâ amÿnê.

²⁴ Tîrtûm kapêr ã kagâ htûm ra kot ixkukamâ harênh xâ hkôt koja mê tanhmâ ixto rax nê ixpî. Nom kot mê kâm ixtâ àmnênh mâ xwÿnhhta hêxta waa nê. Æ kot amnhî nhîpêx anhÿrja mÿrapê koja amnhî xâ htÿx kâm hamak rax kumrêx. Kop apu aa ô māmāj nhôxâ hkre rûm kator kêt ronhÿx ja kâm mex nê. Anê.

²⁵ Hāmri nhûm Jut Kariot kot mê kâm hâ àmnênh mâ xwÿnhhta hāmri amnhî tâ kuma nê kâm:

—Kwa xâ we pa Jejus? Xâ pa kot paj ã anhîpêx anê? Kwa nâ pa hkêt. Anê.

Hāmri nhûm kâm:

—Tÿ. Ka ã ate inhîpêx anhÿr mâ kênâ. Anê.

Jejus kot amnhî kamrô pikapîr kukamâ harênh

Makre 14.22-26; Rukre 22.14-23; mādānēn Wam Korî 11.23-26

²⁶ Tâ nhûm Jejus pāwti hô py nê Tîrtûm mâ harê nê mê inhmâ ho hkry nê ho mê inhîpêx pa nê mê inhmâ:

—E na pa ã mê amâ pāwti ho hkry nê mê amâ ôr anê. Ja pyrâ nê koja mê ã inhîpêx anê nê te ixto hkry hpar pyrâk o inhîpêx pa amnhî xâ htÿx kamâ ijamak kâm ty. Nom mê anê kot paj ty. E mê māmri aku.

Anhÿr o mê inhmâ amnhî jarê pa mê kuma nê kot mê inhmâ ho hkry xwÿnhja ku.

²⁷⁻²⁸ Hāmri nhûm hpānhâ kop py nê mâ ho anê nê Tîrtûm mâ harê nê mê inhmâ kugô nê mê inhmâ:

—Mê kot ixpîr xâ hâ arîgroja ã koja ixkamrô axkapî. Nom koja mê amarî ixpîr nhûm amarî ixkamrô hpikapîr kêt nê. Am paa. Pa kot paj mê anê mê îhkram amnhî jaxâ nhûm mê ã inhîpêx anê nê ixpî. Koja ixkamrô axkapî nhûm Tîrtûm omu nê ixkukwak ri mê ate ixkôt amnhî xunhwÿr xwÿnhjê nê mê ate amnhî tomnuj piitâ te amnhî katut kôt rênh par pyrâk o hipêx nê mê ato hkra. Ra amnepêm kot ã amnhî jarênh anhÿr xâ hkôt. Jakamâ e mê ixkamrô pikapîr mâ ajamaxpêr pê wîhti ho akôm o axpên nhîpêx.

²⁹ Am hāmri na pa ã mê amâ amnhî jarênh anê. Kot paj axte wîhti ho ixkôm kêt rāhā nhûm nhÿmā inhô Papaj akupÿn mê awÿr inhmê. Hāmri pu mê akupÿn ixwrÿk xâ hâ arîgrota ã pahkînh rax kumrêx. No am axtem tanhmâ hâ pahkînh to. Anê.

Nhûm pre ã Jejus mê inhmâ amnhî jarênh anê. Pa mê axpên pānhâ kopta py nê wîta kwÿ ho ixkô.

³⁰ Hāmri nê mê ixpiitâ ho ixkôm pa nê Tîrtûm mâ mex ã gre. Hāmri nê ijapôj nê hixêt prêk pê Oriwêhti hwÿr ma mra.

Jejus kot Simāw Pêtre mā kapêr ã harênh Makre 14.27-31; Rukre 22.31-34; Juāw 13.36-38

³¹ Tâ nhûm Jejus tanhmâ mê ixte hkôt ixpa ho ixpa xwÿnhjê jarênh to nê mê inhmâ:

—E Tîrtûm kapêr ã kagâ htûmta kot tanhmâ mê akukamâ mê ajarênh to nê mê ajarênh kot:

Kot paj ôwêhti jamâr o pa xwÿnhja pi hāmri nhûm ôwêhti hpigrānh pa nê ma angrâ nê ri mra.

Anhÿr o kot mê ajarênh. Te ho mê apê ôwêhti pyrâ nê ã mê ajarênh anê. Tâ kamât ja kamâ koja mê tanhmâ inhîpêx to ka mê ixtâ mê omu nê mê umaj ôwêhti pyrâ nê apiitâ ixkaga hpa nê ma aprôt nê mra.

³² Nê mê kot ixpîr tâ kot paj akupÿm ixtîr. Hāmri nê ma akupÿm mê akukamâ pika pê Garirej wÿr mô. Kamâ kot puj mê axte axpên pumu. Anê.

³³ Hāmri nhûm Simāw Pêtre tee ri tanhmâ mê kot amnhî nhîpêx to hkukamâ amnhî jarênhja ma nê hkapri nê kâm:

—Tk. Nâ kot paj ã amnhî nhîpêx anhÿr kêt nê Pahihtî. Koja pahkwÿja akaga japêr no pa kot paj aa akaga hkêt nê. Kot paj akôt ixpa rāhā nê. Anê.

³⁴ Hāmri nhûm Jejus kâm:

—Nâ ra ixte akukamâ ixâhpumunh mex. Koja apkati hkôt krāhyre hkâr kêt ri ka ra mê umaj ate ixkôt apa hkêt ã mê kâm amnhî tâ axâprâr o axkrunêpxi kâm ga. Kwa jam ajamaxpêr tÿx nê. Anê.

³⁵ Hāmri nhûm tee ri kuma nê axte kâm:

—Kwa nâ. Mê kot ajaxâr nê apîr tâ kot paj arî akôt ri ixpa nhûm mê pahto amÿrâ nê tanhmâ panhîpêx to. Nâ kot paj aa akaga hkêt nê.

Anhÿr o kâm amnhî jarê. Pa mê ijaxwÿja ã kâm amnhî jarênh anê.

Jejus kot Tîrtûm mā amnhî jarênh

Makre 14.32-42; Rukre 22.39-46

³⁶ Tâ nhûm Jejus mê inhmâ anê pa mê ma nhÿri mê kot kâm “Gesēm” anhÿr xwÿnhja wÿr mra. Hāmri nhûm mê inhmâ:

—E mê jar ixkutêp akrî. Pa ma mûtûm tē nê Tîrtûm mā amnhî jarê mān. Anê.

³⁷ Hāmri nê mê ixkwÿjê ho axkrunêpxi nê amnhî kôt mê kuwÿ. Simāw Pêtre nê Jepetew kra pijakrut pê Xiakre nê Juāwja wa nhûm amnhî kôt mê kuwÿ nhûm mê ma hkôt mra. Hāmri nhûm Jejus tee ri mê kot tanhmâ hipêx tota kukamâ hamaxpêr o hkapri nê amnhî kamâ kahak tÿx nê.

³⁸ Hāmri nê mê kâm:

—Hêxta waa nê. Na pa tee ri amnhî xâ htÿx kamâ ijamakja kukamâ ijamaxpêr nê amnhî kamâ ixkahak tÿx o ra ixkapri nê. Te ixkapri kot ixpîr o môr pyrâk. Jakamâ e mê jar anohtÿx nê ixto Tîrtûm wÿr o akrî kē

tanhmã ixto pa mē kot tanhmã ixtoja kutã ixihtÿx nē. Anē.

³⁹ Hāmri nē mē kurūm htēm grire nē Tirtūm mā amnhī jarēnh kaxyw htu mÿr pē tēm nē pikap nō nē kām:

–Kwa Papaj. Hēxta waa nē. Inhmã amnhī xã htÿx kãm ijamak prãm kêt kumrēx. Na pa tee ri amnhī kukamã ijamaxpēr nē amnhī kamã ixkahak tÿx nē. Jakamã kot kaj amã inhnē ja ho ajapēx prãm nē māmri inhnē ho ajapēx nhūm mē kãm ixkurē xwÿnhjaja tanhmã ixto hkêt nē. Rÿ ko. Kot kaj amã mē kot tanhmã ixto hprãm kê mē māmri tanhmã inhîpēx to. Nom pam inhmã hprãm xã hkôt kêt. Anē.

⁴⁰ Hāmri nē kãnhmã xa nē akupÿm Simãw Pêtreja mē hwÿr tē nē tee ri mē omu nhūm mē ra ôt pa nē hikwÿ. Nhūm mē omu nē Simãw Pêtre mā kãm:

–Kwa Simãw Pêtre. E mē hāmri akrã hapôj. Kwa wem anohtÿx grire

⁴¹ nē ixkutēp amnhī to Inhō Papaj wÿr o akrī kê mē ixkôt tanhmã mē ato htã ka mē amã mē uma xaj ixkaga hkêt nē arī mē kutã amnhī to htÿx nē akuhē. Ā mē amã mē ate amnhī nhîpēx anhÿr prãm nom kormã mē amã maa.

⁴² Anhÿr o mē kãm kapēr hāmri nē akupÿm tē nē axte Tirtūm mā amnhī jarē nē kãm:

–Kwa Papaj. Nã inhmã amnhī xã htÿx kãm ijamak prãm kêt. Na pa amnhī kukamã ijamaxpēr nē amnhī kamã ixkahak tÿx kumrēx. Jakamã kot kaj amã inhnē ja ho ajapēx prãm nē māmri inhnē ho ajapēx kê mē kãm ixkurē xwÿnhjaja tanhmã ixto hkêt nē. Nom ko. Kot kaj amã mē kot tanhmã ixto hprãm kê mē māmri tanhmã inhîpēx to. Nom pam inhmã ja prãm xã hkôt kêt. Anē.

⁴³ Hāmri nē kãnhmã xa nē Simãw Pêtreja mē hwÿr akupÿm tē. Nē mē omu nhūm kê mē axte gōr nē hikwÿ. Ra mē ôtwa htÿx nē axte gōr nē hikwÿ. Nhūm Jejus tē nē tee ri mē omunh o xa

⁴⁴ nom axte tanhmã mē kãm nē hkêt nē. Ām awjanã nē akupÿm tē nē kê wam kot Tirtūm mā amnhī jarēnh xã hkôt axte kãm amnhī jarē.

⁴⁵⁻⁴⁶ Hāmri nē akupÿm mē hwÿr tē nē mē kãm:

–Kwa xãn ka mē arī gōr nē anhîkwÿ? E mē tokyx akrã hapôj. Na mē ra mē kot ixwÿr mrrar nē ixpynēnh mã. Koja mē tokyx ixkutã mē kot amnhī xunhwÿr xwÿnhjaja mē kãm ixtã amÿnē. Ota ra kot ixtã mē kãm ãmnēnh xwÿnhta tē. E mē tokyx kãnhmã akrī pu mē kutã mra. Anē.

Mē kot Jejus pynēnh ā harēnh

Makre 14.43-50; Rukre 22.47-53; Juãw 18.2-11

⁴⁷ Nhūm Jejus mē kãm kapēr o ãm rãhã nhūm Jut Kariot pē mē inhîōja hwÿr tē. Nē

amnhī kôt mē ohtō nē hwÿr mē o tē nhūm mē wapohti nē kō jamÿ nē hkôt o mra. Patre krãhtūm mē Ijaew krãhtūmjaja kot Jejus wÿr mē rēnh xwÿnhjaja nhūm mē man hkôt Jejus wÿr mra.

⁴⁸ Na pre ra Jut Kariot amnhī kukamã mē kãm amnhī jarēnh o:

–Kot paj ixkumrēx hwÿr tē ka mē ixkôt hapu hã mra. Kot paj hwÿr tē nē kãm ixkapēr nē kahti hkôt kumÿ. Ka mē hã ixpumu nē hwÿr mra nē unēnh kurē kumrēx. Ixte kahti hkôt mÿnh xwÿnhta kot kaj mē unē. Anē.

⁴⁹ Hāmri nē Jejus wÿr tē nē kãm:

–Pa Jejus? Xãn ka kormã anhôt kêt nē xa? Anē nē kahti hkôt kumÿ.

⁵⁰ Hāmri nhūm amnhī tã omu nē kãm:

–Kwa Jut. Ate tanhmã ixto kaxyw mã xwÿnh jakamã e kam nē māmri tanhmã ixto. Anē.

Hāmri nhūm Jut kôt mē mrrar xwÿnhjaja Jut kot kahti hkôt mÿnh ā omu nē hwÿr mra nē unēnh kurē kumrēx.

⁵¹ Hāmri nhūm mē inhîōja tee ri ja hã mē omu nē ò wapo kapa nē patre maati mã ãpēnh xwÿnh kot mē hkôt htēm xwÿnhta mã ho apē. Nē kot ho hkrã nhîpōnh mã tã kuh-paw nē upōk rŭm hamak nhîkjē pix krãhta.

⁵² Hāmri nhūm Jejus omu nē nē kãm kapēr nē kãm:

–Kwa akupÿm awapota hkãm haxã nē amarī xa. Na htem wapo ho mē oprē ho pa nhūm mē amnhī xwar wapo ho mē kupa.

⁵³ Xã kot paj amnhī to Tirtūm wÿ nhūm ãm inhma nē tanhmã jajē pē ixpytãr to hkêt nē? Nã kot paj amnhī to kuwÿ nhūm ixwÿr kapēr o mē wÿrk xwÿnhjē rēnh kurē kumrēx nhūm mē ohtō rax kumrēx nē wÿr nē mē kēp ixpytã.

⁵⁴ Nom kot paj ā amnhī to hwÿr anhÿr kêt nē. Tirtūm kapēr ā kagã htūm kot amnepēm ixkukamã ā mē kot inhîpēx anhÿr ā mē harēnh jakamã kwãr mē māmri Tirtūm kãm hprãm xã hkôt ā inhîpēx anē. Anē.

⁵⁵ Hāmri nē hpãnhã mē kot unēnh xwÿnhjē mã kapēr nē mē kãm:

–Kwa na pa pre apkati mē Tirtūm mā amnhī jarēnh xã hã ixkre kamã mē kãm ixujarēnh o ixpa. Ka prem tokyx ixpynēnh kêt tã jarãhã te ixte amnhī tomnuj xwÿnh pyrãk o inhîpēx nē ixwÿr wapohti nē kō hã akapēn nē ixwÿr tē.

⁵⁶ Tã nom ra Tirtūm kapēr ā kagã htūm kamã Tirtūm nhÿ hã mē kapēr xwÿnh kot mē akukamã mē ajarēnh nē mē atã kagã xã hkôt na ka mē ri ā inhîpēx anē. Anē.

Nhūm pre ā Jejusja amnhī tã mē kãm kapēr anē. Hāmri pa mē ixte hkôt ixpa ho ixpa xwÿnhjaja mē omu nē tee ri amnhī kukamã ijamaxpēr nē mē umaj ixprôt nē anhgrã nē ma inhmrrar kurē kumrēx.

Mê kot patre maati hwÿr Jejus o môr ã harênh

Makre 14.53-65; Rukre 22.54-55, 22.63-71; Juâw 18.12-14, 18.19-24

⁵⁷ Nhùm pre Ijaew krâhtûmjê mê Tirtûm kapêr tûm o mê ahkre xwÿnhjaja ra patre maati Kajpas nhôrkwÿ hwÿr akuprô nê Jejus kutêp hkrî. Hâmri nhùm mê kot unênh xwÿnhjaja ma mê hwÿr o tê.

⁵⁸ Hâmri nê mê hwÿr ho axâ nê hkôt gjêx pa. Nhùm Simâw Pêtre mê hkôt hapu hâ mê hânopxar o tê nê kîtare hwÿr axâ nê pôristi nhîhkô hâ nhÿ. Hâmri nê tee ri Jejus kukamâ hamaxpêr o nhÿ nê hamaxpêr o:

—Kwa tanhmâ koja mê ixpê mê inhô Pahihti nhîpêx to? E pa jar amÿm tanhmâ mê kot hipêx to hâ mê omunh o nhÿ. Anê.

⁵⁹ Hâmri nhùm patre krâhtûmjê mê juis-tijaja kâm Jejus pîr prâm tÿx nê. Jakamâ na prem Ijaew wa ho hamêxkrut nê axpên kôt tanhmâ mê kâm ho hêx to nhùm mê kot hâ wa mar nê ra hpîr kaxyw mê pikuprônh xwÿnhjê kapi.

⁶⁰ Jakamâ nhùm prem axpên pânâ mê hwÿr mra nê tanhmâ ho hêx to. Nom axpên kôt harênh kêt nê. Âm ahpÿnhâ tanhmâ ri harênh to nom wahô wa akkrut nê axpên kôt harênh kêt nê. Jakamâ nhùm mê tee ri hâ mê kuma.

Tâ nhùm ja wa mê hwÿr tê nê axpên kôt harê nê mê kâm:

⁶¹ —Nâ na pre tanhmâ Tirtûm mâ amnhî jarênh xâ hâ ixkre jarênh to nê harênh o: “Kot paj nhÿrmâ inhmâ ixkreja grânh par prâm nê kugrà hâmri nê âm ixtâ apkati axkrunêpxi pix nê akupÿm hipêx pa. Ja kaxyw ixâhpumunh tÿx.” Anhÿr o na amnhî jarê pa wa kuma.

⁶² Anhÿr o mê kâm ho hêx. Hâmri nhùm patre maatija wa kuma nê kânhmâ xa nê Jejus mâ kapêr nê kâm:

—Kwa xâ âm hâmri na wa ã ajarênh anê nâ? Xàn ka pre ã amnhî jarênh anê? E mê inhmâ tanhmâ amnhî jarênh to. Anê.

⁶³ Nom nhùm amarî mê kâm xa nê mê kâm tanhmâ nê hkêt nê. Hâmri nhùm patre maatija tee ri omu nê axte kâm kapêr nê kâm:

—Kwa aprî hâ mê inhmâ tanhmâ amnhî jarênh to. Tirtûm noo mâ amâ ixkapêr jakamâ kêr ka akatât kôt mê inhmâ amnhî jarê nê amnhî to axêx kêt nê. Xâ apê Tirtûm Kra? Xâ ka na pre Tirtûm mê ixkaxyw axâm? Kwa akatât kôt mê inhmâ amnhî jarê. Anê.

⁶⁴ Hâmri nhùm tâ hprî hâ mê kâm amnhî jarê nê mê kâm:

—Tÿ. Nâ âm hâmri na ka ã ijarênh anê. Ixpê Tirtûm kot mê akaxyw ixâm xwÿnhnta pa. Na pre mê awÿr inhmê pa mê awÿr wrÿ. Tâ kot paj nhÿrmâ axte kakwa rûm amnê akupÿn kakrà kamâ mê awÿr wrÿ. Hâmri nê Tirtûm xâhpumunh o âhpumunh xwÿnhnta

nhîhkô hâ nhÿ hâmri nê pam tanhmâ mê ajarênh to ka mê amnhî tâ ixpumu nê inhma. Anê.

⁶⁵ Hâmri nhùm patre maatija tee ri ã kot amnhî jarênh anhÿr ã kuma nê kamâ gryk tÿx nê. Hâmri nê gryk xâj kêp patre maati hâ ê kapa nê hkaxônha pa nê kumê nê hkwyjê mâ kâm:

—Tk. Kwa mo kaxyw kot puj mê axte ri tanhmâ kot amnhî tomnuj to hâ harênh xwÿnh ò japêr? Tâm kot amnhî pê Tirtûm Kra hâ amnhî jarênh ã amnhî to hêx nhùm mê pahte mar kênâ.

⁶⁶ Jakamâ e kwa tanhmâ kot puj mê hipêx to? Anê.

Hâmri nhùm mê kâm:

—Nâ ã kot amnhî jarênh anhÿr mÿrapê koja ty. Ra htyk mâ tâm kênâ. Anê.

⁶⁷ Hâmri nê tanhmâ hipêx kati hto. Mê hkwyjaja hkuk kuhtô nê îhkra ho htak nhùm mê hkwyjaja îhkra hpo ho htak nê hâ hpêr o axkê nê kâm:

⁶⁸ —E apê Tirtûm Kra hâ ate amnhî jarênh jakamâ mân urâk nê axâhpumunh tÿx. Jakamâ e mê kot atak xwÿnhnta nhîxi jarê pa mê ama. Anê.

Simâw Pêtre kot Jejus kôt pa hkêt ã amnhî jarênh

Makre 14.66-72; Rukre 22.56-62; Juâw 18.15-18, 18.25-27

⁶⁹ Rôm nhùm Simâw Pêtre arî kîtare kamâ nhÿ. Hâmri nhùm mê kâm apênh xwÿnh nitita omu nê hprî hâ omunh kurê kumrêx. Hâmri nê kâm:

—Xê pêr apê Jejus kôt mê pa xwÿnhjê hô na ka. Anê.

⁷⁰ Hâmri nhùm tee ri amnhî tâ kuma nê kâm mê uma xâj mê kâm amnhî tâ aprâ nê kâm:

—Tk. Kokÿ. Ixte mêhô my ata pumunhre hâ. Anê.

⁷¹ Hâmri nê mê umaj kânhmâ xa nê tê nê kîtare hwÿr hakwakrem ahte mê hkâx ã xa. Tâ nhùm hpânâ hõja omu nê hâ mê kâm:

—Xê ma pêr âm hâmri na mê harê. Kêp Jejus kôt ri mê pa xwÿnhjê hô na pêr. Anê.

⁷² Hâmri nhùm amnhî tâ kuma nê kâm:

—Tk. Nâ mê ri ã amnhî krâ hkôt ri ixto axêx anhÿr kêt nê. Ixte aa mêhõta pumunh kêt kumrêx. Anê.

⁷³ Tâ nhùm mê hkwyjaja hwÿr mra nê kâm kapêr nhùm tanhmâ mê kâm kapêr to nhùm mê kuma nê kâm:

—Kwa pêr âm hâmri na mê ajarê. Apê Jejus kwÿ na ka. War akapêr kot axpên pyrâk kênâ. Anê.

⁷⁴ Hâmri nhùm tee ri mê kuma mê kâm amnhî tâ aprâr kâm hihtÿx nê mê kâm:

—Kwa nâ. Na pa Tirtûm noo mâ mê amâ amnhî jarê. Kot paj amnhî to ixêx japêr nhùm inhma nê hâ tanhmâ ixto. Nâ urâk

ixpê Garirej nhô xwýnhre hã. Ixte mēhō mŭj pumunh kêt kumrêx tã ka mē xatã xypên kôt ixte hkôt ixpa ho ixpa xwýnh ã ixkamnhîx o xa.

Anhÿrja o ra mē kãm amnhî tã aprãr o axkrunêpxi nhŭm krãhyre hkãr kurê kumrêx.

⁷⁵ Hãmri nhŭm Simãw Pêtre kuma nê ra Jejus kot hkukamã krãhyre hkãr kêt ri kot hã amnhî aprãr o axkrunêpxi hã harênh ta mã hamaxpêr kurê kumrêx. Hãmri nê kãnhmã hakry hpar o tē nê hkaprî htÿx kumrêx nê kitarē pē kato nē tē nē awry hã xa nē mÿr rax nē.

27

Mē kot pahihiti Pirat wÿr Jejus o htēm ã mē harênh

Makre 15.1; Rukre 23.1-2; Juãw 18.28-32

¹ Tã nhŭm ra myt kator o mōr mē nhŭm mē hkrãhtŭmjê mē patre krãhtŭmjaja xypên wÿr pikuprōnh pa. Hãmri nê Jejus ã xypên mar o hkrî nê xypên mã:

—Nã kot puj mē hã amÿnê kē mē kupî. Kêp Tirtŭm Kra hã kot amnhî jarênh o amnhî to hêx kēnã. Anê.

² Hãmri nê mēō pōristijê mã anê nhŭm mē hpa hpre hpa nē ma pahihiti Pirat wÿr o tē. Pirat kēp Rōm nhô pahihiti nhÿ hã mē ixpê Ijaewjê ho amnhîptãr jakamã nhŭm mē ma hwÿr o tē nê ìhkram haxã.

*Jut Kariot kot amnhî pîr ã harênh
Atre 1.15-19*

³ Rōm nhŭm Jut Kariot tee ri mē kot Jejus pîr kaxyw mē harênh ma nê hkaprî nê. Ra kot mē kãm hã ãmnênh tã mē kot hpîr kaxyw ã mē harênh ma nê tee ri amnhî kukamã hamaxpêr o hkaprî htÿx nê. Hãmri nê hamaxpêr o:

—Hêxta waa nê. Mo na pa pre ri axtem nê ã amnhî nhîpêx anê? Nã na pa pre amnhî tomnuj tÿx kumrêx. Anê.

Hãmri nê ra mē kot kãm kãxpore ho 30 nê òrta jamÿ nê ma akupÿm patre krãhtŭmjê mē Ijaew pigêtjê hwÿr o tē. Hãmri nê mē kot Tirtŭm mã amnhî jarênh xã hã ixkreja wÿr mē hwÿr axã

⁴ nê nhÿri mē omu nê mē hwÿr tē nē mē kãm:

—E ota mē akãxporeta. Na pa ã mē amã Jejus ã ixãmnênh anhÿrja o amnhî tomnuj tÿx nê. Kot tãm amnhî nhîpêx o pa htã pa axtem nê ã mē amã hã ixãmnênh anê. Jakamã e mî. Mē akupÿm akãxporeta jamÿ. Kot paj amnhîm hamÿnh kêt nê. Anê.

Hãmri nhŭm mē tee ri kuma nê kãm:

—Kokÿ. Nom ka na ka pre mē ixwÿr tē nê ho mē inhmar kēnã. Anê.

⁵⁻⁷ Hãmri nhŭm tee ri mē kuma hãmri nê pikap kãxpore rēnh pa nê ma tē nê kato.

Hãmri nê hkaprî htÿx kumrêx nê hamaxpêr o:

—Kwa tanhmã kot pa we amnhî to? Nã kot paj amnhî pî. Anê.

Hãmri nê krî pē kato nê ma mē kot pika kakwÿnh nê ho amnhîm poti nhîpêx xã hã pika hwÿr tē hãmri nê amnhî mut mã ê nê ho amnhî pî. Hãmri nhŭm patre krãhtŭmjaja harênh ma nê tee ri kot kãxpore rēnh ta kawrã nê hã axpên kukja nê axpên mã:

—Kwa tanhmã kot puj wem ja ho? Jut kot mē pamã Jejus ã ãmnênh nhŭm mē pahte hpîr xã hã kãxpore na. Jakamã kot puj mē ho Tirtŭm mã amnhî jarênh xã hã ixkre ho mex kêt nê. Finat Mojes kot ja nê mē panhîgêtjê kurê jakamã na htem mē hpar xã hã kãxpore ho ixkreta ho mex kêt nê. Jakamã kwa tanhmã kot puj mē ho? Anê.

Hãmri nhŭm ja mē kãm:

—E na pa ra ijamaxpêr. Pu mē ho Jut kot amnhî pîr xã hã pikata japrô hãmri nê kamã jar mē kēp mē pahkwÿ hkêt htyk xwÿnhjê jagjênh o papa. Anê.

Hãmri nhŭm mē kuma nhŭm ja mē kãm mex nê. Jakamã nhŭm arîgro hō hã nhŭm mē ma hwÿr mra nê haprô.

⁸ Hãmri nê hã hixi mē nhŭm kēp “mē hkamrô pikapîr xã kamã pika”. Mē kot Jejus pîr xã hã kãxpore ho haprôr jakamã nhŭm prem ã hã hixi mēnh anê. Nhŭm htem arî xypên mã ã hixi jarênh anhÿr o pa.

⁹⁻¹⁰ Nhŭm pre ra amnepêm Tirtŭm nhÿ hã kapêr o pa xwÿnh finat Jeremîsti mē hkukamã hpri hã ja jarê nê hã kagã. Nê hã kagã o:

Koja Ijaew nhô patrejaja mēhō kot mē kãm mēhō my hã ãmnênh pãnhã kãm kãxpore ho 30 nê òr xwÿnhja jamÿ. Hãmri nê ma o tē nê nhÿri mē kot amnhîm pika kakwÿnh nê ho poti nhîpêx o pa xã hã pika hkwy japrô. Ra Tirtŭm kot inhã mē harênh xã hkôt koja mē ã amnhî nhîpêx anê. Anê.

ã finat Jeremîsti kot Tirtŭm nhÿ hã mē hkukamã mē harênh nê hã kagã anhÿr xãja kôt nhŭm prem ã amnhî nhîpêx anê.

Pahihiti Pirat kot Jejus kukjêr ã harênh

Makre 15.2-5; Rukre 23.3-5; Juãw 18.33-38

¹¹ Rōm nhŭm mē pahihiti Pirat wÿr Jejus o tē nê hwÿr ho axã nê kutã ãm nhŭm xa nhŭm Piratja omu nê kãm:

—E. Kwa inhã amnhî jarê. Xã apê Ijaew nhô pahi na ka nã? Xã ka na htem amnhî wÿr ajamãr o pa? Anê.

Hãmri nhŭm kãm:

—Tÿ. Nã ãm hãmri na ka ijarê. Anê.

¹² Hãmri nhŭm mē hkrãhtŭmjê mē patre krãhtŭmjaja pahihiti Pirat mã tanhmã ho kapêr punuj to. Nhŭm amnhî tã mē kuma nom tanhmã kãm amnhî tã aprãr to hkêt nê.

¹³ Jakamâ nhùm pahĩti Pirat tee ri ja hã omu nê kãm:

—Kwa xà na ka ã mē kot ato kapēr anhÿrja mar kêt nê nà?

¹⁴ Anhÿr tâ nom nhùm Jejus akryk xa nê axte tanhmã kãm nê hkêt nê. Hãmri nhùm Pirat tee ri kot ã amnhĩ nhĩpêx anhÿr ã omu nê hamaxpēr o:

—Kokÿÿ. Mē kot ho kapēr punuj tâ nhùm ãm mē kuma nê te kãm mē uma hkêt pyrà nê tanhmã inhmã amnhĩ tâ ãprâr to hkêt nê. Anê.

Pirat kot Jejus pĩr kaxyw hã ãmnênh ã harênh

Makre 15.6-15; Rukre 23.13-26; Juãw 18.39-19.16

¹⁵⁻²¹ Tã nhùm Pirat kormã mē kot expên mar xà hã ixkre kamã ÿr rãhã nhùm hprõja hwÿr hpēr mē nê kãm:

—Xê tanhmã mē kãm Jejusja ã axãmnênh to hkêt nê. Na pa kamãt ja kamã hkôt amÿti nê tee ri hkukamã ijamaxpēr. Kot amnhĩ to mex xwÿnh na. Aa tanhmã kot amnhĩ tomnuj to hkêt jakamã xê tanhmã mē kãm hã axãmnênh to hkêt nê. Kwarĩ. Anê.

Hãmri nhùm Piratja kuma nê hamaxpēr o:

—Nã ixte Ijaew krãhtũmjê pumunh tũm. Ijaew kwÿjaja kãm Jejus kũnh nhùm mē hkrãhtũmjaja kot mē hã Jejus kamã gryk nê. Jakamã ixte tanhmã mē kãm hã ixãmnênh to kaxyw na mē ã ixwÿr o htêm anê. Anê.

Na htem Pas nhõ arĩgrota hapõx mē nhùm pre htem Ijaew o amnhĩptãr xwÿnhja mē kãm mē hãgjênh xà kamã hkrĩ xwÿnhjê ho hpÿnh nê mē hapõj. Mē kãm hprãm xà hkôt nhùm mē kãm mē hapõj nhùm mē akupÿm kapõt ã hamakêtkati nê amnhĩx pa. Jakamã nhùm ra mē hãgjênh xà kamã mēhõ my pē Parapasja hkrĩ. Na pre tanhmã amnhĩ tomnuj to nhùm mē mÿrapē unê nê haxã. Jakamã nhùm Ijaewjaja mē ho amnhĩptãr xwÿnh Pirat wÿr akuprõ nê kuhê nhùm mē kãm:

—E kot paj jarãhã mē amã mē hãgjênh xà kamã mē hkrĩ xwÿnhjê hõ mã inhũre kē ãmnhĩx kato nê ri pa. Nhÿ kot paj mē amã kãm inhũre? Xã Parapas nã? Xã mē akwÿ kot amnhĩm ho mē anhõ pahĩti Jejus pē Tĩrtũm kot mē akaxyw ãm xwÿnhhta kot paj mē amã kãm inhũre? Nhÿ wehe? E mē inhmã nhÿ jarê. Anê.

Pirat na pre mē inhõ patre krãhtũmjê pumunh mex nê. Ijaew kãm Jejus kapēr mar prãm tÿx ã nhùm mē hã kamã gryk tÿx nê hwÿr o mrrarja kôt nhùm mē omunh mex nê. Jakamã ã hã mē hkukjêr anê. Hãmri nhùm mēhpigêt mē patre krãhtũmjaja kuma hãmri nê mē pikuprõnh nê mē kuhê xwÿnhjê mã kãm:

—Kwa mē kãm anê kē mē pamã Parapas mã mãn ure nê mãmri Jejus Kris pĩ. E kwa mē tokyx kãm anê kē Parapas mã ure. Anê.

Hãmri nhùm mē mē kuma nê pahĩti Pirat mã kãm:

—Nã mē inhmã Parapas mã mãn anhũre. Anê.

²² Hãmri nhùm tee ri mē kuma nê mē kãm:

—Kwa no mē ate Jejus pē Tĩrtũm kot mē akaxyw ãm xwÿnh ã harênh xwÿnhhta? Tanhmã kot paj hipêx to? Anê.

Hãmri nhùm mē kãm:

—Apĩ ri. Tokyx pĩ kahpa hã anhõ kē ty. Anê.

²³ Hãmri nhùm tee ri mē kuma nê mē kãm:

—Tk. Kwa nã. Tanhmã kot amnhĩ tomnuj tore hã kot pa kêt ri pĩ kahpa kunhõ nhùm ty. Anê.

Hãmri nhùm mē xatã ãmra kamã kãm:

—Kwa pĩ kahpa hã mãn anhõ kē ty. Kwa tokyx ã mē inhmã hipêx anê. Anê.

²⁴ Hãmri nhùm tee ri ja nê tanhmã mē kãm kapēr to no nhùm mē mar kêt nê. Nhùm tee ri mē ãmra mar o xa. Hãmri nê kãm Jejus pĩr prãm kêt jakamã amnhĩm gõ hkwÿ janhi nê mē piitã mē noo mã amnhĩ nhĩhkra kuhõnh o xa. Mē kot hã omunh xà hkôt kãm hpĩr prãm kêt ã omunh kaxyw. Hãmri nê mē kãm:

—E na pa mē anoo mã ã amnhĩ nhĩhkra kuhõnh anê ka mē ja hã ixpumu. Nã inhmã hpĩr prãm kêt. Tanhmã kot amnhĩ tomnuj tore hã. Mē kaxipixjaja mē amã hpĩr hprãm jakamã mē kam nê tanhmã ho. No pa kot paj tanhmã ho hkêt nê. ãm kwarĩ ho kwarĩ. Anê.

²⁵ Hãmri nhùm mē kuma nê kãm:

—Tõe. Nã ãm hãmri. Kot paj mē pamjaja amnhĩ tâ htykja nhõ. Nê mē ixkra nê mē ixtãmnhwÿjê mē amnhĩ to ixpimrãatã amnhĩ tâ kunhõ. Kê Tĩrtũm kãm tanhmã hã mē ixtõ hto hprãm nê mamri tanhmã hã mē ixtõ hto. Anê.

²⁶ Hãmri nhùm mē kuma nê mē kãm hprãm xà hkôt mē kãm Jejus ã amÿnê nê mē kãm Parapas mã ure. Ra Parapas kot pahi Pirat pē õ põristi kutã amnhĩ xãm nê kēp hõxpĩrja mÿrapē nhùm mē kot unênh nê haxãr tâ Ijaew kãm hprãm xà hkôt akupÿm kãm ure. Hãmri nê õ põristijê mã anê nhùm mē Jejus tak. Nê htak rax nê hãmri nhùm Pirat mē kãm hã amÿnê nhùm mē kot pĩ kahpa hã nhõr o hpĩr kaxyw ma o tē.

Põristi kot Jejus ã hpēr o pikênh ã harênh
Makre 15.16-20; Juãw 19.2-3

²⁷ Tã nhùm põristijaja mē kot pĩ kahpa hã Jejus nhõr kaxyw ma o tē nê pahĩti Pirat nhõrkwÿ kamã ixkre hõ hwÿr ho axã. Nhùm põristi ohtõ nê hwÿr akuprõ nê hã pēr o pikênh kaxyw expên mã:

—E kwa tokyx pu mē kãm pahi xê jaxã ri. Kēp pahi hã kot amnhĩ jarênh kēnã. Anê.

²⁸ Hāmri nê kêp ê kapa nê hpānhā kêp pahi hā mē ê kamrêk mexja py nê kām haxà.

²⁹ Nê kām pahi hā mē ahkà nhîpêx nê hkrām haxà. Nom axtem akunî kamā mēmo mrô nhî te kot ronh kanêre pyrāk xwýnhja nhùm mē hikāx nê hkrām haxà. Nê kām pahi hā kô gô nhùm kupy nê o xa. Hāmri nhùm mē ho anhÿr pa nê kutā hkôn krā ho rôrôk nê hkrî hpa nê hā pēr o pikênh kamā kām:

—E âm hāmri. Apê Ijaew nhô pahi punuti na ka. Anê.

³⁰ Hāmri nê kânhmā kuhê nê hkuk kuhtô nê kêp kô pytā nê xatā ho hkrāx pê htak. Nhùm prem ā pēr o pikênh kām hipêx anê.

³¹ Hāmri nê kêp pahi hā ê kapa nê akupÿm kām ê jaxà nê mē kot pî kahpa hā nhôr kaxyw ho kato nê ma o tē.

Pôristi kot pî kahpa hā Jejus nhôr ā harênh Makre 15.22-32; Rukre 23.27-43; Juāw 19.17-25

³² Nhùm pôristijaja Jejus o kato nê ma kapôt mā o tē. Nê kām pî kahpa pytîja gô nhùm kumÿ nê mē hkôt o hkwy. Nom ra hirot tÿx nê nhùm mē tee ri ja hā omu nê mēhō kot ho ajuta kaxyw mē kot omunh xwýnhjê kapi ho xa. Hāmri nê Sirên nhô xwýnh Simāw kâ htyk pumu nê unê nê kām kot Jejus o ajuta kaxyw hā karô nhùm hwÿr tē nê kêp pî kahpata mÿ nê hkôt kām kumÿ nê o tē.

³³ Hāmri nhùm mē kên nhîxêt te kot mē hkrā hi pyrāk xwýnhhta wÿr mē o pôj. Mē kapêr kām na prem hixêtja jarênh o: “Korkot.” No mē pakapêr kām Korkot jarênhja kêp “mê hkrā hi xà” nhùm mē ma hwÿr Jejus o pôj.

³⁴ Hāmri nê mē kot pî kahpa hā nhôr kaxyw nhùm ā htÿx kumrêx kamā hamak pymaj kām mēmo mē hkanexàja gô. Wîhti mē mēmo mry ma xà ho pihkār nhùm mē kām hkwy gô. Nom nhùm hkaki nê mē kot amnhî xà htÿx kamā hamak kêt xà hā omunh kurê kumrêx nê hkaga. Nhùm mē tee ri ja hā omu hāmri nê kêp ê kapa nê kumê nê pî kahpa hā kuxi nê prek o ihkra nê hpar o htÿx pa. Hāmri nê kânhmā pî jari nê ahkre kamā âm nê ho htÿx nhùm kÿxpê ajêt.

³⁵ Hāmri nhùm pôristi hkwyjaja axpên mā ê hkwy ho pigrānh kaxyw hā kênre ho jôka.

³⁶ Hāmri nê ho anhÿr pa nê pikap Jejus jamār o hkrî.

³⁷ Na htem mē hpar kaxyw nê tanhmā mē kot amnhî tomnuj to hā kagā nê mē mÿri pî kahpa hā hanhō. Jakamā na prem taptî hō py nê tanhmā Jejus ā kagā hto nê hā kagā ho:

IJA EW NHÔ PAHI NA JA

HIXI PÊ JEJUS

Hāmri nê hwÿr ho api nê mÿri kunhō. Ā Jejus kot amnhî jarênh anhÿrja mÿrapê na prem kupî.

³⁸ Hāmri nhùm mē hpānhā wa àhkînh xwýnh wa ho axkrut nê määnên pî kahpa hā wa kunhō. Nê akutā ho Jejus nhîjê nhùm war ajêt.

³⁹ Tā nhùm pry hā mē mrrar xwýnhjaja Jejus pumu nê hā hpêr o pikênh o mra nê kām:

⁴⁰ —Kwa ka na ka pre ate Tirtûm mā amnhî jarênh xà hā ixkre grānh par nê atā apkati axkrunêpxi nê akupÿm hipêx par ā amnhî jarê. Nê apê Tirtûm Kra hā amnhî jarê. Nê axâhpumunh o axâhpumunh jakamā e kwa amnhî kapa nê wrÿ pa mē ja hā apumu. Kwa tokyx. Anê.

⁴¹ Nê patre krâhtûmjê mē Tirtûm kapêr tûm o mē ahkre o mē pa xwýnh mē mē hkrâhtûmjaja piitā hwÿr mra nê hā hpêr o axkê.

⁴² Nê axpên mā harênh o:

—E jahti na xep pre mē kamā ukapri ho pa nê tanhmā mē ho ajuta hto ho pa. Tā nom tām tanhmā amnhî to nê wrÿk kêt nê. Kwa pu mē arî pakuhê nê kot amnhî kaxā nê wrÿk kām omu. Koja wrÿ pu mē omu nê kêp mē panhō pahihiti hā hkôt pajamaxpêr kurê kumrêx. E tokyx wrÿ Jejus. Pa mē awrÿk kām apumu. Na kot kaj awrÿk rax nê.

⁴³ Na hte amnhî kaxyw Tirtûm mā hamaxpêr o pa. Nê kêp Kra hā amnhî jarênh o pa. Jakamā e. Kê Tirtûm tām hwÿr tē nê kêp Kra hā akupÿm mē pahpê utā. Anê.

⁴⁴ Hāmri nhùm wa kot akutā hijê nê jêt xwýnhhta wa haxwÿja mē mar xà hkôt mā ho kapêr anê.

Jejus tyk ā harênh

Makre 15.33-41; Rukre 23.44-49; Juāw 19.28-30; määnên Eprêw 10.19-20

⁴⁵ Tā nhùm kaxkwa nhîpôk ri myt ÿr mē nhùm te kamât pyrāk nhùm kamât kô rax kumrêx. Jao hā awry mē nhùm ra akupÿm myt katêr o mô.

⁴⁶ Hāmri nhùm Jejus kapêr kām hihtÿx nê âmra htÿx kām Tirtûm mā kapêr nê kām:

—Inhō Tirtûm inhō Tirtûm. Kwa mon ka ixkaga? Anê.

Nom kapêr kamā kām kapêr o:

—Eri Eri. Rāmā sapatani. Anê.

⁴⁷ Hāmri nhùm mē kot mar xwýnhjaja kot Eri jarênh ā kuma nê htÿx ho finat Eris mā kapêr ā hkamnhîx.

⁴⁸ Nhùm Jejus par pê guhkrax kām wîhti punure xa. Jakamā nhùm mē ā kapêr anhÿr ā kuma nhùm mēhō kām hkapri nê. Hāmri nê mēmo rerek py nê o tē nê kaxyw pî rytîja py nê ho hkanhwÿ. Nê akupÿn o tē nê ho wîhti nhek nê Jejus kot hkaôr kaxyw kām kupê.

⁴⁹ Hāmri nhùm hkwyjaja tee ri ja hā omu nê nê kām kapêr nê kām:

—Tk. Kwa nhām xa. Pu mē kop Eris jamā mân. Koja hwÿr tē nê ho wrÿk japêr. Anê.

⁵⁰ Hāmri nhūm kamāt kô mē nhūm Jejus ra htyk kaxyw nē axte àmra htýx nē hāmri nē ty.

⁵¹ Tykja kôt nhūm Tirtūm mā amnhī jarēnh xà hā ixkre kamā hakwakre hā kupêxêja kýj rūm ahpar mā axkjê nē amnhī kahê xà mēnh kurê kumrêx. Utī rax tà axkjê nē amnhī kahê xà mē. Te Jejus htyk o te kot mē pahte hkôt amnhī xunhwýr xwýnhjê mā Tirtūm wýr pry jakwa kre kahê xà mēnh pyrāk o ā amnhī nhīpêx anê. Nhūm pika httertet týx kumrêx o kēn rūnh kwý ohtô nē hkrakrak pa.

⁵² Hāmri nhūm mē htyk ā pika kamā mē htykjê nhōrkwý ho ohtô nē mē hā axkjê nhūm mē hikwý xwýnhjaja akupým htír nē hapôj nē kuhê. Na prem kormā htyk kêt ri amnhī kaxyw Tirtūm kôt hamaxpêr. Tā nhūm Jejus ty nhūm mē ohtô nē akupým htír nē hapôj nē kuhê.

⁵³ Nom kormā nhýhým mrar kêt nē. Arī mē hā pika nhīpy Jejus akupým htír ā hamār o kuhê. Tā nhūm Jejus apkati hō hā akupým htír ā arīgrotā ā nhūm mē ri kormā ma Jeru-jarê hwýr mra nē hwýr agjê nhūm mē ohtô nē akupým mē htír ā mē omu.

⁵⁴ Nhūm kormā Jejus htyk o mōrta ā nhūm pôristi krāhtūm mē pôristi hkwyjaja hāmri hparpê hamār o kuhê nē htyk kām omu. Nē pika httertet kamā ama nē mēmoj kot tanhmā amnhī nhīpêx toja pumu nē tee ri hamaxpêr nē kām ma htýx kumrêx. Hāmri nē axpên mā:

—Héxta waa nē. Pêr ām hāmri na pre htyk xwýnhhta amnhī jarê. Kêp Tirtūm Kra kēnā. Tā pu mē amari pah týx kupi. Anê.

⁵⁵⁻⁵⁶ Nhūm pre mēnijaja ohtô nē amým Jejus tyk kām omunh o kuhê. Marir Matarēn nē Xiakre mē Juje wa katorxā Marir nē Xiakre hō mē Juāw wa katorxāja nhūm mē kormā htyk kām omunh o kuhê. Na prem Garirej rūm hkôt tanhmā ho ajuta hto ho hkôt Jerujarê wýr mō.

Mē kot Jejus jaxàr ā harēnh

Makre 15.42-47; Rukre 23.50-56; Juāw 19.38-42

⁵⁷ Tā nhūm ra myt grire nhūm krī pê Ari-matej rūm hikāxpore rax xwýnhjê pê Jujeja tē. Nom axtem Juje hō na pre. Ra kot Jejus kôt amnhī xām jakamā kām ho wrýk nē haxàr prām nē.

⁵⁸ Hāmri nē ma pahi Pirat wýr tē nē ī hā kuwý nē kām:

—E ot pa awýr tē. Kwa inhmā htyk xwýnhhta gō pa ma o tē nē haxà nà? Anê.

Hāmri nhūm kuma nē kām harê nhūm ma o tē nē haxà.

⁵⁹ Kaxyw kupêxê mex ô py nē ho hkupu pa

⁶⁰ nē ma o tē nē ô kēn kre kamā haxà. Na pre htyk kukamā kēn kre kakwý nhūm mē kot kormā kamā mēhō jaxàr kêt tā kamā na

pre Jejus jaxà. Hāmri nē hā kēn rax ô xām nē ho hitom nē ma akupým tē.

⁶¹ Nhūm Marir Matarēn mē Marir ôja wa kēn kreta kapem omunh o wa nhý.

Pôristi kot kēn kre jamār o kuhê ā harēnh

⁶² Tā nhūm apkati nhūm mē inhō arīgromnu pê sap kato. Hāmri nhūm Parijew nhō xwýnhjê mē patre krāhtūmjaja ma pahi Pirat wýr mra nē kām:

⁶³ —Kwa pahihti. Nā amnhī to hêx o pa xwýnhhta na pre kormā htír nē pa ri tanhmā amnhī jarēnh to ho pa. Nē nhýrmā ty nē htyk ā apkati axkrunêpxi pix nē akupým htír ā amnhī jarê.

⁶⁴ Jakamā kwa hwýr anhō pôristi hkwyjê kē mē ma hwýr mra nē hamār mex o apkati axkrunêpxi. Kot ka anhýr kêt nhūm hkôt mē pa ho mē pa xwýnhjaja ma hwýr mra nē ho ahkī nē ma o mra nē nhýri haxà nē mē piitā mē kām ra akupým htír ā harēnh o hêx o pa. Te tām kot amnhī kukamā amnhī jarēnh pyrāk. Nom mē kot axte ā harēnh anhýrja koja omnuj týx o tām kot ā amnhī jarēnh anhýrja jakre. Anê.

⁶⁵ Hāmri nhūm mē kuma nē mē kām:

—Tôe. Nā koja mē ho anê. E mē ma hwýr amnhī kôt pôristi hkwyjê ho mra kē mē hakwakre kahê xà jamār mex o kuhê. Anê.

⁶⁶ Hāmri nhūm mē kuma nē ma hwýr mra nē hakwakre hā kēn raxta o htýx pa. Nē mēhō kot omunh nē kahê mēnh pymaj menh é ho hkukō. Hāmri nē ho anhýr pa nē pôristi mā kām:

—E Kêr ka mē jar kuri hamār mex o akuhê. Kê mēhō tē nē tanhmā ho hkêt nē. Anê.

28

Jejus akupým htír ā harēnh

Makre 16.1-8; Rukre 24.1-12; Juāw 20.1-10

¹ Tā nhūm apkati nhūm tōmīk. Hāmri nhūm Marir Matarēn mē Marir ôja kwýhtā kànhamā nhý nē ma akupým kēn kreta wýr wa tē.

² Puh nhūm pika httertet týx nē nhūm Tirtūm kapêr o mē wrýk xwýnhja kēn kre wýr wrý nē nhām hakwakre nē kēn raxta mē nē hā nhý.

³ Hirā htýx kām nhý. Te na jaxēnh pyrāk. Nē é hā hta xtyk kumrêx.

⁴ Nhūm pôristijaja tee ri omu nē kām ma htýx nē httertet nē umaj pikap rôrōk pa nē te htyk pyrā nē hikwý.

⁵ Hāmri nhūm wa nita kēn kre hwýr pôj nē tee ri Tirtūm kapêr o mē wrýk xwýnhhta pumu. Nhūm wa kām:

—Kwa wa amā ma hkêt nē. War ate Jejus pumunh kaxyw na ka wa tē. Mē kot pī kahpa hā nhōr xwýnhhta.

⁶ Nom jar amrakati. Na ra akupÿm htÿr nê kato nê ma tê. E wa kam nê amnê axâ nê nôr xâ kaprÿ pumu. Anê.

Hâmri nhÿm wa kuma nê tee ri kên kre kamâ Jejus japêr nhÿm kamâ amrakati.

⁷ Hâmri nhÿm Tÿrtÿm kapêr o wrÿk xwÿnh wa kâm:

—E wa tokyx ma akupÿm tê nê hkôt mê pa ho mê pa xwÿnhjê mâ harê. Koja ma Jejus mê akukamâ akupÿm Garirej wÿr mō. Garirej kamâ kot kaj mê axte axpên pumu. Ra kot mê amâ amnhÿ jarênh xâ hkôt. E kwa wa tokyx ma akupÿm mê hwÿr tê. Anê.

⁸ Hâmri nhÿm wa kuma nê ma akupÿm hprôt nê htêm kurê kumrêx. Kâm ma htâ hkÿnh nê. Nê ma Jejus kôt mê pa ho mê pa xwÿnhjê mâ ujarênh kaxyw ma mê hwÿr hprôt nê wa tê.

⁹ Pu nhÿm ra Jejus tãm wa kutâ tê nê wa hkaxpa. Hâmri nê wa haêr pê wa kâm kapêr nê wa kâm:

—Pa? Nhÿhÿm na ka wa tê? Anê.

Hâmri nhÿm wa omu nê hkÿnh tÿx kumrêx nê hwÿr hprôt nê hpar pê hkôn krâ ho têm nê akutâ hpar â kumÿ nê kâm mex o mex â harê nê kâm:

—Hêxta gâa nê. Ma amex kumrêx. Amex o amex. Anê.

¹⁰ Hâmri nhÿm wa kâm:

—E war amâ ma hkêt nê. Mamrÿ ma tê nê ixkôt mê pa ho mê pa xwÿnhjê mâ ijarê kê mê ma Garirej wÿr mra. Kamâ kot paj mê axte axpên pumu. Anê.

Pôristi kot kâxpore hprâm xaj Jejus o hêx â harênh

¹¹ Rôm nhÿm pôristi hkwyjaja akupÿm tãm hkrâ hâmri nê ma kên kreta rÿm akupÿm krÿm mra. Hâmri nê patre krâhtÿmjê hwÿr mra nê mê kâm ujarênh pa.

¹² Hâmri nhÿm mê tee ri mê kuma nê mêhpigêtjê ho akuprô nê mê hâ axpên mar o hkrÿ. Hâmri nê axpên mar pa nê pôristi mâ amnhÿrer rax nê mê kâm:

¹³ —E mê amnhÿm kâxpore jamÿ nê ma ri â mê kâm amnhÿ jarênh anhÿr o apa. Nom kêr ka mê kâm amnhÿ to axêx nê mê kâm: “Na pa prem kên kre kapem ixtÿx gôr nê inhÿkwÿ nhÿm Jejus kôt mê pa ho mê pa xwÿnhjaja mra nê mê ixpê ï ho ahkÿ nê ma o mra.” Anhÿr o mê kâm amnhÿ to axêx o apa. Mê ixte kâxpore ho mê amâ amnhÿrerta pânâ.

¹⁴ Koja pahiti Piratja mê anhôt â mê ajarênh ma nê hâ tanhmâ mê ato kaxyw hâ kot paj mê axy pê tanhmâ kâm ixkapêr to nhÿm tanhmâ mê ato hkêt nê. Jakamâ e. Mê tee ri amnhÿ kukamâ ajamaxpêr kêt nê. Mê māmri ma mra nê â mê kâm axujarênh anhÿr o ri apa. Anê.

¹⁵ Hâmri nhÿm mê kuma nê mê kot amnhÿ to hêxta pânâ kâxpore jamÿ nê ma mê mar xâ hkôt mê piitâ mê kâm Jejus kôt mê pa

xwÿnhjê ho hêx o pa. Tâ na htem arÿ jarâhâ Ijaewjaja â axpên mâ mê harênh anhÿr râhâ ho pa.

Jejus kot hkôt mê pa ho mê pa xwÿnhjê mâ mê âpênh â karô

Makre 16.14-18; Rukre 24.36-49; Juâw 20.19-23; Atre 1.6-8

¹⁶ Tâ pa mê ixte Jejus kôt ixpa ho ixpa xwÿnh pê 11jaja hâmri akupÿm Jejus htÿr â harênh ma hâmri nê ma Garirej wÿr mra. Nhÿri Jejus kot mê inhmâ mêmo hixêt prêk jarênhja wÿr.

¹⁷ Nê ra hwÿr ixpôx o mrrar mê Jejus pumu. Tâ nom nhÿm mê ixkwÿjaja tee ri omu nê htÿx ho nhâm mêhō hâ hkamnhÿx. No kêt mê pajaja na pa prem ixprÿ hâ omunh kurê kumrêx nê ixkÿnh tÿx nê. Nê ixkÿnh nê hwÿr ixprôt nê kâm:

—Pa Jejus? Hêxta waa nê. Amex o amex. Anê.

¹⁸ Hâmri nhÿm mê inhmâ:

—E na pre Tÿrtÿm â inhmâ kapêr anê nê inhmâ: “E kêr ka amnhÿ nhÿ hâ mêmoj piitâ tanhmâ ho ho apa. Kaxkwa kamâ nê pika kamâ. Mamrÿ nhÿhÿm amnhÿ krâ hkôt amâ tanhmâ amnhÿ to hprâm xâ hkôt tanhmâ amnhÿ nhÿpêx to ho ri apa.” Anê. Na pre mê akaxyw â inhmâ kapêr anê.

¹⁹ —Jakamâ e. Kêr ka mê ma pika piitâ hkôt ri mê kâm ijarênh o ri apa. Kê mê ixte mê nê tanhmâ amnhÿ nhÿpêx to hâ ijarênh ma hâmri nê ixkôt amnhÿ xunhwÿ nê ixkôt ri amnhÿ nhÿpêx o pa. Nê kêr ka mê ja hâ mê omu nê Tÿrtÿm mê wa inhmâ mê hkrâ kumrâ. Wa ixkarô nhÿ hâ mê hkrâ kumrâ. Mê kot wa inhÿ hâ pix mâ tanhmâ amnhÿ nhÿpêx to ho pa kaxyw.

²⁰ —Nê mê kâm anê kê mê ixkapêr piitâ hkôt amnhÿ nhÿpêx râhâ ho pa. E kêr ka mê ma mê kâm â ijarênh anhÿr o ri mê hkôt apa. Kot paj mê anhÿkô hâ ri ixpa râhâ nhÿm nhÿrmâ pikaja hapêx o hapêx. Anê.

Na pre â Jejus mê inhmâ mê ixâpênh â karô anê.

Matêwre kot Jejus jarênh nê hâ kagâja ja kôt na hapêx.

Makre

Makre kot tanhmã Jesus kot amnhĩ nhĩpêx to ho pa hã kagã

Juãw Makre na pre kagãja nhĩpêx. Na pre hte ma hkwyjê hkôt mê kãm Jesus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tirtũm kapêr o ahkre nhũm kuma nê mar tỳx nê. Hãmri nê mê pamã tanhmã Jesus ã kagã hto. Simãw Pêtre xô ri tanhmã kot amnhĩ nhĩpêx to hã kagã. Jesus kêp Tirtũm Kra hã hihtỳx o hihtỳx nê ãhpumunh o ãhpumunh ã nhũm pre harê nê hã kagã. Nê kêp mê pakutã nojarêt xwỳnh ã harê nê hã kagã. ã Juãw Makreja mê pamã Jesus jarê nê hã kagã anê.

Matêwre 3.1-10; Rukre 3.1-9; Juãw 1.6-8, 1.19-23

¹ Pa Kris kôt ixkrãmnhwỳja. E kot paj mê amã tanhmã Jesus kot amnhĩ nhĩpêx to ho pa hã kagã ka mê kamã harê nê ama. Kêp Tirtũm Kra na. Tãm na pre mê pakaxyw ãm nê mê pahwỳr kumê. Tã tãm kot mê pahwỳr wrỳk nê tanhmã amnhĩ nhĩpêx to ho paja kot paj mê amã ixprĩ hã harê nê hã kagã ka mê kamã harê nê ama.

Juãw Paxis kot Jesus kukamã harênh

² Kormã Jesus mê pahwỳr wrỳk xwỳj ri na pre Tirtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagã. Nê Jesus kukamã harênh o mõr xwỳnh Juãw Paxisja nhũm pre mããnên hkukamã tanhmã harênh to nê hã kagã. Te Tirtũm tãm hamaxpêr pyrãk o harê nê harênh o:

E kot paj Ixkra hkukamã ma mê hwỳr kot harênh xwỳnhjê hõmê kê ma kutêp mê kãm harênh o ri pa. Kê mê kuma nê kutêp tãm amnhĩ nhĩpêx mex o pa.

³ Koja kukamã harênh xwỳnhja ma kapôt ã ri hwỳr mê mrar xwỳnhjê mã harênh o ri pa. Nê kỳx pê mê kãm kapêr nê mê kãm: “E mê inhma. Kojã Tirtũm tokyx mê pahwỳr mê panhõ Pahihti mê nhũm wrỳ pu mê pahpiitã omu. Jakamã kwa mê tokyx kutêp tãm amnhĩ nhĩpêx. Te ho mê kot mêhõ kutêp pry ho mex pyrãk o amnhĩ nhĩpêx. Nom pry kumrêx o mex kêt nê. ãm amnhĩ nhĩ ho tãm amnhĩ nhĩpêx nê tãm axpên nhĩpêx. Pahihti kutêp. Mê pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mê tee ri kot kãm hã mrar mex prãm kaprỳ pyrãk. Jakamã kot kaj mê Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mê kot pry nhĩnur o mex nê ho katãt nhũm ra katãt mux nê nõr pyrãk

o amnhĩ nhĩpêx. E kwa kêr ka mê ã kutêp amnhĩ nhĩpêx anê.” Anhỳr o koja mê kãm harênh o pa. Anê.

Na pre ã Tirtũm Juãw Paxis kukamã harênh anê nhũm ý hã kapêr xwỳnh pê Ijaisja mê pamã hã kagã.

⁴ Tã ra kot harênh xã hkôt nhũm Juãw Paxisja tẽ. Hãmri nê kapôt ã ri mê kãm Tirtũm kapêr jarênh o pa nê mê kãm:

–Kwa mê tokyx amnhĩ tomnuj kaga nê tãm ri amnhĩ nhĩpêx. Kê Tirtũm ja hã mê apumu nê mê anê mê ate amnhĩ tomnuj rênh pa nê mê ato hkra. Pa mê piitã mê kot ra mê apê hkra hã mê apumunh kaxyw mê akrã kumrã. Anê.

⁵ Hãmri nhũm mê ohtõ nê kot kapêr mar kaxyw ma nhỹhỳnh hwỳr kapôt mã mra. Pyka pê Jutej rũm nê Jutej kamã krĩ pê Jeru-jarê rũm nhũm mê ohtõ nê hwỳr mra. Hãmri nê nhỹri omu nê kãm:

–E ixte amnhĩ tomnuj kaga hprãm xaj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhã amnhĩ tomnuj kaga nê tãm amnhĩ nhĩpêx prãm nê.

Anhỳr ã amnhĩ jarê. Hãmri nhũm Tirtũmja kaxkwa kamã hkrĩ htã mê kuma nê amnhĩ katut kôt mê kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gõx kãm mê hkrã kumrã. Pyhti pê Jotãw kamã.

⁶ Juãw Paxisja hikãxpore hkêt jakamã na pre ê mex kêt nê pa. ãm mêmõ mry pê kamer ki ho amnhĩ ã nhĩpêx nê hagjê nê hã pa. Nê mêmõ mry hkã ho amnhĩ pre nê ri pa. Nê mêmõ mex kur kêt nê ãm krit ku nê menh õr o ri pa.

⁷ Hãmri nê mê kãm tanhmã Jesus jarênh to ho pa nê mê kãm:

–E mê inhma. Kojã tokyx Tirtũm kot mê pakaxyw ãm xwỳnhhta mê pahwỳr wrỳ. Ahpumunh tỳx o kot ijakrenh jakamã na pa hte ãm kukwak ri ixpa nê amnhĩ tã hã ixpijaãm rãhã ho ri ixpa. Te ixkrãm ã ixpijaãm o amnhĩ nhĩpêx pyrãk.

⁸ Na pa hte gõ pix o Tirtũm mã mê akrã kumrãr o ri ixpa. Nom mê pahwỳr wrỳk mã xwỳnhja koja mê awỳr Tirtũm Karõ rê nhũm mê akaxwỳnh mã agjê. Ka mê ý hã tãm ri amnhĩ nhĩpêx rãhã ho ri apa. Anê.

Juãw Paxis kot Jesus krã kumrãr ã harênh Matêwre 3.13-17; Rukre 3.21-22; Juãw 1.32-34

⁹ Tã nhũm Jesusja tãm Juãw Paxis wỳr tẽ. Garirej kamã krĩ pê Najare rũm ma hwỳr tẽn pøj. Hãmri nhũm Juãwja hkrã hkumrã. Pyhti pê Jotãw kamã hkrã kumrã.

¹⁰ Hãmri nê wa gõj rũm api nê mỳr ri kaxkwa pumunh o xa. Nhũm kaxkwa axkjê nhũm kurũm Tirtũm Karõ te tuuti pyrã nê

Jejus wÿr wrÿk o tē nē ĩkre hā xa nhũm amnhĩ tã omunh o xa.

¹¹ Hāmri nhũm Tirtũm kaxkwa rūm kām kapēr nē kām:

E apē Ixkra mex na ka. Ām hāmri na ka hte ixkanrēhā amnhĩ nhĩpēx mex o apa. Inhmā ajapē kamā na ka ri apa ho apa. Anē.

Jejus kot Satanasti kaga hā harēnh

Matēwre 4.1-11; Rukre 4.1-13; mǎānēn Eprēw 2.18, 4.15

¹² Tā nhũm Tirtũm Karōja ma kapōt mā Jejus o mō

¹³ nhũm kapōt ā mry xoprē kaēx ā ri mrar o hā arĭgro pē 40. Hāmri nhũm Satanasti omu nē ma hwÿr tē nē ri hkōt pa. Kapōt ā ri hkōt hēx rom tanhmā kām kapēr to nhũm kot mar nē hkōt amnhĩ xām prām xāj ma hkōt pa. Nom nhũm Jejus hkaga kumrēx nhũm tee ri ho anhÿr kaprÿ nē ma akupÿm tē. Hāmri nhũm Tirtũm kapēr o mē wrÿk xwÿnhjaja Jejus wÿr wrÿ nē tanhmā ho mex to.

Jejus kot Tirtũm mā àpēnh krax ā harēnh

Matēwre 4.12-17; Rukre 4.14-15

¹⁴ Nhũm pre ra mē ixpē Ijaew o amnhĩptār xwÿnh pē Eroxa Juāw Paxis kot mēmojt tā kām àkĵēr mÿrapē nhũm pre ra unē nē haxā. Tā kot haxār jakānh pē nhũm Jejus ma akupÿm pyka pē Garirej wÿr mō nē kamā mē kām Tirtũm kapēr jarēnh o pa. Nē Tirtũm kot mē hwÿr mēnh ā amnhĩ jarēnh o pa. Nom te nhām mēhō jarēnh pyrāk o amnhĩ jarē

¹⁵ nē mē kām:

–E na Tirtũm kām mē ato hkra hprām nē. Jakamā na ra kot mē awÿr ām xwÿnhnta mē nhũm mē awÿr wrÿ. Kwa mē tokyx kapērja ma nē amnhĩ kaxyw hkōt ajamaxpēr. Hāmri nē ate amnhĩ tomnuj kaga nē Tirtũm kōt mǎn amnhĩ nhĩpēx o ri apa. Kot kaj mē ā amnhĩ nhĩpēx anē nhũm Tirtũm amnhĩ tā mē apumu nē mē ato hkra. Anē.

Jejus kot amnhĩ kōt tep pynēnh xwÿnh wa hwÿr ā harēnh

Matēwre 4.18-22; Rukre 5.1-11

¹⁶ Tā nhũm Jejus ma Garirej kamā gō rax pē Garirej mÿri mō. Hāmri nē Simāw mē htō Andreja wa hwÿr kato nē wa omu. Wa kot tep pynēnh xwÿnh jakamā na pre wa gōx kām kryhti rēnh o xa nhũm Jejus wa hānh tē nē wa omu.

¹⁷ Hāmri nē amnhĩ kōt wa kuwÿ nē wa kām:

–E war amnē ixkōt tē nē ixkōt mǎn apa. War apē tep kanhēr rax o ri apa xwÿnh tā kēr ka war axāpēnhnta kaga nē hpānhā ixkōt apa ho apa. Kot paj tanhmā war akrā hto ka wa tep pynēnh pānhā ma ri mē hkōt mē kām ixkapēr jarēnh o ri apa. Mē ohtō nē mē

kot war amar nē Tirtũm kōt amnhĩ xunhwÿr kaxyw. Jao kot kaj te war ate tep kanhēr rax nē Tirtũm mā ōr pyrāk o amnhĩ nhĩpēx.

Anhÿr o wa kām kapēr.

¹⁸ Hāmri nhũm wa kuma nē kryhti kaga nē ma hkōt pa ho pa kurē kumrēx.

¹⁹ Hāmri nē mē gō mÿri mō nē Jepetew kra Xiakre mē htō Juāw wa hwÿr kato nē wa omu. Nhũm wa kormā hipēēxā nhĩhkō hā pār kām kryhti ho mex o wa nhÿ nhũm Jejus wa mē hwÿr kato nē wa omu nē amnhĩ kōt wa kuwÿ.

²⁰ Hāmri nhũm wa kuma nē ma hkōt pa ho pa. Pār kre kamā mē kām àpēnh xwÿnhjē ri hipēēxā re nē ma Jejus kōt pa ho pa.

Jejus kot mēhō nē mēkarōmnuti janor ā harēnh

Rukre 4.31-37

²¹ Hāmri nhũm Jejus mē hkōt mē pa ho mē pa xwÿnhjaja ma krĭ pē Kapanau hwÿr mō hāmri nē hwÿr pōj. Hāmri nhũm mē ixpē Ijaewjē nhō arĭgromu pē sap kato nhũm Jejus ma Tirtũm kapēr o mē ahkre xā hā ixkre hwÿr tē nē hwÿr axā. Hāmri nē kamā mē kot Tirtũm kapēr mar kaxyw axpēn wÿr mē pikuprōnh xwÿnhjē jahkre ho nhÿ.

²² Nē mē ahkre mex nhũm mē kuma nē tee ri hamaxpēr nē axpēn mā:

–Hēxta waa nē. Pēr ām hāmri na ā mē pamā mēmoj jarēnh anē. Tirtũm kapēr tũm o mē ahkre xwÿnhjē rom àhpumunh tÿx kōt na hprĭ hā mē pajahkre mex nē. Anē.

²³ Hāmri nhũm mēhō myja mē hwÿr axā. Na pre ra mēkarōmnuti hwÿr axā nhũm ŷ hā amnhĩ tomnuj o pa. Hāmri nē mē hwÿr axā nē Jejus pumu nē kām kapēr. Nom tām kapēr kēt nē. Mēkarōmnuti nhÿ hā kām kapēr. Kāx pē kām kapēr nē kām:

²⁴ –Pa Jejus? Kwa tanhmā mē ixto hkēt nē. Ixte apumunh mex. Apē Najare nhō xwÿnh tā mǎānēn apē Tirtũm kot mē ixwÿr amēnh xwÿnh maati na ka. Tirtũm rūm na ka pre mē ixwÿr wrÿ. Kwa xā kot kaj mē ixto ajapēx nā? Anē.

²⁵ Hāmri nhũm kām:

–Tk. Kwa anhĭkrē nē myta kurũm akator kurē kumrēx. Anē.

²⁶ Hāmri nhũm kuma nē àmra htÿx kām myja o àk tÿx nē kēp kato nē ma tē nhũm akupÿm mex.

²⁷ Hāmri nhũm mē piitā omu nē kamā no pyma nē. Hāmri nē xatā axpēn mā harēnh o pa nē axpēn mā:

–Kokÿÿ. Jejus na pre àhpumunh tÿx kōt mēkarōmnuti jano nhũm kuma nē mē kurũm hapōx kurē kumrēx. Anē.

²⁸ Hāmri nhũm Garirej kamā mē piitā ri axpēn mā harēnh o pa.

Jejus kot akupÿm Simāw xupānhgēx o mex ā harēnh

Matēwre 8.14-15; Rukre 4.38-39

²⁹ Tã nhũm Jejus Xiakre mẽ Juãw mẽrohã Tĩrtũm kapẽr o mẽ ahkre xã hã ixkre rũm kato nẽ ma Simãw mẽ Andre wa òrkwỹ hwỹr mō.

³⁰ Hãmri nẽ mẽ hwỹr agjẽ. Nhũm Simãw xupãnhgẽxja ra à nẽ hkã kagro htỹx nẽ nõ nhũm Jejus mẽ hwỹr axã nhũm mẽ kãm harẽ.

³¹ Hãmri nhũm mẽ kuma nẽ hwỹr axã nẽ omu nẽ hpa hã kupy nẽ kãnhmã ỹr nhũm hkã hakry nẽ akupỹm mex kurẽ kumrẽx. Hãmri nẽ kãnhmã xa nẽ tẽ nẽ mẽ kãm mẽmoj nhĩpẽx nhũm mẽ hkur o hkrĩ.

Jejus kot akupỹm mẽ hkwyjẽ ho mex ã harẽnh

Matẽwre 8.16-17; Rukre 4.40-41

³²⁻³³ Tã nhũm myt axã nhũm mẽ ohtõ nẽ Simãw mẽ Andre wa òrkwỹ hwỹr mra nẽ hakwakrem Jejus ã akuprõ. Nẽ amnhĩ kõt mẽ ã xwỹnhjẽ ho mra. Nẽ mẽkarõmnuti kot mẽ hwỹr gjẽx xwỹnhjaja nhũm mẽ hwỹr mẽ o mra.

³⁴ Hãmri nhũm Jejus mẽ omu nẽ akupỹm ahpỹnhã mẽ piitã mẽ ho mex pa. Nẽ mẽkarõmnutija nhũm mẽ kurũm mẽ hapõj. Mẽkarõmnuti kot kẽp Tĩrtũm Kra hã omunh tã no nhũm kapẽr nẽ mẽ hkurẽ nẽ mẽ hano nhũm mẽ kapẽr kêt rãhã mẽ kurũm hapõj nẽ ma mra.

Jejus kot Tĩrtũm mã amnhĩ jarẽnh ã harẽnh

Rukre 4.42-44

³⁵ Tã nhũm apkati nhũm kormã myt kator kêt ri nhũm Jejus kãnhmã nhỹ nẽ tẽ nẽ kato. Hãmri nẽ ma kapõt ã ahte nhỹhỹm tẽ nẽ nhỹri Tĩrtũm mã amnhĩ jarẽnh o nhỹ.

³⁶ Hãmri nhũm Simãw Pẽtre mẽ hkwyjaja hkrã hapõj nẽ tee ri ixkre kamã hapẽr. Hãmri nẽ hapõj nẽ ma hpry jakop o mō.

³⁷ Hãmri nẽ hwỹr kato nẽ omu nẽ kãm:

—Pa. Kwa na mẽ piitã tee ri ajapẽr. Anẽ.

³⁸ Hãmri nhũm mẽ kãm:

—Tõ ma pu mẽ mō. Nom kot puj mẽ akupỹm mẽ hwỹr pamõr kêt nẽ. Kot puj mẽ hpãnhã nhãm krĩ hkwyj hõt mãn ri pajapõj. Pa kamã mẽ kãm Tĩrtũm kapẽr jarẽ mãn. Ja kaxyw na pre mẽ awỹr inhmẽ. Krĩ piitã hõt mẽ pa xwỹnhjaja kot kapẽr mar kaxyw. Anẽ.

³⁹ Hãmri nẽ mẽ ma axte Garirej kamã krĩ hkwyj hõt pa. Nẽ krĩ piitã hõt Tĩrtũm kapẽr o mẽ ahkre xã hã ixkre kamã mẽ kãm Tĩrtũm kapẽr jarẽnh o pa. Nẽ mẽ kurũm mẽkarõmnuti japõx o pa.

Jejus kot akupỹm mẽhõ hkãmnu ho mex ã harẽnh

Matẽwre 8.1-4; Rukre 5.12-16

⁴⁰ Tã nhũm mẽhõ hkã hkro xãpẽr tỹx xwỹnhja Jejus wỹr tẽ. Hãmri nẽ hã hpjajaam kaxyw kutã hkõnkrã ho tẽm nẽ nhỹ nẽ kãm:

—Pa Pahihti. E ot pa awỹr amnhĩ to tẽ. Akupỹm ate mẽ ixto mex kaxyw axãhpumunh tỹx jakamã kot ka akupỹm amã ixto mex prãm nẽ mãmrĩ akupỹm ixto mex. Anẽ.

⁴¹ Hãmri nhũm kuma nẽ kamã ukapri nẽ hã ihkra xi nẽ kãm:

—Nã kot paj ato mex. E akupỹm akã mex.

⁴² Anhỹrja kõt nhũm akupỹm hkã mex kurẽ kumrẽx.

⁴³⁻⁴⁴ Hãmri nhũm Jejus kãm kapẽr kãm hitỹx nẽ hano nẽ kãm:

—E kër ka amnhĩ tã akwyjẽ mã tanhmã ijarẽnh to hkêt rãhã ma patre hwỹr tẽ kẽ akupỹm akã mex ã apumu. Hãmri ka amnepẽm Mojes kot mẽ ate akupỹm mẽ amex ã Tĩrtũm mã tanhmã amnhĩ nhĩpẽx to hã karõ xwỹnhta ka kãm ho anẽ. Kẽ mẽ piitã akupỹm akã mex ã apumu. Anẽ.

⁴⁵ Hãmri nhũm kuma nẽ ma tẽ. Nom axtem nẽ ma mẽ piitã mẽ kãm amnhĩ jarẽnh o ri mra. Jejus kot kãm karõ xã kuhpa hã ma mẽ kãm amnhĩ jarẽnh o ri mra. Jakamã nhũm mẽ kuma nẽ piitã nhỹhỹnh Jejus wỹr mra. Mẽ ohtõ rax kumrẽx nẽ hwỹr mra nhũm tee ri mẽ noo mã nhỹri krĩm pa mã. Hãmri nẽ ãm krĩ pu hã ri pa htã nom nhũm mẽ arĩ ohtõ nẽ hwỹr mra.

2

Jejus kot akupỹm ã kamã htyk xwỹnh o mex ã harẽnh

Matẽwre 9.1-8; Rukre 5.17-26; Juãw 10.37-38

¹ Tã nhũm Jejus hã apkati grẽre nẽ hkõt mẽ pa ho mẽ pa xwỹnhjẽ mẽrohã ma akupỹm Kapanau wỹr mō. Hãmri nẽ hwỹr põj nhũm mẽ piitã nhỹri mẽhõ nhõrkwỹ kamã hpõx kõt harẽnh ma nẽ hã akuprõ.

² Ra hã pikuprõnh rax nẽ ixkre nhõtõm pa. Nhũm mẽ hkwyjaja kapõt ã kuhẽ nhũm Jejus Tĩrtũm kapẽr o mẽ ahkre ho nhỹ.

³ Hãmri nhũm mẽmyjaja kẽp kwat nẽ ã kamã htyk xwỹnhja mỹ nẽ Jejus kot ho mex kaxyw hwỹr o tẽ.

⁴ Hãmri nẽ tee ri hã mẽ pikuprõnh rax xwỹnhjẽ pumu nẽ nhỹhỹnh kot hwỹr o ãr kaxyw tee ri amnhĩ kukamã ho ukapi ho pa. Hãmri nẽ hamaxpẽr nẽ ixkre nhĩmõk po hwỹr ho api nẽ himõk kwỹ grã nẽ hkõt ã kamã htyk xwỹnhta nõr xã mẽrohã hkõt Jejus wỹr haxã.

⁵ Hãmri nhũm mẽ kot kaxyw kãm hamaxpẽr tỹx ã mẽ omu nẽ ã kamã htyk xwỹnhta mã kapẽr nẽ kãm:

—Pa? Kwa tee ri amnhĩ kukamã ajamaxpẽr kêt nẽ. Na pa ra anẽ ate amnhĩ tomnuj piitã ho ijapẽx. Kot paj axte kãm ijamaxpẽr kêt nẽ. Anẽ.

6 Hāmri nhūm Tirtūm kapēr tūm o mē ahkre xwýnhjaja tee ri ā kapēr anhýrja ā kuma nē hamaxpēr o:

7—Tk. Kwa pēr mēhō myti mūj kēp Tirtūm kēt tā te kapēr pyrāk o amnhī nhīpēx nē mē nē mē kot amnhī tomnuj o hapēx ā amnhī jarē. Tirtūm pix kot mē nē mē kot amnhī tomnuj o hapēx kēnā. Anē.

8 Nom nhūm Jejus mē hamaxpēr kōt mē omunh mex nē. Mē kot Tirtūm pix kot mē nē mē kot amnhī tomnuj rēnh nē akupým mē ā xwýnhjē ho mex kōt mē hamaxpērja nhūm mē omunh mex nē mē kām:

—Kwa mē ā ajamaxpēr anhýr kēt nē.

9 Ixte mē nē mē kot amnhī tomnuj o ijapēx par ā amnhī jarēnh tā mē ate mē ano ho ja kōt ixpumunh kēt jakamā na ka htem ja hā ixkōt ajamaxpēr kēt nē. Nom kot paj mē anoo mā akupým myja o mex. Ka mē ja hā ixpumu hāmri nē ixkōt ajamaxpēr kurē kumrēx.

10 Ixpē Tirtūm kot mē awýr inhmēnh xwýnh na pa. Ixte mē anē mē ate amnhī tomnuj rēnh kaxyw na pre mē awýr inhmē pa wrý. Tā mē ate ja kōt ixpumunh kaxyw kot paj mē anoo mā mytija ho mex.

11 Anhýr o mē kām kapēr hāmri nē ī kamā htyk xwýnhhta mā kapēr nē kām:

—E kånhmā xa nē anōr xā mý nē ma akupým anhōrkwý hwýr tē. Anē.

12 Hāmri nhūm kuma nē kånhmā ām kurē kumrēx. Hāmri nē akupým mex ā amnhī pumu nē hkīnh týx nē nōr xā mý nē mē noo mā kato nē ma akupým ōrkwý hwýr tē. Hāmri nhūm mē kot omunh xwýnhjaja amnhī jaēr pē omu nē no hapōx kaxyw nē hkōt omunh o kuhē nē kamā no pyma htýx nē. Nē tee ri omu nē axpēn mā:

—Hēxta waa nē. Aa mē pahte ā mēhō kot amnhī nhīpēx anhýr ā omunh kēt kumrēx tā jarāhā ja pumu. Nā Tirtūmja ām mex o mex. Anē.

*Jejus kot amnhī wýr Rewi hwýr ā harēnh
Matēwre 9.9-13; Rukre 5.27-32*

13 Hāmri nhūm Jejus mē ma mra nē akupým gō rax pē Garirej wýr mra nē gō mý ri pa. Hāmri nhūm mē piitā omu nē hwýr mra nē hā akuprō nhūm Tirtūm kapēr o mē ahkre ho nhý.

14 Hāmri nē mē kure nē axte hkōt mē pa ho mē pa xwýnhjē mērohā ma axte mra nē nhýri Apew kra Rewija pumu. Rōm kām mē ō pahīhti mā amnhī kwýjē pē kàxpore hkwy jamýnh xwýnh na pre. Jakamā nhūm āpēnh o nhý nhūm Jejus hānh tē nē omu nē amnhī kōt kuwý nē kām:

—Pa? E kwa axāpēnhhta kaga nē hpānhā amnē mē ixkōt mān ri apa ho apa. Anē.

Hāmri nhūm kuma nē āpēnh kaga nē ma hkōt mō nē hkōt pa ho pa.

15 Hāmri nhūm mēmo arīgro hā nhūm Rewi nhō mē apkur xā hā mēō rax nē. Jakamā nhūm amnhī nhōrkwý hwýr hkrāmnhwýjaja nē Jejus mē hkōt mē pa ho mē pa xwýnhjē hwý. Hāmri nhūm mē ma hkōt mra nē ōrkwý hwýr agjē nē kuri apkur o hkrī. Nē māānēn mē kēp Rōm nhō pahi mā mē kēp kàxpore hkwy jamýnh xwýnh kwý nē mē ohtō nē mē kutā apkur o hkrī.

16 Hāmri nhūm Tirtūm kapēr tūm o mē ahkre xwýnh kwý pē Parijew nhō xwýnhjaja mra nē mē apkur ā mē omu. Nē tee ri mē hkaēx ā Jejus pumu nē hkōt mē pa ho mē pa xwýnhjē hwýr agjē nē hā mē kām akir nē mē kām:

—Kwa na htem mē kot amnhī tomnuj xwýnhjē kutā apkur kēt tā ka mē Jejus mē apimrāātā axtem nē mē kutā axāpkur o akrī. Mē ate amnhī to mex ronhýx ka mē kutā axāpkur kēt nē. Anē.

17 Hāmri nhūm Jejus amnhī tā mē kapēr ma nē mē kām:

—Tk. Ixte tām mē unhwýr kaxyw ixte mē kutā ixāpkur o inhýr kēnā. Xā na hte tōtō mē mex xwýnhjē hwýr mra nē mē hkane? Nā na hte ām mē ā xwýnhjē pix kane ho pa. Ra mē ate ja pumunh mex. Ja pyrā nē na pa pre mē kot amnhī to mex xwýnhjē hwýr ixwrýk kēt nē. Ām mē kot amnhī tomnuj xwýnhjē pix wýr na pa pre wrý. Ixte tām mē unhwýr kaxyw mē hwýr wrý nē jajē kutā ixāpkur o nhý. Mē ate amnhī tomnuj mā anhūrer nē hpānhā tām amnhī nhīpēx o apa kaxyw na pa pre mē awýr wrý nē mē akamā ixukapri ho ri mē akōt ipxa. Tā ka mē atýx ā ixte mē kutā ixāpkur anhýrja ā ixto akapēr anē. Anē.

*Mē kot Tirtūm mā amnhī jarēnh kaxyw
mēō kaga hā mē harēnh*

Matēwre 9.14-17; Rukre 5.33-39

18 Juāw Paxis kōt mē pa xwýnhjē mē Parijew nhō xwýnhjaja na prem tōhā Tirtūm mā amnhī jarēnh kaxyw nē apkur kēt rāhā kamā kām amnhī jarē. Nom nhūm Jejus kōt mē pa ho mē pa xwýnhjaja na prem kām amnhī jarēnh prām nē apkur kām amnhix kām amnhī jarēnh o pa. Jakamā nhūm Ijaew kwýjaja tee ri ja hā mē omu nē Jejus wýr mra nē mē hā hukuja nē kām:

—Pa? Kwa aprī hā mē inhmā mēmoj jarē. Na hte Parijew nhō xwýnhjē mē Juāw Paxis kōt mē pa xwýnhjaja tōhā Tirtūm mā amnhī jarēnh kaxyw nē apkur kēt rāhā kām amnhī jarē. No akōt mē pa ho mē pa xwýnhjaja na htem āmnhix apkur o pa kamā kām amnhī jarēnh o pa. Kwa mo na htem mē urāk nē tōhā apkur kēt rāhā kām amnhī jarēnh kēt nē? Anē.

19 Hāmri nhūm Jejus mē kām:

—Tk. Mo kaxyw kot mē ā amnhī nhīpēx anē? Mē hkapri hkēt kēnā. Mē kot ixkōt pa ho pa hā amnhī pumunh jakamā na htem

hkĩnh nē pa. Kormā ixte mē hkõt ixpa kēnā kot kēt mē Tirtūm mā kapēr kaxyw nē ho apkur kēt kamā kām amnhĩ jarē. Xà na htem hkrāmnhwý hā hkĩnh kaxyw hā akuprō nē hkaprĩ nē apkur kēt nē mýr o hkrĩ? Nà na htem hā akuprō nē hkĩnh nē apkur rūnh nē. Ja pyrā nē na hte ixkõt mē pa ho mē pa xwýnhjaja ixkõt kormā àmnhĩx hkĩnh nē apkati mē apkur kām kām amnhĩ jarēnh o pa.

²⁰ Nom koja mē kām ixkurē xwýnhjaja nhýmā tanhmā ixto hāmri nhūm mē rĩ kormā hkaprĩ htýx kām ho apkur kēt rāhā Tirtūm mā amnhĩ jarē. Anē.

Nhūm pre ā Jejus mē kām hkõt ri mē pa ho mē pa xwýnhjē jarēnh anē hāmri nē axte mē kām kapēr nē mē kām:

²¹⁻²² —Mē kot amnhĩ tomnuj xwýnhjaja mē kot amnhĩ nhĩpēx tūm o amnhĩ pyrāk jakamā na htem mē kot amnhĩ nhĩpēx nyw kaga. Tā ixte amnhĩ nhĩpēx nywja te kot mē ate amnhĩ nhĩpēx tūm pyrāk kēt jakamā na ka htem inhma nē ām inhma. Kwa mē inhma nē mē ate amnhĩ nhĩpēx tūm gryk ā ixkaga hkēt nē. Anē.

Jejus kēp arĩgromnu hpām ā kot amnhĩ jarēnh

Matēwre 12.1-8; Rukre 6.1-5

²³ Tā nhūm mē ixpē Ijaew nhō arĩgromnu pē sapkato nhūm Jejus mē hkõt mē pa ho mē pa xwýnhjaja ma nhýhým mō. Ma mē hpur kahti hkõt nhýhým mō nhūm hkõt mē pa ho mē pa xwýnhjaja ra kām prām nē. Hāmri nē prām xāj purta kamā amnhīm mēmo hy te kot harōj pyrāk xwýnhhta kwý rē nē ma Jejus kōt hkanhar o mō. Mē ixpē Ijaewjaja na pa htem axpēn pur kām ixpa nē ā amnhĩ nhĩpēx anē.

²⁴ Hāmri nhūm Parijew nhō xwýnhjaja mē hkõt mra nē tee ri ja hā mē omu nē Jejus wýr mra nē mē hā kām akir nē kām:

—Kwa jarāhā sap tā akõt mē pa ho mē pa xwýnhjaja mēmo hy hkwy rē nē akõt hkanhar o pa. Tirtūm kapēr ā kaga htūm kot mē panhō arĩgromnu hā mē pahte mēmoj nhĩkēnh nē mē pahkurē kēnā. Kwa mē kām anē kē mē ā amnhĩ nhĩpēx anhýr kēt nē. Anē.

²⁵⁻²⁶ Hāmri nhūm Jejus mē kuma nē hprĩ hā mē kām Tirtūm kapēr tūm jarē nē mē kām:

—Kwa xān ka mē kormā Tirtūm kapēr ā kaga htūm kamā pahi Tawi kot tanhmā amnhĩ nhĩpēx to kamā harēnh nē mar kēt nē? Kormā Apiatar kēp patre maati ri na pre Tawi hkõt ri mē pa xwýnhjē mē prām xāj Tirtūm mā amnhĩ jarēnh xā hā ixkre hwýr agjē. Hāmri nhūm Apiatar mē kām prām týx ā mē omu nē mē kamā ukaprĩ nē mē kām mēmoj gō. Mē kot Tirtūm noo mā pāwti jaxwýr xwýnhhta nhūm mē kām kugō nhūm mē kuku. Tirtūm kapēr ā kaga htūm kot ja

nē mē kurē htā nhūm mē kām prām týx ā mē omu nē mē kamā ukaprĩ xāj mē kām kugō. Patre pix kot ja hkur kaxyw tā nhūm mē kām kugō nhūm mē kuku. Tā nom nhūm Tirtūm ja hā mē omu nhūm ja kēp omnuj kēt nē. Patre kot mē kamā ukaprĩ nē mē kām ōr nhūm ja hā omu nhūm ja kām mex nē. Anē.

Hāmri nē mē kām:

²⁷ —Na pre Tirtūm panhĩ kumrēx o kato nē kormā mē hkōkõt nē Tirtūm mā hamaxpēr o hkrĩ kaxyw arĩgromnu ho kato. No na pre arĩgromnu kumrēx o kato nē hpānhā kaxyw panhĩ ho kator kēt nē.

²⁸ Tā pa na pre Tirtūm mē akaxyw ixām nē mē awýr inhmē. Jakamā papxpix na pa hte arĩgromnu hā tanhmā mē kot amnhĩ nhĩpēx to hā mē kām karō ho ri ixpa. Jakamā kwār mē māmri mēmoja rē nē ixkõt hkanhar o mō. Anē.

3

Jejus kot akupým ihkra grā xwýnh o mex ā harēnh

Matēwre 12.9-14; Rukre 6.6-11

¹ Tā nhūm mē ixpē Ijaewjē nhō arĩgromnu pē sapja axte kato. Hāmri nhūm Jejus Tirtūm kapēr o mē ahkre xā hā ixkreja wýr tē nē axā nē kamā Tirtūm kapēr o mē ahkre ho nhý. Nhūm mēhō my ihkra grā xwýnhja mē ihkō hā mar o nhý.

² Nhūm Parijew nhō xwýnhjaja kām mē hkrāhtūmjē mā Jejus o kapēr prām jakamā htānopxar o kuhē nē axpēn mā:

—E kwa pu mē jar pakuhē nē kot tanhmā amnhĩ nhĩpēx to hā omu. Xā koja jarāhā ihkra grā xwýnh mūj o mex nā? Jarāhā arĩgromnu kēnā kot kēt kām ihkra ho mex. Koja ho anē nē ra Tirtūm kapēr tūm nhĩrōp xa. E pu mē xa nē hā omu. Anē.

³ Hāmri nhūm Jejus ihkra grā xwýnhhta pumu nē kām:

—Pa? E kånhmā xa nē amnē ixwýr tē. Anē.

Hāmri nhūm kånhmā xa nē hwýr tē nē mē piitā mē noo mā xa.

⁴ Hāmri nhūm Jejus mē kot omunh o hkrĩ xwýnhjē hwýr rīt nē arĩgromnu hā tanhmā mē kot amnhĩ nhĩpēx to hā mē hkukja nē mē kām:

—E mē inhma. Tanhmā na htem arĩgromnu hā axpēn nhĩpēx to wehe? Xā kot ka mē arĩgromnu hā axā htýx nē amex prām xāj ma mēhō hwýr amnhĩ to tē nhūm apumu nē apkatim arĩgro mex jamār pē akane hkēt ka ty nhūm ja amā mex nē? Rý nhūm apumu nē tanhmā atomnuj to nē akupým amnhĩ nē ajano nhūm ja amā mex nē? Nā koja ā anhĩpēx anē nhūm ja amā mex kēt nē. E mē inhmā mēmoj jarē. Tanhmā na pre finat Mojesja Tirtūm nhý hā arĩgromnu hā mē pahte axpēn nhĩpēx ā mē pamā karō hto? Xā kot puj mē hā axpēn kām paxukaprĩ rý hā mē pamā axpēn kurē ho papa? Xā kot puj

mê hã mēmoj punuj pê mê utã rý kot puj mê ãm arıgö mex pix ã mê utãr kaxyw arıgö mex jamã? E mê atõ inhmä ja jarë. Anë.

Ra kot hprĩ hã mê hamaxpër ã mê omunh mex nê ã hêx rom mê hkukjër anë. Nom nhũm mēhõ tanhmã kutã kãm nê hkêt nê. Mē ãm piitã akryk mar pê omunh o hkrĩ. Mē kot tanhmã kãm nê nhũm ta pãnhã tanhmã mê kãm nê pymaj nhũm mē tee ri kãm tanhmã nê hprãm nom akryk mar o hkrĩ.

⁵ Hãmri nhũm Jejus tee ri mê ukapri hkêt ã mê omu nê hkapri nê mê kamã gryk nê. Hãmri nê ihkra grã xwýnhja mã kãm:

–Tk. Mē kot tanhmã inhmä ujarënh tore hã. E anhĩkra katãt. Anë.

Hãmri nhũm ihkra katãt nê akupým mex kurë kumrëx.

⁶ Hãmri nhũm Parijew nhõ xwýnhjaja tee ri ã Jejus kapër anhýrja ã kuma nê kot sap ã akupým myta o mex ã omu nê kamã gryk tÿx nê. Nê hapõj nê ma pahi Erox kõt mē pa xwýnhjê hwýr mra nê mê kãm harë nê tanhmã hã axpën kukjër to nê axpën mã:

–Kwa tanhmã kot puj mê ho? Na ã kapër anhýrja o mē pahto kapër punuj nê. Te hkĩnhã mē papamjaja mē kamã paxukapri hkêt pyrak ã mē pajarë. Koja mē pahkwýjaja kuma hãmri nê mē pahte amnhĩ nhĩpëx kaga nê amnhĩ kaxyw hkõt pix mã hamaxpër o pa. Ja pymaj kwa tanhmã kot puj mê ho? Anë.

Mē ohtõ nê kot Jejus kapër mar kaxyw hwýr mra ã mē harënh

Matëwre 4.23-25; Rukre 6.17-19

⁷⁻⁸ Tã nhũm Jejus mē hkõt mē pa ho mē pa xwýnhjê mērohã ma akupým gõ rax wýr mõ nhũm mē ohtõ nê omu nê ma hkõt mra. Pyka pê Garirej mē Jutej wa kurũm nê kri pê Jerujarë rũm nê pyka pê Itumêj rũm nê pyhti pê Jotãw nhĩkjê hã kri hkwy rũm nê kri hkwy pê Xir mē Sitõ wa pu hã kri hkwy rũm ohtõ nê ma hwýr mra. Na prem ra harënh ma nê nhýhým mõr ã omu nê axpën mã harënh o:

–E kwa tokyj pu mē ma hwýr mē à xwýnhjê o mõ kē akupým mē ho mex. Anë.

Hãmri nê hwýr mē o mra nê hã pikuprõnh rax nê.

⁹⁻¹⁰ Hãmri nhũm Jejus akupým mē à xwýnhjê ho mex. Gõ mýri xa nê tanhmã mē ho mex to. Jakamã nhũm mē axte ohtõ nê hwýr mra nê piitã kot htok nê akupým mex kaxyw hwýr axpën nhĩgã. Hãmri nhũm tee ri amnhĩ wýr mē omu nê hkõt mē pa ho mē pa xwýnhjê mã:

–Kwa mē ma mra nê amnë kanõre jët müj kjënh o tē nê jar inhmä anhõ. Ké mē ixtã axpën nhĩgãnh o ijanënh japër pa hwýr axã nê amým mē ho hpýnh nê akupým mē ho mex. Anë.

Hãmri nhũm mē kuma nê ma mra nê kãm ja o tē nê kunhõ.

¹¹ Na pre mēkarõmnuti hkwyja mē hkwyjê hwýr agjë. Jakamã nhũm mē Jejus pumu nê mēkarõmnuti nhý hã kęp Tirtũm Kra hã omunh kurë kumrëx. Hãmri nê hã hpijaãm kaxyw kutã hkõnkrã ho hkrĩ nê mēkarõmnuti nhý hã kãm kapër nê kãm:

–Kwa apë Tirtũm Kra na ka. Anë.

¹² Hãmri nhũm tee ri amnhĩ tã mē kuma. Kãm mēkarõmnuti ã kot harënh anhýr prãm kêt nê. ãm mē piitã mē kot kapër mar nê kot amnhĩ nhĩpëx ã omunh pê kęp Tirtũm Kra hã omunhja na kãm hprãm. Jakamã nhũm mēkarõmnuti ã harënh anë nhũm ja nê mē kãm kapër nê mē kãm:

–Tk kwa na kër ka mē tanhmã ijarënh to hkêt nê. Anë.

Jejus kot amnhĩ kaxyw mē kęp 12 rënh ã harënh

Matëwre 10.1-4; Rukre 6.12-16

¹³ Tã nhũm Jejus hkõt mē pa ho mē pa xwýnh kwýjê mã kãm:

–E pu mē ma mõ nê krãhakÿx müj ã api. Anë.

Hãmri nê mē ma hwýr mõ nê hã api

¹⁴ nhũm Jejus amnhĩ kaxyw mē ho 12 nê mē kurë. Mē kot ma ý hã Tirtũm kapër o mē ahkre

¹⁵ nê ý hã mē nê mēkarõmnuti janor o pa kaxyw.

¹⁶ ã mē hixi kot anhýr.

Na pre ja kęp Simãw no nhũm Jejus hpãnhã hã hixi hõ mē nhũm hpãnhã mããnen kęp Pëtre.

¹⁷ Nê hkõt Jepetew kra Xiakre mē htõ Juãwja wa kuta.

Hãmri nê kot Simãw nhĩpëx pyrã nê wa hã hixi hõ mē nhũm wa hpãnhã mããnen kęp Poanes. Wa kot amnhĩ prëprek jakamã nhũm ã wa hã hixi mēnh anë.

¹⁸ Nê hõ pê Andreja ta.

Nê hkõt Andre htõ Firiptija ta.

Nê hkõt Patoromewja ta.

Nê hkõt Matëwreja ta.

Nê hkõt Tomasja ta.

Nê hkõt Arpëw kra Xiakreja ta.

Nê hkõt Tatewja ta.

Nê hkõt Simãw õja ta.

Simãwja na pre kãm mē ixpë Ijaewjê nhõ pika pê Ijaew kĩnh tÿx nê. Jakamã na pre kãm nhãm pika hõ nhõ pahi kot mē ho amnhĩptãr prãm kêt nê pa.

¹⁹ Nê hkõt Jut Kariotja ta.

Kormã kot mē kãm Jejus kurë xwýnhjê nhĩhkram õr mã nhũm Jejus kot amnhĩ kukamã omunh mex tã mē hkõt amnhĩ kaxyw kuta.

ã mē kot ý hã mē ahkre o pa kaxyw mē rënh xwýnhjê nhixi kot anhýr.

Jejus mē mēkarōmnuti wa harēnh
Matēwre 12.22-32; Rukre 11.14-23, 12.10;
Juāw 10.19-21

²⁰ Hāmri nhūm Jejus hkōt mē pa ho mē pa xwŷnh kwŷjē rēnh pa nē ma amnhī kōt mēhō nhōrkwŷ hwŷr mē o mō. Na prem apkur kēt ry rax nē ra kām prām tŷx nē nhūm ma mē apkur kaxyw amnhī kōt mē o mō. Hāmri nhūm axte mē à xwŷnhjaja mē omu nē Jejus wŷr pikuprōnh rax nhūm mē tokyx apkur kēt nē.

²¹ Hāmri nhūm Jejus katorxà nē htōjaja tee ri mē apkur kēt à mē harēnh ma nē axpēn mā:

—Kwa mǎn ām ra tanhmā hkrā amnhī to nà? Hā na mē kot omunh kaxyw hā hpikuprōnh rax jakamā nhūm kormā apkur kēt nē. E tokyx pu mē ma hwŷr mra nē omu nē mē kēp utà nē akupŷn amnhī kōt o mō. Anē.

²² Rōm nhūm Tirtūm kapēr tūm o mē ahkre xwŷnhjaja Jerujarē rūm Jejus wŷr mōn pōj. Hāmri nē tanhmā ho kapēr punuj to. Kēp mēkarōmnuti hkwy hā hkamnhīx jakamā harēnh o:

—Tk pēr hinhu nhīkōōti nhŷ hā na hte mē nē amnhī kwŷjē japōx o pa. Anē.

Hinhu nhīkōōti nhīxi hō pē Satanasti nhūm prem ŷ hā Jejus kot amnhī nhīpēx o pa hā hkamnhīx.

²³ Hāmri nhūm amnhī tā mē omu nē amnhī wŷr mē kām hpa ho apē nē mē kām amnhī jarē. Nom amnhī tā kuxi nē mē kām mēmoj jarē nē mē kām:

—Kwa mē inhma mē ate ixpē Satanasti hkwy hā ixkamnhīx xwŷnhjaja. Xà na hte Satanasti mē nē amnhī kwŷjē janor o pa? Nà na hte à amnhī nhīpēx anhŷr kēt nē.

²⁴ Na hte pika nhō xwŷnhjaja axpēn kutā amnhī xunhwŷ nē axpu hāmri nē anhgrà nē ma ahpŷnhā ri pa nē amnhī krā hkōt ri tanhmā amnhī to ho ri pa. Jakamā nhūm mē ò pahija mē hamār o pa hkēt nē.

²⁵ Nē krī nhō xwŷnhjaja haxwŷja. Mē kot axpēn to hkwy xwŷnhjaja koja mēmoj tā axpēn kām gryk nē axpēn kutā amnhī xunhwŷ hāmri nē anhgrà nē ahpŷnhā pa hāmri nhūm mē ò pahi tee ri kām mē hamār o pa hprām. Mo hkwyjaja kot kēt ri mē hamār o pa? Nom tām kot amnhī nē mē hanoore hā. Mē tāmjaja na prem axpēn kām gryk nē anhgrà nē ahpŷnhā pa.

²⁶ Tā ja pyrā nē ixte Satanasti nhŷ hā tanhmā amnhī nhīpēx to ho ixpa ronhŷx pa ri mē kurūm amnhī kwŷjē japōx o ri ixpa hkēt nē. Mēkarōmnutijaja kēp Satanasti hkwy kēnā. Koja Satanasti ixte mē kurūm mē hapōx kaxyw tanhmā inhmā nē hkēt nē.

²⁷ àhpumunh tŷx jakamā na hte mē kot hkōt amnhī xunhwŷr xwŷnhjē pumunh tŷx o pa nhūm mēhō tee ri kēp mē utār kaxyw. Tā ixàhpumunh tŷx o ixte hakrenh jakamā

ixte kēp mē utārja inhmā tanhmā kute hkēt. Na pa hte kēp mē utà nhūm mē hpānhā ixkōt amnhī nhīpēx o pa nhūm Satanasti tee ri mē hā ixpumunh o pa kaprŷ.

²⁸ —Ām hāmri na pa mē amā ixkapēr. Kot kaj mē tanhmā amnhī tomnuj to ho apa. Nē amnhī tomnuj tŷx kumrēx rāhā ho apa. Rŷ tanhmā akapēr punuj to ho apa. Rŷ tanhmā Tirtūm o akapēr punuj to ho apa. Tā tee ri ja hā amnhī pumu nē akaprī nē à ate amnhī nhīpēx anhŷrja kaga nē Tirtūm kōt amnhī xunhwŷ. Hāmri nhūm amnhī tā mē apumu nē amnhī katut kōt mē ate amnhī tomnuj nē mē akapēr punuj rēnh pa nē axte kām hamaxpēr kēt nē. Koja ho hapēx par kumrēx.

²⁹ Nom koja Tirtūm Karō xatā mē amā ixto amnhīrit tā ka mē ama nē ām ama nē te kēp amnhī jamak pro pyrāk o amnhī nhīpēx. Jao Tirtūm Karō hā apijaām kēt à amnhī to amnhīrit. Ja mŷrapē koja Tirtūm nhŷrmā amnhī xwar te mē apē amnhī jamak pro pyrāk o mē anhīpēx ka mē tee ri kām amnhī kaprī kaprŷ. Hāmri nē mē kot amnhī xà htŷx kamā hamak o pa htūm xà wŷr ma apa nē kamā apa rāhā apa ho apa. Anē.

³⁰ Mē kot Satanasti nhŷ hā mē nē mēkarōmnuti janor o pa hā hkamnhīx jakamā nhūm pre Jejus à mē kām kapēr anē.

Jejus katorxà mē htōjē jarēnh
Matēwre 12.46-50; Rukre 8.19-21;
māānēn Eprēw 2.11-12

³¹ Rōm nhūm Jejus katorxà mē htōjaja hwŷr mra no ām kormā hwŷr gjēx kēt nē. Mē kot hā htu rax jakamā nhūm mē tee ri hwŷr gjēx kaxyw kormā kapōt à kuhē. Hāmri nē mē kot mar o kuhē xwŷnhjē hō mā kapēr nē kām:

—Kwa ma tēn Jejus mā mē ijarē kē mē ixwŷr kato. Anē.

³² Rōm nhūm ixkre kamā mē hkrī xwŷnhjaja mē omu nē Jejus mā mē harē nē kām:

—Kwa Pahihti. Ota akatorxà mē atōjaja awŷr mra nē pōj nē tee ri awŷr gjēx mā nē kormā kapōt à kuhē nē atā karō. Anē.

³³⁻³⁵ Hāmri nhūm mē kuma nē mē kām:

—Tōe pa ixkato mē omu. Inhmā mē hapēē. Nom kot kaj mē atō Tirtūm kapēr ma nē hkōt amnhī xām nē hkōt amnhī nhīpēx. Hā kot kaj te apē ixtō rŷx katorxà kot amnhī nhīpēx pyrāk o pu mē axpēn nhīpēx. Pa te inhmā mē hapē pyrā nē inhmā mē ajapē nē. Anē.

4

Mēmo hy hkre xwŷnh jarēnh
Matēwre 13.1-9; Rukre 8.4-8

¹ Tā nhūm Jejus axte gō jakāk à mē ahkre ho nhŷ. Hāmri nhūm mē axte hā htu rax jakamā nhūm tee ri mē omu hāmri nē par

krem axà nê gôx kãm amým mē ahkre ho nhÿ. Nhùm mē piitã kýxpê omunh nê mar mex o kuhê.

² Hãmri nhùm mē ahkre ho nhÿ. Nom mē ujarênh pix kãm mē ahkre. Mē kot Tirtùm kapêr mar nê tanhmã hkôt amnhî nhîpêx to ho paja nhùm hã kuxi nê mē kãm hã ujarênh o nhÿ nê mē kãm:

³ –E mē inhma. Koja mēhõ ma pur mã mō nê pur kãm mēmo hy ho ukapêr o pa nom nhùm hy piitã amex kãm rôrôk kêt nê. Koja ahpÿnhã rôrôk.

⁴ Koja hkwy aptÿx kãm rôrôk nhùm kuwênhre omu nê hwÿr mra nê hkrêr pa.

⁵⁻⁶ Nê koja kên kãm hkwy rôrôk hãmri nê higrôt kutã nojarêt nê higrôt pa. Nom nhùm kamã aptÿx nê kamã kêp pika hkryre jakamã nhùm higrôt nhùm hã myt apha nê arÿgro htÿx mē nhùm grã pa. Harê hkryre jakamã grã pa.

⁷ Nê koja hkwy mrônhi kamã rôrôk nê higrôt tã no nhùm utÿja kêp amÿtã nhùm ô hkêt nê.

⁸ –No koja hirã kamã pika mex kãm hkwy rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. Æ mē ujarênh kot anhÿr.

⁹ Kwa mē ama nê kãm ajamexpêr tÿx rãhã ho ri apa. Anê.

*Jejus kot hprî hã mēmo hy jarênh
Matêwre 13.10-23; Rukre 8.9-15*

¹⁰ Hãmri nhùm mē Jejus uxjarênh mar pa nê angrã nê ma akupÿm mra nhùm hkôt mē pa ho pa xwÿnh pê 12 mē hkwyjaja pix Jejus ri arÿk. Hãmri nê ujarênhã Æ hukujã nê kãm:

–Kwa mon ka hte Æ mē kãm axujarênh anê Pahihti? Na pa mē ixprî hã amar mex kêt nê. Anê.

¹¹⁻¹² Hãmri nhùm mē kãm:

–Nã kot paj ixprî hã mē amã harê. Tirtùm kãm mē ate aprî hã mar prãm jakamã kot paj ixprî hã tanhmã mē amã harênh to. Nã mē kot amnhî tomnu kaga nhùm Tirtùm kot ja hã mē omunh xã hkôt mē ho hkra hã harênhja na pa hte mē kãm harê. No müjjaja mē aktinhã mē kãm mar prãm kêt jakamã na pa hte mē kãm mēmoj tã haxwÿ nê awjarê nhùm mē Æm ixujarênh pix ma.

Na htem kuma nê Æm kuma nê htÿx ri hã pa.

No kêp apu mē kãm hprî hã mar prãm ronhÿx mē ra hprî hã kuma nê Tirtùm kôt amnhî xunhwÿ nhùm amnhî tã mē omu nê mē kot amnhî tomnuj o hapêx. Nom mē kãm mar prãm kêt. Anê.

¹³ Tã mē ate aprî hã ixujarênhja mar mex kêt jakamã tanhmã kot kaj mē amnhî to nê ixujarênh piitã ama? E kot paj ixprî hã mē amã mēmo hyta jarê ka mē inhma.

¹⁴ –Nã mēmo hyta te kêp Tirtùm kapêr pyrãk. Nê ahpÿnhã rôrôk xã hã pikata te kêp ahpÿnhã mē kot Tirtùm kapêr mar xwÿnhjê kot mar nê ahpÿnhã tanhmã amnhî nhîpêx to pyrãk.

¹⁵ Jakamã mē kot mar xwÿnh kwÿjaja hte kot aptÿx kãm hkwy rôrôk nhùm kuwênh kot hwÿr mra nê hkrêr par xwÿnhã pyrãk. Jakamã na htem Tirtùm kapêr ma nom nhùm Satanasti te kuwênh kot hy hkrêr parta pyrãk o mē hipêx. Nê mē kot amnhî kaxyw hkôt hamaxpêr nê hkôt amnhî xunhwÿr pymaj tanhmã nê mē hkrã hto. Jakamã nhùm mē Tirtùm kapêr ma nom ho hamakêtkati tokyx anê nê axte kãm hamaxpêr kêt nê.

¹⁶ –Nê mē kot mar xwÿnh kwÿjaja te kot kênre kamã hkwy rôrôk nê higrôt nhùm te hã myt apha nhùm grã par tokyx anhÿr xwÿnhã pyrãk. Na htem Tirtùm kapêr ma nê hkÿnh nê. Nê kãm mar prãm nê. Te hy higrôt tokyx anhÿrta pyrãk.

¹⁷ Tã nhùm mēhõ tē nê Tirtùm nê tanhmã mē kãm kapêr to nhùm mē kuma nê hkaga. Rÿ nhùm mē Tirtùm Æ tanhmã mē homnuj to nhùm mē tee ri amnhî tã mē omu nê hkaga. Te mēmo hy higrôt nê grã par tokyx anhÿrta pyrãk.

¹⁸ –Nê mē kot mar xwÿnh kwÿjaja te kot mrônhi kamã hkwy rôrôk nê higrôt nhùm mrônhi kot kêp Æmnãr xwÿnhã pyrãk. Nê mē kãm Tirtùm kapêr mar prãm nê.

¹⁹ Nom mãânên kãm hikukrêx rax nê hikãxpore rax prãm jakamã Æm ja pix kukamã hamaxpêr o ri pa. Jao ra gryk Æ axte Tirtùm kapêr mã hamaxpêr nê hkôt amnhî nhîpêx kêt nê. Te mrônhi kot higrôt pê Æmnãr nhùm ô hkêeta pyrãk.

²⁰ –No mē kot mar xwÿnh kwÿjaja te hirã kamã pika mex kãm hy hkwy rôrôk nê higrôt nê ô raxta pyrãk. Na htem ixkapêr ma nê amnhî krã him hagjênh tÿx nê. Nê ixkôt ri amnhî nhîpêx mex rãhã ho ri pa. Te mēmo hy hkre kamã ô hkwyjaja kêp 30 nê kamã kêp 60 nê kamã kêp 100ta pyrã nê Tirtùm kapêr kôt amnhî nhîpêx mex rãhã ho pa. E Æ ixujarênhja kot anhÿr. Anê.

Kanê hpimxur Æ harênh

Rukre 8.16-18, 8.24-25; Matêwre 13.10-15, 25.14-30

²¹ Nhùm Jejus arÿ hkôt mē pa ho pa xwÿnhjê jahkre nê mē kãm:

–Xã na htem kanê hpök nê poti ho hpro rÿ hitom kãm par krak ri unhwÿ? Nã na htem hpök hãmri nê kýx pê mēmoj nhimök Æ unhwÿ.

²² Ja pyrã nê mē piitã kot hkwyjê pê tanhmã hamaxpêr punuj to ho hpimxur prãm tã tee ri kot ho hpimxur prãm kaprÿ. Koja nhÿrmã mē hamaxpêr piitã amnhî to amnhîrit pa. Nê mēmoj piitã ra hpimxur

mex tã koja nhÿrmã amnhĩ to amnhĩrit pa. Te mẽ kot kanẽ hpõk nẽ kÿx pẽ unhwÿr nhũm amnhĩrit mex pyrãk. Ja pyrã nẽ na pa hte Tirtũm kapẽr o ri ixpimxur o ixa hkẽt nẽ. Na pa hte ixprĩ hã mẽ amã harẽnh mex o ixa.

²³ Kwa mẽ ixujarẽnhja ma nẽ kãm aja-maxpẽr tÿx rãhã ho ri apa. Anẽ.

Nhũm pre ã Jejus mẽ kãm kapẽr anẽ.

²⁴ Hãmri nẽ mẽ kãm:

—Nẽ kær ka mẽ axpẽn kãm axukapri ho ri tanhmã axpẽn to mex to ho ri apa. Kær kẽ Tirtũm ja hã mẽ apumu nẽ mẽ apyrã nẽ mẽ akamã ukapri pẽ mẽ ato mex o pa.

²⁵ Koja mẽhõ inhmã tanhmã amnhĩ nhĩpẽx mex to pa ja hã omu nẽ kot inhmã ãpẽn mexta pãnhã ho mex nẽ. No koja inhmã ãpẽn mex kêt pa ja hã omu nẽ hã ho mex kêt nẽ.

—Nẽ koja mẽhõ kãm ixkapẽr mar prãm nom kormã hprĩ hã mar mex kêt tã arĩ mar o pa nẽ gaa nẽ mar tÿx o mõ. No koja kuma nẽ ãm kuma hãmri nẽ gaa nẽ hã no hkẽt. Anẽ.

*Pur kãm mẽmo hy hkre xwÿnh jarẽnh
Matẽwre 13.24-30*

²⁶ Nhũm Jejus arĩ hkõt mẽ pa ho mẽ pa xwÿnhjẽ jahkre ho nhÿ nẽ mẽ kãm:

—E pa mẽ amã tanhmã mẽ kot ixkapẽr mar tÿx xwÿnhjẽ jarẽnh to ka mẽ inhma. Koja mẽhõ ixkapẽr mar tÿx nẽ ra hkõt ri amnhĩ nhĩpẽx o pa. Hãmri nẽ hamaxpẽr nyw o hamaxpẽr o pa nẽ amnhĩ nhĩpẽx nyw o amnhĩ nhĩpẽx o pa. Te mẽ hpur kãm mẽhõ kot mẽmo hy hkre xwÿnh kot amnhĩ nhĩpẽx pyrãk. Na hte hyja kre ho pa.

²⁷ Hãmri nẽ hkre hpa nẽ kamãt mẽ õt o hikwÿ nẽ arĩgro mẽ mẽmoj tã ãpẽn o pa. Rãhã nhũm mẽmo hyja arĩ hikwÿ ho hikwÿ hkẽt nẽ. Koja amnhĩ nhĩpẽx õ ho amnhĩ nhĩpẽx nẽ higrõt kato nẽ hprẽk. Kre xwÿnh kot tanhmã kot amnhĩ nhĩpẽx to hã omunh kêt tã nhũm kãm hprẽk.

²⁸ —Na hte hpõm hapõx o pa nẽ higrõt o pyka kahte. Hãmri nẽ hprẽk nẽ hõ axpõt nẽ gaa nẽ hpãnhã õ. Hãmri nẽ hkamrẽk pa nẽ xa.

²⁹ Hãmri nẽ mẽ kot hikẽnh mã mex nẽ nhũm kot hkre xwÿnhnta omu nẽ amnhĩm hamÿnh pa. Tã mẽ kot ixkapẽr mar mex xwÿnhjaja te mẽmo hy ra higrõt kator nẽ hprẽk nẽ hõ pipõt nẽ õ xwÿnhnta pyrãk. Nẽ urãk nẽ amnhĩ nhĩpẽx õ ho amnhĩ nhĩpẽx o pa. Anẽ.

Jejus te kot mẽmo hy pyrãk ã kot amnhĩ jarẽnh

Matẽwre 13.31-32; Rukre 13.18-19

³⁰⁻³² Nhũm Jejus arĩ mẽ ahkre ho nhÿ nẽ mẽ kãm:

—Tirtũm kot mẽ awÿr ixte mẽ ato amnhĩptãr kaxyw inhmẽnã ã jarẽnhja. Te ixte mẽmo hy pixire pyrãk. Koja mẽhõ mẽmo

hy hõ pixire nẽ hkre nhũm ra higrõt. Nẽ gaa nẽ hprẽk. Hãmri nẽ hpa angrã nhũm kuwẽnhre hwÿr mra nẽ hõptĩ kamã amnhĩm haẽ nhĩpẽx. Mẽmo hyta greire htã nhũm hkre nhũm higrõt nẽ ã amnhĩ nhĩpẽx anẽ. Tã kot paj nhÿrmã urã nẽ ixpyi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixa. Anẽ.

Ã na pre Jejusja hkõt mẽ pa ho mẽ pa xwÿnhjẽ mã amnhĩ tã kuxi nẽ ujarẽnh anẽ.

³³ Mẽ kãm ujarẽnh kãm mẽ ahkre ho pa. Te nhãm mẽmoj jarẽnh pyrã nẽ amnhĩ tã haxwÿ nẽ harẽ. Mẽ kot tanhmã mar to hã mẽ omunh xã hkõt tanhmã mẽ kãm ujarẽnh to.

³⁴ Na pre ãm ujarẽnh pix kãm mẽ kãm kapẽr mar prãm kêt xwÿnhjẽ mã amnhĩ jarẽnh rãhã ho pa. No mẽ kot hkõt pa ho pa xwÿnhjẽ mã nhũm hprĩ hã ujarẽnh jarẽ nhũm mẽhprĩ hã mar mex nẽ.

*Jejus kot kõt o pinhkrẽnã ã harẽnh
Matẽwre 8.23-27; Rukre 8.22-25*

³⁵ Tã nhũm amÿkry nhũm Jejus arĩ pãr kre kamã nhÿ. Hãmri nẽ hkõt mẽ pa ho mẽ pa xwÿnhjẽ mã kãm: “E pu mẽ ma xarmã mõ.”

³⁶ Anẽ hãmri nẽ mẽ kot mar o hkrĩ xwÿnhjẽ re nẽ pãr mã agjẽ nẽ ma xarmã mõ. Garirej rũm kato nẽ ma xarmã pika hõ hwÿr mõ. Nhũm pãr kwÿja ma mẽ hkõt mõ.

³⁷⁻³⁸ Nhũm Jejus ra õtxwa nẽ tẽ nẽ pãr kre kamã hkrã japar xã hã hkrã xi nẽ ra õt tÿx nẽ nõ. Nhũm kõt ãpẽn tÿx nẽ nhũm gõ kãnhmã harĩ nẽ axpẽn tak. Ra ri xatã axpẽn tak nẽ pãr kre kamã axkapĩ nhũm ra mẽ kẽp ãr o mõ. Hãmri nhũm mẽ tee ri amnhĩ nhĩpẽx nẽ tee ri amnhĩ kukamã hamaxpẽr nẽ Jejus wÿr hprõt nẽ kumra nẽ kãm:

—Kwa kãnhmã nhÿ Pahihti. Kot puj mẽ jarãhã pahtyk pa. Anẽ.

³⁹ Hãmri nhũm hkrãkato nẽ kãnhmã nhÿ nẽ kõt mẽ gõta pumu nẽ wa kãm kapẽr o:

—E kwa wa anhĩkrẽ. Anẽ.

Hãmri nhũm gõ mẽ kõt hpinhkrẽn kurẽ kumrẽx.

⁴⁰ Hãmri nhũm Jejus hkõt mẽ pa ho mẽ pa xwÿnhjẽ mã kãm:

—Hẽxta waa nẽ. Kormã mẽ ate amnhĩ kaxyw Tirtũm mẽ wa inhmã ajamaxpẽr tÿx kêt. Hã na ka mẽ ri amã na nẽ tee ri amnhĩ kukamã ajamaxpẽr. Anẽ.

⁴¹ Hãmri nhũm mẽ amnhĩ jaer pẽ ã kot amnhĩ nhĩpẽx anhÿr ã omu nẽ tee ri axpẽn pumunh pẽ omunh o kuhẽ. Hãmri nẽ axpẽn mã:

—Kokÿy. Jejus kẽp mẽ panhĩõ hkõt. Mẽ pahtõ kot pu te kot amnhĩ nhĩpẽx pyrã nẽ kõt mã pakapẽr nhũm anhĩkrẽ? Nã mẽ pakurom ãhpumunh tÿx o ãhpumunh tÿx. Anẽ.

5

Jejus kot mēhō nē mēkarōmnuti janor ā jarēnh

Matēwre 8.28-33; Rukre 8.26-34

¹ Tā nhūm Jejus mē hkōt mē pa ho mē pa xwýnhjē mērohā mō nē xarmā Geras wýr pōj.

²⁻⁴ Hāmri nē pàr rūm hapōj nhūm mēhō myja Jejus pumu nē hwýr tē. Mēkarōmnuti kot hwýr àr nhūm ý hā oprē htýx kumrēx. Hāmri nē hkwyjē hkàx ā kapōt ā mē hā pika kamā ri hkēnh nē pa ho pa. Nhūm mē xatā kàx o hte hpre nē hpa hpre htā no nhūm kurē.

⁵ Nē kamāt kām nē arīgro hā àmra htýx o mrap pē kēn o amnhī tak o mra. Mē hā pyka kamā nē kapōt ā hixēt ā amnhī tak týx rāhā ho mra.

⁶ Tā amým Jejus pumu nē hwýr hprōt nē hā hpíjaam kaxyw kutā hkōn krā ho tēm nē hparpē nhý.

⁷⁻⁸ Hāmri nhūm omu nē nē mēkarōmnuti mā kapēr nē kām:

–Kwa kurūm akato nē ma tē. Anē.

Hāmri nhūm kuma nē tanhmā myta o nhūm tām mēkarōmnuti nhý hā Jejus mā kapēr nē àmra kamā kām:

–Pa Tirtūm Kra Jejus? Mo kaxyw na ka ixwýr tē? Kwa tanhmā ixto hkēt nē nà?

⁹⁻¹⁰ Anē nhūm kām:

–Tanhmā na anhīxi te? Anē.

Nhūm kām:

–Nà ixpē Mēohtōhti. Mēkarōmnuti ohtō nē kot ixwýr gjēx jakamā na htem ā inhīxi jarēnh anē. Kwa nē mē ijanor kēt nē nà? Anē.

¹¹⁻¹² Hāmri nhūm mēkarōmnuti tām amnhī to kuwý nē kām:

–Kwa kēr ka jahti nē mē ijapōx japēr nē mē kot amnhī xā htýx kamā hamak o mē pa htūm xāta wýr mē ixrēnh kēt nē. Hagrō hkwy mūj wýr mām mē ixrē pa mē hpānhā hwýr mām hagjē? Anē.

¹³ Hāmri nhūm mē kām:

–Tōe. Mē tām hwýr mra. Anē.

Hāmri nhūm mēmyta pē hapōx pa nē ma hagrō hwýr mrap kurē kumrēx nē mē kām gjēx pa nhūm myja akupým tām hkrā. No nhūm hagrōja mēkarōmnuti pymaj amýra nē axkakhūm nē hprōt nē himó hā krā hixēt ā axpum rōrōk nē gōx kām mrō nē hpikaprār pa. Ohtō rax kumrēx. Kēp 2.000 tā hpikaprār pa.

¹⁴ Hāmri nhūm hagrō jamār o ri mē pa xwýnhjaja tee ri ja hā omu nē ma mē ō patrāw wýr akupým mē piitā mē kām harēnh o hprōt nē mra. Hāmri nē mē kām ujarēnh pa.

¹⁵⁻¹⁶ Nhūm mē tee ri mē kuma nē ma Jejus wýr mra nē hkaxpa nē kuri myta pumu. Nhūm ra akupým tām hkrā nē ē kamā tām

amnhī nhīpēx nē nhý. Nhūm mē kot hā omunh xwýnhjaja mē kām ujarēnh pa nhūm mē kuma nē myta pumu hāmri nē tee ri amnhī kukamā hamaxpēr o kām Jejus puma nē.

¹⁷ Hāmri nē amnhī nē kām kapēr nē kām:

–Kwa mēmo kaxyw na ka mē ixwýr rē?

Mē ma akupým amrap tokyx anē. Anē.

¹⁸ Hāmri nhūm mē kuma nē akupým pàr wýr agjē nhūm akupým mex xwýnhhta tee ri ja hā mē omu nē mē hkōt hkrā.

¹⁹ No nhūm Jejus kām:

–Nà kot kaj mē ixkōt amōr kēt nē. Ma akupým anhō krī hwýr mām tē nē mē kām Tirtūm kot akupým ato mex ā amnhī jarēnh o ri mē hkōt apa. Anē.

²⁰ Hāmri nhūm kuma nē ma akupým tē. Hāmri nē ō pyka pē Tekap kām mē kām Jejus kot tanhmā ho mex to hā harēnh ri mē hkōt pa nhūm mē amnhī jaēr pē kuma nē tee ri hkukamā hamaxpēr.

Jejus kot akupým mēhō ho mex nē akupým mēhō ho htír ā harēnh

Matēwre 9.18-26; Rukre 8.40-56

²¹ Tā nhūm Jejus mē hkōt mē pa ho pa xwýnhjē mērohā akupým xarmā mō nē rē. Hāmri nē pàr nhō nē api nē gō mýri kuhē nhūm pika nhō xwýnhjaja Jejus pumu nē hā pikuprōnh rax nē.

²²⁻²³ Hāmri nhūm mēhō my pē Jajtija hwýr tē nē kutā hkōnkrā ho htēm nē nhý. Kēp Tirtūm kapēr o mē ahkre xā hā ixkre jamār xwýnh maati na pre. Nhūm hkra nija kēp à htýx nē htyk kaxyw nē nō. Kormā nyw. Kormā hā amgrā pē 12 pix tā ra kēp htyk kaxyw. Hāmri nhūm Jajtija tee ri hkukamā hamaxpēr nē ma Jejus wýr tē nē hpar pē hkōn krā ho tēm nē ho hwýr kām hihtýx nē kām:

–Pa akupým mē ixto mex xwýnh maati. E awýr na pa tē. Na ra ixkra ixpē htyk kaxyw. Pa tee ri omu nē kaxyw amā ijamaxpēr nē awýr tē. Jakamā kwa ma ixkōt inhōrkwý hwýr tē nē inhā omu nē hā anhīhkra xi nē akupým inhā ho mex. Anē.

²⁴ Hāmri nhūm kuma nē ma hkōt tē. Nhūm mē ohtō nē axpēn nhīgānh nē axpēn kujahék o wa hkōt mra.

²⁵ Nhūm mēhō nija haxwýja wa hkōt tē. Na pre hte hkamrō hkryre rāhā ho pa hā ra hā amgrā kēp 12.

²⁶ Nē tótō mā amnhīrer rax nē nhūm mē tee ri kot ho mex kaxyw nom xatā hkane kaprý. Hāmri nhūm ra hikāxpore kēp hapēx nhūm arī àm rāhā nē pa.

²⁷⁻²⁸ Hāmri nē tee ri amnhī kukamā hamaxpēr nē Jejus jarēnh ma nē hamaxpēr o:

–Ma kot paj ma hwýr tē nē kēp ē pix kupēnh tā akupým inhmex japēr. Ma kot paj ho anē.

Anhÿr o hamaxpēr hāmri nē ma mē hkōt hwÿr htēm kurē kumrēx. Nhūm mē ohtō raxja kaēx ā mē hkōt hwÿr tē. Hāmri nē katut kōt kēp ē nhîrē kupē.

²⁹ ām ē pix kupēnh tā akupÿm mex ā amnhî pumunh kurē kumrēx.

³⁰ Hāmri nhūm Jejus kot kēp ē kupēnh ā amnhî tā omu nē hēx rom xa nē mē ho hakēx nē amnhî tā mē kām kapēr nē mē kām:

—Kwa mē atō na ka ri amnhî kaxyw inhmā ajamaxpēr tÿx pē ixpē ixē kupē? Anē.

Hāmri nhūm mē piitā kuma nē tee ri axpēn pumu nē kām amnhî tā aprā.

³¹ Hāmri nhūm hkōt mē pa ho pa xwÿnhjaja kām:

—Mē kot apē amnār griā kot ka kēt ri mēhō kot apē hkupēnh xwÿnh ā ri mē hkukja. Kwa mān ām mēhō amarī apē hkupē. Anē.

³² Hāmri nhūm mē kām:

—Nā na amarī ixpē hkupēnh kēt nē. Na amnhî kaxyw inhmā hamaxpēr tÿx pē ixpē hkupē. Tā na ixāhpumunh tÿx xā ho akupÿm mex. Nom ra ixte mēhō kot ixpē hkupēnh xwÿnh ta pumunh jakamā na pa ixēx rom ā amnhî tā ri mē hkukjēr anē. E kwa mē atō inhmā amnhî jarē. Anē.

³³ Hāmri nhūm nija kuma nē tee ri kēp kot amnhî to hpimxur prām. Hāmri nē hpijaām nē hwÿr htetet o tē nē kutā hkōn krā ho tēm nē nhÿ nē kām amnhî jarē nē kām:

—Ma pa na pa inhmā inhmex prām xāj apē axē kupē. Tā na pa akupÿm inhmex. Anē.

³⁴ Hāmri nhūm kuma nē kām:

—Tÿ. Nā ate amnhî kaxyw inhmā ajamaxpēr tÿx kōt ā ate amnhî nhîpēx anhÿr jakamā na ka akupÿm amex. Kot kaj axte akamrō rāhā ho ri apa hkēt nē. E māmri ajamakētkati nē ma akupÿm anhōrkwÿ hwÿr tē. Anē.

Hāmri nhūm kuma nē hkĭnh nē ma akupÿm tē.

³⁵ Rōm nhūm Jajti mā mē āpēnh xwÿnhjaja ōrkwÿ rūm ma ō patrāw kutā mra nē wa hkaxpa nē Jajti mā kām:

—Kwa na ra akra apē ty. Mo kaxyw kot ka kēt amnhî kōt Jejus o mō? Kwār māmri ma akupÿm awjanā nē tē. Anē.

³⁶ Hāmri nhūm Jejus mē kuma nē Jajti mā kām:

—Kwa tee ri akra hkukamā ajamaxpēr kēt nē. Ām kaxyw inhmā mān ajamaxpēr tÿx rāhā nē. Anē.

³⁷⁻⁴⁰ Hāmri nhūm mē axte mō nē mē ōrkwÿ hwÿr pōj nē mē omu. Nhūm mē ra hā htū rax nē mÿr o hkrī. Hāmri nhūm Jejus mē hwÿr axā nē mē omu nē kot mē hkra htyk kumrēx ā omunh tā mē kām:

—Kwa mē hāmri amÿr kēt nē. Na nireta htyk kēt nē. Na ām gōr nē nō. Anē.

Hāmri nhūm mē kot ra htyk ā omunh mex jakamā kuma nē ām kuma nē axtem nē ri axpēn mā hā hpēr o axkē. Hāmri nhūm Jejus

mē hanor pa nē hitom kām htyk xwÿnh wÿr ār kaxyw nē amnhî kōt Juāw nē Xiakre nē Simāw Pētre nē kaxyw htyk xwÿnh katorxā nē hipēxā pix amnhî kōt mē ho axā.

⁴¹ Hāmri nē htyk xwÿnh ta wÿr tē nē hpa hā kupy nē kām kapēr nē kām:

—Pa? E kwa kānhmā nhÿ. Anē.

Nom amnhî kapēr kām harē nē kām:

—Tarit kūm. Anē.

⁴² Hāmri nhūm kānhmā ſr kurē kumrēx nē kānhmā xa nē ri mra. Na pre ra hprēk nē ty. Na ra hā amgrā kēp 12 tā ty nhūm Jejus akupÿm ho htūr nē kānhmā ſr nhūm kānhmā xa nē ri mra.

⁴³ Hāmri nhūm kuri omunh xwÿnhjaja amnhî jaēr pē omu nē kamā no pyma nē hkĭnh tÿx kumrēx. Hāmri nhūm Jejus katorxā mē hipēxāja wa kām:

—E mān ra kām prām nē. Wa tokyx kām mēmoj japēr kē kukrē. Nom kēr ka wa inhmar kumrēx. Kēr ka wa akupÿm ixte ho htūr ā ri mē kām ijarēnh o ri apa hkēt nē. Ām kwarī ho kwarī. Anē.

6

Najare nhō xwÿnhjaja kot Jejus kaga hā mē harēnh

Matēwre 13.53-58; Rukre 4.16-30; Juāw 1.11

¹ Tā nhūm Jejus ma ō krī pē Najare hwÿr ma akupÿm mō nhūm hkōt mē pa ho mē pa xwÿnhjaja ma hkōt mō.

² Hāmri nē hwÿr pōj. Nhūm mē ō arĭgromnu pē sap kator jakamā nhūm Jejus ma Tirtūm kapēr o mē ahkre xā hā ixkre hwÿr tē. Hāmri nē kamā mē ahkre ho nhÿ nhūm mē amnhî jaēr pē kapēr mex ā kuma nē tee ri axpēn pumunh pē hamaxpēr o hkrī. Jejus kēp mē hkwy hā hkamnhix nom nhūm mē kurom āhpumunh tÿx nē kapēr mex jakamā nhūm mē kuma nē tee ri hamaxpēr o hkrī. Hāmri nē axpēn mā:

³ —Kwa kēp mē panhīō htā tanhmā kot we amnhî to nē ā āhpumunh tÿx kōt mē pamā kapēr anē nē ri mē kām aa mē kot mēmoj pumunh kēt kwÿ ho anhÿr o pa? Mē panoo mā na pre hprēk. Kēp ſi kuprār xwÿnh Juje mē hprō Marir wa hkra na. Nē htō Xiakre nē Juje nē Simāw nē Jutja ra mē pahte mē kēp htō hā omunh mex. Nē htōxjaja jar mē pakamā pa nhūm mē pahte mē omunh mex kēnā kot kēt we mē kurom ā āhpumunh tÿx anē. Anē.

Anhÿr o axpēn mā harē. Hāmri nē kamā gryk nē hkaga

⁴⁻⁶ nhūm tee ri amnhî tā mē omu nē hamaxpēr o:

—Hēxta waa nē. Mē kām amnhî kaxyw ixkōt hamaxpēr prām kēt kumrēx. Anē.

Hāmri nē mē kām:

—Nà Tirtùm nhÿ hã kapêr jarênh o mē pa xwÿnhjaja na htem krÿ hkwy kamã kãm mē mar prãm nē. Nom ô krÿ kamã mē kot karàre rùm hprêk o môr kãm omunh xwÿnhjaja na htem kuma nē ãm kuma. Anê.

Hãmri nhùm mē kot amnhÿ kaxyw hkôt hamaxpêr kêt jakamã nhùm tee ri mē kãm aa mē kot mēmoj pumunh kêt kwÿ ho anhÿr rax prãm kaprÿ. Nē ãm mē à xwÿnhjê ho grêre nē mē hã ìhkra jaxwy nē akupÿm mē ho mex. Hãmri nē mē kurùm kato nē ma krÿ hkwy hkôt ri Tirtùm kapêr o mē ahkre ho pa.

Jejus kot mēmoj tã mē kēp 12jê mã karô hã harênh

Matêwre 10.5-15; Rukre 9.1-6, 10.1-12; mãânên Atre 13.50-51, 18.6

⁷ Tã nhùm Jejus amnhÿ wÿr mē kot ÿ hã mē ahkre ho pa xwÿnhjê pē 12jê hwÿ. Ra kot amnhÿ kaxyw mē rênh xwÿnhjaja nhùm amnhÿ wÿr mē kuwy. Hãmri nē axpên kaxyw mē ho axkrut nē mē kurê nē mē kãm mē àpênh ã karô nē ma mē hkwyjê hwÿr mē kurê. Nē mē kãm:

—E kër ka mē ma mē pahkwÿjê hwÿr mra nē inhÿ hã Tirtùm kapêr jarênh o ri mē hkôt apa. Nē mē kurùm mēkarômnuti japôx o ri mē hkôt apa.

⁸⁻⁹ Nom kër ka mē amnhÿ kôt akurêx rax nē ri apa hkêt nē. Nē kawã htu nē ho ri apa hkêt nē. Nē amnhÿ kôt axâpkur xã ho ri apa hkêt nē. Rÿ akâxpore rax nē ri ho apa hkêt nē. ãm mē anhô kamis nē mē apar kã ho pixire nē agjê nē ri hã apa. Nē mē amnhÿ kaxpar xã hã mē anhô kô pix o apa. Mē ã inhÿ kamã mē hkôt ri apa anê.

¹⁰ —Nê kër ka mē nhÿri krÿ hõ hwÿr pôj. Nê apôx xã kamã mēhõ nhôrkwÿ kamã hkôt ri apikamênh tãmtã kurùm akupÿm ajapôj nē ma hpãnhã nhãm krÿ hõ hwÿr apa. Nom atÿx ri nhãm mē hwÿr amrar nē nhãm mē hwÿr amrar kêt nē.

¹¹ —Nê koja mē nhÿri mē akapêr kaga ka mē tee ri amnhÿ tã mē kamã ama hãmri nē tokyx mē kurùm ajapôj nē ma apa. Nê anojarêt nē mē noo mã akuhê nē amnhÿ par ã awjagrô kapÿ. Mē kot Tirtùm kaga hã amnhÿ pumunh nhùm kot amnhÿ pyrã nē mē hkaga hã omunh kaxyw ka mē ã mē noo mã amnhÿ nhÿpêx anê. Hãmri nē hpãnhã ma nhÿhÿm apa.

¹² Anhÿr o mē kãm mē àpênh ã karô. Nhùm mē kuma nē hapôj nē ma mē hkwyjê hkôt pa. Ma krÿ piitã hkôt Tirtùm kapêr o mē ahkre ho ri mē hkôt pa nē mē kãm:

—E kwa mē tokyx amã ate amnhÿ tomnuj kaga hprãm xãj Tirtùm kôt mãn amnhÿ xunhwÿ. Anê.

¹³ Hãmri nē mē nē mēkarômnuti jano. Nê akupÿm mē à xwÿnhjê ho mex kaxyw mēmo htwÿm o mē hkrã gregrer nē Jejus nhÿ hã akupÿm mē ho mex.

Mē kot Juãw Paxis pÿr ã mē harênh

Matêwre 14.1-12; Rukre 9.7-9

¹⁴ Tã nhùm mē piitã Jejus jarênh ma nē axpên mã tanhmã harênh to ho pa. Nom ahpÿnhã tanhmã harênh to. Na prem kamã harênh o:

—Nà Juãw Paxis pimràata na. Pêr akupÿm hÿr jakamã na hte ã mē kot aa mēmoj pumunh kêt kwÿ ho anhÿr o pa. Anê.

¹⁵ Nê kamã axtem harênh o:

—Nà tãm kêt. Pêr finat Eris na. Anê.

Nê kamã axtem harênh o:

—Nà tãm kêt. Pêr Tirtùm nhÿ hã kapêr jarênh xwÿnhjê hõ na. Te kot amnepê mã mē kot Tirtùm nhÿ hã tanhmã amnhÿ nhÿpêx to xwÿnhjê kot amnhÿ nhÿpêx pyrãk o kot amnhÿ nhÿpêx kênã.

Anhÿr o ahpÿnhã harê.

¹⁶ Hãmri nhùm Ijaew o amnhÿptar xwÿnhjê pē Eroxo ãxipasja mē kot ã harênh anhÿr ã mē kuma nē Juãw Paxis mã hamaxpêr kurê kumrêx. Hãmri nē mē kãm:

—Nà pêr Juãw Paxista na. Ixte mē kãm hã ixãmnnênh nhùm mē kot inhãm mut krãhyr xwÿnhjaja mãn ra tanhmã amnhÿ to nē akupÿm hÿr. Anê.

¹⁷⁻²⁰ Na pre ra pahi Eroxo ãxipasja htô Pirip pē hprô Eroxis pytã nē ho hprô nhùm hkra niti mē wa hwÿr ahpa. Hãmri nhùm Juãw Paxisja tee ri ja hã pahihiti Eroxo ãxipasja pumu nē hã kãm akir nē kãm:

—Tk. Kwa Tirtùm kēp ja omnuj. Ra kot ja nē mē pahkurê htã ka axtem nē ã amnhÿ nhÿpêx anê.

Anhÿr jakamã nhùm hprô Eroxisja amnhÿ tã kuma nē kamã gryk tÿx nē. Nê kãm hpÿr prãm nē. No nhùm pahi Eroxo ãxipas kãm hpÿr prãm kêt nē. Juãw Paxis kot Tirtùm kôt amnhÿ nhÿpêx nhùm kot hã omunh mex jakamã kãm hpÿr prãm kêt nē. Juãw na pre hte xatã kãm Tirtùm kapêr jarênh o pa. Nhùm pahihiti Eroxo ãxipasja kormã hpÿr hã mar mex kêt tã hã hpÿjaãm nē kãm mar prãm nē. Nom nhùm hprô kãm hpÿr prãm jakamã nhùm kēp mē kãm hã amÿné nhùm mē ma o tē nē haxã nhùm mex nē mē hagjênh xã kamã hkrÿ ho krÿ.

²¹⁻²⁴ Tã nhùm jãã nhùm pahi Eroxo ãxipas kator ã arÿgo kato nhùm mē piitã hwÿr mra nē hã akuprô nē hã hkÿnh nē hã apkur o hkrÿ. Ô kôwenatôjaja nē hkrãmnhwÿjaja nē krÿ hkwy kamã mē pahijaja nhùm mē ohtô nē hã akuprô nē hã hkÿnh. Hãmri nhùm hprô Eroxis kra nitija mē hwÿr axã nē mē kãm gre. Mē kot omunh nē kamã hkurê pix kaxyw mē noo mã hpÿjaãm kêt nē ã mē kãm gre anê. Hãmri nhùm pahi Eroxo omu nhùm ja kãm mex nē nhùm mē piitã hkÿnh nē kamã nopyma nē. Nê gre kãm hpÿjaãm kêt nē tanhmã mē kãm gre to nhùm mē omu nē kamã no pyma nē. Hãmri nhùm pahi Eroxo ãxipasja kãm:

—Nà ãm hãmri. Na ka mẽ inhmã agrer mex nẽ. Jakamã kwa mãmri mẽmoj tã ixwỳ. Amã mẽmoj prãm xà hkõt inhmã mẽmoj jarẽ pa amã kugõ. ãm hãmri na pa amã amnhĩ jarẽ. Na pa Tirtũm noo mã ã amã amnhĩ jarẽnh anẽ. Ka mamri ixkukrẽx mex kwỳ hã ixwỳ pu axpẽn mã ho axkjẽ. E mẽmo na amã hprãm? Anẽ.

Hãmri nhũm kuma nẽ ma katorxã hwỳr tẽ nẽ kãm harẽ nẽ kãm:

—Xẽ mẽmoj tã kot paj we kuwỳ? Anẽ.

Hãmri nhũm kuma nẽ hamaxpẽr o:

—Ma ãm hãmri koja mẽ tã jarãhã inhmã Juãw Paxis pĩ. Anẽ.

Hãmri nẽ hkrata mã kãm:

—Ma Juãw Paxis krã hã kot kaj awỳ kẽ mẽ amã kugõ ka man ixwỳr o tẽ. Anẽ.

²⁵ Hãmri nhũm kuma nẽ akupỳm pahi hwỳr axã nẽ kãm:

—Ma Juãw Paxis krã kot kaj inhmã agõ. Pasiiti kamã axã nẽ inhmã agõ pa ma amnhĩm o ixtẽm kurẽ kumrẽx. ãm ja pix na inhmã hprãm. Anẽ.

²⁶ Hãmri nhũm tee ri kuma nẽ hkapri nẽ. Nẽ hamaxpẽr o:

—Hẽxta waa nẽ. Inhmã hpĩr prãm kêt. Nom ra ixte ixkutã mẽ hkrĩ xwỳnhjẽ noo mã inhmã kãm mẽmoj prãm xwỳnh nhõr ã amnhĩ jarẽnh nhũm ixte kãm õr ã amnhĩ jarẽnh nhũm mẽ piitã mẽ kot inhmar jakamã tanhmã kot pa we amnhĩ to nẽ kęp nẽ? Nà pa nẽ hkêt nẽ. Anẽ.

²⁷ Hãmri nẽ õ põristijẽ mã kãm:

—E mẽ ma Juãw Paxis wỳr mra nẽ mut krãhta nẽ pasiiti kamã hkrã xà nẽ akupỳn o tẽ nẽ kãm agõ. Anẽ.

Hãmri nhũm mẽ kuma nẽ ma mẽ hagiẽnh xã hwỳr mra nẽ Juãw wỳr axã hãmri nẽ mut krãhta.

²⁸ Hãmri nẽ pasiiti kamã hkrã xà nẽ akupỳm o tẽ nẽ kot hã hwỳr xwỳnh mã kugõ nhũm kumỳ nẽ ma katorxã hwỳr o tẽ nẽ kãm kugõ.

²⁹ Hãmri nhũm Juãw Paxis kõt mẽ pa ho mẽ pa xwỳnhjaja tee ri harẽnh ma nẽ hkapri htỳx nẽ. Hãmri nẽ pahi Erox ãxipas wỳr mra nẽ ì hã kuwỳ nhũm mẽ kãm kugõ nhũm mẽ kumỳ nẽ ma o mra nẽ kẽn kre kamã hxã.

Jejus kot mẽ ho 5.000 nẽ mẽ kãm õ hã harẽnh

Matẽwre 14.13-21; Rukre 9.10-17; Juãw 6.1-14

³⁰ Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỳn Jejus wỳr mõn põi nẽ kãm amnhĩ jarẽ. Tanhmã mẽ kot mẽ ahkre hto ho pa nẽ tanhmã mẽ ho mex to ho pa hã kãm amnhĩ jarẽnh pa.

³¹ Tã nhũm mẽ piitã axpẽn pãnhã kot Jejus mar kaxyw mẽ hwỳr mra nhũm mẽ kormã apkur kêt nẽ. Jakamã nhũm Jejus hkõt mẽ pa ho mẽ pa xwỳnhjẽ mã:

—E ma pu mẽ awrã kaprỳ hwỳr mõ nẽ nhỹri pahkrĩ nẽ pakõkõt nẽ apku.

³² Anẽ hãmri nhũm mẽ gõx kãm kanõre wỳr agjẽ nẽ ma ahte xarmã awrã kaprỳ hwỳr mõ.

³³ Nhũm krĩ hkwy nhõ xwỳnhjaja mẽ omu hãmri nẽ nhỹhỹm mẽ mõr xã hã mẽ omunh kurẽ kumrẽx. Hãmri nẽ krĩ hkwy rũm ma mẽ ìhkrep mra nẽ mẽ kãm amnhĩ to wa nẽ põi nẽ mẽ kutẽp hkrĩ.

³⁴ Hãmri nhũm mẽ mõ nẽ mẽ hwỳr põi nẽ kre kura nẽ kanõre nhõ. Hãmri nhũm Jejus mẽ hwỳr api nẽ mẽ omu nẽ hamaxpẽr o:

—Hẽxta waa nẽ. Na mẽ omnu nẽ pa. Te mẽ kęp õwẽhti jamãr xwỳnh kêt nẽ htỳx ri pa xwỳnh kot amnhĩ nhĩpẽx pyrãk. Mẽhõ kot mẽ kamã ukapri nẽ tanhmã mẽ ho mex to ho pa? Anẽ.

Hãmri nẽ mẽ kamã ukapri nẽ xa nẽ Tirtũm kapẽr o mẽ ahkre rax nẽ.

³⁵⁻³⁶ Tã nhũm myt ãr kaxyw nhũm hkõt mẽ kot pa ho pa xwỳnhjaja hwỳr mra nẽ kãm:

—Kwa hãmri na ra amỳkry htỳx nẽ. Mẽ hano kẽ mẽ ma nhỹri krĩ hkwy hwỳr mra nẽ tokyx amnhĩm mẽmoj japrõ nẽ kuku nẽ hikwỳ nẽ gõr. Mo jar kapõt ã mẽ apkur xã? Anẽ.

³⁷ Hãmri nhũm mẽ kuma nẽ mẽ kãm:

—Kwa nã mẽ kamjaja mẽ kãm mẽmoj gõ kẽ mẽ kuku. Anẽ.

Hãmri nhũm mẽ kuma nẽ tee ri hamaxpẽr nẽ kãm:

—Kwa mo mẽ kaxyw mẽ pakãxpore rax? Kot pu mẽ pakãxpore ho 200 nẽ ho mẽ kãm mẽmoj japrõr tã nom nhũm mẽ ãm ho hkryre nẽ kuku nẽ ho õhy htu hkêt nẽ. Mẽ ohtõ rax kumrẽx kẽnã. Anẽ.

³⁸ Hãmri nhũm mẽ kãm:

—Nà kot puj mẽ kãm mẽmoj japrõr kêt nẽ. No mẽ panhõ pãwtita? Tanhmã na arĩ kute? E mẽ atõ tẽ nẽ omu nẽ akupỳn tẽ nẽ inhmã harẽ. Anẽ.

Hãmri nhũm ja ma tẽ nẽ omu nẽ akupỳn tẽ nẽ kãm:

—Nã pãwti ãm kęp 5 pix. Nẽ kaxyw tep ãm pijakrutre. Anẽ.

³⁹ Hãmri nhũm Jejus kuma nẽ mẽ kãm:

—Tõe. Mẽ kãm anẽ kẽ mẽ ahpỳnhã ri hije nẽ hkrĩ. Anẽ.

⁴⁰ Hãmri nhũm mẽ piitã ahpỳnhã kęp 50 nẽ hije nẽ hkrĩ hpa.

⁴¹ Nhũm Jejus pãwti mẽ tepta jamỳ nẽ kãnhmã kaxkwa hwỳr rĩt nẽ Tirtũm mã kupẽ nẽ kãm harẽ nẽ kãm:

—Pa Papaj? Nã ka na apẽ mẽ inhmã mẽ inhõ ho apa xwỳnh jakamã amex o amex. Anẽ.

Hãmri nẽ mẽ kãm ho hkry hpa nẽ hkõt mẽ pa ho mẽ pa xwỳnhjẽ mã kugõ nhũm mẽ õ ri ho mra nẽ ho mẽ hipẽx pa. Pãwti mẽ tepta nhũm mẽ ho mẽ hipẽx pa.

42-44 Nhũm mē piitā apkur mex nē. Mēōja mē kēp grire htā nhũm Jejus tanhmā mē kām ho rax to nhũm mē ohtō rax tā piitā kuku nē ho ōhy htu hpa. Mēmyjaja kēp 5.000 nē kaxyw mē hprō nē mē hkrajaja nhũm mēōja ho mē hipēx pa nhũm arī hakrēx prā. Jakamā nhũm Jejus kōt mē pa ho mē pa xwýnhjaja akupým hakrēx o pikuprōnh pa nē ho kawā o 12 nē ho nýt.

*Jejus kot gō krāhkā hā htēm ā harēnh
Matēwre 14.22-33; Juāw 6.15-21*

45-46 Tā nhũm Jejus hkōt mē pa ho mē pa xwýnhjē mā kām:

–E mē kanōre mā axā nē ma akupým ixkukamā krī pē Petsēj wýr rē. Pa jajē jano hāmri nē ma tē nē nhýri Tirtũm mā amnhī jarē nē ri ma mē akōt tē. Anē.

Hāmri nhũm mē kuma nē kanōre mā gjēx pa nē ma mō nhũm Jejus mē kot mar xwýnhjē janor pa nē ma hixēt prēk ā api nē Tirtũm mā amnhī jarēnh o nhý.

47 Tā nhũm kamāt nhũm arī ahte kýxpē nhý. Nhũm hkōt mē pa ho mē pa xwýnhjaja kormā kanōre kamā mō.

48 Hāmri nhũm Jejus amým mē omu nhũm kōk ra mē kutā àpēr týx kumrēx nhũm mē tee ri amnhī nhīpēx nē tee ri rrēmti ho gō rēnh nhīpēx o hkrī.

Tā nhũm ra krāhyre kà nhũm Jejus Tirtũm mā amnhī jarēnh pa nē kànhmā xa nē ma mē hkōt tē. Nom kanōre kamā htēm kēt nē gō krāhkā hā xa nē mē hwýr hpar o tē.

49-50 Hāmri nē mē hwýr kato nē mē kamā hamak kaxyw hēx rom kot mē hakrenh mā. Nhũm mē amnhī wýr omu nē mēkarō hā hkamnhīx nē tee ri amnhī kukamā hamaxpēr nē umaj htertēt nē àmra rax nē. Hāmri nhũm mē kām:

–Tk. Kwa mē amā ma hkēt nē. Pa na pa ma mē akōt tē. Anē.

51 Hāmri nē mē hwýr kanōre hkrem axā nhũm kōk xàpēr týxta hapēx. Hāmri nhũm mē Jejus kamā no puma nē tee ri hamaxpēr nē axpēn mā:

–Kokýy. Tanhmā na we amnhī to nē gō krāhkā hā hpar o man mē pahkōt tē mē pahwýr àr mē nhũm kōk hapēx par kurē kumrēx. Anē.

Hāmri nē tee ri kot ā amnhī nhīpēx anhýrja kukamā hamaxpēr o hkrī.

52 Kormā mē kot hprī hā Jejus tanhmā kute hā omunh kēt jakamā. Tirtũm pyrā nē àhpumunh o àhpumunh ā omunh mex kēt jakamā tee ri pāwti grēre ho mē hipēx par nē gō krāhkā hā htēm nē kōk o pinhkrēnh ā omu nē tee ri ā kot amnhī nhīpēx anhýrja kukamā hamaxpēr.

*Kenējare kamā Jejus kot akupým mē ho mex ā harēnh
Matēwre 14.34-36*

53 Tā nhũm mē xarmā rē nē krī pē Jenējare hwýr pōj. Hāmri nē kanōre nhō

54 nē api nē kuhē nhũm krī nhō xwýnhjaja Jejus pumunh kurē kumrēx nē axpēn mā:

–Kwa pēr Jejusta na mō. Nà tām kēnā. Anē.

55 Hāmri nē hkīnh nē ma kape hā mē à xwýnhjē hkōt mrar kurē kumrēx nē mē harir xā rāhā mē hamý nē akupým Jejus wýr mē o mra. Nhýri hpōx xā kamā omu nē hwýr mē o mra.

56 Na pre htem ā Jejus nhīpēx anē. Jakamā nhũm hte ma nhýhým mra. Krī rūnh kōt mra nē krī hkryre hkōt mra nhũm mē omu nē hwýr mē à xwýnhjē ho mra nē mē ho kuwý nē kām:

–Pa? Kwa kē jajaja akupým mex kaxyw apē axē pix kupē nā? Anē.

Hāmri nhũm mē kām:

–Tōe. Nà kwār mē māmri hkupē. Anē.

Hāmri nē mē kot kēp ē kupēnh xwýnh piitā akupým mex pa.

7

*Mē higēt hkōt mē kot amnhī nhīpēx
xwýnhjē jarēnh*

Matēwre 5.21-48, 15.1-20

1-4 Tā nhũm Mojes kapēr o mē ahkre o mē pa xwýnh kwýjaja Jerujarē rüm Jejus wýr mō. Hāmri nē hā akuprō nē hkōt mē pa ho mē pa xwýnhjē kot amnhī nhīpēx ā mē omunh o kuhē. Ijaew na prem mē hkukamā mē higētjē kapēr kōt ri tanhmā amnhī nhīpēx to ho pa. Jakamā mē urāk nē apkur kaxyw nē xatā amnhī nhīhkra kuhōnh japjē nē rī kormā apku. No mē amnhī nhīhkra grā pix kuhōnh nē hkrī nē apkur kēt nē. Kuhōnh japjē nē kormā hkrī nē apku. Tirtũm kot ja hā mē omunh nē amnhūm mē mex ā mē harēnh ā amnhī kamnhīx jakamā na prem ā amnhī nhīpēx anhýr o pa. Nē nhýri amnhūm mēō hkwy japrō nē akupým ōrkwý hwýr o mra nē haxwý nē mē higēt pyrā nē wýr japjē rūnh kumrēx nē rī kormā apku. Nē mē urāk nē poti nē gōj nē papēre hkre kahōnh japjē rūnh nē rī kormā kamā ō nhīpēx. Mē higēt pyrā nē ā amnhī nhīpēx anhýr o pa. Tirtũm kot ja hā mē omunh nē amnhūm mē mex ā mē harēnh prām xāj. Nom nhũm Jejus kōt mē pa xwýnhjaja na prem ā amnhī nhīpēx anhýr kēt nē. Na prem apkur kaxyw nē katāt kōt amnhī nhīhkra kuhō nē àmhīx apkur o hkrī. Jakamā nhũm Parijew nhō xwýnh mē Tirtũm kapēr tũm o mē ahkre xwýnhjaja tee ri ā mē kot amnhī nhīpēx anhýr ā mē omu nē mē hā Jejus kukja nē kām:

5 –Pa Jejus? Kwa mē inhmā mēmoj jarē. Amnepēm mē panhīgētjaja na pre htem apkur kaxyw nē amnhī nhīhkra kuhōnh japjē rūnh kumrēx nē arī kormā hkrīn apku.

Jakamā na pa htem mē urāk nē ā amnhī nhīpēx anē. No akōt mē pa ho mē pa xwýnhjaja na htem ho mē ixpyrà kēt nē. Kwa mo na htem ā amnhī nhīpēx anhýr kēt nē? Anē.

⁶ Hāmri nhūm mē kuma nē mē kām amnepēm Tirtūm nhý hā kapēr xwýnh pē Ijais kapēr jarē nē mē kām:

—Nā ām hāmri na pre finat Ijaisja amnepēm tanhmā mē ajarēnh to. Te Tirtūm tām kapēr pyràk o mē ajarē nē mē ajarēnh o:

Mē kām ixkīnh ā amnhī jarēnh tā mē kām ixkīnh kēt. Na htem ām kām ixprām ā amnhī jarēnh kapry.

⁷ Mē kot ixkapēr kuha hā amnhī krā hkōt mēmoj tā hkwyjē mā karō ho pa jakamā na htem ām kot ixkōt amnhī nhīpēx ā amnhī jarēnh kapry. Anē.

Ā na pre mē ajarēnh anē.

⁸⁻⁹ ām hāmri na pre mē ajarē. Na ka htem mē panhīgēt kapēr kōt pix mā amnhī nhīpēx o apaja gryk ā ra Tirtūm kapēr kaga hpa. Te mē akapēr mex o kot Tirtūm kapēr jakrenh pyràk.

¹⁰ Na pre finat Mojes Tirtūm nhý hā mēmoj tā mē pamā karō ho:

Ker ka mē anhīpēxā nē mē akatorxā wa hā apijaam o ri apa. Jao wa kutā anojarēt rāhā nē. Nom kot kaj mē ho mex hkēt nē tanhmā mē kām akapēr punuj to hāmri nhūm mē akwýjaja ja mýrapē mē apa. Anē.

Na pre ā finat Mojesja Tirtūm nhý hā mē pamā karō anē.

¹¹ No mē kajaja na ka mē axtem nē tanhmā akwýjē mā ja hā karō hto nē mē kām: “Kot kaj mē mēmo arīgro hā akāxpore hkwy nom anhīpēxā ho ajuta kaxyw kām hkwy nhōr kēt nē. Ām wa kām ate ho ajuta kēt ā amnhī jarē hāmri nē Tirtūm mā amnhī jarēnh xā hā ixkre hwýr mām o tē nē mē ixte ixkre ho mex kaxyw mē inhmā agō. Kot kaj mē ā amnhī nhīpēx anē nhūm Tirtūm ja hā mē apumu nhūm ja kām mex nē. E kēr ka mē ā amnhī nhīpēx anhýr o ri apa.” Anhýr o na ka htem akwýjē mā karō.

¹² Jao mē kot mē hipēxā nē mē katorxā ho ajuta nē mē hkurē.

¹³ Te mē amā mē panhīgēt kapēr mex o kot Tirtūm kapēr jakrenh pyràk o na ka htem amnhī nhīpēx. Jao te Tirtūm kapēr mex kēt pyràk o hipēx nē mar kēt nē apa. Ā na ka htem Tirtūm kapēr kuha hā amnhī nhīpēx anhýr o ri apa. Anē.

Mē pajamaxpēr punuj kōt mē pahomnu hā harēnh

Matēwre 15.10-20

¹⁴ Tā nhūm Jejus Parijew nhō xwýnhjē mē hkwyjē mā kapēr pa hāmri nē amnhī wýr ra mē kot mar o kuhē xwýnhjē mā hpa ho apē nē mē kām:

—E pa mē amā mēmoj jarē ka mē inhma nē inhamr mex nē.

¹⁵⁻¹⁶ Na hte Tirtūm kapēr tūm o mē ahkre xwýnhjaja amnhī krā hkōt mē ate amnhī nhīkra kuhōnh japjē hā mē amā karō ho pa. Nē amnhī krā hkōt mē axāpkur xā hā tanhmā mē amā karō hto ho pa. Mē ate ā amnhī nhīpēx anhýr nhūm Tirtūm kot ja hā mē apumunh kōt amnhīm mē amex ā mē ajarēnh kaxyw nhūm htem ā axāpkur xā hā amā karō anē. Nom na hte Tirtūm tanhmā mē panhīkra kuhōnh to hā mē pahpumu nē ām hā mē pa hpumu. Nē mēmo mē paxāpkur xā hā mē pahpumu nē ām hā mē pahpumu. Ja kām tanhmā kute hkēt. Na hte ja hā mē omunh xā hkōt amnhīm mē mex ā mē harēnh rý mē mex kēt ā mē harēnh kēt nē. Rý mē hakwa ho mēmoj kur ā mē omunh xā hkōt tanhmā mē harēnh to hkēt nē. Ām mē hakwa ho tanhmā kapēr to pix ā mē mar kōt na hte tanhmā mē harēnh to.

Anhýr o mē kām kapēr.

¹⁷ Hāmri nē mē kot mar o kuhē xwýnhjē re nē hkōt mē pa ho mē pa xwýnhjē mē mē amnhīm hikranh xā hā ixkre hwýr agjē. Hāmri nhūm hkōt mē pa ho mē pa xwýnhjaja tee ri Jejus kot tanhmā mē hakwa jarēnh to hā kuma nē hā hkukja nē kām:

—Kwa mon ka ri mē inhmā ā ja jarēnh anē? Anē.

¹⁸ Hāmri nhūm mē kām:

—Kwa xān ka mē kormā aprī hā ja mar mex kēt nē? E pa ixprī hā mē amā harē ka mē inhma. Nā mē apkur xā na hte mē hkrā hi kamā mē hamaxpēr wýr gjēx kēt nē.

¹⁹ Na hte ām mē ōhy pix wýr agjē nē gaa nē nhām hapōj nē hapēx. Na htem mē apkur xā nhý hā tanhmā amnhī tomnu to hkēt nē. Jakamā na hte Tirtūm mē apkur xā hā mē omunh xā hkōt tanhmā mē harēnh to hkēt nē. Anē.

Nhūm pre ā mē kām kapēr anhýr o mē paxāpkur xā piitā mex ā harē. Jakamā na hte Tirtūm krajaja amnhīx mēmoj piitā hkur o pa nē kām mēmoj kur puma hkēt nē. Jakamā nhūm Jejus ā mē kām kapēr anē nē mē kām:

²⁰ —Mē hkrā hi kamā mē hamaxpēr punuj pix nhý hā na htem tanhmā amnhī tomnuj to. Jakamā na hte Tirtūm tanhmā mē hamaxpēr to ho pa hā mē omunh xā hkōt tanhmā mē harēnh to. Nom mē kot mēmoj kur ā mē omunh xā hkōt rý mē ihkra kuhōnh japjē hā mē omunh xā hkōt tanhmā mē harēnh to hkēt nē. Ja tanhmā kēp kute hkēt.

²¹⁻²² Nom koja mēhō hamaxpēr punuj nē ra hkōt tanhmā amnhī tomnuj to.

Jao axpēn kamā hpijaam kēt nē.

Rý mēhōx pí rý mē kēp ahkī.

Rý mē kēp mē hprō rý mēhkupry ho amnhīkati.

Rý ri axpēn pē ōxy.

Rý tanhmā hkwyjē homnuj to.

Rỳ tanhmã më ho kapër punuj to.
 Rỳ hëx rom më no kupyr o ri pa.
 Rỳ mëmoj tâ amnhî to jarark o pa.
 Rỳ axpën kukrëx pumu në kãm ho õ
 hprãm xàj hã õ xwýnhhta kamã gryk.
 Rỳ htýx ri tanhmã amnhî nhípëx to.
 Më hamaxpër punuj jakamã na htem ã ri
 amnhî nhípëx anhýr o pa.
 23 Tã ã më kot amnhî nhípëx anhýr ã më
 omunh xã hkõt na hte Tirtùm më kot amnhî
 tomnuj xwýnh hã më harë. Anë.

*Mëhõ kot hkra kaxyw Jejus mã hamaxpër
 ã harënh*

Matêwre 5.21-28

24 Tã nhùm Jejus më hkõt më pa ho më pa
 xwýnhjaja nhýnhým nojarët hãmri në krî rùm
 hapój në ma krî pê Xir pu hã ri pa. Hãmri
 nhùm Jejus hkwyjê mã:

–E kwa pu më tokyx ixkre müj wýr mõ
 më kuri pój në kamã amnhîm hkra. Pu më
 pahpõx tokyx anë kê krî nhõ xwýnhjaja më
 pahpõx ã më pahpumunh kêt në.

Anhýr tâ nom nhùm më piitã më harënh
 ma në më hã akuprõ.

25-26 Nhùm mëhõ ni haxwýja Jejus hpõx
 ã harënh ma në ma hwýr tẽ. Nom kęp
 Ijaew kêt axtem Gres nhõ xwýnh na pre.
 Pika pê Sir kamã krî më kot kãm “Wëniš”
 anhýr xwýnh kamã na pre kato. Nhùm pre
 mëkarõmnuti kęp hkra ni mã axã. Hãmri
 nhùm õ mãmaj tee ri omu në ra Jejus hpõx
 ã harënh ma në ma hwýr tẽ. Hãmri në hwýr
 axã ã në hparpë hkõnkrã ho htëm në nhý në
 kãm:

–Xë Pahiti. Inhmã ixkra në mëkarõmnuti
 jano kê ma tẽ kê akupým inhmã mex. Anë.

27 Hãmri nhùm kãm:

–Nã kormã. Na pre Tirtùm taxy kormã
 Ijaewjê pix wýr inhmë. Jakamã na pa ko-
 rmã nhãm më akwýjê hõ tanhmã më ato
 mex to hkët në. Anë.

28 Hãmri nhùm tee ri amnhî tâ kuma në
 kãm:

–Ma ãm hãmri na ka ja jarë. Ixpë Ijaew
 kêt tâ nom më kuxwar we ixto mex grire kêt
 wehe. Anë.

29 Hãmri nhùm kãm:

–Nã ãm hãmri na ka ã akra kaxyw inhmã
 ajamaxpër týx anë. Jakamã kot paj në
 mëkarõmnutita jano. Koja axte tanhmã apë
 ho hkët në. E ma akupým hwýr tẽ në omu.
 Anë.

30 Hãmri nhùm kuma në ma akupým õrkwý
 hwýr tẽ në omu. Nhùm ra mëkarõmnutija kęp
 kato në ma tẽ nhùm akupým tãm hkrã në
 hkính në par kãm hkõkõt o nõ.

Hamak kro në kapër krok xwýnh jarënh

Matêwre 15.29-31

31 Tã nhùm Jejus më hkõt më pa ho më pa
 xwýnhjaja krî pê Xir rùm hapój në akupým

gõ rax pê Garirej wýr ma mra. Pyka pê Sitõ
 jakre në mõ në pyka pê Tekap jakre.

32 Hãmri në kormã hpõx o mõr rôm nhùm
 më amnhî wýr Jejus pumu në hwýr mëhõ
 myja o tẽ. Kapër krok në umar kêt xwýnhhta
 nhùm më wýr o tẽ në kãm:

–Pa? Ot pa më awýr ixkrãmnhwýta o tẽ.
 Kwa hã anhîhkra xi kê akupým më inhmã
 mex. Anë.

33 Hãmri nhùm omu në hpa hã kupy në
 më kęp o kato në nhýri më hkãx ã o xa. Në
 akutã hamak kre kupë në argõx më në ho
 õhto htok.

34 Hãmri në kaxkwa hwýr rît në htyk xã
 mënh týx në kãm kapër. Më pakapër kãm
 kãm: “E ajamak katër në anhõhto kaxkrit.”
 Anë. Nom kapër kãm kãm: “Epata.” Anë.

35 Hãmri nhùm hamak katër në õhto
 kaxkrit kurë kumrëx në tãm kapër në tãm
 ama.

36-37 Hãmri nhùm më kot omunh xwýnhjaja
 amnhî jaër pê Jejus kot ho mex ã omu në
 kamã no pyma në. Hãmri nhùm më kãm:

–Kwa kêr ka më akwýjê mã ja hã ijarënh
 kêt në.

Anhýr tâ no nhùm më kuma në ãm kuma
 në ma më piitã më kãm harënh o ri hprõt në
 më kãm:

–Kwa Jejus na mex o mex. Na hte
 më ho mex o pa nhùm më umar kêt
 xwýnhjaja akupým tãm ama nhùm më kapër
 kêt xwýnhjaja akupým tãm kapër. ãm hãmri
 na hte ã më hipëx anhýr o pa. Nã ãm mex o
 mex. Anë.

8

*Jejus kot më ho 4.000 në më kãm më õ hã
 harënh*

Matêwre 15.32-39

1-2 Tã nhùm arîgro hõ hã nhùm më õhtõ në
 nhýri kapõt ã Jejus ã htu rax në kot më ahkre
 mar o kuhê hã apkati axkrunëpxi. Nhùm më
 apkur xã hã mëõja ra më kęp hapëx. Hãmri
 nhùm Jejus ja hã më omu hãmri në hkõt më
 pa ho më pa xwýnhjê mã akir në më kãm hpa
 ho apë në më kãm:

–E më amnë ixwýr mra në ixkapër ma.
 Anë.

Nhùm më hwýr mra në kuhê nhùm më
 kãm:

–Kwa na pa inhmã më kot inhmar o kuhê
 xwýnhjê kaprî në. Na më ra më pahkõt ri pa
 hã apkati axkrunëpxi nhùm më apkur xã hã
 mëõja më kęp hapëx.

3 Më õ krî hwýr awry jakamã koja më
 mëmoj kur kêt rãhã ma akupým pa hãmri në
 pry hã hirok në rôrõk o pa. Hãmri pa inhmã
 më hkaprî në. Anë

4 Hãmri nhùm më kuma në axte tee ri
 hamaxpër në kãm:

—Kwa na nh̄h̄nh̄nh̄ kot puj kêt mē kām mēmoj to mra? Jar âm kapôt pix kênã. Anê.

Hāmri nh̄m mē kām:

⁵ —Nã tanhmã na mē anhõ pãwtija kute? Anê.

Nh̄m mē kām:

—Âm kêp 7 pix. Nê kaxyw tep kwỳ no âm grêre. Anê.

⁶ Hāmri nh̄m mē kuma nê mē kot mar o kuhê xw̄nhjê mã anê nh̄m mē kuma nê hkri pa. Hāmri nh̄m pãwti jamý nê ho Tirtũm wỳ nê kām:

—Pa Papaj. Nã ka na apê mē inhmã mē inhõ ho apa xw̄nh. Jakamã amex o amex. Âm amex kumrêx. Anê.

Hāmri nê mē kām ho hkry pa nê hkôt mē pa ho mē pa xw̄nhjê mã kugõ nh̄m mē ho mē hipêx pa.

⁷ Nh̄m hpãnhã tepta py nê mã ho anê nê ho Tirtũm wỳ. Hāmri nê hkôt mē pa ho mē pa xw̄nhjê mã kugõ nh̄m mē mã ho anê nê hamý nê ho mē hipêx pa.

⁸⁻⁹ Hāmri nh̄m mē ohtõ rax kumrêx tã piitã apku nê õhy htu pa. Mēmyjaja kêp 4.000 nê kaxyw mē hprõjaja nê mē hkrajaja. Tã nh̄m Jejus mē apkur xãja o mē hipêx pa. Nh̄m hkôt mē pa ho mē pa xw̄nhjaja hakrêx o akuprõ nê ho kawã ho 7 nê ho nyt. Hāmri nh̄m Jejus ma akupým mē õ kri hwýr mē kot mar xw̄nhjê jano nh̄m mē ma akupým hapêx.

¹⁰ Hāmri nh̄m Jejus hkôt mē pa ho mē pa xw̄nhjê mē ro hã kanõre hkrem agjê nê mē hkwym ma Tamanut wýr mõ.

Parijew nhõ xw̄nh kwỳ kot mēmoj tã Jejus kamã hamak ã mē harênh

Matêwre 12.38-42, 16.1-4; Rukre 12.54-59

¹¹ Tã nh̄m mē Tamanut wýr põj nh̄m Parijew nhõ xw̄nh kwýjaja Jejus pumu nê ma hwýr mra nê mēmoj tã kwý nê kām:

—Pa. Oht pa mē awýr mra. Kwa mē inhmã aa mē ixte mēmoj pumunh kêt õ ho anê. Pa mē ja hã apumu nê Tirtũm kot mē ixwýr amênh ã akôt ijamaxpêr kurê kumrêx. E tokyx. Anê.

Kot tee ri mē kām mēmoj to anhýr kaxyw nê ho anhýr kêt nh̄m mē kot hã omunh nê ma hkwyjê mã ho kapêr punuj kaxyw nh̄m mē ã hêx rom kãm kapêr anê.

¹² Nh̄m ra kãm mē kot amnhĩ kaxyw hkôt hamaxpêr kêt kãm ã kapêr anhýr mar kaga nê. Hāmri nê tee ri amnhĩ tã mē hamaxpêr ã mē omu nê htyk xã mênh tỳx nê mē kām:

—Hêxta waa nê. Mē ajamaxpêr punuj pix o na ka htem ri ajamaxpêr o apa. Ixpê Tirtũm kot mē awýr inhmênh xw̄nh tã ka mē ja hã ixkôt ajamaxpêr kêt nê. Nã mo kaxyw kot pa kêt mē amã mēmoj to anê? Kot paj ho anê ka mē omu nê âm omu nê ixkôt ajamaxpêr kêt nê. Nã kot paj mē amã mēmoj to anhýr kêt nê. Anê.

¹³ Hāmri nê mē kure nê hkôt mē pa ho mē pa xw̄nhjê mērohã ma mra nê akupým kanõre hkrem agjê nê ma xarmã mõ.

Jejus kôt mē pa xw̄nhjaja kot hprĩ hã omunh kêt ã mē harênh

Matêwre 16.5-12; mããñen Makre 6.52

¹⁴ Tã nh̄m mē kormã kanõre kamã xarmã mõr rom nh̄m Jejus kôt mē pa ho mē pa xw̄nhjaja tee ri mē apkur xã japêr nê axpên mã:

—Kwa hêxta waa nê. Na pu mē panhõ pãwti re nê amnhĩ kôt o pamõr kêt nê. Nê âm pixire nê o mõ. Anê.

¹⁵ Hāmri nh̄m Jejus tee ri mē kuma nê tanhmã hã mē kãm kapêr to. Nom mēmoj tã kuxi nê mē kãm awjárê nê mē kãm:

—Kwa oko kêr ka mē amnhĩ nê Parijew nhõ xw̄nh mē Pahi Erox nhõ pãw kaxkrit xã pumunh mex nê. Anê.

¹⁶ Hāmri nh̄m mē kuma nê tee ri kapêrja kukamã hamaxpêr pê hã axpên kukjêr o hkri nê axpên mã:

—Kwa mon na ri ã mē pamã pãw kaxkrit xã jarênh anê? Mãn mē panhõ pãwti hkêt ã mē pahpumu hã na ri ã harênh anê nã? Anê.

¹⁷ Hāmri nh̄m Jejus mē kapêr ã mē kuma nê mē kãm:

—Kwa mon ka wem âm xatã axpên mã mē panhõ pãwti hkêt jarênh pix o mõ? Xãn pa hte mē apyrã nê tee ri mē paxãpkur xã hkêt kukamã ijamaxpêr o ixpa? Nã inhmã ja tanhmã kute hkêt.

¹⁸ Ra mē ano ho mē ate ixpumunh mex tã kormã aprĩ hã tanhmã ixkute hã ixpumunh mex kêt. Nê mē ajamak o ixkapêr mar mex tã aprĩ hã mar tỳx kêt. Kwa wem ixte amnhĩ nh̄pêx mã ajamaxpêr tỳx nê. E mē inhmã mēmoj jarê.

¹⁹ Jãã ixte mē kêp 5.000 mã pãwti kêp 5 nh̄rênhta. Tanhmã na ka prem hakrêx o akuprõ nê ho kawã ho nyt to? E mē atõ inhmã harê. Anê

Hāmri nh̄m ja kãm: “Na pa prem ho kawã ho 12 nê ho nyt.” Anê.

²⁰ Nh̄m kuma nê mē kãm:

—Tý na pre hakrêx ã kawã kêp 12. Tã ham ixte mē kêp 4.000 mã pãwti kêp 7 nh̄rênhta. Tanhmã na ka prem hakrêx ho akuprõ nê ho kawã ho nyt to? Anê.

Nh̄m ja kãm: “Na pa prem ho 7.” Anê.

²¹ Hāmri nh̄m kuma nê mē kãm:

—Tý ra ixte mē anoo mã ã ja ho anhýr o axkrut tã ka mē ra hã ano hkêt nê arĩ axpên mã mē panhõ pãwti hkêt pix jarênh o ixkôt mõ. Kormã mē ate ixãhpumunh tỳx ã ixpumunh kêt. Anê.

Jejus kot akupým nohkre xw̄nh o mex ã harênh

Juãw 9.1-7

²² Tã nh̄m mē ma kri pê Pesêj wýr mõ nê ra hwýr põj. Hāmri nh̄m kri nhõ xw̄nh

kwýjaja mē omu nē Jejus wýr mēhō myja o tē. Ra nohkre nē rīt kēt nē pa xwýnhja nhūm mē hpa hā kupyn hwýr o tē. Hāmri nē ho kuwý nē kām:

—Pa Pahihti? Ot pa mē awýr ja ho tē. Kwa hā anhīkra xi nē akupým mē inhmā no ho mex. Anē.

²³ Hāmri nhūm mē kuma nē nohkre xwýnhja pumu nē hpa hā kupy nē o tē nē krī pē ho kato nē nhýri mē hkāx ā o xa. Hāmri nē no hā argōx mē nē hā īhkra xi nē kām:

—E mán ka mēmoj pumu nā? Anē.

²⁴ Hāmri nhūm kuma nē hkrākato nē ri rīt hāmri nē kām:

—Tý na pa mēmoj pumu. Nom ixprī hā omunh mex kēt nē. Te mēmo pī hpār kwý ri mrrar pyrāk. Anē.

²⁵ Hāmri nhūm axte no hā īhkra xi nhūm tā rīt mex nē. Ri hprī hā mēmoj piitā omunh mex nē.

²⁶ Hāmri nhūm Jejus akupým ōrkwý hwýr kumē nē kām:

—E kēr ka kape hā ri amrar kēt nē. Ām ma ma akupým anhōrkwý hwýr atēm kurē kumrēx. Anē.

Jejus kot amnhī tā hkót mē pa xwýnhjē kukjēr ā harēnh

Matēwre 16.13-20; Rukre 9.18-21

²⁷ Tā hāmri nhūm Jejus ma hkót mē pa ho mē pa xwýnhjē mē mē ma mō. Ma krī pē Sejarēj Piripos pu hā krī hkwy hkót mō. Nē kormā pry hā mō nhūm Jejus amnhī tā hkót mē pa ho mē pa xwýnhjē kukja nē mē kām:

—Kwa mē inhmā mēmoj jarē. Tanhmā na htem ahpýnhā ri axpēn mā ijarēnh to wehe? Anē.

²⁸ Hāmri nhūm mē kām:

—Nā na htem ahpýnhā tanhmā ajarēnh to. Na hte kamā mē hkwyjaja axpēn mā ato finat Juāw Paxis ā ajarē. Nē kamā mē hkwyjaja ato finat Eris ā ajarē nē mē hkwyjaja apē Tirtūm nhý hā kapēr o pa xwýnh ra htyk xwýnhjē hō hā ajarē. Ā na htem ahpýnhā axpēn mā ajarēnh anhýr o pa. Anē.

²⁹ Hāmri nhūm mē kuma nē mē kām:

—No we mē kajaja? Ixpē mēhō hā na ka htem axpēn mā ijarē? Anē.

Hāmri nhūm Simāw Pētre kām:

—Nā mē pajaja na pa htem apē Tirtūm kot mē ixkaxyw axām nē mē ixwýr amēnh xwýnh ā ajarē. Nē apē mē ixpiitā mē inhō Pahi Maati hā ajarē. Ā na pa htem axpēn mā ajarēnh anē. Anē.

³⁰ Hāmri nhūm kuma nē mē kām:

—Nā ām hāmri na ka htem ā ijarēnh anē. Ā ixte anhýr. Kwa nom kwa kēr ka mē inhma. Kēr ka mē kormā ā akwýjē mā ijarēnh anhýr kēt nē. Anē.

Jejus kot amnhī kukamā amnhī jarēnh ā harēnh

Matēwre 16.21-23; Rukre 9.22

³¹ Tā nhūm Jejus amnhī kukamā hkót mē pa ho mē pa xwýnhjē mā tanhmā amnhī jarēnh to nē mē kām:

—Nā ra mē ate Tirtūm kot mē akaxyw ixām ā ixpumunh mex. No mē pahkwýjaja kām ja hā ijarēnh mar nē ixpumunh prām kēt. Ijaew krāhtūmjē mē Tirtūm kapēr tūm o mē ahkre o mē pa xwýnhjē mē patre krāhtūmjaja na mē kām ja hā ixpumunh prām kēt. Jakamā koja mē nhýrmā ixpynē nē ixtak rax nē ixpī. Nom kot paj ixtyk ā ixtā apkati axkrunēpxi hāmri nhūm Tirtūm akupým ixto ixtūr. Anē.

³² Hāmri nhūm mē kot hpīr ā amnhī jarēnh ma nē tee ri hkukamā hamaxpēr. Hāmri nhūm Simāw Pētreja hwýr tē nē hkwyjē pē ho kato nē mē hkāx ā o xa nē kām:

—Kwa nā Pahihti. Koja Tirtūm anē mē omunh mex nē nhūm mē ā anhīpēx anhýr kēt nē. Kwa ri ā kapēr anhýr kēt nē. Anē.

³³ Hāmri nhūm kuma nē hwýr apkjē nē pu hā hkót mē pa ho mē pa xwýnh piitā omu. Hāmri nē mē hamak mā Simāw Pētre mā kapēr nē kām:

—Tk. Kwa na ka ā inhmā akapēr anhýrja o te Satanasti nhý hā akapēr pyrāk. Tirtūm nhý hā na ka ā inhmā akapēr anhýr kēt nē. Ām jar mē kām Tirtūm kapēr mar prām kēt xwýnhjē jamaxpēr o na ka ajamaxpēr nē ā inhmā akapēr anē. No Tirtūm jamaxpēr o ajamaxpēr kēt nē. Anē.

Jejus krajaja tanhmā kot amnhī nhīpēx hto hā mē harēnh

Matēwre 6.24-28; Rukre 9.23-27; Juāw 12.24-26; määnēn Apokarip 2.10, 12.11

³⁴ Tā nhūm Jejus amnhī wýr mē kot mar o kuhē xwýnhjē mē hkót mē pa ho mē pa xwýnhjē mā anē nhūm mē hwýr axkamē nē kuhē. Hāmri nhūm tanhmā mē ahkre hto nē mē kām:

—E mē inhma. Kot kaj mē ixkót amnhī xunhwýr ā amnhī jarē hā kot kaj mē määnēn amnhī jarēnh o: “Jesús kēp inhō Pahihti jakamā kot paj ām kapēr kōt pix mā amnhī nhīpēx rāhā ho ri ixpa. Kwār ixkwýjaja tanhmā hā inhīpēx to pa arī hkót amnhī nhīpēx rāhā ho ixpa.” Anhýr o amnhī jarē.

³⁵ —Koja mē ixtā mē atōx pī rý ixtā tanhmā mē ato ka ty. Ate tanhmā ijarēnh to ho apa hā nhūm mē apī. Tā nom koja akaxwýnh ma inhō krī hwýr āpir kurē kumrēx nē kamā atūr tūm nē amex rāhā nē apa ho apa. Nom kot kaj mē jar atūr prām xāj ixkaga hāmri nē hwýr axāpir kēt nē.

³⁶⁻³⁷ —Nē koja mēhō hikukrēx gryk ā Tirtūm kaga. Hāmri nē nhýrmā ty nē ý kamā kuwy hwýr ma mō nē amnhī kōt kukrēx ō hpyr nē o mōr kēt nē. Koja tee ri kuwy hwýr mōr pymaj amnhī nē hikukrēx rax o amnhī pānhā amnhīrer prām kaprý. Tanhmā koja

amnhĩ to nê Tirtũm mã amnhĩre nê ma õ kri hwyr api? Koja ā amnhĩ nhĩpêx anhÿr kêt nê.

³⁸—Nê koja mēhõ ixte mē ahkre hā inhma nhũm ja kēp omnuj japêr. Nhũm kot mē kām ixprām nõkati xwýnhjê hkõt pa gryk ā ixkaga. Hā kot paj nhÿrmā mē ato amnhĩptār kaxyw akupÿn wrÿ nê amnhĩ swar kot ixkaga xwýnhhta kaga. Ām hāmri na pa mē amā ja hā amnhĩ jarê. Kot paj nhÿrmā inhõ Papaj nhÿ hā ixte mē ho amnhĩptār kaxyw akupÿn wrÿ nhũm kapêr o mē wrÿk xwýnhjaja man ixkõt wrÿ. Pa mē wrÿ hāmri nê ra mē kot ixkaga xwýnhjaja pa amnhĩ pyrā nê amnhĩ swar mē hkaga hpa. Anê.

9

¹ Nhũm Jejus arĩ mē kām kapêr nê mē kām:—Ām hāmri na pa mē amā amnhĩ jarê. Kot paj nhÿrmā akupÿn ixte mē ato amnhĩptār kaxyw mē awÿr wrÿ kām ga. Tā kot kaj mē akwÿjaja kormā atĩr ri ja kukamā tanhmā ixte amnhĩ nhĩpêx to hā ixpumu. Anê.

*Jejus hirā htÿx kām ām ā harênh
Matêwre 17.1-9; Rukre 9.28-36; määnêh
Sikũn Pêtre 1.16-18*

² Tā nhũm arĩgro kēp 6 nê hapêx nhũm Jejus ma nhÿri hixêt prêk wÿr tē. Nê Simāw Pêtre nê Xiakre nê Juāwja nhũm ma amnhĩ kõt wa mē o mō. Nhũm wa mē ahte mō nê hixêt prêk ā api nê himõk ā kuhê. Hāmri nhũm Jejus axtem nê xa.

³ Ra ê haka htÿx kumrêx nê xa.

⁴ Hāmri nhũm ja wa kaxkwa rūm hwÿr wrÿ nê kuri kām kapêr. Finat Mojes mē finat Erisja wa wrÿ nê kuri kām kapêr o xa. Tirtũm amnepêm amnhĩ wÿr wa ho āpir tā nhũm wa akupÿn wrÿ nê kām kapêr.

⁵⁻⁶ Nhũm wa mē mex kumrêx nê hirā htÿx kām kuhê nhũm Jejus kõt mē mōr xwýnhjaja wa mē omu nê mē kamā no pyma nê. Nê tee ri mē kām tanhmā kapêr to hkukamā hamaxpêr. Hāmri nhũm Simāw Pêtre hamaxpêr nê Jejus mã kām:

—Kwa Pahihti. Nā ām hāmri na pu mē amnê mō. Kwa pu mē kritpêm jar axkamê nê tokyx panojarêt kêt nê. Pa mē amā pô nhĩrõnh o axkrunêpxi nê hipêx. Amā nê Mojes mē nê Eris mã hõ nhĩpêx ka mē kamā akrĩ. Kwa xāt pa mē amā ho anê nā? Anê.

⁷ Hāmri nhũm kakrā jaka htÿx wrÿ nê wa mē hkunor pa nhũm wa mē kamā kuhê. Hāmri nhũm kakrā kamā Tirtũm mē kām kapêr nê mē kām:

—Ota Ixkra xa. Inhmā hapê ho inhmā hapê. Kêr ka mē kapêr mar tÿx rāhā ho ri apa. Anê.

⁸ Hāmri nhũm mē kuma nê amnhĩ pu hā rĩt nhũm ām Jejus pix mē kuri xa nhũm Mojes mē Erisja wa ra ma akupÿm api nhũm mē ām Jejus pix pumu.

⁹ Hāmri nhũm mē ma akupÿm hkwyjê hwÿr wrÿk o mō nhũm Jejus mē kām:

—Kwa kêr ka mē ham mē ate mēmoj pumunh xwýnhhta kormā nhām mē kām harênh kêt nê. Koja mē mēmo arĩgro hā ixpĩ hāmri nhũm Tirtũm akupÿm ixto ixĩr ka mē rĩ kormā mē kām ja hā ijarênh o ri apa.

¹⁰ Anê hāmri nhũm mē kuma nê mē kām harênh kêt nê. Ām axpên mã pix mã harê nê kot akupÿm htĩr ā amnhĩ ijarênhja ā axpên kukjêr o pa nê axpên mã:

—Kwa mo na ri ā akupÿm htĩr ā amnhĩ jarênh anê? Tanhmā kot we amnhĩ to nê htÿk tā akupÿm htĩr? Anê.

Hāmri nê tee ri hkukamā hamaxpêr o hkõt pa.

*Juāw Paxis te kot Eris pyrāk ā harênh
Matêwre 11.13-15, 17.10-13*

¹¹ Hāmri nhũm mē kormā ahpar mã wrÿk o mōr mē nhũm Jejus kõt mē mōr xwýnhjaja mēmoj tā hkukja nê kām:

—Kwa mē inhmā mēmoj jarê. Na hte Tirtũm kapêr tũm o mē ahkre xwýnhjaja mē inhmā: “Eris kumrêx koto Tirtũm mē pahwÿr kumê nhũm Krisja hapu hā wrÿ.” Anê. Na htem ā mē inhmā war ajarênh anê. Tā ka na ka ra wrÿ nom nhũm kormā Erisja akukamā wrÿk kêt nê. Anê.

¹²⁻¹³ Hāmri nhũm mē kām:

—Nā ām hāmri na htem mē amā ā ja jarênh anê. Na pre ra ixkukamā te kot Eris kot amnhĩ nhĩpêx pyrāk xwýnhhta tē nê ixkutêp mē kām ijarênh o pa. Nom mē kot ixkukamā ijarênh xwýnh ā omunh kêt jakamā na prem axtem nê kām tanhmā hipêx to hprām xā hkõt tanhmā hipêx kati hton kupĩ. Tā koja mē ā hipêx anhÿr pyrā nê mã ixto anê nê inhĩpêx kati nê tokyx mē kām ixprām kêt xwýnhjaja ixpynê nê ixpĩ pa amnhĩ xā htÿx kamā ijamak kām ty. Tirtũm kapêr ā kaga htũm kot wa ijamê wa ixkukamā wa ijarênh xā hkõt. Anê.

*Jejus kot mēhõ hkra nê mēkarõmnuti janor
ā harênh*

Matêwre 17.14-21; Rukre 9.37-43

¹⁴ Hāmri nhũm Jejus nê Simāw Pêtre nê Xiakre nê Juāwja mē akupÿm hkwyjê hwÿr hpõx o mra nê amnhĩ kukamā hkwyjê pumu nhũm mē ohtõ nê mē hā akuprõ nê mē kām kapêr. Nhũm Tirtũm kapêr tũm o mē ahkre ho mē pa xwýnhjaja mēmoj tā mē hkukjêr o kuhê.

¹⁵ Jakamā nhũm Jejus mē hwÿr hpõx o tē nhũm mē pikuprõnh xwýnhjaja amnhĩ wÿr omu nê hkĩnh nê. Hāmri nê kutā hprõt nê kām:

—Pa. Nā ām hāmri na ka akupÿn mē ixwÿr tē. Anê.

¹⁶ Hāmri nhũm mē kām:

—Kwa mēmoj tā na ka mē axpên mã axākjêr o akuhê? Anê.

17-18 Hāmri nhūm mēhō myja kām:

–Nà ixkra hā na pa mē axpēn mā ixkapēr. Na pre mēkarōmnuti ixpē hwýr axà nē tanhmā ixpē ho nhūm kapēr kēt nē pa. Nhūm hte xatā tanhmā ixpē ho nhūm pykap amnhī rē nē hakwa jamrō ho hikwý. Hāmri nē à htýx kamā ama nē amnhī nham o axpēn kamnhar týx kumrēx pē htýx pa nē hikwý nē ixpē omnuj týx nē. Na hte ā mēkarōmnuti nhý hā amnhī nhīpēx anhýr o pa. Jakamā na pa ate inhmā ho mex kaxyw man o tē nē tee ri ajapēr. Hāmri nē ho akōt mē pa ho mē pa xwýnhjē hwý nhūm mē kot inhmā ho mex kaxyw tee ri tanhmā ho hkapyrý. Anē.

19 Hāmri nhūm Jejus kuma nē hkōt mē pa ho mē pa xwýnhjē mā kām:

–Hēxta waa nē. Ra mē ate Tirtūm nhý hā ixte mē ho mex ā ixpumunh ryy htā ixpyrā nē ā amnhī nhīpēx anhýr kēt nē. Mān ka mē kormā kaxyw Tirtūm kōt ajamaxpēr týx kēt nē. E amnē ixwýr akra ho tē pa omu. Anē.

20 Hāmri nhūm mē hwýr o tē nhūm mēkarōmnuti Jejus pumu nē tanhmā hkrata o htýx to nhūm pykap tēm nē hakwa jamrō nē amnhī rēnh o nō.

21 Nhūm Jejus omu nē hipēèxā mā:

–Kwa tanhmā na ra kot amnhī nhīpēx ā mytwrý kute? Anē.

Nhūm kām:

–Nà hprīre rūm na hte ā amnhī nhīpēx anhýr o pa.

22 Na hte mēkarōmnuti xatā ixpē hpīr kaxyw kuwy kamā kurē nē gōx kām kurē. Kwa kot ka ate ho mex kukamā axāhpumunh japēr nē wa ixkamā axukaprī nē akupým inhmā ho mex. Anē.

23 Hāmri nhūm Jejus kām:

–Xān ka tee ri ixte ho mex kaxyw ixkukamā ajamaxpēr? Nà ixte mēmoj piitā ho anhýr kaxyw ixāhpumunh týx kēnā. Kot ka mē atō mēmoj tā amnhī kaxyw ixkōt ajamaxpēr týx hā kot paj amā ho anē. Anē.

24 Hāmri nhūm kuma nē kām hkra mex prām týx xāj kapēr týx nē kām:

–Nà na pa amnhī kaxyw akōt ijamaxpēr. Nom kot kaj tanhmā ixkrā hto pa akōt ija-maxpēr týx rāhā ho ri ixpa Pahihti. Anē.

25 Rōm nhūm mē ohtō rax nē hwýr kormā mra nhūm Jejus amnhī wýr mē omu hāmri nē mēkarōmnutija mā kapēr kurē kumrēx. Nē kām kapēr kām hihtýx nē kām:

–Pa mēkarōmnuti. E apē mē ho mē kapēr kēt nē mē umar kēt o apa xwýnh ā pa amā ixkapēr ka inhma. Kér ka mē hkrata pē akato nē ma amōr o mō nē axte tanhmā ho hkēt nē. Anē.

26 Hāmri nhūm tee ri kot kām karōja ma nē gryk xāj xatā amýra nē mē hkrata o htýx kumrēx nhūm httertét týx o nō. Hāmri nhūm kēp kato nē ma tē nhūm te htyk pyrā nē nō nhūm mē tee ri omu nē ra htyk ā hkamnhix.

27 Hāmri nhūm Jejus hpa hā kupy nē kānhmā ām nhūm akupým mex nē kānhmā xa nē ri mra. Nē tām kapēr o mra nē umar mex nē.

28 Tā nhūm Jejus hkōt mē pa ho mē pa xwýnhjē mērohā ma akupým amnhīm hikranh xā hā ixkreja wýr mra nē hwýr agjē nē hkrī. Hāmri nhūm Jejus kōt mē pa ho mē pa xwýnhjaja amnhī tā hkukja nē kām:

–Kwa mē inhmā mēmoj jarē Pahihti. Na pa mē tee ri axwakre kamā mē hkrata nē mēkarōmnuti janor kaprý. Kwa mon pa mē apyrā nē ja ho anhýr mex kēt nē? Anē.

29 Hāmri nhūm mē kām:

–Nà axtem na mēkarōmnuti ja. Na htem mē nē hanor tokyx anhýr kēt nē. Na htem ho Tirtūm wýr týx nē rī kormā hano. Anē.

*Jejus kot htyk kukamā amnhī jarēnh
Matēwre 17.22-23; Rukre 9.44-45*

30-31 Tā nhūm Jejus mē hkōt ri mē pa ho pa xwýnhjē mē krīja rūm hapōj nē ma nhām mō. Nē ma pyka pē Garirej kahti hkōt mō. Nom mē piitā mē hkāx ā mō. Jejus kormā kot amnhī tā tanhmā hkōt mē pa ho mē pa xwýnhjē jahkre hto ho pa jakamā kām mē hkāx ā mē o pa hprām nē. Hāmri nē amnhī kukamā mē kām tanhmā amnhī jarēnh to nē mē kām:

–E kot paj mē amā tanhmā amnhī jarēnh to ka mē inhma nē inhmar týx nē. Koja mē kām ixprām kēt xwýnhjaja tokyx mē kām ixtā amýnē nhūm mē ixpī. Kot paj ixtýx ā ixtā apkati axkrunēpxi hāmri nhūm Tirtūm akupým ixto ixtīr. Kwa kēr ka mē ja ma nē hā anohtýx nē ho apa. Anē.

32 Hāmri nhūm mē tee ri ā kot amnhī jarēnh anhýrja ma nē axpēn mā:

–Kwa mo na ri ā mē pamā amnhī jarēnh anē? Nà kēp mē panhō Pahi Maati hā kot amnhī jarēnh kēnā kot kēt mēhō kupī.

Anhýr o axpēn mē harēnh o hkōt mō. Hāmri nē ā kot amnhī jarēnh anhýr mar prām kēt jakamā hprī hā tanhmā hkukjēr to hkēt nē. Ām akryk hkōt mar o mō.

Mē kot amnhī to rūnh xwýnh jarēnh

Matēwre 18.1-5; Rukre 9.46-48

33-34 Tā nhūm Jejus mē hkōt mē pa ho pa xwýnhjaja kormā ma krī pē Kapanaū hwýr mō nhūm hkōt mē pa ho mē pa xwýnh pē 12jaja tanhmā amnhī kukamā hamaxpēr to hāmri nē axpēn mā:

–Kwa mē pahōt kot puj we nhýrmā pahpē pahi nē mē ho amnhīptār rax o ri pahkwýjé jakre?

Anhýr o axpēn kukjēr o Jejus kōt mō. Nē axpēn mā: “Nà pa.” Nhūm mē hkwyjaja: “Nà kēt pa.” Anhýr o hkōt mō. Hāmri nhūm Jejus mē mar o mō. Hāmri nhūm mē mō nē nhýri amnhīm hikranh xā hā ixkre hwýr pōj nē hwýr agjē nhūm mē kām:

—Kwa mëmoj tā na ka mē pry hā amnhī jarēnh o mō? Anē.

Hāmri nhūm mē tee ri kuma nē hpijaam nē. Nē kām tanhmā amnhī jarēnh to hkēt nē.

³⁵ Jakamā nhūm Jejus nhŷ nē mē kām anē nhūm mē kuri hkrī pa nhūm mē kot mē kām mē ho amnhīptār rax prām̄ta ā mē kām kapēr nē mē kām:

—E mē inhma. Ka mē atō amā mē ho amnhīptār rax prām. Hā kēr ka te apē mē piitā mē kām amarī axāpēnh xwŷnh pyrāk o amnhī nhīpēx o mē hkōt apa. Jao mëmoj to mē kutā anojarēt rāhā nē. Anē.

³⁶ Hāmri nē amnhī wŷr mēhprīre hō mā hpa ho apē nhūm hwŷr tē nhūm kumŷ nē o nhŷ nē hā mē kām kapēr nē mē kām:

³⁷ —E mē inhma. Kēr ka mē apē pahi pyrāk o tanhmā amnhī jarēnh to ho ri apa hkēt nē. Ām te amarī ri mē apa pyrāk o amnhī nhīpēx o ri apa. Jao nhŷri mēhprīre hō pumu nē kamā axukapri nē kām mëmoj tanhmā ho rŷ kām mëmoj gō. Hāmri nē ā amnhī nhīpēx anhŷr o te pa ate tanhmā ixto mex to pyrāk o amnhī nhīpēx. Nē kot ka mē atō pa tanhmā ixto mex to nē te ate Tirtūm o mex pyrāk o amnhī nhīpēx. E kēr ka mē amā amnhī to rūnh prām nē ā amnhī nhīpēx anhŷr o ri apa. Anē.

³⁸ Hāmri nhūm Juāw nhŷhŷnh tēn mē hwŷr axā nē Jejus mā:

—Kwa Pahihti. O mŷj mēhō kēp mē pahkwŷ hkēt tā anhŷ hā mē nē mēkarōmnuti janor o pa. Pa mē tee ri ja hā omu nē kēp mē pahkwŷ hkēt jakamā pa mē ā kot amnhī nhīpēx anhŷrja nē kām ixkapēr. Anē.

³⁹⁻⁴⁰ Hāmri nhūm kuma nē kām:

—Kwa nā nē tanhmā kām nē hkēt nē. Kōja mēhō inhŷ hā aa mē kot mëmoj pumunh kēt kwŷ ho anē hāmri nē kēp mē panhiō nē ri mē pahkwŷm tanhmā mē ahkre hto ho pa hkēt nē. Ra mē pahkōt kot amnhī nhīpēx mā kēnā. Jakamā kwa mē ja nē tanhmā kām nē hkēt nē. Kwār māmri ā amnhī nhīpēx anē. Ja mex kēnā.

⁴¹ —Kōja mēhō nhŷri mē atō amā kōr ā apumu nē hamaxpēr o: “Kwa Jejus kōt ri pa xwŷnh mŷj kām kōr. E pa kām gō hkwy kē ho ixkō.” Anhŷr o hamaxpēr nē apē ixkwŷ hā amā gō hkwy ka ho ixkō. Nhūm ām kot amā gō pix nhōr nhūm ate ho akōm tā nhūm Tirtūm atā omu nē ho mex rax nē. Anē.

Mē pahte amnhī tomnuj pymaj tanhmā amnhī nhīpēx to hā mē pajarēnh

Matēwre 18.6-9; Rukre 17.1-2

⁴² Nhūm Jejus arī hkōt mē pa ho mē pa xwŷnhjē mā kapēr nē mē kām:

—Nē mē kot ixkōt amnhī xunhwŷr tohtuj anhŷr xwŷnhjaja. Kōja mēhō ma mē hwŷr tē nē inhnē mē kām kapēr. Mē kot mē mar nē tanhmā amnhī tomnuj to hprām xāj hēx rom mē kām kapēr nhūm mē mar xā hkōt

tanhmā amnhī tomnuj to. Hā kōja Tirtūm ja hā omu nē kot inhnē tanhmā kām nē xwŷnhhta pumu nē homnuj tŷx nē. Te mē kot mēhō pynēnh nē mut ā kēn pytiī hō nhōr nē ma o htēm nē gō xupŷm rax kām mēnh pyrāk o hipēx. Te ho ja pyrāk no ām homnuj tŷx o hakre.

⁴³⁻⁴⁷ —E kwa mē o kora. Kot kaj mē anhīhkra rŷ apar o tanhmā amnhī tomnuj to. Hā kēr ka mē axte ā amnhī nhīpēx anhŷr pymaj te ate amnhī pē anhīhkra rŷ apar krāhyr nē mēnh pyrāk o amnhī nhīpēx nē axte ā amnhī tomnuj anhŷr kēt nē. Rŷ ka mē ano ho mëmoj punuj pumu. Hāmri nē kām ajamaxpēr pix o apa pymaj te ate amnhī pē ano katōk nē mēnh pyrāk o amnhī nhīpēx nē nhām arit kurē kumrēx. Kēr ka mē ā amnhī nhīpēx o apa rāhā nē. Hāmri nē nhŷrmā ty nē ma Tirtūm mē wa inhō krī hwŷr api. No kot ka mē arī akutā ano nē arī akutā apar nē arī akutā anhīhkra rāhā ri mrar tā tōhā tanhmā ho amnhī tomnuj to. Hāmri nē nhŷrmā ty nē ma mē kot amnhī xā htŷx kamā hamak tūm xā pē kuwy maatita wŷr ma apa.

⁴⁸ Kuwyja kamā na htem mē kot amnhī tomnuj mŷrapē amnhī xā htŷx kamā hamak rāhā ho pa ho pa hāmri nē aa hapōx kēt nē.

⁴⁹ ā kōja mē kot amnhī tomnuj o mē pa xwŷnh piitā amnhī nhīpēx anhŷr rāhā nē pa ho pa.

⁵⁰ Jakamā kwa kēr ka mē axpēn to mex rāhā ho ri apa. Nom axpēn kām agryk nē tanhmā axpēn nhīpēx to ho ri apa hkēt nē. Anē.

Nhūm pre ā Jejus hkōt ri mē pa ho mē pa xwŷnhjē jahkre anē.

10

Mē pahte axpēn kaga nē Jejus kot mē pahkurē

Matēwre 5.31-32, 19.1-12; Rukre 16.18; māānēn Wam Korīt 7.10-16

¹ Tā nhūm Jejus mē hkōt mē pa ho pa xwŷnh mērohā ma pyka pē Jutej wŷr mō. Hāmri nē pyhti pē Jotāw ā rē nē hpānhā ma xarmā mō. Nhūm mē axte mē hā akuprō nhūm kē Jejus axte mē ahkre ho xa.

² Hāmri nhūm Parijew nhō xwŷnh kwŷjaja hwŷr mra. Mē kot hēx rom kamā hamak nē mar nē tanhmā ho kapēr punuj to kaxyw hwŷr mra nē mē kām:

—Pa. Ot pa mē mëmoj tā akukjēr kaxyw awŷr mra. Kwa tanhmā na pre amnepēm finat Mojesja mē pahte mē pahprō kaga hā mē panhīgētjē mā karō hto? Xā kōja mē pahprō mē pakapēr hkwyŷm tanhmā amnhī nhīpēx to pu mē mŷrapē hkaga nhūm Tirtūm ja hā mē pahpumu nhūm ja kām mex nē nā? Anē.

³ Hāmri nhūm mē kām:

—Tanhmã na pre Mojes Tirtüm nhÿ hã ja hã mẽ amã karõ hto? Anê.

⁴ Nhũm mẽ kãm:

—Nã na pre harênh o:

Kêr ka mẽ aprõ kaga kaxyw hãmri nê ate hkaga hã amnhĩ jarênh ã kaga nê kãm agõ nê rĩ kormã hkaga. Anê.

Na pre ã mẽ inhmã ja hã karõ anê. Anê.

⁵ Hãmri nhũm mẽ kãm:

—Tÿ nom mẽ kãm Tirtüm kapêr kõt amnhĩ nhĩpêx prãm kêt jakamã na pre ã mẽ kãm ja jarênh anê.

⁶ Amnepêm mẽmoj piitã hkrax kãm na prem axpên kaga hkêt nê. Na pre Tirtüm wam myja nhĩpêx nê hpãnhã kãm hprõ nhĩpêx. Axpên kaxyw wa hipêx.

⁷ Jakamã na hte mẽmyjaja hprõ kaxyw nê gryk ã katorxã nê hipêexã wa hkaga nê ãm hprõ kõt pix mã pa ho pa.

⁸ Te wa tipxi nê ri wa pa pyràk o axpên nhĩpêx o pa.

⁹ Tirtüm tãm kot axpên mã wa òr kênã kot kêt mẽhõ wa kot axpên kaga kaxyw tanhmã wa hipêx to rÿ tanhmã wa kãm kapêr to. Anê.

Nhũm pre ã Jejus mẽ kãm kapêr anê.

¹⁰ Hãmri nê hkõt mẽ pa ho mẽ pa xwÿnhjê mẽ akupÿm ixkrem agjê nhũm mẽ kãm:

—Kwa aprĩ hã mẽ inhmã mẽ kot axpên kaga hã mẽ harênhhta jarê pa mẽ ixprĩ hã kuma nã. Anê.

Hãmri nhũm mẽ kãm:

¹¹ —Nã kot kaj mẽ aprõ kaga nê hpãnhã nhãm mẽhõ ho aprõ nhũm Tirtüm noo mã te ate wam aprõ kamã nhãm aprõ nyw o amnhĩkati pyràk. Tirtüm pê ja omnuj tÿx nê. Rÿ koja mẽhõ hprõ kaga ka hpãnhã ho aprõ nhũm Tirtüm noo mã te ate wam mjên pê ho amnhĩkati pyràk. Ja mãânên Tirtüm pê omnuj tÿx nê.

¹² —Nê mẽnijaja. Koja mẽhõ ni ra mjên kaga nê hpãnhã nhãm mẽhõ ho mjên. Ja mex kêt. Mjên krax kêp mjên kumrêx kênã kot kêt hkaga nê hpãnhã nhãm hõ ho mjên. Koja anê nhũm Tirtüm noo mã te kot wam mjên kamã nhãm hõ ho amnhĩkati pyràk nhũm Tirtüm pê ja omnuj tÿx nê. Anê.

Jejus kot amnhĩ nê mẽhprĩjê janor kêt ã harênh

Matêwre 19.13-15; Rukre 18.15-17

¹³ Tã nhũm Ijaew kwÿjaja Jejus wÿr mẽ hkrarejê jamÿ nê mẽ o mra. Kot mẽ hã ìhkra jaxwÿr nê mẽ ho Tirtüm wÿr kaxyw hwÿr mẽ o mra. Hãmri nhũm hkõt mẽ pa ho pa xwÿnhjaja tee ri ja hã mẽ omu nê mẽ kãm:

—Kwa mo kaxyw na ka mẽ Jejus wÿr mẽ o mra? Kormã mẽ ràxre kênã. Mẽ ma akupÿm mẽ o mra nã? Anê.

¹⁴ Hãmri nhũm Jejus ja hã mẽ kuma nê mẽ kãm:

—Kwa nã kwãr mẽ mãmrĩ ixwÿr mẽ o mra. Mẽ ri inhnê mẽhprĩjê kurê hkêt nê. Anê.

Hãmri nê mẽ kãm hpa ho apê nhũm mẽ hwÿr mẽ o mra nhũm mẽ kuri kuhê. Hãmri nhũm mẽ hã hkõt mẽ pa ho mẽ pa xwÿnhjê mã kãm:

—E mẽ jarejê pumu. Na htem hamakêtkati nê hkĩnh nê ri pare. Mẽ kãm amnhĩ to rũnh prãm kêt nê ri pare. Tã Tirtüm kõt mẽ kot amnhĩ nhĩpêx o ri mẽ pa xwÿnhjaja na htem mẽ urãk nê kãm amnhĩ to rũnh prãm kêt nê ri pa.

¹⁵ —Na hte jarejaja hipêexã nê katorxã wa kapêr ma nê wa hkõt ri amnhĩ nhĩpêx o ri pare. Tã ixpê Tirtüm kot mẽ awÿr inhmênh xwÿnh na pa. Kot ka mẽ amã ixkõt amnhĩ xunhwÿr prãm hã kot kaj mẽ jarejê kot amnhĩ nhĩpêx pyràk o amnhĩ nhĩpêx. Jao ixkapêr ma nê ixkõt ri amnhĩ nhĩpêx mex o ri apa. Anê.

¹⁶ Hãmri nê mẽhprĩrejê jamÿ nê mẽ hã ìhkra jaxwÿr nê mẽ ho Tirtüm wÿr nê kãm:

—Pa Papaj. E kêr ka jarejê ho mex rãhã nê kê mẽ mex nê pa. Anê.

Hikãxpore rax xwÿnh jarênh

Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

¹⁷ Tã nhũm Jejus mẽ hkõt mẽ pa ho pa xwÿnhjaja nhÿri pry hã mẽ nhũm Ijaew krãhtũmja omu nê hwÿr tẽ nê mẽmoj tã hkukja nê kãm:

—Pa mẽ ijahkre xwÿnh maati? E kwa inhmã mẽmoj jarê. Nhÿrmã Tirtüm ri ixtrĩ tũm nê ixpa hprãm xaj mẽmo kot pa we ho anhÿr o ri ixpa? Ate amnhĩ to mex pix o ri apa xwÿnh jakamã kwa inhmã tanhmã ja jarênh to. Anê.

¹⁸ Hãmri nhũm kãm:

—Xã ate ixpê Tirtüm kwÿ hã ixpumunh kõt na ka ixte urãk nê amnhĩ to mex xwÿnh ã ijarê? Tirtüm pix na kot amnhĩ to mex rãhã xwÿnh jakamã kot kaj ã ijarênh anê nê ixpê Tirtüm Kra hã ijarê. Jao urãk nê ixte amnhĩ to mex xwÿnh ã ijarê. Nã xãn ka ãm atÿx ri amnhĩ krã hkõt ã ijarênh anê?

¹⁹ —Tirtüm mex o mex jakamã kot kaj amã nhÿrmã kuri atĩr tũm nê apa hprãm hãmri nê ra kot mẽmoj tã mẽ amã karõ xã hkõt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axãhkĩnh o ri apa hkêt nê.

Nê mẽ hpar kêt nê.

Nê tanhmã axêx kêt nê.

Nê axêx rom tanhmã mẽ nokupyr to hkêt nê.

Nê mẽ kêp mẽ hprõ ho amnhĩkati hkêt nê. Nê anhĩpêexã mẽ akatorxã wa hã apijaãm nê wa ho mex pê wa kutã anojarêt rãhã ho ri apa.

E kot kaj amā nhŷrmā Tirtūm kuri atīr tūm nē apa hprām hā kot kaj ā amnhī nhīpēx anhŷr o ri apa. Anē.

²⁰ Hāmri nhūm kuma nē kām:

—Kwa ixprīre ri ra ā ixte amnhī nhīpēx anhŷr o ri xpa kēnā. Nom te ixtīr tūm nē ixpa kaxyw ixe kormā tām kēt pyrāk. Anē.

²¹ Hāmri nhūm kuma nē hprīr hā omu nē kām hapē nē. Hāmri nē kām:

—Nā kormā mēmoj pyxire nē arīk. Na ka amā akukrēx rax kīnh tŷx o Tirtūm jakre. Jakamā kēr ka ma akupŷm anhōrkwŷ hwŷr tē nē akukrēx rax o wēnē hpa. Nē kaxpore jamŷ hāmri nē ma mē kēp amrakati xwŷnhjē mā ōr o ri apa. Hāmri nē akupŷn tē nē arī ri ixkōt apa ho apa. Anē.

²² Hāmri nhūm kuma nē tee ri hikukrēx rax kukamā hamaxpēr. Kām hapē jakamā kām kām ihkra karo hprām kēt nē. Hāmri nē tee ri Jejus kot ā kām hā karō anhŷrja ma nhūm ja kām mex kēt nhūm awjanā nē hkaprī nē ma akupŷm tē.

²³ Hāmri nhūm Jejus tee ri omu nē hkōt mē pa ho mē pa xwŷnhjē mā kām:

—Hēxta waa nē. Koja mē hikukrēx rūnh xwŷnhjaja ohtō nē kām mē hikukrēx japē xaj Tirtūm mē wa ixri htīr tūm nē pa ho pa hkēt nē. Wa ixte amnhī nhīpēxja mē kēp hihtŷx. Anē.

²⁴ Hāmri nhūm mē tee ri kapērja ma nhūm Jejus mē hamaxpēr kōt mē omunh mex jakamā axte tanhmā mē kām harēnh to nē mē kām:

—Nā Tirtūm mē wa ixte amnhī nhīpēxja na mē hikāxpore rūnh xwŷnhjaja pē ja hihtŷx.

²⁵ Mē kām hikukrēx rax mā ihkra karo hprām kēt rāhā tee kām Tirtūm kōt amnhī nhīpēx prām kaprŷ. Te ho mēhō kot menh kagō hā hkre nē kām kagō katōk prām kēt rāhā kām guhkrax kām ār prām kaprŷta pyrāk. Anē.

²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa no mē ixpiitā mē inhmā mē ixkukrēx japē kēnā. Jakamā xā kot paj mē ixpiitā nhŷrmā war ari ixtīr tūm nē ixpa ho ixpa hkēt nē? Anē.

²⁷ Hāmri nhūm mē kām:

—Nā kot kaj mē amnhī krā hkōt mē amā mē akukrēx japē mā anhūrer kēt nē. Am Tirtūm pix na hte ja kaxyw tanhmā mē akrā hto ka mē amā akukrēx japē hkēt nē. Jao ra mē apē Tirtūm mē wa ixri atīr tūm nē mē apa ho mē apa mā xwŷnh. Anē.

²⁸ Hāmri nhūm Simāw Pētre kām:

—Kwa Pahihti na pa prem agryk ā mēmoj piitā hkaga hpa nē akōt ixpa ho ixpa. Jakamā xā kot paj mē nhŷrmā war ari ixtīr tūm nē ixpa ho ixpa kēt nē nā? Anē.

²⁹ Hāmri nhūm kuma nē hkōt mē pa ho pa xwŷnh piitā mē kām:

—Nā ka mē atō inhmā tanhmā amnhī to ho apa kaxyw akwŷjē re nē ma inhmā tanhmā amnhī nhīpēx to ho ri apa. Anhōrkwŷ re rŷ atō rŷ atōx rŷ aprō nē akrajē re. Rŷ akatorxā nē anhīpēxā wa are. Rŷ akukrēx piitā rer pa hāmri nē ma ixkapēr o mē piitā mē ahkre ho ri mē hkōt apa.

³⁰ Hā kot paj amnhī tā mē apumu nē mē ato mex rax nē. Hāmri ka mē ma mē kām ixkapēr jarēnh o mē hkōt apa nhūm mē kot mē amar xwŷnh kwŷjaja mē ama nē kām mē akīnh nē. Nē ra mē ate akwŷjē rer par tā mē tāmjaja te mē apē mē hkra rŷ mē htō rŷ mē htōx pyrāk o mē anhīpēx. Jao tanhmā mē ato mex to ho pa.

—Nē koja mē kām ixprām kēt xwŷnhjaja ixtā tanhmā mē atomnuj to hā ka mē nhŷrmā ma Tirtūm mē wa inhō krī hwŷr api nē wa ixkuri amex nē atīr tūm nē apa ho apa.

³¹ Nom kēr ka mē ja hā amnhī pumunh kōt amnhī to rax xwŷnh ā amnhī to jarkrar kēt nē. Mē kot amnhī to rūnh xwŷnh ā amnhī jarēnh xwŷnhjaja koja mē nhŷrmā amnhī to rūnh kēt ā amnhī pumu. Nē mē kot amnhī to hkryre xwŷnhjaja koja mē nhŷrmā amnhī to rūnh ā amnhī pumu. Anē.

Jejus kot amnhī kukamā axte amnhī jarēnh

Matēwre 20.17-19; Rukre 18.31-34

³² Tā nhūm Jejus hkōt ri mē pa ho mē pa xwŷnhjē mā kapēr pa hāmri nē ma Jeru-jarē hwŷr mē o mō. Ra kamā kām hkurē xwŷnhjaja kot hpīr ā amnhī jarēnh tā ma hwŷr mē o mō. Jakamā nhūm mē tee ri hkukamā hamaxpēr o hkōt mō. Nhūm mē amarī mē hkōt mrar xwŷnhjaja haxwŷja kām ma nē. Hāmri nhūm Jejus mē kēp 12ta o mō nē hkwyjē hkāx ā amnhī kukamā tanhmā mē kām amnhī jarēnh to ho mō nē mē kām:

³³ —E na pu mē ra Jeru-jarē hwŷr mō. Kot puj mē hwŷr pōj nhūm mē kām ixkurē xwŷnhjaja patre krāhtūmjē mē Tirtūm kapēr tūm o mē ahkre xwŷnhjē nhīhkram ijaxā. Hāmri nhūm mē kām Tirtūm kapēr kōt amnhī nhīpēx prām kēt xwŷnhjaja ixpīr kaxyw mē kām ixtā amŷnē

³⁴ nhūm mē mar xā hkōt tanhmā inhīpēx kati hto. Nē mē hkwyjaja ixtā hpēr o axkē nē ixtā akunha. Nē mē hkwyjaja tanhmā ijaprŷ hto nē ixtā argōx rē nē ixtak hāmri nē ixpī. Koja mē ā inhīpēx anē. Nom kot paj ixtŷk ā ixtā apkati axkrunēpxi nhūm Tirtūm akupŷm ixto ixtīr. Anē.

Xiakre mē Juāw wa kot amnhī to Jejus wŷr ā wa harēnh

Matēwre 20.20-28; Rukre 22.24-30; määnēn Pirīpos 2.3-8; Wam Pētre 5.3

³⁵ Tā nhūm Jepetew kra Xiakre mē Juāw wa tanhmā hamaxpēr to nē Jejus mā kām:

—Kwa mẽ ijahkre xwýnh. Pa wa amã mẽmoj jarê ka wa inhmã “ý” anê nã? Anê.

Hãmri nhùm wa kãm:

³⁶—Ko wa mamrĩ inhmã mẽmoj jarê pa wa ama mãn. Anê.

³⁷Hãmri nhùm wa kãm:

—Nã kot kaj nhýrmã ate mẽ piitã mẽ ho amnhĩptãr kaxyw nhý pa wa akutã anhĩjê. Nê wa papxipix ixpê anhõ kôwenatõ nê akutã anhĩjê nê ato nhý. Ja na pa wa inhmã hprãm. Anê.

³⁸Hãmri nhùm wa kãm:

—Nã na ka wa ãm atýx ri ã amnhĩ to ixwýr anê. Koja mẽ tokyx ixpĩ pa amnhĩ xã htýx kamã ijamak rax nê ty. Tã xã koja mẽ ixpyrà nê ã war anhĩpêx anê ka wa ixpyrà nê amnhĩ xã htýx kamã ajamak rax kãm ty nã? Anê.

³⁹Hãmri nhùm wa kãm:

—Tý. Nã kot pa wa ijaxwýja anê nê apyrã nê amnhĩ xã htýx kamã ijamak kãm ty. Anê.

Hãmri nhùm wa kãm:

—Nã ãm hãmri na ka wa ja hã amnhĩ jarê. War ate ixpyrà nê ixkõt amnhĩ xã htýx kãm ajamak kãm atyk mã kênã.

⁴⁰Tã nom war ate amnhĩ to ixwýrta ã kot paj tanhmã war amã nê hkêt nê. Inhõ Papaj tãm koja ja kaxyw mẽhõ japêr nhùm inhĩhkõ hã nhý. No pa kot paj ri ja kaxyw mẽ atõ rênh kêt nê. Anê.

⁴¹Hãmri nhùm wa urãk nê Jejus kõt mẽ pa ho mẽ pa xwýnh kwýjaja ã wa kot amnhĩ to hwýr anhýr ã wa kuma nê wa kamã gryknê.

⁴²Jakamã nhùm Jejus mẽ piitã mẽ ho akuprõ nê mẽ kãm:

—E mẽ inhma. Na hte Ijaew kêt xwýnhjê nhõ pahitijaja ã amnhĩ nhĩpêx anhýr o ri pa nê amarĩ hkrĩ xã kamã hkrĩ ho hkrĩ. ãhpumunh jakamã amarĩ ixkre kre jakry kamã hkrĩ ho hkrĩ nê kãm mẽ ãpênh xwýnhjê pix mã mẽmo mẽ ãpênh ã karõ ho hkrĩ. Na htem ã amnhĩ nhĩpêx anê. Nê mẽ kot amnhĩm mex ã harênh prãm xãj tanhmã mẽ ho mex to ho pa.

⁴³⁻⁴⁵Tã no mẽ kajaja kêr ka mẽ atõ amã amnhĩ to rax prãm hãmri nê ho mẽ kot amnhĩ nhĩpêx pyrãk kêt nê. Mẽ piitã mẽ kutã anoarêr rãhã ho ri apa. Kêt paa. Mẽ ate inhmã axãpênh o apa kaxyw na pa pre mẽ awýr ixwýryk kêt nê. ãm pa ixte tanhmã mẽ amã amnhĩ nhĩpêx to ho ipa kaxyw na pa pre mẽ awýr wrý. Mẽ ate nhýrmã kuwy wýr apa pymaj mẽ anê ixtyk kaxyw na pa pre mẽ awýr wrý. Jakamã kot kaj mẽ atõ amã amnhĩ to rax prãm hã kêr ka ixpyrà nê akwýjê kutã anoarêr rãhã ho ri apa. Hãmri nê inhmã te ate amnhĩ to rax o amnhĩ nhĩpêx pyrãk o amnhĩ nhĩpêx. Anê.

Jejus kot akupým Paximew o mex ã harênh

Matêwre 20.29-34; Rukre 18.35

⁴⁶Tã nhùm Jejus mẽ hkõt mẽ pa ho mẽ pa xwýnhjaja kormã Jerujarê hwýr mör ri ra krĩ pê Jeriko hkõt mõ. Hãmri nhùm mẽ ohtõ nê mẽ hã ajêt nê mẽ hkõt mõ. Nhùm mẽhõ myja pry nhĩhkrepy nhý. Ximew kra Paximew nohkre xwýnhja pry kamã ahwýr o hkrĩ.

⁴⁷Hãmri nhùm Jejus mẽ hkwýjaja hwýr htêp o mõ nhùm amnhĩ wýr mẽ kuma nê mẽ kot Jejus nhĩxi jarênh o mör ã kuma hãmri nê kãx pê kãm kapêr nê amnhĩ to kuwy nê kãm:

—Pa Jejus? Nã apê mẽ inhõ Pahihti mex kumrêx na ka. Te apê amnepêm anhĩgêt pahihiti Tawi kot amnhĩ nhĩpêx pyrãk. Jakamã kwa we ixkamã axukapri nê akupým ixto mex kêt wehe. Ixte amnhĩ kaxyw akõt ijamaxpêr xwýnh na pa. Anê.

⁴⁸Hãmri nhùm Jejus kukamã mẽ mrar xwýnhjaja kuma nê kãm:

—Tk. Kwa akapêr kêt nê nhý nã. Anê.

Tã nom nhùm ãm mẽ kuma nê xatã amnhĩ to kuwy. Kýx pê amnhĩ to kuwy nê axte kãm:

—Kwa ixxkamã axukapri nê akupým ixto mex Pahihti. Anê.

⁴⁹Hãmri nhùm Jejus kuma nê xa nê hkõt mẽ pa ho mẽ pa xwýnhjê mã kãm:

—E mẽ atõ hwýr tẽ nê hpa hã apy nê amnê ixwýr o tẽ. Anê.

Hãmri nhùm mẽ kuma nê nohkre xwýnhnta mã kapêr nê kãm:

—E tee ri amnhĩ kukamã ajamaxpêr kêt nê. Na atã karõ. E tokyx kãnhmã xa. Anê.

⁵⁰Hãmri nhùm mẽ kuma nê hkĩnh týx nê. Nê kãnhmã harĩ nê amnhĩ nê õ kajaati mẽ nê hwýr htêm kurê kumrêx.

⁵¹Hãmri nhùm Jejus kãm:

—Pa mo na? Tanhmã kot pa ato? Anê.

Hãmri nhùm kãm:

—Nã akupým inhmã ixrĩt mex prãm Pahihti.

⁵²Anê nhùm kãm:

—Tõe. Nã ra ate amnhĩ kaxyw inhmã ajamaxpêr týx jakamã kot kaj akupým arĩt mex kurê kumrêx. E mãmri ma akupým tẽ. Anê.

Nhùm akupým rĩt mex ã amnhĩ pumu nê hkĩnh o hkĩnh. Hãmri nê Jejus ã ajêt nê ma hkõt hkĩnh nê tẽ.

11

Jejus kot Jerujarê hwýr ãr ã harênh
Matêwre 21.1-11; Rukre 10.28-40; Juãw
12.12-19

¹Tã nhùm Jejus mẽ hkõt mẽ pa ho mẽ pa xwýnhjê mẽ kormã Jerujarê hwýr mõ. Hãmri nê krĩ pê Petake mẽ hõ pê Petãn wýr ahtêp o mõ. Hixêt pê Oriwêhti kahti ri na pre krĩja wa xa. Jakamã nhùm Jejus hkõt mẽ pa ho mẽ pa xwýnh wa ho axkrut nê mẽ amnhĩ kukamã wa kumê

²nê wa kãm:

—E wa ma krī mūj wūr mē ixkukamā wa tē. Hāmri nē hwūr pōj nē nhūri jumēnre nyw mā ē nē ām xwýnhhta pumu. Kormā mē kot hā hkrī hkēt kumrēx xwýnhhta.

³ Ka wa omu nē kām ē xā hpôt nē man akupŷn ixwūr o tē. Koja mēhō war apumu nē hā tanhmā war amā kapēr to ka wa ā kām ijarēnh anē nē kām: “Nā mē panhō Pahihti na hā karō pa wa hwūr tē.” Anhŷr o kām ijarē. E wa ma hwūr tē. Anē.

⁴ Hāmri nhūm wa kuma nē ma hwūr htēm kurē kumrēx nē hwūr pōj. Nhūm Jejus kot wa kām hā karō xā hkôt jumēnre nywreta pumu.

⁵ Hāmri nē kām ē xā hpôt o xa nhūm kuri mē kuhē xwýnhjaja tee ri hā wa omu nē wa kām:

—Kwa mo kaxyw na ka wa kām ē xā hpôt o xa? Kwa kot ka wa mē ixpē ho ahkī nā? Anē.

⁶ Hāmri nhūm wa mē kām:

—Nā mē panhō Pahihti na wa inhmā hā karō pa wa hwūr tē. Wa ixte ma hwūr o ixtēm kaxyw. Anē.

Hāmri nhūm mē wa kām:

—Tŷ? Tōe wa māmri ma kām o tē. Anē.

⁷ Hāmri nhūm wa ma akupŷm Jejus wūr o tē. Hāmri nē kaxyw amnhī xē hkwy hkwrŷ nē kām ho hkō kahty hpa nē kām ho htŷx nē o xa nhūm Jejus hā nhŷ nē mō.

⁸ Nē kormā Jerujarē hwūr hixēt ā àpir o mō. Nhūm mē kot omunh o kuhē xwýnhjaja hkīnh nē ma hkukamā pry ho mex kaxyw amnhī xē hkwy hkwrŷ nē ho kām uty. Nhūm mē hkwyjaja nhŷri pō hkwy jakā nē o mra nē hkukamā kām uty.

⁹⁻¹⁰ Nhūm mē hixēt ā api nē ahpār mā wrŷk o mō nhūm mē piitā kax pē Tirtūm mex o mex ā harēnh o hkôt mō. Nhūm mē hkwyjaja kukamā mra nhūm mē hkwyjaja hapu hā mra nhūm prem piitā hkôt Tirtūm mex o mex ā harēnh o mō. Nē harēnh o:

E ota Tirtūm kot mē pahwŷr mēnh xwýnhhta ra pōj. Nā ām hāmri na mē pahwŷr wrŷ. Ja mex kumrēx.

Kēp mē panhō Pahihti mex na. Koja mē panhīgēt pahi Tawi pyrā nē mē pahto amnhīptā nē mē pahto mex o pa.

Ām hāmri na Tirtūm mē pahwŷr kumē.

Tirtūm mex kumrēx. Ām mex o mex. Kukwak ri pix mā na pu htem paja-makētcati nē paxāmnhix papa rāhā ho papa.

Anhŷr o Jejus kôt harēnh o mō. Kot mē ho amnhīptār kurē kumrēx ā hkamnhix nē hkīnh nē ā hkôt kapēr anhŷr o mō.

¹¹ Jao ra Jerujarē hwūr pōj nhūm Jejus Tirtūm mā amnhī jarēnh xā hā ixkre hwŷr tēn axā. Nom nhūm ra amŷkry htŷx jakamā nhūm hwŷr axā nē ām hkre pumunh o xa hāmri nē akupŷm kato nē hkôt mē pa ho mē

pa xwýnh pē 12jē mē nhūm mē ma akupŷm Petān wŷr mra.

Jejus kot pī hpār pē fikēhti mā kapēr ā harēnh

Matēwre 21.18-22

¹² Tā nhūm apkati nhūm Jejus mē hkôt mē pa ho pa xwýnhjē mērohā Petān rūm hapōj nē ma akupŷm Jerujarē hwŷr mra. Nhūm Jejus ra kām prām nē mō.

¹³ Hāmri nē amŷm mēmo pī hpār hōptŷ rax pē fikēhti pumu nē hamaxpēr o:

—E pa hwŷr tē nē ô hkwy rē nē kuwō mān. Anē.

Hāmri nē hwŷr tē. Nhūm kormā ô kaxyw ô mytwrŷ kator kēt jakamā nhūm ô hkēt nē ām hō pix nē xa.

¹⁴ Hāmri nhūm hwŷr tē nē tee ri ô japēr nē ām hō pix pumu. Hāmri nē tee ri omu nē kām:

—E kot kaj axte axō hkēt kumrēx.

Anhŷr o kām kapēr nhūm hkôt mē pa ho mē pa xwýnhjaja hā kuma.

Jejus kot Tirtūm nhōrkwŷ hwŷr ār ā harēnh
Matēwre 21.12-17; Rukre 19.45-46; Juāw
3.13-22

¹⁵⁻¹⁷ Tā nhūm Jejus mē hkôt mē pa ho mē pa xwýnhjaja Jerujarē hwŷr agjē nē Tirtūm mā amnhī jarēnh xā hā ixkre hwŷr agjē. Nhūm Jejus tee ri kamā mē kuhē xwýnhjē pumu. Nhūm mē ra ixkre kamā axtem nē mōx nē ôwēhti nē tuuti ho wēnē ho kuhē. Ixkre hwŷr mra xwýnhjaja kot haprōr nē Tirtūm mā amnhī jarēnh kaxyw kām hpar nē ōr kaxyw mē kām ho wēnē. Nom axtem nē hā ohtō rax kām mē kām ho wēnē nhūm mē hkwyjaja mē kām mē hikāxpore ho anhīpa. Hāmri nhūm Jejus mē hwŷr axā nē tee ri mē kot ā amnhī nhīpēx anhŷr ā mē omu nē mē kām akir nē mē kām:

—Tk. Kwa Tirtūm kapēr ā kagā htūm kot ōrkwŷ jarēnh kot:

Inhōrkwŷja ām pika piitā hkôt mē piitā kot inhmā amnhī jarēnh xā hā ixkre pix kaxyw na.

Anhŷr o kot harēnh tā ka mē axtem nē kamā ā amnhī nhīpēx anhŷr o akuhē. E kwa mē ma mra nē ajapōx tokyx anē. Anē.

Nhūm pre ā mē kām kapēr anhŷr pē mē ahkre hāmri nē ixkreja nē mē kator pa.

¹⁸ Hāmri nhūm patre krāhtūmjē mē Tirtūm kapēr tūm o mē ahkre xwýnhjaja tee ri ā mē hipēx anhŷr ā omu nē kapēr ma nē kamā gryk tŷx nē. Hāmri nē mē kot hā āmnēnh kaxyw tanhmā axpēn mar to nē axpēn mā:

—Tk. Kwa na mē ohtō nē kām mar prām nē. Koja mē anē nē gryk ā mē pahkaga nē axte mē pakapēr mar kēt nē. Kwa pu mē kupī ri. E tanhmā kot puj mē ho nē kupī? Anē.

¹⁹ Tã nhũm myt axã nhũm Jejus mẽ hkõt mẽ pa ho mẽ pa xwýnhjaja Jerujarẽ rũm hapõj nẽ ma nhýri amnhũm hikranh kaxyw mra.

Mẽ pahte tanhmã mẽmoj tã Tirtũm wýr to hã mẽ pamã karõ

Matẽwre 6.14-15, 17.20; Makre 11.13; Juãw 14.13; mããñẽ Xiakre 1.6; Wam Juãw 3.22

²⁰ Tã nhũm apkati nhũm Jejus mẽ hkõt mẽ pa ho mẽ pa xwýnhjaja Jerujarẽ hwýr akupým mra. Hãmri nẽ axte pĩ hpãr pẽ fikẽhtita pumu. Jejus ra kot kãm kapẽr xwýnhta pumu nhũm ra grã pa nẽ xa.

²¹ Hãmri nhũm Simãw Pẽtre Jejus kot tanhmã pĩ mã kapẽr toja mã hamaxpẽr nẽ hã kãm:

–Kwa mẽ ijahkre xwýnh. Ga mẽmoj mũj pumu. Jãã ate fikẽhti mã akapẽr xwýnhta na grã par kumrẽx nẽ xa. Anẽ.

²²⁻²³ Hãmri nhũm kuma nẽ mẽ piitã mẽ kãm:

–Tý nã ãm hãmri na pa mẽ amã ixkapẽr. Kot kaj mẽ mẽmo kaxyw Tirtũm mã ajamaxpẽr týx pẽ mẽmoj tã awý nhũm ama nẽ amã hprãm xã hkõt tanhmã amã hipẽx to. Ka mẽ amnhĩ kaxyw Tirtũm mã ajamaxpẽr týx pẽ hixẽt mũj mã akapẽr nẽ kãm: “E xa nẽ ma tẽ nẽ gõ xujanãr kãm mrõ.” Anhýr o kãm akapẽr nhũm amar xã hkõt ã amnhĩ nhĩpẽx anẽ nẽ tẽn kamã mrõ.

²⁴ Kot kaj mẽ mẽmoj tã Tirtũm wý nẽ kaxyw ãm pix mã ajamaxpẽr týx nẽ nhũm amã ho anẽ.

²⁵⁻²⁶ –Nẽ kot kaj mẽ Tirtũm mã amnhĩ jarẽnh kaxyw nẽ ra mẽhõ kot tanhmã ato mã ajamaxpẽr. Hãmri nẽ ja ho ajamakẽtkati kurẽ kumrẽx nẽ axte kãm ajamaxpẽr kêt nẽ. ãm mẽmoj nyw pix mã ajamaxpẽr o tãm amnhĩ nhĩpẽx o apa. Hãmri nhũm Tirtũm kaxkwa rũm ja hã apumu nẽ apyrã nẽ ate tanhmã amnhĩ tomnuj to ho hamakẽtkati nẽ axte kãm hamaxpẽr kêt nẽ. Anẽ.

Mẽhõ kapẽr kõt Jejus kot mẽ ahkre hã mẽ kot hkukjẽr

Matẽwre 21.23-27; Rukre 20.1-8

²⁷ Nhũm mẽ akupým Jerujarẽ hwýr agjẽ nhũm Jejus kẽ axte Tirtũm mã amnhĩ jarẽnh xã hã ixkre hwýr axã. Nhũm hkõt mẽ pa ho mẽ pa xwýnhjaja hkõt hwýr mra nẽ hkõt agjẽ nẽ kormã kamã kuhẽ. Hãmri nhũm Ijaew krãhtũmjẽ mẽ mẽ kot Tirtũm kapẽr tũm o mẽ ahkre xwýnh mẽ mẽ õ patre krãhtũmjaja Jejus pumu nẽ hwýr mra nẽ hẽx rom tanhmã kãm kapẽr to. Na pre ra Jejus ixkreja nẽ mẽmoj to wẽnẽ xwýnh mẽ kãxpore o mẽ hpĩnhpanh xwýnhjẽ jano nhũm mẽ tee ri ja hã omu nẽ kamã gryk týx nẽ. Jakamã nhũm akupým mẽ hwýr axã nhũm mẽ axte omu nẽ hwýr mrar kurẽ kumrẽx

²⁸ nẽ kãm:

–Kwa mẽ inhmã amnhĩ jarẽ. Mẽhõ nhý hã na ka hte ã amnhĩ nhĩpẽx anhýr o ri apa? Mẽhõ na pre mẽ ixwýr amẽ ka pre mõ? Nã xã amnhĩ krã hkõt na ka hte ã amnhĩ nhĩpẽx anhýr o ri apahti? E kwa mẽ inhmã amnhĩ jarẽ. Anẽ.

²⁹ Nhũm Jejus kot tanhmã mẽ hamaxpẽr to hkõt mẽ omunh mex jakamã mẽ kãm:

–Nã kot pa ixkumrẽx mẽmoj tã mẽ akukja. Ka mẽ inhmã harẽ pa ri kormã mẽ amã tanhmã amnhĩ jarẽnh to.

³⁰ Finat Juãw Paxisja ã kot paj mẽ akukja. Mẽhõ nhý hã na pre hte mẽ hkrã kumrãr o pa? Xã amnhĩ krã hkõt nã xã Tirtũm nhý hã? E mẽ atõ inhmã harẽ. Anẽ.

³¹⁻³² Hãmri nhũm mẽ kuma nẽ tee ri kot tanhmã kutã kãm harẽnh to hkukamã hamaxpẽr nẽ axpẽn mã:

–Kwa tanhmã kot puj mẽ kãm ja jarẽnh to? Mẽ kot mar o kuhẽ xwýnhjaja na htem Juãw Paxis kẽp Tirtũm nhý hã kapẽr jarẽnh xwýnh ã axpẽn mã harẽnh o pa. Jakamã kot puj mẽ kãm kot amnhĩ krã hkõt mẽ hkrã kumrãr o pa hã harẽ nhũm mẽ tee ri mẽ pama nẽ mẽ pakamã gryk nẽ. Nẽ mẽ paxẽx rom ã kãm mẽ pakapẽr anhýr ã mẽ pah-pumu nẽ kẽn o mẽ pahtak o mẽ panhĩmex. No kot puj mẽ kãm Tirtũm nhý hã mẽ hkrã kumrãr ã harẽ nhũm mẽ pama nẽ mẽ pamã: “Kwa ã kot anhýr kẽnã na ka prem kapẽr mar tã ixkõt amnhĩ xunhwýr kêt nẽ?” Anẽ. Nã kot puj pẽr mẽ kãm tanhmã harẽnh to hkõt nẽ. Kot puj mẽ ãm kãm aa te mẽ pahte ja jarẽnh mar kêt pyrãk o harẽ. Anẽ.

Mẽ kot tanhmã kãm nẽ nhũm kot ta pãnhã tanhmã mẽ kãm nẽ pymaj nhũm mẽ tee ri tanhmã kãm nẽ hprãm kapry ho kuhẽ.

³³ Hãmri nẽ Jejus mã kãm:

–Konẽn. Mẽ ixte mẽhõ nhý hã kapẽr o pa hã omunhre hã. Anẽ.

Hãmri nhũm mẽ kuma nẽ mẽ kãm:

–Tk. Tõe kot pa xep ijaxwýja mẽ amã tanhmã amnhĩ jarẽnh to hkõt nẽ. Ijaxwýja ixte mẽhõ nhý hã ã ixte amnhĩ nhĩpẽx anhýr o ri ixpa hã amnhĩ pumunhre hã. Anẽ.

12

Mẽ ãpẽn punuj xwýnhjẽ jarẽnh

Matẽwre 21.33-46; Rukre 20.9-18

¹ Nhũm Jejus arĩ Ijaew krãhtũm mẽ mẽõ patre krãhtũm mẽ Tirtũm kapẽr tũm o mẽ ahkre xwýnhjẽ mã kapẽr o xa. Nẽ mẽ kãm mẽ kot tanhmã hipẽx to hkukamã mẽ kãm tanhmã amnhĩ jarẽnh to. No ãm hã kuxi nẽ mẽ kãm awjarẽ nẽ mẽ kãm:

–Koja mẽhõ hpur ã hkwyjẽ mã karõ. Mẽ kot kamã kãm ãpẽn kaxyw mẽ kãm karõ. Hãmri nhũm mẽ ma hwýr mra nẽ kamã mẽmo hy hkre nẽ hkre pa. Hãmri nẽ pu hã kahẽ hpa nẽ pur kaẽx kãm ixkre hprẽk nhĩpẽx. Mẽ kot hũmõk ã mẽ kot kẽp ãhĩnh

pymaj mẽ hapêr o hkrĩ kaxyw. Hãmri nõ hipêx pa nhũm mẽõ patrãwja awry hã krĩ hõ hwýr nojarêť nõ mẽ kãm tanhmã hpur jarênh to nõ mẽ kãm: “E or ixpurta nõ. Kẽ kamã mẽmoj kã hpa kã mẽ mãmrĩ kamã awjamý nõ ho axkjẽ. Hãmri nõ ixkutêp inhõ jaxyw nõ mãmrĩ anhõ tanhmã ho hprãm xã hkõt tanhmã ho.”

—Anhýr o mẽ kãm kapêr hãmri nõ ma mẽõ.

² Tã nhũm ra pur kãm mẽmoj hkã pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm ãpênh xwýnhjẽ hõja nhũm akupým mẽ hwýr kumẽ. Mẽ kot kãm õ hkwy nhõr nhũm ma kot kãm o mõr kaxyw ma mẽ hwýr kumẽ nhũm ma akupým mẽ hwýr mẽõ. Mõõ nõ ra mẽ hwýr pøj.

³ Hãmri nhũm mẽ omu nõ axtem nõ homnuj nõ. Nẽ unẽ nõ htak nõ akupým hano nhũm ý kamã ma akupým mẽõ.

⁴ Hãmri nhũm õ patrãwja tee ri omu nõ hpãnhã ja mẽ nhũm ma mẽ hwýr mẽõ. Mõõ nõ mẽ hwýr pøj. Hãmri nhũm kẽ wem omu nõ mã ho anẽ nõ. Unẽ nõ htak nõ hkrãx pẽ htak nõ akupým hano nhũm wanta pyrà nõ ma akupým ý kamã mẽõ.

⁵ Hãmri nhũm axpẽn pãnhã kãm mẽ ãpênh xwýnh kwýjẽ rẽ nhũm mẽ axpẽn pãnhã ma mẽ hwýr pa. Ma mẽ hwýr pa nõ pøj nhũm mẽ te ho wantajẽ mẽ hipêx pyrà nõ mẽ hkwyjẽ pynẽ nõ htak rax nõ mẽ hano nõ mẽ hkwyjẽ pa.

⁶ Nhũm mẽ õ patrãw mẽ harênh ma nõ tee ri amnhĩ kukamã hamaxpêr nõ hamaxpêr o: “Hẽxta waa nõ. Tanhmã kot paj wẽ amnhĩ nhĩpêx to nõ inhõta kwý jamý? Nã kot paj mẽ hwýr ixkraja mẽ. Inhmã hapê htã kot paj mẽ hwýr kumẽ kẽ ma mẽ hwýr mẽõ. Hãmri nhũm mẽ kęp ixkra hã omu nõ tanhmã ixpẽ ho hkêt nõ. Nẽ jatã inhmã kãm inhõja kwý gõ nhũm man ixwýr o tẽ. Nã kot paj anẽ.”

—Anhýr o hamaxpêr hãmri nõ ma mẽ hwýr hkraja mẽ nhũm ma mẽ mẽõ.

⁷—Tã mẽ hwýr hpõx o mẽõ nhũm mẽ amým amnhĩ wýr omu nõ kęp hkra hã omunh kurẽ kumrẽx nõ hã axpẽn mã amýnẽ nõ axpẽn mã: “E. Nã oněj hpur nhõ dõn krata tẽ. Kõja nhýrmã õ papaj mýrpe amnhĩm pur ã pyka pytã nõ ho õ. Jakamã e pu mẽ kupĩ nõ kęp hpur ho arĩ nõ ho panhõ. E kwa tokyj pu mẽ kupĩ ri.” Anẽ.

⁸—Rõm nhũm ra mẽ hwýr hpõx o tẽ nõ ra pøj nhũm mẽ unẽ nõ pur nõ ho kato nõ ahkã kamã kupĩ. ã mẽ ujarênh kot anhýr. Anẽ.

⁹ Nhũm pre ã Jejus Ijaew krãhtũmjẽ mã ujarênh anẽ. Hãmri nõ hã tanhmã mẽ hkukjêr to nõ mẽ kãm:

—E mẽ inhmã mẽmoj jarẽ. Kõja pur nhõ dõnja tee ri mẽ kot hkra hpĩr ã harênh ma hãmri nõ tãm mẽ hwýr mẽõ hãmri nõ tanhmã mẽ hipêx to wehe? Nã kõja ma mẽ hwýr mẽõ nõ mẽ himex pa hãmri nõ hpãnhã nhãm hpurta ã mẽmojẽ rẽ.

¹⁰ Mãn ka prem ra Tirtũm kapêr ã kagã htũm kot ja jarênh ma nã? Harênh kot:

Na prem kẽn o amnhĩm õrkwý nhĩpêx kaxyw hãmri nõ kẽn maati pumu nõ htýx omnuj ã hkamnhĩx nõ hkaga. Mẽ kot hkaga htã nom nhũm Tirtũm mẽ kurom mex o kot kẽn piitã hakrenh par ã omunh kurẽ kumrẽx.

¹¹ ãm hãmri na pre ã mex ã omunh anẽ. Anẽ. ã Tirtũm kapêr ã kagã htũm kot harênh kot anhýr. Anẽ.

¹² Nhũm pre ã Jejus mẽ kãm ujarênh kãm mẽ harênh anẽ nhũm mẽ amnhĩ tã kuma. Tirtũm kapêr tũm o mẽ ahkre xwýnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kẽn maati kaga xwýnhjẽ jarênh o te mẽ tãm harênh pyrãkja ma nhũm ja mẽ kęp omnuj nõ. Jakamã nhũm mẽ kãm unênh nõ haxãr prãm nõ. Nom amnhĩ tã kãm mẽ kot mar o kuhẽ xwýnhjẽ puma nõ.

¹³ Jakamã na prem ma mra nõ hapøj hãmri nõ Jejus wýr Parijew nhõ xwýnh mẽ pahĩ Erox kõt mẽ pa xwýnh kwýjẽ rẽ. Mẽ kot hẽx rom mẽmoj tã hkukjêr nhũm kot mẽ mar nõ tanhmã Rõm nhõ xwýnhjẽ nhõ pahĩ Sesti kapêr kuhpa hã ri tanhmã mẽ kãm nõ nhũm mẽ kot mar kaxyw.

¹⁴ Jakamã nhũm mẽ ma hwýr mra nõ hẽx rom kãm kapêr nõ kãm:

—Kwa Jejus? Nã ãm hãmri na ka hte Tirtũm kapêr o mẽ ahkre mex nõ. Na ka hte mẽ kamã akahak o apa hkêt nõ. Nẽ mẽ kot tee ri mẽ kot tanhmã ato kapêr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarẽ. Rõm nhõ pahihtĩ kot mẽ pahpẽ Ijaew mẽ pahte kãm kãxpore hkwy nhõr ã mẽ pamã karõta. Kwa xã ja amã mex nã? Xã kot pu mẽ mẽ kãm kugõ? Xã kot pu mẽ kãm õr kêt nõ? E kwa mẽ inhmã harẽ. Anẽ.

¹⁵ Nhũm prem ã hẽx rom ja hã hkukjêr anhýr tã no nhũm Jejus mẽ hamaxpêr ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kãxpore htýxre hõ gõ pa omu. Anẽ.

¹⁶ Hãmri nhũm ja kãm ja gõ nhũm kupy nõ kãnhmã kupẽ nõ mẽ kãm:

—E mẽhõ nhĩxi nõ mẽhõ karõ na hã? Anẽ.

Anẽ nhũm mẽ mẽ kãm:

—Pahĩ Sesti karõ nõ hixi na hã.

¹⁷ Anẽ nhũm mẽ mẽ kãm:

—Tý. Tõ kër ka mẽ mãmrĩ kãm hkwy nhõr o apa. Hã hkarõ nõ hã hixi. Tãm kot hipêx xwýnh jakamã õ na. No mẽ kajaja na pre Tirtũm mẽ anhĩpêx nhũm mẽ apẽ õ jakamã kwa kër ka mẽ kapêr kõt pix mã ri amnhĩ nhĩpêx o ri apa. Anẽ.

Nhũm pre ã mẽ kãm kapêr anẽ nhũm mẽ piitã mar o kuhẽ. Nhũm mẽ kot hẽx rom hkukjêr xwýnhjaja amnhĩ jaêr pẽ ã kãxpore jarênh anhýrja ã kuma nõ axpẽn mã:

—Kwa mẽ paxêx rom mẽ pahte hã hkukjêr tâ nhũm ãm hãmri mẽ pakutã mẽ pamã harê. Kwa tanhmã kot puj wem hkukjêr to nhũm pahĩ Sesti kapêr kwým ri mẽ pamã mẽmoj jarê? Anê.

Hãmri nê tee ri tanhmã hkukjêr to hkukamã hamaxpêr o kuhê.

Akupým mẽ htĩr xwýnhjê jarênh

Matêwre 22.23-33; Rukre 20.27-40; Juãw 6.21, 6.38-40; mãânên Wam Korĩt 6.14, 15.12-28; Wam Tesarôn 4.13-18

¹⁸ Tã nhũm Satusew nhõ xwýnh kwýjaja. Mẽ kot akupým mẽ htĩr mã hamaxpêr kêt xwýnhjaja na pre mẽ. Tã mẽ kot mẽ htyk nê mẽ hapêx ã mẽ hkamnhĩx jakamã na prem axpên mã Jejus jarênh o:

—E kwa pu mẽ ma hwýr mra nê mẽmoj xihýtã ã hkukja kê mẽ pama nê tee ri tanhmã mẽ pamã kapêr to hkukamã hamaxpêr. Hãmri nhũm mẽ piitã ja hã omu nê ãhpumunh kêt ã omunh kurê kumrêx. E tokyx ma pu mẽ hwýr. Anê.

Hãmri nê ma hwýr mra nê Parijew nhõ xwýnhjê pyrã nê hêx rom kãm:

¹⁹ —Pa Jejus? Kwa mẽ inhmã mẽmoj jarê. Na pre finat Mojesja Tĩrtũm nhỹ hã ã mẽ panhĩgêjtjê mã karõ anê. Mẽ hkra hkêt rãhã mẽ pa nê mẽ htyk xwýnhjaja nhũm mẽ harênh o:

Koja mẽhõ hprõ hãmri nê kamã hkra hkêt rãhã pa nê ty. Hã koja hkõt htõja hpãnhã hprõ o hprõ nê kamã hkra. Hãmri nhũm kato nê te kêp htõ htyk xwýnhhta hkra pyrãk. Anê.

Na pre ã Mojes Tĩrtũm nhỹ hã ja hã mẽ kãm karõ anê.

²⁰ Jakamã kwa ga mẽ ixujarênh ma. Koja mẽmojjaja mẽ kot axpên to htõ xwýnhjaja kêp 7. Nhũm kot waja hprõ. Nê wa pa nhũm myja kormã hprõ kamã hkra hkêt rãhã ty.

²¹ Nhũm hkõt htõ hõta hpãnhã hprõ ho hprõ nê wa axpên to pa. Nhũm haxwýja kamã hkra hkêt rãhã ty. Nhũm hkõt htõ hõta haxwýja ho hprõ nê wa axpên to pa grire nhũm wanta wa urãk nê kamã hkra hkêt rãhã ty.

²² Hãmri nhũm htõ hkwyýjaja piitã nija pyxi nê axpên pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkõt amnhĩ to hitep nê ty.

²³ Tã Tĩrtũm kot akupým nhỹrmã mẽ ho htĩr ronhỹx nhỹ nhỹx kêp nija mjên kumrêx? Ra piitã kot ho hprõ kênã. E kwa mẽ inhmã ja jarê. Anê.

²⁴ Hãmri nhũm Jejus ã mẽ ujarênh anhýrja ma nê mẽ kãm:

—Tk. Nã mẽ ate Tĩrtũm kapêr ã kagã htũm mar mex kêt. Nê mẽ aprĩ hã tanhmã Tĩrtũm kute hã omunh kêt jakamã na ka mẽ ã atýx ja hã ixkukjêr anê.

²⁵ Kormã mẽ htĩr ri mẽ kot Tĩrtũm kõt amnhĩ xunhwýr xwýnhjaja na htem ty hãmri nê Tĩrtũm nhõ krĩ kamã axte kãm hprõ hprãm kêt pa. Rý ni japêr nê kãm mjên prãm kêt nê pa. Hãmri nê Tĩrtũm kapêr o mẽ wrýk xwýnhjê pyrã nê axte htyk kêt nê. ãm htĩr tũm rãhã nê pa ho pa.

²⁶ —Nom mẽ ate akupým mẽ htĩr kêt ã mẽ hkamnhĩxja kot paj ixprĩ hã mẽ amã harê. Amnepêm na pre Tĩrtũm pĩ hpõk kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tĩrtũm na pa. Nê mãânên ixpê Apraãw kra Ijak mẽ htãmnhwý jako wa õ Tĩrtũm na pa.

Anhýr o Mojes mã amnhĩ jarê nhũm kuma nê hã kagã.

²⁷ Kêp apu arĩ mẽ htyk rãhã nhỹx pre ã mẽ harênh anhýr kêt nê. Nhỹx pre mẽ harênh o: “Amnepêm Apraãw nê hkra nê htãmnhwý mẽ htĩr ri ixpê mẽ õ Tĩrtũm na pa pre.” Anhýr o nhỹx pre mẽ harê. Nom na pre ã amnhĩ jarênh anhýr kêt nê. Mẽ pamã te Apraãwja mẽ htyk nê mẽ hapêx pyrãk. Nom nhũm prem ra Tĩrtũm ri akupým htĩr nê mex nê pa ho pa. Tã ka htem Tĩrtũm kapêr kwým ri akupým mẽ htĩr kêt ã mẽ harênh o apa. Anê.

Tĩrtũm kapêr maati jarênh

Matêwre 10.37, 22.34-40; Rukre 10.25-27; mãânên Wam Juãw 2.15, 5.3; Apokarip 2.4

²⁸ Tã nhũm Tĩrtũm kapêr tũm o mẽ ahkre xwýnhjê hõ mẽ hwýr tẽ nê mẽ kot axpên mã kapêr ã mẽ omunh o xa. Hãmri nê Jejus kot tanhmã Satusew nhõ xwýnhjê mã kapêr mex toja ma nê kãm:

—Nã ãm hãmri na ka ã mẽ kãm ja jarênh anê Pahĩti. Kwa inhmã mẽmoj jarê. Na pre Tĩrtũm ahpýnhã mẽmoj to 10 nê mẽ pamã hã karõ. Mẽ pahte hkõt amnhĩ nhĩpêx o ri papa kaxyw hã mẽ pamã karõ. Tã nhỹ kapêr na mex o kot hkwyýjê jahkrenh wehe? Anê.

²⁹ Hãmri nhũm kãm:

—Nã Tĩrtũm kapêr sohtõõ. Kapêr piitã hkõt mẽ pahte amnhĩ nhĩpêx o papaja na kãm hprãm. No pixi na mẽ pahte hkõt amnhĩ nhĩpêx o papaja nhũm kãm hprãm týx o kot hkwyý jakrenh. Kapêr mex maati na ja. Na pre kapêr o:

E mẽ apê Ijaew nhõ xwýnhjaja. Ixpê mẽ anhõ Tĩrtũm ã ixpixi mex na pa.

³⁰ Jakamã kêr ka mẽ amã ixkĩnh týx o mẽmoj piitã hakrenh pa. Jao mẽ anhĩ piitã ho amã ixkĩnh týx kumrêx o ri apa.

³¹ Anhýr o na pre mẽ pamã karõ. Nê hkõt ja: Kêr ka mẽ nhãm mẽ hipêx o te ka amã amnhĩ tã ma pyrãk o mẽ hipêx o ri apa. Jao tãm mẽ hipêx rãhã ho ri apa. Anê.

E ja wa kumrêx na Tĩrtũm kãm mẽ pahte hkõt amnhĩ nhĩpêx o ri papa hprãm týx nê. Anê.

³² Hāmri nhūm kuma nē kām:

—Nā ām hāmri na ka ja jarē Mēijahkre xwýnh. Tirtūm pyxi mex kēnā.

³³ Amnepēm na pre htem kām amnhī jarēnh kaxyw nē kām mēmoj gō nē ri kormā tanhmā kām amnhī jarēnh to. Tā nom kot puj mē ā ate harēnhta kōt amnhī nhīpēx anhýr o papa jao mē panhī piitā pamā Tirtūm kīnh. Nē mē pamā hkīnh o mēmoj piitā hakrenh pa. Nē nhām mē hipēx o te mē papamjaja pamā amnhī tā ma pyrāk o mē hipēx. Jao tām mē hipēx rāhā ho ri papa. Kot puj mē ā amnhī nhīpēx anē nhūm Tirtūm kām ja mex o mē pahte kām mēmoj nhōrta jakre.

Anhýr o kām kapēr.

³⁴ Hamaxpēr mex pē ā Jejus mā kapēr anē nhūm kuma nē kām:

—Nā ām hāmri na ka ja jarē. Na ka ra mē kot Tirtūm kōt amnhī nhīpēx o amnhī nhīpēx nyw pumunh mex o mō. Nā te ate tokyx hkōt amnhī xām kaxyw pyrāk. Anē.

Hāmri nhūm mē kām hkurē xwýnhjaja tee ri wa kot axpēm mā kapēr mar o kuhē nē axte kām mēmoj tā hukujēr pyma nē. Ra tee ri mē kot hēx rom mēmoj tā hukujēr kapry jakamā axte tanhmā hukujēr to hkēt nē.

Jejus kēp pahi finat Tawi nhō Pahihti hā harēnh

Matēwre 22.41-46; Rukre 20.41-44; mǎānēn Rōmān 1.3-4

³⁵ Hāmri nhūm Jejus arī Tirtūm mā amnhī jarēnh xā hā ixkre kamā amnhī tā mē ahkre. Nom te nhām mēhō hā mē hukujēr pyrāk amnhī tā mē hukujā nē mē kām:

—E mē inhmā mēmoj jarē. Tirtūm kapēr tūm o mē ajakre xwýnhjaja na htem tanhmā mē amā Tirtūm kot mē akaxyw ām mā xwýnh jarēnh to nē mē amā harēnh o: “Koja kēp pahi finat Tawi kanrēhā htāmnhwý koja.” Anhýr o kot mē amā harē. Ām kēp kanrēhā htāmnhwý pix ā mē amā harēnh o pa. No na pre pahi Tawija kēp kanrēhā htāmnhwý hā harē nē mǎānēn kēp ō pahihti hā harē. Tā nom nhūm Tirtūm kapēr tūm o mē ajahkre xwýnhjaja na htem urā nē kēp pahihti hā mē amā harēnh kēt nē. Ām kēp kanrēhā htāmnhwý pix ā harē. Kwa mo na htem Tawi pyrā nē kēp ō pahi hā harēnh kēt nē?

³⁶ Na pre Tawi tām Tirtūm kapēr tūm kwý hā kagā nē tanhmā Tirtūm kot mē akaxyw ām mā xwýnhta jarēnh to. Tirtūm Karō nhý hā tanhmā harēnh to. Tirtūm mex ā mē grer xāja kwý hā kagā nē hā kagā ho:

Tirtūm na pre inhō Pahihti mā ā kapēr anē nē kām: “E amnē ixwýr tē nē inhīhkō hā nhý nē inhmā mē ho amnhīptār o akrī. Kot paj mē kot kām akurē xwýnh piitā mē unēnh pa nē awýr mē o mra

nē anhīhkram mē haxār pa.” Anhýr o pre kām kapēr. Anē.

³⁷—Na pre ā Tawi Tirtūm kot Kris mā kapēr jarēnh nē kēp ō pahi hā kagā anē. Tā nom Tirtūm kapēr tūm o mē ajahkre xwýnhjaja na htem kēp Tawi htāmnhwý pix ā ri axpēm mā harēnh o ri pa. No kēt Tawija na pre kēp ō Pahihti hā harēnh o pa. Anē.

Nhūm pre ā Jejus mē kām amnhī jarēnh anē nhūm mē mar o kuhē xwýnhjaja kuma nē hkīnh nē. Nē kām axte mar prām nē.

³⁸ Hāmri nhūm arī mē ahkre ho nhý nē mē kām:

—Kwa mē o kora. Kēr ka mē Tirtūm kapēr tūm o mē ahkre ho mē pa xwýnhjē kot amnhī nhīpēx o amnhī nhīpēx kēt nē. Mē omu nē ām mē omu nē mē kot amnhī nhīpēx kōt amnhī nhīpēx kēt nē. Na htem piitā mē hā hpjiaām kaxyw ē mex pix kām ri pa. Nē mē kot amnhīm mē rūnh ā mē harēnh nhūm mē kot amnhī jarēnh marja na htem kām hprām.

³⁹ Nē Tirtūm kapēr o mē ahkre xā hā ixkre kamā mē kām amnhī to rūnh xwýnhjē hkrī xā mex pix kamā na mē kām hkrī hprām. Nē mēmoj tā mē apkur xā hā arīgro hā ma hkwyjē hkōt mē apkur xā hā ixkre hwýr akuprō nē kām mē kot amnhī to rūnh xwýnhjē hkrī xā mex pix kamā hkrī hprām.

⁴⁰—Nē mē kot mē mjēn htyk xwýnhjē ho mex o pa hā amnhī jarēnh tā amnhī to hēx. Nē na htem axtem nē mē nokupyr kaxyw mē hwýr mra nē mē kām: “E ot pa awýr ato ajuta kaxyw tē. Ra amjēn apē htyk jakamā kot paj pam amā akukrēx jamār o ixpa.” Anē hāmri nē mē kēp mē ōrkwy pytā nē amnhīm mē kēp mē hikukrēx piitā ho hapēx. Te tām kot mē hipēx o pa pyrāk nom tām mē hipēx kēt nē. Nē te tām amnhī nhīpēx pyrā nē Tirtūm mā amnhī jarēnh japjēē ho kuhē. Te mē kot Tirtūm mā ām hāmri amnhī jarēnh pyrāk tā hkwyjaja kot ja hā mē omunh pix kaxyw nhūm mē ā kām amnhī jarēnh anē. Mýrapē koja mē mex kēt nē. Koja Tirtūm tanhmā mē hipēx kati hto. Jakamā kwa kēr ka mē ā mē kot amnhī nhīpēx anhýr o mē pa xwýnhjē kōt amnhī nhīpēx o ri apa hkēt nē. Ām kwarī ho kwarī. Anē.

Kēp mjēn htyk xwýnh jarēnh Rukre 21.1-4

⁴¹ Nhūm Jejus arī Tirtūm mā amnhī jarēnh xā hā ixkre kamā mē omunh o xa. Na pre hte Ijaew ixkreja o mex kaxyw ixkre jamār xwýnhjē mā hikāxpore hkwy nhōr o pa. Nhūm mē hikāxpore rūnh xwýnhjaja hwýr agjē nē kāxpore gjēnh xā kamā hkwy ho rax nē hagjē nē ma akupým mra.

⁴² Tā nhūm mēhō ni pē mjēn htyk xwýnhjaja haxwýja hwýr axā. Kēp amrakati kumrēx. Nē hikāxpore týxre ām pijakrutre htā kāxpore rūnh xwýnhjē hpānhā ixkreta wýr tē. Nē

kām Tirtūm kīnh xàj kàxpore gjēnh xà kamā hamē kumē hāmri nē kato nē ma akupŷm tē.

⁴³ Hāmri nhūm Jejus amŷm ā kot amnhī nhīpēx anhŷr ā omunh o xa nhūm ja kām mex nē. Hāmri nē hkôt mē pa ho mē pa xwŷnhjē mā harē nē mē kām:

—E mǎn ka mēnire htēm mŷj pumu. Na pre mjēn kēp ty nhūm kēp amrakati nē hikàxpore grire htā amnhī pē ōr pa. Kwŷjē rom kām Tirtūm kīnh xàj amnhī pē ōr pa. Apkur xà hā hikàxpore na.

⁴⁴ Kēt mē hkŷwjaja na hte hikàxpore hkŷw pix o mra nē gjēnh xà kamā hajē nom ari mē hikàxpore rūnh. No nija na mē urāk nē kām hikàxpore japē hkēt nē. Nē ho ōxŷ hkēt nē amnhīx piitā o tē nē ōr pa. Anē.

13

Jejus kot nhŷrmā mēmoj piitā ho hapēx ā harēnh

Matēwre 24.1-14; Rukre 21.5-9, 21.17-19; māānēn Wam Ximotre 4.1; Sikūn Ximotre 3.1

¹ Tā hāmri nhūm Jejus kôt mē pa ho mē pa xwŷnhjaja ari Tirtūm mā amnhī jarēnh xà hā ixkre kaxwŷnh pumunh o kuhē nē hā Jejus mā:

—Hēxta waa nē. Ixkreja mex kumrēx Pahitī. Kēn rūnh o mē kot hipēx jakamā mex o mex. Nē mē kot ri Tirtūm mā hkīnh xà nhōr nēj haxwŷja piitā mex kumrēx. Anē.

² Hāmri nhūm mē kām:

—Nā mex tā koja nhŷrmā mē kām Tirtūm kurē xwŷnhjaja grānh pa. Kōja ari kēn axkrutre axpēn mŷnh nē nōr kēt kumrēx. Kōja piitā anhrā nē ahpŷnhā ri hikwŷ.

Anhŷr o mē kām kapēr.

³ Hāmri nē ixkreja rūm kato nē ma tē nē hixēt pē Oriwēhti hā api nē hā nhŷ. Tirtūm nhōrkŷw kutā hixētja nhūm hā api nē hā nhŷ. Hāmri nhūm Simāw Pētre mē Xiakre mē Juāw mē Andreja ma hkôt mra. Ahte hkôt mra nē mē kot Tirtūm mā amnhī jarēnh xà hā ixkre grānh par ā hkukja nē kām:

⁴ —Kwa xà ām hāmri koja mē ā ixkreja nhīpēx anē? E aprī hā mē inhām harē. Xà koja mē nhŷrmā kugrā nà xà koja mē tokyx ho anē? Kwa mēmo koja we wŷj ri tanhmā amnhī nhīpēx to? Anē.

⁵⁻⁶ Hāmri nhūm mē kām:

—Nā kot paj mē amā harē. Nom nhŷrmā mēmoj piitā hapēx kaxyw tanhmā amnhī nhīpēx to kumrēx kot paj mē amā harē ka mē inhama. Kōja mē ohtō nē mē apē ixkwŷjē hwŷr mra nē hēx rom te pa ixte amnhī nhīpēx pyrāk o amnhī nhīpēx o pa. Nē tanhmā mē amā amnhī jarēnh to nē mē amā: “E pa na pre Tirtūm mē awŷr inhmē. Ixpē kaxkwa rūm ixwŷrŷk xwŷnhhta na pa.” Anhŷr o mē akôt mē amā amnhī to hēx o pa. Nē mē amā: “E na pa mē ato amnhīptār kaxyw mē awŷr wrŷ.” Anhŷr o mē amā

amnhī jarē. Nom kēr ka mē ama nē ām mē ama. Mē kot amnhī to hēx xwŷnh na mē. Kormā akupŷn ixpōx xà hā arīgroja kormā.

⁷ —Nē koja mē nhŷri awry hā axpēn par o pa. Nē mē atāā axpēn par o pa. Nom kēr ka mē harēnh ma nē ri tee ri tokyx mēmoj piitā hapēx ā hkamnhīx kēt nē. Mēmoj piitā hapēx xà hā arīgroja kormā.

⁸ —Nē koja mēmoj piitā hapēx kaxyw nhūm ahpŷnhā ri pika piitā hkôt mē pa xwŷnh piitā pika hō nhō xwŷnhjē kutā amnhī xunhwŷ nē axpu nē axpēn pa.

—Nē koja pika piitā hkôt tanhmā mē ā kuteja mē hamŷ nhūm mē amnhī xà htŷx kām hamak o pa. Nhūm nhŷri pika httertēt tŷx nē. Nē nhŷhŷnh pika hkŷw kamā mē pa xwŷnhjaja prām xàj pikaprār pa. Tā nom kormā mē kot amnhī xà htŷx kām hamak xà hkrax pix na ja. Te mēnijaja pijagiri kaxyw nē kormā ōhy xà hpŷnh pyrāk. Kōja mēmoj piitā hapēx kaxyw nē ā amnhī nhīpēx anē.

⁹ —E pa hpānhā mē kot Tirtūm mā amnhī jarēnh xà hā ixkre grānh par xwŷj ri mēmoj tanhmā kot hkukamā amnhī nhīpēx o hā hā harē. Mē ate hā ixkukjēr xwŷnhhta kot paj mē amā harē. Nā koja mē kām ixkurē xwŷnhjaja mē awŷr mra nē ixtā mē apynē nē mē atomunuj nē. Nē ma mē pikuprōnh xà hā ixkre hwŷr mē ato mra nē kamā mē kām mē ato kapēr punuj nē nhūm mē kuma nē ma mē ato mra nē mē ajagjē. Mē ate ixkôt apa ho apa xwŷnh ā ā mē anhīpēx anē. Nē mē ō pahitī hwŷr mē ato mra nē mē kām tanhmā mē ato kapēr punuj to.

¹⁰ Tā nom kwa kēr ka mē kutā akuhē nē māmri tām mē kām ijarēnh o akuhē.

¹¹ Nom kēr ka mē kām amnhī jarēnh kukamā tee ri ajamaxpēr o ri amā mē uma hkēt nē akuhē. Rŷ mē ajamaxpēr o: “Hēxta waa nē. Mē kot ixkukjēr ā arīgrota ā tanhmā kot pa we ri mē kām amnhī jarēnh to?” Anhŷr o tee ri amnhī kukamā ajamaxpēr kēt nē. Kōja Tirtūm Karō tanhmā mē akrā hto ka mē ŷ hā akatāt kôt tanhmā mē kām amnhī jarēnh to.

¹² —Nē mē atō nē mē anhīpēēxā nē mē akrajaja koja mē ixtā mē atā amŷnē nē ma pahī hwŷr mē ato mra nē kām mē ajarē nhūm mē kuma nē mē ajagjē nē mē akwŷjē pa.

¹³ Kōja mē piitā ixkôt mē akamā gryk nē ā kām mē akurē ho pa anē. Nom mē kot ā mē anhīpēx anhŷr mā tā kēr ka mē amnhī to htŷx nē ixkaga hkēt nē. Mē kot mē apar tā ka mē kaxkwa kamā akupŷm atŷr kurē kumrēx. Hāmri nē mē kurom Tirtūm mē wa ixri atŷr tūm nē amex rāhā nē apa ho apa. Mē kot tanhmā mē ato htā mē apē akupŷm kaxkwa kamā atŷr tūm nē apa mā xwŷnh jakamā kwa tee ri amnhī kukamā ajamaxpēr o ri apa hkēt nē. Anē.

Mē pahtomnuj t̄yx xw̄yñh maati hā harēnh

Matēwre 24.15-28; Rukre 21.20-24; määnēn Sikūn Tesarōn 2.3-4; Apokarip 13.11-17

¹⁴⁻¹⁶ Nhūm Jejus arī mē kām kapēr nē mē kām:

—Nē koja nh̄ymā kot mē atomnuj t̄yx kumrēx xw̄yñh maati ja axtem nē Tirtūm mā amnhī jarēnh xā hā ixkreja kamā amnhī xām. Hāmri ka mē ja hā omu nē mē kot krī grānh par mā ajamaxpēr kurē kumrēx. Koja ā amnhī nh̄ipēx anē ka mē am̄ym amnhī w̄yr mē omu hāmri nē ajapōj nē ma aprōt nē amrar kurē kumrēx. Mē apē jar pika pē Jutej kamā mē apa xw̄yñhjaja mē omu hāmri nē mē kot mē apar pymaj ma aprōt nē amrar kurē kumrēx. Hixēt prēk w̄yr ajapōj nē aprōt nē ma mra. Nē jar Jerujarē nhō xw̄yñhjaja kē mē umaj haxw̄yja hapōj nē ma hprōt nē ma mra. Nē kapōt ā ri mē pa xw̄yñhjaja kē mē ē jam̄yñh kaxyw akup̄ym krī hw̄yr ḡjēx kēt nē. Ām ma mē umaj hprōt nē mra. Nē kurē kumrēx.

¹⁷ —Nē mē htujarō xw̄yñhjaja nē mē hkra karāre xw̄yñhjaja. Jajē pē koja mēmoj omnuj t̄yx nē. Tanhmā kot wem amnhī to nē hprōt t̄yx? Nā pika ja kamā koja mē mex kēt nē. Mē kot amnhī tomnuj m̄yrapē koja Tirtūm tanhmā mē homnuj t̄yx to.

¹⁸⁻¹⁹ —Koja ā mēmoj amnhī nh̄ipēx anē hāmri nhūm mē piitā amnhī xā ht̄yx kām hamak rūnh o pa. Tirtūm kot mē piitā mē ho kator krax rūm amnē mē pa xw̄yñhjaja na mē kormā ā ht̄yx kamā hamak rūnh kēt nē. Kormā amnhī xā kamā hamak kryre. No nh̄ymā mē hprōt xā hā arīgrota ā koja mē amnhī xā ht̄yx kamā hamak rax kumrēx.

—Tā akup̄yn ixte mē aw̄yr ixw̄ryk xā hā arīgrota ā kot pa mēmoj punuj o ijapēx pa ka mē axte ā mēmoj kot anh̄yr pumunh kēt nē. Nom kormā akup̄yn ixw̄ryk xw̄yj ri kot kaj mē amnhī xā ht̄yx kamā ajamak o apa. Jakamā kēr ka mē ā amnhī nh̄ipēx anh̄yrja kukamā amnhī to Tirtūm w̄y nē kām: “Pa Tirtūm. Kwa kē mēmoj ā amnhī nh̄ipēx anh̄yr kaxyw hāmri kē amgrā pē ā amnhī nh̄ipēx anē. Koja na pē ā amnhī nh̄ipēx anē nhūm omnuj t̄yx nē.” Anh̄yr o amnhī to aw̄y.

²⁰ —Mē hprōt xā hā arīgrota ā koja Tirtūm kām mē apē hkrajaja mē atyk par pymaj mē anē mēmo punuta ā arīgro hkw̄y grā nē mē akukamā mē amā ho grēre. Koja mē akamā ukaprī xā ā mē anē hipēx anē.

²¹ —Nē koja ā mēmoj amnhī nh̄ipēx anh̄yr kaxyw hāmri nhūm mē hēx o mē pa xw̄yñhjaja ma mē aw̄yr mra nē hēx rom tanhmā mē amā kapēr to nē mē amā: “E ota ra Tirtūm kot mē pakaxyw ām xw̄yñhta pōj. Kwa mē tokyx hw̄yr mra nē omu nē hkōt ri apa.” Anh̄yr o mē amā hēx. Hāmri nhūm mē hkw̄yjaja tee ri mē kuma nē mē

amā: “Nā tām kēt. Jar mē ixkamā na. E mē tokyx amnē hw̄yr m̄an mra nē omu.” Anh̄yr o mē amā hēx o pa. Nom kēr ka mē ama nē ām mē ama nē mē hkōt amrar kēt nē.

²²⁻²³ —E kwa mē inhma. Na pa ra ixprī hā mēmoj kot ā amnhī nh̄ipēx anh̄yrja kukamā mē amā tanhmā harēnh to. Tā kēr ka mē axkām ajamak rom nē ri apa. Koja mē kot amnhī to hēx xw̄yñhjaja axpēn pānhā mē aw̄yr mra nē mē amā kēp Tirtūm kot mē akaxyw ām xw̄yñh ā amnhī to hēx. Nē mē hkw̄yjaja kēp Tirtūm nh̄y hā kapēr jarēnh xw̄yñh ā amnhī to hēx. Hāmri nē aa mē kot mēmoj pumunh kēt kw̄y ho anh̄yr o pa. Te Tirtūm nh̄y hā kot ho anh̄yr pyrāk nom hēx rom mē apē Tirtūm kot amnhīm mē arēnh xw̄yñhjē nokupyr kaxyw ā amnhī nh̄ipēx anh̄yr o pa. Anē.

Akup̄yn Jejus w̄ryk xā hā arīgro jarēnh
Matēwre 24.29-31; Rukre 21.25-28;
määnēn Sikūn Pētre 3.10; Apokarip 1.7, 19.11-16

²⁴⁻²⁵ Nhūm Jejus arī mē kām kapēr nē mē kām:

—Tā koja mē kot amnhī xā ht̄yx kamā hamak xā hā arīgrota hapēx nhūm Tirtūm ā mēmoj nh̄ipēx anē.

Koja kaxkwa ho āk t̄yx nē nhūm myyti ahtyk. Nhūm mytwr̄yre axte hirā hkēt nē.

Nhūm kanhēti piitā axrē nē rōrōk pa.

²⁶ Hāmri pa man akup̄yn pika hw̄yr w̄ry nhūm mē piitā ixw̄ryk kām ixpumu. Kakrā kamā kot paj ixih̄t̄yx o inh̄rā rax kām akup̄yn mē aw̄yr w̄ry.

²⁷ Hāmri nē ma krī piitā hw̄yr Tirtūm kapēr o mē w̄ryk xw̄yñhjē rē nhūm mē ma mra nē amnepēm ixte amnhī kaxyw mē axunhw̄yr xw̄yñh piitā ho akuprō nē akup̄yn ixw̄yr mē ho mra. Anē.

Jejus kot mēmo pī hpār ā ejēp jarēnh

²⁸ Nhūm Jejus arī mē kām kapēr nē mē kām:

—E ka mē pī hpār m̄j pumu. Na hte mēmo mytwr̄y hā rā nhūm mē omu nē ō hkukamā hamaxpēr kurē kumrēx.

²⁹ Ja pyrā nē koja mēmoj ā amnhī nh̄ipēx anh̄yr mē ka mē akup̄yn mē aw̄yr ixw̄ryk mā ajamaxpēr kurē kumrēx.

³⁰ Koja akup̄yn ixpōx kēt ri ā mē kot mēmoj kot amnhī nh̄ipēx anh̄yr pumunh xw̄yñhjaja kormā piitā htyk par kēt ri pa akup̄yn mē aw̄yr w̄ry.

³¹ —Nē koja nh̄ymā pika nē kaxkwa wa hapēx pa. Tā no ām ixkapēr koja wa urāk nē aa hapēx kēt nē. Koja ām rāhā ho rāhā. Kot paj aa ihk̄jē ho tanhmā mēnh to hkēt nē. Anē.

Mē pahte akupŷn Jejus wrŷk xà hā arīgro pumunh kêt à mē pajarēnh

Matēwre 24.36-44; Rukre 12.37-40; määnēn Atre 1.9-11; Wam Tesarōn 5.2; Sikūn Pētre 3

³² Nhūm Jejus arī mē kām kapēr nē mē kām:

–Nom akupŷn ixwrŷk xà hā arīgroja mē ate omunh kêt. Nē kaxkwa kamā Tirtūm kapēr o mē wrŷk xwŷnhjaja kot ja pumunh kêt. Nē pa ixpē Tirtūm Kra htā ijaxwŷja ixte ja hā amnhī pumunh kêt. Ām Mēpahpām maatija tapxipix kot ja pumunh.

³³ –Tā mē ate akupŷn ixwrŷk xà hā arīgro pumunh kêt jakamā kær ka mē axkām ajamak rom nē ri apa. Nē apkati mē amnhī wŷr ijapēr arīt rāhā ho ri apa.

³⁴⁻³⁵ –E pa tanhmā mē amā akupŷn ixwrŷk xà hā arīgro jarēnh to ka mē inhma. Koja mēhō nhŷhŷm nojarēt hāmri nē kām mē āpēnh xwŷnhjē mā mē āpēnh ā karō nē ōrkwŷ jamār xwŷnh mā tanhmā kām karō hto. Hāmri nē ōrkwŷ kahē xà jamār xwŷnh mā kām: “E kær ka ixwakre kamā ijapēr arīt rāhā ho ri apa.” Anē hāmri nē ma nhŷhŷm mō. Tā mē kot ijapēr rīt rāhā ho mē pa xwŷnhjaja te kot ixkre kahē xà jamār xwŷnh kot amnhī nhīpēx pyrāk. Ō patrāwja akupŷn hpōx xà hā arīgro hā omunh kêt jakamā na hte kahē xà jamār rāhā ho pa. Koja apu axpēr kamāt nhūm akupŷn hpōx japēr. Rŷ kôt ā kamāt rŷ krāhyre kà nhūm akupŷn hpōx japēr. Rŷ kwŷhtyk nhūm akupŷn hpōx japēr. Tā urāk nē mē ate akupŷn ixwrŷk xà hā arīgro pumunh kêt jakamā kær ka mē ijamār rāhā ho ri apa. Jao ixkutēp inhmā tanhmā amnhī nhīpēx to rāhā nē. Ra ixte mē amā hā karō xà hkôt.

³⁶ Kop ixkre kahē xà jamār xwŷnhja tee ri ō patrāw kamā ama hāmri nē ra ōtxwa nē htŷx ōt o ŷr rōm nhūm haēr pē hwŷr hpōx ronhŷx ja kēp mex kêt nē. Ja pyrā nē kær ka mē ixkutēp ixkôt amnhī nhīpēx rāhā ho ri apa. Nom tee ri amnhī wŷr ixkām ama hāmri nē axte inhmā ajamaxpēr kêt pē atŷx ri tanhmā amnhī tomnuj to ho apa hkêt nē.

³⁷ –E ixte mē amā mēmoj jarēnhja na pa hte ixkwŷjē piitā mē kām harē. Jakamā kwa kær ka mē akupŷn ixwrŷk ā ijapēr arīt rāhā ho ri apa. Anē.

Nhūm pre ā Jejus amnhī kukamā mē kām ujarēnh anē.

14

Mē kot Jejus pŷr kukamā hamaxpēr ā mē harēnh

Matēwre 26.1-5; Rukre 22.1-2; Juāw 11.45-53

¹Tā nhūm Ijaew hkīnhā ā arīgro pē Pas wŷr apkati axkrut. Pas ā na hte mē ixpē Ijaew-jaja amnepēm Tirtūm kot pika pē Ejit pē mē

inhīgēt nē mē ixpāmjē kator mā ijamaxpēr kaxyw axpēn wŷr akuprō nē hā ixkīnh. Na pa htem arīgroja mā: “Pas” anē. Nē harēnh o: “Mē pahte pāw kaxkrit kêt kur ā arīgro” anē.

² Jakamā nhūm mē inhō patre krāhtūmjē mē Tirtūm kapēr tūm o mē ahkre xwŷnhjaja kām Jejus pŷr prām nē. Nom mē kām hkôt kapēr mar o mē pa xwŷnhjē pyma nē. Nē tee ri hā amnhī jahkre nē axpēn mā:

–Hēxta waa nē. Tanhmā kot puj wem ho nē kupīl? Kot puj mē pahkīnh kām tanhmā ho nhūm mē hkīnh xwŷnhjaja hā mē pahpumu nē mē pakamā gryk tŷx nē. Pu mē hā axpu nē hā tanhmā axpēn to. Jakamā kwa pu mē kormā tanhmā ho hkêt nē. Anē.

Mēhō ni kot Jejus krā gregrer ā harēnh
Matēwre 26.6-13; Rukre 7.36-50; Juāw 12.1-8

³ Rōm nhūm Jejus Simāw nhōrkwŷ kamā kormā apkur o nhŷ. Krī pē Petān kamā. Simāwja na pre hkā kro xāpēr tŷx o pa nhūm Jejus akupŷn ho mex. Jakamā akupŷm ō krī hwŷr pōj nē kutā apkur o nhŷ. Hāmri nhūm mēhō nija harēnh ma nē mē hkuxwa xà hā kàx ō py nē ma hwŷr o tē. Nē mē hwŷr axà nē nhŷhŷnh kàx kahte nē mē hkuxwa xà ho hkrā gregrer pa.

⁴ Hāmri nhūm mē apkur o hkrī xwŷnhjaja tee ri ā kot amnhī nhīpēx anhŷr ā omu nē kamā gryk nē. Nē axpēn mā:

–Tk. Kwa nà na hā mē hkuxwa xàta kapŷr par kumrēx.

⁵ Kop apu ma o htēm nē ho wēnē nē hpānhā kàxpore ho rax kumrēx nē hamŷnh nē ho mē kēp amrakati xwŷnhjē nhīpēx par nhŷx ja kām mex nē. Mo na ri ā amnhī nhīpēx anhŷr kêt nē?

Anē nē hā kām akir.

⁶ Hāmri nhūm Jejus mē kuma nē mē kām:

–Tk. Kwa mē kām axākjēr kêt nē. Ām hāmri na ā inhīpēx anē.

⁷ Mē kēp amrakati xwŷnhjaja koja mē arī mē akôt pa rāhā nē. Ka mē amā mēmo arīgro hā mē ho ajuta hprām nē tanhmā mē ho ajuta hto nē mē kām mēmoj gō. No pa kot paj ri mē akôt ipxa ka mē ixto mex ry ho apa hkêt nē. Kot paj tokyx mē are.

⁸ Ixtyk nhūm mē kot ijaxār kukamā na ā ixkrā gregrer anē. Ām hāmri na ā inhīpēx anē.

⁹ Ām hāmri na pa mē amā ja jarē. Koja mē krī piitā hkôt axpēn mā ixte tanhmā mē anē amnhī nhīpēx to hā jarēnh o pa nē määnēn kot ā inhīpēx anhŷrja määnēn harēnh o pa. Nhūm mē piitā kot tanhmā ixto mex to hā harēnh ma. Anē.

Jut Kariot kot mē kām Jejus ā āmnēnh kaxyw ā harēnh

Matēwre 26.14-16; Rukre 22.3-6; Juāw 13.21-30

¹⁰Tā nhūm Jut Kariotja. Jejus kôt mē pa ho mē pa xwýnh pē 12 hō na pre. Tā axtem nē Satanasti nhý hā ma patre krāhtūmjē hwýr tē nē axtem nē tanhmā Jejus o mē mar to nē mē kām:

—E ot pa mē amā Jejus jarēnh o tē. Xà kot paj mē amā hā amýnē ka mē hpānhā inhmā amnhīre nā? Anē.

¹¹Hāmri nhūm mē kuma nē hkīnh nē. Hāmri nē kām:

—Nà kot paj mē amā amnhīre. Anē.

Hāmri nhūm mē kuma nē kato nē ma tē nē Jejus pynēnh kaxyw htānopxar o hkôt ri pa.

Jejus kot ý hā kapēr o mē pa xwýnhjē kutā apkur ā harēnh

Matēwre 26.17-19; Rukre 22.7-13

¹²Tā nhūm arīgro pē Pas kato. Amnepēm mē inhġētjaja na prem ōwēhti hkrare hkwy pa. Tirtūm kot ja hā mē omunh nē Ejit kām mē kām mē hkurē xwýnhjē nhīhkra nē mē kator kaxyw na prem ā amnhī nhīpēx anē. Jakamā na pa htem arī mē ixpē mē hkanrēhā mē htāmnhwýjaja Pas ā axpēn wýr akuprō nē jam ijamaxpēr pē mē urāk nē ōwēhti hkrare hkwy hpa nē pāwti kaxkrit kēt kām kuku.

Jakamā nhūm Jejus kôt mē pa ho pa xwýnh pē 12jaja Pas ā mē apkur xā hā Jejus kukja nē kām:

—Kwa nhýri kot paj mē akutēp Pas ā mē panhō hā apē? Anē.

¹³Hāmri nhūm mē kuma nē ja wa ho axkrut nē mē amnhī kukamā wa kumē nē wa kām:

—E wa ma Jerujarē hwýr wa tē. Nē hwýr axā nē mēhō myja pumunh kurē kumrēx. Nhūm amnhīm gō ru nē amnhī kre hā poti xām nē o tē ka wa omu nē hā ajēt nē ma ōrkwý hwýr hkôt tē.

¹⁴Hāmri nē ixkre nhō dōn pumu nē kām: “E Jejus na wa inhmē pa wa awýr tē. Na awýr pēr mēnh o: ‘Nhýri kot paj we ixkôt ri mē pa ho pa xwýnhjē mē Pas ā axpēn kutā apku?’ Anhýr o na awýr pēr mē.”

¹⁵—Wa ā kām akapēr anē kē war ama nē war amā ōrkwý nhīmōk ā ixkre rax ō jahkre. Ra kamā kaxyw mē paxāpkur xā hā mēmoj piitāā. Ka wa omu nē māmri kamā mē ixkutēp mē panhō hā apē. Anē.

¹⁶Hāmri nhūm wa kuma nē ma hwýr tē. Nē krīm axā nē ra kot wa kām mēmoj jarēnh xā hkôt mēmoj piitā omu nē mē kutēp mē kām mēō hā àpēnh o wa xa.

Jejus kot mēhō kot mē kām hā àmnēnh ā harēnh

Matēwre 26.20-25; Rukre 22.21-23; Juāw 13.21-30

¹⁷Tā nhūm kamātre nhūm Jejus mē hkôt mē pa ho pa xwýnhjaja wa hkôt mō.

¹⁸Hāmri nē kýxpē ixkreja wýr api nē hwýr agġē nē apkur kaxyw hkrī hpa nē kormā apkur o hkrī nhūm Jejus mē kām:

—E pa mē amā mēmoj jarē ka mē inhma nē amnhī krām haxār týx nē. Kot kaj mē ixkutā axāpkur o akrī xwýnhjē hō mē kām ixkurē xwýnhjē mā ixtā amýnē. Anē.

¹⁹Hāmri nhūm mē tee ri kuma nē hkaprī htýx nē. Nē axpēn pānhā amnhī tā hkukja nē kām:

—Kwa xā pa kot paj ā anhīpēx anē? Nà pa hkēt. Anē.

²⁰Hāmri nhūm mē kām:

—Nà mē apē 12jē hō kot kaj ā inhīpēx anē. Mē ate ixkutā guhkrax kām anhō pāwti ho mry kagō nhek o akrī xwýnhjē hō kot kaj ixtā amýnē.

²¹Tirtūm kapēr ā kagā htūm kot ixkukamā harēnh xā hkôt koja mē tanhmā ixto rax nē ixpī. Nom kot mē kām ixtā àmnēnh mā xwýnhta hēxta waa nē. Ā kot amnhī nhīpēx anhýrja mýrapē koja amnhī xā htýx kām hamak rax kumrēx. Kop apu aa ō māmāj nhōxā hkre rūm kator kēt ronhýx ja kām mex nē.

²²Anē nē kormā mē apkur o hkrī rōm nhūm pāwti hō py nē ho Tirtūm wý. Hāmri nē mē kām ho hkry nē mē piitā mē kām ōr pa nē mē kām:

—E na pa mē amā pāwti ho hkry nē mē amā kugō. Ja pyrā nē koja mē ā inhīpēx anē nē te ixto hkry hpar pyrāk o inhīpēx pa amnhī xā htýx kamā ijamak kām ty. Nom mē anē kot paj ty. E mē māmri aku. Anē.

²³⁻²⁴Nē hpānhā wīhti hā kop py nē mā ho anē nē Tirtūm mā harē. Hāmri nē mē kām kugō nē mē kām:

—E mē kot ixpīr xā hā arīgrota ā koja ixkamrō axkapī. Nom koja mē amarī ixpīr nhūm amarī hpikapīr kēt nē. Ām paa. Pa kot paj mē anē mē ihkram amnhī jaxā nhūm mē ā inhīpēx anē. Koja ixkamrō axkapī nhūm Tirtūm omu nē ixkukwak ri mē anē mē ate amnhī tomnuj piitā amnhī katut kôt rēnh pa nē mē ato hkra. Ra amnepēm kot ja hā amnhī jarēnh xā hkôt. Jakamā e. Mē axpēn pānhā ixkamrō pikapīr mā ajamaxpēr pē ixte mē amā kop kām wīhti nhōrta o akōm o axpēn nhīpēx. Anē.

Nhūm pre ā mē kām amnhī jarēnh anē nhūm mē piitā ho hkōm o axpēn nhīpēx.

²⁵Hāmri nhūm mē kām:

—Ām hāmri na pa mē amā amnhī jarē. Kot paj axte wīhti ho ixkōm kēt rāhā nhýrmā Inhō Papaj akupýn mē awýr inhmē. Hāmri pu mē rī kormā akupýn ixpōx xā hā arigrota ā pahkīnh nē. Nom axtem tanhmā hā pahkīnh to. Anē.

²⁶Nhūm pre ā mē kām kapēr anē hāmri nhūm mē Tirtūm mā mex o mex ā gre hāmri

nē hapôx pa nē ma hixēt pē Oriwēhti hwÿr mra.

Jejus kot Simāw Pêtre hkukamā tanhmā harēnh to

Matēwre 26.31-35; Rukre 22.31-34; Juāw 13.36-38

²⁷ Tā nhūm Jejus hkôt mē pa ho pa xwÿnhjē hkukamā tanhmā mē kām ujarēnh to nē mē kām:

—E mē inhmā. Tirtūm kapēr ā kagā htūm kot ā mē pajarēnh kot anhÿr.

Kot paj ōwēhti jamār o pa xwÿnhja pī hāmri nhūm ōwēhti hpigrānh pa nē ma angrā nē ri mra.

Anhÿr o te ixpē ōwēhti jamār xwÿnh nhūm mē apē ōwēhti pyrāk ā mē pajarēnh. Tā kot puj mē ā amnhī nhīpēx anē.

²⁸ Mē kot ixpīr tā koja Tirtūm akupÿm ixto ixtīr. Pa akupÿm ixtīr nē ma mē akukamā pīka pē Garirej wÿr mō. Kamā kot puj mē axte axpēn pumu. Anē.

²⁹ Hāmri nhūm Simāw Pêtre tee ri mē amnhī tā kuma nē kām:

—Kwa nā. Ri ā mē ijarēnh anhÿr kēt nē Pahihti. Kot paj akaga hkēt nē. Jajaja koja angrā nē hprōt nē ma mrar japēr no pa kot paj anhÿr kēt nē. Anē.

³⁰ Hāmri nhūm kām:

—Nā kot kaj anē Simāw Pêtre. Koja apkati hkôt krāhyre hkār kēt ri ka ra mē umaj ate ixkôt apa hkēt ā mē kām amnhī tā axāprār o axkrunēpxi kām ga. Kwa jam ajamaxpēr tÿx nē. Anē.

³¹ Hāmri nhūm tee ri amnhī tā kuma kām amnhī tā āprār kām hihtÿx nē kām:

—Tk. Kwa nā. Kot paj ā amnhī nhīpēx anhÿr kēt nē. Koja mē tee akôt ixpīr mā tā no pa ām aa akaga hkēt kumrēx. Kot paj akôt ipa ho ipa rāhā nē. Anē.

Hāmri nhūm hkôt mē pa ho mē pa xwÿnh kwÿjē piitā ā kām amnhī jarēnh anē.

Jejus kot Tirtūm mā amnhī jarēnh

Matēwre 26.36-46; Rukre 22.39-46

³² Tā nhūm Jejus ma nhÿri mē kot kām “Gesēn” anhÿr xwÿnhja wÿr hkôt mē pa ho pa xwÿnhjē ho mō. Hāmri nē mē kām:

—E mē jar ixkutēp akrī. Pa ma mütūm tē nē Tirtūm mā amnhī jarē mān. Anē.

³³ Hāmri nē amnhī kôt mē ho axkrunēpxi nē mē o mō. Simāw Pêtre mē Jepetew kra pijakrut pē Xiakre nē Juāwja nhūm amnhī kôt mē o mō.

³⁴ Hāmri nē amnhī kukamā mē kām hkurē xwÿnhjaja kot tanhmā hipēx tota kukamā hamaxpēr o ra amnhī kamā kahak tÿx o ra hkaprī nē. Hāmri nē hkôt mē mrar xwÿnhjē mā kām:

—Hēxta waa nē. Na pa tee ri amnhī xā htÿx kamā ijamakja kukamā ijamaxpēr nē amnhī kamā ixkahak tÿx o ixkaprī nē. Te ra ixkaprīja kot ixpīr o mōr pyrāk. Jakamā e

mē jar anohtÿx nē ixto Tirtūm wÿr o akrī kē tanhmā ixto pa mē kot tanhmā ixtoja kutā ixihtÿx nē. Anē.

³⁵ Hāmri nē mē kurūm htēm grire nē amnhī kamā kahak o Tirtūm mā amnhī jarēnh kaxyw htu mÿr pē htēm nē pikap nō nē kām:

³⁶ —Kwa Papaj. Hēxta waa nē. Inhmā amnhī xā htÿx kām ijamak prām kēt kumrēx. Na pa tee ri amnhī kukamā ijamaxpēr nē amnhī kamā ixkahak tÿx nē. Jakamā kot kaj amā inhnē ja ho ajapēx prām nē māmri ho ajapēx nhūm mē kām ixkurē xwÿnhjaja tanhmā ixto hkēt nē. Rÿ ko. Kot kaj amā mē kot tanhmā ixto hprām kē mē māmri tanhmā inhīpēx to. Nom pam inhmā hprām xā hkôt kēt.

³⁷ Anhÿr o Tirtūm mā amnhī jarē hāmri nē kānhmā xa nē akupÿm Simāw Pêtreja mē hwÿr tē nē mē omu nhūm mē ra htÿx gōr nē hikwÿ. Hāmri nhūm tee ri mē omu nē Simāw Pêtre mā kām:

—Kwa Simāw Pêtre. E mē hāmri akrā hapōj. Kwa wem anohtÿx grire nē ixkutēp amnhī to Inhō Papaj wÿr o akrī

³⁸ kē mē ixkôt tanhmā mē ato htā ka mē amā mē uma xāj ixkaga hkēt nē arī mē kutā amnhī to tÿx nē akuhē. Ā mē amā mē ate amnhī nhīpēx anhÿr prām nom kormā mē amā maa. Anē.

³⁹ Hāmri nē akupÿm tē nē axte Tirtūm mā tanhmā amnhī jarēnh to.

⁴⁰ Nē akupÿm mē hwÿr tē nē mē omu nhūm mē axte ōt pa nē hikwÿ. Nhūm tē nē tee ri mē omu hāmri nē tanhmā mē kām nē hkēt nē. Ām awjanā nē ma akupÿm tē nē axte Tirtūm mā amnhī jarē.

⁴¹⁻⁴² Hāmri nē akupÿm mē hwÿr tē nē mē kām:

—Kwa xān ka mē arī gōr nē anhīkwÿ? E mē tokyx akrā hapōj. Na mē ra ixwÿr mrar nē kot ixpynēnh mā. Koja mē tokyx ixkutā mē kot amnhī xunhwÿr xwÿnhjaja mē kām ixtā amÿnē. Ota ra kot ixtā mē kām āmnēnh xwÿnhta tē. E mē tokyx kānhmā akrī pu mē kutā mra. Anē.

Mē kot Jejus pynēnh ā mē harēnh

Matēwre 26.47-56; Rukre 22.47-53; Juāw 18.1-11

⁴³ Nhūm Jejus kormā mē kām kapēr o ām rāhā nhūm Jut Kariotja tē. Mē hkôt mē pa ho mē pa xwÿnhjē hō htā nhūm pa amnhī kôt mē ohtō nē Jejus wÿr mē o tē nhūm mē wapōhti nē kō jamÿ nē hkôt o mra. Patre krāhtūm mē Ijaew krāhtūmjē mē Tirtūm kapēr tūm o mē ahkre xwÿnhjaja ra Jut kôt mē kurē nhūm mē man hkôt Jejusja wÿr mra.

⁴⁴ Na pre ra Jut Kariotja mē kām tanhmā amnhī jarēnh to nē mē kām:

—E kot paj nhÿri mē pahte unēnh mā xwÿnhja pumu nē hwÿr tē nē kahti hkôt kumÿ nē tanhmā kām ixkapēr to. Ka mē ixpumu nē hwÿr tē nē unē nē ma akupÿm o tē.

Anē hāmri nē ma hwÿr mē o tē.

⁴⁵ Nē Jeusja pumu nē hwÿr tē nē kām: “Pa mē ijahkre xwÿnh.” Anē hāmri nē kahti hkôt kumÿ.

⁴⁶ Hāmri nhūm hkôt mē mrar xwÿnhjaja omu nē Jeus wÿr mra nē unēnh kurē kumrēx.

⁴⁷ Hāmri nhūm Jeus kôt mē pa ho mē pa xwÿnhjaja tee ri ja hā mē omu nhūm hōja ō wapo kapa nē patre maati mā àpēnh xwÿnh kot mē hkôt htēm xwÿnhhta mā wapo ho apē. Nē kot ho hkrā nhÿpōnh mā tā kuhpaw nē upōk rūm hamak nhÿkjē krāhta.

⁴⁸⁻⁴⁹ Hāmri nhūm Jeus amnhÿ tā mē kot unēnh xwÿnhjē mā kām:

—Kwa na pa pre apkati mē Tirtūm mā amnhÿ jarēnh xā hā ixkre kamā mē kām ixujarēnh o ixpa ka prem tokyx ixpynēnh kēt nē. Tā jarāhā te ixte amnhÿ tomnuj xwÿnh pyrā nē ixwÿr wapohti nē kō hā akapēn nē ixwÿr atēm rax nē. Nom ra mē ate tanhmā ixto kaxyw arÿgro kator jakamā mē māmri tanhmā amā ixto hprām xā hkôt tanhmā ixto. Tirtūm kapēr ā kagā htūm kot mē akukamā ā mē ate inhÿpēx anhÿr ā mē ajarēnh xā hkôt. Anē.

⁵⁰ Hāmri nhūm hkôt mē pa ho mē pa xwÿnhjaja tee ri mē kot unēnh ā mē omu hāmri nē mē umaj Jeus kaga nē ma hprōt pa nhūm ahte mē kuri xa.

⁵¹⁻⁵² Hāmri nhūm mē ma o tē. Nhūm korrmā mēhō nyw xwÿnhja tee ri ja hā mē omu nē ma Jeus kôt tē. Nhūm mē amnhÿ kôt omu nē kot unēnh kaxyw kahty xā hā kupy nhūm mē umaj mē ïhkra kamā kahty xāja re nē ma hkēnh nē hprōt nē tēn akunok.

Ijaew nhō patre maati kot Jeus kukjēr ā harēnh

Matēwre 26.57-68; Rukre 22.63-71; Juāw 18.12-14, 18.19-24

⁵³ Tā nhūm mē ma mē ō patre maati nhōrkwÿ hwÿr Jeus o tē. Hāmri nhūm patre krāhtūmjē mē Ijaew krāhtūmjē mē Tirtūm kapēr tūm o mē ahkre xwÿnhjaja ōrkwÿ hwÿr Jeus ā akuprō.

⁵⁴ Hāmri nhūm Simāw Pētre mē hkôt tē nē mē hkôt patre maati nhō kĭtare hwÿr axā nē amÿm hā mē omunh o xa. Nhūm ra pōristijaja kĭtare kamā amnhÿm kuto nē hā ānhunh o hkrĭ nhūm mē hwÿr tē nē mē ïhkō hā ānhunh o nhÿ.

⁵⁵⁻⁵⁶ Rōm nhūm ixkre kamā mē pikuprōnh xwÿnhjaja tee ri Jeus ā krĭ nhō xwÿnhjē kukja nē mē kām:

—E mē atō na ka pre Jeus kot tanhmā amnhÿ tomnuj to hā omu? Mē atō mē

inhmā harē pa mē ama nē Rōm nhō xwÿnhjē nhÿhkram haxā kē mē pamā kupĭ. Anē.

Hāmri nhūm mē axpēn pānhā tanhmā harēnh to. Tanhmā kot amnhÿ tomnuj to hā harēnh to htā nom ri ho hēx jakamā axpēn kwÿm ri tanhmā ri harēnh to nhūm mē tee ri mē kuma nē mē kām:

—Tk. Kwa mē axpēn kwÿm ri tanhmā harēnh to hkēt nē. Axpēn kôt mām ri tanhmā mē inhmā harēnh to. Anē.

⁵⁷ Hāmri nhūm mē hkwyÿjaja kānhmā kuhē nē axpēn kôt tanhmā ho hēx to nē mē kām:

⁵⁸ —Nā kot paj mē amā tanhmā kot amnhÿ nhÿpēx to hā harē. Na pa prem ā kapēr anhÿr ā kuma. Na pre tanhmā Tirtūm mā amnhÿ jarēnh xā hā ixkreta jarēnh to nē harēnh o: “Kot paj ixkreja grānh pa hāmri nē ixtā apkati axkrunēpxi nē akupÿm hipēx. Nom kot paj amnhÿ nhÿhkra ho hipēx kēt nē.” Anhÿr ā ā amnhÿ jarēnh anē pa mē kuma.

⁵⁹ Anhÿr o harēnh tā nom axpēn kôt harēnh kēt nē. Arĭ axpēn kwÿm ri harē.

⁶⁰ Hāmri nhūm mēō patre maati tee ri mē kot tanhmā ho kapēr toja ma nē mē aptār tūmjē noo mā kānhmā xā nē Jeus mā kām:

—E na ka ra mē kot ā ajarēnh anhÿrja ma. Xā kot kaj tanhmā mē inhmā amnhÿ tā axāprār to hkēt nē? Xā ām hāmri na mē ajarē? E kwa mē inhmā tanhmā amnhÿ jarēnh to. Anē.

⁶¹ No nhūm akryk xa nē tanhmā kām nē hkēt nē. Hāmri nhūm tee ri ā kot amnhÿ nhÿpēx anhÿr ā omu nē axte kām:

—Kwa mē inhmā amnhÿ jarē. Xā apē Tirtūm Kra na ka? Xā ka na apē Tirtūm kot mē ixwÿr amēnh xwÿnh na ka? Anē.

⁶² Hāmri nhūm tā kām amnhÿ jarē nē kām:

—Tÿ. Ixpē tāmta na pa. Ra mē ate jarāhā tanhmā ïjarēnh to kaxyw apikuprōnh tā nom kot paj nhÿrmā mē kamjaja tanhmā mē ajarēnh to ka mē amnhÿ tā ixpumu. Kot kaj mē Tirtūm kot mē ato amnhÿptār xā kutā akrĭ hāmri pa hwÿr tē nē ïhkō hā nhÿ. Kakrā kamā kot paj hwÿr tē nē ïhkō hā nhÿ hāmri nē ŷ hā tanhmā mē ajarēnh to ka mē amnhÿ tā ixpumu. Anē.

⁶³⁻⁶⁴ Hāmri nhūm tee ri ā kot amnhÿ jarēnh anhÿrja ā kuma nē gryk xāj amnhÿ xē kaxō nē mē aptār tūmjē mā kām:

—Kwa mo kaxyw kot puj mē axte ri ho tanhmā kot amnhÿ tomnuj to hā harēnh xwÿnhjē hō japēr? Ra tām kot amnhÿ pē Tirtūm Kra hā amnhÿ to hēx nhūm mē pahte pajamak o mar kēnā. E tanhmā kot puj mē ho? Anē.

Hāmri nhūm mē kām:

—Nā kot puj mē kupĭ. Ra htyk mā tām kēnā. E kwa tokyx pu mē ma Rōm nhō pahĭhti hwÿr o tē kē mē pamā hā amÿnē kē mē kupĭ. Anē.

⁶⁵ Hāmri nhūm mē hipêx kati rax nē. Nē hkuk kuhtō nē hpānhā no hpro nē htak nē kām:

–E mē kot atak xwýnhjê nhīxi jarē. Apê Tirtūm Kra hā ate amnhī jarēnh jakamā mān urāk nē axāhpumunh týx. Jakamā e mē hixi jarē. Anē.

Nhūm prem ā hipêx anē hāmri nē pōristijê nhūhkram haxā nhūm mē htak rax o kuhê.

Simāw Pêtre kot Jejus kôt pa hkêt ā kot amnhī jarēnh

Matêwre 26.60-75; Rukre 22.54-62; Juāw 18.15-18, 18.25-27

⁶⁶⁻⁶⁷ Rôm nhūm Simāw Pêtre arī kītare kamā mē ihkō hā ānhunh o nhý. Hāmri nhūm mēō patre maati mā āpēnh xwýnh nitita mē hwýr kato nē xa. Hāmri nē hirā kamā hprī hā Simāw Pêtre pumu nē omunh mex kurê kumrêx nē kām:

–Xê pēr apê Najare nhō xwýnh Jejus kôt mē pa ho mē pa xwýnhjê hō na ka. Anē.

⁶⁸ Hāmri nhūm tee ri kuma nē ra kām ma nē. Nē kām amnhī tā aprā nē kām:

–Tk. Koký. Ixte mēhō my ata pumunhre hā. Anē.

Hāmri nē kànhmā xa nē ma tē nē kītare hwýr kahê hkôt ā mē hkāk ā ahte xa nhūm krāhyre kà.

⁶⁹ Nē gaa nhūm hpānhā mē kām āpēnh xwýnhjê hōja omu nē hā mē kām:

–Xê ma ām hāmri na harē. Kôt ri mē pa xwýnhjê hō na pēr. Anē.

⁷⁰ Hāmri nhūm amnhī tā kuma nē kām:

–Tk. Kwa nā. Mē ri ā amnhī krā hkôt ri ixto axêx anhýr kêt nē. Aa ixte mēhō ata pumunh kêt kumrêx. Anē.

Hāmri nhūm mē hkwyja gaa nē kê axte hprī hā omu nē kām:

–Kwa ām hāmri na mē ajarē. Apê Jejus hkwy na ka. Ajaxwýja apê Garirej nhō xwýnh kēnā. Anē.

⁷¹ Hāmri nhūm tee ri mē kuma nē kām ma htýx nē. Hāmri nē mē kām:

–Kwa nā. Na pa Tirtūm noo mā mē amā amnhī jarē. Kot paj amnhī to ixêx japêr nhūm inhma nē hā tanhmā ixto. Nā urān ixpê Garirej nhō xwýnhre hā. Ixte mēhō mūj gumunh kêt kumrêx tā ka mē xatā axpēn kôt ixte hkôt ixpa ho ixpa xwýnh ā ixkamnhix o xa.

Anhýr o ra mē kām amnhī tā aprār o axkrunêpxi.

⁷² Hāmri nhūm axte krāhyre kà. Jao ra hkār o axkrut. Hāmri nhūm Simāw Pêtre kuma nē Jejus kot ra hkukamā ā amnhī nhīpêx anhýr ā harēnhja mā hamaxpêr kurê kumrêx. Krāhyre kormā hkār o axkrut kêt ri kot mē kām amnhī tā aprār o axkrunêpxi hā harēnhja mā hamaxpêr. Hāmri nē ra kànhmā hakry hpar o tē nē hkaprī htýx kumrêx.

Hāmri nē tee ri amnhī kukamā hamaxpêr nē amnhī mā:

–Héxta waa nē. Ām hāmri na pre Jejus ijarē. Tā pa kot ijarēnh xā hkôt ā amnhī nhīpêx anē. Kwa mo na pa axtem nē ā mē kām amnhī to ixêx anē?

Anē hāmri nē hkaprī xaj mýr rax nē.

15

Pirat kot Jejus kukjêr ā harēnh

Matêwre 27.1-2, 27.11-14; Rukre 23.1-5; Juāw 18.28-38

¹ Tā nhūm myt kato nhūm mē axte Jejus ā axpēn wýr akuprō. Patre krāhtūmjê mē Ijaew krāhtūmjê mē Tirtūm kapêr tūm o mē ahkew xwýnhjê mē Ijaew nhō juistijaja nhūm mē piitā hā akuprō. Hāmri nē pōristi mā anē nhūm mē Jejus pa hpre nhūm mē ma Rôm nhō xwýnhjê nhō pahi Pirat wýr o tē. Piratja na pre hte Rôm nhō xwýnhjê nhō pahi Sesti nhý hā Ijaew o amnhīptār o pa nhūm prem ma hwýr o tē.

² Hāmri nē kutā ām nē tanhmā kām harēnh to nē kām:

–E ot pa mē awýr jahti ho tē. Na hte mē inhmā hêx rūnh o pa. Mē ixte Pahihti Sesti kapêr kwým ri amnhī nhīpêx prām xaj tanhmā mē inhmā hêx to. Nē axtem nē mē ixte Sesti mā kaxpore hkwy nhōr kêt ā mē inhmā karō. Nē Tirtūm kot mē ixkaxyw kēp mē inhō pahi hā ām ā amnhī jarēnh o pa. Na hte ā mē inhmā amnhī to hêx anhýr o pa. Anē.

Hāmri nhūm Pirat mē kuma nē Jejus pumu nē tanhmā hkukjêr to nē kām:

–E inhmā amnhī jarē. Xā ām hāmri na mē ā ajarēnh anē nā? Xā apê Ijaew nhō pahi na ka? Xā ka na htem amnhī wýr akām hamak o pa? Anē.

Hāmri nhūm kām:

–Tý. Nā ām hāmri na ka ā ijarēnh anē. Anē.

³ Hāmri nhūm patre krāhtūmjaja tanhmā kām ho kapêr to.

⁴ Nhūm mē kuma nē axte hkukja nē kām:

–Kwa na mē ā ajarēnh anē ka mē ama nē ām mē ama nē inhmā tanhmā amnhī tā axāprār to hkêt nē. Anē.

⁵ Nom nhūm Jejus ām akryk xa nē tanhmā axte kām nē hkêt nē. Jakamā nhūm Pirat tee ri omunh pē hamaxpêr o nhý.

Pirat kot Jejus pír ā āmnēnh ā harēnh

Matêwre 27.15-26; Rukre 23.13-25; Juāw 18.39-19.16

⁶ Na pre hte pahi Pirat arīgro pē Pasja ā Ijaewjaja kām hprām xā hkôt mē hagjēnh xwýnhjê ho hpýnh nē mē kām ure.

⁷⁻¹⁰ Jakamā nhūm Ijaew kwýjaja hwýr mra nē kām:

–Pa. Kwa xā kot kaj jarāhā mē inhmā mē hagjēnh xwýnhjê hō mā anhýre nā? Anē.

Hāmri nhūm mē kuma nē hamaxpēr o:
 –E paj Jejus ā mē kuma nē kām inhūre.
 Mē piitā mē kām kapēr mar prām nhūm
 mēō patre krāhtūmjaja pix kot mē hkôt kamā
 gryk nē ā ixwyr o mrar anhūr kēnā. Anē.

Hāmri nē mē kām:

–Tỳ. Nà kot paj mē amā hōm inhūre.
 Kwa xà kot pa mē amā mē anhō “pahihti”
 jarēnhja mā inhūre nà? Anē.

¹¹ Hāmri nhūm patre krāhtūmjaja tee ri
 kuma nē mē kām:

–Kwa mē kām anē kē Parapas mā măn
 ure. Anē.

Hāmri nhūm mē kuma nē Pirat mā kām:

–Nà Jejus mā anhūrer kēt nē. Parapas mā
 măn anhūre. Anē.

¹² Hāmri nhūm mē kām:

–No mē ate mē anhō pahi hā harēnh
 xwýnhja? Tanhmā kot paj ho? Anē.

¹³ Hāmri nhūm mē àmra kamā kām hā
 amýnē nē kām:

–Kwa pī kahpa hā anhō kē ty. Anē.

¹⁴ Hāmri nhūm tee ri mē kuma nē mē kām:

–Tk. Kwa nà. Tanhmā kot amnhī tomnuj
 tore hā kot pa ā hipēx anē.

Anhūr tā nhūm mē xatā anhīpē kām kapēr
 kām hihtýx nē kām:

–Kwa pī kahpa hā măn anhō kē ty. Tokyx
 ā mē inhmā hipēx anē.

Anhūr o kuhē. Kàx pē kām anhūr o kuhē.

¹⁵ Nhūm tee ri mē kuma hāmri nē mē kām
 hprām xà hkôt mē kām Parapas mā ure. Nē
 pôristi hkwyjē mā Jejus ā amýnē nē mē kām:

–Tōe. Mē mamrī hwýr tē nē htak hāmri nē
 kapôt ā mē hpar xà hā pika hwýr o tē nē pī
 kahpa hā anhō. Anē.

Mē kot Jejus tak ā mē harēnh

Matēwre 27.27-32; Juāw 19.2-3

¹⁶ Tā nhūm pôristijaja akupým ixkreja wýr
 Jejus o axà nē amnhī wýr hkwyjē hā karō
 nhūm mē hwýr agjē nē Jejus ā akuprō.

¹⁷ Hāmri nē kēp pahi hā hpēr o pikēnh
 kaxyw kām pahi hā mē ahkà nhīpēx nē
 hkrām haxà. Nom axtem nē akunī kamā
 mēmo mrō nhī te kot ronh kanēre pyrāk
 xwýnhja nhūm mē kām hikāx nē hkrām
 haxà. Hāmri nē kēp ē kapa nē pahi hā mē ē
 kamrēk ō py nē kām haxà.

¹⁸ Hāmri nē kām:

–E apē Ijaewjē nhō pahi na ka. Anē.

¹⁹ Hāmri nē xatā axpēn pānhā hwýr mra
 nē pī ho hkrāx pē htak nē hkuk kuhtō nē hā
 hpēr o pikēnh pē hā hpijaam pyrā nē kutā
 hkōn krā ho hkrī.

²⁰ Hāmri nē kēp pahi xē kapa nē akupým
 kām ē jaxà nē pī kahpa hā nhōr kaxyw ma o
 kato nē o tē.

²¹ Nom nhūm ra hiroi týx nē nhūm mē tee
 ri omu hāmri nē mēhō kot ho ajuta kaxyw
 mē kot hkôt omunh o mōr xwýnhjē kapi
 ho xa. Hāmri nē Sirēn nhō xwýnh Simāw

hkà htykreja pumu. Aresān mē Rupti wa
 hipēxà na pre. Nhūm htýx hamakētkati nē
 mē kutā krīm tē. Hāmri nhūm mē haē nē unē
 nē kām Jejus o ajuta kaxyw hā karō nhūm
 kām pī kahpaja mý nē mē hkôt o tē.

*Mē kot pī kahpa hā Jejus nhōr ā mē
 harēnh*

*Matēwre 27.33-44; Rukre 23.33-43; Juāw
 19.17-27*

²² Nhūm mē ra kēn nhīxēt te kot mē hkrā hi
 pyrāk xwýnhja wýr Jejus o pōj. Mē kot kām
 “Korkot” anhūr xwýnhja wýr. Mē pakapēr
 kām na htem Korkotja jarēnh o: “Mē hkrā hi
 xà” anē. Jakamā nhūm mē ra hwýr o pōj.

²³ Hāmri nē kot pī kahpa hā nhōr kaxyw
 wīhti hkwy ho mē mēmo mēhkanexà pē mīra
 ho ahkà. Kot ho kōm nē amnhī xà htýx kām
 hamak kēt kaxyw hipēx nē kām kugō nom
 nhūm hkaga nē ho hkōm kēt nē.

²⁴⁻²⁶ Hāmri nhūm myt kaxkwa nhīpōk wýr
 tē nhūm mē pī kahpata ā Jejus xi nē prek
 o ĩhkra ho htýx nē hpar o htýx. Nē hpānhā
 kaxyw kakwý nē kànhmā pī kahpa jarī nē
 kre kamā am nē hity hpa. Nhūm Jejus kýx
 pē amnhī xà htýx kumrēx kamā hamak o
 ajēt. Nhūm pôristi hōja tē nē tapti hō py nē
 hā kagà ho:

IJAEWJĒ NHŌ PAHI NA JA

Hāmri nē Jejus wýr ho api nē mý ri kunhō.
 Hāmri nhūm hparpē pôristi hkwyja axpēn
 mā ē hkwy ho hpigrānh kaxyw hā kēnre ho
 jōka ho hkrī.

²⁷⁻²⁸ Tā nhūm mē wa kot amnhī tomnuj
 xwýnh wa ho axkrut nē mā wa ho anē nē.
 Nē pī kahpa hā prek o wa ĩhkra ho htýx nē
 wa hpar o htýx hāmri nē akutā ho Jejus nhījē
 nhūm wa ajēt.

²⁹ Hāmri nhūm mē kot omunh mā mrar
 xwýnhja Jejus pumu nē hā hpēr o pikēnh
 punuj nē hkrā ho apē nē kām:

–Kwa na ka pre ate Tirtūm mā amnhī
 jarēnh xà hā ixkre grānh par nē atā apkati
 axkrunēpxi nē akupým hipēx par ā amnhī
 jarēnh o apa. Nē axāhpumunh o axāhpumunh
 ā amnhī jarēnh o apa.

³⁰ Jakamā ē kwa amnhī kapa nē wrý pa
 mē ja hā apumu. E kwa tokyx. Anē.

³¹ Nē patre krāhtūmjē mē Tirtūm kapēr
 tūm o mē ahkre xwýnhja piitā hwýr mra nē
 hā hpēr o pikēnh o kuhē. Nē axpēn mā kapēr
 o:

–E jahti na xep pre mē kamā ukapri ho pa
 nē tanhmā mē ho ajuta hto ho pa. Tā tām
 tanhmā amnhī to nē wrýk kēt nē.

³² Kwa pu mē arī pakuhē nē kot amnhī
 kaxà nē wrýk kām omu. Kōja wrý pu mē
 omu nē kēp mē panhō pahihti hā hkôt paja-
 maxpēr kurē kumrēx. E tokyx wrý Jejus pa
 mē awrýk kām apumu. Nà kot kaj awrýk rax
 nē. Anē.

Hämri nhüm akutã wa kot hijê nê jêt xwýnh wa haxwýja kãm kapêr punuj o ajêt.

Jejus htyk ã harênh

Matêwre 27.45-46; Rukre 23.44-49; Juãw 19.28-30

³³ Tã nhüm ra kaxkwa nhîpök ri myt nhÿr mē nhüm te kamãt pyrãk. Nhüm kamãt kô rax kumrêx o ra hã awry mē nhüm akupÿm myt katêr o mō.

³⁴ Hämri nhüm Jejus ãmra kamã Tirtüm mã kapêr nê kãm:

—Inhō Tirtüm inhō Tirtüm. Kwa mon ka ixkaga? Anê.

Nom kapêr kãm kapêr o:

—Eri Eri rãmã sapatani. Anê.

³⁵ Hämri nhüm mē kot mar o kuhê xwýnhjaja kot Eri hã harênh ma nê htÿx ho finat Eris mã kapêr ã hkamnhix.

³⁶ Hämri nhüm ja hprôt nê mēmo rereeti py nê pî ho hkanhwÿ nê o tē nê ho wihti nhek nê Jejus wÿr o tē nê kot hkaôr kaxyw kãm kupê. Hämri nê hkwyjê mã kãm:

—E hämri pu mē jar hkãx ã pakuhê nê Eris jamã män. Koja kuma nê hwÿr tē nê o wry nã? Anê.

³⁷ Nom nhüm Jejus ra htyk kaxyw nê ãmra htÿx nê ty.

³⁸ Hämri nhüm Tirtüm mã amnhî jarênh xã hã ixkre kamã hakwakre hã kupêxêja axkjê nê amnhî kahê xã mēnh kurê kumrêx. Uti rax tã kÿj rüm ahpãr mã axkjê nê amnhî kahê xã mē. Te Jejus htyk o mē pahte hkôt amnhî xunhwÿr xwýnhjê mã Tirtüm wÿr pry jakwa kre kahê xã mēnh pyrãk o ã amnhî kaxôn anê.

³⁹ Nhüm pôristi krãhtümjê hōja Jejus parpê kutã htyk kãm omunh o xa. Hämri nê tee ri omu nê hamaxpêr o:

—Hêxta waã nê. ãm hämri na pre hte kêp Tirtüm Kra hã amnhî jarênh o pa. Tã pa mã amarî kupî. Anê.

⁴⁰⁻⁴¹ Rôm nhüm mēni kwÿjaja amÿm htyk kãm omunh o kuhê. Na pre htem Garirej kamã Jejus mē hkôt mē pa ho mē pa xwýnhjê mã mē apkur xã hã ãpênh o mē hkôt pa nê mē hkôt Jerujarê hwÿr mō. Marir Matarêñ nê Xiakre nê Jojes wa katorxã Marirja. Nê Sarome. Nê mãânên mēni hkwyjaja nhüm mē amÿm Jejus htyk kãm omunh o kuhê.

Mê kot Jejus jaxã ã harênh

Matêwre 27.57-61; Rukre 23.50-56; Juãw 19.38-42

⁴² Nhüm prem arÿgro pê sêsta hã Jejus pî nhüm ra amÿkry htÿx nê. Sap kukamã na pre htem Ijaewjaja amnhim apkur xã hã mēo nhîpêx pa nhüm sap kato nhüm mēmoj to anhÿr kêt nê.

⁴³ Jakamã nhüm Juje hō pê Arimatej nhō xwýnhja. Kêp Ijaewjê nhō juisti hō na pre. Nhüm mē piitã kãm hkînh nê axpên mã mex o mex ã harênh o pa. Na pre Tirtüm kot mē

pahwÿr Jejus mēnh kôt hamaxpêr o pa. Tã Jejus htyk ã omu hämri nê hamaxpêr o:

—E pa ma pahî Pirat wÿr tē nê Jejus nhî hã kuwÿ. Inhmã uma htã kot paj ma hwÿr tē nê hã kuwÿ kē inhmã kugô pa ma o tē nê tokyx haxã. Kot paj ho anhÿr tokyx anhÿr kêt nhüm mē panhō arÿgromnu pê sapja wÿr ra myt axã hämri pa haxãr kêt nê.

Anhÿr o hamaxpêr nê ma Pirat wÿr tē nê hã kuwÿ.

⁴⁴ Hämri nhüm amnhî jaêr pê ra htyk ã harênh ma nê amnhî wÿr pôristi krãhtümjê hō hã karô nê hã hkukja nê kãm:

—Kwa xã na ra Jejus ty? Anê.

Hämri nhüm kãm:

—Tÿ na ra ty. Anê.

⁴⁵ Hämri nhüm kuma nê Juje mã kãm:

—Tôe. Mamrî ma o tē nê haxã. Anê.

⁴⁶ Hämri nhüm kuma nê akupÿm Jejus wÿr tē nê pôristi mã anê nhüm mē kãm ho wry. Nhüm kumÿ nê kupêxê ho hkupu hpa nê o tē nê kên kre kakwÿnh kãm haxã. Hämri nê kên rax o hitom mex nê ma akupÿm krîm tē.

⁴⁷ Nhüm Marir Matarêñ mē Juje katorxã Marir ôja wa ma hkôt tē nê kot haxãr kãm omunh o xa. Kot mē hkuxwa xã ho gregrer kêt rãhã haxãr kãm omu.

16

Jejus akupÿm htîr ã harênh

Matêwre 28.1-10; Rukre 24.1-12; Juãw 20.1-10

¹⁻² Tã nhüm apkati. Nom nhüm ra mē inhō arÿgromnu pê sap kator jakamã nhüm mē kormã akupÿm kênkreta wÿr mrar kêt nê. Hämri arÿgro mex jamãr pê kôkôt o hkrî. Hämri nhüm axte apkati nhüm tômik nhüm ra mē inhō arÿgromnu hapêx nhüm Marir Matarêñ mē Sarome mē Xiakre katorxã Marirja mē ma akupÿm kênkreta wÿr mra. Kormã kwÿhtãã. Kormã myt kator o môr mē nhüm mē kãnhmã hkrî hämri nê mē kot Jejus gregrer kaxyw mē hkuxwa xã hkwy jamÿ nê ma hwÿr o mra.

³ Hämri nê kormã môr ri tee ri amnhî kukamã hamaxpêr nê axpên mã:

—Xê gãã nê. Mēhō koja mē pamã nhãm kênkre nê hitom raxta xãm pu mē Jejus wÿr agjê nê gregrer? Uti rax kumrêx kênã. Anê.

⁴ Hämri nê hwÿr pøj nê omu nhüm ra hitom xãja kãx ã nõ nhüm mē tee ri omu. Uti rax tã ra kãx ã nõ.

⁵ Hämri nhüm mē kênkre hwÿr agjê nê upök rüm mēhō nyw pumu. Nhüm ê jakajre kamã nhÿ nhüm mē amnhî jaêr pê omu nê tee ri hamaxpêr.

⁶ Hämri nhüm mē kãm:

—Kwa mē amã ma hkêt nê. Mē ate Najare nhō xwÿnh pê Jejus pumunh kaxyw na ka mē mra. Mē kot pî kahpa hã nhôr xwÿnhnta. Nom jar amrakati. Na ra Tirtüm akupÿm ho

htír. E më kam në amnë agjë në ano ho nōr xà kaprý pumu

⁷ Në tokyx ma akupým mra në hkôt më pa ho pa xwýnhjê mã harê. Koja ma Jejus më akukamá akupým Garirej wýr mō. Garirej kama kot kaj më axte axpën pumu. Ra kot më amã amnhí jarēnh xà hkôt. Kwa më tokyx ma akupým më hwýr mra. Në kwa ké Simāw Pêtreja harēnh mar mex në. Anē.

⁸ Hāmri nhūm më kuma në awjanã në ma akupým hprōt. Në tee ri hamaxpēr në kãm ma xaj htertēt týx jakamã kormã nhãm mēhō mã harēnh kēt në.

Jejus kot Marir Matarēn wýr kator ā harēnh

Juāw 20.11-18

⁹ Nhūm semān nyw mã àr xà hà arigro pé tōmíkja ā nhūm Jejus akupým htír. Hāmri në Marir Matarēn kumrēx wýr kato. Kot në mēkarōmnuti ho 7 në në hanor xwýnhta kumrēx wýr kato.

¹⁰ Hāmri nhūm akupým htír kãm omu në hkīnh týx kumrēx. Në ma akupým tē në Jejus krāmnhwýjê mã harê. Nhūm më hkaprī në mýr o hkri nhūm më hwýr axà në më omu në më kãm:

¹¹ —Xê më amýr kēt në. Na ra Jejus akupým htír në ham ixwýr kato pa inhno ho omu. Xê më hāmri axte amýr kēt në.

Anhýr tā nom nhūm më htýx ho amnhí krã hkôt kot ri ā harēnh anhýr ā hkamnhix jakamã kuma në am kuma.

Jejus kot hkwyjê hwýr kator ā harēnh

Rukre 24.13-35

¹² Tã nhūm Jejus axte ja wa hwýr kato. Kôt më pa ho pa xwýnh wa ho axkrut në wa hwýr kato. Na pre wa Jerujarē rūm kato në akupým wa ō krī hwýr mōr më nhūm wa hwýr kato. Nom axtem tanhmã amnhí nhípēx to në wa hwýr kator jakamã nhūm wa tokyx hprī hã kēp Jejus ā omunh kēt në.

¹³ Tã kēp Jejus ā omu hāmri në akupým Jerujarē hwýr mō në hkwyjê mã harēnh kurē kumrēx. Nom nhūm më wa kuma në am wa kuma në akupým htír kôt hamaxpēr kēt në.

Jejus kot hkwyjê mã mëmoj tã karō hã harēnh

Matēwre 28.18-20; Rukre 24.44-49; Juāw 20.19-23; mãānēn Atre 1.6-8

¹⁴ Tã nhūm Jejus tã hkôt më pa ho më pa xwýnh pé 11 wýr kato nhūm më kamã no puma në hkīnh týx në omunh o kuhē. Hāmri nhūm më kãm:

—Kwa hēxta waa në. Marir Matarēn më akwýta më kot akupým ixtír kãm ixpumunh në më amã ijarēnh tã ka më ama në am më ama. Pēr am më akrã hihtýx jakamã na ka më ama në më hkôt ajamaxpēr kēt në. Anē.

¹⁵ Hāmri në më kot tanhmã kãm amnhí nhípēx to ho pa hà më kãm karō në më kãm:

—E kēr ka më ma krī piitã hkôt më kãm ijarēnh o ri më hkôt apa. Ixte tanhmã më në amnhí nhípēx toja ka më aprī hã më kãm ijarēnh o ri më hkôt apa.

¹⁶ Në më kot më akapēr mar në amnhí kaxyw ixkôt hamaxpēr xwýnhjaja kēr ka më hkrã kumrã nhūm më nhýrmã Tirtūm më wa ixri htír tūm në mex rãhã në pa ho pa. No më kot amnhí kaxyw ixkôt hamaxpēr kēt xwýnhjaja koja Tirtūm nhýrmã amnhí në më hano nhūm më ma kuwy hwýr pa.

¹⁷ —Nē amnhí kaxyw ixkôt më ajamaxpēr xwýnhjaja kot kaj më inhý hã tanhmã amnhí nhípēx to ho ri apa. Aa më kot mëmoj pumunh kēt kwý ho anē në inhý hã inhíxi jarēnh kôt më në mēkarōmnuti janor o ri më hkôt apa. Në më ate nhãm më kapēr mar kēt tã inhý hã ho akapēr mex o apa. Mē ate mar kēt tã ra ho akapēr nhūm më kot më kapërta mar xwýnhjaja hprī hã më amar mex në.

¹⁸ Në kot kaj më nhýri atýx kagã xoprē hō hpyr tã no nhūm tanhmã më ato hkēt në. Rý atýx mëmoj to më hpar xà hkwy ho akôm tã no nhūm tanhmã më ato hkēt në. Në inhý hã më à xwýnhjê hã më anhíhkra jaxwý nhūm më akupým mex. Kot kaj më amnhí kaxyw ixkôt më ajamaxpēr xwýnhjaja ā inhý hã amnhí nhípēx anhýr o ri apa. Anē.

Jejus kot akupým kaxkwa hwýr àpir ā harēnh

Rukre 24.50-53; mãānēn Atre 1.6-11

¹⁹ Tã nhūm më panhō Pahihti Jejusja hkôt më pa ho më pa xwýnhjê mã kapēr pa hāmri nhūm Tirtūm ma akupým amnhí wýr kaxkwa hwýr ho api. Hāmri nhūm kaxkwa kamã Tirtūm nhíhkō hã upōk rūm nhý. Kot íhkō hã mëmoj piitã ho amnhíptār kaxyw hkrī ho hkri.

²⁰ Hāmri nhūm hkôt më pa ho pa xwýnhjaja ma akupým àpir kãm omu hāmri në anhrã në ma krī piitã hkôt më kãm Tirtūm kapēr jarēnh o pa nhūm Pahihti Jejus më íhkō hã pa ho pa. Nhūm më ma ý hã hkwyjê mã aa më kot mëmoj pumunh kēt kwý ho anhýr o ri më hkôt pa nhūm më ja hã më omu në axpën mã më harēnh o:

—Nã am hāmri na më pamã Tirtūm kapēr jarēnh o pa në ho hēx kēt në. ý hã më kot aa më pahte mëmoj pumunh kēt kwý ho anhýr o pa kēnã. Nã am hāmri na ā më pamã kapēr jarēnh anhýr o pa. Anē.

Ja kôt na Makre kot Jejus jarēnhja hapēx.

Rukre Rukre tanhmã Jesus kot amnhi nhîpêx to ho pa hã kagã

Rukre na pre kagãja nhîpêx. Kêp Ijaew kêt xwýnh na pre. Tã amnhî kaxyw Jesus kôt hamaxpêr. Na pre kêp tôtô nê mê hkane ho pa. Nê Jesus nhÿ hã kapêr o pa xwýnhjê hô pê Pawreja kôt pa ho pa. Tã tanhmã hamaxpêr to nê hkrãmnhwÿ Teopre mã kagãja nhîpêx nê kamã tanhmã Jesus kot amnhî nhîpêx to ho pa hã harê nê hã kagã.

Nê Jesus kêp Tirtûm nhÿ hã kapêr o pa xwýnh ã harê. Nê mê pahpyrà nê ï ho ï hã harê. Nê kêp mê pakamã ukapri xwýnh ã harê. Nê kêp mê pahte amnhî tomnuj o hapêx xwýnh ã harê. Á na pre Rukreja hkrãmnhwÿ Teopre mã Jesus jarê nê hã kagã anê. Nê mãânên mê pahpiitã mê pakaxyw harê nê hã kagã.

*Rukre kot Teopre mã amnhî jarênh
Atre 1.1-2*

¹ Pa pahî Teopre. Xã amex? E ot pa awÿr kagã nhîpêx nê awÿr kumê. Ixte amã Jesus jarênh kaxyw. Na prem ra ohtô nê jar mê pahkôt Jesus kot amnhî nhîpêx o pa hã kagã rax nê.

² Jesus nhÿ hã Tirtûm kapêr jahkre ho mê pa xwýnhjaja na prem Jesus kot tanhmã amnhî nhîpêx to hkrax kãm kot amnhî nhîpêx o pa hã omunh o hkôt pa. Hãmri nê hprî hã mê inhmã harê nê hã kagã nhÿm mê ohtô nê mê mar xã hkôt mê urã nê kot tanhmã amnhî nhîpêx to ho pa hã kagã.

³ Tã pa mê harênh ma nê ijamaxpêr o: –E kot paj ijaxwÿja Jesus kot amnhî nhîpêx kwÿ hã kagã. Nã kot paj ho anê.

Anhÿr o ijamaxpêr jakamã ot pa ra ixte amã hã kagã kaxyw.

⁴ Tã kêr ka kamã harê nê ixpyrà nê ama nê aprî hã harênh mar tÿx nê mê kot amã harênh xwýnhjê hkôt ajamaxpêr tÿx o apa. Ám hãmri na prem mê amã harê. E kot paj amã hkwÿ hã kagã. Ixpê akrãmnhwÿ Rukre kot paj ixprî hã amã harê nê hã kagã.

Tirtûm kapêr o wrÿk xwýnh kot Juãw Paxis jarênh

⁵ Juãw Paxis nhîpêxã finat Jakarisja kumrêx kot paj amã harê. Kêp finat Apiasti kanrêhã htãmnhwÿ jakamã urãk nê kêp mê apê Ijaew nhô patre na pre. Pahîhti Eroxja kormã kot mê anhô pika kamã mê ho amnhîptãr ri nhÿm Jakaris kêp patre nê pa. Nê hprô Ijapew mê wa kêp Parãw kanrêhã htãmnhwÿ.

⁶ Nê wa hamê na pre Tirtûm kôt tãm amnhî nhîpêx o wa pa. Ám Tirtûm kapêr kôt pix mã ri amnhî nhîpêx rãhã ho wa pa.

⁷ Nom Ijapewja tanhmã hkra xã kute jakamã nhÿm wa hkra hkêt nê wa pa rãhã wa ra hpigêx tÿx nê.

⁸ Jakamã nhÿm Jakaris ma mê kot Tirtûm mã amnhî jarênh xã hã ixkre hwÿr tê. Kwÿjê pyrà nê kot Tirtûm mã tanhmã amnhî nhîpêx to kaxyw ma mê hpãnhã hwÿr tê nê axã.

⁹⁻¹⁰ Hãmri nê kamã Tirtûm mã amnhî jarênh pê kãm mê hkuxwaxã ho xêt o xa. Nhÿm Ijaew kwÿjaja ixkreta wÿr akuprô nê kapem kutêp Tirtûm mã amnhî jarênh o kuhê.

¹¹ Pu nhÿm kaxkwa rÿm Tirtûm kapêr o mê wrÿk xwýnhja wrÿ nê Jakaris kutã xa. Mê hkuxwa xã ho xêt xã hã mës kunîhti xupôk rÿm xa.

¹² Hãmri nhÿm amnhî jaêr pê amnhî kutã omu nê akryk omunh o xa.

¹³ Hãmri nhÿm kãm: –Pa Jakaris? Kwa tee ri ajamaxpêr o amã ma hkêt nê. Na pre Tirtûm ate akra hã hwÿr o apa hã ama nê hã apumu. Jakamã koja tanhmã aprô hkra xã ho ka kamã akra. Nhÿm nô nê rax nê kato nê myre. Ka wa hã hixi mê nhÿm kêp Juãw.

¹⁴ Koja kato ka wa omu nê akînh tÿx kumrêx. Nhÿm akwÿjaja haxwÿja ohtô nê war akra jarênh ma nê war anhÿ hã hkînh nê.

¹⁵ Koja kormã akra kator kêt ri nhÿm Tirtûm Karôja hkarô hwÿr axã. Hãmri nhÿm kato nê gaa nê hprêk nê Tirtûm mã tanhmã amnhî nhîpêx to ho pa. Tirtûm kãm hprãm xã hkôt pix mã tanhmã amnhî nhîpêx to ho pa. Nom kêr ka inhmar kumrêx. Kê mêmoj to wîhti ho hkôm kêt nê pa. Nê kagôyhti ho hkôm kêt nê pa. Ám kwarî o kwarî.

¹⁶ Koja hprêk hãmri nê mê apê Ijaew mã Tirtûm kapêr jarênh o mê hkôt pa. Nhÿm mê ohtô nê kuma nê kot amnhî tomnuj kaga nê Tirtûm kôt amnhî xunhwÿ nê hkôt amnhî nhîpêx mex o pa.

¹⁷ –Tirtûm kot mê awÿr mê apytãr xwýnh maati mênh mã xwýnh kukamã koja mê kãm harênh o pa. Te Tirtûm nhÿ hã kapêr jarênh xwýnh finat Eris kot amnhî nhîpêx pyràk o koja amnhî nhîpêx. Nê urãk nê Tirtûm Karô nhÿ hã mê amã Tirtûm kapêr jarênh o mê akôt pa. Jakamã nhÿm mê akwÿjaja kuma hãmri nê amnhî tomnuj kaga hpa nê Tirtûm kôt pix mã amnhî nhîpêx o pa. Nê tãm mê hkrajê nhîpêx o pa. Koja mê ã akra Juãwja kôt amnhî nhîpêx anê. Jao Tirtûm kot mê awÿr mênh mã xwýnhhta kutêp tãm amnhî nhîpêx o pa. Anê.

¹⁸ Nhÿm pre ã Tirtûm kapêr o wrÿk xwýnh Jakaris mã hkrata jarênh anê. Hãmri nhÿm tee ri kuma nê kãm:

–Kwa xã we ãm hãmri na ka ã inhmã ixkra jarênh anê na? Ra ixprô mê wa ijamê wa ixpigêx tÿx kênã kot pa kêt wa ixkra. Anê.

¹⁹ Hāmri nhūm kām:

—Nā ām hāmri na pa ā amā harēnh anē. Ixpē Gapriew na pa ā awyr ixwryk nē Tirtūm nhý hā amā harēnh anē. Ixte Tirtūm nhýhkō hā ixkuhē xwýnhjē hō na pa. Tām na awyr inhmē pa awyr wrý nē ā amā akra jarēnh anē.

²⁰ Tā ate ixkōt ajamaxpēr kēt jakamā kot kaj axte axumar kēt nē akapēr kēt rāhā nhūm akra kato. Koja kato ka rī kormā akupým akapēr nē akupým ama. Ate ixkōt ajamaxpēr kēt jakamā kot kaj ā amnhī nhípēx anē nē rī amnhī pumu. Ām hāmri na pa ā amā ixkapēr anē. Anē.

Nhūm pre ā Tirtūm kapēr o wrýk xwýnhja Jakaris mā kapēr anē. Jakamā nhūm tokyx ixkre rūm kator kēt nē.

²¹ Hāmri nhūm ixkre kapem mē kuhē xwýnhjaja tee ri kamā ama nē expēn mā:

—Tk. Kwa mo na we ri hitom kām ho anhýr kām unē nē tokyx kator kēt? Anē.

²² Tā nhūm akupým mē hwýr kato. Nē tee ri kot mē kām kapēr kaxyw no ām ihkra pix o ri mē kām tanhmā ujahkre hto. Hāmri nhūm mē amnhī jaēr pē kot ā amnhī nhípēx anhýr ā omu nē tee ri hkukamā hamaxpēr nē expēn mā:

—Kwa tanhmā na we amnhī to? Mān hitom kām mēmoj tanhmā kute hā omu hā na ri ā amnhī nhípēx anē nā? Anē.

²³ Hāmri nhūm Jakaris ixkre kamā mēmoj tā āpēnh pa hāmri nē ma akupým ōrkwý hwýr tē.

²⁴⁻²⁵ Tā nhūm hprō Ijapewja htujarō. Hāmri nē amnhī tujarō hā amnhī pumu nē hkīnh týx nē. Nē hamaxpēr o:

—Héxta gāà nē. Ma ām hāmri na pa pre ixkra hkēt nē amnhī kamā ixpijaam o ri ixa. Tā ra ixtujarō. Kot paj wa axte ri amnhī kamā ixpijaam kēt nē. Ma ām hāmri na Tirtūm ā wa inhípēx anē. Na pa wa ixkīnh týx kumrēx. Anē.

Nhūm pre ā hamaxpēr anē hāmri nē arī ōrkwý kamā hkrī ho hkrī. Aa nhýhým kator nē mōr kēt rāhā hā mytwrý kēp 5.

Tirtūm kapēr o wrýk xwýnh kot Marir mā hkra jarēnh

Matéwre 1.18-21

²⁶ Tā nhūm Ijapew ra htujarō hā mytwrý kēp 6 nhūm Tirtūm axte kapēr o wrýk xwýnh pē Gapriewja mē. Nhýri Garirej kamā krī pē Najare hwýr kumē nhūm ma hwýr wrý.

²⁷ Mēhō pē Marir wýr wrý. Nhūm ra Juje ho mjēn kaxyw. No ām kormā hkukrit rāhā ho mjēn kaxyw. Jujeja Marir pyrā nē kēp pahi finat Tawi kanrēhā htāmnhwý na pre.

²⁸ Jakamā nhūm Gapriew Marir wýr wrý nē kām:

—Pa Marir? E ot pa amā Tirtūm kapēr jarēnh kaxyw awyr wrý. Kot akōt pa ho pa jakamā koja ato mex rax kumrēx. Anē.

²⁹ Hāmri nhūm amnhī tā kuma nē tee ri hamaxpēr nē hamaxpēr o:

—Xē mēmo na we ri ā inhmā kapēr anē? Tanhmā koja we Tirtūmja ixto mex rax to? Anē.

³⁰ Hāmri nhūm Gapriew kām:

—Kwa tee ri amnhī kukamā ajamaxpēr kēt nē. Tirtūm kām ajapēē.

³¹ Kot kaj atujarō nhūm akra kato nē myre. Ka hā hixi mē nhūm kēp Jejus.

³²⁻³³ Koja Tirtūm amā ho mex rax nē. Nē koja mē piitā mē kām kēp amnhī Kra hā ho amnhīrit. Nē mē apē Ijaew o amnhīptār kaxyw koja mē akaxyw ām nhūm higēt pahi Tawi pyrā nē mē ato amnhīptār o pa. Mē ate amnhī wýr kamā ajamak o apa xwýnhhta koja. Tirtūm kām hprām xā hkōt koja mē ato amnhīptār rāhā ho pa. Anē.

³⁴ Nhūm pre ā kām kapēr anē nhūm amnhī tā kuma nē tee ri amnhī kukamā hamaxpēr hāmri nē kām:

—Xē gāà nē. Tanhmā kot pa kēt we amnhī to nē ixtujarō? Kormā ixkukrit nē mo kormā inhmjēn? Mē. Xā Juje kot ixkamā hkra hkukamā na ka ā ri inhmā axujarēnh anē? Anē.

³⁵ Hāmri nhūm kām:

—Nā koja Tirtūm Karō tām tanhmā ato ka ý hā tanhmā amnhī to hkēt tā atujarō. Jakamā koja akra kēp Tirtūm Kraa.

³⁶⁻³⁷ Na ra haxwýja anā Ijapewja htujarō. Ra hpigēx týx nē aa hkra hkēt nhūm hkwýjaja kot expēn mā ōhy kamā hkra hkēt kumrēx ā harēnh o pa htā ra htujarō. Tirtūm kot tanhmā mē ho nhūm mē htujarō tanhmā kēp kute hkēt. Jakamā nhūm tanhmā ho nhūm mjēn tām htu nhūm ra htujarō hā mytwrý kēp 6. Tirtūm tām kot mēmoj piitā tanhmā ho kaxyw āhpumunh xihtýx. Jakamā koja urāk nē mā ato anē nē ka kormā akukrit tā atujarō. Anē.

³⁸ Nhūm pre ā Gapriew Marir mā kapēr anē nhūm amnhī tā kuma nē kām:

—Ko. Kē māmri kām tanhmā ixto hprām xā hkōt māmri tanhmā inhípēx to. Inhmā Tirtūm kapēr kōt amnhī nhípēx prām. Kē māmri kām tanhmā ixto hprām xā hkōt tanhmā inhípēx to.

Anē nhūm kuma nē nē akupým api.

Marir kot Ijapew wýr mōr ā harēnh

Rukre 11.27

³⁹⁻⁴⁰ Tā nhūm Marir amnhī tujarō hā amnhī pumu nē nā Ijapew wýr hkrā kurē kumrēx. Hāmri nē nojarēt nē ō krī rūm kato nē ma hwýr mō. Ma Ijapew papxā hwýr mō. Ijapew nhō kríja pika pē Jutej kamā nhýri hixēt kamā na pre. Nhūm ma hwýr mō hāmri nē hwýr pōj nē Ijapew wýr axā nē omu nē kām:

—Ka? Xā wa amex? Anē.

⁴¹ Hāmri nhūm kuma nē kām:

—ÿ ma wa inhmex na pa wa ixpa.

Anhÿrja kôt nhũm ôhy kamã hkraja haxwÿja te kot Marir kapêr mar nê amnhĩ nhĩpêx pyrãk o htu kamã àxõnh tÿx o nõ. Hãmri nhũm Ijapew Tirtũm Karõ nhÿ hã tanhmã Marir mã kapêr to.

⁴² Kãx pê kãm kapêr nê kãm:

—Xê gaa nê. Ra Tirtũm kot ato mex jakamã na ka akĩnh rax o mẽ inhni hkwyjê jakrenh pa. Anhõhy kamã akraja koja Tirtũm amã ho mex rax nê.

⁴³ Xê mon ka ã ixto mex nê ixwÿr amõr anê? Apê inhõ Pahihti katorxã htã ixto mex nê ã ixwÿr amõr anê. Hêxta gaa nê. Âm hãmri na ka ixwÿr mõ Marir.

⁴⁴ Na ka ixwÿr mõn pøj nê inhmã akapêr hãmri nhũm ixtu kamã ixkrare akapêr ma nê hkĩnh xãj ixtu kamã ixkamnãr tÿx o nõ.

⁴⁵ Na ka pre Tirtũm kapêr o wrÿk xwÿnh kot amã kapêrja ma nê hkõt ajamaxpêr tÿx nê. Jakamã kot kaj Tirtũm nhÿ hã akĩnh nê ajamakêtkati nê amex nê ri apa. Anê.

Marir kot Tirtũm mã mex o mex ã grer ã harênh

Rukre 6.20-26

⁴⁶ Hãmri nhũm Marir Ijapew kot ã kãm kapêr anhÿrja ma nê kãm Tirtũm mex o mex ã gre nê grer o:

Tirtũm na mex o mex.

⁴⁷ Kêp ixkaprĩ xwÿnh na.

Kêp ixkaprĩ xwÿnh jakamã na pa inhmex nê ixkĩnh nê ri ixpa.

⁴⁸⁻⁴⁹ Ixte amnhĩ to gre nê nhũm ja hã ixpumu nê ixkamã ukaprĩ nê ixto mex rax kumrêx.

Jakamã koja mẽ piitã axpên kanrêhã axpên mã ijarênh rãhã ho pa. Tirtũm kot tanhmã ixto mex to hã ijarênh rãhã ho pa.

Tirtũm na mex o mex nê hihtÿx o hihtÿx. Tã na ã inhĩpêx anê.

⁵⁰ Ma na hte ã amnhĩ nhĩpêx anê nê axpên kanrêhã mẽ kot hã hpijaam xwÿnhjê pumu nê mẽ kutã nojarêr rãhã ho pa.

Nê mẽ kamã ukaprĩ rãhã ho pa.

ã na hte mẽ hipêx mex anhÿr o pa.

⁵¹ Nê hihtÿx o hihtÿx jakamã na hte mẽ kot amnhĩ to jarkrar o ri mẽ pa xwÿnhjaja tanhmã mẽ ho nhũm mẽ axkaprã.

⁵² Nê pahihti hkwy kot kapêr mar nê âm mar xwÿnhjaja.

Na hte amnhĩ tã mẽ omu nê mẽ àpênh nê mẽ hapøj nê mẽ hpãnhã mẽ kot amnhĩ to hkryre xwÿnh kwÿ jagjê.

⁵³ Na hte mẽ kãm kapêr kôt amnhĩ nhĩpêx prãm xwÿnhjê ho mex o pa nhũm mẽ mex nê pa.

No mẽ kãm hprãm kêt xwÿnhjaja nhũm tanhmã mẽ ho mex to hkêt nê.

⁵⁴⁻⁵⁵ Âm hãmri na pre amnepê mã mẽ panhigêt mã amnhĩ jarênh xã

hkõt mẽ pahpê Apraãw rũm axpên kanrêhã hkrajaja mẽ pahto mex o pa. Mẽ pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xãj mẽ pahto mex rãhã ho pa.

Nê mẽ pakamã ukaprĩ rãhã ho pa. Anê.

Nhũm pre ã Marir Ijapew mã Tirtũm mex o mex ã grer anê.

⁵⁶ Hãmri nê ri hkõt pa hã mytwrÿ axkrunêpxi nê ma akupÿm õ krĩ hwÿr mõ.

Juãw Paxis kator ã harênh

⁵⁷ Tã nhũm Ijapew hpijagri kaxyw ôhy xã nhũm hkrare kato nê myre.

⁵⁸ Hãmri nhũm omu nê hkĩnh tÿx nê. Hãmri nhũm hkwyjaja Tirtũm kot wa kamã ukaprĩ hã wa kãm wa hkra myre nhõr ã harênh ma nê wa ÿ hã hkĩnh nê.

⁵⁹ Tã nhũm wa hkraja ra hã arigro pê 8 nhũm mẽ hkwyjaja kot my kwryt kã krãhyr kaxyw hwÿr akuprõ. Tirtũm kot mẽ kãm hã karõ xã hkõt nhũm mẽ kot kãm õr ã amnhĩ to amnhĩrĩt kaxyw ã hipêx anhÿr kaxyw. Na htem ã mẽ kêp Ijaew krajê piitã mẽ hipêx anê. Jakamã nhũm prem ã hipêx anê hãmri nê hpãnhã tanhmã kot hã hixi mẽnh to kaxyw ri hã axpên kukja. Hãmri nê hipêxã hkõt kot hã Jakaris mẽnh kaxyw.

⁶⁰ Hãmri nhũm katorxã tee ri axpên tã mẽ kuma nê mẽ kãm:

—Ma koja kêp Jakaris kêt nê. Koja kêp Juãw. Anê.

⁶¹ Hãmri nhũm mẽ tee ri kuma nê kãm:

—Kokÿ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anê. Anê.

⁶² Hãmri nê hixi hã hipêxã kukja. Nom nhũm arĩ umar kêt nê kapêr kêt jakamã nhũm mẽ tanhmã ri kãm mẽ ìhkra nhĩpêx to.

⁶³ Hãmri nhũm ìhkra ho kagã hã ahwÿ nhũm mẽ kãm ja gõ nhũm kupy nê hã mẽ kãm hixi nhĩpêx. Nhũm mẽ kupy nê omu hãmri nê hixi pê Juãw kôt omu. Hãmri nê tee ri hixija kukamã hamaxpêr.

⁶⁴ Rõm nhũm Jakaris akupÿm ama nê kapêr mex kurê kumrêx nê Tirtũm mã mex o mex ã harênh o xa.

⁶⁵⁻⁶⁶ Hãmri nhũm mẽ omu nê ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêt kape hã krĩ hkõt nhũm mẽ ri mẽ piitã mẽ kãm harênh o hprõt. Tirtũm kot wa hkra kôt tãnopxar o pa nê ho mex ã harênh o hprõt. Hãmri nhũm mẽ kuma nê tee ri hkukamã hamaxpêr nê axpên mã:

—Hêxta waa nê. Tirtũm tãm na xep hte jare hkõt ri pa ho pa. Jakamã koja nhÿrmã hprêk hãmri nê tanhmã koja we amnhĩ nhĩpêx to ho pa wehee? Anê.

Jakaris kot Tirtũm nhÿ hã kapêr ã harênh

⁶⁷ Hāmri nhūm Jakaris Tirtūm Karō nhỹ hā Tirtūm mex o mex ā harēnh o xa. Tirtūm kot mē kēp Ijaew o mex ā harē nē mē kām:

⁶⁸ Hēxta waa nē. Nā Tirtūmja mex o mex. Na pre hte mē pahpāmja ām hkōt pix mā amnhī nhīpēx o pa. Jakamā nhūm hte Tirtūm mē pahpē hkrajē kamā ukaprī nē mē pahto mex o pa. E kwa pu mē kām mex o mex ā harēnh rāhā nē.

⁶⁹ Ra kot mē pahwūr mē pahkaprī xwýnh pē mē panhō pahihiti mēnh mā. Ja kaxyw āhpumunh xihtýx o hihtýx jakamā na pre ra mē pahwūr mēnh ā amnhī jarē.

Koja kēp amnepēm Tirtūm mā tanhmā amnhī nhīpēx to ho pa xwýnh Tawija hkanrēhā htāmnhwý.

⁷⁰ Amnepēm Tirtūm nhỹ hā kapēr xwýnhjaja na prem mē kām Tirtūm kapēr jarēnh o pa nē mē kām:

⁷¹ “Koja Tirtūm mē panē mē kām mē pahkurē xwýnhjē pumunh mex o pa.” Anē.

⁷² Tirtūm ra kot mē pahpāmje mā amnhī jarēnh xā hkōt kām mē pakamā ukaprī rāhā ho pa hprām.

Koja aa ja ho anhýr o hamakētkati hkēt nē.

⁷³⁻⁷⁵ Na pre ra mē pahpām Apraāw mā mē pakukamā ā mē pahtā amnhī jarēnh anē nē kām: “Kot paj mē anē mē kām mē akurē xwýnhjē pumunh mex nē mē ĩkra nē mē ato ixkato. Jakamā kot kaj mē amnhī kamā amā mē uma hkēt nē axāmnhīx ri ajamakētkati nē mē kamā apa. Nē kot kaj mē māmri axāmnhīx ri inhmā tanhmā amnhī nhīpēx to ho ri apa rāhā nē. Nē ixkōt amnhī nhīpēx o ri apa rāhā ty.” Anhýr o na pre Tirtūm mē pakukamā mē pahtā amnhī jarē. Anē.

Nhūm pre ā Jakaris mē kām Tirtūm kapēr jarēnh anē. Hāmri nē hkrareja mý nē o xa nē kām:

⁷⁶ —No ka Xugitre. Kot kaj aprēk hāmri nē apē Tirtūm maati nhỹ hā kapēr jarēnh o apa xwýnh. Jakamā kot kaj Pahihiti hkukamā mē piitā mē kām harēnh o ri mē hkōt apa. Mē kot amar nē kutēp tām amnhī nhīpēx kaxyw.

⁷⁷ —Tirtūm kot mē nē mē kot amnhī tonnuj rēnh nē mē ho hkra hā harēnhja kot kaj mē hkōt mē kām harēnh o ri apa.

⁷⁸ —Na hte Tirtūm mē pakamā ukaprī ho pa nē mē pakamā gryk tokyx anhýr kēt nē. Jakamā koja mē pahwūr mē pahkaprī xwýnhja mē. Kormā mē pahwūr wrýk kēt jakamā te mē pahte kamāt kō kamā tee ri mē paxāhkupēnh o ri papa xwýnh pyrāk.

—Nom koja mē pahwūr wrýkja o te ra myt kator nē mē pamā hirā nē mēmoj to amnhīrit mex pyrāk o mē panhīpēx. Ja kaxyw koja Tirtūm mē pahwūr mē pahkaprī

xwýnhja mē nhūm man mē pahwūr wrý nē mē pamā mē pahtyk pyma xwýnhjē mā Tirtūm kapēr o amnhīrit o pa. Mē pahte mar nē ra pajamakētkati nē paxāmnhīx ri papa nē pahtyk kaxyw.

⁷⁹ —Mē kām mē htyk pyma xwýnhjaja te kamāt kō kamā ri pa pyrāk. Tā koja mē pahkaprī xwýnhja wrý hāmri nē tanhmā mē hkrā hto nhūm mē te arīgro hā ri mē pa xwýnh kot amnhī nhīpēx pyrāk o amnhī nhīpēx. Jao hamakētkati nē axte kām htyk pyma hkēt nē ri pa. Anē.

Nhūm pre ā Jakaris Tirtūm Karō nhỹ hā hkrare mā kapēr anē.

⁸⁰ Tā nhūm Juāwja gaa nē aptār. Nē Tirtūm kōt amnhī nhīpēx o pa. Nom kormā kot Ijaew jahkre ho pa hkēt ri kapōt ā ri mē puhā pa.

Ā na pre Juāw kator nē amnhī nhīpēx anhýr o pa anē. Na pre kato nē hā mytwrý grēre hāmri nhūm Jejusja hkōt kato.

2

Jejus kator ā harēnh Matēwre 1.18-25

¹⁻² Na pre ā Jejus kator anē. Nhūm pre Rōm nhō xwýnhjē nhō pahi Sesti Akusja ō pika piitā hkōt mē ho kōta kaxyw. Aa kot mē ho kōta hkēt tā ra kot mē ho kōta kaxyw. Kormā pahi Sirēn haxwýja kot pika pē Sir kamā mē ho amnhīptār ri nhūm pahi Sesti Akus kot mē ho kōta kaxyw. Jakamā kām āpēnh xwýnhjē mā kapēr nē mē kām:

—E kēr ka mē ho kōta kaxyw nē mē piitā mē hixi hā kagā hpa. Anē.

³ Hāmri nhūm mē piitā ā kot mē hipēx anhýr ā amnhī tā harēnh ma hāmri nē mē kot mē hixi hā kagā kaxyw piitā akupým papxā hwýr ma hapēx.

⁴ Nhūm pre Marir mjēn Juje haxwýja ma krī pē Perēj wýr mō. Garirej kamā ō krī pē Najare rūm kato nē ma hwýr mō. Pika pē Jutej kamā na Perējja. Kamā na pre Juje nhīgē Tawija kato.

⁵ Nhūm Juje kēp kanrēhā htāmnhwý jakamā na pre ma akupým hwýr mē hkwyjē hkōt mō. Nē ma amnhī kōt kot ho hprō mā xwýnh Marir o mō. Arī htujarō rax rāhā nhūm ma amnhī kōt o mō.

⁶ Nhūm wa mōō hāmri nē hwýr pōj. Nhūm Marir hpjagri xā hā mytwrý mā ār jakamā nhūm kamāt nhūm ōhy xā.

⁷ Nom nhūm Perēj wýr mē hpōx nyw xwýnhjaja ra ixkre piitā ho nýt pa nhūm wa tee ri hpjagri kaxyw amnhī to ukapi ho pa. Hāmri nē nhýri mōx nhōrkwý punajre hwýr axā nhūm Marir kamā hpjagri. Nhūm hkra kato nē myre. Kra kot wa na pre. Hāmri nhūm kumý nē kupēxē ho hkupu hpa nē mōx xāpkur xā hā kōsti kaprý kamā kuxi nhūm hamakētkati nē gōr nē nō.

ôwêhti jamâr xwýnhjê jarênh

⁸ Rôm nhùm ôwêhti jamâr o mê pa xwýnhjaja kapôt â ri hkrît ôwêhti jamâr o pa. Nhùm ra kamât nhùm mê hamâr o hkrî.

⁹ Pu nhùm kaxkwa rûm Tirtûm kapêr o wrýk xwýnhja wrý nê mê mýri ajêt. Hâmri nê tanhmâ amnhî to nê mê hpuhâ ho hirâ rax kumrêx. Nom nhùm Tirtûm tãm â mê hipêx anê. Hâmri nhùm mê tee ri jawý Tirtûm kapêr o wrýk xwýnhja pumu nê kãm ma htýx nê akryk omunh o hkrî.

¹⁰ Hâmri nhùm mê kãm:

–Pa? Kwa mê amâ ixpyma hkêt nê. Ixte mê amâ mêmoj mex jarênh kaxyw na pa mê awýr wrý. Kot kaj mê harênh ma nê akînh nê. Nom mê kapxipixjaja kaj mê akînh kêt nê. Koja mê piitâ ja jarênh ma nê mê apyrâ nê hkînh nê pa.

¹¹ Na ra ham mê akamâ ukapri xwýnhnta kato. Pahi Tawi nhô krî mê mê anhô krî pê Perêj kamâ. Kêp mê apiitâ mê anhô pahihiti na. Mê ate amnhî wýr kamâ ajamak o apa xwýnh pê Kris na. Tãm na ham kato.

¹² E pa ixpri hâ mê amâ tanhmâ harênh to ka mê inhma. Na kato nhùm katorxâ kupêxê ho kupu hpa nê kôsti kamâ kuxi nhùm nô. Kwa mê tokyx ma hwýr mra nê kêp mê anhô pahihiti hâ omu. Anê.

¹³ Nhùm pre â mê kãm ujarênh anê. Hâmri nhùm hkwyjaja wamta kôt ohtôo nê mê hwýr wrý nê puhâ harir. Hâmri nê Tirtûm mâ mex o mex â grer o harir.

¹⁴ Nê hâ grer o:

Tirtûm maati na mex o mex.

Jakamâ mê kãm hprâm xâ kôt pix mâ amnhî nhîpêx o mê pa xwýnhjaja koja amnhî tâ mê omu nê tanhmâ mê ho nhùm mê hamakêtkati nê amnhîx hkînh nê pa ho pa.

¹⁵ Anhýr o grer o harir hâmi nê ma akupým kaxkwa hwýr âpir pa nê akunok. Hâmri nhùm ôwêhti jamâr xwýnhjaja mê kapêr ma nê ma akupým âpir â mê omu nê expên mâ:

–E tokyx pu mê krîm nê Tirtûm kôt mê pamâ ho amnhîrit xwýnhnta japêr nê tokyx nhýri omu. Kwa ma pu mê tokyx hwýr nê omu. Anê.

¹⁶ Hâmri nhùm mê ma hwýr mra. Hâmri nê krîm agjê nê môx nhôrkwýwýr agjê nê mê hkrareta pumu. Nhùm kôsti kamâ nô nhùm mê omu nê kuri Marir mê Juje wa omu.

¹⁷ Hâmri nê akupým hapôj nê ma mê piitâ mê hkôt ri mê kãm harênh o pa. Ra Tirtûm kapêr o wrýk xwýnh kot mê kãm harênh xâja kôt nhùm mê ma mê kãm harênh o ri mê hkôt pa.

¹⁸ Nhùm mê amnhî jaer pê mê kot harênh ma nê tee ri hkukamâ hamaxpêr.

¹⁹ Nom nhùm Marir mê kot kãm hkrax rûm tanhmâ hkra jarênh to xâta kukamâ pix mâ hamaxpêr rãhâ ho pa.

²⁰ Jakamâ nhùm ôwêhti jamâr xwýnhjaja ma akupým hkrît wýr mra. Tirtûm kapêr o wrýk xwýnh ra kot mê kãm ujarênh xâ hkôt nhùm mê kot Jejus pumunh jakamâ ma akupým hkînh nê Tirtûm mâ mex o mex â harênh pê hâ grer o akupým mra.

Mê kot Jejus â hixi mênh â harênh

Matêwre 1.21; Rukre 1.31

²¹ Tã nhùm wa hkrareta ra hâ arîgro pê 8 nhùm mê hwýr akuprô nê kãm my kwryt kâ krãhta. Na hte Ijaew mê hkra myre piitâ â mê hipêx anê. Mê piitâ mê kot Tirtûm mâ ôr â mê omunh kaxyw. Jakamâ nhùm mê kãm ho anê nê hpãnhâ hâ hixi mê. Marir kormâ kot ho htujarô hkêt ri Tirtûm kapêr o wrýk xwýnh kot hkukamâ kãm hixi jarênh xâja kôt nhùm mê hâ hixi mê nhùm hixi kêp Jejus.

Mê kot Tirtûm mâ Jejus nhôr pyrâk o hipêx

²²⁻²⁴ Tã nhùm Marir hpijagri ho hapêx. Jakamâ nhùm Juje ma krî pê Jerujarê hwýr mê kot Tirtûm mâ amnhî jarênh xâ hâ ixkre hwýr amnhî kôt o mô. Na pre ra finat Mojes amnepêm Tirtûm nhý hâ mê hkukamâ mê hpãmjê mâ ja hâ karô. Nê mê kãm hâ karô ho:

Koja mê aprô hpijagri. Hâmri nê hpijagri ho hapêx ka mê ma Tirtûm mâ amnhî jarênh xâ hâ ixkre hwýr o mra nê hpãnhâ Tirtûm mâ mêmoj gô. Kãm tutre ho gô rý kãm tuuti hô ho axkrut nê agô kê patre hamý nê kãm kupa. Kot ja hâ omunh nê hpijagri xwýnhnta akupým mex â harênh kaxyw.

Anhýr o kot mê kãm ja hâ karô jakamâ nhùm wa ma â amnhî nhîpêx anhýr kaxyw hwýr mô. Nê amnhî kôt Jejus my nê o mô. Tirtûm kot mê kãm ja hâ karô nhùm mê kot hâ kagâ xâ hkôt. Na pre ra finat Mojes mê kãm ja jarê nê mê kãm:

Kot kaj mê akra my kot wa hâmi nê te mê ate Tirtûm mâ ôr kaxyw hipêx pyrâk o hipêx. Kê tãm amnhî nhîpêx o pa nê ý hâ tanhmâ kãm amnhî nhîpêx to ho pa.

Anhýr jakamâ nhùm wa ra Jerujarê hwýr nojarêt nê amnhî kôt Jejus my nê ma amnhî kôt o mô.

Simeaw kot Jejus kukamâ harênh

²⁵⁻²⁶ Rôm nhùm Jerujarê kamâ Simeawja. Tirtûm Karô nhý hâ kot tanhmâ amnhî to mex to ho pa xwýnh na pre. Na pre hte Tirtûm kapêr kôt pix mâ tãm amnhî nhîpêx o pa. Jakamâ nhùm pre ra Tirtûm Karô â kãm kapêr anê nê kãm:

–E inhma Simeaw. Kot kaj atir rãhâ nhýrmâ Tirtûm kot mê akaxyw âm mâ xwýnhja ka ano ho omu nê ri kormâ ty.

Anhýr o kãm kapêr jakamâ nhùm kuma nê hkînh nê âm pix kamâ hamak o pa. Mê

kêp Ijaew wÿr wrÿk nê mê ho mex mã xwÿnhnta pix kamã hamak rãhã ho pa.

²⁷Jakamã nhÿm Jejus katorxã mê hipêêxã purota wa Tirtÿm mã amnhÿ jarênh xã hã ixkreja wÿr Jejus o axã nê kormã o xa. Finat Mojes kot mê kãm hã karõ xã hkõt. Hãmri nhÿm Tirtÿm Karõ mê hwÿr Simeãwja mê nhÿm ma mê hwÿr tẽ nê axã.

²⁸Hãmri nê wa hkrata pumu nê hkÿnh tÿx nê. Hãmri nê wa kêp kumÿ nê o xa nê hã Tirtÿm mã mex o mex ã harê nê kãm:

²⁹⁻³²Pa Pahi Maati. E ot pa ixte amã tanhmã amnhÿ nhÿpêx to ho ixpa xwÿnh ã amnhÿ jarê.

Nã ãm hãmri na ka pre ã inhmã jare hkukamã harênh anê. Tã ate inhmã harênh xã hkõt pa ra inhno ho omu. Kêp mê ixkamã ukapri xwÿnh ã omu. Nê kêp ate mê ixwÿr mênh xwÿnh ã omu.

Nã koja te arÿgro hã myt hirã nê mêmoy piitã ho amnhÿrit mex pyrãk o koja mê inhÿpêx o pa. Jakamã koja hprêk hãmri nê ma Ijaew kêt xwÿnhjê mã apê Tirtÿm ã akapêr o amnhÿrit o pa nhÿm mêhprÿ hã ajarênh ma. Nê mê ixpê Ijaew kot paj mê ijaxwÿja kuma nê hã ixpijaãm o ri ixpa.

Jakamã kot paj ixãmnhÿx ri tanhmã amnhÿ nhÿpêx to ho ri ixpa nê ixãmnhÿx ty. Ra ixte inhno ho ate inhmã harênh xwÿnhnta pumunh kênã. Anê.

³³Nhÿm pre ã Simeãw Jejus jarênh anê. Nhÿm katorxã mê hipêêxã purota wa amnhÿ jaêr pê kot ã harênh anhÿrja mar o xa.

³⁴⁻³⁵Hãmri nhÿm Simeãw wa ho Tirtÿm wÿr nê kãm:

—E Tirtÿm. Kêr ka ja wa ho mex nê. Wa ho mex o wa ho mex rãhã ho apa. Anê.

Hãmri nê Marir mã kapêr nê kãm:

—Nã ãm hãmri na pre Tirtÿm mê pakaxyw akrata xãm. Mê pahpê Ijaew kaxyw ãm. Jakamã koja hprêk nê ma Tirtÿm kapêr o mê piitã mê ahkre ho ri mê hkõt pa. Nhÿm mê kuma hãmri nê ahpÿnhã tanhmã hamaxpêr to xã hkõt tanhmã hipêx to. Jakamã nhÿm mê hkwyjaja kuma nê hkõt amnhÿ xunhwÿ nê hkõt amnhÿ nhÿpêx o pa. Jao tãm hipêx o pa. No nhÿm mê hkwyjaja kuma nê axtem nê kãm hkÿnh kêt nê. Hãmri nê tanhmã hipêx to. Jakamã kot kaj tee ri ja hã mê omu nê akapri htÿx nê. Te mê kot wapo ho akanhwÿr nê akamã ho kaxkep nhÿm apê omnuj tÿx pyrãk o kot kaj amnhÿ kamã ama nê mê omu. Anê.

*ãnti kot Jejus pumunh ã harênh
Wam Ximotre 5.5*

³⁶⁻³⁸Rôm nhÿm mêmõ ni pê ãntija mê hwÿr axã nê Jejus pumu. ãntija Panuew kra na pre. Nê Ase hkwyã na pre. Ni htã kêp Tirtÿm

nhÿ hã kapêr jarênh o pa xwÿnh. Na pre ra mjên no ãm kormã mjên nê pa hã amgrã pê 7 pix nhÿm pre kêp ty. Hãmri nhÿm axte mjên kêt nê pa rãhã ra hpigêx tÿx nê. Ra hã amgrã pê 84. Na pre hte Tirtÿm mã amnhÿ jarênh xã hã ixkre hwÿr pa nê kãm amnhÿ jarênh rãhã ho pa. Nê kot kãm amnhÿ jarênh kaxyw nê apkur kêt rãhã kãm amnhÿ jarê. Nê arÿgro hã hwÿr pa nê kamãt kãm hwÿr pa. ã na pre hte amnhÿ nhÿpêx anhÿr rãhã ho pa anê. Jakamã mê hwÿr axã nê Jejus pumu nê hkÿnh nê. Hãmri nê hã Tirtÿm mã mex o mex ã harê nê kãm:

—Hêxta gãã nê Tirtÿm. ãm hãmri na ka mê ixwÿr Jejus mê. Ma amex o amex. Anê.

Hãmri nê Ijaew kot amnhÿ wÿr mê kamã ukapri xwÿnh kamã hamak xwÿnhjê mã ra Jejus kator ã harênh o ri mê hkõt pa.

*Marir mê Juje wa kot akupÿm Najare
hwÿr mör ã wa harênh*

Matêwre 2.19-23

³⁹Tã nhÿm Marir mê Juje wa Tirtÿm kapêr ã kagã htÿm kêt Tirtÿm mã amnhÿ jarênh xã hã ixkre kamã tanhmã amnhÿ nhÿpêx to hpa hãmri nê kato nê ma akupÿm mō. Ma Garirej kamã õ krÿ pê Najare hwÿr wa ma akupÿm mō.

⁴⁰Tã nhÿm wa hkrata ra wa kãm hprêkre ho mō. Nê mex nê ahpumunh tÿx nê. Tirtÿm kot tãnopxar nê mêmoy to kutã nojarêt rãhã ho pa jakamã nhÿm mex nê hkÿnh nê pa.

*Marir mê Juje wa kot tee ri Jejus japêr ã
wa harênh*

Rukre 4.22

⁴¹Nhÿm pre hte Marir mê Juje wa amgrã mê hkwyjê hkõt ma Jerujarê hwÿr pa. Mê kot arÿgro pê Pas ã hkÿnh kaxyw. Pas ã na hte mê kêp Ijaew amnepêw Tirtÿm kot pika pê Ejit rÿm mê hpãmjê katorja mã hamaxpêr kaxyw axpên wÿr akuprõ nê hã hkÿnh. Jakamã nhÿm wa ma mê hkõt hã hkÿnh kaxyw Jerujarê hwÿr hkwyjê hkõt mō.

⁴²Nhÿm ra Jejus hprêk o mō. Ra hã amgrã pê 12 jakamã nhÿm wa ma amnhÿ kõt o mō.

⁴³⁻⁴⁴Tã nhÿm mê hkÿnh pa hãmri nê akupÿm nojarêt nhÿm Marir mê Juje wa ma hkwyjê hkõt akupÿm mō. Nhÿm Jejus Jerujarê kamã ahte arÿk nê akupÿm wa hkõt mör kêt nê. Nhÿm wa htÿx wam ma hkwyjê hkõt htêm ã hkamnhÿx jakamã wa hapêr kêt nê. Hãmri nê wa hapu hã hamakêtkati nê mê hkõt mör o mör ã ra hã kamãt. Hãmri nê mê kot amnhÿm hikranh xãja wÿr mê hkõt pøj nê tee ri mê hkaêx ã hkra japêr o ri mra nom omunh kêt nê.

⁴⁵Jakamã nhÿm apkati nhÿm wa awjanã nê ma akupÿm Jerujarê hwÿr mō nê kamã hapêr o ri pa.

⁴⁶Nom tokyx kãm kator kêt nê. Mê hkaêx ã tee ri hapêr o pa hã apkati axkrut. Nê nõ nhÿm apkati nhÿm wa tã Tirtÿm mã amnhÿ

jarēnh xā hā ixkreja wýr hapêr o mō nē hwýr axā. Hāmri nē omunh kurē kumrēx. Nhūm arī mē kot Tirtūm kapêr tūm o mē ahkre xwýnhjē mar o mē kutā nhý. Nē mēmoj tā ri mē hkukja nē tanhmā mē kām ujarēnh to.

⁴⁷ Nhūm mē kot mar xwýnhjaja tee ri kapêr ā kuma nē āhpumunh týx ā omu hāmri nē akryk mar o hkrī.

⁴⁸ Hāmri nhūm Marir mē Juje mē hwýr axā nē mē kuri wa hkraja pumunh kurē kumrēx. Hāmri nhūm katorxāja hwýr tē nē kām:

—Xē Jejus. Mon ka axtem nē ā ri amnhī nhípēx anē nē akupým wa ixkōt amōr kēt nē? Na pa wa mō nē mē pahkwýjē hkōt pōj nē tee ri mē hkaēx ā ajapêr nē tee ri akukamā ijamaxpêr. Anē.

⁴⁹ Hāmri nhūm amnhī tā wa kuma nē wa kām:

—Tý. Nom Inhípēxā nhōrkwý kamā ixārīk kēnā na ka wa tee ri ixkukamā ajamaxpêr nē ijapêr o ri apa. Anē.

⁵⁰ Hāmri nhūm wa kuma nē ā kot amnhī jarēnh anhýrja kukamā tee ri hamaxpêr.

⁵¹ Hāmri nē mē ma akupým mō nē Najare hwýr pōj nē kamā pa. Nhūm pre Jejus wa kapêr kōt ri amnhī nhípēx rāhā ho pa. Hāmri nhūm katorxāja hkrax rūm mē kot kām tanhmā hkra kot amnhī nhípēx to hkukamā harēnhja pix kukamā hamaxpêr rāhā ho pa.

⁵² Gaa nhūm Jejus ra aptār o mō. Nē āhpumunh týx nē. Nhūm mē piitā ā kot amnhī nhípēx anhýr ā omu nē kām hkīnh nē. Nhūm Tirtūm haxwýja kām hapē nē.

3

Juāw Paxis kot Tirtūm kapêr jarēnh o pa hā harēnh

Matēwre 3.1-10; Makre 1.1-8; Juāw 1.19-28

¹⁻² Tā nhūm kormā pahihti Tipeja mē ho amnhīptār o pa. Na pre ra mē ho amnhīptār ā amgrā pē 15. Nhūm Pōn Piratja pahihti Xipe mā pika pē Ijaew nhō xwýnhjē ho amnhīptā. Nhūm Eroxa kām pika pē Garirej nhō xwýnhjē ho amnhīptā. Nhūm Erox to Firipja kām pika pē Iturej nē hō pē Takonit wa kamā mē pa xwýnhjē ho amnhīptā. Nhūm Risānja kām pika pē Apirēn kamā mē ho amnhīptā. Nhūm Anas mē Kajpasja wa kēp Ijaew nhō patre maati.

Rōm nhūm Jejus mē Jakaris kra Juāwja wa ra hamē anhīpē aptār. Jakamā nhūm Tirtūm tanhmā Juāw mā kapêr to. Kormā kapōt ā ri pa ri nhūm kām kapêr nē kām tanhmā kot amnhī nhípēx to ho pa hā kām karō nē kām:

—Pa Juāw. E inhma. Kēr ka ma mē kām ixkapêr jarēnh rāhā ho ri apa. Anē.

³ Hāmri nhūm kuma nē ma ri mē kām kapêr jarēnh o pa. Pyhti pē Jotāw mýri mē

piitā mē kām harēnh o ri pa nē hpānhā ihkjē hā ri mē pa xwýnhjē mā harēnh o ri pa. Nē mē kām:

—E kwa mē tokyx amā amnhī tomnuj kaga hprām xā tām ri amnhī nhípēx. Kē Tirtūm ja hā mē apumu nē mē anē mē ate amnhī tomnuj o hapēx pa. Pa mē piitā mē kot mē apē Tirtūm kra hā mē apumunh kaxyw mē akrā kumrā.

Anhýr o mē kām kapêr o ri pa.

⁴⁻⁵ Na pre ra amnepēm mē hkukamā Tirtūm nhý hā kapêr o pa xwýnhjē Jais ra Juāw kukamā kot tanhmā amnhī nhípēx to hā harē nē hā kaga. Nē hā kaga ho:

Koja nhýrmā mēhō mōn pōj. Kapōt ā mōn pōj nē mē kām ujarēnh o ri pa. Nē mē kām ujarēnh o: “E mē inhma. Koja Tirtūm tokyx mē pahwýr mē panhō pahihti mē nhūm wrý nhūm mē piitā omu. Jakamā kwa mē tokyx kutêp tām amnhī nhípēx o apa. Te ho mē kot mēhō kutêp pry ho mex pyrāk o amnhī nhípēx. Jao tām amnhī nhípēx. Nē tām axpēn nhípēx. Pahihtita kutêp. Mē pahte amnhī nhípēx te kot pry nhīnur pyrāk nhūm mē tee ri kot kām hā mrar mex prām kaprý pyrāk. Hinur nē krā hakýx nē pry juk pyrāk o na mē pahte amnhī nhípēxja. Jakamā kot kaj mē ate amnhī tomnuj kaga nē tām amnhī nhípēx. Nē tām axpēn nhípēx. Hāmri nē te mē kot pry nhīnur o mex nē ho katāt nhūm katāt muux nē nōr pyrāk o kot kaj mē amnhī nhípēx. Pahihti nywta kutêp. Kwa kēr ka mē ā amnhī nhípēx anē.

⁶ Kot kaj mē anē nhūm mē ohtō nē ja hā mē apumu hāmri nē mē apyrā Tirtūm kot mē ho hkra kaxyw amnhī to kuwý.”

Anhýr o mē kām ujarēnh o pa. Anē.

Nhūm pre ā finat Ijaisja Juāw Paxis kukamā mē kām ujarēnh anhýr o pa.

⁷ Jakamā nhūm aptār nē Jais kot ra hkukamā harēnh xā hkōt ma Tirtūm kapêr o mē ahkre ho pa. Nhūm prem kuma hāmri nē kot mē hkrā kumrār kaxyw hwýr amnhī to mra. Nhūm mē omu nē tanhmā mē ahkre hto. Nē mē kām kapêr kām hihtýx nē mē kām:

—Tk. Kwa kormā. Mē ate amnhī tomnuj pix o ri apa xwýnhjē kēnā. Xā kot paj mē ate amnhī tomnuj rāhā mē akrā kumrā nhūm Tirtūm ja hā mē apumu nhūm ja kām mex nā? Nā koja ja kām mex kēt nē. Koja ja mýrapē nhýrmā tanhmā mē anhīpēx to ka mē tee ri umaj apimxur prām kaprý.

⁸ —Na htem amnhī tomnuj kaga nē hpānhā tām amnhī nhípēx. Nē tām ri axpēn nhípēx. Jakamā e kwa mē ā amnhī nhípēx anhýr o apa. No na ka htem atýx ri ajamaxpêr o: “Mē ixpē finat Apraāw kanrēhā htāmnhwý jakamā koja Tirtūm ja hā

mē xipumu hāmri nē mē ixte amnhī tomnuj mýrapê tanhmā mē ixto hkêt nē. Koja âm mē ixto mex rāhā nē.” Anhýr o atýx ri amnhī kukamā ajamaxpêr o apa. Nom ja kot anhýr kêt. Mē apê Apraaw kanrêhā htâmnhwý htā urák nē tām amnhī nhípêx o apare hā. Kot ka mē apê kanrêhā htâmnhwý htā amnhī tomnuj o ri apa hāmri nē Tirtúm noo mā te mē apê pikap kênre nhíkwy pix pyrāk.

⁹—Na ra Tirtúm kot mē ate amnhī tomnuj mýrapê tanhmā mē ato kaxyw. Koja mē anhípêx o te mēhō nhō mēmoj pâr ô hkêt nhùm kot tee ri omunh hāmri nē krāhyr nē kuwy kamā mēnh nē ho xêt par pyrāk o mē anhípêx. Jao amnhī nē kuwy hwýr mē arênh pa ka mē kamā amnhī xā htýx kamā ajamak rāhā ho ri apa. Anê.

Nhùm pre ā Juāw Paxisja mē kām kapêr anê.

¹⁰ Hāmri nhùm mē kuma nē tee ri amnhī kukamā hamaxpêr nē kām:

—Kwa xō wehe? Xā koja ā mē inhípêx anê? Kwa tanhmā kot paj mē kot ā mē inhípêx anhýr pymaj amnhī nhípêx to wehe? Anê.

¹¹ Hāmri nhùm mē kām:

—Nā kër ka mē axpên kām axukapri ho ri apa. Nē mē kêp amrakati xwýnhjê mā amnhī kutā mēmoj nhôr o ri apa. Nē mē anhînôhkā axkrut nē mēhō hinôkā hkêt xwýnhjê mā ho pyxi nē agō nē pyxi nē ho arík. Nē mē axâpkur xā ho anhôxy ho apa hkêt nē. Âm axâmnhix ri mē kêp amrakati xwýnhjê mā amnhī kutā mē kām mēmoj to hkryre nē agō. E kër ka mē ā xpên nhípêx anhýr o ri apa. Anê.

¹² Hāmri nhùm Rôm kām mē ô pahihiti mā mē piitā mē kêp kâxpore hkwy jamýnh xwýnhjaja mē urák nē hwýr mra. Kot mē urák nē mē hkrā kumrâr kaxyw hwýr mra nē kām:

—No we mē pajaja? Tanhmā kot paj wem amnhī nhípêx to? Anê.

¹³ Hāmri nhùm mē kām:

—Nā mē kajaja kër ka mē Rôm nhō pahi kot mē amā mē ate mē kêp kâxpore hkwy jamýnh jarênh xā hkôt pix mā hamýnh o ri apa. No mē atýx ri amnhī krā hkôt amnhīm hkwy jamýnh prām xāj mē kām hkre kamā ho rûnh nē mē kām harênh o ri apa hkêt nē. Anê.

¹⁴ Hāmri nhùm hpānhā pôristi hkwyjaja hwýr mra nē kām:

—Kwa no we mē pajaja? Tanhmā kot paj wem ri amnhī nhípêx to ho ixpa? Anê.

Hāmri nhùm mē kām:

—Nā kër ka mē anhō pahihiti kot mē axâpênh pānhā mē amā kâxpore nhôrta pix jamý nē ajamakêtkati nē axâmnhix ri ho amnhīm axujaprôr o ri apa. No mē akwýjaja kām apyma nē mē amā kâxpore nhôr prām xāj ri mē kām tanhmā amnhī pyma hto ho

ri apa hkêt nē. E kër ka mē ā amnhī nhípêx anhýr o ri apa. Anê.

Juāw Paxis kot tanhmā Jejus jarênh to hā harênh

Matêwre 3.11-12; Makre 1.7-8; Juāw 1.19-28; määnên Atre 19.4

¹⁵ Nhùm pre ā Juāw Paxisja mē kām kapêr anê. Nhùm mē kuma nē htýx kêp Tirtúm kot mē pakaxyw âm mā xwýnhta ā hkamnhix.

¹⁶ Hāmri nhùm amnhī tā ā mē hamaxpêr anhýr ā mē omu hāmri nē mē kām amnhī tā aprā nē mē kām:

—Nā pa hkêt. Na pa hte âm Tirtúm mā gô pix o mē hkrā kumrâr o ri ixpa. No koja tokyx xipānhā Tirtúm kot mē pakaxyw âm xwýnhta tām mē pahwýr pøj. âhpumunh týx o kot ijakrenh jakamā na pa hte âm kukwak ri ixpa nē hā xipijaam o ri ixpa. Tirtúm kot mē pakaxyw âm xwýnhta koja mē awýr Karô rê nhùm mē akaxwýnh mā agjê ka mē ý hā tām ri amnhī nhípêx rāhā ho ri apa. Nom kormā mē kot tām amnhī nhípêx hkêt xwýnhjaja koja ja hā mē omu hāmri nē mē hipêx o te kuwy kot mēmoj to kaxâr par pyrāk o mē hipêx.

¹⁷—Na htem pur kām harôj nhíkê nē ho grā nē hpānhā kahtwý. Nē kahuk pa hāmri nē hkapi nhùm kôk apê nē prýhkā ho htor nē ho hapêx pa. Nhùm mē hy ho pa nē ixkre kamā gôj kām unhwý. Ja pyrā nē koja tokyx Tirtúm mē piitā mē kot tanhmā amnhī nhípêx to ho pa hā mē omunh xā hkôt mē ho axkjê. Mē kot tām amnhī nhípêx o mē pa xwýnhjaja koja ma amnhī wýr mē ho api nhùm mē kuri mex nē hkînā rāhā nē pa ho pa. No mē kot amnhī tomnuj xwýnhjaja koja mē hkînā tanhmā mē hipêx to nhùm mē ma kuwy raxja wýr pa nē kamā amnhī xā htýx kamā hamak rāhā nē pa ho pa. Anê.

¹⁸ Nhùm pre ā Juāw Paxis Tirtúm kapêr o mē ahkre anhýr o pa.

Juāw Paxis kot Jejus krā kumrâr ā harênh Matêwre 3.13-17; Makre 1.9-11

¹⁹ Tā nhùm Ijaew nhō pahi Erox ra htô hprô pê Eroxis pytā nē ho hprô nhùm Juāw Paxisja harênh ma nē ma hwýr tē nē hā kām akir. No âm ja pix ā kām âkjêr kêt nē. Määnên tanhmā kot amnhī tomnuj týx to ho pa hā kām akir.

²⁰ Nhùm amnhī tā kuma nē kamā gryk týx nē amnhī tā mē kām hā amýnê nhùm prem unê nē haxā. Jao amnhī tomnuj týx nē.

²¹ Nom kormā mē kot haxâr kêt ri nhùm Juāw Paxis Ijaew kwýjê krā kumrâr o xa. Rôm nhùm Jejusja hāmri tām nhýhýnh hwýr tē nē kot hkrā kumrâr kaxyw kām anê nhùm kuma nē hkrā kumrâr. Hāmri nhùm Jejus gôj rûm api nē kormā gô mý ri Tirtúm mā amnhī jarênh o xa.

²² Pu nhùm kaxkwa axkjê nhùm kurûm Tirtúm Karô te tuuti pyrā nē hwýr wrýk o

tê nê ïkre hã xa. Hãmri nhũm kaxkwa rũm Tirtũm kãm kapêr nê kãm:

Pa? E apê Ixkra mex na ka. Æm hãmri na ka hte ixkanrêhã amnhĩ nhĩpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhĩxi hã harênh

Matêwre 1.1-17

²³ Tã nhũm Jejus Tirtũm mã kapêr o mê ahkre ho pa hkra. Na pre ra hã amgrã pê 30 hãmri nê kãm ho hkra.

E kot paj hpãnhã amã Jejus kukamã hpãmjê nhĩxi jarê Teopre. Ijaewjaja na pre htýx ho Juje kêp Jejus nhĩpêxã kumrêx ã hkamnhĩx nom kêp hipêêxã kumrêx kêt ãm kêp hipêêxã puro na pre.

Jejus kêp Eri htãmnhwý na pre.

²⁴ Nê Eri kêp Matat kra na pre.

Nê Matat kêp Rewi hkra na pre.

Nê Rewi kêp Mewki hkra na pre.

Nê Mewki kêp Jãnaj kra na pre.

Nê Jãnaj kêp axtem Juje hõ hkra na pre.

²⁵ Nê Juje kêp Matatis kra na pre.

Nê Matatis kêp Amõs kra na pre.

Nê Amõs kêp Naũ hkra na pre.

Nê Naũ kêp Eri hkra na pre.

Nê Eri kêp Nakai hkra na pre.

²⁶ Nê Nakai kêp Mate hkra na pre.

Nê Mate kêp axtem Matatis õ hkra na pre.

Nê Matatis kêp Semeĩ hkra na pre.

Nê Semeĩ kêp Juje hõ hkra na pre.

Nê Juje kêp Jotre hkra na pre.

²⁷ Nê Jotre kêp Joanãn kra na pre.

Nê Joanãn kêp Rej kra na pre.

Nê Rej kêp Joropape hkra na pre.

Nê Joropape kêp Saraxi kra na pre.

Nê Saraxi kêp Neri hkra na pre.

²⁸ Nê Neri kêp axtem Mewki hõ hkra na pre.

Nê Mewki kêp Axi hkra na pre.

Nê Axi kêp Kojã hkra na pre.

Nê Kojã kêp Ematã hkra na pre.

Nê Ematã kêp Erti hkra na pre.

²⁹ Nê Erti kêp Jojue hkra na pre.

Nê Jojue kêp Eries kra na pre.

Nê Eries kêp Jorĩ hkra na pre.

Nê Jorĩ kêp Matat hkra na pre.

Nê Matat kêp axtem Rewi hõ hkra na pre.

³⁰ Nê Rewi kêp Simeãw kra na pre.

Nê Simeãw kêp Juta hkra na pre.

Nê Juta kêp axtem Juje hõ hkra na pre.

Nê Juje kêp Janã hkra na pre.

Nê Janã kêp Eriakĩ hkra na pre.

³¹ Nê Eriakĩ kêp Merea hkra na pre.

Nê Merea kêp Mena hkra na pre.

Nê Mena kêp Matata hkra na pre.

Nê Matata kêp Natã hkra na pre.

Nê Natã kêp Tawi hkra na pre.

³² Nê Tawi kêp Jese hkra na pre.

Nê Jese kêp Opex kra na pre.

Nê Opex kêp Poas kra na pre.

Nê Poas kêp Sarã hkra na pre.

Nê Sarã kêp Nasõ hkra na pre.

³³ Nê Nasõ kêp Amĩnatap kra na pre.

Nê Amĩnatap kêp Amĩ hkra na pre.

Nê Amĩ kêp Ari hkra na pre.

Nê Ari kêp Erõ hkra na pre.

Nê Erõ kêp Pere hkra na pre.

Nê Pere kêp Juta hkra na pre.

³⁴ Nê Juta kêp Jako hkra na pre.

Nê Jako kêp Ijak kra na pre.

Nê Ijak kêp Apraãw kra na pre.

Nê Apraãw kêp Tera hkra na pre.

Nê Tera kêp Nako hkra na pre.

³⁵ Nê Nako kêp Jeruk kra na pre.

Nê Jeruk kêp Rakau hkra na pre.

Nê Rakau kêp Parek kra na pre.

Nê Parek kêp Epti hkra na pre.

Nê Epti kêp axtem Sara hõ hkra na pre.

³⁶ Nê Sara kêp Kajná hkra na pre.

Nê Kajná kêp Apaxat kra na pre.

Nê Apaxat kêp Sêre hkra na pre.

Nê Sêre kêp Noehti hkra na pre.

Nê Noehti kêp Ramek kra na pre.

³⁷ Nê Ramek kêp Metujarê hkra na pre.

Nê Metujarê kêp Enok kra na pre.

Nê Enok kêp Jarate hkra na pre.

Nê Jarate kêp Marerer kra na pre.

Nê Marerer kêp axtem Kajná hõ hkra na pre.

Nê Kajná kêp Enos kra na pre.

³⁸ Nê Enos kêp Set kra na pre.

Nê Set kêp Atãw kra na pre.

Nê Atãw kêp Tirtũm kra na pre. Tirtũm kot wam my pê Atãwja pika ho hipêx jakamã te kêp hkra pyrãk.

Æ Jejus kukamã hpãmjê nhĩxi kot anhyr.

4

Satanasti kot amnhĩ tã Jejus kamã hamak ã harênh

Matêwre 4.1-11, 16.23; Makre 1.12-13, 8.33; mããnên Eprêw 2.18, 4.15

¹ Tã nhũm Jejus pyhti pê Jotãw rũm akupým ma mō. Hãmri nê Tirtũm Karõ nhỹ hã mêmōj kutã amnhĩ to htýx nê. Jakamã nhũm nhỹhým ma kapôt wýr o mō

² nhũm Satanasti omu nê ma hwýr tẽ nê ri hkôt pa. Kapôt ã ri hkôt hêx rom tanhmã kãm nê ho pa. Kot mar nê Tirtũm kapêr nhĩrõp ãm prãm xaj ma hkôt tanhmã kãm kapêr to ho pa. Hãmri nê hkôt pa o hã arĩgro pê 40 nhũm Jejus kormã apkur kêt o hã arĩgro pê 40 nê hapêx nhũm ra kãm prãm týt nê.

³ Hãmri nhũm Satanasti kãm:

—Kwa mãn ka ra amã prãm týt kumrêx nã? Nom xep apê Tirtũm Kra jakamã mêmōj tanhmã apê kute hkêt. Kwa kên nhĩkwý mũj mã anê kê amã pãwri hã amnhĩ jahkre ka

aku nê tokyx ho amnhî xihîtyx. E kwa tokyx kãm anê. Anê.

⁴ Hâmri nhûm kuma nê kãm:

—Tk. Nà kot paj akapêr mar xà hkôt tanhmâ amnhî nhîpêx to hkêt nê. Koja Tîrtûm kãm inhmâ mêmoj nhôr prâm nê inhmâ mêmoj gô pa arî kormâ kukrê. Kapêr ã kagâ htûm kot ja jarênh kot:

Na htem mê apkur xà pix kukwak ri htîr nê pa hkêt nê. Na htem määnên Tîrtûm kapêr mar xà hkôt tanhmâ ri amnhî nhîpêx to ho pa ho htîr nê mex nê pa. Anê.

Ã kapêr ã kagâ kot ja jarênh kot anhÿr jakamâ kot paj amar xà hkôt ã ri amnhî nhîpêx anhÿr kêt nê. Ãm kwarî ho kwarî. Anê.

⁵ Nhûm pre ã Jejus Satanasti mã kapêr anê nhûm tee ri kuma hãmri nê hpânâ ma nhÿhÿm o mô nê nhÿri kÿx pê mêmoj prêêti nhîmök ã o xa. Hãmri nê kãm pika piitâ ahkre ho xa. Nê kãm mê hikukrêx piitâ ahkre. Kâxpore nê mêmoj piitâ nhûm kãm ahkre hpa nhûm anhîpê omunh o xa.

⁶ Hãmri nhûm Satanasti kãm:

—E mân ka kam ri mêmoj mÿj piitâ omu. Piitâ inhô na. Inhmâ na pre Tîrtûm piitâ ôr pa. Kot paj inhmâ mêhō mā ôr prâm nê kãm kugō.

⁷ Tã amâ kot paj kugō. Jakamâ e. Kwa tokyx ixkutâ tēm nê inhmâ inhmex o inhmex ã ijarê pa ama nê ri amâ piitâ ôr pa. E tokyx. Anê.

⁸ Hãmri nhûm kuma nê kãm:

—Tk. Kot paj amâ amex o amex ã ajarênh kêt kumrêx. Âm kwarî ho kwarî. Amexti hã. Tîrtûm kapêr ã kagâ htûm kot ja nê kapêr kãm hihtÿx kênã. Kapêr kot:

Kêr ka mê ixkapêr pix ma. Nê ixkutâ pix mã mân akônkrã ho akrî nê inhmâ inhmex o inhmex ã ijarênh o ri apa. Kêr ka mê ã amnhî nhîpêx anhÿr o ri apa.

Anhÿr o kot harênh jakamâ kot paj ri amâ amex o amex ã ajarênh kêt nê Satanasti. Anê.

⁹ Nhûm pre ã Jejus amnhî nê kãm kapêr anê. Hãmri nhûm tee ri kuma nê hpânâ ma krî pê Jerujarê hwÿr o mô. Nê mê kot Tîrtûm mã amnhî jarênh xà hã ixkre hprêk nhîmök wÿr ho api nê kÿxpê hatur xà hã âm nhûm xa. Nhûm amnhî parpê kên rûnh nhîkwÿ pumunh o xa. Hãmri nhûm Satanasti kãm:

—E apê Tîrtûm Kra jakamâ kwa ja rûm ahpâr mã ajarî nê ma tê nê pikap tēm. Koja Anhîpêêxã apumunh mex nê ka tanhmâ amnhî to hkêt nê.

¹⁰⁻¹¹ Kapêr ã kagâ htûm kot ja jarênh kot:

Tîrtûm koja kapêr o wrÿk xwÿnh mã ajarê ka ajarî nê ahpâr mã tê nhûm mê kÿx pê amÿ nhûm mêmoj akã hyr kêt nê.

Ã kapêr ã kagâ kamã ajarênh kot anhÿr jakamã e tokyx ajarî nê ma tēn pikap ahto. Anê.

¹² Hãmri nhûm kuma nê kê axte amnhî tã kãm kapêr nê kãm:

—Tk. Kwa nã. Kot pa ri amar xà hkôt ã amnhî nhîpêx anhÿr kêt nê. Koja Tîrtûm tãm inhmâ ijarî hã karô pa rî mar xà hkôt ijarî no kot pa ri amar xà hkôt ijarî hkêt nê. Tîrtûm kapêr ã kagâ htûm kot ja jarênh kot: Kêr ka mê amnhî krã hkôt amnhî tã ixkamã ajamak kaxyw inhîxi jarênh kôt tanhmâ amnhî nhîpêx to hkêt nê.

Ã ja nê kapêr kot anhÿr jakamã âm kwarî ho kwarî. Kot paj ri amar xà hkôt ã amnhî nhîpêx anhÿr kêt nê. Tãm kot inhmâ ijarî hã karôre hã. Anê.

¹³ Nhûm pre ã Jejus Satanasti mã kapêr anê hãmri nhûm tee ri mêmoj piitâ ho mar kaprÿ hãmri nê hkaga nê ma nhÿhÿm tē. Hãmri nê kot nhÿrmã axte hwÿr htēm nê kot mêmoj punuj o mar kaxyw kormã amnhîm hamãr ri pa.

Jejus kot Tîrtûm kapêr o mê ahkre ho hkrax ã harênh

Matêwre 4.12-17; Makre 4.14-15

¹⁴ Tã nhûm Jejus ma akupÿm Garirej wÿr mô. Nê Tîrtûm Karô nhÿ hã àhpumunh tÿx nê hkwÿjê mã kapêr jarênh o ri pa. Nhûm mê kuma nê piitâ pikaja kamã axpên mã tanhmâ harênh to.

¹⁵ Na pre hte mê kot Tîrtûm kapêr o mê ahkre xà hã ixkre hwÿr agjê nê kamã mê ahkre ho hkrî. Nhûm mê piitâ kuma nê kãm mar prâm nê. Hãmri nê axpên mã mex ã harênh o ri pa.

Najare kamã mê kot Jejus kaga hã mê harênh

Matêwre 13.53-58; Makre 6.1-6; Juãw 1.11

¹⁶ Tã nhûm Jejus ma akupÿm krî kamã àptâr xàja wÿr ma mô. Najare hwÿr. Hãmri nê kamã pōj.

Nhûm Ijaew nhô arîgromnu pê sap kato nhûm Jejus ma mê hkôt Tîrtûm kapêr o mê ahkre xà hã ixkre hwÿr tē. Hãmri nê hwÿr axã nê mê kuri nhÿ. Hãmri nê kamã mê kãm Tîrtûm kapêr ã kagâ htûm kamã harênh kaxyw kãnhmã xa

¹⁷ nhûm mê omu nê kãm ja gō. Finat Ijais pê Tîrtûm nhÿ hã kapêr xwÿnh kot Tîrtûm kapêr kwÿ hã kagãja nhûm mê kãm kugō. Hãmri nhûm kupy nê kamã kormã Tîrtûm kot tanhmã mêmoj jarênh to hō japêr o xa. Nê kãm kato hãmri nê mê kãm kamã harê. Nom amnhî tã kamã mê kãm harênh o xa nê mê kãm:

¹⁸ Na pre ra Tîrtûm Karôja ixto ixàhpumunh tÿx nê mê kêp amrakati xwÿnhjê hwÿr inhmê pa ra mô. Ixte mê kãm mêmoj mex jarênh o ixpa kaxyw. Nê Satanasti kot amnhî kôt mê unhwÿr

xwýnhjê hwýr nhùm pre mãânên inhmê. Ixte mê nê Satanasti japôx o ixa kaxyw. Nê mê kot hprî hã Tirtùm kapêr mar kêt xwýnhjê hwýr nhùm pre mãânên inhmê. Ixpri hã ixte mê kãm kapêr jarênh o ri mê hkôt ixa kaxyw. Nê mê kot amnhî tomnuj o mê pa xwýnhjê hwýr nhùm pre mãânên inhmê. Ixte mê nê mê kot amnhî tomnuj rênh pa nhùm mê hamakêtkati nê àmnhîx ri pa kaxyw. Á na pre Tirtùm jajê piitã hwýr inhmênh anê pa ra man môn pój.

19 Nê amgrã ja kêp Tirtùm kot mê ato mex xã hã amgrãja nhùm ixte mê amã harênh o ixa kaxyw na pre inhmê pa môn pój. Anê.

20 Nhùm pre ã Jejus Tirtùm kapêr ã kagã htùm kamã mé kãm amnhî jarênh anê. Hãmri nê akupým mê kãm kagãja gô nê ho mê ahkre kaxyw akupým nhý nhùm mê pitã omunh pê mar o hkrî.

21 Hãmri nhùm mê kãm tanhmã amnhî jarênh to nê mê kãm:

—E ra Ijais kot ã ixkukamã ijarênh anhýr xã hkôt na pa mê awýr wrý nê mê anoo mã ã amnhî nhîpêx anhýr o hkrax. Anê.

22 Hãmri nhùm mê amnhî jaêr pê ã kot amnhî jarênh anhýr ã kuma. Nê tee ri kuma nê axpên pumunh pê hamaxpêr o hkrî. Jejus mê kurom àhpumunh týx nê kapêr mex tã nhùm mê ãm kêp amnhî kwý pix ã hkamnhîx kãm hihtýx nê. Hãmri nê axpên mã:

—Tk. Kwa kêp Juje hkra pix kênã koja we ri ã amnhî jarênh anê. Anê.

23 Hãmri nhùm amnhî tã mê kuma nê mê kãm:

—Nã na ka mê ixte amnhî jarênh ma nom ixkôt ajamaxpêr kêt nê. Jakamã axpên mã ijarênh o: “Tk. Kêp mê pahkaprî xwýnh ro nhýx jar mê panhõ krî kamã aa mê pahte mêmoj pumunh kêt kwý tanhmã mê pamã hipêx to pu mê hã omu. Te ra kot krî pê Kapanau kamã mê kãm mêmoj kwý ho anhýrta pyrãk. Pu mê omu nê hkôt pajamaxpêr kure kumrêx.” Anhýr o ri axpên mã ijarê.

24 Koja nhãm krî hõ kamã mēhõ kêp Tirtùm kapêr jarênh xwýnh ã amnhî jarê ka mê harênh ma nê amã ma hwýr amrar nê mar prãm nê. No kêt jar mê panhõ krî kamã ixpê mê anhîõ hã ã amnhî jarênh anê ka mê amã inhmar prãm kêt nê.

25 —Kwa mê inhma. Amnepê mormã finat Eris htîr ri na pre mê hã na wrýk kêt ry rax nê. Jao hã amgrã axkrunêpxi nê hkôt mytwrý pê 6. Nhùm mê õ hkêt nê pa. Ra mê kêp mêmoj grã pa nê hapêx nhùm mê kãm prãm týx kumrêx nê pa. Nhùm mê kêp mê mjên tyk xwýnhjaja kãm prãm xãj hiroto o pa.

26 Tã nom Tirtùm mê ho mex kaxyw mê hwýr Eris mēnh kêt nê. Erisja mê urãk nê kêp Ijaew tã nhùm Tirtùm kot mê ho ajuta kaxyw mê hwýr mēnh kêt nê. Mê kot amnhî kaxyw Tirtùm kôt hamaxpêr kêt jakamã nhùm mê hwýr mēnh kêt nê. Axtem Ijaew kêt xwýnhjê hõ hwýr na pre kumê. Nhãm Sitõ kamã krî pê Sarep kamã mjên htyk xwýnhta wýr. Tokyx kot tanhmã ho mex to kaxyw. Jakamã nhùm ma hwýr mō nê tanhmã kãm kapêr to nhùm kuma nê amnhî kaxyw Tirtùm kôt hamaxpêr kure kumrêx.

27 —Nê finat Eriasti haxwýja. Eris pyrã nê kêp Tirtùm nhý hã kapêr o pa xwýnh tã amnhî kwý pê Ijaew tanhmã mê ho ajuta hto hkêt nê. Na prem ohtõ nê hkã nhy nê hkro xãpêr o pa. Jao ra omnuj týx nê. Tã nhùm Tirtùm kot akupým mê ho mex kaxyw mê hwýr Eriasti mēnh kêt nê. Amnhî kaxyw mê kot hkôt hamaxpêre hã. Ám Sir nhõ xwýnh Namãja pix na pre Tirtùm Eriasti mã anê nhùm akupým ho mex. Kêp Ijaew kêt tã nhùm akupým ho mex. Tã ja pyrã nê na pa ãm mê kot amnhî kaxyw ixkôt hamaxpêr pix xwýnhjê mã tanhmã amnhî nhîpêx to ho ri ixa. No mê ate amnhî kaxyw ixkôt ajamaxpêr kêt xwýnhjê mã tanhmã ri amnhî nhîpêx to hkêt nê. Anê.

Nhùm pre ã Jejus mê kãm amnhî jarênh anê.

28 Hãmri nhùm mê kuma nê kamã gryk týx nê axpên mã hã amýné nê axpên mã:

—Tk. Kwa pu mê ixkre nê kator nê ma o tē nê kupî ri. Anê.

29 Hãmri nê kaxyw kãnhmã kuhê hpa nê hwýr hprôt nê unê. Mê kot ma o htēm nê hixêt prêk jatur xã hã hkujãek nhùm ahpãr mã tēn htēm nē htyk kaxyw. Mê õ kríja hixêt prêk nhîmök ã na pre. Jakamã nhùm prem unê nê hatur xãta wýr o tē.

30 Tã nom nhùm tanhmã amnhî nhîpêx to nê mê kêp akunok nê hpãnhã nhãm ma tē nhùm mê tee ri hapêr nom nhýri omunh kêt nê.

Jejus kot mēhõ nê mēkarōmnuti kator ã harênh

Makre 1.21-28

31 Tã nhùm Jejus ma akupým Garirej kamã krî pê Kapanau hwýr mō. Nhùm mê õ arîgromnu pê sap kato nhùm ma mê kot Tirtùm kapêr o mê ahkre xã hã ixkre hwýr tē nê mê ahkre ho nhý.

32 Hãmri nhùm mê kot mar o hkrî xwýnhjaja kuma nê kãm mar prãm nê. Nê axpên mã:

—Héxta waa nê. Ám hãmri na ã mê pamã kapêr anê. Àhpumunh týx xã hkôt na hte ãm hãmri mê pamã awjarê. Anê.

33 Nhùm mēhõ myja mê ìhkõ hã haxwýja mar o nhý. Mēkarōmnuti na pre ra hwýr

axà nhũm ý hã tanhmã amnhĩ tomnuj to ho pa. Hãmri nê mê ĩhkô hã Jejus mar o nhỹ nê ra àmra kamã tanhmã kãm kapêr to. Nom nhũm tãm kãm kapêr kêt àm kamã mēkarōmnutija kãm kapêr.

³⁴ Nê kãm:

—Pa? Jejus pē Najare nhō xwýnh? Nà ate mê ixto ajapêx par kaxyw na ka mê ixwýr mō. Ra ixte apumunh mex kênã. Apê Tirtũm kot mê ixwýr amēnh xwýnh maatita na ka. Jakamã kwa tanhmã kot kaj mê ixto? Mo kaxyw na ka pre mê ixwýr mō? Anê.

³⁵ Hãmri nhũm kuma nê mēkarōmnuti kot kãm ā kapêr anhýr ā omunh kurē kumrêx. Jakamã kutã kãm kapêr nê kãm:

—Tk. Kwa anhĩkrê nê kēp akato. Anê.

Hãmri nhũm kuma nê myta o pika kura nê kēp kato nê ma tē. Ām ho pika kuranh pix nhũm nō. Hãmri nê akupým kãnhmã nhỹ nê akupým mex.

³⁶ Hãmri nhũm mê piitã omu nê kamã no pyma nê. Hãmri nê axpēn mã:

—Kokýy. Na hte Jejus amnhĩ krã hkôt àhpumunh tỳx xã hkôt mēkarōmnuti mã kapêr nê mê hano nhũm htem kuma nê mê kēp hapôx kurē kumrêx. Anê.

³⁷ Hãmri nhũm mê mēō pika kamã piitã ri axpēn mã harēnh o pa.

Jejus kot Simãw Pêtre xupãnhgêx o mex ã harēnh

Matêwre 8.14-15; Makre 1.29-31

³⁸ Tã nhũm Jejus Tirtũm kapêr o mê ahkre xãja rúm kato nê ma Simãw Pêtre nhōrkwý hwýr tē. Nê mê hwýr axà nhũm Simãw Pêtre omu nê kãm upãnhgêx tanhmã kute hã harē nê kãm:

—Kwa Pahihti. Tē nê inhmã ixupãnhgêx pumu. Na hkã kagro htỳx nê amnhĩ to àpêr o nō. Kwa tēn inhmã omu. Anê.

Hãmri nhũm kãm:

—Tôe. Nà kot paj amã omu. Anê.

³⁹ Hãmri nê hwýr tēn kuri xa nê kãm:

—Pa? E kwa akã hakry. Anê.

Hãmri nhũm kuma nê hkã hakry nê akupým hihtỳx kurē kumrêx. Hãmri nê kãnhmã nhỹ nê mê kãm mēō hã àpēnh o ri mra.

Jejus kot mê ho ohtō nê mê ho mex ã harēnh

Matêwre 8.16-17; Makre 1.32-34

⁴⁰ Tã nhũm ra amýkry htỳx mê nhũm mê Jejus wýr ahpýnhã ri mê à xwýnhjê ho mra. Nhũm amnhĩ wýr mê omu hãmri nê mê piitã ri mê hã ĩlkra jaxwý nê akupým mê ho mex pa.

⁴¹ Nhũm ra mēkarōmnuti mê hkwyjê hwýr agjê nhũm mê kurũm mê hano nhũm mê tee ri amnhĩ tã omu nê mê kēp hapôx kurē kumrêx. Hãmri nê mê kēp hapôx kaxyw nê àmra kamã kãm kapêr nê kãm:

—Kwa tanhmã kot pa wem amnhĩ nê ato? Hêxta waa nê. Apê Tirtũm Kra hã axãhpumunh tỳx kênã.

Anhýr o kãm kapêr. Ām hãmri na prem ā harēnh anê. Kēp Tirtũm kot mê pakaxyw ām xwýnh kênã. No nhũm Ijaew nhō pahijaja kot mê kapêr mar nê kēp mēkarōmnuti hkwy hã hkamnhĩx pymaj nhũm Jejus amnhĩ nê mê kãm kapêr nê mê kãm:

—Kwa mê ri ā ijarēnh anhýr kêt nê.

Anhýr o mê kãm kapêr hãmri nê mê hano nhũm mê hapôj nê ma mra.

Mêmo kaxyw Tirtũm kot mê pahwýr Jejus mēnh ã harēnh

Makre 1.35-39

⁴² Tã nhũm apkati nê myt kator grire nhũm Jejus kot Tirtũm mã amnhĩ jarēnh kaxyw kãnhmã nhỹ nê kato nê ma nhỹhým kapôt mã tē. Hãmri nhũm krĩ nhō xwýnhjaja hkrã hapôj nê tee ri hapêr nê ma hkôt hpri jakop o mō. Nê nhýri hwýr kato nê omu hãmri nê ma nhỹhým mōr nê kurē nê kãm:

—Kwa Jejus. Kêr ka tokyx ma nhỹhým amōr kêt nê. Kripêm mê ixkôt axkamê mãn. Anê.

⁴³ Hãmri nhũm mê kuma nê amnhĩ tã mê kãm:

—Nà kot paj kripêm mê akôt ixpikamēnh kêt nê. Kot paj ma krĩ piitã hkôt ri Tirtũm kapêr o mê ahkre ho ri mê hkôt ixpa. Tirtũm kot tanhmã mê ho hkra hto hã harēnhja kot paj mê hkôt ri mê kãm harēnh o ri ixpa. Ja kaxyw na pre Tirtũm mê awýr inhmê. Anê.

⁴⁴ Nhũm pre ã mê kãm amnhĩ jarēnh anê. Hãmri nê mê kēp kato nê ma Ijaew nhō pika piitã hkôt Tirtũm kapêr o mê ahkre ho ri pa. Ijaew nhō Tirtũm kapêr o mê ahkre xã hã ixkre kamã mê piitã ho mê ahkre ho ri pa.

5

Jejus kot amnhĩ kôt mê hkwyjê hwýr ã harēnh

Matêwre 4.18-22; Makre 1.16-20

¹ Tã nhũm Jejus ma gō rax pē Jenêjare hwýr mō. Hãmri nê hwýr pōj nê gō mýri Tirtũm kapêr o mê ahkre ho xa nhũm mê ohtō nê pu hã mar o kuhê. Nê kot hpri hã mar nê hkôt omunh kaxyw hã axpēn nhĩgãnh o kuhê.

² Hãmri nhũm tee ri amnhĩ tã mê omu nê amnhĩ pu hã hakēx nê rít nê gōx kãm pãr kaprý hamēxkrut nê jêta wa omu. Nhũm ò đôn wa gōx kãm kryhti kuhõnh o xa. Nhũm pãr hamê hkaprý nê ajêt nhũm Jejus omu.

³ Hãmri nê hwýr tē nê hõm axà nê ò đôn pē Simãwja mã anê nhũm hkôt axà nê kii mê kēp pãrja amým kunhō nhũm ajêt. Hãmri nhũm pãr kre rúm amým mê ahkre ho nhỹ nhũm mê piitã omu nê mar mex o kuhê.

⁴ Tã nhũm mê ahkre hpa nê Simãw mã kãm:

–E gô xupÿm wÿr anhõ pâr o axkamê nê axte anhõ kryhti mē nē ho amnhîm tep kwÿmnê. Anê.

⁵ Hâmri nhûm tee ri kuma nê kâm:

–Kwa na pa mē ra kamât kâm tee rēnh o apkati nē ho hõmnēnh kêt tâ ka ri inhmâ anê. Nom kot paj amar xâ hkôt kop kumê. Anê.

⁶ Hâmri nê upÿm wÿr pâr o axkamê nê htõ Andre mē wa axte kryhti mē. Nê âm mēnh tipxi htâ ho tep pynēnh rax kumrêx. Jakamâ nhûm kryhtija ra pikaxõnh kaxyw.

⁷ Hâmri nhûm wa tee ri ho anê nê amnhî wÿr pâr ô ho mrar xwÿnhhta wa kâm akir. Jepetew kra Juâw mē Xiakreja wa nhûm wa amnhî wÿr wa kâm akir nhûm wa hwÿr pâr ô ho tē hâmri nê mē kryhti hâ hije nê pâr wÿr ho api. Hâmri nê pârta hamê tep o ho nyt pa nê hamê ho hipu mex nê. Jao nhÿx gõnh mâ wa axâ.

⁸⁻¹⁰ Hâmri nhûm mē amnhî jaêr pê tep xohtõ raxta pumu nê kamâ no puma nê. Hâmri nhûm Simâwja Jejus kutâ hkõn krâ ho tēm nê hipõ nê nhÿ nê hâ hpijaam kamâ kâm kapêr nê kâm:

–Kwa Pahihti. Kii tamû axkamê. Akînhâ ixte amnhî tomnuj tÿx xwÿnh na pa. Anê.

Hâmri nhûm kuma nê âm kuma nê kâm:

–Kwa nâ tee ri amnhî kukamâ ajamaxpêr kêt nê. Kot kaj jarâhâ hpânâ tãm amnhî nhîpêx o apa. Na ka ra tep pynēnh rûnh o apa. Tâ kot kaj ja kaga nê hpânâ ma ri mē hkôt Tirtûm kapêr o mē ahkre ho ri apa. Koja mē ohtõ nê ama nê Tirtûm kôt amnhî xunhwÿ nê hkôt amnhî nhîpêx o pa. Jakamâ kot kaj te ate tep pynēnh rûnh nê Tirtûm mâ ôr pyrâk o amnhî nhîpêx o apa. Anê.

Nhûm pre â Jejus Simâw mâ kapêr anê.

¹¹ Hâmri nhûm mē gô jakâx â pâr janhôr tÿx nê kamâ hikukrêx piitâ hkaga hpa nê ma Jejus kôt pa ho pa.

Jejus kot hkâ nhy kro tÿx xwÿnh o mex â harēnh

Matêwre 8.1-4; Makre 1.40-45

¹² Tâ nhûm Jejus ma krî hõ hwÿr mō. Hâmri nhûm mēhõ my hkâ nhy hkro htÿx xwÿnhja omu nê hwÿr tē nê hâ hpijaam kaxyw kutâ hkõnkrâ ho nhÿ nê kâm:

–Pa Pahihti. E ot pa awÿr amnhî to tē. Kwa akupÿm ate mē ixto mex kaxyw axâhpumunh tÿx jakamâ kot ka akupÿm amâ ixto mex prâm nê māmri akupÿm ixto mex. Anê.

¹³ Hâmri nhûm kuma nê hkâ punuti hâ îhka xi. Amnhî kamâ kahak kêt nê hâ îhka xi nê kâm:

–Nâ kot paj ato mex. E akupÿm akâ mex kurê kumrêx.

Anhÿrja kôt hâmri nhûm hkâja akupÿm mex pa.

¹⁴ Hâmri nhûm Jejus kâm:

–E kêr ka amnhî tâ akwÿjê mâ tanhmâ ijarēnh to hkêt rāhâ ma patre hwÿr tē kê akupÿm akâ mex â apumu. Hâmri ka amnepēm Mojes kot mē ate akupÿm amex â Tirtûm mâ tanhmâ amnhî nhîpêx to hâ karõta ka kâm ho anê. Kê mē mē piitâ akupÿm akâ mex â apumu. Anê.

Hâmri nhûm kuma nê kâm:

–Tõe. Nâ kot paj anê. Anê.

Hâmri nê ma hwÿr htēm kurê kumrêx.

¹⁵ Hâmri nhûm mē piitâ axpēn mâ Jejus jarēnh o ri hprõt nhûm mē kot kapêr mar kaxyw ma hwÿr mra. Nê mē â xwÿnhja nhûm kot mē ho mex kaxyw nhûm mē hwÿr amnhî to mra.

¹⁶ Jakamâ nhûm pre hte Jejus tōhâ mē kēp hapõj nê ahte ma kapõt â Tirtûm mâ amnhî jarēnh kaxyw mra. Nê kâm amnhî jarēnh pa hâmri nê ma akupÿm mē hwÿr mra.

Jejus kot î kamâ htyk xwÿnh o mex â harēnh

Matêwre 9.1-8; Makre 2.1-12; Juâw 10.37-38

¹⁷ Tâ nhûm Jejus ma Tirtûm kapêr o Ijaew jahkre ho pa. Jakamâ nhÿri mēhõ nhõrkwÿ kamâ ho mē ahkre ho xa nhûm Parijew nhõ xwÿnhjê mē Tirtûm kapêr tûm o mē ahkre ho mē pa xwÿnhja kot mar kaxyw ma hwÿr mra. Na pre ra Garirej rûm mē hkwÿjaja ma hwÿr mra. Nê pika pê Jutej rûm mē hkwy haxwÿja ma hwÿr mra. Nê krî pê Jerujarê rûm. Á na prem ohtõ nê krî piitâ kurûm kot mar kaxyw hwÿr akuprõ nhûm mē ahkre anê. Nê Tirtûm kot ho âhpumunh tÿx jakamâ nhûm ÿ hâ akupÿm mē â xwÿnhjê ho mex.

¹⁸ Hâmri nhûm hkwÿjaja î kamâ htyk xwÿnh mÿ nê Jejus wÿr o tē. Nõr xâ kamâ nõr rāhâ nhûm mē hâ hije nê hwÿr o tē. Hâmri nê tee ri kot hwÿr ho âr kaxyw ri mē hkupu ho pa.

¹⁹ Nom nhûm mē ra ixkre ho nyt rax jakamâ nhûm mē tee ri amnhî kukamâ ho ukapi ho ri pa. Hâmri nê ra hamaxpêr nê ixkre nhîmõk po hwÿr ho api nê ixkre nhîmõk kwÿ grâ nê hkôt î kamâ htyk xwÿnhhtajaxâ. Nõr xâ kamâ nõr rāhâ Jejus wÿr haxâ nê mē hipõk ri ho wrÿ nê kutâ kuxi nhûm nõ.

²⁰ Hâmri nhûm Jejus amnhî tâ mē kot kaxyw kâm hamaxpêr tÿx â mē omunh mex nê. Hâmri nê î kamâ htyk xwÿnhhta mâ kapêr nê kâm:

–Pa? E na pa ra anê tanhmâ ate amnhî tomnuj to ho apaja o ijaepêx pa. Kot paj axte kâm ijamaxpêr kêt nê. Anê.

²¹ Hâmri nhûm Parijew nhõ xwÿnhjê mē Tirtûm kapêr tûm o mē ahkre ho mē pa xwÿnhja tee ri kot â kâm kapêr anhÿrja â kuma nê axpēn mâ:

—Tk. Kwa kēp Tirtūm kēt tā te ri kot amnhī nhīpēx pyrāk o ri mē nē mē kot amnhī tomnuj o hapēx ā amnhī jarēnh o kuhē. Tirtūm pix na kot mē nē mē kot amnhī tomnuj o hapēx xwýnh kēnā. Anē.

²² Nhūm mē ā axpēn mā Jejus jarēnh anē nhūm amnhī tā mē kuma nē mē hamaxpēr kōt mē omunh mex nē. Jakamā mē kām:

—Kwa mē ā ajamaxpēr anhýr kēt nē.

²³ Ixte mē nē mē kot amnhī tomnuj o ijapēx par ā amnhī jarēnh tā mē ate ja kōt ixpumunh kēt jakamā na ka mē ixkōt ajamaxpēr kēt nē. Nom kot paj mē anoo mā akupým ī kamā htyk xwýnhata o mex ka mē apiitā ja hā ixpumu hāmri nē ixkōt ajamaxpēr kurē kumrēx.

²⁴ Ixpē Tirtūm kot mē awýr inhmēnh xwýnhata na pa. Ixte mē anē mē ate amnhī tomnuj rēnh kaxyw na pre mē awýr inhmē pa mē awýr wrý. Tā mē ate ja kōt ixpumunh kaxyw kot paj mē anoo mā myja o mex. Anē.

Hāmri nē hpānhā ī kamā htyk xwýnhja mā kapēr nē kām:

—E kánh mā xa nē anōr xā py nē ma akupým anhōrkwý hwýr tē. Anē.

²⁵ Nhūm kánh mā ām kurē kumrēx. Hāmri nē amnhī pumu nē hkīnh týx nē nōr xā py nē mē noo mā kato nē akupým ōrkwý hwýr ma Tirtūm mā mex o mex ā harēnh o tē.

²⁶ Hāmri nhūm mē amnhī jaēr pē omu. Nē no hapōx kaxyw hkōt omunh o kuhē nē kamā no py ma nē. Nē tee ri omu hāmri nē axpēn mā:

—Kokýý. Aa mē pahte ā mēhō kot amnhī nhīpēx anhýr ā omunh kēt tā na pu mē jarāhā ja pumu. Anē.

Hāmri nē Tirtūm mā mex o mex ā harēnh o kuhē.

Jejus kot amnhī kōt Rewi hwýr ā harēnh Matēwre 9.9-13; Makre 2.15-17; Rukre 15.1-2

²⁷ Tā nhūm Jejus ma hkōt mē pa ho mē pa xwýnhjē mērohā ma nhýhým mō. Hāmri nē nhýri Rewi pumu. Rewi nhíxi hō pē na Matēwre. Rōm kām mē ō pahihti mā amnhī kwýjē pē kàxpore hkwy jamýnh xwýnh na pre. Jakamā nhūm ujamýnh xā hā ixkre kamā mē kēp hkwy jamýnh o nhý nhūm Jejus mē hkōt mē pa o mē pa xwýnhjaja hānh mra. Hāmri nhūm Jejus āpēnh ā omu nē amnhī kōt kuwý nē kām:

—Pa? E kwa axāpēnhata kaga nē hpānhā amnē mē ixkōt mán tē. Nē ixkōt mán ri apa ho apa. Anē.

²⁸ Hāmri nhūm kuma nē āpēnh kaga hpa nē ma hkōt mō nē hkōt pa ho pa.

²⁹ Hāmri nhūm mēmo arīgro hā nhūm Rewi nhō mē apkur xā hā mēo rax nē. Jakamā nhūm amnhī nhōrkwý hwýr hkrāmnhwýjaja nē Jejus mē hkōt mē pa ho mē pa xwýnhjē hwý. Mē kot kutā apkur kaxyw nhūm

amnhī kōt mē kuwý nhūm mē ma hkōt mra nē ōrkwý hwýr agjē nē apkur o hkrī. Nē mē kēp Rōm nhō pahī mā mē kēp kàxpore hkwy jamýnh xwýnh kwýjaja nē mē ohtō nē hwýr akuprō nē axpēn kutā apkur o hkrī.

³⁰ Hāmri nhūm Parijew nhō xwýnhjē mē Tirtūm kapēr tūm o mē ahkre ho mē pa xwýnh kwýjaja mra nē mē apkur ā mē omu nē tee ri mē hkaēx ā Jejus pumu hāmri nē Jejus kōt mē pa ho mē pa xwýnhjē hwýr agjē nē hā mē kām akir nē mē kām:

—Kwa mē kot amnhī tomnuj ho mē pa xwýnhjē kutā mē apkur kēt tā ka mē apytār xwýnhjē mē apimrāātā axtem nē mē kutā axāpkur o akrī. Kwa mē ate amnhī to mex ronhýx ka mē kutā axāpkur kēt nē. Anē.

³¹ Hāmri nhūm Jejus amnhī tā mē kapēr ā mē kuma nē mē kām:

—Tk. Nā ixte tām mē unhwýr kaxyw na pa mē kutā ixāpkur o nhý. Xā na hte tōtōja mē mex xwýnhjē hwýr mra nē mē hkanē? Nā ām mē ā xwýnhjē pix wýr na htem mra. Ra mē ate ja pumunh mex kēnā. Ja pyra nē na pa pre mē kot amnhī to mex xwýnhjē hwýr ixwrýk kēt nē. Mē kot amnhī tomnuj xwýnhjē pix wýr na pa pre wrý. Ixte tām mē unhwýr kaxyw na pa pre mē hwýr wrý nē ā jajē kutā ixāpkur o inhýr anē.

³² ām mē kot amnhī tomnuj xwýnhjē hwýr na pa pre wrý nē mē kamā ixukaprī ho ri ixpa. Mē kot amnhī tomnuj mā urer nē hpānhā tām amnhī nhīpēx o pa kaxyw na pa pre mē hwýr wrý. Tā ka mē atýx ā ri mē ixto akapēr anē. Anē.

Mē hpāmja kot amnhī nhīpēx gryk ā Jejus kaga hā mē harēnh Matēwre 9.14-17; Makre 2.18-22

³³ Tā nhūm Ijaew kwýjaja Jejus wýr mra nē kām:

—Pa? E ot pa mē awýr mra. Kwa aprī hā mē inhmā mēmoj jarē. Na hte Parijew nhō xwýnhjē mē Juāw kōt mē pa xwýnhjaja tōhā Tirtūm mā amnhī jarēnh kaxyw nē apkur kēt rāhā kām amnhī jarē. No akōt mē pa ho mē pa xwýnhjaja na htem āmnhix apkur o pa kamā kām amnhī jarē. Kwa mo na htem mē urāk nē tōhā apkur kēt ri kām amnhī jarēnh hkēt nē? Anē.

³⁴ Hāmri nhūm mē kuma nē mē kām:

—Tk. Nā mo kaxyw koja mē apkur kēt rāhā kām amnhī jarē? Mē hkaprī hkēt kēnā. Mē kot ixkōt pa ho pa hā amnhī pumunh jakamā hkīnh nē pa. Kormā ixte mē kamā ixpa kēnā kot kēt mē Tirtūm mā amnhī jarēnh kaxyw nē apkur kēt rāhā kām amnhī jarē. Xā na htem hkrāmnhwý hā hkīnh kaxyw hā akuprō nē hkaprī nē apkur kēt nē mýr o hkrī? Na htem hā akuprō nē hkīnh nē hā apkur rūnh nē. Ja pyra nē na hte ixkōt mē pa ho mē pa xwýnhjaja ixkōt kormā āmnhix ri hkīnh nē apkati mē apkur o pa.

³⁵ Nom koja mẽ kãm ixkurê xwýnhjaja nhýrmã tanhmã ixto hãmri nhùm mẽ ri kormã ixtã hkaprĩ htýx kãm apkur kêt ri tanhmã amnhĩ nhĩpêx to. Anê.

³⁶ Nhùm pre ã Jejus mẽ kãm hkôt ri mẽ pa ho mẽ pa xwýnhjê jarênh anê hãmri mẽ mẽ kãm:

—Nà mẽ kot amnhĩ tomnuj xwýnhjaja mẽ kot amnhĩ nhĩpêx tùm o amnhĩ pyrãk jakamã na htem mẽ kot amnhĩ nhĩpêx nyw kaga.

³⁷⁻³⁹ Ixte amnhĩ nhĩpêx nywja te kot mẽ ate amnhĩ nhĩpêx tùm pyrãk kêt jakamã ka htem inhma mẽ ãm inhma. Kwa mẽ ixkapêr ma mẽ mẽ ate amnhĩ nhĩpêx tùm gryk ã ixkaga hkêt mẽ. Anê.

6

*Jejus kêp arĩgromnu hpãm ã harênh
Matêwre 12.1-8; Makre 2.23-28*

¹ Tã nhùm Ijaew nhõ arĩgromnu pê sapja axte kato. Hãmri nhùm Jejus mẽ hkôt ri mẽ pa ho mẽ pa xwýnhjê mẽ ma mẽ hpur kôt ri nhýhým ri pa. Hãmri nhùm hkôt mẽ pa ho mẽ pa xwýnhjaja ra kãm prãm mẽ mra hãmri mẽ prãm xãj mẽmo hy te kot harõj pyrãk xwýnhta kwý rê mẽ kugrà mẽ ma Jejus kôt hkanhar o mẽ. Ijaew kot amnhĩ nhĩpêx xã hkôt.

² Hãmri nhùm Parijew nhõ xwýnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhýr ã mẽ omu mẽ mẽ hã Jejus kuljêr kurê kumrêx mẽ kãm:

—Kwa Tirtùm kapêr tùm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh mẽ mẽ pahkurê htã nhùm ri akôt mẽ pa ho mẽ pa xwýnhjaja axtem mẽ mẽmo hyta kwý rê mẽ akôt hkanhar o mẽ. Kwa mẽ kãm anê kêt mẽ ã amnhĩ nhĩpêx anhýr kêt mẽ. Na htem arĩgromnu hã ã amnhĩ nhĩpêx anhýr kêt mẽ. Anê.

³⁻⁴ Hãmri nhùm Jejus mẽ kuma mẽ hprĩ hã mẽ mẽ kãm Tirtùm kapêr tùm jarê mẽ mẽ kãm:

—Kwa xã na ka mẽ Tirtùm kapêr ã kagã htùm kamã pahi Tawi kot tanhmã amnhĩ nhĩpêx tota kamã harênh mẽ mar kêt mẽ? Na pre Tawija hkôt ri mẽ pa xwýnhjê mẽ nhùm mẽ prãm xãj Tirtùm mã amnhĩ jarênh xã hã ixkre wýr agjê nhùm patre maatija mẽ kãm prãm týx ã mẽ omu mẽ mẽ kãm mẽmoj gõ. Mẽ kot Tirtùm noo mã pãwti jaxwýr xwýnhta nhùm mẽ kãm kugõ nhùm mẽ kuku. Tirtùm kapêr ã kagã htùm kot ja mẽ mẽ kurê htã nhùm mẽ kãm prãm týx ã mẽ omu mẽ mẽ kamã ukaprĩ xãj mẽ kãm kugõ. Patre pix kot ja kur kaxyw tã nhùm mẽ kãm kugõ nhùm mẽ kuku. Tã nhùm Tirtùm ja hã mẽ omu nhùm ja kêp omnuj kêt mẽ. Kot mẽ kamã ukaprĩ mẽ mẽ kãm õr nhùm mẽ hã omu nhùm ja kãm mex mẽ.

⁵ Tã pa na pre Tirtùm mẽ akaxyw ixãm mẽ mẽ awýr inhmênh jakamã papxpix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Ixpê arĩgromnu hpãm na pa. Anê.

*Jejus kot ìhkra grã xwýnh o mex ã harênh
Matêwre 12.9-14; Makre 3.1-6*

⁶ Tã nhùm Ijaew nhõ arĩgromnu pê sapja axte kato. Hãmri nhùm Jejus Tirtùm kapêr o mẽ ahkre xã hã ixkre hwýr tẽ mẽ axã mẽ Tirtùm kapêr o mẽ ahkre ho nhý. Nhùm mẽhõ myja upõk rùm ìhkra grã xwýnhja mẽ ìhkõ hã mar o nhý.

⁷ Nhùm Parijew nhõ xwýnhjê mẽ Tirtùm kapêr tùm o mẽ ahkre ho mẽ pa xwýnhjaja mẽ kãm mẽ hkrãhtũmjê mã Jejus o kapêr prãm xãj htãnopxar o kuhê. Nê ìhkra grã xwýnhta pumu mẽ hã axpên mã:

—Kwa pu mẽ jar pakuhê mẽ Jejus tanhmã kot amnhĩ nhĩpêx to hã omu. Xã koja jarãhã mũjti ho mex nã? Jarãhã arĩgromnu kênã kot kêt kãm ìhkra ho mex. Koja anê mẽ Tirtùm kapêr kwým ri amnhĩ nhĩpêx. E pu mẽ kop pakuhê mẽ hã omu. Anê.

⁸ Nhùm Jejus ra kot mẽ hamaxpêr kôt mẽ omunh mex jakamã amnhĩ wýr myta mã hpa ho apê mẽ kãm:

—Pa? E kãnhmã xa mẽ amnê ixwýr tẽ. Anê.

Hãmri nhùm kuma mẽ kãnhmã xa mẽ hwýr tẽ.

⁹ Hãmri nhùm Jejus amnhĩ pu hã ri mẽ ho hakêx mẽ mẽ kot mar o hkrĩ xwýnhjê pumu mẽ mẽ kãm:

—E mẽ inhmã mẽmoj jarê. Tanhmã na htem arĩgromnu hã axpên nhĩpêx to ho pa wehe? Xã kot ka arĩgromnu hã axã htýx mẽ nõ hãmri mẽ amnhĩ mex prãm xãj ma mẽhõ hwýr amnhĩ to tẽ. Hãmri nhùm ãm apumu mẽ apkatim arĩgro mex jamãr mẽ akane hkêt ka ty nhùm ja amã mex mẽ nã? Rý nhùm tanhmã atomnuj to mẽ akupým amnhĩ mẽ ajano nhùm ja amã mex mẽ nã? Nã koja ã anhĩpêx anê nhùm ja amã mex kêt mẽ. Na ka htem ã amnhĩ nhĩpêx anhýr o apa hkêt mẽ. E mẽ inhmã mẽmoj jarê. Tanhmã na pre finat Mojesja Tirtùm nhý hã mẽ pamã arĩgromnu hã mẽ pahte axpên nhĩpêx ã karõ hto? Xã kot puj mẽ axpên kãm paxukaprĩ ho papa nã? Kot puj mẽ pamã axpên kurê ho papa? Xã kot puj mẽ hã mẽmoj punuj mẽ axpên pyta nã? Xã kot puj mẽ hã axpên pytar pymaj arĩgro mex jamã? E mẽ atõ inhmã ja jarê. Anê.

Nhùm pre ã mẽ hkukjêr anê.

¹⁰ Mẽ hamaxpêr ã mẽ omunh mex pê ã mẽ hkukjêr anhýr o ma. Nom nhùm arĩ mẽhõ tanhmã kutã kãm mẽ hkêt mẽ. ãm akryk mar pê omunh o hkrĩ. Mẽ kot tanhmã kãm mẽ nhùm ta pãnhã tanhmã kot mẽ kãm mẽ pymaj nhùm mẽ tee ri kãm tanhmã mẽ

hprām nom akryk mar o hkrī. Hāmri nhūm Jejus tee ri mē omu hāmri nē myta mā kām:
 –Tk. Mē kot tanhmā inhmā kapēr tore hā.
 E anhīhkra katāt. Anē.

Hāmri nhūm ihkra katāt nē akupŷm mex kurē kumrēx.

¹¹ Hāmri nhūm mē kām Jejus kurē xwŷnhjaja tee ri ja hā omu nē kamā gryk tŷx nē. Arīgromnu hā kot ho mex jakamā nhūm mē kamā gryk tŷx nē. Nē hā axpēn kukjēr o kuhē nē axpēn mā:

–Kwa ā kot amnhī nhīpēx anhŷr mŷrapē tanhmā kot puj wem ho? Na ā kapēr anhŷrja o tanhmā mē pahto kapēr punuj to. Te mē papamjaja mē pahte hkīnhā pahkwŷjē kamā pazukapri hēt pyrāk ā mē pajarē. Koja mē pahkwŷjaja kuma hāmri nē mē pahte amnhī nhīpēx kaga nē amnhī kaxyw ām hkōt pix mā hamaxpēr o pa. Jakamā kwa tanhmā kot puj mē ja nē ho? Anē.

Jejus kot amnhī kaxyw mē ho 12 nē mē rēnh ā harēnh

Matēwre 10.1-4; Makre 3.13-19

¹² Tā nhūm arīgro hō hā nhūm Jejus ma kot Tirtūm mā amnhī jarēnh kaxyw ma hixēt prēk wŷr tē nē hā api. Hāmri nē kām amnhī jarēnh o apkati.

¹³ Tā nhūm kwŷhtā nhūm amnhī kōt kot ri mē o pa xwŷnhjē hwŷ nē amnhī kaxyw mē ho 12 nē mē kurē. Nē mē kām:

–E mē kajaja kot paj ma mē pahkwŷjē hwŷr mē arē ka mē ma inhŷ hā Tirtūm kapēr o mē ahkre ho ri mē hkōt apa. Kot kaj mē apē inhŷ hā mē ahkre ho apa xwŷnh. Anē.

¹⁴ Kot amnhī kaxyw mē rēnh xwŷnhjē nhīxi na jajaja:

Simāw kumrēx na pre kuta nē axte hā hixi mē nhūm kēp Pētre.

Nē Simāw Pētre hkōt htō Andreja ta.

Nē hkōt Xiakre hta.

Nē hkōt Juāw ta.

Nē hkōt Firiptija ta.

Nē hkōt Patoromew ta.

¹⁵ Nē hkōt Matēwreja ta.

Nē hkōt Tomasja ta.

Nē hkōt Apew kra axtem Xiakre hōja ta.

Nē hkōt Simāw Jeroxja ta.

¹⁶ Nē hkōt Xiakre hō hkra Jutja ta.

Nē hkōt Jut Kariot ta.

Jut Kariotja na pre kormā kot mē kām Jejus kurē xwŷnhjē nhīhkram ōr mā. Nhūm kot amnhī kukamā omunh mex tā mē hkōt amnhī kaxyw kuta.

Ā mē kot Jejus nhŷ hā mē ahkre o pa kaxyw mē rēnh xwŷnhjē nhīxi kot anhŷr.

Jejus xāpēnh ā harēnh

Matēwre 4.23-25

¹⁷ Tā nhūm Jejus akupŷm ŷ hā mē ahkre ho pa xwŷnhjē mē hāmri hixēt prēēta kurūm wrŷ nē nhŷri hinur kām kuhē. Hāmri nhūm nhŷhŷnh mē kot mar mā xwŷnhjaja hā

akuprō. Kōt mē pa ho mē pa xwŷnh kwŷjaja nē nhŷhŷnh krī hkwyŷ rūm mē hkwyŷjaja. Pika pē Jutej kurūm mē hkwyŷjaja. Nē krī pē Jerujarē kurūm mē hkwyŷjaja. Nē gō mŷ ri Xir mē Sitōja wa kamā mē pa xwŷnh kwŷjaja. Ām ahpŷnhā ri nhŷhŷnh krī hkwyŷ rūm mē kot mar mā xwŷnhjaja hā pikuprōnh rax nē.

¹⁸⁻¹⁹ Mē kot kapēr mar nhūm kot akupŷm mē ho mex kaxyw nhūm prem ma hwŷr amnhī to pa. Mē hkwyŷjaja tanhmā ri ā kute. Nhūm mē hkwyŷjaja mēkarōmnuti kot mē hwŷr gŷēx xwŷnhjaja nhūm mē piitā ma hwŷr amnhī to pa. Na prem ra amnhī kaxyw kām hamaxpēr o:

–E pa ma hwŷr tē nē ām hkupēnh pix tā akupŷm inhmex japēr. Anē.

Hāmri nē ma hwŷr mra nhūm mē omu nē Tirtūm xāhpumunh tŷx o akupŷm mē ho mex pa.

Jejus kot hkōt mē pa ho mē pa xwŷnhjē jahkre hā harēnh

Matēwre 5.1-12

²⁰ Tā nhūm Jejus hkōt mē pa ho mē pa xwŷnhjē jahkre nē mē kām:

E kot kaj mē atō amnhī kaxyw tanhmā inhmā ajamaxpēr to nē ajamaxpēr o: “Nā ixkukrēx rax kēt tā na hte Tirtūm ixkōt pa ho pa. Koja ixkōt pa hkēt pa ixtŷx ri tanhmā amnhī nhīpēx to ho ri ixpa rāhā nē. Tirtūmja mex kumrēx o kot mē hikukrēx raxta jakrenh par.” Anhŷr o ajamaxpēr. Hāmri nhūm Tirtūm ā ajamaxpēr anhŷr ā apumu nhūm ja kām mex nē. Hāmri nhūm apē hkra hā ato mex nē atānopxar o akōt pa ka ajamakētkati nē akīnh nē axāmhīx ri apa.

²¹ Nē kot kaj mē atō amā Tirtūm kām hprām xā hkōt tanhmā amnhī nhīpēx to ho ri apa hprām tŷx nē. Nhūm amnhī tā apumu nhūm ja kām mex nē nhūm ato mex nē. Nē tanhmā ato ka hkōt pix mā amnhī to mex o ri apa nē ajamakētkati nē akīnh nē axāmhīx ri apa.

Nē kot kaj mē tanhmā amnhī tomnuj to. Hāmri nē tee ri ja hā amnhī pumu nē ajamaxpēr. Nē apijaām nē akapri xāj amŷr o nhŷ. Amŷr rax nē. Hāmri nhūm Tirtūm ja hā apumu nhūm ja kām mex nē. Jakamā nhūm anē akapri hta nē ato mex nē. Ka ajamakētkati nē akīnh nē axāmhīx ri apa.

²²⁻²³ Nē kwār mē māmrī ixtā tanhmā mē ato kapēr punuj to nē tanhmā mē ato hēx to nē tanhmā ri mē atomnuj to ho pa. Kwār mē māmrī ā mē anhīpēx anhŷr o pa. Ka mē ām inhmā pix mā ajamaxpēr rāhā ho apa pē ajamakētkati nē axāmhīx ri apa. Kwār mē māmrī

ã më anhîpêx anê nê më amex kêt ã më ajarênh o pa. Amnepêm na pre Tîrtûm nhÿ hã kapêr xwÿnhjaja nhÿm prem ã më hipêx anê. Jakamã koja më urak nê ã më anhîpêx anhÿr o pa. Nhÿm Tîrtûm ja hã më apumu nê amnhÿm më amex ã më ajarê. Hãmri nê nhÿrmã kaxkwa kamã wa inhô krî kamã më ato mex rax nê. Ka më akînh nê ajamakêtkati nê axâmnhÿx ri apa. Jakamã kwâr më mãmri pika jakamã ã ixtã më anhîpêx anê. Anê.

Jejus kot arî më kot mar xwÿnhjê jahkre hã hareh

Xiakre 5.1-5

²⁴ Nhÿm Jejus nhãm hkôt më pa ho më pa xwÿnhjê nhÿhkô hã më kot Tîrtûm kôt amnhÿ nhîpêx o pa hkêt xwÿnhjê hwÿr apkjê. Nê më omu nê tanhmã më kãm kapêr to. Më hikurêx rûnh xwÿnhjê kumrêx mã kapêr nê më kãm:

E kwa më o kora më akurêx rûnh xwÿnhjaja. Na ka htem ãm akurêx rûnh më ajamaxpêr o ri apa nê gryk ã Tîrtûm mã ajamaxpêr o apa hkêt nê. Jao më amã kapêr mar prãm kêt nê. Nê ãm akurêx rûnh mã ajamaxpêr pê akînh nê ri apikunhar o ri apa. Tã kot ka më nhÿrmã ty hãmri nhÿm akînh xaja apê hapêx.

²⁵ Nê më amã Tîrtûm kôt ri amnhÿ nhîpêx prãm kêt xwÿnhjaja. Kot kaj më nhÿrmã akapri htÿx kãm tee ri amnhÿ to hwÿr kaprÿ kãm ga. Koja më amar kêt nê.

Nê më atÿx ri më ate tanhmã amnhÿ tomnuj to hkukamã ajamaxpêr nê apikunhar pê amnhÿ tomnuj o apa xwÿnhjaja. Kot kaj më nhÿrmã ã më ate amnhÿ nhîpêx anhÿrja mÿrapê më kot amnhÿ xã htÿx kamã hamak o pa htÿm xã hwÿr ma apa. Hãmri nê kamã akapri xaj amÿr rãhã ho ri apa. Jakamã kwa më o kora më amã Tîrtûm prãm kêt xwÿnhjaja. Kêr ka më ixkapêr ma nê axkãm ajamak rom nê ri apa.

²⁶ Amnepêm më pakukamã më pa xwÿnhjaja na prem Tîrtûm kapêr o hkwÿjê jahkre ho pa. Nom axtem nê hkwÿm ri tanhmã më kãm ho hex to nhÿm më kuma nhÿm ja më kãm mex nê nhÿm më amnhÿm më mex ã më harê. No ãm më mex kêt. Tã më kajaja. Më kot më urak nê axpên mã më amex ã më ajarênh tã Tîrtûm mã më amex kêt. Jakamã kot kaj më amex kêt nê. Anê.

Më kãm më pahkurê xwÿnhjê jarênh

Matêwre 5.38-48; Rukre 23.34; mãânêh

Atre 7.60; Rômân 12.14

²⁷ Hãmri nhÿm Jejus hpãnhã më piitã më ahkre nê më kãm:

—E më ate inhmar xwÿnhjaja. Kêr ka më kot më atomnuj xwÿnhjaja amnhÿ tã tanhmã më ho hkêt nê. ãm më ho mex pix o ri apa hkukamã mãn ajamaxpêr.

²⁸ —Nê më kot më ato kapêr punuj xwÿnhjaja. Kêr ka më amnhÿ xwar amnhÿ tã tanhmã më ho akapêr punuj to hkêt nê. ãm tãm më kãm akapêr pê më kãm akapêr mex o ri apa. Nê më kot tanhmã ri më ato ho pa xwÿnhjaja ka më ho mex pix o ri apa. Nê më ho Tîrtûm wÿr pix kukamã mãn ajamaxpêr.

²⁹ —Nê koja mëhõ anhînep akura ka ãm omu nê tanhmã amnhÿ tã ho hkêt nê. Te ate kãm ihkjê pêr nhÿm kot ihkjê kamã akurand pyrak o amnhÿ nhîpêx nhÿm ja amã mex nê. No kêr ka më amnhÿ tã tanhmã më ho hkêt nê.

—Nê koja mëhõ apê anhînhkã py ka tanhmã hã kãm nê hkêt nê. Kwâr mãmri apê kupy. Ka mãânêh te ate kry pê anhînhkã hpakã ry jagjênh xwÿnhhta anhînhkã hkôt kãm ôr pyrak o hipêx. Nom kamã agryk kãm kãm ôr kêt nê.

³⁰ —Nê koja mëhõ kêp amrakati kumrêx nê awÿr tẽ nê mëmoj tã awÿ. Ka anhõ mëmoj japêr nê mãmri kãm mëmoj gô. Kêp anhõxy hkêt kamã kãm mëmoj gô. Rÿ koja mëhõ apê mëmoj to ahkî ka axãhkurê hkêt nê. Nê tanhmã hã ho hkêt nê.

³¹ Më piitã më kot tãm më anhîpêxja na më amã hprãm. Tã kêr ka më amnhÿ pyrà nê tãm më piitã më hipêx o ri apa. Më kot tãm më anhîpêx kêt tã kêr ka më axâmnhÿx ri anhõxy hkêt nê tãm më hipêx o ri apa.

³² —Nom kot kaj më amã më piitã më ho mex o apa hprãm kêt japêr. Nê ãm më kot më ato mex xwÿnhjê pix ka më amã më ho mex prãm. Xã koja Tîrtûm ja hã më apumu nhÿm ja kãm mex nê? Nã koja kãm mex kêt nê. Koja mëhõ më ato mex kêt tã ka më amnhÿ rom ho mex nê nhÿm Tîrtûm ja hã më apumu hãmri nê më amex ã më ajarê. Më kot amnhÿ tomnuj o më pa xwÿnhjaja na htem ãm më kot më ho mex xwÿnhjê pixjaja nhÿm htem amnhÿ xwar më ho mex o pa. No tãm më kot amnhÿ nhîpêx o më pa xwÿnhjaja na htem më piitã më ho mex o pa. Më kot tãm amnhÿ nhîpêx xwÿnhjaja nê më kot amnhÿ tomnuj xwÿnhjaja nhÿm më ho hpimràatã më ho mex o axpên pyrak o pa.

³³⁻³⁶ —Nê më kot amnhÿ tomnuj xwÿnhjaja na htem ãm më kot më ho mex xwÿnh pixjaja nhÿm htem amnhÿ xwar më ho mex o pa. No më kajaja. Kêr ka më mãmri më piitã më kamã axukapri pix nê. Jao axâmnhÿx ri më piitã më kãm mëmoj nhõr o ri apa. Nhÿm Tîrtûm ja hã më apumu nê ja hã më ato mex nê.

—Jakamã kêr ka më amarî më kãm akurê xwÿnhjê ho mex nê. Nê më kamã axukapri nê. Nê më piitã më kãm mëmoj nhõr o ri

apa. Kê nhÿrmã Tirtÿm maati mē hã mē amã mēmoj nhõr rax nē. Nē mē ate kot amnhÿ nhÿpēx kôt amnhÿ nhÿpēx xwÿnh ã mē ajarē. Tirtÿm na hte mē kot amnhÿ tomnuj xwÿnhjē kamã ukapri ho pa. Jakamã kēr ka mē urãk nē ã mē hipēx anhÿr o ri apa. E kēr ka mē ã axpēn nhÿpēx anhÿr rãhã nē. Anē.

Mē pahte axpēn to pakapēr punuj kēt ã mē pamã karõ

Matēwre 7.1-5; määñēn Rõmãn 2.1-3, 14.1; Wam Korit 4.5; Xiakre 4.11-12

³⁷ Nhÿm Jejus arÿ mē ahkre nē mē kãm:

—Nē kēr ka mē atÿx ri amnhÿ krã hkôt tanhmã mē kot amnhÿ tomnuj to hã tanhmã axpēn jarēnh to ho ri apa hkēt nē. Kēr kē Tirtÿm mē apyrã nē ã mē ajarēnh anhÿr kēt nē.

—Nē kēr ka mē tanhmã mēhõ kot ra atomnuj tota mã ajamaxpēr rãhã hkēt nē. Æm ho ajamakētkati tokyx anē nē axte kãm ajamaxpēr kēt nē. Kēr kē Tirtÿm ja hã mē apumu nē mē apyrã nē axte tanhmã mē ate amnhÿ tomnuj to mã hamaxpēr kēt nē.

³⁸ —Nē kēr ka mē axpēn kamã axukapri pē tanhmã axpēn to mex to ho ri apa. Kēr kē Tirtÿm ja hã mē apumu nē mē apyrã nē mē akamã ukapri pē tanhmã mē ato mex to ho pa. Na hte mē pahte axpēn kamã paxukapri hã mē pahpumunh xã hkôt tanhmã mē pakamã ukapri to.

³⁹ —Nom kēr ka mē atÿx ri tanhmã axpēn to akapēr to hkēt nē. Mē ate apri hã axpēn jamaxpēr kôt axpēn pumunhre hã. Jakamã kot kaj mē atÿx ri mēhõ ho akapēr punuj hãmri nē te mē nohkre xwÿnhjē hõ kot mēmoj pumunh kēt tãa te kot no ho omunh nē tanhmã harēnh to pyrãk o amnhÿ nhÿpēx.

⁴⁰ Tirtÿmja tapxipix na kot mē pajamaxpēr kôt mē pahpumunh par. Mē axãhpumunh tÿx o mē pahte hakrenh kēt jakamã kwa kēr ka mē ãm hkôt pix mã amnhÿ nhÿpēx o ri apa. Kot kaj mē ã amnhÿ nhÿpēx anē hãmri nē gaa nē urãk nē mē piitã mē kamã axukapri pix o ri apa.

⁴¹⁻⁴² Jao mēhõ kot tanhmã amnhÿ tomnuj to hã omu hãmri nē tanhmã hã kãm nē tokyx anhÿr kēt nē. Akumrēx ate tanhmã amnhÿ tomnuj to hã amnhÿ pumu nē hkaga hãmri nē ri kormã mēhõta hwÿr tē nē kot tanhmã amnhÿ tomnuj to hã kãm akapēr to. Anē.

Mē pajamaxpēr xã hkôt mē pakapēr ã mē pajarēnh

Matēwre 7.16-20, 12.33-37

⁴³⁻⁴⁵ Nhÿm Jejus arÿ mē ahkre nē mē kãm:

—Nē koja mēmo pi hpãr mex nē õ mex nē. Nom koja pãr punuj hãmri nē õmnuj nē.

—Nē na htem mēmo xõ pumu nē hkôt tanhmã pãr kute hã omu. No na htem rãrãj pumu nē kēp akunÿ kamã mrõnhÿ xõ hã hkamnhÿx kēt nē. Na htem mēmo xÿ hpãr pumu nē õ xãnhre hã hkamnhÿx kēt nē.

Ja pyrã nē koja mēhõ hamaxpēr punuj nē määñēn hakwa ho kapēr punuj pix nē. Nē htÿx tanhmã amnhÿ tomnuj to ho ri pa. Nom koja hamaxpēr mex nē hãmri nē määñēn hakwa ho kapēr mex o pa. Na htem ahpÿnhã amnhÿ jamaxpēr xã hkôt tanhmã hakwa ho kapēr to ho ri pa. Anē.

Ixkre pijakrut jarēnh

Matēwre 7.24-27; määñēn Xiakre 1.22-25; Wam Juãw 2.3-6

⁴⁶ Nhÿm Jejus arÿ mē hkôt mē pa ho pa xwÿnhjē jahkre ho nhÿ nē mē kãm:

—Nē kot kaj mē ixpē mē anhõ pahihtÿ hã ijarē hã kot kaj mē ixkapēr kôt amnhÿ nhÿpēx rãhã ho ri apa.

⁴⁷ —E pa mē amã ixpri hã mē kot ixkôt amnhÿ nhÿpēx xwÿnhjē kot amnhÿ nhÿpēx jarē ka mē apri hã inhma.

⁴⁸ Mē kot amnhÿ nhÿpēxja te mēhõ hamaxpēr mex pē aptÿx kãm amnhÿm õrkwÿ nhÿpēx pyrãk. Kojã aptÿx kãm õrkwÿ nhÿpēx nhÿm mēmo arÿgro hã na wrÿk rax nē. Nē gõ htãm rax nē hanhi nom nhÿm arÿ ãm tÿx nē xa. Tã kot kaj mē ixkôt amnhÿ nhÿpēx ã kot kaj mē te ixkre jarēnhja pyrãk. Jao amex nē ajamakētkati nē ri apa. Te gõ htãm kot ixkre janhir tã nhÿm ãm tÿxta pyrãk.

⁴⁹ Nom koja mēhõ hamaxpēr mex kēt nē htÿx mõ nē gõ mÿri gÿw rerek kãm amnhÿm õrkwÿ nhÿpēx. Hãmri nhÿm mēmo arÿgro hã na wrÿk rax nē. Nē hã gõ htãm rax nē õrkwÿ janhi nē kēp grãnh pa. Tã koja mēhõ ixkôt amnhÿ nhÿpēx kēt nē te ho mēhõ kot gõ mÿri gÿw rerek kãm ixkre nhÿpēxta pyrãk. Jao mex kēt nē pa. Jakamã kwa mē ixkapēr mar tÿx nē te gõ htãm kot ixkre janhir nē grãnh parta pyrãk o amnhÿ nhÿpēx o apa hkēt nē. Anē.

7

Jejus kot mēhõ mã àpēnh xwÿnh o mex ã harēnh

Matēwre 8.5-13

¹ Tã nhÿm Jejus mē kãm ujarēnh pa hãmri nē ma akupÿm Kapanaũ hwÿr mõ.

² Nē mõõ nē ra hwÿr pøj. Nhÿm krÿ kamã põristi krãhtÿm mã àpēnh xwÿnhja ã htÿx nē nõ. Ra htyk kaxyw nē nõ nhÿm õ patrãw tee ri omu nē kãm hapē jakamã tee ri hkukamã hamaxpēr o hkapri nē.

³ Hãmri nē Jejus põx ã harēnh ma nē hwÿr Ijaew pigēt kwÿjē rē nē mē kãm:

—Kwa mã ma Jejus wÿr mra nē kãm ijarē kē tokyx man ixwÿr tē nē inhã àpēnh xwÿnhã o mex. Anē.

⁴⁻⁵ Hãmri nhÿm mē kuma nē ma hwÿr mra nē omu nē kãm:

—Pa. Na põristi krãhtÿm na awÿr mē inhme pa mē mra. Mē pahkÿnhã kēp Ijaew kēt tã kãm mē pahkÿnh nē. Tãm na pre mē inhõ krÿ kamã mē inhã Tirtÿm kapēr o

mē ahkre xà hā ixkreja nhīpēx. Tā na kām āpēnh xwýnhhta kēp à htýx nē nō nhūm apōx hā ajarēnh ma nē man awýr mē inhmē. Kwa ma hwýr tē nē kām ho mex nā? Anē.

⁶ Hāmri nhūm mē kuma nē mē kām:

–Tōe. Ma pu mē hwýr. Anē.

Hāmri nē ma mē hkót tē. Hāmri nē komā ōrkwý htēp o htēm mē nhūm axte kutā hkrāmnhwý hkwý rē nhūm mē ma kutā mra. Hāmri nē mra nē mē hkaxpa nē Jejus pumu nē kām:

–Pa? Kwa na pōristi krāhtūmta ā awýr karō anē. Na mē inhmā: “E kēr ka mē mra nē nhýri Jejus kaxpa nē kām awjarē kē ām ata rūm kapēr pix o inhmā à xwýnhhta o mex. Kīnh ā ixpē Ijaew kēt jakamā ixte amnhī kuk ā ixpijaām týx. Jakamā kot paj pam hwýr ixtēm kēt nē. Kwa kām anē kē ata rūm kapēr pix o inhmā akupým ho mex.

⁷⁻⁸ Ixpē mē hkrāhtūm jakamā na pa hte inhō pōristi mā mēmoj tā karō nhūm mē inhmā xà hkót inhmā mēmoj tanhmā hipēx to. Na pa hte mē kām: ‘E mē ma mra nē ā amnhī nhīpēx anē.’ Anē nhūm mē inhma nē ma mra kurē kumrēx. Rý pa mē kām: ‘E mē amnē ixwýr mra nē ā amnhī nhīpēx anē.’ Anē nhūm mē inhma nē ixwýr mra. No kēt Jejus na hte ixrom tanhmā mē à kuteja mā kapēr nhūm kuma nē mē kēp hapōj nē ma mra kurē kumrēx. Jakamā koja ata rūm kapēr pix o inhmā ho mex.” Anhýr o awýr karō. Jakamā na pa mē akutā mra nē akaxpa nē ā amā kapēr jarēnh anē. Anē.

⁹ Hāmri nhūm Jejus amnhī jaēr pē mē kapēr ma nē hkīnh nē. Hāmri nē hkót mē kot mar o pa xwýnhjé mā kām:

–Kwa xà na ka mē ā kot ixwýr karō xwýnh hamaxpēr anhýrta ā ama? Mē pahkīnhā kēp Ijaew kēt tā mē arom amnhī kaxyw inhmā hamaxpēr týx nē. Aa mē atō urāk nē ate amnhī kaxyw ā inhmā ajamaxpēr týx anhýr kēt tā nhūm mē arom kām āpēnh xwýnh kaxyw inhmā hamaxpēr týx nē. Anē.

¹⁰ Nhūm pre ā mē kām kapēr anē hāmri nhūm pōristi krāhtūm krāmnhwýjaja kuma nē awjanā nē ma akupým hkrāhtūm nhōrkwýja wýr mra. Nhūm ra Jejus kām āpēnh xwýnhhta akupým ho mex nhūm mex nē ri mra. Hāmri nhūm mē akupým pōj nē akupým mex ā omu.

Jejus kot akupým mēhō hkra ho htír ā harēnh

Juāw 11.1-46

¹¹ Tā nhūm Jejus ma krī pē Naī hwýr hkót mē pa ho mē pa xwýnhjé mērohā mō nhūm mē ohtō nē mē hkót mra.

¹² Nhūm mē ra Naī hwýr hpōx o mō. Nē hwýr agjē. Axpēr kām agjē nē mō nhūm kēp mjēn htyk xwýnhja mē kutā tē. Nhūm hkra myja ham kēp ty. Kra pyxi htā kēp ty nhūm mē kasāw kamā kuxā nē kumý nē kot haxār

kaxyw o mō nhūm katorxā mē hkót mýr o mō. Nhūm krī nhō xwýnh kwýjaja ma hkót mō. Piitā hkaprī nē hkót mýr o mō.

¹³ Tā nhūm Jejus mē hkwýja mē mō nē mē hkaxpa nē katorxā mýr ā omu nhūm Jejus kām hkaprī nē. Hāmri nē xa nē kām:

–Pa? Kwa amýr kēt nē. Anē.

¹⁴ Hāmri nē kasāwta wýr tē nē hā ĩhkra xi nhūm mē kot mýnh xwýnhjaja omu nē amarī kām o xa. Hāmri nhūm htyk xwýnhhta mā kapēr nē kām:

–E kwa kānhmā nhý. Anē.

¹⁵ Pu nhūm kānhmā ýr kurē kumrēx. Nē kapēr o nhý. Hāmri nhūm Jejus nita mā kām:

–E ota akrata. Na akupým amā htír. Anē.

Hāmri nhūm akupým htír ā omu nē hkīnh týx kumrēx.

¹⁶ Hāmri nhūm mē kot omunh xwýnhjaja amnhī jaēr pē akupým hkra htír kām omu nē ý hā haxwýja hkīnh nē. Nē Tirtūm mā mex o mex ā harē nē axpēn mā:

–Kwa ām hāmri na Tirtūm ā mē panhīpēx anē nē mē pahwýr ý hā kapēr jarēnh xwýnhhta mē nhūm mē pahwýr mō. Tirtūm mē pakamā ukaprī jakamā na ā mē panhīpēx anē. Nā ām hāmri na ā mē panhīpēx anē. Anē.

¹⁷ Hāmri nē piitā ma pikaja rūm mē kām harēnh o hprōt nhūm mē piitā harēnh ma.

Juāw Paxis tee ri Jejus kukamā hamaxpēr ā harēnh

Matēwre 11.2-6, 11.22; Rukre 4.16-21

¹⁸ Rōm nhūm Juāw Paxisja kēp prēs nē hkrī nhūm hte hkót mē pa xwýnhjaja hwýr mra nē kām Jejus kot tanhmā amnhī nhīpēx to ho pa hā harē. Hāmri nhūm harēnh ma nē tee ri hkukamā hamaxpēr. Hāmri nē hkót mē pa xwýnh wa ho axkrut nē wa kuta

¹⁹ nē Jejus wýr wa kumē nē wa kām:

–Kwa wa ma hwýr tē nē hkukja. Nē kām: “Xà ka na pre Tirtūm mē ixwýr amē nā? Nā xà kormā axtem hō na pa mē kormā amnhī wýr hamār o ri ixpa?” Anē. E wa ma hwýr tē nē ā hkukjēr anē nē tanhmā kot amnhī jarēnh to hā ama hāmri nē man akupýn tē nē inhmā harē. Anē.

²⁰⁻²¹ Hāmri nhūm wa kuma nē ma hwýr tē. Nhūm Jejus kormā mē ho mex o xa. Mē nohkre xwýnhjaja nhūm akupým mē no ho mex. Nē mēkarōmnuti kot mē hwýr gjēx xwýnhjaja nhūm mē nē mē hapōx o ām rāhā nhūm wa ra hwýr tē nē kormā hā mē omunh o xa. Hāmri nē kām Juāw Paxis kapēr jarē.

²² Hāmri nhūm wa kuma nē wa kām:

–Tý. Nā ām hāmri na ja hā ijarē. Ixpē mē ate ixkamā ajamak o apa xwýnhhta na pa. Jakamā e. Wa kam nē tanhmā ixte amnhī nhīpēx to hā ixpumu hāmri nē ma akupým hwýr tē nē aprī hā kām ijarē. Mē nohkre xwýnhjaja na pa akupým mē no ho mex. Nē mē hkānhy xwýnhjaja pa akupým mē hkā

ho mex. Nê mê hyk o mê pa xwýnhjaja pa akupým mê ho mex. Nê mê htyk xwýnhjaja pa akupým mê ho htír. Nê mê kêp amrakati nê ri mê pa xwýnhjê mã mêmoj mex jarênh o ri ixpa. Na pa hte â mê ho mex o ri mê hkôt ixpa anê. Jakamâ e kwa wa ma akupým hwýr tê nê â kâm ijarênh anê.

²³ Kê ijarênh ma nê arí amnhî kaxyw ixkôt hamaxpêr týx rãhã nê. Koja â amnhî nhîpêx anê nê hamakêtkati nê ri pa. Nê tee ri ijarênh kukamâ hamaxpêr kêt nê. E wa tokyx ma akupým hwýr tê nê â kâm ijarênh anê. Anê.

*Jejus kot Juãw Paxis mex â harênh
Matêwre 11.7-19*

²⁴⁻²⁵ Nhùm pre â Jejus wa kãm amnhî jarênh anê nhùm wa kuma nê ma akupým Juãw Paxis wýr tê. Hãmri nhùm Jejus mê kot mar o kuhê xwýnhjê mã tanhmã Juãw Paxis jarênh to nê mê kãm:

—Na ka prem kapôt â mar kaxyw ma hwýr mra. Nom ê mex â omunh kaxyw rý hpijaãm kãm tanhmã kapêr to hã mar kaxyw hwýr amrar kêt nê.

²⁶ Kêp Tirtúm nhý hã kapêr xwýnh jakamâ na ka prem mar kaxyw ma hwýr mra. Tirtúm nhý hã kot ixkukamâ ijarênh o pa xwýnh na. Ixpê Tirtúm kêt mê akaxyw ixãm xwýnh â na pre mê amâ ijarênh o pa. Nê hprî hã tanhmã mê amâ ijarênh to. Jakamâ na kapêr mex o kot wam Tirtúm nhý hã kapêr jarênh o mê pa xwýnhjê kapêr jakrenh.

²⁷ Tirtúm kapêr â kagã htúm kot Juãw kukamâ tanhmã harênh to nê harênh kot:

Kot paj Ixkra hkukamâ ma mê hwýr harênh o pa xwýnh mê kê ma ri hkukamâ mê kãm harênh o ri pa. Kê mê kuma nê kutêp tãm amnhî nhîpêx.

Anhýr o Tirtúm Juãw Paxis kukamâ harênhùm mê hã kagã. Tã nhùm mê awýr kumê.

²⁸ Juãwja mex kumrêx. Na pre hprî hã ixkukamâ tanhmã ijarênh to ho pa. Nom ixkôt mê pa ho mê pa xwýnhjê hkínhã ixkôt pa ho pa hkêt âm ixkukamâ ijarênh o pa. Jakamâ ixkôt mê pa ho mê pa xwýnhjaja na mex o kot Juãw Paxisja jakrenh. Mê kot ixkôt hprî hã inhmar o pa jakamâ mê mex o kot hakrenh. Anê.

²⁹ Nhùm pre â Jejus mê kãm Juãw Paxis jarênh anê. Mê kot Juãw mar o kuhê xwýnh kwýjaja na pre htem tanhmã amnhî tomnuj to ho pa. Tã Juãw kot mê kãm Tirtúm kapêr jarênh ma nê xapên mã Tirtúm mex â harê. Nê xapên mã:

—Nã âm hãmri. Tirtúm kapêr na mex kumrêx. Anê.

Hãmri nê amnhî tomnuj kaga nê Tirtúm kôt amnhî xunhwý. Jakamâ nhùm Juãw Paxis Tirtúm mã mê hkrã kumrã.

³⁰ No nhùm Parijew nhô xwýnhjê mê Tirtúm kapêr tùm o mê ahkre ho mê pa xwýnhjaja jajê hkínhã Juãw Paxis kaga

kumrêx. Jakamâ nhùm mê hkrã kumrãr kêt nê. Mê kot Tirtúm kapêr kaga jakamâ na pre htem Jejus kapêr ma nê âm kuma.

³¹ Hãmri nhùm Jejus mê kãm:

—E pa mê amâ mê piitã htýx ri hamaxpêr â tanhmã mê harênh to ka mê kot amnhî nhîpêx â mê harênh ma.

³² Te mê kot mêhprîre kot amnhî nhîpêx pyrãk. Mêhprîrejaja na htem ôrkwý kapem hije nê mêmoj to amnhîkati ho hkrî. Nê tee ri hkwyjê kot amnhî nhîpêx pumu nê mê kãm: Kwa na pa mê amâ gre htã ka mê ixkutã anhôkrepôx kêt nê. Pa mê ja hã mê apumu nê hpãnhã mê amâ mê htyk jarê htã ka mê akapri nê amýr kêt nê. Kwa mê ri â amnhî nhîpêx anhýr kêt nê.

Anhýr o axpên mã kapêr. Tã te mê ate mê urãk. Tirtúm kot mê awýr ý hã kapêr xwýnhjê rênh tã ka mê te mêhprîre kot amnhî nhîpêxta pyrã nê mê ama âm mê ama nê mê hkôt amnhî nhîpêx kêt nê.

³³ —Juãw Paxis na pre mê awýr mô nê ixpyrã nê apkur mex o ri pa hkêt nê. Nê ixpyrã nê wíhti ho hkôm kêt nê pa. Tã ka mê ja hã omu nê hkaga nê atýx ri Satanasti nhý hã kot tanhmã amnhî nhîpêx to ho pa hã hkamnhîx nê ri harênh o pa. Hãmri nê mêhprîre kot amnhî nhîpêx pyrã nê hkôt amnhî nhîpêx kêt nê.

³⁴ Tã pa Juãw pãnhã mê awýr mô. Nê kurom apkati mê ixãpkur mex o ri ixpa. Nê kurom wíhti hkwy ho ixkôm o ri ixpa. Ka mê ja hã ixpumu nê atýx ri ixãpkur rúnh nê ixpipãnh o ri ixpa hã ixkamnhîx nê â axpên mã ixto akapêr anhýr o ri apa. Nê mê kot amnhî tomnuj xwýnhjê hkôt ri ixpa hã axpên mã ijarênh o ri apa. Â na ka htem axpên mã ijarênh anê. Jao te mê ate Juãw Paxis nhîpêx pyrã nê ixkaga nê ixkôt amnhî nhîpêx kêt nê. Na hte â htýx ri tanhmã mê hamaxpêr to ho mê pa xwýnhjaja amnhî nhîpêx anhýr o ri pa.

³⁵ —No tãm ri mê hamaxpêr o mê pa xwýnhjaja na htem ahpýnhã Juãw mê wa ixte amnhî nhîpêx â wa ixpumu nê axpên mã wa ijarênh o: “Nã ahpýnhã wa kot amnhî nhîpêx tã wa hamê âm hãmri Tirtúm nhý hã kapêr jarênh mex o pa. E pu mê wa urãk nê Tirtúm kôt amnhî xunhwý.” Anhýr o axpên mã wa ijarênh o pa. Anê.

*Parijew nhô xwýnh pé Simãwre jarênh
Matêwre 26.6-13; Makre 14.3-9; Juãw 12.1-8*

³⁶ Tã nhùm Parijew nhô xwýnh pé Simãwreja amnhî nhôrkwý hwýr Jejus mê hkôt mê pa ho pa xwýnhjê mê kuwý. Mê kot kutã apkur kaxyw amnhî wýr mê kuwý nhùm mê ôrkwý hwýr mra nê mê hwýr agjê nê apkur kaxyw hkrî.

³⁷ Hāmri nhūm mēhō nija mē hwýr axà. Na pre hte amnhī tomnuj pix o pa. Hāmri nē Jejus ō krī hwýr hpōx nē Simāwre nhōrkwý kamā apkur ā harēnh ma nē ma hwýr tē. Mē hkuxwaxā hā ā py nē ma hwýr o tē.

³⁸ Hāmri nē hwýr axà nē Jejus pumu nē hwýr tē nē pum xa. Nē tee ri tanhmā kot amnhī tomnuj to ho paja mā hamaxpēr nē hpijaam nē hkaprī nē mýr o xa. Hāmri nē Jejus kutā hkōn krā ho tēm nē nhý nē no kagō ho hpar go. Hāmri nē amnhī krā kī ho hpar grā nē kupā hāmri nē hpānhā mē hkuxwa xā ho kuxwa. Kām hkīnh xāj ā hipēx anē.

³⁹ Hāmri nhūm Simāwre tee ri ja hā omu nē hamaxpēr o:

—Tk. Kwa jahti kot amnhī tomnuj pix o pa xwýnh tā mē ixwýr axà nē ā Jejus nhīpēx anē nhūm amnhī nē hanor kēt nē. Kēp ām hāmri Tirtūm nhý hā kapēr jarēnh o pa xwýnh ronhýx ja hā omu nē amnhī nē hanor kurē kumrēx. Anē.

⁴⁰ Hāmri nhūm Jejus amnhī tā hamaxpēr ā omu nē hēx rom kām kapēr nē kām:

—E Simāwre. Pa amā awjarē ka inhma. Anē.

Hāmri nhūm kām:

—Tōe. Mex. Māmri inhmā awjarē pa ama. Anē.

⁴¹ Hāmri nhūm kām:

—Nā koja mēhō my wa hamēxkrut. Nhūm hōja mēhō pē kaxpore ho rax kumrēx nē ho ĩpresta. Nhūm hōja ām kēp ho grire nē ho ĩpresta. Hāmri nē wa hamē kaxpore ho hapēx pa.

⁴² Hāmri nē akupým kot kēp ho ĩpresta xwýnhhta mā hpānhā ōr kaxyw tee ri amnhī kukamā hamaxpēr. Ra kot ho hapēx par jakamā tee ri amnhī kukamā hamaxpēr. Tā nhūm kot wa kām ho ĩpresta xwýnhhta wa hwýr tē nē wa kām: “Kwa wa tee ri amnhī kukamā ajamaxpēr kēt nē. Na pa ra war ate ixto tewēn ā kagāta kaxōnh pa nhūm ja hapēx. Kot paj axte kām ijamaxpēr kēt nē. Jakamā wa māmri ajamakētcati nē axāmnhīx ri apa.” Anhýr o wa kām kapēr. Ā mē ujarēnh kot anhýr. Anē.

Nhūm pre ā Jejus Simāwre mā ujarēnh anē. Hāmri nē hā hkukaja nē kām:

—E nhý myja koja we kām ho tewēn xwýnhhta kīnh týx nē wehe? Anē.

⁴³ Hāmri nhūm kām:

—Nā kot kēp ho rax nē ho ĩpresta xwýnhhta koja kām hkīnh týx o hōta jakre. Anē.

Hāmri nhūm kām:

—Tý. Nā ām hāmri na ka ā harēnh anē.

⁴⁴ Tā mān ka ni kot ā inhīpēx anhýr xwýnhhta pumu. Na ka amnhī nhōrkwý hwýr ixwý pa axà nom ka inhmā gō hkwy pa ho amnhī par kuhōnh kēt nē. Tā nhūm nija arom ā inhīpēx anē nē no kagō ho ipar kuhō nē amnhī krā kī ho grā ho nhý.

⁴⁵ —Nē anhōrkwý hwýr ixārta ā ka ixkahti hkōt inhmyñh nē ixpār kēt nē. Tā kēt nija arom xatā ixpar pā o nhý.

⁴⁶ Nē ate orti ho ixkrā gregrer kēt tā nhūm arom mē hkuxwaxā ho ixpar kuxwa ho nhý. Mēhkukwaxā hā kaxpore xohtō htā nhūm āmnhīx ho ixpar kuxwa ho nhý.

⁴⁷ ām hāmri na pa amā ja jarē. Nija kot amnhī tomnuj týx tā pa ra nē kot amnhī tomnuj o ijapēx pa. Ra kot amnhī tomnuj týx xwýnh ā amnhī pumunh jakamā na amnhī kaxyw inhmā hamaxpēr pē kām ixkīnh nē ā inhīpēx anē. No ka na ka hte urāk nē amnhī tomnuj týx o apa htā urāk nē tee ri ja hā amnhī pumunh kēt nē. Tā nita kīnhā ate amnhī tomnuj kaga hkēt jakamā na ka ām amā ixkīnh grire. Anē.

Nhūm pre ā Jejus Simāwre mā kapēr anē.

⁴⁸⁻⁵⁰ Hāmri nē nija mā kapēr nē kām:

—E kānhmā xa. Ra ate amnhī kaxyw inhmā ajamaxpēr jakamā na pa ra ate amnhī tomnuj piitā amnhī katut kōt rēnh pa. Kot paj axte kām ijamaxpēr kēt nē. Jakamā māmri ma ajamakētcati nē axāmnhīx anhōrkwý hwýr tē. Anē.

Hāmri nhūm mē kot axpēn kutā apkur xwýnhhaja tee ri kot kām kapēr anhýrja ā kuma nhūm ja mē kām mex kēt nē. Jakamā nhūm mē ri axpēn mā harēnh o:

—Tk. Kwa mēhō na hte ri kot Tirtūm kot amnhī nhīpēx pyrāk o amnhī nhīpēx nē mē kot amnhī tomnuj o hapēx ā amnhī jarēnh o we ri pahti? Anē.

8

Mēnijē hkwy kot Jejus kōt pa hā mē harēnh

Makre 15.40-41, 16.9

¹ Tā nhūm Jejus ma mē piitā mē kām Tirtūm kapēr o mē ahkre ho ri mē hkōt pa. Krī rūnh kamā nē krī hkryre kamā. Mē kot amnhī tomnuj kaga nē Tirtūm kōt amnhī xunhwýr nhūm kot amnhī tā mē omunh nē mē ho hkra kaxyw nhūm ri mē hkōt mē kām harēnh o pa. Nhūm ý hā mē ahkre ho mē pa xwýnh pē 12jaja ma hkōt ri pa.

² Nē mēni hkwyjaja. Na pre ra Jejus mē hkwyjē nē mēkarōmnuti japōj. Nē mē hkwyjaja tanhmā mē ā kute xwýnhhaja nhūm akupým mē ho mex. Xwýnhhaja nhūm prem haxwýja ma hkōt ri pa. Hō pē na pre Marir Matarēn nhūm pre ra Jejus nē mēkarōmnuti ho 7 nē hapōj.

³ Nē Joanā. Joanā mjēn Kujahiti na pre kēp pahihiti Erox mā mē āpēnh xwýnhjē krāhtūm. Nē Sujānre. Nē kaxyw mēnijē ohtō nē Jejus kōt tanhmā mē ho ajuta hto ho mē hkōt pa. Jao mē hikāxpore ho mēmoj japrō nē ho mē kām mē ō nhīpēx o ri mē hkōt pa.

Mēmo hy hkre xwýnh

Matēwre 13.1-9; Makre 4.1-9

4 Tã nhũm mẽ ra krĩ piitã rũm Jejus wýr akuprõ. Jakamã nhũm mẽ ohtõ rax kumrẽx nhũm Jejus mẽ kãm ujarẽnh o nhỹ. No ãm hprĩ hã ujarẽnh kêt nẽ. Mẽ kot Tirtũm kapẽr mar nẽ tanhmã hkõt amnhĩ nhĩpẽx to nhũm hã kuxi nẽ mẽ kãm hã ujarẽnh o nhỹ.

5 Nẽ mẽ kãm:

—E mẽ inhma. Koja mẽhõ ma pur mã mõ nẽ pur kãm mẽmo hy ho ukapẽr o ri pa. Nom nhũm piitã amex kãm rõrõk kêt nẽ. Kwý ahpýnhã nhỹri rõrõk. Hãmri nhũm hkwy aptýx kãm rõrõk nhũm kuwẽnhre omu nẽ hwýr mra nẽ hkrẽr pa.

6 —Nẽ kẽn kãm hy hkwy rõrõk nẽ higrõt kutã nojarêt nẽ higrõt pa. No nhũm kamã aptýx nẽ kamã kęp pika hkryre jakamã nhũm higrõt nhũm hã myt apha nẽ arĩgro htýx mẽ nhũm grã pa. Kamã kẽn nhũm amgo mex kêt jakamã nhũm grã pa.

7 —Nẽ mrõnhĩ kamã rõrõk xwýnhja haxwýja higrõt tã no nhũm utĩ kęp amyãta nhũm ô hkêt nẽ.

8 —No hirã kamã pika mex kãm rõrõk xwýnhja. Hãmri hirã kamã rõrõk nẽ higrõt mex nẽ piitã ô rax nẽ. Piitã kamã ô kęp 100. ã mẽ ujarẽnh kot anhýr. E kwa mẽ ixujarẽnh ma nẽ kãm ajamaxpẽr týx rãhã ho ri apa. Anẽ.

9 Nhũm pre ã Jejus mẽ kãm ujarẽnh anẽ. Hãmri nhũm hkõt mẽ pa ho mẽ pa xwýnhjaja kuma nẽ tee ri hkukamã hamaxpẽr nẽ kãm:

—Kwa na pa mẽ ixprĩ hã axujarẽnh kõt mẽmoj pumunh kêt nẽ. Aprĩ hã mẽ inh mã tanhmã harẽnh to pa mẽ ixprĩ hã kuma nã? Anẽ.

10 Hãmri nhũm mẽ kãm:

—Tõe. Nã kot paj mẽ amã harẽ. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harẽ. Mẽ kot amnhĩ tomnuj kaga nhũm Tirtũm kot ja hã mẽ omunh nẽ mẽ ho hkra. Ja na pa harẽ.

—No mũjjaja na mẽ akĩnhã kãm mar prãm nõkati. Jakamã na htem ixujarẽnh ma nẽ ãm kuma nẽ htýx ri pa. Anẽ.

*Jejus kot prĩ hã mẽmo hy jarẽnh
Matẽwre 13.18-23; Makre 4.13-20*

11 Hãmri nhũm Jejus hkõt mẽ pa ho mẽ pa xwýnhjẽ mã:

—E kot paj ixprĩ hã mẽ amã mẽmo hy ho ukapẽr ã mẽ ujarẽnh ta jarẽ ka mẽ inhma.

—Nã mẽmo hyta te kęp Tirtũm kapẽr pyrãk. Nẽ ahpýnhã hy rõrõk ã pikata te kęp ahpýnhã mẽ kot Tirtũm kapẽr mar xwýnhjẽ kot amnhĩ nhĩpẽx pyrãk.

12 Mẽ kot mar xwýnh kwýjaja te kot aptýx kãm hy rõrõk nhũm kuwẽnh kot hwýr mra nẽ hkrẽr par xwýnh ta pyrãk. Jao Tirtũm kapẽr ma nhũm Satanasti te kuwẽnh kot hy hkrẽr parta pyrã nẽ mẽ kot amnhĩ kaxyw Tirtũm kapẽr kõt hamaxpẽr nẽ hkõt amnhĩ xunhwýr pymaj tanhmã nẽ mẽ hkrã

hto. Jakamã nhũm mẽ kapẽr ma nom ho hamakẽtkati tokyx anẽ nẽ axte kãm hamaxpẽr nẽ hkõt amnhĩ nhĩpẽx kêt nẽ.

13 —Nẽ mẽ kot mar xwýnh kwýjaja te kot kẽnre kamã hkwy rõrõk nẽ higrõt nẽ grã par tokyx anhýr xwýnh ta pyrãk. Jao Tirtũm kapẽr ma nẽ hkĩnh nẽ. Nẽ kãm mar prãm nẽ. Tã nhũm mẽhõ tẽ nẽ Tirtũm nẽ tanhmã kãm kapẽr to nhũm mẽ kuma nẽ Tirtũm kaga. Te mẽmo hy higrõt nẽ grã par tokyx anhýr ta pyrãk.

14 —Nẽ mẽ kot mar xwýnh kwýjaja te kot mrõnhĩ kamã hkwy rõrõk nẽ higrõt nhũm mrõnhĩ kot kęp amnrã xwýnh ta pyrãk. Jao kãm Tirtũm kapẽr mar prãm nẽ. No ãm mããnhẽn kãm hikukrẽx rax nẽ hikãxpore rax prãm xãj ãm ja pix mã hamaxpẽr o pa. Nẽ gaa nẽ ra gryk ã axte Tirtũm kapẽr mã hamaxpẽr nẽ hkõt amnhĩ nhĩpẽx kêt nẽ.

15 —Nẽ mẽ kot mar xwýnh kwýjaja te hirã kamã pika mex kãm hy hkwy rõrõk nẽ higrõt nẽ ô rax ta pyrãk. Nẽ ixkapẽr ma nẽ amnhĩ krã him hagiẽnh týx nẽ ixkõt ri amnhĩ nhĩpẽx mex rãhã ho ri pa. Jakamã te ra mẽmo hy hkreta ô rax mex pyrãk. E. ã ixujarẽnh kot anhýr. Anẽ.

*Kanẽ mẽ guhkrax wa harẽnh
Makre 4.21-25*

16 Nhũm Jejus arĩ mẽ kãm ujarẽnh o nhỹ nẽ mẽ kãm:

—E mẽ inhma. Xã na htem kanẽ hpõk hãmri nẽ guhkrax o hpro rý par krak ri unhwý? Nã na htem ã hipẽx anhýr kêt nẽ. Na htem hpõk nẽ kýxpẽ kuhẽ xã kamã unhwý nhũm hirã mex o kuhẽ. Nhũm htem ixkrem agjẽ nẽ hirã kamã mẽmoj pumunh mex nẽ. Ja pyrã nẽ na pa hte mẽ ate inhmar týx kaxyw ixprĩ hã mẽ amã awjarẽ.

17 Kormã mẽ ate mẽmoj pumunh nẽ aprĩ hã mar kêt tã kot kaj mẽ tokyx aprĩ hã omu nẽ ama. Te mẽmoj kot mẽ apẽ hpimxur pyrãk tã koja tokyx mẽ amã amnhĩ to amnhĩrit ka mẽ aprĩ hã omunh pa. Te mẽ ate kanẽ hpõk kãm aprĩ hã mẽmoj pumunh mexta pyrãk.

18 Jakamã kër ka mẽ ixkapẽr mar týx nẽ hkõt ajamaxpẽr rãhã ho ri apa. Jao ixkapẽr piitã mar týx nẽ. Nom kot ka mẽ mar týx kêt nẽ hã ano hkêt pa nẽ axte kãm ajamaxpẽr o apa hkêt nẽ. Anẽ.

*Jejus kot tanhmã katorxã mẽ htõjẽ jarẽnh
to hã harẽnh*

*Matẽwre 12.46-50; Makre 3.31-35;
mããnhẽn Eprẽw 2.11-12*

19 Nhũm Jejus arĩ mẽ ahkre ho nhỹ. Rõm nhũm katorxã nẽ htõjaja nhỹhỹnh hwýr mõn pøj. No nhũm mẽ kot mẽ hã htu rax jakamã nhũm mẽ tee ri hwýr gjẽx kaxyw nẽ kormã kapõt ã kuhẽ.

20 Hãmri nhũm mẽhõja mẽ omu nẽ Jejus mã mẽ harẽ nẽ kãm:

—Kwa Pahihti. Ota ra akatorxà mē atōjaja awyr̄ pōj nē tee ri awyr̄ gjēx mā. O mūj mē kormā kapōt ā kuhē. Anē.

²¹ Hāmri nhūm mē kuma nē mē kām:

—Tōe pa ixkato nē mē omu. Inhmā mē hapēē. Nom kot kaj mē atō Tirtūm kapēr ma nē hkōt amnhī xām nē hkōt amnhī nhīpēx. Hā kot kaj te apē ixtō r̄y ixkatorxà kot amnhī nhīpēx pyrāk o pu mē axpēn nhīpēx. Pa te inhmā mē hapē pyrā nē inhmā mē ajapē nē. Anē.

*Jejus kot kōk mā kapēr ā harēnh
Matēwre 8.23-27; Makre 4.35-41*

²² Tā nhūm apkati hō hā nhūm Jejus himō rax ā rē kaxyw nojarēt nē hkōt mē pa ho mē pa xwryn̄hjē mā kām:

—E kot puj mē jarāhā ma xarmā mō. Anē.

Hāmri nē mē p̄r mā gjēx pa nē ma xarmā mō. Garirej rūm kato nē ma xarmā pika hō hwyr̄ kormā mō.

²³ Nhūm ra Jejus ōtxwa nē p̄r kre kamā gōr nē nō. Pu nhūm kōk ap̄er t̄yx nē nhūm gō axpēn tak t̄yx nē k̄anhmā harī. Nē p̄r kre kamā pikap̄ir rax nhūm p̄rta mē kām ār o mō nhūm mē tee ri amnhī nhīpēx. No nhūm Jejus arī ht̄yx gōr nē nō.

²⁴ Hāmri nhūm mē tee ri amnhī kukamā hamaxpēr nē kumra nē kām:

—Kwa Pahihti k̄anhmā nh̄y. Kot puj mē jarāhā pahtyk pa. Anē.

Hāmri nhūm k̄anhmā nh̄y nē kōk mā kapēr nē kām:

—E. Kwa hāmri anhīkrē. Anē.

Hāmri nhūm hpinkhrēnh par mē nhūm gō tām nōr kurē kumrēx.

²⁵ Hāmri nhūm Jejus hkwȳjē hwyr̄ apkjē nē mē kām:

—Kwa kormā te mē ate amnhī kaxyw Tirtūm mē wa inhmā ajamaxpēr t̄yx kēt pyrāk. Anē.

Hāmri nhūm mē amnhī jaēr pē kot ā amnhī nhīpēx anh̄y ā omu nē no hawēnh rūnh nē tee ri axpēn pumunh pē hamaxpēr o kuhē nē axpēn mē:

—Kokȳy. Jejus kēp mē panhīō hkēt. Mē pahtō kot pu we te kot amnhī nhīpēx pyrā nē we kōk mā pakapēr nhūm we pama anhīkrē? Nā Jejus mē parom āhpumunh t̄yx o āhpumunh t̄yx. Jakamā na ā anē. Anē.

Jejus kot mēhō nē mēkarōmnuti kator ā harēnh

Matēwre 8.28-34; Makre 5.1-20

²⁶ Tā nhūm mē ra himō nhīhkjē hā krī pē Geras w̄yr rē. Himō nhīkjē hā na pre pika pē Garirej. Nē Garirej nhīkjē hā na Gerasja. Jakamā nhūm mē ra hwyr̄ rē.

²⁷⁻²⁹ Hāmri nē p̄r kre rūm hapōj nē api nē mra nhūm mēhō myja mē kutā tē. Na pre ra hwyr̄ mēkarōmnuti hkwȳ agjē nhūm mē ȳ hā oprē ht̄yx nē hkēnh nē ri mra. Nē ōrkwȳ kamā hkrī hkēt nē. Ām ri kapōt ā

pa ho pa. Mē htykjē hā pika kamā kēn kre kaēx kōt ri pa. Na pre ra krī nhō xwryn̄hjaja xatā tee ri unē nē hkaxpre. Tee ri k̄ax o ri hkaxpre htā no nhūm amnhī nē rēnh pa. Nhūm mēkarōmnuti tanhmā hkrā hto nhūm kapōt pix ā ri mra. Jakamā nhūm Jejus mē p̄r rūm hapōj nē api nhūm mē omu nē mē kutā tē nē Jejus kaxpa. Nhūm amnhī w̄yr omu nē nē tanhmā mēkarōmnuti mā kapēr to. Hāmri nhūm my xoprēja hwyr̄ tē nē kutā hkōn krā ho tēm nē nh̄y. Hāmri nē k̄axpēē amnhī tā kām kapēr. Nom tām kapēr kēt nē. Mēkarōmnuti nh̄y hā kām kapēr nē kām:

—Pa Tirtūm Kra Jejus? Kwa mo kaxyw na ka mē ixwyr̄ tē? Kwa tanhmā mē ixto hkēt nē. Anē.

³⁰ Hāmri nhūm mē kām:

—Kwa tanhmā na mē anhīxi kute? Anē.

Nhūm mē kām:

—Nā mē ixpē Mēoh̄tōhti. Anē.

Mēkarōmnuti ra kot hwyr̄ ohtō nē gjēx jakamā na prem ā kām amnhī nhīxi jarēnh anē.

³¹⁻³² Hāmri nē Jejus mā:

—Kwa jahti nē mē ijapōj nē mē kot amnhī xā ht̄yx kamā hamak tūm xā hwyr̄ mē ixrēnh kēt nē. Hagrō hkwȳ mūj w̄yr m̄n mē ixrē pa mē hpānhā hwyr̄ m̄n hagjē nā? Anē.

Hagrōja kii mē kēp am̄ym hixēt ā ri apkur o pa nhūm mē ā Jejus mā mē hwyr̄ amnhī to hwyr̄ anē. Hāmri nhūm mē kām:

—Tōe. Tō mē tām hwyr̄ m̄n mra. Anē.

³³ Hāmri nhūm mē kuma nē myta pē hapōj nē ma hagrōja w̄yr mrar kurē kumrēx nē mē kām gjēx pa. Hāmri nhūm myja akup̄ym tām hkrā. No nhūm hagrōja mēkarōmnuti pymaj am̄yra nē askahkūm nē hprōt nē himō hā krā hixēt ā axpum rōrōk nē gōx kām mrō nē pikaprār pa.

³⁴ Hāmri nhūm hagrō jamār xwryn̄hjaja tee ri omu hāmri nē ma mē ō patrāw w̄yr akup̄ym mē piitā mē kām harēnh o hprōt nē mra.

³⁵⁻³⁶ Nhūm mē tee ri mē kuma hāmri nē ma kot Jejus pumunh mā hwyr̄ mra nē hkaxpa. Nē kuri myta pumu nhūm ra akup̄ym tām hkrā nē tām amnhī nhīpēx nē ē kamā mex nē nh̄y. Nhūm mē kot hā omunh xwryn̄hjaja mē kām ujarēnh pa. Nhūm mē kuma nē tee ri amnhī kukamā hamaxpēr o ra kām ma nē.

³⁷⁻³⁹ Hāmri nē amnhī nē Jejus mā kapēr nē kām:

—E kwa mē tokyj ma akup̄ym amrar kurē kumrēx. Anē.

Hāmri nhūm mē kuma nē awjanā nē ma akup̄ym p̄r w̄yr mra nē agjē. Nhūm akup̄ym mex xwryn̄hta mē hkōt hkrā nom nhūm Jejus kām:

—Nā kot kaj mē ixkōt amōr kēt nē. Ma akup̄ym anhō krī hwyr̄ m̄n tē nē Tirtūm

kot tanhmã akupÿm ato mex to hã mē kãm amnhĩ jarēnh o ri mē hkõt apa. Anē.

Hãmri nhũm kuma nē ma akupÿm krĩm tē nē ri mē kãm Jejus kot tanhmã ho mex to hã harēnh ri mē hkõt pa.

Jejus kot wa ho axkrut nē wa ho mex ã harēnh

Matēwre 9.18-26; Makre 5.21-43

⁴⁰ Tã nhũm Jejus mē ma akupÿm xarmã mō nē rē nē mē kutēp mē pikuprōnh xwÿnhjē pumu. Nhũm mē ra amnhĩ wÿr mē omu nē mē kutēp gō jakãx ã pikuprōnh rax nē. Jakamã nhũm mē mē hwÿr pōj nhũm mē amnhĩ wÿr Jejus pumu nē hkĩnh nē.

⁴¹⁻⁴² Hãmri nhũm Jajti ma hwÿr tē. Ijaew nhō Tirtũm kapēr o mē ahkre xã hã ixkre jamãr xwÿnh na pre. Nhũm pre hkra ni pyxire. Hã amgrã pē 12. Tã ra kēp ã htÿx nē htyk kaxyw nē nō. Hãmri nhũm hipēēxãja tee ri omu hãmri nē Jejus wÿr tē nē kutã hkōnkrã ho tēm nē nhÿ nē ho kuwÿ nē kãm:

—Pa akupÿm mē ixto mex xwÿnh maati. E awÿr na pa tē. Na ra ixkra ixpē htyk kaxyw. Pa tee ri omu nē kaxyw amã ijamaxpēr nē awÿr tē. Kwa ma ixkõt inhōrkwÿ hwÿr tē nē inhmã omu nē tokyx inhmã ho mex nã? Anē.

Hãmri nhũm kuma nē ma hkõt tē. Nhũm mē ohtō nē wa hkõt pry hã mra nē axpēn nhigã nē axpēn kujahēk o hkõt mra.

⁴³ Hãmri nhũm mēhō nija haxwÿja wa hkõt tē. Na pre hte hkamrō hkryre rãhã ho pa hã ra amgrã kēp 12. Nhũm tōtō tee ri kot ho mex kaxyw hkane kaprÿ ho pa.

⁴⁴ Jakamã nhũm tee ri amnhĩ kukamã hamaxpēr hãmri nē Jejus jarēnh ma nē ma mē hkõt hwÿr htēm kurē kumrēx. Nom nhũm mē ohtō rax nē hkõt mōr jakamã nhũm mē hkaēx kōt hwÿr tē nē hkatut kōt kēp ã nhirē kupē. Hãmri nē ãm kēp ã pix kupēnh tã akupÿm mex.

⁴⁵ Hãmri nhũm Jejus kot kēp ã kupēnh ã amnhĩ tã omunh tã hēx rom mē ho hakēx nē mē omu nē mē kãm:

—Kwa mē atō na ka ri amnhĩ kaxyw inhmã ajamaxpēr tÿx pē ixpē ixē kupē? Anē.

Hãmri nhũm mē piitã tee ri axpēn pumu nē kãm amnhĩ tã aprã. Hãmri nhũm Simãw Pētre kãm:

—Mē kot apē amnãr griã kot ka kēt ri mēhō kot apē hkupēnh xwÿnh ã ri mē hkukja. Kwa mãn ãm mēhō amarĩ apē hkupē. Anē.

⁴⁶ Hãmri nhũm kãm:

—Nã mēhōja amarĩ hkupēnh kēt nē. Na amnhĩ kaxyw inhmã hamaxpēr tÿx pē ixpē hkupē. Tã ixãhpumunh tÿx xãja kōt na akupÿm mex. Nom ixte mēhō kot ixpē hkupēnh xwÿnhja pumunh jakamã na pa ixēx rom ã amnhĩ tã ri mē hkukjēr anē. Kwa mē atō inhmã amnhĩ jarē. Anē.

⁴⁷ Hãmri nhũm mēhō nita kuma nē tee ri kēp kot amnhĩ to hpimxur prãm kaprÿ. Hãmri nē hpijaãm kãm hwÿr httertē o tē nē kutã hkōn krã ho tēm nē nhÿ nē kãm amnhĩ jarē nē kãm:

—Ma pa na pa inhmã inhmex prãm xãj apē axē kupē. Tã na pa akupÿm inhmex. Anē.

⁴⁸ Hãmri nhũm Jejus kuma nē kãm:

—Tōe. Nã ra ate amnhĩ kaxyw inhmã ajamaxpēr tÿx kōt ate ã amnhĩ nhupēx anhÿr jakamã na ka akupÿm amex. E mãmri ajamakētkati nē ma akupÿm tē. Anē.

Hãmri nhũm kuma nē hkĩnh nē ma akupÿm tē.

⁴⁹ Rōm nhũm Jajti mã ãpēnh xwÿnhjē hō ōrkwÿ rũm ma ō patrãw kutã tē nē wa hkaxpa nē Jajti mã kãm:

—Kwa na ra apē akra ty. Jakamã mo kaxyw kot ka kēt amnhĩ kōt hwÿr Jejus o mō? Kwãr mãmri ma akupÿm tē. Anē.

⁵⁰ Hãmri nhũm Jejus kuma nē Jajti mã kãm:

—Kwa tee ri akra hkukamã ajamaxpēr kēt nē. Kaxyw inhmã mãn ajamaxpēr tÿx nē. Koja te ra apē htyk tã koja akupÿm amã htĩr. Anē.

⁵¹⁻⁵³ Hãmri nhũm mē mō nē ōrkwÿ hwÿr pōj nē hwÿr axã nē mē omu nhũm mē ra htyk xwÿnhã ã htũ rax nē. Nē omũj ri mur. Hãmri nhũm Jejus mē hwÿr axã nē mē mÿr ã mē omu nē mē kãm:

—Kwa mē hãmri amÿr kēt nē. Na nireta mē apē htyk kēt na ãm gōr nē nō. Anē.

Hãmri nhũm ra mē kot htyk ã omunh mex jakamã kuma nē ãm kuma nē axtem nē ri axpēn mã hã hpēr o axkē. Hãmri nhũm Jejus htyk xwÿnhã wÿr hitom wÿr ãr kaxyw nē amnhĩ kōt Juãw nē Xiakre nē Pētre nē kaxyw htyk xwÿnh katorxã nē hipēēxãja. Jajē pix na pre amnhĩ kōt mē ho agjē.

⁵⁴ Hãmri nē htyk xwÿnhã wÿr tē nē hpa hã kupy nē kãm:

—Pa? Kwa tokyx kãnhmã nhÿ. Anē.

⁵⁵ Hãmri nhũm akupÿm htĩr nē kãnhmã ÿr kurē kumrēx. Hãmri nhũm Jejus mē kãm:

—E kwa mē tokyx kãm mēmoj japēr kē kukrē. Mãn ra kãm prãm nē. Anē.

⁵⁶ Hãmri nhũm katorxã mē hipēēxã wa amnhĩ jaēr pē akupÿm htĩr kãm omu nē kamã no puma ho hkĩnh tÿx nē. Hãmri nhũm Jejus wa kãm:

—E wa inhma. Kēr ka wa akupÿm ixte war amã ho htĩr ã ri mē kãm ijarēnh o ri apa hkēt nē. ãm kwarĩ ho kwarĩ. Anē.

9

Jejus kot mē ho 12 nē ahpÿnhã mē rēnh ã harēnh

Matēwre 10.1, 10.5-15; Makre 6.7-13; Rukre 10.1-12; mããnhēn Atre 13.49-50, 18.6

¹⁻² Tã nhũm Jejus hkõt mē pa ho mē pa xwÿnh pē 12jē mã kapēr nē mē kãm:

—E më amnê ixwÿr mra nê ixkapêr ma. Na pa ra mê amâ ixâhpumunh tÿx xâ hkwyê gô. Jakamâ kêr ka mê inhÿ hâ ma ri akwÿjê hkôt tanhmâ mê ho mex to ho ri mê hkôt apa. Mê à xwÿnhjê ho mex o ri mê hkôt apa. Nê mê hkwyêjê nê mêkarômnuu japôj. Nê mê piitâ mê kâm anê kê mê tokyx Tirtûm kôt amnhÿ xunhwÿ kê mê ho hkra.

³ Nom kêr ka mê amnhÿ kôt akurêx ho ohtô nê ri ho apa hkêt nê. Nê amnhÿ kaxpar xâ hâ kô ho apa hkêt nê. Nê kawâ htuw nê ho apa hkêt nê. Nê amnhÿ kôt axâpkur xâ hâ anhô ho apa hkêt nê. Rÿ akâxpore rax nê ho apa hkêt nê. Âm mê anhô kamîs ho pixi nê haxâ nê ri hâ apa. Nê anhÿ kamâ à ri mê hkôt apa anê. Kê mê kot mê akapêr mar xwÿnhjaja tâm mân mê amâ mê anhô ho pa.

⁴ —Nê kêr ka mê nhÿri krî hō hwÿr pōj nê apōx xâ kamâ mêhō nhōrkwÿ kamâ hkôt ri apikamênh tâmtâ kurûm akupÿm ajapōj nê ma hpânhâ nhâm krî hō hwÿr apa. Nom atÿx ri nhâm mê hwÿr amrar nê nhâm mê hwÿr amrar kêt nê.

⁵ —Nê koja mê nhÿri mê akapêr kaga ka mê amnhÿ tâ mê kamâ ama nê tokyx mê kurûm ajapōj nê ma nhâm apa. Nê anojarêt nê mê noo mâ akuhê nê amnhÿ par â aw-jagrô kapî. Mê kot Tirtûm kaga hâ amnhÿ pumunh nhûm Tirtûm kôt amnhÿ pyrâ nê mê hkaga hâ mê kot omunh kaxyw ka mê â mê noo mâ amnhÿ nhîpêx anê. Hâmri nê ma hpânhâ krî hō hwÿr apa. Anê.

⁶ Nhûm pre â Jejus mê kâm mê àpênh â karô anê. Nhûm mê kuma hâmri nê hapôj nê ma mê hkôt pa. Ma krî piitâ hkôt akupÿm mê à xwÿnhjê ho mex nê Tirtûm kapêr o tanhmâ mê ahkre hto ho ri mê hkôt pa.

Pahi Eroxo tee ri kot Jejus kukamâ hamaxpêr à harênh

Matêwre 14.1-12; Makre 6.14-29

⁷⁻⁸ Hâmri nhûm pika pê Garirej kamâ mê piitâ Jejus jarênh ma nê ahpÿnhâ ri tanhmâ axpên mâ harênh to. Mê hkwyêjaja kêp finat Juâw Paxis akupÿm hÿr à ri harê. Nhûm mê hkwyêjaja amnepêr mê hkukamâ Tirtûm nhÿ hâ kapêr jarênh xwÿnhjê hō ra akupÿm hÿr à harê. Nhûm mê hkwyêjaja kêp finat Eris à axpên mâ harê. Jakamâ nhûm pahÿhti Eroxoja mê kot ahpÿnhâ tanhmâ ri harênh toja ma nê tee ri hkukamâ hamaxpêr.

⁹ Nê hamaxpêr o:

—Kwa mêhō na hte we ri â amnhÿ nhîpêx anhÿr o pa wehe? Nâ finat Juâw Paxis kêt. Ra ixte amnepêr hâ ixâmnhênh nhûm mê kot inhmâ mut krâhyr nê hpîr kênâ. Kwa mêhō na hte we ri â amnhÿ nhîpêx anê?

Anhÿr o hamaxpêr hâmri nê kâm omunh prâm nê.

Jejus kot mê ho ohtô nê mê kâm mê ô hâ harênh

Matêwre 14.13-21; Makre 6.30-44; Juâw 6.1-14

¹⁰ Tâ nhûm Jejus nhÿ hâ kapêr o mê pa xwÿnhjaja akupÿn hwÿr mran pōj nê mê kot ri tanhmâ amnhÿ nhîpêx to ho pa hâ kâm amnhÿ jarê. Hâmri nhûm mê kuma nê ma krî pê Pesêj wÿr kormâ mê o mô.

¹¹ Hâmri nhûm krî hkwyê nhō xwÿnhjaja ra ma mê môr â mê harênh ma nê ohtô nê ma mê hkôt mra nê nhÿri mê hkôt pōj. Nhûm Jejus amnhÿ kôt mê omu hâmri nê tanhmâ mê ho mex to ho xa. Kôt mê à nê mê pa xwÿnhjaja nhûm akupÿm mê ho mex. Hâmri nê Tirtûm kapêr o mê ahkre nê mê kâm:

—E kot kaj mê atô amâ amnhÿ tomnuj kaga hprâm xâj Tirtûm kôt amnhÿ xâm nhûm amnhÿ tâ apumu nê ato hkra. Hâmri ka ajamakêtkati nê amex nê axâmnhÿx ri apa.

Anhÿr o mê kâm kapêr pê mê ahkre ho xa.

¹² Tâ nhûm myt àr kaxyw nhûm Jejus nhÿ hâ mê ahkre ho mê pa xwÿnhjê pē 12jaja hwÿr mra nê kâm:

—Kwa na ra kamât o mô. Mê hano kê mê amnhÿ to krî hō japêr nê tokyx amnhÿm mêmoj japrô nê kuku nê hikwÿ nê gôr. Mo mê panhō? Âm jar kapôt pix kênâ. Anê.

¹³⁻¹⁴ Hâmri nhûm mê kuma nê mê kâm:

—Kwa ka mê kamjaja mê kâm mêmoj gô kê mê kuku. Anê.

Nhûm mê ohtô rax nê mê hkôt mra. Mêmyjaja kêp 5.000 nê kaxyw mê hprô nê mê hkrajaja. Jakamâ nhûm mê kêp 12jaja Jejus kôt â mê kâm kapêr anhÿrja ma nê tee ri mê hkukamâ hamaxpêr nê kâm:

—Kwa nâ mo mê panhō rax? Mê panhō pãwti kêp sîk nê kaxyw tep grâ axkrute kênâ kot kêt we mê piitâ mê hipêx pa. Xâ kot paj mê ma mra nê nhÿri mê kâm mê apkur xâ japrô nhûm mê kuku? Anê.

Hâmri nhûm mê kâm:

—Nâ pu mê kâm mêmoj japrôr kêt nê. Mê panhōta kot puj mê kâm ho anhgrâ. E mê kâm anê kê mê ahpÿnhâ ri hije nê hkrî nê apku. Anê.

¹⁵ Hâmri nhûm mê kuma nê mê kâm anê nhûm mê piitâ hkrî pa.

¹⁶ Hâmri nhûm Jejus pãwti mê tepta jamÿ nê kânhmâ kaxkwa hwÿr rît nê kânhmâ kupê nê Tirtûm mâ harê nê kâm:

—Pa Papaj? Apê mê inhmâ mê inhō xwÿnhjê jakamâ amex o amex. Anê.

Hâmri nê mê kâm ho hkry hpa nê hkôt mê pa ho mê pa xwÿnhjê mâ kugô nhûm mê ô ri ho xa nê ho mê hipêx par kumrêx.

¹⁷ Nhûm mê piitâ apkur mex o hkrî. Mêôja mê kêp grire htâ nhûm Jejus tanhmâ mê kâm ho rax to nhûm mê ohtô rax tâ piitâ kuku nê ho ôhy htu hpa. Nhûm arî mêô jakrêx prâ nhûm Jejus kôt mê pa ho mê pa xwÿnhjaja

akupÿm hakrêx o pikuprõnh pa nê ho kawã ho 12 nê ho nyt pa.

Jejus kot amnhî tâ hkõt mê pa xwÿnhjê kukjêr â harênh

Matêwre 16.13-19; Makre 8.27-29

¹⁸ Tã nhûm arîgro hõ hã nhûm Jejus nhÿri ahte Tirtûm mã amnhî jarênh o nhÿ nhûm hkõt ri mê pa ho mê pa xwÿnhjaja ma hwÿr mra. Hãmri nhûm amnhî wÿr mê omu nê amnhî tâ tanhmã mê hkukjêr to nê mê kãm:

—Kwa mê inhmã mêmoj jarê. Tanhmã na htem ahpÿnhã xepên mã ijarênh to wehe? Anê.

¹⁹ Hãmri nhûm mê kãm:

—Nã na htem ahpÿnhã tanhmã ajarênh to. Na hte kamã mê hkwÿjaja ato finat Juãw Paxis â ajarê. Nhûm kamã mê hkwÿjaja ato finat Eris â ajarê nhûm mê hkwÿjaja tôhã apê Tirtûm nhÿ hã kapêr jarênh xwÿnhjê hõ ra akupÿm htîr â ajarê. Â na htem ahpÿnhã ajarênh anê. Anê.

²⁰ Hãmri nhûm mê kuma nê mê kãm:

—No mê kajaja? Ixpê mêhõ hã na ka htem ixkamnhîx? Anê.

Hãmri nhûm Simãw Pêtre kãm:

—Nã mê pajaja na pa htem apê Tirtûm kot mê ixkaxyw axãm nê mê ixwÿr amênh xwÿnh â ajarê. Nê apê mê ixpiitã mê inhõ Pahi Maati hã ajarê. Â na pa htem ajarênh anê. Anê.

²¹ Hãmri nhûm kuma nê mê kãm:

—Tÿ. Nã âm hãmri na ka htem â ijarênh anê. Â ixte anhÿr kênã. Nom kêr ka mê inhmar kumrêx. Kêr ka mê kormã â akwÿjê mã ijarênh anhÿr o ri apa hkêt nê. Anê.

Jejus kot amnhî kukamã amnhî jarênh

Matêwre 16.21; Makre 8.31-33

²² Nhûm Jejus arî hkõt mê pa ho pa xwÿnhjê mã kapêr nê hprî hã tanhmã mê kãm amnhî jarênh to nê mê kãm:

—Nã âm hãmri na Simãw Pêtre ijarê. Mê kajaja ra mê ate ja hã ixpumunh mex. No mê pahkwÿjaja na mê akînhã mê kãm ja hã ijarênh mar nê ja hã ixpumunh prãm kêt. Ijaew pigêtjaja nê Tirtûm kapêr tûm o mê ahkre o mê pa xwÿnhjaja nê patre krãhtûmjaja mê kãm ja hã ixpumunh prãm kêt. Jakamã koja mê nhÿrmã ixpynê nê ixtak rax nê. Hãmri nê ixpi. Nom kot paj ixtyk â apkati axkrunêpxi nhûm Tirtûm akupÿm ixto ixtîr. Anê.

Jejus krajaja tanhmã kot amnhî nhîpêx to hã mê harênh

Matêwre 10.31, 16.24-28; Makre 8.34-9.1; Rukre 14.25-33; Juãw 12.24-26; määnêh Karatas 5.24; Piripos 2.4; Wam Pêtre 4.1-2; Apokarip 2.10-12

²³ Nhûm pre â Jejus amnhî kukamã hkõt mê pa ho mê pa xwÿnhjê mã amnhî jarênh

anê hãmri nê hpãnhã mê kot mar o kuhê xwÿnh piitã mê kãm kapêr nê mê kãm:

—E kot ka mê atõ ate ixkõt amnhî xãm â amnhî jarê hãmri nê määnêh â amnhî jarênh anê nê amnhî jarênh o: “Jesús kêp inhõ Pahihti jakamã kot paj kapêr kõt pix mã amnhî nhîpêx rãhã ho ri ixpa. Kwãr ixkwÿjaja tanhmã hã inhîpêx to.” Anhÿr o apkati mê â amnhî jarênh anê.

²⁴ —Koja mê ixtã mê atõx pí rÿ tanhmã mê atõ hto ka ty. Tã koja akaxwÿnh ma inhõ krî mex wÿr àpir kurê kumrêx. Hãmri nê kamã atîr tûm nê amex rãhã apa ho apa. Nom kot kaj mê jar atîr prãm xãj ixkaga hãmri nê hwÿr axàpir kêt nê.

²⁵ —Nê koja mêhõ hikukrêx rax gryk â Tirtûm kaga. Hã koja nhÿrmã ty nê ÿ kamã kuwy hwÿr ma mõ nê amnhî kõt hikukrêx õ hpyr nê o mór kêt nê. Kaja tee ri kuwy hwÿr mór pymaj amnhî nê hikukrêx rax o amnhî pãnhã amnhîrer prãm kaprÿ.

²⁶ —Nê koja mêhõ ixte mê ahkre hã inhma nhûm ja kêp omnuj nhûm ixkaga japêr. Hã kot paj nhÿrmã akupÿn mê ato amnhîptâr kaxyw akupÿn wrÿ nê amnhî xwar kot ixkaga xwÿnhnta kaga. Âm hãmri na pa â mê amã amnhî jarênh anê. Kot paj nhÿrmã man akupÿn inhõ Papaj nhÿ hã ixte mê ho amnhîptâr kaxyw akupÿn wrÿ. Nhûm kapêr o mê wrÿk xwÿnhjaja man ixkõt wrÿ. Pa mê wrÿ hãmri nê mê kot ixkaga xwÿnhjaja pa amnhî pyrã nê mê hkaga.

²⁷ âm hãmri na pa â mê amã amnhî jarênh anê. Kot paj nhÿrmã akupÿn ixte mê ato amnhîptâr kaxyw mê awÿr wrÿ. Tã kot kaj mê akwÿjaja kormã atîr ri ja kukamã tanhmã ixte amnhî nhîpêx to hã ixpumu. Anê.

Jejus kot kên prêk nhîmõk â hirã kamã âm â harênh

Matêwre 17.1-8; Makre 9.2-8; määnêh Sikûn Pêtre 1.16-18

²⁸ Tã nhûm semãnja hapêx nhûm Jejus Simãw Pêtre nê Xiakre nê Juãw wa mê kãm kapêr nê mê kãm:

—E pu mê ma hixêt prêk mÿj wÿr mõ nê hwÿr api nê himõk â Tirtûm mã amnhî jarê. Anê.

Hãmri nê ma amnhî kõt hwÿr mê o mõ nê hwÿr mê ho api.

²⁹⁻³² Hãmri nhûm Jejus Tirtûm mã amnhî jarênh o xa. Nom nhûm hkõt hixêt wÿr mê mór xwÿnhjaja õtxwa htÿx nê ra gõr nê hikwÿ. Pu nhûm Jejus axtem hkuk nê xa. Nê ê haka htÿx nê xa. Hãmri nhûm ja wa kaxkwa rûm wrÿ nê kuri kãm kapêr o xa. Finat Mojes mê finat Erisja wa kuri kãm kapêr o xa. Na pre ra amnepêm Tirtûm amnhî wÿr wa ho api. Tã nhûm wa ra akupÿn wrÿ nê Jejus mã kapêr o xa. Mê hpimràatã hirã htÿx kãm xepên mã kapêr o kuhê. Jejus kormã krî

pê Jerujarê kapem mê kot hpîr kêt ri nhûm wa mê axpên mâ htyk kukamâ harênh o kuhê. Nhûm wa kâm:

—Nâ Tîrtûm jamaxpêr xâ hkôt kot kaj â amnhî nhîpêx anê.

Anhÿr o Jejus tyk kukamâ kâm hamaxpêr o hihtÿx o wa xa.

Rôm nhûm mê ôt xwÿnhjaja hkrâ hapôj nê tee ri Jejus pumu. Nhûm mex kumrêx nê hirâ htÿx kâm xa nhûm mê omu nê kuri wa âm xwÿnhta wa omu.

³³ Hâmri nhûm Mojes mê Eris wa ra akupÿm nojarêt nhûm Simâw Pêtre tee ri ja hâ wa omu nê Jejus mâ kâm:

—Kwa Pahihti. Nâ âm hâmri na pu mê amnê mô. Kwa pu mê kritpêm jar axkamê nê tokyx panojarêt kêt nê. Pa mê amâ pô nhîrônho o axkrunêpxi nê hipêx. Amâ hô nhîpêx nê Mojes mâ hô nhîpêx nê Eris mâ hô nhîpêx ka mê kamâ akrî. E kwa pa mê amâ ho anê nâ? Anê.

Nhûm amnhî krâ hkôt â kâm kapêr anê.

³⁴ Hâmri nê kormâ kâm kapêr rôm nhûm kakrâ jaka tÿxja wÿr nê mê hkunor nhûm wa mê kamâ kuhê. Hâmri nhûm Simâw Pêtre mê Juâw mê Xiakreja mê tee ri kakrâ kot amnhî nhîpêx â omu nê kâm ma nê.

³⁵ Hâmri nhûm kakrâ kamâ Tîrtûm mê kâm kapêr nê mê kâm:

—E ota Ixkra xa. Mê ate kamâ ajamak o apa xwÿnhta na. Inhmâ hapêê. Kêr ka mê âm tapxipix kapêr mar tÿx o ri apa. Anê.

³⁶ Hâmri nhûm mê kuma nê kânhmâ rît nê âm Jejus pix pumu nhûm ahte xa. Nhûm kuri wa âm xwÿnhta wa ra ma akupÿm api nhûm mê Jejus pix pumu.

Mê tapxipixjaja na prem â Jejus kot amnhî nhîpêx anhÿr â omu nom taxy kormâ nhâm hkwyjê mâ harênh kêt nê. Âm axpên pix mâ harênh pê hkukamâ hamaxpêr o ri Jejus kôt pa.

Jejus kot mêhō nê mêkarōmnuti janor ā harênh

Matêwre 17.14-21; Makre 9.14-29

³⁷ Tâ nhûm apkati nhûm mê ma akupÿm ahparmâ hkwyjê hwÿr wÿrk o mô. Nê mê hwÿr hpôx o mô nhûm mê ra mê kutêp pikuprônho rax nê kuhê.

³⁸ Hâmri nhûm mêhō myja amnhî wÿr mê omu nê mê kutâ tê nê mê hkaxpa nê Jejus pumu nê kâm:

—Pa Jejus. Kwa ixkamâ axukapri nê inhmâ ixkra ho mex. Âm ixpê pyxire.

³⁹ Na hte mêkarōmnuti xatâ ixpê tanhmâ ho nhûm ÿ hâ amÿra nê mra nê rôrôk nê hakwa jamrô ho hikwÿ nhûm tokyx kâm urer kêt nê. Nhûm ra ixpê homnuj tÿx nê.

⁴⁰ Hâmri pa akôt mê pa ho mê pa xwÿnhjê hwÿr o tê nhûm mê kot inhmâ ho mex kaxyw tee ri tanhmâ ho hkapyrÿ. Anê.

⁴¹ Hâmri nhûm kuma nê hkôt mê pa ho pa xwÿnhjê mâ kâm:

—Hêxta waa nê. Na ka mê ra ixte Tîrtûm nhÿ hâ mê ho mex â ixpumunh o ixkôt apa ryy tâ kormâ ixpyrâ nê â mê hipêx anhÿr kêt nê. Mân ka mê kormâ mê kaxyw Tîrtûm kôt ajamaxpêr tÿx kêt nê. Anê.

Hâmri nê myta mâ kâm:

—E amnê ixwÿr akra ho tê pa inhno ho omu. Anê.

⁴² Hâmri nhûm hwÿr o tê nhûm mêkarōmnuti axte kêp ho pika kura nhûm amÿra nê tēm nê nô. Hâmri nhûm Jejus omu nê nê mêkarōmnuti kator nhûm akupÿm mex nê kânhmâ nhÿ. Hâmri nhûm akupÿm hipêêxâ mâ kugō.

⁴³ Hâmri nhûm mê amnhî jaêr pê Jejus kot â hipêx anhÿrja â omu nê ri axpên mâ harênh o:

—Kokÿÿ. Hêxta waa nê. Pêr âm Tîrtûmja âm âhpumunh o âhpumunh. Anê.

Jejus kot htyk kukamâ amnhî jarênh

Matêwre 17.22-23; Makre 9.30-32

⁴⁴ Hâmri nhûm Jejus hkôt mê pa ho mê pa xwÿnhjê mâ kâm:

—E kot paj mê amâ tanhmâ amnhî jarênh to ka mê inhmar tÿx nê. Na pa pre mê ate aa mêmoj pumunh kêt kwÿ ho anhÿr o ixpa pix kaxyw mê awÿr ixwÿrk kêt nê. Koja mê tokyx mê kâm ixtâ amÿnê nhûm mê ixpi. E kwa kêr ka mê ja ma nê hâ anohtÿx nê ho apa. Anê.

⁴⁵ Hâmri nhûm mê tee ri kot â amnhî jarênh anhÿrja ma nê axpên mâ:

—Kwa mo na pêr ri â amnhî jarênh anê? Kêp mê panhō Pahi Maati hâ kot amnhî jarênh kênâ kot kêt mêhō kupî.

Anhÿr o axpên mâ ri harênh o kuhê. Hâmri nê mê kâm â kot amnhî jarênh anhÿrja mar prâm kêt jakamâ hpri hâ tanhmâ hâ hkukjêr to hkêt nê. Âm akryk mar o kuhê.

Mê kot amnhî to rûnh xwÿnhjê jarênh

Matêwre 18.1-5; Makre 9.33-37; Rukre 22.24-27; mǎānēn Piriṓpos 2.3-9; Wam Pêtre 5.5

⁴⁶ Tâ nhûm Jejus kôt mê pa ho mê pa xwÿnhjaja tanhmâ amnhî kukamâ hamaxpêr to hāmri nê axpên mâ:

—Kwa mê pahō kot puj we nhÿrmâ pahpê pahi nê mê ho amnhîptâr rax o pahkwÿ jakre? Anê.

Hâmri nê ja hâ axpên kukjêr o Jejus kôt mô nê axpên mâ: “Nâ pa.” Nhûm mê hkwyjja: “Nâ kêt pa.” Anhÿr o hkôt mô.

⁴⁷ Hâmri nhûm Jejus mê kuma nê mê hamaxpêr kôt mê omu. Hâmri nê xa nê amnhî wÿr mêhprîjê mâ hpa ho apê nhûm hwÿr tê nê kuri xa.

⁴⁸ Hâmri nhûm Jejus hkôt mê pa ho pa xwÿnhjê mâ tanhmâ harênh to nê mê kâm:

—E më inhma. Kêr ka më apê pahi pyrâk o tanhmâ amnhî jarênh to ho ri apa hkêt nê. Âm te amarî ri më apa pyrâk o amnhî nhîpêx o ri apa. Jao nhÿri mëhprîre hõ pumu nê kamâ axukapri ho kâm mëmoj tanhmâ ho rÿ kâm mëmoj gõ. Hâmri nê te pa ate tanhmâ ixto mex to pyrâk o amnhî nhîpêx. Nê kot ka më atõ pa tanhmâ ixto mex to nê te ate Tirtûm tanhmâ ho mex to pyrâk o amnhî nhîpêx. Kot kaj më â amnhî nhîpêx anhÿr o ri apa nhûm Tirtûm ja hâ më apumu nê më ate amnhî to rûnh kêt tâ nhûm tãm më ate amnhî to rûnh xwÿnh â më ajarê. E kot kaj më amâ amnhî to rûnh prâm nê â amnhî nhîpêx anhÿr o ri apa. Anê.

Mêhõ kot Jejus nhÿ hâ tanhmâ amnhî nhîpêx to hâ harênh

Makre 9.38-41

⁴⁹ Hâmri nhûm Jejus kôt më pa ho pa xwÿnhjê hõ pê Juâwja nhÿhÿnh hwÿr hpõx o tẽ nê kâm:

—Kwa Pahihti. O mÿj mëhõ kêp më pahkwÿ hkêt tâ anhÿi jarênh kôt më nê mëkarõmnuati janor o pa. Pa më tee ri kot â amnhî nhîpêx anhÿr â omu nê nê kâm ixkapêr. Kêp më pahkwÿ hkêt kênâ kot kêt â më hanor anhÿr o pa. Anê.

⁵⁰ Hâmri nhûm kuma nê kâm:

—Kwa nâ ja nê tanhmâ kâm nê hkêt nê. Kojâ mëhõ më pahkwÿm ri tanhmâ më ahkre hto hkêt nê hãmri nê kêp më panhîõõ. Ra më pahkõt kot amnhî nhîpêx o pa mâ kênâ. Jakamâ kwa më ja nê tanhmâ kâm akapêr to hkêt nê. Kwâr mãmri â amnhî nhîpêx anhÿr o ri pa. Ja mex kênâ. Anê.

Samar nhõ xwÿnhjaja kot Jejus kaga hâ më harênh

Atre 8.14-15

⁵¹ Hâmri nhûm Jejus akupÿm kaxkwa hwÿr âpir kaxyw ra hwÿr apkati grêre ho mõr jakamâ nhûm hamaxpêr o:

—E pa ma akupÿm Jerujarê hwÿr mõ. Nâ kot paj anê. Mê kot kamâ tanhmâ ixto mâ tâ kot paj ma akupÿm më hwÿr mõ. Anê.

⁵² Hâmri nê amnhî kukamâ më hkwyjê rê nhûm më ma më hkukamâ Samar nhõ kri kamâ nhÿri më kot amnhîm hikranh xâ japêr o mõ.

⁵³ Nom nhûm Samar nhõ xwÿnhjaja kêp Jerujarê nhõ xwÿnhjê hprâm nõkati jakamâ Jerujarê hwÿr mõr â më harênh ma nê amnhî nê më hkurê.

⁵⁴ Hâmri nhûm më tee ri amnhî tâ më kuma nê awjanâ nê akupÿm Jejus wÿr mra nê kâm më harê. Hâmri nhûm Juâw më Xiakre wa më harênh ma nê më kamâ gryk nê nê Jejus mâ:

—Kwa Pahihti. Nâ na më axtem nê amnhî nê më pahkurê. Jakamâ e kwa pu më kaxkwa rûm më hipy kuwy hpõk kwÿ rê kê më hkaxâr pa nâ? Anê.

⁵⁵ Hâmri nhûm wa kuma nê wa kâm:

—Tk. Kwa nâ wa ajamaxpêrja mex kêt. Pu më â ri më hipêx anhÿr kêt nê. Kojâ Tirtûm kâm ja ho anhÿr prâm nê rÿ tãm tanhmâ më ho. No më papajaja pu më ri më kamâ pagryk xâj tanhmâ më hipêx to hkêt nê. Pu më â më hipêx anê nê ra amnhî tomnuj tÿx nê. Kwa wa ri â ajamaxpêr anhÿr kêt nê. Anê.

⁵⁶ Hâmri nê më ma Samar rûm hapõj nê hpânâ nhâm kri hõ hwÿr pa.

Mê hkwyjaja kâm Jejus kôt pa hprâm â më harênh

Matêwre 8.18-22

⁵⁷ Tâ nhûm Jejus më kormâ mõr ri nhûm mëhõja hwÿr tẽ nê kâm:

—Pa Jejus? E kot paj ma akõt ixpa ho ixpa. Anê.

⁵⁸ Hâmri nhûm kuma nê kâm:

—Ko ka mâ. Kam nê rÿ ma ixkõt ri apa ho apa. Nom kêr ka inhmar kumrêx nê rÿ kormâ ixkõt apa. Na hte xore pika hkre kamâ hikwÿ xâ. Nê kuwênhre pÿ nhûmõk â hikwÿ xâ. No pa na Tirtûm kot më awÿr inhmênh xwÿnh tâ jajê hkînhâ inhõrkwÿ hkêt. Na pa hte am nhâm kri hõ hwÿr ixpa nê nhâm ixpa. Tâ xâ kot kaj ixpyrâ nê â amnhî nhîpêx anhÿr o ri apa nâ? Anê.

⁵⁹ Nhûm pre â kâm kapêr anê hãmri nê nhâm mëhõja wÿr apkjê nê kâm:

—Pa? No ka? Xâ kot ka ma ixkõt apa ho apa nâ? Anê.

Hâmri nhûm kâm:

—Tÿ no am kormâ. Kojâ nhÿrmâ inhîpêxâja tanhmâ amnhî to nê ty mân. Pa haxâ hãmri nê rÿ kormâ ma akõt ixpa ho ixpa. Anê.

⁶⁰ Hâmri nhûm Jejus kuma nê kâm:

—Kwa nâ ri â ajamaxpêr anhÿr kêt nê. Ma ixkõt apa ho apa kurê kumrêx. Kê mëmoj ano kupyr rÿ inhê apê amnâr kêt nê. Kwâr më htÿr tûm nê më pa hkêt mâ xwÿnhjaja mân axwakre kamâ amâ anhîpêxâ jamâr o pa nhûm nhÿrmâ ty kê më amâ haxâ. Ka mãmri ma Tirtûm kapêr o më ahkre ho ri më hkõt apa. Kê më ama nê më hkwyjaja hkõt amnhî xunhwÿ nhûm më ho hkra. Anê.

⁶¹ Nhûm pre â kâm kapêr anê hãmri nhûm nhâm mëhõ myja haxwÿja hwÿr tẽ nê kâm:

—E. Pa kot pa ma akõt ri ixpa ho ixpa. Nom kormâ. Pa ma akupÿm tẽ nê ixkwÿjê mâ amnhî jarê nê tanhmâ amnhî to hpa mân. Hâmri nê mëmo arÿgo hâ rÿ kormâ ma akõt ixpa ho ixpa. Anê.

⁶² Hâmri nhûm tee ri kuma nê kâm:

—Kwa nâ. Kot kaj â ajamaxpêr anê hãmri nê ixkõt apa htâ te amnhî katut kôt arÿt râhâ ho ri apa pyrâk o amnhî nhîpêx. Kwa â ajamaxpêr anhÿr kêt nê ma ixkõt apa kurê kumrêx. Anê.

10

Jejus kot mē hwýr mē kēp 72 rēnh ā harēnh Matēwre 10.1, 10.5-15; Makre 6.7-13; Rukre 9.1-6, 9.10-11; määnēn Atre 13.50-51, 18.6

¹ Tā nhūm Jejus axte amnhī kaxyw mē ho 72 nē mē kurē. Hāmri nē mē ho axkrut kapēn nē ma nhýhým krī hkwy hkōt amnhī kukamā mē kurē. Mē kot mē hkōt ri Tirtūm kapēr o mē ahkre ho pa kaxyw.

² Hāmri nē mē kām:

—Na mē ohtō rax nē kormā Tirtūm kapēr mar kēt nē. No ām kormā mē ate mē kām harēnh o apa kaxyw mē agrēre. Te pur kām harōj kamrēk pa nē ām tā no ām kaxyw hikēnh xwýnh grēre pyrāk. Jakamā kwa mē ho Tirtūm wý kē axte mē kaxyw mē hkwyjē rē.

³ —E kot paj ma mē hwýr mē arē. Ma mē hkōt mē ate Tirtūm kapēr o mē ahkre ho ri apa kaxyw. Jakamā kot kaj mē te ate ōwēhti kot mry xoprē hwýr amnhī to mrrar nhūm kot hkwy hpar pyrāk o amnhī nhīpēx. Koja mē hkwyjaja mē ate mē ahkre ma nhūm ja mē kēp omnuj nē nhūm mē hā tanhmā mē anhīpēx to. Tā kēr ka mē tee ri amnhī kukamā ajamaxpēr nē amā mē uma hkēt nē.

⁴ —Nē kēr ka mē hwýr anojarēt nē amnhī kōt amrykā rý akawā rý aparkā hō ho apa hkēt nē. Ām anhy kamā ma mē hwýr apa. Nē mē hwýr mra nhūm mē nhýri pry hā mē atō kaxpa nē amā kapēr o xa ka wa axpēn mā akapēr ry hkēt nē. Anojarēt kām kām akapēr krānre nē mē hakre nē ma krīm apa.

⁵ —Nē kēr ka mē hwýr pōj nē nhýri mē ōrkwy hwýr agjē nē mē kām: “Xā kot paj mē ato Tirtūm wý kē mē ato mex nē ka mē ajamakētcati nē ri apa?” Anē.

⁶ Hāmri nhūm mē ama nhūm ja mē kām mex japēr nhūm mē hkīnh nē amā: “ý kam nē māmri mē ixto awý.” Anē. Hāmri ka mē ama nē tanhmā mē ho Tirtūm wýr to. No koja mē apē ja kaga ka mē ho hwýr kēt nē.

⁷ —Nē kēr ka mē nhýri mē ōrkwy kamā mē hwýr pōj hāmri nē mē hkōt ri apikamēnh tāmtā nē akupým mē kurūm ajapōj nē ma hpānhā krī hō hwýr apa. Nē mē axāmnhix mē kuri axāpkur o ri apa. Mēmoj to akōm o ri apa. Ra mē ate mē ho mex pē mē kām Tirtūm kapēr o mē ahkre ho apa kēnā. Jakamā kwār mē māmri amnhī pānhā mē amā mē axāpkur xā gō ka mē kuri mē apku.

⁸ —Nē kēr ka mē nhýri mē hwýr pōj nhūm mē ato mex nē. Nē mē amā mēmo mē apkur xā gō ka mē māmri axāmnhix aku. Aa kormā mē ate mēmojta kur kēt tā māmri ajamakētcati nē aku. No tee ri amnhī kukamā tanhmā ajamaxpēr to hkēt nē.

⁹ —Nē kēr ka mē ā mē kām akapēr anē nē mē kām: “Tirtūm kām mē ato hkra hprām.

Na hte amnhī wýr mē awý.” Anē hāmri nē akupým mē kām mē ā xwýnhjē ho mex. Ā kot kaj mē mē kām amnhī nhīpēx anhyr o ri mē hkōt apa.

¹⁰ —Nē kēr ka mē nhýri mē hwýr pōj nhūm mē ām mē apumu nē amnhī nhōrkwy hwýr mē awýr kēt japēr. Hāmri ka mē tee ri amnhī tā mē omu hāmri nē ra ma nhām apa kaxyw.

¹¹ Hāmri nē anojarēt nē mē kām: “E mē inhma. Tirtūm kot mē pahwýr mēnh xwýnhta na mē awýr wa inhmē pa wa mē awýr mō. Wa ixte Tirtūm kapēr o mē ajahkre kaxyw. Kām mē ato hkra hprām nhūm wa ixte mē amā harēnh kaxyw na pa pre wa ā mē awýr inhmōr anē. Tā ka mē harēnh ma nē wa ixkaga. Jakamā kot paj wa jar mē anhō krī kamā amnhī par kā hā awjagrō kapī. Mē ate Tirtūm kaga hā amnhī pumunh nhūm Tirtūm kot amnhī pyrā nē mē akaga hā mē ate omunh kaxyw kot paj wa mē anoo mā ā amnhī par kā hā awjagrō kapīr anē. Kot kaj mē nhýrmā tee ri ā amnhī nhīpēx anhyrja mā ajamaxpēr nē akaprī htýx kumrēx kām ga. Ām hāmri na pa wa mē amā ja jarē.” Anhyr o mē kām akapēr nē mē kēp ajapōj nē ma hpānhā nhām krī hō hwýr apa kurē kumrēx.

¹² —Koja nhýrmā Tirtūm mē kot amnhī tomnuj myrapē tanhmā mē ho. Na pre ra ā krī pē Sotō nhō xwýnhjē nhīpēx anē. Na prem amnhī tomnuj týx o pa nhūm Tirtūm tanhmā mē kot amnhī tomnuj týx ā tanhmā mē ho. Tā jar mē kot kām ixkapēr mar prām kēt nē mē kot ixkaga xwýnhjaja. Koja Tirtūm ixtā mē omu nē kot Sotō nhō xwýnhjē nhīpēx pyrāk o mē hipēx nom tanhmā mē ho htýx o mē hakre.

—E kēr ka mē ma krī hkwy hkōt apa nē ā mē kām akapēr anhyr o ri apa. Anē.

Mē kot Tirtūm kōt hamaxpēr kēt xwýnhjē jarēnh

Matēwre 11.20-24

¹³⁻¹⁴ Tā nhūm Jejus krī hkwy nhō xwýnhjē mā kapēr o xa nē mē kot amnhī tomnuj ā mē kām akir. Krī pē Korajī mē Pesēj nhō xwýnhjē kumrēx mā kapēr nē mē kām:

—E mē inhma. Amnepēm krī pē Sitō mē Xir wa kamā mē pa xwýnhjaja na prem tanhmā amnhī tomnuj týx to ho pa nhūm Tirtūm mē omu nē hā mē homnuj týx nē. Tā kwa mē o kora Korajī mē Pesēj wa kamā mē apa xwýnhjaja. Ra ixte mē amā mē ate mēmoj pumunh kēt o anhyr rax o ixpa htā ka mē omu nē arī amnhī tomnuj o ri apa nē tokyx amnhī tomnuj kaga hkēt nē. Jakamā kot kaj mē amex kēt nē. Kop apu Sitō rý Xir kamā mēn ixte mē kām aa mē kot mēmoj pumunh kēt kwý ho anhyr o ri ixpa ronhýx mē omu nē mē arom amnhī kaxyw ixkōt hamaxpēr kurē kumrēx. Nē tee ri tanhmā amnhī tomnuj to ho pa hā amnhī pumu nē

hkapri nê ä amnhî nhîpêx anhÿr kaga hpa. No mē kajaja na pa tee ri mē amā tanhmā amnhî nhîpêx to ho ri ixpa kaprÿ. Ka mē ja hā ixpumu nê am ixpumu nê amnhî tomnuj kaga hkêt nê. Tā koja nhÿrmā Tirtûm mē piitā mē kot amnhî tomnuj mÿrapê tanhmā mē hipêx to. Hāmri nê tanhmā Sitō mē Xir wa kamā mē pa xwÿnhjê jarênh to nhûm mē kot amnhî tomnuj mÿrapê amnhî xā htÿx kamā hamak o ri pa. No mē kajaja mē ate amnhî tomnuj tÿx o mē hakrenh jakamā koja Tirtûm mē hkînhā mē atomnuj tÿx o mē atomnuj tÿx. Ka mē amnhî xā htÿx kamā ajamak rāhā ho ri apa ho apa. Anê.

¹⁵ Nhûm pre ä Jejus mē kām kapêr anê. Hāmri nê hpānhā Kapanau nhō xwÿnhjê mē kapêr nê mē kām:

—No mē apê Kapanau nhō xwÿnhjaja. Kot kaj mē ajaxwÿja mē amex kêt nê. Mē ate amnhî tomnuj kagare pyrā nê Tirtûm nhō krî hwÿr akrā ho apa. Nom kot kaj mē atō hwÿr axāpir kêt nê. Kot kaj mē ma kuwy maati hwÿr ajapêx pa kām ga.

¹⁶ Anhÿr o mē kām kapêr hāmri nê hpānhā hkôt mē pa ho mē pa xwÿnhjê mē kapêr nê mē kām:

—Kot kaj mē Tirtûm kapêr o mē ahkre ho ri apa nhûm mēhō ama nê akapêr kôt amnhî nhîpêx. Hā koja te pa kot ixkôt amnhî nhîpêx pyrāk o amnhî nhîpêx. No koja amar kêt nê akaga hāmri nê te pa kot inumar kêt nê ixkaga pyrāk o amnhî nhîpêx. Jao määnēn Tirtûm kaga.

Anê hāmri nhûm mē kuma hāmri nê angrā nê axkrut kapēn nê ma ahpÿnhā krî hkôt angrā.

*Mē hkînh nê ri mē pa xwÿnhjê jarênh
Apokarip 3.5*

¹⁷ Tā nhûm mē kēp 72jaja krî hkwy rūm akupÿn Jejus wÿr pōj. Piitā hkînh nê hpōx pa. Hāmri nê kām:

—Kwa Pahihti. Na pa prem anhÿ hā mē nê mēkarōmnuti japōx rax nê. Na pa prem mē nê mē hano nhûm mē am mē kurûm hapōx kurê kumrêx. Anê.

¹⁸ Hāmri nhûm mē kuma nê mē kām:

—Tōe. Ixāhpumunh tÿx o ixte Satanasti jakrenh jakamā na ka htem inhÿ hā mē hano nhûm mē tee ri mē akutā hihtÿx prām. Hāmri nê te na haxēnh prēprêk pyrāk o amnhî nhîpêx nê mē kurûm hapōx kurê kumrêx pa ja hā mē omu.

¹⁹⁻²⁰ Mēkarōmnuti te kot kagā xoprê ry te kot makre pyrāk. Tā ra ixte mē amā ixāhpumunh tÿx xā hkwy nhōr jakamā na ka prem mē kām akapêr nhûm mē tee ri akutā tanhmā amnhî tÿx to hprām. Tā koja Satanasti tee ri mē ate nhÿrmā Tirtûm mē wa ixri atÿr tûm nê apa pymaj tanhmā mē ano kupyr to kaprÿ. Ra Tirtûm kot ô kagā kamā mē atÿr tûm nê mē apa kaxyw mē

anhÿi hā kagā kēnā. Jakamā kwa mē jam ajamaxpêr o akînh nê ajamakêtkati nê ri apa. No kêt mēkarōmnuti kot mē akapêr mar nê mē kurûm hapōxta ä mē omunh xā hkôt pix mē akînh nê ri apa hkêt nê. Anê.

*Jejus kînh kām kot Hipêxā mā amnhî
jarênh*

Matêwre 11.25-27

²¹ Tā nhûm Tirtûm Karō tanhmā Jejus to nhûm ÿ hā hkînh nê xa. Hāmri nê Tirtûm mā kapêr nê kām:

—Pa Papaj? Nā apê mē ixpiitā mē inhō Pahi Maati na ka. Pîkap ri mē pa xwÿnhjaja nê kaxkwa kamā mē pa xwÿnhjaja apê mē ixpiitā mē inhō Pahi Maati na ka. Am hāmri na ka hte amnhî nhîpêx mex o ri apa. Na ka hte mē āhpumunh tÿx ä mē kot amnhî jarênh xwÿnhjê mā axāhpumunh tÿx o amnhîrît kêt nê. Am mē āhpumunh kêt ä mē kot amnhî jarênh xwÿnhjê pix mā na ka hte ja ho amnhîrît nhûm mē tapxipixjaja ja hā apumu. Am hāmri na ka hte amā hprām xā hkôt ä mē piitā mē hipêx anhÿr o ri apa. Jakamā mē kot amnhî to hkryre xwÿnh pixjaja na htem ate amnhî nhîpêx ä apumunh o pa.

²² —Na ka pre inhÿkra kamā mēmoj piitā haxār pa. Ixte ho amnhîptār o ri ixpa kaxyw. Jakamā kapxipix na ka hte ixpê akra hā ixpumunh par. No jar ri mē pa xwÿnhjaja na mē kot ja hā ixpumunh kêt. Nē määnēn papxipix na ixte ate tanhmā amnhî nhîpêx to hā apumunh par. Jakamā na pa hte ä amnhî nhîpêx anê nê inhmā hprām xā hkôt mē hkwyê mē ato amnhîrît o ri ixpa nhûm mē ixpyrā nê ate tanhmā amnhî nhîpêx to ho apa hkôt apumu. Anê.

*Jejus kôt mē pa xwÿnhjaja kot hkôt omunh
o pa hā mē harênh*

Matêwre 13.16-17

²³⁻²⁴ Nhûm pre Jejus ä Tirtûm mā amnhî jarênh anê hāmri nê hpānhā hkôt mē pa ho mē pa xwÿnhjê mē kapêr nê mē kām:

—E na ka htem ixkôt mē ano ho ixte tanhmā amnhî nhîpêx to hā ixpumunh o ri apa. Nē mē ajamak o ixkapêr mar o ri ixkôt apa. No amnepēm mē akukamā pahijaja nê Tirtûm nhÿ hā kapêr jarênh o ri mē pa xwÿnhjaja kām ixpumunh prām tÿx o pa htā mē akînhā ixpumunh kêt rāhā htyk pa. Kormā ixwÿryk nê jar ixkator kêt kāmā na prem ixpumunh kêt rāhā ty. Nē mē kām ixkapêr mar prām tā mē akînhā ixkapêr mar kêt nê. Am mē kapxipixjaja na ka mē mÿr pē ixte amnhî nhîpêx ä ixpumunh nê ixkapêr mar o ixkôt apa. Tā mē kurom mē ate ano ho ixpumunh nê ajamak o ixkapêr mar jakamā kwa mē ja hā amnhî pumu nê tām amnhî nhîpêx o akînh nê ri apa. Anê.

Samar nhõ xwýnh jarênh

Matêwre 22.34-40; Makre 12.28-34; mãânên Wam Juâw 3.17-18

²⁵ Tã nhũm Tirtũm kapêr tũm o mē ahkre o mē pa xwýnhja Jejus wýr tē nē hêx rom kot kamã hamak kaxyw kãm:

–Pa? E kwa inhmã mēmoj jarê. Tanhmã kot paj we nhýrmã Tirtũm ri ixtĩr tũm nē ipxa kaxyw amnhĩ nhĩpêx to wehe? Anê.

²⁶ Hãmri nhũm kãm:

–Tanhmã na ka hte Tirtũm kapêr ã kagã htũm kot mē htĩr tũm nē pa hã kagã kamã harênh nē mar to? Anê.

²⁷ Hãmri nhũm kãm:

–Nã harênh kot: Kêr ka mē anhĩ piitã ho amã Tirtũm kĩnh o ri apa. Mē amã hkĩnh týx o mēmoj piitã hakrenh par o ri apa.

Nē kêr ka mē amã mē piitã hã ma ho te ka amã amnhĩ tã ma pyrãk o mē hipêx o ri apa. Jao tãm mē hipêx o ri apa. Anê.

Ã Tirtũm kapêr ã kagã htũm kamã ja jarênh kot anhýr. Anê.

²⁸ Hãmri nhũm Jejus kuma nē kãm:

–Tý. Nã ãm hãmri na ka harê. Kot kaj ã mē hipêx anhýr o ri apa nē nhýrmã Tirtũm mē wa ixri atĩr tũm nē apa ho apa. Anê.

²⁹ Hãmri nhũm kuma nom kãm mē piitã mē ho mex prãm kêt nē. ãm amnhĩ kwý pixjaja nhũm kãm mē ho mex o pa hprãm. Jakamã hêx rom kãm:

–Kwa no mēmojaja kot pa we ri ã mē hipêx anhýr o ri ipxa? Xã mē pahkwý pē Ijaew pixjaja nã? Anê.

³⁰ Hãmri nhũm kuma nē tanhmã kãm ujarênh to. Nom hã kuxi nē kãm awjarê nē kãm:

–E pa amã awjarê ka inhma. Koja Ijaew nhõ xwýnhja ma Jerujarê rũm Jeriko hwýr ahpãr mã ma mō. Mōõ nhũm ra mē ahkĩnh xwýnhjaja kutã mra. Hãmri nē pry kahti ri hwýr kato nē unê nē htak rax nē. Nē kēp ê hkwýrnh pa nē ma kurũm hprõt nē mra nē akunok nhũm mē kot htak o hkã rênh rãhã ra htyk kaxyw nē nō.

³¹ Hãmri nhũm patreja tē nē omu. No ãm omunh o hãnh tē nē hkupu nē ma tē. Urãk nē kēp Ijaew tã ãm omu nē tanhmã ho ajuta hto hkêt nē hãnh omunh o tē nē hkupu nē ma tē.

³² Hãmri nhũm patre ho ajuta xwýnhja mãânên tē. Nē patre pyrã nē omu nē ãm omu nē hkupu nē ma tē. Urãk nē kēp Ijaew tã omu nē ãm omu nē hkupu nē ma tē.

³³ –Tã nhũm Samar nhõ xwýnhja mãânên mō. Samar nhõ xwýnhjê mē Ijaew na prem kãm axpên kĩnh kêt tã nhũm mō nē omu nē kamã ukapri nē. Kēp Ijaew ã omunh tã tee ri omu nē kamã ukapri nē.

³⁴ Hãmri nē hwýr tē nē omu nē kãm mē kot htak o hkã rênh xã kane nē kãm hkupu

pa. Hãmri nē kãnhmã ãm nē hkrit jumênre hã kumê nē ma nhýri mē kot amnhĩ hikranh xã hã ixkre hwýr o mō nē hwýr o pøj. Hãmri nē omunh mex o apkati.

³⁵ Hãmri nē akupým nojarêt nē kãxpore hkwy jamý nē o tē nē kot mē kãm õ xwýnhja mã kugõ nē kãm: “E kot paj hãmri ma mō. Ota ixkãxporeta. Kêr ka inhmã à xwýnhnta tãnopxãr mex nē. Nē inhmã omunh mex kê akupým mex. Koja kãxporeja apê grire hã kot paj nhýrmã akupým mō nē axte hkõt amã hkwy gõ.” Anhýr o kãm kapêr nē ma akupým mō. ã mē ujarênh kot anhýr. Anê.

³⁶ Nhũm pre ã Jejus kãm ujarênh anê. Hãmri nē kãm:

–E nhý na pre kãm mē kot htak xwýnhnta kapri ho te tãm kãm amnhĩ tã ma pyrãk wehe? Anê.

Hãmri nhũm Tirtũm kapêr tũm o mē ahkre xwýnhnta kãm:

–Nã kot kamã ukapri xwýnhnta na pre omu nē kamã ukapri nē ho mex o te tãm kãm amnhĩ tã ma pyrãk o hipêx. Anê.

³⁷ Hãmri nhũm Jejus kãm:

–Tý. Nã ãm hãmri na ka harê. Urãk nē kēp Ijaew kêt tã kamã ukapri nē ho mex nē. Tã kêr ka urãk nē ã mē piitã mē hipêx anhýr o ri apa. Urãk nē mē kēp akwy hkêt tã mē kamã axukapri ho ri apa. Anê.

Jejus kot Matre mē Marir wa hwýr mōr ã harênh

Rukre 12.29-31

³⁸ Tã nhũm Jejus kri rũm kato hãmri nē hkõt mē pa ho mē pa ho xwýnhjê mē mē ma nhãm kri hõ hwýr mō. Mōõ nē hwýr pøj. Hãmri nhũm Matre mē omu nē amnhĩ nhõrkwy hwýr mē kuwý nhũm mē ma hwýr mō nē õrkwy hwýr pøj.

³⁹ Hãmri nhũm Jejus mē ahkre ho nhý nhũm Matre htõx Marirja arĩ hpar pē mar o nhý.

⁴⁰ Hãmri nhũm Matre mē hwýr axã nē omu. Nē tee ri ãpênh rax kukamã hamaxpêr nē Jejus wýr tē nē kãm:

–Xê ma Pahihti. Kormã ixãpênh rax tã nhũm Marir ixto ajuta hkêt nē. ãm akapêr pix mar gryk ã ixkõt htêm nē ixto ajuta hkêt nē. Pa ahte mē panhõ hã ixãpênh o xa. Xã amã ja mex? Xê kãm anê kê tokyx ixkõt tē pa wa hã axkrut nē mē panhõ hã ixãpênh tokyx anê. Anê.

⁴¹ Hãmri nhũm tee ri kuma nē kãm:

–Kwa Matre. Na ka ãm mē panhõ pix kukamã ri ajamaxpêr nē gryk ã tee ri amnhĩ nhĩpêx.

⁴² ãm hãmri na Marir kãm ixkapêr mar prãm nē. Jakamã kot paj ri amnhĩ nē akõt hanor kêt nē. Anê.

11

Mē pahte tanhmā Tirtūm mā amnhī jarēnh to hā mē pamā karō

Matēwre 6.9-13, 7.7-11

¹ Tā nhūm apkati hō hā nhūm Jejus nhÿri Tirtūm mā amnhī jarēnh o nhÿ. Nē kām amnhī jarēnh pa nhūm hkōt mē pa ho mē pa xwÿnhjaja kot kām amnhī jarēnh ā omu nē hwÿr mra nē kām:

—Kwa Pahihti. Amnhī pyrà nē mē ixte Tirtūm mā amnhī jarēnh kaxyw tanhmā mē ijahkre hto. Kēr pa mē apyrà nē tanhmā kām amnhī jarēnh to ho ri ixpa. Na pre finat Juāw Paxisja hkōt mē pa ho mē pa xwÿnhjē mā ja jahkre nhūm mē kuma nē tām kām amnhī jarē. E kwa mē inhmā tanhmā ja jahkre hto nā? Anē.

² Hāmri nhūm mē kām:

—Tōe. Nā kēr ka mē kām amnhī jarēnh kaxyw nē māmri amnhī krā hkōt tanhmā kām amnhī jarēnh to. Rÿ kām amnhī jarēnh o:

Pa Mēinhīpēēxā maati? Nā amex o amex Tirtūm.

Apē mē ijamār mex xwÿnh maati na ka.

³ Nē kwa kēr ka apkati mē mē inhmā mēmoj gō pa mē akukwak ri ho ixāpkur o ri ixpa.

⁴ Nē na pa hte tōhā amnhī tomnuj nē Tirtūm. Nom mē kot tanhmā ixtomnuj to xwÿnhjaja na pa hte ām mē omu nē amnhī tā tanhmā mē ho hkēt nē. Nē ja ho ijamakētkati kurē kumrēx. Ā na pa hte amnhī nhīpēx anhÿr o ri ixpa.

Jakamā kwa kēr ka ja hā ixpumu nē ixpyrà nē ixte tanhmā amnhī tomnuj to hā ixpumu nē hā tanhmā ixto hkēt nē. Ām ho ajamakētkati kurē kumrēx nē axte kām ajamaxpēr kēt nē.

Nē kot paj tanhmā amnhī tomnuj to kaxyw japēr ka ja hā ixpumu nē ixte ā amnhī nhīpēx anhÿrja nē ixto htÿx nē pa ja ho anhÿr kēt nē.

E ām ja pix na hapēx. Anē.

E kēr ka mē ā Tirtūm mā amnhī jarēnh anhÿr o ri apa. Anē.

Mē pahte amnhī to Tirtūm wÿr rāhā hā mē pamā karō

Matēwre 7.7, 15.21-28; Makre 11.24; Rukre 18.1-8; Juāw 14.13-14; māānēn Rōmān 12.12; Epes 6.18; Wam Tesarōn 5.17-18

⁵⁻⁶ Nhūm Jejus arī hkōt mē pa ho pa xwÿnhjē jahkre ho nhÿ nē mē kām:

—Nē ja. Koja mē akrāmnhwÿjē hō. Nhūm kōt ā kamāt nhūm nhÿhÿnh awÿr mōn pōj. Ka anhō mēmoj kēt hāmri nē anhÿjuk ri akrāmnhwÿ hwÿr tē. Hāmri nhūm ra amnhī tā kahē nē nō. Ka tee ri omu hāmri nē hakwa krem xa nē kām akapēr nē kām: “Pa ixkrāmnhwÿ. Na ka mē ra gōr? Kwa kànhmā nhÿ nē inhmā anhō mēmoj japēr. Na ra ham

ixkrāmnhwÿta mōn pōj. Nē kām prām tÿx nē mō nom kaxyw inhō hkēt. Kwa kànhmā nhÿ nē inhmā anhō mēmoj japēr nē inhmā hkwy pa ma o tē kē kukrē. Ām inhō hkēt kumrēx. Ām hāmri na pa amā amnhī jarē. Kwa tokyj kànhmā nhÿ nē inhmā mēmoj japēr nā?” Anhÿr o kām akapēr.

⁷ Hāmri nhūm ama nom kām kànhmā ÿr prām kēt nē. Nē amā: “Tk. Nā ra mē ixte amnhī tā kahē hpar nē inhÿkwÿ kēnā kot pa kēt kànhmā nhÿ nē amā mēmoj japēr.” Anē.

⁸ Ka tee ri ama nē xatā kām: “Kwa ā inhīpēx anhÿr kēt nē ixkrāmnhwÿ. Kwa tokyx.” Anhÿr o xa. Nē xatā kām anojarēt o xa. Hāmri nhūm ra kām amar kaga hāmri nē tā kànhmā nhÿ nē amā ate ho presija xwÿnhhta gō. No ām kēp akrāmnhwÿ hā ate hā axāhwÿr tipxi hā amā ōr kēt nē. Ām xatā ate ho presija htÿx xwÿnhja mē hamaxpēr nē tā kànhmā nhÿ nē amā kugō. Ā mē ujarēnh kot anhÿr.

⁹⁻¹⁰ —Tā kēr ka mē ja pyrà nē amnhī to Tirtūm wÿr rāhā ho ri apa nhūm ama nē ate mēmoj tā hwÿrta amā kugō. Ām xatā ate hā axāhwÿr o ri apa nhūm amā kugō. Ām mēmoj to hwÿr rāhā ho ri apa nhūm ama hāmri nē amā mēmoj tanhmā hīpēx to. Te ho mēhō kām tep xānh nē gōx kām xatā tep rēnh xā rēnh o ām pyrà nē xatā mēmoj tā hwÿr o ri apa. Hāmri nhūm ama nē amā hprām xwÿnhhta gō. Te ho tep kanhēr xwÿnhhta tā kot tep ō kanhēr pyràk o anhīpēx nē amā mēmoj prām xwÿnhhta gō. Anē.

Tirtūm kot hkrajē mā mēmoj mex nhōr ā harēnh

Makre 7.9-11

¹¹ Nhūm Jejus arī hkōt mē pa ho mē pa xwÿnhjē jahkre nē mē kām:

—Nē xā koja akra kām tep xānh nē hā awÿ ka ama nē axtem nē kām kagā xopēr hō py nē agō?

¹² Rÿ nhūm krāhyre gre hā awÿ ka axtem nē kām makre hō py nē agō? Nā na ka htem ā akrājē nhīpēx anhÿr kēt nē. Na ka htem mē kot mēmoj tā āhwÿr xā hkōt kām mēmoj gō.

¹³ Mē kamjaja mē ate amnhī tomnuj o ri apa htā ka htem akrājē ho mex o ri apa. Tā kaxkwa kamā Tirtūmja na hte mē pahto mex o mē ate mē akrājē ho mexta jakrenh. Kām mē pajapē htÿx kōt na hte mē pamā mēmoj mex nhōr o pa. Nē māānēn amnhī Karōja na hte mē pamā kugō. Jakamā kot kaj mē atō Karō hā awÿ nhūm ama nē awÿr kumē nhūm wÿr nē akarō mā axā. Ā na hte Tirtūm kām mē pajapē xāj mē pamā mēmoj mex nhōr o pa anē. Anē.

Jejus mē Satanasti wa harēnh

Matēwre 12.22-32; Makre 3.20-30

¹⁴ Tā nhūm Jejus nhÿri axte mēhō nē mēkarōmnuti kator. Na pre ra mēkarōmnuti

tanhmã ho nhũm kapēr kêt nê pa. Hãmri nhũm Jejus omu nê nê kator nhũm akupÿm kapēr mex nê. Nhũm mē piitã amnhĩ jaēr pē omu nê no hawēnh rūnh nê omunh o kuhē.

¹⁵ Nom nhũm mē hkwyjaja Jejus kot ã hĩpēx anhÿr ã omu nê htÿx ho kēp mēkarōmnuti hkwy hã hkamnhix nê axpēn mã harēnh o:

–Tk pēr hinhu nhĩkōoti nhÿ hã na hte mē nê amnhĩ kwÿjē japōx o pa. Anē.

Hinhu nhĩkōoti nhixi hō pē Satanasti nhũm prem Satanasti nhÿ hã Jejus kot ã amnhĩ nhĩpēx anhÿr o pa hã hkamnhix.

¹⁶ Jakamã nhũm mē hkwyjaja hwÿr mra nê kãm:

–Kwa mē inhmã aa mē ixte mēmoj pumunh kêt ô ho anē. Pa mē omu nê ate Tĩrtũm nhÿ hã tanhmã amnhĩ nhĩpēx to ho apa hã apumunh kurē kumrēx. Anē.

Nom hēx rom mē kot kamã hamak kaxyw ã kãm kapēr anē.

¹⁷ Nhũm ra Jejus mē hamaxpēr kôt mē omunh mex jakamã mē kapēr ma nê mē kãm:

–Kwa mē inhma mē ate ixpē Satanasti hkwy hã ixkamnhix xwÿnhjaja. Koja pika nhō xwÿnhjaja axpēn kutã amnhĩ xunhwÿ nê axpu hãmri nê anhgrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhũm mē ô pahi mē hamãr o pa hkēt nê. Rÿ koja krĩ nhō xwÿnhjaja. Mē kot axpēn to hkwy xwÿnhjaja mēmoj tã axpēn kãm gryk nê axpēn kutã amnhĩ xunhwÿ hãmri nê axpēn pē anhgrã nê ahpÿnhã pa hãmri nhũm mē ô pahi tee ri kãm mē hamãr o pa hprãm. Mo ô krĩ kamã mē hkwy kot ri mē hamãr o pa? No na pre mē ô pahi tãm amnhĩ nê mē hanor kêt nê.

¹⁸ –Tã ja pyrã nê ixte Satanasti nhÿ hã tanhmã amnhĩ nhĩpēx to ho ixpa ronhÿx pa mē nê amnhĩ kwÿjē janor o ri ixpa hkēt nê. Nhÿx Satanasti ixte mē nê mē hanor kaxyw tanhmã inhmã nê hkēt nê.

¹⁹ –No kêt mē akwyjaja? Xã Satanasti nhÿ hã na htem mē nê mē hapōx o pa nã? Kēp apu pa ixte ÿ hã mē nê mē hapōx ronhÿx mē akwyjaja ixpyrã nê ÿ hã mē nê mē hapōx o pa. Nã Tĩrtũm nhÿ hã mē ixte mē nê mē hapōx o mē ixpa kēnã. Jakamã ã mē ate ijarēnh anhÿr o apaja mex kêt.

²⁰ Tĩrtũm Karō nhÿ hã ixte mē nê mē hapōx o ri ixpa kēnã. Jakamã kwa mē ja hã ixpumu nê Tĩrtũm kot ixte mē ato amnhĩptar kaxyw mē awÿr inhmēnh kôt ixpumunh kurē kumrēx kêt wehe. Pa na ka htem ixkamã ajamak o apa.

²¹⁻²² –Satanastija ãhpumunh tÿx jakamã na htem tee ri kēp mē kot hkôt amnhĩ xunhwÿr xwÿnhjē pytar kaxyw nhũm mē nê mē omunh mex nê. Nom ixãhpumunh tÿx o ixte Satanasti jakrenh jakamã pa na pa hte kēp

mē utã nhũm mē hpãnhã ixkôt ri amnhĩ nhĩpēx.

²³ –Mē amã ixkapēr mar prãm tã na ka mē kormã ixkôt amnhĩ xunhwÿr kêt nê. Kwa wem ma amnhĩ to amōr gri nê tokyx ixkôt amnhĩ xunhwÿr kêt wehe. Kot kaj mē anhÿr kêt nê hãmri nê te mē ate ixkutã amnhĩ xunhwÿr xwÿnh pyrãk o amnhĩ nhĩpēx.

²⁴ Mē ate ixkôt amnhĩ xunhwÿr kêt xwÿnhjaja te mē ate mēhō nê mēkarōmnuti japōx xwÿnh pyrãk. Nhũm te kēp kator nê ma mō nê nhÿri amgrã kamã ri pa. Nhũm ja kēp omnuj nhũm tee ri kamã nhÿri hkōkôt xã japēr o pa. Nom tee ri hapēr o pa nê hamaxpēr o: “E kot paj ma akupÿm mē kot nê ixkator xwÿnhhta wÿr tē nê hwÿr axã nê hkôt mãn ixpa.” Anē.

²⁵ Hãmri nê ma akupÿm hwÿr tē. Nom kormã akupÿm hwÿr ãr kêt ri nhũm kamã amrakati nê pa.

²⁶ Jakamã nhũm ma akupÿm hwÿr tēn axã. Nom ahte ãr kêt nê. Ra amnhĩ kôt amnhĩ kwÿjē ho 7 nê hwÿr mē ho agjē. Nê hwÿr gjēx pa. Mē kēp 7jaja nê wamta mē nhũm mē piitã hwÿr gjēx pa. No mē kēp 7jaja omnuj tÿx o kot wamta jakrenh jakamã nhũm mē kot hwÿr gjēx xwÿnhhta mē ÿ hã amnhĩ tomnuj tÿx o pa. Oprē htÿx nê. Wam pyxire nê kot hwÿr ãr nhÿ hã amnhĩ tomnuj o ri pa nom ãm kawax pē oprē. Tã axte hwÿr mē ohtō nê gjēxta nhÿ hã oprē htÿx kumrēx. Ja pyrã nê kot kaj mē tokyx ixkôt amnhĩ xunhwÿr kêt nê hãmri nê ãm amnhĩ tomnuj tÿx pix o ri apa. Anē.

Mē hkÿnh nê mē pa xwÿnhjē jarēnh Rukre 8.19-21

²⁷ Nhũm pre ã Jejus mē ahkre anē nhũm mēhō nija kuma nê kãm:

–Hēxta gãã nê. Mã akatorxã ã ate amnhĩ nhĩpēx anhÿr o apa hã apumu nê hkÿnh nê. Anē.

²⁸ Hãmri nhũm kãm:

–Tÿ. Nã kot anhÿr kēnã. Nom kot ka mē atō Tĩrtũm kapēr ma nê hkôt amnhĩ nhĩpēx hãmri nê akÿnh rax o ixkatorxã kot ixpumunh nê hkÿnhhta jakre. Anē.

Jejus kot tanhmã Jōhti jarēnh to Matēwre 12.38-42; Makre 8.12

²⁹ Tã nhũm mē ohtō nê Jejus ã akuprō nê mēmoj tã kuwÿ nê kãm:

–Pa. Kwa mē inhmã aa mē ixte mēmoj pumunh kêt ô ho anē pa mē omu. Anē.

Hãmri nhũm mē kuma nê mē kãm:

–Tk. Kwa mē ajamaxpēr punuj pix o na ka htem ri ajamaxpēr o apa. Ixpē Tĩrtũm kot mē awÿr inhmēnh xwÿnh tã ka mē ja hã ixkôt ajamaxpēr kêt nê. Tã mē ate aa mēmoj pumunh kêt kwÿ ixte mē amã ho anhÿr kaxyw hã inhmã karō. Nã kot paj kormã mē amã ho anhÿr kêt nê. Kot paj nhÿrmã te amnepēm finat Jōhti kot amnhĩ nhĩpēx

pyràk o amnhì nhìpèx ka mè hā ijarènh ma nè kormā ja hā ixpumu.

³⁰ Tirtùm nhÿ hā kapèr xwÿnh pè Jòhtija amnepèm na pre tep rax kukrè. Tā nom nhùm htír rāhā òxàhkre rùm kato nhùm mè omu nè Tirtùm kot mè hwÿr mēnh ā omu. Tā kot paj nhÿrmā Jòhti pyrà nè tanhmā amnhì nhìpèx to nhùm mè ja hā ixpumu nè Tirtùm kot mè awÿr inhmēnh xwÿnh ā ixpumunh kurè kumrèx.

³¹ –Nē koja nhÿrmā Tirtùm akupÿm mè htyk nè mè hikwÿ xwÿnh piitā akupÿm mè ho htír hāmri nhùm mè piitā Inhìpèéxā mè wa ixkutā hkrī. Pa wa mè piitā tanhmā mè harènh to. Tirtùm mè wa ixkuri mè htír tùm nè mè pa ho mè pa mā xwÿnh ā mè hkwyjè jarè. Nē wa ixkuri mè pa ho mè pa hkèt xwÿnhjè jarè. Mē piitā ā mè harènh anē. Amari mè pa xwÿnhjaja nè mè ò pahijaja. Hāmri nhùm sur kām mè ò pahi niti Tirtùm mā tanhmā amnhì jarènh to hāmri nè hpānhā tanhmā mè ajarènh to nè kām mè ajarènh o: “Na pa pre inhmā pahi Sarumāw kot anhy hā àhpumunh tÿx ā harènh ma hāmri nè inhmā mar prām xāj ma awry hā ò pika hwÿr ixa nè omu nè kapèr ma. Hāmri nè ma akupÿm inhō pika hwÿr ixa nè ixkwÿjè mā àhpumunh tÿx ā harènh o ixa. Tā Akra Jejus na àhpumunh tÿx o pahi Sarumāw jakrenh tā or war akutā mè hkrī xwÿnh kwÿ mÿj na prem kapèr ma no ām ixkīnhā kām mar prām kèt nè. Na prem kuma nè ām kuma.” Anhyr o wa inhmā mè ajarè. Hāmri nè ja hā mè amā akir ka mè tee ri mar o akri nè amnhì kamā agryk o akri.

³² –Hāmri nhùm hpānhā Nīnīwe nhō xwÿnhjaja wa inhmā tanhmā amnhì jarènh to. Jòhti kot mè hwÿr mōr nè mè kām Tirtùm kapèr jarènh o pa xwÿnhjaja nhùm mè tanhmā wa inhmā amnhì jarènh to. Hāmri nè pahi nita pyrà nè wa inhmā tanhmā mè ajarènh to nè wa inhmā. “Na pre Jòhti man mè inhō krī hwÿr mō nè mè inhmā akapèr jarènh o ri mè ixkòt pa. Pa prem kuma nè mè ixte amnhì tomnuj kaga nè akòt amnhì xunhwÿr kurè kumrèx Tirtùm. Nom or war akutā mè hkrī xwÿnh kwÿ mÿj na pre Akra Jejus tām mè hwÿr mō nè mè kām kapèr o ri mè hkòt pa nhùm prem kuma no ām mè ixkīnhā amnhì tomnuj kaga nè hkòt amnhì xunhwÿr kèt nè. Mē kot Akra mar tā amnhì kaxyw kām hamaxpèr kèt nè.” Anhyr o koja mè wa inhmā mè ajarè ka mè tee ri mè ama nè amnhì kamā agryk tÿx nè. Jakamā e kwa ixte mè amā ā ixkapèr anhyrja ma nè kām ajamaxpèr tÿx rāhā ho ri apa. Anē.

Mē pajamaxpèr mex te kot kané hpòk mex pyràk ā harènh

Matèwre 5.15, 6.22-23

³³ Nhùm Jejus arī mè ahkre ho nhÿ nè mè kām:

–Xà na htem kané hpòk nè poti ho hpro? Nà na htem ho anhyr kèt nè. Na htem hpòk nè kÿx pè mēmoj nhīmòk ā unhwÿ nhùm mè piitā mè kām hirā mex nhùm htem ixkrem agjè nè hirā kamā mēmoj pumunh mex o mra.

³⁴ Ja pyrà nè kot ka mè atō ixkapèr ma nè ixkòt amnhì nhìpèx nè tām amnhì nhìpèx o ri apa. Nē tām mè hipèx o ri apa. Jao te hirā kamā mè rīt mex xwÿnhjaja kot amnhì nhìpèx pyràk. Nom koja mēhō inhma nè ām inhma nè ixkwÿm ri tanhmā amnhì nhìpèx to ho pa. Jao te kamāt kō kamā mè rīt mex kèt xwÿnhjaja kot htÿx amnhì nhìpèx o pa pyràk o amnhì nhìpèx.

³⁵ –E kèr ka mè ā amnhì nhìpèx anhyr pymaj ixkapèr ma nè kām ajamaxpèr tÿx rāhā ho ri apa.

³⁶ Kot kaj mè ixkapèr ma nè ixkòt amnhì nhìpèx. Hāmri nè te mè ate kané hpòk mex nhìrā kamā ri apa pyràk o amnhì nhìpèx. Jao aprī hā ixkapèr ma nè aprī hā ixte tanhmā amnhì nhìpèx to hā ixpumunh mex nè. Anē.

Jejus kot tanhmā Parijew nhō xwÿnhjè jarènh to

Matèwre 23.25-26

³⁷ Tā nhùm Jejus ra mè ahkre pa. Hāmri nhùm Parijew nhō xwÿnhjaja hwÿr tē nè kām:

–Pa. E kwa ma ixkòt tē nè mè ixkutā apku. Anē.

Hāmri nhùm kuma nè kām:

–Tòe. Nà kot paj ma akòt tē. Anē

Hāmri nè ma hkòt tē nè òrkwy hwÿr axā nè apkur kaxyw mè ihkō hā nhÿ.

³⁸ No ām mè hkukamā mè hpāmjè pyrà nè amnhì nhìhkra kuhònh rÿy hkèt nè. Ām amnhì nhìhkra htyk pix kuhònh tokyx anē nè nhÿ. Nē ò prat kuhònh rÿy hkèt rāhā apkur kaxyw nhÿ. Jakamā nhùm kot amnhì kòt hwÿr xwÿnhta tee ri ja hā omu nè hamaxpèr o:

–Tk. Kwa na hte mè ixte amnhì nhìpèx kòt amnhì nhìpèx mex kèt nè.

³⁹ Anē nhùm Jejus amnhì tā hamaxpèr ā omu nè kām:

–Nà mè apè Parijew nhō xwÿnhjaja te mè ate mè kot apkur kaxyw prat kre kuhònh punuj tā mex ā harènh pyràk o amnhì nhìpèx. Nē ām mè akrā hkā rùm pix mā na mè amex. Nē mè noo mā te mè amex pyràk no ām mè anhōxàhkre kaxwÿnh kām mè ajamaxpèr mex kèt. Ām mè akapèr prām. Nē mè axàhkurèè. Nē mè anhōxyÿ.

⁴⁰ Mē ate atÿx ri amnhì nhìpèx o ri mè apa xwÿnh kēnā. Kwa kèr ka mè ām akrāhkā pix rùm amex nè ri apa hkèt nè. Mē määnēn anhōxàhkre kaxwÿnh kām ajamaxpèr mex o ri apa. Nē tām mè piitā mè hipèx o ri apa.

⁴¹ Kèr ka mè tām ajamaxpèr o tām mè hipèx o ri apa. Nē axāmnhix ri mè kèp amrakati xwÿnhjè mā mēmoj nhōr o ri apa.

Kot kaj mē ā amnhī nhīpēx anē hāmri nhūm Tirtūm ja hā mē apunu nē amnhīm mē amex ā mē ajarē. No na ka htem mē amā mē amnhī to mex prām xāj tee ri amnhī kuhōnh japjē kaprj. Anē.

Jejus kot Parijew nhō xwýnhjaja mex kēt kukamā mē harēnh

Matēwre 23.4, 23.7, 23.13-24, 23.27-38; Makre 12.38-39

⁴² Nhūm Jejus arī Parijew nhō xwýnhjē jahkre nē mē kām:

–Kwa mē okora Parijew nhō xwýnhjaja. Kot kaj mē amex kēt nē. Na ka htem Tirtūm kapēr piitā hkōt amnhī nhīpēx o apa hkēt nē ām hkwy kōt pix mā amnhī nhīpēx o ri apa. Nē ām kapēr o hpýnhre nē hkōt amnhī nhīpēx hāmri nē hā amnhī pumu nē ate amnhī to mex xwýnh ā amnhī to jarkrar o ri apa. Nom Tirtūm kām hprām xā piitā hkōt amnhī nhīpēx hkēt nē. Mē ate tām mē piitā mē hipēx o ri apa hā kot mē amā karōja. Nē mē amā Tirtūm kīnh ā kapēr kōt amnhī nhīpēx o ri apa hā karōja mē ate mar mex tā hkōt amnhī nhīpēx kēt nē. Mē ate kapēr piitā hkōt amnhī nhīpēx ronhýx ja mē amā mex kumrēx.

⁴³ –Kwa mē o kora. Mē piitā mē kot amnhīm mē ate amnhī to rūnh xwýnh ā amnhīm mē ajarēnhja na mē amā hprām. Nē mē piitā mē kot amnhīm mē apē mē ahkre mex xwýnh maati hā mē ajarēnhja na mē amā hprām.

⁴⁴ –Kwa mē o kora. Kot ka mē amex kēt nē. Mē kot mē akapēr mar nē mē akōt amnhī nhīpēx xwýnhjaja te mē kot htýx ri mē hā pika nhūmōk ā ri mē pa xwýnh kot amnhī nhīpēx pyrāk. Jao mē ate amnhī to mex ā amnhī kamnhix nom mē ate amnhī to mex kēt. Te mē kot pika mex ā hkamnhix nē htýx ri mē hā pika nhūmōk ā ri mē pata pyrāk o na htem amnhī nhīpēx. Anē.

Nhūm pre ā Jejus Parijew nhō xwýnhjē mē mē kot amnhī nhīpēx jarēnh anē.

Jejus kot Tirtūm kapēr tūm o mē ahkre xwýnhjē mā kapēr

Matēwre 23.1-4, 23.13, 23.29-36

⁴⁵ Hāmri nhūm Tirtūm kapēr tūm o mē ahkre ho pa xwýnhja kuma nē kånhmā xa nē kām:

–Kwa na ka ā Parijew nhō xwýnhjē jarēnh punuj anhýr jao määnēn ā mē paja jarēnh anē nā? Mē ixte amnhī nhīpēxja ām tipxi kēnā. Anē.

⁴⁶ Hāmri nhūm kām:

–Tý. Määnēn mē kajaja. Kwa o kora mē apē Tirtūm kapēr tūm o mē ahkre xwýnhjaja. Kot kaj mē urāk nē amex kēt nē. Na ka htem mē kām mēmoj tā karō ho ri apa nē mē kām: “E kēr ka mē ā amnhī nhīpēx anē nē ā amnhī nhīpēx anē.” Anhýr tā no ām mē kajaja amnhī kapērja kōt amnhī nhīpēx kēt

nē. Te mē ate mēhō kot mē katut ā mē kām mē jēnh pytī janhōr tā mē ho ajuta nē hkwy htur kēeta pyrāk o na ka htem amnhī nhīpēx o ri apa.

⁴⁷⁻⁴⁹ –Na pre Tirtūm amnepēm mē pahpāmijē hkukamā tanhmā mē harēnh to. āhpumunh týx xā hkōt tanhmā mē hkukamā mē harēnh to nē mē harēnh o: “Kot paj ma mē hwýr inhý hā ixkapēr jarēnh xwýnhjē rē. Nom koja mē omu nē ām mē omu nē kēp mē hprām nōkati nē tanhmā mē hipēx to ho pa. Nē ixpē mē hkwyjē hpar o pa. Ā koja mē inhý hā ixkapēr jarēnh xwýnhjē nhīpēx anē.” Anhýr o mē hkukamā mē harē. Tā ā mē harēnh anhýr xā hkōt nhūm prem ā mē hipēx anē nē mē hkwyjē hpa nē mē hkwyjē pynē nē mē hagjē.

–Amnepēm mē akukamā mē kot ā mē hipēx anhýr nhūm mē ate mē ano ho ja hā mē omunh kēt tā ka htem arī mē hā pika ho mex o ri apa. Te mē amā mē hapē nē mē ho ajamak pyrā nē mē hā pika ho mex o ri apa. Nom mē amā mē hapē hā ho mex hkēt nē. Ām ra mē htyk nē hapēx nē mē amā Tirtūm kapēr jarēnh o pa hkētja ā na ka htem akīnh nē ā axēx rom mē hā pika ho mex anhýr o ri apa.

⁵⁰⁻⁵¹ –Na prem Tirtūm nhý hā kapēr jarēnh o mē pa xwýnhjē nhīmex rax nē. Amnepēm panhī kator krax rūm finat Atāw kra finat Apewja na pre Tirtūm nhý hā kapēr o pa nhūm htō kām mar prām kēt nē kupī. Tā nhūm Tirtūm axte mē hwýr ý hā kapēr jarēnh o mē pa xwýnh kwýjē rē nhūm prem mā mē ho anē nē mē hkwyjē nhīmex. Nhūm pre xatā mē hwýr mē hkwyjē rē nhūm mē xatā mē kupa. Ā Apew rūm finat Jakaris wýr na prem mē himex rax anē. Nē hpānhā Jakarisja nhūm prem Tirtūm mā amnhī jarēnh xā hā ixkre kamā kupī. Tā ka mē ajaxwýja amā Tirtūm kapēr mar prām kēt nē mē urāk nē amā ý hā kapēr jarēnh o mē pa xwýnhjē nhīmex prām. Tā ā mē pahpāmijē mē ato hpimraātā mē ate mē hipēx anhýrja mýrapē koja Tirtūm ja hā mē apē mē hkanrēhā mē htāmnhwýjaja tanhmā mē ato htýx to ka mē amnhī xā htýx kamā ajamak o ri apa rāhā nē kām ga.

⁵² –Jakamā kwa mē o kora mē apē Tirtūm kapēr tūm o mē ahkre xwýnhjaja. Mē ajaxwýja na ka htem Parijew nhō xwýnhjē pyrā nē Tirtūm kapēr o mē ahkre ho apa. Nē aprī hā mar mex tā no ām amnhī kaxyw hkōt ajamaxpēr nē hkōt amnhī nhīpēx kēt nē. Hāmri nē mē kot mē amar o pa xwýnhjē mā atýx ri tanhmā mē ahkre hto nhūm htem mē ama nē mē apyrā nē amnhī kaxyw Tirtūm kōt hamaxpēr nē hkōt amnhī nhīpēx kēt nē. Mē kām hprī hā kapēr mar mex prām tā mē amar xā hkōt mē ate amnhī nhīpēx pyrāk o amnhī nhīpēx o pa. Nom mē kajaja

na ka htem mē kām mē hamaxpēr mex nhōr kētja mýrapē nhūm htem ā amnhī nhīpēx anhýr o pa. Jakamā kwa mē o kora kot kaj mē amex kēt nē. Anē.

Nhūm pre ā Jejus mē kām kapēr anē.

⁵³⁻⁵⁴ Hāmri nē kato nē ma tē. Nhūm Tirtūm kapēr tūm o mē ahkre ho mē pa xwýnhjē mē Parijew nhō xwýnhjaja hāmri kot tanhmā mē kām kapēr toja ma nē kamā gryk týt nē. Jakamā ma hkōt mra. Hēx rom mēmoj tā hkukjēr o hkōt mra. Nē hā hkukjēr kām hihtýt o hkōt mra. Kot tanhmā mē kām ujarēnh to nhūm mē kot mar nē ra hā āmnēnh kaxyw ma hkōt āhkukjēr o mra.

12

Mē pahte Tirtūm pē mē pajamaxpēr punuj o pahpimxur kēt

Matēwre 10.26-33

¹⁻³ Tā nhūm mē Jejus ā htu rax kumrēx nē hā axpēn nhīgānh o kuhē. No nhūm kormā mē kām tanhmā kapēr to hkēt nē. Ām kormā hkōt mē pa ho mē pa xwýnhjē kumrēx mā kapēr nē mē kām:

—Mē piitā kām amnhī kwýjē pē hamaxpēr punuj o hpimxur hprām tā koja nhýrmā mē hamaxpēr piitā amnhīrīt pa. Nē mēmoj piitā ra hpimxur mex tā koja nhýrmā piitā amnhīrīt pa. Nē mē kot kamāt kō kamā hpimxur pē mēmoj jarēnh tā koja mē piitā nhýrmā kot mēmoj jarēnh ta. Nē mē kot hitom kām kawax pē axpēn mā mēmoj punuj jarēnh tā koja nhýrmā mē piitā mēmoj jarēnh ta. Jakamā kwa kēr ka mē tanhmā Parijew nhō xwýnhjaja kot amnhī nhīpēx to ho pa hā mē omu nē ām mē omu nē mē hkōt amnhī nhīpēx kēt nē. Te mē kot tām amnhī nhīpēx pyrāk o amnhī nhīpēx tā no ām tām amnhī nhīpēx o pa hkēt. Na htem ām htýt ri tanhmā amnhī to hēx to ho pa. Tā kēr ka mē urāk nē ā amnhī nhīpēx anhýr kēt nē. Anē.

Mē pahte pahkwýjē pumaj Tirtūm kaga hkēt ā mē pamā karō

Matēwre 10.28-31

⁴ Nhūm Jejus arī hkōt mē pa ho mē pa xwýnhjē mā kapēr nē mē kām:

—E ixkrāmnhwýjaja. Kēr ka mē amā akwýjē puma rý nhām mē hkwýjē puma ho ri apa hkēt nē. Koja mē apar tā ām mē anhi pix pa nom tanhmā mē akarō hto hkēt nē.

⁵ Tirtūmja tapxipix na hte mē i nē mē hkarō ho hpimrāatā mē kot amnhī xā htýt kamā hamak tūm xā hwýr mē kurē. Tā kēr ka mē ja pumaj Tirtūm kapēr kwým tanhmā ri amnhī nhīpēx to ho apa hkēt nē.

⁶⁻⁷ —Nē Tirtūm kot mē pahto hapēx par pumunh tā māānēn kot mē pajamār pumunh mex. Mān ka htem kuwēnhre pumu. Na hte Tirtūm hamār mex o pa. Mē piitā mē kot ām kuwēnhre pumunh o pa htā nhūm Tirtūm mē kurom hamār mex o pa. Nē

htānopxar rāhā ho pa. Nom kām mē pajapē htýt o kuwēnhre jakrenh jakamā kwa mē tee ri amnhī kukamā ajamaxpēr o ri akapri nē apa hkēt nē. Koja Tirtūm mē pahtānopxar rāhā ho pa. Ra kot tanhmā mē pakute hā mē pahpumunh par. Nē ahpýnhā tanhmā mē pahkrā hkī kute hkōt mē pahpumunh par. Tā kot mē pahtānopxar rāhā jakamā mo kaxyw kot kaj kēt mē ri amā mēhō puma ho ri apa?

⁸ —Jakamā kwa mē māmri mē kām mē apē ixkra hā amnhī jarēnh o ri apa nē amā mē uma xāj tee ri amnhī nhīpēx o ri apa hkēt nē. Koja mē kām ra mē ate ixkōt amnhī xunhwýr ā amnhī jarē. Pa ja hā mē apumu hāmri nē mē apyrā nē kaxkwa kamā Tirtūm kapēr o mē wrýk xwýnhjē mā ra mē ate ixkōt amnhī xunhwýr ā mē ajarē.

⁹ Nom kot ka mē kot ixtā tanhmā mē ato pymaj apē ixkwý hā amnhī jarēnh kēt japēr. Pa ja hā mē apumu hāmri nē nhýrmā amnhī xwar mē kām mē apē ixkwý hkēt ā mē ajarē. Jakamā kwa mē māmri mē kām apē ixkwý hā amnhī jarēnh o ri mē hkōt apa kē mē ama nē tanhmā inhmā hamaxpēr to.

¹⁰ Koja mē ama nē ām ama nē kām ixprām kēt japēr. Hāmri nhūm Tirtūm ixtā mē omu nom tokyx ixtā tanhmā mē ho hkēt nē. Koja kormā amnhī tā mē hamār o pa. Karō kot axte mē kām ijarēnh o amnhīrīt nhūm mē hkwýjaja kot mar nē kām ixprām nē ixkōt amnhī xunhwýr kaxyw nhūm kormā amnhī tā mē hamār o pa. Nom koja Karō xatā mē kām ixto amnhīrīt tā nhūm mē kuma nē ām kuma nē te mē kot kēp amnhī jamak pro pyrāk o amnhī nhīpēx o pa. Jao Karō hā hpijaam kēt mýrapē koja Tirtūm nhýrmā amnhī xwar te kot mē kēp amnhī jamak pro pyrāk o mē hipēx nhūm mē tee kām amnhī kapri kapry. Hāmri nē amnhī xā htýt kamā hamak tūm xatā wýr ma pa nē kamā pa ho pa. Jakamā kwa mē māmri mē kām mē apē ixkra hā amnhī jarēnh o ri mē hkōt apa nē tanhmā mē kām ijarēnh to ho ri apa.

¹¹ Koja mē ama nē kām mē amar prām kēt japēr hāmri nē ixtā mē apynē nē tanhmā mē anhi pēx to kaxyw. Nē Ijaew nhō Tirtūm kapēr o mē ahkre xā hā ixkre hwýr mē ato mrar japēr. Rý mē ō pahi hwýr mē ato mrar nē tanhmā kām mē ato hēx to. Nom kēr ka mē mē kām amnhī jarēnh kaxyw nē tee ri amnhī kukamā ajamaxpēr o amā mē uma kēt nē.

¹² Koja Tirtūm Karō ja kaxyw mē amā mē ajamaxpēr mex gō hāmri ka mē ō ri mē kām amnhī jarē. Jakamā kwa mē tee ri mē kām amnhī jarēnh kukamā ajamaxpēr o ri mē amā mē uma ho apa hkēt nē. Anē.

Mē hikukrēx rūnh pix kukamā hamaxpēr xwýnhjē jarēnh

Wam Ximotre 6.9-10; Xiakre 4.13-17, 5.1-

6

13 Nhũm Jejus arĩ mẽ ahkre o xa nhũm mẽ mar o kuhê. Rôm nhũm mẽhõ myja hwýr tẽ nẽ kãm kapêr nẽ kãm:

–Pa? Kwa ot pa awýr amã mẽmoj jarênh mã tẽ. Na pre inhĩpêxã ty nhũm ixtõ ixrom amnhũm õ mẽmoj piitã ho arĩk pa. Õ pika nẽ hkrit nẽ hikukrêx nẽ am mẽmoj piitã ho arĩk par kumrêx. Kwa ma ixkõt tẽ nẽ kãm anẽ pa wa amnhũm ho axkjê nã? Anẽ.

14 Hãmri nhũm kuma nẽ kãm:

–Tk. Koký. Na pa pre mẽ amã mẽ mẽmoj to ixpikjêr kaxyw mẽ awýr ixwryk kêt nẽ. Anẽ.

15 Hãmri nẽ mẽ kot mar o kuhê xwýnh piitã mẽ kãm kapêr nẽ mẽ kãm:

–Kwa kër ka mẽ amã anhõ mẽmoj rũnh prãm o ri apa hkêt nẽ. Na htem mẽmoj rũnh kukwak ri Tirtũm wýr apir kêt nẽ. Mẽmojta kêp pika pix nhõ xwýnh na.

16 Anhýr o mẽ kãm kapêr hãmri nẽ mẽ kãm awjarê. Mẽ hkukrêx rax ã kuxi nẽ mẽ kãm awjarê nẽ mẽ kãm:

–Nã koja mẽhõ õ mẽmoj rax nẽ. Nẽ hpur kãm õ rax nẽ. No am õ jaxwýr xã hã ixkre kêp grire.

17 Hãmri nhũm tee ri hpur kãm õ rax kukamã hamaxpêr nẽ hamaxpêr o: “Kwa tanhmã kot pa amnhĩ to nẽ ja piitã nhýri haxwý wehe? Inhmã amari mẽ kêp am-rakati xwýnhjê mã hkwy nhõr prãm kêt. Kot paj am amnhũm piitã ir pa nẽ kritpêm hkur o ixpa. Nom ixpê haxwýr xã hã ixkreja ixpê grire.” Anẽ.

18 –Hãmri nẽ hamaxpêr o: “Nã na pa ra ijamaxpêr. Kot paj ixkre grireta grã nẽ hpãnhã rax õ nhĩpêx. Hãmri nẽ ixpur kãm inhõta jamý nẽ kamã ir pa. Nẽ ixãpênh xã hã ixkukrêx piitã kamã haxwýr pa. Nã kot paj ho anẽ.” Anẽ.

19 –Hãmri nẽ ra ixkreja grãnh pa nẽ hpãnhã rax õ nhĩpêx. Nẽ hipêx pa hãmri nẽ kamã hpur kãm õta xir pa. Nẽ apênh xã hã hikukrêx piitã kamã unhwý. Hãmri nẽ omu nẽ hkĩnh nẽ. Nẽ hamaxpêr o: “Nã hãmri. Kot paj tokyx axte mẽmoj tã ixãpênh kêt nẽ. Ra inhõ rax kumrêx kênã. Kot paj kritpêm ho ixãpkur mex o ixpa. Nã am hãmri na pa amnhĩ kukamã ijamaxpêr mex pẽ ixkre rax nhĩpêx.” Anẽ.

20 Tã nhũm Tirtũm tee ri ã kot amnhĩ nhĩpêx anhýr ã omu nhũm ja kãm mex kêt nẽ. Hãmri nhũm hã kãm kapêr nẽ kãm: “Nã na ka atýx ri anhõ rax mẽ akukrêx rax o apikuprõnh kaprý. Na ka am amnhĩ pix kukamã ajamaxpêr o apa pẽ ã amnhĩ nhĩpêx anẽ. Nom kot kaj kamã ja kamã ty nẽ anhý kamã ma mõ nẽ amnhĩ kõt anhõ mẽmoj rax õ ho amõr kêt nẽ. Koja hpãnhã mẽhõ amýr pẽ ho amnhĩptãr pa ka rĩ amnhĩ pumu.”

Anẽ. Nhũm ã Tirtũm kãm kapêr anẽ. Á mẽ ujarênh kot anhýr.

21 –Mẽ kot amnhĩ nhõ nẽ amnhĩ kukamã pix mã hamaxpêr o mẽ pa xwýnhjaja na htem myja pyrã nẽ Tirtũm mã hamaxpêr o pa hkêt nẽ. Jakamã koja mẽ nhýrmã ty hãmri nẽ hkukrêx pix kukamã hamaxpêr nẽ amnhĩ mã pix mã hamaxpêr o paja mýrapê Tirtũm mẽ wa ixri htĩr tũm nẽ mex nẽ pa ho pa hkêt nẽ. Mẽ kot amnhĩ nhõ pix kukamã hamaxpêr xwýnhjaja nẽ amnhĩ kukamã pix mã mẽ hamaxpêr xwýnhjaja nẽ mẽ kamã ukapri hkêt xwýnhjaja mẽ õ mẽmoj rũnh tã koja mẽ nhýrmã ty hãmri nẽ amnhĩ kõt ho ho pixi nẽ o mõr kêt nẽ. Koja mẽ mẽmoj piitã rer pa nẽ ma ý kamã ma mõ. Jakamã kwa kër ka mẽ jajê pyrã nẽ anhõ mẽmoj to anhõxý ho ri apa hkêt nẽ. Anẽ.

Mẽ pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mããnên Wam Pêtre 1.3-9

22 Tã nhũm Jejus hpãnhã tanhmã hkõt mẽ pa ho mẽ pa xwýnhjê jahkre hto nẽ mẽ kãm:

–Kwa kër ka mẽ tee ri amnhĩ kukamã ajamaxpêr o ri apa hkêt nẽ. Amnhĩ xãpkur xã rý axê ka mẽ tee ri hkukamã ajamaxpêr kêt nẽ. Nẽ mẽ am mẽmoj piitã hkukamã tee ri ajamaxpêr kêt nẽ.

23 Tirtũm àhpumunh týx o àhpumunh týx xwýnh na. Na pre àhpumunh týx o mẽ anhĩpêx ka mẽ kukwak ri atĩr nẽ apa. Tã xã kot mẽ amã mẽ anhõ ho pa hkukamã àhpumunh kêt? Nã ja kukamã àhpumunh xihtýx kênã. Kêp mẽ anhĩpêx xwýnh jakamã mããnên kêp mẽ amã mẽ anhõ ho pa xwýnh. Nẽ kêp mẽ amã mẽ axê nhõr o pa xwýnh.

24 –Mãn ka htem kuwênhre pumu. Na hte tee ri amnhĩ xãpkur xã hkukamã hamaxpêr o hkapri nẽ ri pa hkêt nẽ. Na hte Tirtũm tãm kot kãm õ ho pa. Tã kãm mẽ pajapê htýx o kuwênhre jakrenh jakamã koja urak nẽ mẽ pamã mẽ panhõ mex o pa rãhã nẽ.

25-26 Jakamã kwa kër ka mẽ mẽmo arĩgro hã axãpkur xã hkryre pumu nẽ ate amnhĩ pẽ hkrêr par nẽ amã prãm o akapri nẽ apa hkukamã tee ri ajamaxpêr kêt nẽ. Am Tirtũm kamnãr rom axãmnhix anhõ hkryreta ku nẽ akĩnh kãm tanhmã amnhĩ nhĩpêx to ho ri apa. Xã kot ka anhõ mry grire pumu nẽ akapri nẽ nhũm ra tanhmã amã amnhĩ to rax to? Na htem am tee ri mẽmo hkukamã hamaxpêr o hkapri nẽ pa kaprý. Jakamã kër ka mẽ ã ri ajamaxpêr anhýr o akapri nẽ apa hkêt nẽ.

27 –Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpêr o hkapri nẽ harir kêt tã muxre nẽ harir ka mẽ omu. Te ho amnepêm finat pahĩti Sarumãw xê mex pyrãk nom am mex o kot hakrenh.

²⁸ –Pixôràreja arıgro ja hã htır nê muxre nê harir tã koja mêmô arıgro hã grã pa nê hapêx. Kêp pixôrà pix nê hapêx tokyx anhÿr tã na hte Tirtüm ho mex nê nhüm mux nê harir. Nom mê pajaja na hte mê pahto mex o pixôràre ho mexja jakrenh. Jakamã kwa mêmô kaxyw kot ka mê tee ri amnhÿ xê hkukamã ajamxpêr o akaprı nê apa? Nã kot kaj mê anê nê amnhÿ kaxyw Tirtüm mã ajamxpêr tÿx kêt nê.

²⁹ –Kwa mê tee ri amnhÿ xãpkur xã hkukamã ajamxpêr rãhã o ri akaprı nê apa hkêt nê. Nê mê tee ri amnhÿ kukamã tanhmã ajamxpêr to ho ri akaprı nê apa hkêt nê.

³⁰ Mê kot Tirtüm kôt amnhÿ xunhwÿr kêt xwÿnhjaja na htem ã ri hamaxpêr anhÿr o hkaprı nê pa. Tã kêr ka mê ho mê urãk kêt nê. Tirtüm kot mê panhõ mêmôj kêt kôt mê pahpumunh mex kênã.

³¹ Jakamã kêr ka mê ãm hkôt ri amnhÿ nhÿpêx rãhã nê. Nê amã ja pix kukamã ajamxpêr o ri apa hprãm. Hãmri nhüm amnhÿ tã mê apumu hãmri nê apkati mê tãm mê amã mêmôj nhõr o pa. Anê.

Kaxkwa kamã mê pakukrêx rax jarênh

Matêwre 6.19-21; mãânên Sikün Ximotre 4.8; Eprêw 10.34; Wam Pêtre 1.4

³² Nhüm Jejus arı nê kãm kapêr nê mê kãm:

–E mê ate ixkôt amnhÿ xunhwÿr xwÿnhjaja. Ra Tirtüm kot mê ato hkra jakamã kwa mê axãmnhÿx hkamnãr rom ri tanhmã amnhÿ nhÿpêx to ho ri apa. Na hte mê apê hkra hã mê apumu nê hkĩnh nê. Koja nhÿrmã kaxkwa kamã õ krı hwÿr mê ato api ka mê kamã wa ixkuri amex nê atır tım nê apa ho apa. Ja na mex o kot jar pika ja kôt mê õ mêmôj rünh nê pa xwÿnhnta jakrenh.

³³ Jakamã kêr ka mê axãmnhÿx ri akukrêx kwÿ ho wênê nê hpãnhã kãxpore jamÿ nê mê kêp amrakati xwÿnhjê mã ho apigrãnh o ri mê hkôt apa. Kot kaj mê ã amnhÿ nhÿpêx anê hãmri nê kaxkwa kamã akukrêx rax nê. Mo kaxkwa kamã mê ãhkĩnh xwÿnh koja mê apê ho ahkĩ? Nê kamã mo amnhõre kot mê apê homnu? Kaxkwa kamã ja amrakati kumrêx. Jakamã Tirtüm kot mê amã mê akukrêx nhõr mã xwÿnhnta koja aa apê omnuj nê hapêx kêt kumrêx.

³⁴ Kot kaj mê jar pika ja kamã akukrêx rax hãmri nê tanhmã apê omnu hto pix kukamã ajamxpêr rãhã ho ri apa. Nom kot kaj mê apê Tirtüm kra hã kot kaj mê jar akukrêx rax kêt tã kaxkwa kamã akukrêx pix kukamã ajamxpêr rãhã ho ra akĩnh nê ri apa. Anê.

Mê pahte Jejus kutêp tanhmã amnhÿ nhÿpêx to hã mê pamã karõ

Matêwre 24.42-43; Makre 13.32-37;

Rukre 21.34-36; mãânên Wam Tesarõn 5.4-8

³⁵ Nhüm pre Jejus arı mê ahkre nê mê kãm:

–E na pa pre ra mê apê ixkôt mê apa ho apa xwÿnhjê mã tanhmã amnhÿ kukamã amnhÿ jarênh to. Ixtyk nê akupÿm itır nê ma akupÿm ixãpir hãmri nê mêmô arıgro hã akupÿn mê awÿr ixwrÿkja na pa pre ra mê amã ja hã amnhÿ jarê. Tã kwa kêr ka mê ixwakre kamã ixte mê amã ã amnhÿ jarênh anhÿrja mã ajamxpêr tÿx pê ixkôt amnhÿ nhÿpêx rãhã ho ri apa.

³⁶⁻³⁸ –Te mê õ patrãw mã mê ãpênh mex xwÿnhjaja kot amnhÿ nhÿpêx pyrãk o amnhÿ nhÿpêx o ri apa. Koja mê õ patrãw ma mê kot xapên mã wa rer mã xwÿnh pumunh mã ma nhÿhÿm tê. Hãmri nhüm kãm mê ãpênh xwÿnhjaja arı kutêp õrkwÿ kamã hkri. Axkãm hamak rom nê kutêp hkri. Akupÿn htêm nhüm mê kot amnhÿ wÿr mar nê kãm kahê xã mênh tokyx anhÿr kaxyw arı kutêp õt kêt nê hkri. Kôt ã kamãt nhüm akupÿn hpõx o htêm rÿ arıgro hwÿr hpõx o htêm nhüm mê kot amnhÿ wÿr mar nê kãm kahê xã mênh tokyx anhÿr kaxyw kutêp õt kêt nê hkri. Akupÿn hpõx ã omunh hãmri nê tokyx apkur kaxyw kãm õ nhÿpêx kaxyw. Kêr kê akupÿn pøj nê ã mê kot amnhÿ nhÿpêx anhÿr ã mê omu nê hkĩnh nê. Tã kêr ka mê ãpênh xwÿnhntajê pyrã nê ixwakre kamã inhmã ajamxpêr rãhã ho ri apa. Jao ixkamã ajamak o apa ho ixkôt amnhÿ nhÿpêx mex rãhã nê. No kot paj akupÿn mê awÿr wrÿ hãmri ka mê ãpênh xwÿnhjê pyrã nê inhmã mêmôj nhõr kêt nê. Kêt pa kot paj mê õ patrãwta kurom mê amã mêmôj mex gõ.

³⁹ –Na htem mê kêp ãhkĩnh pymaj amnhÿ nhõrkwÿ jamãr rãhã ho pa.

⁴⁰ Ja pyrã nê mê ate akupÿn ixwrÿk xã hã arıgro pumunh kêt jakamã kêr ka mê õrkwÿ nhõ dõnta pyrã nê ixkutêp axkãm ajamak rom rãhã nê ri apa. Jao tãm amnhÿ nhÿpêx rãhã nê. Anê.

Mê õ patrãw mã mê ãpênh mex xwÿnhjê jarênh

Matêwre 24.45

⁴¹ Nhüm pre ã Jejus hkôt mê pa ho pa xwÿnhjê jahkre anê. Hãmri nhüm Simãw Pêtre kuma nê kãm:

–Kwa Pahiiti. Xãn ka mê piitã mê kãm ã akapêr anê nã? Xã ãm mê papxipixjê mã? Anê.

⁴² Hãmri nhüm kãm:

–Nã ãm ixwakre kamã mê ate ixkôt tanhmã inhmã amnhÿ nhÿpêx to ho mê apa xwÿnh piitã mê amã na pa ã ixkapêr anê. Koja mê ãpênh xwÿnhjê hõ õ patrãw mã ãpênh mex o pa nhüm amnhÿ tã omu nê ma nhÿhÿm mõi kaxyw nê ãhkram mêmôj piitã haxãr pa. Hãmri nê kãm: “E kêr ka ixwakre

kamā inhmā inhōrkwŷ htānopxa. Nē mē àpēnh xwŷnhjē mā ò mex kē mē apkr mex o pa.” Anē. Koja ā kām mēmoj tā karō anē hāmri nē kato nē ma nhŷhŷm mō.

⁴³ Hāmri nhŷm kām àpēnh mex xwŷnhnta wakre kamā kām àpēnh mex o pa. Jakamā nhŷm ò patrāw akupŷn hpōx o mō nhŷm amnhī wŷr harēnh ma nē hkīnh nē. Nē mēmoj tā amnhī tā kamā kahak kēt nē. Rŷ tee ri wakre kamā kām àpēnh punuj ā amnhī pumu nē tee amnhī kukamā hamaxpēr kēt nē. Kot wakre kamā kutēp àpēnh mex jakamā akupŷn hpōx ā harēnh ma nē hkīnh nē.

⁴⁴ —Jakamā nhŷm ò patrāwja akupŷn pōj nē kot kām àpēnh mex ā omu nē haxwŷja hkīnh nē. Hāmri nē kot kām hamār o pa kaxyw kām mēmoj piitā ihkram haxār pa.

⁴⁵ Nom koja kām àpēnh xwŷnhnta axtem nē wakre kamā kām àpēnh mex kēt nē. Nē tokyx akupŷn mōr kēt ā hkamnhīx nē wakre kamā kām mē àpēnh xwŷnhjē htak nē pipānh pix nē mē kām gō xānh xwŷnhjē kōt pix mā pa japēr.

⁴⁶ Hāmri nhŷm ò patrāw haēr pē akupŷn pōj nē tee ri ā amnhī nhīpēx anhŷr ā omu. Hāmri nē gryk tŷx nē tanhmā homnuj to. Hāmri nē kām mē àpēnh punuj xwŷnhjē mē mē ho pimrāātā amnhī nē mē hanor pa. Tā kēr ka mē ixwakre kamā ho mē urāk kēt nē. Mē kurom ixkapēr kōt tām amnhī nhīpēx mex rāhā ho ri apa.

⁴⁷⁻⁴⁸ —Nē koja mēhō kormā Tirtŷm kapēr mar kēt nē htŷx ri tanhmā amnhī tomnuj to ho pa. Hā koja Tirtŷm ja hā omu nē nhŷrmā kot amnhī tomnuj o pata mŷrapē tanhmā ho nhŷm amnhī xā htŷx kamā hamak tŷm xā kamā pa. Nom akrānhmā amnhī xā kamā hamak o pa. Aa kot Tirtŷm kapēr mar kēt jakamā koja ām akrānhmā amnhī xā kamā hamak o pa. Nom koja mēhō kapēr mar mex tā ām kuma nē hkōt amnhī nhīpēx kēt nē. Nē xatā hirōp kuhē nē tanhmā amnhī tomnuj to. Hā koja Tirtŷm tee ri ja hā omu nē nhŷrmā tanhmā homnuj tŷx to. Hāmri nhŷm wantajē pyrā nē amnhī xā htŷx kamā hamak tŷm xatā kamā pa ho pa nom mē kīnhā amnhī xā htŷx kamā hamak rāhā ho pa. Anē.

Jejus kot nhŷrmā mē kot amnhī tomnuj xā ho hapēx ā harēnh

Matēwre 10.34-36

⁴⁹ Nhŷm Jejus arī hkōt mē pa ho mē pa xwŷnhjē jahkre nē mē kām:

—Nā ixte mē omnu xā piitā ho ijpāx par nē mē kot tanhmā amnhī tomnuj to piitā ho ijpāx par kaxyw na pa pre wrŷ. Tā ra ixte piitā ho ijpāx par o inhmōr ronhŷx ja inhmā mex kumrēx. Nom kormā.

⁵⁰ Kot paj amnhī xā htŷx kām ijamak rax o mē kot amnhī tomnuj o ijpāx o hkrax.

Hāmri nē nhŷrmā ho ijpāx pa. Na pa ra ixtyk kaxyw ixte amnhī kā xā kamā ijamak kukamā ijamaxpēr o ra amnhī kamā ixkahak nē ri ixpa. Tā kot paj ja ho ijpāx pa nē ixkīnh tŷx kumrēx. Anē.

Mē kot Jejus ā xapēn kutā amnhī xunhwŷr ā mē harēnh

Matēwre 10.21, 10.34-35

⁵¹ Nhŷm Jejus arī mē ahkre nē mē kām:

—Nē ra mē awŷr ixwrŷk tā koja mē piitā ixkukwak ri hamakētcati nē āmnhīx ri pa hkēt nē. Kormā. Koja mē akwŷjaja ixkapēr ma nē mē apyrā nē amnhī kaxyw ixkōt hamaxpēr. No nhŷm mē akwŷjaja mē akīnhā kuma nē ām kuma. Hāmri nē ixtā tanhmā mē anhīpēx to ka mē ixpyrā nē amnhī xā htŷx kamā ajamak o ri apa.

⁵² —Nē koja tanhmān ixkre pyxi kamā mēmojaja ohtōn pa. Nhŷm war axktrutre nē ixkōt amnhī xunhwŷ nhŷm mē axkrunēpxi nē ixkwŷm ri amnhī nhīpēx nē ixkutā amnhī xunhwŷ.

⁵³ Nhŷm mē hipēēxā hkra my mē wa ixtā xapēn kutā amnhī xunhwŷ. Nhŷm mē katorxā hkra ni mē wa ixtā xapēn kutā amnhī xunhwŷ. Nhŷm mē wŷj umregēx mē wa haxwŷja ixtā xapēn kutā amnhī xunhwŷ. Koja mē ā ixtā xapēn nhīpēx anhŷr o pa. Anē.

Mē pahte amnhī tomnuj kaga nē Tirtŷm kōt amnhī nhīpēx ā mē pamā karō

Matēwre 5.25-26, 16.2-4

⁵⁴ Nhŷm Jejus hpānhā mē kot hkōt amnhī xunhwŷr kēt xwŷnhjē mā kapēr nē mē kām:

—Kwa mē inhma mē ate ixkōt amnhī xunhwŷr kēt xwŷnhjaja. Na htem kaxkwa kamā na htŷk rax pumu nē na wrŷk mā hamaxpēr kurē kumrēx. Hāmri nhŷm na wrŷ.

⁵⁵ Nē amgrā pē kōk krihkritja nhŷm htem kuma nē arigo htŷx mā hamaxpēr kurē kumrēx. Hāmri nhŷm arigo htŷx nē.

⁵⁶⁻⁵⁷ ā na ka htem aprī hā mēmoj pumunh kōt mēmoj kukamā ajamaxpēr mex o ri apa anē. Nom nhŷm Tirtŷmja mē ate tanhmā amnhī tomnuj to mŷrapē tanhmā mē ato kaxyw nhŷm mē ate ja hā amnhī pumunh tā tokyx amnhī tomnuj kaga hkēt nē.

⁵⁸⁻⁵⁹ —Na htem tanhmā xapēn tomnuj to. Hāmri nhŷm kot tanhmā war xapēn to xwŷnhnta pahi hwŷr htēm nē kām tanhmā kot ho xwŷnhnta jarēnh kaxyw. Hāmri nhŷm kamā gryk xwŷnhnta kot pahi mā harēnh kaxyw ā harēnh ma nē hāmri tokyx hwŷr tē nē wa tām akupŷm xapēn xām. Na htem ā amnhī nhīpēx anē. Pahi kot ja mar nē tanhmā mē ho pymaj na htem ā amnhī nhīpēx anē nē tokyx akupŷm tām xapēn xunhwŷ. No koja mē ā amnhī nhīpēx anhŷr kēt nē nhŷm pahija mē harēnh ma hāmri nē tanhmā kot hō ho xwŷnhnta pynē nē haxā nhŷm tee kām kator prām o hkrī kaprŷ.

Hāmri nê tanhmā amnhī to nê amnhī pānhā kām amnhī rer pa nhūm pahihtija kormā mē kām anē nhūm mē kām ure nhūm kato. Ja pyrā nê kēr ka mē Tirtūm tanhmā kot mē anhīpēx to pymaj tokyx mē ate amnhī tomnuj kaga nê hkôt amnhī nhīpēx rāhā ho ri apa. Anē.

13

¹ Tā nhūm axtem mē hkwỳjaja Jejus wỳr mra nê kām:

—Pa? Kwa xān ka ra Garirej nhō xwỳnh kwỳjē jarēnh ma nā? Na xep prem Jerujarē hwỳr mra nê ham mē kot Tirtūm mā amnhī jarēnh xā hā ixkre kamā kām amnhī jarēnh kaxyw kormā kām mry hpar o kuhē nhūm xep pahihti Piratja mē harēnh ma nē mē hā amỳnē nhūm mē ma mē hwỳr mra nē mē himex pa. Kwa mām nē kot amnhī tomnuj tỳx o mē pajakrenh ā na prem mē himex nā? Anē.

²⁻³ Hāmri nhūm mē kām:

—Nā mē kot amnhī tomnuj tỳx mỳrapē mē kot mē himex kēt. Mē apiitā mē ate amnhī tomnuj o axpēn pyrāk kēnā. Tā kot ka mē amnhī tomnuj kaga nē Tirtūm kôt amnhī xunhwỳr kēt hā kot ka mē nhỳrmā ty hāmri nē ô krī hwỳr axāpīr kēt nē.

⁴ No Jerujarē kamā ixkre prēkja mē kot kām “Siroe” anhỳr xwỳnhhta mē ho 18 nē mē hipy htem nē mē himex par xwỳnhjaja. Xā mē kot amnhī tomnuj tỳx mỳrapē na prem ty? Xā mē kot amnhī tomnuj tỳx o Jerujarē kamā arī mē htīr xwỳnhjē jakrenh?

⁵ Nā kot anhỳr kēt. Mē apiitā mē ate amnhī tomnuj o axpēn pyrāk. Jakamā kot kaj mē ā amnhī nhīpēx anhỳr kaga nē Tirtūm kôt amnhī nhīpēx kēt nē hāmri nē mē urāk nē nhỳrmā ty hāmri nē Tirtūm nhō krī hwỳr axāpīr kēt nē. Jakamā kwa mē ixkapēr ma nē kām ajamaxpēr tỳx rāhā ho ri apa. Anē.

Tirtūm kot mē pakamā gryk tokyx anhỳr kēt ā harēnh

Rōmān 2.4; Sikūn Pētre 3.8-9

⁶ Tā nhūm Jejus kē axte tanhmā mē ahkre hto. Nē Tirtūm kot tanhmā mē panhīpēx to hā kuxi nē mē kām awjarē nē mē kām:

—Koja hpur nhō dōn mēmo pār kre nhūm ra hprēk mex nē ô mā tām nē. Tā aa ô hkēt ā ra hā amgrā axkrunēpxi.

⁷ Hāmri nhūm kot hkre xwỳnhja tee ri omu nē kām āpēnh xwỳnh wỳr tē nē kām: “E kwa ma tē nē mēmo pār mūj krāhta nē amē. Mexti hā. Ra ô hkēt ā amgrā axkrunēpxi kēnā. Koja pēr aa ô hkēt nē. Mo kaxyw kot kēt ô hkēt tā ô mex xwỳnh kaēx ā mē kēp āmnār o kuhē? E hwỳr tē nē krāhta nē amē.” Anē.

⁸⁻⁹ Hāmri nhūm tee ri kot kām hā karōja ma nē kām: “Kwa nā kormā. Pa kop ixānnhīx pār krax ā mēmo japōk kwỳ kapi nē kop

hamā mām. Kē axte hā amgrā pyxi nē hapēx nē ô hkēt pa kormā krāhta nē kumē. Kōja amgrā ja kamā amā ô japēr ka omu nē akīnh nē.” Anē. Ā mē ujarēnh kot anhỳr. Anē.

Nhūm Jejus ā mē kām ujarēnh anē. Mē kot amnhī tomnuj tỳx o pa htā nhūm Tirtūm kot pur nhō dōn mā āpēnh xwỳnhhta pyrā nē mē kamā gryk tokyx anhỳr kēt ā nhūm ā hā kuxi nē mē kām ujarēnh anē.

Jejus kot arīgromnu hā mēhō ho mex ā harēnh

Rukre 14.1-6; Juāw 5.16-17

¹⁰ Tā nhūm mē ô arīgromnu pē sap kato nhūm Jejus Ijaew pikuprōnh xā hā ixkre hwỳr axā nē kamā Tirtūm kapēr o mē ahkre ho nhỳ.

¹¹ Nhūm kamā mēhō ni hikôt rāhā nē pa xwỳnhja nhỳ. Na pre ra amnepēm mēkarōmmuti tanhmā ho nhūm katāt nē ri mrar kēt kumrēx. Ām hikôt rāhā nē ri pa hā ra hā amgrā pē 18.

¹²⁻¹³ Hāmri nhūm Jejus omu nē amnhī wỳr kām hpa ho apē nhūm hwỳr tē nhūm hā ihkra xi nē kām:

—E na ka ra akupỳm amex.

Anē nhūm akupỳm katāt nē mex kurē kumrēx. Hāmri nē amnhī pumu nē hkīnh tỳx nē Tirtūm mā mex o mex ā harēnh o xa.

¹⁴ Nom nhūm mē pikuprōnh xā hā ixkre jamār xwỳnh maatija tee ri ja hā omu hāmri nē Jejus kamā gryk tỳx nē. Mē ô arīgromnu hā akupỳm kot ho mex jakamā nhūm kamā gryk tỳx nē. Hāmri nē mē pikuprōnh xwỳnhjē mā kām:

—Tk. Kwa semān ā mē āpēnh xā hā arīgro xohtōō. Kēp 6. Kot kaj mē māmri tōmīk nē sikūn nē tēs nē kwata nē kīta nē sēsta ja ā ka mē apē rỳ māmri Jejus wỳr amnhī to mra kē akupỳm tanhmā mē ato mex to. No sap ā kwari. Sap kēp mē pahpē Ijaew nhō arīgromnu kēnā. Na pu htem hā paxāpēnh kēt nē. Jakamā arīgro ja hā kot akupỳm mē ato mexja mex kēt. Anē.

¹⁵ Hāmri nhūm Jejus kuma nē kām:

—Kwa xā mē kajaja na ka htem sap ā axāpēnh kēt nē apa? Nā mē ate hā axāpēnh kēnā. Xān ka htem sap ā akrit kawar nē akrit mōx ma mē ho apa nē mē hkōm kēt nē? Nā na ka htem ma mē ho apa nhūm htem ixkō. Mot ka kēt mē ri axtem nē mē kot sap ā tanhmā amnhī toja nē mē kām akapēr?

¹⁶ Ixte ni ho mex xwỳnhhta mē pahpyrā nē kēp finat Apraāw kagrōt nyw ô na. Nhūm pre Satanasti te kot kām ē nē ri o pa pyrāk o hipēx jakamā nhūm tỳ hā hikôt nē ri paja ā ra hā amgrā kēp 18. Tā pa nē te ixte Satanasti ho ixkrihkrit nē ixte kēp utār pyrāk o hipēx nē akupỳm ho mex. Mo kot pa kēt ri omu nē ām omu nē arīgromnu hā ho mex kēt nē? Nā ixte arīgro piitā hā akupỳm mē ho mex o ixpa xwỳnh kēnā. Anē.

¹⁷ Hāmri nhūm mē kot kām kapēr mar prām kēt xwýnhjaja kuma nē kamā gryk nē. Te ho mēhprjē mā mē hamaxpēr nhōr pyrāk o mē hipēx pyrāk jakamā nhūm mē amnhī tā kuma nē kamā gryk nē. No nhūm mē kot ra ā amnhī nhīpēx anhŷr o pa hā omunh xwýnhjaja ja hā omu nē kām hkīnh nē.

*Jejus te kot mēmo hy pyrāk ā harēnh
Matēwre 13.31-33; Makre 4.30-32*

¹⁸⁻¹⁹ Nhūm Jejus arī mē ahkre nē tanhmā mē kām amnhī tā ujarēnh to nē mē kām:

—Nē Tirtūm kot mē awŷr ixte mē ato amnhīptār kaxyw inhmēnh ā ijarēnhja. Te ixte mēmo hy pixire pyrāk. Na htem hkre nhūm higrōt. Nē gaa nē rī hprēk. Hāmri nē pa anhgrā nhūm kuwēnhre hwŷr mra nē hō pytī kamā amnhīm haē nhīpēx. Tā kot paj nhŷrmā mēmo hy jarēnhnta pyrā nē ixpīxi htā kot paj pika piitā hkōt mē ho amnhīptā nē mē omunh mex rāhā ho ri ipxa. Anē.

Jejus te kot pāwti kaxkrit xā pyrāk ā harēnh

Matēwre 13.33-35

²⁰⁻²¹ Nhūm Jejus arī mē ahkre ho xa. Nom hprī hā amnhī jarēnh kēt nē. Ām amnhī tā kuxi nē mē kām awjarē nē mē kām:

—E kot pa hpānhā tanhmā mē amā pāwti kaxkrit xā jarēnh to. Koja mēnijē hō ām hkwy ho grire nē kupy nē kaxyw mēmo xōm kām kumē nē ho pihkār pa nē ho pāwti nhīpēx. Nhūm kaxkrit xāja grire htā pāwti piitā ho kaxkrit mex nē. Ja pyrā nē kot paj ixpyxi htā koja mē nhŷrmā pika piitā hkōt ixkōt amnhī nhīpēx mex o pa. Anē.

Nhūm pre ā Jejus mē kām amnhī tā pāw kaxkrit xāja xi nē harēnh anē.

*Kaxkwa hwŷr hakwa kre kahē xā jarēnh
Matēwre 7.13-14, 7.21-23; Juāw 10.7-10*

²² Tā nhūm Jejus arī krī pē Jerujarē hwŷr krī hkōt ri mē ahkre ho mē hkōt ri pa.

²³ Hāmri nhūm mēhō myja hwŷr tē nē mēmoj tā hkukja nē kām:

—Pa. Kwa inhmā mēmoj jarē. Xā koja mē ohtō nē nhŷrmā Tirtūm ri htīr tūm nē papa ho nā koja mē grēre? Anē.

²⁴ Hāmri nhūm kuma nē mē kot mar o kuhē xwýnh piitā kām:

—Nā mē kot Tirtūm kōt amnhī xunhwŷr xwýnhjē pix koja mē ō krī hwŷr agjē. Wŷr mē gjēx xāja ām pixii nom koja mē ohtō nē kām hkōt wŷr gjēx prām kēt nē. Na htem te hwŷr mē gjēx xā hō japēr o pa pyrāk. Nom pa na te ixpē hwŷr mē gjēx xā pixita pyrāk. Jakamā kwa kēr ka mē tokyx ixkōt amnhī xunhwŷr tŷx nē ixkōt ri amnhī nhīpēx o ri apa. Na htem ohtō nē kām ixkōt amnhī xunhwŷr prām kēt nē. Ixte amnhī nhīpēxja mē kēp hihtŷx jakamā nhūm htem ixkaga.

²⁵ —Tā koja mē nhŷrmā ty nē tee ri kām Tirtūm wŷr gjēx prām kaprŷ. Kot paj te mē

kēp kahē pyrāk o mē hipēx nhūm mē kapōt ā kuhē nē tee ri amnhī tā ixpumu nē inhmā: “Kwa mē inhmā kahē xā mē pa mē awŷr agjē Pahihti.” Anē. Hāmri pa mē kām: “Nā ixte mē apumunhre hā kot pa kēt ri mē amā kurē.” Anē.

²⁶ —Hāmri nhūm mē tee ri inhma nē inhmā: “Kwa nā ra ate mē ixpumunh mex kēnā. Na ka pre mē inhō krī kamā mē ijahkre ho ri apa nē mē ixkutā axāpkur o ri apa.” Anē.

²⁷ Hāmri pa mē kām: “Tk. Ixte mē akutā ixāpkur tā mē ate ixkōt amnhī xunhwŷre hā. Jakamā e mē ma mra. Mē ate amnhī tomnuy pix o mē apa xwýnh jakamā kot kaj mē ixwŷr agjēx kēt nē.” Anē. Kot paj ā mē kām ixkapēr anē.

²⁸ —Hāmri nhūm mē amŷm ri mē inhmex ā mē ixpumunh o kuhē. Kaxkwa kamā mē ixkīnh nē ri mē inhmex nē ipxa hā amŷm mē ixpumunh o kuhē. Apraāw nē Ijak nē Jako nē Tirtūm kapēr jarēnh o mē pa xwýnh piitā nhūm mē amŷm mē ixkīnh nē mē ixāpkur mex ā mē ixpumunh o kuhē. Hāmri nē tee ri mē ixwŷr kām gjēx prām kaprŷ nē hkaprī nē mur nē amnhī krā hkī jarē nē amnhī kā nhē nē amnhī kamā gryk tŷx nē. No ām tee ri amnhī kamā gryk kaprŷ. Ā koja mē amnhī nhīpēx anē.

²⁹ Nom Tirtūm kōt mē kot amnhī xunhwŷr xwýnhjaja koja mē kurom pika piitā kurūm axpēn wŷr akuprō nē Tirtūm wŷr agjē nē kuri hkīnh nē apkur mex o hkrī. Mē akwŷjaja nē pika piitā kurūm hohtō rax nē axpēn wŷr akuprō nē hwŷr agjē nē kuri apkur mex nē hkīnh nē pa ho pa.

³⁰ —Mē apē Ijaewjaja mē amā Ijaew kēt xwýnhjē hprām nōkati htā koja mē hkwyjaja mē akwŷjē rom Tirtūm ri axpēn wŷr akuprō nē hkīnh nē axpēn kutā apkur mex o hkrī. Jakamā kwa kot kaj mē urāk nē amā Tirtūm mē wa ixwŷr agjēx prām hā kot kaj mē ixkōt amnhī xunhwŷr nē ixkapēr kōt amnhī nhīpēx mex o ri apa. Anē.

Jejus kām Jerujarē nhō xwýnhjē japē hā harēnh

Matēwre 23.37-39

³¹ Hāmri nhūm Parijew nhō xwýnh kwŷjaja Jejus wŷr mra nē kām:

—Pa. E ot pa mē awŷr mra. Kwa kēr ka ma Jerujarē hwŷr amōr kēt nē. Na ra mē hkīnh wŷr pahī Eroxja pōj nē kot tanhmā ato kaxyw atā amnhī jarē pa mē kuma. Jakamā kwa mē hwŷr amōr kēt nē. Nhām krī hō hwŷr mām mō. Anē.

³² Hāmri nhūm mē kuma nē mē kām:

—Tk. Nā kot pa umaj nhām krī hō hwŷr inhmōr kēt nē. Kot paj ma mē hkwyjē nē mēkarōmnuti japōx pē mē hkwyjē ho mex o ma hwŷr mō. Pahī Erox kām mē hpar pix prām. E mē māmri ma akupŷm hwŷr mra nē

ã kãm ixkapêr jarênh anê. No kot paj umaj nhýhým ixprôt nê ixtêm nê kêp ixpimxur kêt nê. Ra ixte ô krî hwýr inhnojarêr kênã. Anê.

³³ Hãmri nê mê kot mar xwýnhjê mã amnhî jarê nê mê kãm:

—Kot paj tanhmã amnhî nhîpêx to ho ri ixpa rãhã Jerujarê hwýr môn pój nê kamã ty. Kamã na htem mê kot Tirtüm nhý hã kapêr jarênh xwýnhjê nhímex. Tã hwýr kot paj mô. Anê.

Nhùm pre ã Jejus mê kãm amnhî jarênh anê.

³⁴ Hãmri nê te ra kot Jerujarê nhô xwýnhjê pumunh o ãm nê mê kãm kapêr pyrãk o kapêr nê mê kãm:

—Hêxta waa nê mê apê Jerujarê nhô xwýnhjaja. Tirtümja xatã mê awýr ý hã kapêr jarênh o mê pa xwýnhjê rênh tã ka mê kapêr mar kêt nê. Nê axtem nê kên o mê htak o mê himex o apa. Na ka htem ã amnhî tomnuj o apa anê. Tã arî inhmã mê ajamãr o ri ixpa hprãm. Te ho krãhyre kot nore hpro nê ho hikwý pyrãk o na pa inhmã mê anhîpêx prãm tã ka mê apê ixprãm nõkati nê ixkaga.

³⁵ Mýrapê koja Tirtüm mê anhô krî jamãr kêt nê. Kot paj tokyx ty nê mê apiitã mê are nê ma akupým api ka mê axte ixpumunh kêt nê. ãm akupýn ixwrýk xã hã arîgrota pix ã koja mê akwýjaja mê amýr pê krî ja hwýr ixwrýk kãm ixpumu. Hãmri nê mê akurom ixpumu nê hkînh týx nê. Nê tã ixkôt amnhî xunhwý nê axpên mã ijarênh o:

E ota Tirtüm kot mê pahwýr mênh xwýnhta pój. Nã ãm hãmri na mê pahwýr wrý. Na mex kumrêx. Anê.

14

Jejus kot axte arîgromnu hã mêhõ ho mex ã harênh

Rukre 13.10-17

¹ Tã nhùm sap nhùm Jejus ma Parijew nhô xwýnhjê krãhtüm kutã apkur kaxyw ôrkwý hwýr tê. Hãmri nhùm mê wa hã htu rax nê Jejus apkur ã tãnopxar o kuhê. Mê kot amnhî nhîpêx kwým ri tanhmã amnhî nhîpêx to nhùm mê kot hã omunh nê ra hã ãmnênh kaxyw nhùm mê kuri htãnopxar o kuhê.

² Nhùm ixkreja kamã mêhõ my hte hikot xwýnh mê kuri xa.

³ Hãmri nhùm Jejus omu nê hã Parijew nhô xwýnhjê mê Tirtüm kapêr tüm o mê ahkre xwýnhjê kukja nê mê kãm:

—Kwa mê inhmã mêmoj jarê. Jarãhã na mê panhõ arîgromnu pê sap. Tanhmã na pre finat Mojesja Tirtüm nhý hã mê pahte sap ã tanhmã amnhî nhîpêx to hã mê pamã karõ hto? Xã kot puj mê akupým mê ho mex nã? Kot puj mê ãm mê omu nê akupým mê ho mex kêt nê? E mê atõ inhmã ja jarê. Anê.

⁴ Hãmri nhùm mê kuma nê tanhmã kutã kãm nê hkêt nê. ãm akryk mar o kuhê.

Mê kot tanhmã kãm nê nhùm kot ta pãnhã mê kãm tanhmã nê pymaj nhùm mê akryk mar o kuhê nê tanhmã kutã kãm nê hkêt nê. Hãmri nhùm tee ri mê omu hãmri nê myja ã ãhkra xi nê akupým ho mex. Hãmri nê hano nhùm ma akupým mex nê hkînh nê ma tê.

⁵ Hãmri nhùm Jejus mê kãm:

—E mê inhma. Xã koja mê akra sap ã mê apê ahkrehti xupým kãm têm ka mê ãm omu nê arîgro mex jamãr pê tokyx ho axãpir kêt nê? Nã kot kaj mê ho axãpir kurê kumrêx. Rý koja akrit môx gyw mã axã xat ka mê omu nê ãm omu nê arîgro mex jamãr pê tokyx hkaxãr kêt nê? Nã kot kaj mê hkaxãr kurê kumrêx. Na htem sap ã tanhmã mê ho mex to ho pa. Mê panhõ arîgromnu htã pu htem hã tanhmã mê ho mex to. Jakamã na pa ã hã myta ho mex kurê kumrêx anê nê ri arîgro mex jamãr kêt nê. Anê.

⁶ Nhùm pre ã Jejus mê kãm amnhî jarênh anê nhùm mê kuma nom kutã kãm mêmoj jarênh kêt nê. Ra kot akupým ho mex jakamã nhùm mê tanhmã hã kãm nê hkêt nê kuhê.

Mê pahte amnhî to hkrye hã mê pa-jarênh

Matêwre 23.6-14; Rukre 6.32-36; mããnêh Xiakre 4.10; Wam Pêtre 5.5-6

⁷ Hãmri nhùm mê apkur kaxyw mê hkri xã hã hkri hpa. Nhùm mê hkwyjaja hkwyjê pê amnhî to wa nê mê hkri xã mex kãm hkri hpa. Hãmri nhùm Jejus ja hã mê omunh o xa nê axte mê kãm mêmoj jarê. No ãm mêmoj tã kuxi nê mê kãm awjarê nê mê kãm:

⁸ —Nã koja mê axpên mã mêhõ rer kaxyw nê amnhî wýr mê atã karõ. Mê ate kutã axãpkr kaxyw. Hãmri kër ka mê hwýr mra nê axãpkr kaxyw nê kupîp kãm akri kurê kumrêx. No kot kaj mê kêp amnhî to wa nê mê hkri xã mex pytã nê hã akri nhùm ra kot amnhî to rax xwýnhjê hõja hapu hã mê akõt tèn axã.

⁹ Hãmri nhùm ixkre nhô dõn kot amnhî wýr mê awýr xwýnhta mê hkri xã mexta ã mê awý nê mê amã: “Kwa mê atõ kãnhmã xa nê kãm mê hkri xã kaprã.” Anê. Hãmri ka nhãm xa nê kãm anhýr xata gõ. Hãmri nê apijaãm kãm hpãnhã kupîp kãm nhý.

¹⁰ Ja pymaj kër ka mê kupîp kãm akri kurê kumrêx. Kê ixkre nhô dõnja tee ri ja hã mê apumu nê mê amã: “Tk. Kwa ixkrãmnhwýjaja. Mê kupîp kãm akri hkêt nê. Kwa mê mra nê jar mê hkri xã mex ã mãn akri.” Anê hãmri nhùm ja mê amã mex nê. Nhùm mê piitã kot mê ato mex ã mê atã omu ka mê ajaxwýja amnhî tã omu nê akînh nê ajamakêtkati nê akri.

¹¹ —Nê koja mêhõ te amnhî to rax o hkwyjê jakrenh pyrãk o amnhî nhîpêx o ri pa hãmri nhùm Tirtüm ja hã omu nê tanhmã hã ho. Hãmri nhùm ra amnhî to

grire hã amnhĩ pumunh o ri pa nê rĩ amnhĩ pumu. Nom koja mēhō amnhĩ to rax o hkwýjê jakrenh pyrāk o amnhĩ nhĩpêx o ri pa hkêt nhũm Tirtũm ja hã omu hãmri nê tãm amnhĩm kot amnhĩ to rax xwýnh ã harê. Anê.

Mê pahte mê kêp amrakati xwýnhjê ho mex ã mê pamã karô

¹² Nhũm pre ã Jejus mē ahkre anê hãmri nê hpãnhã mē apkur xà hã ixkre nhô dõnja mã kapêr nê kãm:

—Nà na ka hte amnhĩ wýr akwýjê pix wý. Atõjê hwý nê akrãmnhwýjê hwý. Nê mē hikãxpore rũnh xwýnhjê hwý. Nom nhýrmã mē kot amnhĩ swar amnhĩ nhõrkwý hwýr awýr pix kaxyw na ka hte ã amnhĩ wýr mē hwýr anê.

¹³ No kêt amnhĩ wýr mē no kre xwýnhjê mãn wý. Nê mē hyk o mē pa xwýnhjê mãn wý. Nê mē hkrã pipãnh puro xwýnhjê mãn wý. Nê mē hpigêx týx xwýnhjê mãn wý. Nê mē hiroto nê ãpênh kêt xwýnhjê mãn wý. Kêr ka amnhĩ wýr jajê mãn wý kê mē awýr mra nê akutã apku.

¹⁴ Mo mē kot amnhĩ swar awýr kaxyw mē õ mēmoj? Mê kêp amrakati. Tã kot kaj mãmri amnhĩ wýr mē awýr nhũm Tirtũm mē hã apumu hãmri nê nhýrmã kot akupým mē ho hũr xà hã arĩgrota ã mē hã amã mēmoj mex gõ nê ato mex nê. Hãmri ka akĩnh nê. Anê.

Tirtũm kutã mê paxãpkur xà maati jarênh Matêwre 8.11, 25.1-10, 26.29; mããnên Apokarip 19.9

¹⁵ Hãmri nhũm mē apkur kaxyw hkrĩ pa nhũm Jejus nhĩhkõ hã mē apkur o mē krĩ xwýnhjê hõja tanhmã Jejus mã kapêr to nê kãm:

—Hêxta waa nê. Kot puj mē nhýrmã Tirtũm nhõ krĩ hwýr api nê kutã paxãpkur o pahkrĩ nê pahkĩnh týx kumrêx. Anê.

¹⁶ Hãmri nhũm kuma nê kê axte mē ahkre. Mē kot Tirtũm kutã apkur kaxyw kot amnhĩ wýr mē hwýrta ã nhũm mē ahkre. No ãm hã kuxi nê tanhmã mē kãm ujarênh to nê mē kãm:

—Koja mēhō amnhĩ wýr mē ho ohtõ nê mē kot kutã mē apkur mex kaxyw mē kuwý.

¹⁷ Hãmri nê mē hwýr kãm ãpênh xwýnh mē nê kãm: “E ma tē nê mē kãm awjarê kê mē tokyx mra pa mē apku.” Anê.

¹⁸ Hãmri nhũm kuma nê ma mē hwýr mē kãm ujarênh o tē. Hãmri nê wamta mã anê nhũm kuma hãmri nê hitõt nê kãm: “Nà kot paj hwýr ixtêm kêt nê. Na pa ham amnhĩm pika hkwýjapró. Jakamã kot paj ma hwýr tē nê ixprĩ hã omu mãn. Kwa kêr ka kãm ijarê kê ixte tanhmã hã nê xà hkõt ã ixte amnhĩ nhĩpêx anhýrja mã hamaxpêr kêt nê.” Anê.

¹⁹ —Hãmri nhũm kuma nê hpãnhã nhãm ja wýr tē nê kãm awjarê nhũm kuma nê

haxwýja hitõt nê kãm: “Nà kot paj hwýr ixtêm kêt nê. Na pa ham amnhĩm mõx o 10 nê hapró. Jakamã kot paj ma hwýr tē nê ixprĩ hã ri omu mãn. Kwa kêr ka kãm ijarê kê tee ri tanhmã hamaxpêr to hkêt nê. Ixte tanhmã hã nê xà hkõt ã ixte amnhĩ nhĩpêx anhýr kêt.” Anê.

²⁰ —Hãmri nhũm kuma nê hpãnhã ma ihõta wýr tē nê kãm awjarê nhũm kuma nê haxwýja hitõt nê kãm: “Nà kot pa hwýr ixtêm kêt nê. Na pa kormã ham ixprõ. Kormã ixprõ nyw nê inhmã rer prãm kêt jakamã kot paj ma hwýr ixtêm kêt nê.” Anê.

²¹ —Hãmri nhũm kãm ãpênh xwýnhhta tee ri mē kuma nê awjanã nê ma akupým tē. Kot ma mē hwýr mēnh xwýnhhta wýr ma akupým tē nê kãm mē harê. Hãmri nhũm tee ri mē harênh ma nê mē kamã gryk nê. Hãmri nê hpãnhã mē kêp amrakati xwýnhjê hwýr kãm ãpênh xwýnhhta mē. Mê hkrã pipãnh puro xwýnhjê hwýr kumê. Nê mē hpigêx týx xwýnhjê hwýr kumê. Nê mē hiroto nê ãpênh hkêt xwýnhjê hwýr kumê nhũm ma mē kãm ujarênh o tē. Hãmri nê amnhĩ kõt mē kuwý nhũm mē kuma nê wamtajê rom hkõt mrar kurê kumrêx. Hãmri nê agjê nê apkur kaxyw mē hkrĩ xà kamã hkrĩ hpa.

²² Hãmri nhũm kãm ãpênh xwýnhja õ pa-trãw wýr tē nê kãm mē harê nê kãm: “E ate mē hã karõ xàta kõt na mē ra hkrĩ hpa htã arĩ mē hkrĩ xà hkwý hkaprý.” Anê.

²³ —Hãmri nhũm kuma nê kãm: “Hêxta waa nê. Kêt ãm mē hkrĩ xàta hipu mex ronhýx pa omu nê ixkĩnh nê. No ãm kormã piitã hipu hkêt. Kwa ma krĩ pu hã ri mē hapêr o mra. Nê nhýri mē hkwýjê pumu nê mē hapró nê man amnhĩ kõt mē o mra kê mē hkrĩxã ho hipu hpa.

²⁴ No kêt wam ixte amnhĩ wýr mē hwýr xwýnhhtaja. Mê hitõt xwýnhhaja kot paj axte amnhĩ wýr mē hwýr kêt nê.” Anê. ã mē ujarênh kot anhýr. Na hte ã Tirtũm amnhĩ wýr mē piitã mē hwýr anê. Anê.

Mê pamã Jejus kĩnh týx ã mê pamã karô Matêwre 10.37-38; Makre 8.34; Rukre 9.23-25; Juãw 12.26

²⁵ Tã nhũm Jejus mē òrkwý rũm kato nê kormã Jerujarê hwýr mē nhũm mē hohto rax nê hkõt mō. Hãmri nhũm Jejus xa nê mē ho hakêx nê mē omu nê mē kãm:

²⁶ —E kot ka mē atõ amã ixkõt amnhĩ xãm prãm nê ã amnhĩ nhĩpêx anê. Nê amã atõ nê atõx nê anhĩpêxã nê akatorxã japê htýx tã kêr ka amã ixkĩnh týx o wa mē hakrenh pa. Nê amã aprõ nê akrajê japê htýx tã kêr ka amã ixkĩnh týx o wa mē piitã mē hakrenh pa. Nê amã ixkĩnh týx o amã amnhĩ japê jakre. Kêr ka mē atõ ixkõt amnhĩ xãm kaxyw nê ã amnhĩ nhĩpêx anê.

²⁷ —Koja mē ixpĩ pa mē anê ty. Tã mē ate ixkõt amnhĩ nhĩpêx o mē apa xwýnhhaja.

Koja mē ixtā mē apar mā tā kēr ka mē amā ixlñh tỳx o mē umaj ixlkaga hkēt nē. Kwār mē māmri tanhmā ixtā mē ato. Kot kaj mē nhÿrmā Tirtũm mē wa ixri axte amnhĩ xā kamā ajamak kēt nē atĩr tũm nē amex rāhā apa ho apa. Nom kot kaj mē ixlñhā jar pika ja kamā amā amex nē apa hprām xāj ixlkaga hāmri nē nhÿrmā wa ixri atĩr tũm nē apa hkēt nē. Anē.

Mē pahte amnhĩ kukamā pajamaxpēr mex ā mē pamā karō

²⁸ Nhũm Jejus arĩ mē kām kapēr nē mē kām:

—Kwa kēr ka mē ixlkōt amnhĩ xunhwÿr kaxyw nē amnhĩ kukamā ajamaxpēr mex nē. Na htem amnhĩm ōrkwÿ rūnh nhĩpēx kaxyw hāmri nē hkukamā hamaxpēr mex nē. Nē kaxyw krax mā kuhē xā hkukamā hamaxpēr. Nē kaxyw kÿx pē kām hikwÿ xāja kukamā hamaxpēr. Nē ōkwaēja kukamā hamaxpēr. Nē hā pōja kukamā hamaxpēr. Ā na htem amnhĩm ōrkwÿ rūnh nhĩpēx kaxyw hkukamā hamaxpēr mex anē.

²⁹ Nom kot kaj mē hkukamā ajamaxpēr mex kēt nē ām kaxyw pĩ ho grēre nē hakā. Rÿ ra hā axapēnh rax kurē ra amā ho anhÿr kaga nē hkaga hpa nē hatur xām mēnh kēt nē. Hāmri nhũm mē hkwyjaja hānh mra nē omu nē atā hpēr o axkē.

³⁰ Nē axpēn mā ri ajarēnh o: “E ga mē ixlkre mÿj pumu. Na pre hipēx xwÿnhja hkurē kām kaga nē hipēx par kēt nē.” Anhÿr o axpēn mā ajarē. Ja pyrā nē kēr ka mē ixlkōt amnhĩ xunhwÿr kaxyw nē amnhĩ kukamā ajamaxpēr mex nē. Nē ajamaxpēr o: “Nā mē kot Jejus ā tanhmā ixto htÿx tā kot paj hkaga hkēt nē. Kot paj hkōt amnhĩ nhĩpēx rāhā ho ri ixpa.” Anhÿr o amnhĩ kukamā ajamaxpēr. Hāmri nē rĩ kormā ixlkōt amnhĩ xām. No kot ka mē umaj ixlkaga hkukamā ajamaxpēr hāmri nē ixlkōt amnhĩ xām kēt kurē kumrēx.

³¹ —Nē koja krĩ hō kamā pahihti nhō pōristi xohtō nē. Nē kutā nhām krĩ hō kamā pahihti nhō pōristija grēre. Tā nhũm wa hpijapu kaxyw nhũm krĩ hō rūm pahihti nhō pōristi xohtōja mē grēreta wÿr mra. Hāmri nhũm kutā krĩ hō kamā mē ō pōristi grēre nhō pahi nhÿ nē tee ri mē amnhĩ kukamā hamaxpēr nē hamaxpēr o: “Kwa koja apu krĩ hō rūm pōristi xohtō raxja nhũm inhō pōristi grēreja mē axpēn kutā kuhē nē axpu nhũm mē inhnē mē himex. Na inhō pōristi grēre kēnā.” Anhÿr o hamaxpēr.

³² —Hāmri nē pahi hōta wÿr ō kōwenatō mē. Kormā krĩ hō rūm mē hohtōtāja mē htēp kēt nhũm mē kutā kumē nhũm ma mē kutā tē. Hāmri nē awry hā mē hkaxpa nē mē ō pahihti mā kām: “E na mē inhō pahihti akutā inhmē pa tē. Na inhmā: ‘Ma tē nē mē kām awjarē. Kot puj pēr mē papijapu hkēt nē. Kwarĩ. Kot puj mē tām axpēn xunhwÿ.’

Anhÿr o kapēr nē mē akutā inhmē pa tē.” ā mē ujarēnh kot anhÿr. Ja pyrā nē na htem mēmoj kukamā hamaxpēr mex nē rĩ kormā tanhmā amnhĩ nhĩpēx to.

³³ —Tā kēr ka mē atō amā ixlkōt amnhĩ xām prām hāmri nē pahita pyrā nē amnhĩ kukamā ajamaxpēr tÿx nē rĩ kormā tanhmā amnhĩ nhĩpēx to. Kēr ka ate inhmā tanhmā amnhĩ nhĩpēx to ho apa kaxyw hāmri nē inhgryk ā te ate amā amnhĩ japē hkēt pyrāk o mēmoj piitā mā anhñkra karo pyrāk o amnhĩ nhĩpēx. Hāmri nē rĩ kormā ixlkōt amnhĩ xām.

³⁴⁻³⁵ No kot kaj mē amnhĩ kukamā ajamaxpēr kēt nē atÿx ri ixlkōt amnhĩ xunhwÿr japēr. Hāmri nē mēmo arĩgo hā mē kot ixtā tanhmā mē ato xwÿnhjē pymaj ra ixlkaga mā. Hā kot kaj mē te mē ate kaxwa punu pyrāk o amnhĩ nhĩpēx. Kaxwaja mē apkur xā kamā mex. Na htem amnhĩm ho ō xānh nē kuku. Nom koja mēhō kamā pika hkwy mē nē ho ahkā hāmri tanhmā kot mē ho nē akupÿm ho mex? ām mē kot hkapĩr pix kaxyw koja mex. Ja pyrā nē kot ka mē atō ate inhmā tanhmā amnhĩ nhĩpēx to ho apa hā amnhĩ jarēnh tā gaa nē amā ixlkōt amnhĩ nhĩpēx prām nōkati. Hāmri nē ra te ate kaxwa punu kapĩr mā tāmta pyrāk. E kwa mē mēmoj tā iuxjarēnhja ma nē mē urāk nē amnhĩ kukamā ajamaxpēr mex nē. Anē.

15

*ōwēhti pikunor jarēnh
Matēwre 18.12-14*

¹ Tā nhũm mē kot pahihti mā hkwyjē pē kaxpore hkwy jamÿnh xwÿnhjē mē mē kot amnhĩ tomnuj xwÿnhjaja Jejus kapēr mar kaxyw hwÿr mra.

² Hāmri nhũm Parijew nhō xwÿnhjē mē mē kot Tirtũm kapēr tũm o mē ahkre xwÿnhjaja mē hā Jejus pumu. Hāmri nē kē wem axte axpēn mā tanhmā ho kapēr punuj to nē axpēn mā:

—Tk. Kwa na hte mÿjti axtem nē mē kot amnhĩ tomnuj xwÿnhjaja amnhĩ wÿr mē kuwÿ nē tōhā mē kutā apku. Kwa mē kot amnhĩ tomnuj xwÿnh kēnā kot kēt mē kutā apku o pa. Anē.

³ Hāmri nhũm Jejus amnhĩ tā mē kuma nē tanhmā mē kām kapēr to. Nom hprĩ hā mē kām kapēr kēt nē. Kē ām amnhĩ tā kuxi nē mē kām ōwēhti pikunor jarē nē mē kām:

⁴ —Koja mēhō ō ōwēhti xohtō nē. Nē ma nhÿri hamār o pa. Hāmri nhũm pyxire nē hkwy kaga nē ma nhÿhÿm ahte tē nē akunok. Hāmri nhũm ō dōnja ma kot akupÿm piitā o mōr kaxyw hkwy ho pikuprōnh pa hāmri nē tee ri hkwy kaēx ā pikunor xwÿnhja japēr. Hāmri nē ma hkwy ho mō nē nhÿri kure. Kot nhÿri kutēp apkur o ri pa kaxyw kure hāmri nē ma akupÿm

pikunor xwýnhnta japêr o tē. Hāmri nē hapêr ryy nē nhýri hwýr kato.

⁵Nē omu nē hkīnh tỳx nē. Hāmri nē amnhī kre hā kumē nē ma akupým hwýr hwýr o tē.

⁶Hāmri nē mē ĩhkō hā kumē nē hkīnh nē hkrāmnhwýjē ho akuprō nē ōrkwý htā mē ōrkwý xwýnhjē ho akuprō nē mē kām: “Kwa na pre ixpē ixkriita ō akunok. Pa pre hapêr kām ixihýtỳx nē kām ixkato nē omu nē ixkīnh nē. Jakamā kwa wem määnēn inhý hā akīnh.” Anē.

—Ā mē ujarēnh kot anhýr.

⁷Ja pyrā nē koja mē kot amnhī tomnuj tỳx xwýnhjē hō tee ri amnhī pumu nē kot amnhī tomnuj kaga nē Tirtüm kōt amnhī xām. Hāmri nhūm kaxkwa kamā mē piitā ja hā omu nē hkīnh tỳx nē. Te ho my kot ōwēhti hpikunor xwýnh mā kator nē hkīnh tỳxta pyrāk. Na hte Tirtüm tām mē kot amnhī nhīpēx o mē pa xwýnhjē pumu nē hkīnh nē. Tā koja mēhō kot amnhī tomnuj tỳx tā ā amnhī nhīpēx anhýrja kaga nē Tirtüm kōt amnhī xām hāmri nhūm amnhī tā omu nē hkīnh tỳx nē. Jakamā na pa hte mē akuoro ā mē kot amnhī tomnuj xwýnhjē hkōt Tirtüm kapêr o mē ahkre rāhā ho ri ixpa. Anē.

Nhūm pre ā Jejus mē kot tanhmā ho kapêr punuj to xwýnhjē mā amnhī jarēnh anē.

Kāxpore pikunor jarēnh

⁸Nhūm Jejus arī mē kām awjarē nē mē kām:

—Nē ja. Koja mēhō ni hikāxpore kēp 10. āpēnh o arīgro pē 10 pānhā kāxpore kēp 10. Tā ho pyxi nē ho akunok. Hāmri nē tee ri hapêr nē hkaprī nē. Hāmri nē kanē hpōk nē hitom kapōnh pē hprī hā hapêr o ri pa nē kām kato.

⁹Hāmri nē kupy nē hkīnh nē hkrāmnhwýjē ho akuprō nē ōrkwý htā mē ōrkwý xwýnhjē ho akuprō nē mē kām amnhī jarē nē mē kām: “Xē na pre ixpē ixkāxpore hōta akunok pa tee ri hapêr tā akupým kām ixkato nē kupy nē ixkīnh nē. Jakamā xē wem inhý hā määnēn akīnh.” ā mē ujarēnh kot anhýr.

¹⁰—Ja pyrā nē koja mē kot amnhī tomnuj xwýnhjē hō pyxire nē amnhī tomnuj kaga nē ixkōt amnhī xām. Hāmri nhūm kaxkwa kamā mē piitā ja hā omu nē hkīnh nē. Te mēhō ni kot kāxpore pikunor xwýnh mā kator nē hkīnhnta pyrāk. Anē.

Mē hkra pikunor jarēnh

¹¹Nhūm Jejus arī mē ahkre ho xa. Tirtüm kām mē piitā mē hapē htỳx ā mē ahkre ho xa. No kē ām hā kuxi nē kē we tanhmā mē kām ujarēnh to nē mē kām:

—Nē koja mēhō hkra my wa axkrut.

¹²Hāmri nhūm kot hapu ō papaj wýr tē nē kām: “E papaj. Ot pa awýr tē. Kot kaj nhýrmā ty pa wa amýr pē akukrēx o ixārīk. Jakamā e kwa tokyx atír ri amnhī kamā wa inhūmā ho axkjē pa inhō ho amnhīptār kurē kumrēx nā?” Anē. Hāmri nhūm kuma nē wa kām

hikukrēx o axkjē. Kot wa mā hwýr gō nē kot hapu mā hwýr gō.

¹³Hāmri nhūm kot haputa ām ri hipēēxā hkōt pa hkrānre hāmri nē kot kām hikukrēx nhōr jamýnh pa nē ma nhýhým o mō nē ho wēnē hpa. Hāmri nē hpānhā kāxpore jamý nē ma nhýhým mō. Nhýhým awry hā pika hō hwýr ma mō. Mōō hāmri nē krī hō kamā htỳx ri tanhmā amnhī tomnuj to ho ri pa. Hāmri nē gaa nē ra mē hkuprýjē hā kāxpore ho hapēx pa. Nē kagōxýhti hā ho hapēx pa. Nē gaa hāmri nē hikāxpore hkēt nē ri pa.

¹⁴—Rōm nhūm pikaja kamā mē hā na wryk kēt ry rax nē. Nē gaa nhūm mē hpur kām mē kēp mē apkur xā hā mēōja hapēx pa. Jakamā nhūm mē hkra kot haputa kēp amrakati nē kām prām tỳx nē ri pa. Hāmri nē tee ri amnhī kukamā hamaxpēr.

¹⁵Hāmri nē amnhī to krī nhō xwýnhjē mar o ri pa. Kot mē kām tanhmā āpēnh to nē hpānhā apkur kaxyw. Hāmri nhūm mēhō kot kām hkrit hagró jamār kaxyw hā kumē nhūm ma hwýr tē nē kām hamār o pa. Nom kot kām hamār o pata pānhā ām kām mēmoj nhōr kryre nhūm arī kām prām tỳx kumrēx.

¹⁶Nē tee ri kot hagró kutā ōta kur prām nē tee ri omunh o pa.

¹⁷—Nē gaa hāmri nē tanhmā hamaxpēr to. Nē tee ri kot tanhmā amnhī tomnuj toja ā amnhī pumu nē hamaxpēr o: “Hēxta waa nē. Mān mūtār inhō krī kamā inhō papaj mā mē āpēnh xwýnhjaja ixrom apkur mex o pa. āpkur mex nē nhūm mēō jakrēx prār rūnh tā pa jar mē hkīnhā prām xāj ra ixtyk o mō.

¹⁸Nā kot paj ma akupým mō. Hāmri nē inhō papaj pumu nē ā kām amnhī jarēnh anē nē kām: “Kwa Papaj. Na pa pre ixpē akra hā amnhī tomnuj tỳx kumrēx nhūm ja apē omnuj nē. Nhūm Tirtüm pē ja omnuj nē.

¹⁹Jakamā na pa ixpē akra hā amā amnhī jarēnh ā ixpijaām nē. Ixte tām kēt kumrēx. Jakamā kwa xā kot pa amā mēmoj tā ixāpēnh o ri ixpa ka hpānhā inhūmā inhō pa apku nā?” Anhýr o kot pa kām amnhī jarē. Nā kot paj anē.”

²⁰—Anhýr o amnhī kukamā hamaxpēr hāmri nē ma akupým mō. Mōō nē ra hpōx o mō. Nē kormā amým mōr ri nhūm ō papaj hwýr rīt nē omu nē amnhī kra hā omunh kurē kumrēx nē hkīnh nē ma kutā hprōt nē tē. Omu nē kām hkaprī nē. Nē hwýr hprōt nē hkaxpa nē kahti hkōt kumý.

²¹Hāmri nhūm kām amnhī jarē nē kām: “Kwa papaj. Na pa pre amnhī tomnuj nē nhūm ja apē omnuj nē. Nē Tirtüm pē ja omnuj nē. Jakamā ixte ixpē akra hā amā amnhī jarēnh ā ixpijaām. Ixte tām kēt kumrēx.” Anē.

²²Nom kormā kām amnhī jarēnh par kēt ri nhūm hipēēxā kām mē āpēnh xwýnhjē mā akir nē mē kām: “E kwa mē atō ma tē nē kām ē mex ō py nē akupýn ixkrata wýr ho aprōt

nē kām haṣā. Nē hpar kā nē ihkra kamā kàx nē amnē kām hamý nē ho aprôt.

²³ Nē akupým aprôt nē môx kra htwym mexta ô pumu nē unē nē apī. Nē mē ho anē pu mē ixkra hā pahkīnh nē apku. E mē amnhī prēprēk nē tokxy ā amnhī nhūpēx anē.

²⁴ Na pre ma ixpē mōr o te ixpē htyk pyrāk. Tā akupýn mō nē ixwýr pōj nē te akupým inhmā htír pyrāk. Jakamā e mē tokyj.” Anhýr jakamā nhūm mē hā môx kra pī nē ho anē nē hkīnh nē hā apkur o hkrī.

²⁵ —Rôm nhūm hkra kot wata kormā pur kām htýx āpēnh o xa. āpēnh o ōm tā akupýn hpōx o tē. Hāmri nē amnhī kukamā mē kot ri mēmoj tatak nē mē grer ma.

²⁶ Hāmri nē tee ri hamaxpēr o tē nē ôrkwy hwýr pōj nē kormā kapem xa nē mē hā mē āpēnh xwýnhjē hō kukja nē kām: “Kwa mēmoj tā na ka wem ā akīnh rax anē?”

²⁷ Anē nhūm kām: “Nā mēhō hkēt. Atō na akupýn pōj nhūm anhīpēxā omu nē hkīnh týx nē. Nē mē inhmā anē pa mē hā môx kra htwym mexja pī nē hā ho anē nē hā ixkīnh nē hkur o ixkrī.” Anē.

²⁸ Hāmri nhūm tee ri htō jarēnh ma nē gryk týx nē. Hāmri nē gryk xaj kapem hkuk punuj o mē omunh o xa nē mē hwýr ār kēt nē. Hāmri nhūm hipēxāja tee ri omu nē hwýr kato nē tee ri kot mē hwýr ho ār kaxyw ho anhýr kapry.

²⁹ Hāmri nhūm kām: “Tk. Kwa na pa hte amā ixāpēnh rūnh rāhā ho ri ipxa hā ra ixtā amgrā sohtō nē. Nē aa akapēr nhīrōp tanhmā ixām to hkēt. Tā ka hte ixpumunh nē akīnh nē ixtā mēmoj tōx pír kēt nē.

³⁰ Tā nhūm akra kot haputa apē akukrēx kwý jamýnh pa nē ma o mō nē axtem nē mē hkupryjē mā ôr par tā akupýn mō nē pōj. Ka omu nē akīnh nē hā môx kra twýmta pī. Nā kot paj mē awýr ixār kēt nē.” Anē.

—Hāmri nē gryk týx nē xa.

³¹ Hāmri nhūm ô papaj tee ri kuma nē kām: “Kwa nā ri ā akapēr anhýr kēt nē. Inhmā ajapē kēnā. Na ka hte ixkōt apā ho apa rāhā nē. Nē ixkukrēx piitā kēp anhōō.

³² No atōja na pre te ixpē htyk pyrāk tā arī htír. Nē te pikunor pyrāk tā te ra akupým kator pyrāk jakamā na pa omu nē ixkīnh nē. Nē inhmā hapē ho te määnēn inhmā ajapē pyrāk.” Anē.

—Ā mē ujarēnh kot anhýr. Ja pyrā nē koja mēhō te kot amnhī tomnuj týx o ri pa htā amnhī kaxyw Tirtūm mā hamaxpēr nē amnhī to kuwý nē hkôt amnhī xām. Hāmri nhūm amnhī tā omu nē hkīnh nē. Nē kām hprām nē. No mē kajaja. Mē apē Parijew nhō xwýnhjē mē Tirtūm kapēr tūm o mē ahkre xwýnhjaja. Na ka htem mē kot amnhī tomnuj xwýnhjaja kot Tirtūm kapēr mar o kuhē hā mē omu nē Tirtūm kīnhā akīnh kēt nē. Nē te hkra kot wata jamaxpēr pyrāk

o ajamaxpēr nē tee ri ja hā mē omu nē mē kamā agryk nē. Nē mē amā mē hprām nōkati. Anē.

16

Mē panhōxy nē Jejus kot mē pamā karō

¹ Tā nhūm kē Jejus axte hkôt ri mē pa ho mē pa xwýnhjē jahkre. No ām mēmoj tā kuxi nē mē kām tanhmā ujarēnh to nē mē kām:

—Nā koja mēhō hikāxpore rax xwýnhja kām āpēnh xwýnh mā mēmoj to wēnē ho pa kaxyw ām. No nhūm kām ho mex kēt nē. Axtem nē kēp amari mē kām mēmoj to fiat par o mō. Hāmri nhūm ra mēhō kot ā amnhī nhīpēx anhýr ā omu nē ma ô patrāw wýr tē nē kām harē.

² Hāmri nhūm tee ri harēnh ma nē amnhī wýr hā karō. Hāmri nhūm hwýr tē nē axā nhūm kām: “Pa. Kwa xa ām hāmri na mē inhmā ajarē? Kwa na mon ka ri axtem nē ā ixpē inhō mēmoj nhīpēx anē? E inhmā ate mē kām ho fiat par xwýnhjē nhīxi hā kagā nē inhmā agō hāmri nē ma tē. Kot ka axte inhmā axāpēnh kēt nē rī amnhī pumu.” Anē.

³ —Hāmri nhūm kuma nē tee ri amnhī kukamā hamaxpēr nē hamaxpēr o: “Hēxta waa nē. Tanhmā kot paj amnhī to? Ixihtýxre hā kot pa mēhō mā pur ā apē. Nom inhmā amari ri ixāhwýr o ri ipxa hprām kēt. Ixte amnhī kuk ā ixpījaam.” Anē.

⁴ Hāmri nē tanhmā amnhī kukamā hamaxpēr to nē hamaxpēr o: “Nā kot paj amnhī wýr ixte mē kām ho fiat xwýnhjē hā karō. Nē mē kām mē ô kōōta ahpar mā hkamē kē mē ām inhō patrāw mā hkwy pix gō. Kēr kē mē amnhī tā ixpumu nē kām ixkīnh nē. Hāmri nē inhō patrāw kot ixkaga hā ixtā harēnh ma nē ixkamā ukapri japēr. Hāmri nē amnhī wýr ixwý pa ahpyñhā mē kutā ixāpku o ri ipxa nhūm prām ixpír kēt nē. Nā kot paj anē.” Anē.

⁵ Hāmri nē amnhī wýr mē hā karō nhūm mē hwýr mra. Nhūm mē omu nē ja mā kām: “E tanhmā na ka pre inhō patrāw pē mēmoj to fiat to? E inhmā harē.” Anē.

⁶ Hāmri nhūm kām: “Na pa pre kēp orti hā ā ho 100 nē ho fiat. Ota hā kagāta. Tā pa kormā kām amnhīrēt kēt nē.” Anē nhūm kuma nē kām: “Tōe ka inhma. Kot paj amā anhō kōt o gri ka ām kām ho 50 pix nē agō pa ixte anhō kōt ho ijapēx par pyrāk o anhīpēx.” Anē.

⁷ Hāmri nē hpānhā nhām ja mā kām: “No ka. Tanhmā na ka pre kēp mēmoj to fiat to?” Anē nhūm kām: “Na pa pre kēp pāy hā xak o 1.000 nē ho fiat. Tā pa kormā hpānhā kām amnhīrēt kēt nē.” Anē nhūm kām: “Tōe. Kot paj hāmri amā anhō kōt o gri ka ām kām ho 800 pix nē agō pa ixte anhō kōt ho ijapēx par pyrāk o anhīpēx.” Anē. Nhūm ā mē hipēx anē. Hāmri nē hamaxpēr o: “E. Na pa mē

kām mē ò kōt o hkry pa. Koja mē amnhī tā kām ixkīnh japēr.” Anē.

⁸—Hāmri nhūm ò patrāwja ā kot mē hipēx anhūr ā harēnh ma nē kām: “Tk. Kwa ate pa ixkukamā ajamaxpēr nē inhmā mēmoj to anhūr mex kēt tā ka amnhī kukamā ajamaxpēr mex pē ā mē hipēx mex anē.” Anē. Ā mē ujarēnh kot anhūr. Anē.

Nhūm pre ā Jejus mē kām ujarēnh anē. Hāmri nē mē kām:

—Tā ja pyrā nē na hte mē kot Tirtūm kōt amnhī xunhwūr kēt xwýnhjaja ām amnhī pix kukamā hamaxpēr mex o pa. Jao amnhī kaxyw pix mā mē piitā tanhmā mē ho mex to ho pa. Mē kot amnhī tā mē omunh nē mē kām mē hkīnh nē amnhī xwar tanhmā mē ho mex to kaxyw nhūm htem ā amnhī nhīpēx anhūr o pa. Tā mē ate ixkōt amnhī xunhwūr xwýnhjaja. Tirtūm kot tanhmā mē ate amnhī kwýjē ho mex to hā amnhūm mē ajarēnh kaxyw kēr ka mē amnhī mē mē piitā mē hkukamā ajamaxpēr mex nē. Pē tanhmā mē ho mex to ho ri apa. Ā mē ate amnhī nhīpēx anhūrja na mex. Nom kormā mē ate ā amnhī nhīpēx anhūr kēt.

⁹—Hēxta waa nē. Mon ka htem mē urāk nē ā xapēn to mex anhūr kēt nē? Kwa mē àpēnh xwýnhnta kot amnhī nhīpēx pyrā nē tanhmā xapēn to mex to o ri apa hkēt wehe. Jao akukrēx nē akāxpore ho anhōxy hkēt nē. Kēr ka nhýrmā ty nē Tirtūm wūr api nhūm ja hā mē ato mex rax nē. Te ho kot ò patrāw mā àpēnh xwýnhnta kot tanhmā mē ho mex to xwýnhjē hwūr mrar nhūm mē kot amnhī xwar tanhmā ho mex tota pyrāk.

¹⁰⁻¹¹—Na hte Tirtūm tanhmā mē pakute hā mē pahpumunh mex nē. Koja mē amā mēmoj gō ka mē kām hprām xā hkōt ho anhōxy hkēt nhūm ja hā mē apumu nē axte mē amā mēmoj gō. Nom hpānhā mē amā òr rax o wamta jakre nē kugō. Nom kot ka mē ri mēmojta o anhōxy ho ri apa nhūm tee ri ja hā mē apumu nē axte mē amā mēmoj nhōr kēt nē. Koja mē amā mēmoj gō ka mē ho anhōxy ho ri apa nhūm ja kēp homnuj nē.

¹²—Nē kot kaj mē jar Tirtūm kot mē amā mēmoj nhōr xwýnhja ho anhōxy ho ri apa. Hā koja nhýrmā kaxkwa kamā mē amā mēmoj mex nhōr kēt nē.

¹³—Nē kot kaj apyxi nē anhō patrāw hamēxkrut nē arīgro pyxi hā hamē wa kām axāpēnh o amýkry hkēt nē. Kot kaj anē nē hō gryk ā hō kaga. Ja pyrā nē kot kaj mē jar pika ja kamā akāxpore nē akukrēx pix kukamā ajamaxpēr o ri apa hā kot kaj mē amā hapē htýx nē mē kēp ho anhōxy ho ri apa. Nē akukrēx rax gryk ā Tirtūm kām hprām xā hkōt akukrēx o tanhmā xapēn to ajuta hto ho ri apa hkēt nē. Ja pymaj kwa kēr ka mē ām Tirtūm pix mā mē ajamaxpēr rāhā ho ri apa. Jao te akukrēx nē akāxpore mā

axāmhīx ri anhīhkra karo ho ri apa pyrāk. Anē.

Nhūm pre ā Jejus mē ahkre anē.

¹⁴Hāmri nhūm Parijew nhō xwýnhjaja mar o kuhē. Na prem ra mē hikāxpore rax gryk ā Jejus kaga. Jakamā ā kot mē kām kāxpore jarēnh anhūrja ma nhūm ja mē kēp omnuj nē nhūm mē hā hpēr o pikēnh o kuhē.

¹⁵Hāmri nhūm amnhī tā mē kuma nē mē kām:

—Nā na ka htem te mē ate tām mē kot amnhī nhīpēx xwýnh pyrāk o amnhī nhīpēx nom ri mē kām amnhī to axēx o ri apa. No nhūm Tirtūmja kot tanhmā mē ate amnhī nhīpēx to nē tanhmā mē ajamaxpēr to hkōt mē apumunh par. Nē hprī hā mē anhōxy hā mē apumu. Te mē ate tām amnhī nhīpēx pyrāk nom mē anhōxy kamā na ka htem apa. Mēmoj te mex pyrāk nhūm htem omu nē mex ā hkamnhīx. No nhūm Tirtūm āhpumunh týx xā hkōt hprī hā mēmojta pumu nhūm kēp omnuj nē. Mē akurum omnuj ā omunh kurē kumrēx. Na hte hprī hā mē ate amnhī nhīpēx ā mē apumu. Anē.

Tirtūm kapēr aa hapēx kēt ā harēnh Matēwre 5.17-18

¹⁶Nhūm Jejus arī mē ahkre nē mē kām:

—Nē na pre finat Mojesja kumrēx mē kām Tirtūm kapēr kwý hā kagā. Tā nhūm hpānhā Tirtūm nhý hā kapēr jarēnh xwýnh kwýjaja māānēn mē kām hkwy hā kagā. Nhūm prem kuma nē mē hkōt amnhī nhīpēx o ri pa. Tā nhūm finat Juāw Paxisja mē hpānhā kato nē Tirtūm kapēr o mē ahkre ho ri pa. Tā pa hpānhā ho mē ajahkre ho ri ixpa nhūm mē ohtō nē ixkōt amnhī xunhwūr nē kām ixkapēr kōt pix mā amnhī nhīpēx o ri pa hprām nē.

¹⁷—Tirtūm kapēr tūmja mex o mex. Koja aa hapēx kēt nē. Koja nhýrmā kaxkwa nē pika wa hapēx pa no nhūm Tirtūm kapēr tūmja aa hapēx kēt nē. Koja rāhā ho rāhā nē aa ihkē ho mēnh kēt nē. Anē.

Mē pahte xapēn kaga hkēt ā mē pamā karō

Matēwre 5.31-32, 19.9-12; Makre 10.2-12

¹⁸Nhūm Jejus arī mē ahkre nē mē kām:

—Nē kēr ka mē aprō kaga hkēt nē apa. Kot kaj mē hkaga nē hpānhā nhām hō ho aprō nhūm Tirtūm noo mā te ate wam aprō kamā nhām ho amnhīkati pyrāk. Nhūm ja kēp omnuj nē. Rý ka ra mēhō kot hprō kaga xwýnhnta ka hpānhā ho aprō. Nhūm Tirtūm noo mā te ate wam mjēn pē ho amnhīkati pyrāk. Nhūm Tirtūm pē ja omnuj nē. Anē.

Hikāxpore rax xwýnh mē kēp amrakati xwýnh wa harēnh

Rukre 6.20-26

¹⁹Nhūm Jejus arī mē ahkre kamā mē kām awjarē nē mē kām:

—Koja mēhō kàxpore rax xwýnh ē mex pix kām ri pa. Nē apkati mē apkur mex o pa.

²⁰ Nhūm amrakati xwýnh pē Rajareja hkā nhyre nē arī pry kamā àhwýr o hkrī. Nhūm htem hamý nē ma o pa nē hikàxpore rax xwýnh nhōrkwý jakwakrem haxwý.

²¹ Nhūm ō jakrēx kwý hkrēr prām xāj hakwa krem àhwýr o hkrī. Nhūm rop hwýr mra nē hkā nhy kunhnwýnh o kuhē.

²² —Tā nhūm Rajare ty nhūm Tirtūm kapēr o mē wrýk xwýnhjaja hwýr wrý nē ma akupým kaxkwa hwýr hkarō ho mō nē ho api. Hāmri nhūm kaxkwa kamā mē pahpām Apraāw nhīhkō hā hkīnh nē apkur mex o hkrī.

—Tā nhūm hikàxpore rax xwýnhhta määnēn hkōt ty. Nhūm hkwyjaja hā akuprō nē hā mur nē ma o tē nē haxā.

²³ Hāmri nhūm hkarō ma mē kot amnhī xā htýx kamā hamak tūm xā pē kuwy maaita wýr ma mō. Nē kamā amnhī xā htýx kām hamak rāhā ho pa. Hāmri nē amnhī xā hā maj kànhamā rīt nē kaxkwa kamā Apraāw pumu. Nhūm Rajare ra kuri mex nē nhý.

²⁴ Hāmri nhūm tee ri wa omu nē Apraāw mā akapēr nē kām: “Kwa Apraāw. Kwa we ixkamā axukapri nē ixwýr Rajare mē kē ixwýr tē nē ihkrakrā ho gō htok nē ho inhōhto jakry. Na pa kuwy kamā amnhī xā htýx kām ijamak týx kumrēx.” Anē.

²⁵ Hāmri nhūm kuma nē kām: “Tk. Nà kot pa awýr mēnh kēt nē. Na ka pre atir ri amex nē akīnh nē ri apa. No nhūm Rajare akīnhā hkā nhy rax nē amnhī xā htýx kām hamak rāhā ho ri pa. Tā ra jar inhīhkō hā hkīnh nē pa. Ka pre kurom amex nē apa htā kot kaj hpānhā amnhī xā htýx kām ajamak rāhā ho ri apa.

²⁶ Nē pahkaēx kām ahkapry griā. Jakamā nhýhýnh kot kēt awýr rē? Ka ajaxwýja nhýhýnh kot ka kēt mē ixwýr rē?” Anē.

²⁷ —Nhūm ā kām kapēr anē nhūm tee ri kuma nē kām: “Kwa tō ma inhō krī hwýr mán amē kē ma ixkwýjē hwýr wrý.

²⁸ O mūj arī inhō krī kamā ixtō kēp 5 nē arī htír nē pa. Kē wa mē kām awjarē kē mē amnē kuwy hwýr pa pymaj tokyx amnhī tomnuj kaga nē Tirtūm kōt mán amnhī xunhwý nē hkōt ri amnhī nhīpēx o pa.” Anē.

²⁹ —Hāmri nhūm Apraāw kām: “Nà pa mē hwýr mēnh kēt nē. Ra mē kuri Tirtūm kapēr jarēnh xwýnhjē mē Mojes kot Tirtūm kapēr ā kagā kēnā. Kē mē kamā harē nē ja ma nē rī tām tanhmā amnhī nhīpēx to.” Anē.

³⁰ Hāmri nhūm tee ri kuma nē kām: “Kwa nā. Kojā mē kagāja mar kēt nē. No kēt Rajare na pre ra htyk tā akupým htír jakamā kojā mē hwýr wrý nē mē kām awjarē nhūm mē akupým htír ā omu nē kapēr ma hāmri nē amnhī tomnuj kaga kurē kumrēx. Kwa nā ā ri anhýr kēt nē mē hwýr amē hēxta waa nē.” Anē.

³¹ —No nhūm kām: “Nà kojā mē Tirtūm kapēr ā kagā mar kēt ā kojā mē määnēn Rajare tyk nē akupým htír nē mē hwýr wrýk nē kot mē kām tanhmā ujarēnh to hā mar kēt nē. Jakamā kwarī pa mē hwýr mēnh kēt nē. Kot paj ho anē nē ām ixte mē hwýr mēnh kapry pyrāk o amnhī nhīpēx.” Anē. Ā mē ujarēnh kot anhýr. Anē.

17

Mē kot Jejus nē mē no kupyr ā mē harēnh Matēwre 18.6; Makre 9.42; määnēn Rōmān 1.32; Sikūn Pētre 2.1, 2.18

¹⁻² Tā nhūm Jejus hkōt mē pa ho mē pa xwýnhjē jahkre ho nhý nē mē kām:

—E kot paj mē kot ixkōt amnhī xunhwýr tohtuj anhýr xwýnhjē jarē ka mē inhma. Nā kojā mēhō mē hwýr tē nē inhē mē kām kapēr. Mē kot mē mar nē amnhī tomnuj prām xāj tanhmā mē kām kapēr to. Hāmri nhūm mē mar xā hkōt tanhmā amnhī tomnuj to. Hā kojā Tirtūm ja hā omu nē kot inhē tanhmā kām nē xwýnhhta pumu nē ja hā homnuj týx nē. Te mē kot mēhō pynēnh nē mut ā kēn pytī hō nhōr nē ma o htēm nē gō rax kām mēnh pyrāk o kojā hipēx. Te ho ja pyrāk no ām homnuj týx o ja jakre. Jakamā kwa mē ixkapēr ma nē kām ajamxpēr týx rāhā ho ri apa. Anē.

Mē pahte amnhī tā tanhmā mēhō hto hkēt ā mē pamā karō

Matēwre 18.21; Makre 11.25-26; määnēn Epes 4.32; Korosē 3.13

³ Nhūm Jejus arī mē ahkre nē mē kām:

—Nē kojā ixkōt atōjē hō tanhmā atomnuj to. Ka amnhī tā omu hāmri nē ma hwýr tē nē ja hā kām akapēr nē kām: “Kwa mon ka axtem nē ri ā inhīpēx anē ixtō? Kwa nā ri ā inhīpēx anhýr kēt nē.” Anē hāmri nhūm amnhī tā ama nē amā: “Nā na pa tee ri ixte tanhmā atota ā amnhī pumu nē ixkapri nē. Nā kot paj axte ā ri anhīpēx anhýr kēt nē. Kwa kēr ka axte tanhmā ja mā ajamxpēr to hkēt nē. Te ate amnhī katut kōt mēnh pyrāk o hipēx pu akupým tām xapēn nhīpēx o papa.” Anē. Kojā ā amā kapēr anē ka amnhī tā ama hāmri nē axte tanhmā kot atoja mā ajamxpēr kēt nē.

⁴ —Kojā arigo pyxi hā xatā tanhmā atomnuj to japēr. Hāmri nē xatā tee ri ja hā amnhī pumu nē awýr mra nē xatā amnhī tā amā kapēr nē amā: “Pa ot pa awýr tē. Na pa ra ixkapri nē. Kwa ixte ā anhīpēx anhýrja pumu nē ām omu. Kot paj axte hkēt nē.” Anhýr o xatā amā kapēr. Nē ra axte tanhmā atomnuj to nē kē axte awýr tē nē ā amnhī tā amā kapēr anē. Nom kēr ka ama nē kamā agryk kēt nē. Ām xatā kām: “Nā kot puj anē nē akupým tām xapēn nhīpēx. Kot paj axte tanhmā ate ixtota mā ijamxpēr kēt nē. Kot puj ja ho pajapēx nē tām xapēn nhīpēx

o akupÿm papa." Anhÿr o kêr ka mē xatā axpēn nhîpêx anhÿr rāhā ho ri apa nē aa jam anhÿrer kêt nē. Anē.

Mē pahte mēmoj tā Tirtûm wÿr hā mē pa-jarēnh

Matêwre 17.20-21, 21.21-22; Makre 11.23

⁵ Tā nhûm Jejus nhÿ hā mē ahkre ho mē pa xwÿnhjaja hāmri kām:

–Kwa Pahihti. Tanhmā mē ixto pa mē amnhî kaxyw Tirtûm kôt ijamaxpêr tÿx rāhā ho ri ixpa. Anē.

⁶ Hāmri nhûm mē kām:

–Nā ra mē ate amnhî kaxyw hkôt aja-maxpêr jakamā na ra amnhî tā mē apumu. Jakamā mē ate hkôt amnhî nhîpêx kukwak ri na ka htem mēmoj tā awÿ nhûm mē ate mēmoj tā hwÿr xā hkôt mē amā tanhmā mēmoj nhîpêx to. Te mē ate pî hpār mÿj mā akapêr nē kām: “E amnhî jarē nē ma tē nē gō xujanār kām mām mrō.” Anē nhûm kot amar nē amar xā hkôt ā kot amnhî nhîpêx anhÿrta pyrāk. Ja pyrā nē kot kaj mē ate Tirtûm kôt amnhî nhîpêx o apa kukwak ri mēmoj tā awÿ nhûm mē ama nē mē amā mēmoj tanhmā ho. Rÿ mē amā mēmoj gō. Anē.

Te mē pahpê Tirtûm mā paxāpēnh xwÿnh pyrāk

⁷ Nhûm Jejus arî mē ahkre nē mē kām:

–Nē ja. Kot kaj mē amā mē āpēnh xwÿnh kwÿjaja nhûm hō amā mēmoj tā āpēnh o pa ē ho anhÿr pa. Hāmri tanhmā kot kaj kām akapêr to wehe? Xā kot kaj kām: “E hāmri axāpēnhta kaga nē tē nē nhÿ nē apku.” Anhÿr o kām akapêr?

⁸ Nā kot kaj kām anhÿr kêt nē. Kot kaj kām: “E kwa tokyx tē nē hpānhā inhā inhō hā apē. Kot pa ixāpkur pa ka ixpānhā nhÿ nē apku.” Anhÿr kām akapêr. Kêp amā āpēnh xwÿnh jakamā ka ā kām akapêr anē.

⁹ Ja pyrā nē kot puj mē Tirtûm kot mē pamā mēmoj tā karō xā hkôt tanhmā kām amnhî nhîpêx to ho ri papa. Mē ô patrāwta pyrā nē kot tanhmā mē pamā karō hto xā hkôt pu mē amnhî nhîpêx.

–Xā na htem mē ô patrāw mā mēmoj tā āpēnh pa hāmri nē hkwyjê mē amnhî to jarkrar o ri pa nē mē kām: “E ka mē ixpumu. Na pa hte inhō patrāw mā ixāpēnh mex o mē hakre ka mē ja hā ixpumu. Hêxta waa nē. Mon pa hte ri axtem ā amnhî nhîpêx anē?” Anhÿr o xā kot kaj mē kām amnhî to jarkrar o ri apa? Nā na ka htem ā amnhî nhîpêx anhÿr kêt nē.

¹⁰ –Tā pa hte mē ô patrāwta pyrā nē tanhmā mē amā mēmoj tā karō hto ho ixpa. Jakamā kêr ka mē inhā nē ixte mē amā mēmoj tā karō xā hkôt tanhmā inhā amnhî nhîpêx to ho ri apa. Hāmri nē hā amnhî to jarkrar pē amnhî jarēnh o: “Ām hāmri na pa ā Jejus mā amnhî

nhîpêx anē. Hêxta waa nē. Ixpê Jejus mā tanhmā ixte amnhî nhîpêx to mex xwÿnh na pa.” Anhÿr o amnhî to jarkrar kêt nē. Kêt ām amnhî jarēnh o: “Nā ixte kām tanhmā amnhî nhîpêx to ho ixpa xwÿnh pix na pa. Na hte mēmoj tā inhā karō pa kuma nē ŷ hā tanhmā kām amnhî nhîpêx to.” Anhÿr o amnhî jarēnh o ri apa. No ri amnhî krā hkôt atÿx tanhmā amnhî to jarkrar to ho ri apa hkêt nē. Anē.

Jejus kot mē ho 10 nē akupÿm mē ho mex ā harēnh

Matêwre 8.1-4

¹¹ Tā nhûm Jejus arî Garirej rûm pika pē Samar hkāx ā Jerujarē hwÿr kormā mō.

¹² Nē nhÿri krî hō htêp o mōr mē nhûm krî pu hā ri mē pa xwÿnhjaja kêp 10 nē kutā mra. Mē hkānhÿ hkro htÿx xwÿnhjaja kutā mra nē hkaxpa nē amÿm kuhē nē omu.

¹³ Hāmri nē kām:

–Pa Pahihti. Kwa mē ixpumu nē mē ixkamā axukapri nē tanhmā mē ixto mex to. Anē.

¹⁴ Hāmri nhûm mē kām:

–Tōe. Nā kot paj mē ato mex. E mē māmri awjanā nē ma akupÿm mē anhō patrejê hwÿr mra kê mē akupÿm mē akā mex ā mē apumu. Anē.

Hāmri nhûm mē kuma nē kapêr mar xā hkôt awjanā. Kā nhy rāhā awjanā nē ma akupÿm patre hwÿr mra. Nē kormā akupÿm hwÿr pry hā mram rāhā piitā hkā mex pa.

¹⁵ Hāmri nhûm ām pyxi nē hkwyjê rom awjanā nē akupÿm Jejus wÿr Tirtûm mā mex o mex ā harēnh o hwÿr tē.

¹⁶ Hāmri nē Jejus kaxpa nē kutā hkōnkrā ho tēm nē nhÿ nē amnhî tā kām kot ho mex ā kām amnhî jarē. Kwÿjê hkānhā kêp Ijaew kêt axtem kêp Samar nhō xwÿnh tā mē kurom akupÿn hwÿr tē nē kām mex o mex ā harē.

¹⁷⁻¹⁹ Hāmri nhûm amnhî tā kuma nē kām:

–No mē akwyjaja? Ixte mē ato 10 nē mē ato mex tā ka ām kapxipix awjanā nē akupÿn ixwÿr tē. Akwyjê hkānhā apē Ijaew kêt tā akupÿm amnhî mex ā amnhî pumu hāmri nē mē kurom awjanā nē Tirtûm mā mex o mex ā harēnh o ixwÿr tē. Hêxta waa nē. Mo na hte ixkwÿjaja apyrā nē amnhî kaxyw ixkôt hamaxpêr kêt nē? E kānhmā xa nē māmri ma ajamakêtkati nē akānh nē ma akupÿm tē. Anē.

Jejus akupÿn wrÿk xā hā arÿgro jarēnh

Matêwre 24.23-24, 24.37-44; Makre 13.32-37; määnēn Wam Tesarōn 5.2-8; Sikûn Pêtre 3.3-10

²⁰⁻²¹ Tā nhûm Parijew nhō xwÿnh kwÿjaja Jejus wÿr mra nē omu nē kām:

–Kwa mē inhā mēmoj jarē. Xā koja apu Tirtûm tokyx kot mē pahwÿr mēnh mā xwÿnhmā mē nhûm mē pahwÿr wrÿ nē mē

pahto amnhĩptàr kuré kumrêx nà kormã? Anê.

Hãmri nhũm mẽ kuma nê mẽ kãm amnhĩ jarê. Te ho nhãm mẽhõ jarênh pyrà nê mẽ kãm:

—Nà ra kot mẽ ho amnhĩptàr o pa kênã. Nom nhĩri hkrĩ xà kamã mẽ ho amnhĩptàr o hkrĩ hkêt nê. Na htem amnhĩ kaxyw hkôt hamaxpêr nê hkôt amnhĩ xunhwý hãmri nhũm kêp mẽ õ pahihiti hã mẽ ho amnhĩptàr o pa. Nê mẽ kãm mẽ hamaxpêr mex gõ nhũm htem hkôt ri hamaxpêr mex o pa. Anê.

²² Hãmri nê hpãnhã hkôt mẽ pa ho mẽ pa xwýnhjê mã kapêr. Mẽ kot nhĩrmã tee ri kamã hamak o pa hã mẽ kãm kapêr nê mẽ kãm:

—Kot kaj mẽ nhĩrmã tee ri amã tokyx akupýn ixwrýk nê ixte mẽ ato amnhĩptàr prãm xáj tee ri inhmã anojarêt kaprý ho ri apa. Nê axpên mã ri ijarênh o: “Hêxta waa nê. Mo na we Pahihiti tokyx akupýn mẽ pahwýr wrýk kêt nê?” Anhýr o inhmã anojarêt o ri apa pẽ ixkamã ajamak rãhã ho apa.

²³ Nê koja mẽ ra akupýn ixwrýk ã tanhmã mẽ amã ixto hêx to ho pa. Nhĩri ixkuhê nhũm mẽ kot ixpumunh ã mẽ amã ixto hêx o pa. Nom kêr ka mẽ ama nê ãm mẽ ama.

²⁴ Kot paj nhĩrmã akupýn mẽ awýr ixwrýk kaxyw nhũm mẽ pika piitã hkôt akupýn ixwrýk kãm anhĩpê ixpumu. Te mẽ piitã mẽ kot anhĩpê na jaxênh pumunh pyràk o kot kaj mẽ apiitã ixpumu.

²⁵ Nom kormã jar pika ja kamã ixpa ri koja mẽ ohtõ nê ixkaga pa amnhĩ xà htýx kamã ijamak kãm ty. Hãmri nê mẽmo arĩgro hã ma akupým kaxkwa hwýr api. Hãmri nê nhĩrmã akupýn mẽ awýr wrý.

²⁶ —Nà kot paj nhĩrmã man akupýn mẽ awýr wrý. Akupýn ixwrýk xã hã arĩgrota ã koja jar pika ja kamã mẽ pa xwýnhjaja htýx ri tanhmã amnhĩ tomnuj to ho pa. Te amnepêm finat Noehti hũr ri mẽ kot htýx ri tanhmã amnhĩ tomnuj to ho pa pyràk o koja mẽ amnhĩ nhĩpêx o pa.

²⁷ Na prem amnhĩ kaxyw Tĩrtũm mã hamaxpêr o pa hkêt nê. Nê ãm jar pika ja kamã mẽ kot amnhĩ nhĩpêx pix kukamã hamaxpêr o ri paja o ãm kôt pix mã tanhmã ri amnhĩ nhĩpêx to ho pa. Rõm nhũm Noehti gõ htãm pymaj pãr raxja nhĩpêx nê kãm axã. Nhũm prem hã omu nê ãm omunh o pa nê tanhmã ri amnhĩ kukamã hamaxpêr to hkêt nê. Tã nhũm nata mẽ haêr pẽ wrý. Hãmri nê wrýk rax o ra pika piitã hanhi nhũm mẽ piitã pikaprãr pa.

²⁸ —Akupýn ixwrýk xã hã arĩgrota ã koja mẽ mããnen te amnepêm Sotõ nhõ xwýnhjaja kot htýx ri tanhmã amnhĩ tomnuj to pyràk o amnhĩ nhĩpêx. Finat Rohti kormã hũr ri

mẽ kot htýx ri tanhmã amnhĩ tomnuj to ho pata pyràk o koja mẽ amnhĩ nhĩpêx. Na pre hte Sotõ nhõ xwýnhjaja ãm pika ja kamã mẽ kot amnhĩ nhĩpêx pix kukamã hamaxpêr o ri pa. Nê ãm kôt pix mã ri amnhĩ nhĩpêx o pa. Nê htýx ri amnhĩ xãpkur xã pix kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprõr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhĩm õrkwý nhĩpêx pix kukamã hamaxpêr. Á na prem pika ja kamã mẽ kot amnhĩ nhĩpêx pix kukamã hamaxpêr o ri pa anhýrja o amnhĩ kaxyw Tĩrtũm mã hamaxpêr o pa hkêt nê.

²⁹ —Tã nhũm Rohti mẽ õ krĩ rũm kator mẽ nhũm Tĩrtũm krĩ nhõ xwýnhjaja kot amnhĩ tomnuj týx o paja mýrapê mẽ himex pa. Jao kaxkwa rũm mẽ hipy mẽmo hpók kwý rẽ nhũm mẽ hkaxãr pa.

³⁰ Tã akupýn mẽ awýr ixwrýkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrà nê htýx ri amnhĩ tomnuj pix o pa.

³¹ —Nê akupýn ixwrýta ã ka mẽ anhõrkwý nhĩmók ã hkrãmnênh o akrĩ japêr nê akupýn ixwrýk kãm ixpumu. Hãmri nê akukrêx wýr axãr nê hõ hpýr mã ajamaxpêr kêt nê. Rý ka mẽ apur kãm axãpênh o akuhê japêr nê akupýn ixwrýk kãm ixpumu. Hãmri nê akupým anhõrkwý hwýr atêm mã ajamaxpêr kêt nê. Mo kaxyw kot ka kêt hwýr tẽ? Kêt ãm inhmã mẽ ajapê hã akupýn mẽ awýr ixwrýk mã ajamaxpêr o akĩnh nê ixpumunh o akuhê.

³² —Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩrõp xa nê amnhĩ natut kôt Sotõta wýr rĩt hãmri nê ã amnhĩ nhĩpêx anhýrja mýrapê htyk kuré kumrêx. Tã kêr ka mẽ ho urak nê amã akukrêx rax japê xáj ixkôt amõr kaxyw anhĩtõt kêt nê.

³³ —Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhĩrmã ja piitã mẽ apê hapêx pa. Mẽ ate kãm anhĩhkra karo hpar pyràk o piitã hipêx hãmri nhũm Tĩrtũm ja hã mẽ apumu nê hpãnhã nhĩrmã mẽ amã mẽmoj mex nhõr rax nê.

³⁴ —Nê kot paj kamãt kãm akupýn ixwrýk japêr nhũm nhĩri mẽhõ ra ixkõt amnhĩ xãm xwýnh mẽ mẽhõ kot ixkõt amnhĩ xãm kêt xwýnh wa par kãm nõr japêr. Hãmri pa amnhĩ wýr ra ixkõt kot amnhĩ xãm xwýnhhta o api nhũm kot ixkõt amnhĩ xãm kêt xwýnhhta arĩ gõr nê nõ.

³⁵ Rý pa arĩgro hã akupýn ixwrýk japêr nhũm mênijê hõ wa hamêkrut nê harõj kahuk o ãm japêr. Hãmri pa ra kot ixkõt amnhĩ xãm xwýnhja ho api nhũm kot ixkõt

amnhĩ xãm kêt xwýnhja ahte arĩ harôj kahuk o xa. Hãmri nê hamaxpêr mex kêt kumrêx o xa.

³⁶ Rý koja mêmjê hõ wa axkrut nê hpur kãm âpênh o âm japêr. Pu pa amnhĩ wýr kot ixkôt amnhĩ xãm xwýnhnta o api nhũm kot ixkôt amnhĩ xãm kêt xwýnhnta pur kãm ahte arĩ apênh o xa. Hãmri nê tee ri hkrâmnhwý hkukamã hamaxpêr o xa. Anê.

Nhũm pre ã Jejus hkôt mê pa ho mê pa xwýnhjê mã amnhĩ jarênh anê.

³⁷ Hãmri nhũm mê kuma nê kãm:

–Kwa nhýri koja mêmjê ã amnhĩ nhĩpêx anê? Anê.

Hãmri nhũm mê kãm:

–Nã koja nhýri mêmjê ã amnhĩ nhĩpêx anê ka mê omunh kurê kumrêx. Te nhýri mêmjê kro nê nõr nhũm nhõnhti kot omunh nê hã htor nê hpinhĩpanh nhũm mê kot hã omunh kurê kumrêxta pyrãk. Anê.

18

Mê pahte Tirtũm mã amnhĩ jarênh rãhã ho papa hã mê pamã karõ

Rukre 11.5-8; mãânên Wam Tesarõn 5.17

¹ Tã nhũm Jejus hkôt mê pa ho mê pa xwýnhjê mã mêmjê tã karõ. Mê kot tanhmã Tirtũm mã amnhĩ jarênh to hã mê kãm karõ. Mê kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No âm hã kuxi nê tanhmã mê kãm hã ujarênh to nê mê kãm:

² –Koja nhýri krĩ hõ kamã juistija kãm Tirtũm prãm nõkati. Nê mãânên kãm amnhĩ kwýjê hprãm nõkati htã kêp juisti nê tanhmã mê kãm kapêr to ho hkrĩ.

³ Jakamã nhũm mēhõ ni pē mjēn htyk xwýnh. Nhũm hte mēhõ xatã tanhmã kēp õ mēmjê to ho pa. Hãmri nhũm tee ri amnhĩ tã omu nê xatã juistita wýr mra nê kãm harê nê kãm: “Xê gãã nê. Na hte pahkwýjê hõja ixtomnuj rãhã ho pa. Xê ixtã tanhmã kãm akapêr to kê tãm inhĩpêx.” Anê. Nê xatã hwýr mra nê amnhĩ to kuwý nê xatã hwýr mra nê amnhĩ to kuwý.

⁴⁻⁵ No nhũm kuma nê âm kuma. Kãm hkwyjê ho ajuta hprãm kêt jakamã âm kuma. Tã nhũm xatã hwýr mra. Gaa nhũm ri kãm mar kaga nê. Hãmri nê hamaxpêr o: “Tk. Hêxta waa nê. Jahti na hte xatã ixwýr mra nê tanhmã inhmã amnhĩ jarênh to. Nê âm xatã ixwýr mra. Nã na pa ra inhmã mar kagyk nê. E pa tokyx tanhmã nê kot tanhmã ho xwýnhnta mã ixkapêr to. Inhmã Tirtũm pyma kamã rý inhmã ixkwýjê kapri kamã pa tanhmã nê kãm nê hkêt tã kot pa anhýr kêt nhũm amnhĩ tã inhmã harênh pix nê pa ra mar kurê ixkrã tãtãk nê.” Anhýr o hamaxpêr. ã mê ujarênh kot anhýr.

⁶ –Juisti tãm hamaxpêr kêt tã nhũm nija xatã hwýr mra nê amnhĩ to hwýr jakamã nhũm jatã tanhmã ho ajuta hto.

⁷⁻⁸ No kêt Tirtũmja. Xãn ka htem mêmjê tã awý nhũm juisti punutita pyrã nê mê ama nê âm mê ama? Nã koja ã amnhĩ nhĩpêx anhýr kêt nê. Kot ka mêmjê tã kãm amnhĩ jarê nhũm ama nê tanhmã amã mêmjê to rý tanhmã amã amnhĩ nhĩpêx to. Juistita rom mê pakamã ukapri xwýnh na. Tã kot paj nhýrmã akupýn wrý nê mê apumu ka mê arĩ amnhĩ kaxyw hkôt ajamaxpêr mex pē kãm amnhĩ jarênh rãhã ho ri apa pa ja hã mê apumu nê ixkĩnh týx nê. Ja na inhmã hprãm. Anê.

Tanhmã mê kot Tirtũm mã amnhĩ jarênh to hã mê harênh

Matêwre 6.5-8; mãânên Wam Pêtre 5.5-6

⁹ Tã nhũm Jejus mê kot amnhĩ to mex o hkwyjê jakrenh ã amnhĩ to jarkrar o ri mê pa xwýnhjê pumu nê tanhmã mê kãm kapêr to. Nom mê kot amnhĩ to jarkrarta ã kuxi nê mê kãm awjarê nê mê kãm:

¹⁰ –Koja mēhõ wa hamēxkrut nē Tirtũm mã amnhĩ jarênh kaxyw wa tē. Ja kēp Parijew nhõ xwýnh nhũm hõja kēp mê õ pahi mã hkwyjê pē kãxpore hkwy jamýnh xwýnh. Nhũm wa Tirtũm mã amnhĩ jarênh xã hã ixkre hwýr wa tēn axã.

¹¹⁻¹² Hãmri nhũm Parijew nhõ xwýnhnta kumrêx tē nē nhýri mē piitã mē noo mã Tirtũm mã amnhĩ jarê. Nê amnhĩ to jarkrar pē kãm amnhĩ jarênh o: “Pa Tirtũm. E ra ate ixpumunh mex. Na pa hte amnhĩ to mex pix o ri ixpa. Ra ate ja hã ixpumunh mex. Na pa hte kãxpore hkwy jamýnh xwýnh nēj rom tãm amnhĩ nhĩpêx. Nê semãn piitã hã ixãpkur kêt rãhã amã amnhĩ jarênh rãhã ho ixtã apkati axkrut. Nom ja pa pix kêt. Na pa hte mãânên ixãpênh pãnhã kãxpore jamý nê mê kot amã tanhmã amnhĩ nhĩpêx to ho pa xwýnhjê mã hkwy nhõr o ixpa. Nê na pa hte ri ixãhkĩnh o ri ixpa hkêt nê. Nê nhãm mē kēp mē hprõ ho amnhĩkati ho ri ixpa hkêt nê. Na pa hte mē piitã mē kurom tãm amnhĩ nhĩpêx ã amnhĩ pumu nê ixkĩnh týx kumrêx. Hêxta waa nê. Mon pa hte ri ã amnhĩ to mex o ixpa anê?” Anhýr o Tirtũm mã amnhĩ to jarkrar pē kãm amnhĩ jarênh o xa.

¹³ –Hãmri nhũm hpãnhã mê kēp kãxpore hkwy jamýnh xwýnhnta haxwýja Tirtũm mã amnhĩ jarê. No âm Parijew nhõ xwýnhnta rom ki hkwyjê pē awry nê ahte hipõ nê kãm amnhĩ jarê. Nê kãm amnhĩ jarênh pē amnhĩ tak nê mur nê kãm: “Kwa Tirtũm. Na pa hte amnhĩ tomnuj týx o ri ixpa. Nê ixtýx ri amã prãm xã kuhpa hã tanhmã amnhĩ nhĩpêx to. Na pa tee ri ja hã amnhĩ pumu nê ixkapri htýx nê. ã inhmã amnhĩ nhĩpêx anhýr o ri ixpa hprãm kêt tã pa hte ã amnhĩ nhĩpêx anhýr o ri ixpa. Kwa xã kot ka

ixkamā axukapri nē amnhī katut kōt ixte amnhī tomnuj rēnh pa Tirtūm?” Anhūr o kām amnhī jarē.

14 –Hāmri nhūm Tirtūm hamē wa kot kām amnhī jarēnh ma no ām wamta ma nē ām kuma. No kēt hkōt hōja ma hāmri nē kot kām amnhī tā āhwūr xā hkōt amnhī katut kōt kot amnhī tomnuj rēnh pa nē ho hkra. Jakamā nhūm mex nē hkīnh nē pa. Ra tām hkrā hāmri nē hkīnh nē ma htēm kurē kumrēx. Ā mē ujarēnh kot anhūr. Ām hāmri na pa mē amā ja jarē. Kōja mēhō Parijew nhō xwŷnhhta pyrā nē kot amnhī to mex xwŷnh ā amnhī kamnhīx hāmri nē Tirtūm kot amnhī katut kōt kot amnhī tomnuj rēnh kaxyw amnhī to hwūr kēt nē. Kōja ām kām amnhī to jarkrar pix nē. Jakamā kōja Tirtūm te kot mar nē ām mar pyrāk o hipēx. No kōja mēhō kot kāxpore hkwy jamŷnh xwŷnhhta pyrā nē tee ri tanhmā amnhī tomnuj to hā amnhī pumu nē hkapri nē. Hāmri nē amnhī to Tirtūm wŷ nhūm kuma nē tanhmā ho mex to. Anē.

Jejus kot amnhī wūr mēhprīrejē hwūr ā harēnh

Matēwre 19.13-15; Makre 10.13-16

15 Tā nhūm Jejus mē hkōt mē pa ho mē pa xwŷnhjaja arī pry hā Jerujarē hwūr mō nhūm Ijaew kwŷjaja mē omu nē mē hkrare jamŷ nē Jejus wūr mē o mra. Kot mē hā ihkra jaxwūr nē mē ho Tirtūm wūr kaxyw. Hāmri nhūm hkōt mē pa ho mē pa xwŷnhjaja tee ri ja hā mē omu nē nē mē kām kapēr nē mē kām:

–Tk. Kwa mē ma akupŷm mē akrata o mra nā? Mo kaxyw na ka mē Jejus wūr mē o mra? Kormā mē rāxre kēnā. Anē.

16 Hāmri nhūm amnhī tā mē kuma nē mē kām:

–Tk. Kwa nā mē ri inhnē mēhprījē kurē hkēt nē. Kwār mē māmri ixwūr mē o mra. Anē.

Hāmri nē amnhī wūr mē kām hpa ho apē nhūm mē hwūr mē o mra nhūm mē kuri kuhē. Hāmri nhūm hkōt mē pa ho mē pa xwŷnhjē mā kām:

–E mē jareja mē omu. Na htem hamakētcati nē hkīnh nē ri pare. Nē kām amnhī to rūnh prām kēt nē ri pa. Tā Tirtūm kōt mē kot amnhī nhīpēx xwŷnhjaja na htem mē urāk nē kām amnhī to rūnh prām kēt nē ri pa.

17 –Jarejaja na htem hipēxā nē katorxā wa kapēr ma nē wa hkōt ri amnhī nhīpēx mex o ri pa. Tā ixpē Tirtūm kot mē awūr inhmēnh xwŷnh kot ka mē amā ixkōt amnhī xunhwūr prām. Hā kot kaj mē te ho jarejē kot amnhī nhīpēx pyrāk o amnhī nhīpēx. Jao ixkapēr ma nē ixkōt ri tanhmā amnhī nhīpēx mex to ho ri apa. Anē.

Kāxpore rax xwŷnh jarēnh

Matēwre 19.16-30; Makre 10.17-31; māānēn Wam Ximotre 6.6

18 Tā nhūm Ijaew nhō pahihiti hōja Jejus wūr tē nē kām kapēr nē kām:

–Pa? Mē ijahkre xwŷnh maati? Kwa inhmā mēmoj jarē. Tanhmā kot pa we nhŷrmā Tirtūm ri itūr tūm nē ixpa kaxyw amnhī nhīpēx mex to ho ri ixpa wehe? Anē.

19 Hāmri nhūm kām:

–Xā ate ixpē Tirtūm kwŷ hā ixpumunh kōt na ka ixte urāk nē amnhī to mex xwŷnh ā ijarē? Tirtūm pix na kot amnhī to mex rāhā xwŷnh jakamā kot kaj ā ijarēnh anhūr jao ixpē Kra hā ijarē. Nē urāk nē ixte amnhī to mex xwŷnh ā ijarē. Nā xān ka ām atŷx ri amnhī krā hkōt ā ijarēnh anē?

20 –Tirtūmja mex o mex xwŷnh jakamā kot kaj amā nhŷrmā kuri atūr tūm nē apa hprām hāmri nē ra kot mēmoj tā mē amā karō xā hkōt amnhī nhīpēx o ri apa. Ra ate mar mex kēnā. Na pre mē amā:

Kēr ka mē axpēn pē axāhkīnh hkēt nē.

Nē mē axpēn par kēt nē.

Nē mē axpēn to axēx o ri apa hkēt nē.

Nē mē axpēn pē aprō ho amnhīkati hkēt nē.

Nē mē anhīpēxā mē akatorxā wa hā api-jaam pē wa kutā anojarēt pix o ri apa. E kot kaj amā nhŷrmā Tirtūm kuri atūr tūm nē apa hprām hā kēr ka ā amnhī nhīpēx anhūr o ri apa. Anē.

21 Nhūm pre ā Jejus kām kapēr anē nhūm kuma nē kām:

–Kwa ixprīre ri ra ā ixte amnhī nhīpēx anhūr o ri ixpa kēnā. Nom ixte itūr tūm nē ixpa kaxyw kormā ixte tām kēt pyrāk. Anē.

22 Hāmri nhūm Jejus kām:

–Nā kormā mēmoj pyxire nē arīk. Na ka amā akukrēx rax japē htŷx o Tirtūm jakre. Jakamā kēr ka ma akupŷm tē nē akukrēx o wēnē hpa nē hpānhā kāxpore jamŷ hāmri nē ma mē kēp amrakati xwŷnhjē mā ōr pa. Hāmri nē ri akupŷn ixwūr tē nē ixkōt apa ho apa. Anē.

23 Hāmri nhūm kuma nē tee ri amnhī kukamā hamaxpēr. Kām kukrēx rax japē nē kām ihkra karo hprām kēt nē. Jakamā tee ri Jejus kot ā kām hā karō anhūrja ma nē awjanā nē ma akupŷm tē.

24 Hāmri nhūm tee ri ja hā omu nē hā mē kot mar xwŷnhjē mā kapēr nē mē kām:

–Hēxta waa nē. Kōja mē hikukrēx rūnh xwŷnhjaja ohtō nē kām mē hikukrēx japē xāj Tirtūm mē wa ixri htūr tūm nē pa ho papa hkēt nē. Wa ixte amnhī nhīpēxja mē kēp hihtŷx.

25 Na htem kām hikukrēx rax mā ihkra karo hprām kēt rāhā tee ri kām Tirtūm kōt amnhī nhīpēx prām kaprŷ. Te ho mēhō kot menh kagō hā hkre nē kām kagō katōk prām

kêt rāhā kām guhkrax kām ar prām kaprÿta pyrāk. Anē.

Nhūm pre ā Jejus mē kām kapēr anē.

²⁶ Hāmri nhūm mē kuma nē tee ri amnhī kukamā hamaxpēr nē kām:

—Kwa nom mē ixpīitā mē inhmā mē ixkukrēx japē kēnā. Jakamā xā kot paj mē ixpīitā nhÿrmā war ari ixtÿr tūm nē ixa pa ho ixa hkēt nē nā? Anē.

²⁷ Hāmri nhūm mē kām:

—Nā kot kaj mē amnhī krā hkōt mē amā mē akukrēx japēja mā anhÿrer kēt nē. Tÿrtūm pix na hte ā mē kot amnhī nhÿpēx anhÿr kaxyw tanhmā mē hkrā hto nhūm mē kām mē hikukrēx japē htÿx kēt nē. Jao mē kēp Tÿrtūm mē wa ixri htÿr tūm nē mē pa ho pa mā xwÿnh. Anē.

²⁸ Hāmri nhūm Simāw Pētre kām:

—Kwa Pahihti no mē pajaja? Na pa prem agryk ā mēmoj piitā hkaga hpa nē akōt ixa pa ho ixa. Jakamā kot paj mē nhÿrmā war ari ixtÿr tūm nē ixa pa ho ixa nā? Anē.

²⁹ Hāmri nhūm kām:

—Tÿ. Nā ka mē atō inhmā tanhmā amnhī nhÿpēx to ho apa kaxyw akwÿjē re nē ma inhmā tanhmā amnhī nhÿpēx to ho ri apa. Anhōrkwÿ re rÿ atō rÿ atōx rÿ aprō nē akrājē re. Rÿ akatorxā nē anhÿpēxā war are. Rÿ akukrēx piitā rer pa hāmri nē ma ixkapēr o mē piitā mē ahkre ho ri mē hkōt apa.

³⁰ Hā kot paj ja hā mē apumu nē mē ato mex rax nē. Hāmri ka mē ma nhÿhÿm apa nē nhÿri mē kām ixkapēr jarēnh o ri mē hkōt apa nhūm mē kot mē amar xwÿnh kwÿjjaja mē ama nē ra kām mē akÿnh nē. Nē ra mē ate akwÿjē rer par tā nhūm mē tāmjjaja te mē apē mē hkra rÿ mē htō rÿ mē htōx pyrāk o mē anhÿpēx nē tanhmā mē ato mex to ho pa. Hāmri ka mē nhÿrmā ty nē ma Tÿrtūm mē wa inhō krī hwÿr api hāmri nē wa ixkuri amex kumrēx nē atÿr tūm nē apa ho apa. Anē.

Nhūm pre ā Jejus Simāw Pētre mē hkwÿjē mā kapēr anē.

Jejus kot axte htyk kukamā amnhī jarēnh Matēwre 20.17-19; Makre 10.32-34

³¹ Tā nhūm Jejus mē kot ŷ hā kapēr jarēnh o mē pa xwÿnh pē 12jaja mē hkwÿjē pē mē ho kato. Nē nhÿri mē hkāx ā mē o xa nē tanhmā mē kām amnhī jarēnh to nē mē kām:

—Amnepēm Tÿrtūm nhÿ hā kapēr jarēnh xwÿnhjaja na prem ixkukamā tanhmā mē kot inhÿpēx to hā ijarē nē ixtā kagā. Tā pu mē ra Jerujarē hwÿr mō. Kamā koja mē tanhmā ixto rax nē. Ra mē kot ixkukamā ijarēnh nē ixtā kagā xā hkōt koja mē ixto anē.

³²⁻³³ Koja mē kām ixkurē xwÿnhjaja ixpynē nē Rōm nhō xwÿnhjē nhō pōristi hwÿr ixto tē nē mē kām ixto hēx nhūm mē kuma nē mē mar xā hkōt tanhmā inhÿpēx to. Nē mē hkwÿjjaja ixtā hpēr o axkē nē akunha. Nē mē hkwÿjjaja ixto kapēr punuj nē ijayrÿ nē ixtā

argōx rē nē ixtak. Hāmri nē ixpī. Ā koja mē inhÿpēx anē. Nom kot paj ām ixtÿk ā apkati axkrunēpxi nhūm Tÿrtūmja akupÿm ixto ixtÿr. Anē.

³⁴ Hāmri nhūm mē kuma nē tee ri htyk nē akupÿm htÿrja kukamā hamaxpēr no ām hprī hā hkōt hamaxpēr kēt nē.

Jejus kot no hkre xwÿnh o mex ā harēnh Matēwre 20.29-34; Makre 10.46-52

³⁵ Tā nhūm Jejus mē kormā Jerujarē hwÿr Jerikoja tēp o mō. Hāmri nhūm pry nhÿhkjē hā no hkre xwÿnhjaja āhwÿr o nhÿ.

³⁶ Hāmri nē amnhī wÿr mē mrar ma. Mē ohtōō nē Jejus kōt mē mrar xwÿnhjē mrar ma nē mē kām:

—Kwa mēmo ri? Mēmoj wÿr na ka mē axohtō nē mra? Anē.

³⁷ Hāmri nhūm mē kām:

—Nā Jejus pē Najare nhō xwÿnh kōt na pa mē mō. Anē.

³⁸ Hāmri nhūm mē kuma nē kàx pē Jejus mā kapēr nē kām:

—Pa Jejus? Apē mē inhō Pahihti mex na ka. Te apē amnepēm anhÿgēt pahihiti Tawi kot amnhī nhÿpēx pyrāk. Jakamā kwa ixkamā axukapri nē akupÿm ixto mex kēt wehe. Ixte amnhī kaxyw akōt ijamaxpēr xwÿnhjē hō na pa. Anē.

³⁹ Hāmri nhūm Jejus kukamā mē mrar xwÿnhjaja tee ri kuma nē kām:

—Tk. Kwa akapēr kēt nē nhÿ nā. Anē.

Tā no nhūm ām mē kuma nē xatā amnhī to hwÿr o nhÿ. Kàx pē kām kapēr o nhÿ.

⁴⁰ Hāmri nhūm Jejus kuma nē xa nē amnhī wÿr hā karō nhūm mē hpa hā kupy nē hwÿr o tē nhūm kām:

⁴¹ —Pa mo na? Tanhmā kot pa ato? Anē.

Nhūm kām:

—Nā akupÿm inhmā ixrÿt mex prām. Anē.

⁴² Hāmri nhūm kām:

—Tōe. Nā ra ate amnhī kaxyw inhmā ajamaxpēr tÿx jakamā kot kaj akupÿm ri rÿt. Anē.

⁴³ Hāmri nhūm akupÿm rÿt mex kurē kumrēx nē ja hā amnhī pumu nē hkÿnh tÿx nē. Hāmri nē ma Jejus kōt Tÿrtūm mā mex o mex ā harēnh o mē hkōt tē. Hāmri nhūm mē kot hā omunh xwÿnhjaja haxwÿja Tÿrtūm mā mex o mex ā harēnh o Jejus kōt mō.

19

Jakew kām Jejus pumunh prām ā harēnh Rukre 3.8, 3.12-13

¹ Tā nhūm Jejus arī Jerujarē hwÿr mō nē Jeriko hwÿr pōj. Hāmri nē krī kahti hkōt pry hā mō.

² Nhūm mē ra hkōt htu rax nē hkōt omunh o mō. Jakamā nhūm Jakew pē Rōm nhō pahī mā kwÿjē pē kàxpore hkwy jamÿnh xwÿnhjē krāhtūm xwÿnhjaja. Na pre hikàxpore rax nē.

³ Tã haxwýja kãm Jejus pumunh prãm nê. Nom ãm hakooti nê hprĩhti jakamã tee ri kot omunh kaxyw amnhĩ nhĩpêx nhũm mê kêp ãmñâr rax nê.

⁴ Hãmri nhũm ra hamaxpêr nê ma kukamã hprôt nê tẽ nê nhĩri pry mýri pí xãm pumu nê hã api nê kutêp ajêt. Hãmri nhũm Jejus mō nê hapa.

⁵ Nê kãnhmã rĩt nê omu nê kãm:

—Pa Jakew. E kwa tokyx tẽn wrý pa ma akôt anhõrkwý hwýr tẽn nê ari amnhĩm hikra. Anê.

⁶ Hãmri nhũm kuma nê hkĩnh nê. Nê wrýk kurê kumrêx nê ma amnhĩ kôt nê o tẽ.

⁷ Hãmri nhũm mê kot omunh o kuhê xwýnhjaja tee ri ja hã omu nhũm ja mê kêp omnuj nê nhũm mê ãxpên mã harênh o:

—Tk. Kwa nã. Jakew kot amnhĩ tomnuj xwýnh tã nhũm Jejus ma hkôt tẽn nê kuri pój. Anê.

⁸ Hãmri nhũm wa õrkwý hwýr axã nê nhý nhũm Jakew Jejus mã amnhĩ jarênh o:

—E. Nã ra ixte pahĩti mã kãxpore jamýnh xwýnhhta na pa pre hte ho prês jakre nê amnhĩm hamýnh rax nê. Tã kot paj akupým mê kãm õr pa. Na pa pre hte mê hkwyjê pẽ ho 10 nê hamý. Tã kot paj hipy ho 40 nê kurê nê akupým mê kãm ho ixpigrãnh pa. ã kot paj mê hipêx anê. Nê ixkãxpore jakrêx kot paj ho axkjê nê mê kêp amrakati xwýnhjê mã ho ixpigrãnh pa. Anê.

⁹ Hãmri nhũm kuma nhũm ja kãm mex nê. Jakamã nhũm kãm:

—Nã ãm hãmri. Ate pahkukamã panhĩgêt Aprãw pyrã nê jarãhã ate amnhĩ tomnuj kaga jakamã na ra jarãhã anhõrkwý hwýr mê mex xã axã. Kojã Tirtũm jarãhã amnhĩ katut kôt ate amnhĩ tomnuj rênh pa nê axte kãm hamaxpêr kêt nê.

¹⁰⁻¹¹ Mê ate amnhĩ tomnuj xwýnhjê hwýr na pre Tirtũm inhmê pa wrý. Te nhýri mê apikunor nhũm ixte mê ajapêr o ixpa kaxyw Tirtũm kot mê awýr inhmênh nhũm ixwrýk nê nhýri ixte mê ajapêr o ixpa nê mê amã ixkator nê ixkĩnh nê ma akupým hwýr mê ato inhmõrta pyrãk. Anê.

Mê pahte Tirtũm mã tanhmã amnhĩ nhĩpêx to

Matêwre 25.14-30

Hãmri nhũm mê ohtõ nê Jejus mar o hkôt Jerujarê hwýr mra. Na prem htýx tanhmã kot amnhĩ nhĩpêx to hã hkamnhĩx o hkôt mō nê ãxpên mã:

—E ma pu mê hkôt. Kojã Jerujarê hwýr pój hãmri nê kêp mê pahpê Ijaew nhõ pahĩ nê mê pahto amnhĩptãr kurê kumrêx. E kwa ma pu mê hkôt. Anê.

¹² Nhũm Jejus mê hamaxpêr kôt mê omunh mex nê. Jakamã kot mê piitã mê ho amnhĩptãr xã hã arĩgro hã mê kãm amnhĩ jarênh kaxyw. Kormã Jerujarê hwýr ahtêp

kêt ri mê kãm amnhĩ jarênh kaxyw. Nom hprĩ hã mê kãm hã amnhĩ jarênh kêt nê. ãm amnhĩ tã kuxi nê mê kãm awjarê nê mê kãm:

—Kojã nhýri krĩ hõ kamã mêhõ myja. Kot amnhĩ to rax o hkwyjê jakrenh xwýnhja. Nê krĩ hõ kamã krĩ piitã hkôt pahĩ nhõ pahĩhtija hãmri harênh ma nê amnhĩ wrý kuwý. Kot ma hwýr mōr nhũm õ krĩ kamã nê mããnen krĩ hkwy kamã kêp mê õ pahĩ kaxyw kot ãm kaxyw nhũm hwýr nojarêt.

¹³ Hãmri nê amnhĩ wrý kãm mê ãpênh xwýnhjê ho 10 nê tanhmã mê hã karõ hto. Nhũm mê hwýr mra nhũm mê kãm amnhĩ jarê nê mê piitã mê kãm kãxpore hkwy gō. Ahpýnhã mê kãm hpýnh nê kugõ nê mê kãm: “E ota ixkãxpore hkwyta. Kot kaj mê ixkutêp tanhmã ri inhmã ho rax to. Kêr pa mêmō arĩgro hã akupýn mō kê ra ixahã inhmã ho ohtõ nê pa hamý.” Anhýr o mê kãm kapêr hãmri nê ma mō.

¹⁴ Hãmri nhũm õ krĩ nhõ xwýnhjaja ra kêp mê õ pahĩ kaxyw harênh ma nhũm ja mê kêp omnuj nê. Nê mê kãm hkĩnh kêt jakamã ma krĩ hõ kamã kot mê kaxyw ãm xwýnhhta wrý hkwy rê nhũm mê ma hwýr mra nê hwýr pój. Hãmri nê kot mê kaxyw ãm mã xwýnhhta pumu nê kãm: “Pa. E ot pa mê awýr mra. Kwa na ka xep ra mê ixkaxyw mê inhĩõja xãm kaxyw. Kwa nã mê inhmã jahti hkĩnhĩ hã. Kwa mê ixkaxyw ãm kêt nê nã?” Anhýr o kãm kapêr.

¹⁵ —Tã to nhũm ãm mê kuma nê ãm mê kuma nhũm mê awjanã nê mã akupým mra. Hãmri nhũm pahija mê kaxyw mê kãm hkĩnh kêt xwýnhhta xãm nhũm ma akupým õ krĩ hwýr mō. Mōõ nê ra pój hãmri nê amnhĩ wrý kãm mê ãpênh xwýnhjê hã karõ nê mê kãm: “E no ixte mê amã kãxpore nhõr xwýnhhta? Tanhmã na ka prem ixkutêp inhmã ho rax to? E mê inhmã agõ pa omu.” Anê.

¹⁶ —Hãmri nhũm wamta kãm: “Ota akãxpore ate inhmã õr xwýnhhta. Na ka pre inhmã ho pyxi nê agõ pa kupy nê ho mêmō hy hkwy japrõ nê hkre. Nhũm õ pa mê kãm ho wênê ho ri ixpa nê hpãnhã kãxpore jamý nê hipy amã kurê nhũm ra kêp 10. Ota. E amý.” Anê.

¹⁷ —Hãmri nhũm kuma nê hkĩnh nê. Hãmri nê kãm: “Nã ãm hãmri na ka ã inhmã ho rax anê. Ixte amã ho pyxi nê õr tã ka pre inhmã hamãr mex nê nhũm kãnhmã axkamê nê ra kêp 10. Tã ra ixpê krĩ hkwy kamã mê õ pahĩ jakamã kot ka inhmã krĩ ho 10 nê inhmã hamãr o ri apa. Jakamã kwa mãmri amnhĩm kãxporeta o arĩk.” Anê.

¹⁸ —Hãmri nhũm hpãnhã hõja hwýr tẽn nê kãm: “E ota akãxporeta. Na pa pre ho mêmō hy hkwy japrõ nê hkre nhũm õ pa mê kãm ho wênê nê hpãnhã kãxpore jamý nê hipy amã kurê nhũm ra kêp 5. Tã ota. E amý.” Anê.

19 Hāmri nhūm kuma nē kām: “Nā ām hāmri. Hāmri na ka ā inhmā ho rax anē. Jakamā kot kaj hpānhā inhmā krī ho 5 nē ho amnhīptār o apa. E māmri amnhīm kàxporeta o arīk.” Anē.

20-21 –Hāmri nhūm hpānhā hkōt hōta tē. Nom hkwyjē hkīnhā ō patrāw mā tanhmā kàxpore ho rax to hkēt nē. Ām tanhmā hamaxpēr punuj to nē htýx ri kot kēp ho ōxy nē amnhīm piitā hamýnh par nē akupým kām hkwy nhōr kēt ā hkamnhīx. Jakamā tanhmā kām ho rax to hkēt nē. Ām hkupu nē o tē nē nhýri kutēp kuxi. Hāmri nhūm ō patrāw amnhī wýr hā karō nhūm hwýr tē nē amnhī nē kām kapēr punuj nē kām: “Tk. Ota akàxporeta. Ixte amā tanhmā ho rax tore hā. Ixte amā ho rax ronhýx ka amnhīm piitā hamýnh pa nē akupýn inhmā hkwy nhōr kēt nē. Rý ixte tanhmā apē homnuj to ronhýx ka hā inhmā akir. Jakamā na pa tanhmā amā ho rax to hkēt nē. Ām hkupu nē o tē nē ho amūxu nhūm arī akutēp hikwý. Tā ota.” Anhýr o amnhī nē ō patrāw mā kapēr punuj nē.

22-23 Hāmri nhūm tee ri amnhī tā kuma. Kot amnhī to mex xwýnh nē kām mē àpēnh xwýnhjē ho mex o pa xwýnh tā ā kām àpēnh xwýnh kot kām kapēr anhýrja ma nē amnhī tā kamā gryk nē. Hāmri nē kām: “Tk. Kwa xā ā ixte amnhī nhīpēx anhýr? Nā ixte ā amnhī nhīpēx anhýr kēt. Ā ixte amnhī nhīpēx anhýr nhūm amā ixpuma ronhýx ka pre amā ixpuma xāj ixkàxporeta py nē ixwakre kamā amnhī krā hkōt tanhmā inhmā ho rax to. Tā nhýx pa pre ra akupýn awýr tē nē hamý. Nā na ka ā ijarēnh anhýr o axēx nē amnhī krā hkōt tanhmā inhmā ho rax to hkēt nē. Mýrapē kot paj atomnuj týx nē ka rī amnhī pumu. Pēr ām ajamaxpēr punuj.”

24 –Nhūm pre ā kām kapēr anē hāmri nē mē kot mar o kuhē xwýnhjē mā kām: “E mē atō kēp kàxpore py nē wam kot ho 10 nē hamýnh xwýnhhta mā agō.” Anē.

25 Hāmri nhūm mē tee ri kuma nhūm ja mē kēp omnuj nhūm mē kām: “Kwa nā ra hikàxpore rax kēnā. Ra ate kām ho 10 nē ōr kēnā.” Anē.

26 Hāmri nhūm mē kām: “ýý nom tāā. Māmri kām agō. Kojā mēhō inhmā àpēnh mex pa amnhī tā omu nē kot inhmā àpēnh mexta pānhā ho mex nē. No kojā inhmā àpēnh mex kēt nē pa tee ri ja hā omu nē ho mex kēt nē. E māmri kām agō.” Anē.

27 Hāmri nē hpānhā mē kām: “E hpānhā mē kām ixprām nōkati xwýnhjaja. Ixte mē ho amnhīptār mā tā mē kām ixprām nōkati xwýnhjaja. Mē ma mē hwýr mra nē mē ho akuprō nē akupýn amnē ixwýr mē o mra nē inhnoo mā mē himex pa.” Anē. Ā mē ujarēnh kot anhýr. Anē.

Nhūm pre Jejus ā mē kām ujarēnh anē. Te tām kēp patrāwta pyrā nē ā amnhī jarēnh anē. Mē kot tanhmā amnhī nhīpēx to ho pa hā mē omunh xā hkōt tanhmā mē hipēx to hā amnhī jarē.

Jejus kot Jerujarē hwýr àr ā harēnh Matēwre 12.1-11; Makre 11.1-11; Juāw 12.12-19

28 Nhūm Jejus kormā Jerujarē hwýr mō.

29 Hāmri nē ra Petake mē Petān wa htēp o mō. Hixēt pē Oriwēhti kahti ri na krī wa xa. Jakamā nhūm Jejus hkōt mē pa ho mē pa xwýnh wa ho axkrut nē amnhī kukamā wa kumē.

30 Nē wa kām:

–E. Wa ma krī mūj wýr mē ixkukamā wa tē. Nē wa hwýr pōj nē nhýri jumēnre nyw mā ē nē ām ata pumu. Kormā mē kot hā hkrī hkēt xwýnhhta. Ka wa omu nē kām ē xā hpōt nē man akupýn ixwýr o tē.

31 Nhūm mēhō ja hā war apumu nē hā tanhmā war amā kapēr to ka wa kām ā ijarēnh anē nē kām: “Mē panhō Pahihti na hā karō pa wa hwýr tē.” Anhýr o wa kām ijarē. E wa ma hwýr tē. Anē.

32 Hāmri nhūm wa kuma nē ma hwýr htēm kurē kumrēx. Nē wa krīm pōj nhūm Jejus kot wa kām harēnh xā hkōt jumēnreta pumu.

33 Hāmri nē kām ē xā hpōt o xa nhūm ō dōnjaja mra nē hā wa omu nē wa kām:

–Tk. Kwa mo kaxyw na ka wa ri mē ixpē mē ixkrit mā ē xā pōt o wa xa? Kwa xā kot kaj wa mē ixpē ho ahkī nā? Anē.

34 Hāmri nhūm wa mē kām:

–Nā mē panhō Pahihti na wa inhmā anē pa wa tē. Wa ixte ma akupým kutā ho inhmōr kaxyw. Anē.

Hāmri nhūm mē wa kuma nē wa kām:

–Tōe. Nā wa māmri mā kām o tē. Anē.

35 Hāmri nhūm wa ma akupým Jejus wýr o tē. Hāmri nē kaxyw amnhī xē hkwy hopōj nē kām ho hkō kahty nē kām ho htýx nē o xa nhūm hā nhý nē mō.

36 Kormā Jerujarē hwýr hixēt ā àpir o mō. Nhūm mē kot omunh o mrar xwýnhjaja hkīnh nē ma hkukamā kot pry ho mex kaxyw amnhī xē hkwyptyr o mō.

37 Hāmri nhūm mē hixēt ā api nē kormā ahpar mā wrýk o mō. Hāmri nhūm Jejus kōt mē pa ho pa xwýnhjaja kàx pē Tirtūm mex o mex ā harēnh o hkōt mō. Ra mē kot hkōt pikamēnh ry nē kot mē kām aa mēmoj pumunh kēt kwý ho anhýr rax ā omunh jakamā hkīnh nē nē Tirtūm mex o mex ā harēnh o hkōt mō.

38 Nē harēnh o:

E ota Tirtūm kot mē pahwýr mēnh xwýnhhta na ra pōj.

ām hāmri na mē pahwýr wrý. Na mex kumrēx.

Kêp mē panhō Pahihti mex na. Ām hāmri na pre Tirtūm mē pahwyr kumē.

Tirtūmja mex kumrēx. Mex o mex. Kukwak ri pix mā na pu htem pajamakētkati nē paxāmnhix ri papa rāhā ho papa.

Anhūr o Jejus kōt harēnh o mō. Ra kot mē ho amnhīptār kurē kumrēx ā hkamnhix jakamā hkīnh nē hkōt ā kapēr o mōr anē.

³⁹ Hāmri nhūm Parijew nhō xwýnh kwýjaja mē hkōt mē tee ri mē kuma hāmri nē Jejus mā kām:

—Kwa Jejus. Mē kām anē kē mē anhīkrē nā? Anē.

⁴⁰ Hāmri nhūm mē kām:

—Tk. Nā kot paj mē kām anhūr kēt nē. Ā mē kapēr anhūrja na inhmā mar hprām. Kwār mē māmri Tirtūm mā mex o mex ā harēnh o ixxōt mō. Kot mē anhūr kēt nhūm ra pikap kēn nhīkwý xwýnhja tee ri ja hā mē omu hāmri nē tām tanhmā amnhī nhīpēx to nē mē hpānhā tām Tirtūm mā mex o mex ā harēnh o hikwý. Jakamā kwār mē māmri kapēr anē. Anē.

Jejus tee ri kot Jerujarē hkukamā hamaxpēr ā harēnh

Rukre 23.27-31

⁴¹ Nhūm mē kormā Jerujarē hwýr hpōx o mō. Kormā hixēt rūm ahar mā hwýr wrýk o mō. Hāmri nhūm Jejus amým amnhī hkukamā Jerujarē nhō xwýnhjē pumunh o mō nē mē hkukamā hamaxpēr o hkaprī nē. Hāmri nē hkaprī xāj mýr o mō.

⁴² Hāmri nē te kot mē kuri mē omunh o ri pa pē mē kām kapēr pyrāk o mē kām kapēr nē mē kām:

—Hēxta waa nē Jerujarē nhō xwýnhjaja. Kot kaj mē amex kēt nē. Mē ate amnhī kukamā axāhpumunh mex ronhýx ka mē ra mē kām mē akurē xwýnhjē pumaj ixkōt amnhī xunhwýr kurē kumrēx nhūm mē tee ri tanhmā mē ato mā. Ka mē ra ixkukwak ri amex nē ajamakētkati nē akīnh nē ri apa ho apa.

⁴³⁻⁴⁴ Tirtūm tām kot mē awýr inhmēnh tā ka mē amā ixprām kēt nē. Jakamā koja nhýrmā mē kām mē akurē xwýnhjaja mē awýr mra nē mē anhō krm hipók pa. Hāmri ka mē amnhī wýr mē omu nē tee ri ajapōx kaxyw nhūm mē awýr agjē nē mē anhīmex pa nē mē anhō krīja grānh pa. Nē ahpýnhā ri mē anhōrkwý grānh pa. Ā koja mē mēmoj piitā grānh par anē. Anē.

Jejus kot Tirtūm nhōrkwý hwýr ar ā harēnh
Matēwre 21.12-17; Makre 11.15-19; Juāw 2.13-22

⁴⁵⁻⁴⁶ Tā nhūm Jejus Jerujarē hwýr axā nē jumēnre rūm wrý hāmri nē ma Tirtūm mā amnhī jarēnh xā hā ixkreja wýr tē. Hāmri nē hwýr axā nē tee ri kamā mē pa xwýnhjē pumunh o xa. Nhūm mē ra axtem nē mōx nē ōwēhti nē tuuti ho wēnē ho kuhē. Mē

kot haprōr nē Tirtūm mā hpar nē kām ōr pē kām amnhī jarēnh kaxyw mē kām ho wēnē ho kuhē. Nē axtem nē mē kām hā ohtō rax kām mē kām ho wēnē. Hāmri nhūm Jejus mē hwýr axā nē tee ri mē omu mē kām akir nē mē kām:

—Tk. Kwa nā. Tirtūm kapēr ā kagā htūm kot ōrkwý jarēnh kot:

Inhōrkwýja ām mē ate inhmā amnhī jarēnh xā hā ixkre pix kaxyw na.

Anhūr o kot harēnh tā ka mē axtem nē kamā ā amnhī nhīpēx anhūr o apa. E mē ajapōj nē ma ajapēx tokyx anē.

Anhūr o mē kām kapēr hāmri nē ixkre nē mē kator nhūm mē ma hapēx pa.

⁴⁷ Tā nhūm Jejus apkati mē Tirtūm mā amnhī jarēnh xā hā ixkreja wýr mra nē kamā mē ahkre ho hkrī. Hāmri nhūm mē ō patre krāhtūm mē Tirtūm kapēr tūm o mē ahkre xwýnhjē mē mē kot amnhī to rūnh xwýnhjaja kot mē ahkre ma nhūm ja mē kēp omuj nē nhūm mē kām hpīr prām nē.

⁴⁸ Nom nhūm amarī mē pa xwýnhjaja mē kurom kām mar prām nē akryk mar o kuhē. Jakamā nhūm mē tee ri ja hā mē omu nē tanhmā mē kot hpīr to hkukamā hā axpēn ma.

20

Mēhō nhý hā Jejus kot mē ahkre hā harēnh

Matēwre 21.23-27; Makre 11.27-33

¹ Nhūm arīgro hō hā nhūm Jejus kē axte Tirtūm mā amnhī jarēnh xā hā ixkreja wýr axā nē mē ahkre ho nhý. Tanhmā mē kot amnhī nhīpēx to nē nhýrmā Tirtūm mē wa kuri htūr tūm nē pa hā mē kām kapēr o nhý. Hāmri nhūm Ijaew nhō pahijē mē mē kot Tirtūm kapēr tūm o mē ahkre xwýnhjē mē mē ō patre krāhtūmjaja hēx rom mar o kuhē.

² Hāmri nē kām:

—Kwa mē inhmā amnhī jarē. Mēhō nhý hā na ka hte ā amnhī nhīpēx anhūr o ri apa? Na ka hte akupým mē ho mex o apa nē tanhmā mē ahkre hto ho apa. Xā amnhī krā hkōt na ka hte ā amnhī nhīpēx anē nā? Anē.

³ Hāmri nhūm mē kām:

—Nā ixkumrēx kot paj mēmoj tā mē akukja. Ka mē inhma nē inhmā harē pa ri kormā tanhmā mē amā amnhī jarēnh to.

⁴ Finat Juāw Paxisja ā kot paj mē akukja. Mēhō nhý hā na pre mē hkrā kumrār o pa? Xā amnhī krā hkōt nā xā Tirtūm nhý hā? E mē atō inhmā harē. Anē.

⁵⁻⁶ Hāmri nhūm mē kuma nē tee ri kot tanhmā kutā kām harēnh to hkukamā hamaxpēr nē axpēn mā:

—Kwa tanhmā kot puj mē kām harēnh to? Jar mē kot mar xwýnhjaja na htem kēp Tirtūm nhý hā kapēr jarēnh o pa xwýnh ā harēnh o pa. Tā kot puj mē kām kot amnhī krā hkōt mē hkrā kumrār o pa hā harē nhūm

mê tee ri mê pama nê mê pakamã gryk tÿx nê. Nê mê paxêx rom mê pahte kãm kapêr ã mê pahpumunh kurê kumrêx nê kên o mê pahtak o mê panhîmex. Nom kot puj mê kãm Tirtûm nhÿ hã mê hkrã kumrãr ã harê nhûm mê pamã kapêr o: “ã kot anhÿr kênã na ka prem kapêr ma nê ra ixkôt amnhî xunhwÿr kêt nê?” Anê. Nà kot puj mê kãm tanhmã harênh to hkêt nê. Kot puj mê ãm kãm aa te mê pahte ja jarênh mar kêt pyrãk o harê. Anê.

Mê kot tanhmã kãm nê nhûm kot ta pãnhã tanhmã mê kãm nê pymaj nhûm mê ãm tee ri kãm tanhmã nê hprãm kaprÿ o kuhê.

⁷ Hãmri nê kãm:

—Konên. Mê ixte mêhõ nhÿ hã kapêr o pa hã omunhre hã. Anê.

⁸ Hãmri nhûm mê kuma nê mê kãm:

—Tk. Tõe kot pa xep ijaxwÿja mê amã tanhmã amnhî jarênh to hkêt nê. Ijaxwÿja ixte mêhõ nhÿ hã ã ixte amnhî nhîpêx anhÿr o ri ixpa hã amnhî pumunhre hã. Anê.

*Mê ãpênh punuj xwÿnhjê jarênh
Matêwre 21.33-46; Makre 12.1-12*

⁹ Nhûm Jejus arî Ijaew nhõ pahijê mã kapêr. Nê mê kot tanhmã hipêx to hkukamã mê kãm tanhmã amnhî jarênh to. No ãm amnhî tã kuxi nê mê kãm awjarê nê mê kãm:

—Koja mêhõ hpur ã hkwyjê kot kamã kãm ãpênh kaxyw mê kãm karõ. Hãmri nhûm mê ma hwÿr mra nê kamã mêmo hy hkre nê hkre pa. Hãmri nhûm ra hpur nhõ dõnja nhÿhÿm nojarêt nê kãm mê ãpênh xwÿnhjê mã tanhmã hpur jarênh to nê mê kãm: “E or ixpur nõ. Kê kamã mêmojê hkã hpa ka mê mãmri kamã axujamÿnh pa nê ho axkjê. Nê ixkutêp inhõ jaxwÿ nê mãmri mê anhõ tanhmã ho hprãm xã hkôt tanhmã ho.” Anê.

—Nhûm ã mê kãm kapêr anê hãmri nê ma nhÿhÿm mô.

¹⁰ —Tã nhûm ra hkã hpa. Nom nhûm hpur nhõ dõnja kormã krî hõ kamã ri hã ujahkre ho ri pa. Tã kuri kãm ãpênh xwÿnhjê hõja nhûm akupÿm mê hwÿr kumê. Mê kot kãm kwÿ nhõr nhûm ma kot kãm o môr kaxyw ma mê hwÿr kumê nhûm ma mê hwÿr mô. Môõ nê mê hwÿr pøj nhûm mê omu nê axtem nê unê nê htak nê akupÿm hano nhûm ma akupÿm ÿ kamã mô.

¹¹ Hãmri nê pøj nhûm õ patrãwja tee ri omu nê hpãnhã ja mê nhûm ma mê hwÿr mô. Môõ nê mê hwÿr pøj nhûm kê wem mã ho anê nê unê nê htak nê akupÿm hano nhûm wamta pyrã nê ma akupÿm ÿ kamã mô.

¹² —Hãmri nhûm kê axte hkôt ja mê nhûm ma mê hwÿr mãânên mô. Ma mê hwÿr mô nê pøj nhûm mê te ho wamta wa hipêx pyrãk o hipêx nê unê nê htak rax nê amnhî nê hano nê pur nê kapôt ã kumê. Hãmri nhûm ma akupÿm mãânên ÿ kamã mô.

¹³ Nhûm mê õ patrãw tee ri mê omu nê hamaxpêr o: “Hêxta waa nê. Tanhmã kot paj amnhî nhîpêx to? Nà kot paj mê hwÿr ixkra mân mê. Inhmã hapê htã kot paj mê hwÿr kumê kê ma mê hwÿr mô. Hãmri nhûm mê kêp ixkra hã omu nê tanhmã ixpê ho hkêt nê. Nê tã inhmã kãm inhõja kwÿ gõ.” Anhÿr o hamaxpêr hãmri nê ma mê hwÿr kumê nhûm ma mê hwÿr mô.

¹⁴ —Tã ra mê hwÿr hpõx o mô nhûm mê amÿm amnhî wÿr omu nê kêp hkra hã omu nê hã axpên mã amÿnê nê axpên mã: “E onêj hpur nhõ dõn krata tẽ. Koja nhÿrmã õ papaj mÿr pê amnhîm pur ã pyka pytã nê ho õ. Kwa pu mê hpîr kurê kumrêx nê kêp hpurja o panhõ. E tokÿj pu mê kupi ri.” Anê.

¹⁵ —Hãmri nhûm tẽ nê mê hwÿr pøj nhûm mê unê nê pur nê ho kato nê ma o tẽ nê kupi. ã mê ujarênh kot anhÿr. Anê.

Nhûm pre ã Jejus mê kãm ujarênh anê nê hã tanhmã mê hkukjêr to nê mê kãm:

—E koja hpur nhõ dõnja hkra jarênh ma hãmri nê tãm mê hwÿr mô nê tanhmã mê hipêx to wehe?

¹⁶ Koja ma mê hwÿr mô hãmri nê mê himex pa. Hãmri nê hpãnhã hpur ã nhãm mêmojê rê nhûm mê tã kãm hamãr mex o pa. Anê.

Nhûm pre ã Jejus mê kãm ujarênh anê hãmri nhûm mê kot mar xwÿnhtaja ujarênh kamã amnhî jarênh mar kurê kumrêx. Mê kot Tirtûm kot mê hwÿr rênh xwÿnhjê kapêr mar kêt nhûm mÿrapê mê kãm mê hkurê xwÿnhjaja kot mê kêp mê õ pika pytã nê mê himex par ã amnhî jarênh ma nhûm ja mê kêp omnuj tÿx nê. Hãmri nê hêx rom Jejus mã kãm:

—Tk. Kwa nã nhÿx pre kêt pur nhõ dõnja ã mê hipêx anhÿr kêt nê. Anê.

¹⁷ Hãmri nhûm mê kuma nê mê omunh o xa. Nê mê omunh pê mê no kagãr mã mê kãm kapêr nê mê kãm:

—Nã ã mê hipêx anhÿr mã mê tãm kênã. Mãn ka prem ra Tirtûm kapêr ã kagã htûm kot ja jarênh ma. Harênh kot:

Mê kot kên o amnhîm õrkwÿ nhîpêx kaxyw nê kên maati pumu nê htÿx omnuj ã hkamnhîx nê hkaga.

Mê kot hkaga htã Tirtûm mê kurom mex o kot kên piitã hakrenh par ã omunh kurê kumrêx. Anê.

ã Tirtûm kapêr ã kagã htûm kot mê ajarênh te mê kot kên maati punuj ã hkamnhîx nê hkaga xwÿnhjê jarênh pyrãk o ã mê ajarênh kot anhÿr. Anê.

¹⁸ Nhûm pre ã Jejus mê kãm te kêp kên maati pyrãk o mê kãm amnhî jarênh anê. Hãmri nê axte amnhî tã kuxi nê mê kãm axte kên jarênhhta pyrã nê mê kãm:

—Nã kot kaj mê atõ ixkaga hãmri nê te mêhõ htÿx htêm nê kên pumunh kêt nê hã htêk nê tẽm pyrãk o amnhî nhîpêx. Jao

ixkutā amnhī xām. Rỳ ka tanhmā amnhī to nē ixkaga nhūm te kēn maati hō htēm nē kot anhīpy htēm nē axōm par pyrāk o anhīpēx ka amex kēt nē. Anē.

¹⁹ Nhūm pre ā Jejus mē kām ujarēnh kām mē harēnh anē. Hāmri nhūm Tirtūm kapēr tūm o mē ahkre xwýnhjē mē mē ō patre krāhtūmjaja kot mē kām kēn jarēnh o te mē tām harēnh pyrākja ma nhūm ja mē kēp omnuj tỳx nē. Jakamā nhūm mē kām Jejus pynēnh nē haxār prām nē. Nom amnhī tā kām mē kot mar o kuhē xwýnhjē puma nē.

Mē kot hēx rom Jejus kukjēr ā mē harēnh Matēwre 22.15-22; Makre 12.13-17; mǎānēn Rōmān 12.1, 13.6-7

²⁰ Hāmri nhūm Tirtūm kapēr tūm o mē ahkre xwýnhjē mē mē ō patre krāhtūmjaja Jejus tānopxar o kuhē. Hāmri nē ra amnhī wýr mēmy hkwý hā karō nē mē kām:

—E. Mē ma Jejus wýr mra nē te mē ate hkōt amnhī xunhwýr kaxyw pyrāk o amnhī nhīpēx nē mēmoj tā ri hkukja. Mēmoj tā hkukjēr rax nē. Kēr kē Rōm nhō pahi Sesti kapēr kwým ri tanhmā mē amā kapēr to ka mē ama nē man akupým nra nē mē inhmā harēnh kurē kumrēx. Pa mē ama nē ma hwýr mra nē hā unē nē ma Sesti nhý hā mē pahto amnhīptār xwýnhhta wýr o tē nē ĩhkram haxā. Anē.

²¹ Hāmri nhūm mē kuma nē mē kām:

—Tōe. Nà kot paj mē anē. Anē.

Hāmri nē ma hwýr mra nē hēx rom kām kapēr nē kām:

—Pa Jejus? Nā ãm hāmri na ka hte Tirtūm kapēr o mē ahkre mex o ri apa. Na ka hte mē kamā akahak kēt nē. Nē mē kot tee ri tanhmā ato kapēr punuj to htā ka aprī hā mē ahkre mex o ri apa.

²² Kwa mē inhmā mēmoj jarē. Rōm nhō pahīhti kot mē pahte kām kǎxpore hkwý nhōr ā mē pahpē Ijaew mā karōta. Kwa xā we ja amā mex nā? Xā kot pu mē kām kugō nā xā kot pu mē kām ōr kēt nē? E kwa mē inhmā tanhmā harēnh to. Anē.

²³ Nhūm prem ā hēx rom kām kapēr anhýr tā nhūm ra mē hamaxpēr ā mē omu nē mē kām:

²⁴ —E mē atō anhō kǎxpore htýxre japēr nē inhmā hō gō pa omu. Anē.

Hāmri nhūm mē kām ja gō nhūm kupy nē omu nē kǎnhmā mē kām kupē nē mē kām:

—E mēhō nhīxi nē mēhō karō na ja hā? Anē.

Hāmri nhūm mē kām:

—Pahi Sesti karō nē hixi na hā kēnā. Anē.

²⁵ Hāmri nhūm mē kuma nē mē kām:

—Tỳ. Tō kēr ka mē māmri kām hkwý nhōr o apa. Hā hkarō nē hā hixi. Tām kot hipēx xwýnh jakamā ō na. No mē kajaja na pre Tirtūm mē anhīpēx nhūm mē apē ō jakamā

kwa kēr ka mē kapēr kōt pix mā ri amnhī nhīpēx o ri apa. Anē.

²⁶ Nhūm pre ā Jejus mē kām kapēr anē nhūm mē piitā mar o kuhē. Nhūm mē kot hēx rom kām kapēr mā xwýnhjaja amnhī jaēr pē ā kot kǎxpore jarēnh anhýrja ma. Hāmri nē tee ri axte mēmoj tā hkukjēr nhūm kot pahi Sesti kwým ri kot tanhmā harēnh to kaxyw ãm tee ri tanhmā hkukjēr to kaprý. Hāmri nē axte tanhmā kām nē hkēt nē ãm akryk omunh pē mar o kuhē.

Akupým mē htír jarēnh

Matēwre 22.23-33; Makre 12.18-27; Juāw 5.21, 6.39; mǎānēn Wam Korīt 6.14, 15.12-28; Wam Tesarōn 4.13-18; Apokarip 20.4

²⁷ Tā nhūm Satusew nhō xwýnh kwýjaja. Mē kot akupým mē htír mā hamaxpēr kēt jakamā mē htyk nē mē hapēx ā mē hkamnhīx. Jakamā na prem tanhmā axpēn mā Jejus jarēnh to nē axpēn mā:

—E kwa pu mē ma hwýr mra nē mēmoj xihtýx ā hkukja kē mē pama nē tee ri tanhmā mē pamā harēnh to hkukamā hamaxpēr. Hāmri nhūm mē piitā ja hā omu nē ãhpumunh tỳx kēt ā omunh kurē kumrēx. E ma pu mē hwýr.

Anē nē ma hwýr mra nē Parijew nhō xwýnhjē pyrā nē hēx rom ahkukja nē kām:

²⁸ —Pa Jejus? Kwa mē inhmā mēmoj jarē. Na pre finat Mojesja Tirtūm nhý hā mē panhīgēt mā ā karō anē. Mē hkra hkēt rāhā mē pa nē mē htyk xwýnhjaja nhūm mē harēnh o:

Koja mēhō hprō nē kormā kamā hkra hkēt rāhā pa nē ty. Hā koja hkōt htōja hpānhā hprōta o hprō nē kamā hkra. Hāmri nhūm kato nē te kēp htō htyk xwýnhhta hkra pyrāk. Anē.

Na pre ā Mojes mē kām karō anē.

²⁹ Jakamā kwa ga mē ixujarēnh ma. Koja mē kot axpēn to htō xwýnhjaja kēp 7. Nhūm kot waja mēhō ho hprō nē wa pa nhūm kamā hkra hkēt rāhā ty. Nhūm hkōt htō hōta hpānhā hprō ho hprō

³⁰ nē wa axpēn to pa. Nhūm mǎānēn ty. Kamā hkra hkēt rāhā ty.

³¹ —Nhūm htō hōta. Haxwýja hpānhā tām o hprō nē wa axpēn to pa grire nhūm haxwýja kamā hkra hkēt rāhā ty. Hāmri nhūm htō hkwýjaja piitā nija pyxi nē axpēn pānhā ho hprō hpa. No ãm mēhō kamā hkra hkēt rāhā ra htyk pa.

³² Hāmri nhūm mē hprōta mē hkōt amnhī to hapu nē ty.

³³ Tā Tirtūm kot akupým nhýrmā mē ho htír ronhýx nhý nhýx kēp nija mjēn kumrēx? Ra piitā kot ho hprō kēnā. E mē inhmā ja jarē. Anē.

³⁴ Hāmri nhūm Jejus mē kām:

—Nā kaxkwa kamā mē kot amnhī nhīpēxa axtem na. Pika ja kamā na htem

pa nê ãptâr nhùm mē axpēn mǎ mē kure. Ja mex.

³⁵ No mē kot Tirtūm kôt amnhī xunhwýr xwýnhjaja na htem ty hāmri nê Tirtūm nhô krī kamā kuri axte kām hprô hprām kêt nê ri pa. Rý ni japêr nê kām mjên prām kêt nê ri pa.

³⁶ Hāmri nê Tirtūm kapêr o mē wrýk xwýnhjê pyrâ nê axte htyk kêt nê. Ām htír tūm rāhâ nê pa ho pa. Tirtūm ra akupým kot mē ho htír jakamā koja mē kēp hkra nê kuri htír tūm nê mex nê pa ho pa nê axte kām hprô rý mjên prām kêt nê ri pa.

³⁷ —Nom mē ate akupým mē htír mǎ ajamaxpêr kêt ā harēnhja kot paj mē amā harē. Amnepêm na pre Tirtūmja pī hpôk kamā Mojes mǎ kapêr nê kām:

Ixpê Apraāw nhô Tirtūm na pa. Nê mǎānēn ixpê Apraāw kra Ijak mē htāmnhwý jako wa ô Tirtūm na pa.

Anhýr o Mojes mǎ amnhī jarē nhùm kuma nê hā kagā.

³⁸ Kēp apu arī mē htyk rāhâ nhýx pre ā mē harēnh anhýr kêt nê. Nhýx pre mē harēnh o: “Amnepêm Apraāw nê hkra nê htāmnhwý mē htír ri ixpê mē ô Tirtūm na pa pre.” Anhýr o nhýx pre mē harē. Nom na pre ā amnhī jarēnh anhýr kêt nê. Mē pamā te Apraāwja mē htyk nê mē hapêx pyrāk. Nom nhùm prem ra Tirtūm ri akupým htír nê mex nê pa ho pa. Tā ka htem Tirtūm kapêr kwým ri akupým mē htír kêt ā mē harēnh o apa. Anê.

³⁹ Nhùm pre ā Jejus mē kām kapêr anê. Hāmri nhùm Tirtūm kapêr tūm o mē ahkre ho mē pa xwýnh kwýjaja kuma nê tee ri axte tanhmā kām nê hprām kaprý nê kām:

—Tý. Nā ām hāmri na ka ā ja jarēnh anê. Anê.

⁴⁰ Hāmri nhùm mē axte mēmoj tā hkukjêr kêt nê. Tanhmā kot wem amnhī to nê hamaxpêr o hakre? Na prem ām tee ri kām hamaxpêr o hakrenh prām kaprý ho kuhê. Jejus kot mēmoj piitā hkukamā āhpumunh týx o āhpumunh týx.

Jejus kēp pahi finat Tawi nhô Pahihti hā kot amnhī jarēnh

Matêwre 22.41-46; Makre 12.35-37; mǎānēn Rômān 1.3-4

⁴¹ Tā nhùm Jejus kànhmā xa nê amnhī tā tanhmā mē kot mar o kuhê xwýnhjê hkukjêr to. Nom te nhām mēhō hā mē hkukjêr pyrâ nê mē kām:

—E kwa mē inhmā mēmoj jarē. Tirtūm kot mē akaxyw ām mǎ xwýnhnta ā na pa mē akukja. Mo na htem axpēn mǎ kēp finat pahi Tawi kanrēhâ htāmnhwý pix ā harē nê mǎānēn kēp ô pahihti hā harēnh kêt nê?

⁴² Na pre Tawi Tirtūm kapêr kwý hā kagā nê tanhmā harēnh to. Tirtūm mex ā mē grer

xāja kwý kamā harē nê hā kagā nê hā kagā ho:

Na pre Tirtūm inhô Pahihti mǎ ā kapêr anê nê kām: “E amnê ixwýr tē nê inhīhkô hā nhý nê inhmā mē ho amnhīptâr o akrī.

⁴³ Kot paj mē kot kām akurê xwýnh piitā mē unēnh pa nê awýr mē o mra nê anhīhkram mē haxâr pa.” Anhýr o pre kām kapêr. Anê.

⁴⁴ Na pre ā Tawija Tirtūm kot Kris mǎ kapêr jarēnh anê. Mē kajaja na ka htem ām kēp Tawi kanrēhâ tāmnhwý pix ā ri axpēn mǎ harēnh o ri apa. No kêt Tawi na pre kēp ô Pahihti hā harēnh o pa. Anê.

Jejus kot tanhmā Tirtūm kapêr tūm o mē ahkre xwýnhjê jarēnh to

Matêwre 23.1-12; Makre 12.38-40

⁴⁵ Nhùm pre ā Jejus mē kām kapêr anê nhùm mē piitā mar o kuhê. Hāmri nhùm hpānhâ hkôt mē pa ho mē pa xwýnhjê mǎ kapêr nê mē kām:

—Kwa mē o kora. Kêr ka mē Tirtūm kapêr tūm o mē ahkre xwýnhjê kot amnhī nhīpêx o amnhī nhīpêx kêt nê. Ām mē omu nê ām mē omu nê mē kot amnhī nhīpêx kôt amnhī nhīpêx o ri apa hkêt nê.

⁴⁶ Na htem mē piitā mē kot mē hā hpijaàm kaxyw mē ê mex pix kām ri pa. Nê mē kām mē piitā mē kot amnhīm mē rūnh xwýnh ā mē harēnh o mē paja na mē kām hprām. Nê mē panhō Tirtūm kapêr o mē ahkre xā hā ixkre kamā mē kām amnhī to rūnh xwýnhjê hkrī xā mex pix ā na mē kām mē hkrī hprām. Nê mēmoj tā mē hkīnh ā arīgro hā nhùm htem mē apkur xā hā ixkre hwýr akuprô nê mē kām mē kot amnhī to rūnh xwýnhjê hkrī xā mex pix ā mē kām mē hkrī hprām. Ā na htem amnhī nhīpêx anhýr o pa.

⁴⁷ —Nê mē kēp mē mjên htyk xwýnhjê ho ajuta ho pa hā amnhī jarēnh tā ām amnhī to hêx nê axtem nê mē nokupyr pē mē kēp mē hikukrêx piitā ho hapêx par o pa. Nê mē kēp mē ôrkwý pytà. Nê mē hêx rom te tām mē kot amnhī nhīpêx pyrâ nê Tirtūm mǎ amnhī jarēnh japjê ho kuhê. Mýrapê koja mē mex kêt nê. Koja Tirtūm tanhmā ja hā mē hipêx to rax nê. Jakamā kwa kêr ka mē ā mē kot amnhī nhīpêx anhýr xwýnhjê hkôt amnhī nhīpêx o apa hkêt nê. Ām kwarī ho kwarī. Anê.

21

Kēp mjên htyk xwýnh jarēnh

Makre 12.41-44

¹ Nhùm Jejus kormā Tirtūm mǎ amnhī jarēnh xā hā ixkre kamā mē omunh o xa. Na pre hte Ijaew piitā ixkreta ho mex kaxyw kām mē hikāxpore hkwy nhôr o pa. Jakamā nhùm mē hikāxpore rūnh xwýnhjaja hwýr

agjê nê kamã kàxpore gjênh xà kamã hkwy gjê nê ma akupým mra.

² Jakamã nhùm mēhō ni pē mjên htyk xwýnh haxwýja hwýr axà. Kêp amrakati kumrêx nê hikàxpore tÿxre ãm axkrutre htã mē hpãnhã hwýr axà. Nê kãm Tirtúm kïnh xàj hamē kamã kuxà hãmri nê kato nê ma akupým tē.

³⁻⁴ Hãmri nhùm Jejus arī omunh o xa. Kot ã amnhī nhīpêx anhýr ã omunh o xa nhùm ja kãm mex nê. Hãmri nê hkôt mē pa ho pa xwýnhjê mã harê nê mē kãm:

—E mãn ka mēnre htēm mÿj pumu. Kêp amrakati nê hikàxpore ãm kêp grire htã amnhī pē òr pa. Kwýjê rom kãm Tirtúm kïnh xàj amnhī pē òr par kumrêx. Apkur xà hã hikàxpore na. Mē hkwyjaja na htem hikàxpore hkwy ho mra nê kugjê nom arī mē hikàxpore rax. No nhùm nire nēj mē kurom kãm hikàxpore japê hkêt nê. Nê ho òxy hkêt nê ãmnhix piitã Tirtúm mã òr pa. Anê.

Mē kot amnhī tomnuj xwýnhjê hukamã mē harênh

Matêwre 24.1-2; Makre 13.1-2

⁵ Tã hãmri nhùm Jejus kôt mē pa ho mē pa xwýnhjaja kormã Tirtúm mã amnhī jarênh xà hã ixkre kaxwýnh pumunh o kuhê nê axpên mã harê nê axpên mã harênh o:

—Hêxta waa nê. Ixkreja mex kumrêx. Kên rûnh o mē kot hipêx jakamã mex o mex. Nê mē kot ri Tirtúm mã hkïnh xà nhôr nēj haxwýja piitã mex. Anê.

Hãmri nhùm Jejus mē kuma nê mē kãm:

⁶ —Nã mex tã koja nhýrmã mē kãm Tirtúm kurê xwýnhjaja grãnh pa. Koja arī kên ò axkrutre nê axpên mýnh nê nôr kêt nê. Koja piitã anhrã nê ahpýnhã ri hikwý. Anê.

⁷ Nhùm pre ã mē kot hipêx anhýrja kukamã mē kãm mē harênh anê nhùm mē tee ri hukamã hamaxpêr nê kãm:

—Kwa xà koja mē ã hipêx anê? Kwa mē inhmã aprī hã mē kot ixkre grãnh parta jarê. Xà koja mē tokyx ho anê nã xà kormã? Kwa mēmo koja wýj ri tanhmã amnhī nhīpêx to? Anê.

⁸ Hãmri nhùm mē kãm:

—Nã nhýrmã mēmoj piitã hapêx kaxyw tanhmã amnhī nhīpêx to kumrêx kot paj mē amã harê ka mē inhma. Koja mē ohtô nê mē apê ixkrajê hwýr mra nê hêx rom te pa ixte amnhī nhīpêx pyrãk o amnhī nhīpêx o pa. Nê tanhmã mē amã amnhī jarênh to nê amnhī jarênh o: “E mē ixpumu. Pa na pre Tirtúm mē awýr inhmê. Ixpê kaxkwa rûm ixwrýk xwýnh na pa.” Anhýr o mē akôt mē amã amnhī to hêx o pa. Hãmri nê mē amã: “E ot pa ra mē ato amnhīptãr kaxyw mē awýr wrý.” Anhýr o amnhī jarênh o mē akôt pa. Nom kêr ka mē ãm mē ama nê ãm mē ama. ãm mē kot mē amã amnhī to hêx o

pa kênã. Kormã akupýn ixpôx xà hã arīgrota kormã.

⁹ —Nê koja mē nhýri awry hã axpên par o pa. Nê mē atãã axpên par o pa. Nom kêr ka mē harênh ma nê ri tee ri tokyx mēmoj piitã hapêx kukamã ajamaxpêr kêt nê. Mēmoj piitã hapêx xà hã arīgrota kormã.

¹⁰ Koja mēmoj piitã hapêx kaxyw nhùm ahpýnhã ri pika piitã hkôt mē pa xwýnhjaja axpên kutã amnhī xunhwý nê pijapu nê axpên pa.

¹¹ Nê koja pika piitã hkôt tanhmã ahpýnhã mē ã kute mē hamý nhùm mē amnhī xà htýx kamã hamak o pa.

Nê koja pikaja tertet tÿx nê.

Nê koja mē nhýri pika hkwy kamã prãm xàj hpikaprãr pa.

Nê koja kaxkwa kamã mēmoj tanhmã amnhī anhīpêx to nhùm pika nhô xwýnhjaja tee ri omu nê kãm ma htýx kumrêx nê httert o kuhê.

Koja mēmoj ã amnhī nhīpêx anê pa rī kormã akupýn mē awýr wrý nhùm mēmoj piitã hapêx pa. Koja mēmoj ã amnhī nhīpêx anê.

¹² —E Tirtúm mã amnhī jarênh xà hã ixkre grãnh par xwýj ri mēmoj tanhmã hukamã kot amnhī nhīpêx to hã mē ate ixkukjêr xwýnhã kot paj hpãnhã mē amã harê ka mē inhma. Koja mē kãm ixkurê xwýnhjaja mē awýr mra nê ixtã mē apýnê nê tanhmã ixtã mē anhīpêx to. Nê ma mē pikuprônã xà hã ixkreja wýr mē ato mra nê kamã mē kãm tanhmã mē ato kapêr punuj to. Nhùm mē kuma hãmri nê ma mē ato mra nê mē ajagjê. Mē ate ixkôt apa ho apa jakamã koja mē ã mē anhīpêx anê. Nê mē ò pahihiti hwýr mē ato mra nê mē kãm tanhmã mē ato kapêr punuj to.

¹³ Tã kêr ka mē kutã akrī nê axãmnhix mãmri tanhmã mē kãm ijarênh to ho akrī.

¹⁴ —Nom kwa kêr ka mē kãm tanhmã amnhī jarênh to hukamã tee ri ajamaxpêr o ri mē amã mē uma hkêt nê. Rý mē ajamaxpêr o: “Hêxta waa nê. Tanhmã koja we mē kot ixkukjêr ã arīgrota ã pa we ri mē kãm ixkapêr to?” Anhýr o tee ri amnhī kukamã ajamaxpêr kêt nê. ãm amnhī kaxyw inhmã pix mē ajamaxpêr tÿx rãhã nê.

¹⁵ Tanhmã mē kot mē anhīpêx to hã arīgrota ã kot paj tanhmã mē akrã hto ka mē inhy hã tanhmã mē kãm amnhī jarênh to. Hãmri nhùm mē amnhī tã mē ama nê axte tanhmã mē ato kapêr to hukamã tee ri hamaxpêr o kuhê.

¹⁶ —Nê koja mē anhīpêxã nê mē akatorxã nê mē atô nê mē akrãmnhwýjaja. Nê kaxyw krī hkôt mē akwýjaja ixtã mē atã amýnê nê ma mē ò pahi hwýr mē ato mra nhùm mē ajagjê nê mē akwýjê pa.

¹⁷ Koja mē piitã ixtã mē akamã gryk nê kãm mē akurê nê.

18-19 Nom më kot ã më anhiþêx anhÿr mã tâ kër ka më amnhÿ to htÿx në ixkaga hkêt në. Më kot më apar tâ ka më kaxkwa kamã akupÿm atÿr kurê kumrêx. Hãmri në ã më kot më anhiþêx anhÿr xwÿnhjê rom Tÿrtÿm më wa ixri atÿr tÿm në amex rãhã apa ho apa. Më kot tanhmã më ato htã më ate kaxkwa kamã atÿr tÿm në apa mã xwÿnh jakamã kwa kër ka më tee ri amnhÿ kukamã ajamaxpêr o ri apa hkêt në.

20 —Koja nhÿrmã nhÿhÿnh pòristi ohtò në mra në Jerujarê hwÿr pøj hãmri në më kãm hipòk pa në kuhê. Ka më ja hã më omu në më kot krÿja grãnh par mã ajamaxpêr kurê kumrêx.

21 Koja më ã amnhÿ nhÿþêx anê ka më amÿm amnhÿ wÿr më omu hãmri në ajapøj në ma apròt në amrar kurê kumrêx. Më apê jar pika pê Jutej kamã më apa xwÿnhjaja ka më omu në më kot më apar pymaj ma apròt në amrar kurê kumrêx. Hixêt prêk wÿr ajapøj në apròt në ma mra.

—Në kê Jerujarê nhò xwÿnhjaja më umaj haxwÿja hapøj në ma hpròt në ma mrar o mra.

—Në jar kapòt ã ri më pa xwÿnhjaja kê më akupÿm krÿ hwÿr gjêx kêt në. Æm ma më umaj hpròt në mrar kurê kumrêx.

22 —Më kot amnhÿ tomnuj mÿrapê koja Tÿrtÿm ã më hwÿr më kãm më hkurê xwÿnhjê rênh anê. Kapêr ã kaga htÿm ra kot më hkukamã ja jarênh kot anhÿr. Jakamã koja më nhÿrmã më hkukamã më harênh xãja kòt ã më hipêx anê.

23 —No më htujarò xwÿnhjaja në më hkra karàre xwÿnhjaja koja më kêp mëmoj omnuj tÿx në. Tanhmã kot më amnhÿ to në hpròt tÿx? Nã pika ja kamã koja më piitã mex kêt në. Më kot amnhÿ tomnuj mÿrapê koja Tÿrtÿm ã më hipêx anê.

24 Koja më nhÿhÿnh krÿ hõ rÿm më hwÿr mra në më unê në më hkamnhwÿr o më kupa. Në më hkwÿjê pynê në ma nhÿhÿm ahpÿnhã më ò pika hwÿr amnhÿ kòt më o pa nhÿm më kamã më hkòt pa ho pa. Koja më kêp Ijaew kêt xwÿnhjaja Jerujarê o amnhÿptã në ã më hipêx anê. Në kamã pa ho pa rãhã nhÿm Tÿrtÿm nhÿrmã akupÿm në më kator pa. Tã koja më në më kator parja o pa ra akupÿn më awÿr inhnojarêt. Anê.

Nhÿm pre ã Jejus më kãm më kot Jerujarê grãnh par xwÿnhjê hkukamã harênh anê.

Akupÿn Jejus wrÿk xwÿj ri mëmoj kot tanhmã amnhÿ nhÿþêx to

Matêwre 24.29-35; Makre 13.24-31; mããnên Sikÿn Pêtre 3.10; Apokarip 1.7

25 Nhÿm Jejus arÿ hkòt më pa ho pa xwÿnhjê mã kapêr në më kãm:

—Në kot paj nhÿrmã akupÿn më awÿr inhnojarêt nhÿm kaxkwa kamã kanhêti në myyti në mytwÿrÿe axtem tanhmã ri amnhÿ

nhÿþêx to. Nhÿm gò xujanãr haxwÿja hkoko htÿx jao axpên tak tÿx në. Hãmri nhÿm pika piitã hkòt më pa xwÿnhjaja kuma në omu në në kãm ma htÿx në mur në htetert në tee ri amnhÿ kukamã hamaxpêr.

26 —Në koja Tÿrtÿm tanhmã kaxkwa ho àk to nhÿm kanhêti piitã pikarêr pa. Hãmri nhÿm pika hkòt ri më pa xwÿnhjaja omu në tee ri amnhÿ kukamã hamaxpêr o amnhÿ japrãr pa në hkÿwÿ.

27-28 Koja ã mëmoj amnhÿ nhÿþêx anê ka më ja hã omu në akupÿn më awÿr inhnojarêt mã ajamaxpêr kurê kumrêx. Hãmri në më kot ixkòt amnhÿ xunhwÿr kêt xwÿnhjê rom akÿnh kãm ijapêr arÿt o akuhê.

—Nã kot paj akupÿn më awÿr wrÿ. Kakrã kamã hirã htÿx kãm akupÿn ixihtÿx kãm më awÿr wrÿ. Hãmri ka më apiitã pika piitã hkòt ano ho ixpumu. Kot paj ã ixwrÿk anê hãmri në mëmoj punuj piitã pé më apytãr pa. Jakamã ka më ã mëmoj kot amnhÿ nhÿþêx anhÿrja ã omu hãmri në tokyx ixkòt axãpirta mã ajamaxpêr në akÿnh tÿx në. Anê.

29 —E ga më pí hpãr mÿj pumu.

30 Na hte mëmo mytwÿrÿ hã rã nhÿm më omu në ò hkukamã hamaxpêr.

31 Ja pyrà në koja ã mëmoj amnhÿ nhÿþêx par anhÿr më ka më omu në akupÿn më awÿr ixwrÿkja mã ajamaxpêr kurê kumrêx.

32 Koja akupÿn ixpòx kêt ri më kot ã mëmoj kot amnhÿ nhÿþêx anhÿr pumunh xwÿnhjaja kormã piitã htyk kêt ri pa ra akupÿn wrÿ.

33 —Në koja nhÿrmã pika në kaxkwa wa hapêx pa. Tã no ãm ixkapêr koja wa uràk në aa hapêx kêt në. Koja ãm rãhã ho rãhã. Kot paj aa ihkjê ho tanhmã mënh to hkêt në.

34-35 —Në kwa më o kora. Më axkãm ajamak rom. Më kot ixkòt amnhÿ xunhwÿr kêt xwÿnhjaja na htem kãm tanhmã amnhÿ nhÿþêx to hprãm xã hkòt pix mã tanhmã amnhÿ nhÿþêx to ho ri pa. Jao ãm amnhÿ xãpkur xã në amnhÿ to mex xã në kãxpore pix kukamã hamaxpêr o pa. Në htÿx ri tanhmã amnhÿ tomnuj to ho pa. Në pipãnh kãm tanhmã amnhÿ to ho pa. Tã koja më ã amnhÿ nhÿþêx anhÿr o pa rãhã pa ra më haêr pé akupÿn wrÿ nhÿm më tee ri ixpumu në kãm ma htÿx kumrêx. Te tutre htÿx ri harøj kajyr o pa në rapuuti hwÿr àr nhÿm kot haê në unênh nhÿm tee kãm kator prãm pyràk. Koja më ã amnhÿ nhÿþêx anê. Nom kër ka më ho më uràk kêt në. Æm pa inhmã hprãm xã hkòt pix mã tanhmã inhmã amnhÿ nhÿþêx to rãhã ho ri apa.

36 —Tã kêr ka më ã më kot amnhÿ tomnuj o pa anhÿrja kòt amnhÿ nhÿþêx o apa pymaj amnhÿ to Tÿrtÿm wÿr rãhã ho apa. Kê tanhmã më ato hihÿtÿx to ka më ÿ hã ho më uràk kêt në. Kêr pa nhÿrmã akupÿn wrÿ ka më ixpumu në më kurom amnhÿ kamã akahak kêt në akÿnh tÿx në man ixwÿr mra. Anê.

Nhũm pre ã Jejus hkõt mẽ pa ho mẽ pa xwýnhjê jahkre anê.

³⁷ Hãmri nê apkati mẽ Tirtũm mã amnhĩ jarênh xà hã ixkre kamã mẽ pikuprõnh xwýnhjê jahkre ho hkrĩ. Nhũm kamãt nhũm hkõt mẽ pa ho mẽ pa xwýnhjê mẽ mẽ krĩ rũm hapõj nê ma hixét prêk pẽ Oriwêhti hwýr mra nê kamã amnhĩm hikra nê hikwý.

³⁸ Nhũm kwýhtã nhũm mẽ kãnhmã hkrĩ nê ma akupým krĩm mra nê ixkreja wýr agjê. Hãmri nhũm mẽ piitã hã akuprõ nê kot mẽ ahkre hã mar o hkrĩ.

22

Mẽ kot Jejus ã ãmnênh ã mẽ harênh

Matêwre 26.14-16; Makre 14.1-2; Juãw 11.47-57

¹ Tã nhũm Ijaew kĩnhã arĩgro pẽ Pasja àhtêp o mō. Pas ã na htem amnepêmm Tirtũm kot pika pẽ Ejit pẽ mẽ hpãmjê kator mã hamaxpêr kaxyw axpên wýr akuprõ nê hã hkĩnh. Na htem arĩgroja jarênh o: "Pas" anhýr ã harê. Nê mãânên harênh o: "Mẽ pahte pãw kaxkrit kêt kur ã arĩgro." Anhýr o harê.

² Jakamã nhũm mẽ õ patre krãhtũmjê mẽ Tirtũm kapêr tũm o mẽ ahkre xwýnhjaja ra kãm Jejus pĩr prãm nê. No mẽ kãm hkõt mẽ kot kapêr mar xwýnhjê pyma nê. Nê tee ri kot tanhmã ho hkukamã hamaxpêr nê axpên mã:

—Hêxta waa nê. Kwa tanhmã kot puj wem ho nê mẽ kêp kupi? Kot puj mẽ noo mã tanhmã ho nhũm mẽ hã mẽ pakamã gryk tÿx kumrêx. Anê.

Jut Kariot kot Jejus ã ãmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴ Tã nhũm Jut Kariotja. Jejus nhý hã mẽ ahkre ho pa xwýnh pẽ 12 hõ na pre. Tã axtem nê tanhmã hamaxpêr to nê Satanastĩ nhý hã ma mẽ õ patre krãhtũm mẽ Tirtũm mã amnhĩ jarênh xà hã ixkre jamãr xwýnh krãhtũmjê hwýr tẽ. Hãmri nê tanhmã Jejus o mẽ mar to nê mẽ kãm:

—E ot pa mẽ amã Jejus jarênh o tẽ. Xà kot paj mẽ amã hã amýnê ka mẽ hpãnhã inhmã amnhĩre nã? Anê.

⁵ Hãmri nhũm mẽ kuma nê hkĩnh nê. Hãmri nê kãm:

—Nà kot paj mẽ amã amnhĩre.

⁶ Hãmri nhũm mẽ kot kãm amnhĩrer ã harênh ma nê hkĩnh nê mẽ kãm:

—Tõe. Nà kot paj mẽ amã ho anê. Anê.

Hãmri nê ma tẽ nê kato. Nê Jejus pynênh kaxyw htãnopxar o ri hkõt pa. Mẽ kot mar o pa xwýnhjê hkãx ã nhýri unênh nê ma mẽ hwýr o htêm kaxyw.

Jejus kot ý hã mẽ ahkre xwýnhjê kutã apkur ã harênh

Matêwre 26.17-25; Makre 14.12-21; Juãw 13.21-30

⁷ Tã nhũm Pasja kato. Amnepêmm Ijaewjê nhĩgêjtaja na prem õwêhti hkrare hkwy hpar o pa. Tirtũm kot ja hã mẽ omunh nê Ejit kãm mẽ kãm mẽ hkurê xwýnhjê nhĩhra nê mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwýjaja arĩgro pẽ Pas ã axpên wýr akuprõ nê mẽ kãm hamaxpêr pẽ mẽ urãk nê õwêhti hkrare hkwy hpa. Hãmri nê pãwti kaxkrit kêt kãm kuku.

⁸ Jakamã nhũm Jejus ý hã mẽ ahkre ho mẽ pa xwýnhjê wa ho axkrut nê mẽ amnhĩ kukamã wa kumê. Simãw Pêtre mẽ Juãwja nhũm wa mẽ amnhĩ kukamã wa kumê nê wa kãm:

—E wa ma mẽ ixkukamã tẽ nê mẽ ixkutêp Pas ã mẽ panhõ hã apê. Anê.

⁹ Hãmri nhũm wa kuma hãmri nê kãm:

—Tõe. Nhýri kot paj we wa tẽ nê mẽ akutêp hã apê? Anê.

¹⁰ Hãmri nhũm wa kãm:

—Nà wa mãmri ma Jerujarê hwýr wa tẽ. Nê hwýr axã nê mẽhõ mytita pumunh kurê kumrêx. Nhũm amnhĩm gõ ru nê amnhĩ kre hã poti xãm nê o tẽ. Ka wa omu nê hã ajêt nê ma hkõt òrkwy hwýr tẽ.

¹¹ Hãmri nê ixkre nhõ dõn pumu nê kãm: "E jar na pa wa awýr tẽ. Jejus na wa inhmẽ pa wa awýr tẽ. Na awýr pêr mẽnh o: 'Nhýri kot paj ixkõt ri mẽ pa ho mẽ pa xwýnhjê mẽ axpên kutã Pas ã apku?' Anê. Na ã awýr hpêr mẽnh anê." Anê.

¹² —E ã kãm akapêr anê kê war ama nê ra war amã òrkwy nhĩmök ã ixkre rax õ jahkre. Kamã ra kaxyw mẽ paxàpkur xà hã mẽmoj piitãã. Ka wa omu hãmri nê mãmri mẽ ixkutêp kamã mẽmoj tã apê. Anê.

¹³ Hãmri nhũm wa kuma nê ma krĩm tẽ. Ma tẽ nê hwýr axã hãmri nê ra kot wa kãm mẽmoj jarênh xà hkõt mẽmoj piitã omu hãmri nê mẽ kutêp mẽõ hã ãpênh o wa xa.

¹⁴ Tã nhũm myt axã nhũm mẽ wa hkõt mõ nê ixkreta wýr àpir pa. Hãmri nê apkur kaxyw hkrĩ hpa nhũm Jejus mẽ ãhkõ hã nhý.

¹⁵ Hãmri nê mẽ kãm tanhmã amnhĩ jarênh to nê mẽ kãm:

—E na pa inhmã Pas ã mẽ anhĩhkõ hã ixàpkur prãm nê. Kormã ixte amnhĩ xà htÿx kãm ijamak xwýj ri.

¹⁶ Kwa mẽ inhma. Kot paj axte mẽ akutã Pas ã ixàpkur kêt ry rax nê. Nom koja nhýrmã Tirtũm akupýn ixte mẽ ato amnhĩptãr kaxyw inhmẽ hãmri pu mẽ rĩ kormã axte arĩgro mex maatija ã pahkĩnh kãm axpên kutã paxàpkur rax nê. Anê.

¹⁷ Nhũm ã mẽ kãm amnhĩ jarênh anê nê hpãnhã wĩhti py nê o xa nê Tirtũm mã harê nê kãm:

—Pa Papaj. Nà ãm hãmri na ka hte mē inhñē mē kãm mē ixkurē xwýnhjē pumunh mex nē mē ìhkra pē mē ìjapòj. Amex o amex. Anē.

Hãmri nē hpãnhã hkòt mē pa ho mē pa xwýnhjē hō mā kugò nē kãm:

—E mī. Apy nē mē axpēn pãnhã hkwy ho ixkò.

¹⁸ ãm hãmri na pa mē amã amnhĩ jarē. Kot paj axte wĩhti ho ixkòm kêt rãhã nhũm nhỹrmã Ìnhõ Papaj akupýn mē awýr inhñē. Hãmri pu mē rĩ kormã akupýn ixpòx xã hã arĩgrota ã pahkĩnh rax nē. No ãm ra axtem tanhmã hã mē pahkĩnh to. Anē.

¹⁹ Hãmri nē hpãnhã pãwti py nē mã ho anē nē Tĩrtũm mã harē. Hãmri nē ho hkry hpa nē mē piitã mē kãm òr pa nē mē kãm:

—E na pa ã pãwti ho hkry nē mē amã òr anē. Koja mē ã inhĩpèx anē nē te mē kot ixto hkry hpar pyrãk o inhĩpèx pa amnhĩ xã htýx kamã ìjamak kãm ty. Nom mē anē kot paj ty. Jakamã kër ka mē ixwakre kamã tōhã axpēn wýr akuprò nē ixte mē ate amnhĩ tomnuj pãnhã amnhĩrer kaxyw mē anē ixtykja mã ajamaxpēr pē akĩnh nē pãwti hkur o akrĩ. E mē mãmrĩ axãmnhĩx aku. Anē.

Nhũm pre ã mē kãm amnhĩ jarēnh anē nhũm mē mar pē pãwtita hkur o hkrĩ.

²⁰ Hãmri nē ra hkur pa. Hãmri nhũm Jejus axte kopta py nē mē kãm:

—Mē kot ixpĩr xã hã arĩgro hã koja ixkamrò axkapĩ. Nom koja mē amarĩ ixpĩr nhũm ixkamrò amarĩ hpikapĩr kêt nē. ãm paa. Pa kot paj mē anē mē ìhkram amnhĩ jaxã nhũm mē ã inhĩpèx anē. Koja ixkamrò axkapĩ nhũm Tĩrtũm omu nē ixkukwak ri mē anē mē ate amnhĩ tomnuj piitã te amnhĩ katut kòt rēnh par pyrãk o hipèx nē mē ato hkra. Amnepēm kot ja hã amnhĩ jarēnh xã hkòt. Jakamã e mē ixkamrò pikapĩrta mã ajamaxpēr pē wĩhti hkwy ho ixkò. Anē.

Jejus ã mē kãm ãmnēnh xwýnh jarēnh

Matêwre 26.21-25; Makre 14.18-21; Juãw 13.18-19

²¹ Nhũm Jejus arĩ mē kãm kapēr nē mē kãm:

—Nē kot mē kãm ixtã ãmnēnh mã xwýnhhta na jar mē pahkaèx ã mē pakutã apkur o nhỹ.

²² Tĩrtũm kãm hprãm xã hkòt koja mē tanhmã ixto rax nē ixpĩ. Nom kot mē kãm ixtã ãmnēnh mã xwýnhhta hēxta waa nē. ã kot inhĩpèx anhỹrja mýrapê koja amnhĩ xã htýx kãm hamak rax kumrèx. Anē.

²³ Nhũm pre ã Jejus mē kãm amnhĩ jarēnh anē. Nhũm mē kuma nē tee ri axpēn pumunh o hkrĩ. Hãmri nē ri axpēn kukja nē axpēn mã:

—Kwa nã mē pahõtò kot pu we ã ri hipèx anē? Nã pa hkêt.

Anhỹr o tee ri axpēn kukjēr o hkrĩ.

Mē pamã amnhĩ to rũnh prãm kêt ã mē pamã karò

Matêwre 20.20-28; Makre 10.35-45; mãanēn Ròmãn 12.3-5, 12.10, 12.16; Epes 4.2-4; Piripos 2.3-8; Xiakre 4.1-10; Wam Pêtre 5.3

²⁴ Tã nhũm Jejus nhỹ hã mē ahke ho mē pa xwýnhhaja axpēn mã tanhmã kapēr to ho hkrĩ nē axpēn mã:

—Kwa mē pahõtò kot puj wem nhỹrmã pahpè pahi nē mē ho amnhĩptār rax o ri papa? Anē.

Hãmri nē mē axpēn mã: “Nã pa.” Anē nē nhãnh axpēn mã: “Nã kêt paa.” Anē. Hãmri nhũm mē nētãnh axpēn mã: “Nã kêt pa kēnã.”

²⁵ Anhỹr o axpēn mã kapēr o hkrĩ. Hãmri nhũm Jejus tee ri axpēn tã mē kuma nhũm mē ã hamaxpēr anhỹrja kèp omnuj nē nhũm mē kãm tanhmã hã kapēr to nē mē kãm:

—E mē inhma. Na hte Ijaew kêt xwýnhjē nhõ pahujaja ã amnhĩ nhĩpèx anhỹr o ri pa nē amarĩ hkrĩ xã kamã hkrĩ ho hkrĩ. ãhpumunh týx jakamã na htem amarĩ ixkre hkre jakry kamã kãm mē ãpènh xwýnhjē mã mēmo mē ãpènh ã karò ho hkrĩ. Na htem ã amnhĩ nhĩpèx anhỹr o pa. Nē mē kot amnhĩm mex ã harēnh kaxyw tanhmã mē ho mex to ho pa.

²⁶⁻²⁷ Tã kër ka mē ho mē urãk kêt nē. Kêt ãm te amarĩ ri mē apa xwýnh pyrãk o axpēn nhĩpèx. Ixpyrã nē amarĩ mēmoj to mē kutã anojarèt rãhã ho ri apa. No mē ate mē ho amnhĩptār rax kukamã ajamaxpēr kêt nē.

²⁸ Na prem axpēn mã ixto hēx nē tanhmã ixto kapēr punuj to htã ka mē ama nē ãm mē ama nē arĩ ixkòt ri apa rãhã nē. ãm hãmri na ka htem arĩ ixkòt ri apa anē.

²⁹⁻³⁰ Kot paj amnhĩ tã mē ato mex rax nē. Na pre ra Tĩrtũm nhỹrmã ixte mē ato amnhĩptār o ixkrĩ kaxyw ixãm. Tã ot pa amnhĩ pyrã nē mē pahkwý Ijaew kaxyw mē axunhwý ka mē nhỹrmã mē piitã mē ho amnhĩptār o apa. Nē mē apé ixkrãmnhwý hã nhỹrmã ixkutã axãpkur o apa. Anē.

Jejus kot Simãw Pêtre mã kapēr ã harēnh

Matêwre 26.31-35; Makre 14.27-31; Juãw 13.36-38

³¹ Tã nhũm Jejus Simãw Pêtre mã kapēr nē kãm:

—Kwa Simãw. Na Satanasti kãm hprĩ hã ixtã mē apiitã mē kamã hamak prãm nē. Tanhmã kot mē akrã hto nhũm mē ate mē kãm ixkurē xwýnhjē pumaj ixkaga hã kãm mē akamã hamak prãm týx nē. Jakamã ã kot mē anhĩpèx anhỹr kaxyw na pre ra amnhĩ to Ìnhõ Papaj ma nhũm kãm: “Tõe. Kam nē mãmrĩ tanhmã mē kamã ajamak to.” Anē.

³² —Tã ate mē umaj ixkaga nē axte ate amnhĩ kaxyw inhñã ajamaxpēr kêt pymaj na pa ra ato Ìnhõ Papaj wýr kãm ixihtýx nē Simãw Pêtre. Jakamã kër ka mēmo arĩgro hã

tee ri ixkaga hã amnhĩ pumu hãmri nê tokyx tãm akupÿm ixkõt amnhĩ xãm tÿx nê. Kêr kê nhÿrmã akwÿjê hõ tanhmã amnhĩ tomnuj to nê tee ri amnhĩ kukamã hamaxpêr ka ja hã omu hãmri nê kãm ate tanhmã amnhĩ tomnuj tota jarê. Kê mê ã ate amnhĩ nhĩpêx anhÿr ã ajarênh ma nê apyrà nê tokyx akupÿm tãm ixkõt amnhĩ xãm tÿx kurê kumrêx. E kêr ka ã akupÿm ixkõt mê piitã mê hipêx anhÿr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê.
³³ Hãmri nhũm tee ri amnhĩ tã kuma nê kãm:

—Kwa nã Pahihti. Kot paj ri akwÿm tanhmã amnhĩ tomnuj to hkêt nê. Koja mê te ajaxà nê apĩ htã kot paj arĩ akõt ri ixpa ho ixpa nhũm mê pahto amÿrà nê tanhmã pahto. Anê.

³⁴ Hãmri nhũm kuma nê kãm:

—Nã koja apkati hkõt krãhyre hkàr kêt ri ka ra mê umaj ate ixkõt apa hkêt ã mê kãm amnhĩ tã axãprãr o axkrunêpxi kãm ga. Anê.

Jejus kot hkwÿjê mã mêmõj tã karõ

Matêwre 10.5-15; Rukre 9.1-3

³⁵ Hãmri nhũm Jejus arĩ hkõt mê pa ho pa xwÿnhjê mã kapêr nê mê kãm:

—E wam ixte mê hwÿr mê arênhnta ã na ka prem amnhĩ kõt aparkã hkwy ho apa hkêt nê. Nê kawa jamãnh nê ho apa hkêt nê. Nê mrykã jamãnh nê amnhĩ kõt ho apa hkêt nê. ãm mê anhÿ kamã mê hwÿr apa hã na pa pre mê amã karõ. Tã xãn ka prem ã mê hwÿr apa anê nhũm mê amnhĩ wÿr awÿr kêt nê? Nã xã na prem amnhĩ wÿr mê awÿ? Anê.

Hãmri nhũm mê kãm:

—Tÿ na prem amnhĩ wÿr mê ixwÿ. Mê ixte amnhĩ kõt mêmõj to ixpa hkêt tã na pa prem amarĩ mê kutã ixãpkur mex o ri mê hkõt ixpa. Anê.

³⁶⁻³⁷ Hãmri nhũm mê kãm:

—Tõe. Nã mê kot mê ato mex tã nom koja mê hpãnhã axtem hõ ho mê anhĩpêx. Jakamã kêr ka mê akupÿm mê kãm ijarênh o apa kaxyw anojarêt hãmri nê anhõ mrykã rÿ akawã htu nê ma amnhĩ kõt ho apa. Nê awapo. Kot kaj mê awapo hkêt japêr hãmri nê apipro xã ho wênê nê amnhĩm hõ japrõ nê ma amnhĩ kõt ho apa. E kêr ka mê ã amnhĩ nhĩpêx anê.

—Nê Tirtũm kapêr ã kagã htũm kot ra ixkukamã tanhmã ijarênh to nê kot ijarênh kot:

Koja mê hipêx o te mê kot amnhĩ tomnuj tÿx xwÿnh nhĩpêx pyrãk. Anê.

ã mê kot inhĩpêx anhÿr kukamã ijarênh kot anhÿr. Tã na mê ra ã inhĩpêx anhÿr kaxyw. Anê.

³⁸ Nhũm pre ã Jejus mê kãm kapêr anê nhũm mê kuma nê kãm:

—Ota mê panhõ wapohti hamêxkrut Pahihti. Anê.

Hãmri nhũm mê kãm:

—Tõe. Nã hãmri. Mê amnhĩm axi nê ho amnhĩm mêmõj to anê. Anê.

Jejus kot Tirtũm mã amnhĩ jarênh

Matêwre 26.36-46; Makre 14.32-42

³⁹ Tã nhũm Jejus kê axte krĩja rũm kato nê hixêt pê Oriwêhti hwÿr tẽ nê api nhũm hkõt mê pa ho mê pa xwÿnhjaja ma hkõt mra.

⁴⁰ Hãmri nê nhÿri hixêt kahti ri hkrĩ nhũm Jejus mê kãm:

—E kwa kêr ka mê ixkutêp amnhĩ to Inhõ Papaj wÿr o akrĩ. Kê mê ixkõt tanhmã mê ato htã ka mê amã mê uma xãj ixkaga hkêt nê. Arĩ mê kutã amnhĩ to htÿx nê akuhê. Anê.

⁴¹ Hãmri nê mê kurũm htêm grire nê Tirtũm mã amnhĩ jarênh kaxyw hkõn krã ho tẽm nê nhÿ.

⁴² Hãmri nê kãm:

—Kwa Papaj. Nã na pa ra amnhĩ xã htÿx kukamã ijamaxpêr nê amnhĩ kamã ixkahak tÿx kumrêx. Inhmã amnhĩ xã kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nê mãmri inhnê ho ajapêx nhũm mê kãm ixkurê xwÿnhjaja tanhmã ixto hkêt nê. Rÿ ko. Kot kaj amã mê kot tanhmã ixto hprãm hã kê mê mãmri tanhmã inhĩpêx to. Nom pam inhmã hprãm xã hkõt kêt. Anê.

Nhũm pre ã Jejus amnhĩ to Hipêêxã Tirtũm wÿr anê.

⁴³ Hãmri nhũm kuma nê hwÿr kapêr o wÿrÿk xwÿnhja mê nhũm hwÿr wrÿ nê kuri xa. Hãmri nê õxãhkre kaxwÿnh kãm tanhmã ho hihtÿx to.

⁴⁴ Nhũm kê axte amnhĩ to Hipêêxã hwÿr kãm hihtÿx nê. Tee ri amnhĩ kukamã hamaxpêr pê amnhĩ kamã kahak tÿx kumrêx. Jao hã gõ rax nê te hkamrõ xãhãr pyrãk o pikap ahã.

⁴⁵ Hãmri nê kãnhmã xa nê akupÿm hkõt mê pa ho mê pa xwÿnhjê hwÿr tẽ nê mê omu nhũm mê ra õt pa nê hikwÿ. Mê kot tee ri Jejus kot mê kãm amnhĩ jarênhja kukamã hamaxpêr o hkaprĩ nê õt pa nê hikwÿ.

⁴⁶ Hãmri nhũm Jejus tẽ nê tee ri mê omu nê mê kumra nê mê kãm:

—Kwa nã. Mê ri ã amnhĩ nhĩpêx anhÿr kêt nê. Kwa mê kãnhmã akrĩ nê amnhĩ to Inhõ Papaj wÿr kê mê ato mê axihtÿx. Hãmri nhũm mê tanhmã ixkõt mê ato ka mê inhÿ hã mê kutã amnhĩ to htÿx nê akuhê. Anê.

Mê kot Jejus pynênh ã mê harênh

Matêwre 26.47-56; Makre 14.43-50; Juãw 18.1-11

⁴⁷ Nhũm pre ã Jejus mê kãm kapêr anhÿr rõm nhũm hkõt pa ho pa xwÿnh pê Jut Kariotja amnhĩ kõt mê kot Jejus pynênh xwÿnhjê

ho tē. Mē ho htēm rax nē. Hāmri nē kot Jejus kahti hkôt mýnh kaxyw hwýr tē

⁴⁸ nhùm amnhĩ tā omu nē kām:

–Kwa Jut. Xà mē kahti hkôt mē hamýnh nē mē hpār o na htem mē kām mē hā amýnē? Anē.

⁴⁹ Hāmri nhùm hkôt mē pa ho mē pa xwýnhjē hōja tee ri mē kot amnhĩ nhĩpēx ā mē omu hāmri mē ō wapota mā hamaxpēr kurē kumrēx nē Jejus mā:

–Kwa Pahihti. Xà kot paj mē panhō wapohiti py nē ho mē panē mē hkwy hpa? Anē.

⁵⁰ Hāmri nhùm hōta kuma nē mē kaxyw ja kapa. Nhùm mē ō patre maati mā āpēnh xwýnhja mē hkôt tē nhùm omu nē kām wapo ho apē. Nē kot ho hkrā nhĩpōnh mā tā kuhpaw nē ho upōk rüm hamak nhĩkjē pix krāhta.

⁵¹ Hāmri nhùm Jejus omu nē nē kām kapēr nē kām:

–Kwa nà ri ā amnhĩ nhĩpēx anhýr kēt nē. Amarĩ xa. Anē.

Hāmri nē hamakja py nē akupým kām hamak ā kuxi nē ho mex.

⁵²⁻⁵³ Hāmri nē mē kot unēnh mā xwýnhjē mā tanhmā kapēr to. Mē ō patre krāhtümjē mē Tirtüm mā amnhĩ jarēnh xà hā ixkre jamār xwýnhjē krāhtüm mē Ijaew nhō pahijē mē nhùm mē ho pimràatā mē kām kapēr nē mē kām:

–Kwa na pa pre apkati mē Tirtüm nhōrkwý kamā mē kām ixkapēr o ixpa ka prem tokyw ixpynēnh kēt tā jarāhā te ixte amnhĩ tomnuj xwýnh pyrāk o inhĩpēx nē ixwýr wapo nē kō hā akapēn nē ixwýr ā atēm rax anē. No ām ra mē ate tanhmā ixto kaxyw arĩgro kator kēnā. Jakamā kot kaj mē māmri tanhmā amā ixto hprām xà hkôt māmri tanhmā ixto. Satanasti nhý hā ā mē ate inhĩpēx anhýr mā kēnā. Anē.

Simāw Pētre kot Jejus kōt pa hkēt ā kot amnhĩ jarēnh

Matēwre 26.69-75; Makre 14.66-72; Juāw 18.15-18, 18.25-27

⁵⁴ Tā nhùm mē Jejus pynē nē ma o tē. Ma mē ō patre maati nhōrkwý hwýr o tē. Nhùm Simāw Pētre ma hapu hā mē hkôt hā mē omunh o tē.

⁵⁵ Nhùm mē patre maati nhōrkwý hwýr Jejus o axā nē hkôt gjēx pa hāmri nhùm Simāw Pētre kītare hwýr axā nē mē kuri xa. Nhùm mē kītare kamā amnhĩm kuto nē hā ànhunh o hkrĩ nhùm

⁵⁶ mē ĩhkō hā ànhunh o nhý. Hāmri nhùm mē kām āpēnh xwýnh niti hirā kamā hprĩ hā omunh kurē kumrēx nē mē kām:

–Xē pēr myti ja kēp Jejus kōt mē pa ho mē pa xwýnhjē hō na. Anē.

⁵⁷ Hāmri nhùm tee ri amnhĩ tā kuma nē kām mē uma nē mē kām amnhĩ tā aprā nē kām:

–Tk. Koký. Ixte mēhō my ata pumunhre hā. Anē.

⁵⁸ Tā nhùm hpānhā mēhō myja kām:

–Kwa nā. Ām hāmri na ajarē. Apē Jejus kōt ri mē pa xwýnhjē hō na ka.

Anē nhùm kuma nē kē axte kām:

–Kwa mē ri ā amnhĩ krā hkôt ri ixto axēx anhýr kēt nē. Ām ixte aa mēhōta pumunh kēt kumrēx. Anē.

⁵⁹ Tā nhùm ja haxwýja axte omu nē kām:

–Kwa ām hāmri na mē ajarē. Apē Jejus kwý hō na ka. Urāk nē te apē Garirej nhō xwýnh pyrāk kēnā. Anē.

⁶⁰ Hāmri nhùm tee ri kuma nē mē kām amnhĩ tā aprār kām hihtýx nē mē kām:

–Tk. Ixpē Garirej nhō xwýnh kēt. Ām ixte mēhō mýj pumunh kēt kumrēx tā ka mē ām xatā hkôt ixpa ho ixpa xwýnh ā ixkamnhix o akuhē.

Anhýrja o ra mē kām amnhĩ tā aprār o axkrunēpxi mē nhùm krāhyre kà.

⁶¹ Hāmri nhùm Jejus arĩ ixkre kamā ām tā Simāw Pētre ho hakēx nē omu. Hāmri nhùm amnhĩ tā no pumu nē kot hkukamā kām ā amnhĩ nhĩpēx anhýr jarēnhja mā hamaxpēr kurē kumrēx. Krāhyre hkār kēt ri kot mē kām amnhĩ tā aprār o axkrunēpxi hā harēnhja mā hamaxpēr nē kànhmā hakry hpar o tē nē hkaprĩ htýx nē.

⁶² Hāmri nē hkaprĩ xāj kītare pē kato nē tē nē awry hā xa nē mýr rax kumrēx.

Mē kot Jejus tak ā mē harēnh

Matēwre 26.67-68; Makre 14.66

⁶³ Hāmri nhùm mē kot Jejus pumunh o kuhē xwýnhjaja hā hpēr o axkē nē htak o kuhē.

⁶⁴ Nē no hpro nē htak nē kām:

–E atak xwýnh nhĩxi jarē. Apē Tirtüm Kra hā ate amnhĩ jarēnh jakamā mán urāk nē axāhpumunh týx. Jakamā e hixi jarē. Anē.

⁶⁵ Hāmri nē xatā haprý nē kām kapēr punuj nē.

Mē kot mē hkrāhtüm wýr Jejus o htēm ā mē harēnh

Matēwre 26.57-68; Makre 14.53-65; Juāw 18.19-24

⁶⁶ Tā nhùm myt kator o mōr mē nhùm Ijaew nhō pahijē mē patre krāhtümjē mē Tirtüm kapēr tùm o mē ahkre xwýnhjaja axpēn wýr pikuprōnh pa. Hāmri nhùm mē ma mē hwýr Jejus o tē.

⁶⁷⁻⁶⁸ Nhùm mē omu nē tanhmā kot amnhĩ jarēnh to hā hkukja nē kām:

–Kwa mē inhmā amnhĩ jarē. Xà ka na apē Tirtüm kot mē ixkaxyw axām xwýnhnta? Xà ka kot kaj Rōm nhō xwýnhjē pē mē ixpytā nē mē ixto amnhĩptār o apa? Anē.

Hāmri nhùm mē kām:

—Nà kot paj tanhmã më amã amnhî jarênh to ka më ixkõt ajamaxpêr kêt nê. Ixte âm hãmri më amã amnhî jarênh tâ ka më inhma nê âm inhma. Nê kot pa amnhî xwar mëmoj tâ më akukja ka më amnhî xwar inhmã tanhmã harênh to hkêt nê. Âm më axêx rom më ate â ixkukjêr anhÿr kênã.

⁶⁹ Tã nom kot paj tokyx ma akupÿm Inhîpêxã Tirtùm wÿr api. Hihtÿx o hihtÿx rãhã nê pa ho pa xwÿnh na. Jakamã kot paj hwÿr api nhùm amnhî nhîkõ hã inhÿr pa upók rùm më apiitã më ato amnhîptãr o ixkrî. Hãmri nê nhÿrmã paa tanhmã më ajarênh to. Anê.

⁷⁰ Hãmri nhùm më tee ri kot ã amnhî jarênh anhÿrja ma nê kãm:

—Tk. Kwa akatãt kôt më inhmã amnhî jarê nã. Xà apê Tirtùm Kra na ka? Anê.

Hãmri nhùm më kãm:

—Tÿ ixpê Kra na pa. Anê.

⁷¹ Hãmri nhùm më tee ri ã amnhî jarênh anhÿrja ã kuma nê axpên mã:

—Kwa mo kaxyw kot puj më axte më hkwyjê japêr nhùm më tanhmã kot amnhî tomnuj to hã harê? Tãm kêp Tirtùm Kra hã amnhî to hêx nhùm më pahte pahpiitã mar kênã. E kwa tokyx pu më ma Rôm nhõ pahÿhti hwÿr o tê kê më pamã hã amÿnê nê më pamã kupi. Anê.

3

Mê kot pahi Pirat wÿr Jejus o htêm ã më harênh

Matêwre 27.1-2, 27.11-26; Makre 15.1-5; Juãw 18.28-38

¹ Tã nhùm më Jejus o kato nê nhãm Pahihti Pirat wÿr o tê.

² Hãmri nê kutã âm nê tanhmã kãm ho hêx to nê kãm:

—E ot pa më awÿr jahti ho tê. Na hte më inhmã hêx rûnh o pa. Më ixte Pahihti Sesti kapêr kwÿm ri amnhî nhîpêx prãm xaj tanhmã më inhmã mëmoj tâ karõ hto ho pa. Nê axtem nê më ixte Sesti mã kãxpore hkwy nhõr kêt ã më inhmã karõ. Nê Tirtùm kot më pakaxyw kêp më panhõ pahi hã âm xwÿnh ã amnhî jarê. Æ na hte më inhmã amnhî to hêx anhÿr o pa. Anê.

³ Hãmri nhùm Pirat më kuma nê Jejus pumu nê kãm:

—E kwa inhmã amnhî jarê. Xà apê Ijaew nhõ pahi na ka? Xà ka na htem amnhî wÿr akãm hamak o pa? Anê.

Hãmri nhùm kãm:

—Nã âm hãmri na ka ã jarênh anê. Anê.

⁴ Hãmri nhùm Pirat tanhmã hkukjêr to nê tee ri kot amnhî jarênh ã kuma hãmri nê patre krãhtÿmjê mã kãm:

—Kwa mëmo mÿrapê kot pa tanhmã më amã hã ixãmnênh to? Kot tanhmã amnhî tomnuj tore hã. Nã kot pa kãm inhÿre. Anê.

⁵ Hãmri nhùm më tee ri kuma nê kot më kãm hã âmnnênh prãm xaj hã kãm kapêr kãm hihtÿx nê. Nê kãm:

—Kwa nã. Na pre hte pika pê Jutej kamã tanhmã më kãm hêx to ho pa. Hãmri nhùm më ra hã axpên kutã amnhî xunhwÿ nê hã pijapu rûnh o pa. Tã mãânênh Garirej kamã ã amnhî nhîpêx anhÿr o hkrax nê hpãnhã amnê më pahwÿr ã amnhî nhîpêx anhÿr kaxyw môr anê. Anê.

Mê kot Eroxx wÿr Jejus o htêm ã më harênh Rukre 9.7-9

⁶ Hãmri nhùm Pahi Pirat më kuma nê më kãm:

—Kwa xã kêp Garirej nhõ xwÿnh na? Anê. Hãmri nhùm më kãm:

—Tÿ. Kêp Garirej nhõ xwÿnh kênã.

⁷ Anê nhùm më kãm:

—Tõ më ma pahÿhti Eroxx ãxipas wÿr mân o tê. Kêp Garirej nhõ xwÿnhjê nhõ pahi na. Tã ra jar Jerujarê kamã ham pøj. No axtem ixpê Jutej kamã më pa xwÿnhjê nhõ pahi jakamã kwa më ma õ pahita wÿr mân o tê kê tãm tanhmã më amã ho. Anê.

⁸ Hãmri nhùm më kuma nê ma pahi Eroxx ãxipas wÿr o tê. Na pre ra Eroxx ãxipasja xatã Jejus jarênh ma nê kãm omunh prãm nê. Kãm aa kot mëmoj pumunh kêt õ ho anhÿr ã omunh prãm tÿx jakamã nhùm më ma hwÿr o tê nhùm omu nê hkÿnh nê.

⁹ Hãmri nê tee ri mëmoj tâ hkukja no nhùm akryk xa nê tanhmã kãm nê hkêt nê.

¹⁰ Hãmri nhùm më õ patre krãhtÿmjê më Tirtùm kapêr tùm o tê. Na pre ra Eroxx xwÿnhjaja kãm ho kapêr punuj nê ho hêx kãm hihtÿx nê.

¹¹ Hãmri nhùm pahi Eroxx ãxipas më kuma hãmri nê õ pôristi më wa kãm kapêr punuj nê hã hpêr o axkê nê tanhmã ri hapÿ to. Hãmri nê hã hpêr o pikênh kãm kêp pahi hã më é mexja py nê kãm haxã nê akupÿm pahi Pirat wÿr kumê.

¹² Na pre Pahi Pirat më Pahi Eroxx ãxipasja wa kãm axpên kÿnh kêt nê. Tã hãmri nhùm Eroxx ãxipasja tee ri Jejus kot kãm tanhmã amnhî jarênh to hã mar prãm xaj tee ri hkukamã hamaxpêr hãmri nê Pirat ã hpi-jaãm kaxyw akupÿm hwÿr kumê. Hãmri nhùm amnhî tã omu hãmri nê wa ra akupÿm kãm axpên kÿnh nê. Nê akupÿm axpên mã hpêr o axkê nê pikunhar o pa pê akupÿm axpên to hkrãmnhwÿ.

Pirat kot Jejus pÿr ã âmnnênh

Matêwre 27.15-26; Makre 15.6-15; Juãw 18.39-19.16; mãânênh Atre 3.13-14

¹³ Tã nhùm Pirat akupÿm amnhî wÿr më hã karõ. Ijaew kwÿjjaja nê më õ pahijaja nê më õ patre krãhtÿmjaja nhùm akupÿm amnhî wÿr më piitã më hã karõ.

¹⁴ Hãmri nhùm më akupÿm hwÿr gjêx pa nê kuhê nhùm më kãm:

—E na ka mẽ ixwỳr mytita o tẽ nõ tanhmã inhmã harẽnh to. Kot mẽ akwỳjẽ mã tanhmã hẽx to ho pa hã harẽ. Tã pa ra jar mẽ anoo mã tanhmã hkukjẽr to nõ tee ri kot inhmã tanhmã amnhĩ jarẽnh to hã kuma. Te kot amnhĩ to mex xwỳnh pyrã. Mẽ ate tanhmã ho akapẽr to htã nom kot anhỹr kêt. Kot amnhĩ to mex xwỳnh na.

¹⁵ Pahi Eroxja ra ixpyrà nõ tee ri tanhmã hkukjẽr to nom nhũm tanhmã kãm nõ hkêt nõ. Nhũm tee ri ja hã omu nõ akupỳn ixwỳr kumẽ. Jakamã kwa mẽmo mỳrapẽ kot paj mẽ amã hã amỳnẽ nhũm mẽ amã kupĩ? Tanhmã kot amnhĩ tomnuj tore hã.

¹⁶ Kot paj ãm mẽ kãm anẽ kẽ mẽ htak nõ kãm ure kẽ mãmri ma tẽ. Anẽ.

¹⁷ Arĩgro pẽ Pas ã na pre hte mẽ õ pahi mẽ kot mẽ ho prẽs nhũm mẽ hkrĩ xwỳnhjaja nhũm pre htem mẽ ho hpỳnh mẽ mẽ kãm ure. Jakamã na pre ã mẽ kãm kapẽr anẽ nõ kot Jejus tak nõ kãm urer mã.

¹⁸⁻¹⁹ Nom nhũm mẽ kuma nhũm ja mẽ kẽp omnuj mẽ nhũm mẽ kãm:

—Kwa nã. Apĩ ri. Apĩ nõ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ põristi mẽ pahi Piratja mẽ kutã amnhĩ xãm nõ kẽp õ põristi hõxpĩ. Mỳrapẽ na prem ra haxã nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapẽr anẽ.

²⁰ Nom nhũm kãm Jejus mã urer prãm jakamã axte hã mẽ hkukja nõ mẽ kãm:

—Kwa nom mẽmoj mỳrapẽ kot paj mẽ kãm hã amỳnẽ nhũm mẽ amã kupĩ?

²¹ Anhỹr tã nhũm mẽ kuma nõ ãm kuma. Nẽ xatã kãm:

—Kwa tokyx pĩ kahpa hã anhõ kẽ ty. Anẽ.

²² Hãmri nhũm tee ri mẽ kuma nõ mẽ kãm:

—Tk. Kwa nã. Tanhmã kot amnhĩ tomnuj tore hã kot pa kêt hã kunhõ nhũm ty. Nã kot paj ãm mẽ kãm anẽ kẽ mẽ htak nõ kãm ure kẽ ma tẽ. Anẽ.

²³ Hãmri nhũm mẽ xatã hã kãm kapẽr kãm hihtỳx nõ kãm:

—Kwa nã. Pĩ kahpa hã mãn anhõ kẽ ty.

Anhỹr o ãm xatã kax pẽ ãmra kamã kãm hã amỳnẽ.

²⁴ Hãmri nhũm Pirat tee ri mẽ kuma hãmri nõ tã mẽ kãm hprãm xã hkõt mẽ kãm ã amỳnẽ.

²⁵ Hãmri nõ mẽ kãm Parapas mã ure. Ra kot pahi Pirat pẽ õ põristi kutã amnhĩ xãm nõ kẽp hõx pĩr tã nhũm mẽ kãm hprãm xã hkõt akupỳm kãm ure. Hãmri nõ mẽ ihkra Jejus jaxã. Mẽ kãm hprãm xã hkõt ri mẽ kot tanhmã hipẽx to kaxyw.

Mẽ kot pĩ kahpa hã Jejus nhõr ã mẽ harẽnh

Matẽwre 27.31-43; Makre 15.21-32; Juãw 19.17-20, 19.27-31; mããnẽn Atre 7.59-8.1

²⁶ Tã nhũm põristijaja Jejus o kato nõ ma kapõt mã o tẽ. Nẽ kãm õ pĩ kahpa gõ nhũm amnhĩ kaxyw kumỳ nõ o tẽ. Nom mẽ kot htak rax kurẽ nhũm hirot tỳx nõ nhũm mẽ ja hã omu nõ mẽhõ kot ho ajuta kaxyw mẽ hkapi ho xa. Hãmri nõ Sirẽn nhõ xwỳnh Simãw hkã htyk pumu. Nhũm pre htỳx hamakêtcati nõ mẽ kutã krĩm tẽ. Hãmri nhũm mẽ haer pẽ unẽ nõ kãm Jejus o ajuta kaxyw hã karõ nhũm kãm õ pĩ kahpaja mỳ nõ mẽ hkõt o tẽ.

²⁷ Hãmri nhũm mẽ ohtõ nõ Jerujarẽ rũm Jejus kõt mõ. Nhũm mẽnhĩ hkwỳjaja omu nõ kãm hkaprĩ xaj mỳr o hkõt mẽ.

²⁸ Hãmri nhũm mẽ mỳr ã mẽ kuma nõ mẽ ho hakẽx nõ mẽ omu nõ mẽ kãm:

—Kwa nã Jerujarẽ nhõ xwỳnhjaja. Mẽ amã ixkaprĩ xaj amỳr kêt nõ. Kêt mẽ kamjaja amã amnhĩ kaprĩ xaj mãn mur. Nẽ mẽ akrajẽ kamã axukaprĩ xaj mãn mur.

²⁹ Koja mẽ nhỹrmã mẽ apẽ mẽ anhõ krĩ grãnh pa ka mẽ apunuj nõ amnhĩ xã htỳx kamã ajamak o ri apa. Nẽ tee ri mẽ akrajẽ hkukamã tanhmã ajamaxpẽr to nõ ajamaxpẽr o: “Hẽxta gãã nõ. Na ixkrajaja ixpẽ amnhĩ xã htỳx kãm hamak o pa. Kẽp apu mẽ hkra hkêt xwỳnhjẽ pyrã nõ ixkra hkêt nõ ixpa ro nhỳx inhmã mex nõ. Nhỳx pa ixkĩnh nõ.” Anhỹr o kot kaj mẽ nhỹrmã ajamaxpẽr nom ã ajamaxpẽr anhỹr kaprỹ.

³⁰ —Nẽ kot kaj mẽ apiitã mẽmo punujta pymaj tee ri amã tokyx atyk nõ ajapẽx par prãm kaprỹ nõ axpẽn mã akapẽr o: “Hẽxta gãã nõ. Kot kẽn prẽk mỳj mẽ panhĩpỹ rõrõk nõ tokyx mẽ panhĩmex par ronhỳx mẽ pamã ja mex.” Anhỹr tã no ãm tee ri ã ajamaxpẽr anhỹr kaprỹ.

³¹ Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpẽx anẽ. Nom mẽ ate amnhĩ tomnuj mỳrapẽ koja mẽ nhỹrmã tanhmã mẽ ato rax o ã mẽ kot inhĩpẽx anhỹrja jakrenh pa. Hẽxta waa nõ. Na pa mẽ akukamã ijamaxpẽr nõ ixkaprĩ htỳx nõ. Anẽ.

³² Tã nhũm mẽ ja wa ho hamẽxkrut nõ tanhmã wa kot amnhĩ tomnuj toja mỳrapẽ Jejus kõt wa hpĩr kaxyw hkõt mããnẽn wa o tẽ.

³³ Jakamã nhũm mẽ ra kẽn nhĩxet te kot mẽ hkrã hi pyrãk xwỳnhnta wỳr mẽ o põj. Mẽ kot kãm “mẽ hkrã hi xã” anhỹr jarẽnhja wỳr mẽ o põj. Hãmri nõ Jejus pẽ ã kapa nõ pĩ kahpa hã kuxi nõ prek o ihkra nõ hpar o htỳx pa. Hãmri nõ kãnhmã pĩ kahpa xãm nõ ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhnta mã wa ho anẽ nõ. Nẽ prek o wa ihkra nõ wa hpar o htỳx pa hãmri nõ akutã ho Jejus nhĩjẽ nõ wa ãm nhũm wa ajẽt.

³⁴ Hãmri nhũm Jejus kỳx pẽ amnhĩ xã htỳx kumrẽx kamã hamak o jẽt rãhã mẽ ho Tirtũm wỳ nõ kãm:

—Kwa Papaj. Ām ixtā jajē pumu. Mē kot mēmoj mex pumunh kēt jakamā na mē ā inhīpēx anē. Jakamā ām ixtā mē omu nē mē kamā axukapri nē. Anē.

Hāmri nhūm hparpē pōristi hkwýjaja axpēn mā ē hkwý ho pigrānh kaxyw hā kēnre ho jōka ho hkrī.

³⁵ Nhūm mē ohtō rax nē Jejus parpē omunh o kuhē. Nhūm mē ō pahijaja mē noo mā hā hpēr o axkē nē mē kām:

—E jahti na pre te kēp mē pakapri xwýnh ā amnhī jarēnh o ri pa. Nē Tirtūm kot mē pakaxyw ām xwýnh ā amnhī jarēnh o ri pa. Jakamā e kwa pu mē xa nē kot amnhī kaxār nē wrýk kām omu. Anē.

³⁶ Nhūm pōristi māānēn tanhmā hā hpēr o pikēnh to. Nē hparpē kām wīhti punuti jahkre nē kām:

—Kwa wrý nē mē ixkutā ja hkwý ho ixkō nā. Anē.

³⁷ Hāmri nē kām:

—E apē Ijaew nhō pahi hā kot kaj amnhī kapa nē akupýn wrý. Kwa tokyx pa mē ja hā apumu. Anē.

³⁸ Nhūm pōristija tapti hō py nē tanhmā hā kagā hto. Nē hā kagā ho:

IJAEW NHŌ PAHI NA JA

Anhýr o hā kagā hāmri nē Jejus wýr api nē mý ri kunhō.

Wa kot Jejus nhījē nē wa jēt xwýnh wa harēnh

Matēwre 27.44; Makre 15.32

³⁹ Hāmri nhūm wa kot ihkō hā jēt xwýnhhta ō haxwýja kām kapēr punuj nē kām:

—Kwa kot kaj apē Tirtūm kot mē ixkaxyw axām xwýnh hā kot kaj amnhī kapa nē wrý. Nē māānēn amnhī kōt wa ixto wrý. Anē.

⁴⁰⁻⁴¹ Hāmri nhūm ihōta kuma nē hā kām akir nē kām:

—Tk. Kwa amarī ajēt. Xā amā Tirtūm pyma hkēt ā na ka ā kēp Krata mā akapēr anē? Nā koja kām wrýk prām nē kot wrý. No pajamē pahte amnhī tomnuj mýrapē koja mē pahpī. No tām kot tanhmā amnhī tomnuj to hkēt tā nhūm mē amarī ā hipēx anē.

⁴² Anhýr o kām kapēr hāmri nē Jejus mā kām:

—Kwa Jejus. Kēr ka nhýrmā mē ixto amnhīptā hāmri nē inhām ājamaxpēr nē ixkamā axukapri nē ixto mex nē. Anē.

⁴³ Hāmri nhūm kām:

—Nā kot kaj jarāhā ma ixkōt kaxkwa hwýr api nē hpānhā ixkuri amex nē atūr tūm nē apa ho apa. Ām hāmri na pa ā amā ixkapēr anē. Anē.

Jejus tyk ā harēnh

Matēwre 27.45-56; Makre 15.33-41; Juāw 19.28-30

⁴⁴ Tā nhūm kaxkwa nhīpōk ri myt nhýr mē nhūm te ra kamāt pyrāk nhūm kamāt kō rax

kumrēx. Nē kamāt kō ho ra hā awry nē. Ja mē nhūm akupým myt katēr o mō.

⁴⁵⁻⁴⁶ Nom nhūm kormā kamāt kōta ā nhūm Jejus ra htyk kaxyw nē āmra kamā Tirtūm mā kapēr nē kām:

—E Papaj. Māmri ixkarō ho amnhīptā.

Anhýrja kōt hāmri ty. Pu nhūm Tirtūm mā amnhī jarēnh xā hā ixkre kamā hakwakre hā kupēxēja axkjē nē amnhī kahē xā mēnh kurē kumrēx. Utī rax tā kōt ā axkjē nē amnhī kahē xā mē. Te Jejus htyk o kot mē pahte hkōt amnhī xunhwýr xwýnhjē mā Tirtūm wýr pry jakwa kre kahē xā mēnh pyrāk o ā amnhī nhīpēx anē.

⁴⁷⁻⁴⁹ Hāmri nhūm mē piitā mēmoj ā kot amnhī nhīpēx anhýr ā omunh o kuhē xwýnhjaja. Nē kaxyw Jejus krāmnhwýjaja nhūm mē amým omunh o kuhē. Nē Garirej rūm mēni kot Jejus kōt mē pa ho mē pa xwýnhjaja māānēn mē kuri amým hkapri nē omunh o kuhē. Nhūm pōristi krāhtūmjē hōja ā mēmoj kot amnhī nhīpēx anhýr ā omu nē tee ri hamaxpēr o:

—Hēxta waa nē. Pēr ām hāmri na pre hte tām amnhī nhīpēx o pa. Tā pa mē amarī mē mar xā hkōt ixtýx kupī. Anē.

Nhūm ā hamaxpēr anhýrja kōt Tirtūm mā mex o mex ā harēnh o xa. Nhūm amarī mē kuhē xwýnhjaja māānēn mēmoj ā kot amnhī nhīpēx anhýrta pumu nē tee ri hkukamā hamaxpēr o ra kām ma htyx nē. Hāmri nē awjanā nē ma akupým krīm mrar kurē kumrēx.

Mē kot Jejus jaxār ā mē harēnh

Matēwre 27.57-61; Makre 15.42-47; Juāw 19.38-42

⁵⁰⁻⁵¹ Tā nhūm axtem Juje pē Arimatej nhō xwýnhja. Arimatejja pika pē Ijaew kamā na. Nhūm Jujeja kot amnhī to mex jakamā Tirtūm kōt amnhī nhīpēx o pa. Jakamā na pre hkwýjē rom Tirtūm kot mē pahwýr Jejus mēnh xwýnh ā omu nē hkōt hamaxpēr. Kēp Ijaew nhō pahi hō htā hkwýjē hkōt hamaxpēr kēt nē. Jakamā nhūm prem kot Jejus pīr ā amýnē nhūm tee ri harēnh ma nhūm ja kēp omnuj nē.

⁵² Jakamā nhūm Jejus ty nhūm Juje ma pahi Pirat wýr tē nē ī hā kuwý nē kām:

—Pa? E ot o awýr tē. Kwa inhām htyk xwýnhhta gō pa ma o tē nē haxā. Anē.

⁵³ Hāmri nhūm kuma nē kām kugō nhūm ma o tē nē haxā. Kaxyw kupēx hō py nē ho hku pu nē ma o tē nē kēn kre kapri kamā haxā. Mē kot kormā kamā mēhō jaxār kēt nhūm mē kamā Jejus jaxā.

⁵⁴ Arīgro pē sēsta hā nhūm prem kupī nhūm myt xār o mōr mē nhūm Juje ma o tē nē haxā. Ijaew kōt xā hā arīgromnuja wýr haxā.

⁵⁵ Nhūm Garirej rūm mēni hkwý kot Jejus kōt pa xwýnhjaja ma hkōt mra nē kot haxār

kām omu. Mē hkuxwaxà ho gregrer kêt rāhā haxār kām omu.

⁵⁶ Hāmri nē ma akupŷm krīm mra nē kaxyw mē hkuxwaxà hkwȳ ho anē.

Tā nhūm apkati nhūm mē ō arīgromnu pē sap kator jakamā nhūm mē kormā akupŷm hwŷr mra r kêt nē. Hāmri arīgro mex jamār pē arī hkōkōt o hkrī.

24

Jejus akupŷm htīr jarēnh

Matēwre 28.1-10; Makre 16.1-8; Juāw 20.1-10

¹ Tā nhūm apkati nhūm tōmīk. Hāmri nhūm mēnijaja kwŷhtā kānhmā hkrī nē ma akupŷm kēn kreta wŷr mē hkuxwaxà ho mra.

² Hāmri nē hwŷr àhtēp o mra nhūm ra hakwakre kahē xā raxta kahē xā hkāx ā xa nhūm mē tee ri omu.

³ Hāmri nē kēn kre wŷr agjē nē kamā tee ri Jejus japēr no nhūm kamā amrakati.

⁴ Nhūm mē tee ri axpēn pumunh pē hkukamā hamaxpēr.

Hāmri nhūm Tirtūm kapēr o wrŷk xwŷnh wa axkrut nē mē haēr pē mē hwŷr kato nē wa xa. Wa ē jaka nē hirā htŷx kām wa xa.

⁵ Nhūm mē tee ri wa omu nē kām wa uma htŷx nē. Nē wa umaj hkōn krā ho rōrōk nē hkrī hpa. Nhūm wa mē omu nē mē kām:

–Kwa mon ka mē ri mē htykjē kamā ra akupŷm htīr xwŷnh ta japēr o ri apa?

⁶ Jar amrakati. Na ra akupŷm htīr. Kormā Garirej kamā pa ri kot mē amā amnhī jarēnh xā hkōt na ra akupŷm htīr. Mān ka mē arī kot ā mē amā amnhī jarēnh anhŷrja ā anohtŷx japēr.

⁷ Mē kot unēnh nē pī kahpa hā nhōr nhūm htyk nē htyk ā apkati axkrunēpxi hāmri nē akupŷm htīr ā kot mē amā amnhī jarēnh ta mān ka mē arī hā anohtŷx japēr.

⁸ Anhŷr o mē kām kapēr nhūm mē kuma hāmri nē ra Jejus kot mē kām ā amnhī jarēnh anhŷrja mā hamaxpēr kurē kumrēx.

⁹ Hāmri nē awjanā nē ma akupŷm krīm hkīnh nē mra. Nē hwŷr pōj nē mē kot Jejus nhŷ hā mē ahkre ho mē pa xwŷnhjē mā awjarē. Mē kēp 11 xwŷnh tajē mē kaxyw hkwȳjē mā awjarē.

¹⁰ Mēni kot mē kām ujarēnh xwŷnh tajē nhŷi na pre Marir Matarēn nhūm ja kēp Joanā. Nē Xiakre katorxā Marir ōta. Nē kaxyw mēni hōja. Jakamā nhūm mē ma akupŷm Jejus nhŷ hā mē ahkre ho mē pa xwŷnhjē hwŷr mra nē mē kām awjarē.

¹¹ Nom nhūm mē kuma nē ām mē kuma nē htŷx ho amnhī krā hkōt mē kot ri ā harēnh anhŷr ā mē hkamnhīx nē ām mē kuma.

¹² Nhūm Simāw Pētre hamaxpēr hāmri nē kānhmā xa nē ma kēn kreta wŷr hprōt nē htēm kurē kumrēx. Hāmri nē tee ri kēn kre

kaprŷ kamunh o xa nē kamā Jejus kupu xā pix pumu nē tee ri hkukamā hamaxpēr hāmri nē ma akupŷm tē.

Jejus kot Emau hwŷr wa mōr xwŷnh wa hwŷr kator ā harēnh

Makre 16.12-13

¹³ Tā nhūm ra amŷkry ho mō nhūm Jejus kwŷjē hō wa hamēxkrut nē Jerujarē rūm kato nē ma akupŷm wa ō krī pē Emau hwŷr wa mō. Jerujarē rūm Emau hwŷr ahkrānre.

¹⁴ Jakamā nhūm wa hwŷr pry hā axpēn mā tanhmā Jejus jarēnh to ho mō. Kēn kre kamā mē kot haxār nhūm ra ī pikunorja nhūm wa axpēn mā harēnh o wa mō. Nē tee ri hkukamā hamaxpēr o wa mō.

¹⁵ Hāmri nhūm Jejus tām tē nē wa hā ajēt nē wa hkōt tē.

¹⁶ Nom nhūm wa hprī hā omunh kēt nē. Tŷx ho nhām mēhō hā hkamnhīx nē wa arī axpēn mā harēnh o wa mō.

¹⁷ Hāmri nhūm Jejus hēx rom wa kām:

–Kwa mēmon ka wa axpēn mā harēnh o wa mō? Anē.

Hāmri nhūm wa hkaprī kamā kām harē.

¹⁸ Ihō pē Kroptija kām:

–Kwa xā na ka Jerujarē kamā ri apa htā kamā mē kot tanhmā amnhī nhīpēx toja jarēnh mar kēt nē? Kurūm amōr kēnā na ka ri mēmoj mar kēt nē ri apa. Anē.

¹⁹ Hāmri nhūm wa kām:

–Nā amrakati ixte mēmoj maare hā. Kwa mo na wehe? Kwa war aprī hā inhmā harē pa kuma. Anē.

Hāmri nhūm wa kām:

–Nā mē kot mē ixpē tanhmā Jejus pē Najare nhō xwŷnh ta kēnā. Kēp Tirtūm nhŷ hā kapēr jarēnh o pa xwŷnh na pre. Nē Tirtūm nhŷ hā tanhmā amnhī nhīpēx to ho pa nhūm prem piitā amnhīm mex ā harē.

²⁰ Tā nhūm mē panhō patre krāhtūmjē mē mē panhō pahijaja axtem nē mē kām hā amŷnē. Mē kot pī kahpa hā nhōr nhūm htyk kaxyw mē kām hā amŷnē.

²¹ Pa prem ixtŷx ho kēp Tirtūm kot mē pahwŷr mēnh xwŷnh ā hkamnhīx nē kot Rōm nhō xwŷnhjē pē mē ixpytār ā hkamnhīx tā nhūm prem mē ixpē kupī. Jāā na prem ā hipēx anē nē kupī. Na ra htyk ā apkati axkrunēpxi.

²²⁻²³ –Nē jarāhā kwŷhtā mēni hkwȳjaja ma haxār xā hā kēn kre hwŷr mra nē xep tee kamā hapēr nē omunh kēt nē. Xep ām Tirtūm kapēr o wrŷk xwŷnhja wa ho axkrut nē wa omu nhūm wa xa. Nhūm mē kām ra akupŷm htīr ā harē nhūm mē akupŷn mē ixwŷr mra nē mē jaēr pē mē inhmā harē.

²⁴ Hāmri nhūm mē ixkwŷjaja ma mē hpānhā kēn kreta wŷr mra nhūm ra mē kot harēnh xā hkōt tee ri kamā hapēr nom nhūm kamā amrakati kumrēx. Anē.

²⁵ Hāmri nhūm Jejus amnhī tā wa kuma nē wa kām tanhmā amnhī jarēnh to nē wa kām: —Hēxta waa nē. Pēr ām mē ate mēmoj mā ajamxpēr t̄yx mex kēt kumrēx. Na pre ra Tirtūm nh̄y hā kapēr jarēnh xw̄ynhjaja Tirtūm kapēr ā kagā htūm kamā ā kot amnhī nh̄ipēx anh̄yrja kukamā hprī hā harē nē hā kagā. Mē akukamā mē anh̄igētjē mā harē nē hā kagā. Tā ka mē kormā aprī hā mar t̄yx kēt nē.

²⁶ Kēt mē anē na Tirtūm kot ām xw̄ynhta ty. Tā ra akup̄ym ht̄ir nē akup̄ym kaxkwa hw̄yr àpir kaxyw. Kot mē ato amnh̄ipt̄ar kaxyw ra akup̄ym hw̄yr àpir mē.

²⁷ Amnepēm na pre finat Mojesja tanhmā hkukamā mē anh̄igētjē mā harēnh to nē hā kagā. Nē hprī hā harēnh o pa. Nhūm hpānhā Tirtūm nh̄y hā kapēr jarēnh o mē pa xw̄ynhjaja ma anē nē mē kām harēnh o pa. Anē.

Nhūm pre ā Jejus wa hkōt hprī hā wa kām amnhī jarēnh anh̄yr o tē. Te ho nhām mēhō jarēnh pyrāk nom tām wa kām amnhī jarēnh o wa hkōt tē. No nhūm kormā wa hprī hā kēp Jejus ā omunh kēt nē.

²⁸⁻²⁹ Nhūm ā wa kām amnhī jarēnh anh̄yr o mōr rāhā nhūm mē ra wa ō krī hw̄yr hpōx o mō. Nhūm ra kamātre nhūm Jejus te kot wa rer nē nh̄yh̄ym ma htēm kaxyw pyrāk o amnhī nh̄ipēx nhūm wa tee ri omu nē kām:

—Kwa xā kot kaj wa ixre nē ma tē? Ra kamāt o mōr kēnā. Kwa ma wa ixkōt tē nē wa inhōrkw̄y kamā mān wa ixri pōj. Anē.

Hāmri nhūm wa kuma nē ma wa hkōt tē. ³⁰ Nē mē wa ōrkw̄y hw̄yr pōj nē hw̄yr agjē. Hāmri nē apkur kaxyw hkrī nhūm Jejus tām pāwti py nē Tirtūm mā harē nē hpānhā ho axkjē nē wa kām kugō.

³¹ Hāmri nhūm wa atā kēp Jejus ā omunh kurē kumrēx. Jao nhūm wa kēp akunok nhūm wa tee yr xā kamā hapēr nhūm hkapr̄y mex nē xa.

³² Hāmri nhūm wa tee ri xep̄n pumu nē ri hkukamā hamaxpēr nē xep̄n mā:

—Hēxta waa nē. Xep tām na. Tām na pahkōt mō nē pry hā hprī hā pamā Tirtūm kapēr ā kagā jarē pu hkōt pahk̄inh nē mar o mō. Hēxta waa nē. Xep tām na. Anē.

³³⁻³⁵ Hāmri nē wa kānhmā xa nē kato nē ujanār kurē kumrēx. Hāmri nē ma akup̄ym Jerujarē hw̄yr wa hkwyjē hw̄yr tē. Nē mē hw̄yr pōj nē axā. Nhūm Jejus nh̄y hā mē ahkre ho mē pa xw̄ynh pē 11jaja ra xep̄n w̄yr akuprō nē hkrī. Mē hkwyjē mē xep̄n w̄yr akuprō nē xep̄n mā tanhmā Jejus jarēnh to ho hkrī. Hāmri nhūm wa mē hw̄yr axā nhūm mē wa omu nē wa kām:

—Kwa na xep ra Jejus akup̄ym ht̄ir nē Simāw Pētre hw̄yr kato. Anē.

Hāmri nhūm wa mē kuma nē mē kām: —T̄y na akup̄ym ht̄ir kēnā. Na pa wa ijaxw̄yja ham omu. Na pry hā wa ixtā ajēt

nē ma wa ixkōt mō nē wa inhōrkw̄y kamā pōj. Hāmri pa mē ixāpkur kaxyw ixkrī nhūm pāwti py nē Tirtūm mā harē nē ho axkjē nē wa inhmā kugō pa wa ixprī hā kēp Jejus ā omunh kurē kumrēx. Ixprī hā omunh jao nhūm wa ixpē hapēx. Anē.

Jejus kot hkwyjē piitā hw̄yr kator ā harēnh

Matēwre 28.16-17; Makre 16.14; Juāw 20.19-23

³⁶ Nhūm mē kormā xep̄n mā Jejus jarēnh o hkrī rōm nhūm tām nh̄yh̄ynh mē hw̄yr axā nē xa. Mē haēr pē mē hw̄yr nh̄yh̄ynh axā nē mē kām:

—Pa? Xān ka mē arī akrī? Anē.

³⁷ Hāmri nhūm mē amnhī jaēr pē omunh jao kānhmā hakry hpar o mra. Jao hakryk kām ma ht̄yx kām omunh o hkrī.

³⁸ Hāmri nhūm mē kām:

—Kwa mon ka mē amā ixpyma kamā tee ri ixpumunh o akrī? Kwa mē ixkarō hā ixkamnh̄ix nē amā ixpyma hkēt nē.

³⁹ Na pa akup̄yn inhī ho mē aw̄yr ixkato nē xa. Ga mē inh̄hkra kamā prek tatak xāja pumu. Nē ixpar kām omu. Kwa mē amā ixpyma hkēt nē. E mē māmri mra nē anh̄hkra ho ixkupē. Kēp apu ixkarō hpix ronh̄yja ka mē inhī kupēnh kēt nē. Mo mēhkarōja ? Nā na pa akup̄ym ixt̄ir nē inhī ho mē aw̄yr ixkato. Anē.

⁴⁰ Hāmri nē mē kām amnhī nh̄hkra hpē nē mē kām amnhī par pē.

⁴¹ Tā nom nhūm mē arī akryk omunh o hkrī. Mē kot omunh nē hk̄inh tā tee ri omunh o hkrī. Hāmri nhūm tee ri ja hā mē omu nē mē kām:

—E kwa mē inhmā mēmoj japēr pa kukrē. Anē.

⁴² Hāmri nhūm mē kām tep gōj kām āmta gō

⁴³ nhūm kupy nē hkur o nh̄y nhūm mē arī hā omunh o hkrī. Jao ra akup̄ym ht̄ir ā omunh kurē kumrēx.

Jejus akup̄ym nojarēt nē hkwyjē mā mēmoj tā karō

Matēwre 28.18-20; Makre 16.15-18; māānēn Atre 1.6-8

⁴⁴⁻⁴⁵ Hāmri nhūm Jejus hprī hā mē kām Tirtūm kapēr ā kagā htūm kot hkukamā harēnh ā amnhī jarē nē mē kām:

—Nā kormā ixyk kēt ri na pa pre ixprī hā mē amā amnhī kukamā amnhī jarē. Tirtūm kapēr ā kagā htūm kot tanhmā mē kot inh̄ipēx to hkukamā ijarēnhja. Na pre finat Mojes Tirtūm nh̄y hā ixkukamā tanhmā ijarēnh to. Nē Tirtūm nh̄y hā kapēr jarēnh o mē pa xw̄ynhjaja Mojes m̄yr pē haxw̄yja ixkukamā tanhmā ijarēnh to. Nē Tirtūm mex o mex ā mē grer ā kagā xw̄ynhjaja haxw̄yja ixkukamā tanhmā ijarēnh to. Jajē piitā na prem Tirtūm kapēr ā kagā htūm kamā ixkukamā ijarē.

⁴⁶ Nē ijarēnh o:

Tirtūm kot mē pakaxyw ām xwýnh pé Krisja koja nhýrmā ty. Nē htyk o apkati axkrunēpxi nē akupým htír.

Anhýr o mē kot ijarēnh. Tā pa ra mē kot ixkukamā ijarēnh xā hkôt ā mē anē amnhī nhīpēx anē.

⁴⁷ —No ām Tirtūm kapēr ā kagā htūm kot papxipix ixkukamā ijarēnh kēt. Kamā määnēn mē kajaja tanhmā mē akukamā mē ajarēnh kute. Mē apē ixkôt amnhī xunhwýr xwýnhjaja ixwakre kamā tanhmā mē ate inhmā amnhī nhīpēx to ho apa hkukamā tanhmā mē ajarēnh kute. Nē mē ajarēnh kot:

E mē ate ixkôt amnhī xunhwýr xwýnhjaja. Kēr ka mē ma pika piitā hkôt mē kām Tirtūm kot mē awýr mēnh xwýnhhta jarēnh o ri mē hkôt apa. Mē kot mē amar nē amnhī tomnuj kaga nē Tirtūm kôt amnhī xunhwýr kaxyw. Kēr kē Tirtūm ja hā mē omu nē amnhī katut kôt mē kot amnhī tomnuj rēnh pa. E kēr ka mē ma krī piitā hkôt mē kām ā ja jarēnh anhýr o ri mē hkôt apa. Krī pé Jerujarē kumrēx kām hāmri nē rī kormā pu hā krī kuhē xwýnh piitā hkôt ajapōj nē mē kām harēnh o ri apa. Anē.

Ā Tirtūm kapēr ā kagā htūm kot mē akukamā mē ajarēnh kot anhýr.

⁴⁸ Tā kēr ka mē ā mē kām tanhmā ijarēnh to ho ri apa anē.

⁴⁹ No ām kormā. Kēr paj ma akupým kaxkwa hwýr api hāmri nē amnhī pānhā mē awýr Tirtūm Karō rē mán. Tirtūm kot ixte amnhī nhīpēx ā ijarēnh xā hkôt kot paj amnhī pānhā mē awýr kurē. Tā kēr ka mē kormā krī ja kamā kutēp apa. Kēr kē mē awýr wrý nē mē amā agjē ka mē rī kormā anhgrā nē ma ŷ hā mē kām ijarēnh o ri mē hkôt apa. Anē.

Jejus kot akupým kaxkwa hwýr àpir ā harēnh

Makre 16.19-20; määnēn Atre 1.9-11

⁵⁰ Tā nhūm Jejus Jerujarē rūm hkôt mē pa ho pa xwýnhjē kator nē ma krī pé Petān wýr mē o mō. Nē kormā hwýr mē o mōr ri nhýri mē o xa nē kānhmā ihkra pé nē mē ho Tirtūm wý.

⁵¹ ā mē ho hwýr anhýrja rōm nhūm Tirtūm amnhī wýr ho àpir o mō nhūm mē noo mā ma akupým tēn api.

⁵² Hāmri nhūm mē kām mex o mex ā harēnh pé ma akupým àpir kām omunh o kuhē. Nhūm ma tē nē mē kēp kakrām axā nē mē kēp akunok. Hāmri nhūm mē awjanā nē ma akupým Jerujarē hwýr hkīnh nē pa.

⁵³ Hāmri nē apkati mē Tirtūm mā amnhī jarēnh xā hā ixkre hwýr agjē nē kamā

Tirtūm mā mex o mex ā harēnh o hkrī rāhā nē.

Tā ām ja pix ixkrāmnhwý Teopre. Ixpē Rukre na pa awýr kagāja nhīpēx nē kamā Jejus kot tanhmā amnhī nhīpēx to hā harē nē hā kagā nē awýr kumē.

Juāw

Juāw kot tanhmā Jejus kot amnhī nhīpēx to ho pa hā kagā

Juāw na pre kagāja nhīpēx. Na pre māānēn Wam Juāw nē Sikūn Juāw nē Hapuhā Juāw nē Apokarip nhīpēx. Juāw Paxis kēt axtem Juāw ō. Nē Jejus kōt mē pa ho mē pa xwýnhjé hō na pre. Nē ý hā mē ahkre ho pa xwýnhjé hō na pre. Nom kormā ā amnhī nhīpēx anhýr o pa hkēt ri na pre kēp tep kanhēr xwýnh. Nē kēp Jejus krāmnhwý mex na pre. Jakamā na pre kagāja nhīpēx nē kamā Jejus kot tanhmā amnhī nhīpēx hā harē nē hā kagā. Nē tanhmā kapēr to hā kagā.

Na pre Jejus kēp Tirtūm Kra hā harē nē hā kagā. Nē ām pix kukwak ri Tirtūm wa kuri mē pahūr tūm nē mē papa ho mē papa hā harē nē hā kagā. Ā na pre Juāwja mē pamā Jejus jarē nē hā kagā anē.

Jejus te kot Tirtūm pyrāk ā harēnh

Matēwre 1.23; Juāw 8.12, 8.58, 10.30, 20.28; māānēn Atre 10.36; Sikūn Korīt 4.4; Piripos 2.6-11; Korosē 1.13-17, 2.9; Xitre 2.13; Eprēw 1.1-4; Wam Juāw 1.1-4, 5.20; Apokarip 1.17-18

¹ Amnepē mā kormā mēmoj kēt ri nhūm kot Tirtūm kapēr o amnhīrīt xwýnhja Tirtūm kōt pa ho pa. Te kēp urāk nē pa. Wa kot amnhī nhīpēxja ām tipxi. Nē wa āhpumunh ām tipxi. Nē wa hkarō māānēn ām tipxi. Ām wa tipxi rāhā nē pa ho pa.

² Kormā mēmoj kēt ri na pre Tirtūm kapēr o amnhīrīt xwýnhhta Tirtūm kōt ri pa ho pa.

³ Nē Tirtūm nhý hā na pre mēmoj piitā hā apē nē ho kato. Jao pyka ho kato nē kaxkwa ho kato nē gō xujanār o kato. Nē kamā mēmoj piitā Tirtūm nhý hā ho kator pa. Kop apu mēmoj to kator kēt ronhýx mēmoj amrakati kumrēx.

⁴ Nē Tirtūm o amnhīrīt xwýnhhta pix kukwak ri na hte mēmoj piitā htír nē pa. Nē ām pix kukwak ri na htem Tirtūm ri htír tūm nē pa ho pa. Nē te myyti kot mē pamā mēmoj piitā hirā ho pa pu mē kukwak ri mēmoj piitā omunh mexja pyrā nē na pre hte mē pahpiitā mē pamā mē pahte amnhī nhīpēx nyw nē mē pajamaxpēr nyw o amnhīrīt pu mē pahprī hā mar mex nē.

⁵ Ja kaxyw na pre wrý nē ri mē kām Tirtūm kapēr jarēnh o ri mē hkōt pa. Jao mē kot amnhī nhīpēx nyw jarē nhūm mē kot amnhī tomnuj xwýnhjaja tee ri kuma nē kām mar prām kēt nē. Nē tee ri kām kapēr o hapēx prām kaprý.

Juāw Paxis kumrēx kot tanhmā Jejus jarēnh to hā harēnh

Matēwre 3.1-3; Makre 1.1-4; Rukre 3.2-6

⁶ Tā nhūm kormā Jejus mē kām kapēr o pa hkēt ri nhūm Juāw Paxis kumrēx mō nē hkukamā Tirtūm nhý hā mē kām tanhmā harēnh to ho pa.

⁷ Mē kām mē kot amnhī nhīpēx nyw nhōr xwýnh pē Jejus Kris kukamā mē kām harēnh o ri mē hkōt pa. Mē kot mar nē amnhī kaxyw Jejus kōt hamaxpēr kaxyw.

⁸ No Juāw Paxisja na pre hte mē kām mē kot amnhī nhīpēx nyw nhōr o pa hkēt nē. Na pre ām kot mē kām ōr xwýnhhta kukamā mē kām harēnh o pa.

⁹ Jakamā na pre hte mē kām harēnh o ri pa nē mē kām harēnh o:

—E ot pa mē amā mēhō jarēnh o ri ixpa. Kot mē pamā mē pahte amnhī nhīpēx nyw nhōr xwýnhhta. Koja tokyx mē pakamā pōj pu mē omu. Koja pōj nē mē piitā mē kām Tirtūm kapēr jarēnh o ri pa. Mē pahte pahprī hā mar mex kaxyw. Anē.

Tirtūm kot mē ho hkra hprām xwýnhjé jarēnh

Rōmān 8.14; Karatas 3.26; Epes 1.5

¹⁰ Tā nhūm Jejus man kot mēmoj piitā ho kator xwýnhhta wýr wrý nē mē hkōt ri pa. No nhūm mē kot kēp mēmoj piitā ho kator xwýnh ā omunh kēt jakamā na prem kapēr ma nē ām kuma nē amnhī kaxyw hkōt hamaxpēr kēt nē.

¹¹ Na pre wrý nē mē pakamā i ho kato. Kēp mē pahpiitā mē pahto kator xwýnh tā nhūm mē ohtō nē omu nē ām omu nē hkōt amnhī nhīpēx kēt nē.

¹² Na prem ām grēre nē kuma nē amnhī kaxyw hkōt hamaxpēr nē hkōt amnhī xunhwý. Hāmri nhūm amnhī tā mē omu nē mē kām:

—E nā ām hāmri. Ra mē ate amnhī kaxyw ixkōt ajamaxpēr nē ixkōt amnhī xunhwýr jakamā na ka mē ixkukwak ri apē Tirtūm kraa. Anē.

¹³ Na htem ā kēp Tirtūm kra hprām xàj Jejus kōt amnhī xunhwýr anē. No na htem mē katorxa nhōxa hkre rūm hapōx kōt kēp Tirtūm kra hkēt nē. Rý amnhī krā hkōt tanhmā amnhī nhīpēx to kukwak ri kēp hkra hkēt nē. Ām Tirtūm tām kot mē ho hkra pix kukwak ri na htem kēp hkra.

Jejus wrýk nē i ho kator ā harēnh

Matēwre 1.20; māānēn Rōmān 1.2-4; Piripos 2.6-7; Eprēw 2.9, 4.15; Wam Juāw 4.2

¹⁴ Jakamā na pre Tirtūm o amnhīrīt xwýnhhta mē pahwýr wrý nē mē pakamā i ho kato nē mē pakamā pa. Kēp Tirtūm Kra hā pixi mex na pre. Nē kot amnhī nhīpēxja te Tirtūm kot amnhī nhīpēx pyrāk. Urāk nē mex o mex. Nē urāk nē mē pakutā nojarēt xwýnh. Na pre hte katāt kōt Tirtūm kapēr jarēnh o ri mē hkōt pa. Pa prem kuma nē mex o mex ā omu.

¹⁵ Nhūm Juāw Paxis na pre hkukamā mē kām harēnh o ri pa nē mē kām:

—E ra ixte mē amā harēnh o ri ixpa xwŷnhhta na ra pōj. Te pa ixte wa nē ixkator pyrāk nom amnepē mā kormā ixkēt ri nhūm hūr rāhā nē pa ho pa. Ham ī ho kator tā kēp Tirtūm Kra jakamā urāk nē rāhā ho rāhā hā pa xwŷnh na. Jakamā kot amnhī to rax o kot ijakrenh par. Anē.

¹⁶ Nē kēp mē pakutā nojarēt rāhā nē pa ho pa xwŷnh jakamā na hte mē pahto mex rāhā pu mē kukwak ri pamex nē ri papa ho papa.

¹⁷ Na pre finat Mojesja mē panhīgētjē mā Tirtūm kapēr jarēnh o ri mē hkōt pa nē mē kām:

—Na pre Tirtūm mē pahte tām amnhī nhīpēx o papa hā mē pamā karō. Jakamā kot puj mē kot mē pamā mēmōj tā karō xā hkōt ā amnhī nhīpēx anhūr o papa nē ra tām amnhī nhīpēx o papa. Anē.

Nhūm pre Mojesja ā mē kām kapēr o pa anē. Hāmri nhūm mē kuma no ām tee ri kām Tirtūm kōt tām amnhī nhīpēx o pa hprām kaprŷ. Jakamā nhūm hpānhā Jejus Krisja wrŷ nē mē pamā kapēr ō ho kapēr o pa nē mē pamā:

—E mē ate Tirtūm kōt amnhī nhīpēx o apa hkēt tā nhūm arī kām mē ajapē nē. Nē kām mē ato mex prām. Jakamā kot kaj mē amnhī to awŷ nhūm tanhmā mē akrā hto ka mē ra tām ri amnhī nhīpēx o apa. Ām hāmri na pa ā mē amā ja jarēnh anē.

Anhūr o mē pamā Tirtūm kapēr jarēnh o pa. Tirtūm kapēr na mex o mex.

¹⁸ Nē aa mē pahtō mē pahte pano ho Tirtūm pumunh kēt. Ām Kraja pix na kot no ho omunh. Kaxkwa kamā kuri ri pa ho pa jakamā kot omunh mex. Nē te kot Hipēēxāja pyrāk jakamā na pre wrŷ nē hprī hā tanhmā kute hā mē pamā harēnh o pa. Jakamā na pu mē ra pahpiitā Tirtūm kot amnhī nhīpēx ā omu nē mar mex nē.

Juāw Paxis kot mē kām Jejus jarēnh o pa hā harēnh

Matēwre 3.1-12; Makre 1.1-8; Rukre 3.15-17; määnēn Atre 19.4

¹⁹⁻²⁸ Na pre Juāw Paxis ma hkwyjē hkōt mē kām Jejus jarēnh o pa nhūm mē hkwyjaja kuma nē amnhī kaxyw Jejus kōt hamaxpēr nē hkōt amnhī xunhwŷ. Hāmri nhūm Juāw Paxis ja hā mē omu nē Tirtūm mā mē hkrā kumrā. Pyhti pē Jotāw nhūkjē hā krī pē Petān tā ri mē hkrā kumrā o pa. Hāmri nhūm krī pē Jerujarē kamā Ijaew krāhtūmjaja harēnh ma nē ma hwŷr hkwyjē rē. Mē kot tanhmā hkukjēr to nhūm kot mē kām tanhmā amnhī jarēnh to kaxyw. Jakamā nhūm mēō patre hkwyjē mē Tirtūm mā amnhī jarēnh xā hā ixkre kamā mē ho ajuta xwŷnh kwŷjē mē Parijew nhō xwŷnh kwŷjē mē nhūm mē ma

hwŷr mra. Juāw Paxis wŷr mra nē omu nē kām:

—Pa. E ot pa mē awŷr mra. Kwa mē inhmā amnhī jarē. Apē mē atō na ka we? Xā ka na apē Tirtūm kot mē ixkaxyw axām mā xwŷnhhta na ka nā? Xā ka na pa htem amnhī wŷr akamā ijamak o ixpa? Anē.

Hāmri nhūm mē kuma nē mē kām: “Nā pa hkēt.” Anē hāmri nhūm mē kām:

—Tō mān xep apē amnepē mā Tirtūm nhŷ hā kapēr jarēnh xwŷnh pē finat Erisja. Hā na ka tanhmā amnhī to nē akupŷm atūr nē mē ixkōt apa nā? Anē.

Hāmri nhūm mē kām:

—Nā ixpē Eris kēt. Anē.

Hāmri nhūm mē kām:

—Tō mān xep apē finat Mojes kot mē kām harēnh o pa xwŷnhhta na ka nā? Anē.

Hāmri nhūm mē kuma nē kē axte mē kām:

—Nā ixpē tām kēt. Anē.

Hāmri nhūm mē tee ri kot ā amnhī tā aprār anhŷrja ma nē kām:

—Kwa apē jajē hō hkēt tā na ka hte mē hkrā kumrār o ri apa. Kwa nā akatāt kōt mē inhmā amnhī jarē. Pa mē ama nē ma akupŷm mra nē mē kot awŷr mē ixrēnh xwŷnhjē mā tanhmā ajarēnh to. Tanhmā na ka hte mē kām amnhī jarēnh to ho ri apa? E kwa mē inhmā amnhī jarē pa mē ama. Anē.

Hāmri nhūm tā hprī hā mē kām amnhī jarē. Amnepē mā mē hkukamā Tirtūm nhŷ hā kapēr jarēnh xwŷnh pē finat Ijais kot hkukamā tanhmā harēnh to nē hā kagā xā hkōt nhūm mē kām amnhī jarē nē mē kām:

—Tōe. Nā kot paj ixprī hā mē amā amnhī jarē ka mē inhma. Amnepēm Tirtūm kapēr jarēnh xwŷnhjē hō pē finat Ijaisja na pre hte mē kām mēhō hkukamā harēnh o ri pa. Mēhō kot mē panhō Pahihti hkukamā htēm nē kapōt ā kutēp mē kām harēnh o pa xwŷnhhta nhūm pre hkukamā harēnh o ri pa. Nē mē kām harēnh o:

Koja nhŷrmā mēhōja kapōt ā mōn pōj nē mē kām tanhmā ujarēnh to ho ri pa. Nē mē kām ujarēnh o: “E mē inhma. Koja Tirtūm tokyx mē pahwŷr mē panhō Pahihti mē nhūm wrŷ nhūm mē piitā omu. Jakamā kwa mē tokyx kutēp tām amnhī nhīpēx o ri apa. Te ho mē kot mēhō kutēp pry ho mex pyrāk o amnhī nhīpēx o ri pa. Jao amnhī nhī ho tām amnhī nhīpēx nē tām axpēn nhīpēx o ri apa. Pahihtita kutēp.”

—Anhŷr o na pre hte finat Ijaisja kot Pahihti hkukamā harēnh o ri pa xwŷnhhta kukamā harēnh anē. Tā paa. Pa na pre Ijaisja ā ixkukamā ijarēnh anhŷr o pa. Pa na pa hte ā Pahihti kutēp mē kām harēnh o ri ixpa anē. Tā ā ixte harēnh anhŷr xwŷnhhta na ra mē pakamā pa ka mē kormā ja hā omunh kēt nē. Kukamā na pa hte mē piitā mē kot hkōt amnhī xunhwŷr ā mē omunh kaxyw gō pix

o mē hkrā kumrār o ri mē hkôt ixpa. Nom na pre ra mē pahwŷr Tirtŷm kot mē pakaxyw ăm xwŷnh̄ta tām mē pahwŷr wrŷ. Ahpumunh tŷx o kot ijakrenh jakamā na pa hte ăm kukwak ri ixpa nē amnh̄i tā hā xpijaam o ri ixpa. Anē.

Juăw Paxis kot mē kām Jejus jahkre hā harēnh

Matēwre 3.11; Makre 1.10; Rukre 3.22

²⁹Tā nhŷm apkati nhŷm Juăw Paxis amnh̄i wŷr Jejus pumu nē mē kot mar o kuhē xwŷnh̄jē mā ihkra ho ahkre nē mē kām:

—E. Onēj Tirtŷm kot mē pakaxyw ăm xwŷnh̄ta tē. Mē pahpē Ijaew na pu htem xatā pahte amnh̄i tomnuj pānhā amnh̄irer kaxyw Tirtŷm mā pahkrit ōwēhti hkra nyw kwŷ hpa nē ho amnh̄i pānhā kām amnh̄irer o papa. No kēt htēm nēj koja nhŷrmā kām mē pahpiitā mē pahte amnh̄i tomnuj pānhā amnh̄irer pa.

³⁰Na pa pre ra mē amā harēnh o: “Te pa ixte wa nē ixkator nē ixtŷr nē ixpa pyrāk. Nom amnepēm kormā ixkēt ri na pre htŷr rāhā nē pa ho pa. Nē ĩ ho wrŷk nē jar kator tā kēp Tirtŷm Kra jakamā urāk nē rāhā nē pa ho pa xwŷnh̄ na. Jakamā kot amnh̄i to rax o kot ijakrenh par.” Anhŷr o pa pre mē amā harēnh o ri ixpa ka prem inh̄ma.

³¹—Ixte mē amā ā harēnh anhŷr tā ijaxwŷja kormā ixte kēp Tirtŷm Kra hā omunh kēt nē ăm hkukamā Tirtŷm nhŷ hā mē amā ā harēnh anhŷr o ri ixpa. Nē hkukamā Tirtŷm mā mē akrā kumrār o ri ixpa. Tā na pa kēp Tirtŷm Kra hā omu nē ā mē amā ahkre anē ka mē omu. Anē.

³²⁻³³Nhŷm pre ā Juăw Paxis mē kām Jejus jahkre anē nē mē kām:

—Nā Tirtŷm na pre ixte mē akrā kumrār o ixpa kaxyw inh̄mā hā karō. Tā na inh̄mā kot mē pakaxyw ăm xwŷnh̄ta o amnh̄irit nē inh̄mā harēnh o: “Koja nhŷrmā Ixkarōja mēhō hwŷr wrŷ nē kuri arĭk. Ka ja hā omu nē kēp Ixkra hā omunh kurē kumrēx. Kojā amnh̄i xō ri amnh̄i pyrā nē mē kām Ixkarō nhōr o pa nhŷm mē hkarō mā agjē.” Anhŷr o inh̄mā harē. Tā na pa ra omu. Na pre Tirtŷm Karō kaxkwa rūm te tuuti pyrā nē hwŷr wrŷk o tē nē ĩkre hā xa.

³⁴Pa ā kot hipēx anhŷr ā omu nē kēp Tirtŷm Kra hā omunh kurē kumrēx. Jakamā na pa ā mē amā ahkre nē mē amā harēnh anē. Anē.

Juăw Paxis kōt pa xwŷnh̄ wa kot Jejus kōt pa hā wa harēnh

Atre 19.4

³⁵Tā nhŷm apkati nhŷm Juăw Paxis axte Jejus pumu. Kot hkôt ri pa ho pa xwŷnh̄ mē wa nhŷri xa nē omunh o xa.

³⁶Nhŷm ra mē hānh̄ tē nhŷm Juăw Paxis omu nē hkôt ri pa xwŷnh̄ wa kām:

—E onēj Tirtŷm kot mē pakaxyw ăm xwŷnh̄ta tē. Nēj koja mē pahte amnh̄i tomnuj pānhā amnh̄ire. Anē.

³⁷Hāmri nhŷm wa kuma nē omu nē ma hkôt tē nē hā ajēt.

³⁸Nhŷm wa omu nē wa kām: “Pa mo na?” Anē nhŷm wa kot kēp mē ahkre xwŷnh̄ ā omunh jakamā kām:

—Nā wa ixte ma akōt ixtēm nē nhŷri anhōrkwy pumunh mā na pa wa akōt tē. Anē.

³⁹Hāmri nhŷm wa kām:

—Tōe. Nā wa kam nē ri ma ixkōt tē. Anē.

Hāmri nhŷm wa kuma nē ma hkôt wa tē nē ōrkwŷ hwŷr pōj nhŷm ra amŷkry nhŷm wa hkôt axā nē kuri ŷr o kamāt hāmri nē kato nē ma akupŷm tē.

⁴⁰Kōt htēm xwŷnh̄jē hōta na pre kēp Andre. Simāw Pētre htō na pre. Nē kaxyw hōja. Wa kumā na pre Juăw Paxis Jejus jahkre nē harē nhŷm wa ma hkôt tē. Tā wa ra akupŷm wa tē.

⁴¹Hāmri nhŷm Andreja htō Simāw wŷr tē nē kām:

—Kwa na pa wa jarāhā Tirtŷm kot mē pakaxyw ăm xwŷnh̄ta pumu. Ma pu hwŷr ka wa ixwar ano ho omu nā. Anē.

Ijaew kapēr kām “Tirtŷm kot mē pakaxyw ăm xwŷnh̄” anhŷrja te kot Gres kapēr kām “Kris” anhŷr jarēnh pyrāk. Ijaew na prem ā Jejus jarēnh anē nē harēnh o: “Tirtŷm kot mē pakaxyw ăm xwŷnh̄.” Anhŷr o harē.

⁴²Jakamā nhŷm ā Andreja htō mā harēnh anē nē ma akupŷm hwŷr o tē. Nē wa hwŷr pōj nhŷm wa omu. Wa kēp Juăw kra hā wa omu hāmri nē Simāw mā kapēr nē kām:

—Pa Simāw. Nā apē Simāw tā kot paj axte atā anh̄ixi hō mē. Kot kaj määnēn apē Septi. Anē.

Mē pakapēr kām Septija te kēp “kēn” jarēnh pyrāk. No Gres kapēr kām te kēp “Pētre” jarēnh pyrāk. No Ijaew kapēr kām kēp “Septi.” Jakamā nhŷm pre Jejus ā Simāw Pētre hā hixi mēnh̄ anē.

Jejus kot amnh̄i kōt Firipti mē Natānaew wa hwŷr ā harēnh

⁴³⁻⁴⁴Tā nhŷm apkati nhŷm ra Jejus pyka pē Garirej wŷr nojarēt nē nhŷri Firipti pumu. Firiptija Andre mē Simāw Pētre wa urāk nē krĭ pē Pesēj nhō xwŷnh̄ na pre. Jakamā nhŷm Jejus nhŷri omu nē amnh̄i kōt kuwŷy nē kām:

—E kwa ma ri ixkōt apa ho apa. Anē.

⁴⁵Hāmri nhŷm kuma nē ma tē nē nhŷri Natānaew pumu nhŷm nhŷri pĭ hpār parpē nhŷ nhŷm omu nē kām:

—Kwa na pa jarāhā finat Mojes kot amnepēm mēhō hā kagā xwŷnh̄ta pumu. Tirtŷm kot mē pakaxyw ăm xwŷnh̄ta na. Tirtŷm nhŷ hā kapēr jarēnh o mē pa xwŷnh̄jaja kot hkukamā harēnh nē hā kagā xwŷnh̄ta. Kēp

Najare nhō xwýnh nē mǎānēn kēp finat Juje hkra. E kwa tokyx pu hwýr ka ixkuxwar ano ho omu. Anē.

⁴⁶ Hāmri nhūm tee ri kot tanhmā harēnh toja ma nē kām:

–Tk. Koký. Najare nhō xwýnh piitā kot amnhī to mexti hā kot kêt we hō kēp Tirtūm kot mē pakaxyw ām xwýnh. Anē.

Hāmri nhūm kām:

–Kwa na ā akapēr anhýr kêt nē. Ma ixkôt tē nē ixpyrà nē ano ho omu mân. Nē rī ā ri akapēr anē. Anē.

Hāmri nhūm kuma nē ma hkôt tē.

⁴⁷ Hāmri nhūm Jejus amnhī wýr wa omu nē kuri mē kuhē xwýnhjē mā Natánaew jarēnh kurē kumrēx nē harēnh o:

–E onēj Ijaew ōja mē pahwýr hpōx o tē. Ām hāmri na hte tām amnhī nhīpēx o pa. Na hte higēt finat Jako kurōm hēx rom ri tanhmā mē kām amnhī to hēx to ho pa hkêt nē. Na hte ām kapēr mex pix o ri kapēr o pa. Anē.

⁴⁸ Hāmri nhūm tee ri amnhī tā kuma nē kām:

–Kwa mēhō na pre ā amā ijarēnh anē? Aa ixte nhýri apumunh kêt kumrēx tā ka ri ām hāmri ā ijarēnh anē. Anē.

Hāmri nhūm kām:

–Nā mēhō kot tanhmā inhmā ajarēnh to hkêt. Ām pa na pa hte inhno ho apumunh o ixpa. Kormā Firipti kot awýr htēm nē amā ijarēnh kêt ri pa ra ixprī hā inhno ho apumu. Na ka kormā pīta parpē nhý pa apumu. Anē.

⁴⁹ Hāmri nhūm tee ri kot hprī hā harēnh ā amnhī tā kuma nē kām:

–Kwa mē ijahkre xwýnh. Pēr ām hāmri apē Tirtūm Kra kumrēx jakamā na ka ā ijarēnh anē. Xep ka na mē ixte amnhī wýr akām ijamak o ixpa xwýnhnta na ka. Nā ka na apē mē ixpē Ijaew nhō Pahihti. Anē.

⁵⁰ Hāmri nhūm Jejus kuma nē kām:

–Nā ām hāmri na ka ixte pī hpar pē apumunh ā ajarēnhja ma nē hkôt pix mā ixpē Tirtūm Kra hā ixpumu. Tā kot kaj ja nhīrō pē axte mēmoj mex o kot ja jakrenh pumu.

⁵¹ Koja nhýrmā kaxkwa axkjē nhūm Tirtūm kapēr o mē wrýk xwýnhjaja kurūm axpēn japa ka mē omu. Finat Jako pyrà nē mē omu. Ixte Tirtūm kot mē akaxyw ixām xwýnh wýr koja mē ā wrýk nē amnhī nhīpēx anē ka ja hā mē omu. Kwa jam ajamaxpēr týx rāhā ho apa. Anē.

2

Jejus kot gō ho mē kām wīhti nhīpēx ā harēnh

¹ Tā nhūm apkati axkrut nē hapēx nhūm Jejus arī Garirej kamā pa. Nhūm krī pē Kanā kamā axpēn mā wahōj wa rer kaxyw nhūm Jejus katorxā ma mē hwýr mō.

² Hāmri nhūm mē amnhī wýr Jejus mē hkôt ri mē ixpa xwýnhjē wý pa mē ijaxwýja ma mē hwýr mō nē ra mē hwýr pōj.

³ Hāmri nē mē hkôt wa hā ixkīnh nē apku nē wīhti hkwy ho ixkōm o ixkrī. Tā nhūm ra wīhti mē kēp hapēx nhūm Jejus katorxāja harēnh ma nē Jejus mā harē nē kām:

–Xē Jejus. Na xep ra mē kēp wīhti hapēx pa. Xāt ka tanhmā mē ho ajuta hto mē? Anē.

⁴ Hāmri nhūm kām:

–Tôe. Kwa tee ri ajamaxpēr kêt nē. Kot paj tanhmā mē kām ho. Nom kot paj kormā ixpē Tirtūm kot mē akaxyw ixām xwýnh ā pa kormā amnhī to amnhīrit kêt nē. Anē.

⁵ Hāmri nhūm katorxā kuma nē mē kām mē àpēnh xwýnhjē hwýr tē nē mē kām:

–An koja Jejus mē awýr tē nē tanhmā mē amā mēmoj tā karō hto ka mē ama nē kām ho anhýr kurē kumrēx. Anē.

⁶ Nhūm mē kuri kēn o poti kēp 6 nē kuhē. Piitā umpým rūnh kumrēx. Kojā hō pyxi nē nýt nē kamā gō kēp 80 rit nē hkwy kamā kēp 100 rit. Ijaew na htem apkur kaxyw nē amnhī nhīhkra kuhōnh jappē rūnh nē kormā apku. Nē apkur pa nē axte amnhī nhīhkra kuhō. Ā mē kot xatā amnhī nhīhkra kuhōnh jakamā nhūm pre htem amnhī ri ā poti rūnh kwý xunhwýr anē. No nhūm ra hkapyr nē kuhē.

⁷ Hāmri nhūm Jejus tē nē omu mē àpēnh xwýnhjē mā kām:

–E mē ma mra nē gō ru nē ho poti kuhē mūj piitā ho nýt pa. Anē.

Nhūm mē kuma nē ma mra nē ho nýt pa.

⁸ Hāmri nhūm mē kām:

–Nā hāmri. Pānhā hō kamā gō hkwy janhi nē o tē nē mē anhō patrāw mā agō ké hkwy ho ixkō nē kamā ama. Anē.

Hāmri nhūm mē mar xā hkôt kām hkwy janhi nē hwýr o tē nē kām kugō.

⁹⁻¹⁰ Nom nhūm gōja arī kēp gō kumrēx kêt nē. Jejus kot tanhmā ho jakamā nhūm ra hpānhā kēp wīhti. Jakamā nhūm mēō patrāw wýr hkwy ho tē nē kām kugō nhūm hkaki nē kamā ama. Nom Jejus kot gō ho hipēx ā omunh kêt nē. Ām htýx ho wīhti kumrēx ā hkamnhīx nē mex kumrēx ā hkaki. Hāmri nē amnhī wýr mjēn nyw xwýnh mā hpa ho apē nhūm hwýr tē nhūm kām:

–Kwa na htem wīhti mex o wa nē mē kām kugō hāmri nhūm mē hpenh pa nhūm mē rī kormā hkôt omnu ho hapu nē mē kām kugō. Tā ka pēr mē axtēm nē wam mē kām omnu nhōr pa hāmri nē kormā mex kumrēxja o hapu nē mē kām agō. Kêt wīhti ja na mex kumrēx. Ām mex o mex. Anē.

Jejus kot gō ho hipēx ā omunh kêt jakamā nhūm ā kām kapēr anē. Ām mē àpēnh xwýnh pixjaja na prem ja hā omu.

¹¹ Nhūm Jejus kormā mē kām aa mē kot mēmoj pumunh kêt ō ho anhýr kêt tā krī pē

Kanã kamã ã më kãm amnhĩ nhĩpêx anhÿr o hkrax. Jao amnhĩ to rax o amnhĩ to rax ã më inhmã amnhĩ to amnhĩrit. Pa më ixpê hkôt ri ixpa xwÿnhjaja ã kot amnhĩ nhĩpêx anhÿr ã omu hãmri nê kêp Tirtùm kot më pakaxyw ãm xwÿnh ã omunh kurê kumrêx.

¹² Tã nhùm Jeus hpãnhã ma krĩ pê Kapanau hwÿr mō. Pa më hkôt ri ixpa xwÿnhjaja nê katorxã nê htōjaja pa më ma xpiitã hkôt mō. Hãmri nê hwÿr pōj nê kamã më hkôt ixpa hã itã apkati grêre nê ma hpãnhã krĩ hō hwÿr ixpa.

Jeus kot Tirtùm nhōrkwÿ hwÿr ar ã harênh Matêwre 21.12-13; Makre 11.15-19; Rukre 19.45-46

¹³ Tã nhùm ra arĩgro pê Pas ahtêp o mō. Pasja ã më ixpê Ijaew na pa htem amnepêp Tirtùm kot pika pê Ejit rùm më inhîgêjtjê kator mã ijamaxpêr kaxyw axpên wÿr akuprō nê hã ixkĩnh. Jakamã nhùm Jeus ma hkwÿjê hkôt krĩ pê Jerujarê hwÿr mō. Pa më ixpê hkôt ri ixpa xwÿnhjaja pa më ma hkôt ixpa. Hãmri nê hwÿr pōj

¹⁴ nê Tirtùm mã amnhĩ jarênh xã hã ixkre hwÿr mra nê ixkre puhã kahêja wÿr agjê. Nhùm më kamã axtem nê mëmoj to wênê ho kuhê. Mōx o wênê nê ôwêhti ho wênê nê tutre ho wênê ho kuhê. Më kot haprôr nê ho Tirtùm mã hkĩnh ã kaxyw më kãm ho wênê. Nê kãxpore ho pinhpanh xwÿnhjaja haxwÿja më kuri hkrĩ.

¹⁵ Hãmri pa më Jeus kôt më hwÿr agjê nê ja hã më omu hãmri nhùm Jeus pê ja omnuj tÿx nê. Jakamã nhùm tee ri më omu hãmri nê amnhĩm mry hkã ho më htak xã nhĩpêx nê ho ixkreja nê më piitã më kator pa. Nê mōx nê ôwêhti nê mëmoj piitã kator pa. Nê kãxpore ho pinhpanh xwÿnhjaja nhùm më kêp më ô mēsti rênh pa nhùm më hikãxpore pykap rōrōk pa nê angrã nê hikwÿ.

¹⁶ Hãmri nhùm Jeus tutre ho wênê xwÿnhjê mã kãm:

—Kwa më anhō tutre jamÿ nê tokyx ma mra. Na htem Inhĩpêéxã nhōrkwÿ kamã mëmoj to wênê hkêt nê. Kêp më ujaarôr xã hã ixkre hkêt. E kwa më tokyx ma mra. Anê.

Nhùm pre ã më kãm kapêr anê nhùm më tee ri kuma hãmri nê ma mrar kurê kumrêx.

¹⁷ Pa më hkôt më ixpa ho ixpa xwÿnhjaja ã kot më hipêx anhÿr ã omu hãmri nê ra Tirtùm kapêr ã kagã htum kot ã amnhĩ nhĩpêx anhÿrja kukamã hã kagãta mã ijamaxpêr kurê kumrêx. Kagã kot amnepêp Jeus kukamã te ra ã kapêr anhÿr pyrãk o harênh. Nê harênh kot:

Na pa hte Tirtùm nhōrkwÿ ho mex rãhã ho ixpa. Nhùm mëmoj punuj hwÿr axã pa omu nhùm ja inhmã mex kêt nê.

Anhÿr o kot hkukamã harênh jakamã na pa më ã Jeus kot më hipêx anhÿrja ã omu hãmri

nê ra hkukamã hã kagãta mã ijamaxpêr kurê kumrêx.

Ijaew krãhtùmjaja kot Jeus kukjêr ã më harênh

¹⁸ Tã nhùm Ijaew krãhtùmjaja tee ri Jeus kot ixkreja nê më kator ã omu hãmri nê hwÿr mra nê kãm:

—Pa. Kwa mon ka ri ã Tirtùm mã amnhĩ jarênh xã hã ixkreja nê më kator anê? Mêhō na we më ixwÿr amê ka ÿ hã ã më hipêx anêhti? Nã xã Tirtùm na më ixwÿr amê? E më inhmã aa më ixte mëmoj pumunh kêt ô ho anê. Pa më ja hã apumu hãmri nê Tirtùm kot më ixwÿr amênh xwÿnh ã apumunh kurê kumrêx. E kwa tokyx më inhmã ho anê. Anê.

¹⁹ Hãmri nhùm më kuma nê më kãm amnhĩ jarê. Nom amnhĩ tã kuxi nê më kãm awjarê nê më kãm:

—Nã kot paj aa më ate mëmoj pumunh kêt ô ho pixi nê më amã ho anê ka më omu. Tirtùm nhōrkwÿ jaa. Kot kaj më agrã pa itã apkati axkrunêpxi nê akupÿm hipêx ka më ja hã ixpumu.

²⁰⁻²² Anhÿr o më kãm kapêr. No ãm ixkreja jarênh kêt nê. Na pre ãm amnhĩ tã kuxi nê ã më kãm kapêr anê. Më kot hpĩr nhùm htyk ã apkati axkrunêpxi nê akupÿm htĩr ã më kãm ã amnhĩ jarênh anê. Te më kot Tirtùm mã amnhĩ jarênh xã hã ixkreta grãnh nhùm hã apkati axkrunêpxi nê akupÿm kot hipêx parta pyrãk ã hã kuxi nê ã më kãm amnhĩ jarênh anê. Jakamã nhùm mëhpri hã mar mex kêt nê. ãm tee ri kuma nê kãm:

—Tk. Kwa ixkre ja na prem hipêx kaxyw nê hã amgrã sohtō rax nê hipêx. Hã amgrã pê 46 nê hipêx par kênã kot ka kêt atã apkati axkrunêpxi pix nê akupÿm hipêx. Anê.

Më kot hpri hã mar kêt jakamã na prem ã kãm kapêr anê. Pa më hkôt më ixpa ho ixpa xwÿnhjaja ã më kãm kapêr anhÿrja ã kuma nê hã inhnohtÿx rãhã ho ri ixpa. Tã nhùm më kot Jeus pĩr nhùm hã apkati axkrunêpxi nê akupÿm htĩr nhō arĩgrota ã pa më kot ã amnhĩ jarênh anhÿrja mã ijamaxpêr kurê kumrêx. Nê axpên mã:

—Hêxta waa nê. Xep ãm hãmri na pre Pahihti amnhĩ kukamã ã amnhĩ jarênh anê. Më kot hpĩr nhùm htyk ã apkati axkrunêpxi nê akupÿm htĩr ã amnhĩ kukamã amnhĩ jarênh mex nê. Te më hkôt më kot Tirtùm nhōrkwÿ grãnh par nhùm hã apkati axkrunêpxi nê akupÿm hipêx ã amnhĩ jarênh pyrãk. ãm hãmri na pre amnhĩ kukamã ã amnhĩ jarênh anê. Anê.

Jeus kot më pajamaxpêr kôt më pah-pumunh ã harênh

²³ Tã nhùm Jeus më hkôt më ixpa ho ixpa xwÿnhjaja arĩ Jerujarê kamã ri ixpa ho ixpa. Nhùm ra arĩgro pê Pasja kato nhùm më piitã hkĩnh kaxyw axpên wÿr akuprō. Nhùm Jeus

mē kām aa mē kot mēmoj pumunh kêt kwý ho anhýr o ri mē hkôt pa. Nhùm mē omu nhùm mē hkwyjaja Tirtüm kot mē pakaxyw âm xwýnh ã hkôt hamaxpêr tâ no âm hkôt hamaxpêr týt kêt nê.

²⁴ Jakamã nhùm Jejus amnhî tâ mē hamaxpêr ã mē omu nê hamaxpêr o:

–Nà mē kot ixkôt hamaxpêr kryre xwýnhjaja koja mē hã apkati grêre nê ixto hamakêtkati nê htýt ri pa. Anê.

²⁵ Jejus kot mē pahte pahtýt ri amnhî tomnuj o papa hã mē pahpumunh par. Nê pahtýt ri pajamaxpêr punuj o papa hã mē pahpumunh par. Jakamã na pre ã mē harênh anê.

3

Jejus mē Nikotê wa kot axpên mã kapêr ã wa harênh

Juāw 1.12-13; mãânên Wam Pêtre 1.23

¹ Tã nhùm Parijew nhô xwýnhjê ô pê Nikotê. Mãânên kêp Ijaew krãhtümjê hô.

² Jakamã na pre Jejus jarênh ma nê kãm omunh prãm nê. Hãmri nê hkwy pymaj kamãt kãm hwýr tê nê omu nê kãm:

–Pa mē ijahkre xwýnh. E ot pa awýr tê. Ra mē ixte apumunh mex. Tirtüm na pre ate mē ijahkre ho apa kaxyw mē ixwýr amê ka mē ixwýr wrý. Mêhõ koja apyrã nê aa mē inhã mē kot mēmoj pumunh kêt kwý ho anhýr o pa? Nã amrakati kumrêx. Kop apu Tirtüm kot mē ixwýr amênh kêt ronhýt ka ã amnhî nhîpêx anhýr kêt nê. Anê.

³ Hãmri nhùm kuma nê tanhmã kãm kapêr to. No âm amnhî tâ kuxi nê kãm awjarê nê kãm:

–Na htem piitã mē katorxã nhôxã hkre rüm hapôj. Tã Tirtüm kãm mē piitã axte mē hapôx prãm. Jakamã kot kaj mē akator o axkrut kêt nê hãmri nê nhýrmã Tirtüm ri atír tùm nê apa ho apa hkêt nê. Âm hkrajê pix na htem kuri htír tùm nê pa ho pa. Jakamã kwa jam ajamaxpêr týt nê ri ho apa. Anê.

⁴ Hãmri nhùm Nikotêja kuma nê tee ri ã kot kãm kapêr anhýrja kukamã hamaxpêr nê kãm:

–Kwa ra ixãptãr kênã kot pa kêt tanhmã amnhî to nê akupým ixkatorxã nhôxã hkre hwýr axã nê axte kurüm ixkato. Anê.

⁵⁻⁷ Hãmri nhùm Jejus kãm:

–Nà na hte mē hkrarejaja mē katorxã nhôxã hkre rüm kagô hkôt hapôj hãmri nê kêp katorxã mē hipêêxã wa hkwyj. Jao wa kot amnhî nhîpêx kôt amnhî nhîpêx o pa. Ja pyrã nê ka mē atô amã apê Tirtüm kra hprãm hã kot kaj amnhî to awý nhùm wa Ixkarôja akarô mã axã hãmri ka ra apê hkraa. Te ra axte akator pyrãk o amnhî nhîpêx. Nê te mē hkra kot katorxã nê hipêêxã wa kot amnhî nhîpêx kôt amnhî nhîpêx o pata pyrã nê apãm Tirtüm kot

amnhî nhîpêx kôt amnhî nhîpêx o ri apa. Nom koja Tirtüm mē wa Ixkarôja akarô mã ãr kêt nê ka apê hkra hkêt nê. Jao te axte akator kêt pyrãk o amnhî nhîpêx. Jakamã na pa amã te ate akator pijakrut o amnhî nhîpêx pyrãk o amã ã ja jarênh anê. Kwa jam ajamaxpêr týt rãhã ho ri apa. No ama nê tee ri amnhî kukamã ajamaxpêr kêt nê.

⁸ –E pa ixprî hã amã ja jarê ka inhma. Na hte kók kãm nhýhým apêr prãm xã hkôt apêr o pa. Pu mē kamã ama no âm pano ho nhýhýnh môr xã hkôt omunh kêt nê. Nê nhýhým ma môr xã hkôt omunh kêt nê. Ja pyrã nê na hte Tirtüm mē wa Ixkarôja mē hkaxwýnh mã agjê nê mē ho Tirtüm kra nom nhùm mēhprî hã kot tanhmã mē ho hã amnhî tâ omunh kêt nê. Anê.

⁹ Hãmri nhùm Nikotê ã Jejus kot kãm kapêr anhýr ã kuma nê tee ri hamaxpêr nê kãm:

–Kwa na pa ixprî hã amar kêt nê. Anê.

¹⁰ Hãmri nhùm kãm:

–Kwa mon ka hte Tirtüm kapêr tùm o Ijaew jahkre ho apa tâ aprî hã ixkapêr mar kêt nê?

¹¹ Ixte mēmoj pumunh xã hkôt ixte mē amã harênh o ixpa htã ka mē apê Ijaew krãhtümjaja mē amã ixkapêr mar prãm kêt nê. ã mē ate anhýr kumrêx. Kwa jam ajamaxpêr týt nê.

¹² Na pa ra Tirtüm kot jar tanhmã amnhî nhîpêx to hã harênh o ixpa htã ka mē âm ama nê ixkôt ajamaxpêr kêt nê. Jakamã xã kot pa hpãnhã mē amã kaxkwa kamã tanhmã kot amnhî nhîpêx to hã harê ka mē ama nê mar týt nê? Nã kot ka mē ama nê âm ama nê hkôt ajamaxpêr kêt nê.

¹³ Mêhõ na we ra ma kaxkwa hwýr api nê kamã mēmoj mex pumu nê man akupým mē awýr wrý nê mē amã tanhmã harênh to? Nã amrakati kumrêx. Âm paxipix ixpê Tirtüm kot mē akaxyw ixãm xwýnh na pa pre amnê kurüm mē awýr wrý hãmri nê ixprî hã mē amã tanhmã harênh to ho ri ixpa.

¹⁴ –Amnepem finat Mojesja kormã kapôt ã mē o pa ri na pre mē kãm kãx o kagã karôja nhîpêx nê kýxpê mē kãm kunhõ. Kagã kot mē hkamnhar xwýnhjaja kot hwýr rit nê omunh nê akupým mex kaxyw mē kãm kunhõ. Tã ixpê Tirtüm kot mē akaxyw ixãm xwýnh kot paj nhýrmã kagã karôta pyrã nê kýxpê pi kahpa hã ajêt.

¹⁵ Ka mē te mē kot kagã karô pumunh nê akupým mexta pyrã nê amnhî kaxyw inhã ajamaxpêr nê ixkôt amnhî xunhwý hãmri nê nhýrmã Tirtüm mē wa ixri atír tùm nê amex rãhã nê apa ho apa.

¹⁶ –Tirtüm kãm pika piitã hkôt mē apiitã mē ajapê htýt. Nê mē ajapê xãj na pre ixpê Kra hã ipxyxi hã mē awýr inhmê. Ka mē atô amnhî kaxyw ixkôt ajamaxpêr nê ixkôt amnhî xãm. Hãmri nê nhýrmã atyk tâ nhùm

Tirtüm akupÿm ato atír ka wa ixkuri atír tùm nê amex ráhã nê apa ho apa. Hãmri nhùm Tirtüm aa amnhî nê nhÿhÿm amênh kêt kumrêx.

¹⁷ No mê ate amnhî tomnuj mÿrapê tanhmã ixte mê anhîpêx to kaxyw na pre mê awÿr inhmênh kêt nê. Æm ixkukwak ri mê atír tùm nê mê amex ráhã apa ho apa hprãm xãj na pre mê awÿr inhmê pa mê awÿr wrÿ.

¹⁸ Jakamã kot ka mê atõ amnhî kaxyw ixpê Tirtüm Kra hã ixkõt ajamexpêr nê ixkõt amnhî xãm nhùm Tirtüm ixtã apumu nê ate amnhî tomnuj mÿrapê tanhmã anhîpêx to hkêt nê. No kêt mê kot ixkõt amnhî xunhwÿr kêt xwÿnhjaja na Tirtüm ma mê kot amnhî xã htÿx kamã hamak tùm xã hwÿr mê pa mã xwÿnhjê hã mê harê. Mê kot ixkõt amnhî xunhwÿr kêt mÿrapê. Anê.

Mê kot amnhî tomnuj o hpimxur prãm kaprÿ ã mê harênh

¹⁹ Nhùm Jejus arí Níkotê mã kapêr nê kãm: —Na pre Tirtüm amnê pika hwÿr mê awÿr inhmê. Mê ate amnhî tomnuj xwÿnh ã amnhî pumunh kaxyw mê awÿr inhmê. Tã nhùm mê ohtõ nê amnhî tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê.

²⁰ Ra ixprí hã ixte mê kot tanhmã amnhî tomnuj to ho pa hã mê omunh mex jakamã mê kãm ixkapêr mar prãm kêt. Nê ixte mê kot tanhmã amnhî tomnuj to ho pa hã mê harênh pymaj ixkõt kãm pa hprãm hkêt nê.

²¹ No kêt mê kot ixkõt amnhî xunhwÿr xwÿnhjaja na mê kot amnhî nhîpêx o pa hã hpijaãm kêt. Na htem ãmnhix ixkõt amnhî nhîpêx o pa. Jakamã koja mê piitã ja hã mê omu nê Tirtüm kot tanhmã mê hkrã hto nhùm mê ra kãm hkõt pix mã amnhî nhîpêx ho pa hprãm ã mê omunh kurê kumrêx. Anê.

Nhùm pre ã Jejus Níkotêja mã kapêr anê.

Juãw Paxis kot Jejus jarênh o pa hã harênh Juãw 1.19-28

²² Tã pa mê ixpê Jejus kôt ri ixpa ho ixpa xwÿnhjaja Jejus kôt Jerujarê rüm ijapôj nê pika pê Jutej kwÿ kamã ixpa. Jejus nhÿ hã Tirtüm mã mê hkrã kumrãr o ri mê hkõt ixpa.

²³ Nhùm finat Juãw Paxis haxwÿja mê ixpyrà nê mê hkrã kumrãr o pa. Krí pê Sarí htã krí pê Enõ mÿri pyhti rax jakamã nhùm pre htem hwÿr mra nhùm kamã mê hkrã kumrã.

²⁴ Kormã mê kot haxãr kêt ri nhùm kamã mê hkrã kumrãr o pa.

²⁵ Rôm nhùm Ijaew hõja Juãw Paxis kôt mê pa ho mê pa xwÿnhjê hwÿr tê nê Juãw Paxis kot mê hkrã kumrãr ã tanhmã mê hkukjêr to nhùm mê kuma nê tee ri hã axpên kukjêr o kuhê.

²⁶ Hãmri nê akupÿm Juãw Paxis wÿr tê nê kãm:

—Kwa mê ijahkre xwÿnh. Pyhti pê Jotãw nhîkjê hã ate mêhõ pumunh nê tanhmã mê inhmã harênh to xwÿnhhta kôt mê pa ho mê pa xwÿnhjaja na xep htem apyrã nê mê hkrã kumrãr o pa nhùm xep mê ra ohtõ nê mê pahkaga nê mê hkõt pa. Kwa xã ja amã mex nã? Anê.

²⁷ Hãmri nhùm mê kuma nê mê kãm:

—Tÿ ja mex kênã. Tirtüm kãm hprãm xã hkõt na htem mê hwÿr mra nhùm mê ixpãnhã mê hkrã kumrã. Nã ja mex.

²⁸ Ixpê Tirtüm kot mê pakaxyw ãm xwÿnh kêt. Na pa pre ra mê amã ja hã amnhî jarê ka prem inhma. Æm hukukamã na pre Tirtüm amnê inhmê pa mō nê ã jar ri ixpa anê.

²⁹ —Te ixte mê umre kot amnhî nhîpêx pyràk. Na htem axpên mã mê rer kaxyw nhùm mê umreja myta wÿr tê nê hpa hã kupy nê ma ni hwÿr o tê nê axpên mã wa kure. Hãmri nhùm hpãnhã mêhõja axpên tã wa hakre. Nhùm umreja wa kuri hkînh nê mar o xa. Tã te ixte mê umre kot amnhî nhîpêx pyràk jakamã koja mê ma Tirtüm kot mê pakaxyw ãm xwÿnhhta wÿr mra nê kapêr ma pa mê harênh ma nê ixkînh nê.

³⁰ Na htem mê umre hã hkînh kêt nê. Mjên nyw xwÿnhja ã na htem hkînh. Tã ja pyrà nê koja mê axte ixte mê kãm Jejus jarênh mar kaxyw ixwÿr mra nê kêt nê. Æm hwÿr koja mê hpãnhã mra nê tãm mar o kuhê. Ja mex kumrêx.

³¹ Jejus kêp kaxkwa rüm amnê mê pahwÿr wÿrÿk xwÿnh jakamã kot amnhî to rax o kot mê pahpiitã mê pajakrenh par. Mê papajaja mê pahpê pika nhõ xwÿnh jakamã Jejus kînhã mê pahte mêmoj piitã omunh tohtuj anhÿr. Nê pika nhõ xwÿnhjê jamaxpêr pix o pajamaxpêr o ri papa.

³² —Na hte Jejus mê kãm kaxkwa kamã kot mêmoj pumunh xwÿnh kwÿjê jarênh o pa. Nê kamã kot mêmoj mar xwÿnh kwÿ jarênh tã nhùm mê ohtõ nê kuma nê ãm kuma.

³³ No mê kot mar nê amnhî kaxyw hkõt hamaxpêr xwÿnhjaja na htem kuma nê axpên mã harênh o: “Nã ãm hãmri na ã Tirtüm kapêr jarênh anê. Nã Tirtüm kapêr mex kumrêx.” Anhÿr o axpên mã harê.

³⁴ —Tirtüm na pre mê pahwÿr Jejus mê nhùm amnê mê pahwÿr wrÿ nê Tirtüm Karõ nhÿ hã mê pamã kapêr jarênh o ri mê pahkõt pa.

³⁵ Tirtüm kãm Krata japê htÿx kumrêx jakamã na pre ihkram mêmoj piitã haxãr pa nhùm urák nê hihtÿx o hihtÿx nê mêmoj piitã ho amnhîptãr o pa.

³⁶ Jakamã mê kot amnhî kaxyw hkõt hamaxpêr nê hkõt amnhî xunhwÿr xwÿnhjaja koja mê nhÿrmã wa kuri htír tùm nê mex ráhã nê pa ho pa. No mê kot hkaga

xwýnhjaja koja mẽ ã amnhĩ nhĩpêx anhÿr kêt nê. Koja Tirtũm mẽ kot amnhĩ xà htÿx kamã hamak tũm xàta wÿr mẽ rênh pa. Anê.

4

¹ Tã nhũm Parijew nhõ xwýnhjaja Jejus jarênh ma. Nê hkõt mẽ pa xwýnhjaja ohtõ rax o Juāw Paxis kõt mẽ pa xwýnhjê jakrenh ã mẽ harênh ma. Nê Jejus kot mẽ hkrã kumrãr rax o Juāw Paxis jakrenh ã harênh ma.

² Nom Jejus na pre mẽ hkrã kumrãr kêt nê. ãm mẽ ixte hkõt ri mẽ ixpa ho mẽ ixpa xwýnhjaja na pa prem kãm mẽ hkrã kumrãr o ri ixpa.

³ Jakamã nhũm Jejus amnhĩ tã Parijew nhõ xwýnhjê jarênh ma hãmri nê mẽ kêp kato nê hpãnhã ma akupÿm Garirej wÿr mō pa mẽ ma hkõt ixpa.

Mêhõ ni kot amnhĩ nhĩpêx nyw o amnhĩ nhĩpêx ã harênh

Juāw 7.37-39; mãänên Apokarip 22.1, 22.17

⁴ Tã pa mẽ mō nê kormã pyka pê Samar mã axã nê hkõt ixpa.

⁵ Hãmri nê krĩ pê Sika hwÿr ixpõx o mō. Amnepêm finat Jako kot hkra Jujê mã pyka nhõr xwýnh tã krĩa xa pa mẽ ra hwÿr ixpõx o mō.

⁶ Nê amnepêm Jako kot gôm kakwýnhata wÿr pōj. Nhũm ra kaxkwa nhĩpõk ri myt nhÿr mẽ nhũm Jejus ra mrar ryy kurê hkêngrã nê. Hãmri nê gôm kakwýnh mÿ ri tēm nê hkõkõt o nhÿ.

⁷⁻⁸ Hãmri pa mẽ kure nê mẽ ixãpkur xà japrõr kaxyw ma krĩm ijapêx.

Rôm nhũm Samar nhõ xwýnh nija amnhĩm gō runh mã tē nhũm Jejus omu nê kãm:

–Kwa inhmã anhõ gōta kwý pa ho ixkõ. Anê.

⁹ Nhũm amnhĩ jaêr pê amnhĩ tã kuma. Ijaew na pre htem Samar nhõ xwýnhjê kutã apkur rÿ mẽ hkõt ri pa rÿ mẽ ho mjên kêt nê. Rÿ mẽ kutã hkõm kêt nê. Tã nhũm Jejus ã gō hã nija wÿr anê nhũm tee ri amnhĩ tã kuma nê kãm:

–Xê pêr apê Ijaew tã axtem nê ri gō hã ixwÿ. Xà ate ixpê Samar nhõ xwýnh ã ixpupunh kêt? Hãn ka ri hã ixwÿ. Anê.

¹⁰ Hãmri nhũm kuma nê kãm amnhĩ jarê. No ãm amnhĩ tã kuxi nê kãm kapêr nê kãm:

–Nà aprĩ hã ate ixpupunh ro nhÿx ka kam gō hã ixwÿ pa amã hkwy. Inhõ gō na axte mã. Tirtũm kãm amarĩ mẽ amã õr prãm. Na htem ho ixkõ hãmri nê mex nê htĩr tũm nê pa ho pa. Anê.

¹¹ Hãmri nhũm tee ri kot ã õ gō jarênh anhÿrja ã kuma nê htÿx ho gôm kakwýnh kamã gō hã hkamnhĩx nê tee ri hkukamã hamaxpêr nê kãm:

–Xê tanhmã kot ka kêt amnhĩ to nê inhmã gōta kwý janhi? Mo kaxyw anhõ gō janhir xà? Gôm kakwýnhata upÿm rax kênã kot ka kêt tanhmã amnhĩ to nê hkwy janhi. Nhÿhÿnh kot ka anhõ gō jarênh xwýnhata kwý janhi pa ho ixkõ hãmri nê ixĩr tũm nê ixpa ho ixpa?

¹² Mē inhõ gôm kakwýnhja amnepê mã mẽ panhĩgêt finat Jako nhõ gôm kakwýnh na pre. Jako hkwyjaja na prem hkakwý nhũm kamã gō kato nhũm pre htem hanhi nê ho hkõm o pa. Nê hkrajaja nê hkrit piitã ho hkõm o pa. Jakamã na pre mẽ ixpê hkanrêhã htãmnhwÿjê mã hkaga. Tã xep axtem anhõ gō. Mē kot ho hkõm nê htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anê.

¹³ Hãmri nhũm Jejus kãm:

–Nà mẽ anhõ gōta na htem ho ixkõ nê arĩ kãm kōr o pa.

¹⁴ No ixte amã gō jarênh xwýnhata kot ka hkwy ho ixkõ hãmri nê axte amã kōr kêt kumrêx nê apa. Nhũm te akaxwýnh kãm hinore hprõt pyrãk o ka amnhĩ nhĩpêx. Hãmri nê te hinore kamã gōja aa grã hkêt pyrã nê aa ajapêx kêt kumrêx. Nhÿrmã atyk tã akupÿm atĩr nê atĩr tũm nê amex rãhã apa ho apa. Anê.

¹⁵ Nhũm nija kuma hãmri nê kãm:

–Xõwehe? Xê tō tokyx inhmã anhõ gōta kwý. Pa ho ixkõ nê axte inhmã kōr kêt nê ixpa. Nê axte amnê amnhĩm gō janhir mã inhmarr kêt nê. Xê tokyx inhmã hkwy mẽ? Anê.

Tÿx gō kumrêx ã hkamnhĩx nê ã hã àhwÿr anê.

¹⁶ Hãmri nhũm kãm:

–Tō ma akupÿm krĩm tē nê amjên japrõ nê man akupÿn ixwÿr wa tē. Anê.

¹⁷ Hãmri nhũm tee ri kuma nê kãm:

–Ma mo inhmjên? Inhmjên kêt na pa hte ri ixpa. Anê.

Hãmri nhũm kãm:

–Tÿ. Nà ãm hãmri na ka ã amnhĩ jarênh anê.

¹⁸ Na ka pre ra amjên kêp 5. Nê my mẽ ri war apa xwýnh ata te kêp amjên pyrãk nom kêp amjên kumrêx kêt. Anê.

¹⁹ Hãmri nhũm amnhĩ jaêr pê kot ã kãm kapêr anhÿrja ma hãmri nê kãm:

–Xê pêr aprĩ hã ate ixpupunh par pyrãk. Mãn apê Tirtũm nhÿ hã kapêr jarênh o mẽ pa xwýnhjê hõ mãn ka mẽ?

²⁰ Xê inhmã mẽmoj jarê. Nhÿhÿm kot paj wem axpên kõt mra nê Tirtũm mã mex o mex ã harê? Amnepê mã mẽ panhĩgêtjaja na prem hixêt mũj nhũmõ ã api nê hã kãm amnhĩ jarê nê kãm mex o mex ã harê. No mẽ apê Ijaew na ka htem krĩ pê Jerujarê pix kãm mẽ ixte axpên kõt mrar nê ã amnhĩ nhĩpêx anhÿr ã mẽ inhmã karõ. Xà hixêt

nhĩmök ã mẽ ixte kãm amnhĩ jarẽnhja xà apê omnuj mẽ? Ma xà apê omnuj kêt? Anê.

²¹ Hãmri nhũm Jejus kãm:

—Nà kot kaj mẽ nhỹrmã ãm Jerujarê pix kãm rỹ hixêt mũj nhĩmök pix ã axpẽn wýr akuprõ nê Tĩrtũm mã amnhĩ jarẽnh kêt nê.

²² Mẽ apê Samar nhõ xwýnhjaja mẽ ate Tĩrtũm mã mex o mex ã harẽnh o apa htã aprĩ hã kot amnhĩ nhĩpêx ã omunh kêt. Nê tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nê tanhmã hamaxpêr to hã omunh mex. Mẽ inhĩo kukwak ri koja Tĩrtũm mẽ kot hkõt amnhĩ xunhwýr xwýnh piitã nê mẽ kot amnhĩ tomnuj rênh pa.

²³ Tã koja mẽ piitã Mẽpahpãm Tĩrtũm mã mex o mex ã harẽnh kaxyw nhỹhỹm pa hkêt nê. Koja mẽ nhỹri pa xà kamã mẽ õpinh xà kaxwýnh kãm ã kãm amnhĩ jarẽnh anhỹr o pa. Ja na Tĩrtũm kãm hprãm. No nhỹhỹm mrar nê nhỹri kuhê xà pix kamã kãm amnhĩ jarẽnhja nhũm kãm hprãm kêt nê.

²⁴ —Nê Tĩrtũmja mẽ pahpyrà nê ĩ hkêt jakamã na te kaxkwa nê pika piitã hkõt pa ho pa. Jakamã na htem nhỹri pa nê õpinh xà kaxwýnh kãm amnhĩ kaxyw kãm hamaxpêr nê kãm mex o mex ã harê nhũm ra amnhĩ tã mẽ kuma. ã mẽ kot amnhĩ nhĩpêx anhỹrja na kãm hprãm. Anê.

²⁵ Nhũm pre ã Jejus nija mã kapêr anê nhũm kuma nê kãm:

—Ma koja xep nhỹrmã Tĩrtũm kot mẽ pakaxyw ãm mã xwýnh pê Krisja mẽ pahwýr wrý hãmri nê hprĩ hã mẽ pamã mẽmoj piitã ho amnhĩrit pu mẽ kuma. Anê.

²⁶ Hãmri nhũm kãm:

—Kwa nhũm paa. Ixte amã ixkapêr xwýnhjaja ixpê Kris na pa. Jakamã na pa ixprĩ hã amã ã ixkapêr anê. Anê.

²⁷ Nhũm pre ã kãm amnhĩ jarẽnh anhỹrja rôm pa mẽ ixte hkõt ri mẽ ixpa ho ixpa xwýnhjaja ra ixujaprõr pa nê akupýn hwýr ixpõx o mra. Hãmri nê amnhĩ jaêr pê kot Samar nhõ xwýnh nita mã kapêr ã omu nê tee ri hkukamã ijamaxpêr nom tanhmã hã hkukjêr to hkêt nê. Nija kêp Samar nhõ xwýnh tã nhũm ãnhĩx kãm kapêr o nhỹ. Pa mẽ omu nê ãm omu nê tanhmã hã kãm nê hkêt nê.

²⁸ Hãmri nhũm nita gôm kakwýnh mýr ri õ poti re nê ma akupým krĩm tẽ nê hkwýjẽ mã awjarê.

²⁹ Nê mẽ kãm:

—Xê mẽ tokyx ma ixkõt gôm kakwýnh wýr mra nê mẽ rĩ mẽhõ my mũj pumu. Tĩrtũm kot mẽ pahwýr mẽnh mã xwýnhja na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkõt mra nê ixpyrà nê kapêr ã ama. Anê.

³⁰ Hãmri nhũm mẽ kuma nê ma hkõt Jejus wýr mrar kurê kumrêx.

³¹ Rôm pa mẽ ixte Jejus kõt ri ixpa ho ixpa xwýnhjaja tee ri mẽ ixàpkur xà ho Jejus ma nê kãm:

—E ota mẽ panhõta. Kwa mẽmoj py nê aku mãn.

³² Anhỹr tã nhũm mẽ inhma nê tanhmã mẽ inhmã amnhĩ jarẽnh to. Nom amnhĩ tã kuxi nê amnhĩ jarê nê mẽ inhmã:

—Nà kormã. Inhõja axtem na. Mẽ ate inhõja pumunh kêt. Anê.

³³ Hãmri pa mẽ kuma nê tee ri hã axpẽn kukja nê axpẽn mã:

—Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anê.

³⁴ Hãmri nhũm mẽ inhma nê mẽ inhmã:

—Nà mẽhõ kot kêt ri inhmã mẽmoj to mra pa kuku? Kot paj kot mẽ awýr inhmẽnh xwýnhja mã tanhmã amnhĩ nhĩpêx to hãmri nê te ra ixàpkur mex nê hã ixihitýx mex pyrãk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyrãk.

³⁵ Anhỹr o mẽ inhmã amnhĩ jarê. Hãmri nê ra Samar nhõ xwýnhjaja mẽ ixwýr mrar ã mẽ omu nê mẽ inhmã tanhmã mẽ harẽnh to nom mẽ hã kuxi nê mẽ harê nê mẽ harẽnh o:

—Kot kaj mẽ axte mẽ atã mytwrý kêp 4 hãmri nhũm ra mẽ apur kãm mẽ anhõja hamýnh mã tãm nê. Nom kormã. E ka mẽ pahwýr mẽ mrar xwýnh nêj pumu. Ra mẽ kot amnhĩ kaxyw ixkõt hamaxpêr nê ixkõt amnhĩ xunhwýr mã tãm jakamã te mẽ apur kãm ra mẽ anhõ jamýnh mã tãm pyrãk. Jakamã ka mẽ atõ ma mẽ hwýr mõ nê mẽ kot amnhĩ kaxyw ixkõt hamaxpêr nê ixkõt amnhĩ xunhwýr kaxyw mẽ kãm ijarê. Hãmri nê te ate ixpur kãm inhmã inhõ jamýnh xwýnh pyrãk o amnhĩ nhĩpêx.

³⁶ —Jakamã koja mẽhõ kumrêx mẽ hwýr tẽ nê mẽ kãm Tĩrtũm kapêr jarê hãmri nê te kêp õ pahi mã hpur kãm ahkre ho pa pyrãk. Nhũm mẽ kot mar xwýnhjaja kuma nom kormã hprĩ hã mar týx kêt nê. Tã kot kaj mẽ atõ wamta kõt mẽ hwýr tẽ nê mẽ kot ixkõt amnhĩ xunhwýr kaxyw aprĩ hã mẽ kãm ijarẽnh o mẽ hkõt apa hãmri nê te apê mẽ anhõ pahi mã hpur kãm axujamýnh xwýnh pyrãk. Hãmri nhũm mẽ hkwýjaja mẽ ama nê ixkõt amnhĩ xunhwýr nê ixkõt ri amnhĩ nhĩpêx o pa. Hã koja nhỹrmã mẽ apyrã nê Tĩrtũm mẽ wa ixri mex rãhã nê htĩr tũm nê pa ho pa. Ka mẽ amnhĩ tã mẽ omu nê akĩnh nê apa. Te mẽ kot mẽ hpur kãm ahkre xwýnhjaja nê mẽ kot hamýnh xwýnhjaja mẽõ rũnh pumunh nê hkĩnhja pyrãk.

³⁷ —Na htem tõhã ã mẽ pur kãm mẽ ãpênh xwýnhjê jarẽnh anê nê mẽ harẽnh o: “Axtem mẽ ahkre xwýnhjaja nê axtem mẽ kot

hamýnh xwýnhjaja.” Anê. Tã te mē ate mē ujārēnh ja pyrãk.

³⁸ Na pa pre ra ma mē hwýr mē arê. Mē ate aprí hã mē kãm ijarēnh nhũm mē kot mē amar nê amnhí kaxyw ixkôt hamaxpēr nê ixkôt amnhí xunhwýr kaxyw. Nom mē kajaja na ka prem akumrēx mē hwýr amrar nê mē kãm ijarēnh kêt nê. Tirtũm kapēr jarēnh o mē pa xwýnhjaja na prem kumrēx mē hwýr mra nê ixkukamã mē kãm ijarēnh o ri mē hkôt pa. Te mē kot hpur kãm ahkre ho pata pyrãk. Tã kot kaj mē hpãnhã mē kot amnhí kaxyw ixkôt amnhí xunhwýr kaxyw aprí hã mē kãm ijarēnh o apa. Jakamã te mē ate mē hpur kãm mēõ jamýnh xwýnh kot amnhí nhípēxta pyrãk. Anê.

Mē hkwý kot amnhí nhípēx nyw o amnhí nhípēx ã mē harēnh

Sikũn Korít 5.17; Wam Juãw 4.14

³⁹ Rôm nhũm Samar nhõ xwýnh kwýjaja nija kot mē kãm amnhí jarēnh ma hãmri nê urãk nê amnhí kaxyw Jejus kôt hamaxpēr. Na pre ra amnhí tã tanhmã mē kãm Jejus jarēnh to nê mē kãm harēnh o:

–Ma aa kot nhýri ixpumunh kêt tã ra kot hprí hã ixpumunh par. Ixte tanhmã amnhí nhípēx to hã ixpumunh par.

Anhýr jakamã nhũm mē kuma nê urãk nê amnhí kaxyw hkôt hamaxpēr kurê kumrēx.

⁴⁰ Hãmri nê man mē ixwýr mra nê Jejus pumu nê amnhí wýr kuwý nê kãm:

–Pa. E kwa mē tokyx anojarêt kêt nê. Mē ma mē ixkôt mē inhõ krí hwýr mō nê mē ixkôt ri apa grire nê arí ma mō. Anê.

Hãmri nhũm mē kuma nê mē kãm:

–Tõe. Nã kot paj mē anê. Anê.

Hãmri pa mē ma mē hkôt mō nê mē õ krí kamã mē hkôt ri ixpa hã apkati axkrut.

⁴¹ Nhũm Jejus mē kãm Tirtũm kapēr jarēnh o ri mē hkôt pa nhũm mē axte ohtõ nê kuma nê nita pyrã nê hkôt amnhí xunhwý.

⁴² Hãmri nê nita wýr mra nê kãm:

–E nã ãm hãmri. Akumrēx na ka mē inhmã Jejus o amnhírít. Pa mē akõt ma hwýr mra nê mē pam omu nê kapēr ã kuma. Jao apyrã nê amnhí kaxyw hkôt ijamaxpēr nê hkôt amnhí xunhwý. Pēr ãm hãmri kēp pyka piitã hkôt mē pahte amnhí tomnuj pãnhã amnhírer mã xwýnhnta na. Anê.

Garirej nhõ xwýnhjaja kot Jejus pumunh ã mē harēnh

Matéwre 13.57

⁴³ Tã pa mē Jejus kôt Samar rũm ixkato nê ma pika pé Garirej wýr mō. Kamã Jejus nhõ krí pé Najare htã pa mē hwýr inhmõr kêt nê.

⁴⁴ Na pre ra Jejus mē inhmã tanhmã õ krí nhõ xwýnhjê jarēnh to nê mē harēnh o:

–Tirtũm nhý hã kapēr jarēnh o mē pa xwýnhjaja na htem amnhí nhõ krí kamã mē kãm Tirtũm kapēr jarēnh o pa nhũm mē kuma nê ãm kuma. Jakamã kot paj Najare

hwýr inhmõr kêt nê. Mē kãm ixkapēr mar prãmre hã.

⁴⁵ Anhýr jakamã na pa prem hwýr inhmõr kêt nê. Pãnhã nhãm krí hõ hwýr mō nê hwýr pøj hãmri nhũm mē amnhí wýr Jejus pumu nê hkĩnh nê. Na prem ra krí pé Jerujarê kamã arĩgro pé Pas ã mē hkĩnh kãm tanhmã kot amnhí nhípēx to ho pa hã omu. Jakamã amnhí wýr omu nê hkĩnh nê.

Jejus kot mēhõ hkra ho mex ã harēnh

⁴⁶ Tã pa mē kormã Garirej kamã ixpa nê akupým krí pé Kanã hwýr mō. Kamã na pre Jejus mē kãm gõ ho wĩhti nhípēx. Jakamã pa mē akupým mē hwýr mō. Nhũm mēõ pahi nhõ kówenatõjê hõ hkra myja kēp ã htýx nê nõ. Nom Kanã kamã hkêt axtem krí hõ pé Kapanau kamã.

⁴⁷ Jakamã nhũm hipēexàja tee ri hkra pumu hãmri nê ra Jejus kot Jutej rũm Kanã hwýr hpõx ã harēnh ma nê hkra kaxyw kãm hamaxpēr nê ma hwýr mör kurê kumrēx. Hãmri nê nhýri omu nê hwýr tē nê kãm kapēr kãm hihtýx nê kãm:

–Pa. E ot pa awýr tē. Na ra ixkra ixpê htyk kaxyw. Kwa ixkamã axukaprí nê ma ixkôt mō nê akupým inhmã ho mex. Anê.

⁴⁸ Hãmri nhũm kuma nê kãm:

–Kwa pēr ãm ixte mē amã aa mē ate mēõj pumunh kêt kwý ho anhýr ã ixpumunh kôt pix mã na ka htem amnhí kaxyw ixkôt ajamaxpēr. Nom amarí amnhí kaxyw ixkôt ajamaxpēr kêt nê. Anê.

⁴⁹ Hãmri nhũm tee ri kuma nê kãm:

–Kwa tokyx. Kot kaj tokyx ixkôt amõr kêt koja ixpê ty. Anê.

⁵⁰ Hãmri nhũm kãm:

–Nã koja apê htyk kêt nê. Ra ixte akupým amã ho mex kēnã. Mãmri ma akupým mō nê tokyx omu. Na ra akupým amã mex. Anê.

Hãmri nhũm kuma nê kaxyw hkôt hamaxpēr kurê kumrēx nê ma akupým hwýr mō. Nê mör o apkati.

⁵¹ Nê kormã õ krí hwýr hpõx o mör ri nhũm ra kãm mē ãpēnh xwýnhjaja kutã mra nê nhýri pry hã hkaxpa nê kãm:

–Pa. Kwa na ra akra hkã hakry nê akupým amã mex. Anê.

⁵² Hãmri nhũm mē kuma nê hkĩnh týx nê. Nê mē kãm:

–Kwa xõ wehe? Mēmo ore hã na pre we ra hkã hakry? Anê.

Nhũm mē kãm:

–Nã jãã na pre kaxkwa nhípõk ri myt nhý nhũm hkã hakry nê akupým amã mex kurê kumrēx. Anê.

⁵³ Hãmri nhũm mē kuma nê mē kãm:

–Héxta waa nê. Kwa pēr ãm hãmri Jejus kot inhmã akupým mex ã harēnh xã hã ore kamã na pre akupým inhmã mex. Nã ãm hãmri. Anê.

Hãmri nê amnhî kaxyw Jejus kôt hamaxpêr kurê kumrêx. Nhûm ôrkwý kamã ri mê pa xwýnhjaja uràk nê amnhî kaxyw hkôt hamaxpêr.

⁵⁴ Nhûm Jejus ã kãm hkra ho mex anê. Na pre ra pika pê Garirej kamã mê kot mëmoj pumunh kêt ô ho anhÿr o tipxi nê mê kãm gô pix o wîhti nhîpêx. Tã ra pyka pê Jutej rûm akupÿm mê hwÿr mô nê ã akupÿm mê hkrata o mex anê.

5

Jejus kot himô mÿri akupÿm mëhõ ho mex ã harênh

Juãw 7.23, 10.30-33

¹ Tã mê ixpê Ijaew mê ixte Tirtûm ã ixkînh kaxyw Jerujarê hwÿr akuprô nhûm Jejus haxwÿja ma hwÿr mô. Pa mê hkôt mê ixpa ho mê ixpa xwýnhjaja ma hkôt mô.

² Jerujarê kamã na himôja hikwÿ. Nhÿhÿnh mê kot krî hwÿr ôwêhti ho gjêx xà htã hikwÿ. Himôja nhÿxi pê na Petes. Nê pu hã mê ã xwýnhjê nhÿkwÿ xà hã ixkre kêp 5.

³ Piitã kamã na pre hte tanhmã mê ã kute xwýnhjaja hikwÿ. Mê nohkre xwýnhjaja nê mê hyk o mê pa xwýnhjaja nê mê î kamã mê htyk xwýnhjaja. ãm ahpÿnhã tanhmã mê ã kute xwýnhjaja ixkre hkwyja kamã akupÿm mex prãm xaj hikwÿ.

⁴ Na pre hte Tirtûm kapêr o mê wrÿk xwýnhja tõhã himô hwÿr wrÿ nê gô xok. Hãmri nhûm mê ã xwýnhjê hõ kot amnhî to wa nê kumrêx hwÿr wrÿk nê kamã mrôr xwýnhja akupÿm mex. Kwÿjê rom akupÿm mex kurê kumrêx. Jakamã nhûm pre hte mê ã xwýnhjaja akupÿm mex prãm xaj gô xok jamãr o hikwÿ.

⁵ Jakamã nhûm mëhõ myja ixkre hõ kamã hikwÿ. Te omnuj nê arî hikwÿ hã amgrã sohtô rax nê. Ra hã amgrã kêp 38.

⁶ Jakamã nhûm Jejus mê hwÿr tã nê omu. Nê hprî hã omu nê hamaxpêr o:

—Kwa mÿj na hte omnuj nê ri pa hkêt ã amgrã sohtô rax nê. E pa akupÿm ho mex.

Anhÿr o hamaxpêr hãmri nê kãm:

—Pa. E kwa inhmã amnhî jarê. Xà amã akupÿm amex prãm? Anê.

⁷ Hãmri nhûm kuma nê mê kãm:

—Ku nhûm. Inhmã tokyx akupÿm inhmex prãm tÿx kumrêx kênã. No mëhõ kot tokyx inhmÿ nê mê kêp ixto wa nê ixkumrêx gô xok kamã inhmôr? Na pa tee ri ixkumrêx hwÿr ixtêm nê inhmã inhmôr prãm nhûm mê xatã ixpê amnhî to wa nê mra nê kamã mrô. Anê.

⁸ Hãmri nhûm Jejus kãm:

—Tÿ? Tôe. E na ka akupÿm amex. E kãnhmã xa nê akupÿm py nê ma akupÿm anhôrkwÿ hwÿr tã. Anê.

⁹ Hãmri nhûm kuma nê ra akupÿm mex nê kãnhmã xa nê ri mra. Nê hkînh tÿx nê

hikupÿr py nê ma akupÿm ôrkwÿ hwÿr tã. Ijaew nhõ arÿgromnu pê sap ã nhûm Jejus kot akupÿm ho mex

¹⁰ nhûm ma akupÿm pry hã hikupÿr py nê o tã. Nhûm Ijaew nhõ pahi hkwyja nhÿhÿnh mra nê tee ri kot sap ã hpyr nê o htêm ã omu nê kãm:

—Tk. Kwa mê pahpê Ijaew na pu htem mê panhõ arÿgromnu hã paxàpênh kêt nê. Finat Mojes kot ja nê mê pahkurê htã ka axtem nê akupÿrta py nê nhÿhÿm o tã. Anê.

¹¹ Hãmri nhûm mê kuma nê mê kãm:

—Tÿ. Kot anhÿr tã kot ixto mex xwýnhhta na ã inhmã kapêr anê pa mar xà hkôt kupy nê akupÿm inhôrkwÿ hwÿr tã. Anê.

¹² Hãmri nhûm mê tee ri kuma nê kãm:

—Kwa mëhõ na we ã ri amã karô anê? Anê.

¹³ Nhûm kormã kot Jejus nhÿxi mar kêt jakamã kot mê kãm ahkre kaxyw hakêx nê tee ri hkwyjê kaêx ã hapêr rît o xa. Nom nhûm mê ohtô nê pry hã mrar jakamã nhûm tee ri hapêr nhûm Jejus ra ma nhÿhÿm tã.

¹⁴ Tã nhûm hã ahtÿmre nhûm Jejus Tirtûm mã amnhî jarênh xà hã ixkre hwÿr tã nê axã nê kot ho mex xwýnhhta pumu nê kãm:

—Pa. E na ka ra akupÿm amex. Nom kwa kêr ka axte tanhmã amnhî tomnuj to ho ri apa hkêt nê. Kot kaj axte ã amnhî nhîpêx anê hãmri nê apunuj tÿx o wam ate apunujta jakre kãm ga. Anê.

¹⁵ Hãmri nhûm kuma nê ma tã nê kato. Nê ma mê ô pahijê hwÿr tã nê mê kãm:

—E na pa ra kot ixto mex xwýnhhta nhÿxi ma. Xep kêp Jejus. Anê.

¹⁶ Hãmri nhûm mê hixi ma nê hã tanhmã axpên mã ho kapêr punuj to. Mê ô arÿgromnu hã kot mê ho mex o pa jakamã nhûm mê axpên jakwa kamã ri hixi ho rê nê nhÿri omu nê tanhmã hã kãm àkêr to.

¹⁷ Hãmri nhûm amnhî tã mê kuma nê mê kãm:

—Ku nhûm. Inhîpêêxã Tirtûm na hte apkati mê tanhmã mê pahto mex to ho pa. Jakamã pa hte urak nê ã mê ho mex rãhã ho ri ixpa anê nê aa mëmo arÿgo hã ja ho anhÿr kaga hkêt nê.

¹⁸ Anhÿr o mê kãm amnhî jarê nhûm mê kuma nê kamã gryk tÿx nê. Nom mê ô arÿgromnu hã kot mê ho mexja pix mÿrapê kamã gryk kêt. Mãânênh Tirtûm kêp hipêêxã hã harênhja mÿrapê nhûm prem kamã gryk tÿx kumrêx nê axpên mã:

—Tk. Kwa na ã amnhî jarênh anhÿr jao te kêp Tirtûm pyrãk ã amnhî jarê. E kwa pu mê kupÿ ri. Anê.

Tirtûm Kra kot Hipêêxã nhÿ hã amnhî nhîpêx ã harênh

Juãw 14.10-13

¹⁹ Hãmri nhûm Jejus axte mê kêp Ijaew nhõ pahijê mã kapêr nê mê kãm:

—Na pa hte amnhī krā hkôt tanhmā amnhī nhīpêx to ho ri ixpa hkêt nê. Na pa hte Inhīpêêxà kot tanhmā amnhī nhīpêx to hā omunh xā hkôt urāk nê mē ho mex o ri ixpa. Kwa mē amnhī krā him ja jaxā nê kām ajamaxpêr t̄yx nê ho apa.

²⁰ —Inhīpêêxà kām ijpapê. Na hte inhmā kot tanhmā mē ho mex to piitā ho amnhīrīt. Ixte omunh nê urāk nê ŷ hā tanhmā mē ho mex to ho ri ixpa kaxyw. Jakamā kot paj ām akup̄ym mē à xw̄ynhjê ho mex pix o ri ixpa hkêt nê. Kot paj māānēn mē kām mēmoj mex o ja jakrenh o anh̄y o ri ixpa ka mē hā ixpumu nê ixkamā an̄o puma ho apa.

²¹ —Nê Inhīpêêxà kot akup̄ym mē htyk xw̄ynhjê ho ht̄ir jakamā kot paj urāk nê akup̄ym mē htyk xw̄ynhjê ho ht̄ir o ri ixpa. Anê.

Mē ht̄ir t̄um nê mē pa mā xw̄ynhjê jarēnh
Juāw 3.16-17, 3.36, 6.27, 6.40, 6.60, 10.28, 17.2-3; Rōmān 6.23; Karatas 6.8; Xitre 1.2; Wam Juāw 2.25, 5.11-13

²² Nhūm Jejus arī mē kēp Ijaew nhō pahijé mā kapêr nê mē kām:

—Koja nh̄ymā Inhīpêêxà mē ht̄ir t̄um nê mē pa ho mē pa mā xw̄ynhjê jarēnh kêt nê. Ja kaxyw na pre pa ixām.

²³ Tā mē piitā mē kot ja hā ixpumunh nê ixtā hpījaām o ri pa kaxyw na pre mē kaxyw ixām. Te mē kot Inhīpêêxà hā hpījaāmta pyrā nê pa ixtā hpījaām o pa kaxyw. Jakamā koja mēhō ixtā hpījaām kêt nê hāmri nê māānēn Inhīpêêxà hā hpījaām kêt à amnhī to amnhīrīt. Tām kot mē aw̄yr inhmēnh kēnā.

²⁴ Jakamā koja mēhō ixkapêr ma nê amnhī kaxyw kot mē aw̄yr inhmēnh xw̄ynhta kôt hamaxpêr nê ixkôt amnhī xām. Hā koja nh̄ymā htyk tā ma mē kot amnhī xā ht̄yx kamā hamak o pa ht̄um xāta w̄yr mōr kêt nê. Koja Inhīpêêxà akup̄ym ho ht̄ir nhūm wa ixri ht̄ir t̄um nê mex kumrēx nê pa ho pa. Jakamā koja mēhō ixkôt amnhī xām hāmri nê ra kēp wa ixri ht̄ir t̄um nê pa ho pa mā xw̄ynh. Kwa mē jam ajamaxpêr t̄yx rāhā ho apa.

²⁵ —No mē kām ixkapêr mar prām kêt xw̄ynhjaja kēp Inhīpêêxà mē wa ixri mē ht̄ir t̄um nê mā xw̄ynh kêt. Tā ixpē Tirt̄um Kra jakamā koja mē ixkapêr ma nê ixkôt amnhī xunhw̄y. Hā kot paj amnhī tā mē omu nê mē ht̄ir t̄um nê mē pa mā xw̄ynh ā mē harē nhūm mē āmnhix ri hkīnh nê pa ho pa. Kwa mē jam ajamaxpêr t̄yx rāhā ho apa.

²⁶ —Nê Inhīpêêxà tām kēp mē ho mē ht̄ir xw̄ynh. Tā ixpē Kra jakamā na pre amnhī pyrā nē ja kaxyw ixām.

²⁷ —Ra kot mē akaxyw ixām jakamā na pre māānēn ixte tanhmā mē ajarēnh to kaxyw ixām. Wa ixri mē at̄ir t̄um nê apa ho apa mā xw̄ynhjê hā mē ajarēnh r̄y wa ixri mē at̄ir

t̄um nê apa hkêt mā xw̄ynhjê hā mē ajarēnh kaxyw.

²⁸⁻³⁰ Jakamā kot paj nh̄ymā ra mē htyk nê mē hikw̄y xw̄ynh piitā mē kām ixkapêr nhūm mē inhma. Koja mē ixkapêr ma hāmri nê akup̄ym ht̄ir nê pika r̄um hapōx pa. Hāmri nhūm mē kot kormā ht̄ir ri Tirt̄um kapêr kôt amnhī nhīpêx hkêt xw̄ynhjaja mē kot amnhī tomnuj m̄yrapē ma mē kot amnhī xā ht̄yx kamā hamak t̄um xāta w̄yr ma hapêx pa. Nom nhūm mē kot amnhī to mex xw̄ynhjaja. Ra mē kot Tirt̄um kôt amnhī nhīpêx jakamā koja mē ma Tirt̄um mē wa ixw̄yr api nê wa ixri mex nê hkīnh rāhā ht̄ir t̄um nê pa ho pa.

—Kot paj ja kaxyw tanhmā mē apiitā mē ajarēnh to. Nom kot paj amnhī krā hkôt inhmā hprām xā hkôt tanhmā mē ajarēnh to hkêt nê. Kot paj Inhīpêêxà kot mē aw̄yr inhmēnh xw̄ynhta nh̄y hā āhpumunh t̄yx xā hkôt tanhmā mē ajarēnh to. Jao ām hāmri mē ajarē. Kwa mē jam ajamaxpêr t̄yx nê. No ā ixte mē amā amnhī jarēnh anh̄yrja ma nê tee ri ajamaxpêr kêt nê. Anê.

Mē kot Jejus kēp Tirt̄um Kra hā harēnh xw̄ynhjê jarēnh

Juāw 8.18; Wam Juāw 5.6-8

³¹ Nhūm Jejus arī mē kēp Ijaew nhō pahijé mā kapêr nê mē kām:

—E na pa ra tanhmā mē amā amnhī jarēnh to. Nom kop ām papxipix ixte ā amnhī jarēnh anh̄yr ronh̄yx ka mē inhma nê ajamaxpêr o: “Ko. Na apu ām hāmri ā mē inhmā amnhī jarēnh an̄y apu ām amnhī to hêx.” Anh̄yr o ajamaxpêr.

³² Nom papxipix na pa hte ā amnhī jarēnh anh̄yr kêt nê. Inhīpêêxā haxw̄yja na hte ā ijarēnh anê. Nê ām hāmri na hte tanhmā ijarēnh to ho pa. Tirt̄umja hêx kêt.

³³ No mē amā pika nhō xw̄ynhjê pix kapêr mar prām jakamā na ka prem finat Juāw Paxisja w̄yr akw̄jé rē nhūm mē ma hw̄yr mra nê ixtā hkukja nhūm mē kām tanhmā ijarēnh to. Nê hprī hā mē kām ijarē.

³⁴ No mē apē pika nhō xw̄ynhjaja mē ate axpēn mā tanhmā ijarēnh toja na ixpē tanhmā kute hkêt. Koja mēhō tanhmā ixto kapêr punuj to r̄y tanhmā ijarēnh mex to pa amnhī jarēnh ma nê tee ri amnhī kukamā ijamaxpêr o ixkaprī hkêt nê. Tā nom Juāw Paxis kapêrja mē amā mex jakamā na pa ā mē amā harēnh anê. Ka mē ra kot tanhmā ijarēnh toja ma nê amnhī kaxyw ixkôt ajamaxpêr nê ixkôt amnhī xunhw̄y nê nh̄ymā ty nê ma mē kot amnhī xā ht̄yx kamā hamak t̄um xāta w̄yr apa hkêt nê.

³⁵ —Juāw Paxis na pre te kanê hpōk mex nê mēmoj to amnhīrīt mex pyrā nê mē amā Tirt̄um kapêr o amnhīrīt mex o pa. Ka prem te maripōtre kot kanê hā ht̄u pyrā nê hw̄yr akuprō nê mar o akuhé. Nom hkôt ajamaxpêr t̄yx kêt nê.

³⁶ Na pre hprī hā mē amā ijarēnh o ri pa.

—Tā pa pam mē awȳr wrȳ nē Inhīpēēxā nh̄ȳ hā mē akamā aa mē ate mēmoj pumunh kēt kw̄y ho anh̄ȳ o ri ixa. Mē ate ja hā ixpumunh nē Inhīpēēxā tām kot mē awȳr inhmēnh kōt ixpumunh kaxyw.

³⁷ —Nē Inhīpēēxāja määnēn ixpē Kra hā mē amā ixto amnhīrīt. Ra mē anhōpinh xā kaxw̄ynh kām kot mē amā ixto amnhīrīt tā ka mē ama nē ām ama nē ixkōt ajamaxpēr kēt nē.

³⁸ Mē amā mē ate hkōt amnhī nhīpēx o apa hprām kēt. Mē ate kapēr mar t̄yx ronh̄ȳx ka mē ixkapēr ma nē amnhī kaxyw ixkōt ajamaxpēr kurē kumrēx. Ixpē Tirtūm kot mē awȳr inhmēnh xw̄ynh kēnā.

³⁹ —Nē Tirtūm kapēr ā kagā htūm haxw̄yja kot tanhmā ijarēnh to. Ka htem wa ixri atūr tūm nē apa ho apa hprām xāj kamā harēnh rāhā ho ri apa. Nē kot tanhmā pa ijarēnh to htā ka mē ixkapēr ma nē amnhī kaxyw ixkōt ajamaxpēr kēt nē. Anē.

Ijaew nhō pahijaja kot Jejus kaga hā mē harēnh

⁴⁰ Nhūm Jejus arī mē kēp Ijaew nhō pahijē mā kapēr nē mē kām:

—Nē pa na ixte Inhīpēēxā mē wa ixri ixte mē ho mē htūr tūm nē mē pa mā xw̄ynh ā mē harēnh tā ka mē amnhī kaxyw ixkōt ajamaxpēr kēt nē.

⁴¹ Nom mē ate inhmex ā ijarēnh kēt tā ja ixpē tanhmā kute hkēt. Ām Inhīpēēxā pix kot inhmex ā ijarēnhja na inhmā hprām.

⁴² Ra ixte mē apumunh mex. Mē amā Tirtūm kīnh kēt.

⁴³ Tām kot mē awȳr inhmēnh tā ka mē ixpumu nē ixkaga nē ixkōt amnhī nhīpēx kēt nē. Nom koja mēhō amnhī krā hkōt mē awȳr tē nē tanhmā mē ajahkre hto ka mē ama nē hkōt amnhī nhīpēx kurē kumrēx.

⁴⁴ —Ām pika nhō xw̄ynh pixjaja kot mē amex ā mē ajarēnhja na mē amā hprām. No Tirtūm kot amnhīm mē amex ā mē ajarēnhja mē amā hprām ā mē ate amnhī jarēnh tā mē amā ja prām kēt. Jakamā na ka htem ixkaga kumrēx.

⁴⁵⁻⁴⁶ Tā nom kot paj pam nh̄yrmā Tirtūm mā mē apē ixkw̄y hkēt ā mē ajarēnh kēt nē. Mo kaxyw kot pa kēt ri ā kām mē ajarēnh anē? Finat Mojes tām koja ja hā kām mē ajarē. Na ka htem tanhmā ajamaxpēr to nē ajamaxpēr o: “Kot paj finat Mojes kot mē inhmā tanhmā kapēr to hkōt amnhī nhīpēx o ri ixa hāmri nē nh̄yrmā Tirtūm ri ixūr tūm nē inhmex nē ixa ho ixa.” Anh̄ȳr o ajamaxpēr nom hkōt amnhī nhīpēx kēt nē. Mojes na pre hte pa ijarēnh o pa. Tā mē ate kapēr kōt amnhī nhīpēx ronh̄ȳx ka mē amnhī kaxyw ixkōt ajamaxpēr nē ixkōt amnhī xunhw̄y. No mē ate ixkaga jakamā

koja Mojes tām Tirtūm mā mē apē ixkw̄y hkēt ā mē ajarē.

⁴⁷ Mē ate Mojes kapēr kōt amnhī nhīpēx kēt jakamā kot kaj mē määnēn ixkōt amnhī nhīpēx hkēt nē. Anē.

Nhūm pre ā Jejus Ijaew nhō pahijē mā kapēr anē.

6

Jejus kot mē ho 5.000 nē mē kām mē ō hā harēnh

Matēwre 14.13-21; Makre 6.30-44; Rukre 9.10-17

¹⁻⁴ Tā nhūm ra arīgro pē Pas ahtēp o mō. Pasja ā mē ixpē Ijaewjaja na pa htem axpēn w̄ȳr akuprō nē hā ōwēhti hkra nyw kw̄y pa nē ī hkur o ixkrī. Amnepēm Tirtūm kot pika pē Ejit rūm mē inhīgētjē kator kaxyw nhūm prem nojarēt nē ā hkwȳ hpar nē ī hkur anē. Tā arī mē ixpē mē hkanrēhā mē htāmnhw̄yja jam ijamaxpēr pē ixkīnh kaxyw ā amnhī nhīpēx anē. Jakamā nhūm Jejus pār krem axā nē ma himō pē Garirej ā rēr kaxyw ma xarmā mō nē rē. Himōja nh̄ixi hō pē na Tipe nhūm hā xarmā mō nē rē. Pa mē hkōt ixa ho ixa xw̄ynhjaja ma hkōt ixa.

Hāmri nhūm pika nhō xw̄ynh kw̄yja Jejus ma mōr kām omu hāmri nē ma gō kape hā pikap mē inhīhkrepp mra. Na pre ra Jejus mē kamā mē ā xw̄ynhjē ohtō nē akup̄ym mē ho mex nhūm mē axte omu hāmri nē ma mē inhīhkrepp gō m̄y ri hpar o pa.

Tā pa mē xarmā rē nē pār rūm ijapōj nē gō m̄y ri k̄yxpē ixkrī hpa.

⁵ Hāmri nhūm mē inhīhkrepp mē mrar xw̄ynhjaja mē iwxw̄y hpōx o mra nhūm Jejus amnhī w̄ȳr mē omu nē mē inhīō pē Firipti mā kapēr nē kām:

—Kwa Firip. Mēmoj kot puj mē pahw̄ȳr mē mōr nējje mā ho anē nhūm mē kuku? Tanhmā kot puj mē amnhī to nē nh̄yri mē kām mēmoj japrō nhūm mē kuku? Anē.

⁶ Ra tām kot tanhmā mē kām ō hto hā amnhī pumunh mex tā ā mē hā Firipti kamā hamak kaxyw mē hā hkukjēr anē.

⁷ Hāmri nhūm kuma nē tee ri mē hkukamā hamaxpēr nē kām:

—Konēn. Mē ohtō rax kumrēx kēnā. Mo mē kaxyw mē pakāxpore rax? Kot pu mē pakāxpore ho 200 nē ho mē kām mēmoj japrōr tā nhūm mē ām ho hkryre nē kuku nē ho ōhy htu hkēt nē. Mē ohtō rax o mē ohtō rax kēnā. Anē.

⁸⁻⁹ Hāmri nhūm mē inhīōja kuma nē Jejus w̄ȳr tē nē kām kapēr. Simāw Pētre htō Andreja hw̄ȳr tē nē kām:

—E ota mēhō hkrata amnhī kōt ō hkwȳ ho mō. No ām grire. Na pāwti kēp 5 nē kaxyw ō tep axkrutere. No mē ohtō gri ā kot kēt mē hipēx pa. Anē.

¹⁰ Hāmri nhūm kuma nē hkôt mē ixpa ho mē ixpa xwýnhjê mã kapêr nē mē inhmā:

—Tôe. Nà hāmri. E mē kām anê kê mē hkri pa. Anê.

Hāmri pa mē kām anê nhūm mē pō kamā hkri hpa. Na prem ohtô kumrêx. Mēmyjê pixjaja kêp 5.000. Nê kaxyw mē hprô nê mē hkrajaja. Na prem ohtô ho ohtô. Tã piitã hkri pa.

¹¹⁻¹² Hāmri nhūm Jejus mēhō hkrata pē ô pãwti jamý nê o xa nê Tirtūm mã harê nê kām:

—Pa Papaj. Na ka hte mē inhmã mē inhō ho pa. Am kapxixip amex o amex. Anê.

Hāmri nê mē inhmã pãwtija gô pa mē ô ri mē hkri xwýnhjê mã ôr o mra nê ho mē piitã mē hipêx pa. Pãwtija am hkryre htã nhūm Jejus tanhmã ho nhūm ra ohtô rax kumrêx. Jakamã pa mē ô ri mē kām ôr o mra nê ho mē piitã mē hipêx pa. Nhūm Jejus hpãnhã tep axkrutreta py nê mã ho anê nê Tirtūm mã harê hāmri nê amnhî xô ri mē inhmã kugô pa mē mã ho anê nê. Te ho pãwti nhípêx pyrã nê ho mē piitã mē hipêx. Hāmri pa mē ixpiitã apku nê inhōhy htu nhūm arî mēō jakrêx kwý hprã. Hāmri nhūm Jejus mē inhmã:

—E kwa mē hkôt mra nê mēō jakrêx o akuprô kê omnu hkêt nê. Anê.

¹³ Hāmri pa mē kuma nê ho akuprô nê kawã o 12 nê ho nyt. Pãwti hkryreja am kêp 5 pix tã nhūm Jejus tanhmã ho nhūm rûnh kumrêx. Jakamã pa mē hakrêx prãr o kawã ho 12 nê ho nyt pa.

¹⁴ Hāmri nhūm mē inhîkrep mē mōr xwýnhjaja amnhî jaêr pē Jejus kot mē kām mēō ho rax ã omu nê ri axpên mã harênh o:

—Kokýý. Tãm mãn pre finat Mojesja amnepêm mē panhigêjtê mã harênh o ri pa. Tã ra mē pahwýr wrý nã?

¹⁵ Kwa pu mē kām pakapêr kām paxihtýx nê ma akupým amnhî kôt o mō nê amnhî kaxyw am kê mē pahto amnhîptãr o pa. Anê.

Hāmri nhūm Jejus amnhî tã mē kapêr ma nhūm ja kêp omnuj nê. Jakamã nhūm mē kêp kato nê ma hpãnhã ahte nhýri hixêt ô hwýr tê.

Jejus kot gô krãhkã hã htêm ã harênh

Matêwre 14.22-27; Makre 6.45-52

¹⁶ Tã nhūm ra kamãtre pa mē Jejus kôt ri ixpa ho ixpa xwýnhjaja ma akupým himô hwýr mra.

¹⁷ Nhūm kormã Jejus mē ixwýr akupýn htêm kêt jakamã pa mē tee ri kamã ama hāmri nê akupým pãr mã axã nê ma akupým Kapanau hwýr xarmã ixrêr o mō.

¹⁸ Pu nhūm ra kôk ãpêr týx nhūm gô xatã kãnhmã harî nê axpên wýr mra nê axpên tak týx nê.

¹⁹ Pa mē kormã gô nhípôk ri mō. Nê tee ri rrêmti ho gô rênh nhípêx kapry nom kormã

ixrêr kêt nê. Nê kormã inhmōr o ixtã 5 kirôm pix nê. Hāmri nhūm ra Jejus gô krãhkã hã hpar o mē ixkôt tê. Pa mē ixpri hã amnhî wýr omunh mex kêt nê ixtýx mēkarô hã hkamnhîx nê mē inhmã uma htýx kumrêx.

²⁰ Tã nhūm mē inhmã ixkapêr nê mē inhmã:

—Tk. Kwa mē amã ma hkêt nê. Pa na pa mē akôt tê. Anê.

²¹ Hāmri pa mē kapêr ma nê ixkînh nê. Nê amnhî wýr pãr kre hwýr ho api nhūm axã pa mē xarmã ixrêr kurê kumrêx nê pãr kre rûm ijapôx pa.

Mê kot Jejus japêr mra ã mē harênh

²² Tã nhūm apkati nhūm xarpê mē kot Jejus wýr mra nhūm kot mē kām ô xwýnhjaja tee ri hapêr o pa nê axpên mã:

—Kwa nhýhým mãn pre we têê? Na pre hkôt ri mē pa xwýnhjaja pix mē ô pãr kãm ma akupým xarmã mō nom nhūm Jejusja mē hkôt htêm kêt nê. Nã mãn kormã jar nhýhým ri mra jakamã pu mē kormã omunh kêt nê. Anê.

²³ Rôm nhūm Tipe rûm pãr kwýja mē hwýr pój. Jejus kot mē apkur xã ho Tirtūm wýr nê mē kãm ho rax xã hã pikata wýr nhūm môn pój.

²⁴ Hāmri nhūm mē amnhî wýr omu nê tee ri pãr kãm Jejus mē hkôt mē ixpa ho mē ixpa xwýnhjê japêr hāmri nê axpên mã:

—E kwa pu mē ma mē hkôt xarmã mō nê Kapanau kamã mē hapêr. Anê.

Hāmri nê mē kãm amnhî jarê nê mē ô pãr kwý hwýr agjê nê ma mē hkôt xarmã môn rê.

²⁵ Hāmri nê ra mē ixwýr rê nê mē ixkôt pój nê mē ixkaêx ã Jejus pumu nê hwýr mra nê kãm:

—Pa mē ijahkre xwýnh. Kwa na pa prem tee ri xarpê ajapêr hāmri nê man akôt môn rê. Kwa tanhmã na ka pre we amnhî to nê man tèn rê? Anê.

²⁶ Hāmri nhūm mē kãm:

—Nã mēmo kaxyw na ka wem ri ijapêr o ri ixkôt apa? Am jãã mē ate ixkutã axãpkur nê anhōhy htu jakamã na ka mē axte ixkutã axãpkur pix kaxyw ijapêr o ri apa. No ixte ã mē amã amnhî nhípêx anhýr ã ixpumu nê ixpê Tirtūm Kra hã ixkôt ajamxpêr kêt nê. Kwa mē ixpê Kra hã inhmã ajamxpêr týx nê kêt wehe. Anê.

Jejus te kêp kaxkwa rûm mē paxãpkur xã maati pyrãk ã kot amnhî jarênh

²⁷ Nhūm Jejus arî hwýr mē mra xwýnhjê mã kapêr nê mē kãm:

—Kwa kêr ka mē ri axãpkur xã pix kukamã ajamxpêr o ri apa hkêt nê. Na htem mē apkur xã kukwak ri Tirtūm mē wa ixri htîr tûm nê pa ho pa hkêt nê. No kot kaj mē amnhî kaxyw pa ixkôt ajamxpêr nê ixkôt amnhî xunhwý. Hã kot kaj mē ixkukwak

ri nhǎrmā atír tǔm nē wa ixri amex nē apa ho apa. Te ixpē mē kot mē apkur xà hkur nē ý hā htír tǔm nē pa ho pa xwýnh pyràk. Ja kaxyw na pre Inhǐpēexà Tirtǔm mē awýr paxpaxix inhǎmē pa mē awýr wrý. Anē.

²⁸ Hāmri nhǔm mē kuma nē kām:

—Kwa tanhmā kot paj wem amnhǐ nhǐpēx to nhǔm Tirtǔm hā mē ixpumu nē mē ixto mex nē? Anē.

²⁹ Hāmri nhǔm mē kuma nē axte mē kām amnhǐ jarē nē mē kām:

—Nà kot kaj mē amnhǐ kaxyw pa Tirtǔm kot mē awýr inhǎmēnh xwýnh kót ajamaxpēr hāmri nhǔm ixtà mē apumu nē tanhmā mē akrā hto ka mē ajamakētkati nē axànnhǐx akǐnh nē tanhmā amnhǐ nhǐpēx to ho ri apa. Anē.

³⁰ Hāmri nhǔm mē kuma nē kām:

—Tōe. Kwa axte mē inhǎmā aa mē ixte mēmoj pumunh kēt ō ho anē. Pa mē ja hā apumu nē amnhǐ kaxyw akót ijamaxpēr kurē kumrēx. E mēmo kot ka mē inhǎmā ho anē? Kwa tokyx mē inhǎmā axte mēmoj tanhmā ho pa mē omu.

³¹ Amnepēm finat Mojes pyrà kot kapót ā mē panhǐgētjē ho pa ri na pre hte apkati mē mē kām mēō mē kot kām “manā” anhýr xwýnhhta gō nhǔm pre htem hkur o pa. Tirtǔm kapēr ā kagà htǔm kot ja jarēnh kot: Na pre kaxkwa rǔm mē hwýr mē apkur xà rē nhǔm mē hkur o pa.

Anhýr o kot harēnh. Tā kot kaj Mojes nē apkati mē mē inhǎmā mē inhō ho ri apa pa mē ja hā apumu nē rǐ kormā amnhǐ kaxyw akót ijamaxpēr japēr. Anē.

³² Hāmri nhǔm mē kām:

—Xà Mojes na pre hte mē kām kaxkwa rǔm mē apkur xà rēnh o pa? Nà tām kēt. Inhǐpēexà na pre hte mē hwýr kurē nhǔm mē hkawrà nē kuku nē kukwak ri hihtýx nē htír nē pa. Tā nhǔm ra mē awýr hpānhā pa ixpē Kra hā inhǎmē. Kwa mē ixkapēr ma nē amnhǐ krām haxàr týx nē.

³³ Na pre Tirtǔm inhǐpēx o te amnepēm kot mē hwýr kaxkwa rǔm mē apkur xà rēnhhta pyrà nē amnē pika hwýr inhǎmē. Jakamā te ixpē kaxkwa rǔm mē apkur xà maati wrýk xwýnhhta pyràk. Mē ate amnhǐ kaxyw ixkót ajamaxpēr nē ixkót amnhǐ xunhwýr hāmri nē ixkukwak ri wa ixri atír tǔm nē apa ho apa kaxyw. Anē.

³⁴ Nhǔm pre ā Jejus mē kām amnhǐ jarēnh anē nhǔm mē kuma nom hprǐ hā mar mex kēt nē. Am htýx ho axtem mē apkur xà mex pix ā harēnh ā hkamnhǐx nē kām:

—Kwa tō mē inhǎmā mē apkur xà maatita kwý gō pa mē apkati mē hkur o ri ixpa. Anē.

³⁵ Hāmri nhǔm mē kuma nē amnhǐ tām mē kām:

—Nà mē apkur xà kumrēxja ām paa. Te ixpē mē apkur xà maati pyràk. Jakamā kot kaj mē atō amnhǐ kaxyw ixkót ajamaxpēr

nē ixkót amnhǐ nhǐpēx o apa hā kot kaj mē akǐnh nē apa. Te ra axàpkur nē anhōhy htu nē akǐnh o ri apa pyràk. Jao amnhǐ tām ixpumu nē akǐnh nē ajamakētkati nē ri apa.

³⁶ —Ra mē ate ixpumunh mex tām kormā amnhǐ kaxyw ixkót ajamaxpēr kēt nē. Kwa mē ixkapēr ma nē amnhǐ krām haxàr týx nē.

³⁷ Tirtǔm kot inhǎmā mē ōr mē xwýnhhaja koja mē ixpumu nē amnhǐ kaxyw ixkót hamaxpēr mex kurē kumrēx. Á mē kot amnhǐ nhǐpēx anhýr xwýnhhaja kot paj aa amnhǐ nē mē hanor kēt nē.

³⁸ —Nē ixte amnhǐ krā hkót kaxkwa rǔm ixwrýk nē inhǎmā hprām xà hkót tanhmā amnhǐ nhǐpēx to ho ixpa kaxyw na pa pre ixwrýk kēt nē. Inhǐpēexà kot mē awýr inhǎmēnh jakamā kām hprām xà hkót pix mā na pa hte tanhmā amnhǐ nhǐpēx to ho ri ixpa.

³⁹ —Tā mo na hte Inhǐpēexà kām hprām? Nà kot inhǎmā mē ōr mē xwýnh piitā nhǎrmā wa ixkuri htír tǔm nē mex nē pa ho paja na kām hprām. Jakamā nhǎrmā akupým mē htír ā arǐgrota ā ixte akupým mē ho htír nhǔm ixte ām pixire nē ho ixpikunor kētja na kām hprām.

⁴⁰ —Tā kot ka mē atō ixpē Tirtǔm Kra hā ixpumu nē amnhǐ kaxyw ixkót ajamaxpēr nē ixkót amnhǐ xām. Hā kot kaj nhǎrmā atyk tām pa akupým mē atír xà hā arǐgrota ā akupým ato atír ka wa ixkuri atír tǔm nē amex nē apa ho apa. Ja na Inhǐpēexàja kām hprām. Anē.

Nhǔm pre ā Jejus mē kām amnhǐ jarēnh anē.

⁴¹ Hāmri nhǔm Ijaew nhō pahijaja mē kuri mar o kuhē nē tee ri kēp kaxkwa rǔm mē apkur xà maati pyràk ā amnhǐ jarēnh ma nhǔm ja mē kām mex kēt nhǔm mē kamā gryk nē.

⁴² Jakamā axpēn mā ri harēnh o:

—Tk. Kwa mo na ri ā amnhǐ jarēnh anē? Kēp mē panhǐō kēnā kot kēt ri kēp kaxkwa nhō xwýnh ā amnhǐ jarē. Kēp Juje mē Marir wa hkra na. Mē pahte katorxā mē hipēexā wa omunh mex kēnā kot kēt axtem nē kēp kaxkwa nhō xwýnh ā amnhǐ jarē. Anē.

⁴³ Hāmri nhǔm amnhǐ tām mē kuma nē mē kām:

—Kwa mē ā jjarēnh anhýr kēt nē.

⁴⁴ Koja Inhǐpēexà kot mē awýr inhǎmēnh xwýnhhta tanhmā mē hkrā hto nhǔm mē rǐ kormā amnhǐ tām ja hā ixpumu nē amnhǐ kaxyw ixkót hamaxpēr. Tām ā mē kot amnhǐ nhǐpēx anhýr xwýnhhaja koja mē nhǎrmā htyk tām pa akupým mē ho mē htír nhǔm mē wa ixri htír tǔm nē mex kumrēx nē pa ho pa.

⁴⁵ —Amnepēm Tirtǔm kapēr jarēnh o mē pa xwýnhhaja na prem ā ja jarēnh anhýr o: Koja Tirtǔm mē hkrā kaxwýnh kām tanhmā mē kām kapēr o amnhǐrit to ho pa.

Anh̄yr o harēnh. Jakamā mē kot Tirtūm kapēr mar nē hkôt amnhī nh̄ipēx xw̄ynhja koja mē māānēn amnhī kaxyw pa ixkôt hamaxpēr nē ixkôt ri amnhī nh̄ipēx o pa.

46 —Nē mē apē pika nhō xw̄ynhjē hō aa mē ate ixkīnhā ano ho Inh̄ipēēxā pumunh kēt. Ām papxpix na ixte omunh. Kurūm na pa pre mē aw̄yr wr̄y.

47 Tā kot ka mē atō amnhī kaxyw ixkôt ajamaxpēr. Hā kot kaj nh̄yrmā wa ixkuri at̄ir tūm nē amex nē apa ho apa. Kwa mē jam ajamaxpēr t̄yx nē.

48 —Nē ixpē mē axāpkurxā maati jakamā pa na ixpē akup̄ym mē ho mē ht̄ir xw̄ynh.

49 Amnepēm mē panhīgētjaja kormā kapôt ā mē pa ri mē kot “manā” anh̄yr xw̄ynhta kur o ri pata ā na prem kukwak ri ht̄ir tūm nē pa ho pa hkēt nē. Na prem ri pa nē gaa nē ri hpigēt nē htyk pa.

50 Axtem kaxkwa rūm mē apkur xā maati jarēnh xw̄ynhta pix kukwak ri na htem nh̄yrmā htyk tā akup̄ym ht̄ir nē wa ixri ht̄ir tūm nē mex nē pa ho pa.

51 Ām paa. Pa na htem inhī hkwy hkrē hāmri nē wa ixri ht̄ir tūm nē mex nē pa ho pa. Na pa pre ra amnhī grōnh kōt mē aw̄yr wr̄y. Jakamā ka mē atō inhī hkwy hkrē hāmri nē nh̄yrmā atyk tā pa akup̄ym ato at̄ir ka Tirtūm mē wa ixri at̄ir tūm nē amex nē apa ho apa. Anē.

52 Nhūm pre ā Jejus Ijaew mā amnhī jarēnh anē. No ām mē kām amnhī tā kuxi nē amnhī jarē. Jakamā nhūm mē tee ri kuma hāmri nē tanhmā hā axpēn mā kapēr to. Mē kot hprī hā mar kēt nē ām mē kot ī hkwy hkrērja pix jarēnh mar jakamā tee ri hamaxpēr nē axpēn mā:

—Kwa tanhmā kot kēt we amnhī to nē mē pamā amnhī nhī hkwy gō pu mē kuku? Anē.

53-54 Hāmri nhūm amnhī tā mē kuma nē mē kām:

—Nā mē kot inhī hkwy hkrēr nē ixkamrō hkwy ho hkōm xw̄ynh pixjaja koja mē nh̄yrmā Tirtūm mē wa ixri ht̄ir tūm nē pa ho pa. Ixte akup̄ym mē ho mē ht̄ir xā hā arīgrotā ā kot paj mē ho mē ht̄ir nhūm mē wa ixri ht̄ir tūm nē mex nē pa ho pa. No kot kaj mē inhī hkwy hkrēr kēt nē ixkamrō hkwy ho akōm kēt hāmri nē wa ixri at̄ir tūm nē amex nē apa ho apa hkēt nē. Kwa mē jam ajamaxpēr t̄yx rāhā nē.

55 Kēt inh̄ija kēp mē apkur xā maati na. Nē ixkamrōja kēp mē hkōm xā maati na. Jakamā na htem inhī hkwy hkrē nē ixkamrō hkwy ho ixkō nē ra kēp wa ixri mē ht̄ir tūm nē mē pa ho mē pa mā xw̄ynh.

56 Jakamā kot ka mē atō inhī hkwy hkrē nē ixkamrō hkwy ho ixkō. Hāmri pa amnhī tā apumu nē akarō mā axā ka te apē pa pyrāk o amnhī nh̄ipēx o pa.

57 Inh̄ipēēxā kot mē aw̄yr inhmēnh xw̄ynhta kukwak ri na pa hte it̄ir tūm nē ixpa ho ixpa. Tā ja pyrā nē kot kaj mē inhī hkwy hkrē hāmri nē ixkukwak ri wa ixri at̄ir tūm nē apa ho apa mā xw̄ynh.

58 —Jakamā na pa ā mē amā ixpē kaxkwa rūm mē axāpkur xā maati hā amnhī jarēnh anē. Amnepēm mē panhīgētjaja na pre htem kapôt ā mēōta kur o pa hāmri nē gaa nē hpigēt nē htyk pa. No kēt pa koja mē inhī hkwy hkrē hāmri nē mē kurom wa ixri ht̄ir tūm nē mex nē pa ho pa. Anē.

59 Nhūm pre ā Jejus mē kām amnhī jarēnh anē. Kormā Kapanāu kamā Tirtūm kapēr o mē ahkre xā hā ixkre kamā ā mē ahkre anh̄yr o xa.

Mē ohtō nē mē kot Jejus kaga hā mē harēnh

Sikūn Korī 3.6; Sikūn Pētre 3.16

60 Hāmri nhūm mē kot Jejus kōt mar o mē pa xw̄ynhja ohtō nē ā kapēr anh̄yrja ma nē tee ri amnhī kukamā hamaxpēr nē hā axpēn mā:

—Tk. Kwa pēr kapērja ām ri kati. Mēhō koja we kuma nē hkôt hamaxpēr nē hkamrō nē ī kur o ri hkôt pa? Nā mē piitā mē kām ja mexti hā. Anē.

61 Hāmri nhūm amnhī tā mē kuma nē mē kām:

—Kwa xā ixkapērja mē apē omnuj?

62 Nā kot paj nh̄yrmā ma akup̄ym kaxkwa hw̄yr api. Ixpē Tirtūm kot mē akaxyw ixām xw̄ynh ā ma akup̄ym hw̄yr api. Hāmri ka mē ā ixte amnhī nh̄ipēx anh̄yr ā ixpumu nē rī kormā ixkôt amnhī xunhw̄yr japēr.

63 Na htem mēmoj kur kukwak ri kēp Tirtūm mē wa ixri ht̄ir tūm nē pa ho pa xw̄ynh kēt nē. R̄y amnhī krā hkôt tanhmā amnhī nh̄ipēx to ho kēp wa ixri ht̄ir tūm nē pa ho pa mā xw̄ynh kēt nē. Tirtūm mē wa Ixkarō tām na hte mē hkarō mā agjē nē mē ho Tirtūm wa ixkuri mē ht̄ir tūm nē mē pa ho mē pa mā xw̄ynh. Tā y hā na pa ā mē amā ixkapēr anē. Nom mē amā amnhī tā kuxi nē amnhī jarē. Tā kot kaj mē ixkapēr ma nē ixkôt amnhī nh̄ipēx. Hā kot kaj mē nh̄yrmā wa ixri at̄ir tūm nē amex nē apa ho apa.

64-65 No mē akw̄yjaja na ka mē ixkapēr ma nē ām ama nē ixkôt ajamaxpēr kēt nē. Jakamā na pa ā mē amā ixkapēr anē nē mē amā: “Koja Inh̄ipēēxāja tanhmā mē akrā hto ka mē rī kormā amnhī tā ixpumu nē amnhī kaxyw ixkôt ajamaxpēr.” Anh̄yr o mē amā ixkapēr. Anē.

Nhūm ā Jejus mē kām kapēr anē. Ra kot mē hkukamā mē omunh mex. Ra kot amnhī kaxyw mē kot hkôt hamaxpēr mā xw̄ynhjē pumunh nē māānēn mē kamā kot mēō pahi nh̄ihkram haxār mā xw̄ynhja nhūm māānēn ra kot amnhī kukamā omunh mex. Jakamā nhūm ā mē kām kapēr anē.

⁶⁶ Hāmri nhūm mē kot hkôt kapēr mar o mē pa xwýnh kwýjaja tee ri kuma hāmri nē hkaga nē axte hkôt pa hkêt nē.

⁶⁷ Hāmri nhūm tee ri mē kot hkaga nē ma mē mrar ā mē omu nē mē ixpē hkôt ixpa ho ixpa xwýnh pē 12jē mā kapēr nē mē inhā: —Pa? No mē kajaja. Xà kot kaj mē uràk nē ixkaga nē ma akupým mra nà? Anē.

⁶⁸ Hāmri nhūm Simāw Pētre kām:

—Nà kot paj mē akaga hkêt nē. Kapxipix na htem amnhī kaxyw akôt hamaxpēr jao kēp Tirtūm mē war akuri htīr tūm nē pa ho pa mā xwýnh.

⁶⁹ Ka na pre Tirtūm mē ixwýr amē. Jakamā na pa mē amnhī kaxyw akôt ijamaxpēr o ri ixpa. Nà kot paj mē aa akaga hkêt nē. Anē.

⁷⁰ Hāmri nhūm kuma nē kām:

—Nà ixte amnhī kaxyw mē apē 12jē rēnh tā na ka mē atō akwýjē hkīnhā axtem nē Satanasti hkôt amnhī xām. Anē.

⁷¹ Nhūm pre ā finat Jut Kariot kot mē inhō pahijē nhīhkram haxārja kukamā mē inhā harēnh anē. Mē inhī ō na pre. Nē kēp Simāw Kariot kra na pre. Tā ra kot mē ihkram haxār kaxyw nhūm Jejus kot amnhī kukamā omunh jakamā ā mē inhā harēnh anē.

7

Jejus tōjaja kot mē hkīnh wýr amnhī kôt hwýr ā mē harēnh

Matēwre 10.36, 13.57-58

¹ Tā nhūm Jejus arī Garirej kamā ri pa nē kormā akupým Jutej wýr mōr kêt nē. Jutej kamā Ijaew nhō pahijaja ra kot hā āmnēnh nhūm mē kot hpīr ā harēnh jakamā nhūm mē umaj kormā hwýr mōr kêt nē.

² Tā mē ixpē Ijaew mē ixte ixkre hkryre nhīpēx nē hā ixkīnh ā arīgroja ra ahtēp o mō. Mē ixkīnhā ā na pa pre htem ixpiitā Jutej wýr axpēn wýr akuprō nē ahpýnhā ri amnhīm ixkre hkryre nhīpēx nē kamā ixkrī.

³ Jakamā nhūm Jejus tōjaja hwýr mra nē kām nojarēt nē amnhī kôt kuwýjē kām:

—E kwa tokyx pu mē pahkwýjē hkôt. Ka mē kām aa mē kot mēmoj pumunh kêt kwý ho anhýr o ri mē hkôt apa kē mē kām akapēr mar prām xwýnhjaja ja hā apumu.

⁴ Na ka hte jar te apimxur pyrāk o amnhī nhīpēx. E kwa tokyx ma pu mē hkôt. Anē.

⁵ Katorxā hkôt mē kēp Jejus tō htā kormā amnhī kaxyw hkôt hamaxpēr kêt jakamā na prem ā kām kapēr anē.

⁶ Hāmri nhūm mē kām:

—Nà kormā. Kormā ixte mē kām amnhī to amnhīrit xā hā arīgro kormā kator kêt. Jakamā kot ka mē amā mē hkôt amrar prām nē māmri ma mē hkôt mra.

⁷ Koja mē apumu nē kām mē akurē hkêt nē. Nē mē akamā gryk kêt ka mē ri tanhmā amnhī nhīpēx to ho mē hkôt apa. No pa kot

paj mē hwýr mō nē mē kām mē kot amnhī tomnuj o pa hā mē harēnh o ri mē hkôt ixpa nhūm mē tee ri amnhī tā inhma nē ixkamā gryk nē.

⁸ Jakamā mē māmri ma mē hkôt mō. Kot paj kormā. Kormā ixte mē kām amnhī to amnhīrit xā hā arīgroja kormā kator kêt.

⁹ Anē nhūm mē tee ri kuma hāmri nē kure nē ma mē hkwyjē hkôt Jutej wýr mō. Nhūm Jejus kormā Garirej kamā ri pa hā apkati grēre.

¹⁰ Hāmri nē kormā ma hapu hā mē hkôt mō. Pa mē hkôt ri ixpa ho ixpa xwýnhjaja ma hkôt ixpa.

Mē kot ahpýnhā tanhmā Jejus jarēnh to hā mē harēnh

Juāw 7.37-44, 9.22, 10.19-21, 12.42-43

¹¹ Rôm nhūm ra mē ixpē Ijaew nhō pahijaja mē hkīnhja kamā mē pikuprōnh xwýnhjē kaēx ā Jejus japēr o ri mra. Nē hā axpēn kujjēr o mra nē axpēn mā:

—Kwa nok? Nhýri mán we? Anē.

¹² Nhūm Ijaew piitā tanhmā axpēn mā Jejus jarēnh to ho pa. Nē kamā mē hkwyjaja harēnh o:

—Nà kot amnhī to mex o pa xwýnh na.

Anhýr o harēnh o pa. Nē kamā mē hkwyjaja axtem nē harē nē harēnh o:

—Tk. Kot mē no kupyro o pa xwýnh kēnā. Anē.

¹³ Nom mē ō pahi pymaj mē piitā mē nom tanhmā harēnh to hkêt nē. Ām axpēn mā pix mā tanhmā harēnh to ho pa.

Jejus kot mē hkīnh xwýnhjē jahkre hā harēnh

Makre 3.22; Juāw 5.16

¹⁴ Tā pa mē mē hwýr pōj. Jejus mē pa mē hkôt ixpa ho ixpa xwýnhjaja mē hwýr pōj. Kormā mē hkīnhja hapēx kêt ri. Hāmri pa mē Jejus kôt Tirtūm mā amnhī jarēnh xā hā ixkreja wýr mra nē agjē nhūm Jejus mē ahkre ho nhý.

¹⁵ Hāmri nhūm mē inhō pahijaja tee ri kot tanhmā mē ahkre hto hā kuma nē hā axpēn kukja nē axpēn mā:

—Kwa mē pahkīnhā kot Tirtūm kapēr o istuda hkêt tā ā mē ahkre anē. Anē.

¹⁶ Hāmri nhūm amnhī tā mē kuma nē mē kām:

—Nà na pa hte amnhī krā hkôt tanhmā ri mē ajahkre hto hkêt nē. Ām kot mē awýr inhēmnh xwýnhhta nhý hā na pa hte ā mē ajahkre anhýr o ri mē akôt ixpa.

¹⁷ Tā kot kaj mē amā Tirtūm kām hprām xā hkôt amnhī nhīpēx prām hā kot kaj mē ixte ý hā ixkapēr ā ixpumunh kurē kumrēx.

¹⁸ Amnhī krā hkôt mē kām kapēr o ri mē pa xwýnhjaja na htem mē kot mē mar nē mē hā hpjiāam pix kaxyw tanhmā mē kām kapēr to ho ri pa. No kêt pa na mē ate ixkapēr mar nē kot mē awýr inhēmnh

xwýnhnta ā apijaam pix kaxyw na pa hte tanhmā mē amā ixkapēr to ho ri ixpa. Jakamā ām hāmri na pa hte mē amā ixkapēr o ri ixpa.

¹⁹—Finat Mojes na pre mē panhīgētjaja kot tanhmā amnhī nhīpēx to ho pa nhūm Tirtūm kot mē kām hā karō jarēnh o ri mē hkôt pa htā ka mē hkôt amnhī nhīpēx kêt nē. Tā ixte hkôt amnhī nhīpēx kêt ā ixto axēx nē mē ate ixpīr kaxyw ixtā amnhī jarēnh ri apa. Anē.

²⁰ Hāmri nhūm mē ā Jejus kot mē kām kapēr anhýrja ma nē hēx rom kām:

—Kwa mē ixtō na pa apīr mā ka ri ā mē ijarēnh anē? Amrakati kēnā. Kwa mām ka akra xapā nā? Hā na ka ā ri akapēr anē. Anē.

²¹ Hāmri nhūm mē kām:

—Nā ixte mē pahkôt xā hā arīgro hā akupým mēhō myta ho mex jakamā na ka prem ja hā ixpumu nhūm ja mē apē omnuj nē. Nē te ixte mē pahkôt xā hā arīgro hā ixpijaam kêt xwýnh pyrāk ā ijarē.

²² Nom na ka htem ixpyrā nē mē panhō arīgromnu hā mēmoj tā axàpēnh o ri apa. E pa mē amā mēmoj jarē ka mē inhma. Na pre finat Mojes mē pamā mē pahte mē pahkra myre pē my kwryt kà jakā ā mē pamā karō. Kukamā hīgētjaja kot kām ja hā karō xā hkôt. Jakamā na htem mē hkra myre hapōj nē hā semān pyxi nē hapēx nhūm mē kēp mēmy hkwrýt kà jakā.

²³ Mē pahkôt xā hā arīgro hā hō kator tādā nhūm mē hā semān pyxi nē mē panhō arīgromnu hō hā kēp my kwryt kà hkwy krāhta. Mojes kot Tirtūm nhý hā ja hā mē pamā karō xā hkôt. Jao mē panhō arīgromnu hā apē. Tā pa pre mē apyrā nē arīgromnu hā ixàpēnh pē akupým mēhō myta ho mex ka mē ja hā ixpumu nē axtem nē ixtýx ri ixte amnhī nhīpēx o ixpa xwýnh ā ijarē nē mē ate ixpīr kaxyw ā amnhī jarē.

²⁴ Kwa mē amnhī krā hkôt tanhmā mē harēnh to ho ri apa hkêt nē. Ām mē kot tanhmā amnhī nhīpēx to ho pa hā mē omu nē ajamaxpēr o: “Kwa xā we Tirtūm kām ja mex nā?” Anhýr o mām kêt mē ajamaxpēr nē ri kormā tanhmā mē harēnh to. Anē.

²⁵ Hāmri nhūm Jerujarē nhō xwýnh kwýjaja ja hā kuma nē tee ri hkukamā hamaxpēr. Hāmri nē hā axpēn kukja nē axpēn mā:

—Kwa xā tām na mē panhō pahijaja mē kot hpīr kaxyw hā amýnē?

²⁶ Ota jar mē pakamā ri pa htā nhūm mē ām omu nē kām tanhmā nē hkêt nē. Mām mē ām hāmri kēp Kris ā hkamnhīx jakamā kapēr ma nē ām kuma nē kēp Kris ā tanhmā ho hkêt nē. Anē.

²⁷ Hāmri nhūm mēhōja kuma nē kām:

—Tk. Nā kēp Tirtūm kot mē pahwýr mēnh xwýnhre hā. Kēp Najare nhō xwýnh kēnā. Mē pahte hipēēxā mē katorxā wa omunh mex. No kêt Tirtūm kot mē pahwýr mēnh

mā xwýnhnta koja xep mē pahwýr kato pu mē nhýhýnh htēm xā hkôt omunh kêt nē. Anē.

²⁸ Róm nhūm Jejus arī Tirtūm mā amnhī jarēnh xā hā ixkreja kamā mē ahkre ho nhý. Jakamā mē kot axpēn mā harēnh ā amnhī tā mē kuma nē mē kām:

—Xā mē ate aprī hā ixpumunh nē nhýhýnh ixtēm xā hkôt ixpumunh? Nā mē ate ja hā ixpumunh kêt. Na pa pre amnhī hkrā hkôt mē awýr inhmōr kêt nē. Na pre mēhō mē awýr inhmē. Nom kot mē awýr inhmēnh xwýnhja kormā mē ate omunh kêt.

²⁹ Ām papxpix na ixte omunh. Kurūm ixwryk xwýnh na pa. Kot mē awýr inhmēnh nhūm kurūm ixwryk jakamā ixte ixpīr hā omunh par. Anē.

³⁰ Hāmri nhūm mē hkwyjaja tee ri ā kot amnhī jarēnh anhýrja ma nē ri axpēn mā harēnh o:

—Kwa Tirtūm kot mē pahwýr mēnh ā kot amnhī to hēx kēnā. E kwa pu mē ā kot amnhī to hēx anhýr ja ā unē nē haxā nā?

Anhýr o axpēn mā hā amýnē. Nom kormā mē kot unēnh nē haxār xā hā arīgroja kormā kator kêt jakamā nhūm Tirtūmja nē mē omunh mex nē nhūm mē ām kām unēnh prām kapry.

³¹ No nhūm mē hkwyjaja mē kurom kuma nē kēp Tirtūm kot mē pakaxyw ām xwýnh ā omunh kurē kumrēx nē amnhī kaxyw hkôt hamaxpēr. Hāmri nē axpēn mā harēnh o:

—Kwa mām kēp Tirtūm kot mē pahwýr mēnh mā xwýnhnta mām nā? Mē pahtō kot pu urāk nē aa mē kām mē kot mēmoj pumunh kêt o anhýr rax o ri papa? Amrakati kumrēx. Nā pēr tām kēnā. Anē.

Pôristi hkwy kot Jejus pynēnh kaxyw ā mē harēnh

³² Nhūm prem ā axpēn mā Jejus jarēnh anhýr o kuhē hāmri nhūm Parijew nhō xwýnhjaja hā mē kuma. Hāmri nē patre krāhtūnjē mē mē ma Jejus wýr mēō pôristi hkwy rē nē mē kām:

—E mē ma Jejus wýr mra nē unē nē man akupýn o tē. Anē.

³³ Hāmri nhūm mē kuma nē ma hwýr mra nē omu nom tokyx unēnh kêt nē. Kormā kapēr ā mar o kuhē. Nhūm Jejus arī mē kām kapēr o xa nē mē kām:

—Nā kot paj jar mē akôt ri ixpa hā mytwry grēre hāmri nē ma akupým kot mē awýr inhmēnh xwýnhnta wýr api.

³⁴ Ka mē tee ri jar ijarē o ri apa nom nhýri ixpumunh kêt nē. Nē ma inhmōr xāta wýr kot kaj mē atō ma ixtō amōr kêt nē. Anē.

³⁵ Hāmri nhūm mē tee ri ā kot amnhī jarēnh anhýrja ma nē axpēn mā:

—Kwa nhýhým koja we ma mō pu mē hkôt papa hkêt nē? Mām mē pahkwýjaja kot Gresjē kamā mē pa xwýnhjē hwýr koja ma

mō nē hpānhā mē hkôt mē ahkre ho pa nà? Hā na ā mē pamā amnhī jarēnh anē?

³⁶ Mo na ri mē pahte tee ri hapêr o papa hā mē pajarē nē mē pahte hkôt pamrar kêt ā mē pajarē? Anē.

Tirtūm Karō te kēp gō nyw pyrāk ā harēnh Juāw 4.13-14; Apokarip 22.1, 22.17

³⁷ Tā nhūm ra mē hkīnhja hapēx kaxyw hitep xā hā arīgro maatija kato. Jakamā nhūm Jejus kānhmā xa nē kypē mē hpikuprōnh xwýnhjē mā kapēr nē mē kām:

—E te mē amā kōr o apa pyrāk xwýnhjaja. Mē amnē ixwýr akuprō. Kot kaj mē amnhī kaxyw ixkôt ajamexpēr pa tanhmā mē ato ka mē apē Tirtūm mē wa ixri atūr tūm nē apa ho apa mā xwýnh.

³⁸ —Kot kaj mē ja hā amnhī pumu hāmri nē ma mē kām ixkapēr jarēnh o ri mē hkôt apa. Te mē kām kōr nhūm mē ate mē kām gō hkwy nhūm mē kot ho hkōm pyrāk o mē hipēx o ri mē hkôt apa. Hāmri nhūm mē ama nē mē apyrā nē amnhī kaxyw ixkôt hamaxpēr. Pa ixte tanhmā mē atoja pyrā nē tanhmā mē ho nhūm mē apyrā nē kēp wa ixri htūr tūm nē pa ho pa mā xwýnh. Anē.

³⁹ Nhūm pre ā Jejus mē kām kapēr anē. No ām hā kuxi nē mē kām kapēr nē hprī hā harēnh kêt nē. Tirtūm Karō kot nhýrmā mē kot amnhī kaxyw Jejus mā hamaxpēr xwýnhjē karō mā gjēxja nhūm ā mē kām hā kuxi nē harēnh anē. No kormā akupým kaxkwa hwýr āpir nē mex o mex nē hkrī hkêt jakamā kormā mē hwýr Karō rēnh kêt nē.

Mē kot ahpýnhā tanhmā Jejus jarēnh to hā mē harēnh

Juāw 7.11-13, 7.25, 10.19-21

⁴⁰ Hāmri nhūm mē kot Jejus mar o hkrī xwýnhjaja ā kapēr anhýrja ā kuma nē nē ahpýnhā tanhmā harēnh to nē harēnh o:

—Kwa finat Mojes pyrā nē kēp Tirtūm nhý hā kapēr jarēnh o pa xwýnh na nà? Anē.

⁴¹ Nhūm kamā mē hkwyjaja mē kām:

—Nā Tirtūm kot mē pakaxyw ām xwýnhata na. Anē.

Nhūm kamā mē hkwyjaja ja hā mē kuma nē mē kām:

—Tk. Nā kēp Garirej nhō xwýnh kēnā kot kêt Tirtūm mē pakaxyw ām.

⁴² Tirtūm kapēr ā kagā htūm kot kēp Garirej nhō xwýnh ā harēnh kêt. Kēp Pahī Tawi hkanrēhā hkagrōt nyw jakamā koja urāk nē Jutej kamā krī pē Perēj kamā kato. Jao koja urāk nē kēp Jutej nhō xwýnh.

Anhýr o ri axpēn mā harē. Mē kot htýx Jejus pika pē Garirej kamā kator ā hkamnhix jakamā ā axpēn mā harēnh anē. Nom pika pē Jutej kamā na pre kato. Krī pē Perēj kamā. Tā no nhūm mē hkwyjaja ja hā mar kêt jakamā kēp Tirtūm kot mē pahwýr mēnh xwýnh kêt ā hkamnhix.

⁴³ Jakamā nhūm mē ā ahpýnhā axpēn mā harēnh anē.

⁴⁴ Nhūm mē hkwyjaja ra kot unēnh kaxyw tā tokyx unēnh kêt nē.

Pōristi kot Jejus pynēnh kêt ā mē harēnh Matēwre 7.28-29

⁴⁵ Tā nhūm patre nhō pōristijaja. Mē kot Jejus pynēnh mā hwýr mrrar tā hāmri ā kapēr anhýrja ā kuma nē tee ri hamaxpēr nē unēnh kêt nē. Nē awjanā nē ahte ý kamā ma akupým patre krāhtūmjē mē Parijew nhō xwýnhjē hwýr mra. Hāmri nhūm mē omu nē mē kām:

—Pa nok? Tanhmā na ka mē amnhī to nē unēnh nē ho amōr kêt nē? Anē.

⁴⁶ Hāmri nhūm mē kām:

—Nā na pa mē unēnh kêt nē. Kapēr mex kēnā. Te kot mē pakapēr pyrāk kêt jakamā pa mē tee ri kapēr ā kuma nē unēnh kêt nē. Anē.

⁴⁷ Hāmri nhūm Parijew nhō xwýnhjaja mē kuma nē mē kām:

—Tk. Kwa mán ka mē ra mē urāk nē tanhmā kot amnhī to hēx toja ma nē hkôt ajamaxpēr nā?

⁴⁸ Mē ixpē Parijew nhō xwýnhjaja nē mē panhō pahijaja na pa htem hkôt ijamaxpēr kêt nē.

⁴⁹ No kêt mē kot mar nē hkôt hamaxpēr xwýnhjtijaja na htem mē ixkīnhā finat Mojes kapēr mar kêt nē. Ām Jejus kapēr pix na htem kuma nē hkôt hamaxpēr. Mýrapē koja Tirtūm tanhmā mē homnuj týx to nhūm mē rī amnhī pumu. Anē.

Nīkotē kot Jejus xyr pē kapēr ā harēnh

Juāw 3.1-21

⁵⁰ Hāmri nhūm Nīkotēja mē mar o xa. Mē urāk nē kēp Parijew nhō xwýnh tā na pre ra kamāt ō hā Jejus wýr tē nē kām kapēr. Jakamā tee ri hā mē kapēr ma hāmri nē yr pē mē kām kapēr nē mē kām:

⁵¹ —Tk. Kwa kormā mē pahte pahprī hā kapēr mar nē tanhmā kot amnhī nhīpēx to hā omunhre hā. Na pre finat Mojesja Tirtūm nhý hā mē panhīgētjē mā ja jarēnh o:

Kēr ka mē aprī hā mē kapēr ā mē ama nē mē kot amnhī nhīpēx ā mē omu nē rī kormā tanhmā mē harēnh to.

Anhýr tā ka mē kormā aprī hā Jejus kot amnhī nhīpēx ā omunh kêt tā ra kot amnhī tomnuj xwýnh ā harē. Anē.

⁵² Hāmri nhūm mē tee ri kuma nē kām:

—Tk. Kwa xa wē urāk nē apē Garirej nhō xwýnh hā na ka ā yr pē akapēr anē? Xā Tirtūm kapēr ā kagā htūm kot Garirej nhō xwýnhjē hō kēp ý hā kapēr jarēnh o pa xwýnh ā harēnh? Nā ā kot harēnh anhýr kêt. Anē.

⁵³ Nhūm mē ā Nīkotē mā kapēr anē hāmri nē anhrā nē Tirtūm nhōrkwý rūm hapōj nē ma akupým ōrkwý hwýr āhkurē ho mra.

8

Mēhō ni kot nhām mē mjēn o amnhīkati hā harēnh

Xiakre 2.10-13

¹ Tā nhūm Jejus Tirtūm nhōrkwý kamā mē ahkre hpa hāmri nē kato nē ma hixēt prēk pē Oriwēhti hwýr tē. Hāmri nē hā api nē nhýri nō nē ra gōr.

² Tā nhūm apkati nē myt kator o mōr mē nhūm kánhmā nhý nē akupým wrý nē Tirtūm mā amnhī jarēnh xā hā ixkre hwýr tē. No ām kormā ixkre pu hā kahē hkre kamā nhý. Nhūm krī nhō xwýnhjaja omu nē hā htu rax nē nhūm tanhmā mē ahkre hto ho nhý.

³ Hāmri nhūm Parijew nhō xwýnhjē mē Tirtūm kapēr tūm o mē ahkre ho mē pa xwýnhjaja hwýr mēhō nija o tē. Na ra ham mēhō pé mjēn o amnhīkati ho nō nhūm mē ja hā omu nē unē nē hpa hā kupy nē ma Jejus wýr hĳjēnh o mō. Hāmri nē mē kot mar o kuhē xwýnhjē kutā ām nhūm xa.

⁴ Hāmri nhūm mē Jejus mā:

–E ot pa mē awýr jahti ho tē ka omu. Na ham mēhō pé mjēn o amnhīkati ho nō. Pa mē ja hā omu nē unē nē man awýr o tē.

⁵ E tanhmā kot puj mē hipēx to? Na pre finat Mojes Tirtūm nhý hā mē panhīgētjē mā ja jarēnh o:

Koja mēnijē hō axtem nē nhām mēhō pé mjēn o amnhīkati ho nō ka mē ja hā omu nē apiitā ahpýnhā kēn rūnh jamý nē ho htak o apī.

Anhýr o kot harēnh. No ka? Tanhmā kot kaj mē inhmā ja jarēnh to? Tanhmā kot paj mē hipēx to nhūm amā mex nē? E mē inhmā tanhmā mē ixte hipēx to jarē. Anē.

⁶ Nhūm mē ā hēx rom nija ā Jejus kukjēr anē. Kot mē kot hpīr nē mē kām kapēr nhūm mē kot hā mar nē mē hkrāhtūmjē hwýr mōr nē kām kot Mojes kapēr kwým ri mē ahkre hā harēnh kaxyw nhūm mē hēx rom ā hkukjēr anē. Hāmri nhūm mē kuma nē tanhmā hā mē kām nē hkēt nē. Ām htýx hikōt nē ĩhkrakrā ho pyka kagā ho nhý.

⁷ Nhūm mē tee ri omu nē axte hā hkukja nhūm kánhmā xa nē mē kām:

–Tōe. Nā kot ka mē atō aa tanhmā amnhī tomnuj to hkēt kumrēx ā amnhī pumu hāmri nē kam nē rī kaxyw kēn ō py nē akumrēx ho hkura. Kē akwýjaja rī kormā akōt hkwy jamý nē ho htak. Anē.

⁸ Hāmri nē akupým hikōt nē pyka kagā ho nhý.

⁹ Hāmri nhūm mē tee ri kapērja kōt kuma hāmri nē mē kot mar o kuhē xwýnhjē rūm anhrā nē ma mra. Mē piitā mē kot amnhī tomnuj xwýnh ā amnhī pumunh mex jakamā tee ri ā kot mē kām kapēr anhýrja ma nē anhrā nē ma akupým hpýnh nē axpēn kōt mror o xa. Mēhpigēt kumrēx nē hpānhā mē nywjaja nhūm mē hpýnh nē ma

axpēn kōt mror o ām kām hapēx. Nhūm Jejus mēnija pix wa ahte mē kot mar xwýnhjē kutā wa arīk.

¹⁰ Hāmri nhūm Jejus kánhmā xa nē nita mā kapēr nē kām:

–Pa? No mē kot ato kapēr xwýnhnta mē? Xā na mēhō kēn o akuranh kēt nē? Anē.

¹¹ Nhūm kām: “Ma amrakati.” Anē nhūm kām:

–Tōe. Nā kot paj ijaxwýja tanhmā ato hkēt nē. E mamri ma akupým anhōrkwý hwýr tē. No ām kēr ka axte ā amnhī nhīpēx anhýr kēt nē. Ām kwari ho kwari. Anē.

Jejus kot hprī hā amnhī jarēnh

Juāw 1.4; Rōmān 13.12-14; Epes 5.8-14; Wam Tesarōn 5.5-8

¹² Tā nhūm arigro hō hā nhūm Jejus axte Tirtūm nhōrkwý hwýr tē nē kamā mē ahkre ho nhý nē mē kām:

–Nā te ixpē mē piitā mē ō kanē pyrāk. Na hte kanēja mē kām hirā mex nē nhūm mē kamā rīt mex o pa. Jao kamāt kō kamā ri pa hkēt nē. Ja pyrā nē na pa hte Tirtūm kot amnhī nhīpēx o amnhīrīt mex o ri ixpa. Kot ka mē atō amnhī kaxyw inhmā ajamaxpēr nē ixkōt amnhī xām hāmri nē tanhmā amnhī tomnuj to ho apa hkēt nē. Ām Tirtūm kām hprām xā kōt pix mā tanhmā ri amnhī nhīpēx to ho ri apa. Jao te ate kanē hpōk nhīrā kamā arīt mex pyrā nē apē wa ixri atīr tūm nē apa ho apa mā xwýnh. Anē.

¹³ Hāmri nhūm Parijew nhō xwýnhjaja tee ri ā kapēr anhýr ā kuma nē kām:

–Tk. Kapxpix na ka ā amnhī jarēnh anē. Mēhō kot ā ate amnhī jarēnh anhýrja kōt kot mē inhmā ajarēnhre hā. Jakamā kot paj mē ama nē ām ama. Anē.

¹⁴ Hāmri nhūm mē kām:

–Nā mēhō kot ā ijarēnh anhýr kēt tā no ām hāmri na pa mē amā amnhī jarē. Ixēx kēt. Mē arom ixte nhýhýnh ixwryk xā hā amnhī pumunh mex. Nē mē arom ma akupým nhýhým ixāpir xā hā amnhī pumunh mex. Jakamā ām hāmri na pa ā mē amā amnhī jarēnh anē.

¹⁵ Na ka htem amnhī krā hkōt tanhmā ri ijarēnh to. No pa na pa kormā amnhī xwar tanhmā mē ajarēnh to hkēt nē.

¹⁶ Ixte tanhmā mē ajarēnh to ronhýx pa ām hāmri mē ajarē. Nhýx pa ām papxpix amnhī krā hkōt tanhmā mē ajarēnh to hkēt nē. Nhýx māānēn Inhīpēxā pé kot mē awýr inhmēnh xwýnhnta inhīkō hā pa wa ām hāmri axpēn kōt tanhmā mē ajarēnh to. Mē ate amnhī to mex ā mē ajarē rý mē ate amnhī tomnuj ā mē ajarē.

¹⁷ Tirtūm kapēr ā kagā htūm kot ja jarēnh kot:

Koja mēhō wa hamēxkrut nē tanhmā mēmoj jarēnh to nē ām axpēn kōt harēnh o htīpxi. Hā kot kaj mē wa ama nē ām

hāmri wa kot harēnh kôt ajamaxpēr kurê kumrêx.

¹⁸ Anhÿr o kot harēnh. Tā pa ā amnhī jarēnh anē nhūm Inhīpēēxà kot mē awÿr inhmēnh xwÿnhhta māānēn ā ijarēnh anē. Wa ixpi-jakrut tā ā wa ixte axpēn kôt amnhī jarēnh anhÿr jakamā kwa mē ixte tanhmā amnhī jarēnh toja ma nē ixkôt ajamaxpēr kêt wehe. Anē.

¹⁹ Nhūm pre ā Jejus mē kām kapēr anē. Hāmri nhūm mē kuma nē kām:

—No nhÿri na we anhīpēēxà ja? Anē.

Hāmri nhūm mē kām:

—Nā mē ate Inhīpēēxà pumunhre hā. Mē ate aprī hā ixpumunh ronhÿx ka mē māānēn aprī hā Inhīpēēxà pumunh mex kurê kumrêx. Nom mē ate ixpumunh mex kêt jakamā na ka mē māānēn omunh mex kêt nē. Anē.

²⁰ Nhūm pre ā Jejus mē kām kapēr anē. Arī Tirtūm mā amnhī jarēnh xā hā ixkreja kamā mē ahkre ho xa. Mē kot kâxpore gjēnh xā kuri mē ahkre ho xa. Nhūm mē kām hkurê xwÿnhjaja tee ri kot tanhmā mē ahkre htoja ma nē kām unēnh nē haxār prām nē. Nom kormā mē kot ā hipēx anhÿr ā arīgro kormā kator kêt jakamā nhūm Tirtūmja nē mē omunh mex nē nhūm mē ām kām unēnh prām kaprÿ.

²¹ Hāmri nhūm Jejus arī mē kām kapēr o xa nē mē kām:

—Nā kot paj nhÿrmā mē arūm ixkato nē ma akupÿm api. Ka mē tee ri ijpār nom nhÿr ixpumunh kêt nē. Hāmri nē mē ate amnhī tomnuj o apa rāhā ty nē mē atō ixwÿr axāpir kêt nē. Anē.

²² Hāmri nhūm Ijaew nhō pahijaja tee ri ā kapēr anhÿrja ā kuma nē axpēn mā hā hpēr o pikēnh o kuhē nē axpēn mā:

—Kwa mām ra kot amnhī pīr kaxyw ā na ri hkôt mē paxāpir kêt ā mē pajarēnh anē nā? Anē.

²³ Hāmri nhūm amnhī tā mē kuma nē mē kām:

—Nā mē kajaja mē apē pyka nhō xwÿnh na ka mē. No pa na mē arom ixpē kaxkwa nhō xwÿnh jakamā mē pajamaxpēr kot axpēn pyrāk kêt.

²⁴ Kot kaj mē ixpē kaxkwa rūm ixwÿrÿk xwÿnh ā ixpumu nē amnhī kaxyw inhmā ajamaxpēr nē ixkôt amnhī xunhwÿr kêt hā kot kaj mē ate amnhī tomnuj o apa rāhā nhÿrmā atyk o mē kamjaja Tirtūm mā amnhī pānhā amnhÿre. Anē.

²⁵ Nhūm Jejus ā mē inhō pahijē hukamā mē kot amnhī nhīpēx jarēnh anē nhūm mē tee ri amnhī tā kuma nē kām:

—Kwa mē atō na ka we ri ā mē inhmā akapēr anē? Anē.

Hāmri nhūm mē kām:

—Nā ra ixte mē amā amnhī jarēnh kēnā. Xān ka mē kormā aprī hā inhmar kêt nē?

²⁶ Kot paj nhÿrmā mē amā mē ate amnhī tomnuj piitā ho amnhīrīt pa. Na pa kot mē awÿr inhmēnh xwÿnhhta pix xō ri tanhmā mē amā ixkapēr to ho ri ixpa. Ām hāmri na hte tanhmā mēmoj jarēnh to. Na hte hēx kêt nē. Anē.

²⁷ Nhūm pre ā Jejus mē kām Hipēēxà kot mē hwÿr mēnh ā harēnh anhÿr tā no nhūm mē Hipēēxà kēp Tirtūm ā hkôt hamaxpēr kêt nē.

²⁸ Jakamā nhūm mē kām:

—Nā koja mē nhÿrmā pī kahpa hā inhō ka mē rī kormā aprī hā ixpē Tirtūm rūm mē awÿr ixwÿrÿk xwÿnh ā ixpumu. Nē ixte amnhī krā hkôt ixkapēr o ri ixpa hkēt ā ixpumu. Nē ām Inhīpēēxà xō ri ixprī hā ixkapēr o ri ixpa hā ixpumu.

²⁹ Ixte kām hprām xā hkôt pix mā tanhmā ri amnhī nhīpēx to ho ri ixpa jakamā na hte ixtānopxar mex o ixkôt pa ho pa. Koja aa ixkaga hkēt nē. Anē.

³⁰ Hāmri nhūm mē hkwyja kuma nē hkwyjē rom kapēr kôt hamaxpēr

³¹ nhūm amnhī tā mē omu nē mē kām:

—Nā ām hāmri na ka mē tā ixkôt ajamaxpēr. Tā kēr ka mē ixkôt amnhī xunhwÿ nē ixkapēr kôt pix mā ri amnhī nhīpēx mex o ri apa. Hāmri pa ja hā mē apumu nē mē apē ixkwÿ kumrêx ā mē ajarē.

³² Ām hāmri na pa hte ā ixkapēr anhÿr o ri ixpa. Tā kot kaj mē ixkôt ri amnhī nhīpēx o ri apa hāmri nē aprī hā inhmar tÿx nē. Nom na hte kormā mēmoj kot amnhī tā mē ato htÿx pyrāk o mē anhīpēx ka mē tee ri amnhī krā hkôt kām anhÿr prām kaprÿ. Tā kot kaj mē ixkôt amnhī xunhwÿ nē ixkôt ri amnhī nhīpēx hāmri nē Tirtūm nhÿ hā tām amnhī nhīpēx. Jao ŷ hā ate amnhī tomnuj mā anhÿre. Anē.

³³ Nhūm pre ā Jejus mē kām kapēr anē hāmri nhūm mē tee ri kuma nē kām:

—Kwa mē ixpē mē pahpār krax finat Apraāw kanrēhā htāmnhwÿjē kēnā. Na pre mēmoj kot amnhī tā ho htÿx pyrāk o hipēx kêt nē. Jakamā mēmo kot we mē ixpē hkanrēhā htāmnhwÿjē ho htÿx ka we ri ā mē ijarēnh anē? Nā amrakati kēnā. Tā kwa mon ka ā mē ijarēnh anē? Anē.

³⁴ Hāmri nhūm Jejus hprī hā mē kām aw-jarē nē mē kām:

—Kwa mē ixkapēr ma nē amnhī krām haxār tÿx nē. Nā mē kot amnhī tomnuj o mē pa xwÿnhjaja te mē kot amnhī tomnuj tām ri kot amnhī tā mē ho htÿx pyrāk o mē hipēx. Jakamā nhūm mē urer kêt rāhā nē pa ho pa. Nē ā amnhī nhīpēx anhÿr rāhā ho pa.

³⁵ Jakamā ixkīnhā mē kēp Tirtūm kwÿ hkēt. No pa na ixpē Tirtūm Kra jakamā māānēn ixpē hkwy na pa.

³⁶ Tā mē kajaja. Kot kaj mē ixpē Tirtūm Kra hā ixkôt amnhī xunhwÿ hā kot pa

tanhmā mẽ ato ka mẽ ixpyrà nê apê wa ixkwýy. Hāmri nhũm mẽ ate amnhĩ tomnuj te kot mẽ amā urer pyrāk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tirtũm kra hkêt xwýnhjê jarênh

³⁷ Nhũm Jejus arĩ mẽ kām kapêr nê mẽ kām:

—Nà ãm hāmri na ka mẽ apê finat Apraāw kanrêhā htãmnhwý hā amnhĩ jarê. Nom mẽ apê hkanrêhā htãmnhwý htā urāk nê amnhĩ kaxyw Tirtũm kôt ajamaxpêr kêt nê. Jakamā na ka htem ixkapêr ma nê ãm ama nê ixk-aga. Nê axtem nê ixpĩr mã. Kop apu Apraāw arĩ mẽ akamā pa ronhýx ã inhĩpêx anhýr kêt nê.

³⁸ Na pa hte Inhĩpêêxā hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhām mẽ kapêr kôt amnhĩ nhĩpêx jakamā na ka htem ixkĩnhā Inhĩpêêxā hkôt amnhĩ nhĩpêx kêt nê. Anê.

³⁹ Hāmri nhũm mẽ tee ri amnhĩ tã kuma nê kām:

—Tk. Kwa mon ka ã mẽ ijarênh anê? Mẽ ixte Apraāw kôt amnhĩ nhĩpêx o ri ixpa kênā. Anê.

Hāmri nhũm mẽ kām:

—Nà. Mẽ ate hkôt ri amnhĩ nhĩpêx o apa ronhýx ka mẽ urāk nê Inhĩpêêxā kapêr kôt amnhĩ nhĩpêx.

⁴⁰ No na ka mẽ ra axtem nê ixpĩr mã. ãm hāmri na pre Tirtũm inhmā awjarê pa ô ri tanhmā mẽ amā mẽmoj jarênh to ho ri ixpa htā ka mẽ ra axtem nê ixpĩr mã. Kwa xā na pre Apraāwja ã mẽ hĩpêx anhýr o pa? Nà na pre ã mẽ hĩpêx anhýr kêt nê.

⁴¹ Mẽ ate hkôt amnhĩ nhĩpêx xwýnhnta axtem na. Kêp Apraāw kêt. Nê mãânên kêp Tirtũm kêt. Anê.

Hāmri nhũm mẽ tee ri kuma nê kām:

—Tk. Kwa nà ã mẽ ijarênh anhýr kêt nê. Mẽ ixte Apraāw kôt amnhĩ nhĩpêx xwýnh kênā. Tã ka ri axtem nê ã mẽ ijarênh anê. Mẽhō hkôt kot pa kêt wem ri axtem amnhĩ nhĩpêx o ri ixpa? Anê.

⁴² Hāmri nhũm mẽ kām:

—Nà mẽ ate Apraāw kôt amnhĩ nhĩpêx ronhýx ka mẽ ixpumu nê urāk nê amā ix-prām nê. Apraāw kot hkôt amnhĩ nhĩpêx o pa xwýnhnta tãm kot mẽ awýr inhmên nhũm mẽ awýr ixwryk kênā. Na pa pre amnhĩ krā hkôt man mẽ awýr ixwryk kêt nê. Tãm na pre mẽ awýr inhmê pa wry.

⁴³ Kwa mon ka mẽ aprĩ hā ixkapêr mar mex kêt nê? Nà mẽ amā ixkôt amnhĩ nhĩpêx prām kêt jakamā na ka mẽ tee ri ixkapêr ma nê aprĩ hā mar mex kêt nê.

⁴⁴ Mẽ ate hkôt amnhĩ nhĩpêx xwýnhnta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwýnhjê hpām maati na. Nê kêp mẽ kām hêx o pa xwýnhjê pām maati na. Ā kot amnhĩ nhĩpêx kot

anhýr. Nê kām mẽ kapêr mex mar prām kêt o pa. Nê ãm hêx pix o pa jakamā kêp mẽ hêx xwýnhjê pām. Ā kot amnhĩ nhĩpêx anhýr xwýnh tã ka htem hkôt amnhĩ nhĩpêx o ri apa.

⁴⁵ —Na pa hte kurom ãm hāmri ixkapêr o ri ixpa. No mẽ kajaja mẽ apê hêx nhi xwýnh maati ja hkra jakamā mẽ amā ixkapêr mar prām kêt.

⁴⁶ Xā na ka pre mẽ atō ixte tanhmā amnhĩ tomnuj to hā ixpumu? Nà amrakati. Ixte amnhĩ to mex o ri ixpa xwýnh na pa. Nê tãm ixkapêr o ri ixpa xwýnh tã ka mẽ inhma nê ãm inhma nê ixkôt ajamaxpêr kêt nê. Kwa mon ka mẽ ja hā ixpumu nê ixkôt ajamaxpêr nê ixkôt amnhĩ xunhwýr kêt nê?

⁴⁷ Tirtũm krajaja na htem kapêr mar týx nê hkôt amnhĩ nhĩpêx o pa. No mẽ apê hkra hkêt jakamā mẽ amā kapêr mar prām kêt. Anê.

Mẽ kot Jejus kêp Satanasti hkwy hā harênh

⁴⁸ Hāmri nhũm mẽ ã Jejus kot mẽ harênh anhýrja ma nê kamā gryk týx kumrêx. Hāmri nê kām:

—Tk. Kwa ate amnhĩ tomnuj o apa xwýnhnti kênā. Ra Satanasti hkwy pẽ mẽkarõmnuti tanhmā kot akra hto jakamā na ka ã mẽ inhmā akapêr anê. Anê.

⁴⁹ Hāmri nhũm mẽ kām:

—Nà mẽkarõmnuti kot tanhmā ixto hkêt. Na pa hte Inhĩpêêxā hā ixpijaam pix o ri ixpa. Tã mẽ ate ixkĩnhā hā apijaam kêt jakamā mãânên pa ixtā apijaam kêt nê.

⁵⁰ Na pa hte amnhĩ krā hkôt mẽ piitā mẽ kot ixtā hpijaam prām xaj tanhmā mẽ kām ixkapêr to hkêt nê. No mẽ piitā mẽ kot ixtā hpijaam o paja na Inhĩpêêxā kām hprām. Tã koja nhýrmā amnhĩ nê ixtā mẽ hpijaam kêt xwýnhjaja mẽ kot amnhĩ ã htýx kamā hamak tũm xata wýr mẽ rênh pa.

⁵¹ —Nê kot ka mẽ atō wa ixkapêr ma nê ixkôt amnhĩ nhĩpêx. Hā kot kaj wa ixri atĩr tũm nê apa ho apa. Kwa mẽ ixkapêr ma nê amnhĩ krām hazar týx nê. Anê.

Nhũm pre ã Jejus Ijaew nhō pahijê mã kapêr anê.

⁵² Nhũm mẽ kuma nê kām:

—Kwa pêr ãm hāmri na ka hte Satanasti nhý hā ã mẽ htĩr tũm nê mẽ pa ho pa hā mẽ harênh anhýr o ri axêx o ri apa. Finat Apraāw na pre ri paa nê ty. Tã mẽ kot Tirtũm nhý hā kapêr jarênh o mẽ pa xwýnhjaja na prem urāk nê ri paa nê mãânên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwýnhjaja ari htĩr tũm nê pa ho pa hā mẽ harê. Nà na ka ãm mẽ inhmā mẽ ho axêx o xa.

⁵³ Na pre mẽ pahpām Apraāwja kot amnhĩ to rax tã ty nê hapêx. Nhũm mẽ kot Tirtũm nhý hā kapêr jarênh xwýnhjaja mãânên mẽ

kot amnhī to rūnh tā htyk pa nē hapêx. Mē kot amnhī to rūnh tā htyk pa nē hapêx kênâ kot kêt mē tanhmā amnhī to nē ari hūr tūm nē pa. Ām mē ixte akapêr mar nē atâ ixpijaam pix prām xaj na ka ā mē inhmā mē hūr tūm nē pa hā mē harēnh anē. Nom na ka ā mē harēnh anhūr kaprūr. Kot paj mē ri akapêr mar kêt nē. Anē.

⁵⁴ Hāmri nhūm mē kuma nē mē kām:

—Nā na pa hte amnhī krā hkôt mē ate ixtā apijaam hprām xaj tanhmā mē amā ixkapêr to hkêt nē. Kot paj anē nē am ixtūx ā amnhī nhīpêx anhūr kaprūr. No Inhīpêxâ tām kām mē apiitā mē ate ixtā apijaam o apaja nhūm kām hprām. Mē ate Tirtūm kôt amnhī nhīpêx o apa hā amnhī to axêx xwŷnhhta tām na kām mē ate ixtā apijaamja nhūm kām hprām. Tā ka htem ā amnhī nhīpêx anhūr kêt nē. Na ka htem ixkuk pumu nē axtem nē ixte Satanasti nhŷ hā mē amā ixêx o ri ixpa hā ijarē.

⁵⁵ Mē ate Inhīpêxâ hkôt amnhī nhīpêx ā amnhī jarēnh tā am amnhī to axêx o ri apa. No pa na pa hte mē arom am hāmri hkôt amnhī nhīpêx mex o ri ixpa.

⁵⁶ Amnepêm mē pahpār krax Apraāwja na pre mē awūr ixwrŷk kukamā ijarēnh ma nē mē arom inhŷ hā hkīnh tŷx nē pa. Anē.

Nhūm pre ā Jejus mē kām amnhī jarēnh anē.

⁵⁷ Hāmri nhūm mē kuma nē tee ri kot mē kām tanhmā Apraāw jarēnh toja ma nē kām:

—Tk. Xà na ka pre finat Apraāwja ano ho omu? Nā kormā anyw kênâ. Apraāw amnepêm htyk nē hapêx kênâ kot ka kêt kot akukamā ajarēnh mar nē hkīnh tŷx ā harē. Xàn ka pre ano ho omu? Kormā akator kêt ri na pre amnepêm htyk nhūm mē haxâr kênâ. Nā na ka am mē inhmā amnhī to axêx. Te amnepêm mē hkukamā apa nē ate mē omunh nē mē harēnh pyrāk. Kwa akatât kot mē inhmā awjarē. Anē.

Jejus kêp rāhā ho rāhā xwŷnh ā harēnh

⁵⁸ Hāmri nhūm Jejus mē kām:

—Nā ixêx kêt. Ām hāmri na pa ā mē amā amnhī jarēnh anē. Amnepêm kormā Apraāw kator kêt ri na pa pre ixrāhā ho ixrāhā ixpa na pa. Ixrāhā ho ixrāhā ixpa xwŷnh jakamā na pa pre hte inhno ho Apraāw pumunh mex o ri ixpa. Kwa mē ixkapêr ma nē amnhī krā him haxâr tŷx nē. Anē.

⁵⁹ Hāmri nhūm mē tee ri kot ā amnhī jarēnh anhūrja ā kuma nē kamā gryk tŷx nē. Nē axpên mā:

—Kwa tanhmā kot we amnhī to nē amnepêm rāhā nē ho pa xwŷnh ā amnhī jarē? Tirtūm pix na rāhā ho rāhā pa xwŷnh. Anē.

Hāmri nē kamā gryk xaj kên rūnh kwŷ kawrā ho ri hprôt nē kot ho htak o hpīr

kaxyw. Nom nhūm ra amnhī tā mē omu nē mē kêp akunok nē Tirtūm mā amnhī jarēnh xā hā ixkreja rūm kato nē ma tē.

9

Jejus kot no hkre xwŷnh o mex ā harēnh

Makre 8.22-26

¹ Hāmri nhūm Jejus ma tē pa mē hkôt ri mē ixpa ho mē ixpa xwŷnhjaja ma hkôt mra. Hāmri nē nhŷri no hkre xwŷnh pumu. Katorxā nhōxā hkre rūm na pre no hkre nē kato. Hāmri nē ra hprêk nē hpri kamā ahwŷr o hkrī.

² Tā hāmri pa mē mra nē omu nē hā Jejus kukja nē kām:

—Kwa mēmoj mŷrapê na pre we myti nēj no hkre nē kato? Xā tām kot tanhmā amnhī tomnuj to mŷrapê nā? Xā katorxā rŷhipêxâ kot amnhī tomnuj mŷrapê na pre ā no hkre nē kator anē? Anē.

³ Hāmri nhūm mē inhmā:

—Nā mēhō kot tanhmā amnhī tomnuj to mŷrapê no hkre nē kator kêt. Ām Tirtūm kot ho mex nhūm mē kot ja hā omunh kaxyw na pre ā no hkren kator anē. Tā kot paj Tirtūm nhŷ hā no ho mex ka mē ja hā ixpumu. Na pa hte kormā jar pikap ri ixpa ri Tirtūm mā tanhmā amnhī nhīpêx mex to ho ri ixpa.

⁴ Na htem arigro hā mēmoj tā apê nhūm kamât nhūm mē kām ure nē apênh kêt nē. Ja pyrā nē na pu htem kormā pahūr ri jar pikap ri papa ri Tirtūm mā tanhmā amnhī nhīpêx to ho ri papa. Tā kot puj mē nhŷrmā ty hāmri nē axte jar ā amnhī nhīpêx anhūr kêt nē. Jakamā kwa kēr pu mē ri jar pikap ri papa ri kām tanhmā amnhī nhīpêx mex to ho ri papa.

⁵ Na pa hte ā kām amnhī nhīpêx anhūr jao te kanē hirā mex pyrā nē ixprī hā mē kām Tirtūm kot amnhī nhīpêx o amnhūrīt mex o ri ixpa. Anē.

⁶ Nhūm pre ā Jejus mē inhmā amnhī jarēnh anē. Hāmri nē kot nohkre xwŷnhhta no o mex kaxyw hikôt nē argōx mē nē ho gwy kwŷ nhīpêx nē kânhmā xa nē ho no kukō.

⁷ Hāmri nē kām:

—E ma gō giēnh xā pē Siroe hwŷr tē nē kamā amnhī no kuhō. Anē.

Mē pakapêr kām Siroeja mē kot kām: “Nhŷhŷm mēnh xwŷnh” anhūr jarēnh pyrāk. Tā nhūm Jejus hwŷr kumē nhūm ma hwŷr tē. Hāmri nē kamā amnhī no hā gwy kuhōnh pa jao rīt mex kurē kumrêx. Hāmri nē rīt mex ā amnhī pumu nē hkīnh tŷx nē ma akupŷm ōrkwŷ hwŷr tē.

⁸ Hāmri nhūm ōrkwŷ kuri mē ōrkwŷ xwŷnhjaja nē mē kot pry kamā ahwŷr o hkrī hā omunh xwŷnhjaja amnhī jaēr pē ra rīt mex ā omu nē tee ri hā axpên kukja nē axpên mā:

—Kwa pēr pry kamā àhwÿr o hkrī xwÿnhnta na nà? Anē.

⁹ Hāmri nhūm kamā mē hwÿjaja mē kām:

—Tÿ. Tām na. Anē.

Nhūm kamā mē hwÿjaja mē kām:

—Nà tām kêt. Axtem mēhō na. Te kot urāk nom tām kêt. Anē.

Anhÿr o ri axpēn mā harē. Tā nhūm tām mē kām amnhī jarē nē mē kām:

—Tÿ pa kēnā. Pa na pa pre hte inhno hkre nē ri ixpa htā ra ixrīt mex. Anē.

¹⁰ Hāmri nhūm mē tee ri kuma nē kām:

—Kwa no tanhmā na ka we amnhī to nē ra arīt mex?

¹¹ Anē nhūm mē kām:

—Nà mē kot kām “Jejus” anhÿr xwÿnhnta na ixwÿr tē nē ixkaxyw gyw kwÿ kagō nē ho inhno kukō. Hāmri nē mē kot gō mā: “Siroe” anhÿr xwÿnhnta kamā ixte amnhī no kuhōnh kaxyw hwÿr inhmā anē pa ma hwÿr tē nē kamā amnhī no kuhō nē ixrīt mex kurē kumrēx. Anē.

¹² Hāmri nhūm mē kuma nē kām:

—No nhÿhÿm na ato mex xwÿnhja ma tē? Anē.

Hāmri nhūm mē kām:

—Konēn. Ixte nhÿhÿm htēm xà hkôt omunhre hā. Anē.

¹³ Hāmri nhūm mē kuma nē ma Parijew nhō xwÿnhjē hwÿr o mō nē mē kām harē.

¹⁴ Nē mē kām:

—E ot pa mē awÿr jahti ho tē. Na xep Jejusja jarāhā akupÿm kām no ho mex. Mē panhō arīgromnu htā nhūm hā no ho mex. Anē.

¹⁵ Hāmri nhūm mē tee ri mē kuma nē myta pumu nē kām:

—E mē inhmā amnhī jarē. Tanhmā na ka pre we amnhī to nē anohkre nē akrī htā ra ano mex nē? Anē.

Hāmri nhūm mē kām:

—Nà na pre Jejus gyw o inhno kukō nē inhmā anē pa gō ho amnhī no kuhō nē ixrīt kurē kumrēx. Anē.

¹⁶ Hāmri nhūm mē kuma nē tee ri Jejus ā xpēn kukjēr o kuhē nē xpēn mā harēnh o:

—Kwa mē panhō arīgromnu hā kot ho mex jakamā kēp Tirtūm rūm mē pahwÿr wrÿk xwÿnh kêt. Ām kot amnhī tomnuj xwÿnh kēnā. Anē.

Nhūm mē hwÿjaja harēnh o:

—Kwa nà. Kot amnhī tomnuj xwÿnh ronhÿx àhpumunh tÿx kôt no ho mex kêt nē. Anē.

¹⁷ Hāmri nē hpānhā no mex xwÿnhnta mā kām:

—No ka? Ate kot ano ho mex xwÿnh ā amnhī tā harēnh jakamā mēhō hā na ka hkamnhix? Mēhō na wehe? Anē.

Hāmri nhūm mē kām:

—Konēn. Mān kēp Tirtūm kapēr jarēnh o ri mē pa xwÿnh mān. Hā na ā inhno ho mex anē. Anē.

¹⁸ Hāmri nhūm mē tee ri kuma nē xpēn mā:

—Kwa pēr aa nohkre hkêt kēnā. Na pre ām amnhī to hēx o pa. E kwa pu mē amnhī wÿr katorxā nē hipēxā wa hā karō kē wa man tē nē tanhmā mē pamā harēnh to. Anē.

Hāmri nē wa hā karō

¹⁹ nhūm wa mē hwÿr tēn axā nhūm mē wa kām:

—Pa. E mē inhmā mēmoj jarē. Xà we wa akrata na ām ja nà? Xà tām na ka hte wa nohkre nē kator ā harē? Kwa tanhmā na we amnhī to nē ra rīt mex? Anē.

²⁰ Hāmri nhūm wa mē kām:

—ÿÿ wa ixkra kēnā. Na pre wa ixpē nohkre nē kato.

²¹ Tā ra tanhmā amnhī to nē ra rīt mex. No wa ixte kot ho mex xwÿnhnta pumunh kêt. Kwa mē tām mān hkukja nē ama. Ra àptār kēnā. Kē tām mān mē amā tanhmā amnhī jarēnh to ka mē ama.

²² Anhÿr o mē kām wa hkrata jarē. No ām wa kām mē uma nē ā mē kām kapēr anē nē mē kām Jejus nhīxi jarēnh kêt nē. Na pre Parijew nhō xwÿnhjaja ra Jejus nē mē kām kapēr nē mē kām:

—Ka mē atō Tirtūm kot mē pakaxyw Jejus xām ā harē hāmri nē axte Tirtūm kapēr o mē ahkre xà hā ixkreja wÿr agjēx kêt kumrēx nē rī amnhī pumu.

²³ Anhÿr o nē mē hkurē jakamā nhūm wa mē umaj ā mē kām hkra jarēnh anē nē kot ho mex xwÿnh nhīxi jarēnh kêt nē.

²⁴ Hāmri nhūm mē axte amnhī wÿr no mex xwÿnhnta ā karō nē kām:

—Kwa akatāt kôt mē inhmā amnhī jarē. Ate kot ano ho mex ā harēnh xwÿnhnta na kot amnhī tomnuj pix o pa xwÿnh kēnā kot kêt ano ho mex. Jakamā kwa Tirtūm noo mā akatāt kôt mē inhmā amnhī jarē nē axēx kêt nē. Anē.

²⁵ Hāmri nhūm mē kām:

—Ko ixte ja hā omunh kêt. Ām ja pix na ixte omunh. Na pa pre inhno hkre nē ri ixpa htā ra ixrīt mex nē. Anē.

²⁶ Hāmri nhūm mē tee ri kot amnhī jarēnhja ā kuma nē kām:

—No tanhmā na we mytita amnhī to nē amā ano ho mex? Anē.

²⁷ Hāmri nhūm tee ri axte mē kot hā hkukjēr ā mē kuma nē mē kām:

—Kwa ra ixte mē amā ām hāmri amnhī jarēnh griā. Tā ka mē inhma nē ām inhma nē arī hā ixkukja. Mān ka mē amā hkôt amnhī xunhwÿr prām hā na ka mē aprī hā ixkukja nà? Mē ate kot amnhī nhīpēx ā aprī hā harēnh mar nē hkôt amnhī xunhwÿr prām xà na ka mē aprī hā amā harēnh prām nē. Anē.

²⁸ HãMRI nhũM mē tee ri kuma nē kamã gryk nē. Nē hã kãm akir nē kãm:

—Tk. Ka na ka hte kapēr kôt amnhĩ nhĩpêx. No kêt mē pajaja na pa htem finat Mojes kapēr kôt pix mã amnhĩ nhĩpêx.

²⁹ Mojes mã na pre hte TirtũM kapēr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harênh xwýnhhta mē ixte omunh kêt. Nē mēhō nhỹ hã kot tanhmã amnhĩ nhĩpêx to ho pa xwýnhja mē ixte omunh kêt. Anē.

³⁰ HãMRI nhũM tee ri mē kuma nē mē kãm: —Kwa kot inhmã inhno ho mex nhũM ra ixrĩt mex tã ka mē tee ri hkukamã ajamaxpēr nē mēhō nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarē.

³¹ Mē pahte TirtũM kot amnhĩ nhĩpêx ã omunh mex. Koja mēhō kot amnhĩ tomnuj xwýnh mēmoj tã kuwý nhũM kuma nē ãm kuma. No kêt mē kot hkôt ri amnhĩ nhĩpêx xwýnhjaja. Nē mē kot kãm mex o mex ã harênh xwýnhjaja na htem mēmoj tã kuwý nhũM mē kuma nē mē kãm tanhmã mēmoj nhĩpêx to rý mē kãm mēmoj gō.

³² Tã aa mē pahte mēhō kot mē no ho mex ã harênh mar kêt tã nhũM ã JeJus inhmã inhno ho mex anē.

³³ Kêp TirtũM kwý hkêt ronhỹx pre inhno ho mex kêt nē. Anē.

³⁴ HãMRI nhũM mē kuma hãMRI nē kãm: —Tk. Kwa pēr ãm akator kôt ate amnhĩ tomnuj o ri apa htã na ka ã mē inhmã akapēr anē. Kwa ixkreja rũM akato nē ma atēm kurē kumrêx.

Anhỹr o kãm kapēr hãMRI nē mē amnhĩ nē hano nhũM kato nē ma tē.

³⁵ Tã nhũM JeJus ra mē kot amnhĩ nē hanor ã harênh ma nē ma hapêr o tē nē nhỹri omu. HãMRI nē amnhĩ tã hkukja nom te nhãm mēhō hã hkukjêr pyrã nē kãm:

—Pa? Xàn ka ra TirtũM kot mē awýr mēnh xwýnhhta amnhĩ kaxyw hkôt ajamaxpēr nã? Anē.

³⁶ HãMRI nhũM kormã kot no ho omunh kêt jakamã kêp JeJus ã omunh kêt nē. Na pre kormã no hkre nē ãm kapēr pix ma. Tã ra akupým rĩt mex nom kormã no ho omunh kêt nē. Jakamã nhũM JeJus hwýr tē nē ã kãm kapēr anē nhũM omu nē kormã kêp JeJus ã omunh kêt nē kãm:

—Tý kot kaj inhmã ahkre pa omu nē hkôt amnhĩ xãm kurē kumrêx. Anē.

³⁷ HãMRI nhũM kãm: —Kwa paa. Ixte amã ixkapêr xwýnhhta pa na pa. Anē.

³⁸ HãMRI nhũM kãm: —Kwa xōwehe Pahĩti? Nã kot paj amnhĩ kaxyw akôt pix mã ijamaxpēr nē akôt pix mã amnhĩ nhĩpêx o ri ixpa. Anē.

HãMRI nē kutã hkõn krã ho tēm nē nhỹ nē kãm mex o mex ã harênh o nhỹ.

³⁹ HãMRI nhũM JeJus kãm:

—Nã ixte mē apiitã tanhmã mē ajarênh to kaxyw na pa pre kaxkwa rũM man mē awýr wrý. Ahpýnhã mē amã ixprãm xwýnhjê jarênh nē ahpýnhã mē kãm ixprãm kêt xwýnhjê jarênh kaxyw. Mē kãm ixprãm kêt xwýnhjaja kot hprĩ hã TirtũM kapêr mar mex kêt tã na htem htýx ri kot mar mex ã amnhĩ jarênh o pa. Jakamã te mē nohkre xwýnhjaja kot amnhĩ nhĩpêx pyrãk. Nom koja mē TirtũM kapêr ma nē ixkôt amnhĩ xunhwýr japêr. HãMRI nē te ra rĩt mex pyrãk o amnhĩ nhĩpêx. Jao ra hprĩ hã TirtũM kapêr mar mex o pa. Anē.

⁴⁰ NhũM pre ã JeJus kãm kapêr anē. NhũM Parijew nhõ xwýnh kwýjaja kot kuri mar o kuhê xwýnhjaja ã kapêr anhỹr ã kuma nē amnhĩ tã kãm:

—Kwa nã. Xà we mē pajaja na ka ã mē inhnohkre hã mē ijarênh anē? Xà mē ixte ixprĩ hã TirtũM kapêr mar mex kêt ã na ka mē ijarê nã? Anē.

⁴¹ HãMRI nhũM mē kãm:

—Ýy kop apu mē ate aprĩ hã kapêr mar mex kêt ã amnhĩ jarênh ronhỹx ja mē amã mex nē. Tã mē ate aprĩ hã mar mex ã amnhĩ to axêx o apa jakamã na ka mē ra amnhĩ tomnuj týx nē. Na hte TirtũM ja hã mē apumu nē amnhĩm mē ate amnhĩ tomnuj xwýnh ã mē ajarê. Anē.

10

ôwêhti jarênh

Matêwre 9.36, 12.11-12; Rukre 15.3-7

¹ NhũM JeJus arĩ Ijaew mã kapêr nē mē kãm:

—E pa mē amã awjarê ka mē inhma nē amnhĩ krã him haxãr týx nē ho apa. Mē hkrit ôwêhti kot paj mē amã harê ka mē inhma. Na hte ôwêhti jamãr o pa xwýnhjaja ôwêhti apkur kaxyw mē o pa hãMRI nhũM kamãt nhũM akupým kahê hwýr mē o pa. Kahê jakwakreja ãm pixii. Tã koja mēhō kahê xã hkôt hwýr ãr kêt nē axtem nē tē nē nhỹhýnh kahê hã api nē ôwêhti hwýr ãr japêr nhũM mē omu nē kot hkwy ho ãhkĩnh ã omunh kurē kumrêx.

² —No ôwêhti jamãr o pa xwýnhja na hte mē kurom katãt kôt kahê jakwakre rũM ôwêhti hwýr agjê.

³ NhũM kahê xã jamãr xwýnhja amnhĩ wýr omu nē kãm kahê xã rênh kurē kumrêx nhũM axã. Na hte apkati mē ma nhỹhým apkur kaxyw mē o pa. Nē nojarê nē mē kãm akir. Ahpýnhã tanhmã mē hixi kute hã mē omunh xã hkôt mē kãm ãkjêr o pa. HãMRI nhũM mē kuma nē hwýr mra nē hã pikuprõnh pa nhũM mē ho hapõj nē ma nhỹhým ri mē apkur kaxyw mē o pa.

⁴ Ma mē apkur kaxyw nhỹhým mē o pa. NhũM ôwêhti ra kot kapêr mar mex jakamã ma ãmnhĩx ri hkôt apkur o pa.

⁵—Na hte hamār o pa xwýnh pix kapēr ma nē hkôt pa nē nhām mēhō hkôt ri pa hkêt nē. Kot kapēr mar kêt jakamā tee ri kuma nē umaj axkakhkūm nē hprôt nē ma mra. Na hte ôwēhti ā amnhī nhīpēx anē. Anē.

Jejus te kēp ôwēhti gjēnh xā hā hakwakre pyrāk

⁶ Nhūm pre ā Jejus mē kām ujarēnh anē. Nē ujarēnhja kamā amnhī kwýjē jarē nē määnēn tām amnhī jarē. Nom mē amnhī tā kuxi nē mē kām amnhī jarēnh o te ho ôwēhti jarēnh pyrāk nhūm mē tee ri kuma nē mar mex kêt nē.

⁷ Jakamā nhūm axte mē kām awjarē nē mē kām:

—E pa ixprī hā mē amā ixujarēnhja jarē ka mē inhma. Te ixpē ôwēhti jagjēnh xā hā hakwakre pyrāk. Kwa mē ja ma nē amnhī krāh im haxār týx nē.

⁸ Na pre ra ixkukamā mē ohtō nē te ām hāmri mē amā Tirtūm kapēr jarēnh pyrāk o mē akôt ri pa. Nom mē amā hēx o pa. Te mē kot ôwēhti o àhkīnh xwýnhja kot amnhī nhīpēx pyrāk. Nom na hte ôwēhtija ām hamār xwýnh pix kapēr ma nē nhām mēhō kapēr mar kêt nē. Ja pyrā nē mē kot ixkôt amnhī xunhwýr xwýnhja na htem Tirtūm kapēr o hēx o mē pa xwýnhjē ma nē ām mē kuma nē mē hkôt amnhī nhīpēx kêt nē. Na htem ām ixkapēr pix ma nē ixkôt pix mā amnhī nhīpēx o pa.

⁹⁻¹⁰ —Te ixpē ôwēhti gjēnh xā hā hakwakre pyrāk. Na hte ôwēhti mēmoj punuj pymaj kahē hwýr agjē nē kamā mex nē kuhē. Nē kurūm hapōj nē ma apkur o pa. Ja pyrā nē mē kot ixkôt amnhī xunhwýr xwýnhja koja mē ixkukwak ri hkīnh nē mex nē hamakētkati nē pa ho pa. Nē nhýrmā Tirtūm mē wa ixri htír tūm nē pa ho pa. Ja kaxyw na pa pre man mē awýr pika hwýr wrý.

—No ôwēhti ho àhkīnh xwýnhja na htem amnhīm ho ahkī nē kupa nē ma amnhīm o pa. Tā mē kot Tirtūm kapēr o hēx o mē pa xwýnhja te mē kot jajaja kot amnhī nhīpēx pyrāk. Anē.

*Jejus te kēp ôwēhti jamār xwýnh pyrāk
Eprēw 13.20; Apokarip 7.17*

¹¹ —Nē ôwēhti jamār mex xwýnhja koja nhýri mēhō kēp ôwēhti hōxpír kaxyw hwýr htēm ā omu nē wa hā axpu. Nhūm ho àhkīnh mā xwýnhja ôwēhti jamār xwýnh pī nhūm ôwēhti nē ty. Tā ixkwýjaja hamakētkati nē mex nē pa kaxyw na pa pre amnhī grōnh kôt mē hwýr wrý. Jakamā kot paj te ôwēhti jamār xwýnh kot amnhī nhīpēx pyrāk o amnhī nhīpēx.

¹²⁻¹³ —Nē na htem tōhā ôwēhti jamār xwýnh nhýhým pa kaxyw nē mēhō mā amnhīre nhūm wakre kamā kām hkrit jamār o pa. Kāxpore pix prām xāj kām hamār o pa. Jakamā koja nhýhýnh mry xoprē ra

hwýr kato nhūm amnhī wýr omu nē umaj ôwēhti re nē ma hprôt nē tē. Kām ôwēhti japē hkêt ām kām htír pix prām xāj ôwēhti mā hamaxpēr kêt nē rer pa nē ma tē. Nhūm mry xoprēta ôwēhti hwýr hprôt nē hkwy pynē nhūm hkwy umaj axkakhkūm nē hprôt nē ma mra. No kêt pa na te ixte ôwēhti mā hamaxpēr kêt nē kot rer nē ma hprôt nē htēm xwýnhja pyrāk kêt. Kot paj aa ixkwýjē rer kêt nē. Kot paj mē hkôt ixpa ho ixpa rāhā nē.

¹⁴⁻¹⁵ —Te ixte ôwēhti jamār xwýnh mex pyrāk jakamā na pa hte urāk nē ahpýnhā mē kot ixkôt amnhī xunhwýr xwýnhjē pumunh mex o ri mē hkôt ixpa. Te mē kēp ixkrit ôwēhti pyrāk nhūm te ixpē mē hamār mex o ri mē hkôt ixpa nē aa mē rer kêt xwýnhja pyrāk.

—Nē mē kot ixkôt amnhī xunhwýr xwýnhja ra mē ixte amnhī nhīpēx kôt axpēn pumunh mex. Nē mē inh mā axpēn japēē. Te Inhīpēēxā mē wa inh mā axpēn japē pyrāk. Tā kot paj nhýrmā mē nē tanhmā amnhī nhīpēx to.

¹⁶ —Mē kot ixkôt amnhī xunhwýr xwýnhja piitā kēp Ijaew pix kêt. Kōja Ijaew kêt xwýnh kwýjaja määnēn ixkapēr ma nē ixkôt amnhī xunhwýr nē ixkôt amnhī nhīpēx. Jao ra te kēp ixkrit ôwēhti pyrāk. Tā kot paj mē ho ixpimrāā tā mē ho tipxi nē mē hamār o ri mē hkôt ixpa.

¹⁷ —Nē mē kot ixkôt amnhī nhīpēx o mē pa xwýnhja mē mex kaxyw na pa pre amnhī grōnh kôt mē hwýr wrý. Jakamā kot paj nhýrmā mē nē ty. Tā inh mā mē nē ixyk puma hkêt jakamā na Inhīpēēxā kām ijapēē. Kōja akupým ixto ixtír.

¹⁸ Kop apu inh mā mē nē ixyk prām kêt ronhýx mē kām ixkurē xwýnhja tee ri kām ixpír prām kaprý. Nom ixte mē kot ixkôt amnhī nhīpēx xwýnhjē nē amnhī grōnh kôt mē hwýr ixwrýk kēnā. Jakamā kot paj arī mē kām amnhī grōnh kôt amnhī gō nē arī mē kām xa nhūm mē ixpí. Nom kot paj akupým ixtír. Mēhō koja tanhmā ixto nē ixpír o ixpír? Nā koja mēhō ixpír o ixpír kêt nē. Inhīpēēxā nhý hā kot paj nhýrmā ā amnhī nhīpēx anē nē akupým ixtír. Anē.

Nhūm pre ā Jejus mē kām amnhī jarēnh anē.

¹⁹ Hāmri nhūm Ijaew tee ri ā kot amnhī jarēnh anhýr ā kuma nē kē axte axpēn kwým ri tanhmā harēnh to ho kuhē.

²⁰ Nē kamā mē hkwyjaja harēnh o:

—Tk. Kwa mē mar kêt nē. Satanasti nhý hā na hte htýx ri ā mē pamā amnhī jarēnh anhýr o pa. Anē.

²¹ Hāmri nhūm mē hkwyjaja mē kuma nē mē kām:

—Nā kot anhýr kêt. Xā na htem Satanasti nhý hā ā kapēr mex anē nē ā mē no hkre

xwýnhjê ho mex anê? Nà kot anhÿr kêt. Satanastija ukapriêrê hã. Anê.

Ijaew nhô pahijaja kot Jesus kaga hã mê harênh

Juåw 5.18, 8.59

²² Tã nhũm ra amgrã hapêx pa mê ixpê Ijaew akupÿm krî pê Jerujarê kamã xapên wÿr akuprô. Axte mê ixte mê ixkînh kaxyw xapên wÿr akuprô. Amnepê mē inhîgêjtaja kot akupÿm Tirtũm mã amnhĩ jarênh xã hã ixkre ho mex pa nê ho Tirtũm wÿr mã hamaxpêr nê hã ixkînh ã arîgroja ã pa mê hwÿr akuprô.

²³ Hãmri nhũm Jesus ma mê ixkôt Tirtũm mã amnhĩ jarênh xã hã ixkreta wÿr tê no ãm hwÿr ãr kêt nê. ãm ixkre hpu hã kahê xã kape hã ri pa. Mê kot kãm: “Pahi finat Sarumãw pa xã” anhÿr xwÿnhã kamã ri pa.

²⁴ Hãmri nhũm kê ra mê inhô pahijaja omu nê hã akuprô nê hêx rom kãm kapêr nê kãm:

–Kwa tokyx aprî hã mê inhmã amnhĩ jarê. Xã apê Tirtũm Kra na ka nã? Xã ka na pre Tirtũm mê ixkaxyw axãm? Kwa aprî hã mê inhmã amnhĩ jarê pa mê ama. Mon ka hte aprî hã mê inhmã amnhĩ jarênh kêt nê? Na pa mê tee ri ate amnhĩ nhîpêx ã apumu nê akukamã ijamaxpêr rũnh kumrêx o ri ixpa. Xã ãm hãmri apê Tirtũm kot mê ixkaxyw axãm xwÿnhã na ka? Anê.

²⁵ Hãmri nhũm mê kãm:

–Tk. Ra ixte mê amã amnhĩ jarênh xohtô htã ka mê inhma nê ãm inhma. Na pa hte xatã Inhîpêêxã nhÿ hã mê amã mê ate aa mêmoj pumunh kêt kwÿ ho anhÿr o ri ixpa ka mê ja hã ixpumu nê ãm ixpumu nê ixkôt ajamaxpêr kêt nê.

²⁶ Mê apê ixkwÿ hkêt jakamã na ka mê ixkôt ajamaxpêr kêt nê. Te mê apê ixkrît ôwêhti pyrãk kêt.

²⁷ Ixkwÿjaja na te ho ôwêhti kot hamãr xwÿnh kapêr mar nê hkôt ri pata pyrã nê ixkapêr ma nê ixkôt amnhĩ nhîpêx o pa. Ixpê mê ô pahihiti hã mê kot ixpumunh mex jakamã na htem ixkôt amnhĩ nhîpêx mex o pa. Ixte ja hã mê omunh mex nê.

²⁸ Kojã mê nhÿrmã htyk tê no ãm ixkukwak ri akupÿm hÿr hãmri nê Tirtũm mê wa ixri hÿr tũm nê pa ho pa nê aa hapêx kêt nhũm mêhõ ixpê mê utãr kêt nê. Te inhîhkra hpo nhîpök ri mê hkrî nhũm te mê hã inhîhkra pikamÿr pyrãk nhũm mêmoj tee ri ixpê tanhmã mê ho hprãm kaprÿ.

²⁹⁻³⁰ Inhîpêêxã tãm kot inhmã mê ôr kênã. Hihtÿx o kot mê piitã mê hakrenh par jakamã kojã mê inhîhkra po nhîpök ri hkrî nê mãânên Inhîpêêxã nhîhkra hpo nhîpök ri hkrî. Te ixpê Inhîpêêxã Tirtũm pyrãk jakamã mêhõ kot wa ixpê wa inhîhkra rũm mê utã? Nã amrakati kumrêx.

Anhÿr o mê kãm amnhĩ jarê.

³¹ Hãmri nhũm mê te kêp Tirtũm pyrãk ã amnhĩ jarênh ã kuma nê kamã gryk tÿx nê. Hãmri nê kot kên o htak kaxyw ra kaxyw hkwy kawrã ho ri hprôt.

³² Hãmri nhũm amnhĩ tã mê omu nê mê kãm:

–Kwa ra ixte Inhîpêêxã nhÿ hã mê amã aa mê ate mêmoj pumunh kêt kwÿ ho anhÿr rax o ixpa. Jao tanhmã mê ho mex to pix o ri ixpa. Tã ka mê axtem nê ã inhîpêx anhÿr kaxyw. Anê.

³³ Hãmri nhũm mê kãm:

–Nã ã ate amnhĩ nhîpêx anhÿr ja mÿrapê hkêt. Kêt apê mê inhîõ htã ri axtem nê te apê Tirtũm pyrãk ã amnhĩ jarênhja mÿrapê na pa mê kên o atak kaxyw. Na pu htem ã amnhĩ jarênh anhÿr o papa hkêt nê. Anê

³⁴ Hãmri nhũm mê kãm:

–No ãm hãmri ixte ã amnhĩ jarênh anhÿr kênã. Tanhmã na Tirtũm kapêr ã kagã htũm kot ja jarênh to wehe? Na pre Tirtũm Ijaew nhô pahijê mã kapêr nê mê kãm:

E mê ate inhÿ hã mê ho amnhîptãr jakamã te mê apê pa ixpê Tirtũm pyrãk.

Anhÿr o kot mê harênh.

³⁵ ãm hãmri na Tirtũm kapêrja. Tãm kot ã mê harênh kot anhÿr. Mê kot ÿ hã mê kãm kapêr jakamã te mê kêp urãk ã mê harênh anhÿr kênã.

³⁶ Tã tãm kot ã mê harênh anhÿr tã hpãnhã mê akaxyw pa ixpê Kra hã ixãm nê mê awÿr inhmênh nhũm ixwÿrk nê ixpê Kra hã amnhĩ jarênh tã ka mê ja hã inhma nê ãm inhma nê ixkôt ajamaxpêr kêt nê. Kwa mon ka mê ja hã ixpumunh nê ixkôt ajamaxpêr kêt nê?

³⁷ Kot paj Inhîpêêxã mê wa ixãhpumunh kôt mê amã aa mê ate mêmoj pumunh kêt kwÿ ho anhÿr kêt ka mê ja hã ixpumu nê mê rî kam nê mãmrî ixkôt ajamaxpêr kêt nê.

³⁸ Mê amã ixkapêr mar prãm kêt tã kwa ixte Tirtũm pyrã nê aa mê ate mêmoj pumunh kêt kwÿ ho anhÿr ã ixpumu nê Inhîpêêxã mê wa ixte amnhĩ nhîpêx tipxi hkôt ajamaxpêr. Anê.

³⁹ Hãmri nhũm mê kuma nhũm ja mê kêp omnuj tÿx nê. Te kot Tirtũm pyrãk ã amnhĩ jarênhja nhũm mê kêp omnuj nê. Jakamã nhũm mê ra kot unênh nê ixkre rũm ho kator nê kapôt ã mênh nê kên ho htak kaxyw nhũm kê axte mê kêp akunok nê ma nhÿhÿm tê.

Jesus kot Jotãw nhîhkjê hã ri pa hã harênh

⁴⁰ Tã nhũm Jesus ma tê nê pyhti pê Jotãw ã rê. Pa mê hkôt ri ixpa ho ixpa xwÿnhjaja ma hkôt mô. Finat Juåw Paxis kot Tirtũm mã wam mê hkrã kumrãr o pa xãta wÿr.

⁴¹ Hãmri nhũm mê ohtô nê mê ixwÿr mra nê Jesus kapêr ma nê kot tanhmã amnhĩ nhîpêx to hã omunh o kuhê. Hãmri nê hã tanhmã xapên mã kapêr to nê xapên mã:

—Kwa ãm hãmri na pre finat Juãw Paxisja mē pamã Jejus jarēnh o pa. Aa kot mē pamã mē pahte mēmoj pumunh kêt kwỳ ho anhỳr kêt tã ãm xatã hkukamã mē pamã harēnh o pa. Kêp Tirtũm Kra hã Juãw rom hihtỳx o hihtỳx ã harēnh o pa. Nē Tirtũm kot mē pakaxyw ãm xwỳnh ã nhũm mē pamã harēnh o pa. Nã ãm hãmri na pre ã mē pamã harēnh anē. Anē.

⁴² Hãmri nhũm mē ohtõ nē amnhĩ kaxyw Jejus kôt hamaxpēr nē hkôt amnhĩ xunhwỳ.

11

*Rajare htyk jarēnh
Juãw 5.21-29, 6.40*

¹ Rôm nhũm krĩ pē Petãn kamã mēhõ my pē Rajareja ra ã htỳx nē nõ. Na pre htõx wa hamēxkrut. Hõ kēp Matre nhũm hõ kēp Marir.

² Marir na pre kormã arĩgro hõ hã kot Jejus o mex kaxyw mē hkuxwaxã ho hkuxwa nē amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kēp ã htỳx nē nõ.

³ Hãmri nhũm wa tee ri hkukamã hamaxpēr nē ma krĩ hõ hwỳr Jejus wỳr mēhõ mē nhũm ma hwỳr tē. Nē hwỳr põj nē omu nē kãm:

—Pa Pahihti. E ot pa awỳr tē. Na ra amã akrãmnhwỳ japē htỳx xwỳnhnta ã htỳx nē nõ nhũm htõx wa tee ri hkukamã hamaxpēr nē awỳr inhmē pa tē. Kwa tokyx pu ma hwỳr tē ka akupỳm wa kãm ho mex nã? Anē.

⁴ Hãmri nhũm kuma nē kãm:

—Nã ã htỳx nē nõr tã koja akupỳm mex. Mē kot akupỳm mex ã harēnh mar hãmri nē Tirtũm mē wa ixtã hpijaam nē wa ixihhtỳx o wa ixihhtỳx ã wa ixpumunh kaxyw na ã ã htỳx nē nõr anē. Nē pa ixpē Tirtũm Kra hã akupỳm ho mex ã ixpumunh nē ixkôt hamaxpēr kaxyw na ã ã htỳx nē nõr anē. Anē.

⁵ Na pre Jejus kãm Rajare mē htõx wa mē hapē nē.

⁶ Tã ã htỳx ã harēnh ma nē hwỳr mōr tokyx anhỳr kêt nē. Pa mē arĩ amnhĩm hikranh xã kamã ri ixpaja o ixtã axte apkati axkrut.

⁷ Hãmri nhũm rĩ kormã hwỳr nojarēt nē mē inhmã:

—E ma pu mē jarãhã akupỳm Jutej kamã Rajare hwỳr mō nē omu. Anē.

⁸ Hãmri pa mē tee ri ja hã kuma nē kãm:

—Kwa ham mē panhõ pahijaja kot kēn o atak o apĩr mã tã ka ra akupỳm mē hwỳr akrã. Kwa pu mē hwỳr pamōr kêt nē nã? Anē.

⁹ Hãmri nhũm mē inhmã:

—Nã koja mē kormã tanhmã ixto hkēt nē. Kormã ixte Tirtũm mã tanhmã amnhĩ nhĩpēx to jatur xãm mēnhre hã. Te ixte kormã arĩgro hã ixrit mex nē ixpa pyrã nē

kormã Tirtũm kot mēmoj tã inhmã karõ xã hkõt pix mã tanhmã amnhĩ nhĩpēx to ho ri ixpa.

¹⁰ Tã kot paj hatur xãm kumē nhũm te myt ãr nhũm ra kamãt kò pyrãk nhũm mē rĩ kormã tanhmã ixto nē ixpĩ. Jakamã e ma pu mē hwỳr. Koja mē tokyx tanhmã ixto hkēt nē. Anē.

¹¹ Hãmri nē mē inhmã Rajare jarēnh o:

—Na mē pahkrãmnhwỳ Rajareta ra gōr nē nõ. Tã kot puj mē ma hwỳr mō pa kumra. Anē.

¹²⁻¹³ Ra htyk ã omunh tã ã mē inhmã harēnh anē. Pa mē kuma nē ixtỳx ho ãm õt nē nõr ã hkamnhĩx nē kãm:

—Kwa mãn ra akupỳm amnhĩ kãm hamak o mōr jakamã na ra amnhĩ krit nē gōr nē nõ. Kwa pu mē awjanã nē hwỳr pamōr kêt nē nã? Anē.

¹⁴ Hãmri nhũm mē inhma nē hprĩ hã mē inhmã harē nē mē inhmã:

—Nã na pre ty.

¹⁵ Nom kormã ã nē hikwỳta ã na pa hwỳr inhmōr kêt nē. Tã kot paj ma hwỳr mō nē hã mē amã ixãhpumunh tỳx ã amnhĩ to amnhĩrit. Ka mē ja hã ixpumu nē amnhĩ kaxyw ixkôt ajamaxpēr tỳx o ri apa. ã mē ate amnhĩ nhĩpēx anhỳr kaxyw na pa kormã ã nē nõr ã hwỳr inhmōr kêt nē. E ma pu mē hwỳr. Anē.

¹⁶ Hãmri nhũm mē inhõ pē Tomas pihpohti tee ri ã kapēr anhỳrja ã kuma nē mē inhmã:

—Tõe ma pu mē hkõt. Kē mē mamrĩ hkõt mē pahto hpmĩràatã mē panhĩmex pa ri. Anē.

¹⁷ Tã pa mē ma hkõt mē hwỳr mō nē ra Rajare nhõ krĩ hwỳr ixpõx o mō hãmri nē harēnh ma. Ra htyk nhũm mē kot haxãr ã arĩgro pē kwat ã harēnh ma.

¹⁸⁻¹⁹ Nhũm Matre mē Marir wa hkamy ho hamak xãj arĩ mỳr o hkrĩ. Jakamã nhũm Ijaew kwỳjaja Jerujarē rũm ma wa hwỳr mra. Mē kot wa kãm kapēr nhũm tokyx akupỳm tãm wa hkrã kaxyw nhũm mē wa hwỳr mra. Wa õ krĩ pē Petãnja Jerujarē hwỳr ãm 3 kirmõm pix jakamã nhũm mē ma wa hwỳr mra nē wa kuri wa kãm kapēr o hkrĩ.

²⁰ Rôm nhũm Matre Jejus hpõx o mōr ã harēnh ma nē kãnhmã xa nē man mē ixkutã tē. No nhũm Marir arĩ mỳr o nhỹ nē hkõt htēm kêt nē.

²¹ Hãmri nhũm Matre mē ixkutã tē nē mē ixkaxpa nē Jejus pumu nē mỳr kamã kãm kapēr nē kãm:

—Héxta gã ã nē Pahihti. Na pre ra wa ixkamy wa ixpē ty. Kop apu jar mē ixkõt ri apa ronhỳx pre htyk kêt nē. Xē mon ka pre we tokyx mē ixwỳr atēme hkēt nē?

²² Tã na pa arĩ akõt ijamaxpēr tỳx nē. Kot kaj mēmoj tã tanhmã Tirtũm wỳr to nhũm

ama nē tanhmā amā mēmoj to. Ra ixte ja hā apumunh mex kēnā. Anē.

²³ Hāmri nhūm Jejus kuma nē kām:

—Kwa tee ri ajamaxpēr nē akaprī hkēt nē. Koja akamy akupým war amā htír kām ga. Anē.

²⁴ Hāmri nhūm kuma nē kām:

—Ma koja anē. Nhýrmā Tirtúm kot mē piitā akupým mē ho htír xā hā arígrota ā koja akupým htír. Anē.

Kamy akupým ho htír tokyx anhýr ā hkamnhix kēt nē ā kām kapēr anē.

²⁵⁻²⁶ Jakamā nhūm kām:

—Nā pa na ixpē akupým mē ho mē htír xwýnh. Jakamā mē kot amnhī kaxyw ixkót hamaxpēr nē ixkót amnhī xunhwýr xwýnhjaja koja mē htyk tā koja mē hkarō Tirtúm mē wa ixri htír tūm nē mex nē pa ho pa. Xā ate ja kaxyw ixkót ajamaxpēr týx nā? Anē.

²⁷ Hāmri nhūm Matre kuma nē kām:

—Xē nhūm. Apē Tirtúm Kra hā na pre mē ixkaxyw axām. Ka na pa htem amnhī wýr akām ijamak o ixpa. Anē.

Hāmri nhūm Jejus kām:

—Nā ām hāmri na ka ā ijarēnh anē. E ma akupým tē nē atōx mā anē kē tokyx man ixwýr tē pa omu. Anē.

²⁸ Hāmri nhūm kuma nē ma akupým tē. Hāmri nē Marir wýr axā nē kām Jejus jarē. Kōt mē hkrī xwýnhjē hkāx ā kām harē nē kām:

—An xē hāmri amýr kēt nē. Na ra mē pajahkre xwýnhhta hpōx o mō nē mūtar nhý nē atā karō. Anē.

²⁹ Hāmri nhūm kuma nē kánhmā xa nē ma mē ixwýr htēm kurē kumrēx.

³⁰ Hāmri pa mē kormā krīm ixpōx kēt nē. Arī Matreja Jejus wýr htēm xā kamā arī ixkrī.

³¹ Jakamā nhūm Matre ma tē nē Marir mā Jejus jarē nhūm kato nē man mē ixwýr tē. Hāmri nhūm Jerujarē rūm wa hwýr mē mrar xwýnhjaja omu nē htýx kot hkamy hā pika pumunh nē mýr kaxyw htēm ā hkamnhix nē man hkōt mra.

³² Hāmri nhūm Marir mē hkukamā mē ixwýr tē nē Jejus pumu nē hpar pē tēm nē kām kapēr pē hipó nē mýr o nhý. Nē kām:

—Héxta gāā nē Pahihti. Na pre ra wa ixkamy wa ixpē ty. Kop apu jar mē ixkót ri apa ronhýx pre htyk kēt nē. Hō mon ka pre we tokyx man mē ixwýr atēmre hkēt nē? Anē.

³³ Hāmri nhūm Jejus kuma nē mýr ā omu. Nē hkōt mē mrar xwýnhjaja mē mýr ā mē omu nē kām mē hkaprī nē.

³⁴ Hāmri nē mē kām:

—Nhýri na ka prem haxā? E mē hwýr ixto tē pa omu. Anē.

Hāmri nhūm mē kuma nē ma hā pyka hwýr mē ixto mō

³⁵ nhūm Jejus mē urāk nē hwýr mýr o tē

³⁶ nhūm mē ja hā omu nē expēn mā:

—Kwa mán kām hapē htýx. Hā na ho ama nē hwýr mýr o tē. Anē.

³⁷ Nom nhūm mē hkwyjaja axtem nē mē kām:

—Tk. Ra kot no hkre xwýnhhta o mex tā mo na we tokyx man kormā htír ri hwýr htēm nē omunh nē akupým ho mex kēt nē? Anē.

Jejus kot akupým Rajare ho htír ā harēnh

³⁸ Tā pa mē ra kēn kre kamā mē kot Rajare jaxār xāta wýr ixpōx o mō nhūm Jejus hkaprī nē hwýr tē nē omu. Nhūm prem ra kēn rax o hitom

³⁹ nhūm omu nē mē kām:

—E mē akwýjaja nhām inhmā nē kahē xā mē. Anē.

Hāmri nhūm Matre kuma nē tee ri hamaxpēr nē kām:

—Xē ma Jejus. Mē ri ā anhýr kēt nē. Ra htyk ā arígro kēp 4 kēnā. Mán ra hkatōk nē hkro htýx kumrēx. Anē.

⁴⁰ Hāmri nhūm kuma nē kām:

—Kwa ri ā ajamaxpēr anhýr kēt nē Matre. Na pa ra amā ixkapēr nē amā ixkapēr o: “Kot kaj amnhī kaxyw ixkót ajamaxpēr týx nē. Hā kot kaj Tirtúm mē wa ixihtýx o wa ixihtýx xāja pumu.” Anhýr o amā ixkapēr. Jakamā kwa ja kaxyw Tirtúm mē wa ixkót mán ajamaxpēr týx nē hkēt wehe. Anē.

Hāmri nhūm kuma nē kām:

—Ma ām hāmri na ka inhmā akapēr. Ma kot paj kaxyw war amā ijamaxpēr týx nē. Anē.

⁴¹ Róm nhūm mē kām nhām kēn jakwa kre kahē xā mē. Hāmri nhūm Jejus Tirtúm mā amnhī jarēnh kaxyw kánhmā kaxkwa hwýr rīt nē kām:

—Pa Papaj. Nā na pa hte tanhmā mēmoj tā awýr to ka inhma nē tanhmā inhmā mēmoj nhípēx to. Amex o amex Papaj.

⁴² Na ka hte ā inhmā amnhī nhípēx anē. Tā pa jajē noo mā ā amā ixkapēr anē. Ate inhmar nē tanhmā Rajare hto nhūm mē kot ja hā ixpumunh nē ixte anhý hā pix mā tanhmā amnhī nhípēx to ho ri ixpa hā ixpumunh kaxyw. Nē ka ate mē hwýr inhmēnh ā apumunh kaxyw. Anē.

⁴³ Nhūm pre ā Tirtúm mā kapēr anē. Hāmri nē kýx pē Rajare mā kapēr nē kām:

—Pa Rajare. Kwa tokyx kánhmā nhý nē amnē mē ixwýr tē nē akato. Anē.

⁴⁴ Puh nhūm akupým htír nē hkupu xā rāhā tē nē mē ixwýr kato nē xa. Arī hkuk nē íhkra nē hpar kupu rāhā mē ixwýr kato nē xa. Hāmri nhūm Jejus mē kām:

—Kwa mē atō nē kupu xā hpōt kē ma akupým órkwý hwýr tē. Anē.

⁴⁵ Hāmri nhūm mē kot Marir mē Matre wa hwýr mra xwýnh kwýjaja ā Jejus kot Rajare nhípēx anhýr ā omu nē amnhī kaxyw hkôt hamaxpēr nē hkôt amnhī xunhwýr kurē kumrēx.

⁴⁶ Nom nhūm mē hkwyjaja axtem nē omu nhūm ja mē kēp omnuj nē. Jakamā nhūm mē ma Parijew nhō xwýnhjē hwýr mra nē mē kām harē.

Mē kot Jejus pīr ā amnhī grōnh

Matēwre 26.1-5; Makre 14.1-2; Rukre 22.1-2

⁴⁷ Hāmri nhūm Parijew nhō xwýnhjaja tee ri Jejus kot akupým Rajare ho htír ā harēnh ma hāmri nē patre krāhtūmjē mē amnhī wýr mē inhō juisti ho akuprō nē axpēn mā Jejus o kapēr punuj pē hā axpēn mar o hkrī. Hāmri nhūm mēhō mē kām:

—Kwa tanhmā kot puj mē ho? Na ra mē kām mēmoj pumunh kēt kwý ho anhýr rax o pa.

⁴⁸ Kot puj mē ām omu nē tanhmā ho hkēt nhūm mē pahkwýjaja kot ā amnhī nhípēx anhýr ā omu nē htýx ām hāmri ā kot amnhī nhípēx anhýr ā hkamnhix. Hāmri nē amnhī kaxyw hkôt hamaxpēr nē hkôt amnhī xunhwý. Jao ra amnhī kaxyw kēp mē ō pahihiti hā ām. Koja mē ā amnhī nhípēx anē nhūm Rōm kamā pahihiti ja mē kot kator nē hpānhā Jejus xām ā harēnh ma. Hāmri nē gryk xāj mē pahwýr ō pōristi hkwy rē nhūm mē pahwýr mra nē mē panhímex pa nē Tirtūm nhōrkwý grānh pa. Kwa tanhmā kot puj wem tokyx amnhī nē ho? Anē.

⁴⁹ Hāmri nhūm Kajpas mē kām kapēr. Kajpasja na pre amgrājā kamā kēp mēō patre nhō pahi maati. Jakamā mē kām:

—Nā na pa ra ijamaxpēr. Kwa mē inhma.

⁵⁰ Nā kot puj mē hpír tokyx anē kē tapxipix ty pu mē arī mýrē pahpiitā paja-makētkati nē ri papa. Anē.

⁵¹ Nhūm pre ā mē kām kapēr anē. Nom amnhī krā hkôt ā mē kām kapēr anhýr kēt nē. Arī kēp mēō patre krāhtūmjē nhō pahi maati jakamā Tirtūm nhý hā Jejus kot Ijaew nē tykja kukamā ā harēnh anē. Nom ja hā amnhī pumunh kēt nē.

⁵² Na pre Jejus mē ixpē Ijaew pix nē htyk kēt nē. Krī piitā hkôt Tirtūm krajē nē na pre ty. Mē piitā mē kot axpēn to hkwy nē ri axpēn to pa kaxyw na pre mē nē ty.

⁵³ Hāmri nhūm ā Kajpas mē kām kapēr anē nhūm mē inhō pahijaja kuma nhūm ja mē kām mex nē. Jakamā nhūm mē kot tanhmā Jejus ā amnhī to nhūm mē kot mē kām tanhmā hpír to kaxyw ā axpēn mar anhýr o pa.

⁵⁴ Jakamā nhūm Jejus axte mē noo mā ri pa hkēt nē. Hāmri ma krī pē Epraī hwýr ma mō. Pa mē hkôt ixpa ho ixpa xwýnhjaja ma hkôt ixpa. Epraīja kapōt ā krī na pre.

Jakamā pa mē ma hwýr mō hāmri nē kamā ri ixpa.

⁵⁵ Tā nhūm arīgro pē Pasja ra ahtēp o mō. Amnepēm finat Mojes kot Ejit rūm mē panhīgētjē kator mā hamaxpēr kaxyw na pa pre htem hā ixkīnh kaxyw Pas ā Jerujarē hwýr akuprō. Na pa pre htem hwýr pōj nē kamā Tirtūm noo mā mē inhímex kaxyw tanhmā amnhī nhípēx to.

⁵⁶⁻⁵⁷ Jakamā nhūm ra Ijaew ohtō nē ma Jerujarē hwýr pa. Nē kām Jejus pumunh prām xāj Tirtūm mā amnhī jarēnh xā hā ixkre wýr mra nē hwýr agjē nē kamā hapēr nē axpēn mā:

—Kwa nok? Xā koja mē hpakīnh wýr mōr kēt nē nā? Anē.

Nhūm Parijew nhō xwýnhjē mē mē inhō patre krāhtūmjaja haxwýja hapēr o kuhē. Nom mē kot axtem nē unē nē haxār kaxyw. Jakamā mē kām hā karō nē mē kām:

—E kēr ka mē nhýri Jejus pumu nē man mē ixwýr mra nē mē inhímā harēnh kurē kumrēx. Anē.

12

Marir kot Jejus kuxwa hā harēnh

Matēwre 26.6-13; Makre 14.3-9; Rukre 7.36-50

¹ Tā nhūm ra Pas wýr apkati grēre. Ra hwýr apkati kēp 6. Jakamā pa mē ma akupým krī pē Petān wýr Jejus kót mō. Jejus kot akupým Rajare ho htír xwýnhhta mē ō krī hwýr pa mē akupým mō nē Rajare nhōrkwý hwýr pōj nē mē hwýr agjē.

² Hāmri nhūm mē Jejus pumu nē hkīnh nē. Nē mē inhímā mēmoj mex nhípēx pa mē ixāpkur o ixkrī. Nhūm Rajare haxwýja mē ixkutā hpok o nhý. Nhūm htōx Matre mē inhímā mēō ho pa nē mēsti hā unhwýr o xa.

³ Hāmri nhūm wa htōx Marir Jejus kukamā tanhmā hamaxpēr to nē hamaxpēr o:

—Ma kot paj tokyx mē kot mē ixpē hpír kukamā mē hkuxwaxā ho hkuxwa. Anē.

Hāmri nē kax rax kām mē hkuxwaxāja py nē o tē. Ra rit kahti hkôt hitep xā nhūm kupy nē hwýr o tē. Mē kot mēmo htwým o mē hkuxwaxā mex nhípēxja na pre hā kaxpore xohtō rax kumrēx. Jakamā nhūm kupy nē Jejus wýr o tē nē hpar ā hkapir ā nē amnhī krā hkī ho hpar grā ho nhý nhūm ra ixkre kuxwa htýx kumrēx.

⁴ Hāmri nhūm mē inhīō pē Jut Kariotja. Kot kormā mē lhkrām Jejus nhōr mā xwýnhhta tee ri ā kot amnhī nhípēx anhýr ā omu nhūm ja kēp omnuj nē

⁵ nhūm mē inhímā:

—Tk. Kwa pēr mē hkuxwaxā hā kaxpore xohtō rax kumrēx tā nhūm ri axtem nē Jejus par ā hkapir pa. Mo na ma o htēm nē ho wēnē nē hpānhā kaxpore ho rax nē hpyr nē ho mē kēp amrakati xwýnhjē nhípēx kēt nē?

Kot ho wēnē ronh̄x hpānhā kàxpore ho rax kumrēx nē kupy nē ho mēmoj japrōr rax o rax. Tā axtem nē amarī Jejus par ā hkapīr pa. Anē.

⁶ Te kām mē kēp amrakati xw̄ynh̄jē japē pyrāk tā kām mē hapē hkēt. Ām hēx rom ā kapēr anē. Na pre hte mē inhmā mē ixkàxpore jam̄y nē mē ixkōt mē inhmā hamār o pa. Nom tōhā axtem nē mē ixpē hkwȳ ho ahkī nē ho amnh̄im mēmoj japrō. Jakamā Marir kot mē hkuxwaxā ho hapēx par ā omu nē tee ri hpānhā kàxpore rax mā hamaxpēr nē kamā gryk nē ā mē inhmā kapēr anē.

⁷ Hāmri nh̄um Jejus amnh̄i tā hamaxpēr ā omu nē kām:

—Tk. Kwa tanhmā kām akapēr to hkēt nē. Ixtyk nh̄um mē kot ixkuxwa hkukamā na ā inh̄ipēx anē.

⁸ Na hte mē kēp amrakati xw̄ynh̄jaja mē akōt pa rāhā nē. Ka mē amā mēmo arīgro hā tanhmā mē ho ajuta hto hprām nē rī mē ho ajuta nē mē kām mēmoj gō. No kēt pa kot paj ri mē akōt ixpa ka mē ixto mex ry ho apa hkēt nē. Kot paj tokyx mē apiitā mē are. Jakamā ām hāmri na ā inh̄ipēx anē. Anē.

Patre krāhtūmjaja kot Rajare hā āmnēnh ā harēnh

⁹ Rōm nh̄um Jerujarē nh̄o xw̄ynh̄jaja ra Jejus Petān w̄yr hpōx ā harēnh ma nē kot omunh mā ma hw̄yr mra. No ām tapxipix pumunh mā hw̄yr mra kēt nē. Māānēn kot akup̄ym ho htīr xw̄ynhta pumunh mā nh̄um mē ma hw̄yr mra.

¹⁰⁻¹¹ Na pre ra Ijaew ohtō nē Jejus kot akup̄ym Rajare ho htīr ā harēnh ma hāmri nē mē inh̄o patre kaga nē Jejus kōt amnh̄i xunhw̄y. Jakamā nh̄um patre krāhtūmjaja tee ri ja hā mē omu nē axpēn mā:

—Nā kot puj mē Jejus pix pīr kēt nē. Kot puj mē māānēn hkōt Rajare pī hāmri nh̄um wa hixi hamē mē kēp hapēx japēr. Anē.

Jejus kot Jerujarē hw̄yr ar ā harēnh

Matēwre 21.1-11; Makre 11.1-11; Rukre 19.28-40

¹² Tā nh̄um apkati nh̄um Ijaew Jerujarē kamā mē hkīnhja kryx nē Jejus ra mē hw̄yr āhtēp o mōr ā harēnh ma.

¹³ Hāmri nē axpēn mā:

—Kwa ma pu mē mō nē pō hkwȳ jakā nē kutā ho mra. Anē.

Hāmri nē hkwȳ jakā nē ham̄y nē ma kutā ho mra. Hāmri nē ra hkaxpa nē omu nē hkīnh nē. Nē kām:

Pa. Nā ām hāmri na ka mē ixw̄yr mō. Tīrtūm na pre mē ixw̄yr amē ka ā amōr anē.

Tīrtūmjaja mex o mex. Ām hāmri na pre mē ixw̄yr amē.

Kot kaj mē inh̄o pahi hpānhā mē ixto amnh̄iptār o ri apa. Anē.

¹⁴ Hāmri nh̄um Jejus nh̄yri jumēnre pumu nē hw̄yr tē nē hā nh̄y nh̄um mē pimrāātā ma akup̄ym Jerujarē hw̄yr mō. Tīrtūm kapēr ā kaga htūm ra kot ja jarēnh kot:

¹⁵ Pa Jerujarē nh̄o xw̄ynh̄jaja. Kwa mē tee ri amnh̄i kukamā ajamaxpēr ho amā ma hkēt nē.

Ota mē anh̄o pahi nyw ra mē aw̄yr jumēnre hā nh̄y nē hpōx o tē. Anē.

¹⁶ No Jejus kōt mē ixpa ho mē ixpa xw̄ynh̄jaja pa mē ā kot amnh̄i nh̄ipēx anh̄yrja ā omu nē tee ri hkukamā ijamaxpēr nē axpēn mā:

—Kwa mo na ri ā amnh̄i nh̄ipēx anē nē jumēnre hā nh̄y nē mē hkōt mō? Anē.

Tā nh̄um arīgro hō hā ty nē akup̄ym kaxkwa hw̄yr api pa prem hā omu hāmri nē kormā Tīrtūm kapēr ā kaga htūm kot hkukamā ā harēnh kot anh̄yrja mā ijamaxpēr kurē kumrēx. Hāmri nē axpēn mā harēnh o:

—Kwa ām hāmri na Tīrtūm kapēr ā kaga htūm kot ra ā Kraja jumēnre hā ŷr nē mē hkōt mōr ā hkukamā kot harēnh anh̄yrta. Anē.

¹⁷ Hāmri nh̄um Jejus kot Rajare mā kapēr pē akup̄ym ho htīr ā omunh xw̄ynh̄jaja arī nhām mē hkwȳjē mā ujarēnh o pa.

¹⁸ Nh̄um mē kuma nē ma Jejus w̄yr omunh mā mra.

¹⁹ Hāmri nh̄um Parijew nh̄o xw̄ynh̄jaja tee ri ja hā mē omu nē axpēn mā:

—Kwa na pu mē tee ri Jejus nē mē kām pakapēr kapr̄y nh̄um mē pamar kēt nē ra piitā hkōt amnh̄i nh̄ipēx o pa. Kwa nā. Anē.

Ijaew kēt xw̄ynh̄jē jarēnh

²⁰ Tā nh̄um ra Gres kw̄ȳjaja Ijaew kōt hkīnh kaxyw ma Jerujarē hw̄yr mē hkōt mra nē mē inh̄o hā Tīrtūm mā mex o mex ā harēnh o hkōt mra.

²¹ Jakamā nh̄um mē nh̄yri mē inh̄o pē Firipti pumu nē hw̄yr mra. Firipti kēp pyka pē Garirej kamā krī pē Pesēj nh̄o xw̄ynh̄ nh̄um Gres nh̄o xw̄ynh̄jaja omu nē hw̄yr mra nē kām:

—Pa. Kwa na pa mē inhmā Jejus pumunh prām nē. Tanhmā kot pa wem amnh̄i to nē omu nē kām ixkapēr? Anē.

²² Hāmri nh̄um mē kuma nē ma Andre hw̄yr mē o mra nē kām mē harē. Hāmri nē wa ma Jejus w̄yr mē o mra nē kām mē harē nē kām:

—Pa Pahiiti. Ota Gres nh̄o xw̄ynh̄jaja kām apumunh prām nē aw̄yr mō. Mē pahkīnhā mē kēp Ijaew kēt tā mē kām apumunh prām nē. Anē.

Jejus kot amnh̄i kukamā amnh̄i jarēnh

Matēwre 16.24-28; māānēn Apokarip 2.10, 12.11

²³ Hāmri nh̄um Jejus mē omu nē mē kām tanhmā amnh̄i jarēnh to. Kot mē ohtō nē mē nē htyk nh̄um mē kukwak ri Tīrtūm wa kuri

htür tûm nê pa ho pa hã mē kãm amnhî jarê nê mē kãm:

—Nà na ra ixtykã arîgro hwÿr apkati grêre. Ixpê Tirtûm kot mē akaxyw ixâm xwÿnh jakamã kot paj mē apiitã mē anê ty hãmri nê akupÿm ixtür nê ma kaxkwa hwÿr akupÿm api.

²⁴ Mē axohtô nê nhÿrmã Tirtûm mē wa ixri atür tûm nê apa ho apa kaxyw kot paj ã amnhî nhîpêx anê. Kwa mē ã ixte amnhî jarênh anhÿrja ma nê mē amnhî krãm haxàr tÿx nê ri hã apa. Te ixte mēmo hy kot amnhî nhîpêx pyrãk. Na htem pikap hagjê nhûm te htyk pyrã nê pika kaxwÿnh kãm hikwÿ. Tã gaa nê higrôt nê hprêk nê ô. Nê ô rax kumrêx. Hyja pyxire nê hikwÿ htã kamã ô rax kumrêx. Nom koja mē hkre hkêt nê nhûm ô hkêt nê. Na hte ã mēmo hyja amnhî nhîpêx anê. Ja pyrã nê kot paj mē anê ixtyk kêt nê te mē kot mēmo hy hkre hkêt nhûm hprêk nê ô hkêeta pyrãk ka mē ixkukwak ri Tirtûm mē wa ixri atür tûm nê apa hkêt nê. Jakamã kot paj mē anê ty nhûm mē ijaxã. Hãmri pa akupÿm ixtür ka mē axohtô nê ixkukwak ri wa ixri atür tûm nê apa ho apa.

²⁵ —Nê koja mē ixpî pa mē anê ty. Tã mē ate ixkôt amnhî nhîpêx o apa xwÿnhjaja. Kojã mē ixtã mē apar mã tã kwa kër ka mē atyk pymaj ixkaga hkêt nê. Kwâr mē mãmri tanhmã ixtã mē ato ka mē nhÿrmã Tirtûm mē wa ixri axte amnhî xã kamã ajamak kêt kumrêx nê atür tûm nê amex nê apa ho apa. No kot kaj mē ixkÿnhã jar amã amex pix prãm hãmri nê nhÿrmã wa ixri atür tûm nê apa hkêt nê.

²⁶ Kot kaj mē ã ixkôt amnhî nhîpêx anhÿr o ri apa hãmri nhûm mē kot inhîpêx pyrãk o mē anhîpêx. Hãmri ka mē nhÿrmã ma ixkôt kaxkwa hwÿr api nê kamã ixri atür tûm nê apa ho apa. Hãmri nhûm Inhîpêxã ixtã mē apumu nê mē ato mex kumrêx. Anê.

*Tirtûm kot Jejus mã kapêr ã harênh
Matêwre 3.17, 17.5*

²⁷ Tã nhûm Jejus tee ri amnhî kukamã htyk mã hamaxpêr nê hkaprî htyx nê. Nê hkôt mē ixpa ho mē ixpa xwÿnhjê mã amnhî jarê nê mē inhmã:

—Hêxta waa nê. Na pa tee ri amnhî kukamã ijamaxpêr. Nê tee ri amnhî xã htÿx kamã ijamak kukamã ijamaxpêr pé ra amnhî kamã ixkahak nê. Nom ixte pika piitã hkôt mē kot ixkôt amnhî xunhwÿr xwÿnhjê nê ixtyk kaxyw ixwÿr kênã. Jakamã kot paj Inhîpêxã kot mē kêp ixpytãr kaxyw tanhmã amnhî to hwÿr to hkêt nê. Anê.

²⁸ Hãmri nê hpãnhã Hipêxã mã kapêr nê kãm:

—Pa Papaj. Æm mēmoj pixi na inhmã hprãm. Kê mē piitã ixkukwak ri amex o

amex ã apumu. Ja na kêt inhmã hprãm tÿx kumrêx.

Anhÿr o Tirtûm mã amnhî jarê. Hãmri nhûm kuma nê kaxkwa rûm kãm kapêr. Kÿxpê kãm kapêr nê kãm:

—Nà na pa pre ra ã mē kãm amnhî to amnhîrit anê nhûm mē ja hã ixpumu. Tã kot paj axte akukwak ri amnhî to amnhîrit nhûm mē piitã axte inhmex o inhmex ã ixpumu. Anê.

²⁹ Nhûm pre ã Tirtûm Jejus mã kapêr anê. Hãmri nhûm mē kot mē ixkuri mar o kuhê xwÿnhjaja kuma no ãm hprî hã kot kãm tanhmã kapêr toja mar mex kêt nê. Nê htyx ho ãm mēmoj tã hkamnhîx. Jakamã nhûm mē hkwÿjaja axpên mã:

—Kwa mo na wehe? Na mãn katôtök nà? Anê.

Nhûm mē hkwÿjaja mē kãm:

—Nà na katôtök kêt. Tirtûm kapêr o wÿrk xwÿnh mãn tanhmã kãm kapêr to. Anê.

³⁰ Hãmri nhûm Jejus mē kãm:

—Nà Tirtûm tãm na inhmã kapêr. Nom pa ixte mar kaxyw inhmã kapêr kêt nê. Mē kajaja mē ate ixtã mar kaxyw na kÿx pé ã inhmã kapêr anê. Anê.

Hãmri nê mē kãm:

³¹ —E hãmri. Kot paj tokyx mē apiitã mē ate amnhî tomnuj pãnhã amnhîrer kaxyw tanhmã amnhî nhîpêx to. Jao mãânên Sattanasti pé hihtÿx xã ho ijapêx.

³² Kojã mē pí kahpa hã inhô pa kÿxpê ajêt. Tirtûm kot mē awÿr inhmênh tã nhûm mē ã inhîpêx anê pa ty. Jakamã koja pika piitã hkôt mē ohtô nê ixkôt amnhî xunhwÿr nê amnhî kaxyw inhmã hamaxpêr rãhã ho pa. Anê.

³³ Mē ixte tanhmã htyk to hã harênh mar kaxyw nhûm pre ã mē inhmã amnhî jarênh anê.

³⁴ Hãmri nhûm mē kot mē ixkuri mar o kuhê xwÿnhjaja tee ri kot htyk ã amnhî jarênhja ma nê kãm:

—Kwa mē ixte amnhî wÿr kamã ijamak o ixpa xwÿnhja htür tûm nê pa ho pa xwÿnh na. Tirtûm kapêr ã kagã htûm kot ã harênh kot anhÿr tã ka ã ri mē kot apîr nhûm atyk ã amnhî jarênh anê. Ate Tirtûm kot mē ixwÿr amênh xwÿnh ã amnhî jarênh tã ã ri atyk ã amnhî jarênh anê. Kwa xã apê mē ixte amnhî wÿr kamã ijamak o ixpa xwÿnh kêt? Anê.

³⁵ Hãmri nhûm mē kuma nê amnhî tã mē kãm:

—Tÿ xpê tãm kênã. Tã kot paj tokyx mē are. Jakamã kër ka mē ixte arî mē akamã ixpa ri ixkôt amnhî xunhwÿr nê amnhî kaxyw ixkôt ajamaxpêr o ri apa. Te ixpê kanê hpök pyrãk jakamã na pa hte mē kãm Tirtûm kapêr o mē ahkre o ri ixpa. Nom kot paj kritpê mē akôt ixpa ry hkêt nê. Jakamã kwa kër ka mē tokyx te mē kot kanê

hpôk nhîrã kamã ri mē pa xwýnh kot amnhî nhîpêx pyrã nē Tirtüm kôt amnhî nhîpêx o ri apa. Kormã mē akôt ixpa ri. Kot paj tokyx ma mō nhūm te ra kamãt kô pyrãk. Na hte kamãt kô kamã mē pa xwýnhjaja tee ri rît mex mã nom rît mex kêt nē. Nē mēmoj pumunh mex kêt nē.

³⁶ Jakamã kwa mē tokyx ixte arî mē akamã ixpa ri amnhî kaxyw inhmã ajamaxpêr nē ixkôt amnhî xunhwý. Te ixpê kanê hpôk nhūm kamã mē arît mex pyrãk. Jao ixpyrã nē te mē apê kanê hpôk nhîrã mex pyrãk o amnhî nhîpêx. Nē ixpyrã nē tãm ri amnhî nhîpêx o apa. Anê.

Nhūm pre ã mē kãm kapêr anê hãmri pa mē kêp ixkato nē ma nhãm mō.

Mē hkwyjaja kot Jejus kôt hamaxpêr kêt ã mē harênh

³⁷ Na pre hte Jejus mē noo mã mē kot aa mēmoj pumunh kêt kwý ho anhýr rax o pa. Tã nom nhūm mē ohtô nē hã omu nē ãm hã omu nē kêp Tirtüm kot mē pahwýr mēnh xwýnh ã hkôt hamaxpêr kêt nē.

³⁸ Nom ra mē hkukamã Tirtüm nhý hã kapêr jarênh o pa xwýnh pē finat Ijaisja mē hkukamã ja hã mē harê nē hã kagã. Nē hã kagãja o:

Pa Pahi Maati. Nã ra ixte mē kãm ajarênh o ixpa ryy htã no nhūm mē inhma nē ãm inhma.

Nē mē kot axihtýx o axihtýx ã ajarênh mar tã no ãm ajarênh ma nē amnhî kaxyw akôt hamaxpêr kêt nē. Anê.

³⁹ Mē kãm Tirtüm kapêr mar prãm kêt jakamã na prem mãânên Jejus kêp Tirtüm kot mē pahwýr mēnh xwýnh hkôt hamaxpêr kêt nē. Nhūm pre finat Ijaisja axte mē hkukamã ja hã mē harê nē mē hã kagã. Nē hã kagã ho:

⁴⁰ Na pre Tirtümja tanhmã amnhî nē mē hkrã hto nhūm mē hkôt hamaxpêr kêt nē.

Ra mē kot hihtýx o hihtýx ã omunh tã omu nē ãm omu.

Nē mē kot kapêr mar tã amnhî tomnuj kaga hkêt nē.

Nē Tirtüm kot mē nē mē kot amnhî tomnuj o hapêx prãm xãj hkôt amnhî xunhwýr kêt nē. Anê.

⁴¹ Kormã Jejus mē hwýr wrýk kêt ri nhūm finat Ijaisja hpimtir kãm kot amnhî to rax kumrêx ã omu nē hkukamã ã harênh nē hã kagã anê.

⁴² Hãmri nhūm Ijaew krãhtüm kwýjaja hkwyjê rom amnhî kaxyw Jejus kôt hamaxpêr nē hkôt amnhî xunhwý. Tã Parijew nhô xwýnhjaja kot ã mē kot amnhî nhîpêx anhýr ã mē harênh mar pymaj ja hã amnhî to amnhîrit kêt nē. Mē kot Tirtüm kapêr o mē ahkre xã hã ixkreja nē mē kator

pymaj nhūm mē kãm amnhî to amnhîrit kêt nē.

⁴³ Na prem hamaxpêr o:

–Nã kot paj ja hã amnhî to amnhîrit nhūm mē amnhî nē ixtomnuj nē. Hãmri nē amnhî pyrã nē axpên mã inhmex ã ijarênh kêt nē.

Anhýr o mē umaj amnhî kukamã hamaxpêr o pa. Nom Tirtüm tãm kot amnhîm mē mex ã mē harênhja nhūm mē hkukamã hamaxpêr kêt nē.

Jejus kot Hipêêxã nhý hã kapêr ã harênh

⁴⁴ Nhūm Jejus axte mē kãm kapêr nē kýx pē kapêr nē mē kãm:

–Nã koja mēhō amnhî kaxyw ixkôt hamaxpêr hãmri nē ixkôt pix mã hamaxpêr kêt nē. Mãânên amnhî kaxyw kot mē awýr inhmēnh xwýnhja kôt hamaxpêr.

⁴⁵ Wa ixte amnhî nhîpêxja te tipxi pyrãk jakamã koja mē tanhmã ixte amnhî nhîpêx to hã ixpumu nē te kot Tirtüm kot amnhî nhîpêx ã omunh pyrãk.

⁴⁶ –Nē te ixpê kanê hpôk nhūm inhîrã kamã mē apa pyrãk kaxyw na pre Inhîpêêxã mē awýr inhmê pa mē awýr wrý. Ixte kapêr o mē ajahkre ho ri mē akôt ixpa kaxyw. Jakamã koja mēhō amnhî kaxyw ixkôt hamaxpêr nē ixkôt amnhî xãm hãmri nē te kanê hpôk nhîrã kamã rît mex o pa pyrãk o amnhî nhîpêx. Jao amnhî nhîpêx nyw o amnhî nhîpêx o pa.

⁴⁷⁻⁴⁸ No mē kot ixkapêr mar nē ãm mar xwýnhjaja te mãânên Inhîpêêxã kapêr mar nē ãm mar pyrãk. Mýrapê koja mē nhýrmã ma kuwy hwýr pa nē mē kot amnhî tomnuj mýrapê kamã pa ho pa. Tã no ã mē ate amnhî nhîpêx anhýr o ri mē apa kaxyw na pa pre mē awýr ixwrýk kêt nē. Ixte mē ate amnhî tomnuj pãnhã amnhîrer par kaxyw na pa pre mē awýr wrý.

⁴⁹ –Nē na pa hte amnhî krã hkôt tanhmã ri mē amã ixkapêr to ho ri ixpa hkêt nē. Æm kot mē awýr inhmēnh xwýnhja nhý hã na pa hte tanhmã mē amã ixkapêr to ho ri mē akôt ixpa.

⁵⁰ Tã mē kot Tirtüm kapêr mar nē amnhî kaxyw hkôt hamaxpêr xwýnhjaja koja mē nhýrmã wa ixri htür tùm nē mex nē pa ho pa. Jakamã na pa hte tanhmã kot inhmã karô hto xã hkôt pix mã tanhmã mē amã ixkapêr to ho ri ixpa. Anê.

13

Jejus kot hkwyjê hpar kuhônã ã harênh Rukre 22.24-27

¹ Tã nhūm ra Pas ã mē ixkînhta ahtêp. Pas ã na hte mē ixpê Ijaewjaja axpên wýr akuprô nē hã ôwêhti hkra nyw pa nē ho anê nē hkur o ixkrî. Amnepêim Tirtüm kot pika pē Ejit rüm mē inhîgêxjê kator kaxyw nhūm mē nojarêt nē ã hkwy hpar nē ho anhýr nē hkwy hkurta pyrãk. Na prem

nojarêť nê mē hkra my kot wa mē kēp htyk pumaj ôwêhti hkra nyw kwý hpa nê ho anê nê ĩ hku. Jakamā nhūm arī mē ixpê mē hkanrêhā mē htāmnhwýjaja ā mē kot amnhī nhīpêx anhýrja mā ijamaxpêr nê hā ixkīnh kaxyw mē urāk nê hkwý hpa nê kuku. Jakamā nhūm ra Pas ahtêp nhūm Jejus amnhī kukamā tanhmā hamaxpêr to kurê kumrêx. Ra ma akupým Hípêêxā hwýr àpir xā hā arīgro hwýr apkati grêre. Jakamā nhūm akupým nojarêť ā amnhī pumu nê kām mē pahte hkôt amnhī xunhwýr xwýnhjê japê jakamā kām mē pajapê rāhā mē panê htyk mā.

² Tā nhūm myt axā pa mē Pas ā ixàpkur o ixkrī. Nhūm Simāw Kariot kra Jut Kariotja määnēn mē ixkutā apkur o nhý. Kēp mē ixkwý htā nhūm pre Sataranasti tanhmā hkrā hto nhūm ra axtem nê kot mē kām Jejus kurê xwýnhjê nhīhkram haxār kaxyw.

³⁻⁴ Tā pa mē kormā axpēn kutā ixàpkur kaxyw ixkrī hpa nhūm Jejus kānhmā xa nê hinókā kapa nê toajti py nê ho amnhī krax pre. Kot amnhī to rax ā amnhī pumunh tā ja hā amnhī to jarkrar pê tanhmā ri mē inhnoo mā amnhī nhīpêx to ho pa hkêt. Kēp mē inhō pahi htā te kēp mē inhmā àpēnh xwýnh pyrāk o amnhī nhīpêx o pa.

⁵ Jakamā toajti py nê ho amnhī krax pre nê pasiiti hō py nê kamā gō hkwý ru nê ho mē ixpar kuhō nê toajti o mē ixpar grā ho mō.

⁶ Ā mē inhīpêx anhýr o mō. Pê ra hpānhā Simāw Pêtre hpar kuhōnh kaxyw nhūm tee ri amnhī tā omu nê kām:

–Tk. Kwa apê inhmā axàpēnh xwýnh kêt kēnā kot ka kêt ri axtem nê ixpar kuhō Pahiiti. Apê mē inhō Pahi kēnā kot ka kêt ā mē inhīpêx anê. Anê.

⁷ Hāmri nhūm kām:

–Kwa nā. Kormā ate ja hā amnhī tā ixpumunh mex kêt. Nom kot kaj nhýrmā aprī hā amnhī tā ixpumu. Anê.

⁸ Hāmri nhūm kām:

–Nā nom kot kaj ām ixpar kuhōnh kêt nê. Kwarī. Anê.

Hāmri nhūm Jejus kām:

–Tōe. Kot paj apar kuhōnh kêt nê ka te apê ixkwý hkêt pyrāk. Anê.

⁹ Hāmri nhūm tee ri kuma nê kām:

–Tōe mamrī ixpar kuhō. Nom ixpar pix kuhōnh kêt nê. Määnēn inhīhkra kuhō nê ixku kuhō. Inhmā ixte apyrāk prām týx kumrêx kēnā. Anê.

¹⁰ Hāmri nhūm Jejus kām:

–Nā amýkry hkôt mē wýr xwýnhjaja na htem mex nê axte wýr kêt rāhā hikwý. Na htem ām amnhī par pix kuhō nê hikwý. Ja pyrā nê Tirtūm kot mē anê mē ate amnhī tomnuj ho hapêx par xwýnhjaja te amýkry hwýr mē axwýr nê amex pyrāk. Ka mē te mē kot amnhī par pix kuhōnhhta pyrā

nê axte tanhmā amnhī tomnuj to hāmri nê Tirtūm mā amnhī jarēnh kurê kumrêx kē anê amnhī katut kôt ate amnhī tomnujta mē nê ho hapêx. Na pre ra mē anê mē ate amnhī tomnuj o hapêx. No ām mē apiitā hkêt. Ota arī mē anhīōja pyxire nê arī amnhī tomnuj rāhā ri pa. Jakamā te wýr kêt nê arī grā htyk rax kām ri pa pyrāk. Anê.

¹¹ Nhūm pre ā Jejus mē inhmā kapêr anê. Ra kot hprī hā mē kot kām hkurê xwýnhjê mā ôr mā xwýnhja pumunh jakamā te wýr kêt nê arī grā htyk rax kām ri pa pyrāk ā ā harēnh anê.

¹² Tā mē ixpar kuhōnh pa nê akupým hinókā py nê haxā nê nhý hāmri nê mē inhmā:

–E mēmo kaxyw na pa we ā mē apar kuhōnh anê? Kot paj ixprī hā mē amā amnhī jarê ka mē inhma.

¹³⁻¹⁴ Na ka htem ixto “mē ijahkre xwýnh” nê ixto “pahiiti” anhýr o ijarēnh o ri apa. Ām hāmri na ka htem ā axpēn mā ijarēnh anê. Ixpê mē ajahkre xwýnh nê määnēn ixpê mē anhō pahiiti htā inhmā mē ate tanhmā axpēn nhīpêx to ho apa hprām xāj na pa ā mē apar kuhōnh anê. Tā kēr ka mē ixpyrā nê tanhmā axpēn to mex to ho ri apa.

¹⁵ Jao amnhī kuxwar axpēn to mex pē mēmoj to axpēn kutā anojarêť rāhā ho ri apa.

¹⁶ Kwa mē ixkapêr ma nê kām amnhī krām haxār týx rāhā ho ri apa. Mē ate amnhī to rax o ijakrenh kêt. Te ixpê mē anhō patrāw nhūm mē ate inhmā tanhmā amnhī nhīpêx to ho apa xwýnh pyrāk. Nê te ixte mēmoj tā mē amā karō nhūm mē ate inhmar nê inhmā tanhmā mēmoj nhīpêx to pyrāk. Tā te ixpê mē anhō patrāw pyrāk tā pa ā mē apar kuhōnh anê. Ka mē amnhī tā ixpumu hāmri nê amnhī xwar tanhmā axpēn to ajuta hto ho ri apa. No ri axpēn pumu nê ajamaxpêr o: “Tk. Nā ixte amnhī to rax o hakrenh kēnā kot pa kêt ri tanhmā ho ajuta hto. Kê tām mān pa ixto ajuta.” Anhýr o ajamaxpêr o ri apa hkêt nê.

¹⁷ –E na pa ā mē amā ixujarēnh anê. Kot kaj mē inhma nê ixujarēnh kôt ā axpēn nhīpêx anhýr o ri apa. Hā kot kaj mē akīnh nê ri apa. Anê.

Jejus kot amnhī tā hā āmnēnh xwýnh o amnhīrīt ā harēnh

Matêwre 26.20-25; Makre 14.17-21; Rukre 22.21-23

¹⁸ Nhūm Jejus arī mē inhmā kapêr nê mē inhmā:

–Kot kaj mē apiitā mē akīnh nê apa hkêt nê. Ixte mē arēnh xwýnhjaja mē apiitā mē apumunh mex. Jakamā na pa Tirtūm kot mē apiitā mē ate amnhī tomnuj o hapêx par kêt ā mē anhīōja jarê. Tirtūm kapêr ā kagā htūm kot harēnh kot:

Ixkutā apkur o Ƴr xwýnhjê hō koja axtem nê mē kot kām ixkurê xwýnhjê nhĩhkram ijaxà. Kêp ixkôt pa ho pa xwýnh tā koja axtem nê ā inhĩpêx anê.

Anh̄yr o kot harênh. Tā koja tokyx ā inhĩpêx anê.

¹⁹ Nom kormā kot ā inhĩpêx anh̄yr kêt ri na pa hkukamā mē amā harê. Jakamā koja ā inhĩpêx anê ka mē ja hā ixpumu nê ra ixte amnhĩ kukamā mē amā amnhĩ jarênhhta mā ajamaxpêr nê ixpê Tĩrtũm rũm mē aw̄yr ixwryk xwýnh kôt ajamaxpêr t̄yx kurê kumrêx.

²⁰ –Kwa mē ixkapêr ma nê amnhĩ krā kamā kām ajamaxpêr t̄yx o ri apa. Koja mēhō ixte mē hw̄yr mē arênh xwýnhjê hā tanhmā mē ato mex to. Hāmri nê te pa kot tanhmā ixto mex to pyrāk. Nê koja mēhō tanhmā pa ixto mex to nê määnēn te kot mē aw̄yr inh̄mēnh xwýnhhta tanhmā ho mex to pyrāk. Anê.

²¹ Nhũm pre ā Jejus mē inh̄mā kapêr anê. Hāmri nê tee ri amnhĩ kukamā hamaxpêr nê hkaprĩ nê mē inh̄mā:

–Hêxta waa nê. Nà kot kaj mē atō mē kot kām ixkurê xwýnhjê nhĩhkram ijaxà. Kwa mē amnhĩ krā kamā ixkapêrja mā ajamaxpêr t̄yx nê. Anê.

²² Hāmri pa mē amnhĩ tā kuma nê tee ri axpên pumunh o ixkrĩ.

²³ Ixpê Juāw na pa pre ixpê Jejus krāmnhw̄y mex ā ihkō hā ixàpkur o inh̄yr

²⁴ nhũm Simāw Pêtreja ixpumu nê inh̄mā nomgōr nê kawax pē inh̄mā:

–Kwa mē pah̄tō nhĩxi hā hkukja nà? Anê.

²⁵ Hāmri pa kuma nê Jejus mā kām:

–Kwa Pahihti. Mē ixtō koja we ā anh̄pêx anê? Anê.

²⁶ Hāmri nhũm mē inh̄mā:

–Nà kot paj pāwti hō py nê guhkrax kām ho mry kagō nhek nê kot mē ihkram ijaxàr mā xwýnhhta mā kugō ka mē hkôt omu. Anê.

Hāmri nê kupy nê ho mry kagō nhek nê Simāw Kariot kra Jut Kariotja mā kugō nhũm kupy.

²⁷ Pyrja kôt nhũm Satanasti tanhmā hkrā hto. Hāmri nhũm Jejus te kot kām amnhĩ to nojarêt pyrāk o amnhĩ tā kām kapêr nê kām:

–E kwa tokyx nà. Anê.

²⁸⁻³⁰ Hāmri nhũm kuma nê kato nê ma kamāt kō kamā htēm kurê kumrêx. Hāmri pa mē ixàpkur o ixkrĩ xwýnhjaja Jejus kot ā kām kapêr anh̄yrja ā kuma nê tee ri hkukamā ijamaxpêr. Hāmri nê kot ma mē hkĩnh ā mēō hkwȳ japrōr kaxyw ma htēm ā hkamnhĩx. Nhũm mē ixkw̄yjaja axtem Jejus kot mē kêp amrakati xwýnhjê mā mēmoj nhōr ā kām karō nhũm ma mē hw̄yr htēm ā hkamnhĩx. Kêp mē inh̄mā mē ixkàxpore jamār o pa xwýnh jakamā pa mē ā ixt̄yx mēmoj tā hkamnhĩx anê.

Jejus akup̄ym nojarêt nê mē kām mēmoj tā karō hā harênh

Matêwre 22.39-40; määnēn Wam Juāw 3.11-24

³¹⁻³² Hāmri nhũm Jejus mē inh̄mā:

–Nà kot kaj mē tokyx mēmoj pumu nê Tĩrtũm mā mex o mex ā harê nê ijaxw̄yja inh̄mā inh̄mex o inh̄mex ā ijarê. Kot kaj mē tokyx mēmojta pumu kām ga.

³³ –Te mē apê ixkra pyrāk tā kot paj arĩ ri mē akôt ixpa grire hāmri nê ma akup̄ym api. Kot kaj mē tee ri jar ijapêr o ri apa nom nh̄yri ixpumunh kêt nê. Nê kormā tokyx ma ixkôt apa hkêt nê.

³⁴ –E kot paj axte mē amā mēmoj tā karō. Kormā ixte mē amā ja hā karō hkêt. Kêr ka mē amā axpên kĩnh o ri apa. Te pa inh̄mā mē ajapê pyrāk o axpên nhĩpêx rāhā ho ri apa.

³⁵ Kot kaj mē ā amnhĩ nhĩpêx anê nhũm mē akw̄yjaja ja hā mē apumu nê mē apê ixkw̄y hā mē apumunh kurê kumrêx. Anê.

Simāw Pêtre kot Jejus ā amnhĩ to hêx kukamā harênh

Matêwre 26.31-35; Makre 14.27-31; Rukre 22.31-34

³⁶ Nhũm Jejus ā kot mē ixrer nê ma nh̄h̄ym mōr ā amnhĩ jarênh anê hāmri nhũm Simāw Pêtre tee ri kot amnhĩ jarênh ma nê kām:

–Kwa Pahihti. Nh̄h̄ym kot kaj kêt mō pa mē akôt ixpa hkêt nê? Anê.

Hāmri nhũm kām:

–Nà ma inh̄mōr xāta w̄yr kot kaj mē kormā ma ixkôt apa hkêt nê. Nom kot kaj mē nh̄yrmā ma ixkôt apa. Anê.

³⁷ Hāmri nhũm Simāw Pêtre kām:

–Kwa mo kot pa mē omu nê tokyx ma akôt inh̄m̄rar kêt nê? Inh̄mā akôt ixt̄yk pyma hkêt kēnā. Kwār mē māmri atō ixpĩ. Inh̄mā ajapê ht̄yx kumrêx kēnā. Anê.

³⁸ Hāmri nhũm Jejus kām:

–Xā ām hāmri na ka ā inh̄mā amnhĩ jarênh anê Simāw Pêtre? Xā amā ixkôt atyk pyma hkêt? Kwa o kora. Koja apkati hkôt krāhyre hkār kêt ri ka ra mē umaj ate ixkôt apa hkêt ā amnhĩ tā axap̄r o axkrunêpxi kām ga. Kwa amnhĩ krā kamā ixkapêrja mā ajamaxpêr t̄yx nê. Anê.

14

Jejus kot Tĩrtũm nhō krĩ jarênh

Eprêw 11.16

¹ Nhũm Jejus arĩ mē inh̄mā kapêr nê mē inh̄mā:

–Kwa ā ixte mē amā amnhĩ jarênh anh̄yrja ma nê tee ri amnhĩ kukamā ajamaxpêr nê akaprĩ hkêt nê. Arĩ amnhĩ kaxyw Tĩrtũm mē wa inh̄mā ajamaxpêr t̄yx rāhā ho ri apa.

² Inh̄pêexā nhō krĩ kamā ixkre xohtōō. Ām hāmri na pa ā mē amā harênh anê. Tā

kot paj ma akupŷm hwŷr api nē mē akutēp mān amā mē anhōrkwŷ ho mex.

³ Hāmri nē ho mex pa nē rī man akupŷn mē awŷr wrŷ. Hāmri nē ma akupŷm amnhī kōt mē ato ixāpir pa ka mē Tirtūm mē wa ixkōt apa rāhā apa ho apa. Jakamā kwa mē ri akapri nē apa hkēt nē. Anē.

Jejus te kēp Tirtūm wŷr pry pyrāk
Epes 2.18

⁴ –Nē ma nhŷhŷm inhmōr xāta ra mē ate harēnh mar mex. Nē hwŷr pryja māānēn mē ate harēnh mar mex. Anē.

⁵ Hāmri nhūm Tomas tee ri kuma nē kām:
–Kwa mē ixte nhŷhŷm amōr xāta pumunhre hā kot pa kēt mē hwŷr pryja pumu. Anē.

⁶ Hāmri nhūm kām:
–Kwa paa. Te ixpē Inhīpēēxā hwŷr pry pyrāk. Na htem amnhī kaxyw inhmā hamaxpēr nē ixkōt amnhī xunhwŷ hāmri nē nhŷmā ixkukwak ri pix mā ma Inhīpēēxā mē wa inhō krī hwŷr api. Ixkukwak ri pix mā na htem hprī hā Tirtūm kapēr ma. Nē ixkukwak ri pix mā na htem wa ixri htŷr tūm nē pa ho pa.

⁷ Kot kaj mē aprī hā ixpumu nē māānēn te aprī hā Inhīpēēxā pumunh pyrāk. Tā ra mē ate tanhmā ixte amnhī nhīpēx to hā ixpumunh mex jakamā māānēn te ra mē ate Inhīpēēxā kot amnhī nhīpēx ā omunh mex pyrāk. Anē.

Jejus mē Tirtūm wa kot amnhī nhīpēx tipxi hā wa harēnh

Juāw 1.1, 10.30; Piripos 2.6; Korosē 2.9

⁸ Nhūm Jejus ā mē inhmā kapēr anē nhūm Firipti kuma nē kām:

–Kwa nom mē inhmā inhno ho Anhīpēēxā pumunh prām. Kot pa mē omu nē ixkŷnh tŷx kumrēx. Anē.

⁹ Hāmri nhūm Jejus kām:

–Kwa na pa pre ra mē akōt ri ixpa ryy nē. Ka mē aprī hā ixpumunh mex nē. Kēt ra mē kot ixpumunh mex xwŷnhjaja te mē kot māānēn Inhīpēēxāja no ho omunh mex pyrāk.

¹⁰ Wa ixte amnhī nhīpēxja ām tipxi. Xā te kormā amnhī krā hi mā ixkapēr jaxār tŷx kēt? Inhīpēēxā mē wa ixte amnhī nhīpēxja ām tipxi. Nē kot axpēn pyrāk. Jakamā na pa hte amnhī krā hkōt ri tanhmā amnhī nhīpēx to ho ri ixpa hkēt nē. Ām Inhīpēēxā nhŷ hā na pa hte ri tanhmā mē amā ixkapēr to ho ri ixpa. Nē hihtŷx xā ho tanhmā amnhī nhīpēx to ho ri ixpa. Ka mē ja hā ixpumu nē te ano ho Inhīpēēxā pumunh pyrāk.

¹¹ Kwa mē ixkapēr ma nē hkōt ajamaxpēr tŷx nē. Inhīpēēxā mē wa ixte amnhī nhīpēxja ām tipxi. Nē kot axpēn pyrāk. Rŷ ka mē tee ri ja kukamā ajamaxpēr japēr hāmri nē ixte aa mē ate mēmoj pumunh kēt kwŷ ho anhŷr ā

mān ixpumu nē ja hā wa ixte amnhī nhīpēx tipxi kōt ajamaxpēr.

¹² –Kwa mē ixkapēr ma nē amnhī krā kamā amnhī krām haxār tŷx nē. Mē ate amnhī kaxyw ixkōt ajamaxpēr xwŷnhjaja kot kaj mē ixte tanhmā amnhī nhīpēx to ho ixpa hā ixpumu nē ixkōt ā amnhī nhīpēx anhŷr o ri apa. Kot paj akupŷm Inhīpēēxā hwŷr api nē kuri ixpa ho ixpa. Ka mē ixwakre kamā ixihtŷx xā ho tanhmā mē akwŷjē mā amnhī nhīpēx to ho ri apa.

¹³ –Nē kot kaj mē apē ixkwŷ hā tanhmā mēmoj tā ixwŷr to pa mē ama nē mē amā tanhmā mēmoj nhīpēx to. Mē kot omunh nē Inhīpēēxā mex o mex ā omunh kurē kumrēx kaxyw.

¹⁴ Nā kot kaj mē apē ixkwŷ hā mēmoj tā ixwŷr pa mē ama nē mē amā tanhmā mēmoj to. Anē.

Jejus kot mē pahwŷr Tirtūm mē wa Karō rēnh ā kot amnhī jarēnh

Juāw 7.37-39, 16.7-17; Atre 2.1-4; māānēn Rōmān 5.5; Wam Korīt 12.7-11; Epes 3.16; Wam Juāw 2.27

¹⁵ Nhūm Jejus arī mē inhmā kapēr nē mē inhmā:

–Nā kot kaj mē amā ixkŷnh hā kot kaj mē ixkapēr kōt pix mā ri amnhī nhīpēx rāhā ho ri apa.

¹⁶ –Kot paj akupŷm kaxkwa hwŷr api hāmri nē mē ato Inhīpēēxā wŷr nhūm inhna nē mē awŷr kot mē ato ajuta xwŷnh maatita rē nhūm man mē awŷr wrŷ nē mē akaxwŷnh mā agjē. Hāmri nē mē akōt tanhmā mē ato ajuta hto ho pa rāhā ho pa.

¹⁷ Wa Ixkarō koja mē awŷr kurē nhūm mē amā agjē. Hāmri nē hprī hā mē amā Tirtūm kapēr o amnhīrit o mē akōt pa ka mē aprī hā mar mex nē. No mē kēp Tirtūm kra hkēt xwŷnhjaja koja hprī hā wa Ixkarō jarēnh mar kēt nē. Mē kot wa ixkōt amnhī xunhwŷr kēt jakamā koja mē hkarō mā gjēx kēt nē. Ām mē ate ixkōt amnhī nhīpēx o apa xwŷnhjē pix wŷr koja wrŷ nē mē awŷr agjē nē mē akamā pa ho pa.

¹⁸ –Nē ixte mē arer nē ma inhmōr mā tā kot kaj mē te mē hā awrāre pyrā nē ahte atŷx ri apa pyrāk kēt nē. Kot paj te pa akupŷn nē awŷr ixwŷrŷ pyrā nē mē awŷr wa Ixkarō rē nhūm mē akām agjē nē mē akamā pa ho pa.

¹⁹ –Nē koja tokyx mē kot amnhī kaxyw Tirtūm mā hamaxpēr kēt xwŷnhjaja axte ixpumunh kēt nē. No mē papajaja kot puj mē tokyx axte nhŷri axpēn pumu.

–Nē kot paj akupŷm ixtŷr hāmri nē ixtŷr tūm nē ixpa ho ixpa ka mē ixkukwak ri ajaxwŷja nhŷrmā Tirtūm mē wa ixri atŷr tūm nē apa ho apa.

²⁰ –Tā koja wa Ixkarō mē awŷr wrŷ nē mē akarō mā agjē ka mē aprī hā Tirtūm mē wa ixte amnhī nhīpēx ā wa ixpumunh mex

kurê kumrêx. Te wa ixte amnhî nhîpêx tipxi pyrâk o ka mê hâ wa ixpumu. Nê määnên mê papajaja te ra mê pahitipxi nê ri mê papa pyrâk ka mê hâ amnhî pumunh mex kurê kumrêx.

²¹ —Nê mê kâm ixkînh xwýnhjaja na htem ixkapêr ma nê hkôt amnhî nhîpêx o pa. Jakamâ nhûm Tirtûm ixtâ mê omu nê kâm mê hapê htýx nê. Pa määnên amnhî tâ mê omu nê inhmâ mê hapê htýx nê. Jakamâ kot paj mê kâm amnhî to amnhîrit nhûm te mê kot no ho ixpumunh pyrâk. Anê.

Nhûm pre â Jejus hkôt mê ixpa ho mê ixpa xwýnhjê mâ amnhî jarênh anê.

²² Hâmri nhûm Jutre hõja. Jut Kariot kêt axtem Jutre hõja Jejus axte kot mê inhmâ pix mâ kot amnhî to amnhîrit â harênhja ma nê kâm:

—Kwa aprî hâ mê inhmâ mêmoy jarê mê ijahkre xwýnh. Mon ka mê kêp akwý hkêt xwýnhjê mâ axte amnhî to amnhîrit kêt â amnhî jarê? Nê âm mê papxipix mâ amnhî to amnhîrit â amnhî jarê? Anê.

²³ Hâmri nhûm kâm:

—Nâ mê amâ ixkînh xwýnhjaja na ka htem ixkapêr ma nê hkôt amnhî nhîpêx. Nhûm Inhîpêxâ ja hâ mê apumu nê ixtâ kâm mê ajapê htýx nê. Hâmri pa wa mê akôt ixpa ho ixpa. Jao mê amâ amnhî to amnhîrit mex o ixpa.

²⁴ Na pa hte amnhî krâ hkôt ri mê kâm ixkapêr o ixpa hkêt nê. Âm Inhîpêxâ nhý hâ na pa hte mê kâm ixkapêr o ri ixpa. Kot mê awýr inhmênh xwýnhnta nhý hâ. Tâ nhûm mê kâm inhmar prâm kêt jakamâ na pa hte wa mê kâm mê apyrâ nê amnhî to amnhîrit o ixpa hkêt nê.

²⁵ —E na pa kormâ ixte mê akôt ri ixpa ri â mê amâ amnhî jarênh anê.

²⁶ Tâ koja Inhîpêxâ ixpânhâ mê awýr wa Ixkarô rê. Ixte hâ mê amâ ixâhwýr xâ hkôt. Hâmri nhûm man mê awýr wrý nê mê akaxwýnh mâ agjê nê mê akôt ri tanhmâ mê ato ajuta hto ho pa. Nê ra ixte â mê amâ ixkapêr anhýrja koja hprî hâ mê amâ ho amnhîrit mex nê. Ka mê amnhî krâ kamâ kâm ajamaxpêr nê hâ ano htýx nê ho apa. Anê.

Jejus kêp mê pajamakêtkati nhôr xwýnh Rô mân 5.1; Karatas 5.22; Piripos 4.7; Koro sê 3.15

²⁷ Nhûm Jejus arî mê inhmâ kapêr nê mê inhmâ:

—Nê mê kêp ixkwý hkêt xwýnhjaja na htem tee ri amnhî kukamâ hamaxpêr o ri pa. Jao hkaprî nê pa. No pa na pa hte mê kurom ijamakêtkati nê ixkînh nê ri ixpa ho ixpa. Tâ kot paj tanhmâ mê ato ka mê ixpyrà nê ajamakêtkati nê axâmnhîx akînh nê ri apa. Jakamâ kwa mê ixte amnhî jarênh ma nê tee

ri amnhî kukamâ ajamaxpêr o amâ ma ho ri apa hkêt nê.

²⁸ —Na pa pre ra mê amâ ma ixâpir nê nhýrmâ man akupýn mê awýr ixwryk â mê amâ amnhî jarê. Tâ na pa ra ma akupým Inhîpêxâ hwýr ixâpir mâ. Kot amnhî to rax o kot ijakrenh. Kot paj akupým hwýr api nê kuri inhmex nê ixpa ho ixpa. Tâ ka mê amâ ixkînh hâ kot kaj mê ma akupým hwýr ixâpir â ijarênh ma nê inhý hâ akînh nê.

²⁹ —Kormâ ma akupým ixâpir kêt ri na pa â mê amâ amnhî kukamâ amnhî jarênh anê. Kêr pa mêmoy arîgro hâ ma akupým api ka mê ja hâ ixpumu nê ajamaxpêr o: “Nâ âm hâmri na pre mê inhmâ amnhî kukamâ akupým Hipêxâ hwýr âpir â amnhî jarê.” Anhýr o ajamaxpêr. Jao ixkôt ajamaxpêr týx râhâ ho ri apa.

³⁰ —Kot paj tokyx axte tanhmâ mê amâ ixkapêr to hkêt nê. Mê kêp ixkwý hkêt xwýnhjê nhô pahihti Satanastija na ra kot tanhmâ ixto kaxyw. Nom koja tee ri tanhmâ kâm ixto hprâm kapry. Kurom ixihtýx o ixihtýx o ixte hakrenh par jakamâ koja tanhmâ ixto hkêt nê.

³¹ Kwâr kâm tanhmâ ixto hprâm xâ hkôt tanhmâ ixto pa omu. Inhmâ Inhîpêxâ hkôt ixte amnhî nhîpêx prâm jakamâ kot paj jahti mâ arî xa nhûm te tanhmâ kot ixto pyrâk o inhîpêx nom tanhmâ ixto hkêt nê. Mê ate inhmâ Inhîpêxâ japê htýx â ixpumunh kaxyw kot paj â mê anoo mâ amnhî nhîpêx anê. Nê mê ate ixte kâm tanhmâ amnhî nhîpêx to ho ri ixpa râhâ mê kot ipxîr â ixpumunh kaxyw. E hâmri. Ma pu mê mô nê amnhî to Tirtûm wý. Anê.

Nhûm pre â Jejus hkôt mê ixpa ho mê ixpa xwýnhjê mâ kapêr anê. Pa mê kuma nê kânhmâ ixkuhê nê inhnojarêt nhûm axte mê inhmâ awjarê.

15

Jejus te kêp mêmoy krô pyrâk Karatas 2.20; Wam Juāw 2.28

¹ Nhûm Jejus arî mê inhmâ kapêr nê mê inhmâ:

—Nâ te ixpê mêmoy pî pê “uwa” anhýr xwýnhnta kahkô maati pyrâk. Nê Inhîpêxâja te kot uwa hkre nê hamâr o pa xwýnhnta pyrâk.

² Nê mê kot ixkôt amnhî xunhwýr xwýnhjaja te mê kot uwa kahkô rûm krô pyrâk. Na hte mê hkwyjaja htýx ri kêp ixkwý hâ amnhî jarênh â amnhî to hêx. Jao te kot krôja râ htâ ô hkêt pyrâk. Koja râ htâ ô hkêt nê nhûm kot hamâr xwýnhjaja tee ri omu nê kahkô nê krâhta nê kumê. No koja ô mex nê nhûm omu nê hkînh nê. Hâmri nê râ nê ô rax kaxyw tanhmâ ho mex to. Tâ na hte Tirtûm uwa krô jamâr xwýnhnta pyrà nê â mê ate ixkôt amnhî xunhwýr xwýnhjê nhîpêx anê.

³No mē kajaja na ka prem mē kot ixkwý hā amnhī to hēx xwýnhjē rom ixkapēr mar týx nē. Nē amnhī kaxyw inhmā ajamaxpēr nē ixkót amnhī nhīpēx mex o apa. Jao te mē ate krō rā nē ô rūnh pyrāk o amnhī nhīpēx.

⁴—Na hte krōja amnhī krā hkót ô hkēt nē. Ām kahkō pix kukwak ri na hte rā nē ô. Ja pyrā nē kot kaj mē ixkukwak ri pix mā inhmā hprām xā hkót ri tanhmā amnhī nhīpēx to ho apa. Jakamā kwa kēr ka mē ixkapēr pix mǎn mar o apa pa mē akót ixpa ho ixpa.

⁵Te ixpē kahkō nhūm te mē apē krō pyrāk jakamā kot kaj mē inhmā hprām xā hkót tanhmā amnhī nhīpēx to ho ri apa nē te krō rā nē ô rūnh pyrāk o amnhī nhīpēx. No kot kaj mē amnhī krā hkót ri amnhī nhīpēx o ri apa nē te krō grā nē ô hkēt pyrāk o amnhī nhīpēx.

⁶Na hte uwa krō nhō dōnja nhýri hā krō grā pumu hāmri nē kahkō nē hakā nē ma o mra nē kuwy kamā kurē nē ho hxēt pa. Ja pyrā nē mē kot htýx ri ixkót amnhī xunhwýr ā amnhī jarēnh xwýnhjaja koja mē nhýrmā amnhī xā htýx kamā hamak rāhā ho pa.

⁷—Tā no mē kajaja. Kēr ka mē ixkapēr kót pix mā amnhī nhīpēx rāhā ho ri apa. Te mē pahtipxi nē ri papa pyrāk o amnhī nhīpēx. Hāmri nē māmri amā hprām xā hkót mēmoj tā Tirtūm wý nhūm ama nē amā mēmoj tā ate hwýr xāta kót kugō.

⁸Kot kaj mē Inhīpēxā mē wa ixkapēr kót amnhī nhīpēx o ri apa nhūm mē piitā ja hā mē apumu nē hamaxpēr o: “Hēxta waa nē. Jajaja na htem Tirtūm kot amnhī nhīpēx o amnhī nhīpēx o pa. Mǎn Tirtūmja mex o mex.” Anhýr o hamaxpēr.

⁹—Nē na pa hte Inhīpēxā kām ijapē pyrāk o inhmā mē ajapē nē. Tā kēr ka mē amarī inhmā mē ajapē hā ri ixkót amnhī nhīpēx mex o apa.

¹⁰Na pa hte ām Inhīpēxā kapēr kót pix mā ri amnhī nhīpēx o ri ixpa. Jakamā na pa hte kām ijapē hā ixkīnh nē ri ixpa. Tā kēr ka mē ixpyrā nē ixkapēr kót pix mā tanhmā amnhī nhīpēx to ho ri apa. Nē ixpyrā nē inhmā mē ajapē hā amnhī pumu nē akīnh nē ri apa.

¹¹—E na pa ā mē amā ixkapēr anē. Mē ate inhmar nē ixpyrā nē axāmnhīx ajamakētkati nē akīnh nē ri apa kaxyw. Tā kēr ka mē ā amnhī nhīpēx anē nē te pa ixte ā amnhī nhīpēx anhýr pyrāk. Anē.

Jejus kot mē pamā axpēn kīnh týx ā mē pamā karō

¹²Nhūm Jejus arī mē inhmā kapēr nē mē inhmā:

—E kēr ka mē te inhmā mē ajapē pyrāk o mē amā axpēn japē ho mē amā axpēn kīnh o ri apa. Jao axpēn to mex o ri axpēn kót apa.

¹³Koja mēhō kām hkrāmnhwý japē htýx nē nhūm ra mēhō mēmo mýrapē kot kēp hpri mā nhūm tee ri hā omu nē nē kām amnhī mē nhūm kupī. Hāmri nhūm mē ja hā omu nē kām hkrāmnhwý japē htýx ā nē htyk ā axpēn mā harē.

¹⁴⁻¹⁵—E kot paj axte mē apē inhmā mē axapēnh xwýnh ā mē ajarēnh kēt nē. Na hte mē ô patrāwjaja hpri hā kām mē apēnh xwýnhjē mā amnhī jarēnh kēt nē. Na htem ām mē apēnh pix ā mē kurē. Nom mē kajaja mē ate ixkapēr mar nē hkót pix mā amnhī nhīpēx jakamā kot paj hpānhā mē apē ixkrāmnhwý hā mē ajarē. Na htem axpēn to hkrāmnhwý nē ma nhýhým pa kaxyw nē tanhmā amnhī kukamā hkrāmnhwý mā amnhī jarēnh to. Tā mē apē ixkrāmnhwý jakamā na pa hte ā amnhī kukamā mē amā amnhī jarēnh anē. Nom ja pix jarēnh kēt nē. Na pa hte mǎānēn Inhīpēxā xō ri mē amā mēmoj piitā ho amnhīrit o mē akót ixpa.

¹⁶—Nē mē kajaja na ka prem ixpē mē akrāmnhwý kaxyw ixām kēt nē. Pa na pa pre amnhī kaxyw inhmā mē aprām. Ixkapēr kót pix mā ri mē ate tanhmā amnhī nhīpēx to ho apa kaxyw. Te uwa krō ô rūnh nē aa grā hkēeta pyrāk. Jakamā kot kaj mē mēmoj tā Inhīpēxā wý nhūm mē ama nē mē ate mēmoj tā hwýr xā hkót amā kugō.

¹⁷—E. Kwa kēr ka mē amā axpēn kīnh nē tanhmā axpēn to ajuta hto ho axpēn mā mēmoj kutā anojarēt pix o mǎn kēt ri apa. Nā ja na kēt inhmā hprām. Anē.

Mē kot Jejus kwýjē kamā gryk xwýnhjē jarēnh

Matēwre 10.22; mǎānēn Juāw 7.7, 17.14; Wam Juāw 3.13

¹⁸—Nē koja ixkwý hkēt xwýnhjaja kām mē aprām nōkati. Tā kēr ka mē amnhī tā mē omu nē tee ri amnhī kukamā ajamaxpēr kēt nē. Ixkumrēx na prem kām ixprām nōkati. Tā koja mē mā ixtā mē ato anē nē kām mē aprām kēt nē.

¹⁹Mē apē mē hkwy ronhýx mē amnhī tā mē apumu nē kām mē ajapē nē. Nom apē mē hkwy hkēt. Ra ixte amnhī kaxyw mē arēnh jakamā na htem tee ixtā mē apumu nē kām mē akīnh kēt o kām mē akurē nē.

²⁰Koja mē ixtā hpijaam kēt nē nē mǎānēn mē atā hpijaam kēt nē. Nē mē anhīpēx o te mē kot pa ixpē mē anhō patrāw nhīpēx pyrāk. Ka mē ixpyrā nē amnhī xā htýx kām ajamak o ri apa. Na pa pre ra mē amā ja jarē. Nom koja mē akwýjaja japē rom te ra mē kot ixkapēr mar nē hkót amnhī nhīpēxta pyrā nē mǎānēn mē akapēr ma nē hkót amnhī nhīpēx o pa. Kwa kēr ka mē ixkapērja mā mǎn ajamaxpēr týx rāhā ho ri apa.

²¹—Koja mē ixtā tanhmā mē anhīpēx to. Mē kot Tirtūm kapēr kót amnhī nhīpēx kēt jakamā koja mē ā ixtā mē anhīpēx anē.

Tirtūm kot mē awýr inhmēnh kôt hamaxpēr kêt nē ā mē anhīpēx anē.

²² Ixwryk nē mē kām Tirtūm kapēr jarēnh o ri i xpa htā nhūm mē inhma nē ām inhma nē ixkôt amnhī nhīpēx kêt nē. Jakamā koja mē kot amnhī tomnuj xwýnh ā amnhī to hpimxur kêt nē.

²³ –Nē koja mēhō kēp ixprām nōkati nē māānēn te kēp Inhīpēēxā prām nōkati pyrāk.

²⁴ Na pa pre mē piitā mē hkôt aa mē kot mēmoj pumunh kēt kwý ho anhýr o ri mē hkôt i xpa nhūm mē hā ixpumu. Ām papx- ipix na pa pre ā amnhī nhīpēx anhýr o ri mē hkôt i xpa nhūm mē hā ixpumu. Kēp ām mē kot ja hā ixpumunh kēt ronhýx prem axpēn mā ijarēnh o: “Tk. Mē pahte mēhōja nhýhýnh mē pahwýr hpōx ā omunhre hā kot puj kēt mē ri hā pahpijaām o ri papa.” Anhýr o nhýx prem axpēn mā ijarē. Tā ra mē kot ja hā ixpumunh mex tā axtem nē Inhīpēēxā mē wa mē kām wa ixkurē nē. Jao mē kot amnhī tomnuj xwýnh ā amnhī to hpimxur kêt nē.

²⁵ No Tirtūm kapēr ā kagā htūm kot mē hkukamā mē harēnh nē mē hā kagā nē kot mē hā kagā kot:

Mēmo tanhmā kute mýrapē na htem kām ixkurē? Nā ām amarī na htem kām ixkurē ho pa. Anē.

Tā ā ixtā kagā kot anhýr xā hkôt na htem ā kām ixkurē anē. Jakamā koja mē māānēn ixtā kām mē akurē nē. Nom kēr ka mē arī mē kām ixkapēr jarēnh o ri mē hkôt apa nē tee ri amnhī kukamā ajamaxpēr kêt nē.

²⁶ –Nē tokyx ma akupým Inhīpēēxā hwýr ixāpir mā tā kot paj hwýr pōj nē aa mē ato ijamakētcati hkēt nē. Kot paj amnhī pānhā mē awýr wa Ixkarō rē. Mē kot kām: “Mē kutā nojarēt xwýnh maati” anhýr xwýnhhta kot paj mē awýr kurē nhūm ixpānhā mē awýr wrý nē mē amā agjē nē hprī hā mē amā Tirtūm mē wa ixto amnhīrīt o ri mē akôt pa.

²⁷ Kot kaj mē ama hāmri nē ma mē piitā mē hkôt ri mē kām ixkapēr jarēnh o ri apa. Na pa pre ra mē kām Tirtūm kapēr jarēnhryy ho mē hkôt ri i xpa ka mē ixkôt ri inhmar o apa ry nē. Jakamā kēr ka mē ixwakre kamā arī mē kām ixkapēr jarēnh o ri mē hkôt ri apa. Anē.

16

¹ Nhūm Jejus arī mē inhmā kapēr nē mē inhmā:

–Nē mē kot nhýrmā ixtā tanhmā mē anhīpēx to nhūm mē ate tee ri amnhī kukamā ajamaxpēr nē mē umaj ixkaga py- maj na pa hte ā mē amā ixprī hā mēmoj jarēnh ry anē.

² Kot kaj mē kām ixkapēr jarēnh o ri apa nhūm mē hkwjýjaja tee ri mē ama nhūm ja mē kēp omnuj nē. Nhūm mē Tirtūm kapēr

o mē ahkre xā hā ixkreja rūm amnhī nē mē ajano nē mē akwjýjē hpar o pa. Hāmri nē hamaxpēr o: “E pu mē axte mē hkwjýjē pynē nē mē kupa. Tirtūm kām ja mex kēnā.” Anhýr o htýx hamaxpēr o pa.

³ Mē kot hprī hā Inhīpēēxā mē wa ixkapēr mar mex kêt nē ā htýx wa inhmā ja mex ā wa ijarēnh anē.

⁴ Nom mē ate ixkôt amnhī xunhwýrta krax kām na pa pre ā mē amā mē harēnh anhýr kêt nē. Arī mē akôt i xpa kēnā. Kot ka mē ixkôt apa rāhā amā mē uma hkēt nē. Tā pa ra akupým inhnojarēt nē ā mē amā mē harēnh anē. Jakamā koja mē nhýrmā ā mē anhīpēx anē ka mē amnhī tā mē omu nē ra ixte mē akukamā ā mē harēnh anhýrja mā ajamaxpēr kurē kumrēx nē tee ri amnhī kukamā ajamaxpēr kêt nē. E kwa ixkapērja mān mē amnhī krā him haxār týx nē ri hā apa. Anē.

Jejus mē Tirtūm wa hkarō jarēnh

⁵⁻⁶ Nhūm Jejus arī mē inhmā kapēr nē mē inhmā:

–E na pa ra kot mē awýr inhmēnh xwýnhhta wýr ra akupým inhnojarēt ka mē ixte amnhī jarēnh ā inhma nē akapri nē. Nē tee ri amnhī kukamā ajamaxpēr tā mē atō aprī hā ma inhmōr xā ā ixkukjēr kêt nē. Rý inhmā: “Kwa mo kaxyw kot kaj kêt mē ixre nē ma akupým mō? Xā we ja amā mex?” Anhýr o mē atō ixkukjēr kêt nē.

⁷ Kēt ma akupým ixāpirja mē amā mex kumrēx. Kop ām akupým ixāpir kēt ronhýx mē amā mēmoj kutā nojarēt xwýnhhta ixpānhā mē awýr wrýk kêt nē. Tā kot paj ma akupým api nē amnhī pānhā mē awýr kurē. Jakamā kwa mē ja ma nē tām ajamaxpēr o ri apa.

⁸ Koja ixpānhā mē awýr wrý hāmri nē mē kēp ixkwý hkēt xwýnhjē mā mēmoj to axkrunēpxi nē ho amnhīrīt. Koja mē kām mē kot tanhmā amnhī tomnuj to xā ho amnhīrīt. Nē māānēn mē kām tanhmā mē kot amnhī to mex to xā ho amnhīrīt. Nē māānēn Tirtūm kot nhýrmā mē kot amnhī tomnuj mýrapē tanhmā mē homnuj to xāta nhūm māānēn mē kām ho amnhīrīt. Koja mē kām ja piitā ho amnhīrīt.

⁹ –Jakamā koja mē ja kukamā tanhmā hamaxpēr to nē hamaxpēr o: “Kwa kot paj xep amnhī tomnuj kaga nē amnhī kaxyw Tirtūm Kra Jejus mā ijamaxpēr nē hkôt amnhī xām kēt nhūm Tirtūm nhýrmā ixte amnhī tomnuj mýrapē tanhmā ixto.

¹⁰ Nā kot paj hkôt amnhī xām hāmri nē ra urāk nē Tirtūm kapēr kôt tām ri amnhī nhīpēx o i xpa. Na pre Jejus tām ri amnhī nhīpēx o pa nhūm Tirtūm amnhī wýr ho api pa mē axte jar nhýri omunh kêt nē.

¹¹ Na xep Tirtūm nhýrmā kot ma kuwy hwýr mē kēp Jejus kwý hkēt xwýnhjē nhō

pahi maatija mēnh ā ra amnhī kukamā hā amnhī jarē. Jakamā kwa arī ixpē hkwy jakamā kot paj tokyx Jejus kōt amnhī xām kēt nhūm hkōt kuwy hwyr inhmē.” Anhūr o hamaxpēr. Kōja ā wa Ixkarōja mē kēp ixkwū hkēt xwŷnhjē mā mēmoj to amnhūrīt mex anē.

¹² —Nē na pa kormā mē amā mēmoj piitā ho amnhūrīt kēt nē. Kormā mē ate aprī hā mēmoj pununh nē mar mā tām kēt.

¹³ Tā kōja ixpānhā wa Ixkarō mē awūr wrŷ nē mē akarō mā agjē hāmri nē hprī hā mē amā Tirtūm kot amnhī nhīpēx o amnhūrīt o mē akōt pa ho pa. Nom kōja amnhī krā hkōt tanhmā mē amā ho amnhūrīt to hkēt nē. Kōja ām Tirtūm pix xō ri mē amā ho amnhūrīt o mē akōt pa. Jao hprī hā mē amā ixkōt mē ate amnhī nhīpēx nyw o mē amā amnhūrīt o mē akōt pa. Ā kōja hprī hā ra ixte mē amā ixujarēnh xā hkōt axte mē amā mēmoj to amnhūrīt mex o pa anē.

¹⁴ —Nē kōja hprī hā mē amā pa ixto amnhūrīt o pa. Jao mē amā inhmex o inhmex ā ixto amnhūrīt o mē akōt pa.

¹⁵ Inhīpēxā mē wa ixkapērja ām htīpxi. Tā kōja wa Ixkarō ixkapēr xō ri ā mē amā mēmoj to amnhūrīt anē. Jao ra wa ijamē wa ixkapēr o amnhūrīt mex o pa. Kōja ā wa mē apē ixkwū hā mē ato mex o pa anē. Anē.

Mē kot akupŷm Jejus tūr ā omunh ā mē harēnh

¹⁶ Nhūm Jejus arī mē inhmā kapēr nē mē inhmā:

—Nē kot paj tokyx mē ano pē akunok ka mē axte amnhī kaēx ā ixpumunh kēt nē. Nom kwa kēr ka mē tee ri ixkapērja kukamā ajamaxpēr kēt nē. Kot paj ixtā apkati grēre ka mē axte ixpumu. Anē.

¹⁷⁻¹⁸ Nhūm pre ā Jejus hkōt mē ixpa ho mē ixpa xwŷnhjē mā kapēr anē. Pa mē tee ri ā kapēr anhūr ā kuma nē xspēn mā:

—Kwa mo na ri ā amnhī jarēnh anē? Nē tokyx mē pano pē pikunor tā hā apkati grēre nhūm axte mē pahte omunh ā amnhī jarē nē akupŷm Hīpēxā hwyr āpir ā amnhī jarē. Pēr kapērja ām ri katii. Anē.

¹⁹ Nhūm amnhī tā mē inhma nē mē inhmā:

—Kwa xā na ka mē kormā aprī hā ixkapēr ā inhmar kēt nē?

²⁰ Kot paj ty nhūm mē kēp ixkwū hkēt xwŷnhjaja ijarēnh ma nē hkīnh nē. No mē kajaja kot kaj mē akapri nē amūr o apa. Nē gaa nē akupŷm akīnh nē. Kwa mē ixkapērja ma nē kām ajamaxpēr tŷx o apa.

²¹ Te mē ate mē hpīagri xwŷnh kot amnhī nhīpēx pyrāk. Na htem ōhy xā nē gaa nē ra ōhy xā htŷx nē. Nē hkīnh kēt nē tee ri amnhī nhīpēx o hikwŷ. Tā gaa nē hpīagri nhūm hkrare kato nhūm omu nē akupŷm hkīnh nē axte ōhy xā htŷx mā hamaxpēr kēt nē.

²² Tā ā mē ate amnhī nhīpēx anhūr kaxyw. Kot kaj mē akīnh kēt nē ri apa. Tā kot paj akupŷm tokyx ixtūr nē axte mē awūr ixkato ka mē ixpumu nē akīnh nē. Hāmri nē akīnh rāhā ri apa ho apa. Nhūm mēhō mē apumu nē tee ri tanhmā mē akīnh nē mē ato kaprŷ ka mē arī akīnh rāhā ri apa ho apa.

²³ —Nē ixte akupŷm kaxkwa hwyr ixāpir nē amnhī pānhā mē awūr wa Ixkarō rēnh nhūm mē awūr wrŷk nē hprī hā mē amā mēmoj piitā ho amnhūrīt jakamā kot kaj mē axte amā mēmoj tā ixkukjēr prām kēt nē. Anē.

Jejus kwŷyaja kot āmnhx mēmoj tā Tirtūm wŷr

Matēwre 18.19-20; Juāw 14.13-14

Nhūm Jejus arī mē inhmā kapēr nē mē inhmā:

—E kwa mē ā ixkapēr anhūrja ma nē amnhī krā kamā kām ajamaxpēr tŷx nē ho apa. Kot kaj mē apē ixkwū hā mēmoj tā Inhīpēxā wŷ nhūm mē ama nē mē ate hā axāhwŷr xā hkōt mē amā mēmoj tanhmā ho rŷ mē amā mēmoj gō.

²⁴ Na ka mē kormā apē ixkwū hā mēmoj tā axāhwŷr kēt nē. Tā kēr ka mē amā mēmoj tā hwŷr prām nē māmri mēmoj tā hwŷr o apa. Kē mē ama hāmri nē tanhmā mē amā mēmoj nhīpēx to ka mē amnhī tā omu nē akīnh nē.

²⁵ —Nē na pa pre mē amā mēmoj jarēnh kaxyw nē mēmoj tā haxwŷr nē mē amā ixujarēnh rax nē. Nom kot paj axte ā mē amā ri ixujarēnh anhūr kēt nē. Kot paj tā ixprī hā mē amā tanhmā Inhīpēxā jarēnh to ka mē aprī hā mar mex kurē kumrēx.

²⁶ Hāmri nē mē kamjaja mē apē ixkwū hā tanhmā amnhī to hwŷr to ho apa. Jakamā mo kaxyw kot pa kēt axte tanhmā mē ato hwŷr to? Kot kaj mē kamjaja amnhī to hwŷr jakamā arī ixte mē ato hwŷr kaxyw ixto presija hkēt nē.

²⁷ —Na ka mē ra amā ijpapē nē. Nē ixte Inhīpēxā rūm mē awūr ixwrŷk ā ixpumu. Jakamā nhūm Inhīpēxāja ixtā māāniēn kām mē ajapē nē. Tā kot kaj mē kamjaja mēmoj tā amnhī to hwŷr o apa nhūm mē ama nē kām mē ajapē htŷx kām mē amā mēmoj gō.

²⁸ —Na pa pre Inhīpēxā rūm amnē mē awūr wrŷ. Hāmri nē kām hprām xā hkōt tanhmā amnhī nhīpēx to hpar o mō nē ra akupŷm hwŷr inhnojarēt kaxyw. Anē.

Nhūm pre ā Jejus mē inhmā amnhī jarēnh anē.

²⁹ Pa mē tā ixprī hā mar mex nē. Hāmri nē kām:

—Tŷ. Nā na pa mē tā ixprī hā ate amnhī jarēnh ma. Ka amnhī tā haxwŷr nē axujarēnh kēt jakamā pa mē tā ixprī hā amar mex nē.

³⁰ Pēr ām ate mēmoj piitā omunh par xwŷnh na ka. Jakamā ate mē ijamaxpēr

piitã hkôt aprî hã mê ixpumunh par kumrêx kênã kot ka tanhmã mê ijumaxpêr to hã mê ixkukja. Âm hãmri na ka Tirtûm rûm awrÿk â amnhî jarê. Anê.

³¹ Hãmri nhûm mê inhma nê mê inhmã:
—Xã ãm hãmri na ka mê ixkôt ajumaxpêr tÿx nê?

³² Kwa mê o kora. Kot kaj mê tokyx mê umaj ixre nê anhrã nê ma ahpÿnhã mê anhõ krî hwÿr mra. Mê kot ixkôt tanhmã mê anhîmex to pymaj kot kaj mê â amnhî nhîpêx anê kãm ga. Kot paj ahte mê kãm ixãm pyrãk o amnhî nhîpêx nom ahte ixãm kêt nê. Inhîpêxã aa kot ixrere hã.

³³ —E ixkukwak ri mê ajamakêtkati nê axãmnhîx mê apa kaxyw na pa ã mê amã ixkapêr anê. Nom mê kêp ixkwÿ hkêt xwÿnhjaja koja nhÿrmã ixtã mê atomnuj tÿx o pa. Tã kêr ka mê amã mê uma nê tee ri amnhî kukamã ajumaxpêr o ri apa hkêt nê. Nhÿrmã ixte mêmoj punuj piitã ho ijapêx par ã arîgrota ã kot paj mê atã mê ho ijapêx par kumrêx. Anê.

17

Jejus kot amnhî to Tirtûm wÿr ã harênh Rômãn 8.34; Eprêw 7.25

¹ Tã nhûm Jejus mê inhmã kapêr pa nê hpãnhã kaxkwa hwÿr rît nê Tirtûm mã amnhî jarê nê kãm:

“Pa Papaj. E na pa ra amã hprãm xã hkôt tanhmã amã amnhî nhîpêx to hpar o mô nê akupÿm awÿr inhnojarê kaxyw. Jakamã kot kaj ixpê Akra hã ma akupÿm amnhî wÿr ixto api. Mê kot ja hã ixpumunh nê amã amex o amex ã ajarênh o pa kaxyw.

² Na ra pyka piitã hkôt ri mê pa xwÿnh kwÿjaja amnhî kaxyw ixkôt hamaxpêr nê ixkôt amnhî xunhwy nom ka na ka pre inhmã mê agõ. Ixte mê htîr tûm nê mê pa mã xwÿnh ã mê harênh kaxyw. Jakamã koja mê nhÿrmã ixkukwak ri pakuri htîr tûm nê pa ho pa.

³ Na mê ra ixkapêr mar mex nê. Nê ixpê Jejus Kris pê ate mê hwÿr inhmênh xwÿnhja kôt hamaxpêr mex nê. Nê apê Tirtûm ã ãm apyxi mex ã mãânêh akôt hamaxpêr mex nê. Nê amex o amex ã akôt hamaxpêr nê kãm akînh nê. Jakamã koja mê nhÿrmã pakuri htîr tûm nê pa ho pa. Nã koja mê anê.

⁴ Amnepêm amnê pyka ja hwÿr inhnojarê nhûm ate tanhmã ixte amnhî nhîpêx to hã inhmã karõta na pa ra hatur xãm mênh kaxyw. Na pa xatã mê kãm akapêr jarênh o ri mê hkôt ixpa. Jao ra mê kãm apê Pahi Maati hã apixi mex ã ajarê nê amex o amex nê axãhpumunh o axãhpumunh ã mê kãm ajarênh o ri ixpa.

⁵ Jakamã e Papaj. Kêr ka tokyx ixpê akra hã ma akupÿm amnhî wÿr ixto api.

Pa akupÿm awÿr pøj nê te amnepêm akuri ixpaja pyrã nê axte akuri ixpa ho ixpa.” Anê.

Jejus kot hkwyjê ho Tirtûm wÿr ã harênh

Nhûm Jejus arî Tirtûm mã kapêr nê kãm:
⁶ “E Papaj. Nã ra ate pyka hkôt inhmã mê òr xwÿnhjaja na pa ra mê kãm akapêr jarênh rÿy ho ri mê hkôt ixpa nhûm mê akapêr kôt pix mã amnhî nhîpêx o pa.

⁷ Tã ixte anhÿ hã tanhmã amnhî nhîpêx to ho ri ixpaja ra mê kot ja hã ixpumunh mex.

⁸ Na pa pre hte axõ ri mê ahkre ho ri ixpa nhûm mê amnhî kaxyw ixkôt hamaxpêr mex nê. Nê ate mê hwÿr inhmênh nhûm mê hwÿr ixwrÿkja ã mê kot ixpumunh mex.

⁹⁻¹⁰ Tã ot pa mê ho awÿr o xa. Nom na pa mê kêp ixkwÿ hkêt xwÿnhjê ho awÿr kêt nê. Âm ate inhmã mê òr xwÿnhjê pix o na pa awÿ. Mê kêp akra jakamã mãânêh mê kêp ixkraa. Jakamã na htem pamã pamex o pamex ã pajarênh o ri pa.

¹¹ Axihitÿx o axihitÿx jakamã na ka pre amnhî xwar inhmã axihitÿx xã hkwy gõ pa te ixte axihitÿx pyrãk. Tã na pa ra akupÿm awÿr inhnojarê kaxyw. Kot paj jar pyka hkôt ri ixpa ry hkêt nê. Nom ixkwÿjaja koja mê arî kamã pa jakamã kwa Papaj. Kêr ka inhmã mê omunh mex nê kê mê inhÿ hã tãm ri amnhî nhîpêx o pa. Nê pahpyrã nê te ixkre tipxi kamã mê htixpi nê mê pa pyrãk o axpên kôt pa.

¹² Kormã mê kamã ixpata ã ate inhmã axihitÿx xã hkwy nhõrta o pa mê htãnopxar mex o ri mê hkôt ixpa. Jakamã nhûm mê ri ixkôt amnhî nhîpêx o pa. Âm Jut Kariot pix koja mê hkînhã tanhmã amnhî tomnuj to nê hapêx. No ãm ra akapêr ã kaga kot hukamak ã kot amnhî nhîpêx anhÿr ã harênh xãja kôt koja ã amnhî nhîpêx anê nê hapêx.

¹³ Tã na pa ra akupÿm awÿr inhnojarê kaxyw jakamã na pa ixte tokyx mê rer mã xwÿnhjê ho awÿr o xa. Kormã mê hkôt ri ixpa ri. Mê kot inhmar nê ixpyrã nê hkînh nê hamakêtkati nê ri pa kaxyw.

¹⁴ Na pa pre ra mê kãm akapêr jarênh ry nê nhûm mê ixpyrã nê akôt pix mã amnhî nhîpêx o ri pa. Jakamã nhûm hte mê kêp ixkwÿ hkêt xwÿnhjaja tee ri ja hã mê omu nê axtem nê kãm mê hkurê nê. Nom mê kêp mê hkwy hkêt jakamã na htem ã mê kamã gryk anê.

¹⁵ Tã na pa ã mê ho awÿr anhÿr o xa. Nom mê kot amnhî tomnuj xwÿnhjê hkãx ã mê pa kaxyw na pa mê ho awÿr kêt nê. Kojã mê arî mê hkôt ri pa. Nom mê urãk nê amnhî tomnuj o pa pumaj na pa ã mê ho awÿr anê.

¹⁶ Mē kēp mē hwýr hkēt. Axtem mē kot amnhī nhīpēx. Te mē kot mē pahte amnhī nhīpēx pyrāk jakamā kē mē amarī mē hkōt pa htā mē kot amnhī nhīpēx kōt amnhī nhīpēx o pa hkēt nē. Ām pahkōt pix mā amnhī nhīpēx o pa.

¹⁷ Akapēr pix na mex o mex jakamā koja mē hkōt amnhī nhīpēx o pa nē gaa nē te pahte amnhī nhīpēx pyrāk o amnhī nhīpēx.

¹⁸ Na ka pre amnē mē hwýr inhmē pa pre ixte mē kām akapēr jarēnh o ri ixpa kaxyw mē hwýr wrý. Nē amnhī pyrā nē mē kot akapēr jarēnh o mē hkōt pa kaxyw pa mē kurē nē ma mē hwýr mē kurē.

¹⁹ Inhmā mē hapē jakamā kot paj amnhī grōnh kōt nhām mē kot axpēn mā ri inhgrōnh o pa xwýnhjē mā amnhī gō. Amā hprām xā hkōt. Ixkwýjaja kot ja hā ixpumunh nē ixpyrā nē amā hprām xā hkōt pix mā tanhmā amnhī nhīpēx to ho pa kaxyw.” Anē.

Jejus kot hkrajé piitā ho Tirtūm wýr

²⁰ Nhūm Jejus arī Tirtūm mā amnhī jarē nē kām:

“Tā na pa ā jajé ho awýr anē Papaj. Nom ixkōt mē pa ho mē pa xwýnhjē pix o na pa awýr kēt nē. Māānēn mē ô ri nhýrmā mē kot ixkōt amnhī xunhwýr mā xwýnhjaja na pa mē ho ixpimrāā tā mē ho awýr.

²¹ Kē mē pahpyrā nē te hamaxpēr tipxi pyrā nē ri axpēn to pa. Nē pahte amnhī nhīpēx kōt pix mā amnhī nhīpēx o pa. Koja mē ā amnhī nhīpēx anhýr o pa nhūm mē kēp pahkwý hkēt xwýnhjaja pahā mē omu nē ate mē hwýr inhmēnh ā apumunh kurē kumrēx.

²² Nē koja mē ixkukwak ri panhý hā te pahpyrā nē hamaxpēr tipxi nē ri pa pyrāk o amnhī nhīpēx o pa.

²³ Na pa htem te ixkre tipxi kamā mē ixtipxi pyrāk o axpēn nhīpēx o ri ixpa. Te pahte axpēn nhīpēxta pyrāk. Tā koja mē ixwakre kamā ā axpēn nhīpēx anhýr o pa nhūm mē kēp pahkwý hkēt xwýnhjaja ja hā mē omu nē hamaxpēr o: ‘Nā pēr ām hāmri na pre Tirtūm tām mē pahwýr Jejus mē. Kām hapē htýx tā mē pahwýr kumē nhūm wrý nē amnhī xwar kām hkwyjé japē nē.’ Anhýr o koja axpēn mā pajarēnh o pa.

²⁴ Amnepēm amrakati ri pa pre amā ijapē hā ri ixpa. Tā ot pa jajé ho awý. Ka na ka pre inhmā mē agō. Tā ma awýr inhmōr mā xāta wýr na pa inhmā mē āpir prām nē. Koja mē nhýrmā ma pahwýr api pu mē pahpiitā pahpimrāātā pamā axpēn japē hā ri papa ho papa.

²⁵ E Papaj. Amex o amex tā mē kēp ixkwý hkēt xwýnhjaja na kormā ate mē hwýr inhmēnh xwýnh ā ixkōt hamaxpēr

kēt nē. Nom mē kot ixkōt amnhī xunhwýr xwýnhjaja na mē kurom ja hā ixkōt hamaxpēr mex nē.

²⁶ Na pa ra ixprī hā mē kām akapēr o amnhīrit o ri ixpa. Tā kot paj axte mē kām akapēr kwý jarē. Amā ijapēta pyrā nē mē kām axpēn kīnh ā axpēn to pa kaxyw na pa mē kām hā karō. Kot paj inhī hā mē hkōt ixpa hkēt tā koja Pahkarōja mē hwýr wrý nē mē hkarō mā agjē nē te pa mē hkōt ixpa pyrāk o mē hipēx. Ja na pa inhmā hprām. Tā koja anē. Jakamā na pa ā mē ho awýr anē. Tā ām ja pix Papaj.” Anē. Nhūm pre ā Jejus ō Papaj mā mē inhuo mā amnhī jarēnh anē pa mē ixpiitā hā kuma.

18

Mē kot Jejus pynēnh ā mē harēnh

Matēwre 26.47-56; Makre 14.43-50; Rukre 22.47-53

¹ Tā nhūm Jejus mē ixto Hipēxā hā hwýr pa. Hāmri nē ixkreja rūm ma tē nē Jerujarē rūm kato nē ma gō pé Kirō hwýr tē pa mē hkōt ixpa ho ixpa xwýnhjaja ma hkōt mra. Nē gō hā rē nē hīkjē hā mē kot mēmo pí hkō hkre xwýnhja wýr mra nē parpē ixkrī hpa.

² Na pre hte Jejus xatā hwýr amnhī kōt mē ixto pa ho kuhē. Jakamā nhūm Jut Kariot kot mē kām ōr mā xwýnhhta ra kot hwýr mē ixpa ho ixkuhē xāta pumunh mex.

³ Jakamā pa mē hwýr pōj nē ixkrī hpa nhūm mē mē ixwýr mra. Jut Kariot mē pōristijaja. Rōm nhō xwýnhjē nhō pōristijē mē patre nhō pōristijaja nhūm mē mē ixwýr Jut Kariot kōt mra. Ijaew nhō pahijē nhý hā mē ixwýr mra. Piitā wapohti jamý nē pō hpōk nē kané jamý nē mē ixwýr hpōk o kato.

⁴⁻⁵ Hāmri nhūm Jejus amnhī wýr mē omu nē kānhmā xa nē ma mē kutā tē. Jut Kariot kot mē kām ōr kaxyw nhūm amnhī tā omunh mex jakamā amnhī wýr mē omu nē ma mē kutā tē. Hāmri nē mē hkaxpa nē mē omunh o xa nhūm Jut Kariot mē kuri xa nhūm Jejus mē omu nē mē kām:

—Pa. Mēmoj japēr na ka mē pō hpōk o ri apa? Anē.

Hāmri nhūm mē kām:

—Nā Jejus pé Najare nhō xwýnh japēr o na pa mē ri ixpa. Anē.

Hāmri nhūm mē kām:

—Tý ot pa xa. Pa na ixpē Jejus. Anē.

⁶ Hāmri nhūm mē kuma nē tee ri axpēn pumu nē umaj katē ho axkamē nē kuhē. Nom katē ho pikamēnh o ra rōrōk pa nē hīkwý.

⁷ Hāmri nē kānhmā kuhē hpa nhūm Jejus axte mē kām:

—Kwa mē inhmā amnhī jarē. Mēhō japēr o na ka mē apa? Anē.

Hāmri nhūm mē kām:

—Jejus pê Najare nhô xwýnhnta japêr o na mē ri ixpa kēnā. Anē.

⁸ Hāmri nhūm mē kām:

—Kwa ra ixte mē amā amnhī jarēnh kēnā. Paa. Ijapêr o na ka mē ri apa. Jakamā kwa kêr ka mē ixkôt ri mē pa xwýnhntaja tanhmā mē ho hkêt nē. Kê mē māmri anhrà nē ma mra.

⁹ Anhýr o mē inhnē mē kām kapêr. Na pre ra ham Hipêxà mā mē ixtā kām amnhī jarē nē kām:

—Kormā mē kamā ixpa ri ate inhmā ixihýtʰ xà nhôrta o na pa mē htānopxar mex o ri mē hkôt ixpa.

Anhýr o mē ixtā kām amnhī jarēnh jakamā nhūm ā mē inhnē mē kot unēnh mā xwýnhjē mā kapêr anē.

Simāw Pêtre kot mēhō pê hamak krāhyr ā harēnh

Matêwre 26.51-54; Makre 14.47; Rukre 22.49-51

¹⁰ Hāmri nhūm Simāw Pêtre tee ri Jesus ā mē omu hāmri nē ō wapo kapa nē jam ho apē nē ho hamak nhīkjē krāhta. Mawti jamak krāhta. Mawtija mēō patre mā apēnh xwýnhjē hō na pre nhūm Simāw Pêtre hamak krāhta.

¹¹ Hāmri nhūm Jesus ja hā omu nē nē kām kapêr nē kām:

—Tk. Kwa nā amarī xa nē akupým awapota hkām haxā. Ixte mē anē amnhī xā htýx kamā ijamak kaxyw na pa pre Inhīpêxā rūm amnē mē awýr pika hwýr wrý. Kêt inhmā kām hprām xā hkôt pìx mā na inhmā tanhmā amnhī nhīpêx to ho ixpa hprām. Jakamā kwār mē māmri tanhmā kām ixto hprām xā hkôt māmri tanhmā ixto. Anē.

Mē kot Anas wýr Jesus o htēm ā mē harēnh

Matêwre 26.57-58; Makre 14.53-54; Rukre 22.54

¹² Tā nhūm pôristi mē mē hkrāhtūm nē mēō patre nhô pôristijaja Jesus pynē nē hpa hpre hpa

¹³ nē ma Anas wýr o tē. Anasja Kajpas piinhō na pre. Nhūm Kajpas kormā amgràja ā Anas pyrā nē kēp mēō patre maati.

¹⁴ Jakamā na pre ra Ijaew nhô pahijē mā Jesus jarēnh o:

—Nā kot puj mē Jesus pìr tokyx anē. Kê tapxipix ty pu mē arī mýrpê pahpiitā paja-makêtkati nē ri papa. Anē.

Jakamā nhūm mē Jesus pynē nē kormā ma patre maati hwýr o tē.

Simāw Pêtre kot Jesus kôt pa hkêt ā kot amnhī jarēnh

Matêwre 26.69-75; Makre 14.66-72; Rukre 22.54-62

¹⁵ Hāmri pa ixpê Juāw mē ixkrāmnhwý Simāw Pêtre mē pa wa ma mē hkôt wa tē.

Nhūm mē ra mē inhō patre maati nhôrkwý hwýr Jesus o axā. Nhūm patre maati kot ixpumpunh jakamā nhūm kām àpēnh xwýnhja ixpumu nē inhmā anē pa mē hkôt axā.

¹⁶ Nom nhūm Simāw Pêtre arī kapôt ā hakwa krem xa. Hāmri pa omu nē akupým hwýr tē nē mēhō niti kot hakwa kre jamār o ām xwýnhja mā anē nhūm kām kahē xā mē nhūm mē ixkôt axā.

¹⁷ Hāmri nhūm nita hprī hā omu nē kām: —Xê. Pêr apê mē kot unēnh nē o mōr mūj kôt ri mē pa xwýnhjē hō na ka mē? Anē.

Hāmri nhūm kuma nē kām:

—Tk. Nā ixte mēhō myti ata pumunhre hā. Anē.

¹⁸ Hāmri nhūm ra kôt ā kamāt nē ra kryy nē nhūm mē àpēnh xwýnh kwý mē mēō patre nhô pôristi hkwyjaja amnhī kuto nē hā ànhunh o kuhê. Nhūm Simāw Pêtre mē omu nē mē hwýr tē nē mē ihkô hā ànhunh o xa.

Patre maati kot Jesus kukjêr ā harēnh

Matêwre 26.59-66; Makre 14.55-64; Rukre 22.66-71

¹⁹ Rôm nhūm Anasja hêx rom tanhmā Jesus kukjêr to nē kām:

—E kwa inhmā amnhī jarē. Tanhmā na ka hte we akôt mē pa ho mē pa xwýnhjē jahkre hto ho apa wehe? Anē.

²⁰ Hāmri nhūm amnhī tā kām:

—Nā na pa hte mē piitā mē noo mā ri mē kām ixkapêr o ixpa. Tirtūm kapêr o mē ahkre xā hā ixkre kamā nē Tirtūm mā amnhī jarēnh xā hā ixkre kamā pa hte mē piitā mē noo mā ri mē kām tanhmā ixkapêr to ho ri ixpa. Na pa hte nhýri ixpimxur pê ri mē kām tanhmā ixkapêr to ho ri ixpa hkêt nē.

²¹ Tā ka ixtā mē kot inhmar o kuhê xwýnhjaja tanhmā ixtā mē hkukjêr to hkêt nē. Ām papxipix ri ixkukja. Kwa ixtā mē hkukja kê mē kot tanhmā ixkapêr mar to xā hkôt tanhmā amā ijarēnh to nā? Anē.

²² Hāmri nhūm patre nhô pôristi hōja kuma nē hwýr tē nē kām:

—Tk. Kwa na htem ā patre maati mā kapêr anhýr kêt nē. Na htem hā hpjaam o kām kapêr. Tā na ka axtem nē ri ā kām akapêr anē. Anē.

Hāmri nē hinep hkura.

²³ Hāmri nhūm Jesus amnhī tā omu nē kām:

—Kwa kot pa tanhmā mē amā amnhī to ixêx to ka mē hā inhma nē rī kormā tanhmā axpēn mā ixto akapêr to rý hā ixtak. Nom ām hāmri ixte mē amā amnhī jarēnh tā ka axtem nē ri inhīnep ixtak. Anē.

²⁴ Hāmri nhūm Anas tanhmā mar to hpa hāmri nē umre Kajpas wýr kumē. Na pre Kajpasja kormā hitom kām ri tanhmā amnhī nhīpêx to ho nhý nhūm Anas mē kām anē

nhūm mē kuma nē hwýr Jejus o tē nē ho axà. Arī hpa hpre rāhā hwýr o tē nē ho axà nhūm xa nē kām amnhī jarē.

Simāw Pêtre kot axte Jejus kôt pa hkêt ā amnhī tā aprār ā harēnh

Matēwre 26.71-75; Makre 14.69-72; Rukre 22.58-62

²⁵ Nhūm Simāw Pêtre arī mē ĩhkô hā ànhunh o xa nhūm mēhōja kām kapēr nē kām: –Kwa pēr apē Jejus kôt ri mē pa xwýnhjē hō na ka. Anē.

Hāmri nhūm kuma nē kām:

–Tk. Koký ixte mēhō nēj pumunhre hā. Anē.

²⁶ Hāmri nhūm hpānhā mēō patre maati mā àpēnh xwýnhja määnēn omu. Simāw Pêtre kot kēp hamak krāhyr xwýnhhta kwý na pre. Jakamā nhūm hprī hā omunh mex kurē kumrēx nē kām:

–Kwa na ka na ka mūtār pī hkôta kamā mē ĩhkô hā xa pa apumu. Anē.

²⁷ Hāmri nhūm tee ri kuma nē axte mē kām amnhī tā aprār kām hihtýx nē. Jao ra mē kām amnhī tā aprār o axkrunēpxija mē nhūm krāhyre hkār kurē kumrēx. Ra Jejus kot hkukamā harēnh xā hkôt kēp hkwý hkêt ā amnhī tā aprār o axkrunēpxi.

Jesus kot Pirat mā amnhī jarēnh

Matēwre 27.1-2, 27.11-31; Makre 15.1-20; Rukre 23.1-5, 23.13-25

²⁸ Hāmri nhūm mē ixpē Ijaew hkrāhtūmjaja ra Kajpas rūm Jejus o kato nē ma Pirat wýr o tē. Piratja na pre te Rōmjē nhō pahi pē Sesti mā mē ixpē Ijaew jamār o pa nhūm mē ma hwýr o tē. Nhūm ra myt kator grire nhūm mē hwýr o tē nē ōrkwý kapem o xa. Pirat kēp Ijaew kēt jakamā nhūm mē ōrkwý hwýr gjēx kēt nē kapôt ā kuhē. Na hte Ijaew kormā Pas ā hkīnh hāmri nē nhām mē kēp Ijaew kēt xwýnhjē nhōrkwý hwýr gjēx kēt nē. Kojā mē hwýr agjē nē amnhī tomnu nē Pas ā apkur kēt nē. Jakamā nhūm mē Pirat wýr Jejus o tē no ām hwýr o ar kēt nē. Ām ixkre kapem o xa.

²⁹ Hāmri nhūm Pirat mē hwýr kato nē omu nē hā mē hkukja nē mē kām:

–Kwa tanhmā na we amnhī tomnuj to ka mē ixwýr o tē? Anē.

³⁰ Hāmri nhūm mē kām:

–Nā kot amnhī tomnuj o pa xwýnh kēnā. Jakamā na pa mē awýr o tē. Ate tanhmā kot amnhī tomnuj to hā harēnh mar nē mýrapē tanhmā ho kaxyw. Anē.

³¹ Hāmri nhūm mē kuma nē mē kām:

–Tk. Kwa mē kamjaja ma amnhī kôt o tē nē amnhī krā hkôt tanhmā ho. Mē ate tanhmā kot amnhī nhīpēx to hā omunh xā hkôt. Anē.

Hāmri nhūm mē tee ri kuma nē kām:

–Kwa amnepēm mē ixpē Ijaewjaja na pa pre htem kēn o mē kot amnhī tomnuj

xwýnhjē tak o mē kupa. Tā na ra Rōm nhō pahitija mē pamjaja mē ixte mē hpar nē mē ixkurē. Tapxipix kām mē hpar ā àmnēnh prām. Jakamā kot kaj ý hā mē inhmā tanhmā hā axāmēnh to kē mē kupī. Ra ja kaxyw mē kot mē ixkaxyw axām kēnā. Anē.

³² Rōm nhō xwýnhjaja na htem mē kot amnhī tomnuj xwýnhjē hpar kaxyw nē pī kahpa hā mē hanhō nē mē kupa. Nhūm Jejus amnhī kukamā tanhmā mē kot hprī to hā mē omunh mex jakamā ra hprī hā mē inhmā mē kot tanhmā hipēx to hā mē harē. Jakamā nhūm pre ā Ijaew Pirat kot mē kām hprī prām xāj ā kām kapēr kām xihtýx anē.

³³ Hāmri nhūm mē kuma nē akupým ōrkwý hwýr axà nē amnhī wýr Jejus ā karō nhūm hwýr axà nhūm kām:

–E kwa inhmā amnhī jarē. Xā apē Ijaew nhō pahi na ka? Xā ka na htem amnhī wýr akām hamak o pa? Anē.

³⁴⁻³⁶ Hāmri nhūm kām:

–Tý ām hāmri na ka ā ijarēnh anē. Nom jar pika ja kamā ixpē mēō pahi hkêt. Axtem ixpē mēō pahi na pa. Mo kaxyw na ka ā ixkukjēr anē? Xā na pre mēhō ixte mē anhō pahi Sesti kutā ixām ā amā ijarē ka ama nē tee ri ixkukamā ajamaxpēr? Nā xā ām hāmri amā Tirtūm kot Ijaew wýr inhmēnh ā ixpumunh prām? Mo kaxyw na ka ā ixkukjēr anē? Anē.

Hāmri nhūm tee ri kuma nē kām:

–Tk. Mo kot pa kēt ri axtem nē Tirtūm kot Ijaew wýr amēnh ā akukja? Mē apyrā nē ixpē Ijaew kēt kēnā. Mē kot ixwýr ato htem xwýnhjaja na mē ā ate amnhī jarēnh anhýr ā ajarēnh anē. Nā mē akwýjē mē mē anhō patre krāhtūmjaja na mē ā inhmā ajarēnh anē. Jakamā e aprī hā inhmā amnhī jarē. Tanhmā na ka we amnhī tomnuj to nhūm mē ixwýr ato tē? Anē.

Hāmri nhūm kuma nē kē axte kām:

–Nā ixpē pyka ja kamā mē ō pahi hkêt. Kop ām ixpē pyka ja kôt mē ō pahi ronhýx ra ixkôt ri mē pa xwýnhjaja tanhmā ixtā mē ato. Nom jar ixpē mē ō pahi hkêt. Ām axtem ixpē mē ō pahi na pa. Ām hāmri na pa ā amā amnhī jarēnh anē. Anē.

³⁷ Nhūm ā kām amnhī jarēnh anē hāmri nhūm tee ri kuma nē kām:

–Xā apē mē ō pahi hō na ka? Anē.

Hāmri nhūm kām:

–Tý. Nā ām hāmri na ka ā ijarēnh anē. Na pa pre amnē pikaja wýr wrý nē jar mē akamā ixkato nē mē akamā ixaptār. Ixte tanhmā mē kām ixkapēr to ho ri ixpa kaxyw na pa pre wrý nē mē akamā ixpa nē ām hāmri mē kām ixkapēr o ri ixpa. Na pa hte tām ixkapēr o ri ixpa. Tā mē kot ixkapēr mar nē ixkôt ri amnhī nhīpēx o mē pa xwýnhjaja

na htem ixpê mē ò pahihiti hā ijarēnh o pa. Anē.

³⁸ Hāmri nhūm Pirat kot tām kām kapēr ā amnhī jarēnhja ā kuma nē kām:

—Tk. Aa ixte pika ja kamā mēhō pumunh nhūm tām kapēr o pare hā. Anē.

Hāmri nē kapēr ā kuma nē tee ri hukkamā hamaxpēr. Hāmri nē akupým Ijaew wýr ho kato nē mē kutā o xa nē mē kām:

—Kwa tanhmā kot amnhī tomnuj tore hā.

³⁹ E mē inhma. Na pa hte amgrā mē arīgro pē Pas kām mē amā mē hagjēnh xà rūm mē akwýjē ho hpýnh nē mē hapój nhūm mē hamakētcati nē amnhīx ri pa. Ka mē ja hā omu nē Pas ā akính nē. Jakamā e. Pa mē amā mē anhō “pahihiti” jarēnhja mā inhüre. E na pa ra kām inhüre. Anē.

⁴⁰ Hāmri nhūm mē tee ri ā kapēr anhýr ā kuma nhūm ja mē kēp omnuj týx nē. Nhūm mē hā kàx pē gryk kamā kām kapēr kām hihtýx nē kām:

—Tk. Kwa nà kām anhürer kēt nē. Kēt Parapas mā mán anhüre. Anē.

Parapasja na pre hte tanhmā amnhī tomnuj týx to ho ri pa nhūm prem mýrapē unē nē haxà. Tā nhūm mē axtem nē Pirat kot kām urer prām xáj Jejus kaga.

19

Mē kot Jejus tak ā mē harēnh

Matêwre 27.27-31; Makre 15.16-21;

Rukre 23.20-25

¹ Tā nhūm Pirat akupým òrkwý hwýr Jejus o axà nē ò pòristijē mā hā amýnē nhūm mē hwýr mra nē htak o kuhē.

² Hāmri nē kēp pahi hā hpēr o pikēnh kaxyw kām pahi hā mē ahkà nhīpēx nē hkrām haxà. Nom axtem mēmo mrōnhī te kot ronh kanēre pyrāk xwýnhja nhūm mē hikāx nē hkrām haxà. Nē kēp pahi hā mē ē kamrēk py nē kām haxà.

³ Hāmri nē xatā hwýr mra nē hinep htak nē hā hpēr o pikēnh o xa nē kām:

—E apē Ijaew nhō pahi punuti na ka. Anē.

⁴ Hāmri nhūm Piratja akupým Ijaew wýr kato nē mē kām:

—E koja inhō pòristi akupým mē awýr ho kato ka mē omu. Na pa tee ri kot tanhmā amnhī tomnuj to hā hukýja. Pēr tanhmā kot amnhī tomnuj to hkēt kēnā. Anē.

⁵ Hāmri nhūm Jejus kato nē arī pahi hā ahkà tu nē ē kamrēk jaxà nē o xa nhūm Pirat mē kām:

—E kwa mē omu nē kamā axukapri hkēt wehe. Anē.

⁶ Hāmri nhūm patre krāhtūmjē mē mēō pòristijaja tee ri ja hā kuma nhūm ja mē kēp omnuj nē. Hāmri nē hā kām kapēr kām hihtýx nē kām:

—Tk. Kwa nà pī kahpa hā mán anhō. Kē pī kahpa hā mán ajēt nē ty. Anē.

Hāmri nhūm tee ri hā mē kuma nē mē kām:

—Nà mē kam nē ma amnhīm o tē nē mē kam amnhīm ho anē. No pa kot paj ho anhýr kēt nē. Mo mýrapē kot pa kēt hā amýnē nhūm mē kupi? Nà kwarī kot pa ho anhýr kēt nē. Anē.

⁷ Hāmri nhūm mē tee ri kuma nē kām:

—Kwa kēp Tirtūm Kra hā amnhī jarēnh kēnā. Mē inhigētjaja na prem ā mē ixte amnhī jarēnh anhýrja nē mē inhmā kapēr pa htem ā amnhī jarēnh anhýr kēt nē. Koja mēhō ā ri amnhī jarēnh anē nhūm mē ja mýrapē kupi. Anē.

⁸ Hāmri nhūm Pirat tee ri Jejus kēp Tirtūm Kra hā amnhī jarēnhja ma nē kām uma nē kām tanhmā ho hprām kēt nē.

⁹ Hāmri nē akupým òrkwý hwýr ho axà nē axte hukýja nē kām:

—Kwa aprī hā inhmā amnhī jarē. Nhýhýnh na ka pre mē ixwýr mō? Anē.

Nom nhūm axte tanhmā kām nē hkēt nē. Ām arī akryk mar o xa.

¹⁰ Nhūm tee ri omu hāmri nē kām:

—Kwa xà ate ixpumunh kēt? Inhý hā na htem mē kupa nē inhý hā akupým mē hapój. Tā ka pēr aprī hā inhmā tanhmā amnhī jarēnh to hkēt nē ri akryk akuhē. Anē.

¹¹ Hāmri nhūm Jejus kām:

—Nom Tirtūm nhý hā pix mā na ka hte ā amnhī nhīpēx anē. Kēp ām Tirtūm kām ja prām kēt ronhýx ka tee ri tanhmā amā ixto hprām hkapyrī. Tām kot mē ixkaxyw axām kēnā. Tā mē kot awýr inhmēnh nē ri ixtyk ā ijarēnh xwýnh pē Ijaew nhō pahijaja. Ra mē kot ixkaga jakamā na mē ā amā ijarēnh anē. Jakamā mē kot amnhī tomnuj týx o ajakrenh. Anē.

¹² Hāmri nhūm Piratja tee ri ā kapēr anhýr ā kuma nē kot kām urer prām nē. Hāmri nē akupým Ijaew wýr kato nē hā mē kām kapēr nhūm mē tee ri kot kām urer kaxyw ā amnhī jarēnhja ma nē kām ja prām kēt kumrēx. Jakamā kàxpē nē kām kapēr nē kām:

—Kwa nà ra kēp mē inhō pahi hā kot amnhī to hēx kēnā. Kot mēhō ā ri amnhī jarēnh anē nhūm Róm kamā mē panhō pahi Sestija ja hā harēnh ma nē kamā gryk týx nē. Tā kot kaj kām anhüre nhūm ajarēnh ma nē akamā gryk nē. Anē.

¹³ Hāmri nhūm tee ri mē kuma hāmri nē ma pahi kot tanhmā mē harēnh to xà hā kēn pota wýr ma tē nē hā nhý. Mē ixpē Ijaew kapēr kām mē ixte kām: “Kapata” jarēnh xwýnhnta wýr kot tanhmā Jejus jarēnh to kaxyw ma hwýr tē nē hā nhý nhūm mē hwýr o tē.

¹⁴ Hāmri nhūm ra arīgro pē sēsta. Mē ixpē Ijaewjaja mē ixte Pas ā amnhī tomnuj mýrapē mry hkwy hpar nē Tirtūm kót pix mā amnhī nhīpēx ā amnhī jarēnh xà hā

arīgroja kato. Jakamā nhūm kaxkwa nhīpōk ri myt nh̄y nhūm Piratja mē kot Jejus kator ā harēnh prām xāj arī mē kām ho mē ō pahī hā harē nē mē kām:

—E ota mē anhō Pahihitita. Anē.

¹⁵ Hāmri nhūm mē tee ri ā harēnh anh̄yrja ā kuma nē kām:

—Kwa apī ri. Ma o tē nē pī kahpa hā anhō kē tokyx ty.

Anē nhūm tee ri mē kuma nē mē kām:

—Kwa nā. Kēp mē anhō pahī kēnā kot paj kēt ri axtem nē mē apē kupī. Anē.

Hāmri nhūm mē kām:

—Nā kēp mē inhō pahī hkēt. Pahī Sesti pix na kēp mē inhō pahī. Anē.

Mē kām Sesti hkīnh kēt tā ā kām Jejus htyk prām xāj ri harēnh anē.

¹⁶ Hāmri nhūm Pirat tee ri ja hā mē kuma nē tā Jejus ā pōristi mā karō nē mē kām:

—E mē māmri ma o tē nē pī kahpa hā anhō kē ty. Anē.

Hāmri nhūm mē kuma nē ma o tē.

Mē kot pī kahpa hā Jejus nhōr ā mē harēnh

Matēwre 27.32-44; Makre 15.21-32; Rukre 23.26-43

¹⁷ Hāmri nhūm pōristija Jejus mā ō pī kahpa gō nhūm kutu nē ma mē hkōt hkjēnh o mō. Nhūm mē krī rūm ho kato nē ma hixēt prēk w̄yr o tē. Hixēt prēkja mē kot harēnh o: “Korkot” anē. No mē ixpē Ijaewjē kapēr kām na pa pre htem harēnh o “Mē hkrā hi xā” anh̄yr xw̄ynhta w̄yr nhūm mē ma o tē nē hā ho api.

¹⁸ Hāmri nē pikap pī kahpa xi nē hā Jejus xi nhūm hā nō nhūm mē prek o īhkra ho ht̄yx nē hpar o ht̄yx. Hāmri nē kaxyw hkakw̄y nē hkakw̄ynh pa nē kamā pī kahpata xām nē hity hpa nhūm Jejus k̄yx pē ajēt. Hāmri nhūm mē māānēn wa ho hamēxkrut nē pī kahpa hā wa kunhō nhūm wa kuri ajēt. Wa kot tanhmā amnhī tomnuy to xw̄ynhja wa ho akutā Jejus nh̄jē nhūm wa urāk nē k̄yxpē ajēt.

¹⁹ Hāmri nhūm Piratja ō pōristi mā anē nhūm mē tap ō py nē hā tanhmā kagā hto nē kagā ho:

IJA EW NHŌ PAHI JEJUS NA JA

KĒP NAJARE NHŌ XWŪNH

²⁰ Nom mē ixpē Ijaew kapēr pix kām hā kagā hkēt nē. Māānēn Gresjē kapēr kām nē Raxjē kapēr kām nhūm mē māānēn hā kagā nē Jejus m̄yri kunhō. Hāmri nhūm Ijaew kw̄yjaja Jerujarē rūm hw̄yr mra nē mē kot ā hā kagā nh̄ipēx anh̄yrta pumu nē kamā harē. Jerujarēja hixēt prēēta w̄yr jawy jakamā nhūm mē kurūm ohtō nē hw̄yr mra nē omunh o kuhē.

²¹ Hāmri nhūm patre hkrāhtūmjaja tee ri ā Jejus jarēnh anh̄yr ā kagāta pumu nhūm ja

mē kēp omnuy nē. Jakamā nhūm mē ma Pirat w̄yr mra nē kām:

—Kwa mon ka ri hā mē kām anē nhūm mē axtem nē ā ri kagā nh̄ipēx anē? Kwa nā kēp mē inhō pahī hkēt. Am ht̄yx ri kot ā kot amnhī jarēnh anh̄yr o pa kēnā. Kwa hā kagāja o anh̄ipa nē hpānhā hā kagā ho: “Kēp Ijaew nhō pahī hā kot amnhī to hēx xw̄ynh.” Anh̄yr o hpānhā hā hipēx nē anhō nā? Anē.

²² Hāmri nhūm mē kuma nē mē kām:

—Tk. Nā pa ho ixpinphanh kēt nē. Ra ixte hā kagā hpar kēnā. Anē.

Pōristijaja kot axpēn mā Jejus xē ho pi-grānh

Matēwre 27.35-36, 27.55-56; Makre 15.24; Rukre 23.34

²³ Hāmri nhūm pōristijaja kot axpēn mā Jejus xē o pigrānh kaxyw amnhī tā haxw̄yr o tē. Mē kēp 4 no nhūm Jejus xē kēp 5 jakamā nhūm mē amnhī kōt ho 4 nē haxw̄y nhūm pyxi nē hprā. ē rytita. Na pre hipēx muxre. Nh̄yh̄ynh hkayr xā pumunh kēt kumrēx.

²⁴ Jakamā nhūm mē omu nē kām hkīnh nē. Hāmri nhūm hō kot amnhīm hpyr nē ho arik kaxyw nhūm mē hā kēne ho jōka. Na pre Tirtūm kapēr ā kagā htūm kot mē hkukamā ja hā mē harēnh nē mē harēnh kot:

Na prem axpēn mā ixē o angrā nē hā kēne ho jōka ho hkrī.

Anh̄yr o kot mē hkukamā mē harēnh. Tā nhūm mē ra hkōt ā amnhī nh̄ipēx anh̄yr o hkrī.

Jejus kot Juāw nh̄ihkram katorxā jaxār ā harēnh

²⁵ Nhūm Jejus par pē katorxā xa. Nē htōx nē Kropti hprō Marir nē Marir Matarēn mē nhūm mē Jejus katorxā nh̄ihkō hā Jejus pumunh o kuhē. Nhūm amnhī tā mē omu

²⁶ nē mē kuri pa ixpē Juāw pumu. Hāmri nē kēp ikrāmnhw̄y mex ā ixtā katorxā mā kapēr nē kām:

—E ota Juāwta. Kōja ixpānhā te kēp akra pyrāk o anh̄ipēx nē tanhmā ato ajuta hto ho pa. Anē.

²⁷ Hāmri nē hpānhā pa inhmā kapēr nē inhmā:

—E Juāw. Kēr ka te kēp akatorxā pyrāk o inhmā hipēx mex o ri apa.

Anh̄yr jakamā pa kuma nē kot inhmā hā karō xā hkōt inhōrkw̄y hw̄yr haxā nē amnhī kōt ri ho ixpa.

Jejus htyk ā harēnh

Matēwre 27.45-56; Makre 15.33-41; Rukre 23.44-49

²⁸ Tā nhūm Jejus ra amnhī pumu hāmri nē hamaxpēr o:

—Nā Inh̄ipēxā kot mēmoj tā inhmā karōta na pa ra kām ho anh̄yr o hitep xā xir kaxyw. Anē.

Hāmri nē kām kōr ā amnhī jarē. Nom ra hkukamā Tirtūm kapēr ā kagā htūm kot htyk kaxyw nē kām kōr kukamā harēnh jakamā nhūm ā amnhī jarēnh anē nē kapēr o:

Nā na pa ra inhmā kōr nē. Anē.

²⁹ Nhūm hpar pē guhkrax kām wīhti punureta ām jakamā nhūm mē ā kot amnhī jarēnh anhērja ma nē kaxyw mēmo rerek py nē o tē nē kaxyw pī ryti hō py nē ho hkanhwý. Nē akupýn o tē nē ho wīhti mā haxā nē kām kupē.

³⁰ Nhūm hkaō nē hkaōr pa hāmri nē kapēr o: E nā hāmri na pa ra mē piitā mē kot amnhī tomnuj pānhā amnhīrer pa. Jao ra Inhīpéxā kām hprām xā hkōt kām tanhmā amnhī nhīpēx to jatur xām kumē.

Anhēr o amnhī jarēnhja kōt ahpār mā hkrā nē ty.

Mē kot kō xwa ho Jejus kamnhwýr ā harēnh

Wam Juāw 5.6-8

³¹ Nhūm ra sēsta nhūm apkati nhūm mē inhō arīgromnu pē sap kaxyw. Sapja ā na hte mē ixpē Ijaew mē ixkīnh pē Pas ā ixkīnh rūnh o ixa. Nhūm mē kām sap ā arī mē htyk nē mē harir xwýnhjē pumunh prām kēt jakamā nhūm Ijaew krāhtūmjaja ma Pirat wýr mra nē kām:

—Kwa pōristi mā anē kē mē tokyx mē hte hi kukē kē mē htyk tokyx anē. Kē mē tokyx mē o wrý nē ma mē o mra nē mē hagjē. Kormā sap kēt ri. Anē.

³² Hāmri nhūm mē kuma nē ō pōristijē mā anē nhūm mē ma mē hwýr mra nē akutā wa kot Jejus nhījē nē jēt xwýnhta wa kumrēx wa hte hi hkwýr.

³³ Hāmri nē hpānhā Jejus wýr tē nē omu nhūm ra htyk mex nē ajēt nhūm mē ja hā omu nē kēp hte hi hkwýnh kēt nē.

³⁴ Nhūm pōristi hōja kō xwa py nē ho ihkjē rūm hkanhwý nhūm hkamrō mē ī kagō ahkā nē hprōt nhūm mē hkwýja omunh o kuhē.

³⁵ Nē ixpē Juāw na pa pre ijaxwýja mē ihkō hā xa nē ja hā omunh jakamā pa ā mē amā hā kagā anē. Ām hāmri na pa mē amā harē nē hā kagā. Mē ate kamā harēnh nē harēnh mar nē hkōt ajamaxpēr kaxyw.

³⁶ Na pre ra Tirtūm kapēr ā kagā htūm kamā ra hkukamā tanhmā kot mē pahwýr mēnh xwýnhta jarēnh to nē hā kagā. Nē hā kagā kot:

Koja mē nhýhýnh hi hkwýnh kēt nē. Anē.

Tā nhūm mē ra hā kagāja kōt ā hipēx anē nē kēp hi hkwýnh kēt nē.

³⁷ Nē Tirtūm kapēr ā kagā htūmja māānēn ja hā harēnh kot:

Mē kot hpīr nē hkanhwýr xwýnhja koja mē hpar pē omunh o kuhē. Anē.

Tirtūm kapēr ā kagā htūm kamā ā Jejus tyk kukamā harēnh kot anhýr.

Mē kot Jejus jaxār ā mē harēnh

Matēwre 27.57-61; Makre 15.42-47; Rukre 23.50-56

³⁸ Tā nhūm Juje pē Arimatej nhō xwýnhja Jejus ra htyk ā omu nē ma Pirat wýr tē nē hā kām kapēr. Kot ma o mōr nē tokyx haxār kaxyw. Na pre ra Jejus kōt amnhī xām nom Ijaew krāhtūmjē pymaj mē kām amnhī to amnhīrit kēt nē. Jakamā nhūm ma Pirat wýr tē nē hā kām kapēr nē kām:

—Pa e ot pa awýr tē. Ixte mēmoj tā amā ixkapēr kaxyw. Kot kaj apu inhmā “ý” anhýr japēr. Kwa xā kot pa ma Jejus o mō nē haxā? Anē.

Hāmri nhūm kuma nē kām: “Nā māmri ho anē.” Anē hāmri nhūm ma hwýr tē nē ho wrý nē kumý nē ma haxār mā o mō.

³⁹ Nhūm Nīkotēja ma hkōt tē. Amnepē mā kot kamāt kām Jejus wýr htēm nē wa axpēn mā kapēr o ýr xwýnhta. Jakamā ma Juje hkōt tē. Nē amnhī kōt mē hkuxwa xā hkwý ho mō. Ām ho mōr rax kumrēx. Ho 34 kir nē kutu nē o mō. Mē hkuxwa xāja na pre mē kot mēmo kuxwa xā mā “mīra” nē “aroe” anhýr jarēnhja nhūm kaxyw hkwý jakā nē ho ahkā nē ho mē hkuxwa xā nhīpēx. Hāmri nē kutu nē ma Juje kot Jejus jaxār nhūm kot ho hkuxwa kaxyw hkōt o mō.

⁴⁰ Hāmri nhūm wa ho kupēxē kukōnh pa nē ho Jejus kupu. Mē ixpē Ijaew mē ixte mē htykjē jagjēnh kaxyw ā mē hipēx anhýr xā hkōt nhūm wa ā hipēx anē nē haxā.

⁴¹ Nhūm ra mē kot pī kahpa hā nhōr xā tā mē kot mēmo pī ho pa nē hkre xwýnh kwý kuhē. Nē kamā kēn kre nyw. Kormā mē kot kamā mē htykjē hō jaxār kēt xwýnhta.

⁴² Jakamā nhūm wa omu nē axpēn mā:

—E kwa pu hwýr Jejus o tē nē kamā mán tokyx haxā. Kēr pu kormā sap kēt ri ra tanhmā amnhī to hpa. Anē.

Hāmri nē hwýr kumý nē o tē nē kamā haxā nē hā hitom pa hāmri nē ma akupým krīm wa tē.

20

Jejus akupým htír ā harēnh

Matēwre 28.1-10; Makre 16.1-8; Rukre 24.1-12

¹ Tā nhūm sap tē nē hapēx nē hpānhā semān nyw krax xā pē tōmík. Hāmri nhūm Marir Matarēn kwýhtā kānhmā nhý. Kormā myt kator kēt ri kānhmā nhý nē ma kēn kreta wýr tē. Nē hwýr pōj nē tee ri hitom xā hā kēn rax pumu. Nhūm ra nhām hakwa kre kuhpa hā ri hikwý nhūm omu nē tee ri hkukamā hamaxpēr pē omunh o xa.

² Hāmri nē awjanā nē ma akupým hprōt nē nhýri Simāw Pētre nē pa ixpē Jejus

krāmnhwý mex ā wa ixpumu nē hkaprī kamā wa inhmā harē nē wa inhmā:

—Xē na pēr mē pahpē mē panhō Pahihtī kapa nē nhýhým ma o tē. Xē nhýhým mǎn pre wem o tē? Anē.

³ Hāmri pa wa kuma nē hwýr ixprōt kurē kumrēx.

⁴ Hāmri pa Simāw Pētre mā wa nē ixkumrēx hwýr pōj.

⁵ Nom kormā kēn kre hwýr ixār kēt ri kormā hakwa krem inhikōt nē kaxwýnh kām nōr xā kamā Jejus japēr ixrīt o xa. Nhūm kupēxē nhūrē pix nō pa omu.

⁶ Hāmri nhūm Simāw Pētre ixkōt tē nē ixrom krem ǎr kurē kumrēx nē kupēxē nhūrēta pumu.

⁷ Nē hkrā kupu xā pumu nhūm axtem hkrā muxre nē ahte nō.

⁸ Hāmri pa hkōt axā nē nōr xā kaprý pumu nē ijamaxpēr o:

—Hēxta waa nē. Nā mǎn akupým htír. Hā na nōr xā hkaprý mex nē. Nā mǎn akupým htír kām ga. Anē.

⁹ Ra Tirtūm kapēr ā kaga htūm kot ja kukamā akupým htír ā harēnh tā pa wa kormā ixprī hā ja hā omunh kēt nē. Tā kēn kre kaprý pumu nē kām ijamaxpēr kurē kumrēx.

¹⁰ Hāmri nē wa ixkato nē awjanā nē ma akupým wa ixkwýjē hwýr wa tē.

Jejus kot Marir Matarēn wýr kator ā harēnh

Makre 16.9-11

¹¹ No nhūm Marir Matarēnja arī kēn kre kapem hkaprī nē mýr o xa. Nē mýr pē hikōt nē kēn kre kamu

¹² nē kamā Tirtūm kapēr o wrýk xwýnh wa ho axkrut nē wa omu. Nhūm wa ē jakajre kamā wa nhý. Nhūm hōja hkrām nhý nhūm hōja htem nhý.

¹³ Hāmri nē wa Marir Matarēn mā kapēr nē kām:

—Kwa mon ka ri omu nē amýr o xa? Anē. Nhūm kām:

—Xē nhūm. Na prem ma nhýhým mē ixpē mē inhō Pahihtija mý nē ma o tē nē hpānhā nhýri kuxi. Anē.

¹⁴ Rōm nhūm Jejus tām tē nē hkatut kōt xa nhūm Marir Matarēn ho hakēx nē omu nom hprī hā omunh kēt nē. Omu nē htýx ho axtem mēhō hā hkamnhīx.

¹⁵ Hāmri nhūm kām:

—Kwa mon ka ri amýr o xa? Mēhō na ka ri hapēr arīt pē amýr o xa? Anē.

Hāmri nhūm kuma nē htýx ho pī hkre jamār xwýnh ā hkamnhīx nē kām:

—Xē xā ka na ka mē ixpē mē inhō Pahihtī ho ahkī nē ma o tē nē nhýri axi mē? Xē ka japēr nē akatāt kōt inhmā harē. Nhýri inhmā nōr xā jarē pa ma hwýr tē nē kumý nē

man akupýn o tē nē akupým kēn kre kamā kuxi. Anē.

¹⁶ Hāmri nhūm Jejus kām hixi jarē nē kām:

—Kwa Marir Matarēn. Amnē ixpumu nē arī ā akapēr anē nā. Anē.

Hāmri nhūm jatā hprī hā kuma nē ho hakēx nē amnhī jaēr pē hprī hā omu nē kām:

—Xē Pahihtī. Xep ka na ka. Hēxta gāà nē. Anē.

Nom mē ixpē Ijaew kapēr kām Pahita jarēnh o: “Raponī” anē. Nhūm ā kām kapēr anē hāmri nē axte ma nhýhým kēp htēm pymaj hpa hā kupy.

¹⁷ Hāmri nhūm kām:

—Kwa inhmā anhūre. Na pa kormā ma akupým Inhīpēēxā hwýr ixāpir kēt nē. E tokyx ma akupým tē nē ixtō nē ixtōxjē mā ijarē. Na ka prem apē ixkrāmnhwý pix tā ra mē apē ixtō nē ixtōx na ka mē. Jakamā ma akupým mē hwýr tē nē mē kām ijarē. Nē mē kām: “Na Jejus mē awýr pēr mēnh o: ‘Kot paj tokyx ma akupým Inhīpēēxā Tirtūm wýr apī. Nom kēp pa Inhīpēēxā pix kēt mǎānēn kēp mē Anhīpēēxā na. Nē mǎānēn kēp mē anhō Tirtūm na.’ Anhýr o mē awýr pēr mē.” Anē. E ma akupým mē hwýr tē nē tokyx ā mē kām ijarēnh anē. Anē.

¹⁸ Hāmri nhūm kuma nē ma akupým mē ixwýr tē nē mē inhmā awjarē nē mē inhmā:

—Xē na pa ham mē panhō Pahihtita pumu. Na akupým mē pamā htír. Anē.

Hāmri nē mē inhmā kot tanhmā kām kapēr to hā harē pa mē kuma nē tee ri hkukamā ijamaxpēr.

Jejus kot hkwýjē hwýr kator ā harēnh

Rukre 24.36-43

¹⁹ Tā nhūm tōmik nē kamāt pa mē Jejus kōt ixpa ho ixpa xwýnhjaja axpēn wýr akuprō hāmri nē Ijaew krāhtūmjē pymaj hakwakre kahē hpa nē axpēn mā ixkapēr o ixkrī. Nhūm Jejus mē ijaēr pē nhýhýnh mē ixwýr axā nē mē ixkuri xa nē mē inhmā:

—Pa. Xā kormā mē anhōt kēt? Anē.

²⁰ Hāmri nē mē inhmā amnhī nhīhkra kamā prek tatak xā jahkre nē hakýx kōt mē kot hkanhwýr xāja nhūm mē inhmā hahkre. Pa mē akupým htír kām omu nē ixkīnh týx kumrēx.

²¹ Hāmri nhūm mē inhmā:

—E kwa kēr ka mē tee ri amnhī kukamā ajamaxpēr o amā ma ho ri apa hkēt nē. Na pre Inhīpēēxāja mē awýr inhmē pa pre wrý. Tā kot paj amnhī pyrā nē mē piitā mē hwýr mē arē. Anē.

²² Hāmri nē mē ixkaxyw htyyxā mē nē mē inhmā Tirtūm mē wa Karō jarē nē mē inhmā:

—E koja Tirtūm mē wa Ixkarōja wrý nē mē akarō mā gjēx pa.

²³ Ka mē ý hā ma mē piitā mē hwýr apa nē mē kām Tirtūm kapēr jarēnh o ri mē hkōt

apa. Nê nhÿri mēhō pumu nē inhÿ hã kãm: “Kot kaj Tirtũm kôt amnhĩ xãm nhũm amnhĩ tã apumu nē anē ate amnhĩ tomnuj rēnh pa.” Anē. Ka mē ā kãm akapēr anē nhũm mē ama nē hkôt amnhĩ xãm nhũm Tirtũm amnhĩ tã omu nē nē kot amnhĩ tomnuj rēnh pa. Nom koja mē ama nē ām mē ama nē hkôt amnhĩ xãm kêt japēr ka mē inhÿ hã kãm: “Nà kot kaj Tirtũm kôt amnhĩ xãm kêt nē nhũm anē ate amnhĩ tomnuj rēnh kêt nē.” Anhÿr o kãm akapēr nhũm Tirtũm ho anē nē nē rēnh kêt nē. E kēr ka mē ā inhÿ hã amnhĩ nhípēx anhÿr o ri apa. Anē.

Nhũm pre ā Jejus mē inhmã kapēr anē hãmri nē kato nē ma nhÿhÿm tē.

*Jejus kot Tomas mã kapēr ā harēnh
Matēwre 28.17*

²⁴No nhũm mē inhĩō pē Tomas pihpohtita kormã mē ixkĩnhã akupÿm Jejus htĩr kãm omunh kêt nē. Na pre ma kape hã tē nhũm wakre kamã mē ixwÿr axà nē mē inhmã kapēr hãmri nē ma nhÿhÿm tē. Jakamã nhũm Tomas akupÿm nē ixwÿr tē nē axà pa mē kãm harē nhũm tee ri mē inhma nē mē ixkôt hamaxpēr kêt nē.

²⁵Nē mē inhmã:

—Nà kot pa ĩhkra kamã prek tatak xã pumu nē kamã inhĩhkra hkrã jaxã. Nē hakÿx kôt hkanhwÿr xãta pa mã ho anē nē omu nē kamã inhĩhkra hkrã jaxã nē rĩ kormã akupÿm htĩr kôt ijamaxpēr. Anē.

²⁶Tã nhũm semãn pyxi nē hapēx pa mē axte axpēn wÿr akuprō nē axte Ijaew krãhtũmjé pymaj amnhĩ tã kahē htÿx nē ixkrĩ. Nhũm Tomas tã mē ixkuri nhÿ. Hãmri nhũm Jejus axte nhÿhÿnh mē ixwÿr axà nē mē inhmã:

—Pa. Na ka mē rĩ akrĩ. Anē.

²⁷Hãmri nē Tomas pumu nē hwÿr tē nē kãm ĩhkra pē nē kãm:

—E ota inhĩhkra kamã prek tatak xãta. Mãmrĩ kamã anhĩhkra hkrã jaxã. Nē hpãnhã ijakÿx kôt mē kot ixkanhwÿr xã kamã mã ho anē nē haxã nē akupÿm ixtĩr kôt ixpumunh kurē kumrēx. Anē.

²⁸Hãmri nhũm kuma nē kãm:

—Nà pēr ām hãmri apē inhō Pahĩti Tirtũm na ka. Anē.

²⁹Hãmri nhũm kãm:

—Tÿ. Ām ano ho ixpumunh kôt pix mã na ka ixkôt ajamaxpēr. Tã no ām koja mē nhÿrmã mē amÿr pē mē pa xwÿnhjaja mē akĩnhã mē no ho ixpumunh kêt tã akupÿm ixtĩr ā ĩjarēnh mar pix tã ixkôt hamaxpēr. Ja na mex kumrēx. Anē.

*Juãw kot tanhmã amnhĩ jarēnh to hã
harēnh*

Rōmãn 15.4; Wam Juãw 5.13

³⁰No pre Jejus kormã mē ixto pa ri mē inhno mã mēmoj tanhmã hipēx to rax nē

nom kot paj kagãja kamã piitã hã kagã hpar kêt nē.

³¹Ām hkwȳ pix na pa mē amã hã kagã. Mē ate mē ixpyrã nē omunh nē kēp Tirtũm Kra hã kot mē pakaxyw ām xwÿnh ā omunh nē hkôt amnhĩ xunhwÿr kaxyw na pa ā mē amã harēnh nē hã kagã anē. Tã kot kaj mē amnhĩ kaxyw hkôt ajamaxpēr nē hkôt amnhĩ xunhwÿ hãmri nē nhÿrmã atyk tã nhũm akupÿm mē ato mē atĩr ka mē ixpyrã nē kuri amex nē atĩr tũm nē apa ho apa. Tã pa ā mē amã mēmoj piitã harēnh nē hã kagã anē.

21

*Jejus kot hkwȳjē hwÿr kator ā harēnh
Matēwre 26.32, 28.7, 28.10*

¹Tã nhũm Jejus axte hkôt mē ixpa ho mē ixpa xwÿnh kwÿjē hwÿr kato. Himō pē Tipeja mÿri.

²Pa mē ixpē 7 nē axpēn wÿr akuprō. Na pre Simãw Pētre nē Tomas pihpohti nē Natãnaew. Natãnaewja Garirej kamã krĩ pē Kanã nhō xwÿnh na pre. Nē wa pa wa ixpē Jepetew krata wa nē wa inhĩō wa pijakru-uta wa. Pa prem wa mē nhÿri axpēn wÿr akuprō.

³Hãmri nhũm Simãw Pētre mē inhmã:

—E pa jarãhã ma tep wÿr tē nē hkwȳmnē. Anē.

Pa mē kuma nē kãm:

—Tōe. Nà pa mē ĩjaxwÿja ma akôt mō. Anē.

Hãmri nē mē ma himō rax pē Tipeja wÿr mō nē kanōre mã agjē nē gōx kãm kryhti rēnh o ixkuhē. Nom tee ri ho tep òmnēnh kaxyw rēnh o ixkuhē nē hōmnēnh kêt nē ixtã apkati nhũm tep amrakati kumrēx.

⁴Tã nhũm myt kato nhũm Jejus gō mÿri xa. Pa mē ixpiitã omu no ām ixprĩ hã kēp Jejus ā omunh kêt nē. Tã no nhũm tãm xa.

⁵Hãmri nē mē inhmã kapēr nē mē inhmã:

—Pa. E mãn ka mē ra tep kwÿymnēnh rax nē nã? Anē.

Hãmri pa mē kãm:

—Tk. Nà mo tep? Amrakati kumrēx kēnã. Anē.

⁶Hãmri nhũm mē inhmã;

—Xō wehe? Tōe. Axte mē axupōk rũm kryhti mē nē omu. Anē.

Hãmri pa mē mar xã hkôt ho anē nē kumē. Hãmri nhũm kamã tep hipu rax kumrēx nhũm utĩ rax nē. Pa mē tee ri ixte ho ixãpir kaxyw ri hkukjē.

⁷Hãmri pa kēp Jejus ā omunh kurē kumrēx nē Simãw Pētre mã kãm:

—Kwa pēr mē panhō Pahĩtita na. Anē.

Hãmri nhũm inhma nē hkĩnh tÿx nē akupÿm hinōkã jaxã nē gōx kãm mrō nē ma hwÿr ho nana ho tē.

⁸Hãmri pa mē hkôt kanōre kamã kryhti kjēnh o mō. Ra amgrã hwÿr amgrire. Wÿr

100 met pix jakamā pa mē hwýr ixpôx tokyx anē.

⁹ Nē pàr o hkre kura nē kuxi nē ijapôx pa nē Jejus wýr ixprôt nē mra. Nhùm ra mē ixkutêp kuto nē par nhîpêx nē nhÿhÿnh tep kwý par kām haxwý nē ho àr o nhÿ. Nē kaxyw pāwti nē amnhî ri haxwý nē o nhÿ.

¹⁰ Hāmri nē mē ixpumu nē mē inhmā:

–E mē amnē anhō tep o mra pu mē hkuxôt nē kuku. Anē.

¹¹ Hāmri nhùm Simāw Pêtre akupým pàr wýr tē nē kryhti ho htýx xà hpôt nē amgrà hwýr hkjēnh o mō. Kamā tep rúnh pix. Nē ohtō nē. Kamā kēp 153 nē hikwý htā nhùm nhÿhÿnh kryhti hkwy pikaxônh kêt nē.

¹² Hāmri nhùm Jejus mē inhmā:

–E kwa mē tokyx mra pu mē apku. Anē.

Hāmri pa mē kuma nē hwýr mra nē ixkrî pa. Hāmri nē tee ri omunh o ixkrî. Mē ixprî hā omunh mex kêt tā kot ā mē inhmā amnhî nhîpêx anhÿr ā omu nē kēp mē inhō Pahihti hkôt omunh kurē kumrêx jakamā hixi hā hkukjêr kêt nē. Ām akryk omunh o ixkrî.

¹³ Hāmri nhùm mē inhmā pāwti ho hkry pa. Nē hpānhā tep jamý nē mā ho anē nē ho hkry pa nē ho mē inhîpêx pa pa mē ixâpkur o ixkrî.

¹⁴ Nhùm Jejus akupým htîr kām ra ahpÿnhā mē ixwýr hapôx o axkrunêpxi.

Jejus kot akupým tām Simāw Pêtre xām

Atre 20.28-31; Wam Pêtre 5.1-4

¹⁵ Tā pa mē ra ixâpkur pa nē kànhmā ixkuhē nē gō mý ri mra. Hāmri nhùm Jejus Juāw hkra Simāw Pêtre mā tanhmā kapêr to. Nom ixpē Juāw nhùm kēp ixkra hkêt axtem Juāw ô hkra na pre. Jakamā nhùm Jejus kām kapêr nē kām:

–Kwa Simāw. Xà we amā ijapê ho ate pika hkôt mēmoj piitā hakrenh par nà? Anē.

Hāmri nhùm kuma nē kām:

–Tý inhmā ajapê htýx kēnā Pahihti. Ra ate ja hā amnhî tā ixpumunh mex. Inhmā ajapêê. Anē.

Hāmri nhùm kuma nē kām:

–Tôe. Nà kēr ka inhmā mē kot ixkôt amnhî xunhwýr xwÿnhjê jahkre mex o ri mē hkôt apa. Te ho ôwēhti hkrare jamār xwÿnh kot hamār mex o ri hkôt pata pyrāk. Anē.

Hāmri nhùm kām:

–Tôe. Nà kot paj amā mē ho anē. Anē.

¹⁶ Tā nhùm hā ahtümre nhùm kē axte kām:

–Kwa Simāw. Xà we amā hāmri na ka inhmā amnhî jarê. Xà we amā ijapêê nà? Anē.

Hāmri nhùm kām:

–Tý. Ra ate inhmā ajapê hā ixpumunh kēnā. Anē.

Hāmri nhùm kē axte kām:

–Tôe. Kēr ka inhmā mē kot ixkôt amnhî xunhwýr mā xwÿnhjê jahkre mex o ri mē

hkôt apa. Te ho ôwēhti jamār xwÿnh kot ôwēhti jamār mex o hkôt pa xwÿnh kot amnhî nhîpêx pyrāk. Anē.

Hāmri nhùm kām:

–Nà kot paj amā mē ahkre mex o ri mē hkôt ixpa. Anē.

¹⁷ Tā hāmri nhùm hā ahtümre nhùm kē axte kām:

–Kwa Simāw. Xà we amā hāmri na ka inhmā amnhî jarê? Xà we amā ijapê htýx kumrêx nà? Anē.

Hāmri nhùm tee ri amnhî tā kuma nē hkaprî nē. Ra kot amnhî tā hkukjêr o axkrunêpxi jakamā nhùm hkaprî nē tee ri hamaxpêr. Hāmri nē kām:

–Kwa Pahihti. Ate mēmoj piitā omunh par. Nē ate inhmā ajapê htýx ā ixpumunh par kēnā. Anē.

Hāmri nhùm kē axte kām:

–Tôe. Kēr ka inhmā mē kot ixkôt amnhî xunhwýr mā xwÿnhjê jahkre mex o ri mē hkôt apa. Te ho ôwēhti jamār xwÿnh kot hamār mex o ri pata pyrāk. Anē.

Hāmri nhùm kām:

–Nà kot paj amā mē ho anē Pahihti. Anē.

Simāw Pêtre tanhmā htyk to hkukamā harēnh

¹⁸ Nhùm Jejus arî Simāw Pêtre mā kapêr nē kām tanhmā htyk to hkukamā harēnh to nē kām:

–Kwa ixkapêr ma nē amnhî krā him haxàr tÿx nē hā apa Simāw Pêtre. Nà kormā anyw ri na ka pre hte ma nhÿhÿm apa kaxyw nē anojarêt hāmri nē anhînhôkà mex jagjê nē ma nhÿhÿm amā apa hprām xà hkôt ri apa. Tā kot kaj apigêt nhùm mē apynē nē akahti hpre nē apa hpre nē ma nhÿhÿm ato mō ka mē kām amnhî gō nē amnhî nē tanhmā mē kām nē hkêt nē. Amā mē hkôt amôr prām kêt tā māmri mē kām amnhî gō kē mē ma nhÿhÿm ato mō.

¹⁹ Tā kēr ka arî ixkôt amnhî xām tÿx nē atîr prām xaj mē umaj axte ixkaga hkêt nē. Hāmri nhùm mē apî nē tanhmā atyk to hā apumu nē amā Tirtüm kînh ā apumunh mex kurē kumrêx. Hāmri nē atā Pahi Maati Tirtüm mex o mex ā harê. Anē.

Nhùm pre ā Jejus Simāw Pêtre tyk kukamā kām ujarēnh anē. Hāmri nē kām:

–E kēr ka ixte amnhî to htýx nē amarî mē kām ixām nhùm mē kot ixpîrja pyrā nē ā amnhî nhîpêx anē. Anē.

Hāmri nhùm kuma nē kām:

–Tôe. Nà kot paj hāmri tā ā amnhî nhîpêx anē Pahihti. Anē.

Juāw tyk kukamā tanhmā harēnh to hkêt ā harēnh

²⁰ Nhùm pre ā Jejus Simāw Pêtre mā tanhmā htyk to hkukamā harēnh anē. Hāmri nhùm kuma nē ixpē Juāw ā ixto hakêx nē ixpê Jejus krāmnhwý mex ā ixpumu.

Kormā Jejus htyk kêt ri kamàt kām mē ixàpkur o ixkríta ā na pa pre ĩhkô hā ixàpkur o nhỹ nē kot mē kām ôr mā xwỳnh̄ta nhĩxi hā hkukja.

²¹ Jakamā nhũm Simāw Pêtre ixto hakêx nē xpumu nē ixtā Jejus kukja nē kām:

—Kwa no pēr pahkôt mōr mũj? Tanhmā koja we htyk to? Anē.

Hāmri nhũm kām:

²² —Nà kot paj amā tanhmā htyk to hkukamā harēnh̄ hkêt nē. Kot pa inhmā arĩ kritpēm pa rāhā pa akupỳn̄ ixwryk prām nhũm arĩ pa nē htyk kêt rāhā pa akupỳn̄ wrỹ. Kêr ka ri htyk kukamā tee ri tanhmā ajamaxpēr to hkêt nē. Ām ixkôt pix mā ate amnhĩ nhĩpêx tỳx pix kukamā mǎn aja-maxpēr o ri apa.

²³ Anhỹr o kām ijarēnh̄ jakamā nhũm mē ixkwỳjaja kot ā ijarēnh̄ anhỹrja ā kuma ma nē htỳx nhỹrmā ixtyk kêt ā ixkamnhĩx. Nē gaa nē rĩ piitā xypēn̄ mā ā ijarēnh̄ anhỹr o pa. Nom na pre ā ijarēnh̄ anhỹr kêt nē. Na kêt pre ijarēnh̄ o:

—Kot pa inhmā arĩ ri kritpēm pa rāhā pa akupỳn̄ ixwryk prām nhũm arĩ pa nē htyk kêt rāhā pa akupỳn̄ wrỹ.

Anhỹr o ijarē. Nom ām hāmri ixtyk kêt rāhā nhũm akupỳn̄ wrỹk ā ijarēnh̄ kêt nē.

Juāw kot Jejus kot tanhmā amnhĩ to hā kagà hpar kêt ā kot amnhĩjarēnh̄

Juāw 20.30-31

²⁴ E na pa mē amā Jejus kot tanhmā amnhĩ nhĩpêx to ho pa hā harē nē hā kagà. Ixpê hkôt ri ixpa ho ixpa xwỳnh̄jê hō na pa ām hāmri ā hā kagà anē. Ka mē kamā harē nē ama nē ām hāmri ixte kagà nhĩpêx kôt xpumunh̄ mex kurê kumrêx.

²⁵ No na pre Jejus ām ja pix o anhỹr o pa hkêt nē. Na pa ām mē amā hkwȳ pix jarē nē hā kagà. Na pre tanhmā ri mēmoj to rax kumrêx o ri pa. Nom kêp ām ixte kot tanhmā ri amnhĩ nhĩpêx to piitā hā kagà hpar ronhỹx hā kagàja katutxô rax kumrêx. Jao te ra kaxkwa htêp o mōr pyràk.

Tā ām ja pix. Na hapêx.

Atre Jejus nh̄y h̄a m̄e ahkre ho m̄e pa xw̄ynhjaja kot tanhm̄a amnh̄i nh̄ip̄ex to ho pa h̄a m̄e har̄enh

Rukre na pre kagaja nh̄ip̄ex. Na pre k̄ep t̄ot̄o n̄e hkw̄ȳj̄e kane ho pa. N̄e Jejus nh̄y h̄a m̄e ahkre ho pa xw̄ynhj̄e p̄e Pawre k̄ot pa ho pa. H̄amri n̄e hamaxp̄er n̄e hkr̄amnhw̄y Teopre m̄a kagaja nh̄ip̄ex n̄e hw̄yr kum̄e. N̄e kagaja kam̄a Jejus nh̄y h̄a m̄e ahkre ho m̄e pa xw̄ynhj̄e maatījaja kot Jejus m̄yr p̄e tanhm̄a amnh̄i nh̄ip̄ex to ho pa h̄a m̄e har̄e.

N̄e Ijaew nh̄o patrejaja n̄e m̄e hkw̄ȳ p̄e Parijew nh̄o xw̄ynhjaja n̄e m̄e hkw̄ȳ p̄e Sat-usew nh̄o xw̄ynhjaja kot Tirt̄um kap̄er ā kagā ht̄um kam̄a har̄enh n̄e mar n̄e hk̄ot amnh̄i nh̄ip̄ex tā Tirt̄um Kra Jejus k̄ot amnh̄i nh̄ip̄ex k̄et ā m̄e har̄e. M̄e kot k̄ep Tirt̄um Kra hk̄et ā hk̄amnh̄ix jakam̄a na prem k̄am m̄e kot hk̄ot amnh̄i xunhw̄yr xw̄ynhj̄e kur̄e n̄e. Tā nh̄um Sim̄aw P̄etre m̄e Pawre m̄e Jejus nh̄y h̄a m̄e ahkre ho m̄e pa xw̄ynhj̄e kw̄ȳjaja m̄e ur̄ak n̄e k̄ep Ijaew tā m̄e kurom Jejus hk̄ot amnh̄i xunhw̄y nh̄um m̄e tee ri ja h̄a m̄e omu m̄e kam̄a gryk t̄yx n̄e tanhm̄a m̄e hip̄ex to ho pa. Tā nom nh̄um m̄e tee ri amnh̄i kukam̄a hamaxp̄er n̄e Jejus kaga hk̄et n̄e. M̄e kot m̄e hip̄ex kati ht̄a na prem ar̄i Tirt̄um Kar̄o nh̄y h̄a m̄e piit̄a m̄e k̄am tanhm̄a Jejus kot m̄e pan̄e amnh̄i nh̄ip̄ex to h̄a har̄enh o pa. Kam n̄e kapit 1 kam̄a wesik 8 jap̄er n̄e kam̄a har̄e. H̄amri nh̄um Rukre ā m̄e kot amnh̄i nh̄ip̄ex anh̄yrja piit̄a h̄a kagā n̄e Teopre hw̄yr kum̄e. N̄e k̄am m̄e har̄enh o:

Tirt̄um Kar̄o jar̄enh

Mat̄ewre 28.16; Makre 16.14; Rukre 24.36; Jūaw 20.19

¹ Pa Teopre? X̄a amex? E ot pa axte aw̄yr kagā nh̄ip̄ex n̄e kum̄e. Na wam ixte aw̄yr kagā nh̄ip̄ex n̄e m̄enhta kam̄a na pa pre am̄a Jejus kot tanhm̄a amnh̄i nh̄ip̄ex to h̄a har̄e n̄e h̄a kagā. Kot tanhm̄a amnh̄i nh̄ip̄ex to ho pa n̄e tanhm̄a m̄e ahkre hto ho paja krax rūm pa pre piit̄a h̄a kagā hpa n̄e aw̄yr kum̄e.

²⁻⁴ Kormā akup̄ym kaxkwa hw̄yr āpir xw̄ȳj̄e ri na pre ŷ h̄a m̄e ahkre ho pa kaxyw hk̄ot m̄e pa xw̄ynhj̄e kw̄ȳj̄e r̄e. Tā nh̄um m̄e k̄am hkur̄e xw̄ynhjaja kup̄i nh̄um amnh̄i x̄a ht̄yx k̄am hamak rax k̄am ty. H̄amri nh̄um Tirt̄um akup̄ym ho ht̄ir. Nom nh̄um ma akup̄ym kaxkwa hw̄yr āpir kur̄e kumr̄ex k̄et n̄e. Na pre xat̄a m̄e kot ŷ h̄a m̄e ahkre ho m̄e pa xw̄ynhj̄e maatīj̄e hw̄yr hap̄oj̄ nh̄um m̄e akup̄ym ht̄ir k̄am omu. Na pre hte nh̄yri m̄e hw̄yr hap̄oj̄ n̄e tanhm̄a m̄e ahkre hto n̄e m̄e k̄am:

—Na pre Tirt̄um m̄e ato hkra n̄e t̄am m̄e ate amnh̄i nh̄ip̄ex o apa kaxyw m̄e axunhw̄y.

Anh̄yr o m̄e ahkre h̄a ar̄igro ho 40. H̄amri n̄e kormā m̄e kamā pa ri axte tanhm̄a m̄e k̄am kap̄er to. Tirt̄um Kar̄o nh̄y h̄a m̄e k̄am kap̄er n̄e m̄e k̄am:

—E k̄er ka m̄e kr̄i ja kamā ri apa n̄e tokyx ma nh̄yh̄ym apa hk̄et n̄e. K̄e Inh̄ip̄ēx̄a Tirt̄um m̄e aw̄yr amnh̄i Kar̄o r̄e m̄an. Ra ixte m̄e am̄a har̄enh x̄a hk̄ot koja m̄e aw̄yr kur̄e nh̄um m̄e aw̄yr wr̄y n̄e m̄e akar̄o m̄a agj̄e ka m̄e r̄i kormā anhr̄a n̄e ma nh̄yh̄ym kr̄i hk̄ot ri m̄e k̄am kap̄er jar̄enh o ri m̄e hk̄ot apa.

⁵ —Jūaw Paxis na pre hte Tirt̄um m̄a ḡox k̄am m̄e hkr̄a kumr̄ar o pa. Tā koja Tirt̄um tokyx m̄e aw̄yr amnh̄i Kar̄o r̄e. Kot ixp̄anh̄a amnh̄i kaxyw m̄e ato m̄e am̄a ma hk̄et kaxyw m̄e aw̄yr kur̄e. Koja h̄a apkati gr̄ere nh̄um m̄e aw̄yr kur̄e nh̄um ixp̄anh̄a m̄e aw̄yr wr̄y n̄e m̄e am̄a agj̄e n̄e m̄e akam̄a m̄e ak̄ot pa ho pa. Ka m̄e r̄i kormā Jerujar̄e rūm ajap̄oj̄ n̄e ma m̄e k̄am Tirt̄um kap̄er jar̄enh o ri m̄e hk̄ot apa. An̄e.

*Jejus akup̄ym kaxkwa hw̄yr āpir ā har̄enh
Makre 16.19; Rukre 24.50*

⁶ Tā nh̄um m̄e axte akupr̄o. Jejus n̄e ŷ h̄a m̄e ahkre ho m̄e pa xw̄ynhj̄e maatījaja nh̄um m̄e hix̄et p̄e Oriw̄eh̄ti nh̄im̄ok ā axte axp̄en w̄yr akupr̄o. H̄amri nh̄um m̄e amnh̄i tā Jejus kukja n̄e k̄am:

—Kwa Pahih̄ti m̄e inh̄m̄a m̄emoj jar̄e. X̄a kot kaj tokyx ap̄e Tirt̄um kot m̄e ixw̄yr am̄enh̄ xw̄ynhj̄e ā amnh̄i jar̄e n̄e R̄om nh̄o xw̄ynhj̄e n̄e m̄e pahp̄e Ijaew ator̄ n̄a? H̄amri pa m̄e pamjaja amnh̄i to amnh̄ipt̄ar o ri ixpa. An̄e.

⁷ H̄amri nh̄um m̄e k̄am:

—Nā Inh̄ip̄ēx̄a pix na ā m̄emoj kot anh̄yrja kukam̄a āhpumunh. Tapxīpix na kot m̄emoj tanhm̄a ho h̄a ar̄igro n̄e m̄emoj tanhm̄a ho h̄a mytwr̄ȳ pumunh mex. No m̄e kajaja mo kaxyw kot ka m̄e amnh̄i katorta kukam̄a amnh̄i jar̄enh ma?

⁸ Nā kot paj ām m̄e am̄a m̄emoj to pyxire n̄e hkukam̄a har̄e. Koja Tirt̄um tokyx m̄e aw̄yr amnh̄i Kar̄o r̄e nh̄um ixp̄anh̄a kot m̄e ato amnh̄ipt̄ar kaxyw m̄e akar̄o m̄a agj̄e. H̄amri ka m̄e ma pyka piit̄a hk̄ot anhr̄a n̄e ma m̄e k̄am ixkap̄er jar̄enh o ri m̄e hk̄ot apa. Jar Jerujar̄e kam̄a n̄e pika p̄e Jutej k̄ot n̄e nh̄am pika p̄e Samar kam̄a n̄e pika piit̄a hk̄ot m̄e k̄am ijar̄enh o ri m̄e hk̄ot apa. Ā m̄e ate amnh̄i nh̄ip̄ex anh̄yr pix kukam̄a kot paj m̄e am̄a har̄e. An̄e.

⁹ Nh̄um pre ā Jejus m̄e k̄am kap̄er an̄e h̄amri n̄e m̄e k̄ep k̄anh̄m̄a āpir o t̄e n̄e m̄e noo mā ma kaxkwa hw̄yr āpir o t̄e n̄e kakr̄am ax̄a n̄e m̄e k̄ep akunok.

¹⁰ H̄amri nh̄um m̄e tee ri hap̄er o kuh̄e r̄ah̄a nh̄um m̄eh̄o myja wa axkrut n̄e m̄e hw̄yr

wrÿ nê mē kutā wa xa. Wa ê hakaj nê wa xa.

¹¹ Hāmri nê mē kām:

—Pa Garirej nhō xwÿnhjaja? Kwa mo kaxyw na ka mē tee ri kaxkwa pumunh o akuhê? Tirtūm na akupÿm amnhī wÿr Kra Jejus o api ka mē àpir kām omu. E mē tee ri hkukamā ajamxpēr kêt nê. Koja nhÿmā man akupÿn mē awÿr wrÿ. Te mē arūm kaxkwa hwÿr àpirja pyrà nê akupÿn mē awÿr wrÿ ka mē omu. Anê.

Akupÿm Jerujarē hwÿr mē mrar ā mē harēnh

Rukre 24.52

¹² Tā nhūm Jejus nhÿ hā mē ahkre ho mē pa xwÿnh maatijaja wa kuma nê awjanā nê ma akupÿm krīm mra. Hixêt pē Oriwēhti rūm ma akupÿm Jerujarē hwÿr mra. Wÿr jawÿ nhūm mē akupÿm hpōx tokyx anê.

¹³ Hāmri nê akupÿm kÿx pē ixkreja wÿr api nê agjē. Na pre

Simāw Pêtre nê

Juāw nê

Xiakre nê

Andrehti nê

Firipti nê

Tomas nê

Patoromew nê

Matēwre nê

Xiakre hō pē Apew kraja nê

Simāw Jerox nê

Jut pē Xiakre hkraja.

Mē piitā Jejus nhÿ hā mē ahkre ho mē pa xwÿnh maatijaja na pre mē.

¹⁴ Nê määnēn mē hkôt mē hkwyjaja. Jejus katorxā Marir nê Jejus tōjaja nê Jejus kot tanhmā mēni ho mex to xwÿnh kwÿjaja nhūm prem kÿx pē ixkreja wÿr Jejus nhÿ hā mē ahkre ho mē pa xwÿnh maatijē hkôt gjēx pa. Hāmri nê xatā axpēn wÿr akuprō nê Tirtūm mā amnhī jarēnh o hkrī.

Tirtūm kot Jut Kariot pānhā mēhō xām ā harēnh

Matēwre 27.3-10; Juāw 15.27

¹⁵⁻¹⁹ Tā nhūm mē kot Jejus kôt amnhī xunhwÿr xwÿnhjaja ra kēp 120. Jakamā nhūm mēmo arīgro hā axpēn wÿr akuprō nê hkrī. Nhūm Simāw Pêtre kānhmā xa nê tanhmā mē kām Jut Kariot jarēnh to nê mē kām:

—E Jejus kôt ixtō nê ixtōxjaja. Pa mē amā tanhmā finat Jut Kariot jarēnh to ka mē inhma. Na pre axtem nê mē pahkwÿjē mā Jejus ā amÿnē nê hpānhā kaxpore hkwyjamÿ nē o tē nê ho amnhīm pyka hkwyjaprō. Tā tanhmā amnhī to nê nhÿri ō pyka kamā tēm nê amnhī tu katōk nê hkrēx kato nê ty nê hkamrō ho ō pyka xy hpa. Jakamā nhūm Jerujarē nhō xwÿnhjaja harēnh na nê pykaja ā hixi mē nhūm kēp “pyka kamrōhti.” No mē pahpē Ijaew kapēr kām kēp “Ajetām.” Annepēm na pre Tirtūm Karō finat Tawi

mā Jut Kariot kukamā tanhmā harēnh to. Kormā kator nê kot tanhmā amnhī to hkêt tā nhūm ra hkukamā omu nê Tawi mā harē. Kot axtem nê mē kām Jejus ā amnēnhja nhūm hkukamā omu nê Tawi mā harē nhūm kuma nê ō ri hā kagā. Tā nhūm kot hkukamā hā kagā hkôt nhūm ā Jejus nhÿpēx anê. Jut Kariotja mē panhō na pre. Na pre Jejus mē pahpyrà nê amnhīm kuta. Mē pahpyrà nê ŷ hā kapēr jarēnh o pa kaxyw. Tā nhūm axtem nê ā hipēx anê.

²⁰ Nom na pre Tawi kot Tirtūm mex ā grer ā kagā kot ra hkukamā tanhmā harēnh to. Kagā hkwy pē Sam kamā kot harēnh kot:

Kot amnhī tomnuj xwÿnhnta nhōrkwy koja hkapyrÿn kuhē ho kuhē nhūm mēhōj mÿr pē kamā pa hkêt kumrēx. Koja ām arī hkapyrÿn kuhē ho kuhē.

Nom kot Jejus mā tanhmā amnhī nhÿpēx to ho paja kē mēhō mÿr pē ho amnhīptā nê hpānhā Jejus nhÿ hā mē ahkre ho pa. Anê.

Ā Tirtūm kapēr ā kagā htūm kot Jut Kariot kukamā harēnh kot anhÿr.

²¹ Jakamā e ixkwÿjaja. Kot puj mē hpānhā mē atō xām ka Jut mÿr pē mē pahpē Jejus nhÿ hā mē ahkre ho ixpa xwÿnhjē hkôt Jejus akupÿm htÿr ā harēnh o apa.

²² E mē atō na ka pre mē ixpyrān finat Juāw Paxis kot Jejus hkrā kumrār ā omu? Nē Jejus kot ri tanhmā amnhī nhÿpēx to ho pa xā hkrax rūm ka mē ixkôt ri omunh o ri apa? Nē htyk kām omu nê akupÿm htÿr kām omu nê ma akupÿm kaxkwa hwÿr àpir kām omu? E mē atō na ka pre mē ixpyrān ā kot amnhī nhÿpēx anhÿr ā omunh par o ri hkôt apa? ā mē ate kot amnhī nhÿpēx anhÿr ā omunh o apa xwÿnhjē hō kot paj mē ata ka Jut Kariot mÿr pē mē ixpyrān ma mē kām Jejus akupÿm htÿr ā harēnh o ri apa. Anê.

²³ Nhūm pre ā Simāw Pêtre mē kām kapēr anê. Hāmri nhūm mē kuma nê axpēn pumunh o hkrī hāmri nê Maxitre mē Jujere wa kām hamaxpēr. Jujere na pre hixi axkrunēpxi. Na pre kēp Jujere nê kēp Pasapas nê kēp Justi.

²⁴⁻²⁵ Hāmri nhūm mē wa hā Tirtūm kukja nê kām:

—Pa Tirtūm? Nā na pre finat Jut Kariotja Jejus kaga nē ty nē kot amnhī tomnuj mÿrapē ma mē kot amnhī xā htÿx kamā hamak tūm xata wÿr ma mō. Tā ot pa mē ixte mēhō kot mÿr pē mē ixpyrà nê Jejus nhÿ hā mē ahkre ho pa kaxyw mēhō hā akukjēr kaxyw akuprō. Ate mē xpiitā tanhmā mē ixte amnhī nhÿpēx to ho ixpa hā mē ixpumunh par Tirtūm. Ate mē ijamaxpēr kôt mē ixpumunh par nē mē ixte tanhmā amnhī nhÿpēx to hā mē ixpumunh par. Jakamā e. Ota Maxitre mē Jujereja wa nhÿ. Nhÿ kot kaj amnhīm ata? Kot paj mē kēn pijakrutja ā wa hixi xi nē ho āk nē hō

py. Hāmri ka amā hprām xwýnhnta ta. Kêr pa mē kên pumunh kêt rāhā hō py nē hā hixi pumu nē amā hprām xwýnh kôt omunh kurē kumrēx. Anē.

²⁶ Nhūm prem ā Tirtūm mā kapēr anē hāmri nē kēja o axkamur nē ho ñk nē omunh kêt rāhā ja py nē omu nhūm hā Maxitre nhixi nō. Jakamā nhūm Jejus nhỹ hā mē ahkre ho mē pa xwýnh maatijaja amnhĩ kôt kumē nhūm mē akupým kēp 12.

2

Tirtūm Karō kot mē hwýr wrýk ā harēnh Rukre 24.49; Atre 4.31, 8.15, 10.44, 19.2

¹ Tā nhūm mē hkính pē Pētekos kato nhūm mē kot Jejus kôt amnhĩ xunhwýr xwýnhjaja nhỹri axpēn wýr akuprō nē hā hkính. Pētekosja ā na pre hte Ijaew mē hpur kām meō rúnh ā hkính kaxyw axpēn wýr akuprō nē hā hkính. Jakamā nhūm mē kot Jejus kôt amnhĩ xunhwýr xwýnhjaja haxwýja axpēn wýr akuprō.

² Hāmri nē kaxkwa kamā mēmoj ma. Nhūm mēmoj te kók xápēr týx krihkrit pyrāk o mē hwýr wrýk o mō nē mē pikuprōnh xā hā ixkreja wýr axā nhūm mē piitā kuma.

³ Hāmri nhūm mēmoj te kuwy jakrax pyrākja ahpýnhā mē hwýr anhgrā nē mē hkrā nhīmōk ā hikwý.

⁴⁻¹³ Tirtūm Karō na pre. Tām mē hwýr wrýk jakamā ā ri mē hipēx anē. Hāmri nē kot mē ho amnhĩptār kaxyw mē hkarōm gjēx pa nhūm mē ý hā tanhmā kapēr to ho kuhē. Nom mē kapēr o kapēr kêt nē. Axtem mē kapēr kwý ho kapēr. Tirtūm Karō kot tanhmā mē ho jakamā nhūm mē axtem mē kapēr kwý ho kapēr. Jao ahpýnhā mē kapēr kwý ho Tirtūm mā mex o mex ā harē. Na pre Ijaew kwýjaja ahpýnhā pyka hō kamā ri mē hkôt pa nē mē kapēr ma nē ho kapēr o pa. Tā akupým Jerujarē hwýr pan pōj nē kamā ri pa ho pa. Hāmri nē mēmojta ma nē ma Jejus kwýjē hwýr hprōt nē ahpýnhā mē kapēr ā mē kuma nē tee ri mē omunh o kuhē. Amnhĩ jaēr pē mē kuma nē tanhmā axpēn mā mē harēnh to ho:

–Kokýý. Garirej nhō xwýnhjaja kot mē pakapēr mar kêt tā ra tanhmā amnhĩ to nē ahpýnhā ri mē pakapēr o kapēr. Ahpýnhā mē pakapēr nē ahpýnhā mē panhō pyka htā nhūm mē ā ri mē pakapēr o kapēr anē.

Na pika pē Pat
nē Met
nē Erāw
nē Mēsopotām
nē Jutej
nē Kapatos
nē Pōt
nē As
nē Prik
nē Pāpir

nē Ejit
nē Sirēn wýr Ripja
nē krī pē Rōm
nē gō hipōk pē Kret
nē Arap.

Nē mē pahkwýjaja mē pahpē Ijaew kumrēx
nē mē pahkwýjaja amarī ri amnhĩ to Ijaew.

Ām ahpýnhā mē panhō pyka nē ahpýnhā ri mē pakapēr.

–Tā pu mē ahpýnhā mē pakapēr kām mē kapēr ma. Tirtūm mex ā mē kot axpēn mā harēnhja pu mē hā mē mar mex nē. Anē.

Nhūm prem ā axpēn mā mē harēnh anē nē tee ri mē omunh o kuhē. Amnhĩ jaēr pē amnhĩ kapēr kām mē kapēr ma nē tee ri hamaxpēr nē axpēn mā:

–Kokýý. Tanhmā mán pre wem amnhĩ to nē ra mē pakapēr ma nē mē pakapēr o kapēr? Anē.

Nhūm mē hkwýjaja axtem nē ri mē hā hpēr o axkē nē axpēn mā:

–Tk. Ām mē pipānh ā ā ri mē kot amnhĩ nhīpēx anhwýr kēnā. Anē.

Simāw Pētre kot mē kām ujarēnh Atre 3.12-26

¹⁴ Hāmri nhūm Simāw Pētre ā mē kapēr anhwýrja ma hāmri nē kýx pē mē kām kapēr nē mē kām:

–E Jerujarē nhō xwýnhjaja nē mē apē ixkwý Ijaew. Pa mē amā mēmoj jarē ka mē inhma nē inhmar týx nē.

¹⁵ Na ka mē atýx ri mē ixpipānh ā mē ixkamnhix. Mē ixkrā pipānh kêt. Kormā myt kaxkwa nhīpōk wýr htēm kēnā. Na hte Ijaew kwýhtā kagōxyhti ho hkōm kêt nē.

¹⁶ Ja na pre Tirtūm amnepē mā ā mē ixte amnhĩ nhīpēx anhwýrja kukamā mē ijarē nhūm ý hā kapēr o pa xwýnh finat Joew mē ixkukamā hā kagā. Nē hā kagā ho:

¹⁷ Koja nhỹrmā mēmoj piitā hapēx kaxyw pa mē piitā mē hwýr Ixkarō rē nhūm ma mē hwýr wrý nē mē hkarō mā agjē. Hāmri nhūm mē hkanrēhā mē hkra xāptār nywjaja ma mē kām ixkapēr jarēnh o ri mē hkôt pa. Koja mē hpimtir kām amnhĩ kukamā mēmoj pumu. Nē mēhpigētjaja haxwýja. Kôt paj mē hpimtir kām tanhmā mē kām ixkapēr to.

¹⁸ Nē kot paj mē kot ixkōt ri tanhmā amnhĩ nhīpēx to ho mē pa xwýnhjē hwýr Ixkarō rē nhūm mē ý hā ma mē kām tanhmā ixkapēr jarēnh to ho ri mē hkôt pa.

¹⁹ Kot paj kaxkwa kamā nē pyka kamā aa mē kot mēmoj pumunh kêt kwý ho anē nhūm mē amnhĩ jaēr pē omu. Jao nhỹri mē hkamrō pumu nē kuwy

- pumu nê kuwy hkûm pumu hāmri nê tee ri amnhî kukamā hamaxpêr.
- 20 Nê koja myyti ahtyk nhûm mytwrÿre haxwÿja te mry kamrô pyrāk. Pahihti Jejus akupÿn hpôx xā hā arġro xwÿj ri koja mēmoj ā amnhî nhîpêx anê. Akupÿn hpôx xā hā arġro koja mex kumrêx.
- 21 Tā koja mēhō mēmoj kot ā amnhî nhîpêx anhÿr ā omu nê amnhî kaxyw inhmā hamaxpêr nê amnhî to ixwÿ pa kuma nê ho ixkra nê mēmoj punujta pē utā. Anê.
- Na pre ā Tirtûm kapêr anê nhûm finat Joewja mē pamā hā kagā.
- 22 E pa mē amā tanhmā Jejus jarênh to ka mē inhma. Nā Najare nhō xwÿnh na pre. Mē pahte Tirtûm nhÿ hā kot tanhmā amnhî nhîpêx to ho pa hā omunh kaxyw na pre Tirtûm mē pahwÿr kumê nhûm ŷ hā mē panoo mā tanhmā amnhî nhîpêx to ho pa. Nê aa mē pahte mēmoj pumunh kêt kwÿ ho anhÿr o pa pu prem hā omu.
- 23 —Tā ka prem tanhmā kaxyw ajamaxpêr punuj to nê apî. Tirtûm ra kot amnepê mā ja kukamā ja hā mē apumunh mex tā mē pahwÿr kumê ka mē axtem nê apî. Jao mē kot htÿx ri amnhî nhîpêx o mē pa xwÿnhjê mā agō nhûm mē kupî. Pî kahpa hā kunhō nhûm ty. No ām mē kajaja na ka prem mē kām hā amÿnê nhûm mē ā mē amā hprām xā hkôt hipêx anê nê mē amā kupî.
- 24 —Tā nhûm Tirtûm akupÿm ho htÿr nhûm akupÿm htÿr o htÿr nhûm mē htykja tee ri kot amnhî kôt mēnh prām kaprÿ.
- 25 Amnepêm na pre finat Tawija Jejus akupÿm htÿr kukamā harê. Te Jejus tām kapêr pyrāk o kapêr nê kapêr o: Na hte Pahi Maati ixkôt pa ho pa rāhā nê. Kot inhîhkō hā ixtānopxar o pa jakamā kot paj inhmā na hkêt nê ri ixāmnhîx ijamakêtkati nê ri ixpa.
- 26-27 Pa Tirtûm? Nā kot paj nhÿrmā ixytk tā arġ amnhî wÿr akām ama. Kot kaj mē htykjê kamā ixkarō rer kêt nê. Ixte akapêr kôt amnhî nhîpêx mex o ri ixpa jakamā koja inhî kormā omnu nê hkro hkêt ri ka akupÿm ixto ixtÿr. Jakamā na pa inhmā ixytk pyma hkêt nê ixkĭnh nê ijamakêtkati nê ri ixpa. Nê amnhî kĭnh jarênh rāhā ho ri ixpa.
- 28 Na ka pre akupÿm ixto ixtÿr ā amnhî jarê pa ixtÿr tûm nê ixpa ho ixpa kaxyw. Tā ate ixkôt ri apa rāhā jakamā pa ixkĭnh nê ri ixpa. Anê.
- 29 Ā na pre mē panhîgêt finat Pahi Tawija Jejus htyk nê akupÿm htÿr kukamā harênh anê. No tām amnhî jarênh kêt nê. Tawija na pre ty nhûm mē haxā nhûm htem arġ haxār xā hā pika ho mex o pa. Tā tām ā kot amnhî jarênh anhÿr ro nhÿx akupÿm htÿr nhûm mē arġ haxār xā kaprÿ ho mex o pa hkêt nê.

30 Pahi Tawi kêp Tirtûm nhÿ hā kapêr jarênh o pa xwÿnh jakamā nhûm Tirtûm kām hkanrêhā htāmnhwÿ Jejusja kukamā harê nê kām:

Koja nhÿrmā akanrêhā atāmnhwÿjê hō amÿr pē apyrā nê mē ho amnhîptār o pa. Ām hāmri na pa amā ja jarê. Anê.

31 Nhûm pre ā Tirtûm Tawi mā mē pakaxyw ām mā xwÿnhnta jarênh anê nhûm kuma. Nê mar tÿx jakamā hkukamā htyk nê akupÿm htÿr ā harê nê hā kagā. Nê hā kagā ho:

Koja Tirtûm mē htykjê kamā hkarō rer kêt nê nhûm aa ĩ omnu nê hkro kêt. Anê.

Ā na pre finat Tawija Jejus Kris kukamā harê nê hā kagā anê.

32 Kot harênh xwÿnh Jejusja tām na pre Tirtûm akupÿm ho htÿr pa mē pamjaja akupÿm htÿr kām omu. Hāmri nê mē ixte omunh xā hkôt ā mē amā harênh anê. Anê.

Nhûm pre ā Simāw Pêtre mē kām Jejus jarênh anê. Hāmri nê mē kām:

33 —Na pre Tirtûm akupÿm amnhî wÿr Kra Jejus o api. Hāmri nê kām anê nhûm ĩhkō hā mēmoj piitā ho amnhîptār o hkrĭ. Hāmri nhûm Tirtûm kot kām amnhî jarênh xā hkôt kām amnhî Karō gō. Tā nhûm ra amnhî pyrā nê mē ixwÿr kurê nhûm jarāhā mē ixwÿr te kuwy jakrax pyrā nê mē ixwÿr wrÿ nê mē ixkarō hwÿr gjêx pa. Hāmri pa mē ŷ hā ahpÿnhā mē akapêr o ixkapêr ka mē inhma. Tā mē akwÿjaja axtem nê mē xpipānh ā mē ixkamnhîx.

34 No finat Tawija na pre tām kaxkwa hwÿr āpir ā amnhî jarênh kêt nê. Jejus kot ĩ ho kaxkwa hwÿr āpirja na pre harê nê harênh o:

Na pre Tirtûm inhō Pahihti mā kapêr nê kām:

35 “E jar inhîhkō hā nhÿ.

Pa amā mē kām akurê xwÿnhjê gō ka mē ho amnhîptār o akri.” Anê.

Ā na pre finat Tawija Tirtûm kapêr jarênh anê. Nom tām ĩ rāhā kaxkwa hwÿr āpir ā amnhî jarênh kêt nê. Pahihti Jejus na pre ā hā harênh anê.

36 Jakamā kwa ixkwÿ Ijaew. Mē inhma nê inhmar tÿx nê. Mē ate Jejus ā axāmnênh nhûm mē kot mē amā pî kahpa hā hpĭr xwÿnhnta. Tām na pre Tirtûmja kêp mē panhō Pahihti kaxyw ām. Nê kêp mē papytār xwÿnh kaxyw mē pakaxyw ām. Anê.

37 Nhûm pre ā Simāw Pêtre mē kām ujarênh anhÿr o xa. Hāmri nhûm mē tee ri ujarênhja ma nê hkaprĭ nê. Nê tee ri amnhî kukamā hamaxpêr nê hamaxpêr o:

—Hêxta waa nê. Pêr ām hāmri na pre Jejus mē pamā amnhî jarênh tā pu prem amnhî kaxyw hkôt pajamaxpêr kêt nê axtem nê kupî. Anê.

Hāmri nê amnhî tā mē hkukja nê Simāw Pêtre mā:

—Kwa ã kot anhÿr jakamã tanhmã kot paj mẽ amnhĩ nhĩpêx to? Anê.

³⁸ Hãmri nhũm mẽ kãm:

—Nà kër ka mẽ tee ri ate amnhĩ tomnuj mã ajamxpêr nê akapri nê. Hãmri nê Jejus Kris kôt amnhĩ xunhwÿ. Pa mẽ ja hã mẽ apumu nê Jejus nhÿ hã mẽ akra kumrà. Hãmri nhũm Tirtũm ja hã mẽ apumu nê te amnhĩ katut kôt mẽ ate amnhĩ tomnuj piitã rênh par pyrã nê axte kãm hamaxpêr kêt nê. Hãmri nê mẽ ixkuxwar mẽ awÿr amnhĩ Karô rê.

³⁹ Kãm mẽ awÿr rênh prãm. Mẽ amã nê mẽ akanrêhã mẽ akra nê mẽ atãmnhwÿjê mã nê mẽ kot kormã Tirtũm kapêr mar kêt xwÿnhjê mã. Æm mẽ kot amnhĩ to hwÿr xwÿnh piitã nhũm kãm mẽ hwÿr rênh prãm. Anê.

⁴⁰ Nhũm pre ã Simãw Pêtre mẽ kãm ujarênh anê. Mẽ kãm kapêr xihÿx o kapêr ry nê. Hãmri nê mẽ kãm:

—Koja nhÿrmã Tirtũm mẽ kot tanhmã amnhĩ tomnuj to ho mẽ pa xwÿnhjaja tanhmã mẽ homnuj tÿx to. Jakamã kex mẽ tokyx mẽ ate amnhĩ tomnuj kaga kê tanhmã mẽ ato hkêt nê. Anê.

⁴¹ Hãmri nhũm mẽ hkwyjaja kapêr mar tÿx nê amnhĩ kaxyw Jejus kôt hamaxpêr nê hkôt amnhĩ xunhwÿ. Mẽ ohtô rax nê hkôt amnhĩ xunhwÿ. Mẽ kêp 3.000 nê hkôt amnhĩ xunhwÿ. Hãmri nhũm mẽ kot Jejus nhÿ hã kapêr jarênh o mẽ pa xwÿnhjaja mẽ hkrã kumràr pa. Mẽ kêp Jejus kwÿ hã amnhĩ to amnhÿr kaxyw mẽ hkrã kumràr pa.

⁴² Hãmri nhũm mẽ ra mẽ kot Jejus kôt amnhĩ nhĩpêx xwÿnhjê hkôt amnhĩ nhĩpêx o pa nhũm Jejus nhÿ hã mẽ ahkre xwÿnh maatijaja apkati mẽ Jejus kapêr o mẽ ahkre nhũm mẽ mar tÿx nê ra Jejus kôt amnhĩ nhĩpêx mex o mō. Nê gaa nê hkôt amnhĩ nhĩpêx mex o pa. Mẽ kãm kapêr mar prãm tÿx jakamã na pre htem axpên wÿr akuprô nê axpên kutã apku nê Tirtũm mã amnhĩ jarênh o hkrĩ. Nê mẽ kãm axpên to mex pix prãm o axpên kôt pa ho pa.

Jejus kwÿ kot tanhmã amnhĩ nhĩpêx to hã mẽ harênh

Atre 4.32-35

⁴³ Tã nhũm Jejus nhÿ hã mẽ ahkre ho mẽ pa xwÿnh maatijaja xatã Tirtũm nhÿ hã mã mẽ kot mẽmoj pumunh kêt kwÿ ho anhÿr o ri krĩ nhô xwÿnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nê mẽ kamã no puma ho tee ri tanhmã Tirtũm mã hamaxpêr to.

⁴⁴ Nhũm mẽ kot Jejus kôt amnhĩ xunhwÿr xwÿnh piitã mẽmoj to axpên kutã nojarêt o pa. Jao axpên pê ri mẽmoj to ðxÿ hkêt nê pa.

⁴⁵ Jakamã nhũm mẽhō kêp amrakati nhũm mẽ ja hã omu hãmri nê ò pyka hkwy ho wênê rÿ mẽ hikukrêx kwÿ ho wênê nê kãxpore jamÿ nê ma o mra nê mẽ kãm kugō. Na

pre hte ã mẽ kot Jejus kôt amnhĩ xunhwÿr xwÿnhjaja axpên nhĩpêx anhÿr o pa.

⁴⁶ Hãmri nê apkati mẽ Tirtũm mã amnhĩ jarênh xã hã ixkre hwÿr mra nê kãm mex o mex ã harê. Nê hamakêtkati nê amnhÿx ri hkĩnh kãm axpên nhōrkwy hkôt ri apkur o pa.

⁴⁷ Pê Tirtũm mã mex o mex ã harênh o ri axpên kôt pa. Æ mẽ kot amnhĩ nhĩpêx anhÿr o pa jakamã nhũm krĩ nhô xwÿnh piitã kãm mẽ hkĩnh nê. Nê mẽ hkwyjaja apkati mẽ mẽ hwÿr mra nê mẽ hkôt axkamê nê mẽ urak nê Jejus kôt amnhĩ xunhwÿr nhũm Tirtũm ja hã mẽ omu nê mẽ ho hkra. Jakamã nhũm mẽ ra ohtô rax kumrêx o mō.

3

Te grã xwÿnh jarênh

Juãw 14.12-14; Atre 14.8-10

¹ Tã nhũm apkati hō hã nhũm Simãw Pêtre mẽ Juãw wa ma Tirtũm mã amnhĩ jarênh xã hã ixkre hwÿr wa tē. Na pre hte myt àhpanh grire nhũm mẽ piitã kot Tirtũm mã amnhĩ jarênh kaxyw hwÿr mra. Jakamã nhũm Simãw Pêtre mẽ Juãw wa haxwÿja ma hwÿr wa mra.

² Nhũm mẽhōja hakwakrem hkrĩ. Katorxã nhōxã hkre rũm hte grã nê kator xwÿnhnta. Nê arĩ hkrĩ ho hkrĩ nê aa kãnhmã ãm nê ri pa hkêt nê. Nhũm hte hkrãmnhwÿjaja apkati mẽ hamÿ nê ma o pa nê Tirtũm mã amnhĩ jarênh xã hã ixkre jakwakrem hkrĩ nhũm mẽ hwÿr o hkrĩ. Hakwakreja mẽ kot kãm: “Mẽ gjêx xã mex” anhÿr xwÿnhnta kapem hwÿr mẽ mra xwÿnhjê hwÿr o hkrĩ.

³ Tã nhũm Simãw Pêtre mẽ Juãw wa tē nê ixkreja wÿr wa àr o tē nhũm hte grã xwÿnhnta wa omu nê kãxpore hã wa kuwÿ

⁴ nhũm Simãw Pêtre omu nê kãm:

—E amnê wa ixpumu. Anê.

⁵ Hãmri nhũm kuma nê htÿx ho wa kot kãm kãxpore hkwy nhōr ã wa hkamnhÿx nê wa omu

⁶ nhũm Simãw Pêtre kãm:

—Nã ixkãxpore hkêt. Nom kot paj Jejus Kris xãhpumunh xã ho tanhmã anhĩpêx to. E pa Jejus Kris pê Najare nhô xwÿnhnta nhÿ hã amã ixkapêr jakamã tokyx kãnhmã xa nê ri mra. Anê.

⁷ Hãmri nê upôk rũm hpa hã kupy nê kãnhmã ãm nhũm hte mex nê kãnhmã xa nê amnhĩ te karo ho ri mra.

⁸ Hãmri nê hte mex ã amnhĩ pumu nê hkĩnh tÿx nê. Nê hkĩnh xaj ma wa hkôt harĩ ho tē nê wa hkôt ixkrem axã. Tirtũm mã mex o mex ã harênh pê harĩ ho wa hkôt tēn axã.

⁹ Hãmri nhũm mẽ piitã amnhĩ jaêr pê akupÿm mex ã omu nê kamã no puma nê.

¹⁰ Nê axpên mã:

—Kokÿÿ mũjti na pre hte mẽ gjêx xã mex kamã mẽ hwÿr rãhã ho hkrĩ htã nhũm

Tirtüm tanhmã ho nhũm kãnhmã xa nê ri mraar mex kurê kumrêx. Hêxta waa nê. Anê.

*Simãw Pêtre kot mē kām ujarēnh
Rukre 24.46-47; Atre 2.14-36*

¹¹ Hāmri nhũm hte mex xwýnhja Simãw Pêtre mē Juãw wa hkôt ixkre hwýr axà nê wa kuri xa. Nhũm mē piitã amnhĩ jaêr pê harēnh ma nê hwýr hprôt nê agjê nê omu. Mē kot ixkre nhĩkjê jarēnh o: “Pahĩ Sarumãw nhõ” anhýr xwýnh jarēnhja wýr nhũm mē hprôt nê hte mex xwýnhnta kamã no pyrna ho kuhê. Nê kuri Simãw Pêtre mē Juãw wa omu nê expēn mã wa harēnh o:

—Hêxta waa nê. Tanhmã na we wa amnhĩ to nê akupým kãm hte ho mex nhũm ri mra?

Anê nê wa kamã no pyrna nê.

¹² Hāmri nhũm Simãw Pêtre mē kuma nê mē kãm:

—Pa ixkwýjaja. Kwa mēmo na ka mē ri mē ixkamã ano pyrna ho akuhê? Xà wa ixãhpumunh týx xà ho na pa wa ho mex? Nà ja kot anhýr kêt. Rý xà wa ixte Tirtüm kôt amnhĩ nhĩpêx mex o ixpaja o na pa wa ho mex? Nà mãânēn ja kot anhýr kêt.

¹³⁻¹⁷ Mē ate omunh xwýnhnta Jesus tãm kot ho mex kênã. Kot amnhĩ kaxyw kãm hamaxpêr týx jakamã nhũm akupým ho mex ka mē omu.

—Finat Apraãw nê Ijak nê Jako mē hkwyjaja kot hkôt amnhĩ nhĩpêx o pa xwýnh pê Tirtümja. Tãm na pre akupým Kra Jesus o htír nê mex o mex ã harê. Mē ate hã axãmnēnh nhũm mē kot hpír xwýnhnta. Pahihti Pirat kot kãm urer kaxyw tã ka mē nê kãm akapêr kãm axihtýx nê. Nom Jesus tãm kot amnhĩ nhĩpêx o pa xwýnh na pre. Na pre hte amnhĩ nhĩpêx mex rãhã ho pa htã ka mē axtem nê hkaga. Nhũm pahihti Pirat mē ate kot kãm urer kêt ã axihtýx nhũm kãm urer kêt nê õ pôristi mã kugõ nhũm mē amã kupĩ. Mē kajaja mē amã hprãm xà hkôt mē amã kupĩ. Tirtüm kot mē pahwýr mēnh tã ka mē axtem nê apĩ.

—Nom mē ate kêp Tirtüm Kra hã omunh kêt jakamã na ka prem ã hipêx anê. Mē kot mē ato amnhĩptãr xwýnhjê mē na ka prem amari apĩ. Na prem mē axãmnēnh xà hkôt mē amã pí kahpa hã kunhõ nê ã hpír anê. Kêp akupým mē pahto mē pahtír xwýnh tã ka prem axtem nê apĩ. No nhũm Tirtüm akupým ho htír pa prem akupým htír kãm omu.

¹⁸ —Amnepêm Tirtüm nhý hã kapêr jarēnh o mē pa xwýnhjaja na prem Tirtüm kot mē pakaxyw ãm xwýnhja kukamã tanhmã harēnh to nê hã kaga nê mē kãm harēnh o pa. Kot amnhĩ xà htýx kãm hamak kãm htykja kukamã nhũm pre htem harēnh o pa. Tã ã Tirtüm kot kukamã harēnh anhýr xãja kôt ka mē ã hipêx anê nê apĩ.

¹⁹ —Jakamã kwa mē tee ri mē ate amnhĩ tomnuj ã amnhĩ pumu nê tokyx hkaga. Hāmri nê amnhĩ to Tirtüm wý kê mē anê mē ate amnhĩ tomnuj piitã amnhĩ katut kôt rēnh pa.

²⁰ Hāmri nê mē ato mex nê ka mē kukwak ri akĩnh nê ajamakêtkati nê axãmnhĩx ri apa. Koja nhýrmã akupým mē pahwýr Jejus mē. Ra kot mē pakaxyw ãm kênã.

²¹ —Nom koja tokyx akupým wrýk kêt nê. Koja kormã kaxkwa kamã pa rãhã nhũm Tirtüm akupým kot mēmoj piitã ho mex par mē nhũm ri kormã akupým mē pahwýr wrý. Amnepêm Tirtüm nhý hã kapêr jarēnh o pa xwýnhjaja kot ja kukamã harēnh nê hã kaga xà hkôt.

²² —Na pre finat Mojes haxwýja Tirtüm nhý hã mē pahpãmjê mã tanhmã ja jarēnh to nê harēnh o:

Koja nhýrmã mē panhõ Pahi Maati Tirtümja te kot ra mē akaxyw pa ixãmja pyrà nê axte mē panhõ xãm. Mē panhõ koja. Koja nhýrmã inhmýr pê mōn pōj nê mē amã Tirtüm kapêr jarēnh o pa. Ka mē kapêr ma nê mar týx nê kapêr kôt amnhĩ nhĩpêx o ri apa.

²³ Koja mēhõ kuma nê ãm kuma nê hkôt amnhĩ nhĩpêx kêt nê nhũm Tirtüm tee ri ja hã omu nê kêp hkra hkêt ã harēnh kurê kumrêx. Anê.

²⁴ ã na pre finat Mojesja mē kãm Jejus kukamã ujarēnh anê. No ãm tapxipix na pre ã harēnh anhýr kêt nê. Tirtüm nhý hã mē kapêr o mē pa xwýnh piitã na prem ã mē kãm harēnh anhýr o pa. Kot harēnh o pa xwýnh kot wa finat Sãmuewja nê hkôt mē hkwyjê piitã ã Jejus kukamã hkwyjê mã harēnh anhýr o pa.

²⁵ —Tã mē pahpê mē hkamrõ hkwy na pu mē. Mē pahpê mē hkanrêhã mē htãmnhwýy. Mē pakaxyw na pre Tirtüm ã mē kãm kapêr anê. Nê Kraja kukamã finat Apraãw mã kãm:

Koja nhýrmã akanrêhã atãmnhwýjê hõ pyka piitã hkôt mē piitã mē ho mex o pa nhũm mē kukwak ri mex kumrêx nê ri pa. Anê.

²⁶ ã kot Kra hkukamã harēnh anhýr tã mē pakumrêxjê hwýr na pre kumê. Kot mē pahto mex nhũm mē pahte amnhĩ tomnuj kaga kaxyw nhũm mē pahpê Ijaew kumrêxjê hwýr kumê. Anê.

Nhũm pre ã Simãw Pêtreja hte grã xwýnh pumunh o mē kuhê xwýnhjê mã ujarēnh anê.

4

*Simãw Pêtre mē Juãw wa kot mē àptãr tũmjê mã kapêr ã wa harēnh
Rukre 21.12-13*

1-4 Nhũm Simāw Pêtre mē Juāw wa arī mē kām Tirtūm kapēr jarēnh o wa xa nē mē kām:

—Nà na pre Jejus ty nhũm Tirtūm akupŷm ho hŷr. Tā kot akupŷm ho hŷr jakamā koja nhŷrmā urāk nē akupŷm mē htyk xwŷnh piitā mē ho hŷr pa. Anē.

Hāmri nhũm mē kot wa mar o kuhê xwŷnh kwŷjaja wa kuma nē wa hkôt hamaxpēr nē wa urā nē Jejus kôt amnhī xunhwŷ. Jakamā nhũm ra mē kot Jejus kôt amnhī xunhwŷr xwŷnhjaja ohtô rax kumrēx. Ra mē kēp 5.000.

Hāmri nhũm axtem mē hkwyŷjaja wa hwŷr mra nē wa mar o kuhê. Mē ô patre nhô pôristi krāhtūm mē Satusew nhô xwŷnh kwŷjê mē nhũm mē ma Simāw Pêtre mē Juāw wa hwŷr mra nē tee ri wa kot mē ahkre hā wa mar o kuhê. Nē mē kām akupŷm mē hŷr jarēnhja ma nē wa kamā gryk nē. Satusew nhô xwŷnhjaja na pre htem akupŷm mē hŷr kôt hamaxpēr kêt jakamā nhũm wa akupŷm mē hŷr jarē nhũm mē tee ri wa kuma nē hamaxpēr punuj nē wa kamā gryk kato. Hāmri nē wa hā amŷnê nhũm mē wa unê nē ma wa o tē nē mē hagjēnh xā kamā wa haxā. Ra myt grire nhũm mē wa haxā. Wa kot mē hagjēnh xā kamā hā apkati nhũm rī kormā mē kot ujarēnh ā tanhmā wa ho kaxyw.

5-6 Tā nhũm apkati nhũm mē ohtô nē wa ujarēnh ā wa mar kaxyw Jerujarē kamā axpēn wŷr akuprô. Ijaew pigêtjaja nē mē aptār tūm kwŷjaja. Nē mē kot finat Mojes kapēr o mē ahkre ho mē pa xwŷnhjaja. Nē mē ô patre maati Anas mē hkwyŷja. Nē Ijaew nhô juisti Kajpas mē Juāw ô mē Aresānja. Nhũm mē kot Simāw Pêtre mē Juāw wa mar kaxyw axpēn wŷr akuprô.

7 Hāmri nē wa hā karô nhũm pôristi wa hwŷr tē nē wa haprô nē ma mē hwŷr wa o tē nē wa ho axā nē mē kutā wa ŷr nhũm wa nhŷ. Hāmri nhũm mē wa omu nē wa kām:

—E mē inhmā amnhī jarē. Mēhō xāhpumunh xā ho na ka pre wa hte grā xwŷnhhta ho mex? Mēhō na pre hwŷr war amē ka wa ho mex? Anē.

8 Hāmri nhũm Simāw Pêtre mē kām awjarē. Tirtūm Karô kot kām hamaxpēr o hihtŷx jakamā nhũm ŷ hā Ijaew pigêtjê mē mē aptār tūmjê mā awjarē nē mē kām:

9 —Tôe mēhō kot ho mex xwŷnhja ā mē ate wa ixkukjêr

10 jakamā kot paj mē amā harē ka mē ixte harēnhja ma. Wa ixpyrā nē mē apē Ijaew kēr ka mē wa ixkapēr mar tŷx nē. Jejus Kris pē Najare nhô xwŷnhhta. Mē ate hpír nhũm Tirtūm kot akupŷm ho hŷr xwŷnhhta. Tām na pre āhpumunh tŷx o akupŷm hte grā xwŷnhhta o mex. ŷ hā ixte kaxyw kām ixkapēr nhũm tām akupŷm ho mex.

11 Tirtūm kot mex o mex ā harēnh nē mē pakaxyw ām tā ka prem axtem nē hkaga. Nom Tirtūm kapēr ā kagā htūm kot ra mē

akukamā ā mē ate amnhī nhīpêx anhŷr ā mē ajarēnh nē mē ajarēnh kot:

Mē kot kēn o amnhīm ôrkwy nhīpêx kaxyw nē nhŷri kēn maati pumu nē htŷx omnuj ā hkamnhix nē hkaga. Mē kot hkaga htā nhũm Tirtūm mē kurom mex o kot kēn piitā hakrenh par ā omunh kurē kumrēx.

Anhŷr o kot mē ajarēnh. Te mē ate kēn maati kaga xwŷnh ā mē ajarēnh pyrāk. Tā ka mē ā mē kot mē akukamā mē ajarēnh anhŷrja kôt te mē ate kēn maati kaga pyrā nē Jejus kaga nē apī. Tirtūm kot amnhīm mex o mex ā omunh nē harēnh tā ka prem axtem nē hkaga.

12 Tapxipix na hte mē panē mē pahte amnhī tomnuj rē. Mēhō koja urāk nē āhpumunh tŷx o mē panē kurē? Mēhō koja āhpŷnhā pyka piitā hkôt urāk nē ā mē panhīpêx mex anē? Nā ām amrakati kumrēx. Ām Jejus pix. Tapxipix na pre Tirtūm ja kaxyw ām jakamā tapxipix na kēp mē pahkaprī xwŷnh maati. Anē.

13 Nhũm pre ā Simāw Pêtreja mē kām kapēr anē. Hāmri nhũm mē amnhījaēr pē kuma nē axpēn mā:

—Kwa wa kām mē pahpyma wa hā hkwyŷ jêt kêt kumrēx. Te ri wa htŷx ri wa pa pyrāk tā wa hamaxpēr tŷx kumrēx. Mān wa kēp Jejus kôt mē pa ho mē pa xwŷnh kwŷ jakamā na wa ā kapēr anē nā? Anē.

14 Hāmri nē tee ri kot tanhmā mēmoj tā wa kām ākjêr to hkukamā hamaxpēr. No nhũm hte grā xwŷnh ra kot mē hwŷr ar nē Simāw Pêtre wa kuri mex nē ām nhũm mē kot no ho omunh jakamā wa kām ākjêr kêt nē.

15 Hāmri nē wa kām anē nhũm wa mē kēp kato nē kapôt ā xa nhũm mē tanhmā wa kām nē kaxyw wa hā axpēn ma nē axpēn mā:

16 —Kwa tanhmā kot puj mē wa ho? Ra jar Jerujarē kamā mē piitā mē kot akupŷm hte grā xwŷnhhta mex ā wa omunh kēnā kot puj kêt mē kām wa kot ho mex hkêt ā wa harē.

17 Tā mē kot harēnh o hprôt pymaj kot puj mē axte Jejus jarēnh o pa nē wa hkurē. Ké hte grā xwŷnh jarēnhja ām jar mē pakamā hapêx. Nā kot puj mē ā wa kām karô anē. Anē.

18 Nhũm mē wa hā axpēn mar pa hāmri nē akupŷn wa hā karô nhũm wa akupŷn mē hwŷr axā nhũm mē wa kām:

—E Simāw Pêtre mē Juāw wa. Wa māmri ma tē. Nom kēr ka wa mē ixkapēr mar kumrēx. Kēr ka wa axte ri tanhmā mē kām Jejus jarēnh to ho ri apa hkêt nē. Ām kwarī ho kwarī. Anē.

19 Hāmri nhũm wa tee ri mē kuma nē mē kām:

—Nā Tirtūm tām kot ja hā wa inhmā karô kēnā kot pa kêt wa mē akapēr ma nē harēnh o ixpa hkêt nē.

²⁰ Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mē ahkre hto hã mar o hkôt ixpa. Nê akupÿm hĩr kãm omu. Jakamã tanhmã kot pa wa amnhĩ to nê mē kãm ja jarênh kêt nê? Nã kot pa wa mē akapêr mar xã hkôt ã amnhĩ nhĩpêx anhÿr hkêt nê. Anê.

²¹⁻²² Hãmri nhũm mē kuma nê tee ri mē kot tanhmã wa ho kaxyw. Te grã xwÿnhã hte grã nê hkrĩ ho hã amgrã pē 40 tã ra akupÿm mex nhũm mē piitã ja hã omu nê hã axpên mã Tĩrtũm mex o mex ã harênh o ri pa. Jakamã nhũm mē utãr xwÿnhjaja mē kuma nê kãm mē uma nê. Hãmri nê mē umaj tanhmã Simãw Pêtre mē Juãw wa ho hkêt nê. ãm axte wa kot Jejus jarênh o pa nê wa kãm kapêr kãm hihtÿx nê wa hano nhũm wa ma tē.

Mē kot amnhĩ to Tĩrtũm wÿr ã mē harênh Matêwre 18.19-20

²³ Tã nhũm Simãw Pêtre mē Juãw wa ma akupÿm Jejus kôt htõ nê htõxjê hwÿr wa tē nê mē kãm amnhĩ jarê. Nê patre krãhtũmjê mē mē ãptãr tũmjaja kot Jejus kapêr jarênh nê wa hkurê kamã hihtÿxja nhũm amnhĩ tã mē kãm mē harê.

²⁴ Hãmri nhũm mē wa kuma nê amnhĩ to Tĩrtũm wÿr kurê kumrêx nê kãm:

–Pa Pahi Maati? Nã mēmoj piitã ho akator xwÿnhã na ka. Na ka pre kaxkwa ho akato nê pyka ho akato nê gõ xujanãr o akato. Hãmri nê kamã mēmoj piitã ho akator pa.

²⁵⁻²⁶ Amnepêm na pre mē inhĩgêt Tawija amã tanhmã amnhĩ nhĩpêx to ho pa. Nê Akarõ nhÿ hã akapêr kwÿ jarê nê hã kagã. Nê kagãja kamã mē kot Pahihti Jejus kutã amnhĩ xunhwÿr xwÿnhjê jarê nê mē hã kagã. Mē hkukamã mē hã kagã nê mē hã kagã ho:

Mēmo mÿrapê na prem Ijaew kêt xwÿnhjaja Tĩrtũm kutã amnhĩ xunhwÿr?

Nê Ijaew haxwÿja. Mēmo mÿrapê na prem htÿx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwÿr pa.

Nê kot mē pakaxyw ãm xwÿnh Jejus Krisja nhũm mē mããnen kutã amnhĩ xunhwÿr pa.

Nê mē kot hpĩr kaxyw mē kãm hã amÿnê. Kwa mēmo mÿrapê na prem axtem nê ã amnhĩ nhĩpêx anê? Anê.

ã na pre finat Tawija Akarõ nhÿ hã mē harê nê hã kagã anê Tĩrtũm.

²⁷ ãm hãmri na pre mē hkukamã mē hã kagã. Ra mē kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprõ. Pahi Eroxo nê pahi Põn Pirat nê mē ixkwÿjaja nê mē kêp Ijaew kêt xwÿnhjaja axpên wÿr akuprõ nê Akra Jejus kutã amnhĩ xunhwÿr nê mē kot hpĩr kaxyw

hã amÿnê. Kot tãm amnhĩ nhĩpêx o pa nhũm ate mē ixkaxyw ãm xwÿnhjaja nhũm mē axtem nê kutã amnhĩ xunhwÿr.

²⁸ –Nom amnepêm kormã mē ixkêt ri na ka pre mē hkukamã ã mē kot amnhĩ nhĩpêx anhÿr ã mē omu. Mē kot tanhmã apê Akra Jejus to mē hpĩrta kukamã ka pre hã mē omu. Tã mē ixwÿr amê nhũm prem kupĩ. No ãm ajamaxpêr xã hkôt.

²⁹ –Tã ka mē omu. Na mē Jejus ã mē ixkamã gryk tÿx nê tanhmã hã mē ixto kaxyw. Jakamã kot kaj mē ixpê amã tanhmã amnhĩ nhĩpêx to ho ixpa xwÿnhjaja ka tanhmã mē ixkrã hto pa mē inhmã mē uma hkêt nê mē hkôt ixpa ho ixpa. Mē kot tanhmã mē ixto hã mē ixkagrõnh tã pa mē inhmã mē uma hkêt nê ixãmnhĩx ri ixkĩnh nê ri ixpa. Nê anhÿ hã mē kutã amnhĩ to htÿx nê arĩ mē kãm akapêr jarênh o ri mē hkôt ixpa. Mē kot Jejus ã tanhmã mē ixto htãã.

³⁰ –Akra Jejus mex o mex jakamã kot paj mē ãhpumunh tÿx xã ho tanhmã mē piitã mē ho mex to ho ri mē hkôt ixpa. Mē to xwÿnhjaja akupÿm mē o mex. Nê mē kot ãa mēmoj pumunh kêt kwÿ ho anê. Kê mē omu nê axãhpumunh o axãhpumunh ã apumunh mex kurê kumrêx. E ãm ja pix na ra hapêx. Anê.

³¹ Nhũm prem ã amnhĩ to Tĩrtũm wÿr anê. Puh nhũm ixkreja mē kãm htertet tÿx nê nhũm Tĩrtũm Karõ axte tanhmã mē hkrã hto nhũm mē ÿ hã kãm mē uma hkêt nê. ãm amnhĩ to htÿx nê mē kãm Tĩrtũm kapêr jarênh rãhã ho ri mē hkôt pa.

Jejus kwÿjaja tanhmã kot axpên nhĩpêx to hã mē harênh

Atre 2.42-47

³²⁻³³ Nhũm Jejus nhÿ hã mē ahkre ho mē pa xwÿnh maatijaja. Na pre Tĩrtũmja mē ho mē kãm ma hkêt jakamã nhũm prem htem akupÿm Jejus hĩr kôt mē kãm harênh o ri mē hkôt pa. Nhũm Tĩrtũm mē kot Jejus kôt amnhĩ xunhwÿr xwÿnh piitã mē kutã nojarêt rãhã ho pa nhũm mē ra ohtõ rax nê. Nê mē kãm axpên to mex pix prãm o ri axpên kôt pa. Mē ohtõ htã te mē tipxi pyrãk. Nê axpên pē mēmoj to õxÿ hkêt nê. Na pre htem axpên mã mē hikukrêx nê mē apkur xã jarênh o: “Inhõ pix kêt mē pahpiitã mē panhõ na.” Anhÿr o ri mēmoj tã axpên kutã nojarêt o ri pa. No kêt axpên mã mēmoj jarênh o: “Tk. Nã ãm inhõ pix na.” Anhÿr o harênh kêt nê.

³⁴⁻³⁵ Na pre htem tõhã õ ixkre hõ ho wênê. Rÿ õ pyka hkwy ho wênê nê kãxpore jamÿ nê ma o mra nê Jejus nhÿ hã mē ahkre ho mē pa xwÿnhjê mã kugõ nhũm mē hamÿ nê mē kêp amrakati xwÿnhjê mã ho anhgrã. Hãmri nhũm mē amnhĩm hamÿ nê ho amnhĩm awjaprõ. Jakamã na pre hte mē hkwyjaja kãm prãm nê ri pa rÿ ê hkêt nê ri pa hkêt nê.

³⁶⁻³⁷ Jujere na pre ā amnhī nhīpēx anē nē mē kaxyw ō pika hkwy ho wēnē. Hāmri nē kàxpore py nē o tē nē Jejus nhỹ hā mē ahkre xwýnh maatiĵē mā kugō. Jujereja Ijaew nhō patre ho ajuta xwýnh na pre. Gō hipōk pē Sipre kamā na pre kato. Kēp Jujere htā no nhūm Jejus nhỹ hā mē ahkre ho mē pa xwýnhjaja na prem kām: “Panāpe” Anē. Mē kapēr kām Panāpeja te kēp “mē hamaxpēr o mē hihtýx o pa xwýnh” anhỹr pyrāk. Jakamā nhūm ō pika hkwy ho wēnē nē kàxpore py nē o tē nē Jejus nhỹ hā mē ahkre xwýnhjē mā kugō nhūm mē kupy nē mē kēp amrakati xwýnhjē mā ho anhrā.

5

Ananīs mē Sapire wa kot amnhī to hēx ā wa harēnh

Karatas 6.7; Eprēw 10.26-31

¹ Tā nhūm Ananīs mē hprō Sapire wa Jujere jarēnh ma nē urāk nē ō pyka hkwy ho wēnē.

² Hāmri nē kàxpore py. Nom na pre wa ra hā axpēn ma. Jakamā nhūm Ananīs Jujere kīnhā kàxpore hkwy pix py nē o tē nē Jejus nhỹ hā mē ahkre xwýnh maatiĵē mā kugō. Nom katāt kōt mē kām ōr ā amnhī jarēnh kēt nē. Kot kàxpore ho pikĵēr nē amnhīm hkwy ho arīk ā amnhī jarēnh kēt nē. Ām mē kām amnhī jarēnh o hēx. Te piitā ōr par pyrāk o amnhī nhīpēx nē mē kām:

—E ota ixkàxporeta. Na pa wa inhō pika hkwy ho wēnē nē kàxpore hpy nē hpānhā Jujere pyrā nē man mē awýr piitā o tē. Anē.

³ Hāmri nhūm Simāw Pētre ra ā kot amnhī nhīpēx anhỹr ā omu hāmri nē kām:

—Tk. Kwa mon ka axtem nē Satanasti kapēr ma nē hkōt amnhī nhīpēx nē te akàxpore piitā ōr pyrāk ā amnhī to axēx anē? Te ate piitā ōr pyrāk tā no ām hkwy pix gō. Hēxta waa nē. Na ka axtem nē Tirtūm Karō mā akàxpore nhōr par o axēx.

⁴ Anhō pyka kēnā. Nē hpānhā kàxporeja anhō kēnā. Kot kaj amā tanhmā ho hprām xā hkōt māmri tanhmā ho. Amā piitā ho axārīk prām nē māmri piitā ho arīk. Rý amā hkwy hpix nhōr prām nē māmri hkwy pix gō. No ri ate ōr par pyrāk o amnhī to axēx kēt nē. Te ate mē inhmā pix mā axēx pyrāk nom mē inhmā pix mā hkēt. Na ka māānēn te Tirtūm mā axēx pyrāk. Anē.

⁵⁻⁶ Nhūm pre ā Simāw Pētre Ananīs mā kapēr anē nhūm kuma nē pykap tēm nē htyk kurē kumrēx. Hāmri nhūm mē aptār nywjaja hwýr tē nē kupēxē ho hkupu nē kumý nē ma o tē nē haxā. Hāmri nhūm mē kot ā kot amnhī nhīpēx anhỹr ā harēnh mar xwýnhjaja tee ri harēnh ma nē kām ma htýx nē.

⁷ Tā nhūm ra hā ahtūm nē. Ra hā 3 ore nē hapēx nhūm Ananīs prō Sapireja htýx

hamakētcati nē mē hwýr tē nē axā. Kormā mjēn htyk ā harēnh mar kēt nē hamakētcati nē hkīnh nē mē hwýr tē nē axā.

⁸ Hāmri nhūm Simāw Pētre omu nē hēx rom hkukja nē kām:

—Pa? E kwa inhmā mēmoj jarē. Tanhmā na prem war anhō pykaja pānhā war amā amnhīrer to? Xā ām hāmri na amjēn mē inhmā harē nā? Anē.

Hāmri nhūm kuma nē mjēn pyrā nē kām ho hēx nē kām:

—Ýý. Ām hāmri kot amā harēnh kēnā. Anē.

⁹ Hāmri nhūm Simāw Pētre tee ri kuma nē kām:

—Tk. Hēxta waa nē. Kwa mon ka war ajamē war akàxpore ho te Tirtūm mā axēx pyrāk? Mān ka wa ajamaxpēr o: “Koja Tirtūm ja hā wa ixpumu nē ām hā wa ixpumu nē tanhmā hā wa ixto hkēt nē.” Anhỹr o mān ka wa ajamaxpēr nā? Nom na ka wa ām kām axēx kaprý. Onēj ra mē kot amjēn jaxār xwýnhjaja akupýn hpōx o mra. Koja mē anhīpēx o te hipēx pyrā nē māānēn ato tē nē ajaxā ka rī amnhī pumu.

¹⁰ Anē nhūm kuma nē mjēn pyrā nē pykap tēm nē htyk kurē kumrēx. Hāmri nhūm mē kot mjēn jaxār xwýnhjaja mra nē mē hwýr agĵē nē omu nhūm ra htyk mex nē nō nhūm mē kumý nē ma o tē nē mjēn nhīhkō hā haxā.

¹¹ Hāmri nhūm mē piitā wa harēnh ma nē kām ma htýx nē. Mē kot Jejus kōt amnhī xunhwýr xwýnhjē mē amari ri mē pa xwýnhjaja nhūm mē tee ri wa hkukamā hamaxpēr o kām ma htýx kumrēx.

Mē kot aa mēmoj pumunh kēt kwý ho anhỹr ā mē harēnh

Makre 16.17-20; Atre 19.11-12

¹²⁻¹⁴ Na pre hte Jejus kōt mē kot amnhī xunhwýr xwýnhjaja xatā Tirtūm mā amnhī jarēnh xā hā ixkre hwýr akuprō. Mē kot ixkre nhīkjē mā: “Pahi Sarumāw nhō” anhỹr xwýnh jarēnhja wýr nhūm pre htem akuprō. Nhūm mē piitā kām mē hkīnh nē mē ohtō nē mē hkōt akuprō nē mē urāk nē Jejus kōt amnhī xunhwý. Mēnijaja nē mēmyjaja. No nhūm mē hkwyjaja Ananīs mē Sapire wa kot amnhī nhīpēxja mā hamaxpēr nē kām mē hkōt mrar pyma nē. Kām mē hkīnh tā kām mē hkōt mrar pyma nē.

Nhūm pre hte Jejus nhỹ hā mē ahkre ho mē pa xwýnhjaja aa mē kot mēmoj pumunh kēt kwý ho anhỹr o ri mē piitā mē hkōt pa.

¹⁵ Jakamā nhūm pre htem mē ā xwýnhjē jamý nē ma mē hwýr mē o mra nē Simāw Pētre kutēp pry kamā mē haxwý nē mē kām:

—E mē jar anhīkwý. Kē Simāw Pētre ja kōt mē ajānh tē nē mē akupēnh o akupým mē ato mex rý nhūm hkarō pix mē atā harir ka mē akupým amex japēr.

Anhÿr o mē kām kapēr hāmri nhūm mē kupīp kām kutēp hkwý.

¹⁶ Nē Jerujarē pu hā krī hkwý kamā. Mē à xwýnhjaja nē mēkarōmnuti kot tanhmā mē ho xwýnhjaja nhūm pre htem mē hamý nē ma mē ìhkrepe mē o mra nhūm mē piitā akupÿm mex pa.

*Mē kot Jejus kwýjē jagjēnh ā mē harēnh
Rukre 21.12-15; Juāw 15.26-27; Atre 4.1-*

22

¹⁷ Tā nhūm mē ō patre maati mē hkrāmnhwý Satusew nhō xwýnhjaja tee ri akupÿm mē mex ā mē harēnh ma nē axpēn mā:

—Tk. Kwa na mē ra ohtō nē Jejus gryk ā mē pahte mē ahkre kaga nē ām hkōt pix mā ri amnhī nhīpēx o pa. Anē.

Hāmri nē Jejus nhÿ hā mē ahkre maati xwýnhjē kamā gryk nē ra tanhmā mē ho kaxyw.

¹⁸ Hāmri mē unē nē mē hagjē nhūm mē hagjēnh xā kamā hkrī hpa.

¹⁹ Tā nhūm kamāt nhūm Tirtūm kapēr o mē wrýk xwýnhja ma mē hagjēnh xā hwýr mē hwýr wrý nē mē hwýr axā nē mē kām hakwakre kahē xā mē nē mē kator pa. Hāmri nē mē kām:

²⁰ —E mē ma akupÿm Tirtūm mā amnhī jarēnh xā hā ixkre hwýr mra nē axte mē kām awjarē. Tanhmā mē kot amnhī nhīpēx to nē Jejus kōt amnhī nhīpēx nyw o amnhī nhīpēx ā mē kām hā karō kē mē ama. Anē.

²¹ Hāmri nhūm mē kuma nē ma akupÿm hwýr hapēx kurē kumrēx. Nhūm myt kator o mōr mē nhūm mē hwýr agjē nē mē kām Tirtūm kapēr jarēnh o kuhē.

Tā nhūm mēō patre maati mē hkōt ri mē pa xwýnhjaja amnhī wýr mē àptār tūm xwýnhjē hwý nhūm mē piitā axpēn wýr pikuprōnh pa. Hāmri nē htýx arī Jejus kwýjaja mē hagjēnh xā kamā mē hkrī hā mē hkamnhīx nē amnhī wýr mē hā karō.

²² Nhūm pōristijaja ma kot mē haprōr kaxyw mē hagjēnh xā hā ixkre hwýr mra nē tee ri kamā mē hapēr nhūm mē kamā amrakati. Hāmri nhūm mē akupÿm mē pikuprōnh xwýnhjē hwýr hprōt nē mē kām:

²³ —Nā na pōristi hkwýjaja arī hakwakrem ixkre jamār mex nhūm hakwakre arī kahē htýx nē xa. Tā pa mē hwýr agjē nē tee ri hkre kamā mē hapēr nhūm mē kamā amrakati kumrēx. Anē.

²⁴ Hāmri nhūm mē kuma nē tee ri hamaxpēr.

²⁵ Rōm nhūm ja mē hwýr tēn axān mē kām: —Kwa jāā mē ate mē hagjēnh xwýnhjaja na mē axte Tirtūm mā amnhī jarēnh xā hā ixkre kamā mē ahkre ho kuhē pa ham mē omu nē mē kurūm tē. Anē.

²⁶ Hāmri nhūm patre nhō pōristi krāhtūmja kuma nē mē hwýr pōristi hkwýr ē nhūm mē

ma mē hwýr mra nē mē hwýr agjē nē kē axte mē unē nē akupÿm mē o mra. Nom tanhmā mē ho hkēt nē. Mē kot hkōt ri mē pikamēnh xwýnhjē pymaj mē ho mex nē mē o mō. Nē mē hā axpēn mā:

—Nā kot puj mē tanhmā mē ho nhūm mē ja hā mē pahpumu nē kēn o mē pahkapē nē tanhmā amnhī to nē hā mē panhīmex. Anē.

²⁷ Hāmri nē mē ho mex nē akupÿm mē o mōn mē hwýr mē ho agjē nē mē pikuprōnh xwýnhjē kutā mē hkrī. Hāmri nhūm mēō patre maati ja mē kām:

²⁸ —Kwa ra mē ixte Jejus kapēr jarēnh nē mē akurē htā ka xep mē ām mē inhma nē arī mē kām harēnh o ri apa. Nē jar Jerujarē kamā mē piitā mē kām harē. Nē mē pajaja mē ixte Jejus pīr ā ka mē ri mē kām mē ijarēnh o apa. Anē.

²⁹ Hāmri nhūm Simāw Pētre mē kuma nē mē amnhī tā mē kām kapēr nē mē kām:

—Tý kot kaj mē Tirtūm kapēr kuhpa hā mē inhma mēmoj tā karō pa mē ama nē ām mē ama nē ām Tirtūm kapēr pix ma nē hkōt ri amnhī nhīpēx.

³⁰ Amnepēm mē panhīgētjaja na prem Tirtūm kōt pix mā amnhī nhīpēx o pa. Tā ka prem axtem nē kēp mē kām Kra Jejus ā amÿnē nhūm mē pīkaha hā kunhō nē kupī. Nom nhūm Tirtūm akupÿm ho htūr

³¹ nē kēp mē panhō Pahihti hā harē. Nē kēp mē pahkaprī xwýnh mex ā harē. Hāmri nē ra amnhī ri ýr nhūm ìhkō hā mēmoj piitā ho amnhīptār o hkrī. Nhūm kām: “Koja ljaew mē kot amnhī tomnuj kaga nē akōt amnhī xunhwý pa ja hā mē omu nē amnhī katut kōt mē kot amnhī tomnuj rēnh pa nē mē ho ixkra.” Anē.

³² Tā mē pajaja mē ixte Jejus htyk nē akupÿm htūr ā omunh mex jakamā na pa hte Tirtūm Karō nhÿ hā ā mē amā harēnh anē. Karōja na pre Tirtūm mē ixte hkōt amnhī nhīpēx xwýnhjē hwýr kurē nhūm mē ixwýr wrý nē mē ixkarō mā agjē. Tā ý hā na pa htem ri ā harēnh anhÿr o ri mē akōt ixpa. Anē.

³³ Hāmri nhūm mē kuma nē mē kamā gryk týx nē. Nē mē kām mē himex prām nē mē kām mē hā amÿnē.

³⁴ Hāmri nhūm Kamariewtija tee ri ja hā mē omu hāmri nē kānhmā xa nē Jejus nhÿ hā mē ahkre xwýnh maati jē xyr pé hkwýjē mā kapēr. Parijew nhō xwýnh na pre. Nē kēp Tirtūm kapēr ā kaga htūm o mē ahkre ho pa xwýnhjē hō na pre. Nhūm mē piitā kām hkīnh nē. Jakamā nhūm kānhmā xa nē pōristi mā anē nhūm mē amnhī nē Jejus nhÿ hā mē ahkre ho mē pa xwýnhjē kator nhūm mē kapōt ā kuhē.

³⁵ Hāmri nhūm Kamariewtija mē nē tanhmā mē kām kapēr to nē mē kām:

—E ixkwýjaja. Kwa kēr pu mē tanhmā mē ho hkukamā pajamaxpēr mex nē.

³⁶ Mãn arĩ mẽ ate finat Tetastija jarēnh ā anohtȳx nē ho apa japēr. Mytwrỹ hō hā na pre mẽ kām amnhĩ to rax ā amnhĩ jarēnh o pa. Hāmri nhũm hkõt ri mẽ pa xwỹnhjaja ohtõ nē. Mē kēp 400. Tã nhũm prem mẽ kēp Tetasti pĩ nhũm hkõt ri mẽ pa xwỹnhjaja axpēn pē anhrã nē ma hapēx.

³⁷ –Tã nhũm mẽ kot mẽ piitã mẽ ho kōta xà hã arĩgroja ā nhũm Garirej nhõ xwỹnh pē finat Jut haxwỹja hkõt mẽ pa xwỹnhjaja ohtõ nē. Tã nhũm mẽ määnēn mẽ kēp kupĩ nhũm hkõt ri mẽ pa xwỹnhjaja haxwỹja axpēn pē anhrã nē ma hapēx.

³⁸ –Jakamã kwa pu mẽ tanhmã jajē ho hkēt nē. Pu mẽ ãm mẽ omu. Kojã mẽ amnhĩ krã hkõt ā ujarēnh anhỹr o pa japēr hã kojã Tetasti mẽ Jut wa hkõt pa xwỹnhjē pyrã nē tokyx axpēn pē anhrã nhũm Jejus jarēnh o paja hapēx o hapēx.

³⁹ Nom kojã mẽ ãm hāmri Tirtũm nhỹ hã ā mẽ ahkre ho pa anhỹr japēr hã kot puj mẽ tee ri ja ho pajapēx mã. Jakamã kwarĩ. Kot puj mẽ tanhmã mẽ ho nē te mẽ pahte Tirtũm kutã amnhĩ xunhwỹr pyrãk. Anē.

Nhũm pre ā Kamariewti Jejus nhỹ hã mẽ ahkre ho mẽ pa xwỹnh maatijē xyr pē hkwȳjē mã kapēr anē.

⁴⁰ Hāmri nhũm mẽ kuma nē kãm:

–Tỹ nã ãm hāmri na ka ā akapēr anē. Kot puj xep mẽ tanhmã mẽ ho hkēt nē. Anē.

Hāmri nē akupỹn mẽ hã karõ nhũm mẽ akupỹn mẽ hwỹr agjē. Hāmri nhũm mẽ pōristi mã mẽ hã amỹnē nhũm mẽ htak. Hāmri nhũm mẽ ãptar tũmrejaja mẽ kãm:

–E mẽ mãmri ma akupỹm mra. Nom kēr ka mẽ axte mẽ kãm Jejus kapēr jarēnh o ri apa hkēt kumrēx. Anē.

⁴¹ Hāmri nhũm mẽ kãm ure nhũm mẽ ma mra. Kĩnh nē ma mra nē axpēn mã:

–Nã kwār mẽ Jejus ā mẽ pahtak nē tanhmã hã mẽ pahto. Kwār mẽ mãmri ā hã mẽ pahto anē. Kot pu mẽ hkaga hkēt nē. Ra Tirtũm kot ja hã mẽ pahpumunh mex kēnã.

Anhỹr o axpēn mã kapēr o axpēn ja-maxpēr o hihtỹx mex o pa.

⁴² Hāmri nē arĩ apkati mẽ hkwȳjē mã Jejus kapēr jarēnh o mẽ ahkre ho mẽ hkõt pa. Tirtũm mã amnhĩ jarēnh xà hã ixkre kamã nē nhãm mẽ òrkwỹ kamã ri mẽ ahkre ho pa. Tirtũm kot mẽ pakaxyw Jejus xãm ā mẽ kãm harēnh o ri mẽ hkõt pa.

6

*Mē kēp mẽ mjēn htyk xwỹnhjē jarēnh
Wam Ximotre 3.8-9*

¹ Tã nhũm mẽ kot Jejus kõt amnhĩ xunhwỹr xwỹnhjaja ohtõ rax kumrēx o mō. Mē piitã kēp Ijaew no nhũm mẽ hkwȳjaja axtem Gres kapēr o kapēr nhũm mẽ hkwȳjaja Ijaew kapēr o kapēr. Na pre hte Ijaew kapēr o kapēr xwỹnhjaja apkati mẽ mẽ kēp mẽ mjēn

htyk xwỹnhjē mã mẽõ ho pa. No ãm mẽ piitã mẽ hipēx o axpēn pyrãk kēt jakamã nhũm Gres kapēr o mẽ kapēr xwỹnhjaja tee ri ā mẽ kot amnhĩ nhĩpēx anhỹr ā mẽ omu nē mẽ kamã gryk nē. Hāmri nē mẽ kãm:

–Kwa na ka htem amnhĩ kamã mẽ kēp mẽ mjēn htyk xwỹnhjē mã mẽõ ho rũnh nē agõ. No mẽ ixkamã jajē mã na ka htem ãm ho hkryre nē agõ. Kwa mẽ ri ā mẽ hipēx anhỹr kēt nē. Mē hipēx o axpēn pyrãk nã. Anē.

² Hāmri nhũm Jejus nhỹ hã mẽ ahkre xwỹnh maatijaja mẽ hã mẽ kapēr ma hāmri nē mẽ piitã mẽ ho akuprõ nē mẽ kãm:

–Kwa kēr ka mẽ ja hã axpēn mã axakjēr kēt nē. E pu mẽ kot mẽ kēp mẽ mjēn htyk xwỹnhjē mã õ ho pa kaxyw mẽ akwỹjē rē. No mẽ pajaja kot paj ja ho anhỹr o ri ixpa hkēt nē. Kot pa mẽ anē nē Jejus kapēr o ri mẽ ajahkre hkēt nē nhũm ja mex kēt nē. Jakamã mẽ atõ kot kaj mẽ akatãt kõt mẽ kãm mẽ õ ho apa?

³ E mẽ amnhĩ kamã mẽ ho 7 nē mẽ arē pu mẽ kēp mẽ mjēn tyk xwỹnhjē mã õ ho pa kaxyw mẽ unhwỹ.

Tãm mẽ hamaxpēr xwỹnhjaja.

Nē mẽ ate axpēn mã mẽ mex ā mẽ harēnh xwỹnhjaja.

Nē Tirtũm Karõ nhỹ hã mẽ kot amnhĩ nhĩpēx o mẽ pa xwỹnhjaja.

Ā mẽ kot amnhĩ nhĩpēx anhỹr xwỹnhjaja ka mẽ ho 7 nē arē pu mẽ kaxyw mẽ unhwỹ.

⁴ Nom mẽ pajaja kot paj mẽ akõt arĩ mẽ amã Tirtũm kapēr jarēnh o ri mẽ ajahkre pix tãnopxar o ri ixpa. Anē.

⁵ Hāmri nhũm mẽ kuma nhũm ja mẽ kãm mex nē. Nhũm mẽ ma mra nē axpēn mã hkwȳjē nhĩxi jarē hāmri nē mẽ ho 7 nē mẽ kurē. Ā mẽ hixi kot anhỹr.

Estewãw. Estewãwja na pre Jejus kõt amnhĩ nhĩpēx mex o pa. Tirtũm Karõ kaxwỹnh mã ãr nē ho amnhĩptar jakamã nhũm pre hte tãm ri amnhĩ nhĩpēx o pa.

Nē kaxyw Firipti

nē Prokot

nē Nĩkanõ

nē Timã

nē Parmēnti

nē Nĩkoraw. Nĩkorawja krĩ pē ãxiok nhõ xwỹnh na pre. Kēp Ijaew kēt tã kãm Tirtũm Kĩnh o pa. Tã ra määnēn Kra Jejus kõt amnhĩ xãm.

⁶ Jakamã nhũm mẽ mẽ kēp 7tajē rē nē Jejus nhỹ hã mẽ ahkre xwỹnh maatijē hwỹr mẽ o mra. Hāmri nhũm mẽ omu nē mẽ ãpēnh ā mẽ unhwỹr kaxyw mẽ hã ihkra jaxwỹ nē mẽ ho Tirtũm wỹ. Hāmri nhũm mẽ kēp mẽ mjēn htyk xwỹnhjē mã mẽ õ ho pa nē mẽ piitã mẽ hipēx o axpēn pyrãk.

⁷ Tã nhũm mẽ ra ohtõ rax nē Tirtũm kapēr ma nē hkõt amnhĩ nhĩpēx o pa. Jakamã

nhũm Jerujarē kamā mẽ kot Jejus kôt amnhĩ xunhwỳr xwỳnhjaja ra ohtò rax kumrēx. Nē mẽ ò patre hkwy haxwỳja ohtò nē mẽ uràk nē amnhĩ kaxyw hkòt hamaxpēr nē hkòt amnhĩ xunhwỳ.

Mẽ kot Estewāw pynēnh ã mẽ harēnh Rukre 21.14-15

⁸Tā nhũm Estewāwja. Kot mẽ kēp mẽ mjên htyk xwỳnhjē mã mẽ ò ho pa xwỳnhjē hōja. Tirtũm kot kutā nojarēt mex jakamā na pre hte ý hã àhpumunh tỳx o aa mẽmoj pumunh kēt kwỳ ho anhỳr o ri mẽ hkòt pa.

⁹Hāmri nhũm Ijaew kwỳjaja tee ri ja hã omu nhũm ja mẽ kēp omnuj tỳx nē nhũm mẽ hã kām akir. Uràk nē mẽ kēp Ijaew nē Jerujarē kamā ri mẽ hkòt pa htã ahpỳnhã mẽ ò pyka. Mẽ kot kām “Ripetat” xwỳnh kwỳ na pre mẽ. Nē ahpỳnhã mẽ ò krĩ.

Mẽ hkwyjaja kēp Sirēn nhò xwỳnh.

Nē mẽ hkwyjaja kēp Aresān nhò xwỳnh.

Nē mẽ hkwyjaja kēp Siris nhò xwỳnh.

Nē mẽ hkwyjaja kēp As nhò xwỳnh.

Ahpỳnhã mẽ ò pika nē mẽ ò krĩ htã na prem Jerujarē kamā ri axpēn kòt pa ho pa. Tã Estewāw kot ã amnhĩ nhĩpēx anhỳr o pa hã omu nhũm ja mẽ kēp omnuj tỳx nē nhũm mẽ hã kām akir.

¹⁰No nhũm Tirtũm Karò nhỹ hã hamaxpēr tỳx o mẽ kām kapēr nhũm mẽ kuma nē tee ri kutã tanhmã kām nē hprām kapry.

¹¹Hāmri nē ma mra nē tanhmã ho hēx to kaxyw amnhĩ kwỳjē rē nē mẽ kām hã amỳnē nē mẽ kām:

—E kēr ka mẽ krĩ nhò xwỳnhjē mã Estewāw o axēx nē tanhmã mẽ kām ho akapēr punuj to ho ri mẽ hkòt apa. Kē mẽ ama nē kamã gryk kato. Kot kaj mẽ ã amnhĩ nhĩpēx anē pa mẽ hpānhã mẽ ama nhĩre. Anē.

Hāmri nhũm mẽ kuma nē ma mra nē hapòj nē ma krĩ nhò xwỳnhjē mã tanhmã ho hēx to ho ri mẽ hkòt pa nē mẽ kām:

—E mẽ amnē akuprò nē mẽ inhma. Kwa kēr ka mẽ Estewāwti kapēr mar kēt nē. Na hte finat Mojes mẽ Tirtũm wa ho kapēr punuj pix o ri pa. Pa mẽ ra kot wa ho kapēr punuj ã kuma. Anē.

¹²Hāmri nhũm mẽ kuma. Krĩ nhò xwỳnhjē mẽ nē mẽ àptār tũmrejē mẽ Tirtũm kapēr tũm o mẽ ahkre ho mẽ pa xwỳnhjaja nhũm mẽ tee ri mẽ kot Estewāw o hēxja ma nē kamã gryk nē. Hāmri nē ma hwỳr mra nē unē nē ma mẽ ò juisti hwỳr o tē.

¹³Hāmri nhũm mẽ kām ho hēx xwỳnhjaja mẽ hkòt mra nē juisti mã tanhmã ho hēx to nē mẽ kām:

—E jahti na hte finat Mojes kot Tirtũm nhỹ hã mẽ pahte tanhmã amnhĩ nhĩpēx to hã karò ho hēx rãhã ho pa. Nē Tirtũm mã amnhĩ jarēnh xã hã ixkreja nhũm tanhmã ho hēx to pa mẽ kuma.

¹⁴Na hte mẽ kām: “Koja nhỹrmã Jejus pē Najare nhò xwỳnh Tirtũm mã amnhĩ jarēnh xã hã ixkreja grành pa kām ga.” Anhỳr o mẽ kām hēx o pa. Nē Mojes kot mẽ pahte amnhĩ nhĩpēx ã karò nē mẽ pahkurē pa prem kuma. Anē.

¹⁵Nhũm prem ã mẽ ò juisti mã Estewāw o hēx anē. Hāmri nhũm mẽ kuma nē Estewāw wỳr rít nē hkuk pumu nhũm te kot Tirtũm kapēr o mẽ wryk xwỳnhjē kuk nhĩrã rax pyrà nē xa nhũm mẽ tee ri omu nē kamā no pyma nē.

7

Estewāw kot juistijē mã ujarēnh

¹Hāmri nhũm mẽ ò patre maatija Estewāw mã kapēr nē kām:

—E mẽ inhmã amnhĩ jarē. Xã ãm hāmri na mẽ ri ã ajarēnh anē nã? Anē.

²Hāmri nhũm kuma nē mẽ piitã mẽ kām kapēr. Mẽ kām kapēr ryy nē mẽ kām:

—Tòe kot paj mẽ amã mẽ panhigēt finat Apraāw tanhmã harēnh to ka mẽ inhma. Amnepēm na pre Tirtũm maatija Apraāw wỳr kato. Kormã pyka pē Mēsopotām kamã pa ri. Kormã kot ma krĩ pē Arã hwỳr mór kēt ri nhũm hwỳr kato nē kām:

³“E kēr ka mẽ anhò krĩ pē akato nē akwỳjē re nē ma mō. Kot paj ma nhỹhỹm hpānhã pyka hō hwỳr mẽ ato mō.” Anē.

⁴—Hāmri nhũm kuma nē amnhĩ to akuprò nē ma mō. Ò pyka pē Katej pē kato nē ma krĩ pē Arã hwỳr mō nē hpānhã kamã pa. Tã nhũm hipēxã Terahti kēp ty nhũm Tirtũm amnē jar mẽ panhò pyka hwỳr kumē. Jar mẽ papapxã hwỳr kumē.

⁵—Nom nhũm kormã kām pykaja nhõr kēt nē. Kormã kām hkwy ho grire nē òr kēt nē. Na pre ãm kām:

E kot paj nhỹrmã amã pykaja gō. Amã nē akanrēhã akra nē atāmnhwỳjē mã kugō ka mẽ kamã ri apa ho apa.

Anhỳr o kām mẽ panhò pika pē Kanaāja jarē. Apraāw kormã hkra hkēt ri nhũm ã kām kapēr anē.

⁶Hāmri nē kām:

Koja akanrēhã atāmnhwỳjaja nhỹrmã ma nhỹhỹm pyka hō hwỳr pa nē hpānhã kamã pa. Mẽ ò pyka kamã pa hkēt tã nhãm pyka hō kamã pa hāmri nē pika nhò xwỳnhjē mã àpēnh rũnh o pa nhũm pyka nhò xwỳnhjaja mẽ hipēx katĩ rũnh o pa. Nē mẽ àpēnh ã mẽ kām amnhĩr kēt nē. ãm mẽ homnuj o pa hã amgrã sohtò rax kumrēx. Nhũm mẽ hã amgrã pē 400.

⁷Nom kot paj mẽ hã mẽ homnuj tỳx nē. Akanrēhã atāmnhwỳjē hã mẽ homnuj tỳx nē nhũm mẽ rĩ kormã mẽ kurũm kato nē man akupỳn pa nē jar pòj.

Hāmri nē jar inhmā inhmex o inhmex ā ijarēnh rāhā ho pa. Anē.

⁸ Hāmri nē kām:

E pu axpēn ma. Koja ka nē akanrēhā akra nē atāmnhwýjaja ka mē ixkôt ri amnhī nhîpêx o apa hā kot paj mē ato ixkra. Tā koja ja amā mex japêr hā kêr ka mē amnhī my kwryt kà hkwy jakà. Nē koja mē akrajaja hapôj nē my ka mē mā mē ho anē nē mē kēp mēmy kwryt kà hkwy jakà. Mē piitā mē kot mē apê ixkra hā mē apumunh kaxyw kot kaj mē ā amnhī nhîpêx anē.

Anhÿr o Apraāw mā kapēr nhūm kuma nē mar xā hkôt hkra Ijak my kwryt kà hkwy krāhta. Kormā hkarāre ri. Kormā hā arigro pē 8 pix ri nhūm kēp hkwy krāhta.

—Tā nhūm Ijak hprêk nē hprô nē hkra. Hāmri nē mā hkra Jako ho anē nē. Nhūm Jako hprêk nē mā hkra pē 12jê ho anē nē mē piitā mēmy kwryt kà hkwy jakār pa. Ā na pre mē pahpār kraxjaja amnhī nhîpêx anhÿr o pa.

⁹ —Jako hkrajê hō na pre kēp Juje. Nhūm Juje htôjaja hipêêxā hkôt kamā gryk nē axtem nē mē urojê mē ho wēnê nhūm mē kēp haprô nē ma pyka pē Ejit wÿr o mō. Amarī Ejit nhō xwýnhjê mē apēnh o pa kaxyw. Tā no nhūm Tirtūm arī tānopxar rāhā ho hkôt pa.

¹⁰ Hāmri nē Ejit kām mē kot homnuy xwýnhjê nhîhkra rūm hkapa nē tanhmā hkrā hto nhūm āhpumunh tÿx nē hamaxpêr mex nē. Jakamā nhūm Ejit nhō xwýnhjê nhō pahī Paraohitja omu nē kām hkānh nē. Kot tām amnhī nhîpêx nē āhpumunh tÿx kôt omu nē kām hkānh nē. Hāmri nē amnhī ri kumê nhūm ihkō hā āpēnh o pa. Kām ôrkwý pumu nē Ejit nhō xwýnhjê ho amnhīptār o pa.

¹¹ —Rôm nhūm mē hpur kām mēmoj nhîgrôt mex kêt nē nhūm mē kēp mē apkur xā hā mē ôja ra ri mē kēp kryre. Ejit kamā nē jar Kanaā kamā nhūm mē apkur xā hā mē ôja mē kēp hapêx par o mō. Nhūm mē piitā prām xāj ra hūire nē kām prām tÿx o pa nhūm mē panhîgêjtaja hāmri prām xāj tee ri amnhī xāpkur xā hā mēmoj japêr.

¹² —Tā nhūm Jakoja Ejit kām arī mē apkur xā hā mē ô rax ā harēnh ma nē ma hwÿr hkra hkwyjê rē. Mē panhîgêjtaja nhūm ma mē hwÿr mē kurê nhūm mē ma mē hwÿr mra. Hāmri nē mē hwÿr pôj nē mē kēp mēmo hy hkwy japrô nē ma akupÿm o mra. Wam mē mōrta ā mē kēp mēmoj japrô nē ma akupÿm o mra.

¹³ —Tā nhūm mē kēp mēmo hy japrô xwýnhja hapêx nhūm mē axte akupÿm mē hwÿr mra. Hāmri nhūm mē htô Juje mē kām amnhī to amnhīrit nē kēp mē htô hā mē kām amnhī jarê. Mē kot ra htyk ā hkamnhix tā nhūm mē kām amnhī jarê. Hāmri nhūm Paraohiti mē kēp Juje htô hā mē harēnh ma.

¹⁴ —Tā nhūm Juje amnhī wÿr hipêêxā Jako mē htāmnhwýjaja mē hā karô nhūm mē piitā ma Ejit wÿr hapêx. Mē kēp 75 nē ma Ejit kamā Juje hwÿr hapêx hāmri nē kamā pa ho pa.

¹⁵ —Ā kot anhÿr jakamā nhūm Jakoja ma Ejit wÿr mō nē hpānhā kamā pa ho pa. Tā hāmri kamā ty. Nhūm hkrajê piitā Ejit kām pa hāmri nē gaa nē htyk pa.

¹⁶ Hāmri nhūm mē hkanrēhā mē hkrajaja mē hamý nē ma akupÿm Kanaā hwÿr kri pē Sikê hwÿr mē o pa nē kamā mē hagjê. Na pre mē hkukamā finat Apraāw kot Amôr krajê pē kēnkre japrô nē kamā hprô jaxā. Jakamā nhūm prem mÿr pē ma hwÿr mē o pa nē kamā mē hagjê hāmri nē ma akupÿm Ejit wÿr pa.

¹⁷ —Tā gaa nē rī ohtô rax kumrêx o mō. Mē panhîgêjtaja ohtô rax kumrêx o mō. Hāmri nhūm Tirtūm kot Apraāw mā mē ô pyka jarēnh xwýnhja nhūm kot mē kām ôr kaxyw.

¹⁸ No nhūm Ejit nhō pahī kot Juje ho mex xwýnhnta na pre ra ty nhūm axtem hpānhā hōja mē ho amnhīptār o pa. Nē aa Juje jarēnh mar kêt nē. Kormā pahī xār nyw kêt ri htyk jakamā nhūm mÿr pē harēnh mar kêt nē.

¹⁹ Hāmri nē hkwyjê homnuy o pa. Tanhmā mē panhîgêjtê nhîpêx to ho pa. Nē mē kām mē hkra my hapôx xwýnhjê hā amÿnê. Mē hapôx nhūm mē kot pikap mē rēnh nhūm mē htyk kaxyw nhūm mē kām mē hā amÿnê.

²⁰ —Rôm nhūm finat Mojesja kato. Nē mexre. Hāmri nhūm katorxā Ejit nhō xwýnhjê kot kēp hpîr pymaj ôrkwý kamā ri mē kēp ho hpimxur o pa hā mytwry axkrunêpxi.

²¹ —Tā nhūm ra htÿxre nhūm katorxā mē hipêêxā wa tee ri hkukamā hamaxpêr hāmri nē mē kot wa kēp hpîr pymaj kumÿ nē ma o tē nē kaxyw ā nhîpêx nē nhÿri gô nhîpôk ri pō kamā ho amÿxu. Tā nhūm Paraohiti hkra nija ra gôx mē wÿr mā tē nē ra omu hāmri nē amnhīm kumÿ nē ma o tē nē ho hkra.

²² Jakamā nhūm Mojes Ejit nhō xwýnhjê kamā hprêk. Hāmri nē mē āhpumunh xā hā kagā pumunh pa. Nē hihtÿx nē mē kām kapêr kām hihtÿx mex o pa.

²³ —Tā hāmri ra hā amgrā pē 40 nē hapêx nhūm Mojes hamaxpêr nē ra kām amnhī kwÿ pē Ijaewjê pumunh prām nē ma mē hwÿr tē.

²⁴⁻²⁵ Hāmri nē htēm kôt ja wa omu. Nhūm Ejit nhō xwýnhja Ijaewja homnuy o xa nhūm Mojes tēn tee ri hā omu nē hamaxpêr o: “E pa ma wa hwÿr tē nē ixkwÿ mÿj ā Ejit nhō xwýnhnta pī kē ixkwÿjaja ja hā ixpumu nē Tirtūm kot mē hwÿr inhmēnh ā ixpumu. Ixte Ejit nhō xwýnhjê nē mē kator kaxyw mē ja hā ixpumunh kurê kumrêx.”

—Anhÿr o hamaxpêr hāmri nē wa hwÿr tē nē amnhîoja nē Ejit nhō xwýnh pī. Tā no nhūm hkwyjaja kot hpîr ā harēnh mar

tā tanhmā amnhī kaxyw kām hamaxpēr to hkēt nē.

²⁶ Nhūm apkati nhūm mēhōja war axkrut nē axte pijapu ho wa xa. Hamē wa kēp Ijaew. Jakamā nhūm Mojes akupŷm mē hwŷr tē nē tee ri axpēn tā wa omu nhūm ja kēp omnuj nē. Hāmri nhūm wa hwŷr tē nē axpēn nē wa kām kapēr nē wa kām: “Pa? Kwa war ajamē war apē Ijaew kēnā na ka wa ri axtem nē ā axpēn nhīpēx anē.” Anē.

²⁷ Hāmri nhūm kot amnhī kaxyw hkryx xwŷnhja kuma nē nhām amnhī nē hkujate nē kām: “Tk. Kwa xa apē mē inhō pahi hā na ka ā wa inhmā akapēr anē? Nā apē mē inhō pahi hkēt kēnā.

²⁸ Kot kaj inhīpēx o te ate Ejit nhō xwŷnhata nhīpēx pyrā nē wa ixtō hpīr kēt nē.” Anē.

²⁹ –Hāmri nhūm tee ri kuma nē ra kām ma nē Ejit rūm kator kurē kumrēx nē ma pyka pé Mijiā hwŷr mō nē kamā hpānhā pa. Kamā hprō nē hkra. Nhūm hkra myja wa hamēxkrut.

³⁰ –Tā nhūm Mijiā kamā pa hā axte hā amgrā pé 40. Hāmri nē mēmo arīgro hā kapōt ā krā hakŷx pé Sinai kape hā ri pa nhūm Tirtūm kām kapēr. Nom nhūm Mojes omunh kēt nē. Ām utī kaōk kamā kuwy hpōk pix pumu.

³¹ Amnhī jaēr pē ā kot amnhī nhīpēx anhŷr ā omu hāmri nē amnhī tā hprī hā omunh kaxyw hwŷr tē nhūm Tirtūm kām:

³² Pa Mojes? E ixpē Tirtūm na pa. Ixpē akukamā anhīgēt Apraāw nhō Tirtūm na pa. Nē ixpē Apraāw kra Ijak mē htāmnhwŷ Jako wa ō Tirtūm na pa. Anē.

Hāmri nhūm tee ri kuma nē kām ma xāj htetert tŷx nē. Hāmri nē umaj axte pī hpōkja wŷr rīt kēt nē. Ām nhām hkrā nē rīt o xa.

³³ Hāmri nhūm Tirtūm kām:

E kwa ixpē Tirtūm maati hā ixtā apijaām ā aparkā kapa nē apar kēnh nē xa.

³⁴ Na pa ra ixkra Ijaewjaja Ejit kām mē omu. Na ra Ejit nhō xwŷnhjaja ixpē mē homnuj tŷx kumrēx rāhā ho pa nhūm mē amnhī xā hā maj tee ri amnhī nhīpēx. Pa ja hā mē omu nē inhmā mē hkaprī nē. Jakamā kot paj Ejit nhō xwŷnhjē nhīhkra rūm mē kator pa. E ka kot paj mē hwŷr amē ka ma akupŷm mē hwŷr mō nē mē kurūm mē kator.

Anhŷr o kām mē kaxyw karō.

³⁵ Ra Ijaew kot Mojes hkaga tā nhūm mē kaxyw ām nē ma akupŷm kot mē hwŷr mēnh kaxyw. Na prem ra omu nē hkaga. Te mē ate Jejus kagaja pyrā nē hkaga. Jakamā nhūm pijapu xwŷnhata tee ri amnhī tā omu nē kamā gryk nē amnhī nē kām kapēr nē kām: “Tk. Kwa xa apē mē inhō pahi hā na ka ā wa inhmā akapēr anē? Nā apē mē inhō

pahi kēt.” Anhŷr tā nhūm Tirtūm mē kaxyw tām xām. Kot mē ho amnhīptār nē Ejit nhō xwŷnhjē rūm mē kator kaxyw. Ja kaxyw na pre pī hpōk kamā kām kapēr nē mē kaxyw ām.

³⁶ –Jakamā nhūm Mojes ma akupŷm Ejit wŷr mō nē mē kurūm hkwyjē kator nē ma mē o pa. Na pre mē ho mex nē Tirtūm nhŷ hā mē kām aa mē kot mēmoj pumunh kēt kwŷ ho anhŷr o ri mē o pa. Ejit kamā nē māānēn mē kot gō xujanār mā: “Gō kamrēk” anhŷr xwŷnhata kamā. Nē kapōt ā mē kām ā amnhī nhīpēx anhŷr o mē o pa. Nē kapōt ā ri mē o pa ho ra hā amgrā pé 40.

³⁷ –Tā tām na pre mē panhīgētjē mā mēhō hkukamā mē kām tanhmā harēnh to nē mē kām harēnh o: “Koja Tirtūm nhŷrmā te ra mē akaxyw pa ixām pyrā nē inhmŷr pé mē panhīō xām. ŷ hā mē amā kapēr jarēnh o pa kaxyw nhūm nhŷrmā mē akaxyw ām ka mē omu.”

–Anhŷr o ā Jejus kukamā harēnh anē.

³⁸ Na pre Mojes kapōt ā mē panhīgētjē ho pa nhūm mē krā hakŷx pé Sinaija wŷr pa. Mē panhīgētjaja hāmri hwŷr pa nhūm Tirtūm kapēr o mē wrŷk xwŷnhja mē kaxyw Mojes mā kapēr nhūm ō ri mē kām awjarē nē hā kaga. Mē kot mar nē hkōt amnhī nhīpēx nyw o amnhī nhīpēx o pa kaxyw nhūm mē kām Tirtūm kapēr jarēnh o pa. Nē mē pajaxwŷja. Mē pahte hkōt amnhī nhīpēx nyw o amnhī nhīpēx o papa kaxyw na pre mē pamā hā kaga.

³⁹ Tā no nhūm mē panhīgētjaja Mojes ma nē ām kuma nē hkaga kumrēx nē akupŷm Ejit wŷr hkrā.

⁴⁰ Jakamā nhūm Mojes kormā nhŷri mē kaxyw Tirtūm mā kapēr o ām rōm nhūm mē wakre kamā htō Arāw wŷr mra nē kām: “Kwa Mojes ra kot tanhmā amnhī to kēnā. Kot Ejit rūm mē pakator nē mē pahto mōr tā ra nhŷri arīk nē tanhmā amnhī to. Jakamā e. Kwa hpānhā mē inhmā mēmo karō nhīpēx pu mē ho panhō sānti kē tām ma akupŷm Ejit wŷr mē pahto pa.” Anē.

⁴¹ –Hāmri nhūm mē kuma nē mē kām kax o mōx krare karō ho sānti nhīpēx nē mē kām ām. Hāmri nhūm mē axtem nē te ho Tirtūm nhīpēx pyrāk o hipēx nē kām ōwēhti hkwy pa nē kām haxwŷ nē hā apku. Hāmri nē ā amnhī nhīpēx anhŷr ā amnhī pumu nē hkīnh nē.

⁴² Hāmri nhūm Tirtūm tee ri ja hā mē omu nhūm ja kēp omnuj tŷx nē nhūm mē hkaga hpa. Jakamā nhūm prem amnhī krā hkōt ri myyti nē mytwrŷre nē kanhēti karō nhīpēx nē te mē kot Tirtūm nhīpēx pyrāk o hipēx o pa. Hāmri nē amnhī kaxyw kumā pix mā hamaxpēr o pa hā amgrā xohtō nē. Tā nhūm Tirtūm nhŷ hā kapēr jarēnh o mē pa xwŷnhjaja tanhmā mē kām kapēr to nē mē

hã kagã. Te Tirtüm tãm mẽ kãm kapër pyràk o mẽ kãm kapër nê hã kagã kot:

Pa mẽ apê Ijaewjaja? E mẽ inhma. Amnepêm mẽ ate kapôt ã ri mẽ apa hã amgrã pê 40ta ã. Xã we inhmä na ka prem akrit kwý hpar o apa?

⁴³ Nã inhmä hkêt. Na ka prem axtem nê ri amnhĩ krã hkôt amnhĩm mẽmo karõ nhĩpêx nê hipêx o te mẽ ate pa inhĩpêx pyràk. Pê kãm akrit kwý hpar nê ôr o ri apa.

Mẽ anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwýnhja ka pre htem à kamã amnhĩ kôt ho apa.

Nê amnhĩm kanhêti karõ nhĩpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa.

Tã ã mẽ ate amnhĩ nhĩpêx anhýrja mẽrapê kot paj pãnhã nhýhým mẽ arê.

Koja mẽ akutã amnhĩ xunhwýr xwýnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axápênh rũnh o ri apa kãm ga. Anê.

Ã na pre Tirtüm mẽ panhĩgêjtjê mã kapër anê nhũm ý hã kapër jarênh o pa xwýnhja mẽ kãm hã kagã.

⁴⁴ –Tã nhũm mẽ panhĩgêjtjaja kormã kapôt ã ri pa ri amnhĩ kôt mry kã ho ixkre ho pa. Tirtüm mã kapër xã hã ixkreja nhũm prem amnhĩ kôt ri o pa. Mẽ kot kãm “Tirtüm nhõrkwý kaãkre” anhýr xwýnhja. Tirtüm kot mẽ kãm hã karõ xã hkôt nhũm mẽ hipêx nê amnhĩ kôt ri o pa. Na pre Tirtüm hpri hã Mojes mã tanhmã kot hipêx to hã karõ nhũm mẽ hkôt hipêx nê amnhĩ kôt ri o pa.

⁴⁵ –Tã nhũm Mojes ty nhũm hpãnhã J-ueja amnhĩ kôt mẽ o pa. Ma Tirtüm kot mẽ kãm pyka mex nhõrta wýr Mojes mýr pê mẽ o pa. Hãmri nê hwýr mẽ o pój nhũm Tirtüm mẽ nê mẽ kot ra kamã mẽ pa ho mẽ pa xwýnhjê japój nhũm mẽ pãnhã kamã pa ho pa. Nê amnhĩ kôt Tirtüm nhõrkwý kaãkreta o pa. Rãhã nhũm finat Tawija mẽ hpãnhã mẽ ho amnhĩptã.

⁴⁶ Na pre Tirtüm Tawi kot tanhmã amnhĩ nhĩpêx to ho pa hã omu nê kãm hapê nê. Jakamã nhũm Tawi kãm kapër nê kãm: “Pa Tirtüm? Kwa xã kot paj amã ixkre mex õ nhĩpêx nã? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xã kot paj amã hipêx?” Anhýr tã no nhũm Tirtüm kormã kãm ja prãm kêt nê.

⁴⁷ Jakamã nhũm Tawi hkra Sarumãwja hipêxta mýr pê hpãnhã kêp mẽ õ pahi nê kãm hipêx.

⁴⁸ Nom xã na hte Tirtüm maatija mẽ pahte kãm panhĩhkra ho ixkre nhĩpêx xwýnh kamã hkrĩ? Nã kaxkwa kamã na hkrĩ xã. Na pre ra Tirtüm nhý hã kapër jarênh o pa xwýnhja

Tirtüm kot tanhmã mẽ pajamãr to ho pa hã kagã nê hã kagã ho:

⁴⁹ Na pa hte kaxkwa rũm pyka hkôt mẽ piitã mẽ hamãr mex o ixkrĩ.

Tã tanhmã kot paj amnhĩ to nê mẽ ihkra ho mẽ kot inhmä ixkre nhĩpêxta wýr axã nê kamã ixpa ho ixpa?

⁵⁰ Nã ixte mẽmoj piitã ho ixkator xwýnh kênã kot pa kêt ã amnhĩ nhĩpêx anê. Anê.

Nhũm pre ã Tirtüm amnhĩ tã mẽ kãm kapër anê nhũm ý hã kapër jarênh xwýnhja ô ri mẽ pamã hã kagã.

⁵¹ –E kwa mẽ inhma ixkwýjaja. Mẽ akra hihtýx kumrêx jakamã mẽ amã Tirtüm kapër mar prãm kêt. Na ka htem mẽ panhĩgêjtjê pyrà nê amnhĩ nê Tirtüm Karõ kaga nê kapër mar kêt nê.

⁵² Na pre hte Tirtüm nhý hã kapër o mẽ pa xwýnhjaja mẽ panhĩgêjtjê hwýr mra nê mẽ kãm kapër jarênh o ri mẽ hkôt pa. Tã nhũm mẽ hkaga nê mẽ hipêx kati ho pa. Na pre htem Jeus wrýk kukamã mẽ kãm: “E koja nhýrmã kot Tirtüm kapër mar nê hkôt amnhĩ nhĩpêx mex rãhã xwýnh maatija mẽ pahwýr wrý.” Anhýr o mẽ kãm harênh o pa. Tã no nhũm mẽ kãm ja mar prãm kêt jakamã axtem nê hã mẽ hpar o pa. Mẽ kot mẽ kãm Jeus jarênh o mẽ pa xwýnhjê hpar o pa. Tã nhũm tãm mẽ pahwýr wrý ka mẽ omu nê mẽ kot amnhĩ nhĩpêxta pyrà nê hã amýnê nhũm prem mẽ amã kupi.

⁵³ –Tirtüm kapër o mẽ wrýk xwýnhjaja kot Tirtüm nhý hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nê ama nê ãm ama nê hkôt amnhĩ nhĩpêx o ri apa hkêt nê. Anê.

Mẽ kot Estewãw pír ã mẽ harênh

Rukre 21.16-19, 23.34; Atre 22.20

⁵⁴ Hãmri nhũm juistijaja tee ri Estewãw xujarênh ma nê kamã gryk týx nê kãm kapër punuj nê.

⁵⁵ Nom nhũm Tirtüm Karõja tanhmã hkrã hto nhũm kãm mẽ uma hkêt nê. Hãmri nê kãnhmä rit nê kaxkwa pumunh o xa nê kamã Tirtüm rũm hirã rax pumu. Nhũm Jeus Tirtüm nhĩhkõ hã xa nhũm omu nê hkĩnh nê mẽ kãm:

⁵⁶ –Kokýý. Na kaxkwa axkjê nhũm kamã Tirtüm nhý pa omu. Nhũm kuri kot mẽ pahwýr mẽnh xwýnh Jeusja xa. Hêxta waa nê. Nã na pa jarãhã wa omu nê ixkĩnh týx kumrêx. Anê.

⁵⁷ Hãmri nhũm mẽ kuma nê kamã gryk týx nê. Hãmri nê kãm mar prãm kêt nê kêp amnhĩ jamak pro. Hãmri nê gryk xãj ãmra htýx nê hwýr hprõt

⁵⁸ nê unê nê krĩ pê ho kato nê ma o tẽ nê nhýri o xa. Hãmri nê kên o htak o hpír kaxyw amnhĩ nhĩnõkã hkwrý nê mẽhõ my pê Sawti mã kugõ nhũm mẽ kãm hamý. Hãmri nhũm

mê kên rûnh kwý jamý nê o mra nê Estewâw wýr rênh prêprêk o kuhê. Nê ho î kamâ htak nê hkrâx pê htak.

⁵⁹ Hâmri nhûm ra htyk kaxyw nê Jejus mâ amnhî jarê nê kâm:

—Pa Pahihti Jejus? E koja ixkarô awýr api ka ixto amnhîpta. Anê.

⁶⁰ Hâmri nê hkôn krâ ho têm nê nhý nê axte kâm amnhî jarê nê mê kot hpîr xwýnhjê nê kâm kapêr nê kâm:

—Kwa Pahihti. Mê kot ixpîr tâ kwa tanhmâ ixtâ mê ho hkêt nê.

Anhýr o mê nê Jejus mâ kapêrja kôt ra ty.

8

Mê kot Estewâw jaxâr â mê harênh
Atre 22.4, 26.9-11

¹⁻² Hâmri nhûm mê kot Jejus kôt amnhî nhîpêx xwýnhjaja Estewâw wýr mra nê htyk kâm omu nê hkaprî nê. Nê mur nê kumý nê ma o mô nê haxâ. Nom nhûm Sawtija mê kot hpîr â omu nhûm ja kâm mex nê.

Sawti kot Jejus kwýjê nhîpêx kati ho pa hâ harênh

Atre 1.8

Tâ nhûm Jerujarê kamâ Ijaewjaja mê kot Jejus kôt amnhî xunhwýr xwýnhjê homnuy týt x o pa. Hâmri nhûm mê tee ri amnhî kukamâ hamaxpêr nê mê hkwyjaja mê umaj hapôj nê ma pika hkwy kôt hpigrânh pa. Mê hkwyjaja Jutej wýr ma pa nhûm mê hkwyjaja Samar hwýr ma pa. Â na prem mê umaj nhýhým hpigrânh par anê. Âm Jejus nhý hâ mê ahkre xwýnh maati pixjaja na prem Jerujarê kamâ arîk nê nhýhým môr kêt nê. Simâw Pêtre nê Juâw nê Xiakre nê Andre nê Firipti nê Patoromew nê Matêwre nê Makre nê Tomas nê Xiakre hôja nê Simâw ô nê Maxitreja. Âm jajaja pix na prem arîk.

³ Nhûm Sawti haxwýja Jejus kôt mê kot amnhî xunhwýr xwýnhjê homnuy o pa. Mê kot Jejus kaga hprâm xâj tanhmâ mê hipêx to ho pa. Na pre hte mê ôrkwy hwýr agjê nê mê unê. Memyjê pynê nê mênijê pynê nê ma mê o mra nê mê hagjênh xâ kamâ mê hagjê. Mê urak nê kêp Ijaew tâ â mê hipêx anhýr o pa.

⁴ Tâ nhûm mê umaj Jerujarê rûm pika hō hwýr mê hpigrânh xwýnhjtaja amari pika hkwy hkôt ri pa hkêt nê. Na pre ma mê piitâ mê kâm Jejus kapêr jarênh o ri mê hkôt pa. Kêp Tirtûm kot mê pakaxyw âm xwýnh â harênh râhâ ho ri mê hkôt pa.

Wajaga kot amnhî tâ Firipti mar â harênh

Juâw 2.23-24

⁵⁻¹² Tâ nhûm Firipti haxwýja ma mô. Ma krî pê Samar hwýr mô nê kamâ mê kâm Tirtûm kot mê pakaxyw âm xwýnhja jarênh o pa. Samar kamâ na pre wajaga Simâwti

ri Samar nhô xwýnhjê hkôt mê no kupyri râhâ ho ri mê hkôt pa. Nê âhpumunh týt â amnhî to jarkrar o ri pa. Jakamâ nhûm mê kot amnhî nhîpêx â omu nê kamâ no pyma nê. Nê htýt ho âm hâmri kot amnhî jarênh â hkamnhîx. Jakamâ nhûm pre mê kâm tanhmâ ri amnhî to hêx to ho pa pê mê no kupyri râhâ ho ri pa nhûm mê amnhî jaêr pê omu. Mê kot amnhî to hkryre xwýnhjaja nê mê kot amnhî to rûnh xwýnhjaja nhûm mê amnhî jaêr pê kot tanhmâ amnhî nhîpêx to hâ omunh o hkôt pa. Nê ri axpên mâ harênh o:

—Kokýy. Wajagaja âhpumunh týt kumrêx. Tirtûm nhý hâ mân te â amnhî nhîpêx anhýr o pa nâ? Mân pre Tirtûm kâm âhpumunh xâ hkwy gô nhûm ý hâ â amnhî nhîpêx anhýr o pa. Anê.

Hâmri nê hkôt hamaxpêr o ri hkôt amnhî nhîpêx o pa.

Tâ nhûm Firipti mê ô krî hwýr mô nê mê kâm Jejus Kris jarênh o ri mê hkôt pa nê mê kâm:

—Jes kêp Tirtûm kot mê pahwýr mênh xwýnh jakamâ kot kaj mê amnhî kaxyw hkôt ajamaxpêr nê hkôt amnhî xunhwý nhûm Tirtûm hâ mê apumu nê mê ato hkra. Anê.

Hâmri nê Tirtûm nhý hâ akupým tanhmâ mê kute xwýnhjê ho mex to ho pa. Mê î kamâ mê htyk xwýnhjaja nê mê hyk o mê pa xwýnhjaja nhûm mê ohtô nê akupým mê ho mex o pa. Nê mê hkwyjê nê mêkarômnuti hkwy jano nhûm mê âmra htýt o mê hkaga nê ma mê kurûm hapôx nê mra. Â Firiptija Jejus nhý hâ mê ho mex o pa anê nhûm mê piitâ ja hâ omu nê kapêr ma nê hkîn nê. Nê kapêr mar týt nê hkôt hamaxpêr. Jao wajaga Simâwti kaga nê hpânâ amnhî kaxyw Jejus kôt pix mâ hamaxpêr nê hkôt amnhî xunhwý. Hâmri nhûm Firipti ja hâ mê omu nê mê hkrâ kumrâ. Memyjaja nê mênijaja nê mê piitâ mê hkrâ kumrâ. Ra mê kot Jejus kôt amnhî xunhwýr â mê piitâ mê kâm amnhî to amnhîrit kaxyw nhûm mê hkrâ kumrâ pa.

¹³ Hâmri nhûm wajaga Simâwti haxwýja Jejus kapêr ma nê mê urak nê amnhî kaxyw hkôt hamaxpêr nê hkôt amnhî xam nhûm Firipti hkrâ kumrâ. Hâmri nhûm hkîn nê Firipti hkôt ri pa. Nê aa mê kot mêmoj pumunh kêt kwý ho anhýr o ri pa hâ omu nê kamâ no pyma ho hkôt ri pa. Nê kot Tirtûm nhý hâ akupým mê ho mex â omu nê tee ri hamaxpêr.

¹⁴ Tâ hâmri nhûm Jerujarê kamâ Jejus nhý hâ mê ahkre xwýnh maati jaja Samar nhô xwýnhjê jarênh ma. Ra mê kot Tirtûm kapêr kôt amnhî nhîpêx â mê harênh ma nê hkîn nê. Hâmri nê ma mê hwýr Simâw Pêtre mê Juâw wa kumê.

15-17 Hāmri nhūm wa ma mē hwýr wa mō nē pōj. Hāmri nhūm Firipti wa omu nē wa kām krī nhō xwýnhjê jarē nē wa kām:

—Nà na pa pre mē kām Jejus kapēr jarē nhūm mē inhma nē hkôt amnhī xunhwý. Jakamā pa pre mē hkrā kumrā. Nom na kormā Tirtūm Karōja mē hkarō mā gjêx kêt nē. Anē.

Hāmri nhūm wa mē harēnh ma nē mē himōk ā wa ĩhkra jaxwýr o ri mē hkôt mra. Ja kôt nhūm Tirtūm Karō mē hwýr wrý nē mē hkarō mā gjêx pa.

18-19 Hāmri nhūm wajaga Simāwja mē amnhī tā wa omunh o xa nē hamaxpēr o:

—Kokýy. Kwa wa kot mē hā ĩhkra jaxwýrja kôt na hte Tirtūm Karō mē hkarō mā agjê. Hēxta wa nē. Inhmā ā mē hipêx anhýr o ri ixpa hprām týx. E pa ixkâxpore hkwy jamý nē o tē nē wa kām kugō kē wa tanhmā ixto pa wa urāk nē ā mē hipêx anhýr o ri ixpa. Nà kot paj anē. Anē.

Hāmri nē wa hwýr tē nē wa kām:

—E ota ixkâxporeta. Kwa amnhīm apy nē hpānhā tanhmā ixto pa war apyrā nē mē hā inhīhkra jaxwýr o ri mē hkôt ixpa kē Tirtūm Karōja mē hkarō mā agjê. Inhmā ja ho anhýr prām týx. Anē.

20-23 Hāmri nhūm wa tee ri ā kapēr anhýrja ā omu nhūm Pētre kām:

—Tk. Kwa ajamaxpērja mex kêt. Xà na htem kâxpore ho Tirtūm mā amnhīrer pē ý hā mē ho hwýr o pa nhūm Karō mē hwýr agjê? Nà na htem kâxpore ho Tirtūm Karō japrōr kêt nē. Kot kaj wa ixpyrā nē ā mē hipêx anhýr kêt nē. Ajamaxpērja mexre hā. Kormā ate Tirtūm kôt amnhī xām týx kêt jakamā na ka atýx ā ri ajamaxpēr anē.

—Na ka ā wa ixte Tirtūm nhý hā mē hipêx anhýr ā wa ixpumu nē amā wa ixpyrā nē ā mē hipêx anhýr o ri apa hprām xaj ajamaxpēr punuj nē. Nhūm ajamaxpēr punuj te kot apa hā apyr ka tee ate kēp amnhī kjēnh pyrāk. Kwa tokyx ajamaxpēr punuj ā amnhī pumu nē akaprī nē tokyx hkaga. Hāmri nē amnhī to Tirtūm wý kē amnhī katut kôt ajamaxpēr punujja mē ka axte ā ajamaxpēr anhýr kêt nē. Á mē hamaxpēr punuj anhýr xwýnhjaja koja mē nhýrmā ma kuwy hwýr pa. Anē.

24 Hāmri nhūm tee ri amnhī tā kuma nē hkaprī nē wa kām:

—Kwa xà wehe? Tō tokyx ixto Tirtūm wý kē ā ijamaxpēr anhýrja mýrapê hwýr inhmēnh kêt nē. Anē.

25 Tā nhūm Simāw Pētre mē Juāw wa Samar nhō xwýnhjê mā Pahiiti Jejus kapēr jarēnh pē ho mē ahkre hāmri nē ma akupým Jerujarē hwýr mō. Ma pyka pē Samar hkôt mē kām Jejus kapēr jarēnh o ma akupým mō.

*Firipti mē Exiop nhō xwýnh wa harēnh
Ijais 53.7-8*

26 Hāmri nhūm Firipti arī Samar kamā arīk. Hāmri nhūm Tirtūm kapēr o mē wrýk xwýnhja hwýr wrý nē kām:

—Pa? E ot pa awýr wrý nē tē. Nà kēr ka tokyx akato nē ma mō nē Jerujarē rüm kânhmā Kas wýr pry kahpēr ta nē hā juk nē ma hā mō. Kapôt ā pry nōrta kahpēr ta nē hā mō. E kwa tokyj.

Anhýr o kām kapēr hāmri nē ma akupým tē nē kaxkwa hwýr api.

27 Hāmri nhūm Firipti kuma nē kato nē ma hwýr mōr kurē kumrēx. Mōō hāmri nē pryja kahpēr ta nē hā mō.

Hāmri nhūm ra mēhō myja mō. Exiop nhō xwýnh na pre. Exiop kamā mēō pahi na pre niti. Hixi pē na pre Kátatre. Nhūm pry hā mōr xwýnhja kēp kām kâxpore jamār o pa xwýnh. Exiop kamā te kēp mē ō kōwenatō pyrāk. Tā kot Tirtūm mā mex o mex ā harēnh kaxyw ma Jerujarē hwýr mō.

28 Hāmri nē akupým Exiop wýr kormā mō. Ō pâr kām nhý nē Tirtūm kapēr ā kagā htūm kamā kapēr o mō. Tirtūm nhý hā kapēr o pa xwýnh pē Ijais kot Tirtūm kapēr ā kagā htūmja nhūm kamā kapēr o mō.

29 Hāmri nhūm Tirtūm Karō Firipti mā harē nē kām:

—E mēhō mýj wýr aprôt nē tē nē hā ajêt nē ma hkôt tē. Anē.

30 Hāmri nhūm kuma nē ma hwýr hprôt nē hā ajêt nē kot kagā kamā kapēr ā kuma. Ijais kot Tirtūm kapēr ā kagā htūm kamā kapēr ā kuma nē kām:

—Pa? Mān ka aprī hā ate kamā akapēr xwýnhta ma nà? Anē.

31 Hāmri nhūm kām:

—Nà ixte maare hā. Mēhō kot hprī hā inhmā harē pa ixprī hā kuma? Xàt ka ixwýr api nē ixri nhý nē aprī hā inhmā harēnh o ixkôt mō nà? Anē.

Hāmri nhūm kuma nē hwýr api nē ĩhkō hā nhý nē kagāta pumunh o nhý.

32 Nhūm hā kagā kot:

Na htem ôwēhti par kaxyw nhūm amarī mē kām akryk kuhê.

Nē mē kot kēp hkī jakār kaxyw nhūm ma anē nē amarī mē kām akryk kuhê.

Tā na pre mēhōja ôwēhti kot amnhī nhīpêx pyrāk o amnhī nhīpêx.

Jakamā nhūm mē kot tanhmā hipêx to htā no nhūm arī mē kām akryk xa. Amnhī nē tanhmā mē kām kapēr punuj to hkêt nē. Ām arī mē kām xa.

33 Na prem homnuj týx nē ri hipêx kati rax nē.

Aa kot tanhmā amnhī tomnuj to hkêt kumrēx tā nhūm mē ā hipêx anē nhūm mēhō yr pē tanhmā nē mē kām kapēr to hkêt nhūm prem kupī.

Nhũm amnhĩ kanrēhā hkra hkēt rāhā ty. Jakamā kot puj mē hkrajē nhĩxi mar kēt nē. Kra hkēt rāhā htyk kēnā. Anē.

³⁴ Nhũm pre ā Exiop nhõ xwýnh Tirtũm kapēr ā kagā htũm kamā harēnh anē. Hāmri nē tee ri ā kot mēhõ jarēnh anhyrja kukamā hamaxpēr nē hā Firipti kukja nē kām:

—Kwa aprĩ hā inhmā mēhõja jarē. Mēhõ na prem ā hipēx rax anē? Xā kot kagā xwýnhta na prem ā hipēx anē nā xā nhām mēhõ na prem ā hipēx anē? E kwa aprĩ hā inhmā harē pa ā mē kot hipēx anhyr xwýnh kõt omu. Anē.

³⁵ Hāmri nhũm kām:

—Tõe kot paj amā hā harē. Nā Jejus na prem ā hipēx anē nhũm prem hā kagā. Anē.

Hāmri nē hprĩ hā kām kot kamā harēnh xwýnhta jarē. Jejus kot tanhmā mē panē amnhĩ nhĩpēx toja nhũm hprĩ hā kām harēnh o hkõt mō.

³⁶ Hāmri nhũm wa kormā mō nē pry htā himõ hānh mō nhũm Exiop nhõ xwýnh omu nē Firipti mā kām:

—E mũj gõ mũj nõ. Xā kot kaj kamā ixkrā kumrā nā? Anē.

³⁷ Nhũm kām:

—Nā kot kaj amnhĩ kaxyw Jejus Kris kõt ajamaxpēr nē hkõt amnhĩ xām hā kot paj akrā kumrār kurē kumrēx. Anē.

Hāmri nhũm kām:

—Tỹ. Kēp Tirtũm Kra kēnā kot paj kēt amnhĩ kaxyw hkõt ijamaxpēr kēt. Anē.

³⁸ Hāmri nē p̄ar o m̄rar xwýnh mā anē nhũm p̄ar o nō nhũm wa kato nē himõ hwýr wrý nhũm Firipti hkrā kumrā. Kot Jejus kõt amnhĩ xām ā hkrā kumrā.

³⁹ Hāmri nē wa akupým api nhũm Tirtũm Karõ Firipti mý nē ma nhýhým o mō nhũm Exiop nhõ xwýnhja axte omunh kēt nē. Hāmri nē ma akupým papxā hwýr mō. Ra kot Jejus kõt amnhĩ xām jakamā hkĩnh nē ma akupým mō.

⁴⁰ Rõm nhũm Firipti krĩ pē Ajõt kamā põj. Tirtũm Karõ kot Exiop nhõ xwýnh pē kator nē tanhmā ho nē Ajõt wýr o mō hāmri nē kamā kumē. Hāmri nhũm mē kām Jejus kot tanhmā mē panē amnhĩ nhĩpēx to hā harēnh pē ma krĩ hõ hwýr mē kām ujarēnh anhyr o pa rāhā krĩ pē Sejarej wýr mō nē põj.

9

*Sawti kot Jejus kõt amnhĩ xām ā harēnh
Atre 22.6-11, 26.12-18*

¹ Rõm nhũm Sawtija xatā Jerujarē kamā Pahĩti Jejus kõt mē kot amnhĩ xunhwýr xwýnhja tanhmā mē homnuj tỹx to ho ri mē hkõt pa. Kām mē himex par prām jakamā na pre hte ā amnhĩ nhĩpēx anhyr pix o pa. Tā ra hamaxpēr nē ma patre maati hwýr tē nē mē hā amnhĩ jarē nē kām:

² —E ot pa awýr tē. Kwa inhmā kagā nhĩpēx pa kupy nē ma krĩ pē Tamas kām mē pahpē Ijaew xāptār tũmrejē hwýr o mō nē mē kām kugõ. Kē mē kamā harē nē omu hāmri nē hkõt inhĩkra kamā Jejus kõt mē kot amnhĩ nhĩpēx xwýnhjē jagē. Mēnijaja nē mēmýjaja. Hāmri pa mē unē nē man akupým awýr mē o mō ka mē omu nē kam tanhmā mē hipēx to. Anē.

Hāmri nhũm kuma nhũm ja kām mex nē. Hāmri nhũm kām kagā nhĩpēx nē kugõ nhũm kupy nē hkõt mē pa xwýnhjē mē ro hā ma Tamas wýr mē hwýr mōr kurē kumrēx.

³ Mõhõ mē ra hpõx o mōr mē nhũm puh kaxkwa rũm hirā rax kumrēx wrý nē hā ajēt nhũm hipõk ri xa.

⁴ Hāmri nē tee ri omu nē kām ma xāj pykap tēm nē akryk nõ. Hāmri nhũm kaxkwa rũm mēhõ kām kapēr nē kām:

—Pa Sawti? Hēxta waa nē. Kwa mon ka hte ixtomnuj tỹx o ri apa? Anē.

⁵ Hāmri nhũm amnhĩ jaēr pē kuma nē kām: —Kwa mē atõ na ka ā inhmā akapēr anē pahĩti? Anē.

Hāmri nhũm kām:

—Kwa nhũm ixpē Jejus ixte amā ixkapēr kēnā. Pa na ka hte ixpē ixkõt mē kot amnhĩ xunhwýr xwýnhjē nhĩpēx kati ho apa. Jao te pa ate ixtomnuj tỹx pyrāk.

⁶ Nom kot kaj axte ā amnhĩ nhĩpēx anhyr kēt kumrēx. E kånhmā xa nē māmri ma krĩ hwýr tē. Kot kaj hwýr põj nhũm mēhõ awýr tē nē mēmoj tā amā karõ ka ama nē hkõt amnhĩ nhĩpēx. Anē.

⁷ Nhũm pre ā Jejus Sawti mā kapēr anē. Nhũm hkõt mē pa xwýnhja mēmoja ma no ām hprĩ mar nē mēmoj pumunh kēt nē. Hāmri nē tee ri hamaxpēr nē kām ma xāj akryk kapēr kēt kumrēx nē kuhē.

⁸ Hāmri nhũm Sawti kånhmā xa nom rĩt kēt nē tee ri rĩt mā nhũm mē hpa hā kupy nē ma krĩm o mō.

⁹ Nē Tamas wýr o põj nē nhýri mēhõ nhõrkwý hwýr ho axā nhũm kamā nohkre nē arĩ hkrĩ. Tee ri amnhĩ kukamā hamaxpēr o hkrĩ. Nē apkur kēt nē hkõm kēt o ra hā apkati axkrunēpxi.

¹⁰ Tamas kamā na pre mēhõ my pē Ananĩsja pa. Kot Jejus kõt amnhĩ xunhwýr xwýnhjē hõ na pre. Jakamā nhũm Jejus hwýr kato nē kām kapēr. Te hpimtir kām hwýr kator nē kām kapēr pyrā nē kām:

—Pa Ananĩs? Anē.

Nhũm kām:

—Ý? Ot pa xa. Mo na Pahĩti? Anē.

¹¹ Nhũm Jejus kām:

—E kēr ka akato nē ma mē kot kām: “Pry katāt” anhyr xwýnhta wýr tē. Hāmri nē kamā Jut nhõrkwý japēr. Kamā na Tas nhõ xwýnh pē Sawtija hkrĩ. Na no hkre nē inhmā amnhĩ jarēnh o hkrĩ. Ka hwýr axā nē omu.

¹² Ate hwÿr atēm nē inhÿ hā hā anhÿhkra xir nhūm akupÿm rīt mex kaxyw na ato amÿti. Jakamā e ma hwÿr tē nē ā hipêx anē. Anē.

¹³ Hāmri nhūm Ananīs tee ri kuma nē kām Sawti puma ho amnhī kamā kahak nē. Hāmri nē kām:

–Kwa nā Pahihti. Tām na xep hte Jerujarē kamā mē kot amnhī kaxyw akōt mē hamaxpēr xwÿnhjē nhīpêx kati ho pa. Pa ra mē hā harēnh ma.

¹⁴ Tā na xep ra jar Tamas wÿr pōj. Patre krāhtūm kapēr nhÿ hā kot mē ixpē akōt amnhī xunhwÿr xwÿnhjē pynēnh nē ma akupÿm hwÿr mē ixto mōr kaxyw. Tān ka ri hwÿr ijano. Kwa nā ri ixto anhÿr kēt nē Pahihti. Anē.

¹⁵ Nhūm Jejus kām:

–Nā mamrī ma hwÿr tē. Ra ixte amnhī kaxyw ām kēnā. Jakamā koja ā mē anhīpêx anhÿrta hpānhā ma mē piitā mē kām ixkapēr jarēnh o pa. Mē apē Ijaew mā nē mē anhō pahi hkwÿjē mā nē mē kēp Ijaew kēt xwÿnhjē mā. Koja mē piitā mē kām ixkapēr jarēnh mex o ri mē hkōt pa.

¹⁶ Koja mē ixtā homnuj tÿx nē nhūm amnhī xā htÿx kamā hamak o pa. Nom kot paj ixprī hā mē kot tanhmā ixtā hipêx to hkukamā kām ixujarēnh pa nhūm amnhī kukamā amnhī jarēnh ma. E tokyx māmrī ma axāmhix hwÿr tē. Anē.

¹⁷ Hāmri nhūm kuma nē kato nē ma Sawti hwÿr htēm kurē kumrēx. Hāmri nē ixkre hwÿr axā nē omu nē hkrā hā ihkra xi nē kām:

–Pa Jejus kōt ixtō Sawti? E na Pahihti Jejus awÿr inhmē pa awÿr tē. Pry kahti ri kot awÿr kator xwÿnhhta. Tā akupÿm arīt nhūm Tirtūm Karō kot akarō mā ār kaxyw na awÿr inhmē pa tē. Anē.

¹⁸ Hāmri nhūm mēmoj te tep kà pyrākja Sawti no rūm hapōj nē rōrōk nhūm akupÿm rīt mex kurē kumrēx. Hāmri nē kànhmā xa nhūm Ananīs hkrā kumrā. Ra amnhī kaxyw Jejus kōt hamaxpēr ā hkrā kumrā.

¹⁹ Hāmri nhūm nhÿ nē apku nē akupÿm hihtÿx.

Sawti kot Tamas kamā Jejus kapēr jarēnh Sikūn Korīt 11.22-23

Nhūm Sawti Tamas kām mē kot Jejus kōt amnhī xunhwÿr xwÿnhjē hkōt amnhī xām nē mē hkōt ri pa nē tokyx ma akupÿm mōr kēt nē.

²⁰ Kormā mē hkōt ri pa nē Ijaew nhō Tirtūm kapēr o mē ahkre xā hā ixkre hwÿr mra nē kamā mē kām Jejus kapēr jarē. Kēp Tirtūm Kra hā harēnh o kuhē.

²¹ Hāmri nhūm mē amnhī jaēr pē ā harēnh anhÿrja ma nē tee ri hamaxpēr nē axpēn mā:

–Kokÿÿ. Kwa tām na xep pre Jerujarē kamā amnhī kaxyw Jejus kōt mē kot amnhī xunhwÿr xwÿnhjē homnuj tÿx o pa. Tā xep

jar kot mē hkwÿjē pynēnh nē ma mē o mōr nē Jerujarē kamā patre krāhtūmjē mā mē ōr kaxyw na pre man mē pahwÿr mō. Tā ra tanhmā hamaxpēr to nē axtem nē mē pamā Jejus kapēr jarēnh o mē pajahkre ho pa. Anē.

²² Hāmri nhūm Sawti arī Tamas kām Ijaew mā tanhmā Jejus jarēnh to kamā hihtÿx o mē hkōt pa nē mē kām:

–Nā Jejus Krisja na pre Tirtūm mē pakaxyw ām nē mē pahwÿr kumē. Ām hāmri na pa mē amā ja jarē. Anē.

Hāmri nhūm mē kuma nē tee ri kutā tanhmā kapēr to hkukamā hamaxpēr.

²³ Tā ra hā apkati xohōtō nē nhūm Tamas kām Ijaew kwÿjaja kot Sawti pīr kaxyw hā axpēn ma.

²⁴ Hāmri nhūm mēhōja hā ama nē Sawti hwÿr tē nē kām mē harē nē kām:

–Kwa Sawti kēr ka axkām ajamak rom. Na mē pahkwÿjaja atā amÿnē. Na mē ra krī puhā kahē xā hā hakwakre piitā hamār ho kuhē. Kot kaj nhÿhÿm akato nhūm mē apumu nē apynē nē apī. Anē.

²⁵ Jakamā nhūm kamāt nhūm Sawti hkōt ri mē pa xwÿnhjaja kawā rax ō mÿ nē hwÿr o tē nē kām ām nhūm hwÿr axā nē nhÿ. Hāmri nhūm mē hkagrī nē kēn o krī puhā kahēja nhīrō pē ho wrÿ nhūm mē kēp kato nē ma mō.

Sawti kot Jejus kwÿjē hkōt pikamēnh ā harēnh

Karatas 1.15-24

²⁶ Tā nhūm Sawti krī pē Tamas rūm kato nē ma akupÿm Jerujarē hwÿr mō hāmri nē hwÿr pōj. Hāmri nē mē kot Jejus kōt amnhī xunhwÿr xwÿnhjē hkōt amnhī jarēnh kaxyw mē hwÿr tē. Hāmri nhūm mē tee ri amnhī wÿr omu nē kot Jejus kōt amnhī xām ā amnhī to hēx ā hkamnhix hāmri nē amnhī kamā kahak o amnhī nē hkurē nē mē piitā kām uma nē.

²⁷ Ām Panāpe pix ām hāmri kot Jejus kōt amnhī xām kōt hamaxpēr. Hāmri nē ma hwÿr tē nē haprō nē ma Jejus nhÿ hā mē ahkre xwÿnh maatiē hwÿr o tē nē yr pē mē kām kapēr nē mē kām:

–Kwa ām hāmri na Sawti amnhī jarē. Na ra mē pahpyrā nē Jejus kōt amnhī xām. Na xep pre Tamas wÿr pry hā kormā mō nhūm xep Pahihti Jejus hwÿr kato nē kaxkwa rūm kām kapēr nhūm kuma nē hkōt amnhī xām. Jakamā nhūm xep ra axtem kot amnhī nhīpêx nyw o Tamas nhō xwÿnhjē mā Jejus kapēr jarēnh o ri mē hkōt pa. Ra amnhī kamā kām mē uma hkēt nē āmhix ri mē kām harēnh o ri mē hkōt pa. Anē.

²⁸ Hāmri nhūm mē kuma nē amnhī kōt Sawti mē nhūm mē hkōt ri pa. Hāmri nē Jerujarē kamā mē piitā mē kām Jejus kapēr jarēnh o pa. Kām Jejus kōt amnhī xunhwÿr

kêt xwýnhjê pyma hkêt nê àmnhîx ri mē kām kapêr jarênh o ri mē hkôt pa.

²⁹ Nê Ijaew kwý pê Gresjê kapêr o mē kapêr xwýnhjê mǎ nhũm xatǎ mē kām Jejus jarênh o ri mē hkôt pa. Kêp Tirtũm kot mē pakaxyw ǎm xwýnh ǎ harênh rǎhǎ ho ri mē hkôt pa. No nhũm mē kām mar prǎm kêt nê ra kot Jejus ǎ hpîr mǎ.

³⁰ Hǎmri nhũm mē kot Jejus kôt amnhî xunhwýr xwýnh kwýnjaja mē harênh ma nê mē kêp ho kato nê ma krî pê Sejarej wýr o mō. Hǎmri nê kurũm ma akupým ō krî pê Tas wýr kumê nhũm ma akupým mō.

³¹ Tǎ ra Sawti kot Jejus kôt amnhî xǎm jakamǎ nhũm mē kām mē hkurê xwýnhjaja axte Jejus ǎ tanhmǎ hkwyjê hto hkêt nhũm mē piitǎ hamakêtkati nê àmnhîx ri pa. Pika pê Jutej kamǎ nê Garirej kamǎ nê Samar kamǎ nhũm mē piitǎ hamakêtkati nê àmnhîx ri pa. Hǎmri nê Tirtũm mǎ mex o mex ǎ harênh o ri pa. Nhũm Tirtũm Karō tanhmǎ mē hkrǎ hto nhũm mē ra kapêr kôt amnhî nhîpêx mex o mō. Hǎmri nhũm mē ohtō rax nê mē urǎk nê Jejus kôt amnhî xunhwý nê hkwyjê hkôt axkamê.

*Enejti akupým mex ǎ harênh
Atre 3.1-10*

³² Tǎ nhũm Simǎw Pêtreja ma mē kot Jejus kôt amnhî xunhwýr xwýnhjê mǎ Tirtũm kapêr jarênh o mē ahkre kaxyw ma krî piitǎ hkôt pa. Jakamǎ krî pê Rit wýr mō

³³ nê hwýr pōj nê kamǎ Enejti pumu. Nhũm ĩ kamǎ htyk pa nê kupip kām hikwý rǎhǎ hǎ amgrǎ pê 8.

³⁴ Hǎmri nhũm Simǎw Pêtre omu nê Jejus nhý hǎ kām kapêr nê kām:

—Pa Enejti? E na Jejus Kris akupým ato mex. Jakamǎ e kǎnhmǎ xa nê akupipta py. Anê.

Hǎmri nhũm akupým mex nê kǎnhmǎ xa nê amnhî pumu nê hkĩnh o hkĩnh.

³⁵ Hǎmri nhũm krĳja kamǎ nê krĳ hō pê Sarō kamǎ mē piitǎ harênh ma nê mē kot amnhî tomnuj kaga hpa nê hpǎnhǎ Jejus kôt amnhî xunhwý nê hkôt amnhî nhîpêx o pa.

*Tapitre akupým htĳr ǎ harênh
Rukre 8.49-56; Atre 20.7-12*

³⁶ Nhũm Tapitreja krĳ pê Jope kamǎ na pre pa. Gres kapêr kām hixi pê Nokre. Mē kapêr kām Nokreja te kêp “karǎ” anhýr jarênh pyrǎk. Na pre ra Tapitre pê Nokreja Jejus kôt amnhî xǎm nê mē piitǎ mē ho mex o ri mē hkôt pa. Nê mē kêp amrakati xwýnhjê kamǎ ukapri ho ri mēmoj to mē kutǎ nojarêt o ri mē hkôt pa.

³⁷ Tǎ ra ǎ htýx nê hǎmri ty. Hǎmri nhũm mē tee ri omu nê hkapri nê mýr rax nê. Nê kumý nê kuhō hǎmri nê kormǎ haxǎr kêt ri kýx pê ixkre kamǎ kuxi nê kuri mýr o hkrĳ.

³⁸ Nhũm Simǎw Pêtre kormǎ krĳ hō pê Rit kamǎ ri pa. Rit rũm Jope hwýr jawý jakamǎ

nhũm Jope kamǎ mē kot Jejus kôt amnhî xunhwýr xwýnhjaja Simǎw Pêtre jarênh ma hǎmri nê hwýr ja wa ho hamêxkrut nê wa kumê. Nhũm wa ma hwýr tē nê hwýr pōj nê omu nê kām:

—Pa? E jar na pa wa awýr tē. Na Jejus kôt mē pahtox Tapitre ham mē pahpê ty. Kwa tokyx kormǎ mē kot haxǎr kêt ri ma wa ixkôt hwýr tēn omu nǎ? Anê.

³⁹ Hǎmri nhũm wa kuma nê ma wa hkôt htēm kurê kumrêx. Hǎmri nê Jope hwýr pōj nê mē hwýr tē nhũm mē kýx pê htyk nê nōr xwýnhja wýr ho api nhũm hwýr axǎ. Nhũm kuri mē kêp mē mjên htyk xwýnhjaja hkapri nê mýr o hkrĳ. Hǎmri nhũm Simǎw Pêtre mē hwýr axǎ nhũm mē omu nê kām Tapitre kormǎ htĳr ri kot tanhmǎ mē ho mex to hǎ harê. Nê mē ê hkwy jamý nê kām kupê nê kām:

—Ga ja pumu. Tyk xwýnhnta na pre mē inhmǎ hkay nê kugō. Na pre hte mē ixto mex o pa. Tǎ mē ixpê ty. Héxta gǎǎ nê. Na pa mē ixkapri htýx kumrêx. Anê.

⁴⁰ Hǎmri nhũm mē kuma nê mē kator pa hǎmri nê htyk xwýnhnta ri hkōn krǎ ho nhý nê ho Tirtũm wý. Hǎmri nê htyk xwýnhnta mǎ kapêr nê kām:

—Pa Tapitre? E kwa kǎnhmǎ nhý. Anê.

Pu nhũm no amra nê Simǎw Pêtre pumu nê kǎnhmǎ nhý.

⁴¹ Hǎmri nhũm hpa hǎ kupy nê kǎnhmǎ ǎm nê kapôt ǎ mē kuhê xwýnhjê mǎ anê nhũm mē akupým wa hwýr agjê nhũm mē kām:

—E ota. Na Tirtũm akupým mē amǎ ho htĳr. Anê.

Hǎmri nhũm mē amnhî jaêr pê omu nê hkĩnh týx nê.

⁴² Hǎmri nhũm Jope kamǎ mē piitǎ harênh ma nê mē ohtō nê amnhî kaxyw Jejus kôt hamaxpêr nê hkôt amnhî xunhwý.

⁴³ Hǎmri nhũm Simǎw Pêtre Jope kamǎ ri pa hǎ apkati xohtō nê tokyx mē kurũm kato nê ma krĳ hō hwýr mōr kêt nê. Na pre mry kǎ ho mēmoj nhîpêx o pa xwýnh pê Simǎw ri pōj nê kuri pa hǎ apkati xohtō nê.

10

*Konêre kot Simǎw Pêtre hǎ karō hǎ harênh
Rukre 7.1-10*

¹ Tǎ nhũm Ijaew kêt xwýnh Konêre. Kêp Rōmjê nhō pōristi krǎhtũm na pre. Ō pōristija pika pê Itar nhō xwýnh na pre mē nhũm Konêre kêp mē hkrǎhtũm. Krĳ pê Sejarej kamǎ.

² Konêreja kot amnhî to mex o pa xwýnh na pre. Kêp Ijaew kêt tǎ na pre hte ōrkwý kamǎ hkwyjê mē Tirtũm ǎ hpjajaam nê kām mex o mex ǎ harênh o pa. Apkati mē kām amnhî jarê. Nê mē kêp amrakati xwýnhjê mǎ kǎxpore hkwy nhōr o pa.

³ Jakamā nhūm mēmo arīgro hā ra myt japanh grire nhūm mēmoj pumu. Te hpimtir kām kot omunh pyrā nē kaxkwa kamā Tirtūm kapēr o wrūk xwýnh pumu. Nhūm hwýr wrý nē tanhmā kām kapēr to nē kām:

—Pa Konēre? Anē.

⁴ Nhūm tee ri omu nē kām ma htýx kumrēx. Hāmri nē kām:

—Mo na? Anē.

Hāmri nhūm kām:

—Nā ate amnhī to Tirtūm wýr o apaja nhūm ra amnhī tā ama nhūm ja kām mex nē. Nē ate mē kēp amrakati xwýnhjē mā káxpore hkwy nhōr o apaja nhūm ja māānēn kām mex nē.

⁵ —Jakamā e inhma. Kēr ka ma Jope hwýr amā mē āpēnh xwýnh kwý rē kē mē ma hwýr mra nē kamā mēhō pē Simāw Pētre japrō nē man akupýn awýr o mō.

⁶ Simāw kot mry kà ho mēmoj nhīpēx o pa xwýnhhta nhōrkwy kamā na hte pa. Ōrkwýja gó mý ri na. E hwýr mē arē kē mē ma hwýr mō nē haprō nē man awýr o mō kē amā mēmoj mex jarē ka ama. Anē.

⁷ Nhūm pre ā Tirtūm kapēr o wrūk xwýnhja Konēre mā kapēr anē hāmri nē kato nē ma akupým api. Hāmri nhūm kot mar xà hkót jajē rē nē Simāw Pētre hwýr mē kurē. Kām āpēnh xwýnhjē ho hamēxkrut nē kaxyw ō pōristi hō. Pōristija na pre hte Konēre pyrā nē Tirtūm ā hpijaām o pa.

⁸ Jakamā nhūm mē kurē nē mē kām kapēr hāmri nē ma Jope hwýr Simāw Pētre hwýr mē kurē nhūm mē kato nē ma hwýr mō.

⁹ Hāmri nhūm apkati nhūm kaxkwa nhīpōk ri myt nhý nhūm mē hwýr hpōx o mō.

Simāw Pētre tanhmā hpimtir to hā harēnh Atre 11.5; Karatas 2.11-21

Rōm nhūm Simāw Pētre kot Tirtūm mā amnhī jarēnh kaxyw ixkre nhīmōk ā api nē nhīmōk po hā kām amnhī jarēnh o nhý.

¹⁰ Hāmri nē ra kām prām nē nom nhūm mē kormā kām ō hā āpēnh jakamā nhūm arī ixkre nhīmōk ā Tirtūm mā amnhī jarē.

Hāmri nē Konēre pyrā nē te hpimtir kām kot mēmoj pumunh pyrā nē mēmoj pumu nhūm Tirtūm Konēre hkukamā tanhmā kām mēmoj to amnhīrīt to. No ām hā kuxi nē kām harēnh jakamā nhūm Simāw Pētre te hpimtir kām kot mēmoj pumunh pyrā nē mēmoj pumu.

¹¹ Nhūm kaxkwa katēr nhūm kurūm mēmoj te kot mē hpiro xà pyrāk xwýnhja pyka hwýr wrūk o mō. Nē hatur xà piitā xpēn tā akuprō nē ajēt nē wrūk o mō nhūm omu.

¹² Mē hpiro xàta kamā mēmo mry piitā hikwý. Mēmo mry hpar o ri pa xwýnhjaja nē htu mýr pē ri pa xwýnhjaja nē mēmo āk kýx

pē htor o ri mrrar xwýnh piitā mē hpiro xàja kamā hikwý nhūm omu.

¹³ Hāmri nhūm Tirtūm kām:

—Pa Simāw Pētre? Mān ka ra amā prām nē nā? E kānhmā xa nē axāmnhix māmri mryta ō kapi nē apī nē ho anē nē aku. Piitā mē ate hkur mā mex. Anē.

¹⁴ Hāmri nhūm tee ri kuma nē kām:

—Kwa nā Pahi Maati. Mē ixpē Ijaew mē ixte mry piitā hkur kēt. Ām hkwy pix na pa htem kuku. No mry jaja aa mē ixte hō hkwy hkrēr kēt. Anē.

¹⁵ Hāmri nhūm Tirtūm kām:

—Nā kot anhýr tā kot paj pam amā mēmoj jarē ka kamā anhōkre kahak kēt nē. Māmri amnhīm hō kapi nē apī nē ho anē nē axāmnhix hkwy hkre. Anē.

¹⁶ Nhūm pre ā kām mry hā karō anhýr o axkrunēpxi. Simāw Pētre kot māmri Ijaew kēt xwýnhjē hkót pa nē āmnhix ri mē kutā apkur nhūm Tirtūm kām ja mex nhūm kot hā amnhī pumunh kaxyw nhūm ā kām harēnh anhýr o axkrunēpxi. Hāmri nhūm mē hpiro xàja ma akupým kaxkwa hwýr āpir o mō nē akunok.

¹⁷ Hāmri nhūm Pētre te hkrākator pyrāk jao tee ri hpimtir kukamā hamaxpēr o nhý nē hamaxpēr o:

—Kwa mo kaxyw na Tirtūm ā inhmā ja hā karō anē? Anē.

Rōm nhūm Konēre kot hwýr mē rēnh xwýnhjaja ra hwýr hpōx o mō. Ijaew kēt xwýnhhta Simāw nhōrkwy hā mē hkujēr o mō nē hwýr pōj nē hakwakrem kuhē.

¹⁸ Hāmri nē ōrkwý nhō xwýnhjē mā kām:

—Pa na ka mē arī akri? E Simāw Pētre hwýr na pa mē mō. Xà jar na hte pa nā? Anē.

Hāmri nhūm mē kām: —Tý. Omūj kýx pē ixkre nhīmōk ā na nhý. Anē.

¹⁹ Nhūm Simāw Pētre arī kot mēmoj pumunhta kukamā hamaxpēr o nhý nhūm Tirtūm Karō kām mē hpōx xwýnhjē jarē nē kām:

—E Simāw Pētre. Ota Ijaew kēt xwýnhjaja axkrunēpxi nē ajapēr o mō nē ra anhōrkwy hwýr pōj.

²⁰ Mē hwýr wrý nē mē kot amā mēmoj jarēnh ma nē māmri axāmnhix ma mē hkót mō. Tanhmā ajamaxpēr to hkēt nē. Pa na pa awýr mē kumē nhūm mē mō. Anē.

²¹ Hāmri nhūm kuma nē mē hwýr wrý nē mē omu nē mē kām:

—Pa? Xà pa na ka mē ijapēr o mō? E ot pa xa. Kam nē mē inhmā mēmoj jarē pa mē ama. Mēmo kaxyw na ka mē ixwýr mō? Anē.

²² Hāmri nhūm mē kām:

—Nā mē inhō patrāw Konēre na awýr mē inhmē pa mē mō. Na hte tām amnhī nhīpēx o pa. Nē Tirtūm ā hpijaām nē kām mex o mex ā harēnh o pa. Nhūm mē inhō kri kamā Ijaew kām hkīnh nē. Tā na Tirtūm kapēr o wrūk xwýnhja ham hwýr wrý nē kām ajarē.

Kot amnhĩ wýr atã karõ nhũm ate hwýr amõr nê kãm axujarênh kaxyw kãm ajarênh jakamã nhũm mē ixte ajaprõr kaxyw awýr mē inhmē pa mē man awýr mō. Anē.

²³ Hāmri nhũm mē kuma nē mē kãm:

—Tõe nã na pa mē ama. E mē agjē nē akrĩ nē jar mē ixri nõ kē apkati pu mē ri ma akupým mō. Anē.

Hāmri nhũm mē kuma nē mē hwýr agjē.

Tã nhũm apkati nhũm mē akupým nojarêt nhũm Simãw Pêtre ma mē hkõt mō. Nhũm Jope kamã mē kot Jejus kõt amnhĩ xunhwýr xwýnh kwýjaja ma mē hkõt mō. Nhũm mē mõr o kamãt.

²⁴ Hāmri nhũm apkati nhũm mē Sejarej wýr hpõx o mō. Nhũm ra Konêre mē kutêp amnhĩ wýr hkwyjê ho akuprõ nhũm mē Simãw Pêtre kutêp õrkwý kamã akuprõ nē hkrĩ.

²⁵ Hāmri nhũm mē hwýr pøj nē mē hwýr àr kaxyw nhũm Konêre amnhĩ wýr omu nē kãnhmã xa nē kutã tē nē hpar pē hkõnkrã ho tēm nē nhý.

²⁶ Hāmri nhũm tee ri ja hã omu nē pa hã kupy nē kãnhmã ãm nē kãm:

—Kwa kãnhmã xa. Ixpê Tirtũm kêt tã ka ri ã inhĩpêx anē. Anē.

²⁷ Hāmri nē hkõt õrkwý hwýr axã nē kutêp mē pikuprõnh xwýnhjê pumu nē mē kãm:

²⁸ —Pa na ka mē arĩ akrĩ? E mãn ra mē ate mē ixpê Ijaew kot amnhĩ nhĩpêx ã mē ixpumunh mex. Na pa htem mē apê axtem nhõ xwýnhjê hkõt ri ipxa hkêt nē. Nē mē anhõrkwý hwýr inhgĩx kêt nē. Tã ham Tirtũm inhmã mē ixte ã amnhĩ nhĩpêx anhýr o ipxaja nē ixkurê nē inhmã: “Kot paj pam mē hkwyjaja mex ã mē harê ka mē kamã anhõkre kahak kêt nē.”

²⁹ —Anhýr jakamã ka xep pre ixtã karõ pa inhĩtõt kêt nē man mē awýr inhmõr kurê kumrêx. E mē inhmã mēmoj jarê pa mē ama. Mēmo kaxyw na ka mē ixtã karõ? Anē.

³⁰ Hāmri nhũm Konêre kãm:

—Nã jãã na pa pre jar inhõrkwý kamã Tirtũm mã amnhĩ jarênh o nhý. Ra myt xãpanh grire pa kãm amnhĩ jarê. Hāmri nhũm Tirtũm kapêr o wrýk xwýnh ixwýr wrý nē hirã rax kãm xa.

³¹ Hāmri nē inhmã: “Pa Konêre? E na hte Tirtũm ate kãm amnhĩ jarênh ta mar o hkrĩ. Nē ate mē kêp amrakati xwýnhjê ho mex o apaja nhũm hã apumu.

³² Jakamã e ma Jope hwýr amã mē àpênh xwýnh kwý rē kē mē ma hwýr mō nē kamã Simãw Pêtre japrõ nē man akupým awýr o mō. Mry kã ho mēmoj nhĩpêx o pa xwýnh Simãw nhõrkwý kamã na hte pa. Órkwýja gõ mý ri na.” Anē.

³³ —Ã kot inhmã kapêr anhýr jakamã na pa kuma hāmri nē awýr jajê rênh kurê kumrêx. Tã ka mē hkõt man mē ixwýr mō

nē ã apõx anē. ãm hāmri na ka mē hkõt mō. Mē apê Ijaew kot amnhĩ nhĩpêx kuhpa hã amnhĩ nhĩpêx nē axãmnhĩx man mē ixwýr mō. Tã ot pa mē Tirtũm noo mã ixkrĩ. Kam nē mãmri ý hã mē inhmã mēmoj jarê pa mē ama. Anē.

Simãw Pêtre kot Konêre mã ujarênh

³⁴ Hāmri nhũm Simãw Pêtre Konêre kot kãm amnhĩ jarênhja ma nē mē kãm awjarê nē mē kãm:

—Nã ãm hāmri na Tirtũm mē akukamã tanhmã inhmã kapêr to. Xep kãm mē ixpê Ijaew pix japê hkêt. Kãm mē pahpiitã mē pajapê nē mē panhĩpêx o xpên pyrãk.

³⁵ Kojã ahpýnhã pyka piitã hkõt mēhõ mē ixpyrà nē kêp Ijaew kêt tãã hkõt amnhĩ xãm nē hã hpijaãm pē kãm mex o mex ã harê nē tãm amnhĩ nhĩpêx. Hāmri nhũm Tirtũm ja hã omu nhũm ja kãm mex nē.

³⁶ —Na pre ra mē ixpê Ijaew mã tanhmã Kra Jejus Kris jarênh to. Jejus kot mē panê htyk kukwak ri na hte mē ixte hkõt amnhĩ xunhwýr xwýnhjê ho hkra. Tã ra mããnen ã mē apê Ijaew kêt xwýnhjê mã ã amnhĩ jarênh anē nē Jejus htyk kukwak ri mē ate mē ixpyrà nē hkõt amnhĩ xunhwýr xwýnhjê ho hkra. Jakamã Jejus Krisja kêp mē pahpiitã mē panhõ Pahihtĩ.

³⁷⁻³⁸ —Mãn ka prem ra harênh ma. Mē ixpê Ijaew nhõ pika pē Jutej kumrêx kãm na pre Juãw Paxisja Jejus kukamã mē kãm harê nē mē hkrã kumrãr o pa. Mē piitã mē kot amnhĩ tomnuj kaga nē Tirtũm kõt amnhĩ xunhwýr ã mē omunh xã hkõt mē hkrã kumrã. Jejusja krĩ pē Najare kamã na pre hprêk. Tã hwýr na pre Tirtũm amnhĩ Karõ mē nhũm wrý nē hkarõ mã axã nē hkõt pa ho pa. Jakamã nhũm àhpumunh o àhpumunh nē ma krĩ piitã hkõt tanhmã mē ho mex to ho ri mē hkõt pa. Pika pē Garirej kumrêx kamã mē piitã ri mē kãm Tirtũm kapêr jarênh o pa. Nē mēkarõmnuti kot Satanasti nhý hã tanhmã mē ho xwýnhjaja nhũm mē nē mēkarõmnuti japõx o pa. ã na pre Tirtũm nhý hã amnhĩ nhĩpêx anhýr o pa.

³⁹ —Tã Jejus nhý hã hkrajê jahkre ho mē ipxa xwýnhjaja na pa prem kot ri tanhmã amnhĩ to ho pa hã omunh par o ri hkõt ipxa. Mē ixpê Ijaew nhõ pyka kamã nē mē inhõ krĩ pē Jerujarê kamã kot ri tanhmã amnhĩ nhĩpêx to ho paja pa prem piitã omunh o hkõt ri ipxa. Tã nhũm prem axtem nē mē ixpê pi kahpa hã kunhõ nē kupĩ.

⁴⁰ Hāmri nhũm htyk o apkati axkrunêpxi nhũm Tirtũm akupým ho htĩr nē akupým mē ixwýr kumê pa prem akupým htĩr kãm omu.

⁴¹ No nhũm mē piitã akupým htĩr kãm omunh kêt nē. ãm mē ixwýr pix na pre kato nē mē ixkutã apku pa mē papxipixjaja akupým htĩr ã omu. Hāmri nhũm Tirtũm

mê ixte ma mê piitã mê kãm akupÿm hÿr ã harênh o ri ixpa kaxyw mê ixrê.

⁴²⁻⁴³ Amnepê m Tirtÿm nhÿ hã kapêr jarênh o mê pa xwÿnhjaja na prem Jejus kukamã tanhmã hã kagã hto nê mê kãm harênh o pa. Nê mê kãm:

Koja nhÿrmã mêhõja man mê pahwÿr wrÿ nê mê panê tanhmã amnhÿ nhÿpêx to. Ka mê atõ amnhÿ kaxyw hkõt ajamaxpêr nê hkõt amnhÿ xãm hã koja Tirtÿm ja hã apumu nê mêhõ kot tanhmã mê panê amnhÿ nhÿpêx to xwÿnhhta kukwak ri amnhÿ katut kõt ate amnhÿ tomnuj rênh pa nê axte kãm hamaxpêr kêt nê. Anê.

Na pre Tirtÿm nhÿ hã kapêr jarênh o mê pa xwÿnhjaja Jejus kukamã ã harênh nê hã kagã anê. Tã koja Jejus nhÿrmã akupÿn wrÿ hãmri nê mê htyk xwÿnhjê nê arÿ mê hÿr xwÿnhjê mê pahto pimràatã tanhmã mê pajarênh to. Mê pahte tanhmã amnhÿ nhÿpêx to ho papa hã mê pahpumunh kõt tanhmã mê pajarênh to. Hãmri nê Tirtÿm mê wa kuri mê pahÿr tÿm nê mê papa ho papa mã xwÿnhjê jarê nê mãânên wa kuri mê hÿr tÿm kêt xwÿnhjê jarê. Mê pahpiitã tanhmã mê pajarênh to kaxyw na pre Tirtÿm mê pakaxyw Jejus xãm. Tã ã kot mê pajarênh anhÿrja kukamã na pre mê ixte mê amã tanhmã harênh to ho ixpa kaxyw mê awÿr mê ixrê. Mê ate kapêr man nê tokyx Jejus kõt amnhÿ xunhwÿr kaxyw. Anê.

⁴⁴ Nhÿm Simãw Pêtre ã mê kãm ujarênh anhÿr rô m nhÿm Tirtÿm mê kot mar o hkrÿ xwÿnhjê hwÿr amnhÿ Karõ rê nhÿm mê hwÿr wrÿ nê mê hkarõ mã gjêx pa.

⁴⁵⁻⁴⁶ Hãmri nhÿm mê Tirtÿm mã mex o mex ã harênh o hkrÿ. No ãm mê kapêr kãm harênh kêt nê. Mê kapêr kwÿ hõ ho kãm mex o mex ã harê. Aa mê kot mê kapêr mar kêt tã ra ho kapêr mex nê. Jakamã nhÿm Jope rÿm mê kot Simãw Pêtre hkõt mê môr xwÿnhjaja. Ijaew kwÿ kot ra Jejus kõt amnhÿ xunhwÿr xwÿnhjaja amnhÿ jaêr pê ja hã mê omu nê axpên mã:

—Hêxta waa nê. Mê kêp Ijaew kêt tã nhÿm Tirtÿm kot mê panhÿpêx pahpyrà nê mê hwÿr amnhÿ Karõ rê nhÿm mê hwÿr wrÿ nê mê kãm agjê. Nã ãm hãmri na mê pahpyrà nê ã mê hipêx anê. Anê.

Hãmri nhÿm Simãw Pêtre mê kuma nê mê kãm:

⁴⁷ —Kwa pu mê hkrã kumrãr kurê kumrêx. Ra Tirtÿm Karõ kot mê pahpyrà nê mê hkarõ mã gjêx kênã kot kêt mêhõ mê nê tanhmã mê pahpê ãmnãr to. Ra mê kot mê pahpyrà nê Jejus kõt amnhÿ xunhwÿr kênã. Anê.

⁴⁸ Hãmri nê Konêre mê hkwyjê mã kãm:

—E kot paj mê ate Jejus Kris kõt amnhÿ xunhwÿr ã mê akrã kumrã. Anê.

Hãmri nê mê hkrã kumrãr pa nhÿm mê Simãw Pêtre mã kãm:

—Kwa kormã anojarêt kêt nê. Kritpê m ri mê ixkõt ri apa hã atã apkati grêre nê kormã ma akupÿm mô. Anê.

Hãmri nhÿm mê kuma nê mê hkõt ri pa hã apkati grêre hãmri nê nojarêt nê ma akupÿm mô.

11

Simãw Pêtre kot hkwyjê mã Konêre jarênh Atre 10:1-48

¹⁻² Hãmri nhÿm Simãw Pêtre ma akupÿm mô. Jutej kamã krÿ pê Jerujarê wÿr ma akupÿm mô hãmri nê pøj. Hãmri nhÿm Jutej kamã Jejus nhÿ hã mê ahkre xwÿnh maatijê mê mê kot Jejus kõt amnhÿ xunhwÿr xwÿnhjaja Ijaew kêt xwÿnhjê jarênh ma. Konêre mê hkwy kot mê urãk nê Jejus kõt amnhÿ xunhwÿr ã mê harênh ma. Jakamã nhÿm Simãw Pêtre akupÿm mê hwÿr pøj nhÿm mê omu nê mê hã ãhkukjêr kurê kumrêx. Hãmri nhÿm mê hkwyjaja mê hã kãm akir nê kãm:

³ —Kwa mê pahpê Ijaew pyrã nê mê kot amnhÿ my kwÿrÿt kã jakãr kêt tã ka mêmomo hwÿr mê hwÿr mô mê kuri pøj nê mê kutã apku. Anê.

⁴ Hãmri nhÿm Pêtre tee ri mê kuma hãmri nê hprÿ hã mê kãm amnhÿ jarê. Nê tanhmã Tirtÿm kot kãm Ijaew kêt xwÿnhjê jarênh to hã mê kãm harê nê mê kãm:

⁵ —Kwa mê ã ri ajamaxpêr anhÿr kêt nê. E pa mê amã amnhÿ jarê ka mê inhma mãn. Nã na pa pre jãã Jope kamã Tirtÿm mã amnhÿ jarênh o nhÿ nê te xpimtir kãm mêmomoj pumunh pyrãk. Nhÿm mêmojja te mê hpipro xã pyrã nê kaxkwa rÿm ixwÿr wrÿk o mô pa ixprÿ hã omu.

⁶ Nhÿm kamã mry piitã. Mry xoprê nê mry xuwapô nê mry hpar o ri pa xwÿnhjaja nê mry htu mÿr pê ri pa xwÿnhjaja nê ãk. Nê mê pahte hkur xwÿnhjaja nê mê pahte hkur kêt xwÿnhjaja.

⁷ Kamã mry piitã pa omu. Hãmri nhÿm Tirtÿm inhã: “Pa Simãw Pêtre? Mã nã ka ra amã prãm nê nã? E kãnhmã xa nê axãmnhÿx mãmri mryta õ kapi nê apÿ nê ho anê nê aku. Piitã mê ate hkur mã mex.” Anê.

⁸ —Pa tee ri kuma nê kãm: “Kwa Pahi Maati. Mê ixpê Ijaewjaja mê ixte mryja piitã hkur kêt. ãm hkwy hpix na pa htem kuku. No ja hkwy aa mê ixte hõ hkwy hkrêr kêt.” Anê.

⁹ Nhÿm inhã: “Nã nom kot anhÿr tãã. Kot paj pam amã mêmoj jarê ka kamã anhõkre kahak kêt nê. Jakamã e mãmri amnhÿm hõ kapi nê apÿ nê ho anê nê axãmnhÿx hkwy hkrê.” Anê.

¹⁰ —Na pre ã Ijaew kêt xwÿnhjê hwÿr inhmõr kukamã inhã karõ ho axkrunêpxi

anē. Nom hā kuxi nē inhmā mē pahte mry kur kēēta jarē. Hāmri nhūm mē hpiro xāja ma akupým kaxkwa hwýr api nē kakrām axā nē akunok.

¹¹ Hāmri nhūm Ijaew kēt xwýnhjaja mē ixwýr axkrunēpxi nē mra nē pój. Konēreja Sejarej rŭm ixwýr mē rēnh xwýnhjaja nhūm mē mra nē ixwýr pój.

¹² Hāmri nhūm Tirtŭm Karō ma mē hkōt inhmē. Mē kēp Ijaew kēt tā nhūm ixāmnhīx ma mē hkōt ixpa kaxyw mē hkōt inhmē pa ma mē hkōt mō. Nhūm Jope kamā mē kot Jejus kōt amnhī xunhwýr xwýnh kwýjaja kēp 6ja ma mē ixkōt mō. Pa mē mō nē Sejarej kamā Konēreja wýr pój.

¹³ Hāmri nhūm mē ixpumu nē mē inhmā amnhī jarē. Tirtŭm kapēr o wrýk xwýnh kot hwýr wrýk nē ōrkwý hwýr ar nē tanhmā kām kapēr toja nhūm inhmā harē. Na xep pre kām: “E kēr ka ma Jope hwýr amā mē ápēnh xwýnh kwýjē rē kē mē ma hwýr mō. Hāmri nē kamā Simāw Pētre japró nē man akupým awýr o mō kē tanhmā mē amā ujarēnh to.

¹⁴ Koja mē amā tanhmā mē apē Tirtŭm kra hprām xāj tanhmā mē ate amnhī nhīpēx to hā mē amā karō ka mē ama nē mar týx nē hkōt amnhī nhīpēx. Ka mē anhōrkwý kamā akwýjē mē apimrāātā ama nē mar týx nē. Hāmri nē kot mē amā hā karō xā hkōt amnhī nhīpēx nhūm Jejus mē ate amnhī tomnuj pē mē apytār pa.” Anē.

—Na xep pre ā Tirtŭm kapēr o wrýk xwýnhja kām ijarēnh anē. Jakamā nhūm ixwýr jajē rē pa ma mē hkōt mō.

¹⁵ Hāmri nē kormā mē kām tanhmā Jejus jarēnh to. Tanhmā kot mē panē amnhī nhīpēx to hā harē. Nē kormā mē kām ixu-jarēnh o ixām rōm nhūm Tirtŭm Karō te wam kot mē panhīpēxta pyrā nē mē hwýr wrý nē mē hkarō mā gjēx pa.

¹⁶ Pa ja hā mē omu nē Pahihti Jejus kot akupým kaxkwa hwýr nojarēt nē tanhmā mē pamā kapēr tota mā ijamaxpēr kurē kumrēx. Na pre mē pamā: “Finat Juāw Paxis na pre hte gō ho mē hkrā kumrār o pa. Tā koja Tirtŭm ta hpānhā mē awýr amnhī Karō rē nhūm mē akarō mā agjē.” Anē.

—Ā na pre Pahihti Jejus akupým nojarēt nē mē pamā kapēr anē. Jakamā pa ā kot mē hipēx anhýr ā mē omu nē ā kapēr anhýrja mā ijamaxpēr kurē kumrēx.

¹⁷ Na pu prem Pahihti Jejus Kris kōt amnhī xunhwý nhūm Tirtŭm ja hā mē pah-pumu nē mē pahwýr amnhī Karō rē. Tā te kot mē panhīpēxta pyrā nē mē mē mē Ijaew kēt xwýnhhtajē hwýr kurē nhūm mē hkarō mā agjē. Mē kēp Ijaew kēt tā nhūm mē pahpyrā nē mē hwýr kurē nhūm mē hkarō mā agjē. Tirtŭm tām kot amnhī krā hkōt mē hwýr rēnh kēnā kot pa kēt mē nē tanhmā kēp ixāmnār to. Anē.

¹⁸ Nhūm pre ā Simāw Pētre mē kām amnhī jarēnh anē nhūm mē kuma nē tām hamaxpēr nē hkīnh nē. Nē axte mē hā tanhmā kām nē hkēt nē. Ām mē hā Tirtŭm mā mex o mex ā harē. Hāmri nē axpēn mā:

—Nā ām hāmri. Mē kēp Ijaew kēt tā na prem Jejus kōt amnhī xunhwý nhūm Tirtŭm kot mē panhīpēxta pyrā nē amnhī katut kōt mē kot amnhī tomnuj rēnh pa. Nhýrmā wa hkuri mē pahpyrā nē htír tŭm nē ho pa kaxyw nhūm ā mē hipēx anē. Nā ām hāmri na ā kot mē panhīpēx pyrā nē mē hipēx anē. Anē.

*āxiok kamā Jejus kwý jarēnh
Atre 4.36-37*

¹⁹ Tā ra mē kot kēn o Estewāw kapēr o hpír xwýj ri mē kot ā hipēx anhýrta pyrā nē mē kot Jejus kōt amnhī xunhwýr xwýnhjaja omnuj týx o pa. Jakamā nhūm mē hkwýjaja mē unaj ma ahpýnhā krī hkwý hkōt pigrānh pa. Wēnīs wýr nē Sipre hwýr nē āxiok hwýr nhūm mē ma ahpýnhā krī hkwý hkōt anhgrā nē kamā pa ho pa. Nē mē kām tanhmā Pahihti Jejus kot mē panē amnhī nhīpēx to hā harēnh o ri mē hkōt pa. No ām kormā Ijaew pix mā harēnh o pa.

²⁰ Tā hāmri nhūm mē hkwýjaja Sipre mē Sirēn rŭm āxiok hwýr pan pój. Hāmri nē kamā mē kēp Ijaew kēt xwýnhjē mā Pahihti Jejus kot amnhī nhīpēx jarēnh o pa. Ā mē kot amnhī nhīpēx anhýr jakamā na mē ra ahpýnhā ri mē kām harēnh o ri pa. Ijaew mā nē mē mē mē Ijaew kēt xwýnhjē mā

²¹ nhūm mē ma mē hkōt ri Pahihti Jejus nhý hā mē kām kapēr jarēnh o ri mē hkōt pa. Hāmri nhūm mē ohtō nē amnhī nhīpēx tŭm kaga hpa nē hpānhā amnhī kaxyw Jejus kōt hamaxpēr nē hkōt amnhī xunhwý.

²² Hāmri nhūm Jerujarē kamā Jejus kwýjaja mē harēnh ma nē mē hwýr Panāpe mē. Āxiok hwýr mē hwýr kumē. Ma mē hwýr mōr nē Jejus kōt mē hamaxpēr o hihtýx kaxyw.

²³ Hāmri nhūm ma mē hwýr mō nē mē hwýr pój nē mē omu. Tirtŭm kot mē ho mex ā mē omu hāmri nē mē ý hā hkīnh nē. Nē mē kām:

—Nā ām hāmri na ka mē ra Jejus kōt amnhī xunhwý nē hkōt amnhī nhīpēx mex o ri apa. Tā kēr ka mē ām kapēr kōt pix mā ri amnhī nhīpēx rāhā ho ri apa nē aa hkaga hkēt nē. Anē.

²⁴ Panāpeja na pre tām amnhī nhīpēx o pa. Nē amnhī kaxyw Jejus kōt pix mā hamaxpēr mex o pa. Nē Tirtŭm Karō hkōt amnhī nhīpēx rāhā jakamā na pre hte ý hā mē kām Pahihti Jejus kot mē panē tanhmā amnhī nhīpēx to hā harēnh o ri mē hkōt pa. Hāmri nhūm mē kuma nē ohtō nē Jejus kōt amnhī xunhwý.

²⁵ Tã nhũm Panãpe ãxiok rũm kato nẽ kot Sawti japrõr kaxyw ma krĩ pẽ Tas hwýr mõ.

²⁶ Hãmri nẽ hwýr pøj nẽ Sawti pumu nẽ haprõ nẽ ma akupým amnhĩ kõt ãxiok hwýr o mõ. Hãmri nẽ kamã mẽ kot Jejus kõt amnhĩ xunhwýr xwýnhjẽ hkõt wa ri pa hã amgrã pyxi nẽ hapêx. Nẽ mẽ ho ohtõ nẽ ri mẽ kãm Jejus kapêr o mẽ ahkre ho ri mẽ hkõt pa. Jakamã nhũm krĩ nhõ xwýnhjaja mẽ kot Jejus kõt amnhĩ nhĩpêx xwýnhjẽ pumu nẽ mẽ hã mẽ hixi rẽ nẽ mẽ harênh o: “Kris tõ nẽ htõxjaja” anhýr o mẽ harê. Æxiok kumrêx kãm na prem ã mẽ kot Jejus kõt amnhĩ xunhwýr xwýnhjẽ jarênh anê. Jakamã nhũm mẽ piitã ã mẽ harênh anhýr o pa.

²⁷ Tã nhũm Panãpe mẽ Sawti wa kormã ãxiok kamã paja rõm nhũm Tirtũm nhý hã kapêr jarênh xwýnh kwýjaja mẽ hwýr mran pøj. Jerujarê rũm mẽ hwýr mran pøj.

²⁸ Hãmri nhũm mẽ piitã mẽ kot mẽ kapêr mar kaxyw mẽ hwýr akuprõ. Jakamã nhũm hõ pẽ Akapõja kãnhmã xa nẽ tanhmã mẽ kãm ujarênh to. Tirtũm Karõ nhý hã mẽmoj kukamã mẽ kãm awjarê nẽ mẽ kãm:

–Kwa okora kër ka mẽ axkãm ajamak rom. Koja tokyx pika piitã hkõt mẽ apkur xã hã mẽmoja mẽ kęp hkryre nẽ mẽ piitã mẽ hipêx kêt nẽ. Anê.

Tã nhũm gaa nẽ ujarênh xãja kõt mẽmoj ã amnhĩ nhĩpêx anê. Kormã Pahihti Krawti kot mẽ ho amnhĩptãr ri nhũm mẽmoj ã amnhĩ nhĩpêx anê. No nhũm kormã ã amnhĩ nhĩpêx anhýr kêt ri nhũm Akapõja kukamã ã mẽ kãm ujarênh anê.

²⁹ Hãmri nhũm mẽ kuma nẽ tee ri Jutej kamã Jejus kõt mẽ hkwyjẽ hkukamã hamaxpêr nẽ axpên mã:

–E kwa pu mẽ Jutej kamã Jejus kõt mẽ pahtõ nẽ pahtõxjẽ mã pahkãxpore hkwy gõ kẽ mẽ ho amnhĩm awjaprõ nẽ hkur o pa. Anê.

Hãmri nẽ mẽ kaxyw kãxpore hkwy ho akuprõ. Nhũm mẽ hikãxpore hkryre xwýnhjaja ãm mẽ kãm ho hkryre nẽ kugõ nhũm mẽ hikãxpore rũnh xwýnhja mẽ kãm ho rũnh nẽ kugõ.

³⁰ Jakamã nhũm mẽ ho hpikuprõnh pa nẽ Panãpe mẽ Sawti wa kot mẽ hwýr o mõr nẽ mẽ kãm õr kaxyw wa kãm kugõ. Hãmri nhũm wa hamý nẽ ma Jutej kamã Jerujarê hwýr mẽ hwýr o mõ. Hãmri nẽ hwýr pøj nẽ mẽ kot Jejus kapêr o mẽ ahkre xwýnhjẽ mã kugõ. Hãmri nhũm mẽ kãm Jejus kõt mẽ htõ nẽ htõxjẽ mã o angrã nhũm mẽ hamý nẽ hkĩnh nẽ ho amnhĩm awjaprõ.

12

Mẽ kot Simãw Pêtre pynênh nẽ haxãr ã mẽ harênh

Matêwre 18.19-20

¹ Tã nhũm mẽ õ pahi Eroxxa õ põristi mã Kris kwýjẽ hã amýnê nhũm mẽ mẽ hipêx kati nẽ nhũm mẽ amnhĩ xã htýx kamã hamak o pa.

² Juãw tõ Xiakreja nhũm mẽ pahi Eroxxa nhý hã unê nẽ hkanhwýr o kupĩ.

³ Hãmri nhũm Ijaew kãm ja mex jakamã nhũm pahi Eroxxa hpãnhã mẽ kãm Simãw Pêtre hã amýnê nhũm unê nẽ haxã. Mẽ kot pãwti kaxkrit kêt kur ã mẽ hkĩnh xã hã arĩgro pẽ Pasja ã nhũm prem unê.

⁴ Na pre Eroxxa Simãw Pêtre hkukamã hamaxpêr o:

–Nã koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anê.

Hãmri nhũm põristi kot Simãw Pêtre jamãr xwýnhjaja kęp 16. Nhũm mẽ axpên pãnhã kęp 4 kapên nẽ hamãr rãhã ho kuhê.

⁵ Nhũm arĩ mẽ hagjênh xã kamã hkrĩ ho hkrĩ. Hãmri nhũm Kris kõt htõ nẽ htõxjaja harênh ma nẽ tee ri hkukamã hamaxpêr hãmri nẽ axpên wýr akuprõ nẽ ho Tirtũm wýr rãhã ho hkrĩ.

Tirtũm kapêr o wryk xwýnh kot Simãw Pêtre kator ã harênh

⁶ Tã nhũm ra mẽ hkĩnh hapêx nhũm kamãt. Hãmri nhũm pahi Eroxxa kot tanhmã Simãw Pêtre ho xã hã arĩgroja wýr nhũm kamãt nhũm põristijaja arĩ mẽ hagjênh xã kamã hamãr mex o kuhê. Nhũm kuri wa hamêxkrut nẽ akutã hijê nẽ hamãr o nõ. Kãx o akutã kãm ê nẽ wa ho nõ nhũm wa hkaêx kãm htýx gõr nẽ nõ. Nhũm ja wa hakwa krem mããnen hamãr o xa.

⁷ Puh nhũm Tirtũm kapêr o wryk xwýnhjẽ hõja mẽ hwýr axã nẽ wryhtak rax kãm xa. Hãmri nẽ Simãw Pêtre grêk nẽ kumra nẽ kãm:

–Pa Simãw Pêtre? E kwa tokyj kãnhmã xa pu mõ. Anê.

Hãmri nhũm hkrãkato nẽ omu nẽ kãnhmã ãm kurê kumrêx nhũm kãxpexã hã kãxja axrê nẽ pykap rõrõk nẽ hikwý. No nhũm kuri põristi wa nõr xwýnhnta wa mar kêt nẽ. Wa arĩ õt týx nẽ nõ.

⁸ Hãmri nhũm Tirtũm kapêr o wryk xwýnhja Simãw Pêtre mã:

–E tokyx anhõ kamãs jaxã nẽ amnê ixkõt tẽ pu pakato nẽ ma tẽ. Anê.

⁹ Hãmri nhũm kamãs nẽ hparkã jaxã nẽ ma hkõt tẽ. No ãm kormã amnhĩ pumunh mex kêt nẽ. Te hpimtir kãm ã kot amnhĩ nhĩpêx anhýr pyrãk ã amnhĩ kamnhix.

¹⁰ Hãmri nhũm wa hakwakrem põristi wa kot hamãr o wa ãm xwýnhja hãnh wa tẽ nẽ wa hakre nẽ hpãnhã ihõja wa hãnh wa tẽ no nhũm mẽ õt týx nẽ hkrĩ nẽ wa omunh kêt nẽ. Nhũm wa hakwakre nhĩtep xã hkõt wa tẽn kato nẽ hpãnhã krĩ nẽ kahê xã hã hakwakreja wýr wa tẽ. Hãmri nhũm tãm wa kãm amnhĩ kahê xã mẽ nhũm wa kato

nē pry hā tē. Ja kôt nhūm Tirtūm kapēr o wrýk xwýnhja akunok nhūm Simāw Pētre axte omunh kēt nē.

¹¹ Hāmri nē hprī hā amnhī pumunh kurē kumrēx nē hamaxpēr o:

—Kwa te ixpimtīr kām ā ixte amnhī nhīpēx anhýr pyrāk tā xep ixpimtīr kēt. Tirtūm na ixwýr kapēr o wrýk xwýnhja mē nhūm ixwýr wrý nē mē kēp ixkator. Pahi Erox ra kot ixpīr nhūm ixkwý Ijaew kām ja prām tā nhūm mē kēp ixkator. Nā ām hāmri na Tirtūm ā mē kēp ixkator anē. Anē.

¹² Hāmri nē Marir nhōrkwý hwýr htēm kurē kumrēx. Juāw Makre katorxā Marirja nhūm ōrkwý hwýr tē nhūm mē ra kamā hpikuprōnh rax nē ho Tirtūm wýr o hkrī nhūm tām mē hwýr tē.

¹³ Hāmri nē kormā kapōt ā hakwa krem mē kām kahē xā tatak o xa nhūm ixkre kamā mē kām āpēnh xwýnh Rotreja kuma nē hwýr tē.

¹⁴ Hāmri nhūm kām kapēr nhūm amnhī jaēr pē kuma nē hkīnh nē. Nē kormā kām kahē xā mēnh kēt ri ma akupým tē nē mē kot ho Tirtūm wýr xwýnhjē hwýr axā nē mē kām:

—Xē pēr Simāw Pētre na tē nē kapōt ā hakwakrem xa nē inhmā kapēr.

¹⁵ Hāmri nhūm mē tee ri kuma nē kām:

—Kwa arī mē hagjēnh xā kamā hkrī kēnā. Mān ka tanhmā amnhī krā amnhī to hā na ka ri atýx ā akapēr anē. Anē.

Hāmri nhūm mē kām:

—Ma tanhmā kot pa kēt ri ixkrā amnhī to? ām hāmri na pa mē amā harē. Mē kam nē mra nē omu. Anē.

Nom nhūm mē kuma nē ām kuma nē kām:

—Nā tām kēt. Kaxkwa rūm Tirtūm mā hamār o pa xwýnh mān amā kapēr nom tām kēt. Anē.

¹⁶ Rōm nhūm Simāw Pētre arī hakwakre tatak o xa. Hāmri nhūm mē jatā hwýr mra nē kām kahē xā mē nē amnhī jaēr pē omu nē hkīnh nē.

¹⁷ Hāmri nhūm kānhmā mē kām ihkra hpē nē mē ho hpinhkrēnh pa nē mē kām:

—Nā Tirtūm na ixwýr kapēr o wrýk xwýnhja mē nhūm ixwýr wrý nē pōristi pē ixkator. Anē.

Hāmri nē mē kām:

—E kēr ka mē Xiakre nē Jejus kôt mē pahōtō nē pahōtxjē mā ijarē kē mē ijarēnh mar kurē kumrēx. Nom kot paj ixkato nē ma krī hō hwýr mō. Anē.

Hāmri nē mē kēp kato nē ma mō.

¹⁸ Tā nhūm apkati nhūm pōristi kot hamār o hkrī xwýnhjaja hkrā hapōj nē tee hapēr nē nhýri omunh kēt nē. Hāmri nē tee ri amnhī kukamā hamaxpēr o kām ma htýx kumrēx nē axpēn mā:

—Kwa tanhmā na pre we amnhī to nē mē pahpē akunok? Tanhmā koja we pahi Erox hā mē pahkukja pu mē harēnh to? Anē.

¹⁹ Hāmri nhūm pahi Erox hpikunor ā harēnh ma nē axtem pōristi hkwyjē mā anē nhūm mē mra nē tee ri mē hagjēnh xā kamā hapēr nom nhýri omunh kēt nē. Hāmri nhūm Erox mē kot hamār xwýnhjē kamā gryk týx kumrēx nē amnhī wýr mē hā karō nē mē kām:

—Kwa nok? Mē ate hamār rāhā ho akuhē hā ixte mē amā karō htā nhūm tanhmā amnhī to nē akunok. Nā kot paj mē anhīmex ka mē ri amnhī pumu. Anē.

Hāmri nhūm mē tee ri kām amnhī tā āprār kaprý nhūm mē hā amýnē nhūm mē ho kator nē ma mē o mra nē mē himex. Hāmri nhūm pahi Erox Jutej rūm kato nē ma Se-jarej wýr mō nē hpānhā kamā pa ho pa.

*Pahi Erox tanhmā htyk to hā harēnh
Wam Pētre 1.24-25*

²⁰ Krī pē Xir mē Sito wa kamā mē pa xwýnhjaja na pre htem pahi Erox nhō pyka hwýr pa nē mē kēp amnhīm apkur xā hā mēō japrōr o pa. Tā nhūm Erox kot mēmoj mýrapé mē kamā gryk jakamā nhūm mē tee ri mē kēp ujaprōr kaxyw mē hwýr mra nom nhūm mē kām mēmoj kwý ho wēnē hkēt nē. Hāmri nhūm mē tee ri amnhī kukamā hamaxpēr nē pahi Erox nhō kōwenatō Pratōja wýr mra nē kām:

—E awýr na pa mē mra. Kwa mē ixyr pē pahi Erox mā tanhmā akapēr to kē ama nē mē ixkamā gryk kēt nē. Pa mē axte mē awýr mra nē mē apē mēmoj kwý japrōr o ri ixpa. Anē.

²¹ Hāmri nhūm mē kuma nē hwýr tē nē mē yr pē tanhmā kām kapēr to nhūm kuma hāmri nē kot tanhmā mē kām kapēr to kaxyw mē kām arīgro hta.

Tā nhūm ra kot arīgro hyr xwýnhta kato nhūm Erox kēp pahi hā ē mex jaxā nē tē nē kēp pahi hā mē hkrī xā kamā nhý nē tanhmā mē kām kapēr to.

²² Mē kām kapēr ryy nē. Hāmri nhūm mē kuma nē hēx rom kām mex o mex ā harē. Nē kýx pēē axpēn mā harē nē harēnh o:

—Kwa pahi Erox kēp mē panhiō hkēt. Pēr kaxkwa rūm Mēpahpām na pre mē pahwýr wrý nē ā mē pamā kapēr mex anē. Anē.

Hāmri nē te kēp Tirtūm pyrāk o hipēx nē kām mex o mex ā harē. Nom hēx rom ā harēnh anē. Kot mē mar nē kām mē hkīnh nē akupým mē kām mēmoj to wēnē hprām xāj nhūm mē hēx rom ā axpēn mā mex ā harēnh anē.

²³ Hāmri nhūm mē kuma nhūm ja kām mex nē nhūm hkīnh nē mē mar o nhý nē kēp Tirtūm pyrāk ā harēnhja nē tanhmā mē kām nē hkēt nē. Jakamā nhūm tee ri amnhī tā omu nē hwýr kapēr o wrýk xwýnhjē hō mē nhūm hwýr wrý nē tanhmā ho nhūm ōhy kamā kutōj rax nē htyk tokyx anē.

Panāpe mē Sawti wa akupŷm āxiok hwŷr mōr ā wa harēnh

Atre 11.27-30

²⁴ Tā nhūm mē ra ohtō nē Tirtūm Kra Jejus kot tanhmā mē panē amnhī nhīpēx to hā harēnh ma nē hkōt amnhī xunhwŷ.

²⁵ Hāmri nhūm Panāpe mē Sawti wa ra Kris kōt htō nē htōxjē mā kăxporeta jamŷ nē ma Jerujarē hwŷr o mō nē mē kām kugō. Hāmri nē ma akupŷm āxiok hwŷr nojarēt nē war amnhī kōt Juāw Makre o mō. Hāmri nē mē ma mō nē akupŷm mē hwŷr pōj.

13

Tirtūm kot Panāpe mē Sawti wa hyr

Atre 9.15-16; Rōmān 1.1

¹ Āxiok kamā Kris kōt mē kot xapēn to htōjaja kot Tirtūm nhŷ hā kapēr o mē ahkre ho pa xwŷnhjē nhūi ā kot anhŷr. Na pre Panāpe nē Sawti nē Simeāw kā htykre nē Rusti pē Sirēn nhō xwŷnh nē pahi Eroxx krāmnhwŷ Mānahēja.

² Jakamā nhūm prem mēmo arīgro hā xapēn wŷr akuprō nē Tirtūm mā mex o mex ā harēnh kaxyw apkur kēt rāhā kām amnhī jarēnh o hkri. Hāmri nhūm Tirtūm Karō mē kām tanhmā kapēr o amnhīrit to nē mē kām:

—E kēr ka mē Panāpe mē Sawti war ata nē wa kot inhmā tanhmā amnhī nhīpēx to ho pa kaxyw wa ām. Anē.

³ Hāmri nhūm mē kuma nē wa hyr kurē kumrēx nē wa himōk ā mē ihkra jaxwŷ nē wa ho Tirtūm wŷ. Hāmri nē wa kot Tirtūm mā tanhmā amnhī nhīpēx to ho pa kaxyw wa kumē nhūm wa ma mō.

Wajaga kot Jejus nē hkrāmnhwŷ kurē hā harēnh

Atre 8.9-24

⁴⁻⁵ Tā nhūm Tirtūm Karō krī pē Serēw wŷr Panāpe mē Sawti wa kumē nhūm wa ma hwŷr mō. Nē amnhī kōt Juāw Makre ho mō. Kot tanhmā wa ho ajuta hto ho wa hkōt pa kaxyw. Hāmri nē wa mē mō nē Serēw wŷr pōj nē pār krem axā nē ma gō hipōk pē Sipre hwŷr mō. Hāmri nē gō hipōk ā krī pē Saramīn wŷr pōj nē Ijaew nhō Tirtūm kapēr o mē ahkre xā hā ixkre hwŷr tē nē kamā Jejus kot mē panē tanhmā amnhī nhīpēx to hā mē kām harēnh o xa.

⁶⁻⁸ Tā nhūm mē krīja rūm kato nē hpānhā gō hipōk kōt mō nē hatur xā kamā krī pē Papos wŷr pōj. Hāmri nē kamā wajaga Pa-jejus pumu. Gresjē kapēr kām hixi pē Erīm. Erīm haxwŷja kēp Ijaew. Na pre hte hēx rom te kēp Tirtūm nhŷ hā kapēr jarēnh o pa xwŷnh pyrāk o amnhī nhīpēx nē ma mē kām ujarēnh o ri mē hkōt pa. No ām mē kām amnhī to hēx o pa. Gō hipōkja ā pahi Sejupaw hkrāmnhwŷ na pre. Pahi Sejupawja āhpumunh tŷx jakamā na pre Panāpe mē Sawti wa harēnh ma nē kām wa kapēr mar

prām nē wa kot kām Tirtūm kapēr jarēnh kaxyw amnhī wŷr wa kuwŷ. Nom nhūm hkrāmnhwŷ wajaga Erīmja kām wa hkīnh kēt nē wa nē kām kapēr kām hihtŷx nē kām:

—Kwa nā wa kapēr mar kēt nē. Kot kaj war ama nē wa urāk nē amnhī kaxyw Jejus kōt ajamaxpēr nē hkōt amnhī xām. Kwarī wa kapēr mar kēt nē. Anē.

⁹ Hāmri nhūm Sawti ra axtem pānhā hixi. Ra hpānhā kēp Pawre. Nhūm Tirtūm Karō ra hkarō mā ār jakamā nhūm ŷ hā wajagata pumu nē wa nē hkrāmnhwŷ mā kapēr ā kām akir nē kām:

¹⁰ —Tk. Kwa pēr apē Satanasti hkwy hā na ka ā wa inhnē kām akapēr anē. Na ka hte mēmoj punuj pix kukamā ajamaxpēr nē mēmoj mex nē mē no kupyro o apa. Tirtūm kapēr mex kumrēx tā ka axtem nē nē mē hkurē ho ri apa.

¹¹ Ā ate amnhī nhīpēx anhŷrja mŷrapē koja Tirtūm tanhmā ato ka ano hkre nē arīt kēt o atā apkati sohtō nē kām ga. Anē.

Hāmri nhūm no hkre kurē kumrēx nē tee ri rīt kaxyw no pikrar pŷnh o xa nom mēmoj pumunh kēt nē. Hāmri nē mēhō kot hpa hā hpŷr nē ōrkwŷ hwŷr ho mōr kaxyw ri amnhī pu hā mē hapēr pēnh o xa.

¹² Hāmri nhūm hkrāmnhwŷ pahihtija tee ri ja hā omu nē amnhī kaxyw Jejus kōt hamaxpēr nē hkōt amnhī xām kurē kumrēx. Hāmri nē Pawre mē Panāpe wa kot tanhmā Tirtūm kapēr jarēnh to hā wa kuma nē hamaxpēr o:

—Hēxta waa nē. Aa ixte ā mēhō kapēr kot anhŷr mar kēt tā pa jarāhā kuma. Nā ām hāmri na Jejus jarēnhja. Anē.

Pawre mē Panāpe āxiok ō hwŷr wa mōr ā wa harēnh

Atre 15.38

¹³ Tā nhūm Pawre mē Panāpe mē Juāw Makre wa mē krī pē Papos rūm kato nē hpānhā ma pyka hō hwŷr mō. Pār kām ma pyka pē Pāpŷr wŷr mō nē kamā krī pē Perke hwŷr pōj. Hāmri nhūm Juāw Makre tanhmā hamaxpēr to nē tee ri axte wa hkōt mōr kukamā hamaxpēr hāmri nē wa hkaga nē awjanā nē ma akupŷm Jerujarē hwŷr ahte mō.

¹⁴ Jakamā nhūm Pawre mē Panāpe wa ahte Perke rūm kato nē hamū pika pē Pisit kām krī pē āxiok wŷr mō nē hwŷr pōj. Nhūm Ijaew nhō arīgrompu pē sap kato nhūm wa Tirtūm kapēr o mē ahkre xā hā ixkre hwŷr wa tē nē hwŷr axā nē nhŷ.

¹⁵ Hāmri nhūm mēhō mē kām Tirtūm kapēr ā kaga htūm kwŷ kamā harēnh o xa. Mojes mē Tirtūm nhŷ hā kapēr o mē pa xwŷnh kot kapēr ā kaga hkwy kamā nhūm mē kām kamā harēnh o xa. Hāmri nē kamā harēnh pa nhūm mē ahkre xwŷnhjaja Pawreja wa

omu nê wa hwÿr mēhō mē nhūm wa hwÿr tē nê wa kām:

—E na mē ijahkre xwÿnhjaja war ate mē inhmā axujarēnh prām nē māmri mē inhmā mēmōj jarēnh kaxyw nhūm mē war atā anē. Anē.

¹⁶ Hāmri nhūm wa kuma nhūm Pawre kånhmā xa nê mē hpinhkrēnh kaxyw mē kām kånhmā ĩhkra nhūm mē omu nê hpinhkrēnh pa nhūm mē kām awjarē. Amnhī kwÿ pē Ijaewjē mē mē kēp Ijaew kēt xwÿnhjē kām Tirtūm kīnh xwÿnhjē mā nhūm mē kām awjarē. Nē mē kām kapēr ryy nē. Tirtūm kot tanhmā mē hkukamā Ijaew nhīgēt nē pāmjē nhīpēx to hā mē kām awjarē nē mē kām:

—E kot paj mē amā awjarē ka mē inhma.

¹⁷ Nā mē ixpē Ijaew nhō Tirtūmja amnepēm na pre mē ixpē Ijaew pāmjē rē. Kormā Ejit kām mē pa ri nhūm amnhī kaxyw mē kurē nē mē ho ohtō rax kumrēx. Hāmri nē mē kaxyw hihtÿx jakamā Ejit rūm mē kator pa.

¹⁸ Hāmri nē mē ho mex ryy ho mē hkōt pa. Mē kot kapōt ā ri pa hā amgrā pē 40 kamā mē kot htÿx ri tanhmā amnhī nhīpēx to ho pa htā nhūm mē kamā ukaprī ryy ho mē hkōt pa.

¹⁹⁻²⁰ Na pre mē kām pyka pē Kanaā kamā mē pa xwÿnhjē nhīmex pa. Kanaā kamā mē pa xwÿnhjaja ahpÿnhā axpēn kaxyw mēō krī pē 7ja nhūm mē kām mē ho hapēx pa. Hāmri nē hpānhā mē inhīgētjē mā pykaja o hpigrānh pa. Mē ixpē Ijaew nhīgētjē mā ho hpigrānh pa nhūm mē kamā pa hā amgrā xohtō nē. Hā amgrā pē 450. Tā nhūm Tirtūm hpānhā mē kām juisti hkwy rē nē mē kaxyw mē unhwÿ nhūm mē ho pa. Tā nhūm hpānhā Sāmuew mē ho amnhīptā nē mē o pa. Kēp Tirtūm nhÿ hā kapēr jarēnh o pa xwÿnhjē hō nhūm Tirtūm mē kaxyw ām.

²¹ —Tā nhūm mē ixpāmjaja axpēn ma nē ra te krī hkwy kamā mē urāk nē mēō pahi kot Sāmuew pānhā mē ho amnhīptār o pa hprām xāj amnhī to Tirtūm wÿ nē kām: “Pa Tirtūm. Kwa mē ixkaxyw pahi hō xām kē mē ixto amnhīptār o pa nā. Ja na mē inhmā hprām tÿx kumrēx.”

—Anhÿr o amnhī to hwÿr jakamā nhūm mē kuma nē mē kaxyw Sawti xām. Kisti hkra na pre. Nē mē inhīgēt Pējamī kanrēhā htāmnhwÿ na pre. Hāmri nhūm Tirtūm mē kaxyw ām nhūm kēp mēō pahi nē mē ho amnhīptār o pa hā amgrā pē 40.

²² Tā nhūm Tirtūm kator nē hpānhā mē kaxyw Tawī xām. Hāmri nē harēnh o: “Nā Jese hkra Tawija na hte inhmā hprām xa hkōt amnhī nhīpēx mex o pa.” Anē.

²³ —Tā Jejus kēp Tawī hkanrēhā htāmnhwÿ na pre. Kukamā na pre Tirtūm mē ixpē Ijaew nhīgētjē mā harē nē harēnh o: “Koja nhÿmā Tawī hkanrēhā htāmnhwÿjē hō mē

ate amnhī tomnuj pē mē apytā.” Anhÿr o hkukamā mē kām harē.

²⁴ No nhūm kormā Jejus kot mē ixpē Ijaewjē mā amnhī to amnhīrit kēt ri nhūm Juāw Paxis kumrēx hkukamā mē ixwÿr mō nē mē inhmā Tirtūm kapēr jarēnh o ri mē ixkōt pa. Nē mē ixte amnhī tomnuj kaga nē hpānhā tām amnhī nhīpēx o ixpa hā mē ixpumunh kōt mē ixkrā kumrār ā mē inhmā karō ho pa.

²⁵ —Tā mē kām kapēr o pa ryy nē ra hatur xām mēnh kaxyw nē amnhī tā tanhmā mē inhmā kapēr to nē mē inhmā: “Na ka mē ixpumu nē atÿx Tirtūm kot mē akaxyw pa ixām ā ixkamnhix nom pa hkēt. Kot mē pakaxyw ām mā xwÿnhnta kukamā na pa pre mō. Tām kot amnhī to rax o ijakrenh. Nē kot amnhī to mex o kot ijakrenh. Jakamā na pa hte ām kukwak ri ixpa nē amnhī tā hā ixpijaām o ixpa.” Anē.

—Na pre ā Juāw Paxisja mē inhmā Jejus jarēnh anhÿr o pa.

²⁶ —Tā kwa mē inhma mē apē Apraāw kanrēhā htāmnhwÿjaja nē mē apē Ijaew kēt xwÿnh kām Tirtūm kīnh xwÿnhjaja. E mē apiitā ixkapēr ma nē kām ajamaxpēr tÿx rāhā ho ri apa. Nā mē pahpiitā mē pakaxyw na Tirtūm kapērja. Kot mē pahte amnhī tomnuj pē mē papytār ā amnhī jarēnhja mē ixpē Ijaew pix kaxyw kēt. Mē pahpiitā mē pakaxyw na. Mē pahpiitā mē pahte ja mar nē hkōt amnhī nhīpēxja na Tirtūm kām hprām.

²⁷ Nom Jerujarē nhō xwÿnhjē mē mē āptār tūmrejaja na prem Jejus kēp Tirtūm kot mē pakaxyw ām xwÿnh ā harēnh mar tā hkōt hamaxpēr kēt nē. Na pre htem mē inhō arīgromnu pē sap ā akuprō nē axpēn mā Tirtūm kapēr ā kaga htūm kamā ujarēnh o hkrī. Kagāja kamā Tirtūm nhÿ hā mē kapēr o mē pa xwÿnhjaja kot hprī hā Jejus jarēnh nē hā kaga nhūm mē kot mar tā hprī hā mar tÿx kēt nē. Jakamā na prem axtem nē mē kām hā amÿnē. Tirtūm nhÿ hā kapēr jarēnh xwÿnhjaja kot mē hkukamā mē harēnh xāja kōt nhūm mē kot hpīr kaxyw mē kām hā amÿnē.

²⁸⁻²⁹ Kot tanhmā amnhī tomnuj to hkēt tā nhūm mē amari hā pahi Pirat wÿ. Kot mē kām hā āmnēnh nhūm ō pōristijaja kot hpīr kaxyw nhūm mē hā kuwÿ nhūm mē kām kupī. Ra Tirtūm kapēr ā kaga htūm kot mē hkukamā mē harēnh xa hkōt. Hāmri nhūm mē kot hkōt pa ho pa xwÿnhjaja pī kahpa nē ho wÿr nē ma o tē nē kēn kre kamā haxā.

³⁰ Tā nhūm Tirtūm akupÿm ho htūr

³¹ nhūm xatā hkōt mē pa ho pa xwÿnhjē hwÿr hapōj. Kormā htyk kēt ri ra Garirej rūm Jerujarē hwÿr hkōt mē pa ho mē pa xwÿnhjē hwÿr xatā mē hwÿr hapōx o pa. Jao hā arīgro xohtō nē nhūm prem piitā omu.

Tā mẽ tām̄jaja na htem mẽ ixpê Ijaew mã harênh o pa.

³²⁻³³ —Annepêm Tirtüm na pre mẽ ixpê Ijaew nhîgêjtjê mã tanhmã Kra Jeus jarênh to. Kormã mẽ pahwÿr wrÿk kêt ri tanhmã mẽ kãm harênh to. Jakamã ra kot hkukamã harênh xã hkôt nhũm pre mẽ pahwÿr wrÿ nê tanhmã mẽ panê amnhĩ nhîpêx to. Tã mẽ ate harênh mar kaxyw na pa wa man mẽ awÿr mō. Annepêm finat Tawi na pre Tirtüm kapêr kwÿ hã kagã. Tirtüm mex ã mẽ grer xã pê Sam 2ja kamã hã kagã. Te Tirtüm tãm Jeus mã kapêr pyrãk o hã kagã nê hã kagã ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrît. Anê.

Nhũm pre ã Tirtüm Jeus mã kapêr anê nhũm Tawi ô ri mẽ pamã hã kagã.

³⁴ —Annepêm na pre Tirtüm tanhmã Kra Jeus kukamã harênh to. Mẽ kot hpîr nhũm kot akupÿm ho htîr kukamã hã amnhĩ jarê. ï hkro pymaj kot mẽ htykjê pê hkaxâr nê akupÿm ho htîr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xã hkôt.

Anhÿr o hkukamã harênh xã hkôt akupÿm ho htîr nhũm axte htyk kêt ã harê.

³⁵ —Nê kagãja nhãm hō hō kot tanhmã Jeus jarênh kute. Te Jeus tãm Tirtüm mã kapêr pyrã nê harênh o:

Ixpê Akra hã ixte akapêr kôt ri amnhĩ nhîpêx rãhã ho ipxa jakamã kot kaj ixpumunh mex pa inhĩ hkro hkêt nê. Anê.

Tirtüm kapêr ã kagã htüm kot ã Jeus jarênh kot anhÿr.

³⁶ Nom ã Tawi jarênh anhÿr kêt nê. Tawi na pre Tirtüm kapêr kôt amnhĩ nhîpêx mex o pa hãmri nê ty nhũm prem mẽ panhîgêjtjê nhîhkô hã haxã hãmri nhũm ï hkro nê hapêx.

³⁷ —Tã no Jeusja Tirtüm kot akupÿm ho htîr jakamã nhũm Tawi pyrãn ï hkro nê hapêx kêt nê.

³⁸ —E mẽ inhmar tÿx nê ixkwÿjaja. Kra Jeus pix kukwak na hte Tirtüm amnhĩ katut kôt mẽ pahte amnhĩ tomnuj rê.

³⁹ Jakamã kot kaj mẽ ãm Mojes kapêr kôt pix mã ri amnhĩ nhîpêx nhũm Tirtüm tee ri ja hã mẽ apumu nê amnhĩ katut kôt mẽ ate amnhĩ tomnuj rênh kêt nê. Jeusja tapxipix na pre htyk o Tirtüm mã mẽ pahte amnhĩ tomnuj piitã hpãnhã amnhĩrer pa.

⁴⁰⁻⁴¹ Annepêm na pre Tirtüm kapêr nhÿ hã kapêr xwÿnhjê hōja mẽ kãm Tirtüm kapêr jarê nê hã kagã. Te Tirtüm tãm mẽ kot kapêr ã hpêr o pikênh xwÿnhjê mã kapêr pyrã nê mẽ kãm:

E kot paj aa mẽ ate mẽmoj pumunh kêt ô ho anê.

Nhũm mẽhō mẽ amã harê ka mẽ harênh ma nê ãm ama.

Nhũm mẽ kot omunh mex xwÿnhjê hō kot hpri hã mẽ amã harênh tã ka mẽ ãm ama nê hkôt ajamaxpêr kêt nê.

Hãmri nê tee ri tanhmã kãm ajamaxpêr to ho ri apa. Anê.

Ã Tirtüm mẽ kãm kapêr anhÿr jakamã kwa mẽ o kora. Apu mẽ kajaja na pre ã mẽ ajarênh anê rÿ ko. Anê.

⁴² Nhũm pre ã Pawre mẽ kãm ujarênh rÿy anê. Hãmri nê Panãpe mẽ wa ixkreta rüm kator kaxyw nhũm mẽ kot mar o hkri xwÿnhjaja tee ri ma wa mōr ã wa omu nê ma wa hkôt mra nê wa kãm:

—Kwa war axujarênhja na mex kumrêx. Mẽ inhmã axte mar prãm. Xã koja axte sap kato ka wa akupÿn mẽ ixwÿr wa tẽ nê axte mẽ inhmã awjarê? Anê.

Hãmri nhũm wa mẽ kãm:

—Tõe. Nã kot paj war anê. Anê.

⁴³ Hãmri nê wa ma tẽ nhũm mẽ hkwÿja ma wa hkôt mra. Ijaew kwÿjaja nê Ijaew kêt xwÿnh kãm Tirtüm kînh xwÿnhjaja nhũm mẽ ma wa hkôt mra. Hãmri nhũm wa pry hã mẽ kãm kapêr o mō. Tirtüm kot mẽ kutã nojarêt rãhã ho pa nhũm mẽ kot amnhĩ tã omunh nê hkôt amnhĩ nhîpêx tÿx rãhã ho pa nê hkaga hkêt ã mẽ kãm kapêr o mō.

⁴⁴ Tã nhũm axte sap nhũm kri nhō xwÿnh piitã axte Tirtüm kapêr mar kaxyw ixkre wÿr akuprō. Ijaewjaja nê Ijaew kêt xwÿnhjaja.

⁴⁵ Hãmri nhũm Ijaew kwÿjaja tee ri mẽ amnhĩ wÿr Ijaew kêt xwÿnhjê pumu nê mẽ hã Pawre mẽ Panãpe wa kamã gryk nê. Mẽ kãm Ijaew kêt xwÿnhjaja kot Tirtüm kapêr mar prãm kêt jakamã mẽ hã wa kamã gryk nê. Hãmri nê Pawre kapêr ma nê xatã kãm kapêr punuj nê kãm:

—Tk. Kwa na ka Tirtüm kapêr jarênh o axêx. Ja kot anhÿr kêt. Anê.

⁴⁶ Nom nhũm wa kãm mẽ uma hkêt nê. Wa ãm Tirtüm Karō nhÿ hã amnhĩ to htÿx nê wa mẽ kãm kapêr. Nê amnhĩ tã tanhmã mẽ kãm kapêr to nê mẽ kãm:

—Nã wa ixpyrã nê mẽ apê Ijaew jakamã na pa mẽ akumrêxjê mã Tirtüm kot mẽ pakaxyw Jeus xãm ã harê. Tã ka mẽ ama nê ãm ama nê te mẽ ate hkaga pyrã nê ã wa inhmã akapêr anê nê wa ixte kapêr o ixêx ã wa ijarê. Pêr ãm mẽ ate mẽ amã Tirtüm mẽ Kra wa kuri mẽ atir tùm nê mẽ apa hprãm kêt. Jakamã kot paj wa mẽ apê ixkato nê hpãnhã ma Ijaew kêt xwÿnhjê mã Jeus kapêr jarênh o ri mẽ hkôt ipxa.

⁴⁷ Tirtüm kapêr ã kagã htüm ã kot mẽ ixte amnhĩ nhîpêx anhÿrja kukamã mẽ ijarê nê mẽ ijarênh o:

Mê ate Ijaew kêt xwýnhjê mã ixkapêr jarênh o ri apa kaxyw na pa pre mê kaxyw mê arê.

Jakamã koja pyka piitã hkôt mê pa xwýnhjaja ohtô nê mê akapêr ma nê ixkra hkôt amnhî xunhwý.

Koja mê ã amnhî nhîpêx anê pa ja hã mê omu nê mê ho ixkra. Anê.

Tirtüm kot ã ja kukamã mê ijarênh anhÿr jakamã kot paj wa mê apê ixkato nê mê apãnhã ma Ijaew kêt xwýnhjê mã Tirtüm kapêr jarênh o ri mê hkôt ixpa. Anê.

⁴⁸ Hãmri nhùm Ijaew kêt xwýnhjaja amnhî tã wa kapêrja ma nê hkînh nê Tirtüm kapêr mex o mex ã harê. Hãmri nhùm ra Tirtüm kot nhÿrmã amnhî ri mê hÿr tùm nê mê pa ho mê pa kaxyw mê rênh xwýnhjaja amnhî kaxyw Pahihti Jejus kôt hamaxpêr nê hkôt amnhî xunhwý.

⁴⁹ Tã nhùm pika pê ãxiok kamã mê piitã Tirtüm kapêr jarênh ma.

⁵⁰ Nom nhùm Ijaew xãptãr tùmrejaja kãm Pawre mê Panãpe wa hã hÿr kêt jakamã na prem krî hkôt mê kot amnhî to rûnh xwýnhjê mã wa ho kapêr punuj o pa. Mê ô pahi mê mêni kot amnhî to rûnh xwýnhjaja nhùm mê kãm tanhmã wa ho kapêr to nhùm mê kuma nê mê hkôt hamaxpêr. Mênijaja kãm Tirtüm prãm tã amnhî kaxyw Jejus kôt hamaxpêr kêt jakamã tanhmã mê kot Pawre mê Panãpe wa ho hêx toja ma nê hkôt hamaxpêr nê wa kamã gryk nê. Jakamã nhùm mê ohtô nê tanhmã wa hipêx to nê amnhî nê wa hano.

⁵¹ Hãmri nhùm wa mê kêp kato nê xa nê mê kot Tirtüm kapêr kaga hã amnhî pumunh kaxyw mê noo mã wa hparã kapa nê nê awjagrô kapî nê ma wa tê. Hãmri nê ma krî pê Ikôn wÿr hpãnhã wa mô.

⁵² Hãmri nhùm ãxiok kamã mê kot Jejus kôt amnhî xunhwÿr xwýnhjaja hkînh nê ri pa. Tirtüm Karô kot mê hkarô mã gjêx jakamã nhùm mê hkînh nê ri pa ho pa.

14

Pawre mê Panãpe wa kot Ikôn wÿr môr ã wa harênh

Matêwre 10.34-35

¹ Hãmri nhùm Pawre mê Panãpeja wa ãxiok rûm kato nê hpãnhã ma krî pê Ikôn wÿr wa mô. Hãmri nê hwÿr pøj nê Ijaew nhô Tirtüm kapêr o mê ahkre xa hã ixkre hwÿr wa tê nê kamã mê kãm Jejus jarênh o nhÿ. Mê kãm harênh kãm hihtÿx jakamã nhùm mê hkwÿjaja wa kuma nê amnhî kaxyw hkôt hamaxpêr nê hkôt amnhî xunhwý. Ijaew kwÿjaja nê mê kêp Ijaew kêt xwýnh kwÿjaja nhùm mê ohtô nê Jejus kôt amnhî xunhwý.

² Tã nhùm mê hkwÿjaja kãm Jejus jarênh mar prãm kêt nê. Hãmri nê kato nê ma Ijaew kêt xwýnh kwÿjê hwÿr mra nê tanhmã mê

kãm Pawre mê Panãpe wa ho hêx to nê wa ho kapêr punuj nê nhùm mê mar xã hkôt wa kamã gryk nê.

³ Nom nhùm wa tokyx kator nê ma môr kêt nê arî Tirtüm Karô nhÿ hã amnhî to htÿx nê mê kãm Tirtüm kapêr jarênh o ri mê hkôt pa. Nê kêp mê kutã nojarêt xwýnh ã harênh o pa. Nê ÿ hã mê kãm aa mê kot mêmoj pumunh kêt kwÿ ho anhÿr o ri mê hkôt pa. Jakamã nhùm mê hkwÿjaja ja hã wa omu nê wa kapêr ma nê hamaxpêr o:

—Kwa ãm hãmri na wa Tirtüm kêp mê pakamã ukapri xwýnh ã harê. Pêr ÿ hã wa kot ã amnhî nhîpêx anhÿr o pa kênã. Anê.

⁴ Hãmri nhùm Ijaew kêt xwýnh kwÿjaja wa hkôt hamaxpêr nê wa hkôt amnhî xunhwý. No nhùm mê hkwÿjaja wa hkôt hamaxpêr kêt nê. Ra mê kot Ijaew kwÿ kot tanhmã wa ho kapêr punuj toja ma nê mê hkôt hamaxpêr jakamã nhùm krî nhô xwýnhjaja axpên kwÿm ri tanhmã wa hkôt hamaxpêr to ho pa. Jao axpên kwÿm ri wa hkôt hamaxpêr o pa.

⁵ Tã nhùm wa hkôt hamaxpêr kêt xwýnhjaja axpên wÿr akuprô nê wa hã amÿnê. Ijaew kwÿjaja nê Ijaew kêt xwýnh kwÿjaja nê mê ô pahijaja nhùm mê kot kên o wa htak o wa hpîr kaxyw wa hã amÿnê.

⁶ Hãmri nhùm wa amnhî tã ama nê mê kêp kato nê hpãnhã ma pika hõ hwÿr mô. Ma Rikôn kãm krî hkwy hwÿr hpãnhã mô. Risti wÿr nê Tepe wÿr nê pu hã krî hkwy hwÿr wa mô.

⁷ Wa mô nê pøj nê ma mê kãm Jejus kot tanhmã mê panê amnhî nhîpêx to hã harênh o ri mê hkôt pa.

*Te grã xwýnh jarênh
Atre 3.1-10*

⁸ Nhùm Risti kamã mêhõ my hte grã nê hkrî xwýnhja. Katorxã nhôxã kre rûm hte grã nê kator jakamã ri pa hkêt nê arî hkrî xã kamã hkrî ho hkrî.

⁹ Jakamã nhùm Pawre mê kãm ujarênh o xa nhùm kuri mar o nhÿ. Hãmri nê hamaxpêr o:

—Nã pêr Tirtüm ãhpumunh o ãhpumunh. Mãn kot ixto mex kaxyw ãhpumunh tÿx. Nã koja ixto mex. Anê.

Hãmri nhùm Pawre ã hamaxpêr anhÿr ã omu

¹⁰ nê kãx pê kãm kapêr nê kãm:

—E kwa kãnhmã xa. Anê.

Hãmri nhùm kuma nê kãnhmã ãm kurê kumrêx nê ri mra. Nê amnhî te kamã hamak o ri mra nê hkînh tÿx kumrêx.

¹¹ Hãmri nhùm kuri mê kuhê xwýnhjaja Pawre kot ã hipêx anhÿrja ã omu nê htÿx wa kêp kaxkwa kamã mêhpãm ã wa hkamnhÿx nê hkînh nê axpên mã:

—Kwa pêr mêpahpãm na wa. Mêpahpãm Jupti mê Mêkurtija na wa panhî hã amnhî

jahkre nē mē pahwyr wrý. Nà ãm hãmri na wa mē pahwyr wrý. Anē.

Nom mē kapēr pē Rikaôn o expēn mā kapēr jakamā nhūm Pawre mē Panāpe wa mē mar kēt nē. Wa kot mē kapēr mar kēt jakamā ā mē kot wa harēnh anhýrja mar kēt nē htýx wa xa.

¹² Nhūm mē ā wa kēp mēhpām ā wa harēnh anē nē hkīnh týx nē. Panāpeja nhūm prem kēp mē hpām Jupti hā hkamnhīx no Pawreja nhūm prem kēp mēhpām Mēkurti hā hkamnhīx. Pawreja Mēkurti pyrā nē kapēr japjē rūnh jakamā nhūm mē kēp hā hkamnhīx.

¹³ Na prem krī htā mēhpām Juptija mā amnhī jarēnh xā hā ixkre nhīpēx nē hkarō nhīpēx. Hāmri nē hwyr akuprō nē kām mex o mex ā harē nē amnhī to hwyr o pa. Jakamā nhūm Jupti nhō patrejaja Pawre mē Panāpe wa kēp mēhpām ā wa harēnh ma hāmri nē wa hā hkwyjē mā kām:

—Kwa pu mē wa kām mōx kwý hpa nē pixōrā hkwy ré. Hāmri nē wa kām wa mex o wa mex ā wa harē nē wa kēp mēpahpām ā amnhī to wa kuwý. Wa kēp mēpahpām kēnā. Anē.

Hāmri nē ra ā wa hipēx anhýr kaxyw

¹⁴ nhūm wa tee ri mē kot amnhī nhīpēx ā mē omu nhūm ja wa kēp omnuj týx nē. Jakamā nhūm wa amnhī pē hinōkà kaxōnh pa nē mē kutā hprōt nē ā mē kot wa hipēx anhýrja nē mē kām kapēr kām hihtýx nē.

¹⁵ Nē mē kām:

—Kwa mē ri ā wa inhīpēx anhýr kēt nē. Wa ixpē mēapām kēt kēnā kot ka kēt mē ā wa inhīpēx anē. Nom mēapāmja na ka htem ãm amnhī to hwyr kapry nē kām mex o mex ā harēnh kapry o ri apa. Tā mē ate ā amnhī nhīpēx anhýr kaga nē hpānhā Tirtūm kōt amnhī xunhwyr nē amnhī to pix wýr o apa kaxyw na pa pre wa mē awýr mō nē pōj. Tirtūmja mē ate mē apām jarēnhra rom htír o htír. Na pre mēmoj piitā ho kato. Kaxkwa ho kato nē pyka ho kato nē gō xujanār o kato. Nē kamā ri mēmoj piitā ho kator pa.

¹⁶ —Amnepēm mē pa xwýnhjaja na pre htem amnhī krā hkōt pix mā tanhmā ri amnhī nhīpēx to ho pa nhūm Tirtūm ja hā mē omu nē ãm mē omu nē tanhmā mē ho hkēt nē.

¹⁷ Mē pahte amnhī tā omunh kaxyw na hte amarī tanhmā mē pahto mex to ho pa. Na hte mē pahwyr na rē nhūm mē pahpur go mex nē. Nhūm mē pamā tanhmā mē pahpur kām mēmo hyja to nhūm ra mē pamā ô rūnh nē. Pu htem hamý nē ho paxāpkur mex nē pahkīnh nē ri papa. Tirtūm pix kukwak ri na pu htem ā amnhī nhīpēx anhýr o ri papa. Anē.

¹⁸ Nhūm pre ā Pawre mē kot wa kām mōx parja nē mē kām kapēr kām hihtýx anē. No nhūm mē kuma nē ãm kuma nē wa kām mry

hkwy hpar kaxyw wa hā hihtýx nē. Jakamā kriptēm nhýx prem wa kām hkwy pa. Tā tanhmā hamaxpēr to nē hkaga nē wa kām hpar kēt nē.

Mē kot Pawre pír ā àmnēnh ā mē harēnh Sikūn Ximotre 3.10-11

¹⁹ Tā nhūm Ijaew kwýjaja mē hwyr mran pōj. Krī pē āxiok mē Ikōn rūm ma mē hwyr mran pōj nē mē kām Pawre ho hēx o mē hkōt pa nhūm mē kuma nē axtem nē Pawre kamā gryk kato. Hāmri nē mē kot hpír kaxyw kēn runh kwý jamý nē ho htak prēprēk o kuhē. Hāmri nhūm amnhī xā htýx kamā ama nē tēm nē akryk nō nhūm mē omu nē htýx ho ra htyk ā hkamnhīx. Hāmri nē hwyr tē nē hpa hā kupy nē ma hkjēnh o mō nē krī pum kumē nē ma akupým mra.

²⁰ Hāmri nhūm Jejus kōt mē kot expēn to htōjaja tee ri ā mē kot hipēx anhýr ā omu nē hkaprī htýx nē hwyr hprōt nē omu nē mýr o kuhē. Hāmri nhūm te htyk pyrā nē nōr tā Jejus nhý hā akupým hihtýx mex nē kánhmā nhý hāmri nē ma akupým mē hkōt krīm tē.

Tā nhūm apkati nhūm Panāpe mē wa krýja rūm kato nē ma wa mō. Pānhā ma krī pē Tepe hwyr wa mō.

Pawre mē Panāpe akupým āxiok wýr wa mōr ā wa harēnh

²¹⁻²² Tā nhūm wa mē Tepe hwyr mō nē pōj. Hāmri nē kamā mē kām Jejus tanhmā kot mē panē amnhī nhīpēx to hā harēnh o ri mē hkōt wa pa nhūm mē wa kuma nē ohtō nē Jejus kōt amnhī xunhwý.

Tā nhūm wa kato nē awjanā nē ma akupým pika pē Pisit wýr wa mō. Nē kamā krī hkwy hkōt ri ra mē kot Jejus kōt amnhī xunhwýr xwýnhjē jahkre ho ri mē hkōt pa. Krī pē Risti nē Ikōn nē āxiokja kōt. Nē mē ahkre kamā Jejus kōt mē ho mē hihtýx o wa pa nē mē kām:

—E ra mē ate Jejus kōt amnhī xunhwýr jakamā koja mē kām Jejus kurē xwýnhjaja tee ri ja hā mē apumu nē hā tanhmā mē anhīpēx to. Tā kēr ka mē ãm amnhī tā mē omu nē ãm mē omu nē Jejus kaga hkēt nē. Nē arī hkōt amnhī nhīpēx mex o ri apa rāhā nhýrmā ma ô krī hwyr api nē Tirtūm wa kuri amex kumrēx nē atír tūm nē apa ho apa. Anē.

²³ Hāmri nē ahpýnhā krī piitā hkōt ri mē kot pastō nhý hā mē ahkre kaxyw mē hkwyjē ré nē mē kaxyw mē unhwý nē mē ho Tirtūm wý. āpkur kēt rāhā mē ho kuwý nē kām:

—Pa Tirtūm? E jajē pumu. Mē kot krī ja kamā pastō nhý hā akrajē jahkre ho pa kaxyw na pa wa mē unhwý. Jakamā e kēr ka mē kutā anojarēt rāhā ho ri mē hkōt apa. Anē.

Hāmri nē wa mē kēp kato nē ma hpānhā nhýhým wa mō.

²⁴Pyka pê Pisit kamā mō nē hpānhā nhām pyka pê Pāpir kōt mō. Wa ma mē kām tanhmā Jesus kapēr-jarēnh to ho mē hkōt mō.

²⁵Hāmri nē krī pê Perke hwÿr wa pōj nē kamā mē kām Jesus kot tanhmā amnhī nhīpēx to hā harē hāmri nē mē kurūm kato nē axte mō. Pānhā ma krī pê Atari hwÿr wa mō.

²⁶Hāmri nē hwÿr pōj nē hpānhā kurūm akupÿm āxiok wÿr wa mō. Pār rax kām ma akupÿm mō. Āxiokja kamā na pre wa nojarēt nhūm Jesus kōt wa htō nē wa htōxjaja wa ho Tirtūm wÿ nē ma kri hkwy hwÿr wa kumē. Wa kot ma mē hkōt tanhmā Jesus kot mē panē amnhī nhīpēx to hā harēnh o wa pa kaxyw wa kumē. Jakamā nhūm wa ra ja ho anhÿr pa nē akupÿm mē hwÿr wa mō.

²⁷Hāmri nē wa akupÿm pōj nē Jesus kōt mē kot axpēn to htō nē htōxjē ho akuprō nē mē kām amnhī jarē nē mē kām:

—Nā ām hāmri na pa wa ra ixkākīnh pê akupÿn mē awÿr pōj. Na pre Tirtūm wa ixkutā nojarēt rāhā ho wa inhīhkō hā pa. Jakamā pa pre wa ma ŷ hā Ijaew kēt xwÿnhjē mā Jesus jarēnh o ixpa nhūm mē hkwyjaja wa inhma nē hkōt amnhī xunhwÿr.

²⁸Anhÿr o wa mē kām kapēr hāmri nē wa tokyx ma nhÿhÿm krī hō hwÿr axte mōr kēt nē. War arī āxiok kamā Jesus kōt wa htō nē htōxjē hkōt ri pa.

15

Jerujarē kamā Jesus kwÿ hpikuprōnh ā mē harēnh

Matēwre 23.1-4; Karatas 2.1-5, 5.1-16

¹Tā hāmri nhūm Ijaew kwÿjaja āxiok wÿr Jesus kwÿ pê Ijaew kēt xwÿnhjē hwÿr mōn pōj. Pika pê Jutej rūm mē hwÿr pōj nē tanhmā mē ahkre hto ho pa. Nom axtem nē Tirtūm kapēr kuhpa hā mē ahkre nē mē kām:

—Kot ka mē amā Jesus kōt amnhī xunhwÿr prām hāmri nē mē ixpyrā nē finat Mojes kot mē pamā karō xā hkōt amnhī my kwrÿt kà kwÿ jakā nē ri kormā hkōt amnhī xunhwÿ. Kot kaj mē ā amnhī nhīpēx anhÿr kēt nē nhūm Tirtūm tee ri ja hā mē apumu nē amnhī katut kōt mē ate amnhī tomnuj rēnh nē mē ato hkra hkēt nē. Anē.

²Hāmri nhūm Pawre mē Panāpe tee ri mē kapēr anhÿrja ma nhūm wa kēp ja omnuj tÿx nē. Hāmri nhūm wa mē kām:

—Tk. Kwa kot anhÿr kēt. Na hte Tirtūm mē pahte amnhī my kwrÿt kà jakār ā mē pahpumunh kōt mē pahto hkra hkēt nē. Anē.

Hāmri nē tee ri mē kapērja nē mē kām kapēr no nhūm mē ām wa kuma nē wa hkōt hamaxpēr kēt nē. Nē arī ā mē ahkre anhÿr o mē hkōt pa. Jakamā nhūm mē ja hā axpēn mā kapēr rax nē. Hāmri nhūm Jesus kwÿ

pē Ijaew kēt xwÿnhjaja amnhī tā Pawre mē Panāpe wa hkukja nē wa kām:

—Kwa xā kot paj mē apyrā nē amnhī my kwrÿt kà jakā nhūm Tirtūm kām ja mex nē nā? Kwa wa ma akupÿm Jerujarē hwÿr mō nē ja hā Jesus nhÿ hā mē ahkre xwÿnh maatiĵē mē mē kot Jesus kwÿ jahkre xwÿnhjē kukja nē hā mē ama. Nē ota mē ixkwÿjaja koja ma war akōt mra. Kē mē tanhmā mē amā ja jarēnh to ka mē ama nē man akupÿn mē ixwÿr mra nē tanhmā mē inhma mē kapēr jarēnh to. Anē.

Hāmri nhūm wa mē kām: “Tōe. Nā kot paj mē anē.” Anē.

³Hāmri nē wa mē ma Jerujarē hwÿr mō. Ma pyka pê Wēnīs mē Samar hkōt ma hwÿr mō. Hāmri nē nhÿri Jesus kōt mē htō nē htōxjē pumu nē mē kām Ijaew kēt xwÿnhjē jarē. Mē hkwyjaja mē urāk nē Jesus kōt amnhī xunhwÿr ā mē harēnh o mō. Hāmri nhūm mē harēnh ma nē mē ŷ hā hkīnh nē.

⁴Hāmri nhūm mē ra Jerujarē hwÿr Jesus kōt mē htōjē hwÿr mōn pōj. Hāmri nē mē ahkre xwÿnhjē mē Jesus nhÿ hā mē ahkre xwÿnh maatiĵē pumu nhūm mē haxwÿja amnhī wÿr mē omu nē hkīnh nē. Nē tanhmā mē ho mex to nē mē kām kapēr mex nē. Hāmri nhūm Pawre mē Panāpe wa mē kām amnhī jarē. Tirtūm kot wa ihkō hā wa hkōt pa nhūm wa ŷ hā kot Ijaew kēt xwÿnhjē mā kapēr o pa nhūm mē hkwyjaja kot wa mar nē Jesus kōt amnhī xunhwÿr ā nhūm wa mē kām amnhī jarē.

⁵Nhūm Jesus kwÿjē kamā mē kēp Parijew nhō xwÿnh kwÿjaja. Mē kēp Parijew tā hkwyjē rom Jesus kōt amnhī xunhwÿ. Jakamā nhūm mē tee ri Pawre mē Panāpe wa kot Ijaew kēt xwÿnhjē jarēnh ma nē kānhmā kuhē nē wa kām:

—Kwa kē mē pahpyrā nē amnhī my kwrÿt kà jakā nē finat Mojes kot Tirtūm nhÿ hā mē pamā mēmoj tā karō hkōt amnhī nhīpēx o pa. No kot mē ā amnhī nhīpēx anhÿr kēt nhūm ja mē pahpē omnuj nē. Anē.

⁶Hāmri nhūm Jesus nhÿ hā mē ahkre xwÿnh maatiĵē mē mē hkwyjē jahkre xwÿnhjaja mē kuma nē hapōj nē nhÿri akuprō. Ijaew kēt xwÿnh kot Jesus kōt amnhī xunhwÿr xwÿnhjaja kot tanhmā amnhī nhīpēx to hā axpēn mar kaxyw nhÿri akuprō.

⁷Hāmri nē mē hā axpēn mar ryy nē. Hāmri nhūm Simāw Pētre tā kānhmā xa nē mē kām:

—Nā na pre Tirtūm mē pahkapi nē Ijaew kēt xwÿnhjē kaxyw pa ixta. Ixte mē kām Jesus kot tanhmā mē panē amnhī nhīpēx to hā harēnh o ri mē hkōt ixpa nhūm mē kot inhmar nē hkōt amnhī xunhwÿr kaxyw nhūm mē kaxyw ixta. Ra mē ate ja hā ixpumunh mex.

⁸⁻⁹Tirtūm kot tanhmā ri mē pakute hkōt mē pahpumunh par jakamā te kot ra

mē panhīpēxta pyrā nē määnēn Ijaew kēt xwýnhjē nhīpēx. Mē kot mē pahpyrā nē amnhī kaxyw Jejus kōt hamaxpēr jakamā nhūm Tirtūm te ra mē panhīpēx pyrā nē amnhī katut kōt mē kot amnhī tomnuj rē nē mē ho hkra. Hāmri nē mē hwýr amnhī Karō rē nhūm mē hkarō mā agjē. Tirtūm tām kot amnhīm mē rēnh kēnā.

¹⁰ –Tā xā mē pahpē Ijaew na pu htem wam Tirtūm kot finat Mojes mā kapēr kōt amnhī nhīpēx mex o papa? Nā na pu htem hkōt amnhī nhīpēx mex kēt nē. Nē mē panhīgētjaja na xep prem haxwýja hkōt amnhī nhīpēx mex o pa hkēt nē. Mē pahpiitā mē pahpē hihtyx kēnā. Tā Ijaew kēt xwýnhjaja kot hkōt amnhī nhīpēx o pa hā ka mē ra mē kām karō kaxyw. Kwa kot kaj mē anē nhūm Tirtūm tee ri ja hā mē apumu nhūm ja kēp omnuj nē. Kām ja prām kēt.

¹¹ Kwa mē ā mē kām hā karō anhýr kēt nē. Mē panhō pahihti Jejus na hte mē pahpiitā mē pakutā nojarēt o axpēn pyrāk. Jakamā Ijaew kēt xwýnhjaja nē mē pahpē Ijaewjaja kot puj mē amnhī kaxyw hkōt pajamaxpēr nē hkōt amnhī xunhwý. Hāmri nhūm Tirtūm ja hā mē pahpumu nē mē panhīpēx o axpēn pyrā nē Jejus kukwak ri amnhī katut kōt mē pahte amnhī tomnuj rē nē mē pahto hkra. No na hte mē pahte amnhī my kwýrýt ká jakār rý finat Mojes kapēr kōt amnhī nhīpēx ā mē pahpumuñh kōt mē pahto hkra hkēt nē. Anē.

¹² Nhūm pre ā Simāw Pētre mē kām kapēr anē. Hāmri nhūm hpānhā Panāpe mē Pawreja mē kām amnhī jarē. Tirtūm kot tanhmā wa ho nhūm wa kot Ijaew kēt xwýnhjē hwýr wa mōr ā amnhī jarē. Nē Tirtūm nhý hā mē kām aa mē kot mēmoj pumunh kēt kwý ho anhýr o ri mē hkōt pa hā mē kām amnhī jarē nhūm mē piitā akryk wa mar o hkrī nē wa ujarēnhhta hkukamā hamaxpēr.

¹³ Hāmri nhūm Simāw Pētre mē Panāpe wa mē kām ujarēnh pa hāmri nhūm Xiakre wa hpānhā kānhmā xa nē mē kām kānhmā Ihkra pē nē mē kām:

¹⁴ –E pa ijaxwýja mē amā ixkapēr ka mē inhma. Nā na pu mē ra Simāw Pētre kapēr ma. Tirtūm kot wam amnhī kaxyw Ijaew kēt xwýnh kwýjē rēnh ā mē harēnhja pu mē ra kuma.

¹⁵ Ām hāmri na ā mē harēnh anē. Amnepēm Tirtūm kapēr nhý hā mē kapēr o mē pa xwýnhjaja na prem ra ja kukamā Tirtūm kot tanhmā mē hipēx to hā amnhī jarēnh kukamā hā kagā. Te ho tām kot kām kapēr pyrā nē hā kagā ho:

¹⁶ Amnepēm finat Tawija na pre hte inhmā amnhī kwýjē ho amnhīptār o pa.

Mē kēp Ijaewjaja nhūm pre inhmā mē ho amnhīptār o pa.

Hāmri nhūm mē gaa nē axpēn pē anhgrā nē ahpýnhā ri pa.

Tā ixpē Tirtūm kot paj nhýrmā ma mē hwýr wry nē axte mē ho akuprō nē tām mē unhwýr pa.

¹⁷ Jakamā Ijaewjē kukwak ri koja Ijaew kēt xwýnh kwýjaja määnēn ixkōt amnhī xunhwý.

Pa te ixte Ijaewjē nhīpēx pyrā nē mē ho ixkra.

¹⁸ Ā mē hkukamā ijamaxpēr anhýr xā hkōt.

¹⁹ Anhýr o mē harēnh jakamā nhūm ra mē hkwyjaja mē higēt kot amnhī nhīpēx kaga hpa nē hpānhā Tirtūm kōt amnhī xunhwý. Jakamā kwa kēr pu mē axte ja nhjuk ri mē kām mēmoj tā karō hkēt nē. Ja pix na mex.

²⁰ Ām ja pix kot puj mē kām hā karō nē hā kagā nē mē hwýr kumē:

Mē kot sānti hā mē ō hkur nē kot puj mē hkurē.

Nē mē kot mēmo mry hpar nē hkamrō runh kēt rāhā hkur nē mē hkurē.

Nē mē kot mēmo mry kamrō kur nē määnēn mē hkurē.

Nē mēmyjaja kot amnhī prō pix tānopxar ā mē kām karō.

Nē mēnijaja haxwýja kot amnhī mjēn pix tānopxar ā mē kām karō.

–Ām ja pix kot puj mē kām hā kagā nē mē kām hā karō.

²¹ Mē panhīgētjē mā finat Mojes kot ā mē kām karō anhýrja na htem arī krī piitā hkōt ā mē kām hā karō anē. Mē panhō arīgromnu pē sap ā na htem arī ri Tirtūm kapēr o mē ahkre xā hā ixkre kamā ā mē kām hā karō anē. Anē.

Mē kot Ijaew kēt xwýnhjē hwýr kagā mēnh ā mē harēnh

Karatas 5.1

²² Hāmri nhūm mē Xiakre kapēr mar o hkrī. Jejus nhý hā mē ahkre ho mē pa xwýnh maatijaja nē mē kot hkwyjē jahkre xwýnhjaja nē Kris kwýjē piitā Xiakre kapēr ma nhūm ja mē kām mex nē. Jakamā nhūm mē axpēn mā:

–Tōe. Nā ām hāmri na Xiakre ā Ijaew kēt xwýnhjē jarēnh anē. Nā ja mex. Pu mē ā āxiok nhō xwýnhjē mā ja hā kagā anē hāmri nē mē hwýr kumē. Kōja Pawre mē Panāpeja wa kupy nē ma akupým mē hwýr o mō nē mē kām kugō. E mē pahto kot puj mē ma wa hkōt mē hwýr mō? Anē.

Hāmri nhūm mē kuma nē Siras mē Jut Pasapas wa kuta. Jejus kōt mē kot axpēn to htō nē htōxjaja kot axpēn mā hamē wa kot amnhī to mex xwýnh ā wa harēnh jakamā nhūm mē ma Pawre mē Panāpe wa hkōt mōr kaxyw wa kuta.

²³ Hāmri nē āxiok kamā Kris kwý pē Ijaew kēt xwýnhjē kaxyw kagā nhīpēx nē kamā ā mē kām kapēr anē nē mē kām:

Pa? Āxiok mē Sir mē Siris kamā Ijaew kēt xwýnhjaja? Xà mē amex? Mē ixpē Jejus kôt mē atōjaja na pa mē awýr kagàja nhìpèx nē mē awýr kumē. Mē ixpē Jejus kôt mē kot amnhī xunhwýr xwýnhjē jahkre ho ixpa xwýnhjaja nē Jejus nhý hā mē ahkre ho mē pa xwýnh maatijaja pa mē awýr kumē.

²⁴ Na xep ra ja rüm mē ixkwýjaja ma mē awýr mō nē mēmoj tā tanhmā mē amā karō hto. Mē ate amnhī my kwryt kà jakār nē amnepēm mē inhīgēt Mojes kapēr kôt amnhī nhìpèx o apa hā mē amā karō. Ka xep mē tee ri ja kukamā ajamexpēr. No mē pajaja na pa prem mē awýr mē rēnh kēt nē. Ām amnhī krā hkôt na prem mē awýr mō nē ā mē amā ja hā karō anē.

²⁵ Tā pa tee ri mē harēnh ma nhūm ja mē ixpē omnuy týx nē. Jakamā na pa mē jar akuprō nē mē akaxyw mē inhīōja wa kuta. Wa kot ma Panāpe mē Pawre wa hkôt mē awýr wa mōr nē mē amā mē ixkapēr jarēnh kaxyw. Panāpe mē Pawreja mē inhmā wa hapē htýx.

²⁶ Na hte mē amā Pahiiti Jejus Kris kapēr jarēnh o pa kaxyw wa amnhī grōnh kôt mē amā harēnh o pa.

²⁷ Tā pa mē akupým mē awýr wa kumē nē wa hkôt mē pahtō Jut mē Siras wa kumē. Mē ixte mē amā kagā kamā mē ixkapērja nhūm wa kot hprī hā mē amā harēnh kaxyw pa mē wa hkôt mē awýr wa kumē.

²⁸⁻²⁹ E ja pix nē kot paj mē akurē:

Kēr ka mē sānti hā mē ō hkur kēt nē.

Nē mēmo mry kamrō kur kēt nē. Jao mēmo mry pa nē hkamrō runh kēt rāhā hkur kēt nē. Kamrō runh pa nē rī kormā tanhmā ho nē aku.

Nē kēr ka mē amyjaja amnhī prō pix tānopxar o apa.

Nē mē anijaja ajaxwýja amnhī mjēn pix tānopxar o apa.

E ām ja pix kot paj mē amā hā karō. Tirtūm Karō kām ja mex. Nē mē inhmā māānēn ja mex. Kot kaj mē ā amnhī nhìpèx anhýr o ri apa nē amex nē apa.

Tā ām ja pix. Mē ixpē Jejus kwýjē jahkre xwýnhjē mē Jejus nhý hā mē ahkre xwýnh maatijē mē pa mē mē awýr kagàja nhìpèx nē kumē. E kēr ka mē amex nē akīnh nē ri axpēn kôt apa. Ām ja pix na hapèx. Anē.

Nhūm prem ā kagā kamā mē kām mēmoj tā karō anē.

³⁰ Hāmri nē Jut wa mē kām kugō nē ma āxiok wýr wa mē kumē nhūm wa mē ma akupým hwýr o mō. Jut nē Siras nē Pawre nē Panāpeja nhūm wa mē ma akupým mē hwýr o mē mō. Mōō hāmri nē mē hwýr pōj. Hāmri nē Jejus kwýjē ho akuprō nē mē kām kagàja gō

³¹ nhūm mē kupy nē kamā harē nē kuma. Kamā mē kot mē kām mēmoj tā karō kamā harē nē kuma nē ý hā hkīnh nē akupým tām hamaxpēr.

³² Jut mē Siras wa kēp Tirtūm nhý hā kapēr o pa xwýnh na pre wa. Jakamā na prem mē hwýr mōn pōj hāmri mē kām tanhmā ujarēnh to ho pa. Mē kot Jejus kôt pix mā hamaxpēr o pa kaxyw mē kām ujarēnh o pa nē mē kām:

—E kēr ka mē māmri Jejus kôt amnhī nhìpèx mex rāhā ho ri apa nē ā hkaga hkēt nē. Anē.

³³ Hāmri nē mē hkôt ri pa hā apkati xohtō nē. Hāmri nē wa akupým Jerujarē hwýr nojarēt nē mē kām amnhī jarē nhūm mē wa kuma nē wa kām:

—Tōe. Nā wa māmri ma akupým mō. Koja Tirtūm war apumunh mex nē ka wa ma akupým amex nē akā hkīnh pé akwýjē hwýr akato. Anē.

³⁴ Hāmri nhūm wa nojarēt tā nhūm Siras tanhmā hamaxpēr to nē hitōt nē mē kuri arīk nhūm Jut Pasapas pix ma akupým hkwyjē kot mē hwýr wa mēnh xwýnhjē hwýr mō.

³⁵ Hāmri nhūm Pawre mē Panāpe wa Siras pyrā nē kormā āxiok kamā pa. Hāmri nē Jejus kôt mē htō hkwyjē mē pimrāātā mē ahkre ho pa. Tirtūm kapēr o mē hkôt mē ahkre ho pa.

Pawre mē Panāpe wa kot axpēn pē pikjēr ā wa harēnh

Atre 13.13; Korosē 4.10

³⁶ Hāmri nhūm Pawre mē Panāpe war arī mē hkôt ri pa hā apkati xohtō nē. Tā nhūm Pawre hamaxpēr nē Panāpe mā:

—Kwa ma pu ma akupým ra pahte krī hkwyjē hkôt mē kām Jejus jarēnh o papa xwýnhjē hkôt akupým mō. Pu ma mē hwýr mō nē Jejus kôt pahtō nē pahtōxjē kot tanhmā ri amnhī nhìpèx to hā mē omu. Anē.

³⁷ Hāmri nhūm kuma nē kām:

—Tōe. Nā pu ma mō. Nom kēr pu ma amnhī kôt Juāw Makre ho mō kē axte pahto ajuta ho pahkôt mō. Anē.

³⁸ Hāmri nhūm Pawre tee ri kuma nhūm ja kēp omnuy nē nhūm kām:

—Tk. Kwa na pre pahkôt pa htā Pāpir kamā tanhmā hamaxpēr to nē pahkaga nē ma akupým Jerujarē hwýr mō. Jakamā kwarī koja axte pahkôt mōr kēt nē. Anē.

³⁹ Hāmri nhūm Panāpe tee ri hā hihtýx no nhūm kēp hkaga kumrēx. Jakamā nhūm wa ja hā axpēn pē axkjē nē ma ahpýnhā mō. Nhūm Panāpe amnhī kôt Juāw Makre ho mō nē wa ma pār kām gō hipōk pē Sipre hwýr wa mō.

⁴⁰ Nhūm Pawre axtem amnhī kôt Siras wý nē ma wa mō. Hāmri nē wa nojarēt nhūm Jejus kôt wa htōjaja wa ho Tirtūm wý nē kām:

—Pa Tirtüm. E koja Pawre më Siras wa ma krî hkwyê hkôt më kãm akapêr jarênh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhùm wa kato në ma krî hkôt ri Jejus kapêr o më ahkre ho wa pa.

⁴¹ Wa ma pyka pê Sir më Siris kôt Jejus kôt më htô në më htôxjê pumunh në Jejus kôt më ho më hihtyx o wa pa kaxyw.

16

Ximotre kot Pawre më Siras wa hkôt ri pa hã harênh

Wam Ximotre 1.1-2; Sikün Ximotre 1.5; Piripos 2.19-22

¹⁻³ Tã nhùm Pawre më Siras wa ma akupÿm krî pê Tepe hwÿr wa mô në hwÿr pøj në hpãnhã kurüm ma Risti hwÿr mô. Hãmri në wa hwÿr pøj në kamã Ximotre pumu. Ximotre na pre ra katorxã pyrã në Jejus kôt amnhî xãm nhùm më kot Jejus kôt axpên to htô xwÿnhjaja kãm hapê në. Nê kot Jejus kapêr kôt amnhî nhîpêx mex o pa hã axpên mã harê.

Krî pê Risti më Ikôn kamã nhùm prem ã axpên mã Ximotre jarênh anhÿr o pa. Jakamã nhùm Pawre më Siras wa mô në më hwÿr pøj në Ximotre kot amnhî nhîpêx ã omu nhùm Pawre kãm war amnhî kôt o môr prãm. Nom Ximotre hkamrô pihkãr na pre. Katorxã kêp Ijaew nhùm hipêêxã kêp Gres jakamã nhùm ã Ximotre hkamrô pihkãr anê. Nhùm Ijaew kot katorxã hkôt kêp Ijaew ã omunh jakamã nhùm Pawre hamaxpêr në më kaxyw kêp my kwÿt kã krãhta në arî kormã më hwÿr amnhî kôt o mô.

⁴ Hãmri në më ma krî hkwyê hkôt mô. Môô në Ijaew kêt xwÿnhjaja ra kot amnhî kaxyw Jejus kôt hamaxpêr xwÿnhjê jahkre ho më hkôt pa. Ra Jerujarê kãm më kot Jejus kwÿjê jahkre ho pa xwÿnhjê më Jejus nhÿ hã më ahkre xwÿnh maatijaja më kot më kãm mëmoj tã karôta nhùm më ma më kãm harênh o ri më hkôt pa.

⁵ Hãmri nhùm më kuma në ra Jejus kôt amnhî nhîpêx mex o mô. Hãmri nhùm apkatî më krî nhô xwÿnh kwÿjaja më urak në Jejus kôt amnhî xunhwÿ. Jakamã nhùm më ra ohtô rax o mô.

Pawre tanhmã hpimtir to hã harênh Rômãn 15.18-21

⁶ Tã nhùm Pawre më Siras më Ximotre më ma pyka pê As wÿr nojarê. Më kot më kãm tanhmã Jejus jarênh to ho pa kaxyw më hwÿr nojarê tã nhùm Tirtüm Karô kormã më në më hkurê. Jakamã nhùm më hpãnhã ma pyka hkwyê pê Prik më Karatas wa hkôt pa. Ixpê Rukre na pa pre më hã ajêt në ma më hkôt ixpa ho ixpa.

⁷ Hãmri në më pyka pê Mïs ã mô në hpãnhã ma Pitün wÿr inhmôr mã tã no nhùm Tirtüm Karô axte kê më në më ixkurê.

⁸ Jakamã pa më arî Mïs jakãr ã mô në gô xujanãr mÿ ri krî pê Tôx wÿr pøj.

⁹ Tã nhùm kamãt pa më ixpiitã gôr në inhîkwÿ nhùm Pawre tanhmã hpimtir to. Nhùm xep pika pê Masetôn nhô xwÿnhja më amnhî wÿr hwÿr kãm hihtyx o xa nhùm hprî hã omu në kapêr ma. Nhùm xep pre kãm:

—Pa Pawre? Kwa amnê Masetôn wÿr më ixwÿr mô në tanhmã më ijahkre hto. Anê.

¹⁰ Hãmri nhùm Pawre hkrãkato në më inhmã hpimtir jarê. Pa më kuma në axpên mã:

—Tô kwa tokyx pu më hwÿr. Tirtüm kot më hwÿr më parênh kênã. E pu më ma më hwÿr mô në më kãm Jejus jarênh o më ahkre. Anê.

Hãmri në amnhî to akuprô në më hwÿr inhnôjarê. kurê kumrêx.

Ritre kot Jejus kôt amnhî xãm ã harênh Piripos 1.1

¹¹ Hãmri pa më ma Masetôn wÿr mô. Tôx rüm ma pãr kãm hwÿr mô. Hãmri në gô nhîpök pê Samôtas wÿr pøj nhùm më hã pãr nhô. Hãmri nhùm apkatî pa më axte mô në Masetôn kamã krî pê Nêap wÿr pøj.

¹² Hãmri në pãr rüm ijapøj në hpãnhã kurüm hamü krî pê Piripos wÿr ixpar o mô. Piriposja Masetôn kamã krî maati na. Rôm nhô xwÿnhjaja na prem ho kato. Jakamã pa prem ma hwÿr mô në pøj në tokyx axte kurüm nhÿhÿm inhmôr kêt në.

¹³ Hãmri nhùm sap kato pa më axpên mã: —Kwa pyhti mÿri mãn hte Ijaewjaja axpên wÿr akuprô në Tirtüm mã amnhî jarênh o hkrî nã. E kwa pu më hwÿr në gô mÿri më hapêr o ri papa. Anê.

Hãmri në ma hwÿr mra në më hapêr o ri ixpa nhùm ãm mëni pixjaja axpên wÿr akuprô. Pa më omu në më kuri ixkrî në më kãm Jejus kapêr jarênh o më ahkre o ixkrî.

¹⁴ Nhùm më kot më inhar o hkrî xwÿnhjê hõ pê Ritreja. Krî pê Xijaxir nhô xwÿnh na pre. Nê kêp kupêxê mex o wênê xwÿnh. Na pre hte kãm Tirtüm prãm o pa. Jakamã nhùm Pawre kot më ahkre ho ÿrja rôm nhùm Pahihti Jejus tanhmã Ritre hkrã hto nhùm hprî hã Pawre kapêr mar tÿx në.

¹⁵ Hãmri në amnhî kaxyw Jejus kôt hamaxpêr në hkôt amnhî xãm kurê kumrêx. Ôrkwÿ kamã hkwyê më nhùm më hkôt amnhî xunhwÿr pa. Jakamã pa më kêp Jejus kwÿ hã më hkrã kumrã. Më piitã më kot më kêp Tirtüm kra hã më omunh kaxyw. Hãmri nhùm Ritre amnhî kôt më ixwÿ në më inhmã:

—An kot kaj më ixte Jejus kôt amnhî xãm tÿx ã ixpumu hã kot kaj më ma ixkôt mô në hpãnhã inhôrkwÿ kamã pøj në apa. Anê.

Pa mē kuma nē ma hkôt mō.

Mē kot Pawre mē Siras wa haxà ā mē harēnh

Makre 1.23-26, 1.34

¹⁶ Tā nhūm arīgro hō hā pa mē Tirtūm mā amnhī jarēnh kaxyw axte pyhti mýri mē pikuprōnh xàja wýr mō. Hāmri nē pry kamā mē kām àpēnh xwýnh nija pumu. Ra mēkarōmnuti kot tanhmā hkrā hto nhūm ý hā àhpumunh týx xwýnhja. Nhūm hte mēkarōmnuti nhý hā mē kām mēmo hkukamā tanhmā ujarēnh to ho pa. Jakamā nhūm ò patrāwjaja kukwak ri ujamýnh rūnh pē hkīnh nē pa.

¹⁷ Jakamā pa mē mō nhūm nija mē ixpumu nē mē ixtā ajēt nē ma mē ixkôt mō. Hāmri nē mē kām mē ijarēnh o mē ixkôt mō nē mē kām:

–Xē mē mran jajē pumu. Na htem Tirtūm maati mō tanhmā amnhī nhīpēx mex to ho pa. Tirtūm kot mē ate amnhī tomnuj pē tanhmā mē apytār to hā mē amā ujarēnh kaxyw na mē awýr mra. Anē.

¹⁸ Nē am xatā mē kām mē ijarēnh o mē ixkôt paja o ra hā apkati sohtō nē. Tā nhūm Pawre ra kām mar kaga nē nē mēkarōmnuti mā kapēr nē kām:

–Tk. Kwa kēp akato nē ma tē. Pa Jejus Kris nhý hā amā ixkapēr ka inhma nē kēp akato nē ma atēm kurē kumrēx. Anē.

Hāmri nhūm kuma nē kēp kato nhūm akupým tām hkrā.

¹⁹ Jakamā nhūm ò patrāwjaja tee ri ja hā omu nē gryk týx nē axpēn mā:

–Kwa ra mēkarōmnutijaja kēp kator jakamā koja axte mēmoj kukamā tanhmā ujarēnh to hkēt nē. Pu mē kukwak ri axte paxujamýnh kēt nē. Anē.

Hāmri nē Pawre mē Siras wa kamā gryk týx nē. Hāmri nē wa unē nē ma mē kot axpēn mar xā hā ixkre hwýr wa hkjēnh o tē

²⁰ Nē mē kot mē ho amnhīptār xwýnhjē mā tanhmā wa ho hēx to nē mē kām:

–Kwa mē amnē Ijaewja wa omu. Na hte wa mē panhō krī kamā hēx pix o pa nhūm mē tee ri wa kapēr ma nē wa kamā gryk týx nē.

²¹ Mē ixte amnhī nhīpēx te kot axpēn pyrāk kēt tā nhūm wa mē kot amnhī nhīpēx o mē pajahkre kaxyw nhýhýnh mē pahwýr mō. Nom mē pahpē Róm nhō xwýnhjaja axtem mē pahte amnhī nhīpēx kēnā kot pu kēt wa kuma nē wa kapēr kôt amnhī nhīpēx. Anē.

²² Hāmri nhūm mē kuma nē piitā wa kamā gryk týx nē. Hāmri nhūm mē ho amnhīptār xwýnhjaja wa kēp wa é kaxōnh o hkapa nē wa hā mē ò pōristi mā amýnē nē mē kām:

–E mē ma wa o tē nē mē htak xā ho wa htak. Anē.

²³ Hāmri nhūm mē kuma nē ma wa o tē nē wa htak rax nē. Hāmri nē wa haxà nē mē hagjēnh xā jamār xwýnh mā kām:

–E kēr ka ja wa omunh mex nē kē wa kator kēt nē. Anē.

²⁴ Tā nhūm kamāt. Nē kôt ā kamāt nhūm wa Tirtūm mā amnhī jarē nē mex o mex ā wa grer o wa nhý nhūm wa urāk nē mē hagjēnh xwýnhjaja wa mar o hkrī.

²⁵ Puh nhūm pyka mē kām tertet týx nē nhūm mē hā ixkreja amnhī to àpēr týx nē amnhī kahē xā rēnh pa. Nhūm mē hagjēnh xwýnhjē kaxpre xā piitā mē nē pirēnh pa.

²⁷ Hāmri nhūm mē hamār o kuhē xwýnhja pika tertet kamā ama nē hkrākato. Hāmri nē mē hā ixkre jakwakre kahē xā rēnh parja pumu nē mē hagjēnh xwýnhjaja hapōx par ā mē hkamnhi x nē tee ri amnhī kukamā hamaxpēr. Hāmri nē pahi kot mē hā hpīr pymaj ò wapo kapa nē ra tām kot ho amnhī pīr kaxyw.

²⁸ Hāmri nhūm Pawre tee ri ja hā omu nē kàx pē kām amýra nē kām:

–Kwa amnhī pīr kēt nē. Ot pa mē arī ixpiitā ixkuhē. Na pa mē ixtō ixkator nē ixprōt kēt nē. Anē.

²⁹ Hāmri nhūm kuma nē kanē hā ahwý nē kuwy nē mē hwýr axà nē mē piitā mē omu. Hāmri nē Pawre mē Sirasja wa omu nē wa hwýr kām ma ho hteret o tē. Hāmri nē wa hā hpijaam kaxyw wa kutā tēm nē hkōnkrā ho nhý.

³⁰ Hāmri nē kànhmā xa nē wa ho kato nē ixkre kapem wa o xa nē wa kām:

–Kwa tanhmā kot pa amnhī nhīpēx to kē Tirtūm war apyrā nē ixte amnhī tomnuj pē ixpytā? Anē.

³¹ Hāmri nhūm wa kām:

–Nā kot kaj amnhī kaxyw Jejus Kris kôt ajamaxpēr nē hkôt amnhī xām nhūm Tirtūm ja hā apumu nē amnhī katut kôt ate amnhī tomnuj piitā rēnh pa. Nhūm anhōrkwý kamā akwýjaja apyrā nē Jejus kôt amnhī xunhwý nhūm ā mē hipēx anē. Anē.

³² Hāmri nē wa ma hkôt òrkwý hwýr tē nē hpri hā mē kām Tirtūm kapēr jarē nhūm mē wa mar o hkrī.

³³ Hāmri nhūm mē hagjēnh xā jamār xwýnhja wa kām wa htak xā kuhō. Kormā kamāt kō hkwý kamā wa kām kuhō nē hkane. Hāmri nhūm wa mē kot Jejus kôt amnhī xunhwýr par ā mē omu nē mē hkrā kumrā. Mē hamār xwýnh mē hkwýjē mē hkrā kumrār pa.

³⁴ Hāmri nhūm mē kot amnhī kaxyw Tirtūm kôt hamaxpēr jakamā piitā hkīnh nē. Hāmri nhūm mē hamār xwýnhja òrkwý hwýr Pawre mē Siras wa o tē nē wa kām ò nhūm

wa apku nhùm ma akupÿm mē hagjēnh xà hwÿr wa o tē nē akupÿm wa haxà.

Mē kot Pawre mē Siras wa kām urer ā mē harēnh

Atre 22.25-29

³⁵ Hāmri nhùm apkati nhùm krī pytār xwÿnhjaja mē ō pōristi nā anē nhùm mē hagjēnh jamār xwÿnh wÿr tē nē kām:

—E na mē papytār xwÿnhjaja ate Pawre mē Siras wa kām anhūrer nhùm wa māmri ma akupÿm htēm kaxyw hā karō. Anē.

³⁶ Hāmri nhùm mē kuma nē wa hwÿr axà nē wa kām:

—E na krī pytār xwÿnhjaja ixte war akator kaxyw war atā inh mā karō. Jakamā e wa māmri axāmnhix ma mō. Anē.

³⁷ Hāmri nhùm Pawre kām:

—Nā wa ixte tanhmā amnhī tomnuj to hkēt tā nhùm mē kot wa ixpynēnh nē wa ixtak. Wa ijaxwÿja wa ixpē Rōm nhō xwÿnh tā nhùm prem axtem nē mē piitā mē noo mā wa ixtak nē wa ijaxā. Mē kot amari Rōm nhō xwÿnh tak nē mē hagjēnh kēt tā nhùm mē ā mē noo mā ā wa inhīpēx anē. Kormā wa ixte tanhmā amnhī tā ixāprār to hkēt tā nhùm mē ā wa inhīpēx anē. Jakamā kwarī kot kaj mē no hkāx ā wa ixkator kēt nē. Kē mē kot wa ijaxār xwÿnhjaja tām man mra nē wa ixkator pa war arī ma mō. Anē.

³⁸ Hāmri nhùm pōristija kuma nē ma akupÿm mē hwÿr mra nē mē kām wa kapēr jarē. Hāmri nhùm mē tee ri mē urān wa kēp Rōm nhō xwÿnh ā wa harēnh ma nē kām ma htÿx nē.

³⁹ Hāmri nē ma wa hwÿr tē nē wa hwÿr axà nē wa kām:

—Pa? E māmri war akato nē axāmnhix ma mō. Na pa prem war anhīpēx kati rax nē. Tā kēr ka wa axte ja mā ajamaxpēr hkēt nē. Kē ja ām jar mē pakamā hapēx. Anē.

Hāmri nē wa kator nē wa kām:

—E kwa wa mē inhō krī pē akato nē ma nhÿhÿm mō. Anē.

⁴⁰ Hāmri nhùm wa kuma nē kato nē ma akupÿm Ritre nhōrkwÿ hwÿr wa tē. Hāmri nē Jesus kōt wa mē htōjē pumu nē wa mē kām amnhī jarē nē mē kām:

—E kot paj hāmri wa mā mō. Nom kēr ka mē arī Jesus Kris kōt amnhī nhīpēx mex rāhā ho ri apa nē aa hkaga hkēt nē. Anē.

Hāmri nē wa mē kurūm kato nē ma krī hō hwÿr wa mō.

17

Tesarōn kamā mē kot wa kamā gryk ā mē harēnh

Wam Tesarōn 1.1, 2.13-14

¹⁻² Tā nhùm Pawre mē Sirasja wa ma krī hkwy hkōt pa. Piripos rūm ma Apiporip mē Apōrōn kōt wa mō hāmri nē ra Tesarōn wÿr wa pōj. Na pre hte Pawre nhÿri pōj nē

Ijaew nhō Tirtūm kapēr o mē ahkre xà hā ixkre hwÿr agjē nē kamā mē kām Jesus kapēr jarēnh o kuhē. Jakamā nhùm wa mō nē Tesarōn wÿr pōj nē ixkre hwÿr mē hwÿr tē nē mē kām ujarēnh o xa. Nē mē kām ujarēnh o hā arīgromnu pē sap o axkrunēpxi.

³ Nē hprī hā mē kām tanhmā Tirtūm kapēr jarēnh to nē mē kām:

—Nā Tirtūm kapēr ā kagā htūm kot mē pakaxyw ām xwÿnh jarēnh. Amnhī xà htÿx kamā hamak kām htyk hāmri nē akupÿm htÿr ā nhùm kot hkukamā harēnh. Tā na pre Jesusja ā amnhī nhīpēx anē. Tām kēp Krisja. Tirtūm kot mē pakaxyw ām xwÿnhnta na. Anē.

⁴ Hāmri nhùm mē hkwyja kuma nē wa hkōt hamaxpēr nē wa urāk nē Jesus kōt amnhī xunhwÿ. Ijaew kwÿjē nē Ijaew kēt xwÿnh kwÿjjaja nē mēni kot amnhī to rūnh xwÿnh kwÿjjaja nhùm mē ohtō nē amnhī kaxyw Jesus kōt hamaxpēr nē hkōt amnhī xunhwÿ.

⁵ Tā nhùm Ijaew kwÿjjaja tee ri hkwy kot wa hkōt amnhī xunhwÿr ā mē omu nē mē hā Pawre mē Siras wa kamā gryk tÿx nē. Hāmri nē ma mra nē wa kaxyw mē kot amnhī tomnuj tÿx xwÿnh kwÿjē ho akuprō nē mē kām wa hā amÿnē. Jakamā nhùm mē ma kapēr punuj pē wa hapēr o ri mra nhùm mē piitā mē omu nē mē kuma. Hāmri nhùm mē wa hapēr o ra Jasāw nhōrkwÿ hwÿr mra. Nē mē kot Pawre mē Siras pynēnh nē ma mē utār xwÿnhjē hwÿr wa o htēm kaxyw mē kēp kahē xà mē nē mē hwÿr agjē.

⁶ Hāmri nē tee ri ōrkwÿ kamā wa hapēr nhùm wa kamā amrakati. Jakamā nhùm mē Jasāw mē kot Jesus kōt axpēn to htō xwÿnh kwÿjē pynē nē ma mē ho amnhīptār xwÿnhjē hwÿr mē o mra. Hāmri nē mē kām tanhmā Pawre mē Siras wa ho hēx to. Ām kapēr punuj kām kax pē mē kām wa harē nē mē kām:

—Kwa na hte Pawre mē Siras wa pyka piitā hkōt mē kām ri mēmoj to hēx o pa. Tā wa ra mē panhō krī hwÿr pōj nē jar mē pamā ri tanhmā hēx to ho ri mē pahkōt pa.

⁷ Jasāw nhōrkwÿ kamā na pre wa pōj nhùm amnhī wÿr wa kuwÿ. Na hte wa hkōt mē hamaxpēr xwÿnhjaja pahihtti Sesti kapēr kwÿm ri kuhpa hā kapēr o pa nē axtem nē mēō pahī pē “Jesus” anhÿr xwÿnhja kapēr kōt amnhī nhīpēx o pa. Anē.

⁸ Hāmri nhùm mē kot mē ho amnhīptār xwÿnhjē mē krī nhō xwÿnhjaja mē kuma nē gryk tÿx kumrēx.

⁹ Hāmri nē Jasāw mā kām:

—E kot paj mē apē mē akāxpore hkwy jamÿ. Ka mē ajapōj nē ma mē panē Pawre mē Siras wa hano nhùm wa kato nē ma mō pa rī akupÿm mē amā kugō. Anē.

Hāmri nē mē kēp mē hikāxpore hkwy jamÿ.

Pawre mē Siras kot Perej wýr mōr ā wa harēnh

¹⁰ Tā nhūm ra kamāt nhūm mē kot Jejus kōt axpēn to htōjaja hāmri Pawre mē Sirasja wa ma krī pē Perej wýr wa kumē. Hāmri nhūm wa kato nē ma hwýr mō nē hwýr pōj. Hāmri nē Ijaew nhō Tirtūm kapēr o mē ahkre xā hā ixkre hwýr htēm kurē kumrēx nē wa axā.

¹¹ Perej kamā Ijaew na pre te mē kot Tesarōn kamā Ijaew pyrāk kēt nē. Mē kuro mē kām Tirtūm kapēr mar prām nē. Jakamā nhūm pre Pawre mē Siras Tirtūm kapēr o mē ahkre ho pa. Apkati mē mē ahkre mex o pa nhūm mē wa kuma nē hkīnh nē. Nē Tirtūm kapēr ā kagā htūm kamā wa kot mē ahkreta japēr nē kamā omu nē axpēn mā wa harēnh o:

—Nā ām hāmri na wa ā Tirtūm kapēr o mē pajahkre anē. Tirtūm kapēr ā kagā htūm hkōt na hte wa mē pajahkre. Anē.

¹² Hāmri nē ohtō nē Jejus kōt amnhī xunhwý. Ijaew kwý nē Ijaew kēt xwýnhjē mē mēni kot amnhī to rūnh xwýnhjaja nhūm mē ohtō nē Jejus kōt amnhī xunhwý.

¹³ Tā nhūm Tesarōn kām Ijaewjaja Pawre jarēnh ma. Kot Perej nhō xwýnhjē mē Tirtūm kapēr jarēnh o pa hā harēnh ma. Hāmri nē ma mē hwýr mra nē mē kām tanhmā ho hēx to nhūm krī nhō xwýnhjaja mē kuma nē ra Pawre kamā gryk týx nē.

¹⁴ Jakamā nhūm Jejus kōt mē htōjaja mē harēnh ma nē mē umaj Pawre kator nē ma gō xujanār wýr o mō. No nhūm Siras mē Ximotre wa Perej kamā mē kuri arīk.

¹⁵ Hāmri nhūm mē hkwyjaja ma Pawre o mō. Ma krī pē Atenas wýr o mō. Hāmri nē hwýr o pōj nē kamā kure. Hāmri nē ra akupým Perej wýr nojarēt nhūm Pawre mē kām:

—E kēr ka mē ma akupým mō nē Siras mē Ximotre wa kām ijarē kē war amnhīm nojarēt nē tokyx man ixkōt wa mō. Anē.

Pawre kot Atenas nhō xwýnhjē mā kapēr ā harēnh

Rōmān 1.18-20

¹⁶ Tā nhūm Pawreja kormā Atenas kamā pa. Siras mē Ximotre wa kamā hamak o ri kormā kamā mē kot amnhī nhīpēx ā mē omunh o pa. Na pre Atenas nhō xwýnhjaja sānti ho ohtō rax nē mē ō krī kamā unhwý nhūm Pawre ri omunh o ri kuhē ho pa. Na pre htem ahpýnhā mēmo karō nhīpēxja o te Tirtūm nhīpēx pyrā nē kutā hkōn krā ho rōrōk nē hkrī nē kām mex o mex ā harēnh o pa. Hāmri nhūm Pawre tee ri ja hā mē omunh o ri mē hkōt pa nē hkaprī nē.

¹⁷ Hāmri nē ma amnhī kwýjē nhō Tirtūm kapēr o mē ahkre xā hā ixkre hwýr pa nē kamā mē ahkre ho kuhē. Ijaewjē mē Ijaew kēt xwýnh kot Tirtūm ā hpijaam xwýnhjē mā

nhūm Tirtūm kapēr jarēnh o kuhē. Nē apkati mē mē kot mēmoj to wēnē xā hwýr mra nē mē ujaarprōr xwýnhjē mā Tirtūm kapēr jarēnh o kuhē.

¹⁸ Hāmri nhūm mē mar o pa. Atenas nhō xwýnhjaja na prem axpēn kōt amnhī nhīpēx o pa hkēt nē. Mē hkwyjaja kēp Epikure hkōt amnhī nhīpēx xwýnh. Nē mē hkwyjaja axtem kēp Etok kōt amnhī nhīpēx xwýnh. Hāmri nhūm Pawre mē kām Jejus kot tanhmā mē panē amnhī nhīpēx to hā harēnh o pa nē akupým htír ā harēnh o pa. Hāmri nhūm mē tee ri kuma nē hā axpēn kujkēr o kuhē nē axpēn mā:

—Tk. Kwa mo na hte myti ata harēnh o pa? Anē.

Nhūm mē hkwyjaja mē kām:

—Ko. Axtem mēpahpām ō na hte tanhmā harēnh to. Anē.

¹⁹⁻²¹ Atenas nhō xwýnhjē mē axtem krī hō nhō xwýnhjaja na prem kām mē ujarēnh nyw mar prām nē. Jakamā nhūm prem mēmoj jarēnh nyw ma hāmri nē ām axpēn mā harēnh pix o ri pa. Tā ra Pawre xujarēnh nyw ma nē ma amnhī kōt mē kot axpēn mar xā hā ixkre hwýr o tē. Ixkre pē Areopja wýr nhūm prem amnhī kōt o tē nē kām:

—E kwa aprī hā mē inhmā ate mēmo jarēnh nywta jarē pa mē ama. Mē inhmā mar prām. Anē.

²² Hāmri nhūm mē kuma nē mē kām ujarēnh o xa. Mē kot axpēn mar xā hā ixkre kamā Atenas nhō xwýnhjē mā awjarē nē mē kām:

—E nā na ka htem anhō mēmo karō nhīpēx xohtōta ā apijaam pē kām amnhī jagrer o ri apa. Pa hte ja hā mē apumunh o mē akōt ixpa.

²³ Na pa ra mē anhō sānti piitā hkōt omunh o ri ixpa nē o mūj hō kuhē xā kaprýja wýr ixkato. Nhūm hīmōk ā mēmo karō nhīpēx amrakati nom ā hā kagā kot:

MĒPAHPĀM PUMUNH KĒT KUHĒ XĀ NA JA
Ā mē ate hā kagā kot anhýr. Mē ate omunh kēt tā ka htem arī hā apijaam o ri apa. Na pa na ixte mēhōja jarēnh mar mex. Tā kot paj mē amā harē ka mē inhma.

²⁴ —Mēpahpām mē ate omunh kēt ā amnhī jarēnhata Tirtūm na. Tām na pre pyka ho kato nē kamā mēmoj piitā ho kator pa. Gō ho kato nē mry ho kato nē panhī ho kato. Ām mēmoj piitā ho kator par kumrēx. Na hte pika kamā nē kaxkwa kamā mēmoj piitā ho amnhīptār mex rāhā ho pa. Jakamā mēmo kaxyw kot puj mē jar kām ōrkwý nhīpēx? Tām kēp mēmoj piitā ho kator xwýnh jakamā kot mēmoj to presija hkēt.

²⁵ Kēp mēmoj piitā hpām jakamā mēmoj piitā ō na. Jakamā tanhmā kot pu wem amnhī to nē kām mēmoj gō? Tām kot mēmoj piitā ho kator nē ho htír nē kot mēmoj piitā

õr kênã kot puj kêt mê amnhĩ pyrà nê kãm mêmõj gõ.

²⁶ Na pre mê pahkukamã ahpýnhã mê pahpiitã mê papaxã jarê nê mê pakator hã arĩgro jarê. Na pre mê pahpãm kot wa Atãwja nhĩpêx. Jakamã nhũm Atãw kêp mê pahpiitã mê pahpãr krax.

²⁷ —Tã mêmõ kaxyw na pre ã Tĩrtũm mê panhĩpêx mex anê? Nã ãm mê pahte amnhĩ kaxyw hkõt pajamaxpêr nê hkõt amnhĩ xunhwýr kaxyw na pre mê panhĩpêx. Ja mê pahpê hihtýx kêt. Kõja mêmõ kãm Tĩrtũm prãm nhũm amnhĩ tã omunh kurê kumrêx.

²⁸ —Nê Tĩrtũm pix kukwak ri na pu htem pahfĩr nê tanhmã amnhĩ nhĩpêx to ho ri papa. Mê akwý kot kagã jahkre xwýnhja na pre ja hã kagã nê hã kagã ho: “Mê pahpê mēpahpãm kra na pu htem papa.” Anê. ã hã kagã kot anhýr.

²⁹ —Tã ka prem amnhĩm mêmõ karõ nhĩpêx. õr o hkwy nhĩpêx nê prat o hkwy nhĩpêx nê kên o hkwy nhĩpêx. Hãmri nê hipêx pa nê ho mēpahpãm ã harê nê ri hã apijaãm o apa. No mê ãm amnhĩ krã hkõt mê ate hipêx. Tĩrtũm te kot ja pyràk kêt.

³⁰ —Amnepêm mê pa xwýnhjaja na prem mê apyrã nê ã mêmõj nhĩpêx anhýr o pa nhũm Tĩrtũm ja hã mê omu nê ãm mê omu nê hã tanhmã mê hipêx to hkêt nê. Kormã mê kot kapêr mar kêt jakamã nhũm pre ja hã mê omu nê ãm mê omu. Tã na ra mê pahte mêmõ karõ nhĩpêx o mēpahpãm nê mê pamã kapêr. Mê pahte hpãnhã amnhĩ kaxyw ãm kõt pix mã pajamaxpêr o papaja na kãm hprãm.

³¹ Kõja nhýrmã tanhmã mê pahte amnhĩ nhĩpêx to ho papa hã mê pahpumunh kõt tanhmã mê pajarênh to. Nê amnhĩ ri mê htĩr tũm nê mê pa ho pa xwýnhjê jarê nê amnhĩ ri mê pa hkêt xwýnhjê jarê. Na pre ra ã mê harênh anhýr kaxyw arĩgro hta. Arĩgrota ã kot hprĩ hã kãm tanhmã mê pajarênh to kaxyw na pre ra Jejusja xãm. Kaxyw na pre akupým ho htĩr. Nê akupým ho htĩr jao kot nhýrmã kãm tanhmã mê pajarênh to xwýnh ã ho amnhĩrit. Anê.

³² Nhũm pre ã Pawre mê kãm Tĩrtũm kapêr jarênh anê nhũm mê mar o kuhê. Kot mê kãm Jejus tyk nê akupým htĩr ã harê nhũm mê mar o kuhê. Nhũm mê hkwyjaja kuma nê ãm kuma nê axtem nê ri hã akunha. Nom nhũm mê hkwyjaja mê kurom mar týx nê Pawre mã kãm:

—E kwa mê inhmã ja mar prãm. Apkati hõ hã ka axte mê inhmã ja jarê pa mê ixpri hã mar mex nê. Anê.

³³ Hãmri nhũm Pawre akupým nhýri hpõx xã hã ixkre hwýr ma tẽ.

³⁴ Hãmri nhũm Xiõnis pê Areop kãm mê kãm kapêr xwýnh nê mêmõ ni pê Tãmaris nê mê hkwyjaja kapêr mar týx nê amnhĩ kaxyw

Jejus kõt hamaxpêr nê hkõt amnhĩ xunhwýr. Hãmri nê Pawre kõt pa.

18

*Pawre Korõt wýr mõi ã harênh
Wam Korõt 1.1-3*

¹ Tã nhũm Pawre krĩ pê Atenas rũm kato nê ma krĩ pê Korõt wýr mõi nê põi.

² Hãmri nê nhýri Akirti pumu. Haxwýja kêp Ijaew. Krĩ pê Põt kamã na pre kato. Tã ma pyka pê Itar wýr mõi nê Itar kamã krĩ pê Rõm kamã hpãnhã pa. Pa ho pa htã nhũm mê õ pahihtĩ Krawti tanhmã hamaxpêr to hãmri nê mê amnhĩ nê Ijaew piitã mê hanor pa. Jakamã nhũm Akirti kato nê hprõ Prisire mê wa ma Korõt wýr mõi. Hãmri nê hwýr põi nê kamã pa ho pa. Jakamã nhũm Pawre Korõt wýr põi nê wa omu

³ nê wa kuri põi nê wa hkõt ri pa. Nê Siras mê Ximotre wa kamã hamak pê wa ãhkõ hã ãpênh o pa. Wa urãk nê kupêxê pytĩ ho ixkre nhĩpêx nê ho wênê ho ri wa hkõt pa.

⁴ Hãmri nhũm sap kato nhũm ma Tĩrtũm kapêr o mê ahkre xã hã ixkre hwýr pa nê kamã mê kãm Tĩrtũm kapêr jarênh o hkrĩ. Ijaew mê Ijaew kêt xwýnhjê mã nhũm mê kãm ujarênh o hkrĩ. Nê mê kãm Jejus kot mê panê tanhmã amnhĩ nhĩpêx to hã harê.

⁵ Tã nhũm Siras mê Ximotre wa ma Masetõn rũm Pawre wýr mõi põi. Jakamã nhũm Pawre axte ixkre nhĩpêx ã ãpênh kêt nê. Pãnhã apkati mê Ijaewjê jahkre ho pa. Mê kãm tanhmã Jejus jarênh to ho ri mê hkõt pa. Kêp Tĩrtũm kot mê pakaxyw ãm xwýnh ã harênh o ri mê hkõt pa. Xatã mê kãm ujarênh o pa.

⁶ Nom nhũm mê kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mê kuma nê mê kãm:

—E ixte mê amã Jejus kot mê panê tanhmã amnhĩ nhĩpêx to hã harênh tã ka mê amã mar prãm kêt nê. Nã mê kam nê mê mãmri ate amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mê ate Tĩrtũm kapêr kaga kênã. Nã kot paj mê akaga nê ma hpãnhã Ijaew kêt xwýnhjê hkõt ri mê kãm ja jarênh o ri ixpa. Anê.

Hãmri nê kãnhmã xa nê hinõka kapa nê ho apê. Mê kot hkaga hã amnhĩ pumunh kaxyw nhũm mê noo mã ã amnhĩ nhĩpêx anê.

⁷ Hãmri nê ixkre rũm kato nê hijuk ri Ijaew kêt xwýnh pê Xijutre nhõrkwý hwýr tẽ nê hpãnhã Xijutre hkõt pa ho pa. Xijutre kêp Ijaew kêt tã amnhĩ kaxyw Tĩrtũm mã hamaxpêr rãhã ho pa.

⁸ Tã nhũm Ijaew õ pê Kriptija hkwyjê rom amnhĩ kaxyw Pahihtĩ Jejus kõt hamaxpêr nê hkõt amnhĩ xãm. Kêp Ijaew nhõ Tĩrtũm

kapêr o mē ahkre xā hā ixkre kamā mē ahkre xwŷnh na pre. Jakamā ōrkwŷ kamā hkŷwŷjē mē mē hpimrāātā Pahihti Jejus kōt amnhī xunhwŷr pa. Nē krĭja kamā ra Ijaew kēt xwŷnh ohtō nē Kripti pyrā nē amnhī kaxyw Jejus kōt hamaxpēr nē hkōt amnhī xunhwŷ. Jakamā nhŷm Pawre mē kēp Jejus kwŷ hā mē piitā mē hkrā kumrā.

⁹ Tā nhŷm kamāt nhŷm Pawre gōr nē nō nē amŷti nhŷm kēwe Pahihti Jejus axte hwŷr kato nē kām kapēr nē kām:

—Pa Pawre? E kwa kēr ka māmri axāmnhix ri atar mē kām ijarēnh rāhā ho ri apa nē amnhī kamā akahak o ri mē hkōt apa hkēt nē.

¹⁰ Kot paj atānopxa nhŷm mēhō tanhmā ato hkēt nē. Krĭ ja kamā koja mē ohtō nē ixkōt amnhī xunhwŷ. Anē.

¹¹ Nhŷm pre ā Pahihti Jejus Pawre hpimtir kām kām kapēr anē. Jakamā nhŷm Korĭt kām arĭ ri mē hkōt pa ryy nē. Arĭ mē hkōt pa hā amgrā pyxi nē hkōt mytwrŷ kēp 6. Jao Tirtŷm kapēr o mē ahkre ho ri mē hkōt pa.

¹² Tā nhŷm Korĭt nhō xwŷnhjē nhō pika pē Gres kamā mē ho amnhīptār xwŷnh nyw Gartija. Korĭt kām pa jakamā nhŷm Ijaew xāptār tŷmrejaja Pawre pynē nē ma hwŷr o tē nē kām tanhmā ho hēx to.

¹³ Jakamā nhŷm Ijaew pikuprōnh xā hā ixkre kamā mē kām kapēr xwŷnh Sostenesja Garti mā Pawre o hēx nē kām:

—Kwa jahti na hte mē ixpē Ijaew kot amnhī nhīpēx kwŷm ri mē ahkre ho pa. Jao mē ixte axtem nē tanhmā Tirtŷm kōt ri amnhī nhīpēx to ho ri ixpa kaxyw mē inhmā karō ho pa. Nom mē ixte amnhī nhīpēx kuhpa hā mē inhmā karō. Anē.

¹⁴ Hāmri nhŷm ra Pawre kot Garti mā amnhī jarēnh mā tā nhŷm Garti amnhī to wa nē hā mē kām kapēr nē mē kām:

—Tk. Kwa kot tanhmā amnhī tomnuj tore hā. Kot tanhmā amnhī tomnuj to nhŷm mē ate inhmā harēnh ronhŷx pa arĭ mē ama nē tanhmā mē amā hipēx to.

¹⁵ No xep ām kot mē xāptār tŷmrejaja kot amnhī nhīpēx kuhpa hā pix mā kot amnhī nhīpēx o pa kēnā. Nē mē ate mē ahkre kuhpa hā kot ri mē ahkreja pix mŷrapē na ka mē kamā agryk nē ā inhmā ho akapēr anē. Nā kot paj ja hā tanhmā ho hkēt nē. Ka mē kam nē amnhī krā hkōt tanhmā ho hprām xā hkōt tanhmā ho. Anē.

¹⁶ Hāmri nē amnhī nē mē hano.

¹⁷ Hāmri nhŷm mē tee ri kuma nē ra Sostenes kamā gryk nē. Kot Garti mā tanhmā Pawre jarēnh to htā nhŷm kuma nē ām mar jakamā nhŷm mē hā Sostenes kamā gryk. Hāmri nē unē nē Garti noo mā htak o xa. Nē htak rax nē. Nom nhŷm hā mē omu nē ām mē omu nē nē tanhmā mē kām nē hkēt nē.

Pawre kot akupŷm āxiok wŷr mōr ā harēnh

¹⁸ Tā nhŷm Pawre arĭ Korĭt kamā mē hkōt pa nē gaa nē nojarēt nē Jejus kōt htōjē mā amnhī jarē nē mē kām:

—E kot paj ma akupŷm pika pē Sir wŷr mō. Anē.

Hāmri nē mē kēp kato nē ma hwŷr mō. Nē ma amnhī kōt Akirti mē hprō Prisire wa o mō. Mōō nē krĭ pē Sēnkrej wŷr pōj. Nhŷm Pawre amnhī kukamā mēmoj tā tanhmā Tirtŷm mā amnhī jarēnh to nē amnhī jarēnh xā hkōt amnhī krā hkēnh pa. Ijaew kot amnhī nhīpēx xā hkōt ā amnhī nhīpēx anē. Hāmri nē mē pār wŷr agjē nē Sēnkrej rūm kato nē ma Sir wŷr mō.

¹⁹⁻²¹ Mōō nē krĭ pē Epes wŷr pōj. Hāmri nhŷm Pawre mē hkŷwŷjaja pār rūm hapōj nē krĭ hwŷr agjē nē Ijaew nhō Tirtŷm kapēr o mē ahkre xā hā ixkre hwŷr mra nē hwŷr agjē nhŷm Pawre mē kām Tirtŷm kapēr jarēnh o nhŷ. Hāmri nhŷm mē kuma nē kām mar prām nē. Nē kām:

—Kwa anojarēt kēt nē. Kritpēm mē ixkōt ri apa ryre nē Tirtŷm kapēr o mē ijahkre. Mē inhmā ja mar prām.

Anhŷr tā no nhŷm mē kām:

—Nā kot paj ma mō. Nom koja Tirtŷm nhŷrmā akupŷn mē awŷr inhmē pa man akupŷn mē awŷr mō nē axte kapēr o mē ajahkre. Anē.

Hāmri nē ma mō. Ma Epes rūm pār kām mō. Nom nhŷm Akirti mē Prisireja wa Epes kamā arĭk nē hpānhā kamā pa ho pa.

²² Tā nhŷm Pawre krĭ pē Seajere wŷr pōj. Hāmri nē hpānhā kurŷm mā akupŷm Jeru-jarē hwŷr mō. Kot Jejus kōt htōjē pumunh mā ma mē hwŷr mō. Hāmri nē mē hwŷr pōj nē mē omu nē tanhmā mē kām amnhī jarēnh to nē mē kēp kato nē ma akupŷm āxiok wŷr mō.

²³ Hāmri nē hwŷr pōj nē kamā mē hkōt ri pa ryy nē mē kurŷm kato nē hpānhā ma akupŷm pyka pē Prik mē Karatas wa hwŷr mō. Nē kamā mē kot Jejus kōt amnhī xunhwŷr xwŷnhjē jahkre ho pa. Mē kot Jejus kōt amnhī nhīpēx tŷx rāhā ho pa kaxyw mē hkōt mē ahkre mex o ri mē hkōt pa.

Apor kot Epes kām Tirtŷm kapēr jarēnh

Epes 1.1-2; Wam Korĭt 3.6-9

²⁴ Tā nhŷm Epes wŷr Ijaew ō pē Aporja mō nē hwŷr pōj. Krĭ pē Aresān kamā na pre kato. Na pre hte amnhī kaxyw Tirtŷm kōt pix mā hamaxpēr nē kapēr ā kaga htŷm mar tŷx nē. Jakamā mē kām harēnh mex o pa nhŷm mē piitā kām mar prām nē.

²⁵ Nom kormā Jejus jarēnh jatur xā mar kēt jakamā ām mē kām hkrax pix jarēnh o pa. Juāw Paxis kot tanhmā mē ahkre htoja nhŷm mar tŷx nē. Nē tanhmā kot mē hkrā kumrār to ho paja nhŷm māānēn mar tŷx nē. Jakamā na pre hte mē kām ja pix jarēnh o

pa. No Jeŕus k p Tirt m kot m  pahw r m nh sw nh   har nhja nh m korm  mar k t n . T  Epes w r m  n  p j.

²⁶ H mri n  Ijaew nh  Tirt m kap r o m  ahkre x  h  ixkre hw r ax  n  kam  m  k m ujar nh o nh . Amnh  kam  kahak k t n   mnh x ri m  k m ujar nh mex n . H mri nh m Prisire m  Akirti wa kot m  k m ujar nh   kuma n  war xap n m :

–Kwa m n korm  Jeŕus jar nh piit  mar k t. E pu amnh  k t panh rkw  hw r o t  n  pahpr  h  k m har nh jatur x m kum  k  hpr  h  mar pa. An .

H mri n  war amnh  k t kuw y n  hpr  h  k m ujar nh jatur x m kum  nh m hpr  h  har nh piit  mar t x n .

²⁷ T  ra pyka p  Gres w r nojar t n  Jeŕus k t ht j  m  amnh  jar  nh m m  kuma nh m ja m  k m mex n . H mri n  Gres kam  Jeŕus k t m  ht j  m  kag  nh p x. Apor kot m  hw r amnh  k t o m r n  m  k m  r nh m m  kot omunh n  kam  har nh n  ho mex kaxyw m  k m hip x. H mri n  hip x pa n  k m kug  nh m kupy n  m  kur m kato n  ma m  hw r m . H mri n  m  hw r p j. Gres nh  sw nh kw jaja na prem ra Jeŕus k t amnh  xunhw y. Tirt m kot m  kut  nojar t jakam  nh m m  ra hk t amnh  xunhw y. Jakam  nh m Apor m  hw r p j h mri n  m  ihk  h  tanhm  m  ho ajuta hto ho pa.

²⁸ N  xat  Ijaew m  tanhm  Jeŕus jar nh to kam  hiht x o m  hk t pa n  m  k m:

–N  Jeŕusja t m na pre Tirt m m  pakaxyw  m. Tirt m kap r   kag  ht m kam    har nh kot anh r. An .

19

Pawre akup m Epes w r m r   har nh Rukre 3.15-16

¹ T  nh m Apor korm  Kor t k m pa ri nh m Pawre ma akup m Epes w r m . Ma kr hak x k t akup m hw r m . H mri n  hw r p j n  m  kot Jeŕus k t amnh  nh p x o m  pa sw nhj  pumu. Nh m m  korm  Jeŕus jar nh jatur x  mar k t n .

² Jakam  nh m Pawre m  hw r m  n  m  omu n  Tirt m Kar  h  m  hukujja n  m  k m:

–Kwa m  ate Jeŕus k t amnh  xunhw r x  h  ar grota   x  na pre Tirt m Kar  m  akar  m  agj ? An .

H mri nh m m  kuma n  k m:

–N  m  ixte Tirt m Kar  jar nh mar k t. An .

³ H mri nh m m  k m:

–No m moj k t na prem m  akr  kumr ? An .

Nh m m  k m:

–N  Ju w Paxis kot m  hkr  kumr r o paja k t na prem m  ixkr  kumr . An .

⁴ H mri nh m Pawre m  k m:

–N  Ju w Paxis na pre Ijaew m  kap r o: “Kot kaj m  m  ate amnh  tomnuj kaga n  hp nh  t m amnh  nh p x pa h  m  akr  kumr .” Anh r o m  k m kap r o pa. N  m  k m Jeŕus jar nh o: “Koja tokyx m h  ixk t hapu h  m  pahw r kato n  tanhm  amnh  nh p x to ho pa. Ka m  omu n  amnh  kaxyw hk t ajamaxp r n  hk t amnh  xunhw y.” An . T  Jeŕusja na pre   m  k m har nh anh r o pa. An .

⁵ Nh m pre   Pawre m  k m Ju w Paxis m  Jeŕus wa har nh an  n  hp nh  Jeŕus nh  h  m  hkr  kumr .

⁶ H mri n  hp nh  m  h  ihkra jaxw y nh m Tirt m Kar  m  hw r wr y n  m  hkar  m  gj x pa. H mri nh m m    h  ahp nh  axtem m  kap r kw y ho kap r n    h  Tirt m mex o mex   har nh o kuh .

⁷   m  kot amnh  nh p x anh r sw nhjaja k p 12.

⁸ T  nh m Pawre Epes k m Ijaew nh  Tirt m kap r o m  ahkre x  h  ixkre hw r mrar   mytwr y axkrun pxi. Amnh  kam  kahak k t n  hpr  h  Ijaew m  hpr  h  Jeŕus jar  n  m  k m:

–E pa m  am  Jeŕus jar  ka m  inhma. N  Tirt m kot m  pahw r m nh sw nhnta na. N  m  pahte kam  pajamak o papa sw nhnta na. Jakam  kot ka m  amnh  kaxyw hk t ajamaxp r n  hk t amnh  xunhw y nh m Tirt m ja h  m  apumu n  m  ato hkra. An .

H mri nh m m  hkwy jaja kuma n  hk t hamaxp r kur  kumr x.

⁹ Nom nh m m  hkwy jaja kuma n   m kuma n  Jeŕus o kap r punuj n . M  piit  m  noo m  kuh  n  ho kap r punuj t x n . Nh m Pawre tee ri ja m  omu h mri n  m  kur m kato. M  pikupr nh x  h  ixkreta r m kato n  hp nh  nh m m  kot k m “Xir n kot m  ahkre x  h  ixkre” anh r sw nhja w r hp nh  m . N  amnh  k t m  kot Jeŕus kot amnh  xunhw r sw nhj  ho pa n  hp nh  ixkreta kam  m  ahkre ho pa. Apkati m  hw r mra n  m  ahkre.

¹⁰ Jao h  amgr  axkrut. Jakam  nh m pyka p  As kam  m  piit  Pahihti Jeŕus jar nh ma. Ijaew n  Ijaew k t sw nhjaja nh m m  piit  har nh ma.

Wajaga hkwy  jar nh

¹¹ T  nh m Pawre Tirt m nh  h  m  k m aa m  kot m moj pumunh k t kw y ho anh r o ri m  hk t pa.

¹² Jakam  nh m pre htem hw r mra n  k p   hkwy  jam y n  ma m    sw nhj  hw r o mra n  m  h  haxw y nh m m  akup m mex. N  m kar mnuti kot tanhm  m  ho ho pa sw nhj  h  nh m prem m  n n m  h    kw y jaxw y nh m m kar mnutija m  kur m hap j n  ma mrar kur  kumr x nh m m  akup m t m hkr .

¹³⁻¹⁴ Tã nhũm mēō patre maati Sewahtija hkra my kēp 7 nē piitã kēp wajaga. Hāmri nē mē kām Pawre pyrã nē mē nē mēkarōmnuti japōx o pa hprãm nē. Jakamã kormã Jejus kôt amnhĩ xunhwýr kēt tã mē kot ý hã Pawre pyrã nē mēhō nē hkwy janor kaxyw nē kām:

–E Pawre kot Jejus jarēnh o ri pa xwýnhnta nhý hã kot paj amã ixkapēr. Jakamã e kwa tokyx myta rúm akato nē ma tē. Anē.

¹⁵ Hāmri nhũm mēkarōmnutija mē kuma nē ãm mē kuma nē mē kām:

–Tk. Mē apē Jejus mē Pawre wa hkwy hkēt tã mē nē ã mē inhãm akapēr anhýr o apa. Nã Jejus mē hkwy pixjaja na htem Tirtũm nhý hã mē kēp mē ijapōx o pa. Mē apē mē hkwy hkēt kēnã. Nã pa ixkatoore kaxyw ã. Anē.

¹⁶ Hāmri nhũm mēkarōmnuti kot tanhmã ho xwýnhnta mēkarōmnuti nhý hã wajagajē pynē nē mē htak rax o kēp mē è kaxōnh pa nhũm mē tee ri amnhĩ nhĩpēx. Hāmri nē hkēnh nē ōrkwý rúm hapōj nē ma umaj hprōt nē mra.

¹⁷ Hāmri nhũm Epes kamã mē piitã ã kot mē hipēx anhýr ã mē harēnh ma nē tee ri hamaxpēr nē kām ma nē. Ijaew nē Ijaew kēt xwýnhjaja nhũm mē piitã tee ri kām hamaxpēr o pa. Nē Pahihti Jejus mã mex o mex ã harē.

¹⁸ Jakamã nhũm mē kot Jejus kôt amnhĩ xunhwýr nyw xwýnhjaja piitã tanhmã amnhĩ jarēnh to. Nē mē hkwyjaja amnhĩ jarēnh o:

–Nã kormã ixte Jejus kôt amnhĩ xãm kēt ri na pa pre ã amnhĩ tomnuj anhýr o ri ixpa. Tã Jejus kôt amnhĩ xãm hāmri nē axte ã amnhĩ nhĩpēx anhýr kēt nē.

Nhũm mē hkwyjaja kēp wajaga htã mē urãk nē Jejus kôt amnhĩ xunhwý hāmri nē amnhĩ jarēnh o:

–Nã ijaxwýja kormã Jejus kôt amnhĩ xãm kēt ri na pa pre hte nē mē no kupyr nē mē y pix o ri mē hkôt ixpa. Tã Jejus kôt amnhĩ xãm hāmri nē axte ã amnhĩ nhĩpēx anhýr kēt nē. Pãnhã axtem amnhĩ nhĩpēx nyw o amnhĩ nhĩpēx o ri ixpa. Anē.

¹⁹ Hāmri mē ō wajaga xãhpumunh xã hã kagã jamý nē ma o mra nē kaxyw kuto nē kamã rēnh pa nē mē piitã mē noo mã ho xēt pa. Wajaga xãhpumunh xã hã kagãja ã kãxpore xohtó rax kumrēx tã nhũm mē Jejus gryk ã hamý nē o mra nē ho hxēt pa nhũm hapēx.

²⁰ Hāmri nhũm krĩ nhō xwýnhjaja ã mē kot amnhĩ nhĩpēx anhýr ã mē omu nē ohtó rax nē mē urãk nē Jejus kôt amnhĩ xunhwý.

*Pawre kot Rôm wýr hkrã hã harēnh
Rômãn 1.13-15, 15.22-29*

²¹ Tã nhũm Pawre ra akupým Jerujarē hwýr nojarēt nē hamaxpēr o:

–E kot paj ixkato nē hpãnhã ma Masetōn mē Gres wa hkôt ma akupým Jerujarē hwýr mō. Ma mē kot Jejus kôt amnhĩ xunhwýr xwýnhjē pumunh o mē hkôt mō. Hāmri nē Jerujarē hwýr pōj nē kamã tanhmã amnhĩ to hpa hāmri nē hpãnhã ma Rôm wýr mō. Anē.

²² Hāmri nē hkôt ho ajuta ho wa pa xwýnh Ximotre mē Eras wa kãm amnhĩ jarē nē wa kãm:

–E kēr ka wa ma ixkukamã Masetōn wýr wa mō. Kot paj kormã jar As kamã ixpa grire hāmri nē ma war akôt mō pu mē hamũ ma Jerujarē hwýr mō. Anē.

Hāmri nhũm wa kuma nē kato nē ma hkukamã Masetōn wýr mō.

Mē kot sãnti hã Pawre mã àkjēr ã mē harēnh

Sikũn Korõt 1.8-9

²³ Rôm nhũm Epes nhō xwýnhjaja tee ri Pawre kot tanhmã Pahihti Jejus jarēnh to hã kuma nhũm ja mē kēp omnuj nē. Nhũm mē Jejus ã kamã gryk týx nē.

²⁴ Na prem amnhĩ kaxyw Tirtũm kôt hamaxpēr kēt nē. Na prem axtem sãnti ho mē hpãm nē amnhĩ to hwýr pē hã hpijaam nē kãm mex o mex ã harēnh o pa. Mē ō sãntija ni Xiãne na pre. Nhũm mē kãm ixkre nhĩpēx nē kamã hkarō nhĩpēx xãm. Hāmri nē hwýr akuprō nē hã hkĩnh nē hkarō hã hpijaam nē kãm mex o mex ã harē. Nhũm pre hte Temētja Xiãne nhōrkwý karō hkryre hkwy nhĩpēx nē mē kãm ho wēnē ho pa. Prat o hipēx nē ho wēnē ho pa. Jao ra hã mē apēnh xwýnhjē mē nhũm mē kot haprōr xwýnhjē kukwak ri kãxpore jamýnh rũnh o pa.

²⁵ –Jakamã nhũm Pawre mē hwýr mō nē pōj nē mē kãm Mēpahpãm Tirtũm jarēnh o ri mē hkôt pa nhũm Temēt tee ri kuma nhũm ja kēp omnuj nē. Hāmri nhũm hamaxpēr nē mē kot urãk nē Xiãne nhōrkwý karō hkryre nhĩpēx nē ho wēnē ho pa xwýnhjē ho akuprō nē mē kãm:

–E kwa mē inhma. Na pu htem mēpanã Xiãne nhōrkwý karō hkryre pãnhã kãxpore jamýnh rũnh o papa.

²⁶ Tã mãn ka mē ra ham hpōx xwýnh Pawreja pumu nē kapēr ma. Na hte jar mē panhō krĩ kamã nē As piitã hkôt mē kãm mēpanã Xiãne karō nē mē kãm kapēr o pa. Xep mē pahte mē hkarō nhĩpēxja kēp mēpanã kumrēx kēt ã mē kãm harēnh o pa nhũm xep mē ohtó nē kuma nē ra hkôt hamaxpēr.

²⁷ –Kwa ja mex kēt. Kojã mē kapēr ma nē hkôt amnhĩ nhĩpēx hāmri nē axte mē pahte ixkre karō hkryre nhĩpēx xwýnhnta japrōr kēt nē. Hāmri nē mē paxapēnh o kapēr punuj nē. No ãm ja pix omnuj kēt. Kojã mēpanã Xiãne mã amnhĩ jarēnh xã hã ixkreja kaga

hpa. Nê haxwýja karôja kaga. Mê piitã kãm hapê kênã. As kamã nê pyka piitã hkôt mê piitã kãm hapê nê hwýr mra nê amnhî to hwýr o pa. Kêp mêpanã mex kumrêx tâ koja mê Pawre kapêr gryk ã hkaga hpa nê axte kãm hamaxpêr kêt nê. Hâmri pu mê axte mê kukwak ri pakâxpore rax nê papa hkêt nê. Kwa tanhmã kot puj mê amnhî nhîpêx to? Anê.

²⁸ Hâmri nhùm mê tee ri ã kapêr anhýr ã kuma nê Pawre kamã gryk tÿx kumrêx. Nê gryk xàj kàx pêê kapêr nê xatã kapêr tÿx kãm kapêr punuj nê. Nê kapêr o:

—Xiãre na mex kumrêx. Kêp mê pahpê Epes nhô xwýnhjê nã maati na.

Anhýr o kâxpêê kapêr o kuhê.

²⁹ Hâmri nhùm krî nhô xwýnh piitã mê kuma nê mê hwýr hprôt nê haxwýja gryk nê kâxpêê mê hkôt ã harênh anhýr o kuhê. Hâmri nê gryk xàj Pawre hkôt ri wa pa xwýnhja wa unê nê ma mê kot axpên mar xã hã ixkre hwýr wa hkjênh o tê. Masetôn nhô xwýnh wa kêp Gajore mê Aristakja nhùm mê wa unê.

³⁰ Hâmri nhùm Pawre mê kot wa unênh ã mê omu nê tee ri wa hkukamã hamaxpêr nê mê hkôt hprôt nê mê kãm tanhmã kapêr to kaxyw nom nhùm mê kot Jesus kôt amnhî xunhwýr xwýnhja ja nê kãm kapêr kãm hihtÿx nê.

³¹ Hâmri nhùm As kamã mê kot mê ho amnhîptâr xwýnh kwýjaja ã mê kot amnhî nhîpêx anhýr ã mê omu nê Pawre hwýr hpêr mê. Mê kãm hkînh jakamã kot mê hkôt htêm nhùm mê kot hpîr pymaj hwýr hpêr mê nê mê hkôt htêm nê hkurê kamã hihtÿx nê.

³² Rôm nhùm mê piitã mê kot axpên mar xã hã ixkre hwýr pikuprônha pa nê kàx pê kapêr punuj o kuhê. Nom axpên kôt kapêr kêt nê. ãm axpên kwým ri kàx pê tanhmã kapêr punuj to ho. Nhùm mê hkwyjaja hprî hã mê mar kêt tâ amarî amnhî krã hkôt kàx pê kapêr punuj nê.

³³ Nhùm Ijaew kwýjaja tee ri ja hã mê omu nê axpên mã:

—Tk. Kwa okora. Koja mê nã Xiãre hã gryk hãmri nê tanhmã mê pahpê Ijaew to na? Anê.

Hâmri nê hamaxpêr nê mê hwýr amnhîo pê Aresãnja mê nê kãm:

—Kwa ma mê hwýr tê nê mê kãm tanhmã mê pahpã axaprâr to. Pawre kêp mê pahkwý htã tãm na mê kãm mê gryk jaxã. No mê papajaja na pu mê kãm mê gryk jaxãr kêt nê. Anê.

Hâmri nhùm mê kuma nê mê hwýr tê nê xa nê tee ri kot mê ho hpinhkrênh kaxyw kãnhmã mê kãm îhkra pêr kaprÿ.

³⁴ Nhùm mê omu nom hpinhkrênh kêt nê arî kàx pêê kapêr punuj ã 2 or. Nê kàx pê kapêr o:

—Mêpanã Xiãreja mex o mex. Kêp mê pahpê Epes nhô xwýnhjê nã mex na. Anê.

³⁵ Tã nhùm mê ô pahi nhô kôwenatô jatã tanhmã Epes nhô xwýnhjê ho hpinhkrênh to hãmri nê ja nê mê kãm kapêr nê mê kãm:

—Kwa mê anhîkrê. Mê piitã kot Xiãre mex o mex ã omunh kênã. Nê mê pahpê kãm amnhî jarênh xã hã ixkre jamãr xwýnh ã mê kot mê pahpumunh mex. Nê kaxkwa rûm karô kot mê pahwýr têm nhùm mê pahpê hamãr o papa xwýnh ã nhùm mê kot mê pahpumunh mex.

³⁶ Jakamã mêhõ kot kêt we mê pahpê hamãr xwýnh kêt ã mê pajarê? Ra mê piitã mê kot ja hã mê pahpumunh jakamã kwa mê anhîkrê nê ri ã akapêr anhýr kêt nê.

³⁷ No mê ate wa unênh nê amnhî kôt wa ho atêm xwýnhja wa. Wa kot tanhmã mêpanã Xiãre ho kapêr punuj to rÿ kêp ô ixkre kamã ãhkînh kêt tâ ka mê amarî wa unê nê amnê amnhî kôt wa o tê.

³⁸ —Kwa kê Temêt mê hkwyjaja kãm tanhmã wa ho kapêr to hprãm nê ma pahihiti hwýr wa o tê nê kumã mãn tanhmã wa ho kapêr to. Mêmõj tâ axpên mã mê kapêr xã hã arîgrota ãã.

³⁹ Rÿ ka mê amã mêmoj jarênh prãm nê arîgroja ã mãn rî kormã mêmoj jarê.

⁴⁰ No jarãhã mê ate amnhî nhîpêxa te mê ate pahihiti kutã amnhî xunhwýr nê ho akapêr punuj pyrãk. Koja Rôm nhô xwýnhjê nhô pahi mê ajarênh ma hãmri nê mê ate kamã agryk ã amnhî kamnhîx. Hâmri nê mê atã ixkukja pa tanhmã kãm mê ajarênh to? Mêhõ nhÿ hã na ka mê ã apikuprônha nê amnhî nhîpêx anê? Nã amnhî krã hkôt na ka mê akuprô nê ã amnhî nhîpêx anê. Anê.

⁴¹ Hâmri nê mê kãm kapêr pa nê mê hano nhùm mê anhrã nê ma akupým örkwý hwýr hapêx.

20

Pawre ma Masetôn mê Gres wa hwýr môr ã harênh

¹ Hâmri nhùm Pawre ra nojarêt. Jerujarê hwýr môr mã nom kormã pika pê Masetôn kumrêx wÿr môr nê kurûm ma akupým Jerujarê hwýr môr mã. Hâmri nê nojarêt nê mê kot Jesus kôt amnhî xunhwýr xwýnhjê ho akuprô nê mê kãm amnhî jarê nê mê kãm:

—E kot paj ma mô. Nom kêr ka mê arî ixwakre kamã Tirtûm kapêr kôt amnhî nhîpêx mex rãhã ho ri apa nê aa hkaga hkêt nê. Anê.

Hâmri nê mê kãm:

—E mê mãmri ixwa kre kamã axãmnhîx ajamakêtkati nê ri apa. Anê.

Hâmri nê kato nê ma Masetôn wÿr mô.

² Nê hwýr pój nê kamã krî hkwy hkôt mô nê nhÿri mê kot Jesus kôt amnhî xunhwýr xwýnhjê pumu nê Tirtûm kapêr o mê ahkre.

Mē kot hkôt amnhî nhîpêx mex nê kām hprām xā hkôt pix mē amnhî nhîpêx kaxyw mē kām kapêr o ri mē hkôt pa. Hāmri nê kato nê ma mō nê pyka pē Gres wÿr pōj.

³ Nê kamā mē hkôt pa hā mytwrÿ axkrunêpxi hāmri nê akupÿm pyka pē Sir wÿr nojarêr. Nê ma pâr kām hwÿr mōr kaxyw nê amnhî tā Sir kamā Ijaew kwÿ kot tanhmā harênh to hā amnhî jarênh ma. Na prem ra hā axpên mā amÿnê nê axpên mā:

—Ekoja amnê mē pahwÿr mō pu mē nhÿri omu nê hpîr kurê kumrêx. Anê.

Hāmri nhūm Pawre amnhî tā mē kapêr ma nê pâr kaga nê mē hwÿr mōr kêt nê. Hāmri nê awjanā nê Jerujarê hwÿr Masetōn kamā pa.

⁴ Nhūm Jesus kôt htō hkwyjaja ma hkôt mō. Ā mē hixi kot anhÿr.

Perej nhō xwÿnh Sopatōja. Piro hkra na pre.

Nê Tesarōn nhō xwÿnh Aristak mē Sikūn wa.

Nê Tepe nhō xwÿnh Gajoreja.

Nê As nhō xwÿnh Xikitre mē Torow wa.

Nê Ximotreja.

Jajaja na prem ma Pawre hkôt Jerujarê hwÿr mō.

⁵ Nê pa ixpê Rukre ixte mē amā ja jarênh nê hā kagā xwÿnhja na pa axte Pawre hā ajêt nê hkôt mō. Jakamā nhūm jajaja piitā ma wa ixkukamā Tôx wÿr mō nê kamā wa ixkām hamak o pa.

⁶ Tā pa wa ma krî pē Piripos rūm ixkato nê pâr kām ma mē hkôt mō. Arîgro pē Pas jakānh mē ma mē hkôt mō.

Tā wa ixtā arîgro pē 5 nê mē hkôt Tôx wÿr pōj nê kamā mē omu nê mē hkôt ixpa hā ixtā ũ semān.

Pawre kot akupÿm Exik o htîr ā harênh Juāw 5.21; Atre 9.36-43

⁷ Tā nhūm sap nê kamāt pa mē kot Jesus kôt amnhî xunhwÿr xwÿnhjê hkôt akuprō nê axpên kutā apku nhūm Pawre mē kām kapêr. Ra apkati hkôt mē inhnojarêr kaxyw jakamā nhūm mē kām Tîrtūm kapêr jarênh rÿy nê. Ra kôt ā kamāt nhūm arî mē kām harênh o nhÿ.

⁸⁻⁹ Ixkre hprêk axpên nhîpy axkrunêpxi nhîtep xā kamā na pa prem akuprō nê mar o ixkrî. Ixkreja kamā kanê ohtō nê hpōk o harir. Jakamā nhūm Pawre arî mē kām ujarênh o nhÿ nhūm mēhō xaptār nyw Exikja ra ôtxwa htÿx nê mē ixkuri ôr o nhÿ. Janere hā ôr o nhÿ. Tā ra gōr nê janere pē kato nê ahparmā tē nē pykap tēm. Pa mē tee ri omu nê ahparmā hwÿr ixprôt nê wÿr nê omu nhūm htyk mex nê nō. Kÿj rūm ahpar mā htēm rÿy jakamā htyk mex nê nō. Hāmri nhūm hkwyjaja tee ri omu nê hkaprî htÿx nê kumÿ nê mÿr o hkrî.

¹⁰ Hāmri nhūm Pawre mē ixkôt wÿr nê hwÿr tē nê htyk ā omu nê kumÿ nê mē kām:

—E mē amÿr kêt nê. Ra htyk tā koja Tîrtūm akupÿm mē pamā ho htîr.

Anhÿrja kôt nhūm akupÿm htîr.

¹¹⁻¹² Hāmri nhūm mē akupÿm htîr ā omu nê hkînh tÿx kumrêx. Hāmri pa mē akupÿm kÿx pē ixkre hwÿr api nhūm Pawre mē inhmā pāwti hkwy nhîrê nê mē inhmā kugō pa mē Jesus kot mē panê htyk mē ijamaxpêr pē kuku. Hāmri nhūm Pawre axte mē kām kapêr o ŷr rāhā nhūm myt kato pa mē kēp angrā nê ma ixpa.

Pawre Mîrêr wÿr mōr ā harênh

¹³ Hāmri pa mē inhnojarêr nhūm Pawre mē ixte hkôt mē inhmōr xwÿnhjê mā:

—E kêt ka mē ma pâr kām ixkukamā mō. Kot paj ahte ma kÿx pē mē akôt ixpar o Asôt wÿr mō. Hāmri nê hwÿr pōj nê mē anhō pâr mā axā pu mē ma pahpimrāatā ma hamū mō. Anê.

¹⁴ Hāmri pa mē kuma nê ma mō nê mēmo arîgro hā Asôt kamā axpên wÿr pōj. Hāmri nhūm Pawre mē ixkôt pâr wÿr axā pa mē ma krî pē Mîrêr wÿr mō.

¹⁵ Nê hwÿr pōj nê kurūm kormā mō nhūm apkati pa mē gō hipōk pē Kiw jakrenh o mō. Nê hakre nê mō nhūm apkati pa mē gō hipōk pē Sām wÿr pōj nê hā pâr nhō. Hāmri nhūm apkati pa mē axte mō nê Mîrêr wÿr pōj.

¹⁶ Nom nhūm ra Pawre nojarêr nê. Kām tokyx As rūm kator nê Jerujarê hwÿr mōr nê tokyx hpōx prām nê. Kām mē hkînh pē Pêtekos xwÿr ri hwÿr hpōx prām jakamā nojarêr tÿx pa mē Epes wÿr inhmōr kêt nê.

Pawre kot Epes kamā Kris kwÿjê mā amnhî jarênh

¹⁷ Tā pa mē Mîrêr wÿr pōj nhūm Pawre amnhî wÿr Epes wÿr Jesus kwÿ jahkre ho mē pa xwÿnhjê hā karō.

¹⁸ Hāmri nhūm mē man mē ixwÿr mō nhūm Pawre mē omu nê mē kām amnhî jarê nê mē kām:

—Nā ixte mē amā amnhî jarênh kaxyw na pa mē atā karō. Ra mē ate tanhmā ixte amnhî nhîpêx to hā ixpumunh mex. Wam mē awÿr As wÿr ixpōxta ā ka prem aprî hā ixpumunh mex nê.

¹⁹ Na pa pre mē akôt ri mē amā tanhmā amnhî nhîpêx to ho ri ixpa. Te ixpê mē amā ixâpênh xwÿnh pyrāk. Nê Pahihti Jesus mā tanhmā amnhî nhîpêx to ho ri mē akôt ixpa. Nê ixkwÿ Ijaew kwÿ kot Jesus kapêr kaga hā mē omu nê ixkaprî nê inhmÿr o ixpa. Nhūm prem Jesus ā ixtomnuj pa amnhî xā htÿx kamā ijamak o ri mē hkôt ixpa.

²⁰ Nom arî ri Tîrtūm kapêr o mē ajahkre ho ri mē akôt ixpa rāhā nê aa hkaga hkêt nê. Mē anhōrkwÿ kamā nê mē ahkre xā hā ixkre kamā. Mē ate tām amnhî nhîpêx prām xāj pa

pre ä me ajahkre mex anhÿr rähä ho ri me akôt ixpa.

²¹ —Në me ixpë Ijaewjë me me apë Ijaew kët xwÿnhjë me pa pre me ajahkre ho xspën pyräk. Më apiitä me ate amnhÿ tomnuj kaga në hpänhä Tirtüm kôt amnhÿ nhÿpëx kaxyw. Në amnhÿ kaxyw me panhö Pahihti Jejus Kris kôt ajamaxpër kaxyw na pa pre me akôt ri me ajahkre rähä ho ri ixpa.

²² —Tä ra Tirtüm Karö kot akupÿm Jerujarë hwÿr inhmënh jakamä pa kormä hwÿr mö. Kot paj hwÿr pøj nhüm krÿ nhö xwÿnhjaja Jejus ä ixtomnuj në nom tanhmä me kot ixtoja kukamä ixte ixprÿ hä ixähpumunh kët.

²³ Ja pix na ixte omunh. Na pa hte nhÿri pøj nhüm htem Jejus ä ixpynë në me hagjënäh xä kamä ijagjë në tanhmä inhÿpëx to. Tirtüm Karö na pre ra ä me kot inhÿpëx anhÿrja kukamä inhmä me harë. Jakamä ixte amnhÿ kukamä amnhÿ tä ixähpumunh mex. Kot paj xep akupÿm Jerujarë hwÿr pøj nhüm me ixpumu në Jejus ä tanhmä inhÿpëx to.

²⁴ Tä no pa amnhÿ kamä ixkahak kët o inhmä me uma hkët në. Koja me käm ixpÿr präm në mämrÿ ixpÿ. Inhmä ixtyk pyma hkët. Äm mëmoj pixi na inhmä hpräm. Ra Pahihti Jejus kot mëmoj tä inhmä karö xäja na inhmä kormä ixtir ri hatur xäm mënh präm. Tirtüm käm me pajapë hä kot me pahto mex präm xäj me pahwÿr Kra Jejus mënh nhüm me panë tanhmä amnhÿ nhÿpëx to hä harënhja na inhmä me piitä me käm harënh jatur xäm mënh präm.

²⁵ —Tä e ixkrämnhwÿjaja. Na pa pre me akôt me ajahkre rähä ho ri ixpa. Më ate Jejus kôt amnhÿ nhÿpëx mex rähä ho ri apa kaxyw. Tä kot puj pë me axte xspën pumunh kët në.

²⁶⁻²⁷ —Na pa pre ra me amä Tirtüm kapër piitä harënh pa. Më ate mar tÿx në hkôt pix mä amnhÿ nhÿpëx o apa kaxyw. Jakamä koja me anhö krÿ nhö xwÿnhjë hō amnhÿ kaxyw Jejus kôt hamaxpër präm kët në rÿ täm. Kwär mämrÿ kot amnhÿ tomnuj kamä ty në arÿ täm amnhÿ pumu no äm kë amnhÿ tä tanhmä inhmä në hkët në.

²⁸ —E me ate Kris kwÿ jahkre ho apa xwÿnhjaja. Kër ka me amnhÿ pumunh mex o ri apa. Në me kot Jejus kôt amnhÿ xunhwÿr xwÿnhjë jamär mex o ri apa. Ja kaxyw na pre Tirtüm Karö me kaxyw më axunhwÿ. Tirtüm Kra Jejus kot htyk o Tirtüm mä me pahte amnhÿ tomnuj piitä hpänhä amnhÿrer pa jakamä kër ka me käm me omunh mex o ri me hköt apa. Te öwëhti jamär xwÿnh kot öwëhti jamär mex o ri pata pyräk.

²⁹ —Kot paj ma mö nhüm mëmojjaja ixpänhä me awÿr pøj në me ate Jejus kaga hpräm xäj tanhmä me amä hëx to ho ri me akôt pa.

³⁰ Në me akwÿjaja me urä në tanhmä hamaxpër punuj to në me ate Jejus kaga hpräm xäj hëx rom tanhmä me amä kapër to ho ri me akôt pa.

³¹ Jakamä kwa me o kora. Kër ka me axkäm ajamak rom në ri apa. Kë jajaja nhÿrmä ä me amä kapër anë ka me ama në me hkôt ajamaxpër kët në. Më ate me mar në me hkôt ajamaxpër pymaj na pa pre me akôt ri me ajahkre ho ri ixpa hä ixtä amgrä axkrunëpxi. Arÿgro hä në kamät käm me ajahkre rünh o ri ixpa. Në me ate me amä me hëx xwÿnhjë hkôt amnhÿ xunhwÿr pymaj me ajahkre pë te inhmÿr pyräk o ri me akôt ixpa.

³² —E kot paj Tirtüm nhÿhkram me ajagjënäh pa. Koja me atänopxar o ri me akôt pa në me akutä nojarët rähä ho pa. Hämri ka me äm hkôt pix mä amnhÿ nhÿpëx. Jao Jejus kaga hkët në. Hämri nhüm nhÿrmä Tirtüm me pahpë hkrajë piitä tanhmä me pahto mex to.

³³ —Na pa pre me akôt ixpa ry htä no äm aa mëmoj tä me awÿr kët në. Më axë hkwy hä me awÿr rÿ me akäxpore hä me awÿr o ri ixpa hkët në.

³⁴ Na pa pre amnhÿ pa kukwak ri amnhÿm ixujaprör pë ixäpkur o ri me akôt ixpa. Në ixköt me pa xwÿnhjë mä ixujaprör o ri ixpa. Ra me ate ja hä ixpumunh mex.

³⁵ —Tä mëmo kaxyw na pa pre ä me akôt amnhÿ nhÿpëx anhÿr o ri ixpa? Nä me ate ja hä ixpumunh në ixpyrä në ä amnhÿ nhÿpëx anhÿr o ri apa kaxyw. Në ixpyrä në tanhmä me kute xwÿnhjë ho ajuta hto ho ri me apa kaxyw. Na pre Pahihti Jejus ja jarënh o: “Koja mëhö amä mëmoj gö ka amnhÿm apy në akÿnh në. Nom kot kaj kam nhäm mëhö mä mëmoj gö hämri në akÿnh tÿx o ate mëhö mä mëmoj nhörta jakre.” Anë.

³⁶ Na pre ä Pawre me käm ujarënh anhÿr pa hämri pa me ra inhnojarët. Hämri nhüm me piitä hkönkrä ho hkrÿ pa nhüm Pawre me ho Tirtüm wÿ.

³⁷⁻³⁸ Hämri nhüm me piitä käm Pawre hkÿnh tÿx jakamä mÿr rax o kuhë. Tee ri kot axte me kot xspën pumunh kët ä me käm amnhÿ jarënhja ma në hkaprÿ htÿx në. Në hkaprÿ xäj kahti hkôt hamÿ në mur. Hämri në ma Jerujarë hwÿr hkujaëk kaxyw më ixköt pär wÿr hkaprÿ në me ixköt mÿr o mö.

21

Pawre kot Jerujarë hwÿr hpôx ä harënh

¹ Tä pa me gö mÿri Jejus kôt me ixtöjë re në pär krem agjë në axte mö. Ma gö hipök pë Kosti hwÿr ixkatät kôt mö në hä ajët. Hämri nhüm apkati pa me axte hamü mö në hpänhä gö hipök pë Roxti hwÿr mö në hwÿr pøj në hä pär xi. Hämri në hpänhä axte krÿ pë Patar wÿr mö.

² Hāmri nē hwýr pōj nē pàr rŭm ijaipōj nē pàr ò pumu. Nhŭm ra pyka pē Wēnīs wýr nojarēt pa mē hwýr agjē nē ma kamā axte mō.

³ Mōō nē amým amnhī kukamā gō hipōk pē Sipre pumu. Hāmri nē upōk rŭm hakrenh mā mō nē pyka pē Sir wýr mō nē kamā Xir hwýr pōj nē hā pàr nhō. Pàr pām kot krī kamā pàr kukrēx rer kaxyw pa mē kormā hā ajēt nē tokyx axte nhām inhmōr kēt nē.

⁴ Hāmri pa mē kutēp api nē krī kamā mē kot Jejus kōt axpēn to htō nē htōx xwýnhjē hkōt o mō. Hāmri nē nhýri mē omu nē mē hkrī ri ixpa ho ixtā ũ semān. Nhŭm prem Tirtŭm Karō nhý hā Pawre mā kapēr nē kām:

–Kwa Pawre mē inhma. Kot ka Jerujarē hwýr pōj nhŭm xep mē kām akurē xwýnhjaja tanhmā anhīpēx to. Tirtŭm Karō na ā akukamā mē inhmā ajarēnh anē. Jakamā kwa hwýr amōr kēt nē. Na pa mē tee ri akukamā ijamaxpēr. Anē.

⁵ Hāmri nhŭm amnhī tā mē kuma nē ām mē kuma nē Jerujarē wýr hkrā kamā hityx nē. Jakamā nhŭm semān hapēx pa mē axte inhnojarēt. Axte Jerujarē hwýr kormā inhmōr kaxyw inhnojarēt. Nhŭm Jejus kōt mē ixtōjaja mē kot mē ixkujaek kaxyw pitā pàr wýr mē ixkōt mō. Mē hprō nē mē hkrajē mē nhŭm mē pimraātā mē ixkōt mō. Hāmri pa mē pàr wýr pōj nē gō mý ri ixpiitā ixkōnkrā ho ixkrī hpa nē amnhī to Tirtŭm wý.

⁶ Hāmri nē mē kām amnhī jarēnh pa nē mē noo mā pàr krem agjē nē ma axte mō nhŭm mē awjanā nē ma akupým ōrkwý hwýr hapēx. Hāmri pa mē kurŭm kormā ma Jerujarē hwýr mō.

⁷ Mōō nē krī pē Poremax wýr pōj nē hā ajēt. Hāmri nē pàr rŭm ijaipōj nē axte krī kamā Jejus kōt mē ixtō nē mē ixtōxjē japēr o mō nē nhýri mē omu nē mē kuri amnhŭm hikra.

⁸ Tā nhŭm apkati pa mē axte mō. Pānhā ma krī pē Sejarēj wýr mō. Hāmri nē hwýr pōj nē Firipti kuri pōj. Firiptija kormā nyw ri mē kot Jerujarē kamā mē mjēn htyk xwýnhjē mā mē apkur xā nhōr ho pa kaxyw mē ho 7 nē mē unhwýr xwýnhtajē hō na pre. Tā hpānhā kēp Tirtŭm kapēr jarēnh o pa xwýnh.

⁹ Nhŭm hkra nijaja kēp kwat. Piitā mjēn kēt nē hkukrit rāhā pa. Mē kēp Tirtŭm nhý hā kapēr o mē pa xwýnh na pre mē. Jakamā pa mē mē kuri pōj.

¹⁰ Hāmri nē mē hkōt ri ixpa hā ixtā apkati grēre nhŭm Akapō Jutej rŭm man mē ixwýr mōn pōj. Kēp Tirtŭm nhý hā kapēr jarēnh o pa xwýnh na pre.

¹¹ Hāmri nē mē ixwýr pōj nē Pawre pumu nē hkukamā kot tanhmā harēnh to kaxyw hwýr tēn kēp hprexā kapa nē ho amnhī te hpre nē ho amnhī pa hpre nē xa. Hāmri nē

mē inhnoo mā Tirtŭm Karō nhý hā mē kot tanhmā hipēx to hkukamā kām awjarē nē kām:

–E kot kaj Jerujarē hwýr pōj nhŭm Ijaew xāptār tŭmjaja apumu nē ā anhīpēx anē nē apa hpre nē ate hpre hāmri nē Ijaew kēt xwýnhjē nhīhkram ajaxā. Koja mē ā anhīpēx anē. Anē.

¹² Hāmri pa mē tee ri ā ujarēnh anhýrja ma nē Pawre kamā ixkahak týx nē ixkaprī nē inhmýr o ixkrī. Nē xatā kot mē hwýr mōr nē kām ixkapēr kām ixihtýx nē kām:

–Kwa mē ixkapēr ma Pawre. Mē hwýr amōr kēt o mē hwýr amōr kēt. Anē.

¹³ Hāmri nhŭm mē inhmā:

–Tk. Kwa mē amýr kēt nē. Na pa mē apumu nē ixkaprī nē. Nā kot paj ma mē hwýr mō. Kwār mē māmri Pahīhti Jejus ā tanhmā ixto rý hā ixpi. Ixte amnhī kamā ixkahak kēt. Anē.

¹⁴ Hāmri pa mē tee ri mē hwýr mōr nē hkurē kaprý nē kām:

–Tōe. Nā kam nē Tirtŭm kām hprām xā hkōt māmri mē hwýr mō rý mē hwýr amōr kēt nē. Anē.

¹⁵ Tā pa mē ra inhnojarēt nē amnhī to ixpikuprōnh pa nē ma Pawre hkōt Jerujarē hwýr tā ma mō.

¹⁶ Hāmri nhŭm Sejarēj kamā Jejus kōt mē ixtō hkwyjaja ma mē ixkōt mō. Pa mē mōō nē Jerujarē hwýr pōj. Hāmri nhŭm mē ixkōt mē mōr xwýnhjaja mē ixto mō nē Mēnasō nhōrkwy hwýr mē ixto pōj. Mēnasōja Sipre kamā na pre kato. Tā hpānhā Jerujarē hwýr aha nē kamā ri pa ho pa. Na pre ra Jejus kōt amnhī xām ā hā amgrā sohtō nē. Tā pa mē kuri pōj.

Pawre mē Xiakre wa harēnh

Atre 15.3-21; Wam Korit 9.19-22, 10.32-33

¹⁷ Tā pa mē Jerujarē hwýr pōj nhŭm Jejus kōt mē ixtōjaja mē ixpumu nē hkīn nē.

¹⁸ Hāmri nhŭm apkati pa mē ma Pawre hkōt Xiakre hwýr mō. Nhŭm mē kot Tirtŭm kapēr o mē ahkre xwýnh piitā ra kuri akuprō nē mē ixkutēp hkrī.

¹⁹ Jakamā nhŭm Pawre mē hwýr axā nē mē kām tanhmā amnhī nhīpēx to ho pa hā amnhī jarē nē mē kām:

–Pa na ka mē rī akrī. E ot pa axte mē apumunh mā mō. Ixte mē amā amnhī jarēnh ā amnhī jarēnh kaxyw. Nā na pa pre ma Ijaew kēt xwýnhjē hkōt ixpa nē mē kām Jejus kot mē panē tanhmā amnhī nhīpēx to jarēnh o ri mē hkōt ixpa. Nhŭm Tirtŭm inhīkō hā ixkutā nojarēt mex jakamā nhŭm prem inhma nē ohtō rax nē mē pahpyrā nē Jejus kōt amnhī xunhwý. Anē.

²⁰⁻²⁵ Hāmri nhŭm mē Ijaew kēt xwýnh kwýjaja kot Jejus kōt amnhī xunhwýr ā mē

harēnh ma nē mē ŷ hā hkānh nē mē hā Tirtūm mā mex o mex ā harē. Hāmri nē Pawre mā kām:

—Nā na pa prem ra mē harēnh ma. Hāmri nē mē kām kagā nhīpēx nē mēmoj tā mē kām karō nē mē hwūr kumē. Mē kot omunh nē kamā harēnh nē hkōt amnhī nhīpēx o pa kaxyw.

Na pa prem kagāja kamā mē kot sānti nhō hkur nē mē hkurē.

Nē mry kamrō hkur nē mē hkurē.

Nē mēmo mry hpar nē hkamrō runh kēt rāhā hkur nē mē hkurē.

Nē mē kot amnhī prō pix tānopxar kaxyw mē kām hā karō.

Nē mēnījaja kot amnhī mjēn pix tānopxar kaxyw mē kām hā karō.

Nē nhām mē kot axpēn to amnhīkati nē mē hkurē.

Ā na pa prem ja hā kagā nē mē hwūr mēnh anē. Jakamā e mē inhma. Na ra mē pahpē Ijaew kwījaja ohtō rax kumrēx nē mē pahpyrā nē Jejus kōt amnhī xunhwūr. Mān ka pre mē harēnh ma. Na htem Jejus kōt amnhī nhīpēx o pa jao māānēn Tirtūm nhī hā Mojes kapēr kōt amnhī nhīpēx mex o pa. Tā nhīri mē kot tanhmā ato hēx to hā ajarēnh ma. Na ka xep hte Ijaew kēt xwýnhjē nhō krī kamā pōj hāmri nē mē ō krī kamā Ijaew kwījē pumu nē mēmoj nē tanhmā mē kām akapēr to ho ri apa. Nom Ijaew kēt xwýnhjē mā ka xep hte ā mēmoj nē akapēr anhūr kēt nē. Ām Ijaew mā pix mā ka xep hte mē kot finat Mojes kapēr kōt amnhī nhīpēx nē mē hkurē ho ri apa. Nē mē panhīgēt kot amnhī nhīpēx kuhpa hā mē kot mē hkra my kwūrēt kā jakār nē ka xep hte mē hkurē ho ri apa. Nē mē kot mē panhīgēt kōt amnhī nhīpēx nē ka xep hte māānēn mē hkurē ho ri apa. Mē kēp Ijaew tā ka xep pre hte ā mēmoj nē mē hkurē anhūr ho ri apa. Na prem jar ā Ijaewjē mā ato hēx o pa anē nhūm mē kuma nē mē hkōt hamaxpēr kurē kumrēx. Jao ra ate mē pahpē Ijaew kot amnhī nhīpēx kōt amnhī nhīpēx kēt ā akamnhīx.

—Tā ra mē kot apōx ā ajarēnh mar jakamā tanhmā kot kaj we mē kām amnhī tā axāprār to? Nē tanhmā kot kaj we mē noo mā amnhī nhīpēx to kē mē arī mē pahte amnhī nhīpēx kōt ate amnhī nhīpēx o apa hā apumu? E na pa mē ra ijamaxpēr. Kot ka ā amnhī nhīpēx anē. Na ra jar mē pahkwījaja kēp kwat nē Tirtūm mā tanhmā amnhī jarēnh to jatur xām mēnh kaxyw amnhī krā hkēnh mā. Jakamā e kēr ka ma mē hkōt tē nē mē urāk nē amnhī krā hkēnh nē kam nē mē ate amnhī krā kēnhā pānhā amnhīre. Kot kaj ā mē hkōt amnhī nhīpēx anē hāmri nhūm mē pahkwījaja arī mē pahte amnhī nhīpēx o ate amnhī nhīpēx o apa hā apumu nē mē kot ato hēx ā apumunh kurē kumrēx. Nē arī ate

finat Mojes kapēr kōt amnhī nhīpēx o ri apa hā apumu. Anē.

²⁶ Hāmri nhūm Pawre mē kuma nē mē kām:

—Tōe. Nā ām hāmri na ka mē inhmā awjarē. Nā kot paj ā amnhī nhīpēx anē. Anē.

Jakamā nhūm apkati nhūm ma mē kēp 4tajē o mō nē mē mex kaxyw tanhmā amnhī nhīpēx to. Hāmri nē Tirtūm mā amnhī jarēnh xā hā ixkre hwūr mra nē agjē nē mē ō patre mā mē amnhī jarē nē kām:

—E ot pa mē awūr mra. Na pa prem ra mēmoj tā tanhmā Tirtūm mā amnhī jarēnh to. Tā kot paj mē axte ixtā ū semān hāmri nē hatur xām mēnh kaxyw akupyn awūr mra nē amā mēmoj gō ka mē inhmā Tirtūm mā agō nē hkōt kām mē ijarē. Nē pa kot paj mē xpiitā hpānhā amā amnhīre. Anē.

*Mē kot Pawre pynēnh ā mē harēnh
Atre 24.12*

²⁷ Tā nhūm semānja hapēx kaxyw nhūm pika pē As rūm Ijaew kwījaja ma mra nē Tirtūm mā amnhī jarēnh xā hā ixkre hwūr agjē. Hāmri nē kamā Pawre pumu nē kamā gryk tīx nē hwūr hprōt nē unē nē tanhmā hkwyjē mā ho hēx to nē ho kapēr punuj nē. Nē mē kām:

²⁸ —E mē amnē mra nē jahti pumu. Na hte krī piitā hkōt ri mē pahkwījē mā tanhmā ri hēx to ho pa. Tirtūm nhī hā finat Mojes kapēr nhūm mē kām ho kapēr punuj o pa. Nē mē pahte Tirtūm mā amnhī jarēnh xā hā ixkreja nhūm hte māānēn tanhmā mē kām ho kapēr punuj to. Mē pahpyrā nē kēp Ijaew tā mē pahpē hkwy ho kapēr o pa. Tā ra axtem nē amnhī kōt Tirtūm nhō ixkre hwūr Ijaew kēt xwýnh kwījē ho agjē. Mē kot hwūr gjēx kēt kumrēx tā nhūm axtem nē amnhī kōt mē ho agjē. Anē.

²⁹ Na pre krīja kamā Ijaew kēt xwýnh Topīja Pawre hkōt pa nhūm mē omu. Kēp Epes nhō xwýnh nhūm mē kot pry ā Pawre hkōt pa hā omu. Tā hā ahtūm nē Tirtūm mā amnhī jarēnh xā hā ixkre kamā Pawre pumu nē htīx amnhī kōt Topī ho ā rā ā hkamnhīx nē ā mē kām harēnh anē.

³⁰ Hāmri nhūm mē kuma nē Pawre kamā gryk tīx nē. Nē hwūr hprōt nē unē nē ixkre rūm ho kato nē kēp hakwa kre kahē.

³¹⁻³² Hāmri nē ma o tē nē htak rax nē. Ra mē kot htak o hpir mā tā nhūm mēhōja pōristi krāhtūm wūr hprōt nē kām awjarē nē kām:

—Kwa o mūj mē ra kot axpēn nhūmex kaxyw pijapu ho kuhē. Anē.

Hāmri nhūm tee ri kuma nē pōristi hkwyjē mā anē nē mē ma mē hwūr hprōt kurē kumrēx. Nhūm mē arī Pawre htak tā amnhī wūr mē omu nē mē umaj kām ure.

³³ Hāmri nhūm pōristi krāhtūm Pawre hā amýnē nhūm pōristijaja unē nē kax o mē hkaxprexā ho axkrut nē ho hkaxpre pa.

Hāmri nhūm mē hkrāhtūm Pawre hā mē hkukja nē mē kām:

—Kwa mē atō inhmā jahti jarē. Tanhmā na hixi te? Tanhmā na we amnhī tomnuj to hā na ka mē ā hipēx anē? Anē.

³⁴ Hāmri nhūm mē kuma nē piitā anhīpē kàxpē kām tanhmā harēnh to. Nom axpēn kwým tanhmā ri kām harēnh to. Hāmri nhūm tee ri hprī hā kot mē mar kaxyw hāmri nē pōristi mā anē nhūm mē kēp Pawre ho kato nē ma mē āpēnh xā hā ixkre hwýr o tē.

³⁵⁻³⁶ Hāmri nhūm Ijaew kwý ohtō nē pry hā axpēn nhīgānh o hkōt mra. Nē gryk xāj kapēr punuj týx o mē hkōt mō nē kàx pē pōristi mā kapēr nē mē kām:

—Kwa mē apīhti ri. Mexti hā. Mēmo kaxyw na ka mē ri amā hapē ho apahti? Anē.

Jakamā nhūm pōristija tee ri mē kuma hāmri nē mē kot tanhmā ho pymaj kumý nē kýx pē mē kēp kupē nē o mō. Jao ixkreja wýr mē āpir xā hā ho āpir o mō.

³⁷ Nē kot ho ār kaxyw tā nhūm Pawre mē hkrāhtūm mā kām:

—E pa amā mēmojarē ka inhma. Anē.

Mē kapēr o kām kapēr hāmri nhūm amnhī jaēr pē kuma nē kām:

—Kwa xā na ka mē ixpyrā nē Gresjē kapēr o akapēr?

³⁸ Na pa ixtýx apē Ejit nhō xwýnh pē mē hpar o apa xwýnhnta ā akamnhix. Ham na pre mē inhō pahīhti kutā amnhī xām nē kot hkurē kaxār kaxyw mē ho ajuta xwýnhjē ho 4.000 nē mē hkurē nē ma kapōt ā mē o pa. Nom tām na xep Gresjē kapēr o kapēr kēt nē. Anē.

³⁹ Hāmri nhūm Pawre kām:

—Nā ixpē Ejit nhō xwýnhnta kēt. Ixpē Ijaew na pa. Pyka pē Siris kamā krī rax pē Tas kamā na pa pre ixkato. E xā kot paj ixkōt mē mōr xwýnh nēj mā ixkapēr nà? Anē.

⁴⁰ Hāmri nhūm kām:

—Tōe. Kam nē māmri tanhmā mē kām akapēr to. Anē.

Hāmri nhūm mē āpir xāta ā kýx pē mē mýri xa nē kānhmā mē kām ihkra pē nhūm mē omu nē hpinkrēnh pa nhūm mē kām amnhī jarē.

22

Pawre kot kām hkurē xwýnhjē mā amnhī jarēnh

Atre 9.1-19, 26.1-23

¹⁻² Nhūm Pawre amnhī kwý Ijaew kapēr o mē kām kapēr nē mē kām:

—E ixkwýjaja. Pa mē amā amnhī jarē ka mē inhma. Anē.

Hāmri nhūm kot mē kapēr o kapēr ma nē hpinkrēnh pa nē akryk mar o kuhē nhūm mē kām:

³ —Nā ixpē mē anhō na pa. Ijaxwýja ixpē Ijaew. Pyka pē Siris kamā krī pē Tas kamā na pa pre ixkato no ām jar Jerujarē kamā na pa pre ixāptār. Kamariew na pre hte ijahkre ho pa. Finat Mojes kot Tirtūm nhý hā mē panhīgētjē mā kapērja nhūm pre hprī hā ho ijahkre ho pa. Na pa pre mē apyrā nē inhmā Tirtūm kōt amnhī nhīpēx prām nē.

⁴ —Jakamā na pa pre mē pahkwý kot Jejus kōt amnhī xunhwýr xwýnhjē japēr o ipxa nē nhýri mē kām ixkato nē mē unē. Mēmyjē pynē nē mēnijē pynē. Hāmri nē mē kot mē hpar kaxyw mē hagjēnh o ri ipxa.

⁵ Na pa pre ā mē hipēx o ri ipxa anē. Mē panhō patre maati nē mē āptār tūmrejaja ra mē kot ja hā ixpumunh mex. Mē tāmjaja na prem krī pē Tamas kām mē pahkwýjē kaxyw kagā nhīpēx nē inhmā kugō pa kupy nē ma mē hwýr o mō. Ixte mē ō krī kamā Jejus kwýjē pynēnh par nē man akupýn Jerujarē hwýr mē ho inhmōr nhūm mē kot tanhmā mē ho kaxyw.

⁶ —Tā ra myt aha pa mē hwýr ixāhtēp o mō. Puh nhūm kaxkwa rūm hirā rax kumrēxja ixwýr wry nē ixtā ajēt pa hipōk ri xa.

⁷ Hāmri nē umaj pykap tēm nhūm mēhō kapēr nē inhmā: “Pa Sawti? Hēxta waa nē. Kwa mon ka hte axtem nē ixtomnuj týx o ri apa?” Anē.

⁸ Hāmri pa kām: “Kwa mē atō na ka ri ā inhmā akapēr anē pahīhti?” Anē nhūm inhmā: “Ixpē Najare nhō xwýnh Jejus. Pa na ka hte ixpē ixkōt mē kot amnhī xunhwýr xwýnhjē homnuj týx o ri apa. Jao te pa ixtomnuj pyrāk.”

⁹ —Anhýr o inhmā kapēr nhūm ixkōt mē pa xwýnhjaja kuma no ām hprī hā mar mex kēt nē. Ām hirā raxta pix pumu.

¹⁰ Tā pa kām: “No tanhmā kot pa we amnhī to Pahīhti?” Anē nhūm inhmā: “E kānhmā xa nē māmri mā Tamas wýr mō. Kot kaj hwýr pōj nhūm mēhō awýr tē nē mēmoj tā amā karō ka ama nē hkōt amnhī nhīpēx.” Anē.

¹¹ —Nhūm pre ā inhmā kapēr anē. Hāmri pa hirā rax pumunh o ixām kurē ra inhno hkre nē ixrit kēt nhūm ixkōt mē pa xwýnhjaja ipxa hā ixpy nē ma Tamas wýr ixto mō nē ixto pōj.

¹² —Tā nhūm Tamas nhō xwýnh pē ānānīsti ixwýr tē. Na pre hte Tirtūm kapēr ā kagā htūm kōt amnhī nhīpēx mex nhūm Tamas kamā Ijaew piitā kām hkīnh nē axpēn mā mex ā harē.

¹³ Jakamā nhūm ixwýr tē nē inhmā: “Pa Jejus kōt ixtō Sawti? E akupým rīt.” Anhýrja kōt pa akupým ixrit mex kurē kumrēx nē omu.

¹⁴ Hāmri nhūm inhmā: “Nā mē panhīgētjē nhō Tirtūm na amnhī kaxyw ata. Ate kapēr mar nē hkōt tanhmā amnhī nhīpēx to ho

apa kaxyw. Nē ate kaxkwa kamā Kra mex pumunh nē kapēr mar kaxyw. Tā ka xep ham hirā rax kamā omu nē kapēr ma.

¹⁵ Jakamā kēr ka ma mē piitā mē kām ate omunh xwýnhja jarēnh o ari mē hkôt apa. Nē mē kām kapēr jarēnh o mē ahkre ho ri apa.

¹⁶ E tokyx kånhmā xa nē Jejus mā amnhī jarē nē hkôt amnhī xām ké anē ate amnhī tomnuj rēnh pa. Hāmri pa apē hkwȳ hā akrā kumrā ka ma mē kām kapēr jarēnh o ri apa.” Anē.

—Nhūm pre ā ānānīsti inh mā kapēr anē.

¹⁷ —Tā pa man akupyn jar Jerujarē hwýr mē awýr mō. Hāmri nē jar Tirtūm mā amnhī jarēnh xā hā ixkre kamā kām amnhī jarēnh o ixām rōm axte mēmoj pumu.

¹⁸ Nhūm Jejus axte ixwýr kato nē xa nē inh mā kapēr nē inh mā: “E inh ma. Jerujarē nhō xwýnhja kām ixkapēr mar prām kēt jakamā kot kaj mē kām ixkapēr jarē nhūm mē amar kēt nē. Jakamā kwa tokyx akato nē hpānhā ma nhýhým mō.” Anē.

—Hāmri pa tee ri ā kapēr anhýrja ā kuma nē kām:

¹⁹ “Kwa na koja mē inh ma Pahiht. Ra mē kot ixte amnhī nhīpēx ā xpumunh mex. Ixte amnhī nhīpēx tūmta kōt mē kot ix-pumunh mex. Na pa pre hte krī piitā hkôt mra nē Tirtūm kapēr o mē ahkre xā hā ixkre kamā mē kot akōt amnhī kaxyw hamaxpēr xwýnhjē pynē nē mē htak nē mē hagjēnh xā kamā mē hagjē nhūm mē kot ja hā ix-pumunh mex.

²⁰ Nhūm mē kot akapēr jarēnh o pa xwýnh Estewāw pirta pa pre hā mē omu nhūm ja inh mā mex pa mē kām mē hinōka jamýnh o hā mē omunh o xa. Na pa pre ā amnhī nhīpēx anhýr o ri ixpa. Tā hpānhā akōt amnhī xām hāmri nē akōt amnhī nhīpēx o ri ixpa. Jakamā koja mē ixte amnhī nhīpēx nyw ā ijarēnh ma nē kām ixkapēr mar prām nē.” Anē.

²¹ —Pa pre ā Jejus mā amnhī jarēnh anē nhūm inh mā: “Nā. Kēr ka māmri krīja rūm akato nē ma nhýhým mō. Kot paj hpānhā ma Ijaew kēt xwýnhjē hwýr amē ka hpānhā ma mē hwýr mō nē mē hkôt mē kām ixkapēr jarēnh o ri apa.” Anē.

²² Nhūm pre Pawre ā amnhī hkwȳjē mā amnhī jarēnh anē nhūm mē arī mar o kuhē rāhā Ijaew kēt xwýnhjē jarēnh ma nē kamā gryk týx nē. Ijaew kēt xwýnhja kot mē urāk nē Tirtūm kapēr marja nhūm mē kām hprām kēt jakamā nhūm Pawre ā mē harēnh anē nhūm mē kuma nē kamā gryk týx kumrēx. Nē gryk xāj kapēr punuj nē kapēr o:

—Kwa mē māmri apīhti ri. Ām hpír mā htāmti kēnā. Anē.

²³ Hāmri nē gryk xāj amnhī nhīnōka hk-wrȳ nē ho apē nē pyka jamý nē kånhmā ri ho ahkapē.

Pawre kot pôristi krāhtūm mā amnhī jarēnh

Atre 16.35-39

²⁴ Hāmri nhūm pôristi krāhtūmja tee ri ā mē kot amnhī nhīpēx anhýr ā mē omu nē mē kapēr ma nē pôristijē mā kapēr nē mē kām:

—Kwa tanhmā na we jahti amnhī tomnuj to nhūm mē ā kamā gryk týx anē? E mē tokyx ixkre hwýr ho axā nē mē htak xā ho htak kē mē pamā tanhmā amnhī jarēnh to. Anē.

²⁵ Hāmri nhūm mē kuma nē ho axā nē htak kaxyw kormā hpre ho xa. Hāmri nhūm pôristi krāhtūm nhō kōwenatōja mē hkôt axā nē hā mē omunh o xa nhūm Pawre omu nē amnhī tā kām kapēr nē kām:

—Kwa kormā ixte tanhmā mē amā amnhī jarēnh to hkēt tā ka mē ixtak kaxyw. Ixpē Ijaew tā māānēn ixpē Rōm nhō xwýnh kēnā. Xā na htem ā Rōm nhō xwýnhjē nhīpēx anē? Anē.

²⁶ Hāmri nhūm tee ri ā amnhī jarēnh anhýrja ā kuma nē pôristi krāhtūmja wýr hprōt nē kām:

—Kwa taxy pu mē tanhmā ho hkēt nē. Xep kēp Rōm nhō xwýnh kēnā. Anē.

²⁷ Hāmri nhūm tee ri kuma nē Pawre hwýr axā nē kām:

—Kwa xā ām hāmri na ka amnhī jarē? Xā apē Rōm nhō xwýnh na ka? Anē.

Hāmri nhūm kām:

—Tý. Ām hāmri ixte mē amā amnhī jarēnh kēnā. Ixpē Rōm nhō xwýnh na pa. Anē.

²⁸ Hāmri nhūm kām:

—Kwa pa na pa pre amnhī to Rōm nhō xwýnh prām xāj amnhī pānhā mē kām amnhīrer rax nē. Anē.

Nhūm Pawre kām:

—Tý nom pa na pa pre amnhī pānhā mē kām amnhīrer kēt nē. Inhīpēxā hkôt ixpē Rōm nhō xwýnh na pa. Anē.

²⁹ Hāmri nhūm mē kuma nē tee ri hamaxpēr o kām ma nē. Nē kām ma ho hkaga kurē kumrēx. Nhūm mē hkrāhtūm nhō pahija māānēn kām ma nē. Kēp Rōm nhō xwýnh tā nhūm mē axtem nē kot unēnh nē kax o hkaxpreja mā hamaxpēr nē kām ma nē. Na htem ā Rōm nhō xwýnhjē nhīpēx anhýr kēt nē. Na htem tanhmā mē hkukjēr to nē hprī hā mē kuma nē rī kormā tanhmā mē hipēx to.

Pawre kot Ijaew xāptār tūmrejē mā amnhī jarēnh

Matēwre 23.27-28

³⁰ Tā nhūm apkati nhūm pôristi krāhtūmja Ijaew kwý ho akuprō. Mēō patre maati nē patre krāhtūmja nē mē āptār tūmrejaja nhūm kot mē kām tanhmā Pawre jarēnh to kaxyw mē ho hpikuprōnh pa. Hāmri nē Pawre pē hkaxpre xā rē nē ma mē hwýr o tē nē mē kutā ýr.

23

¹ Hämri nhüm mē omu nē mē kām amnhī jarē nē mē kām:

—E ixkwýjaja. Pa mē amā amnhī jarē ka mē inhma. Na pa hte Tirtüm nom tām amnhī nhîpêx o ixa nē mē pahpê Ijaew mē pahte amnhī nhîpêx kwým ri tanhmā amnhī nhîpêx to hkêt nē. Anê.

² Hämri nhüm mē ò patre maati ânānīsti kuma nē kamā gryk nē. Axtem ânānīsti hō na pre. Hämri nē ā Pawre kot amnhī jarēnh anhýrja ā kuma nē kamā gryk nē. Hämri nē mē kot mar o kuhê xwýnhjê mē kām:

—Kwa mē atō hakwap hkurahti ri. Tām kot amnhī nhîpêxti hā. Na ām mē pamā amnhī to hêx o xa. Anê.

³ Hämri nhüm Pawre kuma nē hwýr rīt nē omu nē kām:

—Nā ka koja Tirtüm akura kām ga. Te ate finat Mojes kot ý hā kapêr kôt amnhī nhîpêx pyrāk tā ri axtem nē ri mē kot ijakwap ixkuranh kaxyw ri mē kām ixtā amýnê. Anê.

⁴ Hämri nhüm kuri mē kuhê xwýnhja tee ri ā kām kapêr anhýrja ā kuma nē kām:

—Kwa kêp patre maati kēnā kot ka kêt ri ā kām akapêr anê. Anê.

⁵ Hämri nhüm amnhī jaêr pē ja hā kuma nē kām:

—Kwa ixte ja hā omunh kêt jakamā na pa ā ixtýx kām ixkapêr anê. Ixte kêp patre maati hā omunh ronhýx pa ā kām ixkapêr anhýr kêt nē. Tirtüm kapêr ā kagā htüm kot ja nē mē pamā kapêr kēnā. Mē pahte tanhmā mē panhō pahī ho pakapêr punuj to nē mē pamā kapêr. Tā pa ām ixtýx ā kām ixkapêr anê. Anê.

⁶⁻⁸ Hämri nē hprī hā mē kot mar o hkrī xwýnhjê pumu. Nhüm mē kamā Satusew nhō xwýnh kwý nē Parijew nhō xwýnh kwý. Satusew mē Parijew nhō xwýnhjaja na htem axpên kwým ri tanhmā mē htykjê jarēnh to. Satusew nhō xwýnhjaja na htem mē htyk nē mē hkarō mē ro hā mē hapêx o mē hapêx ā mē hkamnhīx. Nē Tirtüm kapêr o mē wrýk xwýnh kêt ā mē harēnh o pa. No Parijewjaja na hte mē kurom mē htyk nē akupým mē htír ā mē hkamnhīx nē Tirtüm kapêr o mē wrýk xwýnh ā mē hkamnhīx. Nhüm Pawre kot ja hā mē omunh jakamā tanhmā hamaxpêr to hāmri nē mē kām kapêr. Na pre Parijew nhō xwýnhjê pyrā nē mē htyk nē akupým mē htír kôt hamaxpêr nē Tirtüm kapêr o mē wrýk xwýnh kôt hamaxpêr. Jakamā mē omu nē kax pē mē kām kapêr nē mē kām:

—Nā ijaxwýja ixpê Parijew nhō xwýnh. Nhüm inhîpêxā haxwýja kêp Parijew nhō xwýnh. Jakamā na pa hte mē apê Parijew nhō xwýnhjê pyrā nē mē htyk nē akupým mē htír kôt ijamaxpêr. Tā ām ja pax mýrapē na ka mē ixpynē nē ā inhîpêx anê. Anê.

Hämri nhüm Parijew mē Satusew nhō xwýnhjaja kuma nē ja hā axpên kām gryk nē. Nē hā axpên mā akir.

⁹ Hämri nē ra axpên mā ākjêr rax nē. Hämri nhüm Parijew kwý pē Mojes kapêr o mē ahkre ho mē pa xwýnhjaja kånhmā kuhê nē mē kām Pawre hā aprār kām hihtýx nē mē kām:

—Kwa pêr tanhmā kot amnhī tomnuj tore hā. Mān ām hpimtir kām na pre ā ri kaxkwa kamā mēmoj mar anê. Rý apu Tirtüm kapêr o wrýk xwýnh kām tanhmā kapêr to nhüm pre Tamas wýr pry kamā mar o xa rý ko. Anê.

¹⁰ Hämri nhüm Satusew nhō xwýnhjaja tee ri Tirtüm kapêr o mē wrýk xwýnh kot kām kapêr ā harēnhja ma nē hā axpên mā ākjêr rax nē. Hämri nhüm pôristi krāhtümja tee ri mē kot axpên mā ākjêr ā mē omu hāmri nē pôristi mā kām:

—Kwa mē Pawre hwýr tē nē mē kêp utā nē ma akupým o tē nē haxā. Kot ka mē ho anhýr kêt nhüm mē tanhmā hamaxpêr to nē gryk xāj axpên nhîhkra kamā hkaxōnh pa. Anê.

Hämri nhüm mē kuma nē hwýr tē nē mē kêp utā nē akupým o tē nē ixkre hwýr ho axā.

Jejus kot Pawre jamaxpêr o hihtýx ā harēnh

Atre 18.9-10

¹¹ Tā nhüm kamāt nhüm Jejus tām Pawre hwýr kato nē kām:

—Pa Pawre? Kwa tee ri amnhī kukamā ajamaxpêr o amnhī kamā akahak kêt nē. Kot kaj te ra ate Jar Jerujarē kamā mē kām ijarēnhja pyrā nē ma krī pē Rôm wýr mō nē krī nhō xwýnhjê mā ijarē. Anê.

*Mē kot Pawre hā āmnēnh ā mē harēnh
Sikün Ximotre 4.18*

¹²⁻¹³ Tā nhüm apkati nhüm Ijaew kwýjaja axpên wýr akuprō. Mēmyjaja kêp 40 nē axte hkôt mē hkwyjaja axpên wýr akuprō. Mē kot Pawre pír kaxyw hā axpên mar kaxyw hā akuprō nē hā axpên mā amýnê nē axpên mā:

—Tôe. Nā kot puj mē hpír kaxyw amnhī jagri htýx o paxāpkur kêt rāhā kupī nē rí kormā apku nē ixkō. Nā kot puj mē ho anê. Ra Tirtüm noo mā mē pahte ja hā amnhī jarēnh kēnā. Anê.

¹⁴ Hämri nē mē ma mē ò patre krāhtümjê mē mē aptār tūmrejê hwýr mra nē mē kām hā amnhī jarē nē mē kām:

—Ot pa mē amā amnhī jarēnh mā mra. Nā kot paj mē tā Pawre pī. Kot paj mē kormā hpír kêt ri ixāpkur kêt rāhā kupī. Ra mē ixte Tirtüm noo mā ja hā amnhī jarēnh xā hkôt.

¹⁵ Jakamā e mē inhma. Kêr ka mē axêx rom pôristi krāhtüm mā anê kē apkati kē man mē awýr Pawre ho tē. Te mē ate aprī hā hkukjêr kaxyw pyrāk o kām axêx. Koja mē kormā mē awýr ho hpōx kêt ri pa mē unên kupī. Anê.

¹⁶ Hämri nhüm Pawre tàmnhwý mè kot ä hä amnhî jarênh anhyrja ma hämri në ma pôristi xapênh xä hä ixkrej wýr Pawre hwýr hprôt në kãm më harê.

¹⁷ Hämri nhüm kuma në amnhî wýr pôristi krähtüm nhý hä më hamär xwýnh ä karô në kãm:

—Kwa ma më akrähtüm wýr ixtàmnhwýtä o të kê kãm mëmoj jarê nä? Anê.

¹⁸ Hämri nhüm kuma në ma hwýr o të në kãm:

—E Pawre na inhmä anê pa awýr htàmnhwý ho të. Kot tanhmä amä ujarênh to kaxyw. Anê.

¹⁹ Hämri nhüm omu në hpa hä kupy në o të në ahte më hkàx ä o xa në kãm:

—E mämri inhmä mëmoj jarê pa ama. Mëmo na ka te inhmä harênh kaxyw? Anê.

²⁰⁻²¹ Hämri nhüm kãm:

—Nä Ijaew xäptär tümrejaja na më kot inhîgét Pawre pír kaxyw hä amnhî jarê pa amä harênh o të. Koja xep më hä awý. Xep apkati nhüm ate ma më hwýr më hkukjêr xä hä ixkre hwýr ho amôr nhüm më kot hpir hä kot amnhî nhîpêx ä hkukjêr kaxyw. Nom koja më äm amä amnhî to hêx. Koja xep më kêp 40 në pry kamä kutêp amüxu në kuhê. Na më ra hä axpên mar pa në axpên mä: “Kot puj më paxäpkur kêt rähä Pawre pí në rî kormä apku në ixkô.” Anhyr o amnhî jarê pa më kuma. Jakamä na më kormä ate më hwýr mënh kaxyw akãm ama. Kwa më hwýr ho amôr kêt në. Anê.

²² Hämri nhüm kuma në kãm:

—Tôe. Nä na pa ra ama. Mämri ma akupým të. Nom kêr ka inhmär kumrêx. Kêr ka nhâm mëhõ mä ja jarênh kêt kumrêx. Äm kwarî ho kwarî. Anê.

Hämri nhüm kuma në kato në ma akupým të.

Më kot Ijaew pymaj nhýhým Pawre mënh ä më harênh

²³⁻²⁴ Tä nhüm pôristi krähtümja amnhî wýr ý hä pôristi jamär o më pa xwýnh wa ho hamêxkrut në wa hä karô në wa kãm:

—E wa inhma. Koja kôt ä kamät ka wa ma krîpê Sejarej wýr Pawre ho mõ kê hkä hkînh pê pahihti Peris wýr pøj.

Në amnhî kôt pôristi ho 200 në o mõ.

Në kê më kêp 70 në kawar ä hkrî në më akôt mõ.

Në kê më kêp 200 në wapo jamý në më akôt o mõ.

Kê më ä ohtõ rax anê.

Në Pawre kot kawar ä ýr në mõr kaxyw ka më kãm hõ ho mõ.

E kêr ka më ä axohtõ në hkôt amôr anê kê hkä hkînh pê pahihti Peris wýr pøj. Anê.

²⁵ Hämri në pahihti Peris mã kagä nhîpêx në kamä kãm Pawre jarê në kãm:

²⁶ Pa pahihti Peris? Xä amex? Ixpê Kraw Risas na pa awýr kagä më.

²⁷ E ot pa awýr Ijaew pê Pawre më. Na pre hkwýja kot hpir kaxyw unênh tä pa mãänên kêp Röm nhõ xwýnh ä harênh ma hämri në hwýr inhõ pôristi rê nhüm më hwýr hprôt në më kêp utä.

²⁸ Hämri në Ijaew xäptär tümrejê hwýr o të. Më kot inhmä tanhmä kot amnhî tomnuj to hä harênh kaxyw.

²⁹ Tanhmä kot amnhî tomnuj to nhüm më kot haxär rý hpir ronhýx ja mex në. No xep äm kot më higêjtê kot amnhî nhîpêx kôt amnhî nhîpêx kêt pix mýrapê na më kamä gryk.

³⁰ Tä pa më kot hpir kaxyw hä më harênh ma në më umaj awýr kumê. Hämri në kamä më gryk xwýnhjê mã ajarê. Jakamä koja më mëmo arîgro hä awýr pøj në tanhmä kot amnhî nhîpêx to hä amä harê ka kam ja hä më ama në tanhmä ho.

Tä äm ja pix na pa amä harê. Ixpê Kraw Risas na pa awýr kagäja më. Tä mãn ka arî ixte amä harênhja ma. Anê.

³¹ Tä nhüm kamät nhüm më hkrähtüm kot më kãm karô xä hkôt nhüm pôristijaja ma Pawre o mõ. Hämri në krî pê äxipat wýr pøj në kamä amnhüm hikra.

³² Nhüm apkati nhüm më kot më hkôt pykap mõr xwýnhjaja më õ pahi kot më kãm hä karô xä hkôt awjanä në ma akupým mõ nhüm kawar ä më mõr xwýnh pixjaja ma Pawre ho mõ.

³³ Hämri në mõ në Sejarej wýr pøj në pahihti Peris nhîhkram Pawre jaxä në kãm kagäja gõ në awjanä në ma akupým hapêx.

³⁴ Hämri nhüm Perisa kagäja py në omu. Nê omunh pa në Pawre mã kãm:

—E inhmä amnhî jarê. Tanhmä na anho pyka hixi te? Anê.

Nhüm kãm:

—Kêp Siris. Anê.

³⁵ Nhüm kãm:

—Tôe. Kê më kot ato kapêr xwýnhjaja pøj pa kormä ixprî hä më kot tanhmä ajarênh to ma mãn. Anê.

Hämri në õ pôristi mã anê nhüm më ma Pawre o të. Ma pahi Eroxo htyk xwýnh nhõrkwý hwýr o të në kamä haxä nhüm hkrî ho hkrî.

24

Ijaew kot tanhmä Pawre ho kapêr punuj to hä më harênh

Rukre 21.12-13; Atre 25.7

¹ Tä nhüm arîgro kêp 5 në hapêx nhüm Ijaew kwýjaja Sejarej wýr pøj. Më õ patre maati änanîsti në Tetur në kaxyw më äptär tümrejaja nhüm më ma hwýr mõ në pøj. Tetur kêp axiwókät ä më yr pê kapêr xwýnh jakamä nhüm më kot tanhmä Pawre o kapêr

punuj to kaxyw pahi Peris wÿr amnhî kôt o mō.

² Hāmri nhūm mē amnhî wÿr Pawre hā karō nhūm pōristi haprō nē mē hwÿr o tēn ho axā. Hāmri nhūm Teturja pahihiti Peris mā Pawre kot tanhmā amnhî tomnuj to hā harē nē kām:

—E pahihiti inhma. Nā na ka hte tām mē inhîpêx nē mē ixto mex o apa. Jakamā nhūm hte nhām pika hkwȳ nhō xwÿnhjaja mē ixkurē kaxār kaxyw mē ixwÿr hprōt kêt nē. Pa htem ixpiitā akukwak ri ijamakêtkati nē ixāmhîx inhme nē ixpa.

³ Nē mē ixkīnh rāhā ho ixpa. Hēxta waa nē. Mē ixpiitā inhmā akīnh.

⁴ E kot paj amā awjarē ka inhma. Kot paj ixujarēnh o hakotre ka inhma nē tokyx ma akupÿm tē.

⁵ Nā Pawre na hte amnhî tomnuj pix o pa. Kêp Jejus pē Najare nhō xwÿnhita kôt amnhî nhîpêx o mē pa xwÿnhjê nhō pahi na. Jakamā na hte pyka piitā hkôt mē ixpē Ijaew tanhmā axpēn kaxyw mē ixkryx to ho pa.

⁶ Jāā na pre Tirtūm mā amnhî jarēnh xā hā ixkre hwÿr amnhî kôt mē kêp Ijaew kêt xwÿnh kwÿjê ho agjē nē mē ixpē ixkreja omnu kaxyw mā tā pa mē omu nē unē.

⁷ Tā nhūm pōristi krāhtūm Risasja mē ixpē utā

⁸ nē awÿr mē ixte tanhmā amā harēnh to xwÿnhjê rē. Tā ot pa mē ixkrī. Nē ota Pawre nhÿ. Kam kot amnhî nhîpêx ā hkukja kē tanhmā amā amnhî jarēnh to ka ama nē ixte amā harēnh xā hkôt tanhmā mar to. Anē.

⁹ Hāmri nhūm Ijaew hkwȳ haxwÿja kām:
—Nā ām hāmri na ā amā harēnh anē pahihiti. Anē.

*Pawre kot pahihiti mā amnhî jarēnh
Rukre 21.14-19*

¹⁰ Hāmri nhūm pahihiti Peris Pawre mā anē nhūm kot kām amnhî tā āprār kaxyw kānhmā xā nē kām:

—Nā na ka ra inhō pyka kamā mē ixto amnhîptār mex o atā amgrā xohtō nē pahihiti. Jakamā na pa pre ate ixkapēr mar kaxyw ā ajarēnh ma nē ixkīnh nē.

¹¹ —E kot paj amā amnhî jarē ka inhma. Ham na pa pre Jerujarē hwÿr mō nē pōj. Na pa hwÿr ixpōx ā ixtā arigro pē 12 pix. Kam nē ixtā ixkwÿjê kukja nē mē ama. Ixte Tirtūm mā amnhî jarēnh xā hā ixkre kamā Tirtūm mā mex o mex ā harēnh kaxyw na pa pre hwÿr mō.

¹² Nō na pa pre nhÿri axpēn kaxyw tanhmā ri mē hkryx to hkêt nē. Nē mē ixte Tirtūm mā amnhî jarēnh xā hā ixkre kamā rÿ kapēr o mē ahkre xā hā ixkre kamā rÿ nhÿri pry kamā tanhmā axpēn kaxyw ri mē hkryx to hkêt nē. Ām amrakati ho amrakati.

¹³ Mē kot ā ri ijarēnh anhÿrja amrakati kumrēx. Mēhō kot ā ixte amnhî nhîpêx

anhÿr ā ixpumunh kêt tā na htem amnhî krā hkôt amā ijarēnh o hēx.

¹⁴ Na htem mē ixte Jejus kôt amnhî nhîpêx xwÿnhjaja mē ixte amnhî nhîpêx mex kêt ā mē ijarē nom kot anhÿr kêt. Ām mē inhîgétjê nhō Tirtūm kapēr nywja kôt na pa hte amnhî nhîpêx mex o ri ixpa rāhā nē. Nhūm ixkwÿjaja htÿx axtem kapēr o hkôt ixte amnhî nhîpêx o ixpa hā ixkamnhix no ām kapēr o hkêt. Ijaxwÿja na pa hte mē urāk nē finat Mojes kapēr ā kagā mar o ixpa. Nē Tirtūm nhÿ hā mē kapēr o mē pa xwÿnh kot kapēr ā kagāja pa hte mē urāk nē hkôt amnhî nhîpêx mex o ri ixpa.

¹⁵ Nē mē urāk nē Tirtūm kot nhÿrmā akupÿm mē ho htÿr kôt pa hte ijaxwÿja ijamaxpēr tÿx nē. Mē htyk xwÿnh piitā. Mē kot amnhî to mex xwÿnhjê mē mē kot amnhî tomnuj xwÿnhjê mē mē ho hpim-rāatā akupÿm mē ho htÿrja kôt pa hte mē urāk nē ijamaxpēr tÿx o ri ixpa.

¹⁶ Jakamā na pa hte tām amnhî nhîpêx rāhā nē. Tirtūm noo mā nē mē piitā mē noo mā tām ri amnhî nhîpêx mex rāhā nē.

¹⁷ —Tā na pa pre pyka hkwȳ hkôt ri ixpa hā ixtā amgrā xohtō nē. Hāmri nē ma akupÿm Jerujarē hwÿr ixkwÿjê hwÿr mō. Amarÿ ixte mē kām kaxpore hkwȳ nhōr kaxyw pa akupÿm mē hwÿr mō. Nē māānēn Tirtūm mā mēmoj nhōr kaxyw.

¹⁸ Hāmri nē mē ixte amnhî nhîpêx xā hkôt pa mē amnhî to mex pa nē ma tēn Tirtūm mā amnhî jarēnh xā hā ixkre hwÿr axā nhūm mē kamā ixpumu. Nom na pa pre ri ixkreja kamā tanhmā amnhî tomnuj to hkêt nē. Rÿ tanhmā ixkapēr punuj to hkêt nē. Na pa prem ām inhgrēre nē akryk ixkuhē nhūm mē ixpumu.

¹⁹ Pika pē As rūm Ijaew kwÿjaja na prem ixkre kamā ixpumu. Nar mē tāmjaja mān awÿr mra nē tanhmā amā ijarēnh to.

²⁰ —Nē jar mē kot ixto kapēr xwÿnhjaja. Na pa pre mē āptār tūmrejē mā amnhî jarēnh pa nhūm mē inhma nē tanhmā inhmā nē hkêt nē. Kam nē ja hā mē hkukja nē mē ama.

²¹ Rÿ ko. Kojā apu mē amā ām ja pix ā ijarēnh japēr. Na pa pre mē kām ixkapēr nē mē kām: “Na pa hte mē htyk nē akupÿm mē htÿr kôt ijamaxpēr tÿx nē. Tā ja pix mÿrapē na ka prem ixpynē nē ā inhîpêx anē.” Anhÿr o mē kām ixujarēnh jakamā nhūm apu mē hkwȳjaja kēp ja omnuj nē. Jakamā kojā apu mē amā ja hā ijarēnh japēr. Nom ja pix jarē. Anē.

Ā na pre Pawreja pahi Peris mā amnhî jarēnh anē.

*Peris mē hprō wa kot Pawre mar ā wa
harēnh*

²² Tā nhūm pahihiti Peris kot mē kot Jejus kôt amnhî xunhwÿr xwÿnhjê kot amnhî

nhîpêx â mê omunh mex jakamâ hāmri Pawre mar pa nê ho kapêr xwýnhjê mã kām:

—Nâ hāmri. Na pa ra mê ama. E mê mamrî ma mra. Kê pôristi krâhtûm Risasja mô nê pøj pa wa ixprî hâ mê ate tanhmâ harênh toja ma nê rî kormâ tanhmâ Pawre jarênh to. Anê.

²³ Hāmri nê hpânhâ pôristi pytâr xwýnh mã Pawre jarê nê kām:

—E mê ma akupým ixkre hwýr o tê nê kamâ hamâr o apa. No âm kwâr māmri âmnhîx ri ixkre kamâ tanhmâ amnhî to ho ri pa. Nê kê hkrâmnhwýjaja māmri hwýr mêmoj to mra kê kuku. Anê.

Hāmri nhûm mê kuma nê ma o tê nê akupým ixkre hwýr ho axâ nhûm kamâ pa ho pa.

²⁴ Tâ ra hâ apkati grêre nhûm Peris mê hprô wa ma Pawre hwýr tê. Prô haxwýja kêp Ijaew. Hixi pê na pre Turujire. Jakamâ nhûm wa ma Pawre nhôrkwý hwýr wa tê. Nhûm Peris Pawre hâ karô nhûm kato nê wa hwýr tê nê wa kām awjarê. Tanhmâ wa kot amnhî to nê amnhî kaxyw Jejus Kris kôt hamaxpêr nê hkôt amnhî xâm prâm xâj hprî hâ wa kām harê.

²⁵ Nê wa kām:

—Nâ na htem Jejus Kris kôt amnhî nhîpêx nê tām ri amnhî nhîpêx o pa. Kām tanhmâ amnhî tomnuj to hprâm tâ ho anhýr kêt nê. Nê arî Jejus kot amnhî nhîpêx kôt amnhî nhîpêx o pa. Kojâ Tirtûm nhýrmâ mê pah-piitâ mê pahte tanhmâ amnhî nhîpêx to ho papa hâ mê pahpumunh xâ hkôt tanhmâ mê pajarênh to. Mê pahte tām amnhî nhîpêx xwýnh â mê pajarê rý mê pahte amnhî tomnuj xwýnh â mê pajarê. Anê.

Nhûm pre â Pawre Peris mê Turujire wa kām kapêr anê. Hāmri nhûm Peris tee ri ujarênhja ma nê kām ma nê. Kot amnhî tomnuj o pa xwýnh â amnhî pumu nê â kām kapêr anhýrja mar pyma nê. Hāmri nê Pawre mã kām:

—E hāmri. Nâ na pa wa ra ama. Mamrî ma akupým tén axâ. Kot paj mêmomo arîgro hâ mêmoj to anhýr kêt nê axte amnhî wýr atâ karô ka axte tanhmâ wa inhmâ axujarênh to. Anê.

²⁶ Nê htýx hamaxpêr o:

—Nâ kot paj mêmomo arîgro hâ axte amnhî wýr hâ karô kê ixwýr tê nê ixte kator prâm xâj inhmâ amnhîrer japêr. Anê.

Hāmri nê xatâ amnhî wýr hâ karô htâ no nhûm aa kot kator kaxyw tanhmâ kām nê hkêt nê.

²⁷ Tâ nhûm amgrâ axkrut nê hapêx nhûm Pos Pesti pahi Peristi hpânhâ kêp mê ô pahi nê mê ho amnhîptâ. Jakamâ nhûm Peris akupým ô krî hwýr nojarênt nê Pawre mã îhkra karo hkêt rāhā ma mô. Na pre hamaxpêr o:

—Nâ kot paj Pawre kator nhûm Ijaew ja hâ ijarênh ma nê ixkamâ gryk nê. Nâ kwâr mê hagjênh xâ hâ ixkre kamâ hkrî ho hkrî. Kot paj kator kêt nê. Anê.

Hāmri nê kām îhkra karo hkêt rāhā ma akupým ô krî hwýr mô. Jakamâ nhûm Pawre arî ixkre kamâ kêp prês nê hkrî ho hkrî.

25

Pawre Rôm wýr hkrâ â harênh

¹ Tâ nhûm pahi nyw Pos Pesti krî pê Se-jarej wýr mōn pøj. Hāmri nê kamâ ri pa hâ apkati axkrunêpxi pix nê ma Jerujarê hwýr mô.

² Hāmri nê hwýr pøj nhûm Ijaew kwýjaja omu nê hwýr mra nê kām Pawre ho kapêr nê hâ hwýr kurê kumrêx. Mêo patre krâhtûmjê mê Ijaew xâptâr tûmrejaja nhûm mê hwýr mra nê kām:

³ —Pa pahihti? E ot pa mê awýr mra. Kwa xâ kot ka Pawre hâ karô kê man awýr mô ka jar kot tanhmâ amnhî tomnuj to hâ hkukja nê ama? Anê.

No âm hêx rom â hâ kām kapêr anê. Kot hâ karô nhûm mê kot pry hâ hpîr kaxyw nhûm mê hêx rom â kām kapêr anê.

⁴ Hāmri nhûm mê kuma nê mê kām:

—Tk. Kwa ra Sejarej kamâ kêp prês nê hkrî kênâ kot pa kêt amnhî wýr hâ karô. Kot pa tokyx ma akupým hwýr mô.

⁵ Jakamâ kêr ka mê axâptâr tûmjaja ma ixkôt mra. Hāmri nê Sejarej kamâ inhmâ tanhmâ kot amnhî tomnuj to hâ harênh to pa mê ama nê rî kormâ tanhmâ harênh to. Anê.

⁶ Hāmri nê mê kamâ pa hâ apkati grêre nê ma akupým Sejarej wýr mô. Hāmri nê hwýr pøj nhûm apkati nhûm mê hkukjêr xâ hâ ixkre hwýr tê nê mê kot mê mar xâ hâ mê hkrî xâ kamâ nhý nê amnhî wýr Pawre hâ karô.

⁷ Nhûm mê hwýr o tê nê ýr nhûm hkwyk kot Jerujarê rûm mê môr xwýnhjaja kām hipôk nê pahi Pos Pesti mã tanhmâ ho kapêr to nê ho kapêr punuj týx nê. Kot tanhmâ amnhî tomnuj to ho pa hâ ho kapêr o kuhê. Nom mê kot â kot amnhî nhîpêx anhýr â omunh kêt tâ âm amnhî hkrâ hkôt ri tanhmâ ho hêx to.

⁸ Jakamâ nhûm Pawre tee ri amnhî tâ mê kot ho hêxja ma nê kânhmâ xa nê Pos Pesti mã amnhî tâ aprâ nê mê kām:

—Nâ aa ixte â amnhî nhîpêx anhýr kêt. Na pa finat Mojes kot Tirtûm nhý hâ kapêr nhîrôp ixâm nê hkwym ri tanhmâ amnhî nhîpêx to hkêt nê. Nê mê ixte Tirtûm mã amnhî jarênh xâ hâ ixkre kamâ ri tanhmâ ixtýx ri amnhî nhîpêx to hkêt. Nê pahihti Sesti kapêrja pa pre hirôp ixâm nê tanhmâ amnhî tomnuj to hkêt nê. Aa ixte â amnhî nhîpêx anhýr kêt kumrêx. Anê.

⁹ Hāmri nhūm Pos Pesti kuma nē tanhmā hkukamā hamaxpēr to nē hamaxpēr o:

—Kwa nh̄y krī kamā kot pa we Pawre kot inhmā tanhmā amnhī jarēnh toja ma nhūm Ijaew ja hā kām ixkīnh japēr? Nā mēō krī pē Jerujarē hw̄yr kot paj akup̄ym mē hw̄yr o mō nē kamā mān hkukja nē kuma. Nā ja na mex. Nā kot paj anē. Anē.

Hāmri nē Pawre mā kām:

—E xā kot puj ma akup̄ym Jerujarē hw̄yr mō pa kamā axte mē kot ajarēnh ma nē tanhmā ajarēnh to nā? Anē.

¹⁰ Hāmri nhūm kām:

—Nā jar ixte pahiht Sesti nh̄y hā mē kot mē hkukjēr xā hā ixkre kamā inh̄yr nē amnhī jarēnh kēnā. Jar na htem mē hkukja nē tanhmā ri mē mar to. Na pa pre tanhmā ixkwj̄jē ho hkēt nē. Mēmo kaxyw kot pa akup̄ym mē hw̄yr mō nē axte mē kām amnhī jarē?

¹¹ Kop apu pa tanhmā ixte amnhī tomnuj to ronh̄yx mē māmrī ja hā ixpī pa mē kēp tanhmā ri amnhī to hkēt nē. Nom mē kot ixto hēx pix o ā ijarēnh anh̄yr kēnā. Jakamā mēmo m̄yrapē kot kaj mē ih̄kram ijaxā? E Rōm kām pahi maati Sesti hw̄yr mān inhmē pa kumā mān amnhī jarē. Anē.

Pahi Sesti kēp pyka piitā hkōt mē ho amnhīptār xw̄ynh maati jakamā nhūm Pawre kot mar kaxyw hw̄yr hkrā.

¹² Hāmri nhūm Pos Pesti kuma nē ma tē nē hā ō kōwenatōjē ma. Hāmri nē hā axpēn mar pa nē akup̄ym hw̄yr tē nē kām:

—Tōe. Nā kot paj pahi maati Sesti w̄yr amē. Ra hw̄yr akrā kēnā. Anē.

Pos Pesti kot Akrip mā Pawre jarēnh

¹³ Tā nhūm apkati grēre nē hapēx nhūm pahi hō pē Akripja ma Pos Pesti hw̄yr mō. Tōx Perēnis mē wa mō.

¹⁴ Hāmri nē wa hw̄yr pōj nē kuri wa pa hā apkati grēre nhūm Pos Pesti wa kām Pawre jarē nē wa kām:

—E pa war amā mēhō jarē. Na pre pahi Perisja mē hagiēnh xā kamā mēhō jaxā nē kormā kator kēt ri nhūm mē āpēnh nē kator pa hpānhā āpēnh o amnhīptā.

¹⁵ Tā ra ma Jerujarē hw̄yr mō nhūm Ijaew nhō patre krāhtūmjē mē mē āptār tūmrejaja inhmā ho kapēr punuj rax nē. Nē ixte mē kām hp̄ir kaxyw inhmā hā āmnēnh kām hiht̄yx nē.

¹⁶ Nom pa mē kēp ja kaga nē mē kām: “Nā mē ixpē Rōm nhō xw̄ynh̄jaja na pa htem ā mē hipēx anh̄yr kēt nē. Na pa htem mē kot ho kapēr xw̄ynh̄ noo mā tanhmā hkukjēr to nhūm tanhmā amnhī tā āprār to pa htem kuma nē rī kormā tanhmā mē ho. No na pa htem kormā mē kot tanhmā amnhī jarēnh to hkēt ri tanhmā mē ho hkēt nē.” Anē.

¹⁷ —Jakamā nhūm prem kaxyw Sejarēj w̄yr pōj nhūm apkati pa hā mē hkukjēr kurē

kumrēx. Nē mē kot mē hkukjēr xā hā mē hkrī xā kamā nh̄y nē ixte hkukjēr kaxyw amnhī w̄yr Pawre hā karō.

¹⁸ Na pa pre ijamaxpēr o: “Mān pre tanhmā amnhī tomnuj t̄yx to hā na mē inhmā harēnh kaxyw.”

¹⁹ Anh̄yr ā hkamnh̄ix tā te kot amnhī to mex xw̄ynh̄ pyrāk. Ām kot mē hkōt amnhī nh̄ipēx kēt pix ā nhūm mē inhmā harē. Nē kaxyw mēhō htyk xw̄ynh̄ jarē. Mē kot kām “Jejus” anh̄yr xw̄ynh̄ja na xep hte mē kām akup̄ym ht̄ir ā harēnh o pa. Ām ja pix na prem inhmā harē.

²⁰ Pa tee ri ixte nh̄yri ixprī hā tanhmā mē kot harēnh to hā mē mar kaxyw hkukamā ijamaxpēr. Hāmri nē hā Pawre kukja nē kām: “Xā kot puj ma akup̄ym Jerujarē hw̄yr mō pa axte akw̄y kot tanhmā ajarēnh to ma nē rī kormā tanhmā ajarēnh to nā?”

²¹ Anh̄yr tā no nhūm akup̄ym Jerujarē hw̄yr mōr kaga kumrēx nē amnhūm Rōm kām pahi maati Sesti jarē. Ixte ma hw̄yr mēnh̄ nhūm kot kām amnhī jarēnh nhūm kot mar nē tām tanhmā harēnh to kaxyw. Jakamā pa kormā ixte hw̄yr mēnh̄ kaxyw amnhī xa hā akup̄ym mē hagiēnh xā kamā haxā nhūm arī hkrī ho hkrī. Anē.

²² Hāmri nhūm Akrip kuma nē kām:

—Xōwehe? Kwa na pa inhmā tanhmā kapēr to mar prām nē. Anē.

Hāmri nhūm kām:

—Tōe. Nā kē apkati pa hā karō ka tanhmā kapēr mar to. Anē.

²³ Jakamā nhūm apkati nhūm Akrip mē htōx Perēnis wa pahi hā mē ē mex jagjē nē ma mē hkukjēr xā hā ixkre hw̄yr wa tē. Pōristi krāhtūm kwj̄jē mē Sejarē kamā mē kot amnhī to rūnh̄ xw̄ynh̄ kwj̄jē mē nhūm mē hw̄yr akuprō. Nhūm mē piitā Akrip mē htōx wa kēp pahi hā wa ē mex ā wa omu nē wa kamā no pyma nē. Hāmri nhūm Pos Pesti Pawre hā karō nhūm mē haprō nē ma mē hw̄yr o tē.

²⁴ Hāmri nhūm Pos Pesti omu nē Akrip mē htōx mē mē kot mar o hkrī xw̄ynh̄jē mā kām:

—E pahiht Akrip mē mē apikuprōnh̄ xw̄ynh̄jaja. Ota Pawre xa. Jerujarē kamā nē jar Sejarē kamā na pre hkwȳjaja inhmā ho kapēr rax nē. Hāmri nē ixte hp̄ir kaxyw inhmā hā āmnēnh̄ kām hiht̄yx nē.

²⁵ Nom mēmoj m̄yrapē kot pa kēt kupī? Tā nhūm amnhūm pahi maati Sesti jarē pa ma hw̄yr mēnh̄ kaxyw.

²⁶⁻²⁷ Nom na htem amarī pahi maati Sesti hw̄yr mē rēnh̄ kēt nē. Na htem kām mē kot tanhmā amnhī tomnuj to hā kagā nē hw̄yr kagā mē ro hā mē kurē. No jahti kot tanhmā amnhī tomnuj toja na ixte omunh̄ kēt. Te inhmā tanhmā kot amnhī tomnuj to hkēt pyrāk. Jakamā na pa mē aw̄yr o tē. Mē ate kapēr mar nē kot tanhmā amnhī tomnuj to

hã inhmã harênh nhùm ixte hã kagã nê pahî Sesti hwÿr mênh kaxyw. Jakamã e mē kam nē hkukja nē ama nē tanhmã mar to. Anē.

26

Pawre kot pahîhti Akrip mã amnhî jarênh

Atre 8.3, 9.1-19, 22.1-21

¹ Hãmri nhùm Akrip Pos Pesti kot tanhmã Pawre jarênh toja ma nē Pawre mã kãm:

—E mãmri mē inhmã amnhî jarē pa mē ama. Anē.

Hãmri nhùm kuma nē kãm amnhî jarênh kaxyw kãnhmã kãm ìhkra pē nē kãm:

²⁻³ —Hêxta waa nē. Nã na pa amã amnhî jarênh kaxyw nē ixkînh nē pahî Akrip. Ra ate mē ixpē Ijaew kot amnhî nhîpêx ã mē xpumunh mex. Nē mē ixte tanhmã amnhî nhîpêx to hã mē ixte xapên kukjêrta ate hã mē xpumunh mex. Jakamã na pa amã amnhî jarênh kaxyw nē ixkînh nē. E tokyx anojarét kêt nē inhma. Pa amã ixujarênh jatür xãm kumē ka aprî hã inhma.

⁴ Nã ixkwÿjaja ra mē kot ixte amnhî nhîpêx ã xpumunh mex. Ixpriê rùm ixpapxã kamã nē mãânê Jerujarē kamã ixte tanhmã amnhî nhîpêx to ho ixpaja mē kot hã xpumunh mex.

⁵ Ixpē mē hkwyê pē Parijew nhõ xwÿnh kwÿjê hã mē kot xpumunh. Kojã mē apu ja hã amã ijarênh japêr rÿ ko. Mē ixpē Parijew nhõ xwÿnhjaja na pa htem amnepê m finat Mojes kot Tirtüm nhÿ hã mē inhîgêjtê mã mēmoj tã karõ xã hkôt amnhî nhîpêx mex o ixkwÿjê jakre.

⁶ —Amnepê m na pre Tirtüm mē inhîgêjtê mã tanhmã amnhî jarênh to. Kot nhÿrmã mē piitã akupÿm mē ho htîr ã amnhî jarē. Tã ixte ja kôt ijamaxpêr pix mÿrapê na prem kot hã amã ixto kapêr kaxyw awÿr ixto mō.

⁷ Mē ixpê Ijaew nhîgêjtê piitã na prem Tirtüm kapêr kôt hamaxpêr o ri pa. Kot nhÿrmã akupÿm mē ho htîr ã amnhî jarênh kôt hamaxpêr tÿx o pa. Amnepê m finat Jako mē hkra pē 12jaja na prem hkôt hamaxpêr. Nē ixpê mē hkanrêhã mē htãmnhwÿ na pa hte ijaxwÿja ja kôt ijamaxpêr tÿx rãhã ho ri ixpa. Tã ãm mēmoj pixi mÿrapê na ixkwÿjaja ã amã ixto kapêr punj anē.

⁸ Mē kot ixpyrã nē ja kôt hamaxpêr ã amnhî jarênh tã nhùm pre Tirtüm akupÿm htîr kot ijamaxpêr kêt nē. Nē ixtÿx ijamaxpêr o: “Kot paj Jejus pē Najare nhõ xwÿnh kôt mē kot amnhî xunhwÿr xwÿnhjê nhîpêx kati ho ixpa nhùm Tirtüm ja hã xpumu nhùm ja kãm mex nē.”

⁹ —Amnepê m kormã Jejus kôt ijamaxpêr kêt ri na pa pre ijaxwÿja mē urãk nē akupÿm htîr kot ijamaxpêr kêt nē. Nē ixtÿx ijamaxpêr o: “Kot paj Jejus pē Najare nhõ xwÿnh kôt mē kot amnhî xunhwÿr xwÿnhjê nhîpêx kati ho ixpa nhùm Tirtüm ja hã xpumu nhùm ja kãm mex nē.”

¹⁰ —Anhÿr jakamã pa pre hte tanhmã mē homnuj tÿx to ho ri ixpa. Jao Jerujarē kamã mē inhõ patre krãhtümjê nhÿ hã mē unē nē mē hagjênh xã kamã mē hagjênh o ixpa nhùm mē kot mē himex kaxyw mē hã inhmã amnhî jarē nhùm ja inhmã mex nē. Pa mē harênh ma nē ixkînh nē.

¹¹ Pa pre hte xatã tanhmã mē hipêx to nē mē kot Jejus kaga hprãm xaj mē hipêx kati rûnh nē. Tirtüm kapêr o mē ahkre xã hã ixkre piitã kamã pa pre hte ã mē hipêx anē. Nē mē kamã inhgryk tÿx jakamã ma krî hkwyê hkôt mē hapêr o ri ixpa. ã na pa pre mē hipêx anhÿr o ri ixpa.

¹² —Tã axte ixte mē hkwyêjê pÿnênh nē mē hagjênh kaxyw ma Tamas wÿr mō. Mē inhõ patre krãhtümjê nhÿ hã ma mē hwÿr mō.

¹³ Hãmri nhùm ra kaxkwa nhîpók ri myt nhÿ pa kormã pry hã inhmõr ri kaxkwa rùm mēmo nhîrãja pumu. Nhùm hirã htÿx o myt jakre nē ixtã ajê pa ixkôt ri mē pa xwÿnhjê mē hipók ri ixkuhê.

¹⁴ Hãmri nē mē inhmã ma xaj pykap ixrôrók pa nhùm kaxkwa rùm mēhõj inhmã kapêr. Mē ixpê Ijaew kapêr o kapêr nē inhmã: “Pa Sawti? Hêxta waa nē. Kwa mon ka hte axtem nē ixtomnuj tÿx o ri apa? Nom na ka tee ri ã amnhî nhîpêx anhÿr kaprÿ.” Anē.

¹⁵ Hãmri pa tee ri kuma nē kãm: “Kwa mē atõ na ka ã inhmã akapêr anē?” Anē.

—Hãmri nhùm inhmã: “Ixpê Jejus na pa amã ixkapêr. Pa na ka hte ixpê ixkôt mē kot amnhî xunhwÿr xwÿnhjê homnuj tÿx o apa ho te pa ixtomnuj tÿx pyrãk.

¹⁶ E kãnhmã xa. Ate inhmã tanhmã amnhî nhîpêx to ho apa kaxyw na pa amã amnhî to amnhîrît. Jarãhã ate xpumunh xã hkôt ate mē kãm ma ijarênh nē mē kãm ixkapêr jarênh o mē ahkre ho ri mē hkôt apa kaxyw na pa amnhî kaxyw ata. Kot paj nhÿrmã axte awÿr ixkato nē tanhmã amã ixkapêr to ka inhma nē ma mē kãm ixkapêr jarênh o ri mē hkôt apa. Ja kaxyw na pa amnhîm ata.” Anhÿr o inhmã kapêr.

¹⁷ Hãmri nē inhmã: “E kot paj Ijaew mē Ijaew kêt xwÿnhjê hwÿr amē nē anē mē omunh mex nē nhùm mēhõ apîr kêt nē.

¹⁸ Kêr ka ma mē hkôt mē kãm ixkapêr jarênh o ri apa kê mēhprî hã kuma. Mē kot amnhî tomnuj kaga nē amnhî kaxyw ixkôt hamaxpêr nē ixkôt amnhî xunhwÿr kaxyw. Hãmri nhùm Tirtüm ja hã mē omu nē ixkukwak ri amnhî katut kôt mē kot amnhî tomnuj piitã rênh pa nē axte kãm hamaxpêr kêt nē. Hãmri nē mē ho hkra. Kojã mē ã amnhî nhîpêx anē hãmri nē axte Satanasti nhÿ hã tanhmã amnhî nhîpêx to hkêt nē. Pãnhã Tirtüm kôt pix mã amnhî nhîpêx o pa.” Anē.

¹⁹ —Ā na pre Pahihti Jejus inhmā kapēr anē. Tā kot kaxkwa rūm inhmā ixāpēnh jarēnh ā karōja pa pre mar t̄yx nē hkôt amnhī nh̄ipēx rāhā ho ri ixpa pahi Akrip.

²⁰ Jakamā na pa pre ma mē hkôt mē kām kapēr jarēnh o ri ixpa. Tamas kumrēx hw̄yr nē hpānhā Jerujarē hw̄yr nē hpānhā pika pē Jutej piitā hkôt Ijaew mā kapēr jarēnh o ri ixpa. Tā hpānhā Ijaew kēt xw̄ynh̄jē mā harē. Na pa hte mē kām ixkapēr o: “Kwa mē ate amnhī tomnuj kaga nē hpānhā Tirtūm kōt amnhī xunhw̄yr. Hāmri nē hkôt pix mā amnhī nh̄ipēx o ri apa. Mē piitā mē kot apē hkwȳ hā mē apumunh kaxyw.” Anē.

²¹ —Ām ja pix m̄yrapē na pre ixkw̄yjaja ixpynē. Tirtūm mā amnhī jarēnh xā hā ixkre kamā ixpynē nē ra mē kot ixp̄ir kaxyw.

²²⁻²³ Nom na hte Tirtūm ixtānopxa nē ixto ixih̄t̄yx mex rāhā ho pa pa arī mē kām harēnh o ri ixpa. Mē kot amnhī to rūnh xw̄ynh̄jē mā nē mē kēp amrakati xw̄ynh̄jē mā nē mē piitā mē kām harēnh o ri ixpa. Finat Mojes mē Tirtūm nh̄y hā kapēr jarēnh o mē pa xw̄ynh̄jaja kot ra hkukamā tanhmā harēnh to xā hkōt pa hte mē kām harēnh o ri ixpa. Nē mē kām: “Tirtūm kot mē pakaxyw ām xw̄ynhta na pre amnhī xā ht̄yx kamā hamak kām ty. Tā nh̄um Tirtūm akup̄ym ho ht̄ir. Kumrēx na pre akup̄ym ho ht̄ir jakamā kumrēx na pre tanhmā mē kām kapēr to ho ri mē hkōt pa. Mē kot amnhī kaxyw hkōt hamaxpēr nē hkōt amnhī xunhw̄yr xw̄ynh̄ piitā urāk nē nh̄yrmā Tirtūm mē wa ō krī kamā ht̄ir tūm nē pa ho pa hprām xāj mē harēnh o pa. Mē ixpē Ijaew nē māānēn mē apē Ijaew kēt xw̄ynh̄jaja nh̄um pre ā mē pajarēnh anē.” Anh̄yr o pa hte mē kām harēnh o ri mē hkōt ixpa pahi Akrip. Anē.

²⁴ Nh̄um Pawre kormā kot mē kām amnhī jarēnh par kēt ri nh̄um Pos Pesti tee ri tanhmā Jejus jarēnh to hā kuma nē kax pē kām kapēr nē kām:

—Kwa na ka akrā axpā nà? Pēr ate kaga pumunh t̄yx kurē akrā pipānh pyrāk o ri at̄yx ā ri mē inhmā axujarēnh anē. Anē.

²⁵ Hāmri nh̄um kām:

—Nā ixkrā pipānh kēt. Ām hāmri na pa mē amā awjarē.

²⁶ Jerujarē kamā na prem Jejus pī nh̄um mē piitā omu. Tā nh̄um akup̄ym ht̄ir hāmri nē hpimxur pē ri pa hkēt nē. Na pre mē ohtō nē akup̄ym ht̄ir kām omu. Pahi Akrip ra kot ja mar mex jakamā na pa ixāmnh̄ix ā mē amā harēnh anē.

²⁷ Anh̄yr o kām kapēr hāmri nē pahi Akrip w̄yr rīt nē kām:

—Kwa pahi Akrip. Xā Tirtūm nh̄y hā kapēr jarēnh o mē pa xw̄ynh̄jaja kot Jejus kukamā tanhmā harēnh toja kōt na ka hte ajamaxpēr? Nā ra hkōt ajamaxpēr kēnā. Ra ixte ajamaxpēr kōt apumunh mex. Anē.

²⁸ Hāmri nh̄um tee ri kuma nē kām:

—Tk. Kwa xā kot kaj ā inhmā akapēr anē pa ama nē apyrā nē amnhī kaxyw Jejus kōt ijamaxpēr? Nā na ka ixte ā ate Jejus jarēnh anh̄yrja kōt ijamaxpēr ā ixkamnh̄ix kapr̄y. Anē.

²⁹ Hāmri nh̄um Pawre kām:

—Ko. Kot kaj ixpyrā nē amnhī kaxyw hkōt ajamaxpēr pa ixk̄nh̄ nē. Nom kaxipix kēt. Mē apiitā mē ate inhmar o akrī xw̄ynh̄jaja māānēn. Mē ate mē ixpyrā nē Jejus kōt amnhī xunhw̄yr na inhmā hprām. Ām ixpyrā nē mē apē prēs pix na inhmā hprām kēt. Anē.

³⁰ Hāmri nh̄um pahi Akrip nē htōx Perēnīs nē pahi Pox Pesti nē mē hkōt mē mōr xw̄ynh̄jaja kānhmā kuhē nē ma mrar kaxyw.

³¹ Nē nojarēt nē Pawre hā axpēn mā:

—Kwa tanhmā kot amnhī tomnuj to hkēt kēnā kot kēt mē haxā r̄y kup̄i. Anē.

³² Hāmri nh̄um Akripja Pos Pesti mā kām:

—Kwa kop apu kot amnhī kaxyw pahi maati Sesti hw̄yr hkrā hkēt ronh̄yx pu mē ra kator. Anē.

27

*Mē kot Rōm w̄yr Pawre mēnh ā mē harēnh
Atre 23.11, 25.12*

¹ Tā nh̄um mē pyka pē Itar w̄yr pahi maati Sesti hw̄yr Pawre mēnh kaxyw. Itar kamā mē ō krī maati na pre kēp Rōm. Jakamā nh̄um Pawre mē mē kot mē hagjēnh xā kamā mē hkrī xw̄ynh̄ mē ho hpimrāātā ma mē o mra nē pōristi krāhtūm Jurti nh̄ihkram mē haxār pa. Kot ma Rōm w̄yr mē o mōr kaxyw. Jurtija kēp Itar kamā mē ō pahi maati hā pōristi krāhtūm nh̄um prem ma mē kām mē o mōr kaxyw ihkram mē hagjēnh pa. Ixpē Rukre na pa pre inhmā Pawre hkōt inhmōr prām nē mē hā ajēt nē mē hkōt mō.

² Tā pa mē ra inhnojarēt nh̄um Aristak haxw̄yja ma mē ixkōt mō. Pyka pē Masetōn nhō xw̄ynh̄ na pre. Ō krī pē na pre Tesarōn. Jakamā nh̄um ma pa ixkōt mō. Hāmri nh̄um pārja nojarēt. Atamix rūm pār nh̄um ra As w̄yr nojarēt pa mē hw̄yr inh̄ḡjēx pa nē ma kamā mō.

³ Hāmri nh̄um apkati pa mē krī pē Sito hw̄yr pōj nē hā pār xi. Nh̄um pōristi krāhtūm Jurtija Pawre ho mex jakamā pa mē Sito hw̄yr pōj nh̄um Pawre mā anē pa mē ixkato nē ma ixkrāmnhw̄jē hw̄yr mra nē mē kutā apku nē ma akup̄ym pār w̄yr mra.

⁴ Tā pa mē axte mō. Nom nh̄um kōk mē ixkutā ap̄er t̄yx jakamā pa mē umaj juk nē gō hipōk kupu ho mō. Gō hipōk pē Sipreja pa mē upōk rūm ma hkupu ho mō nh̄um mē inhnē kōk pē āmnār mex nē.

⁵ Hāmri pa mē mōō nē pyka pē Siris mē Pāpir wa hakrenh o mō nē pyka pē Ris kamā Mira hw̄yr pōj nē hā pār xi nē ijaarōx pa.

⁶ Hāmri nhūm pōristi krāhtūmjā Aresānrir rūm pār pumu nhūm ra Itar wýr nojarēt. Pa mē hwýr inhgîx kurē kumrēx hāmri nē ma kamā axte mō.

⁷ Hāmri nhūm pārja kōk kutā tee ri mōr prēprēk kaxyw nē ām amnhīm hprī nē mōr ā apkati xohtō nē pa mē tokyx ixpōx kēt nē. Tā Sito hwýr ixāhtēp o mō nom nhūm kōk mē ixkutā hihtýx rax kumrēx. Jakamā pa mē juk nē gō hipōk pē Kret jatúr xā jahpa nē ma kape hā mō nhūm mē inhñē kōk pē àmnār mex nē. Hāmri pa mē ma Sarmōn jakrenh o mō

⁸ nhūm pār kōk kutā amnhīm hprī nē kape hā mō. Pa mē mō nē jatā Rasej tā pār nhīkwý xā mex wýr pōj nē kamā pār xi.

⁹ Nom pār kot amnhīm hprī nē mōr jakamā nhūm ra kōk xāpēr týx nē kamā kry htýx ā mytwrý mē ixtā kato. Mytwrýja ā mē kot kōk xāpēr týx pymaj nhýhým pār kām mrar kēt. Jakamā nhūm Pawre tokyx mē inhmōr nē pār nhō xwýnhjē mā kapēr kām hihtýx nē mē kām:

¹⁰ —Kwa pu mē jar kōk xāpēr týx jamār o ri papa nā. Kē kōk mē kry htýxja hapēx pu mē rī kormā axte mō. Kot puj mē anhýr kēt nē kōk xāpēr týx kām mō nhūm nhýri pārja mē pahpē axā nhūm gō mē apē mē akukrēx o hapēx pa. Pu mē pajaxwýja axkaprā.

¹¹ Anhýr o mē kām kapēr tā no nhūm mē kuma nē ām kuma. Pār pām mē pār o mrar xwýnh wa nojarēt týx nē kapēr ma nē ām kuma. Nhūm pōristi krāhtūm wa nojarēt ā wa kuma nē haxwýja Pawre mar kēt nē.

¹² Nhūm mē kot pār nhīkwý xā mex jarēnhja mē kot mex ā harēnh tā mē kēp omnuj nē. Hā na wrýk nē kōk xāpēr týx nhūm mē kēp omnuj týx nē. Jakamā nhūm mē piitā Pawre rom ra nojarēt nē. Mē kām tokyx krī pē Wēnīs wýr hpōx prām jakamā nojarēt týx nē. Gō hipōk pē Kret kamā na Wēnīsja. Nē kamā kōk xāpēr týx kēt jakamā nhūm mē hwýr nojarēt nē axpēn mā:

—E kwa pu mē tokyx Wēnīs wýr mō nē kamā mán kōk xāpēr týx japēx jamār o papa. Anē.

Hāmri nē piitā hwýr nojarēt.

Kōk kot pār o àpēr týx ā harēnh

¹³ Tā nhūm kahpa hkōt kōk xāpērja katāt kōt kawax pē apē nhūm mē kamā ama nē axpēn mā:

—E hāmri. Tokyx pu mē mō. Anē.

Jakamā pa mē pār o htýx xā ho api nē axte mō. Ma gō hipōk pē Kret jakār ā mō.

¹⁴ Puh nhūm na wrý nē kōk àpēr týx kumrēx. Mē kot kām “kōk xāpēr týx maati” anhýr xwýnhja gō hipōk rūm mē ixto àpēr týx kumrēx o mō.

¹⁵ Hāmri nē mē ixkutā àpēr týx nhūm pār tee ri kutā hkarōt. Pa mē kormā Wēnīs wýr

ixpōx kēt ri ra ho awjanā nhūm amnhī krā hkōt kōk kōt mō.

¹⁶⁻¹⁷ Hāmri nē mō nē gō hipōk pē Krawti jahpa nē hakār ā mō nhūm mē inhñē kōk pē amýtā nhūm amnhīm hprī nē kawax pē apē. Hāmri pa mē pār krare kot mē ixkōt mōr xwýnhja pa mē kumý nē pār rax kām kumē. Ra kamā gō rax tā pa mē ixkarōt týx nē nē hkapír pa nē ho api nē pār rax kām kumē nē ho htýx. Hāmri nē hpānhā kōk xāpēr týx pymaj pār rax kaxpre hpa. Hāmri nē kōk kot pykahti grā maati pē Sirteja wýr pār mēnh nhūm kot amnhī to pykahti xām o htēm pymaj nhūm mē kot ho mrar xā hā kupēxē rax o wrý nhūm pār amnhī krā hkōt ma kōk kōt mō.

¹⁸ Tā nhūm apkati nhūm kōk arī mē ixpē pār o àpēr týx nē arī na wrýk rax rāhā nē. Jakamā pa mē pār ar pymaj nē mē hikukrēx kwý gōx kām rēnh pa. Kaxkritre nē ar kēt kaxyw.

¹⁹ Tā nhūm apkati pa mē hpānhā pār kre kamā ri nē hikukrēx kwý rē nē gōx kām kurē.

²⁰ Nhūm kōk arī àpēr týx kumrēx ā apkati xohtō nē. Nē na wrýk rax rāhā jakamā pa mē kanhēti punumh kēt nē myt punumh kēt o mē ixtā apkati xohtō rax kumrēx. Hāmri nē tee ri ahkapi nē tee ri amnhī kukamā ijamaxpēr. Nē ixytk par pix kukamā ijamaxpēr o ixkaprī nē ixkri.

²¹ Hāmri nē mē inhmā ma xāj ixàpkur kēt ryy nē. Hāmri nhūm Pawre tee ri ja hā mē ixpumu nē pār nhō xwýnh wa kām kapēr nē wa kām:

—Kwa na pa pre tee ri Kret kām man mē pamōr nē war amā ixkapēr. Kop apu mūtār mán mē kuri arī ri mē hkōt mē papa ronhýx pu mē pajamakētkati nē paxāmnhix ri papa. Tā nhýx pu mē ri mē hikukrēxja gōx kām rēnh par kēt nē.

²² Nom kwa kēr ka mē tee ri amnhī kukamā ajamaxpēr kēt nē. Kot puj mē pahtō pahtyk kēt nē. Ām pārja pix koja axā nē hapēx.

²³ Ixpē Tirtūm krajē hō na pa. Na pa hte kām tanhmā amnhī nhīpēx to ho ri ixpa. Jakamā na pre kamāt ja kamā ixwýr kapēr o wrýk xwýnhjē hō mē nhūm ixwýr wrý nē inhmā awjarē

²⁴ nē inhmā: “Pa Pawre? Kwa tee ri amnhī kukamā ajamaxpēr o amā ma hkēt nē. Kot kaj akā hkīnh pē ma Itar kamā Rōm wýr mō nē pōj nē pahi maati Sesti pumu nē kām amnhī jarē. Jakamā koja Tirtūm akōt mē mōr xwýnh piitā omunh mex nē ka mē atō tanhmā amnhī to hkēt nē.” Anē.

²⁵ —Ā kot inhmā kapēr anhýr jakamā kwa mē amnhī to htýx nē tee ri amnhī kukamā ajamaxpēr kēt nē. Tirtūm kapēr o wrýk xwýnh kot inhmā ujarēnh xā hkōt koja

Tirtüm ä më panhîpêx anê. Ixte ja hã omunh mex kênã.

²⁶ Koja xep kôkja nhÿri gô hipôk ä pâr krakrak pa. Nom më papajaja kot puj më pahkã hkîn h pê hwÿr pahpôx pa. Anê.

²⁷ Tã pa më môö nê ä inhmôr anhÿrja ä ixtã semãn axkrut nê ra gô rax pê Ariax kôt axã. Kamãt kãm hkôt axã nhÿm kôkja arÿ pâr o apêr tÿx rãhã ho mô. Hãmri nhÿm kôt ä kamãt nhÿm pâr o mrar xwÿnhja ra pâr kot pykahti grã htêp ä hkamnhÿx.

²⁸ Jakamã nhÿm më gô xupÿm pumunh xã ho gô pumu nhÿm upÿm kêp 36 met. Hãmri nhÿm hã ahtÿmre nê axte omu nhÿm ra hpãnhã kêp 27 met pix. Jao ra pâr kot gô kokwe htêp o môr ä omu.

²⁹ Hãmri nê kot kên kuranh nê hã pikrakrak pymaj katê rÿm ho htÿx xã ho 4 nê gôx kãm kurê nhÿm arÿ ajêt. Hãmri nhÿm më tokyx kãm arÿgro hprãm o arÿgro mã nojarêt o hkrÿ.

³⁰ Hãmri nhÿm pâr kãm më àpênh xwÿnhjaja tanhmã hamaxpêr to nê hêx rom pâr krare ho wrÿk o tê. Më kot më ixrer nê ahte xarmã môr nê rêr nê tokyx gô hipôk wÿr hpôx kaxyw. No ãm hêx rom te më kot axte pâr krã rÿm ho htÿx xã hõ mënh kaxyw pyrãk o amnhÿ nhÿpêx nê kaxyw ho wrÿk o tê.

³¹ Nom nhÿm Pawre më hamaxpêr ä më omu hãmri nê pôristi më më hkrãhtÿm mã më harê nê më kãm:

—Kwa koja müjjaja më pare nê ahte pâr krare kamã xarmã môn rê ka më apikaprãr pa kãm ga. Anê.

³² Hãmri nhÿm më tee ri kuma nê më hwÿr hprôt nê më kêp pâr krare pê hkaxpre xã jakã nhÿm gôx kãm têm nê ma gô hkôt hkaprÿn mô.

³³ Tã hãmri nhÿm ra myt kator o mô nhÿm Pawre akupÿm më piitã më ho më hamaxpêr o hihtÿx kaxyw më kãm:

—Kwa na ka më tee ri amnhÿ kukamã ajamaxpêr o akaprÿ nê axãpkur kêt o atã semãn axkrut.

³⁴ E pu më mëmoj krê nê ho amnhÿ xihtÿx. Kot puj më pahôtô pahtyk kêt nê. ãm hãmri na pa më amã ixkapêr. Anê.

³⁵ Hãmri nê mëmoj py nê më noo mã Tirtüm mã harê nê hkur o xa

³⁶ nhÿm më ja hã omunh xã hkôt akupÿm tãm hamaxpêr o mô. Hãmri nê amnhÿm mëö hkwy jamÿ nê kumê kuku.

³⁷ Pâr kãm më inhmôr xwÿnhjaja na pa prem ixpê 276.

³⁸ Tã pa më ra ixãpkur pa. Hãmri nê pâr kaxkrit kaxyw më apkur xã hã mëmoj y jakrêxja gôx kãm hkaprÿ pa.

Pâr më kêp pikrakrak ä harênh

³⁹ Tã nhÿm ra myt kator mex nê nhÿm më amnhÿ kukamã gô hipôk pumu nê axpên mã:

—Kwa nhÿ pika na müj wehe? Anê.

Hãmri nê nhÿri hakãx ä amnhÿm nôr xã mex pumu nê hwÿr pâr o môr kaxyw hã axpên ma.

⁴⁰ Hãmri nê kaxyw pâr o htÿx xã jakã nhÿm axrê nê gôx kãm rôrôk pa. Nê pÿ ho pâr o juk xã nhô xê xãja nhÿm më mãânên krãhta. Hãmri nê akupÿm mrar xã hã kupêxê nhô nhÿm kôk ho hikot nê ma gô jakãx wÿr o mô.

⁴¹ Nom nhÿm pâr kormã hakãx pê awry hã môr ri amnhÿ to kokwe kura nê pyka nhÿmök ä nô nhÿm më tee ri kot hkaxãr nê akupÿm gô xupÿm mã mënh kaxyw. Nom nhÿm gô kot pâr nhÿxô htak tÿx kurê nhÿm më ixpê pikrakrak par o mô.

⁴² Jakamã nhÿm pôristijaja tee ri omu hãmri nê ra më kêp prêsjê nhÿmex kaxyw. Më kot gôx kãm rôrôk nê gô hipôk wÿr hpa ho nana nê më kêp pikunor pymaj kot më himex kaxyw.

⁴³ Nom nhÿm më hkrãhtÿmja kãm Pawre pÿr prãm kêt jakamã ja nê më hkurê nê më inhmã:

—E më ate apa ho gô rên h mex xwÿnhjaja. Akumrêx mra nê mrô nê ho nana ho mra nê rê.

⁴⁴ No më ate apa ho nana punuj xwÿnhjaja kër ka më tapti rÿ pâr kukrêx ô my nê hã ajêt nê hã ma môn rê. Anê.

Hãmri pa më ä amnhÿ nhÿpêx anê nê ixpi-itã ixkã hkîn h pê ixrêr pa.

28

Gô hipôk pê Maw kamã më pa hã më harênh

Makre 16.17-18

¹ Tã pa më ixpiitã ixkã hkîn h pê ixrêr pa. Nhÿm gô hipôk ä më pa xwÿnhjaja më inhmã gô hipôk nhÿxi jarê nhÿm xep kêp Maw.

² Nhÿm Maw nhô xwÿnhjaja më ixto mex nê. Nhÿm axte na wrÿk rax nê nhÿm kry htÿx kumrêx nhÿm më ixkamã ukaprÿ nê më inhmã kuto nê më inhmã kapêr mex nê.

³ Hãmri nhÿm Pawre kuwy kaxyw ri pÿ kawrã ho mra nê kuwy hwÿr o tê nê hã haxwÿr o xa. Hãmri nhÿm kagã xoprê ô wênên xihtÿxja kuwy kagro pymaj pÿ rÿm kato nê ïhka hã kunha nê hã àpêr o ajêt.

⁴⁻⁵ Hãmri nhÿm Pawre omu nê amnhÿ nê ho apê nê kuwy kamã kumê nhÿm kamã têm nê xêt pa. Hãmri nhÿm gô hipôk nhô xwÿnhjaja tee ri ja hã omu nê axpên mã:

—Kwa ga mëmyti müj pumu. Mãn kêp më hpar o pa xwÿnh na. Hã na kagã ô wênên xihtÿxta kunha. Nã koja ty nê rÿ amnhÿ pumu. Ra hkã hkîn h pê gô rÿm më pahwÿr rêr tã koja tã ty kãm ga. Anê.

⁶ Hāmri nhūm mē tee ri kot tanhmā amnhī to hā hkamnhīx nē hamār o kuhē. à htýx nē ĩhkra hikot rý htyk kurē kumrēx à hkamnhīx tā nhūm tanhmā amnhī kamā hamak to hkēt nē. Ām htýx ri hkīnh nē kapēr nē hpikunhar o ri mra. Hāmri nhūm mē tee ri omu nē axpēn mā:

–Kwa tanhmā kot amnhī tore hā. Kēp mē hpar o pa xwýnh kēt. Mān kēp kaxkwa kamā mēpahpāmjē hō nā? Hā na kagā kunha nhūm tanhī to hkēt nē. Anē.

⁷ Nhūm gō hipōk ā mē ō pahihtu pē Puptija. Őrkwý hā jawý jakamā nhūm amnhī kōt mē ixwý pa mē ma hkōt mō nē kuri hkōt ixpa ho ixtā apkati axkrunēpxi nhūm mē ixto mex nē.

⁸ Nhūm ra Puhti nhīpēxā kēp à nē nō. Kā kagro htýx nē haōk. Hāmri nhūm Pawre hwýr tē nē omu nē hā ĩhkra xi nē ho Tirtūm wý nhūm akupým ho mex kurē kumrēx.

⁹ Hāmri nhūm gō hipōk nhō xwýnhja harēnh ma nē Pawre hwýr mē à xwýnh piitā o mra nhūm mē omu nē Tirtūm nhý hā akupým mē ho mex pa.

¹⁰⁻¹¹ Hāmri nhūm gō hipōk nhō xwýnhja mē ixto mex rax nē.

Pawre axte Rōm wýr nojarēt ā harēnh Rōmān 1.10-12, 15.30-32

Tā pa mē gō hipōta kamā ixpa hā mytwry axkrunēpxi. Hāmri nhūm kōk xāpēr týxta hapēx pa mē axte inhnojarēt nē ma mō. Pār ō kamā hpānhā mō. Aresānir rūm pārja pa mē hpānhā kamā mō. Mē kot kām “sānti pihpo” anhýr xwýnhhta kamā. Na pre gō hipōk kamā haxwýja kōk xāpēr týx hapēx jamār xa hā hikwý htā ra axte nojarēt. Hāmri nhūm gō hipōk nhō xwýnhja ma mē inhmōr xā hā mē inhmā mē ixāpkur xā hkwy nhōr rax nē. Hāmri pa mē pār wýr inhgjēx pa nē ma kamā mō.

¹² Mōō nē Sirakus wýr pōj nē hā pār xi. Hāmri nē krīja kamā mē ixtā apkati axkrunēpxi nē axte mō.

¹³ Mōō hāmri nē Rekre hwýr pōj nē hā pār xi. Hāmri nē kamā mē ixtā apkati. Nhūm ra kahpa hkōt kōkja kawax pē āpēr mex jakamā pa mē ma hkōt mō. Nē mē ixtā apkati axkrut nē Potew wýr pōj nē hā pār xi.

¹⁴ Hāmri nē pār rūm ĩjapōj nē krī kamā Jejus kōt mē ixtō nē htōx kwýjē pumu nhūm mē amnhī wýr mē ixwý. Pa mē ma mē hkōt mra nē mē hkōt ri ixpa hā ixtā ū semān. Hāmri nē ma Rōm wýr hpānhā ixpar o mō.

¹⁵ Hāmri nē kormā amým inhmōr ri nhūm Rōm kām Jejus kōt mē ixtō nē ixtōxjaja mē ĩjarēnh ma nē man mē ixkutā mra. Ma krī pē Praxsi Apja mē “Wēn Pijakrunēpxi” anhýr xwýnh jarēnhja wa hwýr mē ixkutā mra. Hāmri pa mē axpēn kaxpa nhūm Pawre mē omu nē hkīnh nē. Nē mē hā Tirtūm mā amnhī jarē nē kām:

–Pa Tirtūm? Nā ām hāmri na ka mē ixkutā jajē rē. Na pa mē omu nē ixkīnh nē. Nā amex o amex Tirtūm. Anē.

¹⁶ Hāmri pa mē ma mē hkōt Rōm wýr mō nē pōj. Jatā Itar kām Rōm wýr pōj. Hāmri nhūm pōristi krāhtūm Pawre mā:

–E kot paj mē hagjēnh xā kamā ajaxār kēt nē. Kot kaj amā nhýri ixkre kamā apa hprām nē mamrī kamā apa. Nom koja pōristi hō akōt pa ho pa.

Anhýr jakamā nhūm nhýri ixkre kamā pahihtu Sesti kot mar kaxyw kamā hamak o pa.

Pawre kot Rōm kamā tanhmā amnhī nhīpēx to hā harēnh Atre 17.5-6

¹⁷ Tā nhūm Pawre Rōm kamā hā apkati axkrunēpxi nē amnhī wýr Ijaew xāptār tūmrejē hwý nhūm mē hā akuprō nhūm mē kām amnhī jarē nē mē kām:

–E ixkwýjaja. Pa mē amā amnhī jarē ka mē inhma. Nā na pa pre mē panhīgētjē kapēr nhīrōp tanhmā ixām to hkēt nē rý ixte tanhmā mē pahkwýjē hō hto hkēt tā nhūm mē pahkwýjaja amarī ixpynē. Jeru-jarē kamā ixpynē nē Rōm nhō xwýnhjē nhīhkram ĩjaxā.

¹⁸ Hāmri nhūm mē ixte amnhī nhīpēx ā ixkukja nē tee ri mē kot mēmoj mýrapē ĩxpīr kaxyw tanhmā ixkukjēr to kaprý. Jakamā nhūm mē kām ixkator prām nē.

¹⁹ Nom nhūm mē pahkwýjaja kām ja mex kēt jakamā pa pre jar pahī maati Sesti kot ixte kām amnhī jarēnh ā inhmār kaxyw amnhīm harē nē man hwýr mō. Kot paj tanhmā kām mē pahkwýjē ho ixkapēr punuj to hkēt nē. Ām ixte amnhī tā tanhmā mar to hpix kaxyw na pa hwýr mō.

²⁰ –Tā pa amnhī wýr mē awý. Ixte mē amā amnhī jarēnh kaxyw. Mē pahkaprī xwýnhhta. Mē pahte kormā kamā pajamak o papa xwýnh Jejusta. Ām ixte amnhī kaxyw hkōt ĩjamaxpēr pix mýrapē na prem ā kax o ixkaxpre anē. Anē.

²¹ Hāmri nhūm mē kuma nē kām:

–Nā jar tanhmā ajarēnh kute hkēt. Na pre Jutej kamā mē pahkwýjaja tanhmā ajarēnh to hā kagā nē mē ixwýr mēnh kēt nē. Nē ham mē kurūm mē hpōx xwýnhjaja na prem tanhmā mē inhmā ajarēnh to hkēt nē.

²² No na xep hte pyka piitā hkōt mē kām mē ate Jejus kōt amnhī xunhwýr xwýnhjē kurē nē. Na pa pre mē ajarēnh ma nē mē inhmā axujarēnh mar prām nē. Anē.

²³ Hāmri nhūm mē kot mar kaxyw arīgro hta.

Tā nhūm mē kot arīgro hyr kato nhūm mē Pawre nhōrkwý hwýr pikuprōnh rax nē nhūm mē kām awjarē. Mē kām ujarēnh ry nē. Nē ho kamāt. Nē mē kām:

—Nà mẽ pahte amnhĩ wỳr kamā pajamak o papa xwỳnh Jejusja. Kot kaj mẽ atō amnhĩ kaxyw hkôt ajamaxpēr nē hkôt amnhĩ xām nhũm Tirtũm ja hā apumu nē ato hkra. Anē.

Nhũm pre ā mẽ kām kapēr anē. Nē finat Mojes kot Tirtũm nhỹ hā Jejus kukamā tanhmā hā kagā htoja nhũm mẽ kām harē. Nē Tirtũm nhỹ hā kapēr jarēnh o mẽ pa xwỳnhjaja kot tanhmā hā kagā htoja nhũm mẽ kām harē.

²⁴ Hāmri nhũm mẽ hkwỳjaja kuma nē hkôt hamaxpēr nē amnhĩ kaxyw Jejus kôt hamaxpēr nē hkôt amnhĩ xunhwỳ. No nhũm mẽ hkwỳjaja kuma nē am kuma nē kām axte mar prām kêt nē.

²⁵⁻²⁹ Jakamā kànhmā kuhē nē nojarēt nhũm Pawre mẽ kām:

—Nà amnepēm na pre Tirtũm finat Ijaisti mã tanhmā kapēr to. ỹ hā kot mẽ panhĩgētjē mã tanhmā kapēr jarēnh to kaxyw. Tirtũm Karō nhỹ hā kot mẽ kām kapēr nē tanhmā mẽ harēnh to kaxyw. Te Tirtũm tām mẽ kām kapēr pyrāk mẽ kām kapēr. Nē am hāmri tanhmā mẽ pahkwỳjē jarēnh to. Na pre mẽ kām:

E Ijaisti. Kēr ka ma akwỳjē hkôt ri mẽ kām tanhmā ixkapēr jarēnh to ho ri apa.

Nē mẽ kām: “Kot kaj mẽ ajamak o axumar tỳx tã aprĩ hā ixkapēr mar kêt nē.

Nē mẽ ano ho arĩt tỳx tã aprĩ hā ixte amnhĩ nhĩpēx ā ixpumunh kêt nē.

Mē amā ixkapēr mar prām kêt jakamā te mẽ ate mar pymaj amnhĩ jamak pro pyrāk o amnhĩ nhĩpēx o ri apa.

Nē mẽ amā ixte amnhĩ nhĩpēx ā ixpumunh prām kêt jakamā te mẽ ate ixte amnhĩ nhĩpēx ā ixpumunh pymaj te mẽ anomnhôt pyrāk o amnhĩ nhĩpēx o ri apa.

Ja o amnhĩ kaxyw ixkôt ajamaxpēr kêt nē.

Kop mẽ amā ixkapēr mar prām ronhỳx ka mẽ aprĩ hā inhmar tỳx nē.

Nē aprĩ hā ixte amnhĩ nhĩpēx ā ixpumunh mex nē.

Ja o amnhĩ tomnuj kaga hpa nē ixkôt amnhĩ xunhwỳ.

Pa ja hā mẽ apumu nē mẽ ato mex nē.

Tã ka mẽ ā amnhĩ nhĩpēx anhỳr kêt nē.”
Anhỳr o kēr ka mẽ kām ixkapēr jarēnh o ri mẽ hkôt apa Ijaisti. Anē.

Na pre ā Tirtũm mẽ panhĩgētjē kaxyw Ijaisti mã kapēr anē nhũm ô ri mẽ kām ujarēnh o pa nē mẽ pamā hā kagā. Jakamā kwa mẽ okora. Kēr ka mẽ jajē pyrā nē ā amnhĩ nhĩpēx anhỳr hkêt nē. Kwa mẽ inhma nē inhmar tỳx nē. Ijaew kêt xwỳnhjaja kot kapēr marja na ra Tirtũm kām hprām nē. Jakamā koja mẽ hwỳr mẽ kot kapēr jarēnh o mẽ pa xwỳnh kwỳjē rē nhũm mẽ hkôt mẽ kām ujarēnh o pa nhũm mẽ kuma nē mẽ akurom kām mar prām nē. Anē.

Hāmri nhũm mẽ kuma nē hapōx pa nē ma akupỳm axpēm mã tanhmā kapēr jarēnh to ho mra.

³⁰ Hāmri nhũm pahi maati Sesti tokyx amnhĩ wỳr Pawre hwỳ nē tanhmā mar to hkêt nhũm ôrkwỳ kamā kēp prēs nē pa ho hā amgrā axkrut. Nē tām ôrkwỳ pānhā mẽ kām amnhĩre. Nhũm pre krĩ nhō xwỳnhjaja ohtō nē hwỳr mra nhũm amnhĩ wỳr mẽ omu nē hkĩnh nē.

³¹ Na pre hte amnhĩ wỳr mẽ kuwỳ nē mẽ kām Tirtũm kapēr jarēnh o hkrĩ. Mē kot Tirtũm Kra Pahiiti Jejus Kris kôt amnhĩ xunhwỳr nhũm Tirtũm kot ja hā mẽ omunh nē amnhĩ katut kôt mẽ kot amnhĩ tomnuj rēnh par nē mẽ ho hkra hā mẽ kām ujarēnh o hkrĩ. Nē mẽ kot hkôt amnhĩ xunhwỳr xwỳnhjē jahkre. Tanhmā mẽ kot Jejus kôt amnhĩ nhĩpēx mex to ho pa hā mẽ kām karō ho hkrĩ. Hāmri nhũm mēhō ja nē tanhmā kām kapēr to hkêt nē.

Tã am ja pix Teopre. Ixpē Rukre na pa awỳr kagāja nhĩpēx nē kumē. Nē kamā amā tanhmā mẽ pahkwỳjē jarēnh to. Tã am ja pix na hapēx.

Römân Pawre kot Rôm kâm Jejus kôt hkwyjê hwÿr kagâ nê mênh

Kagâ ja na pre Pawre hipêx. Kêp Jejus nhÿ hâ mē ahkre ho pa xwÿnh na pre. Na pre hte mry kâ ho ixkre nhÿpêx nê mē kâm ho wênê ho mē hkôt pa pē mē piitâ mē kâm Tirtûm kapêr jarênh o pa. Tâ krî pē Rôm kamâ mē kot Jejus kôt amnhî xunhwÿr xwÿnhjê hwÿr kagâ ja nhÿpêx nê mē hwÿr kumê. Kormâ ma mē hwÿr môr nê mē omunh kêt ri.

Nê Jejus kêp Tirtûm mâ tanhmâ mē pajarênh to xwÿnh â nhÿm pre mē kâm harê nê hâ kagâ. Jejus kot mē pahte amnhî tomnuj pânâ mē panê htyk jakamâ na hte Tirtûm mē pahte hkôt amnhî xunhwÿr â mē pahpumu nê Jejus kumwak ri mē pahte amnhî to mex xwÿnh â mē pajarê.

Nê Tirtûm Karô nhÿ hâ mē kot amnhî nhÿpêx nyw nê hamaxpêr nyw o pa hâ nhÿm Pawre mē kâm karô nê hâ kagâ. Â na pre mē kâm mēmoj jarê nê hâ kagâ anê. Nê hâ kagâ ho:

¹ Pa Rôm nhô xwÿnhjaja? Xâ mē amex? E ot pa mē awÿr kagâ nhÿpêx nê kumê. Tirtûm na pre mē akaxyw ixâm. Ixte mē amâ Jejus kot tanhmâ mē panê amnhî nhÿpêx to hâ harênh o ri ixpa kaxyw. Na pre ixpê Pawre hâ ixpumu nê ixâm. Jakamâ na pa â mē awÿr kagâ nhÿpêx nê mênh anê. Ixte Jejus nhÿ hâ mē ahkre ho ri ixpa xwÿnh na pa. Na pa hte kâm tanhmâ amnhî nhÿpêx to ho ri ixpa. Tâ â mē awÿr kagâ nhÿpêx nê mênh anê.

² Amnepê mē na pre Tirtûm nhÿ hâ kapêr jarênh o ri mē pa xwÿnhjaja mē pakukamâ mē panhigêjtê mâ Jejus kukamâ tanhmâ harênh to ho ri pa. Nê mē kâm kapêr jarênh o mē hkôt pa nê mē kâm:

—Koja nhÿrmâ Tirtûm mē pahpiitâ mē panê tanhmâ kot amnhî nhÿpêx to mâ xwÿnh mē nhÿm mē hpiitâ hpri hâ harênh ma nê omu. Anê.

Nhÿm prem â Jejus kukamâ mē kâm harênh anhÿr o ri mē hkôt pa. Tirtûm kapêr â kagâ htum kamâ harênh xâ hkôt tanhmâ mē kâm harênh to.

³ Tirtûm Kra Jejus Krisja na pre mē kâm harênh o ri mē hkôt pa. Mē panhō Pahiti na. Kêp Tirtûm Kra htâ na pre mē pahpyrâ nê î ho amnhî nhÿpêx nê wry nê katorxâ nhôxâ hkre rûm kato. Jakamâ kêp Tirtûm Kra pix kêt määnen katorxâ hkôt kêp higêt Tawi hkanrêhâ htâmnhwÿ.

⁴ Kêp Tirtûm Kra htâ nhÿm prem axtem nê tanhmâ hamaxpêr to nê kupi. Nom nhÿm Tirtûm kêp amnhî Kra hâ akupÿm ho htir. Jakamâ na pu htem harênh ma nê kâm pajamaxpêr o:

—Jesús kêp Tirtûm Kraa. Mē kot kêp hpîr tâ nhÿm akupÿm ho htir. Jakamâ nhÿm Tirtûm pyrâ nê hihtÿx o hihtÿx. Anê.

⁵ Tâ â Tirtûm kot Kra nhÿpêx anhÿrja ri na määnen pa ixto mex nê mē akaxyw ixâm. Jakamâ na pa hte ma krî piitâ hkôt mē kâm tanhmâ Jejus Kris jarênh to ho ri mē hkôt ixpa. Ijaew mâ nê Ijaew kêt xwÿnhjê mâ. Mē kot harênh mar nê amnhî kaxyw kâm hamaxpêr nê kapêr kôt pix mâ amnhî nhÿpêx mex kaxyw.

⁶⁻⁷ Nê mē apê Rôm nhô xwÿnhjaja. Na ka prem Jejus kôt amnhî xunhwÿr nhÿm Tirtûm ja hâ mē apumu nê mē ato hkra nê mē apê Jejus mē wa hkwy hâ mē ajarê. Mē ate hkôt amnhî nhÿpêx kaxyw nhÿm pre â mē ajarênh anê.

Tâ ot pa kagâ nhÿpêx nê mē awÿr mênh kaxyw. Tirtûm kot mē ato hkra xwÿnhjê hwÿr. Tirtûm kâm mē ajapêê.

Na pa hte mē ato mē panhÿpêêxâ maati Tirtûm mē Pahiti Jejus Kris wa hwÿr rähâ ri ixpa. Nê mē ato wa hwÿr o:

—Kwa kêr ka wa Rôm kamâ war akrajê pumunh mex nê mē kutâ anojarêt rähâ nê. Kê mē hamakêtkati nê amnhÿx ri tanhmâ amnhî nhÿpêx to ho ri pa. Anê.

*Pawre kot Rôm nhô xwÿnhjê pumunh
prâm â amnhî jarênh*

Atre 28.15-16; Römân 15.22-29

⁸ Nê na ka prem amnhî kaxyw Jejus Kris mâ ajamaxpêr nê hkôt amnhî xunhwÿr nhÿm krî piitâ hkôt mē pa xwÿnhjaja mē ajarênh ma. Nê mē ate amnhî nhÿpêx nyw â mē ajarênh ma nê axpên mâ tanhmâ mē ajarênh to ho pa. Nê mē ajarênh o:

—Kwa na xep Rôm kâm mē hkwyjaja amnhî kaxyw Jejus mâ hamaxpêr tÿx nê. Nê hkôt amnhî nhÿpêx mex rähâ ho ri pa. Anê.

Pa â mē kot mē ajarênh anhÿrja ma nê ixkînh tÿx nê. Nê Tirtûm mâ mē anhÿ hâ ixkînh â amnhî jarênh o ri ixpa.

⁹ Na pa hte mē ato hwÿr rähâ ho ri ixpa. Nê nhÿri mē kâm Tirtûm Kra Jejus kapêr jarênh o ri ixpa nê mē amâ ijamaxpêr nê mē ato kuwÿ. Nê tanhmâ Tirtûm mâ amnhî nhÿpêx to ho ixpa pē mē amâ ijamaxpêr nê mē ato kuwÿ. Tirtûm kot ja hâ ixpumunh mex.

¹⁰ Na pa hte tanhmâ kâm amnhî jarênh to kaxyw nê mē akaxyw amnhî to kuma nê kâm:

—Pa Tirtûm? Na pa ra inhmâ ma Rôm wÿr inhmôr nê kamâ akôt ixkwÿjê pumunh prâm tÿx kumrêx. Xâ kot ka tokyx mē hwÿr inhmê nâ? Anê.

¹¹ Na pa ra inhmâ mē awÿr inhmôr prâm tÿx nê. Na pre Tirtûm Karô tanhmâ ixkrâ hto pa ÿ hâ kapêr â kagâ mar tÿx nê. Nê hkôt mēmoj mex pumunh rax nê. Tâ ra inhmâ ma mē awÿr inhmôr nê amnhî xô ri mē amâ

harënh präm në. Më ate inhmar në aprī hā Jesus Kris kōt amnhī xunhwyr̄ t̄yx në hkōt amnhī nh̄ip̄ex mex rāhā ho ri apa kaxyw.

¹² Kot paj nh̄yrmā ma më awyr̄ mō. Nē më awyr̄ pōj pu më axp̄en pumu në pahk̄inh në. Mē pahte amnhī kaxyw Jesus Kris mā pajamaxp̄er mex o papa hā axp̄en pumu në pahk̄inh në. Nē më pahpiitā hkōt amnhī nh̄ip̄ex mex o ri papa.

¹³ E ixkw̄yjaja. Xatā ixte më awyr̄ ixkrā htā nh̄um mëmoj xatā tanhmā ixp̄ē āmtār to pa kormā jar ixpa. Nom kot paj nh̄yrmā ma më awyr̄ mō. Mē ate ja hā inhmar kaxyw na pa ā Tirt̄um noo mā më amā amnhī jarënh anē. Na pa pre krī hkwȳ kamā më apē Ijaew kēt xw̄ynh kw̄yjē hwyr̄ ixpa. Nē më kām Jejus kot më panē tanhmā amnhī nh̄ip̄ex to hā harënh o ri më hkōt ixpa. Nh̄um më hkwȳyjaja inhma në hkōt amnhī xunhwyr̄. Ja kaxyw na pa inhmā ma më anhō krī hwyr̄ inhmōr präm në. Mē akw̄yjaja kot ixkap̄er mar në më apyrā në Jejus kōt amnhī xunhwyr̄ kaxyw.

¹⁴ Na pre ra Tirt̄um ixte kap̄er o më ajahkre ho ixpa kaxyw më piitā më kaxyw ixām. Tanhmā ri më kute xw̄ynhjē kaxyw. Mē kām ma ho më pa xw̄ynhjē më më kām ma hkēt o më pa xw̄ynhjē mā. Nē më kot kagā pumunh xw̄ynhjē më më kot kagā pumunh kēt xw̄ynhjē mā. Mē piitā më kaxyw na pre ixām. Ixte më kām Jejus kot tanhmā më panē amnhī nh̄ip̄ex to hā harënh o ri më hkōt ixpa kaxyw.

¹⁵ Jakamā na pa ra inhmā më apē Rōm nhō xw̄ynhjē hwyr̄ inhmōr präm në. Ixte më anhō krī kamā më piitā më kām ja jarënh o ri ixpa nh̄um më kot inhmar në më pahpyrā në Jejus kōt amnhī xunhwyr̄ kaxyw.

*Jejus kot më panē htyk ā harënh
Sikūn Ximotre 1.6-12*

¹⁶ Nē Jejus kot më panē htyk ā harënhja ām hāmri na. Harënhja mex o mex. Na htem kuma në kām hamaxp̄er në amnhī kaxyw hkōt hamaxp̄er në hkōt amnhī xunhwyr̄. Hāmri nh̄um Tirt̄um ja hā më omu në më në më kot amnhī tomnuj o hap̄ex pa në më ho hkra. Nom më ixp̄ē Ijaew nhō xw̄ynhjē pix kēt. Māānēn më apē Ijaew kēt xw̄ynhjaja nh̄um kām më pajapē ho axp̄en pyrāk. Jakamā na pu htem Jejus kōt amnhī xunhwyr̄ nh̄um Tirt̄um ja hā më pahpumu në më pahto hkra. Ja kaxyw āhpumunh t̄yx o āhpumunh t̄yx.

¹⁷ Ām më kot amnhī kaxyw Jejus mā hamaxp̄er xw̄ynh pixjaja na hte më ho hkra. Kap̄er ā kagā ht̄um kot tanhmā ja jarënh to nē harënh kot:

Na hte Tirt̄um më kot amnhī kaxyw Kra mā hamaxp̄er ā më omunh xā hkōt më ho hkra nh̄um më amnhī kaxyw kām

hamaxp̄er rāhā ho pa. Jao ra ô ri tām amnhī nh̄ip̄ex o pa. Anē.

*Mē pahpiitā më pahte amnhī tomnuj
xw̄ynh ā më pajarënh*

Atre 14.15, 17.22-29; Apokarip 9.20-21

¹⁸ Nē më kot amnhī tomnuj o ri më pa xw̄ynhjaja na hte Tirt̄um axtem tanhmā më harënh to. Na htem Tirt̄um kap̄er ma nom amnhī tomnuj gryk ā ām kuma. Nē më hkwȳyjaja kot kap̄er mar pymaj kap̄er ô ho më kēp āmnār rāhā ho ri pa nh̄um Tirt̄um ja hā më omu nh̄um ja kēp omnuj në.

¹⁹⁻²⁰ Te më kot Tirt̄um kot amnhī nh̄ip̄ex ā omunh kēt pyrāk o amnhī nh̄ip̄ex tā më kot omunh mex. Tirt̄um kot mëmoj to kator krax rūm ra kot më pamā amnhī to amnhīrit mex. Pu më pano ho omunh kēt tā no ām kot amnhī nh̄ip̄ex kōt ra kēp Tirt̄um ā omunh mex në. Nē kēp mëmoj piitā ho kator xw̄ynh ā omunh mex në. Nē mex o mex ā omu në hiht̄yx o hiht̄yx hā omu. Tirt̄um kot amnhī nh̄ip̄ex kot amnhīrit mex nh̄um më kot omunh mex tā hkōt amnhī xunhwyr̄ kēt në. Nē axtem në hamaxp̄er o:

–Tk. Tirt̄um kot inhmā amnhī to amnhīritre hā kot pa kēt ri hkōt amnhī nh̄ip̄ex. Kot pa inhno ho omu në rī kormā hkōt amnhī nh̄ip̄ex jap̄er. Anē.

Ra më kot amnhī nh̄ip̄ex ā omunh mex tā ri ā hamaxp̄er anē. Jakamā nh̄um Tirt̄um tee ri ja hā më omu nh̄um ja kēp omnuj t̄yx në.

²¹ Mē kot amnhī nh̄ip̄ex ā omunh mex tā amnhī kaxyw tanhmā kām hamaxp̄er hto hkēt. R̄y arī hamaxp̄er jap̄er në kām:

–Nā Tirt̄um. Ām hāmri amex kumr̄ex. Ām amex o amex. Apē Tirt̄um ā ām apixi mex kumr̄ex na ka. Ām hāmri na ka hte më ixto mex o apa.

Anh̄yr̄ o amnhī kaxyw kām kap̄er kēt në. Nē ām ht̄yx tanhmā hamaxp̄er punuj to pix o ri pa. Te kamāt kō kamā ri më pa xw̄ynhjē kot amnhī nh̄ip̄ex pyrā në mëmoj mex pumunh kēt në.

²² Mē kot āhpumunh t̄yx ā amnhī to jarkrar o ri pa htā no ām te më hkrā kanh̄in kēt në më hamaxp̄er kēt pyrāk o amnhī nh̄ip̄ex.

²³ Jakamā na htem amnhīm mëmo karō nh̄ip̄ex. Mëmo htyk mā xw̄ynhjē hō karō nh̄ip̄ex. Tanhmān panhī karō r̄y mëmo mry karō r̄y mëmo kuwēnh karō. R̄y mëmo kagā karō nh̄ip̄ex. Hāmri në ho ô sānti në te ri ho Tirt̄um nh̄ip̄ex pyrāk o hip̄ex. Jao hpar pé hkōn krā ho rōrōk në amnhī to kuwȳ në kām amnhī jagrer pé kām mex o mex ā harē. Tirt̄umja sānti rom ht̄ir o ht̄ir tā nh̄um më axtem në sānti gryk ā hkaga në ā amnhī nh̄ip̄ex o pa anē.

²⁴ Jakamā nh̄um tee ri ā më kot amnhī nh̄ip̄ex anh̄yr̄ ā më omu në amnhī pyrā në më hkaga në ām më omu. Jakamā nh̄um më ām amnhī krā hkōt tanhmā ri amnhī tomnuj

to ho pa. Nē axpēn kām ri tanhmā hpījaam kēt to. Ā na htem htýx ri amnhī tomnuj anhýr o pa.

²⁵ Tirtūm kapērja ām hāmri htā nhūm mē axtem nē te amnhī pum rēnh pyrāk o hipēx nē kām hamaxpēr kēt nē. Nē hpānhā ri mē hēx xwýnhjē kapēr pix ma nhūm ja te mē kām mex pyrāk. Na htem ā amnhī nhīpēx anē hāmri nē axtem nē Tirtūm kot mēmoj nhīpēx pix parpē rōrōk nē amnhīm mex o mex ā harē. Nom kot hipēx xwýnh Tirtūm parpē mán ā amnhī nhīpēx anhýr kēt nē. Nom kot mēmoj nhīpēx xwýnhhta mex o mex jakamā koja mē kot hkōt amnhī nhīpēx xwýnhjaja jājē rom kām mex o mex ā harēnh tūm rāhā ho ri pa.

²⁶ No mē kot amnhī tomnuj xwýnhjaja na hte Tirtūm amnhī pyrā nē mē hkaga nhūm mē htýx amnhī krā hkōt ri tanhmā amnhī tomnuj to ho ri pa. Jao mēni hkwyjaja axtem nē axpēn gryk ā mjēn kaga nē axpēn nhīo ho mjēn.

²⁷ Nhūm mēmy hkwyjaja määnēn axtem nē amnhī kwýjē my gryk ā hprō kaga nē axpēn nhīo ho hprō. Na htem ā axpēn kamā hpījaam kēt o pa anē. Mýrapē koja mē ā pix kām amnhī xā htýx kamā hamak o pa.

²⁸ Na htem amnhī tomnuj gryk ā Tirtūm mā hamaxpēr kēt nhūm tee ri amnhī tā mē omu nē hamaxpēr o:

–Mē kām amnhī tomnuj pix prām jakamā kwār mē māmri ā amnhī nhīpēx anē. Kot paj axte ja nē tanhmā mē kām ixkapēr to hkēt nē. Anē.

Jakamā nhūm mē arī htýx ri amnhī krā hkōt tanhmā amnhī tomnuj to ho ri pa rāhā nē.

²⁹ Hāmri nē mēmoj punuj pix mā hamaxpēr.

Nē kām amnhī mex pix prām mā hamaxpēr.

Nē kām axpēn tomnuj pix prām.

Nē mēmoj tā axpēn kām gryk pix prām.

Nē mē kām axpēn par pix prām.

Nē mēmoj tā ri kām axpēn mā ākjēr prām.

Nē mēmoj tā kām axpēn mā hēx prām.

Nē kām axpēn kaxyw tanhmā hamaxpēr punuj to pix prām.

Nē kām tanhmā axpēn to kapēr punuj to pix prām.

³⁰ Nē kām mēmoj tā axpēn to hēx pix prām.

Nē kām Tirtūm prām kēt o ri pa.

Nē mēmoj tā axpēn mā ākjēr o ri pa.

Nē mēmoj tā amnhī to jarkrar rāhā ho ri pa.

Nē tanhmā amnhī tomnuj to pix kukamā hamaxpēr. Nhūm mē katorxā nē mē hipēxā tee ri ja nē tanhmā mē kām kapēr to no nhūm mē mar kēt kumrēx.

³¹ Ā mē kot amnhī nhīpēx anhýr o ri mē pa xwýnhjaja na hte Tirtūm kām mēmoj mex

nhūm mē kēp omnuj nē nhūm Tirtūm kēp mēmoj omnuj nhūm mē kām mex nē. Nē axpēn mā mēmoj tanhmā ho hā amnhī jarēnh tā ho anhýr kēt nē. Nē axpēn kām ukapri ho ri pa hkēt nē.

³² Tirtūm kapēr ā kaga htūm kot tanhmā mē hkukamā mē harēnh to nē mē harēnh kot:

Ā mē kot amnhī nhīpēx anhýr o ri mē pa xwýnhjaja koja mē nhýrmā ty hāmri nē amnhī xā htýx kamā hamak rāhā ho ri pa ho pa. Anē.

Nhūm mē kot amnhī tā ja mar týx tā aa amnhī tomnuj kaga hkēt nē. Ari ā amnhī nhīpēx anhýr o pa rāhā nē. Nhūm mē hkwyjaja mē kot amnhī tomnuj ā mē omu nē mē urāk nē ā amnhī nhīpēx anhýr o ri mē hkōt pa nhūm mē amnhī pyrā nē mē omu nē hkīnh nē. Na htem ā amnhī nhīpēx anhýrja gryk ā Tirtūm kaga nhūm tee ri amnhī tā mē omu nē amnhī pyrā nē mē hkaga nē ām mē omu. Jakamā nhūm mē amnhī tomnuj týx pix rāhā ho pa.

2

Mē kot amnhī tomnuj xwýnhjē hkukamā mē harēnh

Matēwre 7.1-5; Sikūn Tesarōn 1.6; Eprēw 9.27; Sikūn Pētre 2.4, 3.7; Jutre 6-14; Apokarip 6.15, 20.11

¹ Nē kot ka mē atō ā mē kot amnhī tomnuj anhýr xwýnhjē kot amnhī nhīpēx ā mē harēnh ma nē ā ajamaxpēr anē nē ajamaxpēr o:

–Tk. Mē kot amnhī tomnuj pix o ri pa xwýnh kēnā. No pa na ā ixte amnhī nhīpēx anhýr o ri ixpa hkēt. Mē kurom ixte tām amnhī nhīpēx o ri ixpa xwýnh na pa.

Anhýr o amnhī jarē. Kwa nā mē ā ajamaxpēr anhýr kēt nē. Mē pajaxwýja na pu htem tōhā mē urāk nē tanhmā amnhī tomnuj to. Tā ka mē ā mē kot amnhī tomnuj ā mē harēnh anē nē te ka ate amnhī jarēnh pyrāk.

² Tirtūm kapēr ā kaga htūm kot mē kot amnhī tomnuj o ri mē pa xwýnhjē jarēnh kot:

Mē kot amnhī tomnuj mýrapē koja mē nhýrmā amnhī xā htýx kamā hamak rāhā ho ri pa. Anē.

Ām hāmri ā mē harēnh kot anhýr.

³ Mán ka mē atō tanhmā amnhī kukamā ajamaxpēr to nē ajamaxpēr o:

–Nā koja Tirtūm nhýrmā amnhī nē kuwy hwýr mē kot amnhī tomnuj xwýnhjē rē. No pa koja hwýr inhmēnh kēt nē. Anē.

Kwa mē ā ajamaxpēr anhýr kēt nē. Kot ka mē ā amnhī kukamā ajamaxpēr anhýr tā tōhā mē urāk nē tanhmā amnhī tomnuj to. Jakamā koja Tirtūm mē urāk nē hā tanhmā mē ato.

⁴ Kot kaj mē atō tanhmā amnhī tomnuj to hāmri nē ām ja hā amnhī pumu nē ajamaxpēr o:

–Ixte amnhī tomnuj xwýnh tā na hte Tirtūm ja hā ixpumu nē ām ixpumu nē hā tanhmā ixto hkēt nē. Kēp mē ixkamā ukapri xwýnh jakamā na hte gryk tokyx anhýr kēt nē. Jakamā kot paj arī tanhmā amnhī tomnuj to ho ri ixpa nē aa jam inhūrer kēt nē. Tirtūm kot ja hā tanhmā ixtore kaxyw hā.

Anhýr o ajamaxpēr. No ām ja kot anhýr kēt. Na hte Tirtūm kormā amnhī tā mē pajamā. Mē pahte amnhī tomnuj kaga nē hpānhā hkōt amnhī xunhwýr kaxyw na hte kormā amnhī tā mē pajamā. Jakamā na kormā tanhmā ate amnhī tomnuj tota ā tanhmā ato hkēt nē.

⁵ Mē akrā hihtýx jakamā mē amā hkōt amnhī xunhwýr prām kēt. Na ka htem tanhmā amnhī tomnuj to pix kukamā ajamaxpēr o ri apa. Nē gaa nē ra anhýr kumrēx. Nhūm Tirtūm tee ri ja hā mē apumu nhūm ja kēp omnuj týx o mō. Jakamā koja nhýrmā tanhmā mē ajarēnh to nē gryk týx kām tanhmā mē atomnuj týx to. Ām hāmri na hte mē pahte amnhī nhīpēx ā mē pahpumunh xā hkōt ahpýnhā tanhmā mē panhīpēx to.

⁶ Koja nhýrmā mē pahpiitā kormā mē pahtür ri mē pahte amnhī nhīpēx ā mē pahpumunh xā hkōt tanhmā mē panhīpēx to. Mē kot amnhī to mex o ri mē pa xwýnhjaja nhūm mē ho mex nē. Nē mē kot amnhī tomnuj o ri mē pa xwýnhjaja nhūm mē homnuj nē. Koja nhýrmā mē pahpiitā mē pahto hpimrāatā ā mē panhīpēx anē.

⁷ Mē kot hkōt tām ri amnhī nhīpēx o pa pē kām Tirtūm kot amnhīm mē mex ā mē harēnh prām xwýnhjaja koja nhýrmā amnhīm mē mex ā mē harē. Hāmri nhūm mē kuri htír tūm nē hkīnh nē mex kumrēx nē pa ho pa.

⁸ Nom mē kot amnhī mā pix mā ri hamaxpēr o ri mē pa xwýnhjaja. Nē mē kot tanhmā amnhī tomnuj to gryk ā Tirtūm kapēr kaga xwýnhjaja koja kām mē hkīnh kēt nē tanhmā mē homnuj týx to.

⁹ Mē kot amnhī tomnuj xwýnh piitā koja mē nhýrmā amnhī xā htýx kamā hamak rāhā nē pa ho pa. Ijaew kumrēxjaja nē hpānhā Ijaew kēt xwýnhjaja nhūm mē amnhī xā htýx kamā hamak rāhā nē pa ho pa. Mē kot amnhī tomnuj týx o paja mýrapē.

¹⁰ No kēt tām mē kot amnhī nhīpēx xwýnhjaja koja Tirtūm mē ho mex rax rāhā ho pa ho pa. Nē amnhīm mē kot amnhī to mex xwýnhjē hā mē harē. Nē tanhmā mē ho mex to nhūm mē kamā amnhī krit nē pa ho pa. Hamakētkati nē hkīnh nē āmnhīx ri pa ho pa. Ijaew kwý kumrēxjaja nē māānēn Ijaew kēt xwýnh kwýjaja nhūm mē mex nē hamakētkati nē hkīnh nē āmnhīx ri pa ho pa.

¹¹ Koja Tirtūm nhýrmā ahpýnhā mē pahte amnhī nhīpēx ā mē pahpumunh xā hkōt tanhmā mē pajarēnh to pē tanhmā mē panhīpēx to. Mē ixpē Ijaewjaja nē mē apē Ijaew kēt xwýnhjaja nhūm ā mē pahpiitā mē panhīpēx anē.

¹² Annepēm na pre finat Mojes mā tanhmā kapēr to nhūm kuma nē ō ri hā kagā hpa. Mē ixpē Ijaew ri na kapēr ā kagāja. Ra mē ixte mar týx jakamā koja mē ixtō ra kapēr mar týx tā hkōt amnhī nhīpēx kēt hāmri nhūm Tirtūm tee ri amnhī tā omu nē ā amnhī nhīpēx anhýrja mýrapē nhýrmā ma mē kot amnhī xā htýx kamā hamak tūm xāta wýr kumē. Kot kapēr mar týx tā hkōt amnhī nhīpēx kēt mýrapē nhūm ā hipēx anē. No kēt mē apē Ijaew kēt xwýnhjaja mē ixkīnhā mē ari Tirtūm kapēr ā kagā hkēt jakamā koja mē ate kapēr nhīrōp mē akuhē hā mē apumunh kōt tanhmā mē anhīpēx to hkēt nē. Koja hpānhā mē ate tanhmā amnhī tomnuj to ho apa mýrapē mē kot amnhī xā htýx kamā hamak o pa tūm xāta wýr mē arē.

¹³ Na hte mē kot kapēr mar ā mē omunh xā hkōt amnhīm mē kot amnhī to mex xwýnh ā mē harēnh kēt nē. Ām mē kot kapēr kōt amnhī nhīpēx ā mē omunh xā hkōt pix mā na hte amnhīm mē kot amnhī to mex xwýnh ā mē harē.

¹⁴ No mē hkwyjaja kormā kot kapēr mar kēt tā te ra mē kot mar mex pyrāk o amnhī nhīpēx. Jao amnhī krā hkōt tām ri amnhī nhīpēx kurē kumrēx. Te kot Ijaew pyrā nē Tirtūm kapēr mar týx nē hkōt amnhī nhīpēx o ri pata pyrāk.

¹⁵ Na htem amnhī krā hkōt tanhmā amnhī nhīpēx mex to. Te Tirtūm kapēr kot mē hkrām gēx pyrāk o amnhī nhīpēx o pa. Jakamā tee ri tanhmā amnhī tomnuj to hā amnhī pumu nē hkapri nē. Nē tām amnhī nhīpēx ā amnhī pumu nē hkīnh nē.

¹⁶ Tā koja nhýrmā Tirtūm Jejus Kris mā anē nhūm kuma hāmri nē mē piitā kormā mē htír ri tanhmā mē kot amnhī nhīpēx to hā mē omunh xā hkōt tanhmā mē harēnh to. Nē mē hamaxpēr kōt mē omunh mex xā hkōt tanhmā mē harēnh to. Mē papajaja mē pahte xapēn jamaxpēr kōt xapēn pumunh kēt tā Jejus kot mē pajamaxpēr kōt mē pahpumunh par.

Tā na pa hte mē kām Jejus kot tanhmā amnhī nhīpēx to hā harēnh o ixpa pē ā mē kām ixujarēnh anhýr o ri ixpa.

*Pawre kot hkwyjē mā kapēr
Römān 3.19-20*

¹⁷ Nē ixpyrā nē mē apē Ijaew kwýjaja na ka mē axtem nē Ijaew kēt xwýnhjē mā tanhmā amnhī to jarkrar o ri apa nē mē kām:

–Nā mē ixpē Ijaew ri Tirtūm kapēr ā kagā jakamā ām mē papxipixjaja na hte Tirtūm

amnhīm mē inhmex ā mē ijarē. Nē ām mē papxipixjaja na hte mē ixto hkra.

¹⁸ Nē mē papxipixjaja na mē ixte Tirtūm kām hprām xā hkôt mēmoj pumunh par nē mē kot amnhī to mex xā pumunh par nē mē kot amnhī tomnuj xā pumunh par. Mē apē Ijaew kēt xwýnhjē rom mē ixte mēmoj piitā omunh par kumrēx. Anē.

¹⁹⁻²⁰ Nē amnhī jarēnh o:

—Nā te mē ixpē mē nohkre xwýnhjē pa hā mē hamýnh nē ri mē ho ixpa xwýnh pyrāk. Jakamā Ijaew kēt xwýnh pē htýx ri mē pa xwýnhjaja na pa htem mē kām Tirtūm kapēr tūm o mē ahkre mex o ri ixpa. Kormā mē kot hprī hā mar kēt jakamā na pa htem ho mē ahkre ho ri mē hkôt ixpa. Mē kurom mē ixte mar par kēnā.

²¹ Anhýr ā amnhī jarēnh nē mē ate kapēr o mē ahkre ho apa htā hkôt amnhī nhīpēx kēt nē.

Nē mē ate mē kot axpēn pē āhkīnh nē mē hkurē htā no ām mē kamjaja axpēn pē axāhkīnh o ri apa.

²² Nē mē amā sānti hkīnh kēt ā amnhī jarēnh tā axtem nē hwýr agjē nē hpar pē káxpore nhīkwý xwýnh o axāhkīnh o ri apa.

Nē mē kot axpēn prō ho amnhīkati nē mē hkurē ho apa htā mē kamjaja ā ri amnhī nhīpēx anhýr o ri apa.

²³ Nē mē ate Tirtūm kapēr ā kagā mex o mex ā harēnh tā hkôt amnhī nhīpēx hkēt nē. Jakamā nhūm mē akwýjaja ja hā mē apumu nē mē apyrā nē Tirtūm ā hpijaām kēt o pa.

²⁴ Tirtūm kapēr ā kagā htūm kot tanhmā mē ate amnhī nhīpēx ā mē ajarēnh to nē mē ajarēnh kot:

Mē kēp Ijaew kēt xwýnhjaja na htem Ijaew kot htýx ri amnhī nhīpēx o ri mē pa hā mē omu nē mē ý hā tanhmā Tirtūm o kapēr punuj to ho ri pa. Anē.

²⁵ Mē pahpē Ijaew na pu htem mē pahkraja mē hapōx kôt kormā mē hkryre ri pu htem mē kēp mēmy kwrýt kà jakā. Finat Mojes kot Tirtūm nhý hā mē panhīgētjē mā hā karō xā hkôt na pu htem ā mē hipēx anē. Mē pahte Tirtūm mā mē pahkrajē nhōr ā amnhī to amnhīrīt kaxyw. Jakamā na pu htem arī Mojes kapēr kôt ā mē hipēx anē nhūm Tirtūm kām ja mex nē. Nom kot pu mē kapēr kwým ri tanhmā amnhī nhīpēx to ho papa nhūm ja kēp omnuj týx nē hāmri pu mē tee ri mē pahkrajē my kwrýt kà jakār kapry. Na hte Tirtūm ā mē pahkrajē nhīpēx anhýr ā mē pahpumunh kôt amnhīm mē pamex ā mē pajarēnh kēt nē. Nom mē pahte kapēr kôt amnhī nhīpēx mex o papa pē mēmy kwrýt kà jakārja nhūm kām mex nē.

²⁶ Ijaew kēt xwýnhjaja kot ā mē hkrajē nhīpēx anhýr kēt tā ra mē hkwyjaja Tirtūm kapēr ma nē hkôt amnhī nhīpēx o ri pa. Jao

te mē kot amnhī my kwrýt kà jakār pyrāk o amnhī nhīpēx. Jakamā nhūm Tirtūm ja hā mē omu nē mē kām:

—Nā ām hāmri. Mē ate amnhī my kwrýt kà jakār kēt tā mē apē ixkra na ka mē. Anē.

²⁷ Mē kot amnhī jakār kēt tā Tirtūm kapēr kôt amnhī nhīpēx mex o ri pa nhūm amnhī tā mē omu nē mē arom amnhīm mē kot amnhī to mex xwýnh ā mē harē. Mē kot amnhī jakār kēt tāā.

No mē kajaja mē ate Tirtūm nhý hā Mojes kapēr ā kagā mar týx tā hkôt amnhī nhīpēx kēt nē. Ja myrapē koja ja hā mē apumu nē Ijaew kēt xwýnhjē kīnhā mē ate amnhī tomnuj xwýnh ā mē ajarē. Ra mē ate amnhī jakār tā mē ate amnhī tomnuj xwýnh ā mē ajarē.

²⁸ Nē kot ka mē atō tanhmā amnhī to jarkrar to nē amnhī jarēnh o:

—Nā ixpē Ijaew jakamā na hte Tirtūm mē kot inhmý kwrýt kà krāhýr kôt ixto kraa. Anē.

Nom xā na hte Tirtūm ā mē pahte amnhī nhīpēx anhýr ā mē pahpumunh kôt mē pahto hkra? Nā kot anhýr kēt. Na htem ām htýx ā amnhī to jarkrar anhýr kapry ho pa.

²⁹ Nē Tirtūm Karō kot mē hkarō mā gjēx xwýnhjaja kēp Tirtūm kra jakamā na htem Tirtūm kām hprām xā hkôt amnhī nhīpēx. Nom ri amnhī krā hkôt tanhmā amnhī nhīpēx to ho pa hkēt nē. Rý htýx hamaxpēr o:

—Nā kot paj Mojes kapēr ā kagā hkôt amnhī nhīpēx nhūm Tirtūm ja hā ixpumu nē amnhīm inhmex ā ijarē nē ixto hkra.

Anhýr o hamaxpēr kēt nē. Na htem hamaxpēr o:

—Nā ra Tirtūm Karō kot ixkarōm àr jakamā ixpē hkra nhūm amnhīm inhmex ā ijarē. Jakamā kot paj ām kôt pix mā ri amnhī nhīpēx o ri ixpa rāhā ty. Kwār māmri ixkwýjaja amnhīm inhmex kēt ā ijarē. Anē.

Kēr ka mē ā ajamaxpēr anhýr o ri pa. Ā mē hamaxpēr anhýr na mex o mex.

3

¹ Nē mán ka mē ra tee ri tanhmā amnhī kukamā ajamaxpēr to nē ajamaxpēr o:

—Kwa mo kaxyw na pa ixpē Ijaew? Mon pa pre we ixpē Ijaew kētre hkēt nē? Mē kēp Ijaew kēt xwýnhjaja kot amnhī jakār kēt tā nhūm Tirtūm mē pahpyrā nē mē ho hkra. Anē.

Kwa mē ā ri ajamaxpēr anhýr kēt nē.

² Mē pahpē Ijaew na pre Tirtūm Ijaew kēt xwýnhjē rom mē pahto mex rax nē. Na pre amnepē mā mē panhīgēt mā tanhmā kapēr to. Mē pahpiitā mē pahte mar nē hkôt amnhī nhīpēx kaxyw. Nom Ijaew kēt xwýnhjē nhīgēt mā ā kapēr anhýr kēt nē.

Åm më pahpê Ijaew nhîgêt pix mã kapêr. Jakamã më pahpê Ijaew mã ja mex kumrêx.

³ Nom kot kaj më atô ja ma në ajamaxpêr o:

—Nà Tirtùm kot më ixto mex mã më ixtã amnhî jarênh tã no nhùm xep më inhîgêt kwýjaja hkôt amnhî nhîpêx kêt në. Na xep prem kapêr kwým ri amnhî tomnuj o pa. Jakamã ko. Koja Tirtùm më ixpê më hkanrêhã më htãmnhwýjaja tanhmã më ixto mex to japêr ko. Anê.

⁴ Kwa më ri ã ajamaxpêr anhÿr kêt në. Tirtùm na hte më pahpiitã më pakurom mëmoj tã amnhî jarênh o hêx kêt në. Tã ra kot tanhmã më pahtã amnhî jarênh to xã hkôt koja ã më pahto mex anê. Kapêr ã kagã htùm kot mëhõ tanhmã Tirtùm mã kapêr to në harênh kot:

Pa Tirtùm. Nã ãm kapxpix na ka hte mëmoj tã amnhî jarênh xã hkôt amnhî nhîpêx o ri apa.

Jakamã na htem ãm axpên mã axêx ã akapêr ã ajarênh kaprÿ. Anhÿr o harê.

⁵ No kot ka më atô atÿx ajamaxpêr në ajamaxpêr o:

—Xã koja Tirtùm tanhmã më ixte amnhî tomnuj to hã më ixpumu në gryk? Nã koja gryk kêt në. Jakamã kot paj arî amnhî tomnuj o ri ixpa. Kê më piitã ja hã ixpumu në ixrom Tirtùm tapxpix kot amnhî to mex o pa xwýnh ã harênh o pa. Nã ja mex. Jakamã kot paj arî amnhî tomnuj rãhã ho ri ixpa nhùm më Tirtùm pix mã mãn kot tãm amnhî nhîpêx xwýnh ã harê. Hãmri nhùm Tirtùm amnhî tã ixpumu në tanhmã ixto hkêt në. Koja tanhmã ixto japêr hãmri në ixpyrà në amnhî tomnuj në. Anê.

Kot kaj më ã ajamaxpêr anê në ãm amnhî krã hkôt ã ajamaxpêr anhÿr kaprÿ. Nom ã ajamaxpêr anhÿrja Tirtùm jamaxpêr kôt kêt.

⁶ Kwa më ri ã ajamaxpêr punuj anhÿr kêt në. Tirtùm kot më pahpyrà në aa kot amnhî tomnujre hã. Kop ãm më pahpyrà në tanhmã kot amnhî tomnuj to ronhÿx tanhmã kot we amnhî to në më pahte amnhî tomnuj xwýnh ã më pajarê? Nhÿx më pahpyrà në ã amnhî jarênh anê. Nã ã më ajamaxpêr anhÿrja mex kêt.

⁷⁻⁸ E pa ixprî hã më mã ja jarê ka më inhma. Kot kaj më atô amnhî kukamã ajamaxpêr o:

—E kot paj mãmri ri mëmoj tã ixêx o ri ixpa kê më ixêx nhi hã ixpumu në ixrom Tirtùm pix mã mãn kot amnhî to mex ã harê. Nê ãm pix mã mãn hêx kêt xwýnh ã harê. Hãmri nhùm Tirtùm amnhî tã ixpumu në më ã më kot harênh anhÿrja ma nhùm ja kãm mex në nhùm hkính në. Jakamã ixêx o ri ixpaja ã tanhmã ixto hkêt në. Ra më kot ixrom tãm kot amnhî nhîpêx o pa xwýnh ã harênh jakamã nhùm ixêx nhita ã tanhmã ixto hkêt japêr. Jakamã kot paj ixte amnhî tomnuj

o ri ixpaja mã inhÿrer kêt në. Kêr kê më ja hã ixpumu në ixrom Tirtùm tapxpix kot amnhî to mex xwýnh ã harê.

Anhÿr o ajamaxpêr nom më ajamaxpêrja kot anhÿr kêt. Na hte akwýjaja pa ixpê Pawre ixêx o ixpa hã ri axpên mã ijarê no na pa hte ixêx o ri ixpa hkêt në. ã më ajamaxpêr anhÿr o ri apa xwýnhjaja koja Tirtùm më atomnuj tÿx në kãm ga.

Më më pahte amnhî tomnuj xwýnh ã më pajarêh

Wam Korû 6.9; Karatas 3.22; Xitre 3.3

⁹ Tã tanhmã kot puj më pahpê Ijaew amnhî jarênh to? Xã kot pu më pahte amnhî to mex o Ijaew kêt xwýnhjê jakrenh ã amnhî jarê? Nã më pahte ã amnhî nhîpêx anhÿre hã. Më pahpê Ijaew në Ijaew kêt xwýnhjaja. Më pahpiitã më pahte amnhî tomnuj o axpên pyrãk. Na pa pre ra më mã ja jarê.

¹⁰ Tirtùm kapêr ã kagã htùm kot ja jarênh kot:

Mêhõ na we aa kot amnhî tomnuj kêt kumrêx në pa?

¹¹ Nê mëhõ na we kot mëmoj mex piitã omunh par?

Nê mëhõ na kãm Tirtùm prãm?

¹² Nã amrakati kumrêx. Na më ra piitã hkaga hpa.

Nê kapêr kwým ri tanhmã amnhî tomnuj to ho pa.

Åm mëhõ pyxire në amnhî to mex o ri pa hkêt kumrêx.

¹³ Na htem kapêr punuj pix o ri pa.

Jakamã Tirtùm noo mã më kot amnhî nhîpêxa te kot mëmoj tyk në hkro punuj pyrãk.

Na htem ãm ri hêx pix kukamã ri hamaxpêr o pa. Tanhmã më hêx to xãja te kêp kagã xoprê nhõ wenên xihÿtÿx pyrãk.

¹⁴ Nê na htem më piitã mëmoj nhixi ho ri axpên mã më hixi jarênh o pa. Nê ri tanhmã axpên japrÿ hto ho pa.

¹⁵ Nê tanhmã kapêr mã gêt kãm më kãm kapêr to.

¹⁶ Nê tanhmã më hkwyjê homnuj to. Jakamã nhùm më piitã ri hkaprî në mex kêt në pa.

¹⁷ Nhùm htem ãm axpên mã më gryk xã pix o kapêr o pa.

¹⁸ Nê Tirtùm ã hpijaãm kêt o pa. Na htem kapêr ma në ãm kuma në kãm hkính kêt o pa.

Å na htem amnhî nhîpêx anhÿr rãhã ho pa. Anê.

Å Tirtùm kapêr ã kagã htùm kot më pajarênh anhÿr.

¹⁹ Më pahpê Ijaew ra më pahte ja jarênh mar tÿx. Tirtùm kapêr ã kagã htùm kwý na. Na hte ã më kot amnhî tomnuj xwýnhjê jarênh anê. Nê mãânên më papajaja. Më

pahpê Ijaew na hte ā mē pajarēnh anē. No ām mē papapxipix hkēt. Krī piitā hkōt ri mē pa xwŷnhjaja nhūm ā mē harēnh kot anhŷr. Ijaew kēt xwŷnhjaja nē mē pahpê Ijaew. Mē pahpiitā mē pahte amnhī tomnuj xwŷnh jakamā mēmo kaxyw kot pu mē pahte amnhī tomnuj kēt ā ri amnhī to jarkrar o papa? Kot puj mē ā amnhī jarēnh anhŷr kaprŷ. Jakamā koja Tirtūm mē pahpiitā mē pahte amnhī tomnuj mŷrapê tanhmā mē panhīpêx to.

²⁰ Mē pahōtō koja mē pahte kapêr kōt pix mā amnhī nhīpêx o papa hā mē pajarē? Nē mē pahōtō mā koja mē pamā kapêr nē mē pamā:

–Nā na hte akatāt kōt ixkapêr kōt pix mā amnhī nhīpêx mex nē. Ām hāmri na ka hte ā amnhī nhīpêx anhŷr o apa.

Anhŷr o mē pahōtō mā kot we ā kapêr anē? Nā aa kot mē pahōtō mā kapêr anhŷr kēt. Na pu htem ām kapêr ma nē tee ri amnhī kukamā pajamaxpêr. Mē pahte amnhī tomnuj ā amnhī pumunh kaxyw na pre mē pamā kapêr ā kagā htūmjja gō. Mē pahōtō mē pahte kapêr ā kagā hkōt amnhī nhīpêx mex o papa hkēt kēnā kot kēt ri amnhīm mē pahte amnhī to mex xwŷnh ā mē pajarē.

Tanhmā Tirtūm kot mē pahōtō hkra to hā harēnh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

²¹ Nē na hte Tirtūm mē pahte kapêr kōt amnhī nhīpêx ā mē pahpumunh kōt amnhīm mē pahte amnhī to mex xwŷnh ā mē pajarēnh kēt nē. Jakamā mēhō kukwak ri koja we ā mē pajarēnh anē? Nā nhām mēhō kot tām amnhī nhīpêx rāhā ho pa hā omunh pix kukwak ri koja ā mē pajarēnh anē. Tā mēhō kukwak ri kot ā mē pajarēnh anhŷr xwŷnhta na pre ra mē pamā ho amnhīrit. Amnepēm Tirtūm kapêr ā kagā htūm kamā na pre mēhō hkukamā tanhmā harēnh to. Nē Tirtūm nhŷ hā mē kapêr jarēnh o pa xwŷnhjaja haxwŷja kukamā tanhmā harēnh to ho pa.

²² Jejus Krisja na prem hkukamā harēnh o pa. Tām na pu htem hkōt amnhī xunhwŷ nē amnhī kaxyw kām pajamaxpêr rāhā ho papa nhūm Tirtūm ja pix ā mē pahpumunh kōt amnhīm mē pahte amnhī to mex xwŷnh ā mē pajarē. Mē kot Jejus kōt amnhī xunhwŷr xwŷnh piitāā. Mē ixpê Ijaew nē mē apê Ijaew kēt xwŷnhjaja. Mē pahpiitā mē pahte axpēn pyrāk jakamā kot puj mē pahōtō Jejus kōt amnhī xām nhūm Tirtūm Kra Jejus kot amnhī to mex pix o pa kukwak ri mē pahpumu nē amnhīm pajarēnh o:

–Nā ām hāmri. Ra kot ixkra Jejus kōt amnhī xām jakamā ra inhām te Jejus kot amnhī nhīpêx pyrā nē amnhī to mex o pa. Anē.

²³ No mē pahōtō na mē pahte Tirtūm mē Jejus wa urāk nē amnhī nhīpêx mex rāhā ho ri papa? Nā amrakati kumrēx. Mē pahpiitā mē pahte amnhī tomnuj xwŷnh kēnā.

²⁴ Tā Tirtūm kot mēmoj tā mē pakutā nojarēt rāhā jakamā na hte Jejus Kris kukwak ri amarī amnhīm mē pahte amnhī to mex xwŷnh ā mē pajarēnh o pa. Mē pahte Jejus kōt amnhī xunhwŷr xwŷnh piitāā nhūm ā mē pajarēnh anē. Ra Jejus kot htyk o mē pahte amnhī tomnuj piitā hpānhā amnhīrer par jakamā na hte Tirtūm Jejus kukwak ri amarī mē pahte amnhī to mex xwŷnhjē hā mē pajarē. Te mē pahte amnhī tomnuj kēt kumrēx pyrāk mē pajarē.

²⁵⁻²⁶ Na pre mē pahwŷr Jejus mē nhūm mē pahwŷr wrŷ nē mē panē ty nē htyk o mē pahte amnhī tomnuj piitā hpānhā amnhīrer pa. Jakamā kot pu mē pahōtō amnhī kaxyw hkōt pajamaxpêr nhūm Tirtūm ja hā mē pahpumu nē Kra kukwak ri amnhī katut kōt mē pahte amnhī tomnuj piitā rēnh pa. Jao te aa mē pahte amnhī tomnuj kēt kumrēx pyrāk ā mē pahpumu.

No kēt amnepēm kormā Jejus wrŷk nē mē panē htyk kēt ri mē pa xwŷnhjaja. Tanhmā na pre Tirtūm mē kot hkōt amnhī xunhwŷr xwŷnhjē nhīpêx to? Kormā Jejus mē panē htyk kēt ri mē pa xwŷnhjaja tanhmā na pre mē hipêx to? Nā na pre mē hkwyŷjaja amnhī kaxyw Tirtūm kōt hamaxpêr nē hkōt amnhī xunhwŷr nhūm amnhī tā mē omu nē amnhīm mē harēnh o:

–Nā ām hāmri. Koja nhŷrmā Ixkra ma mē hwŷr wrŷ nē mē nē ty nē htyk o mē kot amnhī tomnuj pānhā amnhīrer pa. Jakamā koja mē tāmjaja amnhī tomnuj pānhā amnhīrer kēt nē. Anē.

Tā nhūm Jejus tām mē pahwŷr wrŷ nē mē pahpiitā mē panē ty. Jakamā nhūm Tirtūm ra mē pahte hkōt amnhī xunhwŷr xwŷnhjaja Kra kukwak ri amnhī katut kōt mē pahte amnhī tomnuj piitā rēnh pa. No na hte amarī ā mē panhīpêx anhŷr kēt nē. Ām Jejus tyk pix kukwak ri na hte ā mē panhīpêx anē. Ām hāmri na hte ā mē panhīpêx mex anē. Na hte tām mē panhīpêx rāhā ho pa.

²⁷ Jakamā kot puj mē ā pajamaxpêr anē nē pajamaxpêr o:

–Nā na pa hte amnhī to mex rāhā o ri ixpa. Amnhī to mex o mē piitā mē hakrenh pa.

Anhŷr o pajamaxpêr kēt nē. Koja mēhō ā hamaxpêr anē nē ām amnhī jarēnh o hēx. Na hte Tirtūm mē pahte amnhī to mex ā mē pahpumunh kōt amnhīm mē pahte amnhī to mex xwŷnh ā mē pajarēnh kēt nē. Mē pahte amnhī to mex rāhāre hā. Nom na pu htem amnhī kaxyw Jejus mā pajamaxpêr nē

hkôt amnhî xunhwý nhüm ja hä mẽ pahpumu nê ri kormã amnhüm mẽ pamex ã mẽ pajarê.

²⁸ E pa axte tanhmã mẽ amã ja jarênh to ka mẽ aprî hä inhma. Mëmoj pumunh kôt na hte Tirtüm mẽ pahte amnhî to mex xwýnh ã mẽ pajarênh wehe? Xã mẽ pahte kapêr tùm kôt amnhî nhîpêx o ri papa hä mẽ pahpumunh kôt? Nã na hte ja hä mẽ pahpumunh kôt ã mẽ pajarênh anhýr kêt nê. Mẽ pahte hkôt amnhî nhîpêx rãhã ho papare hä. Æm mẽ pahte amnhî kaxyw Kra Jejus kôt pajamaxpêr nê hkôt amnhî xunhwýr ã mẽ pahpumunh kôt pix mã na hte mẽ pahte amnhî to mex xwýnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

²⁹ Nê xã Tirtüm kêp mẽ ixpê Ijaew pix nhô Tirtüm pix na? Nã kêp mẽ ixpix nhô Tirtüm kêt. Kêp mẽ ixpê Ijaew nhô Tirtüm nê mãânên kêp mẽ apê Ijaew kêt xwýnhjê nhô Tirtüm.

³⁰ Nê Tirtüm ãm pyxi mex. Axtem hõ kêt. Na hte mẽ pahpiitã mẽ panhîpêx o axpên pyrãk. Jakamã na hte mẽ kot amnhî kaxyw Jejus kôt hamaxpêr o mẽ pa xwýnhjê pumu nê mẽ kot amnhî to mex xwýnh ã mẽ harê. Mẽ ixpê Ijaew nê mãânên mẽ apê Ijaew kêt xwýnhjaja.

³¹ Tã koja mẽhõ htýx hamaxpêr o:

—Nã ixte amnhî kaxyw Jejus kôt ijamaxpêr mex o ipxa nhüm Tirtüm kot amnhüm inhmx ã ijarênh jakamã kot paj axte kapêr kôt amnhî nhîpêx kêt nê. Kot paj ãm amnhî krã hkôt amnhî nhîpêx o ri ipxa. Ra Tirtüm kot ixto hkra kênã.

Anhýr o ajamaxpêr japêr. Kwa mẽ ã ri ajamaxpêr anhýr kêt nê. Na htem amnhî kaxyw Jejus kôt hamaxpêr hãmri nê kãm hkôt amnhî nhîpêx prãm rãhã nê pa ho pa.

4

Apraãw kot amnhî kaxyw Tirtüm kôt hamaxpêr

Karatas 3.6-18; Xiakre 2.23

¹ Nê mẽ panhîgêt finat Apraãwja kêp mẽ pahpê Ijaew pãr krax. Tã mëmoj tã na pre Tirtüm omu nê kot amnhî to mex xwýnh ã harê?

² Xã kot kãm tanhmã amnhî nhîpêx to hä karõ xã hkôt amnhî nhîpêx mex ã omunh xã hkôt nhüm pre ã harênh anê? Nã ja kôt kêt. Kop apu ja kôt ã kot harênh anhýr ronhýx Apraãw amnhî tã omu nê Tirtüm mã amnhî to jarkrar nê kãm:

—Pa Tirtüm? E mãn ka ixpumu. Na pa hte akapêr kôt amnhî nhîpêx mex o ri ipxa.

Anhýr o nhýx pre kãm amnhî to jarkrar. No na pre tanhmã kãm amnhî to jarkrar to hkêt nê.

³ Tã mëmoj tã omunh xã hkôt na pre Tirtüm amnhüm mex ã harê? Nã Tirtüm kapêr ã kagã htüm kot tanhmã Apraãw jarênh to kot:

Na pre Apraãw amnhî kaxyw Tirtüm kôt hamaxpêr nê hkôt amnhî xãm nhüm amnhî tã omu nê amnhüm mex ã harê. Anê.

⁴ Mẽ õ patrãwja na htem kãm mẽ ãpênh xwýnhjaja ãpênh mex ã mẽ omunh xã hkôt mẽ kãm amnhîre.

⁵ No Tirtüm na hte ã mẽ panhîpêx anhýr kêt nê. Na hte mẽ pahte tãm amnhî nhîpêx ã mẽ pahpumunh kôt amnhüm mẽ pahte amnhî to mex xwýnh ã mẽ pajarênh kêt nê. Æm mẽ pahte amnhî kaxyw Kra Jejus kôt pajamaxpêr nê hkôt amnhî xunhwýr ã mẽ pahpumunh kôt pix mã na hte amnhüm ã mẽ pajarênh anê. Ra mẽ pahte amnhî tomnuj o ri papa htã hpãnhã amnhî kaxyw Jejus kôt pajamaxpêr xwýnh pixjaja na hte ã mẽ pajarênh anê.

⁶ Jakamã na hte mẽ pamã amnhî jarênh o:

—Ixte mẽ amex ã mẽ ajarênh tã no ãm mẽ ate amnhî to mex kôt mẽ apumunh kôt na pa ã mẽ ajarênh anhýr kêt nê. Æm mẽ ate amnhî kaxyw Ixkra mẽ wa ixkôt ajamaxpêr nê wa ixkôt amnhî xunhwýr ã mẽ apumunh kôt na pa hte ã mẽ ajarênh anê. Anê.

Pu mẽ ã kot pamã kapêr anhýr ã amnhî tã kuma nê pahkính nê. Pahi finat Tawi na pre haxwýja ja jarênh o:

⁷ Na hte Tirtüm amnhî katut kôt mẽ pahte amnhî tomnuj piitã rênh pa nê axte kãm hamaxpêr kêt nê.

Jakamã pu mẽ ja hä amnhî pumu nê pahkính nê.

⁸ Nê amnhî kukamã pajamaxpêr o: “Hêxta waa nê. Na pa pre amnhî tomnuj o ipxa nê tee ri ja hä amnhî pumu nê ixkaprî nê.

Hãmri nê amnhî to Tirtüm wý nhüm inhma nê ixte amnhî tomnuj o hapêx pa nê axte kãm hamaxpêr kêt nê.

Nã ãm hãmri. Ja mex kumrêx.” Anê.

⁹ Tã mẽ kot ja hä amnhî pumunh nê hkính xwýnhjaja mëmojaja na mẽ? Xã mẽ kot amnhî my kwýrýt kã jakãr xwýnh pix kwýjaja na pre pahi Tawija ã mẽ harênh anê nã? Nã mẽ tapxipixjaja kêt. Mãânên mẽ kot amnhî jakãr kêt xwýnh kwýjaja. Tanhmã na pre ra Tirtüm kapêr ã kagã htüm kot finat Apraãw jarênh to? Na pre harênh o:

Na pre Apraãw amnhî kaxyw Tirtüm kôt hamaxpêr nê hkôt amnhî xãm nhüm amnhî tã omu nê amnhüm mex ã harê. Anê.

¹⁰ Xã Apraãw ra kot amnhî my kwýrýt kã krãhýr nhîrõ pê na pre Tirtüm amnhüm mex ã harê? Nã kormã kot amnhî krãhýr kêt ri na pre ã harênh anê.

11 Kormã kot amnhî krâhyr kêt ri kãm kapêr nê kãm:

—E ate amnhî kaxyw inhmã ajamaxpêr nê ixkôt amnhî xãm â ixte apumunh kôt na pa amnhîm amex â ajarê.

Anhÿr o kãm kapêr hãmri nê rî kormã kãm tanhmã amnhî krâhyr to hã kãm karõ nhùm kuma nê mar xà hkôt amnhî my kwryt kã hkwy krãhta. Kot Tirtùm mã amnhî nhõr â amnhî to amnhîrit kaxyw â amnhî nhîpêx anê.

Nom kormã amnhî krâhyr kêt ri na pre Tirtùm amnhîm mex â harê. Tã Ijaew kêt xwÿnhjaja kot amnhî jakâr kêt tã mē hkwyjaja Apraãw pyrà nê amnhî kaxyw Tirtùm mã hamaxpêr nê kãm amnhî nhõr jakamã Apraãw te kēp mē hpār krax maati pyràk.

12 Nê määnēn mē pahpê Ijaew. Kot pu j mē pahpê amnhî kaxyw Tirtùm kôt pajamaxpêr nhùm amnhî tã mē pahpumu nê mē pamex â mē pajarê. No ãm mē pahte amnhî jakâr â mē pahpumunh kôt â mē pajarēnh anhÿr kêt nê. ãm Apraãw pyrà nê amnhî kaxyw Tirtùm kôt pajamaxpêr pix â mē pahpumunh kôt na hte mē pamex â mē pajarê. Kormã Apraãw kot amnhî my kwryt kã krâhyr kêt ri ra kot amnhî kaxyw Tirtùm mã hamaxpêr jakamã kēp mē pahpê Ijaew mē pahte urak nê amnhî kaxyw Tirtùm mã pajamaxpêr xwÿnhjê hpār krax maati. Ijaew kêt xwÿnhjê pyrà nê kēp mē pahpār krax maati.

Tirtùm kot Apraãw mã mēmoj mex jarēnh Karatas 3.22

13 Amnepēm na pre Tirtùm Apraãw mã tanhmã kapêr to nê kãm:

—E koja nhÿrmã akanrêhã akra nê atãmnhwÿjaja amÿrpe apyrã nê krî piitã hkôt mē kēp mē õ pahi. Anê.

Tã tanhmã Apraãw kot amnhî nhîpêx to hã omunh xà hkôt na pre â kãm kapêr anê? Xà kot kãm tanhmã amnhî nhîpêx to hã karõ nhùm kot hkôt amnhî nhîpêx mex â omunh xà hkôt na pre hkînh nê â kãm kapêr anê? Nã kot anhÿr kêt. Mē pahpê kot pu we Tirtùm kapêr xà hkôt pix mã amnhî nhîpêx mex rãhã ho ri papa? Mē pahpê hihtÿx kēnã. ãm kot amnhî kaxyw Tirtùm kôt hamaxpêr nhùm kot amnhî tã omunh nê amnhîm mex â harēnh kôt pix mã na pre â kãm kapêr anê.

14 Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkôt amnhî nhîpêx mex rãhã ho ri apa. Hã koja nhÿrmã akanrêhã akra nê atãmnhwÿjaja kēp krî piitã hkôt mēõ pahihti.

Anhÿr o kãm kapêr ronhÿx ãm kãm â kapêr anhÿr kaprÿ. Apraãw aa kot kapêr piitã hkôt amnhî nhîpêx mex o pare hã. Kop apu â

kãm kapêr anhÿr ronhÿx pre kuma nê tee ri amnhî kukamã hamaxpêr nê hamaxpêr o:

—Kwa nã. Ra ixte Tirtùm kôt amnhî xãm tã tanhmã kot pa amnhî to nê kapêr piitã hkôt amnhî nhîpêx mex rãhã ho ri ixpa? Kot paj tee ri inhmã â amnhî nhîpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtãmnhwÿjaja kēp mē õ pahi hkêt nê pa. Hêxta waa nê.

15 Koja Tirtùm ixte kapêr kwÿm ri tanhmã ixte amnhî tomnuj to hã ixpumu nê tanhmã ixtomnuj to. No mēhõ kot we kapêr piitã hkôt amnhî nhîpêx mex rãhã ho pa? Nã amrakati kumrêx.

Anhÿr o nhÿx pre hamaxpêr.

16 No na pre Tirtùm â kãm kapêr anhÿr kêt nê. Ra kot hprî hã mē pahte amnhî nhîpêx â mē pahpumunh mex kēnã. Na pre ãm kãm:

—E ate amnhî kaxyw ixkôt ajamaxpêr nê ixkôt amnhî xãm jakamã kot paj amarî ato mex nê. Anê.

Tirtùm na hte mēmoj tã amnhî jarēnh o amnhî to hêx kêt nê. Na hte mēmoj tã amnhî jarēnh xà hkôt tanhmã mēmoj nhîpêx to ho ri pa. Jakamã koja mē pahte Apraãw pyrà nê amnhî kaxyw hkôt pajamaxpêr xwÿnh piitã mē pahpê mex nê.

Nê xà na pre â mē pamã kapêr anê nê mē pamã:

—E kot kaj mē ixkapêr kôt pix mã ri amnhî nhîpêx o ri apa hã kot paj mē ato mex rax nê.

Anhÿr o mē pamã kapêr? Nã na pre â mē pamã kapêr anhÿr kêt nê. Na pre mē pamã:

—Kot kaj mē finat Apraãw pyrà nê amnhî kaxyw ixkôt ajamaxpêr nê ixkôt amnhî xunhwÿ hã kot paj mē ato mex nê.

Anhÿr o mē pamã kapêr. Tã Apraãw kumrêx kot mē pakukamã amnhî kaxyw hkôt hamaxpêr jakamã te kēp mē pahpiitã mē pahte urak nê â amnhî nhîpêx anhÿr xwÿnhjê pâr krax maati pyràk.

17 Amnepēm na pre Tirtùm tanhmã Apraãw mã kapêr to. Kot tanhmã kãm kapêr toja Tirtùm kapêr â gagã htùm kamã na. Na pre kãm:

Kot kaj apê ahpÿnhã ri mē urojê hpār krax. Anê.

Kormã Apraãw kra hkêt tã nhùm hkra hkukamã â kãm kapêr anê. Hãmri nhùm kuma nê hkôt hamaxpêr kurê kumrêx nê hamaxpêr o:

—Hêxta waa nê. Ra ixprõ mē wa ijamê wa ixpigêt tÿx nê wa ixkra hkêt kumrêx. Kot paj wa tanhmã amnhî to nê tokyx ty. Tã ra Tirtùm kot ixkra nê ixtãmnhwÿjê hkukamã â inhmã mē harēnh anhÿr kēnã. Jakamã kot pa xep wa ixpigêt tÿx tã tanhmã amnhî to nê ixkra. Nã kot pa xep wa anê. Nê koja ixkraja tanhmã amnhî to nê ixpê htyk japêr tã koja Tirtùm akupÿm inhmã ho htîr. Nã koja inhmã ho anê. Ra kot inhmã ixkra

nê ixkanrêhâ ixtâmnhwý sohtô jarênh kênh. Anê.

¹⁸⁻¹⁹ Na pre ra hpigêt tÿx nê. Ra hã amgrã pè 100 nê hkurê kêt nê pa. Nhùm hprô mãânên hpigêx tÿx nê. Nê ôhy kamã hkra hkêt kumrêx. Kormã wa hkra hkêt tâ nhùm Tirtüm Apraãw mã hkra nê htâmnhwý sohtô hã harê. Nê kêp mē urojê sohtôjê pâr krax ã kãm harê. Hãmri nhùm kuma nê amnhî kaxyw hkôt hamaxpêr tÿx kurê kumrêx.

²⁰ Nê ã amnhî nhîpêx anhÿr rãhã ho pa. Na pre war amnhî kra hã amnhî jarênh ma nê tee ri amnhî kukamã hamaxpêr kêt nê. Æm Tirtüm tãm kot wa kãm wa hkra jarênh pix mã hamaxpêr pè amnhî kaxyw kãm hamaxpêr tÿx o ri wa pa. Nê hamaxpêr o:

—Nà ra wa ixpigêt tÿx kumrêx tâ koja xep Tirtüm wa inhmã wa ixkra hõ gõ. Nà koja wa inhmã kugõ. Hêxta waa nê. Æm hãmri Tirtümja mex o mex.

²¹ Nà kot wa inhmã wa ixkra jarênh xã hkôt koja wa inhmã kugõ. Ja kaxyw àhpumunh o àhpumunh. Tirtümja hêx kêt. Anê.

²² Hãmri nhùm Tirtüm ã hamaxpêr anhÿr ã omu nê amnhîm mex ã harê. Nê kot kãm amnhî jarênh xã hkôt wa kãm wa hkraja gõ.

²³ Nom na pre amnhîm Apraãwja pix mex ã harênh kêt nê.

²⁴ Kot puj mē pahto urak nê amnhî kaxyw hkôt pajamaxpêr nhùm amnhî tâ mē pahpumu nê ra kot Apraãw jarênh ta pyrà nê amnhîm mē pamex ã mē pajarê. Na pre mē panhõ Pahihti Jejus ty nhùm Tirtüm akupÿm ho htÿr. Tã mē papajaja na pu prem amnhî kaxyw Jejus kôt pajamaxpêr nhùm Tirtüm ja hã mē pahpumunh kôt mē pahte amnhî to mex xwÿnh ã mē pajarê.

²⁵ Na pre mē pahwÿr Kra Jejus mē nhùm mē pahwÿr wrÿ. Tã nhùm mē axtem nê kupi nom nhùm amarî htyk kêt nê. Na pre htyk o mē pahte amnhî tomnuj pãnhã amnhîrer pa. Ja kaxyw na pre Tirtüm mē pahwÿr kumê. Jakamã nhùm prem kupi nhùm akupÿm ho htÿr. Tã mēmo kaxyw na pre Tirtüm ã mē pahwÿr Kraja mēnh nhùm mē panê htyk anê nhùm akupÿm ho htÿr? ãm kot kukwak ri amnhîm mē pahte amnhî kaxyw hkôt pajamaxpêr xwÿnhjaja mē pahte amnhî to mex xwÿnh ã mē pajarênh pix kaxyw.

3

Tirtüm kot mē pahto hkwy hã harênh

Matêwre 5.12; Siktün Korî 4.8, 5.18-21; Xiakre 1.2-4; Wam Pêtre 4.12, 5.9

¹ Nê na pu prem amnhî tomnuj o ri papa nhùm Tirtüm ja hã mē pahpumu nhùm ja kêp omnuj nê. Jakamã nhùm Jejus amnhî grõnh kôt wrÿ nê mē panê ty. Nhùm Tirtüm htykja kukwak ri mē pahto hkwy. Mē

pahte amnhî kaxyw hkôt pajamaxpêr nê hkôt amnhî xunhwÿr ã mē pahpumu hãmri nê ã mē panhîpêx anê pu mē ra pahpê hkwy hã papa.

² Na pre Jejus Tirtüm mã mē pajarênh o: —E jajê pumu. Na mē ra amnhî kaxyw pamã hamaxpêr nê pahkôt amnhî xunhwÿ. Anê.

Hãmri nhùm kuma nê mē pahto mex nê mē pakutã nojarêt rãhã ho pa. Tã kot puj mē pahpê hkrajaja nhÿrmã pano ho Tirtüm mex o mex xwÿnhja pumu. Jakamã na pu htem amnhî kukamã ã pajamaxpêr anhÿr o pahkÿnh nê papa nê pajamaxpêr o:

—Hêxta waa nê. Kot paj nhÿrmã inhno ho Tirtüm mex o mex ã omu nê kuri ixpa ho ixpa. Nã ãm hãmri. Inhmã omunh prãm tÿx kumrêx. Anê.

³⁻⁴ Nê na htem Jejus ã mē pahtomnuj nê pu mē pahpunuj nê ri papa. Pamex kêt nê tâ tee ri amnhî kukamã pajamaxpêr o ri pahkaprî nê papa hkêt nê. Kwâr mē mãmrî ã mē panhîpêx anê. Pu mē pahpunuj kurê Jejus kôt amnhî xunhwÿr tÿx o kormã mō. Nê mē umaj hkaga hkêt nê. Arî amnhî wÿr kamã pajamak o papa. Jao amnhî kaxyw kumã pix mã kãm pajamaxpêr tÿx rãhã pahkÿnh nê ri papa.

Kot puj mē ã amnhî nhîpêx anhÿr o ri papa nhùm Tirtüm ja hã mē pahpumu nhùm ja kãm mex nê. Hãmri nhùm ja kaxyw tanhmã mē pahto paxihtÿx to pu mē pahpunuj tâ hkôt pajamaxpêr tÿx rãhã nê.

⁵ Nê ra mē kot Jejus ã tanhmã mē panhîpêx to htã pu mē amnhî kaxyw tee ri kãm pajamaxpêr kaprÿ hkêt nê. Ra kot mē pamã amnhî Karõ nhõr nhùm kot mē pahkarõ mã gjêx kênhã kot pu kêt mē ri tee ri amnhî kaxyw kãm pajamaxpêr kaprÿ. Na hte Karõja mē pahkarõ kamã mē pamã Tirtüm kapêr jarênh o amnhîrît nê kãm mē papajê htÿx ã harênh o amnhîrît rãhã nê.

⁶ Amnepê mã na pre mē piitã amnhî tomnuj o ri pa nê tee ri kãm amnhî to mex rãhã hprãm kaprÿ. Mêhõ kot we ja kaxyw tanhmã mē hkrã hto? Jakamã nhùm Tirtüm ja hã mē omu hãmri nê mē kaxyw Kra Jejus mã kãm:

—E inhma. Ka kot kaj mē kot tanhmã amnhî tomnuj to ho paja ã ma mē hwÿr wrÿ. Ixte mē nê atyk kaxyw agrõnh kôt mē hwÿr amênh jakamã kot kaj wrÿ nê mē kãm ixkapêr jarênh o ri mē hkôt apa. Rãhã nhùm mē hkwyjjaja apî ka mē piitã mē nê ty. Anê.

Hãmri nhùm kuma nê kãm:

—Tõe. Nã kot paj amã hprãm xã hkôt ã amnhî nhîpêx anê. Anê.

Hãmri nê man amnhî grõnh kôt mē pahwÿr wrÿ.

⁷⁻⁸ Xã koja mêhõ kãm axpên japê xaj axpên nê ty nã? Xã kot mêhõ tãm kot amnhî nhîpêx xwÿnh tâ nhùm mē kot hpîr kaxyw nhùm

hkrâmnhwýja kãm hapê nê. Nê nê amnhî grônî kôt mê kãm xa nhùm mê kupî nhùm nê ty? Nâ kot apu nê htyk japêr ko. No mê papajaja. Na pu htem mêhõ hkrâmnhwýta kînhâ arî amnhî tomnuj râhâ ho ri papa htâ nhùm Tirtúmja arî kãm mê pajapê nê. Nê kãm mê pajapê xaj mê pahwýr Kris mê nhùm mê panê ty. Arî mê pahte amnhî tomnuj râhâ ho papa tââ. Na pre â Tirtúmja kãm mê pajapê hâ â mê pahwýr mênî anê.

⁹ Na pre ty nhùm hkamrõ hkwy axkapî nhùm Tirtúm ja hâ omunh xâ hkôt tâm amnhîm mê paxunhwý. Tâ Jejus kukwak ri koja ma mê kot amnhî xâ htýx kamâ hamak tùm xâta wýr mê parênh kêt nê. Mê pahpê hkwy kênâ kot kêt hwýr mê parê.

¹⁰ Nom kormâ mê pahpê hkwy hkêt ri na pu prem te ra kutâ amnhî xunhwýr pyrâk o amnhî nhîpêx. Tâ nhùm Kra mê panê ty pu mê hkôt amnhî xunhwý. Jakamâ nhùm Tirtúm Jejus tyk kukwak ri mê pahto hkwy. Nê ra akupým Kra ho hfrî jakamâ kot puj mê pahte hkôt amnhî xunhwýr xwýnhjaja nhýrmâ wa urâk nê wa kuri pahfür tùm nê pamex kumrêx nê papa ho papa.

¹¹ Nê mê pahpê kuwy rax wýr mê papa mâ xwýnh kêt jakamâ na pu htem pahkînh nê pajamakêtkati nê ri papa. Nom ja pix â na pu htem â amnhî nhîpêx anhýr kêt nê. Mê pahpê Tirtúm krâmnhwý jakamâ na pu htem määnên pahkînh nê ri papa. Pahihti Jejus Kris kot mê panê htyk â omunh xâ hkôt na pre Tirtúm mê pahte hkôt amnhî xunhwýr xwýnhjê ho hkwy jakamâ na pu htem pahkînh nê pajamakêtkati nê ri papa.

*Atâw mê Kris wa harênh
Wam Korî 15.20-22, 45-49*

¹²⁻¹³ Nê amnepêm na pre Tirtúm finat Mojes mâ tanhmâ kapêr to. Hâmri nhùm kuma nê Ijaew kot tanhmâ amnhî nhîpêx to ho pa kaxyw mê kãm mêmojta â karõ nê mê kãm hâ hkagâ. Mê kot kamâ harênh nê mar nê Tirtúm kôt amnhî nhîpêx kaxyw. Hâmri nhùm mê tee ri â kot mê kãm mêmoj tâ karõja ma nê tanhmâ axpên mâ kapêr to nê axpên mâ:

–Kwa na pu htem â amnhî nhîpêx anhýr kêt nê. Na pu htem âm amnhî tomnuj týx kumrêx o ri papa nê amnhî to mex kêt kumrêx. Anê.

Âm hâmri na prem â amnhî jarênh anê. Mê pahpiitâ mê pahte amnhî tomnuj xwýnh kênâ. My kot wa pê finat Atâwja kumrêx na pre tanhmâ mê pahte amnhî tomnuj to ho hkrax. Mýrapê na pre hfrî tùm nê ri pa ho pa hkêt nê. Na pre ri pa nê gaa nê ri hpigêt týx nê ty. Tâ mýr pê ri mê papa xwýnhjaja na pu htem urâk nê tanhmâ amnhî tomnuj to ho ri papa. Mýrapê na pu htem ri papa nê gaa nê Atâw pyrâ nê pahtyk pa. Tirtúm kot mê pahtâ Atâw mâ kapêr xâ hkôt.

¹⁴⁻¹⁹ Jakamâ na prem kormâ Mojes kator xwýj ri pika piitâ hkôt ri pa nê gaa nê haxwýja htyk pa. Mê kot amnhî tomnuj mýrapê ty. Atâw pyrâ nê Tirtúm kot mêmo xõ nê hkurê xwýnhnta krêr kêt tâ urâk nê tanhmâ amnhî tomnuj to ho ri pa. Hâmri nê mýrapê ty.

Na pre â Atâwja mê pahpiitâ mê pamâ Tirtúm kapêr nhîrõp âm nê amnhî tomnuj o hkrax anê nê mêmo xõta krê. Jao te mê pahpiitâ mê pahte urâk nê kumê hkur pyrâk o mê panhîpêx. Mýrapê nhùm htem arî pika piitâ hkôt hapõj nê kormâ hprîre htâ ra Atâw pyrâ nê tanhmâ amnhî tomnuj to ho ri pa. Jakamâ nhùm Tirtúm Atâw kot tanhmâ amnhî tomnuj to hâ omunh xâ hkôt mê pakukamâ hamaxpêr o:

–Nâ koja ma htem pyrâ nê amnhî tomnuj o ri pa. Mýrapê kot paj ma mê kot amnhî xâ htýx kamâ hamak tùm xâta wýr mê rênî pa. Anê.

Tâ Jejus Kris mê Atâw wa harênhja kot axpên pyrâk jakamâ na hte Atâw kanrêhâ hkra nê htâmnhwýjaja Atâw kot amnhî nhîpêx kôt amnhî nhîpêx o ri pa râhâ nê. Urâk nê amnhî tomnuj râhâ ho ri pa. Nhùm axtem Jejus kôt mê kot amnhî xunhwýr xwýnhjaja Jejus kôt amnhî nhîpêx râhâ ho ri pa. Te mê kêp hkanrêhâ hkra nê htâmnhwýjê pyrâ nê urâk nê tâm amnhî nhîpêx. Na htem â ahpýnhâ amnhî nhîpêx anhýr o ri pa. Na pre Jejus mê pahte amnhî tomnuj pânâ amnhîrer par kaxyw mê panê ty. Jakamâ mê pahte hkôt amnhî xunhwýr xwýnhjaja na hte Tirtúm ja hâ mê pahpumunh kôt mê pahto hkra. Kot puj mê nhýrmâ pahtyk tâ nhùm akupým mê pahto mê pahfür pu mê wa kuri pahfür tùm nê papa ho papa.

Atâw kot Tirtúm kapêr nhîrõp âm jakamâ na hte Tirtúm mê pahpiitâ mê pahte amnhî tomnuj xwýnh â mê pajarê. Nom nhùm Jejus Atâw rom kot Tirtúm kapêr mar nê hkôt amnhî nhîpêx râhâ jakamâ na hte Tirtúm mê pahte hkôt amnhî xunhwýr xwýnhjaja amnhîm mê pahte amnhî to mex xwýnh â mê pajarê.

Nhùm Atâw kot Jejus kînhâ Tirtúm kapêr nhîrõp âm mýrapê na hte mýr pê mê pa xwýnhjaja ohtõ nê pa nê gaa nê Atâw pyrâ nê htyk pa. Hâmri nê kormâ hfrî ri amnhî to mex o pa hkêt mýrapê ma mê kot amnhî xâ htýx kamâ hamak tùm xâta wýr ma hapêx. Tâ nhùm Tirtúmja mex o mex jakamâ na hte Jejus Kris mê wa mê pakamâ ukapî nê. Jakamâ na pre mê pahwýr Jejus mê nhùm mê pahwýr wrý hâmri nê htyk o mê pahte amnhî tomnuj pânâ amnhîre. Nhùm Tirtúm â kot amnhî nhîpêx anhýr kukwak ri mê pahte hkôt amnhî xunhwýr xwýnhjaja amarî tanhmâ mê pahto mex to ho ri pa. Atâw kot amnhî tomnuj pix pumunh kôt na pre Tirtúm mê pahpiitâ mê pahte amnhî

tomnuj xwýnh ä më pajarë. Tã nhüm Jejus më pakamã ukapri në më panë ty nhüm Tirtüm ja hä omunh xã hkôt ra më pahte amnhî kaxyw hkôt pajamaxpër xwýnhjaja te më pahte aa tanhmã amnhî tomnuj to hkêt pyrãk o më panhîpëx. Na hte amarî ä më panhîpëx anë.

Në Atãw kot amnhî tomnuj mýrapë na htem piitã ri pa në tanhmã amnhî to në ty rý ri pa në gaa në wejre në ty. No na pre Jejus Krisja aa kot amnhî tomnuj kêt kumrëx tã amarî më panë ty. Jakamã nhüm Tirtüm ra kukwak ri më pahte hkôt amnhî xunhwýr xwýnhjë kutã nojarët rãhã në më pakukamã hamaxpër o:

–Nã më kot Ixkra hkôt amnhî xunhwýr xwýnhjaja na pa më omunh pa. Tã kot paj Ixkrata kukwak ri tãm më unhwý nhüm më nhýrmã wa ixri mex në htír tùm në pa ho pa. Anë.

²⁰⁻²¹ Në na pre Tirtüm tanhmã finat Mojes mã kapër to. Më piitã më kot amnhî tomnuj o ri më pa hä amnhî pumunh kaxyw. Hãmri në më kot kapër mar në hkôt amnhî nhîpëx o pa kaxyw tanhmã më kaxyw Mojes mã kapër to. Nhüm kuma në amnhî xõ ri më kãm hä kagã në më kãm harënh o ri më hkôt pa. No nhüm prem kapër ma në ãm kuma në hkwým pix mã ri tanhmã amnhî tomnuj to ho pa. Në pika piitã hkôt ja ari rãhãã. Ja mýrapë koja më nhýrmã ty në ma më kot amnhî xã htýx kamã hamak tùm xãta wýr ma pa. Nom Tirtüm ari kãm pika piitã hkôt më papa xwýnhjë japë në. Më pahte amnhî tomnuj o papa tã nhüm kãm më pahto mex prãm në. Jakamã na pre më pahwýr Kra Jejus Kris më nhüm më pahwýr wrý. Më panë htyk o kot më pahte amnhî tomnuj pãnhã amnhîrer kaxyw. Tã kukwak ri kot puj më pahte amnhî kaxyw hkôt pajamaxpër xwýnhjaja nhýrmã Tirtüm më wa kuri pahtír tùm në pa mex në papa ho papa.

6

Më kot më pahkrã kumrãr ä më harënh Sikün Korît 5.17; Karatas 2.19-20, 5.24, 6.14; Epes 4.17-24; Korosë 3.1-11; Wam Pêtre 4.1-6

¹ Në më pahte ari tõhã tanhmã amnhî tomnuj to htã nhüm Tirtüm ari kãm më pajapë në. Në ari më pakutã nojarët rãhã në. Jakamã xã kot kaj më atõ ä harënh anhýrja ma në atýx ri ä ajamaxpër anë në ajamaxpër o:

–Nã Tirtüm kãm ijapë në kot ixkutã nojarët rãhã ho ri pa jakamã mo kaxyw kot pa Jejus kôt amnhî nhîpëx o ri ixpa? Nã kot paj ho anhýr kêt në. Anë.

Ka ä më atõ atýx ri ajamaxpër anhýr japër. Kwa xã ajamaxpërja mex? Nã mex kêt.

² Ä ajamaxpër anhýrja më hamaxpër mex xã hkôt kêt. Ra më pahte Jejus kôt amnhî xunhwýr në më pahte amnhî tomnuj kaga jakamã nhüm më pahte amnhî tomnujja te ra më pahpë hapëx pyrãk. Jakamã kot puj më ari tanhmã amnhî tomnuj to ho ri papa hkêt në.

³ Mëmo kaxyw na htem Tirtüm mã më pahkrã kumrã? Nã më pahte ra Jejus kôt amnhî xunhwýr ä amnhî to amnhîrît kaxyw. Te Jejus htyk nhüm më pahte amnhî tomnujja haxwýja hkôt htyk në hapëx par pyrãk o amnhîrît kaxyw. Jakamã na pu htem pajamaxpër o:

–Nã kot paj axte tanhmã amnhî tomnuj to ho ri ixpa hkêt në. Anë.

⁴ Na htem Tirtüm mã gõx kãm më pahkrã kumrã nhüm më pahte amnhî nhîpëx tùmja te më kot Jejus kôt haxwýja haxãr pyrãk. Hãmri nhüm më akupým më pahto api. Te Tirtüm hihtýx o hihtýx o kot akupým Kra Jejus ho htír pyrãk. Te më pahtyk tã nhüm akupým kot më pahto më pahtír pyrãk. Pãnhã më pahte amnhî nhîpëx nyw o amnhî nhîpëx kaxyw.

⁵ Nhüm më pahte amnhî nhîpëx tùmja te Jejus kôt htyk në hapëx par pyrãk. Në më pahte amnhî nhîpëx nywja te Jejus akupým htír pyrãk o amnhî nhîpëx.

⁶ Amnepëm na pu pre htem amnhî tomnuj rãhã ho ri papa. Te më kãm më ãpënh xwýnhjaja kot më õ patrãw mã ãpënh rãhãta pyrãk. Tã nhüm Kris më panë ty. Kot më panë më pahte amnhî tomnuj pãnhã amnhîrer në ho hapëx par kaxyw më panë ty. Jakamã te më pahte amnhî tomnuj më pajamaxpër punujja te pî kahpa hä Jejus kôt harir në htyk në hapëx par pyrãk. Pãnhã më pahte amnhî nhîpëx nyw pix o amnhî nhîpëx kaxyw. Në më pajamaxpër nyw pix o pajamaxpër papa kaxyw.

⁷ Na hte më htyk xwýnhjaja axte tanhmã amnhî tomnuj to hkêt në. Tã kër pu më urãk në axte ä amnhî nhîpëx anhýr kêt në.

⁸ Na pu prem Jejus kot më panë htyk ä harënh ma në pajamaxpër o:

–Nã na Jejus kot më panë htyk jakamã kot paj ixte amnhî nhîpëx tùm kaga hpa në hpãnhã kot amnhî nhîpëx kôt pix mã ri amnhî nhîpëx o ri ixpa. Te ra ixtyk në axte tanhmã ixte amnhî tomnuj to ho ri ixpa hkêt pyrãk. Jao amnhî nhîpëx nyw pix o amnhî nhîpëx o ri ixpa. Anë.

⁹ Në Jejus htyk nhüm Tirtüm akupým ho htír jakamã koja axte htyk kêt në. Ra më pahte ja mar mex.

¹⁰ Na pre ãm htyk tipxi htã htykja o më pahpiitã më pahte amnhî tomnuj pãnhã amnhîre. Tã ra akupým htír o htír në kaxkwa kamã Tirtüm mã tanhmã amnhî nhîpëx to ho ri pa.

¹¹ Tã më papajaja kot puj më ã kot amnhî nhîpêx anhÿrja ma nê ã pajamaxpêr anê nê pajamaxpêr o:

—Nã ãm hãmri. Te ixte Jejus pyrã nê ra ixtyk pyrãk jakamã kot paj axte amnhî tomnuj o ri ixpa hkêtnê. Te ixte Jejus pyrã nê akupÿm ixtÿr nê ãm Tÿrtÿm kôt pix mã amnhî nhîpêx o ri ixpata pyrãk o kot paj hpãnhã amnhî nhîpêx o ri ixpa. Anê.

¹² Jakamã kot ka më atõ nhÿrmã tanhmã amnhî kukamã ajamaxpêr punuj to japêr hãmri nê ajamaxpêr o:

—Nã inhmã ã amnhî tomnuj anhÿr prãm nê. Omnuj tã kot paj ho anê. Nã ixte ho anhÿr mã kênã.

Anhÿr o ajamaxpêr japêr tã kwa më ã ajamaxpêr anhÿr kêt nê.

¹³ Kêt Tÿrtÿm mã mãn amnhî gõ nê hkôt amnhî nhîpêx o ri apa. Hãmri nê amnhî krã kamã mëmoj mex pix mã ajamaxpêr nê tãm akapêr. Nê më kot amnhî to mex xwÿnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê më kot amnhî tomnuj o më pa xwÿnhjê hkôt ri apa.

Nê kagõxyhti japrõ nê ho akõm o ri më hkôt apa.

Tã ra hpãnhã Tÿrtÿm mã amnhî gõ nê axte ã amnhî nhîpêx anhÿr kêt nê.

¹⁴ Amnepêm na pu prem tanhmã më pahte amnhî nhîpêx to ho papa hkukamã pajamaxpêr nê pajamaxpêr o:

—Nã kot paj Tÿrtÿm kapêr kôt pix mã mãn ri amnhî nhîpêx o ri ixpa nê amnhî to mex o ri ixpa nhÿm Tÿrtÿm ja hã ixpumu nê amnhîm inhmex ã ijarê. Nã kot paj anê.

Anhÿr tã no ãm tee ri më pamã hkôt amnhî nhîpêx o ri papa hprãm kaprÿ nê arÿ ri kapêr kwÿm tanhmã amnhî nhîpêx to ho ri papa. Tã ra hpãnhã axtem pajamaxpêr o:

—Nã Tÿrtÿm kot ixkutã nojarêtnê rãhã ho pa xwÿnh. Tã ra ixte hkôt amnhî xãm jakamã koja tanhmã ixto pa hkôt amnhî nhîpêx mex o ri ixpa. Nã koja ixto anê.

Anhÿr jakamã ra amnhî kaxyw kãm pajamaxpêr tÿx o mëmoj punuj kutã amnhî to htÿx nê.

Më pahte Tÿrtÿm mã tanhmã amnhî nhîpêx to hã më pajarênh

Juãw 8.34

¹⁵ Tã ã kot anhÿr jakamã tanhmã kot puj wem pajamaxpêr to? Xã kot pu më ã pajamaxpêr anê nê pajamaxpêr o:

—Nã na hte Tÿrtÿmja ixte kapêr kôt amnhî nhîpêx o ixpa hã ixpumunh kôt amnhîm inhmex ã ijarênh kêt nê. ãm kêp ixkutã nojarêtnê rãhã nê amarÿ amnhîm inhmex ã ijarênh xwÿnh jakamã kot paj arÿ amnhî tomnuj rãhã nê aa ja kaga hkêtnê.

Anhÿr o kot puj më pajamaxpêr? Nã kot puj më ã pajamaxpêr anhÿr kêt nê. ã më pajamaxpêr anhÿrja mex kêt.

¹⁶ Koja mëhõ nhÿri kot amnhî tomnuj tÿx xwÿnhjê hõ pumu nê kãm amnhî jarênh japêr nê kãm:

—E inhma. Kot paj ãm akõt pix mã tanhmã amnhî nhîpêx to ho ri ixpa. Jakamã e inhmã mëmoj tã karõ pa ama nê amã tanhmã ho ho ri ixpa.

Anhÿr o kãm kapêr japêr. Hãmri nê ã amnhî nhîpêx anhÿr tã amnhî tomnuj pix o ri pa. Tã ã më kot amnhî nhîpêx anhÿr o më pa xwÿnhjaja koja nhÿrmã ty hãmri më kot amnhî xã htÿx kamã hamak tÿm xãta wÿr ma hapêx.

No koja mëhõ Tÿrtÿm mã amnhî jarênh nê kãm:

—Pa Tÿrtÿm. E kot paj ãm akapêr kôt pix mã ri amnhî nhîpêx o ri ixpa.

Anhÿr o kãm amnhî jarê nê hkôt amnhî nhîpêx mex o pa. Nê tãm amnhî nhîpêx o ri pa. Hãmri nê nhÿrmã ty nê ma õ krÿ hwÿr api nê Jejus më Tÿrtÿm wa kuri htÿr tÿm nê mex rãhã nê pa ho pa.

¹⁷ Tã më kajaja na ka xep prem tee ri më amã më ate amnhî tomnuj mã anhÿrer prãm tã nhÿm te tãm kot amnhî tã më ato htÿx pyrãk o më anhîpêx ka më tee ri kãm anhÿrer prãm kaprÿ. Tã nhÿm Tÿrtÿm tanhmã më akrã hto ka më kapêr ma nê amnhî kaxyw hkôt ajamaxpêr tÿx nê ãm hkôt pix mã amnhî nhîpêx. Pa ja hã më ajarênh ma nê më anhÿ hã ixkÿnh nê. Nê Tÿrtÿm mã ixte më ajarênh mar nê më anhÿ hã ixkÿnh ã amnhî jarê.

¹⁸ Na pre Tÿrtÿm tanhmã më akrã hto ka më amnhî tomnuj mã anhÿrer pa nê hpãnhã hkôt pix mã amnhî nhîpêx.

¹⁹ E kot paj ixpri hã tanhmã më amã ja jarênh to. Te ixte ixkrajê jahkre pyrãk o kot paj më amã awjarê. Nã amnepêm na ka prem ajamaxpêr punuj kôt amnhî tomnuj o ri apa. Nê gaa nê ra amnhî tomnuj pix kukamã ajamaxpêr. Tã kër ka më arÿ ã amnhî nhîpêx anhÿr kêt nê. Pãnhã tãm ri ajamaxpêr o ri apa. Jao gaa nê ra Tÿrtÿm kãm hprãm xã hkôt tãm amnhî nhîpêx mex nê.

²⁰ Na ka prem tee ri amã amnhî tomnuj mã anhÿrer prãm kaprÿ. Te tãm kot amnhî tã më ato htÿx nê amnhî kôt më ato pa pyrãk o më anhîpêx.

²¹ Xãn ka prem ã amnhî tomnuj anhÿr o apa nê akÿnh nê ajamakêtkati nê ri apa? Nã na ka prem akÿnh nê apa hkêtnê. Tã na ka prem Jejus kôt amnhî xunhwÿt nê tee ri ate tanhmã amnhî tomnuj to hã amnhî pumu nê akaprÿ nê apijaam nê. ã më kot amnhî tomnuj anhÿr o pa xwÿnhjaja na htem ja mÿrapé ty nê ma më kot amnhî xã htÿx kamã hamak tÿm xãta wÿr pa.

²² No na pre ra Tirtūm tanhmā mē akrā hto ka mē amnhī tomnuj kaga hpa. Te Tirtūm tām kot hpānhā amnhī tā mē ato htýx nē amnhī kōt mē ato pa pyrāk ka mē ra ām hkōt pix mā amnhī nhīpēx mex o ri apa. Nē hpānhā amā kapēr kōt pix mā amnhī nhīpēx mex prām. Nē hkōt pix mā amnhī nhīpēx hprām. Jakamā kot kaj mē nhýrmā kuri amex kumrēx nē atīr tūm nē ri apa ho apa.

²³ Na hte mē kām àpēnh o ri mē pa xwýnhjaja mē kām mēmoj tā apē nē àpēnh pa nē hpānhā amnhīrēx xā jamý. Ja pyrā nē koja mē kot amnhī tomnuj xwýnhjaja nhýrmā ty hāmri nē ma mē kot amnhī xā htýx kamā hamak tūm xāta wýr ma pa.

No mē pahte amnhī kaxyw Jejus Kris kōt pajamxpēr xwýnhjaja na hte Tirtūm ja hā mē pahpumu nē mē pajarēnh o:

—Nā ām hāmri. Jajaja koja nhýrmā Ixkra mē wa Ixkuri mex kumrēx nē htīr tūm nē pa ho pa. Hēxta waa nē. Nā ām hāmri koja mē anē. Anē.

Xā tām mē pahte amnhī nhīpēx ā mē pahpumunh kōt na hte ā mē pajarēnh anē? Nā ām mē pahte Kra Jejus Kris kōt amnhī xunhwýr ā mē pahpumunh kōt pix mā na hte ā mē pajarēnh anē.

7

Mē pahte amnhī tomnuj kot axte amnhī tā mē pahto htýx kēt ā harēnh

Römān 8.2, 10.4; Karatas 4.1; Epes 2.2; Korosē 3.7

¹ E Jejus kōt ixkwýjaja. Nā Tirtūm kot mē pakaxyw tanhmā Mojes mā kapēr tota na ka mē ra mar týx nē. Na pu htem kormā pahfir ri hkōt amnhī nhīpēx o ri papa. Tā ty hāmri nē axte hkōt amnhī nhīpēx kēt nē. Ra mē ate ja mar týx. E pa mē amā ja hā ejēp jarē ka mē inhma.

² Nā finat Mojes kot Tirtūm nhý hā mēnijaja kot tanhmā amnhī nhīpēx to ho pa hā mē kām karōja. Kojā mēhō ho mjēn hāmri nē ām kōt pix mā ri pa ho pa nē aa hkaga hkēt nē. No koja nhýrmā mjēn kēp ty nhūm ahte ri pa. Hāmri nē kām axte mēhō ho mjēn prām nē māmri axte mēhō ho mjēn. Ja tanhmā kute hkēt.

³ Nom koja wam mjēn arī htīr japēr nhūm hprō tanhmā hamaxpēr to nē hkaga nē hpānhā nhām mēhō ho mjēn. Hā koja Tirtūm pē ja homnuj nē. Nom koja mjēn ra kēp ty nhūm mýrpē axte kām mēhō ho mjēn prām nē māmri ho mjēn. Ja na Tirtūm pē homnuj kēt. Ra wam mjēnja htyk kēnā. Á Tirtūm kot Mojes mā mē pakaxyw mēmoj tā karō kot anhyr.

⁴ Tā ja pyrā nē na pu prem amnepēm pajamaxpēr o:

—Ixte Tirtūm kapēr kōt pix mā amnhī nhīpēx o ri ixpa jakamā nhūm Tirtūm ja hā ixpumu nē amnhīm inh mex ā ijarē. Anē.

Tā pu mē ra tanhmā pajamaxpēr to nē hpānhā pajamaxpēr ō ho pajamaxpēr o:

—Nā na xep hte Tirtūm mē ixte kapēr kōt amnhī nhīpēx ā mē ixpumunh kōt amnhīm mē inh mex xwýnh ā mē ijarēnh kēt nē. Mē ixte hkōt amnhī nhīpēx mex o ri ixpare hā. Kēt ām Kris kot mē inhē htyk nhūm mē ixte amnhī kaxyw hkōt ijamaxpēr nē hkōt amnhī xunhwýr pix ā mē ixpumunh kōt na hte mē inh mex ā mē ijarē. Ām ja pix ā mē ixpumunh kōt na hte mē ixto hkra nē mē ixkutā nojarēt o pa. Kra Jejus pix kukwak ri na hte ā mē inhīpēx anhyr o pa. Anē.

Á mē pajamaxpēr nyw kot anhyr. Jakamā te mē pahte mēhō kot mjēn nyw xwýnh gryk ā axte mjēn htyk xwýnh mā hamaxpēr kēēta pyrāk o na pu htem amnhī nhīpēx o papa. Jao Kris kapēr kōt pix mā amnhī nhīpēx o ri papa. Nē Tirtūm noo mā tām ri amnhī nhīpēx. Nē axte mē pahte amnhī tomnuj kukamā tanhmā pajamaxpēr to hkēt nē.

⁵ Nē amnepē mā mē pahte amnhī krā hkōt tanhmā mē pahte amnhī nhīpēx to ho ri papata ā na pu prem amnhī tomnuj pix o ri papa. Ra mē pahte Tirtūm kapēr mar týx tā kuma nē ām kuma nē ri papa nē ri hkōt amnhī nhīpēx kēt nē. Mýrapē nhūm Tirtūm tee ri ja hā mē pahpumu nē mē pahtyk nē ma mē kot amnhī xā htýx kamā hamak tūm xā hwýr papa mā xwýnhjē hā mē pajarē.

⁶ Nē amnepēm na pu pre htem ā pajamaxpēr anhyr o:

—Nā kot paj Tirtūm kapēr kōt pix mā amnhī nhīpēx o ri ixpa nhūm amnhī tā ixpumu nē ixte amnhī tomnuj kēt xwýnh ā ijarē.

Anhyr o pajamaxpēr no ām tee ri ā pajamaxpēr anhyr kaprý. Nē arī tanhmā amnhī tomnuj to ho ri papa. Tā hpānhā te Jejus Kris kōt pahtyk pyrāk o amnhī nhīpēx nē hpānhā Karō nhý hā tām amnhī nhīpēx. Jao ra tee ri mē pamā Tirtūm kapēr kōt amnhī nhīpēx prām kaprý hkēt nē. Ra Tirtūm Karō nhý hā amnhī nhīpēx nyw o amnhī nhīpēx mex o ri papa.

Tirtūm kapēr ā kaga htūm kot tanhmā mē pajarēnh to

Römān 3.20, 5.20; Karatas 3.23-24

⁷ Tā Tirtūm mē pahte kapēr kōt ri amnhī nhīpēx ā mē pahpumunh kōt amnhīm mē pamex ā mē pajarēnh kēt jakamā mēmo kaxyw na kapēr ā kaga htūmja? Nā mē pahte mar nē pahprī hā Tirtūm noo mā mē kot amnhī tomnuj xā jarēnh mar nē omunh mex kaxyw na. Na hte mē pahkwýjē kukrēx kīnh o pamā ho panhō hprām nē mē pamā karō. Á kot mēmoj punuj piitā nē mē pamā karō kot anhyr. Tā mē pahte ja mar

kēt ronhÿx pu mē Tirtūm kēp ja homnuj ā harēnh mar kēt nē.

⁸ Tā ra mē pahte harēnh mar nē kēp ja homnuj ā harēnh ma. Mē pamā axpēn kukrēx kīnh o ho pamā panhō hprāmja māānēn kēp ja homnuj ā harēnh mar tā nom aa hkaga hkēt nē arī pamā axpēn kukrēx kīnh o pamā ho panhō hprām tÿx rāhā ho ri papa. Kop ām Tirtūm kapēr kēt ronhÿx pu mē kot amnhī tomnuj xāja aa mar kēt kumrēx nhūm te mē pamā amrakati pyrāk.

⁹ Amnepē mā ixte Tirtūm kapēr mar kēt ri na pa pre ixtÿx ri amnhī kukamā ijamaxpēr o ri ixa nē ijamaxpēr o:

–E kot paj nhÿrmā Tirtūm ri ixtūr tūm nē inhmex nē ixa ho ixa.

Anhÿr tā hpānhā pamā axpēn kukrēx kīnh o ho pamā panhō hprām nē kapērta ma nē ja hā amnhī pumunh kurē kumrēx. Hāmri nē tee ri amnhī kukamā ijamaxpēr nē ijamaxpēr o:

–Hēxta waa nē. Nā ā ixte amnhī nhīpēx anhÿr o ixa jakamā kot paj nhÿrmā ty nhūm Tirtūm akupÿm ixto ixtūr pa kuri ixtūr tūm nē ixa ho ixa hkēt nē. Hēxta waa nē. Ixte amnhī tomnuj xwÿnh na pa. Kot paj nhÿrmā ty nhūm Tirtūm ma mē kot amnhī xā htÿx kamā hamak tūm xāta wÿr amnhī nē inhmē. Anē.

Hāmri nē ixkaprī nē tee ri amnhī kukamā ijamaxpēr o ri ixa.

¹⁰ Tā hpānhā axtem ijamaxpēr o:

–Nā kot paj Tirtūm kapēr kōt pix mā mān ri amnhī nhīpēx o ri ixa hāmri nē nhÿrmā ixtyk tā hwÿr api nē kuri ixtūr tūm nē inhmex nē ixa ho ixa. Nā kot paj anē.

Anhÿr ā ijamaxpēr tā no ām tee ri inhmā hkōt amnhī nhīpēx o ixa hprām kaprÿ. Na pa pre xatā kapēr nhīrōp ixkuhē nē tee ri ja hā amnhī pumu nē ijamaxpēr o:

–Kwa tanhmā kot pa amnhī nhīpēx to nē ām Tirtūm kōt pix mā ri amnhī nhīpēx? Na pa hte tee ri inhmā ā amnhī nhīpēx anhÿr prām tÿx kaprÿ. Ām ixte amnhī tomnuj pix o ri ixa xwÿnh jakamā ām hāmri koja amnhī nē kuwyta wÿr inhmē. Nā koja ixto anē. Hēxta waa nē. Tanhmā kot paj we ja nē kām ixkapēr to? Anē.

¹¹ No mēhō koja Tirtūm kapēr kōt amnhī nhīpēx mex o ri pa? Na pu htem pahpiitā tee ri pamā ho anhÿr prām kaprÿ. Mē pahpē hihtÿx kumrēx jakamā na pa pre ixtÿx ixte Tirtūm kuri ixtūr tūm nē ri ixa hā amnhī kukamā amnhī jarēnh kaprÿ. Ām xatā kapēr nhīrōp ixkuhē nē amnhī tomnuj pix o ri ixpaja mÿrapē koja mē kot amnhī xā htÿx kamā hamak tūm xāta wÿr amnhī nē inhmē.

¹² Kot anhÿr tā tanhmā kot puj mē Tirtūm kapēr ā kagā htūmta jarēnh to? Nā kot mē pamā mē pahte amnhī nhīpēx ā karōta mex kumrēx. Mex o mex.

¹³ Mex kumrēx tā na htem kuma nē tee ri kām hkōt amnhī nhīpēx hprām kaprÿ. Jao nhÿrmā ty nē ma kuwy hwÿr pa. Kēt pa na pa pre ra mar nē omunh mex tā hkōt amnhī nhīpēx mex kēt nē. Jao ra ixte amnhī tomnuj xwÿnh ā amnhī pumu. Na pa pre tee ri inhmā hkōt amnhī nhīpēx o ri ixa hprām tā no ām xatā kapēr nhīrōp ixkuhē nē hkwy m ri amnhī nhīpēx rāhā ho ri ixa. Tā ra tee ri ja hā amnhī pumu nē amnhī kukamā ijamaxpēr o:

–Nā na pa hte ām tee ri inhmā Tirtūm kōt amnhī nhīpēx prām kaprÿ no ām ho anhÿr kēt nē. Ām ixte amnhī tomnuj pix o ixa xwÿnh na pa. Ja mÿrapē koja Tirtūm amnhī nē ma kuwy hwÿr inhmē. Nā koja ixto anē. Anē.

Mē pahte mē pamā amnhī tomnuj kaga hprām kaprÿ hā mē pajarēnh

Karatas 5.17

¹⁴ Nē Tirtūm kapēr ā kagā htūmta Tirtūm kapēr na. Nē Tirtūm kīnhā ām inhī pix na pa ri ixa jakamā tanhmā kot pa amnhī to nē kapēr kōt ri amnhī nhīpēx mex o ri ixa?

¹⁵ Inhmā tām ixte amnhī nhīpēx prām tā no ām amnhī tomnuj pix o ri ixa. Mēmoj ixpē omnuj tā pa hte ra hkōt tanhmā amnhī tomnuj to ho ri ixa. Hāmri nē ja hā amnhī pumu nē tee ri amnhī kukamā ijamaxpēr o:

–Hēxta waa nē. Mon pa hte axtem nē ā amnhī nhīpēx anhÿr o ri ixa? Mēmoj ixpē omnuj nhūm inhmā ho anhÿr prām kēt tā ra ho anē. Nhūm mēmoj mex nhūm inhmā ho anhÿr prām tā ho anhÿr kēt nē. Mon pa hte axtem nē ā amnhī nhīpēx anhÿr o ri ixa? Anē.

¹⁶ Ā ixte amnhī nhīpēx anhÿr o ri ixa htā ra Tirtūm kapēr mexta ma hāmri nē ra ijamaxpēr o:

–Nā Tirtūm kapērja mex kumrēx tā pa tee ri inhmā hkōt amnhī nhīpēx mex hprām kaprÿ ho ri ixa. Hēxta waa nē. Anē.

¹⁷ Inhmā amnhī tomnuj prām kēt tā arī ixkaxwÿnh kām ijamaxpēr punuj nhÿ hā ā amnhī nhīpēx anhÿr o ri ixa.

¹⁸ Nē inhmā tām amnhī nhīpēx prām tā no ām tee ri ā inhmā amnhī nhīpēx anhÿr prām kaprÿ. Tanhmā kot pa amnhī to nē tām amnhī nhīpēx o ri ixa? Na pa tee ri inhmā ja ho anhÿr prām kaprÿ. Ixte amnhī tomnuj xwÿnh na pa. Nē aa ixte amnhī to mex kēt kumrēx xwÿnh.

¹⁹ Inhmā mēmoj mex kōt pix mā amnhī nhīpēx prām tā no ām ā amnhī nhīpēx anhÿr kēt nē. Nē ām hkwy m ri tanhmā amnhī tomnuj to ho ri ixa. Mēmoj ixpē omnuj tā pa hkōt amnhī nhīpēx o ri ixa.

²⁰ Ixte Tirtūm kapēr kōt amnhī nhīpēx kēt jakamā na pa hte ā amnhī tomnuj anhÿr o ri ixa. Mēmoj ixpē omnuj pa inhmā ho anhÿr prām kēt tā ra hkōt amnhī nhīpēx. Ixte

Tirtüm kapër kôt amnhî nhîpêx kêt jakamâ â amnhî nhîpêx anhÿr o ri ixpa.

²¹ Nê mëmoj mex nhûm inhmâ hkôt amnhî nhîpêx prâm tâ ra hkwÿm ri amnhî nhîpêx. Â ixte amnhî nhîpêx anhÿr xwÿnh na pa.

²² Nê inhmâ Tirtüm kapër mar nê hkôt ri amnhî nhîpêx prâm tâ

²³ nom ixte amnhî tomnuj xwÿnh jakamâ hkôt amnhî nhîpêx kêt nê. Na pa tee ri ja hâ amnhî pumu nê amnhî kukamâ ijamaxpêr o:

–Na kot paj axte amnhî tomnuj kêt nê. Kot paj âm amnhî to mex pix kukamâ ijamaxpêr o ri ixpa.

Anhÿr tâ no âm arî amnhî tomnuj o ri ixpa nê amnhî to mex kêt. Ixte amnhî tomnuj xwÿnh jakamâ na pa hte â amnhî nhîpêx anhÿr râhâ ho ri ixpa nê tee ri inhmâ amnhî tomnuj kaga hprâm kaprÿ.

²⁴ Héxta waa nê. Na pa ixkaprî htÿx nê ri ixpa. Â ixte amnhî nhîpêx anhÿr o ri ixpaja mÿrapê kot paj nhÿrmâ ty nê ma më kot amnhî xâ htÿx kamâ hamak tûm xâta wÿr ma mô. Mêhō kot tanhmâ ixkrâ hto pa â amnhî nhîpêx anhÿrja kaga?

²⁵ Nâ më panhō Pahihti Jejus Krisja pix. Tâm koja ixte amnhî tomnuj kutâ tanhmâ ixto ixihtÿx to. Jakamâ na pa axte tee ri amnhî kukamâ ijamaxpêr kêt nê. Pânhâ ixkînh nê ri ixpa nê Tirtüm mâ kâm:

–Pa Tirtüm. Nâ âm hâMRI amex o amex. Anê.

Tâ ra ixte Jejus Kris kôt amnhî xâm jakamâ koja tâm tanhmâ ixto ixihtÿx to pa rî kormâ Tirtüm kapêr kôt amnhî nhîpêx mex o ri ixpa. No kot pa pam amnhî krâ hkôt amnhî tomnuj râhâ ho ri ixpa. Â ixte anhÿr xwÿnh na pa.

8

Tirtüm Karō kot më pahto tâm më pahte amnhî nhîpêx xwÿnh â harênh

Karatas 5.16-26

¹ Nê Jejus Kris kêp mëmoj punuj kutâ më pahto më paxihtÿx xwÿnh jakamâ më pahte hkôt amnhî xunhwÿr xwÿnhjaja na pu htem ÿ hâ amnhî tomnuj o ri papa hkêt nê. Jao më pahte kuwy hwÿr papa mâ xwÿnh kêt.

² Te ra më pahtÿk nhûm Tirtüm kot akupÿm më pahto më pahtÿr pyrâk jakamâ nhûm Karōja më pahkarō mâ agjê pu më ÿ hâ tâm amnhî nhîpêx o ri papa. Te tâm kot amnhî nhîpêx pyrâk o amnhî nhîpêx nhûm Karō mëmoj punuj piitâ kutâ më pahto më paxihtÿx. Kêp më pajamaxpêr punuj kutâ më pahto më paxihtÿx xwÿnh jakamâ kot puj më nhÿrmâ më kot amnhî xâ htÿx kamâ hamak tûm xâta wÿr papa hkêt nê.

³ Nom kormâ më pahte Jejus kôt amnhî xunhwÿr kêt ri na pu prem tee ri pamâ Tirtüm kapêr piitâ hkôt amnhî nhîpêx prâm

kaprÿ nhûm më pahpê hihtÿx kumrêx. Jakamâ tanhmâ koja Tirtüm amnhî to nê amnhî mâ më pamex xwÿnh â më pajarê? Na pre tee ri amnhî tâ më pajamâ hâMRI nê më pahwÿr Kraja më nhûm man më pahwÿr wrÿ nê më pahpyrâ nê I ho më pakamâ kato. Nom më parom aa tanhmâ amnhî tomnuj to hkêt kumrêx nê ri pa. Tâ më kot hpîr tâ nhûm amarî htyk kêt nê. Na pre htyk o më pahte amnhî tomnuj piitâ hpânhâ amnhîrer pa. Jakamâ tâm kêp më pajamaxpêr punuj kutâ më pahto paxihtÿx xwÿnh. Na pu htem hkôt amnhî xunhwÿ hâMRI nê kukwak ri amnhî tomnuj o ri papa hkêt nê.

⁴ Pânhâ Tirtüm kot amnhî nhîpêx kôt amnhî nhîpêx o ri papa nê axte më pahte amnhî nhîpêx tûm kôt amnhî nhîpêx kêt nê. HâMRI hpânhâ Tirtüm Karō kot amnhî nhîpêx kôt pix mâ amnhî nhîpêx. Nê hamaxpêr kôt pix mâ pajamaxpêr. Ja kaxyw na pre Tirtüm më pahwÿr Kraja më nhûm wrÿ nê më pahpiitâ më panê ty.

⁵ Nê më kot amnhî krâ hkôt tanhmâ amnhî nhîpêx to ho ri më pa xwÿnhjaja na htem htÿx ri tanhmâ hamaxpêr to xâ hkôt amnhî nhîpêx o ri pa. No kêt Tirtüm Karō kot më pahkarō mâ gjêx xwÿnhjaja na pu htem më kuroM te Jejus jamaxpêr pyrâk o pajamaxpêr o papa.

⁶ Nê më kot amnhî krâ hkôt amnhî nhîpêx xwÿnhjaja koja më nhÿrmâ ty nê ma kuwy hwÿr pa nê kamâ pa ho pa. No më pahte Tirtüm Karō hkôt amnhî nhîpêx xwÿnhjaja kot puj më pajamaxpêr nyw o pajamaxpêr nê amnhî nhîpêx nyw o amnhî nhîpêx. Jao paxâmnhîx ri pajamakêtkati nê ri papa. Nê nhÿrmâ ty hâMRI nê Tirtüm më Jejus wa kuri akupÿm pahtÿr tûm nê pamex kumrêx nê papa ho papa.

⁷ Nê më kot amnhî krâ hkôt ri amnhî nhîpêx xwÿnhjaja kâm Tirtüm kînh kêt. Nê kâm kapêr mar prâm kêt jakamâ tanhmâ kot më amnhî to nê hkôt amnhî nhîpêx?

⁸ Koja mëhō amnhî krâ hkôt kâm hprâm xâ hkôt pix mâ amnhî nhîpêx hâMRI nhûm Tirtüm tee ri ja hâ omu nê hkînh kêt nê.

⁹ No më papajaja na pu htem më urâk nê â amnhî nhîpêx anhÿr kêt nê. Ra Tirtüm Karō kot më pahkarō mâ gjêx jakamâ na pu htem hkôt pix mâ amnhî nhîpêx hprâm. No koja Tirtüm Karō mëhō kaxwÿnh mâ àr kêt nê nhûm kêp hkra hkêt nê.

¹⁰⁻¹¹ Tâ më papajaja. Më pahte amnhî tomnuj mÿrapê koja më pakrâhkâja nhÿrmâ ty. No nhûm Tirtüm ra kot amnhîm më pahte amnhî to mex xwÿnh â më pajarênh nhûm Kris Karō kot më pahkarō mâ gjêx jakamâ koja më pahkarōja htyk kêt nê. Më pakrâhkâ pix koja ty nhûm më pahkarōja ma kaxkwa hwÿr âpir kurê kumrêx. Tâ nhûm nhÿrmâ Tirtüm akupÿm më pakrâhkâ ho htÿr nê akupÿm më pahkarōja më pakrâhkâm

hagjê pu mê wa kuri pahťır tũm nê papa ho papa.

¹² Jakamã e kwa ixkwýjaja. Kêr pu mê axte ri mê pajamaxpêr tũm kôt amnhĩ nhĩpêx o ri papa hkêt nê.

¹³ Kot puj mê arĩ ã amnhĩ nhĩpêx anhýr o ri papa hãmri nê nhýrmã ty nê ma mê kot amnhĩ xã htýx kamã hamak tũm xãta wýr papa. Jakamã kêr pu mê mêmõ arĩgro hã pamã tanhmã amnhĩ tomnuj to hprãm hãmri nê amnhĩ kukamã pajamaxpêr o:

–Nã inhmã ã amnhĩ nhĩpêx anhýr prãm tã kot paj Tirtũm Karõ nhý hã ja kutã amnhĩ to htýx nê ho anhýr kêt nê. Anê.

Kot puj mê ã pajamaxpêr anê hãmri nê nhýrmã kuwy wýr papa hkêt nê. Pãnhã Tirtũm mê Jesus wa kuri pamex nê pahťır tũm nê ri papa ho papa.

¹⁴ Mẽ kot Tirtũm Karõ hkôt amnhĩ nhĩpêx xwýnhjaja kêp Tirtũm kraa.

¹⁵ Nom amnepêm kormã mê pahte hkôt amnhĩ xunhwýr kêt ri. Nê kormã mê pamã kapêr mar prãm kêt ri nhũm kot amnhĩ tã mê pahpumunh nê tanhmã mê pahto pumaj na pu prem pamã uma ho ri papa. Tã hkôt amnhĩ xunhwý nhũm Karõja mê pahkarõ mã gjêx jakamã na pu htem ra pamã uma hkêt nê ri papa. Karõ kot mê pahpê Tirtũm kra hã mê pajarênh jakamã pu mê amnhĩ kamã kot tanhmã mê panhipêx to puma hkêt nê ri papa. Nê paxãmnhĩx pajamakêtkati nê kãm amnhĩ jarê nê kãm amnhĩ jarênh o:

–Pa Inhipêxã maati? Ot pa ixpê akra hã amã amnhĩ jarênh kaxyw amnhĩ kaxyw amã ijamaxpêr. Anê.

Jao ra mê pamã uma hkêt nê ri papa.

¹⁶ Karõ kot mê pahkarõ mã gjêx nhũm mê pahte amnhĩ tã omunh jakamã na pu htem pajamaxpêr o:

–Nã Tirtũm Karõ kot ixkarõ mã àr jakamã ixpê hkra na pa. Anê.

Nhýrmã mêmõj piitã akupým mex par ã harênh

Sikũn Korõt 4.16-18; Korosê 3.4; Wam Pêtre 4.13

¹⁷ Nê mê kãm Tirtũm prãm kêt xwýnhjaja na htem te mê kot Tirtũm Kra Jesus nhĩpêx pyrãk o mê panhipêx pu mê pahpunuj nê ri papa. Nom kot puj mê nhýrmã Tirtũm mex o mex xwýnhja kuri pamex kumrêx nê papa. Mẽ pahpê hkra jakamã kot puj mê Kra Jesus pyrã nê õ krĩ kamã kuri pamex kumrêx nê ri papa ho papa.

¹⁸ Jar Jesus ã mê pahpunuj nê ri papa htã kot puj mê nhýrmã kuri pamex kumrêx nê papa ho papa. Hãmri nê mê pamex o pamex ã amnhĩ pumu nê jar pika ja kamã tanhmã mê pahpunuj toja mã axte pajamaxpêr kêt kumrêx.

¹⁹ Nê pika hkôt Tirtũm kot mêmõj ho kator xwýnhjaja na htem Tirtũm kot mê pahto mex par jatur xãm mênh ã arĩgro jamãr rãhã ho pa. ãk nê mry nê pĩ nê gõ nê mêmõj piitã mê pajamãr o pa. Te kot mê pakukamã hamaxpêr o:

–Kwa mêmõ arĩgro hã koja Tirtũm hkrajê piitã ho amnhĩrit nê mê ho mex par jatur xãm kumê pu mê ja hã mê omu? Hêxta waa nê. Inhmã tokyx ja hã mê omunh prãm týx. Koja tokyx ã mê hipêx anê pa ixkĩnh týx kumrêx.

Anhýr o hamaxpêr pyrãk.

²⁰ Mêmõ kaxyw na hte mryja ã mê pakukamã hamaxpêr anê? Nã amnepê mã Tirtũm kot mêmõj piitã ho katorta ã nhũm pre piitã mex o mex. Pĩ nê mry nê gõ. Mêmõj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mýrapê nhũm ra ý hã mêmõj piitã homnu par jakamã na hte mêmõj hťır nê pa nê gaa nê ty nê hapêx. Nê mê pahpur kãm ahkagrõt punuj hapõj. Atãw kot amnhĩ tomnuj mýrapê nhũm Tirtũm kapêr xã hkôt ã mêmõj omnu hpar anê.

²¹ Nom koja arĩ rãhã ho rãhã hkêt nê. Koja nhýrmã Tirtũm akupým mêmõj piitã ho mex pa nhũm mex o mex nê axte grã rý axte htyk nê hapêx kêt nê. Nê axte omnu nê hikwý hkêt nê. Koja mê pahpyrã nê mex o mex. Jakamã na htem Tirtũm kot mê pahto mex par jatur xãm mênh xã hã arĩgro jamãr rãhã ho pa.

²² Te mêmõ ni hpjagri kaxyw õhy xã htýx nê tokyx kãm hpjagri hprãm xãj àmra ho nõr pyrãk o amnhĩ nhĩpêx pê mê pahto mex jatur xãm mênh ã arĩgrota jamãr o pa.

²³ Nê mê papajaja na pu htem tanhmã pahpunuj to nê jajê pyrã nê te amnhĩ kamnhêr o ri papa pyrãk. Rý tanhmã paxã kute nê ri papa. Rý pamã prãm nê paxãã nê ri papa. Nê tanhmã mê pahpunuj to nê ri papa. Jao te pĩ nê gõ nê mryja pyrã nê amnhĩ tã Tirtũm kot mê pahto mex par jatur xãm mênh ã arĩgro jamãr rãhã ho ri papa.

Na pre Tirtũm mê pahwýr Karõ rê nhũm mê pahkarõ mã agjê nê mê pakukamã Tirtũm tanhmã kot mê pahto mex to hã mê pamã ho amnhĩrit nê mê pamã ho amnhĩrit o:

–Koja nhýrmã Tirtũm mê ato mex par jatur xãm kumê nê mê piitã mê kãm mê apê hkra hã mê ato amnhĩrit. Hãmri nê mê amã mê anhi nyw gõ ka mê axte axã nê ri apa nê atyk kêt nê. Hãmri nê Tirtũm ri amex kumrêx nê ri apa ho apa. Nã kot kaj mê nhýrmã ã amnhĩ nhĩpêx anê. Anê.

Ã Tirtũm Karõ kot mê pakukamã mê pajarênh anhýr jakamã na pu htem amnhĩ tã kot mê pahto mex jatur xãm mênh pix jamãr o ri papa.

²⁴ Nom na kormã ä më pahto mex anhÿr kêt nê. Kormã më pamã më panhÿ nyw nhôr kêt nê. Nom ra kot më pahto hkra jakamã pu më ja hä amnhÿ pumu nê pajamexpêr o:

—Nã ra Tirtüm kot ixto hkra jakamã koja nhÿrmã mãänên inhmã inhÿ nyw gö. Nã koja inhmã kugö.

²⁵ Anhÿr o pajamexpêr tä kormã. Na pu htem kormã amnhÿ tä hamãr rãhã ho ri papa nê aa hkaga hkêt nê papa.

Më pahte Tirtüm Karö nhÿ hä Tirtüm mã amnhÿ jarênh

²⁶ Nê na pu htem Tirtüm mã amnhÿ jarênh kaxyw nhüm hte Karöja më pahto ajuta pu më ý hä pakatãt kôt kãm tanhmã amnhÿ jarênh to. No kot puj më amnhÿ krã hkôt kãm amnhÿ jarênh mex kêt nê. Na pu htem ja kaxyw tee ri amnhÿ kukamã pajamexpêr o:

—Kwa tanhmã kot pa Tirtüm mã amnhÿ jarênh to? Tanhmã kot pa mëmoj tä ixãhwÿr to rÿ amnhÿ to hwÿr to? Nã kot paj amnhÿ krã hkôt ja ho anhÿr mex kêt nê. Héxta waa nê. Anê.

No nhüm Tirtüm Karö ra kot më pahkarö mã gjêx jakamã na hte tanhmã më pahkrã hto pu më ý hä kãm amnhÿ jarênh mex nê pakatãt kôt mëmoj tä kuwÿ. Te Karöja tanhmã më pakute hä më pahpumunh nê më pakamã ukapri xãj tãm më pahto hwÿr pyrak.

²⁷ Jakamã pu më ý hä tanhmã Tirtüm mã amnhÿ jarênh to nhüm më pamar kurê kumrêx. Ra kot më pajamexpêr kôt më pahpumunh par kênã. Nhüm ra Karö kot më pahkarö mã gjêx jakamã na pu htem kãm hprãm xã hkôt kãm amnhÿ jarê nê tanhmã amnhÿ to paxãhwÿr to.

Tirtüm kot më pamã mëmoj piitã ho mex ä harênh

Römän 8.37; Piripos 1.12; Wam Pêtre 5.10

²⁸ Nê më pamã Tirtüm kÿnh xwÿnhjaja. Tirtüm kot më pahto hkra xwÿnhjaja. Koja mëmoj më pakamã tanhmã amnhÿ to htã kêr pu më ãm ja hä amnhÿ pumu nê tee ri amnhÿ kukamã pajamexpêr kêt nê. Koja te më pahpê omnuj pyrak tä koja nhÿrmã hpãnhã më pamã mex nê. Koja Tirtüm nhÿrmã tanhmã më pamã mëmojta o mex to.

²⁹ Amnepê mã mëmoj piitã hkêt ri na pre Tirtüm më pakukamã tanhmã më pajarênh to nê më pajarênh o:

—E kot paj nhÿrmã më kot Ixkra Jejus kôt amnhÿ xunhwÿr xwÿnhjê ho ixkra jakamã nhüm më Jejus pyrà nê kêp ixkraa. Nê urãk nê ixkapêr kôt amnhÿ nhÿpêx o pa. Jao pa ra ixkra xóhtó nê. Nã ja na inhmã hprãm. Anê.

³⁰ Tä pu htem pajapôj nê ri papa. Hãmri nê kapêr ma nê amnhÿ kaxyw Kra Jejus kôt pajamexpêr nê hkôt amnhÿ xunhwÿ. Hãmri nhüm Tirtüm ja hä më pahpumu nê pahto

hkra nê amnhÿm më pamex xwÿnh ã më pajarê nê më pahto mex nê. Nê te ho Kra Jejus nhÿpêx pyrak o më panhÿpêx. Jao nhÿrmã wa kuri më pahÿr tùm nê papa ho papa mã xwÿnh ã më pajarê.

Mêhõ kot Tirtüm pë aa më papytãr kêt ä harênh

Römän 5.1

³¹ Tä ä Tirtüm kãm më pajapê nê më pahto mex kot anhÿr. Ä kot më panhÿpêx mex anhÿr jakamã ra më pahkôt pa ho pa rãhãã. Jakamã mëhõ koja hkra pë më pahpytã? Nê mëhõ koja tanhmã ri kêp më pahto? Nã koja kêp më papytãr rÿ tanhmã kêp më pahto hkêt nê.

³² Tirtüm kãm Kra Jejus japê htÿx tä na pre më pahpê nê hkêt nê më pahwÿr kumê. Te kot më pamã ör pyrak o hipêx nhüm më pahwÿr wrÿ nê më panê ty. Tä ra Tirtüm kot më pamã ör jakamã koja mãänên kãm më pahte Kra hkôt amnhÿ xunhwÿr xwÿnhjê japê nê më pahto mex rãhã ho ri pa. Nã koja ä më pahto mex anê.

³³ Jakamã mëhõ koja kãm më pahte amnhÿ tomnuj xwÿnh ã më pajarê? Ra tãm kot më pahto hkra nê më pahte amnhÿ to mex xwÿnh ã më pajarênh kênã kot kêt mëhõ kãm tanhmã më pahto kapêr punuj to nhüm më kuma. Koja më tee ri kãm tanhmã më pahto kapêr to kaprÿ.

³⁴ Na pre ra Jejus Kris më pahte amnhÿ tomnuj pãnhã amnhÿer kaxyw më panê ty nhüm Tirtüm akupÿm ho htÿr. Hãmri nhüm ma akupÿm kaxkwa hwÿr api nê Pahi Maati krÿ xã kamã Tirtüm nhÿhkó hä hkrÿ ho hkrÿ. Nê Tirtüm mã më pakutã nojarêr rãhã ho kuri hkrÿ ho hkrÿ. Jakamã mëhõ koja kêp më kot amnhÿ xã htÿx kamã hamak tùm xãta wÿr më pajano? Nã amrakati kumrêx.

³⁵ Nê Krisja kaxkwa kamã Tirtüm nhÿhkó hä hkrÿ ho hkrÿ htã mãänên jar më pahkôt pa ho pa. Kãm më pajapê htÿx jakamã kot puj më tanhmã pahpunuj to htã nhüm arÿ kãm më pajapê nê më pahkôt pa ho pa.

Rÿ nhüm më kot hkôt amnhÿ xunhwÿr kêt xwÿnhjaja tanhmã hä më pahto htã nhüm arÿ kãm më pajapê kamã më pahkôt pa ho pa.

Rÿ më pamã prãm nê ri papa. Rÿ më paxê hkêt nê pamã kry nê ri papa htã nhüm arÿ kãm më pajapê kamã më pahkôt pa ho pa.

Rÿ ra më kot hä më panhÿmex kaxyw rÿ hä më pahpar kumrêx. Tä nhüm arÿ kãm më pajapê kamã më pahkôt pa ho pa rãhã nê.

Kãm më pajapê kamã më pahkôt pa ho pa rãhã jakamã pu më tee ri amnhÿ kukamã pajamexpêr kêt nê. ãm hkôt paxãmnhÿx ri pajamakêtkati nê ri papa ho papa.

³⁶ Tirtūm kapēr ā kagā htūm te mē papajaja mē pahte kām tanhmā amnhī jarēnh to pyrā nē mē pajarēnh kot:

Pa Tirtūm. Na htem atā mē ixtomnuj t̄yx o pa.

Nē ra mē kot mē inhīmex kaxyw.

Nē mē inhīpēx o te mē kot ōwēhti ho mōr nē hpar kaxyw tanhmā hipēx to pyrāk.

Jakamā na pa mē ra ixyk kaxyw.

Anh̄yr o kot mē pajarēnh.

³⁷ Tā kwār mē ā mē panhīpēx anē. Arī Kris kām mē pajapē kamā mē pahkōt pa ho pa rāhā jakamā mē kot tanhmā mē pahto htā pu mē arī amnhī kaxyw kām pajamaxpēr t̄yx rāhā ho ri papa. Nhūm arī mē kutā mē pahto paxiht̄yx pu mē arī mē kām pakuhē.

³⁸ Mēmoj koja tanhmā mē pahto nhūm Tirtūm tee ri ja hā mē pahpumu nē kām mē pajapē hkēt nē? Na amrakati kumrēx. Koja mēhō r̄y mēmoj mē pahpē āmnār kēt nē. Na hte jar pika ja kamā Kris kām mē pajapē kamā mē pahkōt pa ho pa. Nē kot puj mē nh̄yrmā ty nhūm arī kām mē pajapē kamā mē pahkōt pa ho pa rāhā nē. Jakamā koja mēkarō r̄y mēkarōmnuti r̄y jar pika ja kamā mē kām Tirtūm prām kēt xw̄ynhjaja mē pahpē āmnār kēt nē. R̄y mēmoj tanhmā kute. R̄y kormā hapu hā mēmoj tanhmā kute. Koja mēmoj piitā tee ri tanhmā kēp mē pahto htā nhūm Kris arī kām mē pajapē kamā mē pahkōt pa ho pa rāhā nē nhūm mēmoj tee ri mē pahpē āmnār kapr̄y.

³⁹ Nē koja k̄y r̄m mēmoj wr̄y nē tanhmā kēp mē pahto japēr. R̄y pyka r̄m mēmoj kato nē tanhmā kēp mē pahto japēr. R̄y kuwy r̄y kōk xapēr t̄yx tanhmā kēp mē pahto. Tā nhūm mē panhō Pahihti Jejus Kris arī kām mē pajapē kamā mē pahkōt pa ho pa rāhā nē. Te Tirtūm kām mē pajapē pyrāk o kām mē pajapē ht̄yx kām mē pahkōt pa ho pa rāhā jakamā nhūm mēmoj tee ri mē pahpē āmnār kapr̄y.

9

Ijaew jarēnh

Atre 3.25; Rōmān 3.1-2

¹⁻² Nē na pa tee ri ixkw̄y Ijaew kot tanhmā amnhī nhīpēx to ho pa hā mē omu nē ixkapr̄i nē. Ixpyrā nē mē kēp Ijaew tā ixkīnhā amnhī kaxyw Kris kōt hamaxpēr kēt jakamā nhūm Kris tee ri kām mē hamakētkati nē āmnh̄ix ri mē pa hprām kapr̄y. Pa tee ri mē hkukamā ijamaxpēr nē ixkapr̄i nē ri ixpa. Nē aa ixkapr̄i ixpē kator kēt kumrēx. Mē kot inh̄mā mē hkīnh kēt ā amnhī tā ijarēnh tā inh̄mā mē hkīnh kēnā. Ām hāmri na pa ā amnhī jarēnh anē. Tirtūm Karō kot ja hā ixpumunh mex nē inh̄mā:

—Nā ām hāmri na ka amā mē hkīnh ā amnhī jarē. Anē.

³ Mē kēp ixkw̄y na mē. Mē ixpār kraxja ām pixi mex. Tā nhūm mē ixkīnhā amnhī kaxyw Kris kōt hamaxpēr kēt jakamā kop ām Tirtūm kot mē nē kuwy hw̄yr pa inh̄mēnh ronh̄yx ja inh̄mā mex. Nh̄yx pa kām:

—Kwa Tirtūm. Amnhī nē kuwy hw̄yr ixkw̄yjē rēnh kēt nē. Inh̄mā mē hapē ht̄yx kumrēx. Mē hpānhā pa mān mē nē hw̄yr inh̄mā nā.

Anh̄yr o nh̄yx pa kām ixkapēr. Nom kot paj amnhī to ā ixāhw̄yr anh̄yr kapr̄y. Tirtūm kot mē kamā ukapr̄i htā no nhūm mē amnhī kaxyw Kris mā hamaxpēr kēt jakamā tanhmā koja amnhī to nē mē hpānhā pa mē nē kuwy w̄yr inh̄mē nhūm mē ixrom kuri ht̄r tūm nē pa ho pa? Mē kot hkōt amnhī xunhw̄ȳre hā.

⁴ Mē ixpē Ijaew nh̄gētjaja na pre Tirtūm amnepē mā mē ho mex rax nē. Nē kām mē ho hkra hprām nē. Nhūm prem tanhmā kot amnhī nhīpēx mex to hā no ho omunh o pa. Nē hirā ht̄yx kām ri pa hā omu nhūm mē kām:

—E kot kaj mē ixkapēr ma nē ixkōt amnhī nhīpēx o ri apa. Hā kot paj mē akōt ixpa ho ixpa nē mē ato mex nē ka mē expēn kanrēhā axāmnār rax nē. Hāmri pa mē amā pika mex gō ka mē kamā ajamakētkati nē axāmnh̄ix ri apa ho apa.

Anh̄yr o mē kām kapēr. Hāmri nē mē kaxyw Mojes mā tanhmā kapēr to nē mē kaxyw kām mēmoj piitā hā karō. Mē kot tanhmā amnhī tomnuj to hāmri nē tee ri ja hā amnhī pumunh nē tanhmā amnhī to Tirtūm w̄yr to nhūm kot mē mar nē mē nē ja ho hapēx par kaxyw. Finat Mojes kot amnhī xō ri mē kām ujarēnh nhūm mē kot mar nē hkōt amnhī nhīpēx mex o ri pa kaxyw.

⁵ Mē ixkukamā mē ixpāmjaja. Apraāw nē Ijak nē Jako kanrēhā mē hkra nē mē htāmnhw̄yjaja na pre mē. Mē hw̄yr na pre Tirtūmja Kra Jejus Kris mē nhūm mē hw̄yr wr̄y nē mē kamā ī ho ī ho kator jakamā haxw̄yja kēp Ijaew na pre. Kēp Mēpahpām nē mex o mex nē hiht̄yx o hiht̄yx tā Ijaew w̄yr wr̄y nē mē kamā kato. Hāmri nhūm Ijaew kēt xw̄ynhjaja harēnh na nē tee ri hamaxpēr nē hamaxpēr o:

—Hēxta waa nē. Kēp ām Jejus mē papa kamā mān kator ronh̄yx mē pamā mex kumrēx. Anē.

⁶ No nhūm kormā Ijaew hw̄yr wr̄yk kēt ri nhūm Tirtūm ra kot mē ho hkra kaxyw mē hā amnhī jarē nhūm mē hkwyja kām ja prām kēt nē hkaga. Tā xā na pre Tirtūm kot mē ho hkra hā amnhī jarēnh ā amnhī to hēx? Nā aa hēx kēt kēnā kot kēt ri mēmoj tā amnhī jarē nē hā amnhī to hēx. Jakamā na pre mē hkwyjaja hkwyjē rom hkaga hkēt nē nhūm amnhī tā mē omu nē mē ho hkra. Nom mē piitā mē ho hkra hkēt nē. Mē hkwyjaja kot

hkaga jakamâ nhûm âm mê hkwÿjê pix o hkra.

⁷Nê finat Apraâwja na pre hkanrêhâ hkra nê htâmnhwÿ xohtô nê. Tâ xâ na pre Tîrtûm htâmnhwÿ piitâ mê ho hkra hâ amnhî jarê? Nâ mê piitâ â mê harênh anhÿr kêt nê. Âm mê hkwÿjê pix na pre mê ho hkra hâ mê harê. Apraâw kra Ijak kôt hkanrêhâ htâmnhwÿ pixjaja nhûm kot mê ho hkra hâ mê harê.

⁸⁻⁹Nê Apraâw kormâ hprô kamâ hkra hkêt ri na pre kâm âpênh xwÿnh kamâ hkra nhûm kato nê myre nê hixi pê Ismael. Nom kêp Apraâw prô kumrêx kamâ hkra hkêt. Prô kuprÿ kamâ hkra na pre. Tâ nhûm Tîrtûm kâm hkra kumrêx kukamâ harê nê kâm:

—E kot paj ma tê hâMRI nê mêmô arîgro hâ akupÿn awÿr tê nhûm ra aprô hpijagri nhûm war akra myre. Anê.

Tâ nhûm hprô Saraja htujarô. Nê gaa nê hpijagri nhûm hkraja myre. Hixi pê Ijak. Kêp Apraâw prô kamâ hkra jakamâ Tîrtûm nom kêp Apraâw kra kumrêx. Jakamâ hkra Ijak kanrêhâ htâmnhwÿjaja na pre Tîrtûm kot mê ho hkra hâ mê harê. Ra kot Apraâw mâ ja hâ amnhî jarênh xâ hkôt.

¹⁰Tâ nhûm Ijakja hprêk nê Repek o hprô. Nê gaa nê ra haxwÿja wa hkra nhûm hkraja wa ahpo nê kato nê wa hamê my. Kot wa pê Ejau nhûm kot hapu pê Jako.

¹¹⁻¹²Nom nhûm kormâ wa kator kêt ri nhûm Tîrtûm wa hkukamâ tanhmâ wa harênh to. âhpumunh xâ hkôt wa katorxâ mâ wa harê nê kâm:

—E kot paj amâ war akra wa hkukamâ tanhmâ wa harênh to ka inhma. Nâ koja wa kato nê gaa nê hprêk hâMRI nhûm kot haputa amnhî to rax o kot wa jakre. Anê.

Kot wata koja kot hapu kînhâ amnhî to grire nê ri pa nhûm â wa hkukamâ wa harênh anê. Kâm wa kot tanhmâ amnhî nhîpêx to hprâm xâ hkôt â wa harênh anê. Kormâ wa kot tanhmâ amnhî tomnuj to rÿ tanhmâ amnhî to mex to hâ kot wa omunh kêt tâ kâm hprâm xâ hkôt â wa hkukamâ wa harênh anê.

¹³Tîrtûm kapêr â kagâ htûm kot wa harênh nê wa hâ kagâ kot:

Ejau rom Jako kanrêhâ hkra nê htâmnhwÿ pixjaja na pre Tîrtûm amnhîm mê ho hkra. Anê.

¹⁴Mân ka mê Tîrtûm kot â wa harênh anhÿrja ma nê ajamaxpêr o:

—Tk. Kwa ja mexti hâ. Mo na pre hamê wa hkanrêhâ wa hkra nê wa htâmnhwÿ piitâ ho hkra hkêt nê? Anê.

Kwa mê â ajamaxpêr anhÿr kêt nê. Tîrtûm na hte kâm hprâm xâ hkôt tanhmâ mê panhîpêx to ho pa pu mê kot tanhmâ mê panhîpêx to hâ omu nê âm omu nê amnhî tâ tanhmâ kâm nê hkêt nê.

¹⁵Na pre finat Mojes mâ amnhî jarênh o: Inhmâ hprâm xâ hkôt na pa hte mê omu nê tanhmâ mê kamâ ixukapri hto ho ri ixpa.

Nê inhmâ hprâm xâ hkôt na pa hte ahpÿnhâ tanhmâ mê hipêx to ho ri ixpa.

Anhÿr o kâm amnhî jarê.

¹⁶Nom tanhmâ mê pahte amnhî nhîpêx to hâ mê pahpumunh kôt na hte mê pakamâ ukapri hkêt nê. Âm tām kām hprâm xâ hkôt na hte amnhî mê pakamâ ukapri hto ho pa.

¹⁷Amnepê mâ Ejit kâm mê ô pahihti Paraohti hwÿr na pre Mojes mê nhûm ma hwÿr mô nê kâm tanhmâ Tîrtûm kapêr jarênh to nê kâm:

—E Tîrtûm na awÿr inhmê pa mô. Tām na pre apê Ejit nhô xwÿnhjê nhô pahi kaxyw axām. Akra hihtÿx tâ nhûm mê kaxyw axām. Tâ ra xatâ âhpumunh tÿx o tanhmâ anhîpêx to. Krî piitâ hkôt ri mê pa xwÿnhjaja kot atâ harênh mar nê âhpumunh o âhpumunh â omunh kaxyw. Tâ ixte amâ ja jarênh kaxyw na pre awÿr inhmê pa man awÿr mô. Anê.

¹⁸Â na hte Tîrtûm kâm hprâm xâ hkôt tanhmâ mê panhîpêx anhÿr to ho pa. Jao mê hkwÿjê kamâ ukapri ho pa. No mê hkwÿjaja nhûm tee ri mê hkrâ hihtÿx â mê omu nê âm mê omu nhûm mê amnhî krâ hkôt ri tanhmâ amnhî tomnuj to ho ri pa.

Tîrtûm kêp mê pakamâ ukapri xwÿnh â harênh

¹⁹Nê kot kaj mê atô Tîrtûm kot â mê hipêx anhÿrja â harênh ma nê tanhmâ hâ ixkukjêr to nê inhmâ:

—Kwa na xep hte Tîrtûm ahpÿnhâ tanhmâ mê hipêx to. Nê mê hkwÿjê kamâ ukapri ho pa nê mê hkwÿjaja mê hkrâ hihtÿx â mê omu nê âm mê omu nê mê kamâ ukapri hkêt nê. Jakamâ kwa mo na hte mê kot amnhî tomnuj xwÿnh â mê harê? Tām kot â mê hipêx anhÿr kênâ kot kêt mê kot amnhî tomnuj xwÿnh â mê harê.

Anhÿr o ajamaxpêr japêr.

²⁰Kwa mê ri â atÿx Tîrtûm jarênh anhÿr kêt nê. E pa mê amâ ejêp jarê ka mê inhma. Xâ kot mêhō gwy kwÿ ho amnhîm poti nhîpêx nhûm tee ri amnhî tâ omu nê amnhî tâ tanhmâ kâm kapêr to nê kâm: “Tk. Kwa mon ka ri â inhîpêx anê?” Anhÿr o amnhî tâ kâm kapêr? Nâ koja kâm tanhmâ nê hkêt nê.

²¹Hipêx xwÿnh kâm hprâm xâ hkôt kot â hipêx anhÿr kênâ kot kêt amnhî tâ kâm akir. Kojā amnhîm gwy kwÿ kakwÿ nê ho poti ho axkrut nê hipêx. Nê hō ho muxre. Ho mex kumrêx nhûm xa. Nhûm ihōja mâ ho anê nê hipêx no âm waxta kînhâ ho hanhâjiti nhûm omnaji nê xa. No âm tām kot hamê wa hipêx prâm xâ hkôt wa hipêx kênâ.

²²Tâ na hte â Tîrtûm mê panhîpêx anê. Te poti pynajre pyrâ nê mê pahkwÿjê nhîpêx

nhūm mē kām kapēr mar prām kēt nē htýx ri tanhmā amnhī tomnuj to ho ri pa. Hāmri nhūm amnhī tā mē omu nē te amnhī nē mē rēnh kaxyw pyrāk o mē hipêx no ām kormā hamaxpēr o:

—Nà kot paj nhýrmā mē kot amnhī tomnuj mýrapê mē ho ijpêx pa nhūm mē piitā ja hā ixpumu nē inhmā ixāhpumunh o ixāhpumunh ā ijarē. Nē inhmā mēmoj punuj piitā hkīnh kēt kumrêx ā axpēn mā ijarē. Anē.

²³ Nom na hte jajē rom mē pahkwýjē nhīpêx o te poti mexta nhīpêx pyrā nē amnhī kaxyw mē paxunhwý nē mē pahto hkra kaxyw. Nē mē pajarēnh o:

—Nà koja mē amnhī kaxyw Ixkra Jejus mā hamaxpēr nē hkót amnhī xunhwý pa ja hā mē omu nē mē kamā ixukaprī ho ri ixpa. Nē mē ho mex pē mē kutā inhnojarēt rāhā ho ri ixpa. Hāmri nhūm mē nhýrmā Ixkra mē wa ixri htír tūm nē mex nē pa ho pa. Kot paj ā mē ho mex anē nhūm mē amnhī tā ixpumu nē inhmā inhmex o inhmex ā ijarēnh o pa. Anē.

Ā na hte Tirtūm ahpýnhā mē pahpiitā mē panhīpêx anē.

²⁴ Nē na hte mē ixpē Ijaew pix o hkra hkēt nē. Na hte māānēn mē apē Ijaew kēt xwýnhjē ho hkra.

²⁵ Amnepēm mā mē kām kapēr jarēnh o ri mē pa xwýnhjē hō pē finat Ojeja na pre te Tirtūm tām kot Ijaew kēt xwýnhjē jarēnh pyrā nē mē harēnh o:

Amnepēm na pa pre mē ho ixkra hkēt tā kot paj mē hkwyjē ho ixkra. Na pa pre mē kamā ixukaprī hkēt tā pa ra inhmā mē hapē nē.

²⁶ Nē ixte mē kēp ixkra hkēt ā mē harēnh tā kot paj ra mē kēp ixkra hā mē harē. Ixpē mēo Tirtūm kot paj ā mē harēnh anē. Anē.

²⁷ Hāmri nhūm finat Ijais Ojej pānhā tanhmā Ijaew jarēnh to. Ijaisja Tirtūm nhý hā kapēr jarēnh o ri pa xwýnhjē hō na pre. Jakamā nhūm Tirtūm kām tanhmā mē ijarēnh to nhūm kuma nē ô ri mē ixkukamā mē inhīgexjē mā ujarēnh o pa nē hā kagā. Nē hā kagā ho:

Ijaew na mē ohtō rax kumrêx.

Te gō xujanār mýri pykahti grā hkryre sohtō pyrāk.

Tā koja mē piitā ixkót amnhī xunhwýr kēt nē.

Koja mē ām grēre nē amnhī kaxyw inhmā hamaxpēr nē ixkót amnhī xunhwý. Jakamā mē tapxixjaja koja hkwyjē rom nhýrmā inhō krī hwýr api.

²⁸ No mē kot amnhī kaxyw inhmā mē hamaxpēr kēt xwýnhjaja kot paj tokyx tanhmā mē harēnh to.

Mē kot amnhī tomnuj mýrapē tanhmā mē harēnh to nhūm mē ma mē kot amnhī

xā htýx kamā hamak tūm xàta wýr ma pa.

Nà kot paj tokyx ā mē hipêx anē.

Anhýr o mē harē.

²⁹ Nom nhūm kormā ā mē harēnh anhýr kēt ri nhūm ra wam tanhmā mē harēnh to nē mē harēnh o:

Amnepēm Sotō mē Komo kamā mē pa xwýnhjaja na prem amnhī tomnuj týx rāhā ho ri pa.

Mýrapê nhūm Tirtūm xāhpumunh o āhpumunh xwýnhjaja tee ri ja hā mē omu hāmri nē kaxkwa rūm mē ô krī wa hipy mēmoj pōōta rē.

Nhūm mē hā rōrōk nē mē ho hkaxār pa nhūm mē hapêx.

Tā na pu htem mē urāk nē amnhī tomnuj o ri papa.

Jakamā kop ām Tirtūm kot mē pahkwýjē kamā ukaprī kēt ronhýx pu mē ra mē urāk nē pahpiitā pajapêx pa. Anē.

Ijaew kwý kot Jejus kót amnhī xunhwýr kēt ā mē harēnh

Rōmān 10.1-4

³⁰ Nē Ijaew kēt xwýnhjaja na prem Ijaew pyrā nē kām Tirtūm prām kēt tā Jejus jarēnh ma nē Ijaew rom amnhī kaxyw hkót hamaxpēr nē hkót amnhī xunhwý. Hāmri nhūm Tirtūm ja hā mē omu nē mē ho hkra nē mē kot amnhī to mex xwýnhjē hā mē harē.

³¹⁻³² Hāmri nhūm Ijaew tee ri mē kot Jejus kót amnhī xunhwýr ā mē omu nhūm ja mē kām mex kēt nē. Hāmri nhūm mē hamaxpēr o:

—Tk. Kwa ra mē ixte finat Mojes kapēr kót amnhī nhīpêx mex o ri mē ixpa xwýnh jakamā koja Tirtūm ja hā mē ixpumu nē mē ixte amnhī to mex xwýnhjē hā mē ijarē nē mē inhnē mē ixte amnhī tomnuj rēnh pa. No kot paj mē Ijaew kēt xwýnhjē pyrā nē Jejus kót amnhī xunhwýr kēt nē. Ām kwarī ho kwarī.

Anhýr ā amnhī jarē. No ām ā mē hamaxpēr anhýrja mex kēt. Na prem htýx Tirtūm noo mā kot amnhī to mex ā amnhī jarēnh kaprý nē arī ri tanhmā amnhī tomnuj to ho ri pa. Te pry kamā kēn nōr nhūm mē kot nhām nē mēnh kaxyw hkamnār nē ho amnhī par krā hi kukēnh pyrāk o na htem amnhī nhīpêx. Jao amnhī krā hkót tanhmā amnhī nhīpêx to ho pa hprām xāj te Jejus kapērja nhām amnhī nē rēnh pyrāk o hipêx. Jakamā koja mē Tirtūm nhō krī hwýr āpir kēt nē.

³³ Tirtūm kapēr ā kagā htūm kot ja jarēnh kot:

E mē inhma. Kot paj nhýrmā Ijaewjē hwýr mēhō mē nhūm mē hkót kapēr o pa.

Nom koja mē kapēr mar kēt nē. Koja mē kuma nē ām kuma.

Te pry kamä kën nör nhüm më kot nhäm pry në mënh kaxyw hkamnär në ho amnhî par krâ hi kukënh pyrâk o koja më amnhî nhîpëx.

No te më kot nhäm pry në mënh kaxyw hkamnär kêt pyrâk xwýnhjaja koja më kurom nhÿrmä ma Tirtüm nhö krî hwÿr api.

Hämri në hkînh në pa ho pa. Anë. Nom kën kumrëx jarënh kêt në. Na prem Jejus ä kuxi në ä harënh anë. Ijaew te më kot kën nhîpëx pyrâk o Jejus nhîpëx në amnhî kaxyw hkôt hamaxpër kêt në axtem në hkaga në äm kamä gryk pix o ri pata ä nhüm më harë. No më kot amnhî kaxyw hkôt hamaxpër ronhÿx Jejus te kën kot më kÛp ämnär pyrâk kêt në. Jakamä ä më harënh kot anhÿr.

10

¹ Hêxta waa në. Ijaxwÿja ixpë Ijaew. Më kÛp ixkwÿ jakamä kÛp apu më kot amnhî kaxyw Jejus mä hamaxpër në hkôt amnhî xunhwÿr ronhÿx pa ixkînh tÿx kumrëx. Inhmä më kÛp Tirtüm kra hpräm tÿx kumrëx kênä. Inhmä ja präm xäj na pa hte më ho Tirtüm wÿr rähä ho ri ixpa.

² Ra ixte më omunh mex. Më käm Tirtüm mä tanhmä amnhî nhîpëx to hpräm tä no äm më kot hprî hä kapër mar kêt. Jakamä na htem tee ri tanhmä käm amnhî nhîpëx to ho ri pa hpräm kaprÿ.

³ Nhüm pre Tirtüm tee ri amnhî tä më omu në hamaxpër o:

—Koja mëhō amnhî kaxyw Ixkra Kris kôt hamaxpër në hkôt amnhî xäm pa ja hä omu në kot amnhî to mex xwýnh ä harë në ho ixkra kurë kumrëx. Nom na hte Ijaew ohtō në ä amnhî nhîpëx anhÿr kêt në.

Anhÿr o më harë. Äm hämri na ä më harënh anë. Na htem äm axtem në hamaxpër o:

—Tk. Kot paj amnhî kaxyw Kris kôt ijamaxpër në hkôt amnhî xäm kêt në. Kot paj äm pam amnhî krâ hkôt tām ri amnhî nhîpëx o ri ixpa. Më ixpë Ijaewjê më ixte amnhî nhîpëx xä hkôt. Hämri nhüm Tirtüm ja hä ixpumu në amnhîm inhmex ä ijarë. Nom kot paj Kris kôt amnhî xäm kêt në. Äm kwarî ho kwarî.

Anhÿr ä amnhî jarë.

⁴ Nom na htem äm htÿx ri amnhî krâ hkôt amnhî to mex o pa hä amnhî kamnhîx kaprÿ. Kojamä tee ri kām finat Mojes kapër kôt amnhî nhîpëx o ri pa hpräm kaprÿ. Jejus tapxipix na pre tām amnhî nhîpëx mex rähä ho pa. Na pre Tirtüm kapër kôt amnhî nhîpëx mex o ri pa në aa kapër ö nhîrōp äm në hkwÿm ri tanhmä amnhî tomnuj to hkêt në. Kot amnhî tomnuj kêt xwýnh ä äm pixi mex na. Jakamä tapxipix kukwak ri na

hte Tirtüm amnhîm më pahte amnhî to mex xwýnh ä më pajarë.

Tirtüm kām më pahpiitä më pahto hkra hpräm ä harënh

⁵ Në amnepëm na pre finat Mojes Tirtüm nhÿ hä Ijaew mä tanhmä ujarënh to në hä kaga. Në më kām ujarënh o:

—E kot kaj më atō Tirtüm nhÿ hä ixujarënh ma në hkôt amnhî nhîpëx mex o ri apa në hkwÿm ri tanhmä amnhî nhîpëx to hkêt në. Hä koja Tirtüm hä apumu në amnhîm ate amnhî to mex xwýnh ä ajarë ka nhÿrmä kuri atÿr tÿm në amex në apa ho apa. Anë.

⁶ Äm më kām kapër anhÿr tä më pahte Mojes kapër xä hkôt amnhî nhîpëx o papaja na më pahpë hihtÿx kumrëx. Tirtüm kapër tÿm na. Kapër ä kaga kamä kot më pamä më pahte tanhmä amnhî nhîpëx to hä karōja ohtō rax kumrëx jakamä pu më tee ri pamä piitä hkôt amnhî nhîpëx präm kaprÿ. Nhüm Tirtüm tee ri amnhî tä më pajamä hämri në më pahwÿr Kra Jejus më. Jakamä na pu htem amnhî kaxyw hkôt pajamaxpër në hkôt amnhî xunhwÿr nhüm Tirtüm hä më pahpumu në kukwak ri më pahto hkra kurë kumrëx. Kra kukwak ri kot më pahto hkra kaxyw kot më pahwÿr mënh nhüm më kot hprî nhüm akupÿm ho htÿr jakamä na pu htem harënhja ma në pajamaxpër o:

—Nä na xep pre Jejus ixto ixpë Tirtüm kra. Anë.

Nom xä na hte Tirtümja ä më pamä kapër anë në më pamä:

—E kot kaj më ma kaxkwa hwÿr api në Kris japrō në man amnhî kôt akupÿn o wÿr pa ja hä më apumu në më ato ixkra.

Anhÿr o më pamä kapër? Nä na hte ä më pamä kapër anhÿr kêt në. Tanhmä kot puj më amnhî to në ä amnhî nhîpëx anë?

⁷ Ry xä na hte ä më pamä kapër anë në më pamä:

—E na pre Krisja ty. Jakamä më kam në ma hwÿr mra në akupÿm amnhîm ho htÿr. Hämri pa ja hä më apumu në më ato ixkra.

Anhÿr o më pamä kapër? Nä na hte ä më pamä kapër anhÿr kêt në. Tanhmä kot pu më amnhî to në akupÿm ho htÿr? Ja pyrä në na hte Tirtüm më pamä mëmoj tä karō pu më kām ho anhÿr nhüm ja hä më pahpumunh kôt më pahto hkra hkêt në.

⁸ Äm më pahte amnhî kaxyw Jejus kôt pajamaxpër në hkôt amnhî xunhwÿr ä më pahpumunh kôt pix mä na hte më pahto hkra. Hämri në më pahwÿr Karō rë nhüm më pahkarō mä gjëx jakamä më pahte Tirtüm kām hpräm xä hkôt amnhî nhîpëx o papaja na më pahpë hihtÿx kêt. Te kapër ra më pahkrä hi kaxwýnh kām hikwÿ pyrâk o pu më piitä më kām harënh o ri më hkôt papa. Jakamä na pa hte më piitä më kot amnhî kaxyw Jejus kôt hamaxpër kaxyw

tanhmā mē kām harēnh to ho ri mē hkôt ixpa nē mē kām:

⁹ –Kot ka mē atō Jejus kēp anhō Pahihti hā harē nē Tirtūm kot akupūym ho htīr kōt ajamaxpēr. Hā koja Tirtūm ja hā apumu nē anē ate amnhī tomnuj o hapēx nē ato hkra. Ām ja pix ā mē pahpūmūnh kōt na hte mē pahto hkra. Anē.

¹⁰ Nē na pu htem mē pahkrāhi kaxwūnh kām amnhī kaxyw Jejus mā pajamaxpēr. Nē mē pajakwa ho kēp mē panhō Pahihti hā harē. Hāmri nhūm Tirtūm ja hā mē pahpūmu nē amnhīm mē pahte amnhī to mex xwūnh ā mē pajarē nē mē pahto hkra.

¹¹⁻¹³ Tā mē pahte amnhī kaxyw Jejus kōt pajamaxpēr nē hkōt amnhī xunhwūr xwūnhjaja kot puj mē pahkīnh nē papa ho papa. Mē pahpiitāā. Ijaew nē Ijaew kēt xwūnhjaja. Mē pahpiitā mē panhō Pahi Maatija ām pyxi mex na. Jakamā koja Ijaewjē hō rý Ijaew kēt xwūnhjē hō amnhī to kuwý nhūm kuma nē ho hkra. Kapēr ā kagā htūm kot ja jarēnh kot:

Mē kām kēp Tirtūm kra hprām xwūnhjaja koja mē amnhī to Tirtūm wý nhūm mē kuma nē Jejus kot mē nē htyk kukwak ri mē nē mē kot amnhī tomnuj o hapēx nē mē ho hkra nhūm mē hkīnh nē pa. Anē.

¹⁴⁻¹⁵ Xā na htem kormā amnhī kaxyw Kris mā hamaxpēr kēt rāhā amnhī to Tirtūm wý nhūm mē kuma nē mē ho hkra? Nā tanhmā kot wem amnhī to nē amnhī kaxyw kām hamaxpēr kēt rāhā amnhī to kuwý? Na hte Tirtūm ma mē hwūr mē hkwyjē rē nhūm mē ma mē hwūr mra nē Tirtūm kapēr o mē ahkre ho ri mē hkōt pa. Nhūm mē hkwyjaja mē kuma nē amnhī kaxyw Jejus kōt hamaxpēr nē amnhī to Tirtūm wý. Kapēr ā kagā htūm kot ja jarēnh kot:

Koja mēmoj mex jarēnh xwūnhjaja ma mē hwūr mra.

Nē mē hwūr hpōx o mō nhūm mē amým amnhī wūr mē omu nē hkīnh nē. Anē.

¹⁶ Tā ra mē piitā kot kapēr mar tā piitā amnhī kaxyw hkōt hamaxpēr kēt nē. Jakamā nhūm finat Ijais tee ri ja hā mē omu nē Tirtūm mā mē harēnh o:

Pa Pahi Maati. Kwa ra mē kot akapēr mar týtā tā akōt amnhī nhīpēx kēt nē. Mē kām akapēr kōt amnhī nhīpēx o pa hprām kēt. Na htem ām grēre nē akōt amnhī xunhwý nē akōt amnhī nhīpēx o ri pa. Anē.

¹⁷ Kot anhūr tā ām mē kot Kris kapēr jarēnh mar kōt pix mā na htem amnhī kaxyw hkōt hamaxpēr. Kōja mē harēnh mar kēt tā tanhmā koja wem amnhī to nē amnhī kaxyw hkōt hamaxpēr nē hkōt amnhī xunhwý?

¹⁸ Mān ka mē atō atýtā ā ajamaxpēr anhūr o:

–Ko mān Ijaew kormā Jejus kot mē panē tanhmā amnhī nhīpēx to hā harēnh mar kēt jakamā na mē kormā hkōt amnhī xunhwūr kēt nē.

Anhūr o ajamaxpēr. Nom ja kot anhūr kēt. Ijaew piitā ra mē kot harēnh mar kēnā. Tirtūm kapēr ā kagā htūm kot ja hā mē harēnh kot:

Na prem ma mē piitā mē kām ja jarēnh o ri mē hkōt pa nhūm mē piitā kuma. Anē.

¹⁹ Tā mān ka prem ra ja ma nē atýtā ajamaxpēr o:

–Kot anhūr tā no mān kormā hprī hā Jejus jarēnh mar kēt jakamā mē hkōt amnhī xunhwūr kēt nē. Anē.

Nom ja haxwýja kot anhūr kēt. Ra mē kot hprī hā harēnh mar mex tā kuma nē ām kuma nē amnhī kaxyw kām hamaxpēr kēt nē. No mē apē Ijaew kēt xwūnh kwýjaja na ka mē kurom harēnh ma nē amnhī kaxyw hkōt ajamaxpēr nē hkōt amnhī xunhwūr kurē kumrēx. Hāmri nhūm Ijaew tee ri ja hā mē apumu nē mē akamā gryk týtā nē. Nom ra Tirtūm kot ā mē hkukamā mē kot amnhī nhīpēx anhūr ā mē omūnh nē mē harēnh kot anhūr kēnā. Na pre finat Mojes mē kām tanhmā hā kagā hto. Te Tirtūm tām kot mē hā kagā pyrā nē kapēr ā kagā htūm kamā kot mē harēnh kot:

Mē ate mē kamā mē akahak o apa xwūnhjaja. Mē kot htýtā ri amnhī nhīpēx o mē pa hā mē ate mē harēnh tā no kot paj mē arom amnhīm mē kot amnhī to mex xwūnhjē hā mē harē.

Kot kaj mē tee ri ja hā mē omu nē mē kamā agryk týtā kumrēx.

Nē määnēn pa ixte mē ho mex ā xpumu nē mē hā ixkamā agryk nē. Anē.

²⁰ Nē finat Ijais na pre haxwýja ā mē harēnh anē. Na pre kām amnhī kwý pē Ijaew pyma hkēt nē xatā Tirtūm nhý hā tanhmā mē kām Ijaew kēt xwūnhjē jarēnh to ho pa. Te Tirtūm tām kot mē harēnh pyrāk o mē kām:

Nā Ijaew kēt xwūnhjaja kot Tirtūm japēr kēt tā koja tām mē kām amnhī to amnhīrit nhūm mē hkōt amnhī xunhwý.

Mē kot kormā amnhī kaxyw kām hamaxpēr kēt tā koja tām mē kām amnhī to amnhīrit. Anē.

²¹ Ā Ijaew kēt xwūnhjē jarēnh kot anhūr. Nē axte mā tanhmā Ijaewjē jarēnh to kot:

Te mē katorxā kot tanhmā hkrajē ho mex to kaxyw tee ri amnhī wūr mē kām ākjēr pyrāk o na hte Tirtūm Ijaewjē nhīpēx o pa.

Jao tee ri kām tanhmā mē ho mē mex to hprām tā no nhūm mē amnhī tā kuma nē ām kuma nē hkōt amnhī nhīpēx kēt nē. Anē.

11

*Tirtüm kot Ijaew kamā ukapri hā harēnh
Matēwre 13.10-17*

1 Tā ra Ijaew kot Tirtüm kaga jakamā män ka mē atō mē harēnh ma nē ajamaxpēr o:

—Män pre Tirtüm tee ri amnhī tā mē omu nē amnhī pyrà nē mē hkaga.

Anhÿr o ajamaxpēr. Nom na pre mē hkaga hkēt nē. Ijaxwÿja ixpē Ijaew na pa. Mē urāk nē ixpē Ijaew pār krax pē finat Apraāw kanrēhā htāmnhwÿ Pējami kanrēhā hō na pa. Tā xā na pre Tirtüm ixkaga? Nā kot ixkaga hkēt.

2 Amnepēm kormā mēmoj piitā hkēt ri na pre mē ixpē Ijaew hkukamā mē ixto hkra hā amnhī jarē. Tā nhüm amgrā xohtō nē hapēx nhüm mē hapōj hāmri nē Tirtüm kōt amnhī nhīpēx o pa hkēt nē. Hāmri nhüm finat Erisja tee ri mē kot amnhī nhīpēx ā mē omunh o pa nē Tirtüm mā tanhmā mē harēnh to nē mē hā kagā. Nē hā kagā ho:

3 Kwa Tirtüm. Mē ixte amā amnhī jarēnh xā hā mēsti hkwy na prem ra hkrakrak pa. Nē anhy hā akapēr jarēnh o ri mē pa xwÿnh kwÿ nhūmex rax nē. Ām papxipix na pa arī ixtūr nē ri ixpa nom nhüm mē ra kot ixpēr kaxyw ixtā amnhī jarē. Anē.

4 Tā tanhmā na Tirtüm kutā kām kapēr to? Na pre kām:

Nā kapxipix na ka arī atūr kēt nē. Arī mē ohtō nē apyrā nē amnhī kaxyw ixkōt hamaxpēr. Mē ohtōō. Arī mē kēp 7.000 nē akwÿjē rom ri sānti Paaw kutā hkōnkrā ho hkrī nē kām mex ā harēnh kēt nē. Anē.

5 Tā arī ā jarāhā mē kot ā amnhī nhīpēx anhÿr kēnā. Tirtüm kām Ijaew japē jakamā mē kamā ukapri. Jakamā nhüm ra mē hkwyjaja mē pahpyrà nē amnhī kaxyw Kris kōt hamaxpēr nhüm Tirtüm mē ho hkra.

6 Nom mē kot amnhī to mex ā mē omunh xā hkōt mē ho hkra hkēt nē. Amari kām mē hapē htüm xā hkōt na hte mē ho hkra. Kop apu mē kot amnhī to mex ā mē omunh xā hkōt kot mē ho hkra ronhÿx amari mē ho hkra hkēt nē. Nhÿx mē kot tanhmā amnhī nhīpēx to ho pa hā mē omunh xā hkōt pix mā mē ho hkra.

7 Ijaew piitā Tirtüm kot amnhīm mē mex ā mē harēnh prām tā no ām mē grēre nē hamaxpēr xā hkōt Jejus kōt amnhī xunhwÿ. Na htem ohtō rax nē kapēr ma nē ām kuma nē tee ri kot amnhīm mē mex ā mē harēnh prām xāj amnhī krā hkōt tanhmā amnhī nhīpēx to ho ri pa. Nom ra mē kot Jejus kaga jakamā ā amnhī nhīpēx anhÿr kapry. Mē kot hkaga jakamā te ri mē hamak kro nē Tirtüm kapēr mar kēt pyrà nē pa.

8 Tirtüm kapēr ā kagā htüm kot mē harēnh kot:

Tirtüm na hte mē kām kapēr mar prām kēt xwÿnhjē pumu nē ām mē omu nhüm htem htÿx ri pa ho pa. Nē Tirtüm mā hamaxpēr kēt o ri pa. Mē kot kapēr mar tā hprī hā mar tÿx kēt nē. Nē mē kot kapēr ā kagā kamā harēnh tā hprī hā mar tÿx kēt nē. Jakamā na htem amnhī kaxyw hkōt hamaxpēr kēt o pa.

Tā na htem arī jarāhā ā amnhī nhīpēx anhÿr o ri pa. Te mē nohkre nē mē hamak kro xwÿnh kot amnhī nhīpēx pyràk. Anē.

9 Nē amnepēm na pre pahi finat Tawija amnhī kwÿ Ijaew jarēnh o:

Na htem htÿx ri hkīnh kām apkur o pa.

Te tutre kām prām nē kot rapuuti hwÿr ar nē tee ri kām kator prām kapry pyràk.

Ja pyrà nē mē kot Tirtüm kapēr mar kēt mÿrapē koja Tirtüm tanhmā mē ho nhüm mē tee ri kām mex prām kapry.

10 Te mē nohkre xwÿnhjaja tee ri mē hpa nhīpēx o pa pyràk.

Nē omnuj nē ā nē ho gjēx o ri pa pyràk o amnhī nhīpēx o ri pa.

Anhÿr o mē harē.

11 Tā arī Ijaew Jejus kaga nē kām kapēr mar prām kēt jakamā xā na Tirtüm tee ri ja hā mē omu nē mē hkaga kumrēx? Nā kot mē hkaga hkēt. Ām mē tāmjaja kēp Jejus prām nōkati jakamā nhüm tee ri ja hā mē omu nē mē hpānhā Ijaew kēt xwÿnhjē mā amnhī to amnhīrit nē mē hkwyjē ho hkra. Jakamā koja Ijaew kwÿjaja ja hā mē omu nē tee ri hamaxpēr nē hamaxpēr o:

—Kwa na xep Ijaew kēt xwÿnh kwÿjaja Jejus kōt amnhī xunhwÿ nhüm Tirtüm ja hā mē omu nē mē ho hkra. Kwa mon pu prem axtem nē ri Jejus kaga? E pu mē kuxwar amnhī kaxyw hkōt män pajamaxpēr nē hkōt amnhī xunhwÿ kē Tirtüm ja hā mē pahpumu nē Ijaew kēt xwÿnhjē pyrà nē mē pahto hkra. Hāmri nē amnhī mā mē pahte amnhī to mex xwÿnh ā mē pajarē. Anē.

Ā Ijaewjaja hamaxpēr anhÿr kaxyw na pre Tirtüm Ijaew kēt xwÿnhjē mā amnhī to amnhīrit.

12 Hāmri nhüm mē amnhī tā omu nē hkīnh nē pa. No nhüm Ijaew kwÿjaja. Mē kām Jejus prām nōkati ho mē pa xwÿnhjaja mē hkīnhā hkapri nē pa. Tā koja mē nhÿrmā amnhī kapri hā amnhī pumu nē amnhī kīnh kēt ā amnhī pumu hāmri nē Tirtüm kōt amnhī xunhwÿr nē amnhī kaxyw Kra Jejus Kris mā hamaxpēr japēr. Koja mē ā amnhī nhīpēx anē hāmri nē Ijaew kēt xwÿnhjē pyrà nē hkīnh nē ri pa. Hāmri nhüm Tirtüm ja hā mē omu nē Ijaew kēt xwÿnhjē mē mē ho hpimrāatā mē ho mex rax nē nhüm mē hkīnh nē hamakētkati nē pa ho pa.

Tirtüm kot Ijaew kêt xwýnhjê ho hkra hã harênh

¹³ E kot paj hpãnhã mê apê Ijaew kêt xwýnhjê mã ixkapêr nê mê atã kaga. Na pre Jejus ma mê awýr inhmê. ý hã ixte mê ajahkre ho ri mê akôt ixpa kaxyw. Pa pre ma krî hkwy kamã mê akwýjê hwýr mô nê ixkînh kãm mê kãm kapêr jarênh o ri mê hkôt ixpa. Nhùm mê hkwyjaja inhma nê amnhî kaxyw Jejus kôt hamaxpêr nê hkôt amnhî xunhwý.

¹⁴ Tã koja apu ixkwýjaja mê harênh mar japêr. Ijaew tee ri mê apê Ijaew kêt xwýnhjê jarênhja ma hãmri nê ra amnhî kamã gryk japêr. Jao mê apyrã nê Jejus kôt amnhî xunhwý nê nhýrmã kuri htîr tùm nê mex nê pa ho pa.

¹⁵ Kormã mê kot amnhî kaxyw kãm hamaxpêr kêt jakamã na pre Tirtüm hpãnhã mê apê Ijaew kêt xwýnhjê mã amnhî to amnhîrit. Ka mê ra krî piitã hkôt axohtô nê hkôt amnhî xunhwý nê hkôt amnhî nhîpêx mex o ri apa. Tã koja Ijaewjaja nhýrmã amnhî kaxyw Tirtüm mã hamaxpêr nê mê apyrã nê Jejus kôt amnhî xunhwýr japêr. Hãmri nê te mêhõ hkra kêp htyk nhùm hkaprî htã nhùm hkraja tanhmã amnhî to nê akupým kãm htîr nhùm kot omunh nê hkînh týx kumrêxta pyrãk o amnhî nhîpêx. Jao Tirtüm mê kot hkôt amnhî xunhwýr ã mê omu nê hkînh nê. Pu mê pahpimràatã urãk nê pahkînh nê ri papa.

¹⁶ E pa mê amã mê ujarênhja ã ejêp kwý jarê. Koja mêmo pí hpãr jarê mex nê hã koja pãr mex nê xa. Ja pyrã nê Ijaew pãr krax finat Aprãwja kumrêx na pre amnhî kaxyw Tirtüm mã hamaxpêr nhùm ho hkra. Jakamã koja nhýrmã hkanrêhã htãmnhwýjaja urãk nê amnhî kaxyw kãm hamaxpêr nhùm mã mê ho anê nê mããnen mê ho hkra nhùm mê mex nê pa. Te kot mêmo pí hpãr jarê mexja nhý hã pãr mexta pyrãk.

¹⁷ Nê na htem akunî kamã mêmo pí hpa jakã nê hamý nê ma amnhî kôt o mra. Nê ixkre kapem ra mê kot mêmo pí hkreja hpa jakãr nê rênht xwýnh zwakre kamã wam pí hpa jakãr xwýnhnta nhõ nê axpên tã hkaxpre nê gaa nê axpên jamýnh mex nê grã hkêt nê. Nê arî htîr mex nê. Te kêp hpa kumrêx pyrãk. Tã Ijaew kwý kot amnhî kaxyw Jejus kôt hamaxpêr xwýnhjaja te mê kêp ixkre kapem pí hpãrta pyrãk. No mê hkwyjaja mê kot Jejus kaga xwýnhjaja te mê kêp mê kot kêp hpa jakãr nê rênhtta pyrãk. Jakamã nhùm Tirtüm te mê kot pãr pê hpa jakãr nê rênhtta pyrãk o mê hipêx nê mê hkaga. Nê axtem te mê kot mêmoj pãr pa jakãr nê hpãnhã kamã axtem pí hpa janhôr nê hã hkaxpreta pyrãk o mê apê Ijaew kêt xwýnhjê nhîpêx nê mê amã amnhî to amnhîrit. Ka mê ra amnhî

kaxyw Jejus mã ajamaxpêr nê hkôt amnhî xunhwý nhùm Tirtüm mê ato mex nê.

¹⁸ Tã kêt ka mê arî Ijaew o mex o ri apa. Tanhmã ri mê hipêx to mã ajamaxpêr to hkêt nê. Rý ajamaxpêr o:

—Nã ãm hãmri na Tirtüm mê hkaga nê ãm kãm mê papxipixjê japê.

Anhýr o ajamaxpêr kêt nê. Ijaew te ixkre kapem pí hpãr mexta pyrãk. No mê kajaja te mê ate akunî rùm pí hpa kot ixkre kapem pãr mex pix kukwak ri htîr nê hã hariirta pyrãk. Kêt akunî rùm pí hpa jakãr kukwak ri na hte ixkre kapem pãrta htîr nê kuhê hkêt nê. Kop apu pãrta mex kêt ronhýx ra akunî rùm hpaja grã pa. Ja pyrã nê Ijaew kukwak ri kot kaj mê nhýrmã Tirtüm ri atîr tùm nê apa ho apa. Jakamã kwa kêt ka mê ate amnhî to rûnh o mê hakrenh ã amnhî to jarkrar kêt nê.

¹⁹ Mãn ka mê atõ ajamaxpêr o:

—Ra Tirtüm kot Ijaew kaga nê hpãnhã mê pajaja mê ixto hkra jakamã mãn kãm mê ijapê ho mê hakre. Ra mê hpãnhã mê ixto hkra kênã. Anê.

²⁰ Nã ãm hãmri na pre Tirtüm Ijaew kwý kaga. Mê kot Jejus kôt amnhî xunhwýr kêt mýrapê na pre te mêmo pí hpa jakãr nê rênhtta pyrãk o mê hipêx. Ka mê ra mê kurom amnhî kaxyw hkôt ajamaxpêr jakamã nhùm Tirtüm te kot akunî kamã pí hpa jakãr nê ho htêm nê ixkre kapem pí hpãr mex ã hanhôr nê hã hkaxpre pyrãk o mê anhîpêx. Nom kwa kêt ka mê ja hã amnhî pumu nê ri hã Ijaewjê mã amnhî to jarkrar kêt nê. ãm amnhî to mex nê Tirtüm kapêr kôt amnhî nhîpêx mex o ri apa. No kot kaj mê ã amnhî nhîpêx anhýr kêt nhùm amnhî tã mê apumu nê ra kot Ijaew kwý nhîpêxta pyrã nê tanhmã mê ato nê mê akaga.

²¹ ã Ijaew jarênh kot anhýr. Te mê kêp pãr mex pyrãk. Tã nhùm mê kot Jejus kôt amnhî xunhwýr kêt jakamã nhùm Tirtüm te kot pí hpa jakãr nê rênhtta pyrãk o mê hipêx nê mê homnuj nê. Kot kaj mê urãk nê ã amnhî nhîpêx anê nhùm mã mê ato anê nê.

²² Ijaew kot Jejus kôt amnhî xunhwýr kêt jakamã nhùm Tirtüm mê hpãnhã mê apê Ijaew kêt xwýnhjê mã amnhî to amnhîrit. Tã ka mê Ijaew rom amã Jejus prãm nhùm Tirtüm ja hã mê apumu nê amnhî pyrã nê kãm mê aprãm nê mê akamã ukapri rãhã nê pa ho pa. Tã kwa mê okora. Kêr ka mê hkôt pix mã amnhî nhîpêx o ri apa rãhã ty. Kot kaj mê hkaga nhùm amnhî tã mê apumu nê te Ijaew kot hkaga xwýnhjê nhîpêx pyrãk o mê anhîpêx nê mê akaga.

²³ Koja Ijaew nhýrmã Jejus kôt amnhî xunhwýr japêr nhùm Tirtüm ja hã mê omu nê mê ho hkra. Te mê kot pãr pa jakãr nê rênht nhùm grã par xwýnh nhùm kot akupým amnhîm hamýnh nê ixkre kapem pãr wýr

o htēm nē akupŷm hā hanhōr nē hā hkaxpre ho htŷx nhūm kukwak ri akupŷm htūrta pyrāk. Ja kēp tanhmā kute hkēt. Kot ā hipēx anhŷr kaxyw āhpumunh tŷx.

²⁴ Mē apē Ijaew kēt xwŷnhjaja te mē ate akunī kamā pī hpa jakār nē ixkre kapem pār ā hanhōr nē hā kaxpreta pyrāk. Jao Jejus kōt amnhī xunhwŷ nhūm mē ato hkra kurē kumrēx. No Ijaew te mē kēp ixkre kapem pārta pyrāk jakamā Tirtūm kot akupŷm hanhōrta tanhmā kēp kute hkēt. Kēp Tirtūm kēnā kot tanhmā kēp kute. Jakamā koja mē hkōt amnhī xunhwŷ nhūm amnhī tā mē omu nē mē ho hkra kurē kumrēx.

Tirtūm kot mē piitā mē kamā ukapri hā harēnh

Matēwre 23.37-39; Rukre 21.24; Juāw 10.16

²⁵ E kot paj mē amā mēmoj to amnhīrit ka mē inhma. Nā na pa ra mē amā Ijaew krā xihitŷx xwŷnhjē jarē ka mē harēnh ma. Ra mē kot Jejus kaga hā mē harēnhja. Tā koja mē ā amnhī nhīpēx anhŷr o pa rāhā hkēt nē. Na hte Tirtūm kormā amnhī tā mē apē Ijaew kēt xwŷnhjē jamār o pa. Amnepēm na pre amnhī kaxyw mē akukamā tanhmā mē akwŷjē jarēnh to. Tā kot kaj mē kot tanhmā mē ajarēnh to xwŷnh piitā Jejus kōt amnhī xunhwŷr pa nhūm rī Ijaew amnhī to hapu nē kormā hkōt amnhī xunhwŷ. Ā mē kot amnhī nhīpēx anhŷr kaxyw. Jakamā kwa kēr ka mē ri ja hā amnhī to jarkrar o ri mē hkōt apa hkēt nē. Mē pahpyrā nē mē kot Jejus kōt amnhī xunhwŷr mā xwŷnh kēnā.

²⁶ Kōja Tirtūm nhŷrmā Ijaew piitā ho hkra. Kapēr ā kaga htūm kot mē harēnh kot: Nhŷrmā kot mē ate amnhī tomnuj pē mē apytār mā xwŷnhja Ijaew ō koja. Jako hkanrēhā htāmnhwŷjē hō koja. Kōja nhŷrmā wrŷ nē mē ate amnhī tomnuj pē mē apytā nē mē ate amnhī tomnuj o hapēx pa. Anē.

Anhŷr o kot harēnh.

²⁷ Nē määnēn ja:

Kot paj mē nē mē kot amnhī tomnuj o ijpapēx pa.

Amnepē mā ixte mē hkukamā mē hā amnhī jarēnh xā hkōt. Anē.

²⁸ Nom arī mē kām Jejus mar prām kēt jakamā te mē kot kutā amnhī xunhwŷr pyrāk o amnhī nhīpēx. Tā ā mē kot amnhī nhīpēx anhŷrja ri ka mē kamjaja mē hpānhā mē apē Tirtūm kra. Nom nhūm Tirtūm arī kām mē hapēē. Na pre amnepē mā kot tanhmā mē ho mex to hkukamā tanhmā mē hā amnhī jarēnh to. Mē hpār kraxjē mā tanhmā mē hā amnhī jarēnh to. Finat Apraāw mē Ijak mē Jakoja mā mē hkanrēhā mē htāmnhwŷjē hā tanhmā amnhī jarēnh to.

²⁹ Na hte Tirtūm mēmoj tā tanhmā amnhī jarēnh to nē ām hāmri hā amnhī jarē nē

amnhī jarēnh xā hkōt tanhmā hipēx to. No na hte mēmoj tā amnhī jarēnh tā gaa nē ho hamakētcati hkēt nē. Rŷ hpānhā axtem tanhmā hipēx to hkēt nē. Na hte mēmoj tā amnhī jarēnh xā hkōt tanhmā hipēx to. Tā ra amnepē mā kot Ijaew o mex ā amnhī jarēnh jakamā koja nhŷrmā mē ho mex rax nē ā mē hipēx anhŷrja o hamakētcati hkēt nē.

³⁰ No mē kajaja mē apē Ijaew kēt xwŷnhjaja. Amnepēm na ka prem ajaxwŷja Tirtūm kōt amnhī nhīpēx kēt nē. Tā nhūm mē akamā ukapri nē kām mē ajapē nē. Ka mē ra harēnh ma nē hkōt amnhī xunhwŷ nē hkōt amnhī nhīpēx mex nē. No ām Ijaew kukwak ri. Mē kot kapēr kōt amnhī nhīpēx o pa hkēt jakamā nhūm Tirtūm mē hpānhā nhām mē amā amnhī to amnhīrit nē mē ato mex rax nē. Jakamā te Ijaew kukwak ri mē amex nē ri mē apa pyrāk.

³¹ Tā koja nhŷrmā kot mē anhīpēxta pyrā nē Ijaew ho hkra. Nē mē apyrā nē mē kamā ukapri nē. Mē kot mē apyrā nē amnhī kaxyw Kra hkōt hamaxpēr xwŷnhjaja nhūm mē apyrā nē mē ho hkra nē mē ho mex nē.

³² Mē apē Ijaew kēt xwŷnhjaja nē mē ixpē Ijaew mē pahte axpēn pyrāk. Na pu htem pahpiitā Tirtūm kapēr piitā hkōt amnhī nhīpēx rāhā ho ri papa hkēt nē. Tā kot puj mē tee ri ja hā amnhī pumu nē amnhī to kuwŷ nhūm mē pama nē amarī mē pakamā ukapri nē mē pahto mex nē.

Pawre kot Tirtūm mex o mex ā harēnh

Epes 3.20; Korosē 1.16; Wam Korīt 2.9, 2.16

³³ Tirtūmja āhpumunh tŷx o āhpumunh tŷx. Nē ukapri ho ukapri nē mex o mex. Mē pahtō na pu urāk nē ā amnhī nhīpēx anhŷr o papa? Nā amrakati kumrēx. Nē mē pahtō na pahte Tirtūm jamaxpēr kōt omunh? Nā mē pahte hamaxpēr kōt omunh kēt.

³⁴ Kapēr ā kaga htūm kot ja jarēnh kot:

Mē pahte Tirtūm jamaxpēr kōt omunh kēt.

Nē kot pu mē pahtō mēmoj tā hakre hkēt nē.

Mē parom āhpumunh o āhpumunh xwŷnh kēnā.

³⁵ Nē mē pahtō kot puj we kām pakapēr nē kām: “Kwa Tirtūm. Ra ixte amā mēmoj nhōrta pānhā kwa amnhī xwar inhāmā mēmoj gō.” Anē.

Nā mēmoj piitā ō kēnā kot puj kēt ri ā kām mēmoj nhōr ā amnhī jarēnh anē. Anē.

³⁶ Tām na pre amnhī kaxyw mēmoj piitā ho kator pa. Nē ām pix kukwak ri na mēmoj piitā htūr nē pa. Jakamā kwa pu mē kām mex o mex ā mām harēnh rāhā ho ri papa.

12

Mê pahte Tirtûm mâ amnhî nhôr â mê pajarênh

Wam Korîti 6.20; Epes 4.1; Piripos 4.8-9; Korosê 1.10; Wam Tesarôn 4.1-3; Wam Pêtre 2.11

¹ Kwa Jejus kôt ixkwýjaja. Tirtûm na hte mê pahto mex nê mê pakamâ ukaprî rãhã jakamã na pa â mê amã ixkapêr anê. Kwa mê tokyx kãm amnhî jarê nê kãm amnhî gô. Te mê ate kãm hkînã xã nhôr pyrãk o amnhî nhîpêx nê kãm amnhî gô. Jao mê amã kapêr kôt pix mâ amnhî nhîpêx o ri apa hprãm â kãm amnhî jarê. Nê kãm hprãm xã hkôt pix mâ tanhmã amã amnhî nhîpêx to ho ri apa hprãm â kãm amnhî jarê. Kot kaj mê â kãm amnhî jarênh anê nhûm amnhî tâ mê ama nê hkînã nê. Â mê pahte kãm amnhî jarênh anhýrja na kãm mar prãm.

² Nê kêr ka mê kãm Tirtûm prãm kêt xwýnhjaja kot amnhî nhîpêx o ri amnhî nhîpêx o ri apa hkêt nê. Nê mê amnhî to Tirtûm mân wý kê mê amã mê ajamaxpêr mex jagiê. Kojã mê ama nê mê amã hagjê ka mê ra aprî hã hamaxpêr xã hkôt mê pahte amnhî to mex xã pumunh mex nê. Na pu htem hkôt amnhî nhîpêx o ri papa nhûm amnhî tâ mê pahpumu nê hkînã nê. Pu mê pajaxwýja ý hã pahkînã nê ri papa.

Kris kwýjaja kot tanhmã axpên nhîpêx to hã mê kãm karô

Römân 12.1-11; Epes 4.11-16; Wam Pêtre 4.10-11

³ Nê na pre Tirtûm ixto mex nê. Nê mê akaxyw ixãm. Ixte mê amã Kra Jejus kot tanhmã mê panê amnhî nhîpêx to hã harênh o ri mê akôt ixpa kaxyw. Tã na pa â kagãja kamã mê amã harênh anê.

Jakamã kwa kêr ka mê amnhî to jarkrar o ri mê kãm apa hkêt nê. Âm kwarî ho kwarî. Rý atýx ri ajamaxpêr o:

—Na pa na ixte amnhî to mex o ixte ixkwýjê piitã mê hakrenh par.

Anhýr â amnhî to jarkrar o ri mê hkôt apa hkêt nê. Kêt mê âm amnhî jarênh o:

—Na pa pre amnhî kaxyw Jejus kôt ijamaxpêr nhûm Tirtûm ixpumu nê ixto hkra. Jakamã na pa hte Jejus Kris pix kukwak ri tãm amnhî nhîpêx o ri ixpa. No amnhî krã hkôt â amnhî nhîpêx anhýr kêt nê. Anê.

⁴ E pa mê amã mêmoj jarê ka mê inhma. Nã mê panhja pyxi htã kamã mêmoj xohtóó. Na kamã mê pano nê mê pajakwa. Nê kamã mê pajamak nê mê pahte. Na pu htem mê pano ho rít nê mê pajakwa ho pakapêr. Nê mê pajamak o ri ama nê mê pahte ho ri mra.

⁵ Ja pyrã nê Kris kôt mê pahte amnhî xunhwýr xwýnhja âm pyxi tâ hkôt mê pahte amnhî xunhwýr xwýnhjaja mê paxohtóó. Jakamã na pu htem ahpýnhã tanhmã axpên

to mex to ho ri papa. Jao Kris kôt axpên to pahtô nê pahtôx o papa.

⁶ Tirtûm na hte mê pahpê hwý hã ahpýnhã mê pamã tanhmã mêmoj tâ karô to nê kaxyw mê pahto mê paxihtýx. Tã kêr pu mê ra kot mê pamã mêmoj tâ karô xã hkôt kãm amnhî nhîpêx rãhã ho ri papa. Jakamã kojã mêhõ ate Tirtûm kapêr jarênh o ri apa kaxyw axãm nê amã anê ka Tirtûm kamnãr rom mê kãm kapêr jarênh mex o ri mê hkôt apa.

⁷ Rý ate akwýjê mâ tanhmã axápênh to ho ri apa kaxyw axãm ka mê kãm axápênh mex o ri mê hkôt apa.

Rý ate Tirtûm kapêr ho mê ahkre ho ri apa kaxyw axãm ka ho mê ahkre mex o ri apa.

⁸ Rý ate Tirtûm kapêr o ri Jejus kôt mê akwýjê jamaxpêr o hihtýx o ri apa kaxyw axãm ka mê kãm kapêr jarênh pê mê ho mê hihtýx mex o ri mê hkôt apa.

Rý ka mê atô akukrêx rax japêr nê ate mê kêp amrakati xwýnhjê mâ mêmoj nhôr o ri apa kaxyw axãm ka axãmnhix ri mê kãm mêmoj nhôr o ri mê hkôt apa.

Rý ate akwýjê ho amnhîptãr kaxyw axãm ka mê ho amnhîptãr mex o ri apa.

Rý ate tanhmã mê akwýjê ho mex to nê mêmoj to mê kutã anojarêt o ri apa kaxyw axãm ka akînã kãm â mê hipêx anhýr rãhã ho ri apa nê tanhmã akapêr punuj to hkukamã ri ajamaxpêr o ri mê hkôt apa hkêt nê.

⁹ Nê kêr ka mê apiitã amã axpên kînã kãm axpên to mex rãhã ho ri apa nê ri axêx rom amã axpên kînã â amnhî jarênh o ri apa hkêt nê. Nê mê kot amnhî tomnuj xã piitã hkaga hpa nê hpãnhã mê kot amnhî to mex xã pix pyr týx nê hkôt amnhî nhîpêx rãhã ho ri apa.

¹⁰ Nê mê apê Kris kwý hã amã axpên kînã kãm tãm axpên nhîpêx o ri apa. Nê mê akwýjaja mê kot amnhî to mex xwýnh â mê harênh o ri mê hkôt apa. No mê ri atýx ajamaxpêr o:

—Nã kojã mêhõ ixkumrêx ixte tãm amnhî nhîpêx xwýnh â ijarê pa rî kormã amnhî xwar tãm kot amnhî nhîpêx xwýnh â harê.

Anhýr o ajamaxpêr kêt nê. Kêr ka akumrêx tãm kot amnhî nhîpêx xwýnh â harê.

¹¹ Nê kêr ka mê Tirtûm mâ mêmoj to anhýr kaxyw nê kamã amã kaga hkêt kãm tanhmã kãm mêmoj to ho ri apa. Jao akînã kamã kãm ho anhýr mex nê.

¹² Nê mê nhýrmã Tirtûm kot kaxkwa kamã mê ato mex rax kukamã ajamaxpêr nê akînã rãhã kãm mêmoj to anhýr o ri apa.

Nê kêr ka mê tanhmã amnhî to rý nhûm mêhõ tanhmã mê ato ka mê akaprî nê ri apa htã no âm tee ri amnhî kukamã ajamaxpêr o

Tirtüm kaga hkët nê. Arī amnhī to hwÿr rāhā ho ri apa.

¹³ Nê koja Kris kôt atōjê hō kēp amrakati ka mē ja hā omu nê anhō mēmoj japēr nê māmri kām hkwy gō. Nê amnhī wÿr awÿ nê tanhmā ho mex to.

¹⁴ Nê mē kot tanhmā mē atomnuj to xwÿnhjaja kēr ka mē amnhī tā mē omu nê agryk nê wajaga kot tanhmā amā ho kaxyw hwÿr atēm nê kām tanhmā hā axāmnēnh to hkët nê. Kēt ām ho Tirtüm pix wÿ nê kām:

–Pa mē ijamār mex xwÿnh maati. Nā na ixkwÿjê hōja ā inhīpēx anē. Tā nom kēr ka ixtā tanhmā homnuj to hkët nê. Ām tanhmā ho mex to.

Anhÿr o mǎn mē ho awÿ.

¹⁵ Nê koja akwÿjê hō mēmoj tā hkīnh nê. Ka omu nê urāk nê ŷ hā akīnh nê. No koja mēmoj tā hkaprī nê mÿr o nhÿ ka omu nê ra urāk nê ŷ hā akaprī nê.

¹⁶ Nê kēr ka mē piitā mē hipēx o axpēn pyrāk o ri apa. Te mē ate amnhī to rax o akwÿjê jakrenh o te mēmoj kamā akahak o amnhī nhīpēx pyrāk kēt nê. Nê axāhpumunh tÿx o ate mē piitā mē hakrenh par pyrāk o ri amnhī nhīpēx o ri apa hkët nê.

¹⁷ Nê koja mēhō tanhmā ato htā ka ām amnhī tā omu nê tanhmā amnhī tā ho hkët nê. Nê mē piitā mē noo mā tām ri amnhī nhīpēx o ri apa.

¹⁸⁻¹⁹ Nê kēr ka mē tām ri axpēn mā akapēr rāhā ho ri apa.

Nê kot kaj akrāmnhwÿ mē wa tanhmā axpēn nhīpēx to. Hāmri ka wa akupÿm tām axpēn xām kaxyw kām akapēr tā nhūm ama nē ām ama nē akaga. Ka ām amnhī tā omu nê kamā agryk kēt nê. Koja Tirtüm tām tanhmā atā ho. Kapēr ā kagā htūm kot ja jarēnh kot:

Kēr ka mē amnhī tā tanhmā kot ato xwÿnh to hkët nê. Pa kot paj mē atā tanhmā ho. Anē.

Nê harēnh kot:

²⁰ Kēr ka mē amā mē kām mē akurē xwÿnhjê o mex pix o ri apa.

Kē mē kām prām ka ja hā mē omu nê mē kamā axukaprī nê mē kām mēmoj kwÿ gō kē mē kuku.

Rÿ nhūm mē kām kōr ka mē kām gō hkwy kē mē ho ixkō.

Kot kaj mē ā amnhī tā mē hipēx mex anē nhūm mē tee ri amnhī tā mē apumu nê amnhī kamā hpijaām jao mē atā amnhī kamā gryk nê. Anē.

²¹ Nom kot kaj mē amnhī tā tanhmā mē homnuj to hāmri nē ajaxwÿja urāk nē amnhī tomnuj nê. Ja pymaj kēr ka mē amnhī rom tām mē hipēx. Hāmri nhūm mē amnhī tā mē apumu nê mē apyrā nē tām mē anhīpēx japēr.

E kēr ka mē ā axpēn nhīpēx o ri apa anē.

13

Mē pahto amnhīptār xwÿnhjê jarēnh

Matēwre 22.21; Xitre 3.1; Wam Pētre 2.13-17

¹ Nê kēr ka mē kot mē ato amnhīptār xwÿnhjê kapēr ma nē kapēr kōt ri amnhī nhīpēx rāhā ho ri apa. Tirtüm kot mē pakaxyw mē unhwÿr kēnā. Mē kot mē pahto amnhīptār o pa kaxyw na hte mē unhwÿ.

² Jakamā koja mēhō mē kapēr ma nē ām kuma nē hkōt amnhī nhīpēx kēt nē hāmri nē te kot Tirtüm kapēr mar nē ām mar pyrāk o amnhī nhīpēx. Hāmri nhūm Tirtüm tee ri ja hā omu nē nhÿmā tanhmā hā ho.

³ Xā na hte tām mē kot amnhī nhīpēx xwÿnhjaja kām mē kot mē ho amnhīptār xwÿnhjê pyma ho pa? Nā na htem kām mē uma hkët kām ri pa. Ām mē kot amnhī tomnuj xwÿnh pïxjaja na amnhī kamā kām mē uma ho pa. Tā ka mē amā mē kot mē ato amnhīptār xwÿnhjê pyma hprām kēt xwÿnhjaja kēr ka mē kapēr ma nē hkōt amnhī nhīpēx kē amnhī tā mē apumu nē hkīnh nê. Nê amnhīm mē ate amnhī to mex xwÿnh ā mē ajarē.

⁴ Tirtüm nhÿ hā mē panhō pahi kot mē pahto amnhīptār jakamā na htem mē kām mē pahto mex prām nê. Nê kot pu mē pahtō axtem nē tanhmā amnhī tomnuj to hāmri nhūm tee ri ja hā pajarēnh ma nē tanhmā hā mē pahto. Ām hāmri na hte ā mē pahto amnhīptār xwÿnhjaja mē panhīpēx anē. Tirtüm kām hprām xā hkōt.

⁵ Jakamā kwa mē kapēr ma nē hkōt ri amnhī nhīpēx mex rāhā ho ri apa. Nom amā kot tanhmā ato pix pymaj hkōt ri amnhī nhīpēx kēt nê. Māānēn ā amnhī kukamā ajamaxpēr anē nē ajamaxpēr o:

–Nā Tirtüm kot mē ixkaxyw unhwÿr jakamā na pa hte kapēr ma nē hkōt amnhī nhīpēx mex o ri xpa.

Anhÿr o ajamaxpēr.

⁶ Nê mē pahto amnhīptār xwÿnhjaja kot Tirtüm nhÿ hā tanhmā mē panhīpēx to ho pa jakamā na pu htem mē āpēnh pānhā mē kām amnhīre. Mē pahpiitā axpēn kaxyw kām kǎxpore ho hkryre nē kugō. Tanhmā kot ho mē pamā mēmoj to mex to kaxyw.

⁷ Jakamā kēr ka mē hā apijaām o ri apa kamā māmri mē kām kǎxpore hkwy ho hkryre nē ōr o ri apa. Mē kot hā āhwÿr xā hkōt.

Mē pahte tanhmā axpēn nhīpēx to hā mē pamā karō

Matēwre 22.39-40; Karatas 5.13-15; Wam Juāw 3.11-24

⁸ Nê kēr ka mēhō ho tewēn japēr nē tokyx kām amnhīre. Nê mē amā axpēn kīnh o aa ho ajamakētkati hkët nê. Jao mēmoj to axpēn kutā anojarēt rāhā ho ri apa. Kot kaj mē ā

axpên nhîpêx anê nê Tîrtûm kapêr piitâ hkôt amnhî nhîpêx mex o ri apa.

⁹ Amnepê mâ na pre finat Mojesja Tîrtûm nhÿ hâ Ijaew mâ mêmoj tâ karô nê mê kâm:

Kêr ka mê aprô pix tânopxa nê nhâm mênjê hô kamâ ri akurê ho apijaam kêt o pa hkêt nê.

Nê mê anijaja mê amjên pix tânopxa nê nhâm ri mêmjê hô kamâ akurê ho api-jaam kêt o ri apa hkêt nê.

Nê mê ri axpên par kêt nê.

Nê mê ri axpên pê axâhkînh o ri apa hkêt nê.

Nê mê amâ ri axpên kukrêx kînh o ri amâ ho anhô hprâm o ri apa hkêt nê. Anê.

Nê määnên ja:

Kêr ka mê nhâm mê axpên nhîpêx o te ka amâ amnhî tâ ma pyrâk. Jao tâm axpên nhîpêx o ri apa. Anê.

Â kot mê kâm hâ karô kot anhÿr. Kot puj mê â pamâ pahkwÿjê kînh anê nê määnên wam finat Mojes kot mêmoj tâ mê panhîgêjtjê mâ karô hkôt amnhî nhîpêx o ri papa râhâ nê. Jao axpên par kêt nê. Nê axpên pê paxâhkînh kêt nê. Nê axpên kutâ panojarêt râhâ nê.

¹⁰ Koja mêmô kâm amnhî tâ ma pyrâk o hkwyjê nhîpêx nê mê ho mex pix o pa. Jakamâ kot kaj mê amâ ri axpên kînh nê mêmoj to axpên kutâ anojarêt pix nê. Jao Tîrtûm kapêr piitâ hkôt amnhî nhîpêx mex o ri apa.

¹¹ Amnepê mâ mê pahte amnhî kaxyw Jejus kôt pajamaxpêr xâ hâ arîgrota â na pre kormâ akupÿn mê pahwÿr hpôx xâ hâ arîgro kormâ hwÿr awry rax nê. Tâ ra hwÿr ahtêp o mô. Koja tokyx akupÿn mê pahwÿr wrÿ nê ma akupÿm kaxkwa hwÿr mê pahto api. Jakamâ kwa kêr pu mê arî hamâr râhâ ho ri apa. Jao tanhmâ amnhî tomnuj to kaxyw nê pajamaxpêr o:

—Kwa koja Jejus tanhmâ amnhî to nê jarâhâ akupÿn wrÿk japêr. Tâ kot pa ri â amnhî nhîpêx anê nhûm wrÿ nê tee ri ja hâ ixpumu pa amnhî kamâ ixpijaam tÿx nê. Nâ kot paj â amnhî tomnuj anhÿr kêt nê. Anê.

Hâmri nê Jejus kamâ ajamak pê kutêp Tîrtûm kapêr kôt pix mâ ri amnhî nhîpêx mex râhâ ho ri papa.

¹² Na pu htem kamât kâm gôr nê arîgro jamâr pê kamâ pajamak o panhîkwÿ. Arîgro te kêp Jejus akupÿn wrÿk pyrâk. Jakamâ kwa pu mê kamâ pajamak pê kâm panojarêt râhâ ho ri papa nê amnhî nê tanhmâ mê omnu xâ kute pumunh mex o ri papa. Te ho pôristi kot amnhî nê mê kot kâm mê hkurê xwÿnhjê pumunh mex pyrâk o Jejus kutêp tâm amnhî nhîpêx o ri papa. Na pre tanhmâ mê pahkrâ hto pu mê ÿ hâ tâm ri amnhî nhîpêx. Tâ kêr pu mê arî â amnhî nhîpêx anhÿr o ri papa nê te mê pahte arîgro hâ mê pa xwÿnhjê kot amnhî nhîpêx pyrâk o amnhî nhîpêx.

¹³ Kot puj mê â amnhî nhîpêx anê nê mê piitâ mê noo mâ tee ri tanhmâ mê pahte amnhî tomnuj to mâ pajamaxpêr kêt nê. Jao amnhî kamâ pahpijaam nê ri papa hkêt nê. Nê pajamakêtkati nê paxâmnhîx ri papa. Te ho hirâ kamâ ri mê pa xwÿnhjê kot amnhî nhîpêx pyrâ nê âm ri paxâmnhîx tâm amnhî nhîpêx o ri papa.

Nê mê pahprô pix tânopxar o ri papa.

Nê mê pahpipânh nê ri papijapu ho ri papa hkêt nê.

Nê mêmoj tâ axpên mâ paxâkjêr hkêt nê.

Nê mêmoj tâ axpên kâm pagryk kêt nê.

¹⁴ Nom kot puj mê axtem nê â amnhî tomnuj anê nê mê pahte amnhî nhîpêx tûm kôt pix mâ amnhî nhîpêx. Tâ kêr pu mê â amnhî nhîpêx anhÿr pumaj hpânhâ amnhî to Pahihti Jejus Kris wÿ nê kâm:

—Pa Jejus. Nâ kormâ jar apa ri na ka pre mê kot tanhmâ amnhî tomnuj to kutâ axihtÿx o axihtÿx nê aa tanhmâ amnhî tomnuj to hkêt nê. Tâ inhmâ apyrâ nê ixte amnhî tomnuj kutâ ixihtÿx o ixihtÿx o ixpa hprâm. Anê.

Jao mê pajamaxpêr tûmja te ra kot amnhî tâ mê pahto htÿx kêt pyrâk o pu mê amnhî nhîpêx o ri papa.

14

Mê pahte Kris kôt pahkwÿjê mâ paxâkjêr kêt â mê pamâ karô

Matêwre 7.1-5; Römân 2.1; Wam Korî 10.23-33; Xiakre 4.11

¹ Nê koja mêmô kormâ Jejus kôt amnhî xâm nyw ri kormâ hkôt hamaxpêr tohtuj anê. Hâmri nê htÿx tanhmâ hamaxpêr to nê mêmoj mex kaga. Ka mê ja hâ omu nê âm omu nê hâ tanhmâ kâm nê hkêt nê. Kwâr mâmri â amnhî nhîpêx anê. Koja gaa nê rî hprî hâ Tîrtûm kapêr mar tÿx nê hâmri nê hkôt mêmojta pumunh mex nê.

² Jakamâ koja Jejus kôt akwÿjê hô mê apkur xâ piitâ hkur pymaj tanhmâ hô kute hâ harê nê hkaga nê hamaxpêr o:

—Nâ kot pa ja hkur kêt nê. Kot pa apu kuku nê hkur o amnhî tomnuj nê. Anê.

Kwâr mâmri â hamaxpêr anê nê hkur kêt nê. Nom mê pahte Jejus kôt amnhî xunhwÿr tÿx xwÿnhjaja na pu htem paxâmnhîx Jejus kamnâr rom mêmoj piitâ kuku. Nom mê pahkînhâ ham mê kot hkôt amnhî xunhwÿr xwÿnhjaja kormâ kapêr piitâ mar kêt jakamâ kwâr mê mâmri anê nê mêmoj kur kêt nê.

³ Nom kêr ka mê ri tanhmâ hâ mê kâm akapêr to hkêt nê. Rÿ mê kâm:

—Kwa mê ixpyrâ nê mêmoj piitâ aku.

Anhÿr o mê kâm akapêr kêt nê. Ano ho âm hâ mê omu.

Nê mê ate mêmoj piitâ hkur kêt xwÿnhjaja kêr ka mê ajaxwÿja mê ixte mêmoj piitâ hkur

ã tanhmã më inhmã axàkjêr to hkêt në. Më ixte mëmoj piitã hkur o ixpa hä më ixpumu në ãm hä më ixpumu në hä tanhmã më inhmã axàkjêr to hkêt në. Rÿ hä më inhmã:

—Kwa nã kot kaj më ja kur o amnhî tom-nuj në.

Anhÿr o hä më inhmã akapêr kêt në. Ano ho ãm ja hä më ixpumu. Më pahte ahpÿnhã tanhmã paxàpkur to htã Tÿrtüm kot më pahte Kra Jejus kôt amnhî xunhwÿr xwÿnh piitã më pahto hkra kênã.

⁴Jakamã kwa mëmoj tã tanhmã axpên mã axàkjêr to ho ri apa hkêt në. Koja Kris kôt atôjê hõ axtem tanhmã hamaxpêr anê. Tÿrtüm pix na hte tanhmã më pajarênh to xwÿnh. ãhpumunh o ãhpumunh xwÿnh jakamã koja tanhmã më hkrã hto nhüm më rÿ kormã tãm hamaxpêr pë ãmnhÿx ri tanhmã amnhî nhîpêx to ho pa.

—Tk. Na hte ã ri amnhî nhîpêx anhÿr o pa. Ja omnuj. Pa na pa hte ã amnhî nhîpêx anhÿr kêt në.

Anhÿr o ri axpên kukamã ajamaxpêr hkêt në. Më pahpê Tÿrtüm kêt kênã kot pu kêt më ã ri axpên kukamã pajamaxpêr anê. Tÿrtüm pix na hte tanhmã më pajarênh to xwÿnh. ãhpumunh o ãhpumunh xwÿnh jakamã koja tanhmã më hkrã hto nhüm më rÿ kormã tãm hamaxpêr pë ãmnhÿx ri tanhmã amnhî nhîpêx to ho pa.

⁵Në koja Jejus kôt atôjê hõ mëmo arÿgromnu jarê në hä ãpênh kêt në. Ka më apê hkwyjaja tee ri ja hä omu në ajamaxpêr o:

—Nã arÿgro piitã më pamã mex kênã. Kot paj mãmri arÿgro piitã hä apê.

Anhÿr o ajamaxpêr japêr. Nom kër ka më ja hä axpên mã tanhmã axàkjêr to hkêt në. Na pu htem ahpÿnhã pamã tanhmã më pahte amnhî nhîpêx to hprãm xã hkôt tanhmã amnhî nhîpêx to. No tanhmã ri hä axpên mã paxàkjêr to ho ri papa hkêt në.

⁶Kêt më kot arÿgromnu jarênh xwÿnhjê më më pahte arÿgro piitã mex ã harênh xwÿnhjaja më pahpiitã më pahpê Tÿrtüm kraa. Jakamã më pahpiitã na pu htem pajamaxpêr o:

—Na pa hte Tÿrtüm kãm hprãm xã hkôt ã amnhî nhîpêx anhÿr o ri ixpa. Anê.

Në më pahte mëmoj piitã hkur xwÿnhjaja në më kot mëmoj kwÿ hkur kêt xwÿnh piitã më pahpê Tÿrtüm kraa. Më pahpiitã më pamã kãm hprãm xã hkôt amnhî nhîpêx prãm jakamã na pu htem paxàpkur kaxyw. Nã Tÿrtüm mã amnhî jarê në kãm:

—Pa më ijamãr mex xwÿnh maati. Nã ãm hãmri na ka hte apkati më më inhmã më inhõ ho apa. Amex o amex Tÿrtüm.

Anhÿr o kãm amnhî jarê. Hãmri në kormã hkamnãr rom paxãmnhÿx ri tanhmã mëõ kuteta ku.

⁷⁻⁸Më pahpê Tÿrtüm kra jakamã na pre ra më pakukamã tanhmã më pajarênh to. Më pakukamã pahtyk ã arÿgro jarê në më pahte pahÿr ri tanhmã ri amnhî nhîpêx to ho papa

hkukamã hamaxpêr. No më papajaja na pu htem amnhî krã hkôt tanhmã më pahte amnhî nhîpêx to kukamã paxãhpumunh kêt.

⁹Jakamã na pre Kris ja hä më pahpumu në tãm më pakaxyw amnhî to kêt më panhõ Pahihiti në më panê ty. Hãmri në akupÿm htÿr. Kêp më panhõ Pahihiti hä akupÿm htÿr. Kêp më pahte hkôt amnhî xunhwÿr xwÿnhjê nhõ Pahihiti kaxyw. Jakamã kêt ra më pahkwÿ htyk xwÿnhjê nhõ Pahihiti në mããnen kêt arÿ më pahÿr xwÿnhjê nhõ Pahihiti.

¹⁰No më papajaja më pahpê Kris kôt më pahkwÿjê nhõ pahi hkêt jakamã kër më Kris kôt akwÿjê hõ tanhmã amnhî nhîpêx to hä omu hãmri në tanhmã ho akapêr to hkêt në. Rÿ ajamaxpêr o:

—Kwa na ã amnhî nhîpêx anê. Inhmã ja mex kêt.

Anhÿr o ajamaxpêr kêt në. Koja nhÿrmã Tÿrtüm tãm më pahpiitã tanhmã më pahte amnhî nhîpêx to hä më pahpumu xã hkôt tanhmã më pajarênh to. Nom kër pu më papajaja amnhî hkrã hkôt ã axpên jarênh anhÿr kêt në.

¹¹⁻¹²Kot puj më nhÿrmã pahpiitã Tÿrtüm kutã pahkrÿ në kãm tanhmã amnhî jarênh to. Kormã më pahÿr ri tanhmã më pahte amnhî nhîpêx to ho papa hä kãm pahprÿ hä amnhî jarê. Kê më pama në tanhmã më pajarênh to. Kapêr ã kagã htüm kot më pakukamã më pajarênh kot:

Koja nhÿrmã më piitã ixpê më õ pahi hä ixkutã hkõn krã ho rôrõk në hkrÿ në inhmã inhmex o inhmex ã ijarê.

Në më piitã ixpê Tÿrtüm ã ixpyxi mex ã ijarê. Æm hãmri na pa ã më hkukamã më harênh anê. Anê.

Më pahte Kris kôt pahkwÿjê ho mex ã më pamã karõ

Wam Korÿt 8.9-13

¹³Në kwa kër ka më akwÿ kot Jejus kôt amnhî xunhwÿr tohtuj anhÿr xwÿnhjaja tanhmã më kot amnhî nhîpêx to ho pa hä më omu në ja në tanhmã më kãm akapêr to hkêt në. Æm më noo mã tãm ri amnhî nhîpêx rãhã ho ri apa. Më kot ja hä më apumunh në më akõt amnhî nhîpêx kaxyw. No kot ka më kot tanhmã amnhî nhîpêx toja ã kãm akapêr nhüm ama në tee ri amnhî kukamã hamaxpêr në hkaprÿ në.

¹⁴E kot pa hpãnhã më paxàpkur xã hä tanhmã më panhõ jarênh to. Ixte Pahihiti Jejus jamaxpêr xã hkôt tanhmã ijamaxpêr to ho ri ixpa jakamã kot paj ixkatã kêt më amã tanhmã më panhõ jarênh to në ãm hãmri harê. Nã më paxàpkur xaja ãm pixi në omnu hkêt. Piitã mex o mex. Nom koja mëhõ tee ri mëmo më apkur xã hõ pumu në hamaxpêr o:

—Nā kot paj ja hkur kêt nê. Kot paj apu kuku nê ho amnhî tomnuj nê. Anê.

Hāmri nê hkur kêt nê. Tā kwār māmri ā hamaxpēr anê nê hkur kêt nê. Nom na ām amnhî krā hkôt Tirtūm kēp ja omnuj ā hkamnhîx. Kēp omnuj kêt. Ra kot mēmo mē paxāpkur xā piitā mex ā harēnh.

¹⁵ Tā kot kaj mē kot mēmoj kur kêt xwŷnh̄ta py nê o tē nê kot hkaga xwŷnh̄ noo mā hkur o xa nhūm apumu nê tee ri hamaxpēr nê hkaprī nê. Jakamā kot ka mē ā noo mā amnhî nhīpēx anhŷrja o ho mex kêt nê. Kwa mē ā ri axpēn nhīpēx anhŷr hkêt nê. Kot ka mē ā axpēn nhīpēx anê nê te amnhî pix kukamā ajamaxpēr pyrāk o amnhî nhīpēx. Jao akwŷjê ho mex kukamā ajamaxpēr kêt nê. Kris kām mē hapē h̄tyx kôt mē kot amnhî tomnuj pānhā amnhīrer kaxyw ra nê htyk kēnā kot ka kêt mē axtem nê ri ā mē noo mā mē kot mēmoj kur kēēta kur anê. Rŷ koja apu tee ri kot mēmoj kur kēēta kur ā mē apumu nê tanhmā amnhî tomnuj to. Jao Kris kaga japēr. Jakamā kwa mē ā mē noo mā mēmojta kur kêt nê.

¹⁶ Mēmo mē apkur xāja mex tā nhūm mē akwŷjê hō kām mex kêt japēr ka mē noo mā hkur kêt nê. Nē tanhmā hā kām nê hkêt nê. Kot kaj mē anê nhūm Kris kra hkêt xwŷnh̄haja tee ri ja hā mē apumu nē tanhmā axpēn mā mē apē Kris kwŷjê ho kapēr punuj to.

¹⁷ Mē pahpē Tirtūm krajaja na pu htem paxāpkur xā nē pahkōm xā pix kukamā pajamaxpēr o ri papa hkêt nê. Na pu htem amnhî mē pahkwŷjê mex kukamā pajamaxpēr. Nē mē pahte tām amnhî nhīpēx kukamā pajamaxpēr. Nē tām axpēn nhīpēx kukamā pajamaxpēr. Kot puj mē ā amnhî nhīpēx anê nhūm Tirtūm Karō ja hā mē pahpumu nē mē pahto mē pahkīnh̄ nê. Pu mē pahkīnh̄ nē pajamakētkati nē ri axpēn kôt papa.

¹⁸ Tā kot puj mē ā Kris mā tanhmā amnhî nhīpēx to ho ri papa anê nhūm Tirtūm ja hā mē pahpumu nhūm ja kām mex nê. Nē Kris kôt mē pahkwŷjê mā haxwŷjaja ja mex nê.

¹⁹ Jakamā kēr pu mē tām axpēn mā pakapēr o ri papa. Nē pajamakētkati nē axpēn kôt ri pajapōj. Nē Kris kôt tanhmā axpēn to paxih̄tyx to ho ri papa.

²⁰ No kot ka mē axāpkur xā gryk ā akwŷ hukamā ajamaxpēr kêt nē atŷx ri mēhō noo mā mēmoj kur japēr. Kēp omnuj tā ka mē ām amnhî pix kukamā ajamaxpēr nē noo mā hkur japēr. Hāmri nhūm ja hā mē apumu nē ra kot Tirtūm kaga mā. Ra kēp hkra jakamā kwa mē noo mā mē kot mēmoj punuj ā harēnh̄ xwŷnh̄ta kur kêt nê. Nom mē paxāpkur xāja piitā mex. Tirtūm kot mē pamā ōr jakamā piitā mē panhōō. Tā koja akwŷjê hō Tirtūm kēp mēmoj omnuj ā

hkamnhîx tā ka mē noo mā aku nê ho amnhî tomnuj nê.

²¹ Kēr pu mē pahkwŷjaja tanhmā kot amnhî tomnuj to pymaj pu mē pahte amnhî nhīpēx kukamā pajamaxpēr mex o papa. Mēmo mēō nē mēmo kagō pē wih̄tija. Tirtūm kot mē pamā mēmoj piitā ōr tā no nhūm mē pahkwŷjaja kēp ja omnuj nē pu mē noo mā hkur rŷ ho pahkōm kêt nê. Mēmo mry nē mēmo wih̄ti pu mē noo mā hkur rŷ ho pahkōm kêt nê.

²² Nē kēr ka mē atō mēmoj krēr kaxyw nē hkukamā ajamaxpēr o:

—Nā kot paj ja krē. Tirtūm kām ja mex kēnā. Anê.

Hāmri nē māmri Tirtūm kamnār rom axāmh̄h̄x akrē. Kām ja mex kēnā kot ka kêt ri tee ri hkrēr kaxyw hkukamā ajamaxpēr nē hkaga.

²³ No kot kaj mē atō mēmoj to anhŷr kaxyw nē tee ri amnhî kukamā ajamaxpēr nē ajamaxpēr o:

—Ko kot paj apu ja ho anê nhūm Tirtūm hā ixpumu nhūm ja kēp omnuj nē rŷ ko. Anê.

Hāmri nē tee ri amnhî kukamā ajamaxpēr. Tā ra ā amnhî nhīpēx anê nē akrē rŷ mēmoj to anê. Hāmri nhūm Tirtūm tee ri ā ate amnhî nhīpēx anhŷr ā apumu nhūm ja kēp omnuj nē. Ate hkamnār rom mēmoj to anhŷr kêt nē amarī amnhî krā hkôt ho anhŷr jakamā ho amnhî tomnuj nē.

15

Mē pahte amnhî pix kukamā pajamaxpēr kêt ā mē pamā karō

Makre 10.45; Wam Korī 10.24; Piripos 2.3-5

¹ Nē kēr pu mē pahte ra Jejus kôt amnhî xunhwŷr tŷx xwŷnh̄haja amnhî kôt kormā mē kot Jejus kôt amnhî xunhwŷr totuj janhŷr xwŷnh̄jē jamār mex nê. Jao mē kamā pagryk tokyx anhŷr kêt nê. Ām mē kutā panojarēt pix o papa. Jao ra amnhî pix kukamā pajamaxpēr kêt nê.

² Māānēn amnhî mē Kris kôt mē pahkwŷjê hkukamā mān mē pajamaxpēr. Jao mē kot tām amnhî nhīpēx kaxyw mē ho mex o ri papa.

³ Kris na pre jar pa ri amnhî pix kukamā hamaxpēr kêt nê. Na pre māānēn ō Papaj kukamā hamaxpēr. Jakamā Tirtūm kapēr ā kaga htūm kot kām kapēr jarēnh̄ kot:

Pa Papaj. Na hte mē pahkurē xwŷnh̄haja ixto kapēr punuj nē. Nom māānēn ā ato kapēr o pa anê. Anê.

⁴ Mē pakaxyw na Tirtūm kapēr ā kagāja. Mē pahte kamā harēnh̄ nē mar nē amnhî kaxyw hkôt pajamaxpēr tŷx o ri papa kaxyw. Jakamā na pu htem tanhmā pahpunuj to htā kapēr kwŷ ma nē pahkīnh̄ nē. Jao tee ri amnhî kukamā pajamaxpēr o ri pahkaprī

hkêt nê. Ām nhÿrmā Tirtūm kot mē pahto mex kukam pajamaxpēr o akupÿm paxihtÿx nê pahkÿnh nê ri papa. Mē pahkÿnh nê ri papa kaxyw na Tirtūm kapēr ā kagāja.

⁵⁻⁶ Na pu htem Tirtūm kamnār rom pahkÿnh nê. Nê expēn kamā paxukapri ho ri papa. Jakamā na pa hte tanhmā mē ato Tirtūm wÿr to nê kām:

—Pa Tirtūm. Apē mē ijamār xwÿnh maati na ka. Nê apē mē inhō Pahihti Jejus Kris nhō Papaj na ka. Nā xep ra Rōm nhō xwÿnh kwÿjaja kām akapēr kōt amnhÿ nhÿpēx prām jakamā kwa tanhmā mē hkrā ho mex to kē mē hamakētkati nê ajamaxpēr kōt hamaxpēr rāhā ho ri akōt pa. Hāmri nhūm mē amnhÿ tā apumu nê piitā amex o amex ā jarē.

Anhÿr o pa hte mē ato kuwÿ.

Ijaew kêt xwÿnhjē jarēnh

Atre 10.34; Römân 9.24; Karatas 3.28

⁷ Nē kwa kēr ka mē amā expēn tā ma ho ri apa. Te ho Kris kām mē pahtā mata pyrāk. Jao expēn to mex pix o apa. Kot kaj mē ā expēn nhÿpēx anē nhūm mē piitā expēn tā mē apumu nê mē anhÿ hā Tirtūm mā mex o mex ā harē.

⁸ Amnepēm Tirtūm Ijaew mā tanhmā Kris jarēnh to. Kormā pika hwÿr wrÿk kêt ri nhūm hkukamā nhÿrmā mē hwÿr wrÿk nē mē kamā kator ā harē.

Tā nhūm mē hwÿr wrÿ nē mē kamā kato. Ijaew hkanrēhā htāmnhwÿjē kamā kato nē mē ho mex o ri mē hkōt pa. Mē kot amnhÿ tā omunh nē ā hamaxpēr anhÿr kaxyw. Nē hamaxpēr o:

—Amnepēm Tirtūm kot mē panhÿgēt mā hkukamā harēnh xā hkōt na mē ixwÿr Kraja mē nhūm wrÿ nē mē ixto mex o ri pa. Nā ām hāmri na pre mē ixwÿr kumē.

Anhÿr o hamaxpēr kaxyw.

⁹ Nē mē apē Ijaew kêt xwÿnhjaja mē ajaxwÿja mē ate tanhmā kot amnhÿ nhÿpēx to hā harēnh mar nē Tirtūm mā mex o mex ā harēnh kaxyw. Nē Tirtūm kot mē akamā ukapri hā mē ate amnhÿ tā omunh nē mex o mex ā harēnh kaxyw na pre wrÿ. Tirtūm kapēr ā kagā htūm kot tanhmā mē xpē Ijaew jarēnh to nē māānēn tanhmā mē apē Ijaew kêt xwÿnhjē jarēnh to nē mē pajarēnh kot:

Kot paj Ijaew kêt xwÿnhjē jamak mā amā amex ā jarēnh o ri mē hkōt ixpa.

Nē amex ā inhgrer o ri mē hkōt ixpa. Anē.

¹⁰ Nē ja:

Kwa mē apē Ijaew kêt xwÿnh mē mē apē Ijaew. Kēr ka mē apiitā Tirtūm nhÿ hā akÿnh nê ri apa. Anē.

¹¹ Nē māānēn ja:

E kēr ka mē apē Ijaew kêt xwÿnhjaja nē kri piitā hkōt mē apa xwÿnhjaja mē apiitā

Tirtūm mā mex o mex ā harēnh o ri apa.

Anhÿr o kot harēnh.

¹² Nē Tirtūm nhÿ hā kapēr o pa xwÿnh finat Ijais haxwÿja Ijaew mā Jejus jarēnh o:

Koja nhÿrmā Jese kanrēhā htāmnhwÿjē hōja mē pahwÿr kato.

Hāmri nē mē pahpē Ijaew mē Ijaew kêt xwÿnhjē ho amnhÿptār o pa.

Jakamā nhūm mē amnhÿ kaxyw hkōt hamaxpēr o pa. Anē.

¹³ Nē na pa hte tanhmā mē ato Tirtūm wÿr to ho ri ixpa nē kām:

—Pa Tirtūm. Kwa kēr ka Rōm nhō xwÿnhjē ho mex kē mē amnhÿ kaxyw Akra hkōt hamaxpēr mex o ri pa. Jao hkōt hkÿnh nē hamakētkati nē ri expēn to pa. Nē kē Akarō mē ho mē hihtÿx o pa kē mē amnhÿ kaxyw amā mēn hamaxpēr tÿx rāhā ho ri pa. Anē.

Pawre kot hprī hā amnhÿ jarēnh

Sikūn Pētre 1.12-13

¹⁴ E Kris kōt ixkwÿjaja. Nā ra ixte mē ajarēnh mar mex. Na ka xep htem amnhÿ to mex o ri apa. Nē mēmoj to expēn kutā anojarēt rāhā ho ri apa. Nē mē kot tanhmā Tirtūm kapēr kōt amnhÿ nhÿpēx to xāja ka mē omunh mex nē ho expēn jahkre ho ri apa.

¹⁵ Tā ot pa kagā ja kamā mē amā ixujarēnh kām ixihtÿx nē. Tirtūm nhÿ hā. Ra mē ate mēmoj mar mex tā pa axte mē amā harē. Mē ate mar tÿx nē hā anohtÿx kaxyw. Nā ā ixte amnhÿ nhÿpēx anhÿr kaxyw na pre Tirtūm mē akaxyw ixām.

¹⁶ Ixte Jejus Kris mā mē apē Ijaew kêt xwÿnhjē mā kapēr jarēnh o ri mē akōt ixpa kaxyw. Nē mē ato hwÿr o ri ixpa kaxyw. Tā pa hte kri hkwy kamā ā mē akwÿjē mā harēnh anhÿr o ri mē hkōt ixpa. Nē Jejus jarēnhja pa hte mē hkōt mē kām harēnh o ri ixpa. Mē kot mar nē hkÿnh kām hkōt amnhÿ nhÿpēx mex kaxyw. Hāmri nhūm Tirtūm Karō mē kām mē hamaxpēr nyw jagjē nhūm Tirtūm hā mē omu nhūm ja kām mex nē nhūm hkÿnh nē hamaxpēr o:

—Nā ām hāmri. Kōja mē nhÿrmā wa ixri htÿr tūm nē mex nē pa ho pa. Anē.

¹⁷ Tā na pa ixte Jejus Kris nhÿ hā Tirtūm mā tanhmā amnhÿ nhÿpēx to ho ixpa hā amnhÿ pumu nē ixkÿnh nē.

¹⁸⁻¹⁹ Na pa hte ŷ hā mē apē Ijaew kêt xwÿnhjē mā Tirtūm kapēr jarēnh o ri mē akōt ixpa. Nē mē anoo mā tanhmā ri Kris kot mē amā amnhÿ nhÿpēx to hā harē. Nē mē amā aa mē kot mēmoj pumunh kêt kwÿ ho anhÿr o ri mē akōt ixpa. Tirtūm Karō nhÿ hā. Nhūm hte mē akwÿjaja amnhÿ jaēr pē omu nē kamā no puma nē. Hāmri nē mē pahpyrā nē Jejus kōt amnhÿ xunhwÿ. Nom pa hte ā amnhÿ nhÿpēx anhÿr ā amnhÿ pumu nē ri hā amnhÿ to jarkrar kêt nē. Ām ixte Kris pix nhÿ hā mē kām ixkapēr ā mē kām amnhÿ jarēnh o ri mē

hkôt ixpa. Tã pa ra Jerujarê rûm Irir wÿr krî piitã hkôt mê kãm Kris kapêr jarê. Tirtûm Karô kot tanhmã ixto hihtÿx to jakamã pa mê piitã mê kãm harênh mex nê.

²⁰ Na pa hte mê hwÿr inhnojarêrê nê ã ijamaxpêr anê nê ijamaxpêr o:

–Kormã mê kot Kris jarênh mar kêt xwÿnhjê hwÿr kot paj mō. Nom ra mê kot harênh mar xwÿnhjê nhō krî hwÿr inhmōrja inhã prãm kêt. Anê.

²¹ Tirtûm kapêr ã kagã htûm kot kapêr mar kêt xwÿnhjê jarênh kot:

Kormã mê kot Tirtûm kapêr mar kêt xwÿnhjaja koja mê kuma nê hprî hã mar tÿx nê. Anê.

Pawre kot Rôm wÿr hkrã hã amnhî jarênh Römân 1.8-15

²² Hêxta waa nê. Inhmã mê apumunh prãm tÿx nê Rôm kãm Jejus kôt ixkwÿjaja. Na pa hte xatã mê awÿr ixkra nom kormã mê awÿr inhmōr kêt nê. Kormã ixte krî hkwy kamã mê kãm Kris jarênh o ri ixpa jakamã kormã mê awÿr inhmōr kêt nê.

²³ Na pa ra xatã mê awÿr ixkra hã ixtã amgrã xohtō nê. Tã ra jar mê kãm Kris kot mê panê tanhmã amnhî nhîpêx toja jarênh pa.

²⁴ Jakamã kot paj tokyx ma mê awÿr mō. Hãmri nê mê awÿr pōj pu mê axpên pumu nê pahkînh nê axpên mã pakapêr o papa. Pa mê akôt ri ixpa tãmtã hamû pyka pê Espãnhã wÿr ma mō. Nê kot paj inhnojarêrê ka mê ixto Tirtûm wÿr nê inhã ixãpkr xã hkwy gō pa ma mê hwÿr pry hã hkur o mō.

²⁵⁻²⁶ No na pa kormã mê awÿr inhnojarêrê kêt nê. Kot paj ja rûm awjanã nê akupÿm Jerujarê hwÿr mō. Kamã Kris kôt mê pahkwÿjaja kêp amrakati nê ri pa nhûm pika pê Gres mê Masetōn kamã Kris kôt mê pahkwÿjaja mê harênh ma nê mê kãm kãxpore hkwy ho akuprō nê mê kaxyw inhã kugō. Tã kot paj ma mê hwÿr o mō nê mê kãm kure nê ri kormã ma mê awÿr mō.

²⁷ Jerujarê kamã Kris kôt mê pahkwÿjaja Ijaew na mê. Mê kumrêx na prem Kris kôt amnhî xunhwÿ. Hãmri nhûm mê hkwyjaja ma mê apê Ijaew kêt xwÿnhjê mã kapêr jarênh o ri mê akwÿ hkôt pa. Hãmri nhûm pika pê Gres kamã mê pa xwÿnhjaja mê kapêr ma nê mê urak nê Kris kôt amnhî xunhwÿr kurê kumrêx. Jakamã amnhî xwar kãm nhãm krî hō kamã Kris kôt mê pahkwÿjê ho mex prãm nê. Hãmri mê kãm kãxpore hkwy ho akuprō nê mê kaxyw inhã kugō.

²⁸⁻²⁹ Tã kot paj ma Jerujarê hwÿr mê kãm o mō nê mê kãm kure hãmri nê awjanã nê ri kormã ma Rôm wÿr mê awÿr mō. Hãmri nê mê awÿr pōj pu mê axpên pumu nê pahkînh nê. Nê axpên mã Jejus Kris mex o mex ã harê nê kãm tanhmã amnhî jarênh to ho

papa. Jao pahkînh nê papa. Tã pa hpãnhã hamû ma Espãnhã wÿr mō.

³⁰ Nê na pu prem Jejus Kris o panhō Pahihti. Jao te mê pahpê hkôt axpên to pahtō nê pahtōx pyrãk o axpên nhîpêx. Nê Karô nhÿ hã pamã axpên kînh nê. Jakamã kwa Jejus kôt ixkwÿjaja. Kêr ka mê ixpê mê atō hã ixto Tirtûm wÿr kãm axihtÿx nê.

³¹ Kêr pa ma pyka pê Jutej kamã Jerujarê kamã Kris kôt mê pahkwÿjê hwÿr mō nê mê kãm kãxporeta gō nhûm mê omu nê Ijaew kêt xwÿnhjê kot mê kãm ôr ã mê omunh tã tee ri hamaxpêr kêt nê. Æm hkînh kãm mãmrî ãmnhîx hamÿ nê ho amnhîm awjapró.

Nê kêr ka mê ixto awÿr kê inhñê mê kêp mê pahkwÿ hkêt xwÿnhjê pumunh mex nê.

³² E kêr ka mê ã ixto Tirtûm wÿr anê. Kê ixte ma Jerujarê rûm ma Rôm wÿr pãr kãm inhmōrta ã kê ixpumunh mex nê. Pa inhmex pê mê kurûm ma mê awÿr mōn pōj pu mê tokyx axpên pumu nê pahkînh nê. Pa mê ate tanhmã amnhî nhîpêx to ho ri apa hã mê apumunh o mê akôt ri ixpa nê ixkînh nê.

³³ Tã ãm ja pix. Kê Tirtûm mê akôt pa ho pa. Tãm na hte tanhmã mê pahto pu mê ÿ hã pajamakêtkati paxãmnhîx ri pahkînh nê ri papa.

16

Pawre kot ahpyñhã hkrãmnhwÿjê mã kapêr

¹ Ku nê mããñen ja. Ot pa mê awÿr Kris kôt pahtōx Pepreja mê awÿr kumê. Na hte krî pê Sênkrej kamã Kris kôt mê pahkwÿjê tanhmã mê ho mex to ho ri mê hkôt pa.

² Nê mããñen pa na hte tanhmã ixto mex to. Tã kê mêmō arigrō hã mê awÿr pōj ka mê kêp Kris kôt mê pahtōx ã omu nê ho mex nê tanhmã ho ajuta hto.

³ Nê kêr ka mê atar Kris kôt ixkrãmnhwÿjê mã ijarê. Na pa hte mê kãm ijamaxpêr rãhã ho ri ixpa. Nê Akirti mê hprō Prisireta ka mê wa kãm ijarê. Na pre hte wa inhñkō hã Jejus Kris mã tanhmã amnhî nhîpêx mex to ho wa pa.

⁴ Jao wa amnhî grōnh kôt mê kãm ixkurê xwÿnhjê pê ixpytã. Pa amnhî tã wa omu nê inhã wa hkînh nê. No ãm papxpix inhã wa hkînh kêt nê. Na pre Ijaew kêt xwÿnh kwÿ pê Kris kwÿjaja ixtã wa harênh ma nê haxwÿja kãm wa hkînh nê.

⁵ Nê na hte Kris kwÿjaja wa ôrkwÿ kamã axpên wÿr akuprō. Mê kot Tirtûm mã amnhî jarênh nê kapêr ã kagã hkwy mar kaxyw axpên wÿr akuprō. Tã kêr ka mê mê kãm ijarê.

Nê Kris kôt mê pahtō Epênre mã ijarê. Kêp ixkrãmnhwÿ mex na. Inhmã hkînh. Kumrêx na pre jar pika pê As kamã amnhî kaxyw Kris kôt hamaxpêr nê hkôt amnhî xãm.

⁶ Nē Kris kōt mē pahtōx Marir ka mē kām ijarē. Na xep hte tanhmā mē ato mex to rūnh o pa.

⁷ Nē Kris kōt mē pahtō ārōhti mē Jūhti wa kām ijarē. Ixpyrā nē wa kēp Ijaew na wa. Kormā ixte Kris kōt amnhī xām kēt ri na pre wa kumrēx hkōt amnhī xām. Na hte Jejus nhý hā mē ahkre ho mē pa xwýnhjaja wa kot Kris kapēr jarēnh mex ā wa harē. Tā ā amnhī nhípēx anhýrja mýrapē na pre mē hkwyjaja wa unē nē wa haxā pa prem ix-pimrāatā ixpē prés nē mē hagjēnh xā kamā ixkrī.

⁸ Nē Kris kōt mē pahtō āpritre mā ka mē ijarē. Kēp Kris kōt ixkrāmnhwý mex na.

⁹ Nē Kris kōt mē pahtō Upānre mā ijarē. Na hte ixpyrā nē Kris mā tanhmā amnhī nhípēx to ho ri pa.

Nē Kris kōt mē pahtō Etaki mē ijarē. Kēp ixkrāmnhwý mex na.

¹⁰ Nē Kris kōt mē pahtō Apes ka mē kām ijarē. Na prem ra Kris ā hipēx punuj nē no nhūm mē kutā amnhī to htýx nē Kris kaga hkēt nē.

Nē Aristopti nhōrkwý kamā hkwyjē mā ijarē.

¹¹ Nē Kris kōt mē pahtō Erojäwti mā ijarē. Ixpyrā nē kēp Ijaew na.

Nē Nasisti nhōrkwý kamā Kris kwýjaja ka mē kām ijarē.

¹² Nē Kris kōt mē pahtōx Xiripēre mē Xiripos wa kām ijarē. Wa kēp Pahihti Jejus mā tanhmā amnhī nhípēx mex to xwýnh na wa.

Nē Kris kōt mē pahtōx Pesixti mā ijarē. Haxwýja kēp ixkrāmnhwý na. Na hte Pahihti Jejus mā tanhmā amnhī nhípēx mex to ho ri pa.

¹³ Nē Kris kōt mē pahtō Rupti mā ijarē. Na hte Kris kōt amnhī nhípēx mex o ri pa. Nē katorxā mā ijarē. Na pre te ixpē hkra nhípēx pyrāk o inhípēx.

¹⁴ Nē Kris kōt mē pahtō Asīnre mā nē Prekōxti nē Emes nē Patopas nē Emas mē. Jajē piitā mē pahkwý kot mē hwýr pikuprōnh xwýnhjē mē mē ho apimrāatā mē kām ijarē.

¹⁵ Nē Kris kōt mē pahtō Pirorti mā nē mē pahtōx Juure mē Nērew na nē htōxja nē mē pahtō Orīpti wa mē kām ijarē. Nē mē pahkwý kot mē hwýr pikuprōnh xwýnhjē mē mē ho apimrāatā mē kām ijarē.

E kēr ka mē jajē piitā mē kām ijarē. Na pa hte mē kām ijamaxpēr rāhā ho ri ixpa.

¹⁶ Nom mē tapxipixjaja kēt. Á mē apiitā mā na pa hte ijamaxpēr rāhā ho ixpa.

Nē ota jar Kris kwýjaja mē awýr hpēr mē.

¹⁷ Kwa ixkrāmnhwýjaja. Na ka mē ra aprī hā Tirtūm kapēr mar týx nē. Tā kēr ka mē amnhī nē mē kot Tirtūm kapēr o hēx xwýnhjē pumunh mex o apa. Mē kām axpēn nē mē ato hpigrānh par prām. Nē mē ate Kris kaga nē hpānhā mē kot amnhī nhípēx

o amnhī nhípēxja mē kām hprām jakamā kwa mē amnhī nē mē omunh mex nē axkām ajamak rom.

¹⁸ Na htem ā amnhī nhípēx anhýr o Pahihti Kris mā tanhmā amnhī nhípēx to ho pa hkēt nē. Ám amnhī hkrā hkōt tanhmā ri hkwyjē jahkre hto ho pa. Kot mē no kupyx kaxyw tanhmā mē kām hēx to ho ri mē hkōt pa. Te mē ahkre mex pyrāk tā mē ahkre mex kēt nē. Jakamā nhūm htýx ri mē pa xwýnhjaja mē kot mē ahkreja ma nhūm te mē kām mex pyrāk. Jakamā kwa mē okora mē amnhī nē mē omunh mex nē.

¹⁹ Na ka htem mē kurom Kris kōt amnhī nhípēx mex nē nhūm xep mē piitā mē apumu nē axpēn mā ja hā mē ajarēnh o ri pa. Pa mē ajarēnh ma nē ixkīnh nē. Tā kēr ka mē arī ajamaxpēr mex rāhā ho ri ajamaxpēr o apa. Nē amnhī nhípēx mex rāhā nē. No tanhmā ajamaxpēr punuj to ho ri amnhī tomnuj o ri apa hkēt nē. Á mē ate amnhī nhípēx anhýrja na inhmā hprām.

²⁰ Nē na hte Satanasti mē hkwyjaja mē ate Jejus kaga hprām xāj mē akōt tanhmā ri mē anhípēx to ho ri pa htā kēr ka mē amnhī tā mē omu nē tee ri amnhī kukamā ajamaxpēr kēt nē. Koja gaa nhūm Tirtūm mē hipēx o te mē kot kagā xoprē hkrā xōm nē hpír pyrāk o mē hipēx. Jakamā ā mē kot mē anhípēx anhýr tā koja Tirtūm mē amā mē ajamakētkati xāja gō. Tapxipix na kot mē pajamakētkati xā nhōr kaxyw āhpumunh týx.

Nē na pa hte mē ato Pahihti Jejus wý nē kām:

–Pa Pahihti. Kwa kēr ka Rōm kām akwyjē pumu nē mē ho mex nē mēmoj to mē kutā anojarēt rāhā ho ri apa. Anē.

²¹ Nē ota mē pahtō Ximotreja mē awýr hpēr mē. Na hte inhīhkō hā Kris mā tanhmā amnhī nhípēx to ho ri pa. Nē ixtō Rusti mē Jasāwti mē Sosipa wa mē haxwýja mē awýr hpēr mē.

²² Nē kot inhmā ixkapēr ā kagā xwýnh Testi haxwýja mē awýr hpēr mē. Kēp Kris kōt mē pahtō na.

²³ Nē Kris kōt mē pahtō Gajre haxwýja mē awýr hpēr mē. Ōrkwý kamā na hte Kris kwýjaja axpēn wýr akuprō nē kamā Tirtūm mā amnhī jarē nē kapēr ā kagā kamā harē nē mar o hkrī. Ōrkwý kamā na pa pre pōj.

Nē mē pahtō Eras haxwýja mē awýr pēr mē. Na hte jar krī ja kamā Rōm nhō pahihti mā ō káxpore jamār pē ho mēmoj to anhýr o pa.

Nē Kris kōt pahtō Kwatre haxwýja mē awýr hpēr mē. E jajaja piitā na mē awýr hpēr rē.

²⁴ E kē Pahihti Jejus Krisja mē akutā nojarēt rāhā ho pa.

Pawre kot Tirtüm mex o mex ä harēnh

*Epes 1.3, 3.20-21; Wam Ximotre 1.17;
Eprēw 13.20; Jutre 24-25*

²⁵ Nē kwa kēr pu mē Tirtüm mā mex ä harēnh rāhā ho ri papa.

Nē ixte mē amā Jejus Kris jarēnhā ā ka prem ama nē hkôt amnhī xunhwý. Tā koja mē ato mē axihtýx ka mē hkôt axihtýx kām hkôt ri amnhī nhīpēx mex o ri apa. Amnepēm na pre Tirtüm mē apē Ijaew kēt xwýnhjē ho hkra kaxyw hā amnhī jarēnh kēt nē. Kormā ja ho hpimxur ryy nē.

²⁶ Tā ā mē anhīpēx anhýrja o amnhīrit nē ý hā mē kapēr jarēnh o ri pa xwýnhjē mā kapēr nē mē kām:

—E Jejus kot tanhmā amnhī nhīpēx to ho pata kēr ka mē piitā mē kām hā kagā kē mē pyka piitā hkôt kamā harē nē kuma. Nom kē Ijaew pixjaja mar kēt nē. Kē pika piitā hkôt kamā harē nē kuma. Panhī nē kupē nē kupē hkā htykre nē mē hkā haka nē mē hkā kamrèkjaja. Kē mē piitā Jejus jarēnh ma nē amnhī kaxyw hkôt hamaxpēr nē hkôt amnhī xunhwý. Hāmri nē hkôt amnhī nhīpēx mex o ri pa. Anē.

Nhūm pre ā mē pakaxyw mē kām kapēr anē nhūm prem kuma nē hā kagā.

²⁷ Nā Tirtümja tapxipix na àhpumunh týx xwýnh ā ām pyxi mex. Nē tapxipix kēp mē pahpiitā Mēpahpām. Tā kēr pu mē Jejus Kris kot mē pané htyk ā omunh xā hkôt Tirtüm pix mā mex o mex ä mán harēnh rāhā ho papa.

Tā ām ja pix. Ixpē Pawre na pa ā mē awýr ixpēr ménh anē. Na hapēx.

Wam Korîit Pawre kot Korîit kām Jesus kôt hkwýjê hwýr kagá nê mēnh

Pawre na pre kagája nhîpêx. Jesus nhý há kapêr jarênh o pa xwýnhjê hō na pre. Na pre hipêx nê ma krî pê Korîit kām Jesus krajê hwýr kumê. Nê kagája kamā mē kām tanhmā mēmoj tâ karō hto. Na pre mē kot ahpumunh týx ā amnhî to jarkrar o pa nê mē kām kapêr. Nê tanhmā amnhî tomnuj to nê mē kām kapêr. Nê mē hprō nê mē mjên xwýnhjaja tanhmā wa kot axpên nhîpêx to há mē kām karō. Nê mē kot Tîrtüm mā mex o mex ā harênh kaxyw axpên wýr mē pikuprōnh nê tanhmā amnhî nhîpêx to há nhüm mē kām karō. Á na pre Pawre mē kām mēmoj tâ karō nê há kagá anê. Nê mē kām:

¹ Pa Korîit kām Jesus kôt ixkwýjaja. Xà mē amex? Ot pa mē awýr kagája nhîpêx nê kumê. Ixpê Pawre na pa Kris kôt mē pahťō Sostenes mē wa awýr ixpêr mē. Tā kagája nhîpêx nê mē awýr kumê. Tîrtüm na pre ixte Jexyw Kris nhý há mē ajahkre ho ri ixpa kaxyw ixām.

² Tā ot pa mē awýr kagá nhîpêx nê mēnh mā. Korîit kām ixpyrà nê mē apê Tîrtüm krajê hwýr.

Tîrtüm kot amnhî kaxyw mē axunhwýr jakamā na ka prem amnhî tomnuj kaga nê Kris kôt amnhî xunhwý nê hkôt amnhî nhîpêx mex o ri apa. Krî piitā hkôt mē kot amnhî to Jexyw Kris wýr o mē pa xwýnhjê pyrà nê. Mē panhō Pahihti Jexyw Krisja ām pixi mex na.

³ Nê Tîrtüm kēp Mēpahpām maati nê Jexyw Kris kēp mē panhō Pahihti jakamā na pa hte mē ato wa hwýr rāhā o ri ixpa nê mē ato wa hwýr o:

—Kwa Tîrtüm mē Jexyw wa. Kêr ka wa Korîit nhō xwýnhjê kutā anojarêr rāhā ho wa ri apa. Nê mē ho mex rāhā nê. Kê mē amnhî tā war apumunh kôt ri hamakêtkati nê hkînh nê āmnhîx tanhmā ri amnhî nhîpêx to ho ri pa. Anê.

Tîrtüm kot Jexyw Kris kukwak ri mē pahťō mex ā harênh

Sikûn Pêtre 1.2; Wam Tesarōn 5.23-24

⁴ Nê mē ate amnhî kaxyw Jexyw Kris kôt ajamaxpêr o ri apa jakamā na hte Tîrtüm mē ato mex nê. Tā pa hte kām amnhî jarênh kaxyw nê kām mē ajarênh o:

—Pa Tîrtüm. Ām hāmri na ka pre Korîit nhō xwýnh kwýjê ho akra. Nā ja mex o mex. Anê.

⁵ Nê ra mē ate Kris kôt amnhî xunhwýr jakamā na ka mē ra amex kumrêx nê ri apa. Nê aprî há Kris kot amnhî nhîpêx pumunh

mex nê aprî há akwýjê mā harênh o ri mē hkôt apa.

⁶ Na pa pre mē awýr mō nê mē amā Kris kot amnhî nhîpêx ā harênh o ri mē akôt ixpa. Ka prem inhma nê hkôt amnhî xunhwýr týx kurê kumrêx.

⁷ Jakamā nhüm Tîrtüm mē ate kām tanhmā amnhî nhîpêx to ho apa kaxyw mē ato mē axihtýx. Nê kaxyw mē amā mē ate axpên to mex xà piitā mē amā kugō. Mē ate Jexyw kot akupýn mē pahwýr wrýk jamār pê hapêr arîit o apa pê tanhmā kām axpên nhîpêx to ho apa kaxyw.

⁸ Koja Tîrtüm tanhmā mē akrā hto ka mē hkôt pix mā ri amnhî nhîpêx rāhā nhüm Pahihti Jexyw Krisja akupýn mē pahwýr wrý. Hāmri nê mē ate amnhî nhîpêx ā mē apumu nê mē ajarênh o:

—Nā ām hāmri na hte jajaja amnhî to mex pix o ri pa. Anê.

⁹ Nê koja Tîrtüm ra kot amnhî jarênh xà hkôt mē ato mex nê. Ra kot mē ate Pahihti Jexyw Kris kôt apa kaxyw amnhüm mē axunhwýr jakamā koja ra kot amnhî jarênh xà hkôt mē ato mex rāhā nê.

Mē pahťe mēmoj tâ axpên pê pahpigrānh kêt ā mē pamā karō

Rōmān 15.5-6; Sikûn Korîit 13.11; Epes 4.1-6; Pîripos 2.1-4; Wam Pêtre 3.8

¹⁰⁻¹¹ E Kris kôt ixkwýjaja. Na ka xep htem mēmoj tâ axpên mā axākjêr pix o ri apa nhüm pre Krojre hkwýjaja amnê ixwýr pōj nê inhma mē ajarê. Kwa nā mē ā amnhî nhîpêx anhýr kêt nê. Kêr ka mē axpên kôt ri amnhî nhîpêx rāhā ho ri apa. Nê axpên kôt ri ajamaxpêr rāhā nê. Te ixkre tipxi kamā mē ri apa pyràk o mán kêt mē axpên nhîpêx o ri axpên kôt apa. Nê mē axpên kutā anojarêr rāhā ho ri apa. No mēmoj tâ axpên mā axākjêr pê axpên pê apigrānh kêt nê. Na pa Pahihti Jexyw Kris nhý há mē amā ā ja há karō anê.

¹² Nê na ka xep htem ahpýnhā ri mē apê mē ixkwý há amnhî jarênh o ri apa. Jao mē akwýjaja pa ixkôt ri amnhî nhîpêx xwýnh ā amnhî jarê. Nê mē akwýjaja axtem Apor kôt ri amnhî nhîpêx xwýnh ā amnhî jarê. Nê mē akwýjaja axtem Simāw Pêtre hkôt amnhî nhîpêx xwýnh ā amnhî jarê. Nê mē akwýjaja axtem Kris kôt amnhî nhîpêx o ri apa xwýnh ā amnhî jarê. Á na ka xep htem ahpýnhā amnhî jarênh anhýr o ri pa.

¹³ Kwa nā ka mē ā ahpýnhā amnhî jarênh anê nê te mē ate Kris o apigrānh pyràk o hipêx. Kwa mon ka hte mē akwýjaja apê ixkwý há amnhî jarê? Xà pa na pa pre pí kahpa há ajêt nê mē anê ty? Nā Kris pix na pre mē panê há ajêt nê ty. Xà mē apê pa ixkwý há amnhî jarênh kaxyw na prem mē akrā kumrā? Nā mē apê Kris kwý há amnhî jarênh kaxyw na prem ā mē anhîpêx anê.

Mē kot ja hā mē apumunh xw̄ynhjaja kot mē apē Kris kw̄y hā mē apumunh kaxyw. Tā na ka xep htem axtem nē ā ri ahp̄n̄hā mē kām amnh̄i jarēnh anhȳr o ri apa.

¹⁴⁻¹⁵ Kop ām ixte amnh̄i kōt mē axunhw̄yr prām ronhȳx pa mē ato mē axohtō nē mē akrā kumrā nē mē amā: “E ra mē apē ixkw̄y na ka mē.” Anē. Nom na pa pre ā mē amā ixkapēr anhȳr kēt nē. Ām hāmri na pa pre ām mē ato grēre nē mē akrā kumrā. Ām Kripti mē Gajre wa pix.

¹⁶ Ku nē xep māānēn Estepti nē kaxyw mē hkwȳjaja. Ām jajē pixjaja. Nom ko apu axte mē hkwȳ ko. Ixte mē hkrā kumrār xw̄ynhjē mā ijamaxpēr t̄yx kēt.

¹⁷ Na pre Kris ixte mē hkrā kumrār o ri ixpa kaxyw ixām kēt nē. Ām ixte mē kām kapēr jarēnh o ri mē hkōt ixpa pix kaxyw na pre ixām.

Nē na pa hte amnh̄i krā hkōt ri ixujarēnh o ri mē akōt ixpa hkēt nē. Kot pa ā amnh̄i nh̄ip̄ex anē nh̄um mē ixkapēr mex ā inhma nē pa ixkōt amnh̄i xunhw̄yr. Ja pymaj na pa hte amnh̄i krā hkōt ri tanhmā ixujarēnh to ho ri ixpa hkēt nē. Na pa hte ām ixpr̄i hā Kris kot tanhmā mē panē amnh̄i nh̄ip̄ex to hā harēnh o ri mē hkōt ixpa. Mē pahpiitā mē panē htyk ā harēnhja pa hte mē kām harē. Mē kot hpr̄i hā mar nē hkōt amnh̄i xunhw̄yr kaxyw. Jao amnh̄i krām mē ujarēnh mexta jagjēnh nē hā no ht̄yx kaxyw. Pa ja hā mē omu nē ixkūnh nē ijamaxpēr o:

–Na htem ixkapēr ma nē Jesus kōt amnh̄i xunhw̄yr kurē kumrēx. Nā ām hāmri na pa hte mē kām ixkapēr kapr̄y ho ri ixpa hkēt nē. Anē.

¹⁸ No kēt mē pahte Tirtūm kot mē pahto hkra xw̄ynhjaja ra mē pahte Kris p̄i kahpa hā mē panē htyk ā harēnh mar nē pahkīnh nē papa xw̄ynh na pu mē. Jakamā na pu htem pajamaxpēr o:

–Nā ām hāmri na Tirtūm Kraja htyk kukwak ri mē ixto mex nē mē ixto hkra. Mē ujarēnhja mex kumrēx. Anē.

No kēt mē kēp hkra hkēt xw̄ynhjaja na htem tee ri Kris tyk ā harēnh ma nē hamaxpēr o:

–Tk. Tanhmā kot kēt we amnh̄i to nē mē panē ty? ām amarī mē kot amnh̄i krā hkōt p̄i kahpa hā nhōr nē hpr̄i kēnā. Anē.

*Tirtūm kra hkēt xw̄ynhjē jarēnh
Matēwre 11.25-26; Wam Korit̄ 3.19*

¹⁹ Nē Tirtūm kapēr ā kaga htūm kot mē kēp hkra hkēt xw̄ynhjē jarēnh kot:

Mē kot ht̄yx ri āhpumunh t̄yx ā amnh̄i to jarkrar o pa htā kot paj mē kēp ja ho ijp̄ex pa nh̄um mē ā amnh̄i jarēnh anhȳr kapr̄y. Anē.

²⁰ Jakamā mē āhpumunh t̄yx ā mē kot amnh̄i to jarkrar xw̄ynhjaja nē mē kot Mojes kapēr o mē ahkre ho ri mē pa xw̄ynhjaja nē mē kapēr

rūnh xw̄ynhjaja. Mē kot Tirtūm Kra hkōt amnh̄i xunhw̄yr kēt jakamā te mē āhpumunh kēt pyrāk. Tirtūm kra hkēt xw̄ynhjaja kot mē āhpumunh t̄yx ā mē harēnh tā no ām Tirtūm noo mā te mē āhpumunh kēt pyrāk. Nē te ht̄yx ri mē kot amnh̄i nh̄ip̄ex o pa pyrāk.

²¹ Tirtūm āhpumunh o āhpumunh jakamā na pre ra mē hkukamā hamaxpēr o:

–Nā kot paj mē āhpumunh t̄yx ā mē omunh xā hkōt mē ho ixkra hkēt nē. Ām mē kot ixkra Jesus kot mē nē htyk ā harēnh mar nē amnh̄i kaxyw hkōt hamaxpēr pix ā mē omunh xā hkōt kot paj mē ho ixkra. Anē.

²²⁻²⁴ No Ijaewjaja kām amnh̄i krā hkōt pix mā amnh̄i nh̄ip̄ex prām jakamā na pa hte mē ixpē Jesus kw̄yjaja mē hw̄yr mra nē mē kām Kris kapēr jarēnh o ri ixpa nh̄um mē inhma nē ām mē inhma. Nē te mē kot mē inhmar kēt pyrā nē mē inhmā:

–Tk. Nā kot paj mē tokyx axujarēnh kōt amnh̄i nh̄ip̄ex kēt nē. Kot kaj mē inhmā mē ixte aa mēm̄oj pumunh kēt ō ho anē pa mē ja hā apumu nē axiht̄yx ā apumu nē r̄i kormā hkōt amnh̄i nh̄ip̄ex.

Anhȳr o inhmā kapēr. Tā no pa mē kām ā amnh̄i nh̄ip̄ex anhȳr kēt nē. Ām Kris kot mē panē p̄i kahpa hā htykja pix pa htem mē kām harēnh o ri ixpa. Ja kamā nh̄um mē hkwȳjaja mē inhma nē ām mē inhma nē Kris xih̄t̄yx kēt ā ām amarī htyk ā harē. No mē hkwȳjaja. Tirtūm kot amnh̄i kaxyw mē unhw̄yr xw̄ynhjaja na htem mē kurom mē inhma nē ra mē inhmar t̄yx kurē kumrēx. Nē mē inhmā kapēr o:

–Nā ām hāmri na Krisja Tirtūm pyrā nē hiht̄yx o hiht̄yx. Ām hāmri na ka ā harēnh anē. Anē.

No Ijaew kēt xw̄ynhjaja na Ijaew pyrā nē kām amnh̄i krā hkōt amnh̄i nh̄ip̄ex o pa hprām kēt nē. Nē mē kām mē āhpumunh t̄yx pix prām o pa. Jakamā na pa htem mē kām Kris kapēr jarēnh o ri mē hkōt ixpa nh̄um mē hkwȳjaja mē inhma nē Ijaew kw̄yjē pyrā nē ām mē inhma nē mē inhmā:

–Tk. Nā na ka htem ām ri axēx o ri apa. Kot pa mē akapēr mar kēt nē. Kot paj mē axāhpumunh t̄yx ā mē apumu nē r̄i kormā mē ama nē mē akōt amnh̄i nh̄ip̄ex.

Anhȳr tā pa mē ām arī Kris kot mē panē htykja pix pa mē kām harēnh o ri mē hkōt ixpa. Nh̄um mē hkwȳjaja mē inhma nē mē inhmā:

–Nā mē axāhpumunh kēt jakamā na ka htem at̄yx ri ā ja jarēnh anē.

Anhȳr tā no nh̄um mē hkwȳjaja. Tirtūm kot amnh̄i kaxyw mē unhw̄yr xw̄ynhjaja na htem mē inhma nē mē inhmā kapēr o:

–Nā ām hāmri na ka mē ā Krisja jarēnh anē. Tirtūm pyrā nē āhpumunh o āhpumunh kēnā. Anē.

²⁵ Tirtūm mē Jejus wa mē pakurom āhpumunh o āhpumunh nē hihtýx o hihtýx.

Tirtūm mē parom hihtýx o hihtýx ā harēnh Matēwre 11.25; Sikūn Korīt 12.7-10; Xikre 2.5

²⁶ E Kris kōt ixtō nē ixtōxjaja. Amnepē mā Tirtūm kot amnhīm mē axunhwýrta ā tanhmā na ka prem amnhī nhīpēx to ho ri apa? Nā na ka prem axohtō nē jar mē noo mā axāhpumunh kēt nē ri apa. Nē mē apē pahī hkēt nē ri apa. Mē axohtō nē amnhī to hkryre nē ri apa.

²⁷ Tā nhūm Tirtūm amnhī kōt mē ate amnhī to hkryre xwýnhjē xunhwý. Koja nhýrmā kot tanhmā mē pahpiitā mē pajarēnh to xā hā arīgrota kato hāmri nhūm mē āhpumunh týx ā amnhī to jarkrar xwýnhjaja Tirtūm kot mē kurom mē pahto hkra hā mē pahpumu hāmri nē tee ri amnhī kukamā hamaxpēr nē amnhī kamā hpijaam týx nē. Nē mē hihtýx ā amnhī to jarkrar xwýnhjaja haxwýja. Nhūm Tirtūm kot mē kurom mē pahto hkra hā mē pahpumu nē tee ri amnhī kukamā hamaxpēr nē amnhī kamā hpijaam týx nē.

²⁸ Na hte Tirtūm amnhī kaxyw mē kot amnhī to hkryre xwýnhjē xunhwý. Nē mē kot mē kamā kahak o pa xwýnhjē xunhwý. Jar pyka ja kamā mē hkwy kot mē hkaga htā nhūm Tirtūm amnhī mā mē unhwý. Mēmo kaxyw na hte ā amnhīm mē unhwýr anē? Nā mē kot nhýrmā tee ri mē āhpumunh týx ā amnhī jarēnh xwýnhjē pumunh nē xspēn mā mē harēnh o:

—Kwa mē pahte mē āhpumunh týx ā mē harēnh tā nhūm Tirtūm mē pahpyrà nē amnhī kaxyw mē unhwýr kēt nē. Nā te mē āhpumunh kēt pyràk.

Anhýr o xspēn mā mē harēnh kaxyw na pre Tirtūm amnhīm mē kot amnhī to hkryre xwýnhjē xunhwý.

²⁹ Jakamā kot puj mē nhýrmā Tirtūm mā amnhī to jarkrar pē tanhmā kām amnhī jarēnh to hkēt nē. Rý kām:

—Kwa ga ixpumu Tirtūm. Na pa hte ā amnhī nhīpēx anē nē ā amnhī nhīpēx anē. Kwa ja hā ixpumu nē ixto akra nā?

Anhýr o amnhī to hwýr kēt nē.

³⁰ Ām Jejus pix kukwak ri na hte Tirtūm mē pahto hkra. Tām na pre Tirtūm noo mā amnhīm mē paxunhwý. Mē pahte urāk nē pahpē hkra kaxyw. Jakamā na pu htem ām pix kukwak ri amnhī nhīpēx mex o ri papa. Nhūm mē pamā āhpumunh týx xā hkwy gō. Tā ra kot mē pahte amnhī tomnuj pē mē papytār jakamā kot puj mē nhýrmā pahtyk tā no ām akupým pahtír nē Tirtūm mē wa kuri pahtír tūm nē pamex kumrēx nē papa ho papa.

³¹ Tā ā Jejus kot mē panhīpēx kot anhýr jakamā Tirtūm kapēr ā kagā htūm kot ja jarēnh kot:

Kot ka mē amā mēmoj tā jarkrar prām nom kēr ka mē kamjaja amnhī to jarkrar kēt nē. Mē panhō Pahihtī ra kot mē panē tanhmā amnhī nhīpēx toja pix ā tanhmā ho jarkrar to ho ri apa. Anē.

2

Pawre kot tanhmā Kris jarēnh to hā harēnh

Sikūn Korīt 4.1-7; Wam Pētre 3.15

¹⁻² E Kris kōt ixtō nē ixtōxjaja. Amnepē mā ixte mē awýr inhmōrta ā na pa pre inhnojarēt nē ijamaxpēr o:

—Kot paj ma mē hwýr mō nē mē kām Kris kapēr jarē. Kot amnhī grōnh kōt mē inhnē htykja pa mē kām harē. Ām ja pix jarēnh o ri mē hkōt ixpa. Nom kot paj mē kapēr japjē xwýnhjē pyrà nē mē kām ixkapēr japjē hkēt nē. Rý mē urāk nē te ixāhpumunh týx o ri ixkapēr japjē pyràk o ri mē kām ixkapēr japjē hkēt nē. Kot paj ām ixkatāt kōt ri mē kām tanhmā Jejus jarēnh to pix o ri mē hkōt ixpa.

Anhýr o mē akukamā ijamaxpēr. Hāmri nē ma mē awýr mō nē mē awýr pōj nē mē amā Jejus kot mē panē htyk nē akupým htírja pix jarēnh rāhā ho ri ixpa.

³ Na pa pre tee ri amnhī kukamā ijamaxpēr nē ijamaxpēr o:

—Hēxta waa nē. Tanhmā kot pa we mē kām Tirtūm kapēr jarēnh to nhūm mē inhar týx nē hkōt amnhī xunhwýr kurē kumrēx wehe? Kot paj amnhī krā hkōt mē kām harēnh kēt nē. Ja kaxyw ijamaxpēr týx kēt kēnā. Kot paj amnhī krā hkōt mē kām harē nhūm mē ām inhma nē hkōt amnhī xunhwýr kēt nē. Nā kot paj Tirtūm nhý hā mē kām tanhmā ixkapēr to kē tām tanhmā mē hkra hto kē mē inhma nē hkōt amnhī xunhwýr japēr.

Anhýr o ijamaxpēr.

⁴ Nē mē ate inhar kaxyw na pa pre ixēx rom tanhmā mē ano kupyr to ho ri ixpa hkēt nē. Rý mē pajaja mē ixāhpumunh xā hkōt tanhmā mē amā ixkapēr to hkēt nē. Na pa pre ām Tirtūm Karō nhý hā mē amā awjarē. Mē ate mar nē hihtýx o hihtýx ā omunh kaxyw.

⁵ Jakamā na ka prem Tirtūm xihtýx ā omu nē amnhī kaxyw hkōt ajamaxpēr kurē kumrēx. No pa ixāhpumunh týx ā ixpumunh kōt ixkōt ajamaxpēr kēt nē. Na ka prem ixkapēr ma nē ajamaxpēr o:

—Nā Tirtūm na mē parom āhpumunh o āhpumunh nē hihtýx o hihtýx.

Anhýr o ajamaxpēr kōt ajamaxpēr kurē kumrēx.

Tirt̄um Karō kot mē pamā àhpumunh xà nhōr ā harēnh

Matēwre 7.6; Juāw 14.22, 16.13-15; Xiakre 3.13-18

⁶Nē na hte Tirt̄um kra hkwȳjaja Tirt̄um kot amnh̄i nh̄ipēx ā omunh mex. Nē hamaxpēr ā omunh mex. Jakamā na pa hte mē ahkre japjē ho mē hkōt ixpa. Nom jar pika ja kamā mē pajamaxpēr t̄yx xà ho mē ahkre hkēt nē. R̄y pika piitā hkōt mē utār xw̄ynhjē jamaxpēr t̄yx xà ho ri mē ahkre ho ri ixpa hkēt nē. Kōja nh̄ymā mē àhpumunh xàja mē kēp hapēx pa.

⁷Jakamā na pa hte am Tirt̄um xàhpumunh xà pix o mē ahkre o ri ixpa.

Amnepē mā kormā mēmoj piitā hkēt ri na pre Tirt̄um amnh̄i kukamā amnh̄i jarēnh o:

—Mē kot amnh̄i kaxyw Ixkra hkōt mē hamaxpēr o mē pa xw̄ynhjaja kot paj mē ho ixkra nh̄um mē mex kumrēx nē pa ho pa.

Anh̄yr o mē harē. Nom mē kot hkōt amnh̄i xunhw̄yr kēt xw̄ynhjaja nh̄um kormā mē kām ja ho amnh̄ir̄it̄ kēt nē. Tā ja na pa hte ra mē kām harēnh rāhā ho ri mē hkōt ixpa nh̄um mē Tirt̄um kām mē pahto hkra hprām hā harēnh ma.

⁸Nom pika piitā hkōt mē ho amnh̄iptār xw̄ynhjaja na mē kormā ja mar kēt nē. Kēp apu mē kot mar ronh̄yx prem pī kahpa hā mē panhō Pahih̄ti nh̄or nē hpr̄i kēt nē. Mex o mex tā nh̄um prem axtem nē ā hipēx anē.

⁹Mē kot mēmoj mex pumunh kēt tā Tirt̄um kapēr ā kagā ht̄um kot mēmoj mex jarēnh kot:

Na pre Tirt̄um mē kām hk̄inh xw̄ynhjē kutēp mēmoj mex kw̄y jaxw̄y nh̄um mex o mex nē mē ahā hikw̄y.

Aa mēhō kot mēmoj mex o mexja pumunh kēt.

Nē aa mēhō kot ā mēmoj kot anh̄yr pumunh kēt.

Nē aa ā mēmoj mex kot anh̄yr kukamā hamaxpēr kēt.

Tā nh̄um Tirt̄um mē kutēp hkwȳ jaxw̄y.

Anh̄yr o kot harēnh tā no nh̄um mē kot hkōt amnh̄i xunhw̄yr kēt xw̄ynhjaja ā kapēr anh̄yrja mar kēt nē.

¹⁰Mē pamā na pre Tirt̄um ja ho amnh̄ir̄it̄. Na pre ra mē pamā Karō gō nh̄um mē pamā gjēx o mē pamā mēmoj to amnh̄ir̄it̄ mex nē. Tirt̄um Karōja àhpumunh t̄yx o àhpumunh t̄yx. Nē kot hpr̄i hā Tirt̄um jamaxpēr pumunh par.

¹¹No mē papajaja na pu htem axpēn jamaxpēr kōt axpēn pumunh kēt nē. Na pu htem papam amnh̄i jamaxpēr ā amnh̄i pumu. Ja pyrā nē Tirt̄um Karō pix na hte Tirt̄um jamaxpēr pumunh.

¹²No mē pahpē hkrajaja na hte mē pahkarōja pix mē pakamā pa hkēt nē. Na hte määnēn Tirt̄um Karōja mē pakamā pa nē mē pamā tanhmā mēmoj to amnh̄ir̄it̄ to

ho mē pahkōt pa. Nē Tirt̄um kot mē pakutēp mēmoj mex jaxw̄yrja nh̄um ja kukamā mē pamā harēnh o amnh̄ir̄it̄.

¹³Jakamā na pa htem amnh̄i krā hkōt ri mē kām ixujarēnh kēt nē. Am Tirt̄um Karō nh̄y hā na pa hte ixpr̄i hā mē kām kapēr jarēnh o ri mē hkōt ixpa. Ra Tirt̄um Karō kot mē amā gjēx xw̄ynhjē mā pa ŷ hā ixkapēr.

¹⁴No mē kām Tirt̄um Karō kapēr mar prām kēt xw̄ynhjaja na htem Tirt̄um kot amnh̄i nh̄ipēx pumu nē hpr̄i hā omunh kēt nē. Mē kām kapēr mar prām kēt jakamā na htem ri kot tanhmā mē pahto mex to hā harēnh ma nē hamaxpēr o:

—Tk. Kwa mo kaxyw na htem ri ā Tirt̄um jarēnh anē? Tanhmā kot we amnh̄i to nē mē pahto mex? Nā kot anh̄yr kēt. Anē.

¹⁵Nom mē pahpē Tirt̄um kra hkwȳ hā mē pahte Karō kapēr mar mex xw̄ynhjaja na pu hte mē kurom Tirt̄um kot amnh̄i nh̄ipēx ā omunh mex nē. Nē Karō xō ri mar mex nē nh̄um mē kot Karō kapēr mar kēt xw̄ynhjaja tee ri ā mē pahte amnh̄i nh̄ipēx anh̄yr ā mē pahpumu. Nom hpr̄i hā mē pahte Tirt̄um kōt amnh̄i nh̄ipēx pumunh kēt nē.

¹⁶Tirt̄um kapēr ā kagā ht̄um kot ja jarēnh kot:

Mēhō na kot Tirt̄um jamaxpēr pumunh?

Nē mēhō na pre we kām hamaxpēr gō?

Nā amrakati kumrēx. Tapxixip na àhpumunh t̄yx o àhpumunh t̄yx. Anē.

Tā mē papajaja mē pahte Tirt̄um Karō kapēr mar t̄yx xw̄ynhjaja na pu htem Kris xō ri pahpr̄i hā hamaxpēr kōt omunh mex nē.

3

Mē kot Tirt̄um mā tanhmā amnh̄i nh̄ipēx to xw̄ynhjē jarēnh

Wam Korit̄ 14.20; Karatas 5.16-21; Epes 4.14; Eprēw 5.11

¹E Kris kōt ixtō nē ixtōxjaja. Pa mē amā mēmoj jarē ka mē inhma nē kām ajamaxpēr. Nā amnepē mā kormā mē ate Kris kōt amnh̄i nh̄ipēx tohtuj anh̄yrta ā tanhmā na ka prem amnh̄i nh̄ipēx to ho ri apa wehe? Na ka prem ar̄i ajamaxpēr t̄um kōt pix mā amnh̄i nh̄ipēx. Kormā mē ate Tirt̄um Karō hkōt amnh̄i nh̄ipēx mex kēt jakamā na ka pre htem mēhpr̄ire kot amnh̄i nh̄ipēx pyrāk o amnh̄i nh̄ipēx. Nē mē urāk nē kormā mēmoj piitā omunh kēt nē. Jakamā na pa pre mē amā ixujarēnh kaxyw nē te mē ate kormā Tirt̄um kapēr mar kēt xw̄ynhjē pyrāk o mē anh̄ipēx nē mē amā tanhmā ixujarēnh to.

²Mē hkarāre na htem mē hkā kagō pix kaō nē kormā mē apkur xà mex kur kēt nē. Ja pyrā nē na pa pre te ixte mē ato hpijaōr pyrā nē mē amā Tirt̄um kapēr piitā harēnh par kurē kumrēx kēt nē. Am mē amā hkwȳ pix jarē ka prem ama nē Jejus kōt amnh̄i xunhw̄y. Tā na pa hte ar̄i mē amā hkwȳ

pix jarênh o ri ixpa nê kormâ piitâ ho mē ajahkre jatur xâm mēnh kêt nê.

³ Na ka htem arî te mē apê Kris kwý hkêt pyrâk o amnhî nhîpêx o apa. Nê mēmoj kôt axpên kâm agryk axpên mâ axâkjêr o apa. Â amnhî nhîpêx anhÿr jao arî mē ate amnhî nhîpêx tûm kôt amnhî nhîpêx râhâ nê.

⁴ Na hte mē akwýjaja amnhî jarênh o: “Ixpê Pawre hkwy na pa.” Anê. Nê mē akwýjaja amnhî jarênh o: “Pa na ixpê Apor kwý na pa.” Anê. Kwa na ka htem â amnhî jarênh anhÿr o te mē apê Kris kwý hkêt pyrâk.

⁵ Apor mē pa âm wa ixte Tirtûm kapêr o mē ajahkre xwýnh pix na pa wa. Wa ixpê mē anhô pahihiti hkêt kênâ kot ka kêt mē axtem nê mē apê ahpÿnhâ wa ixkwý hâ amnhî jarê. Na pa pre wa mē amâ Tirtûm kapêr jarênh o ri mē akôt ixpa ka prem wa inhma nê amnhî kaxyw hkôt ajamaxpêr tÿx nê. Nê hkôt amnhî xunhwý nom wa pa wa ixkôt amnhî xunhwýr kêt nê. Na pa wa âm Tirtûm kapêr o mē ajahkre nom amnhî kôt mē axunhwýr kêt nê.

⁶⁻⁹ E pa ixprî hâ mē amâ war amnhî jarê ka mē inhma. Te wa ixpê Tirtûm pur kâm wa ixâpênh xwýnh pyrâk no mē kajaja te mē apê hpur pyrâk. Na htem hpur karê nhûm hirâ nhûm mē kamâ ahkre ho pa. Ja pyrâ nê na pa pre ixkumrêx mē awÿr ixpa nê mē amâ Tirtûm kapêr jarênh o ri mē akôt ixpa. Te mē kot pur kâm ahkre ho ri pata pyrâk. Tâ nhûm Apor ixpânhâ ma mē awÿr pa nê te mē kot pur karêta pyrâk o mē anhîpêx nê mē amâ Tirtûm kapêr o mē ajahkre mex o ri pa. Xâ na hte pur karêr xwýnhja rÿ kamâ ahkre xwýnhja tâm tanhmâ mēmo hy hto nhûm ra higrôt nê hprêk nê ô? Nâ na htem âm ahkre hpa nhûm arî hikwý. Nhûm Tirtûm tâm tanhmâ hyta to nhûm higrôt nê hprêk nê ô. Ja pyrâ nê na hte Tirtûm mē ho hkra nê tanhmâ mē ho nhûm mē amnhî kaxyw hkôt hamaxpêr tÿx nê hkôt amnhî nhîpêx mex o pa. Nom mē kâm harênh o pa xwýnhhta kôt amnhî xunhwýr kêt nê.

Nê na hte pur karêr xwýnh rÿ kamâ ahkre xwýnhja tâm tanhmâ hyta to nê ho htîr kêt nê. Tirtûm pix na hte tanhmâ ho nhûm higrôt. Ja pyrâ nê na pa hte Tirtûm kapêr o mē ajahkre o ri mē akôt ixpa nom pa tanhmâ mē ato ka mē apê Tirtûm kra nê ri apa hkêt nê. Tanhmâ kot pa mē ato ka mē apê hkra? Tapxipix na kot mē pahto hkra kaxyw ahpumunh. Nê tapxipix na hte tanhmâ mē pahkrâ hto pu mē kâm hprâm xâ hkôt amnhî nhîpêx mex o ri papa.

Nê pur karêr xwýnh mē pur kâm ahkre xwýnhja wa. Hamê wa âpênh mex jakamâ koja hamê wa kot pur kâm âpênh pânâ amnhîm ujamýnh rax nê. Ja pyrâ nê kot paj mē ixte Tirtûm kapêr o mē ajahkre ho ri mē akôt ixpa xwýnhja nhûm Tirtûm nhÿrmâ

mê ixâpênh pânâ mē inhmâ amnhîrer mex nê.

Nê te mē ate Tirtûm nhô ixkre pyrâk.

¹⁰ Nê pa te ixpê Tirtûm mâ ixkre hâ ixâpênh xwýnh pyrâk jakamâ na pre Tirtûm mē akaxyw tanhmâ ixto pa mē amâ tanhmâ kot amnhî nhîpêx to hâ harênh o ri mē akôt ixpa. Te ixte ô ixkre kaxyw âm xâ maati xâm pyrâk o mē anhîpêx. Jao mē amâ kapêr jarênh o ri mē akôt ixpa. Mē ate amnhî kaxyw hkôt ajamaxpêr nê hkôt amnhî xunhwýr kaxyw. Tâ na ka prem hkôt amnhî xunhwýr nhûm ixpânhâ Tirtûm kapêr o mē ahkre ho mē pa xwýnh kwýjaja mē awÿr mra nê mē amâ kapêr jarênh jatur xâm kurê. Nê hprî hâ ho mē ajahkre ho ri mē akôt pa. Te ho mē kot ixkre krax nhîpêx pyrâk o mē anhîpêx.

Nê kwa mē ate mē ahkre o mē apa xwýnhja kêt ka mē akatât kôt mē ahkre mex râhâ ho ri mē hkôt apa.

¹¹ Nê Jejus Kris tapxipix na pu htem hkôt amnhî xunhwýr nhûm mē panê mē pahte amnhî tomnuj o hapêx. Jakamâ te kêp kýxpê ixkre nhîmôk â nôr xâ maatita pyrâk.

¹² Nê na htem tōhâ ixkre nhîpêx kaxyw nê pî htÿx jakâ nê ho hipêx nhûm kritpê mē kâm mex ry nê kuhê. No na htem tōhâ nojarêt kâm ixkre hâ apê nê pî rerek o hipêx nhûm mē kâm mex ry hkêt nê. Koja rôr nhyre hwÿr mra nê mē kêp hapôk nê homnu. Ja pyrâ nê na hte Tirtûm kapêr o mē ahkre ho ri mē pa xwýnh kwýjaja te mē kot katât kôt pî htÿx o ixkre nhîpêxta pyrâ nê katât kôt mē ahkre ho ri mē hkôt pa. No nhûm mē hkwyjaja axtem nê te mē kot pî rerek o ixkre nhîpêxta pyrâk o amnhî nhîpêx nê htÿx ri Tirtûm kapêr kwÿm ri tanhmâ mē ahkre hto ho pa. Jao hkwy m ri amnhî nhîpêx râhâ ho ri pa.

¹³ Nê koja mēhō pî htÿx pix o amnhîm ôrkwý nhîpêx hâ mri nhûm mēmo arigro hâ tanhmâ amnhî to nê kêp pôr. No âm hâ pôja pix xêt pa nhûm kâm hikwý xâ nê ôkwa êja arî piitâ mex nhûm ixkre hpâm axte hâ pô janhôr o nyw. No koja pî rerek o hipêx nhûm mēmo arigro hâ kêp pôr hâ mri nê piitâ kêp kaxâr pa. Ja pyrâ nê koja nhÿrmâ Krisja akupÿn mē pahwÿr wrÿ hâ mri nê mē pahte kâm tanhmâ amnhî nhîpêx to ho papaja piitâ hâ mē pahpumunh kôt tanhmâ mē pajarênh to. Koja mē pahkwýjaja mē pahte mē kot pî htÿx o ixkre nhîpêxta pyrâ nê Tirtûm mâ mē pahte amnhî nhîpêx mex o mē papa xwýnhjê xâpênh pumu nê mē pahte amnhî to mex xwýnh â mē pajarê. Hâ mri nê hpânâ mē kot pî rerek o ixkre nhîpêxta pyrâ nê mē kot kâm amnhî nhîpêx mex kêt xwýnhjê pumu nê mē kot amnhî to mex kêt xwýnh hâ mē harê.

¹⁴ Nê pî htÿxja na hte tanhmâ amnhî to nê hpôr no âm arî mex nê kuhê nhûm mē piitâ

arī mex ā omu. Ja pyrà nē koja Krisja mē kot kām tanhmā amnhī nhīpēx mex to ho mē pa xwýnhjē pumu nē mē kot tanhmā kām amnhī nhīpēx to hpānhā mē kām amnhīre nhūm mē piitā mē kot amnhī to mex ā mē omu.

¹⁵ No pī rerekja na hte pôr nē kaxār pa. Ja pyrà nē mē kot Kris mā amnhī nhīpēx mex hkēt xwýnhjaja koja Tirtūm mē kām amnhīrer kēt nē. Nom arī mē kēp hkra jakamā koja mē arī kuri htīr tūm nē pa. No ām mē kot Tirtūm mā amnhī nhīpēx mex kēt jakamā koja mē hkwyjē hkīnh ā amnhīm mēmoj mex kwý jamýnh kēt nē. Te mēhō nhōrkwý kēp hpōr nhūm mē hkukrēx kwý jamýnh kēt nē ý kamā kurūm hapōx pyrāk.

¹⁶⁻¹⁷ E pa mē amā mēmoj jarē. Ra mē ate mar tā mān ka mē ra tanhmā amnhī to nē hā ano hkēt rý ko. Nā te mē pahpē Tirtūm nhōrkwý pyrāk. Tirtūm nhōrkwýja ō na. Tā mē pahpē hkra nhūm Karō kot mē pakaxwýnh mā gjēx jakamā te mē pahpē ōrkwý pyrāk. Jakamā mē kot kapēr kwým ri mē ajahkre o ri mē pa xwýnhjaja te mē kot Tirtūm nhōrkwý grānh xwýnh pyrāk. Koja mē nhýrmā amnhī xā htýx kamā hamak o pa.

Mē pahte amnhī to jarkrar kēt ā mē pamā karō

Wam Korit 1.10-25

¹⁸ Nē kot kaj mē atō axāhpumunh týx o amnhī to jarkrar o ri apa japēr. Kwa mē jam anhūre nē axte ri ā amnhī nhīpēx anhýr kēt nē. Nē te mē ate amnhī nē axāhpumunh týx xāja nhām rēnh par pyrāk o amnhī nhīpēx. Mē paxāhpumunh xāja pika kamā mē āhpumunh pix jakamā kēr ka mē te amnhī nē nhām rēnh pyrà nē hpānhā Tirtūm xāhpumunh xā hkōt pix mā amnhī nhīpēx o ri apa.

¹⁹ No pika kamā mē āhpumunh xwýnhjaja Tirtūm noo mā te mē hkrā pipānh nē htýx ri pata pyrāk. Tirtūm kapēr ā kagā htūm kot mē harēnh kot:

Pika ja kamā mē āhpumunh týx ā mē kot amnhī to jarkrar xwýnhjaja Tirtūm noo mā te mē kot amnhī to hēx o pa pyrāk. Anē.

²⁰ Nē määñēn mē harēnh kot:

Mē kot amnhī xāhpumunh týx ā amnhī to jarkrar o ri mē pa xwýnhjaja na hte Tirtūm mē omu nē mē kot ā amnhī jarēnh anhýr kaprý hā mē harē. Anē.

²¹⁻²² Jakamā kwa kēr ka mē axte mē apē ixkwý rý mē apē Apor kwý hā amnhī jarēnh o ri apa hkēt nē. Mē apē wa ixkwý hkēt kēnā. Nē mē apē nhām mēhō hkwy hkēt. Mē pahpiitā mē pahpē Kris kwý na pu mē.

Nē kot puj mē nhýrmā pahtyk tā akupým pahtír nē Tirtūm mē Jesus wa kuri pamex nē

pahtír tūm nē ri papa. Jakamā kwa mē tee ri amnhī kukamā ajamaxpēr kēt nē.

Nē jarāhā mēmoj piitā mē panhō. Nē kormā mēmoj kot amnhīrit kēt xwýnhjaja haxwýja mē panhō na. Ām mēmoj piitā mē panhō jakamā te mē pahpē mēmoj piitā mēhō pahi pyràk.

²³ No mē papajaja axtem Kris kēp mē panhō Pahihti. Nē Tirtūm kēp Kris nhō Pahihti.

4

Tirtūm pix kot tanhmā mē pajarēnh to xwýnh ā harēnh

Eprēw 13.17

¹ Nē mē pajaja mē ixpē mē anhō pahi hkēt. Ām mē ixte Kris mā tanhmā amnhī nhīpēx to ho ixpa xwýnh pix jakamā Tirtūm kormā kapēr kwý ho amnhīrit kētja na pa htem mē amā ho amnhīrit o ri mē akōt ixpa. Ja kaxyw na pre mē ixunhwý.

² Na pre Kris tanhmā mē inhmā kapēr to nē mē inhmā:

—E kēr ka mē ixkapēr pix o mān mē ahkre ho ri mē hkōt apa. Anē.

³⁻⁴ Kumā pix mā ixte amnhī nhīpēx o ri ixpa jakamā koja tapxipix ixte kām amnhī nhīpēx ā ixpumunh kōt tanhmā ijarēnh to. Ixte kām amnhī nhīpēx mex ā ijarē rý ixte kām amnhī nhīpēx mex kēt ā ijarē. Ām tapxipix koja tanhmā ijarēnh to. No koja nhām mēhō rý mē atō ā ijarēnh anē pa ama nē ām ama. Rý papam tanhmā kām ixte amnhī nhīpēx mex to hā kām amnhī jarēnh japēr hāmri nē ām ixtýx kām ā amnhī nhīpēx anhýr ā amnhī jarēnh kaprý. Pahihti Kris pix kot hprī hā mē pahte amnhī nhīpēx kōt pahpumunh jakamā tapxipix koja tanhmā mē pajarēnh to.

⁵ Jakamā kwa kēr ka mē ri mē kot Tirtūm mā tanhmā amnhī nhīpēx to hā mē omunh xā hkōt tanhmā mē harēnh to hkēt nē. Koja nhýrmā Pahihti Krisja akupým mē pahwýr wrý nē rī tām tanhmā mē pahte amnhī nhīpēx to hā mē pahpumunh xā hkōt tanhmā mē pajarēnh to. Nē mē kot hpimxur pē tanhmā amnhī tomnuj to ho mē pa xwýnhjaja nhūm mē piitā mē noo mā mē kām ja ho amnhīrit nhūm mē ja hā mē omu. Nē mē pahpiitā mē pajamaxpēr xā ho amnhīrit nhūm mē piitā hprī hā ja hā axpēn pumu. Hāmri nhūm Tirtūm rī kormā mē pahte kām tanhmā amnhī nhīpēx mex to ho pa xwýnhjē jarē.

⁶ E Jesus kōt ixkwýjaja. Nā na pa ā mē amā Apor mē wa amnhī jarēnh anē. Mē ate inhmā nē Tirtūm kapēr ā kagā hkōt tanhmā wa ijarēnh to kaxyw. Kot kaj mē ā amnhī nhīpēx anē hāmri nē ahpýnhā tanhmā mē ixte Kris kapēr jarēnh xwýnhjē jarēnh to hkēt nē. Nē axpēn mā mē ijarēnh o:

—Nà tām kot Kris kapēr jarēnh mex o kot hkwyjê jakrenh jakamā kot paj hkôt pix mā mǎn ri ixpa.

Anhÿr o axpēn mā mē ixtō jarēnh kêt nē. Kot kaj mē ā mē ixtō jarēnh anē nē te mē ixtō jarkrar pyrāk o amnhî nhîpêx.

⁷ Kwa mēhō na pre mē amā tanhmā ri mē ijarēnh to ka mē mar xā hkôt ā mē ijarēnh anē? Nē mē ixkapēr mex ā mē ixkwjê jarē nē mē ixkapēr mex kêt ā mē ixkwjê jarē. Nà na ka mē ām amnhî krā hkôt ā mē ijarēnh anē nom Kris xāhpumunh xā ho ā mē ijarēnh anhÿr kêt nē. Ām mē ixte Tirtūm kapēr o mē ajahkre xwÿnhjaja na pa prem mē amā mēmoj jarē ka mē ama nē mē inhÿ hā hkôt axāhpumunh mex nē. No amnhî krā hkôt mē axāhpumunh kêt kēnā kot ka kêt mē ā ahpÿnhā tanhmā mē ixtō jarkrar anhÿr to ho ri apa.

⁸ Te mē ate Apor mē wa ixrom Tirtūm kapēr mar par nē hkôt amnhî nhîpêx mex pyrāk. Te wa ixrom mē ate Jejus nhîhkō hā mē ho amnhîptār pyrāk. Hēxta waa nē. Kop apu ām hāmri mē ate ihkō hā mē ho amnhîptār ronhÿx pa ijaxwÿja mē apyrā nē ā amnhî nhîpêx anē. Hāmri nē ixkînh tÿx kumrêx.

⁹ Nom ja kot anhÿr kêt.

*Jejus nhÿ hā mē ahkre xwÿnhjê jarēnh
Sikūn Korîit 4.8-10; Eprêw 12.1*

Nē mē ixpê Jejus nhÿ hā mē ajahkre ho mē ixpa xwÿnhjaja te Tirtūmja axtem tanhmā mē inhîpêx to pyrāk pa mē inhmex kêt nē ixpa. Te mē ixte gyw kām amnhî rēnh nhūm nē kot mē ixkamā ôkre kahak pyrāk o na htem mē inhîpêx. Jakamā na hte mē hkwyjaja mē ixpumu nē mē ixkapēr ma nē ām mē inhma nē axpēn mā mē ijarēnh o:

—Tk. Kot mē ahkreja mexti hā. Kwa pu mē himex ri.

Anhÿr jakamā te ra mē ixtyk nē mē inhîkwÿ nhūm mē piitā mē ixtā htu nē mē ixpumunh nē ma pa pyrāk o amnhî nhîpêx. Jakamā na htem mē ixte mē ahkre ma nē ām kuma nē ma pa. Nom Tirtūm kapēr o mē wrÿk xwÿnhjaja na htem ja hā mē pahpumu nē axpēn mā mē pajarēnh o:

—Kwa mē kot Jejus ā mē hipêx kati htā nhūm mē arî hkôt amnhî nhîpêx mex nē aa hkaga hkêt nē. Hēxta waa nē. Nā ām hāmri na htem ā amnhî nhîpêx anhÿr o pa. Anē.

¹⁰ Na hte mē kot mē ixkapēr mar xwÿnh kwÿjaja kām mē ixkînh kêt nē tanhmā mē ixtō kapēr punuj to. No mē kajaja nhūm mē ā mē ato kapēr anhÿr kêt nē. Na htem mē ixkrā pipānh ā mē ijarē no mē kajaja nhūm mē Kris nhÿ hā mē axāhpumunh tÿx ā mē ajarē. Nē mē ixte Tirtūm kapēr kôt amnhî nhîpêx mex kêt ā mē ijarē no mē kajaja na htem Tirtūm kôt mē ate amnhî nhîpêx mex ā mē ajarē. Nē mē kot mē ixkamā ôkre kahak

tÿx tā mē akamā ôkre kahak kêt nē mē kām mē akapēr mar prām nē.

¹¹ Na pa htem arî Kris ā ixpunuj nē ixpa. Nē mē inhmā prām nē mē inhmā kôr nē ri ixpa. Nē mē ixê pikaxônhre nē ri ixpa. Nhūm htem Kris ā mē ixtar rûnh nē. Pa mē inhôrkwÿ hkêt nē nhām ri ixpa nē nhām ri ixpa. Na pa htem arî ā amnhî nhîpêx anhÿr o ri ixpa.

¹²⁻¹³ Nē ixâpkur xā kaxyw ixâpēnh rûnh o ri ixpa. Nhūm hte mē kām Jejus prām kêt xwÿnhjaja mē ijayrÿ ho pa htā pa mē amnhî kurom mē kām ixkapēr mex nē mē kām:

—E kêt Tirtūm mē ato mex nē ka mē amex nē apa. Anē.

Nē mē kot mē inhîpêx kati htā pa htem mē kutā amnhî to htÿx nē arî mē hkôt ixpa. Na htem te mē kot ahpunuj nhîpêx pyrāk o mē inhîpêx nē mē ixwÿr mrar kêt nē. Ā na htem mē ixte Jejus nhÿ hā mē ahkre o mē ixpa xwÿnhjê nhîpêx anē.

Pawre te kēp mē hpām pyrāk ā kot amnhî jarēnh

Wam Tesarōn 2.11-12

¹⁴⁻¹⁵ E Kris kôt ixkwÿjaja. Na pa ā mē amā kagā nē mēnh anē. Nom mē ate inhmar nē amnhî kamā apijaam kaxyw kêt. Inhmā mē ajapê jakamā na pa ā mē amā ixkapēr nē hā kagā nē mēnh anē. Na mē ra ohtō nē ixpānhā mē awÿr pa nē mē amā Tirtūm kapēr o mē ajahkre. Nom ixkumrêx na pa pre mē amā kapēr jarē ka prem inhma nē Kris hkôt amnhî xunhwÿ nē amnhî kaxyw hkôt ajamaxpêr tÿx nē. Jakamā paxipix te ixpê mē apām nhūm te mē apê ixkra pyrāk.

¹⁶ Jakamā kwa mē ixte amnhî nhîpêx kôt ixpumu nē ixkôt mǎn kêt mē amnhî nhîpêx o ri apa.

¹⁷ Ā mē ate amnhî nhîpêx anhÿr kaxyw na pa pre ijamaxpêr nē ma mē awÿr Ximotre mē. Haxwÿja Kris kôt te kēp ixkra pyrāk. Nē inhmā hapêê. Na hte jar Kris mē tanhmā amnhî nhîpêx mex to ho pa. Tā pa pre mē awÿr kumē. Koja ma mē awÿr mō nē pōj nē mē amā Kris kapēr jarēnh o ri mē akôt pa. Nē mē amā tanhmā ijarēnh to nē mē amā:

—Nā Pawre na hte Jejus Kris jamaxpêr kôt hamaxpêr o pa. Nē kot amnhî nhîpêx kôt amnhî nhîpêx o pa. Nē krî piitā hkôt mē kot urāk nē ā amnhî nhîpêx o pa anhÿr kaxyw mē ahkre mex o pa. Anē.

¹⁸ Nē na xep mē akwÿjaja te ra āhpumunh tÿx pyrā nē tanhmā ijarēnh to nē ijarēnh o:

—Pawreja akupÿn mē pahwÿr mōr ā amnhî jarēnh tā koja akupÿn mōr kêt nē kām ga. Ām kapēr kati xwÿnh na.

¹⁹ Anhÿr ā ijarēnh tā koja Tirtūm kām tokyx ma mē awÿr inhmōr prām hā kot pa ma mē awÿr inhmōr kurē kumrêx. Hāmri nē pōj nē ixprî hā ā mē kot ixtō kapēr anhÿr

xwýnhtajé pumu. Nê mēhō kot ā mē kām ijarēnh anhyr xwýnhnta ā ahkukja.

²⁰ Tirtūm krajaja na htem hkōt pix mā amnhī nhīpēx jakamā na htem hkōt tanhmā amnhī nhīpēx to hā mē omu nē rī kormā kēp hkra hā mē harē. Tā kot paj nhýrmā mē awýr pōj nē ā ixto kapēr anhyr xwýnhjé pumu nē ixprī hā mē kot amnhī nhīpēx ā mē omu nē rī kormā tanhmā mē harēnh to. Jao Tirtūm nhý hā mē kot mē ajahkre hā mē omu rý amnhī krā hkōt mē kot mē ajahkre hā mē omu nē rī kormā tanhmā mē harēnh to.

²¹ Jakamā kwa mē tokyx ixkutēp tām amnhī nhīpēx o ri apa. Kēr pa mō nē mē awýr pōj nē mē ate tām amnhī nhīpēx ā mē apumu nē ixkīnh nē. Nē mēmoj tā mē amā ixākjēr kēt nē. Nē mē amā ixkapēr mex pix o ri mē amā ixkapēr. Te mē hipēēxā kot hkrajé mā kapēr mex pyrāk o mē amā ixkapēr mex nē. Hāmri pu mē axpēn pumu nē pahkīnh nē.

5

Mēhō kot tanhmā amnhī tomnuj to hā harēnh

Sikūn Korit 2.5-11

¹ Nē kwa na pa pre tee ri mē anhiōja jarēnh ma nē ixkaprī htýx nē. Na xep hte amnhī tomnuj týx pē nā puro hā hpijaam kēt o pa. Kwa mē pahpē Kris kwýjaja mē pahte ā amnhī nhīpēx anhyr kēt nhūm mē kot Kris kōt amnhī xunhwýr kēt xwýnhjaja haxwýja ā amnhī nhīpēx anhyr kēt tā nhūm ra mē anhiōja kot Kris kōt amnhī xām tā ā amnhī nhīpēx anē. Kwa ja omnuj týx kumrēx.

² Na xep ri ā amnhī nhīpēx anhyr o pa ka mē ja hā omu nē ām omu nē nē tanhmā kām nē hkēt nē. Amarī hā omunh o ri hkōt apa. Mē ate Tirtūm kōt axāhpumunh týx ā amnhī jarēnh tā no ām ja hā omu nē ām hā omu nē nē tanhmā kām nē hkēt nē. Kwa nā. Mē tee ri kot ā amnhī nhīpēx anhyrja ā omu nē akaprī nē hkēt wehe. Nē mē tokyx amnhī nē hano kē mē akōt Tirtūm mē amnhī jarēnh xā hā ixkre hwýr axte mmar kēt nē.

³⁻⁵ Ixte mē apē awry htā ā kot amnhī nhīpēx anhyr ā harēnh ma nē hkukamā tanhmā ijamaxpēr to. Nā ra ixte mē awýr ixpō ronhyx pa mē ato akuprō. Pahihti Jejus nhý hā mē ato akuprō nē mē amā kot amnhī tomnuj xwýnhnta jarē nē mē anē hanor kurē kumrēx. Jakamā e kēr ka mē māmri ā amnhī nē hipēx anē. Mē panhō Pahihti Jejus nhý hā amnhī nē hano nē te Satanasti mā rer pyrāk kē tee ri ja hā amnhī pumu nē tokyx kām urer japēr. Hāmri nē akupým tām amnhī nhīpēx. Kē nhýrmā Pahihti akupýn mē pahwýr wrý nhūm ma mē pahkōt ō krī hwýr api.

⁶ Mē ate Tirtūm kapēr jarēnh mar mex ā amnhī jarēnh tā kormā amnhī nē ā kot

amnhī nhīpēx anhyr xwýnhnta janor kēt nē. Kwa mē tokyx amnhī nē hano. Na htem pāwti nhīpēx kaxyw nē kamā kot ho hikot xā ho hkryre nē kamā kurē nē gaa nē rī ho piitā hikot pa. Ja pyrā nē kot ka mē amnhī nē kot amnhī tomnuj xwýnhnta janor kēt nē hāmri nē gaa nē ra urāk nē apiitā ā amnhī nhīpēx anhyr o ri apa.

⁷ Kwa mē tokyx amnhī nē hano. Kēr ka mē arī amnhī to mex pix o ri axpēn kōt apa nē tām ri amnhī nhīpēx o ri axpēn kōt apa. Na pre ra Jejus Kris mē pahte amnhī to mex o papa kaxyw mē panē ty. Mē pahpiitā mē panē ty.

⁸ Jakamā na pu htem ām amnhī to mex pix o ri papa. Nē tām amnhī nhīpēx o ri papa. Jao tanhmā amnhī tomnuj to ho ri papa hkēt nē.

⁹ Nē wam ixte mē awýr kagā nē mēnhnta kamā na pa pre mē amā:

—Kēr ka mē nhām mē kot mēnijé kamā hpijaam kēt o mē pa xwýnhjé hkōt ri apa hkēt nē. Ām ri mē hkāx ā pa.

Anhyr o mē amā hā karō.

¹⁰⁻¹¹ Nom na pa pre mē piitā ā mē nē mē akurē anhyr kēt nē. Ām mē kēp Kris kwý hā amnhī jarēnh tā ā ri amnhī tomnuj anhyr xwýnh pixjaja na pa pre mē nē mē akurē. Kōja mēhō kēp Kris kōt mē pahtō rý mē pahtōx ā amnhī jarēnh tā mē kamā hpijaam kēt o ri pa ka mē ja hā omu nē hkōt ri apa hkēt kurē kumrēx.

Nē mē kām nhām mē hkukrēx kīnh o kām ho ō hprām o ri mē pa xwýnhjaja.

Nē sānti kutā hkōn krā ho rōrōk nē hkrī nē kām mex ā harēnh o ri mē pa xwýnhjaja.

Nē mē kot axpēn to kapēr punuj o ri mē pa xwýnhjaja.

Nē mē pipānh o ri mē pa xwýnhjaja.

Nē axpēn pē ri mē āhkīnh o mē pa xwýnhjaja.

Kōja mēhō kēp Kris kwý hā amnhī jarēnh tā ā amnhī nhīpēx anhyr o ri pa ka mē ja hā mē omu nē hkōt ri apa hkēt kumrēx. Nē mē kotā axāpkur kēt nē. Ām mē hkāx ā ri mra.

No mē kēp Kris kwý hkēt xwýnhjé nē na pa pre ā mē akurē anhyr kēt nē. Mē piitā ā mē kot amnhī nhīpēx anhyr o pa kēnā. Na htem axpēn kām hpijaam kēt o ri pa.

Nē mē kām axpēn kukrēx kīnh o kām ho ō hprām o ri pa.

Nē sānti kutā hkōn krā ho rōrōk nē hkrī nē kām amnhī jagrer pē amnhī to hwýr o pa.

Nē mē axpēn pē āhkīnh pix o pa.

Kris kwý hkēt xwýnhjaja na htem ā amnhī nhīpēx anhyr o pa. Tā tanhmā kot ka wem amnhī to nē mē hkāx ā ri apa? Mē piitā ā mē kot amnhī nhīpēx anhyr kēnā. Kot puj mē nhýrmā Tirtūm nhō krī mex wýr api nē rī kormā mē hkāx ā ri papa.

12-13 Nê mê kêp Kris kwÿ hkêt xwÿnhjaja na pa hte mê kot amnhî tomnuj â mê omu nê âm mê omu nê tanhmâ hâ mê kâm nê hkêt nê. Tirtûm tãm koja nhÿrmâ ja hâ tanhmâ mê hipêx to. No koja Kris kôt mê pahtô rÿ mê pahtôxjê hõ tanhmâ amnhî tomnuj to ho pa pu mê pahtô ja hâ omu nê nê tanhmâ kâm pakapêr to kurê kumrêx. Tirtûm kapêr â kagâ htûm kot ja jarênh kot:

Kêr ka mê amnhî nê Kris kôt akwÿjê hõ kot tanhmâ amnhî tomnuj to ho pa xwÿnhjê jano. Â harênh kot anhÿr.

6

Mê pahte Kris kwÿjê ho pakapêr kêt Matêwre 5.38-40

¹ Nê na ka xep htem Kris kôt atô rÿ atôxjê hõ mê ka wa tanhmâ axpên tomnuj to nê axtem nê juisti hwÿr axpên to mra. Mê apyrâ nê kêp Kris kwÿ hkêt tâ ka htem ma hwÿr amnhî to mra nhûm war axpên tâ war ama nê tanhmâ war ajarênh to. Kwa mon ka htem axtem nê â Kris kwÿ hkêt xwÿnhjê hwÿr mê amnhî to amrar anê? Kêt mê Kris kôt anhîo hwÿr mân kêt mê amnhî to mra nê kumâ mân amnhî jarê kê axpên tâ war ama nê axpên tâ tanhmâ war amâ kapêr to.

² Ra mê ate ja mar tÿx tâ hkôt amnhî nhîpêx kêt nê. Mêmoj âm grire htâ ka wa tokyx akupÿm hâ tãm axpên xâm kêt nê. Rÿ Kris kôt war atôjê hõ hwÿr wa amnhî to atêm nhûm akupÿm tãm axpên tâ war axâm kêt nê. Âm axtem nê mê kêp Kris kôt mê atô hkêt xwÿnhjê hwÿr amnhî to mra. Kwa mê â amnhî nhîpêx anhÿr kêt nê. Mê pahpê Kris kwÿjaja kot puj mê nhÿrmâ Kris nhîhkô hâ mê kêp hkwy hkêt xwÿnhjê tanhmâ mê harênh to.

³ Nê Tirtûm kapêr o mê wrÿk xwÿnhjaja kot puj mê määnên nhÿrmâ tanhmâ mê harênh to ho pahkrî. Jakamâ kwa mämri â mê pahte amnhî nhîpêx anhÿrja kukamâ akupÿm tanhmâ axpên xunhwÿr to ho apa. Mêmoj tâ mê atôjê hõ wa kot tanhmâ axpên to hâ wa omu nê tokyx akupÿm axpên tâ wa kâm akapêr kê wa tokyx akupÿm tãm axpên nhîpêx. Â mê kot axpên nhîpêx anhÿr o paja na kêt mex.

⁴ No na ka xep htem arî Kris kôt mê akwÿ hkêt xwÿnhjê hwÿr axpên to mra nê mê kâm amnhî jarê. Kwa mê ri â amnhî nhîpêx anhÿr kêt nê.

⁵ Mê tokyx tee ri ja hâ amnhî pumu nê amnhî kamâ apijaam kêt wehe. Xâ mê akamâ Kris kôt mê atôjê hõ pixire nê kot tãm akupÿm mê axunhwÿr kaxyw amrakati kumrêx?

⁶ Na ka xep htem mêmoj tâ axpu. Kris kôt mê atôjê hõ mê mêmoj tâ axpu nê ra mê kêp Kris kwÿ hkêt xwÿnhjê hwÿr amnhî to mra.

Kot tãm akupÿm mê unhwÿr xwÿnhjê hwÿr amnhî to mra.

⁷ Mê apijapu ho apa jakamâ na ka mê amnhî tomnuj tÿx nê. Hämri nê te mê apê Kris kwÿ hkêt xwÿnhjê pyrâ nê mê hwÿr amnhî to mra. Kwa kwâr Kris kôt anhîo mämri apê ahkî rÿ tanhmâ anhîpêx to. Ka mê âm amnhî tâ omu kê tapxipix tanhmâ amnhî tomnuj to.

⁸ Ja mex tâ mê ate â amnhî nhîpêx anhÿr kêt. Na ka htem axpên pê ahkî. Mê ate Kris kôt axpên to atô nê atôx tâ axtem nê â axpên nhîpêx anê. Te mê apijaam kêt pyrâk o amnhî nhîpêx o ri apa.

⁹⁻¹⁰ Mê kot tanhmâ amnhî tomnuj to xwÿnhjaja koja mê nhÿrmâ ma Tirtûm nhõ krî mex wÿr âpir kêt nê. Ra mê ate ja jarênh mar tÿx.

Mêmyjê hõ kot nhâm mênijê hõ ho amnhî kati xwÿnhjaja.

Nê mênijê hõ kot nhâm mêmyjê hõ ho amnhî kati xwÿnhjaja.

Nê mênijaja axtem nê mê kot amnhîo ho mjên o ri mê pa xwÿnhjaja.

Nê mêmyjaja haxwÿja axtem nê amnhîo ho hprô ho ri mê pa xwÿnhjaja.

Nê mê âhkînh o ri mê pa xwÿnhjaja.

Nê mê kâm nhâm mê hkukrêx kînh o kâm ho ô hprâm o ri mê pa xwÿnhjaja.

Nê ri mê pipânh o mê pa xwÿnhjaja.

Nê ri axpên to kapêr punuj o mê pa xwÿnhjaja.

Nê mê kot amnhî to sânti hwÿr o mê pa xwÿnhjaja.

Â mê kot amnhî nhîpêx anhÿr xwÿnhjê piitâ koja mê Tirtûm nhõ krî hwÿr âpir kêt nê.

¹¹ Kormâ mê ate Kris kôt amnhî xunhwÿr kêt ri na ka pre mê akwÿjaja â amnhî nhîpêx anhÿr o ri apa. Tâ amnhî kaxyw Jejus kôt ajamaxpêr nê hkôt amnhî xunhwÿ. Hämri nhûm Tirtûm Karô mê Pahihti Jejus Krisja wa mê anê mê ate amnhî tomnuj piitâ rênh pa nê mê apê Tirtûm kra hâ mê axunhwÿ nê amnhîm mê ate amnhî to mex xwÿnhjê â mê ajarê.

Mê pahte tãm amnhî nhîpêx o papa hâ mê pamâ karô

Matêwre 5.27; Rômân 12.1-2; Epes 5.3; Korosê 3.5; Wam Tesarôn 4.1-8

¹² Nê na ka hte mê akwÿjaja amnhî jarênh o:

—Nâ na pa hte pa inhâm tanhmâ amnhî nhîpêx to hprâm xâ hkôt amnhî krâ hkôt amnhî nhîpêx o ri ixpa. Anê.

Mê ate â amnhî jarênh anhÿr tâ no âm mê ate amnhî jarênhja mex kêt. Mêmoj piitâ mê pamâ mex kêt. Na pu htem pamâ hprâm xâ hkôt mêmoj to anê nê gaa nê ra ho amnhî pyrâ nê ho anhÿr pix o papa. Nê gaa nê kâm panhûrer kêt kumrêx. Jao ra pahpipânh pix o ri papa. Rÿ paxêx pix o ri papa. Rÿ

paxàhkĩnh pix o ri papa. Jakamā kēr pu mē pamā tanhmā amnhĩ nhĩpēx to hprām xà hkòt tanhmā amnhĩ nhĩpēx to ho papa hkēt nē. Ām amnhĩ mē amnhĩ kaxyw Jejus mā pajamaxpēr pix nē.

¹³ Nē na htem amnhĩ jarēnh o:

—Nà kot paj inhmā prām nē māmri mēmoj ku. Nē inhmā nhām mēhō kamā xipijaam kēt prām nē māmri ā amnhĩ nhĩpēx anē. Ja tanhmā inhmā kute hkēt. Anē.

Tā koja nhỹrmā Tirtūm mē panhija o hapēx pa. Na pre mē pahte nhām mē kamā pahpijaam kēt o papa kaxyw mē panhĩpēx kēt nē. Ām mē pahte mē panhĩpēx xwỹnh maatija mā tanhmā amnhĩ nhĩpēx mex to ho papa pix kaxyw na pre mē panhĩpēx.

¹⁴ Nē na pre Pahihtija ty nhūm Tirtūm akupỹm ho hĩr. Ja pyrā nē kot puj mē nhỹrmā mē pajaxwỹja ty nhūm akupỹm mē pahto mē pahĩr. Ja kaxyw tapxipix pix na àhpumunh tỹx o àhpumunh tỹx.

¹⁵ Na pu htem Kris kòt amnhĩ xunhwỹr kòt pahpē hkwy nē te pahpē ĩ pyrāk. Jakamā kwa mē ja hā anohĩtỹx nē axte nhām mē hkuprỹjē hwỹr amrar nē mē ho amnhĩkati hkēt nē. Tirtūm kēp ja omnuj. Te mē pahte Kris nhĩ pyrāk jakamā kot kaj mē ā amnhĩ nhĩpēx anhỹr jao te Kris tām kot ā amnhĩ nhĩpēx anhỹr o pa pyrāk. Kwa ja mex kēt. Xà kot we Krisja ā amnhĩ nhĩpēx anē? Nà koja ā amnhĩ nhĩpēx anhỹr kēt nē.

¹⁶ Tirtūm kapēr ā kagā htūm kot ja jarēnh kot:

Kot ka mē atō mēnijē hō ho aprō nhūm kēp aprō kumrēx. Hāmri nē te ra war atixi pyrāk o axpēn nhĩpēx. Anē.

Ā kot aprō mē wa ajarēnh anhỹr jakamā kwa kēr ka mē atỹx ri nhām mē hkuprỹjē hwỹr apa hkēt nē. Kot kaj mē ā amnhĩ nhĩpēx anē nē Tirtūm noo mā te ate aprō kuhpa hā hkuprỹta o aprō pyrāk. Te wam aprōta kuhpa hā war atixi pyrāk.

¹⁷ Na pu htem Pahihti Jejus Kris kòt amnhĩ xunhwỹr nhūm amnhĩ tā mē pahpumu nē mē pamā Karō gō nhūm mē pamā agjē. Pu mē ra Karōja kòt te ra Jejus mē wa pahtipxi nē ri papa pyrāk o axpēn nhĩpēx. Jao Kris jamaxpēr mē mē pajamaxpērja te wa kot axpēn pyrāk. Nē Kris kot amnhĩ nhĩpēx mē mē pahte amnhĩ nhĩpēxja te kot axpēn pyrāk.

¹⁸ Jakamā kwa kēr ka mē amnhĩ prō pix tãnopxar o ri apa. Nē mē anijaja amjēn pix tãnopxar o ri apa. No mē nhām mēmyjē ho amnhĩkati ho ri apa hkēt nē. Nē mē amyjaja nhām mēnijē ho amnhĩkati ho ri apa hkēt nē. Kot ka mē nhām mēmoj tanhmā omnuj kute ho anē no ām amnhĩ nhĩ homnu hkēt nē. Nom kot kaj mē nhām mēnijē ho amnhĩkati rỹ nhām mēmyjē ho amnhĩkati hāmri nē ra amnhĩ nhĩ homnu hpa.

¹⁹ Mē panhĩ kamā na hte Tirtūm Karō agjē nē kamā hkrĩ. Tirtūm na pre mē pahwỹr kurē nhūm mē pahkarō mā agjē pu mē te mē pahpē ōrkwỹ pyrāk. Jakamā na pu htem amnhĩ krā hkòt pahĩtỹx ri mēmoj tanhmā ho ho papa hkēt nē. Ām Tirtūm jamaxpēr xà hkòt pix mā na pu htem tanhmā mēmoj nhĩpēx to ho papa.

²⁰ Na pre ra Jejus mē pahte amnhĩ tonuj pānhā amnhĩr kaxyw mē pahpiitā mē panē ty. Te htyk o amnhĩm mē pajaprōr pyrāk o mē panhĩpēx. Jakamā kwa kēr pu mē ām hkòt pix mā mān ri amnhĩ nhĩpēx rāhā ho ri papa. Kē mē pahkwỹjaja ja hā mē pahpumunh kòt Tirtūm mā mex o mex ā harēnh o ri pa.

7

Mē mjēn mē mē hprō wa kot axpēn to mex ā mē pamā karō

Epes 5.22; Korosē 3.18; Eprēw 13.4

¹ Nē ota mē ate ixwỹr kagā nē mēnhta na pre ixwỹr pōj pa omu. Nē kamā mē ate mē aprō hā ixkuljēr xwỹnhta pa kamā harē nē omu. Tā kot paj mē amā tanhmā harēnh to ka mē inhma.

Nà kot ka mē amyjē hō amā aprō hkēt nē ahte ri apa hprām nē kam nē aprō hkēt apa. Ja tanhmā kute hkēt. Nom kēr ka mē hkuprỹjē ho presija ho ri apa hkēt nē.

² Na htem tōhā kām hprō hprām kēt nē ri pa nē gaa nē mē hkuprỹjē hō pumu rỹ mē kēp mē hprōjē hō pumu nē kamā hpijaam kēt o ri pa. Ja pymaj kēr ka mē amyjaja māmri aprō nē mē anijaja māmri amjēn.

³ Nē mē anijaja. Koja mē amjēn akamā hkurē ka mē māmri kām amnhĩ gō kē mē anĩ. Nē mē amyjaja määnēn. Koja mē aprō mē akamā hkurē ka mē māmri mē anĩ.

⁴ Ām ka amā tanhmā amnhĩ nhĩpēx to hprām xà hkòt pix mā amnhĩ nhĩpēx kēt nē. Määnēn amā aprō kot kām tanhmā amnhĩ nhĩpēx to hprām xà hkòt määnēn hkòt kām amnhĩ nhĩpēx.

⁵ Nē kot kaj mē mēmo arĩgro hā amā Tirtūm mā amnhĩ jarēnh ryy hprām japēr. Hāmri nē aprō mā:

—E kot puj jarāhā axpēn to amnhĩkati hkēt nē. Kot puj ām Tirtūm pix mā amnhĩ jarēnh o amỹkry. Anē.

Hāmri nē māmri ā amnhĩ nhĩpēx anē. No kwa kēr ka mē ām ja ho anhỹr o apkati pixi nē kām anhũre. Nhūm jāā ka mē amā axpēn to amnhĩkati hprām nē māmri tanhmā axpēn nhĩpēx to. No kot kaj mē ā amnhĩ nhĩpēx anhỹr kēt o hā atā apkati sohtō nē gaa nē ra akurē xāj axtem nē Satanasti jamaxpēr o ajamaxpēr. Jao nhām mēhō ni hwỹr mra nē aprō kuhpa hā kamā akurē ho kamā apijaam kēt. Rỹ nhūm mēnijaja nhām mēmyjē

hõ hwÿr mra nê mjên kuhpa hã kamã hkurê ho war axpên kamã hpjjaãm kêt.

⁶ E mē ate ja hã ixkukjêr jakamã na pa ã ixprî hã mē amã ja jarênh anê. Ka mē akwÿjaja amã aprõ hprãm nê mãmri aprõ nê ri apa. Nê mē akwÿjaja amã aprõ hprãm kêt nê mãmri aprõ hkêt nê ri apa. Nom kot pa paa mē amã mē aprõ hã ixãmnhênh kêt nê. Ka mē kam amnhî krã hkôt ajamaxpêr xã hkôt tanhmã amnhî nhîpêx to.

⁷ Na pa hte ixprõ hkêt nê ri ixpa nom inhmã ja mex pa hte ahte ixpa.

Mē mjên kêt nê mē hprõ kêt xwÿnhjê jarênh

Nê kormã mē aprõ hkêt xwÿnhjaja. Ka mē ixpyrà nê aprõ hkêt nê ri apa ronhÿx inhmã ja mex nê. Na hte mēmy hkwyjaja hprõ kêt nê ri pa nhũm Tirtũm ja hã mē omu nê tanhmã mē ho nhũm mē mex nê ri pa nê mēnijê kamã hkurê ho mē kamã hpjjaãm kêt o ri pa hkêt nê. No na hte mē hkwyjaja hprõ hkêt nê ri pa nê gaa nê ra hkurê xã mēnijê kamã hpjjaãm kêt. Æ mē ate amnhî nhîpêx anhÿr pymaj kër ka mē amã aprõ hprãm nê mãmri aprõ. Tirtũm mã ja mex kênã.

⁸ E mē aprõ hkêt nê mē amjên kêt xwÿnhjaja. Nê ra mē apê mē aprõ htyk rÿ mē amjên htyk xwÿnhjaja. Pa mē amã mēmoj jarê. Nã kot kaj mē ixpyrà nê mē aprõ hkêt nê ri apa rÿ mē amjên kêt nê ri apa nhũm ja inhmã mex nê.

⁹ No kot ka mē atõ ra akurê japêr nê mãmri aprõ rÿ mãmri amjên. Ja mãânênh tanhmã kute hkêt.

Mē pahte axpên kaga hkêt ã mē pamã karõ

Matêwre 5.31, 19.3-9; Makre 10.2

¹⁰ E kot paj hpãnhã ra mē ate axpên to amjên nê axpên to aprõ xwÿnhjê mã ixkapêr. Nom kot paj amnhî krã hkôt tanhmã ixkapêr to hkêt nê. Pahiiti Jesus Kris kapêr xã hkôt kot paj mē amã ixkapêr. Jakamã e kër ka mē anijaja mē amjên kaga hkêt nê.

¹¹ Nom kot kaj mē tanhmã ajamaxpêr to nê hkaga japêr hãmri nê ahte ri apa nê axte nhãm mēhõ ho amjên kêt nê. Rÿ tee ri amnhî kukamã ajamaxpêr nê mãmri akupÿm amjênta wÿr tê nê akupÿm hkôt ri apa. No kër ka mē axte nhãm mēhõ ho amjên kêt nê.

Nê ra mē amyjaja kër ka mē ajaxwÿja ã amnhî nhîpêx anê nê mē aprõ kaga hkêt nê. E kër ka mē ã amnhî nhîpêx anhÿr o ri apa.

¹² Nê mē ate ixwÿr kagã mēnh kamã axpên tã ixkukjêrta kot paj hpãnhã mē amã harê. Na Pahiiti Jesusja ja hã tanhmã inhmã nê hkêt nê. Æm amnhî krã hkôt kot paj mē amã tanhmã harênh to ka mē inhma.

Ka mē amyjê hõ ra Kris kôt amnhî xãm nom nhũm aprõ kormã hkôt amnhî xãm kêt

japêr. Nom koja kãm arî ri akõt pa hprãm ka hkaga hkêt nê. Kê arî ri akõt pa.

¹³ Nê mē anijaja. Ka mē ajaxwÿja ra apê Kris kwÿ hã ri apa nhũm amjên kêt hkwy hkêt tã arî ri akõt pa hprãm nê arî ri akõt pa ka hkaga hkêt nê.

¹⁴ Kêp Kris kwÿ hkêt tã koja akõt Kris kwÿjê hkôt ri pa. Rÿ mē aprõ kêt Kris kwÿ hkêt tã koja akõt Kris kwÿjê hkôt ri pa. Jao Tirtũm kapêr mar o pa nê gaa nê apyrã nê hkôt amnhî xãm japêr. Nê mē akra kêt Kris kwÿ hkêt xwÿnhjaja haxwÿja mē akõt Kris kwÿjê hkôt ri pa nê Tirtũm kapêr mar o pa nê gaa nê akõt Jesus kôt amnhî xunhwÿr japêr.

¹⁵ Nom koja aprõ kêt Kris kwÿ hkêt tã kãm akaga hprãm nê ri tãm mãmri akaga. Rÿ amjên kêt Kris kwÿ hkêt ã kãm akaga hprãm nê ri tãm mãmri akaga. Kêr ka mē kot akaga nê tee ri kãm tanhmã akapêr to hkêt nê. Kwãr mãmri akaga ka ahte ajamakêtkati nê axãmnhix ri apa. Mē pajamakêtkati nê mē paxem nê ri papaja na Tirtũm kãm hprãm.

¹⁶ No koja amjên kêt Kris kwÿ hkêt tã kãm mē akaga hprãm kêt nê ka mē hkaga hkêt nê. Rÿ aprõ kêt Kris kwÿ hkêt tã ka mē kam hkaga hkêt nê. Koja arî ate amnhî nhîpêx ã apumunh o ri akõt pa nê gaa nê ri apyrã nê Kris kôt amnhî xãm japêr.

¹⁷ Jakamã kot ka mē aprõ rÿ amjên ra Kris kôt ahte amnhî xãm. Hãmri nê wa arî ri axpên kôt ri apa ho apa. Na pa hte krî piitã hkôt Jesus kôt mē pahkwÿjê mã ã ixujarênh anhÿr o ri ixpa. Tã kër ka mē ã amnhî nhîpêx anhÿr o ri apa.

Kris kôt amnhî xunhwÿr kêt ri tanhmã mē pakute hã mē pajarênh

¹⁸ Ja pyrà nê kot kaj mē ra amy kwrÿt kã jakãr japêr. Tã ra Kris kôt amnhî xãm nê arî arãhã ri apa. Rÿ amnhî jakãr kêt rãhã hkôt amnhî xãm japêr nê arî arãhã ri apa. Mo kaxyw kot ka kêt amnhî jakã?

¹⁹ Tirtũm na hte mē pahte amnhî my kwrÿt kã jakãr ã mē pahpumunh kôt tanhmã mē pajarênh to hkêt nê. Rÿ mē pahte amnhî jakãr kêt ã mē pahpumunh kôt mãânênh tanhmã mē pajarênh to hkêt nê. Æm mē pahte hkôt amnhî nhîpêx pix ã mē pahpumunh kôt na hte tanhmã mē pajarênh to.

²⁰ Jakamã kër pu mē pahte Kris kôt amnhî xunhwÿr kêt ri tanhmã mē pakuteja arî rãhã ri papa.

²¹ Ka mē akwÿjaja ate nhãm mē kãm mē axapênh o apa htã Jesus kôt amnhî xunhwÿ. Tã kër ka mē mãmri mē kãm axapênh o ri apa. Nom koja anhõ patrãwja amnhî nê mē ajano ka mē mãmri ma mra nê amnhî mã tanhmã axapênh to ho ri apa.

²² Nê koja mēhõ Kris kôt amnhî xãm. Tanhmãn kêt mē õ patrãw rÿ kot mē kãm mē apênh xwÿnhjê hõ. Tã Kris kôt amnhî

xām hāmri nē arī amnhī nhīpēx tūm kōt ri amnhī nhīpēx o pa hkēt nē. Ra Kris kōt amnhī nhīpēx nyw o amnhī nhīpēx o pa. Jao ra tanhmā amnhī tomnuj to hkēt nē. Te kot ō patrāw punuj kaga nē hpānhā ō patrāw mex kapēr kōt amnhī nhīpēx pix o pa pyrāk.

²³ Na pre Jejus mē pahte amnhī tomnuj piitā hpānhā amnhīrer kaxyw mē panē ty. Te htyk o kot amnhīm mē pajaprōr pyrāk o mē panhīpēx. Jakamā kwa kēr ka mē jar mē anhō patrāw kōt pix mā amnhī nhīpēx o ri apa hkēt nē. Mē māānēn Tirtūm kapēr kōt amnhī nhīpēx o ri apa.

²⁴ Jakamā kēr pu mē pahte Kris kōt amnhī xunhwyr̄r kēt ri tanhmā mē pakuteta pu mē arī rāhā ri hā papa.

Ra mē pahte amnhī jakā r̄y mē pahte amnhī jakār kēt.

R̄y ra mē pahte nhām mēhō mā paxāpēnh o papa r̄y amnhī mā paxāpēnh o papa.

R̄y ra mē pahprō nē ri papa r̄y mē pahprō hkēt nē ri papa.

Pu mē pahte Kris kōt amnhī xunhwyr̄r kēt ri tanhmā mē pakuteta ām arī rāhā hā ri papa. Jao Tirtūm kām hprām xā kōt pix mā amnhī nhīpēx o ri apa.

*Mē hprō nē mē mjēn kēt xw̄ynhjē jarēnh
Matēwre 19.10-12*

²⁵ Nē mē ate ixwyr̄r kaga mēnhta kamā na ka mē māānēn kormā mē hprō hkēt xw̄ynhjē hā ixkukja. Tā kot paj mē amā tanhmā mē harēnh to. Nom Pahihti Jejus Kris na pre ja hā tanhmā inhmā nē hkēt nē. Ām pa kot paj ām amnhī krā hkōt tanhmā hā mē amā ixkapēr to. Na pre Pahihti mē akaxyw tanhmā ixkrā hto pa hte ŷ hā tanhmā mē amā mēmoj tā karō hto ho ri ixpa. Jakamā e mē inhma nē inhmar t̄yx nē.

²⁶⁻²⁷ Nā ra mē kām mē pahkurē xw̄ynhjaja Kris ā mē pahptomnuj o pa jakamā koja ixpyrā nē mē hprō hkēt rāhā mē pa xw̄ynhjaja ahte ri pa nhūm ja mex nē. Nhūm mē umaj amnhī pix tānopxar o ri pa. Nē mē aprō xw̄ynhjaja kēr ka mē kām mē pahkurē xw̄ynhjē pymaj mē aprō kaga hkēt nē. Ām pix tānopxar o ri apa.

²⁸ Tā kot ka mē atō amā aprō hprām nē māmri aprō. Ja māānēn tanhmā ixpē kute hkēt. Nē mē anijaja mē amā amjēn prām nē māmri amjēn. Ja tanhmā ixpē kute hkēt. Nom kot ka mē akw̄jyē pyrā nē aprō r̄y amjēn. Nē gaa nē akra. Hāmri nē tanhmā mēmoj kute kamā ka tee ri wa mē amnhī kukamā ri ajamaxpēr o ri apa. Ja pymaj na pa hte mē amjēn kēt nē mē aprō hkēt ā mē amā awjarē.

²⁹ Nē Kris tokyx akup̄yn mē pahwyr̄r wryk kaxyw jakamā kwa ra mē aprō nē apa xw̄ynhjaja. Kēr ka mē amnhī prō nē amnhī kra pix kukamā ajamaxpēr o ri apa hkēt nē. Te ho mē hprō hkēt nē mē pa xw̄ynhjaja kot

amnhī nhīpēx pyrā nē Kris kutēp kumrēx mā ajamaxpēr pē tanhmā amnhī nhīpēx to ho apa nē arī kormā aprō nē akrajē ho hapu nē tanhmā mē kutā anojarēt to ho apa.

³⁰ Kris kot tokyx akup̄yn mē pahwyr̄r wryk jakamā kwa mē ri amyr̄ o ri mē apa xw̄ynhjaja. Kēr ka mē kutēp tee ri amnhī kaprī pix mā ajamaxpēr o akaprī nē ri apa hkēt nē. Nē mē akīnh nē ri apikunhar o ri mē apa xw̄ynhjaja kēr ka mē Kris kutēp amnhī kīnh xā pix mā ajamaxpēr o ri apa hkēt nē. Nē ri mē axujaprōr o ri mē apa xw̄ynhjaja kēr ka mē Kris kutēp tanhmā axujaprōr to pix kukamā ri ajamaxpēr kēt nē.

³¹ Nē mē apē mē ate mēmoj to wēnē ho ri mē apa xw̄ynhjaja Kris kutēp ām ri mē akukrēx pix kukamā ajamaxpēr kēt nē. Koja mē panhō pika piitā hkōt mē pakukrēxja nē mēmoj piitā arī rāhā hkēt nē.

³² Jakamā kot kaj mē akukrēx pix kukamā ajamaxpēr nē amnhī pix kukamā ajamaxpēr nhūm ja apē omnuj nē. Kris kw̄y pē mē hprō hkēt xw̄ynhjaja na htem Pahihti Jejus Kris kām hprām xā hkōt pix mā kām tanhmā amnhī nhīpēx to ho ri pa hprām. Jao ām pix kutā tanhmā nojarēt to rāhā ho ri pa.

³³ No kēt ra mē hprō nē mē pa xw̄ynhjaja na htem hprō pix kukamā kām tanhmā amnhī nhīpēx to ho pa hprām. Jao pix kukamā amnhī nhīpēx o pa.

³⁴ Mē kām Tirtūm kapēr kōt amnhī nhīpēx prām tā no ām māānēn kām hprō kapēr mar nē hkōt kām tanhmā amnhī nhīpēx to ho ri pa hprām.

Nē mēnijaja kot Jejus kōt amnhī nhīpēx nē kormā mē mjēn kēt xw̄ynhjaja na htem kām Pahihti Jejus kām hprām xā hkōt pix mā kām tanhmā amnhī nhīpēx to ho pa hprām. Nē ām pix mā hamaxpēr o pa. Nē ām hkōt pix mā amnhī nhīpēx o pa. No ra mē mjēn nē mē pa xw̄ynhjaja na htem arī ri mē hikukrēx tānopxar o pa. Nē mjēn mā hprām xā hkōt tanhmā kām amnhī nhīpēx to ho pa. Jakamā tanhmā kot wem amnhī to nē Jejus kām prām xā hkōt pix mā amnhī nhīpēx o pa?

³⁵ E ixte mē ato ajuta kaxyw na pa ā mē amā ixkapēr anē. Jakamā na pa mē ate mēhō ho aprō nē mē akurē hkēt nē. Ām mē ate Tirtūm kapēr kōt pix mā amnhī nhīpēx o apa hā na pa mē amā karō. Mē ate kumā pix mā ajamaxpēr o ri apa pix kaxyw. Nē kumā pix mā tanhmā ri amnhī nhīpēx to ho apa kaxyw na pa mē amā tanhmā mēmoj tā karō hto.

Mē kot mē hprō mā xw̄ynhjē jarēnh

³⁶ E kot paj hpānhā mē ate mēhō ho aprō mā xw̄ynhjē mā ixkapēr ka mē ixkapēr ma. Nā kot kaj mē atō ate ho aprō mā xw̄ynhta kukamā ajamaxpēr o:

—Nà kot paj ho ixprô hkêt nê. Inhmã hkînh týx tâ kot paj ho ixprô hkêt nê. Kot paj âm ixprô hkêt nê ahte ri ixpa. Anê.

Hâmri nê ahte ri apa. Tã ra tee amnhî kurê kamã ama nê ajamaxpêr o:

—Hêxta waa nê. Mon pa pre ho ixprô hkêt nê ahte ri ixpa? Anê.

Hâmri nê mãmri ma hwÿr tê nê kãm amnhî jarê nê ho aprô. Ra ate aprô hkêt nê ahte ri apa hã amnhî jarênh tâ no âm mãmri ho aprô. Ja tanhmã kute hkêt kênã.

³⁷ Nom kot kaj ho aprô hkêt ã amnhî jarê nê määnên akurê hkêt nê ri apa. Hâmri nê mãmri ho aprô hkêt nê ri ahte ri apa. Ja määnên tanhmã kute hkêt.

³⁸ Kot ka ho aprô nê war amex nê apa. Rÿ kot ka ho aprô kêt nê määnên amex kumrêx nê ri apa. Ja na mex o ate mêhõ ho aprô nê ho apata jakrenh.

Mê kêp mê mjên tyk xwÿnhjê jarênh

³⁹ E kot paj hpãnhã mê apê mê amjên tyk xwÿnhjê mã ixkapêr. Nã koja amjên arî htîr ri ka âm hkôt pix mã axkamê nê hkaga hkêt nê. No koja nhÿrmã apê ty hãmri ka tee ri amnhî kukamã ajamaxpêr hãmri nê amã axte amjên prãm nê mãmri axte amjên. Nom kwa kêr ka mê amnhî pyrã nê Kris kôt akwÿjê hõ pix o amjên. No mamri nhãm mêhõ ho amjên kêt nê.

⁴⁰ No kot ka mê axte amjên kêt nê ahte ri apa hãmri nê axãmnhîx ri ajamakêtkati nê apa. Na na pa âm amnhî krã hkôt mê amã ã ja jarênh anê. Mãn Tirtûm Karõ mã määnên ja mex nê.

8

Sãnti hã mê apkur xã jarênh

Rõmãn 14.13-23; Wam Korîit 10.14-22, 13.2; Karatas 5.13; Wam Pêtre 4.8; Wam Juãw 3.18

¹ Nê mê ate ixwÿr kagã mênhta kamã na ka prem määnên sãnti hã mê apkur xã hã ixkukja. Tã kot paj mê amã tanhmã ja jarênh to ka mê inhma.

Nã na hte Kris kôt pahkwÿ hkêt xwÿnhjaja mêmo karõ ho sãnti nhîpêx mã mêõ hkwy nhîpêx nê hwÿr o mra. Hãmri nê hpar pê haxwÿ nê kutã hkõn krã ho rôrõk nê hkrî nê kãm mex o mex ã harê nê kãm amnhî jagrer pê amnhî to kuwÿ. Hãmri nê kãm amnhî jagrer pa nê akupÿm amnhîm mêõta jamÿ nê ma o mra nê hkwyjê mã ho wênê. Na htem ã amnhî nhîpêx anhÿr o pa. Tã na ka prem kagãta kamã mê ate mê kêp mêõ japrôr nê hkur ã ixkukja. Nã ra mê ate sãnti pumunh mex. Âm mê kot îhkra pix o hipêx ã omunh mex jakamã na pu htem hã pamã mê apkur xãta hkur prãm nê mãmri paxãmnhîx ri kuku. Ja tanhmã Tirtûm pê kute hkêt. Ra mê pahte ja pumunh mex. Tã nom kwa kêr pu mê ja hã Kris kôt mê pahkwÿjê mã amnhî to

jarkrar o ri papa hkêt nê. Nê ja hã mê kurom paxãhpumunh týx ã mê kãm amnhî to jarkrar hkêt nê. Kot pu mê ã amnhî nhîpêx anhÿr o mê hamaxpêr o hihtýx hkêt nê. Kêr pu mê âm mê kamã paxukapri pê tanhmã mê ho mex to ho papa. Nê Kris kôt mê hamaxpêr o hihtýx o papa. Æ mê pa hte amnhî nhîpêxja na Tirtûm kãm hprãm.

² No koja mêhõ mêmoj pumunh týx ã amnhî to jarkrar o ri pa nê âm tee ri ã amnhî jarênh anhÿr kaprÿ.

³ No koja mêhõ ãhpumunh týx kêt tâ kãm Tirtûm kînh nhùm amnhî tâ omu nê kãm hapê nê ho hkra. Kêt ja na mex o mex.

⁴ E kot paj ixpri hã mê amã tanhmã sãnti hã mê apkur xãta jarênh to ka mê inhma. Nã Mêpahpãmja pixii. Axtem hõ hkêt. Nom mê kot sãnti nhîpêxta âm mê kot îhkra o hipêx jakamã htîr kêt. Ra mê pahte ja jarênh mar týx nê omunh mex.

⁵ Na htem ohtõ nê ri sãnti kêp Mêpahpãm ã hkãmnhîx o pa. Kaxkwa kamã mêmo karõ nhîpêxja nê pika kamã mêmo karõ nhîpêxja nhùm htem kêp Mêpahpãm ã harênh ho pa. Nom ja kot anhÿr kêt.

⁶ Mêpahpãmja âm pixi ho pixi mex. Mê panhõ Tirtûmja. Tãm na pre mêmoj piitã ho kator pa. Jakamã na pu htem kapêr kôt pix mã amnhî nhîpêx o ri papa.

Nê mê panhõ Pahihti haxwÿja pixii. Pahihti Jejus Krisja. Na pre Tirtûm nhîhkõ hã mêmoj piitã ho kator pa. Na pu htem ja hã omunh xã hkôt ri pamex nê ri papa. Ra mê pahte ja jarênh mar týx nê omunh mex. Jakamã na pu htem paxãmnhîx ri mêmoj piitã hkur o papa. Tirtûm kot mêmoj piitã ho kator par kênã.

⁷ Tã no âm ham mê kot Kris kôt amnhî xunhwÿr xwÿnhjaja na htem mê pahkînhã kãm sãnti hã mê apkur xã hkur puma nê. Ham mê kot sãnti kaga nê amnhîx kaxyw Kris kôt amnhî xunhwÿr jakamã kormã Tirtûm kôt amnhî nhîpêx tohtuj anê. Jakamã na htem tee ri sãnti hã mê apkur xãja pumu nê hamaxpêr o:

—Nã kot paj ja kur kêt nê. Kot paj anê nhùm apu Tirtûmja pê ja omnuj nê. Anê.

⁸ Nom na kêt hte Tirtûm mê paxãpkur xã hã mê pahpumunh kôt mê pahte amnhî to mex xwÿnh ã mê pajarênh kêt nê. Kot puj mê mêmoj ku rÿ mêmoj kur kêt nê nhùm ja hã mê pahpumunh kôt tanhmã mê pamex ã pajarênh to hkêt nê. Jakamã na pu htem mãmri paxãmnhîx ri mêmoj nê mê apkur xã hkur o papa nê tanhmã amnhî to hkêt nê.

⁹⁻¹⁰ Nom kwa mê okora. Kêr ka mê sãnti mã amnhî jarênh xã hã ixkre hwÿr agjê nê kamã axãpkur hkêt nê. Kot kaj mê atõ ã amnhî nhîpêx anê nhùm mêhõ kormã kot Kris kôt amnhî xãm tohtuj anhÿr xwÿnhja ja hã mê apumu nê tee ri hamaxpêr. Axãhpumunh týx ã ate amnhî jarênh tâ sãnti

nhörkwý kamä axäpku o nhý nhüm ja hä apumu nê tanhmä amnhî nhîpêx to wehe? Koja ja kêp omnuj tâ apyrä nê tē nê axà nê mē kutä apku. Hämri nê apkur pa nê tee ri amnhî kukamä hamaxpêr o:

—Hêxta waa nê. Kwa mon pa axtem nê ri ä mëmoja kur anê? Nà na pa anê nê ra amnhî tomnuj tÿx nê. Anê.

Hämri nê hkaprî nê pa.

¹¹ Ate axähpumunh tÿx ä amnhî jarênh tâ amnhî kôt atôja mex kukamä ajamaxpêr kêt nê. Kris ra mÿrapê htyk tâ nhüm ä ate sânti hä mëo hkur ä apumu nê tee ri hamaxpêr o Jejus hkôt amnhî nhîpêx mex kêt nê.

¹² Kormä kot Kris kôt amnhî xäm tÿx kêt tâ tee ri ja hä më apumu nê hamaxpêr mex kêt nê. Jakamä ka Kris noo mä amnhî tomnuj nê.

¹³ Tâ ä ixte Kris kôt ixkwýjê nhîpêx anhÿr pymaj koja ixtôjê hō kām mëmoj kur pyma nê. Nê htÿx ho Tirtüm kêp omnuj ä hkamnhîx. Pa ja hä omu nê ijaxwýja axte hkur kêt nê. Ixte mex ä omunh tâ no äm kot tee ri ja hä ixpumunh nê hamaxpêr o:

—Kwa Tirtüm kêp ja mex kêt tâ nhüm Pawreja ri kuku. Jakamä kot paj ijaxwýja uräk nê kuku. Omnuj täa.

Anhÿr o hamaxpêr pymaj kot paj uräk nê mëmota kur kêt nê. Na pa hte ä Kris kôt ixtôjê mex kukamä ri ijamaxpêr anhÿr o ixpa.

9

Pawre kot amari Tirtüm kapêr o më ahkre hä amnhî jarênh

Atre 9.1-18, 20.33-35; Sikün Korit 11.7-9

¹ Nê ixte Jejus nhÿ hä më ahkre ho më pa xwýnhjê hō jakamä na pa hte Tirtüm kapêr o më ajahkre ho ri ixpa. Na pa pre inhno ho më panhō Pahihti Jejus pumu nê më amä harênh o ri më akôt ixpa ka prem inhma nê hkôt amnhî xunhwý.

² Më hkwýjaja kot axpên mä ixpê Jejus nhÿ hä më ahkre xwýnh kêt ä ijarênh tâ më kajaja më ate ja hä ixpumunh mex. Ixte më amä më ujarênh mexja jarênh nhüm më ate mar nê hkôt amnhî xunhwýrja kukwak ri na ka më apê Jejus kwýy.

³ Jakamä koja më atä ixto kapêr japêr kot paj ä më kām më ajarênh anê.

⁴ Nê ixte Jejus nhÿ hä kapêr jahkre o ixpa xwýnh jakamä kot paj inhmä Kris kwýjê kutä amari ixäpku präm nê mämri më kutä apku. Ja tanhmä kute hkêt tâ kot paj ä amnhî nhîpêx anhÿr kêt nê. Kot paj ixäpku kaxyw nê amnhî pānhä amnhîre nê rî korrmä apku. Na pa hte ä amnhî nhîpêx anhÿr o ri më akôt ixpa.

⁵ Rÿ kot pa ixkwýjê pyrā nê inhmä Kris kôt ixkwýjê hō ho ixprō hpräm nê mämri ho ixprō. Nê wa ma krî piitā hkôt Kris

kwýjê kukwak ri ixäpku o ixpa hpräm nê wa mämri ä amnhî nhîpêx anhÿr o ixpa. Ja mex kēnā. Na hte ä Simāw Pêtre më Jejus tō kot hapujaja amnhî nhîpêx anhÿr o pa nhüm ja tanhmä kêp kute hkêt. No äm më hkīnhā ixprō hkêt na pa hte ri ixpa.

⁶ Nê ixkwýjaja na htem apkur xā hpānhā äpênh o pa hkêt nê. Na htem Jejus nhÿ hä kapêr jarênh o ri pa nhüm hte Jejus kwýjaja më kām më apkur xā gō nhüm më amari hkur o pa. Tā no pa na pa hte Panāpe më wa ä amnhî nhîpêx anhÿr kêt nê. Na pa hte wa mry kā ho ixkre nhîpêx nê më kām ho wēnē nê hpānhā amnhîm awjaprō. Na pa hte wa ä amnhî pa kukwak ri ixujaprōr nê ho ixäpku o ri ixpa anê.

⁷ Më kām pur kām harōj jamÿnh o më pa xwýnhjaja na htem amari hkwy jamÿ nê ho apkur o pa. Nê motre jamār o më pa xwýnhjaja haxwýja amari hkā kagō janē nê ho hkōm o pa. Nê pôristijaja na hte më õ pahija më äpênh pānhā më kām amnhîre o pa. Jajē piitā na htem më äpênh pānhā më kām amnhîre o pa. Ja pyrā nê te ixpê më amä ixäpênh o ixpa xwýnh pyrāk jakamä ixte më ajahkreta pānhā kot ka më inhmä inhō ho apa nhüm ja määnēn mex nê.

⁸ No äm paxpîx na pa hte ja mex ä harênh kêt nê. Tirtüm kapêr ä kagā htüm haxwýja kot ja mex ä harênh.

⁹ Kamä na pre finat Mojesja Tirtüm nhÿ hä harênh kot:

Koja akrit amä äpênh o pa ka omu nê ho mex nê. Kām õ mex nê.

Anhÿr o kot harênh. Xā na pre Tirtümja äm më pahkrit pix kukamä ukaprî nê ä harênh anê nā? Nā kot anhÿr kêt.

¹⁰ Määnēn më pahpê panhî kaxyw na pre ä ja jarênh anê. Më pahte më hpur kām paxähkre xwýnhjaja nê më pahte kamä paxujamÿnh o papa xwýnhjaja. Jajē kaxyw më pahte pur kukwak ri amari paxäpku o ri papa kaxyw ä pre ä ja jarênh anê.

¹¹ Tā ja pyrā nê na pa hte më awÿr mō nê më amä Tirtüm kapêr jarênh o ri më akôt ixpa. Nê më akôt ho më ajahkre ho ri ixpa ka htem inhmä ixäpênhä pānhā amnhîre kêt nê. Ixkwýjaja kot Tirtüm kapêr o më ajahkre hpānhā më ate më kām amnhîre tâ pa inhmä amnhîre kêt nê. Na pa pre më ajahkreta pānhā mëmoj tâ më awÿr kêt nê. Äm nhām ixäpênh õta kukwak ri na pa hte ixäpku o ri ixpa.

¹² Nê na hte më ixkwýjaja më awÿr mra nê Tirtüm kapêr o më ajahkre o ri më akôt pa. Hämri nê hpānhā më apkur xā hä më awÿ ka më kām mëmoj gō. No kêt na pa hte më uräk nê ixäpku xā hä më awÿr kêt nê. Kot pa apu hä më awÿ ka më tanhmä ixto akapêr to nê axpên mä ijarênh o:

—Pêr äm më pahte kām amnhîre pix kaxyw na hte Pawre më pahwÿr mra nê më

pamã Jejus Kris kot tanhmã më panê amnhî nhîpêx to hã harênh o pa. Pêr âm apkur xà pix prãm xàj ã kot më pamã ujarênh anhÿr o pa. Jakamã kot puj më kuma nê âm kuma.

Anhÿr o axpên mã ijarênh pymaj na pa hte më ajahkre hpãnhã mëmoj tâ më awÿr kêt nê. Na pa hte âm mrykã ho ixkre nhîpêx nê ho wênê nê ja pix kukwak ri ixãpkur o ri ixpa. Nê amarî ri më ajahkre ho ri më akôt ixpa.

¹³ Nê Tirtûm mã amnhî jarênh xà hã ixkre kamã më âpênh xwÿnhjaja na htem hwÿr më mrrar xwÿnhjaja më âpênh pãnhã më kãm amnhîre. Nê më kot më kãm Tirtûm mã mëmoj nhôr o kuhê xwÿnhjaja na htem mãânên më âpênh pãnhã më kãm amnhîre.

¹⁴ Nê Pahihti Krisja na pre ja hã më pakukamã pahatã karô kot:

—Kêr ka më kot tanhmã më amã ijarênh to ho ri më pa xwÿnhjê mã amnhîrer o ri apa. Anê.

¹⁵ Tã no na pa hte aa mëmoj tâ ixãhwÿr kêt nê. Nê më ate inhmã amnhîrer kaxyw pa më amã ja jarênh kêt nê. Aa ixte mëmoj tâ më awÿr kêt. Kot paj apu anê nê ixpjaam nê. Rÿ kot pa apu anê nê më akukwak ri ixãpkur o ri ixpa hãmri nhûm më akwÿjaja ja hã ixpumu nê hã ijarênh o:

—Tk. Na hte amarî më pajahkre o ri pa hkêt nê. Âm më apkur xà pix prãm xàj na hte ã më pajahkre ho pa anê. Anê.

Jakamã na pa hte mëmoj tâ më awÿr kêt nê.

¹⁶ Ixte më amã më ujarênh mexja jarênh o ri ixpa htã na pa hte ja hã amnhî to jarkrar o ri ixpa hkêt nê. Pahihti Jejus na pre ja hã inhmã karô pa hte kãm ho anhÿr o ri ixpa. Kot paj kãm ho anhÿr kêt nê ixpunuj nê ri ixpa.

¹⁷ Kêp âm amnhî krã hkôt mân tanhmã më amã ixujarênh to ho më akôt ri ixpa ronhÿx pa hpãnhã ixãmnhîx kãxpore hã më awÿ. No âm ã ixte amnhî nhîpêx anhÿr kêt. Tirtûm tâm kot inhmã ja hã karô jakamã na pa hte amarî ixãmnhîx ri më amã kapêr jarênh o më ajahkre ho ri më akôt ixpa nê mëmoj tâ ixãhwÿr o ri ixpa hkêt nê.

¹⁸ Ixte amarî ri më amã më ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhî nhîpêx anhÿr o ri ixpa nhûm ja inhmã mex pa ixkînh nê ri ixpa. Jakamã na pa hte hpãnhã ixãhwÿr kêt nê. Nê inhmã mëmoj prãm o ri ixpa hkêt nê.

¹⁹ Nê nhãm më kãm tanhmã ixãpênh to ho ixpa hkêt tâ pa hte më piitã tanhmã më kãm amnhî nhîpêx to ho ri ixpa. Pê më kãm Jejus kapêr jarênh o ri ixpa. Jakamã na më ra ohtô nê ixujarênh ma nê amnhî kaxyw Jejus kôt hamaxpêr nê hkôt amnhî xunhwÿ.

Pawre kot tãm më piitã më hipêx o pa hã amnhî jarênh

Wam Korîit 10.33

²⁰ Nê na pa hte Ijaewjê hwÿr ixpa nê më kot amnhî nhîpêx kôt amnhî nhîpêx o ri më hkôt ixpa. Ixte më kurom Tirtûm kot finat Mojes mã mëmoj tâ karô hkôt amnhî nhîpêx o ixpa hkêt tâ më hkôt ri ixpa nê më urak nê hkôt amnhî nhîpêx o ri ixpa. Mê kot ja hã ixpumunh nê ixte më kãm Jejus jarênh mar nê ixpyrà nê amnhî kaxyw hkôt hamaxpêr kaxyw.

²¹ Tã pa hpãnhã më kêp Ijaew kêt xwÿnhjê hwÿr ixpa nê më kot amnhî nhîpêx kôt amnhî nhîpêx o ri më hkôt ixpa. Mê kot ja hã ixpumunh nê ixkapêr mar nê ixpyrà nê amnhî kaxyw Jejus kôt hamaxpêr kaxyw. Tirtûm më Kris wa hamaxpêr xà hkôt na pa hte ahpÿnhã më kot amnhî nhîpêx xwÿnhjê hwÿr mra nê ã amnhî nhîpêx anhÿr o ri më hkôt ixpa.

²² Nê na pa hte kormã më kot Kris kôt amnhî xunhwÿr tohtuj anhÿr xwÿnhjê hkôt ri ixpa nê te ixte ho më urak nê kormã hkôt amnhî xãm nyw pyrãk o amnhî nhîpêx o ri më hkôt ixpa. Mê kot ja hã ixpumunh nê ixkapêr mar nê hkôt amnhî nhîpêx mex kaxyw. Æ na pa hte më piitã më hkôt ri ixpa nê më hkôt amnhî nhîpêx o ri ixpa anê. Mê kot ja hã ixpumunh nê inhmã nê ixpyrà nê Kris kôt amnhî nhîpêx tÿx kaxyw.

²³ Mê kot më ujarênh mex mar kaxyw na pa hte më piitã më hkôt ã amnhî nhîpêx anhÿr o ri ixpa. Tirtûm kot më ho hkra nê më ho mex kaxyw. Nê mãânên pa kot më hã ixto mex kaxyw.

Pawre kot htÿx ri amnhî nhîpêx kêt ã kot amnhî jarênh

Sikûn Ximotre 4.7; Eprêw 12.1-3

²⁴ Mê hprôt xwÿnhjaja na htem hprôt tÿx no nhûm mëhõ pixi nê wam hkwyjê re nê wam tèn pøj nhûm htem ja hã omu nê kãm më hkînhxã gô. Ja pyrà nê kêr ka më apiitã tãm amnhî nhîpêx mex rãhã ho ri apa kê Tirtûm më apumu nê nhÿrmã ja pãnhã më amã mëmoj mex gô.

²⁵ Nê më hprôt xwÿnhjaja na htem më hkînhxã hpyr prãm xàj më hprôt xà hã arigro hwÿr apkati më hprôt o kuhê. Prôt tÿx prãm xàj. Tã më hprôt xà hã arigrota ã nhûm hkwyjê pê amnhî to wa nê amnhîm hkînhxã py. Nom koja hkînhxãja krittêpãm kãm mex ry hkêt nê. Kojã gaa nê hapêx tokyx anê. Tã nom kot puj më Tirtûm kapêr kôt amnhî nhîpêx mex o ri papa. Nê më hprôt xwÿnhjê kot hkînhxã hpyr prãm xàj apkati më hprôt o kuhêta pyrà nê apkati më hkôt amnhî nhîpêx mex o ri papa. Hãmri nhûm amnhî tâ më pahpumu nê nhÿrmã më pamã hkînhxã mex ô gô. No âm jar hkînhxã kurom koja aa

mê pahpê hapêx kêt nê. Koja mê pamã mex rãhã ho rãhã.

²⁶ Nê na hte mê hprôt xwýnhjaja htýx ri tanhmã hprôt to ho pa hkêt nê. Na htem hkwyjê pê amnhî to wa kaxyw hprôt nê nhýri mê àhuk xata pix pumunh pê hwýr hprôt nê mra hãmri nê kamã ahtwý. Nê kamã àhuk pix kukamã hamaxpêr o hprôt týt nê mra. Ja pyrà nê na pa hte apkati mê Tirtúm kôt pix mã amnhî nhîpêx o ri ixpa. Nhýrmã kôt inhmã mêmoj mex nhôr kaxyw.

Nê mê pijapu mex xwýnhjaja na htem htýx ri nhýhýnh axpên tak kêt nê. Na htem nhýhýnh kot mê htak o mê rênh xã pix kamã mê htak o mê rênh kukamã hamaxpêr pê kamã mê htak. Ja pyrà nê na pa hte ixtýt ri tanhmã amnhî nhîpêx to ho ri ixpa hkêt nê. Na pa hte Tirtúm mã ijamaxpêr pê tanhmã amnhî nhîpêx to rãhã ho ixpa. Kôt nhýrmã inhmã mêmoj mex nhôr kaxyw.

²⁷ No na pa hte ixtýt ri amnhî jamaxpêr xã hkôt tanhmã amnhî nhîpêx to ho ri ixpa hkêt nê. Kot pa ã amnhî nhîpêx anê nê ixte mê kãm Jejus kapêr jarênh o ri ixpa htã ãm ri ixtýt ri ã amnhî nhîpêx anhýr kaprý nhúm Tirtúmja tee ri ja hã ixpumu nê inhmã mêmoj mex nhôr kêt nê.

10

Ijaew kot amnhî nhîpêx

Rômãn 15.4; Eprêw 3.8-11; Jutre 5

¹ E Kris kôt ixkwýjaja. Kot paj mê amã amnepê mã mê ixpê Ijaew hkukamã mê inhîgêjtaja tanhmã mê harênh to ka mê inhma. Mê kot pahî finat Mojes kôt ri mê pa xwýnhjaja kot paj mê amã harê. Mê pahte mê urák nê pahtýt ri amnhî nhîpêx pymaj kot paj mê amã tanhmã mê harênh to ka mê inhma. Mãn ka mê arî mê harênh ã anohtýt japêr. Na prem piitã pika pê Ejit kamã pa htã kurúm kator pa. Hãmri nê ma kapôt ã kakrã pumunh o hkôt pa ho pa. Pry hkêt jakamã nhúm pre Tirtúm tanhmã kakrã hto nhúm ma mê hkukamã pa nhúm mê omu nê hkôt pa. Hãmri nê ra gó xujanãr mê kot kãm: “Gó kamrêk” anhýr xwýnhja wýr pój nê tee ri rêr prãm xãj amnhî kukamã hamaxpêr. Hãmri nhúm Tirtúm mê kãm hkôt ã ho amgrã nhúm mê hkôt mex pê rêr pa nê axte kakrã hkôt pa ho pa.

² Finat Mojes kot mê o pa jakamã nhúm prem kêp hkwy há amnhî jarê nê kãm amnhî jarênh o:

–Nã kot paj mê akapêr ma nê akôt ri amnhî nhîpêx o ixpa. Anê.

Te mê pahpê Kris kwý há amnhî jarênh kaxyw mê kot góx kãm mê pahkrã kumrãr nhúm mê pahte Kris mã amnhî jarênh ta pyràk.

³ Na prem kapôt ã ri pa nhúm Tirtúm tãm kaxkwa rúm mê hwýr mê apkur xã rê nhúm mê hkawrà nê ho apkur o pa.

⁴ Tã ra kôr xãj hírot nhúm Tirtúm tanhmã mê kãm kên prêkja to nhúm kurúm mê kãm gó axkaprã nhúm mê ho ixkô nê akupým hihtýt. Á Krisja mê hkôt mê ho mê hihtýt o pa anê. Mê kot no ho omunh kêt tã nhúm mê hkôt mê ho mê hihtýt o pa.

⁵ Tã no nhúm mê ohtô nê Tirtúm kôt amnhî nhîpêx kêt nê. Kot mê ho mex kumrêx tã nhúm mê ãm amnhî tã omu nê ãm omu nê kapêr kôt amnhî nhîpêx kêt nê. ãm kapêr kwým ri tanhmã amnhî tomnuj to ho pa nhúm tee ri amnhî tã mê omu nê tanhmã mê ho nhúm mê hkwyja hpikaprãr pa. Hãmri nhúm arî mê htír xwýnhjaja kapôt ã mê hagjênh pa nê axte ma pa.

⁶ Jakamã kwa kêr pu mê kot ã amnhî nhîpêx anhýr ã mê harênh ma nê hã pano htýx nê ho papa hãmri nê ho mê urák kêt nê. Mê urák nê pahtýt ri tanhmã amnhî nhîpêx to ho ri papa hkêt nê.

⁷ Nê na pre mê hkwyjaja sãnti kutã hkôn krã ho rórók nê hkrî nê kãm amnhî jagrer pê amnhî to kwý. Tirtúm kapêr ã kagã htúm kot mê kot amnhî nhîpêx anhýr ã mê harênh kot:

Na prem sãnti kutã apkur o hkrî nê kãm amnhî jagrer o hkrî nê gaa nê pipãnh pix o pa. Jao axpên kamã hpijaãm kêt o pa.

Anhýr jakamã kwa kêr pu mê ã mê kot amnhî nhîpêx anhýrja ã pano htýx nê ho mê urák hkêt nê.

⁸ Nê na pre mê hkwyjaja htýx ri mjên nê hprô kuhpa hã nhãm ri mê kamã hpijaãm kêt o pa. Mýrapê nhúm arigro pixi hã mê ohtô rax kumrêx nê axkaprã. Mê kêp 23.000 nê pikaprãr pa. Tã ã Tirtúm kot mê panhîpêx anhýr pymaj kêr pu mê ja hã pano htýx nê ho mê urák kêt nê. ãm kwarî ho kwarî.

⁹ Nê na pre mê hkwyjaja axtem nê htýx ri tanhmã axpên mã Tirtúm jarênh to nê harênh o:

–Nã Tirtúmja gryk tokyx anhýr kêt jakamã kwa pu mê ã amnhî tomnuj anhýr o papa. Koja mê pahpumu nê tanhmã mê pahto hkêt nê.

Anhýr tã nhúm tee ri ja hã mê kuma nê mê omu nhúm ja kãm mex kêt nê nhúm mê hwýr kagã xoprê nhô wenên xihtýt kwý rê nhúm mê hwýr mra nê mê hkamnhar o mê hkwyjê pa. Tã ã kot mê panhîpêx anhýr pymaj kwa kêr pu mê ja hã pano htýx nê mê urák nê amnhî tã Tirtúm kamã pajamak o papa hkêt nê. Kwarî ho kwarî.

¹⁰ Nê na pre mê hkwyjaja axtem nê Tirtúm o kapêr punuj nê nhúm tee ri amnhî tã mê kuma nê mê hwýr kapêr o wrýk xwýnh mê nhúm ma mê hwýr wrý nê ý há mê hkwyjê

nhîmex. Tã ã kot mē panhîpêx anhÿr pymaj kwa kēr pu mē ja hã pano htÿx nē ho mē uråk nē Tîrtûm o pakapêr punuj kêt nē.

¹¹ Na pre mē ixpê Ijaew nhîgêjtaja ã htÿx ri amnhî nhîpêx o pa anê. Tîrtûm kapêr ã kagã htûm kot ã mē kot amnhî nhîpêx anhÿr piitã harênh par. Mē panhõ ejêp kaxyw. Mē pahte kamã harênh nē mē harênh mar tÿx nē mē uråk nē ã amnhî nhîpêx anhÿr kêt kaxyw. Ra Jeus akupÿn mē pahwÿr wrÿk xã hã arîgro hkukamã grêre jakamã kwa kēr pu mē kutêp mē kurom kapêr kôt pix mã ri amnhî nhîpêx mex rãhã ho ri papa.

Mē pahte mēmoj punuj nē amnhî to htÿx ã mē pamã karõ

Matêwre 4.1, 6.9-13; Wam Korîit 1.8; Sikûn Pêtre 2.9; Jutre 24

¹² Tã kēr ka mē ã Ijaew kot amnhî nhîpêx anhÿr ã mē harênhja ma nē ã ajamaxpêr anhÿr kêt nē. Rÿ mē ajamaxpêr o:

–Nã mēmoj piitã kutã ixihÿtÿx kênã kot pa hkêt mē uråk nē ã amnhî nhîpêx anhÿr o ri ixa.

Anhÿr o mē ajamaxpêr kêt nē. Kot kaj mē ã amnhî jarênh anê nē ra mē uråk nē tanhmã amnhî tomnuj to.

¹³ Nē na prem kapõt ã pare ri omnuy nē ri pa. Nhûm mêkarõmnuti tanhmã mē hkrã hto nhûm mē tanhmã amnhî tomnuj to ho pa. Ja pyrà nē na hte arî mē pahte amnhî tomnuj hprãm xãj tanhmã mē pahkrã hto ho pa. Mē pahpiitã ã mē pahto anhÿr o ri mē pahkôt pa. Nom nhûm Tîrtûm ra kot mē pamã amnhî jarênh xã hkôt mē panê omunh mex rãhã ho pa. Jakamã na pu htem tanhmã amnhî tomnuj to hkukamã pajamaxpêr nhûm ja hã mē pahpumu nē mē panê mêkarõmnuti mã kapêr. Nē kutã mē pahto paxihÿtÿx nē pu mē ÿ hã amnhî tomnuj kêt nē. Nē ãm kôt pix mã amnhî nhîpêx mex o ri papa.

Mē kot sãnti mã mēmoj nhõr xwÿnhjê jarênh

Wam Korîit 8.1-13; Karatas 4.8; Apokarip 9.20

¹⁴ Jakamã e Kris kôt ixkwÿjaja. Kēr ka mē amnhî kaxyw sãnti hkôt ajamaxpêr o ri apa hkêt nē. Nē amnhî to hwÿr kêt nē. ãm kwarî ho kwarî.

¹⁵ E mē axãhpumunh tÿx ã amnhî jarênh jakamã kot paj mē amã mēmoj jarê ka mē aprî hã inhmar tÿx japêr.

¹⁶ Nã na pu htem tõhã Jeus kot mē panê hÿk mã pajamaxpêr kaxyw axpên wÿr akuprõ. Hãmri nē mēmo kagõ hkwy ru nē Tîrtûm mã mex ã harê nē mēmoj o pahkõm pê Jeus kot mē panê hkamrõ pikapîr mã pajamaxpêr. Nē hpãnhã pãwti hõ py nē axpên mã ho hkry nē mē kot Kris pîr nē ï kamã hkamnhwÿr nhûm mē panê hÿkja mã pajamaxpêr pê kuku.

¹⁷ Pãwtita ãm pixire htã pu htem axpên mã ho hkry nē pahpiitã kuku. Mē pahpê Kris kwÿ hã mē pahte amnhî jarênh nhûm mē pahkwÿ kot ja hã mē pahpumunh kaxyw. Te mē pahÿpxi nē ri mē papa pyràk nē pãwti pixire htã pu mē pahpiitã kuku.

¹⁸ E kot paj hpãnhã mē amã amnepê mã Ijaew kot tanhmã amnhî nhîpêx to jarê ka mē inhma. Na pre htem Tîrtûm mã mex ã harênh nē kãm amnhî nhõr ã kot amnhî tã mē omunh kaxyw nhûm prem tanhmã amnhî nhîpêx to. Jao kãm mē apkur xã hkwy gõ nē kãm mex o mex ã harê. Hãmri nē amnhî mã mēmojta kwÿ xã nē hkur o hkrî. Jao ra Tîrtûm mã mex o mex ã harê nē kãm kêp hkra hã amnhî jarê.

¹⁹ Nom mē kot sãnti mã mēmoj nhõr xwÿnhjaja na htem kãm mēmo mē apkur xã hkwy gõ nom ãm kãm õr kaprÿ. Tanhmã kot we amnhî to nē amnhî tã mē omu? Mo rît kaxyw no? ãm mē ïhkra ho mē kot amnhîm hipêx kênã. Jakamã na htem ãm kãm mē apkur xã hkwy nhõr kaprÿ.

²⁰ Mē kot sãnti mã mēmoj nhõr xwÿnhjaja na htem Tîrtûm mã õr kêt nē. Mêkarõmnuti mã na htem kugõ. Jakamã kot kaj mē uråk nē sãnti mã mēmoj gõ nē apê mêkarõmnuti hkwy hã amnhî to amnhîrit nē apê hkwy hã ri apa. Jakamã mē ate sãnti mã mēmoj nhõrta na inhã hprãm kêt kumrêx.

²¹ Kot kaj mē panhõ Pahihti Jeus kot mē panê hÿk ã mēmoj kagõ hkwy ho ixkõ hãmri nē ma mra nē hpãnhã sãnti pê mêkarõmnuti hã mēmoj to ixkõ. Hãmri nhûm Tîrtûmja tee ri ja hã mē apumu nhûm ja kêp omnuy tÿx nē. Rÿ ka mē Pahihti Jeus kot mē panê hÿk ã pãwti hkwy hku nē hpãnhã ma mra nē sãnti pê mêkarõmnuti hã mēmoj hku. Hãmri nhûm Tîrtûm kêp ja omnuy tÿx nē. Mē pahte ã amnhî nhîpêx anhÿrja na axpên kuhpa hã.

²² Jakamã kot ka mē ã amnhî nhîpêx anê nē te ra mē amã mêkarõmnuti hkînh nē mããnen amã Tîrtûm Kînh pyràk o amnhî nhîpêx. Nē te Tîrtûm kurom mē kajaja mē axãhpumunh tÿx pyràk o amnhî nhîpêx. Nhûm tee ri amnhî tã mē apumu nē mē akamã gryk tÿx nē. Kwa mē okora. Koja Tîrtûm akamã gryk ka amex kêt kumrêx.

Mē pamã Kris kôt mē pahkwÿjê hkînh pê mē ho mex ã mē pamã karõ

Matêwre 20.28; Rõmãn 14.1-15.7; Pîripos 2.1-4

²³ Nē na htem tõhã amnhî jarênh o:

–Nã kot pa inhã mēmoj to anhÿr prãm nē ixãmnhîx ã amnhî nhîpêx anhÿr o ri ixa. Anê.

Tã no ãm mēmoj piitã mē pamã mex kêt. Na htem kãm mēmoj to anhÿr prãm xã hkôt mēmoj piitã tanhmã ho ho ri pa nē tanhmã amnhî tomnuj to. Hãmri nhûm mē hkwyjaja ja hã mē omu nē mē uråk nē tanhmã ri

amnhĩ tomnuj to. Jao Kris kôt amnhĩ xunhwyr t̄yx kêt nê.

²⁴ Jakamã kwa kêr pu mê amnhĩ pix kukamã pajamaxpêr pê tanhmã amnhĩ nhĩpêx to ho papa hkêt nê. Määnên amnhĩ kwjê hukukamã pajamaxpêr pê tanhmã mê ho mex to ho ri papa pê tãm ri amnhĩ nhĩpêx o papa.

²⁵ Nê kot kaj mê amnhĩ xàpkur xà japrôr kaxyw ma nhỹh̄ym mra nê mãmri axãmnhĩx ri amã mëmoj prãm xà hkôt mëmoj japrô. Nom kêr ka mê axujaprôrja kêp sãnti xàpkur xà hã mê hkukjêr kêt nê. Âm axãmnhĩx ri mê kêp mëmoj japrôr o ri apa.

²⁶ Tirtũm kapêr ā kagã htũm kot ja jarênh kot:

Pika piitã hkôt mëmoj piitã kêp Tirtũm nhõ na. Anê.

Jakamã mê mãmri axãmnhĩx ri mëmoj piitã haprô nê mëmoj piitã hkur o apa.

²⁷ Tã koja mê kêp Kris kwjê hkêt xwỹnhjê hõ ate kutã axàpkur kaxyw amnhĩ w̄yr aw̄y ka amã hw̄yr amõr prãm nê mãmri ma hw̄yr mõ. Nhũm mëmoj to amã anhõ ka axãmnhĩx ri mãmri aku. No ri tee ri amnhĩ kukamã ajamaxpêr nê tanhmã hã hkukjêr to hkêt nê. R̄y kãm:

–Kwa xà we mryja sãnti hã mê apkur xà na nã?

Anh̄y o hã mê hkukjêr kêt nê. Âm mãmri axãmnhĩx hkur o akr̄i.

²⁸⁻²⁹ Nom koja Kris kôt mê kot amnhĩ xãm tohtuj anh̄y xwỹnhjê hõ mê aw̄yr axã nê tee ri ja hã apumu nê amã:

–Kwa sãnti hã mê apkur xà na ka ri mê kutã hkur o akr̄i.

Anh̄y o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atõja kêp omnuj jakamã ka hkaga nê hkur kêt nê. No kot ka âm ama nê ar̄i hkur o anh̄y japêr. Kot amã harênh xwỹnh̄ta kêp omnuj tã ka ar̄i noo mã hkur japêr. Nhũm ja hã apumu nê tee ri Tirtũm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhĩ kukamã hamaxpêr nê amnhĩ mã:

–Hêxta waa nê. Sãnti nhõja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkapr̄i nê. Ā kot amnhĩ nhĩpêx anh̄y pymaj koja mēhõ ā mëmo më apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Määnên Kris kôt atõ nê atõxjê mex kukamã ajamaxpêr. Nom koja amã kêp sãnti hã mê apkur xà hã harê ka ama nê ā ajamaxpêr anh̄y japêr nê ajamaxpêr o:

–Nã kêp omnuj tã kot paj mamri kuku. Ja inhã mex kênã.

³⁰ Ra ixte Tirtũm mã harênh nê ixãmnhĩx hkur o inh̄y kênã kot kêt ā nê inhã kapêr anê. Anê.

Kwa mê ā ajamaxpêr anh̄y kêt. Kot kaj mê ā ajamaxpêr anê hãmri nê Kris kôt atõ r̄y atõx mex kukamã ajamaxpêr kêt nê.

³¹ Jakamã kêr ka mê tãm tanhmã amnhĩ nhĩpêx to ho ri apa. Nê axàpênh mex nê. Kêr kê mê piitã ja hã mê apumu nê mê apumunh kôt amnhĩm Tirtũm mex ā harê.

³² Nê kêr ka mê piitã mê noo mã tãm ri amnhĩ nhĩpêx o apa. Ijaew noo mã nê Ijaew kêt xwỹnhjê noo mã. Nê Jejus kwjê noo mã. Mê piitã mê noo mã tãm ri amnhĩ nhĩpêx rãhã ho ri apa. Mê kot tee ri mëmoj tã mê apumunh nê hpjiaam pymaj ka mê tãm ri mê piitã mê noo mã tanhmã amnhĩ nhĩpêx mex to ho ri apa.

³³ Na pa hte ā amnhĩ nhĩpêx anh̄y o ri ixpa. No na pa hte pa amnhĩ pix kukamã ijamaxpêr kêt nê. Mê piitã mê mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mê kot ja hã ixpumunh nê ixpyrã nê Jejus kôt amnhĩ xunhw̄yr nê âm kôt pix mã ri amnhĩ nhĩpêx o pa kaxyw.

11

¹ Na pre hte Kris ā ā amnhĩ nhĩpêx anê nê mê piitã mê mex kukamã hamaxpêr rãhã ho ri pa. Tã na pa hte urak nê ā amnhĩ nhĩpêx anê. Jakamã kwa kêr ka mê ixpyrã nê ā amnhĩ nhĩpêx anh̄y o mãn ri apa.

*Mênijaja mê mjên ā hpjiaam ā mê kãm karõ
Epes 5.22; Wam Pêtre 3.1-6*

² Nê na ka xep htem ar̄i ra ixte tanhmã mê amã ixkapêr toja mã ajamaxpêr t̄yx o ri apa. Na pa pre Kris kôt mê pahtõ nê mê pahtõxjaja xapên w̄yr pikuprõnh nê tanhmã amnhĩ nhĩpêx to hã mê amã karõ ka prem inhma nê mê urak nê ā amnhĩ nhĩpêx anê. Âm hãmri na ka htem ā amnhĩ nhĩpêx anh̄y o apa. Ja na inhã mex.

³ Na pa pre kr̄i hõ kamã mênijaja kot amnhĩ krã hpro hã mê amã mê harê. Ka prem inhma nhũm mê akwỹjaja kãm ja mex nê nhũm mê akwỹjaja tee ri ja kukamã ajamaxpêr. No mëmo kaxyw na hte mênijaja amnhĩ krã hpro? E kot paj ixpr̄i hã mê amã ja jarê ka mê inhma. Nã Tirtũm kêp Kris jamãr xwỹnh nhũm Kris kêp Tirtũm mã mê inhmyjê jamãr xwỹnh. No mê anijaja mê amjên kêp Kris mã mê ajamãr xwỹnh. Na hte mênijaja ohtõ nê ra mê mjên ā amnhĩ to amnhĩr̄it kaxyw amnhĩ krã hpro nê ri pa. No mê inhmyjaja na pa htem ā amnhĩ nhĩpêx anh̄y kêt nê. Na pa htem amar̄i ixkrã hkênh nê ixpa.

⁴ Jakamã na pa htem Tirtũm kapêr mar xã hã ixkre hw̄yr xapên w̄yr akuprõ nê Tirtũm nhỹ hã mê anijê mã kapêr jarênh o

ixkuhê. Rÿ Tirtûm mâ tanhmâ mê pajarênh to. No âm amnhî krâ hpro hkêt râhâ kâm mê ajahkre rÿ kâm mê pajarê. Kot pa mê amnhî krâ hpro nê te mê apê ixprôjaja mê apê mê ijamâr xwÿnh â mê ajarênh pyrâk. Jao te mê ixte mê ijamâr xwÿnh Kris â ixpijaâm kêt pyrâk o amnhî nhîpêx.

⁵No mê anijaja mê ixte Kris mâ mê ajamâr xwÿnh jakamâ na ka htem Tirtûm nhÿ hâ mê inhmâ kapêr jarênh rÿ kâm mê pajarênh kaxyw nê amnhî krâ hpro. Mê ixte Kris mâ mê ajamâr xwÿnhjê hâ apijaâm kaxyw â amnhî nhîpêx anê nê mê amnhî krâ hpro. Kot ka mê â amnhî nhîpêx anhÿr kêt nê te mê ate mê ixtâ apijaâm kêt pyrâk o amnhî nhîpêx nhûm mê amjên tee ri ja hâ apumu nê hpijaâm nê. Te ate amnhî krâ hkênh nê ri apa nhûm tee ri apumunh nê hpijaâm pyrâk.

⁶Kot kaj mê amnhî krâ hkênh nê ri apa nê amnhî kamâ apijaâm nê ri apa. Mê anijaja na ka htem akrâ hkî japjê nê kamâ amex nê ri apa. No kot ka mê amnhîm akrâ hkênh nê apunuj nê amnhî kamâ apijaâm nê ri apa. Jakamâ kêr ka mê Tirtûm mâ amnhî jarênh kaxyw nê amnhî krâ hpro. Nom kot ka mê amjên â apijaâm kêt nê ri apa hprâm japêr nê mamrî amnhîm akrâ hkênh nê ri amnhî kuk â apijaâm kêt nê ri apa.

⁷No mê inhmyjaja na pa htem amnhî krâ hpro hkêt nê. Te mê ixpê Tirtûm pyrâk nhûm mê anijaja te mê apê Tirtûm kra pyrâk o na pu htem axpên nhîpêx. Tirtûm krajaja na htem mêmoj tâ Tirtûm mâ karô hkêt nê. Ja pyrâ nê mê anijaja na ka htem mê inhmyjê mâ mêmoj tâ karô kamâ axihtÿx o apa hkêt nê. Na ka htem mê ixtâ apijaâm kâm mêmoj tâ mê ixwÿ.

⁸Amnepê mâ Tirtûm kot mêmoj to kator krax rûm na pre myja kumrêx nhîpêx hâMRI nê kêp ôkwa i hō kapa nê ho kâm hprô nhîpêx. No na pre nija kumrêx nhîpêx nê ôkwa i ho kâm mjên nhîpêx kêt nê.

⁹Myja mâ na pre hprô nhîpêx. No nija mâ mjên nhîpêx kêt nê.

¹⁰Jakamâ kêr ka mê anijaja amjên â apijaâm â amnhî to amnhîrît kaxyw hâMRI nê mê inhmâ Tirtûm nhÿ hâ tanhmâ akapêr jarênh to kaxyw rÿ kâm amnhî jarênh kaxyw hâMRI nê amnhî krâ hpro nê akuhê. HâMRI nhûm Tirtûm kapêr o mê wrÿk xwÿnhjaja ja hâ mê apumu nê hkînh nê tee ri mê akukamâ hamaxpêr kêt nê.

¹¹⁻¹²Nê wam ni kator xwÿnhnta na pre myja rûm kato. Tâ na pa htem jarâhâ mê inhmyjaja hpânâ mê anijê rûm ijapôj. Tirtûm jamaxpêr xâ hkôt. Tâ na pre â mê pahte amnhî nhîpêx anhÿr kaxyw â mê panhîpêx anê. Tâ mê ixpê Pahihti Kris kwÿ hâ mê inhmyjaja nê mê anijaja na pu htem ri ahte papa hkêt nê. Na pu htem axpên kutâ pamâ axpên hkînh o papa nê mêmoj to axpên kutâ panojarêt o ri papa. Nê axpên

to presija ho papa. Na hte mê anijaja mê amjên o presija ho apa. Nê mê amyjaja na ka htem mê aprô ho presija ho apa. Tâ kêr ka mê anijaja mê amjên â apijaâm o ri hkôt apa.

¹³Jakamâ kwa mê kot amnhî krâ hproja kukamâ ajamaxpêr tÿx nê. Xâ mê anhô krî kamâ mênijaja mê mjên â hpijaâm â amnhî to amnhîrît kaxyw amnhî krâ hpro nâ? Koja mê ja kaxyw â amnhî nhîpêx anhÿr japêr kê mê rî mê anoo mâ Tirtûm mâ amnhî jarênh kaxyw nê kupê xê hkwy ho amnhî krâ hprô nê rî kâm amnhî jarê. Nom koja mê â amnhî nhîpêx anhÿr kêt nhûm mêmyjaja tee ri ja hâ mê omunh nê ho kapêr hkêt japêr hâMRI kê mê rî amnhî krâ hpro hkêt nê ri pa.

¹⁴Mê kot mê pahte amnhî nhîpêx â mê pahpumunh nê hkînh kaxyw na pu htem tanhmâ amnhî nhîpêx to ho ri papa. Na htem mê pahkrâ hkî jarênh o: “Koja mêmyjaja hkrâ hkî japjê nê ri pa nê ra kamâ omnajti.” Anhÿr jakamâ na pa htem amnhî krâ hkênh nê ri ixpa.

¹⁵No mê anijaja na htem mê ajarênh o: “Mênijaja na htem hkrâ hkî japjê nê ri pa nê kamâ muxti.” Anhÿr jakamâ na ka htem akrâ hkî japjê nê ri apa. Mê akî te kêp mê akrâ hpro xâ pyrâk. Na ka htem â amnhî nhîpêx anhÿr o apa.

¹⁶E na pa ra mê amâ krî hkwy kamâ Kris kwÿ nijaja kot mjên â hpijaâm â amnhî to amnhîrît kaxyw tanhmâ amnhî nhîpêx to hâ mê harê. Tâ koja mêhō nija tee ri ja ma nhûm ja kêp omnuj japêr. Nhûm amnhî jarênh o:

–Kêt. Kot paj tanhmâ inhmâ amnhî nhîpêx to hprâm xâ hkôt tanhmâ ri amnhî nhîpêx to ho ri ixpa. Koja inhmjên ja hâ ixpumu nê hpijaâm nê ri tãm.

Anhÿr â amnhî jarê ka mê tee ri â kot amnhî jarênh anhÿrja â ama nê kâm:

–Kwa nâ â ri ajamaxpêr anhÿr kêt nê. Na hte Kris kwÿjaja â hamaxpêr anhÿr kêt nê. Anê.

Jejus tyk mâ mê pajamaxpêr pê tanhmâ mê pahte amnhî to hâ mê pajarênh

Matêwre 26.26-30; Makre 14.22-26; Rukre 22.19-20

¹⁷Nê na ka xep htem Tirtûm mâ amnhî jarênh xâ hâ ixkre hwÿr axpên wÿr akuprô nê kamâ amnhî to mex kêt nê. Na ka htem tanhmâ amnhî tomnuj to pa tee ri mê ajarênh ma nê ixkaprî nê. Nê amnhîm mê amex â mê ajarênh kêt nê.

¹⁸Na ka xep htem axpên wÿr akuprô nê mêmoj tâ axpên mâ akir nê axpên pê anhgrâ. Nê ahpÿnhâ mêmoj mâ ajamaxpêr jao ra mê amâ axpên kînh kêt nê. Na pa tee ri â mê ajarênh anhÿrja ma nê ixkaprî htÿx nê.

¹⁹Xâ na hte Tirtûm ahpÿnhâ tanhmâ mê pahte amnhî anhîpêx to hâ mê pahpumunh

kôt kām mē pajapē hkēt ā amnhī jarē? Nā na hte ā amnhī nhīpēx anhūr kēt nē. Kām mē pajapē ho axpēn pyrāk kēnā.

²⁰ Nē na hte Kris kwījē piitā tōhā axpēn wūr akuprō nē Jejus tyk mā hamaxpēr kaxyw pāwti hkwy hku. Tā mē kajaja na ka xep htem ja kaxyw axpēn wūr akuprō nom axtem nē Jejus tyk mā ajamaxpēr pē axāpkur kēt nē. Ām mē axāpkur pix kukamā ajamaxpēr nē axtem nē axāpkur rūnh o akrī.

²¹ Jao amnhī pix kukamā ajamaxpēr. Mē akwījajaja wam mrrar nē hpōx nē mē apkur xā hā mē hkrī xwŷnhjaja na xep htem hkwyjē rom mēōta pinh pa. Nē wīhtija nhūm mē māānēn hpenh pa nē axtem nē ho axpā. Jakamā nhūm mē akwījajaja kot amnhī to hapu nē hpōx xwŷnhjaja mēmojta ā hprār pa.

²² Kwa mon ka mē amā hprām nē anhōrkwŷ kamā axāpkur kēt nē? Mē kot Tirtūm mā amnhī jarēnh xā hā ixkre kamā na htem apkur rūnh hkēt nē. Ka mē ā amnhī nhīpēx anē nhūm mēō hkēt xwŷnhjaja amnhī to hapu nē mra nē mēō hā prā nē amnhī kamā hpjajaam nē. Kwa xā kot pa ā mē ate amnhī nhīpēx anhūr ā mē ajarēnh ma nē ixkīnh nē mē ate amnhī nhīpēx mex ā mē ajarē? Nā kot paj ā mē ajarēnh anhūr kēt nē.

²³ Pahihti Jejus na pre ja hā tanhmā inhmā kapēr to nē inhmā:

—Kēr ka mē tōhā axpēn wūr akuprō nē axāpkur pē ixtyk mā mām mē ajamaxpēr pē ā amnhī nhīpēx anē nē ā amnhī nhīpēx anē. Anē.

Jakamā kot paj ixprī hā amnhī xō ri mē amā kot tanhmā inhmā kapēr tota jarē ka mē inhma. Nā Jejus kormā htyk kēt ri Jut Kariot ra kot pōristi mā hā ānnēnh kaxyw nhūm kamāt nhūm Jejus mē ŷ hā mē ahkre xwŷnhjē mē apkur kaxyw hkrī hpa. Hāmri nhūm Jejus pāwti hō py nē o xa

²⁴ nē Tirtūm mā harē nē kām:

—Pa Papaj. Nā ām hāmri na ka hte mē inhmā mē inhō mex o apa. Anē.

Nē hpānhā pāwja o hkry pa nē ho mē kot ŷ hā mē ahkre ho mē pa xwŷnhjē nhīpēx pa nē mē kām:

—E na pa ā pāwti ho hkry nē mē amā ōr anē. Koja mē ā inhīpēx anē nē te mē kot ixto hkry hpar pyrāk o inhīpēx pa amnhī xā htŷx kamā ijamak kām ty. Nom mē anē kot paj ty. Jakamā e kēr ka mē ixwakre kamā tōhā axpēn wūr akuprō nē ixte mē ate amnhī tomnuj pānhā amnhīrer kaxyw mē anē ixtyk mā ajamaxpēr pē akīnh nē pāwta kur o akrī. E mē māmri axāmnhīx aku. Anē.

²⁵ Hāmri nē hpānhā kop kām wīhtita py nē o xa nē mē kām:

—E kop kām wīhtija te kēp Tirtūm kot mē atā amnhī jarēnh nyw xā jarēnh pyrāk. Ixtyk kukwak ri koja mē ato hkra. Kot paj ty nhūm ixkamrō mē anē axkapī. Jakamā e. Mē kopja kamā wīhtē ho akōm o axpēn

nhīpēx. Nē ho akōm pē ixte mē anē ixtyk mā ajamaxpēr. Anē.

²⁶ Tā ā kot amnhī jarēnh anhūr jakamā na pu htem axpēn wūr akuprō nē pāwti hkwy hku nē mēmo kagō hkwy o ixkō. Nē ho pahkōm pē axpēn mā Jejus tyk jarēnh o pahkrī. Tā kēr pu mē arī ā amnhī nhīpēx anhūr o ri papa rāhā nhūm Jejus akupŷn mē pahwūr wrŷ.

²⁷ Jakamā kot kaj mē tōhā mēmo arīgro hā kot mē panē htykja mā ajamaxpēr kaxyw axpēn wūr akuprō. Hāmri nhūm mē anhīō mē awūr axā nē nhŷ. Nom axtem nē Jejus tyk mā hamaxpēr kēt japēr. Nē htŷx pāwti kur o nhŷ. Nē hkōt amarī mēmo kagō ho hkōm o nhŷ. Koja ā htyk mā hamaxpēr kēt rāhā amnhī nhīpēx anē nē te Jejus o kapēr pyrāk o amnhī nhīpēx. Te ho kapēr o:

—Nā Jejus amarī htyk nhūm hkamrō amarī hpikapār kēnā. Na pre mē panē htyk kēt nē.

Anhūr o ho kapēr pyrāk.

²⁸ Jakamā kwa kēr ka mē ate pāwta kur kaxyw nē taxy kormā tanhmā ate amnhī nhīpēx to mā ajamaxpēr nē ajamaxpēr o:

—Kwa mān pa Tirtūm kapēr kōt amnhī nhīpēx mex rāhā ho ri ixpa nā?

Anhūr o mān ajamaxpēr. Hāmri nē ate hkōt amnhī nhīpēx mex ā amnhī pumu nē amarī axāmnhīx aku. No kot ka mē kormā mēmoj punuj kaga hkēt nē arī ri ho anhūr o pa hāmri nē kām ajamaxpēr nē hkur kēt nē. Rŷ tanhmān tee ri tanhmā ate amnhī tomnuj tota mā ajamaxpēr nē akapār nē. Hāmri nē tokyx Tirtūm mā amnhī jarē nē amnhī to mex prām xāj amnhī to awŷ hāmri nē arī kormā axāmnhīx pāwtita ku.

²⁹ Koja mēhō mē akōt axā nē mēmoj kukamā hamaxpēr pē htŷx pāwti nhūrēnhata ō py hkur o nhŷ. Hāmri nhūm Tirtūm tee ri ja hā omu nē hā tanhmā ho.

³⁰ Na ka mē ra axohtō nē ā amnhī nhīpēx anē nē atŷx ri mēmoj kukamā ajamaxpēr pē pāwta ku. Jejus kot mē panē htykja mā ajamaxpēr kēt pē atŷx tanhmā ajamaxpēr to pē hkwy hkur o akrī. Mŷrapē na ka mē ra ja hā axā nē ri apa. Nē mē akwījajaja ra htyk rax nē.

³¹ Nom kot ka mē axpēn wūr akuprō hāmri nē akupŷm tām axpēn kōt ajamaxpēr nē axpēn kōt amnhī nhīpēx nē rī kormā pāwtita ku. Hāmri nhūm Tirtūm ja hā mē apumu nē tanhmā mē ato hkēt nē.

³² Na hte mē pahte tanhmā amnhī tomnuj to hā mē pahpumu nē hā tanhmā mē pahto. Mē pahte ja hā amnhī pumunh nē axte ā amnhī nhīpēx anhūr kēt kaxyw na hte ā mē pahpē hkrajē nhīpēx anē. Jakamā kot puj mē nhŷrmā mē kēp hkra hkēt xwŷnhjē hkōt kuwyta wūr ma papa hkēt nē.

³³ Jakamā e Kris kōt ixto nē ixtoŷxaja. Kēr ka mē axte Pahihti Jejus tyk mā ajamaxpēr

kaxyw axpên wÿr akuprô. Hâmri nê ra axpên wÿr apikuprôn pa hâ axpên pumu nê rî kormã pãwti hkwy hku nê hkur pê Jejus kot mê panê htykmã ajamaxpêr o akrî.

³⁴ Nê ka mê atô ra amã prãm japêr nê anhörkwÿ kamã apku nê rî kormã mê hkôt tê. Jao ra anhôhy htu nê ajamakêtkati nê akwÿjê jamãr o nhÿ. Kê mê hpôx pa ka mê atipxi nê Pahihti Jejus tyk mã ajamaxpêr pê hkur o akrî. Hâmri nhûm Tirtûm ja hã mê apumu nê hkînã nê tanhmã mê ato hkêt nê.

Na ka prem mê ate inhmã kagã nê mênhta kamã mêmôj tâ ixkukjêr rax nê. Tã na pa ra kagã ja kamã mê amã hkwy jarênh rax nê. Nom kot paj piitã harênh par kêt nê. Kot paj âm mê amã hkwy pix jarê. Hâmri nê nhÿrmã ma mê awÿr mô nê mê apumu nê kormã axte mê amã harênh jatur xãm kumê.

12

Mê kot Tirtûm kapêr o hêx xwÿnhjê jarênh Rômãn 12.6-8; Wam Korîit 14.29; Wam Pêtre 4.10-11; Wam Juãw 4.1-2

¹ Nê kot paj hpãnhã mê amã tanhmã Tirtûm Karô jarênh to ka mê inhma. Tanhmã kot mê pahkrã hto nhûm mê pahte ahpÿnhã tanhmã kãm amnhî nhîpêx to ho papaja kot paj mê amã harê.

² Amnepê mã kormã mê ate Kris kôt amnhî xunhwÿr kêt ri na ka prem sãnti hkôt ri amnhî nhîpêx o ri apa. Kapêr kêt tâ ka prem hkôt ri amnhî nhîpêx rãhã ho ri apa. Te kot mê ano kupyrr pyrãk ka mê kãm mex o mex ã harênh o ri apa. Nê kãm amnhî jagrer pê amnhî to hwÿr o ri apa. Æ na ka prem amnhî nhîpêx anhÿr o ri apa.

³ Tã ra hpãnhã Tirtûm kôt amnhî xunhwÿ.

Na htem ohtô nê Tirtûm nhÿ hã kapêr jarênh o pa hã amnhî jarênh tâ no âm mê hkwyjaja ja hã amnhî to hêx. Tã kot paj ixprî hã mê amã tanhmã mê harênh to. Koja mêmô mê kãm Tirtûm nhÿ hã kapêr jarênh o pa hã amnhî jarê hã koja Jejus o kapêr punuj o pa hkêt nê. Koja harênh o:

—Jesús kêp mê panhõ Pahihti jakamã kwa pu mê hkôt amnhî xunhwÿ nê hkôt amnhî nhîpêx o ri papa.

Anhÿr o harê. Koja mêmô ã mê amã kapêr anê ka mê ama nê mê kot Tirtûm nhÿ hã kapêr jarênh o pa xwÿnh ã omunh kurê kumrêx. No koja mê amã ã kapêr anhÿr kêt nê ka mê ama nê Tirtûm kapêr o hêx o pa hã omunh kurê kumrêx.

Tirtûm Karô kãm mê pahte axpên to mex prãm ã harênh

Rômãn 12.6; Epes 4.7; Wam Pêtre 4.10

⁴ Nê ahpÿnhã kot tanhmã mê panhîpêx to xwÿnhja âm pixii. Kêp Tirtûm Karô. Na hte mê pahkarô mã agjê nê ahpÿnhã tanhmã mê pahte axpên to mex kaxyw tanhmã mê panhîpêx to. Kot tanhmã mê panhîpêx to

xàja ohtô. Mê pahte ahpÿnhã ri tanhmã kãm amnhî nhîpêx to nê tanhmã axpên to mex to ho ri papa kaxyw na. Tirtûm Karô na hte ja kaxyw tanhmã mê pahkrã hto.

⁵ Nê mê pahte kãm tanhmã amnhî nhîpêx to ho papa xwÿnhja haxwÿja âm pixii. Kêp Pahihti Jejus. Tã na pu htem ahpÿnhã kãm tanhmã amnhî nhîpêx to ho ri papa.

⁶ Nê kot mê pahto ajuta nhûm mê pahte ahpÿnhã tanhmã axpên to mex to ho papa xwÿnhja haxwÿja âm pixii. Kêp Tirtûm. Na pu htem ahpÿnhã tanhmã hkôt axpên xunhwÿr tÿx to kaxyw tanhmã axpên to mex to ho papa.

⁷ Nê Karôja na hte ahpÿnhã tanhmã axpên kaxyw mê panhîpêx to pu mê axpên to ajuta mex o ri papa.

⁸ Jakamã na pu hte mê pahkwÿjaja Tirtûm Karô nhÿ hã ma mê pahkwÿjê mã Tirtûm kapêr jarênh o ri mê hkôt papa.

Nê mê pahkwÿjaja ma ÿ hã paxãhpumunh mex pê ma ri kapêr o mê ahkre ho mê hkôt papa.

⁹ Nê mê pahkwÿjaja Karô nhÿ hã Tirtûm kot tanhmã mê pahto ajuta hto kaxyw hkôt pajamaxpêr tÿx nê.

Nê mê pahkwÿjaja akupÿm mê ã xwÿnhjê ho mex o papa nhûm mê akupÿm mex nê pa.

¹⁰ Nê mê pahkwÿjaja aa mê kot mêmôj pumunh kêt kwÿ ho anhÿr o ri mê hkôt papa.

Nê mê pahkwÿjaja Tirtûm kapêr mar tÿx nê ô ri mê kãm harênh o mê hkôt ri papa.

Nê mê pahkwÿjaja Tirtûm Karô nhÿ hã tanhmã mê kot amnhî nhîpêx to hã mê omunh o papa. Rÿ pahprî hã mêkarômnuti nhÿ hã mê kot amnhî nhîpêx ã mê omunh o papa.

Nê mê pahkwÿjaja nhãm mê kapêr mar kêt tâ ra mê kapêr o pakapêr.

Nê mê pahkwÿjaja mê kapêr o pakapêrja ma nê mê kot mar kêt xwÿnhjê mã harê. Kormã aa pahte mar kêt tâ ra pahprî hã mar mex nê mê kãm harê.

¹¹ Æ na hte Tirtûm Karô kãm hprãm xà hkôt tanhmã mê panhîpêx to pu mê ahpÿnhã ÿ hã ã axpên nhîpêx anhÿr o ri axpên kôt papa.

Te mê pahpê Kris nhî pyrãk ã mê pajarênh Rômãn 12.3-8; Epes 1.22-23, 4.11-16; Korosê 3.15

¹² E pa hpãnhã mê amã mê panhî kamã tanhmã mêmôj jarênh to ka mê inhma nê hã anohtÿx nê. Mê panhîja âm pixi htã no âm kamã mêmôj xohtô. Kamã mê pahte nê kamã mê pahpa nê kamã mê pajakwa. Nê mê panhînhu nê mê pano. Æ mê panhî kamã mêmôj xohtô kot anhÿr. Ja pyrã nê Kris nhÿja âm pixi htã te mê pahpê ï kamã mêmôj xohtôta pyrãk. Mê pahkwÿjaja te mê

pahpê hte pyrâk. Nê mê pahkwýjaja te mê pahpê ìhkra pyrâk. Nê mê pahkwýjaja te mê pahpê no pyrâk.

¹³ Mê pahpê Kris kwýjaja axpên kaxyw mê paxohtôô. Mê ixpê Ijaewjaja nê mê apê Ijaew kêt xwýnhjaja. Nê amari ri mê kâm mê axâpênh o mê apa xwýnhjaja nê amnhî mâ ri mê axâpênh o mê apa xwýnhjaja. Á ahpýnhâ mê paxohtô kot anhýr tâ nhûm Tirtûm Karô te mê pahpê Kris nhî pixi pyrâk o mê panhipêx. Nhûm Krisja mê pahpiitâ mê pamâ Karô gô nhûm mê pahkarô mâ agjê. Pixi htâ mê pahpiitâ mê pahkarô mâ agjê.

¹⁴ Nê mê panhîja pixi tâ kamâ tanhmâ mê pakute xâja ohtôô. Tâ Kris nhîja te kot mê panhîja pyrâk. Urâk nê kamâ mê paxohtôô. Jakamâ na pu htem ahpýnhâ tanhmâ kâm amnhî nhîpêx to ho ri papa. Karô kot tanhmâ amnhî kaxyw mê panhipêx to xâ hkôt.

¹⁵ Nê kop âm mê pahparja kapêr ronhýx tee ri mê panhîhkra pumu nê amnhî mâ:

–Hêxta waa nê. Kêp âm ixpê mê ìhkra ronhýx pa inhmex nê ìjarir. No âm ixpê mê hpar pix jakamâ pêr âm mê hkînhâ ixpê mê hkwyî hkêt âm ixpê mê hatur xâ pix na pa.

Anhýr o amnhî jarênh japêr. Nom ja kot anhýr kêt. Axtem nhýhým kot mê pahto pa kaxyw na mê pahparja. Nê axtem mêmoj tâ mê paxâpênh rý mêmoj jamýnh kaxyw na mê panhîhkraja. Na pu htem hamê wa ho presija râhâ ho papa. Ja pyrâ nê kot puj mê pahkwýjê hō mê parom Tirtûm Karô nhý hâ mêmoj tâ âpênh týx â omu nê hkînhâ mê pahte amnhî to warê hkêt â amnhî jarênh o pa pa hkêt nê.

¹⁶ Nê mê pajamakja kapêr ronhýx kapêr o:

–Hêxta waa nê. Kêp apu ixpê mê no ronhýx pa inhmex nê ìjarir. No âm ixpê mê umar xâ pix jakamâ pêr âm ixte ho warê hkêt kumrêx.

Anhýr o amnhî jarênh japêr. Nom ja kot anhýr kêt. Hamê wa mex kênâ. Axtem ho mê paxumar kaxyw na mê pajamakja. Nê axtem ho mê parit kaxyw na mê panoja.

¹⁷ Kêp âm mê pano pix ronhýx pu mê parit pix nê paxumar kêt nê ri papa. Rý kêp âm pajamak pix ronhýx pu mê paxumar pix nê parit kêt nê mê paxupâr kêt nê ri papa.

¹⁸ Mê panhîja pixi htâ kamâ hikukrêx xohtôô. Na pre Tirtûm amnhî krâ hkôt kamâ mêmoj piitâ hipêx nê hanhō.

¹⁹ Kêp âm mê panhîja kamâ âm mêmoj pixi ronhýx pu mê pamex kêt nê papa.

²⁰ Tâ no âm kot anhýr kêt. Mê panhîja âm pixi htâ kamâ hikukrêx xohtôô.

²¹ Jakamâ na hte mê panoja amnhî nê mê panhîhkra mâ kâm:

–Tk kwa ma tē. Ixte ato presijare hâ. Anhýr o kâm kapêr kêt nê. Rý mê pahkrâja amnhî nê mê pahpar mâ kâm:

–Tk kwa ma tē. Na pa ato presija hkêt nê.

Anhýr o kâm kapêr kêt nê. Ja pyrâ nê kot puj mê nhýri Kris kôt panhîo pumu nê pamex o pahte hakrenh â amnhî jarênh kêt nê.

²² Nê mê panhî kamâ mêmoj kwý te hirek pyrâk tâ no pu mê ari pamâ hapê nê. Ja pyrâ nê kêt pu mê kormâ mê kot Kris kôt amnhî xunhwýr tohtuj anhýr xwýnhjaja pu mê pamâ mê hkînh kâm tanhmâ mê kutâ panojarêt to ho ri papa.

²³⁻²⁴ Nê na pu htem mê panhî kamâ mê pakukrêx kwý hâ pahpijaam nê hpro nê ri ho papa. Nê hkwyî hâ pahpijaam kêt nê hpro hkêt nê ho ri papa. Nê hkwyî hâ pahpê omnaji htâ pu mê ho mex nê ri ho papa. Tirtûm kot â mê panhipêx anhýr jakamâ na pu htem mê pakamâ mê pakukrêx kwý mê pahpê omnaji htâ pu mê ho mex nê ri ho papa. Ja pyrâ nê kêt pu mê Tirtûm kôt mê pahtô nê mê pahtôx piitâ ho mex o ri papa. Nê tām mê hipêx. Mê pahkwýjaja muxre nê mê pahkwýjaja omnaji htââ. Tanhmâ mê kute htâ pu mê kêp mê Jejus kôt mê pahtô nê mê pahtôx â mê ho mex o ri apa.

²⁵ Nê na hte mê panhî kamâ mê pahpar nê mê panhîhkra nê piitâ axpên kôt âpênh mex o pa. No na hte mê pahparja nhýhým ma mra nhûm ihōja hkwyîm nhýhým ma mrar kêt nê. Na hte wa axpên kôt âpênh mex o pa. Ja pyrâ nê kêt pu mê pahpê Tirtûm krajaja axpên kôt amnhî nhîpêx râhâ ho ri papa. Nê axpên to mex râhâ ho ri papa. No ri axpên kwým ri tanhmâ amnhî nhîpêx to ho ri papa hkêt nê.

²⁶ Na pu htem tōhâ nhýhýnh panhî kamâ paxâ nê ri papa. Pahkrâ tátâk rý pakatut gêk. Jao te mê panhî piitâ kamâ mê paxâ pyrâk. Nê nhýhýnh akupým pamex nê te panhî piitâ hkôt akupým pamex pyrâk. Ja pyrâ nê koja Kris kôt panhîo nhýhýnh â nê ri pa. Rý tanhmâ amnhî to nê ra hkaprî nê ri pa pu mê ja hâ omu nê ý hâ pahkaprî nê papa. No koja mêmoj tâ hkînh nê pa pu mê ja hâ omu nê ý hâ pahkînh nê papa.

Te mê pahpê Kris nhî pixi pyrâk â mê pa jarênh

²⁷ Nê mê pahpê Kris kwýjaja te mê pahpê Kris nhî pixi pyrâk. Ahpýnhâ mê pahte tanhmâ amnhî nhîpêx to ho papa htâ mê pahpê Kris kwý jakamâ te mê pahpê i pixi pyrâk.

²⁸ Nê mê pahte Kris kôt tanhmâ pahkwýjê ho ajuta hto ho papa kaxyw na pre Kris ahpýnhâ tanhmâ mê paxunhwýr to.

Mê pahkwýjaja mê pahte ý hâ nhâm mê kâm kapêr jarênh o papa kaxyw mê paxunhwý.

Nê mê pahkwýjaja mê pahte ý hâ tanhmâ kapêr jarênh to ho ri papa kaxyw mê paxunhwý.

Nē mē pahkwýjaja Tirtüm kapēr jarēnh o mē ahkre ho ri mē papa kaxyw mē paxunhwý.

Nē mē pahkwýjaja mē pahte aa mē kot mēmoj pumunh kēt kwý ho anhyr o ri papa kaxyw mē pa xunhwý.

Nē mē pahkwýjaja akupým mē à xwýnhjé ho mex o mē papa kaxyw mē pa xunhwý.

Nē mē pahkwýjaja mē kapēr o mē hihtýx o mē papa kaxyw mē pa xunhwý.

Nē mē pahkwýjaja mē pahte tanhmā mē ho ajuta ho ho ri papa kaxyw mē pa xunhwý.

Nē mē pahkwýjaja nhām mē kapēr ō ho mē pakapēr o mē papa kaxyw mē pa xunhwý.

Ā na pre ahpýnhā mē pahpé hkwýjé piitā mē paxunhwýr ané.

²⁹ No na pu htem pahpiitā axpēn kōt Tirtüm kapēr o mē ahkre ho ri papa hkēt nē.

Nē mē pahpiitā ý hā tanhmā pakapēr to ho ri papa hkēt nē.

Nē mē pahpiitā kapēr jarēnh o ri papa hkēt nē.

Nē mē pahpiitā aa mē kot mēmoj pumunh kēt kwý ho anhyr o ri papa hkēt nē.

³⁰ Nē mē pahpiitā akupým mē à xwýnhjé ho mex o ri papa hkēt nē.

Nē mē pahpiitā mē kapēr ō ho ri pakapēr o ri papa hkēt nē.

Nē mē pahpiitā ri mē kapērja ma nē pakapēr kām pahkwýjé mā harēnh o ri papa hkēt nē.

Na pu htem ahpýnhā tanhmā Kris kōt mē pahkwýjé ho ajuta hto ho ri papa.

³¹ Tā kēr pu mē pahpiitā pamā axpēn kīnh pē tanhmā axpēn to mex to ho ri papa. Ja na mex o kot mēmoj piitā hakrenh par. E kot paj ixprī hā tanhmā mē amā ja jarēnh to ka mē inhma.

13

Mē pahte axpēn kamā paxukaprī ho papa hā mē pamā karō

Juāw 13.31-35; Karatas 5.13-15; Korosé 3.12-14

¹ Kot pa ma mē piitā ahpýnhā mē kapēr kām mē kām Tirtüm kapēr jarēnh o ri ixpa japēr. Ām mē piitā mē kapēr o ixkapēr mex o mē kām harēnh o ri ixpa japēr. Nē Tirtüm kapēr o mē wrýk xwýnhjé kapēr o mē ahkre ho ri ixkwýjé hkōt ixpa japēr. Tā inhām mē hkīnh kēt kām ixte mē ahkre ho ri ixpa ronhýx mē inhma nē ām inhma. Nhūm ixkapērja te ixte rat tatak pyrāk o pa tee ri Tirtüm kapēr o mē ahkre kaprý ho ri mē hkōt ixpa nhūm Tirtüm tee ri inhām mē hkīnh kēt ā ixpumu nē inhām:

—Nā amā mē hkīnh kēt jakamā na ka tee ri ixkapēr o mē ahkre kaprý. Ané.

² Rý kot paj Tirtüm xāhpumunh týx o mē kām kapēr pimxur kwý jarēnh o ri ixpa japēr. Rý Tirtüm mē kurom inhām mēmoj to amnhīrit pa omu nē mē kām harēnh o ri ixpa japēr. Rý pa Tirtüm kot amnhī nhīpēx piitā omunh par japēr. Rý ixte amnhī kaxyw hkōt ijamaxpēr týx kōt ý hā kēn krā hprēk ō mā ixkapēr nhūm kot inhmar nē inhmar xā hkōt nhām pikamēnh japēr. Tā inhām ixkwýjé hkīnh kēt kām ā amnhī nhīpēx ané nhūm Tirtüm tee ri ja hā ixpumu nē inhām:

—Nā amā mē hkīnh kēt jakamā te axāhpumunh týx kēt kumrēx pyrāk. Na ka tee ri ā mē kām ixkapēr jarēnh anhyr o ri apa kaprý. Ané.

³ Rý pa mē kēp amrakati xwýnhjé mā ixkukrēx nhōr par japēr. Rý Kris ā mē kām amnhī grōnh kōt mē kām xa nhūm mē hā ixpīr japēr. Tā inhām mē hkīnh kēt kām ā amnhī nhīpēx ané nhūm Tirtüm tee ri ja hā ixpumu nē inhām:

—Nā ā ate mē kām amnhī nhīpēx anhyr o ri apa htā amā mē hkīnh kēt jakamā na ka tee ri ā mē kām amnhī nhīpēx anhyr kaprý. Ané.

⁴ Kot puj mē pamā axpēn kīnh hā kot puj mē kritpēm mē piitā mē kām pahprī ho papa.

Āo axpēn kām pagryk tokyx anhyr kēt nē.

Nē pamā axpēn to mex pix prām.

Nē mēmoj tā axpēn kamā pagryk kuré kumrēx kēt nē.

Nē mēmoj tā amnhī to jarkrar o ri papa hkēt nē.

Kot puj mē pamā axpēn kīnh hā kot puj mē ā amnhī nhīpēx anhyr o ri papa hkēt nē.

⁵ Nē kot puj mē axpēn kamā paxukaprī ho papa hā kot puj mē tām axpēn nhīpēx rāhā ho papa. Āo amnhī pix kukamā pajamaxpēr o ri papa hkēt nē. Nē mē pagryk tokyx anhyr kēt nē. Rý axpēn kām pagryk tokyx anhyr hkēt nē. Rý koja mēhō tanhmā mē panhīpēx kati hto pu mē ām amnhī tā omu nē axte kot tanhmā mē panhīpēx tota mā pajamaxpēr kēt nē.

⁶ Nē kot puj mē pamā axpēn kīnh o papa hā kot puj mē tee ri mēhō kot tanhmā amnhī tomnuj to hā omu nē pahkaprī nē. Rý tanhmā kot amnhī to mex to hā omu nē pahkīnh nē.

⁷ Nē kot puj mē pamā axpēn kīnh o papa hā kot puj mē arī Tirtüm kot mē pahto mex par jatur xā mēnh xā hā arīgro jamār rāhā ho ri papa. Nē mē kot Kris ā tanhmā mē pahto htā pu mē tee ri amnhī kukamā tanhmā pajamaxpēr to hkēt nē. Ām mē kutā amnhī to htýx nē mē kām pakuhé nē arī amnhī kaxyw Tirtüm mā pajamaxpēr týx rāhā nē.

⁸ Nē kot puj mē pamā axpēn kīnh o papa hāmri nē aa mē pahte ā amnhī nhīpēx anhyrja mā panhūrer kēt nē. Nē arī mē pamā axpēn kīnh rāhā ho papa ho papa. Jar pika ja

kamā mẽ pahte Tirtũm nhỹ hã mẽ kãm kapẽr jarẽnh o ri papa htã kot puj mẽ nhỹrmã ma õ krĩ hwỹr api hãmri nẽ kuri axte ã kãm amnhĩ nhĩpẽx anhỹr kêt nẽ. Mo kaxyw kot puj mẽ axte ri mẽhõ mã kapẽr jarẽ? Kot puj mẽ õ krĩ hwỹr api nẽ ra mẽ pahpiitã paxãhpumunh o axpẽn pyrãk.

Nẽ na pu htem tõhã mẽ kapẽr õ ho pakapẽr o ri papa. Nom kot puj mẽ nhỹrmã Tirtũm nhõ krĩ hwỹr api hãmri nẽ kuri axte nhãm ri mẽ kapẽr o pakapẽr kêt nẽ.

Nẽ na pu htem jar mẽ pahkwỹjaja mẽ paxãhpumunh mex kõt Tirtũm kapẽr jarẽnh o ri papa. Tã kot puj mẽ nhỹrmã õ krĩ hwỹr api hãmri nẽ axte ã amnhĩ nhĩpẽx anhỹr kêt nẽ. ãm mẽ pamã axpẽn kĩnh pixja kot puj mẽ arĩ õ krĩ kamã mẽ pamã axpẽn kĩnh tũm rãhã papa ho papa.

⁹Jar mẽ pahpiitã mẽ paxãhpumunh tohtuj anhỹr o pakapẽr jakamã na pu htem kormã Tirtũm kapẽr jarẽnh tohtuj anhỹr o ri papa.

¹⁰Tã kot puj mẽ nhỹrmã õ krĩ hwỹr api nẽ kuri paxãhpumunh jatur xãm mẽnh pa. Jakamã nhũm jar mẽ paxãhpumunh tohtuj anhỹr xwỹnhhta mẽ pahpẽ hapẽx.

¹¹E pa mẽ amã ja hã ejẽp jarẽ ka mẽ inhma. Nã amnepẽ mã ixprĩre ri na pa pre ıxtỹx ri mẽhprĩe kot amnhĩ nhĩpẽx o amnhĩ nhĩpẽx nẽ mẽ hamaxpẽr o ijamaxpẽr. Nẽ mẽ kapẽr mex kõt o ixkapẽr o ri ixpa. Tã ra ixãptãr hãmri nẽ mẽ ãptãrjẽ jamaxpẽr o ijamaxpẽr o ri ixpa. Te ra mẽ pahte kaxkwa kamã mẽ paxãhpumunh jatur xãm mẽnh parta pyrãk mẽ aptãrjẽ jamaxpẽr o ijamaxpẽr o ri ixpa.

¹²Ja pyrã nẽ na pu htem kormã Tirtũm kot amnhĩ nhĩpẽx ã omunh tohtuj anhỹr. Te mẽ pahte amnhĩ pumunh xã pynajre kamã pahprĩ hã amnhĩ pumunh mex kĩaeta pyrãk. Nom kot puj mẽ nhỹrmã õ krĩ hwỹr api hãmri nẽ pahprĩ hã paxãhpumunh jatur xãm kumẽ. Te Tirtũm kot hprĩ hã tanhmã mẽ pakute hã mẽ pahpumunh parja pyrãk.

¹³E arĩ mẽ pahte Tirtũm kõt amnhĩ nhĩpẽx o papa xãja na axkrunẽpxi. Mẽ pahte hkõt amnhĩ nhĩpẽx o papa rãhã ho papa kaxyw. Wamta na ja: Kẽr pu mẽ arĩ amnhĩ kaxyw Tirtũm mã pajamaxpẽr mex rãhã ho ri papa. Nẽ hkõt ja: Kẽr pu mẽ arĩ Tirtũm kot mẽ pahto mex par jatur xãm mẽnh xã hã arĩgro jamãr rãhã ho papa. Nẽ hkõt ja: Kẽr pu mẽ arĩ pamã axpẽn kĩnh pẽ tanhmã axpẽn to mex to rãhã ho papa. Ja na mẽ o kot wamta wa hakrenh. E kẽr pu mẽ ã amnhĩ nhĩpẽx anhỹr rãhã ho ri papa.

14

Tirtũm Karõ kot mẽ pahto mẽ paxihitỹx ã harẽnh

Wam Korit 12.7-11, 12.27-31

¹E kẽr ka mẽ arĩ amã axpẽn kĩnh pẽ axpẽn to mex rãhã ho ri apa nẽ aa jam anhũrer nẽ ho ajamakẽtkati hkõt nẽ. Nẽ amnhĩ to Tirtũm Karõ mãn amnhĩ to awỹ kẽ mẽ amã tanhmã mẽ ajamaxpẽr to ka mẽ ahpỹnhã tanhmã axpẽn to mex to ho ri axpẽn kõt apa. Nẽ kẽr ka mẽ ã ajamaxpẽr anẽ nẽ ajamaxpẽr o:

—Inhmã mẽ hkĩnh o ri ixpa hprãm tỹx. Nẽ Tirtũm Karõ kot tanhmã ixto nhũm ixte ahpỹnhã tanhmã mẽ ho ajuta hto ho ixpaja pa mããnẽnh inhmã ho anhỹr prãm. Nẽ kot tanhmã ijakewa hto nhũm ixte ahpỹnhã mẽ kapẽr õ ho ixkapẽrja pa mããnẽnh inhmã ho anhỹr hprãm. No kõt ixte Tirtũm nhỹ hã mẽ kãm kapẽr jarẽnhja na inhmã ho anhỹr prãm tỹx kumrẽx. Anẽ.

²⁻⁴Mẽ pakamã mẽ kapẽr õ ho Tirtũm mã kapẽr xwỹnhjaja na htem Tirtũm Karõ nhỹ hã ãm kumã pix mã kapẽr õta o kãm kapẽr nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẽ. ãm kapẽr xwỹnhhta pix koja mẽ pakurom amnhĩ ma. Nom koja mẽ pakapẽr kãm Tirtũm mã amnhĩ jarẽ pu mẽ mar mex nẽ. Nhũm mẽ pakapẽr kãm Tirtũm nhỹ hã mẽ pamã kapẽr jarẽ pu mẽ pahprĩ hã kuma. Jao mẽ pamã kapẽr kõt amnhĩ nhĩpẽx prãm nẽ. Nẽ mẽmoj tã pahkaprĩ nẽ ri papa htã mẽ kuma nẽ amnhĩ kaxwỹnh kãm amnhĩ to paxihitỹx.

⁵Mẽ apiitã mẽ ate nhãm mẽ kapẽr õ ho Tirtũm mã amnhĩ jarẽnhja na mex. Nom mẽ ate mẽ akapẽr o mẽ akwỹjẽ mã Tirtũm kapẽr jarẽnh o ri mẽ apaja na mex o wamta jakre. Kot ka mẽ nhãm mẽ kapẽr õ ho Tirtũm mã amnhĩ jarẽ nhũm mẽ akwỹjaja mẽ amar kêt jakamã ka mẽ ã akapẽr anhỹrja o Kris kõt mẽ ho mẽ hamaxpẽr o hihtỹx kêt nẽ. ãm kapxipix amnhĩ ma. Rỹ koja mẽ kapẽr õja mar mex xwỹnhjẽ hõ amar japẽr nẽ mẽ akapẽr kãm akwỹjẽ mã harẽ. Hã koja ja mex nẽ. Nom kot kaj mẽ apiitã ma mẽ kapẽr kãm mẽ kãm Tirtũm kapẽr jarẽnh o ri apa nhũm mẽ piitã hprĩ hã amar mex nẽ. Nẽ amar xa hkõt Tirtũm kapẽr kõt amnhĩ nhĩpẽx mex nẽ.

⁶Jakamã e Kris kõt ıxtõ nẽ ıxtõxjaja. Kot paj apu nhỹrmã ma mẽ awỹr mõ hãmri nẽ nhãm mẽ kapẽr õ ho mẽ amã ixkapẽr japẽr ka mẽ inhmar kêt nẽ. Nom kot paj mẽ akapẽr o mẽ amã ixkapẽr ka mẽ apiitã aprĩ hã inhmar mex nẽ. Pa Tirtũm nhỹ hã mẽ amã mẽmoj jarẽ rỹ tanhmã kot amnhĩ nhĩpẽx toja pa mẽ amã harẽ. Rỹ Karõ nhỹ hã mẽ amã mẽmoj jarẽnh o ã mẽ amã Tirtũm kapẽr jarẽnh anẽ ka mẽ aprĩ hã inhmar mex nẽ.

⁷Nom mẽ kapẽr õ ho mẽ kapẽr o mẽ akõt ri mẽ pa xwỹnhjaja te mẽhõ kot htỹx ri wiorãwti kakrẽnh xwỹnh pyrãk. Koja htỹx ri hkakrẽnh o xa nhũm mẽ tee ri kot grer mar mã. Rỹ

nhûm mēhō ht̄yx ri pifti kakōr o xa nhûm mē tee ri mēmo mē grer mar mā.

⁸ Pōristijaja na htem amarī ri tanhmā amnhī nhīpēx to ho pa nhûm mē hkrāhtūmja mē kām pifti kakō nhûm mē kuma nē mē pijapu mā hamaxpēr kurē kumrēx nē hwyr hprōt. Nom koja kawax pē hkakōr r̄y ht̄yx ri tanhmā hkakōr to nhûm mē kuma nē ām kuma.

⁹ Ja pyrā nē kot kaj mē kapēr ō ho akw̄yjē mā akapēr nhûm mē ama nē ām mē ama. Ka te ām mē kām ajakwa momok pyrāk o axām o amnhī nhīpēx.

¹⁰ Nē ahp̄ynhā mē pakapēr sohtōō. Na htem ahp̄ynhā mē kapēr o amnhī kw̄yjē mā kapēr nē axpēn mar mex nē.

¹¹ Nom koja mēhō nh̄yh̄nh pika hō rūm ixwyr mō nē mē kapēr o inhmā kapēr pa mar kēt nē. Nē amnhī xwar kutā ixkapēr o kām ixkapēr nhûm ixpyrā nē inhmar kēt nē.

¹² Jakamā kot kaj mē amā Tirtūm Karō xiht̄yx xā ho amā tanhmā kām amnhī nhīpēx to ho apa hprām hā kot kaj mē amnhī to awy nē kām:

—Kwa amnhī kōt ijamaxpēr o axiht̄yx Tirtūm. Pa anhyr hā ixkapēr o ma Kris kōt ixkw̄yjē ho mē hamaxpēr o ixiht̄yx o ri mē hkōt ipxa. Kē mē akapēr ma nē Kris kōt amnhī xunhwyr t̄yx nē. Nē hkōt amnhī nhīpēx mex o ri pa. Anē.

¹³ Nē kēr ka mē nhām mē kapēr ō ho Tirtūm mā amnhī jarēnh xw̄ynhjaja amnhī to Tirtūm Karō w̄y nē kām:

—Ixte mē kapēr ō ho ixkapēr tā ixte amnhī mar kēt. Jakamā kwa tanhmā ixto ijamaxpēr mex to pa amnhī mar mex nē ixkapēr kām ixprī hā Kris kōt ixkw̄yjē mā ja jarē kē mē inhmar t̄yx nē. Anē.

¹⁴ Nom kot paj nhām mē kapēr ō ho Tirtūm mā mex ā harēnh tā amnhī mar kēt nē. Te ixpimtir kām ixkarō pix kapēr pyrāk. No kot paj pam amnhī krā hkōt ixkapēr o kām mex ā harē hāmri nē ra amnhī mar mex nē.

¹⁵ Nā ja na inhmā mex jakamā kot paj nhām mē kapēr ō ho Tirtūm mā mex ā harē nē kām gre. Nē māānēn ijamaxpēr xā hkōt ixkapēr o māānēn kām mex ā harē nē kām gre. Nā ja na inhmā mex.

¹⁶ Nom kot puj mē ma mē kot Tirtūm kapēr mar xā hā ixkre hwyr mra nē kamā Tirtūm mā mex ā harē. Tā pa nhām mē kapēr ō ho kām ixkapēr japēr. Ka mē ate inhmar o akrī xw̄ynhjaja tee ri inhma. Jakamā tee ri inhma nē ixkōt Tirtūm mā akapēr kēt nē. R̄y kām:

—Nā ām hāmri na ā amex ā ajarēnh anē Tirtūm.

Anhyr o kām akapēr kēt nē. Mē ate inhmaare hā kot ka mē ā kām akapēr anē. Jakamā kot paj ri mē akamā mē kapēr ō ho ixkapēr kēt nē. Ām mē akapēr pix o mē anom Tirtūm mā mex ā harē.

¹⁷ Kot paj mē kapēr ō ho Tirtūm mā mex o mex ā harēnh mex tā ka mē mēmo mē kapērja aprī hā mar kēt jakamā inhmar pē Tirtūm kōt amnhī xunhwyr t̄yx kēt nē.

¹⁸ Na pa hte tōhā mē arom nhām mē kapēr ō ho Tirtūm mā amnhī jarē. Nom nh̄yri ahte nh̄y nē ā kām amnhī jarēnh anē. Ām hāmri na pre Tirtūm ja kaxyw tanhmā ixto pa hte ā amnhī nhīpēx anhyr o ri ipxa.

¹⁹ Tā na pu htem Tirtūm mā mex o mex ā harēnh kaxyw nē ma mē kot kām amnhī jarēnh xā hā ixkreta w̄yr axpēn w̄yr mra pa mē pikuprōnh xw̄ynhjē kapēr o mē kām ixkapēr. Nom kot paj nhām mē kapēr ō ho mē kām ixkapēr ry rax kumrēx tā no nhûm mē inhmar kēt nē. Nom kot paj mē kapēr o ām ixkapēr krānre htā no nhûm mē inhmar mex kurē kumrēx. Ja na inhmā mex.

²⁰ Kwa mē ixkapēr ma nē mar t̄yx nē. Nē mēhpr̄irejē jamaxpēr o ajamaxpēr kēt nē. Ām Kris kōt mē āptār tūmjē jamaxpēr o mān kēt mē ajamaxpēr o ri apa. Ām mēmoj pixire hkōt kot kaj mē ām hāmri te mēhpr̄ijē jamaxpēr pyrāk o ajamaxpēr. Mēhpr̄ijaja na htem mēmoj punuj kukamā hamaxpēr kēt nē. Na htem ām ht̄yx pa. Tā kēr ka mē urāk nē mēmoj punuj kukamā ajamaxpēr o ri apa hkēt nē.

²¹ Amnepēm na pre Tirtūm tanhmā Ijaewjē mā kapēr to. Mē kapēr o mē kām kapēr tā no nhûm mē kuma nē ām kuma. Jakamā nhûm tee ri ja hā mē omu nē amnhī tā tanhmā mē harēnh to. Tanhmā mē harēnh toja Tirtūm kapēr ā kagā htūm kamā na. Kot mē harēnh kot:

E kot paj ma mē hwyr axtem pika hō rūm pōristi hkwȳ rē kē mē ma mē hwyr mra nē mē unē. Hāmri nē amnhī kapēr o mē kām kapēr nhûm mē tee ri mē kuma no ām hkōt mēmoj pumunh kēt nē.

Koja mē ā mē hipēx anhyr tā nhûm mē arī kām ixkapēr mar nē amnhī kaxyw ixkōt hamaxpēr prām kēt nē. Anē.

Tirtūm kapēr ā kagā htūm kot ā mē harēnh kot anhyr.

²² Jakamā kot kaj mē Tirtūm mā amnhī jarēnh xā hā ixkre hwyr akuprō nē mē kapēr ō ho Tirtūm mā amnhī jarēnh japēr. Nhûm Kris kōt amnhī xunhwyr kēt xw̄ynhjaja mē akōt agjē nē hkrī nē tee ri mē akapēr ma nē Kris kōt amnhī xunhwyr kēt nē. Tanhmā kot mē amnhī to nē hkōt amnhī xunhwyr? Mē kot akapērta maare hā. No kot ka mē akapēr o Tirtūm nh̄y hā mē kām akapēr nhûm mēhpr̄i hā amar mex nē. Jao tanhmā hamaxpēr to nē mē apyrā nē Kris kōt amnhī xunhwyr japēr.

²³ Nom kot ka mē apiitā nhām mē kapēr ō ho Tirtūm mā mex ā harē nhûm amarī ri mē pa xw̄ynhjaja mē awyr agjē nē mē akapēr ā

mē ama nē hā mē apumu. Hāmri nē tee ri hamaxpēr nē mē akrā pipānh ā axpēn mā mē ajarē.

²⁴ Nom koja mē awyr agjē ka mē akatāt kōt mē amnhī kapēr o Tirtūm kapēr jarēnh o akuhē nhūm mēhprī hā mē amar mex nē. Hāmri nē amnhī kapēr o akapēr ma nē hamaxpēr o:

—Hēxta waa nē. Xep ixte amnhī tomnuj xwŷnh na pa. Nā ām hāmri na mē Tirtūm kapēr jarē. Nā ām hāmri na kēt ja. Anē.

²⁵ Hāmri nē mē amā tanhmā kot amnhī tomnuj to hā amnhī jarēnh pa hāmri nē hk-aga nē Jejus kōt amnhī xunhwŷ. Nē hkōnkrā ho htēm nē hkrī nē Tirtūm mā mex o mex ā harē. Hāmri nē mē amā:

—Nā ām hāmri na hte Tirtūm mē akamā pa ho pa. Anē.

Tirtūm nhōrkwŷ kamā mē pahte tanhmā amnhī nhīpēx to hā mē pamā karō

Atre 2.42, 5.12-13; Eprēw 10.25

²⁶ E Jejus kōt ixkwŷjaja. Kot paj hpānhā axtem mē amā mēmoj tā karō. Mē kot Tirtūm mā amnhī jarēnh xā hā ixkre kamā tanhmā mē ate amnhī nhīpēx to hā karō ka mē inhma.

Nā kēr ka mē axpēn wŷr akuprō nē akrī ka mē atō amā Tirtūm mā mex ā harēnh ā mē grer o agrer prām hāmri nē māmri kām ho gre. Hāmri nē agrer pa kē apānhā mēhō kānhmā xa nē Tirtūm kapēr kwŷ ho mē ajahkre. Nē ho anhŷr pa nhūm hpānhā mēhō kānhmā xa nē Tirtūm kot tanhmā ho mex to hā mē amā amnhī jarē. Nē amnhī jarēnh pa hāmri nhūm mēhō nhām mē kapēr ō ho mē amā ujarēnh japēr. Hāmri nē ujarēnh pa kē mēhō hpānhā mē akapēr o hprī hā mē amā kapērta jarē.

E kēr ka mē axpēn wŷr akuprō nē Kris kōt axpēn to axihtŷx kaxyw ā axpēn pānhā amnhī nhīpēx anē.

²⁷ Nē ka mē atō amā nhām mē kapēr ō ho mē kām akapēr prām japēr. Nom kēr ka mē axotō nē ā mē kām amnhī nhīpēx anhŷr kēt nē. Ām mē atō wa axkrutre rŷ axkrunēpxire nē mē kapēr ō ho mē kām akapēr. Hāmri nē axpēn pānhā akapēr pa kē mēhō kot hprī hā mē kapēr ōta mar japēr nē mē apānhā xa nē mē akapēr o mē kām harē kē mēhprī hā mar mex nē.

²⁸ Nom koja ja kaxyw mēhō amrakati japēr ka mē kapēr ō ho akapēr kēt nē. Ām kapxpix nhŷri ahte Tirtūm mā akapēr.

²⁹ Nē kē Tirtūm nhŷ hā kapēr jarēnh xwŷnhjē hō wa axkrut rŷ axkrunēpxi nē mē ajahkre ka mē aprī hā mar o akrī. Hāmri nē mar pa nē tanhmā mē harēnh to. Ām hāmri Tirtūm nhŷ hā kapēr ā mē harē rŷ ho hēx ā mē harē.

³⁰ Nē koja mēhō Tirtūm nhŷ hā mēmoj jarēnh o xa. Rōm nhūm Tirtūm mē kaxyw mē

atō mā ajamaxpēr kwŷ gō. Ka kapēr o ām xwŷnhta mā kānhmā anhīhkra pē kē apumu nē anhīkrē. Hāmri ka hpānhā xa nē mē kām tanhmā ajamaxpēr tota jarē.

³¹ Nom kēr ka mē anhīpē mē kām akapēr hkēt nē. Ām axpēn pānhā Tirtūm kapēr o axpēn jahkre nē ho axpēn jamaxpēr o axihtŷx. Ja mex.

³²⁻³⁴ Nom kēr ka mē axpēn wŷr akuprō nē apiitā anhīpē atŷx ri akapēr kēt nē. Ja na Tirtūm kēp hprām nōkati. Mē ate axpēn pānhā axpēn mā akapērja na kām hprām. Jakamā kē mē kot Tirtūm nhŷ hā mē kapēr jarēnh o pa xwŷnhjaja taxy axpēn jahkre hā axpēn jamā. Nhūm mēhō kumrēx kapēr pa hāmri ka hpānhā mē kām akapēr.

Nē kē mēnijaja amarī mē ahkreja mar o hkrī. Ijaew kot amnhī nhīpēx xā hkōt. Jakamā kwa mē anijaja. Kēr ka mē amarī akryk mē mar o akrī nē axpēn mā akapēr o akrī hkēt nē.

³⁵ No kot kaj mē tee ri mēmoj ma nē mar mex kēt japēr tā hā axpēn kujēr kēt nē. Ām akryk arī mar o akrī. Hāmri nē akupŷm anhōrkwŷ hwŷr tē nē rī kormā hā amjēn kujja. Nom kot ka mē apikuprōnh xā hā ixkre kamā axpēn mā akapēr o akrī nhūm mē amjēnjaja tee ri ja hā mē apumu nē hpi-jaām nē.

³⁶ E na pa ā Tirtūm mā amnhī jarēnh xā hā ixkre kamā tanhmā mē pahte amnhī nhīpēx to hā mē amā karō anē. Tā te mē apē ja mex kēt pyrāk. Kwa mon ka wem ja ma nhūm mē apē omnuj nē? Xā mē ate Tirtūm kapēr mar mex o ijakrenh kōt na ka mē ā ajamaxpēr anē? Xā na pre Tirtūm mē akumrēx mā kapēr? Hā na ka mē ā ajamaxpēr anē? Rŷ xā mē kapxpix mā na pre kapēr? Hā na ka mē ixkapēr ma nhūm mē apē omnuj nē? Nā ixkumrēx na pa pre mē awŷr inhōr nē mē amā Tirtūm kapēr jarēnh kēnā kot ka kēt mē axtem nē ā ajamaxpēr anē.

³⁷ Kot kaj mē atō ā ajamaxpēr anhŷr japēr nē ajamaxpēr o:

—Nā na pre Tirtūm tanhmā inhmā kapēr to pa ō ri mē kām iuxjarēnh mex o ri ipxa.

Anhŷr o ajamaxpēr. Rŷ ajamaxpēr o:

—Nā na pre Tirtūm Karō mē kaxyw tanhmā ixto pa ŷ hā tanhmā mē ho mex to ho ri ipxa.

Anhŷr o ajamaxpēr. Kot kaj mē ā ajamaxpēr anē hāmri nē määnēn pa ā ixte amnhī nhīpēx anhŷr ā ixpumunh mex kurē kumrēx. Amnhī pyrā nē ixte Tirtūm nhŷ hā mē kām ixkapēr xwŷnh ā ixpumunh nē hā ijarēnh kurē kumrēx.

³⁸ Nom koja ja hā ijarēnh kēt ka mē ja hā omu hāmri nē tanhmā kot mē amā kapēr toja ma nē ām ama.

³⁹ E Kris kōt ixtō nē ixtōxjaja. Kēr ka mē amnhī to Tirtūm Karō wŷ kē ma mē ate mē

kâm Tîrtûm kapêr jarênh o ri apa kaxyw mê ato mê axihtýx.

Nê koja mêhõ kâm nhâm mê kapêr õ ho kapêr prâm ka mê ja nê kâm akapêr kêt nê. Kwâr nommri ã amnhî nhîpêx anê.

⁴⁰ Nom kêr ka mê ate Tîrtûm mã amnhî jarênh xà hã ixkre kamã axpên pãnhã axpên mã akapêr nom anhîpê kâm akapêr hkêt nê.

15

*Kris akupým htîr kumrêx ã harênh
Atre 2.23-36, 10.39-41; Wam Korîit 6.14*

¹ E Kris kôt ixkwýjaja. Kot paj axte mê amã Jejus kot mê panê tanhmã amnhî nhîpêx to hã harê ka mê inhma. Na pa pre ra mê amã ja jarê ka mê ama nê hkôt amnhî xunhwý. Nê hkôt amnhî nhîpêx mex o ri apa.

² Na pa pre mê amã harê ka mê amnhî kaxyw kãm ajamaxpêr týx nê nhûm Tîrtûm mê ato hkra. Tã ka htem arî kapêr kôt amnhî nhîpêx mex o ri apa. Koja mêhõ kot Tîrtûm kapêr mar tã amnhî kaxyw hkôt hamaxpêr kêt nê nhûm Tîrtûm tee ri amnhî tã omu nê ho hkra hkêt nê.

³ Na pa pre amnhî krã hkôt mê amã tanhmã Kris jarênh to hkêt nê. Ixte kapêr mar xà hkôt na pa hte amnhî xõ ri mê amã tanhmã harênh to ho ri ixpa. Jejus jarênhja na mex o kot mê ujarênh piitã hakrenh par kumrêx. Tã tãm kot paj mê amã harê. Na pre Krisja mê pahte amnhî tomnuj pãnhã amnhîrer kaxyw mê panê ty. Tîrtûm kapêr ã kagã htûm kot hkukamã harênh xà hkôt.

⁴ Hãmri nhûm mê kên kre kamã haxã nhûm kamã nõr o apkati. Nê axte hã apkati. Hãmri nhûm Tîrtûm akupým ho htîr. Kapêr ã kagã htûm kot hkukamã harênh xà hkôt.

⁵ Tã nhûm Simãw Pêtre kumrêx akupým htîr ã omu nhûm hpãnhã Jejus nhý hã mê ahkre ho mê pa xwýnh maatijaja haxwýja omu.

⁶ Hãmri nhûm mê kot hkôt mê pa xwýnh pè 500 jakrenh xwýnh piitã anhîpê haxwýja akupým htîr kãm omu. Na pre ra mê hkwyjaja ty nhûm mê hkwyjaja arî htîr nê pa.

⁷ Jakamã nhûm prem ra akupým htîr kãm omu. Hãmri nhûm hpãnhã Xiakreja omu. Nhûm hpãnhã ý hã mê ahkre o mê pa xwýnh piitã omu. Akupým htîr kãm omu.

⁸ Tã pa na pa pre ijaxwýja amnhî to hapu nê akupým htîr kãm omu. Te ixpê mê hkra kot hapu pyrã nê amnhî to hapu nê omu. Na pre kaxkwa kamã inhmã kapêr o xa pa ixprî hã omu.

⁹ No mê kot ixpyrã nê Kris nhý hã mê ahkre ho mê pa xwýnh maati hkwyjaja na mê mex o kot ijakrenh. Na pa pre hte mê hkînhã amnhî tomnuj týx nê. Jao Kris pè hkrajê homnuj týx o ri ixpa. Tã hkôt amnhî xãm hãmri nê tee ri ã amnhî nhîpêx anhýr ã amnhî pumu nê amnhî kamã ixpijaãm týx

nê. Jakamã na pa hte Kris nhý hã kapêr jarênh o ixpa hã amnhî pumu nê ixte hkôt amnhî xãm kêt ri tanhmã ixte amnhî nhîpêx toja mã ijamaxpêr nê ixpijaãm nê.

¹⁰ Na pa pre amnhî tomnuj týx o ixpa htã nhûm Tîrtûm arî kãm ijapê nê. Nê ixkamã ukapri nê. Pa pre hkôt amnhî xãm nhûm ixto hkra pa ra kãm tanhmã amnhî nhîpêx to mex rãhã ho ixpa. Jakamã na hte tee ri amnhî tã ixpumu nê tanhmã hamaxpêr to hkêt nê. Rý hamaxpêr o:

–Hêxta waa nê. Inhmã Pawre japê nê ixte ho mex tã nhûm ixkôt amnhî nhîpêx kêt kumrêx.

Anhýr o tee ri hamaxpêr kêt nê. Na pa hte kãm tanhmã amnhî nhîpêx to ho ixpa rûnh o ý hã mê kapêr o pa xwýnh kwýjê jakre ho ixpa. Nom amnhî krã hkôt mê ahkre hkêt nê. Ja kaxyw na pre Tîrtûmja ixto ixihtýx pa ý hã kãm tanhmã amnhî nhîpêx to ho ri ixpa nhûm ja hã ixpumu nê hkînh nê.

¹¹ Nê Jejus jarênhja ãm pixii. Axtem hõ hkêt. Nê ý hã mê ahkre ho mê pa xwýnhjê kapêrja nê pa ixte mê amã harênhja kot axpên pyrãk. Harênh tipxi. Kris kot mê pahte amnhî tomnuj myrapê mê panê htyk nhûm Tîrtûm kot akupým ho htîr ã wa harênhja na pa hte pix jarênh o ri mê akôt ixpa. Ka prem inhma nê amnhî kaxyw hkôt ajamaxpêr týx nê.

Tîrtûm kot akupým mê pahto mê pahitir ã harênh

Rukre 20.37

¹² Nê kwa ra ixte mê amã Kris htyk nê akupým htîr ã harênh tã ka xep mê akwýjaja axtem nê mê htyk nê akupým mê htîr kêt ã mê hkamnhix o ri apa.

¹³ Kwa mê ajamaxpêrja mex kêt. Kêp apu ãm hãmri mê ate ã mê harênh anhýr ronhýx pre Kris haxwýja akupým htîr kêt nê. Nhýx pre htyk o ty.

¹⁴ Nê kêp apu Kris akupým htîr kêt ronhýx pa mê ãm mê amã kapêr jarênh o ixpa kaprý. Ka mê ajaxwýja amnhî kaxyw hkôt ajamaxpêr kaprý.

¹⁵ Nê kêp ãm akupým mê htîr kêt ronhýx pa mê ixte mê amã Tîrtûm kapêr jarênh o ri ixpa xwýnhjaja mê amã ho ixêx o ri ixpa. Na pa htem mê amã Tîrtûm ra kot akupým Jejus o htîr ã harênh o mê akôt ixpa. Tã kêp apu akupým mê htîr kêt ronhýx pa mê ãm mê amã harênh o ixêx.

¹⁶ Nê kêp apu akupým mê htîr kêt ronhýx pre Kris haxwýja akupým htîr kêt nê. Nhýx pre ãm amari tyn hapêx.

¹⁷ Nê Kris amari htyk nê hapêx ronhýx kot pu mê ri amnhî kaxyw hkôt pajamaxpêr nê hkôt amnhî xunhwýr kaprý.

Nē Kris amarī htyk nē hapêx ronhÿx pre Tirtūm Jejus kukwak ri mē panē mē pahte amnhī tomnuj o hapêx kêt nē. Nhÿx pu mē pahpiitā nhÿrmā ma kuwy hwÿr pajapêx pa.

¹⁸ Nē kēp apu Kris htyk nē hapêx ronhÿx ra mē kot amnhī kaxyw hkôt hamaxpēr tā ra htyk xwÿnhjaja ma mē kot amnhī tomnuj mÿrapê kuwyta wÿr hapêx.

¹⁹ Nē kēp apu Kris htyk kumrêx nē hapêx ronhÿx pu mē kormā pahtyk kêt xwÿnhjaja tee ri amnhī wÿr kamā pajamak o ri papa kaprÿ. Nē pahpê hkra hā amnhī jarênh kaprÿ. Jao pahkaprī htÿx o mēmoj piitā hakrenh par kumrêx nē ri papa.

Kris kumrêx akupÿm htÿr ā harênh

Atre 26.23; Sikūn Korit̄ 4.14; Piripos 3.10-11; Wam Tesarōn 4.15-18; Apokarip 20.1-15

²⁰ Nā mē htyk nē nhÿrmā akupÿm mē htÿr kêt ā mē harênhja kot anhÿr kêt. Ra Tirtūm kot akupÿm Kris o htÿr jakamā koja määnēn hkra htyk xwÿnhjaja nhūm mē piitā Jejus pyrā nē nhÿrmā akupÿm mē ho htÿr pa. Jakamā na pu htem Kris akupÿm htÿrja mā pajamaxpēr nē amnhī kukamā pajamaxpēr o:

—Nā ra Tirtūm kot akupÿm Jejus o htÿr jakamā koja urāk nē nhÿrmā akupÿm mē pahte hkôt amnhī xunhwÿr xwÿnh piitā mē pahto mē pahhtÿr. Nā koja ā mē panhīpêx anē. Ja kaxyw āhpumunh tÿx kumrêx xwÿnh kēnā. Anē.

²¹ Nē amnepēm na pre Tirtūm my kot waja nhīpêx. Hāmri nhūm kot tanhmā amnhī tomnuj to ho ra mē htykja o hkrax. Tā nhūm wamta kôt my hōta wamta rom amnhī to mex o mē htyk tā akupÿm mē ho htÿr o hkrax.

²²⁻²³ Tā mē pahpê wam my pē Atāw kanrēhā tāmnhwÿ jakamā kot puj mē urāk nē nhÿrmā ty. No ām määnēn mē pahpê Kris kraa. Kris kumrêx na pre akupÿm htÿr. Tā koja nhÿrmā akupÿn mē pahwÿr wrÿ hāmri nhūm Tirtūmja kôt hipêx pyrā nē akupÿm mē pahto mē pahhtÿr. Mē pahte hkôt amnhī xunhwÿr ā mē pahpumunh kôt akupÿm mē pahto mē pahhtÿr pa. No ām kormā.

Kris nhÿrmā kot mē htyk o hapêx ā harênh

Juāw 11.25; Rōmān 6.23; Wam Korit̄ 15.54; Sikūn Ximotre 1.10; Eprêw 2.14; Apokarip 20.14

²⁴⁻²⁸ Nē koja Kris arī mē ho amnhīptār rāhā nhūm Tirtūm mē kot kutā amnhī xunhwÿr xwÿnhjē pē mē hihtÿx xā ho hapêx pa. Kapêr ā kagā htūm kot ja jarênh kot: Kojā nhÿrmā Tirtūm Kris kot kām mē ho amnhīptār kaxyw ām. Anē.

Jakamā Jejus tapxipix koja mē ho amnhīptār o pa. Kojā Tirtūm pix mē ho amnhīptār kêt

nē. Nom koja pahi hkwyjê hō axte nhām mē ho amnhīptār kêt kumrêx.

Tā mē kot mēkarōmnuiti hkôt kām tanhmā amnhī to ho mē pa xwÿnhjaja koja Tirtūm ma amnhī nē kuwy hwÿr mē rēnh pa. Nē mēhtykja o hapêx nhūm mēhō axte htyk kêt kumrêx. Jakamā koja Jejus Kris mēmoj punuj piitā ho hapêx nē Mēpahpām Tirtūm nhūhkram akupÿm mēmoj piitā haxār pa. Tirtūm jamaxpēr xā hkôt ā mēmoj to anhÿr par anē hāmri nē ihkram mēmoj jaxār pa. Nē määnēn tām kām amnhī gō. Jakamā nhūm Tirtūm tapxipix mēmoj piitā ho amnhīptār pa.

Mē htyk xwÿnhjē jarênh

²⁹ Nē na hte mē pahkwÿjaja kormā kēp Tirtūm kra hkêt tā Jejus kôt mē kot amnhī xunhwÿr nē mē htyk xwÿnhjē mā hamaxpēr o pa. Hāmri nē mē kām nhÿrmā axte mē omunh prām xāj mē urāk nē Jejus kôt amnhī xunhwÿr nhūm mē hkra kumrā. Tā akupÿm mē htÿr kêt ronhÿx mē ām ā pajamaxpēr anhÿr kaprÿ.

³⁰ Nē paa. Na pa hte ma mē kām Tirtūm kapêr jarênh o ri mē hkôt ixpa. Nhūm mē hkwyjaja ja hā inhna nē ixkamā gryk nē ixtā amÿnē pa mē mÿrapê ixpunuj nē ri ixpa. No ām amnhī to htÿx nē arī ri mē kām Kris kapêr jarênh o ri mē hkôt ixpa. Tā kēp ām nhÿrmā akupÿm ixtÿr mā kêt ronhÿx pa tee ri ā amnhī nhīpêx anhÿr o ri ixpa kaprÿ.

³¹ Na htem apkati mē ixtā tanhmā āmnēnh to ho ri pa. Ām hāmri na pa mē amā ā mē harênh anē. Nom na pa hte tee ri amnhī kukamā ijamaxpēr o ri ixkaprī nē ixpa hkêt nē. Mē kot ixpÿr mā tā pa hte mē ate Pahihti Jejus Kris kôt amnhī nhīpêx mex ā mē apumunh kôt ixkīnh nē ri ixpa. Nhūm te ixkamā mēmoj kêt pyrāk pa hte ri ixpa.

³² Na pa hte jar Epes kamā mē oprê xwÿnhjē kutā amnhī to htÿx pē mē kām Jejus kapêr jarênh o ri mē hkôt ixpa nhūm mē kām mar prām kêt jakamā hā ixtomnuj tÿx nē. No nhÿrmā ixtyk nē akupÿm ixtÿr mā kêt ronhÿx pa mē kēp Kris kwÿ hkêt xwÿnhjē jamaxpēr o ijamaxpēr nē mē urāk nē ijamaxpēr o:

Ixte ixtyk ā arīgro pumunh kêt jakamā kot paj māmri mēmoj piitā hkur o ri ixpa.

Nē māmri mēmoj piitā ho ixkōm o ri ixpa.

Nē māmri mēmoj piitā ri tanhmā ho ho ri ixpa.

Ixtyk nē axte ixte ā amnhī nhīpêx anhÿr o ixpare kaxyw ā.

Anhÿr o nhÿx pa ijamaxpēr o ixpa. Kēp ām Tirtūm kot akupÿm mē pahto mē pahhtÿr mā kêt ronhÿx pu mē ā mē kēp Kris kwÿ hkêt xwÿnhjē jamaxpēr anhÿrja kôt pajamaxpēr pix o ri papa. No ām ja kot anhÿr kêt.

³³ Na htem mēmoj jarênh o:

—Mê kot htýx ri amnhî tomnuj xwýnhjê hkôt ri mê pa xwýnhjaja koja mê gaa nê mê kot amnhî nhîpêx kôt amnhî nhîpêx o ri pa. Anê.

Âm hãmri na ã mê harênh anhÿrja. Jakamã kwa mê okora. Kêr ka mê ã amnhî nê mê kot amnhî nhîpêx anhÿr o mê pa xwýnhjê pumunh mex o ri apa.

³⁴ Kwa mê tokyx mê ate tanhmã amnhî tomnuj to hã amnhî pumu nê axte ã amnhî nhîpêx anhÿr kêt nê. Nê mê ate Tirtûm kot akupÿm mê ho htîr kêt ã harênh xwýnhjaja. Te mê ate Tirtûm kot amnhî nhîpêx ã omunh kêt pyrãk. Tã mê ate tokyx ja hã amnhî pumunh nê amnhî kamã apijaãm kaxyw na pa ã mê amã ixkapêr anê.

Mê panhî nyw jarênh

Rukre 20.34-36; Rômãn 8.10-11; Sîkûn Korît 5.1; Piripos 3.20-21

³⁵ Nê mân ka mê atô akupÿm mê htîr ã mê harênh ma nê tee ri mê hkukamã ajamaxpêr nê hã ri tanhmã axpên kujêr to nê axpên mã:

—Kwa tanhmã koja we Tirtûm akupÿm hkra htyk xwýnhjê ho htîr to? Ra mê htyk nê mê ã katök nê hapêx par mã kênã. Tanhmã kot wem amnhî to nê akupÿm htîr? Nê tanhmã koja we mê ã nywja kute wehe? Anê.

³⁶ Nã na ka mê atÿx ri ã ajamaxpêr anê nê tee ri mê hkukamã ajamaxpêr. E kot paj ixprî hã ja hã ejêp jarê ka mê inhma. Nã na htem mêmo y hkre. Te mê kot mê htyk jaxàr pyrãk o hipêx nê hkre nhûm hikwÿ nê gaa nê higrôt hapôj. Nom te kêp mêmo yta pyrãk kêt.

³⁷ Âm hy pix na htem hkre. No higrôt kre hkêt nê. Rÿ tanhmãn pãr nywja kre hkêt nê. Âm hy pix na htem hkre. Tã nhûm higrôt hapôj nê hprêk nê gaa nê ô.

³⁸ Tirtûm na hte hamaxpêr xã hkôt tanhmã ho nhûm higrôt hapôj nê hprêk nê ô. Tã ja pyrã nê kot puj mê Tirtûm jamaxpêr xã hkôt pahtyk tã koja akupÿm mê pahto mê pahtîr nê mê pamã mê panhî nyw gô.

³⁹ Nê mêmo hy piitã te kot axpên pyrãk kêt. Ahpÿnhã na. Ja pyrã nê ahpÿnhã ri mêmoj piitã ã. Na axtem mê panhî nê axtem mry nhî nê axtem ãk nhî nê axtem tep nhî. Mêmoj piitã ahpÿnhã ri ã.

⁴⁰⁻⁴¹ Nê kaxkwa kamã haxwÿja mêmoj piitã ahpÿnhã no ãm muxre. Myyitja mex. Nê mytwÿreja axte mã no ãm haxwÿja mex. Nê kanhêti haxwÿja mex. Haxwÿja axte mã. Kamã hkwy hpök kryre nê kamã hkwy hpök rûnhti no ãm piitã mex.

Nê jar pika ja kamã haxwÿja mêmoj piitã mex. No ãm te kot kaxkwa kamã mêmoj jarir xwýnhja mex pyrãk kêt. Axtem na raa.

⁴² Tã koja mê panhî nywja haxwÿja axte mã. Te kot panhî htûm pyrãk kêt. Na htem

ty nhûm mê ma mê o mra nê mê hagjê. Nhûm mê hikwÿ nê gaa nê ã rerek nê hapêx. Tã koja Tirtûm akupÿm tanhmã mê pahto mê pahtîr to pu mê hpãnhã pamex kumrêx. Hãmri nê axte mã mê panhî nyw mex o mex jakamã koja axte htyk nê ã rerek kêt nê.

⁴³ Na htem ty nhûm mê hagjê nhûm htyk xwýnhta tanhmã amnhî to hkêt nê amarî hikwÿ. Omnuj nê ã nhenhek nê hikwÿ. Tã koja Tirtûm akupÿm mê ho mê htîr nê mê kãm mê ã nyw gô nhûm mê hpãnhã mex kumrêx nê hihtÿx nê Tirtûm nhô krî kamã pa ho pa.

⁴⁴ Mê htyk nhûm mê kot mê hagjênh xwýnhjaja na htem arî ã htûm ã hikwÿ. Âm jar pika ja pix kãm ri mê papa kaxyw na mê panhî htûmja. No mê panhî nywja axtem Tirtûm nhô krî kamã ri mê papa kaxyw jakamã koja mê panhî nywja axte mã. Tirtûm Karô koja mê pamã kugô.

Mê panhî nyw te kot Kris nhî pyrãk ã harênh

Rukre 20.34-36

⁴⁵⁻⁴⁶ Nê Tirtûm kapêr ã kagã htûm kot Atãw jarênh kot:

Na pre Tirtûm my kot wa Atãwja nhîpêx. Jakamã Atãw kêp pika nhô xwýnh na pre. Anê.

Â Atãw jarênh kot anhÿr. Ja pyrã nê na pu htem pakatorxã nhôhy rûm pajapôj nê Atãw pyrã nê pahpê pika nhô xwýnh. Tã nhûm Atãwja pa nê gaa nê hpigêt nê ty. Jakamã kot puj mê urãk nê papa nê gaa nê ty. Nom nhûm Krisja Atãw kurom kêp akupÿm mê ho mê htîr xwýnh jakamã kot puj mê pahpê hkwyjaja Atãw pyrã nê nhÿrmã mê pahtyk tã nhûm Kris akupÿm mê pahto mê pahtîr. Hãmri nhûm Tirtûm Karô mê pamã mê panhî nyw gô pu mê axte pahtyk kêt nê. Pãnhã axte mã mê pahpê kaxkwa nhô xwýnh.

⁴⁷ Nê Atãw na pre Tirtûm pika ho hipêx nê ho htîr nhûm ri pa. Nom Kris na pre Atãw rom kaxkwa rûm mê pahwÿr wrÿ.

⁴⁸ Tã mê pahpê pika nhô xwýnhjaja te mê pahpê Tirtûm kot wam my nhîpêx xwýnhta pyrãk. No mê pahpê kaxkwa hwÿr ma papa mã xwýnhjaja te mê pahpê kaxkwa rûm my kot mê pahwÿr wrÿk xwýnh Krista pyrãk.

⁴⁹ Tã kormã mê pahpê pika nhô xwýnh jakamã te mê pahpê my pika ho hipêx xwýnhta nhî pyrãk. Nom kot puj mê nhÿrmã ty hãmri nê hpãnhã te pahpê kaxkwa rûm my kot mê pahwÿr wrÿk xwýnhta nhî pyrãk.

Axte mê pahtyk kêt kumrêx ã mê pajarênh Juãw 11.25; Sîkûn Korît 5.4; Wam Tesarôn 4.13-18

⁵⁰ Nê kot puj mê panhî htûm rãhã Tirtûm nhô krî hwÿr paxãpir kêt nê. Panhî htûm na hte ty nê rerek nê hapêx. Jakamã koja Tirtûm Karô mê pamã mê panhî nyw gô pu

mê rî kormã ma ô krî hwÿr pajapêx pa nê kamã papa ho papa.

⁵¹⁻⁵² E mê inhma. Na pre kormã Tirtûm mê amã mêmoj to amnhîrit kêt tâ ra inhmã ho amnhîrit. Jakamã kot paj ÿ hã mê amã harê ka mê inhma. Nã kot puj mê pahpiitã mê pahtyk kêt nê. Kojã nhÿrmã Tirtûm kapêr o mê wrÿk xwÿnhjê hõja mê pamã pifti kakô. Mê pajaêr pê hkakô. Hãmri nhûm Tirtûm kra ra mê htyk nê mê hikwÿ xwÿnhjaja akupÿm î nyw o htîr kurê kumrêx. Nê kormã mê pahtyk kêt xwÿnhjaja kot pu mê mê pahtyk kêt ri mê urãk nê panhî nyw kurê kumrêx. Hãmri pu mê pahpiitã pahfir o pahfir tûm nê papa.

⁵³ Kojã Tirtûm mê panhîpêx o te mê pahte paxê htûm o papinhîpanh nê hpãnhã paxê nyw jagênh pyrãk. Jao mê panhî htûm o hapêx nê hpãnhã mê pamã mê panhî nyw gô pu mê axte pahtyk kêt kumrêx nê ri papa ho papa.

⁵⁴ Tirtûm kapêr ã kagã htûm kot ja jarênh kot:

Na ra Tirtûmja mêhtyk ho hapêx pa. Anê. Te ra kot ho hapêx par pyrãk o ã harênh kot anhÿr. No ãm kormã. Jakamã kot puj mê nhÿrmã panhî nyw nê ri papa nê mê pahotô axte pahtyk kêt kumrêx.

⁵⁵ Mê pahtykja te mê kot makre par nhûm axte kot mê hkamnhwÿr kêtja pyrãk. Urã nê kojã Tirtûm akupÿm mê pahotô mê pahfir pu mê axte pahtyk kêt nê. Nê axte ri pamã ma hkêt nê papa. Nê axte paxã hkêt nê.

⁵⁶ Tirtûm kapêr ã kagã htûmja ã mê pakukamã mê pajarênh kot anhÿr. Mê pahte amnhî tomnuj xwÿnh jakamã kot puj mê nhÿrmã ty.

⁵⁷ Nom nhûm Tirtûm àhpumunh tÿx o àhpumunh tÿx jakamã na hte Pahihti Jejus Kris kukwak ri mê pahte hkôt amnhî xunhwÿr xwÿnhjê nê mê pahte amnhî tomnuj rênh pa. Pu mê nhÿrmã mê pahtyk tâ nhûm akupÿm mê pahotô pahfir.

Mê pahte Jejus mã tanhmã amnhî nhîpêx mex to hã mê pamã karô

Karatas 6.9; Korosê 1.10

⁵⁸ Jakamã e kwa Jejus kôt ixkwÿjjaja. Kêr ka mê arî Pahihti Jejus kôt mân amnhî xunhwÿr tÿx rãhã ho ri apa. Nê kapêr kôt pix mã ri amnhî nhîpêx rãhã nê kãm tanhmã amnhî nhîpêx mex to ho ri apa. Kot kaj mê ã amnhî nhîpêx anê hãmri nê kãm tanhmã amnhî nhîpêx to kapry ho ri apa hkêt nê. ãm hãmri kãm mêmoj to anhÿr mex rãhã ho ri apa.

16

Mê kêp amrakati xwÿnhjê jarênh

Atre 11.27-30; Rômãn 15.25-27; Sikûn Korit 8.1-24, 9.1-5; Wam Ximotre 6.18

¹ Nê na pa pre krî pê Karatas kamã tanhmã Jerujarê kamã Kris kwÿjê jarênh to. Ijaew kwÿ kot mê pahpyrã nê Jejus kôt amnhî xunhwÿr ã mê harê nê mê kêp amrakati hã mê harê hãmri nê mê kãm:

—E. Kwa kêr ka mê kãm mê akãxpore hkwy ho akuprô nê ma mê hwÿr amê.

Anhÿr o mê kãm ixkapêr. Jakamã kwa kêr ka mê urãk nê mê kaxyw mê kãm kãxpore hkwy ho akuprô.

² Mê panhõ arîgromnu pê sap ã hkwy ho akuprô. Kot kaj mê akãxpore rax japêr nê mê kaxyw hkwy ho rax nê axi. Nom kot kaj akãxpore griire japêr nê mê kaxyw mê kãm ho griire nê agô. Kêr pa mêmo arîgro hã ma mê awÿr mô ka mê ra mê kaxyw ho apikuprônh rax nê.

³ Nê ma mê kot mê kãm ho môr mã xwÿnhjaja ka mê ixkutêp mê akwÿjê rê. Kêr pa pøj nê mê omu hãmri nê mê kaxyw kagã nhîpêx nê kamã mê harê. Nê mê kãm kugô nhûm mê ma Jerujarê hwÿr kãxpore mê ro hã amnhî kôt o mô nê mê kãm kugô. Mê kot kamã harênh nê mar hãmri nê mê kamjaja mê ate mê kaxyw mê rênh ã mê ajarênh ma.

⁴ Ry kot ka mê amã mê hkôt inhmênh prãm nê mãmri mê hkôt inhmê pa ma mê hkôt mô.

Pawre kot amnhî kukamã amnhî jarênh Atre 19.21-22

⁵ Nom kot paj tokyx mê awÿr inhmôr kêt nê. Kot paj ja rûm ixkato nê hpãnhã ma pika pê Masetôn wÿr mô. Hãmri nê mê hkôt ixpa griire nê ma kormã mê awÿr Korit wÿr mô.

⁶ Hãmri nê pøj nê mê akôt ri ixpa ryy nê. Nê ixtã angrã pixi nê hapêx nê rî kormã ma axte nhãm krî hõ hwÿr mô. Nê inhnojarêt ka mê ixto Tirtûm wÿ nê inhmã ixãpkur xã hkwy gô pa ma mê hwÿr pry hã hkur o mô.

⁷ No ixte mê awÿr xpôx nê tokyx mê akurûm ixkator nê hpãnhã ma nhãm krî hõ hwÿr inhmôrja na inhmã hprãm kêt. Jakamã kojã Tirtûm kãm ja mex pa arî ri mê akôt ri ixpa hã ixtã mytwÿr sohtô nê tokyx ma nhãm inhmôr kêt nê.

⁸ Kot paj kormã jar Epes kamã ri ixpa rãhã nhûm mê hkînh pê Pêtekos kato nê hapêx pa rî kormã ma Masetôn wÿr mô.

⁹ Na pa hte jar kormã mê kãm Jejus kapêr jarênh o ri mê hkôt ixpa nhûm mê ohtô nê inhmar o pa. Mê kãm mar prãm. Tã no nhûm mê hkwyjjaja ohtô nê mê kêp ja omnuj nê nhûm mê hã ixkamã gryk nê ixtomnu o pa.

Mê kot Ximotre ho mex ã mê harênh Hapuhã Juãw 5

¹⁰ Nê kwa kojã Ximotre mêmo arîgro hã mê awÿr pøj ka mê omu nê ho mex nê. Nê mê amnhî nhôrkwÿ hwÿr awÿ kê mê akutã apkur o pa. Na hte ixpyrã nê Pahihti Jejus mã tanhmã amnhî nhîpêx to mex o pa.

¹¹ Kormã mê pahkînhã nyw tâ kêr ka mê tee ri ja hã omu nê ri axpên mã tanhmã

harênh to hkêt nê. Mê âm akapêr mex pix o kâm akapêr. Nê koja akupÿn nojarêt ka mê pry hâ kâm apkur xâ hkwȳ gô kê mex pê man akupÿn ixwÿr mō pa tokyx omu. Kot paj jar mê pahkwÿjê mê akupÿn hpōx kamâ ijamak o ixpa.

¹² Nê na pa hte xatâ jar mê pahtō Aporja ma mê awÿr mōr kaxyw mê awÿr hano. Kot jar mê pahtō hkwȳjê mê ma mê awÿr mōr kaxyw. Nom kormâ. Koja xep mê jar tanhmâ amnhî to hpa nê rî kormâ ma mê awÿr mō.

Kagâ jatur xâ kamâ Pawre kot mēmoj tã karō

Epes 6.10-12; Sikûn Ximotre 1.7; Wam Pêtre 5.8-9

¹³ E kwa kêr ka mê arî amnhî wÿr Jejus kamâ ajamak rãhã ho ri apa. Nê hamâr pê kutêp tãm amnhî nhîpêx o ri apa. Nê amnhî kaxyw hkôt ajamaxpêr tÿx rãhã nê.

¹⁴ Nê mê amâ axpên kînh pê tanhmâ axpên to mex to.

¹⁵ Mãn ka mê ra Estepti mê hkwȳjê jarênh ma. Mê hkumrêxjaja na prem pika pê Gres kamâ Kris kôt amnhî xunhwÿ. Tã xep mê ra Kris kôt hkwȳjê ho mex o ri mê hkôt pa.

¹⁶ Kêr ka mê â mê kot amnhî nhîpêx anhÿr xwÿnhjê kapêr ma nê hkôt ri amnhî nhîpêx o ri apa. Mê kot Kris mã mê ajamâr xwÿnh piitã kêr ka mê kapêr ma nê mê hkôt ri amnhî nhîpêx mex nê.

¹⁷ Nê ota Estepti nê Akajkre nê Putunatretra na mê ra jar pōj. Pa mê Sostenes mê wa mê omu nê wa ixkînh nê. Te ixte mê apumunh nê ixkînh tÿxta pyrãk.

¹⁸ Na xep prem ma mê awÿr mō nê tanhmâ mê amâ kapêr to ka prem mê ama nê akînh nê. Tã mê ra amnê ixwÿr mō nê tanhmâ inhmâ kapêr mex to pa mê kuma nê ijaxwÿja ixkînh nê. Kwa kêr pu mê â mê kot mê panhîpêx anhÿr xwÿnhjê ho mex o papa.

¹⁹⁻²⁰ Nê ota jar pika pê As kamâ Kris kôt mê pahkwÿjaja piitã mê awÿr hpêr mê. Nê Akir mê hprō Prisireja wa. Nê wa ôrkwÿ kamâ mê kot Tirtûm mã amnhî jarênh kaxyw mê pikuprōnh xwÿnh piitã mê awÿr hpêr mê.

Nê kêr ka mê nhÿri axpên pumu nê mê apê Kris kôt mê ate axpên to atō nê atōx â axpên mã akapêr mex nê akînh nê.

²¹ E kot paj kagâ jatur xâ kamâ inhîhkra ho mê amâ amnhî nhîxi nhîpêx ka mê omu. Koja inhmâ ixkapêr â kagâ xwÿnhnta ja hã kagâ hkêt nê. Pa kot paj hipêx. Ixpê Pawre na pa â amnhî nhîxi nhîpêx anê ka mê omu.

²² Nê kwa kêr ka mê arî amâ Pahihti Jejus kînh o ri apa. Koja mēhō kâm hkînh kêt hã koja Tirtûm ja hã homnuj tÿx kumrêx.

E "maranat." Mê pakapêr kâm na htem maranat jarênh o: "Kwa tokyx akupÿn mê ixwÿr wrÿ Pahihti." Anê.

²³ E kê Pahihti Jejus Krisja mê ato mex nê mê akutã nojarêt rãhã ho pa.

²⁴ Ixpyrã nê mê apê Jejus Kris kwÿ jakamã na pa hte inhmâ mê akînh nê.

Tã âm ja pix. Ixpê Pawre na pa â mê awÿr kagâ nhîpêx nê mēnh anê.

Sikûn Korîit

Pawre wam Korîit kām Jejus kôt hkwyjê hwÿr kagà nê mēnh kôt kagà hō mēnh

Pawre na pre kagàja nhîpêx. Kêp mry hkâ ho ixkre nhîpêx nê ho wênê ho pa xwÿnh na pre. Tâ hpânhâ kêp Jejus nhÿ hâ hkrajê jahkre ho pa xwÿnh. Jakamâ na pre kagàja nhîpêx nê Korîit kām mē kot Jejus kôt amnhî xunhwÿr xwÿnhjê hwÿr kumê. Na pre ra mē hwÿr wamta nhîpêx nê kumê. Wam kagà nhîxi pē Wam Korîit. Tâ axte hkôt ja nhîpêx nê mē hwÿr mēnh jakamâ kagà nhîxi pē Sikûn Korîit.

Na pre Korîit kām Jejus kôt mē htōjê hō axtem nê nâ puro kamâ hpîjaam kêt o pa nhûm Pawre tee ri harênh ma nê mē hwÿr wam kagàta mē nê kamâ tanhmâ mē kot hipêx to hâ mē kām karō. Tâ kagà ja kamâ axte tanhmâ hâ mē kām karō hto.

Na pre ra Korîit wÿr mē kêp Kris nhÿ hâ mē ahkre hâ amnhî to hêx xwÿnhjaja mē hwÿr pōj nê tanhmâ mē kām kapêr jarênh to ho mē hkôt pa. Nê tanhmâ mē kām Pawre ho hêx to. Jakamâ nhûm kagàja kamâ tanhmâ mē kām amnhî tâ âprâr to nê kām mē hkînh tÿx â amnhî jarê. Â na pre Pawre mē kām mēmoj jarênh nê hâ kagà anê. Nê mē kām hâ kagà ho:

1 Pa Korîit kām Tîrtûm krajaja. Xà mē apiitâ mē amex na ka mē apa? E ot pa mē awÿr kagà nhîpêx nê kumê. Mē amâ nê mē anhō pîka pē Gres kamâ Tîrtûm krajê mē mē ato xpinràatâ mē awÿr hipêx nê kumê. Ixpê Pawre na pa hte Tîrtûm jamaxpêr xâ hkôt ma Jejus Kris nhÿ hâ krî piitâ hkôt hkrajê jahkre ho ri ixpa. Tâ Kris kôt mē pahto Ximotre mē wa mē awÿr hipêx nê kumê.

2 E kê Mēpahpâm Tîrtûm mē Pahîhti Jejus Kris wa mē ato mex rāhâ ho pa. Nê mēmoj to mē akutâ nojarêr rāhâ ho pa. Ka mē wa kukwak ri ajamakêtkati nê amex nê ri akînh nê apa ho apa.

Pawre kām amnhî xâ htÿx kamâ hamak pÿma hkêt â harênh

Rômân 1.11-12; Korosê 1.11; Sikûn Tesarôn 2.16

3-4 Nâ Tîrtûm kêp mē panhō Pahîhti Jejus Kris nhîpêxâ na. Nê kêp Mēpahpâm maati jakamâ na hte mē pakamâ ukapri nê tanhmâ mē pahto mex to ho pa. Kot puj mē mēmoj tâ tanhmâ amnhî to nê pahkapri nê ri papa nhûm ja hâ mē pahpumu hāmri nê hamaxpêr pix o akupÿm mē pahto mē paxihtÿx. Mēmo kaxyw na hte â mē pahto mex anê? Nâ mē pahte amnhî tâ omunh nê amnhî pyrâk mē hkapri nê ri mē pa xwÿnhjê jamaxpêr o hihtÿx o mē hkôt papa kaxyw.

Ja kaxyw na hte mē pajamexpêr o hihtÿx. Jakamâ kwa pu mē kām mex o mex â mân harênh rāhâ ho papa.

5 Na htem tōhâ ixto Kris nhîpêx pyrâ nê tanhmâ ixto pa amnhî xâ htÿx kamâ ijamak o ri ixpa. Tâ nhûm Tîrtûm inhîpêx o te Kris nhîpêx pyrâ nê hamaxpêr pix o tanhmâ ixkrâ hto pa mē kutâ amnhî to htÿx nê arî mē hkôt ixpa.

6-7 Na pa hte mē amâ Kris kapêr jarênh o ixpa. Mē ate inham nê hkôt amnhî nhîpêx kaxyw. Jakamâ na hte mē kām Tîrtûm kapêr mar prâm kêt xwÿnhjaja tōhâ mē atâ ixtomnuj nê pa amnhî xâ htÿx kamâ ijamak o ri ixpa. Tâ kwâr mē māmri â inhîpêx anê. Mē ate Jejus kôt amnhî xunhwÿr tÿxja na inhmâ hprâm. Na htem tanhmâ Kris â inhîpêx to nhûm Tîrtûm mē hâ ixpumu nê tanhmâ ixkrâ hto pa inhmâ amnhî xâ htÿx kamâ ijamak pÿma hkêt nê ixpa. Nê arî mē hkôt mē kām kapêr jarênh rāhâ ho ri ixpa. Na hte Tîrtûm amarî â inhîpêx anhÿr kêt nê. Mē ate â kot inhîpêx anhÿr â ixpumunh nê ixpyrâ nê amnhî kaxyw kām ajamexpêr tÿx kaxyw na hte â inhîpêx anê. Mē ate ja hâ ixpumunh nê â ajamexpêr anhÿr kaxyw nê mē ajamexpêr o:

—Nâ kot pa nhÿrmâ Pawre pyrâ nê tōhâ mē mÿrapê amnhî xâ htÿx kamâ ijamak o ixpa. Hāmri nhûm Tîrtûm ja hâ ixpumu nê te ho Pawre nhîpêx pyrâ nê tanhmâ ixto pa inhmâ amnhî xâ htÿx kamâ ijamak pÿma hkêt nê ixpa. Nâ koja â inhîpêx anê.

Anhÿr o mē ajamexpêr kaxyw na hte Tîrtûm mē kutâ ixto ixihtÿx. Mē ate ja hâ ixpumunh nê akupÿm tām ajamexpêr pē Karō nhÿ hâ amnhî to axihtÿx kaxyw. Jakamâ na pa tee ri mē akukamâ ijamexpêr kêt nê.

Tîrtûm kêp mē papytâr xwÿnh â harênh

8 E Kris kôt ixkwÿjaja. Kot paj ixpri hâ mē amâ tanhmâ amnhî jarênh to ka mē inhma. Na pa pre ma pîka pē As wÿr mō nê mē kām Jejus kapêr jarênh o ri mē hkôt ixpa. Hāmri nhûm mē hkwyjaja ja hâ ixtomnuj tÿx nê pa amnhî xâ htÿx kamâ ijamak pē mē hkôt ixpa. Kironhÿx pa pre mē kamâ ty.

9 Na pa pre tee ri amnhî kukamâ ijamexpêr o:

—Koja pêr mē ixpi. Tanhmâ kot pa we amnhî to nê tokyx mē kêp amnhî pytâ? Kot paj tee ri inhmâ mē kêp amnhîpâr prâm. Tîrtûm pix na ja kaxyw mē kutâ âhpumunh tÿx. Rÿ nhûm mē kot ixpir tâ nhûm kot akupÿm ixto ixtîr kaxyw tapxipix na âhpumunh tÿx. Nâ kot paj amnhî kaxyw tapxipix mâ mân ijamexpêr o ri ixpa nhûm amnhî tâ ixpumu nê hkînh nê. Â ixte amnhî nhîpêx anhÿr o ixpaja na kām hprâm. Anê.

10 Tâ nhûm pre â inhîpêx anê nê xatâ mē kêp ixpytâr o ixkôt pa. Kojâ â mē kêp inhîpêx

anhÿr rāhā ho pa. Nā ā kot inhīpêx anhÿr mā kēnā.

¹¹ Nom kwa kêr ka mē apiitā arī ixto Tirtūm wÿr rāhā ho ri apa kē mē ama nē mē kām ixkurē xwÿnhjê kutā ixto ixihytÿx rāhā ho pa. Nē ixto mex rāhā nē. Hāmri nhūm mē ohtō nē kot mē kēp tanhmā ixpytār to hā ixtā omu nē ixtā kām mex o mex ā harē.

Pawre kot mē kām amnhī tā aprār ā harēnh

Wam Korīt 2.1-5

¹² Nē na xep pre atar Kris kōt mē pahkwÿjaja tanhmā ixto kapêr punuj to nē Jesus kot mē awÿr inhmēnh kēt ā mē amā ixto hēx. Nē ijakwa nhīkjê ho inhmā mē akīnh nē ijakwa nhīkjê ho mē ato ixkapêr punuj ā ijarēnh o ri pa. Nom ixte ā amnhī nhīpêx anhÿr kēt. Aa ixte tanhmā mē ano kupyrt to hkēt. Ām hāmri na pa mē amā amnhī jarē nē tām mē amā ixkapêr o ri ixpa nē tām ri mē anhīpêx o ri ixpa. No ijamaxpêr tūm kōt tanhmā mē anhīpêx to hkēt nē. Ām Tirtūm kot mēmoj to mē pakutā nojarēt ā omunh xā hkōt pix mā na pa hte ŷ hā mē ato mex o ri ixpa. Ijamaxpêr nyw o. Na pa hte Tirtūm pyrā nē mē piitā mē ho mex nē. No mē kajaja ixpyrān mē apē hkra jakamā na pa hte mē ato mex kumrēx o ri ixpa.

¹³ Na pa hte mē amā kagā hkwy nhīpêx nē ixprī hā mē amā tanhmā mēmoj jarēnh to. Mē ate kamā harēnh nē mar mex kurē kumrēx kaxyw. No na pa hte mē amā tanhmā ixēx to rÿ tanhmā mē ano kupyrt to hkēt nē.

¹⁴ Ā ixte amnhī nhīpêx anhÿr o ri ixpa htā kormā mē apiitā ja hā ixpununh mex kēt nē. Nē Jesus kot mē awÿr inhmēnh ā ixpununh mex kēt nē. Jakamā na hte mē akwÿjaja ixto akapêr punuj o pa. Tā kot kaj mē nhÿrmā ām hāmri Jesus kot mē awÿr inhmēnh ā axpēn mā ijarē pa mē ama nē ixkīnh nē. Hāmri nhūm nhÿrmā mē panhō Pahīti Jesus mē pahwÿr akupÿn wrÿ pa kām mē ajarē nē kām:

—E Pahīti. Jajē mā na pa pre akapêr jarēnh o ixpa nhūm mē inhma nē akōt amnhī xunhwÿr kurē kumrēx nē tām amnhī nhīpêx mex o pa.

Anhÿr o kām mē ajarē. Hāmri nē ā mē ate amnhī nhīpêx anhÿr ā mē apumunh kōt ixkīnh nē. Ka mē ajaxwÿja akīnh pē tanhmā kām ijarēnh to ho akuhē.

Pawre hēx kēt ā kot amnhī jarēnh

Wam Korīt 16.5-6

¹⁵⁻¹⁶ Nē na pa pre ra mē awÿr ixkrā. Ixte ma mē awÿr inhmōr nhūm mē ate ixpununh nē akīnh nē mē akamnhīx nē mē awÿr ixkrā nē ijamaxpêr o:

—Nā ma Masetōn wÿr inhmōr xwÿj ri kot paj ma Korīt kumrēx wÿr mō. Hāmri nē Kris kōt ixkwÿjê pumu nē rī kormā hamū

Masetōn wÿr mō. Nē mē kamā ri ixpa tāmā awjanā nē akupÿn Korīt wÿr mō nē axte mē omu. Jao Tirtūm kapêr o mē ahkre ho axkrut nhūm mē amnhī tā ixpumu nē hkīnh nē. Hāmri pa akupÿm Jutej wÿr inhnojarēt nhūm mē pry hā ixāpkur xā hā inhmā mēmoj kwÿ nhōr japêr.

Anhÿr o ijamaxpêr.

¹⁷ Tā kormā jar tanhmā amnhī nhīpêx to ho ixpa ka xep mē tee ri amnhī wÿr ixkām ama nē axpēn mā ijarēnh o:

—Kwa Pawre kot ra mē pahwÿr nojarēt ā amnhī jarēnh tā amnhīm nojarēt kēt kumrēx. Mān pre ām mē pamā amnhī to hēx nā? Ra kot mē pamā amnhī jarēnh tā tokyx hpōx kētre hā. Anē.

¹⁸ Kwa mē ri ā inhmā ajamaxpêr anhÿr kēt nē. Na pa pre mē amā ixēx kēt nē. Na pa hte Tirtūm noo mā ām hāmri mēmoj jarēnh o ri ixpa nē mē amā mēmoj jarēnh o ixēx kēt nē. Nā ām hāmri na pa pre ma mē awÿr inhmōr ā amnhī jarē.

¹⁹ Na pa pre ra Ximotre mē Siras mē wa mē amā Jesus Kris jarēnh o ri mē akōt ixpa. Jesus kēp Tirtūm Kra hā harē nē kot amnhī nhīpêx te kot Tirtūm kot amnhī nhīpêx pyrāk ā harēnh o ri ixpa. Jesus haxwÿja amnhī to hēx kēt. Kot mēmoj tā amnhī jarēnh xā hkōt na hte ām hāmri tanhmā amnhī nhīpêx to. Tā ā kot amnhī nhīpêx anhÿrja kōt na pa inhmā ixte amnhī nhīpêx o ixpa hprām nē.

²⁰ Ra Tirtūm Jesus Kris kukwak ri kot mē pahto mex ā amnhī jarēnh jakamā na pu htem axpēn mā harēnh o:

—Koja Tirtūm Jesus kukwak ri mē pahto mex rax nē. Ra kot mē pahtā amnhī jarēnh xā hkōt. Nā Tirtūm mex o mex. Anē.

Tirtūm kot mē pa hwÿr Karō rēnh ā harēnh Rōmān 8.14; Epes 1.13

²¹ Nā Tirtūmja mex o mex. Kot mē pahpê hkra kaxyw amnhīm mē paxunhwÿr jakamā na hte tanhmā mē pahkrā hto pu mē Kris kōt amnhī nhīpêx mex o papa.

²² Na pu htem Kris kōt amnhī xunhwÿr nhūm Tirtūm ja hā mē pahpumu nē mē pahwÿr Karō rē nhūm mē pahwÿr agjē. Mē piitā mē kot mē pahpê hkra hā mē pahpumunh kaxyw. Te mē kot tanhmā mē hikukrēx kagā hto nhūm mē kot kēp ō dōn ā omunhta pyrāk. Tā koja Tirtūm Karō mē pakamā hkrī pu mē ja hā amnhī pumunh kōt Tirtūm kot nhÿrmā mē pahto mex rax ā amnhī tā omunh kurē kumrēx. Ra kot mē pahto mex tā koja nhÿrmā mē pahto mex rax o wam kot mē pahto mex raxta jakre.

Pawre kām mē kām ākjêr prām kēt ā kot amnhī jarēnh

Wam Korīt 4.21; Sikūn Korīt 10.1-2

²³ E Kris kōt ixtō nē ixtōxjaja. Kot paj kormā ma mē awÿr inhmōr kēt ri ixprī hā mē amā tanhmā amnhī jarēnh to ka mē ixte

amnhĩ jarēnh ma. Tirtūm tām mē arom kot ijamaxpēr kōt ixpumnunh mex jakamā kot paj noo mē ixpri hā mē amā tanhmā amnhĩ jarēnh to ka mē inhma.

Na pa pre ra mē awȳr inhnojarēt tā no ām tee ri amnhĩ kukamā ijamaxpēr nē ijamaxpēr o:

—Nā kot paj taxy kormā ma mē hw̄ȳr inhmōr kēt nē. Kot paj tokyx mē hw̄ȳr mōn pōj nē kot amnhĩ tomnuj xw̄ȳnhnta ā mē kām akir nē nē tanhmā mē kām ixkapēr to. Hāmri nhūm mē amnhĩ tā inhma nē hkaprĩ nē tee ri amnhĩ kukamā hamaxpēr. Ā mē kot amnhĩ nhĩpēx anhȳr pymaj kot paj kormā mē hw̄ȳr inhmōr kēt nē.

Anhȳr o ijamaxpēr.

²⁴ Inhmā ma mē awȳr inhmōr nē tanhmā mē ate amnhĩ nhĩpēx to hā axte mē amā karō kamā ixhiťyx prām kēt. Mē akw̄j̄jē rom ra mē ate Kris hkōt amnhĩ xunhw̄ȳr t̄yx kēnā. Tā mē ate hkōt amnhĩ nhĩpēx mex o akīnh nē apaja na inhmā hprām.

2

¹ Na pa pre ma mē awȳr mō nē mēmoj tā mē amā akir nē nē tanhmā mē amā ixkapēr to ka prem inhma nē akaprĩ nē ri apa. Tā inhmā akup̄ym mē awȳr inhmōr nē axte mē amā ixāk̄jēr prām kēt jakamā na pa kormā mē awȳr inhmōr kēt nē.

² Kot kaj mē akīnh nē apa pa ijaxw̄j̄ja ixkīnh nē ixpa. No kot paj ma mē awȳr mō nē mēmoj tā mē amā akir ka mē tee ri inhma nē akaprĩ nē. Pa mē apumu nē ijaxw̄j̄ja ixkaprĩ nē.

³ Ja pymaj na pa pre wam ixte mē awȳr kagā mēnhnta kamā mēmoj nē tanhmā mē amā ixāk̄jēr to. Mē ate kamā harēnh nē mar nē tokyx kormā mē awȳr inhmōr xw̄j̄jē ri tanhmā mē ate amnhĩ tomnuj tota kaga nē tām amnhĩ nhĩpēx kaxyw. Kēr pa mēmo arīgro hā ma mē awȳr mōn pōj nē mē ate tām amnhĩ nhĩpēx o apa hā mē apumu nē ixkaprĩ hkēt nē ixkīnh nē. Ka mē ajaxw̄j̄ja ixpumu nē akīnh nē.

⁴ Jakamā na pa pre ā mē amā kagāta nhĩpēx nē mē awȳr mēnh anē. Nē kamā mēmojta nē tanhmā mē amā ixāk̄jēr to. Na pa pre ixkaprĩ ht̄yx nē tee ri mē akukamā ijamaxpēr o inhm̄ȳr rax pē mē amā mēmojta ā kagā. No ām mē akaprĩ kaxyw na pa pre mē amā hipēx kēt nē. Ām mē ate kamā harēnh nē inhmar nē ajamaxpēr o:

—Hēxta waa nē. Nā Pawre na kām mē pahkīnh t̄yx kumrēx. Hā na pre mē pahte tanhmā amnhĩ tomnuj to hā mē pajarēnh ma nē tee ri mē pakukamā hamaxpēr pē kagāja kamā hā mē pamā akir nē mē pahw̄ȳr kumē. Nā kām mē pahkīnh t̄yx kām na ā mē pamā kapēr kām hĩťyx anē.

Anhȳr o ajamaxpēr kaxyw na pa pre hipēx nē mē awȳr kumē.

Mē kot axte amnhĩ tomnuj mā hamaxpēr kēt ā mē kām karō

Rukre 17.3-4; Wam Korit 5.1-13; Karatas 6.1-2

⁵⁻⁹ Nē wam kagāta kamā na pa pre mē amā mē akw̄j̄jē hō kot nā kaakre kamā hpijaām kēēta pa mē amā tanhmā hā karō hto. Ra mē ate harēnh mar tā nē kām akapēr kēt nē. Tā mē ate inhmar nē nē tanhmā kām akapēr to nē amnhĩ nē hanor kaxyw na pa pre mē awȳr kagāja mē. Hāmri nē ijamaxpēr o:

—Ko. Kōja mē ixkapēr mar xā hkōt amnhĩ nē hanor japēr. Anē.

Tā ka xep prem kamā harē nē ama nē tee ri ja hā amnhĩ pumu nē akaprĩ nē. Nē ixpyrā nē apijaām nē. Hāmri nē ijamaxpēr xā hkōt amnhĩ nē hanor kām axiťyx nē. Ām hāmri na ka prem ā hipēx anē. Nhūm xep tee ri ja hā amnhĩ pumu nē hkaprĩ nē hkaprĩ xāj ri m̄ȳr o pa. Jao ra ā amnhĩ nhĩpēx anhȳrta kaga nē akup̄ym tām amnhĩ nhĩpēx. Tā ra ā kot amnhĩ nhĩpēx anhȳr jakamā kwa mē tokyx akup̄ym amnhĩ w̄ȳr awȳ kē axte mē awȳr mra nē mē akōt pa. Ra kot amnhĩ tomnujta kaga jakamā kēr ka mē axte kām ajamaxpēr kēt nē. Akup̄ym tām kām akapēr kē tokyx akup̄ym tām hamaxpēr nē hkīnh nē pa. Kot kaj mē tokyx ā hipēx anhȳr kēt nē nhūm tee ri amnhĩ kukamā hamaxpēr nē hkaprĩ nē pa. Ja pymaj kwa mē amā hkīnh ā kām amnhĩ jarē nē akup̄ym tām kām akapēr pē tām hipēx o ri apa. Kē amnhĩ tā mē apumu nē akup̄ym hkīnh nē tām hamaxpēr.

¹⁰ E kēr ka mē axte kot tanhmā amnhĩ tomnuj tota mā ajamaxpēr kēt nē. Kwarĩ ho kwarĩ. Kot kaj mē ā hipēx anē pa ijaxw̄j̄ja ma hipēx anē. No pa na pre tanhmā ixtomnuj to hkēt nē. Ām Jeus kapēr kw̄ym na pre ri ā amnhĩ nhĩpēx anē. Tā ra kot amnhĩ tomnujta kaga jakamā kot paj Jeus nh̄ȳ hā akup̄ym tām hipēx nē kot amnhĩ tomnujta o ijamakētati tokyx anē nē axte kām ijamaxpēr kēt nē. Mē apiitā mē amex nē ri mē apa kaxyw. Jakamā kēr ka mē ajaxw̄j̄ja mē amex nē apa kaxyw ā amnhĩ nhĩpēx anē nē axte kām ajamaxpēr kēt nē.

¹¹ Kwa mē tokyx ja ho ajamakētati. Kē Satanasti tee ri ja hā mē apumu nē mē amā mē ate tanhmā amnhĩ tomnuj to hprām xāj tee ri tanhmā ri mē ato ho pa kapr̄ȳ. Kēr pu mē Satanasti kot amnhĩ nhĩpēx kōt amnhĩ nhĩpēx o ri papa hkēt nē. Ra mē pahte Tirtūm kapēr kuha hā tanhmā kot amnhĩ nhĩpēx to ho pa hā omunh mex kēnā.

Pawre kot Xitre japēr o pa hā harēnh

¹² Nē na pa pre ja rūm ixkato nē ma Tōx w̄ȳr mō. Ixte mē kām Kris jarēnh o mē hkōt ixpa kaxyw ma mē hw̄ȳr mō. Nhūm Pahihti Kris ixkukamā tanhmā mē hkrā hto

jakamā pa pre mē hwýr pōj nhūm mē piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkôt ixpa.

¹³ Na pa pre Xitre ra mē hwýr ixkukamā hpōx ā hkamnhix tā nhýri omunh kêt nē. Hāmri nē ijamaxpēr o:

—Héxta waa nē. Inhmā Korīt kām Jejus kwýjé jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupýn hpōx kêt. Mān komā Masetōn kamā pa.

Anhýr o ijamaxpēr hāmri nē mē kām amnhī jarē nē ixkato nē ma Masetōn wýr krī hkwý hkôt hapēr o mō. Tā ra hwýr ixkato nē omu.

Te mē pahpē mēhkuxwa xā pyrāk ā mē pajarēnh

Epes 5.2; Piripos 4.18

¹⁴⁻¹⁶ Nā Tirtūmja mex o mex. Na hte mē pahto mex rāhā ho pa. Nē mē kot mē panē āmnār xwýnhjaja nhūm hte tanhmā mē ho pu mē ma paxāmnhix ri mē hkôt mē kām Kris kapēr jarēnh o ri papa. Te mē pahte mē hkuxwa xā ho ri mē hkuxwa ho papa pyrāk. Mē pahte Kris kôt amnhī nhīpēx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pē te mē hkuxwa xā ho mē hkuxwa ho ri mē hkôt papa pyrāk. Nhūm hte mē hkwýjaja mē pama nē kām mar prām nē. Nē mē paxujarēnhja haxwýja te kot mē hkuxwa xā kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kôt amnhī xunhwý. No nhūm mē hkwýjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxý htýx nhūm mē kot hpār nē htyk pymaj amým kuhé pyrāk. Jao kapēr kaga nē kēp amým amnhī xunhwý.

Nē na pu htem amnhī krā hkôt mē kām Kris kapēr jarēnh o ri papa hkêt nē. Ām Tirtūm nhý hā pix mā tanhmā harēnh to ho papa.

Pawre kot katāt kôt Tirtūm kapēr o mē ahkre hā harēnh

¹⁷ Na hte mē kot mē kēp Kris nhý hā mē ahkre hā amnhī to hēx xwýnhjaja te Tirtūm kapēr o wēné pyrāk o mē hkôt pa. Jao kāxpore hprām xāj amnhī krā hkôt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpēx anhýr kêt nē. Nē mē urāk nē amnhī krā hkôt Tirtūm kapēr jahkre ho ixpa hkêt nē. Tirtūm kot mē akaxyw ixām jakamā na pa hte ixkatāt kôt Kris nhý hā amarī mē amā kapēr jarēnh o ri mē akôt ixpa. No mē urāk nē kāxpore prām xāj mē amā harēnh kêt nē. Tirtūm kot ja hā ixpumunh mex.

3

¹ Mē kēp Kris nhý hā mē ahkre hā amnhī to hēx xwýnhjaja na htem nhýhým nojarēt nē mē kot mar xwýnhjé mā:

—E kot paj ma nhām krī hō hwýr mō nē Tirtūm kapēr o mē ahkre. Jakamā kwa mē kaxyw inhmā kagā nhīpēx nē kamā ixte Tirtūm kapēr o mē ajahkre mex xwýnh ā ijarē nē hā kagā. Hāmri nē inhmā agō pa ma amnhī kôt o mō nē mē kot inhmar mā xwýnhjé mā kugō kē mē kamā harē nē ijarēnh ma nē kām ixkapēr mar prām nē.

Anhýr o na htem amnhī to mē hwýr o pa. No pa na inhmā ā amnhī nhīpēx anhýr prām kêt. Inhmā nhām mē kām amnhī to jarkrar prām kêt. Mē ate ja hā ixpumunh mex. Ra mē piitā mē kot ixkatāt kôt ixte Tirtūm kapēr jarēnh mex ā ixpumunh mex jakamā mo kaxyw kot pa ri amnhī kôt kagā jamý nē ho ixpa? Nā kot pa amnhī kôt hō ho inhmōr kaxyw hā ixāhwýr kêt nē.

²⁻³ Mē kajaja te mē apē inhō kagā pyrāk. Na ka prem ixte mē ajahkre ma nē Jejus kôt amnhī xunhwýr kurē kumrēx. Hāmri nhūm Tirtūm mē amā amnhī Karō rē nhūm mē amā agjé ka mē ý hā amnhī nhīpēx nyw o amnhī nhīpēx o apa. Hāmri nhūm mē akwýjaja amnhī jaēr pē mē ate amnhī nhīpēx nyw ā mē apumu nē mē atā axpēn mā ijarēnh o:

—Héxta waa nē. Pēr ām hāmri na pre Kris mē hwýr Pawre mē. Na pre ma mē hwýr mō nē mē kām Tirtūm kapēr o mē ahkre nhūm mē kuma nē amnhī tomnuj kaga hpa nē hpānhā Tirtūm kapēr kôt amnhī nhīpēx nē tām ri amnhī nhīpēx o pa. Ām hāmri na hte Pawre mē ahkre mex o pa. Héxta waa nē.

Anhýr o mē atā ijarēnh jakamā mo kaxyw kot pa kagā hkwý jamý nē amnhī kôt ho ixpa? Nā mē kajaja te mē apē inhō kagā pyrāk.

⁴ Na pa pre Jejus kôt amnhī xām nhūm Tirtūm ja hā ixpumu nē tanhmā inhmā kapēr o amnhīrit to nē inhmā:

—E Pawre. Kēr ka ma mē kām ixkapēr jarēnh o ri mē hkôt apa.

Anhýr jakamā na pa hte Tirtūm kamnār rom ā amnhī nhīpēx anhýr o ri mē hkôt ixpa.

⁵ Nom amnhī krā hkôt mē ahkre hkêt nē. Tanhmā kot pa we amnhī to nē amnhī krā hkôt mē kām kapēr o mē ahkre mex nē? Nā Tirtūm pix na hte ja kaxyw tanhmā ixkrā hto pa ô ri mē ahkre ho ri ixpa.

Tirtūm kapēr nyw jarēnh

⁶ Nē Tirtūm na hte tanhmā ixkrā hto pa Karō nhý hā mē piitā mē kām kapēr nyw jarēnh o ri ixpa. Amnepēm Tirtūm kot Ijaew mā mēmoj tā karō xwýnhnta. Mojes kot kapēr tūm jarēnh o pa xwýnhnta mex tā no nhūm mē tee ri hkôt kām amnhī nhīpēx prām o pa. Nē

xatā kamā harē nē omunh tā tee ri kot hkôt kām amnhī nhīpēx prām. Tā mē kot hkôt amnhī nhīpēx kēt mýrapē na prem pikaprār pan hapēx. No kēt Tirtŭm kapēr nywja. Jejus jarēnhja. Na hte Tirtŭm Karō tanhmā mē pahkrā hto pu mē Jejus kôt amnhī nhīpēx o ri papa. Jao mē pahpē pahťir tŭm nē papa mā xwýnh. No na hte nhām mē hkwyjaja kām harēnhja mar prām kēt nē amnhī jarēnh o:

—Nā kot paj amnhī krā hkôt ā amnhī nhīpēx anē nē ā amnhī nhīpēx anē nhŭm Tirtŭm ja hā ixpumu nē ictŭr tŭm nē ixpa mā xwýnh ā ɨjarē.

Anhýr tā no ām ā amnhī jarēnh anhýr kaprý. Tirtŭm Karō nhý hā mē kot amnhī to mex o mē pa xwýnh pixjaja koja mē htŭr tŭm nē pa ho pa.

⁷Nē Tirtŭm kapēr tŭmta na pre Mojes mē kām harēnh kaxyw nhŭm mēmoj tanhmā amnhī nhīpēx to rax kumrēx. Naja hkrakrak nē haxēnh nē kamā kamāt kō htyk. Hāmri nhŭm Tirtŭm mē kot hkôt amnhī nhīpēx kaxyw kēn po hā mē kām mēmoj tā karō nhŭm Mojes kumý nē mē hwýr o wrý nē mē kām kamā harē. Tirtŭm kot hirā htýx kamā kām kapēr nhŭm kuri mar o ām jakamā urāk nē ý hā hkuk nhīrā htýx kumrēx nē mē kām kapēr jarēnh o xa. Jakamā nhŭm mē tee ri kot hprī hā omunh mex kaxyw no ām nom gēk týx nē. Tā gaa nhŭm hkuk kām hirāja amnhŭm hprī nē hapēx o mō. Na pre ā Tirtŭm Ijaewjē mā kapēr tŭm nhōr anē. Hāmri nhŭm Mojesja ō ri mē kām kamā harē nē harēnh pa hāmri nē mē kām:

—E kēr ka mē Tirtŭm kapēr mar týx nē hkôt amnhī nhīpēx mex rāhā ho ri apa. Kēr ka mē nhýrmā atyk tā kē akupým mē ato mē atŭr ka mē ō krī kamā kuri atŭr tŭm nē amex nē apa ho apa. Anē.

Hāmri nhŭm mē kuma nē kām:

—Tōe. Nā kot paj mē hkôt pix mā ri amnhī nhīpēx mex rāhā ho ri ixpa.

Anhýr ā amnhī jarēnh tā no ām hkôt amnhī nhīpēx kēt nē nhŭm Mojes tee ri mē kot amnhī nhīpēx ā mē omu nē mē kām:

—Nā mē ate Tirtŭm kapēr kôt amnhī nhīpēx kēt jakamā kot kaj mē nhýrmā ty nē Tirtŭm pē awry rax kumrēx nē ri apa. Anē.

⁸Tā na hte Tirtŭm jarāhā axtem tanhmā mē pamā kapēr to. Pānhā kapēr nyw o kapēr nē mē pamā:

—Kot kaj mē Ixkra Jejus kôt amnhī xunhwý pa hā mē apunu nē mē ato ixkra. Hāmri nhŭm Ixkarō mē amā agjē. Anē.

Kapēr ja na mex kumrēx o kot kapēr tŭm jakrenh.

⁹Kapēr tŭmja mex tā nhŭm htem hkôt amnhī nhīpēx kēt nē. Jakamā na htem ty nē Tirtŭm pē awry rax ā ri pa. No kapēr nywja na tŭmta rom mex o mex. Na hte Tirtŭm mē pamā kapēr nywja jarēnh o:

—Kot paj tanhmā mē akrā hto ka mē amnhī to mex pix o ri apa. Jao ixkôt ri amnhī nhīpēx mex o ri apa. Anē.

¹⁰Nē kapēr tŭmja te kot kanē hpók kryre pyrāk. No kapēr nywja mex o kot tŭm jakrenh jakamā te kot mēmo hpók rŭnh o kanē hpók kryre jakrenh pyrāk. Jakamā nhŭm mē kot hirā rax kām ri mrar gryk ā hpók grire nhīrā kamā mrar kēt pyrāk.

¹¹Tirtŭm kapēr tŭm te kot Mojes kuk pyrāk. Na pre kamā hirā rax tā gaa nē amnhŭm hprī nē kamā hirā hapēx o mō. Nē gaa nē hapēx. No kēt Tirtŭm kapēr nywja te kot Tirtŭm nhīrā htýx rāhā ho rāhāta pyrāk. Koja urāk nē aa hapēx kēt kumrēx.

Ijaewjē jarēnh

Rōmān 11.7-10

¹²Nē Tirtŭm kapēr nywja mex o mex jakamā na pa hte ixāmnhix mē kām harēnh o ri ixpa.

¹³Te ixte Mojes kot amnhī nhīpēx pyrāk kēt. Na pre hte Mojes ixkŭnhā āmnhix Ijaewjē mā Tirtŭm kapēr jarēnh o ri pa hkēt nē. Mē kot hkuk kām hirāta ra hapēx o mōr ā omunh nhŭm hpijāam pymaj na pre kupēx puroore ho amnhī kuk pro nē ri mē hkôt pa.

¹⁴Jakamā nhŭm prem hprī hā hkuk kām hirā pumunh mex kēt nē. Nē Tirtŭm kapēr ā kagā htŭmja nhŭm prem määnēn hprī hā mar mex kēt nē. Mē hkrā hihtýx jakamā te mē kot amnhī jamak pro nē mēmoj mar mex kēt pyrāk jakamā mē kot mar tā hprī hā mar kēt nē. Nē hkôt ri amnhī nhīpēx mex kēt nē. No mē kot Kris kôt amnhī xunhwýr xwýnhjaja na hte Tirtŭm amnhī tā mē omu nē te mē nē mē hamak hpro xāta rēnh par nē rēnh pyrāk o mē hipēx nhŭm mēhprī hā kapēr mar týx nē.

¹⁵Tā na hte Ijaewjaja arī jarāhā Mojes kot Tirtŭm kapēr ā kagā htŭm kamā harēnh o pa. Nom arī mē hkrā hihtýx jakamā te mē kot amnhī jamak pro nē kamā harēnh o pa pyrāk o amnhī nhīpēx jakamā kormā hprī hā mar kēt nē.

¹⁶Tā koja mē hkwyjaja Pahihti Jejus Kris kôt amnhī xunhwýr nhŭm amnhī tā omu nē te kot mē hamak nē hpro xā hpyr nē mēnh pyrāk o mē hipēx nhŭm mēhprī hā kapēr nyw mar týx nē.

¹⁷Pahihti mē Karōja wa htipxi jakamā na hte mē pakamā agjē nē hprī hā mē pamā kapēr o amnhīrŭt o pa.

¹⁸Ra mē pahte Pahihti Kris kôt amnhī xunhwýr jakamā te mē pahte mē kot amnhī jamak pro xwýnh kot amnhī nhīpēx pyrāk kēt. Nhŭm Pahihti Karōja tanhmā mē panhīpēx to pu mē ra hkôt amnhī nhīpēx mex o mō. Jakamā na htem mē pahte amnhī nhīpēx nyw pumunh kôt Tirtŭm kot tām amnhī nhīpēx ā omunh kurē kumrēx. Kormā mē pahte hkôt amnhī nhīpēx mex

kumrēx kēt tā ra hkôt amnhī nhīpēx mex o mō. Jao te tām kot amnhī nhīpēx pyrāk o amnhī nhīpēx o mō.

4

*Jejus kapēr te kēp kanē pyrāk ā harēnh
Wam Korīt 2.1-5; Sikūn Korīt 1.12; Wam
Tesarōn 2.1*

¹ Nē na pre Tirtūm ixto mex nē tanhmā kām ixàpēnh to hā inhmā karō. Ixte ma mē kām kapēr jarēnh o ri mē hkôt ixpa kaxyw. Jakamā na pa hte ixàmnhīx mē hkôt mē kām harēnh o ri ixpa.

² Nhūm mē hkwjyaja axtem nē ixēx o ri ixpa hā ijarēnh tā ixte ā amnhī nhīpēx anhūr kēt. Na pa hte amnhī tomnuj o ri ixpa hkēt nē. Mē hkwjyaja kot mē no kupyw kaxyw mē kām Tirtūm kapēr o hēx o pa htā pa na pa hte ā amnhī nhīpēx anhūr kēt nē. Ixpri hā mē kām harēnh o ixpaja na inhmā hprām jakamā na pa hte ixkatāt kôt harēnh o ri mē hkôt ixpa. Mē piitā mē kot ixēx kēt kôt ixpumunh mex kaxyw. Tirtūm kot ixēx kēt kôt ixpumunh mex.

³ No nhỹrmā mē htyk nē ma kuwy hwūr mē pa mā xwŷnh pixjaja na htem hprī hā ixkapēr mar mex kēt nē.

⁴⁻⁶ Satanasti tām kēp mē hpām. Kēp mē kām Tirtūm kapēr mar prām kēt xwŷnh piitā mē hpām. Jakamā na pa hte mē kām tanhmā Jejus jarēnh to. Kēp Tirtūm Kra hā harē nē te kot Tirtūm kot amnhī nhīpēx pyrāk ā harēnh o ri ixpa. Hāmri nhūm Satanasti tee ri ja hā ixpumu nhūm ja kēp omnuj nē. Jakamā nhūm tanhmā Tirtūm nē mē hkrā hto nē te mē hamak pro pyrāk o mē hipēx. Mē kot hprī hā Jejus jarēnh mar nē hkôt amnhī xunhwūr pymaj nhūm ā nē mē hipēx anē. Jejus jarēnh te kēp kanē hpōk mex pyrāk jakamā mē kot mar kēt xwŷnhjaja te kamāt kō kamā ri mē pa pyrāk. No nhūm Satanasti tām kot nē mē no kupyw jakamā nhūm htem ā ri kamāt kō kamā mē pa pyrāk o amnhī nhīpēx anē.

Amnepē mā kormā mēmoj kēt ri nhūm kamāt kō pix. Tā nhūm Tirtūm tanhmā kapēr to nē kapēr o:

–E kē hirā kato. Anē.

Hāmri nhūm ra kapēr xā hkôt hirā kator kurē kumrēx. Tā ja pyrā nē na pa pre kamāt kō kamā ixtýx ri ixpa pyrāk nhūm Tirtūm te kot inhmā kanē hpōk nhūm hirā pyrāk o inhīpēx pa mex o mex ā omunh kurē kumrēx. Hāmri nē Jejus Kris kot amnhī nhīpēx ā omu nē te Tirtūm kot amnhī nhīpēx ā omunh pyrāk. Wa kot amnhī nhīpēx te kot axpēn pyrāk.

Nē na pa hte pam tanhmā amnhī jarēnh to ho ri ixpa hkēt nē. Ām Jejus Krisja pix na pa hte harē. Tapxipix na kēp mē panhō Pahīti. Jakamā hkīnhā te ixpē mē amā

ixàpēnh xwŷnh pyrāk o na pa hte mē amā kapēr jarēnh o ri mē akôt ixpa.

*Pawre te kēp poti grāre nhīpēx pyrāk ā
harēnh*

Wam Korīt 2.4-5; Sikūn Korīt 11.23, 12.9

⁷ Nē Tirtūm ixrom hihtýx o hihtýx. No pa na hkīnhā ixihtýx kēt. Te ixpē poti grāre nhīpēx pyrāk jakamā na pa hte Tirtūm xih-týx xwŷnh pix nhỹ hā mē kām kapēr jarēnh o ri mē hkôt ixpa. Nhūm htem inhma nē ām hāmri ixte ý hā ixkapēr ā ixpumunh kurē kumrēx. No pa ixte amnhī krā hkôt ixkapēr ā ijarēnh kēt nē.

⁸ Na pa hte mē hkôt mē kām Jejus jarēnh o ri ixpa nhūm mē hkwjya tōhā inhma nē ja hā inhīpēx kati nē pa amnhī xā htýx kamā ama. Nom nhūm Tirtūm mē kutā tanhmā ixkrā hto pa inhmā amnhī xā kamā ijamak puma hkēt nē arī mē kām kapēr jarēnh o ri mē hkôt ixpa. Nē amnhī kaxyw Jejus kôt pix mā ijamaxpēr týx rāhā pé tee ri amnhī kukamā ijamaxpēr o ri ixpa hkēt nē.

⁹ Nē mē kām ixkurē xwŷnhjaja ohtōō. Na htem xatā Jejus ā tanhmā ixtomnuj to htā pa kormā ixtýk kēt nē. Na pa hte Tirtūm kamnār rom arī mē hkôt ixpa nhūm Tirtūm ixkōt pa ho pa.

¹⁰ Na htem Jejus pyrā nē ixpīr kaxyw tanhmā inhīpēx to. No ām ko. Kōja mē nhỹrmā ixpī rý ko. Ixte amnhī kukamā ixāhpumunh kēt. Kot paj ām arī ixtir ri mē kām Jejus jarēnh o ri mē hkôt ixpa. Kēr-kē mē hkwjyaja ixkapēr ma nē axpēn mā tanhmā Jejus jarēnh to nē harēnh o:

–Nā pēr ām hāmri na pre Jejus akupým htir nē tanhmā hkwjýjē ho mex to. Ām hāmri na hte Pawre ja hā harē. Anē.

¹¹ Mē kot Jejus ā ixpīr mā tā pa arī mē kām akupým htir ā harē. Tirtūm na hte ja kaxyw tanhmā ixkrā hto pa arī mē kām harēnh o ri mē hkôt ixpa.

¹² Na pa pre ra mē amā harē ka prem inhma nē Jejus kôt amnhī xunhwūr kurē kumrēx nē amnhī nhīpēx nyw o amnhī nhīpēx o ri apa. Jakamā ixpyrā nē mē apē atūr tūm nē apa mā xwŷnh. Nhūm htem piitā mē ate Jejus kôt amnhī xunhwūr ā mē apumu. Tā nhūm mē kot Jejus ā ixpīr kaxyw. Nom kwār mē māmri ixpī. Ja inhmā tanhmā kute hkēt. Mē kot ixpīr mā tā kot paj arī Jejus kapēr jarēnh o ri ixpa rāhā ty. Ra mē kot ixkapēr mar nē Jejus kôt amnhī xunhwūr xwŷnhjaja mē pahpyrā nē kēp htir tūm nē pa ho pa mā xwŷnh kēnā.

¹³ Jakamā kwār mē māmri ixpī. Na pa hte arī amnhī kaxyw Tirtūm kôt ijamaxpēr mex rāhā nē. Amnepē mā na pre Pahi finat Tawija tanhmā Tirtūm kapēr jarēnh to nē harēnh o:

Âm hãmri na Tîrtûm kapêrja. Hêx kêt jakamã na pa hte mê kãm harênh rãhã ho ri ixa. Anê.

Tã pa hte Tawi pyrã nê mê piitã mê kãm Tîrtûm kapê jarênh o ri ixa. Tîrtûm kot mê pamã tanhmã mêmoj to hêx to hkêt.

¹⁴ Ra kot amnhî jarênh xã hkôt akupÿm Pahihti Jejus o htîr jakamã kot puj mê nhÿrmã urãk nê ty nhÿm akupÿm mê pahto mê pahîr nê ma war amnhî wÿr mê pahto api.

¹⁵ Amnepê m na pa pre ma mê awÿr mō nê mê akôt mê amã Tîrtûm kapê jarênh o ri ixa. Ka prem inhma nê Jejus kôt amnhî xunhwÿ nê ixyrã nê Tîrtûm mã mex o mex ã harê. Jakamã kwãr mê mãmri Jejus ã tanhmã inhîpêx to. Koja mê gaa nê rî mê hkwyjaja mê pahpyrã nê Jejus kôt amnhî xunhwÿ nê Tîrtûm mã mex o mex ã harê.

Pawre tee ri amnhî kukamã hamaxpêr kêt ã kot amnhî jarênh

Rômãn 8.17; Sikûn Korîit 1.7; Wam Pêtre 1.3-9, 4.12-16, 5.10

¹⁶ Jakamã na pa tee ri amnhî kukamã ijamaxpêr o ixkapri nê ixa hkêt nê. Mê kot Jejus ã tanhmã ixtomnuj to htãã pa hte ixãmnhîx kapê jarênh o ri ixa. Ra ixpigêt nê ixirerek o inhmôr tã inhôpinh xã kaxwÿnh kãm ijamaxpêr o Jejus kôt amnhî nhîpêx mex o mō.

¹⁷ Mê kãm ixkurê xwÿnhjaja na htem Jejus ã inhîpêx kati htã ã inhîpêx anhÿr japiê hkêt nê. Nom kot paj nhÿrmã ty nhÿm Jejus akupÿm ixto ixtîr pa Tîrtûm mê wa kuri inh mex kumrêx nê ixa ho ixa. Mê kot ixtomnujja na mê ho apkati grêre no kot paj nhÿrmã Tîrtûm mê Krata wa kuri inh mex kumrêx nê ixtîr tûm nê ri ixa ho ixa. Jao rãhã ho rãhã.

¹⁸ Jakamã na pa tee ri mê kot tanhmã ixtomnuj tota kukamã ijamaxpêr o ri ixa hkêt nê. Ja koja tokyx hapêx. Na pa hte am nhÿrmã Tîrtûm nhô krî kamã inh mex nê ixkînh rãhã ri ixpaja pix kukamã ijamaxpêr o ri ixa.

5

Mê panhî nyw jarênh

Piripos 3.21; Sikûn Pêtre 1.13-14

¹ Nê mê panhîja te kot tyrti hō ho ixkre pyrãk. Na htem tyrti hō ho ixkre nhîpêx nhÿm gaa nê hapêx. Tã mê panhîja na hte urãk nê hapêx tokyx anê. Na pu htem ri papa nê gaa nê pawej nê ty. Tã nhÿm Tîrtûm hpãnhã mê pahpê hkrajê mã mê panhî nyw gō pu mê kuri ô krî kamã pamex kumrêx nê pahîr tûm nê papa ho papa.

²⁻³ Na pu htem jar pahpunuj nê papa. Nê mê paxã nhi nê mê pahkapri nê. Mê panhî htÿmja te kot mê paxê htÿm pyrãk jakamã na pu htem ty nê te paxê htÿm kwÿrÿnh nê hpãnhã nyw jagjênh pyrãk o amnhî nhîpêx.

Tã na pu htem amnhî kukamã panhî nywja mã pajamaxpêr o ri papa. Kot pu mê kaxkwa kamã pahkarô pix nê ri papa hkêt nê. Mê panhî nyw ã kot puj mê ri papa ho papa.

⁴ Nê na pu htem jar pahpunuj nê pamex kêt nê ri papa. Nê tokyx mê pahtyk nê panhî htÿm o pajapêx nê hpãnhã panhî nyw ã mê papa hprãm. Tã koja Jejus tokyx akupÿn wrÿk japêr pu mê pahtyk kêt rãhã tokyx panhî nywta o panhî nyw. Nom koja tokyx akupÿn wrÿk kêt japêr pu mê nhÿrmã ty nhÿm Tîrtûm akupÿm mê pahto mê pahîr nê mê pamã mê panhî nyw gō pu mê ho panhî nyw.

⁵⁻⁶ Na pre ra Tîrtûm mê panhî nyw kukamã hamaxpêr nê mê pahîr tanhmã amnhî jarênh to. Nê mê pahwÿr Karô rê nhÿm mê pahkarô mã agjê pu mê ja hã amnhî pumu nê pahkînh nê pajamaxpêr o:

—Nã ra Tîrtûm kot ixwÿr amnhî Karô mênh nhÿm ixkarô mã ar jakamã koja mãânên nhÿrmã inh mã inhî nyw gō. Kormã inhî htÿm kamã ixa nê Pahihti Jejus mê wa ô krî kamã ixa hkêt tã koja nhÿrmã inh mã inhî nywja gō pa inhî nyw o wa kuri ixa ho ixa. Nã koja ã inhîpêx anê.

Anhÿr o pajamaxpêr pê pahkînh nê papa.

⁷ Nê mê pahte jar pano ho nhÿri Jejus pumunh kêt tã no am panhîpinh xã kaxwÿnh kãm kãm pajamaxpêr mex nê.

⁸ Jakamã na pu mê tee ri amnhî kukamã pajamaxpêr o papa hkêt nê. Na pu htem am tokyx mê pahtyk nê ma Pahihti Jejus nhô krî hwÿr paxãpir jamãr o papa. Ô krîja kêp mê papapxã kumrêx jakamã na pu htem ma hwÿr paxãpir pix kukamã pajamaxpêr rãhã nê.

⁹ No am mê pamã ja pix prãm kêt. Na pu htem mãânên pamã Jejus mã hprãm xã hkôt nhÿri tanhmã kãm amnhî nhîpêx to ho ri papa hprãm o papa. Jar mê panhî htÿm rãhã rÿ mÿtar kuri ô krî mex kãm mê panhî nyw ã tanhmã kãm amnhî nhîpêx to ho ri papaja na mê pamã hprãm.

¹⁰ Nê na hte Krisja jar mê pahte tanhmã amnhî nhîpêx to hã mê pahpumunh o hkrî. Mê pahte tãm amnhî nhîpêxja nê mê pahte amnhî tomnujja nhÿm hte hã mê pahpumunh rãhã ho hkrî. Tã koja nhÿrmã kot mê pahte tanhmã amnhî nhîpêx to hã mê pahpumunh kôt tanhmã mê panhîpêx to. Mê pahte tãm amnhî nhîpêx o ri papa xwÿnhjaja koja ra mê panê htyk kukwak ri mê pahto mex nê. No mê kot amnhî tomnuj o mê pa xwÿnhjaja koja mê homnuj tÿx nê. Jakamã na pa inh mã kãm hprãm xã hkôt pix mã amnhî nhîpêx o ixa hprãm nê.

Mē pajamaxpēr nyw jarēnh
Rōmān 6.4-6; Sikūn Korīt 4.2; Epes 4.22-24; Korosē 3.9-10

¹¹ Nē Tirtūm kot hprī hā mē pahpumunh rāhā ho hkrī jakamā inhmā kām hprām xā hkôt pix mā amnhī nhīpēx o ri ixpa hprām. Mān ka mē ra ja hā ixpumunh mex nē rý ko. Mē piitā mē kot hkôt amnhī xunhwýr prām xāj na pa hte mē kām kapēr jarēnh o ri ixpa.

¹² Nom ixte ja hā amnhī to jarkrar o ri ixpa hkēt. Ām mē ate inhmār nē mē kēp Kris nhý hā mē ahkre hā amnhī to hēx xwýnhjē mā tanhmā ijarēnh to kaxyw na pa ā mē amā amnhī jarēnh anē. Mē kot Tirtūm kapēr jahkre mex kumrēx ā amnhī to jarkrar tā na htem hkôt amnhī nhīpēx kēt nē. Tā mē ate aprī hā ixte Tirtūm kapēr kôt amnhī nhīpēx mex ā ixpumunh nē tanhmā mē kām ijarēnh to kaxyw na pa ā te ixte amnhī to jarkrar pyrāk o mē amā amnhī jarēnh anē.

¹³⁻¹⁴ Mē kot ixkrā pipānh ā ijarēnh tā Tirtūm na mē akaxyw ixām pa hte mē amā kapēr jarēnh o ri mē akôt ixpa. Ixkrā pipānh kēt. Ixte Tirtūm kām hprām xā hkôt tanhmā amnhī nhīpēx to xwýnh na pa. Tā mēmo kaxyw na pa hte ā kapēr jarēnh rūnh anhýr o ri mē akôt ixpa? Nā inhmā mē akīnh kēnā. Mē ate Tirtūm kôt tām amnhī nhīpēx prām xāj na pa hte ā mē amā kapēr jarēnh anhýr rāhā nē. Kris na pre tanhmā ixto pa inhmā mē akīnh nē. Te tām kām mē ajapē pyrāk. Na pre Kris amnhī grōnh kôt mē pahpiitā mē nē ty. Tirtūm kot mē pahte amnhī tomnuj mýrapē tanhmā mē pahto pymaj nhūm mē pahpiitā mē panē ty. Jakamā te mē pahpiitā Jejus kôt mē pahtyk pyrāk o na pu htem amnhī nhīpēx. Jao te mē pahte amnhī nhīpēx tūmja mē pahpē hapēx par pyrāk o pu mē amnhī nhīpēx nyw o amnhī nhīpēx o ri papa.

¹⁵ Mē pajamaxpēr nyw o tām mē pahte amnhī nhīpēx o papa kaxyw na pre Jejus mē panē ty. Jakamā na pu htem axte amnhī pix kukamā ri pamā mēmoj prām o ri papa hkēt nē. Na pu htem māānēn Tirtūm kām hprām xā hkôt tanhmā kām amnhī nhīpēx to ho ri papa. Ja kaxyw na pre Tirtūm akupým Kris o htír pu mē kukwak ri pajamaxpēr nyw o amnhī nhīpēx o papa.

¹⁶ Jao mē piitā mē hkrā hkā hā mē omunh xā hkôt pix mā tanhmā mē harēnh to hkēt nē. Mē kot amnhī tomnuj ā mē harēnh rý mē kot amnhī to mex ā mē harēnh kēt nē. Amnepē mā na pa pre ā Kris jarēnh anē nē harēnh o:

—Nā Krisja na hte mē pahte amnhī nhīpēx kôt amnhī nhīpēx kēt nē. Ām ri kot mē pahte amnhī nhīpēx kwým ri amnhī nhīpēx jakamā kot amnhī tomnuj týx xwýnh na.

Anhýr ā harēnh o ixpa. Tā axte ā harēnh anhýr hkēt nē. Kot amnhī tomnuj xwýnh

kēt jakamā na pa hte hpānhā hkôt pix mā tanhmā kām amnhī nhīpēx to ho ri ixpa.

Mē pahpē Tirtūm krāmnhwý hā mē pajarēnh

Rōmān 5.1, 5.10; Epes 6.20; Korosē 1.20

¹⁷ Nē koja mēhō Kris kôt amnhī xām nhūm kot amnhī nhīpēx tūmja kēp hapēx nhūm hpānhā kot amnhī nhīpēx nyw pix o amnhī nhīpēx nē hamaxpēr nyw pix o hamaxpēr.

¹⁸ Tirtūm na hte tanhmā mē pahto pu mē ā amnhī nhīpēx anhýr o ri papa. Na pu prem pamā hkurē htā nhūm Kris kukwak ri mē pahte hkôt amnhī nhīpēx xwýnhjē ho hkrāmnhwý. Hāmri nē tanhmā mē pahte amnhī nhīpēx to hā mē pamā karō nē mē pamā:

—E kēr ka mē ma krī piitā hkôt ri mē kām ixkapēr jarēnh o ri apa kē mē ama nē mē apyrā nē Kris kôt amnhī xunhwý. Pa ja hā mē omu nē ixte mē anhīpēx pyrā nē mē ho ixkrāmnhwý. Anē.

¹⁹ Jakamā na pa hte ma mē kām kapēr jarēnh o ri mē hkôt ixpa nē mē kām:

—E pa mē amā mēmoj mex jarē ka mē inhma. Nā na pre Krisja mē pahte amnhī tomnuj mýrapē mē panē ty. Nē htýk o Tirtūm mā mē pahpānhā amnhīrer par kumrēx. Jakamā na ra Tirtūmja Kris kukwak ri kām mē pahpiitā mē pahto hkrāmnhwý prām. Kōja kukwak ri mē pahte amnhī tomnuj piitā ho hamakētcati nē axte kām hamaxpēr kēt kumrēx. Kām mē pahto hkrāmnhwý hprām jakamā koja ā mē panhīpēx anē. Jakamā e kwa mē tokýx Kris kôt amnhī xunhwý kē Tirtūm kot inhīpēx pyrā nē mē ato hkra nē mē ato hkrāmnhwý.

Anhýr o mē kām harēnh o ri mē hkôt ixpa.
²⁰ Kris kot mē apiitā mē awýr inhmēnh jakamā na pa hte ý hā mē amā kapēr jarēnh o ri mē akôt ixpa nē mē amā:

—E Tirtūm kām mē ajapē jakamā na mē awýr inhmē na mō. Jakamā kwa mē tokýx amnhī tomnuj kaga nē hkôt amnhī xunhwý. Kē amnhī tā mē apumu nē mē ato hkrāmnhwý. Anē.

²¹ Krisja aa kot tanhmā amnhī tomnuj to hkēt kumrēx tā nhūm pre Tirtūmja te mē kot amnhī tomnuj týx kumrēx xwýnh pyrāk o hipēx. Tā mēmo kaxyw na pre ā hipēx anē? Nā mē panē kēnā. Mē pahte hkôt amnhī xunhwýr nhūm kot mē panhīpēx o te aa mē pahte amnhī tomnuj kēt kumrēx xwýnh pyrāk o mē panhīpēx kaxyw na pre ā mē panē Krata nhīpēx anē.

6

¹ Tā kot ā Kra nhīpēx anhýr jakamā kwa mē ixkapēr ma nē mar týx nē. No mē ama nē ām mar kēt nē. Tirtūm kām mē pajapē htýx jakamā mē pakutā nojarēt rāhā ho pa.

Kumã na pa hte ã mẽ amã kapêr jarênh anhÿr o ri mẽ akôt ixpa.

² Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhî to ixwÿ pa pre mẽ ama nê mẽmojtã pê mẽ apytã nê mẽ ato mex nê. Anê.

Jakamã kwa mẽ inhma. Tirtûm kãm mẽ ate amnhî tomnuj pê mẽ apytãr prãm tÿx jakamã kwa mẽ tokyx amnhî to awÿ kê ã kêp mẽ apytãr anê.

Mê kot Kris ã tanhmã Pawre nhîpêx to hã mẽ harênh

Sikûn Korîť 4.7, 11.23-33; Korosê 1.10

³⁻⁴ Nê mẽ kot Tirtûm kapêr mar nê hã ixtomnuj tã pa hte amnhî katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arî mẽ kãm kapêr jarênh rãhã ho ri mẽ hkôt ixpa. Mê kot mar nê ãm mar nê hkaga pymaj na pa hte ã amnhî nhîpêx anhÿr rãhã nê. Mê kot ja hã inhîpêx punuj tã pa arî mẽ kãm harênh o ri mẽ hkôt ixpa.

⁵ Mê kot Kris ã ixtak nê ijagênh nê tanhmã ixto kaxyw ixtã htu htã pa hte mẽ kutã amnhî to htÿx nê ixkuhê. Na pa pre hte Tirtûm mã mẽ kãm kapêr jarênh rax nê. Jao tãhã inhôt kêt nê inhôtuxwa ho ri mẽ hkôt ixpa. Nê tãhã inhmã prãm tÿx nê ri ixpa. Tã no ãm arî mẽ kãm kapêr jarênh rãhã nê.

⁶ Inhmã tanhmã ixte amnhî tomnuj to hprãm kêt. Inhmã Tirtûm kot amnhî nhîpêx kôt pix mã amnhî nhîpêx prãm. Nê inhmã inhgryk tokyx anhÿr prãm kêt. ãm inhmã mẽ piitã mẽ hkĩnh kãm mẽ ho mex pix prãm. Á na pa hte Tirtûm Karô nhÿ hã amnhî nhîpêx anhÿr o ri mẽ hkôt ixpa. Mê kot ja hã ixpumunh nê ra Tirtûm kapêr ma nê hkôt amnhî xunhwÿr kaxyw.

⁷ Na pa hte ixkatãt kôt mẽ kãm ixkapêr mex pix nê. Tirtûm xihtÿx xwÿnhja nhÿ hã ri mẽ kãm kapêr jarênh jao tãm amnhî nhîpêx nê tãm ri ijamaxpêr o ri mẽ hkôt ixpa. Jakamã na htem ja hã ixpumu nê ixte Tirtûm kapêr jarênh ma nê hkôt amnhî xunhwÿr.

⁸ Na hte mẽ hkwÿjaja kãm ixkĩnh nê nhûm mẽ hkwÿjaja axtem kãm ixkurê nê. Nê mẽ hkwÿjaja amnhîm inhmem ã ijarê nhûm mẽ hkwÿjaja axtem axpên mã tanhmã ixto kapêr punuj to. Mê kot ixêx nhî hã ijarênh tã pa hte ixkatãt kôt mẽ kãm ixkapêr o ri ixpa. Nom kwãr mẽ mãmrî tanhmã ri ixto kapêr to. Ja tanhmã inhmã kute hkêt.

⁹ Na hte mẽ hkwÿjaja ixkamã ôkre kahak nê pika piitã hkôt axpên mã tanhmã ijarênh to ho pa. Mê kãm ixpîr prãm tã no pa arî ixtîr nê ixpa. Mê kot Jejus ã ixtomnuj tÿx tã kormã ixpîr kêt nê pa ri ixtîr nê ixpa.

¹⁰ Ixte Kris ã amnhî xã htÿx kamã ijamak o ri ixpa htã arî ixkĩnh nê ixpa. Nê ixkãxpore hkêt tã nhûm mẽ ohtô nê ixte mẽ kãm Jejus kapêr jarênh kukwak ri mex nê pa. Nê

ixkukrêx rax kêt tã nhûm Tirtûm ixto mex nê pa inhmem nê ixpa. Tã kot paj nhÿrmã ô krî kamã kuri inhmem kumrêx nê ixtîr tûm nê ixpa ho ixpa. Jakamã na pa hte arî mẽ kãm Jejus kapêr jarênh o ri mẽ hkôt ixpa.

¹¹ E Korîť kãm ixkrãmnhwÿjaja. Na pa ixpîr hã mẽ amã amnhî nhîpêx jarênh par kumrêx.

¹² Inhmã mẽ akĩnh tÿx tã te mẽ amã ixkĩnh kêt pyrãk.

¹³ Kwa te mẽ ate ixto mẽ akatut nê akuhê pyrãk o inhîpêx kêt nê. Amnhî pyrã nê amã ixkĩnh nê hkêt wehe. Te mẽ apê ixkra pyrãk o na pa ã mẽ amã ixkapêr anê.

Te mẽ pahpê Tirtûm nhôrkwÿ pyrãk ã mẽ pajarênh

Wam Korîť 10.20-22, 15.33; Epes 5.3-14; Sikûn Ximotre 2.4; Xiakre 4.4-5; Wam Pêtre 2.11, 4.1-6

¹⁴ Nê kêr ka mẽ kot Kris kôt amnhî xunhwÿr kêt xwÿnhjê mẽ mẽmojtã tanhmã axpên mar to hkêt nê. Rÿ mẽhõ ho amjên rÿ mẽhõ ho aprõ hkêt nê. Ahpÿnhã mẽ pajamaxpêr kênã. Tanhmã kot we mẽ hamaxpêr nyw xwÿnhjaja nê mẽ hamaxpêr tûm xwÿnhjaja amnhî to nê axpên kôt hamaxpêr nê ri axpên kôt pa? Nã koja mẽ ã amnhî nhîpêx anhÿr kêt nê. Ahpÿnhã mẽ pajamaxpêr. Na hte hirã htÿxja kamãt kô mẽ pihkãr kêt nê.

¹⁵ Xã na hte Kris mẽ Satanasti wa axpên kôt hamaxpêr? Nã wa kot axpên kôt hamaxpêr kêt. Ahpÿnhã wa hamaxpêr nê ahpÿnhã wa kot amnhî nhîpêx. Nê ahpÿnhã hirã nê ahpÿnhã kamãt kô. Nê mẽ pahpê Kris kwÿjaja nê mẽ kêp hkwÿy hkêt xwÿnhjaja ahpÿnhã mẽ pajamaxpêr nê ahpÿnhã mẽ pahte amnhî nhîpêx.

¹⁶ Na pu htem Tirtûm mã amnhî jarênh xã hã ixkre kamã sãnti xunhwÿr nê amnhî to hwÿr pê kãm mex o mex ã harênh kêt nê. Axtem na sãntija. Mê panhõ Tirtûmja sãnti rom htîr tûm rãhã nê pa ho pa xwÿnh. Nê mẽ papajaja te mẽ pahpê Tirtûm nhôrkwÿ pyrãk. Kapêr ã kagã htûm kot ja jarênh kôt: Ixkrajaja te kêp inhôrkwÿ nhûm ixpê ô dön pyrãk. Te ixpê inhôrkwÿ kamã ixpa xwÿnh pyrãk jakamã kot paj ixkrajê kamã ri ixpa ho ixpa. Ixpê Mêhpãm na pa. Anê.

¹⁷⁻¹⁸ ã Tirtûm xihtÿx xwÿnhja kot amnhî jarênh anhÿr jakamã na hte mẽ kot amnhî tomnuj xwÿnhjê nê mẽ pahkurê ho:

Kêr ka mẽ hkôt ri apa hkêt nê. Kwarî ho kwari.

Nê mẽ hkôt ri amnhî nhîpêx o apa hkêt nê. Kot kaj mẽ ixkapêr ma nê ixkôt amnhî nhîpêx hã kot paj amnhî wÿr mẽ awÿ nê mẽ ato ixkra.

Nê pa kot paj ixpê Mëapãm maati. Anê.

7

¹ Tā ā Tirtūm kot mē pahto hkra nē mē pahkōt pa ho pa hā amnhī jarēnh kot anhūr jakamā kwa ixkrāmnhwījaja. Kēr pu mē kapēr ma nē tanhmā amnhī tomnuj to hkēt nē. Nē mēmoj punuj kukamā pajamaxpēr kēt nē. Nē ām kapēr kōt pix mā amnhī nhīpēx mex rāhā nē.

Pawre kot Korīt nhō xwñnhjē nhī hā hkīnh ā harēnh

² Nē kwa Kris kōt ixtō nē ixtōxjaja. Kēr ka mē tee ri amnhī tā tanhmā inhmā ajamaxpēr to hkēt nē. Na pa pre tanhmā mē atō hto hkēt nē. Rū tanhmā mē atō hto ka mē ja hā ixpumu nē ixkōt tanhmā amnhī tomnuj to hkēt nē. Rū pa pre ixēx rom tanhmā mē anokupyr to ho ri ixpa hkēt nē. Kwa mē amā ixkīnh nē tokyx ixkōt ajamaxpēr kēt wehe.

³ Mē ate inhmar nē amnhī tā apijaām kaxyw na pa ā mē amā ixkapēr anhūr kēt nē. Inhmā mē akīnh kēnā. Na pa pre inhmā mē akīnh ā amnhī jarēnh rax nē. Inhmā ri mē akōt ixpa rāhā ho ixpa hprām. Rū ka mē nhūrmā apiitā apikaprār par japēr pa inhmā mē akōt ixtyk prām nē.

⁴ Na pa hte ra mē amā ijamaxpēr pē ixkīnh nē ixpa. Nā kot kaj mē ixkapēr ma nē Jejus kōt amnhī nhīpēx mex nē. Tā kēr ka mē ā amnhī nhīpēx anhūr rāhā nē. Na pa hte jar ra amnhī xā htīx kamā ijamak o ri ixpa htā no ām mē amā ijamaxpēr nē ixkīnh nē.

⁵ Nē na pa pre amnē Masetōn wūr kormā Xitre japēr o mō. Hāmri nē Masetōnja wūr pōj nē hapēr pē mē kām Jejus kapēr jarēnh o ri mē hkōt ixpa. Hāmri nhūm mē kām ixkurē xwñnhjaja Kris ā inhīpēx punuj nē hā inhmā ākjēr pix o pa. Hāmri nē mā Masetōn kamā krī piitā hkōt ri mē kām ixto kapēr punuj nē pa amnhī tā mē mar o ri mē hkōt ixpa. Nē mē kajaja mē ate Kris kaga nē nhām mē hamaxpēr kōt amnhī nhīpēx pymaj na pa pre tee ri mē akukamā ijamaxpēr o ri mē hkōt ixkaprī nē ixpa.

⁶ Tā Tirtūm kēp mē hkaprī xwñnhjē pumunh nē akupūm mē ho mē hkīnh xwñnh jakamā na pre ixkaprī hā ixpumu nē ixwūr Xitre mē. Pa pre omu nē akupūm ixkīnh nē tām ijamaxpēr.

⁷ No ām Xitre pumunh kōt pix mā ixkīnh kēt. Na pre ixwūr pōj nē tanhmā inhmā mē ajarēnh to nē mē ate tanhmā ho mex to hā mē ajarē. Nē mē amā ixpumunh prām tīx ā mē ajarē. Nē Kris kōt mē atōta hpijaām kēt o pa nhūm ixte kagā kamā hā mē amā ixākjēr nhūm mē ate ja hā omunh nē ra amnhī kamā apijaām o akaprī htīx ā mē ajarē. Nhūm Tirtūm kot inhñē mē kām ixkurē xwñnhjē pumunh mex kaxyw mē ate ixto hwūr ā mē ajarē. Na pre ā inhmā mē ajarēnh anē pa kuma nē mē anhūr hā ixkīnh tīx kumrēx.

⁸⁻⁹ Nē wam ixte mē amā kagāta nhīpēx kēt ri na pa pre tee ri mē ate amnhī nhīpēx ā mē ajarēnh ma nē mē akaxyw hipēx. Nē kamā mē ate hpijaām kēt xwñnhā kot tanhmā amnhī nhīpēx to hā omunh nē ām omunh o arī hkōt apa hā kagāta kamā mē amā akir hāmri nē Xitre mā kugō nhūm kupy nē ma mē awūr o mō. Tā ka xep prem kamā harē nē ama nē amnhī kamā apijaām nē. Nē akaprī nē ajamaxpēr o:

—Hēxta waa nē. Ām hāmri na Pawre ā mē ijarēnh anē. Na pa mē ā amnhī nhīpēx anē nē amnhī tomnuj tīx nē. Anē.

Tā nhūm Xitre akupūn ixwūr pōj nē inhmā mē ajarē. Pa mē ajarēnh ma nē tee ri ijamaxpēr nē ijamaxpēr o:

—Hēxta waa nē. Mon pa pre axtem nē ā ri mē kām ixākjēr anē? Nā na xep prem kagāta kamā harē nē kuma nē hkaprī htīx nē. Anē.

Tā ām hāmri na pa pre ā mē akaxyw hipēx nē mēmojta ā mē amā ixākjēr anē. Na ka xep prem kamā harē nē ama nē tee ri ajamaxpēr o ra akaprī nē. Nom Tirtūm kām hprām xā hkōt na ka prem ja hā amnhī pumu nē ā akaprī anē. Tā xep ra akupūm tām amnhī nhīpēx nē akupūm Tirtūm kōt amnhī nhīpēx mex nē. Jao akupūm akīnh nē ri apa. Jakamā ām hāmri na pa pre mē awūr wam kagāta mēnh nē mēmoj tā ā mē amā ixākjēr anē.

¹⁰ Koja Tirtūm krajē hō tanhmā amnhī tomnuj to. Hāmri nē tee ri ja hā amnhī pumu nē amnhī kamā hpijaām nē akupūm Tirtūm kōt tām amnhī nhīpēx. Hāmri nē akupūm mex nē tām hamaxpēr pē hkīnh nē ri pa. Nē axte tee ri amnhī kukamā hamaxpēr hkēt nē. Ja na Tirtūm kām hprām. Tā koja mē kēp hkra hkēt xwñnhjē pyrā nē tanhmā amnhī tomnuj to nē ra hpijaām japēr. Nom hkwyjaja kot ja hā omunh pix myrapē hpijaām nē arī Tirtūm kōt amnhī nhīpēx kēt japēr. Hā koja nhūrmā ty nē Tirtūm kra kot akupūm hkōt tām amnhī nhīpēx xwñnhjē kīnhā Tirtūm pē awry rax kumrēx nē ri pa.

¹¹ Mē pahte Tirtūm kapēr kwūm ri tanhmā amnhī nhīpēx to hā tee ri amnhī pumunh nē amnhī kamā hpijaām nē akupūm tām amnhī nhīpēxja na Tirtūm kām hprām. Tā na ka xep ā amnhī nhīpēx anē. Wam ixte mē awūr kagā mēnhā na ka xep prem kamā tanhmā ixte nā puro kamā hpijaām kēt xwñnhā ā mē amā ixākjēr tota kamā akapēr nē ama. Hāmri nē tee ri mē ate kormā kot amnhī tomnuj ā kām axākjēr kēt ā amnhī kukamā ajamaxpēr nē amnhī kamā apijaām nē. Nom Tirtūm kām hprām xā hkōt. Mē ate jam ajamaxpēr pē amnhī kamā apijaāmja na kām hprām. Tā ka mē hpijaām xwñnhā kamā agryk nē kām akapēr o:

—Kwa mē pahpē Jejus kwūjaja mē pahte ā amnhī nhīpēx anhūr kēt tā ka ā amnhī nhīpēx anē. Nā na ka amnhī tomnuj tīx kumrēx. Kot kaj ā amnhī nhīpēx anē pa

mê hã apumu nê gaa nê apyrã nê ã amnhĩ tomnuj anê. Kwa ja kaga nê axte ã amnhĩ nhĩpêx anhÿr kêt nê. Nê akupÿm Tirtũm kôt amnhĩ xãm tÿx nê hkôt amnhĩ nhĩpêx rãhã ho ri apa. Anê.

Hãmri nhũm krĩ nhõ xwÿnhjaja ja hã mê ajarênh ma nê mê apê jamnuj ã mê apumunh kurê kumrêx. Æm hãmri na ka prem ã kãm akapêr anê.

¹² Nê ixte mê awÿr kagã nê mênhta kamã na pa pre nã puro kamã hpijaãm kêt xwÿnhhta mã tanhmã ixãkjêr to hkêt nê. Rÿ nã purota mã tanhmã ixãkjêr to hkêt nê. Na pa pre mê apê Kris kwÿjê hwÿr kagã nhĩpêx nê kamã tanhmã mê amã hpijaãm xwÿnhhta ã karõ hto. Mê ate kamã harênh hãmri nê inhÿ hã amnhĩ nê hanor nhũm Korit' nhõ xwÿnh piitã kot ã mê ate amnhĩ nhĩpêx anhÿr ã mê apumunh kaxyw. Nê mê ate Tirtũm nom ã hipêx anhÿr jao mê amã ixkĩnh pê ixkapêr kôt ã hipêx anhÿr ã amnhĩ pumunh kaxyw.

¹³ Tã nhũm Xitre ixwÿr pøj nê tanhmã inhmã mê ajarênh to. Na xep pre mê awÿr nojarêr nê tee ri amnhĩ kukamã hamaxpêr. Mê ate kagãta kamã harênh nê ijarênh mar nê kamã agryk pymaj tee ri amnhĩ kukamã hamaxpêr. Tã ma mê awÿr mõn pøj nê mã amã kugõ. Ka xep prem kamã harê nê ama nê hkôt amnhĩ nhĩpêx kurê kumrêx nhũm mê ate amnhĩ nhĩpêx ã mê apumu nê hkĩnh nê. Hãmri nê tãm hamaxpêr. Tã ra akupÿn ixwÿr mõ nê inhmã mê ajarê pa mê ajarênh ma nê ijaxwÿja ixkĩnh nê.

¹⁴ Na pre kormã mê awÿr nojarêr pa kãm tanhmã mê amex ã mê ajarênh to. Tã nhũm xep ma mê awÿr mõn pøj nê mê apumu nê hamaxpêr o:

—Nã pêr Æm hãmri na pre Pawre inhmã mê mex ã harê. Mê mex kênã. Anê.

¹⁵ Tã nhũm pre mê arũm kato nê ra man akupÿn ixwÿr mõn pøj nê inhmã mê ajarênh o:

—Na pa pre ma mê hwÿr mõ nê mê kãm ixkapêr o ri mê hkôt ixpa nhũm mê ixkapêr ma nê ixkôt amnhĩ nhĩpêx kurê kumrêx nê ixto mex nê. Kormã ixte mê hwÿr inhmõr kêt tã mê harênh ma nê inhmã mê hkĩnh nê. Tã pa ma mê hwÿr mõ nhũm mê ixto mex rax nê pa ra inhmã mê hkĩnh tÿx kumrêx. Anê.

¹⁶ Æ inhmã mê ajarênh anê pa mê ajarênh ma nê ixkĩnh tÿx nê. Æm hãmri na ka htem mêmõj tã amnhĩ jarênh xã hkôt tanhmã amnhĩ nhĩpêx to ho apa.

8

Mê kot Kris kôt mê hkwÿjê pê õxÿ hkêt ã mê kãm karõ

Atre 11.27-30; Rõmãn 15.25-27; Wam Korit' 16.1-4

¹ E Kris kôt ixkwÿjaja. Kot paj hpãnhã mê amã jar Masetõn kamã tanhmã Jeus kwÿjaja kot amnhĩ nhĩpêx to hã mê harê ka mê harênh ma. Na hte Tirtũm mê kutã nojarêr nhũm mê mex nê pa.

² Mê hkwÿjaja kot Kris ã mê hipêx kati nhũm mê kot amnhĩ xã htÿx kãm hamak o pa htã hkĩnh nê hamakêtkati nê ri pa. Nê mê hkãxpore hkryre htã ho õxÿ hkêt nê pa. Na htem Æmnhix ri mê kêp amrakati xwÿnhjê mã hkwy nhõr o pa.

³⁻⁴ Tã na prem Jerujarê kamã Kris kôt mê pahkwÿjê jarênh ma. Mê kêp amrakati hã mê harênh ma nê kãm mê hkaprĩ nê. Nê mê kãm mê hwÿr mêmõj rênh nê mê ho ajuta hprãm nê. No Æm pa ixte mê kãm hã karõ xã hkôt kêt. Mê tãmjaja mê hamaxpêr xã hkôt na prem ã hamaxpêr anê nê mê kaxyw kãxpore ho pikuprõnh rax nê. Hãmri nê inhmã kugõ nê inhmã:

—Kwa na pa prem Jerujarê kamã Kris kôt mê pahkwÿjê jarênh ma nê mê inhmã mê hkaprĩ nê mê kãm mê ixkãxpore hkwy ho akuprõ. Jakamã e amÿ nê ma mê hwÿr o mõ nê mê kãm agõ kê mê tokyx ho amnhĩm awjaprõ nê kuku. Anê.

⁵ Pa mê kuma nê ixtÿx ho Æm kãxpore grire hã hkamnhix nê ijamaxpêr o:

—Kwa mo mê hikãxpore rax koja mê ri ho akuprõ nê mê kãm kugõ? Æm mê hikãxpore hkryre kênã.

Anhÿr o ijamaxpêr tã no nhũm mê kaxyw ho rax nê ho akuprõ. Mê hikãxpore hkryre htã mê kãm õr rax nê. Hãmri nê inhmã amnhĩ jarênh o:

—Na pa mê ra Pahihti Jeus Kris mã amnhĩ gõ. Mê ixte tanhmã kãm amnhĩ nhĩpêx to ho ri ixpa kaxyw. Jakamã e tanhmã mê inhmã mêmõj tã karõ hto. Kot pa mê ama nê akapêr kôt amnhĩ nhĩpêx. Ja na pa mê inhmã hprãm nhũm Tirtũm haxwÿja kãm ja prãm. Anê.

⁶ Na pa pre ã mê kot amnhĩ nhĩpêx anhÿr ã mê omu nê mê apê Korit' nhõ xwÿnhjê mã ijamaxpêr kurê kumrêx. Hãmri nê Xitre mã mê ajarê. Na pre mê awÿr mõ nê mê amã Jerujarê nhõ xwÿnhjê jarê. Mê ate mê kãm kãxpore hkwy ho apikuprõnh kaxyw. Tã pa pre jam ijamaxpêr nê ra akupÿm mê awÿr mênh mã nê kãm:

—Kwa ma akupÿm Korit' wÿr mõ nê mê kãm anê kê mê ra kot amnhĩ jarênh xã hkôt Jerujarê nhõ xwÿnhjê kaxyw kãxpore hkwy ho akuprõ nê tokyx mê hwÿr kumê. Ra mê kãm Kris kôt mê hkwÿjê hkĩnh ã amnhĩ jarênh kênã. E kwa tokyj. Anê.

⁷ Na ka htem amnhĩ to mex o ri apa. Nê amnhĩ kaxyw Kris hkôt ajamaxpêr tÿx nê. Nê ma mê kãm Tirtũm kapêr jarênh mex o ri mê hkôt apa. Nê mê ajamaxpêr mex nê. Nê mê piitã mê ho mex o ri apa. Nê mê amã ixkĩnh o ri apa. Jakamã kwa kêr ka mê axãmnhix mê kêp amrakati xwÿnhjê mã

mē akāxpore hkwý nhōr o apa. Jao mē amā Tirtūm kīnh týx ā amnhī to amnhīrīt.

⁸ Ixte ā mē amā ja hā karō anhūr tā hā mē atā ixihtýx kēt nē. Ām mē kamā axukapri hōt mē ate mē kām axāmnhōr o apa kaxyw na pa ā mē amā ixkapēr anē. Masetōn kamā mē pahkwýjaja kot amnhī nhīpēxa pyrā nē.

⁹ Ra mē ate Jejus Kris kām mē pajapē hā kot tanhmā amnhī nhīpēx to hā mar mex. Amnepēm na pre kaxkwa kamā mex kumrēx nē ri pa ho pa nhūm mēmoj piitā kēp ō htā nhūm rer pa nē mē pahwūr wrý nē mē pakamā kēp amrakati nē ri pa. Hikāxpore hkēt nē ri pa. Tā mēmo kaxyw na pre ā mēmoj mex piitā rer par nē mē pahwūr wrýk anē? ām kot mē pahto mex pix kaxyw. Kot mē pahto mex nhūm mē pahte kukwak ri mē paxāmnhīx ri mē pajamakētati nē mē papa kaxyw na pre ā amnhī nhīpēx anē. Mē pahte nhūr mā urāk nē kaxkwa kamā pamek kumrēx nē ri papa ho papa kaxyw.

¹⁰ E kwa kēr ka mē tokyx kāxpore hkwý ho apikuprōnh pa nē Jerujarē nhō xwýnhjē hwūr amē. Mē akumrēxjaja na ka prem ham amgra hapēxta kamā ra mē kaxyw ho apikuprōnhja krax. Mē amā mē ho mex prām xāj ham ho hkrax tā no ām kormā hatur xām mēnh nē mē hwūr mēnh kēt nē.

¹¹ Kwa mē tokyx ja ho ajapēx nā. Na ka prem ate ho anhūr krax ā akīnh pē kāxpore hkwý ho apikuprōnh o apa. Tā kēr ka mē arī akīnh rāhā ho apikuprōnh par jatur xām amē. No mē ri atýx tanhmā ajamaxpēr to hkēt nē. Rý mē ajamaxpēr o:

—Nā kormā. Kot paj nhūr mā ixkāxpore rax nē ri kormā mē hwūr hkwý mē.

Anhūr o mē ri ajamaxpēr hkēt nē. Mē ate tanhmā akāxpore hkre kamā kute hā omunh xā hkōt mē kām hkwý pix gō.

¹² Kēr ka mē axāmnhīx akīnh kām mē kām ho akuprō. Ate amnhī kāxpore pumunh xā hkōt. Ka mē akāxpore rax nē mē kām ho rax nē agō. Rý mē akāxpore grire nē mē kām ho grire nē agō. Ja na kēt mex.

¹³ No mē ate mē kām ōr par nhūm mē arom mē hikāxpore rax nē ri paja mex kēt.

¹⁴ Nom ra mē akāxpore rūnh jakamā kwa mē amnhī kutā mē kām hkwý ho hkrýre nē ho akuprō kē mē apyrā nē hikāxpore nē ri pa. Kēr ka mē nhūr mā tanhmā amnhī to nē axā nē nhūm akāxpore apē hapēx nhūm mē ajarēnh ma nē amnhī kuxwar mē ato ajuta nē mē amā hkwý ho akuprō nē mē awūr kumē. Ka mē akāxpore ho axpēn pyrā nē ri apa.

¹⁵ Amnepēm Tirtūm kot kaxkwa rūm Ijaewjē hwūr mēō rēnh nhūm mē kot apkati mē amnhīm hkawrā nē ho apkur o pata ā na pre Tirtūm kapēr ā kagā htūmjā ā mē harēnh anē nē mē harēnh kot:

Na pre mē hkra xohtō xwýnhjaja mē apkur xā hkawrā rūnh nē. Nē gōj kām

unhwý nē kuku nē piitā ho ōhy htu. Nhūm mē hkra grēre xwýnhjaja haxwýja hkwý kawrā no ām ho hkrýre nē hkawrā. Nē gōj kām unhwý nē kuku nē haxwýja ho ōhy htu hpa. Na pre htem apkati mē ā amnhī nhīpēx anhūr o pa. Anē.

Ja pyrā nē kēr ka mē akāxpore ho axpēn pyrāk o ri ho apa.

Xitre mē hkrāmnhwýjē jarēnh

¹⁶ Nē Xitre na pre ixpyrā nē kām mē ato ajuta hprām nē. Na pre inhmā mē atā amnhī jarē pa pre kuma nhūm ja inhmā mex nē pa ixkīnh nē. Nē ijamaxpēr o:

—Nā ām hāmri na Tirtūm tanhmā Xitre hkrā hto nhūm ā hamaxpēr mex anē. Anē.

¹⁷ Tā pa ma akupým mē awūr mōr ā hkukja nhūm inhma nē hkīnh nē mē awūr nojarēt kurē kumrēx. Nom kormā ixte kām mē ajarēnh kēt ri nhūm tām amnhī kukamā hamaxpēr nē mē awūr hkrā.

¹⁸ Tā na ra nojarēt kaxyw. Kot paj ma hkōt Kris kōt mē pahtōjē hō mē kē ma hkōt mō. Kōt ixte mēnh xwýnhnta na hte mē kām Tirtūm kapēr jarēnh mex nē nhūm htem amnhīm mex ā harē.

¹⁹ Na pre jar Jejus kwýjaja kot ma ixkōt Jerujarē hwūr kāxpore hkwý ho mōr kaxyw nhūm prem amnhīm mē kurē. Tā koja Xitre mē wa mē awūr mōn pōj ka mē kām kāxporeta gō nhūm man akupýn o mō pa wa ri kormā ma Jerujarē hwūr mē kām o mō. Mē kot hamýnh nē mē pamā mē hkīnh ā kot amnhī tā mē pahpumunh kaxyw. Nē Tirtūm mā mex o mex ā harēnh kaxyw.

²⁰⁻²¹ Nom kāxpore rax nhūm ixte mē hwūr o inhmōr nhūm mē kot hā ixkamnhīx pymaj kot paj ma amnhī kōt Kris kōt mē pahtōta o mō. Ixte Xitre hkōt mē awūr mēnh xwýnhnta pa ma amnhī kōt o mō. Nom ixāhkīnh o ixpare hā. Tirtūm kot ja kōt ixpumunh mex tā kot paj ma amnhī kōt o mō.

²² Nē ot pa ma Xitreta wa hkōt axte mē awūr ja mē. Kēr kē mē axkrunēpxi nē ma ixkukamā mē awūr mō. Ixte wa hkōt mēnh xwýnhnta ixte kot amnhī nhīpēx ā omunh mex. Na hte kām mē piitā mē ho ajuta ho pa hprām nē. Tā mē ajarēnh ma nē inhmā mē ajarēnh o:

—Nā koja mē Jerujarē nhō xwýnhjē mā kāxpore nhōr rax nē kām ga. Mē kot amnhī to mex kēnā. Anē.

Jakamā ra mē awūr hkrā. Tā koja ma Xitre wa hkōt mō nē mē ato ajuta ka mē tokyx kāxpore ho apikuprōnh pa.

²³ Nē koja mēhō tanhmā Xitre hā mē akujēr to ka mē kēp ixkrāmnhwý mex ā harē. Nē kot inhīhkō hā mē ho ajuta mex o pa hā harē. Na pre ra jar Kris kwýjaja mē akaxyw kuta nē ma mē awūr kumē. Jakamā koja ma mē awūr mō nhūm Kris kōt mē

pahtōjê hō wa pijakrutja wa ma hkōt mō. Na hte wa haxwýja Kris kōt amnhī nhīpêx mex o pa.

²⁴ Koja mē awýr pōj ka mē omu nē mē ho mex nē. Nē mē amā mē hkīnh nē. Kē krī piitā hkōt Kris kōt mē pahkwýjê piitā mē hā mē ajarēnh ma nē axpēn mā mē amex ā mē ajarē. Nē mē ajarēnh o:

–Pēr ām hāmri na pre Pawreja mē pamā Korīṭ kām mē pahkwýjê jarē. Na xep pre Xitre mē hkwyta ma mē hwýr mō nhūm mē ho mex rax nē. Ra Pawre kot mē pamā mē harēnh xā hkōt. Anē.

9

Mē kot kàxpore ho pikuprōnh ā mē harēnh

¹⁻² Kwa ixkrāmnhwýjaja. Kot paj Jerujarē nhō xwýnhjê kaxyw mē atā ixihtýx kêt nē. Ra mē amā mē ho ajuta hprām jakamā na pa pre Masetōn kamā Kris kōt mē pahkwýjê mā mē ajarēnh o:

–Pika pē Gres kamā Kris kōt mē pahkwýjaja na prem ham amgrā hapêxta kamā Jerujarē kamā mē pahkwýjê jarēnh ma nē kām mē ho ajuta hprām. Anē.

Hāmri nhūm mē ajarēnh ma nē mē apyrā nē kām tanhmā mē ho ajuta hto hprām.

³⁻⁴ Tā ot pa mē awýr Xitre mē hōta wa mē ho xipimrāatā wa mē kumē. Mē kot kàxpore hā mē akukjêr kaxyw. Kêr pa mytwrý hō hā ma Masetōn nhō xwýnh kwýjê mē mē awýr mō nē ra ixte mē kām kàxpore hkwy ho mē apikuprōnh ā mē ajarēnh kōt mē ate ho apikuprōnh rax ā mē apumu nē ixkīnh nē. Nom kot pa mō nē tee ri hapêr nē te ixte Masetōn nhō xwýnhjê mā mē ato ixêx pyrā nē xipijaam nē. Ka mē ajaxwýja amnhī kamā apijaam nē.

⁵ Ā mē pahte amnhī nhīpêx anhýr pymaj na pa ā mē amā kagāja nhīpêx nē Xitre mā ōr nē ma amnhī kukamā mē awýr mēnh anē. Nē hkōt wa mōr mā xwýnhhta mē ho xipimrāatā amnhī kukamā wa mē kumē. Tā kē mē awýr pōj nē mē amā kagāja gō ka mē kamā harē nē ama nē tokyx kàxpore ho apikuprōnh jatur xām amē. Kêr pa mē hapu hā mē awýr mō ka mē ra mē ixkutêp ho apikuprōnh pa nē mē kām agō nē ajamakêtkati nē apa. No pa ixte mē amē mē ate ho apikuprōnh kaxyw mē atā ixihtýx kêt.

⁶ Na htem piitā ā hamaxpēr anhýr o pa nē hamaxpēr o:

–Kot ka apur rax nē kamā anhō rax nē. Nom kot ka apur grire nē kamā anhō grire.

Anhýr o hamaxpēr jakamā kēr ka mē apitā ajamakêtkati nē Jerujarē nhō xwýnhjê mā kàxpore nhōr mex nē. Kêr ka mē ho apikuprōnh pa nhūm rax nē. Te mēhō ihpur rax nē kamā ō raxta pyrāk. Kê Tirtūm ā mē ate amnhī nhīpêx anhýr ā mē apumu nē nhýrmā mē ato mex nē.

⁷ Nom kēr ka mē anhōxy kamā mē kām ōr kêt nē. Mē pahte pahkīnh kām panhōxy hkêt kām mē kēp amrakati xwýnhjê mā mēmoj nhōr o papaja na Tirtūm kām hprām.

⁸⁻⁹ Koja mē hā mē apumu hāmri nē amnhīm mē amex ā mē ajarēnh rāhā ho pa. Mē kām Tirtūm kīnh xwýnhjaja na htem amnhīx ri mē kēp amrakati xwýnhjê mā mēmoj nhōr o pa. Te Tirtūm kot amnhī nhīpêx pyrāk. Na hte amnhīx ri mē pamā mēmoj nhōr o pa. Mē pahwýr na rē nhūm wrý. Nhūm mē pamā mē paxàpkur xā nhōr o pa. Nē tanhmā mē pahto pu mē paxā hkêt nē pajamakêtkati nē paxàpēnh o papa. Nē pamex nē ri papa. Panhō rūnh nē ri papa. Jakamā kwa pu mē urāk nē paxamnhīx ri mē kēp amrakati xwýnhjê mā mēmoj nhōr o papa.

¹⁰ E pa ixprī hā mē amā ja jarē ka mē inhma. Nā na hte ā Tirtūm mē pamā mē paxàpkur xā nhōr o pa anē. Kot kaj apur kām ahkre nhūm tanhmā amā mēmo hyta nhīpêx to nhūm amā hapōx mex nē amā ō rūnh nē ka anhō rax nē. Nē hkwy ho axàpkur o apa nē axte hkwy hkre. Tā kēr ka mē ā Tirtūm kot mē ato mex anhýr ā amnhī pumu hāmri nē urāk nē axamnhīx ri mē kēp amrakati xwýnhjê mā axamnhōr pē mē ho mex o ri apa. Nhūm Tirtūm mē hā mē apumu nē mē amā mēmoj nhōr rāhā nē. Ka mē amnhī pyrā nē mē kēp amrakati xwýnhjê mā hkwy nhōr o apa.

¹¹ Koja Tirtūm mē ato mex rax nē ka mē anhō mēmoj rax nē. Ja o amnhī xwar mē kēp amrakati xwýnhjê kaxyw kàxpore hkwy jaxwý. Kêr pa mē amā hkwy jamý nē ma Tirtūm kōt mē pahkwýjê mā o mō nē mē kām kugō kē mē omu nē hkīnh nē. Nē mē atā Tirtūm mā mex o mex ā harē.

¹² Hāmri nē mē akukwak ri mex nē ri pa. Nē axpēn mā Tirtūm mex o mex ā harēnh o ri pa.

¹³ Koja mē amnhī tā mē apumu nē hkīnh nē. Hāmri nē Tirtūm mā amnhī tā tanhmā mē ajarēnh to nē kām:

–Pa Tirtūm. Nā ām hāmri na pre Korīṭ kām akōt mē ixkwýjaja amnhī jarē. Na htem akōt pix mā amnhī nhīpêx mex o ri pa. Jao mē xipê ōxy hkêt nē mē inhmā kàxpore hkwy nhōr rax nē. amnhīx ri hamakêtkati nē mē inhmā hkwy nhōr rax nē. No ām mē papxipix na htem ā mē inhīpêx anhýr kêt nē. Na htem mē kēp amrakati xwýnh piitā ā mē hipêx anhýr o pa. Ām hāmri na ka pre tanhmā mē hkrā hto nhūm mē anhý hā ā amnhī nhīpêx anhýr o pa. Amex o amex Tirtūm. Anē.

¹⁴ Hāmri nē mē ato hwýr o:

–Pa Tirtūm. Ām hāmri na hte Korīṭ nhō xwýnhjaja amnhī pyrā nē mēmoj to mē ixkutā nojarēt o pa. Jakamā aa mē ixte

amnhî tâ mê inhno ho mê omunh kêt tâ mê inhmä mê hkînh nê. Kwa kêr ka mê ixtâ mëmoj to mê kutâ anojarêt râhâ ho apa Tirtüm.

Anhÿr o më ato kuwÿ.

¹⁵ Tirtümja mex o mex. Nom na hte më pahto mex pê më pamâ kâxpore nhôr kêt nê. Kra Jesusja na pre më pamâ kugô. Kâm më pajapê ho më pahwÿr kumê nhüm më pahwÿr wrÿ nê më pahpiitâ më pahte amnhî tomnuj pânâ amnhîrer kaxyw më panê ty. Ja na mex o kot më pamâ kâxpore nhôr jakrenh. Mëhõ koja uräk nê ä më panê htyk anê? Nâ amrakati ho amrakati. Äm Jesus pix na pre ä amnhî nhîpêx anê.

10

Pawre kêp Tirtüm Karô nhÿ hä kapêr xwÿnh ä harênh

Epes 6.10-20; Wam Tesarôn 5.8

¹ E Kris kôt ixkwÿjaja. Nâ ixpê Pawre kot paj më akwÿ kot tanhmâ ixto kapêr to xwÿnhjê mä amnhî jarê ka mê apiitâ inhma. Nâ na hte Kris më pakamâ gryk tokyx anhÿr kêt nê. Na hte më pahto mex japê nê. Tâ inhmä uräk nê ä më anhîpêx anhÿr präm nê. No na hte më akwÿjaja axpên mä tanhmâ ixto kapêr punuj to nê ri axpên mä:

—Pawre na hte nhÿri krî kamâ pa nê më pamâ kagâ nhîpêx nê më pahwÿr kurê nê kamâ mëmoj tâ më pamâ kapêr kâm hihtÿx nê hä më pamâ akîr. Tâ amnê më pahwÿr mō hämri nê te kâm më pahpyma pyrâk o më pamâ kapêr o pa.

Anhÿr o ijarê.

² Nom inhmä më awÿr inhmôr nê mëmoj tâ më amâ ixäkjêr präm kêt tâ kot paj nhÿrmâ më awÿr mō ka më tanhmâ amnhî tomnuj to ho apa japêr. Pa ja hä më apumu nê hä më amâ akîr kâm ga.

³ Na pa htem jar pika ja kamâ Tirtüm kwÿ hkêt xwÿnhjê kaêx ä ri ixpa nom më uräk nê amnhî krâ hkôt tanhmâ amnhî nhîpêx to ho ixpa hkêt nê. Nê më uräk nê amnhî krâ hkôt tanhmâ ijamaxpêr to ho ixpa hkêt nê. Na pa htem Tirtüm Karô nhÿ hä âhpumunh xâ ho amnhî nhîpêx o ri ixpa.

⁴ Nê Tirtüm xâhpumunh tÿx xâ ho më kâm kapêr jarênh o ri ixpa. Mê kot mar nê hkôt amnhî nhîpêx kaxyw. Nê âhpumunh tÿx o na pa htem më kot Tirtüm kôt amnhî xunhwÿr pymaj më kêp ämnâr xwÿnhjaja tanhmâ më nê më ho.

⁵ Na htem htÿx ri tanhmâ Tirtüm nê hkwÿjê mä kapêr to ho pa. Amnhî kaxyw hkôt më hamaxpêr kêt kaxyw tanhmâ nê më kâm kapêr to. Na pa htem ja hä më omu nê Tirtüm xâhpumunh tÿx xâ ho tanhmâ më kâm ixkapêr to nhüm më tee ri inhma nê axte më kêp ämnâr kêt nê. Pa më kâm Tirtüm kapêr jarê nhüm më ohtô nê kuma nê Kris

kôt amnhî xunhwÿ nê hkôt amnhî nhîpêx o pa.

⁶ Tâ më kajaja kot kaj më Tirtüm kôt amnhî nhîpêx mex tâ më atô ra kapêr nhîrôp xa nê tanhmâ amnhî tomnuj to. Pa ja hä apumu rÿ hä ajarênh ma nê hä amâ akîr.

⁷ Mê ate Tirtüm kot më awÿr inhmênh kêt ä axpên mä ijarênh tâ kot kaj më atô äm hämri apê Kris kwÿ hä amnhî pumu nê ra mäânên pa ixpê hkwÿ hä ixpumunh kurê kumrêx. Mê apyrâ nê ixpê hkwÿ kênâ.

⁸ Na pa pre ma më awÿr mō nê tanhmâ më amâ amnhî jarênh to nê më amâ:

—Tirtüm na pre më awÿr inhmê pa mō. Ixte ÿ hä më amâ kapêr jarênh o ri më akôt ixpa kaxyw. Anê.

Tâ pa hte arî ä amnhî jarênh anhÿr o ri ixpa. Äm hämri na pre Tirtüm më awÿr inhmê pa hte äm hämri më amâ kapêr jarênh o ri më akôt ixpa. Na pa hte Tirtüm nhÿ hä më amâ ixkapêr nê kapêr o ixêx o amnhî to jarkrar kêt nê. Ixte tanhmâ më atomnuj to ho ri ixpa kaxyw na pre Tirtüm më awÿr inhmênh kêt. Mê amâ ixkapêr mex nhüm më ate inhmar nê Kris kapêr kôt amnhî nhîpêx mex o apa kaxyw na pre më awÿr inhmê.

⁹ E kwa Kris kôt ixkwÿjaja. Na pa hte më amâ ixpuma kaxyw më awÿr kagâ rênh kêt nê. Mê ate kamâ harênh nê tee ri amnhî kukamâ ajamaxpêr o amnhî kamâ amâ ma kaxyw kêt.

¹⁰ Mê akamâ më kâm ixkînh kêt xwÿnhjaja na htem ijarênh o:

—Pawre na hte awry hä pa nê më pahwÿr kagâ rênh nê kamâ te kêp pahi ho amnhî nhîpêx pyrâ nê mëmoj tâ më pamâ kapêr kâm hihtÿx nê. Tâ më pahwÿr pøj hämri nê kapêr kaxyw nom kapêr kâm hihtÿx o kapêr kêt nê. Jakamâ mo kaxyw kot puj më hwÿr mra nê kapêr ma?

Anhÿr o ijarê.

¹¹ Nom ä ixte anhÿr kêt. Kwa më inhma. Kot paj nhÿrmâ ma më awÿr mō hämri nê te kagâ ja kamâ më amâ ixkapêr pyrâk o më amâ ixkapêr nê ixkapêr xihtÿx o më amâ ixkapêr kâm ga.

¹² Na hte më akwÿjaja kot amnhî to mex o më ajakrenh ä amnhî to jarkrar o ri pa. No äm amnhî krâ hkôt pix mä na htem ä ri amnhî jarênh anê. Na hte Tirtüm ä më harênh anhÿr kêt nê.

¹³ Tâ inhmä më uräk nê ä amnhî jarênh anhÿr präm kêt. Äm ixte Tirtüm kot tanhmâ inhmä karô hto xâ hkôt amnhî nhîpêx o ixpaja na inhmä hpräm. Tâ më kajaja më awÿr na pre inhmê.

¹⁴ Ra kot më awÿr inhmênh jakamâ ixkumrêx na pa pre më awÿr mō nê më akôt ri më amâ tanhmâ Kris jarênh to ho ri ixpa.

Tîrtûm kâm nhÿhÿm ixpa hprâm xà pix wÿr na inhmâ ixpa hprâm.

¹⁵ No kêt mê kot amnhî krâ hkôt htÿx ri Tîrtûm kapêr jahkre o mê pa xwÿnhjaja na htem nhÿri krî kamâ mê kot Kris kôt amnhî xunhwÿr â mê harênh ma nê mê hâ amnhî to jarkrar o ri pa. Te tam kot mê hwÿr mör nê mê kâm ujarênh nhûm mê kot mê mar xà hkôt Kris kôt amnhî xunhwÿr pyrâk. Nê mê hâ amnhî to jarkrar o:

—E na pa pre ma mê hwÿr mō nê mê kâm Tîrtûm kapêr jarê nhûm mê inhma nê hkôt amnhî xunhwÿr kurê kumrêx. Ixkukwak ri na prem â amnhî nhîpêx anê. Anê.

Nom â amnhî nhîpêx anhÿrja â amnhî to hêx. No pa na pa hte ho mê urâk kêt nê. Kojja Tîrtûm ma nhÿri krî hwÿr ixkwÿjê hō mê nhûm ma hwÿr mō nê mê kâm Kris kapêr jarê. Hâmri nhûm mê kuma nê mê Kris kôt amnhî xunhwÿ. Pa mê harênh ma nê mê ÿ hâ ixkÿnh nê nom pa ixkukwak ri mê kot hkôt amnhî xunhwÿr â amnhî to jarkrar kêt nê. Ixte mê hwÿr ixpa nê mê kâm ix-ujarênhre hâ kot pa hkêt mê hâ amnhî to jarkrar. Âm Tîrtûm kâm nhÿhÿm ixpa hprâm xà pix wÿr na pa hte ixpa nê mê kâm kapêr jarê. Jakamâ kot kaj mê nhÿrmâ Kris kôt amnhî nhîpêx mex o ri apa pa ja hâ mê apumu nê mê are nê hpânâ ma krî hō hwÿr Kris kot mê hwÿr inhmênh xà hō hwÿr mō. Ka mê ja hâ ixto Tîrtûm wÿr o apa.

¹⁶ Kot paj mê anhō krî kamâ mê piitâ mê kâm Jejus kapêr jarênh pa hāmri nê hpânâ ma krî hkwyê hkôt ijapōx o ri ixpa nê kamâ mê kâm harênh o ri mê hkôt ixpa. Kormâ aa mê kot mar kêt kumrêx xwÿnhjê mâ harênh o ri mê hkôt ixpa. Na pa hte â mê hwÿr ixpa nê mê kâm ixujarênh anê. Jakamâ nhûm mê ja hâ ixpumu nê mê kot Tîrtûm kapêr mar xwÿnhjê pix wÿr ixpa hâ ijarênh kêt nê.

¹⁷ Nê Tîrtûm kapêr â kagâ htûm kot mēmoj tâ mê kot amnhî to jarkrar â harênh kot:

Kêr ka mê kamjaja amnhî mex â amnhî to jarkrar kêt nê. Âm Tîrtûm pix mâ mân mex o mex â harênh o ri ho jarkrar o ri apa. Anê.

¹⁸ Kot pu mê Tîrtûm noo mâ amnhî to mex â amnhî to jarkrar nê am amnhî to jarkrar kapry. Nom kojja Tîrtûm tâm ja hâ mê pahto jarkrar nê am hāmri mê pahte amnhî to mex xwÿnh â pahto jarkrar.

11

Jejus kot mê hwÿr mê rênh â amnhî to hêx xwÿnhjê jarênh

Matêwre 7.15; Rômân 16.17; Karatas 1.6-9; Korosê 2.8; Sikûn Pêtre 2.1

¹ E kot paj te mê hkrâ pipân xwÿnh kot htÿx ri amnhî jarênh pyrâk o tanhmâ mê amâ amnhî to jarkrar to. Kwa mê inhma

nê ixkamâ agryk kêt nê. No mê ixkapêr kumrêx mân ma.

² Inhmâ mê akÿnh. Te ho Mēpahpām Tîrtûm kâm mê akÿnh ta pyrâk. Te mê apê mēhō kukrit kâm my hkÿnh nê kot ho mjên prām xwÿnh ta pyrâk. Kâm mēmyjê piitâ mê hkÿnh kêt am kâm pix kÿnh. Ja pyrâ nê kêr ka mê amâ Kris kÿnh o nhâm amâ mê hkÿnh xwÿnhjê jakre. Te ho mēhō ni kot kâm myta pix kÿnh nê kâm ho mjên prām xwÿnh ta pyrâk. Ja na pa inhmâ hprâm.

³ Ra mê amâ Kris kÿnh tÿx o apa nê hkôt amnhî nhîpêx mex o ri apa htâ nhûm mê kot amnhî krâ hkôt htÿx ri Tîrtûm kapêr jahkre ho mê pa xwÿnhjaja tee ri ja hâ mê ajarênh ma nê axpên mâ mê ajarênh o:

—Kwa na ja mex kêt. Kojja mê Pawre kapêr ma nê am kuma nhûm ja mex nê. No mê pahkôt mê kot amnhî nhîpêxja na mê pamâ mex. Ja na kêt mê pamâ mex o mex. Anê.

Hâmri nê ra kot Kris nê tanhmâ mê amâ hêx to kaxyw. Te annepê mâ kagâ kot mê panâ kot wa pê Ewa mâ hêx nhûm kot mar nê hkôt amnhî nhîpêx ta pyrâk.

⁴ Na pa pre ra mê awÿr mō nê mê amâ tanhmâ Jejus jarênh to. Nê tanhmâ mê amâ Tîrtûm Karō jarênh to. Nê tanhmâ wa kot mê pahto hkra hto hâ mê amâ wa harê ka prem inhma nê mar tÿx nê. Tâ nhûm ra mê kot htÿx ri Tîrtûm kapêr jahkre xwÿnhjaja ixpânâ mê awÿr mō nê Jejus kapêr kwÿm ri tanhmâ mê amâ ujarênh to nê mê amâ harênh o hêx rāhā ho pa. Nê Tîrtûm Karōja nhûm mê amâ tanhmâ ho hêx to. Nê ixte mê amâ Tîrtûm kapêr jarênh kwÿm ri ixpânâ tanhmâ mê amâ harênh to ho pa. Na ka prem mê ama nê am hāmri harênh â hkamnhîx. Kwa kêr ka mê ri mê ujarênh piitâ mar nê hkôt amnhî nhîpêx kêt nê. Mê kot Jejus jarênh tâ no am katât kôt harênh kêt nê. Âm ri ho hêx o pa. Ka htem ama nê am hāmri harênh â hkamnhîx nê mê amâ mê mar prām nê. Mê kot mê amâ harênh o hêx o pa htâ ka mê ama nê ra mê hkôt amnhî nhîpêx kaxyw. Kwa mê ri â amnhî nhîpêx anhÿr hkêt nê.

⁵ Kris kot mê awÿr mê rênh â mê kot amnhî jarênh tâ amnhî to hêx. Ka prem ama nê am hāmri mê kot mê amâ harênh â mê hkamnhîx. Nom na pre Krisja mê awÿr mê rênh kêt nê. Kêt pa na pre mê awÿr inhmê.

⁶ Mē hkÿnhâ ixkapêr krör pyrâk tâ no am ixte Tîrtûm kapêr mar tÿx. Nê kot amnhî nhîpêxja na ixte omunh par. Ra mê ate ja hâ ixpumunh mex.

⁷ Na pa pre mê akôt ri mê amâ Jejus jarênh o ri ixpa no am hpânâ mēmoj tâ mê awÿr o ri ixpa hkêt nê. Xâ amari ixte mê amâ harênh nê hpânâ mēmoj tâ mê awÿr kêtja mê apê omnuj?

⁸⁻⁹ Kormâ ixte mê amâ Tîrtûm kapêr jarênh o ri ixpata â na pa pre hte tōhā

kāxpore ho presija no ām aa hā mē awýr kêt nē. Jar Masetōn kamā Kris kôt mē pahkwýjaja na prem ixwýr hkwȳ rēnh o pa pa ho ixāpkur xā japrōr o ri mē akôt ixpa. Mē kumā ixte Tirtūm kapēr jarēnh o ri ixpa hkêt tā pa hte mē kukwak ri mē akôt ho ixāpkur o ri ixpa. Tā kot paj arī ā mē akôt ixpa nē ā amnhī nhīpēx anē nē mēmoj tā mē awýr o ri ixpa hkêt nē.

¹⁰ Ja inhmā mex. Jakamā kot paj amarī mē anhō pika pē Gres kām ā mē amā Tirtūm kapēr jarēnh o ixpa anē nē mēmoj tā mē awýr kêt nē. Ām hāmri na pa ā mē amā amnhī jarēnh anē. Kris pyrā nē ixēx kêt kēnā.

¹¹ Xā we inhmā mē akīnh kêt kôt na pa hte ā mē amā Tirtūm kapēr jarēnh pānhā mē awýr kêt anē? Nā inhmā mē akīnh jakamā na pa hte kapēr jarēnh pānhā mē awýr o ri ixpa hkêt nē. Inhmā mē akīnh tỳx kēnā. Tirtūm kot ja hā ixpumunh mex.

¹² No mē kot amnhī krā hkôt htỳx ri Tirtūm kapēr jahkre xwýnhjaja na htem mē ajahkre hpānhā kāxpore hā mē awýr pix o pa. Nē mē amā tanhmā amnhī to hēx to nē mē amā:

—Nā mē ixte Pawre kot amnhī nhīpēx pyrāk. Mē ixte amnhī nhīpēxja kot axpēn pyrāk.

Anhýr o mē amā amnhī to hēx. Nom ixte ho mē urāk kêt kumrēx. Mē ixte amnhī nhīpēx kot axpēn pyrāk ronhỳx pa mē urāk nē kāxpore hā mē awýr o ri ixpa. Nom ixte ā amnhī nhīpēx anhýr kêt. Kot paj aa ā amnhī nhīpēx anhýr o ixpa hkêt nē.

¹³ Ā mē kot amnhī nhīpēx anhýr xwýnhjaja na pre Tirtūm mē awýr mē rēnh kêt nē. Mē kot Kris nhý hā mē ahkre xwýnh ā amnhī jarēnh tā ām amnhī to hēx.

¹⁴ Mē ō pahi Satanastija te mēmoj mex jarēnh pyrāk tā no ām na hte mē pano kupyri pē mē pamā tanhmā hēx to ho mē pahkôt pa. Te kot mēmoj mex ā ām hāmri kot harēnh pyrāk tā no ām ho hēx.

¹⁵ Tā hkôt mē kot amnhī nhīpēx xwýnhjaja na htem urāk nē te tām mē kot amnhī nhīpēx xwýnhjē pyrā nē mē pahwýr mra nē tanhmā mē pamā hēx to. Satanasti pyrā nē mē pano kupyri kaxyw tanhmā mē pamā hēx to. Nom koja Tirtūm nhýrmā mē pahťā mē homnuj tỳx kumrēx nhūm mē rī amnhī pumu.

Tanhmā mē kot Kris ā Pawre nhīpēx to ā mē harēnh

Atre 9.23-25

¹⁶ E kot paj axte te ixtỳx ri amnhī to jarkrar pyrāk o mē amā tanhmā amnhī jarēnh to ka mē inhma nē ixkamā agryk kêt nē.

¹⁷ Pahihti Kris nhý hā kot paj mē amā amnhī jarēnh kêt ām amnhī krā hkôt kot paj mē amā amnhī jarē.

¹⁸ Na htem ohtō nē mē ate mē hā apijaam kaxyw tanhmā mē amā amnhī to jarkrar to ho pa. Tā kot paj mē urāk nē amnhī krā hkôt mē amā amnhī to jarkrar ka mē inhma.

¹⁹ Mē ate amnhī xāhpumunh tỳx ā amnhī jarēnh tā ka htem htỳx ri mē kot amnhī to jarkrar o ri mē pa xwýnhjē kapēr ma nē mē hkôt ajamaxpēr nē mē hkôt amnhī nhīpēx kurē kumrēx.

²⁰ Mē kot Kris nhý hā mē ahkre hā amnhī to hēx xwýnhjaja mē pakurom mē kot amnhī to rax xwýnh ā amnhī jarēnh jakamā na htem mēmoj tā mē amā karō ho pa.

Nē mē kām hprām xā hkôt nhýhým mē arē nē nhýhým mē arē.

Nē mē apa pix kukwak ri apkur o pa.

Nē mēmoj tā mē ajakwap mē atak o pa.

Ā mē kot mē anhīpēx anhýr tā ka te mē ate atūm kêt pyrā nē atỳx ri mē kapēr ma nē mē hkôt amnhī nhīpēx o ri apa.

²¹ Tā ixte mē urāk nē ā mē anhīpēx anhýr kêt tā kot paj mē urāk nē mē amā tanhmā amnhī to jarkrar to ka mē inhumar japēr. Te ixtỳx ri amnhī jarēnh pyrāk o kot paj mē amā amnhī jarē nom ām hāmri mē amā amnhī jarē.

²² Mē kot Jejus nhý hā mē ahkre hā amnhī to mē hēx xwýnhjaja na htem mē amā tanhmā amnhī to jarkrar to nē mē amā:

—E mē inhma. Mē ixpē Ijaew na pa mē. Mē arom mē ixpē finat Apraāw kanrēhā htāmnhwý jakamā kwa mē ixkapēr ma nē mē ixkôt amnhī nhīpēx. Anē.

Nom ijaxwýja ixpē Ijaew tā pa hte mē urāk nē ja hā amnhī to jarkrar hkêt nē.

²³ Nē mē kot Kris kapēr jarēnh mex o pa hā amnhī jarēnh tā pa na pa hte harēnh mex o mē hakre. Te ixkrā pipānh pyrāk o ā mē amā amnhī jarēnh anhýr tāā.

E pa mē amā tanhmā amnhī jarēnh to ka mē inhma. Nā na pre Kris ā mē kām ixkurē xwýnhjaja mē kot amnhī to jarkrar xwýnhjē hkīnhā Kris ā ixpynēnh nē ijagjēnh sohtō nē. Nē mē hkīnhā tōhā ixtak rūnh kumrēx. Pa mē hkīnhā xatā mē kot tanhmā ixto hā kripēm ronhỳx pa pre ty.

²⁴ Na pre Ijaew krāhtūmjaja Kris ā ixtatut kām ixtak rūnh nē. Nē ixtak xāja pī hā mry kā janhōr o ixtak. Nē ixtak kaxyw nē ixtak xā jatur xā kamā kax xwa gixre janhō nē ho ixtak rūnh o ixtatut kā rē. Ixtak o 39 hāmri nē rī kormā mē kot ixpīr pymaj inhmā ure. Na pre htem nhýri ixpynē nē ā inhīpēx anē. Na prem ā inhīpēx anhýr o 5 wēs.

²⁵ Nē na prem ra mē kot ixpīr kaxyw nē kēn rūnh kwý jamý nē ho ixtak o kuhē. Nē Rōm nhō xwýnhjaja haxwýja pī ho ixtak rax kumrēx. Ā inhīpēx anhýr o axkrunēpxi.

Nē na pa pre hte gō xujanār kām nhýhým Jejus jarēnh o ri ixpa kaxyw pār kām mē hwýr ixpa nhūm pārja tanhmā amnhī to nē

agjê. Kritpêrn nhÿx pre hte gôja xipĭ. Pa pre ã amnhĭ nhĭpêx anhÿr o axkrut. Tã arĭgro hõ hã kê axte pãr õ mã axã nê ma axte krĭ hõ hwÿr mõ. Nhũm kê pãrta axte mē xipê axã nhũm gôja nhÿx kê axte xipĭ. Pa pãr jakã hã kumÿ nê hã ijêt o amÿkry. Nê ho apkati. Tã nhũm nhÿhÿnh pãr õja mõ nhũm kamã mē mõr xwÿnhjaja xipumu nê ixwÿr pãr o mõ nê amnhĭ wÿr ixto api nê ma amnhĭ kõt ixto mõ.

²⁶ Na pa pre amnhĭ xã htÿx kamã ijamak o ri ã mē kãm Kris kapêr jarênh o ri ixpa anê. Kironhÿx pre gõ tãmjã xipĭ. Nhũm mē àhkĭnh nhĭ xwÿnhjaja kironhÿx prem mãânên xipĭ. Nê Ijaew nê Ijaew kêt xwÿnhjaja tõhã tanhmã ixtomnuj to ho pa. Pa pre krĭ hkwy hwÿr ixpa rÿ kapõt ã ixpa nhũm mē ixtã amÿnê. Pa pre gõ xujanãr kãm pãr kãm ri ixpa nê nhÿx kamã ty. Nhũm mē kêp Kris kwÿ hã amnhĭ to hêx xwÿnhjaja haxwÿja tanhmã ixtomnuj to pa mē ŷ hã amnhĭ xã htÿx kamã ijamak o ri ixpa. ã na prem Kris ã inhĭpêx anhÿr o pa.

²⁷ Nê na pa Jejus kapêr jarênh o ri ixpa kurê ixkêngrã nê ri ixpa. Nê tõhã inhõt kêt ã ixtã apkati. Nê tõhã inhmã prãm nê inhmã kôr nê ri ixpa. Nê tõhã ixê mex kêt nê inhmã kry nê ri ixpa.

²⁸ Na pa hte Kris kapêr jarênh o ri ixpa pē ã amnhĭ nhĭpêx anê. Nom ja pix kêt. Na pa hte krĭ piitã hkõt Kris kwÿjê hkukamã tee ri ijamaxpêr nê ijamaxpêr o:

–Hêxta waa nê. Mãn mē arĭ Kris kõt amnhĭ nhĭpêx mex japêr rÿ ko. Mãn mē ra kapêr kwÿm ri tanhmã amnhĭ tomnuj to rÿ ra hkaga.

Anhÿr o ijamaxpêr o ixpa.

²⁹ Nê na hte mēhõ Tirtũm kapêr nhĭrõp xa nê tanhmã amnhĭ tomnuj to pa tee ri omu nê ixkaprĭ htÿx kumrêx. Kõja mēhõ tanhmã Tirtũm nê mēhõ mã kapêr to nhũm kuma nê Tirtũm kõt amnhĭ nhĭpêx kêt pa tee ri ja hã omu nê nê kêp ànnãr xwÿnhta kamã inhgryk tÿx kumrêx.

³⁰ E Kris kõt ixkwÿjaja. Na pa ã mē amã amnhĭ jarênh anê. Te ixte amnhĭ to ijarkrar pyrak nõ ãm mē ate ixirerek xwÿnh ã ixpumunh pix kaxyw.

³¹ ãm hãmri na pa ã mē amã amnhĭ jarênh anê. Ixêx kêt. Pahihti Jejus nhĭpêxã Tirtũm kot ja hã xipumunh mex. Tirtũmjã mex o mex. Kõja mex o mex tũm nê pa rãhã ho pa. Tãm kot ixirerek ã xipumunh mex.

³² Kormã krĭ pē Tamas kãm ixpare ri na pre mē õ pahi Arêtja mē kãm ixtã amÿnê nhũm põristijaja krĭ hpu hã kahê xã nhõ hakwãre piitã kãm hipõk pa nê ixkãm hamak o kuhê. Pa tee inhmã nhÿhÿnh ixkator nê ma mē umaj xprõt nê ixtêm prãm nê ixirerek xwÿnh ã amnhĭ pumunh kurê kumrêx.

³³ Tã nhũm Kris kõt mē pahkwÿjaja hamaxpêr nê kawã rax mÿ nê o tē nê inhmã ãm pa hwÿr axã nê kamã nhÿ. Hãmri nhũm mē pãr nhõr o kahê nhĭrõ pē ixto wÿr pa ixkato nê mē kêp amũxu nê amnhũm xprĭ nê ma tē nê mē kêp akunok. ã na pre Tirtũm ixirerek xwÿnh ã inhmã ixto amnhĭrĭt anê.

12

Tirtũm kot Pawre mã mēmoj to amnhĭrĭt ã harênh

¹ E Kris kõt ixkwÿjaja. Na inhmã amnhĭ to jarkrar hprãm kêt tã kot paj tanhmã mē amã amnhĭ jarênh to ka mē inhma nê hã ixtã apijaãm japêr. Na hte Tirtũm tõhã inhõt kãm ixkarõ mã tanhmã kapêr to.

²⁻³ Amnepê mã angrã hõ hã na pre tanhmã ixkrã hto nê õ krĭ hwÿr amnhĭ wÿr ixto api. Na pre ra hã amgrã pē 14 ãn. Apu inhĭ rãhã ixto api rÿ apu ãm ixkarõ pix o api rÿ ko. Ixte ja hã amnhĭ pumunh mex kêt. Tirtũm pix kot ja hã xipumunh.

⁴ Na pre ixto api pa põj nê õ krĭ kamã axtem tanhmã mē kapêr to hã mē kuma. Na prem mēmoj mex kumrêx jarê pa kuma nê ixkĭnh nê. Nê inhmã mar prãm nê. Hãmri nê ijamaxpêr o:

–Hêxta waa nê. Mēmoj jarênhja mex kumrêx. Nã kot paj akupÿm wÿr nê ixkwÿjê mã harê kê mē ixpyrã nê kuma. Nã kot paj anê.

Anhÿr tã nhũm Tirtũm Karõ ja nê ixkurê nê inhmã:

–Nã kêr ka mē kãm ja jarênh kêt nê. ãm kapxipix kot kaj ama nê ri hã apa.

⁵ Anhÿr jakamã pa pre paxipix mē arom mēmojja pumu nê kuma nom kot paj ri hã amnhĭ to jarkrar kêt nê. Kot paj ãm Jejus pix tanhmã harênh to ho ri ixpa. Pão ixrom mex o mex ã harê. Nê ixrom hihtÿx o hihtÿx nê àhpumunh o àhpumunh ã harênh o ri ixpa.

⁶ Nê ixte Tirtũm nhõ krĭ hwÿr ixãpirja ãm hãmri ixte hã amnhĭ jarênh tã kot paj ja hã amnhĭ to jarkrar o ri ixpa hkêt nê. Mē ate ja hã inhmar kõt inhmex ã ijarênhja na inhmã hprãm kêt. Nom kot ka mē ixte tãm amnhĭ nhĭpêx ã xipumu nê tãm ixkapêr ã inhma hãmri nê rĭ kormã inhmã inhmex ã ijarê. ã mē ate amnhĭ nhĭpêx anhÿrja na inhmã hprãm.

⁷ Na pre Tirtũm inhõt kãm inhmã mēmoj mex kwÿ jarênh rax nê. Hãmri nê hpãnhã inhmã:

–E na ka akwÿjê rom inhõ krĭ hwÿr api nê mē kurom mēmoj mex pumunh rax nê. Tã ate ja hã amnhĭ pumunh nê ma mē kãm hã amnhĭ to jarkrar o ri apa pymaj kot paj Satanastĭ mã anê nhũm inhma nê tanhmã atomnuj to ho pa. Nom ijamaxpêr xã hkõt kõi ã anhĭpêx anê.

Anh̄yr jakamā nh̄um tanhmā inh̄ip̄ex to pa inh̄mek kēt nē ixa. Te mr̄onh̄i rax nh̄yh̄nh̄ kot ixkamnh̄w̄yr nh̄um inh̄mā tee ri hkax̄ar pr̄am kapr̄y nē ŷ hā ho inh̄ḡj̄ex rāhā nē ixpaja pyrāk.

⁸ Tā pa tee ri ja hā amnh̄i pumu nē amnh̄i to Jejus w̄y nē kām:

–Kwa Pahihti. Na pa ra mēmoja nh̄y hā ixpunuj nē ixirerek nē ixa. Kwa inh̄né ata pa akup̄ym̄ ixih̄t̄yx nē ijamakēt̄kati nē ri ixa nā?

Anh̄yr o amnh̄i to hw̄yr o axkrun̄ēpxi.

⁹ Hāmri nh̄um inh̄mā:

–Nā kot paj anē h̄yr kēt nē. Kot paj ām akutā inh̄nojarēt rāhā ho ri akōt ixa. Ka axirerek nē apa htā ixih̄t̄yx xw̄ynh̄ ā ixpumunh̄ kōt ixkamnār rom tanhmā inh̄y hā amnh̄i nh̄ip̄ex to ho ri apa. Anē.

Ā inh̄mā kap̄er anh̄yr jakamā na pa ixpunuj nē ri inh̄rot nē ixa htā ixrom hiht̄yx xw̄ynh̄ta nh̄y hā ixk̄nh̄ nē ixa. Nē kurom ixirerek xw̄ynh̄ pix ā amnh̄i to jarkrar o ri ixa.

¹⁰ Jakamā kot paj Kris ā ixpunuj nē ri ixa htā ixk̄nh̄ nē ijamakēt̄kati nē ri ixa. Kwār mē mām̄rī hā tanhmā ixto kap̄er to nē tanhmā hā inh̄ip̄ex to pa amnh̄i xā ht̄yx kamā ijamak o ri ixa. Nē ixp̄e amrakati nē inh̄rot nē ri ixa htā Kris nh̄y hā tanhmā kām amnh̄i nh̄ip̄ex mex to rāhā ho ri ixa.

Pawre kot tee ri mē hkukamā hamaxp̄ēr ā harēnh̄

¹¹ Tā mēmo kaxyw na pa ā mē amā amnh̄i jarēnh̄ anē? Nā mē ate ixtā apijaam̄ kēt jakamā na pa ā mē amā amnh̄i jarēnh̄ anē. Mē k̄ep̄ Kris nh̄y hā mē ajahkre xw̄ynh̄ ā amnh̄i to h̄ex xw̄ynh̄aja na ka htem ixrom kot amnh̄i to rūnh̄ xw̄ynh̄ ā mē harē nē mē hā apijaam̄ o ri apa. Nom ixte amnh̄i to grire xw̄ynh̄ tā mē kot amnh̄i to rūnh̄ o ijakrenh̄ kēt.

¹² Na pa pre mē akamā ri ixa nē Tirtūm nh̄y hā aa mē ate mēmoj pumunh̄ kēt kw̄y ho anh̄yr rax o ri mē akōt ixa. Nē ŷ hā akup̄ym̄ mē ā xw̄ynh̄ja ho mex. Nē mē nohkre xw̄ynh̄jē no ho mex. Na pa pre hte ā mē amā mēmoj nh̄ip̄ex anh̄yr o ri mē akōt ixa. Amnh̄i xā ht̄yx kamā ijamak o ri ixa htā Tirtūm xiht̄yx xā ho amnh̄i to ht̄yx nē ā mē amā mēmoj to anh̄yr o ri mē akōt ixa. Mē ate omunh̄ nē Tirtūm āhpumunh̄ t̄yx ā omunh̄ kurē kumr̄ex kaxyw. Nē ixp̄e Kris nh̄y hā mē ajahkre hā ixpumunh̄ kurē kumr̄ex kaxyw na pa pre ā mē amā amnh̄i nh̄ip̄ex anh̄yr o ri mē akōt ixa.

¹³ Xān pa pre nhām krī hkwȳ kamā Kris kōt mē pahkw̄yjē ho mex tā mē kajaja tanhmā mē ato mex to hkēt nē? Nā na pa pre hte mē anh̄ip̄ex o axp̄en pyrāk. Ām mēmoj pixire na pa pre mē urāk nē mē aw̄yr kēt nē. Nhām krī hkwȳ kamā ixpata ā na pa pre

mēmoj to presija nh̄um prem inh̄mā ōr o pa. Tā pa pre mē mō nē mē akōt ixa nē mēmoj to presija htā hā mē aw̄yr kēt nē. Kwa mē ā ixte amnh̄i jarēnh̄ anh̄yrja ma nē ixkamā agryk kēt nē.

¹⁴ Tā ot pa ra akup̄ym̄ mē aw̄yr inh̄nojarēt kaxyw. Na pa pre ra mē aw̄yr inh̄mōr o axkrut. Tā ra axte mē aw̄yr inh̄nojarēt kaxyw. Kot paj mē aw̄yr mō nē mē akōt ixa nom te wam ixtēmta pyrā nē mēmoj tā ri mē aw̄yr kēt nē. Ām mē amā ixk̄nh̄ pix na inh̄mā hprām. Mē apiitā te mē apē ixkra pyrāk. Na hte mē hkrarejaja mē katorxā nē mē hip̄ēxā mā ujarp̄r o pa hkēt nē. Mē hip̄ēxā nē mē katorxā na hte hkrare mā kot mēmoj to presija xā hkōt kām haprōr o pa nom mēmoj tā hw̄yr kēt nē. Ja pyrā nē kot paj mē apē ixkra pyrāk ā mēmoj tā mē aw̄yr kēt nē.

¹⁵ Kot kaj mē mēmoj to presija jap̄er nē inh̄mā harē pa ixāmnh̄ix ixk̄nh̄ kām mē amā ixk̄axpore piitā ōr par pyrāk o amnh̄i nh̄ip̄ex. Nē mē amā tanhmā amnh̄i nh̄ip̄ex to ho ixa rāhā ixtykja na inh̄mā hprām. Inh̄mā mē ak̄nh̄ t̄yx kumr̄ex tā mē kajaja mē amā ixk̄nh̄ja mē atā hkwȳ jēt kēt kumr̄ex.

¹⁶ Ixte amnh̄i mā mēmoj tā mē aw̄yr kēt tā na hte mē akw̄yjaja ix̄ex rom ixte nhām mē k̄ep̄ amrakati xw̄ynh̄jē mā k̄axpore hā mē aw̄yr o ixa hā ixkamnh̄ix.

¹⁷ Kwa tanhmā na pa pre ri mē ano kupȳr to? Xā ja kaxyw na pa pre mē aw̄yr ixkrāmnhw̄yta wa kumē?

¹⁸ Na pa pre Xitre hā ixih̄t̄yx nē mē aw̄yr kumē. Nē Kris kōt mē pah̄t̄oja pa Xitre hkōt kumē nh̄um wa ma mē aw̄yr mō. Tā xā na pre Xitre tanhmā mē ano kupȳr to? Nā na pre ā mē anh̄ip̄ex anh̄yr kēt nē. Tā wa ixte amnh̄i nh̄ip̄ex nē wa ijamaxp̄erja kot axp̄en pyrāk. Nā na pa hte urāk nē mē ano kupȳr o ri ixa hkēt nē.

¹⁹ Mān ka mē axp̄en mā mē ijarēnh̄ o:

–Nā Pawre mē hkwȳjaja mē kām amnh̄i to rūnh̄ xw̄ynh̄ prām jakamā na ā Pawre kagaja kamā mē pamā amnh̄i tā āpr̄an nē.

Anh̄yr o mē ijarēnh̄ jap̄er nom mē inh̄mā amnh̄i tā tanhmā ixāprār to hprām kēt. Ām mē inh̄mā mē ak̄nh̄ nē mē ato mex prām jakamā na pa htem tanhmā mē amā amnh̄i nh̄ip̄ex to ho ri ixa. Na pa Tirtūm noo mā Kris nh̄y hā ā mē amā mē amnh̄i jarēnh̄ anē.

²⁰ Tā kot paj jatā ma mē aw̄yr mō ka mē akw̄yjaja tanhmā amnh̄i tomnuj to jap̄er.

Mēmoj tā axp̄en mā axāk̄j̄er o apa.

R̄y mēmoj tā axp̄en kām agryk.

R̄y axp̄en kām agryk tokyx anh̄yr o apa.

R̄y axp̄en pē anh̄ox̄y.

R̄y axp̄en to akap̄er punuj o apa.

R̄y mē ajakwa kamā nhām mē hixi ho r̄er o ri apa.

Rý amnhî to rûnh prâm xâj anhmâ amnhî nhîpêx to ho apa.

Kot kaj mê â amnhî nhîpêx anhÿr o ri apa pa ja hâ mê apumu nê ixkaprî htÿx kumrêx ka mê tee ri amnhî tâ ixpumu.

²¹ Xâ kot paj mê awÿr mō nê mê apumu ka mê akwÿjaja arî mê aprō kuhpa hâ nhâm mēnijê ho amnhîkati ho ri apa? Rý arî tanhmâ ajamaxpêr punuj to ho apa? Rý atÿx ri apijaâm kêt o apa? Kot ka mê arî â amnhî nhîpêx anê pa ja hâ mê apumu nê ixkaprî xâj inhmÿr rax nê. Nê mê anhÿ hâ Tîrtûm noo mâ ixpijaâm tÿx kumrêx.

13

Pawre kot tanhmâ amnhî kukamâ mê kâm karō hto

¹ Tîrtûm kapêr â kagâ htûm tanhmâ mê kot amnhî tomnuj to xwÿnhjê jarênh kot:

Koja mēhō tanhmâ amnhî tomnuj to nhûm mēhō pyxi nê â amnhî nhîpêx anhÿr â omu nê awÿr tē nê amâ harē ka mê ama nê âm ama nê hkôt ajamaxpêr kêt nê. No koja mēmojaja axkrut rÿ axkrunêpxi nê hâ omu nê awÿr mra nê xepên kôt amâ harē ka mê ama nê mê hkôt ajamaxpêr kurê kumrêx. Anê.

Tâ ra mê awÿr inhmōr o axkrut tâ kot paj akupÿm mê awÿr mō nê mê apumu.

² Hapu hâ mê awÿr inhmōrta â na pa pre mê akwÿ kot tanhmâ amnhî tomnuj to hâ mê omu nê hâ mê kâm akir nê mê kâm:

—Kot kaj mê amnhî tomnuj kaga nê tām amnhî nhîpêx kêt kot paj nhÿmâ akupÿm mê awÿr mō nê â mê ate amnhî nhîpêx anhÿr â mê apumu nê hâ mê atomnuj tÿx kumrêx kām ga. Anê.

Jakamâ kot paj mê ma mê awÿr mō nhûm mê akwÿjaja arî mê ate amnhî tomnuj o apa hâ inhmâ mê ajarê pa mê atâ mê kuma nê tanhmâ mê ato htÿx nê.

³ Kot kaj mê ja hâ ixpumu nê aprî hâ ixte Kris nhÿ hâ ixkapêr xwÿnh â ixpumunh tÿx kurê kumrêx. Kris ixrom hihtÿx o hihtÿx. Na pre ra mê ate amnhî tomnuj o apata mÿrapê tanhmâ mê anhîpêx to. Tâ kot kaj mê kormâ â ate amnhî nhîpêx anhÿrja kaga hkêt hâ koja tee ri ja hâ mê apumu nê mê anhîpêx kati nê.

⁴ Amnepēm na pre Krisja te hihtÿx kêt pyrâ nê âm arî mê kâm xa nhûm mē unê nê pî kahpa â kunhō nê kupî. Tâ nhûm Tîrtûmja âhpumunh tÿx o akupÿm ho htîr nhûm akupÿm htîr o htîr nê Tîrtûm nhÿ hâ hihtÿx o hihtÿx â amnhî to amnhîrîť. Ja pyrâ nê wam mê awÿr inhmōrta â na pa pre hte mê akamâ te Kris kormâ htyk kêt ri hihtÿx kēeta pyrâ nê mê akôt ixpa. Tâ kot paj ma akupÿm mê awÿr mō hāmri nê te Kris ra akupÿm htîr nê hihtÿx o hihtÿxta

pyrâ nê Tîrtûm xihtÿx xâ ho tanhmâ mê kot amnhî tomnuj xwÿnhjê nhîpêx to. Hāmri nhûm mê amnhî tâ ixpumu nê Tîrtûm nhÿ hâ ijamaxpêr tÿx â ixpumunh kurê kumrêx.

⁵ Kwa mê aprî hâ tanhmâ mê ate amnhî nhîpêx to hâ amnhî pumu. Xân ka htem âm hāmri amnhî kaxyw Jejus Kris kôt ajamaxpêr o ri apa nâ? Kot kaj mê apê hkwy hâ koja mê akaxwÿnh kām mê akamâ hkrî rāhâ nê. Nom koja mê akaxwÿnh kām mê akamâ hkrî hkêt ka mê âm apê hkwy hâ amnhî jarênh kaprÿ.

⁶ No pa na ixte ja hâ amnhî pumunh mex. Ixpê Jejus kwÿ na pa. Ra ixkamâ hkrî nê ixkôt pa ho pa jakamâ ixpê hkwy na pa. Tâ mê ate ja hâ ixpumunh mexja na inhmâ hprâm. Na pa hte ixpê Jejus kwÿ hâ amnhî jarênh kaprÿ hkêt nê.

⁷ Nê na pa hte mê ato tanhmâ Tîrtûm wÿr to ho ri ixpa nê mê ato hwÿr o:

—Pa Tîrtûm. Kwa tanhmâ Korîť nhō xwÿnhjê hkrâ hto kē mê tanhmâ amnhî tomnuj to ho pa hkêt nê.

Anhÿr o mê ato kwÿw. Mēmo kaxyw na pa hte â mê ato hwÿr anê? Ixte mê ajahkre mex â amnhî to amnhîrîť kaxyw kêt. Âm mê ate amnhî to mex rāhâ ho ri apa kaxyw. Kot kaj mê â amnhî nhîpêx anhÿr o ri apa hāmri nhûm axtem mēhō mê awÿr mōn pōj nê tanhmâ mê amâ mê ijarênh to nê mê ijarênh o:

—Kwa Pawre mê hkwyjaja na htem Tîrtûm kapêr kwÿm ri Korîť nhō xwÿnhjê jahkre ho pa.

Anhÿr tâ pa amnhî tâ mê kuma nê âm mê kuma.

⁸ Na pa hte Tîrtûm kapêr kutâ amnhî xunhwÿr kêt nê. Na pa hte âm mê ate hkôt amnhî nhîpêx o ri apa hâ mê amâ karō kamâ ixihtÿx rāhâ ho ri mê akôt ixpa.

⁹ Jakamâ kot kaj mê hkôt amnhî nhîpêx mex o apa pa ja hâ mê apumu nê ixkînh nê. Mê kot xepên mâ ixirerek â ijarênh o pa htāâ. Â mê ate amnhî nhîpêx anhÿr o apa kaxyw na pa hte mê ato Tîrtûm wÿr o ri ixpa nê kām:

—Pa Tîrtûm. Kwa tanhmâ Korîť nhō xwÿnhjê hkrâ hto kē mê kot amnhî tomnuj kaga hpa nê hpānhâ akapêr kôt pix mâ mām amnhî nhîpêx rāhâ nê. Anê.

¹⁰ Tâ pa kormâ mê awÿr inhmōr xwÿj ri â amnhî kukamâ kagâ nhîpêx nê mēnh anê. Mê ate kamâ harênh nê mar nê tokyx akupÿm tām amnhî nhîpêx kaxyw. Kot pa mê awÿr mō nê Pahihti nhÿ hâ mê ate amnhî tomnuj â mê amâ akir. Nom inhmâ â mēmoj tâ mê amâ ixākjêr anhÿr prām kêt. Âm ŷ hâ kapêr o mê ajahkre mex nhûm mê ate inhmar nê hkôt amnhî nhîpêx rāhâ ho apaja na inhmâ hprâm.

¹¹ E Kris kôt ixkwỳjaja. Ām ja pix. Kwa kēr ka mē ixkapēr mar tỳx nē hkôt amnhī nhīpēx mex nē. Nē Tirtūm kôt pix mā ri tanhmā amnhī nhīpēx to ho apa rāhā ho apa. Nē tām ri amnhī nhīpēx. Nē axpēn kôt ajamakētkati nē akīnh nē axāmhīx ri apa. Kot kaj mē ā amnhī nhīpēx anhyr o apa nhūm Tirtūm mē akôt pa ho pa. Kām mē pajapē htỳx kumrēx. Kēp mē pamā mē pahkīnh nē mē pajamakētkati jagjēnh xwỳnh.

¹²⁻¹⁴ Nē ota jar Kris kôt mē pahkwỳjaja pa mē ixpimrāātā mē awỳr ixpēr mē. Mē xpiitā mē inhmā mē akīnh tỳx jakamā na pa mē awỳr ixpēr mē.

Nē kē Pahihti Jejus Kris mēmoj to mē akutā nojarēt rāhā ho pa. Nhūm Tirtūm arī kām mē ajapē rāhā ho pa. Nhūm Karō tanhmā mē akrā hto ka mē axpēn to mex pix kukamā mēn ajamaxpēr o apa.

Tā e ixkwỳjaja. Ām ja pix. Ixpē Pawre na pa mē awỳr kagàja nhīpēx nē ā mēnh anē.

Karatas Pawre kot Karatas kamã Jejus kõt hkwyjê hwÿr kagã nê mênh

Pawre na pre kagãja nhîpêx nê pika pê Karatas kamã Kris kwÿjê hwÿr kumê. Na pre ra Ijaew kwÿjaja mē hwÿr mra nê Tirtüm kapêr kwÿm ri mē ahkre ho pa nê mē kãm:

–Kot kaj mē amnhî kaxyw Jejus Kris kõt ajamaxpêr hãmri nê mãnen mē xpe Ijaew nhîgêt kot amnhî nhîpêx kõt amnhî nhîpêx. Kê Tirtüm ja hã mē apumu nê mē ato hkra. Anê.

Nom ã mē kapêr anhÿrja kot anhÿr kêt. Mē pahte amnhî kaxyw Jejus Kris kõt pajamaxpêr nê hkôt amnhî xunhwÿr pix ã mē pahpumunh kôt na hte Tirtüm mē pahto hkra. Tã nhüm prem ã mē kãm ho hêx anhÿr o pa nhüm Pawre tee ri ã mē kapêr anhÿrja ã mē harênh ma nhüm ja kêp omnuj nê. Jakamã nhüm Karatas nhô xwÿnhjê mã kagãja nhîpêx nê mē hwÿr kumê. Nê kamã hprî hã Tirtüm kot mē ho hkra kaxyw tanhmã amnhî nhîpêx to hã mē kãm harê nê hã kagã. Nê mē kãm:

1-2 Pa Karatas nhô xwÿnhjaja? Xã mē amex? Ixpê Pawre na pa mē awÿr ixpêr mē nê mēmoj tã mē amã karô.

Mêpahpãm Tirtüm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhüm Tirtüm akupÿm ho htür. Hãmri nhüm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtüm mē Jejus Kris na pre wa ixãm. Jakamã na pa ã mē awÿr kagã nhîpêx nê mênh anê. Mē apê Tirtüm krajê hwÿr.

Nê ota jar krî ja kamã ixpyrà nê Kris kõt mē pahkwÿjaja mē awÿr hpêr mē.

³ E kê Mêpahpãm Tirtüm mē Pahihti Jejus Kris wa mēmoj to mē akutã nojarêt rãhã ho pa. Nê mē ato mex rãhã nê. Ka mē wa ÿ hã akînh nê ajamakêtkati nê axãmnhîx ri apa.

⁴ Nã na pre Krisja amnhî grõnh kõt mē pahwÿr wrÿ nê mē panê ty. Mē pahte amnhî tomnuj pãnhã amnhîrer kaxyw mē panê ty. Mêpahpãm Tirtüm kãm hprãm xã hkôt. Tã mēmo kaxyw na pre ã mē panê amnhî nhîpêx anê? Nã pika ja kamã mē kot amnhî nhîpêxja omnuj tÿx jakamã nhüm amnhî grõnh kõt te mē kot amnhî tomnuj pê mē papytãr pyràk o mē panhîpêx nê ã mē panê htyk anê.

⁵ Jakamã kwa kêr pu mē Tirtüm mã mex o mex ã mãn harênh o ri papa. Nã kot puj mē ã amnhî nhîpêx anhÿr rãhã ho ri papa.

Mê ujarênh pixi ãm hãmri hã harênh Rômãn 16.17; Sikün Korît 11.3-4; Epes 4.14; Korosê 2.8; Sikün Pêtre 2.1-3

⁶ Kwa ixkrãmnhwÿjaja. Na pa pre mē ate tanhmã amnhî nhîpêx to hã mē ajarênh ma nê ixkaprî nê tee ri mē akukamã ijamaxpêr. Na pre Tirtümja Kris kukwak ri mē ato mex nê. Nê mē ate hkôt amnhî nhîpêx o apa hprãm xãj te kot amnhî wÿr mē awÿr pyràk o mē anhîpêx ka mē hkôt amnhî xunhwÿ. Tã xep tanhmã mē ajamaxpêr to nê ra hkaga kaxyw. Ra axtem mē ujarênh ôja ma nê gryk ã Tirtüm kaga kaxyw. Pa tee ri mē ajarênh ma nê ixkaprî nê. Kwa mon ka mē axtem nê ri ã amnhî nhîpêx anhÿr mã?

⁷ Jejus jarênh pix na ãm hãmri. Mo mē ujarênh mex ô kot ka kêt mē ama nê hkôt amnhî nhîpêx? Nã amrakati kumrêx. ã mē amã ujarênh anhÿr xwÿnhjaja na htem Kris kapêr o pihkãr rûnh kumrêx o pa nê katãt kôt harênh kêt nê. Ka xep mē ama nê ajamaxpêr kati rûnh nê.

⁸ Na pa pre ma mē awÿr mō nê ãm hãmri mē amã Jejus kot tanhmã mē panê amnhî nhîpêx to hã harê ka prem inhma. Tã koja mēhõ mē awÿr mō nê mē amã nhãm mē ujarênh ô jarê nhüm Tirtüm ja hã omu nê nhÿrmã ma mē kot amnhî xã htÿx kamã hamak tùm xã hwÿr kumê nhüm ma hwÿr mō nê aa kator kêt nê. Mē pahtõ rÿ Tirtüm kapêr o wrÿk xwÿnhjê hõ koja ã amnhî nhîpêx anê nhüm ja hã omu nê ma kuwy pê hîmõta wÿr amnhî nê kumê.

⁹ E kot paj axte mē amã ja jarê ka mē aprî hã inhma. Kojã mēhõ mē awÿr mō nê mē ate hkôt amnhî xunhwÿr xwÿnhhta kwÿm ri tanhmã mē amã ujarênh to. Hã koja Tirtüm omu nê nhÿrmã ma mē kot amnhî xã htÿx kamã hamak tùm xã hwÿr kumê nhüm ma hwÿr mō nê kamã pa ho pa nê aa kator kêt kumrêx.

Tirtüm pix kãm Pawre hkînh hprãm ã kot jarênh

Juãw 5.44; Atre 26.9-20; Karatas 2.6

¹⁰ Nê koja mēmojaja ixkapêr ma nê kãm mar prãm kêt o kãm ixkînh kêt japêr nê mãmrî kãm ixkînh kêt. Tirtüm kãm ixkînhja pix na inhãm hprãm. Kop apu mē piitã kãm ixkînhja mãn inhãm hprãm ronhÿx pa Kris nhÿ hã kapêr jarênh o ri ixpa hkêt nê.

Tirtüm kot Pawre mã Kra Jejus o amnhîrît ã harênh

Sikün Korît 1.12; Wam Tesarõn 2.4

¹¹⁻¹² E Jejus kõt ixkrãmnhwÿjaja. Nã ixte mē ujarênh mex jarênh o ixpaja na pre jar pika ja kamã mēhõ amnhî krã hkôt inhãm harênh rÿ inhãm ahkre hkêt nê. Jejus Kris tãm na pre ixwÿr kato nê inhãm ho amnhîrît. Jakamã mex o kot pika jakamã mē ujarênh piitã hakrenh par.

¹³⁻¹⁵ E kot paj ixprî hã mē amã tanhmã amnhî jarênh to ka mē inhma. Tanhmã Tirtüm kot amnhî kaxyw ixãm to hã pa mē amã amnhî jarê. Nã na pre kormã ixkêt

ri ixkukamā hamaxpēr nē amnhīm ixta nē amnhī kaxyw ixām nē kot ixta mex ā ixtā amnhī jarē. Tā pa pre ixkato nē gaa nē ixàptār nom kormā Jejus Kris kōt amnhī xām kēt nē. Na pa pre axtem nē inhmā mē ixpē Ijaew kot amnhī nhīpēx kōt pix mā amnhī nhīpēx o ri ixpa hprām nē. Nhūm pre ixpyrā nē arī mē nywjaja haxwýja kām mē hkōt pix mā ri amnhī nhīpēx o pa hprām nē. No inhmā mē hkōt amnhī nhīpēx mex o mē hakrenh par prām jakamā na pa pre mē inhīgēt kōt amnhī nhīpēx mex kumrēx o ri ixpa. Mē kapēr piitāā hkōt amnhī nhīpēx mex nē. Tā ā amnhī nhīpēx kōt o ixpa kaprý. Na pa pre axtem nē mē kot Tirtūm Kra Jejus Kris kōt amnhī xunhwýr xwýnhjē nhīpēx kati ho ri mē hkōt ixpa nē inhmā mē himex prām týx kumrēx. Á na pa pre amnhī nhīpēx anhyr o ri ixpa. Ra mē ate ja hā ixpumunh mex.

¹⁶⁻¹⁷ Tā pa pre ma Tamas wýr mō. Kamā tanhmā Kris kwýjē nhīpēx to kaxyw ma mē hwýr mō. Hāmri nē kormā mē hwýr ixàhtēp o inhmōr mē nhūm Tirtūm tanhmā ixta nē inhmā Kra Jejus o amnhīrit pa jatā omu. Kēp Tirtūm Kra hā pa ixpri hā omu. Nhūm inhmā kapēr nē ixte kām tanhmā amnhī nhīpēx to ho ri ixpa kaxyw ixàpēnh ā inhmā karō nē Ijaew kēt xwýnhjē hwýr inhmē. Ixkwý Ijaew wýr inhmēnh kēt nē. Na pre inhmā:

–E kēr ka ma Ijaew kēt xwýnhjē hkōt ri mē kām ixkapēr jarēnh o ri apa.

Anhyr jakamā pa pre kuma nē hkōt amnhī xām kurē kumrēx nē ā amnhī nhīpēx anhyr o ri ixpa. Jao tanhmā ixte kēp hkwyjē nhīpēx tota kaga nē ma pyka pē Arap wýr mō. Nom tanhmā amnhī tā Jejus kwýjē kujjēr to hkēt nē. Nē Jerujarē hwýr inhmōr nē Jejus nhý hā mē ahkre xwýnh maatijaja tanhmā amnhī tā mē kujjēr to hkēt nē. Ám Tirtūm kot inhmā hā karō xā hkōt ma Arap wýr mō nē kamā kapōt ā ri ixpa. Kamā na pre Tirtūmja inhmā Jejus Kris kot tanhmā amnhī nhīpēx to ho amnhīrit o pa. Hāmri nē inhmā kapēr pa amnhī tā kuma hāmri nē ma akupým Tamas wýr mō.

¹⁸ Tā nhūm ra amgrā axkrunēpxi nē hapēx pa Tamas rūm ixkato nē ma Jerujarē hwýr Simāw Pētre hwýr mō. Hāmri nē kuri pōj nē hkōt ixpikamēnh ā ixtā semān axkrut.

¹⁹ Nom mē kot Jejus nhý hā hkwyjē jahkre ho mē pa xwýnh maati hkwyjē hō pumunh kēt kumrēx. Ám Simāw Pētre mē Pahihti Jejus tō Xiakreja pix wa omu.

²⁰ Ám hāmri na pa ā amnhī jarēnh anē. Tirtūm kot ja hā ixpumunh mex.

²¹ Tā pa pre mē kurūm ixkato nē hpānhā ma pika hkwyjē hkōt ijaarōx o mē hkōt ixpa. Ma pika pē Sir mē Sirisja wa hwýr mō.

Mē kot amnhī jaēr pē Pawre kot amnhī nhīpēx nyw ā omunh ā mē harēnh

²² Nom Jutej kamā Kris kwýjaja na prem kormā ixpumunh kēt nē. Ám Simāw Pētre mē Xiakreja pix na pre wa ixpumu.

²³ Na pre ra mē hkwyjaja tanhmā hkwyjē kot axpēn mā ijarēnh toja mā. Na prem ijarēnh o:

–Kwa Jejus ā mē panhīpēx kati htýx o pa xwýnhhta na pre tanhmā hamaxpēr to nē hpānhā mē kām Jejus kapēr jarēnh o ri mē hkōt pa. Mē kot amnhī kaxyw hkōt hamaxpēr kaxyw. Ra kot Jejus nē mē pahkurē htā hpānhā mē kām kapēr jarēnh o ri mē hkōt pa. Anē.

²⁴ Hāmri nhūm Kris kwýjaja amnhī jaēr pē ijarēnh ma nē inhý hā hkīnh nē. Nē ixtā Tirtūm mā mex o mex ā harē.

2

Pawre kot Kris kwý hkrāhtūmjē mā amnhī jarēnh

Atre 15.1-11

¹⁻² Tā nhūm amgrā pē 14 nē hapēx nhūm Tirtūm akupým Jerujarē hwýr inhmē pa ma akupým mō. Panāpe nē Xitre mē pa mē mō nē mē hwýr pōj. Hāmri nē Kris kwý hkrāhtūmjē hwýr mra nē mē kām amnhī jarē. Mē tapxipixjē mā amnhī jarē nē ixte Ijaew kēt xwýnhjē mā Jejus kapēr jarēnh o ixpa hā amnhī jarē. Na pa pre ra amnhī kukamā ijamaxpēr o:

–Koonēn. Kot pa apu mē kām amnhī jarē nhūm mē inhma nē ixte Tirtūm kapēr kwým ri mē ahkre ho ixpa hā ixkamnhīx rý hā inhmā akir. Na pa hte Ijaew kēt xwýnhjē mā Kris jarēnh o ixpa no ām mē ixpē Ijaew pyrā nē finat Mojes kapēr kōt mē kot amnhī my kwryt ká jakār ā mē kām karō hkēt nē. Ám mē kot Kris kōt amnhī xunhwýr pix kaxyw na pa hte mē kām hā karō ho ixpa. Tā kot paj Kris kōt mē ixkrāhtūmjē mā ja hā amnhī jarē nhūm mē inhma nē tanhmā hamaxpēr to nhūm ja mē kēp omnuj japēr nhūm mē tanhmā amnhī to nē ixte Kris kapēr jarēnh o ixpaja nē ixkurē. Jakamā nhūm ra ixte mē kām Kris kapēr jarēnh o ixpa nhūm mē kot inhar xwýnhjaja ijarēnh ma nē tee amnhī kukamā hamaxpēr o ra hkapri nē pa.

Anhyr o ijamaxpēr.

³ Tā na prem ixte amnhī jarēnhja ma nē ja nē tanhmā inhmā nē hkēt nē. Pa mē kām amnhī jarēnh pa nhūm mē inhma nhūm Ijaew kēt xwýnhjaja kot amnhī jakār kētja nhūm mē kām mex nē. Mē kēp tanhmā kute hkēt nē. Nhūm Ijaew kēt xwýnh Xitre ixkōt pa nhūm mē kot omunh tā kot mē ixpyrā nē amnhī my kwryt ká krāhyr ā kām karō hkēt nē.

⁴ Tā nhūm mē kēp Jejus kwý hā amnhī jarēnh o hēx xwýnhjaja mē ixtā akuprō. Nom

hêx rom mê ixte Kris kôt amnhî nhîpêx â mê ixpumunh pix kaxyw. Hâmri nê ixkapêr ma nê Xitre hâ inhmâ akir nê inhmâ:

–Kwa na pre Xitre Jejus kôt pix mâ amnhî xâm nom finat Mojes kot mê pahpê Ijaew kôt amnhî nhîpêx â karô hkôt amnhî nhîpêx kêt nê. Kwa ja mex kêt. Na htem Jejus kôt amnhî xunhwÿ nê määnên finat Mojes kapêr kôt amnhî nhîpêx. Jakamâ kwa kâm anê kê amnhî my kwryt kâ krâhta. Finat Mojes kot mê panhîgêtjê mâ hâ karô xâ hkôt.

⁵ Anhÿr tâ pa prem mê kuma nê âm mê kuma. Kot pa ri mê kâm ja hâ karô hkêt nê. Âm Jejus kapêr kôt pix mâ kot puj mê amnhî nhîpêx o papa nê finat Mojes kapêr mê Jejus kapêr o papihkâr kêt nê. Kot puj mê anhÿr o Jejus kapêr o ahkâ nhûm ja mex kêt nê. Jejus kapêr kâm mo mê kot mêmÿ kwryt kâ jakâr â mê kâm karô? Amrakati. Jakamâ na pa pre âm mê pano kupyr o mê pa xwÿnhtajê kapêr ma nê âm mê kuma.

⁶ Tâ pa pre ra Ijaew kwÿ pê Jejus kôt ixkwÿ hkrâhtûmjê mâ amnhî jarênh pa. Tanhmâ ixte Ijaew kêt xwÿnhjê mâ Jejus kapêr jarênh to hâ mê kâm amnhî jarê nhûm mê inhma nhûm ja mê kâm mex nê. Jakamâ Ijaew kêt xwÿnhjaja kot mê ixpê Ijaew pyrâ nê finat Mojes kapêr kôt amnhî nhîpêxja nhûm mê tanhmâ mê kaxyw inhmâ hâ karô hto hkêt nê. Tirtûm na hte mê kêt mê hkrâhtûm â mê omunh xâ hkôt mê hkwÿjê rom tanhmâ mê ho mex to hkêt nê. Na hte mê pahpiitâ mê panhîpêx o axpên pyrâk. Jakamâ na pa hte ijaxwÿja Jejus kôt mê ixkrâhtûmjaja kot amnhî to rax o ijakrenh â tanhmâ ija-maxpêr to hkêt nê.

⁷ Na pa pre mê kâm amnhî jarênh pa nhûm mê inhma nê axpên mâ:

–Nâ âm hâMRI na pre Tirtûm ahpÿnhâ Pawre mê Simâw Pêtre wa kâm wa âpênh â karô nê Ijaewjê hwÿr Simâw Pêtre mê nê axtem Ijaew kêt xwÿnhjê hwÿr Pawre mê. Wa kot ahpÿnhâ mê hkôt mê kâm Jejus kapêr jarênh o ri pa kaxyw. Nâ âm hâMRI na hte wa â amnhî nhîpêx anhÿr o pa. Nâ ja mex. Anê.

⁸ Ra Tirtûm kot Ijaew wÿr Simâw Pêtre mênh tâ hpânâ Ijaew kêt xwÿnhjê kaxyw pa ixâm. Ý hâ wa ixte mê kâm Jejus kapêr jarênh o ri mê hkôt wa ixpa kaxyw.

⁹ Jakamâ nhûm mê ixkrâhtûm Xiakre mê Simâw Pêtre mê Juâwja ixte mê kâm amnhî jarênh ma nê hkÿnh nê. Tirtûm kot ixto mex nê Ijaew kêt xwÿnhjê hwÿr inhmênh â ixte amnhî jarênhja ma nê hkÿnh nê. Hâmri nê Panâpe mê wa inhmâ kapêr nê wa inhmâ:

–Nâ âm hâMRI. Kot puj xep mê anê. Kâ mê Panâpe wa kot kaj wa ma Ijaew kêt xwÿnhjê hkôt mê kâm Jejus kapêr jarênh o ri apa. No mê pajaja kot paj mê axtem mê pahkwÿ Ijaew kôt harênh o ri ixpa. Â kot puj mê ahpÿnhâ mê hwÿr papa anê.

¹⁰ Nom kêr ka wa inhmar kumrêx. Kêr ka wa mê ixpyrâ nê Kris kôt mê pahkwÿjê pê amrakati xwÿnhjê ho mex o ri apa. Mêmÿoj to mê kutâ anojarêt râhâ ho ri apa.

Anhÿr o wa inhmâ kapêr pa wa mê kuma nê mê kâm:

–Tôe. Nâ kot paj wa anê. Ra â wa ixte amnhî nhîpêx anhÿr kaxyw kênâ. Anê.

Pawre kot Simâw Pêtre mâ âkjêr â harênh Atre 10; Rômân 3.21-31, 6.1-14

¹¹⁻¹⁴ Tâ nhûm Simâw Pêtreja man mê ixwÿr krî pê âxiok wÿr mô. Nê jar mê ixkôt ri pa. Ixpyrâ nê kêt Ijaew tâ Kris kôt Ijaew kêt xwÿnhjê hkôt pa nê mê kutâ apkur o pa. Ixpyrâ nê amnhîx ri mê kutâ apkur o ri mê hkôt pa. Ijaew kêt xwÿnhjaja kot amnhî my kwryt kâ jakâr kêt jakamâ na pa htem mê kutâ ixâpkur kêt nê. Tâ ra mê ixte Kris kôt amnhî xunhwÿr jakamâ ja mê ixpê tanhmâ kute hkêt. Na pa htem ixâmnhîx mê hkôt ixpa nê mê kutâ apku. Ra mê ixte Kris kôt amnhî xunhwÿr kênâ kot pa hkêt ri mê hkôt ixpa hkêt. Na pa htem ixâmnhîx mê hkôt tanhmâ amnhî nhîpêx to ho ri ixpa.

Tâ nhûm Xiakre kot mê ixwÿr mê rênh xwÿnhjaja haxwÿja mê ixwÿr mô. Mê ixpyrâ nê mê kêt Ijaew tâ mê ixpyrâ nê Kris kôt amnhî xunhwÿ. Jakamâ ra mô nê mê ixwÿr pøj. Hâmri nhûm Simâw Pêtre mê omu nê mê umaj axte Ijaew kêt xwÿnhjê kutâ apkur kêt nê. Axtem nê ôja py nê o tê nê mê hkâx â ahte apkur o nhÿ. Hâmri nhûm ra mê ixri Ijaew kwÿ pê Kris kôt mê pahkwÿjaja ja hâ omu nê piitâ urâk nê â amnhî nhîpêx anê nê Simâw Pêtre ri Ijaew kêt xwÿnhjê hkâx â apkur o hkrî. Nhûm ixkôt pa xwÿnh Panâpeja haxwÿja ja hâ mê omu nê mê urâk nê â amnhî nhîpêx anê nê mê hkâx â apku. Hâmri pa tee ri ja hâ mê omu nhûm ja inhmâ mex kêt nê. Na prem â amnhî nhîpêx anhÿr o Tirtûm kapêr â kagâ htûm kamâ mê ujarênh mex kwÿm ri amnhî nhîpêx. Jakamâ pa â mê kot amnhî nhîpêx anhÿrja nê Simâw Pêtre mâ ixkapêr. Mê piitâ mê noo mâ xa nê â kot amnhî nhîpêx anhÿrja nê kâm ixkapêr nê kâm:

–Tk. Kwa nâ Simâw Pêtre. Ri â amnhî nhîpêx anhÿr kêt nê. Pahpê Ijaew tâ kormâ pahkwÿjaja hpôx kêt ri ka hte ixpyrâ nê axâmnhîx Ijaew kêt xwÿnhjê kutâ axâpkur o ri apa. Tâ amnhî wÿr mê pahkwÿjê pumu nê axtem nê mê hkâx â axâpkur o akrî. Kwa nâ na ka â amnhî nhîpêx anê nê ra axtem amnhî nhîpêx. Te ate mê kâm akapêr nê mê kâm: “Kot kaj mê ixpyrâ nê amnhî my kwryt kâ jakâ pa ri mê akôt ri ixpa nê mê akutâ ixâpkur o ixpa.” Anhÿr pyrâk. Kwa ja mex kêt.

¹⁵ –Mê pahpê Ijaew na pu htem mê kêt Ijaew kêt xwÿnhjê jarênh o: “Mê kot mê

pahte amnhî nhîpêx kôt amnhî nhîpêx kêt xwýnhjaja.” Anê.

¹⁶ Tã mê pahpê Ijaew tã na hte Tirtûmja mê pahte mê panhîgêt kot amnhî nhîpêx kôt mê pahte amnhî nhîpêx â mê pahpumunh kôt mê pahto hkra hkêt nê. Ra mê pahte ja pumunh mex. Âm mê pahte amnhî kaxyw Jejus Kris kôt pajamexpêr â mê pahpumunh kôt pix mâ na hte mê pahto hkra. Kot pu mê amnhî kaxyw hkôt pajamexpêr nhûm ja hã mê pahpumunh kôt pix mâ mê pahto hkra.

¹⁷ —Mê pahpê Kris kwý jakamã na hte Tirtûm amnhîm mê pamex â mê pajarê nê mê pahte amnhî tomnuj xwýnh kêt â mê pajarê. Jakamã na pu htem paxâmnhîx ri Ijaew kêt xwýnhjê kot Kris kôt amnhî xunhwýr xwýnhjê hkôt ri papa ho papa. Ra Tirtûm kot mê pahpyrã nê amnhîm mê mex â mê harênh kênã. Tã koja mêhõ kormã ja mar kêt nê tanhmã hã mê pajarênh to nê mê pajarênh o: “Tk. Ra mê kot amnhî kaxyw Kris kôt hamaxpêr tã axtem nê Ijaew kêt xwýnhjê hkôt ri pa. Jakamã arî mê kot amnhî tomnuj xwýnh kênã.” Anhýr o mê pajarênh japêr. Nom âm mê pahte amnhî tomnuj xwýnh â mê pajarênh kaprý. Na pu htem Kris kôt amnhî nhîpêx nê ra tãm amnhî nhîpêx mex o papa.

¹⁸ No kot pu mê hkôt ri amnhî nhîpêx o papa htã tanhmã pajamexpêr to nê pahte amnhî nhîpêx tûm o awjanã hãmri nê amnhî tomnuj týx kumrêx.

¹⁹ —Tã tanhmã kot puj wem amnhî to nê mê panhîgêt kot amnhî nhîpêx piitã hkôt amnhî nhîpêx mex o ri papa? Na pu htem pajamexpêr o: “Kot paj â amnhî nhîpêx anê nê â amnhî nhîpêx anê nhûm Tirtûm ja hã ixpumu nê amnhîm inhmem â ijarê.” Anhýr o pajamexpêr. Hãmri nê finat Mojes kot mê panhîgêjtê mã kapêr piitã hkôt ri mnhî nhîpêx o papa nom tõiã hkwyým ri tanhmã amnhî tomnuj to. Jakamã nhûm Tirtûm ja hã mê pahpumunh kôt mê pamex â mê pajarênh kêt nê. Kapêr â kagã htûm kot â ja jarênh kot anhýr. Nom kot puj mê amnhî kaxyw Kris kôt pajamexpêr nhûm ja hã mê pahpumunh kôt amnhîm mê pamex â mê pajarê. Hãmri pu mê Tirtûm kôt amnhî nhîpêx o ri papa nê axte mê pahpê Ijaew nhîgêjtê kot amnhî nhîpêx kôt amnhî nhîpêx hkêt nê. Te ra mê pahtyk nê axte hkôt amnhî nhîpêx kêt pyrã nê pãnhã Tirtûm kapêr kôt pix mâ ri amnhî nhîpêx o ri papa.

²⁰ —Nê na prem pí kahpa hã Kris nhô nê kupi nhûm mê pahte amnhî tomnuj te ðhkõ hã jêt nê haxwýja htyk pyrãk. Jakamã na pu htem amnhî tomnuj kaga nê Kris kôt amnhî xunhwý nhûm Karõ mê pahkarõm agjê pu mê te Jejus Kris kot amnhî nhîpêx pyrãk o amnhî nhîpêx o papa. Jao hpãnhã mê pahte amnhî nhîpêx nyw pix o amnhî nhîpêx o ri papa. Kris kãm hprãm xã hkôt pix mâ

tanhmã ri amnhî nhîpêx to ho papa. Kris kêp Tirtûm Kra htã kãm mê pajapê kamã mê panê htyk jakamã na pu htem amnhî kaxyw kôt pix mâ pajamexpêr rãhã ho papa.

²¹ —Âm hãmri na pre Tirtûm mê pahto mex kumrêx nê mê pahwýr Krisja mê nhûm mê pahwýr wrý nê mê panê ty. Tã na pa pre kapêrja ma nê mar týx nê hã ri ixpa nê ho ijamakêtkati hkêt nê. Tã kop apu Tirtûm kot mê pahte mê panhîgêjtê kot amnhî nhîpêx o amnhî nhîpêx â mê pahpumunh kôt mê pamex â mê pajarênh ronhýx pre Krisja âm mê panê htyk kaprý. Mo kaxyw nhýx pre mê panê ty? Anê.

Â na pa Simãw Pêtre mã ixkapêr anê nhûm mê piitã apkur pê hã inhmar o hkrî.

3

Mê pahte amnhî krã hkôt pahpê Tirtûm kra hkêt â mê pajarênh

Karatas 5.16-23; Epes 2.8; Piripos 3.9; Sikûn Ximotre 1.9; Xitre 3.4-7

¹ Kwa Karatas nhõ xwýnhjaja. Te ri mê ajamexpêr kêt kumrêx pyrãk. Amnepê mã mê awýr inhmõrta â na pa pre mê amã tanhmã Kris htykja jarênh to. Pí kahpa hã mê panê htyk â harê ka mê aprî hã inhma. Tã nhûm Tirtûm kapêr jarênh o mê hêx xwýnhjaja ixpãnhã mê awýr mra nê tanhmã mê amã ujarênh to ka mê ama nê mê ajamexpêr o apihkãr rax nê. Jao axte Kris tyk mã ajamexpêr kêt nê.

² E mê inhãm mêmoj jarê. Mêmoj tã mê apumunh kôt na pre Tirtûm mê awýr amnhî Karõ rê nhûm mê awýr agjê? Xã mê anhîgêt kot amnhî nhîpêx kôt mê ate amnhî nhîpêx â mê apumunh kôt? Nã na pre ja hã mê apumunh kôt mê awýr rênh kêt nê. Na ka prem Kris jarênh ma nê amnhî kaxyw hkôt ajamexpêr nhûm ja hã mê apumunh kôt mê awýr kurê nhûm mê awýr agjê.

³ Na pu htem amnhî krã hkôt tanhmã amnhî nhîpêx to ho pahpê Tirtûm kra hkêt nê. Tirtûm Karõ pix kukwak ri na pu htem pahpê hkra. Tã ka mê axtem nê ajamexpêr o:

—Nã Tirtûm ra kot ixto hkra jakamã kot paj arî ri mê inhîgêt kot amnhî nhîpêx kôt amnhî nhîpêx o ixpa rãhã nê inhmem kumrêx nê ri ixpa. Anê.

Kwa â mê ajamexpêr anhýrja mex kêt.

⁴ Mê akwý kot Kris â mê atomnuj tã ka mê amnhî xã htyx kamã ajamak o ri apa htã Kris kaga hkêt nê. Tã ra axtem nê mê kapêr o mê hêx xwýnhjê jamaxpêr kôt ajamexpêr o te Kris â amnhî xã kamã ajamak kaprý pyrãk. Kwa nã mê ri mê hkôt ajamexpêr kêt nê.

⁵ Na pre Tirtûm mê awýr amnhî Karõ rê nhûm mê awýr agjê nê mê amã aa mê ate mêmoj pumunh kêt kwý ho anhýr o ri

mē akamā pa ho pa. Xà mē anhîgēt kot amnhî nhîpêx kôt mē ate amnhî nhîpêx ā mē apumunh kôt na pre ā mē amā amnhî nhîpêx anê? Nà ja kôt kêt. Ām mē ate Kris kapêr mar nê amnhî kaxyw hkôt ajamaxpêr ā mē apumunh kôt pix mā na pre ā mē amā amnhî nhîpêx anê.

Tirtûm kot amnhî tâ finat Apraâw pumunh kôt mex ā harênh

Rômân 4.1-25; Xiakre 2.23

⁶ Nê mē ixpê Ijaew pâr krax finat Apraâw na pre amnhî kaxyw Tirtûm kôt hamaxpêr nhûm amnhî tâ omu nê kām:

Nà ate amnhî kaxyw inhmā ajamaxpêr tÿx jakamā na pa amnhîm amex ā ajarê. Amex kumrêx Apraâw.

⁷ Anhÿr o kām kapêr jakamā mē pahte urāk nê amnhî kaxyw hkôt pajamaxpêr xwÿnhjaja te mē pahpê Apraâw tâmnhwÿ pyrāk.

⁸ Nê mē apê Ijaew kêt xwÿnhjaja. Na hte Tirtûm mē pahto hpimrāk tâ mē pahte amnhî kaxyw kām pajamaxpêr ā mē pahpumunh kôt amnhîm mē pamex ā mē pajarê nê mē pahto hkra. Amnepêm na pre Apraâw mā kapêr nê kām:

E ate amnhî kaxyw ixkôt ajamaxpêr jakamā kot paj akukwak ri pyka piitā hkôt mē piitā mē ho mex nê.

Anhÿr o kām kapêr jao määnê nê mē apê Ijaew kêt xwÿnhjê jarê.

⁹ Jakamā mē pahte Apraâw pyrā nê amnhî kaxyw Tirtûm kôt pajamaxpêr xwÿnhjaja kot puj mē pahpiitā urāk nê pamex kumrêx nê papa ho papa.

Tanhmā Tirtûm kot mē panê pÿ kahpa hā jêt xwÿnh nhîpêx to hā harênh

Rômân 4.14, 7.10; Wam Korîit 15.56

¹⁰ Nê koja mēhō hamaxpêr o:

—E kot paj finat Mojes kapêr kôt ri amnhî nhîpêx o ri ixpa nhûm Tirtûm ja hā xpumu nê amnhîm inhmex ā ijarê nê ixto hkra. Anê.

No ām ja kot anhÿr kêt. Tirtûm kapêr ā kagā htûm kot ja jarênh kot:

Ixte amnhîm mē mex ā mē harênh kaxyw mē kot Mojes kapêr kôt amnhî nhîpêx xwÿnhjaja koja mē ām mēmoj pixire nê hirôp kuhê. Rÿ mēmoj pixire nê hkôt amnhî nhîpêx kêt pa ja hā mē omu nê hā mē homnuj tÿx kumrêx.

Anhÿr jakamā tanhmā kot pu mē amnhî to nê Mojes kapêr piitā hkôt amnhî nhîpêx nê aa ho pixi nê hirôp pakuhe hkêt? Nà kot puj mē ho anhÿr kêt nê. Kot puj mē tee ri pamā ja ho anhÿr prām kaprÿ. Jakamā Tirtûm kot amnhîm mē mex ā mē harênh kaxyw mē kot ā amnhî nhîpêx anhÿr mā xwÿnhjaja koja mē mex kêt nê.

¹¹ Na hte Tirtûm mē kot finat Mojes kapêr kôt amnhî nhîpêx o mē pa hā mē omunh xā

hkôt mē mex ā mē harênh kêt nê. Ām mē kot amnhî kaxyw hkôt hamaxpêr xwÿnh pixjaja na hte ā mē harênh anê. Kapêr ā kagā htûm kot mē harênh kot:

Mē kot amnhî kaxyw ixkôt hamaxpêr xwÿnhjaja na pa hte mē mex ā mē harênh o ixpa. Mē tapxipixjaja koja mē nhÿrmā Ixkra mē wa ixri mex kumrêx nê htûr tûm nê pa ho pa. Anê.

¹² Nom na htem amnhî kaxyw Tirtûm mā hamaxpêr pê finat Mojes kapêr kôt amnhî nhîpêx o pa hkêt nê. Mojes kapêr ā kagā kot ja jarênh kot:

Mē kot ixkapêr piitā hkôt amnhî nhîpêx mex o mē pa xwÿnh pixjaja koja mē htûr tûm nê pa ho pa. Anê.

¹³ Tā kot pu mē ām kapêr o pixire nê hirôp pakuhe hāmri nê mÿrapê pahÿr tûm nê papa hkêt nê. Nê hpānhā mē kot amnhî xā htÿx kamā hamak tûm xāta hwÿr ma papa. Ja pymaj na pre Krisja ĩ ho mē pahwÿr wrÿ nê mē pahte amnhî tomnuj mÿrapê mē panê ty. Tirtûm kot mē pahte amnhî tomnuj mÿrapê tanhmā mē pahto pymaj ā mē panê htyk anê. Jakamā nhûm Tirtûm mē pahte amnhî tomnuj ā mē pahpumunh kôt mē pakuha hā Kraja homnuj nê. Kapêr ā kagā htûm kot ja jarênh kot:

Pÿ kahpa hā jêt xwÿnhhta na pre Tirtûm homnuj tÿx kumrêx. Anê.

Mē kot amnhî kaxyw Kris kôt mē hamaxpêr xwÿnhjê jarênh

¹⁴ Tā ā Jejus Kris kot mē panê amnhî nhîpêx anhÿr kukwak ri na pre Tirtûm kot Apraâw nhîpêx pyrā nê mē ixpê Ijaew pix o mex kêt nê. Määnê nê mē apê Ijaew kêt xwÿnhjê ho mex nê. Jakamā koja mēhō. Ijaew ô rÿ Ijaew kêt xwÿnhjê hō amnhî kaxyw Kris kôt hamaxpêr nhûm Tirtûm hā omu nê ho hkra nê hwÿr Karô mē nhûm kām axā.

Tirtûm kot finat Mojes kukamā mē pahto mex ā harênh

Rômân 3.19-20, 5.20-21, 11.32; Eprêw 6.13-18

¹⁵ E ixkrāmnhwÿjaja. Kot paj ixprî hā mē amā ja jarê ka mē inhmā. Nà koja mēhō wa hamêxkrut nê mēmoj tâ axpên ma. Pika hā war axpên ma rÿ mēmoj tâ war axpên ma. Hāmri nê wa hā axpên mar pa nhûm ja ām hāmri nê ām rāhāā. Koja nhām mēhō tē nê axtem tanhmā harênh to hkêt nê.

¹⁶ Ja pyrā nê na hte ā Tirtûm mēmoj tâ amnhî jarênh anê. Na hte mēmoj jarê nhûm arĭ rāhāā. Na hte jarāhā mēmoj jarê nhûm jāā nhûm axtem hijuk ri mēmoj jarênh kêt nê. Na hte ām kapêr pÿnh nê. Tā na pre Apraâw mā hkanrêhā htāmnhwÿjê hō kukwak ri Apraâw o mex ā amnhî jarê. Tāmnhwÿ piitā kukwak ri ho mex ā amnhî jarênh kêt nê. Ām kanrêhā htāmnhwÿ Krisja

pix kukwak ri ã Apraãw o mex ã kãm amnhĩ jarẽnh anẽ.

¹⁷ E kot paj hpãnhã axtem tanhmã mẽ amã harẽnh to. Na hte Tirtũm kot mẽmoj tã amnhĩ jarẽnh xã hkõt tanhmã mẽmoj to ho pa rãhã nẽ. ã na pre finat Apraãw mã kot ho mex ã amnhĩ jarẽnh anẽ. Tã ra hã amgrã pẽ 430 nẽ hapẽx nhũm hpãnhã finat Mojes mã kapẽr. Kot mar nẽ amnhĩ xõ ri Ijaew mã harẽnh o ri mẽ hkõt pa kaxyw. Tã no nhũm ra kot Apraãw mã mẽmoj jarẽnhã arĩ hã no htỹx rãhã nẽ aa ho hamakẽtkati hkõt nẽ. Nẽ kot Mojes mã tanhmã kapẽr toja nẽ Apraãw mã tanhmã kapẽr toja nhũm hamẽ wa ho hamakẽtkati hkõt nẽ. Nhũm wa hamẽ arĩ rãhã ho rãhã.

¹⁸ Tã mẽ ano kupyri o ri mẽ pa xwỹnhjaja na htem htỹx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapẽr kõt amnhĩ nhĩpẽx o papa hkõt nẽ nhũm Tirtũm tee ri ja hã mẽ pahpumu nẽ mẽ pahto mex kõt nẽ. Anẽ.

Nom ja kot anhỹr kõt. Kop apu ã kot anhỹr ronhỹx Tirtũm ra wam kot tanhmã Apraãw mã kapẽr tota ra ho hamakẽtkati. Nom na hte arĩ kãm hamaxpẽr rãhã nẽ ho pigrãnh nẽ ho hapẽx kõt nẽ. Na pre Apraãw mã kãm:

Kot kaj amnhĩ kaxyw ixkõt ajamaxpẽr hã kot paj ato mex kumrẽx. Anẽ.

Tã kot ho mex ã amnhĩ jarẽnhja arĩ rãhãã. Na hte arĩ mẽ kot amnhĩ kaxyw hkõt hamaxpẽr xwỹnhjẽ ho mex nẽ. Nom mẽ kot Mojes kapẽr kõt amnhĩ nhĩpẽx o pa hã mẽ omunh xã hkõt mẽ ho mex kõt nẽ. ãm mẽ kot amnhĩ kaxyw hkõt hamaxpẽr xwỹnh pixjaja na hte mẽ ho mex.

Mo kaxyw na Mojes kapẽr ã kagã?

Rõmãn 3.20, 5.20, 7.7

¹⁹⁻²⁰ Tã mo kaxyw na Mojes kapẽr ã kagãja? Nã mẽ pahte tanhmã amnhĩ tomnuj to ho papa hã amnhĩ pumunh nhũm Tirtũm kot ã mẽ pahte amnhĩ nhĩpẽx anhỹrja nẽ mẽ pahkurẽ kaxyw. Na pre Mojes Tirtũm nhỹ hã mẽmoj nẽ mẽ pahkurẽ. Mẽ pahte axpẽn pẽ paxãhkĩnh nẽ mẽ pahkurẽ. Nẽ mẽ pahte axpẽn mã paxẽx o ri papa nẽ mẽ pahkurẽ. ã mẽmoj nẽ mẽ pahkurẽ anẽ. Mẽ pahprĩ hã kapẽr mar nẽ tãm amnhĩ nhĩpẽx o papa kaxyw. Ja kaxyw na pre Tirtũm Ijaew kaxyw Mojes mã kapẽr gõ. Na pre kaxkwa rũm kapẽr o wryk xwỹnhjaja kumrẽx kãm harẽ nhũm kuma nẽ Ijaew mã hã kagã. Jakamã na htem harẽnh o: “Mojes kapẽr” anhỹr o harẽ.

Tã Apraãw kanrẽhã htãmnhwỹ Krisja kormã kator kõt ri nhũm Ijaew Mojes kapẽr ma nẽ hkõt ri amnhĩ nhĩpẽx o pa. Tã nhũm Krisja kator o Mojes kapẽr o hapẽx. Ra Tirtũm kot Kris kukamã ho mex ã amnhĩ

jarẽnh xã hã arĩgrota kator mẽ nhũm Mojes kapẽr hapẽx.

No na pre Tirtũm Ijaew mã ujarẽnh kaxyw tãm mẽ kãm ujarẽnh kõt nẽ. Kapẽr o wryk xwỹnhjẽ mã na pre harẽ nhũm mẽ amnhĩ xõ ri Mojes mã mẽ kaxyw kãm awjarẽ. Kot mẽ õ ri mẽ kãm harẽnh kaxyw. No Apraãw mã na pre Tirtũm tãm kapẽr. Na pre hwỹr kapẽr o wryk xwỹnhjẽ hõ mẽnh kõt nẽ. Tãm kot kãm kapẽr jakamã kapẽrja na mex o Ijaew kaxyw Mojes mã kapẽr jakrenh.

²¹ Nẽ na pre Tirtũm tanhmã mẽ pamã kapẽr o amnhĩrit to nẽ mẽ pamã:

—E kot paj amnhĩ kaxyw ixkõt mẽ ajamaxpẽr ã mẽ apumunh kõt pix mã mẽ amex ã mẽ ajarẽ.

Anhỹr o mẽ pamã kapẽr. Tã xã na pre kapẽrja nhĩjuk ri axte amnhĩ jarẽ nẽ amnhĩ jarẽnh o:

—E kot paj mẽ ate Mojes kapẽr kõt amnhĩ nhĩpẽx mex o apa hã mẽ apumunh kõt mẽ amex ã mẽ ajarẽ.

Anhỹr o mẽ pamã kapẽr? Xã na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nã Tirtũm kapẽr ãm hpỹnh kẽnã. Kop ãm mẽ pahte Mojes kapẽr kõt amnhĩ nhĩpẽx o papa hã mẽ pahpumunh kõt mẽ pamex ã mẽ pajarẽnh ronhỹx mẽ pamã:

—ãm ja pix ã mẽ apumunh kõt kot paj mẽ amex ã mẽ ajarẽ. Anẽ.

²² Nom na pre ã kapẽr anhỹr kõt nẽ. Kapẽr ã kagã htũm kot ja jarẽnh o:

Mẽ apiitã mẽ ate amnhĩ tomnuj o mẽ apa xwỹnh na ka mẽ.

Anhỹr jakamã tanhmã kot puj mẽ amnhĩ to nẽ Mojes kapẽr kõt amnhĩ nhĩpẽx mex o papa? Mẽ pahpiitã mẽ pahte amnhĩ tomnuj xwỹnh kẽnã. Mẽ pahte kapẽr piitã hkõt amnhĩ nhĩpẽx kõt jakamã koja Tirtũm ja hã mẽ pahpumunh kõt mẽ pamex ã mẽ pajarẽnh kõt nẽ. Kojã ãm mẽ pamã kapẽr o:

—Kot kaj mẽ amnhĩ kaxyw Jejus Kris mã ajamaxpẽr pa ja hã mẽ apumunh kõt mẽ amex ã mẽ ajarẽ nẽ mẽ ato ixkra nẽ mẽ ato mex o ri ipxa. Anẽ.

Mojes kapẽr te kẽp Kris xwỹr ri mẽ hamãr xwỹnh wryk ã harẽnh

Rõmãn 10.4; Karatas 4.1

²³ Nẽ kormã Kris kot mẽ pahwỹr wryk nẽ mẽ panẽ htyk xwỹr ri na pre Ijaew Mojes kapẽr ma nẽ hkõt amnhĩ nhĩpẽx o ri pa. Nhũm kapẽrja te kot amnhĩm mẽ unẽnh nhũm mẽ kot hkõt pix mã amnhĩ nhĩpẽx o ri pa wryk. Na prem Tirtũm kot mẽ mex ã mẽ harẽnh prãm xãã ãm pix ma nẽ hkõt amnhĩ nhĩpẽx o pa. Nom kapẽr piitã hkõt amnhĩ nhĩpẽx mex kõt nẽ.

²⁴ Te mẽhprĩre nhũm Mojes kapẽr te kẽp mẽ hamãr xwỹnh wryk. Mẽhprĩ jamãr xwỹnhjaja na htem mẽhprĩjẽ pumu nẽ tãm mẽ kot amnhĩ nhĩpẽx kaxyw tanhmã mẽ

ahkre hto ho mē hkôt pa. Ja pyrā nē na pre Ijaew tām amnhī nhīpēx o pa kaxyw Mojes kapēr ma nē hkôt amnhī nhīpēx o ri pa. Jejus Kris kutēp ā amnhī nhīpēx anhyr o ri pa. Tā nhūm Jejus tām kaxkwa rūm wr̄y pa mē ixkw̄y p̄ixjaja mē ixkw̄yĵē rom amnhī kaxyw hkôt ijamaxpēr. Hāmri nhūm Tirtūm ja hā mē ixpumunh kôt mē inhmex ā mē ijarēnh kurē kumrēx.

Jejus kukwakri mē pahpē Tirtūm kra ā mē pajarēnh

Juāw 1.12; Rōmān 8.14; Epes 1.5

²⁵⁻²⁶ Tā ra mē ixte amnhī kaxyw Kris kôt ijamaxpēr jakamā na pre Tirtūm mē ixto hkra pa mē ra te ixpē hkra xāptār pyrāk o amnhī nhīpēx nē kapēr kôt amnhī nhīpēx mex o ri ixa. Jao Mojes kapēr kaga. Te mēhprīre ra mē ahkre kamā mē āptār nē kot mē ahkre xw̄ynh kaga pyrāk. Hāmri pa mē ixpē Tirtūm kra xāptārjaja hāmri axte Mojes kapēr kôt amnhī nhīpēx hkēt nē.

²⁷ Tā mē kajaja na ka pre mē ixpyrā nē amnhī kaxyw Kris kôt ajamaxpēr nhūm mē akw̄y kot mē apē Jejus kw̄y hā mē apumunh kaxyw nhūm mē akrā kumrā. Hāmri ka mē Jejus kot amnhī nhīpēx kôt pix mā amnhī nhīpēx o ri apa.

²⁸ Tā ra mē pahpē Jejus Kris kôt amnhī xunhw̄yr xw̄ynh jakamā na hte Tirtūm ahp̄ynhā ri tanhmā mē pakute hkôt mē pahpumunh kēt nē. Mē pahpē Ijaew r̄y mē pahpē Ijaew kēt xw̄ynhjaja. R̄y mē pahpē nhām mē kām paxāpēnh xw̄ynh r̄y amnhī mā mē paxāpēnh xw̄ynh nhūm hte ja hā mē pahpumunh kôt tanhmā mē pajarēnh to hkēt nē. R̄y mē anijē hkôt r̄y mē inhm̄yĵē hkôt mē pahpumunh kôt tanhmā mē pajarēnh to kēt nē. Ām mē pahte Jejus Kris kôt amnhī xunhw̄yr ā mē pahpumunh kôt pix mā na hte ā mē pahpumunh o pa anē.

²⁹ Nē na pre Tirtūm Apraāw mā hkanrēhā htāmnhw̄y Jejus Kris o mex ā amnhī jarē. Tā Kris kēp mē panhō Pahihti jakamā pu mē Tirtūm noo mā urāk nē te mē pahpē Apraāw tāmnhw̄y pyrāk. Jakamā koja Apraāw nhīpēxta pyrā nē mē pahto mex rax nē.

4

Mojes kapēr te axte mē pahpynēnh kēt pyrāk ā harēnh

Rōmān 7.1, 8.14-17; Karatas 3.23

¹ E kot paj axte mē amā tanhmā mēhpr̄ijē jarēnh to ka mē inhma. Kōja mēhō ra hkra mā mēmo hikukrēx nhōr kaxyw. Hikukrēx nē ō pika. Ō mēmoj piitā ōr kaxyw. No nhūm hkraja kormā hprīre nē hamaxpēr mex kēt jakamā nhūm kormā hprēk jamār o pa. Nhūm hkraja ar̄i te kām āpēnh o pa xw̄ynh kot amnhī nhīpēx pyrā nē amnhī krā

hkôt ri amnhī nhīpēx o pa hkēt nē. Kormā hipēēxā kapēr kôt ri amnhī nhīpēx o pa. Nhūm hipēēxāja kot kām ō mēmoj piitā ōr kaxyw no ām kormā hprēk jamā.

² Tā kormā hkraja hprīre ri nhūm hipēēxā tanhmā amnhī to nē ty. Nom nhūm hkraja m̄yr pē kormā ō mēmoj o amnhīptār kēt nē. Kormā hprīre jakamā nhūm hipēēxā m̄yr pē kot kām hamār o pa xw̄ynhja kormā kām hamār o pa. Tā nhūm hipēēxā kot kām amgrā jarēnh xw̄ynhta kato nhūm tām mēmoj piitā ho amnhīptā. Ra āptār mex nē hamaxpēr mex nē amnhīm ho amnhīptār pa.

³ Tā Ijaew na prem ā amnhī nhīpēx anē. Amnepēm kormā mē kot Mojes kapēr kôt ri amnhī nhīpēx o pata ā na prem te mēhprīre hamaxpēr kēeta pyrāk. Te kormā mē āptār kēt pyrā nē jar pika ja kamā mē kot amnhī nhīpēx tūm kôt pix mā amnhī nhīpēx o pa. Mē kot amnhī nhīpēx tūm te kot amnhīm mē unēnh nē mē kām ē pyrāk o mē hipēx nhūm mē hkôt pix mā amnhī nhīpēx o ri pa.

⁴ Tā nhūm Tirtūm kot Kra hkukamā mē pahw̄yr mēnh xā hā arigrota kato hāmri nhūm mē pahw̄yr kumē nhūm mē pahw̄yr wr̄y nē mē pahpyrā nē mēhō nhōhy rūm kato. Nē mē pahpyrā nē gaa nē hprēk nē mē ixpē Ijaew rom Mojes kapēr piitā hkôt amnhī nhīpēx mex kumrēx o ri pa.

⁵ Jao te kot Mojes kapēr pē mē papytār pyrāk o mē panhīpēx pu mē hpānhā pahpē Tirtūm kra kaxyw.

⁶ Tā mē ixpē Ijaew kw̄yĵaja nē mē apē Ijaew kēt xw̄ynh kw̄yĵaja ra mē pahpē Tirtūm kra jakamā na pre mē pahw̄yr Kra Jejus Karōja rē nhūm mē pamā agjē. Hāmri nē mē pamā kapēr o:

–Ra mē apē Tirtūm kra jakamā kēr ka mē kām amnhī jarēnh kaxyw nē kām: “Pa Papaj” anē. Kēr ka mē ā kām akapēr anē. Anē.

⁷ Jakamā na pu mē ra te pahpē mē kām paxāpēnh xw̄ynh pyrāk kēt nē. Ra mē pahpē Tirtūm kra jakamā na hte mē panhīpēx o te Kra Jejus nhīpēx pyrā nē mē pahto mex nē.

Mojes kapēr kôt mē kot amnhī nhīpēx xw̄ynhjē jarēnh

Sikūn Korīt 11.3-4; Korosē 2.16-19; Eprēw 6.1; Wam Pētre 1.14

⁸ Nē annepē mā kormā mē ate amnhī kaxyw Jejus kôt ajamaxpēr kēt ri na ka prem Tirtūm jarēnh mar kēt nē. Ām at̄x ri sānti mā mex ā harē nē kām amnhī jagrer o ri apa. Nē amā mēmoj kīnh nē amā hprām xāj tanhmā amnhī to hw̄yr to ho ri apa. Te mē kām mē āpēnh o mē pa xw̄ynhjaja kot amnhī nhīpēx pyrā nē sānti mā tanhmā amnhī nhīpēx to ho ri apa. Nom sāntija kēp Tirtūm kēt.

⁹ Tã ka prem Tirtũm jarẽnh ma nẽ hkõt amnhĩ xunhwý nhũm amnhĩ tã mẽ apumu. Tã tãm kot amnhĩ kaxyw mẽ paxunhwýr jakamã kwa mon ka mẽ ra axtem nẽ akupým sãnti hkõt amnhĩ nhĩpẽx kaxyw? Nã mẽ ajamaxpẽrja mex kêt. Sãnti nhĩpẽxta tanhmã koja amnhĩ to nẽ mẽ ato ajuta? ãm mẽ kot ìhkra ho hipẽx pix jakamã hihtýxti hã. Amarĩ kuhẽ xã kamã kuhẽ ho kuhẽ xwýnh kãnã. Tã te kot akupým amnhĩ kõt mẽ arẽnh kaxyw pyrãk o mẽ anhiẽpẽx ka mẽ ra axtem nẽ akupým hkõt amnhĩ nhĩpẽx kaxyw. Kwa na nã mẽ ã ri amnhĩ nhĩpẽx anhýr kêt nẽ.

¹⁰ Nẽ na ka htem amnhĩ kukamã ajamaxpẽr o:

—Na pre hte Ijaewjaja Mojes kapẽr xã hkõt arĩgro hkwy hã axtem tanhmã amnhĩ nhĩpẽx to nẽ mẽmo mytwrý hã tanhmã amnhĩ nhĩpẽx to nẽ mẽmo amgrã hã tanhmã amnhĩ nhĩpẽx to. Tã kot paj mẽ urãk nẽ ã amnhĩ nhĩpẽx anhýr o i xpa. Kẽ Tirtũm ja hã ixpumu nẽ inhmex ã iarẽ. Anẽ.

Kwa mẽ ã ajamaxpẽr anhýr kêt nẽ. Mon ka htem axtem nẽ ri ã ajamaxpẽr anẽ? Na hte Tirtũm ã mẽ pahte amnhĩ nhĩpẽx anhýr ã mẽ pahpumunh kõt mẽ pamex ã mẽ pajarẽnh kêt nẽ.

¹¹ Na pa ja hã mẽ ajarẽnh ma nẽ tee ri mẽ akukamã ijamaxpẽr. Te ixte Tirtũm kapẽr o mẽ ajahkre kapry ho ri i xpa pyrãk.

Karatas nhõ xwýnhjaja kot Pawre ho mex ã mẽ harẽnh

Wam Korõt 9.21-23

¹² Kwa ixkrãmnhwýjaja. Ixpẽ Ijaew tã te ixpẽ Ijaew kêt pyrãk o amnhĩ nhĩpẽx o ri mẽ apẽ Ijaew kêt xwýnhjẽ hkõt ri i xpa. Jao Kris kapẽr gryk ã mẽ inhĩgõtjaja kot amnhĩ nhĩpẽx kaga nẽ axte hkõt amnhĩ nhĩpẽx kêt nẽ. Tã kwa mẽ ipxyrã nẽ ã amnhĩ nhĩpẽx anẽ. Wem ma amnhĩ to amõr gri kêt wehe. Wam ixte mẽ awýr inhmõrta ã na pa pre mẽ amã Tirtũm kapẽr jarẽnh o ri mẽ akõt i xpa ka prem inhma nhũm ja mẽ amã mex nẽ ka mẽ ja hã tanhmã ixto hkõt nẽ.

¹³ Na pa pre ixãã nẽ mẽ awýr mõ nhũm ixãja ixto htýx nẽ pa tokyx ixkator nẽ ma akupým mẽ arũm inhmõr kêt nẽ arĩ mẽ amã Tirtũm kapẽr jarẽnh o i xpa.

¹⁴ Kormã ixã nẽ tanhmã ixkute htã ka prem ja hã ixpumu nẽ ixto mex nẽ ixkamã anhõkre kahak kêt nẽ. Na ka prem te ixto Jesus Kris nhĩpẽx pyrãk o inhĩpẽx. Nẽ te ixto Tirtũm kapẽr o wrýk xwýnh nhĩpẽx pyrãk o inhĩpẽx.

¹⁵ Jao mẽ amã ixkĩnh nẽ ã inhĩpẽx anẽ nẽ mẽ amã ixto mex pix prãm. Nẽ nhýri ixpumu nẽ ixkamã axukapri nẽ inhmã akapẽr o:

—Hẽxta waa nẽ. Anopxãã. Inhmã amnhĩ no kaxãr nẽ amã õr prãm nom tanhmã kot

pa mẽ amnhĩ to nẽ hkapa nẽ amã kugõ? Anẽ.

Nẽ mẽ amã inhmã mẽmoj mex pix nhõr prãm. Tã ra tanhmã ajamaxpẽr to nẽ axtem nẽ te mẽ amã ixkĩnh kêt pyrãk o inhĩpẽx.

Mẽ no kupyr xwýnhjaja kot mẽ hamaxpẽr o pihkãr ã mẽ harẽnh

¹⁶ Nẽ na pa pre ãm hãmri mẽ amã Tirtũm kapẽr jarẽnh o ri mẽ akõt i xpa. Nom ra mẽ amã mar prãm kêt jakamã na ka mẽ axtem nẽ inhĩpẽx o te ixte mẽ akutã amnhĩ xãm pyrãk.

¹⁷ Mẽ amã Tirtũm kapẽr o mẽ hẽx xwýnhjaja te mẽ kãm mẽ akĩnh pyrãk o mẽ anhiẽpẽx no ãm mẽ kãm akĩnh kêt. Na htem mẽ amex kaxyw tanhmã mẽ amã kapẽr to hkõt nẽ. ãm mẽ ate mẽ mar nẽ mẽ gryk ã ixkaga nẽ mẽ hkõt ri amnhĩ nhĩpẽx o apa pix prãm xãj na htem mẽ akõt tanhmã mẽ amã hẽx to ho pa.

¹⁸ Pa mẽ harẽnh ma hãmri nẽ mẽ kamã inhgryk o ã mẽ amã mẽ harẽnh anhýr kêt nẽ. Koja mẽhõ mẽ awýr mra nẽ ixwakre kamã rý inhnoo mã mẽ amã mẽmoj mex jarẽ nhũm ja inhmã mex nẽ. No nhũm mẽ amã mẽ hẽx xwýnhjaja axtem nẽ mẽ ajamaxpẽr o pihkãr pix kaxyw na htem mẽ awýr mra nẽ mẽ amã ã ujarẽnh o pa anẽ.

Pawre kot tee ri mẽ hkukamã hamaxpẽr ã harẽnh

¹⁹ Te mẽ apẽ ixkra pyrãk jakamã na pa hte mẽ ate amnhĩ nhĩpẽx ã mẽ apumu nẽ tee ri ijamaxpẽr nẽ ixkapri htýx nẽ. Te nhýhýnh ixã htýx nẽ ixte amnhĩ xã htýx kamã ijamak o ri i xpa pyrãk. Rý te mẽ hpijagri ho mẽ hikwý xwýnh õhy xã htýxta pyrãk. Mẽ ate Kris kõt amnhĩ nhĩpẽx mex o apa hprãm xãj na pa hte ã amnhĩ nhĩpẽx anhýr o ri i xpa.

²⁰ Hẽxta waa nẽ. Kop apu ra mẽ awýr ixpõk nẽ mẽ akõt i xpa ronhýx pa ixkĩnh týx kumrẽx. Nhýx pa ra ixpri hã mẽ amã ixkapẽr ka mẽ inhma. Nẽ amnhĩ tã inhmã mẽ akĩnh týx ã mẽ akamã inhgryk kêt ã ixpumunh kurẽ kumrẽx. No kaga pix kãm ixkapẽrja ka mẽ kamã harẽ nom aprĩ hã inhmar mex kêt nẽ. Na pa tee ri mẽ akukamã ijamaxpẽr o ixkapri htýx nẽ i xpa.

Mojes kapẽr kõt mẽ kot amnhĩ nhĩpẽx xwýnhjẽ jarẽnh

Eprẽw 12.18-29

²¹ Kwa mẽ amã arĩ Mojes kapẽr kõt amnhĩ nhĩpẽx o ri mẽ apa hprãm xwýnhjaja. Mãn ka mẽ kormã aprĩ hã Mojes kapẽr piitã mar par kêt jakamã na ka mẽ amã hkõt amnhĩ nhĩpẽx prãm. E pa ixpri hã mẽ amã tanhmã harẽnh to ka mẽ inhma.

²² Nã Tirtũm kapẽr ã kaga htũm kot finat Apraãw jarẽnhja. Na pre hkra myja wa hamẽxkrut. Prõ Sara kamã ja nẽ kot amnhĩ

haprôr nhùm ri kām àpênh o pa xwýnh Aga kamā ja.

²³ Kām àpênh xwýnh kamā ja na pre mē pahpiitā mē pahpyrà nē amarī kato. No hprô Sara kamā ja. Sara na pre ra hpigêx týx nē. Ra hkamrô hkêt ryy nē pa htā nhùm Tirtüm kot wa hkra hkukamā wa kām ujarênh xā hkôt nhùm Apraāwja htu nhùm wa hkrata kato. Tirtüm kot hkukamā wa kām harênh xā hkôt nhùm kamā hkra nhùm kato.

²⁴⁻²⁵ Tā wa nita ā wa harênh kot anhýr. Na pre Tirtüm mēmoj jarē. Te ho wa urāk o wa harē no ām hā kuxi nē ā wa harênh anē. Jakamā ni wa harênhja te kot Tirtüm kapēr pijakruuta pyràk. Wam ni Agata te kot hixêt prêk pē Sinai nhümök ā Tirtüm kot Mojes mā kapërta pyràk. Hixétja pika pē Arap kamā na pre. Jakamā nhùm Tirtüm Ijaew kaxyw Mojes mā kapēr nhùm kuma nē amnhī xō ri mē kām hā kagā. Tā na hte arī jarāhā mē hkwyjaja hamaxpēr o:

–E kot paj mē panhigêt finat Mojes kapēr kôt amnhī nhîpêx o ri ixpa nhùm Tirtüm ja hā ixpumu nē amnhīm inhmex ā ijarē nē ixto hkra.

Anhýr o hamaxpēr no ām ā hamaxpēr anhýr kapry. Ā mē hamaxpēr anhýr xwýnhjaja te mē kēp Apraāw mā àpênh xwýnh Aga hkrata pyràk. Nē kri pē Jerujarē kēp Ijaew nhō krī jakamā haxwýja te kēp Agata pyràk. Nhùm krī nhō xwýnhjaja haxwýja te mē kēp Aga hkrata pyràk. Na htem htýx Tirtüm kot mē omunh nē mē ho hkra hprām xāj Mojes kapēr kôt amnhī nhîpêx o pa hā amnhī jarênh kapry. Jakamā haxwýja te mē kēp mē kām mē àpênh o pa xwýnh pyràk.

Jejus kôt mē kot amnhī kaxyw hamaxpēr xwýnhjē jarênh

²⁶ Nē hapu hā Tirtüm kapërta. Apraāw prō kumrêx Saraja te kēp kaxkwa kamā Jerujarē ōja pyràk. Krī ja kamā mē pa mā xwýnhjaja te mē kēp mē kām mē àpênh xwýnhjē pyràk kêt. Ra mē kot amnhī kaxyw Kris mā hamaxpēr nē hkôt amnhī xunhwýr jakamā na htem hamaxpēr o:

–Ixte amnhī kaxyw Kris mā ijamaxpēr nē hkôt amnhī xām jakamā na Tirtüm ixpumu nē amnhīm inhmex ā ijarē nē ixto hkra. Anē.

Ām hāmri na mē ā wamtajē rom hamaxpēr anē. Tā ā mē hamaxpēr anhýr xwýnhjaja te mē kēp Sara hkra pyràk.

²⁷ Tirtüm kapēr ā kagā htüm kot ja jarênh kot:

E kormā akra hkêt nē apa htā kēr ka māmri akīnh nē ri apa.

Nē kormā apijagri hkêt tā kēr ka akīnh týx nē ri apa.

Kormā amjên kot akamā hkra hkêt nē te kot akaga pyràk tā kot kaj akra nē akanrêhā atāmnhwý xohtō rax nē.

Mē ohtō rax o ra amjên kot nhām hprō hō kamā hkrata jakre. Anē.

Ā kapēr kot anhýr o mē kot amnhī kaxyw Kris kôt hamaxpēr xwýnhjē hkukamā mē ohtō hā mē harē.

²⁸ E ixkrāmnhwýjaja. Te mē apē Ijak kanrêhā htāmnhwý pyràk. Koja mēhō amnhī kaxyw Kris kôt hamaxpēr hāmri nē te kēp Apraāw mē hprō Sara wa hkra Ijak kanrêhā htāmnhwý pyràk. Na pre Tirtüm amnepē mā kormā Ijak kator kêt ri ra hkukamā hamaxpēr nē Apraāw mā harē. Nē mē papajaja nhùm Tirtüm Ijak pyrà nē mē pakukamā mē pamā hamaxpēr nē amnhīm mē paxunhwýr ā amnhī jarē. Tā ra mē ate amnhī kaxyw Kris kôt ajamaxpēr jakamā te mē apē Ijak kanrêhā htāmnhwý pyràk.

²⁹ Nhùm Apraāw kot Aga kamā hkra Ismaewja na pre hprō kumrêx kamā hkrata pumu nē kām hkīnh kêt nē kamā gryk pix o pa. Nē tanhmā hipêx to pē ri hapry ho ri hkôt pa. Tā mē kot amnhī krā hkôt amnhī to Tirtüm kra hprām xwýnhjaja na htem ā mē pahte Kris kôt amnhī xunhwýr xwýnhjē nhîpêx anhýr o pa. Na htem Tirtüm kot mē pahto hkra hā mē pahpumu nē Ismaew kot Ijak nhîpêx pyrà nē mē pakamā gryk pix o pa. Nē tanhmā mē pahtomnuj to pē mē pahto kapēr o ri pa.

³⁰ Tā no ām kwār mē māmri ā mē panhîpêx anē. Koja mē pahpyrà nē nhýrmā Tirtüm nhō krī hwýr āpir kêt nē. Tirtüm kapēr ā kagā htüm kot mē harênh kot:

Na pre Tirtüm Apraāw mā kapēr nē kām: “E kēr ka amnhī nē ate haprôr nhùm kot amā àpênh o ri pa xwýnh mē hkrata wa hano. Koja hkrata amýr pē amnhīm mēmoj to ārik kêt nē.

Ate aprō kumrêx kamā akrata pix koja hōja rom amýr pē mēmoj piitā ho amnhîptār pa.” Anē.

³¹ Tā te mē pahpē àpênh xwýnh kamā hkrata pyràk kêt. Te mē pahpē Apraāw prō kumrêx kamā hkrata pyràk. Te Tirtüm kot Ijak kukamā hamaxpēr pyràk o na pre mē pakukamā hamaxpēr.

5

¹ Nē Kris kot mē pahte amnhī nhîpêx tùm pē mē papytār jakamā kwa ixkrāmnhwýjaja. Kēr ka mē arī ate amnhī nhîpêx tùm kôt amnhī nhîpêx kêt nē. Ra Kris kot ja pē mē papytār nhùm mē paxāmnhix ri papa kēnā.

Mē pahpē Tirtüm kra hprām xāj tanhmā mē pahte amnhī nhîpêx to

Juāw 8.32, 8.36; Korosē 2.20

² E mē inhma. Kot kaj mē atō Tirtüm kot ato hkra hprām xāj amnhī my kwryt

kà kràhta hã kot kaj mẽ ãm amarĩ ã amnhĩ nhĩpêx anhÿr kaprÿ. Na hte Tirtũm ja hã mẽ omu mẽ ãm hã mẽ omu. Kot kaj ã amnhĩ nhĩpêx anê nhũm Krisja ãm ate amnhĩ tomnuj mÿrapê anê htyk kaprÿ pyrãk o amnhĩ nhĩpêx.

³ Hãmri nhũm Tirtũm tee ri ja hã mẽ apumu mẽ te kot ã mẽ amã kapêr anhÿr pyrã nê mẽ amã kapêr o:

—E ra amã apê Kris kwÿ hprãm xãj amnhĩ my kwryt kà krãhyr jakamã kot kaj mããnen Mojes kapêr piitã hkôt amnhĩ nhĩpêx o ri apa.

Anhÿr o mẽ amã kapêr pyrãk.

⁴ Nom kot kaj mẽ atô amnhĩ kukamã ajamaxpêr o:

—Nã kot paj Mojes kapêr piitã hkôt amnhĩ nhĩpêx o ri ixpa nhũm Tirtũm ja hã ixpumu mẽ inhmex ã ijarê mẽ ixto hkra kãm ga. Anê.

No ãm ja kot anhÿr kêt. Na hte Tirtũm ã mẽ pahte amnhĩ nhĩpêx anhÿr ã mẽ pahpumnh kôt mẽ pahto hkra hkêt nê. Jakamã kot kaj mẽ ã amnhĩ nhĩpêx anê mẽ te ate Kris kutã amnhĩ xãm pyrãk nhũm Tirtũm ato mex kêt nê.

⁵ Nom kot ka mẽ axtem ajamaxpêr o:

—Ra ixte amnhĩ kaxyw Kris kôt ijamaxpêr nê hkôt amnhĩ xãm jakamã koja Tirtũm hã ixpumu mẽ inhmex ã ijarê. Karô ra kot ã inhmã ja ho amnhĩrit anhÿr kênã.

Anhÿr o ajamaxpêr. ãm hãmri ã mẽ ajamaxpêr anhÿrja.

⁶ Jakamã mẽ pahpê Kris kôt amnhĩ xunhwÿr xwÿnhjê kamã ra mẽ kot amnhĩ my kwryt kà jakãr xwÿnhjaja nhũm mẽ pahkwÿjaja ã amnhĩ nhĩpêx anhÿr kêt nê. Tã nhũm Tirtũm ja hã mẽ pahpumu nhũm ja tanhmã kêp kute hkêt. Na hte mẽ pahte amnhĩ my kwryt kà jakãr ã mẽ pahpumu mẽ ãm hã mẽ pahpumu. No kot pu mẽ Jejus Kris kôt amnhĩ nhĩpêx mex o ri papa. Nê amnhĩ kaxyw hkôt pajamaxpêr tÿx o ri papa. Nê mẽ pamã axpên kÿnh pê tãm ri axpên nhĩpêx o ri papa. Ja na kêt Tirtũm kãm hprãm.

⁷ Ra mẽ ate Kris kôt amnhĩ nhĩpêx mex o ri apa htã nhũm mẽ hêx xwÿnhjaja mẽ awÿr mra nê tee ri ã mẽ ate amnhĩ nhĩpêx anhÿr ã mẽ apumu mẽ tanhmã mẽ amã Tirtũm kapêr o hêx to. Ka mẽ ama nê axte Tirtũm kôt amnhĩ nhĩpêx mex hkêt nê.

⁸ No ãm ã mẽ kot mẽ amã mẽ ujarênh anhÿr xwÿnhjaja na pre Tirtũm mẽ awÿr mẽ rênh kêt nê. Tirtũm kot amnhĩ wÿr mẽ awÿr xwÿnh kênã kot kêt axtem nê mẽ awÿr kapêr o mẽ amã hêx o mẽ pa xwÿnhjê rê.

⁹ Nê koja mẽhõ pixi mẽ tanhmã amnhĩ tomnuj to nhũm mẽ piitã ja hã omu mẽ urãk nê kãm tanhmã amnhĩ tomnuj to hprãm.

¹⁰ No kêt mẽ apê Kris kwÿ na ka mẽ. Ixte ja hã mẽ apumunh mex. Kot kaj mẽ axte ixkapêr ma mẽ akupÿm Kris kôt amnhĩ nhĩpêx mex o ri apa. Nã kot kaj

mê ã amnhĩ nhĩpêx anê mẽ axte mẽ kot mẽ apê ãnnãr xwÿnhjê kapêr mar mẽ mẽ hkôt amnhĩ nhĩpêx kêt nê. Koja Kris mẽ atã mẽ homnuj tÿx kumrêx nhũm mẽ rĩ amnhĩ pumu.

Pawre kot mẽ kot amnhĩ jakãr ã mẽ kãm karô hkêt ã harênh

¹¹ Nê na hte Tirtũm kapêr o mẽ hêx xwÿnhjaja tanhmã mẽ amã ixto hêx to ho pa. Ixte mẽ kãm Tirtũm kot mẽ ho hkra kaxyw mẽ kot amnhĩ my kwryt kà jakãr ã mẽ kãm karô hã ixto ri hêx o pa. Nom ixte anhÿr kêt ixkrãmnhwÿjaja. Kop apu ixte mẽ kãm ja hã karô ho ixpa ronhÿx Ijaew krãhtũmjaja ja hã ijarênh ma nhũm ja mẽ kãm mex mẽ nhũm mẽ axte Kris ã tanhmã inhihêx to hkêt nê. Nom ixte ja hã mẽ kãm karô hkêt. ãm ixte mẽ kãm Kris kot mẽ panê pĩ kahpa hã htyk jarênh pix mÿrapê na htem ixkamã gryk nê.

¹² Hêxta waa mẽ. Mê mẽ mẽ amã hêx o pa pê mẽ ajamaxpêr o pihkãr xwÿnhjaja kop mẽ ãm mẽ anhõ krĩ rũm hapôx mẽ ma nhÿhÿm hapêx ronhÿx pa ixkÿnh tÿx kumrêx.

Mê pahte axpên to mex o papa hã mẽ pamã karô

Wam Korĩ 13; Eprêw 13.3, 13.16; Wam Pêtre 1.22; Wam Juãw 3.11

¹³⁻¹⁴ Kwa ixkrãmnhwÿjaja. Nã na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhÿr pê mẽ papytar jakamã kêr ka mẽ amnhĩ tã ja ma nê axte atÿx ri amã hprãm xã hkôt tanhmã amnhĩ nhĩpêx to ho ri apa hkêt nê. Mẽ ãm amã axpên kÿnh pix o ri axpên kôt apa. Nê nhãm mẽ hipêx o te ka amã amnhĩ tã ma pyrãk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê mẽ te mẽ ate wam Tirtũm kapêr piitã hkôt amnhĩ nhĩpêx pyrãk.

¹⁵ No kot kaj mẽ axtem nê axpên kãm axopêrê ho ri apa hãmri mẽ te ra mẽ ate axpên to ajapêx par o amôr pyrãk o amnhĩ nhĩpêx. Te mry xopêrê kot axpên par o pata pyrãk. Kwa mẽ ã amnhĩ nhĩpêx anhÿr hkêt nê. Mẽ ãm axpên to mex pix mẽ mẽ axpên kãm axukapri ho ri axpên kôt apa.

Mê pahte amnhĩ nhĩpêx nyw jarênh Matêwre 26.41; Rômãn 8.1-11

¹⁶ Nê kwa kêr ka mẽ amnhĩ to Tirtũm Karô wÿ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mẽ mãn amnhĩ nhĩpêx o ri apa.

¹⁷ Tirtũm Karô kot amnhĩ nhĩpêxja mẽ mẽ pahte amnhĩ nhĩpêx tũmja wa kot axpên pyrãk kêt. Te wa kot axpên kutã amnhĩ xãm nê wa pijapu pyrãk. Jakamã kot puj mẽ pahte amnhĩ nhĩpêx tũm o amnhĩ nhĩpêx

nē Tirtūm Karō mā hprām xà hkôt amnhī nhīpēx hkēt nē.

¹⁸ No kot puj mē Tirtūm Karō hkôt amnhī nhīpēx nē ra jar pika ja kamā mē kot amnhī nhīpēx kôt ri amnhī nhīpēx kēt nē. Ra axtem mē pahte amnhī nhīpēx nyw o amnhī nhīpēx.

¹⁹ Jar mē kot amnhī nhīpēx tūmta mex kēt. Ra mē piitā mē kot ja pumunh mex.

Na htem ht̄yx ri hkw̄yjē kamā hp̄ijaam kēt o pa.

Jao mēmyjaja hprō kuhpa hā nhām mēnijē ho amnhīkati.

Nhūm mē hprōjaja mē mjēn kuhpa hā nhām mēmyjē ho amnhīkati.

Nē mēmy hkw̄yjaja axtem nē mēmyjē hkw̄y ho amnhīkati.

Nē mēni hkw̄y haxw̄yja axtem nē mēnijē hkw̄y ho amnhīkati.

²⁰ Nē mē kām mēmoj mē hikukrēx japē ht̄yx o kām Tirtūm kīnh jakre.

Nē mēmoj kaxyw ma wajaga hw̄yr amnhī to pa.

Nē hkw̄yjē kamā oprē ho ri pa.

Nē mēmoj tā axpēn kām gryk pix nē.

Nē mēmoj to axpēn pē ōxy nē.

Nē mēmo m̄yrapē axpēn pē anhrā nē am̄ym ahp̄ynhā ri pa.

²¹ Nē mēmoj tā axpēn kamnhīx rāhā ho ri pa.

Nē axpā nē mē grer kām ri axpēn kām hp̄ijaam kēt o ri pa.

Ā na htem mē kot amnhī nhīpēx tūm kôt amnhī nhīpēx o ri mē pa xw̄ynhjaja amnhī nhīpēx anē. Ā mē kot amnhī nhīpēx anh̄yr xw̄ynhjaja koja mē Tirtūm nhō krī hw̄yr gjēx kēt nē. Ra ixte mē amā ja jarēnh tā pa axte mē amā harē. Mē ate hā ano ht̄yx rāhā ho ri apa kaxyw.

²² No mē kot amnhī nhīpēx nywja axtem na. Tirtūm Karō hkôt mē kot amnhī nhīpēx nyw o amnhī nhīpēx xw̄ynhjaja na htem axtem kām axpēn kīnh nē.

Nē hkīnh nē ri hamakētcati nē amnhīx ri axpēn kôt pa.

Nē gryk tokyx anh̄yr hkēt nē. Ām axpēn to mex pix o ri axpēn kôt pa.

Nē tām axpēn nhīpēx.

Nē kot mēmoj tā amnhī jarēnh xà hkôt tanhmā mēmoj to.

²³ Nē axpēn mā kapēr mā hprī ho ri axpēn mā kapēr.

Nē mēmoj punuj piitā nē amnhī to ht̄yx o ri pa.

Ā na hte mē kot Tirtūm Karō hkôt amnhī nhīpēx o mē pa xw̄ynhjaja Karō nh̄y hā amnhī nhīpēx nyw o amnhī nhīpēx anh̄yr o pa. Jao māānēn Mojes kapēr kw̄ym ri amnhī nhīpēx hkēt nē. Jakamā koja mēhō mē pahte amnhī nhīpēx nyw nē tanhmā mē pahkurē hto hkēt nē.

²⁴ Tā mē pahpē Jejus Kris kw̄y jakamā na pu mē pahte amnhī nhīpēx tūmja nhīpēx o te mē pahte amnhī nē hp̄ir pyrā nē axte hkôt amnhī nhīpēx kēt nē.

Tirtūm Karō hkôt mē pahte amnhī nhīpēx ā mē pamā karō

Epes 4.23-24; Korosē 3.10

²⁵ Tā ra Tirtūm Karō kot mē pahto hkra jakamā kwa kēr pu mē am̄ kôt pix mā amnhī nhīpēx nyw o amnhī nhīpēx o ri papa.

²⁶ Kot puj mē ā amnhī nhīpēx anē hāmri nē mēmoj tā mē pahkw̄yjē mā amnhī to jarkrar o ri papa hkēt nē. Kot puj mē ā amnhī nhīpēx anē nhūm mē pakamā gryk nē. Jakamā kēr pu mē ā amnhī nhīpēx anh̄yr o ri papa hkēt nē.

6

Mē pahte tanhmā axpēn to ajuta hto hā mē pamā karō

Matēwre 18.15-17; Rukre 17.3-4; Sikūn Tesarōn 3.14-15; Xiakre 5.19-20

¹⁻³ Kwa ixkrāmnhw̄yja. Mē apē Tirtūm Karō hkôt amnhī nhīpēx o ri mē apa xw̄ynhjaja. Koja Kris kôt akw̄yjē hō tanhmā amnhī tomnuj to ka mē ja hā omu nē ā amnhī nhīpēx anh̄yrja nē kām akapēr. Nom kēr ka mē kamā agryk kamā kām tanhmā nē hkēt nē. Ām kām akapēr mā aprī ho kām akapēr nē akup̄ym tām am̄. Nom kwa kēr ka mē amnhī pumunh mex nē urāk nē ā amnhī tomnuj anh̄yr kēt nē.

Kot ka mē atō ā kot amnhī nhīpēx anh̄yr ā omu nē am̄ omu nē nē tanhmā kām akapēr to hkēt nē. Nē ajamaxpēr o:

–Tk. Kwār māmri ā amnhī nhīpēx anē. Pa ja nē tanhmā kām ixkapēr to hkēt nē. Kurom ixte amnhī nhīpēx mex o ri ixpa kēnā.

Anh̄yr o ajamaxpēr japēr. Kwa mē ā ajamaxpēr anh̄yr kēt nē. Kot kaj mē ā ajamaxpēr anē nē nē kām akapēr kēt nē hāmri nē te ate amnhī to mex ā amnhī jarēnh kapr̄y pyrāk.

Nē kēr ka mē axpēn to ajuta mex o ri axpēn kôt apa. Jao Kris kôt amnhī nhīpēx mex nē.

⁴⁻⁵ Nē na htem piitā amnhīm apēnh pix t̄anopxar o pa. Jakamā kēr ka mē amnhī t̄anopxar pē tām amnhī nhīpēx rāhā ho ri apa. Hāmri nē ja hā amnhī pumu nē akīnh nē. Nom kwa kēr ka mē ate amnhī nhīpēx mex o akw̄yjē jakrenh ā mē kām amnhī to jarkrar o ri apa hkēt nē.

⁶ Nē kēr ka mē kot Tirtūm kapēr o mē ajahkre xw̄ynhjē ho mex nē mē kām mēmoj nhō o ri apa.

⁷ Koja Tirtūm nh̄yrmā mē pah̄tir ri mē pahte amnhī nhīpēx ā mē pahp̄umunh kôt tanhmā mē pajarēnh to. Hāmri pu mē tee ri amnhī kukamā pajamaxpēr nom amnhī nē tanhmā kām paxēx to hkēt nē. Koja mēhō

kām amnhī to hêx nê te tām kot amnhī mā hêx pyrāk nom kot puj mē Tirtūm mā amnhī nê tanhmā paxêx to hkêt nê.

⁸ Jakamā kot kaj mē amnhī krā hkôt tanhmā ri amnhī nhîpêx to rāhā ho apa hāmri nê nhÿrmā ty nê Tirtūm pē awry rax ā ri apa. Nom kot kaj mē Tirtūm Karō mā hprām xā hkôt pix mā amnhī nhîpêx nê nhÿrmā ty nhūm Tirtūm akupÿm ato atÿr ka kuri amex nê ajamakêtkati atÿr tūm nê ri apa ho apa.

Mê pahte axpên to mex rāhā hā mē pamā karō

Atre 20.35; Wam Korÿt 15.58; Xitre 3.14; Eprêw 13.3, 13.16; Xiakre 1.27

⁹ Jakamā kwa kêr ka mē arĭ tām ri amnhī nhîpêx nê tām axpên nhîpêx o ri axpên kôt apa nê jam anhÿrer kêt nê. Mē ā amnhī nhîpêx o ri apa anhÿr rāhā ty nhūm Tirtūm nhÿrmā ja hā mē ato mex rax nê.

¹⁰ Tā kêr pu mē arĭ Kris kôt pahtojê ho mex rāhā ho ri papa. Nom mē tapxipixjê ho mex kêt nê. Pu mē mē piitā mē ho mex o axpên pyrāk.

¹¹ E ixte mē amā kagā nhîpêx nê mēnh nhūm mē ate ja hā ixpumunh kaxyw kot paj pam kagā jatur xā hā inhĭkra ho inhĭxi nhîpêx ka mē ixte inhĭxi hā kagā rŭnhitita pumu.

Jejus kot mē panê htyk ā Pawre kām harênh prām ā harênh

Wam Korÿt 1.22-24, 2.1-2

¹² Nê mē amā Tirtūm kapêr o mē hêx xwÿnhjaja na htem hamaxpêr o:

—Nā kot paj Karatas nhō xwÿnhjê mā Kris pĭ kahpa hā htyk ā harênh o ri ixpa hkêt nê. Kot pa anê nhūm mē ixpê Ijaew kwÿjaja ja hā inhma nê hā tanhmā inhîpêx to. Ja pymaj kot paj mē kām tanhmā harênh to hkêt nê. Kot paj ām mē kot amnhī my kwrÿt kà jakār pix ā mē kām karō kê mē ixkapêr xā hkôt ā amnhī nhîpêx anê. Pa hā mē omu nê ma ixkwÿjê mā mē hā amnhī to jarkrar o ri ixpa. Anê.

¹³ Te mē kot finat Mojes kapêr kôt ri amnhī nhîpêx pyrāk tā no na htem ā amnhī nhîpêx anhÿr kêt nê. Ra mē kot amnhī jakār tā no ām Mojes kapêr piitā hkôt amnhī nhîpêx hkêt nê. Ām hkwyĭ hkôt pix mā amnhī nhîpêx o pa. Nom kot kaj mē ama nê mē urāk nê amnhī jakā nhūm mē ja hā mē apumu nê hkĭnh nê. Nê ma ri mē hkwyĭjê mā mē atā amnhī to jarkrar o ri pa nê mē kām:

—E Karatas nhō xwÿnhjaja na pa prem mē kot amnhī my kwrÿt kà jakār ā mē kām karō nhūm mē inhma nê mē pahpyrā nê ā amnhī nhîpêx anê. Anê.

¹⁴ No pa na pa hte ā mē kām mēmoj tā karō anhÿr o ri ixpa hkêt nê. Ām Tirtūm kot mē pahto hkra kaxyw mē panhō Pahihti Jejus Kris kot mē nê htykja pix na pa hte mē kām

harê. Ra kot inhnê htyk jakamā te pa ixte kuri ijet nê ixtyk pyrāk. Jakamā ra jar pika ja kamā mē kot amnhī nhîpêxja te ixpê htyk nê hapêx pyrāk pa axte hkôt amnhī nhîpêx kêt pyrāk.

¹⁵ No mē kot amnhī my kwrÿt kà jakār xwÿnhjaja nê mē kot amnhī jakār kêt xwÿnhjaja na hte Tirtūm ja hā mē omu nê ām mē omu. Ām mē pahte amnhī nhîpêx nyw o amnhī nhîpêx o ri papaja pix na kām hprām.

¹⁶ Kot kaj mē ā amnhī nhîpêx anhÿr o ri apa nê apê Tirtūm kra mex nhūm mē ato mex rax nê. Nê mēmoj to mē akutā nojarêt rāhā nê. Ka mē axāmmhĭx ajamakêtkati nê ri apa ho apa.

¹⁷ Nê na prem Kris ā ixtak rax nê nhūm ixkatut ā ixtak xā arĭ rāhā nê pa hte hā ixpa. Ixte Jejus Kris mā tanhmā amnhī nhîpêx to xwÿnh ā ixto amnhÿrit xā na. Jakamā kê mēhō axte Jejus kot mē awÿr inhmēnh ā tee ri ixpumu nê tanhmā hā ixkukjêr to hkêt nê.

¹⁸ E ixkrāmnhwÿjaja. Kê Pahihti Jejus Kris mēmoj to mē akutā nojarêt nê mē ato mex rāhā ho pa. Nā koja mē ato anê.

Ām ja pix na hapêx. Ixpê Pawre na pa ā mē amā kagā nhîpêx nê mē awÿr mēnh anê.

Epes

Pawre kot Epes kām Jejus kôt hkwýjê hwýr kagà nê mēnh

Pawre na pre kagàja nhîpêx. Jejus nhý hã hkrajê jahkre o pa xwýnhjê hõ na pre. Jakamã na pre krî pê Epes kãm Kris kwyjê hwýr hipêx nê kumê. Epes nhõ xwýnhjaja Ijaew kêt xwýnh na pre mē. Nhũm pre ra Pawre ma mē hwýr mō nê mē kãm Tirtũm kapêr jarēnh o ri mē hkôt pa nhũm mē hkwýjaja kuma nê Jejus kôt amnhî xunhwý.

Na pre hte Pawre ma krî piitã hkôt ri Tirtũm kapêr jarēnh o ri mē hkôt pa. Hãmri nhũm mē hkwýjaja Jejus ã unê nê krî pê Rõm wýr kumê nê kamã haxã nhũm arî hkrî ho hkrî. Nom amarî hkrî hkêt nê. Na pre hte mē kot hwýr mrar xwýnhjê mã Tirtũm kapêr jarê. Nê krî hkwý hkôt Jejus kôt hkwýjê mã kagà nhîpêx nê mē hwýr kurê. Jakamã na pre Epes kamã hkwýjê hwýr kagàja nhîpêx nê mē hwýr kumê.

Nê kagàja kamã hprî hã mē kot Jejus kôt amnhî xunhwýr xwýnhjê kot tanhmã amnhî nhîpêx to ho pa hã mē kãm karõ. Ra mē kot hkôt amnhî xunhwýr jakamã te mē htîpxi nê ri mē pa xwýnh kot amnhî nhîpêx pyrãk o amnhî nhîpêx o pa hã mē kãm hã karõ. Nê jar pika hkôt te mē kêp Kris nhî pyrã nê pa hã mē harê. ã na pre Pawre mē kãm mēmoj jarê nê hã kagà anê nê mē kãm:

¹ Pa Epes kãm Kris kôt ixkwýjaja. Xã mē amex na ka mē apa? E ot pa mē awýr kagà nhîpêx nê kumê. Ixpê Pawre na pa hipêx nê mē awýr kumê. Ixpê Jejus Kris nhý hã mē ahkre ho mē ixpa xwýnh na pa. Tirtũm kãm hprãm xã hkôt. Tã pa ã mē awýr kagà nhîpêx nê mē awýr mēnh anê. Mē apê Tirtũm krajê hwýr. Na ka xep htem Jejus Kris kôt amnhî nhîpêx mex o ri apa. ãm hãmri na ka htem ã amnhî nhîpêx anê.

² E kê Mēpahpãm Tirtũm mē Pahihti Jejus Kris wa mē ato mex nê mēmoj to mē akutã nojarêt rãhã ho pa. Ka mē wa ý hã axãmnhix ajamakêtkati nê akñih pê tanhmã amnhî nhîpêx to ho ri apa.

Tirtũm kot mē pakukamã amnhũm mē parēnh ã harēnh

Rõmãn 8.28-30; Wam Korî 1.21-22; Wam Tesarõn 1.4; Sikũn Tesarõn 2.13; Wam Pêtre 1.2

³ Na hte mē panhõ Pahihti Jejus Kris nhîpêxã Tirtũmja mē pahto mex rãhã ho pa. Mē pahpê Kra Kris kwý hã mē pahpumunh kôt tanhmã mē pahto mex to ho pa. Ra wa Karõja mē pahkarõ mã gjêx jakamã te ra mē pahte kaxkwa kamã wa kuri mē pamex nê mē papa pyrãk. Tã ra mē pahte jar pika ja kamã paxãmnhix pajamakêtkati mē pamex

nê ri papa jakamã kwa kêr pu mē amnhũm ãm mex o mex ã harēnh rãhã nê.

⁴⁻⁵ Amnepê mã kormã mēmoj kêt ri na pre Tirtũm mē pakukamã amnhũm mē parê. Kris kukwak ri amnhũm mē parê. Tã mēmo kaxyw na pre ã mē pakukamã mē parēnh anê? ãm mē pahte kapêr kôt pix mã amnhî nhîpêx o ri papa kaxyw. Jao tãm kot amnhî nhîpêx pyrã nê noo mã tãm amnhî nhîpêx o ri papa. Kãm mē pajapê jakamã na pre mē pakukamã tanhmã hamaxpêr to nê hamaxpêr o:

–Nã Ixkra Jejus Kris koja nhýrmã ma mē hwýr wrý nê mē nê ty. Tã mē kot mē nê htyk ã harēnh mar nê amnhî kaxyw hkôt hamaxpêr xwýnhjaja kot paj mē ho ixkra. Nã kot paj ã mē hipêx anê. Anê.

⁶ No mē pajajaja tanhmã mē pahte amnhî nhîpêx mex to hã mē pahpumunh kôt na pre ã mē pahto hkra hã mē pajarēnh anhýr kêt nê. ãm Kra Kris pix kukwak ri na pre ã mē pajarēnh anê. Kãm Kra japê jakamã na hte mēmoj to mē pahpê hkwý hã mē pakutã nojarêt rãhã ho pa. Jakamã na pu htem amnhî tã kãm mex o mex ã harēnh o papa.

⁷⁻⁸ Na pre Krisja mē panê htyk o Tirtũm mã mē pahte amnhî tomnuj pãnhã amnhîre. Nhũm Tirtũm ã kot amnhî nhîpêx anhýr ã omunh xã hkôt mē pahte hkôt amnhî xunhwýr xwýnhjê nê mē pahte amnhî tomnuj rēnh pa. Koja aa tanhmã hã mē pahto hkêt nê. Pu mē axte amnhî amnhî tomnuj o papa hkêt nê. Hêxta waa nê. Kãm mē pajapê htýx kumrêx jakamã na pre ã mē pahto mex rax anê. ãm mex o mex nê ãhpumunh o ãhpumunh.

⁹⁻¹⁰ Amnepê m na pre hamaxpêr o:

–Nã na pa ra kaxkwa ho ixkato nê kamã mēmoj piitã ho ixkato. Nê pika ho ixkato nê kamã mēmoj piitã ho ixkato. Tã koja nhýrmã Ixkra Kris mēmoj piitã ho amnhîptãr o pa. Kaxkwa kamã nê pika piitã hkôt mēmoj piitã ho amnhîptã nê tapxîpix inhý hã kêp mēõ Pahihti. Koja ã amnhî nhîpêx anhýr xã hã arîgro kato nhũm ã amnhî nhîpêx o pa anê. Nã ja na inhmã hprãm. Anê.

ã Tirtũm amnhî kukamã hamaxpêr anhýrja kôt na pre Kris kêp mē panhõ Pahihti hã harê. Tã nhýrmã mē pahto amnhîptãr kaxyw koja mē pakaxyw ãm. Amnepê m ri mē pa xwýnhjê mã kot kormã ja ho amnhîrît kêt tã ra jarãhã mē pamã ho amnhîrît.

¹¹ Kris kukwak ri na pre amnhũm mē parê. Ra kot mē pakukamã mē pahtã amnhî jarēnh xã hkôt.

¹² Tã mē ixpê Ijaew kwý kumrêx mē ixte Kris kôt amnhî xunhwýr jakamã koja mē piitã mē inhý hã Tirtũm mã mex o mex ã harēnh o ri pa.

¹³ Nē mē kajaja na ka prem mē ixpyrā nē Tirtūm kapēr ma nē ajaxwýja hkôt amnhī xunhwý. Ām hāmri na Tirtūm kapērja. Tā ka prem ama nē hkôt amnhī xunhwý. Hāmri nhūm amnhī tā mē apumu nē kot inhīpēx pyrā nē mē anē mē ate amnhī tomnuj piitā rēnh pa nē mē ato hkra. Hāmri nē mē awýr Karō rē nhūm mē awýr wrý nē mē akarō mā agjē nē mē akamā pa ho pa. Kris kukwak ri na pre mē awýr kurē. Amnepē mā na pre mē pakukamā hamaxpēr o:

—Koja mē Ixkra hkôt amnhī xunhwý pa ja hā mē omu nē mē ho ixkra nē mē hwýr Ixkarō rē. Hāmri nhūm mē hkarō mē agjē nē mē kamā hkrī ho hkrī.

¹⁴ Anhýr jakamā na pre mē pahwýr kurē nhūm mē pahwýr wrý nē mē pahwýr agjē nē mē pakamā hkrī ho hkrī. Pu mē ja hā amnhī pumu nē pajamaxpēr o:

—Nā ra Tirtūm kot ixwýr Karō mēnh jakamā na ixkarō hwýr axā nē kamā hkrī ho hkrī. Tā koja ra kot mē ixtā amnhī jarēnh xā hkôt ja hā ixto mex nē. Ra kot ixto hkra kēnā. Jakamā koja nhýrmā ma amnhī wýr ixto api pa kuri inhīmex kumrēx nē ixpa ho ixpa. Hāmri nē kukwak ri axte tanhmā amnhī tomnuj to ho ri ixpa hkēt nē. Anē.

Jakamā koja mē piitā ā kot mē ho mex anhýr ā amnhī tā kamā ama nē amnhī tā omu nē kām mex o mex ā harēnh rāhā ho pa.

Pawre kot Epes nhō xwýnhjē ho Tirtūm wýr ā harēnh

Piripos 1.9; Korosē 1.9-12; Wam Tesarōn 5.23; Sikūn Tesarōn 1.11, 2.16; Eprēw 13.20

¹⁵ Nē na ka xep htem amnhī kaxyw Kris kōt ajamaxpēr týx pē amā Tirtūm krajē piitā mē hkīnh o mē ho mex o apa. Na pa pre mē ajarēnh ma nē ixkīnh týx nē.

¹⁶⁻¹⁸ Nē xatā mē ato Tirtūm wýr o ri ixpa nē mē ato hwýr o:

—Pa Mēinhīpēxā maati Tirtūm. Nā amex o amex. Ka na ka pre mē ixwýr mē inhō Pahihti Jejus Krisja mē nhūm mē ixwýr wrý nē hprī hā mē inhā mē ate tanhmā amnhī nhīpēx to ho apa hā ato amnhīrit. Tā Epes kām akrajaja na xep htem akōt pix mā ri amnhī nhīpēx rāhā ho ri pa. Ām hāmri na htem ā amnhī nhīpēx anē.

—Nē kwa Tirtūm. Kē Akarō tanhmā mē hkrā hto kē mēhprī hā akapēr mar týx rāhā ho pa. Jao ra ate mē ixkukamā mē ixtā tanhmā mē ixto mex to hā amnhī jarēnhja kē mē kām hamaxpēr týx rāhā ho pa. Nē ate nhýrmā mē ixpē akrajaja mē xpiitā tanhmā mē ixto mex to jarēnhja kē mē kām hamaxpēr týx pē hkīnh rāhā ho pa ho pa.

¹⁹⁻²⁰ —Nē kē mē axāhpumunh o axāhpumunh ā ate akupým Akra Kris o hūr ā apumunh mex nē Tirtūm. Na ka pre axāhpumunh xā ho akupým ho hūr nē ma akupým anhō krī hwýr ho api nē

amnhī nhīhkō hā ýr nhūm arī hkrī ho hkrī. Apyrā nē kot mē ixto amnhīptār kaxyw. Ā axāhpumunh xā htýx kot anhýr. Tā kē akrajē piitā ja hā apumu nē axāhpumunh týx o ate tanhmā mē ixto ajuta hto ho apa hā apumu.

Anhýr o na pa hte mē ato hwýr o ri ixpa.

²¹ Nē Krisja āhpumunh týx o mēkarōmnuti piitā hakrenh. Nē hihtýx o mē hakrenh jakamā krī nhō xwýnhjē mā te mē āhpumunh týx kēt pyrāk o na htem htýx ri amnhī nhīpēx o pa pyrāk. Nē Krisja hihtýx o pika piitā hkôt pahi piitā mē hakrenh par kumrēx. Nē hihtýx o kot pika piitā hkôt mēmoj piitā mē hakrenh par. Jakamā mēhō koja we tanhmā kot amnhī nhīpēx to hā kām karō rý kām hamaxpēr gō? Nā amrakati kumrēx. Ra kot ā amnhī nhīpēx anhýr rāhā nē pa ho pa xwýnh kēnā. Nē hihtýx o hihtýx rāhā nē pa ho pa xwýnh. Nē āhpumunh o āhpumunh rāhā nē pa ho pa xwýnh. Nē hihtýx o kot jar pika ja kōt mē pajakrenh par nē hihtýx o Tirtūm nhō krī kamā mē mēmoj piitā hakrenh par. Tā koja mēmoj piitā ho amnhīptār rāhā hūr tūm nē pa ho pa.

Kris te kēp mē pahkrā pyrāk ā harēnh

Rōmān 12.4; Wam Korīt 12.12; Epes 4.16;

Korosē 3.25

²² Na pre Tirtūmja Kra Kris nhīhkram mēmoj piitā haxār pa. ý hā kot nhýrmā ho amnhīptār o pa kaxyw. Jakamā kot mē pahto amnhīptār xwýnh ā kēp mē panhō Pahihti. Nē te kēp mē pahkrā pyrāk. Nē mē papajaja te mē pahpē ī pyrāk jakamā na pu htem hkōt ri amnhī nhīpēx o papa.

²³ Na hte mē panhīja mē pahkrā kamā mē pajamaxpēr xā hkōt tanhmā amnhī nhīpēx to. Ja pyrā nē na pu htem mē pahkrā pyrāk xwýnh Krisja kapēr ma nē hkōt tanhmā ri amnhī nhīpēx to ho ri papa.

Koja mēhō ām hkrā pix nē ī hkēt nē pa hāmri nē mex kēt nē. Na htem hkrā nē mēānēn ī nē pa nē mex nē. Ja pyrā nē na hte Kris mē pahte hkōt amnhī nhīpēx o papa hā mē pahpumu nē hkīnh nē mex nē pa. Pu mē pajaxwýja hkōt ri amnhī nhīpēx ā amnhī pumu nē pahkīnh nē pamex nē papa ho pa.

2

Tanhmā Tirtūm kot mē pahto hkra hto ā harēnh

Wam Korīt 6.11; Xitre 2.11-3.7

¹ Nē amnepē mā na pu pre htem Tirtūm kax ā tanhmā amnhī tomnuj to ho ri papa.

² Nē jar mē kot amnhī nhīpēx o amnhī nhīpēx. Jao amnhī tomnuj pix o ri papa. Nē mēkarōmnuti nhō pahi Satanasti kapēr kōt pix mā ri amnhī nhīpēx rāhā nē. Na pre hte tanhmā mē pahkōt mē pahto ho pa. Mē pahte tanhmā amnhī tomnuj to kaxyw mē pamā mē pajamaxpēr punuj jagjē. Pu mē

amnhî tā omunh kêt tã y hã amnhî tomnuj o papa. Satanastija kêp mē kot Tirtūm kapēr kwým ri amnhî nhîpêx o mē pa xwýnhjê nhõ pahihiti na. Tã pu pre htem pahtýx ri hkõt amnhî nhîpêx pix o ri papa.

³ Mē pahpiitã tanhmã amnhî tomnuj to hprãm xã hkõt pix mã tanhmã amnhî nhîpêx to. Nē mēmoj punuj kukamã pajamaxpēr nē ra hkõt ã amnhî tomnuj anē. Ā na pu prem mnhî nhîpêx anē nhūm Tirtūm ja hã mē pahpumu nhūm ja kãm mex kêt nē. Jakamã nhūm tee ri mē pakukamã hamaxpēr nē hamaxpēr o:

–Hêxta waa nē. Na htem ixkapēr kwým ri tanhmã amnhî tomnuj to rãhã ho pa. Ā mē kot amnhî nhîpêx anhýr o mē pa xwýnhjaja koja mē nhýrmã ixri hñr tūm nē mex nē pa ho pa hkêt nē. Ixkñnhã mē kot amnhî tomnuj xwýnh jakamã tanhmã kot mē amnhî to nē ixri hñr tūm nē pa ho pa? Nã mē kot amnhî tomnuj mýrapé koja mē nhýrmã ma amnhî xã htýx kamã hamak tūm xãta wýr ma hapêx pa. Nã koja mē anē. Hêxta waa nē. Inhmã ma hwýr mē pa prãm kêt tã ra ma hwýr mē pa kaxyw.

Anhýr o hamaxpēr.

⁴⁻⁵ Nē amnepēm kormã mē pahte amnhî tomnuj o papata ã te mē pahte amnhî xã htýx kamã pajamak tūm xã hwýr pryta ã mē papa pyrãk. Nom Tirtūm kãm mē pajapê nē mē pakamã ukapri jakamã na pre mē pahto mex rax nē. Nē akupým Kris o hñrja ri te ra mē pahte amnhî xã htýx kamã pajamak tūm xã hwýr pryta nē mē pahto ujanãr pyrãk o mē panhîpêx. Mē pakamã ukapri nē kãm mē pajapê ho ã mē panhîpêx anē. Amarã ã mē panhîpêx anē nē mē panê mē pahte amnhî tomnuj rēnh pa. Jakamã kot puj mē pahte Kra hkõt amnhî xunhwýr xwýnhjaja nhýrmã amnhî xã htýx kamã mē hamak tūm xãta wýr papa hkêt nē.

⁶ Ra Tirtūm akupým Jesus Kris o hñr jakamã te ra Jesus kõt akupým mē pahpê hkwyjê ho mē pahñr pyrãk. Jakamã te ra õ kri kamã ñhkõ hã mē pamex kumrêx nē pahkri pyrãk.

⁷ Mēmo kaxyw na pre Tirtūm kãm mē pajapê hkõt ã mē pahwýr Jesus Kris mēnh nhūm mē panê htyk anē? Nã kãm mē pajapê htýx ã mē pahte pahpri hã amnhî tã omunh kaxyw na pre ã mē pahwýr mēnh anē. Tã kot puj mē nhýrmã kaxkwa kamã hwýr põi nhūm mē pamã amnhî jarēnh o:

–E mē amnē ixpumu. Inhmã mē ajapê htýx jakamã na pa pre mē akamã ixukapri xãja ma mē awýr Ixkra Jesus Krisja mēnh nhūm amnhî grõnh kõt mē awýr wrý nē mē anē ty. Inhmã mē ajapê htýx jakamã na pa pre ã mē awýr mēnh nhūm mē anē htyk anē. Inhmã mē apê ixkrajê japê xãja na pa pre ã mē ato mex rax anē.

Anhýr o mē pamã kapēr hãmri nē mē pahto mex rãhã ho pa.

⁸⁻⁹ Xã na pu prem pahpê hkra hprãm xãja amnhî krã hkõt mē papamjaja kãm tanhmã amnhî to mex to nē kãm:

–E kwa Tirtūm. Na pa ã amnhî to mex anē nē ã amnhî to mex anē. Jakamã kwa ja hã ixpumu nē ixto akra nã?

Anhýr o na pu prem amnhî to kuwý? Nã na pu prem ã amnhî to hwýr anhýr kêt nē. Na pu prem amnhî kaxyw hkõt pajamaxpēr nē hkõt amnhî xunhwý nhūm ja pix ã mē pahpumunh kõt mē panê mē pahte amnhî tomnuj rē nē mē pahto hkra. Kãm mē pajapê nē mēmoj to mē pakutã nojarêt rãhã ho pa jakamã na hte ã mē panhîpêx mex anē. Jakamã na pu htem amnhî tã omu nē pajamaxpēr o:

–Nã na xep hte Tirtūmja mē pahte tanhmã amnhî nhîpêx to ho papa hã mē pahpumunh kõt mē pahto hkra hkêt nē. Ām mē pahte amnhî kaxyw kãm pajamaxpēr ã mē pahpumunh kõt pix mã na hte mē pahto hkra. Anē.

¹⁰ Nē Tirtūm tapxipix na hte tanhmã mē pahto pu mē amnhî to mex rãhã ho papa. Nom kormã kot mē pahto hkra hkêt ri na pu prem ã amnhî nhîpêx anhýr kêt nē. Tã Jesus Kris kõt amnhî xunhwý nhūm Tirtūm ja hã mē pahpumu nē mē pamã mē pahte amnhî nhîpêx nyw jagjê pu mē y hã tãm amnhî nhîpêx o ri papa. Amnepēm tanhmã kot mē pakukamã hamaxpēr to xã hkõt. No na hte tanhmã mē pahte amnhî krã hkõt amnhî nhîpêx to hã mē pahpumunh kõt mē pahto hkra hkêt nē.

Tirtūm krajaja te kot axpēn to htõ nē htõx pyrãk

Karatas 3.28; Korosê 1.21-23

¹¹ E mē apê Ijaew kêt xwýnhjaja. Na ka htem mē akatorxã nhõhy rūm ajapõj hãmri nē mē ixpê Ijaew pyrã nē amnhî my kwryt kã jakãr kêt nē. Jakamã na pre ixkwýjaja mē akurom amnhî jakãr ã amnhî to jarkrã o ri pa nē amnhî jarēnh o:

–Ra mē ixte amnhî my kwryt kã jakãr ã mē ixpumunh kõt na hte Tirtūm mē ixto hkra. Tã Ijaew kêt xwýnhjaja kot mē ixkñnhã amnhî jakãr kêt jakamã mē kêp hkra hkêt. Nē mããnen mē kêp mē pahkwý hkêt.

Anhýr o mē ajarēnh o pa.

¹² ãm hãmri na prem mē apê mē ixkwý hkêt ã mē ajarē. Na pa prem mē akurom amnhî my kwryt kã jakã nē mē akurom Kris kamã ijamak o ri ixpa. Jakamã nhūm Tirtūm kot mē ixto mex ã amnhî jarê pa mē mē apyrã nē tee ri amnhî kukamã ijamaxpēr o ri ixpa hkêt nē. Nē mē akurom amnhî kaxyw Tirtūm mã ijamaxpēr. Nã ãm hãmri na prem mē apê mē ixkwý hkêt ã mē ajarē.

¹³ Te Tirtüm kàx à ri mè apa pyràk tã ka mè arí à amnhí nhípèx anhÿr kêt nè. Jeus Kris kot mè panè htyk nhùm mè ate hkòt amnhí xunhwÿr jakamã ra mè apè hkwyÿ. Jao arí hkàx à ri apa hkêt nè. Te mè ixpè Ijaew kwÿ pyrã nè hpãnhã kuri ra ri apa pyrãk.

¹⁴ Jakamã na pu htem Kris kukwak ri ra expèn nhípèx nyw o expèn nhípèx o ri papa. Mè ixpè Ijaewjaja nè mè apè Ijaew kêt xwÿnhjaja na pu htem te ra ixkre tipxi kamã ri papa pyrãk. Nom amnepèm na pu prem à expèn nhípèx anhÿr kêt nè. Mè pahte amnhí nhípèx tùmja ahpÿnhã na pre. Na pu prem pamã expèn kurè nè expèn kàx à ri papa. Nè nhÿri expèn pumu nè te pahte expèn pumunh kêt pyrã nè nhãm parit o ri mra. Tã nhùm Kris mè panè htyk o mè pahte amnhí tomuj piitã hpãnhã amnhÿer pa. Mè ixpè Ijaew nè mè apè Ijaew kêt xwÿnhjaja. Nè htyk o te ra kot mè pahte expèn nhòrkwyÿ hwÿr expèn wÿr o papa pyrãk. Jao mè pamã expèn kurè ho hapèx nè hpãnhã tãm expèn kaxyw mè paxunhwÿ pu mè hpãnhã expèn to mex rãhã ho ri papa.

¹⁵ Amnepèm Mojes kot Tirtüm nhÿ hã mè ixpè Ijaew mè ixte tanhmã amnhí nhípèx to ho ixpa hã karõja. Na pa prem mè apè Ijaew kêt xwÿnhjaja mè ate Tirtüm kòt amnhí nhípèx kêt à mè apumu nè mè akamã ingryk nè. Nè expèn mã mè ajarènh o:

—Nã mè pahkìnhã mè kot Mojes kapèr kòt amnhí nhípèx kêt jakamã koja Tirtüm mè ho hkra hkêt nè.

Anhÿr tã nhùm Kris mè pahwÿr wrÿ nè mè pahpiitã mè panè htyk o mè pahte hkòt amnhí xunhwÿr à mè pahpumunh kòt pix mã mè pahto Tirtüm kra. Jakamã pa mè axte mè ate Mojes kapèr kòt amnhí nhípèx kêt à mè apumunh kòt mè apè Tirtüm kra hkêt à mè ajarènh kêt nè. Hãmri nè mè ixpè Ijaew nè mè apè Ijaew kêt xwÿnhjaja pu mè axte expèn kãm pagryk o ri papa hkêt nè. Ra te ixkre tipxi kamã mè pahte expèn kòt ri papa pyrãk.

¹⁶ Kris na pre pì kahpa hã mè panè htyk o à mè panhípèx anè nè mè pahte expèn kòt amnhí nhípèx o papa kaxyw mè paxunhwÿ. Nom Tirtüm jamaxpèr xà hkòt à mè panhípèx anè. Jakamã na pu htem arí pamã expèn kurè ho papa hkêt nè.

¹⁷ Na pre Kris mè pahwÿr wrÿ nè à mè panhípèx anè. Mè apè Ijaew kêt xwÿnhjaja mè ate kormã Tirtüm kapèr mar kêt xwÿnhjaja nè mãanèn mè ixpè Ijaew mè ixte kapèr mar mex xwÿnhjaja nhùm pre akupÿm tãm mè pahte expèn kòt amnhí nhípèx o papa kaxyw mè paxunhwÿ.

¹⁸ Hãmri nhùm Tirtüm mè pahwÿr amnhí Karõ rè nhùm mè pahkarõ mã agjè. Kris kukwak ri pix mã mè pahwÿr kurè pu mè ý hã paxãmnhix ri kãm tanhmã amnhí jarènh to ho ri papa.

¹⁹ Hãmri nè te mè pahpè nhãm expèn kaxyw mè urojè pyrã nè expèn kàx à ri papa hkêt nè.

Te mè pahpè Tirtüm nhòrkwyÿ pyrãk à mè pajarènh

Wam Korit 3.16; Sikùn Korit 6.16; Wam Pètre 2.5

²⁰ Nè mè pahpè Jeus kwÿ jakamã te mè pahte ixkre tipxikamã ri papa pyrãk. Nè te mè pahpè ixkre nhípèx mex pyrãk. Nè Kris te kèp ixkre hkrax mã kuhè xà nè kÿxpè kãm nòr xà maatija pyrãk. Nè mè kot Jeus nhÿ hã mè ahkre xwÿnhjaja nè mè kot Tirtüm nhÿ hã kapèr o ri mè pa xwÿnhjaja te mè kèp ixkre nhòkwa èja pyrãk. Nè mè papajaja te mè pahpè ixkre nhùmòk à pòja pyrãk.

²¹ Ixkre mã kuhè xà nè kÿxpè kãm nòr xà maati kukwak ri pix mã na hte òkwa è nè hã pòja kÿxpè mex nè expèn tã harir. Ja pyrã nè àm Kris kukwak ri pix mã na pu htem te ixkre tipxi kamã ri papa pyrãk o expèn nhípèx mex o ri papa. Te mè pahpè mè kot ixkre rax kumrèx nhípèx o mòr nhùm muxre nè àm xwÿnhnta pyrãk.

²² Na htem amnhim òrkwyÿ nhípèx nè hipèx pa nè hwÿr agjè nè kamã pa ho pa. Ja pyrã nè na hte Tirtüm Karõja mè pahpè hkrajè karõ mã agjè nè mè pakamã pa ho pa. Te mè pahpè Tirtüm nhòrkwyÿ pyrãk. Mè ixpè Ijaew nè mè apè Ijaew kêt xwÿnhjaja Tirtüm mã te mè pahpè òrkwyÿ pyrãk.

3

Pawre kot Ijaew kêt xwÿnhjè mã mèmjo to amnhÿit à harènh

Ròmã 15.14-21; Korosè 1.24-29

¹ Tã te mè pahpè Tirtüm nhòrkwyÿ pyrãk jakamã na pa hte jar mè hagjènh xà kamã mè ato hwÿr rãhã ho ixkrí. Na pa pre hte ma mè apè Ijaew kêt xwÿnhjè hwÿr ixpa nè ixprí hã mè amã Jeus kapèr jarènh o ri mè akòt ixpa. Mÿrapè na prem ixpynè nè ijaxã pa arí jar ixkrí ho ixkrí. Nom arí amnhí kaxyw Tirtüm mã ijamaxpèr tÿx pè mè ato hwÿr rãhã ho ixkrí.

² Na pre kãm ijapè hã mè apè Ijaew kêt xwÿnhjè kaxyw ixãm. Ma ixte ri mè akòt ixpa nè mè amã kapèr jarènh o ri mè akòt ixpa kaxyw. Ra mè ate ja hã ijarènh mar mex.

³ Na pre mè pahto hpimràatã tanhmã mè pahto mex to hã inhmã amnhí to amnhÿit pa pre omu. Mè kajaja nè mè pajaja. Pika piitã hkòt mè piitã tanhmã mè ho mex to. Na pre kormã kot mèhò mã ja jarènh kêt tã inhmã ho amnhÿit pa pre omu. Tã kagã ja kamã kot paj mè amã hkwyÿ ho grère nè ho amnhÿit nè mè amã hã kagã ka mè ixpyrà nè kamã harè nè ama.

⁴ Jao aprí hã mar mex nè.

⁵ Amnepēm mē pahkēt ri mē pa xwýnhjé mā Tirtüm kot ja ho amnhírít kēt tā nhüm Karō mē ixkwýjé kumrēx mā ho amnhírít. ý hā kapēr o ri mē pa xwýnh mē mē ixpē Jejus nhý hā mē ajahkre o mē ixpa xwýnhjé kumrēx mā ho amnhírít. Mē ixte kām tanhmā amnhí nhípēx to ho ixpa xwýnhjé mā ho amnhírít pa prem omu.

⁶ Na pre mē inhmā tanhmā mē ato amnhírít to pa prem ja hā mē apumu nē mē akukamā ijamaxpēr o:

–Nā ām hāmri koja xep Ijaew kēt xwýnhjaja mē ixpē Ijaew pyrā nē Tirtüm kapēr ma nē Jejus Kris kōt amnhí xunhwý nhüm Tirtüm ā mē kot amnhí nhípēx anhýr ā mē omu nē mē ixpyrā nē mē ho hkra nē mē ho mex o pa. Anē.

⁷ Tā nhüm Tirtümja mē awýr inhmē. Ixte mē amā ja jarēnh o ri mē akōt ixpa nhüm tokyx mē ate mar kaxyw. Na pre ixto mex nē kām hprām xā hkōt mē akaxyw ixām nē ixte ý hā kām tanhmā amnhí nhípēx to ho ixpa kaxyw ixto ixihýt x nē mē awýr inhmē.

⁸ Tā mo kaxyw na pre mē akaxyw ixām? Te ixte ja kaxyw inhmex kēt pyrāk. Ixkwýjaja ja kaxyw mex o kot ijakrenh tā nhüm pre ixpumu nē tanhmā hamaxpēr to nē mē akaxyw ixām nē mē awýr inhmē. Ixte mē amā mēmoj mex kumrēx jarēnh o ri mē akōt ixpa kaxyw. Na pre inhmā:

–Kēr ka ma Ijaew kēt xwýnhjé hwýr mō nē mē kām Jejus Kris kapēr jarēnh o ri mē hkōt apa. Nē mē kām: “Kot kaj mē Jejus Kris kōt amnhí xunhwý hāmri nē kukwak ri amex nē apa.” Anē.

⁹ Koja mē apē Ijaew kwýjē pyrā nē amnhí kaxyw Ixkra Kris kōt hamaxpēr nē hkōt amnhí xunhwý pa hā mē omu nē mē ho ixkra. Kormā aa ixte mē kām ja hā amnhí to amnhírít kēt tā pa akumrēx mā harē. E ma mē hkōt ri mē kām ā ijarēnh anhýr o ri apa kē mē ijarēnh ma.

Anhýr o mē pahto kator xwýnh maati ja inhmā kapēr.

¹⁰ Tā mēmo kaxyw na hte mē pahto hpim-rāatā mē pahto hkra? Nā kaxkwa kamā kapēr o mē wrýk xwýnh pytār xwýnhjaja nē mēkarōmnuti kot mē pahte amnhí nhípēx nyw o papa hā mē pahpumunh kōt axpēn mā tanhmā Tirtüm jarēnh to kaxyw. Nē harēnh o:

–Kokýý. Tirtüm àhpumunh týx o àhpumunh týx jakamā na hte tanhmā mē hipēx to nhüm mē tām amnhí nhípēx mex o pa. Nā Tirtüm àhpumunh o àhpumunh nē hihtýx o hihtýx. Anē.

Koja mē ate amnhí to mex o apa hā mē apumu nē ā axpēn mā Tirtüm jarēnh anē.

¹¹ Amnepēm kormā mēmoj kēt ri na pre Tirtüm mē pakukamā mē pahtā tanhmā amnhí jarēnh to hāmri nē Jejus kukwak ri

ā mē panhípēx anē. Jao mē piitā mē kām àhpumunh o àhpumunh ā amnhí to amnhírít.

¹² Tā pu mē ra Jejus kukwak ri amnhí kamā pamā Tirtüm puma hkēt nē. Kām mē pajapē kēnā kot pu kēt mē ri amnhí kamā pamā uma ho papa. Kot puj mē paxāmnhí ri kām amnhí jarēnh rāhā ho ri papa. Te ra pahte hwýr paxàpir nē pano ho omunh nē kām pakapēr o pakuhē pyrāk.

¹³ Jakamā kwa kēr ka mē kot mē atā tanhmā ixtomnuj to hā ijarēnhja ma nē tee ri ixkukamā ajamaxpēr hkēt nē. Kwār mē māmri tanhmā inhípēx to. Ām ixte mē amā amnhí jarēnh ma nē axpēn mā ijarēnh o:

–Héxta waa nē. Mān Pawre kām mē pajapē hā na pre amnhí grōnh kōt mē pamex kaxyw mē pahwýr mra nē mē pamā Tirtüm kapēr jarēnh o pa. Mē kot ja hā tanhmā hipēx kati hto htā nhüm jam urer kēt nē. Anē.

Kris kām mē pajapē kamā tanhmā mē panē amnhí nhípēx to

Juāw 3.16; Wam Juāw 3.1

¹⁴ Nē na pa hte mē ato Mēpanhípēēxā maati hwýr kām ixihýt x o ixpa.

¹⁵ Kēp mē pahte hkōt amnhí xunhwýr xwýnhjé nhō Pahi Maati mex kumrēx na. Kra hkwyjaja ra kaxkwa kamā kuri htír tūm nē pa ho pa nē arī pyka ja kamā mē pahpē hkwyjaja kormā jar papa. Nom te mē pahpī-itā mē pahte ixkre tīpxi kamā Tirtüm kōt ri papa pyrāk.

¹⁶ Jakamā na pa hte mē ato hwýr o:

–Pa Tirtüm. Nā amex o amex. E ot pa Epes nhō xwýnhjé ho awýr o ixkrī. Kwa kē Akarō mē kām axāhpumunh xā hkwy gō kē mē akōt ri amnhí nhípēx rāhā ho pa.

¹⁷ –Nē kē mē amnhí kaxyw Kris kōt hamaxpēr týx o pa. Te mēmo pī hpār jarē kot pika kaxwýnh kām pimānh nē pika jamýnh týxta pyrāk. Nhüm kōk xàpēr týx tā tee kot kām mēnh prāmta pyrāk. Kē mē pī hpār jarē kot pika jamýnh pyrā nē kām axpēn kīnh o pa. Jao mēmoj to axpēn kutā nojarēt rāhā ho pa.

¹⁸⁻¹⁹ –Nē kē krī piitā hkōt mē akrajē pyrā nē amnhí tā Kris kām mē hapē htýx o mē hapē htýx ā amnhí pumu. Jao urāk nē mē kām axpēn kīnh týx o pa. Nē kē mē ate amnhí nhípēx pix o amnhí nhípēx rāhā ho pa. Nē ajamaxpēr pix o hamaxpēr rāhā ho pa. Jao te mēmo pī hpārta pyrā nē akōt hihtýx nē. Anē.

²⁰ Kot puj mē ā amnhí to Tirtüm wýr anē nhüm mē pama nē ra àhpumunh týx xā ho ā mē panhípēx anē. Ra kot mē pakamā pa ho pa kēnā.

²¹ ā Tirtüm Jejus Kris kukwak ri mē pahpē hkrajē nhípēx anhýr jakamā kwa pu mē pahpē hkra xwýnhjaja kēr pu mē kām mex o

mex ã harênh rãhã ho papa. Nã kot puj mẽ ã kãm anhÿr o papa.

4

Te ixkre tipxi kamã axpên kôt ri mẽ papa pyràk

Rômãn 15.5; Pìripos 2.1-4; Korosê 3.12-17; Wam Pêtre 3.8

¹Nê ra mẽ kot Kris ã ijaxàr nhùm ixkrĩ htã pa ã inhmã mẽ akĩnh xaj mẽ amã ixkapêr nê hã kagã anhÿr o ixkrĩ. Kwa kêr ka mẽ Tirtùm kot amnhĩ nhĩpêx kôt amnhĩ nhĩpêx mex rãhã ho ri apa. Ja kaxyw na pre amnhĩ kôt mẽ awÿy ka prem hkôt amnhĩ xunhwÿ.

²Nê kêr ka mẽ amã amnhĩ to rax o akwÿjê jakrenh prãm o ri apa hkêt nê. Nê mẽ agryk tokyx anhÿr kêt nê. ãm axpên kãm axukapri pix o mãn ri axpên kôt apa. Kê mẽhõ tee tanhmã ri mẽ ato htã ka mẽ kamã agryk tokyx anhÿr kêt nê. ãm mẽ amã ri axpên hkĩnh pix o mãn ri axpên kôt apa.

³Ra Tirtùm Karõ kot mẽ pahkarõ mã gjêx par jakamã te mẽ pahte ixkre tipxi kamã axpên kôt ri mẽ papa pyràk. Jakamã kêr ka mẽ axpên to mex pix kukamã mãn kêt ajamaxpêr o ri axpên kôt apa. Nê tãm axpên nhĩpêx. Jao ajamakêtkati nê axãmnhĩx ri axpên kôt ri apa ho apa.

⁴Te mẽ pahte ixkre tipxi kamã ri axpên kôt papa pyràk jakamã mẽ pahpiitã mẽ pahkarõ kamã Tirtùm Karõja hkrĩ ho hkrĩ. Jakamã kot puj mẽ nhÿrmã ma õ krĩ hwÿr api nê kamã mẽ paxem rãhã papa ho papa.

⁵Nê mẽ panhõ Pahihtija ãm pixii. Na pu prem pahpiitã amnhĩ kaxyw hkôt pajamaxpêr jao ra mẽ pahpê hkraa. Tã mẽ pahpê Kris kwÿ hã amnhĩ to amnhĩrit kaxyw na prem Tirtùm mã mẽ pahkrã kumrã. ã mẽ panhĩpêx anhÿr o axpên pyràk o mẽ panhĩpêx o pa anê.

⁶Nê Tirtùm haxwÿja ãm pixii. Kêp mẽ pahpiitã mẽ panhĩpêxã maati na. Na hte mẽ pahpê hkrajê mã àhpumunh xã hkwy gõ pu mẽ ÿ hã kãm tanhmã amnhĩ nhĩpêx to ho papa. Nhùm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kôt papa pyràk.

Kris kot ahpÿnhã tanhmã mẽ pahto mex to hã harênh

Rômãn 12.3-8; Wam Korĩt 12.1-12; Wam Pêtre 4.10-11

⁷⁻⁸Nê Tirtùm kapêr ã kagã htùm kot Kris jarênh kot:

Na pre mẽ kot kutã amnhĩ xunhwÿr xwÿnhjê pytãr pa nê ma akupÿm kaxkwa hwÿr api.

Tã arĩ jar pika hkôt mẽ pahpê hkwyjê mã tanhmã mẽ pahto paxihtÿx to ho pa. Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw

tanhmã mẽ pahto paxãhpumunh to. Kãm hprãm xã hkôt.

⁹Tirtùm kapêr ã kagã htùm kot akupÿm kaxkwa hwÿr àpir ã harênh. ãm tapxipix na pre ã pika hwÿr wrÿk nê akupÿm kaxkwa hwÿr àpir anê. Na pre ty nhùm mẽ haxã. Hãmri nhùm akupÿm htrĩ nê kato nê ma akupÿm api. Tapxipix na pre ã amnhĩ nhĩpêx anê.

¹⁰Tã akupÿm kaxkwa hwÿr àpir xwÿnhnta na hte kaxkwa kamã nê pika hkôt amnhùm mẽmoj piitã tanhmã ho ho hkrĩ.

¹¹Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tirtùm nhÿ hã hkrajê jahkre ho ri mẽ hkôt papa kaxyw mẽ paxunhwÿ.

Nê mẽ pahkwÿjaja mẽ pahte pahpri hã mẽ piitã mẽ kãm tanhmã mẽ kot amnhĩ nhĩpêx to nê Jejus kôt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastõ kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tirtùm kapêr ã kagã jarênh o mẽ ahkre ho papa kaxyw mẽ paxunhwÿ.

¹²ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhùm mẽ pamar tÿx nê. Nê gaa nê mẽ pahpyrà nê Tirtùm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa.

¹³Nê gaa nê mẽ pahpiitã mẽ pahpê Tirtùm kra hã Jejus kot amnhĩ nhĩpêx kôt omunh mex nê. Nê amnhĩ kaxyw hkôt pajamaxpêr tÿx nê. Jao te ra hkôt mẽ paxãptãr mex pyràk. Nê te kot amnhĩ nhĩpêx pyràk o amnhĩ nhĩpêx.

¹⁴Mêhprĩrejaja na htem nhãm hamaxpêr nê nhãm hamaxpêr o pa. Te kók xãpêr nê nhãm mẽmoj to mrar nê nhãm mẽmoj to mrar pyràk. Nom kêr pu mẽ ho mẽ urãk kêt nê. ãm Kris kôt pix mã pajamaxpêr tÿx o papa. Jakamã nhùm mẽ tee ri mẽ pahte hkwyim ri tanhmã amnhĩ tomnuj to hprãm xaj tanhmã mẽ pahto kaprÿ. Nom kêr pu mẽ mẽ mar kêt nê. ãm pakatãt kôt mẽ àptãr kot amnhĩ nhĩpêx o amnhĩ nhĩpêx o papa. Jao Kris kôt axpên to paxihtÿx o papa.

¹⁵Tãm axpên mã pakapêr nê pamã axpên kĩnh o axpên mã paxêx kêt nê. Kwa kêr pu mẽ ã amnhĩ nhĩpêx anhÿr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mõ.

16 Nē mē panhī kamā tanhmā mē pakuteja piitā na hte mē pahkrā kamā mē pajamaxpēr xā hkôt axpēn kôt ahpŷnhā tanhmā axpēn to ajuta hto. Te ixkre pixi kamā mē pahte axpēn kôt tanhmā axpēn to ajuta hto ho ri papa pyrāk.

Kris kôt mē pahte amnhī nhīpēx nyw ā mē pamā karō

Korosē 3.5-11; Wam Pētre 4.7

17 E kot paj Pahihti nhī hā mē amā mēmoj jarē nē nē mē amā ixkapēr kām ixihtŷx nē ka mē inhma. Nā kēr ka mē axte mē kēp Tirtūm kra hkēt xwŷnhjē kot amnhī nhīpēx o amnhī nhīpēx o ri apa hkēt nē. Na htem htŷx ri tanhmā hamaxpēr punuj to ho ri amnhī tomnuj o pa.

18 Jao Tirtūm mā hamaxpēr kēt nē pa. Kām hamaxpēr prām kēt kumrēx nē pa. Te mē kot omunh nē nhām hkrā pyrāk o amnhī nhīpēx. Rŷ te mēhō wa kot axpēn kām gryk kām axpēn nhīpēx pyrāk o hīpēx. Jao te kamāt kō kamā ri pa pyrā nē Tirtūm kot amnhī nhīpēx pumunh kēt nē pa. Jakamā koja mē nhŷrmā kuri hŷir tūm nē pa hkēt nē.

19 Na htem tanhmā amnhī tomnuj to htā amnhī kamā hpjjaām kēt nē pa. Nē axpēn kamā hpjjaām kēt rāhā ho pa. Ām amnhī pix kukamā hamaxpēr nē tanhmā amnhī tomnuj to ho ri pa.

20-21 Nom Jejus Krisja ā kot amnhī nhīpēx anhŷr kēt. Mē kurom tām kot amnhī nhīpēx mex o pa xwŷnh nē tām kapēr o pa xwŷnh na. Na pa pre ma mē awŷr mō nē ixprī hā mē amā ja hā harē ka prem inhma nē inhmar tŷx nē.

22 Na pa pre mē amā:

–Kwa mē ri axte amnhī nhīpēx tūm kôt amnhī nhīpēx o ri apa hkēt nē. Ja na omnuj tŷx. Na ka prem ā amnhī nhīpēx anē nē ajamaxpēr punuj pix o ri apa. Jao amnhī tomnuj rāhā nē. Tā kēr ka mē amnhī nē awry hā mēnh pyrā nē axte ā amnhī tomnuj anhŷr o ri apa hkēt nē.

23 –Nē kēr ka mē axte mē ajamaxpēr tūm nē mē ate amnhī nhīpēx tūm kôt ri amnhī nhīpēx kēt nē. Nē mē ajamaxpēr nyw nē mē ate amnhī nhīpēx nyw kôt pix mā ri amnhī nhīpēx o ri apa. Te mē kot mē ē htūm kwŷnh nē rēnh nē hpānhā nyw jagjēx nē ri hā pata pyrā nē ām amnhī nhīpēx nyw kôt pix mā amnhī nhīpēx o ri apa.

24 Mē ajamaxpēr nyw nē mē ate amnhī nhīpēx nywja axtem na. Te Tirtūm jamaxpēr nē kot amnhī nhīpēxta pyrāk. Jakamā kwa kēr ka mē kām hprām xā hkôt pix mā tanhmā amnhī nhīpēx to ho ri apa. Jao kām amnhī nhīpēx mex o ri apa. Nē kapēr kôt ri amnhī nhīpēx. Anē.

Na pa pre ā mē amā ixkapēr anē. Tā kēr ka mē arī ixkapēr kôt pix mā amnhī nhīpēx.

25 Mē pahpē Kris nhī jakamā te pahte ixkre htixpi kamā axpēn kôt amnhī nhīpēx pyrāk jakamā kwa mē axte axpēn mā mēmoj to axēx kēt nē. Nē amarī axpēn xō ri axpēn mā mēmoj to axēx kēt nē. Ām tām axpēn mā mēmoj jarēnh o ri apa.

26 Nē kot kaj mē mēmoj tā agryk japēr. Rŷ mēhō kamā agryk rŷ amarī agryk japēr. Tā kēr ka ho ajapēx tokyx anē agryk japjē hkēt nē. Kēr kē kormā kamāt kēt ri ka akupŷm tām akra nhūm ja amā mex nē.

27 Nom kot ka mē arī kamā agryk o ri apa nhūm mēkarōmnuti nhō pahi Satanastija ja hā mē apumu nē te mē ate amnhī tomnujta ā mē apynēnh pyrāk o mē anhīpēx. Ka mē ra hkôt tanhmā amnhī tomnuj to. Ja pymaj kēr ka mē agryk japjē hkēt nē. Satanasti kām hprām xā hkôt ā amnhī nhīpēx anhŷr kēt nē.

28 Nē mē axāhkīnh o mē apa xwŷnhjaja kēr ka mē axte mē kēp axāhkīnh hkēt nē. Mēmoj tā apē nē hpānhā kaxpore jamŷ nē ho amnhūm awjaprō. Nē mē kēp amrakati xwŷnhjē mā mēmoj japrōr o ri apa. Kēr ka mē ate amnhī nhīpēx tūmta pānhā ā amnhī nhīpēx nyw o amnhī nhīpēx anhŷr o ri apa.

29 Nē kēr ka mē amā axpēn kīnh kamā tām axpēn mā akapēr o ri apa. Nē akapēr mā agēt kām ri axpēn mā akapēr kēt nē. Ām axpēn mā akapēr mā aprī ho axpēn mā akapēr. Nē mē amā axpēn kīnh nē mē amā axpēn to mex pix prām xāj tām axpēn mā ri akapēr o ri apa.

30 Tirtūm na pre mē pahwŷr amnhī Karō rē nhūm mē pahpē hkra hā mē pahkarō mā agjē nē mē pakamā hkrī ho hkrī. Koja mē pakamā hkrī ho hkrī rāhā nhūm nhŷrmā Tirtūm amnhī wŷr mē pahto api pu mē kuri pahtŷr tūm nē papa ho papa. Jakamā kwa kēr ka mē tanhmā amnhī tomnuj to ho amnhī kamā Tirtūm Karō mā hkaprī jagjēnh kēt nē. Nē kām hpjjaām jagjēnh kēt nē. Koja mē pahte amnhī tomnuj ā mē pahpumu nē mē pahkaga hkēt tā tee ri ja hā mē pahpumu nē hkaprī nē. Jakamā kēr pu mē ām kām hprām xā hkôt pix mā tanhmā ri amnhī nhīpēx to ho ri papa.

31 Nē kēr ka mē axte ri axāhkurē ho ri apa hkēt nē. Nē agryk kām axpēn mā tanhmā akapēr punuj to hkēt nē. Rŷ axpēn japrŷ ho ri apa hkēt nē. Nē atŷx ri axpēn tā apēr o apikēnh kēt nē. Nē ri axpēn tā mē kām axāmnēnh kēt nē.

32 Kēt mē ām axpēn to mex pix nē axpēn kām axukaprī ho ri apa. Nhūm mēhō tanhmā mē ato ka mē ām amnhī tā omu nē tanhmā ho hkēt nē tanhmā kot atoja ho ajamakētcati kurē kumrēx. Tirtūm na pre Kris kukwak ri mē pahte amnhī tomnuj grānh pa nē axte kām hamaxpēr kēt nē. Tā

kêr ka mê uräk në mëhō kot tanhmā atom-nuj tota tokyx ho ajamakêtkati në axte kām ajamaxpêr kêt në.

5

¹ Në koja mëhō kām hkra japê nhūm amnhî tā omu në hkīnh në. Hāmri në nhÿrmā hkra në amnhî pyrā në kām hapê në. Ja pyrā në Tirtūm kām mê pahpê hkwÿjê japê jakamā kêr pu mê amnhî pyrā në pamā pahkwÿjê hkīnh tÿx o papa.

² Kris haxwÿja kām mê pajapê jakamā na pre htyk o mê panê mê pahte amnhî tomnuj pānhā amnhîrer pa. Kêp Tirtūm Kra htā amnhî mex pix kukamā hamaxpêr kêt në ā mê panê amnhî nhîpêx anê. Tā ā kām mê pajapê anhÿr jakamā nhūm Tirtūm ja hā omu nhūm ja kām mex në. Te ho mê hkuxwa xā mex kuxwa pyrāk. Jakamā kêr pu mê amnhî tā omu në uräk në pamā axpên kīnh o axpên to mex o mār ri papa.

Mê pahte amnhî tomnuj kaga hā kot mê pamā karō

Sikūn Korīt 6.14-7.1; Korosē 3.16-17; Wam Juāw 1.5-10, 2.15

³ Në mê pahpê Tirtūm kra jakamā kêr pu mê pahprō pix tānopxar o ri papa në nhām mēnijê hō kamā pahpijaam kêt o ri papa hkêt në.

Nê kêr pu mê amnhî pix kukamā pajamaxpêr kêt në. Ām ja ho anhÿr hkêt kumrêx. Mê pahpê Tirtūm kra kēnā kot pu kêt axtem në ā amnhî nhîpêx anhÿr o ri papa. Tirtūm krajaja na htem ā amnhî nhîpêx anhÿr kêt në.

⁴ Në määnēn mê pakapêrja. Kêr pu mê ri tanhmā axpên mā pakapêr punuj to hkêt në. Nê ri axpên japrÿ hkêt në. Nê amnhî krā hkôt pahÿx ri tanhmā pakapêr to hkêt në. Ām tām axpên mā pakapêr mex në axpên mā Tirtūm mex o mex ā harēnh o ri papa.

⁵ Në Tirtūm kapêr kôt amnhî nhîpêx kêt xwÿnhjaja në axpên kām mê hpijaam kêt xwÿnhjaja në amnhî pix kukamā mê hamaxpêr o pa xwÿnhjaja. Ā mê kot amnhî nhîpêx anhÿr xwÿnhjaja kêp Tirtūm mê Kris wa hkra hkêt. Na htem ā amnhî nhîpêx anhÿrja gryk ā wa kām hamaxpêr kêt në.

⁶ Në koja nhÿrmā mëhō mê awÿr mō në mê ate tanhmā amnhî tomnuj to prām xāj hêx rom amā kapêr në mê amā:

—Kwa mon ka hte mê ixpyrā në ā amnhî nhîpêx anhÿr kêt në? Ja mex kēnā. Anê.

Koja ā mê amā kapêr anê ka mê ama në ām ama. Ā mê kot amnhî nhîpêx anhÿr xwÿnhjaja koja Tirtūm nhÿrmā ja hā mê homnuj tÿx kumrêx.

⁷ Jakamā kwa kêr ka mê ate ho mê kot amnhî nhîpêx pyrāk pymaj mê hkôt ri apa hkêt në. Kwarī ho kwarī.

Mê pahte amnhî nhîpêx nyw jarēnh Juāw 1.4, 3.19, 8.12, 12.35; Rōmān 13.12; Wam Tesarōn 5.5; Wam Juāw 1.5

⁸ Amnepēm kormā mê ate Tirtūm kôt amnhî xunhwÿr kêt ri na ka prem te kamāt kō kamā ri apa pyrā në atÿx ri tanhmā amnhî tomnuj to ho ri apa. Tā ra Jejus kôt amnhî xunhwÿ hāmri në te hirā kamā mê apa xwÿnh pyrāk. Jakamā kwa kêr ka mê hpānhā Tirtūm kām hprām xā hkôt pix mā mār ri amnhî nhîpêx o apa. Ra mê apê hirā kamā mê apa xwÿnh kēnā.

⁹ Kot kaj mê ā amnhî nhîpêx anê në tām amnhî nhîpêx mex në tām akapêr o apa.

¹⁰ Jao Tirtūm kām hprām xā hkôt pix mā amnhî nhîpêx o ri apa

¹¹⁻¹² në te kamāt kō kamā ri mê pa xwÿnhjaja kot amnhî nhîpêx pyrāk o amnhî nhîpêx kêt në. Ā mê kot amnhî nhîpêx anhÿr xwÿnhjaja na htem hpimxur pê tanhmā amnhî tomnuj tÿx to ho pa. Nom kot paj ixprī hā mê amā tanhmā mê kot amnhî tomnuj to hā mê harēnh kêt në. Kot pa mê amā harē në ixpijaam tÿx në. Ixte harēnh mā xwÿnhja omnuju. Tā kêr ka mê uräk në ā amnhî nhîpêx anhÿr kêt në. Ām mê noo mā tām ri amnhî nhîpêx o ri apa.

¹³ Mê kot ja hā mê apumunh në tee ri tanhmā kot amnhî tomnuj to hkukamā hamaxpêr kaxyw. Jao amnhî tomnuj kaga japêr.

¹⁴ Te mê kot kanê hpōk rax kām mēmoj piitā omunh mexta pyrāk. Tirtūm kapêr ā kagā htūm kot ja jarēnh kot:

Mê amā Tirtūm prām kêt xwÿnhjaja te ra mê atyk në mê anhīkwÿ pyrāk.

Nê te kamāt kō kamā mê anhōt në mê anhīkwÿ pyrāk.

Jakamā kwa te mê akrā hapōx në kànhmā mê akrī pyrāk o amnhî nhîpêx në Tirtūm kôt amnhî xunhwÿ.

Kê Kris tanhmā mê akrā hto ka mê te myt kato nhūm mê ate arigro hā ri apa pyrāk o amnhî nhîpêx. Anê.

Tirtūm krajaja kot tanhmā amnhî nhîpêx to hā mê kām karō

Korosē 4.5; Sikūn Ximotre 4.2

¹⁵ Në kwa kêr ka mê amnhî pumunh mex o ri apa. Nê mê ri htÿx ri mê kot amnhî nhîpêx xwÿnhjê hkôt amnhî nhîpêx kêt në. Nê ām amnhî to mex pix o ri apa.

¹⁶ Na htem ra Kris ā mê pahotomnuj o pa pu mê pamex kêt në ri papa. Tā nom kêr pu mê apkati mê arī Tirtūm mā tanhmā amnhî nhîpêx to ho papa mā panhÿrer kêt në.

¹⁷ Në ām Tirtūm pix mā amnhî jarēnh o ri papa në kām:

—Pa Tirtūm. Inhmā akôt pix mā amnhî nhîpêx prām jakamā kwa ixte amā mēmoj to anhÿr kaxyw ixkrām ijamaxpêr mex jagjê

nē ho amnhīrīt mex pa tanhmā amā amnhī nhīpēx to ho ri ipxa.

Anhūr o amnhī to kuwū. Nom kēr pu mē pahťx ri pajamaxpēr kōt tanhmā kām amnhī nhīpēx to hkēt nē.

¹⁸ Nē kēr pu mē ri pahpipānh o papa hkēt nē. Kwarī ho kwarī. Kot puj mē ā amnhī nhīpēx anē nē te kagōxŷhti kot amnhī tā mē pahkaxpre pyrāk o mē panhīpēx pu mē tee ri pamā hkaga hprām kaprŷ. Te kot amnhīm mē pahto ārik pyrāk o mē panhīpēx nhūm ja mex kēt nē. Na htem pipānh kām hamaxpēr mex kēt nē ām htŷx ri tanhmā amnhī nhīpēx to ho pa. Tā kēr pu mē ā amnhī nhīpēx anhūr hkēt nē ām Tirtūm Karō pix hkōt mān ri amnhī nhīpēx o ri papa.

¹⁹ Nē kēr pu mē axpēn wūr akuprō nē pahkīnh kām Tirtūm mā mex o mex ā harēnh pē ho pagrer o pahkri.

²⁰ Nē mē pamex nē ri papa rŷ pahpunuj nē ri papa htā arī kām mex o mex ā harēnh rāhā ho ri papa. Kēp Mēpanhīpēxā maati jakamā mē pahpē Pahihtī Jejus Kris kwŷ hā pu mē kām mex ā harēnh rāhā ho papa nē aa ho pajamakētkati hkēt nē.

²¹ Nē kēr ka mē Kris ā apijaam rāhā o ri apa. Jao axpēn kōt ajamaxpēr nē axpēn kōt ri amnhī nhīpēx mex o ri apa.

Tanhmā mē hprō nē mē mjēn kot axpēn nhīpēx to hā mē kām karō

Wam Korūt 11.3; Korosē 3.18-19; Wam Pētre 3.1-7

²² Nē kēr ka mē anijaja mē amjēn ā apijaam o ri apa. Nē mē hamaxpēr mex ā mē omu nē mē hkōt ri amnhī nhīpēx o ri apa. Te mē ate Pahihtī Kris kapēr kōt amnhī nhīpēx o ri apata pyrāk.

²³ Kris kēp mē pakamā ukaprī xwŷnh nē kēp mē papytār xwŷnh jakamā te kēp mē pahpiitā mē pahkrā pyrāk. Nē mē papajaja te mē pahpē ī pyrāk. Jakamā na pu htem pahpē ŷja te mē pahkrā kot tanhmā hamaxpēr to xā hkōt amnhī nhīpēx o papaja pyrāk. Ja pyrā nē kēr ka mē anijaja mē amjēn jamaxpēr mex ā mē omu nē mē hkōt amnhī nhīpēx mex nē.

²⁴ Mē pahpē Kris kwŷ jakamā na pu htem hkōt amnhī nhīpēx mex o ri papa. Ja pyrā nē kēr ka mē amjēn kōt amnhī nhīpēx mex o ri apa.

²⁵ Nē mē amyjaja. Kēr ka mē amā aprō hā ma ho ri apa. Te ho Kris kot mē pahťa ma ho pata pyrāk. Na pre kām mē pajapē xāj amnhī grōnh kōt mē pahwūr wrŷ nē mē panē ty. Tā kēr ka mē urāk nē ā amā aprō hā ma ho apa anē.

²⁶ Na pre Kris kām mē pajapē xāj mē pahte amnhī tomnuj pē mē pahpytā. Te mēhō my kām mēhō ni hkīnh nē mēmoj punuj pē utār nē ho hprōta pyrāk. Nhūm te mē kot axpēn mā wa rer kaxyw nhūm nija ma gōx mā

htēm nē wūr nē amnhī to mex nhūm mē kot axpēn kaxyw wa ho mexta pyrāk. Hāmri nē te ra axpēn mā wa rer nhūm wa kot axpēn kōt pa ho pata pyrāk.

Ja pyrā nē na pre Jejus kām mē pajapē nē kām amnhī kuri mē papa ho mē papa hprām xāj mē pahwūr wrŷ nē mē pahte amnhī tomnuj pē mē pahpytā nē mē pamā Tirtūm kapēr jarēnh o pa. Tā mē pahpē hkrajaja na pu htem kapēr ma nē hkōt amnhī nhīpēx o papa ho amnhī tomnuj kaga. Te gōx kām mē paxwūr nē mē pahte amnhī nē amnhī grā htyk kuhōnh par pyrāk. Jao Tirtūm kapēr kōt pix mā amnhī nhīpēx o ri papa. Te ra paxwūr nē amnhī nē tanhmā mē pahte amnhī tomnuj to grānh par pyrāk. Nē te mjēn mā xwŷnh wūr nē amnhī to mex pyrāk.

²⁷ ā mē pahte amnhī nhīpēx anhūr jakamā te mē pamex nē ri papa pyrāk. Hāmri nhūm Krisja ja hā mē pahpumu nē kām mē pajapē htŷx nē. Jakamā koja nhŷrmā akupŷn wrŷ nē ma akupŷm amnhī kōt mē pahto api pu mē kuri pa hūr tūm nē papa ho pa.

²⁸ Nē xā mē amyjaja mē amā amnhī japēē? Nā mē amā amnhī japē ho na ka htem amā amnhī tā ma ho apa. Tā kēr ka mē aprō nhīpēx o te ka amā amnhī tā mata pyrāk. Jao tām mē hipēx o ri apa. Te war apixire nē war apa pyrāk o wa axpēn nhīpēx. Kot kaj mē tanhmā hipēx to nē te ate amnhī nhī tanhmā hipēx to pyrāk.

²⁹⁻³⁰ Na htem amnhī nhī ho mex pix o pa nē kamā gryk kēt nē. Nē kām prām nē apku. Nē kām kōr nē ixkō. Nē nhŷhŷnh ā nē amnhī kane. Na pu htem ā amnhī to mex o ri papa anē. Ja pyrā nē te mē pahpē Kris nhī pyrāk jakamā na hte mē pahto mex o pa. Te mē pamā mē papa mē pahte amnhī nhī hā mata pyrāk.

³¹ Tirtūm kapēr ā kagā htūm kot ja jarēnh kot:

Koja mēmŷjē hō hprō kaxyw hāmri nē hipēēxā nē katorxā wa ōrkwŷ kaga nē ām hprō kōt pix mā hpānhā ri pa ho pa. Te wa tipxi nē ri pa pyrāk o wa axpēn nhīpēx o pa. Anē.

³² Na pre Tirtūm ā ja jarēnh anē. Kapērja mex tā amnepē mā mē pa xwŷnhjaja na prem hprī hā mar tŷx kēt nē. Na prem htŷx mē mjēn kot tanhmā mē hprō nhīpēx to pix ā hkamnhīx no ām ja pix kēt. Māānēn te mē pahpē Kris nhī pyrā nē tām mē pahte amnhī nhīpēx nē axpēn nhīpēx o papa hā ā mē pajarēnh kot anhūr. Te ixkre tipxi kamā mē pahte Kris kōt mē papa pyrāk o ā mē pajarēnh anē.

³³ Jakamā kwa kēr ka mē amyjaja mē amā mē aprō japē ho ri apa. Te ka amā amnhī tā ma pyrāk o mē hipēx. Jao tām mē hipēx. Nē mē anijaja kēr ka mē ajaxwŷja mē amjēn ā apijaam o ri apa.

6

Mē hkrajaja kot tanhmā hipêxà nē katorxà nhîpêx to hā mē kām karō
Korosē 3.20-21

¹ Nē mē apē mē hkrajaja kêr ka mē anhîpêxà nē mē akatorxà wa kapêr ma nē hā ano htÿx nē wa hkôt ri amnhî nhîpêx rāhā ho ri apa. Mē amā Pahihti Kris kôt amnhî nhîpêx prām xāj ā amnhî nhîpêx anhÿr o ri apa. Kot kaj mē ā amnhî nhîpêx anhÿrja o amnhî nhîpêx mex o ri apa.

²⁻³ Tirtūm kapêr ā kagā htūm kot ja jarēnh kot:

Kêr ka mē anhîpêxà nē mē akatorxà wa kapêr ma nē wa hkôt ri amnhî nhîpêx.

Kot kaj mē ā amnhî nhîpêx anē nē amex nē kritpēm atir nē ri apa ry nē.

Anhÿr jakamā kot kaj mē amā kritpēm atir nē ri apa hprām hā kêr ka mē ā amnhî nhîpêx anhÿr o ri apa. Kormā mē aprîre htā ā amnhî nhîpêx anē. E kêr ka mē ā mē anhîpêxà nē mē akatorxà nhîpêx anhÿr o ri apa.

⁴ Nē mē apē mē hipêxà nē mē katorxà kêr ka mē akrajê gryk kaxyw mē kām apêr o apikēnh hkêt nē. Tām mē kām akapêr nē Pahihti Jejus kapêr o mē ahkre ho ri apa. E kêr ka mē ā akrajê nhîpêx anhÿr o ri apa.

Mē pahte mē panhō patrāw kapêr kôt amnhî nhîpêx ā mē pamā karō

Korosē 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵ Nē mē ate mē kām mē axâpênh o mē apa xwÿnhjaja kêr ka mē anhō patrāw kapêr ma nē hkôt amnhî nhîpêx mex o ri apa. Te mē ate Kris kapêr mar nē hkôt amnhî nhîpêx pyrāk. Jao mē hā apijaam rāhā nē.

⁶ Nom kêr ka mē ām mē noo mā pix mā ri mē kām axâpênh mex kêt nē. Māānēn mē wa kre kamā mē kām axâpênh mex rāhā nē. Ja na Tirtūm kām hprām. Mē apē Tirtūm Kra Kris mā tanhmā amnhî nhîpêx to ho apa xwÿnh jakamā kêr ka mē anhō patrāw mā axâpênh mex o ri apa.

⁷ Nē mē akînh kām mē kām axâpênh mex nē. Te mē ate Pahihti mā akînh kām tanhmā kām amnhî nhîpêx to pyrā nē mē kām tām amnhî nhîpêx pē axâpênh mex o ri apa.

⁸ Kot puj mē amnhî kaxyw Tirtūm mā pajamaxpêr pē pahkînh kām tām amnhî nhîpêx o ri papa nhūm Pahihti ja hā mē pahpumu nē nhÿrmā ja hā mē pahto mex rax nē. Mē pahpē hkrajê piitāā. Mē pahte mē kām paxâpênh xwÿnhjaja nē amnhî mā mē paxâpênh xwÿnhjaja nhūm nhÿrmā mē pahpiitā mē pahte tām amnhî nhîpêx xwÿnhjê ho mex rax nē.

Mēō patrāwja kot tanhmā kām mē âpênh xwÿnhjê nhîpêx to
Korosē 4.1

⁹ Nē mē apē mē ō patrāwja kêr ka mē amā mē âpênh xwÿnhjê ho mex nē mē âpênh ā mē kām axâkjêr o ri apa hkêt nē. Tām mē hipêx. Kaxkwa kamā mē panhō Pahi Maatija māānēn kêp mē ō Pahi Maati jakamā ā mē hipêx mex anhÿr o apa. Tām na kām mē pahpiitā mē pajapê ho axpênh pyrāk. E kêr ka mē ā mē hipêx anhÿr o ri apa.

Tanhmā mē pahte Satanasti kutā amnhî to htÿx to hā mē pamā karō

Rōmān 16.20; Sikūn Korūt 10.3-5; Wam Tesarōn 5.8-11; Xiakre 4.7; Wam Pêtre 5.8-11

¹⁰ E kot paj hpānhā tanhmā mē pahte mēkarōmnuti nhō pahi Satanasti kutā amnhî to htÿx to jarē ka mē inhma. Kêr ka mē Pahihti nhÿ hā kutā amnhî to htÿx rāhā nē apa. Ate tanhmā amnhî tomnuj to hprām xāj tanhmā kot ato htā ka Tirtūm xihtÿx o anhōpînh xā kaxwÿnh kām kutā amnhî to htÿx nē. Rÿ koja ate mēmoj mex o anhÿr nē tanhmā ato ka mē amnhî tā hamaxpêr ā omu nē ām omu nē arî Tirtūm xihtÿx nhÿ hā tām ajamaxpêr mex rāhā ho ri apa.

¹¹ Na hte pōristijaja pijapu kaxyw hāmri nē amnhî nē kax o mē ē jagjê nhūm mē tee ri kām mē hkamnhwÿr prām hkaprÿ. Tā ja pyrā nē koja Satanasti mē ate kapêr kôt tanhmā amnhî nhîpêx to hprām xāj tanhmā mē ato ka mē amnhî tā hamaxpêr ā omu hāmri nē Tirtūm xihtÿx nhÿ hā kutā amnhî to htÿx nē. Jao mē ate amnhî nhîpêx nyw pix o amnhî nhîpêx nē mē ajamaxpêr nyw pix o ajamaxpêr. Kot kaj mē ā amnhî nhîpêx anē nhūm Satanasti tee ri tanhmā kām mē ato hprām hkaprÿ.

¹² Mē pahpê Tirtūm kra jakamā mē kot mē pakutā amnhî xunhwÿr xwÿnh maatijaja axtem na mē. Mē kêp mēkarōmnuti jakamā mē pahkînhā mē i hkêt. Ām mē hkarō kaxkrit pix na mē. Na htem kōk kôt tanhmā amnhî tomnuj tÿx to ho pa. Nē mē hihtÿx. Na htem arî jar pika ja kamā mē kêp Tirtūm kra hkêt xwÿnhjê ho amnhîptā nhūm htem mē hkôt ri htÿx tanhmā ri amnhî tomnuj tÿx to ho pa. Nom amnhî tā mē omunh kêt nē.

¹³ Jakamā kwa kêr ka mē Tirtūm kot mē akarō mā amnhî Karō jagjênh xwÿnhhta kôt pix mā amnhî nhîpêx o apa. Jao mē ate amnhî nhîpêx nyw kôt pix mā mār ri mē amnhî nhîpêx. Kêr kê mēkarōmnuti tee ri kām tanhmā mē ato hprām kaprÿ ka mē arî Tirtūm Karō xihtÿx nhÿ hā kutā amnhî to htÿx rāhā ho apa.

¹⁴ Jakamā kwa kêr ka mē axkām ajamak rom nē te ho sōrdat kot pijapu kaxyw ē jagjênh pyrāk o amnhî nhîpêx. Na htem amnhî nē mōx kâ ho mē ē jagjê nē mē hpre xā ho amnhî pre hpa. Nē hipy kâx o mē hinō kâ jagjê. Hāmri nē rî kormā ma mē kām mē hkurê xwÿnhjê kutā mra nē axpu. No mē kajaja kêr ka mē kurom amnhî krām Tirtūm

kapēr jaxàr tỳx nē hkòt pix mā ri ajamaxpēr rāhā ho ri apa. Nē hkòt ri amnhī nhīpēx mex nē. Jao te sòrdat pijapu kaxyw kot amnhī nhīpēxta pyrāk.

¹⁵ Na hte sòrdatjaja hpar kà jagjē nē aa hopòx kēt nē. Ām rāhā gōr nē hikwỳ. Jao ra mē kutā pijapu kaxyw amnhī grōnh rāhā gōr nē hikwỳ. Tā kēr ka mē ma mē kām Jejus kot tanhmā mē panē amnhī nhīpēx to hā harēnh o apa kaxyw nē sòrdat pyrā nē amnhī grōnh kòt ma mē hwỳr apa nē amnhī kamā akahak kēt nē.

¹⁶ Nē sòrdatjaja na htem amnhī nē amnār xā hā kàx po jamỳ nē ho kuhē nhūm mē tee ri kām mē hkamnhwỳr prām kaprỳ. Ja pyrā nē koja Satanasti tanhmā mē ato ka mē Tirtūm kēp mē anhō pahi hā hihtỳx o kot Satanasti jakrenhja mā ajamaxpēr kurē kumrēx nē ām hkòt pix mā amnhī nhīpēx. Na hte Satanasti te kot mē pahwỳr krur rēnh pyrāk o mē panhīpēx. Jao xatā mē pahte Tirtūm kaga hprām xāj tanhmā mē pahto. Nē mē pahte Tirtūm mā tanhmā amnhī nhīpēx to pymaj xatā tanhmā mē pahto kaprỳ. Pu mē amnhī tā omu hāmri nē Tirtūm Karō xihitỳx nhỳ hā Tirtūm kòt pix mā amnhī nhīpēx.

¹⁷ Nē na hte sòrdatjaja kàx o mē hkrājapap jagjē nē pijapu kaxyw mē kutā mra nhūm mē tee ri mē hkrā jayr prām kaprỳ. Ja pyrā nē kēr ka mē amnhī kaxyw Tirtūm kòt pix mā ajamaxpēr rāhā ho ri apa. Nē ra kot mē ato hkra mā ajamaxpēr rāhā nē. Kē Satanasti tee ri kām mē akrā kamā mē amā mē ajamaxpēr punuj jagjēnh prām hkaprỳ.

Nē sòrdatjaja na htem mē kutā wapo jamỳ nē ho kuhē. Nom mē papajaja mē panhō wapoja na axtem kēp Tirtūm kapēr. Na hte Tirtūm Karō mē pahkrā kamā kapēr o amnhīrīt pu htem pix mā pajamaxpēr o papa nhūm Satanasti tee ri kām mē pahkrām mē pajamaxpēr punuj jagjēnh prām kaprỳ. Te mē papijapu nhūm mē pahte amnhī nē ho pakrihkrit pyrāk o hipēx.

¹⁸ Ā Satanasti pē mē pahte amnhī nē amnhī nhīpēx kot anhỳr. Jakamā kēr pu mē amnhī to Tirtūm pix wỳr o ri papa kē Satanasti kutā mē pahto paxihitỳx pu mē hkòt tanhmā amnhī tomnuj to hkēt nē.

Nē kēr pu mē mēmoj to anhỳr kaxyw nē ra Tirtūm Karō nhỳ hā amnhī to Tirtūm wỳ. Nē kām amnhī jarēnh rāhā ho papa nē aa ja ho pajamakētkati hkēt nē. Nē Tirtūm krajē piitā mē ho hwỳr rāhā ho ri papa.

¹⁹ Nē kwa kēr ka mē määnēn ixto Tirtūm wỳr rāhā nē. Kot tanhmā ixto nhūm ixamnhīx ixte mē kām kapēr jarēnh mex o ri mē hkòt ixpa kaxyw. Mē kot ja hā tanhmā ixto htā pa arī ixamnhīx mē kām harēnh mex o ri mē hkòt ixpa. Nē ixprī hā mē kām Jejus kot tanhmā mē panē amnhī nhīpēx to hā harē. Kormā mē kot hprī hā ja mar mex kēt.

²⁰ Tā ixte mē kām ja jarēnh kaxyw na pre Tirtūm mē hwỳr inhmē nhūm prem hā ijaxā pa arī mē hagjēnh xā kamā ixkrī ho ixkrī. Jakamā kwa mē ixto Tirtūm wỳ kē tanhmā ixto ixihitỳx to pa arī mē kām kapēr jarēnh o ixkrī. Ja na Tirtūm kām hprām nē ijaxwỳja inhmā ja prām.

Kagà jatur xà

Korosē 4.7-8

²¹ Nē ot pa mē awỳr Xikitre mē. Kot paj mē amā kagàja nhīpēx pa nē kām kugō nhūm kupy nē ma mē awỳr o mō. Hāmri nē mē awỳr o pōj nē mē amā kugō nē mē amā tanhmā ijarēnh to ka mē ijarēnh ma nē akīnh nē. Xikitre na hte Pahihti mā tanhmā amnhī nhīpēx mex to o pa. Kris kòt mē pahtō na. Nē inhmā hapēē.

²² Tā ot pa mē awỳr kumē. Kē mē awỳr pōj nē mē amā ijarē ka mē kam ama nē akupỳm tām akrā nē tee ri ixkukamā ajamaxpēr kēt nē.

²³ E ixkrāmnhwỳjaja. Kē Mēpahpām Tirtūm mē Pahihti Jejus Krisja wa tanhmā mē akrā hto ka mē ajamakētkati nē axamnhīx ri apa. Nē mē amā axpēn kīnh o ri axpēn kòt apa. Nē mē apiitā wa hkòt ajamaxpēr mex o ri apa.

²⁴ E mē amā mē panhō Pahihti Jejus Kris kīnh rāhā ho apa xwỳnhjaja. Kē Tirtūm mē ato mex nē mēmoj to mē akutā nojarēt rāhā ho pa.

Tā ām ja pix na hapēx. Ixpē Pawre na pa mē awỳr kagàja nhīpēx nē kumē.

Piripos

Pawre kot Piripos kamã Jejus kôt hkwyjê hwyr kagã në mênh

Pawre na pre kagãja nhîpêx. Jejus nhÿ hã më ahkre o më pa xwÿnhjê hõ na pre. Na pre Jejus ã më kãm hkurê xwÿnhjaja unê në ma krî pê Rôm wÿr kumê në kamã haxã nhÿm më hãgênh xã kamã hkrî ho hkrî. Tã nhÿm arî hkrî rãhã Piripos kamã Jejus kôt hkwyjê hwyr kagãja nhîpêx në kumê. Na prem Pawre jarênh ma në kãm ukapri në. Jakamã axpên kaxyw kãxpore hkwy ho akuprõ në hwyr kumê. Hãmri nhÿm omu në hkînê në amnhî tã kagãja nhîpêx në kamã më kãm amnhî jarê në më hwyr kumê. Kot amnhî xã htÿx kamã hamak o hkrî htã arî hwyr më mrar xwÿnhjê mã Tirtüm kapêr jarênh rãhã ho hkrî hã amnhî jarê. Në kãm Jejus kot amnhî nhîpêx kôt pix mã amnhî nhîpêx o pa hprãm ã amnhî jarê. Në kãm Jejus jamaxpêr kôt pix mã hamaxpêr prãm ã amnhî jarê. Æ na pre Pawre kagãja kamã më kãm amnhî jarênh anê. Në më kãm:

¹ Pa Piripos kamã Jejus Kris kôt ixkwÿjaja. Xã më amex na ka më apa? E ixpê Pawre na pa më amã kagãja nhîpêx në kamã më amã amnhî jarê në më awÿr kumê. Nhÿm Ximotre haxwÿja kãm ja mex në. Wa ixpê Jejus mã tanhmã amnhî nhîpêx to ho wa ixpa xwÿnh jakamã na pa wa mã awÿr hipêx në kumê. Më ate Tirtüm kapêr o më ajahkre xwÿnhjê hwyr në më kãm më ate tanhmã amnhî to xwÿnhjê hwyr në më ate më mar o akri xwÿnhjê hwyr. Më apê Kris kôt wa ixtõ në wa ixtõxjê ho ixpimrãatã mã awÿr hipêx në kumê.

² E kê Mëpanhîpêxã maati Tirtüm më Pahihti Jejus Kris wa mëmoj to më akutã nojarêt rãhã në ka më axãmnhix ri ajamakêtkati në ri apa ho apa.

Pawre kot Piripos nhõ xwÿnhjê ho Tirtüm wÿr ã harênh

Epes 1.15-19; Korosê 1.9-12

³ Na pa hte xatã më amã ijamaxpêr o ixkrî në më panhõ Tirtüm kot tanhmã më ato mex toja pa kãm ijamaxpêr në ixkînê në ixkrî.

⁴ Në Tirtüm mã më ajarênh në më ato kuwÿ. Ixkînê kãm më ato kuwÿ.

⁵ Wam ixte më awÿr inhmõrta ã na pa pre më amã Jejus kot më panê tanhmã amnhî nhîpêx to hã harênh o ri më akôt ixpa. Ka prem inhma në hkôt amnhî xunhwÿr tÿx në hkôt amnhî nhîpêx o ri apa. Jakamã inhmä axpên kaxyw ri kãxpore hkwy nhõr o apa. Te ham më ate ixwÿr mênhta pyrãk pa pre më akukwak ri amnhîm ho ixujaprõr o ri ixpa pê nhãm ri më kãm Jejus jarênh o ri më hkôt ixpa. Na pa hte arî jam ijamaxpêr rãhã ho

ixkînê në ixkrî. Në Tirtüm mã më ate ixto mex ã kãm më ajarênh o ixkrî.

⁶ Në na pa pre ma mã awÿr mõ në më amã Jejus jarê ka prem inhma në hkôt amnhî xunhwÿ nhÿm Tirtüm ja hã më apumunh mex në. Hãmri në më ate hkôt amnhî to htÿx kaxyw tanhmã më ato më axihtÿx to. Tã koja arî më ato më axihtÿx rãhã nhÿm Jejus Kris nhÿrmã akupÿn më pahwÿr wÿr. Koja ã më ato mex anê.

⁷ Na hte tanhmã ixto mex tota pyrã në tanhmã më ato mex to ho pa në më akutã nojarêt rãhã ho pa.

Në kormã më kot ijaxàr kêt ri pa pre ma mã piitã më kãm Jejus jarênh o ri ixpa. Në ãm hãmri më kãm harê. Më kot mar në hkôt amnhî xunhwÿr tÿx kaxyw pa pre më hkôt harênh rãhã ho ri ixpa. Ka prem ja kaxyw inhmä kãxpore hkwy gõ pa pre ho amnhîm ixujaprõr pê më hkôt ri më kãm harênh o ri ixpa. Tã nhÿm prem jar Rôm kamã ijaxã pa arî ixkrî htã ka më axte ixwÿr hkwy më. Jakamã na pa hte më amã ijamaxpêr rãhã ho ixkrî në inhmä më akînê tÿx në.

⁸ Te Jejus Kris kãm më ajapê htÿx pyrãk. Tirtüm kot ja hã ixpumunh mex.

⁹⁻¹⁰ Na pa hte më ato kuwÿ në kãm:

– Pa Tirtüm. E Piripos nhõ xwÿnhjê pumu. Na më ra kãm axpên kînê o axpên kôt pa. Kwa tanhmã më hipêx to kê më arî kãm axpên kînê tÿx pix në. Jao axpên to mex rãhã ho pa. Në tanhmã më hkrã hto kê më amnhî krãm akapêr jaxàr tÿx në. Jao tãm amnhî nhîpêx mex në hamaxpêr mex o ri pa. Nom kormã më kot ja pumunh tohtuj anhÿr. Tã kêr ka tanhmã më ho kê më ã amnhî nhîpêx anhÿr rãhã Jejus Kris akupÿn më ixwÿr wÿr.

Anhÿr pa hte më ato hwÿr o ixpa.

¹¹ Nã koja Jejus Kris më akaxwÿnh kãm më ato më axihtÿx ka më ÿ hã axihtÿx pê tãm ri amnhî nhîpêx në tãm axpên nhîpêx o ri axpên kôt apa. Nhÿm më piitã ja hã më apumu në axpên mã Tirtüm mex o mex ã harê.

Pawre kãm Kris kôt amnhî nhîpêx prãm ã harênh

Atre 28.30-31; Epes 6.19-20; Sikün Xi-motre 2.9

¹² E Kris kôt ixtõ në ixtõxjaja. Kot paj më amã tanhmã amnhî jarênh to ka më inhma. Na prem ra Jejus ã ixtomnuj tÿx në hã ijaxã pa amnhî xã htÿx kamã ijamak o ixkrî. Nom më kot ã inhîpêx anhÿr tã pa hte arî ixkrî xã kamã më kãm Jejus jarênh o ixkrî. Jakamã na më ra ohtõ në tanhmã kot më panê amnhî nhîpêx to hã harênh ma.

¹³ Põristi kot inhîhkõ hã ixtãnopxar xwÿnhjê më ixwÿr më mrar xwÿnh piitã ixte Kris kapêr jahkre ho ixpa pix ã më kot ijaxàr ã jarênh ma.

¹⁴ Nê jar Kris kôt mê pahô nê mê pahôxjaja haxwýja ijarênh ma nê ohtô nê ixpyrà nê Kris nhý há amnhî to htýx nê arî hkwyjê mâ kapêr jarênh rãhã ho pa. Ixpyrà nê kãm mê uma hkêt nê mê kutã amnhî to htýx pê mê kãm harênh rãhã ho pa.

¹⁵⁻¹⁸ Nê na pre mê hkwyjaja ixte mê amã Kris jarênh o ixpa há ijarênh ma nê há ixkamã gryk nê axtem hamaxpêr nê ixwakre kamã gryk kãm mê kãm Kris kapêr jarênh o pa. Na htem hamaxpêr o:

—E kot paj ma Pawre kot ra mê hwýr môr xwýnhjê hwýr mô nê kot ra mê kãm Jejus kapêr jarênh nhîpy xte mê kãm harênh o ri mê hkôt ixpa. Hãmri nhùm mê inhma nê inhgryk ã Pawre kaga. Hãmri nhùm mê hagjênh xã kamã arî hkrî tá tee ri mê há ijarênh ma nê hkaprî nê rî amnhî pumu. Nã kot paj anê.

Anhýr o hamaxpêr tá pa mê harênh ma nê ixkaprî hkêt nê. Mê kot mê amã hprî há Kris kapêr jarênh kênã kot pa kêt tee ri mê harênh ma nê ixkaprî. Kwãr mê mãmri ri ixkamã gryk kãm kapêr jarênh o ri pa. Pa mê harênh ma nê ixkînh nê. Nom na hte mê hkwyjaja jajê rom kãm ixkînh kãm mê kãm Kris kapêr jarênh o pa. Nê tãm hamaxpêr pê mê kãm harênh o pa. Ra mê kot ixpumunh mex jakamã nhùm Tirtùm kot jar mê hwýr inhmeñh nhùm ixte ãm hãmri mê kãm kapêr mex jarênh o ri ixkrî há ixpumunh mex. Jakamã kwãr mê mãmri tanhmã inhã hamaxpêr to xã hkôt mê ujarênh mexja jarênh o pa. Mê kãm ixkînh kãm harê rý ixkamã gryk kãm ri harênh o pa. ãm hãmri Kris kapêr jarênh o pa jakamã pa mê harênh ma nê ixkînh nê.

¹⁹ Nê ra mê ate ixto Tirtùm wýr o apa jakamã koja Karôja ixkaxyw tanhmã jar Rôm kamã pahîhti nhîpêx to nhùm tokyx ixkator japêr. Pa ixãmnhix ijamakêtkati nê ri ma mê akôt ixpa.

²⁰ Nom inhã Jejus kãm hprãm xã hkôt pix mã tanhmã amnhî nhîpêx to ho ixpa hprãm. Jakamã koja mê ixkator pa ixkînh nê arî kãm tanhmã amnhî nhîpêx to ho ri ixpa. Nom koja mê tanhmã hamaxpêr to nê ixpî pa mê kutã mê kãm amnhî to htýx nê ixãm rãhã nhùm mê ixpî pa ijamakêtkati nê ty. Kê mê ja há ixpumu nê ixtã Kris mex o mex ã harê. ãm Jejus kãm hprãm xã hkôt pix mã na inhã amnhî nhîpêx prãm.

²¹ Tá kot paj tanhmã amnhî to nê arî ixtîr japêr há kot paj ãm kôt pix mã amnhî nhîpêx rãhã ho ixpa. Nom koja mê tanhmã hamaxpêr to nê há ixpî pa ty nhùm Tirtùm ma kaxkwa hwýr ixkarô ho ãpir kurê kumrêx. Pa Tirtùm mê Krata wa kuri inhmex o inhmex nê wa kuri ixpa ho ixpa.

²²⁻²³ Tá nhý na we inhã mex o hõ jakrenh wehe? Na pa tee ri amnhî kukamã

ijamaxpêr. Inhmã tokyx ixtyk nê Kris kuri ixpa hprãm. Ja na inhã hprãm o inhã hprãm. Nom ko. Kot pa arî ixtîr nê arî mê kãm Jejus kot tanhmã mê panê amnhî nhîpêx to há harênh rãhã ho ri ixpa. Ko. Ja mãñêñ inhã mex.

²⁴ No mê amã na arî ixtîr nê ixpaja mê amã hprãm

²⁵ jakamã kot paj pêr tokyx ixtyk kêt nê. Kot paj arî ri mê amã Kris kôt mê ato mê axihtýx o ri mê akôt ixpa. Jao ãm ho hkrãñre ka mê ra amnhî kaxyw kãm ajamaxpêr nê hkôt amnhî xunhwýr týx nê. Jao akînh nê apa.

²⁶ Tá kot paj nhýrmã akupým ixtîr rãhã mê awýr mô ka mê ixpumu nê akînh nê. Jejus Kris kot akupým ixkator ã akînh nê. Hãmri nê ixtã Jejus mã mex o mex ã harê.

Mê pahte Jejus ã pahpunuj tá mê pahte amnhî to htýx ã mê pamã karô

Rukre 6.22; Sikûn Korî 2.14-16; Xiakre 1.12; Jutre 3

²⁷ Jakamã e kêr ka mê Jejus Kris kapêr kôt pix mã amnhî nhîpêx. Nê axpên kôt axpên to axihtýx pê mê kãm Jejus kot tanhmã mê panê amnhî nhîpêx to há harênh o ri apa kê mê ama nê mê pahpyrà nê hkôt amnhî xunhwý. E kêr ka mê ã amnhî nhîpêx anhýr o ri apa. Kêr pa nhýrmã mê hagjênh xãja rûm ixkator japêr nê nhýri ja há mê ajarênh ma rý ma mê anhô krî hwýr mô nê ja há mê apumu nê ixkînh nê.

²⁸ Nom kwa kêr ka mê amã mê kot Kris ã tanhmã mê ato xwýnhjê puma hkêt nê. Mê kot tanhmã mê anhîpêx kati hto htã kêr ka mê kutã amnhî to htýx nê mê hkôt apa. Kêr kê mê amnhî tá mê apumu nê tee ri hamaxpêr hãmri nê axpên mã:

—Kwa mê pahte Kris ã tanhmã mê hipêx to htã na htem amnhî to htýx nê arî mê pamã harênh o ri pa. Pêr mê kãm mê pahpuma hkêt. Mãn hte Tirtùm tanhmã mê ho nhùm mê ý há kãm mê pahpuma hkêt nã? Kwa tanhmã kot puj mê ho nhùm mê Jejus kapêr jarênh o pata kaga? Nã kot puj mê ãm tee ri há tanhmã mê ho kaprý. Mãn ãm hãmri na htem nhýrmã Tirtùm kuri htîr tùm nê pa ho pa há amnhî jarênh o pa nã? Anê.

Koja mê ã mê ajarênh anê. Tirtùm kot mê ato mê axihtýx ã mê apumunh kôt.

²⁹ Na pre tanhmã mê ato ka mê Kris kôt amnhî xunhwý. Tá mê kot tanhmã há mê anhîpêx to htã na hte Tirtùm mê kutã tanhmã mê ato ka mê ý há amnhî to htýx nê apa.

³⁰ Ijaxwýja na pa hte amnhî xã htýx kamã ijamak o ixkrî. Na pre htem Jejus ã ixtomnuj o pa ka prem ja há ijarênh ma nê há ixpumu. Tá ota kê mê ra axte tanhmã há inhîpêx to. Pa kê amnhî xã htýx kãm ijamak o ixkrî ka mê ijarênh ma. Tá xep mê ixpyrà nê

Kris ā amnhī xà ht̄yx kamā ajamak o apa. Nom kwa kēr ka mē tee ri amnhī kukamā ajamaxpēr o akapri nē apa hkēt nē.

2

Jejus kām mē pajapē xaj tanhmā kot amnhī nhīpēx to hā harēnh

Rōmān 15.5-6; Epes 4.1-6; Piripos 2.18

¹ Nē ra mē pahte Jesus kōt amnhī xunhw̄yr jakamā pu mē tee ri amnhī kukamā pajamaxpēr o pahkapri nē ri papa hkēt nē. Ām kām mē pajapēja mā pajamaxpēr rāhā ho pahkīnh nē pajamakēt kati nē ri papa. Nhūm Karō mē pahkarō mā agjē nē mē pahto mex nē mēmoj to mē pakutā nojarēt o ri mē pakamā pa.

² Tā kēr ka mē axpēn mar mex nē mēmoj tā axpēn mā axākjēr o ri apa hkēt nē. Te ri ixkre pixi kamā mē atipxi nē axpēn kōt amnhī nhīpēx pyrāk. Nē Tirtūm kām hprām xà hkōt pix mā ajamaxpēr o ri apa. Nē mē amā axpēn kīnh o ri apa. Kot kaj mē ā amnhī nhīpēx anē pa ja hā mē apumu r̄y hā mē ajarēnh ma nē ixkīnh t̄yx kumrēx.

³ Nē kwa kēr ka mē axpēn pumu nē ā ajamaxpēr anh̄yr kēt nē. Mē ajamaxpēr o:

–Tk. Kot pa ri tanhmā jahti ho ajuta hto ho ixpa hkēt nē. Ixte amnhī to rax o hakrenh kēnā kot pa hkēt ri ho ajuta. Kē tām mān tanhmā ixto ajuta hto.

Anh̄yr o ajamaxpēr kēt nē. Kēt nh̄yri mēhō pumu nhūm tanhmā kute ka hā omu nē ajamaxpēr o:

–Hēxta waa nē. Kwa tanhmā kot pa we ho ajuta htoo?

Anh̄yr o ajamaxpēr hāmri nē ajamaxpēr xà hkōt tanhmā ho ajuta hto.

⁴ Jao Jesus pyrā nē mēmoj to axpēn kutā anojarēt o ri apa. No ri amnhī pix kukamā ajamaxpēr o apa hkēt nē.

⁵ Kēr pu mē te Jesus tanhmā hamaxpēr toja pyrāk o pajamaxpēr o ri papa.

⁶ Kēp Tirtūm Kra kumrēx jakamā te urāk tā xà na pre ja hā amnhī pumu nē amnhī pix kukamā ā hamaxpēr anē nē hamaxpēr o:

Te ixte Tirtūm pyrāk jakamā mēmoj piitā inhō na. Jakamā kot paj ja kaxkwa kamā inhmēx nē ixkīnh nē ixpa ho ixpa nē aa rer nē nh̄yh̄m inhmōr kēt kumrēx. Anh̄yr o na pre hamaxpēr? Nā na pre ā hamaxpēr anh̄yr kēt nē.

⁷⁻⁸ Kām mē pajapē xaj na pre kaxkwa kamā mēmoj mex piitā rer pa nē man mē pahw̄yr wr̄y nē mē pahpyrā nē ī ho katorxā nhōhy rūm kato.

Kēp mē panhō Pahihti htā te kēp mē panhīō nē te kot amnhī to grire pyrāk o amnhī nhīpēx o ri pa.

Nē Tirtūm kām hprām xà hkōt pix mā amnhī nhīpēx o pa.

Nē ām kōt pix mā amnhī nhīpēx o pa rāhā nhūm prem kupi nhūm arī mē kām xa nē tanhmā amnhī tā mēhō hto hkēt nē.

Na prem hipēx kati nē. Te kēp mē kot amnhī tomnuj t̄yx xw̄ynh̄jē nhīpēx pyrāk o hipēx nē pī kahpa hā kunhō nē kupi.

Tā no nhūm mē kēp tanhmā amnhimnuj to hkēt nē arī mē kām xa. Mē panē na pre ā amnhī nhīpēx anē.

⁹ Hāmri nhūm Tirtūm ā kot amnhī nhīpēx anh̄yr ā omu nē akup̄ym ho ht̄ir nē akup̄ym amnhī w̄yr ho api.

Nē mex o mex ā harē.

Nē kot nh̄ymā mē pahpiitā mē pahto amnhīptār kaxyw mē pakaxyw ām.

¹⁰ Jakamā kot puj mē nh̄ymā pahpiitā Jesus kutā pahkōnkrā ho rōrōk nē pahkrī hpa nē kax pēē kām mex o mex ā harē.

Mē pahpiitā. Kaxkwa kamā mē pa xw̄ynh̄jaja nē pika piitā hkōt mē papa xw̄ynh̄jaja.

Nē mē htyk xw̄ynh̄ piitā koja mē akup̄yn ht̄ir pu mē pahpimrāatā Jesus kutā pahkōnkrā ho parōrōk nē pahkrī hpa nē kām mex o mex ā harē.

¹¹ Nē kām:

Pa Pahihti Jesus. Nā ām hāmri na apē mē inhō Pahi Maati hā apyxi mex na ka.

Jakamā mē ixtō kot paj mēmoj tā tanhmā amā karō hto? Nā kot paj mē ixtō ā amnhī nhīpēx anh̄yr kēt nē. Anē.

Kot puj mē nh̄ymā ā Jesus mā pakapēr anē. Jao māānēn Tirtūm hih̄tyx o hih̄tyx nē āhpumunh o āhpumunh ā omu. Nē mex o mex ā omu.

Te mē pahpē kanhēti pyrāk ā mē pajarēnh Matēwre 5.14-16

¹²⁻¹³ Tā kwa ixkrāmnhw̄yjaja. Inhmā mē akīnh. Kwa kēr ka mē arī Tirtūm kōt amnhī nhīpēx mex rāhā nē. Te ixte mē akamā ixpare ri mē ate amnhī nhīpēx mexta pyrāk o ixwakre kamā amnhī nhīpēx mex o ri apa. Na pre ra Tirtūm mē panē mē pahte amnhī tomnuj rē nē tanhmā mē pahto pu mē ŷ hā kapēr kōt amnhī nhīpēx o ri papa. Jakamā kwa kēr pu mē axte tanhmā amnhī tomnuj to ho papa hkēt nē. Nē mē pahte Tirtūm kapēr kw̄ym ri amnhī nhīpēx pymaj ām hkōt pix mā amnhī nhīpēx o ri papa.

¹⁴ Nē kēr ka mē mēmoj to anh̄yr kaxyw nē agryk kām tanhmā ri ho hkēt nē. Nē mēmoj tā axāpēnh kaxyw nē ri hā axpēn mā akapēr kati kamā ho anh̄yr kēt nē.

¹⁵⁻¹⁶ Mē kot amnhī tomnuj xw̄ynh̄jaja na htem ā amnhī nhīpēx anh̄yr o pa. No kēt mē kajaja. Mē ate mē hkōt apa htā kēr ka mē hkōt amnhī nhīpēx kēt nē. Mē kurom mē apē Tirtūm kra jakamā kēr ka mē hkōt pix mā amnhī nhīpēx o ri apa. Nē tanhmā amnhī tomnuj to r̄y tanhmā ajamaxpēr

punuj to hkêt nê. Mê kot amnhî tomnuj xwýnhjaja te ri kamát kô kamâ ri mê kêp àhkính o ri mê pa xwýnhjê kot amnhî nhîpêx pyrâk. Tã kot kaj mê hkôt tãm ri amnhî nhîpêx o apa nê te ate kanhêtija kamát kô kamâ hirã ho harir pyrâk o amnhî nhîpêx. Jao mê kãm Tirtûm kapêr jarênh o ri mê hkôt apa. Mê kot amar nê apyrã nê nhýrmã kuri htûr tûm nê pa ho pa kaxyw. Kot kaj mê ã amnhî nhîpêx anê nhûm nhýrmã Jejus Kris akupÿn mê pahwÿr wrÿk ã arîgrota ã pa mê apumun nê ixkính nê. Nê ixkính kãm Jejus mã mê ajarê nê kãm mê ajarênh o:

–Kwa Pahihti. E jajê pumu. Na pa pre mê kãm akapêr jarênh o ri mê hkôt ixpa nhûm mê inhmar tÿx nê nê akapêr kôt amnhî nhîpêx o ri pa. Jakamã na pa pre mê kãm akapêr jarênh kaprÿ hkêt nê.

Anhÿr o kãm mê ajarê.

¹⁷ Na pa pre mê akôt mê amã Tirtûm kapêr jarênh o ri ixpa ka prem inhma nê hkôt amnhî xunhwÿ. Jakamã te ixte Tirtûm mã mê ato ixkính xã nê kãm mê anhör pyrâk.

Nê koja jar Rôm nhö pahihtija tanhmã ixto hkêt japêr. Rÿ tanhmã ixto. Nom kwãr mê mãmri tanhmã kãm ixto hprãm xã hkôt tanhmã ixto rÿ ixpî. Koja mê ã ixte mê anhîpêx anhÿr ã ixpî pa ixkính nê. Nê tanhmã ijamaxpêr to hkêt kãm ty. Jakamã na pa ra ã mê kot inhîpêx anhÿrja kukamã mê amã amnhî kính ã amnhî jarê ka mê inhma.

¹⁸ Tã kêr ka mê ixpyrã nê ajaxwÿja ixtã akính nê apa.

Ximotre mê Eparoxit wa harênh

¹⁹ Nê koja Pahihti Jejus kãm ja prãm hã kot paj ma mê awÿr Ximotre mê nhûm ma mê awÿr mô nê ri mê akôt pa nê tanhmã mê ate amnhî nhîpêx to hã mê apumu. Hãmri nê man akupÿn ixwÿr mô nê inhmã mê ajarê pa mê ajarênh ma nê ixkính nê tee ri mê akukamã ijamaxpêr o ixkrî hkêt nê. ãm tãm mê akukamã ijamaxpêr o ixkrî.

²⁰ Ximotre tapxipix na ixpyrã nê kãm mê akính nê kãm mê ato ajuta hprãm. Na hte mê ajarênh rãhã ho pa.

²¹ Nom jar mê piitã Ximotre kínhã amnhî mex pix kukamã hamaxpêr o pa nê kãm Jejus Kris kôt tanhmã amnhî nhîpêx to ho pa hprãm kêt nê.

²² Ximotre te kêp ixkra pyrâk. Na hte ixkôt pa nê ixpyrã nê Jejus mã tanhmã amnhî nhîpêx mex to ho pa. Pa pre wa ijamê mê kãm mê ujarênh mex jarênh o wa ri mê hkôt ixpa.

²³ Tã koja mê tanhmã ixtã axpên mar to. Apu mê kot ixpîr ã amnhî jarê rÿ ixkator ã amnhî jarê. Pa tanhmã amnhî tã mê mar to nê ri kormã ma mê awÿr Ximotre mê kê ma mê awÿr mô nê mê amã tanhmã ijarênh to.

²⁴ Nê koja Pahihti Jejus kãm ja mex pa ijaxwÿja ma mê awÿr mô pu mê axte axpên pumu.

²⁵ Nê kot paj tokyx ma akupÿm mê awÿr Kris kôt mê pahtô Eparoxit mê. Na ka prem kãm kãxpore gô nhûm man ixwÿr o mô nê inhmã kugô. Hãmri nê jar inhmã àpênh rax nê ixpyrã nê mê ujarênh mexja jarênh o pa.

²⁶⁻²⁷ Tã ra à htÿx nê. Kironhÿx pre mê pahpê ty. Tã nhûm Tirtûm omu nê kamã ukapri nê. Nê mãânên pa ixkamã ukapri nê. Nê tee ri ixte à htÿx ã omunh nê ixkapri htÿx pymaj akupÿm inhmã ho mex nhûm ra akupÿm mex nê ri pa. Hãmri nê kãm mê apumunh prãm nê. Mê ate à htÿx ã harênh mar nê akapri hã mê ajarênh ma nê tee ri mê akukamã hamaxpêr.

²⁸ Jakamã inhmã akupÿm tokyx mê awÿr mênh prãm. Tã koja mêmo arîgro hã mê awÿr pôj ka mê omu nê akính nê tãm ajamaxpêr. Pa ijaxwÿja jar ixkính nê tãm ijamaxpêr.

²⁹⁻³⁰ Na ka prem ixwÿr amê nhûm man ixwÿr mô nê jar ixri mê kãm Kris kapêr jarênh o ri mê hkôt pa rãhã nhÿx hã ty nom kot amnhî kamã kahak kêt. Jakamã kê akupÿm mê awÿr pôj ka mê omu nê akính nê. Nê kahti hkôt amÿ nê ho mex nê. Kêp Kris kôt mê pahtô mex kênã. ã na htem Kris mã mê kot tanhmã amnhî nhîpêx to ho mê pa xwýnhjê nhîpêx mex anhÿr o pa.

3

*Mêmoj tã mê pahpumunh kôt Tirtûm kot tãm mê paxunhwÿr ã harênh
Piripos 2.18, 4.4*

¹ E Kris kôt ixtô nê ixtôxjaja. Kris kêp mê panhõ Pahihti jakamã kwa mê jam ajamaxpêr nê akính rãhã ho ri apa.

Na pa ra mê amã mêmoj jarênh rax nê. Nê hã kagã rax tã kormã inhmã ja ho anhÿr kaga hkêt nê. Kot paj axte mê amã hkwy hã kagã. Mê ate hã ano htÿx nê ho apa kaxyw.

² Jakamã e kwa mê okora. Kêr ka mê amnhî nê mê kot Tirtûm kapêr o hêx xwýnhjê pumunh mex o ri apa. Na htem tanhmã mê amã kapêr ho pa nê mê amã:

–Kot kaj mê ixpê Ijaewjê pyrã nê amnhî my kwrytã kã jakã hãmri nê apê Tirtûm kra. Anê.

³ Nom ja kot anhÿr kêt. Mê pahte amnhî jakãr kôt mê pahpê Tirtûm kra hkêt. ã kot anhÿr ronhÿx pu mê amnhî krã hkôt tanhmã amnhî nhîpêx to ho pahpê hkra. Nom ja kot anhÿr kêt. Mê ate amnhî jakãr kêt tã mê ixpyrã nê amnhî kaxyw Jejus Kris mã ajamaxpêr jakamã mê ixpyrã nê mê apê Tirtûm kra na ka mê. Na ka htem mê ixpyrã nê Karô nhÿ hã kãm mex o mex ã harênh o ri apa nê mê ixpyrã nê Jejus kukwak ri akính nê ri apa. Nom na pu htem pahpê hkra kaxyw amnhî jakãr kêt nê.

⁴ Kop am amnhī krā hkōt mē pahte amnhī to Tirtūm kra ronh̄ȳx pa ra amnepēm amnhī to hkra nē ri ixpa. Na pa pre ixpē hkra hprām xāj amnhī krā hkōt tanhmā ri amnhī nhīpēx to rax o ixpa nom ā amnhī nhīpēx anh̄ȳr kapr̄y. E pa ja hā mē amā amnhī jarē ka mē ijarēnh ma.

⁵ Na pa pre ixkato nē kormā ixtā semān pixire nhūm mē ixpē Ijaew ā inhmy kwr̄yt kā krāhta. Nom pa ā mē kot inhīpēx anh̄ȳr kōt ixpē Tirtūm kra hkēt nē. Nē inhīpēxā hkōt ixpē finat Pējamī kanrēhā htāmnhw̄y jakamā ixpē Ijaew mex na pa. Nē Ijaew kapēr o ixkapēr o ri ixpa. Nom ja kōt ixpē Tirtūm kra hkēt. Nē määnēn ixpē Parijew nhō xw̄ynh jakamā na pa pre Tirtūm kot finat Mojes mā mē pakaxyw mēmoj tā karō kōt pix mā amnhī nhīpēx o ixpa hprām.

⁶ Jao tee ri mē kot Jejus kōt amnhī nhīpēx xw̄ynh̄jē pumu nē mē homnuj t̄yx o ri ixpa. Na pa pre ijamaxpēr o: “Nā m̄ijaja na htem mē ixkw̄yem ri amnhī nhīpēx o pa.” Anē nē mē hipēx kati ho ri ixpa. Nē ijamaxpēr o: “Ra ixte finat Mojes kot Tirtūm nh̄y hā kapēr piitā hkōt amnhī nhīpēx mex jakamā na pa hte tanhmā ri amnhī tomnuj to ho ri ixpa hkēt nē.” Anē.

⁷ ā na pa pre ixpē Tirtūm kra hprām xāj amnhī nhīpēx anh̄ȳr o ixpa. Tā nom am ā amnhī nhīpēx anh̄ȳr hkapr̄y. Na htem ā ri amnhī nhīpēx anh̄ȳr kōt kēp Tirtūm kra hkēt nē. Tā pa hpānhā amnhī kaxyw Kris kōt ijamaxpēr nhūm ixto hkra kurē kumrēx.

⁸ Ra ixte Jejus Kris kōt amnhī xām jakamā Jejus kēp inhō Pahihtī pa inhmā kapēr kōt pix mā amnhī nhīpēx o ri prām. No hkrax rūm ixte amnhī nhīpēx t̄umja na pa ra Jejus gryk ā hkaga hpa. Te ixte mēmoj punuj pyr nē amnhī katut kōt mēnh nē axte kām ijamaxpēr kēt pyrāk. Jao amnhī kaxyw Jejus kōt pix mā ijamaxpēr o ri ixpa.

⁹ Nom kormā ā ijamaxpēr anh̄ȳr kēt ri na pa pre ixt̄yx ri ijamaxpēr o:

—Nā ixte Mojes kot Tirtūm nh̄y hā kapēr kōt amnhī nhīpēx o ixpa jakamā koja Tirtūm ja hā ixpumu nē ixto hkra.

Anh̄ȳr tā nom ja kot anh̄ȳr kēt. Na htem amnhī krā hkōt tanhmā ri amnhī nhīpēx to ho pa nhūm Tirtūm am ja hā mē omu nē am hā mē omu nē mē ho hkra hkēt nē. Nom koja mē Kris kōt amnhī xunhw̄y nhūm ja hā mē omu nē mē ho hkra kurē kumrēx. Jakamā ixte Kris kōt amnhī xām ā ixpumunh kōt pix mā na pre ixto hkra nē inhmēx ā ijarē.

¹⁰ Hāmri pa ra inhmā Kris kōt pix mā amnhī nhīpēx o ri ixpa hprām. Na pre ty tā akup̄ym h̄tir nē hiht̄yx nē āhpumunh t̄yx o tanhmā amnhī nhīpēx to ho pa. Tā ijaxw̄yja inhmā urān ā amnhī nhīpēx anh̄ȳr prām. Nē inhmā urāk nē amnhī xā ht̄yx kutā amnhī to ht̄yx nē ixpa hprām. Mē kot hā ixp̄ir mā tā pa urāk nē Tirtūm kapēr kaga hkēt nē am kōt

pix mā amnhī nhīpēx o ri ixpa rāhā urāk nē hā ty. Ja na inhmā ho anh̄ȳr prām.

¹¹ Kē Tirtūm kot hipēxta pyrā nē akup̄ym ixto ixt̄ir pa wa kuri ixt̄ir tūm nē ixpa ho ixpa.

¹² Inhām Kris kōt pix mā amnhī nhīpēx o ixpa hprām t̄yx kumrēx. Kormā ixte hkōt amnhī nhīpēx o inhmōr nē kormā hatur xām mēnh kēt tā inhmā tokyx hatur xām mēnh prām. Na pa ā inhmā amnhī nhīpēx anh̄ȳr prām t̄yx kumrēx.

Nē na pa hte ixte amnhī tomnuj kēt ā amnhī to jarkrar o ri ixpa hkēt nē. Na pa hte arī tōhā tanhmā amnhī tomnuj to nom inhmā ā amnhī nhīpēx anh̄ȳr prām kēt. Nē na pa kormā ixprī hā Kris kot amnhī nhīpēx mar o inhmōr nē hatur xām mēnh kēt tā inhmā hkōt amnhī nhīpēx o inhmōr nē tokyx hatur xām mēnh prām. Ja kaxyw na pre Jejus Kris amnhī kaxyw ixta.

¹³ Na pa hte mē akurom papxipix ixte Jejus kām hprām xā hkōt amnhī nhīpēx o ixpa hā amnhī to jarkrar kēt nē. Nom ra ixte tanhmā amnhī tomnuj to ho ixpata pa axte kām ijamaxpēr kēt nē. Te amnhī katut kōt ixte rēnh par pyrāk o hipēx nē axte kām ijamaxpēr kēt nē. Nē Jejus kām hprām xā hkōt pix mā amnhī nhīpēx prām xāj amnhī kaxyw kām ijamaxpēr o ri ixpa.

¹⁴ Koja nh̄yrmā Tirtūm ixpē Kris kw̄y hā amnhī w̄yr ixw̄y nē inhmā:

—E amnē ixw̄yr api Pawre. Kot kaj jarāhā amnē mē ixw̄yr api.

Anh̄ȳr o nh̄yrmā inhmā kapēr jakamā na pa hte amnhī tā am pix jamār rāhā ho ixpa. Pē ra Jejus kot amnhī nhīpēx piitā omunh par o mō. Nā kot paj gaa nē hkōt pix mā amnhī nhīpēx mex o ri ixpa.

¹⁵ Kwa kēr pu mē pahpiitā ā pajamaxpēr anē. Jao amnhī w̄yr hamār pē hkōt pix mā amnhī nhīpēx o ri papa. Mē pahpiitā mē pahpē Kris kw̄y kēnā. Nom kot ka mē atō ja kaxyw tee ri amnhī kukamā ajamaxpēr nē ajamaxpēr o:

—Nā tanhmā kot paj we amnhī to nē Jejus kōt amnhī nhīpēx mex rāhā o ri ixpa? Ja kaxyw ixāhpumunh t̄yxre hā. Anē.

Hāmri nē ā ajamaxpēr anh̄ȳr o apaja apē hiht̄yx japēr. Hā koja Tirtūm hprī hā tanhmā amā ja kukamā harēnh to nē kaxyw ato axiht̄yx ka ixpyrā nē hkōt pix mā ri amnhī nhīpēx o apa.

¹⁶ Jakamā kēr pu mē am Tirtūm kām hprām xā hkōt pix mā tanhmā kām amnhī nhīpēx to ho papa. Ra mē pahte hkōt amnhī nhīpēx o papa xāja kōt pix mā arī amnhī nhīpēx rāhā ho papa.

¹⁷ E Kris kōt ixtō nē ixtōxjaja. Na pa ra mē anoo mā Jejus kōt tām ri amnhī nhīpēx o ri ixpa. Tā kēr ka mē ja hā ixpumu nē ixpyrā nē hkōt amnhī nhīpēx o ri apa. Hāmri nē nh̄yri mē kot ixpyrā nē ā amnhī nhīpēx

anhÿr xwÿnhjê hõ pumu nê uràk nê ã amnhì nhìpêx anê.

¹⁸⁻¹⁹ Jejus kot mē pamā mē pahte amnhì tomnuj mÿrapê pī kahpa hā mē panē htykja nhūm nê ra ohtō nē hprī hā mar tā hkōt amnhì xunhwÿr kêt nē. Mē kām ã kot amnhì nhìpêx anhÿrja ã mar prām nōkati. Jakamā te mē kām Jejus kurê xwÿnh pyrāk. Na htem hā hpjiaam kêt kām tanhmā ri amnhì tomnuj to ho pa. Nē kām amnhì mex pix prām. Nē tanhmā amnhì tomnuj to nē ja hā amnhì pumu nē hkīnh nē. Nom tee ri ja hā amnhì pumu nē hkaprī nē ri pa hkēt nē. Tā ã mē kot amnhì nhìpêx anhÿr jakamā koja mē nhÿrmā ma mē kot amnhì xā htÿx kamā hamak o pa tūm xāta wÿr hapêx. Nā koja mē ã amnhì nhìpêx anê. Ra ixte mē amā ja hā mē harēnh rax tā pa axte mē amā mē harē. Inhmā mē hkaprī hkōt na pa hte xatā mē amā ja hā mē harē.

²⁰ Kêt mē papajaja mē kurom mē pahpê kaxkwa nhõ xwÿnh nom kormā. Koja nhÿrmā Jejus Kris akupÿn mē pahwÿr kaxkwa rūm wrÿ. Mē papytār xwÿnh maati Pahihtija akupÿn wrÿ hāmri nē ma akupÿm amnhì kōt mē pahto api. Jakamā na pu htem arī pahkīnh pē amnhì wÿr kamā pajamak rāhā ho ri papa.

²¹ Na pu htem jar pyka ja kamā Jejus kīnhā paxirerek nē pahpunuj nē ri papa. Nom koja nhÿrmā akupÿn mē pahwÿr wrÿ hāmri nē amnhì pyrā nē mē pamā mē panhī nyw gō pu mē urāk nē paxihtÿx kām pahÿr tūm nē papa ho papa. Ā kot mē panhìpêx anhÿr kaxyw àhpumunh o àhpumunh. Tā koja àhpumunh tÿx kām mēmoj piitā ho amnhìptār pa. Pu mē pahpiitā hkōt amnhì nhìpêx mex rāhā ho ri papa.

4

*Pawre kot mēmoj tā mē kām karō
Epes 4.3; Piripos 2.2; Korosē 3.15*

¹ E Kris kōt ixtō nē ixtōxjaja. Inhmā mē ajapêê. Na pa hte mē ato ijamak o ixkrī nē mē amā ijamaxpêr nē ixkīnh nē. Nē jar mē pahkwÿjê mē mē ajarēnh o ri ixkrī. E kwa kër ka mē arī Pahihti kapêr kōt pix mā mē amnhì nhìpêx mex rāhā ho ri apa.

² Nē wa ka Ewox mē Sixika wa. Na ka xep hte wa mēmoj tā axpēn kamā agryk rāhā ho ri apa. Kwa wa ã amnhì nhìpêx anhÿrja mā anhÿre nē tām axpēn nhìpêx. Pahihti Kris kōt war ate axpēn to war atōx kēnā kot ka kêt wa axtem nē mēmoj tā axpēn kamā agryk o ri apa.

³ Nē ka Xikitre. Apê ixkrāmnhwÿ mex jakamā kër ka axpēn tā wa nita wa kām akapêr kām axihtÿx nē kē war ama nē akupÿm tām axpēn nhìpêx. Na pre wa ra Kremēn mē hkwyjê mē hpimrāatā ixpyrā nē Jejus kot tanhmā mē panē amnhì nhìpêx to

hā harēnh o ri pa. Tirtūm nhõ kagā kamā mē hixi piitā hikwÿ. Mē pahÿr tūm nē mē papa mā xwÿnhjaja ra Tirtūm nhõ kagā kamā mē panhixi jaxwÿr par.

⁴ Nē kër ka mē apê Pahihti hkwyj hā akīnh nē ri apa. Mē ate ã amnhì nhìpêx anhÿr o apaja na pa inhmā hprām tÿx jakamā kot paj axte mē amā harē. Kwa kër ka mē akīnh nē ri axpēn kōt apa.

⁵ Pahihti Jejus ra akupÿn mē pahwÿr nojarêt jakamā kër ka mē kutêp mē piitā ri mē ho mex o ri mē hkōt apa.

⁶ Nē kër ka mē tee ri amnhì kukamā ajamaxpêr o ri apa hkēt nē. Arī amnhì to Tirtūm wÿr rāhā nē. Kot ka mē mēmo arīgro hā apê amrakati japêr nē tee ri ja hā amnhì pumu nē amnhì to awÿ kē mē ama nē mē amā mēmoj gō. Rÿ mē ate mēmoj tā hwÿr xwÿnhnta tanhmā mē amā hipêx to ka mē amnhì tā omu nē kām:

—Nā ãm hāmri na ka ã inhìpêx anê nē inhmā ja gō Tirtūm. Amex o amex.

Anhÿr o kām amnhì jarê.

⁷ Kot kaj mē ã amnhì to hwÿr anhÿr o ri apa nhūm tanhmā mē akra hto ka mē mē apê Jejus Kris kwÿ hā ajamakêtkati nē axāmnhix ri apa. Hāmri nē mēmoj tā tee ri amnhì kukamā ajamaxpêr o ri akaprī nē apa hkēt nē. Ām akīnh rāhā ri apa. Tirtūm kot tanhmā mē pahto nhūm mē pajamakêtkati nē ri mē papaja mē pahte amnhì tā omunh kêt. Ām tapxipix kot ã mē panhìpêx anhÿr kukamā àhpumunh tÿx.

⁸ E Kris kōt ixtō nē ixtōxjaja. Nā ixkapêr ã kagā jatūr xā na ja. Kwa kër ka mē ixujarēnh mar tÿx nē hkōt amnhì nhìpêx o apa.

Nē kër ka mē axàpēnh mex pix kukamā ri ajamaxpêr o apa.

Nē mēmoj mex pix kukamā ri ajamaxpêr. Nē axpēn mā akapêr mex pix kukamā ri ajamaxpêr.

Nē akatār kōt akapêr xàptār pix o axpēn mā akapêr hkukamā ri ajamaxpêr o ri apa.

Nē tām ri amnhì nhìpêx hkukamā mēn ajamaxpêr o ri apa.

Nē mē piitā ri mē ho mex o apa hkukamā ajamaxpêr.

Nē mē akapêr mex pix kukamā mēn ajamaxpêr o ri apa.

E kër ka mē ã amnhì nhìpêx anhÿrja kukamā ajamaxpêr rāhā ho ri apa.

⁹ Nē mē akōt ixpare ri na pa pre Kris kōt amnhì to mex pix nē tām ixkapêr o ri ixpa. Tā kër ka mē ixpyrā nē ã amnhì nhìpêx anê. Koja Tirtūm ja hā mē apumu nē mē akōt ri pa ho pa. Kêp mē pamā mē paxāmnhix pajamakêtkati xā nhõr xwÿnh na.

*Mē kot Pawre hwÿr mēmoj mēnh nhūm kot omunh nē hkīnh ã harēnh
Sikūn Korīt 11.7-9; Piripos 1.5*

¹⁰ Nē amnepēm na ka prem xatā tanhmā ixto mex to ho ri apa. Tā axte ā inhīpēx anhūr prām nom mē apē awry nē ixa jakamā ka xep prem tee ri tanhmā ixto mex to hkukamā ajamxpēr kaprū. Tā jar mē kot ijaxār ā ijarēnh ma nē ixwūr Eparoxit mē nhūm man ixwūr mō nē inhmā kàxporeta gō. Mē amā ijpāpē hā ixwūr amē pa omu nē ixkīnh tūx nē. Nē ixkīnh kām Tīrtūm mā mē ajarē. Ām hāmri na ka prem ixwūr amē.

¹¹⁻¹² Nē na pa hte tanhmā ixkute htā arī ixkīnh nē ijamakētcati nē ri ixa. Jakamā kot pa mēmo arīgro hā ixpē amrakati nē inhmā prām japēr tā no ām tee ri amnhī kukamā ijamxpēr o ri ixkaprī hkēt nē. Arī ixkīnh rāhā ixāmnhīx ri ixa. Rū pa inhō mēmoj rax japēr nē māānēn ixkīnh nē ixāmnhīx ri ixa. Na pa pre tōhā inhō rax nē ixa. Nē tōhā inhō hkēt nē ixa. Tā arī ixkīnh rāhā nē ixa ho ixa.

¹³ Na hte Kris mēmoj piitā hkukamā ixto ixihtūx pa ŷ hā mēmoj kutā ixihtūx nē ixa. Jao mēmo arīgro hā inhmā prām tūx nē ri ixa htā ŷ hā kutā ixihtūx nē ixāmnhīx ri ixa.

¹⁴ Tā jar ixpunuj nē ixkrī ka mē ijarēnh ma nē ixwūr kàxpore hkwy rē. Ām hāmri na ka prem ixwūr arē.

¹⁵ Amnepēm na pa pre mē anhō pika pē Masetōn rūm ixkato nē mē piitā mē kām Jejus kot tanhmā mē panē amnhī nhīpēx to hā harēnh o ri ixa ka mē xatā ixwūr kàxpore hkwy rē pa ho amnhīm ixujaprōr o ri mē hkōt ixa. Mē apē Piripos kamā Kris kōt ixtō nē ixtōx pixjaja na ka prem ā inhīpēx anē. Krī hkwy kamā Kris kōt mē pahkwījaja na mē akīnhā ā inhīpēx anhūr kēt nē. Ām mē kapxīpīx na ka pre ā ixto mex anē.

¹⁶ Tesarōn kamā ixpare ri na pa pre ixpē amrakati kumrēx nē ri mē hkōt ixa ka mē xatā ixwūr kàxpore hkwy rē pa pre ho amnhīm ixujaprōr rāhā ho ri mē hkōt ixa.

¹⁷ Nom mē ate ixwūr hkwy rēnh kaxyw mē akamā ijamak o ri ixa hkēt nē. Rū ijamxpēr o:

—Ko. Koja Piripos nhō xwūnhjaja ijarēnh ma nē kām ixkaprī nē ixwūr kàxpore hkwy rēnh japēr.

Anhūr o mē akukamā ijamxpēr kēt nē. Nom ra mē ate ixwūr hkwy rēnh jakamā koja Tīrtūm ja hā mē apumu nē mē ato mex nē. Ā mē pahte xapēn kutā panojarēt anhūrja na kām hprām.

¹⁸ Tā nhūm Eparoxitja ham mē arūm kato nē man ixwūr mō nē inhmā kàxporeta gō. Kwa na ka mē inhmā ōr rax nē. Koja tokyx ixpē hapēx kēt pa kritpēm ho ixāpkur o ixkrī. Tā ot pa ho kōta nē tanhmā hkre kamā kute pumunh xā hkōt hā kagā nē mē awūr kumē. Nā mē ate ixwūr axāmnhōrta na Tīrtūm omu nē ixtā mē apumu nhūm ja

kām mex kumrēx. Te mē kot mē hkuxwaxā hpār nhūm mē kām mexta pyrāk nhūm ja kām mex nē.

¹⁹ Nā koja Tīrtūm mē apē Jejus Kris kwū hā mē amā mē ate mēmoj to presija xā nhōr rāhā ho pa. Mēmoj piitā kēp ō kēnā.

²⁰ E kēr pu mē Mēpanhīpēxā maati Tīrtūm mā mex o mex ā harēnh rāhā o papa. Ja na inhmā hprām.

²¹⁻²² Nē ot pa mē jar ixpiitā mē apē Jejus Kris kōt mē ixkwījē hwūr kagāja kamā mē ixpēr mē. Mē ixpyrā nē mē apē Tīrtūm kra hā. Pa nē Kris kōt mē pahtō nē mē pahtōxjaja. Nē Rōm nhō pahi mā mē āpēnh xwūnh kot Kris kōt amnhī xunhwūr xwūnhjaja māānēn. Ām jar mē ixpē Tīrtūm krajē piitā pa mē awūr ixpēr mē.

²³ E kē Pahīhti Jejus Kris mēmoj to mē akutā nojarēt rāhā nē. Jao mē ato mex o pa.

Tā ām ja pix. Ixpē Pawre na pa mē awūr kagāja nhīpēx nē kumē.

Korosê

Pawre kot Koros kamâ Jejus kôt hkwyjê hwÿr kagâ nê mênh

Pawre na pre kagâja nhîpêx. Jejus nhÿ hâ hkrajê jahkre o mê pa xwÿnhjê hô na pre. Tâ nhûm mê kêp Jejus kra hkêt xwÿnh kwÿjaja Jejus â unê nê haxâ nhûm arî hkrî ho hkrî. Hâmri nê krî pê Koros kamâ Jejus krajê mâ kagâ nhîpêx nê mê hwÿr kumê. Koros kamâ Jejus kwÿjê kamâ Ijaew kwÿ nê kamâ Ijaew kêt xwÿnh kwÿ nhûm Pawre mê ho hpmràatâ mê hwÿr kumê. Kormâ mê hwÿr môr nê mê omunh kêt tââ. Nê kagâja kamâ mê kot tanhmâ Jejus o hêx to ho pa xwÿnhjê jarênh to. Jejus kêp Tirtûm Kra hkêt â mê kot ho hêx xwÿnhjê jarê nê mê nê mê kâm kapêr. Mê kot mê hkôt amnhî nhîpêx kêt kaxyw mê kâm kapêr nê hâ kagâ nê mê hwÿr kumê nê mê kâm:

¹ Pa Koros kamâ Kris kôt ixkwÿjaja. Xâ mê amex na ka mê apa? Ixpê Pawre na pa mê awÿr kagâja nhîpêx nê mê awÿr kumê. Kris kôt mê pahto Ximotre mê wa kumê. Ixte Jejus Kris nhÿ hâ mê ahkre ho mê ixpa xwÿnhjê hô na pa. Tirtûm kâm hprâm xâ hkôt.

² Tâ pa mê awÿr kagâ nhîpêx nê kumê. Mê apê Kris kôt mê ixtô nê ixtôx na ka mê. Na ka xep htem Kris kapêr kôt amnhî nhîpêx mex o ri apa. E kê Tirtûm mê apê hkra hâ mê akutâ nojarêt râhâ nê. Ka mê amex nê ajamakêtkati nê axâmnhîx ri tanhmâ amnhî nhîpêx ho ri apa.

*Koros nhô xwÿnh kwÿjaja kot Jejus kôt
amnhî xunhwÿr â mê harênh*

Wam Tesarôn 1.2-5

³⁻⁴ Na pa ra Ximotre mê wa mê ajarênh ma. Mê ate amnhî kaxyw Jejus Kris kôt ajamaxpêr tÿx nê hkôt amnhî nhîpêx mex o apa hâ mê ajarênhja ma. Nê mê kot Tirtûm kôt amnhî xunhwÿr xwÿnh piitâ mê amâ mê hkînh â mê ho mex o apa hâ mê ajarênhja ma nê wa ixkînh nê. Jakamâ na pa wa Pahihtî Jejus Nhîpêxâ Tirtûm mâ amnhî jarênh kaxyw nê kâm mê anhÿ hâ wa ixkînh â amnhî jarê.

⁵ Na pre Epas ma mê awÿr mô nê mê amâ Jejus kot tanhmâ mê panê amnhî nhîpêx to hâ harênh o mê akôt pa. Âm hâmri kot mê amâ harênhja. Tâ ka xep prem ama nê amnhî kaxyw hkôt ajamaxpêr nê hkôt amnhî xunhwÿ. Hâmri nê amnhî wÿr Jejus jamâr o ri apa. Koja nhÿrmâ akupÿn mê pahwÿr wÿr nê amnhî pyrà nê ma akupÿm kaxkwa hwÿr mê pahto api nê mê pahto mex kumrêx o mê pahkôt pa ho pa. Tâ ka xep htem amnhî kaxyw hkôt ajamaxpêr tÿx nê â kot amnhî nhîpêx anhÿr kutêp amnhî

wÿr kamâ ajamak râhâ nê. Nê mê amâ mê kot Tirtûm kôt amnhî xunhwÿr xwÿnhjê hkînh tÿx nê.

⁶ Na hte Tirtûm âm hâmri mê pahto mex pix râhâ ho pa. Nê mêmôj to mê pakutâ nojarêt râhâ nê. Tâ wam mê ate harênh marta â ka mê hkôt amnhî xunhwÿr kurê kumrêx nê ri kapêr kôt axpên kôt amnhî nhîpêx mex o ri apa. Jao hkôt pix mâ amnhî nhîpêx mex nê. Tâ na hte pika piitâ hkôt ri mê pa xwÿnh kwÿjaja mê apyrâ nê Jejus jarênh ma nê hkôt amnhî xunhwÿ. Nê mê apyrâ nê axtem hkôt pix mâ amnhî nhîpêx nê kapêr kôt amnhî nhîpêx mex o ri pa.

⁷ Nê mê awÿr môrta â na pre Epasja mê amâ Tirtûm kapêr jarênh o ri mê akôt pa ka prem ama nê amnhî kaxyw hkôt ajamaxpêr nê hkôt amnhî xunhwÿ. Epasja wa ixpyrà nê kot Kris mâ tanhmâ amnhî nhîpêx to ho pa xwÿnh. Nê wa inhmâ hapêê. Na pre katât kôt mê amâ Tirtûm kapêr jarênh pa. Kot mêmôj to mê pakutâ nojarêt râhâ hâ harênh o ri mê akôt pa.

⁸ Tâ man akupÿn wa ixwÿr môn pôj nê wa inhmâ tanhmâ mê ajarênh to. Tirtûm Karô nhÿ hâ mê amâ Kris kôt atô nê atôx piitâ mê hkînh o ri apa hâ mê ajarê. Pa wa mê ajarênh ma nê wa ixkînh tÿx kumrêx.

*Pawre mê Ximotre wa kot Koros kâm
hkwyjê ho Tirtûm wÿr â wa harênh*

*Epes 1.15-23, 3.14-21; Piriopis 1.9; Wam
Tesarôn 5.23-24; Sikûn Tesarôn 1.11, 2.16*

⁹ Nê na pre Epas akupÿn wa ixwÿr pôj nê wa inhmâ tanhmâ mê ajarênh to. Mê ate amnhî kaxyw Jejus kôt ajamaxpêr o apa nê mê amâ Kris kôt akwÿjê piitâ mê hkînh o ri apaja nhûm wa inhmâ mê ajarê. Pa wa mê ajarênh ma nê mê ato Tirtûm wÿr râhâ o jar mê hagjênh xâ kamâ ixkrî. Nê arî mê ato hwÿr râhâ ho ixkrî. Nê mê ato hwÿr o:

—Pa Tirtûm. Ot pa Ximotre mê wa Korosê nhô xwÿnhjê ho awÿr kaxyw amâ mê harê. Kwa tanhmâ mê hamaxpêr to kê mê amâ hprâm xâ hkôt pix mâ amâ tanhmâ amnhî nhîpêx to ho pa. Nê Akarô nhÿ hâ hprî hâ akapêr ma nê âm hkôt pix mâ tanhmâ amnhî nhîpêx to ho pa. Anê.

¹⁰ Na pa hte wa â mê ato Tirtûm wÿr anhÿr râhâ ho ixkrî. Kot kaj mê â amnhî nhîpêx anhÿr o ri apa nê Jejus kot amnhî nhîpêx o amnhî nhîpêx mex o ri apa. Nê aprî hâ Tirtûm kot amnhî nhîpêx â omunh mex o mô. Jao mêmôj to axpên kutâ anojarêt pix o ri apa hprâm. Hâmri nhûm Tirtûm ja hâ mê apumu nê hkînh nê.

¹¹ Tirtûmja mê pakurom mêmôj piitâ kaxyw âhpumunh o âhpumunh. Nê mêmôj piitâ kaxyw hihtÿx o hihtÿx. Jakamâ na pa hte wa mê ato hwÿr o:

—Pa Tirtûm. Kwa tanhmâ Koros nhô xwÿnhjê ho kê mê axihtÿx nhÿ hâ mêmôj

punuj kutã amnhĩ to htýx nê. Mê kot Jejus ã tanhmã mê ho nhũm mê kot amnhĩ xã kamã hamak tã kê mê tee ri amnhĩ kukamã hamaxpêr o hkaprĩ nê ri pa hkêt nê. Æm anhy hã mê hkurê xwýnhjê kutã amnhĩ to htýx nê hkĩnh kãm ri pa ho pa. Anê.

Na pa hte wa ã mê ato hwýr anê.

¹² Na pre ra Tirtũm amnhĩ ri mê pakutêp mêmoj mex kwý jaxwý. Mê pahpê hkrajê mã haxwý. Tã ka mê ý hã tãm amnhĩ nhĩpêx o apa jao mê ate mêmoj mex jamýnh mã tãm. Ô krĩ nhĩrã rax kumrêx kamãã. Jakamã kwa mê kot Jejus ã tanhmã mê pahto htã kêr pu mê arĩ Tirtũm mã mex o mex ã harênh rãhã ho ri papa.

¹³ Nê Satanasti kêp kamãt kô kamã mê kot amnhĩ tomnuj ho mê pa xwýnhjê pãm. Tãm na hte mê ho amnhĩptãr o pa nê hkôt na pu prem amnhĩ nhĩpêx o papa rãhã nhũm Tirtũm tee ri ja hã mê pahpumu. Hãmri nê kãm kêp mê papytãr prãm xãj mê pahwýr Kra japê htýx kumrêx xwýnhja mê. Nhũm mê pahwýr wrý nê mê panê htyk o mê pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwý nhũm Tirtũm hã mê pahpumu nê mê panê mê pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pê mê pahpytã nhũm hpãnhã Jejusja tãm kêp mê pahto amnhĩptãr o pa xwýnh.

¹⁴ Ra htyk o mê pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwý nhũm mê pahte amnhĩ tomnuj o hapêx pu mê axte Satanasti hkôt ri amnhĩ nhĩpêx kêt nê. Æm Jejus kôt pix mã amnhĩ nhĩpêx o ri papa.

Kris mê Tirtũm wa kot amnhĩ nhĩpêx te wa kot axpên pyrãk ã harênh

Juãw 1.1-5; Korosê 2.9; Eprêw 1.1-14

¹⁵ Nê Krisja te kot Tirtũm pyrãk. Mê pahte pano ho Tirtũm pumunh kêt tã Kra Kris kot amnhĩ nhĩpêx ã harênh mar kôt mããnen Tirtũm kot amnhĩ nhĩpêx ã omunh mex nê. Amnepê mã kormã mêmoj kêt ri nhũm Jejus pa ho pa rãhã nê. Jakamã kot amnhĩ to rax o Tirtũm kot mêmoj to katorja piitã hakrenh par kumrêx.

¹⁶ Na pre hipêêxã Tirtũm nhý hã mêmoj piitã ho kator pa. Kaxkwa kamã nê pika hkôt mêmoj piitã ho kator pa. Nê kaxkwa kamã mê pahte pano ho mêmoj pumunh par xwýnhjaja nhũm pre ho kato. Nê kamã mê pahte pano ho mêmoj pumunh kêt xwýnhjaja nhũm pre mããnen ho kato. Nê kapêr o wrýk xwýnhjaja nê mê hkrãhtũmjaja nhũm pre mê ho kato. Nê pika kamã mê ho amnhĩptãr xwýnhjaja nhũm pre mê piitã mê ho kator pa. Kãm hprãm xã hkôt Tirtũm nhý hã mêmoj piitã ho kator pa.

¹⁷ Tã na hte arĩ kaxkwa kamã nê pika hkôt mêmoj piitã hamãr rãhã ho pa. Kêp apu

kot hamãr kêt ronhyx mêmoj piitã akupým hapêx pa.

¹⁸ Nê tãm na hte mê pahpê hkrajê ho amnhĩptãr o pa. Te kêp mê pahkrã nhũm te mê pahpê ĩ pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupým htĩr o htĩr jakamã kot amnhĩ to rax o mêmoj piitã hakrenh par.

¹⁹ Nê na pre Tirtũm ã hamaxpêr anê nê hamaxpêr o: "Nã Ixkra mê wa ixte amnhĩ nhĩpêxja te kot axpên pyrãk. Nê wa ixihitýx mããnen te kot axpên pyrãk. Nê wa inhmex xã mê wa ixãhpumunhja te kot axpên pyrãk. Æ wa ixte amnhĩ nhĩpêx kot anhyr. Wa ixte amnhĩ nhĩpêxja na mex kumrêx." Anê.

²⁰ Tã Jejus kot pi kahpa hã mê panê tyk nê hkamrô pikapĩr kukwak ri na hte Tirtũm mê kot hkôt amnhĩ xunhwýr xwýnhjaja mê ho hkra nhũm mê hamakêtkati nê ãmnhix pa ho pa. Kaxkwa kamã nê pika piitã hkôt mê kot Jejus kôt amnhĩ xunhwýr xwýnhjaja na htem ã amnhĩ nhĩpêx mex anhyr o pa. Æ Jejus kot mê panê htyk anhyr jakamã kot amnhĩ to rax o kot mêmoj piitã hakrenh par.

Jejus kêp tãm mê paxunhwýr xwýnh ã harênh

²¹ Nê mê papajaja na pu prem pamã Tirtũm prãm kêt o ri papa. Te hkãã ã ri papa pyrã nê kutã amnhĩ xunhwý nê pajamaxpêr punuj nê tanhmã amnhĩ tomnuj to pix o ri papa.

²² Tã Jejus kôt amnhĩ xunhwý nhũm amnhĩ tã mê pahpumu. Hãmri nê ra mê panê htyk jakamã amnhĩ tã mê pahpumu nê Tirtũm noo mã tãm mê paxunhwý. Te aa mê pahte tanhmã amnhĩ tomnuj to hkêt pyrãk o mê panhĩpêx nê tãm mê paxunhwý. Pu mê arĩ pahpê Tirtũm kutã amnhĩ xunhwýr xwýnh kêt nê hpãnhã pahpê hkrãmnhwýy.

²³ Na pre Tirtũm mê pahte amnhĩ kaxyw Kra Kris kôt pajamaxpêr nê hkôt amnhĩ xunhwýr ã mê pahpumunh kôt ã mê pahto mex anê. Tã kêr pu mê arĩ hkôt amnhĩ nhĩpêx o ri papa nê aa hkaga hkêt nê. Mê kot Kris ã tanhmã mê pahto htã pu mê arĩ hkôt amnhĩ nhĩpêx mex rãhã ho ri papa.

Kormã mê kot jar ijaxãr kêt ri na pa pre hte mê kãm ã harênh anhyr o ri mê hkôt ixpa. Tã ka prem Jejus jarênh ma nê hkôt amnhĩ xunhwýr kurê kumrêx. Nhũm krĩ piitã hkôt ri mê pa xwýnh kwýjaja mê apyrã nê harênh ma nê hkôt amnhĩ xunhwý nê hkôt amnhĩ nhĩpêx o pa.

Pawre kêp Ijaew kêt xwýnhjê mã Jejus jarênh xwýnh ã harênh

Epes 3.1-13

²⁴ Nê ixte mê amã Kris kot tanhmã mê panê amnhĩ nhĩpêx to hã harênh o ixpaja ã na prem tanhmã ixto htýx nê pa amnhĩ xã htýx kãm ijamak o ri ixpa. Tã arĩ Tirtũm

kâm hprâm xà hkôt ã amnhî nhîpêx anhÿr jakamã na pa ixkînh nê jar ixkrî. Ixte Kris kwÿjê kaxyw amnhî xà kamã ijamak tÿx o ixkrî. Te mê apê Kris nhî pyrâk xwÿnhjê mãã. Tã pa te ixpê Kris kot amnhî nhîpêx pyrâk o mê akaxyw amnhî xà htÿx kãm ijamak o ixkrî.

²⁵ Na pre Tirtûm mê apê Ijaew kêt xwÿnhjê kaxyw ixâm. Ixte mê amã kapêr piitã harênh par nhûm mê ate mar nê hkôt amnhî nhîpêx mex o ri apa kaxyw.

²⁶ Na pre kormã mêhõ mê awÿr môr nê mê amã harênh kêt nê. Tã ra Tirtûm kãm mê ate mar prãm nê. Kãm mê apê Ijaew kêt xwÿnhjê mê mê pahpê Ijaew xwÿnhjê japê o axpên pyrâk. Nom na pre amnepêm ri mê pa xwÿnhjê mã kormã ja hã amnhî to amnhîrît kêt nê. Tã ra jarãhã mê pahpê Kris kwÿjê mã ja ho amnhîrît. Mããnên kãm mê apê Ijaew kêt xwÿnhjê japê hã amnhî to amnhîrît.

²⁷ Mê apê Ijaew kêt tã na ka prem Kris kôt amnhî xunhwÿ nhûm Tirtûm Karõ mê akarõ mã agjê nê mê akamã pa ho pa. Ka mê ra hkôt amnhî nhîpêx jakamã kot kaj mê ixpyrà nê nhÿrmã kuri atîr tûm nê amex rãhã ho apa ho apa. Ja na mex kumrêx. Tã ja na Tirtûm kãm mê ate mar prãm nê mê akaxyw ixâm.

²⁸ Jakamã na pa pre Ximotre mê wa mê apiitã mê amã Kris kot mê panê tanhmã amnhî nhîpêx to hã harênh kãm ixhtÿx o ri mê akôt ixpa. Nê kapêr o mê ajahkre ho ri mê akôt wa ixpa. Nê jar mê hagjênh xà kamã krî piitã hwÿr kagã nhîpêx nê mê hwÿr kurê. Mê kot kamã harênh nê mar nê amnhî tomnuj kaga nê hpãnhã Kris kôt amnhî xunhwÿr nê ãm kôt pix mã amnhî nhîpêx o pa kaxyw. Kêr pa nhÿrmã kãm mê ate inhmar nê hkôt amnhî xunhwÿr xwÿnhjê jahkre nê kãm:

—E Pahihti. Ota akwÿjaja. Na htem akôt amnhî nhîpêx mex rãhã ho ri pa. Anê.

²⁹ ã ixte kãm mê piitã mê harênh anhÿrja na inhãm hprãm. Ja kaxyw na pre Jesus ixto ixhtÿx. Jakamã na pa hte Tirtûm nhÿ hã tanhmã kapêr o mê ahkre hto ho ri mê hkôt ixpa. Jao mê ho Tirtûm wÿr o ri ixpa nê mê kãm kagã nhîpêx nê mê hwÿr kurê nê kamã kapêr o mê ahkre o ri ixpa.

2

Pawre kot Jesus kapêr o Koros nhõ xwÿnhjê o hihtÿx ã harênh

Epes 3.14-19; Pîripo 1.9

¹ E kot paj mê amã tanhmã amnhî jarênh to ka mê inhma. Na pa hte mê ato Tirtûm wÿr rãhã ho ixkrî. Mê kajaja nê krî pê Ratisej kamã Jesus kôt mê pahkwÿjaja. Kormã ixte mê apumunh kêt tã pa hte mê ato Tirtûm wÿr kãm ixhtÿx ãhã ho ixkrî.

² Mêmio kaxyw na pa hte ã mê ato hwÿr anê? Nê mêmo kaxyw na pa hte mê amã kagã nhîpêx nê mê awÿr kurê? Nã ãm mê ate kamã harênh nê mar nê Jesus kapêr kôt axpên to axihtÿx o ri apa kaxyw. Nê mê amã axpên kînh o ri apa kaxyw. Pê te mê ate ixkre tipxi kamã axpên kôt amnhî nhîpêx o ri apa pyrâk. Jao aprî hã Tirtûm kot amnhî nhîpêx pumunh mex nê amnhî kaxyw hkôt ajamaxpêr tÿx nê. Kot kaj mê ã amnhî nhîpêx anê nê Kris kot amnhî nhîpêxta pumunh pa. Na pre Tirtûm tokyx mê kãm Kris o amnhîrît kêt tã ra mê pamã ho amnhîrît.

³ Tirtûm kot amnhî nhîpêx nê kapêrja na pu htem Kris nhÿ hã pahprî hã omunh nê mar mex nê.

⁴ Jakamã koja mêmojaja mê awÿr mra hãmri nê hêx rom Tirtûm kapêr kwÿm ri tanhmã mê amã mêmoj jarênh to. Te mê ãhpumunh tÿx pyrâk o mê amã harê no ãm mê ãhpumunh kêt. Ka mê ama nê ãm mê ama nê Kris kaga hkêt nê.

⁵ Nê kormã arî Jesus ã ijaxàr nê ixkrî nê kormã mê akôt ixpa hkêt tã ot pa hte mê amã ijamaxpêr rãhã ho ixkrî. Nê ra tanhmã mê ajarênh mar to. Na ka xep htem Kris kôt amnhî nhîpêx tÿx o ri apa. Te ahkró pê kukryt mut kuxêêti kot pî kupu htÿxta pyrâk. Nê ka xep htem arî amnhî kaxyw Kris mã ajamaxpêr tÿx o ri apa. Pa mê ajarênh ma nê ixkînh tÿx nê.

⁶ Na ka prem Pahihti Jesus Kris kôt amnhî xunhwÿr pa. Tã kêr ka mê arî hkôt amnhî nhîpêx mex rãhã ho apa. Kêp mê panhõ Pahihti kênã.

⁷ Jakamã mê ãm kôt pix mã amnhî xunhwÿr tÿx nê aa hkaga hkêt nê. Te mêmo pî hpàr jarêja pika kaxwÿnh kãm pimãnh nê kot pika jamÿnh tÿxta pyrâk. Nhûm kók xàpêr tÿx tã tee kot mênh kaxyw pyrâk. Tã kêr ka mê pî hpàrta pyrã nê hkôt amnhî xunhwÿr tÿx nê hkôt amnhî nhîpêx mex o ri apa. Ra Epas kot mê ajahkre ho pa xà hkôt. Nê amnhî krãm Kris kapêr jaxàr tÿx nê aa ho ajamakêtkati hkêt nê. Pê akînh kãm Tirtûm mã mex o mex ã harênh rãhã ho ri apa.

⁸ Nê kwa kêr ka mê kot hêx rom mê amã tanhmã kapêr to ho mê pa xwÿnhjaja ka mê amnhî nê mê omunh mex nê. Nê mê kapêr mar hkêt nê. Mê ate Kris kaga hprãm xàj na htem tanhmã mê amã hêx to ho ri mê akôt pa. Te amnepêm mê kot Tirtûm kapêr kwÿm ri tanhmã mê ahkre hto xwÿnhjê pyrâk. Hínhu hikôôti kapêr kôt na htem tanhmã mê amã hêx to nom Kris nhÿ hã mê amã kapêr kêt nê. Jakamã kwa mê amnhî nê mê omunh mex nê.

⁹ Nê Kris mê Tirtûm wa kot amnhî nhîpêx kot axpên pyrâk. Nê wa hamaxpêr kot axpên pyrâk.

¹⁰ Tã kêr pu mê pajaxwýja wa hamaxpêr o pajamaxpêr nê wa kot amnhî nhîpêx o amnhî nhîpêx. Jakamã kwa mê kot Tirtûm kapêr kwým ri tanhmã mê kapêr to xwýnhjê kot amnhî nhîpêx o amnhî nhîpêx kêt nê. Nê mê kapêr ma nê âm mê ama. Kris na hihtýx o hihtýx o kot mêkarômnuti nhô pahi piitã mê hakrenh par. Nê hihtýx o hihtýx o kot Tirtûm kapêr o mê wrýk xwýnhjê piitã mê hakrenh par. Nê ãhpumunh o ãhpumunh o kot mêmoj piitã hakrenh par jakamã kêr ka mê kapêr kôt pix ma nê hkôt pix mã ri amnhî nhîpêx o ri apa.

*Mê pahte amnhî nhîpêx nyw jarênh
Rômân 6.3; Karatas 5.24*

¹¹ Nê na hte ixkwý Ijaewjaja mê hkra nhýrmã hprêk nê Tirtûm kôt amnhî nhîpêx ã mê harênh kaxyw mê kêp mêmy kwryt kã jakã. Tã mê kajaja. Mê apê Ijaew kêt xwýnhjaja na pre Kris mê anhîpêx o te mê kot amnhî jakãta pyrãk. Jao te kot mê anê mê ate amnhî nhîpêx tûm jakãr par pyrãk o mê anhîpêx ka mê ra amnhî nhîpêx nyw o amnhî nhîpêx o apa. Nhûm htem mê ate amnhî nhîpêx nyw ã mê apumu nê mê ate Jejus kapêr kôt amnhî nhîpêx ã mê apumunh kurê kumrêx.

¹² Tã na pu htem jarãhã mê pahte Tirtûm kôt amnhî nhîpêx o papa hã amnhî jarênh kaxyw amnhî jakãr kêt nê. Na pu htem hpãnhã amnhî kaxyw Tirtûm xihtýx o hihtýx xwýnhja kôt pajamaxpêr. Kot mê panê pahte amnhî tomnuj rênh par kôt pajamaxpêr hãmri nhûm mê gôx kãm mê pahkrã kumrã. Te mê pahte gôx kãm mê pahte amnhî nhîpêx tûm rer par pyrãk o amnhî nhîpêx. Te Jejus htyk nhûm mê kot haxãr nhûm nôr nhûm mê pahte amnhî tomnujja ãhkô hã nôr nê hapêx par pyrãk. Tã pu htem ra gôj rûm pahkrã hapôj. Te Tirtûm kot akupým Kris o hîr pyrãk. Jao ra mê pahte Kris kôt amnhî nhîpêx nyw o amnhî nhîpêx o papa hkra xã amnhî to amnhîrît.

¹³ Amnepê mormã mê pahte Jejus kôt amnhî xunhwýr kêt ri na pu prem ri amnhî tomnuj to nê tanhmã pajamaxpêr punuj to ho ri papa. Tirtûm noo mã te ra mê pahtýk pyrãk. Tã Tirtûm te akupým Kris kôt mê pahto pahtr pyrãk o mê panhîpêx nê mê panê mê pahte amnhî tomnuj piitã ho hapêx nê axte kãm hamaxpêr kêt kumrêx.

¹⁴ Te mê pahte tanhmã amnhî tomnuj to ho papa nhûm Tirtûm kot ja hã mê pahpumunh nê mê pahte amnhî tomnuj piitã hã kagã hpar pyrãk. Nê kot kagãja pyr nê Kris nhîkhô hã pí kahpa hã nhôr pyrãk. Jao te kot mê pahte amnhî tomnuj ã kagãta hkaxônh nê rênh par pyrãk o hipêx.

¹⁵ Hãmri nhûm Krisja pí kahpa hã htykja o mêkarômnuti mê mê ô pahi Satanasti wa mê ho hîrerek pa. Jao hihtýx o kot mê hakrenh

par ã amnhî to amnhîrît. Te mê kot kutã amnhî xunhwýr xwýnh piitã mê noo mã mê ho krihkrit par nê ma akupým ô krî hwýr hkînh nê grer o môrta pyrãk.

¹⁶ Nê koja mêmojaja mê awýr mra nê tee ri mê ate mêmoj kur o akrî hã mê apumu nê mê amã:

–Kwa na hte Tirtûm kôt mê kot amnhî xunhwýr xwýnhjaja ja kur kêt nê. Nê ja ho hkôm kêt nê. Nê mê panhô arîgromnu pê sap ã ri mêmoj tâ ãpênh kêt nê. Nê mytwrý nyw ã mêmoj tâ ãpênh kêt nê. Na htem ã Tirtûm ã hkînh o pa anê. Tã ã mê ate mê ixkôt amnhî nhîpêx anhýr kêt jakamã mãn mê apê Tirtûm kra hkêt nã. Anê.

Tã nom kêr ka mê kapêr ma nê âm ama.

¹⁷ Amnepê mormã mê pahte Kris kôt amnhî xunhwýr kêt ri na pu prem ã amnhî nhîpêx anhýr o papa. Tã Jejus kôt amnhî xunhwý hãmri nê axte ã amnhî nhîpêx anhýr kêt nê. Pãnhã kapêr pix ma nê hkôt pix mã amnhî nhîpêx o ri papa.

Mê pahte mê kot Tirtûm kapêr o mê hêx xwýnhjê mar kêt ã mê pamã karô

¹⁸ Nê koja mêmojaja mê awýr mra nê hêx rom tanhmã mê amã amnhî jarênh to nê mê amã:

–Na pre Tirtûm âm mê papxpix mê inhã amnhî to amnhîrît. Jakamã kwa mê ixkapêr ma. Kot kaj mê inhmar kêt nê hãmri nê mê amex kêt nê apa.

Anhýr o mê amã kapêr japêr ka mê ama nê âm mê ma. Rý nhûm mê amã:

–Tirtûm mê parom kot amnhî to rax o kot mê pahpiitã mê pajakrenh par jakamã kwa mê tanhmã amnhî to hwýr to hkêt nê. Kot ka mê anê nhûm mê ama nê mê akamã gryk nê. No kêt mê amnhî to kapêr o wrýk xwýnhjê mãn wý. Koja mê ama nê mê akamã gryk kêt nê tanhmã mê amã mêmoj nhîpêx to. Anê.

Koja mê ã mê amã kapêr anê ka mê ama nê âm mê ama. Te ho mê ãhpumunh týx kãm mê kot ã mê amã kapêr anhýr pyrãk no âm mê kapêrja mex kêt. Na htem amnhî krã hkôt te amnhî to rax pyrãk o ã mê amã kapêr jao mê hamaxpêr tûm o hamaxpêr o ri pa. No mê apyrã nê mê hamaxpêr nyw o hamaxpêr kêt nê.

¹⁹ âm mê kot Tirtûm kapêr kwým ri mê ahkre jakamã mê kêp Jejus kwý hkêt. No mê papajaja mê pahpê Jejus kwý na pu mê. Nhûm Jejus kêp mê panhô Pahihti jakamã na hte tanhmã mê pahto paxihtýx to pu htem kukwak ri tanhmã ãxpên to ajuta hto ho ri papa. Nê hkôt ãxpên to paxihtýx o ri papa. Mê pahpiitã mê pahte hkôt amnhî nhîpêx mex o ri papa kaxyw. Tirtûm kãm hprãm xã hkôt.

Mê pahte amnhî krã hkôt tãm amnhî nhîpêx kêt ã mê pajarênh

Karatas 3.1-5, 5.1-9; Epes 2.8; Piripos 3.9

²⁰⁻²¹ Nê wam mê pahte amnhî nhîpêx tûm nê mê pajamaxpêr tûmta te kot Kris kôt htyk nê mê pahpê hapêx par pyrâk jakamã na pu htem arî hkôt amnhî nhîpêx kêt nê. Nê mêkarômnuti hkôt amnhî nhîpêx kêt nê. Tã no nhûm xep ra mêhõja mê awýr mô nê hêx rom mêmoj nê tanhmã mê amã kapêr to nê mê amã:

—Kwa mê ja jamýnh kêt nê. Nê ja hkur kêt nê. Nê ja kupênh kêt nê.

Anhýr o mêmoj nê mê akurê ho pa. Xep mê ã mêmoj nê mê akurê anê ka xep mê ama nê mê hkôt amnhî nhîpêx. Kwa na mon ka mê ri axtem nê mê hkôt amnhî nhîpêx?

²² Tîrtûm kot mêmoja nê tanhmã mê pahkurê htore hã. Æm mê kot amnhî krã hkôt mêmoj nê mê akurê ka mê ama nê mê hkôt amnhî nhîpêx. Mêmoj kur nê mê akurê xwýnhnta na htem kuku nhûm hapêx kurê kumrêx. Mo koja we Tîrtûm omu nhûm kêp omnuj? Nã ja kot anhýr kêt kênã. Mê Æm amnhî krã hkôt mê kot ja nê mê akurê.

²³ Tã ã mêmoj nê mê akurê anhýr xwýnhjaja na ka htem nhýri mê omu nê mê kapêr ma nê atýx ajamaxpêr o:

—Nã te Tîrtûm kôt amnhî nhîpêx mex o pa pyrâk. Te mê Æhpumunh týx pyrâk o ã mê inhmã mêmoj jarênh anê. Anê.

No Æm mê kot mêmoj jarênhja kot anhýr kêt. Æ mê kot amnhî nhîpêx anhýr xwýnhjaja kêp Tîrtûm kra hkêt. Na htem Æm amnhî krã hkôt mêmoj nê mê akurê ho pa. Nê hã amnhî to jarkrar o ri pa. Mê ate ja hã mê mar nê mê kot amnhî to rûnh ã mê hkamnhîx kaxyw. Na htem kot amnhî tomnuj pymaj tanhmã amnhî nhî hto ho pa. No Æm ri ã amnhî nhîpêx anhýr kaprý. Nê Æm htýx Tîrtûm kapêr o mê wrýk xwýnhjê hwýr kaprý ho pa.

3

Mê pajamaxpêr nyw nê mê pahte amnhî nhîpêx nyw jarênh

Rômãn 6.4-11

¹ Nê na pre Tîrtûm akupým Kris o hûr nhûm mê pahte hkôt amnhî xunhwýr jakamã te Tîrtûm kot Kris nhîpêx pyrã nê akupým mê pahto mê pahfîr pyrãk o mê panhîpêx. Jakamã kwa kêr pu mê axte pahte amnhî nhîpêx tûm kôt amnhî nhîpêx kêt nê. Te Kris pyrã nê ra kaxkwa hwýr paxàpir nê kamã ri papa pyrãk o amnhî nhîpêx. Jao pajamaxpêr nyw pix o pajamaxpêr nê pahte amnhî nhîpêx nyw pix o amnhî nhîpêx o ri papa. Te Kris kot amnhî nhîpêx pyrãk. Na pre akupým kaxkwa hwýr api nê Tîrtûm nhîhkô hã mê ho amnhîptâr xã kamã hkrî ho hkrî.

²⁻³ Nê ra mê pahte Kris kôt amnhî xunhwýr jakamã te jar pika hkôt pajapêx par nê Tîrtûm wa kuri kaxkwa kamã pamex nê papa ho papa pyrãk. Jakamã kwa kêr

pu mê pahte amnhî nhîpêx nyw mã mãn pajamaxpêr rãhã ho papa. Nê axte mê pahte amnhî nhîpêx tûm mã pajamaxpêr kêt nê.

⁴ Kris kêp akupým mê pahto mê pahfîr xwýnh. Koja nhýrmã akupým mê pahwýr wrý hãmri nhûm Tîrtûm te ho mex raxta pyrãk o mê panhîpêx nê mê pahto mex rax kumrêx.

Mê pahte akupým amnhî nhîpêx tûm o paxujanãr kêt ã mê pamã karô

Epes 4.17-5.2

⁵ Jakamã kwa kêr ka mê axte ate amnhî nhîpêx tûm kôt amnhî nhîpêx kêt nê. Te ra mê apê htyk nê hapêx par pyrã nê axte kãm ajamaxpêr kêt nê.

Jakamã axte ri axpênh mjên rý axpênh prô ho amnhîkati hkêt nê.

Nê nhãm ri mêmyjê hõ rý mênijê hõ ho amnhîkati hkêt nê.

Nê mê amã tanhmã amnhî tomnuj to hprãm kêt nê.

Nê mê amã akukrêx rax prãm kêt nê. Kot ka mê ã amnhî nhîpêx anê nê gaa nê akukrêx rax gryk ã axte Tîrtûm mã ajamaxpêr kêt nê.

⁶ ã mê kot amnhî nhîpêx anhýr xwýnhjaja Tîrtûm kãm mê hprãm kêt. Koja nhýrmã tanhmã ja hã mê homnuj týx to.

⁷ Amnepêh kormã mê ate Kris kôt amnhî xunhwýr kêt ri na ka prem ã amnhî nhîpêx anhýr o ri apa.

⁸⁻⁹ Tã kêr ka mê axte ã amnhî nhîpêx anhýr kêt nê.

Nê mê ri axpênh kãm agryk o ano hkã karôt o axpênh pumunh kêt nê.

Nê mê axpênh kamã axãhkurê hkêt nê. Ri tanhmã axpênh tomnuj to ho apa hkêt nê.

Rý axpênh jakwa kamã mêmoj ma nê ri axpênh xõ ri tanhmã ri axpênh mã ho axêx to ho ri apa hkêt nê.

Nê mê akapêr mã agêt o ri mê kãm akapêr kêt nê.

Nê mê ri mêmoj to axpênh mã axêx hkêt nê.

Æ mê ate amnhî nhîpêx anhýr tûmta ra mê apê hapêx par kênã.

Mê pahte amnhî nhîpêx nyw kôt amnhî nhîpêx ã mê pamã karô

Rômãn 12.2; Epes 4.23; Wam Pêtre 2.11

¹⁰ Nê na ka mê ra mê ate amnhî nhîpêx nyw o amnhî nhîpêx o ri apa. Jao ra mê pahto kator xwýnh maatija kôt amnhî nhîpêx mex o mô. Kot kaj mê gaa nê ri hkôt amnhî nhîpêx mex kumrêx o ri apa. Kãm hprãm xã hkôt.

¹¹ Nê mê pahpê Kris kwýjaja ahpýnhã na pu mê. Na mê pakamã Ijaew nê Ijaew kêt xwýnhjaja. Nê mê pakamã panhî nê kupê. Nê mê kãm Æpênh xwýnhjaja nê mê kot amnhî mã ri Æpênh xwýnhjaja. Æm ahpýnhã mê pahpê Kris kwýjaja mê pahte anhýr tã

na hte Tirtûm tanhmâ mê pakute hkôt mê pahpumunh kêt nê. Na hte mê panhîpêx o axpên pyrâ nê mê pahpiitâ mê pakamâ pa ho pa pu htem pahpimrâatâ hkôt ri amnhî nhîpêx o papa.

¹² Nê Tirtûm kâam mê pajapê nê kâam mê pajapê xâj mê pakukamâ amnhîm mê parê. Mê pahte kâam tanhmâ amnhî nhîpêx to ho ri papa kaxyw mê pakukamâ mê parê.

Jakamâ kêr ka mê axpên kamâ axukapri ho ri axpên kôt apa.

Nê axpên to mex pix o ri axpên kôt apa. Nê mê amâ amnhî to rax o axpên jakrenh prâm kêt nê.

Nê mê am amnhî pix kukamâ ri ajamaxpêr kêt nê. Amnhî mê nhâm mê hkukamâ ajamaxpêr o ri apa.

Nê mê ri agryk tokyx anhyr kêt nê.

¹³ Nê koja mêhō tanhmâ mê ato ka mê amnhî tâ omu nê tanhmâ amnhî tâ ho hkêt nê. Am ja ho ajamakêtkati kurê kumrêx nê axte kâam ajamaxpêr o ri apa hkêt nê. Ra Jesus kot mê panê mê pahte amnhî tomnuj piitâ rênh par kênâ kot pu kêt mê amnhî tâ tanhmâ mêhō hto. Tâ kêr ka mê axpên to mex o ri apa nê amnhî tâ tanhmâ axpên to ho ri apa hkêt nê.

¹⁴ E kêr ka mê â axpên nhîpêx anhyr o ri apa. No am ja pix kêt. Nê mê määnên amâ axpên kînh pê axpên kutâ anojarêt râhâ nê. Kot kaj mê â amnhî nhîpêx anê nê määnên ra ixte mêmoj tâ mê amâ karōta ka mê ho anhyr mex kurê kumrêx. Mê pamâ axpên kînhja na mex kumrêx o kot mêmoj piitâ hakrenh par.

¹⁵ Nê kêr ka mê Kris kukwak ri anhōxâhkre kaxwýnh kâam akînh nê ajamakêtkati nê tãm ri axpên nhîpêx o ri axpên kôt apa. Te ixkre tipxi kamâ mê ate axpên kôt ri amnhî nhîpêx pyrâk. Â mê pahte amnhî nhîpêx anhyr o papa kaxyw na pre Tirtûm amnhî wýr mê pahwý. Mê pahte hkôt amnhî xunhwýr kaxyw.

Nê kêr ka mê Tirtûm mâ amnhî jarênh kaxyw nê kâam Kra Jesus â akînh â amnhî jarênh o ri apa.

Mê pahte Tirtûm mâ mex â pagrer â mê pamâ karō

Epes 5.19

¹⁶ Nê kêr ka mê Kris kapêr piitâ hkôt amnhî nhîpêx mex nê. Nê kapêr o axpên jahkre mex o ri axpên kôt apa. Tirtûm kot amnhî nhîpêx o axpên jahkre ho ri axpên kôt apa. Nê kâam agrer o ri apa. Kâam mex o mex â agrer o ri axpên kôt apa. Nê kâam kukwak ri akînh â amnhî jarênh o kâam gre.

¹⁷ Nê kêr ka mê Mēpahpām Tirtûm mâ amnhî jarênh o:

—Pa Tirtûm. Nâ am hāmri na ka pre mê ixwýr Akra Jesus mê nhûm mê ixwýr wrý nê mê inhnê ty.

Anhyr o kâam amnhî jarê. Hāmri nê am Pahihti Jesus kot amnhî nhîpêx kôt pix mâ tanhmâ ri amnhî nhîpêx to ry am kôt pix mâ tanhmâ akapêr to ho ri apa.

Tanhmâ mê pahte axpên nhîpêx to hâ mê pamâ karō

Epes 5.22-6.9

¹⁸ Nê mê anijaja. Tirtûm kot myja kumrêx nhîpêx nê hkôt kâam hprō nhîpêx jakamâ kêr ka mê amjên â apijaam o apa. Nê mê hamaxpêr mex â mê omu nê mê hkôt ri amnhî nhîpêx mex nê. Â mê ate amnhî nhîpêxja na Tirtûm kâam hprâm.

¹⁹ Nê mê amyjaja kêr ka mê amâ mê aprō japê nê. Te amâ amnhî tâ ma pyrâk o mê hipêx o ri apa. Jao tanhmâ mê homnuj to hkêt nê.

²⁰ Nê mê apê mê hkrajaja kêr ka mê anhîpêxâ nê akatorxâ wa hâ apijaam nê wa kapêr ma nê wa hkôt ri amnhî nhîpêx. Â mê ate amnhî nhîpêx anhyrja na Tirtûm kâam hprâm. Koja â mê ate amnhî nhîpêx anhyr â mê apumu nê hkînh nê.

²¹ Nê kêr ka mê apê mê hipêxâ nê mê katorxâ mê akra gryk kaxyw mê kâam apêr o apikênh kêt nê. Kot kaj mê â mê hipêx anê nhûm mê tee ri amnhî tâ mê ama nê hkapri nê.

²² Nê mê ate mê kâam tanhmâ amnhî nhîpêx to ho ri mê apa xwýnhjaja kêr ka mê anhō patrâw kapêr ma nê hkôt amnhî nhîpêx. Nê mê noo mâ mê kâam tanhmâ amnhî nhîpêx mex to nê määnên mê wa kre kamâ mê kâam tanhmâ amnhî nhîpêx mex to. Nom mê kot axâpênh â apumunh nê hâ kâam akînh pix kaxyw axâpênh mex kêt nê. Määnên mê amâ Pahihti Kris kînh â akatât kôt mê kâam mêmoj tâ axâpênh mex nê. Mê noo mâ nê määnên mê wakre kamâ.

²³ Nê mê akînh kâam mê kâam axâpênh mex o ri apa. Te mê ate Pahihti mâ akînh kâam tanhmâ kâam amnhî nhîpêx to pyrâ nê tãm amnhî nhîpêx o tãm mê kâam axâpênh mex o ri apa.

²⁴ Te mê anhō patrâw pix mâ axâpênh pyrâk nom kumâ pix mâ hkêt. Määnên mê panhō Pahihti Krisja mâ. Jakamâ kot kaj mê â amnhî kaxyw Tirtûm mâ ajamaxpêr pê akînh kâam anhō patrâw mâ mêmoj tâ apê nhûm Pahihtija ja hâ mê apumu nê nhýrmâ mê ato mex rax nê.

²⁵ E kêr ka mê â mê anhō patrâw mâ axâpênh mex o ri apa anê. No kot kaj mê kapêr kwým amnhî krâ hkôt ri tanhmâ amnhî nhîpêx to nhûm Tirtûm tee ri ja hâ mê apumu hāmri nê nhýrmâ tanhmâ hâ mê anhîpêx to. Na hte â mê kot amnhî tomnuj xwýnhjê piitâ mê hipêx anê nê mê hipêx o axpên pyrâk. Jakamâ kwa kêr ka mê anhō patrâw mâ axâpênh mex râhâ ho ri apa.

4

¹ Nê mê apê mê ô patrâw kêr ka mê kot mê amâ mê âpênh xwýnhjê ho mex nê tanhmâ mê homnuj to hkêt nê. Mê urâk nê kaxkwa kamâ mê anhô Patrâw maatija hkrî. Kot mê pahte tanhmâ amnhî nhîpêx to nê tanhmâ mê pajamaxpêr to hâ mê pahpumunh râhâ jakamâ kêr ka mê noo mâ mê ho mex râhâ ho ri apa.

E kêr ka mê apiitâ â xepên to mex anhÿr o ri apa.

Mê pahte Tirtûm mâ amnhî jarênh râhâ hâ mê pamâ karô

Matêwre 7.7; Rukre 11.1-8; Atre 1.14; Epes 6.18

² Nê kêr ka mê xatâ Tirtûm mâ amnhî jarênh râhâ ho ri apa. Nê tanhmâ mêhō kot amnhî nhîpêx to hâ harênh ma nê ho Tirtûm wÿ. Nê mê ate kâam amnhî jarênh kamâ kâam mex o mex â harê.

³⁻⁴ Nê määnên ixto awÿ kê mê tokyx ixkator japêr. Pa ixâmnhix mê kot kormâ Kris jarênh mar kêt xwýnhjê mâ harênh o ri mê hkôt ixpa. Â ixte amnhî nhîpêx anhÿrta â na prem ixpynê nê ijaxâ pa kormâ jar ixkrî. Jakamâ kwa mê mämri ja hâ ixto Tirtûm wÿr o apa.

Mê pahte apkati mê mê pahkwÿjê mâ Jejus jarênh â mê pamâ karô

Epes 5.16

⁵ Nê kêr ka mê kêp Kris kwÿ hkêt xwýnhjê hkôt nhÿhÿm ri apa nê tãm ri Tirtûm kapêr kôt amnhî nhîpêx o mê hkôt ri apa.

⁶ Nê kê mêhō awÿr tē nê tanhmâ Jejus â akukjêr to ka amâ hkînh â aprî hâ kâam awjarê. Ahpÿnhâ tanhmâ mê kot hâ akukjêr to xâ hkôt tanhmâ mê kâam harênh to kê mêhprî hâ mar mex nê.

Pawre kot Koros wÿr Xikitre mê Ones wa mēnh â harēnh

Epes 6.21-22

⁷⁻⁸ Nê ot pa mê awÿr mê pahtō Xikitre mēnh mâ. Kot ma mê awÿr ixte mê amâ ixkapêr â kagâ nhîpêx o mōr kaxyw. Na hte ixkôt Tirtûm mâ amnhî nhîpêx o ri pa. Inhmâ hapêê. Tâ kot paj mê awÿr kumê kê ma mê awÿr mō nê hprî hâ mê amâ ijarê. Mê ate ijarênh mar nê tãm ajamaxpêr nê akînh kaxyw.

⁹ Mê akwÿ Onesti hkôt koja ma mê awÿr mō. Määnên Kris kôt kêp mê pahtō hâ mê pamâ hapê xwýnh na. Na hte Tirtûm kapêr kôt amnhî nhîpêx mex râhâ ho ri pa. Tâ Xikitre mê koja wa ma mê awÿr mō. Hämri nê mê awÿr pōj nê jar tanhmâ mê ixte amnhî nhîpêx to hâ mê ijarê ka mê ama.

Kris kôt mê hkwy kot mê hwÿr hpêr mēnh â mê harēnh

¹⁰ Nê ota Aristakja ixpyrâ nê kêp prês nê hkrî. Tâ mê awÿr hpêr mê. Nê Panâpe htō

Juãw Makreja määnên mê awÿr hpêr mê. Na pa pre ra mê amâ Juãw Makre jarê. Tâ koja mēmo arîgro hâ akupÿn mê awÿr mōr japêr ka mê omu nê ho mex nê.

¹¹ Nê Jejus Justija määnên mê awÿr hpêr mê. Jajaja nê ixpyrâ nê kêp Ijaew. Tâ mê tapxipixjaja na htem ixpyrâ nê mê ixpê Ijaew kwÿjê rom mê kâam Tirtûm kapêr nyw o mê ahkre ho ri mê hkôt pa. Tirtûm kot Kra Kris kôt mê kot amnhî xunhwÿr xwýnhjê ho hkra hâ harênh nywja na htem mê kâam harênh o ri mê hkôt pa. Pa ja hâ mê omu nê ixkînh nê.

¹² Nê mê anhîō Epasja määnên mê awÿr hpêr mê. Na hte Jejus Kris mâ tanhmâ amnhî nhîpêx mex to ho pa. Nê mê ato Tirtûm wÿr râhâ ho pa nê mê ato hwÿr o:

—Pa Tirtûm. E kwa tanhmâ Koros kamâ akrajê ho kê mê akôt amnhî xunhwÿr tÿx nê. Nê amâ hprâm xâ hkôt pix mâ amnhî nhîpêx o ri pa. Nê amnhî kaxyw Kris kôt pix mâ hamaxpêr tÿx râhâ nê. Anê.

¹³ âm hāmri na hte mê ato hwÿr o pa. Nom mê kapxipix o hwÿr kêt nê. Määnên krî pē Ratisej kamâ nê krî pē Jerop kamâ Kris kôt mê pahtōjê ho hwÿr o ri pa. Mê ate Tirtûm kôt amnhî nhîpêx mex o apa kaxyw. Ixte ja hâ omunh mex.

¹⁴ Nê jar mê pahtō tōtō Rukre mê Tēmtija wa määnên mê awÿr hpêr mê. Tōtō Rukreja kêp ixkrâmnhwÿ mex na.

¹⁵ Nê kêr ka mê krî pē Ratisej kamâ Kris kôt mê pahkwÿjê mâ ijarê. Nê Nîpare mâ nê ôrkwÿ hwÿr mê pikuprōnh nê Tirtûm mâ mex o mex â harênh o mê hkrî xwýnhjê mâ määnên ijarê.

¹⁶ Nê e kêr ka mê ixte mê awÿr kagâ mēnhja kamâ harênh pa nê hpānhâ krî pē Ratisej kamâ Kris kôt mê pahkwÿjê hwÿr amê kê mê apyrâ nê kamâ harê nê piitâ kuma. Nê mê kâam anê kê ra ixte mê hwÿr kagâ mēnh xwÿnhnta kê mê amâ kugō ka mê kuxwar kamâ harê nê ama.

¹⁷ Nê kêr ka mê Akip mâ ijarê kê ra Tirtûm kot kâam mēmoj tã karō xwÿnhnta kê ho anhÿr jatur xâm kumê. Kêp hkra hâ kê tãm kâam âpênh jatur xâm kumê.

¹⁸ Tâ âm ja pix. E paj pam amnhî nhîhkra ho hatur xâ hâ kagâ. Mê ate ixte mēmoj tã kagâ pumunh nê hkôt inhmâ ajamaxpêr kaxyw. Nê ixte mê awÿr mēnh â ijarênh mar kaxyw. Kwa kêr ka mê arî ixpê prês â ixto Tirtûm wÿr râhâ ho ri apa.

E kê Tirtûmja mēmoj to mê akutâ nojarêr nê mê ato mex nê ka mê amex nê ajamakêtkati nê apa ho apa. Tâ âm ja pix. Ixpê Pawre na pa mê awÿr kagâja nhîpêx nê â mê awÿr mēnh anê.

Wam Tesarõn Pawre kot Tesarõn kamã Jesus kõt hkwýjê hwýr kagã nê mênh

Pawre na pre kagãja nhîpêx. Kêp Jesus nhý hã mê ahkre ho pa xwýnhjê hõ na pre. Jakamã na pre kagãja nhîpêx nê ma krî pé Tesarõn kamã Jesus kõt hkwýjê hwýr kumê. Tesarõn kamã Jesus ã kãm mê hkurê xwýnhjaja na prem Jesus ã mê homnuj o pa nhũm mê amnhî xã htýx kamã hamak o pa. Hãmri nhũm Pawre mê harênh ma nê kagãja nhîpêx nê mê hwýr kumê. Kot mê kãm mê hamaxpêr o hihtýx kaxyw mê kot arî Jesus kõt amnhî nhîpêx mex o pa nê aa hkaga hkêt ã mê kãm karõ. Nê nhýrmã Jesus akupýn kaxkwa rúm mê pahpê hkwýjê hwýr wrýk nê ma akupým amnhî kõt mê pahto àpirja nhũm mê kãm harê. Ña na pre mê kãm mêmoj jarê nê hã kagã anê nê mê kãm:

¹ Pa mê apê Tesarõn kamã Jesus kwý hã axpên wýr mê apikuprõnh xwýnhjaja? Xã mê amex na ka mê apa? Ixpê Pawre na pa mê awýr kagãja nhîpêx nê mê awýr kumê. Siras mê Ximotre mê pa mê awýr kumê. Mê pahpê Mëpanhîpêxã maati Tirtüm mê Pahihti Jesus Kris wa hkwý jakamã na pa htem mê ato Tirtüm wýr rãhã ho ri ixpa. Kot mê akutã nojarê rãhã nhũm mê ajamakêtkati nê axãmnhîx mê apa kaxyw.

²⁻³ Nã mêmoj kêt. Na pa htem mê amã ijamaxpêr nê mê anhý hã ixkînh nê ixpa hãmri nê mê awýr kagãja mê. Na pa htem mê ato Tirtüm wýr rãhã ho ri ixpa nê kãm mê ajarênh o:

—Pa Tirtüm. E mãn ka Tesarõn kamã akrajê pumu. Æm hãmri na ka pre tanhmã mê hkrã hto nhũm mê akõt amnhî nhîpêx mex o pa. Na htem amnhî kaxyw akõt hamaxpêr týx nê. Jao mê piitã mê kamã ukaprî kamã tanhmã mê ho ajuta hto ho pa. Nhũm mê kãm mê ixkurê xwýnhjaja Pahihti Jesus Kris ã tanhmã mê ho ho pa htã nhũm mê tee ri amnhî kukamã hamaxpêr o hkaprî nê Jesus mê war akaga hkêt nê. Arî war anhý hã amnhî to htýx nê Pahihti Jesus kutêp tanhmã kãm amnhî nhîpêx to ho pa. Æm hãmri na htem ã amnhî nhîpêx anê Tirtüm. Na pa htem mê kot ã amnhî nhîpêx anhýrja mã ijamaxpêr nê ixkînh nê.

Anhýr o pa htem mê ato kuwý.

⁴ E Kris kõt ixkwýjaja. Nã Tirtüm kãm mê ajapê jakamã na pre amnhîm mê arê. Kot mê ato hkra nhũm nhýrmã kuri mê amex nê afír tùm nê apa ho apa kaxyw. Ra mê ixte ja hã mê ajarênh mar mex.

*Mê piitã mê kot Tesarõn nhõ xwýnhjê
jarênh mar ã mê harênh*

⁵ Nê na pa prem ma mê awýr mô nê mê amã Jesus jarênh o mê akõt ixpa. Kot mê panê tanhmã amnhî nhîpêx to hã harênh o ri mê akõt ixpa. Nom pa mê amnhî krã hkõt mê amã ixujarênh kêt nê. Æm Tirtüm Karõ nhý hã na pa prem hihtýx xã ho tanhmã mê amã ixkapêr to ka prem mê inhma nê mê ixkõt ajamaxpêr kurê kumrêx. Na pa prem tãm amnhî nhîpêx o ri ixpa ka mê ja hã mê ixpumunh o ri mê ixkõt apa.

⁶ Tã Jesus kõt amnhî xunhwý nê hkõt amnhî nhîpêx mex nê. Nê mê ixkõt amnhî nhîpêx mex nê. Mê kot Jesus ã tanhmã mê ato htã ka htem Tirtüm Karõ nhý hã akînh nê hkõt amnhî nhîpêx mex rãhã ho ri apa.

⁷ Tã nhũm pika pé Masetõn mê Gres wa kamã Jesus kõt mê pahkwýjaja ã mê ate amnhî nhîpêx anhýr ã mê ajarênh ma nê mê apyrã nê ã amnhî nhîpêx anhýr o pa.

⁸ Na ka prem tanhmã Jesus kot mê panê amnhî nhîpêx to hã harênh o ri mê hkõt apa nhũm mê piitã mê akapêr ma. Nom mê tapxipixjaja mar kêt nê. Na mê ra ohtõ nê mê ajarênh ma nê mê apyrã nê ma mê kãm Jesus jarênh o pa. Ra mê ate Jesus kõt amnhî xunhwýr ã amnhî jarênh o ri apa nhũm mê piitã kot mê amar jakamã mê pajaja na pa htem mê kãm ã mê ajarênh anhýr kêt nê. Mo kaxyw? Ra mê kot mê ajarênh mar mex kênã.

⁹ Na pa htem nhýri krî hõ hwýr pøj nhũm mê ixpumu nê ra mê tãmjaja mê inhmã mê ajarênh kurê kumrêx. Nê mê ajarênh o:

—Kwa Tesarõn kamã Kris kõt mê pahkwýjaja na xep kãm mê akînh nê. Amnepêr na pre htem amnhîm sãnti nhîpêx nê kêt mêhpãm ã harê nê amnhî to hwýr o pa. Tã ka xep prem ma mê hwýr mô nê mê kãm Tirtüm kapêr jarê nhũm mê ama nê Tirtümja sãnti rom Æm hãmri hã omunh kurê kumrêx. Hãmri nê gryk ã sãnti kaga hpa nê Tirtüm kõt amnhî xunhwý nê hkõt pix mã amnhî nhîpêx mex o pa.

¹⁰ Nê amnhî wýr Tirtüm Kra kamã hamak rãhã ho ri pa. Anê.

Æm hãmri na ka htem amnhî wýr kamã hamak rãhã ho apa. Na pre ty nhũm Hipêêxã Tirtüm akupým ho htír. Tã koja nhýrmã akupýn mê pahwýr kumê nhũm akupýn mê pahwýr wrý. Hãmri pu mê Æm pix kukwak ri mê kot amnhî xã htýx kãm hamak o pa htüm xãta wýr papa hkêt nê.

2

*Pawre kot amnhî jarênh
Sikün Korõt 1.12, 4.1-6*

¹⁻² Nê kormã mê awýr mê inhmõr kêt ri na pa prem kormã Piripos nhõ xwýnhjê mã Tirtüm kapêr jarênh o ri mê hkõt ixpa. Nom nhũm mê hkwýjaja kãm mê inhmar prãm kêt nê. Na prem Jesus ã mê inhmã kapêr

punuj nē mē inhīpēx kati pa prem amnhī xā htýx kamā ijamak o mē hkôt ixpa. Na ka prem ja hā mē ijarēnh ma. Ā mē kot mē inhīpēx anhýr tā pa mē tee ri amnhī kukamā ijamaxpēr pē Tirtūm kapēr jarēnh kaga hkēt nē. Na pa prem arī mē kām Jejus kot tanhmā mē panē amnhī nhīpēx to hā harēnh o ri mē hkôt ixpa. Tā mē awýr inhnojarēt nē Tirtūm nhý hā amnhī to htýx nē ma mē awýr mō. Hāmri nē mē amā tanhmā Jejus jarēnh to ho ri ixpa. Ka prem mē inhma hāmri nē axohtō nē hkôt amnhī xunhwý.

³ Nom pa prem ixēx rom tanhmā mē amā ixkapēr to hkēt nē. Rý mē inhmā mēmoj prām xāj mē ano kupyrr pē mē amā ixkapēr kēt nē.

⁴ Rý mē ate mē ixkapēr mar nē mē inhmex ā mē ijarēnh kaxyw pa tanhmā mē amā ixkapēr to hkēt nē. Ām Tirtūm kot mē inhmar nē tapxipix mē inhmex ā mē ijarēnh pix prām xāj na pa prem mē amā kapēr jarēnh o ri mē akôt ixpa. Tirtūm tapxipix na hte tanhmā mē pakute hkôt mē pahpumunh rāhā ho pa. Tām na pre mē ixte kapēr jarēnh o ri ixpa kaxyw mē ixunhwý.

⁵ Xān pa prem mē ijakwa nhīkjē ho mē ate tām amnhī nhīpēx ā mē ajarē hāmri nē mē ijakwa nhīkjē ho mē ato ixkapēr punuj nē? Nā na pa prem ā amnhī nhīpēx anhýr kēt nē. Na pa prem ixkatāt kôt mē ate amnhī nhīpēx ā mē apumunh kôt tanhmā mē ajarēnh to ho ri ixpa.

Nē xā mē ate mē ixkapēr mar nē akīnh nē hpānhā mē inhmā amnhīrer kaxyw na pa prem mē awýr mō nē mē amā Jejus kapēr o mē ajahkre? Nā na pa prem kàxpore prām xāj mē amā ixkapēr kēt nē. Tirtūm kot ja kôt mē ixpumunh mex.

⁶ Rý xā mē ate mē inhmex ā mē ixto jarkrar kaxyw na pa prem mē awýr mō? Nā māānēn ja kaxyw kēt. Ā mē ate mē ijarēnh anhýr prām xāj na pa htem Tirtūm kapēr o mē ajahkre ho ri ixpa hkēt nē.

⁷ Rý xān pa pre mē awýr mō nē mē amā amnhī jarēnh o:

–E mē ixte Jejus nhý hā ixkapēr o ixpa xwýnh jakamā kot paj mē amā tanhmā ixkapēr to ka mē inhma nē hpānhā mē inhmā amnhīre.

Anhýr o mē amā ixkapēr? Nā na pa pre ā mē amā ixkapēr anhýr kēt nē. Na pa prem te mē katorxā kot hkrajē nhīpēx pyràk o mē anhīpēx nē amarī mē ajahkre ho ixpa nē mēmoj tā mē awýr kēt nē.

⁸ Mē inhmā mē akīnh jakamā na pa prem mē amā ixprī hā Tirtūm kapēr piitā harēnh par o mē akôt ixpa nē mē kot ja hā tanhmā mē ixto pymaj tee ri amnhī kukamā ijamaxpēr o ri ixkaprī hkēt nē. Ām ixāmnhīx ri tanhmā Jejus kot mē panē amnhī nhīpēx to hā harēnh o mē akôt ixpa.

⁹ Mē apē mē ixkwý jakamā na pa prem tanhmā mē amā ixkapēr to hpānhā mē ixàpkur xā rý mēmoj tā mē awýr kēt nē. Na pa prem mē pamjaja mēmoj tā ixàpēnh pē mē amā ixkapēr o ri ixpa. Nē ixàpēnh rūnh kumrēx. Arīgro hā nē kamāt kām. Mān arī mē ate ā mē ixte amnhī nhīpēx anhýrja ā anohtýx japēr ko.

¹⁰ Na pa prem tām amnhī nhīpēx o mē akôt ixpa. Tirtūm kām hprām xā hkôt. Jao tanhmā amnhī to mex to rāhā ho ri ixpa ka prem amnhī tā mē ixpumu. Nhūm Tirtūm haxwýja ja hā mē ixpumu.

¹¹ Na pa pre mē apē mē ixkra pyràk mē anhīpēx o ri mē akôt ixpa.

¹² Jao mē amā ixkapēr mex nē. Nē mē akapri nē apa xwýnhjaja pa prem akupým mē ajamaxpēr o mē axihtýx hāmri nē mē apiitā mē amā ixkapēr nē mē amā:

–Kwa kēr ka mē Tirtūm kôt amnhī nhīpēx mex rāhā ho ri apa nē aa hkaga hkēt nē. Anē.

Tirtūm tām na pre amnhī wýr mē pahwý pu prem hkôt amnhī xunhwý. Tā koja nhýrmā amnhī wýr mē pahto api pu mē Kra Jejus kukwak ri wa kuri pamex kumrēx nē ri papa ho papa. Jakamā kwa kēr ka mē hkôt amnhī nhīpēx mex rāhā ho ri apa.

Jejus kwýjaja kām Jejus kôt amnhī xunhwýr hkēt xwýnhjē pyma hkēt

Atre 17.1-9

¹³ Nē ma mē awýr mē inhmōrta ā na pa prem mē amā Tirtūm kapēr jarēnh o ri mē akôt ixpa ka prem mē inhma nē mē ixte amnhī krā hkôt mē ixkapēr ā mē ixkamnhīx kēt nē. Na ka prem ām hāmri mē ixte Tirtūm kapēr jarēnh ā mē ixpumunh kuré kumrēx nē amnhī kaxyw hkôt ajamaxpēr nē Jejus mē Hipēēxā wa hkôt amnhī xunhwý. Jakamā na pa hte mē amā ijamaxpēr nē mē anhý hā ixkīnh nē. Hāmri nē Tirtūm mā mē anhý hā ixkīnh jarēnh o ri ixpa. Nā na ka htem arī Tirtūm kapēr kôt amnhī nhīpēx mex nē.

¹⁴ Nhūm hte mē akwýjaja tee ri ja hā mē apumu nē Jejus ā mē atomnuj nē. Nom mē kapxipixjaja ā mē anhīpēx anhýr kēt nē. Jutej kamā Ijaew kwýjaja na prem mē apyrā nē Jejus kôt amnhī xunhwý nhūm mē hkwýjaja tee ri ja hā mē omu nē hā mē hipēx kati ho pa.

¹⁵ Amnepēm Ijaew na prem Tirtūm nhý hā mē kām kapēr o mē pa xwýnhjē homnuj nē mē hkwýjē hpar o pa. Hāmri nhūm hpānhā mē hkanrēhā mē htāmnhwýjaja mē urāk nē Pahihti Jejusja pī. Tā jarāhā māānē ā Jejus ā mē panhīpēx anē nhūm Tirtūm tee ri mē pahtā mē omu nhūm ja kēp omnuj týx kumrēx nhūm mē pahtā mē kamā gryk nē.

Na hte mē apē Ijaew kēt xwýnhjē ho hkra nhūm Ijaew kām ja prām kēt

¹⁶ jakamā na htem mē akwý kot Tirtūm kōt amnhī xunhwýr pymaj mē anē mē ixkurē nē mē inhmā:

—Kwa Ijaew kēt xwýnhjē mā Tirtūm kapēr jarēnh kēt nē. Ja mex kēt. Anē.

Mē ate Jejus kōt amnhī xunhwýr nē nhýrmā Tirtūm wa kuri atír tūm nē apaja mē kām hprām kēt jakamā na htem ā mē anē àmnār o pa anhýrja o amnhī tomnuj nē. Mē kot amnhī tomnuj tỳx o mē pa xwýnh jakamā na Tirtūm mē kamā gryk nē. Kōja nhýrmā mē kot amnhī xā htỳx kamā hamak tūm xā hwýr mē rēnh pa.

Pawre akupým Tesarōn nhō xwýnhjē hwýr hkrā hā harēnh

Atre 17.10-13

¹⁷ Nē ma mē awýr mē inhmōr tā mē anhō krī kamā mē kēp Kris kwý hkēt xwýnhjaja na pre mē ixpumu nē mē anē mē ijano pa prem ijapōj nē hpānhā ma nhýhým krī hō hwýr ixa. Nom arī mē amā ijamaxpēr rāhā nē mē ato ijamak o ri ixa nē xatā akupým mē awýr ixkrā.

¹⁸ Na pa prem inhmā akupým mē awýr inhmōr prām tỳx nē. Ixpē Pawre na pa pre xatā mē awýr ixkrā htā nhūm Satanasti tanhmā mē anē ixpē amnār to pa kormā mē awýr inhmōr kēt nē. Ām tee ri inhmōr prām kaprý.

¹⁹⁻²⁰ Mē inhmā mē akīnh tỳx. Mē ate Tirtūm kōt amnhī nhīpēx mex jakamā kōja nhýrmā Pahihti Jejus akupým mē pahwýr wrý pa mē akuri xa nē kām mē ajarēnh o:

—Pa Pahihti. E Tesarōn nhō xwýnhjē pumu. Na ka pre mē hwýr inhmē pa mē hwýr mō nē mē kām ajarē nhūm prem inhma nē amnhī kaxyw akōt hamaxpēr tỳx nē akōt amnhī xunhwý. Tā na htem akōt tām amnhī nhīpēx rāhā ho pa.

Anhýr o kām mē ajarē nē mē anhý hā ixkīnh tỳx kumrēx.

3

Pawre kot Tesarōn wýr Ximotre mēnh ā harēnh

Atre 17.14-15, 18.5

¹⁻⁵ Nē kormā mē akōt ixa ri na pa pre Kris kwý hkēt xwýnhjaja kot Kris ā tanhmā mē atomnuj to hkukamā mē amā mē harē ka prem mē inhma. Na htem ā Kris ā mē pahkurē xwýnhjaja mē panhīpēx anhýr o pa. Tā nhūm prem ā mē anhīpēx anē pa mē ajarēnh ma nē tee ri mē akukamā ijamaxpēr nē axpēn mā mē ajarēnh o:

—Hēxta waa nē. Kwa mē kot Jejus ā tanhmā mē homnuj toja mýrapē mām mē tee ri amnhī kukamā hamaxpēr nē Jejus kaga rý ko. Mān ra Satanasti tanhmā mē kām Jejus o hēx to nhūm mē kuma nē tanhmā hamaxpēr to nē hkaga. Kwa mān pu prem

ām mē kām Tirtūm kapēr jarēnh kaprý nā? Anē.

Hāmri nē tee ri mē akukamā ijamaxpēr nē mē awýr Ximotre mēnh kaxyw nē kām:

—Mān ra Tesarōn nhō xwýnhjaja Jejus ā tanhmā mē homnuj to nhūm mē amnhī xā htỳx kamā hamak o ra tee ri amnhī kukamā hamaxpēr. Kwa ma mē hwýr mō nē ja hā mē omu. Hāmri nē mē kot Kris kōt amnhī xunhwýr tỳx kaxyw mē hamaxpēr o axihtỳx. Hāmri nē akupým wa ixwýr mō nē wa inhma tanhmā mē harēnh to. Kot paj Siras mē wa akutēp jar Atenas kamā wa arīk. Anē.

Hāmri nē mē awýr kumē. Ximotre na hte Siras mē wa inhīkō hā mē kām Tirtūm kapēr jarēnh o pa. Nē Kris kot tanhmā mē panē amnhī nhīpēx toja nhūm wa inhīkō hā mē kām harēnh o pa. Tā pa pre mē awýr kumē nhūm ma mē awýr mō pa Siras mē wa Atenas kamā kutēp arīk.

Ximotre akupým mōr nē Pawre mā mē harēnh

⁶ Tā nhūm ra ham akupým mē arūm wa ixwýr mō nē wa inhma tanhmā mē ajarēnh to pa wa mē ajarēnh ma nē ixkīnh nē. Na ka xep htem arī amnhī kaxyw Kris kōt ajamaxpēr tỳx rāhā nē. Jao mē amā mē piitā mē hkīnh nē tanhmā mē ho mex to ho ri apa. Nē arī mē inhmā ajamaxpēr nē ixpyrā nē mē amā mē ixpumunh prām o ri apa.

⁷ Nā ām hāmri na ka htem ā amnhī nhīpēx anē. Na pa wa ra jar ixpunuj nē ixa nē Kris ā amnhī xā htỳx kamā ijamak tā mē ajarēnh ma nē tām ijamaxpēr.

⁸ Tesarōn nhō xwýnhjaja kot Kris ā tanhmā mē anhīpēx to htā ka mē arī hkōt amnhī xunhwýr tỳx rāhā nē. Pa wa mē ajarēnh ma nē mē anhý hā ixkīnh pē tanhmā Pahihti Jejus mā amnhī nhīpēx to ho ri ixa.

⁹ Nā na pa hte wa mē anhý hā ixkīnh nē. Nē xatā Tirtūm mā mē ajarē nē kām:

—Pa Tirtūm. Nā ām hāmri na ka pre amnhī kōt Tesarōn kām akwýjē xunhwýr tỳx nē nhūm htem akōt amnhī nhīpēx mex rāhā ho pa. Ām hāmri na ka hte ā mē hipēx anē. Na pa hte mē kot amnhī nhīpēx mā ijamaxpēr o ri ixa nē ixkīnh nē.

Anhýr o kām mē ajarē.

¹⁰⁻¹¹ Nom kām ja pix jarēnh kēt nē. Na pa hte wa māānēn arīgro hā nē kamāt kām amnhī to Mēpanhīpēxā Tirtūm mē Pahihti Jejus Kris wa hwýr kām ixihtỳx rāhā ho ixa nē wa kām:

—Kwa Tirtūm mē Jejus wa. Na pa wa ra inhma Tesarōn wýr inhmōr nē mē pahkwýjē pumunh prām tỳx nē. Kormā mē kot akapēr jatur xā mar kēt. Tā wa inhma akupým mē hwýr wa inhmōr nē mē kām akapēr jatur xām mēnh prām. Mē kot mar nē akōt amnhī nhīpēx mex o pa kaxyw. Kwa

xàt ka wa akupÿm mē hwÿr wa inhmē nà? Anē.

Na pa hte wa ā amnhī to wa hwÿr rāhā ho ixpa anē. Tā koja wa akupÿm mē awÿr wa inhmē pa wa ma mē awÿr inhmōr kurē kumrēx.

¹² Koja Tirtūm tanhmā mē akrā hto ka mē amā axpēn kīnh pē tanhmā axpēn to ajuta hto ho ri apa. Nē mē amā akwÿjē hā ma ho te mē kam amā amnhī tā ma pyrāk o ri apa. Ā kot kaj mē apiitā axpēn nhīpēx anē. Te wa inhmā mē akīnh pē tanhmā mē ato mex to pyrāk.

¹³ Koja Tirtūm ja kaxyw tanhmā mē akrā hto ka mē tām ajamaxpēr mex nē. Kēr kē Jejus nhÿrmā akupÿn wrÿ. Mē kot hkōt amnhī xunhwÿr xwÿnhjē mē ro hā akupÿn wrÿ. Hāmri ka mē Mēpanhīpēēxā Tirtūm kutā amnhī kukamē ajamaxpēr nē tām mē ate amnhī nhīpēx ā amnhī pumunh kōt akīnh nē apikunhar o kuri akuhē. No ri tee ri amnhī kamā ajamaxpēr nē ajakwamna-jre nē akuhē hkēt nē.

4

Tirtūm kām mēmoj prām ā harēnh Rōmān 13.11-14; Epes 5.3-14

¹ E Jejus kōt ixkwÿjaja. Na pa prem ma mē awÿr mō nē Tirtūm kapēr o mē ajahkre ho ri mē akōt ixpa. Mē ate mar nē Tirtūm kām hprām xā hkōt tanhmā amnhī nhīpēx to kaxyw. Ka prem mē inhma nē hkōt amnhī nhīpēx mex o ri apa. Tā kot paj axte ja hā tanhmā mē amā karō hto. Pahihti Jejus nhÿ hā axte mēmoj tā mē amā karō. Jakamā kwa kēr ka mē arī Tirtūm kapēr kōt pix mā ri amnhī nhīpēx mex nē ŷ hā amnhī to htÿx pē ā amnhī nhīpēx anhÿr o ri apa.

² Na pa prem ra Jejus nhÿ hā mē amā mēmoj tā karō. Mē ate hkōt amnhī nhīpēx prām xāj mē amā hā karō ka prem mē inhma.

³ Nā mē pahte tām amnhī nhīpēx o papaja na Tirtūm kām hprām. No kēt mē pahtÿx ri nhām mēnijē ho amnhīkati o papaja na kām hprām kēt.

⁴ Jakamā kwa kēr ka mē amyjaja aprō pix tānopxar o ri apa. No mē ri nhām mēnijē ho amnhīkati ho ri apa hkēt nē. Nē mē anijaja kēr ka mē amjēn pix tānopxar o ri apa. No mē ri nhām mēmyjē ho amnhīkati ho ri apa hkēt nē.

⁵ Jejus kwÿ hkēt xwÿnhjaja kot htÿx ri kām hprām xā hkōt mēnijē hwÿr mrar nē mē ho amnhīkati htā kēr ka mē ho mē urāk kēt nē. Kwarī ho kwarī.

⁶ ā mē kot amnhī nhīpēx anhÿr xwÿnhjaja koja Tirtūm nhÿrmā mē homnuj tÿx kumrēx. Na pa prem ra mē amā ja jarē ka prem mē inhma. Jakamā kwa kēr ka mē ā amnhī nhīpēx anhÿr o ri apa hkēt nē.

⁷ Xà na pre Tirtūm ā mē pahte amnhī nhīpēx anhÿr kaxyw amnhī wÿr mē pahwÿ nē mē pahto hkra? Nā ja kaxyw na pre mē pahto hkra hkēt nē. Ām mē pahte tām amnhī nhīpēx o ri papa kaxyw nē tām ri axpēn nhīpēx o ri papa kaxyw na pre mē pahto hkra.

⁸ Jakamā kot kaj mē atō ja hā mē inhma nē ām mē inhma nē arī ā amnhī nhīpēx anē. Hāmri nē mē pajaja mē ixkapēr nhīrōp axām kēt nē. Tirtūm kapēr nhīrōp kot kaj xa. Nē määnēn kot mē pahwÿr Karō mēnh xwÿnhjaja kapēr nhīrōp kot kaj xa.

⁹ Nē mē amā axpēn kīnh pē axpēn to mex o apa hprām xāj na pre Tirtūm tanhmā mē amā kapēr o amnhīrīt to ka htem ā axpēn nhīpēx anhÿr o ri apa. Jakamā kot paj mē axte ja hā tanhmā mē amā nē hkēt nē.

¹⁰ Na ka mē ra amā axpēn kīnh pē te mē kam amā amnhī tā ma pyrāk o axpēn nhīpēx o ri apa. Nē pika pē Masetōn kamā Kris kōt mē akwÿjaja ka mē määnēn amā mē hkīnh pē ā mē hīpēx anē. Tā kēr ka mē arī ā amnhī nhīpēx anhÿr rāhā nē.

¹¹ Kot kaj mē ā amnhī nhīpēx anē hāmri nē ajamakētkati nē axāmnhīx axāpēnh pix tānopxar o ri apa. Jao mē hakwa kamā nhām tanhmā mē hixi jarēnh to ho ri apa hkēt nē. Nē ām amnhī pix tānopxar o ri apa. Nē amnhī pa kukwak ri axāpkur kaxyw amnhīm axāpēnh mex o ri apa. Na pa prem ra ā ja hā mē amā karō anē.

¹² Kot kaj mē ā amnhī nhīpēx anē hāmri nē amā prām xāj axāhwÿr o ri apa hkēt nē. Nhūm Kris kwÿ hkēt xwÿnhjaja mē ate amnhī nhīpēx ā mē apumu nē axpēn mā mē ate tām amnhī nhīpēx xwÿnhjē hā mē ajarēnh kurē kumrēx.

Kris kwÿ htyk xwÿnhjē jarēnh

Matēwre 24.29-31; Wam Korūt 15.51-58

¹³ E Kris kōt ixkwÿjaja. Na ka xep mē tee ri Kris kōt akwÿ htyk xwÿnhjē hkukamā ajamaxpēr. Jakamā kot paj ixprī hā tanhmā mē amā mē harēnh to ka mē inhma. Nā Kris kwÿ hkēt xwÿnhjaja na htem ty nhūm mē hkwÿjaja tee ri mē hkukamā hamaxpēr o hkaprī nē. Mē htyk nē ma Jejus wÿr āpir kēt jakamā na htem mē mÿr pē hkaprī htÿx nē pa. No mē papajaja na pu htem ho mē urāk kēt nē.

¹⁴ Jejus na pre ty nhūm Tirtūm akupÿm ho htÿr. Tā ra ā kot hīpēx anhÿr jakamā koja nhÿrmā Jejus akupÿn wrÿ nē mē kot hkōt amnhī xunhwÿr nē htyk xwÿnhjē karō nhūm man amnhī kōt kaxkwa rūm mē o wrÿ. Na pu htem ā ja kot pajamaxpēr anē.

¹⁵⁻¹⁶ Na pre Pahihti Jejus inhma hkōt mē pahkwÿ htyk xwÿnhjē jarēnh o:

–Kot paj nhÿrmā akupÿn mē awÿr wrÿ ka mē ate ixkōt amnhī nhīpēx xwÿnh piitā ma ixkutā axāpir o mō. Nom kot kaj mē arī

atir nê apa xwýnhjaja akumrêx axâpir kêt nê. Kormã. Koja Tirtûm kapêr o mê wrýk xwýnh krãhtûmjaja Tirtûm mã pifti kakô. Kakôr tÿx pa ixkwý htyk nê hikwý xwýnhjê mã ixkapêr nê ixãmra kamã mê kumra. Nhûm mê hkarô akupÿn mê hwýr wrý nê mê kãm gjêx pa. Hãmri nhûm mê akupÿm htír nê kãnhmã hkrí hpa nê ma kumrêx ixkutã àpir o mô.

¹⁷ Hãmri ka mê ate ixkôt amnhí xunhwýr xwýnh arí mê atír nê apa xwýnhjaja ka mê hã ajêt nê mê atipxi nê ma ixkutã axâpir o mô pu mê kakrã kamã axpên kaxpa. Hãmri nê mê pahpimrãatã ma kaxkwam api nê inhô krí hwýr pôi. Kaj mê Tirtûm mê wa ixkuri amex kumrêx nê atír tûm nê apa ho apa. Anê.

¹⁸ ã Pahihti Jejus inhmã mê pakukamã mê pajarênh anê. Jakamã kwa kêr ka mê tee ri mê pahkwý htyk xwýnhjê hkukamã ajamaxpêr hkêt nê. ã ixujarênh anhÿrta ã anohtÿx pê axpên jamaxpêr o axihtÿx o ri axpên kôt apa.

5

Mê pahte akupÿn Jejus wrýk xã hã arígro pumunh kêt ã harênh

Matêwre 24.32-25.13; Wam Pêtre 3.8-13

¹⁻² Nê mê pahte Jejus akupÿm wrýk xã hã arígro pumunh kêt jakamã kot paj mê amã tanhmã hã kagã hto hkêt nê. Koja nhÿrmã akupÿn mê pahwýr nojarêt hãmri nê te kot mê ahkính xwýnh kot amnhí nhípêx pyrã nê mê pajaêr pê mê pahwýr wrý.

³ Jakamã koja kormã wrýk kêt ri nhûm Kris kwý hkêt xwýnh kot amnhí wýr kamã hamak kêt xwýnhjaja hãmri mex nê pa hã amnhí pumu nê hkính nê pa. Nê axpên mã kapêr o:

—Nã koja Tirtûm tanhmã mê pahto hkêt nê. Arí mê pamex nê ri mê papa kênã. Nã kot puj mê paxãmnhix ri pajamakêtkati nê ri papa ho papa.

Anhÿr o axpên mã kapêr rôm nhûm puh Jejus mê haêr pê akupÿn wrý. Hãmri nê ma mê kot amnhí xã htÿx kamã hamak o pa htûm xã hwýr mê rênh pa nhûm mê tee ri kêp hpimxur prãm kaprý. Te mê htujarô xwýnh kot amnhí nhípêx pyrã. Na htem mex nê pa htã hpijagri kaxyw ôhy xã htÿx kumrêx nê tee ri kãm ôhy xã hkêt prãm kaprý ho hikwý.

⁴ Nom mê kajaja kot kaj mê urã nê amnhí jaêr pê akupÿm wrýk kãm omu nê tee ri amnhí kukamã ajamaxpêr o akaprí hkêt nê.

⁵ Mê pahpê Jejus kwý jakamã na pu htem kapêr kôt ri tãm amnhí nhípêx o ri papa. Jao te mê pahte mê kêp Jejus kwý hkêt xwýnhjê kot amnhí nhípêx pyrã kêt.

⁶ Na htem mê pahkínhã akupÿn wrýk kukamã hamaxpêr kêt nê. Te htÿx ri mê ôt rãhã ho hikwý pyrã. Nom mê papajaja na pu htem akupÿn wrýk kamã pajamak o

papa pê kãm tanhmã amnhí nhípêx mex to rãhã ho ri papa.

⁷ Te kot ja pyrã. Na htem kamã kãm gôr nê mêmoj mã hamaxpêr kêt nê htÿx hikwý. Nê mê hkwyjaja kamã kãm axpã nê htÿx ri tanhmã amnhí tomnuj to ho pa. Jao hamaxpêr mex kêt nê. Tã mê kêp Jejus kwý hkêt xwýnhjaja hte mê urãk nê htÿx ri tanhmã amnhí tomnuj to ho pa nê akupÿn Jejus wrýk mã hamaxpêr kêt nê.

⁸ No kêt mê papajaja. Mê pahte hkôt amnhí xunhwýr xwýnhjaja. Kêr pu mê ho mê urãk kêt nê. Satanasti kãm mê pahte amnhí tomnuj prãm tã mê pahte kãm hprãm xã hkôt amnhí nhípêx pymaj kêr pu mê mêmoj punuj pê amnhí to htÿx rãhã ho ri papa.

Nê amnhí kaxyw Jejus kôt pajamaxpêr tÿx rãhã nê.

Nê mê pamã mê piitã mê hkính pê mê kutã panojarêt rãhã ho ri papa.

Nê nhÿrmã Tirtûm mê hkra Jejus wa kuri pahÿr tûm nê papa ho papa hkukamã mãn pajamaxpêr rãhã o ri papa.

Kot puj mê ã amnhí nhípêx anê hãmri nhûm Satanasti tee ri mê pahte amnhí tomnuj prãm xãj mê pahkrãm pajamaxpêr punuj jagiênh kaprý.

⁹ Xã na pre Tirtûm mê pakamã gryk kãm mê kot amnhí xã htÿx kamã hamak tûm xã hwýr mê pajanor kaxyw mê parê? Nã na pre ja kaxyw mê parênh kêt nê. ãm Pahihti Jejus Kris kukwak ri kot amnhí katut kôt mê pahte amnhí tomnuj rênh par nê mê pahto hkra kaxyw na pre mê parê.

¹⁰ Tã mêmo kaxyw na pre Krisja mê panê ty? Nã nhÿrmã Tirtûm mê wa kuri mê pamex kumrêx nê pahÿr tûm nê papa ho papa hprãm xãj na pre mê panê ty. Jakamã koja nhÿrmã akupÿm amnhí kôt ma mê pahto àpir kaxyw akupÿn mê pahwýr wrý pu mê amnhí kaxyw hkôt pajamaxpêr xwýnh piitã ma hkôt kaxkwa hwýr api hãmri nê Tirtûm wa kuri pamex nê pahÿr tûm nê papa ho papa. Kormã mê pahÿr ri mê papa xwýnhjaja nê ra mê htyk nê hikwý xwýnhjaja nhûm akupÿm mê ho htír. Hãmri nê mê pahto hpimrãatã amnhí kôt mê pahto àpir pa. Mê pahte hkôt amnhí xunhwýr xwýnh piitã koja Jejus nhÿrmã akupÿn wrý nê ã mê panhípêx mex anê.

¹¹ Tã ã kot anhÿr jakamã kwa kêr ka mê jam ajamaxpêr o apa pê axpên jamaxpêr o hihtÿx o ri axpên kôt apa. Nê Jejus kôt axpên jamaxpêr o hihtÿx o ri axpên kôt apa. Ra ã mê ate axpên nhípêx anhÿr tã kêr ka mê arí ho anhÿr rãhã ho ri apa nê aa hkaga hkêt nê.

Tirtûm kapêr o mê pajahkre xwýnhjê jarênh

Karatas 6.6; Wam Ximotre 5.17-19

12 Nē kwa Kris kōt ixkwýjaja. Na hte mē kot Tirtūm kapēr o mē ajahkre xwýnhjaja mē ajahkre mex pē Tirtūm mā mē ajamār mex o pa. Na htem ā mē anhīpēx mex anhūr rāhā ho ri mē akōt pa. Tā kwa kēr ka mē amnhī tā mē omu nē mē kapēr mar tỳx nē.

13 Nē mē hā apijaām pē tanhmā mē ho mex to ho apa.

Nē kwa kēr ka mē tām axpēn nhīpēx nē axāmhīx ri ajamakētkati nē axpēn kōt ri apa ho apa.

Mē pahte tanhmā Kris kōt mē pahkwýjē nhīpēx to hā mē pamā karō

Epes 4.1-6

14 Nē koja Kris kōt mē anhīō kām kaga nē pa ka mē ja hā omu nē kām anē kē ā amnhī nhīpēx anhūr kēt nē. Kē hpānhā amnhī xāpkur xā kaxyw āpēnh o pa.

Nē mē kām ma ho mē pa xwýnhjaja ka mē kām mē hamaxpēr o axihtỳx o ri mē hkōt apa.

Nē kormā amnhī kaxyw Jejus kōt mē hamaxpēr tohtuj anhūr xwýnhjaja ka mē tanhmā Jejus kōt mē ho mē axihtỳx to kē mē hkōt amnhī nhīpēx mex o pa.

E kēr ka mē ā mē axpēn nhīpēx anhūr o ri apa nē axpēn kamā agryk tokyx anhūr kēt nē.

15 Nē koja mēhō tanhmā atomnuj to ka mē ām omu nē amnhī tā tanhmā ho hkēt nē. Ām ho mex o ri apa. Nē mē piitā tanhmā mē ho mex to hpix kukamā ajamaxpēr rāhā nē.

16 Ā mē pahte amnhī nhīpēx anhūr o papaja na Tirtūm kām hprām.

Mē pahpē hkra hā pahkīnh rāhā papaja na kām hprām.

17 Nē mē pahte Tirtūm mā amnhī jarēnh rāhā ho papaja na māānēn kām hprām.

18 Nē tanhmā mē pakute htā arī Tirtūm mā mex o mex ā harēnh o papaja na māānēn kām hprām. Mē pahkīnh nē papa kamā kām mex o mex ā harē. Rỳ mē pahpunuj nē papa htā arī kām mex o mex ā harē. Rỳ nhūm mēhō tanhmā mē panhīpēx to htā pu mē arī kām mex o mex ā harē.

Ā mē pahte amnhī nhīpēx anhūr o papaja na Tirtūm kām hprām.

Mē pahte tanhmā Tirtūm Karō nhīpēx to hā mē pamā karō

19 Nē koja Tirtūm Karō mē amā mēmoj tā tanhmā kapēr o amnhīrit to ka mē ama nē hkōt amnhī nhīpēx kurē kumrēx. Rỳ mēhō mā tanhmā akapēr to kurē kumrēx. No kēr ka mē ama nē ām ama nē atỳx ri hā apa hkēt nē.

20 Rỳ nhūm mēhō Tirtūm Karō nhī hā tanhmā mē amā kapēr to ka mē ama nē agryk nē tanhmā ho akapēr punuj to hkēt nē.

21 Koja Tirtūm kapēr kōt tanhmā mē amā mēmoj jarēnh to nē ām hāmri Tirtūm Karō nhī hā harēnh ā amnhī jarē. Ka mē ama nē hkōt amnhī nhīpēx.

22 No koja Tirtūm kapēr kwým ri tanhmā mēmoj jarēnh to hāmri nē Tirtūm Karō nhī hā ja jarēnh kēt nē. Ām amnhī krā hkōt harē. Ka mē tee ri ama nē amnhī krā kamā kapēr xir tỳx kēt nē. Jao hkōt amnhī nhīpēx kēt nē.

Tanhmā Pawre kot mē ho Tirtūm wỳr to hā harēnh

Wam Tesarōn 3.3, 16

23 Nē na pa hte mē ato Tirtūm wỳr o ri ixpa nē kām:

—Pa Tirtūm. Nà ate mē inhmā mē ijamakētkati xā nhōr jakamā na pa htem anhī hā ixāmhīx ijamakētkati nē ri ixpa. Jakamā kwa kēr ka tanhmā Tesarōn kamā akwýjē ho kē mē amnhī to mex rāhā ri pa. Jao tām amnhī nhīpēx nē tām ri hamaxpēr rāhā nhūm Pahihti Jejus Kris akupýn mē ixwýr wrý.

Anhūr o mē ato kuwý.

24 Tā koja ā mē anhīpēx anē. Ra kot amnhī jarēnh xā hkōt. Ā mē anhīpēx anhūr kaxyw na pre amnhīm mē arē.

Kagā jatur xā

25 E Kris kōt ixkwýjaja. Kwa kēr ka mē amnhī xwar ixto Tirtūm wỳr o apa.

26 Nē kēr ka mē atar Kris kōt mē pahkwýjē piitā mē kām mē ijarē.

27-28 Nē kē Pahihti Jejus Kris mē akutā nojarēt rāhā ho pa. Ixte Pahihti nhī hā ā mē amā ixkapēr nē hā kagā anhūr jakamā kēr ka mē atar Kris kwýjē piitā mē kām kamā harē kē mē piitā ixkapēr ma.

Tā ām ja pix na hapēx. Ixpē Pawre na pa ā mē amā kagā nhīpēx nē mē awỳr mēnh anē.

Sikũn Tesarõn
Pawre kot Tesarõn kamã Jejus
kõt kwýjê hwýr wam kagã nê
mênh kõt hõ kagã nê mênh

Pawre na pre kagãja nhípêx nê ma Tesarõn kamã Jejus kõt hkwyjê hwýr kumê. Na pre hte Tesarõn kamã mê kãm Jejus ã mê hkurê xwýnhjaja Jejus ã tanhmã mê homnuj to nhũm mê amnhĩ xã htýx kamã hamak o pa. Hãmri nhũm Pawre mê harênh ma nê kagãja nhípêx nê mê hwýr kumê. Nê kamã mê kãm mê hamaxpêr o hihtýx. Nê mê kot arĩ Tirtũm kõt amnhĩ nhípêx mex o pa nê hamaxpêr kõt hamaxpêr o pa hã mê kãm karõ. Nê nhýrmã Jejus akupýn kaxkwa rũm mê pahpê hkrajê hwýr wrýk nê pika ho hapêx par ã mê kãm harê. Á na pre Pawre mê kãm kagãja kamã mê kãm ujarênh anê. Nê mê kãm:

¹ Pa Tesarõn nhõ xwýnh kot Tirtũm kapêr mar kaxyw axpên wýr mê apikuprõnh xwýnhjaja? Xã mê amex na ka mê apa? Ixpê Pawre na pa axte mê awýr kagã nhípêx nê kumê. Siras mê Ximotre mê pa mê awýr kumê. Nã mê pahpê Mëpanhípêxã maati Tirtũm mê Kra Jejus Kris kwý na pu mê.

² Jakamã na pa htem mê ato wa hwýr rãhã ho ri ixpa. Wa kot mê akutã nojarêr rãhã ka mê ajamakêtkati nê apa kaxyw. Nê mëmoj to mê akutã wa nojarêr rãhã ho pa kaxyw.

Tirtũm kot nhýrmã hkrajê nhípêx kati xwýnhjê homnuj týx ã harênh
Wam Pêtre 4.12-19

³ Nê na ka htem amnhĩ kaxyw Tirtũm mã ajamaxpêr týx mex o ri apa. Nê axpên kutã anojarêr rãhã nê. Na pa htem ã mê ate amnhĩ nhípêx anhýrja mã ijamaxpêr nê mê anhý hã ixkĩnh nê Tirtũm mã mê anhý hã ixkĩnh ã amnhĩ jarê.

⁴ Nê nhýhým ixpa nê nhýri krĩm agjê nê kamã Tirtũm kõt mê pahkwýjê mã mê ato amýra nê mê kãm:

—E pa mê amã Tesarõn kamã Kris kwýjê jarê ka mê inhma. Nã mê õ krĩ kamã mê hkwyjaja na htem Kris ã mê hipêx kati ho pa nhũm htem amnhĩ xã htýx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkõt amnhĩ nhípêx mex rãhã ho pa. Anê.

⁵ ã mê ate mê kutã amnhĩ nhípêx anhýr o apaja na hte Tirtũm hã mê apumu nê hkĩnh nê pa. Nê mê akukamã hamaxpêr o:

—Mê kot Ixkra Jejus ã tanhmã mê hipêx to ho pa htã ãm hãmri na htem mê kutã amnhĩ to htýx o pa nê mê umaj wa ixkaga hkêt nê. Na htem ã amnhĩ nhípêx anê nê mê kêp ixkra hã amnhĩ to amnhĩrit mex nê. Nã koja

mê nhýrmã wa ixri mex kumrêx nê htĩr tũm nê pa ho pa.

Anhýr o hamaxpêr.

⁶ Nê mê kot Kris ã mê anhípêx punuj xwýnhjaja koja Tirtũm nhýrmã mê atã mê homnuj týx nê nhũm mê amnhĩ xã htýx kamã hamak rãhã ho pa. Ám hãmri koja ã mê atã mê hipêx anê.

⁷⁻¹⁰ Koja Pahihti Jejusja nhýrmã man akupýn pika hwýr hirã htýx kãm wrý nhũm Tirtũm kapêr o mê wrýk xwýnh xihtýx xwýnhjaja man hkõt wrý. Koja mê wrý hãmri nê mê kot amnhĩ tomnuj xwýnhjê homnuj týx kumrêx. Jao ma mê kot amnhĩ xã htýx kamã hamak tũm xãta wýr mê rênh pa nhũm mê kamã htĩr tũm nê amnhĩ xã htýx kamã hamak rãhã ho pa ho pa. Koja ã Pahihtija amnhĩ nê mê kot hkõt amnhĩ xunhwýr kêt xwýnhjê rênh anê nhũm mê pahkĩnhã Tirtũm mê Krata wa kuri mex nê pa hkêt nê. Nê mê pahkĩnh ã wa mex o wa mex nê wa hihtýx o wa hihtýx ã wa omunh kêt nê. Koja Pahihti Jejus nhýrmã akupýn wrý nê ã mê panê mê hipêx anê. Koja wrý pu mê amnhĩ kaxyw hkõt pajamaxpêr xwýnhjaja amnhĩ wýr omu nê pahkĩnh nê. Hãmri nê amnhĩ nhĩ nyw ã amnhĩ pumu nê kãm:

—Héxta waa nê. Amex o amex Pahihti. Na ka pre mê inhnê ty hãmri nê mê inhmã mê inhi nyw gõ. Kot paj mê Tirtũm mê war ari inhmex kumrêx nê ixtĩr tũm nê ixpa ho ixpa. Ám hãmri na ka ã mê ixto mex anê. Nã amex kumrêx o amex kumrêx Pahihti. Anê.

Á kot puj mê pahpê hkwyjaja amnhĩ tã kãm mex o mex ã harênh anê. Ra mê ate mê ixkapêr mar nê hkõt amnhĩ xunhwýr jakamã kot kaj mê ixpyrã nê ã kãm mex o mex ã harênh anê.

Pawre kot Tesarõn nhõ xwýnhjê ho Tirtũm wýr ã harênh

¹¹⁻¹² Nê na pa htem mê ato Tirtũm wýr rãhã ho ixpa nê kãm:

—Pa Tirtũm? E Tesarõn kãm akrajaja na pa mê ho awý. Na ka hte Akra Pahihti Jejus Kris mê wa mê ho mex rax o apa. Jao amnhĩm mê arê nhũm mê ra kãm amnhĩ to mex prãm nê. Na htem amnhĩ kaxyw Jejus mã hamaxpêr rãhã pê mëmoj to axpên kutã nojarêr o pa. Jakamã kwa tanhmã mê hkrã hto kê mê akõt ã amnhĩ nhípêx anhýr rãhã ho pa. Kêr ka mê kot akõt amnhĩ nhípêx o pa hã mê omu nê akĩnh nê mê kãm mê mex ã mê harê. Nhũm mê ate tanhmã mê ho mex to hã amnhĩ tã apumu hãmri nê mê amnhĩ pyrã nê amã amex o amex ã ajarênh rãhã ho pa. Anê.

2

Kot amnhĩ tomnuj týx kumrêx xwýnh maati jarênh

Matêwre 24.23-25; Makre 13.14-23;

Rukre 21.20-24; Wam Juâw 2.18-19; Apokarip 13.1-18

¹ Nê koja nhÿrmã mê panhõ Pahihti Jejus Kris akupÿn wrÿ pu mê ma kutã api nê kakrã kamã hkaxpa. Jakamã kwa Jejus kôt ixkwÿjaja.

² Koja mēhõ mê awÿr mō nê mê amã Jejus ra akupÿn wrÿk ã harēnh japēr. Rÿ tanhmã mê amã Jejus hpōx xã hã arÿgro jarēnh o hêx to nê mê amã:

—Kwa na ra Jejus akupÿn nojarēt. Koja tokyx akupÿn mê pahwÿr wrÿ. Semãn ja kamã rÿ ko. Apu hõ hã koja apu wrÿ rÿ ko.

Anhÿr o harē. Nê Tirtûm Karō nhÿ hã ã kot mê amã harēnh anhÿr ã amnhÿ jarē rÿ nhãm mēhõ kot ã kãm harēnh anhÿr ã harē. Rÿ pa ixte harēnh nê hã kagã hã ijarē. Nom kwa kēr ka mê kapēr ma nê ãm ama nê hkôt ajamaxpēr kêt nê. Rÿ ama nê tee ri amnhÿ kukamã ajamaxpēr kêt nê. Koja mēhõ ã mê amã Jejus tokyx wrÿk ã harēnh anē nê ãm amnhÿ krã hkôt ã harēnh anhÿr o hêx. Nom Tirtûm Karō nhÿ hã rÿ pa inhÿ hã rÿ nhãm Kris kôt mê panhõ nhÿ hã ã harēnh anhÿr kêt nê.

³⁻⁴ Jakamã kēr ka mê ãm mê kot harēnh o hêxja ma nê hkôt ajamaxpēr kêt nê. Kormã Pahihti Jejusja akupÿn nojarēt kêt. E kot paj ixprÿ hã mê amã ja jarē ka mê inhma. Nã kormã Pahihti akupÿn nojarēt kêt ri koja mê ohtõ rax kumrēx nê Tirtûm kutã amnhÿ xunhwÿ nê kãm hkurē ho pa. Nê amnhÿ tomnuj tÿx o pa. Hãmri nhũm ra kot amnhÿ tomnuj tÿx kumrēx xwÿnh maati ja amnhÿ to amnhÿrit. Nom na pre ra Tirtûm tanhmã kot hipēx to hkukamã hã amnhÿ jarē. Koja xep gaa nê ma mê kot amnhÿ xã htÿx kamã hamak tũm xata wÿr kumē nhũm kamã amnhÿ xã htÿx kamã hamak o pa rãhã nê pa ho pa.

Tã nom kormã Pahihtija akupÿn wrÿk nê ma hwÿr mēnh kêt ri koja mê piitã omu nê kēp Mēhpãm maati pixi hã harēnh kaxyw mê kēp mê õ sãnti piitã hkrakrak pa. Nê mê kot mēmo karō ho amnhÿ pãm ã harēnh xwÿnhja nhũm piitã hkrakrak pa. Hãmri nê axtem nê Tirtûm mã amnhÿ jarēnh xã hã ixkre jatur xã kamã hitom wÿr axã nê kamã nhÿ nê hêx rom mê piitã mê kãm kēp Tirtûm ã amnhÿ to hêx nê mê kãm:

—E mê amnē ixpumu. Ixpē mê anhõ Tirtûm na pa. Pa kot kaj mê inhãm inhmx o inhmx ã ijarē. No kēr ka mê anhõ sãnti ho apãm o apa hkēt nê. Kwarÿ ho kwarÿ. ãm paxipix ixpē Mēapãm maati nê paxipix ixpē mê anhõ Tirtûm.

Anhÿr o amnhÿ to hêx.

⁵ Na pa pre arÿ mê akõt ixpa ri ã mê amã harēnh anē. Mãn arÿ mê ate ja hã anohtÿx rÿ ko.

⁶ Nom kormã ã kot amnhÿ nhÿpēx anhÿr xã hã arÿgrota kormã kator kêt. Mēhõ kormã

kot kēp ãmnar jakamã nhũm kormã kator kêt nê. Ra mê ate kēp ãmnar xwÿnhja jarēnh mar. Tã koja hpōx xã hã arÿgro kato nhũm kēp ãmnar xwÿnhnta kãm pry kaprã nhũm rÿ kormã mō.

⁷ Nom na hte ra hpimxur pē Tirtûm nê mê piitã mê hkurē ho pa. Mê kot Tirtûm kôt amnhÿ xunhwÿr pymaj tanhmã nê mê ho ho pa. Nom kormã kēp ãmnar xwÿnhja kēp ãmnar jakamã nhũm hte mê noo mã tanhmã mê ho hkēt nê. Tã koja Tirtûm nhÿrmã kēp ãmnar xwÿnhja mã anē nhũm kuma nê kãm ure nhũm rÿ kormã amnhÿ to amnhÿrit nê mê piitã mê noo mã mō nê Tirtûm nê tanhmã mê kãm hêx to ho pa.

⁸⁻¹² Koja kato nê Satanasti mê wa mê piitã tanhmã mê nokupyr to ho ri mê hkõt pa. Nê hêx rom mê kãm aa mê kot mēmoj pununh kêt kwÿ ho anhÿr o ri pa. Koja wa hêx rom te Tirtûm kot amnhÿ nhÿpēx pyrãk o ã amnhÿ nhÿpēx anē. Hãmri nhũm mê kot Jejus kôt amnhÿ xunhwÿr kêt xwÿnhjaja ja hã wa omu nê wa hkôt hamaxpēr kurē kumrēx. Nê ãm hãmri wa kapēr ã wa hkamnhÿx. Kop apu ra mê kot Tirtûm kapēr mar nê hkôt amnhÿ xunhwÿr ronhÿx ra Tirtûm amnhÿ tã mê omu nê mê ho hkra. Nom koja mê kãm kapēr mar prãm kêt nê. ãm wa kot amnhÿ to hêx o wa pa xwÿnhnta kôt pix mã koja mê kãm amnhÿ nhÿpēx prãm.

Ja mÿrapē koja Tirtûm tee ri ja hã mê omu hãmri nê mê nê wa kot amnhÿ tomnuj tÿx xwÿnhnta wa omunh kêt nhũm wa tanhmã mê kãm amnhÿ nhÿpēx to nhũm mê wa omu nê wa hkõt hamaxpēr kurē kumrēx. Hãmri nê wa gryk ã Tirtûm kaga jakamã nhũm nhÿrmã mê kot amnhÿ xã htÿx kamã hamak tũm xaja wÿr mê rēnh pa.

Koja Satanasti mê kot amnhÿ tomnuj tÿx kumrēx xwÿnh maati ã hêx rom tanhmã mê no kupyr to anhÿr o pa rãhã nhũm Pahihti Jejusja hirã rax kãm akupÿn mê pahwÿr wrÿ. Hãmri nê kot amnhÿ tomnuj tÿx kumrēx xwÿnh maati ã amÿnē nhũm mê kãm hpÿr kurē kumrēx nhũm hapēx. Koja ã amnhÿ nhÿpēx anē.

Tirtûm kot tanhmã mê pahto mex to hã harēnh

Rômãn 8.28-30; Wam Tesarôn 2.13, 5.23-24

¹³ Nê amnepēm kormã mēmoj kêt ri na pre Tirtûm amnhÿm mê arē. Mê ate kapēr mar nê hkôt amnhÿ xunhwÿr nhũm kot mê ato hkra kaxyw mê arē. Kãm mê ajapēē. Na pre mê awÿr amnhÿ Karō rē nhũm mê akarõ mã agjē nê tanhmã mê ajamaxpēr to ka mê ÿ hã tãm amnhÿ nhÿpēx rãhã ho ri apa. Na pa htem ja hã mê amã ijamaxpēr nê mê anhÿ hã ixkÿnh kãm Tirtûm mã mê ajarēnh o ri ixpa.

¹⁴ Na pre mē awyr mē ixrē. Mē ixte mē awyr ixa nē mē amā tanhmā Jejus kot mē panē amnhī nhīpēx to hā harēnh o ixa kaxyw. Mē ate mē inhmar nē Jejus kōt amnhī xunhwyr nhūm Tirtūm kot Pahihti Jejus Kris o mex pyrā nē tanhmā mē ato mex to kaxyw.

¹⁵ Jakamā kwa kēr ka mē ra mē ixte wam mē awyr kagā mēnhā kamā harē nē mar t̄yx nē. Nē mē akōt mē ixa ri tanhmā mē ixte mē ajahkre htoja mā ajamaxpēr mex nē hā ano ht̄yx nē hkōt amnhī nhīpēx rāhā ho ri apa. Jao Jejus kōt amnhī nhīpēx mex o ri apa Kris kōt ixkw̄yaja.

¹⁶ Mēpanhīpēxā maati mē Pahihti Jejus Kris wa kām mē pajapē ht̄yx kumrēx. Na hte wa tanhmā mē pajamaxpēr o hiht̄yx to ho pa pu mē wa ŷ hā tām pajamaxpēr o ri papa. Nē wa ŷ hā nh̄ymā wa kuri pamex nē pah̄tūr tūm nē papa hkukamā pajamaxpēr kapr̄y ho papa hkēt nē.

¹⁷ Na pa htem mē ato wa hw̄yr o ixa nē wa kām:

—Pa Tirtūm mē Jejus wa? Kwa kēr ka wa tanhmā Tesarōn kamā akrajē mā mē hamaxpēr o hiht̄yx to kē mē war anh̄y hā tām amnhī nhīpēx nē tām hamaxpēr. Jao kapēr mex rāhā nē pa ho pa. Anē.

3

Tanhmā mē pahte axpēn to Tirtūm w̄yr to hā kot mē pamā karō

Korosē 4.2-4

¹ Nē kwa Kris kōt mē ixtō nē ixtōxaja. Kēr ka mē amnhī xwar mē ixto Tirtūm w̄yr rāhā ho ri apa. Mē ixte krī piitā hkōt mē kām Jejus jarēnh o ri mē hkōt ixa nhūm mē kot mē inhmar nē amnhī kaxyw Jejus kōt hamaxpēr kaxyw. Jao mē apyrā nē hkōt amnhī nhīpēx mex o pa kaxyw.

² Nom koja mē piitā ā amnhī nhīpēx anh̄yr kēt nē. Mē hk̄w̄yaja kām Jejus jarēnh mar prām kēt jakamā kwa mē ixto Tirtūm w̄y kē mē inhnē mē omunh mex nē nhūm mē Jejus ā tanhmā mē ixto hkēt nē.

³ Nē koja Pahihti tanhmā mē akrā hto ka mē ajamaxpēr mex nē ŷ hā hkōt amnhī xunhwyr t̄yx o ri apa. Jakamā nhūm Satanasti mē ate amnhī tomnuj hprām x̄aj tee ri tanhmā mē anhīpēx to kapr̄y nhūm Pahihti mē anē omunh mex nē. Ra kot mē atā amnhī jarēnh xā hkōt.

⁴ Koja ā mē anē hipēx anē ka mē ŷ hā tanhmā mē ixte mēmoj tā mē amā karō xā hkōt amnhī nhīpēx mex o ri apa.

⁵ Tā kē Pahihti tanhmā mē akrā hto ka mē Tirtūm pyrā nē mē piitā mē kamā axukapri ho ri apa. Nē Pahihti Kris pyrā nē mēmoj punuj kutā amnhī to ht̄yx nē. Jao hkōt amnhī nhīpēx mex rāhā ho ri apa.

Mē kām kaga xw̄ynh̄jē jarēnh

Wam Korit 4.12; Epes 4.28; Wam Tesarōn 4.9-12

⁶ E kot paj hpānhā Kris kōt mē pahkw̄y kām kaga xw̄ynh̄jē jarē ka mē inhma. Pahihti Jejus nh̄y hā kot paj mē amā tanhmā mē harēnh to. Nā koja mē akw̄yaja kām kaga nē amnhīm mēmoj tā àpēnh kēt japēr. Nē mē ixte mē axàpēnh mex o apa hā mē amā karōja kuhpa hā amnhīm mēmoj tā àpēnh kēt japēr. Koja mē ā amnhī nhīpēx anē ka mē ja hā mē omu hāmri nē mē hkōt ri apa hkēt nē.

⁷⁻⁸ Xā mē pajaja na pa prem ma mē awyr mō nē mē akōt inhmā kaga nē mēmoj tā ixàpēnh kēt nē ri ixa? Nā na pa prem mē apa kukwak ri ixàpkur pymaj ixàpēnh rūnh nē amnhī pa pix kukwak ri ixàpkur o ri ixa. Na ka prem mē inhmā mēmo mē apkur xā ho mra pa prem amarī amnhīm ham̄ynh nē hkur kēt nē. Na pa prem hpānhā mē amā amnhīre nē kormā kuku. Tā kēr ka mē ā amnhī nhīpēx anh̄yr o ri axpēn kōt apa nē amnhī pa pix kukwak ri apku. Nē mē amā kaga hā nhām akw̄yē hpa kukwak ri axàpkur o ri apa kēt nē.

⁹ Na pa prem amnhī pa pix kukwak ri ixàpkur o ri mē akōt ixa. Mē ate ja hā mē ixpumunh nē mē ixpyrā nē ā amnhī nhīpēx anh̄yr kaxyw. Nom mē ixte Jejus mā tanhmā mē ajahkre hto nhūm mē ate mē inhmar nē hpānhā mē inhmā mē ixàpkur xā nhōrja Jejus mā tanhmā kute hkēt tā pa prem ā amnhī nhīpēx anh̄yr kēt nē. Mē ate ja hā mē ixpumunh nē mē ixpyrā nē ā amnhī nhīpēx anh̄yr kaxyw na pa prem amnhī pa pix kukwak ri ixàpkur o ri mē akōt ixa.

¹⁰ Na pa prem mē amā ja hā karō ho:

—Koja mēhō kām kaga nē àpēnh kēt nē ka mē ja hā omu nē kām ō hkēt nē. Kwār māmri apkur kēt nē kām prām nē ri pa nē amnhī pumu. Anē.

¹¹ Tā xep ra mē akw̄yaja ā amnhī nhīpēx anē nē kām kaga nē àpēnh kēt nē amarī ri pa. Nē xep ht̄yx ri axpēn jakwa kamā nhām mē hixi ho rēr o ri pa.

¹² Kwa mē inhma Jejus kōt ixkw̄yaja. Kot paj Pahihti Jejus nh̄y hā mē amā mē kot ā amnhī nhīpēx xw̄ynh̄jē jarē ka mē inhma nē mē inhmar t̄yx nē. Kēr ka mē kām kaga xw̄ynh̄jē mā anē kē mē jam ure nē hpānhā àpēnh mex o pa. Jao mē apyrā nē amnhī pa kukwak ri apkur o pa. Kēr ka mē ā mē kām ixkapēr jarēnh anē.

¹³ Nē kwa kēr ka mē axpēn to mex o apata kaga hkēt nē.

¹⁴ E na pa mē ā Tirtūm nh̄y hā mēmoj tā mē amā karō nē hā kagā anē. Tā koja mēhō kamā harē nē kuma nē ām kuma nē hkōt amnhī nhīpēx kēt ka mē ja hā omu nē hkōt ri apa hkēt nē. Tokyx kot ja hā amnhī pumunh nē amnhī tā hpijaam kaxyw.

¹⁵ Nom arî Kris kôt kêp mē akwỳ jakamā kēr ka mē arî kêp mē atō rỳ atōx ā tām hipêx nē kām akapêr mex o ri apa. Nom te ho kêp mē akwỳ hkêt pyrāk o kām akapêr kêt nē.

Tanhmā Pawre kot mē ho Jejus wỳr to hā harēnh

¹⁶⁻¹⁸ Nē na pa hte mē ato Pahihti Jejus wỳr rāhā ho ixpa. Kot mē pamā mē pajamakêtkati xā nhōr jakamā na pa htem mē ato kuwỳ nē kām:

—Pa Pahihti? Kwa kēr ka Tesarôn kamā akwỳjê pumu nē mēmoj to mē kutā anojarêt rāhā ho ri mē hkôt apa. Kê mē hamakêtkati nē àmnhīx pa ho pa. Anē.

Tā ām ja pix. Ixpê Pawre na pa kagà jatur xā kamā inhīhkra ho amnhī nhīxi nhīpêx. Na hte kagà nhīpêx xwýnh inhmā ixkapêr ā kagà. Nē hā kagà hpa pa hpānhā hatur xā kamā pam inhīxi nhīpêx. Tā na hapêx.

Wam Ximotre Pawre kot Ximotre hwÿr kagà nê mênh

Pawre na pre kagàja nhîpêx. Kêp Jejus nhÿ hà hkrajê jahkre ho pa xwÿnhjê hô na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwÿjê jahkre ho pa. Hãmri nhûm Pawre krî hô kamã pa nê kagàja nhîpêx nê hwÿr kumê. Nê kamã kãm mêmoy tã karô. Na pre ra Epes kamã mê hkwÿjaja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karô. Nê Tirtûm kãm hprãm xã hkôt pix mã mê ahkre ho pa hà kãm karô nê hwÿr kagà nê kumê. Nê kãm:

¹ Pa Ximotre? Xã amex? Ixpê Pawre na pa awÿr kagà nhîpêx nê kumê. Ixte Jejus Kris nhÿ hà mê ahkre ho ixpa kaxyw na pre Mëpapytãr xwÿnh Tirtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

² Nã ra ate ixkapêr mar xã hkôt Jejus kôt amnhî xãm jakamã te ahte ixkra pyrãk Ximotre. Jakamã na pa hte ato Mëpanhîpêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukapri nê kutã war anojarêt rãhã ho wa ri apa. Kot kaj wa ã ho mex anê nhûm war anhÿr hà hamakêtkati nê ãmnhîx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh Rômãn 16.17; Wam Ximotre 6.3; Sîkûn Ximotre 2.23; Xitre 1.5-16

³ Nê na pu pre wa Epes kamã papa tã pika pê Masetôn wÿr panojarêt nê tee ri Epes kamã Tirtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetôn wÿr ixkôt amôr kêt nê. ãm Jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harê hãmri nê Epes kamã are nê ma Masetôn wÿr ahte mô.

⁴ Mê hêx xwÿnhjaja amnepêm panhîgêjtaja kot tanhmã amnhî nhîpêx to nê tanhmã ujarênh toja nhûm htem mê kãm harênh pix o pa. Nê mê hixi piitã harênh o pa. Na htem ã amnhî krã hkôt hkwÿjê mã ujarênh anhÿr o pa. Jao xapên kwÿm ri mê ahkre nê mê hà xapên mã ãkêr o pa. ã mê kot amnhî nhîpêx

anhÿr jao Tirtûm nhÿ hà kãm hprãm xã hkôt mê ahkre hkêt nê. Kojã mêmõ Tirtûm nhÿ hà kapêr o mê ahkre hãmri nê amnhî kaxyw kãm hamaxpêr tÿx pê tanhmã mê ahkre hto. Nom ixte amã mê harênh xwÿnhjaja Tirtûm nhÿ hà mê ahkre hkêt jakamã na pa pre inhnojarêt nê ã amã mê harênh anê nê mê kuri Epes kamã are.

⁵ Tã kêr ka arî mê ahkre ho ri mê hkôt apa Ximotre. Nê Kris kôt mê pahkwÿjê mã anê kê mê amnhî kaxyw Jejus kôt hamaxpêr tÿx pê hamaxpêr mex o pa. Jao tanhmã hamaxpêr punuj to hkôt amnhî nhîpêx kêt nê. Nê mê kãm anê kê mê te kãm amnhî tã ma pyrãk o nhãm kãm mê hà ma ho pa.

⁶ Ixte amã mê hêx xwÿnh jarênh xwÿnhjaja na htem ã mê ahkre anhÿr kêt nê. Na htem htÿx ri amnhî krã hkôt tanhmã mê ahkre hto.

⁷ Tirtûm kot finat Mojes mã mêmoy tã karôja mê kot mar tÿx ã amnhî kamnhîx nê ho mê ahkre hprãm tã no ãm hprî hà mar kêt nê htÿx ri ho mê ahkre ho pa.

⁸ Tirtûm kot Mojes mã mêmoy tã karôja mex. Mê kot mar nê hkôt amnhî nhîpêx o pa kaxyw na pre.

⁹ No na pre mê kot tãm amnhî nhîpêx xwÿnhjê mã ã hà karô anhÿr kêt nê. ãm mê kot amnhî tomnuj xwÿnhjê mã na pre hà karô.

Mê kot mê õ pahi kapêr mar kêt xwÿnhjê mã.

Nê mê kot Tirtûm kapêr nhîrôp kuhê ho mê pa xwÿnhjê mã.

Nê Tirtûm ã mê hpîjaãm kêt xwÿnhjê mã.

Nê mê kot mê hipêxã nê mê katorxã hpar xwÿnhjê mã.

¹⁰ Nê mê hprô kuhpa hà nhãm mênijê ho amnhîkati xwÿnhjê mã.

Nê mê mjên kuhpa hà nhãm mêmoyjê ho amnhîkati xwÿnhjê mã.

Nê mêmoyjaja kot mênijê kuhpa hà kãm amnhî kwÿ myjê hkînh nê mê ho amnhîkati xwÿnhjê mã.

Nê mênijaja kot mêmoyjê kuhpa hà kãm amnhî kwÿ nijê hkînh nê mê ho amnhîkati xwÿnhjê mã.

Nê mê kot mêmoy to ãhkînh nê nhãm mê kãm ho wênê o mê pa xwÿnhjê mã.

Nê ri mê hêx o mê pa xwÿnhjê mã.

ã mê kot Tirtûm kapêr kwÿm ri amnhî nhîpêx anhÿr o mê pa xwÿnh piitã mê kaxyw na pre Mojes mã mêmoyta ã karô. Mê kãm Jejus prãm kêt xwÿnhjê mã. Mê kot mar nê tãm amnhî nhîpêx kaxyw.

¹¹ Tã pa na pa hte Pahihti kot tanhmã mê panê amnhî nhîpêx to hà harênh o ri mê hkôt ixpa. Ja kaxyw na pre Tirtûm ixãm. Tirtûmja mex o mex. Tãm na pre ja kaxyw ixãm.

Tanhmä Pahihiti Jejus Kris kot Pawre ho mex to hä harënh
Atre 26.9-18

¹² Nê Pahihiti Jejus Kris na hte ixto mex rähä ho pa. Na hte tanhmä ixto pa ý hä mä piitã mä kãm tanhmä kot mä panë amnhĩ nhĩpëx to hä harënh o ri mä hkõt ixpa. Na pre ixte ä amnhĩ nhĩpëx anhÿrja kukamã inhmä ixãpënh ä karõ nê inhmä:

—E ate amnhĩ kaxyw ixkõt ajamaxpër mex jakamã kêr ka ma mä piitã mä hkõt ri mä kãm ixkapër jarënh o ri apa. Anë.

¹³ Nom amnepëm na pa pre hkõt ijamaxpër kët nê. Äm axtem nê haprÿ rÿnh nê ho ixkapër punuj o ri ixpa. Nê hkwyjê ho ixkrihkrit nê mä haprÿ nê mä htak. Nom kormã amnhĩ kaxyw Kris kõt ijamaxpër kët jakamã ixtÿx ä mä hipëx anhÿr o ixpa nhÿm Pahihiti ja hä ixpumu nê ixkamã ukapri nê mä hä tanhmä ixto hkõt nê.

¹⁴ Nê kãm ijapë xäj mëmoj to ixkutã nojarët rähä ho pa nê tanhmä ixkrã hto pa ra amnhĩ kaxyw hkõt ijamaxpër nê hkõt amnhĩ xãm. Hämri nê kukwak ri ra inhmä hkwyjê hkĩnh nê hpãnhã mä ho mex o ri mä hkõt ixpa.

¹⁵ Nê Jejus Kris ra wrÿk nê mä pahte amnhĩ tomnuj piitã hpãnhã amnhÿrer kaxyw mä panë htyk ä harënhja na pa hte harënh o ri ixpa. Ä kot amnhĩ nhĩpëx anhÿrja na mex o mex. Kê mä piitã kuma nê hä nohtÿx rähä ho pa.

Kormã ixte hkõt amnhĩ xãm kët ri na pa pre amnhĩ tomnuj tÿx kumrëx o mä piitã mä hakrenh

¹⁶ nhÿm Tirtÿm ixpumu nê ixkamã ukapri nê. Hämri nê amnhĩ kaxyw ixãm. Më piitã mä kot ja hä ixpumunh nê axpën mã ä ijarënh anhÿr kaxyw. Nê ijarënh o:

—Kwa Pawre na pre amnhĩ tomnuj tÿx kumrëx o pa nhÿm Jejus Kris ja hä omu nê kamã gryk tokyx anhÿr kët nê. Na pre tanhmã hkrã hto nhÿm ra tãm amnhĩ nhĩpëx o pa. Kwa pu mä uräk nê amnhĩ kaxyw Jejus kõt pajamaxpër nê hkõt amnhĩ xunhwÿ. Kêr pu mä Pawre pyrã nê nhÿrmã Tirtÿm mä Kraja wa kuri pamex nê pahÿr tÿm nê papa ho papa.

Anhÿr o axpën mã ijarënh nê ixpyrã nê Jejus kõt amnhĩ xunhwÿr kaxyw na pre Tirtÿm ä ixto mex anë.

¹⁷ Jakamã na pa hte kãm amnhĩ jarënh kaxyw nê kãm:

—Pa Tirtÿm? Nã kapxipix apë Pahi Maati. Nê arähä ho arähä nê amex o amex. Më ixte inhno ho aa apumunh kët tã kapxipix apë Mëinhĩpëxã maati. Tã koja nhÿrmã mä piitã ä mã amex o amex ä ajarënh anhÿr o pa. Anë.

Ximotre kot tanhmä Epes nhõ xwÿnhjê jahkre hto hä kãm karõ

Wam Korit 5.1-5

¹⁸ Nê te apë ixkra pyrãk Ximotre. Tã kot paj mëmoj tã amã karõ ka inhma nê inhmar tÿx nê. Nã Pahihiti Jejus mã ate tanhmã amnhĩ nhĩpëx to ho apa kaxyw na pa prem axãm nhÿm Tirtÿm nhÿ hä kapër o mä pa xwÿnhjaja axãpënh kukamã amã kapër nê amã:

—E ate ma mä kãm Pahihiti Jejus jarënh o apa kaxyw Tirtÿm kot axãm jakamã kêr ka ä amnhĩ nhĩpëx anhÿr o ri mä hkõt apa. Anë.

Tã kot paj ijaxwÿja kagãja kamã amã ixkapër nê mëmoj tã amã karõ. Ka mar tÿx nê hkõt amnhĩ nhĩpëx mex pë Tirtÿm mã amnhĩ nhĩpëx mex o ri apa. Jao aprÿ hä mä kãm tanhmã Jejus jarënh to ho ri mä hkõt apa.

¹⁹ Nê amnhĩ kaxyw Jejus mã ajamaxpër mex nê. Nê mëmoj punuj pumu nê amã ho anhÿr prãm tã Jejus nhÿ hä nê amnhĩ to htÿx nê ho anhÿr kët nê. Jao tãm amnhĩ nhĩpëx ä amnhĩ pumunh mex o ri apa. Nom kot kaj ja nê amnhĩ to htÿx kët nê tanhmã amnhĩ tomnuj to hämri nê te ate Pahihiti Jejus kaga pyrãk. Na pre pahkwÿjaja ä amnhĩ nhĩpëx anhÿr o hkaga nê axte kãm hamaxpër kët nê.

²⁰ Imënew mä Aresãnja na pre wa ä amnhĩ nhĩpëx anë nê tanhmã Tirtÿm o kapër punuj to. Mÿrapë na pa pre Satanasti nhÿhkram wa haxã. Kõt tanhmã wa ho nhÿm wa kot tee ri amnhĩ tomnujta ä amnhĩ pumunh nê tokyx tãm amnhĩ nhĩpëx nê axte ä amnhĩ nhĩpëx anhÿr kët kaxyw.

2

Tanhmä mä pahte Tirtÿm mã amnhĩ jarënh to hä mä pamã karõ

Rukre 11.2-4; Atre 10.34-35; Epes 6.18

¹ E kot paj hpãnhã tanhmã mä pahte Tirtÿm mã amnhĩ jarënh to hä mã karõ Ximotre. Ka inhma nê ixõ ri ho mä pahkwÿjê jahkre ho ri mä hkõt apa. E ja kumrëx kot paj mä kaxyw amã hä karõ. Kêr ka mä piitã mä ho Tirtÿm wÿr ho ri pa. Nê kãm mä harë nê mä kaxyw mëmoj tã axãhwÿr o ri apa. Kêr kê ama nê tanhmã mä ho mex to. Kê mä amnhĩ tã omu nê ä kãm kapër anë nê kãm:

—Pa Tirtÿm? Nã äm hämri na ka ä më ixto mex anë. Amex o amex. Anë.

² Nê mä kãm anë kê më õ pahi nê më ho amnhÿptär xwÿnh piitã mä ho ahwÿr o pa ho:

—Pa Tirtÿm? Kwa kêr ka mä inhõ pahi më mä kot mä ixto amnhÿptär xwÿnh piitã tanhmã mä ho kê mä ixto mex o pa. Kêr pa mä ijamakëtkati nê ixãmnhix ixpa pë mã tanhmã amnhĩ nhĩpëx to ho ri ixpa. Nê ixãmnhix mä hkõt tãm amnhĩ nhĩpëx. Anë.

³ Kot puj më ä më ho më papytär xwýnh Tirtümja wýr o papa anë nhüm më pama nhüm ja kãm mex në.

E kêr ka ä më kãm ja hã karō anë Ximotre.

Tirtüm kãm mëmoj prãm ä harënh

Sikün Pëtre 3.9

⁴ Në më piitã më kot kapër mar në amnhî kaxyw Jejus kôt hamaxpër në hkôt amnhî xunhwýrja na Tirtüm kãm hprãm.

⁵ Ja kaxyw na pre më pahwýr Kra Jejus më nhüm man më pahwýr wrý. Tirtümja tapxipix na kęp Mëpahpãm. Në Kra Jejusja tapxipix na kot Tirtüm mã tãm më paxunhwýr mã xwýnh. Ja kaxyw na pre amnhî grõnh kôt wrý më pahpyrà nê i ho ï në kato.

⁶ Hãmri në gaa në äptär hãmri në më pahpiitã më panë ty. Jao Tirtüm mã më pahte amnhî tomnuj piitã hpãnhã amnhîrer pa. Tã më pahpiitã më pahte kot ä amnhî nhîpëx anhÿr ä harënh mar në tokyx hkôt amnhî xunhwýrja na Tirtüm kãm hprãm.

⁷ Ja kaxyw na pre ixãm. Ixte Ijaew kêt xwýnhjê mã Tirtüm kapër jarënh o ri më hkôt ixpa kaxyw. Në Jejus nhÿ hã tanhmã më kãm ixkapër to ho ri ixpa kaxyw. Në tanhmã kot më panë amnhî nhîpëx to hã harënh kaxyw. Äm hãmri na pa ä amnhî jarënh anë. Ixêx kêt. Na pa hte Ijaew kêt xwýnhjê hkôt ixpa në ä më kãm ixkapër anë në më kãm:

—E më ate Tirtüm Kra Jejus kôt amnhî xunhwýrja na Tirtüm kãm hprãm. Jakamã kwa më tokyx amnhî kaxyw hkôt aja-maxpër në hkôt amnhî xunhwý. Anë.

Ikrësti kamã tanhmã më pahte amnhî nhîpëx to hã më pamã karō

⁸ Në kot kaj më tōhã Tirtüm kapër mar kaxyw axpën wýr akuprō. Hãmri në Tirtüm mã amnhî jarë nom kêr ka më mëmoj tã axpën kamã agryk kamã kãm amnhî jarënh kêt në. Rý mëmoj tã axpën mã axakjêr kamã kãm amnhî jarënh kêt në. Äm tãm më aja-maxpër pix o kãm amnhî jarë. Në tãm amnhî nhîpëx kamã kãm amnhî jarë. Ja na inhmã hprãm. Tã kêr ka ä Epes nhō xwýnhjê mã ja hã akarō anë Ximotre.

Mënjaja kot tanhmã amnhî nhîpëx to kaxyw më hã kãm karō

Wam Korît 14.34; Epes 5.22; Xitre 2.3; Wam Pëtre 3.1-7

⁹ Në kot paj hpãnhã Kris kôt më pahtōxjaja tanhmã kot amnhî nhîpëx to hã më kaxyw amã karō ka inhma. Nã mëmyjaja kot më omunh në kãm më hkînh prãm xäj kê më htýx ri më noo mã tanhmã amnhî nhîpëx to hkêt në. Në ja prãm xäj tanhmã ê jagjênh to hkêt në rý tanhmã ri mrar to hkêt në. Rý më kãm më hkînh prãm xäj ôkrexê mex jagjênh rý më ïhkra kamã kãx mex jagjênh në ri hã më hkôt pa kêt në. Rý ja kaxyw tanhmã ri

amnhî kî jaxwýr to në ri hã më hkôt pa kêt në. Rý më ê mex jagjê në më noo mã htýx ri hpijaãm kêt o pa hkêt në. Kê mëmyjaja kãm më hkînh prãm xäj ä htýx ri amnhî nhîpëx anhÿr o pa hkêt në.

¹⁰ Më kãm anë kê më kãm Tirtüm mãnh kînh xäj më piitã më kutã mëmoj to nojarêt o pa.

¹¹ Në më kãm anë kê më Tirtüm kapër mar kaxyw më pikuprõnh xã hwýr agjê në akryk Tirtüm kapër mar o hkrî në htýx ri axpën mã kapër o hkrî kêt në.

¹² Nê kê më ikrësti kamã Tirtüm kapër o mëmyjê jahkre hkêt në. Rý kamã mëmoj tã tanhmã më kãm karō hto hkêt në. Äm akryk Tirtüm kapër mar o hkrî.

¹³ Mëmo myrapê koja më ä amnhî nhîpëx anë? Nã na pre Tirtüm my kot wa finat Atãwja kumrëx nhîpëx në kormã hprō Ewa o hapu në hipëx.

¹⁴ Nê Atãwja na pre kagã kapër mar në hkôt amnhî nhîpëx kêt në. Prō na pre mar xã hkôt Tirtüm kapër nhîrōp xa në tanhmã amnhî tomnuj to.

¹⁵ Myrapê na htem mënjajaja hpijagri ho hikwý nhüm më hkrajaja ä htýx kãm hapój. Tã nom koja më Jejus kôt amnhî xunhwý në ä ixte më kaxyw amã mëmoj tã karō xã hkôt amnhî nhîpëx hãmri në nhÿrmã mex kumrëx në htîr tùm në pa ho pa. E kêr ka ä mënjê mã mëmoj tã karō anë Ximotre.

3

Pastō kot tanhmã amnhî nhîpëx to kaxyw më hã kãm karō

Xitre 1.5-9

¹ E kot paj hpãnhã tanhmã pastō jarënh to. Koja mëhō kãm kęp Kris kwjê nhō pastō në Tirtüm kapër o më ahkre hprãm në äm hãmri ä hamaxpër anë. Ja mex.

² Jakamã koja mëhō kãm kęp pastō hprãm hãmri në ä amnhî nhîpëx anhÿr o apa.

Koja më piitã më noo mã tãm ri amnhî nhîpëx.

Në hprō pix tãnopxar o pa.

Në mëmoj punuj kutã amnhî to htýx në.

Në tãm hamaxpër.

Në ämnhîx amnhî wýr më piitã më kuwý.

Në Tirtüm kapër o më ahkre mex në.

³ No kê më kagōxyhti japrōr në ho pipãnh o pa hkêt në.

Në ähkurê ho pa hkêt në.

Në më piitã më kamã ukapri ho ri më hkôt pa. Jao më kutã nojarêt rãhã ho pa.

Në ämnhîm kãxpore rax o pikuprõnh prãm xäj tanhmã amnhî nhîpëx to hkêt në.

⁴⁻⁵ Nê hkrajê jahkre mex o pa nhüm më kapër ma në hkôt amnhî nhîpëx. Nê hã hpijaãm kãm tãm amnhî nhîpëx.

Koja më hkrajê jahkre mex kêt në hãmri në mãänën Kris kwjê jahkre mex kêt

nē. Jakamā nhūm hkrajē mē Kris kwýjaja tām amnhī nhīpēx kēt nē.

6-7 Nē kē mē kot Jejus kōt amnhī xunhwýr kēt xwýnhjē noo mā tām amnhī nhīpēx rāhā ho pa.

Mē kot ja hā mē omunh nē mē hā hpijaam o pa kaxyw. Nom koja mē tanhmā amnhī tomnuj to nhūm mē tee ri ja hā mē omu nē mē ho kapēr punuj nē. Satanasti kām hprām xā hkōt.

Nē kē mē kot Kris kōt amnhī xunhwýr nyw xwýnhjaja kēp pastō hkēt nē.

Koja mē kēp pastō hāmri nē mēmo arigro hā tanhmā hamaxpēr to nē amnhī to rax prām xāj tanhmā amnhī to jarkrar to ho pa. Hāmri nhūm Tirtūm tee ri ja hā omu nē te kot Satanasti nhīpēx pyrāk o hipēx nē tanhmā homnuj to. Ja pymaj kē mē kot Kris kōt amnhī xunhwýr nyw xwýnhjaja kēp pastō hkēt nē.

E pastō na hte ā amnhī nhīpēx anhýr o pa kamā Jejus kwýjē jahkre nē tanhmā mē ho ajuta hto ho mē hkōt pa Ximotre.

Mē kot Kris kōt hkwyjē ho ajuta xwýnhjē kaxyw mē hā kām karō

Atre 6.1

8 Nē kot paj hpānhā amā mē kot Kris kōt hkwyjē ho ajuta xwýnhjē jarē ka inhma Ximotre. Nā koja mēhō kām Kris kōt hkwyjē ho ajuta hprām hā koja ā amnhī nhīpēx anhýr o pa.

Koja mē htýx ri mēmoj tā mē kām hpēr o pikēnh o pa hkēt nē.

Nē tanhmā mēmoj to hēx to ho pa hkēt nē. Nē kagōxyhti japrōr nē ho pipānh o pa hkēt nē.

Nē amnhīm kàxpore ho pikuprōnh nē ho rax prām xāj tanhmā amnhī nhīpēx to hkēt nē.

9 Nē kē Tirtūm kapēr piitā hkōt hamaxpēr o pa. Ra Tirtūm kot mē pamā kapēr piitā ho amnhīrit jakamā koja Kris kōt hkwyjē ho ajuta xwýnhjaja kapēr piitā hkōt hamaxpēr pē hkōt amnhī nhīpēx mex rāhā ho pa.

10-13 Nē kē mē amnhī prō pix tānopxar o pa.

Nē pastō pyrā nē mē hkrajē jahkre mex nhūm mē hkōt ri amnhī nhīpēx mex o pa.

Nē kē mē hprōjaja mjēn pyrā nē mē piitā mē noo mā tām ri amnhī nhīpēx.

Nē hkwyjē ho kapēr rý mē axpēn jakwa kamā ri axpēn mā mē hixi ho rēr o pa hkēt nē.

Nē mjēn pyrā nē mēmoj punuj kutā amnhī to htýx o ri pa. Nē amnhī to mex rāhā nē.

E koja mēhō kām Kris kwýjē ho ajuta ho pa hprām hā koja ā amnhī nhīpēx anhýr o pa. Nom kēr ka mē kot mē ho ajuta kaxyw mē

unhwýr tokyx anhýr kēt nē Ximotre. Taxy mē kamā ama nē aprī hā mē kot ri tanhmā amnhī nhīpēx to hā mē omu mǎn. Hāmri nhūm mē piitā mē mex ā mē harē ka mē hā mē ama nē rī kormā mē kot mē ho ajuta ho pa kaxyw mē unhwýr. Hāmri nhūm mē amnhī tā omu nē axpēn mā mex ā harē. Nē amnhī kaxyw Jejus Kris mā hamaxpēr mex o pa hā mē omu nē mē hā hpijaam o pa.

Pawre kot Ximotre mā amnhī jarēnh

14 Nē inhmā awýr inhmōr nē apumunh prām Ximotre. Nom kot pa amnhī kukamā ā mēmoj tā amā karō nē hā kagā anē.

15 Kēr pa tokyx awýr inhmōr kēt japēr ka ixte amā mēmoj ā kagāta kamā harē nē ixkutēp ho mē ahkre ho ri apa. Mē kot mar nē hprī hā mē ō pastō nē mē kot mē ho ajuta ho mē pa xwýnhjaja kot tanhmā amnhī nhīpēx to hā mē harēnh mar kaxyw.

Mē pahpē Kris kwýjaja mē pahpē Tirtūm kra jakamā na pu htem kapēr kōt ri amnhī nhīpēx nē pakatāt kōt mē piitā mē kām pakapēr o papa. Jao tanhmā mē kām Jejus Kris jarēnh to ho ri papa.

Pawre kot Jejus mex o mex ā mē grer jarēnh

16 Nē Jejusja mex o mex. Amnepēm kormā mē pahte harēnh mar kēt tā pu prem harēnh ma hāmri nē mex o mex ā pagrer o papa. Nē pagrer o:

Kris kēp Mēpahpām tā na pre mē pahwýr wrý nē mē pahpyrā nē i ho i nē kato.

Nhūm pre Tirtūm Karōja mex o mex ā harē. Nhūm Tirtūm kapēr o mē wrýk xwýnhjaja omunh o pa.

Nhūm ahpýnhā pika piitā hwýr tanhmā kot mē panē amnhī nhīpēx to hā harēnhja anhrā.

Nhūm hte mē hkwyjaja harēnh ma nē amnhī kaxyw hkōt hamaxpēr nē hkōt amnhī xunhwý.

Tā nhūm pika kamā àpēnh jatur xām kumē nhūm Tirtūm akupým amnhī wýr ho api.

Na pu htem ā Jejus mex o mex ā pagrer anē.

4

Mē kot Tirtūm kapēr kwým ri tanhmā Kris kwýjē jahkre hto xwýnhjē jarēnh

Matēwre 24.4-13; Korosē 2.16-19; Sikūn Ximotre 3.1-9; Sikūn Pētre 2.1-3; Jutre 3-16

1 Nē nhýrmā Jejus akupýn mē pahwýr wrýk kaxyw koja pika nhō xwýnh kwýjaja ma hkwyjē mā tanhmā Tirtūm kapēr o hēx to ho pa. Na pre Tirtūm Karō hprī hā mē hkukamā tanhmā mē harēnh to. Koja xep Satanasti hkwyjaja Jejus kwýjē hwýr mra nē hēx rom tanhmā mē kām kapēr to. Satanasti nhý hā mē kām hēx o pa nhūm mē hkwyjaja mē kuma nē mē hkōt hamaxpēr nē Jejus

kaga. Á koja mẽ Jejus akupÿn mẽ pahwÿr wÿrk kukamã amnhĩ nhĩpêx anê.

² Nê Satanasti nhÿ hã mẽ kãm mẽmoj to hêx xwÿnhjaja âm Satanasti pix mar o pa jakamã koja mẽ hamaxpêr mex kêt nê. Kojã mẽ mẽmoj punuj pumu nê htÿx mex á hkamnhĩx.

³ Tã koja mẽ Tirtũm kapêr kwÿm ri á Jejus kwÿjê mã hêx ho pa anê nê mẽ kãm:

—Kwa kêr ka mẽ axpên mã ri mẽ rer o apa hkêt nê. Tirtũm kãm ja prãm kêt. Âm ahte ri mẽ papaja na kãm hprãm. Anê.

Nê mẽ kot mẽmoj mex kur á mẽ omu nê nê mẽ kãm kapêr nê mẽ kãm:

—Kwa na htem ata hkur kêt nê. Tirtũm pè omnuj kênã kot ka kêt ri aku.

Anhÿr o koja mẽ kãm kapêr o pa.

⁴ Nom Tirtũm na pre mẽ pamã mẽ apkur xã piitã ho kato. Mẽ paxãmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tirtũm mã harê hãmri nê paxãmnhĩx kuku.

⁵ Tirtũm kot mẽ paxãpkur xã piitã mex á harênh jakamã na pu htem kãm harênh pè paxãmnhĩx piitã hkur o papa.

Pawre kot mẽmoj tã Ximotre mã karõ

Sikũn Ximotre 1.6-14; Xitre 2.1-8

⁶ E Ximotre. Ixte mẽmoj tã amã karõta kêr ka ho Kris kôt pahkwÿjê jahkre mex o ri mẽ hkôt apa. Kot kaj á mẽ ahkre anhÿr jao ra Jejus Kris mã axãpênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêr ka arĩ hkôt amnhĩ nhĩpêx mex rãhã kê mẽ piitã ja hã apumu.

⁷ Nê mẽ ujarênhja kot paj tanhmã amã hã karõ hto. Mẽ panhĩgêt uxjarênh kamã mo Tirtũm jarênh? Amrakati kumrêx. Jakamã kêr ka mẽ hkôt ajamaxpêr o ri apa hkêt nê. Âm Tirtũm kapêr kôt pix mã ajamaxpêr tÿx rãhã ho ri apa. Tirtũm kapêrja âm hãmri na.

⁸ Nê na htem amnhĩ karo hprãm xãj tanhmã amnhĩ karo ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tirtũm kapêr kôt ri amnhĩ nhĩpêx o paja na mex o mẽ hkarota jakre. Na htem Tirtũm kapêr kôt ri amnhĩ nhĩpêx hãmri nê mex nê hĩnh nê pa ho pa. Hãmri nê nhÿrmã kaxkwa kamã Tirtũm mẽ Kra Jejus wa kuri mex nê htĩr tũm nê pa ho pa. Ja na mex o mex.

⁹ Âm hãmri ixte amã ja jarênh jakamã kwa kêr ka ja hã anohtÿx nê ri ho apa Ximotre.

¹⁰ Nê Tirtũmja rãhã ho rãhã. Tã na pu pre amnhĩ kaxyw Kra Jejus kôt pajamaxpêr nê hkôt amnhĩ xãm nhũm Tirtũm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhĩ kaxyw Kra hkôt hamaxpêr nê hkôt amnhĩ xunhwÿ nhũm

amnhĩ tã mẽ omunh xã hkôt mẽ ho hkra. Ja kaxyw na pu htem mẽ piitã mẽ kãm Jejus kot tanhmã mẽ panê amnhĩ nhĩpêx to hã harênh rãhã o ri mẽ hkôt papa. Jao Tirtũm mã paxãpênh mex nê.

¹¹ E kêr ka á ja ho pahkwÿjê jahkre anhÿr ho ri mẽ hkôt apa. Mẽ kot amar nê akapêr kôt amnhĩ nhĩpêx mex ho pa kaxyw.

¹² Nê kormã anyw tã kêr ka mẽ piitã mẽ noo mã tãm ri akapêr nê tãm amnhĩ nhĩpêx o apa. Mẽ kot Jejus á tanhmã ato htã arĩ amnhĩ kaxyw kãm ajamaxpêr tÿx nê. Nê mẽ piitã mẽ kutã anojarêt nê ajamaxpêr mex pix o ri apa. Kot kaj kormã anyw tã á mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw á apumunh tã kãm akapêr mar prãm nê.

¹³ Nê kêr ka mẽ ate Tirtũm kapêr mar kaxyw axpên wÿr akuprõ ka arĩ ixkutêp mẽ kãm Tirtũm kapêr tũm á kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

¹⁴⁻¹⁵ E kêr ka á amnhĩ nhĩpêx anhÿr o ri mẽ hkôt apa nê amã ho anhÿr kaga hkêt nê. Mẽ piitã mẽ kot ate Jejus mã amnhĩ nhĩpêx mex o amõr á apumunh kaxyw. Kormã ate mẽ kãm Jejus jarênh o apa hkêt ri na pre pastõ nhÿ hã mẽ kapêr xwÿnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk á mẽ ihkra jaxwÿ nê axãpênh kukamã tanhmã ajarênh to nê ato Tirtũm wÿ. Hãmri nhũm ate mẽ kãm kapêr jarênh o ri apa kaxyw amã ajamaxpêr o hihtÿx. Tã kêr ka ÿ hã á kãm amnhĩ nhĩpêx anhÿr rãhã ho ri apa.

¹⁶ Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tirtũm kapêr o mẽ ahkre ho ri mẽ hkôt apa. Kot kaj á amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwÿ. Hãmri nê pahpyrà nê nhÿrmã Tirtũm wa kuri htĩr tũm nê pa ho pa.

5

Tanhmã mẽ pahte Kris kôt mẽ pahkwÿjê nhĩpêx to kaxyw mẽ pamã karõ

Sikũn Ximotre 2.24-25

¹⁻² E kot paj hpãnhã Kris kôt pahkwÿjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nã koja mẽhõ tanhmã ri amnhĩ tomnuj to ka harênh ma hãmri nê ma hwÿr tẽ nê ja nê tanhmã kãm akapêr to. Nom kêr ka kãm akapêr mã agêt kêt nê.

Koja mẽwejjê õ tanhmã amnhĩ tomnuj to ka te kèp anhĩpêexã rÿ akatorxã pyràk o kãm akapêr. Jao hã apijaam o tanhmã kãm akapêr to.

Rÿ koja apyrã nê mẽ nywÿjê hõ tanhmã amnhĩ tomnuj to ka te kèp atõ pyràk o kãm akapêr.

Rý mēnijê nyw ò amnhî tomnuj japêr ka te kēp atōx pyrāk o kām akapêr. Jao hā apijaam o kot amnhî tomnujja nê tanhmā kām akapêr to.

E kēr ka mē kot amnhî tomnuj nê ā mē pahkwýjê mā akapêr anhyr o apa Ximotre.

*Mē kēp mē mjên htyk xwýnhjê jarēnh
Xiakre 1.27*

³ Nē kot paj hpānhā Kris kōt pahkwý pē mē mjên htyk xwýnhjê jarē. Nā koja mēhō nija hkra hkēt nē htāmnhwý hkēt nē pa nhūm mjên kēp ty ka mē apē Kris kōt hkwyjaja ja hā omu nē mēmoj to kutā anojarēt rāhā ho ri apa.

⁴ Nom koja ra hkra rý ra htāmnhwý japêr kē mē tāmjaja tanhmā ho ajuta hto ho pa. Kām ò nē kām mēmoj nhōr o pa. Kormā mēhprīre ri na pre mē ò wōwō nē mē katorxā nē mē hipēxā mē hamār mex pē mē kām ò ho pa. Tā ra mē aptār jakamā kē mē amnhî pyrā nē mē hamār mex pē mēmoj to mē kutā nojarēt rāhā ho pa. Ja na Tirtūm kām hprām. Ā mē kot hkwyjê kamā ukapri ho pa jakamā te mē kot Tirtūm mā apēnh pyrāk.

⁵ No koja mēhō ni ra wejre nē ahte ri pa. Nē hkra nē htāmnhwý hkēt nē ri pa. Tā kē ja hā amnhî pumu nē Tirtūm kamnār rom amnhî to hwýr o pa. Nē mē piitā mē ho hwýr o pa. Jao tām hamaxpêr. Ka mē apē Kris kōt hkwyjaja ja hā omu hāmri nē mē kam nē tanhmā kutā anojarēt to ho ri apa.

⁶ No koja mē ā amnhî nhīpēx anhyr kēt nē. Nē htýx ri mē grer wýr mra nē hpijaam kēt o ri mra ka mē ja hā mē omu nē mē ho ajuta hkēt nē. Na htem ā amnhî nhīpēx anhyr o pa nē arī htír tā te ra htyk nē hikwý pyrāk.

⁷ E kēr ka ā ja hā Kris kōt pahkwýjê mā karō anē. Kē mē ama nē ā mē mjên htyk xwýnhjê nhīpēx anhyr o pa.

⁸ Nom koja mēhō amnhî kwýjê ho mex kēt japêr. Nē ōrkwý kamā hprō nē hkra-jaja nē hipēxā nē katorxā nhūm mē kām mē apkur xā nhōr kēt japêr. Koja mē ā amnhî nhīpēx anhyr jao Jejus kaga nē te mē kot hkōt amnhî xunhwýr kēt xwýnhjaja kot amnhî nhīpēx pyrāk o amnhî nhīpēx nom amnhî tomnuj týx o mē hakre.

⁹ Nē mē mjên htyk nē mē hkra nē mē htāmnhwý hkēt xwýnhjaja kēr ka mē tanhmā mē ho ajuta hto kaxyw hāmri nē mē hixi piitā hā kagā. Nom kwa kēr ka aprī hā tanhmā mē amnhî nhīpēx to hā mē omu nē rī kormā mē hixi hā kagā.

Koja mēhō kormā mjên htír ri tām hipēx nē nhām mēmyjê ho amnhīkati hkēt nē. Nē ra hā amgrā pē 60 rý ra hā 60 jakre.

¹⁰⁻¹¹ Nē tām mē piitā mē hipēx o pa.

Nē hkrajaja kormā htír ri nhūm mē hamār mex nē mē ahkre mex o pa.

Nē nhām krī hō nhō xwýnhjaja ò krī hwýr pōj nhūm mē omu nē amnhî nhōrkwý hwýr mē kuwý.

Nē mē kēp amrakati xwýnhjê ho mex o pa. Koja mē ā amnhî nhīpēx anē ka ja hā mē omu nē rī kormā mē ho ajuta kaxyw mē hixi hā kagā. Nom mē hixi hā kagā kaxyw nē mēmoj tā mē hkukja nē mē kām:

—E kot kaj ā amnhî nhīpēx anhyr o apa hā inhmā amnhī jarē pa ama nē rī kormā anhīxi hā kagā.

Kot kaj axte amjēn kēt nē.

Nē tanhmā Kris kōt akwýjê ho mex to ho ri apa.

Nhūm mēhō mēmo myrapē hkapri nē pa ka ja hā omu nē tanhmā ho ajuta hto.

E kot kaj ā amnhî nhīpēx anhyr o apa hā amnhī jarē pa ama nē anhīxi hā kagā. Hāmri nhūm Kris kōt akwýjaja amā axāpkur xā nhōr o pa. Anē.

Ā mē kām akapêr anē nhūm mē ama nē amā:

—ÿ. Ma kot paj ā amnhî nhīpēx anē.

Anhyr ā amnhī jarē ka mē ama nē mē hixi hā kagā. No kormā mē hā amgrā pē 60 kēt xwýnhjaja kēr ka kormā mē hixi hā kagā hkēt nē. Koja mē tanhmā mē kot amnhî nhīpēx to ho pa hā mē kām karōja mra nē wam tajē pyrā nē amā:

—ÿ. Ma kot paj ā amnhî nhīpēx anē. Na pa Jejus Kris noo mā ā amnhī jarēnh anē.

Anhyr ā amnhī jarēnh tā gaa nē ra hkurē hapōj nē ra kot amnhī jarēnhra kwým ri tanhmā amnhī nhīpēx to nē axte mjēn.

¹² Ra amnhī jarēnh o:

—Ma kot paj ām Jejus mā pix mā tanhmā amnhī nhīpēx to ho ri ixpa nē axte inhmjēn kēt nē.

Anhyr tā tanhmā hamaxpêr to nē kot amnhī jarēnh kwým ri axte mjēn. Jao te Jejus mā amnhī to hēx pyrāk nhūm Tirtūm pē jamnuj. Ja pymaj kēr ka mē kormā mē hā amgrā pē 60 kēt xwýnhjê nhīxi hā kagā hkēt nē. Kormā mē hā amgrā pē 60 kēt xwýnhjaja arī mē hkīnh týx

¹³ jakamā kot kaj mē kām mē apkur xā nhōr o apa nhūm mē ja hā amnhī tā mē apumu nē axte amnhīm apēnh kēt nē. Ām kām kaga nē htýx ri nhām mē hwýr mra nē nhām mē hwýr mra. Nē amnhī pumunh mex kēt nē htýx ri axpēn jakwa kamā ri mē hixi ho rēr o pa. Nē nhýri mēmoj pumu rý tanhmā mēmoj jarēnh mar to hāmri nē ma htýx ri hkwyjê mā harēnh o mra. Koja mē ā amnhī nhīpēx anhyr o pa hāmri nhūm mē kēp Kris kwý hkēt xwýnhjaja ja hā mē omu nē mē hkōt mē pahpē Kris kōt pahkwýjê ho kapêr punuj nē.

¹⁴ ā mē kot amnhī nhīpēx anhyr o pa pymaj kēr ka kormā mē nyw xwýnhjê mā anē kē mē māmri axte mjēn nē o pa. Hāmri

nē hkra nē hkrajē jamār o pa. Ja na inhmā hprām. Koja mē ā amnhī nhīpēx anē hāmri nhūm mē kēp Kris kōt pahkwý hkēt xwýnhjaja mē hkōt tanhmā mē pahto kapēr punuj to hkēt nē.

¹⁵ Mān ka ra Kris kōt pahkwýjē nyw pē mē mjēn htyk xwýnh kwýjaja tanhmā amnhī tomnuj to hā mē harēnh ma. Na prem Jejus kaga nē Satanasti hkōt amnhī nhīpēx o pa.

¹⁶ E kēr ka mē ā Kris kwý pē mjēn htyk xwýnhjē nhīpēx o apa anē Ximotre. Nom koja mē akwý kamā mēhō nhō wōwō mjēn rý katorxā mjēn kēp ty kē tām kām ō ho pa. Kēr kē Kris kōt pahkwýjaja ām mē kēp mē mjēn htyk xwýnh pē mē hkra nē mē htāmnhwý hkēt nē ahte ri mē pa xwýnh pix-jaja tanhmā mē ho ajuta hto ho pa.

Mē pahpē Kris kōt pahkwýjē hkrāhtūm kaxyw mē pahā kām karō

Atre 14.23; Wam Korūt 9.7-14; Karatas 6.6; Wam Tesarōn 5.12; Wam Pētre 5.1-4

¹⁷⁻¹⁸ Nē kot paj hpānhā amā Kris kōt mē pahkrāhtūmjē jarē. Tirtūm kapēr ā kaga htūm kot mē harēnh kot:

Kēr ka Tirtūm kapēr o mē ajahkre xwýnhjaja mē ahkre pānhā mē kām amnhīre. Anē.

Nē määnēn mē harēnh ā kuxi nē mē harēnh o:

Koja akrit amā āpēnh o pa ka ho mex nē kām ō mex o apa. Anē.

Ā ja jarēnh kot anhýr jakamā koja Kris kōt mē akrāhtūmja Kris mē tanhmā mē ato mex to ho pa ka mē amnhī tā kām amnhīrer mex o ri apa. Kot Tirtūm kapēr o mē ajahkre mex jakamā ka mē amnhī tā kām amnhīrer mex nē.

¹⁹ Nē koja mēhō pixi nē mē awýr tē nē amā Kris kōt mē akrāhtūm kot tanhmā amnhī tomnuj to hā harēnh to ka ama nē ām ama. Nom koja wa hamēxkrut rý mē axkrunēpxi nē mē awýr mra nē axpēn kōt tanhmā harēnh to ka mē ama nē ām hāmri mē kot tanhmā kot amnhī tomnuj tota kōt ajamaxpēr.

²⁰ Hāmri nē Kris kwýjē piitā mē noo mā kot amnhī tomnuj xwýnhta mā tanhmā kot amnhī tomnuj to nē kām akapēr kē axte ā amnhī nhīpēx anhýr kēt nē. Mē piitā mē kot hā amar nē nhýrmā tanhmā amnhī tomnuj to nhūm ate urāk nē hā tanhmā mē kām axākjēr to pymaj tanhmā amnhī tomnuj to hkēt nē.

²¹ E Tirtūm noo mā na pa ā amā mē kaxyw mēmoj tā karō anē Ximotre. Nē Jejus Kris mē Tirtūm kapēr o mē wrýk xwýnhjē noo mā pa ā amā karō anē. Jakamā kēr ka inhmar týt nē hkōt amnhī nhīpēx o ri apa. Jao mē piitā mē hipēx o axpēn pyrāk. Nom kēr ka akrāmnhwý kot tanhmā amnhī tomnuj to hā omu nē axtem nē ām omu nē ajamaxpēr o:

—Nā kēp ixkrāmnhwý kēnā kot paj kēt ja nē tanhmā kām ixkapēr to. Pa ho anhýr kēt nē.

Anhýr o ajamaxpēr kēt nē. Mē piitā mē hipēx o axpēn pyrāk.

²² Nē kēr ka anojarēt kām mē kot Tirtūm mā tanhmā amnhī nhīpēx to ho mē pa kaxyw mē unhwýr kēt nē. Aprī hā tanhmā mē kot amnhī nhīpēx ā hā mē omu nē mē hkapi nē rī kormā mē unhwý rý tee ri mēmoj tā mē omu nē mē hkaga.

Nē koja mēhō tanhmā amnhī tomnuj to ka ja hā omu rý harēnh ma hāmri nē urāk nē ā amnhī nhīpēx anhýr kēt nē. Arī Tirtūm kōt amnhī nhīpēx pē tām ri amnhī nhīpēx pix o apa.

²³⁻²⁵ Na htem tōhā tanhmā amnhī tomnuj to nhūm mēhō ja hā mē omu nē mē harēnh kurē kumrēx. Kris kōt mē hkrāhtūm kormā kot tanhmā hā kām nē hkēt ri nhūm mē ja hā mē omu nē tanhmā mē harēnh to. Nom na htem tōhā hpimxur pē tanhmā amnhī tomnuj to nhūm Tirtūm pix ja hā mē omu. Tā koja nhýrmā mē piitā mē kām ja ho amnhīrit nhūm mē piitā harēnh ma nē hkōt omu.

Nē mē kot amnhī to mex xwýnhjaja haxwýja. Na htem tōhā mē noo mā tanhmā mēhō ho mex to nhūm hkwyjaja ja hā omu nē axpēn mā mex ā mē harē. Nē tōhā hpimxur pē tanhmā mēhō ho mex to nhūm mēhō ja hā omunh kēt nē. Ām Tirtūm pix ā kot amnhī nhīpēx anhýr ā omu. Tā koja nhýrmā mē piitā mē kām ja ho amnhīrit nhūm mē piitā harēnh ma nē hkōt omu.

Nē kwa Ximotre. Axā nē anhōhymnuj nē ri apa jakamā kwa kēr ka gō pix o akōm o apa hkēt nē. Määnēn wīhti hkwy ho ixkō kēr ka anhōhy mex japēr.

6

Mē kām mē āpēnh xwýnhjē kaxyw mē hā kām karō

Epes 6.5-9; Korosē 3.22-4.1; Xitre 2.9-10; Wam Pētre 2.18-25

¹ E kot paj mē akwýjaja mē kām mē āpēnh o mē pa xwýnhjē kaxyw mēmoj tā amā karō. Mē kām anē kē mē ō patrāw ā hpijaam o ri pa. Jao mē kapēr ma nē hkōt kām āpēnh mex nē. Koja mē ā amnhī nhīpēx anē nhūm amnhī tā mē omu nē hamaxpēr o:

—Kwa pēr Tirtūm kapēr na mex kumrēx. Inhmā āpēnh xwýnhja na hte hkōt amnhī nhīpēx pē amnhī to mex o pa. Pēr ām hāmri na hte Pawre ho mē ahkre ho pa.

Anhýr o hamaxpēr.

² Nē koja mē ō patrāw ra Kris kōt amnhī xām japēr ka kām mē āpēnh xwýnhjē mā anē kē Kris kōt mē kēp mē htō hā mē kām āpēnh mex o ri pa. Nom kē mē urāk nē kēp Kris kōt hkwy hā mē omu nē hamaxpēr o:

—Nà Kris kòt ixtō kēnā kot paj kêt ri kapêr kòt amnhî nhîpêx nê kām ixâpênh mex o ri ixpa.

Anhÿr o hamaxpêr kêt nê. Kê kêp Kris kòt htô hâ kām ho mex prām xaj kām âpênh mex o pa.

E kêt ka mē kām mē âpênh o mē pa xwÿnhjê mǎ â tanhmǎ mē âpênh to ho pa hâ karō anê Ximotre.

Tirtûm kapêr kwÿm ri mē ahkre xwÿnhjê jarênh

Rukre 12.13-21; Xiakre 5.1-6

³ Nê na hte Kris kwÿ hkêt xwÿnh kwÿjjaja Kris kwÿjê mǎ Tirtûm kapêr o hêx o pa. Nê htÿx ri Jejus kapêr kwÿm ri tanhmǎ harênh to ho pa. Âm hāmri na Tirtûm mē Pahihti Jejus Kris wa kapêr tâ nhûm htem htÿx ri tanhmǎ ho hêx to ho ri mē hkôt pa.

⁴ Mē kot amnhî to rûnh xwÿnh â amnhî to jarkrar tâ mē âhpumunh tÿx kêt. Na htem tanhmǎ Tirtûm kapêr kute hâ xapên mǎ akir nê mēmoj tâ xapên kām gryk o pa. Nê xapên mǎ kapêr punuj nê mēmoj tâ xapên kamnhîx o pa.

⁵ Nê hamaxpêr mex kêt jakamǎ mēmoj tâ xapên mǎ âkjêr pix o pa. Na htem â amnhî nhîpêx anhÿr o Tirtûm kapêr mar tÿx kêt nê. Hāmri nê htÿx ri hamaxpêr nê hamaxpêr o:

—Kot paj Tirtûm kapêr o mē ahkre ho ixpa nhûm mē inhma nê inhmǎ amnhîrer mex nê pa ixkâxpore rax nê ri ixpa. Nà kot paj â amnhî nhîpêx anhÿr o ri ixpa. Ja inhmǎ mex.

Anhÿrja o kām hikâxpore rûnh prām o amnhî to amnhîrit o pa.

Kâxpore jarênh

⁶⁻⁸ E kot paj hpânâ amǎ tanhmǎ kâxpore jarênh to ka inhma Ximotre. Xà na pu htem pakatorxǎ nhôhy rûm pajapôj nê amnhî kòt kâxpore hkwy jamÿ nê ho pajapôj? Nà na pu htem pahkênh nê panhÿ kamǎ pajapôj. Tâ kot puj mē ja pyrǎ nê nhÿrmǎ ty nê mǎ ho anê nê panhÿ kamǎ ma papa. Jakamǎ kêt pu mē kormǎ pika ja kamǎ pahtÿr nê papa ri paxâpkur xǎ nê mē paxê pix tânopxar pê pahkînh nê ri papa. Pakâxpore rûnh kêt tâ na pu htem Tirtûm kamnâr rom pahkînh nê pajamakêtkati nê papa. Jao pajamaxpêr o:

—Nà ixkâxpore rax kêt nê ixkurrex rax kêt tâ na hte Jejus ixkôt pa ho pa nê mēmoj to ixkutâ nojarêr rǎhâ ho pa. Jakamǎ ixkâxpore rax kêt tâ ixkînh nê ijamakêtkati nê ixâmnhîx ixpa.

Anhÿr o pajamaxpêr o papa.

⁹⁻¹⁰ Mē kot amnhîm kâxpore o pikuprônh rûnh xwÿnhjaja na htem kâxpore pix kukamǎ hamaxpêr o pa nê gaa nê kâxpore rûnh gryk â amnhî tomnuj o pa. Na pre mē pahkwÿjjaja kâxpore rûnh prām xaj Jejus kaga. Tâ ra mē hikâxpore rûnh tâ hkînh nê hamakêtkati nê pa hkêt nê. Na htem omnuj nê hkaprî nê pa.

Â na htem mē hikâxpore rûnh xwÿnh kwÿjjaja amnhî nhîpêx anhÿr o pa. Jao kâxpore pix kukamǎ hamaxpêr nê gaa nê ra gryk â mē kot amnhî to mex xǎ kaga hpa nê htÿx ri tanhmǎ amnhî tomnuj to ho pa. Nê tanhmǎ hkwyjê nhîpêx punuj to. Te tutre kot harôj xânh â htÿx rapuuti hwÿr gjêx nê tee ri kām kator prām kaprÿ pyrǎk. Â mē kot amnhî nhîpêx anhÿr o pa jakamǎ koja nhÿrmǎ Tirtûm ma mē kot amnhî xǎ htÿx kamǎ hamak tûm xǎ hwÿr mē kurê.

Pawre kot Ximotre mǎ mēmoj tâ karô

Korosê 4.17; Wam Ximotre 4.14; Sikûn Ximotre 2.1-7

¹¹ Nê kwa Ximotre kêt ka mē urǎk nê kâxpore rax prām xaj amnhî tomnuj o apa hkêt nê. Ate Tirtûm mǎ tanhmǎ amnhî nhîpêx to ho apa xwÿnh jakamǎ kêt ka kām hprām xǎ hkôt pix mǎ amnhî nhîpêx o ri apa. Jao Tirtûm pyrǎ nê ate amnhî jarênh xǎ hkôt amnhî nhîpêx o ri apa. Nê amǎ Kris kòt akwÿjê hkînh pê mēmoj to mē kutâ anojarêr o ri apa. Nê Kris kòt mē hkwy hkêt xwÿnhjaja kot Kris â tanhmǎ ato htâ ka arî hkôt amnhî nhîpêx mex nê mē piitǎ mē ho mex o ri mē hkôt apa.

¹² Na ka pre Kris kòt mē pahkwÿjê noo mǎ tanhmǎ amnhî jarênh to. Tirtûm kot amnhî wÿr awÿr nhûm ate Jejus kòt amnhî xām nê amǎ kām tanhmǎ amnhî nhîpêx to ho apa hprām â amnhî jarê nhûm ikrêsti kamǎ mē piitǎ ja hâ ama. Jakamǎ kwa kêt ka arî Jejus kòt amnhî nhîpêx mex rǎhâ ho ri apa. Hāmri nê nhÿrmǎ Tirtûm mē Kra wa kuri amex kumrêx nê atÿr tûm nê apa ho apa.

¹³⁻¹⁴ E na pa mēmoj tâ amǎ karô rax ka piitǎ kamǎ harê nê mar pa. Tâ kêt ka inhmǎ ja hâ tanhmǎ amnhî jarênh to. Mēmoj piitǎ ho htÿr xwÿnh Tirtûm mē Jejus Kris wa noo mǎ tanhmǎ ja hâ inhmǎ amnhî jarênh to. Jejus htyk kaxyw nê âmnhîx kot Pahi Pôn Pirat mǎ amnhî jarênh xwÿnhnta noo mǎ amnhî jarê nê inhmǎ amnhî jarênh o:

—Nà kot paj ate mēmoj tâ inhmǎ karô piitǎ hkôt amnhî nhîpêx rǎhâ nhûm Pahihti Jejus Kris akupÿn mē pahwÿr wÿr. Âm hāmri na pa â amǎ amnhî jarênh anê Pawre.

Anhÿr o inhmǎ amnhî jarê.

Tirtûm mex o mex â mē grer

¹⁵ Nê koja Tirtûm akupÿn mē pahwÿr Jejus mēnh xǎ hâ arîgro jarê hāmri nhûm kot harênh xata wÿr pôj nhûm akupÿn mē pahwÿr kumê. Tirtûmja mex o mex. Tapxipix kêt mēmoj piitǎ ho amnhîptâr xwÿnh maati. Nê kêt jar mē ho amnhîptâr xwÿnh piitǎ mē ô Pahi Maati.

¹⁶ Nê tapxipix na rǎhâ ho rǎhâ nê mex o mex jakamǎ puhǎ hirǎ rax kumrêx. Tâ hkînhâ mē pahte amnhî tomnuj xwÿnh jakamǎ kot puj mē puhǎ hirǎ

raxja kutā hkēt nē. Jao hwỳr mē pam-
rar kēt nē.

Nē aa mēhō kot no ho Tirtūm pumunh kēt
tā kwa kēr pu mē pahpiitā kām mex o
mex nē hihtỳx o hihtỳx ā harēnh rāhā
ho papa.

*Axte mē hikàxpore rūnh xwỳnhjē jarēnh
Rukre 16.9*

¹⁷ Nē kēr ka Kris kwỳjē kamā mē hikàxpore
rūnh xwỳnhjē mā anē kē mē kot amnhī
to rūnh kōt amnhī to àmra ho pa hkēt nē.
Nē amnhī kaxyw mē hikàxpore rūnh kōt
hamaxpēr o pa hkēt nē. Kàxpore na hte
hapēx tokyx anē. Mē kām anē kē mē hpānhā
amnhī kaxyw Tirtūm kōt mām hamaxpēr tỳx
rāhā ho pa. Na hte àmnhīx tanhmā mē pahto
mex to ho pa nē mē pahpē õxy hkēt nē. Jao
mē pahwỳr na rē nhūm mē pahpur go mex
nē pu mē kamā panhō rūnh o papa. Nē
mē pamā myyti ho hirā pu mē kukwak ri
parīt mex pē mēmoj tā paxàpēnh o papa. Ā
Tirtūm kot mē pahto mex kot anhyr pu mē
kukwak ri pahkīnh nē pajamakētkati nē ri
papa. Tā kēr ka mē hikàxpore rūnh xwỳnhjē
mā anē kē mē amnhī kaxyw kumā pix mā
mām hamaxpēr rāhā ho pa.

¹⁸ Nē mē kām anē kē mē hikàxpore ho
hkwỳjē pē õxy hkēt nē ho tanhmā mē ho
mex to ho pa. Nē àmnhīx ho tanhmā mē kēp
amrakati xwỳnhjē ho ajuta hto ho pa.

¹⁹ Koja mē ā amnhī nhīpēx anē nhūm
Tirtūm ja hā mē omu nē hkīnh nē õ krī kamā
mē kutēp mē kām mēmoj mex o akuprō.
Jakamā nhūm mē kormā jar htīr nē pa ri
mex nē pa nē määnēnh nhỳrmā kaxkwa kamā
mex kumrēx o jar pika ja kamā mex nē pata
jakre. E kēr ka ā mē hikàxpore rūnh xwỳnhjē
mā ja hā karō anē Ximotre.

*Pawre kot Ximotre mā mēmoj tā karō
jatur xà*

*Korosē 4.17; Wam Ximotre 6.14; Sikūn
Ximotre 1.13, 4.5*

²⁰ Nē ra Tirtūm kot ate kapēr o mē ahkre
ho apa kaxyw axām jakamā kēr ka tām
amnhī nhīpēx pē mē ahkre mex rāhā ho ri
apa. Jao Tirtūm kapēr o hēx o ri mē ahkre
xwỳnhjē hkōt apa hkēt nē. Na htem mē
kuma nē mē kapēr mex ā mē hkamnhīx
nom mē kapēr mex kēt. Jakamā kwa kēr ka
mē kot tanhmā mē ahkre hto hā mē ama nē
ām mē ama.

²¹ Na pre ra mē pahkwỳjaja mē kuma nē
mē kapēr gryk ā Jejus kaga.

E ām ja pix. Kē Tirtūm mē apiitā mē akutā
nojarēt rāhā ho pa. Ixpē Pawre na pa ā amā
ixkapēr ā kagā anē.

Sikûn Ximotre Pawre kot Ximotre hwÿr wam kaga në mēnh kôt hō mēnh

Pawre na pre kagaja nhîpêx. Na pre Jejus kwÿk hêt xwÿnhjaja Jejus â unê nê krî pê Rôm kamâ haxâ nhûm arî hkrî ho hkrî. Tâ ra mē kot hpîr kaxyw nhûm Ximotre mâ kagaja nhîpêx nê hwÿr kumê. Na pre Ximotre Pawre hkôt pa ho pa hâ mytwrÿ xohô nê. Tâ hpânâ krî pê Epes kamâ arîk nê Tîrtûm kapêr o Jejus kôt hkwyjê jahkre ho ri mē hkôt pa. Jakamâ nhûm Pawre kagaja nhîpêx nê kamâ kâm mēmoj tâ karô nê hwÿr kumê. Nê nhÿrmâ mē kot Pawre pyrâ nê Jejus â hpîr mâ htâ tee ri amnhî kukamâ hamaxpêr kêt â kâm karô.

Nê mē hkwyjaja kêp Tîrtûm kra hâ amnhî jarênh tâ nhûm Pawre Tîrtûm kâm hprâm xâ kuhpa hâ mē kot tanhmâ amnhî nhîpêx to ho pa hâ Ximotre mâ mē harê. Kot mē harênh mar nê Jejus kwÿjê nê mē omunh mex o pa kaxyw. Nê Ximotre kot Tîrtûm kâm hprâm xâ kot pix mâ amnhî nhîpêx o pa hâ kâm karô. Â na pre Pawreja Ximotre mâ mēmoj tâ karô kamâ hihtÿx nê hâ kaga nê hwÿr mēnh anê. Nê kâm:

¹ Pa Ximotre? Xâ amex? Ixpê Pawre na pa amâ ixkapêr nê hâ kaga nê awÿr kumê. Ixpê Jejus nhÿ hâ hkwyjê jahkre ho ipxa xwÿnh na pa. Tîrtûm na pre ja kaxyw ixâm. Tîrtûm Kra Jejus Krisja kot puj mē pahpê hkwyjaja nhÿrmâ kukwak ri pamek kumrêx nê pahûr tûm nê ri papa ho papa.

Pawre kot Ximotre ho Tîrtûm mē Jejus wa hwÿr â harênh

Atre 16.1-2

²⁻³ Te apê ixkra pyrâk Ximotre. Jakamâ na pa hte ato Mēpanhîpêxâ maati Tîrtûm mē Pahihti Jejus Kris wa hwÿr rāhâ ho ri ipxa. Na pa hte mē pakukamâ mē panhîgêt pyrâ nê tām ijamaxpêr o ipxa pê Tîrtûm mâ tanhmâ amnhî nhîpêx to ho ri ipxa. Jakamâ na pa hte ato Kra Jejus mē wa hwÿr rāhâ ho ri ipxa. Arîgro hâ nê kamât kâm amâ ijamaxpêr nê ato wa kuwÿ nê wa kâm:

—Pa Tîrtûm mē Pahihti wa. E ixte ixkra puro Ximotre ho war awÿr kaxyw war amâ ijamaxpêr. Na ka hte wa ho mex nhûm war akôt amnhî nhîpêx mex o pa. Te ô wôwô mē katorxâ wa kot amnhî nhîpêx pyrâk. Na pa hte kot amnhî nhîpêx o paja mâ ijamaxpêr nê ÿ hâ ixkînh nê. War ate kamâ axukapri ho ri apa kaxyw na pa ho war awÿ. War ate kutâ war anojarêr rāhâ ho ri war apa nhûm hamakêtkati nê amnhîx ri pa ho pa kaxyw. Anê.

Pawre kot Ximotre nhÿ hâ hkînh â harênh

⁴ Nê na ka pre hte ixkôt ixto ajuta ho ri ixkôt apa htâ pa pre nhÿhÿm inhnojarêr nê axtem axâpênh ô hâ amâ karô hāmri nê Epes kamâ are nê ma mō. Ka amâ ijapê xaj tee ri ma inhmōr â ixpumu nê amÿr rax nê. Na pa hte arî ja hâ inhnohtÿx nê ri ho ipxa Ximotre. Jao ra ato ama nê. Tâ kot puj nhÿrmâ axte expên pumu nê pahkînh tÿx nê.

⁵ Nê na pa hte akatorxâ Enître mē anhō wôwore Rojti wa kâm ijamaxpêr rāhâ ho ri ipxa. Na pre wa kumrêx amnhî kaxyw Jejus kôt hamaxpêr nê hkôt amnhî xām. Tâ ka wa hkanrêhâ wa urak nê â amnhî nhîpêx anê. Ixte ja hâ apumunh mex.

⁶ Na pa pre ate tanhmâ Jejus mâ amnhî nhîpêx to ho ri apa kaxyw axâm kaxyw anhîmōk â inhîkra xi nê ato Tîrtûm wÿ. Kot tanhmâ akrâ hto nhûm ate Karô nhÿ hâ tanhmâ amnhî nhîpêx to ho apa kaxyw. Tâ kêt ka arî â kâm amnhî nhîpêx anhÿr rāhâ ho ri apa.

⁷ Na pu htem Tîrtûm Karô nhÿ hâ pamâ ma ho papa hkêt nê. Na pu htem ÿ hâ pamâ mē piitâ mē hkînh pê paxamnhîx tanhmâ mē ho ajuta hto ho papa. Nê ÿ hâ kapêr o mē ahkre htÿx o ri mē hkôt papa. Nê mēmoj punuj kutâ amnhî to htÿx rāhâ nê. Jao amnhî to mex pix nê.

⁸ Jakamâ kwa kêt ka amâ mē kâm Jejus jarênh o apa pymaj tee ri amnhî kukamâ ajamaxpêr kêt nê. Nê mē kot Jejus â ijaxâr nhûm arî ixkrî hâ ijarênh ma nê mē kot ixkuxwar ajaxâr pymaj mē kâm Tîrtûm kapêr o mē ahkre hkukamâ tee ri ajamaxpêr kêt nê. Mē kot â anhîpêx anhÿr mâ tâ kêt ka amnhî kamâ akahak kêt nê. Âm Tîrtûm nhÿ hâ hihtÿx xâ ho amnhî to htÿx nê ixpyrâ nê ma mē kâm Jejus kot mē panê tanhmâ amnhî nhîpêx to hâ harênh to rāhâ ho ri mē hkôt apa. Mē kot tanhmâ hâ anhîpêx to htââ.

⁹ Na pu htem Jejus kôt amnhî xunhwÿ nhûm Tîrtûm ja hâ mē pahpumu nê Jejus kukwak ri amnhî katut kôt mē pahte amnhî tomnuj piitâ rēnh pa nê mē pahto hkra. Hāmri nê mē pahte hkôt pix mâ amnhî nhîpêx o papa kaxyw mē paxunhwÿ. Âm Jejus pix kukwak ri na hte mē pahto hkra nê â mēmoj to mē pakutâ nojarêr rāhâ ho pa anê. No na hte mē pahte amnhî to mex â mē pahpumunh kôt mē pahto hkra hkêt nê. Amnepêm kormâ mēmoj piitâ hkêt ri na pre mē pakukamâ hamaxpêr o:

—Koja mē nhÿrmâ Ixkra Jejus Kris kôt amnhî xunhwÿ pa ja hâ mē omu nê Ixkra kukwak ri mē ho mex nê. Anê.

¹⁰ Tâ kormâ mē pahte amnhî tâ â kot mē pajarênh anhÿrja mar kêt jakamâ na pre Jejus mē pahwÿr wrÿ nê tanhmâ mē pahto mex to. Na pre ty nhûm Tîrtûm akupÿm ho htîr. Jakamâ na pu htem ra amnhî kaxyw hkôt pajamaxpêr nê hkôt amnhî xunhwÿ

hāmri nē nhýrmã mē pahtyk tã nhũm Tĩrtũm kot Kra Jejus nhĩpēx pyrà nē akupým mē pahto mē pahtĩr pu mē Jejus kukwak ri wa kuri pamex nē pahtĩr tũm nē papa ho papa. Jakamã na pu htem mē pamã pahtyk pyma ho papa hkēt nē.

¹¹ Amnepēm na pre Tĩrtũm ixãm nē tanhmã inhmã ixãpēnhã karō hto nē inhmã:

—E Pawre kēr ka Jejus nhý hã ma hkwyjē jahkre ho ri mē hkõt apa. Nē ixkapēr o mē ahkre mex nē. Kēr ka ã amnhĩ nhĩpēx anhýr rãhã ho ri mē hkõt apa. Anē.

¹² Tã ã kot inhmã kapēr anhýr nhũm ixte kapēr kõt amnhĩ nhĩpēx o ixpaja mýrapē na htem Jejus ã tanhmã inhĩpēx katĩ hto ho pa. Pa hte ixpunuj nē amnhĩ xã htýx kamã ijamak o ri Jejus mã tanhmã amnhĩ nhĩpēx to ho ri mē hkõt ipxa. Tã nom txe ri ja hã amnhĩ pumu nē amnhĩ kamã ixpijaãm nē ixkaprĩ hkēt nē. Ixte amnhĩ kaxyw hkõt ijamaxpēr xwýnhja na ixte tanhmã kot amnhĩ nhĩpēx to hã omunh mex jakamã kot paj ty nhũm mē arĩ inhmýr pē Tĩrtũm kapēr mar o pa. Mē kot ja hã ixpĩr tã koja mē apē Kris kõt ixkwýjaja inhmýr pē arĩ mē kãm harēnh o apa. Koja mē ã xapēn mýr pē amnhĩ nhĩpēx anhýr o pa rãhã nhũm Pahihti Jejus akupým mē pahwýr wrý.

¹³ Kwa Ximotre. Ra ixte amã mēmoj tã karō rax jakamã kēr ka mar týx nē hkõt amnhĩ nhĩpēx rãhã o ri apa. Jao Jejus Kris nhý hã mē piitã mē noo mã amnhĩ kaxyw kãm ajamaxpēr týx rãhã nē. Nē mē piitã mē ho mex o ri apa.

¹⁴ Ate mē kãm tanhmã Jejus jarēnh to ho ri apaja ãm hāmri na. Tã koja mēhō htýx ri tanhmã ho kapēr punuj to rý axtem nē tanhmã harēnh to ka ja hã ama nē nē kãm akapēr kãm axihtýx nē. Tĩrtũm Karō ra kot akarō hwýr ãr jakamã kēr ka ý hã ã Jejus jarēnhja jamãr mex o ri apa anē.

*Pawre kot tanhmã amnhĩ jarēnh to
Sikün Ximotre 4.16-18*

¹⁵ Nē mãn ka pre ra pika pē As kamã Kris kwý kot ixkaga hã mē harēnh ma. Na pre Pijerti mē Emosti mē mē ohtō nē tanhmã hamaxpēr to nē ixto ajuta hkēt nē.

¹⁶⁻¹⁸ ãm Onēsipti pix na pre mē kurom ijarēnh ma nē man ixwýr Rõm wrý mō nē ijapēr o ri mē hkõt mra nē ixwýr kato. Hāmri nē xatã ixwýr mra nē tanhmã ixto mex to. Jao akupým ijamaxpēr o hihtýx. Ixpē prēs nē ixkrĩ htã kēp ixkrãmnhwý hã amnhĩ jarēnh ã hpijaãm kēt nē. Nē amnepēm kormã krĩ pē Epes kamã ipxa ri na pre mãanēn tanhmã ixto mex to ho pa. Tã ã kot inhĩpēx mex anhýr o pa jakamã na pa hte ho Pahihti Jejus wý nē kãm:

—Pa Pahihti? Onēsipti o na pa awý. Kot ixto mex rãhã ho pa jakamã kwa kēr ka ixtã omu nē kutã anojarēt rãhã ho apa. Nē Õrkwý

kamã hkwyjaja mãanēn tanhmã mē ho mex to. Hāmri nē nhýrmã akupým mē ixwýr wrý nē ixtã kamã axukapri hã tanhmã ho mex to. Anē.

2

Mē pahte Jejus kõt amnhĩ nhĩpēx pix prãm ã mē pamã karō

Wam Ximotre 6.11-16

¹ E Ximotre. Jejus Kris kot mēmoj to mē pakutã nojarēt rãhã jakamã kwa kēr ka ý hã amnhĩ to htýx nē kãm tanhmã amnhĩ nhĩpēx to ho apa hã amnhĩ kamã akahak o ri apa hkēt nē.

² Ra ate pa tanhmã Tĩrtũm kapēr o mē ahkre htoja mar jakamã kēr ka amnhĩ xõ ri ã Jejus kõt mē pahkwýjē jahkre ho apa anē. Mē kot amar nē pahpyrãn xapēn xõ ri ho xapēn jahkre ho pa kaxyw.

³⁻⁴ Sõrdat na htem mē hkrãhtũm kãm prãm xã hkõt tanhmã amnhĩ nhĩpēx to. Jao tanhmã kute htã kapēr ma nē hkõt amnhĩ nhĩpēx. Tanhmã ã rý kãm prãm rý tanhmã omuj to htã kutã amnhĩ to htýx nē mē hkrãhtũm kõt amnhĩ nhĩpēx. Na htem amnhĩ xãpēnh kukamã tee ri hamaxpēr o pa hkēt nē. ãm mē hkrãhtũm kapēr kõt pix mã amnhĩ nhĩpēx o pa hprãm. Tã kēr ka mē urãk nē Pahihti Jejus kõt amnhĩ nhĩpēx rãhã ho ri apa hprãm. Mē kot hã tanhmã atomnuj to htãã.

⁵ Nē mē hprõt týx xwýnhjaja na htem hkwyjē pē amnhĩ to wa hprãm xãj ãm ja pix kukamã hamaxpēr. Hāmri nē hprõt týx prãm xãj mēmoj kot mē ho hirerek kēt nē amnhĩ jagri htýx nē. Hāmri nē hprõt týx o hkwyjē jakre nē amnhĩ to wa nē põj nē kot amnhĩ to wa hã mēmoj to kãnja. Tã kēr ka mē urãk nē amã Pahihti Jejus kot amnhĩ nhĩpēx kõt pix mã amã amnhĩ nhĩpēx prãm.

⁶ Nē pur kãm mē ãpēnh xwýnhjaja na htem mē hpur kãm ãpēnh pix tãnopxar o pa nē ãpēnh rũnh nē. Kãm kaga hkēt kãm ãpēnh o pa. Tã ãpēnh rũnhja kukwak ri ihpur kãm õ rũnh nē ho apkur mex o pa. Nom koja mē kãm kaga nē ãpēnh mex kēt nē hāmri nē õ grire nē apkur mex kēt nē. Tã kēr ka pur kãm mē ãpēnh rũnh xwýnhjē pyrà nē Pahihti Jejus mã amnhĩ nhĩpēx mex o apa. Nē mē urãk nē amã kaga hkēt kãm axãpēnh pix tãnopxar o ri apa.

⁷ E na pa ã ajahkre anē Ximotre. Tã kēr ka ixte ajahkreja ma nē kãm ajamaxpēr rãhã nē. Koja Pahihti tanhmã akrã hto ka aprĩ hã mar týx nē.

⁸ Nē kēr ka Pahihti Jejus Kris mã ajamaxpēr rãhã ho ri apa. Na pre katorxã hkõt kēp Pahi finat Tawĩ kanrēhã htãmnhwý hã mē pahpyrã nē i ho i nē kato nē panhõ pika kamã pa ho pa. Tã nhũm prem kupĩ nhũm amnhĩ xã htýx kamã hamak kãm ty. Hāmri

nhūm Tirtūm akupŷm ho ht̄ir nhūm akupŷm ht̄ir o ht̄ir. Ā na pre hte harēnh anhŷr rāhā ho ri mē hkôt ixpa.

⁹ Mŷrapē na prem ijaxā pa arī jar ixkrī ho ixkrī. Na htem ixte amnhī tomnuj xwŷnh pyrāk o inhīpēx nē axte ixte Jejus kapēr jarēnh o ixpa pymaj ijaxā. Tā ā mē kot inhīpēx anhŷr tā na hte Kris kôt pahōjaja arī ixpānhā mē kām harēnh o ri pa. Koja mē tee ri kām Jejus jarēnh o hapēx prām kaprŷ.

¹⁰ Jakamā kwār mē māmri ā inhīpēx anē. Koja mē arī Jejus kot tanhmā mē panē amnhī nhīpēx toja mar o pa nhūm mē hkŷwjaja hkôt amnhī xunhwŷ nē nhŷrmā pahpyrā nē kēp Jejus Kris kwŷ hā Tirtūm mē wa kuri mex nē ht̄ir tūm nē pa ho pa.

Kris kwŷ kot tanhmā amnhī tā grer to hā mē harēnh

¹¹ Na pu htem mē pahpē Kris kwŷ hā ā amnhī tā pagrer anē:

Mē kot Kris ā mē panhīmex tā kot puj mē akupŷm pahŷir nē kuri pamex nē pahŷir tūm nē papa ho papa.

¹² Mē kot tanhmā Kris ā mē pahotomnuj to htā kot puj mē arī hkôt amnhī nhīpēx o papa rāhā ty nē nhŷrmā ihkō hā mē ho amnhīptār o papa.

Nom kot puj mē amnhī kamā pakahak pē mē pahpē Jejus kwŷ hkēt ā amnhī jarē hā koja Jejus amnhī swar mē pahpē hkŷw hkēt ā mē pajarē.

¹³ Nē mē pahte amnhī kaxyw Jejus kôt pajamaxpēr kēē tā tanhmā amnhī jarēnh to xā hkôt tanhmā amnhī nhīpēx to. Aa kot mēmoj tā amnhī jarēnh kuhpa hā ri tanhmā amnhī nhīpēx to hkēt. Anē.

Mē kot Tirtūm kapēr o mē ahkre mex xwŷnhjē jarēnh

Wam Pētre 3.15-16

¹⁴ E Ximotre. Ixte ā mēmoj tā amā karō anhŷrja kēr ka ho mē ahkre rāhā ho ri mē hkôt apa. Kē mē ama nē kām hamaxpēr rāhā nē.

Nē mē kām anē kē mē Tirtūm kapēr o mē ahkre mex o ri pa nē kapēr ā tanhmā axpēn mā ākjēr to hkēt nē. Koja mē hā axpēn mā akir hāmri nē amnhī to mex kēt nē. Hāmri nhūm mē kot mē kapēr mar xwŷnhjaja ja hā mē omu nē tee ri Tirtūm kapēr kukamā hamaxpēr nē hkôt amnhī nhīpēx mex kēt nē.

¹⁵ Nē na htem mē kām mē àpēnh mex xwŷnhjaja mē ō patrāw kapēr ma nē hkôt mēmoj tā àpēnh mex nē. Nhūm ō patrāwja hwŷr mra nē àpēnh ā omu. Hāmri nhūm amnhī wŷr omu nē àmnhīx noo mā apē. Kām àpēnh mex jakamā amnhī kamā kām uma hkēt nē. Ja pyrā nē kēr ka Tirtūm noo mā kām amnhī nhīpēx mex rāhā nē aprī hā kapēr o mē ahkre mex o ri mē hkôt apa. Kē ā ate amnhī nhīpēx anhŷr ā apumu nē

anhŷ hā hkīnh nē. Ka àpēnh xwŷnhnta pyrā nē amnhī kamā amā uma hkēt nē noo mā kām amnhī nhīpēx mex o ri apa.

¹⁶ No mē kot Tirtūm kapēr o hēx o mē pa xwŷnhjaja kēr ka mē hkôt ri apa hkēt nē. Nē mē kapēr mar nē ri mē hkôt axām hkēt nē. Na htem mē kapēr ma nē mē hkôt amnhī nhīpēx o pa nē kām Tirtūm kapēr mar prām kēt nē. Nē gaa nē te kēp mar pumaj amnhī jamak pro pyrāk o amnhī nhīpēx.

¹⁷ Tŷx ri tanhmā mē ahkre hto xāja te kot mē hkānhy aa mex kēt nē ra omnuj tŷx o mōrja pyrāk. Jao mē kot mē kapēr mar o mē pa xwŷnhjaja mē mar pē ra mē hkôt amnhī tomnuj tŷx o mō. Na hte ra Imēnew mē Pijertija wa ā htŷx ri amnhī krā hkôt mē ahkre anhŷr o pa.

¹⁸ Nē Tirtūm o hēx o mē hkôt pa nē nhŷrmā akupŷm mē pahō mē pahŷir kēt ā harēnh o pa. Hāmri nhūm mē amnhī tā wa kuma nē tee ri amnhī kukamā hamaxpēr pē Jejus kaga nē axte amnhī kaxyw hkôt hamaxpēr kēt nē. Nom wa kapērja kot anhŷr kēt.

¹⁹ Kēt Tirtūm kapērja ām hāmri na. Kot mēmoj to hēx kēt jakamā na pu htem amnhī kaxyw hkôt pajamaxpēr kaprŷ hkēt nē. Kapēr ā kagā htūm kot tanhmā mē pahpē hkrajē jarēnh to nē harēnh kot:

Tirtūm na kot hkrajē piitā omunh mex rāhā ho pa xwŷnh.

Anhŷr o mē pajarēnh. Nē mē pamā mēmoj tā karō kot:

Kē mē kot Jejus kôt amnhī xunhwŷr xwŷnhjaja amnhī tomnuj o pa hkēt nē. Anē.

Tirtūm krajaja te kēp kot mex pyrāk ā mē harēnh

²⁰ Nē mē hikāxpore rūnh xwŷnhjaja mē ō xijere nē mē ō prat sohtōō. Prat kwŷ muxre nē hkŷw omnajre. Prat pynajre na htem māmri kamā apku no prat muxreja ām mēmoj mex pix kaxyw na htem mēsti hā haxwŷ nē kamā apku. Kasamēt ā rŷ mē hkra krā hkēnh ā mē hkīnh nhūm htem mēsti hā haxwŷ nē kamā apku.

²¹ Tā mē kot Tirtūm kapēr o hēx o mē pa xwŷnhjē hkôt hamaxpēr kēt nē mē hkôt amnhī tomnuj kēt xwŷnhjaja te mē kot prat muxre pyrāk. Na htem tām amnhī nhīpēx nē tanhmā hamaxpēr punuj to ho pa hkēt nē. Hāmri nhūm Tirtūm ja hā mē omu nē mē ŷ hā hkīnh nē. Hāmri nē te mē kot prat muxre jaxwŷr nē kamā apkur pyrā nē mē kot kām tanhmā amnhī nhīpēx to ho pa kaxyw mē unhwŷ.

Mē pahte tām amnhī nhīpēx ā mē pamā karō

²² Nē mē àptār nyw jamaxpēr punujja kēr ka te ate hamŷnh nē amnhī katut kôt rēnh par pyrāk o hipēx Ximotre. Jao axte ho ajamaxpēr o ri apa hkēt nē. Nom mē hamaxpēr

mexja kêr ka hamÿ nê amnhî krâ him hagjê nê ho ajamaxpêr rāhā ho ri apa. Jao tām amnhî nhîpêx nê amnhî kaxyw Tirtūm kôt ajamaxpêr rāhā nê. Nê amā mē kēp Kris kôt akwÿjê hkînh pê tanhmā mē ho ajuta ho to ri mē hkôt apa. Jao mēmoj to mē kutā anojarêt rāhā nê. Na hte ā Pahihtu Jejus kôt amnhî nhîpêx xwÿnhjaja amnhî nhîpêx anhÿr o pa.

²³ Nê kêr ka mē kot htÿx ri amnhî krâ hkôt mē ahkre ho mē pa xwÿnhjê hkôt apa hkêt nê. Te ate mē kēp awry hā ri apa pyrā nê mē kapêr ma nê ām ama. Na htem mē kapêr mar o pa nê ra hā axpên mā tanhmā ākjêr to ho pa. Jakamā kwari mē hkôt ri apa hkêt nê.

²⁴ Mē pahte Tirtūm mā amnhî nhîpêx o papa xwÿnhjaja na pu htem mē kurom mēmoj tā axpên mā paxākjêr o ri papa hkêt nê. Na pu htem ām mē piitā mē kamā paxukapri pê mē ho mex nê mē kamā pagryk tokyx anhÿr kêt nê. Nê Tirtūm kapêr o mē ahkre mex nê. Na hte ā mē pahte Tirtūm mā tanhmā amnhî nhîpêx to xwÿnhjaja amnhî nhîpêx o papa anê.

²⁵⁻²⁶ Jakamā koja mēhō ate Tirtūm kapêr o mē ahkreja ma nê tanhmā ho amā kapêr to ka ama nê amnhî tā tanhmā kām akapêr punuj to hkêt nê. Ām kamā axukapri ho tanhmā hā kām akapêr mex to. Na hte Satanasti te kot amnhîm mē unênh pyrāk o mē hipêx nê tanhmā mē kām Tirtūm kapêr o hêx to nhūm mē kuma nê hkôt hamaxpêr nê kapêr kôt amnhî nhîpêx. Tā kot kaj mē kamā axukapri ho mē kām akapêr mex nê nhūm Tirtūm tanhmā mē hkrā hto nhūm mē ama nê hkôt amnhî xunhwÿr japêr. Te Tirtūm kot Satanasti pê amnhîm mē utār pyrāk. Jakamā nhūm mē hpānhā Tirtūm kapêr mex ā harê nê harênh o:

—Nā pêr ām hāmri na Tirtūm kapêrja. Ām mex o mex. Anê.

3

Jejus akupÿn wrÿk kukamā mē kot amnhî tomnuj xwÿnhjê jarênh

Matêwre 24.4-13; Korosê 2.16-19; Wam Ximotre 4.1-5; Sikūn Pêtre 2.1-3; Jutre 3-16

¹ Nê Jejus akupÿn mē pahwÿr wrÿk xwÿj ri mē kot tanhmā amnhî nhîpêx toja kot paj hpānhā ixpri hā amā harê ka inhmar tÿx nê Ximotre. Koja Jejus akupÿn mē pahwÿr nojarêt pu mē pahpê hkwÿjaja pahpunuj nê papa.

² Nê Kris kwÿ hkêt xwÿnhjaja koja mē amnhî pix kukamā hamaxpêr o pa.

Jao hikāxpore rax o pikuprōnh pix kukamā hamaxpêr pê hkwÿjê pê ôxy htÿx o pa.

Nê mēmoj tā amnhî to jarkrar o pa.

Nê tanhmā hkwÿjê japry hto ho pa.

Nê mē hipêxā nê mē katorxā hā hpijaam kêt o pa.

Nê Tirtūm ā hpijaam kêt o pa.

Nhūm mēhō tanhmā mē ho mex to nhūm mē amnhî tā mē omu nê ām mē omu nê amnhî tā tanhmā mē kām nê hkêt nê. Rÿ mē kām: “Nā ām hāmri na ka ā ixto mex anê. Nā ja mex.” Anhÿr o mē kām kapêr kêt nê.

³ Mē ukapri hkêt jakamā koja mēhō tanhmā mē homnuj to nhūm amnhî tā mē omu nê kamā gryk kurê kumrêx nê aa gryk o hapêx kêt nê.

Nê amnhî tā tanhmā hkwÿjê ho hêx to ho pa.

Nê htÿx ri kām hprām xā hkôt tanhmā amnhî tomnuj to.

Nê oprê ho pijapu pix kukamā hamaxpêr. Nê axtem nê kām mēmoj mex pumunh prām rÿ mēmoj mex mar prām kêt nê.

⁴ Nê mēhō ho hkrāmnhwÿ htā axtem nê mē kām mē hkurê xwÿnhjê nhîhkram haxā. Nê hamaxpêr mex kêt o tanhmā amnhî tomnuj to rāhā ho ri pa.

Nê amnhî to rūnh o mē piitā mē hakrenh par ā amnhî to jarkrar o ri pa.

Nê amnhî krâ hkôt kām amnhî nhîpêx prām xā hkôt amnhî nhîpêx o pa nê kām Tirtūm kām prām xā hkôt amnhî nhîpêx prām kêt nê.

⁵ Hāmri nê mē kēp hkra hā amnhî jarênh o pa htā aa hkôt amnhî nhîpêx kêt. Ā Tirtūm kra hkêt xwÿnhjaja amnhî nhîpêx kot anhÿr jakamā kwa kêr ka ā mē hkôt apa hkêt nê Ximotre.

⁶⁻⁷ Na htem hêx rom hkwÿjê nhōrkwÿ hwÿr agjê nê kamā tanhmā mēnijê mā hêx to. Mē kot mē mar nê tanhmā amnhî tomnuj to hāmri nê ja hā amnhî pumu nê tee ri amnhî kukamā hamaxpêr kaxyw. Nê mē kām mē kapêr nyw mar prām tā nhām mē kapêr ma nê nhām mē kapêr mar nê aa Tirtūm kapêr mar nê amnhî kaxyw hkôt hamaxpêr kêt nê. Jakamā nhūm mē kot amnhî tomnuj xwÿnhjaja hêx rom mē hwÿr mra nê mē ôrkwÿ hwÿr agjê nê tanhmā mē kām mēmoj to hêx to.

⁸ Te kot amnepêm finat Jānre mē finat Jāmtija wa kot amnhî nhîpêxta pyrāk. Na pre finat Mojestia Tirtūm nhÿ hā tanhmā mē ahkre hto ho pa nhūm Jānre mē Jāmti wa kām mar prām kêt nê. Nê tanhmā ja nê hkwÿjê mā kapêr to ho pa. Tā ā mē kot amnhî tomnuj anhÿr o mē pa xwÿnhjaja na htem wa urāk nê kām Tirtūm kapêr mar prām kêt nê kapêr nê tanhmā hkwÿjê mā kapêr to ho pa. Nhūm mē hamaxpêr mex kêt jakamā ām mēmoj punuj pix kukamā hamaxpêr nê mē kuma nê amnhî kaxyw Jejus kôt hamaxpêr kêt nê.

⁹ Tā nom koja mē hkwÿjaja tokyx hprî hā mē kot mēmoj to hêx ā mē omu hāmri nê

axte mē hkôt hamaxpēr kêt nē nhūm mē ri amnhī pumu. Te amnepēm mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

Mē pahte Jejus ā pahpunuj tā hkaga hkēt ā mē pamā karō

Atre 13.50-14.7, 14.19-22

¹⁰ E Ximotre. Ate ixkôt apa ryy jakamā ra ate tanhmā ixte amnhī nhīpēx ho ixpa hā ixpumunh mex.

Ixte tanhmā Tirtūm kapēr o mē ahkre hto ho ixpaja.

Nē inhmā mēmoj to anhūr prām xwýnhja. Nē ixte amnhī kaxyw Kris kôt ija-maxpērja.

Nē inhgryk tokyx anhūr kētja.

Nē ixte tanhmā Kris kôt ixkwýjē ho mex to ho ri ixpaja.

Nē ixpunuj nē ixpa htā arī Kris kôt amnhī nhīpēx mex o ixpaja.

Ā ixte amnhī nhīpēx anhūr o ixpaja ate ixpumunh mex.

¹¹ Na pa pre krī pē āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpēx to pa amnhī xā htýx kamā ijamak o ri mē hkôt ixpa. Tā nhūm Pahihti Kris xatā mē kēp ixpytā pa ixtīr pē mē ihkra rūm ijpāōx o ixpa.

¹² Na hte Kris kwý hkēt xwýnhjaja mē pahte Kris kôt amnhī nhīpēx o papa hā mē pahptomnuj o pa.

¹³ Nē mē kot Tirtūm kapēr o hēx o mē pa xwýnhjaja koja arī mē kēp Kris kwý hā amnhī to hēx pē mē nokupyr. Nē mē kām Tirtūm kapēr o hēx o pa. Jao ra mē tāmjaja amnhī nokupyr o pa nē amnhī tomnuj týx kumrēx.

Pawre kot tanhmā Tirtūm kapēr ā kagā jarēnh to

Rōmān 15.4; Sikūn Pētre 1.19-21

¹⁴⁻¹⁵ No ka Ximotre. Amnepēm aprīre rūm na pa pre mē ixohtō nē Tirtūm kapēr o ajahkre ho ixpa. Akatorxā nē anhō wōwōre nē pa nē Kris kwýjaja pa prem ho ajahkre rāhā ho akôt ixpa ka mē inhmar týx nē amnhī kaxyw Jejus kôt ajamaxpēr. Jakamā kwa kēr ka arī hkôt ajamaxpēr mex rāhā ho ri apa. Tirtūm kapērja na htem mar pē amnhī kaxyw Jejus Kris kôt hamaxpēr nē hkôt amnhī xunhwý nhūm Tirtūm ja hā mē omunh xā hkôt mē ho hkra.

¹⁶ Tirtūm kapēr ā kagāja Tirtūm kapēr na. Na htem ho mē ahkre ho pa. Koja mēhō hkwyīm ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rý tanhmā amnhī tomnuj to htā kapēr ā kagā kamā kapēr nē Tirtūm kot ā kot amnhī tomnuj anhūrja nē mē pamā kapēr ā harēnh ma nē amnhī tomnujta kaga kurē kumrēx. Rý kamā kapēr nē Tirtūm kot tanhmā mē pahte amnhī to mex

to hā mē pamā karō kamā harē nē kuma. Hāmri nē ý hā hkôt amnhī nhīpēx mex rāhā nē. Ā na hte Tirtūm kapēr kagāja mē kot mar nē hkôt amnhī nhīpēx xwýnhjē ho mex anē.

¹⁷ Na hte mē kot Tirtūm mā amnhī nhīpēx o mē pa xwýnhjaja kamā harē nē hkôt amnhī nhīpēx mex pē mē piitā mē ho mex nē ho mē ahkre mex rāhā ho pa.

4

Pawre kot mēmoj tā Ximotre mā karō Korosē 4.5-6

¹ Nē koja nhýrmā Jejus Krisja akupýn mē pahwýr wrý hāmri nē mē pahpiitā tanhmā mē pajarēnh to. Ra mē htyk xwýnhjaja nē arī mē pahfür xwýnhjaja nhūm tanhmā mē pahte amnhī nhīpēx to ho papa hā mē pahpumunh kôt tanhmā mē pajarēnh to. Jao Tirtūm mē wa kuri mē pahfür tūm nē papa ho papa hā mē pajarē rý wa kuri pahfür tūm nē papa hkēt ā mē pajarē. Jakamā kwa Ximotre kot paj Tirtūm mē Jejus Krisja wa noo mā mēmoj tā amā karō ka inhmar týx nē.

²⁻⁴ Koja nhýrmā mē kēp Tirtūm kra hkēt xwýnhjaja axte kām Tirtūm kapēr mar prām kēt nē nhām mē kapēr pix mar prām o ri pa. Jao amnhī kukamā hamaxpēr o:

–Nā inhmā Tirtūm kapēr mar prām kēt. Kot mēmoj piitā nē mē hkurē kēnā. Kot paj hpānhā mēhō kot mēmoj nē mē hkurē hkēt xwýnhjē kapēr pix mar o ri ixpa. Nā kot paj anē. Ja na inhmā hprām. Nom kot paj axte Tirtūm kapēr mar kēt nē.

Anhūr hā kapēr kaga nē hpānhā htýx ri nhām mē ujarēnh pix ma nē hkôt hamaxpēr. Koja mē ā amnhī nhīpēx anhūr o pa. Jakamā kwa kēr ka arī mē kām Jejus kot tanhmā mē panē amnhī nhīpēx to hā harēnh rāhā ho ri mē hkôt apa Ximotre. Mē kām mar prām kēt tā māmri ri mē kām harē. Nē nhýri mēhō pumu nē kām harē. Mē kām mar prām xwýnhjē mā harē nē mē kām mar prām kēt xwýnhjaja ka mēānēn mē kām harē. Nhūm mēhō tanhmā amnhī tomnuj to ka hā omu nē tanhmā nē kām akapēr to kē hkaga tokyx anē nē akupým tām amnhī nhīpēx. Rý nhūm mēhō tām amnhī nhīpēx o pa ka ja hā omu nē hā kām akapēr nē kām:

–Ām hāmri na ka hte Tirtūm kôt amnhī nhīpēx mex nē. Anē.

Hāmri nē anojarēt kēt kām mē kām Tirtūm kapēr o mē ahkre rāhā ho ri apa.

⁵ Nē tām ri amnhī nhīpēx rāhā nē. Mē kot Jejus ā tanhmā anhīpēx to htā kēr ka ý hā amnhī to htýx nē arī mē kām kapēr jarēnh o ri mē hkôt apa. Jao Tirtūm mā amnhī nhīpēx mex rāhā nē. Kēr ka ā mē hkôt amnhī nhīpēx anhūr o ri apa Ximotre.

Pawre kot ra htyk kaxyw ā amnhī jarēnh Atre 20.17-35

⁶ Nē mē kot xpīr xà hā arīgroja ra hwýr ahtēp o mō. Kot paj pēr tokyx ty. Amnepēm na prem Tirtūm mā mēmoj nhōr kaxyw nē mē hkōm xà kamā mēmo kagōja py nē mē kot Tirtūm mā mēmoj nhōr xà hā mēstija ā hkapīr pa nhūm hapēx. Tā te ixpē mē hkōm xà kamā mēmo kagō pikapīrta pyrāk. Kot paj tokyx ty nē jar ijpāpēx.

⁷ Na pa ra Pahihti Jejus mā amnhī nhīpēx mex o ri ixpa. Mē kot tanhmā hā ixtomnuj to htā pa hkaga hkēt nē arī hkōt amnhī nhīpēx mex rāhā ra ixyk kaxyw.

⁸ Ixte Pahihti kām hprām xà hkōt amnhī nhīpēx mex o ri ixpa jakamā koja amnhī tā tanhmā ixto mex to. Nom papxpix ixto mex kēt nē. Na hte ām hāmri tām mē pahpiitā mē panhīpēx. Jakamā nhīrmā kot mē piitā tanhmā mē harēnh to xà hā arīgrota ā koja mē pahkīnh pē mē pahte amnhī wýr kamā pajamak o papa xwýnh piitā mē pamā mā mēmoj mex gō.

Pawre kot amnhī wýr Ximotre hwýr

⁹ Kwa na pa ra ato ijamak týx nē Ximotre. Kwa kēr ka amnhīm anojarēt nē tokyx tanhmā amnhī to hpa nē man ixwýr mō.

¹⁰ Na pre ra Kresēx ma Karatas wýr mō nhūm Xitre ma pika pē Tawmas wýr mō. Nhūm Tēmti ra tanhmā hamaxpēr to nē āpēnh gryk ā ixkaga nē ma akupým Tesarōn wýr mō.

¹¹ ām Rukre pix na arī ixkōt pa jakamā kēr ka anojarēt hāmri nē ahte amōr kēt nē. Makre mā anē kē man akōt ixwýr mō nē tanhmā ixto ajuta hto ho pa.

¹² Nē Xikitre na pa pre ra Epes wýr kumē.

¹³ Nē Torōt kām Kapti nhōrkwý kamā ixte kry pē inhō kamīs pa hkā ryti rer jakamā kēr ka anojarēt nē inhmā apy nē man inhmā o mō. Nē inhō kagāta ka mǎānēn inhmā amý nē o mō. Nē mēmo mry kà hā ixte mēmoj tā kagāta ka mǎānēn apy nē mǎn inhmā o mō. E kēr ka anojarēt nē ixkukrēxja jamý nē ixwýr ho mō.

Tanhmā Aresānti kot Pawre nhīpēx to hā harēnh

¹⁴⁻¹⁵ Nē na pre kàx o mēmoj nhīpēx xwýnh Aresāntija ixtomnuj nē. Pa pre mē kām Tirtūm kapēr o mē ahkre ho ri mē hkōt ixpa nhūm tee ri inhma nē kām mar prām kēt nē. Hāmri nē ixkutā amnhī xām nē inhīpēx kati nē. Nom koja Pahihti Jejus ixtā tanhmā ho. Kwa kēr ka amnhī nē omunh mex nē Ximotre.

Pahihti Jejus kot Pawre mā hamaxpēr o hihtýx ā harēnh

¹⁶ Nē pahi kot mē mar xà hā ixkre kamā wam ixte mē kām amnhī jarēnhta ā na pre mēhō ixyr pē mē kām tanhmā ijarēnh to hkēt nē. Na prem piitā mē unaj ixkaga hpa. Nom

kwār mē māmri ā amnhī nhīpēx anē. Tirtūm kot ixtā tanhmā mē hoja na inhmā hprām kēt.

¹⁷ ām Pahihti Jejusja pix na pre mē kurom ixkaga hkēt nē. Na pre ixto ixihtýx nē pa ý hā mē kām tanhmā mē panē kot amnhī nhīpēx to hā harēnh pa. Nhūm Ijaew kēt xwýnh kot inhmar o hkrī xwýnhjaja ixujarēnh mar o hkrī nhūm Tirtūm inhne tanhmā mē ho nhūm mē ixpīr kēt nē.

¹⁸ Koja Pahihti mē kutā ixto ixihtýx rāhā nē mēmo arīgro hā amnhī wýr ixto api. Pa Tirtūm mē wa kuri inhmex kumrēx nē ixtīr tūm nē ixpa ho ixpa. Pahihti mex o mex jakamā kēr pu mē kām mex o mex ā harēnh rāhā ho papa nē aa jam panhūrer kēt nē.

Pawre kot tanhmā hkrāmnhwýjē jarēnh to

¹⁹ Nē kēr ka Prisire mē mjēn Akir wa kām ijarē. Nē Onēsipti hprō nē hkrajaja ka mǎānēn mē kām ijarē.

²⁰ No Eras kormā Korīt kām pa. Nē Toropti na pre ā nē pa Mīrēt kām kure nhūm ixkōt mōr kēt nē.

²¹ Kwa kēr ka amnhīm anojarēt nē amgrā pē man tokyx ixwýr mō Ximotre.

Nē ota Epti mē Prutēhti mē Rīnre mē Krawreja awýr hpēr mē. Nē jar Kris kot pahkwýjē piitā awýr hpēr mē.

²² E kē Pahihti Jejus ato mex rāhā nē mē apiitā mē akutā nojarēt rāhā ho pa.

Tā ām ja pix. Ixpē Pawre na pa awýr kagāja nhīpēx nē kumē.

Xitre Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hâ hkrajê jahkre ho pa xwÿnhjê hô na pre. Nhûm pre Xitre Pawre hkôt pa hâ mytwrÿ xohtô nê. Tâ kêp Jejus kôt hkwyjê nhô pastô kaxyw gô hipôk pê Kret â arîk nê Tîrtûm kapêr o mê ahkre ho mê hkôt pa. Jakamâ nhûm Pawre kâm kagàja nhîpêx nê kamâ kâm mêmoj tâ karô. Tîrtûm kapêr o mê hêx xwÿnhjaja tanhmâ kot ja nê mê hkurê to hâ kâm karô. Nê mê kot Tîrtûm kapêr o mê ahkre mex pix xwÿnhjaja Jejus kwÿjê kaxyw kot mê rênh â kâm karô. Nê Jejus kwÿjaja kot axpên to mex o pa hâ kot mê kâm karô kaxyw kagàja kamâ mê kaxyw kâm hâ kagà. Â na pre Pawre Xitre mâ mêmoj tâ karô nê hâ kagà nê hwÿr mênh anê. Nê kâm:

¹ Pa Xitre? Xâ amex? Ixpê Pawre na pa awÿr kagà nhîpêx nê kumê. Na pa hte Tîrtûm mâ tanhmâ amnhî nhîpêx to ho ixpa. Nê ixpê Jejus Kris nhÿ hâ hkrajê jahkre o ixpa xwÿnh jakamâ na pa hte mê kot amnhî kaxyw hkôt hamaxpêr tÿx kaxyw tanhmâ mê kâm ixkapêr to ho ri ixpa. Nê mê kot hprî hâ mar kaxyw Tîrtûm kapêr o mê ahkre mex nê.

² Mê kot inhmar nê nhÿrmâ htyk nê ma Tîrtûm mê Jejus wa hwÿr âpir nê wa kuri htîr tûm nê pa ho pa hâ amnhî kukamâ hamaxpêr kaxyw. Amnepê m na pre Tîrtûm â mê pahpê hkrajê hkukamâ mê pajarênh anê. Nê âm hâ mri â mê pajarênh anê. Na hte mêmoj tâ amnhî to hêx kêt nê.

³ Tâ ra mê pakukamâ mê pamâ mêmoj to amnhîrit nê inhmâ kapêr o:

—E Pawre kêr ka ma mê hpiitâ mê hkôt ri apa nê mê kâm ixkapêr jarê nê mê kâm: “Kot kaj mê amnhî kaxyw Tîrtûm Kra hkôt ajamaxpêr nê hkôt amnhî xunhwÿ nhûm Tîrtûm ja hâ mê apumu nê mê ato hkra. Ka mê nhÿrmâ atyk tâ nhûm amnhî wÿr mê ato api ka mê wa kuri amex kumrêx nê afir tûm nê apa ho apa.” Anhÿr o mê kâm ixkapêr jarênh o ri mê hkôt apa Pawre.

⁴ Anhÿr o inhmâ kapêr tâ pa â amâ ixkapêr nê hâ kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xâm jakamâ te apê ixkra pyrâk. Jakamâ na pa hte ato Mêpanhîpêxâ maati Tîrtûm mê mê papytâr xwÿnh Jejus Krisja wa hwÿr râhâ ho ri ixpa nê wa kâm:

—Pa Tîrtûm mê Pahihti wa. Nâ Xitre ho na pa wa awÿ. Kwa kêr ka wa kutâ anojarêr râhâ ho ri apa. Kê wa akukwak ri hamakêtkati nê âmnhîx pa ho pa. Anê.

Kris kwÿ hkrâhtûmjaja kot tanhmâ amnhî nhîpêx to kaxyw mê hâ kâm karô

Wam Ximotre 3.1-13

⁵ Nê na pa pre Kret rûm inhnojarêr hâ mri nê amâ axâpênh â karô nê Kret kâm are nê man mō. Na pa pre amâ:

—E kêr ka jar arîk nê mê kâm ixkapêr jarênh jatur xâm mênh o mê hkôt apa. Nê Kris kôt pahkwÿjê mâ mê hkrâhtûmjê xunhwÿ. Kret kâm kri piitâ hkôt. Na pa pre ixprî hâ tanhmâ amâ mê harênh to. Tâ kêr ka ate inhmar xâ hkôt mê hkwyjê kapi nê mê unhwÿ. Koja mê â amnhî nhîpêx anhÿr o pa ka ja hâ mê omu nê mê unhwÿ.

⁶ Koja mê tām amnhî nhîpêx o pa nhûm mê piitâ axpên mâ mê mex â mê hupa.

Nê mê hprô pix tânopxar o pa nê kuhpa hâ nhâm mēnijê ho amnhîkati hkêt nê.

Nê kê mê hkrajaja hipêxâ pyrâ nê amnhî kaxyw Jejus kôt hamaxpêr o pa. Jao hipêxâ nê katorxâ wa kapêr ma nê wa hkôt amnhî nhîpêx. No ri htÿx ri amnhî tomnuj o pa hkêt nê.

Anhÿr o na pa pre mê hâ amâ karô.

⁷ Jejus kôt pahkwÿjê hkrâhtûmjaja kot Tîrtûm nhÿ hâ hkrajê mâ kapêr mex o pa jakamâ na htem tām amnhî nhîpêx o pa.

Nê amnhî pix kukamâ hamaxpêr o pa hkêt nê.

Nê gryk tokyx anhÿr kêt nê.

Nê kagôxyhti japrôr nê ho pipânho o pa hkêt nê.

Nê oprê ho pa hkêt nê.

Nê kâxporê rûnh prâm xâj hêx rom tanhmâ amnhî nhîpêx to hkêt nê.

Na htem â amnhî nhîpêx anhÿr hkêt nê.

⁸ Âm âmnhîx amnhî nhôrkwÿ hwÿr mê hwÿr o pa.

Nê mê piitâ mê kutâ nojarêr râhâ nê.

Nê tām hamaxpêr nê tām mê piitâ mê hipêx o pa.

Nê amnhî tomnuj pymaj amnhî to htÿx pê Tîrtûm kôt amnhî nhîpêx mex râhâ ho pa.

⁹ Nê mê kot Tîrtûm kapêr mar tÿx jakamâ kê mê arî hâ nohtÿx nê mar tÿx xâ hkôt amnhî xô ri ho hkwyjê jahkre mex o pa. Nê ho mê piitâ mê hamaxpêr o hihtÿx o pa.

Nhûm mêhō Tîrtûm kapêr kwÿm ri tanhmâ ujarênh to nhûm hâ kuma nê hprî hâ kâm tanhmâ harênh to kê mar mex nê.

E Xitre. Na hte â Jejus kwÿjê hkrâhtûmjaja amnhî nhîpêx anhÿr o pa. Jakamâ kêr ka aprî hâ Kret kâm Jejus kôt pahkwÿjê kapi nê mê kot tanhmâ amnhî nhîpêx to ho pa hâ mê omu. Nhûm mêhō â amnhî nhîpêx anê ka ja hâ omu hâ mri nê kêp Jejus kwÿjê hkrâhtûm kaxyw âm.

Kret nhō xw̄nhjaja kot tanhmā amnhī tomnuj to hā mẽ harēnh

Xitre 3.9-11

¹⁰Nē atar Kret kām na hte mẽ ohtō nē kām mẽ ò pahi kapēr mar prām kêt nē ht̄yx ri tanhmā Kris kw̄jê mã kapēr to ho pa. Na hte Ijaew kw̄jaja ã amnhī nhīp̄ex anh̄yr o pa. Jao Ijaew kêt xw̄ynh kot Jejus kôt amnhī xunhw̄yr xw̄ynh̄jê mã kām:

—Kwa mẽ ixpyrà nē mẽ ixpê Ijaewjê kot amnhī nhīp̄ex kôt mãn amnhī nhīp̄ex kêt wehe.

¹¹Anh̄yr o mẽ kām kapēr jakamā kwa kēr ka ã mẽ kapēr anh̄yrja nē mẽ kām akapēr kām axiht̄yx nē. Na htem hp̄ijaam kêt o hik̄axpore hprām x̄aj ã mẽ kām kapēr anh̄yr o pa. Jao mẽ hamaxpēr o ahkã nhũm mẽ kuma nē tee ri hamaxpēr.

¹²Na pre ra mẽ hk̄w̄jê hō tanhmā mẽ harēnh to. Mẽ ahkre xw̄ynh̄jê hōja mẽ harēnh o:

—Kret nhō xw̄nhjaja na htem hēx pix o pa. Nē oprē nē kām kaga nē apkur x̄a pix kukamā hamaxpēr o pa. Anē.

¹³ãm hāmri ã mẽ harēnh kot anh̄yr. ã mẽ kot amnhī nhīp̄ex anh̄yr jakamā kwa mẽ kot amnhī nhīp̄exja nē mẽ kām akapēr kām axiht̄yx o ri mẽ hkôt apa Xitre. Kê mẽ ã amnhī nhīp̄ex anh̄yr kêt nē. Nē mẽ kām anē kē mẽ amnhī kaxyw Tirt̄um kôt mãn hamaxpēr t̄yx nē.

¹⁴Nē kē mẽ axte Ijaewjê xujarēnh nē mẽ kot amnhī nhīp̄ex kôt amnhī nhīp̄ex kêt nē. ã mẽ kot amnhī nhīp̄ex o pa hã mẽ kām karō xw̄nhjaja na prem Tirt̄um kapēr kaga hpa.

¹⁵Mẽ kot Jejus kôt amnhī xunhw̄yr xw̄ynh̄jaja tām mẽ hamaxpēr o pa jakamā na htem Tirt̄um kot mẽmoj piitã ho kator xw̄ynh pumu nē piitã mex ã harē. No mẽ kēp Jejus kw̄y hkêt xw̄ynh̄jaja na htem hamaxpēr punuj pix o pa. Nē mẽmoj mex pumu nē mex kêt ã harē. Mex tã nhũm mex kêt ã harēnh o pa.

¹⁶Nē mẽ kēp Tirt̄um kra hã amnhī jarēnh tã amnhī tomnuj pix o pa. Jao kēp hkra hã amnhī jarēnh o hēx nē kapēr kw̄ym ri amnhī nhīp̄ex pix o pa. Nhũm Tirt̄um tee ri ja hã mẽ omu nē kām mẽ hk̄nh kêt nē. Tirt̄um mã mẽ kot amnhī to mex kw̄y mẽ hã jēt kêt kumrēx.

2

¹E Xitre kot paj tanhmā ate mẽ ahkre hto hã amã karō ka inhma nē amnhī xō ri mẽ kām hã karō ho ri apa.

Měmy wejja kot tanhmā amnhī nhīp̄ex to kaxyw mẽ hã kām karō

²Nē kēr ka mẽmy wejje mã anē kē mẽ amnhī to apt̄ar mex nē pa.

Nē pip̄anh nē ri pa hkêt nē.

Nē mẽ gryk kaxyw ht̄yx ri hk̄w̄jê hã hpēr o pikēnh kêt nē.

Kê mẽ tām hamaxpēr nē tām amnhī nhīp̄ex o pa.

Nē amnhī kaxyw Jejus kôt hamaxpēr t̄yx rāhã nē.

Nhũm mẽ hk̄w̄jaja kot mẽmoj tã tanhmā mẽ homnuj to htã kē mẽ arī tām amnhī nhīp̄ex o pa nē amnhī tã tanhmā mẽ ho hkêt nē.

E kēr ka ã mẽmy wejje mã ja hã akarō anē.

Měni wejja kot tanhmā amnhī nhīp̄ex to kaxyw mẽ hã kām karō

Wam Korīt 14.34-35; Wam Ximotre 2.9-15, 3.11; Wam Pētre 3.1-6

³⁻⁴Nē mẽni wejje mã anē kē mẽ kām Jejus k̄nh x̄aj tām ri amnhī nhīp̄ex o pa.

Jao axp̄en jakwa kamã nhām mẽ hixi ho rēr o pa hkêt nē.

Nē kagōxyhti ho pip̄anh o pa hkêt nē.

Nē mẽ kām anē kē mẽni x̄apt̄ar nywjê jahkre mex o pa. Mẽ kot mẽ mar nē mẽ urāk nē tām amnhī nhīp̄ex kaxyw. Jao mẽ kām mẽ mj̄en nē mẽ hkrajē japē hã mẽ kām mẽmoj to anh̄yr o mẽ kutã nojarēt rāhã ho pa.

Kēr ka ã mẽni wejje mã akapēr anē.

Měni x̄apt̄ar nywjaja kot tanhmā amnhī nhīp̄ex to kaxyw mẽ hã kām karō

⁵Nē mẽni x̄apt̄ar nywjê mã anē kē mẽ tām hamaxpēr p̄e tām amnhī nhīp̄ex o pa.

Nē mẽ őrkw̄y kamã ap̄ēnh mex o pa.

Nē mẽ mj̄en kapēr ma nē hkôt amnhī nhīp̄ex.

E. ã mẽni x̄apt̄ar nywjê mã karō anē. Koja mẽ ã amnhī nhīp̄ex anh̄yr o pa hāmri nhũm mẽ piitã mẽ kot amnhī nhīp̄ex ã mẽ omu nē mẽ harēnh o:

—Tirt̄um kapērja mex kumrēx. Mẽ kot hkôt amnhī nhīp̄ex o mẽ pa xw̄ynh̄jaja na htem tām amnhī nhīp̄ex mex o pa. Anē.

Měmy x̄apt̄ar nywjaja kot tanhmā amnhī nhīp̄ex to kaxyw mẽ hã kām karō

Wam Ximotre 4.12; Sikūn Ximotre 2.22; Wam Pētre 5.5

⁶Nē kēr ka mẽmy x̄apt̄ar nywjê mã anē kē mẽ mẽmoj punuj p̄e amnhī to ht̄yx o pa. Mẽ hamaxpēr punuj nē mẽ kot tanhmā amnhī tomnuj to mẽ amnhī to ht̄yx o pa.

⁷Nē kēr ka ajaxw̄yja tām amnhī nhīp̄ex rāhã ho ri mẽ hkôt apa Xitre. Mẽ kot ja hã apumunh nē akôt amnhī nhīp̄ex o pa kaxyw. Nom kēr ka tanhmā mẽ ahkre hto hk̄w̄ym ri tanhmā amnhī nhīp̄ex to hkêt nē. ãm Tirt̄um ã apijaam o akat̄at kôt mẽ kām kapēr o mẽ ahkre p̄e tām amnhī nhīp̄ex o ri apa.

⁸Nē kēr ka tām akapēr rāhã ho ri apa. Kēr kē mẽ kām mẽ pahkurē xw̄ynh̄jaja ja hã ama nē amnhī kamã hp̄ijaam hāmri nē apē Kris kw̄y hã tanhmā ato kapēr punuj to hkêt japēr.

Mē kām mē àpènh xwýnhjaja kot tanhmā amnhī nhīpèx to kaxyw mē hā kām karō

Epes 6.5-8; Korosē 3.22-25; Wam Ximotre 6.1-2; Wam Pètre 2.18-25

⁹ Nē kēr ka mē kām mē àpènh o mē pa xwýnhjē mā anē kē mē ò patrāw kām hprām xā hkót amnhī nhīpèx o pa.

Jao mē kapēr ma nē hkót amnhī nhīpèx mex nē.

Nē amnhī tā tanhmā mē kām kapēr punuj to hkēt nē.

¹⁰ Nē kē mē kēp mēmoj to àhkīnh kēt nē.

Nē tām mē hipèx rāhā nē.

Nē kām hkukrèx jamār mex o pa.

Koja mē ā amnhī nhīpèx anhÿr o pa nhūm mē ò patrāw amnhī tā mē omu nē mē ŷ hā hkīnh nē pa. Hāmri nē hamaxpēr o:

–Héxta waa nē. Inhmā àpènh xwýnhnta na hte inhmā àpènh mex o pa. Na hte ixkukrèx nē ixkrit jamār mex nē ixpé mēmoj to àhkīnh kēt nē. Nā mē kot Tirtūm kapēr kót amnhī nhīpèx o mē pa xwýnhjaja na htem tām amnhī nhīpèx o pa. Pēr Tirtūm kapēr ām hāmri na. Ām mex o mex. Anē.

E Xitre kēr ka mē kām mē àpènh xwýnhjē mā ā mē kot amnhī nhīpèx anhÿr ā karō.

Tanhmā Jejus kām mē pajapè xāj amnhī nhīpèx to hā harēnh

Epes 2.8-10; Wam Tesarōn 1.9-10

¹¹ Nē Tirtūm kot mēmoj to mē pakutā nojarēt rāhā ho pa jakamā na hte mē pahte Kra hkót amnhī xunhwÿr xwýnhjē ho hkra pu mē nhÿrmā wa kuri pahfør tūm nē papa ho papa.

¹² Na hte ā mē pamā kapēr o amnhīrit anē nē mē pamā:

–E kēr ka mē apé ixkra hā tām amnhī nhīpèx rāhā ho ri apa nē axte tanhmā amnhī tomnuj to nē tanhmā ajamaxpēr punuj to hkēt nē. Mē ate amnhī tomnuj pè amnhī to htÿx nē ixkapēr kót pix mā ri amnhī nhīpèx rāhā nē. Anē.

¹³ Na pu htem ā amnhī nhīpèx anhÿr o papa jao pahkīnh nē mē papytār xwýnh Jejus Kris jamār o papa. Koja nhÿrmā mē panhō Tirtūm xihtÿx xwýnhja akupÿn mē pahwÿr kumè pu mē mex o mex ā omu.

¹⁴ Na pre Jejus amnhī grōnh kót mē pahwÿr wrÿ nē mē pahpiitā mē pahte amnhī tomnuj pānhā amnhīrer kaxyw htyk o Tirtūm mā amnhīrer pa. Mēmo kaxyw na pre ā mē pané amnhī nhīpèx anē? Nā mē pahpè hkwyja na kām hprām. Nē mē pahte tām ri Tirtūm kapēr kót amnhī nhīpèx o papaja na kām hprām. Nē mē pahte urāk nē mē piitā mē kutā panojarēt rāhā ho papaja na kām hprām. Jakamā na pre ā mē pané amnhī nhīpèx anē.

¹⁵ E Xitre. Ixte mēmoj tā amā karōja kēr ka ho Kris kwÿjè jahkre mex o apa kē mē ama nē kapēr kót amnhī nhīpèx o pa. Nhūm

mēhō tanhmā amnhī tomnuj to ka hā omu nē Tirtūm nhÿ hā tanhmā nē kām akapēr to kē axte hkēt nē. Tā mām ka inhma. Kēr ka ā Kris kwÿjè jahkre mex o apa anē.

3

Tanhmā Kris kwÿ kot amnhī nhīpèx to hā mē kām karō

Rōmān 13.1-10; Epes 2.1-10

¹ Nē kēr ka Kris kót akwÿjè mā anē kē mē ho amnhīptār xwýnhjē kapēr ma nē mē hkót amnhī nhīpèx o pa. Nē mēmoj to mē kutā nojarēt rāhā ho pa.

² Nē mē kām anē kē mē tanhmā hkwyjè mā kapēr punuj to ho pa hkēt nē. Rÿ mēmoj tā mē kām àkjér kēt nē. Kē mē tām mē hipèx nē mē kamā ukapri pè mē ho mex rāhā ho pa. Na hte ā Kris kwÿjaja axpèn nhīpèx o pa anē.

³ Kormā mē pahte hkót amnhī xunhwÿr kēt ri na pu prem ā amnhī nhīpèx anhÿr kēt nē. Na pu prem Tirtūm mā pajamaxpēr kēt nē kapēr kót ri amnhī nhīpèx hkēt nē. Nē amnhī tomnuj pix kukamā pajamaxpēr o ri papa. Nē amnhī pix kukamā pajamaxpēr. Jao mē pamā pam amnhī nhīpèx prām xā kót pix mā tanhmā amnhī nhīpèx to ho ri papa. Nē axpèn tomnuj nē. Nē axpèn kām pagryk rāhā ho papa. Ā mē pahte amnhī nhīpèx anhÿr ho papa jakamā nhūm pre mē piitā kām mē pahkīnh kēt nē. Pu mē pajaxwÿja pamā mē hkīnh kēt nē.

Tanhmā Tirtūm kot mē pahto mex to hā harēnh

Rōmān 5.6-8; Epes 2.4-10

⁴ Tā pu prem Tirtūm kēp mē papytār xwýnh ā harēnh ma. Kot tanhmā mē pané amnhī nhīpèx to hā harēnh ma nē mex o mex nē mē pakamā ukapri hā harēnh ma.

⁵⁻⁶ Hāmri nē amnhī kaxyw hkót pajamaxpēr nē hkót amnhī xunhwÿr nhūm amnhī tā mē pahpumu nē mē pahto hkra. Nom mē pahte tanhmā amnhī to mex to hā mē pahpumunh kót mē pahto hkra hkēt nē. Mē pahte tanhmā amnhī to mex tore hā. Na pre mē pakamā ukapri nē ā mē papytār anē. Tā tanhmā na pre mē papytār to wehe? Nā na pre Jejus Kris kukwak ri te kot mē pane mē pahte amnhī tomnuj piitā kuhōnh par pyrāk o mē panhīpèx. Hāmri nē mē pahwÿr amnhī Karō rē nhūm mē pahwÿr agjē nē mē pamā mē pahte amnhī nhīpèx nyw gō. Ā na pre Tirtūm Jejus Kris kot mē pané htyk kukwak ri mē pahto mex rax anē hāmri nē mē pahwÿr amnhī Karō rēnh anē.

⁷ Tā mēmo kaxyw na pre ā mē pahto mex anē? Nā kām mē pajapè jakamā na pre ā mē panhīpèx anē. Mē pahte amnhī tomnuj xwýnh tā kām mē pajapè htÿx nē kām tanhmā mē pahto hprām kēt nē. Nē mē pahwÿr Kra Jejus mē nhūm wrÿ nē mē pahte

amnhî tomnuj pānhā mē panē ty. Jakamā mē pahte amnhî kaxyw hkôt pajamaxpēr nē hkôt amnhî xunhwȳr xwȳnhjaja Jejus kukwak ri mē pahpē Tirtūm kraa. Ā na pre Jejus mē pahto mex anē. Jakamā kot puj mē nhȳrmā Tirtūm mē wa kuri pahtīr tūm nē pamex nē papa ho papa. Kojā wa nhȳrmā ā mē pahto mex anē.

⁸ Ām hāmri na pa amā ā ja jarēnh anē Xitre. Jakamā kwa kēr ka inhma nē inhmar tȳx nē. Nē ho amnhî kaxyw Tirtūm kôt mē hamaxpēr xwȳnhjē jahkre mex o ri apa. Kē mē amar xā hkôt tām ri amnhî nhīpēx o pa.

⁹ Nē mē kot htȳx ri mēmoj tā axpēn mā àkjēr o mē pa xwȳnhjaja kēr ka mē hkôt apa hkēt nē. Nē mē hkukamā mē higēt kôt apa hkēt nē. Rȳ finat Mojes kot Tirtūm nhȳ hā kapēr ā axpēn mā mē àkjēr xwȳnhjē hkôt apa hkēt nē. Na htem ā ri axpēn mā àkjēr anhȳr o pa nē tām amnhî nhīpēx kēt nē.

¹⁰ Nē koja mē akwȳjē hō amnhî krā hkôt tanhmā hkwȳjē mā kapēr to nhūm mē kuma nē hā axpēn mā akir nē axpēn pē pikjēr kaxyw. Ka ja hā omu nē ā kapēr anhȳrja nē kām akapēr kē axte hkēt nē. Hāmri nhūm ama nē ām ama nē arī ā mē kām kapēr anhȳr japēr ka axte nē kām akapēr. Tā ra ate nē kām akapēr o axkrut tā nhūm arī ā kapēr anhȳr o axkrunēpxi japēr ka ja hā omu hāmri nē mē amnhî nē hano kē axte mē apē Kris kwȳjē hkôt ri pa hkēt nē.

¹¹ Ā mē kot amnhî nhīpēx anhȳr o mē pa xwȳnhjaja na mē ra Jejus wȳr pry kaga nē htȳx ri tanhmā amnhî tomnuj to ho pa. Nē ā amnhî nhīpēx anhȳr o pa jao kēp Kris kwȳ hēt ā amnhî to amnhīrīt.

Pawre kot kagā jatur xā kamā tanhmā Xitre mā kapēr to

¹² Nē kot paj tokyx ma Nīkop wȳr mō. Kēr pa tokyx hwȳr pōj nē amgrā pē krī nhō xwȳnhjē hkôt ixpa. Jakamā kot paj tokyx ma awȳr Atēmti rȳ Xikitre mē. Kē mō nē awȳr pōj ka tokyx tanhmā amnhî to hpa nē man ixwȳr mō pu mē Nīkop kamā axpēn pumu.

¹³ Nē ota mē akuri Apor mē axiwōkat Jēntija. Kojā wa mēmo arīgro hā ma krī hō hwȳr nojarēt ka wa kām mē apkur xā hkwy gō kē wa ma ŷ kamā mōr kēt nē.

¹⁴ Nē kēr ka Kris kwȳjē mā anē kē mē arī ōrkwȳ pix kām hkrī ho hkrī hkēt nē. Kē mē tanhmā axpēn to mex to ho axpēn kôt pa. Nhūm mēhō kēp amrakati kē mē tanhmā ho ajuta hto. Mē kām anē kē mē ā axpēn nhīpēx anhȳr o pa.

¹⁵ Nē ota jar Kris kôt pahkwȳjē piitā awȳr hpēr mē Xitre. Nē kēr ka atar Kris kôt mē pahkrāmnhwȳjē mā mē ijarē.

E ām ja pix. Kē Pahīhti Jejus mē akutā nojarēt rāhā ho pa. Ixpē Pawre na pa amā ā ixkapēr nē hā kagā nē awȳr mēnh anē.

Piremõ Pawre kot Piremõ hwÿr kagà në mënñ

Pawre na pre kagàja nhÿpëx në hkràmnhwÿ Piremõ hwÿr kumë. Na pre Piremõja amnhÿm kãm àpënh xwÿnh Onesti japró. Kàxpore ho hapró nhÿm amarÿ kãm àpënh o pa. Tã tanhmã hamaxpër to në hkaga në ma umaj krÿ hõ hwÿr hprõt në tën amÿxu në kamã pa ho pa. Hãmri në Pawre pumu në kãm amnhÿ jarë. Pawre arÿ kèp prës në hkrÿ ho hkrÿ nhÿm Onesti omu në kãm amnhÿ jarë. Hãmri nhÿm Pawre kãm Jejus jarë nhÿm kuma në hkõt amnhÿ xãm kurë kumrëx. Hãmri nhÿm Pawre ja hã omu në hkràmnhwÿ Piremõ mã kagà nhÿpëx në kamã Onesti xyr pë kãm kapër. Hãmri në hipëx pa në Onesti mã kugò në ma akupÿm ò patrãw Piremõ wÿr kumë nhÿm ma mō. Nhÿm Pawre kagàja kamã kãm kapër në kãm:

¹ Pa ixkràmnhwÿ Piremõ? Xà amex? Ixpë Pawre na pa awÿr kagà nhÿpëx në kumë. Apë Kris kót ixtò hã inhmä akÿnh. Na ka hte ixpyrà në Kris mã tanhmã amnhÿ nhÿpëx to ho apa. Ta ot pa awÿr kagàja kamã ixpër mē.

² Amã në anhörkwÿ kamã Tirtüm kapër mar kaxyw mē kèp Jejus kwÿ hã mē pikuprõnh xwÿnhjê hwÿr. Në Kris kót pahtõx Apti mē Akip wa hwÿr kumë. Akipja na hte mē pahpyrà në Pahihti Jejus mã tanhmã amnhÿ nhÿpëx to ho pa.

³ Na pa hte mē ato Mëpanhÿpëxà maati Tirtüm mē Pahihti Jejus Kris wa hwÿr rãhã ho ri ixpa. Kot mëmoj to mē akutã nojarët rãhã nhÿm wa ÿ hã mē ajamakëtkati në axãmnhÿx apa ho apa kaxyw.

Pawre kot Piremõ nhÿ hã hkÿnh ã harënh

⁴⁻⁵ Na pa pre ajarënh ma Piremõ. Na htem xatã tanhmã inhmä ajarënh to në ajarënh o: –Hëxta waa në. Piremõ na hte amnhÿ kaxyw Pahihti Jejus Kris kót hamaxpër tÿx në kãm mē ixpë Kris kót hkwyjé piitã hkÿnh pë tanhmã mē ixto mex to ho ri mē ixkòt pa.

Anhÿr o inhmä ajarë pa mē kuma në anhÿ hã ixkÿnh në ato Tirtüm wÿr rãhã ho ixpa në ato hwÿr o:

–Pa Tirtüm. Na xep hte Piremõ kãm akÿnh tÿx në akwÿjê ho mex rãhã ho pa. ãm hãmri na hte ã mē hipëx anhÿr o pa.

⁶ Na xep mē piitã mē kãm tanhmã Jejus kot mē inhne amnhÿ nhÿpëx to hã harënh o ri mē hkõt pa. Jakamã kër ka tanhmã mē kot mar xwÿnhjê hkrã hto kē mëhprÿ hã mar tÿx në Kris kot tanhmã mē ho mex to hã amnhÿ tã omu.

Anhÿr o ato kuwÿ.

⁷ Ate Kris kwÿjê ho mex o apa jakamã te ate pa ixto mex pyrãk Piremõ. Na htem anhÿ hã hkÿnh në pa. Pa ijaxwÿja ajarënh ma në anhÿ hã ixkÿnh tÿx në jar mē hagjênh xà kamã ixkrÿ.

Piremõ kot Onesti kamã ukapri hã Pawre kot kãm karõ

Römãn 15.7; Epes 4.31

⁸ Nã ixte amã mëmoj jarënhja tanhmã kute hkët. Kot paj ãm amã mëmoj jarë në hã awÿ. Nom kot paj Kris nhÿ hã amã tanhmã hã karõ hto hkët në.

⁹ Kot paj ãm pahte axpën to pahkràmnhwÿ hã hã awÿ. Ra ixwej tÿx në Kris ã arÿ mē hagjênh xà kamã ixkrÿ htã mëmoj tã awÿ ka inhma në inhmä ho anhÿr japër ko.

¹⁰ E amã àpënh xwÿnh Onesti na ixte amã harënh kaxyw. Na pre man ixwÿr mō. Ixpë prës në ixkrÿ nhÿm ixwÿr mō. Pa omu në kãm Jejus jarë nhÿm inhma në pahpyrà në amnhÿ kaxyw hkõt hamaxpër në hkõt amnhÿ xãm. Jakamã te kèp ixkra pyrãk. Hãmri në ixto ajuta mex o pa.

¹¹ Xep kormã Jejus kót amnhÿ xãm kët ri na pre amã àpënh mex kët në. Në kãm kaga në htÿx ri tanhmã àpënh to ho pa. Tã ra Jejus kót amnhÿ xãm hãmri në katãt kót inhmä àpënh mex o pa. Në ixto ajuta mex në. Kojã akupÿm amã apë hãmri në amã àpënh mex në.

¹² Jakamã ot pa akupÿm awÿr kumë ixkràmnhwÿ. Nom inhmä hapë jakamã kojã ma akupÿm mō pa ho ama në. Tã kot paj akupÿm awÿr kumë.

¹³ Kot jar ixri arÿk në apãnhã tanhmã ixto ajuta hto ho paja na inhmä hprãm.

¹⁴ Jakamã kot kaj amã akupÿn ixwÿr mënñ prãm në mãmrÿ ixwÿr amë. Nom ixte ja pumunh kët. Kam në amã hprãm xà hkõt tanhmã kãm akapër to. Kãm anë kē akuri arÿk në amã àpënh o pa rÿ akupÿn ixwÿr amë.

¹⁵ Nom konën. Mãn akupÿm awÿr mör në kèp Kris kót akwÿ hã amã àpënh mex kaxyw na pre Tirtüm ixwÿr kumë nhÿm ixwÿr mō në ixri Jejus kót amnhÿ xãm në ixri pa hã mytwrÿ hkwy hapëx pa akupÿm awÿr kumë.

¹⁶ Nom ra kèp amã àpënh xwÿnh pix kët mãänën kèp Kris kót atõð. Jakamã kot kaj wa atar axpën kót Pahihti Jejus kót tãm amnhÿ nhÿpëx o ri apa. Nom mãänën kèp ixkràmnhwÿ mex ã inhmä hapëð.

¹⁷ Jakamã kot kaj ixpë Kris kót akràmnhwÿ hã ijarë hã kot kaj mãänën inhmä ho mex o apa.

¹⁸ Në wam amã àpënh o pata ã mãn pre apë mëmoj to ahkÿ rÿ akãxpore hkwy ho ahkÿnh japër. Tã pa kot paj hpãnhã amã amnhÿre. Ka inhmä tanhmã kãxpore jarënh to pa amã amnhÿre.

¹⁹ Ixpê Pawre kot paj tanhmã kot ato tewên toja pãnhã amã amnhĩre. E pa amnhĩ nhĩhkra ho ã amã amnhĩ jarênh ã kagã anê. Nom ajaxwýja na ka tanhmã ixto tewên to Piremō. Na pa pre amã Jejus kot mẽ panê htyk ã harê ka pre inhmar xã hkôt hkôt amnhĩ xãm. Jao ixpyrà nê atĩr tũm nê apa ho apa mã xwýnhhta pãnhã te ate ixto tewên pyràk.

²⁰ E kwa ixkrãmnhwý. Ixpyrà nê apê Kris kwý jakamã kêr ka ixkamã axukaprĩ hã inhã Onesti ho mex nê. Kêr pa ja hã ajarênh ma nê ixkĩnh nê tãm ijamaxpêr.

²¹ Nã ra ixte apumunh mex kênã. Kot kaj ixte hã awýrta kôt hipêx. Ja kaxyw na pa amã kagãja nhĩpêx nê awýr kumê. Nom kot kaj ãm ja pix ho anhýr kêt nê. Kot kaj ixte hã awýrja kôt amnhĩ krã hkôt tanhmã ho mex to. Nã kot kaj ho anê.

Pawre kãm Piremō hwýr mōr nê omunh prãm ã harênh

²² Nê Tĩrtũm kot mẽ awýr inhmênh kaxyw mẽ ate ixto hwýr o apa jakamã koja apu tokyx ma mẽ awýr inhmê. Jakamã kwa kêr ka ixkutêp tanhmã mẽmoj to mex to. Kêr pa mẽmo arĩgro hã mōn awýr pōj ka ra ixkutêp tanhmã amnhĩ to hpa nê ãm ixpix kãm ajamak o apa.

²³ Nê ota Epasja awýr hpêr mẽ. Na hte ixpyrà nê Jejus Kris ã mẽ hagjênh xã kamã kêp prês nê hkrĩ ho hkrĩ.

²⁴ Nê Makre nê Aristak nê Tẽmti nê Rukre mẽ awýr hpêr mẽ. Na htem ixpyrà nê Kris mã tanhmã amnhĩ nhĩpêx to ho pa nom ixrom mẽ kêp prês kêt.

²⁵ E kê Pahihti Jejus Krisja akutã nojarêt rãhã ho pa. Ta ãm ja pix. Ixpê Pawre na pa amã kagã nê awýr kumê.

Eprêw Ijaew hwÿr kaga

Kaga ja na pre Ijaew ò amnhî kwÿjê mã hipêx nom mê pahte hipêx xwÿnhjã nhÿxi mar kêt. Na pre tanhmã hamaxpêr to nê amnhî nhÿxi hã kaga hkêt nê. Apu Pawre rÿ apu axtem mēhōja na pre hipêx. Ijaew kwÿjaja urāk nê Jejus kôt amnhî xunhwÿr xwÿnhjê mã na pre hipêx nê mê hwÿr kumê. Ijaewjaja mê hixi hō pê Eprêw. Jakamã nhÿm kaga nhÿpêx xwÿnhjã mê hwÿr hipêx nê kumê. Nê kamã mê kãm mēmoj jarēnh rax nê tanhmã Jejus jarēnh to.

Nê mê hkwÿjaja hkwÿjê hkÿnhã kãm Jejus prãm kêt jakamã na prem hkaga nê mê kot amnhî nhÿpêx tÿm o ujanār prãm xāj tanhmã mê homnuj to ho pa. Jakamã nhÿm kaga nhÿpêx xwÿnhjã tanhmã ja hã mê kãm kapêr to.

Nê na pre tanhmã Tirtÿm nhōrkwÿ kaakre hã kaga hto. Nê kaxkwa kamã òrkwÿ mexja nhÿm tanhmã hã kaga hto nê mex o òrkwÿ kaakre jakrenh ā harê.

Nê mê kot Jejus ā amnhî xà htÿx kamã hamak o pa htã mê kot tee ri ja hã amnhî pumunh nê Jejus kaga nê mê hkurê kamã hihtÿx nê. Ā mēhōja mê kãm kapêr anê nê hã kaga nê mê hwÿr kumê. Nê mê kãm kapêr o:

¹ Pa Kris kôt ixkwÿjaja? Xà mê amex? E ot pa mê amã kaga nhÿpêx nê mê awÿr kumê. Amnepêm Tirtÿm na pre mê panhġētêj hwÿr ŷ hã kapêr jarēnh o ri mê pa xwÿnhjê rē nhÿm mê xatã mê kãm kapêr jarēnh o ri mê hkôt pa. Ahpÿnhã tanhmã mê kãm kapêr to ho amnhîrit o mê hkôt pa. Nhÿm Tirtÿm xatã mê hkanrēhã mê hkra nê mê htãmnhwÿjê hwÿr mê hkwÿjê rē nhÿm mê kãm kapêr jarēnh o ri mê hkôt pa. Nom mê kãm kapêr piitã harēnh kurê kumrêx kêt nê. Na prem ām hkwÿ pix jarê. Tã nhÿm hpãnhã mê hkwÿjaja wamtajê mÿr pê mê hwÿr mra nê axte mê kãm hkwÿ jarēnh o ri pa. Jao ra mê kãm harēnh jatur xãm mēnh o mō.

²⁻³ Tã nhÿm Tirtÿm Kraja mê pahwÿr wrÿ nê mê pamã kapêr jarēnh jatur xãm kumê. Kêp Tirtÿm Kra jakamã te kot amnhî nhÿpêx pyrã nê pa. Urāk nê mex o mex. Nê wa hihtÿx xāja tipxi. Nê wa āhpumunh tÿxja mãānēn tipxi. Jakamã mê pahte pano ho Tirtÿm pumunh kêt tã Jejus pumunh pê te mê pahte Tirtÿm pumunh pyrāk. Urāk nê kot amnhî to rax o mê pahpiitã mê pajakrenh par. Amnepêm kormã mēmoj kêt ri nhÿm Jejus Tirtÿm kukwak ri mēmoj piitã ho kator pa. Tã koja Tirtÿm nhÿrmã kãm mēmoj piitã òr pa. Kaxkwa kamã mēmoj piitã nê jar pika piitã hkôt nhÿm kãm piitã òr pa.

Nê Jejus xāhpumunh xà pix kukwak ri na mēmoja arġ rāhã. Na pre mê panê mê pahte

amnhî tomnuj piitã hpãnhã amnhîrer par kaxyw mê panê ty. Hāmri akupÿm htġr hāmri nê ma akupÿm kaxkwa hwÿr api. Tirtÿm xihtÿx o hihtÿx xwÿnhjã wÿr akupÿm api. Nê ò krġ kamã upōk rÿm pahġ maati hkrġ xà hã kuri hkrġ ho hkrġ. Nê ħkō hã mê pahto amnhġptār rāhã ho hkrġ.

Jejus mē Tirtÿm kapêr o mē wrÿk xwÿnhjê jarēnh

⁴⁻⁵ Nê Jejus kot amnhî to rax o Tirtÿm kapêr o mē wrÿk xwÿnhjê jakrenh jakamã na pre ā Tirtÿm kãm kapêr anê nê kãm:

Na ka amnhî to rax o mê kot ixkapêr o mē wrÿk xwÿnhjê jakre.

Mê kot inhmã tanhmã amnhî nhÿpêx to ho mê pa xwÿnh na mē.

No mê kurom apê Ixkra kumrêx jakamã amex o ate mēmoj piitã hakrenh par.

Nê apê pika nhō xwÿnhjê hwÿr ixte amēnh mã xwÿnh na ka. Nã apê Ixkra kumrêx.

Kot paj jarāhã ixpê anhġpēxã hã mê piitã mê kãm amnhî to amnhîrit. Pa na ixpê anhġpēxã.

Anhÿr o Kra Jejus mã kapêr. Na pre kapêr o mē wrÿk xwÿnhjê mã ā kapêr anhÿr kêt nê. Jejus mã pix mã ā kapêr anê.

⁶ Nê koja nhÿrmã akupÿn mê pahwÿr Kra mēnh kaxyw hāmri nê kapêr o mē wrÿk xwÿnhjê mã kãm:

E ota Ixkrata. Ixkra kumrêx na. Kot amnhî to rax o mē piitã mê hakrenh par.

Jakamã kēr ka mē apiitã kutã arōrōk nê kãm mex o mex ā harê.

Anhÿr o mē kãm kapêr.

⁷ Nê kapêr o mē wrÿk xwÿnhjê na pre axtem tanhmã mê harēnh to nê mê harēnh o:

Ixkapêr o mē wrÿk xwÿnhjaja na pa hte nhÿhÿm mê kurê nhÿm htem inhmar xà hkôt ma nhÿhÿm mra nê inhmã tanhmã amnhî nhÿpêx to.

Te ixte ma nhÿhÿm kōk nê kuwyja mēnh nhÿm ixkapêr kôt nhÿhÿm mōrja pyrāk.

Anhÿr o mē harê.

⁸ No ā Krata jarēnh anhÿr kêt nê. Na pre tanhmã kãm kapêr to nê amnhî pyrã nê kêt Tirtÿm ā harê nê kãm:

Pa Tirtÿm? E ka kot kaj mê ho amnhġptār rāhã ho akrġ. Nê akatāt kôt mê ho amnhġptã.

⁹ Koja mê tãm amnhî nhÿpêx ka ja hã mê omu nhÿm ja amã mex nê.

No koja mê tanhmã amnhî tomnuj to ka ja hã mê omu nhÿm ja apê omnuj nê. Mê kot tanhmã amnhî tomnuj to ho paja na omnuj tÿx.

Tã ate inhmã hprãm xà hkôt amnhî nhÿpêx jakamã na pa mê kaxyw axãm ka akġnh kãm mê ho amnhġptã.

Ixpê anhô Tirtûm na pa â amâ ixkapêr anê.
Anê.

¹⁰ Hâmri nê kâm:

Pa Pahihiti. Nâ amnepêm kormâ mêmôj kêt ri na ka pre ixkukwak ri pika nê kaxkwa ho akato. Âm hâMRI na ka pre â amnhî nhîpêx anê.

¹¹ Tâ nom koja nhÿrmâ hamê wa hapêx pa. Âm kaxipix kot kaj kurô arî arâhâ nê aa ajapêx kêt nê.

Kaxkwa nê pika koja wa nhÿrmâ te ixkre hâ pô htûm kot amnhî nhîpêx pyrâk.

¹² Kot kaj wa hipêx o te mê kot ixkre nê pô htûm mâ hikranh par nê hpânhâ hâ nyw janhôr pyrâk.

Jao pika nê kaxkwa htûm o ajapêx pa nê hpânhâ nyw nhîpêx. Kaxkwa nyw nhîpêx nê pika nyw nhîpêx.

Nom kot kaj pika nê kaxkwa tûmta pyrâ nê aa awej nê axirerek kêt nê.

Kot kaj arî anyw nê axihtÿx râhâ apa ho apa nê aa ajapêx kêt nê. Arâhâ atîr tûm nê apa ho apa xwÿnh na ka.

¹³ E jar inhîhkô hâ nhÿ nê inhmâ mê ho amnhîptâr o akri.

Kot paj mê kâm akurê xwÿnhjê pynênh pa nê man awÿr mê o mra nê anhîhkram mê haxâr pa. Anê.

Â na pre Tirtûmja Kra Jejus mâ kapêr anê. No kapêr o mê wÿk xwÿnhjê mâ â kapêr anhÿr kêt nê.

¹⁴ E kot paj hpânhâ ixprî hâ mê amâ Tirtûm kapêr o mê wÿk xwÿnhjê jarê ka mê inhma. Tirtûm mâ na htem tanhmâ amnhî nhîpêx to ho pa. Na hte nhÿrmâ kuri mê htîr tûm nê mê pa mâ xwÿnhjê hwÿr mê kurê nhûm mê ma mê hwÿr wÿr nê tanhmâ mê ho ajuta hto ho pa. Na htem â amnhî nhîpêx anhÿr o pa.

2

Mê pahte Jejus kaga hkêt â mê pamâ karô

¹ Tâ â Tirtûmja Kra kot amnhî to rax o kapêr o mê wÿk xwÿnhjê jakrenh â harênh kot anhÿr jakamâ kwa kêr pu mê kapêr mar tÿx râhâ nê hkôt pix mâ amnhî nhîpêx o papa. Kot pu mê ho anhÿr kêt hâMRI nê gaa nê hkaga.

² Na pre Tirtûm kapêr o mê wÿk xwÿnhjaja amnepê mâ mê panhîgêtjê hwÿr wÿr nê Tirtûm nhÿ hâ mê kot tanhmâ amnhî nhîpêx to ho pa hâ mê kâm karô nê ma akupÿm api. Nê katât kôt ri mê kâm Tirtûm kapêr jarênh o pa. Hâmri nhûm mê kot hkôt amnhî nhîpêx nê mar mex xwÿnhjaja nhûm mêmôj mê kâm mex nê. No nhûm mê kot mar nê âm mar xwÿnhjaja koja mêmôj mê kêp omnuj nê.

³ Koja nhÿrmâ mêmôj mê kêp omnuj tÿx kumrêx nhûm mê tee ri amnhî tâ omu nê tee ri kêp amnhîptâr prâm kapÿr nê mex kêt nê pa. Nom mê kot Tirtûm kapêr mar tÿx

xwÿnhjaja koja mêmôj mê kâm mex o mex. Koja Tirtûm amnhî katut kôt mê kot amnhî tomnuj rênh pa nê axte kâm hamaxpêr kêt nhûm mê kuri htîr tûm nê mex râhâ nê pa ho pa. Na pre Pahihiti Jejus mê kot kapêr mar o kuhê xwÿnhjê kumrêx mâ â ja jarênh anê nê mê kâm:

–Nâ kot kaj mê amnhî kaxyw inhmâ ajamaxpêr nhûm Tirtûm ixtâ mê apumu nê mê anê mê ate amnhî tomnuj piitâ ho hapêx pa nê axte kâm hamaxpêr kêt nê. Anê.

Hâmri nhûm mê kot kapêr mar nê hkôt mê pa ho mê pa nê xwÿnhjaja mar tÿx nê amnhî xô ri mê pamâ harênh o ri pa. Nê mê pamâ:

–Nâ âm hâMRI. Nâ â ja jarênh kot anhÿr. Anê.

⁴ Hâmri nê mê pamâ aa mê pahte mêmôj pumunh kêt kwÿ ho anhÿr o ri mê pahkôt pa. Tirtûm Karô kot ja kaxyw mê ho mê âhpumunh tÿx jakamâ nhûm mê ÿ hâ ahpÿnhâ tanhmâ mê pamâ amnhî nhîpêx to ho pa. Mê pahte ja hâ mê omunh nê kamâ pano puma kaxyw. Nê â mê pajamaxpêr anê nê pajamaxpêr o:

–Nâ âm hâMRI na mê pamâ â Jejus jarênh anê nê ÿ hâ â amnhî nhîpêx anhÿr o pa.

Anhÿr o pajamaxpêr kaxyw na prem â mê pahkôt amnhî nhîpêx anhÿr o pa.

Mê pahpê Jejus tô nê htôx â mê pajarênh

Juâw 1.14; Rôman 8.3-4; Piritipos 2.5-11; Korosê 2.9; Wam Juâw 4.2

⁵ Nê na pre Tirtûm amnhî kukamâ tanhmâ amnhî jarênh to nê nhÿrmâ kot akupÿm mêmôj piitâ ho nyw nê tâm mêmôj piitâ ho amnhîptâr o pa hâ amnhî jarê. No na pre kapêr o mê wÿk xwÿnhjê mâ â mê kot amnhî nhîpêx anhÿr â mê kâm karô hkêt nê. Koja jajaja mê pahto amnhîptâr o pa hkêt nê.

⁶ Tirtûm kapêr â kaga htûm kot ja jarênh kot:

Kwa Tirtûm. Nâ âm hâMRI na ka hte pika ja kamâ ri mê ixpa xwÿnhjê jamâr mex râhâ ho apa.

Akînhâ amarî ri mê ixpa xwÿnh tâ amâ mê ijapêê.

Nê mê ixkutâ anojarêr râhâ ho apa.

⁷ Na ka hte tanhmâ mê inhîpêx to pa mê te mê ixpê akapêr o mê wÿk xwÿnhjê pyrâk.

Jao mê urâk nê akukwak ri mê inhmex nê ixpa ho ixpa.

Mê urân mê ixâhpumunh nê ixihitÿx kêt tâ mê inhmex nê ixpa.

⁸ Na ka pre ra ate mêmôj to akator xwÿnh piitâ mê inhîhkram haxâ.

Nâ âm hâMRI na ka pre â mê inhîpêx anê Tirtûm. Amex o amex. Anê.

Na pre ra mêmôj piitââ mê panhîhkram haxâ. Pika nê kaxkwa nê kapêr o mê wÿk

xwýnhjaja nê mêkarõmnuti nê kot mëmoj piitã hipêxa nhùm mê panhîhkram haxâr pa. Mê pahte îhkô hã ho amnhîptâr o papa kaxyw. No na pu mê kormã piitã ho amnhîptâr kêt nê.

⁹ No kêt Jejusja na Tirtûm mê pakurom îhkram mëmoj piitã haxâr par kumrêx. Kormã pika ja kamã ri pare ri na pre tanhmã amnhî nhîpêx to nê Tirtûm kapêr o mê wrýk xwýnhjê hkînhã te amnhî to greire pyrà nê amnhî xã htýx kamã hamak kãm ty. Tirtûm kãm mê pahto mex prãm xãj ã mê pahpiitã mê panê htyk anê. Tã nhùm Tirtûm akupým ho htír nê akupým amnhî wýr ho api nê kêp Pahi Maati mex o mex ã harê. Na pre ã Jejusja mê panê amnhî nhîpêx anê nhùm Tirtûm ja hã omu nê kukwak ri mê pahto mex nê.

¹⁰ Nê Tirtûm kot mëmoj piitã ho kator jakamã mëmoj piitã õ na. Na pre mê pakukamã hamaxpêr o:

—Inhmã ixkra xohtõ hprãm. Kot paj nhýrmã man amnhî wýr mê ho api kê mê ixri mex rãhã nê pa ho pa. Nã kot paj ã mê hipêx anê. Nê Ixkra Jejus koja kêp mê õ Pahihti. Koja mê urãk nê mëmoj punuj pununh o pa hãmri nê ã htýx kamã hamak o kêp mê õ Pahihti mã tãm. Anê.

¹¹ Na hte Jejus mê panê mê pahte amnhî tomnuj rê nê hpãnhã mê pamã mê pahte amnhî nhîpêx nyw jagjê nhùm Tirtûm ja hã mê pahpumunh kôt mê pahto hkra. Kêp Jejus Nhîpêxã nê kêp Mêpanhîpêxã maati jakamã nhùm Jejusja mê pahpê htõ nê mê pahpê htõx ã mê pajarê nê mê panhý hã hkînh nê.

¹² Tirtûm kapêr ã kagã htûm ã mê pajarênh kot anhýr. Kamã Jejusja Mêpanhîpêxã maati mã mê pajarênh kot:

Koja ixtõ nê ixtõxjaja akapêr mar kaxyw xypên wýr akuprõ pa ma mê hkôt mra nê mê kãm akapêr jarê nê mê îhkô hã amex ã gre. Anê.

¹³ Hãmri nê kãm:

Kot paj amnhî kaxyw akôt pix mã ijamaxpêr mex o ri ixpa. Anê.

Hãmri nê hpãnhã kãm:

Ot pa akrajê hkôt ri ixpa ho ixpa.

Ka na ka pre mê kêp ixtõ nê ixtõx kaxyw inhmã mê agõ.

Koja mê ixpyrà nê amnhî kaxyw amã hamaxpêr rãhã ho pa Tirtûm. Anê.

¹⁴ Nê mê pahpê pika nhõ xwýnhjaja na pu htem ãm ri panhî pix ã papa. Nê panhî kamã pahkamrõ hã ri papa. Jakamã na pre Jejus kot mê panê htyk kaxyw mê pahwýr wrý nê mê pahpyrà nê ã ho mê pakamã kato. Tã mëmo kaxyw na pre ã ho ã nê mê pahkôt pa? Nã ã ho htyk o Satanasti pê hihtýx xã ho hapêx par kaxyw na pre ã amnhî nhîpêx anê. Satanasti kêp mê kot

amnhî tomnuj xwýnhjê hpãm nê kêp mê htyk xwýnhjê hpãm.

¹⁵ Jakamã na hte kot mê pahtã îhkra pikamýr pyràk o mê panhîpêx pu mê ý hã pamã pahtyk pyma nê ri papa. Tã ra Jejus kot mê pahwýr wrýk nê te kêp mê papytãr pyràk o mê panhîpêx jakamã pu mê tee ri pahtyk kukamã pajamaxpêr o ri pamã ma ho papa hkêt nê.

¹⁶ Nê Tirtûm kapêr o mê wrýk xwýnhjê ho mex kaxyw na pre Jejus pika hwýr wrýk kêt nê. Mê panhîgét finat Apraãw pyrà nê mê panhî ho panhî xwýnhjê ho mex kaxyw na pre wrý.

¹⁷ Ijaew nhõ patrejaja na pre htem mê kot amnhî tomnuj mýrapê mê hpãnhã Tirtûm mã mry hkwy pa nê hkamrõ kapí nê mê ho Tirtûm wý. Kot hã mê omunh nê mê mex ã mê harênh kaxyw. Tã nhùm Jejus wrý nê mëmo mryta pyrà nê ã mê panê hkamrõ pikapír anê. Kaxyw na pre mê pahtõ maati ja mê pahwýr ã ho ã nê wrý nê mê pahpyrà nê ni nhõhy rûm kato. Jao kêp mê pahto Tirtûm wýr xwýnh maati. Na pre Tirtûm kãm hprãm xã hkôt mê panê mê pahte amnhî tomnuj pãnhã amnhîrer pa. Tã kot mê pahpyrà nê mëmoj punuj pununh nê amnhî xã htýx kamã hamak o pa jakamã kêp mê pakamã ukapír xwýnh ã pixi mex na.

¹⁸ Kormã htyk kêt ri na pre mê pahpyrà nê omnuj nê ri pa. Nhùm mêkarõmnuti nhõ pahi kot tanhmã amnhî tomnuj to hprãm xãj tee ri hkôt kãm ahkrox o pa hkapyrý nhùm hkôt amnhî nhîpêx kêt nê amnhî nê ho axtem nê. Jakamã koja Satanastija urãk nê tanhmã mê panhîpêx to nhùm Jejus mê pahtã omu nê amnhî pyrà nê tanhmã kêp mê panhîpêx to pu mê ý hã kutã amnhî to htýx nê papa.

3

Jejus kot amnhî to rax o Mojes jakrenh ã harênh

Juãw 1.17-18

¹ E ixkrãmnhwýjaja. Ra Tirtûm kot mê pahte kapêr mar nê tãm amnhî nhîpêx o ri papa kaxyw mê pahto hkra jakamã kwa kër ka mê Jejus kot tanhmã mê pamã amnhî nhîpêx toja mã ajamaxpêr rãhã ho ri apa. Na pre Tirtûm mê pahwýr kumê nhùm mê pahwýr wrý nê Tirtûm kapêr o mê pajahkre ho ri mê pahkôt pa. Nê te kêp mê panhõ patre pyrà nê mê pahto Tirtûm wýr o pa.

² Na pre Tirtûm finat Mojes kwý kaxyw Mojesja xãm nhùm kãm hprãm xã hkôt tanhmã mê hipêx to ho pa. Tã nhùm hpãnhã mê pakaxyw Kra Jejusja xãm nhùm Mojes pyrà nê Tirtûm kãm hprãm xã hkôt pix mã tanhmã mê panhîpêx to ho pa. Hamê na pre

wa Tirtûm jamaxpêr xâ hkôt tanhmâ kâm mē panhîpêx to ho pa.

³ Koja mēhō amnhîm ixkre mex nhîpêx nê hipêx pa nhûm hkwyjaja hwÿr mra nê omu nê mex kumrêx â harê. Nom kot hipêx xwÿnhnta âhpumunh xâ hkôt hipêx jakamâ tâm na mex o kot ixkreta jakrenh. Ja pyrâ nê finat Mojes kot amnhî to rax tâ nhûm Jejus kot amnhî to rax o kot hakrenh. Mojes te kêp ixkre nhîpêxta pyrâk no Jejus te kêp ixkre nhîpêx xwÿnhnta pyrâk jakamâ kot amnhî to rax o kot Mojes jakrenh.

⁴ Nê mē kot ahpÿnhâ amnhî krâ hkôt tanhmâ ixkre nhîpêx to jakamâ kot hipêx xwÿnhnta na mex o ixkreja jakrenh. Tâ ja pyrâ nê Tirtûm kot mēmoj piitâ ho kator jakamâ kot amnhî to rax o kot mēmoj piitâ ho kator xwÿnh jakrenh par.

⁵ Nê finat Mojes na pre hte Tirtûm kâm hprâm xâ hkôt tanhmâ amnhî nhîpêx to ho pa. Nê ma kâm hkwyjê piitâ hkôt mē kâm kapêr jarênh o ri pa. Tirtûm tanhmâ kot mē kâm kapêr tota kukamâ nhûm mē kâm harênh o mē hkôt pa. No âm Tirtûm mâ tanhmâ amnhî nhîpêx to ho hpa xwÿnh pix na pre.

⁶ Nê Kris haxwÿja na pre hte Tirtûm kâm hprâm xâ hkôt tanhmâ amnhî nhîpêx to ho pa. Nom Mojes rom kêp Tirtûm Kra kumrêx jakamâ kurom kêp mē panhō Pahihî kumrêx. Tâ kwa kêr pu mē kâm hprâm xâ hkôt pix mâ tanhmâ kâm amnhî nhîpêx to ho ri papa. Mē kot hâ tanhmâ mē panhîpêx to htâ pu mē ŷ hâ mē kutâ amnhî to htÿx nê papa nê pajamaxpêr o:

—Nâ ixpunuj nê ixpa htâ kot paj ixpunuj râhâ ixpa ho ixpa hkêt nê. Koja nhÿrmâ Tirtûm ixto mex kumrêx pa axte tanhmâ ixpunuj to nê ixpa hkêt nê. Hêxta waa nê. Nâ ja inhmâ hprâm tÿx kumrêx.

Anhÿr o amnhî kukamâ pajamaxpêr o papa.

Mê pahte Tirtûm kaga hkêt â mē pamâ karô

Wam Korû 10.1-11; Jutre 5

⁷⁻⁸ Amnepêm na pre mēhōja tanhmâ Tirtûm Karô nhÿ hâ kapêr to nê kapêr o: E kêr ka mē Tirtûm kapêr mar tÿx o apa.

No ama nê âm ama nê ri hâ apa hkêt nê. Rÿ kapêr pê akrâ hihtÿx o apa hkêt nê.

Mê akukamâ mē anhîgêjtaja na prem â amnhî nhîpêx anê nê Tirtûm kapêr pê hkrâ hihtÿx o pa. Kapôt â Mojes kôt mē pata â na prem kâm Tirtûm kapêr mar prâm kêt nê. Nê tee ri amnhî kukamâ hamaxpêr nê akupÿm Ejit wÿr hkrâ nê axpên mâ: “Kwa na pu mē ra pahpunuj tÿx nê papa nhûm Tirtûm âm ja hâ mē pahpumu nê tanhmâ mē pahto mex to hkêt nê. Mân ra mē pahkaga nâ? E kwa pu mē

awjanâ nê ma akupÿm Ejit wÿr mân papa.” Anê.

⁹⁻¹⁰ Na prem â axpên mâ kapêr anhÿr o ri pa hâ amgrâ pê 40.

Tirtûm xatâ kot tanhmâ mē ho mex to nhûm mē kot amnhî tâ omunh tâ âm omu nê htÿx ri amnhî hkrâ hkôt pa.

Nhûm tee ri amnhî tâ mē omu nê mē kamâ gryk nê.

Hâmri nê hamaxpêr o: “Nâ pêr mē hamaxpêr kot mē hâ hkwy jêt kêt kumrêx. Te mē hamak kre hkêt pyrâ nê ixkapêr mar kêt nê.” Anhÿr o hamaxpêr.

¹¹ Hâmri nê mē kâm: “E mē inhma. Â mē ate amnhî nhîpêx anhÿrja mÿrapê kot kaj mē ma ixte mē amâ pika mex nhôr mâ xwÿnhnta wÿr apa hkêt nê.” Anhÿr o mē kâm kapêr. Anê.

Â mēhōja Tirtûm Karô nhÿ hâ te Tirtûm tâm kot mē kâm kapêr pyrâk o mē harênh anê.

¹² Jakamâ kwa mē okora ixkrâmhÿwjaja. Kêr ka mē amnhî to mex o apa. Tirtûm kêp Mēpahpâm â pixi mex tâ kot kaj mē tanhmâ ajamaxpêr punuj to rÿ amnhî kaxyw hkôt ajamaxpêr kêt hâmri nê te ate amnhî katut kôt âm pyrâk o hipêx nê hkaga. Kwa mē â amnhî nhîpêx anhÿr kêt nê.

¹³ Kêt mē Kris kôt axpên to axihtÿx o ri apa. Nê apkati mē â axpên nhîpêx anhÿr râhâ nê. Kot kaj mē anhÿr kêt hâmri nê mē amâ Tirtûm kapêr mar prâm kêt â amnhî to amnhîrît. Jao tanhmâ amnhî tomnuj to ho ri apa nê atÿx ajamaxpêr o: —Nâ ixte â amnhî tomnuj anhÿr tâ nhûm Tirtûm ja hâ ixpumu nê âm hâ ixpumu.

Anhÿr o ajamaxpêr japêr. Rÿ mē ajamaxpêr o:

—Nâ na pa hte â amnhî tomnuj anê nhûm Tirtûm ja hâ ixpumu nhûm ja kâm mex nê.

Anhÿr o ajamaxpêr japêr.

¹⁴ Kwa mē ri â ajamaxpêr anhÿr kêt nê. Amnepê mâ mē pahte Kris kôt amnhî xunhwÿr nhûm kot mē pahto hkrata â na pu prem amnhî kaxyw hkôt pajamaxpêr o papa. Tâ kêr pu mē arî â amnhî nhîpêx anhÿr tÿx o papa râhâ ty.

¹⁵ Tirtûm kapêr â kaga htûm kot ja jarênh kot:

E kêr ka mē Tirtûm kapêr ma nê mar tÿx nê. No ama nê âm mar nê ri hâ apa hkêt nê.

Rÿ mē kot hkaga xwÿnhjê pyrâ nê kêp akrâ hihtÿx kêt nê. Anê.

¹⁶ Mē panhîgêjtaja na prem Mojes kôt pika pê Ejit rûm kato nê hkînh nê ma kapôt â kormâ pika mex wÿr pa. Nom Tirtûm kapêr mar nê hkôt amnhî nhîpêx râhâ hkêt nê. Na prem kuma nê hkôt amnhî nhîpêx o hâ apkati grêre htâ ra mēmoj nhÿ hâ omnuj nê pa hâ amnhî pumu nê tee ri amnhî kukamâ hamaxpêr.

¹⁷ Jao xatã kapêr nhîrôp kuhê nê amnhî hkrã hkôt pix mã amnhî nhîpêx o pa ho ra hã amgrã pê 40. Hãmri nhûm tee ri amnhî tã mē omu nhûm ja kêp omnuj nê. Jakamã nhûm mē piitã kapôt ã ri pa nê gaa nê pikaprãr pa.

¹⁸ Mē kot kapêr mar kêt jakamã nhûm mē kãm:

–Nã ã mē ate amnhî nhîpêx anhÿr o ri apaja mÿrapê kot kaj mē ixte mē amã mē amex nhôr mã xwÿnhhta wÿr apa hkêt nê. Anê.

¹⁹ Tã mē kot amnhî kaxyw Tirtûm kôt hamaxpêr o pa hkêt jakamã na prem pika mexta wÿr hpôx kêt rãhã pikaprãr pa. Nhûm mē hkra nê mē htãmnhwÿjê pixjaja na prem mē mÿr pê hwÿr pøj nê kamã pa.

4

Mê pahte Tirtûm kukwak ri pajamakêtkati nê ri papa hã mē pajarênh

¹ Mē pahte Tirtûm kukwak ri pajamakêtkati nê ri papa ho papaja Tirtûm kãm hprãm jakamã kwa kêr pu mē amnhî pumunh mex o papa. Nê wam mē panhîgêt rom Tirtûm kapêr mar tÿx nê hkôt mãn kêt ri amnhî nhîpêx mex rãhã nê. Kêr pu mē kurom mē pajamak kãm amnhî krit xã hã pika mexta wÿr pøj.

² Mē kot mē pahpyrà nê Tirtûm kapêr mar mex tã na htem amnhî kaxyw hkôt hamaxpêr kêt nê. Te mē kot mar kêt pyràk.

³ ãm mē kot amnhî kaxyw Kris mã hamaxpêr xwÿnh pixjaja na htem kukwak ri hamakêtkati nê ri pa ho pa. Amnepê mã mēmoj piitã hkêt ri na pre Tirtûm mēmoj piitã ho kator pa hãmri nhûm apkati nhûm axte mēmoj tã ãpênh kêt nê. ãm ô kri kamã arî hamakêtkati nê hkôkôt o hkrî. Tã mē pahte urãk nê pajamakêtkati nê papa ho papaja na kãm hprãm. No wam ri mē pa xwÿnhjaja mē kot amnhî tomnuj mÿrapê na pre Tirtûm mē kot urã nê hamakêtkati nê paja nê mē hkurê. Kapêr ã kagã htum kot harênh kot:

Na pre Tirtûm tee ri amnhî tã mē kot hipêx ã mē omu nhûm ja kêp omnuj nê. Hãmri nhûm mē kãm: “Nã kot kaj mē ixkukwak ri axãmnhîx ajamakêtkati nê apa hkêt nê.” Anê.

⁴ Nê kot harênh kot:

Na pre Tirtûm ãpênh ã arîgro kêp 6 hãmri nhûm arîgro pê 7ta ã nhûm axte mēmoj tã ãpênh kêt nê. Na pre arî hkôkôt o nhÿ.

Arîgro pê 7 ã arî hamakêtkati nê hkôkôt o nhÿ. Anê.

⁵ Nê mē kot kapêr mar nê ãm mar xwÿnhjê jarênh kot:

Kot kaj mē aa ixkukwak ri axãmnhîx nê ajamakêtkati nê apa hkêt nê. Anê.

⁶ Mē panhîgêjtaja kot amnhî kaxyw Tirtûm kôt hamaxpêr kêt jakamã na prem hamakêtkati nê ri pa hkêt nê. Tã mē papajaja na Tirtûm arî kãm mē paxãmnhîx nê pajamakêtkati nê papa hprãm.

⁷ Amnepêm Ijaew Tirtûm kôt hamaxpêr kêt jakamã na prem kapôt ã pikaprãr pa. Hãmri nhûm amgrã sohtô nê hapêx nhûm Tirtûm mē hkanrêhã mē htãmnhwÿjê hõ pê finat Tawija mã kapêr nhûm kuma nê mē pamã tanhmã kapêr tota ã kagã nê hã kagã kot: Kwa kêr ka ixkapêr ma nê mar tÿx nê.

No mē anhîgêjtê pyrà nê akrã hihtÿx ho inhma nê ãm inhmar kêt nê. Anê.

Na pa pre ra mē amã ã ja jarênh anê.

⁸ Na pre finat Jojueja finat Mojes mÿr pê ma pika pê Kanaã hwÿr mē hkanrêhã mē hkrajê o pa nê hwÿr mē o pøj. Tã nhûm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhî nhîpêx anhÿr ronhÿx Tirtûm axte mē kãm mē hamakêtkati nê mē hamak kãm amnhî krit nê mē pata hkukamã harênh kêt nê.

⁹ Nom mē pahte kukwak ri pajamakêtkati nê pajamak kãm amnhî krit nê ri papa ho papaja na Tirtûm arî kãm hprãm.

¹⁰ Na pre arîgro pê 6ja ã mēmoj piitã ho kator pa nhûm apkati nhûm hamakêtkati nê hkôkôt o nhÿ. Tã kot puj mē pahpê hkrajaja amnhî to kuwÿ nhûm tanhmã mē pahkrã hto pu mē kukwak ri urãk nê paxãmnhîx nê pajamakêtkati nê papa ho papa. Te Tirtûm ãpênh pa nhûm apkati nhûm hamakêtkati nê hkôkôt o ÿrta pyràk.

¹¹ Jakamã kwa kêr pu mē amnhî to kuwÿ kê ã mē panhîpêx anê pu mē urãk nê ã amnhî nhîpêx anhÿr rãhã ho papa. Nom kot pu mē pahkwÿ Ijaewjê pyrà nê kapêr kwÿm amnhî nhîpêx o papa hãmri nê mē urã nê paxãmnhîx pajamakêtkati nê papa hkêt nê.

Tirtûm kapêr te kot wapo xwa gix pyràk ã harênh

¹² Nê Tirtûm kapêrja te ï ho tanhmã kot mēmoj to kaxyw hihtÿx pyràk. Nê te wapo xwa gix pyràk. Koa mēhõ ô wapo xwa mex nê ho mēmoj jakãr mex nê. Ho mry hi jakãr mex pê kaxwÿnh kãm hi kanhî o amnhîrit. Ja pyrà nê na hte Tirtûm kapêr mē pajamaxpêr o amnhîrit nê mex ã harê rÿ omnuj ã harê.

¹³ Nê na htem Tirtûm pê mēmoj to pimxur kêt nê. Na hte hprî hã mēmoj piitã omunh pa. Nê mē pajamaxpêr kôt mē pahpumunh pa. Na pu htem ã kot mēmoj piitã omunh par anhÿr xwÿnhja noo mã tanhmã amnhî nhîpêx to rãhã ho papa.

Jejus kêp mē panhõ patre maati hã harênh

Eprêw 10.19-25; Wam Juãw 2.1-2

¹⁴ Nê Ijaew nhõ patrejaja na pre htem Tirtûm mã amnhî jarênh xã hã ixkre hwÿr

agjê nê kamâ mê ho Tirtûm wÿr o pa. Ja pyrà nê na pre ra Jejus Tirtûm nhô krî hwÿr api nê kamâ mê pahto hwÿr o hkrî. Kêp Kra kumrêx jakamâ kêp mê pahto Tirtûm wÿr xwÿnh maati. Jakamâ kwa kêp pu mê amnhî kaxyw hkôt pajamaxpêr tÿx rãhã ho papa.

¹⁵ Satanasti na pre te kot mê panhîpêx pyràk o Jejus nhîpêx. Nê tee ri kot tanhmã kãm kapêr to nhùm kot mar nê tanhmã amnhî tomnuj to hprãm xãj ãm ri kãm ahkrox kaprÿ nhùm kutã amnhî to htÿx nê hkôt amnhî nhîpêx kêt nê. Tã kot Satanasti kot amnhî nhîpêx ã omunh mex jakamâ na hte kêp mê pahãnopaxar mex o pa. Kot mê paxirerek kôt mê pahpumunh mex.

¹⁶ Jakamâ kwa kêp pu mê amnhî tã kamã pahpijaãm kêt kãm paxãmnhîx ri amnhî to hwÿr o papa. Kêp mê pakutã nojarêt xwÿnh nê kêp mê pakamã ukapri xwÿnh jakamâ kêp pu mê tee ri mêmoj tã amnhî pumu nê amnhî to hwÿr kurê kumrêx. Hãmri nê ý hã paxãmnhîx nê pajamakêtkati nê ri papa.

5

¹ Nê mê panhõ patre maati Jejusja Tirtûm na pre mê pakaxyw ãm. Kêp mê pahkwÿ hã mê pakaxyw ãm nhùm hte mê pahto Tirtûm wÿr o pa. Nê kãm mê pahkînh xã nhõr o pa. Kot ja hã mê pahpumunh nê mê pahte kapêr kwÿm tanhmã amnhî nhîpêx to ho papa hã mê pakamã gryk o hapêx tokyx anhÿr kaxyw.

² Mê panhîgêjtaja na pre htem mê õ patre maati hwÿr mra nê kãm tanhmã amnhî tomnuj to hã amnhî jarê nhùm mê kuma nê mê kamã ukapri nê. Mê urã nê kormã kot Tirtûm kôt amnhî nhîpêx totuj anhÿr jakamâ na pre mê kot tanhmã amnhî jarênh toja ma nê mê kamã ukapri nê.

³ Hãmri nê mê hpãnhã Tirtûm mã mêmoj gõ nê mããnen amnhî pãnhã kãm mêmoj gõ. Mê urãk nê kot amnhî tomnuj o paja mÿrapê amnhî pãnhã kãm mêmoj gõ.

⁴ No na pre hte patrejaja amnhî krã hkôt kêp patre maati kaxyw amnhî xunhwÿr kêt nê. Tirtûm kot mê kaxyw mê unhwÿr jakamâ na pre mê kaxyw finat Arãwja xãm nhùm kêp mê õ patre maati hã mê ho Tirtûm wÿr o pa.

⁵ Nê Kris haxwÿja kêp mê panhõ pahi maati hã tãm kot amnhî xãm kêt. Tirtûm na pre mê pakaxyw ãm nê tanhmã kãm kapêr to nê kãm:

Nã apê Ixkra na ka.
Kot paj jarãhã ixpê Anhîpêêxã hã mê kãm amnhî jarê. Anê.

⁶ Nê hpãnhã kãm:

Kot kaj Mekijetek pyrà nê apê patre maati hã mê ho ixwÿr rãhã ho ri apa. Anê.

⁷ Jejus kormã pika ja kamã pa ri na pre amnhî to Tirtûm wÿr rãhã ho pa. Tôhã hkapri nê tee ri mêmoj tã amnhî pumu nê

amnhî to kuwÿ. Nê tee ri mê kot hpîrta kukamã hamaxpêr nê mÿr kãm amnhî to kuwÿ. Kop apu Tirtûm kãm mê kot kêp hpîr prãm kêt ronhÿx pre tanhmã nê mê kãm hkurê xwÿnhjê ho nhùm mê hpîr kêt nê. Jakamã nhùm pre ã amnhî to hwÿr anê. No ãm Tirtûm kãm prãm xã hkôt kãm amnhî nhîpêx prãm jakamã nhùm kuma no ãm tanhmã nê mê ho hkêt nhùm prem kupî. ⁸ Kêp Tirtûm Kra kumrêx tã amnhî xã htÿx kãm hamak kãm ty. Jao Tirtûm kãm hprãm xã hkôt amnhî nhîpêx ã amnhî pumunh mex nê.

⁹ Na pre amnhî xã htÿx kãm hamak o amnhî mex o amnhî mex ã mê kãm amnhî to amnhîrit. Jakamã na hte mê kot kapêr kôt ri amnhî nhîpêx o mê pa xwÿnhjê mã mê kot amnhî nhîpêx nyw jagjê nê nhÿrmã Tirtûm mê wa kuri mê htîr tùm nê mê pa mã xwÿnhjê hã mê harê.

¹⁰ Jakamã na pre Tirtûm Mekijetek pyrà nê kêp patre maati kaxyw ãm.

Mê pahte Kris kaga nê mê pahkurê

Wam Korî 3.1-2, 13.11, 14.20; Epes 4.11-

16

¹¹ Nê Jejus kêp mê pahto Tirtûm wÿr xwÿnh maati hã harênhja inhãm ixpri hã mê amã harênh par prãm tã ka mê kormã inhmar tÿx kêt nê. Pa tee ri ixpri hã mê amã harênh kaprÿ. Te mê amã mar prãm kêt o amõr pyràk.

¹² Amnepê mã mê ate Kris kôt amnhî xunhwÿr nê kapêr mar tÿx tã kormã nhãm amnhî xõ ri ho amnhî kwÿjê jahkre ho ri apa hkêt nê. Te mê ate hã ano hkêt pyràk jakamâ na pa hte arî mê amã kapêr kot amnhîrit mex xwÿnh kwÿ ho mê ajahkre ho pa. No kot amnhîrit mex kêt xwÿnh o mê ajahkre hkêt nê. Te mê hkarãre kot amnhî nhîpêx pyràk o na ka htem amnhî nhîpêx o apa. Na hte mê hkarãre mêõ mex kur kêt nê. ãm kormã katorxã hkã pix kaõ. Ja pyrà nê ãm Tirtûm kapêr kot amnhîrit mex xwÿnhnta pix na ka mê mar tÿx o apa nom kapêr kot amnhîrit mex kêt xwÿnhja ka mê mar mex kêt nê.

¹³ Nê mê hkarãre kormã Tirtûm kapêr mar kêt jakamâ na htem kormã mêmoj mex nê mêmoj punuj pumunh kêt nê. Tã te mê ate mê kot amnhî nhîpêx pyràk.

¹⁴ Mê kot Tirtûm kapêr mar mex xwÿnhjaja na htem hpri hã kapêr piitã mar tÿx nê. Kot amnhîrit mex xwÿnhnta mar tÿx nê mããnen kot amnhîrit mex kêt xwÿnhja nhùm mēhpri hã piitã mar tÿx nê. Te ho mê ãptar kot mêõ mex kur o pata pyràk. Jao ra mê ãptar jamaxpêr o hamaxpêr o ri pa nê hamaxpêr o:

—Kot paj tãm amnhî nhîpêx o ri ixpa nhùm ja inhãm mex nê. Nom kot paj axtem

tanhmã amnhĩ tomnuj to nhũm ja ixpê omnuj nê. Jakamã kot paj tãm amnhĩ nhĩpêx pix o ri ixpa nhũm Tirtũm mã ja mex nê. Anê.

6

1-2 Na pu prem ra Tirtũm kapêr kot amnhĩrit mex xwýnhhta kwý ma. Tãm na ja: Kris kot mē panē tanhmã amnhĩ nhĩpêx to hã harēnhja.

Nê mē pahte amnhĩ tomnuj kaga hã kot mē pamã karōja.

Nê amnhĩ kaxyw Tirtũm kôt mē paja-maxpêr ā mē pamã karōja.

Nê mē pahpê Tirtũm kra hã amnhĩ to amnhĩrit kaxyw mē kot mē pahkrã kumrãr ā pamã karōja.

Nê mē pahte Tirtũm mã tanhmã amnhĩ nhĩpêx to ho papa hkukamã mē kot mē pahkrã hã ihkra jaxwýr nê mē pahto Tirtũm wýr ā mē pamã karōja.

Nê mē pahtyk nê akupým mē pahtír ā mē pajarēnhja.

Nê Tirtũm kot nhýrmã mē kot amnhĩ xã htýx kãm hamak tũm xã hwýr mē kēp hkra hkêt xwýnhjê janorja.

Mēmoja piitã pu mē ra harēnh mar týx nê. Prĩ hã kot amnhĩrit mex. Tã kwa kēr pu mē hpãnhã hijuk ri kot amnhĩrit mex kêt xwýnh kwý ma. Jao mē pahpê Tirtũm kra xãptãr mex nê ri papa.

³ Jakamã kwa kēr pu mē kot amnhĩrit mex xwýnh kumrêx kwý ma nê hpãnhã hijuk ri kot amnhĩrit mex kêt xwýnh kwý ma. Nê axpên mã harēnh rãhã ho ri papa. Nã koja Tirtũm kãm ja prãm pu mē ā amnhĩ nhĩpêx anhýr rãhã o ri papa.

⁴⁻⁶ Na pre ra mē pahkwýjaja Kris kaga nê htýx ri amnhĩ nhĩpêx o pa. Mē kot kapêr mar týx tã axtem nê hkaga jakamã koja mē axte kapêr mar kêt nê. Ra mē kãm mar prãm kêt. Kot puj mē tee ri axte mē kãm harēnh o papa kaprý. Na prem hprĩ hã kuma. Tirtũm kãm mē ho hkra hprãm ā harēnhja nhũm prem hprĩ hã kuma nê kãm mar prãm nê hkôt amnhĩ xunhwý. Hãmri nhũm Tirtũm Karõ te mē panhĩpêx pyrã nê mē hkarõ mã agjê nê mē kot amnhĩ to mex o pa kaxyw tanhmã mē hkrã hto nhũm prem ý hã tanhmã kãm amnhĩ nhĩpêx to ho pa. Nê kãm Tirtũm kapêr mar prãm nê. Nê axpên mã mex o mex ā harēnh o pa. Nê aa mē kot mēmoj pumunh kêt kwý pumu nê axpên mã harēnh o:

—Nã Krisja ãm hãmri ãhpumunh týx o ãhpumunh týx. Koja nhýrmã akupým nê pahwýr wrý nê axte mē pamã ãhpumunh týx o amnhĩrit pu mē omu.

Anhýr o kapêr tã tanhmã hamaxpêr to nê hkaga. Jakamã te mē kot axte Tirtũm pē Krata pĩ hã nhõr nê hpír pyrãk. Nê te mē piitã mē noo mã tanhmã haprý hto nê tanhmã kãm kapêr punuj to pyrãk. Jakamã

kot pu mē tee ri akupým tãm mē unhwýr prãm kaprý.

⁷ Na hte Tirtũm mē pahto mex rãhã ho pa. Jao mē pamã mē pahpur ā na rē pu mē kamã panhõ rũnh nê. Jakamã mē kot amnhĩ kaxyw Kris kôt hamaxpêr nê hkôt amnhĩ xunhwýr prãm xwýnhjaja te mē hpur mex nê kamã mēmoj õ rũnh pyrãk. Nê urãk nê amnhĩ to mex o pa.

⁸ Nom koja mē hpur kãm mēmoj nhĩgrõt mex kêt japêr. Kamã mrõnhĩ nê kahpare nê mēmoj punuj pix hapõj nhũm mē tee ri omu nê hkaga kurê kumrêx. Tã mē kot Kris kaga xwýnhjaja te pur punuj kot amnhĩ nhĩpêxta pyrãk nhũm Tirtũm te kēp pur nhõ dõn pyrãk. Jao tee ri amnhĩ tã mē kot amnhĩ nhĩpêx ā mē omu nê mē hkaga kurê kumrêx nê ma mē kot amnhĩ xã htýx kãm hamak tũm xã pē kuwytã wýr mē rēnh pa.

⁹ E ixkrãmnhwýjaja. Inhmã mē akĩnh jakamã na pa ā mē amã mē kot Kris kaga xwýnhjê jarēnh anê. Nom te mē ate mē urãk kêt. Kris kôt mē ate amnhĩ xunhwýr xwýnh mex na ka mē. Ra mē ate hkôt amnhĩ xunhwýr týx jakamã te mē apē pur mexta pyrãk.

¹⁰ Na ka htem Kris kôt mē akwýjê ho mex o ri apa. Te mē amã amnhĩ tã ma pyrãk o axpên nhĩpêx o ri apa nhũm Tirtũm ja hã mē apumu. Tã koja tanhmã ja hã mē ato mex to. Kot tãm mē panhĩpêx o pa jakamã koja tanhmã mē ate axpên nhĩpêx mex tota ā tanhmã mē ato mex to.

¹¹ Tã kēr ka mē arĩ ā axpên nhĩpêx anhýr o ri apa rãhã ty kē nhýrmã ja hã mē ato mex nê. Ā mē ate amnhĩ nhĩpêx anhýr o apaja na inhmã hprãm týx kumrêx.

¹² Kot kaj mē ā amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tirtũm kra hkwy htyk xwýnhjaja kormã htír ri kot amnhĩ nhĩpêxta pyrãk. Na prem amnhĩ kaxyw Tirtũm mã hamaxpêr týx rãhã ho pa. Kot mē ho mex ā mē hã amnhĩ jarēnhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tirtũm ra kot mē hã amnhĩ jarēnh xã hkôt mē ho mex nê. Tã kēr ka mē urãk nê ā amnhĩ nhĩpêx anhýr o ri apa rãhã ty.

¹³⁻¹⁵ ā na pre finat Apraãwja amnhĩ nhĩpêx anê. Kormã hkra hkêt tã nhũm Tirtũm kãm hkra nê kanrêhã htãmnhwýjê hkukamã tanhmã mē harēnh to nê kãm:

—Pa Apraãw. E inhma. Kot paj aprõ mē war ato mex nê. Kot kaj war akra hãmri nê gaa nhũm akanrêhã war atãmnhwýjaja ohtõ rax kumrêx. Ām hãmri na pa ā mē hkukamã amã mē harēnh anê. Kot paj amã amnhĩ jarēnh xã hkôt ā anhĩpêx anê. Ixpê mē anhĩpêx xwýnh na pa ā amã amnhĩ jarēnh anê. Anê.

Tã ã kãm wa hkra jarênh anhÿr tâ nhùm wa tokyx hkra hkêt nê. Nom tee ri ja hã amnhÿ pumu nê Tirtùm kot wa kãm hêx ã hkamnÿx kêt nê. Æm hkamnâr rom ã hamaxpêr anê nê hamaxpêr o:

—Nã kot paj wa nhÿrmã ixkra. Tirtùm tãm kot wa inhmã wa ixkra jarênh kênã. Anê.

Tã nhùm amgrã xohtô rax kumrêx nê hapêx nhùm wa hkra. Nhùm axte amgrã hkwy hapêx nhùm wa hkanrêhã htãmnhwÿ hkwy. Ra Tirtùm kot mê hkukamã Apraãw mã mê harênh xã hkôt. Tirtùmja hihtÿx o hihtÿx nê ãhpumunh o ãhpumunh jakamã na pre amnhÿ jarênh xã hkôt ã wa kãm wa hkra nê wa htãmnhwÿjê nhôr anê. Kot ra wa kãm hã amnhÿ jarênh xã hkôt. No ri nhãm mêhõ nhÿxi jarênh kôt wa kãm wa hkra jarênh kêt nê. Mêhõ kot we hihtÿx o hihtÿx o Tirtùm jakre nhùm we ri hixi jarênh kôt ã wa kãm mê harênh anê? Amrakati kumrêx. Jakamã na pre wa kãm amnhÿ jarênh o:

—Nã ixãhpumunh xã hkôt na pa ã war amã war akra jarênh anê. Anê.

¹⁶ No pika ja kamã na htem ã amnhÿ jarênh anhÿr kêt nê. Na htem mêhõ mã tanhmã mêmoy tâ amnhÿ jarênh to kaxyw nê mêhõ hihtÿx o kot hakrenh xwÿnh nhÿxi jarênh kôt amnhÿ jarê. Nê amnhÿ jarênh o:

—Nã ixte jahti noo mã ã amã amnhÿ jarênh anhÿr jakamã ãm hãmri na pa ã amnhÿ jarênh anê. Anê.

Kot hã amnhÿ to hêx nhùm hihtÿx o kot hakrenh xwÿnh ta kot hã harênh mar nê hã tanhmã homnuj to pymaj na htem ã mê hixi jarênh kôt mêmoy tâ amnhÿ jarênh anê. Hãmri nê kot tanhmã hã ho pymaj ra kot amnhÿ jarênh xã hkôt tanhmã mêmoy nhÿpêx to.

¹⁷ Nom Tirtùm na hte urak nê nhãm mêhõ nhÿxi jarênh kôt ri mêmoy tâ amnhÿ jarênh kêt nê. Na hte tãm amnhÿ jarênh xã hkôt mêmoy to anê nê aa hã amnhÿ to hêx kêt nê. Na pre mê pahpê hkrajê mã kãm:

—Kot paj nhÿrmã mê ato mex rax nê. Æm hãmri na pa mê amã amnhÿ jarê. Ixte amnhÿ pumunh xã hkôt na pa ã mê amã amnhÿ jarênh anê. Anê.

Mê pahte ãm hãmri kot amnhÿ jarênhja mar nê amnhÿ to hêx kêt ã omunh kurê kumrêx kaxyw. Kojã Tirtùm mêmoy tâ ã amnhÿ jarênh anê hãmri nê hijuk ri axtem hpãnhã tanhmã amnhÿ jarênh to hkêt nê.

¹⁸ Jakamã kojã nhÿrmã mã amnhÿ wÿr mê pahto ãpir ã amnhÿ jarê hãmri nê ãm hãmri amnhÿ jarê nê amnhÿ jarênh o:

—Nã ãm hãmri ixte amnhÿ pumunh xã hkôt na pa mê amã ja hã amnhÿ jarê. Anê.

Kojã ã amnhÿ jarênh anê hãmri nê hijuk ri axte hpãnhã tanhmã mêmoy jarênh to hkêt nê. Ra kot ã amnhÿ jarênh anhÿrja kojã arÿ rãhã nê. Jakamã e kwa kêr ka mê tee ri

amnhÿ kukamã ajamaxpêr o ri apa hkêt nê. Ra mê pamex nê ri papa kaxyw Tirtùm kôt amnhÿ xunhwÿr jakamã kêr pu mê arÿ kot mê pahto mex rax xã hã arÿgrota jamãr rãhã ho ri papa.

¹⁹ Na hte kanôre ho htÿx xãja kanôre ho htÿx nhùm ma gô hkôt pa hkêt nê. Ja pyrà nê kot puj mê Tirtùm kot mê pahto mex xã kamã pajamak o papa hãmri nê hkaga hkêt nê.

Amnepê mã na pre hte mê panhõ patre maatija Tirtùm mã amnhÿ jarênh xã hã ixkre hwÿr agjê nê hkôt ã kupêxê ho hitom maati hwÿr agjê nê kamã mê ho Tirtùm wÿr o kuhê. Tã nhùm Jejus akupÿm kaxkwa hwÿr api nê Tirtùm ri hkrÿ hãmri nê patre maatita pãnhã tãm mê pahto hwÿr o hkrÿ.

²⁰ Na pre ra mê pakukamã kaxkwa hwÿr api nê kamã pa ho pa nê finat Mekijetekja pyrà nê kêp mê panhõ patre maati. Tã kojã mê pahto Tirtùm wÿr rãhã nê pa ho pa.

7

Patre Mekijetek jarênh

¹⁻³ E kot paj ixprÿ hã mê amã tanhmã finat Mekijetekja jarênh to ka mê inhma. Krÿ pê Sarê kamã na pre kêp mê ò pahÿ nê mããñên kêp mê ò patre. Sarêja mê pakapêr kãm kêp: “Mê hamakêtkati nê ri mê pa xwÿnhjê nhõ krÿ.” Jakamã Mekijetekja mê pakapêr kãm kêp: “Mê hamakêtkati nê ri mê pa xwÿnhjê nhõ pahÿ.” Nê mããñên kêp: “Pahi kot tãm amnhÿ nhÿpêx o pa xwÿnh.” Nê Mekijetek nhÿpêxã nê katorxã nê higêt nhÿxija mê pahte harênh mar kêt. Nê kator ã arÿgro nê htyk ã arÿgroja mããñên mê pahte harênh mar kêt. Tirtùm kapêr ã kagã htùm kot tanhmã ja jarênh to hkêt. Æm Jejus pyrà nê kêp patre hã mê ho Tirtùm wÿr rãhã ho pa xwÿnh pix ã kot harênh. Æm ja pix na mê pahte harênh mar. Nê kot amnhÿ to rax xwÿnh jakamã na pre Apraãw nhÿri omu nê hã hpijaãm kaxyw kãm hikukrêx kwÿ gô. Na pre hkwyjê mê ra mê urojê kutã amnhÿ xunhwÿr nê pijapu nê mê kêp mê ò pahÿ ho 4 nê mê himex. Nê mê kêp mê hikukrêx kwÿptã nê hamÿ nê ma ò krÿ hwÿr o mô. Nê kormã pry hã môr ri Mekijetek kaxpa nhùm amnhÿ wÿr omu nê kãm:

—Pa Apraãw? E kê Tirtùm ato mex nê ka amex nê apa. Anê.

Nhùm amnhÿ tâ kuma nê hkÿnh nê. Hãmri nê kãm mê hikukrêx kwÿptãr xwÿnh ta hkwy gô nhùm hamÿ nê ma amnhÿm o mô.

⁴ Na pre Apraãw kot amnhÿ to rax ã omu nê kãm mêmoyta kwÿ gô. Kêp mê pahpê Ijaew pãr krax jakamã mããñên kot amnhÿ to rax tâ Mekijetekja urak nê kot amnhÿ to rax ã omu nê kãm mêmota kwÿ gô.

⁵ Finat Mojes kot Ijaew mã Tirtùm kapêr jarênh xã hkôt kãm kugô. Na pre mê kãm:

—Mê akwý pê finat Rewi hkanrêhâ htâmnhwýjaja kêp mê anhô patre jakamâ kêr ka mê kâmb mê akukrêx kwý nhôr o ri apa. Kot kaj mê akrit kêp 10 nê kâmb ho pixi nê agô. Nê mê akâxpore kêp 10 nê kâmb hō gô. Kêr ka mê â mê kâmb mê akukrêx nê mê akrit kwý nhôr o apa anê. Nê kêr ka mê kâmb mêmoj mex pix gô. Mê kêp mê akwý na mê. Mê apiitâ mê apê Apraâw kanrêhâ htâmnhwý jakamâ kêr ka mê â mê hipêx anhÿr o apa. Anê.

⁶ Tâ Mekijetekja kêp Rewi hkwyê hkêt tâ nhûm Apraâw amari â hipêx anê nê kâmb pahî htyk xwýnhjê kukrêxta kwý gô. Jao hikukrêxta kamâ mêmoj kêp 10 nhûm omu nê kamâ kâmb ho hpÿnh nê kugô. Na pre â kâmb mêmoj nhôr anê. Hâmri nhûm amnhîm hamý nê kâmb:

—Nâ âm hâmbri koja Tîrtûm ato mex rax nê. Anê.

Ra Tîrtûm kot Apraâw kanrêhâ kâmb htâmnhwý ho ohtô nê mê hkukamâ mê harênh jakamâ nhûm Mekijetekja â kâmb Tîrtûm kot ho mex â harênh anê.

⁷ Mê kot amnhî to rûnh o mê hakrenh xwýnh pixjaja Tîrtûm kot mê ho mex kaxyw mê ho âhwÿr o pa jakamâ na pre Apraâw o Tîrtûm wÿ. Jao kot amnhî to rax o kot hakrenh â amnhî to amnhîrit.

⁸ Hâmri nê Rewi hkanrêhâ htâmnhwý kot amnhî nhîpêx pyrâ nê Apraâw o Tîrtûm wÿ nê kêp mêmojta jamý. Mê urâk nê mêmoj kamâ kêp 10ja rûm ho hpÿnh nê amnhîm hamý. Nom kot amnhî to rax o Rewi hkanrêhâ htâmnhwýjê jakrenh. Tîrtûm kapêr â kagâ htûm kot Rewi hkanrêhâ htâmnhwýjê htyk par â mê harênh tâ tanhmâ Mekijetek htyk â harênh to hkêt jakamâ kot amnhî to rax o kot Rewi hkwyê jakrenh.

⁹⁻¹⁰ Nê kot pry kamâ Apraâw kaxparta â kormâ Rewi kator kêt tâ kêp Apraâw kanrêhâ htâmnhwý mâ xwýnh. Jakamâ nhûm Apraâwja Mekijetek mâ mê hikukrêxta kwý nhôr jao te Rewi mâ ôr pyrâk. Tâ nhûm amgrâ xohtô nê hapêx nhûm Rewi hkanrêhâ htâmnhwýjaja hapôj nê kêp mê ô patre nê ri pa. Jao Mekijetek pyrâ nê mê kêp mê hikukrêx kwý jamÿnh o ri pa.

¹¹ Nê finat Mojes na pre Ijaewjê mâ tanhmâ Rewi hkanrêhâ htâmnhwýjê jarênh to. Kormâ mê hapôx kêt ri nhûm hkwyê mâ tanhmâ mê harênh to. Mê kêp patre hâ mê harê. Tâ nhûm mê hapôj nê hprêk nê mê ho Tîrtûm wÿr o ri mê hkôt pa. Nom mê kot tâm amnhî nhîpêx o pa kaxyw na prem tanhmâ mê hkrâ hto hkêt nê. Tanhmâ kot mê amnhî to nê â mê hipêx anê? Jakamâ nhûm Tîrtûm mê hpânhâ mê pahwÿr kÿj rûm mêhója mê nhûm mê pahwÿr wrÿ. Nom kêp Rewi hkanrêhâ htâmnhwý hkêt. Nê mãânê kêp Rewi hpâm Arâw kanrêhâ htâmnhwý

hkêt. Axtem te Mekijetek kot amnhî nhîpêx pyrâk xwýnh na pre. Jejus Krisja. Tâmb na pre mê pahwÿr wrÿ hâmbri nê tanhmâ mê pahkrâ hto pu mê ÿ hâ tâm amnhî nhîpêx o papa.

¹² No Mojes kapêr kot Rewi hkanrêhâ htâmnhwý pixjaja kêp mê ho Tîrtûm wÿr xwýnh â mê harênh. Tâ nhûm Krisja mê pahwÿr wrÿ nê mê hpânhâ kêp mê pahto âhwÿr o pa xwýnh. Jakamâ na pu htem axte Mojes kapêr kôt amnhî nhîpêx kêt nê. Pânhâ Jejus kapêr kôt pix mâ amnhî nhîpêx o papa.

¹³⁻¹⁴ Nê Jejus kêp Rewi hkanrêhâ htâmnhwý hkêt. Katorxâ hkôt kêp Apraâw tâmnhwý Juta hkanrêhâ htâmnhwý na pre. Ra mê pahte ja mar mex. Aa Juta hkanrêhâ htâmnhwýjaja kêp patre hkêt. Na pre Tîrtûm jajê mâ mê kot mêmoj nhôr xâ hâ mési kunihita â kâmb mêmoj nhôr nê hkwyê ho hwÿr â mê kâmb karô hkêt nê. Âm Apraâw tâmnhwý Rewi hkanrêhâ htâmnhwýjê mâ pix mâ na pre â mê kâmb ja hâ karô anê. Tâ nhûm Jejus wrÿ nê mê hpânhâ mê pahto hwÿr o pa. Mê urâk nê kêp Rewi hkanrêhâ htâmnhwý hkêt axtem kêp Juta hkanrêhâ htâmnhwý htâ Rewi hkwyê hpânhâ mê pahto Tîrtûm wÿr o pa.

Mekijetek pyrâ nê mê pahto Tîrtûm wÿr xwýnh jarênh

¹⁵⁻¹⁹ Nê Ijaewja na prem Mojes kapêr mar tÿx nê hkôt amnhî nhîpêx tâ aa amnhî to mex kêt nhûm Tîrtûm tee ri ja hâ mê omu nê hamaxpêr o:

—Nâ Rewi hkanrêhâ htâmnhwýjaja kêp mê ô patre nê mê ho ixwÿr o pa htâ nhûm mê arî htÿx ri amnhî tomnuj pix o pa. Jakamâ koja mê axte ri mê ho ixwÿr o pa hkêt nê. Anê.

Hâmri nê mê pakaxyw mê pahto âhwÿr xwýnhja ta nê âm. Kra Jejusja nhûm kuta nê âm. Tâmb na hte Rewi hkwyê rom tanhmâ mê pahkrâ hto pu mê kukwak ri tâm amnhî nhîpêx nê Tîrtûm kôt amnhî nhîpêx mex nê. Jao nhÿrmâ ma mê pahte Tîrtûm nhô krî hwÿr paxâpirja jamâr o papa.

Jejus na hte Mekijetek pyrâ nê kêp mê panhō patre maati nê mê pahto Tîrtûm wÿr rāhā ho pa. Kêp Rewi hkanrêhâ htâmnhwý hkêt tâ Tîrtûm pyrâ nê kêp hÿr tûm nê pa ho pa xwýnh jakamâ na pre Tîrtûmja mê pakaxyw kuta nê mê pahwÿr kumê. Kapêr â kagâ htûm kot harênh kot:

Kot kaj Mekijetek pyrâ nê mê ho ixwÿr rāhā ho ri apa. Anê.

²⁰⁻²¹ No Rewi hkwyê mâ na pre â kapêr anhÿr kêt nê. Âm Jejus pix mâ â kapêr anê nê kâmb:

E kot kaj apê mê ho ixwÿr rāhā o apa xwýnh. Kot paj nhÿrmâ apānhā axtem mêhō xām kêt nê. Âm kapxipix kot kaj mê ho ixwÿr o apa rāhā ho rāhā. Âm

hāmri na pa amā ã ixkapēr anē. Ixpê Pahi Maati hã ã ajarēnh anē.

²² Anhÿr jao Jejus kot amnhĩ to rax o Rewi hkwyjê jakrenh par ã ho amnhĩrĩt. Mē kot Ijaew mã Tĩrtũm kapēr jarēnh nhũm mē kot mar nom hkõt amnhĩ nhĩpêx kêt jakamã nhũm Tĩrtũm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa.

²³ Rewi hkwyjaja na prem axpēn myr pē kēp mēõ patre nē ri pa htã htyk pa nē hapêx.

²⁴ Nom Jejusja htĩr tũm nē pa ho pa xwÿnh jakamã koja mē urak nē aa hapêx kêt. Koja mē pahto Tĩrtũm wÿr rãhã ho pa nē aa jam urer kêt nē.

²⁵ ã Jejus kot amnhĩ nhĩpêx anhÿr jakamã te kēp Tĩrtũm wÿr mē panhõ pry pyrãk. Na pu htem hkõt amnhĩ xunhwÿ nhũm mē panē mē pahte amnhĩ tomnuj piitã rênh pa nē mē pahpê Tĩrtũm kra hã mē pajarê.

²⁶ Nē ãm hāmri kēp mē pahto Tĩrtũm wÿr xwÿnh maati mex na. Mē pakurom tãm kot amnhĩ nhĩpêx mex o pa nē aa kot tanhmã amnhĩ tomnuj to hkêt. Tã ra Tĩrtũm kot amnhĩ wÿr ho àpir jakamã nhũm ra kuri mē pahto hwÿr rãhã ho pa.

²⁷ Nē kot amnhĩ to rax o wam mēõ patre maati jê jakrenh. Wamtaja na prem hkwyjê pyrã nē amnhĩ tomnuj o pa. Jakamã na prem apkati mē amnhĩ tomnuj pãnhã Tĩrtũm mã mēmoj gõ nē kãm amnhĩ jarê nē amnhĩ to kuwÿ. Hāmri nē rĩ kormã kot nhãm mē hwÿr mē mra xwÿnhjê mã mē ho anē nē mē hpãnhã Tĩrtũm mã mēmoj nhõr pē mē ho kuwÿ. No kêt Jejusja wam patre maati rom aa kot amnhĩ tomnuj kêt jakamã na pre hte mē urak nē amnhĩ tomnuj pãnhã Tĩrtũm mã mēmoj nhõr o pa hkêt nē. ãm mē papajaja na pre mē pahte amnhĩ tomnuj pãnhã htyk o kãm amnhĩre. ãm htyk tipxi htã mē pahpiitã mē pahpãnhã amnhĩre pa. Jakamã koja axte ã amnhĩ nhĩpêx anhÿr kêt nē. Mo kaxyw kot kêt axte mē panē ty?

²⁸ Mojes kapēr kõt na pre Ijaew amnhĩm Rewi hkwyjê xunhwÿ nhũm mē kēp mē õ patre nē ri pa. Tã no nhũm mē urak nē arĩ amnhĩ tomnuj o pa nhũm Tĩrtũm tee ri mē omu nē mē hpãnhã mē pakaxyw Krata xãm nē kãm:

—Nã kapxipix mē kurom ate tãm amnhĩ nhĩpêx o apa jakamã kapxipix kot kaj mē hpãnhã mē ho ixwÿr o apa rãhã ho rãhã. Anē.

8

Jejus kēp mē pahto Tĩrtũm wÿr xwÿnh maati hã harēnh

Rukre 22.20; Sikũn Korĩt 3.6-11

¹ E kot paj axtem tanhmã mē amã mē pahto Tĩrtũm wÿr xwÿnh maati jarēnh to ka mē inhma. Na hte kaxkwa kamã Tĩrtũm

nhĩhkõ hã hkrĩ. ĩhkõ hã kēp Pahi Maati hã hkrĩ xã hã upõk rũm hkrĩ ho hkrĩ.

² Wam patre maati jaja na prem Tĩrtũm nhõrkwy kaakre wÿr mra nē kamã hitom maati kamã mē ho Tĩrtũm wÿr o pa. Nom nhũm Jejus na hte mē kurom kaxkwa kamã Tĩrtũm nhõrkwy mex kãm mē pahto àhwÿr o hkrĩ. Őrkwy kaakreja na prem ĩhkra ho hipêx nom kaxkwa kamã Őrkwy mexja na pre mēhõ ĩhkra ho hipêx kêt nē. Tĩrtũm na pre tanhmã hipêx to nhũm kamã Jejusja mē pahto hwÿr o hkrĩ.

³ Nē mē pahpê Ijaew nhõ patre maati jaja na prem mē ho hwÿr kaxyw nē mē kot amnhĩ tomnuj pãnhã Tĩrtũm mã mēmoj nhõr kõt mē ho kuwÿ. No Kris na hte ã amnhĩ nhĩpêx anhÿr kêt nē. Ra htyk o kot kãm amnhĩ nhĩ nhõr jakamã na hte wam patre maati pyrã nē xatã kãm mēmoj nhõr kêt nē.

⁴ Tã na hte arĩ Ijaew Mojes kapēr kõt amnhĩm Rewi hkwy kēp mē õ patre kaxyw mē unhwÿ nhũm mē ho Tĩrtũm wÿr o pa. No Jejus kēp Rewi hkanrêhã htãmnhwÿ hkêt. Katorxã hkõt kēp Jura hkanrêhã htãmnhwÿ jakamã kop apu arĩ jar pika ja kamã htĩr nē pa ronhÿx Ijaew nhõ patre pyrã nē kēp mē ho Tĩrtũm wÿr o pa xwÿnh kêt. ãm Rewi hkanrêhã htãmnhwÿ pixjaja na htem mē kaxyw kãm mēmoj gõ nē hkõt mē ho kuwÿ.

⁵ Jar na htem arĩ ã amnhĩ nhĩpêx anhÿr o pa nom kaxkwa kamã na htem ã amnhĩ nhĩpêx anhÿr hkêt nē.

Nē jar Tĩrtũm nhõrkwy kaakreja te kot kaxkwa kamã Őrkwy mexta pyrãk. Na pre Mojes Őrkwy kaakre nhĩpêx kaxyw nhũm Tĩrtũm tanhmã kãm hã karõ hto nē kãm:

—E jãã hixêt prêk nhĩmõk ã axãmta ã na pa pre amã ixkreta kukamã ixprĩ hã tanhmã mē ate hipêx to hã amã karõ. Tã kër ka ã hipêx anē. Anē.

Hāmri nhũm kuma nē kot kãm hã karõ xã hkõt hipêx. Hāmri nhũm mē õ patre maati ixkreja kamã mē ho Tĩrtũm wÿr o pa. Na prem ã amnhĩ nhĩpêx anhÿr o pa.

⁶ Tã nhũm ra Tĩrtũm axtem mē hpãnhã mē pakaxyw Kris xãm nhũm hte mē pahto hwÿr mex o wantajê jakre. Na hte kaxkwa kamã mē pahpiitã mē pahpumunh mex rãhã ho hkrĩ nē wantajê rom tanhmã mē pahkrã hto pu mē tãm amnhĩ nhĩpêx o ri papa. Tĩrtũm kot finat Mojes mã kapërja mex nē nom axtem na pre. Tã kapēr nyw na mex o kot wam kapēr jakrenh. Kapēr nyw kõt kot puj mē pahtyk tã akupÿm pahĩr nē nhÿrmã Tĩrtũm mē Jejus wa kuri pamex nē pahĩr tũm nē papa ho papa nē axte pahtyk kêt nē.

⁷ Kēp apu Tĩrtũm kot Mojes mã kapēr kõt mē kot tãm amnhĩ nhĩpêx o pa ronhÿx pre Tĩrtũm axte kapēr nyw ã kagã hkêt nē.

⁸ Nom wam kapêr tûmta na pre mē mar t̄yx htā arī amnhī tomnuj rāhā ho pa nhūm tee ri ja hā mē omu nē mē kām:

Nā kot paj axte nh̄ymā mē apē Ijaew mā axtem tanhmā ixkapêr to.

⁹ Amnepēm mē anhīgētjē mā na pa pre ixkapêr.

Na pa pre Ejit pē mē kator nē mē kot tanhmā amnhī nh̄ip̄ex to ho pa kaxyw tanhmā hā mē kām karō hto.

Nom na prem ixkapêr ma nē am kuma nē ixkōt amnhī nh̄ip̄ex kēt nē. Pa tee ri ja hā mē omu hāmri nē mē hkaga.

¹⁰ Tā kot paj mē apē mē hkanrēhā mē htāmnhw̄y nywjē mā axtem ixkapêr ka mē ixkapêr nywja ma.

Kot paj nh̄ymā tanhmā mē akrā hto ka mē ixkapêr nyw mar t̄yx nē hā ano ht̄yx nē ho apa.

Nē akīnh nē apa.

Nē ixkōt ri amnhī nh̄ip̄ex mex o apa.

Nē axp̄en mā ijarēnh o: “Nā am hāmri Tirtūm kēp mē panhō Tirtūm na.” Anh̄y o ri axp̄en mā ijarēnh o apa.

Pa amnhī tā mē ama nē mē apumu nē amnhī xwar mē apē ixkra hā amnhīm mē ajarē.

¹¹ Kot kaj mē apiitā ixte amnhī nh̄ip̄ex kōt ixpumunh mex o ri apa. Mē akāxpore rūnh xw̄ynhja nē mē akāxpore hkrye xw̄ynhja mē apiitā ixpumunh mex jakamā kot kaj mē ri axte ixtā tanhmā axp̄en kujjēr to ho ri apa hkēt nē.

¹² Nē kot paj mē ato mex rax o ixpa.

Nē axte tanhmā mē ate amnhī tomnu hto ho apaja mā ijamaxp̄er kēt nē. Anē.

¹³ Nē koja mēmoj ra htūm hāmri nē hap̄ex tokyx anē. Ja pyrā nē na pre Tirtūm mē pamā kapêr tūmta jarēnh o:

—E kēr ka mē axte ixkapêr tūm mar kēt nē. Pānhā ixkapêr nyw pix mān mar o apa nē am kot pix mā mān amnhī nh̄ip̄ex rāhā ho ri apa. Anē.

9

Tirtūm nhōrkw̄y kaàkre jarēnh

¹ Nē amnepēm na pre finat Mojesja mē panhīgēt nē mē pahpāmje mā tanhmā Tirtūm nhōrkw̄y kaàkre jarēnh to. Tanhmā mē kot hip̄ex to nē kamā tanhmā amnhī nh̄ip̄ex to hā mē kām karō. Nē kamā tanhmā mē kot amnhī to Tirtūm w̄yr to hā mē kām karō. Nē tanhmā mē hkwyjē ho hw̄yr toja nhūm pre māānēn mē kām hā karō. No Tirtūm nhōrkw̄y kaàkreja kēp ōrkw̄y kumrēx kēt. Am mē kot omunh nē kaxkwa kamā ōrkw̄y kumrēx mā hamaxp̄er kaxyw na pre.

² Jakamā nhūm prem Mojes kapêr ma nē hip̄ex. Kamā hitom hamēxkrut. Wam hitom kamā na pre kanē hprēeti xām nē kutā mēsti

xām. Nē mēsti nhīmōk ā Tirtūm mā ō pāwti jaxw̄y. Mē panhō patre na pre htem Tirtūm mā kugō nē mēsti ā kām haxw̄y hāmri nē hkwyjē ho kuw̄y. Tā hitom ja na prem kēp Tirtūm nhō hitom mex ā harē.

³⁻⁴ Nē hitom wa hkaēx kām na pre kupēxē ho hakwakre kahē xāja ajēt. Haturxā kamā hitomja na prem Tirtūm nhō hitom maati hā harē. Tirtūm na pre te hirā ht̄yx kām hw̄yr wry nē te kamā hkrī pyrāk. Nē kamā na pre Tirtūm mā mēhkuxwa xā ho xēt xā hā mēs kunīhtija kuhē. Na prem ōr o hip̄ex nē kamā am nhūm kuhē. Nhūm pre hte mēō patre hw̄yr agjē nē kutā kuhē nē mē ho Tirtūm w̄y. Nē mēs kunīhti haxw̄yja hitom maati kamā kuhē. Na prem pī ho hip̄ex nē ōr o hpro nē kamā am. Mēstija kaxw̄ynh kām na pre htem mēmoj jagjē.

Tirtūm kot Ijaew mā tanhmā mē kot amnhī nh̄ip̄ex to ho pa hā karō nē kēn po hā mē kām hā kagaja nhūm prem kamā kuxā nhūm hikw̄y.

Nē māānēn ōr o xijereja xā nhūm hikw̄y. Nē xijere kamā amnepē mā Tirtūm kot kaxkwa rūm mē hw̄yr mēō rēnh kw̄y hikw̄y. Mēōja mē kot kām: “Manā” anh̄y xw̄ynhja na prem hkwyjē hkarā nē xijere kamā kugjē hāmri nē mēsti kamā kuxā.

Nē finat Arāw nhō kō kot ho amnhī kaxpar xā htūmta nhūm prem kamā kuxā. Tirtūm kot tanhmā ho nhūm kurūm pixōrā muxre hapōx xw̄ynhta nhūm prem māānēn mēs kunīhti kamā kuxā nhūm hikw̄y.

⁵ Nē himōk ā Tirtūm kapêr o wryk xw̄ynh wa hkarō nh̄ip̄exja wa hamēxkrut nē axp̄en kutā wa hkōn krā ho hkrī. Axp̄en w̄yr hara koror nē wa hkrī. Patre maati kot omunh nē Tirtūm kot mē hkōt pa ho paja mā hamaxp̄er kaxyw. Nē wa hkaēx kām ahkapryja Tirtūm kot mē nē mē kot amnhī tomnuj rēnh mā hamaxp̄er xā na pre.

Ā Tirtūm nhōrkw̄y kaàkre kot anh̄y. No kot paj ixprī hā mē amā piitā harēnh par kēt nē.

⁶ Na pre hte mēō patre apkati mē wam hitom w̄yr agjē nē kamā Ijaew ho Tirtūm w̄yr o pa.

⁷ No hitom maati ja am mē ō patre maati pix na pre hw̄yr agjē. Nom apkati mē hw̄yr pa nē gjēx kēt am amgrā p̄ynh kām hw̄yr gjēx p̄ynh nē. Nē hw̄yr gjēx kaxyw nē mēmo mry pa nē hkamrō ru nē o pa nē hitom maati hw̄yr ho agjē. Hāmri nē ho mēs kunīhti nhīmōk kamī nē Tirtūm mā kām:

—Pa Tirtūm. E ota mry kamrōta. Mē ixpē akw̄yja mē ixte amnhī tomnuj jakamā na pa mē amnhī pānhā mēmo mry nhōkre jakā nē kupī nē hkamrō ru nē man aw̄yr o mra. Te kot mē ixte amnhī tomnuj m̄yrapē htyk pyrāk. Jakamā kwa ā mē ixte amnhī nh̄ip̄ex

anhÿrja ä mē ixpumunh hkôt mē inhnē mē
ixkre amnhî tomnuj rē.

Anhÿr o mē amnhî to kuwÿ.

⁸Nē patre maati pix na pre hitom maati ja
wÿr agjē nē mē ho Tÿrtüm wÿ. Ijaew na prem
ixkre kapem hamâr o kuhē nē hwÿr gjēx
kēt nē. Tÿrtüm Karô kot hâ mē kâm karô xâ
hkôt. Te Tÿrtüm pê amÿm kuhē pyrâk. Tâ
na htem jarâhâ arî Ijaew kanrêhâ mē hkra
nē mē htâmnhwÿjaja ä amnhî nhîpêx anhÿr o
pa. Jao mē higêtjē pyrâ nē Tÿrtüm pê amÿm
kuhē.

⁹Mē kot arî Tÿrtüm mâ mry hpar nē
hkamrô ho mēmoj kamîr nē amnhî to hwÿr
o pa htâ na htem arî hamaxpêr punuj pix o
pa.

¹⁰Tÿrtüm kapêr tùm kot tanhmâ mēmoj tâ
mē kâm karô hto.

Na pre tanhmâ mē apkur xâ hâ mē kâm
karô hto nhùm htem pix kur o pa.

Nē tanhmâ mē hkôm xâ hâ mē kâm karô
hto nhùm htem pix o hkôm o pa.

Nē tanhmâ amnhîmnuj to hâ tanhmâ
mē kot amnhî kuhôn h to hâ karôja
nhùm htem hkôt pix mâ tanhmâ amnhî
kuhôn h to ho pa.

Nē tanhmâ mē kot ri mē hikukrêx kuhôn h
to hâ mē kâm karôja nhùm htem kôt pix
mâ tanhmâ kuhôn h to ho pa.

Ä na pre Tÿrtüm Kris kukamâ mē kâm mēmoj
tâ karô rax anē. Kris kutêp pix mâ ä mē kot
amnhî nhîpêx anhÿr kaxyw. No mē pahte
arî ä amnhî nhîpêx anhÿr kaxyw kêt. Na
pre ra Kris mē pahwÿr wrÿ nē Tÿrtüm kapêr
tüm o hapêx nē hpânâhâ mē pamâ kapêr nyw
jarê pu mē hpânâhâ nywta kôt pix mâ amnhî
nhîpêx o papa. Kapêr nywja mex o mex. Nē
mex o wamta jakrenh.

*Kris htyk o mē pahte amnhî tomnuj
pânâhâ amnhîrer ä harênh*

¹¹Tâ na pre Krisja tâm mē pahwÿr wrÿ
nē kêp mē pahto Tÿrtüm wÿr xwÿnh maati
nē patre hpânâhâ mē pahto hwÿr o pa. Nom
jar pika ja kamâ mē kot mē hkra ho Tÿrtüm
nhôrkwÿ kaäkre nhîpêxta wÿr ar nē kamâ mē
pahto hwÿr kaxyw na pre wrÿk kêt nē. Na
pre ra akupÿm kaxkwa hwÿr api nē kamâ
ôrkwÿ mex wÿr axâ nē kamâ tanhmâ mē
pahto mex to nē tanhmâ mē pahto Tÿrtüm
wÿr to râhâ ho hkrî.

¹²Ä kaxkwa kamâ Tÿrtüm nhô hitom
maati ja wÿr ar tipxi htâ mē pahpiitâ mē
pahte amnhî tomnuj pânâhâ amnhîrer pa.
Nom mēmo mry kamrô ho mē pahpânâhâ
amnhîrer kêt nē. Môx kamrô rÿ motre
kamrô ho mē pahpânâhâ amnhîrer kêt nē.
Amnhî kamrô ho na pre mē pahpânâhâ
amnhîre. Tyk nē hkamrô pikapîrta o mē
pahpiitâ mē pahpânâhâ amnhîrer pa.

¹³Nē amnepê m Ijaew kot Tÿrtüm kapêr
tùm kôt amnhî nhîpêx mex o pa hkêt jakamâ

nhùm tee ri mē omu nē mē kot amnhî tom-
nuj o mē pa xwÿnh ä mē harê. Jakamâ
na pre mēo patre xatâ mry kamrô ho mē
hkamî. Môx kamrô nē motre kamrô ho mē
hkamî. Na pre môx krare hkwy hpa nē ho
hxêt nē hprâ ho hkwyjê kamî. Ä na prem
xatâ mē hipêx anhÿr o pa. Tÿrtüm kot ja hâ
mē omunh nē mē mex ä mē harênh kaxyw.
Nom te mē krâhkâ pix mex pyrâ nē mē hkra
kaxwÿnh kâm arî hamaxpêr punuj o pa.

¹⁴Ä na prem amnhî nhîpêx anhÿr o pa.
Nom Krisja mē kurom aa tanhmâ amnhî
tomnuj to hkêt jakamâ na pre mē pahte
amnhî tomnuj xwÿnhjê nē ty. Te mē kot
amnhî nē môx rÿ motre hpar nē hkamrô
runhta pyrâk o amnhî nhîpêx nē mē panê
Tÿrtüm mâ amnhî gô nhùm pre mē kâm
hkurê xwÿnhjaja kupî. Na pre Tÿrtüm Karôja
ä kot mē panê htyk anhÿr kaxyw tanhmâ ho
hihtÿx to. Karôja aa hapêx kêt kumrêx râhâ
nē pa ho pa xwÿnh jakamâ na pre Kris tykja
kukamâ tanhmâ ho hihtÿx to nhùm mē panê
ty. Tapxipix na mē pahte tãm amnhî nhîpêx
o papa kaxyw kêp tanhmâ mē pahkrâ hto
xwÿnh. Jakamâ na pu htem ra pajamaxpêr
nyw o pajamaxpêr o papa nē pajamaxpêr o:

—Na pa pre tee ri inhmâ amnhî krâ hkôt
tãm amnhî nhîpêx o ixpa hprâm kaprÿ nē
äm amnhî tomnuj pix o ri ixpa. Tâ Kris
kot inhnē htyk o hkamrô pikapîr ä harênh
ma nē amnhî kaxyw hkôt ijamaxpêr tÿx nē
nhùm amnhî tâ ixpumu nē ixte tãm amnhî
nhîpêx o ixpa kaxyw ixâm. Jakamâ kot
paj äm Tÿrtüm pix mâ kâm tanhmâ amnhî
nhîpêx to ho ri ixpa. Tir râhâ nē pa ho pa
xwÿnh jakamâ kot paj nhÿrmâ kuri urâk nē
ixtîr tùm nē ixpa ho ixpa. Anê.

¹⁵Nē amnepê mâ na prem piitâ Tÿrtüm
kapêr tùm kôt amnhî nhîpêx mex o pa hkêt
nē. Mē kot xatâ hkôt amnhî nhîpêx o pa hâ
amnhî jarênh tâ hkôt amnhî nhîpêx kêt nē.
Jakamâ na pre Kris wrÿ nē mē pahte hkôt
amnhî xunhwÿr mâ xwÿnhjê mâ Tÿrtüm
kapêr nyw jarê nē mē pamâ:

—Kot paj mē anê ty nhùm Tÿrtüm ä ixte
amnhî nhîpêx anhÿrja kukwak ri mē ato
mex râhâ ho pa. Anê.

Hâmri nē amnhî jarênh xâ hkôt mē
pahte amnhî tomnuj piitâ hpânâhâ amnhîrer
kaxyw mē panê ty.

¹⁶⁻¹⁷Te jar pika ja kamâ mēhō htyk
kukamâ hkrajê mâ tanhmâ amnhî jarênh to
pyrâk. Na htem htyk kaxyw nē hkrajê mâ:

—Nâ kot paj mēmo arîgro hâ ty ka mē
inhmÿr pê ixpê ixkukrêx kwÿ o arîk.

Anhÿr o na htem amnhî jarê. Hâmri nē
ty nhùm hkrajaja amnhîm ô mēmoj to arîk
pa. Mē hipêxâ kukwak ri mē hikukrêx mex
nē mÿr pê o pa. No kormâ htîr ri nhùm mē
kormâ kêp hamÿnh kêt nē. Ja pyrâ nē na pre
Tÿrtümja Jesus htyk kukwak ri tanhmâ mē

pahto mex to pu mē kukwak ri mē pamex nē pahkūnh nē ri papa.

¹⁸ Nē Tirtūm kapēr tūm kōt na pre hte mē ō patre mry pa nē ām hkamrō runh kōt pix mā mē ho Tirtūm wūr o pa nhūm amnhī tā mē omunh xā hkōt mē kuma nē tanhmā mē ho mex to.

¹⁹ Na pre finat Mojesja Ijaew mā Tirtūm kapēr tūm piitā harē nē harēnh pa hāmri nē mōx ōxpī nē kaxyw motre hōxpī. Hāmri nē xijere kamā hamē wa hkamrō runh pa nē kamā gō hkwy ru. Hāmri nē kaxyw mēmo pī hpa hkryre pē “isop” jarēnhja kwī kukē. Nē kaxyw ōwēhti hkī kamrēkre hkwy hpy nē isop mē ho pihkār pa nē mry kamrō o go. Hāmri nē ho hkwyjē kamī. Nē ho Tirtūm kapēr ā kagā tūmta kamī.

²⁰⁻²² Hāmri nē ho anhūr pa nē mē kām:

–Nā na Tirtūmja ixte mry kamrō ho mē akamīr pumunh kōt mē pamā kapēr o: “E kot kaj mē ixkapēr kōt amnhī nhīpēx o ri apa hā kot paj tanhmā mē ato mex to rāhā ho ri ixpa ka mē amex nē akīnh nē ajamakētkati nē ri apa. Jakamā kēr ka mē mry kamrō ho mēmoj piitā hkamīr pa. Nē ho amnhī kamī. Kēr pa ja hā mē apumu hāmri nē axte tanhmā mē ate amnhī tomnuj tota mā ijamaxpēr kēt nē.” Anē. Ā na Tirtūm mē pamā kapēr anē. Anē.

Hāmri nē hpānhā mry kamrōta o ōrkwy kaākre kamī. Nē hkre kamā mēmoj kuhē xwūnh piitā nhūm ho hkamīr pa. Ā na pre mē ō patre mē mex kaxyw mē hipēx anhūr o pa. Mē kot tōhā mēmoj to hpūnhre nē ho hkamīr kēt jakamā kironhūx pre mēmoj pitā ā hipēx anhūr o pa. Kop apu mē kot mry hpar nē hkamrō runh kēt ronhūx pre Tirtūm arī mē kot amnhī tomnuj mā hamaxpēr rāhā ho pa.

²³ Na prem ā Tirtūm nhōrkwy kaākre kamā mēmoj kuhē xwūnh piitā mex kaxyw hipēx anē. Te Tirtūm kot mē pahto mex nhūm mē pahte nhūrmā ma kaxkwa hwūr ō krī hwūr paxāpirta pyrā nē. Nom mē kot mry hpar nē hkamrō runhta kukwak ri mē pamex nē papa hkēt. Ām mēhō kamrō kukwak ri mē pamex xwūnhata pix kukwak ri na mē pahpē pahūr tūm nē papa mā xwūnh. Ja na mex o mry kamrō piitā hakrenh pa.

²⁴ Jejus Krisja pix kukwak ri. Tām na pre patre pyrā nē mē pahto Tirtūm wūr kaxyw mē ihkra ho Tirtūm nhōrkwy kaākre nhīpēxta wūr gjēx kēt nē. Ām ixkre kaākre pix na pre. Na pre kaxkwa kamā Tirtūm nhō krī hwūr axā. Tā arī kamā Tirtūm nhīhkō hā mē pahto hwūr rāhā ho hkrī.

²⁵ Nē Ijaew nhō patre maati na hte amgrā mē ōrkwy kaākre kamā hitom maati hwūr gjēx tipxi. Nē amnhī kōt mry kamrō ru nē ho agjē. Tirtūm kot hā omunh nē axte mē kot amnhī tomnuj mā hamaxpēr hkēt kaxyw.

Nom Kris na pre mē urāk nē mēmo mry pa nē Tirtūm mā hkamrō kapēr kēt nē. Kamrō na pre mē panē axkapī. Nom patre pyrā nē amgrā mē ā amnhī nhīpēx anhūr kēt nē. Na pre htyk o Tirtūm mā amnhī nhōr tipxi.

²⁶ Kēp apu patre pyrā nē amgrā mē mē panē htyk o pa ronhūx ra mē panē htyk xohtō rax kumrēx. Nhūx pre amnepē mā Tirtūm kot mēmoj piitā ho katorta rūm amgrā mē mē panē htyk o pa ho hkrax. Jao xatā htyk o amgrā xohtō rax kumrēx. Nom ja kot anhūr kēt. Na pre mē pahwūr wūr nē mē panē htyk tipxi htā htykja o mē pahte amnhī tomnuj piitā hpānhā amnhīrer par kumrēx. Jakamā mo kaxyw koja axte ty?

²⁷ Ām pahtyk tipxi htā koja Tirtūm nhūrmā akupūm mē pahpiitā mē pahto pahūr nē ahpūnhā tanhmā mē pajarēnh to nē ahpūnhā tanhmā mē panhīpēx to. Kormā mē pahūr ri mē pahte amnhī nhīpēx ā mē pahpumunh xā hkōt tanhmā mē panhīpēx to.

²⁸ Ja pyrā nē na pre Krisja ām mē panē htyk tipxi htā mē pahto ohtō nē mē panē mē pahte amnhī tomnuj piitā rēnh pa. Hāmri nhūm Tirtūm akupūm ho htūr nē akupūm amnhī wūr ho api. Tā koja nhūrmā akupūn mē pahwūr wūr. Nom axte mē pahte amnhī tomnuj pānhā amnhī rer kaxyw mē panē htyk kaxyw wūr kēt nē. Ra kot mē pahte amnhī tomnuj pānhā amnhīrer kēnā. Kōja akupūn wūr nē mē pahte amnhī wūr kamā pajamak o papa xwūnhjaja ma akupūm amnhī kōt kaxkwa hwūr mē pahto āpir pa. Ra mē pahtyk tā nhūm akupūm mē pahto mē pahūr nē ma amnhī kōt mē pahto āpir pa pu mē kuri pamex nē pahūr tūm nē papa ho papa.

10

Kris kot mē panē htyk tipxi hā harēnh

¹ Nē arī mē kot Tirtūm kapēr tūm kōt amnhī nhīpēx o mē pa xwūnhjaja kormā hprī hā Tirtūm kot tanhmā mē pahto mex to hā harēnh mar tūx kēt. Na prem kormā hkwy pix ma. Na hte mē ō patreja amgrā mē kānhmā kaxkwa hwūr mry kamrōta pē nē mē amnhī to Tirtūm wūr. Kot ja hā mē omunh nē axte mē kot amnhī tomnuj mā hamaxpēr hkēt kaxyw. Tā ā mē kot amnhī nhīpēx anhūr tā arī Tirtūm kapēr kwūm amnhī nhīpēx rāhā

² jakamā na prem xatā kām mēmo mry kamrō runh o pa. Kēp apu tām amnhī nhīpēx nē tām ri hamaxpēr ronhūx arī ā amnhī nhīpēx anhūr o pa hkēt nē. Nē xatā amnhī pānhā mry hpar nē hkamrō ho Tirtūm nhōrkwy kaākre kamā mēmoj kamīr kēt nē.

³ Nom na prem tām amnhī nhīpēx o pa hkēt nē. Mē kot amgrā mē Tirtūm kot mē

nê mē kot amnhî tomnuj rênh kaxyw mē kot kām mēmo mry hpar o pa htā no ām hkôt amnhî nhîpêx xwýnh ā amnhî jarênh kêt nê. Arî mē kot amnhî tomnuj o pa jakamā na prem mry hparta ā amnhî pumu nê tee ri amnhî kukamā hamaxpêr o hkaprî nê pa.

⁴ Nom na hte môx kamrô rý motre kamrôja mē panê mē pahte amnhî tomnuj rênh kêt nê.

⁵⁻⁸ Jakamā na pre Krisja mē pahwýr no-jarêr nê Tirtûm mā amnhî jarênh o:

Pa Tirtûm? E kot paj ma mē hwýr wrý. Mē kot amnhî pānhā amā mry hparta apê hprām nōkati nê amā hkînh kêt.

Ate mē nê mē kot amnhî tomnuj rênh kaxyw mē kot amā mēmo mry hparta amā hprām kêt. Ām ixkukamā na ka pre ā mē kot amnhî nhîpêx anhýr kaxyw mē kām ja hā karô.

Mē kot mry nhîpêx o te pa ixte mē nê ixtyk nê ixkamrô pikapîr pyrāk o na prem ixkukamā ā amnhî nhîpêx anê.

Jakamā na ka ra mē kaxyw inhmā inhî gō pa mē urāk nê inhî ho inhî.

Tā kot paj ma mē hwýr wrý. Ixte amā hprām xā hkôt pix mā ixte tanhmā amā mnhî nhîpêx to ho ixpa kaxyw. Akapêr ā kagā htûm kot tanhmā ixkukamā ijarênh to xā hkôt kot wrý nê ā amā amnhî nhîpêx anê. Anê.

Hāmri nê man mē pahwýr wrý.

⁹ Kot Tirtûm kapêr tûm o hapêx par nê hpānhā tām mē panê htyk kaxyw wrý. Jakamā na pre nojarêr nê Tirtûm mā amnhî jarênh o:

—E ixte amā hprām xā hkôt amnhî nhîpêx kaxyw kot paj ma mē hwýr wrý.

¹⁰ Anhýr jakamā wrý nê Tirtûm kām hprām xā hkôt mē panê ty. Na pre nhām mēhō mē kām hkurê xwýnhjê mā ōr nhûm mē kot hpîr nhûm amarî htyk kêt nê. Na pre amnhî grōnh kôt mē kām amnhî gō nhûm prem kupî. Hāmri nhûm htyk o mē pahte hkôt amnhî xunhwýr xwýnhjê o Tirtûm kra. Mē kot xatā mry hparta rom htyk tipxi tā mē pahpiitā mē pahte amnhî tomnuj pānhā amnhîrer pa.

¹¹ Nê mē ō patrejaja na htem apkati mē Tirtûm nhōrkwý kaākre kamā kām tanhmā amnhî nhîpêx to. Nê apkati mē hkwyjê hpānhā mry hkwy hpa nê hkamrô ru nê mē ho Tirtûm wý. Tā nom ja hā mē omunh xā hkôt mē nê mē kot amnhî tomnuj rênh kêt nê.

¹² No kêt Kris na pre mē kot xatā mry hpar xwýnhta rom ām htyk tipxi htā mē pahte amnhî tomnuj piitā hpānhā amnhîre. Hāmri nê ma akupým kaxkwa hwýr api nê Tirtûm nhîhkō hā Pahi Maati hkrî xā kamā upōk rûm hkrî ho hkrî.

¹³ Koja kuri hkrî rāhā nhûm Tirtûmja îhkram mē kot kutā amnhî xunhwýr

xwýnhjê jaxār pa. Ja kaxyw na kormā kuri hamār o hkrî.

¹⁴ Ām htyk tipxi htā htykja o mē pahte hkôt amnhî xunhwýr xwýnhjê ho Tirtûm kra pu mē ra hpānhā tām amnhî nhîpêx rāhā ho papa. Nê pajamaxpêr mex o ri papa. Tirtûm kām hprām xā hkôt.

¹⁵ Amnepêm mē kot Tirtûm nhý hā kapêr jarênh o mē pa xwýnhjaja na prem mē panhîgêjtjê mā kapêr o pa. Tirtûm Karô nhý hā mē kām kapêr nê mē kām:

¹⁶ —E na Tirtûm mē pamā amnhî jarê nê amnhî jarênh o:

Kot paj nhýrmā axtem ixkapêr nyw o mē amā ixkapêr.

Nê mē akrām hagjê ka mē mar tÿx pē hā ano htÿx nê ho apa.

Ixkapêr tûm na pa pre mē amā kēn pota ā hā kagā.

Nom ixkapêr nyw kot paj axtem mē akrām hagjê.

¹⁷ Nê kot paj axte mē ate amnhî tomnuj mā ijamaxpêr kêt nê.

Anhýr o mē pamā amnhî jarênh. Anê.

¹⁸ Tā ra axte mē pahte amnhî tomnuj mā hamaxpêr kêt ā kot amnhî jarênh jakamā mo kaxyw kot pu mē arî amnhî pānhā kām mēmo mry hpar nê hkamrô runh o papa? Tā mē pahkwýjaja na hte arî kām ja ho anhýr prām o pa. E kwa mē axte ā amnhî nhîpêx anhýr kêt nê ixkwýjaja.

Akupým mē pahte amnhî nhîpêx tûm o paxujanār kêt ā mē pamā karô

Matêwre 27.51; Rukre 23.45; Rōmān 5.1-2; Epes 3.12; Eprêw 4.14-16

¹⁹⁻²⁰ E ixkrāmnhwýjaja. Ra Jejus kot mē panê htyk o hkamrô pikapîr jakamā na pu htem arî tee ri amnhî kukamā pajamaxpêr hkêt nê. Tirtûm axte kot mē pahte amnhî tomnuj mā hamaxpêr kêt jakamā na pu htem paxāmnhîx amnhî to hwýr o papa. Te paxāmnhîx ōrkwý kaākre kamā hitom maati hwýr pagjêx nê kamā amnhî to hwýrta pyrāk. Jao ra mē papamjaja amnhî to hwýr o papa nhûm patre axte mē pahto hwýr kêt nê. Jejus na pre htyk o mē pamā hitom maati wýr hakwakre kahêxā hā kupêxêja kôt ā ho axkjê. Jao mē paxāmnhîx hwýr mē pagjêx kaxyw mē pamā kahê xā mē.

²¹ Tā ra kēp Tirtûm nhō krî kamā mē pahto hwýr xwýnh maati na. Nê mex kumrêx o jar pika ja kamā patre kot mē ho hwýr o pa xwýnhta jakrenh.

²² Jakamā e kwa kêr pu mē māmri paxāmnhîx amnhî to Tirtûm wýr o papa. Ra Jejus kot mē panê htyk nhûm mē pahte amnhî kaxyw hkôt pajamaxpêr rāhā ho papa jakamā kêr pu mē axte mē pahpê amnhî tomnuj xwýnh ā amnhî jarênh kêt nê. Kêr pu mē nhýrmā tanhmā pajamaxpêr punuj to rý tanhmā amnhî tomnuj to hāmri

nê tee ri ja hã amnhî pumu nê pahkaprî kamã amnhî to Tirtûm wÿr kurê kumrêx. Jejus ra kot mē pahte amnhî tomnuj pãnhã amnhîrer par jakamã kot puj mē Tirtûm mã tanhmã mē pahte amnhî tomnuj to hã amnhî jarê nhûm mē pama nê axte kãm hamaxpêr kêt nê. Pu mē te paxwÿr nê pahte amnhî nê pagrã htyk kuhõnh par nê akupÿm pamex pyrãk. Nê axte paxãmnhîx amnhî to Tirtûm wÿr o papa.

²³ Nê mē kot Kris ã tanhmã mē pahto htã kwa kër pu mē tee ri amnhî kukamã pajamaxpêr kêt nê. Rÿ pajamaxpêr o:

—Konên. Koja mē tanhmã hamaxpêr to nê Kris ã ixpî rÿ ko. Pa apu mē kot ixpîr pymaj akupÿm ixte amnhî nhîpêx tûm o awjanã nê akupÿm hkôt amnhî nhîpêx japêr rÿ ko. Anê.

Kwa pu mē tee ri ã pajamaxpêr anhÿr hkêt nê. Pu kêt mē pajamaxpêr o:

—Nã mē kot Kris ã tanhmã ixto htã kot paj aa hkaga hkêt nê. Mē kot hã ixpîr mã tã kot paj hkaga hkêt kumrêx.

Anhÿr ã amnhî jarê.

²⁴ Nê kër ka mē akwÿjê mã anê kê mē mēmoj to axpên kutã nojarêt rãhã ho ri axpên kôt pa. Jao tanhmã axpên to mex to o ri axpên kôt pa.

²⁵ Na pre ra mē pahkwÿjaja tanhmã hamaxpêr to nê axte mē pahkôt pikuprõnh nê Tirtûm kapêr mar o hkrî hkêt nê. No kër pu mē ho mē urãk kêt nê. Kër pu mē arî xatã axpên wÿr akuprõ nê mē pahte tee ri amnhî kukamã pajamaxpêr nê axpên mã pakapêr o papa. Kêt mē panhõ Pahîhtija ra akupÿn mē pahwÿr wrÿk kaxyw jakamã kwa kër pu mē kutêp arî axpên mã pajamaxpêr mex nhõr pê tãm axpên nhîpêx mex rãhã ho i papa.

²⁶ Mē pahkwÿjaja kot Tirtûm kapêr mar mex tã na htem kuma nê ãm kuma. Kwa kër ka mē ho mē urãk kêt nê. Kris kot mē panê htyk ã harênhja mē kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mē kot amnhî tomnuj pãnhã amnhîre? Nã arakati kumrêx. ãm Jejus pix na pre Tirtûm ja kaxyw ãm. Tapxipix na pre ã mē panê amnhî nhîpêx anê. Tã nhûm mē kot hkagaja mÿrapê koja mē nhÿrmã mē tãmjaja mē kot amnhî tomnuj pãnhã amnhîre.

²⁷ Mē kot Tirtûm kutã amnhî xunhwÿr xwÿnh na mē. Amnepêm na pre Tirtûm mē kot kutã amnhî xunhwÿr xwÿnhjê kaxyw mē kot amnhî xã htyx kamã hamak tûm xata nhîpêx. Tã ra mē kot Jejus kaga jakamã koja nhÿrmã ma hwÿr mē rênh pa nhûm mē tee ri kãm hwÿr pa hprãm kêt kaprÿ.

²⁸ Amnepêm finat Mojesja kormã htîr ri na pre hte mēhõ pixi nê kapêr kaga nê akupÿm kot amnhî nhîpêx tûm o awjanã nê tanhmã amnhî tomnuj to nhûm hkwÿjaja ja hã omu. Tanhmãn axkrut rÿ axkrunêpxi nê

ja hã omu. Hãmri nê ma Mojes wÿr mra nê axpên kôt kãm tanhmã kot amnhî tomnuj to hã harê. Hãmri nhûm harênh ma nê mē kãm hã amÿnê nhûm tee ri kãm htîr prãm kaprÿ. Mē kot akupÿm amnhî nhîpêx tûm o ujanãr nê amnhî tomnuj o paja mÿrapê na prem mē kupa. ã na pre htem mē hipêx anhÿr o pa.

²⁹ Nê koja mēhõ tanhmã Tirtûm Kra Jejus o kapêr punuj to. Tirtûm kapêr ã kaga htûm kot ra mē kot kêt Tirtûm Kra hã harênh mar mex tã axtem nê tanhmã ho kapêr punuj to ho pa. Kot mē panê htyk nê hkamrõ pikapîr kôt kot mē pahte amnhî tomnuj pãnhã amnhîrer ã harênh mar tã kuma nê ãm kuma nê harênh o:

—Nã mē pahpyrã nê kot amnhî tomnuj xwÿnh nhûm mē kot hã hpîr kênã. Na pre mē panê htyk kêt nê.

Anhÿr ã harê. Nê Tirtûm Karõja nhûm mãânên tanhmã ho kapêr punuj to. Kêp mē pakutã nojarêt xwÿnh tã nhûm axtem nê tanhmã ho kapêr punuj to. Mÿrapê koja nhÿrmã Tirtûm tanhmã homnuj tÿx to. Homnuj tÿx o mē kot Mojes kapêr kaga nhûm mÿrapê kot mē hparta jakre. Jakamã kwa kër ka mē ã amnhî nhîpêx anhÿr hkêt nê.

³⁰ Tirtûm kapêr ã kaga htûm kot ja jarênh kot:

Ixpê Tirtûm kot paj mē kot amnhî tomnuj xwÿnhjê homnuj tÿx nê. Anê.

Nê mē kot tãm amnhî nhîpêx xwÿnhjê jarênh kot:

Mē kot amnhî to mex o mē pa xwÿnhjaja kot paj nhÿrmã mē ho mex rax nê. No mē kot amnhî tomnuj o mē pa xwÿnhjaja kot paj nhÿrmã mē homnuj tÿx nê. Anê.

Ra mē pahte ã kapêr anhÿr xwÿnhja kot amnhî nhîpêx ã omunh mex.

³¹ Jakamã kwa mē okora. Kër ka mē amnhî to mex rãhã ho ri apa. Tirtûm rãhã ho rãhã nê hÿhtÿx o hÿhtÿx jakamã koja mēmoj tã akamã gryk ka amex kêt o amex kêt.

³² Nê amnepêm mē ate Jejus kôt amnhî xunhwÿr krax kãm na prem Jejus ã mē atomnuj tÿx tã ka prem mē umaj hkaga hkêt nê. Tã kër ka mē arî ã amnhî nhîpêx anhÿrja kukamã mãn ajamaxpêr nê hã anohtÿx rãhã ho apa. Jao arî ã amnhî nhîpêx anê nê mē umaj Jejus kaga hkêt nê.

³³ Na prem mē piitã mē noo mã tanhmã mē amã kapêr punuj to nê tanhmã mē anhîpêx to. Nê tõiã tanhmã mē akwÿjê homnuj tÿx to ka mē tee ri ja hã mē omu nê mē kamã axukapri nê. Nê mē hkôt axkamê nhûm prem mã mē ato anê nê.

³⁴ Na prem mē akwÿjê jagjê ka prem ja hã mē omu nê ma mē hagjênh xã hã ixkre hwÿr mē hwÿr mra nê tanhmã mē ho mex to. Nhûm prem mē apê mē akukrêx kwÿptã

nê ma amnhîm o pa ka mē ãm amnhî tã mē omu nê ajamaxpêr o:

—Kwâr mē māmri ma amnhîm hamÿn o pa. Koja nhÿrmã Tirtûm inhmã ixkukrêx mex o kot ja jakrenhta kwÿ nhôr rax nê pa amnhîm hamÿ nhûm aa ixpê hapêx kêt nê. Hâmri nhûm axte mēhō aa ixpê utâr kêt nê. Jar mē ixkukrêxta mexti hã. Anê.

Jao mē kot mē apê utâr tã ka mē akapri nã apa hkêt nê. ã amnhî kukamã ajamaxpêr anhÿr pê akînh nê apa. ãm hãmri na ka prem ã amnhî kukamã ajamaxpêr anê.

³⁵ Na ka prem mē kutã amnhî to htÿx kãm ã apa anê. Tã kwa kër ka mē arî ã amnhî nhîpêx anhÿr o ri apa. Kër kê nhÿrmã Tirtûm ja hã mē ato mex rax nê.

³⁶ Nê kër ka mē arî amnhî kaxyw Tirtûm mã ajamaxpêr rãhã ho ri apa. Mē kot Jejus ã tanhmã mē ato htã ka mē hkaga hkêt nê. Kot kaj mē ã amnhî nhîpêx anhÿr o apa nhûm Tirtûm ja hã mē apumu nhûm ja kãm mex nê. Hâmri nhûm ra kot amnhî jarênh xã hkôt nhÿrmã amã mēmoj mex nhôr rax nê. Jakamã kwa mē kot tanhmã mē anhîpêx to hã amnhî pumu nê tee ri amnhî kukamã ajamaxpêr o ri akapri hkêt nê. Kot kaj mē Kris ã apunuj rãhã apa hkêt nê.

³⁷ Tirtûm kapêr ã kaga htûm kot Jejus jarênh kot:

Koja mē pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸ Nê harênh kot:

Ikkôt mē kot amnhî nhîpêx mex o mē pa xwÿnhhaja koja mē amnhî kaxyw ixkôt hamaxpêr tÿx rãhã nê. Jao nhÿrmã ixri htîr tûm nê mex rãhã nê pa ho pa.

Nê koja mēhō ixkaga pa tee ri kãm ixkînh kêt ã omu. Anê.

³⁹ No mē papajaja te mē pahte mē kot Jejus kaga nhûm kot amnhî tã mē homnuj mã xwÿnhjê pyrãk kêt. Arî mē pahte amnhî kaxyw hkôt pajamaxpêr rãhã jakamã koja nhÿrmã amnhî wÿr mē pahto api.

11

Amnhî kaxyw Tirtûm kôt mē hamaxpêr mex xwÿnhjê jarênh

Sikûn Pêtre 3.5-7

¹ Nê na htem Kris ã mē panhîpêx kati ho pa pu mē pahpunuj rãhã nê ri papa. Te Kris kot mē pahto mex kêt pyrãk pu htem mēmoj punuj pix kãm ri papa nê kormã Tirtûm kot mē pahto mex ã amnhî tã omunh kêt nê. Tã ã mē pahte anhÿr tã kwa kër pu mē arî kapêr kôt amnhî nhîpêx rãhã ho papa. Mē pahte pano ho Tirtûm pumunh kêt tã kot mē pahkôt pa ho pa hã amnhî kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhî nhîpêx o papa.

² Amnepê mã mē pakukamã mē panhîgêjtaja na prem no ho Tirtûm pumunh kêt tã amnhî kaxyw kãm hamaxpêr nê kapêr kôt amnhî nhîpêx o pa nhûm amnhî tã mē omu nhûm ja kãm mex nê.

³ Nê mē papajaja na pu htem pajaxwÿja mē pano ho omunh kêt tã amnhîm harênh o:

—Nã amnepêm kormã mēmoj piitã amrakati ri nhûm Tirtûm ãm kapêr pix o mēmoj piitã ho kato. Ixte inhno ho ja hã omunh kêt tã kot ã amnhî nhîpêx anhÿr ã amnhî jarênhja jakamã kot paj hkôt ijamaxpêr tÿx rãhã ho ri ixpa. Anê.

⁴ Na pre finat Atãw nhîpêx nê kaxyw hprō Ewa nhîpêx. Hâmri nhûm wa hkra Apewja htō Kaî rom amnhî kaxyw Tirtûm kôt hamaxpêr tÿx o pa. Jakamã nhûm wa Tirtûm mã mēmoj gō. Nhûm Apew kot Kaî rom Tirtûm kãm hprãm xã hkôt kãm mēmoj nhôr jakamã nhûm amnhî tã omu nê kot amnhî to mex xwÿnh ã harê nê kot kãm ôr xwÿnhhta nhûm mex ã harê. Tã Apew amnepêm htyk tã pu htem arî harênh mar rãhã ho papa nê kãm pajamaxpêr o:

—Apew na pre hte amnhî kaxyw Tirtûm kôt hamaxpêr tÿx rãhã ho pa.

Anhÿr ã kãm pajamaxpêr.

⁵ Nê Atãw kanrêhã htãmnhwÿ Enokja na pre haxwÿja amnhî kaxyw Tirtûm mã hamaxpêr tÿx o pa. Jao hkamnâr rom kãm hprãm xã hkôt pix mã tanhmã kãm amnhî nhîpêx to ho pa nhûm amnhî tã omu nê amnhîm mex ã harê. Jakamã na pre htyk kêt nê. Na pre Tirtûm htîr rãhã ma amnhî wÿr ho api nhûm hkwÿjjaja tee ri hapêr o pa. Jakamã na pu htem arî axpên mã Enok kot amnhî kaxyw Tirtûm kôt hamaxpêr mex o pa hã harênh o papa.

⁶ Mē kot amnhî kaxyw Tirtûm mã mē hamaxpêr kêt xwÿnhhaja na hte Tirtûm mē mex ã mē harênh kêt nê. Tã mē papajaja kër pu mē Enok pyrã nê amnhî kaxyw kãm pajamaxpêr tÿx rãhã ho papa. Nê pajamaxpêr o:

—Tirtûmja htîr rãhã ho rãhã. Koja nhÿrmã mē ixte amnhî kaxyw hkôt ijamaxpêr xwÿnhjê ho mex rax nê. Nã koja mē ixto anê.

Anhÿr o mē pajamaxpêr nhûm Tirtûm amnhî tã mē pajamaxpêr ã mē pahpumu nê mē pahte amnhî to mex ã mē pajarê. No mē kot amnhî kaxyw kãm hamaxpêr kêt xwÿnhhaja na hte ã mē harênh anhÿr kêt nê.

⁷ Nê Enok kanrêhã htãmnhwÿ Noehtija na pre haxwÿja amnhî kaxyw Tirtûm mã hamaxpêr tÿx o pa. Jao hkamnâr rom amnhîm pâr raxja nhîpêx. Na pre ra Tirtûm na rax kukamã tanhmã kãm ujarênh to. Kormã aa na wrÿk nhûm Noehtî kot omunh kêt tã Tirtûm kapêr ma nê mar xã hkôt amnhîm pâr rax kumrêxta nhîpêx. Ôrkwÿ

kamã hkwýjê mê mê amnhîm hipêx. No mê kot Tirtûm kapêr mar nê âm mar xwýnhjaja na pre Tirtûm gô tám o mê hanhi nê mê himex pa. Nom Noehtija nhûm kot amnhî to mex xwýnh ã harê. Kot amnhî kaxyw hkôt hamaxpêr rãhã ho pa jakamã nhûm pre ã mex ã harênh anê.

⁸ Nê Nohti kanrêhã htãmnhwý Apraãwja na pre haxwýja amnhî kaxyw Tirtûm mã hamaxpêr týx o pa. Na pre Tirtûm kot kãm pika nhôr ã kãm amnhî jarê nê ra kot ma hwýr mênh kaxyw. Hãmri nhûm Apraãw kuma nê hkamnâr rom ô pika kaga nê ma pika hõja wýr pa. Aa kot ma hwýr môr nê omunh kêt tâ Tirtûm kapêr mar xã hkôt ô pika kaga nê ma hwýr pa ho pa.

⁹ Hãmri nê hwýr pøj nê omu nhûm Tirtûm kãm:

—E pika ja kot paj nhýrmã akanrêhã akra nê atãmnhwýjê mã kugô. Anê.

Hãmri nhûm kuma nê pikaja kamã pa ho pa. Ra kamã axtem mê uro hkwýjaja ri pa nhûm Tirtûm kormã mê kator kêt ri nhûm mê ô pika hwýr pøj nê mê kamã pa ho pa. Nom amnhîm ôrkwý mex nhîpêx kêt nê. Kormã kêp ô pika kumrêx kêt ã hkamnhix jakamã âm mry kã o ixkre nhîpêx nê kamã pa ho pa. Nê nhýhým pa kaxyw nê kugrà nê ma amnhî kôt o pa. Amnhî kaxyw Tirtûm mã hamaxpêr rãhã jakamã ã amnhî nhîpêx anhýr o pa.

Nê Apraãw kra Ijak nê htãmnhwý Jakoja wa Apraãw pyrã nê mry kã o ôrkwý nê ma amnhî kôt o pa. Nhûm Tirtûm kot Apraãw mã kapêr pyrã nê wa kãm wa hkanrêhã wa hkra nê wa htãmnhwýjê mã pika nhôr ã amnhî kukamã wa kãm amnhî jarê.

¹⁰ Jakamã nhûm Apraãw kormã Tirtûm nhô krí hwýr àpir xa hã amnhî tâ hamâr pê kot ho ô pika mã xwýnhjê kamã pa ho pa. Kaxkwa hwýr àpir mã xwýnhja mex kumrêx. Tirtûm kot hipêx jakamã kôja mry kã ho ixkre nhîpêxta rom aa hapêx kêt nê. Jakamã nhûm Apraãw mê pahpyrà nê ma kot hwýr àpir xa hã amnhî tâ Tirtûm jamãr rãhã ho pa.

¹¹⁻¹² Tã ra hpigêt týx nê hkurê hkêt nê pa. Te ra ri htyk kaxyw pa pyrãk. Nhûm hprô Sara haxwýja hpigêx týx nê. Kamrô hkêt ã amgrã sohtë rax kumrêx. Nhûm wa aa hkra hkêt nê pa htã nhûm Tirtûm nhýrmã wa hkra hã wa kãm awjarê nhûm wa kuma nê amnhî kaxyw hkôt hamaxpêr kurê kumrêx. Nom amnhî tâ kuma nê tee ri amnhî kukamã hamaxpêr hkêt nê. Na pre wa kuma nê xpeñ mã:

—Nã kot puj xep hãmri tâ pahkra. Tirtûm kot hã ã pajarênh anhýr kênã. Anê.

Tã ã wa kot hkra kaxyw Tirtûm mã hamaxpêr anhýr jakamã na pre Apraãwja hprô htu. Ra wa hamê hpigêt týx kumrêx tâ nhûm htu. Nhûm wa hkra Ijakja gaa nê

wa kãm kato. Jakamã nhûm wa gaa nê rí wa hkanrêhã wa htãmnhwý sohtë rax o ohtë rax. Ohtë ho kaxkwa kamã kanhêti sohtë jakre. Nê ohtë ho gô xujanâr mýri pikahti grã hkryre jakre. Jakamã nhûm mê tee ri mê ho kôta hpar mã. Nhûm Apraãw kêp mê hpãr krax.

¹³ Tã nhûm Apraãw nê Ijak nê Jakoja mê ri pa tãmtã nê htyk pa nê hapêx. Tirtûm kormã kot mê kãm pika jarênhã nhôr xwýj ri ra htyk pa. Nom kormã mê htír ri tanhmã kãm hamaxpêr to nê hamaxpêr o:

—Nã kormã Tirtûm kot mê inhmã pika jarênhja nhôr kêt tâ koja nhýrmã inhmýr pê ixkanrêhã ixkra nê ixtãmnhwýjê mã kugô. Nã koja mê kãm kugô. Ra kot hã inhmã amnhî jarênh kênã kot kêt mê kãm ôr kêt.

Anhýr o kaxyw kãm hamaxpêr rãhã ho pa. Jao hkính nê hamaxpêr o:

—Nã inhô kríja axtem na. Na pa hte jar pika ja kamã ri mê hkôt ri ixpa. Te ixpê mê uro pyrã nê ri mê hkôt ixpa nom jar inhô krí hkêt. Inhô krí na kêt axte mã. Anê.

¹⁴⁻¹⁵ Na prem ã ô krí hõ hkukamã hamaxpêr anhýr o pa. No ô krí htúmta mê kot hkaga nê pika hõ hwýr môr xwýnhã na prem ã harênh anhýr kêt nê. Kop apu mê kot amnhîm tám mã jarênh ronhýx prem awjanã nê ma akupým hwýr pa. Na prem axtem krí hõ jarê nê kormã hwýr môr kêt ã amnhî jarênh o pa.

¹⁶ Tã nhý krí na prem ã harênh anê? Nã kaxkwa kamã Tirtûm nhô kríja. Tãm na mex kumrêx jakamã nhûm prem kormã hwýr ma àpir xa hã mê pahpyrà nê amnhî tâ Tirtûm jamãr rãhã ho pa nhûm amnhî tâ mê omu nê hkính nê. Nê mê kot tám amnhî nhîpêx ã mê omu nê mê kêp hkra hã mê harênh ã hpijaãm kêt nê. Hãmri nê mê kutêp tanhmã ô krí ho mex to ho pa.

¹⁷⁻¹⁸ Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwýjaja koja mê kêp ixkra. Anê.

Tã ra kot amnhî tâ Apraãw kamã hamak kaxyw hkukamã hamaxpêr nê hamaxpêr o:

—Xã we Apraãw kãm ixkính týx kumrêx nê kãm ixkôt amnhî nhîpêx rãhã ho pa hprãm nã? Xã we kãm ixkính týx o hkrata jakrenh? E pa kop we ja hã amnhî tâ kamã ama nê omu mã. Anê.

Hãmri nê kot hkra hpír nê kãm ôr ã kãm karô. Hãmri nhûm kuma nê ra kot kãm hpír kaxyw. Kot Tirtûm kot amnhî nhîpêx ã omunh mex jakamã hkamnâr rom kot kãm hpír kaxyw.

¹⁹ Nê hamaxpêr o:

—Nã Tirtûm akupým kot mê ho htír xwýnh kênã.

Anhýr jakamã kãm hkra hpír pyma hkêt nê ra kot kãm hpír mã tâ nhûm Tirtûm amnhî tâ omu nê nê kãm kapêr nhûm kuma nê hpír

kêt nê wa ma akupÿm ôrkwÿ hwÿr mō. Tã ã kot hkra nhîpêx anhÿr jakamã Apraãw mã te Ijak htyk nê akupÿm htÿr pyrãk.

²⁰ Nê Ijakja na pre haxwÿja amnhî kaxyw Tÿrtÿm mã hamaxpêr tÿx o pa. Jao hkamnãr rom amnhî kra wa kãm Tÿrtÿm kot wa ho mex kukamã wa kãm harê. Kra Jako mē Ejauta wa kãm harê nê wa kãm:

—E koja nhÿrmã Tÿrtÿm inhmÿr pê war ato mex rãhã ho pa. Anê.

²¹ Nê Jakoja na pre haxwÿja amnhî kaxyw Tÿrtÿm mã hamaxpêr tÿx o pa. Jao hkamnãr rom hkra Juje mã Tÿrtÿm kot mē ho mex kukamã harê. Na pre Jakoja hkra nê htãmnhwÿ mē hpimràatã hprãm xãj ma Ejit wÿr pa nê kamã pa ho pa. Tã nhÿm Jako hpigêt tÿx nê ra htyk kaxyw. Hãmri nê hkra Juje mē hkra wa mē kãm kapêr nê mē kãm:

—E na pa tee amnhî kamã ama. Na pa ra ixytyk kaxyw. Nom koja Tÿrtÿm nhÿrmã inhmÿr pê mē ato mex rax nê. Anê.

Hãmri nê amnhî kaxpar xã hã pÿ hã amnhî kaxpa nê kãnhmã xa nê Tÿrtÿm mã mex o mex ã harê. Hãmri nê akupÿm nôr xã kamã nõn ty.

²² Nê Jujeja na pre haxwÿja amnhî kaxyw Tÿrtÿm mã hamaxpêr tÿx o pa. Jao htyk kaxyw nê hkamnãr rom hkwÿjê mã tanhmã amnhî jarênh to. Ra hpigêt nê htyk kaxyw nê hkwÿjê mã tanhmã amnhî tã karô hto nê mē kãm:

—E na pa ra ixytyk kaxyw. Tã koja Tÿrtÿm inhmÿr pê nhÿrmã Ejit rÿm mē akator nê ma akupÿm mē panhō pika hwÿr mē ato pa. Ra kot mē panhîgêt Apraãw mã amnhî jarênh xã hkôt. Jakamã kwa mē inhma. Kêr ka mē akupÿm anojarêt nê ma amnhî kôt ixtã kasãwja mÿ nê amnhî kôt ixto mō. Hãmri nê mÿtar mē panhō pika kamã mē anhō krÿ htã ijaxã pa jawÿ mē akuri ixtã pyka. Anê.

²³ Nê Mojes katorxã mē hipêêxãja na pre wa haxwÿja jajê pyrã nê amnhî kaxyw Tÿrtÿm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhÿm Ejit nhō pahija tee ri Ijaew sohtō rax kumrêx ã mē omu nhÿm ja kêp omnuj nê. Hãmri nhÿm mē hkra myjaja mē hapōx kôt mē hamÿnh xwÿnhjaja kot mē hpar ã mē kãm karô. Tã nhÿm Mojes kato nhÿm hipêêxã mē katorxãja wa omu nhÿm muxre nhÿm wa tee ri hkukamã hamaxpêr. Hãmri nê pahi Paraohiti mã mē hkra jamÿnh xwÿnh kot wa kêp hpÿr pymaj ho pimxur o hã mytwrÿ axkrunêpxi. Tÿrtÿm kamnãr rom wa amnhî tã kãm uma hkêt nê ã kêp hkra ho hpimxur anê.

²⁴ Nê Mojes na pre haxwÿja amnhî kaxyw Tÿrtÿm mã hamaxpêr tÿx o pa. Kormã karãre ri na pre Paraohiti hkra nija omu nê amnhîm kumÿ nê ho hkra nê amnhî kôt o pa. Rãhã nhÿm ãptãr nhÿm Ejit nhō xwÿnhjaja kêp pahi Paraohiti htãmnhwÿ hã xapên mã harê.

Hãmri nhÿm tee ri amnhî tã mē kuma nê amnhî tã mē kãm aprã nê mē kãm:

—Kwa mē ã ijarênh anhÿr kêt nê. Ixpê mē akwÿ hkêt. Anê.

²⁵ ãm kãm Tÿrtÿm kwÿjê kôt pix mã ri pa ho pa hprãm. Nê kãm Ejit nhō pahi hkôt amnhî tomnuj prãm kêt nê. ãm mē kot amnhî tomnuj pix o paja na mē kãm hprãm nhÿm ja hã mē omu nê tee ri mē hkukamã hamaxpêr nê hamaxpêr o:

—Nã kot paj mē hkôt ri ixpa hkêt kumrêx. Mē hkÿnh nê pa htã koja mē gaa nê ty nhÿm mē hkÿnhja mē kêp hapêx. Nã kot paj Tÿrtÿm kwÿjê hkôt mãn ri ixpa ho ixpa. Mē kot Tÿrtÿm ã mē inhîpêx kati htã pa arÿ mē hkôt ixpa ho ixpa.

²⁶ Inhmã Ejit nhō xwÿnhjê hkôt ixkukrêx rax nê ri ixpa hprãm kêt. Kwãr mē mãmrÿ Tÿrtÿm ã tanhmã inhîpêx to. Kojã mē ã inhîpêx anê pa ixpunuj nê ri ixpa htã koja Tÿrtÿm nhÿrmã ixto mex rax nê. Nã kot paj Ejit nhō pahiti hkôt ri ixpa hkêt nê.

Anhÿr jao ra mē pahpyrã nê Kris gryk ã mē hkaga.

²⁷ Tã akupÿm mēō pika hwÿr Ijaewjê ho mōr kaxyw nhÿm Ejit nhō pahihitja tee ri ja hã omu nê kamã gryk tÿx nê. No nhÿm Mojesja amnhî kaxyw Tÿrtÿm kôt hamaxpêr tÿx o hkamnãr rom kãm mē uma hkêt nê. Nê mē kêp hkwÿjê kator pa nê ma akupÿm mēō pika hwÿr amnhî kôt mē o pa. Tÿrtÿm kamnãr rom ã mē kêp mē ho kator anê. Aa kot no ho omunh kêt tã amnhî kaxyw kãm hamaxpêr tÿx nê hkamnãr rom mē kator nê hamakêtkati nê mē o pa.

²⁸ Nê hkamnãr rom mē hkÿnh ã arÿgro mē kot kãm “Pas” anhÿr xwÿnhhta ho hkrax. Kormã Ejit rÿm kator kêt ri. Nê kaxyw amnhî kwÿjê mã hã karô nê mē kãm:

—E pa mē amã Tÿrtÿm kapêr jarê ka mē inhma. Nã kot puj xep mē jarãhã ôwêhti hkwÿ pa nê hkamrō ru. Nê hkamrō ho panhōrkwÿ jakwakre hã pÿ kukō. Hãmri nê ÿ kuxôt nê kuku. Kojã kamãt nhÿm mē kot amnhî tomnuj xwÿnhjê pê mē hkra my kot wa piitã mē hpar mã xwÿnhja mō. Hãmri nê mē pamÿ ri mō nê ã mē pahte mē panhōrkwÿ nhîpêx anhÿrja ã omu nê tanhmã mē pahkrajê ho hkêt nê. Tÿrtÿmja ã mē pahte amnhî nhîpêx anhÿr kaxyw ã inhmã karô anê. Jakamã e pu mē hkamnãr rom ã amnhî nhîpêx anê kē mē pahkrajaja mē pahpê htyk kêt nê. Anê.

Hãmri nê ã mē kot Ejit rÿm kator xã hã arÿgrota ã mē hkÿnh o kator krax anê. Mē hkÿnhja na htem kãm “Pas” anê.

²⁹ Nê Ijaewjaja na prem haxwÿja Ejit rÿm kormã Mojes kôt mē pa ri urãk nê amnhî kaxyw Tÿrtÿm mã hamaxpêr. Jakamã na prem ra gō xujanãr pê “Gō Kamrêk” anhÿr xwÿnhja mÿ ri kuhê nhÿm Tÿrtÿm mē kãm ho axkjê. Nê mē kãm hkôt ã ho amgrã nhÿm

mê hã hkamnâr rom mex nê rêr pa. No nhùm mê hkôt mê kot mê himex kaxyw mê mñar xwýnhjaja. Ejit nhõ pôristijaja nhùm gôja akupým mê hã axkamur nê mê himex pa.

³⁰⁻³¹ Nê Ijaew kot Mojës mýr pê Jojue hkôt pa ri mê urak nê amnhî kaxyw Tirtûm kôt hamaxpêr o pa. Na prem ra Tirtûm kot mê kãm pika nhõr xwýnhhta wýr pøj nhùm Tirtûm krî pê Jeriko hwýr mê kurê. Mê kot kamã mê pa xwýnh pê utâr kaxyw mê hwýr mê kurê. Mêõ krî pu hã kahêja kên týx pix o na pre. Nê hprêk rax kumrêx. Nê krî nhõ xwýnhjaja kãm Tirtûm kapêr mar prãm kêt. Hãmri nhùm Tirtûm mê hã Ijaewjê mê amýnê nê mê kãm:

—E mêõ krîja kot paj mê amã kugõ nom kêr ka mê inhmar kumrêx. Kêr ka mê apkati mê mê õ krî hwýr mra nê kupu hpýnh o atã apkati kêp 7 nê rî ma akupým mra. Anê.

Hãmri nhùm mê kuma nê mar xã hkôt ma Jeriko hwýr mra. Hãmri nê hwýr pøj nê Tirtûm kamnâr rom krî puhã kahêja kupu hpýnh o hã apkati kêp 7. Hãmri nhùm apkati pê 7ta ã nhùm kên týx o kahêja mê kêp amnhî krakrak nê rôrøk pa. Nhùm mê mra nê hkôt krî hwýr agjê nê krî nhõ xwýnhjê nhímex pa. Nom krî kamã kupry pê Raapja Ijaew pyrã nê amnhî kaxyw Tirtûm mã hamaxpêr o pa jakamã nhùm mê kormã mê himex kaxyw mê hwýr mör kêt ri amnhî kukamã mê hkwyjaja kot mê hã ukapi ho pa kaxyw mê hwýr mê kurê. Hãmri nhùm Raapja mê kêp amnhî pyrã nê Tirtûm kôt hamaxpêr ã mê omu nê hkwy kot mê himex pymaj amnhî nhõrkwy kamã mê kêp mê ho amûxu nhùm mê hkã hkînþ pê ma akupým hkwyjê wýr mõ. Jakamã nhùm mê kot mê himex kaxyw mê hwýr mra hãmri nê amnhî pyrã nê tanhmã Raap mê õ fãmii ho hkêt nhùm mê arî htîr nê pa. Mê urak nê amnhî kaxyw Tirtûm kôt hamaxpêr o pa hã omunh xã hkôt tanhmã mê ho hkêt nê.

³² ã na pre mê kot amnhî kaxyw Tirtûm kôt mê hamaxpêr xwýnhjaja Tirtûm kamnâr rom amnhî nhîpêx anhýr o pa. Nom jajê pixjaja na prem ã amnhî nhîpêx anhýr hkêt nê. Määnên Giteaw nê Parak nê Sãsõ nê Jepte nê Tawi nê Sãmuew nê Tirtûm nhý hã mê kapêr o pa xwýnhjaja. Jajê piitã na prem wamtajê pyrã nê amnhî kaxyw Tirtûm kôt hamaxpêr týx rãhã ho pa. Nom kot paj ixprî hã tanhmã mê kot hkamnâr rom amnhî nhîpêx to hã mê harênh kêt nê. Kot pa anê nê tokyx harênh par kêt nê. Mê ohtõ rax kumrêx jakamã na pa ãm hkwy pix jarê nê hã kagã.

³³ Na prem hkwyjaja Tirtûm kamnâr rom ma mê kot amnhî tomnuj xwýnhjê nhõ krî hwýr mra nê mê kêp mê õ pika pytã. Nê mê hkwyjaja Tirtûm kamnâr rom mê ho amnhîptâr mex o pa. Nhùm prem kãm

Tirtûm kurê xwýnhjaja mê hkwyjê pynê nê ahkrehti kamã mry xoprê hwýr nhîpy mê kurê. Nhùm prem amnhî tã mê omu nê amnhî kaxyw Tirtûm mã hamaxpêr kurê kumrêx nhùm amnhî tã mê omu mê nê te mry jakwa ho pikamýr týx pyrãk o mê hipêx nhùm ãm mê omunh o kuhê nê tanhmã mê ho hkêt nê. ã na prem Tirtûm kamnâr rom amnhî nhîpêx anhýr o pa.

³⁴ Nhùm mê kot kuwy rax kãm mê hkwyjê rênh tã nhùm mê kot amnhî kaxyw Tirtûm mã hamaxpêr týx nhùm amnhî tã mê omu nê mê nê tanhmã kuwy ho nhùm mê hxêt kêt nê. Nhùm pre mê hkwyjaja wapo ho mê hkamnhwýr o mê hkwyjê hpar kaxyw nhùm mê amnhî kaxyw Tirtûm mã hamaxpêr nhùm amnhî tã mê omu nê mê nê tanhmã mê ho nhùm mê amnhî rê nê mê umaj hprõt nê ma mra. Mê hihtýx kêt tã Tirtûm kamnâr rom ý hã hihtýx nê mê kãm mê hkurê xwýnhjê ho krihkrit pa nhùm mê ma akupým hapêx.

³⁵ Nê mênî hkwyjaja na prem haxwýja amnhî kaxyw Tirtûm mã hamaxpêr týx o pa. Jao mê hkrajaja mê kêp htyk tã nhùm prem Tirtûm kamnâr rom mê ho kuwy nhùm mê kuma nê akupým mê kãm mê ho htîr.

ã na prem amnhî kaxyw Tirtûm mã hamaxpêr pê mex nê pa anê. No na pre mê hkwyjaja mê urak nê amnhî kaxyw kãm hamaxpêr týx tã nhùm Tirtûm tokyx mê ho mex kêt nê. Na pre mê kãm mê hkurê xwýnhjaja Tirtûm ã mê par kaxyw. Nê mê hkwyjaja Tirtûm ã mê hipêx kati ho pa nhùm mê amnhî xã htýx kãm hamak kãm ty. Nhùm mê himex kaxyw nê mê kãm:

—Kwa mê Tirtûm kaga. Kot kaj mê hkaga pa mê amã inhüre nê mê anhímex kêt nê. Anê.

No nhùm mê kuma nê ãm mê kuma nê amnhî kaxyw kãm hamaxpêr týx pê mê kãm:

—Nã mê kam nê mãmri ixpi. Inhmã ixyk pyma hkêt. Kot paj ty nhùm Tirtûm akupým ixto ixtr pa kuri inhímex kumrêx nê ri ixtr tûm nê ixpa ho ixpa.

Anhýr o mê kãm amnhî jarênh jakamã hãmri Tirtûm kaga hkêt rãhã nhùm mê himex.

³⁶ Nê mê kãm mê hkurê xwýnhjaja na prem Kris ã mê hkwyjê mã hpêr o pikênh pê mê htak xã ho mê htak rûnh o pa. Nê kãx o mê hkwyjê hpa hpre nê mê hte hpre nhùm mê kêp prês nê hkrî ho hkrî.

³⁷⁻³⁸ Nhùm prem kên rûnh o mê hkwyjê htak o mê kupa. Nê mê hayr o mê hkwyjê pa. Nê mê hkamnhwýr o mê hkwyjê pa. ã na prem Kris kôt mê hamaxpêr ã mê omunh xã hkôt mê hipêx anhýr o pa. Jakamã na pre mê hkwyjaja mê umaj mêõ krî rûm hapój nê ma hprõt nê mra. Nê te mê õ krî hkêt pyrã nê kapôt ã kêp amrakati nê ri pa. Mê ê hkêt

nê ôwêhti hkà ho ê nê ri hã pa. Nê motre kà ho amnhî pre nê ri hã pa. Nê kên prêk ã api nê kre kamã hpimxur o pa. Nê pika hkre kamã hpimxur o pa. Nhüm mē kām mē hkurê xwýnhjaja te mē kēp ahpunu nê mē kēp akro pyràk o mē hipêx nê axpēn mā mē harēnh o:

—Nà mē mexti hã. Kwa pu mē piitã mē himex paa ri.

Anhÿr o mē harēnh tã nhüm Tirtüm mē uràk nê ã mē harēnh anhÿr kêt nê. Na pre mē mex kumrêx ã mē harê. Nê nhÿrmã kuri mē mex nê pa ho pa hkukamã mē harê.

³⁹ ã na prem Tirtüm kamnãr rom mē kām mē hkurê xwýnhjê kutã amnhî to htÿx kām htyk o pa anê. Nhüm Tirtüm ja hã mē omu nê hkînã nê kām mē hapê htÿx nê. No nhüm mē kormã htÿr ri amnhîm Tirtüm kot mē ho mex xã jamÿnh kêt rãhã ty.

⁴⁰ Tã mo na pre Tirtüm kormã mē htÿr ri hkwyjê pyrà nê mē ho mex kêt nê? Nà na pre kormã mē hkukamã hamaxpêr o:

—Nà kot paj kormã mē ho mex kêt nê. Kot pa mē mÿr pē mē kot ixkôt amnhî xunhwÿr mã xwýnhjê jamãr grire mãn. Kêr pa inhô krî kamã mē ho ixpimràatã mē ho mex rax kumrêx. Nà kot paj ã mē ho mex anê. Ja na kêt inhmã mex o kormã mē htÿr ri ixte mē ho mexta jakrenh. Anê.

Jao ra ã mē papajaja mē pakukamã hamaxpêr anê.

12

Mē pahte Jejus pyrà nê mēmoj kutã amnhî to htÿx ã mē pamã karô

Piripos 3.12-21

¹ Na pre mē pakukamã mē panhigêt kwýjaja amnhî kaxyw Tirtüm mã hamaxpêr pē ã amnhî xã htÿx kamã hamak o pa anê. Tã te ra mē kot kýj rüm kaxkwa rüm mē pahpupunh nê tanhmã mē pamã kapêr to pyrà nê mē pamã kapêr o:

—E mē inhma mē ixkanrêhã mē ixtãmnhwýjaja. Na pa prem ã Tirtüm kamnãr rom amnhî nhîpêx o ixpa anê. Mē kot ja hã mē inhîpêx kati htã pa prem Jejus kaga hkêt nê. Tã kër ka mē ixpyrà nê ã mē kām mē akurê xwýnhjê kutã amnhî to htÿx anê. Nê mē ixpyrà nê amnhî kaxyw Tirtüm kôt pix mã ajamxpêr tÿx rãhã ho ri apa. Anê.

Jakamã kwa kër pu mē uràk nê ã amnhî nhîpêx anhÿr rãhã ho mãn ri papa. Te mē hprôt xwýnhjaja kot amnhî nhîpêx pyràk o amnhî nhîpêx. Na htem hprôt tÿx kaxyw mēmoj pyti jamÿnh nê ho hprôt hkêt nê. Na htem ÿ kamã hprôt o hprôt tÿx nê wam hkwyjê mã wa nê mra. Ja pyrà nê kër pu mē pahte Tirtüm kapêr kôt amnhî nhîpêx mex o papa kaxyw tanhmã mē pahte amnhî tomnuj to hã amnhî pumu nê hkaga kurê kumrêx. Mē pahte amnhî tomnuj o papa

xãja te mex pyràk no ãm mex kêt. Te ho mē hprôt xwýnh kot axtem nê mēmoj pyti mÿnh nê tee ri ho hprôt tÿxta pyràk. Kot puj mē tanhmã amnhî tomnuj to ho papa nê Tirtüm kapêr kôt amnhî nhîpêx mex kêt nê. Jakamã kwa kër pu mē Tirtüm kapêr gryk ã amnhî tomnuj nê amnhî to htÿx rãhã ho papa. Te ho mē hprôt nê nhÿri mē àhuk xã pix kukamã hamaxpêr rãhã hprôt tÿx xwýnhhta pyrà nê ãm Jejus mã pajamxpêr tÿx rãhã ho papa.

² E kot paj mē amã Jejus kot tanhmã mē panê amnhî nhîpêx toja jarê ka mē inhma. Nà kot mē panê mē pahte amnhî tomnuj pãnhã amnhîrer kaxyw htyk nhüm mē pahte hkôt amnhî xunhwÿr jakamã na hte mē pamã pajamxpêr nyw gô pu mē amnhî kaxyw hkôt pajamxpêr ho ri papa. Na pre mē kām hkurê xwýnhjaja kot pí kahpa hã nhôr nê hpîr mã nhüm mē kutã mē kām amnhî to htÿx nê arî mē kām xa nhüm prem kupî. Tã tee ri amnhî kukamã hamaxpêr o Tirtüm kaga hkêt nê. Na pre hamaxpêr o:

—Nà kwãr mē mãmrî ixpî. Kot paj ty nhüm Inhîpêêxã akupÿm ixto ixtÿr pa kuri inhmex kumrêx nê ixtÿr tùm nê ixpa ho ixpa. Anê.

Tã na ra kaxkwa kamã Tirtüm xupôk rüm mex nê hkrî ho hkrî.

³ Jakamã kwa kër pu mē kot ã mē panê amnhî nhîpêx anhÿrja mã pajamxpêr rãhã ho ri papa. Mē kot hipêx kati htã nhüm mē kutã amnhî to htÿx nê xa. Tã kër pu mē uràk nê mē kām mē pahkurê xwýnhjê kutã amnhî to htÿx rãhã ri papa. Jao tee ri amnhî kukamã pajamxpêr o mē umaj Tirtüm kaga hkêt nê.

⁴ Na ka htem ma mē kot amnhî tomnuj xwýnhjê hwÿr mra nê mē kot amnhî tomnuj kaga kaxyw tanhmã mē kām akapêr to nhüm mē ja hã mē ama nhüm ja mē kēp omnuj nhüm mē amnhî tã tanhmã mē atomnuj to. Nom wam mē kot mē pahkwýjê nhîpêxta pyrà nê kormã mē atôxpîr kêt nê.

Tirtüm kot tanhmã hkrajê nhîpêx to hã harēnh

Juãw 15.1-2; Eprêw 5.7-8; Xiakre 1.2-4

⁵ Nê mãn ka mē arî Tirtüm kapêr ã kaga htüm kwý hã ano htÿx japêr. Mē pahpê Tirtüm krajê mã kapêr jarēnh kot:

Koja Pahi Maati tanhmã mē ate amnhî tomnuj to nê mē amã kapêr ka mē ama nê mar tÿx nê mēmojta kaga kurê kumrêx. No mē ama nê tee ri kot nê akurê xwýnhhta kukamã ajamxpêr o ri akaprî o axtem nê Tirtüm kaga hkêt nê. Ama nê kot amã mēmoj nê kapêr xwýnhhta kaga kurê kumrêx.

⁶ Na hte Tirtüm kām mē pajapê hã tanhmã mē pahte amnhî tomnuj to hã mē pahpumu nê hã tanhmã mē panhîpêx to. Tãm mē pahte amnhî nhîpêx o

papa kaxyw. Kot mē pahpê hkra hã mē pajarênh jakamã na hte ã mē pahte tãm amnhĩ nhĩpêx o papa kaxyw mē panhĩpêx anê. Anê.

7 Jakamã kot kaj mē tanhmã amnhĩ tomnuj toja mýrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêt nê. Kêt mē ãm ajamaxpêr o:

–Nã ixte tãm amnhĩ nhĩpêx kaxyw na Tirtũm ã inhĩpêx anê. Ixpê hkra hã ixte amnhĩ to mex o ixpa prãm xãy ã inhĩpêx anê.

Anhỹr o mãn kêt ajamaxpêr. Na hte mē hipêxã mē hkra kot amnhĩ to mex kaxyw ã mē hipêx anê. Tã Tirtũm na hte mē urãk nê ã mē panhĩpêx anê.

8 No koja mēhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêt nê. Hã koja hkraja te hipêxã hkêt nê hã awrãre nê ri pa pyrãk. Tã mē pahpê Tirtũm krajaja kot puj mē tanhmã amnhĩ tomnuj to nhũm ja hã mē pahpumu nê hã tanhmã mē pahto. Nom mē kêp hkra hkêt xwýnhjaja nhũm hte ja hã mē omu nê ãm hã mē omu nê hã kormã tanhmã mē hipêx to hkêt nê.

9 Nê na hte mē panhĩpêxã mēmoj tã mē pamã karõ pu htem kuma nê hkõt amnhĩ nhĩpêx. Ja mex. Nom kaxkwa kamã Mēpahpãm maatija mē pahte mar nê hkõt amnhĩ nhĩpêxja na kêt mex kumrêx. Kot puj mē ã amnhĩ nhĩpêx anê nê nhỹrmã kuri pamex nê pahĩr tũm nê papa ho papa.

10 Nê mēhĩrẽre na htem hamaakro nhũm mē hipêxã tanhmã hã mē ho. Hã mē hkaprêprêk rý hã mē kãm akir. Amnhĩ krã hkõt tanhmã mē hipêx to. Mê kot ja hã amnhĩ pumunh nê axte hkêt kaxyw. Ja mex. Tã mē papajaja. Mē pahpê Tirtũm kra na pu htem tõhã tanhmã amnhĩ tomnuj to nhũm mē pahpumu nê tanhmã hã mē pahto. Mē pahte amnhĩ pumunh nê axte hkêt kaxyw. Urãk nê amnhĩ to mex pix o papa kaxyw.

11 Na hte mēmoj tã tanhmã mē panhĩpêx to pu mē tee ri amnhĩ pumu nê pahkaprĩ nê pahkĩnh kêt nê ri papa. Nom kot puj mē tokyx tanhmã amnhĩ tomnuj tota kaga nê akupỹm Tirtũm kõt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mê pahte Tirtũm kaga hkêt ã mē pamã karõ

12 Jakamã e kwa kêt ka mē amnhĩ to htýx nê apa. Mē kot Kris ã tanhmã mē anhĩpêx to htãã. ãm Tirtũm kõt pix mã amnhĩ nhĩpêx mex pê akĩnh nê apa.

13 Kêr kêt Kris kõt atõjê hõ tee ri mēmoj tã amnhĩ pumunh kõt ra Tirtũm kaga kaxyw tã ã mē ate amnhĩ nhĩpêx anhỹr ã mē apumu nê mē apyrã nê akupỹm hkõt amnhĩ xãm týx nê hkaga hkêt nê.

14 Nê kêt ka mē tãm ri axpên nhĩpêx o ri apa. Jao axpên kõt ajamakêtkati nê ri apa nê amnhĩ to mex pix kukamã ajamaxpêr. No kot kaj mē anhỹr kêt nê nhỹrmã mē panhõ Pahi Maati hwýr axãpir nê kuri amex nê apa hkêt nê.

15 Na hte Tirtũm mē pahto mex nê mēmoj to mē pakutã nojarêt rãhã o pa. Jakamã kwa kêt ka mē hkaga hkêt nê. Nê tanhmã ri ajamaxpêr punuj to ho ri apa hkêt nê. Kot ka mē ã amnhĩ nhĩpêx anê nhũm Kris kõt mē pahkwýjaja ja hã mē apumu nê mē apyrã nê tanhmã amnhĩ tomnuj.

16 Nê kêt ka mē axpên kãm apijaãm kêt o ri apa hkêt nê. Nê te finat Ejau kot amnhĩ nhĩpêx pyrãk o ri apa hkêt nê. Na pre Tirtũm ã hpiajaãm kêt nê hkwyjê kamã hpiajaãm kêt o pa. Nê Tirtũm mã hamaxpêr kêt kumrêx. Kêp Ijak kra kot wa jakamã koja nhỹrmã hipêxã mýr pê kêp hikukrêx nê õ pika piitã ho ãrĩk pa. Hãmri nhũm hipêxã kot ho Tirtũm wýr nhũm kot ho mex kaxyw mã tã nhũm axtem nê mēmo arĩgro hã kãm prãm xãy kot kêp mēmoj to ãrĩk mã xwýnhta htõ Jako mã hkaga hpa. Mãnkwýrte gõj kãm ãm prãm xãy kãm hkaga hpa. Jakamã nhũm Jako hpãnhã te kêp Ijak kra kot wa pyrã nê mýr pê õ mēmoj piitã ho ãrĩk mã.

17 Gaa nhũm Ejau tee ri ã amnhĩ nhĩpêx anhỹrja mã hamaxpêr o hkaprĩ nê. Nê tee ri kãm Jako kot akupỹm kãm mēmojta nhõr prãm kaprý. Nê mur nê hã hipêxã wý no nhũm axte kãm mēmoj nhõr kêt nê. Nhũm kot ho Tirtũm wýr kaxyw tee ri amnhĩ to kuwý no nhũm kuma nê ãm kuma nê kãm ho anhỹr kêt nê.

18 Nê amnepê mã Tirtũm kot mē panhĩgêxjê mã kapêr kaxyw na prem hixêt prêk pê Sinai jarênhja wýr akuprõ nê hparpê kuhê. Hãmri nhũm hixêt nhĩmõk ã kuwy hpõk rax kumrêx. Nê kuwy mýr ri kakrã htyk ajêt. Nê kõk ãpêr týx nê. Nhũm Ijaewjaja hixêt krax ã omu nê kãm maa ho htertet o kuhê.

19-21 Hãmri nhũm mēhõ pifti kakõ nhũm Tirtũm hixêt nê mē kãm kapêr nê mē kãm:

–E mē inhma. Kêr ka mē hixêt ã axãpir kêt nê. Kot kaj mē atõ hã api rý mē akrit õ hã api ka mē ja hã omu nê kaxyw kên rũnh kwý jamý nê ho htak o api. Anê.

Hãmri nhũm mē piitã tee ri kuma nê kãm ma htýx kumrêx nê amnhĩ nê kãm:

–Kwa hãmri Tirtũm. Axte mē inhmã mēmoj jarênh kêt nê. Mojes pix mã mãn mē ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêtja ã api. Kãm ma nê htertet rãhã mõ nê hã api.

22 Nom mē kãm ma ho Tirtũm mã amnhĩ jarênh tã mē papajaja na pu htem mē kurom paxãmnhĩx kãm amnhĩ jarênh o papa. Na pu htem kãm amnhĩ jarênh kaxyw nê hixêt

prêk ã paxàpir kêt nê. Te ra mê pahte ma kaxkwa hwÿr ò krî hwÿr paxàpir nê pano ho omunh pê kãm amnhî jarênh pyrâk. Ò krîja mex o mex. Kamã kapêr o mê wrÿk xwÿnhjaja ohtò o ohtò. Na htem kamã hkîn hãhã ho pa ho pa.

²³ Nê ò krî hwÿr na hte hkra xàpir xwÿnhjaja ri pa. Nê mê papajaja na pu htem kãm amnhî jarênh kaxyw nê te kaxkwa kamã kuri pakuhê nê kãm amnhî jarênh pyrâk o amnhî nhîpêx. Te mê pahpê hkra kot wa pyrâk jakamã mê pamã uma hkêt. Nhùm pre Tirtùm ra ò kagã kamã mê pakutêp amnhîm mê panhîxi hã kagã hpa. Na hte mêmoj piitã hamâr o hkri. Nê krîja kamã amnepê mormã Kris kot mê pahwÿr wrÿk kêt ri nhùm ra amnhî kaxyw Tirtùm kôt hamaxpêr mex xwÿnhjaja haxwÿja ra kamã ri pa. Ra Tirtùm kot mê ho hkra jakamã nhùm mê kuri ri pa ho pa.

²⁴ Nê Jesus haxwÿja kamã pa ho pa. Na pre mê panê htyk nê hkamrô pikapîrja o mê pahte amnhî tomnuj pãnhã amnhîre. Jakamã na pu htem hkôt amnhî xunhwÿ nhùm mê pahto hkra pu mê paxãmnhîx ri Tirtùm mã amnhî jarênh nê amnhî to hwÿr o papa.

Amnepê m na pre Tirtùm tee ri Kaî kot htò Apew pîr nê hkamrô pikapîrja ã omu nê hamaxpêr o:

—Nã ã kot amnhî nhîpêx anhÿr jakamã kot paj hã homnuj tÿx nê. Anê.

Tã ra hpãnhã Jesus kot mê panê htyk nê hkamrô pikapîrja ã omu nê ra axtem hamaxpêr o:

—Nã ãm hãmri na Ixkraja mê nê ty. Jakamã mê kot hkôt amnhî xunhwÿr xwÿnhjaja kot pa Ixkra kukwak ri mê kot amnhî tomnuj mÿrapê tanhmã mê ho hkêt nê.

Anhÿr o mê pakukamã hamaxpêr. Æ hamaxpêr anhÿrja mex o mex.

²⁵ Na pre Mojes Tirtùm nhÿ hã mê panhîgêxjê mã xatã mê kãm Tirtùm kapêr jarênh o ri pa nhùm mê kuma nê hkôt amnhî nhîpêx o pa. Tã gaa nê ra hã nohkêt pa nê akupÿm mê kot amnhî nhîpêx tùm o awjanã nhùm Tirtùm tee ri ja hã mê omu nê mÿrapê tanhmã mê hipêx to. Tã nhùm Kraja kaxkwa rùm mê pahwÿr wrÿ nê mê pamã kapêr. Jakamã kwa mê okora kêr pu mê panhîgêtjê pyrã nê mê pahte amnhî nhîpêx tùm o paxujanãr kêt nê. Kot puj mê anê nhùm Tirtùm ja hã mê pahpumu nê mê urãk nê ja hã tanhmã mê panhîpêx to.

²⁶ Amnepê m Tirtùm kot hixêt prêk pê Sinai kamã mê kãm kapêrja. Na pre kapêr tÿx o pika ho ãk nhùm htertet tÿx nê. Tã koja nhÿrmã axte pika ho ãk nê kaxkwa ho ãk nhùm wa hamê htertet tÿx kumrêx. Koja axte ho anhÿr ho pixi nê axte ho anhÿr kêt nê.

²⁷ Tã nhÿrmã axte mêmoj to ãk ã amnhî jarênh jakamã koja mêmoj to kator xwÿnhnta piitã ho ãk. Nê mê pahte panhîhkra ho mêmoj nhîpêx xwÿnhja nhùm ho ãk nhùm htertet tÿx kãm hpigrãnh pa nê hapêx. Nhùm mêmoj htertet nê hpigrãnh kêt xwÿnh pixjaja arî rãhã ho rãhã.

²⁸ No Tirtùm nhò krî koja htertet nê hapêx kêt nê. Nê mê papajaja mê pahpê hkra jakamã te ra kuri ò krî kamã ri mê papa pyrãk. Jakamã kot puj mê mê urãk nê papajapêx kêt nê. Jakamã e kwa kêr pu mê amnhî tã Tirtùm mã mex o mex ã harênh nê hã pahpijaãm rãhã ho papa. Nê tanhmã amnhî tomnuj to hã amnhî pumu nê Tirtùm pumaj mêmojta kaga kurê kumrêx. Æ mê pahte amnhî nhîpêx anhÿr o papaja na Tirtùm kãm hprãm.

²⁹ Hihtÿx o hihtÿx jakamã koja mêmoj tã akamã gryk kot kaj amex kêt o amex kêt.

13

Mê pahte Tirtùm kãm hprãm xã hkôt amnhî nhîpêx ã mê pamã karò

Rômãn 12.1-2; Epes 4.1-3; Korosê 1.10-11; Wam Tesarôn 4.1-12; Wam Pêtre 2.11-12; Wam Juãw 3.17-18

¹ Nê e kwa Kris kôt ixtò nê ixtòxjaja. Kêr pu mê arî Kris kôt pahkwÿjê ho mex o mãn axpên kôt ri papa. Nê kêr pu mê tanhmã pahpunuj to hã amnhî pumunh tã axpên to mex mã panhÿrer kêt nê. Æ axpên nhîpêx anhÿr rãhã ho papa.

² Nê amnepê mã na pre mêmojaja nhÿhÿnh mra nê mê panhîgêtjê hõ hwÿr pøj. Hãmri nhùm mê omu nê htÿx axtem krî hõ nhò xwÿnh ã mê hkamnhîx tã no nhùm mê kèp Tirtùm kapêr o mê wrÿk xwÿnh kwÿ na prem. Hãmri nhùm amnhî nhòrkwÿ hwÿr mê kuwÿ nhùm mê ma hkôt mra nê kuri pøj nê kutã apku. Jakamã kwa koja nhÿhÿnh krî hõ rùm mêmojaja ma mê awÿr mō ka mê omu nê axãmnhîx amnhî nhòrkwÿ hwÿr mê hwÿr kurê kumrêx kê mê ari pøj. Æ mê hipêx anhÿr o apa hãmri nê nhÿrmã mê panhîgêtja pyrã nê amnhî wÿr Tirtùm kapêr o mê wrÿk xwÿnhjê hõ hwÿr japêr. Mê urãk nê ja hã mê omunh kêt tã atÿx amnhî wÿr mê awÿ nhùm ja mê amã mex o mex.

³ Nê kêr ka mê ra mê kot Jesus ã mê akwÿjê pynênh nê mê hagjênh xwÿnhjê mã ajamaxpêr rãhã ho ri apa nê mê ho ajamakêtkati hkêt nê. Te mê kajaja mê ìhkò hã mê hagjênh xã kamã apunuj nê akri pyrãk o mê kãm ajamaxpêr o ri apa. Jao mê kamã axukapri ho mê hwÿr mra nê mê kãm mêmoj nhòr o ri apa.

⁴ Nê mê kot axpên to hprõja na mex. Nom kêr ka mê amyjaja ãm aprò pix tânopxar o ri apa. Nê mê anijaja mê ajaxwÿja amjên pix tânopxar o ri apa. No mê hkuprÿje hwÿr mê

mrar xwýnhjaja nê nhâm mê kêp mê hprô ho amnhîkati xwýnhjaja nê nhâm mê kêp mê mjên o amnhîkati xwýnhjaja koja Tirtûm ja hã mê omu nê mê homnuj týx kumrêx.

⁵⁻⁶Nê kêr ka mê akâxpore rûnh kêt â amnhî pumu nê tee ri amnhî kukamâ ajamaxpêr o akapri hkêt nê. Na pre Tirtûm mê pamã kapêr o:

Kot paj akôt ri ixpa rãhã ho ixpa nê aa arer ry akaga hkêt kumrêx.

Anhÿr jakamã kot kaj mê akâxpore grire htã akapri nê apa hkêt nê. Aa Tirtûm kot mê pahkaga hkêt â amnhî jarênh jakamã mêmoj kot pu wem omu nê pamã nhâm ri mê uma ho papa? Tirtûm kot mê pahkôt pa ho pa kênã. Jakamã na pu htem pajamaxpêr o:

Nã Pahi Maatija ra kot ixkôt pa ho pa xwýnh jakamã mêmoj kot pa hkêt ri inhmã uma ho ixpa?

Mêmo kot kêt ri tanhmã kêp ixto?

Anhÿr o pajamaxpêr o papa.

⁷Nê mê kot Kris mã mê ajamãr o mê pa xwýnh ra mê htyk xwýnhjaja ka mê arí mê kot tanhmã amnhî nhîpêx to ho paja mã ajamaxpêr rãhã ho ri apa. Na prem Tirtûm kapêr o mê ajahkre mex nê. Nê tãm ri amnhî nhîpêx o ri mê akôt pa. Nê amnhî kaxyw Tirtûm kôt pix mã hamaxpêr rãhã ty. Tã kêr ka mê urãk nê â amnhî nhîpêx anhÿr o ri apa rãhã ty.

⁸Nê Jesus Krisja arí rãhãã. Nê amnepê mã kot amnhî nhîpêxa mãânên arí rãhãã. Aa kot amnhî nhîpêxa nhîjuk ri axtem tanhmã amnhî nhîpêx to hkêt.

⁹Nê kwa kêr ka mê Tirtûm kôt amnhî nhîpêx rãhã ho ri apa. Na hte kapêr o hêx xwýnhjaja mê awÿr mra nê mê amã:

—Amnepêm mê ate Tirtûm kôt mê amex â mê ajarênh kaxyw mê ate kãm mêmo mry nhôr nê akupÿm hamÿnh nê hkur o apa htã ra ja ho anhÿr kaga. Kwa mê ja ho awjanã nê axte â amnhî nhîpêx anhÿr o ri apa. Kê Tirtûm ja hã mê apumunh kôt mê amex â mê ajarê.

Anhÿr o mê amã kapêr. Nom xã na hte Tirtûm â mê pahte amnhî nhîpêx anhÿr â mê pahpumunh kôt mê pamex â mê pajarê? Xã na htem mêmo mê apkur xã hkur pê amnhî kaxyw Jesus kôt hamaxpêr týx o pa? Nã na htem anhÿr kêt nê. Na pu htem mêmoj kur kôt pamã Tirtûm kînh kêt nê. Kêt mê paxãpkur xãja mê panhî pix o hihtýx kaxyw na. Na hte Jesus kôt mê pahto paxihtýx kêt nê. Æm Tirtûm kôt amari kãm mê pajapê nê mêmoj to mê pakutã nojarêt jakamã na pu htem ja hã amnhî pumu nê amnhî kaxyw hkôt pajamaxpêr týx o papa.

¹⁰Tirtûmja Jesus kôt mê panê htyk â omunh xã hkôt ra kot mê pamex â mê pajarênh jakamã mo kaxyw kot pu mê axte kot mê pamex â mê pajarênh kaxyw kãm mêmo mry gô nê hkwy hku? Kojã mêhõ akupÿm

Tirtûm kapêr tûm o ujanãr jao Jesus kot nê htyk nê hkamrô pikapirja kaga.

¹¹Amnepêm na pre patre maatijaja tãhã mê kãm mêmo mry hpar xwýnh hkamrô ru nê guhkrax kãm kuru nê hamÿ nê ma o mra nê Tirtûm nhôrkwÿ kaàkre hwÿ hitom maati hwÿr ho agjê. Tirtûm kot mê omunh nê axte mê kot amnhî tomnuj mã hamaxpêr kêt kaxyw. Hãmri nhûm hpãnhã ï my nê krí pê ho kato nê ma o mra nê nhÿri amÿm hkwyjê hkãx â ho hxê pa. Tirtûm kapêr tûm kôt na prem â amnhî nhîpêx anhÿr o pa.

¹²Tã ja pyrà nê na prem ma krí pê amÿm Jesus o tã nê kupi nhûm hkamrô axkapí. Kot mê pahte amnhî tomnuj pãnhã amnhîrer nê mê pahto mê pahpê Tirtûm kra kaxyw â htyk nê hkamrô pikapir anê.

¹³Na prem Tirtûm kapêr tûm gryk â Jesus kaga nê pôristijê mã anê nhûm mê ma krí pê ho kato nê o tã nê kupí. Tã kêr pu mê jajê rom Jesus gryk â mãn Tirtûm kapêr tûm kaga. Kwãr mê mãmri Jesus pyrà nê Tirtûm â tanhmã mê pahto nê amnhî nê nhÿhÿm mê pajano.

¹⁴Kêt jar mê papapxãja kêp mê papapxã kumrêx kêt. Nê jar mê panhõ kríja kêp mê panhõ krí kumrêx kêt. Mê pamã te kot pô nhîrõnh o ixkre pix pyràk. No kêt mê panhõ krí kumrêx koja jar mê panhõ krí rom aa hapêx kêt nê. Tã tãm na pu mê kormã ma hwÿr papa kaxyw arí amnhî tã Tirtûm jamãr o papa.

¹⁵Nê na htem Ijaew arí ohtõ nê amnhî pãnhã Tirtûm mã mry hpar ho pa. Nom mê papajaja kot puj mê axte â amnhî nhîpêx anhÿr hkêt nê. Kot puj mê Æm Jesus kukwak ri Tirtûm mã mex o mex â harênh rãhã ho mãn papa. Jao te mê pahte kãm hkînh xã nhôr pyràk o amnhî nhîpêx.

¹⁶Nê kêr pu mê arí axpên to mex o ri axpên kôt papa. Nê kê mêhõ kêp amrakati japêr ka ja hã omu nê amnhî kutã kãm anhõ mêmoj kwÿ. Æ kot puj mê axpên nhîpêx anhÿr rãhã ho ri axpên kôt papa. Kot puj mê anê nê te mê pahte Tirtûm mã hkînh xã nhôr pyràk o amnhî nhîpêx. Æ mê pahte amnhî nhîpêx anhÿrja na mex o mex.

¹⁷Nê kêr ka mê Kris kôt mê akrãhtûmjê kapêr ma nê mê hkôt amnhî nhîpêx mex nê. Na htem Tirtûm mã mê ajamãr o ri mê akôt pa. Kojã mê nhÿrmã mê kot tanhmã mê anhîpêx to hã Tirtûm mã amnhî jarê. Jakamã mê kãm mê ato ajuta prãm. Tã kêr ka mê kapêr ma nê mê hkôt ri amnhî nhîpêx mex o ri apa. Kêr kê mê amnhî tã mê apumu nê hkînh nê. No kot kaj mê ama nê Æm mê ama nhûm mê tee ri amnhî tã mê apumu nê hkapri nê. Jao tee ri kot tanhmã mê ato ajuta mex to hkukamã hamaxpêr.

¹⁸Nê kwa kêr ka mê ixto Tirtûm wÿr rãhã ho apa. Inhmã Tirtûm noo mã tanhmã

amnhî tomnuj to hprâm kêt. Æm inhmã amnhî to mex pix o ri ixpa hprâm.

¹⁹ Nê kêr ka mê ixto awÿ kê tokyx akupÿm mê awÿr inhmê. Na pa ra inhmã mê apumunh prâm tÿx nê.

Kagà nhîpêx xwÿnh kot tanhmã mê ho Tirtûm wÿr to hã harênh

Epês 3.14-19; Piripos 1.0-11; Wam Tesarôn 3.9-13, 5.23; Sikûn Tesarôn 1.11-12, 2.16-17

²⁰ Nê mê panhō Pahihtî Jejus Krisja na hte mê panhîpêx o te ôwêhti jamâr xwÿnh kot hkrit jamâr pyrâk o pa. Jakamã kêp mê pajamâr xwÿnh maati mex na. Na pre mê panê ty nhûm Tirtûm akupÿm mê pamã ho htîr nê mê pamã harênh o:

—E ra Ixkra kot mê anê htyk jakamã kêr ka mê ãm ixkapêr nyw kôt pix mã ri amnhî nhîpêx o ri apa. Kot kaj mê ã amnhî nhîpêx anê hãmri nê nhÿrmã ty pa akupÿm mê ato mê atîr ka mê ixri atîr tûm nê apa ho apa. Anê.

Tirtûm kêp mê pahto mê pajamakêtkati nê ri mê papa xwÿnh na.

²¹ Tã na pa hte tanhmã mê ato hwÿr to ho ixpa nê mê ato hwÿr o:

—Pa Tirtûm. E kwa tanhmã ixkwÿjê ho mex to kê mê kãm akapêr kôt pix mã amnhî nhîpêx o pa hprâm. Nê mê kãm tãm amnhî nhîpêx o pa hprâm. Nê kê Jejus haxwÿja tanhmã mê ho mex to kê mê war amã hprâm xã hkôt pix mã war amã tanhmã ri amnhî nhîpêx to ho pa. Anê.

E kêr pu mê arî Jejus Kris mã mex o mex ã harênh rãhã ho papa.

Kagà jatur xã kamã mêmoj jarênh

²² E Kris kôt ixkrãmnhwÿjaja. Nã na pa ã mê amã kagã nhîpêx anê. Jejus kôt mê ato mê axihtÿx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mê kamã harê nê mar tÿx nê hkôt amnhî nhîpêx mex o ri apa.

²³ Nê mãn ka mê ra Ximotre jarênh mar japêr. Na pre Kris ã mê hagiênh xã kamã hkrî hã apkati sohtô nê. Tã nhûm xep mê ra kator. Tã koja kormã mê awÿr inhmôr xwÿj ri man ixwÿr mō nê hpôx japêr kot paj ma amnhî kôt mê awÿr o mō ka mê omu.

²⁴ Nê kêr ka mê kot Kris mã mê ajamâr xwÿnhjê mã ijarê. Nê atar Tirtûm krajê piitã mê kãm ijarê.

Nê ota jar Tirtûm kra hkwyja piitã mê awÿr hpêr mê.

²⁵ E kê Tirtûm mê apiitã mê ato mex o pa. Tã ãm ja pix. Na pa ã mê amã hã kagã ho anê. Na hapêx.

Xiakre Xiakre kot Jejus kôt hkwyjê piitâ hwÿr kagâ nê mēnh

Xiakre na pre kagâja nhîpêx. Kêp Jejus tō nê kêp Jerujarê kamâ mē kot Jejus kôt amnhî xunhwÿr xwÿnhjê nhô pastô na pre. Nê kêp Ijaew. Jakamâ na pre hkwyjê mâ kagâja nhîpêx nê krî piitâ hkôt urâk nê Jejus kôt mē kot amnhî xunhwÿr xwÿnhjê hwÿr kurê. Jejus â mē kâ mē kurê xwÿnhjêja na prem mē hipêx kati nhûm mē amnhî xâ htÿx kamâ hamak o pa. Jakamâ nhûm Xiakre kot mē hamaxpêr o mē hihtÿx kaxyw kagâja nhîpêx nê mē hwÿr kurê nê mē kâ m:

¹ Pa ixkwÿjaja. Xâ mē amex? E ixpê Xiakre na pa. Ixte Tirtûm mē Pahihti Jejus Kris wa kâ m tanhmâ amnhî nhîpêx to xwÿnh na pa. Jakamâ kot paj kagâja nhîpêx nê pika piitâ hkôt mē apiitâ mē awÿr kurê. Mē apê Tirtûm krajê hwÿr.

Mê pahpunuj tâ mê pahte amnhî kaxyw Tirtûm kôt pajamaxpêr

Rukre 6.20-23; Rômân 5.3-5; Korosê 1.11; Wam Pêtre 4.12-19

²⁻³ E ixkwÿjaja. Kêr ka mē atô tanhmâ amnhî to rÿ tanhmâ apunuj to. Rÿ mēhō tanhmâ Jejus â mē anhîpêx to. Tâ kêr ka mē ja hâ amnhî pumu nê tee ri amnhî kukamâ ajamaxpêr o ri akaprî hkêt nê. Arî akînh kâ m amnhî kaxyw Tirtûm kôt ajamaxpêr tÿx râhâ ho ri apa. Kot kaj mē â amnhî nhîpêx anê nê gaa nê rî mēmoj punuj pê Jejus kôt amnhî xunhwÿr tÿx nê. Jakamâ kwa kêr ka mē tanhmâ apunuj to hâ amnhî pumu nê â mē ate amnhî nhîpêx anhÿrja kukamâ ajamaxpêr pê akînh nê ri apa.

⁴ Nom kêr ka mē tee ri tanhmâ apunuj to hâ amnhî pumu nê akaprî xâj Tirtûm kaga hkêt nê. Â m amnhî kaxyw hkôt ajamaxpêr tÿx râhâ ho ri apa. Kot kaj mē â amnhî nhîpêx anê nê gaa nê Tirtûm noo mâ tã m amnhî nhîpêx mex o ri apa. Nê kâ m hprãm xâ hkôt pix mâ amnhî nhîpêx o apa.

Mê pahte tanhmâ amnhî kute hâ amnhî pumunh kôt amnhî to Tirtûm wÿr â mê pamâ karô

Matêwre 21.18-22

⁵ Nê kêr ka mē mēmoj mÿrapê tanhmâ apunuj to hãmri nê tee ri ja hâ amâ Tirtûm mâ ajamaxpêr tÿx prãm nhûm apê ja hihtÿx japêr. Rÿ mēmoj tanhmâ apê amnhî nhîpêx to ka tee ri hukamâ ajamaxpêr japêr. Kêr ka mē â ajamaxpêr anhÿr japêr hãmri nê amnhî to Tirtûm wÿr kurê kumrêx. Kot amâ ajamaxpêr mex nhôr nhûm ate ÿ hâ tã m ajamaxpêr kaxyw amnhî to awÿ. Kot kaj mē â amnhî to hwÿr anê nhûm amnhî tâ mē ama nê mēmojta kutâ tanhmâ ato axihtÿx

to kurê kumrêx ka ÿ hâ hkôt ajamaxpêr tÿx mex o ri apa. Jao tanhmâ akute htâ akînh nê ajamakêtkati nê ri apa. Kojâ Tirtûm tee ri amâ mēmoj kôt ajamaxpêr tÿx prãm kaprÿ hâ apumu nê hâ amâ âkjêr kêt nê. Kojâ ate amnhî to hwÿrta ma nê tanhmâ ato mex to.

⁶ Nom kêr ka mē amnhî to hwÿr kâ m tee ri amnhî kukamâ ajamaxpêr kati hkêt nê. Rÿ ajamaxpêr o:

—Koonên. Kojâ apu Tirtûm inhmâ ja ho anhÿr japêr.

Anhÿr o tee ri amnhî kukamâ ajamaxpêr kati hkêt nê. Â m akînh kâ m tanhmâ ate amnhî to hwÿr toja kukamâ ajamaxpêr o:

—Nâ kojâ inhmâ ho anê. Ixte amnhî kaxyw kâ m ijamaxpêr nê amnhî to hwÿr xâ hkôt kojâ inhmâ tanhmâ amnhî nhîpêx to.

Anhÿr o hkamnâr rom â amnhî kukamâ ajamaxpêr anê.

Nom kot kaj mē tanhmâ amnhî to hwÿr to nê tee ri amnhî kukamâ ajamaxpêr kati nê hkôt ajamaxpêr tÿx kêt nê. Nê tee kôk nhâm âpêr nê nhâm âpêrta pyrâ nê nhâm ri ajamaxpêr nê nhâm ri ajamaxpêrja o hkôt ajamaxpêr kêt nê. Kot kaj mē â amnhî nhîpêx anê nhûm Tirtûm tee ri ja hâ mē apumu nhûm ja kâ m mex kêt nê.

⁷⁻⁸ â mē hamaxpêr anhÿr xwÿnhjêja na htem nhâm hamaxpêr nê nhâm hamaxpêr jao hamaxpêr mex kêt nê. Jakamâ kot kaj mē â ajamaxpêr anhÿr o amnhî to Tirtûm wÿ hãmri nê â m amnhî to hwÿr kaprÿ. Kojâ ama nê â m ama. Nom kot kaj mē tanhmâ akute hâ amnhî kaxyw hkôt ajamaxpêr tÿx pê amnhî to awÿ. Nê tee ri amnhî kukamâ ajamaxpêr kati hkêt kâ m tanhmâ amnhî to hwÿr to nhûm amnhî tâ ama nê hkînh nê tanhmâ amâ mēmoj nhîpêx to. Mē ate hâ axâhwÿr xâ hkôt tanhmâ mē amâ mēmoj nhîpêx to.

Mê kêp amrakati xwÿnh mē mê kot amnhî to rûnh xwÿnhjê jarênh

Eprêw 13.5-6; Wam Pêtre 1.24-25

⁹ Nê kwa mē akâxpore hkêt xwÿnhjêja. Jar mē apê amrakati htâ mē apê Tirtûm kra na ka mē. Jakamâ kêr ka mē akâxpore rûnh kêt tâ mē apê Tirtûm kra hâ amnhî pumunh kôt ajamakêtkati nê nê akînh nê apa.

¹⁰⁻¹¹ Nê mē akâxpore rûnh xwÿnhjêja. Mē akâxpore rûnh nê mē akukrêx rûnh tâ kot kaj mē nhÿrmâ ty nê piitâ rer pa nê mē kêp amrakati xwÿnhjê pyrâ nê anhÿ kamâ Tirtûm kuri akri nhûm tanhmâ mē ajarênh to. Te mē apê mēmo pixôrà kot amnhî nhîpêx pyrâk. Na hte kwÿhtâ axpên pê axpôt nê muxre nê mex nê harir. Tâ gaa nê rî hâ myt xâhpanh mē nhûm ra nhôore. Nê gaa nê ra grâ pa nê rôrôk nê hapêx. Tâ kot kaj mē nhÿrmâ urâk nê ty nê akukrêx rer pa. Jakamâ kwa kêr ka mē akâxpore rûnh pumunh kôt akînh nê ri apa hkêt nê. Kêt â m

mê apê Tirtûm kra hã mãn amnhî pumunh kôt akînh nê apa.

Mê pahpunuj kôt pagryk nê mê pahkurê

¹² Nê kot kaj mê atô tanhmã apunuj to htã arî amnhî kaxyw Tirtûm mã ajamaxpêr tÿx rãhã ho ri apa. No tanhmã apunuj to hã amnhî pumu nê hkaga hkêt nê. Rÿ kot tanhmã ato xwÿnhã kêr ka mê amnhî tã kamã agryk nê tanhmã ho hkêt nê. Âm Jejus kôt pix mã amnhî nhîpêx rãhã ho ri apa. Kêr kê Tirtûm amã hkînh ã amnhî tã apumu nê amex ã ajarê. Ka nhÿrmã kuri amex kumrêx nê atÿr tûm nê apa ho apa. Ra kot mê pakukamã mê pahã amnhî jarênh xã hkôt. Jakamã kêr ka mê tanhmã apunuj to htã ã amnhî kukamã ajamaxpêr anhÿr pé akînh nê apa.

¹³ Nê Tirtûm aa kãm tanhmã amnhî tomnuj to hprãm kêt. Nê mê papajaja mê pahte tanhmã amnhî tomnuj to kaxyw na hte mê pamã tanhmã amnhî to rÿ mê pamã mê pajamaxpêr punuj jagjênh kêt nê. Jakamã kot ka mê atô amã tanhmã amnhî tomnuj to hprãm tã kwa kêr ka Tirtûm tãm kot ja kaxyw mê akrãm mê ajamaxpêr punuj jagjênh to hã hkamnhîx kêt nê.

¹⁴⁻¹⁵ Mê papamjaja na pu htem pajamaxpêr punuj xã hkôt tanhmã amnhî tomnuj to. No Tirtûm Karô na hte mê pamã mê pajamaxpêr punuj jagjênh kêt nê. Mê papamjaja na pu htem pajamaxpêr punuj nê gaa nê ra hkôt tanhmã amnhî tomnuj to. Hãmri nê gaa nê ã amnhî nhîpêx anhÿr rãhã ho ri papa. Mê kot amnhî tomnuj o mê pa xwÿnhjaja koja mê nhÿrmã ty hãmri nê Tirtûm mê Kra wa kuri htîr tûm nê pa ho pa hkêt nê.

Tirtûm kot tanhmã mê pahto mex to hã harênh

Xiakre 3.17-18; Sikûn Pêtre 1.3-4

¹⁶ Nê e ixkwÿjaja. Tirtûm kot mê pahte amnhî tomnuj prãm xaj mê pamã mê pajamaxpêr punuj jagjênh kêt jakamã kwa kêr ka mê ã ajamaxpêr anhÿr kêt nê.

¹⁷ Na hte mê pahto mex pix o pa. Na pre myyti ho kato. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhûm mê pamã hirã mex o harir. Na hte mytwrÿre tãhã hirã mex o pa. Nê gaa nê nyw kaxyw nê kamãt kô. Nê gaa nê nyw mê nhûm akupÿm hirã. Á na hte amnhî nhîpêx anhÿr o pa. No Tirtûmja ã kot anhÿr kêt. Kot amnhî nhîpêxja am rãhã ho rãhã. Na hte mê pahto mex pix o pa. No tãhã tanhmã mê pahto mex to nhûm jãã nhûm tanhmã mê pahtomnuj to hkêt nê.

¹⁸ Tã kapêr pix o kot ã mêmoj to kator kot anhÿr. Nê mê pamã kapêr o amnhîrît. Kãm mê pahto hkra hprãm xaj mê pamã Jejus kot tanhmã mê panê amnhî nhîpêx toja nhûm pre mê pamã ho amnhîrît. Na pu

preme kuma nê hkôt amnhî xunhwÿ nhûm amnhî tã mê pahpumu nê mê pahto hkra. Mê pahpê Ijaew kumrêxjaja na pre mê pahto hkra.

Mê pagryk o papa nê mê pahkurê

Rômãn 12.17-21; Epes 4.25-5.2

¹⁹ E ixkwÿjaja. Kwa mê ixkapêr ma nê hã anohtÿx nê ho apa. Koja mêhõ Tirtûm kapêr o mê ajahkre kaxyw mê awÿr mō nê mê amã kapêr jarê ka mê mar tÿx nê. Koja mê ate tanhmã amnhî tomnuj to nê mê amã kapêr ka mê amnhî tã ama nê kamã agryk kêt nê.

²⁰ Mê gryk o mê pa xwÿnhjaja na htem Tirtûm kapêr kôt ri amnhî nhîpêx kêt nê.

²¹ Jakamã kwa kêr ka mê axte amnhî tomnuj rÿ ajamaxpêr punuj o ri apa hkêt nê. Na htem ohtô nê ã amnhî nhîpêx anhÿr o pa nom kêr ka mê kurom Tirtûm kapêr mãn amnhî krã him haxãr tÿx nê. Kapêr o mê ajahkre xwÿnhjaja na htem ho mê ajahkre mex o pa. Tã kêr ka mê ama nê amã hkôt amnhî nhîpêx prãm rãhã ho ri apa. Na pu htem Tirtûm kapêr ma nê hkôt amnhî nhîpêx o papa hãmri nê nhÿrmã Tirtûm mê Kra wa kuri pahãr tûm nê pa mex nê papa ho papa.

Mê pahte Tirtûm kapêr kôt amnhî nhîpêx ã mê pamã karô

Matêwre 7.24-27; Wam Juãw 2.3-6

²² Nê kwa mê okora. Kêr ka mê am Tirtûm kapêr ma nê am mar kêt nê. Mããnen hkôt amnhî nhîpêx rãhã ho ri apa. Kot kaj mê ama nê am ama nê hkôt amnhî nhîpêx kêt nê hãmri nê apê Tirtûm kra hã amnhî jarênh kaprÿ. Jao nhÿrmã Tirtûm mê Kra wa kuri atÿr tûm nê apa hkêt nê.

²³⁻²⁴ Te ho mêhõ kot amnhî pumunh xã hpyr nê kamã amnhî pumunh nê amnhî krã hki jaê rÿ amnhî kuk tyk pumunh pyrãk. Tã te kot am ja hã amnhî pumunh nê kot amnhî to mex kêt rãhã akupÿm amnhî pumunh xã xir nê ma htêm nê axte amnhî kuk tyk rÿ amnhî krã ki jaêrta mã hamaxpêr kêt pyrãk. Mê kot Tirtûm kapêr mar nê am mar nê hkôt amnhî nhîpêx kêt xwÿnhjaja te kot ja jarênh pyrãk.

²⁵ Tã kêr ka mê ã amnhî nhîpêx anhÿr kêt nê. Mê ate Tirtûm kapêr kôt amnhî nhîpêx o apa kaxyw xatã kamã harê nê mar tÿx o apa. Jao hkôt amnhî nhîpêx mex o apa. Tirtûm kot mê pahte tanhmã amnhî nhîpêx to ho papa hã mê pamã karô xaja am hãmri na. Na htem hkôt amnhî nhîpêx nhûm Tirtûm ja hã mê omu nê mê ho mex nê nhûm mê amnhîx hamakêtkati nê hkôt amnhî nhîpêx o pa.

²⁶ Nom koja mêhõ kêp Tirtûm kra hã amnhî jarênh tã htÿx ri kapêr punuj o ri pa hãmri nê am kêp hkra hã amnhî jarênh kaprÿ. Mê pahpê Tirtûm krajaja na pu htem ã pakapêr anhÿr kêt nê.

²⁷ Axtem mē pahte amnhī nhīpēx. Na pu htem mē hā awrā rý mē kēp mē mjēn tyk xwýnhjē ho mex nē mē hā pahpēr o pahpikēnh o papa hkēt nē. Nē tanhmā mē kute hā mē omu nē mē ho ajuta ho papa. Ā na pu htem pahpē Tirtūm krajaja amnhī nhīpēx anhýr o papa nhūm Mēpanhīpēxā Maati Tirtūm ja hā mē pahpumu nē hkīnh nē. No na pu htem mē kot amnhī tomnuj o mē pa xwýnhjē hkōt ri amnhī nhīpēx kēt nē ām Tirtūm kapēr xā kōt pix mā amnhī nhīpēx nhūm amnhī tā mē pahpumu nē hkīnh nē.

2

Mē pahte mē piitā mē hipēx o axpēn pyrāk ā mē pamā karō

Rōmān 2.11; Korosē 3.25

¹ E ixkwýjaja. Pahihti Jejus Krisja mex o mex. Tā ra mē ate hkōt amnhī xunhwýr jakamā kwa kēr ka mē apē hkwy hā mē piitā tām mē hipēx o apa. Nē mē hipēx o axpēn pyrāk.

² Jakamā kot kaj mē nhýrmā Tirtūm kapēr mar kaxyw axpēn wýr akuprō nhūm hikāxpore rax xwýnhnta mē akōt axā. ē mex nē ōr o ihkra kamā kāk hāmri nē mē akōt axā. Nhūm hkōt mēhō pē amrakati xwýnhja tē nē axā. Nom wamta kīnhā kēp amrakati nē ē omnajti nē pikaxōnhiti. Hāmri nē hikāxpore rax xwýnhnta hkōt mē awýr tēn axā.

³ Tā tanhmā kot kaj wem ri wa hipēx to? Xā kot kaj mē wa hipēx o axpēn pyrāk nā? Nā xā kot kaj mē ā wa hipēx anē nē wam ār xwýnhnta ē mex ā omunh xā hkōt kām kadēre hō gō nē kām:

—E ota kadēre. Māmri hā nhý. Anē.

Hāmri nē ē pynajti xwýnhnta pumu nē axtem nē kām:

—E atar pikap nhý.

Anhýr o ahpýnhā wa kām akapēr?

⁴ Kot kaj mē ahpýnhā ā wa hipēx anē nē amnhī tomnuj nē. Wam ār xwýnhnta ka kām akapēr mex nē tanhmā ho mex to. No hkōt hōta omnajti hā omunh xā hkōt te kamā anhōkre kahak pyrāk o hipēx. Kot kaj mē ā ahpýnhā wa hipēx anē nhūm Tirtūm tee ri ja hā mē apumu nhūm ja kēp omnuj nē.

⁵ Kwa mē inhma ixkwýjaja. Mē kēp amrakati xwýnhjaja mē hikāxpore hkēt tā na hte mē hkwyjaja amnhī kaxyw Tirtūm kōt hamaxpēr nē hkōt amnhī xunhwý nhūm amnhī tā mē omu nē kot mē panhīpēx pyrā nē mē ho hkra. Jakamā jar mē kēp amrakati htā na htem amnhī kaxyw Tirtūm kōt hamaxpēr týx rāhā ho pa. Jakamā koja mē nhýrmā kuri htír tūm nē mex kumrēx nē pa ho pa. Mē kām Tirtūm kīnh o mē pa xwýnh piitā koja mē nhýrmā ā mex nē ri pa anē.

⁶ Nom kot kaj mē ahpýnhā mē hipēx nē amnhī tomnuj nē. E pa mēmoj tā mē akukja. Mēmojaja na htem tanhmā mē ato hēx to?

Nē mēmojaja na htem juisti mā tanhmā mē ato kapēr punuj to? Xā mē kēp amrakati xwýnhjaja? Nā mē tām kēt. Mē hikāxpore rūnh xwýnhjaja na htem ā mē anhīpēx anhýr o pa.

⁷ Nē ra mē ate hkōt amnhī xunhwýr xwýnhja nhūm mē axtem nē tanhmā mē apē ho kapēr to ho pa. Tā ka htem mē kēp amrakati xwýnhjē rom mē kām akapēr mex nē mē kām kadēre mex gō nhūm mē hā hkrī.

⁸ Tirtūm kapēr ā kaga htūm kot ja jarēnh kot:

Kēr ka mē piitā mē hipēx o te ka amā amnhī tā ma pyrāk. Anē.

Ā kot mē pamā karō kot anhýr. Kapērja mex kumrēx. Kot puj mē ā axpēn nhīpēx anhýr jao Tirtūm kām hprām xā hkōt amnhī nhīpēx mex nē.

⁹ Nom kot puj mē ā amnhī nhīpēx anhýr kēt nē ahpýnhā tanhmā mē hikāxpore rūnh xwýnhjē ho mex to nē ahpýnhā tanhmā mē kēp amrakati xwýnhjē nhīpēx to japēr. Hā kot puj mē Tirtūm kapēr htūmta nhīrōp pakuhē nē amnhī tomnuj nē.

¹⁰ Kot pu mē kapēr tūm piitā hkōt ri amnhī nhīpēx mex o ri papa htā ām pixire nē hirōp pakuhē. Jao te pahte kapēr piitā hirōp pakuhē pyrāk.

¹¹ Na pre Tirtūm mē pahte mē pahprō pix tănōpxar o papa hā mē pamā karō. Nē mē pamjēn pix tănōpxar o papa hā mē pamā karō. Nē mē pahte axpēn par nē mē pahkurē. Jakamā kot puj mē pahprō pix tănōpxar mex o ri papa japēr. Nē mē pamjēn pix tănōpxar mex o ri papa japēr tā tanhmā pajamaxpēr to nē pahkwýjē hōxpī. Jao te Tirtūm kapēr tūm piitā hirōp pakuhē hpar pyrāk o amnhī nhīpēx.

¹²⁻¹³ Koja nhýrmā Tirtūm mē pahpūr ri tanhmā axpēn nhīpēx to ho papa hā mē pahpumunh kōt tanhmā mē pajarēnh to. Mē pamā axpēn kīnh ā axpēn to mex o papa hā mē pahpumunh kōt mē pajarē rý mē pamā axpēn kīnh kēt ā axpēn nhīpēx o papa hā mē pahpumunh kōt mē pajarē. Jakamā mē kamā mē ukapri kēt xwýnhjaja koja nhýrmā ja hā mē omu nē mē urāk nē mē kamā ukapri hkēt nē. Nom mē kamā mē ukapri ho mē pa xwýnhjaja koja ja hā mē omu nē mē urāk nē mē kamā ukapri nē mē nē mē kot amnhī tomnuj piitā rēnh pa. Jakamā kwa kēr ka mē amnhī to mex nē tām axpēn nhīpēx o ri axpēn kōt apa. Nē axpēn mā akapēr mex nē axpēn kamā axukapri pix kukamā ajamaxpēr o apa.

Amnhī kaxyw Tirtūm kōt mē hamaxpēr xwýnhjē jarēnh

Rukre 3.8-14

¹⁴ Nē kwa ixkwýjaja. Koja mēhō kot amnhī kaxyw Jejus kōt hamaxpēr nē hkōt amnhī xām ā amnhī jarēnh tā hkōt ri amnhī nhīpēx

kêt nê. Hã koja nhÿrmã ty hãmri nê tanhmã kot we amnhÿ to nê Tirtûm mê Jejus wa kuri htÿr tûm nê pa ho pa? Nã koja anhÿr kêt nê. Kêp hkra hã amnhÿ jarênh tâ hkôt amnhÿ nhÿpêx kêt jakamã koja nhÿrmã wa hwÿr aprÿr kêt nê.

¹⁵ Nê xã koja mêhõ kêp amrakati nê ri pa. Nê ê pynajre pix jagjê nê ri hã pa. Nê õ hkêt nê ri kãm prãm nê pa.

¹⁶ Ka mê ja hã omu nê tanhmã kãm akapêr to nê kãm:

—Kwa ã amnhÿ nhÿpêx anhÿr kêt nê. Anhõrkwÿ hwÿr tÿn axê mex japêr nê axã nê amnhÿm mêmoj japêr nê aku. Kojã Tirtûm ato mex rax nê.

Anhÿr o kãm akapêr tâ kãm mêmoj nhõr kêt nê. Tã xã koja we ama nê amar xã hkôt ê mex jagjê nê apkur mex o ri pa? Nã kot ka mê ã kãm akapêr anê nê ho ajuta hkêt nê nhÿm arÿ kãm prãm nê ê hkêt nê omnuj nê ri pa. Na htem mê kapêr pix o mê ho mex kêt nê. Kot kaj mê ã kãm akapêr anê nê ãm kãm mêmoj tâ karõ kaprÿ.

¹⁷ Ja pyrã nê koja mêhõ ra amnhÿ kaxyw Jejus kôt hamaxpêr nê hkôt amnhÿ xãm ã amnhÿ jarênh tâ kapêr kôt ri amnhÿ nhÿpêx kêt japêr. Hã koja ãm kêp hkra hã amnhÿ jarênh kaprÿ.

¹⁸ Nê kot kaj mê atõ ã ajamaxpêr anê nê ajamaxpêr o:

—Nã Jejus kwÿjaja na htem ahpÿnhã tanhmã amnhÿ nhÿpêx to ho pa. Na hte mê hkwyjaja amnhÿ kaxyw Jejus kôt hamaxpêr tÿx pix o ri pa. Nê mê hkwyjaja tanhmã hkwyjê ho mex to ho ri pa. Á na htem ahpÿnhã tanhmã amnhÿ nhÿpêx anhÿr to ho pa. Anê.

Kwa mê ri ã ajamaxpêr anhÿr kêt nê. Mê hkwyjê ho mex o mê pa xwÿnhjaja na htem Tirtûm hkôt hamaxpêr pê mãânên hkôt amnhÿ nhÿpêx nê hkwyjê ho mex o pa. Kojã mêhõ amnhÿ kaxyw Jejus kôt hamaxpêr hã koja mãânên hkôt amnhÿ nhÿpêx pê tanhmã hkwyjê ho mex to ho pa. Na htem amnhÿ kaxyw hkôt hamaxpêr pix o pa hkêt nê. Na htem mãânên hkôt mê piitã mê ho mex o ri pa.

¹⁹ Na ka hte mê akwÿjaja ã ajamaxpêr anê nê ajamaxpêr o:

—Nã Tirtûmja pyxi mex o pyxi mex. Tã kot paj jam ijamaxpêr rãhã ho ri ixpa nê ra ixpê hkra hã ri ixpa. Nom kot paj kapêr kôt amnhÿ nhÿpêx o ri ixpa hkêt nê.

Anhÿr o ajamaxpêr nê ã ajamaxpêr anhÿr kaprÿ.

Nê ãm hãmri na ka htem Tirtûm pyxi mex o pyxi mex ã harê. Nom na htem jam hamaxpêr kôt pix mã kêp hkra hkêt nê. Mêkarõmnutijaja na htem haxwÿja Tirtûm pyxi mex o pyxi mex kôt hamaxpêr tâ mê kêp hkra hkêt. Na htem ã hamaxpêr anhÿr pê kãm uma ho pa.

²⁰ ã mê ajamaxpêr anhÿrja mex kêt. Kojã mêhõ amnhÿ kaxyw Tirtûm kôt hamaxpêr ã amnhÿ jarênh tâ hkôt amnhÿ nhÿpêx o pa hkêt japêr. Hãmri nê ãm amnhÿ kaxyw hkôt hamaxpêr ã amnhÿ jarênh hkapyr. E kot paj ixprÿ hã mê amã ja jarê ka mê inhma.

²¹ Mê panhÿgêt finat Apraãw na pre amnhÿ kaxyw Tirtûm mã hamaxpêr nê hkôt ri amnhÿ nhÿpêx mex o pa. Tã nhÿm amnhÿ tâ kamã hamak kaxyw hkra Ijak ã kuwÿ nhÿm kuma nê ra kot kãm hpÿr nê õr kaxyw nhÿm Tirtûm amnhÿ tâ omu nê amnhÿm mex ã harê. Hãmri nê kot hkra hpÿr nê kãm kapêr.

²² Ra kot amnhÿ kaxyw hkôt hamaxpêr nê hkôt amnhÿ xãm jakamã mãânên hkôt amnhÿ nhÿpêx nê ra kot kãm hkra nhõr kaxyw Tirtûm amnhÿ tâ omu nê amnhÿm mex ã harê. Na pre ã finat Apraãw Tirtûm kapêr kôt amnhÿ nhÿpêx mex anhÿr o pa. Jao amnhÿ kaxyw hkôt hamaxpêr mex ã amnhÿ to amnhÿrÿt.

²³ Nê kormã Apraãw wa hkra hkêt ri nhÿm Tirtûm wa kãm hkra jarê nhÿm kuma nê hkra hkukamã amnhÿ kaxyw Tirtûm kôt hamaxpêr tÿx o pa nhÿm amnhÿ tâ omu nê mex ã harê. Nê kêp hkrãmnhwÿ hã harê. Kapêr ã kagã htÿm kot ja jarênh kot:

Na pre Apraãw hkra hkukamã amnhÿ kaxyw Tirtûm kôt hamaxpêr tÿx nhÿm amnhÿ tâ omu nê amnhÿm mex ã harê. Anê.

²⁴ ã na pre finat Apraãwja hkra kaxyw Tirtûm kôt hamaxpêr anhÿrja o ra hkôt amnhÿ nhÿpêx nê ra kot kãm hpÿr kaxyw. Nom kop apu amnhÿ kaxyw hkôt hamaxpêr pix nê hkôt amnhÿ nhÿpêx kêt ronhÿx pre Tirtûm tee ri amnhÿ tâ omu nê amnhÿm mex ã harênh kêt nê. Na htem amnhÿ kaxyw Tirtûm mã hamaxpêr nê mãânên hkôt ri amnhÿ nhÿpêx mex o pa nhÿm amnhÿ tâ mê omu nê amnhÿm mê mex ã mê harê.

²⁵ Mêhõ ni kuprÿ finat Raapja na pre ã amnhÿ nhÿpêx anê nê amnhÿ kaxyw Tirtûm kôt hamaxpêr pê tanhmã hkôt amnhÿ nhÿpêx to ho pa. Na pre Ijaew myja wa hamêkkrut nê ma Raap nhõ krÿ hwÿr wa tẽ. Mê hã ukapi nê kot mê hkurê kaxãr kaxyw mê hwÿr wa tẽ. Hãmri nhÿm Raap Tirtûm kot wa mênh ã wa omunh kurê kumrêx nê põristi kot tanhmã wa ho pymaj amnhÿ nhõrkwÿ kamã mê kêp wa ho amûxu nê wa nê mê kãm tanhmã hêx to. Nê hpãnhã nhãm pry hõ hkôt akupÿm wa kumê nhÿm wa hkã hkinh pê ma akupÿm mex nê tẽ. Hãmri nhÿm Tirtûm wa hã Raap pumu nê amnhÿm mex ã harê.

²⁶ Tã kot kaj mê atõ amnhÿ kaxyw Tirtûm kôt ajamaxpêr ã amnhÿ jarênh tâ hkôt amnhÿ nhÿpêx kêt japêr. Hãmri nê apê hkra hã amnhÿ jarênh kaprÿ. Te ra mêhõ htyk nê nõr tâ nhÿm mê kot arÿ htÿr ã harênh kaprÿta pyrãk.

3

Mē kot Tirtūm kapēr o mē ahkre xwǎnhjē jarēnh

¹ Nē kwa Kris kôt ixkwǎjjaja. Mē axohtô nē mē amā Tirtūm kapēr o mē ahkre hprām tā kormā ja kaxyw mē apiitā mē amex kêt. Mē ixte Tirtūm kapēr o mē ajahkre xwǎnhjaja kot paj mē tanhmā amnhī tomnuj to japēr nhūm Tirtūm ja hā mē ixpumu nhūm ja kēp omnuj nē. Mē ixte kapēr o mē ajahkre ho mē ixpa kēnā kot pa hkêt mē ri tanhmā amnhī tomnuj to ho ri ixpa. Jakamā kot kaj mē Tirtūm kapēr piitā hkôt ri amnhī nhīpēx mex nē ri kormā ho akwǎjē jahkre ho ri apa.

² Nē mē pahpiitā na pu htem tōhā mē pajakwa ho tanhmā amnhī tomnuj to. Mēmoj tā axpēn kām pagryk nē tanhmā mē kām pakapēr punuj to. Nom koja mēhō tanhmā kapēr punuj toja nē amnhī to htǎx nē hāmri nē tām amnhī nhīpēx o pa.

Mē pajakwajarēnh

Epes 4.29

³ Na htem nhǎhǎm kawar o juk kaxyw hakwam kàx jagjē nē kām nhǎhǎm o htēm prām xā hkôt ma nhǎhǎm ho juk o tē. Kàxja hkryre nhūm kawar rūnh tā no nhūm kām ma nhǎhǎm ho mrar prām xā hkôt ho juk o mra.

⁴ Nē gō xujanār kām pār rūnhta rūnh tā na hte kōk àpēr tǎx nē ma nhǎhǎm o pa. Nē pī ho pār o juk xāta hkryre htā ma nhǎhǎm ho juk o mō. Nhǎhǎm pār o mrar xwǎnh kām o mōr prām xā hkôt o mō.

⁵ Ja pyrā nē mē pajakwaja hkryre htā na htem ho kapēr o tanhmā mē hipēx to ho pa. Tōhā ho kapēr mex nē nhūm mē kuma nē hkīnh nē. Nē tōhā ho kapēr punuj nē nhūm mē tee ri mē kapēr ā mē kuma nē hkaprī nē rǎy kapēr xwǎnhta kamā gryk nē. Mē pajakwa hkryreja te kot kuwy jakrax kryre pyrāk. Kot ka kuwy jakrax grīre ho tē nē nhǎyri pōti kamā amē nhūm kōk ho apē nhūm hpōk rax tokyx anē. Hāmri nē ma pā ho hkaxār par o mō nē ho hkaxār pa.

⁶ Mē pajakwaja mā kot anhǎy. Kot kaj atǎx ri tanhmā ho akapēr punuj to nhūm mē ama nē axpēn mā anhǎxi ho krī nhīpēx ka amex kêt nē apa. Rǎy ka atǎx ri ajakwa ho tanhmā akwǎjē ho akapēr to nhūm mē tee ri amnhī tā ama nē hkaprī nē rǎy akamā gryk nē. Satanasti nhǎ hā na htem ā mē hakwa ho kapēr punuj anē.

⁷ Na htem tōhā mēmo mry xoprē pynē nē tanhmā ho nē ra ho kām ma hkêt. Kagā rǎy hagrōre rǎy àati rǎy gōx kām mēmo mryja nhūm htem unē nē tanhmā ho nhūm kām ma hkêt nē mē hkôt pa ho pa. Nom na htem mry piitā ā hipēx anhǎy kêt nē.

⁸ Tā mē pajakwa te mē kot tee ri mēmo mry ho kām ma hkêt kaprǎy xwǎnhta pyrāk. Na pu htem amnhī krā hkôt pajakwa ho

pakapēr mex pix kêt nē. Tanhmā kot puj mē pakapēr punuj kêt kaxyw amnhī jakwa hto? Mē pakapēr punuj te kot kagā xoprē kot mē hkamnhar nē ō wenēn o mē hparta pyrāk.

⁹⁻¹⁰ Na pu htem tōhā pajakwa ho tām pakapēr nē tōhā pakapēr punuj nē. Nē tōhā Pahi Maati Tirtūm mā mex o mex ā harēnh tā ra axtem nē tanhmā mēhō japrǎy hto. Tirtūm kot mē pahto amnhī pyrā nē mē panhīpēx tā pu htem axtem nē tanhmā axpēn japrǎy hto ho ri papa. Jao te pahte Tirtūm japrǎy pyrāk. Kwa ixkwǎjjaja. Kēr pu mē pahpē Tirtūm krajaja ā pakapēr punuj anhǎy hkêt nē. Ām mē pajakwa ho mēmoj mex pix jarēnh o ri papa.

¹¹⁻¹² Xā koja pā kamā hinore pyxi htā kamā gō xānh nē mǎānēn kamā gō xenh nōkati? Nā koja anhǎy kêt nē. Na hte kamā gō mex pix nē rǎy kamā gō xenh nōkati pix nē.

Nē xā koja jāxō hpār ā rārāj harir? Rǎy ahkrō xō hā mǎnkwrǎytre harir? Nā na hte ahpǎnhā hpār ā harir. Ja pyrā nē kēr pu mē pahpē Tirtūm krajaja pajakwa ho pakapēr punuj pē ho papikamǎy tǎx nē. Nē te hinore kamā gō mex pixta pyrā nē ēmoj mex pix jarēnh o ri papa. No mē pajakwa nhǎkēj ho tām pakapēr nē hikjē ho pakapēr punuj kêt nē. Ām pakapēr mex pix o pakapēr o ri papa. Kwa kēr pu mē ā amnhī nhīpēx anhǎy rāhā ho papa.

Tirtūm kôt mē àhpumunh xwǎnhjē jarēnh

Wam Korīt 2.6-16

¹³ Nē kwa mē axàhpumunh tǎx xwǎnhjaja kēr ka mē amnhī to mex o ri apa. Nē mē piitā tām mē hipēx mex nē mē amā axpēn japē hā axpēn to ajuta mex o ri apa. Tirtūm kapēr xā hkôt. Kot kaj mē ā amnhī nhīpēx anē nē axàhpumunh mex ā amnhī to amnhǎit.

¹⁴ Nom kot ka mē mēmoj tā axpēn kamā agryk o ri apa. Rǎy amnhī pix kukamā ajamaxpēr o ri apa hāmri nē ām ate Tirtūm kapēr kôt amnhī nhīpēx ā amnhī jarēnh kaprǎy.

¹⁵ Ā mē kot amnhī nhīpēx anhǎy xwǎnhjaja na htem Tirtūm kôt amnhī nhīpēx kêt nē. Mē kēp Tirtūm kra hkêt xwǎnh pixjaja na htem ā amnhī nhīpēx anhǎy o pa. Jao mēkarōmnuti kot amnhī nhīpēx kôt pix mā amnhī nhīpēx o pa.

¹⁶ Axpēn kamā mē gryk o mē pa xwǎnhjaja na htem amnhī pix kukamā hamaxpēr jao tanhmā amnhī tomnuj to ho pa. Nē amnhī tā mē kamā mē gryk xwǎnhjē homnuj o pa. Tā ā mē pahte amnhī nhīpēx anhǎy pumaj kwa kēr pu mē mēmoj tā axpēn kamā pagryk o ri papa hkêt nē.

¹⁷ Mē kot Tirtūm kôt amnhī nhīpēx xwǎnhjaja na htem jajē rom tām axpēn nhīpēx rāhā o pa.

Nē axpēn kamā ukapri pix o ri axpēn kōt pa.
 Nē tām hamaxpēr o pa.
 Nē mē piitā mē hipēx o axpēn pyrāk.
 Nē axpēn tā hpjiaam o ri pa.
 Nē tanhmā ri axpēn no kupyr to hkēt nē.
 Nē ri oprē ho pa hkēt nē.
 Nē mē axpēn kamā ōkre kahak kēt nē.
 Nē mē piitā mē ho mex o axpēn pyrāk.
 Nē tām mē piitā mē hipēx rāhā nē.

Ā na htem Tirtūm kōt mē kot amnhī nhīpēx xwŷnhjaja amnhī nhīpēx anhŷr o pa.

¹⁸ Kot puj mē ā amnhī nhīpēx anē nē pajamakētcati nē paxāmnhix pahkīnh nē ri papa. Nhūm nhŷri mēhō wa axpēn kām gryk pu mē wa omu rŷ wa harēnh ma hāmri nē mē pahtō ma wa hwŷr tē nē wa kām pakapēr nē tām akupŷm wa ām. Hāmri nhūm wa ra mē pahpyrā nē tām amnhī nhīpēx pé hamakētcati nē wa ri pa. āmnhix ri hkīnh nē wa ri pa.

4

Mē kot amnhī pix kukamā mē hamaxpēr xwŷnhjē jarēnh

Matēwre 20.20-28; Juāw 16.24

¹ Nē kwa mon ka hte mē akwŷjaja axpēn mā akapēr mā agēt o axpēn kām agryk pix o apa? Na ka htem ā amnhī nhīpēx anhŷr o amnhī pix kukamā ajamaxpēr. Nē mē amā amnhī jamaxpēr kōt pix mā ri amnhī nhīpēx prām. No Tirtūm kām hprām xā hkōt amnhī nhīpēx prām kēt nē.

² Na ka htem nhŷri mēmoj pumu nē tee ri ho amā anhō hprām kaprŷ. Nē amā ho anhō hprām xāj ō xwŷnhhta pīr nē kēp utār mā.

Nē na ka htem tanhmā axpēn kukrēx kute hā omu nē amā ho anhō hprām nē hā ō xwŷnhhta mē wa axpu. No mē amā hprām xwŷnhhta mē ate hō hā Tirtūm wŷr ronhŷx ra mē ama nē mē amā hō gō. Tā mē ate hā axāhwŷr kēt jakamā nhūm mē amā ōr kēt nē.

³ Rŷ ka mē tōhā mēmoj tā awŷ nhūm kot mē amar tā mē amā ōr kēt nē. Kot mē amā ōr nhūm mē ate ho anhōxŷ ho apa pymaj na hte tōhā mē amā mē ate hā axāhwŷr xwŷnhhta nhōr kēt nē.

⁴ Kormā mē ate hkōt amnhī nhīpēx mex kēt. Te mēni hō ra mjēn tā nhām kot mēhō my ho amnhīkati pyrāk o na ka htem amnhī nhīpēx o apa. Jao mē amā mē apē Tirtūm kra hprām tā axtem nē mē kām hprām kēt xwŷnhjē hkōt amnhī nhīpēx o ri apa nē mē urāk nē tanhmā amnhī tomnuj to ho ri apa. Nē mē ate amnhī tomnuj gryk ā mē amā Tirtūm prām kēt ā amnhī to amnhīrīt.

⁵ Tirtūm kapēr ā kagā htūm kot tanhmā Karō jarēnh to nē harēnh kot:

Na pre Tirtūm mē pahwŷr amnhī Karō rē nhūm mē pahwŷr wrŷ nē mē pakamā agjē nē mē pahkōt pa ho pa. Mē pahte

hkōt pix mā amnhī nhīpēx o papaja na kām hprām. Anē.

Ām hāmri ā harēnh kot anhŷr jakamā kwa kēr ka mē harēnh ma nē kām ajamaxpēr tŷx rāhā ho ri apa.

⁶ Na hte Tirtūm mēmoj to mē pakutā no-jarēt rāhā pu mē ŷ hā tām amnhī nhīpēx o ri papa. Kapēr ā kagā kot ja jarēnh kot:

Mē kām Tirtūm kōt amnhī nhīpēx prām kēt xwŷnhjaja na hte Tirtūm amnhī tā mē omu nē mē kutā amnhī xunhwŷ.

No mē kām hkōt ri amnhī nhīpēx prām xwŷnhjaja na hte amnhī tā mē omu nē mē ho mex o pa nhūm htem hihtŷx xā nhŷ hā mē kām hprām kēt xwŷnhjē hkōt ri amnhī nhīpēx kēt nē. Anē.

⁷ Jakamā kwa kēr ka mē Tirtūm kapēr kōt pix mā mān ri amnhī nhīpēx o ri apa. Kēr kē Satanasti tanhmā mē ate amnhī tomnuj to hprām xāj tanhmā mē ato ka mē Tirtūm Karō nhŷ hā ām ama nē hkōt amnhī nhīpēx kēt nē. Nhūm tee ri amā āhkrox kaprŷ nē akaga nē ma tē.

⁸ Nē kot kaj mē Tirtūm kapēr kōt pix mā ri amnhī nhīpēx o apa nhūm amnhī tā mē apumu nē te kot mē apa hā mē ajamŷnh nē mē ato pa pyrāk o mē anhīpēx. Jao mē ato mex o ri mē akōt pa ho pa. Nē mē atānopxar rāhā ka mē ajamakētcati nē akīnh nē ri apa.

Nē kēr ka mē tanhmā amnhī tomnuj to hāmri nē tee ri ja hā amnhī pumu nē hkaga kurē kumrēx nē axte ā amnhī nhīpēx anhŷr kēt nē. Rŷ ka mē tanhmā ajamaxpēr punuj to hāmri nē ja hā amnhī pumu nē hkaga nē hpānhā tām ajamaxpēr pix o ri apa. Mē apē Tirtūm kra hā kēr ka mē ām hkōt pix mā ri tām amnhī nhīpēx o ri apa.

Mē pahte amnhī tomnuj ā tanhmā amnhī nhīpēx to hā mē pamā karō

Wam Juāw 1.5-10

⁹ Nē kēr ka mē tee ri ate tanhmā amnhī tomnuj to hā amnhī pumu nē akapri xāj mur nē akīnh kēt nē. Nē akapri xāj amŷr rax nē.

¹⁰ Hāmri nē Tirtūm mā amnhī jarēnh o: —Pa Tirtūm. Na pa ā amnhī tomnuj anē. Nom kot paj axte hkēt nē. Ām inhmā akapēr kōt pix mā ri amnhī nhīpēx prām.

Anhŷr o kām akapēr kē mē ama nē mē ate amnhī tomnujta ā tanhmā mē ato hkēt nē. Ām mē ato mex nē ka mē akupŷm ajamakētcati nē axāmnhix akīnh nē ri apa.

Mē pahte axpēn to pakapēr nē mē pahkurē

Matēwre 7.1-5; Rōmān 2.1-3, 14.10-13; Wam Korīt 4.5

¹¹ E ixkwŷjaja. Kwa kēr ka mē anhō kot tanhmā amnhī tomnuj to hā omu nē tanhmā ho akapēr punuj to hkēt nē. Tirtūm kapēr ā kagā htūm kot ja nē mē pahkurē

kamā hihtỳx jakamā kot ka mẽ ri ā amnhĩ nhĩpèx anè nê te ate Tirtùm kapèr tùm kwỳ omnuj ā harènh pyrāk. Rỳ te axàhpumunh tỳx o ate Tirtùm jakrenh ā amnhĩ to jarkrar pyrāk. Jao kapèr kòt amnhĩ nhĩpèx kèt nê. Na htem Tirtùm kapèr ā kaga htùm kwỳ mex ā harè nê hkwy omnuj ā harènh kèt nê. Piitā mex kènā.

¹² Nê Tirtùmja tapxipix na kèp mẽ pahto amnhĩptār xwỳnh maati. Nê tapxipix na hte mẽ pahte tanhmā amnhĩ nhĩpèx to hā mẽ pahpumunh hkòt tanhmā mẽ pajarènh to. Mẽ pahte amnhĩ to mex xwỳnh ā mẽ pajarè rỳ mẽ pahte amnhĩ tomnuj xwỳnh ā mẽ pajarè. Ām tapxipix kot ā mẽ pajarènh kot anhyr xwỳnh. Tā ka mẽ axtem nê kapèr kwỳm ri tanhmā akwỳjè ho akapèr punuj to ho ri apa.

Mẽ pahte Tirtùm mã pajamaxpèr pè kām amnhĩ jarènh ā mẽ pamā karò
Rukre 12.13-21

¹³ E kwa mẽ inhma ixkwỳjaja. Na ka hte mẽ akwỳjaja tanhmā amnhĩ kukamā ajamaxpèr to nê akwỳjè mã amnhĩ jarènh o:

–Koja apkati pa ma krĩ hō hwỳr mō nê kamā mẽ kām ixápènh o ixa hā ixtā amgrā pyxi nê hpànā kàxpore jamỳnh rax nê man akupỳn mō.

Anhyr o amnhĩ jarè.

¹⁴ Kwa mẽ ā amnhĩ kukamā amnhĩ jarènh anhyr kèt nê. Mẽ pahtō mẽ pahte amnhĩ kukamā paxàhpumunh mex? Amrakati kènā. Kot ka mẽ ā amnhĩ kukamā amnhĩ jarènh anhyr tā kormā ā amnhĩ nhĩpèx anhyr kèt ri tanhmā amnhĩ to nê ty. Rỳ tanhmā amnhĩ to nê axā hāmri nê nhỹhým amòr kèt nê. Te mẽ pahpè namè pyrāk na pu htem ri papa nê tanhmā amnhĩ to nê ty nê pajapèx tokyx anè.

¹⁵ Jakamā mẽ ā amnhĩ kukamā amnhĩ jarènh anhyr kèt nê. Kèt amnhĩ jarènh o:

–Koja Tirtùm kām ja prām koja apkati pa ā amnhĩ nhĩpèx anè nê ā amnhĩ nhĩpèx anè.

Anhyr o Tirtùm kamnār o tanhmā amnhĩ kukamā amnhĩ jarènh to.

¹⁶ No mẽ ate amnhĩ krā hkòt amnhĩ kukamā amnhĩ jarènh ta Tirtùm jamaxpèr xā hkòt kèt. Ām amnhĩ krā hkòt mẽ ate amnhĩ kukamā amnhĩ jarènh kènā. Ā mẽ ate amnhĩ jarènh anhyrja mex kèt.

¹⁷ Nê mẽ kot tām amnhĩ nhĩpèxja kot kaj mẽ ate mar mex tā hkòt amnhĩ nhĩpèx kèt japèr hāmri nê amnhĩ tomnuj o apa.

5

Mẽ hikàxpore rùnh xwỳnhjè jarènh
Rukre 12.13-21; Wam Ximotre 6.9-10;
Apokarip 18.14

¹ Nê kwa mẽ akàxpore rùnh xwỳnhjaja. Mẽ inhma nê inhmar tỳx nê. Nhỹrmā mẽ amex kèt jakamā kwa mẽ tee ri amnhĩ kukamā

ajamaxpèr o ra akapri nê amyr o apa kurè kumrèx.

² Tirtùm noo mã mẽ akàxpore te ra mẽ apè hapèx par pyrāk. Te ra mẽ anhy kamā mẽ ate amnhĩ tomnuj xwỳnh ā kutā akrĩ pyrāk.

³ Mẽ ate mẽ akukrèx nê mẽ akàxpore ho apikuprònh rùnh tā ka htem mẽ akwỳjè pè ho anhòxy ho ri apa. Mýrapè koja nhỹrmā tanhmā mẽ apè amnhĩ to nê omnu pa ka mẽ ho apikuprònh rax kaprỳ. Hāmri nê mẽ ate amnhĩ tomnuj mýrapè Tirtùm mẽ Kra wa kuri atir tùm nê apa ho apa hkèt nê. Ām kuwy kamā mẽ amnhĩ xā htỳx kamā ajamak rāhā ho ri apa.

⁴ Na ka htem apur kām mẽ àpènh xwỳnhjè mã amnhĩrer kèt nê. Nhùm mẽ tee ri amnhĩ tā mẽ ajamā hāmri nê mẽ atā amnhĩ to Pahi Maati Tirtùm xihtỳx xwỳnh ta wýr o pa nhùm mẽ atā mẽ kuma.

⁵ Mẽ akĩnhā mẽ kèp amrakati htā ka htem ām ja hā mẽ omu nê mẽ àpènh pānhā mẽ kām amnhĩrer kèt nê amnhĩ pix kukamā ajamaxpèr. Nê amā prām xā hpix kukamā amnhĩm mẽmoj japròr pè akĩnh o ri apa. Jao te mẽ apè mōx htwỳm nhùm mẽ kot hpir nê hkrèr mã mex ā harènh xwỳnh ta pyrāk. Mýrapè kot kaj mẽ mōxta pyrā nê nhỹrmā ty hāmri nê Tirtùm mẽ Kra wa kuri atir tùm nê apa ho apa hkèt nê.

⁶ Nom ja pix kèt. Na ka htem mẽ anhò krĩ kamā mẽ anhò pahi mẽ tanhmā akwỳjè ho axèx to ho ri apa. Mẽ kot tanhmā atomnuj to hkèt tā ka mẽ kām mẽ ho axèx rùnh nê. Tā koja nhỹrmā Tirtùm mẽ hā tanhmā mẽ ato rax kumrèx ka mẽ rĩ amnhĩ pumu.

Mẽ pahte Jejus kutèp amnhĩ kaxyw kām pajamaxpèr o papa hā mẽ pamā karò
Sikùn Pètre 3.1-13

⁷ E ixkwỳjaja. Kojā mẽhō tanhmā mẽ atomnuj to htā ka mẽ arĩ amnhĩ kaxyw Jejus mã ajamaxpèr rāhā ho ri apa. Pè akupỳn hpòx xā hā arĩgro jamār rāhā nê. Te pur nhò dòn kot amnhĩ nhĩpèx pyrāk. Kojā hpur kām ahkre nê ahkre hpa hāmri nê arĩ hamār o pa nê kām nojarèt kèt nê hā na wryk jamār o pa. Jao hamakètkati nê ò jamār rāhā ho pa.

⁸ Tā kèr ka mẽ uràk nê arĩ Pahihti akupỳn hpòx xā hā arĩgro jamār rāhā ho ri apa. Kojā tokyx akupỳn mẽ pahwỳr wry. Jakamā kèr ka mẽ kutèp mẽ kot mẽ atomnuj xwỳnhjè kutā amnhĩ to htỳx nê ri apa. Nom tee ri amnhĩ kukamā ajamaxpèr o Jejus kaga hkèt nê. Arĩ hamār pè akĩnh nê ajamakètkati nê ri apa. Kojā akupỳn mẽ pahwỳr wry nê mẽ pahto mex rax kumrèx.

⁹ Nê kèr ka mẽ axpèn to akapèr o ri apa hkèt nê. Kot ka mẽ ā amnhĩ nhĩpèx anè nhùm Tirtùm mẽ ama nê tanhmā mẽ ajarènh to. Kot mẽ pahpumunh xā hkòt tanhmā mẽ pajarènh to xwỳnh na. Tā ra tanhmā kot

mē pahpiitā mē pajarēnh to xā hā arīgroja ra ahtēp o mō.

¹⁰ E ixkwýjaja. Kēr ka mē wam mē kot Tirtūm nhý hā kapēr jarēnh xwýnhjaja kot amnhī nhīpēx mā ajamaxpēr rāhā nē. Na prem Tirtūm nhý hā mē kām kapēr o ri mē hkōt pa nhūm mē hkwýjaja ja hā tanhmā mē hipēx to nhūm mē amnhī xā htýx kamā hamak rāhā ho pa. Tā tee ri amnhī kukamā hamaxpēr pé Tirtūm kaga hkēt nē. Na prem arī ý hā kapēr jarēnh rāhā ho ri mē hkōt pa. Tā kēr ka mē kot amnhī nhīpēx pyrāk o amnhī nhīpēx nē Tirtūm kaga hkēt nē.

¹¹ Na prem amnhī xā htýx kamā hamak o pa rāhā ty hāmri nē Tirtūm kuri mex nē hkīnh nē pa ho pa. Ra mē ate finat Johti jarēnh mar mex. Na pre omnuj týx nē pa htā amnhī tā Pahi Maati Tirtūm kamā gryk nē hkaga hkēt nē. Hāmri nhūm amnhī tā omu nē gaa nē ho mex rax nē nhūm akupým mex kumrēx nē. Pahi Maati ja ukapri ho ukapri nē mex o mex jakamā na pre ā Johti ho mex anē. Tā koja ho mexta pyrā nē ā mē pahto mex anē.

Mē pahte tanhmā amnhī nhīpēx to hā mē pamā karō

Matēwre 5.33-37, 18.15; Rōmān 12.15; Karatas 6.1-2; Jutre 22-23

¹² E ixkwýjaja. Pa mē amā mēmoj jarē ka mē inhma nē inhmar týx nē. Kēr ka mē mēmoj tā amnhī jarēnh kaxyw hāmri nē akatāt kōt amnhī jarēnh kurē kumrēx. Nē amnhī jarēnh o: “Nā kot paj ja ho anē.” Anē. Rý amnhī jarēnh o: “Nā kwarī pa ja ho anhýr kēt nē.” Anhýr o amnhī jarēnh kurē kumrēx. Kē mē akwýjaja ām hāmri mē ate amnhī jarēnh ā mē apumunh kurē kumrēx nē axēx ā mē akamnhīx kēt nē. Mē apē Tirtūm kra kēnā kot ka kēt mē ri axtem nē amnhī jarēnh o axēx.

¹³ Nē koja mē anhīō mēmoj tā tanhmā amnhī to nē omnuj nē. Ka mē ja hā omu nē kām anē kē amnhī kaxyw Tirtūm mā hamaxpēr pé amnhī to hwýr rāhā ho pa. Rý koja hkīnh nē ri pa ka mē ja hā omu nē kām anē kē hkīnh kām mex o mex ā grer o pa.

¹⁴ Rý koja ā nē nō ka mē ja hā omu nē kām anē kē amnhī wýr pastō nhý hā mē kapēr xwýnh kwýjē hā karō. Kē mē hwýr mra nē Jejus nhý hā mēmo twým kwý ho hukō nē ho Tirtūm wý.

¹⁵ Kē mē ā mē ā xwýnhjē hwýr mra nē mē ho Tirtūm wýr o pa anē. Koja mē ho kuwý nhūm mē kuma nē akupým mē ho mex. Nhūm mē tanhmā amnhī tomnuj to japēr kē mē ja hā amnhī jarē kē Tirtūm mē kuma nē ja hā tanhmā mē ho hkēt nē.

¹⁶ Jakamā kēr ka mē atō tanhmā amnhī tomnuj to nē tee ri ja hā amnhī pumu hāmri nē tokyx akwýjē mā amnhī jarē kē mē tokyx ato Tirtūm wý. Kē atā mē kuma nē tanhmā

akrā hto ka axte ā amnhī nhīpēx anhýr kēt nē. Nē ra amex nē apa.

Nē koja mēhō Tirtūm kōt pix mā amnhī nhīpēx mex rāhā ho pa. Hāmri nē mēmoj tā kuwý nhūm kuma nē kām tanhmā mēmoj to.

¹⁷ Te finat Eris kot mēmoj tā hwýr nhūm kot mar nē kām ho anhýrta pyrāk. Erisja kēp mē panhīō na pre. Tā na pre hkwýjaja amnhī tomnuj pix o pa nhūm tee ri mē omu nē mē hā na wrýk kēt kaxyw ho Tirtūm wýr kām hihtýx nē. Hāmri nhūm kuma nē kām ho anē nhūm na wrýk kēt ry rax kumrēx. Hā amgrā axkrunēpxi nē hkōt mytwry kēp 6. Mē kot amnhī tomnuj týx o paja mýrapē.

¹⁸ Tā nhūm Eris axte mē ho kuwý nhūm axte mē hwýr na rē nhūm akupým katāt kōt wrýk mex nē. Nhūm akupým mē hpur kām mē ōja mē kām mex nē akupým mē kām ō rūnh nē. Tā ā Tirtūm kot Eris mar nē kām mēmoj nhīpēx anhýrja pyrā nē koja mē pama nē mē pamā mēmoj tanhmā ho.

¹⁹ Nē e mē inhma ixkwýjaja. Koja mēhō Tirtūm kapēr mar týx nē te kēp hkra pyrāk o amnhī nhīpēx. Tā tanhmā hamaxpēr to nē kapēr kaga nē htýx ri amnhī tomnuj pix o pa. Ka mē ja hā omu nē hwýr mra nē kot amnhī tomnuj nē kām akapēr kām axihtýx kē tokyx hkaga nē akupým Tirtūm kōt amnhī xām týx nē ām hkōt pix mā amnhī nhīpēx.

²⁰ Koja amnhī tā mē ama nē Tirtūm kōt amnhī xām týx nhūm amnhī tā omu nē kot tanhmā amnhī tomnuj tota ho hamakētcati nē amnhī katut kōt kurē nhūm nhýrmā kuri htír tūm nē mex nē pa ho pa. Koja amnhī tomnuj týx o pa htā hkaga hpa nhūm Tirtūm ja hā omu nē hā tanhmā ho hkēt nē axte tanhmā kot amnhī tomnuj tota mā hamaxpēr kēt nē.

Tā ām ja pix. Ixpē Xiakre na pa ā mē awýr kaga nhīpēx nē mēnh anē.

Wam Pêtre Simāw Pêtre kot Jejus kôt hkwyjê hwyr kagã nê mênh

Simāw Pêtre na pre kagãja nhîpêx. Kêp tep pynênh o pa xwýnh tâ hpãnhã kêp Jejus nhý hã hkrajê jahkre ho pa xwýnh. Nê krî pê Jerujarê kamã kêp Jejus krajê nhô pastô. Na pre krî piitã hkôt Jejus ã mê kãm mê hkurê xwýnhjaja tanhmã hã mê hipêx to nhûm Pêtre mê harênh ma nê mê hamaxpêr o hihtýx kaxyw mê kãm kagãja nhîpêx nê krî piitã hkôt mê hwyr kurê. Mê kot kamã harênh nê mar nê amnhî kamã kahak kêt nê arî Tirtûm kôt amnhî nhîpêx mex o pa kaxyw. Nê Jejus ã mê kot amnhî xã htýx kamã hamak tâ nhýrmã kaxkwa kamã mex nê pa ho pa hã mê kãm awjarê. Æ mê kãm mêmôj jarê nê hã kagã anê. Nê mê kãm:

¹ Pa mê ate Jejus kôt amnhî xunhwýr nhûm Tirtûm kot mê ato hkra xwýnhjaja. Xã mê amex? Ot pa mê awýr kagã nhîpêx nê kumê. Ixpê Simāw Pêtre na pa. Ixte Jejus nhý hã hkrajê jahkre ho mê ixpa xwýnhjê hõ na pa mê awýr kagã nê kumê.

Na xep pre Kris ã mê kãm mê pahkurê xwýnhjaja tanhmã mê anhîpêx to ka mê panhõ pika rûm mê umaj anhgrã nê ma ahpýnhã krî hkôt ri apa.

Jao mê akwýjaja ma pika pê Põt kamã krî hkwyjê hkôt apa.

Nê mê akwýjaja pika pê Karatas wýr apa.

Nê mê akwýjaja pika pê Kapatos wýr apa.

Nê mê akwýjaja pika pê As wýr apa.

Nê mê akwýjaja Pitûn wýr apa.

Æ ahpýnhã pika hkôt mê apigrãnh par anê. Tã ot pa mê awýr kagã nhîpêx nê mê apiitã mê awýr kurê. Mê apýnh nê mê ate kamã harênh nê ixkapêr mar kaxyw.

² Na pre Mêpahpãm Tirtûmja amnhîm mê pahte amnhî kaxyw kãm pajamaxpêr xwýnhjê rê nê mê pahã amnhî jarênh o:

–Kot paj jajê ho ixkra. Na pre ra Ixkra Jejus Kris ixpê mê nê ty nê htyk o hkamrô akxapi nhûm mê harênh ma nê hkôt amnhî xunhwý. Tã nhûm Ixkarô mê hkarô mã agjê nhûm mê ra inhã hprãm xã kôt pix mã ri inhã tanhmã amnhî nhîpêx to ho pa.

Anhýr o mê pahã amnhî jarênh. Tã kê mê akutã nojarêr rãhã ho ri mê akôt pa ka mê ý hã axãmnhîx ajamakêtkati nê akînh nê ri apa.

Mê pahte amnhî kukamã pajamaxpêr pê pahkînh o papa hã mê pamã karô

Rukre 12.32-34; Rômã 8.18-25; Sikûn Korût 4.16-18

³ Nê na pre mê panhõ Pahiiti Jejus Krisja ty nhûm Hipêêxã Tirtûm akupým ho htîr. Tã kot mê pakutã nojarêr rãhã ho pa jakamã

na pre mê pahpê hkrajê mã mê pajamaxpêr nyw jagjê pu mê ý hã pahte amnhî nhîpêx nyw o amnhî nhîpêx o papa. Hãmri nê Jejus akupým htîrja mã pajamaxpêr nê amnhî kukamã pajamaxpêr o:

–Kot paj nhýrmã ty nhûm Tirtûm kot Jejus nhîpêx pyrã nê akupým ixto ixtîr pa wa kuri ixtîr tûm nê inhmex kumrêx rãhã ixpa ho ixpa. Nã koja ã inhîpêx anê.

Anhýr o pajamaxpêr jakamã kwa kêr pu mê Tirtûm mã mex o mex ã mãn harênh rãhã ho pa.

⁴ Na ra mê pakutêp ô krî kamã mêmôj piitã ho mex nê. Ô krî kamã mêmôj kot omnu nê hapêx kêt jakamã na pu htem amnhî tâ hamãr rãhã ho papa.

⁵ Nê mê kot Kris ã mê atomnuj mýrapê na ka mê amnhî xã htýx kamã ajamak o ri apa nom arî amnhî kaxyw Tirtûm mã ajamaxpêr rãhã ho ri apa. Hihtýx o hihtýx jakamã koja mê pahkôt pa ho pa nê mê pamã pajamaxpêr o hihtýx rãhã nhûm nhýrmã Jejus akupým mê pahwýr wrý. Hãmri pu mê hkôt ri amnhî nhîpêx mex rãhã ho ri papa. Ra Tirtûm kot mê pakukamã mê pajarênh xã hkôt.

⁶ Jar mê pahte arî amnhî xã htýx kãm pajamak o papa htã na pu htem Tirtûm nhýrmã kot mê pahã mexta kukamã pajamaxpêr hãmri nê tee ri amnhî kukamã pajamaxpêr kêt nê. Mê pahpê mê pahpunuj tûm nê ri papa ho papa mã xwýnh kêt.

⁷ Na hte Tirtûm mê panhîpêx o te mê kot ôr nhîpêx pyrãk. Na htem hprî hã tanhmã ôr kute hã omu. Kêp ôr kumrêx ã omu rý mêmôj mê ho pihkãr ã omunh kaxyw kuwy kamã kurê. Nhûm piitã ôr nê pigãnh pa japêr nhûm mê omu nê harênh o:

–Nã ãm hãmri. Kêp ôr kumrêx nê mêmôj mê ho pihkãr kêt. Anê.

Na hte Tirtûm ã mê panhîpêx anê. Jakamã mê pahpê Jejus kôt amnhî nhîpêx o mê papa xwýnhjaja mê pahte tõhã tanhmã pahpunuj to htã no nhûm mê panê ja rênh kêt nê. Na hte amnhî tâ mê pahpumu nê hamaxpêr o:

–Kot paj kormã ja hã mê hamã nê tokyx akupým mê ho mex kêt nê. Koja mê omnuj nê pa htã tee ri amnhî kukamã hamaxpêr nê ixkaga hkêt nê arî amnhî kaxyw ixkôt hamaxpêr rãhã ho pa. Hãmri nhûm mê hkwyjaja ja hã mê omu nê mê kêp ixkra hã mê omunh kurê kumrêx. Te mê kot hprî hã ôr pumunh nê kêp ôr kumrêx ã omunhta pyrãk. Anê.

Jakamã kêr pu mê arî amnhî kaxyw hkôt pajamaxpêr rãhã ho papa. Mêmô mýrapê mê pahpunuj nê ri papa htã arî hkôt pajamaxpêr rãhã nhûm Jejus nhýrmã akupýn mê pahwýr wrý. Hãmri nhûm Tirtûm mê pahpumu nê mê pamã:

–Nã ãm hãmri na ka prem amnhî kaxyw ixpix mã ajamaxpêr rãhã ho ri apa. Mê

kot ixtã tanhmã mẽ atomnuj to nhũm mẽ ate amnhĩ xã htỳx kamã ajamak o apa htã aa ixkaga hkêt nẽ arĩ amnhĩ kaxyw inhmã ajamaxpẽr rãhã ho ri apa. Nã ãm hãmri mẽ ate amnhĩ to mex kumrẽx xwỳnh na ka mẽ. Kot paj mẽ piitã mẽ kãm ja hã mẽ ajarẽ.

Anhỳr o mẽ pamã kapẽr.

Nẽ ôr o mẽ hikukrẽxja mex tã koja arĩ mex rãhã hkêt nẽ. Koja mẽhõ kãm tanhmã homnu hto hprãm nẽ homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpẽr rãhã ho papa hãmri nẽ ôrta pyrà nẽ pajapẽx kêt nẽ. Kurom mẽ pamex tũm nẽ aa pajapẽx kêt nẽ papa ho papa.

⁸⁻⁹ Nẽ Jesusja aa mẽ ate ano ho omunh kêt tã na ka htem kãm mẽ ajapẽ htỳx nẽ kot mẽ panẽ tanhmã amnhĩ nhĩpẽx to hã harẽnh ma nẽ mẽ amã hkĩnh nẽ. Nẽ amnhĩ kaxyw hkõt ajamaxpẽr mex rãhã ho ri apa. Jakamã na pre Tĩrtũm ja hã mẽ apumu nẽ mẽ ato hkra nẽ mẽ apẽ ô krĩ kamã wa kuri amex nẽ apa mã xwỳnh ã mẽ ajarẽ. Ja kaxyw na pu prem amnhĩ kaxyw hkõt pajamaxpẽr rãhã jao pahkĩnh nẽ ri papa. Nẽ tee ri tanhmã amnhĩ kĩnh tỳx ã amnhĩ jarẽnh to hkukamã pajamaxpẽr. Kormã aa ã mẽ pahkĩnh anhỳr kêt tã mẽ pahkĩnh tỳx nẽ ri papa.

¹⁰ Nẽ Tĩrtũm kot mẽ pahto mex pẽ mẽ panẽ mẽ pahte amnhĩ tomnuj rẽnh par nhũm kuri mẽ pahũr tũm nẽ mẽ papa hã mẽ pajarẽnhja. Amnepẽ mã Tĩrtũm nhỹ hã kapẽr jarẽnh o ri mẽ pa xwỳnhjaja na pre mẽ pakukamã ã mẽ pajarẽnh anhỳrja ma nẽ tee ri hamaxpẽr nẽ tee ri hã axpẽn kukjẽr o ri axpẽn kõt pa. Nom hprĩ hã mar mex kêt nẽ. Tã arĩ ri mẽ pakukamã hkwỳjẽ mã ja hã mẽ pajarẽnh o ri pa.

¹¹ Na pre Tĩrtũm Karõja Kris tyk kukamã mẽ kãm ã mẽ pajarẽnh anhỳr o amnhĩrit. Kormã Kris kaxkwa kamã pa ri. Kormã wrỳk nẽ katorxã nhõxãhkre rũm kator kêt ri nhũm pre hkukamã mẽ kãm tanhmã ho amnhĩrit to. Mẽ kot hprĩ nhũm kot amnhĩ xã htỳx kãm hamak kãm mẽ panẽ htykja ã hkukamã mẽ kãm harẽnh o amnhĩrit. Nhũm Tĩrtũm kot akupỳm ho htĩr nẽ kãm mex o mex ã harẽnhja nhũm hkukamã mẽ kãm harẽnh o amnhĩrit. No ãm hprĩ hã mẽ kãm mẽhõ nhĩxi hkõt harẽnh kêt jakamã nhũm prem harẽnh ma nẽ tee ri hkukamã ri hamaxpẽr nẽ tee ri hã axpẽn kukjẽr o ri axpẽn kõt pa. Nẽ hã axpẽn kukjẽr o:

–Kwa mẽhõ koja we ã amnhĩ nhĩpẽx anẽ? Xã koja tokyx ã amnhĩ nhĩpẽx anẽ nã kormã?

Anhỳr o hã axpẽn kukjẽr o ri pa.

¹² Hãmri nhũm Tĩrtũm axte mẽ kãm Jesus jarẽnh kwỳ ho amnhĩrit nẽ mẽ kãm:

–Nã mẽ anoo mã koja ã amnhĩ nhĩpẽx anhỳr hkêt nẽ. Mẽ amỳr pẽ mẽ akanrẽhã mẽ

akra nẽ mẽ atãmnhwỳjẽ noo mã koja kato nẽ mẽ hkõt ã amnhĩ nhĩpẽx anhỳr o pa. Anẽ.

Mẽ papamjaja mẽ panoo mã kator nẽ ã kot amnhĩ nhĩpẽx anhỳr o paja o ã mẽ kãm ho amnhĩrit anẽ.

Amnepẽm Tĩrtũm nhỹ hã kapẽr o ri mẽ pa xwỳnhjaja nẽ jarãhã mẽ ixte Jesus nhỹ hã mẽ ahkre ho ri ixpa xwỳnhjaja mẽ ixkapẽr ãm pixii. Na pa htem wantajẽ pyrà nẽ Tĩrtũm Karõ nhỹ hã ãhpumunh tỳx xã ho mẽ amã tanhmã Jesus jarẽnh to ho ri mẽ akõt ixpa. Nhũm hte Tĩrtũm kapẽr o mẽ wrỳk xwỳnhjaja mẽ ixkapẽr ma nẽ tee ri hamaxpẽr o mẽ pahpyrà nẽ kãm hprĩ hã harẽnh mar par prãm nẽ.

Mẽ pahte Tĩrtũm pyrà nẽ tãm amnhĩ nhĩpẽx ã mẽ pamã karõ

Epes 4.1-3; Korosẽ 1.10-12; Sikũn Pêtre 3.10-13; Wam Juãw 3.1-6

¹³ E kwa Kris kõt ixtõ jaja. Kẽr ka mẽ Jesus kutẽp mẽmoj punuj kutã amnhĩ to htỳx rãhã ho ri apa. Nẽ Tĩrtũm mã amnhĩ nhĩpẽx mex rãhã nẽ. Pẽ tãm ajamaxpẽr nẽ tãm amnhĩ nhĩpẽx o apa. Nẽ mẽ ã ajamaxpẽr anhỳr o:

–Nã koja nhỹrmã Jesus akupỳn mẽ ixwỳr wrỳ hãmri nhũm Tĩrtũm ixto mex rax nẽ. Nã koja ã inhĩpẽx anẽ. Anẽ.

¹⁴ Nẽ kër ka mẽ Tĩrtũm kapẽr kõt pix mã mãn ri amnhĩ nhĩpẽx mex rãhã ho ri apa. Te mẽhprĩre kot mẽ hipẽxã kapẽr mar nẽ hkõt amnhĩ nhĩpẽx pyràk. Kormã mẽ ate Kris kõt amnhĩ xunhwỳr kêt ri na ka prem ate amnhĩ nhĩpẽx tũm kõt ri tanhmã amnhĩ tomnuj to ho ri apa.

¹⁵ Tã kër ka mẽ hpãnhã amnhĩ to mex o mãn ajamaxpẽr o apa nẽ Tĩrtũm pyrà nẽ amnhĩ tomnuj o apa hkêt nẽ. Tĩrtũmja kot amnhĩ to mex pix o pa xwỳnh na.

¹⁶ Kapẽr ã kaga htũm kot ja jarẽnh kot:

Kër ka mẽ ixpyrà nẽ amnhĩ to mex pix o ri apa. Anẽ.

¹⁷ Tã koja nhỹrmã kẽp Mẽpahpãm maati hã hprĩ hã mẽ pahte amnhĩ nhĩpẽx ã mẽ pahpumpunh hkõt tanhmã mẽ pajarẽnh to. Tãm mẽ pahte amnhĩ nhĩpẽx kõt mẽ pajarẽ rỳ mẽ pahte amnhĩ tomnuj kõt mẽ pajarẽ. Hãmri nẽ ahpỹnhã mẽ panhĩpẽx. Mẽ pahto mex nẽ rỳ mẽ pahptomnuj nẽ. Jakamã kwa pu mẽ nhỹrmã kot tanhmã mẽ pahptomnuj to pymaj hkõt pix mã amnhĩ nhĩpẽx o ri papa rãhã nẽ.

¹⁸ Nẽ kormã mẽ pahte Jesus kõt amnhĩ xunhwỳr kêt ri na pu prem mẽ panhĩgèt pyrà nẽ pahťỳx ri amnhĩ tomnuj o ri papa. Tã nhũm Krisja te amnhĩm mẽ pajaprõr pyràk o mẽ panhĩpẽx. Mẽ pahte hpãnhã kapẽr kõt pix mã amnhĩ nhĩpẽx o papa kaxyw. No mẽmoj to na pre mẽ pahpãnhã amnhĩre? Nã ra mẽ pahte ja jarẽnh mar tỳx. Na pre kãxpore ho mẽ pahpãnhã amnhĩrer kêt nẽ. Rỳ ôr o mẽ hikukrẽx ã ohtõ ho mẽ

pahpānhā amnhīrer kêt nê. Rỳ prat o mē hīkukrêx ā ohtô ho mē pahpānhā amnhīrer kêt nê. Jajaja hapêx tokyx anhÿr mā xwÿnh na.

¹⁹ Na pre ā mē hpānhā amnhīrer anê nê tām mē panê ty nê htyk o amnhī nhī ho mē pahpānhā amnhīrer pa. Nhūm hkamrô axkapī. Te amnepê mā mē panhīgêt kot amnhī pānhā Tirtūm mā ôwêhti hkrare hpar nhūm hkamrô pikapīrta pyrāk. ôwêhti krare mexre pix na prem kām kupa. Mex nê tanhmā kute hkêt xwÿnh pix. Tā Krisja aa tanhmā amnhī tomnuj to hkêt kumrêx nê mē panê ty nê htyk o Tirtūm mā mē pahte amnhī tomnuj piitā hpānhā amnhīrer pa.

²⁰ Amnepê mā kormā mēmoj kêt ri na pre Tirtūm kot ā mē pahpānhā amnhīrer anhÿr kaxyw mē pakukamā kuta nê ām. Tā nhūm amgrā ohtô nê hapêx nhūm mē pahwÿr kumê nhūm man mē pahwÿr wrÿ. Kot ā mē pahpānhā amnhī nhīpêx anhÿr kaxyw.

²¹ Tā nhūm prem kupī nhūm Tirtūm akupÿm ho htīr nê mex o mex ā harê. Mē pahte ja hā harênh mar kôt amnhī kaxyw Tirtūm pix mā pajamaxpêr o ri papa kaxyw. Nê mē pahte amnhī wÿr Jejus jamār rāhā ho ri papa kaxyw.

²² Tā pu prem ra kot ā mē panê amnhī nhīpêx anhÿr ā harênh ma nê mē pahte amnhī tomnuj kaga nê hkôt amnhī xunhwÿ. Jao amnhī to mex pix o ri papa. Nê mē pamā Kris kôt mē pahkwÿjê hkīnh o papa. Tā kwa kêt pu mē arī pamā axpên kīnh tÿx rāhā ho papa.

Te mē pakatorxā rūm mē pajapôx pyrāk o axte mē pajapôx ā mē pajarênh

Juāw 3.1-21

²³ Nê na pu prem mē pakatorxā nhôxāhkre rūm mē pajapôx pyrā nê axte mē pajapôx pyrāk o amnhī nhīpêx. Jao ra mē pahpê Tirtūm kra nê ri papa. Na hte mē pakatorxā nê mē panhīpêxāja wa ri pa nê gaa nê mē pahpê ty. No kêt Mēpanhīpêxā maati Tirtūmja wa kurom rāhā ho rāhā. Tā ra mē pahte amnhī kaxyw kapêr kôt pajamaxpêr o pahpê hkra jakamā kot puj mē urāk nê nhÿrmā pahÿr tūm nê papa rāhā ho papa.

Nê Tirtūm kapêrja Tirtūm pyrā nê rāhāā. Kojā aa hapêx kêt nê.

²⁴ Kapêr ā kagā htūm kot ja jarênh kot: Pika piitā hkôt mē pa xwÿnhjaja te mē kot pōti grā pyrāk.

Nê mē kot amnhī to mex xāja te kot kapôt ā pixôrā pyrāk.

Na hte pōti tokyx grā nê hapêx.

Nê pixôrāja haxwÿja arīgro htÿx mē nhūm grā tokyx anê nê rarak pa nê hapêx.

²⁵ No Tirtūm kapêr kojā pōti mē pixôrāta wa kurom aa hapêx kêt nê. Kojā arī rāhā ho rāhā. Anê.

Tā kapêrja tām na htem mē pamā kamā harê pu mē pahpiitā mar o papa.

2

Mē pahte Tirtūm kot amnhī nhīpêx kôt amnhī nhīpêx ā mē pamā karô

Rômān 12.2; Wam Korīt 3.16-17; Epes 2.19-22

¹ Nê kwa kêt pu mē axte tanhmā amnhī tomnuj to ho ri papa hkêt nê.

Rỳ tanhmā axpên mā paxêx to hkêt nê.

Nê paxêx rom tanhmā ri axpên nokupyri to hkêt nê.

Nê mēmoj tā axpên kām pagryk kêt nê.

Nê tanhmā axpên japrÿ hto hkêt nê.

Kêt pu mē ā amnhī nhīpêx anhÿr o papa hkêt kumrêx.

² Mē hkarare na htem ām kām pijaôr pix prām. Nê gaa nê htÿxre nê ra hprêk o mō. Tā kêt ka mē pijaôr pix prām xwÿnhjê pyrā nê amā Tirtūm kapêr mar nê hkôt pix mā amnhī nhīpêx o apa hprām. Jao mar tÿx pē ra hkôt amnhī nhīpêx mex o mō nê gaa nê hkôt amnhī nhīpêx mex o apa. Te mē karare pijaôr nê gaa nê ra hprêk o mōrta pyrāk.

³ Ra mē ate Jejus kot mē pahto mex ā omunh mex kēnā.

⁴ Nê na htem kēn o ixkre nhīpêx kaxyw hāmri nê hkwy kawrā nê ri hkapi. Nhūm hō mex kêt nhūm mē tee ri omu nê nhām kumê. Tā ja pyrā nê na pre mē pahkwÿjaja tee ri Kris pumu nê htÿx mex kêt ā hkamnhÿx nê te mē kot kēn mēnhnta pyrāk o hipêx nê hkaga. No nhūm Tirtūmja amnhīm Kris mex o mex ā harê. Te ho mēhō kot kēn mex kêt ā hkamnhÿx nê mēnh nhūm mēhō kot mex ā omunh nê amnhīm mÿnhnta pyrāk. Nom Krisja kēn rom kēp htīr tūm nê pa xwÿnh jakamā nhūm pre Tirtūm mē pakaxyw ām pu prem hkôt amnhī xunhwÿ.

⁵ Nê Tirtūm na hte nhÿrmā mē pahÿr tūm nê wa kuri mē papa mā xwÿnh ā mē pajarê. Te mē pahpê kēn nhūm Tirtūm te kot amnhī Karô mā mē pahto ixkre nhīpêx pyrāk. Jakamā na hte Jejus Kris tanhmā mē pahkrā hto pu mē Tirtūm kôt amnhī nhīpêx mex rāhā ho ri papa. Nê tanhmā kām amnhī nhīpêx mex to nhūm ja hā mē pahpumu nê hkīnh nê.

⁶ Tirtūm kapêr ā kagā htūm kot tanhmā Kris jarênh to. Nê hā kuxi nê tanhmā harênh to. Te kēp kēn pyrāk ā harê nê harênh kot: Kot paj nhÿrmā ljaew wÿr mēhō mē nhūm mē hkôt pa ho pa.

Kojā te kēp kēn o inhōrkwy nhīpêx kaxyw kēn maati mex kumrêxta pyrāk.

Kojā amnhī kaxyw hkôt mē hamaxpêr xwÿnhjaja nhÿrmā ma inhō krī hwÿr api nê hkīnh nê mex rāhā nê pa ho pa. Anê.

7 Tã ra amnhî kaxyw hkôt mê pajamaxpêr xwýnhjaja. Kên pyrãk xwýnh pê Jejusja na mê pamã mex o mex. No mê kot hkaga xwýnhjaja na htem hamaxpêr punuj xwýnh ã hkamnhîx nê hkaga nê kãm hkîn kêt nê. Tirtûm kapêr ã kaga htum kot mê harênh kot: Na prem kên o amnhîm ôrkwý nhîpêx kaxyw hkawrà ho pa nê kên maati ja pumu nê htýx omnuj ã hkamnhîx nê hkaga. Mê kot hkaga htã nhûm Tirtûm mê kurom mex o kot kên piitã hakrenh par ã omunh kurê kumrêx. Anê.

8 Nê mãnênh harênh kot:

Coja mê kapêr mar kêt kumrêx.

Te pry kamã kên nôr nhûm mê kot nhãm pry nê mênh kaxyw hkamnãr o amnhî par krã hi kukênh pyrãk o koja mê amnhî nhîpêx. Anê.

Mê kot Kris kapêr mar tã hkôt amnhî xunhwýr kêt jakamã te ho mê kot amnhî nê kên kamnãr o amnhî par krã hi kukênh pyrãk o koja mê amnhî nhîpêx. Jakamã koja nhÿrmã Tirtûmja ja hã tanhmã mê ho htýx kumrêx. Ra kot amnhî kukamã mê kãm amnhî jarênh xã hkôt.

9 No mê papajaja na pre Tirtûm jajê rom amnhî kôt mê paxunhwý. Nhÿrmã ô krî kamã mê papa ho papa kaxyw. Nê mê pahte mex o mex ã harênh kaxyw. Na pu htem Ijaew nhô patre pyrã nê Pahi Maati Tirtûm mã tanhmã amnhî nhîpêx to ho papa. Nom kormã mê pahte Kris kôt amnhî xunhwýr kêt ri te mê pahpê kamãt kô kamã mê pahtýx ri mê papa xwýnh pyrãk. Tã Jejus kôt amnhî xunhwý nê hpãnhã te mê pahpê hirã mex kãm ri mê papa xwýnh pyrã nê tãm amnhî nhîpêx rãhã ho papa. Ra mê pahpê Tirtûm kra jakamã na pu htem amnhî to mex rãhã ho ri papa. Nê Mêpahpãm maati Tirtûm mã tanhmã amnhî nhîpêx to ho ri papa. Te mê kot mê ho áhwýr xwýnhjaja kot kãm amnhî nhîpêx o pata pyrãk. Á na pre Tirtûm mê pahte amnhî nhîpêx anhÿr o papa kaxyw mê panhîpêx.

10 Amnepêm kormã mê pahpê hkra hkêt ri na pre mêhõ mê pakamã ukaprí hkêt kumrêx pu htem pahpunuj nê ri papa. Tã Jejus kôt amnhî xunhwý nhûm Tirtûm mê pahto hkra pu mê pahpê hkra hã ri papa nhûm mê pakamã ukaprí rãhã ho mê pahkôt pa.

Mê pahpê Tirtûm mã tanhmã amnhî nhîpêx to xwýnh ã mê pajarênh

Rômãn 13.1-7; Xitre 3.1

11 E ixkrãmnhwýjaja. Ra mê pahpê Tirtûm kra jakamã mê pahpê ô krî nhô xwýnh. Te mê pahpê jar pika nhô xwýnh kêt pyrãk jakamã kwa kêr pu mê arî mê pahte amnhî nhîpêx tùm o amnhî nhîpêx kêt nê. Nê mê pajamaxpêr tùm o pajamaxpêr kêt nê. Ra axtem mê pajamaxpêr nyw nê axtem

mê pahte amnhî nhîpêx nyw kêñã. Mê pahte amnhî nhîpêx tùmja te kãm akupým mê pahte hkôt amnhî to paxujanãr prãm pyrãk. Mê pahte axte hkôt amnhî nhîpêx o ri papa kaxyw. Tã nom kêr pu mê anhÿr kêt nê.

12 E kwa kêr ka mê anhõ krî kamã akwý kot Kris kôt amnhî xunhwýr kêt xwýnhjê noo mã tãm ri amnhî nhîpêx o ri apa. Mê kot Kris ã tanhmã mê anhîpêx to rý tanhmã hã mê ato kapêr punuj to htãã. Kot kaj mê ã mê hkôt amnhî nhîpêx anhÿr o ri apa hãmri nhûm mê tee ri mê apumu nê hamaxpêr o:

–Kwa mê ixte mê kot amnhî tomnuj xwýnh ã mê harênh tã mê kot amnhî to mex pix xwýnh na mê. Anê.

Hãmri nê nhÿrmã mê pahpyrà nê Tirtûm kôt amnhî xunhwý nê kãm mex o mex ã harê nê kãm:

–Kwa Tirtûm. Na pre hte akrajaja anhÿ hã amnhî to mex rãhã nê pa ho pa pa ja hã mê omu. Nã xep amex o amex Tirtûm. Anê.

13 Nê mê apê Pahihti Jejus Kris kôt amnhî nhîpêx xwýnh jakamã kêr ka mê anhõ krî kamã mê anhõ pahihti kapêr ma nê kapêr kôt mãn amnhî nhîpêx mex o ri apa. Nê mê anhõ pika kamã mê anhõ prêjitênja ka mê kapêr ma nê hkôt amnhî nhîpêx. Mê kot mê ato amnhîptãr xwýnhjaja ka mê piitã mê kapêr ma nê mê kapêr kôt pix mã amnhî nhîpêx rãhã ho ri apa.

14 Nê mê anhõ pahi nhÿ hã mê kapêr o mê pa xwýnhjaja na htem mê akaxyw mê unhwý. Mê kot amnhî tomnuj xwýnhjaja nhûm tanhmã mê kot mê ho kaxyw. Nê tãm mê kot amnhî nhîpêx o ri mê pa xwýnhjaja nhûm mê kot mê ô pahi mã mex ã mê harênh kaxyw.

15 Tã kêr ka mê kapêr ma nê mê hkôt tãm amnhî nhîpêx rãhã ho ri apa. Hãmri nhûm mê ato kapêr punuj xwýnhjaja ja hã mê apumu nê axte tanhmã mê ato kapêr to hkêt nê. Á mê ate amnhî nhîpêx anhÿr o apaja na Tirtûm kãm hprãm.

16 Nê mê pahpê Tirtûm kra jakamã na pu htem paxãmnhîx kãm tanhmã amnhî nhîpêx to ho ri papa. Nom kêr pu mê pahpê hkra hã pahtýx ri amnhî nhîpêx kêt nê.

17 Nê kêr ka mê piitã mê ho mex o ri apa.

Nê mê ato amnhîptãr xwýnhjê ho mex nê mê hã apijaãm rãhã ho ri apa.

Nê mê apê Kris kôt mê ate axpên to mê atõ nê mê atõxjê hã amã axpên kîn hê pe axpên to mex nê.

Nê Tirtûm ã apijaãm rãhã nê.

Mê kãm mê apênh xwýnhjaja kot tanhmã amnhî nhîpêx to hã mê kãm karõ

Epes 6.5-8; Korosê 3.22-25; Wam Ximotre 6.1-2; Xitre 2.9-10

18 Nê mê apê mê kãm mê axápênh xwýnhjaja kêr ka mê anhõ patrãw kapêr ma

nê hkôt ri amnhî nhîpêx. Kot mê ato mex o pa rÿ mê atomnuj o pa htâ ka mê arî mê hâ apijaam pê hkôt ri amnhî nhîpêx.

¹⁹ Tanhmâ kot mê anhiêpêx punuj to htâ ka mê arî kâam axâpênh mex râhâ nê. Kêr kê Tîrtûm ja hâ mê apumu nê hâ ato mex nê ka mê ajamakêtkati nê axâmnhîx ri kâam axâpênh o apa.

²⁰ Nom kot kaj tanhmâ amnhî tomnuj to nhûm anhô patrâw ja hâ apumu nê hâ atak ka amnhî xâ htÿx kamâ ama nê rî amnhî pumu. No kot kaj akatât kôt kâam axâpênh mex tâ nhûm amarî atak japêr tâ kêr ka amnhî tâ kamâ agryk kêr nê. Arî kâam amnhî to htÿx kamâ kâam xa nê amnhî tâ tanhmâ ho hkêt nê. Hâmri nhûm Tîrtûm ja hâ apumu nê ato mex nê.

²¹ Amnepê m na pre mê pahte hkôt amnhî xunhwÿr xwÿnhjaja Kris pyrâ nê mê paxâ htÿx kamâ pajamak o papa hkukamâ ja hâ mê pahpumunh mex. Na pre Kris mê pakaxyw amnhî xâ htÿx kâam hamak tÿx tâ amnhî to htÿx nê mê kâam xa. Tâ kêr pu amnhî xâ htÿx kamâ pajamak tâ ÿ hâ urâk nê amnhî to htÿx nê papa.

²² Krisja aa tanhmâ amnhî tomnuj to hkêt nê pa ho pa. Nê aa mêmoj tâ amnhî to hêx o pa hkêt.

²³ Mê kot kâam kapêr punuj tâ nhûm amnhî tâ tanhmâ mê kâam nê hkêt nê. Nê mê kâam kapêr punuj kêr nê. Nhûm prem homnuj tÿx kumrêx nhûm amnhî xâ htÿx kamâ hamak tâ amnhî tâ mê kâam âkjêr nê tanhmâ mê haprÿ hto hkêt nê. Na pre âm hamaxpêr o: “Nâ Tîrtûm kot ixtâ mê omunh mex kê nâ. Kojâ nhÿrmâ mê piitâ tanhmâ mê kot amnhî nhîpêx to hâ mê omunh xâ hkôt tanhmâ mê hipêx to. Tâam kojâ âhpumunh tÿx xâ hkôt tanhmâ ixtâ mê harênh to. Mê kurom âhpumunh tÿx o âhpumunh tÿx xwÿnh kê nâ.” Anê.

²⁴ Kris na pre te kawâ kamâ mê pahte amnhî tomnuj piitâ gjênh nê ho nÿt nê htur râhâ pî kahpa hâ mê panê htyk pyrâk o amnhî nhîpêx. Mê pahte axte tanhmâ amnhî tomnuj to hkêt prâm xâj. Pânhâ mê pahte amnhî to mex pix o ri papa kaxyw. Tâ â kot amnhî xâ htÿx kâam hamak anhÿr o jêt jakamâ kot puj mê pahte hkôt amnhî xunhwÿr xwÿnhjaja aa mê pahte amnhî tomnuj pânhâ amnhîrer kêr nê. Ra Jejus htyk o kot mê panê amnhîrer par kê nâ.

²⁵ Na pu pre te mê pahpê ôwêhti pikunor pyrâ nê pah tÿx ri papa. Tanhmâ amnhî tomnuj to râhâ ho ri papa. Tâ nhûm Kris te kot ôwêhti jamâr xwÿnh kot ôwêhti pikunor mâ katorta pyrâk o mê panhiêpêx. Pu mê hkôt amnhî xunhwÿr nê hkôt amnhî nhîpêx mex o ri papa. Jao hkôt papa ho papa.

3

Mê mjên mê mê hprô kot tanhmâ axpênh nhîpêx to hâ mê kâam karô

Wam Korî 7; Epes 5.22-25; Korosê 3.18-19; Wam Ximotre 2.9-15

¹ Nê kêr ka mê anijaja mê amjên kapêr ma nê hkôt amnhî nhîpêx. Akînhâ kormâ kot Tîrtûm kôt amnhî nhîpêx kêr japêr tâ arî kapêr ma nê hkôt amnhî nhîpêx mex o ri apa. Kê mê ate amnhî nhîpêx â mê apumu nê mê apyrâ nê Kris kôt amnhî xunhwÿr japêr. Mê kâam Tîrtûm kapêr mar prâm kêr tâ koja mê â mê ate amnhî nhîpêx anhÿr â mê apumunh kôt mê apyrâ nê amnhî kaxyw hkôt hamaxpêr japêr.

² Na htem mê ate Tîrtûm kapêr kôt tâm ri amnhî nhîpêx o apa hâ mê apumunh o ri mê akôt pa.

³ Jakamâ kêr ka mê anijaja amnhî mex pix kukamâ ajamaxpêr o ri apa hkêt nê. Rÿ ajamaxpêr o:

—Ma kot paj mê hkuxwaxâ ho amnhî krâ hkî kuxwa mex nê inhôkrexê mex jagjê nê ri hâ mra. Nê kupêxê mex kwÿ japrô nê ho amnhîm ixê mex nhîpêx hâ mri nê hagjê nê ri hâ mra. Kot paj â amnhî nhîpêx anê nhûm mê piitâ ja hâ ixpumu nê kâam ixkînh nê inh mex â ijarê. Ma kot paj â amnhî nhîpêx anê.

Anhÿr o ri amnhî kukamâ ajamaxpêr kêr nê.

⁴ Tîrtûm na hte â mê pahte amnhî nhîpêx anhÿr â mê pahpumu nê âm hâ mê pahpumu. Mê ôkrexê nê mê ê mex na hte hapêx tokyx anê. No mê panhōpinhxâ kaxwÿnh kâam tâm ri mê pajamaxpêr nê pakamâ amnhîkrit nê papaja. Kot kaj mê â amnhî nhîpêx anhÿr o ri apa hâ mri nhûm Tîrtûm ja hâ mê apumu nhûm ja kâam mex nê.

⁵ Amnepê mâ mê pakukamâ mê panhō wôwô nê mê panâjaja. Mê hkwy kot Tîrtûm kôt amnhî nhîpêx xwÿnhjaja na prem â amnhî nhîpêx anhÿr o pa. Mê kot mjên kôt amnhî nhîpêx o pa jakamâ na prem amnhî tâ mê omu nê mê ho mex nê kâam mê hapê nê.

⁶ Mê panhō wôwô finat Saraja na pre â amnhî nhîpêx anhÿr o pa. Jao mjên Apraâw kapêr ma nê hkôt amnhî nhîpêx. Nê kêp ô pahî hâ harê nê hkôt pix mâ amnhî nhîpêx o ri pa. Tâ kot kaj mê urâk nê amnhî to htÿx nê â amnhî nhîpêx anhÿr o apa. Hâmri nê amnhî tâ amâ amjên puma hkêt nê apa nê te apê Sara hkra pyrâk.

⁷ Nê mê amyjaja kêr ka mê tâm mê aprô nhîpêx o ri mê hkôt apa. Mê akînhâ mê hihtÿx kêr jakamâ mê kamâ axukaprî râhâ ho ri mê hkôt apa. War ajamê war apê Jejus kukwak ri war atÿr tûm nê apa mâ xwÿnh jakamâ kêr ka mê ho mex râhâ ho ri mê hkôt apa. Tîrtûm kâam war ajamê war ajapê jakamâ kot kaj mê â mê hipêx anhÿr o ri

apa hāmri nē ra axàmnhīx mēmoj tā amnhī to Tirtūm wý nhūm mē amar kurē kumrēx.

Tirtūm krajaja kot amnhī xà htýx kamā hamak ā mē harēnh

Rōmān 12.9-21; Korosē 1.10; Wam Tesarōn 5.14-15

⁸ E Kris kōt ixkrāmnhwýjaja. Nà ixkapēr jatur xà na ja. Kēr ka mē ri axpēn kōt ajamaxpēr mex pē axpēn to mex rāhā ho ri apa. Nē mē ate Kris kōt axpēn to atō nē atōx ā amā axpēn kīnh o ri apa. Jao axpēn kamā axukapri nē mēmoj to axpēn kutā anojarēt rāhā nē.

⁹ Na pu prem Jejus kōt amnhī xunhwý nhūm Tirtūm mē pahto hkra nē mē pahto mex ā amnhī jarē. Tā koja mēhō tanhmā mē anhīpēx to rý tanhmā mē ato kapēr punuj to. Nom kēr ka mē ama nē amnhī tā tanhmā ho rý tanhmā ho akapēr punuj to hkēt nē. Ām te Tirtūm kot mē panhīpēx pyrāk o mē hipēx nē mē ho mex pix o ri mē hkōt apa. Ja na Tirtūm kām hprām.

¹⁰ Kapēr ā kagā htūm kot ja jarēnh kot:

Kot kaj mē amā amex nē akīnh nē ri apa hprām hā kot kaj mē ā amnhī nhīpēx anē:

Kot kaj mē ri akapēr punuj o ri apa hkēt nē. Nē mēmoj tā amnhī to axēx o ri apa hkēt nē.

¹¹ Nē te mē ate amnhī katut kōt ate amnhī tomnuj rēnh o apa pyrā nē hpānhā amnhī to mex pix o ri apa.

Nē mē amā tām axpēn nhīpēx pix prām o ri axpēn kōt apa.

Nē mē amā ajamakētkati nē axpēn kōt apa hprām rāhā ho ri apa.

¹² Na hte Tirtūmja ā mē kot amnhī nhīpēx anhýr o pa xwýnhjē jamār mex rāhā ho pa.

Nhūm mē tanhmā amnhī to hwýr to nhūm mē mar kurē kumrēx.

No mē kot amnhī tomnuj o mē pa xwýnhjaja na hte mē kutā amnhī xām nē ām mē omu nē mē ho mex kēt nē. Anē.

Tirtūm kapēr ā kagā htūm kot ā mē harēnh kot anhýr.

¹³ Nē kot kaj mē amā amnhī to mex pix o apa hprām nhūm mēhō ja hā tanhmā mē atomnuj to hkēt nē.

¹⁴ No kot kaj mē amnhī to mex pix o apa htā nhūm mēhō ja hā apumu nē tanhmā hamaxpēr to nē atomnuj ka amnhī xà htýx kamā ajamak japēr. Tā koja Tirtūm nhýrmā ja hā tanhmā mē ato mex to. Jakamā kwa kēr ka mē tee ri mēhō kot tanhmā mē atomnuj to hkukamā ajamaxpēr pē amā mē uma ho ri apa hkēt nē. Nē tee ri amnhī kukamā ajamaxpēr o akapri nē ri apa hkēt nē.

¹⁵ ām amnhī kaxyw Kris mā mán ajamaxpēr týx rāhā nē mē panhō Pahihtā hā apijaam rāhā ho ri apa. Nhūm mēhō ja hā mē

apumu nē tanhmā hā mē akukjēr to nē mē amā:

–Kwa mēmo kaxyw na ka pre Kris kōt amnhī xām nē hkōt ri amnhī nhīpēx o apa? Anē.

Ka mē ama hāmri nē aprī hā kām amnhī jarēnh kurē kumrēx.

¹⁶ Nom kēr ka mē akapēr mā aprī kamā kām amnhī jarē. Tirtūm kapēr kōt amnhī nhīpēx o apa hā mē kām amnhī jarē. Koja mē Kris ā mē ato kapēr punuj rý hā mē atā hpēr o axkē nē pikunhar japēr ka mē ām amnhī tā mē ama nē ām mē ama. Kwār mē māmri ā mē anhīpēx anē. Kēr ka mē amnhī tā mē omu nē arī amnhī to mex rāhā ho ri apa. Kēr kē mē tee ri amnhī tā mē apumu nē hpijaam nē.

¹⁷ Nē koja mē akwýjaja mē ate Tirtūm kapēr kōt amnhī nhīpēx mex o apa hā mē apumu nē hā tanhmā mē anhīpēx to htā kēr ka mē arī Tirtūm kōt amnhī nhīpēx o ri apa. Ja na kām hprām. Nom kot kaj mē tanhmā amnhī tomnuj to nhūm mē ja hā mē apumu nē pahihtā mā mē ajarē nhūm kuma nē ja hā tanhmā mē amā àkjēr to ka mē ra apijaam nē.

¹⁸ Nē Krisja na pre mē panē ty. Ām htyk tipxi tā mē pahpiitā mē pahpānhā amnhīre. Mē pakurōm aa kot tanhmā amnhī tomnuj to hkēt tā mē pahte amnhī tomnuj piitā hpānhā amnhīrer pa. Mē pahte hkōt amnhī xunhwýr nē nhýrmā ma Tirtūm nhō krī hwýr paxapir nē kamā pahfir tūm nē papa ho papa kaxyw. Mē kot hpīr tā nhūm Tirtūm akupým ho htūr nhūm htūr o htūr.

¹⁹⁻²⁰ Nom kormā akupým htūr kēt ri na pre hkarō pix o mē htyk xwýnhjē hwýr mō. Ahpunu kamā mē hkarō kēp prēs nē hkrī xwýnhjē hwýr mō nē mē kot Noehtī kapēr mar nē hkōt amnhī nhīpēx kēt nhūm gō htām kot mē hanhir par xwýnhjē mā kapēr. Tirtūm kot nhýrmā mē kot amnhī tomnuj mýrapē kuwy maati wýr mē rēnh ā mē hkukamā mē kām awjarē. Amnepēm kormā Noehtī kot par raxta nhīpēx o kuhē ri na prem kām Tirtūm kapēr mar prām kēt nē. Nhūm amnhī tā mē omu nē mē kamā gryk tokyx anhýr kēt nē. Arī amnhī tā mē hamār o pa. Mē kot hkōt amnhī xunhwýr nē hkōt amnhī nhīpēx prām xāj arī mē hamār ry ho pa. No ām tee ri mē hamār kapry nhūm mē amnhī kaxyw hkōt hamaxpēr kēt nē htýx ri amnhī tomnuj o pa. Mē ām grēre nē Noehtī kapēr ma nē gō htām pymaj hkōt pār raxta wýr agjē. Ām mē kēp 8 pix nē hwýr agjē nhūm gō htām mē hanhir kēt nē. Tirtūm na pre mē nē omunh mex nē. No mē kot amnhī tomnuj xwýnhjaja nhūm gō htāmja mē hanhir o mē himex pa. Nhūm mē kēp 8ja pix arī htūr nē mex nē pār raxta kamā gō krāhkā hā mex rāhā ja pa.

²¹ Gô tàmja kêp hprî hã mê pahte Jejus kôt amnhî xunhwÿr ã mê pahto amnhîrît xà na. Mê pahte amnhî nhîpêx tùm kaga nê hpânã amnhî nhîpêx nyw o amnhî nhîpêx o papa hã mê pahto amnhîrît xà. Jakamã na htem mê pahkrã kumrã. Nom mê kot mê panê mê pagrã kugrành kaxyw kêt ra mê pahte Jejus kôt amnhî xunhwÿr ã amnhî to amnhîrît kaxyw na htem mê pahkrã kumrã. Ra mê pahte Tirtùm kapêr kôt amnhî nhîpêx o papa hã amnhî to amnhîrît kaxyw. Pu mê ra mê pahte amnhî nhîpêx nyw o amnhî nhîpêx ã amnhî to amnhîrît. Te mê pahte gôx kãm mê pahte amnhî tomnuj rer par pyrà nê hpânã amnhî nhîpêx nyw o amnhî nhîpêx o papa.

²² Nê na pre Jejus akupÿm htîr nê ma akupÿm Tirtùm nhô krî hwÿr api nê Tirtùm nhîhkô hã pahihiti hã mê hkrî xà kamã hkrî ho hkrî. Hãmri nê ra Tirtùm kapêr o mê wrÿk xwÿnh nê pahi piitã mê ho amnhîptâr o hkrî.

4

Mê pahte amnhî nhîpêx nyw o amnhî nhîpêx ã mê pamã karô

Epes 4.17-24; Korosê 3.1-11

¹ Nê na prem Kris pî nhùm amnhî xà htÿx kãm hamak kãm htyk kaxyw tâ arî mê kãm xa. Ra kot amnhî xà hkukamã amnhî tâ mê omunh tâ tee ri amnhî kukamã hamaxpêr o amnhî tâ tanhmã ri mê kot hprî mã xwÿnhjê homnuj to hkêt nê. Arî mê kãm xa nhùm prem kupî. Tã kêr pu mê uräk nê ã amnhî nhîpêx anhÿr o ri papa. Mê kot hã tanhmã mê panhîpêx to htã pu mê uräk nê amnhî xà htÿx kãm pajamak tâ tanhmã amnhî tâ mê ho hkêt nê. Na hte ra mê htyk nê mê hikwÿ xwÿnhjaja axte amnhî tomnuj kêt nê. Tã kêr pu mê uräk nê axte tanhmã amnhî tomnuj to ho ri papa hkêt nê.

² Jakamã kêr pu mê axte mê pahte amnhî nhîpêx tùm kôt amnhî nhîpêx o papa hkêt nê. Nê mê pajamaxpêr tùm kôt axte pajamaxpêr o papa hkêt nê. Âm Tirtùm kãm hprãm xà hkôt pix mã tanhmã amnhî nhîpêx to ho papa rãhã ty.

³ Amnepê mormã mê pahte Jejus kôt amnhî xunhwÿr kêt ri na pu prem mê kêp Tirtùm kra hkêt xwÿnhjê hkôt amnhî nhîpêx.

Jao nhãm mênijê pumu nê mê kamã pahpîjaam kêt hprãm.

Nê pahpipãnh o ri papa.

Nê mê pahpipãnh kaxyw axpên wÿr akuprô nê mênijê kamã pahpîjaam kêt.

Nê sãnti hwÿr pahkônkrã ho pahkrî nê kãm amnhî jagrer.

⁴ Tã Kris kôt amnhî xunhwÿ hãmri nê mê pahte amnhî nhîpêx nyw o amnhî nhîpêx o papa. Hãmri nhùm arî mê kot amnhî nhîpêx tùm o amnhî nhîpêx xwÿnhjaja tee ri ja hã mê pahpumu nê hêx rom amnhî kôt mê pamã tanhmã ri àhkrox to ho pa. Pu mê axte mê

hkôt amnhî nhîpêx kêt nhùm mê tee ri ja hã mê pahpumu nê mê pakamã gryk kato nê tanhmã mê pahto kapêr punuj to.

⁵ Tã koja Tirtùm nhÿmã amnhî wÿr mê hã karô nhùm mê ma hwÿr mra nê kutã hkrî. Nê kormã mê htîr ri tanhmã mê kot amnhî nhîpêx to ho pa hã kãm amnhî jarênh pa. Hãmri nhùm mê kot amnhî nhîpêx ã tanhmã mê hipêx to. Koja mê pahpiitã tanhmã mê pajarênh to. Mê htyk xwÿnhjaja nê kormã mê pahpîr nê mê papa xwÿnhjaja nhùm mê pahpiitã tanhmã mê pajarênh to.

⁶ Na pre Jejus ty hãmri nê kormã akupÿm htîr kêt rãhã hkarô pix o ma amex wÿr tê nê kamã mê htîr ri amnhî kaxyw Tirtùm mã hamaxpêr xwÿnhjê mã awjarê. Na prem mê kot amnhî tomnuj mÿrapê ra wej nê ty nê arî amex kãm ri pa. Jakamã nhùm Jejusja hkarô ho ma mê hwÿr tê nê mê kãm:

—E na pa ra mê ate amnhî tomnuj pãnhã amnhîrer pa. Tã kormã mê atîr ri mê ate amnhî kaxyw Tirtùm kôt ajamaxpêr jakamã kot kaj mê ma hwÿr api nê wa ixkuri wa ixpyrà nê atîr tùm nê amex nê apa ho apa. Anê.

Mê pahpê Kris kwÿ hã tanhmã mê pahpê axpên nhîpêx to hã mê pamã karô

Rômãn 12.6-8; Wam Korî 12.1-11

⁷ Nê koja tokyx mê amã axpên pikaja mê pahpê hapêx nê kamã mêmoy piitã hapêx pa. Jakamã kwa kêr ka mê ate amnhî nhîpêx ã amnhî pumunh mex o papa.

Nê mê atÿx ri ajamaxpêr ri apa hkêt nê.

Nê mêmoy punuj nê amnhî to htÿx o ri apa ho ajamaxpêr nyw pix o amnhî to Tirtùm wÿr rãhã ho ri apa.

⁸ Nê kwa kêr ka mê amã axpên kînh o ri axpên kôt apa. Ja na mex o mex. Kot kaj mê ã axpên nhîpêx anê nhùm Kris kôt atô rÿ atôxjê hõ tanhmã atomnuj to japêr ka amnhî tâ omu nê âm omu. Amã hkînh o âm amnhî tâ omu. Jao axte kot tanhmã atoja mã ajamaxpêr kêt nê.

⁹ Nê kêr ka mê axãmnhîx ajamakêtkati nê amnhî nhôrkwÿ hwÿr axpên wÿr nê axpên to mex o ri apa. Nom kêr ka mê agryk kãm amnhî wÿr mê hwÿr kêt nê.

¹⁰ Na pre ra Tirtùm mê pahpê hkra hã ahpÿnhã tanhmã mê pamã mêmoy tâ karô hto nê ã mê pahte amnhî nhîpêx anhÿr o papa kaxyw mê pahto mê paxihtÿx. Mê pahte ahpÿnhã tanhmã axpên to mex to ho ri axpên kôt papa kaxyw. Tã kêr ka mê ra kot mêmoy tâ mê amã karô hkôt axpên nhîpêx o ri axpên kôt apa.

¹¹ Koja ma mê ate akwÿjê mã kapêr jarênh o ri apa kaxyw mê amã karô ka mê ama nê akatãt kôt ÿ hã mê kãm harênh mex o ri mê hkôt apa. Rÿ tanhmã axpên to ajuta hto ho ri apa kaxyw mê axunhwÿr japêr ka mê amnhî tâ omu nê hkamnã rom mê ho ajuta

mex rāhā ho ri apa. Mē apiitā Jejus nhỹ hā ā amnhĩ nhĩpêx anhỹr o ri apa. Kêr kê Jejus kôt mē akwỹjaja amnhĩ tã mē apumu nē mē anhỹ hā Tirtũm mǎ mex o mex ā harē.

Jejus kwỹjaja kot amnhĩ xà htỹx kamā hamak o pa hā mē harēnh

Rukre 6.20-23; Juāw 16.1-4; Sikũn Tesarõn 1.3-12; Sikũn Ximotre 3.13; Eprēw 12.3; Xiakre 1.2-4

¹² E Kris kôt ixkrāmnhwỹjaja. Koja Kris kwỹ kêt xwỹnhjaja Kris ā tanhmā mē anhĩpêx to nom kwa kêr ka mē tee ri amnhĩ kukamā ajamaxpêr o akapri nē apa hkêt nē. Kêt mē akĩnh rāhā axpên kôt ri apa. Na htem ā mē pahpê Kris kwỹjê nhĩpêx anhỹr o pa. Jakamā kwa mē amnhĩ tã mē omu nē tee ri amnhĩ kukamā ajamaxpêr kêt nē.

¹³ Mē arĩ akĩnh nē ri apa. Mē kot Kris pyrā nē mē panhĩpêx punuj tãā. Kêr kê Jejus nhỹrmā akupỹn mē pahwỹr wry pu mē omu nē pahkĩnh tỹx o pahkĩnh tỹx.

¹⁴ Kwār mē māmri mē pahpê Kris kwỹ hā tanhmā mē panhĩpêx to. Na htem ā Tirtũm Karõ kot mē pahkarõ mǎ gjêx xwỹnhjê nhĩpêx o pa anē.

¹⁵ Nē mē apê Kris kwỹ jakamā kwa kêr ka mē amnhĩ to mex rāhā o ri apa.

Ja o mē hpar o ri apa hkêt nē.

Nē ri axāhkĩnh o ri apa hkêt nē.

Nē nhām mē hkaêx mǎ agjêx o ri apa hkêt nē.

Nē tanhmā mē homnuj to ho ri apa hkêt nē.

Kot kaj mē ā amnhĩ nhĩpêx anhỹr o ri apa nhũm mē anhõ pahihti ja hā tanhmā mē ato ka mē amnhĩ kamā apijaām tỹx nē.

¹⁶ Nom koja mē apê Kris kwỹ hā tanhmā mē anhĩpêx to ka mē ja hā amnhĩ tã mē omu nē amnhĩ kamā apijaām kêt nē. Ām Tirtũm pix mǎ amnhĩ jarē nē kām:

–Pa Tirtũm. Ixpê akra Kris kwỹ hā na mē ā ixtomnuj anē. Nom ixpê akra jakamā kwār mē māmri tanhmā inhĩpêx to. Amex o amex o ate ixto akra jakamā kwār mē māmri ā inhĩpêx anhỹr o pa. Anē.

¹⁷ Nē koja Tirtũm tokyx mē pahpiitā tanhmā mē pahte amnhĩ nhĩpêx to hā mē pahpumu nē tanhmā mē panhĩpêx to. Mē pahpê hkrajaja koja tanhmā mē pahte amnhĩ nhĩpêx to hā tanhmā mē pahto mex to. Hāmri nē hpānhā mē kēp hkra hkêt xwỹnhjê ho hapu nē tanhmā mē hipêx to. Mē kot amnhĩ kaxyw hkôt hamaxpêr kêt jakamā nhũm mē pahkĩnhā tanhmā mē homnuj tỹx to.

¹⁸ Kapêr ā kagā htũm kot ja hā mē pajarēnh kot:

Mē kot Tirtũm kapêr kôt amnhĩ to mex xwỹnhjaja na htem āmnhix amnhĩ xā htỹx kamā hamak o pa kamā ty nhũm

Tirtũm ma õ krĩ hwỹr amnhĩ wỹr mē ho āpir kurē kumrêx.

Nom mē kot amnhĩ tomnuj xwỹnhjaja koja mē hkĩnhā amnhĩ xā htỹx kamā hamak rāhā nē pa ho pa nē aa mex kêt nē. Anē.

¹⁹ Tã koja Tirtũm kām ja prām japêr kwār mē māmri Kris ā tanhmā mē pahptomnuj to. Nom kêr pu mē Tirtũm kamnār rom amnhĩ to mex pix o ri papa. Kêp mē panhĩpêx xwỹnh maati jakamā ra kot amnhĩ jarēnh xā hkôt koja tanhmā ri mē pamā amnhĩ nhĩpêx to ho pa.

5

Tirtũm krajaja kot tanhmā amnhĩ nhĩpêx to hā mē kām karõ

Atre 20.28-31

¹ E kot paj hpānhā mē apê Kris kwỹ hkrāhtũmjê mǎ ixkapêr ka mē inhma. Ijaxwỹja ixpê mē akrāhtũmjê hõ na pa. Na pa pre mē akurom Kris htyk kām omu. Nom kot puj mē nhỹrmā pahpimrāatā mex o mex ā omu nē urāk nē mē pamex nē ri papa ho papa.

²⁻³ Jakamā e Kris kôt mē hkrāhtũmjaja kêr ka mē atar Kris kôt pahkwỹjê jamār mex nē. Ra Tirtũm kot mē ate kām hkwỹjê jamār kaxyw mē axunhwỹr jakamā kêr ka mē omunh mex rāhā ho mē hkôt ri apa. Te ho õwêhti jamār xwỹnh kot õwêhti jamār mexta pyrāk. Te mē kēp Tirtũm kriet õwêhti nhũm mē ate kām mē hamār o apa xwỹnh pyrā nē kām mē omunh mex rāhā ho ri mē hkôt apa. Nē akĩnh pē tanhmā ri mē ho ajuta hto ho ri mē hkôt apa. Ja na Tirtũm kām hprām. Nom kêr ka mē ano hkā karõt kām mē ho ajuta hkêt nē. Rỹ kākxpore hprām xāj mē kām tanhmā amnhĩ nhĩpêx to hkêt nē. Ām amarĩ tanhmā mē kutā anojarêt to pix kukamā ajamaxpêr o ri mē hkôt apa.

Nē kêr ka mē kām mēmoj tã karõ kamā axihtỹx kêt nē. Mē akapêr mǎ aprĩ kamā mē kām mēmoj jarē kē mē amnhĩ tã mē apumu nē mē apyrā nē ā axpên nhĩpêx anhỹr o pa.

⁴ E kêr ka mē ā Kris kôt mē akwỹjê jamār mex pē mē hipêx o apa anē. Hāmri nhũm mē pajamār xwỹnh maati ja hā mē apumu nē nhỹrmā akupỹn mē pahwỹr wry nē mē ato mex rax nē.

⁵ Nē e mē amy xāptār nywjaja. Kêr ka mē Kris kôt mē akrāhtũmjê kapêr ma nē mē hkôt ri amnhĩ nhĩpêx mex o ri apa.

Nē kwa kêr ka mē apiitā axpên nhĩpêx o te anhõ kot amnhĩ to rax o ajakrenh pyrāk. Tirtũm kapêr ā kagā htũm kot ja jarēnh kot:

Mē kot amnhĩ to jarkrar o ri mē pa xwỹnhjaja na hte Tirtũm mē kutā amnhĩ xunhwỹ.

No mê kot amnhî to hkryre nê expên tâ hpijaam o mê pa xwÿnhjaja na hte mê ho mex o pa.

⁶ Anhÿr â mê harênh jakamâ kwa kêr ka mê Tirtûm â apijaam râhâ ho ri apa ixkwÿjaja. Nê expên mâ ri amnhî to jarkrar o ri apa hkêt nê. Kêr kê Tirtûm xihtÿx xwÿnhja ja hâ mê apumu hâMRI nê nhÿrmâ kot mê pahto mex xâ hâ arÿgroja kato nhÿm mê ate amnhî to mex xwÿnh â mê ajarê nê mê ato mex rax nê.

⁷ Nê kêr ka mê tee ri amnhî kukamâ ajamaxpêr pê akaprî ho ri apa hkêt nê. Am te mê ate Tirtûm mâ akaprî nhôr pyrâk o amnhî nhîpêx nê axâmnhîx akînh nê akaprî hkêt nê apa. Tirtûm kêp mê pajamâr xwÿnh maati kênâ kot ka kêt mê ri akaprî nê ri apa.

⁸ Nê kwa mê okora. Kêr ka mê amnhî nê kot mê pakutâ amnhî xunhwÿr xwÿnh maati Satanastija pumunh mex râhâ ho ri apa. Na hte mê panhîpêx o te ropkror kot akunî kamâ mry ho krihkrit o ri mrar pyrâk o mê panhîpêx. Jao mê pahte Kris kaga hprâm xâj apkati mê tanhmâ nê mê pahto ho ri mê pahkôt pa.

⁹ Na hte â pika piitâ hkôt Kris kôt mê pahtô nê mê pahtôxjê nhîpêx anhÿr o pa nhÿm mê pahpyrà nê amnhî xâ htÿx kamâ hamak o pa pê omnuj nê pa. Jakamâ kwa kêr ka mê Kris kôt amnhî xunhwÿr tÿx nê kutâ amnhî to htÿx râhâ ho ri apa.

¹⁰ Tirtûm kâm mê pajapê jakamâ na hte mêmoj to mê pakutâ nojarêt râhâ ho ri pa. Na pre mê pamex nê nhÿrmâ mê pahte kuri tâm amnhî nhîpêx o papa mâ xwÿnh â mê pajarê. Kris kukwak ri â mê pajarênh anhÿr jakamâ mê ate jar Kris â apunuj nê ri apa htâ kot kaj mê kritpêm â amnhî nhîpêx anhÿr ry hkêt nê. Koja Tirtûm mê akrâ kamâ mê ajamaxpêr xihtÿx jagjê ka mê akupÿm amex nê axihtÿx pê ate amnhî nhîpêx nyw o amnhî nhîpêx râhâ ho ri apa.

¹¹ Tirtûmja hihtÿx o hihtÿx nê âhpumunh o âhpumunh. Nê hihtÿx xâ nê âhpumunh xâ koja aa kêp hirerek nê hapêx kêt kumrêx. Am hâMRI na mê kot harênh kot anhÿrja.

Pêtre kapêr jatur xâ

¹² Nê ota Kris kôt mê pahtô Sirastija na inhmâ mê akaxyw kagâja nhîpêx pa mê awÿr mênh kaxyw. Na pa hte kâm ixkapêr nhÿm inhma nê inhmâ hâ kagâ. Na hte Kris kapêr kôt amnhî nhîpêx râhâ ho ri pa. Tâ inhmâ kagâja nhîpêx. Mê ate kamâ harênh nê mar nê tâm ajamaxpêr kaxyw. Nê Tirtûm kâm mê ajapê nê kot mêmoj to mê akutâ nojarêt â mê ate kamâ harênh kaxyw. Tâ kêr ka mê kâm mê ajapê hâ amnhî tâ harênh ma nê kapêr kôt pix mâ amnhî nhîpêx mex râhâ ho ri apa. Mê akwÿjaja kot tanhmâ hâ mê ato htââ.

¹³ Nê ota jar Papirôn kamâ Kris kôt mê pahtô nê mê pahtôxjaja mê awÿr hpêr mê. Tirtûm kot mê pahpyrà nê mê ho hkra jakamâ mê kêp mê atô nê mê atôx â mê awÿr hpêr mê. Nê Xiakre mâânênh mê awÿr hpêr mê. Te kêp ixkra pyrâk.

¹⁴ Nê kêr ka mê nhÿri apê Kris kwÿ hâ expên pumu nê mê expên to atô nê atôx â expên mâ akapêr mex kurê kumrêx.

E kê Tirtûm mê apê Kris kwÿ hâ mê amâ mê ajamakêtkati nê mê apa xâ gô ka mê axâmnhîx ajamakêtkati nê amex nê ri apa ho apa.

Tâ am ja pix. Ixpê Simâw Pêtre na pa â mê awÿr kagâ nê mênh anê.

Sikūn Pêtre
Simāw Pêtre kot Jejus kôt
hkwýjê hwýr wam kagá nê
mênh kôt hō mēnh

Simāw Pêtre na pre kagája nhîpêx. Jejus nhý hā hkrájê jahkre ho mē pa xwýnhjê hō na pre. Mē kēp Jejus kra hkêt xwýnhjaja ra kot Jejus ā hprî kaxyw nhūm pre kagája nhîpêx nê krî piitā hkôt Jejus kwýjê hwýr kurê nê kamā hprî hā mē kām mēmoj tā karō. Mē kot arî Tirtūm kot amnhî nhîpêx kôt amnhî nhîpêx rāhā ho pa hā mē kām karō. Nê hamaxpêr o mē hamaxpêr rāhā ho pa hā mē kām karō.

Nê mē hkwý kot Tirtūm kôt amnhî nhîpêx ā amnhî jarēnh tā hkôt amnhî nhîpêx kêt xwýnhjaja nhūm pre tanhmā mē harēnh to. Ā na pre mē kām mēmoj jarēnh nê hā kagá nê krî piitā hkôt mē hwýr rēnh anê. Nê mē kām:

¹ Pa Kris kôt ixtō nê ixtōxjaja. Xà mē amex? Ot pa mē awýr kagá nhîpêx nê krî piitā hkôt mē awýr kurê. Ixpê Simāw Pêtre na pa wam ixte kagá nhîpêx nê mē awýr mēnh tā axte hō nhîpêx. Ixte Jejus Kris nhý hā mē ajahkre ho ixpa xwýnh ā mē amā hipêx nê kumê. Na pa hte Jejus mā amnhî nhîpêx mex o ri ixpa.

Nê mē papytār xwýnh Jejus Krisja Tirtūm pyrā nê mex o mex. Nê wa kot amnhî nhîpêxja mex o mex. Jakamā na pre wa tanhmā mē pahkrā hto pu mē amnhî kaxyw wa hkôt pajamaxpêr týx rāhā ho ri papa. Na ka htem ixpyrā nê ā amnhî nhîpêx anê. Tā pa mē amā kagája nhîpêx.

² Na Tirtūm mē mē panhō Pahihti Jejus wa kot amnhî nhîpêxja na ka mē ra harēnh mar týx nê. Wa kot tanhmā amnhî nhîpêx to nê tanhmā wa hamaxpêr toja ka mē mar týx nê wa hkôt pix mā amnhî nhîpêx. Tā kēr ka mē arî ā amnhî nhîpêx anhýr rāhā ho ri apa. Jao axāamnhîx ajamakêtkati nê akūnh nê apa ho apa. Na pa hte ā mē ato Tirtūm mē Pahihti Jejus Kris wa hwýr o ri ixpa anê. Na hte Tirtūm mē ato mex nê mē akutā nojarêt rāhā ho pa.

Tirtūm kot mē pahto mex o pa hā harēnh
Epês 2.12-13; Wam Tesarôn 1.2-4; Sikūn
Pêtre 3.18

³ Nê Tirtūmja āhpumunh týx o āhpumunh týx jakamā na pu htem hkôt amnhî xunhwý nhūm amnhî tā mē pahpumu nê mē pamā āhpumunh týx xā hkwý gō. Hāmri pu mē ra urāk nê amnhî to mex nê tām amnhî nhîpêx o ri papa. Tā kot puj mē nhýrmā ma ō krî hwýr api.

⁴ Na pre mē pakukamā amnhî jarēnh o:
 –Kot paj nhýrmā ixkrajê mā ixte amnhî nhîpêx mex kwý gō nhūm mē inhý hā ho

tām ri amnhî nhîpêx mex o pa. Nê ixpyrā nê hamaxpêr mex o pa.

Anhýr jao te ra mē pamā hkīnh xā mex kwý nhōr pyrāk o mē panhîpêx. Nê te ra kot mē pahkrām hamaxpêr mex jagjēnh nê mē pamā kot amnhî nhîpêx mex jagjēnh pyrāk. Mēmo kaxyw na pre ā mē panhîpêx mex anê? Nā urāk nê tām mē pahte amnhî nhîpêx mex rāhā o ri papa kaxyw. Jao mē pahte mē kēp hkwý hkêt xwýnhjê hkôt amnhî nhîpêx kêt nê. Nê mē hamaxpêr punuj o pajamaxpêr kêt nê. Nê hpānhā mē pahte Tirtūm kôt pix mā amnhî nhîpêx rāhā ho papa. Ā mē pahte amnhî nhîpêx anhýrja na mex o mex.

⁵ Tā ā Tirtūm kot mē panhîpêx mex anhýr jakamā kwa kēr ka mē kapêr mar týx nê hkôt pix mā amnhî nhîpêx mex o ri apa. Jao amnhî kaxyw hkôt ajamaxpêr rāhā nê. Kot kaj mē ā amā amnhî nhîpêx anhýr o apa hprām hā kot kaj mē määnēn amā tām amnhî nhîpêx o apa hprām. Nê mē amā Tirtūm kapêr piitā mar prām o ri apa.

⁶ Hāmri nê piitā mar pa nê mēmoj punuj piitā nê amnhî to htýx nê. Nhūm mē kēp Kris kwý hkêt xwýnhjaja Kris ā tanhmā mē anhîpêx to htā ka mē ām amnhî tā mē omu nê mē umaj mē amā Kris kaga hprām kêt nê. Nê mē amā Tirtūm mā amnhî jarēnh rāhā ho apa hprām.

Nê mē amā kapêr mar rāhā ho apa hprām.
⁷ Nê mē amā Kris kôt mē atō nê mē atōxjê ho mex pix o ri apa hprām. Jao te mē amā amnhî tā ma pyrāk o mē piitā mē hipêx o ri mē hkôt apa.

⁸ E kēr ka mē ā amnhî nhîpêx anhýr o ri apa. Kot ka mē ā amnhî nhîpêx anê nê mē panhō Pahihti Jejus Kris kôt amnhî nhîpêx mex o mō. Hāmri nhūm mē akwýjaja mē apumu nê mē apêr Kris kwý hā mē ajarēnh kurê kumrêx.

⁹ No kot ka mē atō ixkapêr mar tā hkôt amnhî nhîpêx kêt nê hāmri te Tirtūm kot anê ate amnhî tomnuj rēnh par mā ajamaxpêr kêt pyrāk.

¹⁰⁻¹¹ No na ka htem ā amnhî nhîpêx anhýr kêt nê. Ra mē ate Pahihti Jejus Kris kôt amnhî nhîpêx mex jakamā na htem ja hā mē apumu nê Tirtūm kot mē ato hkra hā mē ajarēnh kurê kumrêx. Kot kaj mē ā hkôt amnhî nhîpêx anhýr o apa nê mēmo arîgro hā apunuj nê apa htā Jejus kaga hkêt nê. Hāmri nê nhýrmā ma Tirtūm nhō krî hwýr api nhūm mē apumu nê mē ato mex rax nê. Hāmri ka mē ō krî kamā mē panhō Pahihti Jejus Kris wa kuri atūr tūm nê amex nê apa ho apa.

¹² Nê na ka mē ra Tirtūm kot amnhî nhîpêx mar týx nê amnhî krā kamā kot amnhî nhîpêx mā ajamaxpêr týx o ri apa. Tā nom kot paj arî mē amā ja jarēnh rāhā ho ri ixpa.

¹³ Kormã ixtîr ri kot paj xatã mê amã harênh o amnhîrit. Ja na kêt inhmã hprãm. Mê ate nhÿrmã tanhmã ri ajamxpêr to nê hkaga pumaj.

¹⁴ Na pre mê panhõ Pahihti Jejus Krisja inhmã tokyx ixtÿk ã ijarê. Kot paj xep kritpêrn ri ixtîr nê ixpa hkêt nê.

¹⁵ Jakamã na pa kormã ixtîr ri ã mê amã kagã nhîpêx anê. Mê ate inhmÿr pê arî omunh nê kamã harênh nê Tîrtûm kot amnhî nhîpêx mã ajamxpêr tÿx rãhã ho ri apa kaxyw.

Pêtre kot no ho Jejus pumunh ã amnhî jarênh

Matêwre 17.1-5; Makre 9.1-8; Sikün Ximotre 3.16-17

¹⁶ Nê na pa pre ra tanhmã mê amã mê panhõ Pahihti Jejus Krisja jarênh to. Hihtÿx o hihtÿx ã harê nê ãhpumunh tÿx o ãhpumunh tÿx ã harê. Nê nhÿrmã akupÿn mê pahwÿr wrÿk ã harê. No na pa pre amnhî krã hkôt ã harênh anhÿr kêt nê. Na pa pre inho ho Jejus hihtÿx o hihtÿx ã omunh o hkôt ixpa nê ixte omunh xã hkôt ã mê amã harênh anê.

¹⁷⁻¹⁸ Amnepê mã kormã ixkwÿjê mê mê ixte arî hkôt ixpa ri pa prem hkôt hixêt prêk nhîmök wÿr api. Pa nê kaxyw Xiakre nê Juãw mê pa mê hkôt ixpimrãatã hixêt ã api nê himök ã ixkuhê. Hãmri nhûm Tîrtûm tanhmã Jejus to nhûm hirã htÿx kãm xa. Hãmri nhûm Mêpahpãm Tîrtûmja mê inhmã kapêr. Kaxkwa kamã hirã htÿx rax rûm mê inhmã kapêr o:

—E ota lxxkrata xa. Inhmã hapê ho inhmã hapê. Anê.

Tã ra ixte mar xã hkôt pa amnhî xõ ri mê amã harê nê hã kagã.

¹⁹ Na pa prem ã hixêt prêk nhîmök ã Jejus pumunh nê Tîrtûm kot tanhmã harênh to hã mar anê. Hãmri nê ijamxpêr o:

—Nã ãm hãmri na pre amnepêrn Tîrtûm nhÿ hã kapêr jarênh o mê pa xwÿnhjaja Jejus kukamã ã harênh anhÿr o pa. Anê.

Mê kot tanhmã Jejus kukamã harênh toja te kot kamãt kô kamã kanê hpök nhîrã hkryre pyrãk. Tã koja nhÿrmã akupÿn wrÿ hãmri nê te myt kator nê hirã mex nhûm mê pahte mêmoj pumunh mex pyrãk. Jakamã kwa kêr pu mê kot tanhmã Jejus kukamã harênh toja mar tÿx rãhã nhûm nhÿrmã te myt kator pyrã nê akupÿn mê pahwÿr wrÿ.

²⁰ Tîrtûm kapêr ã kagã htûm kot tanhmã ÿ hã kapêr jarênh xwÿnhjê jarênh to. Mê kot mêmoj kukamã ujarênh ã mê harê. Nê Jejus kukamã tanhmã ujarênh to hã mê harê. ã mê kot mêmoj kukamã harênh kot anhÿr. Nom na pu htem amnhî krã hkôt ã mê ujarênh anhÿrja mar tÿx kêt nê. Kojã Tîrtûm Karõ hprî hã mê pamã ho amnhîrit pu mê rî kormã pahprî hã mar tÿx nê.

²¹ Na pre ÿ hã kapêr jarênh o mê pa xwÿnhjaja amnhî krã hkôt hkwyjê mã ujarênh o pa hkêt nê. Tîrtûm Karõ na pre tanhmã mê hkrã hto nhûm mê ÿ hã hkwyjê mã tanhmã harênh to ho pa nê ÿ hã mê pamã hã kagã.

2

Tîrtûm kapêr jarênh o hêx xwÿnhjê jarênh Korosê 2.16-17; Wam Ximotre 4.1-5; Sikün Ximotre 3.1-9; Jutre 3-16

¹ Nê amnepêrn na pre Ijaew kwÿjaja te mê kêp Tîrtûm nhÿ hã kapêr jarênh xwÿnh pyrãk. Nom Tîrtûm kapêr kwÿm ri hkwyjê mã tanhmã ho hêx to ho pa. Tã koja nhÿrmã mêmojaja mê urãk nê mê awÿr mra nê ã mê amã Tîrtûm kapêr o hêx o pa anê. Nê kapêr kwÿm ri tanhmã mê ajahkre hto ho mê amã hêx o mê akôt pa. Mê ate mê mar nê amnhî nhîpêx nyw kaga nê hpãnhã mê kot amnhî tomnuj kôt apa hprãm xãj nhûm mê hêx rom tanhmã mê ajahkre hto ho pa. Pahihti Jejus kot mê nê htyk tã nhûm mê hkôt amnhî nhîpêx kêt nê axtem nê ri kapêr o hêx o pa. Mÿrapê kojã Tîrtûm tokyx mê kot amnhî xã htÿx kamã hamak tûm xã hwÿr mê rênh pa.

² Kojã mê ohtõ nê mê kapêr ma nê kãm mê mar prãm nê. Nê mê hkôt hamaxpêr nê mê hkôt amnhî nhîpêx o pa. Jao ra hpijaãm kêt nê mê hkôt htÿx ri tanhmã amnhî tomnuj to ho ri pa. Tã ã mê kot Tîrtûm kapêr o mê hêx xwÿnhjê mar nê mê hkôt amnhî nhîpêx anhÿr jakamã kojã mê kãm Tîrtûm kapêr mar prãm xwÿnhjaja mê kot amnhî nhîpêx ã mê omu nê Tîrtûm kapêrja mex kêt ã harênh japêr.

³ Tîrtûm kapêr o mê hêx o mê pa xwÿnhjaja na htem kãxpore pix prãm xãj mê awÿr mra nê tanhmã mê amã kapêr jarênh o hêx to ho pa nhûm Tîrtûm ja hã mê omunh rãhã ho hkrî. Na hte nhÿÿm mra kêt nê rÿ htÿx òt o hikwÿ hkêt nê. Na hte arî mê kot amnhî nhîpêx ã mê omunh rãhã ho hkrî. Tã koja nhÿrmã ma mê kot amnhî xã htÿx kamã hamak tûm xãta hwÿr mê kurê nhûm mê ma hwÿr hapêx pa.

⁴ Nê amnepê mã kaxkwa kamã Tîrtûm kapêr o mê wrÿk xwÿnh kwÿjaja na prem axtem nê Tîrtûm kapêr nhîröp kuhê nhûm tee ri amnhî tã mê omu hãmri nê amnhî nê mê kator pa. Mê kamã ukaprî hkêt nê amnhî nê mê kator pa hãmri nê mê kot amnhî xã htÿx kamã hamak tûm xãta wÿr mê hano. Nhûm prem ma hwÿr pa nê ahkre xupÿm kãm kamãt kô kamã arî hkrî ho hkrî. Tîrtûm kot mê piitã tanhmã mê harênh to xã hã arîgroja jamãr o hkrî. Nê tee ri kãm hapôx prãm kaprÿ ho hkrî.

⁵ Nê amnepêrn pika kamã ri mê pa xwÿnhjaja na prem haxwÿja piitã amnhî tomnuj pix o ri pa. Jakamã nhûm Tîrtûm

ja hã mē omu nē mē kamã ukapri hêt nē. Nē mē hwyr na rax mē. Mē kãm kapër mar prãm kêt jakamã nhũm mē hwyr kumē nhũm wrøk rax kumrëx nē mē hanhir pa nē mē himex. Æm Noehiti mē hkwý pē 7 pixjaja nhũm mē kurom htr̄ nē hkã hkĩnh nē mex nē pa. Noehiti kormã na xwýj ri kot mē kãm Tirtũm kapër jarënh o ri mē hkôt pa htã nhũm mē kuma nē ãm kuma. Mýrapē na prem piitã pikaprãr pa.

⁶ Nē Sotõ mē Gomo wa kamã mē pa xwýnhjaja haxwýja na prem amnhĩ tomnuj týt kumrëx o pa nhũm Tirtũm wamtajē pyrã nē mē kamã ukapri hêt nē. Na pre kaxkwa rũm mē hipy mēmo hpók kwý rē nē ho mē ho hapëx pa. Tã mēmo kaxyw na pre ã mē hipëx anē? Nã mē piitã mē kot mē harënh mar nē hamaxpër o:

—Na hte ã Tirtũm mē kot amnhĩ tomnuj xwýnhjē nhĩpëx anē.

Anhýr o hamaxpër kaxyw na pre ã mē hipëx anē.

⁷⁻⁸ Nom Rohtija na pre Tirtũm Sotõ nē kator jakamã nhũm htyk kêt nē. Na pre hkwýjē rom tãm amnhĩ nhĩpëx tã mē kot amnhĩ tomnuj týt xwýnhjē nhõ krĩ kamã òrkwý nē ri pa. Nē apkati mē tee ri mē kot amnhĩ nhĩpëx ã mē omu nē mē ý hã hkapri nē tee ri mē hkukamã hamaxpër o pa. No nhũm mē amnhĩ tomnuj ã amnhĩ pumunh nē tokyx tãm amnhĩ nhĩpëx kêt nē. Nē apkati mē tanhmã amnhĩ tomnuj to nē kapër punuj o pa nhũm Rohti tee ri mē omu nē hkapri htyx nē pa.

⁹ Tã nhũm Tirtũm mē himex kaxyw nē mē nē kator nē mē himex pa. Na hte ã Tirtũm mēmoj punuj pē mē kot amnhĩ kaxyw kãm hamaxpër nē hkôt amnhĩ nhĩpëx xwýnhjē pytar anē. No mē kot amnhĩ tomnuj xwýnhjaja na hte axtem mē hipëx. Tã koja nhýrmã mē pahpiitã tanhmã mē pajarënh to xã hã arigro kato nhũm ma mē kot amnhĩ xã htyx kamã hamak tũm xã wýr mē rënh pa. Æm tapxipix kot ã mē hipëx anhýr kaxyw ãhpumunh týt.

¹⁰ Tã mē hpijaam kêt kãm amnhĩ tomnuj o mē pa xwýnhjaja nē mē kot Tirtũm kapër mar nē ãm mar xwýnhjaja koja nhýrmã mē homnuj týt nē.

Nē Tirtũm kapër o hëx o ri mē pa xwýnhjaja na htem amnhĩ to jarkrar pix o pa. Nē Tirtũm kapër o mē wrøk xwýnhjē hã hpijaam kêt nē. Nē axtem nē mē ho kapër punuj pē tanhmã mē hapry hto ho pa.

¹¹ Tã nhũm htem amnhĩ tã mē kuma nē ãm mē kuma. Mē kurom mē hihtýt kumrëx tã no ãm amnhĩ tã Tirtũm mã tanhmã mē ho kapër to hêt nē.

¹² Nē mry xoprē na hte htyx ri pa ho pa. Tã Tirtũm kapër o mē hëx o mē pa xwýnhjaja htem mry xoprēta pyrã nē htyx ri hamaxpër

mex kêt o pa. Jao hprĩ hã mēmoj mar kêt tã htyx ri hijuk ri tanhmã mēmoj jarënh to.

Nē mry xoprēja htyx pa nhũm mē kot hparja pyrã nē mē kot Tirtũm kapër o hëx o mē pa xwýnhjaja koja Tirtũm nhýrmã kuwy hwýr mē ho hapëx nē kamã mē rënh pa.

¹³ Nē koja nhýrmã Tirtũm mē kot tanhmã mē ama hëx to ho pa hã mē omunh xã hkôt mē homnuj týt nē. Na htem hpijaam kêt nē mē piitã mē noo mã tanhmã amnhĩ tomnuj to ho pa. Kamãt kãm nē arigro hã. Nē mē kãm tanhmã amnhĩ nhĩpëx to hprãm xã hkôt pix mã amnhĩ tomnuj o pa.

Na htem te mē kēp Kris kôt mē atõjē pyrã nē mē akôt Tirtũm kapër mar xã hã ixkre hwýr agjē nē mē anhihkõ hã mē kot Jejus tyk mã hamaxpër kaxyw pãwti hkwý hku. Nom htyx hkur o hkrĩ nē htyk mã hamaxpër kêt nē. Kãm Jejus kĩnh kêt tã hëx rom hpijaam kêt kãm mē anhihkõ hã htyx ri hkur o hkrĩ.

¹⁴ Nē nhýri krĩ hwýr pøj nē mēnijē pumu nē kãm mē hkĩnh nē. Ra mē mjën ri pa htã nhũm mē kãm mē ho amnhikati hprãm nē mē kamã hpijaam kêt o ri pa.

Nē kormã mē kot Kris kôt amnhĩ xunhwýr tohtuj anhýr xwýnhjē hwýr mra nē hëx rom tanhmã mē kãm kapër to pē mē no kupyr o ri mē hkôt pa. Mē kot mē mar nē Kris kaga nē mē hkôt ri amnhĩ nhĩpëx prãm xã ã mē hipëx anhýr o pa.

Na htem hikãxpore rũnh o pikuprõnh pix kukamã hamaxpër o ra ho õxy nē.

Æ na htem amnhĩ nhĩpëx anhýr o pa. Tã ra Tirtũm kot mē homnuj týt kaxyw mē hã amnhĩ jarē.

¹⁵⁻¹⁶ Te mē kot kamãt kõ kamã pry juk ã hpikunor nē htyx ri pa pyrãk o na htem amnhĩ nhĩpëx nē kãm Tirtũm kapër mar prãm kêt nē amnhĩ tomnuj pix o pa.

Amnepêm Peo hkra Paraãwta kēp Tirtũm nhý hã kapër jarënh o pa xwýnh tã axtem nē kãxpore rax prãm xãj tanhmã amnhĩ tomnuj to kaxyw. Nhũm Tirtũm tee ri ja hã omu nē Paraãw krit jumënreja tanhmã hakwa hto nhũm kãm kapër. Jumënre kapër kêt tã nhũm Tirtũm tanhmã hakwa hto nhũm kãm kapër nē tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nē ã amnhĩ nhĩpëx anhýr kêt nē. Tã mē kot Tirtũm kapër o mē hëx ho mē pa xwýnhjaja na htem Paraãw pyrã nē kãxpore rax prãm xãj tanhmã amnhĩ tomnuj to pix prãm.

¹⁷ Te hino ra grã nhũm mē tee ri kamã gõ japër pyrãk o mē htem amnhĩ nhĩpëx. Rý te kakrã hapõx nhũm mē kot omunh nē na wrøk ã hkamnhix kapry pyrãk. Tã ra Tirtũm mē kaxyw kamãt kõ htyx pē mē kot amnhĩ xã htyx kamã hamak tũm xãta o mē nē.

¹⁸ Na htem htyx ri amnhĩ tomnuj o pa hã mē amã amnhĩ to jarkrar o ri pa. Jakamã nhũm mēhõ ra amnhĩ tomnuj kaga kaxyw nhũm mē tee ri ja hã omu nē kot ã amnhĩ

nhîpêx anhÿr pymaj tanhmā nê kām kapêr to nê mē kām:

—Kwa ixte amnhî tomnuj o ixpa htā nhūm Tirtūm ja hā ixpumu nē am ixpumu nē arî inhmex ā ijarē. Na pa hte mē hkuprÿjê hwÿr mra nhūm ja hā ixpumu nē am ixpumu nē hā tanhmā ixto hkêt nē. Jakamā kwa mē ixpyrà nē arî ā amnhî nhîpêx anhÿr o ri apa. Koja Tirtūm tanhmā hā ato hkêt nē. Anē.

Hāmri nhūm mē tee ri kuma nē ra hamaxpêr kati nē.

¹⁹ Na htem mē kām kapêr o:

—Kwa mē ixpyrà nē māmri amā tanhmā amnhî tomnuj to hprām xā hkôt amnhî nhîpêx o ri apa. Mēhō kot kêt ja nē tanhmā amā kapêr to? Anē.

Mē kot amnhî tomnuj xàja te kêp mē ō patrāw pyrāk jakamā na htem am kôt pix mā amnhî nhîpêx o pa. Jakamā kot pu mē tanhmā amnhî tomnuj to. Nē gaa nē axte. Nē gaa nē ra ho amnhî pyrāk. Hāmri nē tee ri pamā hkaga hprām kaprÿ nhūm te kêp mē panhō patrāw pyrāk o mē panhîpêx pu mē am kôt pix mā ri amnhî nhîpêx o ri papa.

²⁰ Nē koja mēhō ra Tirtūm kapêr ma. Nē mē panhō Pahihti Jejus Kris jarēnhja nhūm hprî hā kuma. Kêp mē pahte amnhî tomnuj pē mē papytār xwÿnh ā harēnh ma. Tā nhūm mē kot Tirtūm kapêr o mē hēx xwÿnhjaja hwÿr mra nē tanhmā kām ho hēx to nhūm mē kuma nē kot amnhî nhîpêx tūm o awjanā. Jao amnhî tomnuj tÿx o kormā kot Tirtūm kapêr mar kêt ri kot amnhî tomnujta jakre.

²¹ Kêp am aa kot Tirtūm kapêr mar kêt rāhā htyk ronhÿx ja kām mex nē. Nom ra kot mar mex tā am kuma nē hkaga jakamā koja mex kêt kumrêx.

²² Mē kot ā mē kot amnhî nhîpêx anhÿr ā mē harēnh kot:

Rop na hte ōjaîr nē akupÿm ōjaîrta ku.

Nē hagrō na htem unē nē hkumrā nhūm muxre. Tā nhūm mē kām ure nhūm akupÿm hprôt nē mra nē akupÿm gyw o amnhî tomnu pa. Anē.

Tā mē kot Tirtūm kapêr o mē hēx xwÿnhjê mar nē mē hkôt amnhî nhîpêx xwÿnhjaja te mē kot rop mē hagrō wa kot amnhî nhîpêxta pyrà nē Tirtūm kapêr kaga nē akupÿm mē kot amnhî nhîpêx tūm o awjanā nē htÿx ri amnhî nhîpêx o pa.

3

Tirtūm kot pika ho hapêx kaxyw kormā amnhî tā mē pajamar ā harēnh

Matêwre 24.29-31; Xiakre 5.7-11; Apokarip 19.11-16, 21.1-8

¹ E Kris kôt ixkrāmnhwÿjaja. Na pa pre ra wam kagāta nhîpêx nē mē awÿr kurē. Tā ra axte hkôt ja nhîpêx. Hamē wa kamā na pa mē amā Tirtūm kot tanhmā amnhî nhîpêx to

hā harē. Nē Jejus Kris nhÿrmā akupÿn mē pahwÿr wrÿk ā harē. Mē ate mar nē tām amnhî nhîpêx nē tām ajamaxpêr o kutêp mē apa kaxyw.

² Amnepê mā Tirtūm nhÿ hā kapêr jarēnh o ri mē pa xwÿnhjaja na prem Tirtūm kot nhÿrmā mē pahwÿr mēhō mēnh mā xwÿnhnta jarēnh o pa. Kot nhÿrmā mē pahwÿr wrÿk nē mē pahto amnhîptār o pa hā harēnh o pa. Tā kêt ka mē kapêr ma nē hā ano htÿx nē hkôt ajamaxpêr tÿx rāhā ho ri apa. Nē Jejus kot mē awÿr mē rēnh xwÿnhjaja ka mē kapêr ma. Mē kot mē amā mēmoj jarēnh o mē pa xwÿnhjaja na htem tanhmā mē amā Pahihti Kris jarēnh to ho ri mē akôt pa. Nē tanhmā kot mē panē amnhî nhîpêx to hā harē. Tā kêt ka mē kapêr ma nē hā ano htÿx nē kām ajamaxpêr tÿx rāhā ho ri apa.

³ Nē kwa mē inhma. Nhÿrmā Kris akupÿn mē pahwÿr wrÿk xwÿj ri koja mē kot amnhî tomnuj tÿx xwÿnhjaja mē awÿr mra. Mē hpîjaam kêt o pa xwÿnh jakamā koja mē tanhmā mē akamā amnhî tomnuj to ho pa. Nē mē apê Kris kwÿ hā mē apumu nē mē atā hpêr o pikēnh o pa.

⁴ Nē htÿx ri Kris ā mē akukja nē mē amā:

—Kwa no Krisja? Amnepêm akupÿn wrÿk nē mēmoj piitā tanhmā hipêx to hā amnhî jarēnh tā arî Tirtūm kot mēmoj to kator krax rūm mēmoj amari rāhā. Ra mē panhîgêtjaja pikaprār par tā nhūm kormā akupÿn wrÿk kêt nē. Kot mē pamā amnhî to hēx kēnā. Mo kaxyw koja kêt akupÿn mē pahwÿr wrÿ? Kot mē pamā amnhî to hēx kēnā. Anē.

⁵⁻⁶ Nom ā mē kot harēnh anhÿrja kot anhÿr kêt. Tirtūm kot mēmoj to kator krax rūm mēmoj amari rāhā hā mē kot harēnhja kot anhÿr kêt. Na pre Tirtūm kapêr pix o kaxkwa nē pika ho kato. Nhūm gō hkwyja kapêr mar xā hkôt pika hā amnhî jahkre. Nhūm hpānhā panhî nhîpêx. Tā no nhūm mē kapêr mar kêt kumrêx. Nē mē kot amnhî tomnuj tÿx mÿrapê na pre Tirtūm gō ho mē himex pa. Jao mē hwÿr na rax mē nhūm mē hanhir o mē ho hapêx. No nhūm mē kot Jejus wrÿk ā hpêr o pikēnh xwÿnhntaja kām ā mē harēnh anhÿrja mar prām kêt. Ra mē kot mar tā kām mar prām kêt nē arî mēmoj piitā rāhā hā ri harēnh o pa.

⁷ Pika nē kaxkwaja arî rāhā htā koja Tirtūm nhÿrmā mē pahpiitā mē pahte tanhmā amnhî nhîpêx to hā mē pahpumunh kôt tanhmā mē pajarēnh to. Nē mē kot amnhî xā htÿx kamā hamak tūm xā hwÿr mē kot amnhî tomnuj xwÿnhjê rēnh pa. Hāmri nhūm ri kormā kaxkwa nē pikaja wa pôr nhūm himōk ā mēmoj piitā hkaxār pa nē hapêx.

⁸ Nē amgrā pē 1.000ja mē pamā amgrā xohtō rax kumrêx no Tirtūm mā te arigro pixire pyrāk.

⁹ Tã ra kot mē pamã tokyx Jejus akupÿn wrÿk ã harēnh tã nhūm kormã wrÿk kêt jakamã nhūm htem tōhã tee ri hamãr o pa nē hamaxpēr o:

—Hēxta waa nē. Tirtūm kot tokyx akupÿn mē pahwÿr Jejus mēnh ã amnhī jarēnh tã tokyx mēnh kêt nē.

Anhÿr o harēnh tã no ãm kot anhÿr kêt. Na kormã amnhī tã mē kot amnhī tomnuj xwÿnhjē jamãr o pa. Mē kot amnhī tomnuj kaga nē hkôt amnhī xunhwÿr prãm xàj kormã amnhī tã mē hamã. Kãm mē kot amnhī xà htÿx kamã hamak tūm xãta wÿr mēhō ho pixire nē mōr prãm kêt jakamã na kormã amnhī tã mē hamã.

¹⁰ Tã koja nhÿrmã mē panhō Pahihtija akupÿn mē pahwÿr wrÿ. Te mē àhkīnh xwÿnh kot amnhī nhīpēx pyrãk o mē pajaēr pé akupÿn wrÿ. Pu mē pahtÿx ri tanhmã paxãpēnh to ho ri papa nē akupÿn wrÿk ã hkamnhīx kêt rãhã nhūm mē pajaēr pé akupÿn wrÿ. Hãmri nē ma akupÿm amnhī kôt mē pahte hkôt amnhī xunhwÿr xwÿnhjē ho ãpir par kurē kumrēx. Hãmri nhūm rī kormã kaxkwa kaxãr o hkrihkrit tÿx kãm hapēx pa. Nē kanhēti mē myt nē mytwÿrre kaxãr pa. Nē pikaja nē mãânēn kamã mēmoj piitã kaxãr pa.

¹¹⁻¹² Koja nhÿrmã ã mēmoj hapēx par anē. Jakamã kwa kēr pu mē Jejus kutēp tãm ri amnhī nhīpēx rãhã ho ri papa. Nē Tirtūm kapēr kôt pix mã amnhī nhīpēx rãhã nē. Nē kãm hprãm xà hkôt tanhmã kãm amnhī nhīpēx to ho ri papa. Kēr kē Jejus akupÿn wrÿ nē ã mē pahte amnhī nhīpēx anhÿr ã mē pahpumu. Koja wrÿ nhūm rī kormã kaxkwa nē pikaja wa kaxãr pa. Nhūm kuwy mÿri kaxkwa kamã mēmoj harir xwÿnhja xēr nē ôr pa nē hapēx.

¹³ Tã kwãr mãmrī mēmoj ã amnhī nhīpēx anē. Koja Tirtūm axte mēmoj mex nhīpēx. Na pre amnhī kukamã ja jarēnh o:

Kot paj axte pika nē kaxkwa hō nhīpēx nhūm mex o mex. Nhūm mē kot amnhī kaxyw Jejus mã hamaxpēr nē hkôt amnhī xunhwÿr nhūm ixte mē mex ã mē harēnh xwÿnh pixjaja koja mē pika nywja kamã mex nē pa ho pa. Anē.

¹⁴ Jakamã kwa ixkrãmnhwÿjaja. Kēr ka mē Kris kutēp kapēr kôt amnhī nhīpēx mex rãhã ho ri apa. Jao kutēp ajamakētkati nē axãmnhīx axpēn kôt apa. Kēr ka mē nhÿrmã amnhī wÿr omu nē tee ri amnhī kukamã ajamaxpēr kêt nē. Ate tãm amnhī nhīpēx o apa hã amnhī pumu nē akīnh nē amnhī wÿr omunh o akuhē.

¹⁵ Nom arī Jejus kãm mē pahkwÿjē ho hkra hprãm jakamã na kormã amnhī tã mē hamã nē tokyx akupÿn wrÿk kêt nē. Na pre Jejus kôt mē pahō Pawre Tirtūm nhÿ

hã ã mē pamã ja hã kagã anē. Pawreja ixkrãmnhwÿ mex na.

¹⁶ Na hte mē pakaxyw kagã nhīpēx nē kamã mē pahte Jejus kutēp tãm amnhī nhīpēx o papa hã mē pamã karō. Na hte tōhã mēmoj tã kagã pu mē kamã harē nē tee ri pahprī hã mar mã no ãm mar mex kêt nē. Hãmri nhūm Tirtūm kapēr o mē hēx o mē pa xwÿnhhtaja haxwÿja kuma hãmri nē amnhī krã hkôt hijuk ri tanhmã ho hēx to. Te mē kot hprī hã mar nē harēnh pyrãk nom hprī hã mar kêt nē. ã na htem Tirtūm kapēr ã kagã piitã ho hēx o pa anē. Mÿrapē koja mē nhÿrmã amnhī xã kamã hamak tÿx kumrēx.

¹⁷ Tã e Kris kôt ixkrãmnhwÿjaja. Ra mē ate mē harēnh mar jakamã kwa mē okora. Mē amnhī nē mē omunh mex nē mē hkôt amnhī nhīpēx kêt nē. Kot kaj mē anē nē Tirtūm kôt amnhī nhīpēx mex kêt nē.

¹⁸ Na ka htem mē papytãr xwÿnh Pahihti Jejus Kris kôt ri amnhī nhīpēx o apa. Tã kēr ka mē arī hkôt amnhī nhīpēx mex rãhã ho ri apa. Nē hkôt amnhī xunhwÿr tÿx nē. Kēr kē amnhī tã mē apumu nē mēmoj to mē akutã nojarēt nē. Krisja mex o mex nē hihtÿx o hihtÿx. Tã kēr pu mē kãm mex o mex ã mãn harēnh rãhã ho ri papa.

Tã ãm ja pix. Ixpē Simãw Pêtre na pa ã mē amã ja hã kagã nē mē awÿr mēnh anē.

Wam Juāw Juāw kot Jejus kôt hkwỳjê hwỳr kagà nê mēnh

Juāw na pre kagàja nhìpèx. Na pre kagà hkwỳ nhìpèx rax nê. Na pre määnēn Juāw kot tanhmā Jejus kot amnhì nhìpèx to ho pa ā kagà nê Apokarip nê Sikūn Juāw nê Hapuhā Juāw nhūm pre ja piitā Tirtūm nh̄y hā hā kagà.

Juāwja Jejus nh̄y hā hkrajê jahkre ho mē pa xwỳnhjê hō na pre. Nê kēp Xiakre htō na pre. Tā ra hpigēt tỳx nê kagàja nhìpèx. Urāk nê mē kot Tirtūm kôt amnhì xunhwỳr xwỳnhjê mē hipèx. Mē kot kamā harēnh nê mar nê kām axpēn kīnh o pa kaxyw. Nê mē kot amnhì tomnuj ā amnhì pumunh kôt tanhmā amnhì nhìpèx to hā mē kām karō nê hā kagà. Ā na pre Juāw mē kām mēmoj jarēnh nê hā kagà anē nê mē hwỳr kumē. Nê mē kām:

Jejus kēp Tirtūm kapēr o amnhīrīt xwỳnh ā harēnh

Juāw 1.1-4; Eprēw 1.1-4

¹ Pa ixpyrà nê mē ate Jejus kôt amnhì xunhwỳr xwỳnhjaja? Xà mē amex? E ot pa mē amā kagàja nhìpèx nê mē awỳr kumē. Ixte mē amā Tirtūm kapēr o amnhīrīt xwỳnh jarēnh kaxyw. Amnepē mā kormā mēmoj amrakati ri nhūm pre ra rāhā ri pa ho pa. Ām kukwak ri pix mā na pu htem Tirtūm mē wa kuri pahťir tūm nê papa ho papa mā xwỳnh. Tā ŷ hā mē ixte kapēr o mē ajahkre ho ri mē ixpa xwỳnhjaja na pa prem ixpiitā kormā akupỳm kaxkwa hwỳr āpir kēt ri inhno ho omunh o ri hkôt ixpa. Nê mē ijamak o kapēr mar o ri hkôt ixpa. Nê mē inhīhkra ho hkupēnh o ri hkôt ixpa.

² Na pre kaxkwa kamā Hipéèxā hkôt ri pa ho pa htā amnē pika hwỳr mē pahwỳr wrỳ. Hāmri nê jar mē pakamā kato pa pre mē ixkwỳjaja omu. Tā mē ixte omunh xā hkôt na pa htem amnhì xō ri tanhmā mē amā harēnh to. Koja nh̄ymā akupỳm mē pahto mē pahťir pu mē kuri pahťir tūm nê pamex nê papa ho papa.

³ Na pa prem tanhmā kapēr to hā mar o ri hkôt ixpa. Nê kot tanhmā mē kām amnhì nhìpèx to hā omunh o ri hkôt ixpa. Ta kagàja kamā amnhì xō ri ixprī hā mē amā harē nê hā kagà. Mē ate ixpyrà nê aprī hā kot tanhmā amnhì nhìpèx to ho pa hā harēnh mar kaxyw. Jao mē pahpiitā te ixkre tipxi kamā mē papa pyràk o amnhì nhìpèx o papa nê axpēn kôt pajamaxpēr o ri papa. Jao Mēpanhìpéèxā Maati mē Kra Jejus Kris wa hkôt amnhì nhìpèx mex o ri papa.

⁴ Tā pa mē amā kagàja nhìpèx nê mē awỳr kumē. Mē ate kamā harēnh nê mar hāmri

nê mē ixpyrà nê ajamakētkati nê akīnh nê ri apa kaxyw.

Tirtūm mex o mex ā harēnh

Juāw 8.12; Epes 5.3-21; Wam Tesarōn 5.5; Eprēw 4.14-16, 9.11-14

⁵ Nê Jejus kot tanhmā mē inhmā Tirtūm jarēnh toja kot paj amnhì xō ri mē amā hā kagà. Nā Tirtūm kot amnhì nhìpèxja mex o mex. Aa kot tanhmā amnhì tomnuj to hkēt. Mex o mex jakamā na hte tanhmā mē kot amnhì tomnuj to mā amnhì jagjēnh kēt. Ām kot amnhì to mex o kot amnhì to mex rāhā nê pa ho pa xwỳnh na.

⁶ Kot mē pahte amnhì tomnuj kēt ā mē pamā karō jakamā kot puj mē pahpē hkra hā amnhì jarēnh tā amnhì tomnuj pix o ri papa nê ām pahpē hkra hā amnhì jarēnh kaprý nê amnhì to paxèx. Tirtūm krajaja na htem amnhì tomnuj o pa hkēt nê.

⁷ Nom kot puj mē hkôt amnhì nhìpèx nê urāk nê tām ri amnhì nhìpèx o papa. Nê kapēr kôt ri amnhì nhìpèx. Hāmri nê te ixkre tipxi kamā ri Tirtūm mē Kra Jejus Kris wa hkôt axpēn to papa pyràk o amnhì nhìpèx. Na pre Jejus mē panē ty nê hkamrō axkapī. Jao mē pahte hkôt amnhì xunhwỳr xwỳnhjaja mē panē mē pahte amnhì tomnuj piitā hpānhā amnhīrer pa. Jakamā ām kukwak ri pix mā na pu htem tām amnhì nhìpèx o ri papa.

Mē pahpiitā mē pahte amnhì tomnuj xwỳnh ā mē pajarēnh

⁸ Nê mē pahte tōhā tanhmā amnhì tomnuj to jakamā kot puj mē aa pahte amnhì tomnuj kēt ā amnhì jarē hāmri nê ā amnhì jarēnh anh̄yr o paxèx. Tirtūm kot mē pahpiitā mē pahte amnhì tomnuj ā mē pahpumunh xwỳnh kēnā.

Mē pahte amnhì tomnuj nê tanhmā amnhì nhìpèx to hā mē pamā karō

Xiakre 4.9-10

⁹ Nê mē pahpē Tirtūm krajaja na pu htem tanhmā amnhì tomnuj to hāmri nê tee ri ja hā amnhì pumu nê pahkaprī nê. Nê tokyx amnhì to Tirtūm wỳ. Hāmri nhūm mē pama nê Jejus kukwak ri tanhmā hā mē pahto hkēt nê. Ām amnhì katut kôt tanhmā mē pahte amnhì tomnuj tota rē nê axte kām hamaxpēr kēt nê. Ra kot mē pahťir amnhì jarēnh xā hkôt. Na hte Tirtūm amnhì jarēnh xā hkôt tanhmā amnhì nhìpèx to. Tā ra kot mē pahpē hkrajaja mē pahte amnhì tomnuj piitā amnhì katut kôt rēnh par ā amnhì jarēnh jakamā na pre ā mē panhìpèx anē. Na hte mēmoj tā tanhmā amnhì jarēnh to hāmri nhūm apkati nhūm ihkjê ho kumē nê axtem tanhmā mēmoj jarēnh to hkēt nê.

¹⁰ Ra kot mē pahpiitā mē pahte amnhì tomnuj xwỳnh ā mē pajarēnh jakamā kot puj mē pahťir ā mē pajarēnh anh̄yrja ma nê

hkôt pajamaxpēr kêt japêr. Rÿ kuma nê ãm kuma nê pajamaxpêr o:

—Nà ixte tanhmã amnhî tomnuj tore hã.

Anhÿr o amnhî jarê. Hãmri nê te ate Tirtûm hêx xwÿnh ã harênh pyrãk. Jao amã kapêr mar prãm kêt ã amnhî to amnhîrît.

2

Jejus kêp mē paxyr pē Tirtûm mā kapêr xwÿnh ã harênh

Wam Ximotre 2.5; Eprêw 9.11-14

¹⁻² E mē ate amnhî tomnuj o apa hkêt kaxyw na pa ã mē amã ixkapêr nê hã kagã anê. Mē ate kamã harênh nê mar hãmri nê tanhmã amnhî tomnuj to hkêt kaxyw. Jejus Kris na pre mē pahpiitã mē pahte amnhî tomnuj pãnhã amnhîrêr kaxyw mē panê ty. Jakamã kot puj mē pahpê hkrajaja tanhmã amnhî tomnuj to nhûm ja hã mē pahpumu nê te kêp mē paxyr pē Tirtûm mā kapêr xwÿnh pyrãk o amnhî nhîpêx. Mē pakurom aa kot amnhî tomnuj kêt jakamã na hte mē paxyr pē Tirtûm mā kapêr nhûm kuma. Hãmri nê kukwak ri pix mã mē pahte tanhmã amnhî tomnuj to piitã amnhî katut kôt rênh pa nê axte kãm hamaxpêr kêt nê.

Tirtûm krajaja kot Tirtûm kôt amnhî nhîpêx ã mē kãm karô

³ Nê na pu htem Tirtûm kôt ri amnhî nhîpêx o papa hã amnhî pumunh kôt pahpê hkra hã amnhî pumunh mex nê.

⁴ Nom koja mēhõ kêp hkra hã amnhî jarênh tâ hkôt amnhî nhîpêx kêt nê ãm kêp hkra hã amnhî to hêx.

⁵ Na htem Tirtûm kapêr kôt amnhî nhîpêx o pa pē kãm hkînh tÿx ã amnhî to amnhîrît. Nê kêp hkra hã amnhî to amnhîrît mex o pa.

⁶ Jakamã kêr ka mē apê Jejus Kris kwÿ hã amnhî jarênh xwÿnhjaja hkôt pix mã amnhî nhîpêx mex o ri apa.

Mē pamã axpên kînh ã mē pamã karô

Juāw 13.34-35; Wam Juāw 3.14-18

⁷ E Kris kôt ixkrãmnhwÿjaja. Inhmã mē akînh jakamã na pa ã mē amã mēmoj jarênh nê hã kagã anê. Kot paj mē amã mēmoj nyw jarênh kêt nê. Ra mē ate mēmoj mar xwÿnhã kot paj axte mē amã harê. Mē pamã axpên kînh nê tãm axpên nhîpêx o papa hã Tirtûm kot mē pamã karôta. Ra mē ate mar tâ kot paj axte mē amã harê nê hã kagã.

⁸ Wam Tirtûm kot mē pamã axpên kînh ã mē pamã karôja kormã Jejus kot mē panê htyk hkêt ri kot mē pamã hã karôta na. Tã ra Jejus kãm mē pajapê xaj mē panê htyk jakamã na pa axte ã mē ate axpên nhîpêx anhÿr o apa hã mē amã karô nê hã kagã. Mē ate Kris pyrã nê amã axpên kînh xaj tanhmã axpên kutã anojarêt to ho ri apa kaxyw. Nom kormã mē pahte Jejus kôt amnhî xunhwÿr kêt ri na pu prem ã axpên

nhîpêx anhÿr kêt nê. Tã hkôt amnhî xunhwÿ hãmri nê ã axpên to mex o papa anê.

⁹⁻¹¹ Tã koja mēhõ kot Jejus kôt amnhî nhîpêx ã amnhî jarênh tâ kãm hkwyjê hkînh kãm ãmnhîx ri mē kutã nojarêt o pa hkêt nê. Hãmri nê kot Jejus kôt amnhî nhîpêx ã amnhî jarênh ã amnhî to hêx. Jao te htÿx ri kamãt kô kamã pa pyrãk. No koja mēhõ kãm hkwyjê hkînh kãm mē kutã nojarêt o pa nê määnên Jejus kôt amnhî nhîpêx mex o pa. Jao te hirã kamã ri pa pyrãk. Jakamã tanhmã hkwyjê homnuj to ho pa hkêt nê mē piitã mē ho mex o axpên pyrãk o pa.

Juāw kot mē piitã ahpyñhã tanhmã mē kãm kapêr to

¹²⁻¹⁴ E kot pa ahpyñhã tanhmã mē amã ixkapêr to nê hã kagã. Mē apiiã te mē apê ixkra pyrãk. Na ka prem Jejus kôt amnhî xunhwÿ nhûm Tirtûm ja hã mē apumu nê Kra kukwak ri mē ate amnhî tomnuj piitã amnhî katut kôt rênh pa nê axte kãm hamaxpêr kêt nê. Jakamã ra mē ate Tirtûm kêp Mëpanhîpêxã Maati hã omunh mex.

Nê mē ate Jejus kôt amnhî xunhwÿr ã amgrã sohtô xwÿnhjaja. Amnepêm amrakati ri Jejus ra rãhã ri pa ho pa xwÿnhjaja kôt mē ate amnhî xunhwÿr xwÿnhjaja kot paj mē amã tanhmã ixkapêr to nê hã kagã.

Nê mē akwÿjaja ham Jejus kôt mē ate amnhî xunhwÿr xwÿnhjaja ra mē ate Tirtûm kapêr mã ajamaxpêr rãhã ho ri apa. Jakamã na hte Satanasti mē ate amnhî tomnuj prãm xaj tee ri tanhmã mē akrã hto ka mē Jejus nhÿ hã kutã amnhî to htÿx pē hkôt amnhî nhîpêx kêt nê.

Mē kot amnhî tomnuj xwÿnhjaja tanhmã kot amnhî nhîpêx to

Matêwre 6.24; Eprêw 11.24-26; Xiakre 4.4

¹⁵ Nê kêr ka mē amã Tirtûm kôt amnhî nhîpêx prãm xaj mē kot amnhî tomnuj xwÿnhjê hkôt amnhî nhîpêx kêt nê. Nê mē hamaxpêr punuj xwÿnhjê hkôt ri amnhî nhîpêx kêt nê. Kot kaj mē hkôt amnhî nhîpêx hãmri nê amã Tirtûm kînh kêt ã amnhî to amnhîrît.

¹⁶ Mē kot amnhî tomnuj xwÿnhjaja na htem mēmoj punuj mã hamaxpêr nê hkôt tanhmã amnhî tomnuj to. Nê mēmoj pumu nê ra kãm ho ô hprãm nom Tirtûm pē ja omnuj ã hkamnhîx kêt nê. Rÿ tanhmã mēhõ kot amnhî tomnuj to hã omu nê hkôt kãm amnhî nhîpêx prãm. Nê tanhmã amnhî to jarkrar to ho ri pa. Æ na hte mē kot amnhî tomnuj xwÿnhjaja amnhî nhîpêx anhÿr o pa. Mē kot amnhî nhîpêxã Mëpanhîpêxã Tirtûm kãm hprãm kêt.

¹⁷ Kojã nhÿrmã mē kot tanhmã amnhî tomnuj toja piitã hapêx pa. Nê mē hamaxpêr punujja määnên nhÿrmã hapêx pa. Nê mē kot amnhî tomnuj o mē pa xwÿnhjaja koja mē amnhî xã htÿx kamã

hamak rāhā ho pa ho pa. No Tirtūm kōt mē kot amnhī nhīpēx o mē pa xwýnhjaja koja mē kurom kuri htūr tūm nē mex nē hkīnh nē pa ho pa.

*Kām Kris kurē xwýnh maati jarēnh
Wam Juāw 4.1-6; Sikūn Juāw 7-11*

¹⁸ E Kris kōt ixkwýjaja. Kris akupýn mē pahwýr wrýk kukamā koja mēmoj tanhmā amnhī nhīpēx to. Na pre ra Kris kōt mē panhīōja mē pamā ā harēnh anē nē harēnh o:

–Koja mē panhō Pahihti Kris akupýn mē pahwýr wrýk kaxyw hāmri nhūm kēp Kris ā amnhī to hēx xwýnh maati kumrēx nhýhýnh kato. Hāmri nē hēx rom te Kris pyrā nē tanhmā mē kām kapēr to nē tanhmā mē hipēx to ho pa nhūm rī kormā Kris akupýn mē pahwýr wrý. Anē.

Na pre hkukamā ā harēnh anē ka mē harēnh ma. Tā ra mē kēp Kris ā amnhī to hēx xwýnhjaja ohtō nē mra nē kām hkurē xwýnh maatita kukamā tanhmā amnhī nhīpēx to pē mē kām amnhī to hēx o pa. Jakamā na pa ixprī hā mē amā tanhmā mē harēnh to. Kojā tokyx kēp Kris ā amnhī to hēx xwýnh maatita nhýhýnh mē pahwýr kato.

¹⁹ Na pre hkwyjaja mē pahpē Kris kwýjē hkōt ri pa htā mē pahkīnhā kēp Kris kwý hkēt. Kēp hkwy rōnhýx arī mē pahkōt Kris kōt amnhī nhīpēx o pa. Nom axtem nē āhpumunh týx pyrā nē mē pahkaga nē htýx tanhmā amnhī tomnuj to ho pa. Jao kēp Jejus kwý hkēt ā amnhī to amnhīrīt.

²⁰ No kēt mē pahpē Tirtūm krajaja na pre Jejus mē pahwýr Karō rē nhūm mē pahkarō mā agjē nē mē pahkrām kapēr mex jagjē. Jakamā na pu mē mē kēp Kris kwý hkēt xwýnhjē rom Tirtūm kapēr mar mex nē.

²¹ Xā mē ate Tirtūm kapēr ā kaga pumunh kēt kōt na pa ā mē amā ixkapēr nē hā kaga anē? Nā ra mē ate omunh nē mar mex kēnā. Tā mē ate mē kot tanhmā Jejus o hēx to xwýnhjē pumunh mex nē mē harēnh mar mex kaxyw na pa ā mē awýr kaga nhīpēx nē mēnh anē. Kēr kē mē mēmo arīgro hā mē awýr agjē nē tanhmā mē amā Jejus o hēx to ka mē aprī hā mē omunh mex kurē kumrēx.

²² Tanhmā na htem Jejus o hēx to? E kot paj ixprī hā mē amā tanhmā mē harēnh to ka mē inhma. Nā koja mēhō mē amā tanhmā harēnh to nē harēnh o:

–Nā Jejus kēp Tirtūm Kra hkēt. Tirtūm kot mē pahwýr mēnh kēt tā ka htem atýx kapēr kōt ri amnhī nhīpēx o ri apa. Kwa kēt mē ixkapēr kōt mār ri amnhī nhīpēx o ri apa.

Anhýr o mē amā kapēr ka mē ama nē kām Kris mē Tirtūm wa hkīnh kēt xwýnh ā omunh kurē kumrēx.

²³ Kojā mēhō Tirtūm Kra Jejus kaga nē määnēn Hipépēxā kaga. No koja mēhō Tirtūm

Kra hkōt amnhī xām nē määnēn Hipépēxā hkōt amnhī xām.

*Mē pahte Kris kaga pymaj tanhmā
amnhī nhīpēx to hā mē pamā karō*

²⁴ Amnepēm mē ate Jejus kōt amnhī xunhwýrta ā na ka prem kēp Tirtūm Kra hā Tirtūm kot mē pahwýr mēnh xwýnh ā harēnh ma. Tā kēr ka mē arī amnhī kaxyw hkōt ajamaxpēr nē hkōt pix mā amnhī nhīpēx o ri apa. Kot kaj mē anē nē Mēpanhīpépēxā Maati mē Kra wa hkōt amnhī nhīpēx mex o apa rāhā ty.

²⁵ Hāmri nē wa kuri atūr tūm nē amex kumrēx nē apa ho apa. Ra Jejus kot ja jarēnh xā hkōt.

²⁶ Na pa ā mē amā ixkapēr nē hā kaga anē. Mē aprī hā mē amā Jejus o hēx xwýnhjē kapēr mar nē mē kot mē amā hēx kōt mē omunh mex kaxyw.

²⁷ Tirtūm Karō na pre mē akarō mā gjēx pa nē mē amā Tirtūm kapēr piitā o amnhīrīt mex o mē akōt pa. Jakamā mēmo kaxyw kot kaj mē Tirtūm kapēr o hēx xwýnhjaja kot tanhmā harēnh toja ma? Ra Tirtūm Karō kot mē amā ho amnhīrīt o mē ajahkre mex o pa kēnā kot ka kēt mē nhām mē kapēr ma. Na hte Tirtūm Karōja mē urā nē Tirtūm kapēr ho hēx kēt nē. Ām katāt kōt kot ho amnhīrīt mex jakamā kwa kēr ka mē mar týx nē hkōt ri amnhī nhīpēx mex rāhā ho ri apa.

*Mē pahte tām ri amnhī nhīpēx ā mē pamā
karō*

Juāw 14.25-26, 15.1-8

²⁸ E Jejus kōt ixkrajaja. Kēr ka mē arī Kris kōt amnhī nhīpēx mex rāhā ho ri apa. Kē nhýrmā akupýn mē pahwýr wrýk o tē ka mē amnhī wýr omu nē akīnh nē. Nē akīnh kām axāmnhix kutā mra nē hkaxpa nē amnhī kamā amā uma hkēt nē. Rý mēmoj tā amnhī tā apijaam kēt nē. Ām axāmnhix akīnh nē ma kutā mra.

²⁹ Krisja mex o mex jakamā na pu htem urāk nē amnhī to mex o ri papa. Mē pahte amnhī to mex o papa xwýnhjaja urāk nē mē pahpē Tirtūm kra na pu mē.

3

*Tirtūm krajē hkukamā tanhmā mē
harēnh to*

*Rōmān 8.18; Sikūn Korīt 3.18; Sikūn Pêtre
3.11-14*

¹ Nē Mēpanhīpépēxā Maati kām mē pajapē htýx kumrēx jakamā na pre mē pahte hkōt amnhī xunhwýr ā mē pahpumunh kōt mē pahpē hkra hā mē pajarē pu mē pahpē hkra nē ri papa. Ja na mē pamā mex o mex. Nom mē kot hkōt amnhī xunhwýr kēt xwýnhjaja kot hprī hā ja hā mē pahpumunh kēt jakamā na htem mē pahte tām amnhī nhīpēx ā mē pahpumu nē tee ri hamaxpēr.

² E Kris kôt ixkwýjaja. Ra mē pahpê Tirtūm kra htā kormā mē pahte amnhī kukamā mē pahprī hā ja hā amnhī pumunh mex kêt. Koja nhýrmā Jejus akupýn mē pahwýr wrý pu mē pano ho tanhmā kute hā omunh mex nē. Hāmri nē tā te kot amnhī nhīpêx pyrāk o amnhī nhīpêx mex o papa. Ra mē pahte ja mar mex.

³ ā mē pahte amnhī kukamā pajamexpêr anhýr o papa xwýnhjaja na pu htem kormā amnhī wýr Jejus kamā pajamak o papa. Pê urāk nē mēmoj punuj mā pajamexpêr kêt o papa. Nē urāk nē tanhmā amnhī tomnuj to hkêt nē.

Tirtūm krajaja kot amnhī tomnuj o pa hkêt ā mē kām karō

⁴ Nē mē kot amnhī tomnuj o mē pa xwýnhjaja na htem Tirtūm kapêr kwým ri amnhī nhīpêx o pa. Tā kot puj mē tanhmā amnhī tomnuj to hāmri nē mē urāk nē kapêr kwým ri amnhī nhīpêx.

⁵ No Jejus na pre mē pahte amnhī tomnuj pānhā amnhīrer kaxyw mē pahwýr wrý. Aa kot amnhī tomnuj kêt jakamā tapxipix kot mē pahpānhā amnhīrer mā tām. Ra mē pahte ja jarēnh mar mex.

⁶ Jakamā mē pahpê hkwyjaja na pu htem ri pahýt× tanhmā amnhī tomnuj to ho papa hkêt nē. Ā mē kot amnhī nhīpêx anhýr xwýnhjaja kēp hkwyj kêt.

⁷ Nom koja mēhō Kris pyrā nē tām amnhī nhīpêx o pa hāmri nē kēp Tirtūm kraa. Jakamā kwa koja mēhō Tirtūm kapêr kwým ri tanhmā mē amā kapêr to ka mē ama nē ām ama.

⁸ Mē kot amnhī tomnuj o mē pa xwýnhjaja na htem Satanasti hkôt ā amnhī nhīpêx anhýr o pa. Satanastija Tirtūm kot mēmoj to kator krax rüm nhūm ā kot amnhī tomnuj anhýr o pa xwýnh na. Tā ā kot amnhī nhīpêx anhýr o paja o hapêx par kaxyw na pre Tirtūm Kra Jejusja amnē pika hwýr wrý.

⁹ Nom mē papajaja mē pahpê Tirtūm kra na pu mē. Na pre mē pahwýr amnhī Karō rē nhūm mē pahkarō mā gjêx pa nē mē pahkôt pa ho pa. Jakamā tanhmā kot puj wem amnhī to nē Satanasti pyrā nē pahýt× ri amnhī tomnuj o papa? Nā kot puj mē ā amnhī nhīpêx anhýr kêt nē.

¹⁰ Koja mēhō tām amnhī nhīpêx kêt nē hāmri nē māānēnh hkwyjê kamā ukapri hkêt nē. Hāmri nē ā amnhī nhīpêx anhýr o kēp Tirtūm kra hkêt ā amnhī to amnhīrit. Ām kēp Satanasti hkra hā amnhī to amnhīrit kurē kumrêx.

Mē pamā axpēn kīnh o te Jejus kām mē pahkīnh pyrāk ā mē pamā karō

Matēwre 22.39; Rukre 10.25-37; Juāw 13.31-35

¹¹ Nē kēr ka mē arī amā axpēn kīnh pê tām axpēn nhīpêx o ri apa rāhā nē. Te anepê mā mē ate Jejus kôt amnhī xunhwýr ā arīgrota ā mē kot mē amā ja hā karō pyrā nē.

¹² No mē ri finat Kaī kot amnhī nhīpêx pyrāk o amnhī nhīpêx kêt nē. Kēp Satanasti hkra jakamā na pre htōja pī. Kurom kot tām amnhī nhīpêx ā omu nē kamā gryk nē kupī.

¹³ Tā koja mē kēp Tirtūm kra hkêt xwýnhjaja Kaī pyrā nē kēp mē aprām nōkati nom kēr ka mē amnhī tā mē omu nē tee ri amnhī kukamā ajamexpêr kêt nē.

¹⁴ Kormā mē pahte Jejus kôt amnhī xunhwýr kêt ri na pu prem mē urāk nē amnhī tomnuj o papa. Jao mē pahpê kuwy hwýr papa mā xwýnh. Tā mē pahte Jejus kôt amnhī xunhwýr jakamā ra pahpê Tirtūm mē Kra wa kuri pahýt tūm nē papa mā xwýnh. Jakamā na pu htem mē kēp hkra hkêt xwýnhjê kurom pamā mē piitā mē hkīnh o tanhmā mē ho mex to ho papa. Mē kām amnhī kwýjê hkīnh kêt xwýnhjaja arī mē kēp kuwy hwýr mē pa mā xwýnh na mē. Ra mē pahte ja jarēnh mar mex.

¹⁵ Mē kām mē hpar prām o mē pa xwýnhjaja koja nhýrmā Tirtūm mē Kra wa kuri htūr tūm nē pa ho pa hkêt nē. Ra mē pahte māānēn ja mar mex. Jakamā kwa mē amā akwýjê hprām nōkati ho ri mē apa xwýnhjaja. Tirtūm noo mā te ra mē ate mē hpar pyrāk jakamā kot kaj mē arī ā amnhī nhīpêx anhýr o ri apa hāmri nē nhýrmā Tirtūm nhō krī hwýr axāpir kêt nē.

¹⁶⁻¹⁸ E ixkwýjaja. Kwa kēr pu mē pajakwa pix o pamā axpēn kīnh ā amnhī jarēnh kêt nē. Māānēn axpēn kutā panojarēt o ri papa. Nē tanhmā axpēn to mex to. Tanhmā na pre Jejus kām mē pajapê hā amnhī nhīpêx to? Nā na pre kām mē pamex prām xāj mē panē ty. Kām amnhī tā ma hkêt kām mē pakamā ukapri xāj mē panē ty. Tā kēr pu mē urāk nē pahkwýjê kamā paxukapri ho mē kutā panojarēt rāhā ho papa. Jao mē paxāpkur xā hā panhō pumu nē nhýri pahkwýjê hō pumu nhūm kēp amrakati. Pu mē tee ri ja hā omu hāmri nē kām mē panhōta kwý gō. Kot pu mē ā amnhī nhīpêx anhýr kêt nē hāmri nē pamā Tirtūm kīnh ā amnhī jarēnh kapry.

¹⁹ Nē kot puj mē ā axpēn to mex o papa anē nē ra pahte Tirtūm kôt amnhī nhīpêx mex ā amnhī to amnhīrit. Hāmri nē ra paxāamnhīx kām tanhmā amnhī jarēnh to ho papa. Amnhī kamā pamā ama hkêt nē paxāamnhīx pajamakētkati nē kām tanhmā amnhī jarēnh to.

Mē paxāamnhīx amnhī to Tirtūm wýr ā mē pamā karō

²⁰ Nē kot puj mē mēmo arīgro hā tanhmā amnhī tomnuj to hāmri nē tee ri ja hā amnhī pumu nē amnhī kamā pagryk nē. Na hte Tirtūm tanhmā mē pahte amnhī tomnuj to

hā mē pahpumu nom arī kām mē pajapê. Mē parom āhpumunh o āhpumunh jakamā kot mē pahte amnhī tomnuj prām kêt ā mē pahpumunh mex.

²¹ Jakamā puj mē ā kām pajamaxpēr anē nē amnhī kamā pamā uma hkêt kām paxāmnhīx tanhmā ri amnhī to hwȳr to ho ri papa.

²² Kot puj mē hkôt amnhī nhīpêx o papa rāhā nē mēmoj tā kuwȳ. Nē kām hprām xā hkôt amnhī nhīpêx o papa hā amnhī pumunh kôt mēmoj tā kuwȳ. Hāmri nhūm mē pama nē tanhmā mē pamā mēmoj to rȳ mē pamā mēmoj gō.

Te ixkre pixi kamā mē pahtixpi pyrāk ā mē pamā karō

²³ Nē tanhmā mē pahte amnhī nhīpêx to ho papa hā na hte Tirtūm mē pamā karō? Nā mē pahte amnhī kaxyw Kra Jejus Kris kôt pajamaxpēr nē hkôt amnhī nhīpêx o papa hā na hte mē pamā karō. Nē kapēr xā hkôt pamā axpēn kīnh o mēmoj to axpēn kutā panojarēt o papa hā na hte mē pamā karō. Na hte ā mē pahte amnhī nhīpêx anhȳr ā mē pamā karō anē.

²⁴ Jakamā kot puj mē kapēr xā hkôt axpēn nhīpêx o papa nē te ixkre tipxi kamā mē pahte axpēn kôt Tirtūm kôt ri papa pyrāk. Ra kot mē pahwȳr Karō rēnh nhūm kot mē pahkarō mā gjêx jakamā na hte mē pahkôt pa ho pa hā amnhī to amnhīrīt.

4

Mē kot Kris kapēr jarēnh ā amnhī to hêx xwȳnhjê jarēnh

Wam Korīt 12.1-3; Wam Juāw 2.18-26; Sikūn Juāw 7-11

¹⁻³ Nē koja mēhō Tirtūm kapēr o mē ajahkre kaxyw mē amā tanhmā Jejus Kris jarēnh to nē ām hāmri harē nē harēnh o:

—Na pre Tirtūm Kra Jejus mē pahwȳr wrȳ nē ī ho ī ho mē pakamā kato. Tirtūm tām na pre mē pahwȳr kumē nhūm wrȳ.

Anhȳr o mē amā harē ka mē ama nē kapēr kôt ajamaxpēr kurē kumrêx. Ām hāmri na hte Tirtūm Karō nhȳ ā harēnh anē. No koja Jejus kēp Tirtūm Kra hkêt ā harē ka mē ama nē ām ama nē hkôt ajamaxpēr kêt nē. Kām Kris kurē xwȳnh maati nhȳ hā kapēr xwȳnhjaja na hte ā harēnh anhȳr o pa. Na ka prem ra kām Kris kurē xwȳnh maati ja tokyx hpōx ā harēnh ma. Tā na ra ŷ hā kapēr xwȳnhjaja ohtō nē pika piitā hkôt mē hkôt pa nē te Tirtūm Karō nhȳ hā mē kām kapēr pyrāk o amnhī nhīpêx o pa. Nom ām amnhī to hêx o pa. Jakamā e kwa ixkwȳjaja. Kōja mēhō mē awȳr mra nē tanhmā mē amā Tirtūm kapēr jarēnh to ka mē aprī hā ama nē rī kormā kēp Tirtūm nhȳ hā kapēr jarēnh xwȳnh ā harē rȳ kot amnhī to hêx xwȳnh ā harē.

⁴ Kêt mē papajaja jajê rom mē pahpê Tirtūm kra na pu mē. Nē Tirtūm Karō kot ra mē pahkarō mā gjêx xwȳnhhta hihtȳx o jajê piitā mē hakrenh. Jakamā na pu htem ŷ hā mē kutā amnhī to htȳx o papa nhūm mē tee ri tanhmā mē pamā Jejus o hêx to kaprȳ. Pu mē kuma nē ām mē kuma.

⁵ Mē kēp Tirtūm kra hkêt jakamā na htem hkôt amnhī nhīpêx kêt nē. Mē kot amnhī nhīpêxja axtem na. Jakamā na htem Tirtūm kapēr kwȳm ri tanhmā hkra hkêt xwȳnhjê mā kapēr to ho pa nhūm mē kuma nē kām mē mar prām nē.

⁶ Nom mē ixte Tirtūm kapēr o mē ajahkre xwȳnhjaja na pa htem mē kurom Tirtūm nhȳ hā ixkatāt kôt ām hāmri mē amā kapēr jarēnh o ri ixpa. Jakamā ka mē apē hkra hā mē amā mē inhmar prām nē. No mē kēp hkra hkêt xwȳnhjaja kām mē inhmar prām kêt.

Na pu htem pahprī hā mē kapēr ā mē kuma nē ri kormā tanhmā mē harēnh to. Tirtūm nhȳ hā kapēr ā mē harē rȳ kām hkurē xwȳnh maati nhȳ hā kapēr ā mē harē.

Tirtūm kām mē pajapê hā tanhmā amnhī nhīpêx to hā harēnh

Juāw 3.16-21; Rōmān 5.5-9, 8.35-37

⁷ E ixkwȳjaja. Na hte Tirtūm tanhmā mē pahpê hkrajê ho pu mē pamā axpēn kīnh nē. Jakamā kēr pu mē ā axpēn nhīpêx anhȳr jao axpēn to mex pix nē. Ā Tirtūm kot mē panhīpêx anhȳr jakamā kēr pu mē pahpê hkrajaja ŷ hā ā axpēn nhīpêx anhȳr o ri papa.

⁸ Kōja mēhō Tirtūm kīnhā kām mē hkȳjê hkīnh kêt hāmri nē mē kamā ukapri hkêt o pa. Hāmri nē kēp Tirtūm kra hkêt ā amnhī to amnhīrīt mex nē.

⁹⁻¹⁰ Tirtūm kām mē pajapê htȳx kumrêx. Kormā mē pamā hkīnh kêt ri nhūm kumrêx amnhī rom kām mē pajapê ho pa. Nē kām mē pajapê xāj mē pahwȳr Kra pyxita mē. Mē pahte amnhī tomnuj pānhā kot mē panē htyk kaxyw. Mē pahte kukwak ri amnhī nhīpêx nyw o amnhī nhīpêx nē nhȳrmā wa kuri pahȳr tūm nē pamex nē papa ho papa kaxyw. Ā na pre Tirtūm mē pahwȳr Kra mēnh anhȳr o kām mē pajapê hā amnhī to amnhīrīt.

¹¹ E ixkwȳjaja. Tirtūm kām mē pajapê htȳx jakamā kwa kēr pu mē urāk nē pamā axpēn kīnh o papa. Nē axpēn kamā paxukapri nē.

¹² Āa mē pahō pahte pano ho Tirtūm pumunh kêt tā na hte mē pakamā pa ho pa. Pu mē kām mē pajapêta pyrā nē ŷ hā pamā axpēn kīnh o papa.

¹³ Na pre mē pahwȳr Karō rē nhūm mē pahkarō mā agjē pu mē ŷ hā kot amnhī nhīpêx o amnhī nhīpêx o papa.

¹⁴ Nē mē ixpê Jejus nhȳ hā mē ajahkre xwȳnhjaja. Mē ixte kot amnhī nhīpêx nē kot

mēmoj tanhmā ho hā omunh o ri hkôt ixpa jakamā na pa htem ma mē piitā mē kām harēnh o ri mē hkôt ixpa. Nē mē kām harēnh o:

—Tirtūm na pre mē pahwyr Kraja mē. Kot mē pahpiitā mē panē htyk kaxyw mē pahwyr kumē. Anē.

¹⁵ Mē kot Jejus kēp Tirtūm Kra hā harēnh o pa xwýnhjaja na hte Tirtūm mē kamā pa ho pa nhūm htem ŷ hā ā Kra jarēnh anhýr o pa.

¹⁶ Na pu mē ra pahprī hā Tirtūm kām mē pajapē hā amnhī tā omu. Kām mē pajapē htyx kumrēx ā amnhī tā omu. Jakamā kot puj mē urāk nē ŷ hā pamā mē piitā mē hkīnh o papa. Tirtūm mē mē pahtipxi nē ri papa kēnā.

Mē kām axpēn kīnh xwýnhjaja kām Tirtūm puma hkēt ā mē harēnh

¹⁷ Nē kot puj mē pamā axpēn kīnh o papa nē määnēn Kris kôt amnhī nhīpēx ho papa. Hāmri nhūm nhýrmā Tirtūm kot Kra mē wa kuri mē hfír tūm nē mē pa ho mē pa mā xwýnhjē nhīxi jarēnh kaxyw pu mē tee ri amnhī kukamā pajamaxpēr kēt nē. Ra amnhī nhīxi jarēnh ma nē pahkīnh nē.

¹⁸ Nē koja mēhō kām hkwyjē hkīnh kēt nē tanhmā hō homnuj to. Hāmri nē kot amnhī tā tanhmā ho pymaj kām uma ho hwýr mrrar kēt nē. No koja kām hkwyjē hkīnh nē tanhmā mē ho mex to ho pa nē kām mē uma hkēt nē.

¹⁹ Tirtūm kumrēx na pre kām mē pajapē nē mē pakukamā tanhmā mē pahto mex to. Tā pu mē ra amnhī pyrā nē pamā hkīnh o papa. Nē pamā mē piitā mē hkīnh o papa.

²⁰ Nē koja mēhō kām Tirtūm kīnh ā amnhī jarēnh tā kām hkwyjē hō hprām nōkati hāmri nē ra kām Tirtūm prām kēt ā amnhī to amnhīrit. Kot kaj mē ano ho akwyjē pumunh o apa xwýnhhta amā hkīnh kēē tā tanhmā kot ka we amnhī to nē ate ano ho Tirtūm pumunh kēēta amā hkīnh ā amnhī jarē? Nā ka ā amnhī jarēnh anhýr o amnhī to axēx.

²¹ Na pre Tirtūm mē pamā kapēr o amnhīrit o:

Kot kaj mē amā ixkīnh hā kot kaj mē määnēn amā akwyjē hkīnh o mē ho mex o ri apa. Anē.

5

Tirtūm nhý hā mē pamā axpēn kīnh ā mē pamā karō

¹ Nē Tirtūm kot mē pahwyr Jejus mēnh ā harēnhja. Koja mēhō kuma nē amnhī kaxyw hkôt hamaxpēr nē Jejus kôt amnhī xām hā koja Tirtūm ja hā omu nē ho hkra.

Nē koja mēhō kām Tirtūm kīnh hā koja määnēn kām hkwyjē hkīnh o pa.

² Ja pyrā nē kot puj mē pamā Tirtūm kīnh nē kapēr kôt amnhī nhīpēx. Hāmri nē määnēn pamā krajē piitā mē hkīnh ho papa.

³ Nē kot puj mē pamā Tirtūm kīnh nē nhūm kapērja mē pahpē hihtýx kēt nē. Pu mē pamā Tirtūm kīnh ā kapēr kôt amnhī nhīpēx mex o ri papa.

⁴⁻⁵ Na pu prem amnhī kaxyw Tirtūm Kra Jejus kôt pajamaxpēr nē hkôt amnhī xunhwý nhūm Tirtūm ja hā mē pahpumu nē mē pahto hkra pu mē ŷ hā amnhī nhīpēx nyw o amnhī nhīpēx o papa. No ri tanhmā amnhī tomnuj to ho ri papa hkēt nē.

Mēmoj axkrunēpxi nē kot Jejus kēp Tirtūm Kra hā ho amnhīrit

Juāw 1.32-34, 3.36, 5.31, 15.26

⁶ Nē Jejus pix na pre Tirtūm mē pakaxyw ām nhūm kēp Kra hā mē pahwyr wrý. Hāmri nhūm Juāw Paxisja pyhtī kamā hkrā kumrā. Kēp Tirtūm Kra hā hkrā kumrā. Tā nhūm Tirtūm kapēr kôt ma tanhmā amnhī nhīpēx to ho pa. Nē ri hkwyjē mā kapēr jarēnh o ri mē hkôt pa. Tā nhūm mē kupī nhūm kēp Tirtūm Kra hā pī kahpa hā ajēt nē ty nē hkamrō axkapī. Á mē panē amnhī nhīpēx anē nhūm Tirtūm Karōja kēp Kra hā mē pamā ho amnhīrit. Ám hāmri na hte ā tanhmā mēmoj to amnhīrit to anē. Mēmoj to hēx kēt jakamā na pre Jejus kēp Tirtūm Kra hā mē pamā ho amnhīrit.

⁷ Nē kēp Tirtūm Kra hā mē pamā mēmoj to axkrunēpxi nē ho amnhīrit.

⁸ Tirtūm Karō na pre kēp Kra hā mē pamā ho amnhīrit pu prem kēp Kra hā omu. Nē Juāw Paxis kot hkrā kumrārta ā pu mē määnēn kēp Tirtūm Kra hā kot ho amnhīritja ā omu. Nē määnēn kēp Tirtūm Kra hā pī kahpa hā jēt nē htyk nē hkamrō pikapīrta ā mē pamā ho amnhīrit pu mē kēp Kra hā omu. E mē pamā mēmoj to axkrunēpxi nē Jejus kēp Tirtūm Kra hā kot ho amnhīrit xwýnh na jajaja.

⁹ Nē na pu htem jar pahkwýjaja kot axpēn mar xā hā ixkre kamā mē kapēr ma nē mē hkôt pajamaxpēr. Tā koja Tirtūm tanhmā mē pamā mēmoj to amnhīrit to pu mē hkôt pajamaxpēr kurē kumrēx. Kēp Tirtūm kēnā kot pu kēt mē kapēr prā nē hkôt pajamaxpēr kēt. Tām na pre mē pamā Jejus kēp Kra hā ā ho amnhīrit anē.

¹⁰ Jakamā mē pahte Tirtūm Kra hkôt amnhī xunhwýr xwýnhjaja na pu prem Jejus kēp Kra hā harēnh ma nē hkôt pajamaxpēr kurē kumrēx. No mē kēp hkra hkēt xwýnhjaja na htem Tirtūm kot kēp Kra hā harēnh ma nē ām kuma nē amnhī kaxyw hkôt hamaxpēr kēt nē. Jao te Tirtūm kēp Hipéèxā hā amnhī to hēx pyrāk ā harē.

¹¹ E kot paj ixprī hā mē amā tanhmā ja jarēnh to ka mē inhma. Nā na pre Tirtūm Krata mē pahpiitā panē ty. Jakamā kot puj

mē pahte hkôt amnhī xunhwÿr xwÿnhjaja nhÿrmā ty nhūm Tirtūm akupÿm mē pahto mē pahūr. Pu mē wa kuri pamex nē pahūr tūm nē papa ho papa.

¹² Mē pahpē Jejus kwÿjaja kot puj mē ā pahūr tūm nē papa anē. No mē kēp hkwy hkēt xwÿnhjaja koja mē nhÿrmā ty nē mē pahpyrā nē wa hwÿr āpir kēt nē.

¹³ Na ka prem ixpyrā nē amnhī kaxyw Tirtūm Kra hkôt ajamaxpēr nē hkôt amnhī xunhwÿ. Tā pa ā mē amā kagāja nhīpēx anē. Mē ate kamā harēnh nē mē pahte nhÿrmā Tirtūm mē Kra wa hwÿr mē paxāpir ā mē pajarēnhja mar nē amnhī kaxyw hkôt ajamaxpēr o ri apa kaxyw nē kapēr prār o ri apa hkēt nē.

Mē pahte paxāmnhīx mēmoj tā Tirtūm wÿr ā mē pajarēnh

Juāw 14.13-14

¹⁴ Nē mē pahpē Tirtūm krajaja na pu htem paxāmnhīx pajamakētkati nē mēmoj tā tanhmā hwÿr to ho papa. Kot puj mē kām hprām xā hkôt mēmoj tā kuwÿ nhūm mē pama.

¹⁵ Na pu htem mēmoj tā kuwÿ nhūm mē pamar mex nē mē pahte mēmoj tā hwÿr xā hkôt tanhmā mē pamā mēmoj nhōr to rÿ tanhmā mēmoj to. Ra mē pahte ja mar mex.

Tirtūm kot tanhmā hkra hkēt xwÿnhjē nhīpēx to hā harēnh

Rukre 22.31-32

¹⁶⁻¹⁷ Nē koja Kris kōt mē anhiō tanhmā amnhī tomnuj to ka mē atō tee ri ja hā omu nē ho Tirtūm wÿ. Ho awÿ kē nē tanhmā kot amnhī tomnuj tota o hapēx nē ja nē ho htÿx kē axte ā amnhī nhīpēx anhÿr kēt nē. Kot puj mē pahūr tanhmā amnhī tomnuj to nhūm Tirtūm tee ri ja hā mē pahpumu nhūm ja kēp omnuj nē. Tā kot puj mē amnhī tomnujta kaga nhūm ja hā mē pahpumunh kōt tanhmā hā mē pahto hkēt nē. Ām mē kot amnhī nhīpēx pixi koja ho hamakētkati hkēt nē. Kojā mēhō Tirtūm kaga ho hkaga nē aa hkôt amnhī xām kēt nē. Hāmri nhūm tee ri amnhī tā omu nhūm ja kēp omnuj tÿx kumrēx. Jakamā koja aa ho hkra hkēt nē. Nē aa kot hkaga ho hamakētkati hkēt nē pa ho pa. Jakamā koja hkaga xwÿnhhta nhÿrmā ty nē kuri hūr tūm nē pa ho pa hkēt nē.

¹⁸ Nē mē pahpē Tirtūm krajaja na pu htem amnhī tomnuj o papa hkēt nē. Tirtūm Kra Jejus kot ja pymaj mē panē Satanasti pumunh mex jakamā nhūm tee ri mē pahte tanhmā amnhī tomnuj to hprām xāj mē pano kupyk kaprÿ ho ri pa. Ra mē pahte ja mar mex.

¹⁹ Mē pahpē Tirtūm kra na pu mē. No mē kēp hkra hkēt xwÿnhjaja Satanasti kot amnhī tā mē ho htÿx pyrāk o mē hipēx jakamā nhūm htem tanhmā amnhī tomnuj to ho pa. Mē pahte ja mar mex.

²⁰ Nē māānēn ja mē pahte mar mex. Na pre Tirtūm Kra mē pahwÿr wrÿ nē mē pamā tanhmā Tirtūm o amnhīrīt to ho pa. Tapxipix kēp Mēpahpām ā mē pamā ho amnhīrīt. Tā Jejus kukwak ri mē pahpē Tirtūm kra jakamā kot puj mē nhÿrmā wa kuri pahūr tūm nē pa mex nē papa ho papa.

²¹ E Kris kōt ixkwÿjaja. Kēr ka mē Tirtūm kapēr kōt pix mā mān ri amnhī nhīpēx o ri apa rāhā nē. No nhām mē kot Tirtūm kapēr kwÿm ri mē amā kapēr o hēx xwÿnhjē kapēr ma nē ām mē ama nē mē hkôt amnhī nhīpēx hkēt nē.

Tā ām ja pix. Ixpē Juāw na pa krī piitā hkôt mē amā kagā nhīpēx nē kurē.

Sikūn Juāw Juāw kot Jejus kôt hkwyjê hwÿr wam kagà nê mēnh kôt hō mēnh

Juāw na pre kagàja nhîpêx. Jejus nhÿ hâ hkrajê jahkre ho ri pa xwÿnhjê hō na pre. Jakamā na pre hkrî hō kamā Kris kôt htōx mē ô fāmi mā kagàja nhîpêx nê mē hwÿr kumê. Na pre hte Tirtūm kapêr o mē hêx o pa xwÿnhjê hō mē ô krî hwÿr mra nhūm Juāw krāmnhwÿ nita omu nê htÿx kot mē ahkre mex ā hkamnhîx. Hāmri nê kot Tirtūm kapêr o hkwyjê jahkre kaxyw amnhî nhōrkwy hwÿr kuwÿ. Hāmri nhūm Juāw tee ri harēnh ma nê kām kagàja nhîpêx nê kamā kot amnhî wÿr hwÿr nê kām kapêr nê hprî hâ kām tanhmā mē kot Tirtūm o hêx to ho pa hâ tanhmā mē harēnh to. Kot kamā harēnh nê mē harēnh mar hāmri nê mē axkām hamak rom nê ri pa kaxyw. ā na pre Juāwja hkrāmnhwÿ ni mē hkwyjê mā mēmoj jarēnh nê hâ kagà nê mē hwÿr mēnh anê. Nê mē kām:

¹ Pa Jejus kôt ixtōx. Xà mē amex? E ot pa mē amā kagà nhîpêx nê mē awÿr kumê. Akrajaja nê apê mē hkatorxà mē mē ato ixpimrāatā mē awÿr kumê. Ixpê Juāw pigêtre na pa. Inhmā mē akînh nom papxpîx inhmā mē akînh kêt. Mē pahpyrà nê mē kot Tirtūm kôt amnhî xunhwÿr xwÿnhjaja haxwÿja kām mē akînh.

² Mē pahte Tirtūm kapêr kôt ri amnhî nhîpêx rāhā ho ri papa jakamā na pu htem pamā axpên kînh o ri papa.

³ Na pa hte mē pahto Mēpanhîpêxà maati Tirtūm wÿr o ixa nê kām:

—Pa Tirtūm. Ot pa mē amnhî to awÿ. Akra Jejus Kris mē mē amnhî to war awÿ. Kêr ka wa mē ixkamā axukapri nê mē ixkutā war anojarêt rāhā ho ri apa. Nê tanhmā mē ixkrā hto pa mē ixāmnhîx ijamakêtkati nê ixkînh nê mē inhmā axpên kînh nê axpên to mex o ri axpên kôt ixa. Nê tām ri amnhî nhîpêx. Anê.

Mē pamā axpên kînh kām axpên to mex ā mē pamā karō

Juāw 13.34-35; Wam Juāw 2.7-9, 3.14-18

⁴ Nê na pa pre akra hkwyjê pumu nhūm mē inhmā amnhî jarê pa mē kuma nê mē ŷ hâ ixkînh nê. Na xep prem Tirtūm kôt amnhî xunhwÿ nê hkôt ri amnhî nhîpêx mex o pa. Mē kot Mēpanhîpêxà Maati Tirtūm kapêr ā kagà hkôt amnhî nhîpêx ā inhmā amnhî jarê pa mē kuma nê ixkînh nê.

⁵⁻⁶ Jakamā na pa ā amā ixkapêr nê hâ kagà anê. E kwa Kris kôt ixtōx. Kêr pu mē pamā axpên kînh o ri papa hâ mēmoj to axpên kutā panojarêt rāhā ho ri papa. ā ixsjarēnh

anhÿrja nyw kêt. Amnepê mā mē ate Jejus kôt amnhî xunhwÿr ā arîgrota ā na prem ā mē amā karō anê. Tā kêr pu mē arî pamā axpên kînh pē Tirtūm kapêr piitā hkôt amnhî nhîpêx mex o ri papa. Kapêr ā kagà kot ā mē pahte amnhî nhîpêx anhÿr ā mē pamā karō.

Tirtūm kapêr o mē hêx xwÿnhjê jarēnh Rōmān 16.17-18; Wam Ximotre 5.22; Wam Juāw 2.18-26, 4.1

⁷ Nê mē kot Tirtūm kapêr o hêx o ri mē pa xwÿnhjaja na mē ra ma krî piitā hkôt mē kām tanhmā ho hêx to ho pa nê mē kām:

—Jesús kêp Tirtūm Kra hkêt ām mē panhîo na pre. Na pre Tirtūm mē pahwÿr mēnh kêt nê. ām mē panhîo rûm na pre kato.

Anhÿr o mē kām ho hêx o pa. Kām Kris kurê xwÿnh maatija nhÿ hâ na htem ā ri ho hêx o pa anê.

⁸ Jakamā kwa mē amnhî nê mē omunh mex nê mē ama nê ām mē ama. Kot kaj mē kapêr ma nê mē hkôt ajamaxpêr hāmri nê mē ixte Tirtūm kapêr o mē ajahkreta kaga. Kwa mē arî mē ate amnhî nhîpêx nyw pix o mān amnhî nhîpêx rāhā o ri apa. Nê arî mē amā axpên kînh kām tanhmā axpên to ajuta hto rāhā ho ri apa. Kêr kê Tirtūm ja hâ mē apumu nê nhÿrmā mē ato mex nê.

⁹ Nom kot kaj mē nhām mē kapêr punujja kôt amnhî nhîpêx nê Kris kôt amnhî nhîpêx kêt nê nhūm Tirtūm mē akôt pa hkêt nê. Nom kot ka mē arî Kris kôt amnhî nhîpêx mex nê hāmri nhūm Tirtūm mē Kra Jejusja wa mē akôt ri pa ho pa rāhā nê.

¹⁰ Jakamā koja ā Tirtūm kapêr ā kagà kuhpa hâ Jejus o hêx xwÿnhjaja mēmo arîgro hâ mē anhō krî hwÿr pōj ka mē omu nê amnhî nhōrkwy hwÿr mē hwÿr kêt nê. Nê tanhmā mē kām akapêr to hkêt nê. ām ri mē hkāx ā ri mra.

¹¹ No kot kaj mē ā mē hipêx anhÿr kêt nê mē hwÿr mra nê mē mar o akuhê hāmri nê te mē ate mē hkôt amnhî nhîpêx o amnhî nhîpêx pyrāk. Ja pumaj kêr ka mē nhÿri mē omu nê mē htêp kêt kumrêx.

Kagà jatur xà

Hapuhā Juāw 13-15

¹² E Kris kôt ixtōx. Ixkapêr jatur xà na ja. Ixkapêr ā kagàja ām hakotre nom inhmā mē amā ixkapêr ry hprām. Jakamā kot paj mēmo arîgro hâ ma mē awÿr mō pu mē axpên pumu nê pahkînh nê. Pa rî kormā mē amā ixkapêr jatur xām kumê ka mē aprî hâ inhma.

¹³ Nê ota jar Kris kôt atōx krajaja awÿr hpêr mē.

E ixpê Juāw pigêtre na pa ā awÿr kagàja nhîpêx nê mēnh anê.

Hapuhã Juãw Juãw kot Jejus kôt hkwýjê hwýr kagã nê mênh o axkrut kôt hõ mênh

Juãw na pre mãânên kagãja nhípêx. Jejus nhý hã hkrajê jahkre ho mê pa xwýnhjê hõ na pre. Tã hkrãmnhwý Gajore mã kagãja nhípêx nê hwýr kumê. Na pre Jejus kwýjaja ma krí piitã hkôt mê kãm Jejus kapêr jarênh o ri mê hkôt pa. Jao Gajore nhõ krí hwýr pøj nhùm Gajore mê hpõx ã mê harênh ma nê amnhí nhõrkwý hwýr mê kuwý. Jakamã nhùm pre htem ma õ krí hwýr pa hãmri nê kuri pøj. Nhùm Juãw ã Gajore kot amnhí nhípêx anhýr ã harênh ma nê hkính nê hwýr kagãja nhípêx nê kumê. Nê kamã kãm mēhõ pē Xotre kot tanhmã amnhí tomnuj to ho pa hã harê. ã na pre Juãwja Gajore mã mēmoj jarênh nê hã kagã nê hwýr mēnh anê. Nê kãm:

¹ Pa ixkrãmnhwý Gajore? Xã amex? E ot pa awýr kagãja nhípêx nê kumê. Apê ixkrãmnhwý mex na ka. Inhmã akính.

²⁻³ Na pre ra Kris kôt pahtõ hkwýjaja ixwýr pøj nê tanhmã inhmã ajarênh to. Na ka xep hte Tirtúm kôt amnhí nhípêx mex ráhã ho ri apa. Pa ajarênh ma nê anhý hã ixkính nê. Nê ato Tirtúm wýr o ixpa. Kot ato mex nhùm amex nê ajamakêtkati nê apa ho apa kaxyw. Nê axã hkét nê amex nê ri apa kaxyw.

⁴ Ixte Tirtúm kapêr o mê ajahkre o ri ixpa jakamã te mê apê ixkra pyrãk. Tã pa tanhmã ate mê pahkwýjê nhípêx to ho apa hã ajarênh ma nê ixkính nê.

Gajore kot tanhmã Jejus kôt hkwýjê ho mex to hã harênh

Wam Korit 16.10-11

⁵ E ixkrãmnhwý. Na ka xep hte Jejus kôt pahtõjê ho mex o ri apa. Aa ate mê omunh kêt tã nhùm htem ma anhõ krí hwýr pa ka mê omu nê apê Jejus kôt mê htõ hã mê ho mex nê. ãm hãmri na ka hte ã mê hipêx anhýr o ri apa Gajore.

⁶ Na pre ra mê hkwýjaja akupýn ixwýr pøj nê mê ixpê Kris kwýjê mã amnhí tã ajarê. Amã mê hkính nê ate tanhmã mê ho mex to hã ajarê. Nhùm prem nojarêt ka xep pre mê kãm pry hã mê apkur xã hã mēmoj gõ nhùm mê inhmã ajarê. Nã ãm hãmri na ka hte ã mê ho mex o apa anê. ã ate mê hipêx anhýr o apata ã na hte Tirtúm apumu nê hkính nê.

⁷ Na htem krí piitã hkôt mê kãm Kris kot tanhmã mê panê amnhí nhípêx to hã harênh kaxyw ma mê hwýr pa. Nom mê apkur xã hprãm xaj mê kot Kris kôt amnhí xunhwýr kêt xwýnhjê hwýr pa hkêt nê.

⁸ Jakamã kwa kêr pu mê papajaja mê pahpê Jejus kôt mê htõ hã mê kãm mēõ

hkwý nhõr o papa. Kot puj mê ã mê ho ajuta anê nê te mê pajaxwýja mê lhkõ hã ri mê kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

⁹ Nê ra ixte anhõ krí kamã mê apê Kris kwýjê mã kagã nê mēnh nhùm mê ate kamã harênhhta. Na xep pre Xotreja kuma nê ãm kuma. Kêp mê akrãhtúm prãm xaj kãm ixkapêr mar prãm kêt nê.

¹⁰ Na xep hte tanhmã ixto hêx to ho pa. Nom paxpaxix ixto hêx kêt nê. Mãânên Kris kôt mê pahtõjaja nhýhýnh krí hõ rúm mê awýr pan pøj nhùm xep tanhmã mê amã mê ho hêx to. Nê mê hpõx ã mê omu nom amnhí nhõrkwý hwýr mê hwýr kêt nê. Tã ka mê kurom amnhí nhõrkwý hwýr mê awý nhùm xep tee ri ja hã mê apumu nê mê akamã gryk nê mê hã mê amã akir nê Tirtúm mã amnhí jarênh xã hã ixkre nê mê ajano. Na xep hte ã amnhí nhípêx anhýr o pa. Jakamã kot paj nhýrmã ma mê awýr mō hãmri nê mê apiitã mê anoo mã hã kãm akir. Tanhmã kot mê ixto hêx to nê tanhmã kot amnhí tomnuj to hã kãm akir ka mê apiitã hã inhma.

Mê pahte mê kot amnhí tomnuj xwýnhjê hkôt amnhí nhípêx kêt ã mê pamã karõ

Rukre 6.45; Rõmãn 12.9

¹¹ E kwa ixkrãmnhwý. Kêr ka ã Xotre kot amnhí tomnuj o pa anhýrja kôt amnhí nhípêx kêt nê. Mê kot amnhí tomnuj o mê pa xwýnhjaja na htem Tirtúm kôt amnhí nhípêx kêt nê. No kêt mê kot amnhí to mex o ri mê pa xwýnhjaja na mê kêp Tirtúm kra jakamã kêr ka mê ã mê kot amnhí nhípêx anhýr xwýnhjê kôt pix mã amnhí nhípêx.

Temêtre jarênh

¹² Nê Temêtre na hte tãm ri amnhí nhípêx nê ãm hãmri Tirtúm kapêr o mê ahkre mex nê nhùm mê piitã xapên mã mex ã harê. Pa hte ijaxwýja mê kãm mex ã harênh o ri mê hkôt ixpa ka htem inhma. ãm hãmri na pa hte tanhmã harênh to ho ri ixpa.

Kagã jatur xã

Sikún Juãw 12-13

¹³ E kagãja kamã na pa ãm ja pix jarê nê hã kagã nê awýr kumê Gajore. Na pa kormã harênh jatur xã mēnh kêt nê.

¹⁴ Nom kot paj tokyx ma awýr mō hãmri nê ri kormã amã hatur xãm kumê.

E kê Tirtúm akutã nojarêt ráhã ho pa.

Nê ota jar Kris kôt akrãmnhwýjaja awýr hpêr mê. Nê kêr ka atar Kris kôt ixkrãmnhwýjê mã ijarê.

Tã ãm ja pix. Ixpê Juãw pigêtre na pa ã awýr kagã nhípêx nê mēnh anê.

Jutre Jutre kot Jejus kôt hkwyjê piitã hwÿr kagã nê mênh

Jutre na pre kagãja nhîpêx. Xiakre pyra nê kêp Jejus tã na pre. Tã kagãja nhîpêx nê krî piitã hkôt Jejus kôt hkwyjê hwÿr kurê. Na pre mê hkwyjaja kêp Jejus kwÿ hã amnhî jarênh tã axtem nê tanhmã amnhî tomnuj to ho pa. Jakamã nhùm Jutre kagãja kamã Jejus kwÿjê mã hprî hã tanhmã mê harênh to nê mê kot mê hkôt amnhî nhîpêx nê mê kãm kapêr kãm hihtÿx nê. Nê mê kãm:

1 Pa Jejus kôt ixtõ nê ixtõxjaja. Xã mê amex? E ot pa mê amã kagã nhîpêx nê mê awÿr kurê. Tirtüm kot ixpyrã nê amnhî kaxyw mê axunhwÿr xwÿnhjê hwÿr. Mêpanhîpêxã Maati Tirtüm kãm mê pahpiitã mê pajapê jakamã na hte Kra Jejus Kris mê wa mê pahtãnopxar mex rãhã ho pa.

Ixpê Jutre na pa hte Jejus Kris mã tanhmã amnhî nhîpêx to ho ri ixpa. Nê ixpê Xiakre htõ na pa.

2 Na pa hte mê ato Tirtüm wÿr ho ixpa nê kãm:

—Pa Tirtüm. Kwa mê kot Akra Jejus kôt amnhî xunhwÿr xwÿnhjê pumu nê amã mê hapê hã mê kamã axukapri rãhã ho apa. Kê mê kamã amnhî krit nê ãmnhîx hamakêtkati nê ri tanhmã amnhî nhîpêx to ho pa. Nê mê kãm axpên kÿnh o ri axpên kôt pa. Anê.

*Mê kot Tirtüm kapêr o hêx xwÿnhjê jarênh
Wam Ximotre 1.18-20, 6.12*

3 E ixkrãmnhwÿjaja. Nã inhmã mê akÿnh. Na pa pre jãã mê amã kagã hkwy nhîpêx kaxyw. Mê pahte Jejus Kris kukwak ri amnhî nhîpêx nyw ã tanhmã mê pajarênh to nê hã kagã kaxyw tã kormã harênh kêt nê. Kot paj axtem mêmoj jarê. Na pre Tirtüm mê pamã kot amnhî nhîpêx o amnhîrit pa. Nê kapêr o amnhîrit pa. Mê pahte mar nê hkôt amnhî nhîpêx kaxyw. Jakamã kêr pu mê kapêr mar tÿx nê amnhî krã hi kamã haxãr tÿx nê hã papa. Nom koja mêhõ kapêr kuhpa hã tanhmã mê amã kapêr o hêx to ka mê ama nê ãm ama.

4 Na xep ra kapêr o mê hêx xwÿnhjaja mê akôt pa nê mê apyrã nê Jejus kôt amnhî xunhwÿr ã amnhî jarê nom amnhî to hêx. Ka xep mê aprî hã mê hêx ã mê omunh kêt nê mê kêp Jejus kôt mê atõ hã mê hkãmnhîx nê atÿx amnhî nhõrkwÿ hwÿr mê awÿ. Nom mê kot Tirtüm kapêr o hêx pix kaxyw na htem mê akôt pa nê mê amã kapêr o:

—Tirtüm kãm mê pajapê htÿx kumrêx nê mê pakutã nojarêt ho pa jakamã kwa kêr pu mê mãmri nhãm mênijê ho amnhîkati ho papa. Koja ja hã mê pahpumu nê tanhmã hã mê pahto hkêt nê. Kãm mê pajapê kênã

kot kêt hã tanhmã mê pahto. No kêt Jejus Krisja mê ate kêp mê panhõ Pahihtî hã harê nom kêp mê panhõ patrãw rÿ kêp mê panhõ Pahihtî hkêt. Anê.

Ã Tirtüm kapêr kuhpa hã mê amã harênh anhÿr o pa. Tirtüm kapêr ã kagã htüm kot amnepêm mê hkukamã tanhmã mê harênh to nê mê harênh kot:

Å mê kapêr anhÿr o paja mÿrapê koja mê mex kêt nê pa. Koja Tirtüm mê homnuj tÿx kumrêx.

Anhÿr o kot mê harênh. Tã pa mê amã ixpri hã mê harê nê hã kagã. Mê ate inhmar nê amnhî nê mê omunh mex kaxyw.

*Tirtüm kot tanhmã mê kot amnhî tomnuj
xwÿnhjê nhîpêx to hã harênh*

Sikün Pêtre 2.1-17; Sikün Ximotre 3.1-9

5 Nê amnepê mã mê panhîgêttaja kormã Ejit kamã mê pa ri nhùm Tirtüm Ejit nhõ xwÿnhjê rüm mê kator pa. Hãmri nhùm mê hkwyjaja tanhmã hamaxpêr to nê axtem nê amnhî kaxyw hkôt hamaxpêr kêt nê. Nhùm tee ri amnhî tã mê omu nê ã mê kot amnhî nhîpêx anhÿr xwÿnhjê nhîmex pa. Ra mê ate mê harênh mar mex tã pa axte mê amã mê harê.

6 Nê Tirtüm kapêr o mê wrÿk xwÿnhjê kwÿjaja. Na prem Tirtüm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nõkati nê Tirtüm kaga. Jakamã nhùm mê hã amÿnê nhùm mê unê nê kãx o mê hkaxpre pa. Nê nhÿri pika kaxwÿnh kãm kamãt kó htyk kãm mê kurê nhùm mê arî kamã hkrî ho hkrî. Nom koja nhÿrmã Tirtüm kot tanhmã mê pahpiitã mê pajarênh to xã hã arÿgato kato nhùm mê ri kormã hapõx pa. Hãmri nê kot amnhî tomnuj mÿrapê mã mê kot amnhî xã htÿx kamã hamak tùm xãta wÿr ma hapêx.

7 Nê krîpê Sotõ nê Komo nhõ xwÿnhjaja na prem haxwÿja kãm Tirtüm kapêr kôt amnhî nhîpêx prãm kêt nê. Nê krÿja wa hpuhã krî hkwy kamã ri mê pa xwÿnhjaja haxwÿja mê urãk nê nê kãm kapêr mar prãm kêt nê. Na prem amnhî tomnuj tÿx rãhã ho pa. Nê axtem nê axpên pè ri mê hprõ ho amnhîkati ho pa. Nê mêmy hkwyjaja ri axtem nê axpên to amnhîkati ho pa. Hãmri nhùm Tirtüm tee ri mê kot amnhî nhîpêxja ã omu nê mê hipy kuwy hpók kwÿ rê nhùm mê amnhî wÿr omu nê kãm ma xãj tee ri hprõt kapry. Nê hprõt kaxyw òrkwÿ rüm hapõj nê hxêt pa nê hapêx. Na hte ã Tirtüm mê kot amnhî tomnuj o mê pa xwÿnhjê nhîpêx anê. Jakamã koja nhÿrmã kuwy hpók rãhã xwÿnhhta wÿr mê piitã mê rênh pa nhùm mê kamã amnhî xã htÿx kamã hamak rãhã ho pa ho pa nê aa ã hapêx kêt nê. Nê ã htÿx rãhã papa ho pa. Tã mê pahte Sotõ mê Komo nhõ xwÿnhjê jarênh mar nê mê pahte amnhî tomnuj kaga kurê

kumrëx kaxyw na pre Tirtüm ä mä pamä mä harënh o amnhürt anë.

*Më hpijaam kët xwýnhjë jarënh
Sikün Pëtre 2.10*

⁸ Në më kot Tirtüm kapër o pihkär xwýnhjaja na htem ä mä kot amnhí nhípëx anhÿr xwýnhjë pyrã në amnhí tomnuj týx pix o ri pa. Jakamã na htem tanhmã hpimtir punuj to hämri në hkrã hapôj në hpimtir xã hkôt tanhmã amnhí tomnuj to. Jao hkwyjë kamã hpijaam kët o pa. Rý mënijë hõ rý mëmyjë hõ nhüm më axpën kãm hpijaam kët o pa. Rý Tirtüm kapër o më wrýk xwýnhjë ho kapër punuj në. Kapër mä gët o tanhmã më ho kapër punuj to. ä na htem hpimtir punuj xã hkôt amnhí tomnuj o pa anë.

⁹ Tirtüm kapër o më wrýk xwýnh krãhtüm Mikewja. Këp më hkrãhtüm tä aa mä kãm kapër mä gët kët në. Na pre Mojes ty nhüm Mikew ra ma hwÿr tën wrý. Në kuri Satanasti pumu hämri në Mojes nhí në tanhmã kãm kapër to. Nom kapër mä gët o kãm kapër kët në. äm kapër mä hprí ho kãm kapër në kãm:

–Kwa äm omu kë nõ. Kot kaj tanhmã ho nhüm Tirtüm apumu në hä tanhmã hä ato. Anë.

¹⁰⁻¹¹ Nom ixte më amã më hpimtir punuj jarënh xwýnhjaja. Më kot Tirtüm kapër o pihkär xwýnhjaja kot hprí hä Tirtüm kot amnhí nhípëx ä harënh mar kët jakamã na htem htýx ri ho kapër o haprý ho pa. Te ho mry xopreja hamaxpër kët në htýx ri amnhí nhípëx o pa pyrãk. Nom koja nhÿrmã Tirtüm më homnuj týx në.

Te më kot finat Kaí kot amnhí tõ hpír xwýnh kot amnhí nhípëxta pyrãk. Në te më kot finat Paraãw kot amnhí nhípëx pyrã në kãxpore rühn prãm xäj Tirtüm kapër kuhpa hä tanhmã amnhí nhípëx to ho pa. Në te më kot finat Kore kot amnhí nhípëx pyrã në Tirtüm kot më kaxyw më õ pahi xãm xwýnhhta kutã amnhí xunhwý. Mýrapë koja më jajë pyrã në kuwy hpók rãhä xwýnhhta wrý ma hapëx pa.

¹² Na ka htem apë Jejus kwý hä axpën wrý akuprõ. Në tõhä më apë hkwy hä amã axpën kínã ä axãpkur kaxyw xpën wrý akuprõ. Nhüm ixte më amã më harënh xwýnhjaja më akõt agjë në më akutã apku. Jakamã kwa më o kora më amnhí në më omunh mex në. Më hipëx o te më ate më axãpkur xã hä më anhõ kamã këne pumunh në hanhir në rënh pyrã në amnhí nhíhkó hä më pumu në amnhí në hanor kurë kumrëx. Na htem hpijaam kët kãm amnhí pix kukamã hamaxpër pe apkur rühn o pa.

Te na wrýk kaxyw htyk rax në mör nhüm më kot omunh në wrýk ä hkamnhix tä nhüm kók kot nhãm mënh nhüm wrýk këeta pyrãk o na htem amnhí nhípëx. Jao te më kot

äm hämri më amã Tirtüm kapër jarënh mex pyrãk tä më amã ho hëx.

Në te më këp mëmo pí hpär ra õ mã tãm tä äm htýx rä në aa õ hkët nhüm më kot krãhyr në mënh nhüm grã parta pyrãk.

¹³ Në te më këp gó xujanär kot amnhí nhípëx pyrãk. Na hte gó xujanärja hakãx wrý kapë në mra nhüm hamrõ kýxpë amgrã kamã arík nhüm gó awjanã në ma akupým hipók wrý mra. Ja pyrãk na htem ma nhÿhým mra në më kãm mëmojarë në nhãm mra në më kãm mëmojarë në ma akupým më kurüm mra. Nhüm më mar xã hkôt amnhí tomnuj rãhä ho pa.

Në te më kot kaxkwa hä kanhëre nhÿhým htëm nhüm më kot nhÿhým htëm xã hkôt omunh këeta pyrãk. Jakamã koja Tirtüm nhÿrmã kamatã kó kamã më rënh pa nhüm më aa hapõx kët në.

*Më kot amnhí tomnuj xwýnhjë hkukamã
më harënh*

Apokarip 20.11-15

¹⁴ Në na pre finat Enokja amnepë mä ä mä kot amnhí tomnuj anhÿr xwýnhjë hkukamã tanhmã më harënh to. Më kot Tirtüm kapër o pihkär o ri më pa xwýnhjaja nhüm më hkukamã më harë. Enokja finat Atãw kanrëhä htãmnhwý na pre. Tä ä më kot amnhí tomnuj anhÿr xwýnhjë hkukamã më harënh o:

Koja nhÿrmã Pahihtija man pika hwÿr akupým wrý. Kapër o më wrýk xwýnh xohtõ rax më më hpimràatã akupým wrý.

¹⁵ Hämri në më pahpiitã kormã më pahür ri më pahte tanhmã amnhí nhípëx to ho papa hä më pahpumunh xã hkôt tanhmã më pajarënh to. Hämri në më kot Tirtüm kapër o hëx o pa xwýnhjë pumu në tanhmã më harënh to në më harënh o: “Jajaja na pre më kãm Inhípëëxã Tirtüm prãm kët në ri kapër kwým pix mä amnhí nhípëx o pa. Në kapër punuj o pa. Ä na prem amnhí nhípëx anhÿr rãhä ho pa.” Anhÿr o më harë në amnhí në kuwy hwÿr më kurë nhüm më amnhí xã htýx kãm hamak o pa rãhä në pa ho pa. Anë.

Ä na pre finat Enokja më hkukamã më harënh anë.

¹⁶ Äm hämri na më harë. Tä na hte arí më hkwyjaja ä amnhí nhípëx anë. Në hamaxpër mex kët në. Na htem nhãm tanhmã më ho kapër punuj to pix kukamã hamaxpër. Në amnhí krã hkôt htýx ri tanhmã amnhí tomnuj to ho pa. Në amnhí to jarkrar rãhä në. Në hëx rom më këp mëmojarë jamýnh kaxyw tanhmã më kãm hëx to.

¹⁷ E Kris kôt ixkrãmnhwýjaja. Koja më ä më amã Tirtüm kapër o hëx anhÿr o më akõt pa ka më ama në äm më ama në më kapër mar kët në. äm më panhõ Pahihti Jejus Kris

nhý hã më ajahkre o më pa xwýnhjaja kot tanhmã më amã më harênh toja mã mãn kêt ajamaxpêr týt rãhã o ri apa.

¹⁸ Na prem më amã më harênh o:

—Jeus akupýn wrýk xwýr i koja mëmojaja më awýr mran pój. Nom më kot Jeus kapêr kwým amnhí krã hkôt tanhmã amnhí nhípêx to xwýnhjaja koja më. Hãmri nê më apê Jeus kwý hã më apumu nê më atã akunha nê më atã hpêr o axkê nê Tirtúm ã hpêr o axkê nê kapêr ã kagã hã hpêr o axkê. Anê.

¹⁹ Æ më kot amnhí nhípêx anhýr xwýnhjaja më pahpê Jeus kwýjaja më pahte axpên kutã amnhí xunhwýrja na më kãm hprãm. Më kamã Tirtúm Karô gjêx kêt jakamã më kãm amnhí krã hkôt pix mã tanhmã amnhí tomnuj to ho pa hprãm.

Më pahte Kris akupýn wrýk jamãr pê tanhmã amnhí nhípêx to hã më pamã karô

Matêwre 24.45-51; Rukre 12.25-40; Karatas 6.1-2; Xiakre 5.19-20; Sikün Pêtre 3.12-15

²⁰ Kwa më apê Jeus kôt ixtô nê ixtôxjaja kër ka më ã më kot amnhí nhípêx anhýr o më pa xwýnhjê rom apkati më amnhí kaxyw Jeus pix mã mãn ajamaxpêr rãhã ho ri apa. Te më kot më hakre hã ra ãptãr nê amnhí krãm më hakre xã jagjênh týtã pyrãk.

Jao Tirtúm kapêr mar týt nê hkôt amnhí nhípêx mex o ri apa.

Nê Karô nhý hã amnhí to hwýr rãhã nê.

²¹ Nê Tirtúm kãm më pajapê hã kãm ajamaxpêr rãhã ho ri apa.

Nê Pahihti Jeus Kris kãm më pajapê hã kãm ajamaxpêr týt rãhã ho apa.

Koja nhýrmã kãm më pajapê hã akupýn më pahwýr wrý nê tanhmã më pahto mex to pu më kuri pahfír tùm nê pahkính nê papa ho papa. Tã kër pu më arí akupýn më pahwýr wrýk xã hã arígro jamãr rãhã ho papa.

²² Nê më pahkwýjaja kormã më kot Jeus kôt amnhí xunhwýr týt kêt xwýnhjaja kër ka më kamã axukaprí nê aprí hã më kãm Tirtúm kapêr jarênh o ri më hkôt apa.

²³ Na pre ra më hkwyjaja më kot Tirtúm kapêr o pihkãr xwýnhjê kapêr ma nê më hkôt amnhí nhípêx. Jakamã kër ka më ja hã më omu nê te më ate kuwy hpók rúnh né më hpa hã më hamýnh nê nhãm më rênh pyrãk o më hipêx. Jao më kot nhýrmã Tirtúm kapêr o pihkãr xwýnhjê hkôt kuwy hpók rúnhta wýr pa pymaj më nê më kãm akapêr kãm axihtýt o ri më hkôt apa. Kê më ama nê më hkaga nê më hkôt ri amnhí nhípêx kêt nê.

Nê htýt ri më kot amnhí tomnuj o më pa xwýnhjaja kër ka më kamã axukaprí ho ri apa nê më kamã agryk tokyx anhýr kêt nê. Xatã më kãm Tirtúm kapêr jarênh rãhã ho ri më hkôt apa. Nom kwa më okora kër ka më

kot amnhí nhípêx o amnhí nhípêx o ri apa hkêt nê. Kwarí ho kwarí.

Jutre kot Tirtúm mã mex o mex ã harênh Wam Pêtre 1.5-7

²⁴ Nê kër pu më Tirtúm mã amnhí jarênh kaxyw nê ã kãm amnhí jarênh anê nê kãm:

—Pa Tirtúm. Nã ãm hãmri na ka hte amnhí kôt më ixunhwýr týt nê pa më akaga hkêt nê akôt amnhí nhípêx rãhã ho ri ixpa. Kot kaj nhýrmã amnhí wýr më ixto api pa më Akra më war akuri axte tanhmã amnhí tomnuj to hkêt nê. Nê amnhí to mex pê anhíãr htýt rax kãm ixpa. Jao ixlkính týt nê ixpa ho ixpa.

²⁵ —Apê më inhô Tirtúm ã apyxi mex kumrêx na ka. Na ka pre Pahihti Jeus Kris kukwak ri më ixpiitã më ixte amnhí tomnuj pê më ixpytã. Nê na ka hte anhíãr htýt rax rãhã ri apa. Nê amex o amex nê axihtýt o axihtýt nê axãhpumunh o axãhpumunh. Nê apê më inhô Pahi Maati hã apyxi mex na ka. Amnepê mã kormã mëmoj kêt ri ka pre ã amnhí nhípêx anhýr o apa rãhã nê. Tã arí ã ate amnhí nhípêx anhýr ho apa ho rãhãã. Nê kot kaj apkati më ã ate amnhí nhípêx anhýr ho rãhãã. ã ate amnhí nhípêx anhýr o apa ho rãhãã. Tã ãm ja pix na hapêx. Anê.

E kër pu më ã Tirtúm mã mex o mex ã harênh anhýr o papa.

Æm ja pix. Ixpê Jutre na pa më awýr kagãja nhípêx nê kumê.

Apokarip Juāw kot Jejus nh̄y hã mẽmoj kukamã harēnh

Juāw na pre mẽ pamã kagãja nh̄ipêx. Juāw Paxis kêt axtem Jejus nh̄y hã hkrajê jahkre ho mẽ pa xw̄ynh̄jê hõ pê Juāw na pre hipêx. Na pre Jejus ã mẽ kãm hkurê xw̄ynh̄jaja unê nê ma gô hipók pê Patos w̄yr kumê nh̄um kêp prês nê gô hipók kãm pa ho pa nê aa kurum kator kêt rãhã ty.

Jakamã kormã ht̄ir ri nh̄um Tirtũm kapêr o wr̄yk xw̄ynh̄jê hõ gô hipókja w̄yr wr̄y nê kãm mẽmoj kukamã awjarê nh̄um kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnh̄i xõ ri mẽ pamã hã kagã. Na pre mẽmoj to axkrunêpxi nê hã kagã. Mẽ kot Jejus kutã amnh̄i xunhw̄yr xw̄ynh̄jaja kot Jejus ã tanhmã kêp hkwȳjê to ho pa nh̄um mẽ hkwȳjaja pikaprãr ã kagã. Nê Jejus kêp Pahi Maati hã kot nh̄yrmã mẽ kot Tirtũm kutã amnh̄i xunhw̄yr xw̄ynh̄jaja piitã ma mẽ kot amnh̄i xã ht̄yx kamã hamak tũm xã hw̄yr mẽ rēnh par ã kagã. Nê Tirtũm kot nh̄yrmã hkrajê ho mex kumrêx ã nh̄um mãânēn hã kagã. Hãmri nê mẽ pamã hã kagã o:

¹⁻² E kot paj mẽ amã awjarê nê hã kagã. Ixpê Juāw ixte Tirtũm mã tanhmã amnh̄i anh̄ipêx to ho ixpa xw̄ynh̄ kot paj mẽmoj jarê nê hã kagã. Na pre Tirtũmja Jejus mã mẽmoj kukamã tanhmã ujarēnh to ho ra kãm ho amnh̄ir̄it pa. Kot amnh̄i xõ ri mẽ pahte hkôt amnh̄i xunhw̄yr xw̄ynh̄jê mã harēnh kaxyw. Hãmri nh̄um kuma nê kot amnh̄i xõ ri inhmã ujarēnh kaxyw man ixw̄yr kapêr o wr̄yk xw̄ynh̄ mẽ nh̄um man ixw̄yr wr̄y nê ô ri inhmã mẽmoj to amnh̄ir̄it pa. ãm hãmri ã inhmã mẽmoj to amnh̄ir̄it anê. Tã kot paj amnh̄i xwar mẽ apê Jejus kôt ri mẽ apa xw̄ynh̄jê mã harê nê hã kagã. Mẽ ate mar nê axkãm ajamak rom nê ri apa kaxyw. Nã ixte hã kagã mã xw̄ynh̄ja koja tanhmã amnh̄i to nê tokyx mẽ pahw̄yr wr̄y.

³ Jakamã kwa kera ka mẽ apr̄i hã kagãja kamã harê nê am̄ nê hkôt pix mã amnh̄i nh̄ipêx nê mẽ piitã mẽ kãm kamã harēnh o ri mẽ hkôt apa. Kot kaj mẽ ã amnh̄i nh̄ipêx anê nh̄um Tirtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarēnh mar nê hkôt amnh̄i nh̄ipêx xw̄ynh̄jaja koja Tirtũm ja hã mẽ omu nê mẽ ho mex nê nh̄um mẽ apyrã nê hkĩnh nê pa ho pa.

Juāw kot kr̄i pê 7 kôt Jejus kw̄ȳjê hw̄yr kagã rēnh

⁴ E ixpê Juāw kot paj atar pika pê As kamã kr̄i pê 7 piitã hkôt mẽ apê Jejus kw̄ȳ hã axpēn w̄yr mẽ apikuprõnh xw̄ynh̄jê hw̄yr kagã nê kurê ka mẽ kamã harê nê ama.

Na pa hte mẽ ato Tirtũm w̄yr rãhã ho ri ixpa. Nê mẽ ato hw̄yr o:

—Pa Tirtũm. Kwa kêt ka pika pê As kamã akrajê ho mex nê mẽmoj to mẽ kutã anojarêh rãhã ho apa. Kê mẽ hamakêtkati nê ãmnh̄ix ri pa ho pa. Ja na inhmã hprãm. Anê.

Tirtũmja rãhã ho rãhã. Amnepēm kormã mẽmoj kêt ri nh̄um pre ra rãhã ho rãhã. Nê koja nh̄yrmã mẽmoj akup̄ym hapêx par tã nh̄um Tirtũm aa hapêx kêt kumrêx. Koja ar̄i rãhã ho rãhã. Na hte kaxkwa kamã kot mẽ pahto amnh̄ipt̄ar ã hkri xã kamã mẽ papyt̄ar rãhã ho hkri.

Nê Tirtũm Karõ te kot Tirtũm kot mẽ pahto amnh̄ipt̄ar xã hã hkri xã kapem kanê maati pixi kamã kw̄r̄yt pê 7 xãm xw̄ynh̄ta pyrãk. Na hte Tirtũm nh̄ihkõ hã hkri ho hkri. Tã kê mẽ ato mex rãhã ho pa.

⁵ Nê Jejusja na pre hte Tirtũm kapêr o mẽ ahkre mex o pa nê aa hkaga hkêt nê. Tã nh̄um prem axtem nê kupi. Hãmri nh̄um Tirtũm akup̄ym ho ht̄ir. Jejus kumrêx ho ht̄ir nh̄um ht̄ir o ht̄ir. Nê kêp pika piitã hkôt pahi piitã nhõ Pahihti. Kãm mẽ pajapê ht̄yx jakamã na pre mẽ panê ty nê hkamurõja te mẽ panê hpikapir pyrãk o amnh̄i nh̄ipêx. Nê htyk o mẽ pahte amnh̄i tomnuj pãnhã amnh̄ire. Jao te mẽ pahte amnh̄i tomnuj pê mẽ papyt̄ar par pyrãk o mẽ panh̄ipêx.

⁶ Nê na pre mẽ pahpê patre nê mẽ piitã mẽ ho Hipêxã Tirtũm w̄yr o papa kaxyw mẽ paxunhw̄y. Nê kêp mẽ panhõ Pahi Maati hã kãm hprãm xã hkôt mẽ pahte kãm tanhmã amnh̄i nh̄ipêx to ho papa kaxyw mẽ paxunhw̄y. Jakamã kwa kêt pu mẽ kãm mex o mex nê hiht̄yx o hiht̄yx ã mãn harēnh rãhã ho pa.

⁷ Nê koja tokyx akup̄yn mẽ pahw̄yr kakrã kamã wr̄y pu mẽ pahpiitã wr̄yk kãm omu. Nh̄um mẽ kot hp̄ir xw̄ynh̄jaja tee ri amnh̄i w̄yr omu. Nê pika piitã hkôt ri mẽ pa xw̄ynh̄jaja omu nê mẽ kot amnh̄i tomnuj jakamã tee ri amnh̄i kukamã hamaxpêr o kãm ma ht̄yx kumrêx. Hãmri nê kãm ma xãj mur nê ht̄ert̄et o kuhê. Koja nh̄yrmã Jejus akup̄yn wr̄y nh̄um mẽ amnh̄i w̄yr omu nê ã amnh̄i nh̄ipêx anê.

⁸ Nê Tirtũm na hiht̄yx o hiht̄yx nê ãhp̄umunh o ãhp̄umunh. Nê aa kot mēhõ ni r̄um kator kêt. Na hte amnh̄i jarēnh o:

—Ixrãhã ixpa xw̄ynh̄ na pa. Amnepê mã kormã mẽmoj piitã hkêt ri pa pre ra ixrãhã ri ixpa ho ixpa. Nê koja nh̄yrmã mẽmoj akup̄ym hapêx tã pa ar̄i ixrãhã. Anê.

Juāw kot Jejus akup̄ym ht̄ir ã omunh

⁹ Nê ixpê Jejus kôt mẽ atõ Juāw na pa hte mẽ apyrã nê Jejus kôt amnh̄i nh̄ipêx nh̄um hte mẽ kãm Jejus kurê xw̄ynh̄jaja mẽ apyrã nê hã inh̄ipêx kati ho pa. Mẽ pahte hkôt ri amnh̄i nh̄ipêx o papa jakamã na htem hã mẽ pahptomnuj t̄yx rãhã ho pa. Tã pu htem ý hã

mē kutā amnhī to htýx nē arī hkôt amnhī nhīpêx. Jakamā na pa pre Tirtūm kapêr o mē ajahkre rāhā ho ri mē akôt ixpa. Nē Jejus kēp mē panhō Pahihti hā mē amā harē. Mýrapē na prem hā ixpynē nē man amnē ixto tē nē jar gō hipōk pē Patos kām inhme pa kamā ixpē prēs nē ixpa ho ixpa.

¹⁰ Tā nhūm tōmik pa Tirtūm mā amnhī jarēnh o nhý. Hāmri nhūm Karō tanhmā ixkrā hto pa te ixpimtir kām mēmoj pumunh pyrā nē amnhī katut kôt mēhō kapêr ma. Te kot pifti kakōr týx pyrāk pa kuma.

¹¹ Hāmri nhūm inhmā kapêr nē inhmā:

—Pa Juāw? E kot paj amā mēmoj to amnhīrit ka omu nē akwýjē mā hā kagā. Nē hā kagā hpa hāmri nē ahpýnhā krī hkwy hkôt mē kēp ixkwý hā axpēn wýr mē pikuprōnh xwýnhjē hwýr arē. Mē kot kamā harēnh nē mar nē axkām hamak rom nē ri pa kaxyw. Epes wýr nē Emīnā hwýr nē Pekamō hwýr nē Xijaxir wýr nē Satre hwýr nē Pirate hwýr nē Raxisej wýr. Krī pē 7ja piitā hwýr ixkapêr ā kagā nē mē hwýr arē kē mē apyrā nē mēmoj jarēnhja ma. Anē.

¹² Hāmri pa ixte mēhōja pumunh kaxyw ho ijakēx nē kanē hkwy pumu. Kanē kēp 7 nē piitā ōr o.

¹³ Nē kanē nhīpōk ri mēhōja te panhī pyrā nē pahi hā ē mex kām xa. Éja hpar kōn kôt hitep nhūm xa. Nē pahi hā mē hinō hpre xā ho amnhī nhīnō hpre nē xa. Hinō pre xāja ōr pix o.

¹⁴ Nē hkrā hki te kaxāt nhī jaka pyrā nē hakaajre. Nē no te kuwy hpōk pyrā nē hkarýr týx nē.

¹⁵ Nē hpar te mēmo kax karýr týx pyrāk. Nē kapêr te gō hprōt týx koko pyrāk.

¹⁶ Na pre upōk rūm kanhēti ho 7 nē hamý nē o xa. Nē hakwa rūm wapo pōm kato nē akutā wa gixre nē ajēt. Nē hkuk kamā hirā htýx kumrēx. Te myt kot mē pano hā harir nhūm gēk týx pyrāk. Ā mēhōja kot anhýr.

¹⁷ Pa tee ri tanhmā kute hā omu nē inhmā ma htýx kumrēx nē umaj tēm nē hpar pē te ixytyk pyrā nē nō. Hāmri nhūm ixtā upōk rūm ihkrajā xi nē inhmā kapêr nē inhmā:

—Kwa amā ixpuma hkēt nē. Pa na pa. Amnepē mā kormā mēmoj kator kēt ri pa pre raa. Nē ixrāhāā. Koja nhýrmā mēmoj akupým hapēx pa arī ixrāhā ixpa ho ixpa.

¹⁸ —Na pa pre ty tā akupým ixtír. Nē ixtír o ixtír. Kam ixpumu. Kot paj axte ixytyk kēt nē. Ixpē mēhtýkjē hpām jakamā papxpix na pa hte mē htyk ā arīgro jarē nhūm mē hā ty nē ma mēhtýkjē papxā hwýr ma pa.

¹⁹ —E kēr ka ate mēmoj pumunh xwýnhta pumunh týx nē akwýjē mā hā kagā. Nē mēmoj kormā kot amnhī nhīpêx kēt nhūm ate omunh mā xwýnhta ka inhý hā mē kām hā kagā. Mē kot kamā harēnh nē mar týx kaxyw.

²⁰ —Nē kot paj axte ixprī hā ate mēmoj pumunh xwýnhta jarē ka inhma. Nā kanē pē 7ta te mē kot krī hkwy pē 7 kamā mē kēp ixkwý hā axpēn wýr mē pikuprōnh xwýnhjē pyrāk. Nē inhīhkra kamā kanhēti pē 7ta te kēp inhma mē kot mē hamār xwýnhjē pyrāk. Anē.

2

Epes kamā Jejus kwýjē hwýr kagā

¹ Nhūm Jejus arī inhmā kapêr nē inhmā:

—E kēr ka krī pē Epes kamā ixkwýjē jamār xwýnh wýr kagā nē amē. Nē kagāja kamā mē kām ixkapêr jarē nē mē kām:

Pa Epes kamā ixkapêr mar kaxyw axpēn wýr apikuprōnh xwýnhjaja. Ot pa mē awýr ixpēr mē. Ixpē ixupōk o kanhēti ho 7 nē hamýnh nē ho ixām xwýnhta na pa. Nē ixpē ōr o kanē pē 7 nhīpōk ri ixpa xwýnhta na pa ā mē awýr ixpēr mēnh anē.

² Na pa hte tanhmā mē ate amnhī nhīpêx to ho apa hā mē apumunh mex o ixpa. Na ka htem inhmā amnhī nhīpêx mex nē pa ja hā mē apumu. Mē kot ixtā mē anhīpêx kati htā ka mē kutā amnhī to htýx nē ixkaga hkēt nē. Nē mē kot amnhī tomnuj xwýnhjē hkôt amnhī nhīpêx o ri apa hkēt nē. Nhūm ixte mē awýr mē rēnh ā amnhī to hēx xwýnhjaja mē awýr pan pōj ka mē aprī hā mē kot amnhī to hēx ā mē omu. Hāmri nē tee ri mē kot amnhī nhīpêx ā mē omu nē amnhī nē mē hanor kurē kumrēx. Ām hāmri na ka htem ā mē hipêx anē.

³ Nē mē kām ixkurē xwýnhjaja kot tanhmā ixtā mē atomnuj týx to htā ka mē kutā amnhī to htýx nē aa ixkaga hkēt nē. Nē ixkōt amnhī nhīpêx mex rāhā ho ri apa. Ām hāmri na ka htem ā amnhī nhīpêx anhýr o ri apa.

⁴ Ām mēmoj pixi na ixpē omnuj. Amnepē mā kormā mē ate ixkōt amnhī xunhwýr nyw ri na ka prem amā axpēn kīnh nē axpēn to mex o ri apa. Nē mē amā axpēn tā ma ho te mē amā amnhī tā ma pyrāk o axpēn nhīpêx. Tā tanhmā ajamaxpēr to nē axte ā axpēn nhīpêx anhýr kēt nē. Jao te mē amā ixkīnh kēt pyrāk o amnhī nhīpêx. Pa tee ri ja hā mē apumu nhūm ja inhmā mex kēt nē.

⁵ Kwa mē tokyx ja hā amnhī pumu nē akupým mē ate ixkōt amnhī xunhwýr nyw ri mē ate axpēn nhīpêxta o akupým axpēn nhīpêx o apa. Kot kaj mē anhýr kēt kot paj te mē apē mē anhō kanē hpyr nē kapōt ā mēnh pyrāk o mē anhīpêx ka mē ri apa nē gaa nē apikaprar pa. Tā mēhō koja mē amýr pē mē anhō krī kamā mē kām ijarēnh o pa?

⁶ Nē mē kēp Nikoraw nhō xwýnhjaja na ka htem mē kot tanhmā amnhī tomnuj to hā mē omu nē ixpyrā nē apē ja hprām

nōkati nē mē hkōt ri amnhī nhīpēx kēt nē. Pa ja hā mē apumu nē ixkīnh nē.

⁷ Tā ixte mē amā ixkapēr jatur xà na ja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhī hā ixte mē amā ixkapēr anhīrja ma nē kām ajamaxpēr tīx rāhā ho ri apa.

Tirtūm nhō krī kamā mēmo pī hpār kuhē xwīnh. Mē kot ô hkur nē axte htyk kēt nē pa ho pa mā xwīnh. Kot kaj mē ate amnhī tomnuj nē amnhī to htīx nē arī inhmā hprām xā hkōt amnhī nhīpēx rāhā ty pa akupūm mē ato mē atūr nē ma pī hpārta wūr mē arē. Ka mē ma hwūr mra nē ô hō hta nē akrē nē axte atyk kēt kumrēx nē apa ho apa.

E ām ja pix na hapēx. Anē.

—E Juāw. Kēr ka Epes kamā ixkwījē jamār o pa xwīnh. Kēt nē mē hwūr amē. Anē.

Hāmri pa kuma nē ô ri mē kām hā kaga hpa.

Emīnā kamā Jejus kwījē hwūr kaga

⁸ Hāmri nhūm hpānhā Emīnā nhō xwīnhjē kaxyw inhmā kapēr nē inhmā:

—Nē hpānhā Emīnā kamā ixkwījē jamār xwīnh wūr kaga nē mē hwūr amē. Nē mē kām ixkapēr jarē nē nē mē kām:

Pa Emīnā kamā ixkapēr mar kaxyw axpēn wūr mē apikuprōnh xwīnhjaja. Ot pa mē awūr ixpēr mē. Ixrahā ho ixrahā ixpa xwīnh. Amnepēm kormā mēmoj piitā hkēt ri na pa pre ixrahā nē ri ixpa. Kōja nhīrmā mēmoj akupūm hapēx pa arī ixrahā ho ixrahā nē ri ixpa. Na pa pre ty no ām akupūm ixtīr o ixtūr. Tā pa ā mē awūr ixpēr mēnh anē.

⁹ Nā na pa hte mē ate tanhmā amnhī nhīpēx to ho apa hā mē apumunh rāhā ho ixpa. Na hte mē kām ixkurē xwīnhjaja ixtā mē atomnuj to ka mē apē amrakati nē ri apa. Nom mē ate tām amnhī nhīpēx jakamā te mē apē mē hikukrēx rūnh kumrēx xwīnhjē kot amnhī nhīpēx pyrā nē ixkukwak ri akīnh rāhā ri apa. Na hte mē kēp Ijaew ā amnhī to hēx xwīnhjaja mē ato kapēr punuj rūnh o pa. Mē kot Tirtūm kōt amnhī nhīpēx ā amnhī jarēnh tā no ām hkōt amnhī nhīpēx kēt nē. Ām Satanasti kōt pix mā na htem amnhī nhīpēx o pa.

¹⁰ Tā mē kām ixkurē xwīnhjaja kot ixtā mē atomnuj tīx o pa htā kēr ka mē amnhī tā mē omu nē tee ri amnhī kukamā ajamaxpēr kēt nē. Nē arī mē kutā amnhī to htīx nē. Kōja Satanasti mē akwījē pynē nē mē ajagjē. Hāmri nē mē ate ixkaga hprām xāj tanhmā mē anhīpēx kati hto ka mē hagiēnh xā kamā amnhī xā htīx kamā ajamak o atā arīgro pē 10. Nom kēr ka mē kutā amnhī to htīx nē ixkaga hkēt nē. Mē kot mē apar mā tā ka mē kutā amnhī

to htīx nē. Kot kaj mē aa ixkaga hkēt nē ixkōt ri amnhī nhīpēx rāhā ty pa akupūm mē ato mē atūr nē ma amnhī wūr mē ato api. Hāmri ka mē Tirtūm mē wa ixri amex nē atūr tūm nē apa ho apa nē axte atyk kēt nē apa.

¹¹ E ixkrajaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhī hā ixte mē amā ixkapērja anhīr ma nē kām ajamaxpēr tīx rāhā ho ri apa. Kot kaj mē ate amnhī tomnuj nē amnhī to htīx nē inhmā hprām xā hkōt pix mā amnhī nhīpēx rāhā ty. Hā kot paj akupūm mē ato mē atūr ka mē ma kuwyta wūr apa hkēt nē.

E. Ām ja pix. Na hapēx. Anē.

—E Juāw. Kēr ka Emīnā kamā ā ixkrajē mā ixkapēr ā kaga anē. Anē.

Hāmri pa kuma nē ô ri mē kām hā kaga.

*Pekamō kamā Jejus kwījē hwūr kaga
Sikūn Korīt 6.14-7.1*

¹² Nhūm Jejus arī inhmā kapēr nē hpānhā inhmā:

—E hpānhā Pekamō kamā ixkrajē jamār o pa xwīnhjaja wūr kaga nē mē hwūr amē. Nē mē kām ixkapēr jarē nē mē kām:

Pa Pekamō kamā ixkapēr mar kaxyw axpēn wūr mē apikuprōnh xwīnhjaja. Ot pa mē awūr ixpēr mē. Ixpē ijakwa rūm pōm wapo akutā wa gix nē kator nē ām xwīnh. Na pa mē awūr ixpēr mē.

¹³ Na pa hte mē anhō krī nhō xwīnhjaja kot tanhmā amnhī tomnuj to ho pa hā mē omunh mex nē. Mē kot Satanasti kōt pix mā ri amnhī nhīpēx o pa jakamā mē anhō krī te kēp Satanasti nhō krī pyrāk. Āxipas kot mē hkōt mē kām ixkapēr o mē ahkre ho pa nē aa hkaga hkēt tā nhūm prem axtem nē ixtā kupī. Ka mē ja hā mē omunh tā mē umaj ixkaga hkēt nē arī ixkōt amnhī nhīpēx rāhā ho ri apa. Ām hāmri na ka htem ā amnhī nhīpēx anē.

¹⁴ Mēmoj pixi na ixpē omnuj. Na hte mē akwījaja axtem nē Paraāw kapēr kōt amnhī nhīpēx o pa. Na pre Paraāwja Parak mā tanhmā kapēr to nhūm kuma nē amnhī xō ri tanhmā mē anhīgēt mā kapēr to ho pa. Nom ixkapēr kōt kēt ixkapēr kuhpa hā tanhmā mē kām kapēr to nē mē kām: “Mē māmrī ma sānti hā mē hkīnh mā xwīnhjē hkōt mra nē sānti hā apku nē ā akīnh. Nē mē urāk nē axpēn pē axpēn prō ho amnhīkati nē axpēn pē ri axpēn mjēn o amnhīkati nē mē ā ri amnhī nhīpēx anhīr o ri apa. Ja mex kēnā.” Anhīr o mē anhīgēt mā kapēr o pa nhūm mē kuma nē mē hkōt amnhī nhīpēx. Tā ka mē akwījaja mē urāk nē ā amnhī nhīpēx anhīr o apa. Kwa ja mex kēt.

¹⁵ Na hte mē akwýjaja Nikorawjê kapêr kôt ixkapêr kuha hã tanhmã amnhî nhîpêx to ho pa. Ja mãânên mex kêt.

¹⁶ Tã ra mē akwýjaja ã amnhî tomnuj anhÿr o pa ka mē ja hã mē omu nē ãm mē omu nē nē tanhmã mē kãm akapêr to hkêt nē. Kwa mē ate ã amnhî nhîpêx anhÿr xwýnhjaja. Kêr ka mē tokyx ja kaga nē akupÿm ixkôt ri amnhî nhîpêx mex nē. Kot kaj mē anhÿr kêt kot paj tokyx mē awÿr wrÿ nē te iakwa rûm pôm wapo kator xwýnhhta o mē hkanhwÿr pyrãk o mē anhîpêx. Nom ixkapêr xihÿtx pix o tanhmã mē anhîpêx to.

¹⁷ E kot kaj mē ate ixkapêr mar prãm hã kot kaj mē ã Tirtûm mē wa Ixkarô nhÿ hã ixte mē amã ixkapêr anhÿrja ma nē kãm ajamxpêr tÿx rãhã ho ri apa.

Nê kot kaj mē ate amnhî tomnuj nê amnhî to htÿx nê inhmã hprãm xã hkôt amnhî nhîpêx rãhã ty. Hã kot paj akupÿm mē ato mē atÿr hãmri nê ra pam mē amã mē anhô ka mē hkur o apa. Te amnepêm Ijaew kapôt ã pa nhûm ixte mē hwÿr “manã” anhÿr xwýnhhta rênh nhûm mē kot hkur o pata pyrãk. Nom ixte mē amã mē anhôja na hpimxur. ãm papxipix na pa hte mē kãm ôr o ixpa.

Nê kot paj mē atã mē anhîxi nyw rê. Jao kên jakare hkwy hã ahpÿnhã mē anhîxi nyw jaxwÿ nê mē amã kugô. Ka mē hamÿ nê kapxipix amnhî nhîxi nyw pumunh o apa.

E ãm ja pix. Na hapêx. Anê.

—E Juãw. Kêr ka Pekamô kamã ixkrajê hwÿr ã ixkapêr anhÿr ã kaga nê mē hwÿr amê. Anê.

Hãmri pa kuma nê ô ri mē kãm hã kaga.

*Xijaxir kamã Jesus kwÿjê hwÿr kagã
Jutre 3-23*

¹⁸ Nhûm Jesus arî inhmã kapêr nê inhmã:

—E hpãnhã Xijaxir kamã ixkwÿjê jamãr xwýnh wÿr kagã nê amê nê mē kãm ixkapêr jarê nê mē kãm:

Pa Xijaxir kamã ixkapêr mar kaxyw mē apikuprôn xwýnhjaja. E ot pa mē awÿr ixpêr mē. Ixpê Tirtûm Kra na pa. Ixpê inhno te kot kuwy hpók karyr tÿx pyrãk xwýnhhta na pa. Nê ixpê ixpar te kot kãx karyr tÿx pyrãk xwýnhhta na pa mē awÿr ixpêr mē.

¹⁹ Na pa hte mē ate amnhî nhîpêx kôt mē apumunh mex o ri ixpa. Na ka htem amnhî kaxyw inhmã ajamxpêr pê inhmã amnhî to mex o ri apa. Mē akwÿ kot ixtã tanhmã mē anhîpêx to htã ka mē umaj aa ixkaga hkêt nê. Nê arî amã ixkînh tÿx kãm tanhmã amnhî nhîpêx to ho ri apa. Nê axpên to mex nê ixkôt pix mã amnhî nhîpêx o ri apa. Jao ra ixkôt amnhî nhîpêx mex o wam mē ate ixkôt amnhî nhîpêxã jakre. Nã ja inhmã mex kumrêx.

²⁰ ãm mēmoj pixi na ixpê omnuj. Mē akôt niti ri pa xwýnh Jejapewtita. Kêp Tirtûm nhÿ hã kapêr jarênh o pa xwýnh ã amnhî to hêx xwýnhhita. Na hte ixkapêr kupa hã tanhmã mē ajahkre hto ka htem ama nê nê tanhmã kãm nê hkêt nê. Na hte mē amã: “Xê mē mãmrî ri mē hkuprÿjê hwÿr mra nê mē ho amnhîkati. Nê axpên pê mē aprô nê mē amjên o amnhîkati. Nê mē kot sãnti hã mē hkînh nê hã akur xwýnhjê hkôt mra nê mē hkôt amnhî nhîpêx. Tirtûm kãm ja mex kênã.” Anhÿr o mē amã kapêr o pa. Nê inhmã ja mex ã ijarê nom inhmã ja mex kêt. Tã ra mē akwýjaja kapêr ma nê hkôt amnhî nhîpêx ka mē ja hã mē omunh tã amnhî nê nitita janor kêt nê nhûm arî ri mē amã hêx o ri mē akôt pa.

²¹ Ra kot ã amnhî nhîpêx anhÿr o mē akôt pa ry rax kumrêx tã pa kormã ja hã tanhmã ho hkêt nê kormã amnhî tã hamã. Kot ã amnhî nhîpêx anhÿr kaga kaxyw na pa kormã hamãr o ri ixpa. No nhûm aa hkaga hkêt nê.

²² Mÿrapê kot paj tokyx tanhmã ho nhûm amnhî xã htÿx kamã hamak o hikwÿ. Tã mē kot kapêr mar nê hkôt amnhî nhîpêx xwýnhjaja kot amnhî tomnuj ã amnhî pumu nê hkaga hkêt hã kot paj mã mē ho anê nê. Mãânên tanhmã mē homnuj to nhûm mē nitita pyrã nê amnhî xã htÿx kamã hamak o hikwÿ.

²³ Nê nitita kot paj kêp hkrajê nhûmex pa. Ka mē apê ixkrajaja ja hã ixpumu nê ixte mē apiitã ahpÿnhã tanhmã mē ajamxpêr to hkôt mē apumunh ã ixpumu. Nê ixte ahpÿnhã mē apiitã tanhmã mē ate amnhî nhîpêx to ho apa hã mē apumunh xã hkôt tanhmã mē anhîpêx to hã ixpumu.

²⁴ Na hte mē akwýjaja akwÿjê rom nita kapêr ma nê ãm kuma nê hkôt amnhî nhîpêx kêt nê. Nê mē kapêrja mē kot kãm: “Satanasti kapêr pimxur” anhÿr xwýnhhta kôt nhûm mē amnhî nhîpêx kêt nê. Na htem ixkôt pix mã amnhî nhîpêx mex o ri pa. Tã ã mē ate ixkôt amnhî nhîpêx anhÿr o apa xwýnhjaja kot paj mē amã ja pix ã karô ka mē inhma.

²⁵ Kêr ka mē arî ixkôt pix mã amnhî nhîpêx o ri apa rãhã pa akupÿn mē awÿr wrÿ. ãm ja pix ã kot paj mē amã karô.

²⁶ Nê kot kaj mē ate amnhî tomnuj nê amnhî to htÿx nê arî inhmã hprãm xã hkôt amnhî nhîpêx rãhã ty. Hãmri pa ja hã mē apumu nê nhÿrmã mē ate krî hkwy hkôt mē pa xwýnhjê ho amnhîptãr o apa kaxyw mē axunhwÿ. Ka mē apê mē ô pahihiti nê inhmã mē ho amnhîptãr o ri apa.

²⁷ Na pre Inhîpêxã ixte pika piitã hkôt ri mē pa xwýnhjê ho amnhîptãr kaxyw ixãm.

Tã kot paj nhÿrmã amnhî pyrã nê mē

kaxyw mē axunhwý ka mē inhmā mē hamār o apa.

Nhūm mēhō ixkapēr kwým ri tanhmā amnhī nhīpēx to ka mē ja hā omu nē hā tanhmā ho. Te mē kot poti punuj mýnh nē mēnh nē hkrakrak pyrāk.

²⁸ Kot paj ā mē ate mē hipēx anhýr o apa kaxyw mē axunhwý. No ām ja pix kēt. Kot paj te ixte mē amā kanhēti hō nhōr pyrāk o mē anhīpēx. Arīgro hkōt kanhēti no hpōk rax japōx xwýnhnta kot paj te ixte mē amā ōr pyrāk ka mē ixri atīr tūm nē apa ho apa.

²⁹ E ixkrajaja. Kot kaj mē amā ixkapēr mar prām hā kot kaj mē ā Tīrtūm mē wa Ixkarō nhý hā ixte mē amā ixkapēr anhýrja ma nē kām ajamaxpēr týx rāhā ho ri apa. Anē.

—E Juāw. Kēr ka ā Xijaxir kamā ixkrajē kaxyw ixkapēr ā kagā nē mē hwýr mēnh anē. Anē.

Hāmri pa kuma nē ō ri mē kām hipēx nē mē hwýr kumē.

3

*Satre kamā Jejus kwýjē hwýr kagā
Rukre 12.35-40*

¹ Nhūm Jejus arī inhmā kapēr nē inhmā: —E hpānhā Satre kamā ixkwýjē jamār xwýnh wýr kagā nē mē kām ixkapēr jarē nē mē kām:

Pa Satre kamā ixkrajaja. E ot pa mē awýr ixpēr mē. Ixpē inhīhkra ho kanhēti pē 7 jamýnh nē xām xwýnhnta na pa. Nē ixpē inhīhkra ho Tīrtūm Karō ām pyxi htā te kamā kēp 7 jamýnh nē ho ixām xwýnhnta na pa mē amā ixkapēr.

Na pa hte mē ate tanhmā ri amnhī nhīpēx to hā mē apumunh rāhā ho ixpa. Mē piitā kot axpēn mā mē ate ixkōt amnhī nhīpēx ā mē ajarēnh tā ā mē ate amnhī nhīpēx anhýr kēt. Na ka htem ixkuhpa hā pix mā amnhī nhīpēx o apa. Jakamā te inhmā ra mē atyk nē mē anhīkwý pyrāk.

² Na ka htem ām akrānh mā ixkōt ri amnhī nhīpēx nom Tīrtūm mē wa ixkōt amnhī nhīpēx mex kēt nē. Ra Tīrtūm mē wa ixte ja hā mē apumunh mex. Mē ate kormā wa inhnoo mā tām ri amnhī nhīpēx kēt jakamā kwa mē tokyx ja hā amnhī pumu nē ate amnhī tomnuj mā anhūre nē wa ixkōt amnhī xunhwýr týx nē.

³ Kēr ka mē amnepē mā kormā mē ate ixkōt amnhī nhīpēx nyw ri mē kot ixkapēr o tanhmā mē ajahkre htoja mā ajamaxpēr nē amnhī tomnuj mā anhūre. Nē ixkapēr kōt pix mā mān amnhī nhīpēx o ri apa. Kot kaj mē anhýr kēt kot paj nhýrmā mē ajaēr pē akupýn mē awýr wrý nē ja hā tanhmā mē ato.

⁴ ām mē agrēre nē amā ixkōt amnhī nhīpēx prām. Jao tām ri amnhī nhīpēx

nē mē kot amnhī tomnuj xwýnhjē hkōt amnhī nhīpēx kēt nē. Te mē axē jakare kamā apa nē tanhmā amnhī pē htyk to hkēt pyrāk. Tā kot kaj mē nhýrmā ixri mē axē jakare kamā apa ho apa. Ra mē ate ja ho anhýr mā tām kēnā. Ja na Tīrtūm kām hprām.

⁵ Nē krī piitā hkōt mē ate amnhī tomnuj nē amnhī to htýx nē inhmā hprām xā hkōt amnhī nhīpēx rāhā atyk xwýnh piitā kot ka mē nhýrmā Tīrtūm mē wa ixri amex nē atīr tūm nē apa ho apa. Ra mē hixija Mēpahpām Maati nhō kagāja kamā na. Kamā mē atīr o mē atīr mā xwýnhjē nhīxi piitā hā kagā. Kot paj kagāta kamā aa mē anhīxi grānh kēt nē. Hāmri nē Inhīpēxā mē kapēr o mē wrýk xwýnhjē mā mē ajarēnh o: “E mē jajē pumu. Ixkwý na mē.” Anhýr o mē kām mē ajarē.

⁶ E ixkwýjaja. Kot kaj mē amā ixkapēr mar prām hā kot kaj mē ā Tīrtūm mē wa Ixkarō nhý hā ixte mē amā ixkapēr anhýrja ma nē kām ajamaxpēr týx rāhā ho ri apa.

Tā ām ja pix. Na hapēx. Anē.

—E Juāw. Kēr ka ā Satrejē mā ixkapēr ā kagā nē mē hwýr mēnh anē. Anē.

Hāmri pa kuma nē ō ri mē kām hā kagā.

*Pirate kamā Jejus kwýjē hwýr kagā
Wam Tesarōn 2.13-16*

⁷ Nhūm Jejus arī inhmā kapēr nē inhmā: —E hpānhā Pirate kamā ixkwýjē jamār xwýnh hwýr kagā nhīpēx nē amē nē mē kām ixkapēr jarē nē mē kām kām:

Pa Pirate kamā mē ate ixkapēr mar kaxyw mē apikuprōnh xwýnhjaja. E ot pa mē awýr ixpēr mē. Inhmex o inhmex xwýnh na pa. Aa ixēx kēt nē ixpa xwýnh. Amnepē mā na pre mēhōja pahī Tawi mā ōrkwý mex ā saf jamār o pa. Tā pa hte urāk nē Inhīpēxā Tīrtūm nhō krī hwýr mē gjēx xā hā saf jamý nē ho ixpa. Ām papxpix inhō safjakamā papxpix na pa hte mē ate ixkōt amnhī xunhwýr xwýnhjaja mē agjēx kaxyw mē amā kahē xā rē nē ixkra hkēt xwýnhjē pē kahē. Kot paj mē apē ixkrajē mā kahē xā rē ka mē hwýr agjē. Hāmri pa mē atā kahē nhūm ixkra hkēt xwýnhjaja tee ri kām mē akōt gjēx prām kaprý.

⁸ Na pa hte tanhmā mē ate amnhī nhīpēx to ho apa hā mē apumunh mex o ri ixpa. Mē agrēre htā na ka htem ixkapēr kōt amnhī nhīpēx mex nē aa inhmex hkēt nē. Jakamā kot paj te ixte mē amā Tīrtūm nhō hakwakre kahē xā mēnh pyrāk o mē anhīpēx ka mē axāmnhīx ajamakētkati nē ma mē kām Tīrtūm kapēr o mē ahkre ho ri mē hkōt apa. Nhūm mē hkwyjaja tee ri ā mē ate amnhī nhīpēx anhýrja nē mē amā kapēr kaprý ka mē arī ho mē ahkre ho ri mē hkōt apa.

⁹ Nê mê anhô krî kamâ mê akwýjaja na prem ra Satanasti hkôt amnhî xunhwý nê hêx rom mê amâ amnhî to hêx nê mê amâ: “E mê ixpê Ijaew mex jakamâ kwa mê ixkapêr ma nê mê ixkôt amnhî nhîpêx.” Anhîr o mê amâ karô htâ no âm mê kot Satanasti hkôt amnhî nhîpêx xwýnh na mê. Tâ kot paj nhýrmâ tanhmâ mê homnuj to nhûm mê tee ri amnhî pumu nê akupým mê awýr mra nê mê akutâ hkônkrâ ho rôrôk nê hkrî nê mê amâ: “Nâ mê kajaja na ka pêr mê ixrom Jejus kôt amnhî nhîpêx. Mân kâm mê ajapêé.” Anê.

¹⁰ Mê kot ixtâ mê atomnuj týx nhûm mê ate amnhî xâ htýx kamâ ajamak tâ aa mê umaj ixkaga hkêt nê. Nê arî ixte mê amâ mêmoj tâ karô xâ hkôt mê kutâ amnhî to htýx rãhã arî ixkôt ri amnhî nhîpêx o apa. Jakamâ mê kot nhýrmâ mê kâm ixkurê xwýnhjaja pika piitâ hkôt tanhmâ mê homnuj týx to nhûm mê amnhî xâ htýx kamâ ama. Tâ kot paj mê anê mê omunh mex nê nhûm mê tanhmâ mê ato hkêt nê ka mê amex nê ri apa ho apa.

¹¹ E kot paj tokyx akupým mê awýr wrý nê mê ate ixkôt pix mâ amnhî nhîpêx â mê ato mex rax kumrêx. Jakamâ kwa mê mâmri â amnhî nhîpêx anhýr o inhmâ hprãm xâ hkôt pix mâ amnhî nhîpêx rãhã ty. Kot ka mê anhýr kêt kot pa mê amâ mêmoj mex nhôr kêt nê.

¹² Nê kot kaj mê kot amnhî tomnuj xwýnhjê kutâ amnhî to htýx nê inhmâ hprãm xâ hkôt pix mâ amnhî nhîpêx rãhã ty. Hã kot paj amnhî kôt mê ato mê axihtýx nê ka mê aa ixkaga hkêt nê. Nê kot paj nhýhýnh mê atâ mê inhîxi ho axkrunêpxi nê haxwý. Inhîpêxâ nhîxi nê inhîxi nyw nê Inhîpêxâ nhô krî nhîxija kot paj nhýhýnh mê atâ haxwý. Tirtüm nhô krî mê kot kâm: “Jerujarê nyw” anhýr xwýnhãtã koja nhýrmâ tanhmâ amnhî to nê ra kaxkwa rûm pika wýr wrý.

¹³ E ixkwýjaja. Kot kaj mê amâ ixkapêr mar prãm hã kot kaj mê â Tirtüm mê wa Ixkarô nhý hã ixte mê amâ ixkapêr anhýrja ma nê kâm ajamaxpêr týx rãhã ho ri apa.

Tâ âm ja pix. Na ra hapêx. Anê.

—E Juãw. Kêr ka â Pirate kamâ ixkrajê mâ ixkapêr â kagã anê. Anê.

Hãmri pa kuma nê ô ri mê kâm hã kagã.

Raxisej kamâ Jejus kwýjê hwýr kagã

¹⁴ Nhûm pre Jejus arî inhmâ kapêr nê inhmâ:

—E hpãnhã krî pê Raxisej kamâ ixkrajê jamãr xwýnh wýr kagã nhîpêx nê amê. Nê mê kâm ixkapêr jarênh o:

Pa Raxisej kamâ ixkrajaja. Ot pa mê awýr ixpêr mê. Âm hãmri ixkapêr o ixpa nê aa ixêx kêt xwýnhãta na pa. Jakamâ âm

hãmri na pa hte Tirtüm kapêr o mê ajahkre o ixpa nê aa ja kaga hkêt nê. Pa na ixpê mêmoj piitã hpãr krax.

¹⁵⁻¹⁶ Na pa hte mê ate tanhmâ amnhî nhîpêx to ho apa hã mê apumunh rãhã ho ixpa. Kop apu mê ate ixkôt amnhî nhîpêx mex ronhýx pa ja hã mê apumu nê ixkãnh nê. Nom mê ate â amnhî nhîpêx anhýr kêt. No mããnêen aa ixkaga hkêt nê. Na ka htem ri atýx amnhî krã hkôt pix mã tanhmâ amnhî nhîpêx to ho apa nhûm ja ixpê omnuj nê. Kot kaj mê arî â amnhî nhîpêx anhýr o apa pa hpãnhã amnhî nê mê akurê. Te mê kot gô xenh nôkati janhir nê tee hkakinh nê akupým hkapîr pyrãk.

¹⁷ Mê ate inhmâ hprãm xâ hkôt amnhî nhîpêx â amnhî jarênh tâ â amnhî nhîpêx anhýr kêt nê. Nê ixkapêr mar týx nê amnhî kaxyw inhmâ ajamaxpêr mex kêt nê.

¹⁸ Kwa mê tokyx ja hã amnhî pumu nê akupým ixkôt amnhî xunhwýr týx nê. Kêr pa ja hã mê apumu nê amnhî katut kôt mê ate amnhî tomnuj rê nê tanhmâ mê akurã hto ka mê inhnoo mã tãm amnhî nhîpêx mex o ri apa. Hãmri pa mê amâ tanhmâ amnhî to amnhîrit to ka mê aprî hã ixte amnhî nhîpêx â ixpumunh mex nê ixkôt amnhî nhîpêx mex rãhã o ri apa.

¹⁹ Xâ inhmâ mê ajapê hkêt â na pa â mê amâ ixkapêr anê? Nâ inhmâ mê apiitã mê ajapê htýx kênã. Nom inhmâ mê ajapê htã ka htem ixkôt amnhî nhîpêx kêt nê. Na pa tee ri amnhî tâ mê apumu nê ja hã tanhmâ mê atomnuj týx to. Tokyx mê ate amnhî tomnuj mã anhýrer nê hpãnhã tãm amnhî nhîpêx kaxyw. Jakamâ kwa mê tokyx ate amnhî tomnuj kaga nê akupým amnhî kaxyw inhmâ ajamaxpêr ho ri apa.

²⁰ Na htem hkwyjê nhôrkwý hwýr gjêx kaxyw hakwa krem kãm âkjêr o kuhê nhûm mê kuma nê mê kâm anê nhûm mê hwýr agjê. Nê mê ixkre hkre kamã axpên mã kapêr o hkrî rý xypên mã kapêr pê mêmoj to hkôm o hkrî. Ja pyrã nê ot pa mê ajamãr o ixpa. Mê ate inhmâ anhýr nhûm ixte mê akôt ixpa ho ixpa nhûm mê pahte axpên to mex o papa kaxyw.

²¹ Kormã mê kot ixpîr kêt ri na pa pre mê kot amnhî tomnuj xwýnhjê kutâ amnhî to htýx o ixpa. Amnhî to htýx nê ri ixpa kamã ixyk jakamã nhûm Inhîpêxã akupým ixto ixtîr nê akupým amnhî wýr ixto api. Hãmri nê amnhî nhîhkô hã mê ho amnhîptãr â hkrî xâ kamã inhýr pa ixkrî ho ixkrî nê îhkô hã mê piitã mê ho amnhîptãr o ixkrî. Tã kot kaj mê atô ixpyrã nê ate amnhî tomnuj nê amnhî to htýx nê. Nê inhmâ hprãm xâ hkôt pix mã amnhî nhîpêx rãhã ty. Hã kot paj amnhî pyrã nê wa ixte mê ato amnhîptãr â ixkrî xãja kamã amnhî nhîhkô hã mê

akrī ka mē wa inhīhkō hā wa inhmā mē ho amnhīptār o akrī.

²² E ixkwýjaja. Kot kaj mē amā ixkapēr mar prām hā kot kaj mē ā Tirtūm mē wa Ixkarō nhý hā ixte mē amā ixkapēr anhýrja ma nē kām ajamaxpēr týx rāhā ho ri apa.

Tā am ja pix. Na hapēx. Anē.

—E Juāw. Kēr ka Raxisej kamā ixkrajē mā ixkapēr ā kagā nē mē hwýr amē. Nē kagāja piitā krī hkwy kamā ahpýnhā ixkwýjē hwýr arē kē mē kamā harē nē ixkapēr ma. Anē.

Nhūm pre ā Jejus inhmā kapēr anē. Pa kuma nē ō ri mē piitā mē kām hā kagā hpa.

4

Tirtūm kot mē ho amnhīptār ā hkrī xà jarēnh

¹ Tā pa axte mēmoj pumu nhūm kaxkwa hwýr mē gjēx xà hā hakwakreja amnhī kahē xà mē pa omu. Hāmri nhūm axte mēhō kapēr týx xwýnhnta. Te kot pifti kakōr týx pyrāk xwýnhnta axte inhmā kapēr nē inhmā:

—E amnē ixwýr api pa mēmoj nhýrmā kot tanhmā amnhī nhīpēx to hkukamā amā ho amnhīrit ka omu. Anē.

² Hāmri nhūm Tirtūm Karō tanhmā ixto nē ixto api pa kaxkwa kamā mēmoj pumunh o xa. Tirtūm kot mē ho amnhīptār ā hkrī xà maatita pa pre omu. Nhūm kamā mēhōja nhý.

³ Kuk kamā hirā htýx kumrēx. Te mēmo kēn kamrēk karýr jaxēnh týx pyrāk. Nē kot mē ho amnhīptār ā hkrī xà puhā māxwýxti grāgrāreja kām hipōk nē harir pa omunh o xa.

⁴ Nhūm hkrī xà maati puhā mē ho amnhīptār o hkrī xà kēp 24. Kamā mē aptār tūmjaja hkrī. Mē piitā ōr o mē ahkà htu nē ē jakare nē hkrī.

⁵ Nē Tirtūm hkrī xà maati rūm na katōtōk nē hkrakrak nē haxēnh japà nē hikwý. Nē hkrī xà kapem kanē maati pixi kamā kwryt pē 7ja pōk rāhā ho kuhē. Kanēja te Tirtūm Karō pyrāk.

⁶ Nē hkrī xà kapem mēmo te gō rax pyrākja hkarýr jaxēnh týx kumrēx nē nō. Te ho kāk karýr jaxēnh týx pyrā nē hkarýyre. Nē hkrī xà puhā mēmoj tīr nē kuhē pē kwat kuhē. Nē ōkwa nē katut piitā hkōt no. Am no sohtō rax kumrēx. Na pre ā mēmoj kēp kwatja no sohtō anē pa omu.

⁷ Wamta te kot mry pē rēawti pyrāk. Nē hkōt ja te kot mōx myti pyrāk. Nē hapu hā hkuk te panhī hkuk pyrāk. No hapu hā ja te kot àanhāhti htor kaxyw hara koror pyrāk.

⁸ Nē piitā hara kēp 6. Nē ī piitā kamā no. Nhūm prem Tirtūm mā mex o mex ā grer rāhā ho kuhē nē aa pinhkrēnh kēt nē. Nē kām grer o:

Amex o amex Tirtūm.

Nē axihtýx o axihtýx.

Nē aa ate amnhī tomnuj kēt kumrēx.

Amnepē mā kormā mēmoj kēt ri ka ra arāhā ri apa. Tā arī arāhā ri apa xwýnh na ka. Kot kaj aa ajapēx kēt nē.

am hāmri na ka hte mē ixto mex rāhā ho apa.

Nē amex o amex Tirtūm. Anē.

⁹⁻¹⁰ Nhūm prem xatā mē ho amnhīptār hkrī xà kamā hkrī xwýnhja mē kot kām “Rāhā pa xwýnh” anhýr xwýnhnta mā ā grer anhýr o kuhē. Kām mex o mex ā grer pē tanhmā kot mē ho mex to hā harē. Hāmri nhūm mē aptār tūm pē 24jaja māānēn kutā hkōn krā ho rōrōk nē hipō hpa nē hkrī. Nē amnhī krā rūm ōr o mē ahkāja kwryt nē hpar pē haxwý. Kēp mē ō Pahi Maati hā hā hpijaam kaxyw wamtajē pyrā nē mex o mex ā harēnh o hkrī nē kām:

¹¹ am hāmri na pa htem amex o amex ā ajarē Tirtūm

Apē mē inhō Pahi Maati na ka.

Nē apē mē inhō Tirtūm na ka.

Na ka pre mēmoj piitā ho akato. Axāhpumunh týx nē ajamaxpēr týx o mēmoj piitā amā hprām xà hkōt ho akator pa.

Jakamā na pa htem ā amex o amex ā ajarēnh anē. Mē ixrom axihtýx mex kumrēx na ka hte apa Tirtūm. Anē.

5

Mē pahte amnhī tomnuj pānhā amnhīrer xwýnh jarēnh

Juāw 1.29; Pīripōs 2.5-11

¹ Tā pa pre arī te kaxkwa kamā mēmoj pumu. Mē ho amnhīptār ā hkrī xà maatita kamā hkrī xwýnh nhīhkra kamā kagā pa omunh o xa. Upōk rūm omu. No am axtem kagā kaxkep na pre. Nē akutā hā kagā nē menh ē ho ho htýx xāja kēp 7.

² Hāmri nhūm Tirtūm kapēr o wrýk xwýnh xihtýx xwýnhja kapēr týx kām kapēr o:

—E mē atō na ate kag mýj pyr nē ho htýx xà hpōt mā tām? Anē.

³ Hāmri nē tee ri mē piitā mē hkapi nom nhūm ja kaxyw mēhō amrakati kumrēx. Kaxkwa kamā amrakati nē pika kamā māānēn amrakati nē pika hkrak ri amrakati. Nhýri mēhō kot kagā kaxkepta pyr nē hpōt nē omunh mā tām xwýnhja amrakati ho amrakati.

⁴ Nhūm tee ri mēhō japēr nom mēhō pumunh kēt nē. Pa tee ri ja hā omu nē ixkaprī htýx nē inhmyr o xa.

⁵ Hāmri nhūm pahi hōja ixpumu nē inhmā: —Kwa amýr kēt nē. E mēhō mýj pumu. Juta kanrēhā htāmnhwý xihtýx xwýnhnta. Pahi Tawi kanrēhā htāmnhwý te kēp mry pē rēaw xihtýx pyrāk o hihtýx xwýnh mýj pumu. Kot mē kām hkurē xwýnhjē kutā

amnhî to htÿx nê mēmoj punuj piitā ho hapêx kaxyw mā xwÿnh jakamā tapxipix na kot kagāta hpyr nê ho htÿx xā hpôt par mā tām. E ka omu. Anê.

⁶ Hāmri pa kuma nê hwÿr rît nê Jejusja kumu. Kot mē pahte amnhî tomnuj pānhā amnhîrer xwÿnhhta mē ho amnhîptār o hkrî xā maati kapem xa. Mēmoj htÿr pē kwat mē aptār tūm pē 24jê nhîpôk ri xa. Mē kām hkurê xwÿnhjaja kot hpîr nhūm ra akupÿm htÿr nê xa. Nom ra axtem nê xa. àhpumunh tÿxja te kot pahi xāhpumunh pyrāk. Nê hpār kēp 7. Nê no määnēn kēp 7. Noja te Tîrtūm Karō pyrā nê kēp pika piitā hkôt pa xwÿnh. Ā Jejusja axtem nê am anê pa omu.

⁷ Hāmri nhūm mē pahto amnhîptār o hkrî xwÿnhhta wÿr tē nê îhkra kamā kēp kaga kaxkepta py.

⁸ Hāmri nhūm mē htÿr pē kwat mē mē aptār tūmjaja hpar pē hkôn krā ho rōrôk nê hkrî hpa nê hipô nê hkrî. Piitā wiorāwti jamÿ nê ôr o xijere kamā mēhkuxwa xā jamÿ nê o hkrî. Nhūm Tîrtūm krajaja Tîrtūm mā tanhmā amnhî jarēnh to nhūm mē mar o hkrî. Te xijere kamā mēhkuxwa xā hpār o hkrî pyrā nê mē kuma.

⁹⁻¹⁰ Jakamā nhūm mē hkôn krā ho hkrî xwÿnhjaja mē pahte amnhî tomnuj pānhā amnhîrer xwÿnhhta kutā kām grer o hkrî. Mē grer nyw o kām gre nê kām:

Na prem apî ka atyk o mē piitā mē kot amnhî tomnuj pānhā amnhîrer pa.

Ahpÿnhā pika piitā hkôt mē urojê piitā hpānhā amnhîrer pa.

Nê ahpÿnhā ri mē kapêr xwÿnh kwÿjê pitā mē hpānhā amnhîrer pa. Atyk o mē kot amnhî tomnuj piitā hpānhā amnhîrer pa.

Jakamā nhūm mē kot akôt amnhî xunhwÿr xwÿnhjaja kēp Tîrtūm kra nê ri pa.

Ka ra mē panhō Tîrtūm mā mē kēp patre kaxyw mē unhwÿ nhūm htem pika piitā hkôt mē ho amnhîptār o pa.

Tā atyk o ate pika piitā hkôt mē hpānhā amnhîrer jakamā kapxipix na ate kagāta pyr nê ho htÿx xā hpôt mā tām. Anê.

¹¹ Hāmri nhūm Tîrtūm kapêr o mē wrÿk xwÿnhjaja nhÿhÿnh hapôj nê kuhê. Mē ohtô rax o ohtô rax. Ohtô rax o mē pajamaxpêr jakrenh. Hāmri nê Tîrtūm kot mē ho amnhîptār ā hkrî xā maatija wÿr mra nê kām hipôk pa. Nê mēmoj tÿr nê kuhê xwÿnhjê mē mē aptār tūmjê mā hipôk pa nê mē pahte amnhî tomnuj pānhā amnhîrer xwÿnhhta mā kapêr.

¹² Kax pē kām kapêr nê kām:

Ām hāmri na pa htem amex o amex ā inhgrer o ixkuhê.

Mē ixrom axihtÿx o axihtÿx.

Nê mēmoj piitā anhô.

Nê ate mēmoj piitā hkukamā axāhpumunh par.

Nê amex o amex jakamā na pa htem amā amex pix ā inhgrer o ri ixpa. Anê.

¹³ Tā nhūm mēmoj piitā Tîrtūm mē Jejus wa kām wa mex o wa mex ā harê. Pika hkôt panhî nê mry nê āk nê mēmoj piitā. Nê pika hkrak ri nê gô hkrak ri mēmoj piitā. Nê mē htykjaja. Nhūm mē piitā wa kām wa mex o wa mex ā wa harê nê wa kām:

E ate mē ixto amnhîptār ā akri xā kamā akri xwÿnh mē kot mē ixte amnhî tomnuj pānhā amnhîrer xwÿnh mē war amex o wa amex.

Nê war axihtÿx o war axihtÿx.

Nê war axāhpumunh o war axāhpumunh.

Na pa htem ā war ajarēnh anhÿr rāhā ixpa ho ixpa. Anê.

¹⁴ Hāmri nhūm mēmoj tÿr pē kwatjaja mē kuma nê mē kām:

—Nā am hāmri na ka mē ā wa harēnh anê.

Wa mex o wa mex kumrêx. Anê.

Hāmri nhūm mē aptār tūmjaja Tîrtūm mē Jejus wa hpar pē hkôn krā ho rōrôk nê hkrî hpa nê haxwÿja wa kām wa mex o wa mex ā wa harê.

6

Kaga ho htÿx xā pē 7 jarēnh

Matêwre 24.3-14; Sikūn Tesarôn 2.3; Wam

Juāw 2.18

¹ Tā pa arî kaxkwa kamā mē pahte amnhî tomnuj pānhā amnhîrer xwÿnh kot tanhmā amnhî nhîpêx to hā omunh o xa. Nhūm kaga kaxkepta py nê wam ho htÿx xā pôt. Hāmri nhūm mēmo tÿr pē kwatjê hōja kapêr tÿx kumrêx. Te na katôtôk tÿx pyrāk o mēhōj mā kapêr nê kām:

—E amnê mē ixwÿr tē. Anê.

² Hāmri nhūm kawar jakajre nhÿhÿnh hwÿr hpôx o tē. Nhūm mēhōja ô kuxê mÿ nê hā nhÿ nê tē. Hāmri nhūm nhām mēhōja hwÿr tē nê kām pahi hā mē ahkâ htu. Hāmri nê kām tanhmā kapêr to nhūm kuma nê mē kot kām Tîrtūm mē Jejus wa kurê xwÿnhjê nhîmex par kaxyw hakêx nê ma pika hwÿr tēn wrÿ.

³ Hāmri nhūm mē pahte amnhî tomnuj pānhā amnhîrer xwÿnhja wam kaga ho htÿx xāta kôt axte ja pôt. Hāmri nhūm mēmoj tÿr pē kwatjê hōja axtem mēhōj mā kapêr nê kām:

—E amnê mē ixwÿr tē. Anê.

⁴ Hāmri nhūm kawar kamrêk mē hwÿr hpôx o tē. Nhūm mēhō hā nhÿ nê tē. Nhūm nhām mēhōja kām wapo gô nê ma pika hwÿr htēm nê wrÿk kaxyw hano. Kot hwÿr wrÿk nê pikap mē pa xwÿnhjê kurê huk kaxyw. Mē kot axpēn par kaxyw ma mē hwÿr kumê. Hāmri nhūm kuma nê wapota py nê hakêx nê ma mē hwÿr tēn wrÿ.

⁵ Hämri nhüm më pahte amnhî tomnuj pânâ amnhîrer xwÿnhja kagâ ho htÿx xâ hõ pôt. Na pre ra ho axkrut në hpôt tâ hpânâ axte hkôt ja pôt. Hämri nhüm mëmoj tÿr pê 4jê hõta mëhõj mã kapër në kâm:

–E amnë më ixwÿr tē. Anē

Hämri nhüm kawar tykre më hwÿr hpõx o tē. Nhüm hä ÿr xwÿnhja mëmoj to peja xâ hä paräs mȳ në o tē.

⁶ Hämri nhüm më htÿr pê kwatjê rüm mëhõja kâm kapër në kâm:

–E kêr ka ma pika hwÿr më hwÿr tēn wrÿ në më kâm myt pyxi kamâ më âpēnh pânâ më kâm mëmoj to hkryre në anhõ parâsta kamâ ho peja në më kâm ör o apa. Nom më apkur xâ hä orti në wÿhti ka më kêp tanhmâ ho hkêt në. Anē.

Hämri nhüm kuma në hakēx në ma tēn më hwÿr wrÿ.

⁷ Tâ nhüm më pahte amnhî tomnuj pânâ amnhîrer xwÿnhja axte kagâ ho htÿx xâ hõ hpôt. Na pre ra ho axkrutëpxi në hpôt tâ hpânâ axte hkôt ja pôt. Hämri nhüm mëmoj tÿr pê kwat kot hitēp xwÿnhja mëhõj mã kâm:

–E amnë më ixwÿr tē. Anē.

⁸ Hämri nhüm kawar rârâare më hwÿr hpõx o tē. Nhüm mëhõ hä nhÿ në tē. Hä ÿr xwÿnh nhÿxi na pre kêp “Mēhtyk” anē. Hämri nhüm mëhõja kâm kapër në kâm:

–E ma pika hwÿr wrÿ në tanhmâ më ho kê më ohtõ në tanhmâ amnhî to në axkaprâ. Kê më hkwȳjaja pijapu kamâ axpēn pa në më hkwȳjaja prâm xâj ty në më hkwȳjaja tanhmâ â htÿx kute kamâ ty. Nē mëmo mry xoprēja më hkwȳjê pa. E ma më hwÿr wrÿ në tanhmâ më ho ho apa. Anē.

Hämri nhüm kuma në hakēx në ma pika hwÿr tēn wrÿ. Hämri nhüm më htykjê papxâja tanhmâ amnhî to në te kot hä jēt në ma hkôt mör në pika hwÿr wrÿk pyrak pa pre arÿ omunh o xa.

⁹ Hämri nhüm më pahte amnhî tomnuj pânâ amnhîrer xwÿnhja axte kagâ ho htÿx xâ hõ hpôt. Na pre ra ho kwat në hpôt tâ hpânâ axte ja pôt. Hämri në hpôtja kôt pa ra më kot Tÿrtüm mã mëmoj nhõr xâ hä mësti pumu. Nē hkrak ri më hkarõjê pumu. Mē kot hkwȳjê hkôt ri më kâm Tÿrtüm kapër jarēnh në Jejus kêp më ô Pahihti hä harēnh o pa nhüm më kot hä më hpar xwÿnhjê karõja pa pre më omu. Nhüm më mësti hkrak ri amnhî to Tÿrtüm wÿr o hkrÿ.

¹⁰ Kÿx pê kâm kapēr në kâm:

–Âm hämri amex o amex Pahi Maati. Aa ate mëmoj tâ tanhmâ amnhî to axē to hkêt kumrēx. Kwa xâ kot kaj tokyx pika hkôt më kot më inhîmex xwÿnhja tanhmâ më ixtâ më ho nâ? Anē.

¹¹ Hämri nhüm mëhõja më hwÿr tē në më kâm më é jakajre gõ nhüm më hagjê. Hämri nhüm më kâm:

–E më mamrÿ atar akõkõt o akrÿ. Koja Tÿrtüm kormâ tanhmâ më kot më atomnuj xwÿnhjê ho hkêt në. Kê më axte më apyrâ në më akwȳjê nhîmex mân. Koja më Tÿrtüm jamaxpēr xâ hkôt axte më akwȳjê pa nhüm rÿ kormâ më ato hpimrâatâ tanhmâ më atâ më hipēx to. Jakamâ e më atar kutēp māmri akõkõt o akrÿ. Anē.

¹² Hämri nhüm më pahte amnhî tomnuj pânâ amnhîrer xwÿnhja axte kagâ ho htÿx xâ hõ hpôt pa omu. Na pre ra ho 5 në hpôt tâ hpânâ hkôt axte ja pôt. Hämri nhüm pika hteret tÿx kumrēx. Nē myyti ahtyk në mytwÿre te kêp më hkamrõ kamrēk tÿx pyrâ në ajēt.

¹³ Nē kanhēti tanhmâ amnhî to në axrē në pikap rõrõk pa. Te kôk xâpēr tÿx në kot pârerekre kormâ râx tâ kot kâm hikranh par pyrâ në piitâ rēnh pa nhüm rõrõk.

¹⁴ Hämri nhüm kaxkwaja te kagâ kaxkep pyrâ në amnhî to kaxkep o tē. Nē pika piitâ hkôt kēn prēk në hixēt prēk maati piitâ te hkrÿ xâ rüm hapõx në mrar në nhâm hkrÿ pyrak. Nhüm gõ hipõk piitâ haxwÿja te hikwÿ xâ rüm hapõx në mrar në nhâm hikwÿ pyrak. Pika hteret tÿx nhÿ hä â mëmoj amnhî nhîpēx anē.

¹⁵ Hämri nhüm pika hkôt më piitâ tee ri mëmoj â amnhî nhîpēx anhÿr â omu në kâm ma në hteret tÿx kumrēx. Mē ho amnhîptâr xwÿnhjaja në pôristi krâhtümjaja në më kot amnhî to rünh xwÿnhjaja në më hihtÿx xwÿnhjaja në më kâm më âpēnh xwÿnhjaja në amnhî mã më âpēnh xwÿnhjaja. Âm piitâ mëmoj â kot amnhî nhîpēx anhÿr â omu në tee ri amnhî kukamâ hamaxpēr në kâm ma ho kâm ma. Hämri në hpimxur kaxyw ma kēn prēk kre japēr o hprõt në mra.

¹⁶⁻¹⁷ Hämri në amnhî to kēn prēk wÿ në kâm:

–Kwa na ra më ixto amnhîptâr â hkrÿ xâ maati kamâ hkrÿ xwÿnh më kot më ixte amnhî tomnuj pânâ amnhîrer xwÿnhja wa më ixkamâ gryk tÿx kumrēx. Ra wa kot tanhmâ më ixtomnuj to xâ hä arÿgrotâ kato. Koja wa më ixtomnuj tÿx në pa më kutâ hkêt në. Kwa tokyx më inhÿpy arõrõk në wa kêp më ixto amÿxu. Anē.

7

Mē kot Tÿrtüm mã hkrājê kagâ Apokarip 9.4

¹ Tâ pa arÿ kaxkwa kamâ mëmoj pumu. Nhüm Tÿrtüm kapēr o më wrÿk xwÿnh pê kwatja piitâ ahpÿnhâ pika nhîter pa hkôt kôk jatür xâ hä hamÿ në ho kuhê. Pika piitâ hkôt kôk hpinhkrēnh par në âpēr kêt në gõ xujanâr kôt âpēr kêt kaxyw hatur xâ hä hamÿ në ho kuhê. Nē pa piitâ hkôt âpēr në tanhmâ pÿ hkwȳ ho pymaj nhüm më â

amnhî nhîpêx anê nê nê hatur xâ hâ hamý nê ho kuhê.

² Na pre ra Tirtûm ja hâ mê kâm karô nê mê kâm:

—E kêr ka mê ma pika hwÿr wrÿ nê pika nê gô xujanârja tanhmâ wa homnu hto. Anê.

Hâmri nhûm mê kuma nê hwÿr wrÿ nê kormâ nê kôk ho htÿx. Hâmri nhûm Tirtûm kapêr o wrÿk xwÿnhjê hōja myt japôx xâ rûm mê hwÿr hpôx o tē. Nê ïhkra kamâ mê kot Tirtûm kra hâ mê hixi jarênh xâ hâ kagata py nê o tē. Hâmri nê kax pê mê kot pika mê gô xujanâr homnu mâ xwÿnhjê mâ kapêr nê mê kâm:

³ —Kwa taxy pa Tirtûm krajê nhôkrâ kaga hpa mân. Kêr ka mê omu nê mê tapxipixjaja tanhmâ mê ho hkêt nê. Anê.

⁴⁻⁸ Hâmri nê mê hkagâ pa. Ahpÿnhâ Ijaew pigrânh xwÿnhjaja mê ho ohtô rax kumrêx nê tanhmâ mê hkagâ hto. Pa tanhmâ mê kute hâ mê harênh ma nhûm xep mê ohtô rax kumrêx.

Juta kamâ mê kêp 12.000.

Nê Rupê kamâ mê kêp 12.000.

Nê Gax kamâ mê kêp 12.000.

Nê As kamâ mê kêp 12.000.

Nê Natari kamâ mê kêp 12.000.

Nê Manase kamâ mê kêp 12.000.

Nê Simeaw kamâ mê kêp 12.000.

Nê Rewi kamâ mê kêp 12.000.

Nê Isaka kamâ mê kêp 12.000.

Nê Jepurô kamâ mê kêp 12.000.

Nê Juje kamâ mê kêp 12.000.

Nê Pêjamî kamâ mê kêp 12.000.

Â mê ohtô rax kot anhÿr. Hâmri nê mê piitâ mê pikamÿr par kâm mê kêp 144.000. Piitâ kêp Apraaw kanrêhâ htâmnhwÿ na pre mê. Tâ â axpên kaxyw mê ohtô rax kumrêx kot anhÿr tâ nhûm mê hkagâ pa.

*Tirtûm kra hkwyjê jarênh
Apokarip 14.1-5*

⁹ Tâ pa axtem mêmoj pumu. Nhûm mê ohtô rax nê Tirtûm nhô krî kamâ kuhê. Ahpÿnhâ ri pika piitâ hkêt mê urojaja. Nê ahpÿnhâ ri mê kapêr xwÿnhjaja nhûm prem pika piitâ kurûm kot mê ho amnhîptâr â hkrî xâ maati ja kamâ hkrî xwÿnh pê Tirtûm mê mê pahte amnhî tomnuj pânâ amnhîrer xwÿnhja wa kutâ kuhê. Mê ohtô rax kumrêx jakamâ pa tee ri mê piitâ mê ho kôta hpar prâm kaprÿ. Nê piitâ ê jakare kamâ kuhê. Nê hkînh nê hkînh xâj pô hkwy jamÿ nê ho âpêr o kuhê.

¹⁰ Hâmri nê kÿx pêê Tirtûm mê Jejus wa kâm kapêr nê wa kâm:
Hêxta waa nê. War amex o war amex Pahi Maati.

Na ka pre Akra Jejus kukwak ri mê ixte amnhî tomnuj â tanhmâ mê ixto hkêt nê.

War ajamê mê ixkamâ axukapri râhâ ho apa xwÿnh na ka wa.

Jakamâ pa mê inhmex nê war awÿr api nê war akuri inhmex nê ijamakêtkati nê ixpa ho ixpa.

Âm hâmi na ka hte wa mê ixto mex rax kumrêx o apa. War amex o war amex. Anê.

¹¹ Hâmri nhûm Tirtûm kapêr o mê wrÿk xwÿnhjaja Tirtûm krî xâ mâ hipôk nê hkôn krâ ho rôrôk nê hkrî hpa. Nê mê âptâr tûmjê mê mê htÿr nê kuhê xwÿnhjaja mê ïhkô hâ kâm hipôk nê wam tajê pyrâk nê hkôn krâ ho rôrôk nê hkrî. Hâmri nê mê ohtô kot Tirtûm mê Jejus wa kâm kapêr â mê kuma hâmi nê Tirtûm â hpijaam kaxyw hpar pê htu mÿr pê hikwÿ hpa nê kâm mex o mex â harê nê kâm:

¹² “Âm hâmi na mê â ajarênh anê Tirtûm. Amex o amex.

Na ka hte mê ixto mex o apa.

Mê ixrom axâhpumunh o axâhpumunh.

Nê mê ixrom axihtÿx o axihtÿx.

Jakamâ na ka hte mê ixpiitâ mê ixto mex kumrêx râhâ ho apa.

Â ate anhÿr râhâ o râhâ jakamâ na pa htem amâ amex o amex â ajarênh râhâ ho ixpa.” Anê.

¹³ Hâmri pa mê omunh o ixâm rôm nhûm mê âptâr tûmjê hōja ixwÿr tē nê mê ê jaka kamâ mê hkînh xâj pô jamÿnh nê ho kuhê xwÿnhjê hâ ixkukja nê inhmâ:

—E mân ate mê ê jakare kamâ mê kuhê xwÿnh mÿjê pumunh nâ? Tanhmâ na prem amnhî nhîpêx to nê amnê api? Xâ ate mê omunh? Anê.

¹⁴ Hâmri pa kuma nê kâm:

—Nâ ixte mê omunh kêt. Kêt ka na ixrom ate mê omunh. Anê.

Hâmri nhûm inhmâ mê harênh o:

—Nâ na pre mê hkwyjaja Jejus â mê homnuj tÿx kumrêx nê mê kupa. Tâ mê kêp Jejus kwÿ jakamâ na pre mê nê mê kot amnhî tomnuj o hapêx nê te amnhî kamrô ho mê nê mê kot amnhî tomnuj piitâ kuhôn par pyrâk o mê hipêx. Jakamâ nhûm mê ê jaka kamâ mex nê hkînh tÿx nê pa.

¹⁵ Nê Tirtûm kot mê pahto amnhîptâr â hkrî xâ maati kutâ kâm mex o mex â harênh râhâ ho kuhê.

Na hte mê ho mex râhâ ho pa. Mê hkôt pa ho pa jakamâ koja mêmoj tanhmâ kêp mê ho hkêt nê.

¹⁶⁻¹⁷ Nê mê pahte amnhî tomnuj pânâ amnhîrer xwÿnh kot Tirtûm krî xâ maati kamâ am xwÿnhnta na hte mê hamâr mex râhâ ho mê hkôt pa.

Te mê kot mê hkrit jamâr mex pyrâk.

Nê te mê kot mê hkrit kôm o pa nhûm htÿr nê pa pyrâk.

Koja mê kuri htÿr tûm nê hkôt pa ho pa.

Nê axte kâm prâm kêt nê.

Nē axte kām kōr kēt nē.

Nhūm arīgro htýxja axte mē hkà ho hxét kēt nē.

Koja Tirtūm te mē kot mē hkra no kagō nhūnhīn par pyrāk o mē hipēx nhūm mē axte hkaprī nē mýr o pa hkét nē. Pānhā hkīnh nē mex rāhā kuri pa ho pa. Anē.

8

Kagā kaxkep o htýx xà kot hitep jarēnh

¹ Tā pa arī kaxkwa kamā mēmoj pumu nhūm mē pahte amnhī tomnuj pānhā amnhīrer xwýnhja kagā kaxkep o htýx xà kot hitepta pôt. Hāmri nhūm kaxkwa kamā mēmoj piitā hpinhkrēnh pa nhūm mēhō kapēr kēt kumrēx. Nē hpinhkrēnh par o ra hā ahtūm ry mex nē.

² Hāmri nhūm Tirtūm kutā kapēr o wrýk xwýnh pē 7 nē mē kuhē xwýnhjaja. Nhūm kapēr o wrýk xwýnhjē hōja mē hwýr tē nē mē piitā mē kām pifti gō.

³⁻⁴ Hāmri nhūm kapēr o wrýk xwýnhjē hōja ôr o xijere py nē Tirtūm mā mēhkuxwa xà ho xét xà hā mēs kunīhti hwýr o tē. Mē ho amnhīptār ā hkrī xà maati kutā ôr o mēstija wýr o tē nē kuri o xa. Hāmri nhūm mē kām kamā mēhkuxwa xà hkwy runh rax nē nhūm mēsti hā ho xét o xa. Rôm nhūm Tirtūm krajaja Tirtūm mā tanhmā amnhī jarēnh to. Jakamā nhūm mēhkuxwa xà xét kūm mē mē kot Tirtūm mā amnhī jarēnh xāja mē nhūm ahkà nē Tirtūm kapēr o wrýk xwýnh nhūhkra kamā xijere rūm Tirtūm kutā kax mā àpir o pa.

⁵ Hāmri nhūm kapēr o wrýk xwýnhjaja xijere kamā kuwy hpòk kwý ho nýt nē aghar mā pika hwýr kumē nhūm ma tē nē pikap tēm nhūm pika htetet týx nē kamā na katôtók nē haxēnh nē hkrakrak.

Mē kot pifti kakōr ā mē harēnh

⁶ Hāmri nhūm Tirtūm kapēr o wrýk xwýnh pē 7 kot pifti jamýnh xwýnhjaja ra kot pafti kakōr mā.

⁷ Jakamā nhūm wamta ô pifti kakō nhūm na mē te kot jēr krā jakot pyrāk xwýnh mē kuwy te kot mēmo kamrō kamrēk pyrāk xwýnhja pikap rôròk pa. Nē nhýhýnh pika hkwy ho rax nē ho kaxār pa. Nē pōti nē akunī hkwy ho rax kumrēx nē ho kaxār pa.

⁸ Hāmri nhūm wam ām xwýnh nhūjuk ri ām xwýnhja ô pifti kakō nhūm mēmoj te kēn krā hprēk pòk pyrā nē kaxkwa rūm aghar mā tē nē gō xujanār nhīkjē kamā hpòk rāhā tēn mrō. Hāmri nhūm gō nhīkjē kamā gōja mēmo hkamrō hā amnhī jahkre hpa.

⁹ Jakamā nhūm gōx kām mēmoj htír nē ri mrar xwýnhjaja pikaprār pa. Nē gōx kām pār gō krāhkā hā pa xwýnhja haxwýja gjēx pa. Nē pār kām mē pa xwýnhjaja haxwýja hagjē nē pikaprār pa. No nhūm gō mex kām pār kām mē pa xwýnhjaja mē kurom arī htír nē.

¹⁰ Tā nhūm wam ām xwýnhja wa hijuk ri ām xwýnhja ô pifti kakō. Hāmri nhūm kanhēti rax kumrēxja axta nē hpòk o ma aghar mā tēn pikap tēm nē pyhti nē hino hkwy ho ohtō nē homnu hpa.

¹¹ Kanhēti nhīxi pē na pre “mēmoj xy xà” anhýr jakamā nhūm tēm nē pyhti nē hino hkwy ho ohtō nē homnu pa. Nhūm prem hwýr mra nē hkwy janhi nē ho ixkō nhūm ý nē nhūm mē ohtō nē ho ixkō nē axkaprā.

¹² Hāmri nhūm hpānhā Tirtūm kapēr o wrýk xwýnhjē hōja ô pifti kakō. Na pre ra ho axkrunēpxi nē hkakōr tā hpānhā ra axte hō ja kakō. Hāmri nhūm mēhōja tē nē myyti kura nhūm hkwy ahtyk nē hirā hkét nē. Nhūm mytwýre nē kanhēti mā ho anē nē myyti pyrā nē hkwy ahtyk nē hirā hkét nē harir. Jakamā nhūm kamāt kām hirā mex kēt nē. Nē arīgro hā myytija haxwýja hirā mex kēt nē.

¹³ Hāmri pa kaxkwa kamā àanhāhti pumu nhūm týx pē ri htor o pa pē tanhmā kapēr to nē kapēr o:

–Hēxta waa nē. Kormā kot pifti kakōr xwýnhjaja axkrunēpxi nē kormā hkakōr kēt nē. Koja mē tokyx hkakō nhūm pika hkót ri mē pa xwýnhjaja amnhī xà htýx kamā hamak týx o pa. Na pa tee ri mē hkukamā ijamaxpēr nē inhmā mē hkaprī htýx nē. Hēxta waa nē. Koja mē omnuj týx kumrēx. Anē.

9

¹ Tā pa axte mēmoj pumu. Nhūm Tirtūm kapēr o wrýk xwýnhjē hō ô pifti kakō. Na prem ra ho kwat nē hkakōr tā hpānhā axte hōja ja kakō. Hāmri nhūm kanhēti hō axta nē pikap tēm kurē kumrēx nhūm mēhōja omu nē hwýr tē nē kām mēmoj tā saf gō. Satanasti jagjēnh xà hā ahkre xupým o htýx xà hā safja nhūm kanhēti mā kugō.

² Hāmri nhūm kupy nē ahkrehtita wýr o tē nē kahē xà mē nhūm kurūm kuwy hkūm hapòx rax nē. Nē ma kax mā àpir o pa nē myyti hpro hpa nhūm kamāt kō rax kumrēx.

³⁻¹¹ Nē kuwy hkūmja rūm mēmoj te krit pyrāk xwýnh kwýjaja pikap rôròk nē kuhē. Te kot krit pyrāk tā mē hkuk te panhī hkuk pyrāk. Nē mē hkrā hkī te mēnijē hkrā hkī japjē pyrāk. Nē ôr o mē ahkà jagjē. Nē mē wa japjē htýx kumrēx. Te rēawti xwa japjē pyrāk. Nē kax o mē hinó hkà. Nhūm mē htor o hara hkoko htýx o mra. Te ho kawar sohtō pijapu kaxyw kot mē hkjēnh xà kamā mē htur nē mē hkjēnh o hprôt nhūm hkoko htýx pyrāk. Nē mē hkamnhwýr o pa kaxyw mē hanhyja te kot makre janhy pyrāk. Á krititja kot anhýr. Nē te nhýhým oprē kaxyw nojarēt nē mē hkrit kawar hā hīkukrēx mex rēnh pyrāk. Mēō pahija ahkre xupýmta kamā kēp mē hkrāhtūm. Ijaew kapēr kām hixi pē “Apātō.” No Gres kapēr kām kēp “Aporiāw.” No

mē pakapēr kām kēp “mē hpar o pa xwýnh.” Hāmri nhūm Tirtūm kriiti mā kapēr nē mē kām:

–E kēr ka mē ma pika piitā hkôt te makre kot amnhī nhīpēx pyrā nē ri mē hkôt mē hkamnhwýr o apa. Ā amnhī nhīpēx anhýr o mē atā mytwrý pē sík. No ām kēr ka mē hpar kumrēx kēt nē. Ām mē kot amnhī xā htýx kām hamak pix kaxyw tanhmā mē ho ho apa. Te makre kot mē hkamnhwýr nhūm à htýx kumrēxta pyrāk. No mē ate mē hkamnhwýr nhūm mē hkamnhwýr xāja koja à htýx o makre kot mē hkamnhwýr jakre. Nom ra mē kot Tirtūm kra hā mē hkagā xwýnhjaja kēr ka mē omu nē ām mē omu nē tanhmā mē ho hkēt nē. Mē kēp ixkwý na mē. Nē pō nē prāt ka mē ām omu nē tanhmā ho hkēt nē. Ām mē kot panhī nhōkrā kagā hkēt xwýnh pijajaja ka ā mē hipēx anhýr o ri mē hkôt apa. Nom kēr ka mē hpar kēt nē. Kē mē tee ri amnhī xā hā maj kām tokyx htyk nē hapēx prām hkaprý ho pa. E ma mē hwýr mra nē ā mē hipēx anhýr o ri apa. Anē.

Hāmri nhūm mē kuma nē ma mē hwýr mra.

¹² Na ra pika hkôt wam mē homnu xā pyxi nē hapēx. No ām arī hamēxkrut.

¹³ Jakamā nhūm Tirtūm kapēr o wrýk xwýnhjē hōja axte ō pifti kakō. Na prem ra ho sík nē hkakōr tā axte hkôt hōja hkakō. Nhūm Tirtūm kutā ōr o mēsti rūm mēhōja tanhmā kapēr to. Mēsti janhá rūm kapēr.

¹⁴ Pifti kakōr xwýnhnta mā kapēr nē kām:

–E na ra mē kot mē hkwyjē nhūmex ā arīgrota kato. Jakamā kēr ka ma pyhti pē Erax wrý wrý nē gō mý ri Satanasti mā mē àpēnh xwýnh pē kwatja pumu. Na prem ra mē hpa hpre nhūm mē gō mý ri arī hkrī ho hkrī. Ka mē omu nē mē kām mē hpa hpre xā hpót pa kē mē ma mē hkôt ri mē hpar o pa. Anē.

¹⁵ Na pre ra Tirtūm mē kot mē hkwyjē nhūmex o pa kaxyw mē kurē nē gō mý ri mē unhwý nhūm mē kormā mē hpar xā hā arīgro jamār o hkrī. Jakamā nhūm ā pifti kakōr xwýnhnta mā mē harēnh anē nhūm kuma nē ma tē nē mē hwýr wrý nē mē kām mē hpa hpre xā hpót pa. Hāmri nhūm mē ma pika piitā hkôt ri mē hpar o mē hkôt pa. Nē mē ho ohtō rax kumrēx nē mē himex.

¹⁶ Nē ma amnhī kôt pōristi ho ohtō rax nē o pa. Piitā kawar ā hkrī nē mē hkôt hprōt nē hkoko ho mra. Mē kēp 200.000.000 hā mē harē pa mē harēnh ma. Mē ohtō rax o mē ohtō rax.

¹⁷ Na pa pre arī te ixpimtir kām mē omunh pyrāk. Nhūm kawar ā mē hkrī xwýnhjaja. Mē hinō kāja axtem kax o. Nē hkamrēkja te kuwy hpók kamrēk pyrāk. Nē rārārja te mē hkurót kane xā pē ēšóf rārār pyrāk. Nē kakrā htyk. Ā kax o mē hinō hkā kot anhýr. Nē

mē hkrít kawarti hkrāja te rēawti krā pyrāk. Nē mē hakwa rūm kuwy hpók mē ēšófti mē kuwy hkūm axpēn kôt hapōx o pa.

¹⁸⁻¹⁹ Nē kawarti jamy axtem te kēp kagā xoprē hkrā pyrāk nhūm mē hamy ho mē hkamnhar o mē kupa. Nē mē hakwa rūm kuwy hkūm mē kuwy hpók mē ēšófti hapōx xwýnhnta mā mē ho anē nē. Jakamā nhūm kawartijaja mē hkôt ri hamy mē hakwa ho mē hpar o pa nē mē ohtō rax kumrēx nē mē himex.

²⁰⁻²¹ Tā nom nhūm arī mē htír nē ri mē pa xwýnhjaja. Mē kot mē hkwyjē hpar kēt xwýnhjaja hāmri ja hā mē omunh tā arī amnhī tomnuj o pa nē kām urer kēt nē. Arī tanhmā amnhī tomnuj to ho pa. Axpēn pē hprō nē mjēn o amnhīkati nē axpēn pē ahkī. Nē axpēn par o ri pa nē tanhmā axpēn xyhto ho pa. Ā htýx ri amnhī nhīpēx anhýr o pa nē kām urer kēt nē. Ām Satanasti hkôt pix mā ri amnhī nhīpēx o pa. Nē amnhīm sānti hkwy nhīpēx. Pī ho hipēx nē kax o hipēx nē kēn o hipēx. Nē hipēx pa nē amnhī to hwýr o pa. Nom mo kot mē mar kaxyw sānti jamak kre? Nē kot mē omunh kaxyw mo no? Nē ri mrar nē mē ho utār kaxyw mo hte? Na htem arī ā amnhī to hwýr kaprý anhýr o pa.

10

Kagā kaxkep grire jarēnh

¹ Tā pa arī mēmoj pumu. Nhūm axte Tirtūm kapēr o wrýk xwýnh xihýtýxjē hōja pika hwýr wrýk o tē. Nē ēja kakrā ho na pre. Nē hkrā mý ri máxwýxti ajēt. Nē hkuk te myt no kamā hirā htýx pyrāk. Nē akutā hte kamā te kuwy hpók pyrāk.

² Nē ĩhkra kamā kagā kaxkep grire ra pipōt nhūm ma o tē nē o wrý nē o xa. Nē gō xujanār kām upók rūm hte xām nē kýx pē amgrā kamā apke rūm hte xām nē o xa pa ixprī hā omu.

³ Hāmri nhūm kax pēē amýra. Te rēaw hkār týx pyrāk. Nhūm hpānhā kaxkwa kamā mēhōja kām kapēr. Te na katōtōk o 7 wēs pyrāk pa ixprī hā tanhmā kapēr to hā kuma.

⁴ Hāmri nē ra mē amā ā kagā kaxyw nhūm mē ja nē inhmā kapēr nē inhmā:

–Kwa nā kwarī ja kot kaj hā kagā hkēt nē. Ām ja pix kot kaj akwýjē mā hā kagā hkēt nē. Ām kapxipix mán ama nē ri hā apa.

Anhýr jakamā pa mē amā hā kagā hkēt nē. Ām paxpax kuma nē ri hā ixpa.

⁵ Tā nhūm Tirtūm kapēr o wrýk xwýnh kot gō xujanār kām upók rūm hte xām nē apke amgrā kamā ām xwýnhnta hāmri Tirtūm nhý hā kapēr kaxyw nē kánhmā ĩhkra pē.

⁶⁻⁷ Tirtūm pē kaxkwa nē pika nē gō xujanār o kator nē kamā kot mēmoj piitā ho kator xwýnhja. Nē htír rāhā nē pa ho pa xwýnhja. Nhūm ý hā kapēr nē kapēr o:

—E hāmri. Amnepê mā na pre Tirtūm ŷ hā mē kām kapēr o ri mē pa xwýnhjê mā tanhmā amnhī kukamā amnhī jarēnh to. Tanhmā kot pika piitā hkôt mē pa xwýnhjê nhīpêx to hā amnhī jarē. Nē mēmo arīgro hā mē kot amnhī tomnuj mýrapê tanhmā kot mē hipêx to hā mē hkukamā mē hā amnhī jarē. Tā ra ā mē hipêx anhýr xā hā arīgro kato. Jakamā koja kapēr o wrýk xwýnh kot hitepta ō pifti kakō hāmri nhūm mēmoja ā amnhī nhīpêx anhýr kurē kumrêx. Ām hāmri na pa mē amā ja jarē. Anē.

⁸ Pa mar o ixām rōm nhūm wam inhmā kapēr xwýnhhta axte inhmā kapēr nē inhmā:

—E mā pika hwýr wrý nē gō xujanār kām upōk rūm hte xām nē amgrā kamā apke rūm hte xām xwýnhhta wýr tē nē kēp kagā kaxkep grire pipōt xwýnhhta py. Anē.

⁹ Hāmri pa kuma nē mā hwýr wrý nē hā kuwý nhūm inhmā kugō nē inhmā:

—E mī. Apy nē akrē. ànhre. Te kot menh xānh pyrāk. Nom kot kaj akrē nē anhōhy xā. Nom māmri apy nē akrē. E mī. Anē.

¹⁰ Hāmri pa kēp kupy nē hkaki nhūm ànhre. Pa hkrēr pa hāmri nē inhōhy xā kurē kumrêx.

¹¹ Hāmri nhūm kot inhmā ōr xwýnhhta inhmā:

—Nā ām hāmri na ka apy nē akrē. Jakamā kēr ka ano ho ate mēmoj piitā omunh xwýnhja nē ajamak o ate mēmoj mar xwýnhja nē ate tanhmā Tirtūm kapēr mar toja ka piitā hā kagā hpa. Hāmri nē ate omunh xā hkôt akwýjê mā piitā harēnh o apa. Mē kot nhýrmā Tirtūm kot tanhmā mē piitā mē hipêx to hā harēnh mar kaxyw. Ahpýnhā ri pika piitā hkôt mē urojê piitā koja nhýrmā ā mē hipêx anē. Ahpýnhā ri mē kapēr xwýnh piitā. Nē mē ō pahijaja. Ām mē piitā koja nhýrmā ā mē hipêx anē. Anē.

11

Tirtūm nhý hā kapēr xwýnh pijakrut wa harēnh

¹ Tā nhūm mēhōj inhmā mēmoj to mīdi xā hā pī ryre gō nē inhmā:

—E ja py nē Jerujarē hwýr wrý nē kamā Tirtūm mā amnhī jarēnh xā hā ixkreja o mīdi. Nē ixkre kamā amnepēm mē kot amnhī tomnuj pānhā Tirtūm mā ōwēhti nhōr xā hā mēstita mā ho anē nē ho mīdi. Nē ixkre kamā mē kot Tirtūm mā amnhī jarēnh o mē hkrī xwýnhjaja ka aprī hā mē ho kōta.

² —No ixkre kapem pikaja ka ho mīdi hkēt nē. Ra Tirtūm kot mē kot amnhī tomnuj xwýnhjê mā hkaga jakamā koja mē htýx ri kām hprām xā hkôt tanhmā homnu hto ho pa. Nē Jerujarē piitā hkôt ri homnu ho paja ā hā amgrā axkrunēpxi nē hkôt mytwrý kēp 6.

³ —Koja Tirtūm ma ŷ hā kapēr xwýnh ho hamēxkrut nē mē hwýr wa kumē nhūm wa ma mē hwýr wrý nē mē kām Tirtūm kapēr jarēnh o ri mē hkôt pa. Hāmri nē tee ri mē kot tanhmā amnhī tomnuj to hā mē omu nē hkapri nē. Hāmri nē wa hkapri xāj xak punure kaxō nē haxā nē mē kām Tirtūm kapēr jarēnh o ri wa pa hā amgrā axkrunēpxi nē hkôt mytwrý kēp 6. Jakamā e. Pīja py nē ma mē hwýr wrý nē ixkreta o mīdi. Anē.

⁴ Wa pijakrut wa kot Tirtūm nhý hā kapēr jarēnh o wa pa xwýnhhta wa. Na htem wa kot amnhī nhīpêx ā wa harēnh ma nē mēmo pī hpār pē oriwēhti kot tanhmā amnhī nhīpêx toja mā hamaxpēr kurē kumrêx. Nē amnepēm Tirtūm nhý hā kapēr o pa xwýnh pē Jakaris kot kanē hpōk xāmta mā māmēn hamaxpēr. Oriwēhti xōja htwým rax kumrêx nhūm htem htwým opōj nē ho kanē ho nyt nē hpōk nē kýx pē unhwý nhūm mē piitā hirā kamā rīt mex o ri mra. Nē kanē hpōk mexja te kot Tirtūm kapēr pyrāk. Nē kanē xām xāja te kot Tirtūm nhý hā kapēr jarēnh o wa pa xwýnhhta wa urāk. Nē oriwēhtija haxwýja te kot wa urāk. Ra Tirtūm Karō kot wa hkarō mā ār jakamā na hte wa hprī hā mē kām Tirtūm kapēr jarēnh o pa nhūm mē kot mar xwýnhjaja te kanē nhīrā kamā ri rīt mex nē ri pa pyrā nē hprī hā mar týx nē.

⁵ Tā koja mēhō tanhmā wa hipêx to kaxyw wa hwýr tē nhūm wa hakwa rūm kuwy hpōk kato nē kot tanhmā wa ho mā xwýnhhta o hxēt o kupi.

⁶ Nē koja wa Tirtūm xāhpumunh týx xā ho tanhmā ri mē hā mēmoj nhīpêx to pē mē kām kapēr jarēnh o ri mē hkôt pa. Jao tanhmā na hto nhūm mē hā wrýk kēt ry nē. Rý tanhmā mē kēp gō hto nhūm mē hkamrō hā mē kēp amnhī jahkre. Kōja wa ā Tirtūm nhý hā mē kēp mēmoj nhīpêx anhýr ho wa pa. Nē xatā wa kām hprām xā hkôt tanhmā mēmoj tomnu hto.

⁷ Nē mē kām kapēr o pa pē ā mē hipêx anhýr o wa hā amgrā axkrunēpxi nē hkôt mytwrý kēp 6 nē rī kormā ho hapêx. Hāmri nhūm ahkre xupým rūm Satanasti nhō kōwenatōja kato nē ma wa hwýr tē nē nhýri pry kahti ri wa unē nē wa kupi nhūm wa pry kamā ty nē nō.

⁸ Hāmri nhūm mē wa haxār kēt nē nhūm wa arī pry kamā nō. Krī kapem na prem pī kahpa hā Jeus nhō nē kupi. Krī nhō xwýnhjaja mē kot amnhī tomnuj týx xwýnh na mē. Te ho amnepēm krī pē Sotō mē pika pē Ejit kamā mē kot amnhī tomnuj xwýnhjê kot amnhī nhīpêx pyrāk.

⁹ Jakamā nhūm mē kot wa haxār nē axpēn kurē nhūm wa pry kamā arī ty nē nō nhūm mē piitā wa hwýr mra nē wa omu. Nē ahpýnhā krī piitā hkôt mē pa xwýnhjaja tanhmā amnhī to nē ja hā wa omu. Ahpýnhā

ri pika piitã hkôt mē urojaja. Nē ahpŷnhã ri mē kapēr xwŷnh piitã. Hãmri arĩ ahpŷnhã mē ô krĩ kamã pa htã tanhmã amnhĩ to nē wa htyk ã wa omunh ã hã apkati axkrunēpxi nē hkôt hã myt apha.

¹⁰ Koja mē wa htyk ã wa omu hãmri nē hkĩnh nē. Nē hkĩnh xaj axpēn mã hkĩnh xã nhõr o pa. Wa kot kormã htĩr ri tanhmã mē homnuj to ho ri mē hkôt paja mã hamaxpēr nē wa htyk ã wa omu nē hkĩnh tŷx nē.

¹¹ Tã koja wa htyk ã apkati axkrunēpxi nē hkôt hã myt apha hãmri nhũm Tĩrtũm wa kamã htŷyxã rē nē akupŷm wa ho wa htĩr nhũm wa kãnhmã xã nē ri mra. Hãmri nhũm mē kot wa omunh xwŷnhjaja tee ri hã wa omu nē kãm wa uma htŷx kumrēx. ãm kãm wa uma ho kãm wa uma.

¹² Hãmri nhũm kaxkwa kamã mēhõja wa kãm kapēr nē wa kãm:

—E war amnē mē ixwŷr war api. Anē.

Hãmri nhũm wa kuma nē ma kakrã kamã àpir o mō. Nhũm mē kãm wa hkurē xwŷnhjaja tee ri wa àpir ã wa omu.

¹³ Hãmri nhũm pika htetert tŷx nē. Nē krĩ kamã ixkre ohtō nē grãnh pa nē mē hkwy nhĩmex rax nē nhũm mē ohtō rax kumrēx nē axkaprã. Mē kēp 7.000 nē pikaprãr pa. Hãmri nhũm arĩ mē htĩr nē ri mē pa xwŷnhjaja tee ri mē omu nē kãm ma xaj htetert tŷx nē axpēn mã:

—Kwa Tĩrtũm mãn ã mē panhĩpēx anē. Hihitŷx o hihitŷx jakamã kaxkwa rũm ã mē panhĩpēx anē pu mē pahipiitã pano ho ixkre pigrãnh ã omu. Anē.

¹⁴ E na ra amnhĩ xã htŷx kamã hamak xãja hamēxkrut nē hapēx. Tã no ãm arĩ mē kaxyw pyxi nē arĩk.

Mē kot pifti kot hitep kakõr ã harēnh

Apokarip 4,8, 5,9-14, 7,9-12, 14,2-5, 15,3-4, 19,1-2

¹⁵ Tã nhũm Tĩrtũm kapēr o wrŷk xwŷnh kot hitepja õ pifti kakõ nhũm kaxkwa kamã mē pa xwŷnhjaja kãx pē kapēr o:

E ãm hãmri. Na ra Mēpahpãm Maati mē Jejus Krisja wa kēp krĩ piitã hkôt mē piitã mē ô Pahihti na wa.

Koja Mēpahpãm Maati ja kēp Pahi Maati rãhã nē pa ho pa xwŷnh. Anē.

¹⁶ Hãmri nhũm mē àptãr tũm pē 24jaja. Tĩrtũm kot mē pahto amnhĩptãr o hkrĩ xã mã hipók nē mē hkrĩ xwŷnhjaja. Hãmri ã mē kapēr anhŷrja ma nē Tĩrtũm ã hpjiaãm kaxyw hpar pē rõrõk pa nē htu mŷr pē hikwŷ. Hãmri nē kãm mex o mex ã harē nē kãm:

¹⁷ Pa Pahi Maati Tĩrtũm. Nã ãm hãmri mē ixrom axãhpumunh o axãhpumunh nē axihtŷx o axihtŷx.

Amnepē mã kormã mēmoj kēt ri na ka pre arãhã apa ho apa.

Tã arĩ arãhã apa ho apa.

ãm hãmri apē mē xpiitã mē ixto amnhĩptãr xwŷnh. Nã ãm hãmri amex o amex.

¹⁸ Kot kaj tokyx mē piitã tanhmã mē kot amnhĩ nhĩpēx to ho pa hã mē omunh xã hkôt tanhmã mē harēnh to.

Nē ra mē htyk xwŷnhjaja kot kaj mē piitã akupŷm mē ho mē htĩr pa nhũm mē pika rũm hapõx pa nē ma mra nē arĩ mē htĩr xwŷnhjē nhĩhkõ hã akutã hkrĩ pa.

Ka mē piitã mē omu nē tanhmã mē kot amnhĩ nhĩpēx to ho pa hã mē omunh hkôt tanhmã mē harēnh to.

Mē kot amnhĩ tomnuj xwŷnhjaja kot kaj ma mē kot amnhĩ xã htŷx kamã hamak o pa htũm xã hwŷr amnhĩ nē mē arē nhũm mē ma hwŷr hapēx. Hãmri nē tee ri amnhĩ kukamã hamaxpēr nē gryk tŷx kumrēx.

Ka hpãnhã mē kot akõt amnhĩ xunhwŷr nē akapēr kõt amnhĩ nhĩpēx o mē pa xwŷnh piitã mē omu nē tanhmã mē ho mex to.

Mē kot amnhĩ to rũnh xwŷnhjaja nē mē kot amnhĩ to hkrŷre xwŷnhjaja.

Nē amnepēm mē kot anhŷ hã mē kapēr o mē pa xwŷnhjaja.

Akrajà piitã kot atã hpjiaãm xwŷnhjaja kot kaj kormã mē htĩr ri tanhmã amnhĩ to mex hã mē omunh xã hkôt tanhmã mē ho mex to.

ã kot kaj tokyx mē piitã ahpŷnhã mē omunh xã hkôt mē hipēx anē. Anē.

¹⁹ Hãmri nhũm kaxkwa kamã Tĩrtũm nhõrkwŷ hã hakwakre kahē xã amnhĩ mē pa kamã õr o mēs kunĩhtita pumu. Pu nhũm na hkatõtõk nē haxēnh nē hkrakrak nē na mē te kot jēr krã hakotere pyrãk xwŷnhja pikap rõrõk rax nē. Nē pika htetert tŷx o htetert tŷx pa arĩ omunh o xa.

12

Mēhõ ni mē kagãmnuti wa harēnh

¹ Tã pa axte mēmoj pumu. Kaxkwa kamã aa mē pahte mēmoj pumunh kēt xwŷnhja pa omu. Nhũm mēhõ nija xē te myt no mã hirã htŷx pyrãk. Nē hpar nhõkwa kamã mytwŷre ajēt. Nē kanhēti ho 12 o mē ahkã tu nē o xa.

² Na ra htujarõ nē hpjagri kaxyw õhy xã nē amnhĩ kamnhēr o xa.

³ Tã pa axte mēmoj pumu. Aa mē pahte mēmoj ã kot anhŷr pumunh kēt xwŷnh õja pa omu. Kagãmnuti nom ãm axtem hkã kamrēk tŷx kumrēx. Nē rax kumrēx. Nē hkrã kēp 7. Nē hkrã piitã kamã õr o pahi hã mē ahkã htu nē o nõ. Nē hkrã kamã pãr kēp 10.

⁴ Tã nhũm hamy ho apē o kaxkwa kamã kanhēti ho ohtō nē pikap kurē. Hãmri nē õhy xã nē amnhĩ kamnhēr o ãm xwŷnhnta wŷr tē nē hkra kator nhũm kot kēp krēr kaxyw kutã hamãr o nõ.

⁵ Hāmri nhūm hkra kato nē myre. Hihtýx o hihtýx ā kot pika piitā hkôt mē piitā mē ho amnhīptār mā xwýnh na pre. Nhūm kagāmnuti ja kot kēp utār nē hkrēr mā tā nhūm Tirtūm kapēr o wrýk xwýnhjē hōja hwýr wrý nē kēp kumý nē ma Tirtūm wýr kaxkwa kamā kot mē pahto amnhīptār ā hkrī xā maati ja wýr ho api.

⁶ Hāmri nhūm kagāmnuti tee ri ma kot kēp o mōr ā omu nē hpānhā nita o apkjē nē kot tanhmā ho kaxyw nhūm amnhī tā omu nē umaj hprōt nē ma tē nē nhýri kapōt ā amūxu. Ra Tirtūm kot hkukamā kām hpimxur xā nhīpēx xā hwýr hprōt nē ma tē nē kamā kēp amūxu. Nhūm Tirtūm ja nē kagā pumunh mex nhūm kēp hpimxur mex ā amgrā axkrunēpxi nē hkôt hā mytwrý kēp 6.

Mē kot kaxkwa kamā mēkarōmnuti kurē kaxār ā mē harēnh

⁷ Tā nhūm mē ra kaxkwa kamā kurē kaxār kaxyw. Kagāmnuti mē hkwyjaja nhūm mē ra Tirtūm kurē kaxār kaxyw kutā amnhī xunhwý. Jakamā nhūm Tirtūm kapēr o mē wrýk xwýnhjē hkrāhtūm Mikewja ma mē hwýr amnhī kôt hkwyjē o mra nē mē pijapu ho kuhē.

⁸ Hāmri nhūm kagāmnuti tee mē kutā amnhī to htýx kaprý nhūm Tirtūm kapēr o mē wrýk xwýnhjaja amnhī nē mē ho axtem nē kaxkwa rūm mē kator o mē kator.

⁹ Satanasti pē kagāmnuti kagā kot ni kator ewa mā hēx xwýnh na pre. Nē hēx rom tanhmā hēx to ho pa xwýnh. Jakamā nhūm Mikew mē hkwyjaja hkwyjē mē mē ho hpimrātā amnhī nē pikap mē rēnh pa.

¹⁰ Hāmri nhūm kaxkwa kamā mēhōja axte kaxpē kapēr nē kapēr o:

E ām hāmri. Na ra Tirtūm hihtýx o hihtýx o mē panē mēmo j punuj piitā ho hapēx par kumrēx.

Na pre hte Satanasti pē mēkarōmnuti ja xatā hwýr mra nē kām tanhmā Jejus kwýjē ho kapēr punuj to ho pa.

Tā koja axte mē ho kapēr kēt kumrēx. Ra Tirtūm kot amnhī nē kator o kator nhūm ra ma mōr o mōr kēnā.

Koja Tirtūm pika piitā hkôt mē ho amnhīptār xwýnhjē japōx pa nē hpānhā mē kaxyw Kra Krisja xām nhūm pika piitā hkôt mē ho amnhīptār rāhā ho pa.

Nā ām hāmri. Ja mex o mex.

¹¹ Na pre Jejus kôt mē pahtō nē mē pahtōxjaja mēkarōmnuti kutā amnhī to htýx nē pa. No ām amnhī nhý hā ā kutā amnhī nhīpēx anhýr kēt.

Mē pahte amnhī tomnuj pānhā amnhīrer xwýnhā na pre ty nē hkamrō ho mē kuhō nē mē nē mē kot amnhī tomnuj o hapēx.

Jakamā nhūm prem kukwak ri Satanasti kutā amnhī to htýx rāhā pa.

Nhūm mē kot Jejus ā mē himex par kaxyw tā nhūm mē kām htyk pyma hkēt nē. Ām Jejus kôt arī amnhī to htýx nē mē hkôt pa rāhā nē.

Ja o arī mē kām Jejus kot mē panē tanhmā amnhī nhīpēx to hā harēnh o ri mē hkôt pa.

¹² Tā Tirtūm ra kot mē panē mēmo j punuj o hapēx par jakamā kwa kaxkwa kamā mē apa xwýnhjaja kēr ka mē akīnh nē apa.

Nom gō xujanār kām nē pika kamā mē pa xwýnhjaja hēxta waa nē. Koja mē mex kēt nē.

Nē ra Mikew mē hkwyjaja kot amnhī nē kaxkwa rūm mēkarōmnuti mē hkwyjē kator nē pikap mē rēnh par jakamā nhūm Satanastija gryk týx kumrēx.

Tirtūm kot ma mē kot amnhī xā htýx kamā hamak o pa tūm xāta wýr mēnh xā hā arīgro hwýr amgrā grēre nhūm tee ri amnhī kukamā hamaxpēr nē gryk týx o gryk týx. Anē.

¹³ Hāmri nhūm kagāmnuti ja mē kot amnhī nē kaxkwa rūm kator ā amnhī pumu nē gryk týx nē. Nē gryk xāj ma akupým ni kot hkra myre ho pijagri xwýnhā wýr tē nē tanhmā ho kaxyw hkôt ho krihkrit.

¹⁴⁻¹⁶ Hāmri nhūm Tirtūm kapēr o mē wrýk xwýnhjē hōja omu nē nija mā āanhāhti jara gō. Kōt kagāmnuti pē ho htor nē ma nhýri hpimxur xā wýr htēm kaxyw. Nē kormā htor kaxyw nhūm kagāmnuti omu nē kot gō ho hanhīr kaxyw hkôt hakwa rūm gō kapī nhūm hpikapīr rax kumrēx. Te pyhti hprōt týx pyrāk. Hāmri nhūm Tirtūm omu nē nija nē tanhmā pika hto nhūm kām axkjē nhūm gō hprōt nē kamā pikapīr pa. Jakamā nhūm mex pē āanhāhti jara ho to nē ma kapōt ā pimxur xā hwýr ma tē. Nē kamā pa hā amgrā axkrunēpxi nē hkôt mytwrý kēp 6 nhūm prem hamār mex rāhā ho pa.

¹⁷ Hāmri nhūm kagāmnuti tee ri kām hpīr prām kaprý nē gryk týx kumrēx. Hāmri nē ma ni hkwyjē hwýr mō. Mē kot Tirtūm mē Jejus wa hkôt amnhī nhīpēx o mē pa xwýnhjē hwýr tanhmā mē homnuj to kaxyw ma mē hwýr mō. Hāmri nē tanhmā kot mē ho kaxyw gō xujanār mý ri nō.

13

Satanasti nhō kōwenatō wa kot gō xujanār rūm kator ā wa harēnh

Sikūn Tesarōn 2.3-5

¹ Tā pa axte mēmo j pumu. Nhūm gō xujanār rūm Satanasti nhō kōwenatōjē hōja te mrymnuti pyrā nē āpir o mō. Kagāmnuti pyrā nē hkrā kēp 7. Nē urāk nē hpār kēp 10. Nē hpār piitā kamā pahi hā mē ahkā. Nē

ahkà piitã hã axtem tanhmã Tirtũm o kapër punuj to nẽ tanhmã haprÿ hto hã kagãja hikwÿ.

² Nẽ hkà te kęp ropkrorti kã pyrãk. Nẽ hakwa te kot rêãwti jakwa pyrãk. Nẽ ìhkra te kot pãiti nhìhkra pyrãk. Jakamã na pre kagãmnuti nhÿ hã hihtÿx o kęp pahì hã pika nhõ xwÿnhjẽ ho amnhÿptãr o pa.

³ Nẽ hkrã hõ te mẽ kot hayr o hpÿr nhũm ra akupÿm htÿr nẽ arì hayr xà wakre rã nyw pyrãk. Jakamã nhũm pika kamã mẽ pa xwÿnhjaja amnhÿ jaẽr pẽ omu nẽ kamã no pyma nẽ. Hãmri nẽ hkõt amnhÿ nhÿpẽx o pa.

⁴ Hãmri nẽ kagãmnuti kot tanhmã mrymnuti ho nhũm ÿ hã mẽ ho amnhÿptãr jakamã nhũm mẽ piitã hamẽ wa hã hpjiaam kaxyw wa kãm wa mex o wa mex ã wa harẽnh o pa. Nẽ mrymnuti hã axpẽn mã:

—Hẽxta waa nẽ. Mẽ pahtõ na mẽ pahte mrymnutita pyrã nẽ ã mẽ pahte amnhÿ nhÿpẽx kot anhÿr? Mẽ pahtõ kot pu kutã xa nẽ paxihtÿx o hkurẽ kapa? Nã amrakati kumrẽx. Anẽ.

⁵⁻⁶ Hãmri nhũm Satanasti tanhmã mrymnuti ho nhũm kapër o ri mẽ hkõt pa nẽ mẽ ho amnhÿptãr o hã amgrã axkrunẽpxi nẽ hkõt mytwrÿ kęp 6. No ãm axtem nẽ Tirtũm o kapër punuj o ri mẽ hkõt pa. Nẽ ri tanhmã haprÿ hto nẽ õ krÿja mex kêt ã harẽnh o ri mẽ hkõt pa.

⁷ Hãmri nhũm Satanasti ra kot mẽ hkurẽ kaxãr kaxyw kãm anẽ nhũm axtem nẽ Tirtũm pẽ hkrajẽ kutã amnhÿ xãm nẽ mẽ hwÿr hprõt nẽ tanhmã hpjijapu hto ho pa nẽ mẽ ho axtem nẽ mẽ ho krihkrit pa nẽ ahpyñhã ri pika piitã hkõt mẽ uro hkwyjẽ ho amnhÿptãr o pa. Nẽ ahpyñhã mẽ kapër xwÿnh piitã mẽ ho amnhÿptã.

⁸ Jakamã nhũm mẽ ohtõ rax kumrẽx nẽ mrymnuti hkõt amnhÿ nhÿpẽx. Nẽ kutã hkõn krã ho rôrõk nẽ hkrÿ nẽ kãm mex o mex ã harẽ. No ãm mẽ piitã hkõt. Kot mẽ pahte amnhÿ tomnuj pãnhã amnhÿrer xwÿnh kõt ra mẽ kot amnhÿ xunhwÿr xwÿnhjaja tapxipixjaja na prem hkõt amnhÿ xunhwÿr kêt nẽ. Amnepẽ mã kormã amrakati ri Tirtũm mẽ Jesus wa õ kagã kamã mẽ htÿr tũm nẽ mẽ pa mã xwÿnh nhÿxi xwÿnh pixjaja na prem mrymnuti pumu nẽ mẽ hkwyjẽ rom hprÿ hã kot amnhÿ nhÿpẽx ã omunh kurẽ kumrẽx nẽ hkõt amnhÿ nhÿpẽx kêt nẽ.

⁹ E ka mẽ atõ axumar kaxyw ajamak kre hã kot kaj ixujarẽnh piitã ama nẽ kãm ajamaxpër tÿx rãhã ho apa.

¹⁰ Jakamã kwa Tirtũm kõt ixkwÿjaja. Kwãr mẽ mãmrì mẽ apynẽ nẽ mẽ ajagjẽ.

Nẽ kwãr mẽ mãmrì wapo ho mẽ ajayr o mẽ apa.

Nom kër ka mẽ umaj ixkaga hkõt nẽ. Ixkaga hkõt o ixkaga hkõt.

Mẽ ãm ixkõt pix mã amnhÿ nhÿpẽx o ri apa rãhã ty.

Pika rũm mrymnuti hõ kator ã harẽnh Makre 13.22

¹¹ Tã pa mrymnuti hõ pumu. Nom wamta pyrã nẽ gõ xujanãr rũm kator kêt axtem pika rũm kato. Nẽ õwẽhti hkrare pyrã nẽ hpãr pijakrutre. Nẽ te ho kagãmnuti kapër tÿx pyrã nẽ kapër tÿx kumrẽx o pa.

¹² Gõ xujanãr rũm mrymnuti xãpir xwÿnhhta nhÿ hã pika nhõ xwÿnhjẽ mã kapër tÿx nẽ mẽ kãm:

—E pika piitã hkõt mẽ apa xwÿnhjaja mẽ inhma. Kër ka mẽ kot hkrã hõ jayr o hpÿr nhũm akupÿm htÿr xwÿnhhta kõt pix mã amnhÿ nhÿpẽx rãhã ho ri apa. Nẽ kãm mex o mex ã harẽnh rãhã nẽ.

Anhÿr o mẽ kãm kapër.

¹³ Hãmri nẽ Satanasti nhÿ hã mẽ kãm aa mẽ kot mẽmoj pumunh kêt kwÿ ho anhÿr o pa. Jao kaxkwa rũm tanhmã mẽ kãm kuwy ho wrÿk to nhũm pikap rôrõk nhũm mẽ amnhÿ jaẽr pẽ omu nẽ kamã no pyma nẽ.

¹⁴ ã ri mẽ noo mẽ mẽ kãm amnhÿ nhÿpẽx anhÿr o ri mẽ hkõt pa. Gõ xujanãr rũm mrymnutija noo mã ã hẽx rom amnhÿ nhÿpẽx anhÿr o mẽ no kupyr o pa nhũm mẽ omu nẽ mẽ kõt amnhÿ nhÿpẽx. Hãmri nhũm mẽ kãm mẽmoj tã karõ nẽ mẽ kãm:

—E wam mrymnutita. Mẽ kot hkrã hõ jayr o hpÿr nhũm akupÿm htÿr xwÿnhhta kër ka mẽ kãm hkarõ nhÿpẽx nẽ ho mẽ anhõ sãnti. Kẽ mẽ piitã hwÿr mra nẽ kutã hkõn krã ho rôrõk nẽ hkrÿ nẽ amnhÿ to kuwy nẽ kãm mex o mex ã harẽ.

Anhÿr o mẽ kãm hã karõ.

¹⁵ Hãmri nhũm mẽ kuma nẽ mar xà hkõt hipẽx nẽ ãm nhũm xa. Hãmri nhũm mrymnuti kot hitepta omu nẽ hwÿr tẽ nẽ tanhmã ho nhũm ra kapër nẽ mẽ kãm:

—E kër ka mẽ kot inhmx ã ijarẽnh kêt xwÿnhjẽ pynẽ nẽ mẽ hímex pa. Anẽ.

¹⁶ Hãmri nhũm pika rũm mrymnuti kator xwÿnhhta haxwÿja mẽ kãm kapër nẽ mẽ kãm:

—E koja ixkwÿjaja inhÿ hã mẽ apiitã mẽ apẽ ixkwÿ hã mẽ akagã. Mẽ ate amnhÿ to rũnh xwÿnhjaja nẽ mẽ ate amnhÿ to hkrÿre xwÿnhjaja. Nẽ amari mẽ kãm mẽ axãpẽn xwÿnhjaja nẽ amnhÿ mã mẽ axãpẽn xwÿnhjaja. Nẽ mẽ akãxpore rũnh xwÿnhjaja nẽ mẽ apẽ amrakati xwÿnhjaja. Kojã mẽ apiitã mẽ akagã hpa. Mẽ akwÿ nhõkrã kagã nẽ mẽ akwÿ xupõk rũm mẽ anhìhkra katut kagã.

¹⁷ —Gõ xujanãr rũm mrymnutita nhÿxi kot paj mẽ atã hipẽx. Rÿ hixi hã nũm nhÿpẽx. Hãmri ka mẽ axãpkur xã japrõr kaxyw nhÿhÿm mra nhũm mẽ atã hixita pumu nẽ ri kormã mẽ amã mẽmoj kwÿ ho wẽnẽ ka mẽ amnhÿm haprõ nẽ ho axãpkur o ri apa. Nẽ mẽ ate mẽmoj to wẽnẽ xwÿnhjaja koja mẽ apẽ mẽmoj japrõr kaxyw mẽ awÿr mra ka mẽ tee ri nhÿhÿnh mẽ hã hixi japër hãmri nẽ mẽ kãm mẽmoj to wẽnẽ hkõt nẽ. ãm

nhÿhÿnh mē atā hixi hā kagāta pumunh pix kukwak ri kot kaj mē awjaprō rÿ mēmoj to wēnē. Anē.

¹⁸ E kwa kēr ka mē ixte mēmoj pumunh nē mē amā hā kagāta pumu nē ama nē kām ajamaxpēr tÿx o apa. Mrymnutita nhÿxi na kēp nūm. Nūmja kēp 666. E kaj mē akrā hi mex xwÿnhjaja kot kaj mē aprī hā ja mar tÿx kurē kumrēx.

14

Tirtūm mex ā mē grer Apokarip 7.1-8

¹ Tā pa axte mēmoj pumu. Nhūm mē pahte amnhÿ tomnuj pānhā amnhÿrer xwÿnhja hixēt pē Siāwja nhūmōk ā xa. Nē puhā mē ohtō rax kumrēx nē kuhē. Mē ohtō ho mē ohtō. Piitā kamā mē kēp 144.000. Nē piitā ōkrā hā mē pahte amnhÿ tomnuj pānhā amnhÿrer xwÿnh mē Hipēēxā wa hixi jaxwÿr pa mē omu.

² Nhūm mē kaxkwa kamā grer o kuhē. Mē grerja mex o mex. Te kot gō hprōt tÿx hkoko htÿx pyrāk. Nē te na katōtōk tÿx pyrāk. Nē te wiorāw mōr xwÿnhjaja kot hkakrēnh mex pyrāk pa mē mar o xa.

³ Nē mē grer xwÿnhjaja. Jejus puhā mē ohtō rax kumrēx nē mē kuhē xwÿnhjaja na prem Tirtūm kot mē ho amnhÿptār ā hkri xāta kuri grer o kuhē. Nē mēmoj tÿr pē kwat xwÿnhjē mē mē āptār tūm pē 24jē kuri grer o kuhē. Mē grer nyw o gre. Ām mē tapxipxjaja mē kot mē grer nywja mar. Ra mē kēp Tirtūm kra hā mē kot mē ōkrā hā Tirtūm mē Kra Jejus wa hixi ā kagā nhūm Tirtūm kot ra mrymnuti mē hōta wa kēp mē utār nē amnhÿ wÿr mē ho āpir xwÿnh na pre mē. Ām mē tapxipxjaja mē grer nywja ma nē wa kām ho grer o kuhē.

⁴⁻⁵ Na prem tām amnhÿ nhÿpēx nē Tirtūm kōt amnhÿ nhÿpēx rāhā ho pa. Te mē kot amnhÿ prō pix tānopxar rāhā ho pata pyrāk. Nē ri tanhmā hēx to rÿ tanhmā ri amnhÿ tomnuj to ho pa hkēt nē. Ām tām ri amnhÿ nhÿpēx mex o pa. Mē kēp Tirtūm mē mē pahte amnhÿ tomnuj pānhā amnhÿrer xwÿnh kwÿ jakamā na prem mē pahte amnhÿ tomnuj pānhā amnhÿrer xwÿnhnta kōt pix mā amnhÿ nhÿpēx o pa. Jakamā na prem mrymnuti kutā rōrōk nē kām mex o mex ā harēnh kēt nē. Tā mē kumrēxjaja Tirtūm mē Kra wa kuri wa kām grer o kuhē.

Tirtūm kapēr o wrÿk xwÿnh pijakrunēpxi jarēnh

⁶ Tā pa axte Tirtūm kapēr o wrÿk xwÿnhjē hō pumu nhūm kÿx pē ri htor o pa. Ahpÿnhā ri pika piitā hkōt mē uro hkwyjē hkōt. Na ahpÿnhā ri mē kapēr xwÿnhjē piitā mē hkōt mē kām Tirtūm kot tanhmā mē hipēx to hā harēnh kaxyw. Ahpÿnhā mē kapēr xwÿnh

piitā mē kām harēnh o pa. Nē htor o pa pē kÿx pē mē kām kapēr nē mē kām:

⁷ “E na ra Tirtūm mē ate amnhÿ tomnuj mÿrapē tanhmā mē ato kaxyw. Jakamā kwa mē tokyx hā apijaām kaxyw akōn krā ho arōrōk nē akrī nē kām mex o mex ā harē. Kēp mēmoj piitā ho kator xwÿnh na. Na pre kaxkwa ho kato nē pika ho kato nē gō xujanār o kato nē hino ho kato nē mēmoj piitā ho kator pa. Jakamā kwa kēr ka mē tapxipix ā mān apijaām nē kām mex o mex hā harēnh rāhā ho apa.”

Anhÿr o mē kām kapēr.

⁸ Hāmri nhūm hōja wamta kōt tē nē urāk nē kÿx pē mē kām kapēr o:

—Koja Tirtūm tokyx Papirōn grānh pa. Na hte krī nhō xwÿnhjaja amnhÿ tomnuj pix rāhā ho pa. Mē kot amnhÿ nhÿpēx te mē kot kagōxyhti ho hkōm nē amnhÿ mē mē piitā mē kām ōr nē ho mē ho pipānh pyrāk. Na htem mēnijē piitā ho amnhÿkati o pa. Nē amnhÿ kwÿjē pē mē hprō ho amnhÿkati. Nē amnhÿ mē pika piitā hkōt mē pa xwÿnhjē mā anhÿr o pa. Mē kot mē urāk nē ā amnhÿ nhÿpēx anhÿr o pa kaxyw mē kām anhÿr o pa. Ja mÿrapē na ra Tirtūm kot tanhmā mē ho kaxyw mē hā amnhÿ jarē. Anē.

⁹ Tā nhūm wa hkōt hōja tē nē wa urāk nē kax pē pika nhō xwÿnhjē mā kapēr nē mē kām:

—E mē ate mrymnuti kutā akōn krā ho arōrōk nē akrī nē kām mex ā harēnh xwÿnhjaja. Nē mē ate karō nhÿpēx nē kutā akōn krā ho akrī nē kām mex ā harēnh xwÿnhjaja. Nē mē anhōkrā nē mē anhÿkra hā hixi hā kagā xwÿnhjaja.

¹⁰⁻¹¹ —Tirtūm na tee ja hā mē apumu nē mē akamā gryk tÿx kumrēx. Mē ate kapēr kuhpa hā mrymnuti hkōt amnhÿ xunhwÿr jakamā nhūm mē akamā gryk tÿx o mē akamā gryk tÿx. Jakamā koja kuwy hpōk rāhā ho rāhā xwÿnhnta kamā mē arēnh pa ka mē amnhÿ xā htÿx kamā ajamak rāhā apa ho apa. Koja kuwy hpōkja aa hapēx kēt nē kurūm kax mā hkūm āpir o pa rāhā nē. Koja ā mē ate amnhÿ tomnuj o mē apa xwÿnhjē nhÿpēx anē ka mē kamā apa ho apa nē aa kurūm ajapōx kēt nē kamā amnhÿ xā htÿx kām ajamak rāhā apa ho apa. Arīgro hān kamāt kām arī ā amnhÿ nhÿpēx anhÿr rāhā apa ho apa. Mē ate gōj rūm mrymnuti mē hkarō ho sānti wa kutā akōn krā ho arōrōk nē akrī nē wa kām wa mex ā wa harēnhja mÿrapē kot kaj mē ā amnhÿ nhÿpēx anē. Kot mē pahte amnhÿ tomnuj pānhā amnhÿrer xwÿnh mē Tirtūm kapēr o mē wrÿk xwÿnhjē noo mā kot kaj mē ā amnhÿ nhÿpēx anhÿr o apa.

¹² Anhÿr o mē kām kapēr jakamā kwa kēr pu mē pahte Tirtūm kōt amnhÿ xunhwÿr xwÿnhjaja mē hukamā mē harēnhja ma nē Tirtūm kapēr kōt pix mā amnhÿ nhÿpēx rāhā

ho ri papa. Mē kot tanhmā hā mē pahto htā pu mē hkaga hkēt nē amnhī kaxyw Jejus kōt pajamaxpēr t̄yx rāhā nē. Hāmri nē nh̄ymā mē kurōm ma ō krī hw̄yr api nē kamā pamex kumrēx nē papa ho papa.

Mē kēp Jejus kw̄y hā mē htyk xw̄ynhjē jarēnh

Wam Tesarōn 4.16

¹³ Tā nh̄um kaxkwa kamā mēhōja axte inhmā kapēr nē inhmā:

E Juāw. Kēr ka ā akw̄yjē mā mēmoj tā kagā anē nē mē kām hā kagā ho: “E mē ate Tirtūm kōt ri amnhī nh̄ipēx xw̄ynhjaja. Mē kot Tirtūm ā mē apar nh̄um mē atyk tā koja amnhī tā mē ato mex rax kumrēx.” Anh̄yr o mē kām hā kagā.

Anh̄yr o inhmā kapēr. Hāmri nh̄um Tirtūm Karōja kuma nē kām:

—Nā ām hāmri na ka ā mē harēnh anē. Ra Tirtūm kot amnhī tā mē omunh rāhā ho pa. Mē kot kōt pix mā amnhī nh̄ipēx o pa pē mē kām mē hkurē xw̄ynhjē kutā amnhī to ht̄yx rāhā htykja nh̄um Tirtūm kot amnhī tā mē omunh mex. Koja mē ho mex kumrēx. Mē kot Jejus ā mē hpar tā koja mē ho mex rax nē nh̄um mē kuri mex rāhā nē pa ho pa nh̄um mēhō axte tanhmā mē ho hkēt nē. Anē.

Tirtūm kot tanhmā mē kām hk̄nh xw̄ynhjē nh̄ipēx to

¹⁴ Tā pa axte mēmoj pumu. Kaxkwa kamā kakrā jakajre pumu. Nē kamā mēhōj te panhī pyrā nē nh̄y. Nh̄um ōr o pahī hā mē ahkā htu nē kuteere xwagixre py nē o nh̄y.

¹⁵ Hāmri nh̄um kaxkwa kamā Tirtūm kapēr o mē wr̄yk xw̄ynhjē hōja Tirtūm mā amnhī jarēnh xā hā ixkre rūm kato nē kakrā jaka kamā ųr xw̄ynhta mā kapēr. Kāx pē kām kapēr nē kām:

—E pika nhō xw̄ynhjaja te mē hpur kām mēmo hy ra hkamrēk nē hikēnh mā mex pyrāk. Jakamā anhō kuteere ata py nē ma mē hkōt tanhmā ri mē ho ho ri mē hkōt apa. Te mē kot mēmo hy nh̄ikēnh o ri pa pyrāk o mē hipēx nē ma ho mē himex o ri apa. Anē.

¹⁶ Hāmri nh̄um kuma nē pika piitā m̄yri ō kuteere ho apē nē te mēmo hy jakār pyrāk o mē hipēx.

¹⁷ Hāmri nh̄um axte Tirtūm mā amnhī jarēnh xā hā ixkre rūm kapēr o mē wr̄ykjē hōja kato. ĩhkra kamā kuteere xwa gixre py nē o xa.

¹⁸ Hāmri nh̄um axte hōja ixkre rūm kē hkōt kato nē hukamā kator xw̄ynhta mā kapēr. Kāx pē kām kapēr nē kām:

—E na ra Tirtūm tanhmā mē kot amnhī tomnuj to hā tanhmā mē hipēx to kaxyw. Te mē kēp mē hpur kām mēmo xō pē uwa ra hkamrēk nē rēnh mā tām pyrāk. Jakamā ma pika hw̄yr mē hw̄yr wr̄y nē mē hkōt ri anhō kuteere ho mē himex o ri apa. Anē.

¹⁹ Hāmri nh̄um kuma nē ma pika hw̄yr wr̄y nē mē hipēx o te mē kot uwa xō rēnh nē prēs kām hkapīr nē kagō janēnh pyrā nē mē hkōt ri kuteere ho mē hpar o pa. Tirtūm ra mē kamā gryk t̄yx o mē kamā gryk t̄yx jakamā nh̄um ā mē hkōt mē hipēx anh̄yr o ri pa.

²⁰ Jakamā nh̄um mē hkamrō hpikapīr rax kumrēx o uwa kagō jakre. Te ho pyhti hprōt o nōr pyrāk. Jao up̄ym o 2 met nē hkōt ho mēj met. Nom hprōt xā hkōt ry rax o ry rax. Ho 300 kirōm. Nh̄um ā mē kamrō hprōt rax anē.

15

Tirtūm mex ā mē grer

¹ Tā pa axte kaxkwa kamā mēmoj pumu. Hāmri nē amnhī jaēr pē omu nē tee ri hkukamā ijamaxpēr. Aa mē pahte mēmoj ā kot anh̄yr pumunh kēt xw̄ynh pa pre omu. Nh̄um Tirtūm kapēr o mē wr̄yk xw̄ynh pē 7jaja ahp̄ynhā pika hkōt mē kot amnhī tomnuj xw̄ynhjē homnuj kaxyw akuprō nē kuhē. Ām jajē pixjaja koja Tirtūm nh̄y hā axte tanhmā mē homnuj to nē ho anh̄yr pa hāmri nh̄um ra ja hapēx o hapēx.

² Jakamā pa axte Tirtūm kapem gō rax pumu. Te kot kāx kar̄yr jaxēnh mē kuwy hpōk o pihkār pyrāk xw̄ynhja hprōt o nō. Nh̄um Tirtūm kra hk̄w̄yjaja gō m̄y ri ohtō rax kumrēx nē kuhē. Na pre ra mrymnutija tee ri amnhī kōt mē rēnh mā nē tee ri mē hā amnhī nh̄ixi hā kagā hprām kapr̄y nom nh̄um mē hkaga nē Jejus kōt amnhī nh̄ipēx rāhā ho pa. Nē mrymnuti karō ho sānti mā mex ā harēnh kēt rāhā ty nē kaxkwa hw̄yr api. Jakamā nh̄um Tirtūm amnhī tā mē omu nē mē kām wiorāwti hk̄w̄y gō nh̄um mē piitā ham̄y nē gō rax m̄y ri ho kuhē.

³ Hāmri nē Tirtūm mā tanhmā amnhī to ho pa xw̄ynh pē Mojes mē mē pahte amnhī tomnuj pānhā amnh̄irer xw̄ynhta wa kot Tirtūm mā greta nh̄um mē Tirtūm mā ho grer o kuhē nē grer o:

E Pahi Maati Tirtūm. Na pa mē ra inhmex pē aw̄yr ixāpir pa.

Ām hāmri na ka hte tanhmā amnhī nh̄ipēx to ho ri apa.

Aa tanhmā axēx to hkēt.

Nē mē ixrom axiht̄yx o axiht̄yx.

Nē mē ixrom axāhpumunh o axāhpumunh.

Jakamā na ka hte mē inhmā aa mē ixte mēmoj pumunh kēt kw̄y ho anh̄yr o apa.

Pika piitā hkōt ahp̄ynhā mē ho amnh̄iptār xw̄ynhjē nhō Pahi Maati na ka.

Nē ate tām amnhī nh̄ipēx xw̄ynh na ka.

⁴ Jakamā na htem piitā atā hp̄ijaam o pa.

Nē amā mē kapēr xāptār pix o amā kapēr.

Nē amā amex o amex ā ajarēnh rāhā nē.

Ām hāmri mē ixrom kap̄ixp̄ix amex o amex.

Jakamā koja ahpÿnhā pika piitā hkôt akrajē piitā ate tām amnhī nhīpēx nē tām mē piitā tanhmā mē harēnh to hā ajarēnh ma nē awÿr mra nē akutā hkôn krā ho rōrōk nē hkrī nē amā amex o amex ā ajarē. Anē.

Mē homnu xā hā xijere jamÿnh xwÿnh jarēnh

⁵ Tā na pa axte mēmoj pumu. Kaxkwa kamā Tirtūm nhōrkwÿ hā hitom xā piitā amnhī kahē xā rē nē kuhē pa omu. Nē ixkre kamā ō hitom mex maati haxwÿja amnhī kahē xā mē nē xa.

⁶ Hāmri nhūm ixkreja rūm Tirtūm kapēr o mē wrÿk xwÿnh pē 7jaja hapōj nē kuhē. Mē ē hakajre nē hirā htÿx kumrēx. Nē mē hinō pre xāja ōr pix o. Nē piitā Tirtūm mā tanhmā kot mē homnuj to xā hā xijere pē 7ta jamÿnh kaxyw kuhē.

⁷ Hāmri nhūm mēmoj tÿr pē kwatjē ōja mē kām xijere hkwy jamÿ nē mē hwÿr o tē. Xijere kēp 7 nē piitā ōr o. Nhūm hamÿ nē Tirtūm kapēr o mē wrÿk xwÿnh tajē hwÿr o tē nē ho mē hipēx nhūm mē ahpÿnhā hamÿ. Xijere kamā Tirtūm gryk xā jamÿ nē o kuhē.

⁸ Pu nhūm Tirtūm rūm kuwy hkūm hapōj. Tirtūm mex nē hihtÿx xwÿnh ta rūm hapōx rax o ikreta kunor pa nhūm mē tee ri hwÿr gÿēx prām kaprÿ.

16

Xijere kamā mē homnu xā pē 7 jarēnh

¹ Tā pa arī mēmoj pumu nhūm Tirtūm nhōrkwÿ kamā mēhōja kapēr o wrÿk xwÿnh pē 7jē mā kax pē kapēr nē mē kām:

—E na pa ra mē kot ikxapēr kwÿm ri amnhī nhīpēx xwÿnhjē pumu nhūm ixpē ja omnuj tÿx o ixpē omnuj tÿx. Jakamā e mē anhō xijereta jamÿ nē ma pika hwÿr mē hwÿr wrÿ nē axpēn pānhā mē hā xijere kamā mē homnu xā kapī. E mē tokyx ma mē hwÿr wrÿ. Anē.

² Hāmri nhūm mē kuma nē axpēn pānhā mē hwÿr wrÿ. Nhūm wamta kumrēx pika piitā hkôt mē homnu xāta kapī. Pu nhūm mē kot mrymnuti mē ō sānti wa kām mex ā harēnh nē amnhī tā wa hixi jaxwÿr xwÿnh piitā hkānhÿ hpa nē ā htÿx kumrēx nē ri pa.

³ Hāmri nhūm wamta kōt hōja ō xijere py nē gō xujanār kām hkapīr pa nhūm gō te mē htykjē kamrō pyrā nē kamā mēmo mry htyxā rēnh xwÿnh piitā pikaprār pa.

⁴ Tā ra xijere kapīr xwÿnh o axkrut nē ō xijere kapī hāmri nhūm hkôt hōta ō xijere py nē hpānhā gō hkryre piitā hkôt hkapīr pa. Pyhti nē ri hino piitā hkôt hkapīr pa nhūm piitā gō xujanār pyrā nē mē hkamrō hā amnhī jahkre hpa.

⁵ Hāmri nhūm axtem Tirtūm kapēr o mē wrÿk xwÿnhjē hō kot kām gō piitā hamār xwÿnh ta ja hā omu nē Tirtūm mā kām:

Pa amex rāhā apa ho apa xwÿnh. Nē arāhā apa ho apa xwÿnh.

Nā ām hāmri na ka ā mē kēp gōta nhīpēx anē.
⁶ Na prem mē kot akōt amnhī nhīpēx xwÿnhjē mē mē kām ri akapēr jarēnh xwÿnhjē hpar o pa nhūm mē hkamrō hpikapīr rax nē.

Tā ka ra mē hā mē kēp mē hkōm xā homnu hpa nhūm mē kēp mē hkamrō ā amnhī jahkre nhūm mē tee ri ho hkōm mā. Nā ām hāmri na ka ā mē kēp gō nhīpēx anē Tirtūm. Anē.

⁷ Hāmri nhūm mē kot Tirtūm mā mēmoj nhōr xā hā mēsti hpar pē hkrī xwÿnhjē hōja kuma nē kām:

Nā ām hāmri na ā ajarēnh anē Tirtūm.

Ām hāmri na ka ā akrajē hā mē hipēx anē.

Ra ate mē hā amnhī jarēnh xā hkôt na ka hte tanhmā mē hipēx to.

Nā apē mē inhō Tirtūm Maati na ka. Mē ixrom axihtÿx o axihtÿx nē axāhpumunh o axāhpumunh. Anē.

⁸ Tā ra axkrunēpxi nē ō xijere kapī. Jakamā nhūm mē hpānhā hōja ō xijere o tē nē myyti hā hkapīr pa nhūm hkagro htÿx nē pika hkôt mē pa xwÿnhjē hkā ho hxēt o pa.

⁹ Kagro htÿx o hkagro htÿx jakamā mē hkā ho hxēt nhūm mē kamā hkā kajē hpa. Hāmri nē tee ri amnhī pumu nē hamaxpēr o:

—Nā Tirtūmtija na ā mē pahomnuj tÿx anē. Anē.

Hāmri nē kamā gryk tÿx nē haprÿ nē tanhmā ho kapēr punuj to ho pa. Nom mē kot amnhī tomnuj kaga nē kām mex o mex ā harēnh kēt nē arī tanhmā amnhī tomnuj to ho pa.

¹⁰ Nhūm ra kēp kwat nē ō xijere kamā mēmoja kapī. Jakamā nhūm ra hpānhā hōja ō xijere o tē nē gōj rūm mrymnuti kot mē ho amnhīptār xā hā hkrī xā hā hkapīr pa. Jakamā nhūm ra kot mē ho amnhīptār xā hā pikaja kamā kamāt kō htyk par kumrēx. Hāmri nhūm mrymnuti mē hkôt mē kot amnhī nhīpēx xwÿnhjē hā kamāt kō hpa nhūm mē amnhī xā htÿx ā maj amnhī nham o axpēn kamnuhar tÿx kumrēx.

¹¹ Nē ā Tirtūm kot mē hipēx anhÿr ā amnhī tā omu nē kamā gryk tÿx nē tanhmā ho kapēr punuj to ho pa. No ām kot amnhī tomnuj xwÿnh ā amnhī pumunh nē kot amnhī tomnuj kaga hkēt nē.

¹² Nhūm prem ra kēp sĭk nē ō xijere kamā mēmoj kapī. Jakamā nhūm hpānhā hōja ō xijere kamā mēmoja o tē nē pyhti pē Erax kamā hkapīr pa nhūm gōja grā pa nē te kēp pry pyrā nē nō. Jakamā nhūm myt japōx xā rūm mē ho amnhīptār xwÿnhjaja nē pōristijaja hāmri pijapu kaxyw Jerujarē hwÿr nojarēt nē hā hwÿr pa.

¹³ Tā nhūm kagāmmnuti mē ſ hā mē kām hēx o pa xwÿnh mē mrymnutita wa mē hakwa rūm mēmoj te priti pyrā nē hapōx o pa. No

ām priti hkêt mê kêp Satanasti mā mê âpênh xwýnh kwýy.

¹⁴ Jakamā na prem pika piitā hkôt mê kot aa mêmoj pumunh kêt kwý ho anhýr o hêx rom mê no kupyr o mê hkôt pa. Tā pika piitā hkôt mê ho amnhîptār xwýnhjê mê ho pikuprônh kaxyw mê hapêr o pa. Mê kot Tirtûm xihtýx o hihtýx kurê kaxār kaxyw mê pijapu xā hā arîgro kukamā mê ho pikuprônh o pa.

Jejus kot amnhî kwýjê mā kapêr ā harênh

¹⁵ Tā nhûm Jejus pika hkôt hkrajaja arî mê htîr nê pa xwýnhjê mā kapêr nê mê kām:

E mê inhma ixkwýjaja. Akupým ixte mê awýr ixwryk xā hā arîgroja ā kot paj te mê àhkînh xwýnh kot amnhî nhîpêx pyrā nê mê ajaêr pê mê awýr wrý. Jakamā kêr ka mê amnhî wýr ijamār rāhā ho apa. Kêr pa akupýn wrý ka mê amnhî wýr ixpumu nê akînh nê amnhî kamā amā ixpuma hkêt nê. Anê.

Mê kot axpên kurê kaxār kaxyw mê pikuprônh ā mê harênh

¹⁶ Tā nhûm Satanasti hkwyjaja pika piitā hkôt mê ho amnhîptār xwýnhjê ho pikuprônh pa nê mê hkurê kaxār kaxyw ma Ijaew kot kām “Amaketô” jarênhja wýr mra.

¹⁷ Hāmri nhûm Tirtûm kapêr o mê wryk xwýnh pê 7 kot hitepta ô xijere py nê kām mā kamā mêmoj kapîr pa. Jakamā nhûm Tirtûm nhôrkwý kamā mê ho amnhîptār ā hkrî xā rûm Tirtûm kax pê kapêr o:

—E hāmri. Na pa ra mê kot amnhî tomnuj mýrapê tanhmā mê ho jatur xām mênh kaxyw. Anê.

¹⁸ Pu nhûm na hkatôtök nê hkrakrak nê haxênh nhûm pika httertet týx nê. Aa mê kot pika httertet týx kot anhýr ā omunh kêt kumrêx.

¹⁹ Jakamā nhûm Papirônja kajê axkrunêpxi. Papirôn nhô xwýnhjaja kot amnhî tomnuj týx o paja mýrapê nhûm Tirtûm ā mê hipêx anê. Nê pika httertet o pika piitā hkôt krî grānh pa.

²⁰ Nhûm gô hipök piitā gôja hā axkamur nhûm hapêx pa. Nê kên prêk nê hkrā hixêt rôrök nê hpigrānh pa. Pika httertet týx kumrêx jakamā ā mêmoj amnhî nhîpêx anê.

²¹ Nê na mê pê jêr krā jakootija mê piitā mê hipý rôrök. No âm hkrā hkryre hkêt hkrā rûnh kumrêx. Âm hpýnh nê kamā kêp 40 kir nê mê hā rôrök nhûm mê tee ri amnhî tā ā omu nê Tirtûm kamā gryk týx nê hapry nê ho kapêr punuj nê.

17

Tirtûm kra hkêt xwýnhjê jarênh

¹ Tā pa pre kê axte mêmoj pumu. Nhûm kot xijere jamýnh xwýnhjê hōja ixwýr tē nê inhmä:

—E ma ixkôt tē nê mêmoj pumu. Anê.

Hāmri pa kuma nê ma hkôt tē nhûm inhmä:

—Nā ahpýnhā gô rax mýri krî nhô xwýnhjaja te ho ni hkupry gô mý ri ýr nê kām mêmyjê piitā hkînh o ýr xwýnhnta pyrāk. Na htem urāk nê Tirtûm kapêr kôt ri amnhî nhîpêx kêt nê. Âm htýx ri tanhmā amnhî tomnuj to ho pa. Jakamā koja Tirtûm tanhmā mê homnuj týx to nê mê ho hapêx.

² Krî piitā hkôt mê ho amnhîptār xwýnhjaja na hte ma mê ô krî hwýr mra nê te mê kot mê hkupryjê ho amnhîkati pyrāk o amnhî nhîpêx. Nê te pipānh nê htýx ri amnhî nhîpêx pyrāk o amnhî nhîpêx o pa. Nhûm krî nhô xwýnhjaja mê urāk nê amnhî krā hkôt pix mā tanhmā amnhî tomnuj to ho ri pa. E ma ixkôt tē nê ja hā mê omu. Anê.

³⁻⁴ Hāmri nhûm Tirtûm Karô tanhmā ixto nhûm kapêr o wryk xwýnhja ma kapôt wýr ixto mô pa kapôt ā mrymnuti hkrā kêp 7 nê kamā hpār kêp 10 xwýnhnta pumu nhûm hkamrêeti nê xa. Nê î piitā hā tanhmā Tirtûm o kapêr punuj to hā kagā. Nhûm katut ā mêhō ni kupryta nhý. Mê ho amnhîptār xwýnh ā mê ê kakrā htyk nê hkamrêk o hkukār jaxā nê hā nhý. Nê ôr o ôkrexê. Nê ôr o hinwýyxê nê îhkra kamā kax. Âm ôr pix o hikukrêx. Nê kên mex karýr pix o amnhî jamrêx. Nê ôr o kopti hō py nê hā nhý. Kopti kamā ni kupry kot amnhî tomnuj xā. Âm kot mê kêp mê mjên o amnhîkati ho pa xā pix nhûm kupy nê o nhý.

⁵ Nê ôkrā hā amnhî nhîxi hā kagā kot:

Inhîxi pimxur pê PAPIRÔN RAXTI.

Nê ixpê mê kêp mê mjênjê ho amnhîkati ho mê pa xwýnhjê nā na pa.

Nê ixpê mê kot axpên prô ho amnhîkati o mê pa xwýnhjê nā na pa.

Nê ixpê mê kot Tirtûm nê mê kām hêx o ri mê pa xwýnhjê nā na pa.

Nê ixpê mê kot Tirtûm kapêr kôt amnhî nhîpêx o pa hkêt xwýnhjê nā na pa.

Anhýr o ôkrā hā amnhî nhîxi hā kagā kot anhýr.

⁶ Nhûm axpā nê nhý pa omu. No âm kagóxýhti ho hpiipānh kêt. Mê kot Jejus kôt amnhî xunhwýr nê ri mê kām Jejus kêp mê ô pahîhti hā harênh xwýnhjê kamnhwýr o mê hpar nhûm mê hkamrô pikapîr xwýnhjê kamrô ho na pre axpā nê nhý. Pa ā kot amnhî nhîpêx anhýr ā omu nê tee ri ija-maxpêr.

⁷ Hāmri nhûm Tirtûm kapêr o wryk xwýnhja inhmä:

—Kwa mon ka ri ja pumu nê tee ri aja-maxpêr? E kot paj ixprî hā amā harê ka inhma. Niti mê hā ýr xwýnh pê mrymnutita.

Krã pë 7 nê kamã hpär pë 10 xwýnhnta kot paj ixprí hä amã hamê wa harê ka wa harênh ma.

⁸—Nã mrymnutija na pre htír nê ri pa ta ty nê ahkre xupýmti kamã hkwý. Nom koja akupým htír nê kurým kato nhüm mē piitã omu nê ahpýnhã tanhmã hamaxpër to. Amnepêm kormã amrakati ri Tirtüm kot õ kagã kamã mē htír tùm nê mē pa mã xwýnhjê nhíxi jaxwýr xwýnhjaja koja kator ã omu nê ãm omu nê tanhmã hamaxpër to hkét nê. No mē kot Jejus kót amnhí xunhwýr kêt xwýnhjaja koja mē amnhí jaêr pë akupým kator ã omu nê tee ri hkukamã hamaxpër. Hãmri nê axpën mã: “Kwa amnepêm htyk tã ra tanhmã amnhí to nê akupým htír nê api nê mō.” Anhýr o axpën mã harê. Hãmri nhüm kato nê ma tē nhüm Tirtüm tã ho hapêx kumrêx nhüm hapêx o hapêx.

⁹—Kwa inhma nê jam ajamaxpër týx nê. Mrymnuti krã pë 7ta te kêp hixêt prék pë 7 pyrã nê hä ýr xwýnh ni kupryta te hixêt prék pë 7ta ã ýr pyrãk.

¹⁰—Nê mrymnuti hkrã pë 7ja te kêp mē ho amnhíptär xwýnh pë 7 pyrãk. Nhüm mē ho amnhíptär xwýnhjaja te mē kêp 5 nê ra htyk pyrãk nhüm hkôt hõja arí mē ho amnhíptär o pa. No kot hitepta kormã. Nom koja mē ho amnhíptär ry hkét nê.

¹¹—Mrymnuti htír nê pa htã htyk nê ra akupým htír nê àpir xwýnhnta koja hkrã hitepta pãnhã mē ho amnhíptär o pa. Jakamã te mē ho amnhíptär xwýnh pë 7jê hõ pyrãk. Koja hkrã pë 7ja mē ho amnhíptã nê gaa nê htyk mē nhüm hpãnhã mrymnutita hpãnhã mē ho amnhíptã. Hãmri nhüm rí kormã Tirtüm tã mē ho hapêx par kumrêx.

¹²—Nê ate mrymnuti hkrã kamã pãr pë 10 pumunh xwýnhnta te mē kêp mē ho amnhíptär xwýnh pë 10 pyrãk. No ãm jaja na kormã mē ho amnhíptär kêt nê. Koja mē nhýrmã anhípê mrymnuti nhý hä ahpýnhã ri mē ho amnhíptär o pa nom mē ho amnhíptär japijê hkét nê.

¹³Koja mē tanhmã ja hä axpën mar to hãmri nê mrymnuti mã anê nhüm mē hpãnhã mē piitã mē ho amnhíptã.

¹⁴—Nê mē ho amnhíptär xwýnh pë 10jaja koja mē pahte amnhí tomnuj pãnhã amnhírer xwýnh kurê kaxàr kaxyw hwýr mra nê kutã pijapu ho kuhê. No ãm tee ri kãm tanhmã ho hprãm hkapyr nhüm mē ho axtem nê amnhí tã mē hímex pa. Hihtýx o hihtýx o kot mē ho hpimràãtã mē hakrenh par. Nê kêp pika piitã hkôt mē ho amnhíptär xwýnhjê nhõ Pahihti. Tãm na pre amnhí wýr mē kot hkôt amnhí nhípêx o mē pa xwýnhjê wý nhüm htem amnhí kaxyw hkôt hamaxpër mex rãhã ho pa.

¹⁵—Nê krí pë Papirõn kapem gô xohtó mý ri ni kupry hkrí xwýnhnta. Gô xohtõja te kêp ahpýnhã ri pika piitã hkôt mē uro hkwý

pyrãk. Nê te ahpýnhã ri mē kapër xwýnh kwý pyrãk.

¹⁶—Nê mrymnuti hpär pë 10ta kêp mē ho amnhíptär xwýnh pë 10 pyrãk. Jakamã koja mē kãm ni kupryta prãm nõkati nê kamã gryk týx kumrêx. Hãmri nê hwýr mra nê kêp hikukrêx piitã utã nê kêp ê hkwýrnh pa nhüm hkênh mex nê xa. Hãmri nhüm mē kupí nê í hkrêr pa nê kuwy kamã hi rē nhüm kaxàr pa nê hapêx.

¹⁷—Na pre pahi pë 10jaja mrymnuti hkôt amnhí xunhwý nhüm Tirtüm ãm ja hä mē omu nê tanhmã nê mē kãm nê hkét nê. Jakamã koja mē ãm hkôt pix mã amnhí nhípêx o pa rãhã nhüm Tirtüm mē ho hapêx. Nê mē õ krí mē mē ho hpimràãtã mē ho hapêx pa. Hãmri nê mē ho hapêx o mē ho hapêx.

¹⁸—Nê ate mēhõ ni kupry pumunh xwýnhnta te kêp krí rax pë Papirõn nhõ xwýnhjê pyrãk. Nê mē ho amnhíptär xwýnhja pika piitã hkôt mē ho amnhíptär xwýnhjê hkrãhtüm na. Anê.

Å Tirtüm kapër o mē wryk xwýnhja inhã mē harênh anê. Pa kuma nê õ ri mē amã hä kagã. Mē ate kamã harênh nê aprí hä mar týx kaxyw.

18

Tirtüm kot Papirõn grãnh par ã harênh

¹Tã pa kê axte mëmoj pumu. Nhüm axte Tirtüm kapër o mē wryk xwýnhjê hõja kaxkwa rüm ahpär mã wryk o tē. Tirtüm nhý hä hihtýx nê kamã hirã rax kumrêx o pika piitã hkôt mē kãm hirã pa.

²Nê ahpär mã tén wry nê kãx pë kapër o: E koja Papirõnja pigrãnh pa nê hpãnhã kêp Satanasti mã mē àpênh xwýnhjê papxã nê kêp nhõnhti papxã. Hãmri nê aa kamã mëmoj mex kêt kumrêx.

³Krí nhõ xwýnhjaja na htem Tirtüm kapër kót amnhí nhípêx kêt nê amnhí krã hkôt kãm prãm xã hkôt pix mã tanhmã amnhí tomnuj to ho pa. Te mēhõ pipãnh nê htýx ri amnhí nhípêx o pa pyrãk.

Nhüm krí piitã hkôt mē ho amnhíptär xwýnhjaja mē hwýr mra nê mëniijê ho amnhíkati ho pa.

Nê krí nhõ xwýnhjaja mëmoj pumu nê kãm hkính nê haprõr kurê kumrêx o pa nê aa ujaaprõr o hapêx kêt nê.

Jakamã na hte krí hkwý nhõ xwýnhjaja mē hwýr mëmoj to pa nê xatã mē kãm ho wênê nê mē kukwak ri mē hikãxpore rûnh nê pa.

Anhýr o kapër.

⁴Hãmri nhüm Tirtüm Papirõn kamã hkrãjê mã kapër nê mē kãm:

E mẽ tokyx mẽ kot ri htỳx amnhĩ nhĩpêx xwỳnhjê nhõ krĩta rũm ajapõj ixkra-jaja.

Kot kaj mẽ anhỳr kêt nê ra mẽ hkõt amnhĩ nhĩpêx pa mẽ ato apimràatã mẽ ate amnhĩ tomnuj ã mẽ atomnuj tỳx nê.

⁵ Krĩ nhõ xwỳnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kên katutxõ nhũm hprêk rax o kot kaxkwa kanhwỳr kaxyw pyràk.

Na pa hte ã mẽ kot amnhĩ nhĩpêx anhỳr ã mẽ omunh rãhã ho ri ixpa. Jakamã kwa ixkraja mẽ tokyx mẽ kurũm ajapõj.

Anhỳr o hkrajê mã kapêr. Hãmri nê kapêr o mẽ wrỳk xwỳnhjê mã kãm:

⁶ E kwa mẽ ma mẽ hwỳr wrỳ nê tanhmã ixkraja mẽ hã mẽ ho.

No ãm kêr ka mẽ tanhmã mẽ ho htỳx o mẽ kot ra tanhmã ixpê ixkraja nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx kumrêx o mẽ kot mẽ hipêxta jakre.

⁷ Krĩ nhõ xwỳnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ jarênh o:

“Ot pa mẽ te pahi ni kot amnhĩ nhĩpêxta pyrà nê ixkrĩ xà mex pix kãm ixkrĩ pyràk.

Nê te Tĩrtũm kot amnhĩ nhĩpêx pyràk o na pa htem amnhĩ nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

Ã mẽ ixte amnhĩ nhĩpêx anhỳr xwỳnh na pa mẽ.”

Anhỳr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj tỳx nê pa.

Nê kê mẽ hkaprĩ nê amnhĩ xà htỳx kãm hamak rãhã nê pa ho pa.

⁸ E kê mẽ ã amnhĩ nhĩpêx anhỳr o pa.

Jakamã koja mẽ arĩgro hpỳnh kãm mẽ hkwỳjaja hpikaprãr rũnh nê nhũm arĩ mẽ hĩr xwỳnhjaja omnuj nê pa.

Nê tee ri amnhĩ pumu nê hkaprĩ xaj mỳr o pa.

Nê amnhĩ xà htỳx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihitỳx kãm ã mẽ hipêx anê. Anê.

⁹ Hãmri nhũm krĩ piitã kurũm mẽ ho amnhĩptãr xwỳnhjaja. Mẽ kot mẽ hwỳr mrar nê mẽ hkuprỳjê ho amnhĩkati nê mẽ uràk nê mẽmoj pumunh nê haprõr rãhã ho pa xwỳnhjaja tee ri krĩ kaxàr nê kax mã kuwy hkũm ãpir o paja pumu nê hkaprĩ nê mỳr o kuhê.

¹⁰ Nê Tĩrtũm kot mẽ ho hapêx par ã mẽ omu nê kãm ma htỳx kumrêx. Amỳm mẽ omunh o kuhê nê tee ri amnhĩ kukamã

hamaxpêr nê htertet tỳx nê. Nê mỳr kãm kapêr o:

Hêxta waa nê Papirõn nhõ xwỳnhjaja.

Mẽ amex nê axihitỳx mex nê apa htã nhũm Tĩrtũm mẽ anhĩmex pa. Hêxta waa nê. Anê.

¹¹ Nê mẽ hwỳr mrar nê mẽ kãm mẽmoj to wênê ho mẽ pa xwỳnhjaja haxwỳja krĩ pumu nê tee ri amnhĩ kukamã hamaxpêr nê hkaprĩ nê mỳr o kuhê. Nhỳri koja mẽ tokyx axte mẽmoj to wênê? Mẽ kêp mẽmoj japrõr rũnh xwỳnhjaja hkaxàr par kumrêx kênã.

¹² Na prem mẽmoj piitã ho pa nê mẽ kãm ho wênê. Mẽmoj mex piitã. Ôr o mẽ hkukrêx nê prat o mẽ hkukrêx nê kên jaxênh ã kãxpore xohtõ. Nê kupêxê mex. Kakrã htyk nê hkamrêk nê hkroore nê hã hapjê. Nê mẽmoj pi kuxware nê pi htỳx nê kên jakãr nê kax o ri mẽmo nhĩpêxja nhũm prem mẽ kãm ho wênê ho pa.

¹³ Nê mẽmo htwỳm nê mẽ hkuxwa xà. Nê mẽ ô ho ãnh xà nê mẽ ô kuxwa xà nê xwỳgrã nê harõj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhỳhỹnh krĩ hõ kamã pãnhĩ hkwỳ pynê nê mẽ hwỳr mẽ ho pa nê mẽ kãm mẽ ho wênê nhũm mẽ amari mẽ hkõt ri ãpênh rũnh o pa. Na prem ã mẽ kãm mẽmoj to wênê anhỳr o pa. Tã ra mẽ kot mẽ haprõr xwỳnh mẽ mẽ pimràatã hapêx pa.

¹⁴ Jakamã nhũm mẽ tee ri mẽ hkukamã hamaxpêr nê te kot mẽ kãm kapêr pyrà nê mẽ kãm:

Hêxta waa nê. Mẽ amã mẽmoj prãm nê amnhĩm haprõr xwỳnhnta na mẽ apê hapêx par kumrêx.

Nê mẽ akãxpore rũnh nê mẽ akukrêx rũnhnta mẽ mẽ apimràatã ajapêx pa. Kot kaj mẽ axte tanhmã amnhĩ nhĩpêx to ho apa hkêt nê. Anê.

¹⁵ Hãmri nê amỳm ri Tĩrtũm kot tanhmã mẽ hipêx to hã mẽ omu nê kãm ma xaj mur nê htertet o kuhê.

¹⁶ Nê mỳr kãm kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mẽ hikukrêx mex o amnhĩ jamrêx nê ri hã mra.

Nê ôr nê kên mex ã ohtõ xwỳnh o amnhĩ jamrêx nê ri hã mra.

¹⁷ Tã ra hapêx par kumrêx. Anê.

Hãmri nhũm gõ xujanãr kãm pãr nhõ dõn nê mẽ kot mẽ kãm pãr o ri mrar xwỳnhjaja nê mẽ kot kamã tep pynênh xà ho tep pynênh o ri mẽ pa xwỳnhjaja nê pãr kãm amari mẽ pa xwỳnhjaja hãmri mẽ hwỳr mra nê wamtajê pyrà nê tee ri amỳm ri mẽ ô krĩ pumu nê mỳr o kuhê.

¹⁸ Nê kurũm kuwy hkũm xãpir o pa hã omu nê tee ri mẽ hkukamã hamaxpêr nê axpênh mã:

Hêxta waa nê. Krî mûj na pre mex o mex. Mex o krî piitâ hakrenh par htâ hapêx pa. Anê.

¹⁹ Hâmri nê mur nê hkaprî xâj pika hkwy jamý nê ho amnhî kamî nê mýr kâm kapêr o:

Hêxta waa nê. Krî mûj na pre rax o rax.

Nhûm pre nhÿhÿnh pâr kâm mêmoj to wênê ho pa xwÿnhjaja mê hwÿr mêmoj to pa nê mê kâm ho wênê nê mê hkukwak ri hikâxpore rûnh nê ri pa.

Tâ hâmri mê hapêx pa. Anê.

²⁰ Hâmri nhûm Tîrtûmja krajê piitâ mê kâm kapêr nê mê kâm:

E ixpê Tîrtûm na pa â mê hipêx anê.

Mê kot mê apê ixkrajaja tanhmâ mê atomnuj to ho paja mýrapê na pa mê atâ â mê hipêx anê.

Jakamâ e kaxkwa kamâ mê apê ixri mê apa xwÿnhjaja.

Nê mê ate inhÿ hâ ri mê kâm ixkapêr jarênh o mê apa xwÿnhjaja.

Nê Jejus nhÿ hâ mê akapêr o ri mê apa xwÿnhjaja. Mê apiitâ mê apê ixkra na ka mê.

E mê amnhî tâ ja pumu nê akînh nê axpên mâ apikunhar o akuhê. Pa na pa mê atâ â mê ho ijapêx anê. Anê.

²¹ Tâ nhûm kapêr o mê wrÿk xwÿnhjê hõja hihtÿx o kên rax kumrêxa mý nê o tê nê gó xujanâr kamâ kâm gêt nê kumê nhûm mrô nê akunok. Hâmri nhûm kapêr o:

E krîta koja Tîrtûm te ho ixte gôx kâm kên mênh nhûm mrôr nê hpikunor pyrâk o hipêx nhûm hapêx par kumrêx.

²²⁻²⁴ Na pre hte krîja kamâ mê kot ri mê kâm mêmoj to wênê xwÿnhjaja amnhî to rûnh o krî piitâ hkôt mê hakrenh pa.

Nê krî nhô xwÿnhjaja na prem pika piitâ hkôt hêx rom tanhmâ mê no kupyr to ho ri pa. Jakamâ ra mêmoj to wênê xwÿnhjê pyrâ nê mê hikukrêx rûnh gryk â Tîrtûm kaga.

No âm ja pix kêt. Tîrtûm krajê mê Tîrtûm nhÿ hâ kapêr o mê pa xwÿnhjaja na prem mê himex rax nê. Hâmri nhûm krî piitâ kamâ mê pa xwÿnhjaja mê kot mê hipêx â mê omu nê mê urâk nê â mê hipêx anhÿr o pa.

Tâ Papirôn nhô xwÿnhjaja kot mê hipêx anhÿrja mýrapê koja Tîrtûm mê himex par kumrêx.

Jakamâ koja mê axte hkînh nê hkînh xâj ri grer kêt nê.

Nê axte hkînh nê grer kâm hakwa kór o ri pa kêt nê.

Nê axte ri wiorâw kakrênh hkêt nê.

Nê axte ri amnhîm kawâ hyr o hkrî hkêt nê.

Nê axte harôj kahuk o kuhê hkêt nê.

Nê axte mê ôrkwÿ kamâ kanê hpôk kêt nê.

Nê axte axpên mâ ri hkrajê rer o ri pa hkêt nê. Koja â mêmoj kot anhÿr piitâ hapêx pa. Anê.

19

Mê kot Tîrtûm mex â mê harênh

¹ Tâ pa kê axte mêmoj pumu. Nê kaxkwa kamâ mê kapêr ma nhûm mê ohtô rax kumrêx nê tanhmâ axpên mâ kapêr to. Nê anhÿpê kâx pê kapêr tÿx nê kapêr o:

E pu mê pahpiitâ Tîrtûm mâ mex o mex â harê.

Tapxipix na hihtÿx o hihtÿx.

Nê tapxipix na âhpumunh o âhpumunh.

Nê tapxipix na mex o mex.

Tapxipix na mex o kot mêmoj piitâ hakrenh par.

Ra kot mêmoj punuj pê mê papytâr par jakamâ kêp mê papytâr xwÿnh â pixi mex na.

² Na hte amnhî jarênh xâ hkôt tanhmâ mêmoj to ho pa.

Nê amnhî to hêx kêt nê.

Tâ âm hâmri na â Papirôn nhô xwÿnhjê nhÿpêx anê.

Na prem mê kâm Tîrtûm kapêr jarênh o mê pa xwÿnhjê nhÿmex rax kumrêx.

Nê krî piitâ hkôt ri pa nê amnhî kôt mê kurê nhûm mê kuma nê mê hkôt amnhî tomnuj o pa.

Nhûm Tîrtûm tee ri hâ mê omu nê â hkrajê hâ mê hipêx kati anê. Âm hâmri na â mê hipêx anê.

Anhÿr o axpên mâ harê.

³ Hâmri nê xatâ axpên mâ:

Nâ âm hâmri na â mê panhō Tîrtûmja mê hipêx anê nhûm mê kurûm kuwy hkûm kâx mâ âpir o pa.

Koja krî nhô xwÿnhjaja amnhî xâ htÿx kamâ hamak râhâ ho pa nê aa â htÿx hapêx kêt.

E pu mê hâ Tîrtûm mâ mex o mex â harê. Anê.

⁴ Hâmri nhûm mê âptâr tûm pê 24 mê mêmoj tÿr pê kwatjaja hâmri Tîrtûm kot mê ho amnhÿptâr â hkrî xâ maati kutâ rôrôk nê kâm hipô hpa. Hâmri nê â mê kapêr anhÿr xwÿnhjê mâ kapêr nê kâm:

Nâ âm hâmri na ka mê â Tîrtûm mex â harênh anê. E pu mê pahpiitâ kâm mex o mex â harê. Anê.

⁵ Hâmri nhûm mêhõja Tîrtûm krî xâ maati kamâ kapêr o:

E mê axte Tîrtûm mâ mex o mex â harê.

Mê ate Mêpahpâm kôt amnhî nhÿpêx o mê apa xwÿnhjaja.

Nê mê apê mê ho amnhÿptâr xwÿnhjaja nê amarî ri mê apa xwÿnhjaja nê mê apiitâ mê ate Tîrtûm â apijaam o mê apa xwÿnhjaja kam mex o mex â harê. Anê.

Kot mē pahpānhā amnhīrer xwýnh mē hkwýjē jarēnh

⁶ Tā pa tanhmā mē kapēr to hā mē kuma nhūm mē kax pē kapēr týx nē. Te mē ohtō rax kumrēx kapēr pyrāk. Nē te gō koko htýx rý na katōtōk týx pyrāk. Hāmri nē mē kapēr o:

E na ra Tirtūm kēp mēmoj piitā ho amnhīptār xwýnh.

Nē kēp mē panhō Pahi Maati.

Nē hihtýx o hihtýx nē āhpumunh o āhpumunh.

E pu mē kām mex o mex ā mān harē.

⁷⁻⁸ Nē hā pahkīnh nē.

Nē kām hihtýx o hihtýx ā harē.

Te mē kot axpēn mā mē rer xwýnh kot amnhī nhīpēx pyrāk.

Ja o mē pahte amnhī tomnuj pānhā amnhīrer xwýnhhta te kēp myja pyrāk.

Nē mē kot hkōt amnhī nhīpēx xwýnh piitā te mē kēp nija pyrāk.

Nē te mē kot axpēn mā wa rer nhūm wa kot axpēn kōt pa ho pa pyrāk o koja mē amnhī nhīpēx.

Nē te mē kot mjen mā xwýnh mā ē mex jakare nhōr nhūm kot hagjēnh pyrāk. Nē ē mexja te mē kot tām amnhī nhīpēx xā pyrāk. Anē.

⁹ Hāmri nhūm Tirtūm kapēr o wrýk xwýnhja inhāmā:

—E Juāw. Pa amā mēmoj jarē ka mar týx nē akwýjē mā hā kagā. Tirtūm kapēr kwý kot paj amā harē. Kēp Tirtūm kapēr jakamā ām hāmri na. Na hte mēmoj jarēnh o hēx kēt nē. E kapēr ā kagā ho:

Na htem axpēn mā mē rer kaxyw nē amnhī wýr hkwýjē wý nhūm mē hwýr mra nē wa hā hkīnh nē apkur mex nē.

Ja pyrā nē Tirtūm kot amnhī wýr mē hwýr xwýnhjaja koja mē nhýrmā mē pahte amnhī tomnuj pānhā amnhīrer xwýnhhta wýr api nē ā amnhī nhīpēx anē nē hkīnh nē apkur mex nē.

Hāmri nhūm Tirtūm mē ho mex rax kumrēx. Anē.

—E kēr ka ā akwýjē mā ja hā kagā anē Juāw. Anē.

Hāmri pa kuma nē kagā ja kamā mē amā hā kagā.

¹⁰ Hāmri nē hā kagā hpa nē ra ixte kām mex o mex ā harēnh kaxyw kutā ixkōn krā ho tēm nē nhý nhūm tee ri amnhī tā ixpumu nē inhāmā:

—Kwa ā ri inhīpēx anhýr kēt nē. Apyrā nē ixte Jejus mā tanhmā amnhī nhīpēx to xwýnh kēnā. Jejusja apyrā nē kēp inhō pahihiti na. Jejus kapēr na prem hkukamā mē kot Tirtūm nhý hā kapēr o mē pa xwýnhjaja hā kagā nē mē kām harēnh o pa. Jakamā kwa pu mē Tirtūm pix kutā mān pahkōn krā ho parōrōk nē pahkrī nē kām mex o mex ā harē. Anē.

Kawar jaka hā ýr xwýnh jarēnh

¹¹⁻¹⁶ Tā pa kē axte mēmoj pumu. Nhūm kaxkwa axkjē nhūm kamā kawar jakajre xa nhūm mēhōja hā nhý. Hixi na pre kēp “Aa kot Tirtūm kaga hkēt xwýnh.” Anē nē hixi hō na pre kēp: “Tirtūm kōt pix mā amnhī nhīpēx o pa xwýnh.” Anē. Á hixi kot anhýr jakamā na hte katāt kōt ahpýnhā mē kot amnhī nhīpēx ā mē omunh xā hkōt tanhmā mē harēnh to. Mē kot amnhī to mex ā mē omunh xā hkōt tanhmā mē hkwýjē jarēnh to nē mē kot amnhī tomnuj ā mē omunh xā hkōt ahpýnhā tanhmā hkwýjē jarēnh to. Na pre mē kot tanhmā hkwýjē nhīpēx to ho pa xwýnhjē kutā amnhī xunhwýr nē mē hā tanhmā mē ho. Á na pre kawar ā ýr xwýnhja amnhī nhīpēx anhýr o pa.

Nē no te kot kuwy hpōk pyrāk jakamā hprī hā mēmoj piitā omu nhūm mēmoj kēp hpimxur kēt nē. Nē kēp pahi hā mē ahkā ho ohtō nē kutu. Nē nhýhýnh ī hā hixi hō hā kagā nom ām tapxixip kot amnhī tā amnhī nhixija pumunh. Na pre ra amnhī kamrō ho ē xy hpa nē xa. Nē hixi hō pē:

TIRTŪM KAPĒR O AMNHĪRĪT XWÝNH

Nē ē ryti hā hixi hō hā kagā. Nē ihkjē hā ām tām. Hā kagā jarēnh kot:

Ixpē mē ho amnhīptār xwýnh piitā mē ō Pahi Maati na pa.

Nē hakwa rūm wapo xwa gixre pōm katon ajēt. Kot ho tanhmā mē kot Tirtūm mē wa kutā amnhī xunhwýr xwýnhjē nhīpēx to kaxyw. Jakamā ra mē piitā mē ho pikuprōnh pa nē mē hipēx o te mē kot prēs kām uwa xō kagō janēnh pyrāk nhūm mē hkamrō hpikapīr rax kumrēx. Tirtūm xihtýx xwýnh kot mē kamā gryk týx jakamā nhūm ā kām mē hipēx anē. Mē kot amnhī tomnuj o paja mýrapē.

Nhūm ō pōristi piitā urāk nē kawar jakare hā hkrī nē hkōt ri pa. Mē ē jaka muxre jagjē nē hā ma hkōt ri pa.

¹⁷⁻¹⁸ Tā pa axte Tirtūm kapēr o mē wrýk xwýnh ōja pumu nhūm myyti kutā xa nē kax pē nhōnhti mā kapēr nē mē kām:

—E mē amnē mē ixwýr wrý nē Tirtūm ā akīnh nē mē htyk nē mē hkwý xwýnhjē hā atu nē aku. Mē ho amnhīptār xwýnhjaja nē pōristijaja nē mē hkrāhtūm nē kawar nē kawar ā mē hkrī nē ri mra xwýnhjaja nē mē kot amnhī to rūnh xwýnhjaja nē mē kot amnhī to hkryre xwýnhjaja. Nē mē kām mē āpēnh xwýnhjaja nē amnhī mā ri mē āpēnh xwýnhjaja. Ām mē htyk nē mē hkwý xwýnh mūj piitā māmri mē hwýr wrý nē mē hā atu nē mē aku. E mē tokyx nhōnhti. Anē.

¹⁹ Tā nhūm mrymnuti nē krī piitā hkōt mē ō pahi nē mē ō pōristijaja piitā axpēn wýr akuprō. Wam kawar jakare hā ýr nē htēm xwýnh mē ō pōristijē hwýr hprōt nē

mê hkurê kaxâr kaxyw xapên mar kaxyw akuprô.

²⁰⁻²¹ Hâmri nê mê hwÿr mra nê mê hkurê kapa. No âm tee ri amnhî nhîpêx nê tee ri kâm tanhmâ mê ho hprâm hkaprÿ nhûm wam kawar jakare hà ÿr nê htkêm xwÿnhnta hakwa rûm wapo xwagixre kator o mê himex pa. Hâmri nhûm mê hkwyjê pyrân htyk pa nê hikwÿ. Nhûm nhônhti mê omu nê mê hwÿr wrÿk o mra nê mê kuku hâmri nê kâm mê hkur kaga nê mê hkaga. No nhûm mrymnuti nê ÿ hâ mê kâm hêx o pa xwÿnhnta wa nhûm mê axtem nê htiî râhâ wa unê nê ma wa o tê nê êsôf o kuwy maati kamâ wa kumê. Hâmri nhûm wa kamâ htiî tûm nê hxêt râhâ nê pa ho pa nê aa htyk kêt nê.

20

Mê kot Satanasti hpa hpre hâ mê harênh Wam Korît 15.20-28

¹ Tâ pa kê axte mêmoj pumu. Nhûm Tirtûm kapêr o mê wrÿk xwÿnhjê hõja kaxkwa rûm wrÿ nê ahkre xupÿmti hpro xâ ho htyx xâ hâ safja py nê kâx pytihti ho mê hpre xâja ô py.

²⁻³ Hâmri nê kagâmnuti pê hêx xwÿnh maati Satanastija pynê. Amnepêm Atâw mê Ewa wa kâm hêx xwÿnhnta pynê nê kâx pyti o hpa hpre nê hte hpre hâmri nê ahkre xupÿmti nhîtom xâ mê nê kamâ kumê. Hâmri nê akupÿm hpro xâ ho hpro nê saf o hâ ho htyx. Kot pika piitâ hkôt mê kâm hêx o pa pymaj â hipêx anê. Kojâ tokyx kator kêt ry rax kumrêx. Kojâ kamâ arî hkrî hâ amgrâ xohtô nê. Hâ amgrâ pê 1.000 nhûm rî kormâ Tirtûm akupÿm kator nhûm kato nê ri pa. Nom pa hkrânre.

⁴ Tâ pa mê htyk nê akupÿm mê htiî xwÿnh kwÿjê pumu. Kormâ mê htiî ri na prem Tirtûm kapêr kôt pix mâ amnhî nhîpêx o pa. Nê Jejus kêp mê ô pahihtî hâ harênh râhâ ho pa. Aa mê kot mrymnuti kutâ hkônkrâ ho rôrôk nê kâm mex â harênh kêt. Nhûm prem tee mê ôkrâ hâ nê mê îhkra katut â mrymnuti nhîxi nhîpêx kaxyw nom nhûm prem hkaga kamâ hihtÿx nhûm prem kâm mê hkurê xwÿnhjaja tee ri ja hâ mê omu nê mê mut jakâr o mê kupa. Hâmri nhûm Tirtûm akupÿm mê ho mê htiî nê mê kot mê ho amnhîptâr â hkrî xâ kamâ mê hkrî. Jejus nhîhkô hâ mê hkrî hâ amgrâ pê 1.000 kaxyw.

⁵ Mê kumrêx na pre Tirtûm akupÿm mê ho mê htiî nhûm mê hkwyjêjaja mê hkînâ â arî ty nê hikwÿ hâ amgrâ pê 1.000 jakre nhûm rî kormâ akupÿm mê ho mê htiî.

⁶ Wam akupÿm mê htiî xwÿnhjaja kêp Tirtûm kra jakamâ kojâ mê Tirtûm kra hkêt xwÿnhjê kurom hkînâ nê pa ho pa. Nê mê kurom mê kot amnhî xâ htyx kamâ hamak o pa htûm xâ wÿr pa hkêt nê. Nê mê kurom Tirtûm mê Kra Jejus Kris wa kuri

mex kumrêx nê wa kâm tanhmâ ri amnhî nhîpêx to ho pa. Nê Jejus nhîhkô hâ mê ho amnhîptâr o pa hâ amgrâ pê 1.000.

Tirtûm kot kuwy hwÿr Satanasti mênh â harênh

⁷ Tâ kojâ amgrâ pê 1.000 hapêx nhûm rî kormâ Tirtûm kapêr o wrÿk xwÿnhjaja akupÿm ahkre xupÿm wÿr tê nê Satanasti mâ kahê xâ mê nhûm kato.

⁸ Hâmri nê kê axte pika piitâ hkôt tanhmâ mê kâm hêx to ho ri pa. Gorti nhô xwÿnhjê mâ nê Makok nhô xwÿnhjê mâ nê krî piitâ hkôt Tirtûm nê tanhmâ mê kâm hêx to ho mê hkôt pa. Hâmri nê mê kot Tirtûm krajê kutâ amnhî xunhwÿr nê mê hkurê kaxâr kaxyw amnhî kwÿjê ho akuprô nhûm mê ohtô rax kumrêx nê xapên wÿr akuprô. Te pikahti grâ xohtô pyrâk.

⁹ Hâmri nê ma Tirtûm krajê nhîmex par kaxyw mê hwÿr mra nê mê ô krî mâ hipôk pa nê kuhê. Mê ô krîja Tirtûm mâ mex tâ nhûm mê kot kêp grânh par kaxyw ma hwÿr mra. Hâmri nhûm kaxkwa rûm kuwy hpôkja mê haêr pê mê hâ rôrôk nê mê ho hxêt pa.

¹⁰ No mê kâm hêx xwÿnh maati Satanastija nhûm Tirtûm kapêr o wrÿk xwÿnhjaja axte unê nê ma êsôf o kuwy maaita wÿr o tê nê kamâ kumê. Ra mê kot kamâ mrymnuti wa kot Tirtûm nê mê nokupyr o pa xwÿnh wa mênh tâ wa hkôt Satanasti mâ ho anê nê kamâ kumê nhûm kamâ pa ho pa. Kojâ mê aa kator kêt kumrêx. Nê arî kamâ amnhî xâ htyx kamâ hamak râhâ nê pa ho pa.

Tirtûm kot ahpÿnhâ tanhmâ mê piitâ mê harênh to kaxyw

Matêwre 25.31-46; Juâw 5.25-29

¹¹ Tâ pa axte mêmoj pumu nhûm kaxkwa mê pikaja wa ra hapêx pa. Pa Tirtûm kot tanhmâ mê piitâ mê harênh to hâ hkrî xâ raxja pumu. Nhûm hakajre nhûm Tirtûm kamâ nhê.

¹²⁻¹³ Hâmri nhûm ra mê htyk nê mê hikwÿ xwÿnh piitâ akupÿm hapôx pa nê Tirtûm kot tanhmâ mê harênh to hâ hkrî xâta kutâ hkrî pa. Mê piitâa. Mê kot amnhî to rûnh xwÿnhjaja nê mê kot amnhî to hkryre xwÿnhjaja nê mê ho amnhîptâr xwÿnhjaja nê gô xujanâr kâm mê nrôr nê mê htyk xwÿnhjaja. Ra mê htyk nhûm mê kot mê hagjênh xwÿnhjaja piitâ mê htykjê papxâ rûm hapôx pa nê Tirtûm kutâ ohtô ho ohtô nê hkrî. Hâmri nhûm Tirtûm ô kagâ py nê kamâ mê piitâ mê hixi japêr. Kagâ kamâ ra mê hkukamâ mê htiî tûm nê mê pa ho mê pa mâ xwÿnhjê nhîxi japêr. Nê kagâ hõ kamâ mê htiî ri tanhmâ mê kot amnhî nhîpêx to ho pa hâ mê piitâ mê hâ kagâja. Nhûm kupy nê kamâ tanhmâ mê harênh to nê hkôt hprî hâ mê piitâ mê omunh pa nê rî kormâ ahpÿnhâ tanhmâ mê harênh to.

14-15 Hāmri nē mē htīr tūm nē mē pa mā xwýnhjé nhīxi hā kagàja kamā tee ri mē hkwyjé nhīxi japêr nhūm kamā amrakati. Jakamā nhūm mē ma kuwy maaita wýr mē o mra nē kamā mē rēnh pa. Te axte mē htyk nhūm mē kot kuwy kamā mē hagiēnh pyrāk nhūm mē kamā rōrōk nē tee ri amnhī xà htýx kamā hamak rāhā nē pa ho pa nē aa kator kêt kumrēx.

21

*Pika mē kaxkwa wa nyw jarēnh
Sikūn Pêtre 3.8-13*

¹ Tā pa axte mēmoj pumu. Nhūm Tirtūm ra pika mē kaxkwa nyw wa ho kato. Ra pika nē kaxkwa nē gō xujanār tūmja hapēx pa nhūm kaxkwa mē pika nyw wa ho kato. Nom axte gō xujanār o kator kêt nē.

² Hāmri nhūm Tirtūm nhō krī mex pé Jerujarē nywja tanhmā amnhī to nē pika nyw wýr wrýk o mō. Krīja mex kumrēx. Mex o mex. Te mjēn mā xwýnh é mex jaxār nē amnhī to muxre nē mjēn wýr htēm pyrā nē pika nyw wýr mex kumrēx nē wrýk o mō.

³ Hāmri nhūm Tirtūm kot mē ho amnhīptār ā hkrī xà maaitija kamā mēhōja kapēr o:

—Nā ām hāmri. Na ra Tirtūm hkrajē hkōt pa ho pa. Pika nyw kamā mē hkōt pa ho pa nhūm mē tā no ho omu nē hkōt pa ho pa rāhā nē. Nā ām hāmri. Ja mex o mex.

⁴ —Koja hkrajaja hkōt pa ho pa nē axte htyk kêt kumrēx. Nhūm Tirtūm mē nē mē no kagō nhīnhīnh pa nhūm mē axte hkaprī nē mýr kêt nē. Nē ri axte amnhī xà kamā hamak kêt nē. Nē axte ri tanhmā omnu hto hkēt nē. Ra mē hkaprī nē ā nē mýr o pata hapēx par kumrēx nhūm hpānhā mēmoj nyw pix. Anē.

⁵ Hāmri nhūm Tirtūm tām tanhmā inhmā kapēr to. Krī xà maaiti kamā ýr xwýnhnta tām inhmā kapēr o:

—E na pa ra akupým mēmoj piitā ho nyw pa. Jakamā e Juāw. Ām hāmri na pa ā amnhī kukamā amā mēmoj jarēnh anē. Ixēx kêt. Jakamā kēr ka akwýjé mā piitā hā kagā hpa. Kē mē kamā harē nē tokyx kuma nē hkōt hamaxpēr rāhā ho pa.

⁶ —Ra ixte amnhī kukamā mēmoj mā ijamaxpēr xwýnhja na pa ra ho anhýr pa. Ixpē mēmoj piitā ho anhýr o hkrax xwýnh nē māānēn ixpē mēmoj piitā ho ijpāx par xwýnh. Nē ixrāhā ixpa xwýnh. Amnepēm kormā mēmoj kator kêt ri na pa pre ixrāhā ixpa. Nē ot pa arī ixrāhā ixpa. Tā mē kām kōr nē kām gō hkwy ho hkōm hprām xwýnhjé pyrā nē mē kām ixpī prām xwýnhjaja kot paj te mē kām inhō hino rūm gō hkwy nhōr nhūm mē kot ho hkōm pyrāk o mē hipēx. Hāmri nhūm mē htīr tūm nē ixri pa ho pa nē axte htyk kêt nē. Kot paj ā mē hipēx mex anē.

⁷ —Mē ate tanhmā amnhī tomnuj to nē amnhī to htýx nē ixkōt pix mā amnhī nhīpēx o mē apa rāhā mē atyk xwýnhjaja kot paj ā mē anhīpēx mex anē. Ka mē apē ixkra hā amex nē ixkōt ri apa rāhā ho apa. Pa ixpē mē anhō Tirtūm ā tanhmā mē ato mex to rāhā ho ixpa.

⁸ —No mē kot amnhī kaxyw ixkōt hamaxpēr kêt xwýnhjaja. Nē mē kot amnhī tomnuj xwýnhjaja nē mē kot ri mē hpar prām xwýnhjaja. Nē mē kot nhām ri mēnijé ho amnhīkati xwýnhjaja. Nē wajagajaja. Nē mē kot amnhī to sānti hwýr o pa xwýnhjaja. Nē ri mē hēx nhi xwýnhjaja. Ā mē kot amnhī nhīpēx anhýr xwýnh piitā koja mē apē ixkrajē hkīnhā ma kuwy maaiti wýr hapēx par kumrēx. Te axte mē htyk pyrāk nom koja mē axte htyk kêt nē. Anē.

*Jerujarē nyw jarēnh
Sikūn Korīth 6.16; Karatas 4.26; Eprēw 12.22-24*

⁹ Tā nhūm mē kot xijere pé 7 kamā Tirtūm gryk xà jamýnh xwýnhjé hōja hāmri ixwýr tē nē inhmā:

—E ma ixkōt tē nē mēmoj pumu. Na ra krī nywja pika nyw wýr wrýk o mō. Te mjēn mā xwýnh é mex jaxār nē amnhī to muxre nē mjēn wýr htēm pyrā nē mex kumrēx nē kaxkwa rūm pika nyw wýr wrýk o mō. Nē kot ho mjēn mā xwýnhnta te mē pahte amnhī tomnuj pānhā amnhīrer xwýnhnta pyrāk. E tokyx tē nē omu. Anē.

¹⁰ Hāmri nhūm Tirtūm Karō tanhmā ixto pa ma kot inhmā kapēr xwýnhnta kōt tē nhūm ma ixto mō nē kēn krā hprēēti hwýr ixto api nē himōk ā ixām. Pa Tirtūm nhō krī mex pé Jerujarē nywja pumunh o xa. Nhūm mex o mex. Ām hāmri te mjēn mā xwýnh kot é mex jaxār nē amnhī to muxre nē mjēn wýr htēm pyrā nē ahpār mā wrýk o mō pa ixprī hā omu.

¹¹ Na pre rax o rax nē mex o mex. Tirtūm kamā pa ho pa jakamā nhūm kamā hirā htýx kumrēx. Te kēn mex ā kaxpore xohtō jaxēnh mex týx pyrāk.

¹²⁻¹³ Nē krī puhá kahēja hprēk rax nē. Nē hwýr mē gjēx xà kēp 12. Na pre myt japōx xà rūm axkrunēpxi. Nē myt gjēx xà rūm haxwýja axkrunēpxi. Nē akutā kahpa hkōt haxwýja axkrunēpxi. Nē ahpýnhā hakwakre hā Tirtūm kapēr o wýr xwýnhjaja hamār o kuhē. Nē hakwa kye piitā hā Ijaew pé ahpýnhā mē pikjēr kām mē kēp 12jaja mē hixi hā kagā.

¹⁴ Nē kahē xunhwýr xà hukamā kēn pytyrja ahpýnhā kēp 12. Kēn pytyrta ā na mē kot Jejus nhý hā mē ahkre o mē pa xwýnh maaiti pé 12jē nhīxi hikwý.

¹⁵ Tā nhūm kot ixto mōr nē inhmā mēmoj jahkre xwýnhnta ōr o mēmo pi py nē kot ho krī

ho mīdi kaxyw xa. Nē ho kahē piitā ho mīdi kaxyw. Nē mē gjēx xāja ho mīdi kaxyw.

¹⁶⁻¹⁷ Hāmri nē ho mīdi hpa. Krīja ry nē kahpa piitā axpēn pyrāk. Nē hprék piitā māānēn axpēn pyrāk. Kamā mēmoj piitā ahpýnhā kēp 2.200 kīrōm. No puhá kahēja hprék o 64 met pix nē.

¹⁸ Nē kahēja kēn jaxēnh pix o kot amnhī nhīpēx jakamā mex o mex. Nē hkarýr týx kumrēx. Nē kahē hkre kamā krī kamā ahpýnhā ri ixkreja ōr pix o kot amnhī nhīpēx. Nē piitā hkarýr týx.

¹⁹⁻²⁰ Nē kahē xunhwýr xā hkukamā kēn pytyrta ahpýnhā ri kēn mex pix o kot amnhī nhīpēx. Piitā mex kumrēx nē hkarýrti.

Wamta kawax pē grāgrāre.

Nē hkōt ja kawax pē grāgrā kakrā htyk.

Nē hkōt ja kakrā htyk.

Nē hkōt hōja grāgrā karýr.

Nē hkōt ja hkamrēk pihkārti.

Nē hkōt ja grāgrā kakrā htyk.

Nē hkōt ja hkamrēk týx kumrēx.

Nē hkōt ja rārāare.

Nē hkōt ja grāgrā mē pihkār.

Nē hkōt ja rārār mē pihkār.

Nē hkōt ja grāgrā karýyre.

Nē hkōt ja kakrā htyk pihkār.

Ā kēn pytyr mex kot anhyr.

²¹ Nē mē gjēx xā hā hakwakre kahē xā pē 12ja mēmo kēn jakooti rūnh kumrēx pix o. Nē krī kahti hkōt pry nhīkwý xwýnhja ām ōr pix o. Nē hkarýyre.

²² Pa pre tee ri krī kamā Tirtūm mā amnhī jarēnh xā hā ixkre japēr nhūm amrakati. Mo kaxyw koja mē axte ixkreja hwýr mra? Ra Pahi Maati Tirtūm xihtýx xwýnh mē mē pahte amnhī tomnuj pānhā amnhīrer xwýnhhta ra hkrajē kamā pa ho pa kēnā kot kēt mē axte ri ixkreta o presija. Koja mē kām wa mex ā wa kām harēnh prām nē nhýri tām wa hwýr mra nē ā wa kām kapēr anē. Te mē pahte pahi hwýr pamrar nē kām pakapērta pyrā nē wa hwýr mra nē wa kām kapēr.

²³ Nē koja krīja kamā myyti nē mytwýre hkēt. Mo kaxyw kot kēt myyti nē mytwýreja arī ri hirā ho pa? Krī kamā Tirtūm pa ho pa jakamā kamā hirā mex kumrēx. Nē mē pahte amnhī tomnuj pānhā amnhīrer xwýnhhta haxwýja kamā pa ho pa. Te kēp kanē hpōk rax kumrēx pyrā nē hirā mex o pa. Kot hirā mex o kot myyti jakrenh. Ā Tirtūm mē Kra wa krīja kamā pa ho pa jakamā nhūm mē axte myyti ho presija hkēt nē.

²⁴ Koja krī nhō xwýnhja hirā mex pix kām ri pa ho pa nē tām ri amnhī nhīpēx o ri pa. Tā koja mē ho amnhīptār xwýnhja Tirtūm wýr mra nē amnhī rom kām mex o mex ā harē nē kām:

—Na pre mē ixkwýjaja mē ixpē mē ho amnhīptār xwýnh ā axpēn mā mē inhmex nē

mē ixāhpumunh ā ri axpēn mā mē ijarē. Nom mē ixrom amex o amex nē axāhpumunh o axāhpumunh. Jakamā ām hāmri na htem amā amex o amex ā ajarē Tirtūm. Anē.

²⁵ Nē krī hwýr hakwakre koja amnhī kahē xā rēnh rāhā kuhē nē aa amnhī kahē hkēt nē. Jar mē panhō pika kamā na hte kamāt kaxyw nhūm htem amnhī tā hakwakre kahē hpa. No mo kaxyw koja mē axte pika nywja kamā ā amnhī nhīpēx anē? Koja kamāt kēt nē hirā rāhā ho rāhā jakamā nhūm mē amnhī tā kahē hkēt rāhā nē pa ho pa.

²⁶ Nē koja mē piitā Tirtūm wýr mra nē kām mex o mex ā harē nē kām:

—Pa Tirtūm. Hēxta waa nē. Anhō krīja mex kumrēx. Mex o mex. Nē mē ixrom amex o amex nē axihtýx o axihtýx. Nē mē ixrom axāhpumunh o axāhpumunh. Ām hāmri na ka ra mē ixpē akrajē kamā apa ho apa Tirtūm. Anē.

²⁷ Nē koja mēmoj punuj krīja wýr gjēx kēt kumrēx. Mē hpījaām kēt xwýnhja nē ri mē hēx xwýnhja hwýr gjēx kēt nē. Ām mē pahte amnhī tomnuj pānhā amnhīrer xwýnhhta nhō kagā kamā Tirtūm ri mē htír tūm nē mē pa mā xwýnhjē nhīxi nhīpēx xwýnh pixjaja koja mē hwýr agjē nē kamā pa ho pa.

22

¹⁻² Tā pa pre axte mēmoj pumu. Nhūm Tirtūm kapēr o wrýk xwýnhja axte inhmā mēmoj jahkre. Nhūm Tirtūm mē kot mē pahpānhā amnhīrer xwýnhja wa kot mē ho amnhīptār ā hkrī xā maati rūm pyhti hprōt. Krī kahti hkōt pry pohti nōr xwýnhhta kahti hkōt hprōt o nō. Pyhti kamā gōja na htem ho ixkō nē htír tūm nē pa ho pa. Gō karýyre. Nhūm mēmo pī hpār muxre xwýnhja akutā hijē nē xa. Pī xōja na htem kuwō nē htír tūm nē pa ho pa. Na hte apkati mē ō rāhā nē kuhē. Nē axtem hōja mē piitā mē mex nē ā hkēt kaxyw na hōja.

³ Amnepēm na pre Tirtūm Atāw mā kapēr nē kām:

—Ate amnhī tomnuj mýrapē kot paj tanhmā pika homnu hto nhūm apē mex kēt nē. Ka kamā apur nē kamā axāpēnh rūnh o apa rāhā nē rī kormā kamā axāpkur o ri apa. Apē jamnuj tā kot kaj mē ā amnhī nhīpēx anhyr o apa rāhā ty. Anē.

Tā ra Tirtūm nhō krī nyw kamā mē omnuj xāja amrakati kumrēx. Nē Tirtūm mē kot mē pahpānhā amnhīrer xwýnhhta wa ō krī kamā pa ho pa jakamā mē pahte kamā mē papa xwýnhja kot puj mē wa kām tanhmā amnhī nhīpēx to ho ri papa.

⁴ Kot puj mē tā pano ho Tirtūm pumunh o papa. Hāmri nhūm te mē pahpiitā mē

panhõkrã hã amnhĩ nhĩxi nhĩpêx pyrãk o mē panhĩpêx.

⁵ Nē kot puj mē Pahi Maati Tirtũm nhĩrã kamã ri papa nē axte myyti nhĩrã ho presija hkêt nē. Koja kamãt hapêx pa pu mē axte kanê ho presija hkêt nē. Nē Jesus nhĩhkõ hã hirã kamã mēmoj to amnhĩptãr rãhã ho papa.

*Jejus tokyx akupÿn wrÿk ã harênh
Apokarip 1.1-3*

⁶ Tã nhũm Tirtũm kapêr o mē wrÿk xwÿnh kot ixto mör xwÿnhã axte inhmã kapêr nē inhmã:

—E nã ãm hãmri na ixte amã mēmoj piitã harênh xwÿnhja. ãm hãmri na. Jakamã kwa kër ka arĩ hã ano htÿx rãhã ho apa. Amnepêm Tirtũmja ÿ hã mē kapêr o pa xwÿnhjê mã tanhmã kapêr o amnhĩrit to. Kot tanhmã amnhĩ nhĩpêx to hkukamã mē kãm ho amnhĩrit nhũm prem kuma nē ô ri ma hkwyjê mã harênh o ri mē hkõt pa. Tã ra mē hpãnhã pa mē awÿr inhmê. Mē ate Tirtũm mã tanhmã amnhĩ to ho apa xwÿnhjê mã ixte ja jarênh kaxyw Pahiiti Tirtũmja mē awÿr inhmê pa wrÿ. Nã koja mēmoj tokyx ã amnhĩ nhĩpêx anê.

⁷ Na pre Jejus mē amã amnhĩ jarênh o: “Kot paj tokyx akupÿm mē awÿr wrÿ. Tã mē ate ijarênh ã kagã kamã harênh nē mar nē amnhĩ kaxyw hkõt ajamaxpêr nē hkõt amnhĩ nhĩpêx xwÿnhjaja kot kaj mē akĩnh nē ri apa.” Anhÿr o amnhĩ jarê. Anê.

⁸ Nã ixpê Juãw na pa pre ã inhno ho mēmoj pumunh anê. Hãmri nē omunh pa nē Tirtũm kapêr o wrÿk xwÿnh kot inhmã harênh xwÿnhã kutã ixkõn krã ho ixtêm nē inhÿr kaxyw. Nom nhũm amnhĩ nē inhmã kapêr kãm hihtÿx nē inhmã:

⁹ —Kwa nã ri ã inhĩpêx anhÿr kêt nē. ãm Tirtũm pix kutã na pu htem ã amnhĩ nhĩpêx anê. Apyrã nē ixpê Jejus kwÿ kênã. Na pa hte apyrã nē ÿ hã tanhmã amnhĩ nhĩpêx to ho ixpa. Nē mē apyrã nē kapêr ã kagã hkõt pix mã amnhĩ nhĩpêx. Na pu htem axpên kutã pahkõn krã ho parõrõk kêt nē. ãm Tirtũm pix kutã na pu htem ã amnhĩ nhĩpêx anê.

¹⁰ —E ã ate mēmoj pumunh nē mar anhÿr xwÿnhja koja tokyx ã amnhĩ nhĩpêx anê. Jakamã kwa kër ka akwyjê pē ho apimxur kêt nē. Piitã hã kagã hpa kê mē kamã harê nē kuma nē mēmoj kot ã amnhĩ nhĩpêx anhÿr mã xwÿnhã piitã hkukamã harênh ma. Koja tokyx mēmoj ã amnhĩ nhĩpêx anê.

¹¹ —Jakamã kwãr mē mãmri piitã tanhmã kãm amnhĩ nhĩpêx to ho pa hprãm xã hkõt amnhĩ nhĩpêx o pa. Kwãr mē mē kot amnhĩ tomnuj xwÿnhjaja ã amnhĩ anhĩpêx anhÿr o pa. Nē kwãr mē kot tanhmã kapêr punuj to xwÿnhjaja mãmri ã amnhĩ nhĩpêx anhÿr o pa. Nē kwãr mē kot tãm amnhĩ nhĩpêx o ri mē

pa xwÿnhjaja mãmri Tirtũm kõt pix mã ri tãm amnhĩ nhĩpêx o pa. Anê.

Nhũm pre ã kaxkwa hwÿr ixto ãpir xwÿnhã inhmã kapêr anê.

¹² Hãmri nhũm hpãnhã Jejus tãm inhmã kapêr nē inhmã:

—E kot paj tokyx akupÿm mē awÿr wrÿ. Nē akupÿm pøj hãmri nē mē kot amnhĩ tomnuj o mē pa xwÿnhjaja pa ja mÿrapê ma mē kot amnhĩ xã htÿx kamã hamak tũm xãta wÿr mē rēnh pa. No mē kot ixkõt amnhĩ nhĩpêx xwÿnhjaja kot paj akupÿn inhõ krĩ hwÿr amnhĩ kõt mē ho api.

¹³ —Nē ixrãhãã xwÿnh na pa. Amnepê mã kormã mēmoj kêt ri na pa pre ra ixrãhãã. Nē koja nhÿrmã mēmoj piitã akupÿm hapêx pa arĩ ixrãhã nē ixpa ho ixpa.

¹⁴ —Nē Tirtũm kot mē anê mē ate amnhĩ tomnuj kuhõnh par xwÿnhjaja kot kaj mē amex kumrêx nē apa ho apa. Nē akĩnh nē ajamakêtkati nē ri atÿx apa ho apa. Te ho mē kot amnhĩ xê kahõnh nē mex jagjênh nē ri hã pata pyrãk. Koja Tirtũm mē amã anê ka mē ajamakêtkati nē ô krĩ hwÿr agjê nē kamã ri amex kumrêx nē ri apa ho apa. Nē kamã mēmo pi xõ mē kot kur nē htÿr tũm nē pa mã xwÿnhã wÿr mra nē amnhĩm ô ré nē hkur o ri apa. Ra mē ate Jejus kõt amnhĩ xunhwÿr jakamã kot kaj mē axãmnhix hwÿr mra nē amnhĩm hkwy rê nē hkur o ri apa. Kot kaj mē ã amnhĩ nhĩpêx anê.

¹⁵ —Nom mē kot amnhĩ tomnuj o mē pa xwÿnhjaja koja mē akĩnhã inhõ krĩ hwÿr gjêx kêt nē. Mē kot ri mē y ho mē pa xwÿnhjaja. Nē mē kot nhãm ri mēnijê ho amnhĩkati ho mē pa xwÿnhjaja. Nē mē kot ri mē hpar o mē pa xwÿnhjaja. Nē mē kot ri sãnti nhĩpêx o te Tirtũm nhĩpêx pyrãk o mē pa xwÿnhjaja. Nē mē kãm ri hêx prãm o ri mē pa xwÿnhjaja. Koja mē akĩnhã inhõ krĩ hwÿr pa hkêt nē.

¹⁶ —E Juãw. Nã ixpê Jejus na pa awÿr ixkapêr o mē wrÿk xwÿnhã mē. Kot ixkwÿnjê kaxyw amã ixkapêr jarênh kaxyw. Ixpê Tawi pãr krax na pa. Te ixpê arĩgro hkõt kanhêti hpõk rax kot arĩgro ho mör ã ho amnhĩrit xwÿnhã pyrãk. Anê.

Nhũm pre ã Jejus inhmã kapêr anê.

¹⁷ Tirtũm Karõ mē Jejus kwÿjaja na htem ã Jejus kot amnhĩ jarênh anhÿrja ma nē hkĩnh nē. Nē kãm kapêr o:

—Hêxta waa nē. Kwa amnhĩm anojarêt nē tokyx akupÿn mē ixwÿr wrÿ Pahiiti. Pa mē tokyx ã amnhĩ nhĩpêx anhÿr o ri war akõt ixpa. Anê.

Nē mē ate ja mar xwÿnhjaja kër ka mē urãk nē ã kãm akapêr anê.

Nē te mē amã kôr nē ri mē apa pyrãk xwÿnhjaja kër ka mē te Jejus wÿr amrar nē ô gõ ho akõm pyrã nē hkõt amnhĩ xunhwÿ. Te Jejus amari mē pamã ô gõ nhõr pyrãk o mē panhĩpêx pu mē hkõt amnhĩ xunhwÿ nē ra pahpê pahÿr tũm nē papa mã xwÿnh. Hãmri

nē amnhī pānhā tanhmā kām amnhīrer to hkēt nē.

Nhỹrmā mẽmoj nyw par ā harēnh jatır xà

¹⁸ E ixpē Juāw na pa Jejus nhỹ hā mẽ amā mẽmoj tanhmā kot amnhī nhīpēx to hkukamā ā mẽ amā hā kagā anē. Tā kwa mẽ o kora. Kēr ka mẽ atō amnhī krā hkôt ri ajamaxpēr o te ho ja pyrā nē hijuk ri axte mẽmoj nhīpēx kēt nē. Ām kwarī ho kwarī. Kot ka mẽ atō anē nhūm Tirtūm ja hā apumu nē kagāja kamā tanhmā mẽ hipēx kati hto xāta o tanhmā anhīpēx to ka arī amnhī pumu.

¹⁹ Rỹ ka mẽ atō kagā kamā harē nē ama nē tanhmā ajamaxpēr to nē ajamaxpēr o:

—Nā ja kot anhỹr kēt. Na mẽ ām harēnh o hēx. Kot paj kuma nē ām kuma.

Anhỹr o ajamaxpēr japēr. Hāmri nhūm Tirtūm amnhī tā ama nē kagā mexta kamā kot tanhmā mẽ ho mex toja o ato mex kēt nē. Ka ō krī hwỹr axāpir nē mẽmo pī xō mẽ kot hkur nē htír tūm nē pa kaxyw mā xwỹnhta

ka amnhīm hō hyr nē hkrēr kēt nē. Jakamā e kwa mẽ o kora. Kēr ka mẽ kagāta kamā ā mẽmoj kot amnhī nhīpēx anhỹr mā xwỹnhta jarēnh ma nē aprī hā piitā hkôt ajamaxpēr tỹx rāhā ho ri apa.

²⁰ E Jejus kot inhmā mẽmoj kukamā tanhmā ujarēnh to xwỹnhta na pre inhmā amnhī jarēnh o: “Kot paj tokyx akupỹn mẽ awỹr wrỹ.” Anē. Ām hāmri na pre ā amnhī jarēnh anē. Koja tokyx akupỹn mẽ pahwỹr wrỹ hāmri nhūm mẽmoj piitā mex o mex. Jakamā kwa kēr ka amnhīm anojarēt nē tokyx akupỹn mẽ ixwỹr wrỹ Pahihti Jejus.

²¹ Nē ixpyrā nē mẽ apē Tirtūm krajaja na pa hte mẽ ato Pahihti Jejus wỹr rāhā ho ri ixpa nē kām:

—Kwa akwỹjē pumu nē mẽ kutā anojarēt rāhā ho ri apa Pahihti. Anē.

E mẽ ujarēnhja na hapēx. Ixpē Juāw na pa Jejus kot inhmā tanhmā ujarēnh toja pa amnhī xō ri mẽ amā hā kagā hpa. E na hapēx.